



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



## A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

## Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

## À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>








LELAND STANFORD JUNIOR UNIVERSITY





7  
022







NOUVELLE COLLECTION

DES

# MÉMOIRES

POUR SERVIR

A L'HISTOIRE DE FRANCE.

—

DEUXIÈME SÉRIE.

II.



NOUVELLE COLLECTION

DES

# MÉMOIRES

POUR SERVIR

## A L'HISTOIRE DE FRANCE,

DEPUIS LE XIII<sup>e</sup> SIÈCLE JUSQU'A LA FIN DU XVIII<sup>e</sup>;

Précédés

DE NOTICES POUR CARACTÉRISER CHAQUE AUTEUR DES MÉMOIRES ET SON ÉPOQUE;

SUIVIS DE L'ANALYSE DES DOCUMENTS HISTORIQUES QUI S'Y RAPPORTENT;

PAR MM. MICHAUD DE L'ACADÉMIE FRANÇAISE ET **POUJOLAT.**



TOME DEUXIÈME.

MAXIMILIAN DE BETHUNE, DUC DE SULLY;

SAGES ET ROYALES ŒCONOMIES D'ÉSTAT,

SUIVIES D'UNE RÉPUTATION CONTEMPORAINE INÉDITE.

I.



A PARIS,

CHEZ L'ÉDITEUR DU COMMENTAIRE ANALYTIQUE DU CODE CIVIL,

RUE DES PETITS-AUGUSTINS, N<sup>o</sup> 24.

IMPRIMERIE DE FIRMIN DIDOT FRÈRES, RUE JACOB, N<sup>o</sup> 56.

1837.

117343

YHABU  
ROBIL OROBAT OABU  
YHABU

# MEMOIRES

DES

SAGES ET ROYALES

OECONOMIES D'ESTAT,

DOMESTIQUES, POLITIQUES ET MILITAIRES DE HENRY LE GRAND,

L'EXEMPLAIRE DES ROYS, LE PRINCE DES VERTUS, DES ARMES ET DES LOIX,  
ET LE PERE EN EFFET DE SES PEUPLES FRANÇOIS,

Et des servitudes utiles, obéissances convenables et administrations loyales de Maximilian de Bethune,  
l'un des plus confidens, familiers et utiles soldats et serviteurs  
du grand Mars des François.

DEDIEZ A LA FRANCE, A TOUS LES BONS SOLDATS ET TOUS PEUPLES FRANÇOIS.





# NOTICE

SUR

## HENRI IV, ROI DE FRANCE ET DE NAVARRE,

NÉ LE 13 DÉCEMBRE 1553, MORT LE 14 MAI 1610 (1).

Ce fut une grande joie dans la principauté de Béarn, dans le comté de Bigorre, et dans ce morceau de terre montagneuse qui conservait encore en deçà des Pyrénées le nom de Navarre, lorsque, le 13 décembre 1553, Jeanne d'Albret, femme d'Antoine de Bourbon, duc de Vendôme et de Beaumont, mit au monde un fils dans le château de Pau. Son père, Henri d'Albret, roi titulaire de la Navarre au delà des monts, que la couronne d'Espagne avait réunie depuis quarante ans à ses domaines, du reste seigneur réel du Béarn, duc de Nemours, sire d'Albret, comte de Foix, d'Armagnac, de Bigorre, de Pontievre, de Périgord, vicomte de Limoges, de Castelbon, de Marsan et autres lieux, vivait en bon gentilhomme dans ses terres et seigneuries, sans souci de conquête et sans crainte d'invasion, s'inquiétant assez peu de son royaume héréditaire, et ne voulant plus se risquer à pareille fortune qu'il avait courue autrefois, lorsque, fait prisonnier à Pavie, il eut le bonheur de s'échapper. Il s'approcha du lit de sa fille, emporta son petit-fils dans un pan de sa robe, lui frotta les lèvres d'ail, lui fit avaler quelques gouttes de vin, et se chargea de l'élever, non pas avec ces funestes délicatesses qui avaient déjà fait mourir deux enfants nés de ce mariage, mais « à la béarnaise, pieds nus et tête nue. » Ce fut là, sans aucun doute, la plus belle action de sa vie, qui ne compte guère dans l'histoire que par le nom de sa femme, la spirituelle et bonne Marguerite de Valois, sœur de François I<sup>er</sup>, laquelle encore il avait traitée fort rudement.

Si cette naissance mettait le pays en liesse au pied des Pyrénées, c'était chose peu considérable en France; et il eût fallu certes une grande témérité d'astrologue pour prédire à ce jeune nourrisson des montagnes béarnaises qu'il porterait un jour la couronne de saint Louis. Il descendait pourtant de ce roi en ligne directe et masculine, par le cin-

quième de ses fils, Robert, comte de Clermont, qui, ayant épousé l'héritière de Bourbon, prit le titre de cette baronnie, et garda prudemment les fleurs de lis sur son écusson. Mais, encore bien que neuf branches du sang royal issues du saint roi se fussent successivement éteintes, que la lignée même de Robert eût failli trois fois au profit des puînés, encore bien qu'Antoine de Bourbon fût alors et sans conteste premier prince du sang de France, il ne semblait certainement pas que la famille régnante dût sitôt manquer, et faire place à ce vieux rameau dont le représentant actuel se rattachait à elle par dix-neuf degrés de parenté. Henri II régnait, âgé de trente-quatre ans, père de cinq enfants mâles, et marié à Catherine de Médicis, dont la tardive fécondité paraissait vouloir réparer sans relâche les dix années de mariage qu'elle avait perdues. Il y avait là de quoi faire souche d'une longue race et rejeter peut-être la maison de Bourbon dans la même obscurité où se perdait humblement la branche de Courtenay, venue de Louis le Gros; aussi voit-on que Henri de Béarn fut reçu comme né uniquement pour l'héritage maternel, et que son grand-père s'en empara bien vite, afin de lui apprendre à vivre la vie de son pays, pendant qu'Antoine de Bourbon, qui n'avait rien à lui laisser, faisait tranquillement sa charge de gouverneur en Picardie.

Le fils de Jeanne d'Albret n'était pas encore âgé de dix-huit mois, partant avait eu peu d'occasions « de réjouir son vieux grand-père, » qui du reste ne comptait que cinquante-trois ans, quand ce prince mourut (25 mai 1555), en ordonnant, comme il convenait à un roi dépossédé, que son corps fût porté à Pampelune, capitale de son royaume, dès qu'on pourrait la reprendre. Sa mère recueillit toute la succession qui était restée de ses ancêtres; et Antoine de Bourbon s'appela le roi de Navarre.

(1) Cette notice, qui retrace dans sa vérité primitive la physionomie de Henri IV comme homme privé, comme homme politique, comme guerrier, est l'ouvrage d'un de nos amis, M. Bazin; nous la donnons ici comme on donne un portrait. Le travail de M. Bazin se distingue par la netteté, la précision, l'élégance du style, par la finesse des observations et la connaissance approfondie des mœurs, des événements et des hommes de cette époque. Il y a des gens qui peut-être reprocheront à l'auteur une certaine

disposition à montrer, à énumérer les faiblesses de Henri IV, mais, en dépit de ces faiblesses, Henri IV ne reste pas moins un grand roi dans la notice de M. Bazin. Les curieuses remarques sur les Economies Royales, qui suivent la notice sur Henri IV, sont sorties aussi de la plume de notre obligé ami. N'oublions pas d'annoncer au public une bonne nouvelle littéraire, c'est que M. Bazin va publier une *Histoire de France sous Louis XIII*, en quatre volumes in-8°, qui paraîtront prochainement chez le libraire Paulin.

Ce n'était pas encore là un mauvais partage pour un pauvre cadet de race royale, qui n'avait apporté au monde que sa généalogie, et qu'on avait vu en ses jeunes ans « fort petit et bas de fortune. » Il est probable qu'il aurait passé honnêtement sa vie comme son beau-père, à visiter ses châteaux, à cultiver ses terres, à faire exécuter « los fors et costumaz de Bearn reformatz et metatz en lengoadge intelligible per le rey Henric en 1552, » comme aussi à courtiser les dames de son voisinage (car il était « grandement adonné à l'amour »), si le coup imprévu qui frappa Henri II (1559) ne l'eût appelé à jouer un rôle politique dans les troubles de France. Il l'accepta d'abord à regret, avec peine, en reculant le plus qu'il lui fut possible. Mais enfin, après plusieurs expériences maladroites et fâcheuses, il s'y forma de telle façon et y devint si habile, qu'ayant débuté dans un parti, on le vit bientôt figurer à la tête du parti contraire. D'abord partisan de la réforme et protecteur du prêche, il devint en peu de temps le plus violent ennemi de ces nouveautés, rattaché subitement à la foi catholique par l'espoir qu'on lui donna d'y gagner le royaume de Sardaigne. Quand les huguenots prirent les armes sous la conduite du prince de Condé, son frère (1562), il conduisit l'armée du roi contre les casques blanches, et « s'y montra fort animé, brave, vaillant, courageux, aussi prompt d'alleurs que perçonne à faire pendre les hérétiques. » Mais il fut arrêté tout court dans cette bonne voie par une arquebusade tirée des murs de Rouen, et dont il mourut un mois après en un bateau sur la rivière de Seine (17 novembre 1562).

Par sa mort, Jeanne d'Albret restait reine de Navarre, et son fils devenait premier prince du sang. Henri avait alors neuf ans ; et peut-être serait-ce assez mal employer le temps que de chercher comment s'était passée sa première enfance. Quelques historiens le font venir vers l'âge de cinq ans à la cour de France, « où chacun, disent-ils, fut émerveillé de sa gentillesse ; » ce qui est certain, c'est qu'en sortant des mains de son grand-père, il fut élevé au château de Coaraze, en Béarn, par Suzanne de Bourbon-Busset, femme de Jean d'Albret, baron de Miossens ; que là il apprit à gravir les rochers, à mesurer les précipices, à supporter le froid et le chaud, à lutter de force et d'agilité avec les jeunes paysans, et qu'ensuite il accompagna ses père et mère en France, lorsqu'Antoine de Bourbon vint s'y faire reconnaître lieutenant général du royaume pour le roi mineur Charles IX. C'était en 1561 ; et en supposant vrai le voyage de l'an 1558, son éducation montagnarde, interrompue par cet épisode, aurait duré huit années. Dans ce dangereux séjour de la famille béarnaise auprès de Catherine de Médicis, Antoine de Bourbon n'avait pas seulement trahi sa religion et son parti, il avait aussi manqué d'amour et de fidélité pour sa femme qui, fuyant les rudesses d'un mari, et voulant au moins sauver ses États, retourna promptement en Béarn. Henri resta en France avec le baron de Beauvoir, son gouverneur,

et son précepteur nommé la Gaucherie. Là, comme tous les princes, il apprit le latin et le grec pour oublier l'un et l'autre ; comme tous les princes, il traduisit les Commentaires de César ; il lut avec transport les Vies de Plutarque, se passionna pour le romain Camille et s'indigna contre Coriolan. En même temps il faisait amitié avec les jeunes gens de son âge, non plus bergers et villageois comme au pays maternel, mais fils de France, princes et seigneurs. Au mois de septembre 1563, on le vit en son rang assister à la déclaration de la majorité du roi Charles IX, qui se fit dans la ville de Rouen.

Peu de temps après, sa mère obtint la permission de le ramener en Béarn, où il trouva la réforme établie ; car Jeanne d'Albret qui, avant son dernier voyage de France, voulait se maintenir catholique, et avait envoyé une ambassade d'obédience au pape, s'était subitement éprise d'un zèle ardent pour la religion reniée par son mari. A peine était-elle de retour chez elle avec ses enfants, qu'il fut bruit d'une conspiration découverte, laquelle avait pour but de les livrer tous ensemble à l'Espagnol. Jeanne trouva plus sûr alors de se tenir sur la terre de France qu'au lieu où elle était souveraine. Elle se rendit donc à Nérac, et son fils revint auprès du roi Charles, qui se prépara alors (1564) à visiter son royaume. Le prince de Navarre partit avec lui ; il parut avec magnificence à cette célèbre entrevue de Bayonne, où la reine d'Espagne Élisabeth vint embrasser sa mère Catherine, et où l'on croit que les deux cours arrêrèrent, au milieu des fêtes et des jeux, le plan d'une politique cruelle pour la destruction de l'hérésie. On lui attribua même la découverte et la révélation de ces projets. Comme c'était chose naturelle qu'un prince de douze ans pénétrât étourdiment ou demeurât inaperçu dans le cabinet où l'on discutait les affaires les plus sérieuses et les plus secrètes, il entendit un jour le duc d'Albe formuler ainsi son avis : « Une tête de saumon vaut mieux que cent têtes de grenouilles. » Il comprit aussitôt le sens de ce proverbe ; et les chefs des huguenots se tinrent dès lors pour avertis. Sa mère rejoignit la cour à Bordeaux, la reçut à Nérac, la suivit à Blois, à Moulins et enfin à Paris, où elle reprit son fils pour l'emmener dans ses États (octobre 1566). Là se termina la seconde éducation de Henri, son apprentissage de cour ; ce qu'on en rapporte de plus intéressant, c'est qu'un jour ayant voulu dans une partie de jeu soutenir son droit contre Charles IX, celui-ci tendit son arc contre le jeune prince, qui se mit aussitôt en même posture ; il fut impitoyablement fouetté pour cette hardiesse.

Alors commença, sous la conduite de Jeanne d'Albret, son instruction politique. Elle n'avait à lui montrer qu'un petit État, mais aussi troublé d'ambitions et d'opinions ennemies que pouvait l'être un grand royaume. Elle le réconcilia d'abord avec la religion protestante, contre laquelle on l'avait fort prévenu ; elle lui apprit comment on déjouait les complots, comment on résistait aux violences, comment on s'accommodait avec les passions, en-

fin ce qu'au milieu de tous ces soins pour la défense de son droit, on pouvait faire encore pour le bonheur des peuples. Quand elle le crut en état de se produire, elle lui fit passer quelque temps dans son gouvernement de Guyenne et dans ses domaines qui en faisaient partie. Il y réussit beaucoup et s'y endetta fortement. Lorsqu'il manquait d'argent, il en demandait sans façon par écrit, à ce qu'on raconte, aux seigneurs et dames du pays, priant qu'on lui renvoyât en réponse ou la somme ou son billet; et c'était toujours sa signature qu'on voulait garder : « car deux astrologues gascons avoient prédit qu'il deviendrait un grand prince. » Il y eut ensuite une guerre civile en France (1567), où la reine de Navarre ne prit aucune part. Mais, au troisième soulèvement des huguenots, elle pensa qu'il n'y avait plus d'abri pour elle que dans un camp; que le sort de ce qu'elle appelait son royaume était désormais remis aux chances de la lutte entre Français, où elle avait en quelque sorte son rang de bataille. Elle se rendit donc à la Rochelle (septembre 1568) avec son fils, que le prince Louis de Condé se chargea de former à la guerre. Après la mort de ce prince tué à Jarnac (mars 1569), toute l'armée déféra le titre de général à Henri de Navarre, en partage avec Henri de Condé son cousin, et la présence des deux jeunes gens devint nécessaire, avec les précautions convenables, à l'amiral de Coligny, qui commandait réellement sous leur nom. Ce fut une rude école de la vie des combats; car des deux côtés on ne s'y portait pas avec mollesse et courtoisie, pas même avec humanité; une cruelle suite de défaites fit connaître au général novice tout ce que ce métier avait de fatigues, de périls et de soucis. Battus à Moncontour comme ils l'avaient été à Jarnac, les huguenots furent obligés d'aller chercher bien loin un lieu où rassembler leurs débris et attendre des secours. Leur chemin fut vers le Béarn que le comte de Montgomery venait de reconquérir pour Jeanne d'Albret, puis par le Languedoc, les Cévennes, le voisinage de Lyon d'où, traversant la Bourgogne, et victorieuse « à la demi-bataille » d'Arnay-le-duc, leur armée sembla prête à s'abattre sur Paris. Dans cette longue marche pleine de souffrances et de privations, pleine aussi de vengeance et de cruelles représailles, les deux cousins furent constamment à la suite de l'amiral, préservés de péril, mais privés aussi de gloire, par sa grande autorité. Les catholiques disaient avec mépris qu'ils étaient devenus « ses pages. » Plus tard les historiens de Henri, devenu grand capitaine et roi puissant, lui ont attribué une sagesse précoce, une expérience improvisée qui avait aperçu du premier coup toutes les fautes commises par les généraux et constatées par des revers. Enfin la paix se fit (août 1570). Le prince de Navarre alla visiter les États de sa mère qui l'y rejoignit ensuite, après avoir assuré autant qu'il était en elle, et comme véritable chef du parti, l'exécution des promesses faites aux siens par le traité. Catherine de Médicis la tira bientôt de son

Béarn par la proposition d'un mariage entre le prince de Navarre et la sœur de Charles IX, Marguerite.

Jeanne d'Albret partit elle-même pour aller régler les conditions de cette alliance (26 novembre 1571), ne voulant pas livrer son fils à la foi de la cour, ne voulant pas aussi hasarder sa jeunesse, déjà très-friande de plaisirs, dans un lieu « où, » « écrivait-elle, ce ne sont pas les hommes qui prient les femmes, mais les femmes qui prient les hommes. » Henri, qui était de nature à se laisser tenter plutôt qu'effrayer de pareille chose, eut cependant le mérite d'obéir ponctuellement à sa mère. Il ne se mit en route que lorsque le mariage fut conclu, arrêté, quand tous les préparatifs en étaient faits par les soins de Jeanne d'Albret. A peine était-il en France qu'il apprit la mort de sa mère (juin 1572). Deux mois après il arrivait à Paris avec son cousin le prince de Condé, et il déposait son habit de deuil pour épouser, le 18 août, Marguerite de Valois, âgée de vingt ans, belle, vive, spirituelle, plus vive peut-être qu'il ne convenait au mariage; du reste, dotée pour tous droits successifs de 67,500 livres de rente sur l'hôtel de ville. La cinquième nuit qui suivit celle de leurs noces vit s'exécuter, au signal du tocsin de Saint-Germain l'Auxerrois, et à la lueur des torches, le massacre de la Saint-Barthélemy, œuvre de fureur populaire, autorisée ou acceptée par un roi. Le Louvre et Marguerite protégèrent le nouveau marié, mais on ne lui fit grâce que de la mort. Appelé dans la chambre de Charles IX, on lui enjoignit de quitter sa religion. Jeanne d'Albret eût refusé sans doute, car les femmes ont du courage pour le martyre. Henri se soumit et demanda le temps de s'éclaircir. Il n'en accompagna pas moins le roi au parlement (2 septembre), quand il alla s'y déclarer l'auteur de ce grand meurtre; il l'entendit publier que Coligny avait été justement puni pour avoir conspiré contre le roi de France et « contre lui-même, roi de Navarre. » Ensuite il abjura la croyance de sa mère (11 septembre), sur le simple discours d'un ministre protestant, que la peur avait converti; il écrivit au pape (3 octobre) pour implorer sa miséricorde; il défendit l'exercice de la religion réformée dans ses États souverains (16 octobre); il assista avec le roi de France, caché derrière le rideau d'une fenêtre de l'hôtel de ville, au supplice exécuté par arrêt du parlement (27 octobre), sur l'effigie de l'amiral; enfin, il suivit l'armée du roi au siège de la Rochelle, qu'il eut du moins le bonheur de trouver imprenable (1573).

Les quatre années qui suivirent le massacre furent pour le roi de Navarre une de ces époques fâcheuses que le panégyrique omet à dessein, où l'histoire, qui a bien autre chose à faire, ne se met pas en peine de chercher, et que la biographie elle-même, avec cette exactitude qui est son seul mérite, ne saurait fouiller sans se donner un air de médisance. Il est bien certain qu'une surveillance menaçante le retenait dans la résidence royale ou

le traînait à la suite des voyages du roi, et difficilement pourrait-on lui reprocher de n'avoir pas su plutôt s'y soustraire. Mais sa liberté n'était pas tellement gênée qu'il ne se mit fort au large pour le plaisir. Si les princes et seigneurs catholiques traitaient avec mépris « ce petit prisonnier de « roitelet qu'on galopait à tous propos de paroles « et de brocards, et qui avoit, disoit-on, plus de « nez que de royaume, » il savait très-bien rétablir l'égalité, voire même reprendre son rang dans la débauche, et il ne figurait pas le dernier dans les plus insolentes prouesses de cette jeune cour. Les mémoires du temps le mettent au nombre de ceux qui exécutèrent en riant ce que nos gens du roi appelleraient un vol à main armée dans le logis du prévôt de Paris (septembre 1573). Mari infidèle et trompé, sa position s'empirait encore de ce mauvais relief que donne toujours, avec juste raison, la honte du ménage. Les velléités qui lui venaient de se créer une importance politique, n'avaient pas d'inspiration plus haute et d'autre portée qu'une intrigue de femmes, qu'une liaison d'intérêts avec un jeune étourdi, son beau-frère d'Alençon, et tout cela était à la disposition d'une coquette, qui se jouait des deux princes à la fois, ou tour à tour. La mort de Charles IX le trouva tout à fait prisonnier (mai 1574) tenu sous bonne garde par Catherine, en suite d'une folle conspiration qui coûta la vie à deux serviteurs du duc d'Alençon. En cet état la reine mère le conduisit à Lyon au-devant de Henri III qui s'était échappé de la Pologne, son royaume électif, pour venir prendre possession de sa couronne héréditaire. Après que le roi de Navarre se fut mis aux genoux du nouveau roi et lui eut juré, sur l'hostie qu'il venait de recevoir, une éternelle fidélité, Henri III lui ôta ses gardes, reprit avec lui cette ancienne communauté de joyeuse vie qui les avait unis, et on les vit côte à côte figurer dans Avignon « à la procession des battus. » Pendant la première année de ce règne, le roi de Navarre ne fut encore à la cour de France qu'un gai compagnon dont on redisait les bons mots, dont on racontait les disgrâces conjugales. Cependant il y avait en France un parti ardent, inquiet, qui respirait la guerre et qui demandait un chef. Le prince de Condé s'enfuit heureusement de Paris et alla porter dans le camp des réformés le nom si aimé de son père. Le duc d'Alençon, frère du roi, qui avait besoin de faire une paix pour augmenter ses apanages, s'échappa aussi. Le roi de Navarre restait seul, se leurrant de l'espoir qu'on allait le proclamer lieutenant général du royaume. C'était absolument la situation où s'était trouvé son père treize ans auparavant, et la même cause, l'amour d'une femme qui n'était pas la sienne, le retenait là où il pouvait perdre de même sa réputation, son influence, son avenir, pendant qu'une prince de sa famille allait encore prendre le poste qui lui appartenait dans la guerre civile. Enfin ses amis, parmi lesquels se place au premier rang d'Aubigné, lui remontrèrent le tort qu'il faisait à sa gloire, et

son départ fut résolu. Sous prétexte d'aller à la chasse vers Senlis, il franchit les limites du cercle où on le renfermait (février 1576), courut à travers pays et se rendit dans la province d'Anjou, « ne « laissant à Paris, disait-il, que deux choses dont « il se soucioit peu, sa femme et la messe. »

Cette démarche pourtant ne lui assurait pas sur le champ un grand crédit ni du côté de la cour ni parmi les réformés. Le duc d'Alençon avec ses catholiques unis et le prince de Condé à la tête des huguenots étaient plus à considérer que lui, qui ne savait trop où se ranger, suspect aux uns et aux autres, tellement que sa petite escorte, mêlée de gens des deux religions « fut trois mois « sans ouïr messe ni prêcher. » Avant qu'il se fût décidé, la paix se fit (mai 1576), et le duc d'Alençon en eut tout l'honneur, sans compter le profit. L'édit de cette paix était le plus avantageux qu'eussent encore obtenu les réformés; aussi se préparèrent-ils à le voir révoquer. Ce fut alors (juin 1576) que le roi de Navarre retourna publiquement à leur religion, sans laquelle il n'y avait pas de porte ouverte pour lui à la Rochelle. Il y fut reçu, mais moins bien que son cousin de Condé, tant la défiance était grande contre ce fils de renégat, renégat lui-même (les réformés ne ménageaient pas les termes), marié en famille ennemie, et le dernier venu de cette cour où s'était tramé l'assassinat de leurs frères. Il fallut tout ce qu'il y avait d'humeur aimable et facile, d'engageante bonté, de loyauté naïve dans son caractère, pour lui réconcilier des esprits farouches, qui, avec toutes ces causes de répugnance, se scandalisaient encore de ses amours. Car il y a dans la vie de ce prince cette singularité que chaque phase en est marquée par le nom d'une maîtresse. Durant la captivité de Paris, c'était madame de Sauve. A son entrée dans le maniement des affaires, ce fut la jeune Tignonville « qui ré- « sista, dit-on, vertueusement à ses poursuites « tant qu'elle demeura fille. » Enfin, le besoin que les réformés avaient de son autorité, et la généreuse conduite de son cousin, qui s'effaçait de son mieux devant lui, le firent reconnaître de tous « pour protecteur général des églises de France. »

Il avait ce titre quand les états généraux, convoqués à Blois, désavouèrent le traité de paix accordé par le roi et, sous l'influence de la ligue qui s'était formée dans les provinces, convièrent de nouveau le royaume à la guerre. Henri de Condé s'y jeta le premier en publiant qu'il agissait par le commandement du roi de Navarre; celui-ci se partagea entre quelques tentatives d'exploits militaires et la négociation d'une paix nouvelle qui fut conclue (septembre 1577) après sept mois seulement d'hostilités. Les plus belliqueux de ses amis trouvèrent qu'il s'était bien lâté; mais c'était vraiment un acte de haute sagesse politique que de faire un traité en son nom, à la tête d'un parti, en acquiesçant ainsi le droit d'en demander l'exécution ou d'en proclamer la rupture. Aussi de ce moment date l'importance du roi de Navarre, non pas par la grandeur de ses États et la richesse de ses reve-

tus, mais parce que son nom était arrivé à représenter une cause, un intérêt, une passion. Il ne paraît pas pourtant qu'il ait compris sur-le-champ tout le sérieux de son rôle. Car, dès les premiers mois de 1578, une folie lui fit perdre la ville la plus considérable qui l'eût reçu dans son gouvernement de Guyenne. Les jeunes seigneurs de la cour qu'il tenait dans Agen, jaloux de lui montrer qu'ils en savaient autant que les courtisans de Paris, s'avisèrent au milieu d'un bal d'éteindre les chandelles pour faire main-basse sur les belles dames gasconnes. Irrités de cette insulte, les habitants d'Agen, pères, maris, amants et frères, appelèrent dans leurs murs les troupes du roi, et la cour de Navarre perdit ainsi « son Paris. » Elle s'établit alors à Nérac où la reine Catherine vint trouver son gendre, lui ramenant Marguerite, dont, à vrai dire, il savait fort bien se passer. Le rapprochement des deux époux se fit pourtant de meilleure amitié qu'on n'aurait pu croire, grâce à la tolérance mutuelle dont ils semblaient être convenus; le mari permettant à sa femme tout exercice de sa beauté, pourvu que ce fût à bonne fin en lui gagnant des amis, la femme ne témoignant aucune jalousie de l'amour que montrait son seigneur d'abord à « la « jolie Dayelle Cypriote » (ainsi parlent les mémoires), qui avait accompagné la reine mère, puis à la douce et naïve demoiselle de Fosseuse, jeune fille de quatorze ans que Marguerite lui donna de sa main. Le résultat politique de ce voyage fut une série d'articles ajoutés au dernier traité (février 1579), dans la rédaction desquels on assure que Catherine de Médicis fut trompée à son tour, son conseiller tenant la plume, le vieux seigneur de Pibrac, s'étant laissé charmer par le doux regard de Marguerite. Le roi de Navarre conduisit ensuite sa femme à Pau, et la princesse catholique trouva un assez mauvais accueil « dans cette petite « Genève; » puis ils revinrent tenir à Nérac « une « cour si leste et si galante » qu'il n'y avait pas à envier celle de France. Maximilien de Bethune, seigneur de Rosny, se fait raconter gravement par ses secrétaires « qu'il y prit une maîtresse comme « les autres. »

En cette cour on désirait la guerre bien plus que dans les châteaux et dans les villes qui devaient la faire et la payer. L'amour y parlait prise d'armes, exploits militaires et retour glorieux. La reine Marguerite qui gardait rancune à son frère pour quelques railleries sur sa conduite, le roi de Navarre qu'on traitait en France de mari aveugle et bénin, les jeunes femmes qui détestaient à bon escient Henri III, les jeunes seigneurs qui voulaient plaire aux jeunes femmes, tout cela demandait à combattre. On se mit donc aux champs encore une fois (avril 1580), et ceci s'appela « la guerre « des amoureux. » Le roi de Navarre, dès les premières entreprises, s'y révéla tout à coup un héros, « son honneur et sa vertu guerrière commençant « dès lors à se dénouer. » A la prise de Cahors, on le vit diriger les attaques avec sang froid, avec courage, et combattre vaillamment de sa main cinq

jours durant dans les rues de la ville. En toutes les rencontres qui suivirent, il gagna beaucoup de gloire, mais peu de profit; et il lui arriva bien à point que le duc d'Alençon, ayant besoin de soldats et d'argent pour aller prendre les Pays-Bas sous sa protection, s'entremît de rétablir la paix : ce qu'il vint faire lui-même en Gascogne (décembre 1580), ravi de se retrouver avec sa bonne sœur Marguerite, et recrutant pour son expédition ce qu'il y avait de meilleurs gens d'armes à la suite de son beau-frère.

Quatre ans de repos suivirent cette affaire d'honneur engagée, vidée et arrangée en quelques mois. Pendant que le duc d'Alençon allait manquer un mariage à Londres et une conquête en Flandre, le roi de Navarre reprenait le cours de sa vie paisible dont il ne reste guère de notable souvenir, sinon qu'en 1581 la jeune Fosseuse fut délivrée d'un enfant mort, la reine Marguerite faisant office de matrone; qu'en 1582 cette princesse alla visiter la cour de son frère, emmenant avec elle la nouvelle accouchée; que son mari remplaça femme et maîtresse absentes par la veuve du comte de Gramont, Diane d'Andouins; qu'enfin Marguerite fut en 1583 outrageusement renvoyée de la cour de France pour la mauvaise conduite qu'elle y avait tenue, et dont il existait, disait-on, une preuve vivante au sein de quelque nourrice. Ainsi cette renommée brillante qui s'était si noblement produite à Cahors risquait fort de se ternir, si un événement inattendu n'était venu lui fournir une nouvelle occasion d'éclat. Le duc d'Alençon était mort à trente ans (11 juin 1584), et il ne restait plus que la vie de Henri III, libertin efféminé dont le mariage et les amours étaient également stériles, pour séparer du trône l'aîné des Bourbons. Mais déjà on disputait ce titre au roi de Navarre. La ligue catholique plusieurs fois formée et rompue, se renouant alors, essayait de prouver par arguments et par textes que le cardinal Charles de Bourbon, oncle de Henri, devait exclure son neveu de ce qui n'était encore qu'une espérance. Le droit du roi de Navarre fut soutenu en d'autres écrits, et chacun prépara ses armes à l'appui. Le temps était venu pour l'héritier du trône de France de réformer sa vie et de suivre le conseil des gens graves. Henri prit un terme moyen; il employa du Plessis-Mornay et garda sa maîtresse.

Il faut rendre cette justice à Henri III, qu'il ne craignit pas de songer à son successeur, et qu'il le voulut comme la justice et l'intérêt de l'État le demandaient. Dès les premières atteintes du mal qui emporta son frère, il envoya un de ses favoris au roi de Navarre pour l'engager à se faire catholique, afin qu'il se trouvât tout prêt à recueillir sa couronne; c'est plus que n'auraient fait peut-être des caractères mieux famés. Le roi de Navarre crut sans doute qu'il n'en serait jamais réduit à la nécessité de se convertir; il refusa hautement, et son parti applaudit; le parti contraire se leva : car c'était vraiment un beau procès à juger par bataille. Cependant, quoiqu'il parût s'agir surtout

de son intérêt, le roi de Navarre ne fut pas le premier sous le harnais; le prince de Condé le devança. Mais lorsque Henri III « se couchant, comme dit un historien du temps, pour n'être pas abattu, » eut accepté la ligue et révoqué ses édits (juillet 1585); lorsque deux mois après le pape Sixte-Quint excommunia le roi de Navarre, Henri en appela tout à fait du roi et du pape à son épée. La moitié de ses amis venait d'être mise en déroute à la suite du prince de Condé dont on avait cruellement blâmé la fougue et raillé la défaite; le reste tremblait, et « il y avait parmi les réformés un tel naufrage des courages et des volontés, » que qui eût pu choisir n'aurait pas porté là sa fortune. Celle du roi de Navarre y était tout entière. Il s'y jeta bravement, « affriandé au travail par la beauté de sa besogne, et recevant du péril une nouvelle hauteur de cœur. » En même temps son excommunication lui rapporta cela de bon qu'elle le délivra de sa femme. Marguerite le quitta pour se jeter dans Agen, d'où elle fut bientôt chassée, et elle alla enfermer les licences de sa vie dans un château d'Auvergne. Le roi de Navarre dit adieu à la comtesse de Gramont, revint lui raconter son premier exploit, et enfin s'achemina heureusement jusqu'à la Rochelle (juin 1588). Là il eut à conduire quelques entreprises hardies dans le voisinage, à se démêler d'une négociation où l'avait entraîné Catherine escortée de ses filles d'honneur, à s'excuser d'un enfant que lui donna dans la ville même la fille d'un homme de robe longue, et qui causa grand scandale parmi les ministres réformés. Cependant il ne s'était encore montré qu'en des attaques de places et rencontres de cavalerie où il avait galamment fait le coup de pistolet, quand une armée royale, toute neuve et toute dorée, vint arrêter auprès de Coutras l'armée huguenote qui allait joindre ses auxiliaires allemands. Le roi de Navarre lui livra bataille sans marchander, et s'y fit reconnaître grand capitaine (octobre 1587). Après la victoire, il prit à peine le temps d'essuyer la poussière qui le couvrait (car ce n'était guère son habitude), et il courut jusqu'à Pau porter aux pieds de la comtesse de Gramont les drapeaux conquis sur l'ennemi.

Il avait repris son poste à la Rochelle, et la mort du prince de Condé, en le soulageant d'une rivalité, venait de lui laisser sur les bras toute la conduite du parti (1588), quand un caprice des Parisiens mit le roi de France presque en même état que son héritier. Chassé de sa capitale, Henri III s'humilia, fit un traité, assembla les états généraux, ensarglanta le château de Blois par un meurtre, puis fut forcé d'appeler à son secours celui qu'il avait exclu de sa succession. L'autre Henri s'était tenu tout le temps l'épée au poing; il avait eu aussi son assemblée à la Rochelle, où on l'avait assez rudement traité sur ses amours, sur ses complaisances pour les catholiques, sur la misère de ses serviteurs, toutes choses qu'il entendit patiemment comme prince qui savait sa condition. Profitant alors du soulèvement de la ligue qui pre-

nait des villes au roi de France, il se fit également sa part, tellement qu'il étendit ses limites jusqu'au lieu où Henri III était acculé. Là, c'est-à-dire à Tours, les deux rois se joignirent, s'embrassèrent (30 avril 1589), et marchèrent ensemble pour assiéger Paris; Paris, siège d'une république catholique comme la Rochelle l'était d'une république protestante, le Paris de la ligue tout semblable au Paris de nos révolutions, avec ses bourgeois armés et ses orateurs populaires, ses meneurs de faubourgs et ses agitations de la place publique, ses emportements aveugles et ses rumeurs soupçonneuses, ses crédulités forcenées et ses affections mobiles. Par-dessus tout cela, il s'y trouvait du fanatisme. Cette passion en fit sortir un moine jacobin qui vint à Saint-Cloud enfoncer son poignard dans le ventre de Henri III, et mourut aussitôt percé de plusieurs coups. Le 2 août 1589, Henri de Bourbon entrant dans la chambre de son beau-frère au lever du jour, y vit un cadavre au pied duquel priaient deux minimes; ce triste spectacle lui apprit qu'il était maintenant roi de France. « En quatre heures on lui fit un habit de deuil violet, » avec lequel il alla recevoir le serment de l'armée.

Mais ce n'était là qu'un simulacre d'avènement, à tel point que, dès le premier jour, il y eut des courtisans qui lui tournèrent le dos. C'est tout au plus même s'il lui restait une armée; car une partie de sa noblesse reprit incontinent le chemin de ses châteaux. Force lui fut de lever le siège et de conduire son infanterie jusqu'auprès de Dieppe. C'était chose piteuse que de voir l'héritier du grand empire de France se plaçant, dans le premier mois de son règne, à la frontière la plus prochaine de ses États, avec la mer ouverte derrière lui pour la retraite. Le duc de Mayenne alla l'y chercher avec une armée formidable; il en reçut le choc sans s'ébranler au poste d'Arques (21 septembre), et un mois après il était revenu aux portes de Paris dont il occupa les faubourgs toute une journée; puis reprenant sa course, il se rendit maître tour à tour de Vendôme, du Mans, d'Alençon, de Falaise, tout cela en sept semaines, par une marche de cent cinquante lieues; après quoi il vint se présenter à la rencontre du duc de Mayenne qu'il battit complètement dans la plaine d'Ivry (14 mars 1590). C'était le cas de redevenir amoureux, puisque la comtesse de Gramont était trop lo'n; aussi le devint-il, à la Roche-Guyon, d'une noble veuve, dame du lieu, qui fit bonne défense et ne se rendit pas.

Il avait encore une forte passion pour la ville de Paris, se plaignant, dans son langage cavalier, « de n'avoir pu que baiser cette belle maîtresse sans lui mettre la main au sein. » Aussi vint-il l'assiéger une troisième fois (25 avril), en dessein de la réduire par famine. A Montmartre il trouva quelque chose comme ce qu'il cherchait, une fille de bonne maison, Marie de Beauvilliers, ayant titre d'abbesse et habit de religieuse, ce qui ne la déparait pas, laquelle lui fut moins cruelle que la grande ville fermée de murs et souffrant dure disette.



Cette agréable distraction ne lui servit pas médiocrement pendant quatre mortels mois qu'il se tint en vue de sa capitale, rôdant autour des remparts, menaçant les portes, attaquant les faubourgs, donnant la chasse aux habitants affamés qui en sortaient et dont il eut enfin pitié, jusqu'à ce que l'arrivée du duc de Parme le contraignit à se retirer, emmenant avec lui cette abbesse dont il avait par trop soulevé le voile. Il fallut donc recommencer la guerre à travers pays, en suivant le duc de Parme qui, satisfait d'avoir délivré Paris, retournait vers la Flandre. Au mois de janvier 1591, il reparut sous les murs de Paris pour y tenter un coup de main. Puis, désespérant d'y entrer, il chercha du moins à s'élargir dans les provinces voisines, en Picardie, en Normandie, en Champagne; il prit Chartres, Louviers, Noyon, mais il manqua Rouen que le duc de Parme vint encore une fois lui ôter des mains (1592). Pendant que ces expéditions l'appelaient tantôt d'un côté, tantôt de l'autre, toujours assez loin et avec grande chance d'y recevoir quelque mousquetade, comme il lui arriva au combat d'Aumale, il s'était fait dans la jolie ville de Mantes une sorte de capitale au petit pied, où il tenait, dans l'intervalle des sièges et des entreprises, sa cour, son conseil, tout ce qu'il avait d'appareil royal, sauf sa justice qui était à Tours. Ce fut en ce lieu de Mantes qu'un de ses courtisans, l'ayant entrevenu souvent d'une sienne maîtresse dont la beauté défiait toute comparaison, lui fit venir l'envie de la voir. Henri IV fut tellement de son avis qu'il la prit pour lui, d'abord en partage, puis, à ce qu'il crut, en toute propriété. Elle se nommait Gabrielle, fille du seigneur d'Estrées.

Mais pour toute la peine qu'il se donnait, et tout le chemin qu'il lui fallait faire, et tous les combats qu'il avait à livrer, ses affaires n'avançaient pas, et il sentait bien que son casque n'était pas une couronne. Succès et défaites servaient également à l'embarrasser; car dans la mauvaise fortune il trouvait les divisions de son parti plus irritées et plus défiantes; dans la bonne, il se heurtait aussitôt contre cette nécessité prévue dès le premier jour, écartée tant qu'il n'y avait eu qu'à combattre, mais vers laquelle le ramenait chaque progrès de ses armes. Il y avait en effet cette bizarrerie dans sa position, qu'il n'était jamais plus libre de sa conscience que lorsqu'il n'avait rien à espérer, sinon des arquebusades et des coups d'épée. Dès qu'il avait fait un pas vers la possession de son trône, il retombait sous l'obligation de se convertir, d'abjurer, de renier la religion de sa mère, la croyance de sa jeunesse, celle qu'il avait choisie plus tard hautement et sans contrainte, celle enfin qui lui avait donné une armée et sa gloire. Et pourtant c'était une condition qu'il fallait subir; car de conquérir toute la France pièce à pièce, c'était une entreprise à user plus que la vie d'un homme, plus surtout que la patience des gens qui le servaient. S'il est vrai qu'en pareille matière une conviction profonde, sincère, fondée sur l'assurance du salut dans la voie qu'on suit et de la damnation dans l'au-

tre, doive persister jusqu'à la ruine et à la mort, il faudra dire seulement que cette conviction n'existait pas tout à fait chez le roi de Navarre, ou s'était fort affaiblie chez le roi de France. En tout cas, après avoir fait pour son honneur tout ce qu'on pouvait demander au courage humain, il se crut autorisé à faire bon marché de sa foi. Sept années de guerre ne l'avaient conduit qu'à la possibilité d'une transaction, et c'était comme vainqueur qu'on l'y recevait. Il y entra huguenot chancelant pour en sortir tiède catholique. Un excellent trait de son caractère et qu'il est bon de remarquer, c'est que, s'étant réservé deux mois pour s'instruire, il employa tout ce temps à prendre une ville. Réconforté par cette victoire, il se trouva en état de faire, tête levée, « le saut périlleux, » et il entendit la messe à Saint-Denis le 25 juillet 1593.

Cependant Paris n'ouvrait pas ses portes; on convint seulement d'une trêve, pendant laquelle tous les curieux de la ville venaient se donner le spectacle du Béarnais hérétique et relaps s'agenouillant dévotement à l'église, ou suivant à pas lents la procession; puis ils retournaient se quereller chez eux. Ce ne fut qu'au bout de huit mois qu'ayant traité avec le gouverneur de Meaux, s'étant fait sacrer à Chartres, faute de Reims, pour contenter la fantaisie des plus scrupuleux, ayant réduit Orléans, Bourges et Rouen à son obéissance, moyennant bonne condition à ceux qui les tenaient, il trouva les intelligences pratiquées dans Paris assez mûres pour s'y présenter de nouveau, non pas à force ouverte, non pas aussi en façon d'entrée solennelle, mais par surprise et de connivence avec les officiers et le gouverneur de la ville; ce qui s'exécuta le matin avant l'aube (22 mars 1594), sans bruit ni autre résistance que celle de quelques lansquenets qu'on jeta dans la Seine, les Espagnols du reste gardant leurs quartiers, d'où ils sortirent ensuite par composition. Mais ce n'était pas encore là le repos. Il s'était passé moins de deux mois que déjà le roi marchait vers la frontière de Picardie pour repousser les Espagnols, conduisant avec lui sa maîtresse enceinte jusqu'au château de Coucy où elle mit au monde un fils nommé César, dont il se laissa persuader qu'il était le père. Après avoir pris Laon, il revint à Paris, où un jour qu'il était dans la chambre de madame de Liancourt (car Gabrielle avait gagné ce nom par mariage), un jeune écolier appelé Jean Châtel, se glissant dans la foule, leva sur le roi son couteau et l'atteignit à la bouche (25 décembre 1594). Sur quoi le huguenot d'Aubigne dit ce bon mot qui, selon lui, a couru toute la France : « Vous n'avez renié Dieu que des lèvres, et il vous les a percées. Si vous le reniez du cœur, il vous le percera aussi. » Un homme de sens, et qui connaissait les partis, avait dit mieux lors de l'abjuration de Henri IV : « C'est maintenant qu'il y a péril pour la vie du roi; car il est devenu tuable, auparavant il n'étoit qu'ennemi. » Du reste l'attentat de Jean Châtel n'était pas le premier. Dès le mois d'août 1593, un Orléanais, parti de Lyon tout exprès pour tuer le roi,

avait été arrêté aux portes de Melun, porteur d'un couteau qui servit de preuve à le faire pendre; celui-là se nommait Pierre Barrière.

Le roi n'avait encore racheté que la moitié de ses villes, lorsqu'il déclara la guerre à l'Espagne (1596) hautement, ouvertement, et de royaume à royaume. La gloire ne lui manqua pas dès l'abord; car il fit des prodiges de valeur en Bourgogne au combat de Fontaine-Française (30 juin). Mais les Espagnols prirent leur revanche en Picardie. Il accourut de Lyon où lui était parvenue l'absolution du pape, pour venir au secours de cette province, ayant alors à ses côtés le duc de Mayenne, le chef de la ligue, qui s'était réconcilié avec lui et qui resta jusqu'à la fin serviteur fidèle, comme il avait été, tant qu'il l'avait pu, brave et loyal adversaire. Malgré toute son activité, Henri IV ne put sauver Calais (avril 1596), mais il réussit à prendre la Fère dont il donna le gouvernement à son fils César, âgé de deux ans. Aussi Gabrielle, qu'il avait faite marquise de Monceaux, et qui plus est dé mariée, était-elle auprès de lui, où Rosny l'avait amenée, « faisant, comme il le dit lui-même, le bon valet auprès de la dame. » Alors le roi, qui se voyait fort court d'argent, car en ce temps (c'est lui qui parle) « ses chemises étoient toutes déchirées, ses « pourpoints troués au coude, et sa marmite souvent « renversée, » imagina de convoquer une assemblée des notables à Rouen, sachant bien que les assemblées sont surtout bonnes à fournir des écus. Il adressa aux notables (novembre 1596) un excellent discours où il leur promettait toute liberté d'avis et de paroles, allant jusqu'à dire qu'il se mettait sous leur tutelle, mais en ayant soin d'ajouter « que « cette envie prenoit rarement aux barbes grises et « aux victorieux. » Pendant que l'assemblée votait des impôts, à côté d'elle la marquise de Monceaux accouchait d'une fille, et les notables en virent le baptême. Tout cela rendit la joie au cœur du roi, qui se donna enfin la douceur d'un hiver passé à Paris dans les fêtes. Elles duraient encore quand la nouvelle arriva de la prise d'Amiens par l'Espagnol (mars 1597). Le roi y courut avec tout ce qu'il put ramasser de troupes, et en compagnie de sa maîtresse. Il ne quitta le siège que pour venir à Paris presser de ses ordres, souvent aigres et sévères, le recouvrement des deniers que le parlement lui marchandait. Amiens repris à la vue de l'armée espagnole, et toute la province rassurée (septembre 1597), il y eut à s'occuper de la Bretagne, dernier asile du parti catholique. Le duc de Mercœur, qui s'était réservé l'honneur d'enterrer la ligue, fit sa soumission, et le roi, réglant ses comptes un peu arriérés avec ses anciens amis, data de Nantes un édit en faveur des réformés (avril 1598). Presqu'en même temps la paix avec l'Espagne était conclue à Vervins (mai 1598), et Henri IV se vit enfin arrivé au terme de ses longues traverses, possesseur de tout son héritage, aimé de ses sujets, absous du pape, n'ayant d'autre embarras que de contenter tous ses serviteurs anciens et nouveaux.

En cet état Gabrielle, qui était devenue duchesse

de Beaufort, lui donna un second fils dont le nom fut Alexandre. La naissance de cet enfant rendit plus vif un désir qu'il essayait de temps à autre dans l'oreille de ses plus intimes confidens, et qu'il avait grand dépit de voir partout repoussé. Il lui semblait qu'ayant une femme toute trouvée, et des héritiers tout faits, ce n'était qu'affaire de bonne amitié avec le saint-siège, d'annuler son mariage, d'en contracter un nouveau, et de légitimer ses enfants déjà nés. Car il faut noter le profit qui lui était survenu d'être catholique. Huguenot, il n'aurait eu personne par qui faire consacrer la rupture d'un lien librement et publiquement formé; catholique, il avait cette ressource du démariage par autorité pontificale, que les papes, lui semblait-il, ne pouvaient plus refuser depuis l'exemple de Henri VIII. La reine Marguerite, toujours retirée en Auvergne, ne demandait pas mieux que de prêter les mains au divorce, pourvu qu'on mit en sa place quelque chose de mieux que Gabrielle; car encore son mari devait-il gagner au change. Celui-ci cependant vivait en bonne espérance d'y réussir, sans se rebuter des mauvais propos, traitant sa maîtresse comme il eût fait sa femme, et voyant croître avec plaisir une quatrième grossesse, toujours à compte sur le mariage futur, lorsque la duchesse de Beaufort fut frappée à Paris de mort subite (10 avril 1599). Le roi s'abandonna au plus profond désespoir, s'habilla de deuil, écrivit à sa sœur « que la racine de son amour était morte », et au bout de quelques semaines prit une autre maîtresse. Celle-ci était fille du seigneur d'Entragues et d'une Marie Touchet dont Charles IX avait eu un fils; elle ne se rendit que moyennant une somme de cent mille écus avec promesse de mariage pour le cas où elle accoucherait dans l'année d'un enfant mâle. Pendant qu'il jouissait de sa nouvelle conquête, on s'occupait à Rouen de faire dissoudre son mariage avec Marguerite, ce qui lui fut accordé bien volontiers (novembre 1599); mais en même temps on négociait pour lui une nouvelle épreuve du lien conjugal avec la nièce du grand-duc de Toscane, et, la chose étant conclue, il n'y eut plus à s'en dédire.

De cette longue guerre qui avait coûté tant de sang, il restait une petite contestation avec le duc de Savoie, que l'on croyait avoir réglée à Paris lorsqu'il vint y visiter le roi (1599). Comme il tardait à tenir parole, le roi se mit en route pour l'y contraindre (juin 1600), laissant à Paris Henriette d'Entragues, maintenant marquise de Verneuil, sur le point d'accoucher; ce qu'elle fit avant terme et d'un enfant mort. La Savoie, hardiment conquise en quelques mois, força le duc à s'accommoder; alors le roi, se trouvant tout porté au-devant de sa nouvelle épouse, congédia la marquise qui était venue le rejoindre à Chambéry, et courut à Lyon surprendre Marie de Medicis le soir dans son logis, où, comme il n'y avait pas de lit préparé pour lui, il la pria de le recevoir sans façon dans le sien (9 décembre 1600). Après la cérémonie qui suivit la consommation, toute la cour revint à Paris, et le roi présenta sa maîtresse à sa

femme, voulant qu'elles vécussent toutes deux en bon ménage, ensemble et avec lui. L'année 1601 se passa en soins domestiques, et ne fut remarquable que par un voyage du roi à Calais, voyage qui mit près l'un de l'autre, séparés seulement par un bras de mer, les souverains d'Angleterre et de France, sans les amener à se voir et à s'entendre. Ce qu'il y eut en cela de particulier, c'est que des deux têtes couronnées, celle qui était sur un corps de femme parut la plus désireuse d'embrasser l'autre, et que Henri IV, qui n'avait peur de rien, ce nous semble, recula devant les caresses d'Élisabeth. Il revint en hâte de Calais pour assister à la naissance de son premier enfant légitime qui naquit neuf mois et dix-huit jours après la soirée de Lyon (27 septembre 1601), et fut depuis le roi Louis XIII. La marquise accoucha le mois suivant d'un fils qui devint évêque. Le roi partagea ses attentions avec une égalité fort touchante aux deux mères et aux deux enfants.

Henri IV avait vu presque toute sa vie la guerre civile, puis le poignard s'était approché de son cœur; il lui restait à connaître un autre souci de la paix et de la royauté, les conspirations. Il s'en découvrit une dont le chef était un de ses meilleurs généraux, de ses plus fidèles serviteurs au temps des combats, son compagnon d'Arques, d'Ivry, d'Aumale, de Fontaine-Française, Charles de Gontaut, maréchal de Biron, celui qu'il avait publiquement appelé « le plus tranchant instrument de ses victoires. » Ce qu'on lui reprochait ne pouvait guère se nommer que menées, intelligences, projets, vaneries, rêves d'indépendance et de souveraineté, sans effet ni exécution, tout cela révélé par le méprisable agent qui avait excité son orgueil. Le roi commença par mettre ordre au pays, où quelques mécontentements d'un ordre matériel pouvaient tenter les ambitions. Sa présence à Poitiers suffit pour rétablir l'obéissance; puis il manda le maréchal de Biron à Fontainebleau. Là il le pressa d'avouer sa faute; Biron rappela fièrement ses services. Il fut arrêté aussitôt, conduit à la Bastille, livré au parlement, où les pairs ne voulurent pas siéger, condamné à mort et exécuté par la main du bourreau (31 juillet 1602). Le roi n'intervint au procès que pour faire grâce au coupable de l'échafaud dressé en place de Grève; on lui coupa la tête, par faveur, entre quatre murs et sans témoins. Le comte d'Auvergne, fils naturel de Charles IX, avait été mis en prison comme son complice; mais il n'y eut pas de rigueur pour le frère de la marquise de Verneuil.

C'est le moins sans doute que l'on compte la mort de ce brave capitaine, quoiqu'il ait pu exiger la raison d'État, parmi les chagrins de Henri IV, puisque l'histoire, ordinairement si tendre pour les victimes, ne fait pas reproche de celle-ci à sa mémoire. Mais dans le même temps il avait d'autres sujets de tristesse. Moins heureux avec Marie qu'il ne l'avait été avec Marguerite, il la trouvait jalouse et s'avisait d'être jaloux; c'est assez de la moitié pour troubler la vie. Cependant les choses se passèrent

aussi régulièrement la seconde année que la précédente. La reine et la marquise mirent chacune au monde une fille à deux mois de distance (novembre 1602 et janvier 1603). Peu de temps après, le roi mena sa femme à Metz où il était survenu quelque désordre, et au retour, sa première visite fut pour la marquise. Le double ménage reprit son cours, et les querelles recommencèrent à ce point qu'il s'y forma le germe d'une conspiration nouvelle. Le duc de Bouillon, soupçonné d'intelligence avec Biron, et qui s'était mis prudemment hors de portée, continuait, disait-on, ses intrigues, où étaient entrés le père, le frère de la marquise et cette dame elle-même. Parmi les instruments dont on voulait se servir contre le repos de l'État, se trouvait cette promesse de mariage à laquelle la jeune Henriette s'était rendue, que Rosny avait brutalement déchirée, et dont le roi avait fait sans mot dire une seconde copie. Il fallut la racheter des mains du père (juillet 1604), qui n'en fut pas moins arrêté quelques mois après, ainsi que le comte d'Auvergne, la marquise restant sous bonne garde en son logis. Par suite, le sieur d'Enragues et le comte d'Auvergne furent condamnés à mort, et la marquise à la reclusion dans un couvent (février 1605). Le roi fit grâce au père, laissa le frère en prison et retourna chez la fille. Mais pendant sa disgrâce il lui avait donné une rivale : Jacqueline de Bueil, qu'il avait faite comtesse de Moret, et mariée pour plus de sûreté, était maintenant en tiers dans ses bonnes grâces, et bientôt la famille devint complète par l'arrivée à Paris de la reine Marguerite, qui eut charge sans doute d'enseigner la complaisance à la reine Marie.

Tous ces tracas d'intérieur n'empêchaient pas Henri IV de veiller avec zèle et prudence, avec une haute connaissance des hommes et des choses, aux intérêts de son royaume. Mais les temps de calme ont cela de désobligeant pour les rois, que leurs actes s'enregistrent froidement dans l'histoire sous le titre des établissements qu'ils ont fondés, des réformes qu'ils ont opérées, des bâtiments qu'ils ont élevés, et que la curiosité, peu excitée à les suivre dans les fonctions du gouvernement, se reporte tout naturellement sur leur personne. Ainsi, quoi qu'on veuille faire, en l'absence des grands événements, et pendant le silence des sages projets qui mûrissent et produisent sans bruit, la dernière partie de la vie de Henri IV est tout entière dans sa maison. On voit bien qu'en 1605 il partit pour rétablir l'ordre dans quelques provinces toujours travaillées par un sourd esprit de sédition; qu'en 1606 il alla, suivi d'une armée, demander au duc de Bouillon compte de sa conduite et assurance de sa fidélité dans sa ville souveraine de Sedan; que la même année il établit une chambre de justice pour la recherche des vols commis en finance; qu'il se porta ensuite médiateur puissant entre le pape et Venise pour la conciliation de leurs différends (1607), entre l'Espagne et les Provinces unies pour la conclusion d'une trêve (1608), ce qui le fit nommer l'arbitre de la chrétienté; mais tout cela tient encore

moins de place, même dans les relations sérieuses, que ses querelles sans cesse renaissantes avec la reine sa femme, que les bouderies, les pleurs et les colères du lit conjugal, que le coup de poing surtout destiné par la reine à son mari et intercepté par le bras du duc de Sully. Pendant tout ce temps néanmoins l'heureuse fécondité de la princesse florentine ne se démentit pas. En février 1606, elle mit au monde une seconde fille; en avril 1607 un second fils; en avril 1608 un autre fils, et en novembre 1609 une autre fille. A tous ces dons du ciel la comtesse de Moret joignit celui d'un fils né en 1607, et Charlotte des Essars, comtesse de Romorantin, augmenta de deux filles cette nombreuse postérité.

A travers tout cela, peut-être à cause de tout cela, Henri IV avait vieilli, plus vite que son âge ne le voulait. Son admirable activité était entravée souvent par des infirmités et des maladies. Plusieurs fois il avait été averti de songer à la mort, et, le péril passé, il s'était aussitôt rejeté gaiement dans ces passe-temps joyeux qui remplaçaient pour lui le travail des camps. A l'âge de 56 ans, on le vit tout à coup entreprendre une nouvelle guerre et un nouvel amour. La guerre était contre l'Espagne, sa vieille ennemie. Quant à l'amour, une jeune fille de seize ans lui avait apparu dans un ballet sous le costume de Diane, sa main gentille armée du dard des chasseresses. C'était la fille du connétable de Montmorency. Le roi en fut épris sur le champ, et, pour la garder auprès de lui, il la maria, non pas au beau comte de Bassompierre qui la désirait trop, mais au prince de Condé, pauvre hère, d'une légitimité assez suspecte, sans biens, sans amis, sans crédit, qui n'était plus rien dans le royaume, pas même huguenot, et à qui l'on payait une pension (mai 1609). Au bout de six mois le jeune marié, ennuyé de voir trop souvent son vieux cousin à la poursuite de sa femme, la fit monter à cheval et l'emmena en Flandre. C'était en Flandre aussi que devaient se porter les armes du roi, et il n'en fut que plus prompt à faire les préparatifs de son départ. Tout était disposé, et il allait quitter Paris pour se retrouver encore une fois à la tête de sa noblesse, de ses régiments, de ses bons et fidèles Suisses, de sa belle artillerie tout nouvellement fondue par les soins de Sully. Il avait de grands desseins dans la pensée et une vive passion au cœur, mi-partie de colère et d'amour. La reine, sa femme, venait d'être couronnée à Saint-Denis; il ne lui restait plus qu'un jour à passer dans Paris, un jour de fête et d'entrée solennelle pour lequel les échafauds étaient dressés, les tapisseries tendues, les canons chargés, toute la ville en attente, lorsque, la veille de cette cérémonie, le 14 mai 1610, un de ces hommes sombres et retirés, qui ramassent en leur cerveau toutes les préventions, toutes les crédulités de leur temps, et les convertissent en désir de meurtre, un homme de la même trempe que le moine Jacques Clément et notre contemporain Pierre Louvel, suivit le carrosse du roi, et, trouvant l'occasion belle, lui

plongea froidement son couteau dans le cœur. Avant qu'on l'eût ramené au Louvre, Henri IV était mort.

.....

## SUR LES OECONOMIES ROYALES.

Ce monument, élevé à la mémoire d'un grand roi par un grand ministre qui ne s'est pas oublié, est certainement l'ouvrage le plus singulier que la préoccupation de soi-même ait jamais légué à la curiosité publique. Tout y est hors des habitudes adoptées par les hommes qui ont voulu laisser quelque souvenir de leur présence dans les événements du siècle où ils ont vécu, et faire en quelque sorte les affaires de leur renommée. Pour en comprendre seulement la forme, il faut se représenter dans une salle du château de Villebon ou de Sully, quatre hommes de plume qui viennent tour à tour, après avoir passé de longues journées à feuilleter notes, relations, lettres, mémoires ou états entassés dans une armoire, lire au seigneur du lieu, lequel écoute, approuve ou reprend, le récit de ce qu'il a fait, vu, dit et entendu; s'adressant non pas au public comme les écrivains de métier, non pas à des lecteurs choisis comme les plus modestes des hommes célèbres, mais à lui-même, en face, au héros, au témoin, au personnage de tous les faits qu'ils racontent. Si les choses se sont ainsi passées, si ce n'est pas là un artifice d'auteur qui recherche l'originalité, il n'y a rien assurément de plus piquant, dans tout ce livre si plein de renseignements précieux, que la façon même dont il a été rédigé; il ne s'y trouve pas de scènes plus curieuses que celle où l'on peut se figurer un homme d'Etat assis pour entendre le compte à lui rendu de ses propres actions, auditeur patient de sa vie, donnant la réplique à son historien, et se prêtant pour ainsi dire à essayer la gloire.

On ne se douterait guère, en le lisant, que la tâche imposée à ceux qui l'ont écrit était d'abord d'abrégé et de réduire, et pourtant ce qui nous a été laissé ne serait, au dire des rédacteurs, qu'un extrait de plus amples mémoires recueillis au fur et à mesure des événements, presque depuis la naissance de Maximilien de Bethune jusqu'à la mort de Henri IV, et à la retraite de son principal ministre. Ces mémoires primitifs étaient l'ouvrage de trois secrétaires dont il ne restait plus qu'un seul au service de l'ancien surintendant, les deux autres s'étant sans doute perdus dans sa disgrâce. Celui qui était demeuré fidèle, et qui parle souvent en son seul nom, s'était associé trois rédacteurs, domestiques de nouvelle date, pour la compilation qu'il avait à faire. L'époque où l'on se mit à l'œuvre est assez vaguement indiquée. Ce fut, dit-on, « plusieurs années après la mort de Henri IV, » lorsqu'il avait déjà été publié nombre d'ouvrages sur la vie de ce prince; et les rédacteurs prenaient la plume sous l'inspiration avouée « du dépit et de « la colère » que leur causait l'ignorance ou la ma-

lice des autres historiens. Nous croyons d'autant plus volontiers à cette déclaration, qu'une composition d'aussi longue haleine n'a pu être entreprise et finie que dans un temps de parfait repos. Or, malgré ce que l'on en croit généralement, ce ne fut pas de sitôt après avoir quitté le maniement des affaires que le duc de Sully se résigna aux tristes loisirs de la vie seigneuriale. Pendant assez d'années, on retrouve son nom mêlé, quoique sans éclat, à toutes les agitations comme à toutes les cérémonies du règne de Louis XIII. C'est seulement bien tard, après la ruine du parti réformé, qu'il s'éteint dans la retraite pour ne plus se révéler qu'à sa mort.

Les quatre rédacteurs ne furent pas longtemps à travailler ensemble; deux seulement s'en occupèrent avec assiduité, deux autres en furent détournés « pour avoir trouvé des emplois plus profitables. » La besogne fut ainsi poussée jusqu'à la composition de deux parties ou livres, après laquelle on s'arrêta pour avoir l'agrément du noble personnage à qui l'on rendait ses souvenirs. Le premier livre contenait tout le temps écoulé depuis l'année 1570 jusqu'au commencement de l'an 1601, à partir de la paix qui prépara le massacre de la Saint-Barthélemy, en finissant à la paix de Savoie et au mariage du roi avec Marie de Médicis. Ce sont les quatre-vingt-dix-neuf premiers chapitres de notre édition qui se terminent à la page 354 du premier volume. Le second livre menait la suite du récit à la fin de l'année 1605. Là, les deux rédacteurs faisaient une pause, parce que le temps leur manquait pour arriver au terme de leur tâche, « ce qu'ils désespéraient d'achever, ni bientôt, ni entièrement », et, pour compléter au moins le principal objet de leur entreprise, ils adressaient au duc un épilogue de leur façon, un panégyrique à bout portant, qui embrassait toute son administration et même sa retraite, de telle sorte que, le recueil historique venant à faillir par manque de temps pour en réunir les matériaux, la part personnelle, celle de l'éloge, et, sans qu'on voulût prononcer ce mot, de l'apologie, aurait du moins atteint sa perfection. Cette seconde partie se termine dans notre édition à la p. 122 du deuxième tome.

Le nom des rédacteurs est resté à peu près inconnu, et ne donnerait lieu en réalité qu'à une recherche d'intérêt domestique. Cependant, sans mettre un grand prix à savoir quels ils furent, il faut rectifier ce qu'on a pu à tort en dire ailleurs. M. Petitot donne la liste de douze secrétaires qui servirent le duc de Sully, soit pendant, soit depuis son administration. Cette liste est tirée du discours dont nous venons de parler, où elle se trouve plus complète et plus claire. Il se demande si les quatre Arnault qui en font partie étaient de la célèbre famille des Arnault; il le nie dans le texte, il paraît le supposer dans une note. L'affirmative n'est pas douteuse; le discours le dit nettement. « Les quatre Arnault dont l'un mourut avant le roi, l'autre a été intendant des finances, le troisième maître de camp, le quatrième trésorier de France

« et de la voirie, » sont bien quatre des huit fils d'Antoine Arnault, mort en 1585, savoir : Claude, qui mourut en 1602, Isaac l'intendant, Pierre le mestre de camp, et Louis. Cette observation n'aurait d'autre valeur que la réparation d'une erreur imprimée, puisqu'aucun des trois frères survivants ne suivit le duc de Sully hors des affaires, et ne put prendre part à la rédaction des *Oeconomies*; mais il y est entré un morceau notable tout entier de la main de deux d'entre eux, l'intendant, sans doute, et le mestre de camp : c'est la relation de l'ambassade du marquis de Rosny vers le roi Jacques d'Angleterre (page 423 de notre premier volume). Le seul des douze secrétaires qui, n'ayant pas emploi, paraît être resté auprès du duc, s'appelait Legendre. Deux autres qui ne se nomment pas, et sont auteurs pour leur compte du discours placé à la fin de la seconde partie, furent introduits dans sa maison par ceux-là mêmes dont ils se séparèrent, et reçurent, des frères Arnault notamment, toutes les communications nécessaires à leur service de secrétaires ou d'historiographes.

Les deux premières parties étant terminées, on s'occupa de les imprimer; car bien que le récit fût adressé au duc de Sully, il était fait pour le public, « les changements du temps, celui de l'état des affaires, les diverses sortes d'administrateurs et d'administrations que l'on avoit vues, ayant donné lieu de croire que quelque jour les libertés dont on avoit usé à dire la vérité de beaucoup de choses importantes, ne seroient plus hors de saison. » Cette phrase, qui se trouve dans l'avant-propos du deuxième livre, annonce clairement que l'on écrivait sous le ministère du cardinal de Richelieu, qui avait ramené la marche des affaires à la politique de Henri IV. Les formes de « la mise en lumière » furent aussi singulières que l'avaient été celles de la rédaction. Dans le château de Sully fut appelé un imprimeur d'Angers, auquel on livra le précieux manuscrit pour le reproduire sous les yeux du maître et sous la garde des serviteurs. Mais à cette précaution, dont plusieurs seigneurs avaient usé déjà pour l'émission de leurs œuvres par la presse, et notamment ceux de la religion, comme du Plessis-Mornay et d'Aubigné, on ajouta un raffinement de bizarrerie et de mystère. Au lieu de ne mettre sur le frontispice ni lieu d'impression ni nom d'imprimeur, suivant l'usage des publications clandestines ou privilégiées, on affubla de noms grecs deux prétendus imprimeurs d'Amsterdam, lesquels adressaient de cette ville, « aux lecteurs vertueux et judicieux, » les deux volumes in-folio dont le long titre figure en tête de notre premier volume. Les bibliographes leur donnent la date de 1638, et nous ne croyons pas faire une conjecture hasardeuse en trouvant la preuve de la réalité de cette date dans un passage du chapitre 104. On y raconte que le feu roi s'étant fait donner l'horoscope de son fils par le sieur de la Brosse, celui-ci lui avait dit, entre autres choses, « que son fils auroit lignée. » Or Louis XIII, marié en 1615, ayant commencé en 1619 la vie conjugale, vit naître son premier

enfant, Louis XIV, en 1639. Comme les autres prédictions sont passablement épigrammatiques, il est bien probable qu'on n'y inséra celle-ci que lorsqu'elle s'était réalisée hors de toute espérance. Il ne paraît pas que cette édition de château ait été tirée à un assez grand nombre d'exemplaires pour qu'il en soit tombé dans le cabinet des gens de lettres. Du reste, comme on était alors fort délicat sur l'élégance du style, il est à peu près certain qu'on en aurait fait fort peu de cas. On doit croire que la distribution s'en fit avec réserve et discrétion, à gens d'élite, et que les volumes restèrent longtemps en mains sûres. Ce fut seulement onze ans après, en 1649, qu'un libraire de Rouen mit le livre en circulation. Le médecin Guy-Patin annonce ainsi, le 27 novembre 1649, l'apparition prochaine de l'édition vulgaire : « Nous aurons ici « bientôt, de Rouen, en deux volumes in-folio, « les mémoires de feu M. de Sully, qu'il avoit fait « imprimer de son vivant, en sa maison, et qui « n'ont jamais été vus que très-peu; » et le 10 janvier 1650, il écrit : « On vend ici fort librement et « publiquement les Mémoires de M. de Sully, en « deux petits volumes in-folio. » C'est donc à partir de cette époque que la lecture des OEconomies royales fut accessible à tout le monde. Ces deux premiers livres, qui composaient jusque-là tout l'ouvrage, furent réimprimés encore à Amsterdam, en quatre volumes petit in-12, l'an 1652.

Cependant, le duc de Sully avait survécu trois années au moins à l'impression des deux premières parties de ses Mémoires, car il mourut le 25 décembre 1641; les rédacteurs annonçaient une suite, et, dans le fait, ils la devaient; ils étaient restés en chemin d'un règne, au milieu d'événements entamés, sans qu'on vît bien pourquoi ils n'étaient pas allés plus avant. Maintenant que le public avait pris connaissance de l'ouvrage, il demandait qu'on le lui donnât achevé. C'est pour répondre à ce vœu que le savant Jean le Laboureur, historien lui-même, et, comme nous, collecteur de monuments historiques, obtint la permission de publier cette continuation, qui était restée manuscrite; elle commence à la page 122 de notre second volume.

S'il faut en croire l'épître liminaire placée en tête de la troisième partie, elle ne serait pas écrite des mêmes mains que les précédentes; les rédacteurs seraient deux nouveaux secrétaires recrus au service du duc de Sully après les quatre précédents; leur récit, tout à fait semblable, pour la prolixité du style et la liberté des digressions, à celui de leurs prédécesseurs, part du point où ceux-ci s'étaient arrêtés, au commencement de l'année 1606, et marche du même pas à peu près jusqu'au mois de février 1611, époque à laquelle le duc de Sully fut mis hors de ses charges (p. 87 de notre troisième volume). Le surplus se compose de « plusieurs « manuscrits de ces temps-là, ramassés par les « mêmes secrétaires parmi les papiers qui étaient en « confusion dans le cabinet de leur maître, et qu'ils « transcrivirent sans ordre, remettant à ceux qui « voudront les lire le soin de les ranger. » Ce sont

premièrement des discours sur les desseins du roi Henri le Grand, projets de réglemens, états de recette et dépense, états des armées, recueil de maximes et conseils politiques; puis des notes critiques sur les mémoires de Villeroy; un discours sur le gouvernement des affaires après la mort de Henri IV; plusieurs lettres de ce roi; une lettre anonyme adressée au roi Louis XIII contre le maréchal d'Ancre; des remarques fort aigres sur plusieurs historiens contemporains; un autre discours sur le règne de Louis XIII jusqu'à la prise de la Rochelle (que M. Petitot a cru être l'ouvrage d'un officier protestant, et qui est tout simplement un extrait des Mémoires du duc de Rohan, auquel on a cousu assez maladroitement un commencement et une fin); enfin une lettre du duc de Sully, adressée au roi Henri IV, et omise dans les Mémoires; toutes pièces que nous avons dû reproduire pour qu'il ne manquât rien à notre édition de ce que Jean le Laboureur avait recueilli des secrétaires du duc de Sully, et de ce qu'il publia l'an 1662 en deux volumes in-folio. Depuis, l'ouvrage complet a été réimprimé plusieurs fois, en 1663 in-12, en 1664 in-folio, et en 1725, à Trévoux, sous l'indication d'Amsterdam, dans le format petit in-12.

Avec cette œuvre de première origine, un écrivain du dix-huitième siècle a composé un ouvrage de seconde main, qu'il n'est pas du tout nécessaire de déprecier pour faire valoir celui que nous donnons. L'abbé de Lécuse des Loges, vivant dans un temps où l'on avait peu de goût pour les originaux, où l'on voulait de commodes et faciles lectures, a imaginé de faire pour tous ce que chacun éprouve l'envie de faire pour soi en lisant un livre comme celui-ci. Il a tiré des OEconomies royales un récit façonné en bon ordre, écrit en bon style, selon ses idées, son esprit, sa foi, sa conscience, son intérêt, toutes choses dont nul homme ne peut se départir. Le profit a été de rendre populaires le nom de Sully et les souvenirs de Henri IV; l'inconvénient était, non pas de mettre aux mains des lecteurs mondains un document historique altéré, modifié, partant corrompu, car ceux-là ne seraient pas allés chercher le vrai à la source, mais de fournir à ceux qui veulent paraître savants et font profession d'instruire les autres, un travail tout prêt, qui les dispensait de s'instruire eux-mêmes. Le tort n'était pas de l'auteur qui donnait son œuvre, qui avait rempli son but et obtenu son succès; il était chez ceux qui s'en rapportaient à lui, qui le citaient pour autorité, comme si, en publiant son livre, il eût déchiré celui d'où il l'avait extrait, et fermé à tous la mine où il avait puisé. Les Mémoires de l'abbé de Lécuse peuvent donc très-bien continuer à faire leur chemin dans le monde avec les OEconomies royales, sans que les éditions de l'un et de l'autre ouvrage puissent se nuire et croient devoir se quereller; car ils ne sont pas destinés aux mêmes lecteurs, l'un étant pour le passe-temps qui fuit la peine, l'autre pour l'étude qui s'y complait.

La personne du duc de Sully tient tant de place



dans le volumineux recueil de ses secrétaires, qu'il serait fort mal séant de vouloir anticiper ici sur la longue biographie qu'on va lire. Il est vrai qu'elle se termine à l'année 1611, époque où le ministre de Henri IV cessa de diriger les finances et de siéger dans les conseils. Le duc n'avait guère alors que cinquante ans; car il était de six ans moins âgé que son maître, quoique la tradition et les arts persistent à nous le représenter vieux ministre. Nous avons dit déjà que sa retraite ne fut pas le repos et ne resta pas conlinée dans une terre, en dépit de ce qu'assurent ses panégyristes. La vérité est qu'il prit sa part de tous les troubles qui agitérent les premières années du règne de Louis XIII, qu'on le voit sans cesse reparaitre à la cour, aux lits de justice, aux assemblées, mais toujours en seconde ligne; effacé dans les intrigues par le duc de Bouillon, dans les transactions par le maréchal de Lesdiguières, dans les actes de fidélité par le duc d'Épernon, dans la révolte ouverte par son gendre le duc de Rohan. Ensuite il disparaît tout à fait sous le ministère du cardinal de Richelieu, qui le fait pourtant maréchal de France en 1634, pour lui retirer sa charge de grand maître de l'artillerie. Enfin il meurt presque ignoré en 1641, à l'âge de quatre-vingt-un ans, après en avoir passé trente d'une vieillesse verte et vigoureuse, comme il semble qu'elle était partout alors, sans que l'admiration justement due à la première partie de sa vie puisse trouver une seule action à prendre dans la seconde.

C'est heureusement cette première partie, si belle, si glorieuse, mêlée aux plus grands événements et aux plus nobles figures de notre histoire, qui remplit tout ce livre, où semble respirer Henri IV. Le duc de Sully lui-même y tient le second rang, aimant son maître avec passion, mais d'un amour grondeur et jaloux, semblant ne vouloir laisser personne s'en approcher, mordant également qui le menace et qui le caresse. Il est presque inutile de dire qu'on doit se tenir en garde contre les jugements portés sur les hommes et sur les choses par les rédacteurs des Mémoires. Ce n'est pas sans doute un grand mal de prendre trop haute estime de l'homme d'État qui les a fait écrire, mais c'en serait un de flétrir, sur la foi de sa mauvaise humeur, les réputations moins bien traitées que la sienne. Ici même il n'y a pas la

haine ou la complaisance des partis. Le duc de Sully n'épargne personne; huguenots et jésuites, catholiques et politiques, d'Épernon comme du Plessis-Mornay, Lesdiguières comme le comte d'Auvergne, amis, ennemis, parents, maîtresses, collègues ou devanciers du ministère, tout est coupable ou suspect, tout subit une impitoyable censure. Il faut aussi ne pas accepter aveuglément l'importance de certains faits où le duc de Sully figure, et ne pas renfermer toute l'histoire, surtout des premières années, dans la part que le jeune Rosny a pu y prendre. Enfin, lorsqu'on trouvera de si longs et de si fréquents développements sur ce que les rédacteurs appellent « les hauts et « magnifiques desseins de Henri le Grand, » on aura soin de se rappeler que la rédaction définitive et la mise en ordre des Mémoires est postérieure de vingt ans au moins à la mort de ce roi, que c'est une œuvre de vieillesse et de retraite, de chagrin et de regret. Alors on comprendra que l'envie de blâmer le présent a dû conduire nécessairement à « magnifier » le passé; que les rêveries du vieux ministre, s'étendant à l'aise hors des choses positives et vivantes qui l'avaient occupé autrefois, ont pu se formuler en projets sans fin, en possibilités capricieusement enchaînées, dont il a prêté le plan et la déduction à l'ancien règne, pour la plus grande gloire de son maître, et la plus profonde humiliation du règne suivant. La république européenne de Henri IV est certainement née au château de Sully; au Louvre, à l'Arsenal, on avait bien autre chose à faire qu'à bâtir des utopies; et certes un roi, auquel il avait fallu cinq ans de sa vie pour rentrer dans sa capitale, dix ans pour achever son dernier traité avec le dernier de ses sujets rebelles, aurait été le plus insensé de tous les hommes s'il eût pensé, lui presque sexagénaire, qu'il lui restait encore assez de temps pour refaire à neuf la chrétienté, distribuer les couronnes, répartir les lots, fixer à chacun ses limites et à tous une loi commune. Ces longues vœs appartiennent au loisir, à l'inoccupation, au besoin d'employer un esprit actif et remuant, qui n'a plus à s'exercer sur les affaires réelles; l'homme de génie appelé à les diriger sait trop bien l'incertitude du lendemain pour laisser sa pensée se perdre dans un avenir infini.



# AVIS

## DES PREMIERS IMPRIMEURS.

### LES IMPRIMEURS

AUX LECTEURS VERTUEUX ET JUDICIEUX, SALUT.

Nous, Alethinographe de Cleartimelée et Graphexcon de Pistariste, imprimeurs en la ville d'Amstelredam, en faisant l'adresse de ces Memoires aux sages et judicieux lecteurs, nous leur remettons aussi fort volontiers la decision et correction de toutes les erreurs et fautes de nostre impression, les priant seulement d'approuver sans aucune aversion, la creance que nous avons eue de long-temps, à sçavoir, que depuis l'entière dépravation de la nature humaine, laquelle en sa pureté aymoît son createur de tout son cœur et son prochain comme soy-mesme, nul des individus d'icelle ne s'est encore peu trouver aux paroles duquel il ne se rencontra plus de mensonges que de veritez, et en toute sa vie plus de manquemens que de perfections, et de vices que de vertus; et partant n'y a-t-il point de doute que d'une telle corruption ne soient procedez tant de diverses sortes d'abus et d'erreurs qui ont cours dans le monde et entre les mondains; desquels le nombre en estant infiny, nous n'entreprendrons point de les specifier; mais, laissant cet ouvrage aux plus meditatifs, speculatifs et judicieux, nous nous contenterons d'en faire la remarque d'un seul particulier, dans ceste epistre liminaire, d'autant que ceux de nostre vacation semblent y avoir plus d'interest que tous les autres; puis que ce defaut est cause qu'il se trouve si peu d'excellentes et bien véritables histoires, et de fideles, vertueux et bien capables historiens, lesquels aussi, pour en dire la verité, ont besoin de tant de vertus et de bonnes parties pour se rendre tels, que difficilement se rencontreront-elles en un mesme sujet: leur estant necessaire, s'ils veulent suivre l'avis des anciens sages, de s'assubjectir à une grande quantité d'observations, esgards et respects, d'entre lesquels, pour servir d'eschantillon et d'instruction à ceux qui auront besoin, nous en avons choisi treize de leurs principales maximes sur ce sujet telles que s'ensuit.

La premiere, que ceux qui voudront meritoirement estre dits historiens, c'est-à-dire, faire de veritables narrations des mœurs, dits, faicts et gestes des roys, princes, potentats, peuples et nations, qu'ils n'entreprennent point de parler comme d'eux-mesmes des choses qui se sont dites et faictes dans les temps fort esloignez du leur; mais que s'ils veulent prendre les choses dès leur origine, qu'ils fassent mention des autheurs desquels ils ont pris ce qu'ils en disent, sans faire les correcteurs ny les juges entre eux, ains choisir seulement, en

l'advouant, celui dont à leur opinion les escrits ont plus de vray semblance et d'apparence de verité.

Plus la seconde, qu'ils fassent des narrations de leur temps selon la pure verité de ce qu'ils en auront veu, sceu et cogneu par eux-mesmes, ou par les recits et memoires de gens non passionnez ny interessez.

Plus la troisieme, que s'ils entreprennent de représenter les mœurs, dits, faicts et gestes qui se sont passez entre des roys, potentats, nations et peuples divers et de diverses factions, professions, creances et religions, qu'ils se gardent bien en leurs escrits de faire paroistre qu'ils ayent espousé les passions des uns ou des autres, ny d'user d'invectives, injures et reproches des uns contre les autres en se les attribuant, ny de vouloir faire les juges entre eux pour donner le droict aux uns et le tort aux autres; mais se contenter de représenter les causes et raisons que chacun d'eux met en avant pour leur justification particuliere et la condamnation de leurs contraires.

Plus la quatrieme, qu'il ne paroisse jamais en leurs escrits aucunes louanges ny blasmes affectez, soit par leurs propres passions, soit par se vouloir porter à celles d'autrui.

Plus la cinquieme, qu'ils ne tesmoignent point de vouloir faire des recherches trop exactes des defauts et des erreurs d'autrui, tellement secrets et cachez, qu'ils ne sont cogneus d'aucune personne qui en ait receu dommage ou offence, et desquels nulles voix publiques ne se sont jamais plaintes, ny que l'on ait sceu que les peuples en general ny en particulier en ayent non plus receu dommage visible et notoire.

Plus la sixieme, que si quelques grands roys, capitaines, magistrats ou chefs d'armées, de républiques et de peuples ont acquis une generale reputation d'avoir esté excellens és faicts d'armes, de justice et police, ont eu quelques vices et passions particulieres, secrettes et cachées, qui n'ayent point porté de préjudice au public et dont la publication d'iceux ne leur peut apporter aucun advantage, il faut qu'ils en laissent la correction à eux-mesmes ou à leurs amis, serviteurs et confidens particuliers, n'estant jamais bien sceant à un historien d'essayer à passer sous silence les vertus, belles œuvres et actions manifestes, ny de descouvrir les defauts et manquemens secrets d'autrui.

Plus la septiesme, que si ces historiens ont quelques cognoissances, amitez ou obligations envers un ou plusieurs qui ayent quelques vertus et bonnes parties, et dit ou fait des choses dignes de louange, tout ainsi qu'ils ne doivent pas oublier d'en faire honorable mention dans leurs escrits, aussi faut-il

qu'ils se gardent bien d'user de tels excez en cela, que surpassant le merite d'iceux, ils ne donnent sujet à l'envie d'en parler, et luy faciliter le moyen d'extenuer autant ce qu'ils en auront dit, qu'ils se seront licentiez à en dire plus qu'il n'y en avoit.

Plus la huictiesme, qu'ils reçoivent avec grand jugement et discretion, les memoires qui leur seront baillez par les uns et les autres, tant en ce qui concerne leurs louanges et de ceux qu'ils affectionnent, que les blasmes des personnes qu'ils ont en aversion.

Plus la neufiesme, qu'ils usent de ce mesme jugement et discretion en la certaine recognoissance generale et particuliere, tant de ceux qu'ils affectionnent, que de ceux qu'ils n'ayment pas, afin qu'ils balancent bien ce qu'ils en auront à dire, d'autant que si en ceux qui sont leurs amis ils voyent que les blasmes publics soient beaucoup plus grands et plus universellement creus que leurs louanges et bonnes reputations, ils feront sagement d'en parler sobrement, de crainte que quelques jaloux, comme il y a en a tousjours assez, des louanges d'autrui, ne fassent une recherche exacte de tout ce qu'il y pourra avoir eu en iceux, qui merite reprehension en aucun des temps de leur vie, et ne l'exagerent tellement, qu'ils ne flestrissent toutes les plus belles fleurs de leurs plus veritables louanges; et que tout au contraire s'ils ont voulu supposer trop de défauts en ceux qu'ils n'ayment pas, et diminuer ce qu'il y aura eu de veritablement bon en eux, ils ne leur donnent sujet de se vouloir necessairement defendre de leurs suppositions et calomnies, et n'exaltent par ce moyen autant leur gloire par dessus leur merite, qu'ils l'auroient voulu mettre au dessous d'iceluy.

Plus la dixiesme, qu'ils se gardent bien d'escrire ny dire chose qui les puisse faire tenir pour generallyment mensongers, et sur tout en deux choses, dont l'une les pourroit faire declarer imprudens, et l'autre malicieux, comme cela seroit infailible; si d'une part recognoissans des personnes ayans des mœurs, des desirs et des actions notoirement meschantes et dommageables, ils vouloient excuser et justifier tels malefices, et persuader qu'en les exploitant, ils ont eu de bonnes pensées et intentions secretes; et d'autre part, si recognoissans des personnes qui eussent des vertus, des desirs, des desseins et des actions manifestement bonnes et avantageuses pour le public et les particuliers, ils vouloient flestrir tant de choses excellentes, en supposant à ceux qui les auroient exploitées, qu'en les faisant ils avoient eu de mauvais desirs, desseins et intentions secretes et cachées.

Plus l'unziesme, de se garder bien lors que le fil de l'histoire qu'ils traittent, leur fournira sujet de parler des personnes eslevées es charges et dignitez supremes, esquelles ils se seront tant prudemment conduits, qu'ils auront acquis une bonne reputation, et l'amour et la bien-veillance des peuples, d'envelopper dans le malicieux voile de l'oubly et du silence aucunes des vertus, belles et louables actions cogneuës d'un chacun, et dont mesmes

quelques autres escrivains auroient fait mention, ny de les accuser tout ouvertement de quelques vices, défauts et imperfections particulieres qu'ils peussent avoir eûs, sinon en les extenuant le plus qu'il leur seroit possible, n'estant de la biensceance d'un historien de vouloir prejudicier et flestrir plusieurs vertus patentes et utiles au public, par l'exageration de quelques petites imbecillitez latentes et cachées, sur tout de celles dont peu de grands personnages se sont trouvez exempts.

Plus la douziesme, qui sera comme une recapitulation des precedentes, que tous les historiens se gardent bien de vouloir faire les scrutateurs des cœurs, et les penetratifs des bonnes ou mauvaises intentions et pensées d'autrui, en attribuant des affections vertueuses, saintes, pieuses et louables, desquelles Dieu seul peut juger, à des personnes dont les desseins et operations manifestes auroient esté pernicieuses et dommageables au public et aux particuliers; et par contre-opposition aussi de vouloir imputer de meschantes intentions, desirs et pensées, desquelles semblablement Dieu seul peut estre le juge, à des personnes dont la vie et toutes les operations manifestes ont esté apparemment genereuses, utiles et avantageuses au public et aux particuliers, sur tout, lors qu'il n'y a nulle apparence que tels historiens ayent jamais pû avoir eu assez d'habitudes et familiaritez avec les personnes dont ils veulent parler, ny avec leurs ministres et confidens serviteurs, pour en avoir peu apprendre par eux-mesmes quelques semblables particularitez avec certitude; et partant semble-t-il qu'ils ne scauroient mieux faire, se voulans émanciper dans de tels discours, que de nommer ceux desquels ils tiennent cette decouverte des secrets les plus cachez, ou sur les memoires et en la recommandation desquels ils publient de telles contrarietez à la creance publique, repugnances à toute apparence de raison et contradictions aux veritez manifestes.

Et finalement la treiziesme, qu'ils louent pour principales vertus requises en tous potentats, la pieté envers Dieu, la compassion envers les hommes, et une disposition à haïr toute detracton, et desguisement de vertus en vices, et de vices en vertus.

Or, ayans choisi, comme nous avons dit, ces treize maximes, d'entre plusieurs autres que les anciens sages avoient estimé estre de necessaire observation à tous ceux qui voudroient obtenir le tiltre de bons et vrayz historiens, nous ne pensons pas qu'il se puisse trouver des esprits si peu judicieux, ou qui ayent une telle aversion à la verité, que de vouloir nier qu'elles ne meritent d'estre bien examinées et meurement considerées; et lesquels l'ayans fait, comme nous n'y avons pas manqué de nostre part, ne jugent qu'en examinant par icelles les escrits de ceux qui se sont voulus dire historiens en ces derniers temps, ils ne tiennent leurs histoires plutost pour invectives et adulations, que pour convenables narrations; ce qu'eux-mesmes ayans peut-estre bien recogneu, a esté cause qu'ils n'ont rien voulu mettre en lumiere, sinon lors qu'ils ont

veu quelque apparence de lumieres esteintes et de vertus offusquées à cause de l'eclipse espouventable, et du tout lamentable, de ce beau soleil de justice, honneur, clemence et sagesse, le roi Henry le Grand, qui a laissé le regime de la terre pour aller regner aux cieux; tellement que par son absence les tenebres s'estans establies, les raisons perverses, les veritez desguisées et les loyautez extenuées, tels historiens ont pris la hardiesse de transformer quelquefois les vices en vertus et les vertus en vices; tout cela estant procedé de l'inobservation de ces treize maximes cy-dessus spécifiées, n'y ayant rien si facile à verifier que leurs excessives passions d'amour et de haine envers ceux des deux diverses sortes de religions qui sont libres en France, louans incessamment les intentions des uns, quelques vices qu'ils puissent avoir et malefices qu'ils perpetrent, et blasmans continuellement les intentions des autres, quelques vertus qui paroissent en eux et bonnes actions qu'ils produisent; mais tout cela estant de trop longue déduction et hors de nostre dessein pour le present, nous nous contenterons de faire trois remarques particulieres touchant les trois plus apparens desguisements de ces nouveaux historiens, faisons veoir par la premiere que leurs narrations sont impertinentes; par la seconde qu'elles sont ridicules; et par la troisieme qu'elles sont malicieuses.

Quant à l'esclaircissement de la premiere des trois remarques cy-dessus, il semble que ces historiens dont il est parlé, ayant beaucoup plus pensé à la complaisance qu'à rechercher la verité, se contentans de faire des éloges continuels à ceux qui les y ont obligés, ou qu'ils ayment en leur attribuant toutes sortes de vertus, magnifiant leurs personnes et celebrant leurs dits, faits, et gestes, comme tous heroïques, voire faisant demonstration de leur vouloir imputer quelquefois à gloire et honneur des actions que plusieurs tiendroient à flétrisseure; dequoy pour donner quelque espece de preuve particuliere, nous produirons celuy duquel les voix publiques ont le plus parlé, à cause qu'une soudaine faveur des plus speciales que l'on eust gueraveuës, l'avoit, dès sa premiere adolescence, élevé aux suprêmes dignitez, richesses, et grandeurs mondaines, ayans fait à cette personne-là qu'ils ont tesmoigné d'aymer et reverer plus que nuls autres, plusieurs éloges sur toutes occasions, et donné de suprêmes louanges par elle, à la verité, bien meritées, lesquelles mesme ils pouvoient encore augmenter par raison les vertus de sa personne, et plusieurs autres belles actions de toute sa vie, dont ils ne se sont pas souvenus, leur en fournissant assez de legitime sujet s'ils eussent eu la discretion et prudence requise pour ne les pas si mal choisir qu'ils ont fait, soit par excès de zèle ou par inconsideration, ayans par ce défaut donné quelque espece de pretexte aux envieux des louanges d'autrui, aux esprits pointilleux et aux mal-intentionnez, de donner diverses interpretations à telles formes de louanges; leur semblant que les termes dont ils usent leur en fournissoient quel-

que sujet, attribuant à grande augmentation de gloire et singuliere pieté, generosité, prudence et prud'hommie d'avoir eu, disent-ils, la resolution et le courage de contrecarrer une éminente vertu royale, toute florissante de palmes et de lauriers, à laquelle avec sa franchise et hardiesse naturelle, il s'opposoit souvent et traversoit ses volontez, desseins, et entreprises, prevenant l'execution des plus importantes par son industrie et diligence; disent de plus, qu'avec un exquis tesmoignage de son grand courage et admirable pieté, il refusa de reconnoistre (1) son legitime Roy, croyant y aller de sa conscience, et de souscrire une declaration par laquelle la plupart des sages princes, officiers de la couronne, et principaux seigneurs de France, estans lors en l'armée, reconnoissoient sa legitime royauté successive. Davantage, qu'il contraignit le Roy de trouver bon, que luy et ses troupes se retirassent de l'armée; ce que plusieurs autres ayans fait à son imitation, l'armée de sa Majesté se trouva tellement énermée, qu'elle en demeura si vivement piquée, qu'elle en avoit eu du ressentiment toute sa vie; et de plus comme par augmentation de glorification, ils ajoustent encore qu'il ne doutoit nullement qu'il ne fust esloigné des bonnes graces de son Roy, pour plusieurs raisons qu'ils alleguent trop longues à reciter; mais tant y a, que telles manieres de louanges pouvans estre trouvées mal digerées par les plus circonspects ou mal intentionnez, devoient plutost estre teuës que publiées, voire est à croire que celuy en faveur duquel elles ont esté dites, a trop d'esprit et de jugement pour n'avoir pas la mesme opinion, et ne fasse en sorte qu'elles seront supprimées.

Quant à l'esclaircissement de la seconde remarque, l'impertinence de leurs discours paroist assez; en ce que se meslans de parler d'un party formé de plusieurs princes et peuples en forme d'union, et d'avoir dit qu'il estoit remply de souslevations et felonniees contre leur Roy, et que partant leur cause estoit-elle injuste, mais que leurs desirs, desseins et intentions estoient louables, pieuses, et saintes; en quoy ils font paroistre leur grandeur d'esprit, de pouvoir ainsi bien concilier deux choses, non seulement opposées et entierement contradictoires, mais du tout incompatibles.

Et quant à l'esclaircissement de la troisieme remarque, il ne se peut dire qu'il y ait jamais eu de malices plus noires que celles dont il apparoitra que ces historiens ont usé envers une personne non seulement la plus éminente en tiltres, qualitez et dignitez, mais qui a esté la merveille de son siecle en toutes sortes de vertus exquises et rares, et a accomply tant de glorieuses actions de justice, milice, finance, police et d'Estat, qu'elles devoient servir de modeles et d'exemplaires à tous grands roys judicieux, liberaux, et magnifiques. Toutes lesquelles tant exquises particularitez font assez juger que ces historiens n'ont parlé de cet auguste monarque Henry le Grand, qu'en extenuant toutes

(1) Il s'agit du duc d'Épernon.

ces excellences. Et encore, afin de flétrir tout ce peu qu'ils en ont dit de bien, luy ont-ils supposé une infinité d'erreurs, vices, et impertinens desirs, desseins, projets, et entreprises. Dequoy pour cognoistre la verité nous nous sommes resolus, d'autant que les particularitez en seroient trop longues à specifier article par article, d'imprimer et mettre en lumiere ce que quelques uns des serviteurs d'un sien fidele et ancien ministre d'Estat, qui a couru toutes les fortunes de ce grand Roy, ont recueilly d'icelles, d'une partie desquelles ont esté dressez des Memoires tels que nous les presentons maintenant à tous amateurs de la vertu, de l'honneur, et de la verité, afin qu'en estant fait rapport et comparaison avec les choses qui ont esté dites par ces escrivaains nouveaux, il se cognoisse facilement ce qu'ils ont supprimé ou extenué pour diminuer sa gloire, et ce qu'ils luy ont adjousté et supposé, pour faire trouver à redire à sa memoire, supplians le lecteur debonnaire et judicieux de recevoir de bonne part l'impression que nous avons fait faire de ces Memoires, pour le seul desir de ne laisser pas ensevelir dans l'oubly des plumes malicieuses, les gloires bien meritées de ce grand et auguste monarque : mais les rendant admirables à tous, faire venir aux roys le desir d'imiter ses OEconomies royales, politiques, et militaires, et son administration en toutes sortes d'affaires domestiques, d'Estat, justice, milice, finance, et police : et partant à luy soit louange, honneur et reverence, et à ce grand Dieu éternel, toute gloire, honneur, graces, et tres-humbles remerciemens, qui luy a esté si liberal de ses beneficences et benedictions.

Ayant achevé d'imprimer cette épistre liminaire en forme de preface, adressée aux lecteurs vertueux et judicieux, comme nous disposions en ordre les manuscrits qui nous ont esté mis entre les mains pour les imprimer, nous avons rencontré entre iceux une piece destachée de toutes les autres, laquelle, quoy qu'elle parlast des desseins du roy Henry le Grand, qui sont le principal sujet de ces Memoires, si est-ce que ne luy ayant peu trouver place entre iceux par une apparence de suite et liaison necessaire, nous avons estimé à propos de

l'adjouster en suite de nostre epistre afin qu'elle soit aussi adressée aux vertueux et judicieux lecteurs, lesquels à nostre advis en feront mieux leur profit que nous, meditant sur icelle et discourant sur les expediens et moyens par lesquels tant de grandes choses pourront estre rendues de facile execution. Pour donner quelque espece de cognoissance d'une partie des hauts et magnifiques desseins qu'avoit le roy Henry le Grand au temps de sa mort, desquels il a esté fait des discours tant differens apres icelle, que l'on ne sçauroit juger lequel peut estre le plus vray; nous en specifierons seulement quatre desquels nous avons ouy parler à un de ses confidens serviteurs et qu'il disoit devoir rendre de fort facile execution.

Le premier, d'essayer à establir de tels ordres entre les trois religions de la chrestienté qui ont une plus generale estenduë en icelle, et desquels apparemment il est impossible à l'une de ruyner les deux autres sans se destruire elle-mesme, et ce par des voyes telles que toutes les trois en tiroient avantage et contentement.

La seconde, de composer la chrestienté d'Europe de quinze dominations, et ce avec de tels temperammens et assaisonnemens que l'on en püst former une republique nommée Tres-Chrestienne, tousjours pacifique en elle-mesme et capable de rendre telles toutes les dominations dont elle seroit composée, qui seroit estable avec des voyes et moyens si faciles que nul potentat n'y auroit aversion.

La troisieme, d'establir un tel ordre entre ces quinze dominations qu'ils peussent souldoyer à frais communs et proportionnez à leur puissance une armée assortie de toutes choses necessaires pour demener une guerre continuelle contre les infideles, y ayant des moyens desja excogitez pour rendre un tel ordre agreable à tous.

Et la quatriesme, de pouvoir restablir à la Germanie et aux electeurs princes et Estats d'icelle, leurs anciens droicts de liberté pour l'eslection de l'Empereur, avec un tel assaisonnement qu'il n'en püst jamais estre esleu deux d'une mesme maison et race tout de suite, ny jamais aucun des roys qui ont une domination hereditaire sans user de voyes ny moyens qui pussent prejudicier ou porter dommage à aucun.

# MEMOIRES

DE CE QUE NOUS QUATRE, QUI AVONS ESTÉ EMPLOYEZ EN DIVERSES AFFAIRES DE FRANCE,  
SOUS MONSIEUR LE DUC DE SULLY, AVONS PEU SÇAVOIR DE SA VIE, MŒURS,  
DICTS, FAICTS, GESTES ET FORTUNES, ET DE CE QUE LUY MESME NOUS  
PEUT AVOIR APPRIS DE CEUX DE NOTRE VALEUREUX ALCIDE LE  
ROY HENRY LE GRAND, DEPUIS LE MOIS DE MAY 1572  
QU'IL FUT MIS A SON SERVICE, JUSQUES AU MOIS  
DE MAY 1610, QU'IL LAISSA LA TERRE  
POUR ALLER AU CIEL.

*Adressez à Monseigneur le duc de Sully.*

MONSIEUR,

Vostre grandeur ayant commandé à nous quatre, que vous cognoissez assez, de revoir et considerer bien exactement certains Memoires que deux de vos anciens serviteurs et moy avons autre-fois ramassez, et depuis fort amplifiez, en forme neantmoins de simple journal, parlant de tout le cours de vostre vie, gestes, actions, bonnes et mauvaises fortunes, à commencer seulement de vostre aage douziesme, que vous fustes donné par monsieur vostre pere au feu Roy, et finissant à sa déplorable mort.

Mort, hélas! bien desastreuse pour la chrestienté, mais tres-funeste et lamentable pour la France, ses peuples et sujets, qu'il disoit toujours aymer comme ses enfans, ainsi qu'à la verité il en a incessamment esté le vray pere, doux, benin et aymable.

Et par vous à nous ordonné de faire sur les susdits Memoires de vostre vie (qu'il est impossible de représenter sans y faire grande mention de celle du Roy) des extraits abrezgez des choses plus importantes pour le public, et retranchant aussi, autant que nous pourrions, ce qui concerneroit vostre seul particulier, ou que nous jugerions estre trop librement dit touchant vos amis ou ceux que vous respectez.

De toutes lesquelles choses nous nous sommes acquittés le mieux qu'il nous a esté possible, et en avons mis au net une partie des deux premiers livres que nous vous presentons maintenant, afin que vous jugiez si nous aurons bien suivy vostre intention, ayans essayé de ne parler de vous en

particulier sinon autant qu'il nous a semblé estre necessaire pour la liaison et les suites de l'histoire; et pour faire cognoistre les causes fondamentales de vostre advancement, et de l'employ de vostre personne en plusieurs grands offices, dignitez, ambassades, negociations, traictez et administrations des grandes affaires du royaume, avec tant de probité, suffisance et diligence, que vos louanges en sont encore publiquement celebrées et vostre employ ardemment désiré<sup>(1)</sup>; et qui le sera d'autant plus que moins on verra l'Estat bien gouverné.

Vous supplians de nous excuser si, pour demeurer dans les limites que vous nous avez prescrites, vous y rencontrez quelquefois des narrations trop obscures pour n'avoir pas esté assez estenduës. Mais nous laisserons ce discours pour commencer à vous représenter quelque partie des extraits que nous avons faits, par lesquels vous verrez les mauvais rencontres que vous eustes d'abord en entrant dans le monde, d'une infinité de traverses, perils et hazards qui vous furent occurrens, à cause de la plus calamiteuse, cruelle et sanglante tragedie (quasi universelle dans la France) qui se soit jamais veüe sous le ciel, laquelle fut cause de faire terminer tant de diverses sortes d'esjouyssances, mariages, nopces, bals, dances, magnificences, parades, foy et paroles données, par une generale, cruelle et furieuse effusion de sang innocent, voire execrable et horrible bourrellerie; des particularitez

<sup>(1)</sup> Sully était alors retiré des affaires; les auteurs ont voulu dire qu'on désirait ardemment qu'il fût remis en place.

de laquelle nous laisserons le recit aux historiens, d'autant que le souvenir nous fait desja trembler de crainte, fremir d'horreur et frissonner d'effroy, et nous contenterons d'en dire quelque chose en general et encore le ferons-nous preceder par quelques chapitres preparatifs, qui serviront pour l'intelligence des causes de telles execrations, et de plusieurs autres choses grandement funestes, lesquelles nous reduirons en cinq chapitres, afin de faire le tout facilement comprendre.

Le premier, parlant des causes estranges de la fin des troisiemes troubles, de la paix de l'an

1570, ce qu'elle produisit, et de ses suites.

Le second, des causes et moyens par lesquels vous parvinstes au service de nostre grand Roy, luy n'estant encor que prince de Navarre.

Le troisieme, des ruses, cauteilles et belles apparences, desquelles la Cour se servit pour faire que les huguenots se conflassent en elle.

Le quatrieme, des apparentes causes desoupçon qui devoient empescher les huguenots de se confier en ceux qui les avoient tant de fois massacrez.

Et le cinquiesme, des choses qui vous furent occurrentes durant le massacre, et comme vous fustes guaranty du peril.

---



# MEMOIRES

DES

## SAGES ET ROYALES

### OECONOMIES D'ESTAT

#### DE HENRY LE GRAND.

---

#### CHAPITRE PREMIER.

##### *Situation de la France à la paix de 1570.*

[1570] Desirans donc de donner à vous et à tous autres qui liront ces Memoires, quelque espece d'esclaircissement des causes de l'acheminement de la reine de Navarre à la Cour et à Paris, et d'y faire venir le prince son fils, celui de Condé, l'admiral de Colligny, le comte Ludovic de Nassau (1), et une infinité d'autres personnes fort qualifiées et bons capitaines, desquels il sera parlé cy-apres.

Dequoy desirans de représenter les causes et fondemens, nous vous ramentevrons une partie de ce qui est assez amplement deduit dans les Memoires que vous nous avez ordonnez d'abbreger, lesquels portent que les principaux plus autorisez et accreditez serviteurs, conseillers et confidens du roy Charles, de la Reine mere, des freres du Roy et de ceux de la maison de Guyse, que l'on recognoissoit bien avoir toujours esté des plus envenimez contre les huguenots, voyans que la reine de Navarre, son fils et tous autres de la religion, desireux de vivre en une entiere liberté de leur conscience, estoient tellement obstinez en ce dessein qu'ils ne s'en departiroient jamais tant qu'ils pourroient mouvoir les armes, tant peu que ce püst estre : puis que nonobstant la perte qu'ils avoient faite de deux grandes batailles rangés (2), où leur chef general estoit mort, l'une en suite de l'autre, et par icelles esté reduits à se retirer comme fugitifs espars vers les provinces plus esloignées du royaume, par lesquelles ils avoient long-temps erré, tracassé et grandement souffert, patl et enduré, sans se pouvoir relever de leurs déroutes si grandes, qu'à la cour l'on croyoit qu'ils se

resoudroient enfin à obeyr au Roy, ou à sortir du royaume.

Et neantmoins tout au contraire, on voyoit maintenant qu'ayans remis sur pied quelque espece d'assez bon corps d'armée, ils commençoient à reprendre courage, voire à tourner la teste vers la Bourgongne, le Bourbonnois et le Berry, en intention de se venir encor renforcer és environs de la Charité, Vezelay et autres villes, lesquelles tenoient pour eux ; voire estoient si audacieux que de parler desja de s'approcher de la riviere de Seine et de Paris, si tost qu'ils auroient joint une levée de reistres et lansquenets qui se faisoient en faveur de la religion dans l'Allemagne ; et de plus qu'ayans sur tous ces bruits envoyé une grande et forte armée, sous la charge du mareschal de Cossé, assisté de Strossy, la Chatres, Tavanès (3), la Vallette et autres capitaines, croyans que non seulement ils arresteroient leurs progrez et la jonction de leurs estrangers, mais qu'ils ne s'oseroient presenter avec leur malotrué armée, car ainsi l'appeloient les courtisans, ayans commandé de les poursuivre vivement jusques à leur totale défaite, mettans les mains basses par tout et d'en faire amener à la cour tous les chefs principaux vifs ou morts : mais leur ayant esté depuis donné advis, que ceste armée par eux tant mesprisée, s'estoit présentée en plaine campagne en ordre de bataille et demonstration de ne la vouloir pas refuser, voire mesme avoit à l'approchement des deux armées toujours entamé les combats, et en l'avantage d'iceux, et estre demeurée comme victorieuse en une demie bataille, qui s'estoit donnée près d'Arnay-le-Duc.

Toutes lesquelles particularitez bien considérées par la cour, ceux qui en avoient l'adminis-

(1) Frère de Guillaume, prince d'Orange.

(2) Les batailles de Jarnac et de Montcontour.

(3) Gaspard de Saulx Tavanès, dont on verra les Mémoires dans cette collection.

tration craignans qu'il arrivast encore pis si l'on hazardoit davantage contre de tant obstinez rebelles, mutins et seditieux, qui ne combattoient plus qu'en gens desesperes, et qui vouloient vaincre ou mourir, ils changerent tout à coup d'opinion et de forme d'attaquement, prenants resolution de se desfaire d'eux par d'autres voyes que celles des armes apparentes. Et pour y parvenir plus facilement d'entrer en un traité de paix, duquel nous laisserons la maniere d'y proceder, la conclusion et les conditions d'iceluy aux historiens, ensemble les entremises des diverses personnes, les difficultez aux executions, les voyages que le prince de Navarre fit par son gouvernement de Guyenne et en ses terres souveraines, et comment il fut receu par tout, afin de dire que finalement il se rendit aupres de la Reine sa mere à la Rochelle, où aussi estoit l'admiral et les principaux chefs de leur party; faisans alors bien estat de former entr'eux tous, une plus ferme union et bonne correspondance que jamais, et d'establir par leur continuelle residence en ceste ville, un solide fondement à leurs affaires.

Mais telles resolutions tant salutaires pour eux, furent bien-tost et bien legerement changées: car les plus subtils de la cour prejugerent bien qu'ils pourroient avoir ce dessein, ils se resolerent d'employer toutes sortes d'inventions pour le rompre. Et pour cet effect le Roy, la Reine mere, Monsieur et ceux de Guyse despescherent le mareschal de Cossé à la Rochelle, assisté de quelques maistres des requestes, entr'autres de Bellassise et de la Proustiere, particulieres creatures de la Reine mere, ennemis des reformez, et neantmoins grandement artificieux pour le desguiser, avec charge de se servir de toutes les sortes d'inventions qu'ils jugeroient propres pour les tirer de soupçon et leur faire prendre une entière confidence en la cour, desquelles je specifieray celles qui eurent le plus d'efficace.

La première, que le roy et toute la cour vouloient de bonne foy entretenir le traité de paix, et qu'il fust remedié à toutes les contraventions desquelles se plaindroient la reine de Navarre et monsieur le prince son fils, afin que tous ceux de la religion leur en eussent une particuliere obligation, et que mesme aussi-tost qu'ils seroient aupres du Roy, il leur defererent la nomination des commissaires: sa Majesté estant resolué de les mettre en sa particuliere confidence, et se servir d'eux et de l'admiral en chose de bien plus grande importance.

La seconde, le desir que le Roy et la Reine mere avoient de faire le mariage de monsieur le prince de Navarre avec madame Marguerite,

sœur du Roy, laquelle seroit dotée de quatre cens mille escus et autres avantages, ensemble ceux de la troisieme heritiere de Cleves extrêmement riche avec le prince de Condé, et de la comtesse d'Antremont avec l'admiral, ce qu'ils desiroient fort, et que le Roy leur feroit ressentir sa liberalité.

La troisieme, de proposer à l'admiral la resolution que le Roy avoit prise de secourir puissamment le prince d'Orange et tous ses associez de Flandre: voire de declarer la guerre au roy d'Espagne, jusques à ce qu'il luy eust restitué les feodalitez de Flandre et Artois qu'il luy détenoit: mais qu'il ne vouloit rien entreprendre sans les conseils de l'admiral, ny entamer les choses qu'il ne fust aupres de luy, pour avoir son advis sur les occurrences et mesme l'establir chef en tiltre de vice-roy en ses desseins, afin que tant de bons capitaines que le Roy sçavoit estre parmy ceux de la religion, s'y employassent plus volontiers.

La quatrieme, de renouveler les alliances anciennes de la France avec les princes et villes protestantes d'Allemagne, de faire le semblable et plus estroitement avec la reine d'Angleterre, et l'affermir par le mariage d'un des freres du Roy avec elle, afin de tesmoigner que sa Majesté n'avoit plus aucune aversion contre les reformez.

Lesquelles raisons eurent assez de force pour leur faire changer leurs precedentes resolutions et les disposer d'aller à la cour et à Paris, quoy que pussent dire les plus sages et consideratifs, lesquels par leurs reiterées remonstrances vouloient tirer des choses passées, dont ils en remarquoient un grand nombre et de fort precises et concluantes, des consequences infaillibles de leurs futures calamitez, desquelles nous ne dirons rien maintenant ny cy-apres que bien peu, les evenements les ayans rendus assez notoires, non plus que des choses qui se passerent pour les preparatifs du voyage durant son cours, ny des magnificences et ceremonies des mariages et des nopces, ny mesme des effroyables et tragiques suites d'icelles, dont il sera fait mention cy-apres: mais tousjours le plus modérément et avec le moins d'horreur que l'acte nous le pourra permettre.

## CHAPITRE II.

*Réunion des chefs protestans à la cour de Charles IX. Pressentimens du père de Rosny.*

[1571] Suivant ce que vostre grandeur nous ordonna en faisant ces Memoires, de remarquer

exactement tout ce qui concerneroit la vie et les faits des plus grands personnages et sur tout les affaires d'Estat, le recit desquelles peut ayder aux historiens à former une histoire entiere de nostre temps, et de n'y employer que le moins que nous pourrions des particularitez de vostre personne, en quoy bien que nous nous fussions resolu de vous obeyr precisément, si avons nous creu toutesfois que vous nous permettriez en parlant d'une infinité de particularitez des affaires d'alors, et mesme des personnes et interets de la reine de Navarre, du prince son fils et de tous ceux de la religion, de dire comment prit naissance l'amour du Roy envers vous, et comme l'accroissement d'icelle rencontrant une grande royauté, vous a aussi faict rencontrer des affaires, dans l'employ desquelles vous vous estes rendu si admirable tant en la milice, aux finances, qu'en la police, les avez administrées avec tant de dexterité et de fidelité que vous estes le vray exemple auquel se devoient conformer tous les ministres d'Estat.

Nous ramentevrons donc à vostre grandeur que monsieur vostre pere avoit quatre fils, lesquels il n'avoit autre ambition que de rendre si galands hommes, que quelqu'un d'iceux pût relever sa maison dans son ancienne splendeur de laquelle les branches des aînez tombées trois fois en quenouille, et les mauvais mesnages de ses devanciers et particulièrement de son pere, l'avoient beaucoup diminuée de biens. En considerant que l'aîné (1) avoit des incommoditez qui luy ostolent l'esperance qu'il pût reüssir dans le monde, il jetta les yeux sur vous en qui il avoit remarqué non seulement une grande vigueur de corps et d'esprit, mais que vous fasiez aussi paroistre avoir une grande inclination à la vertu et une forte aversion contre le vice, ce qui luy ayant fait concevoir une grande esperance de vous, il vous appela un jour dans sa chambre de la haute-tour, et en la seule presence de la Durandiere vostre precepteur, vous dit :

« Maximilian, puis que la coustume ne me permet pas de vous faire le principal heritier de mes biens, je veux en recompense essayer de vous enrichir de vertus, et par le moyen d'icelles, comme l'on m'a predit, j'espere que vous serez un jour quelque chose. Preparez vous donc à supporter avec courage toutes les traverses et difficultez que vous rencontrerez dans le monde, et en les surmontant genereusement acquerez vous l'estime des gens d'honneur et particulièrement celle du maistre à qui je veux vous donner, au service duquel je

(1) Louis de Béthune, qui se noya à l'âge de vingt et un ans, en traversant un torrent.

« vous commande de vivre et mourir. Et quand je seray sur mon partement pour aller à Vandosme trouver la reine de Navarre et M. le prince son fils auquel je veux vous donner, disposez vous de venir avec moy, et vous preparez par une harangue à luy offrir vostre service vice lors que je luy presenteray vostre personne. »

Or monsieur vostre pere qui estoit venu à Rosny si tost que la paix de l'an 1570 fut publiée, voyant que les plus qualifiez et les plus advisez de ceux de la religion estoient allez trouver la reine de Navarre vers la Rochelle, avec dessein de passer quelques années en ces quartiers là, ne jugeans pas qu'apres tant d'offences faites et receuës, ce fust grande prudence à eux de commettre si tost leurs vies et biens à la discretion des apparens ennemis de la religion, delibera de donner un tel ordre à ses affaires qu'il pût, quand il voudroit, se retirer avec les autres et y porter dequoy vivre; mais il fut bien estonné d'entendre dire, dès l'année 1571, que plusieurs des principaux reformez commençoient à changer de langage et à parler avec joye du doux air de la cour, lequel devint si universel que, dès le commencement de l'année 1572, l'on parloit ouvertement de s'y vouloir fier.

Tellement qu'au mois de may monsieur vostre pere receut une lettre de la reine de Navarre par laquelle elle le mandoit de l'aller trouver, et suivant icelle il s'achemina à Vandosme où il trouva tous les esprits extrêmement resjouys de la bonne volonté qu'ils s'étoient imaginez que le Roy avoit pris pour eux; sur lesquels bruits il ne disoit jamais ses sentimens en public, quoy que son esprit luy en fournist qui eussent esté fort salutaires pour le party, s'il les eust voulu suivre; mais lors qu'il se trouvoit en particulier avec la reine de Navarre, M. le prince son fils, celui de Condé, le comte Ludovic, l'Admiral; le comte de la Roche-Foucault, La Noüe, Taligny, Briquemault et autres qui tesmoignoient aymer ces vanitez de cour, il leur representoit librement le peu d'apparence qu'il y avoit de croire que le Roy, la Reine mere, les deux fils de France et tant d'autres grands qui avoient tant de fois juré leur ruine, eussent si soudain recherché la paix, si ce n'estoit à dessein de se servir de quelque autre moyen que celui de la guerre pour exercer leurs vengeances; que les fondemens sur lesquels ils posoient leur confiance, qui estoit le mariage du prince de Navarre avec madame Marguerite sœur du Roy, ne luy sembloit nullement à propos, y prevoyant de grands inconveniens, et que sur tout Paris luy estoit suspect; qu'il estoit à craindre que ce

prince qui estoit jeune et avoit le cœur haut, ne se laissast aller aux blandices de cour; qu'il eust esté plus à propos de le marier avec la reine d'Angleterre que l'on disoit vouloir donner à un des freres du Roy, et bien qu'elle eust dix ans plus que luy, si estoit elle assez jeune pour luy donner plusieurs enfans, et par le moyen d'iceux faciliter le recouvrement du royaume de Navarre; voire pourroit arriver tel succez d'affaires, que ceste alliance uniroit pour tousjours en la maison de Bourbon, les couronnes de France, Angleterre et Navarre.

Tous lesquels bons arraisonnemens n'eurent aucun effet, tant leurs esprits estoient preoccupez des artificieuses promesses de la Cour. Ce que voyant monsieur vostre pere, il se resolut de n'en plus parler et de courir la mesme fortune de tous les autres, quoy qu'il preveist bien que si ces nopces se faisoient à Paris, les livrées en seroient bien vermeilles. Et s'estant resolu de retourner chez luy, dressa son equipage pour accompagner le prince de Navarre à Paris, il voulut vous presenter à luy, ce qu'il fit en presence de la Reine sa mere, avec des protestations que vous luy seriez à jamais tres-fidelle et tres-obeyssant serviteur. Ce que vous luy jurastes aussi en si beaux termes, avec tant de grace et d'assurance et un ton de voix si agreable, qu'il conceut dès lors de bonnes esperances de vous. Et vous ayant relevé, car vous estiez à genoux, il vous embrassa deux fois et vous dit qu'il admiroit votre gentillesse, veu vostre aage qui n'estoit que d'unze années, et que luy aviez presenté vostre service avec une si grande facilité et estiez de si bonne race, qu'il ne doutoit point qu'un jour vous n'en fissiez paroistre les effects en vray gentil-homme, et aussi vous promit-il en foy de prince, qu'en vous recevant de fort bon cœur il vous aymeroit tousjours et qu'il ne se presenteroit jamais occasion de vous faire acquerir du bien et de l'honneur, qu'il ne s'y employast de tout son cœur.

Tous lesquels discours qui n'estoient lors faits que par complimens, ont eu depuis des evenemens plus avantageux que vous n'aviez esperé; et partant laisserons nous ce propos pour entrer aux narrations des autres chapitres.

### CHAPITRE III.

#### *Motifs de confiance des Protestans.*

Premierement, une soudaine trefve à eux envoyée lorsqu'ils l'esperoient le moins, et en suite d'icelle une paix promptement concluë qui leur estoit fort avantageuse, et qu'ils obtindrent

apres les combats et rencontres d'Arnay-le-Duc.

Plus, le grand soin que l'on eust en Cour d'envoyer promptement des commissaires par les provinces, pour faire observer l'edict de paix et pourvoir à toutes contraventions, ayans choisi des personnes que ceux de la religion estime-roient leur estre favorables.

Plus, le bruit que l'on faisoit courir par tout, que le Roy nommoit ceste paix là la sienne, et que comme telle, il vouloit prendre un tel soin de la faire loyaument observer, qu'elle fut rendüë perpetuelle.

Plus, la solemnelle députation du mareschal de Cossé à la Rochelle, accompagné de la Proustiere et Bellassise qui estoient des confidens de la Reine mere, avec charge expresse d'asseurer la Reine de Navarre, le prince son fils et autres principaux de la religion, qu'il avoit fait ceste paix de son propre mouvement, ayant bien recogneu qu'en traittant honorablement ceux de leur party, il les auroit tous pour fideles et utiles serveurs.

Plus, les belles propositions qui furent faites par ces députez, desquelles je n'en specifieray que trois des principales: la premiere, que le Roy leur envoyoit son grand serment, sur lequel ils pouvoient prendre une entiere confiance, qu'il vouloit absolument que l'observation de l'edict de paix fust inviolable; la seconde qu'il estoit resolu de se lier d'amitié particuliere avec la reine de Navarre et le prince son fils; et, afin de l'affermir, de luy faire espouser madame Marguerite, sa sœur, et de luy faire de grands avantages; et la troisieme, que le Roy ayant plusieurs causes de mescontentement contre le roy d'Espagne, et entre les autres la mort qu'il sçavoit bien qu'il avoit procurée à sa femme Elizabeth de France, par jalousie de ce qu'elle estoit en bonne intelligence avec le prince Charles, son fils aîné, à cause de tous lesquels il estoit resolu de luy faire la guerre, et d'y employer ceux de la religion et notamment monsieur l'admiral, afin de retirer le royaume de Navarre, et les feodalitez de Flandre et Artois.

Plus, la declaration que ces députez firent à l'admiral en particulier, que le Roy vouloit faire la guerre aux Pays-Bas, et luy en bailler la charge et la conduite, avec le tiltre de vice-roys et de prendre son conseil en toutes ses affaires importantes.

Plus, les grandes cheres, carresses et presens, qui furent faits aux sieurs de Teligny, Briquemault, Beauvais, La Nocle et Cavagnes: mais sur tout au premier, qui estoit gendre de monsieur l'admiral, lesquels avoient esté députez

par la reine de Navarre au nom de tous ceux de la religion, pour aller protester au Roy de leurs loyautéz et servitudes.

Plus, un second envoy par le roy Charles du sieur de Biron vers la reine de Navarre et les reformez, pour leur reconfirmer les promesses et offres que le mareschal de Cossé leur avoit faites.

Plus, l'envoy du mareschal de Montmorency et du president de Morsan à Rouën, que l'on sçavoit bien estre des amis de l'admiral, pour faire faire justice de quelques excez commis contre les reformez, au prejudice de la paix du roy Charles, car ainsi vouloit-il que l'on la nommast pour y faire prendre confiance entiere.

Plus, la libre permission qui fut donnée aux reformez de lever telles sommes de deniers que bon leur sembleroit, tant pour contenter leurs Allemans, que pour leurs autres affaires.

Plus, l'aggregation de la cour touchant les mariages du prince de Condé (1) avec la troisieme heritiere de la maison de Cleves, et de l'admiral (2) avec la comtesse d'Antremont, et le don que le Roy luy fit de cent mille livres pour present de nopces, et de la jouïssance de tous les benefices du feu cardinal son frere.

Plus, la negociation du mariage de la reine d'Angleterre avec un des freres du Roy, au choix d'elle, pour l'acheminement duquel le mareschal de Montmorency fut envoyé ambassadeur vers elle, afin, disoit-on, de commencer à familiariser les deux religions.

Plus, l'acheminement du Roy à Blois et à Bourgueil, afin, disoit-on, d'avoir moyen de communiquer en particulier avec les reformez.

Plus, un voyage que le Roy desira que fissent le comte Ludovic, La Nouë et Francourt, en habits desguisez et secrettement vers luy à Blois, afin de leur communiquer le dessein de la guerre contre le roy d'Espagne.

Plus, la resolution avec eux prise du temps de commencer ladite guerre, et sa declaration d'en vouloir remettre toute la charge et conduite à l'admiral, avec le tiltre de vice-roy aux Pays-Bas.

Plus, le renouvellement public des alliances et confederations du Roy et de la France avec la reine d'Angleterre, tous les princes, Estats et villes protestantes d'Allemagne.

Plus, la declaration publique que le Roy et la Cour firent, de vouloir secourir Monts-en-Hainault, que le prince d'Orange avoit prise sur le roy d'Espagne.

(1) Henri I<sup>er</sup>, prince de Condé, s'était marié avec Marie de Cleves; il avait épousé en secondes noces Charlotte-Catherine de la Tremouille.

(2) L'admiral Coligny.

Plus, les commissions delivrées pour lever des gens de guerre pour aller en Hainault, et icelles à la nomination de l'admiral, et les grandes sommes de deniers desboursez pour le payement.

Plus, les grands honneurs qui estoient rendus, et les favorables receptions qui estoient faites à la reine de Navarre, au prince son fils et à tous les reformez de qualité, lors qu'ils passoient et logeoient dans les villes, et particulièrement à l'admiral, dans Paris.

Plus, les bruits qui couroient des défaveurs de ceux de Guyse, et des grandes plaintes qu'ils faisoient par tout de voir gratifier les huguenots à leur prejudice, et sur tout leurs ennemis particuliers.

Plus, la grande affection que le Roy tesmoigna en la reconciliation de l'admiral avec ceux de Guyse, laquelle il mesnagea avec tant de dexterité, que toutes les parties firent demonstration d'en estre bien contentes, et sur tout le Roy declarant qu'il vouloit demeurer pleige et caution de leur accord.

Plus, les grandes familiaritez que le Roy tesmoignoît à l'admiral, le nommant son pere, et disant tout haut, en presence et en absence, qu'il l'estimoit un des grands hommes de guerre et d'Estat de son temps, des plus capables de le servir, et qu'il avoit regret de ne l'avoir pas bien cogneu.

Plus, la grace du sieur de Villandry, accordée par le Roy à l'admiral, sur un crime que l'on tient irremissible (3), et qu'il avoit, comme tel, refusée à la Reine sa mere, et à ses freres.

Plus, les inclinations particulieres que le Roy disoit, et tesmoignoît avoir d'aymer plusieurs reformez, et de trouver les humeurs à son gré, nommant entre les autres, mais les uns pour un sujet et les autres pour un autre, La Roche-Foucault, Teligny, Bethune, Resnel, Baudiné, Pilles, Puviaut, Coulombieres, Grand-mont, Duras, Bouchavannes et Gamaches.

Plus, les extrêmes desplaisirs que le Roy et tous ses confidens tesmoignerent de la soudaine mort de la reine de Navarre, les grandes recherches qu'ils firent faire pour decouvrir s'il y avoit point eu de malefices d'autrui, et les grandes louanges qu'ils luy donnoient publiquement.

Plus, les grandes coleres qu'il tesmoignoît contre le pape Pie V, et les blasmes qu'il luy donnoit sur ce qu'il refusoit la dispense necessaire pour le mariage de madame Marguerite de France, sa sœur, et le roy de Navarre.

Plus, le libre consentement accordé par le

(3) Villandry avait manqué de respect au roi Charles IX dans une partie de paume.

Roy à celui de Navarre de pouvoir estre marié sans entrer dans l'église Nostre-Dame, n'y estre tenu à faire aucune ceremonie romaine, et ses coleres contre le cardinal de Bourbon à cause des refus qu'il faisoit de s'accommoder à sa volonté.

Plus, les juremens, reniements et blasphemes du Roy, et les coleres, despits et desplaisirs qu'il tesmoigna, lors qu'il eut advis de la blessure de l'admiral, et les execrables sermens qu'il fit de faire la vengeance de cet assassinat, sur qui que ce pût estre sans nul excepter; ce qui fut non moins exageré par la Reine mere.

Plus, la permission avec exprés commandement que le Roy donna d'informer de ce crime, et d'aller rechercher dans les hostels de ceux de Guyse, pour voir s'il ne s'y trouveroit nul indice qui les rendist coupables.

Plus, l'amiable visite faite à l'admiral par le Roy, messieurs ses freres, la Reine mere, le cardinal de Bourbon, les ducs de Montpensier et de Nevers, les mareschaux de Cossé et de Rets; le Bastard d'Angoulesme et autres, s'offrans tous à luy, et luy protestans de venger son outrage.

Plus, le mandement fait au mareschal de Montmorency de venir à Paris pour se loger au logis de l'admiral, afin de l'assister de son autorité et de ses bons offices, lequel neantmoins ne voulut jamais partir de Chantilly.

Plus, les continuelles sollicitations que faisoient la Roche-Foucault, Teligny, Grand-mont, Duras, Bouchavannes, Gamaches, Beauvoir, Boursaut, Pilles, Briquemault, Francour, Cavaignes et autres ausquels l'on avoit fait mille belles promesses, dans les logis des plus deffians huguenots, afin de les rassurer et les prier de ne faire pas des plaintes que le Roy pût sçavoir, de crainte qu'elles n'alterassent sa bienveillance.

Plus, les belles paroles dont le Roy usa envers le roy de Navarre et le prince de Condé, lorsqu'ils luy vindrent faire plainte de la blessure de l'admiral et parler de se retirer hors de la Cour à ceste occasion, les tesmoignages qu'il rendit d'estre fort mal content de ceux de Guyse, ayant descouvert qu'ils avoient de grandes intelligences avec l'Espagne, voire faisoient desja des menées dans le royaume pour le troubler un jour; et partant étoit-il resolu de se bien reünir avec tous ceux de son sang, et tous les bons François, afin de les prevenir.

Plus, les discours qu'il fit au roy de Navarre et au prince de Condé, sur les causes de mescontentement qu'il avoit du roy d'Espagne, et qu'outre celles qui regardoient les affaires d'Es-

tat, il avoit fait mourir sa femme Élizabeth, sa sœur, en luy imposant de trop grandes familiaritez avec son fils dom Carle.

Plus, la retraite de l'ambassadeur d'Espagne hors de la Cour, avec declaration de son acheminement en Espagne, puis qu'il voyoit bien qu'à la persuasion des huguenots de France, le Roy se disposoit à entreprendre la guerre contre son maistre.

#### CHAPITRE IV.

##### *Motifs de défiance des Protestans.*

Premierement, les conclusions que les reformez sçavoient bien avoir esté prises au concile de Constance, de n'estre point tenu de garder la foi à ceux de leur profession.

Plus, les maximes tenuës pour generales, que les princes souverains n'oublient jamais tant les offences qu'ils ont receuës en leurs personnes ou en leurs dignitez, et sur tout par leurs sujets, qu'il ne leur en reste tousjours un souvenir pour s'en venger, lorsqu'ils le pourront faire.

Plus, deux causes de haine, que la Reine mere disoit souvent avoir contre les huguenots, et telle qu'elle ne cesseroit jamais, à sçavoir : d'avoir nommé antechrists ceux de sa maison, et qu'un huguenot eust tué son seigneur et mary.

Plus, la haine extrême que le roy Charles disoit ne s'estre jamais pû empêcher de porter aux huguenots, depuis qu'ils eurent entrepris de se saisir de sa personne à Meaux, et qu'ils le contraignirent de s'enfuir.

Plus, les exemples passez qui leur estoient souvent representez par les plus zelez reformez, de trente-quatre massacres de leur profession, sans jamais en avoir pû obtenir justice.

Plus, la remarque à eux faite d'un article du concile de Trente, par lequel les roys de France et d'Espagne estoient exhortez de joindre leurs armes pour l'entiere extermination des reformez de France et Pays-Bas.

Plus, les advis bien certains donnez aux reformez du dessein formé au voyage de Bayonne dans les cours de France et d'Espagne de leur faire conjointement la guerre.

Plus, le souvenir d'avoir grièvement offensé le Roy et la cour en plusieurs occasions, desquelles leurs ennemis en ramentevoient sept nullement remissibles : la premiere, de s'estre voulu saisir de la personne du Roy à Meaux; la seconde, de s'estre emparez par trahison des villes d'Orleans, Roüen, Bourges, Lyon et autres; la troisieme, d'avoir livré le Havre aux

Anglois, ennemis du royaume; la quatriesme, d'avoir fait entrer les Allemans en France à main armée; la cinquiesme, d'avoir donné une bataille au Roy près de Dreux, où le connestable fut pris prisonnier; la sixiesme, d'avoir donné une seconde bataille au Roy devant Paris, où le connestable fut tué; et la septiesme, les longues guerres du Poictou, durant lesquelles ils avoient rendu plusieurs combats, surpris et assiégué diverses villes, et donné les batailles de Jarnac, Moncontour, et Arnay-le-Duc, qui avoient enfin contrainct le Roy de leur donner la paix.

Plus, la reputation que le roy Charles avoit d'estre grand blasphemateur, colere, despit et sanguinaire.

Plus, la certitude en quoy estoient les reformez, que le chancelier de l'Hospital avoit esté chassé de la Cour, pour leur vouloir rendre justice esgalement, et avoir refusé de sceller une revocation de paix faite avec eux.

Plus, les grands desplaisirs qu'ils sceurent qu'avait tesmoigné toute la Cour, lors qu'elle eust avis que tous les reformez de qualité avoient pris resolution de s'habituer à la Rochelle, transporter leurs biens aux environs, et sur tout dans les isles et marais, et là se cantonner.

Plus, le refus que ceux de Bourdeaux firent au roy de Navarre de le recevoir en leur ville, et ce par ordre de la Cour, comme il en eut de bons avis.

Plus, le peu de déference que luy rendit le marquis de Villars, ne l'estant point venu visiter, et levant des gens de guerre en Guyenne, sans luy en rien mander, tenant une espece d'armée en campagne, si bien payée et disciplinée, qu'il paroissoit que de plus grands que luy s'en mesloient assez.

Plus, le peu de bon accueil que le prince de Navarre avoit receu par les villes catholiques de son gouvernement de Guyenne.

Plus, les excez et violences exercées contre les reformez en diverses villes, mais sur tout à Roüen, Diepe et Orange, sans qu'il leur en eust esté renduë aucune justice, quelques commissaires que l'on y eust envoyez.

Plus, les tumultes excitez à Paris, à cause de la croix de Gastines (1), quoy que ce fust un des plus precis articles de l'edict de paix, et les grandes menaces que les peuples firent contre les reformez.

Plus, les avis qui furent donnez aux reformez des conferences secrettes des plus confidens du Roy et de la Reine mere, avec le cardinal Alexandrin, neveu du pape Pie V, et du conten-

(1) Philippe Gastines, marchand de la rue Saint-Denis, reconnu protestant, avait été pendu.

tement qu'il tesmoigna d'avoir receu en icelles, dont il rapporteroit de joyeuses nouvelles à son oncle à l'avantage de l'Eglise.

Plus, le feint esloignement de ceux de Guyse hors de Paris, et l'avis certain qu'eurent les reformez, qu'ils avoient esté depuis recognus en habits desguisez en deux conseils secrets, avec la Reine mere, Monsieur, frere du Roy, le duc de Rets, et le chancelier de Birague.

Plus, les avis que quelques catholiques, amys des reformez, leur donnerent, d'avoir ouy dire au Roy, parlant à la Reine sa mere : « Et bien, Madame, ne jouay-je pas bien mon jeu ? » Et qu'elle luy avoit respondu : « Fort bien, mon fils, mais il faut continuer jusques à la fin, et se garder bien d'en rien dire. »

Plus, les grandes plaintes de ceux de la Rochelle, faites au roy de Navarre, à l'admiral et autres reformez à Paris, du long séjour d'une grande armée navale en leurs costes, sous ombre d'aller en Hollande; mais que beaucoup de raisons leur faisoient croire qu'elle avoit plustost dessein sur leur ville, les sieurs de Strosse, de La Garde, de Lansac, et Landereau, se rendans si familiers avec leurs bourgeois, voire avec ceux de la garde des portes, qu'ils craignoient qu'ils s'en saisissent à la fin.

Plus, la subite mort de la reine de Navarre, laquelle estoit soupçonnée de malefice, par les reformez, voire en parloient assez haut, la tenant à mauvais presage.

Plus, les avis receus de la défaite de Genlis, La Nouë, et autres qui estoient allez au secours du prince d'Orange, par commandement du Roy, et neantmoins n'estoit advenuë que par le moyen des conseils et intelligences de la Cour.

Plus, les libres discours de Langoyran, lors qu'on le blasmait de se retirer de la Cour, et les raisons qu'il alleguoit pour son excuse, disant : Que les trop bonnes cheres, et belles promesses que l'on leur faisoit, estoient cause qu'il s'en alloit, afin de n'estre pas pris au fillet comme les mal advisez.

Plus, la retraite du mareschal de Montmorency à Chantilly, disant les mesmes choses que Langoyran.

Plus, les instances continuelles de tous les reformez, qui n'estoient point repeus des vents de la Cour, pour faire trouver bon au roy de Navarre qu'ils se pussent retirer chez eux, y ayant plusieurs de leurs amys catholiques qui leur disoient à l'oreille qu'ils seroient mieux en leurs maisons.

Plus, les avis que receurent de divers endroits les reformez, qu'il y en avoit parmy eux qui estoient gaignez par la Cour, afin de leur

oster toutes sortes de défiances, et partant qu'ils prissent garde à la diversité des conseils qui leur seroient donnez par les leurs mesmes.

Plus, la blessure de l'admiral, le redoublement de ses gardes, de gens tous reconnus pour des plus grands ennemis des reformez, les jouyssances que demenoient les peuples pour un tel accident, et les desirs qu'ils tesmoignoient avoir que c'en fust fait, et de tous les autres aussi; car c'estoit les langages qui se tenoient par tout.

Plus, les obstinations de Mongommery, Frontenay, le Vidame de Chartres, Lonconay, Rabodanges, le Bruëil, Segur, Sey, le Touchet, des Hayes, Saint-Gelais, Choupes, Beauvais, Grandry, Saint-Estienne, d'Arnes, Bois-Sec, et autres gentils-hommes de Normandie et de Poictou, jusques à plus de soixante : à ne vouloir point loger dans la ville, quelque instance qui leur en eust esté faite, respondans toujours que l'air des fauxbourgs leur estoit plus salutaire, voire celuy des champs.

Plus, les lettres interceptées du cardinal de Pelevé, escrivant à celuy de Lorraine, à Rome, et autres siens amis, qu'ils ne se missent point en peine des bruits qui courroient de la grande faveur et credit des huguenots, et qu'ils entendroient bien-tost d'autres nouvelles au grand advantage de l'Eglise.

Plus, les discours tenus par l'évesque de Valence à quelques-uns de ses amys de la religion, que les instructions que l'on luy donnoit pour sa charge d'ambassadeur en Polongne, correspondoient si mal aux bonnes cheres que l'on faisoit aux huguenots, aux hautes esperances qu'ils se donnoient et à tout ce qui se disoit par les plus clair-voyans, qu'il falloit necessairement qu'il arrivast des choses à quoy les reformez ne s'attendoient pas.

Plus, les bruits tous communs dans Paris, que les bourgeois avoient eu commandement de se fournir d'armes et de se tenir prests pour les employer.

Plus, la reconnaissance qui avoit esté faite, que le logis d'où l'admiral avoit esté blessé, appartenoit à un nommé Villemur, qui avoit esté precepteur de M. de Guyse, et que des gens revenans des champs, avoient rencontré celuy qui avoit fait le coup, monté sur un cheval qu'ils avoient veu dans l'escurie du Roy.

Plus, pour la fin, les instances tant de fois reiterées par les plus sages et speculatifs, envers ceux qui paroissent les plus vains, credules, et ambitieux des huguenots, de ne point commettre ainsi en mesme temps tous les plus qualifiez d'entr'eux à la discretion de ceux qui leur

avoient tousjours tesmoigné tant de haines, et les mespris de tous ces advis, voire mesme avec apparence de despits, coleres, injures et reproches, les accusans de malice, donnoient des presages à tous les autres de leurs futures calamitez.

En suite des precedens chapitres, nous en avons rencontré un autre, lequel au commencement a fait douter si nous le devons employer ou non, d'autant qu'il fait mention de plusieurs particularitez, qu'à nostre advis quelques-uns n'eussent pas eües agreables, et entre les autres, les six qui ensuivent.

La premiere; une denomination trop libre de tous les autheurs et conseillers de massacres, sans nul excepter.

La seconde, de tous les massacreurs plus qualifiez, qui ont mis les mains inhumainement dans le sang innocent des vieillards, des femmes et des enfans.

La troisieme, de tous les plus qualifiez massacrez, tant dans Paris, que dans les autres villes et par les champs.

La quatrieme, de tous les massacrez en general par tout le royaume.

La cinquieme, de toutes les instances faites par la Cour en Angleterre, Allemagne, Suisse et Geneve, de ne recevoir aucuns refugiez françois, qui fussent de la religion reformée.

Et la sixieme, de tous les blasmes, reproches, et menaces dont il fut usé par les autheurs des massacres.

Mais en fin estimant, pour l'honneur de nostre nation, qu'il falloit plustost estouffer la memoire de telles énormitez que de les ramentevoir, nous nous sommes resolus de retrancher entierement tout ce chapitre, et nous contenterons d'escrire les deux suivans, lesquels, ce nous semble, n'en disent encore que trop.

## CHAPITRE V.

### *Massacre de la Saint-Barthelemy.*

Pour commencer le discours de ce qui vous arriva le vingt-quatrieme jour d'aoust, et dire aussi quelque chose des adventures du Roy vostre maistre, et du prince de Condé, nous vous ramentevrons ce que nous vous en avons oüy conter, à sçavoir : que vous ayant fait dessein d'aller faire vostre cour ce jour-là, vous vous estiez couché la veille de bonne heure, et que sur les trois heures du matin, vous vous reveillastes au bruit de plusieurs cris de peuples, et des allarmes que l'on sonnoit dans tous les clochers. Le sieur de Saint-Julien, vostre gouver-



neur, et vostre valet de chambre, qui s'estoient aussi éveillez au bruit, estans sortis de vostre logis, pour apprendre ce que c'estoit, n'y rentrent point, et n'avez-vous jamais sceu ce qu'ils estoient devenus. De sorte qu'estant reduit vous seul dans vostre chambre, et vostre hoste, qui estoit de la religion, vous pressant d'aller avec luy à la messe, afin de guarentir sa vie et sa maison de saccagement, vous vous resolustes d'essayer à vous sauver dans le college de Bourgogne. Pour ce faire, vous pristez vostre robbe d'escolier, un livre sous vostre bras, et vous mistes en chemin.

Par les ruës, vous rencontrastes trois corps de garde, l'un à celle de Saint-Jacques, un autre, à celle de la Harpe, et l'autre, à l'issuë du cloistre Saint-Benoist. Au premier, ayant esté arresté et rudoyé par ceux de la garde, un d'entr'eux prenant vostre livre, et voyant que (de bon-heur pour vous) c'estoit de grosses heures, vous fit passer : ce qui vous servit de passe-port aux autres. En allant vous vistes enfoncer, et piller des maisons, massacrer hommes, femmes et enfans, avec les cris de *tuë, tuë, ô huguenot, ô huguenot* : ce qui vous faisoit souhaitter avec impatience d'estre arrivé à la porte du college, où en fin Dieu vous accompagna, sans qu'il vous fust arrivé autre mal que la peur. A l'abord le portier vous refusa deux fois l'entrée de la porte ; mais en fin, moyennant quatre testons que vous luy donnastes, il alla dire au principal, nommé la Faye, que vous estiez à la porte, et ce que vous demandiez ; lequel aussitost meu de compassion (estant vostre particulier amy) vous vint faire entrer, empesché toutesfois de ce qu'il feroit de vous, à cause de deux ecclesiastiques qui estoient dans sa chambre, et qui disoient y avoir dessein formé de tuer tous les huguenots, jusques aux enfans à la mammelle, et ce à l'exemple des Vespres Siciliennes. Neantmoins, par pitié, ce bon personnage vous mit dans une chambre fort secrette, dans laquelle personne n'entra que son valet, qui vous y portoit des vivres, et vous y servit trois jours durant, au bout desquels il se fit une publication de par le Roy, portant deffences de plus tuer ny saccager personne.

Auquel temps, deux archers de la garde, sujets de monsieur vostre pere, l'un nommé Ferrieres et l'autre la Vieville, vindrent avec leurs hocquetons et halebardes à ce college, pour s'enquerir de vos nouvelles, et les mander à monsieur vostre pere, qui estoit fort en peine de vous, duquel vous receustes une lettre trois jours apres, par laquelle il vous mandoit de demeurer à Paris, et d'y continuer vos estudes comme

auparavant ; et pour ce faire, il jugeoit bien qu'il vous faudroit aller à la messe, à quoy il vous falloit resoudre aussi bien qu'avoit fait vostre maistre et beaucoup d'autres, et que surtout il vouloit que vous courussiez toutes les fortunes de ce prince jusqu'à la mort, afin que l'on ne vous pût reprocher de l'avoir quitté en son adversité : à quoy vous vous rendistes si soigneux, que vous en acquistes l'estime d'un chacun.

Or, pour vous parler de son adventure, nous vous avons ouy dire que, deux heures devant le jour, ils furent resveillez lui et le prince de Condé, par grand nombre d'archers de la garde, qui entrèrent effrontément dans leurs chambres, et leur firent commandement, de par le Roy, de s'habiller et le venir trouver sans espées ; ce qu'ils furent contraints de faire, et, en sortans de leurs chambres, virent percer de leurs gentils-hommes de plusieurs coups de halebardes. Ayans esté presentez au roy Charles, il les receut avec un visage farouche et des yeux ardens de courroux ; et apres plusieurs blasphemés, injures et reproches de luy avoir fait la guerre, il leur commanda de quitter leur belle religion, qu'ils avoient prise pour servir de pretexte à leur rebellion ; et sur quelques refus qu'ils firent de changer leur religion, il entra en une furieuse colere, puis leur dit qu'il ne vouloit plus estre contredit en ses volontez par ses sujets ; mais que par leur exemple les autres apprissent à le reverer comme étant l'image de Dieu, et à n'estre plus ennemis des images de sa mere. Et, apres plusieurs menaces et injures, leur commanda d'aller à la messe, ou qu'il leur feroit faire leur procès, comme estans criminels de leze majesté divine et humaine ; et leur furent ces paroles reiterées tant de fois, que finalement ils cederent à la force, sans que ceste obeysance aveugle rendist leur condition beaucoup meilleure, sinon par boutades, et selon les caprices de la Cour ; tantost ce prince estant traité comme libre, et lors ses domestiques avoient liberté de le venir servir (à quoy vous vous rangiez soigneusement), et tantost comme prisonnier et criminel, et lors vous estiez tous chassés ; mais, en quelque condition que vous fussiez, vous preniez tousjours le temps de continuer vos estudes, sur tout de l'histoire (de laquelle vous faisiez desja des extraits, tant pour les mœurs que les choses naturelles) et des mathematiques, lesquelles occupations faisoient paroistre vostre inclination à la vertu.

Après que ceste sorte de vie eut duré quelque temps, advint la mort du roy Charles, peu apres

laquelle, toute la Cour s'achemina vers Lyon, pour aller au devant du roy Henry III, qui revenoit de Polongne, auquel voyage vous suivistes le roy de Navarre.

Pour l'esclaircissement desquelles choses et de celles qui se passerent durant les années 1572, 1573, 1574 et 1575, nous nous sommes resolus de faire un chapitre, d'un certain recueil que vous aviez fait d'icelles, que nous trouvâmes escrit de vostre main parmy de vieux papiers, que nous visitions pendant que vous estiez de sejour à la Rochelle, lors que la Reine mere vint en Poictou, il estoit tel que s'ensuit.

## CHAPITRE VI.

*Remords de Charles IX. Conduite qu'il tient. Nouveau soulèvement des Protestans. Mort de Charles IX. Conduite de Henri III.*

Ce recueil, dont est parlé au precedent chapitre et au titre cy-dessus, semble estre comme un tableau raccourcy de ce que vos yeux virent, et vos oreilles entendirent pendant le massacre, et tout le temps que le roy de Navarre fut detenu en une espee de prison à la suite de la Cour, auquel nous avons tousjours estimé que vostre loüable curiosité avoit travaillé, d'autant qu'il estoit entierement escrit de vostre main; il disoit ainsi.

En l'année 1572 se joüa la mal-heureuse tragedie du vingt-quatriesme d'aoust, qui a fait tant resprendre de larmes et de sang. Le roy Charles oyant le soir du mesme jour, et tout le lendemain, conter les meurtres et tueries qui s'y estoient faits des vieillards, femmes et enfans, tesmoigna d'en avoir horreur, et en parla comme si ces cruantez luy eussent fait mal au cœur, voire engendré quelque espee de trouble en l'esprit. Tellement qu'ayant tiré à part maistre Ambroise Paré son premier chirurgien, qu'il aymoit infiniment et avec telle familiarité, quoy qu'il fust de la religion, que comme il luy eut dit le jour de la Saint-Barthelemy, que c'estoit maintenant qu'il falloit être catholique, il luy respondit fort hardiment : « Par la lumiere de « Dieu, je croy qu'il vous souvient bien, Sire, « m'avoir promis, afin que je ne vous desobeysse « jamais, de ne me commander aussi jamais « quatre choses : à sçavoir de rentrer dans le « ventre de ma mere, de me trouver en une ba- « taille au combat, de quitter vostre service, ny « d'aller à la messe. » Ayant donc ceste privauté avec luy, il luy dit : « Ambroise, je ne « sçay ce qui m'est survenu depuis deux ou trois jours; mais je me trouve l'esprit et le corps

« grandement esmeus, voire tout ainsi que si « j'avois la fièvre, me semblant à tout moment « aussi bien veillant que dormant, que ces corps « massacrez se presentent à moy les faces hy- « deuses et couvertes de sang : je voudrois que « l'on n'y eust pas compris les imbecilles et inno- « cens. » Et sur ce qui luy fut respondu, il fit dès le lendemain publier des défences sur peine de la vie de plus tuer ny saccager personne, lesquelles neantmoins furent fort mal observées, les animositez et les fureurs du peuple estans trop allumez pour y déferer.

Deux jours apres, le Roy fit encore expedier des lettres patentes, qui furent envoyées aux provinces, par lesquelles il desadvoüoit ces cruantez, les rejettoit sur ceux de Guyse, et les querelles d'entr'eux et l'admiral de Colligny, defendant de plus user de tels actes en tous autres lieux, voire en escrivit en Angleterre, Allemagne, Suisse et autres pays estrangers, et néantmoins se laissant aller aux passions d'autrui et changeant au bout de huit jours d'opinion et de stile, il s'en alla en son parlement, et là seant en son lit que l'on nomme de justice (quelque iniquité qu'il produise) il déclara qu'il ne s'estoit rien fait que par son commandement, dont furent expedies lettres patentes, remplies de toutes sortes d'invectives et de calomnies contre ceux que l'on avoit massacrez, pour essayer de trouver quelques pretextes et donner couleur à tant de cruantez. En diverses provinces aucuns des gouverneurs les ayans prises en horreur, refuserent de faire executer ce qui leur estoit commandé à l'exemple de Paris, et entre iceux nous avons oüy nommer les comtes de Tende et de Charny, les sieurs de Mandelot, de Gordes, de Saint-Heran, de Carouge et le viconte d'Hostes, gouverneur de Bayonne, lequel fit sur ce mandement une fort genereuse response au roy Charles, qui luy en avoit escrit; dequoy il fut grandement blasmé par ceux qui avoient le plus de credit en Cour, qui estoient les auteurs de ces violens et sanguinaires conseils.

Le roy de Navarre et le prince de Condé, estans amenez devant le Roy, le matin de cette mal-heureuse journée, comme il en a esté dit quelque chose cy-devant, il leur commanda de quitter leur religion, et sur leur refus usa de plusieurs juremens et injures et mesmes de menaces de mort, s'ils s'opiniastroient davantage. Tellement qu'en fin, apres plusieurs delais, ils furent necessitez, comme tous les autres du royaume qui n'avoient point de retraite en iceluy ou qui ne le voulurent point quitter, de flechir sous ceste aspre servitude; voire le roy de Navarre fut contrainct d'envoyer dans ses terres

souveraines un edict, par lequel il defendoit tout exercice de la religion autre que celui de la catholique romaine.

Peu avant ceste journée, le Grand Seigneur ayant entendu les desseins du Roy, que l'on publioit par tout afin de mieux attraper les huguenots, à sçavoir : de faire la guerre au roy d'Espagne, pour recouvrer ce qui luy appartenoit aux Pays-Bas, luy envoya offrir gens, galeres et tout autre secours dont il auroit besoin, pour unir à perpetuité toutes les dix-sept provinces à la couronne de France; mais cet accident changea bien la face des affaires et des desseins; car ceux-là mesmes que le Roy avoit envoyez en Flandres pour commencer la guerre en son nom, sous la charge de Genlis, la Nouë et autres, furent desfaits par les advis et moyens provenans de la Cour.

[1573-1574] L'on commença aussi en ce mesme temps à negocier pour Henry, duc d'Anjou, à ce qu'il fust esleu roy de Pologne; en quoy il se rencontra de grandes difficultez, à cause que l'on le disoit principal autheur des massacres. Neantmoins, par l'artifice de ceux qui furent employez à cela, l'on desguisa si bien toutes choses, que l'eslection s'en ensuivit.

L'on fit semblablement plusieurs pratiques et menées pour se saisir de la Rochelle sous ombre des bons traitemens qu'on leur promettoit, auxquelles promesses les principaux et les plus riches de la ville estoient resolus de se confier, tant ils desiroient de conserver leurs biens et offices, et posseder ceux que l'on offroit si la ville se mettoit en l'obeyssance du Roy. Mais les peuples et plusieurs refugiez qui estoient eschappez des massacres, s'y opposans formellement, et menaçans les autres de les jetter dans la mer s'ils entroient en aucun traité, il fallut l'entreprendre par la force des armes, aussi bien que Sanxerre : toutes les autres personnes, villes et places demeurans si esperduës d'avoir veu massacrer plus de soixante et dix mille personnes de leur profession, en moins de huit jours, et d'entendre les cruels et rigoureux edicts que l'on publioit et faisoit executer contr'eux, qu'ils ne pensoient qu'à fleschir sous l'esclavitude ou à s'enfuyr hors du royaume; duquel descouragement et consternation ils commencerent à se relever sur une telle occasion.

Le sieur Regniers, gentil-homme voisin de Mont-auban, eschappé du massacre de Paris et d'entre les mains du sieur de Vesins, son mortel ennemy, par une assistance toute divine et qui se peut nommer vray miracle, il s'en vint à Mont-auban, accompagné du vicomte de Gourdou, et tous deux suivis de quelques trente hom-

mes d'armes et cinquante harquebusiers à cheval, seulement avec dessein de faire prendre les armes au peuple de cette ville là; mais ils trouverent tous les habitans en un tel effroy et si abbattus de courage, que ne les pouvant pas seulement faire resoudre à se garder et fermer leurs portes à des troupes que le sieur de Mont-luc faisoit estat d'y envoyer en garnison, ils en sortirent promptement de peur d'estre enveloppez là dedans et reprindrent le chemin de leurs maisons. Mais ayans rencontré sur iceluy deux cens cinquante hommes d'armes et deux cens harquebusiers à cheval que Mont-luc envoyoit pour tenir garnison à Mont-auban, et ce en tel lieu et si serré qu'il falloit perir ou combattre, ils embrasserent ce dernier expedient avec une telle resolution que les autres, lesquels ne s'estoient preparez à rien de semblable, prirent l'espovente et furent mis en route sans aucune defence, avec un si grand heur et courage qu'il demeura cent des ennemis morts sur la place, soixante gentils-hommes prisonniers et cent chevaux de combat gaignez, avec cinq cornettes qui demeurèrent entre leurs mains. Et s'en estans retournez à Mont-auban ils y furent receus avec une telle allegresse et admiration d'un tant heureux succez, que l'attribuans à un vray miracle de Dieu, il n'y eut un seul habitant qui ne prist courage, ne courust aux armes, ne se resolust de deffendre la ville et ne s'assujetist à faire les gardes necessaires aux portes. Et en suite donnerent si bon ordre à toutes choses que M. de Mont-luc fut contraint de se retirer et de changer de dessein, voire la reputation d'un si haut fait d'armes et la fermeté de ceux de Mont-auban à se defendre, fut de tel efficace es autres provinces, que plus de trente places et grand nombre de gentils-hommes et soldats se declarerent et commencerent à s'esvertuer et faire si bien la guerre, que ceux que l'on avoit estimez perdus et entierement destruits, reduisirent en plusieurs lieux leurs destructeurs sur la defensive.

Durant tels mouvemens aux lieux ainsi esloignez des forces royales (car tout estoit accouru où l'on estimoit estre reduit le fort de la guerre, et où se devoit, à leur advis, jetter le dernier soupir des huguenots), les sieges de Sanxerre et de la Rochelle se continuans avec telle obstination de toutes parts, qu'en fin la premiere fit quelque espee de traité, à cela contrainte, par la plus extrême famine dont on ait jamais oüy parler, et l'autre ayant lassé ceux qui l'attaquoient, capitula tant pour elle que Mont-auban et Nismes seulement.

Toute la subsistance des edicts n'ayant plus

de lieu que pour ces trois places, pendant les sieges desquelles, qui durerent sept ou huit mois, plusieurs mescontentemens et desseins se formerent entre les princes et grands du royaume, qui ne pouvoient plus souffrir, comme ils le disoient entr'eux, de se voir tant mesprizez et rabaissez par ceux qui gouvernoient la Cour, et que des gens de basse condition et des estrangers fussent eslevez aux charges principales et eussent l'entiere conduite, administration et disposition des affaires d'Estat, avec un entier mespris des loix, constitutions et ordonnances du royaume et de toute droicteure, équité et justice; usans d'un tel orgueil et fierté, et se rendans de si difficile accez, qu'il estoit beaucoup plus facile d'obtenir audience du Roy que de cette gent basse et vile.

Le duc Henry d'Anjou fut lors esleu roy de Pologne, suivant les sollicitations continuelles qu'en avoient faites les agens et ambassadeurs du roy Charles qui ne pouvoient plus souffrir ce sien frere dans son royaume, voyant qu'il usurpoit toute l'autorité et le credit par l'intelligence de Reine mere, qui l'aymoit uniquement et haïssoit son autre fils François, duc d'Alençon, vers lequel tous les plus mal-contens, tant catholiques que huguenots, jettoient les yeux pour en faire leur chef, et luy s'estoit donné à entendre qu'il ne refuseroit pas cette qualité; les uns et les autres faisans de tels desseins, avec d'autant plus de hardiesse qu'ils voyoient journellement accroistre les desordres et necessitez du royaume, quoy que les buts de tous ces gens là fussent bien differens; celuy du duc d'Alençon tendant à se fortifier d'amis et de partisans pour empescher le retour du roy de Pologne en France, advenant la mort du roy Charles que chacun tenoit pour infaillible et fort prochaine. Aussi ayant voulu entreprendre de conduire son frere le roy de Pologne jusques hors la France où il ne le pouvoit plus souffrir, il fust contraint de s'en retourner dès Vitry où il tomba malade de la langueur qui le porta au tombeau, non sans soupçon de quelque malefice de la part de ses plus proches.

La Reine mere d'autre costé qui haïssoit et se voyoit haïe de son fils d'Alençon, et avoit par ses espions et mouchards descouvert ce qui se projettoit pour la des-authoriser et empescher le retour du roy de Pologne, voulant essayer de l'esloigner du royaume et luy occuper l'esprit en d'autres entreprises, elle fit traiter de le marier avec la reine d'Angleterre, et envoya vers le prince d'Orange, le comte Ludovic et autres principaux revoltez és Pays-Bas contre le roy d'Espagne, afin qu'ils le voulussent eslire chef

de leurs armes et de leurs desseins, et finalement leur prince au cas qu'il les deslivrast absolument de la succession d'Espagne, et leur fit faire tant de belles promesses d'une puissante assistance, et donner tant d'asseurances d'un doux et moderé gouvernement avec entiere liberté de conscience et traitement egal envers ceux tant d'une que d'autre religion, qu'elle leur fit prendre goust à cette proposition.

D'ailleurs les progrez assez heureux de ceux de la religion en diverses provinces de France; le bon ordre que l'on sceut qu'ils avoient estably entr'eux en leurs affaires par une entiere et loyale union et bonne correspondance de toutes les parties en un mesme corps (ceux qui ne le pouvoient joindre avec les personnes, y contribuant les vœux, les cœurs et les moyens abondamment) et la resolution qu'ils firent paroistre de vouloir tous mourir ou vivre en liberté de conscience et seureté pour leurs vies, biens, honneurs et dignitez, commencerent d'affoiblir les esperances que l'on avoit prises de leur totale destruction; fit resoudre le Roy, qui se sentoît défailir peu à peu et commençoit à se repentir d'avoir suivy les violens conseils de ceux qu'il soupçonnoit estre cause de sa langueur, de traiter avec eux malgré la Reine mere et ceux de sa faction, et de trouver bon que pour cet effect ils envoyassent des députez à la Cour pour luy faire entendre leurs plaintes et leurs demandes; lesquels ayans rencontré en leur chemin des députez catholiques de toutes les mesmes provinces qui estoient envoyez pour demander diminution de tailles, imposts, tributs et autres charges pour dix ans; qu'il fut establi une meilleure forme d'administration aux affaires, et qu'elle fut mise és mains de personnes plus qualifiées, plus intelligentes et mieux famées, et à défaut d'y pourvoir, protester de n'imposer plus rien sur ces provinces.

Lesquels députez s'estans entre-communiqués leurs charges, et recevans journellement des sollicitations des mal-contens pour les encourager à parler haut, cela leur donna hardiesse de proposer des conditions à eux plus avantageuses que jamais, fondées sur les cruautés, perfidies et desloyautés dont on avoit usé en leur endroit; n'y ayant plus moyen qu'ils se pussent confier en une foy et une parole tant laschement et sanguinairement enfreinte et brisée, quoy que les cahiers, où ces demandes estoient inserées, ne fussent signez que de quatre ou cinq gentilshommes peu eminens en biens et qualitez, ce qui mit ceux du conseil du Roy en une merveilleuse colere, avec chagrin et despit de voir des gens qu'ils estimoient avoir tous atterrez, se re-

lever avec telle audace, si bien que ne leur voulans rien conceder qui leur püst faire prendre pied ferme, et n'ayans pas aussi les moyens de leur faire une puissante guerre à cause de la langueur du Roy et des factions qui se formoient en l'Estat, l'on usa de remise sur remise sans rien conclure, tellement que la France demeura quasi deux ans tousjours en paix et tousjours en guerre, qui causoit de merveilleuses ruines sur le peuple; les uns et les autres tenans la campagne librement jusqu'à la prise des armes, que l'on appela du mardy gras pource qu'en ce jour là ceux de la religion se saisirent de plusieurs places.

Le comte de Mont-gommery descendit d'Angleterre en France où il fit de mesme. Guitry et Buhuy cestuy-cy de la faction de M. d'Alençon et l'autre du roy de Navarre, s'approchant de St. Germain en Laye avec forces, sous esperance d'enlever de la Cour ces deux princes; mais toutes choses en se trouvant pas disposées selon le project, il ne s'en ensuivit aucun effet, et neantmoins l'alarme fut si chaude dans St.-Germain que chacun s'enfuit à Paris et fit à sauve qui peut, ce qui servit de pretexte fort specieux à la Reine mere (car le Roy declinant à veü d'œil estoit entré en de telles tristesses et melancolies qu'il ne vouloit oüyr parler de nulles affaires) de mettre des gens aupres de ces deux princes et sur tout du roy de Navarre, lequel, depuis la St.-Barthelemy, avoit tousjours esté detenu comme en une espee de demie prison, pour observer leurs actions et prendre garde à leurs personnes; mais apres les executions de la Mole et de Coconas, et les prisons des mareschaux de Mont-morency et de Cossé, il leur fut baillé des gardes et eux furent resserrez dans leurs chambres au Louvre; dequoy le prince de Condé, qui estoit à Amiens observé secrettement comme les autres, ayant esté promptement adverty avant que ceux que l'on envoyoit pour le faire arrester fussent arrivez, il se desguisa aussitost et s'enfuit luy troisieme en Allemagne, où il fut receu des princes protestans avec honneur et promesses d'assistance, et fut peu apres déclaré chef de tous ceux de la religion en France, contre lesquels furent dressées trois armées; l'une en Normandie, sous la charge du mareschal de Matignon, qui eut bien-tost destruit Mont-gommery; lequel ne s'estoit saisi que de trois ou quatre meschantes places, et n'ayant pas eu loisir de se fortifier, munitionner ny fournir d'hommes, capitula dans l'une d'icelles et fut mené à Paris où il eut la teste tranchée.

La seconde armée fut sous la charge de M. de Mont-pensier, qui prit Fontenay et apres Lus-

gnan par un long et perilleux siege; M. de Rohan, pere de celuy qui est à cette heure commandant dans la place, où il fit des merveilles de prudence, vigilance et vaillance.

La troisieme armée fut baillée au prince d'au-phin, qui prit quelques foibles places en Dauphiné, puis leva honteusement le siege de devant Livron, quelques uns de ces chefs ayans esté rappelez en Cour par la Reine mere, à cause de la mort du roy Charles IX, qui arriva au bois de Vincennes le jour de la Pentecoste 1574, n'ayant durant l'excès de ses douleurs, et lors qu'il se voyoit tout baigné de son sang dans son lit, tesmoigné nul plus grand regret que d'avoir fait respandre celuy des innocens le 24 aoust 1572.

Le roy de Pologne en treize jours fut adverty de cet accident, et aussitost se desroba de ses domestiques Polonois, s'enfuit du pays, et s'en vint en France en résolution, suivant les conseils qu'il en avoit receu en passant pays, de l'empereur Maximilian, du duc et senat de Venise, et du viell duc Charles de Savoye, de donner la paix à tous ses sujets, avec libre exercice à ceux de la religion et traitement esgal aux autres.

A son arrivée il y trouva une trefve faite pour trois mois, laquelle, par l'instance de la Reine mere et de ses conseillers à elle affidez, il changea en une guerre contre ceux de la religion et plusieurs catholiques associez que le mareschal de Dan-ville y avoit joints avec luy à cause de la prison de son frere : il se fit de fort foibles factions de guerre. Livron fut deux fois assiégé, à la derniere desquelles le Roy s'y trouva avec toute la Cour, et fut contraint de se retirer avec mille sortes de reproches et d'injures que les femmes et enfans crierent contre luy et la Reine sa mere, avec laquelle il s'en alla en Avignon. Ce honteux decampement, l'aversion que le Roy tesmoigna dès-lors de toutes choses genereuses et de la vraye gloire, qui ne s'acquiert que par les armes, et une inclination et disposition portée toute au repos, aux delices et plaisirs, le firent tomber en mespris qui engendra la haine, et la haine l'audace d'entreprendre contre luy; de laquelle proceda sa perdition avec infamie.

La sur-veille de Noël mourut le cardinal de Lorraine en terre papale, et se fit ce jour là une des plus grandes tempestes dont on ait guerre oüy parler.

[1575] Peu apres, le nouveau Roy s'achemina vers Reims, pour s'y faire sacrer; en passant il devint amoureux d'une des filles du comte de Vaudemont (1), et l'espousa.

Le duc d'Alençon, ci-apres dit Monsieur, et

(1) Louise de Lorraine.

le roy de Navarre, durant quelques mois, avoient tousjours marché par pays en coches, accompagnez de gardes; mais apres le sacre et le mariage, il leur fut donné quelque espece de plus grande liberté, laquelle de fois à autre leur estoit retranchée par le Roy et la Reine mere, selon les divers advis, fussent vrayz ou faux, qui se recevoient de leurs menées, projets et desseins.

La guerre se continuant tousjours dans le royaume, en quelques provinces esloignées, les jalousies et deffiances de Cour, à cause de tous ces intrigues, leur tenans tellement l'esprit occupé, qu'ils ne pensoient point à y mettre un fin, mais seulement à semer des dissensions entre Monsieur et le roy de Navarre, tantost par le moyen des mesmes maistresses qui leur estoient suscitées et instruites par la Reine mere, lesquelles par divers rapports et jalousies qu'ils leur donnoient, essayoient de les mettre en querelles; tantost en faisant esperer la lieutenance generale du Royaume, aujourd'huy à l'un, et demain à l'autre; et tous les conseillers d'Etat et ministres d'iceluy, songeans plutost à leur particulier, et à se maintenir en autorité, ou à se débutter les uns les autres, qu'à chercher des remedes à tant de malheurs qui menaçoient le Royaume, par les escapades de ces deux princes, et les menées de leurs partisans; sans y voir prendre aucune resolution, jusques au 15 septembre 1575, qu'elles commencerent d'esclatter par la sortie de Monsieur, lequel apres plusieurs remises et delais, se travestit un soir, s'enfuit de la Cour et se retira à Dreux, où grande quantité de noblesse, mal-contente des mauvais traitemens qu'ils avoient receus des ministres et conseillers du Roy, le vindrent trouver; comme fit incontinent apres la Reine mere, pensant de cajoler et le ramener à la Cour, mais il fuyoit tousjours, et elle couroit apres, sans luy pouvoir rien persuader, les armes se prenans de tous costez en faveur de ce prince, tant en France qu'en Allemagne, où M. le prince de Condé avoit si bien travaillé, que le prince Casimir (1) en personne, avec une grande armée, se trouva prest pour entrer en France.

## CHAPITRE VII.

### *Le roi de Navarre à l'armée des Protestans. Paix de Monsieur.*

[1576] Le roy de Navarre voyant la France et l'Allemagne en armes, pour la deffence de ceux

(1) Le prince Casimir étoit fils de l'électeur palatin du Rhin.

qu'il affectionnoit en son cœur, et rebutté des remises de cette lieutenance generale que l'on luy avoit tant promise, prit resolution de se mettre en liberté toute entiere; et pour cet effet, estant un jour, environ le mois de février, allé à la chasse vers Senlis, sur l'advis qui luy fut donné par mesdames de Carnavalet et de Sauve, que l'on avoit pris conseil à la Cour, de bailler cette charge à Monsieur frere du Roy, afin de le faire revenir à la Cour, et de se saisir de sa personne si tost qu'il y seroit arrivé; il se jugea tellement pressé de la necessité (qui rend tous desseins et toutes armes justes) qu'il resolut de se sauver. Et s'estant défait de ses gardes et de ses espions, d'une grande traite il vint passer la riviere de Seine, près de Poissy, gaigna Chasteau-Neuf en Timeraye, qui estoit à luy, n'ayant que trente ou quarante chevaux: là il prit quelque argent de ses fermiers, et s'en alla à Atençon, duquel le sieur de Hertray s'estoit saisi pour son service, où aussi-tost grande quantité de noblesse et de soldats le vindrent trouver. Et ainsi ces deux princes et celuy de Condé, s'estans joints ensemble, ils firent une armée de plus de cinquante mille hommes, par le moyen de laquelle ils obtindrent, pour donner la paix au royaume, et laisser le Roy en repos, dans la molesse des plaisirs et delices où il s'estoit plongé, tant pour leurs personnes, celles de leurs estrangers, des seigneurs qui les avoient assistez, que pour le party de ceux de la religion en general, toutes les conditions avantageuses qu'ils purent desirer; car rien ne leur fut refusé pour les separer; lesquelles ils eussent conservées, s'ils fussent tousjours demeurez unis et loyaux les uns envers les autres; voire il se presenta depuis de telles occasions, et se rencontrèrent de telles conjonctures d'affaires en Flandres et ailleurs, qu'en se gardans la foy les uns aux autres, Monsieur eut pû se rendre le plus puissant prince de la chrestienté sans couronne royale, ce qui meriteroit bien un discours à part, pour servir d'instruction à ceux qui auront cy-apres semblables affaires à démesler; mais nous laisserons cela aux historiens, et reprendrons la suite du nostre, pour ce qui vous regarde en particulier; nostre dessein n'estant pas de parler des succez des choses, sinon en tant que vous y aurez eu quelque part.

Or, est-il vray (comme nous croyons que vous vous en souviendrez bien) que nous ne vous pûmes suivre lors que vous vous sauvastes avec le roy de Navarre, nous en estans allez à Rosny, pour ce que nous estions malades; de sorte qu'estans absens, il nous a esté impossible d'apprendre aucune chose de vos actions et fortunes, que

par quelques uns de vos valets, ausquels nous nous enquismes à nostre retour; mais tout cela tant en confus et embarrassé, que n'en ayans pû tirer aucun esclarcissement de vous, nous devons estre excusé si nous obmettons beaucoup de choses qui vous peuvent avoir esté occurentes, et si nous manquons aucunesfois au temps et à la dénomination des lieux et des personnes; quoy que ce soit, nous n'avons point appris qu'en toute cette souslevation, il se fut fait aucunes factions de guerre fort remarquables, ny que vous ayez rien fait de particulier, ny esté employé en choses qui meritent d'estre escrites, sinon qu'en certaines escarmouches és environs de Tours, le roy de Navarre vous y voyant des plus eschauffez, et vous exposer aux plus grands perils en une chose quasi de neant; car vous vous estiez jetté parmy l'infanterie, et y viviez comme le plus simple soldat; afin, disiez-vous à ceux qui vous en vouloient divertir, d'apprendre le mestier des armes dés ses premiers commencemens. Il vous appella, et vous ayant fait revenir à luy, apres vous avoir tancé, vous dit: « Rosny, « ce n'est pas icy où je veux que vous hazardiez « vostre vie; je loué vostre courage, mais je desire vous le faire employer en une meilleure « occasion. » Puis se tournant, lors que vous fustes un peu esloigné, vers ceux qui estoient près de luy, leur dit: « Voilà un jeune gentil-homme « de fort bonne maison, qui est fils d'un brave « pere que j'ay fort aymé; il ne laisse guere passer d'occasion sans s'y trouver, et a un fort « gentil esprit, et croyez que s'il vit, il fera un « jour quelque chose de bon, ou je seray bien « trompé. »

La paix se fit trois ou quatre mois apres, et suivistes le roy de Navarre, lequel fit lors, estant à Tours, nouvelles protestations de vivre en la religion que l'on luy avoit fait quitter par force à la Saint Barthelemy, d'où il fit partir Farvaques, pour aller à la Cour redemander madame sa sœur (avec lequel vous fustes pource qu'il estoit fort de vos amis) laquelle dés la premiere ou seconde journée, au partir de Paris, se declara de la religion, et vous aussi fustes au presche à Chasteau-Dun avec elle, et plusieurs autres qui avoient changé au massacre. Le Roy son frere l'attendoit à Partenay, et vint trois lieues au devant d'elle; puis s'en allerent ensemble à la Rochelle, où ceux de la ville firent entrée au roy de Navarre, sans neantmoins luy avoir voulu donner le dais, disant qu'il n'appartenoit qu'au souverain, ny avoir voulu laisser entrer les catholiques qui suivoient le roy de Navarre, entre lesquels estoit Caumont, depuis due d'Espernon; pource, disoient-ils, qu'il y

en avoit qui avoient ensanglanté leurs espées le 24 d'aoust.

## CHAPITRE VIII.

### *Reprise d'armes. Sièges de quelques villes. Trêve.*

Vous suivistes tousjours le roy de Navarre en tous ses voyages, et quoy que vous vous jettassiez tout à fait dans l'exercice des armes, pour en apprendre le mestier, si ne laissiez vous pas de continuer vos estudes, lors mesmes que vous vous fustes mis dans la compagnie colonnelle de M. de Laverdin (qui vous cherissoit infiniment en vous apparentant) de faire toutes les factions comme le moindre soldat.

Or, quelques belles promesses que l'on eut faites au roy de Navarre, et prince de Condé, de faire executer loyalement tout ce qui leur avoit esté promis par la paix, en ce qui concernoit leur autorité dans leurs gouvernemens de Guyenne et Picardie, si est-ce qu'ils n'eurent pas plutost separé leurs troupes, et sur tout licencié leurs estrangers, et iceux conduits hors du Royaume, qu'ils ne vissent bien que Monsieur avoit esté gaigné, et devenu leur plus contraire ennemy, tellement que par les inexecutions de l'edict, et mauvais traitement que recevoient eux et tous ceux de la religion, ils se trouverent forcez de revenir aux armes dés la fin de l'année 1576, auquel temps M. de Laverdin vous donna son enseigne colonnelle, et fustes mis en garnison à Perigueux, et puis à Ville-Neufve d'Agenois, lors qu'on le menaça du siege. Avant la levée des armes, il n'y eut quasi homme de qualité aupres du roy de Navarre, au moins de ceux du pays, qui ne se vantast d'avoir gens tous prests pour mettre une bonne troupe en campagne, les uns de cavalerie, les autres d'infanterie, et qui ne se dist avoir une entreprise infaillible sur quelque place, et neantmoins quand se vint au fait et au prendre, il ne s'en trouva que cinq ou six qui pussent faire troupes, et encore assez chetives; et de toutes les entreprises, il ne s'en trouva que deux qu'il y eut apparence de devoir tenter.

La premiere, fut la Reole, que Favas conduisit si heureusement qu'il l'emporta par escalade; en laquelle vous montastes quasi des premiers, y ayant mené cinquante soldats de vostre compagnie. Elle fut prise sans grand combat, au moins ne nous souvient-il point avoir oüy dire qu'il vous y fut rien arrivé fort digne de remarque.

La seconde entreprise, fut sur Saint Macary,

laquelle ne fut pas semblable; Langoiran la conduisit, mais il y eut de la trahison, ceux de la ville estant bien advertis, de sorte que tout ce qui donna fut quasi tué ou pris; et si Favas, qui menoit la seconde troupe, ne vous eut retenu pres de luy, avec le jeune Bethune (pource que l'aisné vous avoit fort recommandez à luy), vous estiez tous deux des premiers perdus, car vous le pressastes plusieurs fois de vous mettre à la première troupe.

Peu apres M. de Laverdin, qui estoit dans Ville-Neufve d'Agenois, s'en alla assieger Ville-Franche de Perigord, où, selon ce que nous en avons oüy dire à la Trape, vostre valet de chambre, qui estoit fort bon soldat, vous courustes de grandes fortunes à ce siege; car, outre celles des approches, portant vostre drapeau à l'assaut, vous fustes renversé à coups de piques et halebardes, du haut de l'escarpe du fossé, dans le fond d'iceluy, tellement embarrassé dans le tafetas de vostre enseigne, et enfoncé dans l'eau et la bouë, que vous faillistes y estre suffoqué, d'où ayant esté retiré par la Trape et autres de vos soldats, vous ne laissastes pas de remonter à l'assaut, et s'estant lors ouvert quelque pourparler pour la reddition de la ville, elle fut par un autre costé surprise en parlementant, et icelle toute saccagée, où vous gaignastes quelques mil escus en or, par le plus grand hazard qu'il est possible; car un vieillard estant poursuivy par cinq ou six soldats, passant devant vous, se jetta entre vos bras, vous priant de luy sauver la vie, et de vouloir prendre sa bourse, pour laquelle on le poursuivoit, qu'il aimoit mieux que vous eussiez qu'un autre. Cette ville avoit quelque temps auparavant couru une autre fortune, à laquelle encore que vous n'avez point eu de part, nous ne laisserons d'en faire le recit, tel qu'il s'ensuit.

Une autre ville, sa voisine de trois ou quatre lieues, nommée, ce nous semble, Mont-pasier, estant de different party et elles s'entre-faisans continuellement la guerre, il arriva qu'en une mesme nuit, ils executerent une entreprise l'une sur l'autre, lesquelles reüssirent toutes deux, d'autant plus heureusement que l'une et l'autre ayans fait sortir tout ce qu'elles avoient de gens de guerre, il ne s'y trouva personne de defence, tellement qu'elles se trouverent prises et pillées toutes deux quasi en une mesme heure; de quoy bien estonnées, par l'entremise de leurs amys communs, elles convinrent, que chacune retireroit ses gens, sans rien emporter l'une et l'autre, et demurerent comme auparavant.

Peu apres il survint de grandes divisions entre les serviteurs plus qualifiés du roy de Na-

varre, comme si dans sa Cour il y eût eu deux partis; l'un de catholiques, composé de MM. de Laverdin, Miossens, Grand-mont, Duras, Roquelaure, Sainte Coulombe, Bégoles, Podins et autres: l'autre de huguenots, composé de MM. de Thurenne, Mont-gommery, Guित्रy, Lesignan, Favas, Pardaillan et autres, lesquels par plusieurs fois faillirent d'en venir aux mains, portans ces querelles et dissensions plus de prejudice aux affaires générales du party, que les ennemis mesmes; le roy de Navarre se trouvant bien empesché à concilier tant d'esprits et de fantaisies diverses, luy eschappant quelquefois de dire, qu'il sembloit avoir plus d'obligation aux catholiques, que non pas aux huguenots, d'autant que ceux-cy le servoient et assistoient à cause des interests de leurs personnes et de leur religion, au lieu que les autres n'y estoient menez que par la seule affection qu'ils portoient à sa grandeur et à sa fortune, au prejudice de leur propre creance et religion.

Or, pource que plusieurs personnes s'estonnans de la mauvaise intelligence qui a tousjours paru entre M. de Thurenne (1) et vous, nous en ont souvent demandé la cause, il nous a semblé à propos sur l'occasion de ces dissensions qui en furent la premiere origine, d'en dire icy un mot, selon ce que nous en avons appris d'un gentil-homme de Normandie, nommé le sieur d'Yvetot, qui estoit lors à vous; lequel nous conta que vous estant, dès ce temps-là, survenu quelque dispute avec le sieur de Frontenac, vous n'ayant point encore de barbe, pource que sur certains propos qui ne luy plaisoient pas, il vous dit: « Vous faites desja bien l'entendu, » encor que vous soyez si jeune que si l'on vous tordoit le nez, il en sortiroit du lait. » A quoy vous luy respondistes: « Que vous aviez assez d'aage pour luy tirer le sang du sien, l'espée à la main. » Et quoy qu'il fust catholique et vous de la religion, si arriva-il, que M. de Laverdin et la plupart des catholiques envoyèrent s'offrir à vous, d'autant qu'ils avoient sceu que M. de Thurenne et plusieurs des huguenots de ce pays de delà, à cause de luy, s'estoient envoyez offrir à l'autre, et à vostre accord parurent ces deux factions tout ouvertement, ce qui vous obligea de là en avant d'estre contre M. de Thurenne en toutes les disputes qui luy survenoient, tellement que cette broüillerie, et ce que dès auparavant vous aviez tesmoigné d'affectionner Langoyran, contre qui M. de Thurenne s'estoit tousjours bandé, pource qu'il ne l'avoit point voulu recognoistre pour son général es lieux où il commandoit, et avoit dit tout haut

(1) Le vicomte de Turenne, depuis duc de Bouillon.



qu'il ne l'estimoit point de meilleure maison que luy, que c'estoit un jeune homme ambitieux, qui n'estoit point si expérimenté aux armes que luy, qu'il estoit si bigot, qu'il n'y avoit que trois jours qu'il protestoit de vouloir plutost estre chien que huguenot, et ne s'estoit rangé avec ceux de la religion, que pour n'avoir pû durer avec M. d'Alençon, à cause du sieur de Bussy (1), lequel le devançant en faveur, le vouloit aussi preceder en toutes autres choses. Vos amys et parens firent ce qu'ils pûrent pour vous disposer à rechercher le vicomte de Thurenne; mais il n'y eut jamais moyen, aussi que luy mesme vous faisoit tellement le froid, qu'il estoit aisé à juger qu'il y avoit je ne sçay quelle contrariété naturelle entre vos humeurs et inclinations.

Les affaires et encore plus les esprits estans donc en cette disposition, tant plaines de bigarrures et contrarietez, l'on ne laissa pas neantmoins d'entreprendre, par l'opiniâtreté de quelques uns que vous sçavez bien, et contre les sentiments du roy de Navarre mesme, et du sieur de la Nouë, d'aller assieger Marmande, ville située sur Garonne, trop grande, trop forte et trop bien munie de toutes choses, pour une armée si mal assortie de ce qui estoit necessaire, qu'estoit celle du roy de Navarre, devant laquelle M. de Laverdin, colonel d'infanterie, ayant esté commandé de faire faire les approches, il vous bailla, comme estant son enseigne, cent harquebusiers à conduire, afin de vous aller loger dans des maisons et chemins creux, qui estoient à deux cens pas de la ville, vers le bas de la riviere, mais vous et tous les autres capitaines qui eurent mesme commandement vers les autres quartiers, fustes si furieusement receus, par trois fois autant de gens armez et soldats sortis de la ville, qu'après une grande escarmouche, vous fustes tous contraints de vous retirer avec perte; et de vous loger et défendre dans des maisons fort estoignées, au lieu d'assaillir, jusques à ce que le roy de Navarre, avec le reste de sa malotruë armée, tant cavalerie qu'infanterie, fut arrivé, qui les contraignit par deux ou trois charges qui leur furent faites (en l'une desquelles ce prince fut luy mesme, n'ayant que sa seule cuirasse) de regagner les contrescarpes de leurs fosses, et vous donna moyen de vous loger, barricader et retrancher aux lieux qui vous avoient esté ordonnez assez proche de la ville : laquelle se trouva si mal investie n'y ayant pas assez de gens pour la ciruire entierement, et l'artillerie qui ne consistoit qu'en un canon et deux coulevrines si mal montée, munitionnée et servie, qu'il n'y avoit apparence que de honte

(1) Clermont Bussy d'Amboise.

et dommage pour les assiegeans : pour lesquelles éviter, et couvrir en quelque façon, le roy de Navarre prit pretexte de lever le siege, par une telle quelle capitulation sur l'arrivée du mareschal de Biron, que le Roy envoyoit vers luy pour traiter de la paix, des particularitez de laquelle négociation je ne diray rien, tant pource qu'il ne s'en ensuivit aucun effet, que pource que vostre jeune aage ne vous permettoit pas d'estre encore employé en telles affaires.

Peu de temps apres vous quittastes l'enseigne colonnelle de M. de Laverdin, et la baillastes au jeune de Bethune vostre cousin; pource qu'ayant receu une bonne somme d'argent de vostre revenu, que vous aviez espargné durant trois ou quatre ans, que vous n'y aviez point touché, et aviez vescu d'inventions et de vos soldes et profits faits à la guerre, vous vous reneastes tout à fait à la suite du roy de Navarre; avec un fort gentil équipage, auquel ne manquant jamais rien non plus que vous d'argent, tant vous estiez prevoyant et bon mesnager; ce prince commença dès lors, comme il vous l'a souvent dit depuis, à vous estimer et prendre une bonne opinion de vostre esprit et de vostre conduite.

Cette négociation de paix tirant en longueur, il fut fait une trefve pendant laquelle le Roy s'en alla en Bearn, sous pretexte d'aller voir sa sœur; mais en effet on croyoit qu'il y estoit attiré par la jeune Tignonville (2), dont il faisoit lors l'amoureux, et là commençastes vous à faire le courtisan, Madame sœur du Roy, prenant la peine elle-mesme, de vous montrer les pas d'un balet, dont elle vouloit que vous fussiez, et de fait vous le dançastes huit jours apres devant le Roy, ainsi que nous l'avons oüy dire au sieur d'Yvetot, car vous nous aviez laissé avec vostre train.

## CHAPITRE IX.

### *Diverses expéditions du roy de Navarre.*

Au retour de ce voyage de Bearn, la trefve estant preste à finir, le roy de Navarre fit dessein de se saisir de la ville d'Eause, qui estoit à luy en propre, où il courut de grandes fortunes; car estimant que les habitans qui n'avoient point voulu recevoir garnison, auroient du respect à la personne de luy qui estoit leur Seigneur, il voulut marcher tout le premier pour entrer dedans avec peu de gens, afin de ne donner point d'alarme, et de fait, n'ayant pris que quinze ou seize de vous autres messieurs, qui vous rangiez

(2) Sa mère étoit gouvernante de la princesse Catherine, sœur de Henri.

le plus près de luy, desquels vous fustes, avec de simples cuirasses sous vos juppes de chasse, deux espées et deux pistolets, il surprit la porte de la ville et entra dedans avant que ceux de la garde eussent eu moyen de prendre les armes; mais l'un d'iceux ayant crié à celui qui estoit au portail en sentinelle, il coupa la corde de la herce-coulisse, qui s'abatit aussi-tost quasi sur la croupe de vostre cheval et de celui de M. de Bethune l'aisné, vostre cousin, ce qui empescha le reste de la suite qui venoit au galop de pouvoir entrer: tellement que le Roy et vous quinze ou seize, tous seuls, demeurastes enfermez dans cette ville, de laquelle tout le peuple s'estant armé, il vous tomba à diverses troupes et à diverses fois sur les bras, le tocxin sonnait furieusement, et un cry d'*arme, arme, et de tué, tué*, retentissant de toutes parts. Ce que voyant le roy de Navarre, dès la première troupe qui se presenta de quelques cinquante, les uns bien, les autres mal armez, luy marchant le premier le pistolet au poing, droit à eux, il vous cria: « Or sus, mes amys, mes compagnons, c'est icy où il vous faut montrer du courage et de la resolution: car d'icelle dépend nostre salut; que chacun donc me suive et fasse comme moy, sans tirer le pistolet qu'il ne touche. » Et en mesme temps oyans trois ou quatre, qui croiyent: « Tirez à cette jupe d'escarlatte, à ce pennache blanc, car c'est le roy de Navarre, » il les chargea de telle impetuosité, que sans tirer que cinq ou six coups, ils prirent l'espouvante et se retirerent par diverses troupes: d'autres semblables vous vindrent encore mugoter par trois ou quatre fois; mais si tost qu'ils se voyoient enfoncer, ils tiroient quelques coups et s'escartoyent, jusques à ce que s'estans ralliez près de deux cens, ils vous contraignirent de gagner un portail, et deux de vous autres monterent pour donner le signal au reste de la troupe, que le Roy estoit là, et qu'il falloit enfoncer la porte, le pont-levis n'ayant pas esté levé; à quoy chacun commença de travailler, et lors plusieurs de cette populace qui aymoient le Roy et d'autres qui craignoient de l'offencer estant leur seigneur, se mirent à tumultuer en sa faveur, et enfin apres quelques harquebusades et coups de pistolets tirez de part et d'autre, il se mit une telle dissension entr'eux, voyans que les portes se rompoient, les uns crians il se faut rendre, les autres il se faut défendre, que cette irresolution donna moyen et loisir de faire ouverture des portes, et à toutes les troupes de se presenter, à la teste desquelles le Roy se mit voyant la plupart des peuples s'enfuir, et des consuls avec leurs chaperons crier: « Sire, nous sommes vos sujets et vos serviteurs

« particuliers: *helas!* ne permettez pas le saccage ment de cette ville qui est vostre, pour la folie de quelques meschans garnemens qu'il faut chastier. » Il se mit, dis-je, à la teste pour empescher le pillage; aussi ne se commit-il aucune violence ny desordre ny autre punition, sinon que quatre, qui avoient tirés au pennache blanc, furent pendus, avec la joye de tous les autres habitans, qui ne pensoient pas en devoir estre quittes à si bon marché.

Le roy de Navarre ayant donné à M. de Bethune, vostre cousin, le gouvernement de cette ville, s'en alla à Nerac où il eut advis qu'un gentil-homme catholique, qui tenoit son party, nommé Sainct Cricq, s'estoit saisi de la ville de Mirande; mais que n'estant pas assez fort, il avoit esté contraint de se retirer dans une tour et portail proche des murailles, où il se resolvoit de se défendre, attendant secours qu'il luy prioit de luy donner promptement: à quoy desirant satisfaire, il partit aussi-tost et manda aux garnisons voisines de le suivre, et de se trouver à un certain rendez-vous qu'il leur donna, auquel s'estant trouvé d'assez bonnes troupes de cavalerie et infanterie, il marcha aussi droit à Mirande; mais il estoit arrivé que sur l'alarme de la surprise de cette ville, tous les gens de guerre catholiques du voisinage s'estant jettez dedans, ils attaquèrent si furieusement et perseveramment ce portail, qu'avant l'arrivée du roy de Navarre, ils forcerent Sainct Cricq et les siens, et les firent tous brusler dedans: neantmoins l'on ne laissa pas, lors que vos troupes commencerent à paroistre, de fanfarder les mesmes signaux que l'on avoit mandez, afin de vous faire approcher et attraper, à quoy le roy de Navarre preparoit dés-ja des troupes pour donner: lesquelles infailliblement se fussent perdus pour la plupart, lors qu'un soldat de la religion qui s'estoit marié là dedans à une femme catholique, s'estant jetté par dessus les murailles, vint advertir de la tromperie, lequel advis sauva la vie à beaucoup de gens de bien, qui estoient tous prests et bien resolus de donner à ce portail, du nombre desquels vous estiez: tellement que l'ennemy voyant bien par vos contenance et le changement de vostre ordre, que vous changiez tous de dessein et par consequent aviez esté advertis du mal-heur arrivé à Sainct Cricq et aux siens, ils sortirent dehors en fort grand nombre, cavalerie et infanterie, et attaquèrent une grande et furieuse escarmouche, en laquelle vous et le jeune Bethune, vostre cousin, vous allastes mesler des premiers, et vous y trouvastes enfin si embarrassez, qu'il y demeura plusieurs des vôtres; et sans M. de Bethune l'aisné, pere de ceux

que nous avons veus en Flandres, et M. de Le-  
signan, qui, par commandement du roy de Na-  
varre, vous vindrent tous faire retirer, et pour  
vous des-engager furent contraints de faire une  
furieuse charge à ceux qui vous poursuivoient  
chaudement à la faveur de leurs courtines, vous  
couriez tous deux fortune, et beaucoup d'autres  
d'estre tuez ou pris : car vous fustes trouvez si  
las et si hors d'haleine, vous et vos chevaux, que  
vous ne pouviez quasi plus aller ny respirer ;  
ainsi que de tout cecy nous en avons oüy faire  
le recit audit sieur d'Yvetot et à la Trape, qui  
furent tousjours avec vous ; nous n'estant pas de  
ces fois qui se meslassent en ces hazards : et lors  
le roy de Navarre voyant ne pouvoir plus rien  
faire là devant, et que le jour commençoit à  
decliner, il fit sonner la retraite, et s'en alla à  
Jegun, où, deux jours apres, toutes les troupes  
des catholiques de la province, qui s'estoient as-  
semblées en grand nombre sous la charge de M.  
l'admiral de Villars, sur l'alarme de cette sur-  
prise de Mirande, où ils croyoient qu'il se pour-  
roit faire quelque grand combat devant, voire  
dedans cette ville là, si le portail eut tousjours  
tenu. Ayant appris que la plupart de celles du  
roy de Navarre s'estoient retirées en leurs garni-  
sons, se vindrent presenter et mettre en bataille  
devant Jegun, avec forces fanfares et defits pour  
combats singuliers : voyant qu'à une grande  
escarmouche qui se faisoit, ceux du roy de Na-  
varre, comme les plus foibles, ne quittoient point  
la faveur des courtines, et ne taschoient qu'à les  
attirer dans la portée d'icelles, ainsi qu'eux me-  
mes avoient fait le jour de devant, les sieurs de  
Laverdin et de la Devese, l'un d'un party et l'autre  
de l'autre, accorderent un combat singulier  
de six contre six : mais, comme vous vous de-  
batiez tous à qui en seroit, le roy de Navarre  
d'un costé, et M. l'admiral de Villars de l'autre,  
vindrent faire retirer les troupes ; et ainsi cha-  
cun s'en alla loger, qu'il estoit presque nuict.

Peu de temps apres le roy de Navarre fit un  
voyage de Leytoure à Mont-auban, sur le pas-  
sage duquel s'estant approché de Beau-mont de  
Laumagne, et ceux de la ville ayans fait filer  
quelques harquebusiers dans les hayes, vignes  
et chemins creux, afin de l'incommoder et es-  
sayer de tuer ou blesser quelques hommes ou  
chevaux, le roy de Navarre commanda au comte  
de Meilles et à vous, de prendre vingt-cinq che-  
vaux, et leur faire une espece de fausse charge,  
afin de les faire retirer ; ce que voulant execu-  
ter, ils vous tirerent de fort loin, tous en foule,  
et aussi-tost prenant l'espouvante, vous les en-  
fonçastes et menastes battans, en sorte qu'il en  
demeura dix ou douze par les chemins, jusques

dans les faux-bourgs et jardinages de la ville,  
d'où il sortit cent harquebusiers à leur secours :  
ce que voyant le roy de Navarre, et qu'ils s'es-  
toient avancez jusqu'à un lieu où, à cause de  
quelques maisons et grands arbres fort espais,  
les courtines ne se voyoient que fort peu, il fit  
mettre pied à terre à cinquante de ses gardes,  
lesquels marchans au combat, de toute autre  
façon que ces gens de ville, n'eurent pas plutost  
tiré leurs premieres harquebusades, qu'ils mirent  
l'espée à la main, et s'allèrent mesler avec eux  
dans les clos, vergers et jardins ; et mesmes les  
clayes d'iceux ayans esté ouvertes en plusieurs  
lieux, le roy de Navarre luy mesme avec quel-  
ques uns de vous autres, les chargea furieuse-  
ment, de quoy tous ces gens effrayez, ils se mi-  
rent en fuitte, jettans leurs armes pour se sauver ;  
il y en eut quelque vingt de tuez, et presque au-  
tant de prisonniers : le reste se jetta dans les fos-  
sez de la ville, laquelle d'effroy, et craignant  
que l'on entrast pesle-mesle, leverent les ponts-  
levés ; et le Roy voyant que toutes les courtines se  
garnissoient d'harquebusiers, se retira sans qu'il  
y perdit qu'un homme, et un nommé Rangues  
et le Bois de Thoneins qui furent blessez, et deux  
ou trois chevaux, et ainsi suivistes vostre chemin  
vers Mont-auban.

Quinze jours apres le roy de Navarre s'en re-  
tournant de Mont-auban à Leytoure, et ne vou-  
lant plus passer si près de Beau-mont, au partir  
du Mast de Verdun, il prit plus à droicte vers  
un lieu qui s'appelle Sainct Nicolas (comme il  
nous semble), et ayant fait environ une lieüe,  
l'on entendit le son de quatre ou cinq tabourins,  
vers lesquels le Roy ayant envoyé pour les re-  
cognoistre, on luy raporta que c'estoient environ  
trois cens harquebusiers, lesquels, sous cinq en-  
seignes, tenoient le chemin de Beau-mont à Flo-  
rance, marchans en assez mauvais ordre ; lors  
il y eut de grandes disputes entre les vieux et  
jeunes gentils-hommes et capitaines, pour resou-  
dre si on les laisseroit passer ou si on les yroit  
attaquer, car le Roy n'avoit qu'environ cent ou  
six-vingts gentils-hommes ou fort bons capitaines  
bien armez, et cent cinquante harquebusiers de  
ses gardes ; et en fin sa majesté conclut qu'il les  
falloit envoyer taster par vingt chevaux et cin-  
quante harquebusiers tous à cheval, afin de  
prendre conseil sur la resolution qu'ils tesmoi-  
gneroient avoir, leur mettant en veüe tout ce  
qu'il y avoit de gens, qui paroissoit fort à cause  
de la quantité de serviteurs, domestiques et va-  
lets que vous autres messieurs aviez, que l'on  
fit mettre en bataille en quatre gros, avec vos  
casques en teste à ceux des premiers rangs, ce  
qui reluisoit fort au soleil, et le surplus qui estiez

tous gens de combat et un peu plus apres, en trois autres gros, les gardes estans à cheval les harquebuses et petrinails (1) hors le fourreau. Si tost que ces gens vous descouvrirent en cet ordre et virent vos coureurs venir à eux les pistolets au poing, ils commencerent à se tremousser, les uns courans d'un costé, les autres de l'autre, sans aucun rang, montrans de s'effrayer. L'on voyoit trois ou quatre capitaines à cheval à leur teste, qui faisoient en apparence tout ce qui se pouvoit pour les rassurer et mettre en ordre dans un grand champ; mais voyans que les uns apres les autres passaient à travers les plus fortes hayes, et se jettoient dans les chemins creux sans vouloir garder ordre ny rangs, eux mesmes se mirent à la teste, et au grand trot, se faisans suivre de mesme par tous leurs soldats, avec dessein d'aller gagner un bourg nommé les Cassaux, fermé par les costez et les devants, réservé que les portaux en avoient esté démolis, croyans qu'ils auroient assez de loisir pour s'y baricader; mais ils furent suivis de si près, que les plus mal enjambez demurerent par les chemins et furent taillez en pieces, et les autres passans dans le bourg, cognoissans bien qu'ils n'auroient pas le loisir de baricader les portaux, ils gagnerent, au nombre de quelques deux cens, une grande eglise qui estoit hors le bourg où les paysans avoient accoustumé de se retirer, tellement qu'ils la trouverent toute retranchée et mesme pourvue de vin et farine et quelque peu de pain et de bois, là où le roy de Navarre se resolut de les assieger; et pource qu'il n'avoit autre infanterie que ses gardes et qu'il ne doutoit point que les villes catholiques voisines, comme Grenade, Beau-mont, Mirande, Valence et Fleurance, n'essayassent de les secourir, il depescha aussitost à Leytoure, au Villa, le Mast de Verdun, Lisle et Mont-auban pour luy envoyer le plus de gens de pied et de cheval qu'ils pourroient, et, en attendant il fut contraint d'employer non seulement ses gardes et toute la noblesse, mais aussi vos valets, pages et laquais, et fustes ainsi près de quatre jours sans vous des-habiller, ny quasi des-арmer, ny avoir autre soulagement, sinon qu'en sortant des gardes à pied, où il falloit travailler à la sappe de ceste eglise, vous entriez en garde à cheval, pour empescher le secours et les advis, et ne dormiez tour à tour que de deux nuits l'une: mais en fin vous estant arrivé quelque cent chevaux, et mille ou douze cens harquebusiers de toutes ces villes nommées, avec des pics, pelles, pioches et grenades, suivant ce que le Roy l'avoit demandé, vous commençastes à prendre quelque repos et à travailler avec plus

(1) Gros pistolets.

de facilité, quoy que les murailles de ceste eglise fussent si dures et si espaises, que l'on n'avança pas guere la besongne.

Le Roy vous ayant baillé pour vostre quartier, le rond du chœur de l'église à percer, vous vous y opiniastres de telle sorte et tous les vostres, que dans douze heures vous y eustes fait un trou, par lequel vous faisiez jeter des grenades dans l'église, qui leur blessaient force soldats; et puis listes dresser un petit eschaffaut contre le trou, de dessus lequel vous faisiez tirer à ceux qui paroissent; tellement que ces gens ayans apperceu le renfort qui estoit arrivé au Roy, n'ayans chirurgiens, linge ny drogues pour panser leurs blessez, ny eau, ny feu pour leur faire du pain qu'ils petrissoient avec du vin, et le trouvoient fort mauvais, engendrant mesme des maladies, ils furent enfin contrainsts de se rendre à discretion, qui estoit telle en l'esprist du Roy, qu'il se vouloit contenter d'en faire pendre sept ou huit, qui estoient accusez d'avoir exercé de grandes cruautés contre ceux de la religion, et notamment six filles ou femmes, lesquelles apres avoir violées, ils avoient remply la nature de poudre, et puis les avoient fait crever en y mettant le feu; mais il ne fut jamais possible d'en sauver un seul, tant ceux de Mont-auban s'acharnerent dessus, jusques à les venir tuer entre les bras de ceux de vous autres de qualité qui les vouliez sauver, dequoy le roy de Navarre ne fut pas puis apres trop marry, lorsqu'il sceut par qui les capitaines se disoient estre levez.

## CHAPITRE X.

*Députation des premiers états de Blois vers le roi de Navarre. Paix de 1577. Négociations entre le roi de Navarre et Catherine de Médicis. Rupture de la paix.*

[1577—1578] Le roy de Navarre, apres tous ces petits exploits, s'estant retiré à Nerac pour se rafraischir, arriverent vers luy les députez de la part du Roy et des Estats à Blois, qui estoient, ce nous semble, MM. de Mont-pensier, l'archevesque de Vienne, Richelieu et quelques autres, pour luy venir faire entendre qu'aux Estats qui se tenoient à Blois, il y avoit esté resolu qu'il n'y auroit qu'une seule religion en France, et que chacun seroit tenu de fournir tous les ans le centiesme de son bien, jusques à l'entiere ruine des heretiques; et partant le prioient, comme desirieux de son salut eternel et de ses prosperitez temporelles, de vouloir recevoir instruction. Ce qui se passa là dessus seroit de trop longue deduction, dequoy ne vous estant pas meslé, nous

n'en dirons autre chose sinon que M. de Bethune, vostre cousin, et vous avec luy, fustes envoyez au devant de ces messieurs jusqu'à Bergerac, pour les recevoir et faire loger et honorer dans les villes du party.

S'en estans retournes sans rien faire, M. l'admiral de Villars assembla son armée pour aller assieger Castel-jaloux; mais'ayant sceu que cinquante ou soixante de la jeune noblesse du roy de Navarre, cinquante de ses gardes et cinq cens harquebusiers, vous estiez aller jeter dedans, il changea de dessein, et peu apres ayant pratiqué, comme il publia depuis, quelque intelligence dans la ville de Nerac, il se presenta devant avec toute son armée, pour l'exécuter plus facilement; mais les partisans n'ayant pas bien pris leurs mesures, cela n'eut autre effet, sinon qu'il s'attaqua une fort grande escarmouche, en laquelle vous vous allastes mesler des plus avant, et ne fut pas jusques au roy de Navarre mesme qui ne s'y voulut trouver armé de toute piece, l'espée à la main, et quelque chose que ses serviteurs luy pussent remontrer que ce n'estoit pas un lieu digne de luy, il se mit à la teste d'une troupe qu'il voyoit disposée d'aller à la charge, en laquelle il fit tant bravement, qu'il fit lascher le pied à une troupe de cavalerie qui s'estoit avancée, et la contraignit de regagner le gros de leur infanterie; et d'autant qu'en se retirant il vit douze ou quinze chevaux des siens qui continuoient à escarmoucher et à demander le coup de pistolet, ayant demandé qui ils estoient, et sceu que vous estiez du nombre, nous entendismes qu'il dit à M. de Bethune, vostre cousin: Allez à vostre cousin le baron de Rosny, il est estourdy comme un hanneton, retirez-le de là et les autres aussi, car l'ennemy nous voyant retirer, leur fera sans doute, car c'est le droict de la guerre, une si rude charge, qu'ils seront tous pris ou tuez; et quand vous fustes tous revenus, il vous tança infiniment, voyant vostre cheval blessé d'une harquebusade dans l'espaule à l'endroit du poitrail: en fin chacun estant lassé et l'escarmouche s'appaisant un peu, l'on vint à parler les uns aux autres, apres que le roy de Navarre et l'admiral de Villars se furent retirez, et en vint on si avant qu'il se proposa un combat singulier de quatre cavaliers et quatre harquebusiers de chaque costé, entre lesquels vous fustes nommé par M. de Laverdin qui en estoit aussi; mais l'admiral de Villars vint luy mesme empescher tout cela, et faire retirer ses troupes voyant la nuit approcher.

En ce mesme temps M. du Mayne (1) estant

(1) Charles de Lorraine, duc de Mayenne, second fils de François de Guise.

venu avec armée en Poictou, avoit assiégué Broüage, et ceux de dedans se voyans pressez (car nous ne parlons point du siege, d'autant que vous n'y estiez pas), ils firent solliciter le roy de Navarre, par messages redoublez, de les vouloir secourir promptement: à quoy s'estant resolu, il manda ses forces de tous costez, et s'achemina à Bergerac, puis à Mont-guyon et Ponts, où estoient M. le prince, M. de la Roche-foucault et autres, ayant laissé M. de Thurenne derriere, pour assembler et amener l'infanterie; mais à cause des jalousies, défiances et envies qui prirent lors naissance entre le roy de Navarre et M. le prince, où M. de Thurenne estoit si avant meslé, que M. le prince voulut se battre avec lui, et les longueurs dont il usa pour amener les troupes, tout cela ne pût estre mis ensemble, que Broüage n'eut capitulé, et convenu de la forme de sa reddition.

Peu apres la paix de l'an 1577 fut conclüe, le Roy ayant tesmoigné un grand desir d'icelle, tant pource que son esprit estoit entierement esloigné des faits militaires, et tout porté dans le repos, la faineantise et les délices, que pource que, par la guerre, il se voyoit contraint de mettre les forces, et par consequent, l'autorité entre les mains de ceux de la maison de Lorraine, qu'il cognoissoit bien faire des pratiques et des menées contre la royauté et succession legitime du royaume. Les années 1578 et 1579 se passerent et consommèrent en allées et venues, pour l'exécution de l'edict que l'on n'observoit en aucun de ses articles. Quoy que par ceste paix, tous les grands avantages, obtenus par celle dite de *Monsieur*, eussent esté retranchez, mesmes si tost que le roy de Navarre fut party d'Agen et des environs de Ville-neufve, le mareschal de Biron se saisit de ces deux villes: et quoy que se fut en plaine paix et contre les articles d'icelle: si est-ce que le roy de Navarre n'en pût jamais obtenir la raison.

Environ le mois d'aoust 1578, comme il me semble, la Reyne mere, la reine de Navarre, et le roy de Navarre, se virent aupres de la Reole; et puis s'en allerent ces trois Cours ensemble à Auchx, où n'oyant plus parler d'armes, mais seulement de dames et d'amour, vous devintes tout à fait courtisant, et faisant l'amoureux comme les autres; ne vous amusans tous à autre chose qu'à rire, dancer et courir la bague; voire mesme le roy de Navarre, cependant que sa belle mere l'amusoit de belles paroles, semoit des divisions et dissensions entre luy, M. le prince, M. de Thurenne et autres des plus signalez party de la religion, et faisoit des pratiques dans leurs villes, et se passa, durant ce temps, une infinité de particularitez sur tels subjects,

qui mériteroient bien d'estre escrites : mais à cause qu'il ne me souvient pas bien des temps, et que je n'ay rien à y dire de vous, je laisse cela aux historiens : et me contenteray d'une seule action, qui est digne d'estre nottée, qui fut telle.

Ces trois Cours estans donc ensemble à Auchx, un soir ainsi que l'on tenoit le bal, un gentil-homme, envoyé par M. de Favas, vint advertir le roy de Navarre, qu'un vieil gentil-homme nommé Ussac, que l'on tenoit pour un des piliers de l'église huguenotte, estant des plus autorisez dans les consistoires, et accreditez dans les assemblées, et à ceste cause avoit esté choisi entre plusieurs autres pour estre gouverneur de la Reole, place des plus importantes pour ceux de la religion, avoit esté persuadé par une des filles de la Reine mere, dont il estoit devenu esperduement amoureux, à se faire catholique, et remettre la place entre les mains de la Reine mere : ce qu'entendu par le roy de Navarre, sans montrer aucune émotion, n'y faire semblant de rien, s'escoula doucement de la presse avec trois ou quatre de vous autres, ausquels il dit tout bas à l'oreille : « Advertissez, le plus secrettement que vous pourrez, tous mes serviteurs, dont vous pourrez sçavoir les logis, que dans une heure je seray à cheval, hors la porte de la ville, avec ma cuirasse sous ma jupe de chasse : et que ceux qui m'ayment et qui voudront avoir de l'honneur me suivent. » Ce qui fut aussitost fait que dit : et le tout si heureusement executé, qu'à portes ouvrantes, il se trouva à Florence, de laquelle, les habitans ne se doutans de rien, à cause que l'on estoit en paix, il se saisit facilement ; ce qui ayant esté le matin rapporté à la Reine mere, qui le pensoit avoir couché à Auchx, elle n'en fit que rire, et en branlant la teste, dit : « Je voy bien que c'est la revanche de la Reole, et que le roy de Navarre a voulu faire chou pour chou : mais le mien est mieux pommé. »

Cet accident esloigna pour quelques jours ces deux Cours l'une de l'autre : mais les choses s'estans un peu remises en apparence seulement, elles furent ensemble en Foix, où le roy de Navarre voulut faire voir la chasse des ours aux dames ; mais on leur en fit si grand peur, qu'il n'y eut pas moyen de les mener aux montagnes ; aussi arriva-il en icelle des cas fort estranges, de la force et furie de ces animaux ; car il y en eut deux qui desmembrerent des chevaux de medlocre taille ; quelques autres qui forcerent dix Suisses et dix harquebusiers, et un des plus grands qu'il estoit possible de voir, lequel percé de plusieurs harquebusades, et ayant six ou sept bris et tronçons de piques et hallebardes, em-

brassa sept ou huit qu'il trouva en l'acul d'un haut rocher, avec lesquels il se précipita en bas, et furent tous déchirez et brisez en pieces.

La Reine mere n'ayant pas tout ce qu'elle avoit désiré, qui consistoit à faire rendre les villes de seureté avant le temps, et mener son gendre à la Cour, toutes choses demeurerent plus pleines de plaintes et de craintes que jamais, et s'en alla par le Languedoc, la Provence, où elle vit le duc de Savoye, le Dauphiné et Lyonnais, trouver le Roy, son fils, à Paris, qui commençoit à se travailler à bon escient, l'esprit, des desseins tous apparens d'une ligue entre les catholiques.

Peu apres le roy de Navarre s'en alla avec la Reine, sa femme, à Mont-auban, où il fut tenu une assemblée pour prendre resolution sur ce qui estoit de faire, puis que la Reine s'en estoit allée, sans pourvoir aux plaintes de ceux de la religion.

Quelque temps auparavant, à cause des divisions semées par la Reine mere et les siens, M. le prince fit appeler M. de Thurenne, qui n'alla sur le pré qu'avec des sumissions à sa qualité : en suite il fut appelé par MM. de Duras et Rosan, avec lesquels il se battit ; mais luy ayant esté usé de supercherie, il fut blessé de plusieurs coups.

Le roy et la reine de Navarre, et Madame, sœur du Roy, s'estans retirez à Nerac, la Cour y fut un temps fort douce et plaisante ; car on n'y parloit que d'amour, et des plaisirs et passe-temps qui en dependent, ausquels vous participiez autant que vous pouviez, ayant une maistresse comme les autres.

La ville de Figeac fut lors surprise par les catholiques, la citadelle assiégée : mais M. de Thurenne que le roy de Navarre envoya au secours d'icelle, avec toute la noblesse de la Cour, du nombre desquels vous fustes, M. de Thurenne vous ayant demandé : « Hé bien, Monsieur, serez-vous des nostres ? » Et vous luy ayant respondu : « Ouy, Monsieur, je seray tousjours des vostres, quand ce sera pour le service du Roy, et en tout temps quand vous m'aymerez ; » car lors Laverdin, Duras, Grand-mont et autres catholiques qui avoient accoustumé de vous assister, s'estoient retirez : M. de Thurenne, dis-je, fit si bonne diligence, que la ville de Figeac fut quittée par ceux qui l'avoient prise, voyans approcher un tel secours.

La reine de Navarre estant fort mal à la Cour, et haissant infiniment le Roy, son frere, à cause qu'ils s'estoient faits plusieurs reproches sur leur façon de vivre, estoit aucunement bien avec le Roy, son mary : tellement que ses per-

suasions de ce que l'on n'avoit pourveu aux plaintes et contraventions aux edicts, et les belles esperances que donnoient plusieurs particuliers, qui croyoient de profiter davantage dans la guerre que la paix, furent cause que les armes se prindrent derechef; mais de trente ou quarante entreprises qu'avoient les huguenots, il n'y en eut que trois qui réussirent, à sçavoir : la Fere en Picardie et Mont-aigu en Poitou, desquelles nous ne dirons rien pource que vous n'y estiez pas, mais seulement de la troisieme qui estoit Cahors.

## CHAPITRE XI.

### *Prise de Cahors.*

[1580] Le roy de Navarre estant à Montauban, environ le mois de may ou juin 1580, fit dresser une entreprise sur Cahors, dont l'exécution fut l'une des plus signalées prises de ville par petard, sans aucune intelligence, qui se soit jamais faite : car la ville est bonne, grande et toute environnée de rivières par trois côtes, dans laquelle, outre les habitans bien armez, il y avoit près de deux mille hommes de pied et cent hommes d'armes estrangers, sous un gouverneur des plus braves et qualifiez gentils-hommes de la province, nommé de Vesins, lequel avoit esté adverty, quatre ou cinq jours auparavant, que le roy de Navarre avoit entreprise sur la place : car ledit avis fut trouvé dans sa boîte, sur lequel il avoit escrit de sa main, par trois fois, nergie pour les huguenots.

Le roy de Navarre ayant passé par Montauban, Negrepelisse, Saint Anthonin, Cajarc et Senevleres, pour rassembler tousjours des gens, à cause que M. de Choupes qu'il avoit mandé, n'estoit pas encor joint; finalement ayant fait une bonne traite, il arriva, environ minuit, à un grand quart de lieu de Cahors : auquel lieu dans un grand vallon fort plein de pierrotages, sous plusieurs touffes de noyers, où il se trouva une source qui vous fut un fort grand secours, car il faisoit grand chaud, le temps esclatant de toutes parts, de plusieurs grondemens de tonnerre, qui ne furent pas neantmoins suivis de grandes pluies; le roy de Navarre, faisant luy mesme l'ordre de ses troupes, selon qu'elles devoient marcher, attaquer et combattre, donna dix soldats des plus dispos et fermes de courage de ses deux gardes, aux deux petardiers qui estoient, à ce que nous vous avons oüy dire, au vicomte de Gourdon, car aussi c'estoit luy qui avoit fait l'entreprise; apres cela marchoit une troupe de vingt hommes armez et trente har-

quebusiers des gardes, commandez par Saint Martin, capitaine des gardes : cette troupe estoit suivie d'une autre, à laquelle commandoit M. de Roquelaure, composée de quarante gentils-hommes de la Cour du roy de Navarre, des plus determinez, au premier rang desquels vous estiez, et soixante soldats des gardes du Roy, lequel suivoit apres avec deux cens hommes armez, separez en quatre, et mille ou douze cens harquebusiers, separez en six troupes. Il falut emporter trois portes à coups de petards, et encore entr'ouvrir les trous qu'ils avoient faits à coups de haches; d'autant que les hommes armez ne pouvoient entrer qu'à quatre pattes : dès l'entrée de la ville vous eustes à combattre une troupe d'environ quarante hommes bien armez, ayant des hallebardes et pistolets, et environ deux cens harquebusiers; car l'obscurité empeschoit d'en bien juger; mais, au feu des salués d'arquebusades, on voyoit que la plupart d'iceux estoient nuds jambes, n'ayans eu loisir de prendre leurs bas de chausses : les cloches faisoient un merveilleux bruit, sonnans l'allarme de toutes parts : les voix un autre, crians incessamment : Charge, charge, et tué, tué; les harquebusades et cliquetis d'armes un autre; les tuilles, pierres, tisons et pieces de bois, que du haut des maisons l'on jettoit sur vous, un autre; et les bris des espées et froissis des piques et hallebardes un autre : car, dès le premier combat, l'on en vint aux mains, jusqu'à se colleter les uns les autres, et dura cette meslée plus d'un grand quart d'heure, durant laquelle vous fustes porté par terre d'une grosse pierre, qui, ruée d'une fenestre, vous tomba sur le casque, et fustes relevé par le sieur de Bertichere et la Trape, qui combattoient pres de vous.

Il se fit encore plus d'une douzaine de semblables combats, en quelques uns desquels le Roy mesme se trouva, de sorte qu'il y rompit deux hallebardes, et furent ses armes trouvées marquées de quelques coups d'harquebuses ou pistolets et de plusieurs coups de main; les vostres n'en furent pas exemptes, et notamment à la troisieme meslée, lors que l'on attaqua les barricades de la grande place, où estoient les pieces d'artillerie, vos tassettes (1) s'estans défaites, vous fustes blessé d'un coup de hallebarde dans la cuisse gauche, qui ne vous empescha pas neantmoins de vous trouver aux exploits, qui furent en grand nombre, n'y ayant quasi canton, place ou maison de pierre, où ceux de la ville ne se défendissent si obstinément, que vous fustes pres de cinq jours et cinq nuicts avant que d'en estre maistres absolus.

(1) Cuissards.

Les trois dernières nuits il y eut incessamment de grandes alarmes sur les bruits de secours meslez d'harquebusades, voix, cris et tel tintamarre et confusion de toutes parts, que nous vous avons souvent oüy dire, que vous n'aviez guere veu de choses plus dignes de remarque, pour estre des plus belles et des plus effroyables tout ensemble; et la ville estant de grand circuit, il n'estoit plus possible, veu le peu de gens de guerre qu'avoit le roy de Navarre, qu'il püst plus faire faire par tout les gardes necessaires, tant vous estiez tous las, alterez, affamez et travailliez de sommeil, y ayant desja trois jours et trois nuits que vous estiez armez, sans avoir entré en maison ( car si l'on se fust amusé au pillage dès le commencement, tout estoit perdu ), beu ny mangé qu'un coup et un morceau par-cy par-là en combattant, ny dormy que tout debout, vos cuirasses appuyées sur quelques étaux de boutiques; et eussiez en fin succombé aux attaquemens des ennemis de dehors, qui venoient de toutes parts au secours de cette ville, qui s'augmentoient journellement et pouvoient entrer facilement dedans, par un des quartiers d'icelle nommé la Barre, que les habitans tenoient encore, et estoient apres à percer la muraille pour cet effet; tellement que tous les plus sages et consideratifs serviteurs du roy de Navarre, prevoyans tous ces inconveniens, luy conseilloyent, à tous momens, de rassembler le plus de ses gens qu'il luy seroit possible, monter à cheval, abandonner la ville et se retirer; car tous vous autres, voire luy mesme, estiez si fatiguez, et outre les blessures de plusieurs, aviez les pieds si escorchez et plains de sang, que nul ne se pouvoit quasi plus soutenir; mais à toutes telles propositions de sa retraitte, ce prince respondit tousjours constamment et avec un visage riant, qui resolvoit les cœurs les plus effrayez: « Il est dit là haut ce qui doit estre fait de moy « en toute occasion, et partant souvenez-vous « que ma retraitte hors de cette ville, sans l'avoir « conquise et assurée au party, sera la retraitte « de ma vie hors de ce corps, y allant trop de « mon honneur d'en user autrement, et partant « que l'on ne me parle plus que de combattre, de « vaincre ou de mourir. »

Les choses estans en cette extremité, il n'y a point de doute qu'elles alloient augmentant, lors que M. de Choupes, qui avoit esté mandé pour se trouver à cette entreprise, et n'avoit pu assembler ses troupes plustost, arriva aux portes de la ville, du costé où l'on estoit entré, ayant environ cent hommes bien armez et cinq à six cens harquebusiers, avec lesquels, sçachant l'estat déplorable où toutes choses estoient re-

duittes, il fit de tels efforts et combattit si bravement dedans la ville, dehors icelle, contre le secours, assisté des moins las et blessez du roy de Navarre, qui, par son arrivée, avoient repris courage, qu'en fin le quartier de la Barre et le college qui tenoient encore furent pris, toutes les courtines, tours et portaux de la ville garnis, le secours ennemy contraint de se retirer, et la ville entierement conquise, au pillage de laquelle on ne s'espargna pas; et en vostre particulier, vous gagnastes, par le plus grand bonheur du monde, une petite boüette de fer, que nous croyons que vous avez encore, que vous baillastes lors à l'un de nous quatre à porter, et l'ayant ouverte trouvastes quatre mille escus en or dedans. Qui voudroit reciter toutes les particularitez de cette surprise de ville et n'oublier rien des choses dignes de remarque qui y arriverent, tant au roy de Navarre qu'à chacun de vous autres messieurs les plus qualifiez, il s'en feroit un gros volume; mais nous laisserons cela aux historiens, aussi bien, comme nous l'avons desja dit, que toutes les autres où vous n'avez point eu de part, soit par le moyen de l'employ des mains ou de la bouche, ou des yeux ou des oreilles, nostre but n'ayant esté autre que de vous ramentevoir ce qui a passé par vostre cognoissance.

## CHAPITRE XII.

### *Escarmouche près de Marmande.*

Le roy de Navarre ayant pourveu à la conservation de cette ville de Cahors, où il laissa, ce nous semble, M. de Cabreres pour gouverneur, il s'en retourna vers Mont-auban, puis vers Eause, où il défit deux ou trois troupes qui commençoient à se former pour aller trouver le mareschal de Biron qui assembloit une armée que le Roy luy avoit commandé de mettre sur pied pour resserrer le roy de Navarre dans ses places, et empescher luy et ses troupes de tenir la campagne. Entre lesquelles factions que fit le roy de Navarre, celle de Marmande merite de n'estre pas oubliée, laquelle passa ainsi qu'il s'ensuit.

Le roy de Navarre passant de Mont-auban à Leytoure, et le mareschal de Biron ne voulant plus souffrir que les calvacades et diligences ordinaires de ce prince luy escrocassent sans cesse quelques pieces de ses troupes naissantes, prit resolution de ne les assembler, ny loger plus à la campagne, mais dans la ville de Marmande; ce qui fut cause que le roy de Navarre quitta Nerac, et s'en alla loger à Thoneins, d'où il se



faisoit journellement quelques factions guerrieres, entre lesquelles nous en remarquerons une seule, pource que vous y eustes part, et non aux autres ainsi que nous l'a conté M. de Bols-bruëil, qui estoit avec vous en ce temps-là.

Le roy de Navarre donc, voyant que cette quantité de noblesse gasconne qui estoit dedans Marmande, au moindre ennemy qui paroïssoit, sortoit à diverses troupes pour aller apres luy, et le charger à l'envy l'un de l'autre, à qui se monstroient le plus eschauffé à la poursuite, se resolut de dresser une partie, pour essayer d'en attrapper quelques uns; et pour y parvenir s'estant de bon matin, avec trois cens chevaux et les deux compagnies de ses gardes, mis en embuscade dans un grand bols situé à demie lieuë de Marmande, au bout duquel il passe un ruisseau non gueable à gens de cheval, pource que les bords en sont trop hauts et trop droicts, sur lequel il y a un pont de pierre; il y logea cent harquebusiers de ses gardes assez près d'iceluy, sur les rives de ce ruisseau, où ils se tenoient couchez sur le ventre, esperant que quelques troupes des ennemis le passeroient en poursuivant ceux des siens qu'il faisoit estat d'envoyer donner le coup de pistolet aux portes de la ville: pour lequel effet il commanda au sieur de Lesignan, brave et sage gentil-homme, de prendre vingt ou vingt-cinq des mieux montez et armez, plus deliberez et obeyssans de vous autres messieurs, du nombre desquels vous fustes, avec des défenses expresses de s'engager en aucun combat, mais tousjours en se retirant avec espée d'effroy, essayer de les faire passer le pont, et aux harquebusiers de ne se decouvrir ny tirer, qu'un bon nombre n'eut passé, pource qu'aux premieres saluës d'harquebusades, il marcheroit en gros pour soustenir ses coureurs, qui lors auroient tourné teste.

Tout cela ainsi disposé, le sieur de Lesignan l'observa exactement, donnant jusques aux portes de la ville, qu'il estoit encore assez matin, où la plupart de vous autres, comme ils disent en Gascongne, firent fumer le pistolet sur quelques soldats et habitans qu'ils rencontrèrent dehors; puis aussi-tost, afin d'éviter les harquebusades des murailles et tours, vous vous mistes sur la retraite, laquelle ayans faite jusques hors la portée d'harquebuse, et voyans que vous n'estiez pas suivis de cavalerie, M. de Lesignan fit faire halte et tourner teste, auquel lieu vous ne demeurastes pas long-temps, pource qu'il sortit quelques harquebusiers, qui s'avançoient par les lieux couverts, pour vous saluër: tellement que vous pristez un peu plus de large, craignant que la blessure de quelque homme ou de quelque

cheval ne vous engageast, pour le retirer ou l'attendre, à ce qui vous estoit expressément deffendu, et lors vous vistes trois trompettes sonnantes à cheval, sortir de la ville, suivies de bon nombre de cavalerie que vous ne pouviez pas bien conter certainement, pource que tousjours il en arrivoit de nouveau qui se joignoient aux premiers, qui se mirent à marcher droit à vous au trot, paroissans plus de cent chevaux, dont quelques uns crioiient: « Ça, ça, cavaliers, un coup de pistolet pour l'amour de la maïstresse, car vostre Cour est trop remplie de belles dames pour en manquer. »

Mais M. de Lesignan faisant la sourde oreille à ces déffs, ne pensoit qu'à se retirer pour les attirer dans l'embuscade, et laissant six des siens, un peu derriere, pour faire la retraite, avec defence de s'engager à rien (ceux-là, ce nous semble, commandez par un que l'on nommoit le Bols ou Quasy, que l'on estimoit fort brave et advisé soldat; mais à cette fois la vanité et la hayne l'emporterent), et luy se mit au grand trot vers le pont, nonobstant tous les déffs des autres qui crioient incessamment: « Comment, cavaliers, sera-t-il possible que des gens, qui se disent marcher sous la bannière de Mars et d'Amour tout ensemble, se retirent ainsi fuyans, sans avoir donné un seul coup d'espée que sur des pauvres manans, que vous avez trouvez hors des portes. » En fin un seul d'eux, avec lequel Quasy avoit querellé, s'estant avancé, se mit à crier vers les six qui estoient plus derriere falsans la retraite: « Cavalier au cheval noir et chanfrin blanc, si vous estes Quasy, comme je vous estime tel, et trop brave pour refuser à donner un coup de pistolet pour vulder nos differends, je vous le demande, et vous promets d'aller seul et faire faire halte à la troupe, si vous voulez faire de mesme. » Ce qui ayant esté executé ils s'avancerent l'un contre l'autre, et s'attaquerent si bravement, que celui de Marmande fut blessé et porté par terre hors de dessus son cheval qui s'enfuyt à la troupe, et celui de Quasy fut tué et tomba à terre, son maïstre se sauvant à pied vers ses compagnons; lesquels le voulant attendre, et M. de Lesignan eux, afin de passer tous ensemble le pont, qui n'estoit plus qu'à deux ou trois cens pas de là, vous fustes chargez de telle furie et impetuosité, qu'il fut impossible d'empescher le combat, et que leurs coureurs au nombre de cinquante, ne passassent le pont pesle-mesle avec vous, où il fut donné plusieurs coups de pistolets et d'espées, lesquels porterant presque tous, vos harquebusiers n'ayans osé faire leur saluë, pource qu'ils eussent aussi-tost tué des

vostres que des ennemis, lesquels ne laisserent pas de les descouvrir, et partant se douterent bien qu'il y avoit partie faite et qu'il falloit tenir bride en main, comme ils firent apres s'estre desmelez : neantmoins quelque vaillante lance, ou bien quelque valet qui avoit pris l'espouvante, d'une si furieuse attaque, suivie de tant de troupes s'enfuyant vers les troupes du roy de Navarre, trouva un gentil-homme de sa Cour fort brave, et aussi estimé fort sage et prevoyant, auquel il fit accroire, adjoustant de grands sermens à son assertion, que les coureurs du roy de Navarre, que l'on avoit envoyez agacer les ennemis, avoient trouvé toute leur armée en bataille, cavalerie et infanterie, par laquelle ils avoient esté taillez en pieces, et tous les harquebusiers logez sur le bord du ruisseau, investis de telle sorte, qu'ils estoient lors tous morts ou pris ; ce qu'entendu par ce gentil-homme qui aymoît infiniment le Roy, il luy porta aussitost ces nouvelles pour tres-certaines, le conjurant de se vouloir sauver et se retirer en diligence, et en fit de telles instances reiterées, donnant la chose pour indubitable, que les plus vieux et sages capitaines se conformerent à ce conseil, et importunerent tellement ce prince de le vouloir suivre, que nonobstant l'opiniastreté qu'il tesmoignoît au contraire, disant qu'il seroit encor assez temps de se retirer lors qu'il auroit l'ennemy en veuë, ils s'en firent croire, laissant trente chevaux pour faire la retraite ; avec lesquels et les harquebusiers des gardes des rives du ruisseau, qui avoient regagné le bois et là trouvé leurs chevaux, vous vous joignistes peu à peu avec le Roy mesme, que vous trouvastes faisant halte en trois escadrons separez, la teste tournée vers le lieu du combat, sur l'advis au vray qu'il avoit receu de M. de Lesignan, de ce qui s'estoit passé en ce combat : les ennemis perdirent deux gentils-hommes morts, cinq ou six hommes ou chevaux blessez, dont le vostre estoit du nombre, ayant eu un coup de pistolet dans le col, duquel il mourut trois jours apres. Le Roy fut fort en colere contre ceux qui l'avoient fait retirer si viste, d'autant que le seigneur de Lesignan en parloit fort haut et avec blâme contre ceux qui s'en estoient fuits sans voir l'ennemy, d'autant que cela n'estoit jamais arrivé à ce prince.

### CHAPITRE XIII.

*Formation d'un nouveau parti par le prince de Condé. Siège de Nerac. Prise de Montségur. Faute commise par Rosny.*

Quelque temps auparavant toutes telles ex-

cutions, M. le prince avoit fait surprendre la Fere en Picardie, et s'estoit retiré en icelle apres s'estre separé du roy de Navarre en assez mauvais mesnage, à cause de M. de Thurenne, qu'il disoit tous les jours estre favorisé à son prejudice ; et combien qu'il se soit passé plusieurs choses signalées, tant au siege qui fut mis devant la dite ville, qu'au voyage de M. le prince en Allemagne, si ne laisserons nous pas d'en remettre les particularitez aux historiens, d'autant que vous n'y eustes nulle part, et vous ramentevrons seulement que ce prince fit lors des brigues et menées pour former, dans le party general de ceux de la religion, quelque espede de party particulier, qui dépendist tout de luy, ayant, pour parvenir à ce dessein, attiré quelques villes de Dauphiné et de Languedoc, et convenu de bailler Ayguemortes et Pécas au prince Casimir, comme une espede d'ostage, tant pour retraite, que pour servir de garand des deniers qui luy seroient deubs pour la solde des gens de guerre qu'il ameneroit, lesquels ne seroient tenus de recognoistre le roy de Navarre ; lequel, adverty de ces monopoles, envoya le vicomte de Thurenne dans ces provinces là, pour les renverser, comme il fit, et se passa plusieurs particularitez en ces intrigues, qui meritoient bien d'estre sceuës.

Mais pource que vous n'eustes aucune part en icelles, ny n'y fustes employé, nous en laisserons le recit aux historiens, et dirons seulement qu'apres la faction de Marmande, cy-dessus recitée, le roy de Navarre voyant que le mareschal de Biron s'estoit rendu maistre de la campagne, et desirant de pouvoir disperser ses troupes par les villes qui, en apparence, en pourroient avoir le plus de besoin, il se retira dans Nerac, qui estoit le Paris et les délices de la cour huguenotte, à cause de la grande quantité de belles dames que la reine de Navarre et Madame avoient avec elles en cette ville là, devant laquelle le mareschal de Biron, comme par une espede de bravade, à cause de quelques paroles de mespris que le roy et la reine de Navarre avoient tenuës de luy, vint mettre son armée en bataille sur le haut d'un costeau, duquel on descouvroit toute la ville ; là il fut attaqué d'une fort grande escarmouche, et d'autant que le roy de Navarre avoit fait deffendre de sortir à cheval, de crainte d'engager quelque chose mal à propos, voire n'avoit laissé ouvrir que les petits guichets des portes, pource que n'estoit que hayes, vignes et fossez entre la ville et l'armée : vous vous resolustes de reprendre vostre premier mestier, et faire encore le fantassin ; et en ce dessein, vous estant pour

veu d'une bonne harquebuse et de l'esquipage necessaire, vous vous allastes mesler avec les simples soldats, aux lieux plus hazardés, tellement que l'on vint dire au roy de Navarre, que vous estiez pris et blessé; dequoy grandement fâché et en colere, il envoya le sieur des Champs et le capitaine Dominge pour voir ce qui en estoit, avec commandement de vous ramener; lesquels vous ayans retiré de l'escarmouche où vous estiez entre les plus advancez, ils vous ramenerent au roy de Navarre, lequel vous rabroüa infiniment, vous appella estourdy, et presomptueux, et vous deffendit d'aller plus en aucune faction de guerre sans son congé. La reine de Navarre, madame sœur du Roy et toutes les dames de leurs suites vindrent, pour voir l'armée ennemie et l'escarmouche, sur les murailles, tours et portaux de la ville, contre lesquels le mareschal de Biron fit tirer cinq ou six coups de canons, puis se retira pour aller prendre logis.

Quelque temps apres le roy de Navarre s'en alla vers Bergerac et Sainte Foy, desquels lieux il fit manier par un nommé le capitaine Melon une entreprise sur Monsegur, qui fut executée avec heureux succez, par le moyen d'un trou pour escouler les eaux, qui avait esté laissé à une muraille dont on avoit bouché une des portes de la ville, y ayant en icelle deux portes, dans lequel trou on ficha une saucisse pleine de poudre à canon, si longue et si grosse qu'elle contenoit bien quatre ou cinq cens livres, et laissé un bout dehors, pour mettre le feu, caché entre les herbes, orties et ronces: tout cela ainsi bien préparé, et le jour de l'exécution pris, le roy de Navarre vous permit, ensemble à quelques autres de sa jeune noblesse, d'y aller. Le feu ayant esté mis à cette saucisse, elle fit des merveilles, car elle emporta non seulement les deux portes entre lesquelles elle avoit esté logée et les murailles qui estoient contre icelles pour les boucher, et les jetta plus de cinquante pas loing, l'une dehors et l'autre dedans la ville; mais aussi ruyna une partie des voûtes du portail, de telle sorte que l'on pouvoit entrer trois hommes de front, ce qui fut fait aussi-tost, et se trouverent les habitans tellement surpris, qu'ils ne firent pas grande resistance; aussi n'y eut il que cinq des leurs tuez, et huit ou dix blessez, et deux tuez du costé du roy de Navarre et autant de blessez. Nous ne nous souvenons point avoir oüy dire qu'il vous y fut rien arrivé de particulier qui soit digne de remarque, ny du temps que sur le bruit du siege de cette ville, vous vous jettastes dedans pour la defendre avec quarante gentils-hommes de la jeune noblesse du

roy de Navarre, qu'il y envoya outre quatre ou cinq cens harquebusiers; mais nous sçavons bien qu'il regna cette année là une certaine maladie nommée la coqueluche, de laquelle encore que vous fussiez des plus violemment assaillis, neantmoins on remarqua que vous ne laissastes pas de travailler de telle sorte au quartier qui vous avoit esté baillé à defendre, qu'encore qu'on l'eut estimé le plus faible, il fut estimé le plus fort, à cause des grands terrassemens et retranchemens que vous y aviez faicts lors que vous vous en retournastes à la Cour; car les ennemis voyans cette ville fournie de tant de braves hommes, qui tous travailloient et remuoient terre en diligence, n'oserent l'assieger.

A vostre retour pres du roy de Navarre, il loüa infiniment vostre personne et vos ouvrages; mais huit jours apres il y eut de grandes colères entre luy et vous, d'autant que deux gentils-hommes des siens, l'un nommé le sieur de Beauvais, fils de celuy qui avoit esté gouverneur de sa jeunesse, et l'autre le sieur d'Usseau, ayans de longue main disputé ensemble, et se picottans tous les jours l'un l'autre, se rencontrerent un soir tous deux par hazard à souper avec vous, et au sortir de table tous deux l'un apres l'autre, et puis conjointement, vous prièrent de leur faciliter le moyen de se battre sans qu'ils fussent obligez de se servir de seconds; vous fistes tout ce qu'il vous fut possible pour les accommoder, mais chacun d'eux avoit en tel mespris son compagnon, que n'en pouvant venir à bout, vous les menastes sur le pré, où, pour le commencement, ils ne s'approchoient pas de trop prés; neantmoins, à la fin, vous les ramenastes tous deux fort blessez; de quoy, le roi de Navarre ayant esté adverty il s'en offensa infiniment, pource qu'il aymoît Beauvais, et en vint jusques à vous dire des injures, et vous menacer de vous faire trancher la teste, pour avoir fait, comme il disoit, une action qui treuchoit du souverain; vous repliquastes, comme chacun le publoit, un peu bien haut; disant que vous n'estiez ny son sujet, ny son vassal, que vous l'estiez venu servir de pure affection que vous luy portiez, à vos despens pour acquerir de la gloire et de l'honneur, et non pour y perdre la vie honteusement, comme il vous en menaçoit; et partant estiez resolu de vous retirer, estant bien asseuré que vous ne manqueriez pas de maistre, lors que vous en desireriez trouver. Sur quoy il vous repartit: que les chemins vous estoient libres, et qu'il ne manqueroit pas aussi de serviteurs; tellement que nous vous vismes tout prest de le quitter; mais

en fin la reine et la princesse de Navarre, qui vous ont toujours affectionné, racommoderont tout cela, de sorte que le roy de Navarre vous fit depuis quasi meilleure chere.

#### CHAPITRE XIV.

*Les Pays-Bas offrent la couronne ducale au duc d'Anjou, frère de Henri III. Propositions que ce prince fait à Rosny. Surprise de Saint-Milon.*

Nous rassemblerons en ce chapitre diverses affaires; non peut estre selon l'ordre des temps, mais selon qu'il nous en pourra souvenir, et commencerons par vous ramentevoir comme il se fit plusieurs conferences entre la Reine mere et le roy de Navarre, és lieux d'Auchx, Nerac et du Fleix, sur les inexecutions du traitté de paix, pendant lesquelles il se passa infinies particularitez touchant les affaires d'Estat, intrigues de Cour, et amourettes qui seroient bien dignes de remarques. Mais d'autant que vostre jeunesse ne permettoit pas que vous eussiez part aux plus importantes, et que nous n'en pourrions raconter toutes les veritez, dont nous avons oüy parler, sans manquer de respect à ceux auxquels nous devons, nous laisserons la narration aux bons historiens, lesquels par icelle n'obmettront pas à faire bien comprendre que le plus souvent les passions humaines en choses frivoles, les extravagances des esprits, et les nialseries et jalousies de Cour, sont les premiers mobiles qui donnent le bransle et l'acheminement, bon ou mauvais, aux plus grandes affaires d'Estat, et nous contenterons de vous ramentevoir une faction guerriere qui se fit pendant que les Cours de la Reine mere, de M. d'Alençon, du roy, reine et princesse de Navarre, furent à Coutras pour traitter de la paix que Monsieur poursuivoit instamment, pour les raisons suivantes.

Nous avons cy-devant fait mention que la Reine mere ayans pris opinion que son fils d'Alençon, devenu duc d'Anjou, ne l'aymoit pas beaucoup, à cause qu'elle avoit toujours plus tesmoigné d'amitié à son fils d'Anjou, devenu roy de Pologne, et pour lors roy de France, que non pas à luy, et qu'à cette occasion il traverseroit incessamment ses desseins et enverroit son autorité, elle avoit recherché les moyens, sous couleur de procurer son agrandissement, de luy faire espouser la reine d'Angleterre, et le faire eslire chef des armes, des desseins et des peuples des Pays-Bas, lesquels, en ces dernieres années, s'estoient quasi tous, grands et petits, huguenots

et catholiques, revoltiez de l'obeyssance et sujec-tion du roy d'Espagne.

Or, toutes ces pratiques là ayans tiré en longueur, il estoit advenu que ceux de ces provinces croyans de rendre leur revolte moins odieuse, en choisissans pour leur prince, quelqu'un qui fut de la maison d'Autriche, avoient appelé l'archiduc Matthias; lequel à son arrivée, avec son simple train, ayant fait le prince d'Orange (1) son lieutenant general en toutes les provinces qui s'estoient sousmises à luy, fit naistre de telles jalousies et mescontentemens de tous les autres grands seigneurs qui presumoient ne luy estre en rien inferieurs, qu'ils commencerent à se diviser et se des-unir, et les uns apres les autres à retourner sous l'obeyssance d'Espagne, et dès lors tomba cét Archiduc en telle haine et mespris parmy ces peuples, joignant à cela sa foiblesse, qu'ils le prièrent de se retirer en Allemagne, et jetterent à bon escient les yeux et les cœurs sur M. le duc d'Alençon et d'Anjou, et se resolurent de l'eslire leur prince, lequel estant adverti de leur dessein, et qu'il venoit députez vers luy pour cét effet, au temps qu'il séjournoit à Coutras: il sollicita si ardemment la paix, afin de s'en pouvoir aller, qu'elle y fut en peu de temps conclue (2), après laquelle il s'achemina vers Tours, où il commença ses levées de gens de guerre, pour aller promptement secourir ces peuples qui l'avoient déclaré leur prince et souverain seigneur.

Avant que de partir de Coutras, il convia et fit solliciter par les siens, tout ce qu'il y avoit de braves et galants hommes près du roy de Navarre, de le vouloir assister et venir servir de leurs personnes et de leurs amis, ces prieres accompagnées de tant de belles promesses, qu'il y avoit dequoy s'y laisser persuader, entre lesquels vous ne fustes pas oublié; MM. de Fervaques et de la Roche-pot, qui estoient vos parens et amys intimes, vous portant parole de la part de Monsieur, laquelle il vous confirma peu apres, de vous mettre en possession de tous les grands biens du vicomte de Gand, vostre oncle et vostre parrain, desquels il vous avoit des-herité à cause de la religion, et outre cela vous dit: que vous regardassiez à luy demander quelque chose sur les terres qu'il avoit proche de vous, et qu'il vous le donneroit jusques à douze mille escus, pour vous ayder à dresser vostre compagnie, adjoustant à ces mots (plus genereux qu'il ne montra depuis avoir le courage): Car je suis resolu de donner tout ce que j'ay à ceux qui m'assisteront en une si bonne occasion, sans vouloir

(1) Guillaume de Nassau.

(2) A Fleix sur la Dordogne, en novembre 1580.

réserver pour moy, que l'esperance des choses plus grandes.

Or, retournant à cette faction guerrière dont nous avons parlé, vous vous souviendrez que pour traiter la paix, l'on avoit fait une espèce de trefve, mais qui ne s'estendoit que dans Coutras et une lieue et demie à l'entour. La Reine mere n'ayant jamais voulu estendre davantage ses limites, pource, disoit-elle, qu'elle estoit résoluë de conclure plutost la paix, ou en ôster du tout l'esperance, qu'une trefve generale n'auroit esté publiée aux lieux esloignez, tellement que dans cét espace où residoloient ces quatre Cours, l'on n'y voyoit, ny oyoit-on parler que de paix, d'amour, d'ances, balets, courses de bagues et autres galanteries; mais si tost qu'à sans passeport l'on estoit hors de ses bornes, ils se prenoient prisonniers, et se donnoient coups d'épées et pistolets entre gens de differends party, lesquels se rencontroient à la campagne.

Sur ce fondement, le roy de Navarre fit dresser une entreprise, à quelques uns des siens, pour essayer de prendre une ville à deux lieues de Coutras, nommée Sainct Milion, pour laquelle executer, tous ceux de vous autres; qui desireroient estre de la partie, fustes renvoyez à Saincte Foy, afin que l'on ne se pût pas plaindre que fussiez partis d'un lieu qui fut en trefve; et deux jours après vous partistes un soir à nuit fermée, et vous rendistes deux heures avant le jour à un quart de lieue de la ville, où ayant mis pied à terre, vous marchastes par un profond valon et arrivastes sans allarmes près des murailles: celui qui menoit le dessein marchant devant avec six soldats choisis qui portoient la saucisse, laquelle ils fourrerent dans une assez grosse tour, par deux canonnières assez basses, qui estoient en icelle, ausquelles saucisses le feu ayant esté mis, la tour s'entrouvrit, de sorte que deux hommes y pouvoient entrer de front, avec un tel tintamarre, qu'il fut entendu jusqu'à Coutras; laquelle occasion fut aussi-tost embrassée par tous vous autres qui estiez couchés sur le ventre, départis en trois bandes, chacune composée de vingt hommes armez et soixante harquebusiers, et après eux venoit encore M. de Roquelaure, avec soixante hommes armez, pour demeurer dehors et subvenir aux accidens qui se pourroient présenter. Vous entrastes dans la ville, sans aucune opposition, et ne rencontrastes que deux troupes qui, ayans tiré quelques harquebusades, se retirèrent; bref il n'y eut que quatre hommes de tuez de ceux de la ville, et six ou sept de blessez, et de vostre costé, deux soldats tuez et trois ou quatre blessez; puis tous les habitans se renfermerent dans leurs maisons, sans

faire plus aucune défence; puis on s'employa au pillage, où les gens de guerre et sur tout les voisins du lieu s'employèrent comme braves Gascons.

Cette surprise de ville estant sceüe à Coutras, il y eut de grandes plaintes contre tous vous autres qui l'aviez favorisée, de la part de la Reine mere, de monsieur d'Alençon et d'Anjou, et autres députés pour la paix; comme d'une infraction de foy et de trefve; dequoy ils demanderent justice au roy de Navarre, lequel la promit si la place estoit scituée dans les limites données à la trefve; sur quoy il y eut des commissaires députés de part et d'autre pour faire cette verification, à laquelle il ne resta plus aucune difficulté, lors qu'on fit apparoir qu'un marchand de la religion ayant esté pris à un quart de lieue de Sainct Milion, par ceux de la ville même, avoit esté depuis huit jours déclaré de bonne prise au conseil de la Reine mere, ce qui fit terminer toutes ces plaintes, pour venir à une conclusion de paix que Monsieur sollicitoit et pressoit instamment, pour les raisons cy-dessus dittes; aussi ne fut elle pas plutost publiée, qu'il partit en diligence pour aller assembler son armée.

## CHAPITRE XV.

### *Conversation entre le roi de Navarre et Rosny. Départ de ce dernier pour les Pays-Bas.*

Or pource que nous avons dit cy-devant, que les plus grandes, magnifiques et serieuses affaires d'Estat, tirerent leur origine et leurs plus violents mouvemens, des maliseries, jalousies, envies et autres biyareries de la Cour, et se reglent plutost sur icelles, que sur les meditations et consultations bien digerées, ny sur les considerations d'honneur, de gloire, ny de foy; nous vous ramentevrons un discours que vous nous tintes peu après que vous fustes party d'aupres du roy de Navarre, pour aller chez vous, donnant pour pretexte à ce congé ainsi soudainement requis, la foy et la parole que vous aviez donnée à Monsieur, de le servir, en ses guerres de Flandres, avec un régiment ou une bonne troupe de vos amys, d'autant qu'il vous avoit promis de vous mettre en possession des biens de M. le vicomte de Gand, vostre oncle et vostre parrain, desquels il avoit des-herité monsieur vostre pere et vous par consequent, à cause de la religion, et qu'il ne vous avoit pas voulu envoyer en Flandres, pour y estre eslevé pres de luy.

« Quoy donc, vous dit lors le roy de Navarre, « c'est à ce coup que nous vous allons perdre du tout, car cela estant vous deviendrez Flamant

« et vous serez papiste. » Sire, luy respondistes-  
 « vous, je n'ay point encore pensé à vous quitter  
 « pour cela, et beaucoup moins à quitter Dieu et  
 « son service; mais la Flandre estant le pays ori-  
 « ginel de ma maison, tant du costé de Bethune  
 « que de Melun et de Hornes, n'y ayant quasi  
 « seigneur de bonne maison en toutes ces pro-  
 « vines ausquels je ne sois parent, et plusieurs  
 « grands biens m'y appartenans, si mon oncle  
 « ne me fait point de tort, vostre majesté voit  
 « bien que toutes sortes de raisons m'obligent de  
 « faire ce voyage, et de suivre ce prince pour  
 « un temps, mais je ne laisseray pour cela d'estre  
 « tousjours vostre serviteur, puis que mon pere  
 « m'y a destiné dès ma premiere jeunesse, et me  
 « l'a fait ainsi jurer en mourant, et cela fondé  
 « (outre l'affection naturelle des miens de pere  
 « en fils envers ceux de vostre maison en l'al-  
 « liance de laquelle ils ont eu l'honneur d'estre  
 « entrez) sur ce qu'un mien precepteur nommé  
 « la Brosse, qui se mesle de predire et de faire  
 « des nativitez, ayant fait la vostre et la mienne,  
 « et par icelles veu que j'avois l'honneur d'estre  
 « né, comme vostre majesté, en décembre le jour  
 « de sainte Luce, m'a plusieurs fois asseuré,  
 « avec grands sermens, qu'inailliblement vous  
 « serez un jour roy de France, regnerez assez  
 « longuement, et tant heureusement, que vous  
 « esleverez vostre gloire et la magnificence de  
 « vostre royaume, au plus haut degré d'honneur  
 « et de richesses, que l'on sçauroit desirer; que  
 « je seray des mieux aupres de vostre majesté,  
 « laquelle m'eslvera en biens et aux plus hautes  
 « dignitez de l'Estat, et pour mon regard je com-  
 « mence à y adjoûter quelque foy, pource que  
 « tout ce qu'il m'a predit de la mort de mon pere  
 « et de mon frere aîné, des perils et hazards que  
 « j'ay courus, des blessures que j'ai desja re-  
 « ceuës, et en dois bien encor avoir de plus gran-  
 « des, et de toutes mes autres fortunes, voire  
 « jusqu'à me particulariser le voyage que j'en-  
 « treprends maintenant, s'est trouvé veritable;  
 « et partant soyiez asseuré, quelques petits débits  
 « que je puisse avoir tesmoigné assez mal à pro-  
 « pos, desquels je me repentis aussi-tost, et vous  
 « en demanday pardon, que je vous serviray à  
 « jamais de cœur, d'affection et tres-loyalement;  
 « voire vous promets que si vous avez la guerre  
 « sur les bras, je quitteray Monsieur et la Flan-  
 « dre, pour vous venir servir. »

« Or bien, vous respondit le roy de Navarre,  
 « vous me resjouissez infiniment de me dire cela,  
 « encore que je n'adjouste pas trop de foy à tous  
 « ces pronostiqueurs, pource que Dieu y est of-  
 « fencé grandement, et me faites souvenir de  
 « quelque chose de semblable, touchant Mon-

« sieur et moy; et puis que vous protestez de ne  
 « changer jamais de religion et de nous venir  
 « ayder, si on nous fait la guerre, je ne vous  
 « tiens plus pour perdu, mais pour estre à moy  
 « autant que je me le suis promis, et que je le  
 « desire; car, quant à ce prince que vous allez  
 « maintenant servir, il me trompera bien, s'il ne  
 « trompe tous ceux qui se fieront en luy, et sur  
 « tout s'il ayme jamais ceux de la religion, ny  
 « leur fait aucuns avantages; car je sçay pour  
 « luy avoir oüy dire plusieurs fois, qu'il les hayt  
 « comme le diable dans son cœur; et puis il a le  
 « cœur double et si malin, a le courage si lasche,  
 « le corps si mal basti, et est tant inhabille à  
 « toutes sortes de vertueux exercices, que je ne  
 « me sçauois persuader qu'il fasse jamais rien  
 « de genereux, ny qu'il possede heureusement  
 « les honneurs, grandeurs et bonnes fortunes qui  
 « semblent maintenant luy estre préparées; et  
 « quelque bonne mine qu'il me fasse en m'appel-  
 « lant son bon frere, je cognois bien son dessein,  
 « c'est de peur qu'il a, que je veille empescher  
 « le vicomte de Thurenne, vous, Esternay, Sa-  
 « lignac et autres de la religion, d'aller en Flan-  
 « dre avec luy, et sçachez qu'il me hayt plus que  
 « personne qui soit au monde, comme de ma  
 « part je ne l'ayme pas trop.

« Nos premieres haines ayans commencé dès  
 « lors que nous estions tous deux prisonniers à la  
 « Cour, et que ne sachans à quoy nous divertir,  
 « pource que, comme vous le sçavez bien, nous  
 « ne sortions pas souvent et n'avois autre exer-  
 « cice qu'à faire voller les cailles dans ma cham-  
 « bre, nous nous amusions à carresser les dames;  
 « en sorte qu'estans tous deux devenus amou-  
 « reux d'une mesme beauté, qui estoit madame  
 « de Sauve<sup>(1)</sup>, que vous voyez encore icy, elle  
 « me tesmoignoît de la bonne volonté, et le ra-  
 « broüoit et mesprisoit devant moy, ce qui le  
 « faisoit enrager; à cela s'adjousta un autre su-  
 « jet de haine, à cause d'une prediction quasi  
 « semblable à celle que vous m'avez dite de vos-  
 « tre precepteur; car on m'a donné pour chose  
 « tres-certaine, qu'un jour ce prince demandant  
 « sa bonne fortune à un des siens qui avoit fait  
 « sa nativité, apres plusieurs refus sur ce faits,  
 « et qu'il l'eut menacé de luy faire desplaisir,  
 « s'il luy celoît la verité des choses qui luy de-  
 « voient advenir; il lui dit: « Je ne vous voulois  
 « rien dire de tout ce que vous desirez sçavoir  
 « touchant la royauté, car ny vos mains, ny  
 « vostre face, ny vostre horoscope, n'y aucun  
 « astre, ne vous promettent ny felicité, ny gran-  
 « deur de longue durée; vous ne serez jamais

(1) Beaune de Semblancay, baronne de Sauve, devenue veuve en 1579, épousa le marquis de Noirmoutiers.

« Roy, car tout cela est réservé pour le roy de  
« Navarre, qui sera un jour roy de France, des  
« plus estimez qui ayent jamais regné.

« Et depuis cela je sçay, car il ne s'en est pu  
« taire, qu'il me porte une envie et une haine  
« mortelle, laquelle tout de nouveau s'est aug-  
« mentée, à cause des louanges qu'il entend  
« m'estre données par les dames, et entre les ca-  
« valiers qui disent tout haut qu'il a si mauvaise  
« grace que rien plus, à cajoller les dames, dan-  
« cer et courir la bague; qu'il faut en tous exer-  
« cices de vertu et gentilleses de Cour, qu'il me  
« cede le prix; dequoy on luy a dit que je me  
« glorifiois, et mesme me mocquois de luy, lors  
« qu'il dançoit ou couroit la bague; et vous sça-  
« vez s'il y eut moyen de s'empescher de rire,  
« une fois qu'il brida la potence, et une autrefois  
« qu'il se laissa choir en faisant manier un che-  
« val, et que son escuyer couppa les rennes du  
« cheval, pour en rejeter la faute là dessus, et  
« vous ay dit tout cecy sur ce que vous m'avez  
« représenté des pronostications que vous avoit  
« autre-fois fait vostre precepteur, lesquelles j'es-  
« sayeray d'accomplir pour ce qui vous regarde,  
« si le surplus se trouve veritable, et ainsi vous  
« le promets-je; cependant je seray bien-ayse  
« que vous puissiez avoir bonne fortune en Flan-  
« dre, puis que vous m'asseurez de nous venir  
« revoir si l'on nous fait la guerre, laquelle, à  
« mon opinion, ne tardera pas beaucoup à nous  
« tomber sur les bras, plus furieuse que jamais;  
« car, selon les advis que j'en reçoÿ, il se jette  
« des fondemens de toutes parts pour exterminer  
« entierement la religion. »

Et sur cela il vous embrassa, et vous dit :  
« Adieu, mon amy, souvenez-vous de vos pro-  
« messes; » lesquelles, en luy embrassant le ge-  
« nouïl et baisant une main, vous luy reiterastes  
avec grands sermens, et ainsi vous retirastes à  
vostre logis; puis ayant pris congé de la Reine  
mere, de celle de Navarre, de Madame, et de  
quelques uns de vos amys, vous montastes à  
cheval, pour aller prendre la poste, où, à la  
premiere, vous laissastes vostre train, et nous  
avec pour le conduire.

## CHAPITRE XVI.

*Entrée du duc d'Anjou dans Cambray. Prise  
de Cateau-Cambresis. Trahison dont le gou-  
verneur de Cambray est victime.*

[1581] Estant donc party d'aupres du roy de  
Navarre, ainsi qu'il a esté dit au chapitre pre-  
cedent, vous vous en allastes à Rosny, où la pre-  
miere chose que vous fistes, fut d'envoyer le sieur

de Maignan, vostre escuyer, à Paris, pour vous  
achepter de grands chevaux; lequel, huit ou  
dix jours apres, vous en amena six assez beaux  
et bons, et, entre iceux, un cheval d'Espagne,  
noir, qui n'avoit rien qu'une tache blanche à la  
fesse droicte, l'un des plus gentils et dociles  
chevaux, que nous ayons jamais veu: car n'ayant  
que cinq ans, et n'ayant jamais esté dressé, il  
manioit terre à terre à toutes mains: et un che-  
val de Sardaigne cavasse de More (1), ayant les  
oreilles fenduës, le plus hardy et furieux cheval  
dont nous ayons jamais oüy parler: car il se  
laissoit tirer des pistolades et des harquebusades  
aux pieds et aux environs de la teste, sans se  
mouvoir, cligner les yeux, ny haucher les oreil-  
les: mais si quelqu'un luy eut présenté une  
espée ou un baston, avec demonstration de le  
vouloir frapper, aussi-tost il plioit les oreilles,  
rouloit les yeux, et ouvrant la bouche se jettoit  
sur luy.

Pendant vostre séjour à Rosny, vous mesna-  
geastes si bien vos amys et vasseaux, qu'en  
quinze jours vous en eustes bien quatre-vingts  
d'asseurez, bien montez, armez et prêts à mar-  
cher avec vous, au moindre desquels vous pro-  
mistes deux cens livres: quelques uns en eurent  
davantage, mais quelques autres aussi ne vou-  
lurent rien prendre. Et vous souvenant des pro-  
messes que M. le duc d'Anjou vous avoit faites,  
de vous faire un present, si vous trouviez quelque  
chose à demander dans ses terres; par le moyen  
de deux marchands qui estoient, ce nous sem-  
ble, de Meulan et de Mante, nommez le Clerc et  
Chasteau-Poissy, vous descouvrites qu'il y avoit  
dans les duchez et comtez d'Evreux, Dreux,  
Mont-fort, Passy, Mante, Meulan et autres terres  
et seigneuries, que ce prince avoit es environs de  
Rosny, plusieurs restes et surmesures de ventes  
de bois, et de vieux restats de comptes à recou-  
vrer: lesquels luy ayant demandé lors qu'il vint  
à Mante, ces marchands en composerent avec  
vous, à quarante mille livres, à payer moitié  
comptant et moitié dans un an: ce qui vous vint  
tellement à propos, que dans quinze jours vostre  
troupe fut toute sur pied, et allastes trouver  
Monsieur à Fere en Tartenois, où chacun estrilla  
bien messieurs les dains du parc.

Deux ou trois jours apres toutes les troupes  
s'estans jointes, elles marcherent en forme de  
corps d'armée vers Sainct Quentin et aux envi-  
rons, puis elles furent loger vers Walincourt,  
Vauchelles, Crevecœur et autres lieux circon-  
voisins: duquel logement à vostre instance,  
M. de Farvaques, qui estoit grand mareschal de  
camp de l'armée et de tout temps vostre intime

(1) Cheval qui a la tête et les extrémités des pieds noires.

amy, fit ordonner votre compagnie pour estre la premiere, qui yroit à la guerre vers Cambray, afin de prendre langue des ennemis. Et comme vous alliez monter à cheval, ayant rencontré M. de Thurenne avec une bonne troupe de noblesse, qui vous demanda où vous alliez en si grande diligence avec vos compagnons; et luy ayant respondû que vous estiez ordonné pour battre l'estrade, il vous dit : que si vous vouliez attendre jusques au lendemain, il faisoit une partie avec des plus braves de ses amys pour ce mesme effet, et qu'il vous promettoit de ne revenir point, sans avoir fait quelque chose digne d'honneur : mais vous luy respondites, qu'ayant receu commandement de marcher, vous n'estiez plus en vostre propre disposition et partant le priez de vous excuser.

Estant donc monté à cheval sur les sept à huit heures du soir, car c'estoit, se nous semble, au mois d'aoust, vous marchastes toute la nuit vers Marquouin sans rien trouver sinon quelques valets et chevaux de bagage, qui s'en retournoient vers les trenchées et blocus, que le prince de Parme (1) avoit fait faire à l'entour de Cambray : par lesquels vous appristes, qu'il avoit esté publié, par les quartiers, que chacun eût à faire filer tous les valets et chevaux de somme vers Bouchain et Saint Amand; voire que l'on parloit desja de desloger. Vous donnastes fort proche desdits blocus, jusques à vous y faire demander, qui va là, et tirer quelques harquebusades. Mais voyant leurs logemens entièrement retranchez, qu'il s'y faisoit une tres-bonne garde, et qu'il n'en sortoit personne, vous repristes vostre chemin vers l'armée, sans trouver sur vostre retour, sinon encore quelques bêtes de somme, et de la val-taille qui vous en dirent autant que les premiers, desquels vous en amenastes quatre ou cinq, afin de confirmer par iceux le rapport que vous feriez à M. de Farygues : si bien que le lendemain, comme M. de Thurenne sceut que vous n'aviez rien fait, il vous dit : « Hé bien ! monsieur, vous n'avez pas voulu estre des nostres, nous ne partirons qu'après demain : mais souvenez vous que nous ne reviendrons pas, sans faire parler de nous d'autre façon que vous n'avez fait. » Monsieur, luy dites vous, puisque j'ay suivy et observé exactement ce qui m'avoit esté commandé, je n'estime point estre sujet à reprehension; que si vous ne rencontrez pas plus d'occasion de mener les mains, que nous avons fait, je ne croy pas que vous enliez gueres les croniques, de vos faits et gestes de ce jour là : car vous

(1) Alexandre Farnèse, duc de Parme, général de Philippe II.

« trouverez des gens merveilleusement bien clos  
« et couverts dans leurs retranchemens, et fort  
« resolu à n'en point sortir. »

Le jour d'après M. de Thurenne monta donc à cheval avec six vingt gentils-hommes des plus braves et mieux montez et armez de tout le camp; bien resolu, à ce qu'ils publioient tout haut, de passer sur le ventre à tout ce qu'ils trouveroient de gens de guerre; et qu'à quelque prix que ce pût estre, ils entreroient les premiers dans Cambray : ce que toute l'armée croyoit facilement, considerant la grande reputation du chef, et de tant de vaillante noblesse triée à l'eslite; et neantmoins, le lendemain de leur depart, les nouvelles vindrent, que tous ces braves gens, par un extrême mal-heur, avoient esté deffaits, sans autre rencontre que de quatre-vingts ou cent hommes d'armes, tels quels de la compagnie du marquis de Roubaix (2) vostre cousin; plusieurs tuez sur la place, dix ou douze prisonniers, entre lesquels estoient messieurs de Thurenne et de Ventadour, et les autres mis en fuite, sans avoir quasi rendu aucun combat; duquel succez il fut discoursu fort diversement dans l'armée, comme vous savez.

Deux jours après elle marcha droict aux ennemis en ordre de bataille, toute resoluë de combattre ou de faire lever le siege. Celle du prince de Parme se presenta aussi tout en mesme estat, mais rengée et placée en scituation si avantageuse, qu'il fut aysé à cognoistre qu'ils n'avoient nulle envie de combattre, mais seulement d'en faire la mine : aussi la nuit suivante, le prince de Parme abandonna, sans son de trompette ny tambour, toutes ses trenchées et blocus et se retira vers Valenciennes, laissant des gens de guerre dans Casteau en Cambresis, et aux passages de l'Escluse, Arleu, Bouchain et Saint Amand, sans que le lendemain il se trouvast un soldat ny un valet de l'armée que l'on pust prendre.

Monsieur fut receu dans Cambray avec une merveilleuse joye des habitans de la ville et du sieur d'Inchy, leur gouverneur, tesmoignée par une magnifique entrée en armes, sons de cloches, feux de joye, festins et banquets.

Deux jours après l'armée mit le siege devant Casteau en Cambresis, qui souffrit que l'artillerie joüst : la batterie fut dressée contre une courtine et une grosse tour de brique, avec telle furie et si diligemment servie, et à propos exploitée, que la tour fut effondrée et entr'ouverte, et la courtine abbatue, de sorte que l'assaut y fut donné, auquel vous vous trovastes avec dix ou douze de vostre troupe, et plusieurs autres

(2) Robert de Melun, marquis de Roubaix ou Robeck.



personnes de qualité de la Cour de Monsieur, et la ville emportée avec fort peu de résistance, à cause de la division qui se mit entre les habitans et la garnison, les uns voulans que l'on capitulast, les autres que l'on resistast : mais tant y a que tout fut exposé au pillage, et les femmes et les filles à la violence des soldats, nonobstant que la peste fut quasi par toutes les maisons : de laquelle vous fustes trois jours entiers en une merveilleuse crainte, pour une telle cause : c'est qu'ayant esté publié des défences, sur peine de la vie, de violer femme ny fille, et crié par les rues, que toutes celles qui en auraient apprehension, eussent à se retirer dans les églises. Comme vous alliez par les rues, suivy de ceux de vos compagnons qui avoient esté avec vous à l'assaut, vous vistes venir droict à vous une assez belle fille, toute deschevelée et gouspillée en ses habits ; laquelle courant tant que jambes la pouvoient porter, se vint jeter entre vos bras, vous voyant une mandille de velours orangé en broderie d'argent, et criant : « Helas ! monsieur, « sauvez moy l'honneur et la vie : car voila de « vos soldats qui me poursuivent pour me tuer « ou violer. » A quoy vous luy respondistes : « Hé ! où sont-ils, ma mie, car je ne vois per- « sonne apres vous ? » « Ils se sont cachez, vous « dit-elle, dans une maison que voila, lorsqu'ils « vous ont veus, et en voy encor'un, qui regarde « à la porte ce que je deviendray. » « Et bien, « bien, luy dites vous, n'ayez plus de peur, j'em- « pescheray bien qu'il ne vous fassent desplaisir, « voire vous meneray surement dans la plus pro- « chaine eglise. » A quoy elle respondit, vous tenant toujours embrassé : « Helas ! monsieur, je m'y « suis bien voulu retirer ; mais celles qui sont « dedans, ne m'ont pas voulu recevoir, à cause « qu'ils sçavent que j'ay la maladie. » « Comment, « vray Dieu, luy dittes-vous en la repoussant « des deux bras, vous avez la peste ? Pardieu, « vous estes une meschante femelle, et yrez cher- « cher refuge ailleurs qu'entre mes bras. Hé ! ma « mie, ne vous estoit-ce pas une assez bonne dé- « fence, pour empescher que l'on ne vous tou- « chast, que de dire que vous estiez pestiférée ? » Et lors, sans attendre sa responce, vous la quit- tastes là avec une telle apprehension, qu'à toutes heures, plus de quatre jours durant, vous vous tastiez le pouls, et au moindre mal de teste que vous sentiez, vous croyiez avoir la peste, neantmoins vous n'eustes aucun mal.

En suite de la prise de cette ville, on fut attaquer les passages d'Arleux et de l'Escluse, où il se fit deux ou trois belles escarmouches dans les marests et sur les chaussées, qui avoient esté retranchées par les ennemis, en l'une desquelles

vous vous hazardastes de telle façon, que sans le sieur de Sesseval, qui fit une furieuse charge pour vous des-engager, vous eussiez esté infailliblement pris, et peut-estre couru fortune de la vie ; car comme apparemment vous eussiez pris quelques soldats, se disans estre des gardes du marquis de Roubaix, et que comme à vostre parent de la maison de Melun, vous les luy eussiez renvoyez sans rançon, avec parole de compli- ment ; luy, tout au contraire, sçachant bien que vous pretendiez aux biens que le vicomte de Gand luy avoit donnez, tant par heritage que le don de Monsieur, respondit : « Pardieu, ces ci- « vilitez sont belles et bonnes, mais s'il estoit « pris, il porte sa rançon quant et luy. »

Après ces factions de guerre, le prince de Parme ayant séparé son armée dans les pays-forts, Monsieur s'en retourna dans Nambray, pour donner ordre à la conservation de la place, en laquelle desirant, à la persuasion de quelques ames mal trempées qui estoient pres de luy, mettre un gouverneur à leur poste, il usa de la plus sale tromperie que sçauroit faire prince, contre le pauvre M. d'Inchy, qui la luy avoit conservée loyalement et généreusement. Et pour y parvenir, feignant qu'il luy vouloit teamoigner toutes sortes de bien-veillances et confi- dences, il luy dit un jour, qu'il desiroit qu'il luy donnast à disner en son logis, qui estoit dans la citadelle, où il ne vouloit estre traité ny servi que par ses gens, non par ses officiers, ny gardé que par ses soldats et non par les gardes de son corps ; dequoy le pauvre M. d'Inchy, qui y alloit à la bonne foy, et croyoit que Monsieur fit de mesme ; extrêmement resjouy luy dit que son altesse luy faisoit tant de faveur et d'honneur, qu'il apprehendoit qu'une telle grâce luy tournast à honte, considéré le peu de moyen qu'il avoit de le traiter royalement, comme son altesse meritoit, y ayant si peu que la ville estoit delivrée d'un tant long et ennuyeux siege ; neantmoins qu'il feroit du mieux qu'il luy seroit possible, pourveu qu'il luy donnast deux ou trois jours de temps pour envoyer aux villes de France voisines ; ce qui luy ayant esté accordé, il convia pour ce festin la plupart des plus qualifiez qui fussent aupres de Monsieur jusques au nombre de soixante, du nombre desquels vous fustes des plus instamment priez, ayant fait amitié particuliere avec ce pauvre seigneur, pource qu'il se disoit estre allié des maisons de Melun et de Hornes, dont vous estes descendu.

Le jour venu, il vint querir Monsieur sur les huit à neuf heures, lequel fit demeurer ses gardes derriere, et défendit qu'elles n'entra-

sent point : les services du festin furent magnifiques et assaisonnez d'une tres-bonne musique ; vous estiez soixante et quatre à table , car nous les contasmes , au bout d'embas de laquelle M. d'Inchy fut assis , par commandement de Monsieur ; car il ne vouloit point s'asseoir du tout , s'estant préparé à porter la coupe pour boire. Sur l'apport du second service, quelqu'un luy vint dire quelque chose à l'oreille , que vous n'entendistes pas , à ce que vous nous avez dit ; mais la responce qu'il y fit , en ces propres paroles de Flamant : « Hé bien , hé bien , hé qu'on les laische eintrer ; il n'y a mie deinger m'est à voir. » Et puis se tournant vers Monsieur , il luy dit : « Monchieur chéchont les gardes de « vostre altesse qui veulent intrer , et chest bien « fait , car vous avez tout pouvoir chiens. » Semblable advis fut donné au pauvre seigneur par trois fois , à mesure que nouvelles troupes entroient ; et semblable responce fit-il aussi par trois fois , sans que Monsieur s'en esmeut ny fit aucune responce , qu'avec des signes de teste , en sousriant sous le chapeau : au quatriesme avis , M. d'Inchy s'esmut grandement , changea de couleur , les yeux luy estincellans de colere , puis s'accotant des deux mains sur le bout de la table , respondit à celuy qui parloit : « Hé ! com-  
« meint , commeint chela ? esteindre le mesche  
« de mes geins et des-арmer ma soldatesque , hé !  
« chela n'est mie la raison ; hé ! Monchieu , hé !  
« qu'esche chechy ? hé ! je ne pense mie que  
« vostre altesse enteinde chela , car je ne l'ay  
« mie dechervy ; che cheroit me faire trop de  
« tort et mal recompencer mes chervices. » A  
quoy Monsieur , en sousriant tousjours , ne respondit jamais autre chose sinon : « Cela n'est  
« rien , M. d'Inchy , cela n'est rien ; j'y pour-  
« voiray et vous contenteray avant que de partir  
« d'icy. » Mais lors qu'il fut assuré qu'il estoit le maistre dans la citadelle , il luy dit , qu'en récompense de Cambray , qu'il ne tenoit qu'en gouvernement , il luy donnoit la ville et duché de Chasteau-Thierry en propriété ; et voyant ce pauvre seigneur , qu'il n'en pouvoit avoir autre raison , il sortit les larmes aux yeux et les regrets au cœur , accompagné de ceux de plusieurs de vous autres messieurs , et de maudissons contre les auteurs d'une telle ingratitude et perfidie envers un si bon serviteur , et prejudice des capitulations à luy accordées et jurées , lequel fut , peu apres , tué en une escarmouche , d'un coup d'harquebuse , par derriere la teste. Monsieur establit en sa place M. de Balagny , gouverneur dans la ville et citadelle de Cambray ; et les ayant munies de toutes choses necessaires pour leur conservation , il voulut re-

venir en France , quelques instances que luy fissent les Etats d'entrer dans le cœur du pays avec sa florissante armée , pour les delivrer entierement de la subjection d'Espagne , ne restant plus , à ce qu'ils disoient , que cinq ou six places de consequence , qui tinsent ce party-là.

## CHAPITRE XVII.

*Conduite perfide du duc d'Anjou dans les Pays-Bas. Il est abandonné de presque tous ses partisans.*

[1582] Quelques mois apres le retour de Monsieur , en France , il passa en Angleterre où vous le suivistes. Il se passa plusieurs choses de consequence , desquelles nous laisserons les particularitez aux historiens , d'autant que nous n'avons point appris qu'il s'en fit en iceluy où vos interests fussent meslez ; et nous contenterons de vous ramentevoir fort sommairement , que le mariage de Monsieur et de la reine d'Angleterre fut negocié jusqu'à s'entre-donner des promesses , lesquelles n'eurent aucun effet.

D'Angleterre Monsieur passa en Zelande , fut receu avec entrée à Flessingue et Middelbourg , s'en alla des-embarquer à Lillo et de là à Anvers , où il fut receu avec joye et applaudissement merveilleux , tesmoigné par toutes sortes de magnificences aux entrées ; et lors fut-il couronné duc de Brabant , par le prince d'Orange , assisté de M. le prince dauphin.

Quelque temps apres , le prince d'Orange receut un coup de pistolet vers la gorge , estant dedans sa chambre , duquel il fut en danger de mort ; ce qui causa sur l'heure une telle esmotion dans la ville , que le peuple , croyant que cet assassinast vint des françois , s'estant mis tumultuairement en armes , il se mit à crier : qu'il falloit tuer ces massacreurs des nopces de Paris , qui n'estoient venus à Anvers que pour en faire autant , et passa l'esmeute si avant , que Monsieur luy mesme ne croyant pas demeurer en seureté de sa vie dans son logis , fut contraint , par le conseil des siens , de se retirer dans celuy du prince d'Orange ; et encore que peu apres , lors que l'on sceut au vray les auteurs d'un tel attentat , tout cela fut appaisé , et que ceux de la ville vinsent faire des excuses à Monsieur , de ce qui s'estoit dit et fait en icelle sur une telle alarme ; il en demeura neantmoins tellement ulcéré , que dés cette heure là , il resolut d'essayer à s'en rendre maistre absolu.

Pendant ces ceremonies et autres qui furent faites és autres villes , aux receptions de leur nouveau Seigneur , il se fit plusieurs sieges , pri-

ses et reductions de places et autres factions guerrieres de part et d'autre, desquelles, comme nous avons dit, nous laissons le recit à ceux qui feront l'histoire generale, d'autant que vous n'eustes part en aucune d'icelles, n'ayant en ce voyage suivy Monsieur qu'avec vostre simple train, et vous tenant tousjours près de sa personne, à poursuivre l'expedition des promesses qu'il vous avoit faictes, jusques à environ trois semaines ou un mois devant l'entreprise d'Anvers, que vous commençastes à vous refroidir de luy, et de vous renger plus que de coustume apres du prince d'Orange, pour deux raisons.

La premiere, d'autant qu'ayant un jour pressé Monsieur de commander que les expeditions necessaires pour vous mettre en possession du vicomté de Gand, vous fussent deslivrées, et sollicitant le sieur de Quincy, secretaire d'Estat, de la mesme chose : en fin luy voyant qu'il n'avoit plus de raisons valables, pour excuser tant et tant de remises, il vous dit, comme tout en colere : « Monsieur, voulez vous que je vous en parle librement ? Pardieu je ne saurois faire mesmes expeditions à deux diverses personnes, et ne vous celeray point que le dernier en don et en service, vous a devancé en faveur pre-sente : j'entends parler du prince d'Espinoy, vostre cousin ; entendez le reste à demy mot, et sur cela prenez vostre resolution. »

La seconde cause, qui vous refroidit envers ce prince, fut que vous entendistes dire à Monsieur lors qu'il se défit du vieil monsieur d'Avantigny, qui estoit de son conseil estroit, qu'il avoit l'esprit bien en repos, depuis qu'il n'avoit plus de huguenots en ses secrets.

(1583) Deux ou trois jours devant cette malheureuse et desloyale action d'Anvers, le prince d'Orange estant dans sa chambre, discourant avec monsieur de Sainte Aldegonde et un ministre nommé de Villiers, vous ouystes qu'il leur dit : « Ces gens icy ont des desseins pernicieux et pour eux et pour nous, où à mon advis ils ne trouveront pas leur conte ; car l'on se doute de tout, » et là dessus vous dit : « Monsieur, je vous prie de ne vous esloigner plus guerres de resnavant de moy ny de mon logis. » Ce que vous fistes, et ce nous semble, environ le quinze ou vingtiesme fevrier, sur les deux heures apres midy, comme vous sortiez du logis de M. le prince d'Orange ; et montant à cheval pour suivre Monsieur, qui estoit allé pour faire faire, comme il se publoit, une reveuë à son armée, proche la porte de Quipedorp, vous entendistes une grande rumeur ; vistes plusieurs hommes, femmes, filles et enfans de la ville, s'enfuyans avec effroy, suivis de troupes de cavalerie et in-

fanterie, les pistolets et les espées a la main, les piques basses, et les harquebuses et mousquets couchez en joüe, tirans en escopeterie, et crians Tuë, tuë ; Ville gagnée, ville gagnée ; Vive la messe, vive la messe ; auquel bruit le prince d'Orange estant accouru, accompagné de ses gardes et d'un nombre de gens armez, tant gentils-hommes capitaines, que bourgeois, il vous cria ensemble à quelques autres gentils-hommes françois qui estoient avec vous : « Messieurs, messieurs, retirez-vous dans mon logis, et si vous aymez vostre vie, n'en sortez point que je ne vous le mande : » ce que vous fistes tous aussi-tost, bien estonnez de voir ce furieux tumulte, les particularitez duquel nous laissons aux histoires generales, pource qu'il ne vous y arriva rien de bien remarquable ; et n'en dirons autre chose, sinon que tout ce qui estoit entré en la ville, ayant esté tué ou pris, ou s'estans jetté par dessus les murailles dans les fossez, ny ayant moyen de sortir par la porte, pource qu'elle estoit remplie de corps morts. Monsieur le prince d'Orange remit en peu de temps toutes choses en ordre, voire en voie de reconciliation, la faisant prosperer à Monsieur, et fit permettre à vous, à tous ceux de la religion et autres luy appartenans, qui s'estoient garantis de l'occision, de le suivre, lequel, ce nous semble, vous trouvastes vers Rosandal et Liere, qui taschoit à prendre le chemin d'Herentals pour gagner Ville-vorde ; mais luy et toute son armée, enveloppée dans une submersion generale (ceux de la ville de Malines ayant rompu les digues des rivières et inondé entierement le pays), il se perdit plus de quatre à cinq mille chevaux et autres bestes de charge et de voiture, et presque autant de personnes, dont la moitié estoient gens de guerre, tant par la falm que par les aspres froidures qu'ils avoient pasties durant trois jours et trois nuicts dans ce petit deluge, car c'estoit au mois de fevrier 1581 ou 82.

Cette action descria tellement Monsieur et tous les siens, qu'elle avoit rendu tous les françois en general, en horreur et en opprobre, voire en execration envers toutes nations, ce qui vous fit resoudre de quitter ce prince tout à fait ; joinct la fourbe qu'il vous avoit faicte, et qu'il estoit facile à juger, que de là en avant, quelque reconciliation qu'il se püst faire, il n'auroit pas grande creance parmi ces peuples, et par consequent peu de moyen de faire du bien ny de l'honneur à personne, dans ces provinces où il estoit detesté et deschiré d'injures, d'amys et d'ennemis ; esquelles il séjourna encore cinq ou six mois, rodant par-cy par-là, avec sa miserable armée, qui alloit de jour en jour deperissant :

essayant, mais en vain, de renouer quelque traité, car dans le mois d'aoust, tant luy que M. de Mont-pensier, M. le mareschal de Biron, et tous autres ses partisans abandonnerent le pays, le laissant en telle discorde et desordre, qu'il ne se passoit quasi sepmaine, que quelques seigneurs de qualité et villes de consequence, ne se remissent au service du roy d'Espagne, ny mois que le prince de Parme ne leur prist quelque place par force.

## CHAPITRE XVIII.

*Rosny quitte le service du duc d'Anjou. Ses différentes courses en revenant des Pays-Bas. Négociations dont il est chargé par le roi de Navarre. Son mariage avec Anne de Courtenay.*

[1583] Toutes ces confusions et desordres arrivés es Pays-Bas, ainsi qu'il en a esté dit quelques choses es chapitres precedens, vous firent resoudre de quitter Monsieur, frere du Roy, et pour cet effet, ayant obtenu un passe-port, par le moyen du comte de Barlemont vostre parent, vous vous en allastes visiter madame de Mastin vostre tante, qui residoit à la Bassée, laquelle aussi bien que le vicomte de Gand, vous avoit des-herité à cause de la religion : s'étant laissée persuader aux moynes, que ceux de vostre profession ne croyoient ny en Dieu, ny en Jesus-Christ, et qu'ils avoient en horreur la Vierge Marie, les Saints, et les bonnes œuvres.

Et nous permettez de faire icy un petit discours de ce qui se passa entr'elle et vous, pour faire voir l'innocence, ou plutost simplicité niaise de cette dame, plongée dans la bigotterie, laquelle à vostre arrivée, ne vous fit pas trop bonne chere, ne vous pouvant quasi regarder de bon œil, comme elle vous le dit depuis, croyant certainement que vous n'adressiez nulle de vos prieres à Dieu; mais le lendemain matin, comme elle vous eust mené dans la grande eglise de l'Abbaye, laquelle elle avoit fondée, pour y voir les sepultures de marbre de vos ancestres, qu'elle y avoit fait construire, et entre les autres celles d'Helene de Melun, femme de Robert d'Artois; de Hugues de Melun vostre ayeul, et d'Anne de Melun vostre grand mere, et celle d'elle mesme, qu'elle y avoit desja fait eslever, elle vous dit, ayant les larmes aux yeux : « Hélas ! mon nepveu, mon amy, que mon pere vostre ayeul, et ma sœur vostre grand mere, s'ils estoient en vie, jetteroient des larmes, et ressentiroient des desplaisirs, aussi bien que moy, de voir l'un de leurs

« enfans ne point croire en Dieu, ny en sa mère, et n'adresser ses prières qu'à l'ennemy d'enfer, qui vous rend ennemy des bonnes œuvres, ainsi que je l'ai entendu dire à nos bons peres confesseurs. »

« Vray Dieu, ma tante, que dites-vous ? Jesus seroit-il bien possible, luy dites-vous, que vous disiez cecy à bon escient et qu'il y ait eu de gens si pleins d'impostures et de calomnies, que de vous avoir voulu persuader telles execrations, qui nous rendroient indignes de vivre sur la terre. Or, ma tante, ostez de vostre esprit toutes ces mauvaises opinions que vous avez prises de nous, et ne doutez nullement que nous ne croyons, en toutes les trois personnes de la sainte Trinité; que nous ne les adorions et invoquions comme estant un seul Dieu; que nous ne reverions et honorions la Sainte Vierge et les Saints; ne prisions et ne tenions pour necessaires les bonnes œuvres et la sanctification, sans laquelle nul ne verra jamais Dieu. »

« Mais comment se peut faire, vous respondit cette bonne dame, mon amy, que ce que vous dittes soit vray ? car le bon pere Sylvestre (qui estoit un cordelier grand predicateur, et son confesseur) m'a asseuré il n'y a pas huit jours, que les huguenots sont pires que les Juifs, et qu'ils ne prient ny Dieu ny sa mere. »

« Madame, je vous prie de croire, luy respondistes vous, que nostre *Credo* et nostre *Pater* sont les vostres mesmes, et n'y a autre difference, sinon que nous les disons en françois, et vous les dites en latin; et afin que vous cognoissiez la malice des imposteurs qui vous ont persuadé vous et mon oncle le vicomte, à nous des-heriter mon pere et moy, je vous les veux dire presentement. » Et lors ayant commencé par l'Oraison Dominicale, et continué par le Symbole des apostres, elle vous escouta fort attentivement sans rien respondre, tant que vous ne parlastes que de Dieu, de Jesus-Christ et du Saint-Esprit; mais lors que vous eustes dit, *qui est né de la Vierge Marie*, et encore apres, *je croy la communion des Saints*, elle se mit à crier : « Hélas ! mon nepveu, mon amy, est-il possible qu'en vos oraisons vous parliez de la bonne Dame, et fassiez mention des Saints bienheureux ? Or, venez m'embrasser puisque cela est, car je vous ayme comme mon bon nepveu, et me semble en vous voyant et vous oyant parler, que ma pauvre sœur est encore en vie; ô ! que j'ay de desplaisir, que mon nepveu, vostre parrain et moy, vous avons des-herité; vrayement je veux essayer à rompre tout cela, et vous le jure par la Sainte Vierge. »

Les effets neantmoins ne suivirent pas les paroles.

De la Bassée vous vous en allastes en la ville de Bethune, que de long temps vous aviez envie de voir : à la porte, on vous demanda vostre qualité, vostre nom, vostre surnom, d'où vous veniez, où vous alliez, et où vous pensiez loger ; en quoy vous les satisfistes, de sorte qu'ils tesmoignerent d'en estre demeurez contens, sur tout voyant que vous aviez un passe-port du prince de Parme, que vous veniez de chez la comtesse de Mastin, qu'elle estoit vostre tante, que vous aviez nom de Bethune, et vous alliez loger à l'escu de vos armes ; vers laquelle hostellerie, peu apres que vous fustes arrivé, vous vistes une troupe d'habitans s'acheminer, qui avoient des haliebardiens devant eux, et entre iceux quelques uns qui portoient des livrées d'officiers de ville ; lesquels vous vindrent visiter avec des complimens et paroles d'honneur et de respect, disans ne vous en pouvoir assez rendre, puisque vous estiez descendu de l'antique maison de leurs anciens seigneurs, dont ils sçavoient bien qu'il y avoit quelque branche en France ; ils vous firent des presens de vin, patisseries et confitures, et vous menerent voir tout ce qu'il y a d'excellent dans la ville, que vous trouvastes grandement forte, belle, riche et bien peuplée, et sur tout des structures et sepultures de plusieurs messieurs vos predecesseurs ; et nous souvient vous avoir ouï dire, qu'au commencement que vous vistes venir tant de gens, avec les armes et livrées de la ville, vous eustes quelque espece d'aprehension, craignant qu'ils eussent decouvert, que vous eussiez porté les armes avec Monsieur, et se voulussent saisir de vostre personne.

De Bethune vous vous en retournastes à Rosny, et peu apres vous fistes un voyage vers le roy de Navarre, auquel contant tout ce que vous aviez fait, ouï et veu, pendant le temps que vous aviez esté avec Monsieur, il vous respondit : « Hé bien ! ne voyla pas l'accomplissement de tout ce que je vous dis de ce prince à Coutras, lors que vous pristez congé de moy pour l'aller servir ; mais le vicomte de Thurenne que je dissuaday, tant qu'il me fut possible, de le suivre, y a encore plus mal fait ses affaires que vous. »

Ce prince estoit lors au plus chaud de ses passions amoureuses vers la comtesse de Guichen (1), laquelle estant allé voir en un lieu nommé Agemau, il receut des nouvelles d'un espagnol nommé dom Bernardin de Mandosse, sur lesquelles il vous envoya en Cour vers le Roy et la Reine sa mere, pour les advertir que

(1) Diane ou Corisande d'Andouins, comtesse de Guiche, etait épousée Philibert, comte de Grammont.

le roy d'Espagne, irrité de la guerre que Monsieur, son frere, assisté de M. de Montpensier, d'un mareschal de France, et des plus qualifiez de la noblesse françoise, luy avoit faite en ses Pays-Bas, l'avoit fait solliciter de traitter alliance et confederation afin de faire la guerre en France, luy offrant d'abord des seuretez suffisantes pour toucher deux cens mille escus par advance, deux cens mille escus en prenant armes, et quatre cens mille escus dans l'année, et continuer cette assistance, tant que la guerre durera, pour subvenir à partie des frais d'icelle, à condition qu'il ne poseroit point les armes que de son consentement ; pour assurance de laquelle, il ne demandoit que sa foy et sa parole, qu'il sçavoit bien estre inviolable, à quoy il avoit fait quelque espece de demonstration de vouloir entendre, sans s'engager encore neantmoins à rien, les supplians de bien mesnager cet advis, et s'asseurer qu'il estoit leur fidel serviteur.

A vostre arrivée en Cour, vous voulustes, suivant la charge que vous en aviez, parler à la reine de Navarre, afin de vous donner entrée vers le Roy son frere et la Reine sa mere ; mais vous sceutes par le moyen de vostre cousine de Bethune, qui la gouvernoit lors confidemment, que son entremise vous nuiroit plustost qu'elle ne vous serviroit, d'autant que depuis deux mois, elle estoit très-mal avec le Roy, s'entr'estans faits une infinité de reproches meilleurs à taire qu'à dire, ce qui l'avoit mise mal aussi avec la Reine sa mere. Le premier vous demanda si vous aviez des lettres du roy de Navarre, qui fissent mention de ce que vous disiez ; et sur ce que vous luy dittes qu'elles ne portoient qu'une simple creance, il ne fut jamais en vostre puissance d'avoir audience du Roy ; lequel deux jours apres s'alla renfermer dans le bois de Vincennes, auquel lieu nul n'entroit s'il n'étoit mandé. Vous vous adressastes apres à madame de Sauve qui vous fit parler à la Reine mere, laquelle vous receut tres-bien, vous escouta fort attentivement sur tout ce que vous luy voulustes dire, tesmoigna d'en sçavoir un grand gré au roy de Navarre, vous fit bailler des lettres de creance sur vous, du Roy et d'elle au roy de Navarre, par M. Pinart, et neantmoins pour tout cela, il ne s'en ensuivit aucune chose à l'avantage du roy de Navarre, mais au contraire il en receut des reproches d'Espagne, par lesquelles il fut aysé à juger que l'on les avoit advertis de tout ce que vous aviez dit.

Sur la fin de cette année vous retournastes chez vous, où ayant appris que Monsieur, frere du Roy, l'estant venu voir secrettement à Paris, s'en estoit retourné fort mal-content à Chasteau-

Thierry, vous le fustes trouver, pour essayer d'apprendre quelque chose de ses desseins, que l'on publioit plus grands et plus magnifiques que jamais, disant tout haut : que ses erreurs et ses malheurs passez estoient les plus certains et fidèles conseillers qu'il eut pû choisir, et que par iceux il avoit esté instruit à proceder tout d'une autre façon qu'il n'avoit fait par le passé; mais vous le trouvastes tout chagrin et fort mélancolique; aussi commençoit-il à languir de la maladie dont il mourut peu apres. Vous ne laissastes pas neantmoins de luy baiser les mains, y estant présenté par M. d'Aurilly, lequel vous fit apres tout plein d'offres au nom de son maistre, si vous le vouliez servir, vous donner à luy tout à fait, et quitter le roy de Navarre.

Ces discours vous firent concevoir une mauvaise opinion des intentions de ce prince et prendre resolution de vous en retourner à Paris, où vous receustes peu apres des lettres du roy de Navarre, par lesquelles vous tesmoignant beaucoup d'affection, il vous ramentevoit les promesses que vous luy aviez faites à Contras, de le servir tousjours en toutes les occasions qui se presenteroient, et vous conjuroit de le venir trouver en diligence, pour vous dire des choses qui importoit à luy et à vous, lesquelles il ne vous pouvoit escrire, ny les confier à d'autres qu'à vous mesme. Vous fistes ce voyage, auquel il vous entretint particulièrement, de tous les desseins de ceux de la ligue, fort approchant de tout ce que nous avons veu esclorre depuis, et finalement vous dit : « Le bruit est fort grand « que vos deux jeunes freres (1) sont fort en la « fantaisie du Roy, et on m'a mandé de Paris, « que les mignons mesmes en ont grande jalou- « sie. Je voudrois bien qu'ils fussent en faveur, « et cela arrivant, je desire et vous en prie, que « vous vous rengiez à la Cour, sous couleur de « leur autorité, sans neantmoins vous départir « de l'affection que vous m'avez promise; car, « par ce moyen, vous pourrez descouvrir plu- « sieurs choses; me tenir adverty de celles qui « me pourront estre d'importance, et à tout le « party, et me rendre de plus grands et signalez « services que si vous demeuriez près de moy. » A quoy vous estant aussi-tost resolu, et luy ayant donné toutes les sortes d'asseurances de vostre affection et loyauté à son service, et de ne quitter jamais la religion, vous embrassa par trois fois, et vous dit en partant : « Mon amy, souve- « nez-vous de la principale partie d'un grand « courage et d'un homme de bien, c'est de se « rendre inviolable en sa foy et en sa parole, et « que je ne me manqueray jamais à la mienne. » Sur

(1) C'étaient les neveux de Rosny et non point ses freres.

cela vous vous en retournastes à la Cour, où vous trouvastes messieurs vos freres en de grandes esperances de faveur, le Roy les ayant nommés pour prendre l'habit de penitent avec luy, et fait outre cela plusieurs belles promesses; mais toute cette nouvelle mignonnerie dura si peu, vous en avez depuis sceu les causes qui valent mieux tenuës que dittes, que ny eux, ny vous n'eustes pas grand moyen de vous en prevalloir.

Or, comme l'oisiveté est la mere des delices, et par consequent des vices, vous fustes pendant ce temps de sejour à la Cour, retenu plus long temps apres à Paris, que peut-estre il n'estoit convenable à la forme de vie que vous aviez jusques à lors professée; car vous devintes grandement amoureux de la fille du president de Sainct Mesmin, laquelle en verité le meritoit bien, aussi emportoit elle le prix de beauté, par dessus les plus renommées de ce temps-là, et puis la bonne chere qu'elle et les siens vous faisoient, croyans bien qu'en fin vous seriez homme pour l'espouser, voyans l'assiduité que vous rendiez pres d'elle, estoient de grands liens, et bien puisans pour vous y tenir enlassé. Neantmoins la raison pouvant plus sur vous, qui avez tousjours tenu pour maxime, que celui qui veut acquerir de la gloire et de l'honneur, doit tascher à dominer ses plaisirs, et ne souffrir jamais qu'ils le dominant, que tant de bonnes cheres que vous receviez de cette belle fille; ayant oüy parler de la beauté, vertu et haute extraction d'une fille de feu M. de Bontin qui avoit beaucoup de moyens, vous vous resolustes de la rechercher pour l'espouser; et apres l'avoir veuë deux fois, et desja en quelque sorte tesmoigné vostre dessein, sans neantmoins vous estre encore déclaré, il se presenta une occasion qui vous y engagea autant qu'elle vous desgagea de l'autre; car ne pensant à rien moins qu'à vos maistresses, il arriva que passant pays, et venant loger à Nogent sur Seine, vous les rencontrastes toutes deux logées en vostre hostellerie, dequoy au commencement vous fustes fort marry; car vous eussiez bien voulu ne rompre ny avec l'une ny avec l'autre, et fustes deux ou trois fois prest de desloger de là sans les voir; car desja chacune d'elles, vous avoit fait la guerre l'une de l'autre; mais comme vous pensiez descendre en bas, vous trouvastes la jeune Sainct Mesmin qui vous vint embrasser, et comme c'estoit un petit bec bien affilé, elle vous dit : « Comment, monsieur, « l'on nous a dit qu'il y a plus de demie heure « que vous estes arrivé en ce logis, et vous n'es- « tes point encore venu voir ma sœur, vraiment « elle parlera bien à vous, car on luy a dit que « vous aviez une autre maistresse. » A ces paroles

vous vous trouvastes grandement surpris, comme vous nous le dittes apres, et ne sçaviez quasi quelle resolution prendre, jusques à ce que M. de la Font, qui estoit le premier qui vous avoit parlé de faire l'amour à mademoiselle de Courtenay, vous dit à l'oreille : « Monsieur, tournez votre cœur à droict, car là vous trouverez des biens, une extraction royalle, et bien au tant de beauté lors qu'elle sera en âge de perfection. » A quoy vous resolvant aussi-tost sans plus contester en vous mesme, vous respondistes à cette sœur : « Ma belle fille, je l'iray voir tout à cette heure; mais je me suis engagé en une petite visite auparavant et vous prie de faire mes excuses. » Je vous assure, vous respondit-elle, demie en colere, qu'elles ne seront point receuës, et sur cela vous quitta en grommelant. Et vous prenant cette occasion, respondistes : « Il n'y a remede, je ne me desespereray pas pour cela. » Et de ce pas vous en allastes voir mademoiselle de Courtenay, envers laquelle vous et vos gentils-hommes fistes si bien valoir ce qui c'estoit passé, que cette belle et sage fille vous prit en affection, et peu apres vous l'espousastes : l'amour et gentillesse de laquelle vous retint toute l'année 1584, en vostre nouveau mesnage, où vous commençastes à tesmoigner, comme vous aviez desja bien fait auparavant en toute vostre vie, en la conduite de vostre maison, une œconomie, un ordre et un mesnage merveilleux, prenant la peine de voir et sçavoir tout ce qui concernoit la recepte et despence de vostre bien, escrivant tout par le menu, sans vous en remettre n'y fier en vos gens, chacun s'estonnant comment, sans bien-faits de vostre maistre, ny sans vous endéter, vous pouviez avoir tant de gentils-hommes à vostre suite, et si honnestes gens qu'estoient les sieurs de Choisy, Morelly, Bois-brueil, Mallosnay, Tilly, la Fond et Maignan, et faire une si honorable despence; mais ils ne sçavoient pas de quelle industrie vous usiez, ny les grands profits que vous faisiez sur quantité de beaux courtaux que vous acheptiez à bon marché, envoyant jusqu'en Allemagne pour cet effet, et puis les revendiez si cher en Gascogne, qu'ils vous payoient grande partie de vostre despence.

#### CHAPITRE XIX.

*Traité de Henri III avec la Ligue. Assemblée des Protestans à Montauban. Ambassade envoyée au roi de Navarre. Tentative sur Angers. Périlleux voyage de Rosny pour aller joindre le roi de Navarre à Bergerac.*

[1584-1585] A la fin de l'année 1584, le roy

de Navarre vous fit nouvelle instance de le retourner trouver, vous escrivant que les occasions de luy tesmoigner vostre affection, alloient estre plus opportunes que jamais, d'autant qu'il voyoit preparer des desseins pour ruiner l'Estat et la religion tout ensemble; ce qui vous fit penser à mettre tel ordre en vos affaires, que vous ne manquassiez d'argent au besoin, et, pour cet effet, mistes en vente une coupe de bois de haute futaye, qu'un marchand, nommé Boisseau, achepta de vous quarante-huit mille livres.

Au commencement de l'année 1585, ceux de la ligue commencerent leurs mouvemens; le Roy se declara contr'eux, et envoya, contre M. d'Elbœuf, en Normandie, M. de Joyeuse, lequel passa à Rosny ayant messieurs vos freres avec luy, où vous les traitastes tous au chateau, fort honorablement; et M. de Joyeuse voyant en vostre escurie sept ou huit pieces de grands chevaux des plus beaux de France, il vous convia d'aller avec luy, ce que vous luy accordastes.

Il nous souvient avoir oüy dire à M. de Maignan le tour que Chicot fit lors à M. de Laverdin, qu'il appelloit la folle, et qui s'estoit logé au bout du bourg de Rosny; car il luy manda, comme en grand secret, qu'il s'armast promptement, et vint au secours de M. de Joyeuse, qu'il nommoit le sourdant, duquel ce diable de huguenot, ayant intelligence avec les ligueurs, s'estoit saisi; lequel sieur de Laverdin, sans juger de l'impossibilité et importance de ce dessein, fit armer un chacun et vint au chateau, et lors se fut à se mocquer de luy. Vous fustes en ce voyage avec M. de Joyeuse, où il se reconnut une estrange procedure de la Cour; car comme vous et tout plain d'autres seigneurs et gentils-hommes de la religion, estiez à Vernueil, pour servir le Roy contre la ligue, M. de Joyeuse receut un paquet de la Cour, par lequel on luy mandoit que le Roy avoit fait la paix avec ceux de la ligue, et s'estoit obligé de faire la guerre à ceux de la religion; lors il se tourna vers vous, disant : « Hé! bien, M. le baron de Rosny, c'est à ce coup que j'auray vos beaux chevaux à bon marché, car la guerre est declarée contre ceux de la religion; mais je m'assure que vous ne serez pas si fol que d'aller trouver le roy de Navarre, ny vous embarquer dans un party qui sera infailliblement ruyné et perdre vostre belle terre de Rosny. »

Lors vous luy respondistes : « Monsieur, monsieur, par les voyes que vous pensez ruiner le roy de Navarre, c'est par là mesme que vous établirez sa grandeur, au moins si un diable

« de precepteur que j'ay eu à dit vray, lequel a  
 « nom la Brosse; car il m'a dit que le roy de  
 « Navarre seroit fort pres d'estre ruiné; mais  
 « qu'enfin il ruineroit tous ses ennemis, et qu'il  
 « seroit un jour le plus grand et estimé roy du  
 « monde, et que je ferois une si grande fortune  
 « en le servant, que je ne l'oserois quasi pas es-  
 « perer, tellement que je suis resolu d'en tenter  
 « le hazard, et puis que vous n'avez plus que  
 « faire de moy, adieu vous dis. » Et lors prist  
 « congé de luy si brusquement, qu'il s'en estonna,  
 « et dit à ceux qui estoient pres de luy : « Voilà  
 « un maistre fol, qui n'a peur de rien; mais il  
 « pourroit bien s'abuser avec son sorcier de mais-  
 « tre. » Lors M. de Morinville luy respondit :  
 « Monsieur, ce gentil-homme est brave et a un  
 » merveilleux esprit; croyez que là où il sera,  
 « il vaudra toujours un homme. » Sur cela vous  
 vous retirastes à vostre maison.

Un mois apres vous fistes un voyage vers le  
 roy de Navarre, pour sçavoir au vray sa resolu-  
 tion, afin de pourvoir à vos affaires, selon cela.  
 Le voyage fut de quatre ou cinq mois; car il  
 vous retint pres de luy et vous mena à Montau-  
 ban, où se faisoit une assemblée de ceux de la  
 religion, en laquelle Bùtrix le vint trouver de la  
 part du comte Palatin; vous fustes avec luy à  
 Sainct Paul de la Miata, où se fit l'entrevuë avec  
 M. de Mont-morency, et fut pris resolution de  
 se défendre et employer à cét effect, tout ce qui  
 seroit en la puissance d'un chacun. Le roy de  
 Navarre vous appella lors, au sortir d'un certain  
 conseil, vous fit cas de vostre opinion, et puis  
 vous dit : « M. le baron de Rosny, ce n'est pas  
 « tout que de bien dire, il faut encore mieux  
 « faire : estes-vous pas resolu que nous mourions  
 « ensemble? il n'est plus temps d'estre bon mes-  
 « nager, il faut que tous les gens d'honneur et  
 « qui ont de la conscience, employent la moitié  
 « de leurs biens pour en sauver l'autre, et m'as-  
 « seure que vous serez des premiers à m'assister;  
 « aussi je vous promets que si j'ay jamais bonne  
 « fortune, vous y participerez. »

Lors vous luy respondistes : « Non, non, Sire,  
 « je ne veux point que nous mourions ensemble,  
 « mais que nous vivions et rompions la teste à  
 « tous nos ennemis; mon bon mesnage y servira  
 « plus qu'il n'y nuira : j'ay encore pour cent mille  
 « livres de bois à vendre, que j'employeray à  
 « cela; mais vous m'en donnerez un jour davan-  
 « tage, lors que vous serez bien riche; car comme  
 « je le vous ay desja dit autrefois, j'ay eu un  
 « precepteur qui avoit le diable au corps, qui  
 « m'e l'a ainsi dehoncé. » Il tourna cela en risée  
 et vous embrassa, vous disant : « Or bien, mon  
 « amy, retournez vous en chez vous, faites dili-

« gence et me venez retrouver au plustost, avec  
 « le plus de vos amys que vous pourrez, et n'ou-  
 « bliez pas vos bois de haute futaye. » Apres en  
 secret il vous dit : « Vous voyez, il me va tom-  
 « ber sur les bras et à tous ceux de la religion,  
 « une grande, fort dangereuse et longue guerre;  
 « je voudrois bien la pouvoir jeter dans leurs  
 « entrailles et l'approcher de Paris, où pour le  
 « moins de la riviere de Loire, car c'est le seul  
 « moyen de les mettre à la raison; j'ay, pour  
 « cét effect, quelques pratiques sur le chasteau  
 « d'Angers; M. le prince y a aussi quelque des-  
 « sein, j'ay peur que l'un pour l'amour de l'autre,  
 « nous ne gastions tout; cependant tenez vous  
 « prest de partir avec vos amis, pour me venir  
 « assister, je vous advertiray de ce qui se pas-  
 « sera. » Sur cela il vous embrassa par deux fois  
 et ainsi pristest vostre congé.

Partant d'aupres du roy de Navarre, vous  
 vous acheminastes en France, laissant neant-  
 moins vostre bagage, hardes et si peu d'argent  
 que vous aviez à Bergerac, en passant, où vous  
 trouvastes messieurs le cardinal de Lenoncourt,  
 de Sillery, Poigny et quelques autres députez du  
 Roy, vers le roy de Navarre, qui estoient prests  
 d'arriver; vous pristest le soin de les faire loger,  
 recevoir et entretenir; et nous souvient vous  
 avoir ouy dire qu'un matin M. de Poigny vous  
 dit : « Hé! bien, monsieur, nostre voyage ser-  
 « vira-il de quelque chose? » Vous luy respon-  
 distes : « J'en ay mesme opinion que vous en  
 « sçauriez avoir; car si vous venez pour donner  
 « de simples paroles et non des effets, et pour  
 « nous disposer sous l'ombre d'icelles, à laisser  
 « perdre l'Estat et nostre religion ensemble,  
 « vous perdrez vostre temps. » Lors il soupira  
 et haussa les espauls, vous disant : « Monsieur,  
 « je croy qu'une messe est de difficile conquête  
 « en cette ville. » A quoy vous respondistes : « Je-  
 « sus! monsieur, tant que vous en voudrez, et  
 « plust à Dieu que vous ne nous fussiez point plus  
 « chiches de presches; que vous fussiez si pru-  
 « dens que de laisser à chacun gagner paradis  
 « comme il l'entend, et que vous ne songeassiez  
 « pas tant au ciel pour autrui, que vous vinssiez  
 « à en faire perdre la terre au Roy et à tous les  
 « bons françois. » Vous menastes ainsi devisant  
 tous ces messieurs, au lieu où se disoit la messe,  
 et à l'entrée leur dittes adieu.

En vostre voyage vous rencontrastes plusieurs  
 petites difficultez dont nous n'avons pas retenu  
 le particulier. A Paris on ne parloit d'autre chose  
 que de ruyner le roy de Navarre et tous les hu-  
 guenots; plusieurs bons françois vous parlerent  
 avec singulier desplaisir de la nonchalance, las-  
 cheté et stupidité du Roy; et entr'autres mes-



sieurs de Rambouillet, Montbazon l'aîné, d'Aumont, la Roche-guyon, de Serpentin et autres dont nous vous avons ôté faire cas, et ne nous souvient pas des noms de ceux qui vous dirent, il faut, s'il y a moyen, que le roy de Navarre s'avance vers la rivière de Loire, avec des bonnes forces, et cela estant, il y a plusieurs bons François qui parleront bien haut, voire aucuns se joindront avec luy, à quelqu'uns desquels vous dittes : « Et bien, souvenez-vous de vostre parole. » Mais les divers accidens changerent bien ces bonnes dispositions.

Cependant vous pourvestes à vostre équipage : achetastes de M. de la Roche-guyon un des plus beaux chevaux d'Espagne qui se pouvoit voir, six cens escus ; trois autres chevaux de prix de messieurs de Laugnac, de Rieux et de la Taillade, achetastes au marché aux chevaux un roussin roüan fleur de pescher quarante escus, qui ne sembloit propre qu'à porter la malle, lequel se fit si excellent cheval, que depuis vous le vendistes six cens escus à M. le vidame de Chartres : comme vous fistes aussi vostre cheval d'Espagne à M. de Nemours la Garnache douze cens escus, desquels ne vous pouvant payer, vous en eustes une tapisserie des forces de Hercule, qui est en vostre grande salle de Sully.

L'on avoit peu avant fait l'edit de juillet 1585, par lequel il estoit fait commandement à tous ceux de la religion d'aller à la messe, ou sortir hors du royaume dans six mois : cela avoit mis tous les huguenots en rumeur, le roy de Navarre faisant toutes sortes de pratique dedans et dehors le royaume, pour se fortifier d'argent, d'amys, d'armes et de soldats.

Monsieur le prince prit tost apres les armes, assiegea Broüage quelque temps, et s'il ne se fût point diverty en un autre dessein, tous les deux eussent réussi. Il avoit, comme nous avons dit cy-dessus, entreprise sur Angers, laquelle il voulut precipiter, sans attendre le roy de Navarre ; M. de Brissac, que l'on sçavoit bien estre de la ligue, estoit gouverneur du chasteau d'Angers ; un nommé le capitaine Grec, son lieutenant en iceluy, y avoit vingt soldats en garnison ; entr'autres deux de commandement, nommez Roche-morte et le Fresne, qui avoient esté autrefois huguenots. Il y avoit dans la ville un nommé le capitaine Hallot, qui avoit commandé au chasteau du temps de Monsieur, frere du Roy ; ces trois traittoient, à sçavoir : Hallot avec charge du Roy, les deux autres avec charge du roy de Navarre et du prince de Condé, chacun pour leur livrer la place, et en tirer profit. Hallot prit intelligence avec ces deux, et ainsi toutes

ces trois intelligences se conjoignirent à faire perdre le chasteau à la ligue ; mais avec divers desseins dix ou douze soldats furent si bien pratiqués, que sous ombre d'un desjeuner, le Grec fut mené en un lieu à part, luy tué ; et quelques uns des siens si bien enfermez, que les autres eurent moyen de se saisir du chasteau.

La rumeur fut incontinent grande, d'autant que quelqu'un cria par les fenestres, que le chasteau estoit surpris. Incontinent ce bruit s'espand par la ville, et tout le peuple se met en armes : dequoy le sieur de Hallot estant adverty, il croit que cecy c'estoit fait sous sa pratique, pour le service du Roy ; et partant il se jette aussi-tost parmy la foule de cette populace, et pour l'apaiser crie : « Tout beau, Messieurs, tout beau, ce n'est rien que pour le service du Roy : je l'ay fait faire par son commandement, et qu'ainsi ne soit, allons au chasteau, et vous le verrez. » Le bruit s'appaisa lors aucunement, et lors s'estans avancez, et trouvant les ponts levez, Hallot crie fort haut : « Messieurs du Fresne et de Roche-morte ; » Mais nul ne respond. Toutesfois en fin, l'un d'eux parle du dedans d'une tour, et demande ce qu'il vouloit. Hallot les prie d'abaisser le pont, de le recevoir, et de declarer qu'ils tenoient pour le Roy. Plusieurs paroles et contestations se passent durant deux heures : en fin quelqu'un crie du dedans : « Retirez vous, nous tenons pour le roy de Navarre. » Sur ce cry, sans autre formalité, Hallot est pris, son procez fait, et dans deux jours il est mis sur la rouë. Cependant le chasteau est investy ; l'on presse Roche-morte de parler, il s'y accorde : pour gagner temps il sort au bout du pont-levis ; quelques soldats coulent de la ville par des advenues couvertes pour le surprendre ; il veut regagner le pont, ceux de dedans le levant, il se prend aux chaisnes du pont, il ne les peut tenir ferme, il tombe dans les fossez demy froissé, un cerf nourry dans les fossez le tué à coups d'endoüillées, l'allarme se redouble ; harguebusades se tirent, de tous costez l'on fait barricades. Deux jours apres, le Fresne dormant sur un carneau de muraille, du costé de la rivière, est tué d'une mousquetade, venant de delà l'eau où il y a plus de cinq cens pas.

Pendant toutes ces choses M. le prince est adverty, lequel quitte le siege de Broüage et s'y achemine ; courriers volent de toutes parts, les nouvelles en viennent jusqu'à Rosny ; vous advertistes vos amis, communiquez avec eux, afin de marcher au premier mandement du roy de Navarre. Mais voyant que vous n'en receviez point ; que M. le prince avoit passé la rivière de Loire, et qu'il ne faisoit plus peur pour ceux de la

religion en leurs maisons, vous sondiez messieurs de Moüy, Fequeres, Morinville et quelques autres, pour sçavoir si ils seroient de la partie ; chacun fait le froid et se resout de prendre une autre route : tellement que vous partistes avec six gentils-hommes seulement et vos domestiques ; allastes coucher à Nonnancourt, de là à Chasteaudun, où estant à l'hostellerie, un nommé la Mothe-Potain vous demanda si vous alliez joindre M. de Joyeuse, et qu'il y auroit beau moyen de faire ses affaires aux despens des huguenots ; vous fistes bonne mine, et deslogeastes devant le jour, arrivastes à Vandosme, où, pour ce que M. de Mailly Benehart vous cognoissoit, vous fistes faire le maistre au sieur de Bois-bruëil, et ayant pris un manteau de valet, montastes sur un bon courtaut, portant neantmoins une malle, où il y avoit six mil escus en or ; un autre de vos gentils-hommes en portoit une semblable : car vous n'aviez quasi autre bagage.

A Vandosme l'on fit forces questions à celui qui faisoit le maistre du train, en fin vous allastes loger aux faux-bourgs de delà, et estant à table, M. de Benehart vous envoya dire que vous n'estiez pas là en seureté, qu'il avoit fait commandement à tous ceux des faux-bourgs, de se retirer dans la ville, et que vous en fissiez de mesme : d'autant qu'il venoit d'avoir advis, que M. le prince et son armée avoit esté repoussée d'Angers ; qu'une partie d'icelle avoit bien repassé la riviere ; mais que luy avec le reste estoit vers Saint Arnoul comme à la desbandade, saccageant tout, et qu'ils pourroient bien donner dans les faux-bourgs. Vous fistes lors meilleure mine que vous n'aviez bon jeu, estant merveilleusement en peine de ce qu'il estoit besoin de faire. En fin vous criastes fort haut : « Que l'on selle tous les chevaux et que l'on charge les malles, il faut rentrer dans la ville. » Il y avoit un tel tintamarre dans les faux-bourgs, des charroits qui portoient tous les meubles dans icelle, que l'on ne prenoit garde à rien, et ne s'entendoit on pas quasi parler les uns les autres : ce qui vous servit grandement ; car apres le plus long temporisement qu'il vous fut possible, pour laisser passer la nuit, et bien repaistre vos chevaux, vous montastes à cheval ; mais au lieu d'entrer dans la ville, vous sortistes des faux-bourgs par une fausse ruelle que vous aviez fait recognoistre, et pristes vostre chemin vers les troupes de M. le prince.

Environ la pointe du jour, vous rencontrastes le sieur de Falandre, avec sa compagnie de chevaux legers, qui vous cria qui vive ? Ayant respondu, vive le Roy ! vous dit que vous estiez

perdu, si vous passiez outre ; d'autant que les troupes du prince de Condé s'acheminolent en deçà ; mais que vous trouveriez encore derriere, deux ou trois compagnies d'argoulets qui vous en diroient plus de nouvelles, d'autant qu'il ne les avoit apprises que d'eux ; mais il estoit advenu que ces argoulets, ayans descouverts les troupes de M. le prince, s'en estoient fuits dans les forests prochaines et que la premiere chose que vous rencontrastes, fut quatre compagnies de M. le prince, auxquelles ayant respondu vive le Roy, pensant que ce fussent des siens, vous fustes aussi tost environné de tous, le pistolet et l'espée à la main, crians, rendez vous ! et est un miracle de Dieu, que vous et tous les vostres ne fustes tuez cent fois, et bien vous prit de ne perdre le jugement : car encore que vous eussiez recogneu trois des capitaines ; neantmoins vous fistes demonstration d'estre prisonnier, mesme leur baillastes vos grands chevaux, jusques à ce qu'ayant rencontré messieurs de Clermont et de Saint Gelais, et vous estant fait recognoistre à eux, tout vous fut rendu, et mesme vos deux courtaux à malle, où il y avoit douze mille escus en or ; ce qui vous tenoit le plus au cœur.

Deux heures apres vous rencontrastes M. le prince, plus estonné que l'on ne sçauroit dire ; vous soupastes avec luy, n'estant servis que dans des escuelles de bois ; à minuict il vous demanda que c'est que vous vouliez devenir, et vous voyant resolu d'aller trouver le roy de Navarre, et que vous estiez asseuré de passer, il se resolut de se desguiser et passer dans vostre train ; mais vous ne vous en voulustes jamais charger, ny de M. de La Trimouille aussi : ains seulement de messieurs de Fors, du Plessis, de Verac et d'Oradour.

A trois heures de là, M. le prince partit avec douze chevaux, lequel courut toutes les malheureuses fortunes que l'on sçauroit imaginer, sans mort ny prison. Et sur les dix heures, de toutes ses troupes, qui estoient encore de douze cens chevaux, compris les argoulets, l'on n'en eût pas trouvé vingt chevaux ensemble ; la plus grosse troupe estoit la vostre, qui estoit de ce nombre, avec laquelle vous allastes coucher à Chateau-renauld, passant sous le nom de messieurs vos freres, et sous couleur d'aller trouver M. de Joyeuse à Angers. La difficulté estoit de passer la riviere, en quoy M. d'Arpentis vous fit un vray tour d'amy. Vous allastes coucher à Mont-bazon, celant lors vostre nom : en fin M. de Mont-bazon l'aisné, qui mourut depuis, vous envoya tant de fois visiter et donner du vin et des poires de bon chrestien, que vous fustes recogneu ; mais au lieu de vous nuire

comme vous craigniez, il vous offrit tout ce qui se peut dire, et vous fit séjourner là trois jours, qui vous fut un grand plaisir pour laisser reposer vos chevaux, qui commençoient d'estre fatiguez.

Partant de là vous passastes à Châtellerauld et Poitiers, sous le nom de messieurs vos freres, et sous pretexte d'aller trouver M. de Matignon de la part de M. de Joyeuse, publiant, avec apparence de joye, que tous les huguenots estoient défaits, et M. le prince mort ou pris. Il y avoit une telle resjouissance que l'on ne prenoit point garde à vous; et pource que vous aviez fait raser vostre barbe et vos moustaches fort pres, ceux qui vous avoient veus avec de la barbe disoient: « Il ressemble bien à son frere le huguenot. » A Villefaignan vous rencontrastes un regiment de Suisses, qui alloient trouver M. de Matignon, avec lequel vous fistes quatre journées; et pource que vous leur donniez à dejeuner tous les matins, ils eussent au besoin combattu pour vous.

Au passage de la riviere, à Saint Marsaut, vous faillistes d'estre attrappé par un nommé Puiferat; car vous ne faisiez que sortir du bateau, comme il arriva sur l'autre bord avec son regiment, et eustes loisir d'aller gagner la maison de M. de Neufvy.

A Martron vous estant logé aux faux-bourgs, pource qu'il n'y avoit pas de bonne hostellerie dans la ville, Dieu vous inspira d'aller loger en icelle; car la nuit il fut posé un petard à vostre escurie, pour enlever vos chevaux. Le lendemain, comme vous vouliez partir, un homme de la ville vous vint dire: « Monsieur, je ne me veux point enquerir qui vous estes; mais si vous estes huguenot et partez d'icy, vous estes perdu; car il y a une embuscade à deux mille pas d'icy, de cinquante chevaux bien armez, qui, à mon advis, vous attendent. » Vous ne negligastes point cet advis; mais, sans monstrier d'allarme, luy dittes: « Mon amy, je vous remercie, car encore que je ne sois pas huguenot, il ne fait jamais bon tomber dans une embuscade, et est toujours dangereux d'estre pris pour un autre. » Sur cela vous fistes desseller tous vos chevaux et commençastes à crier tout haut, apres vostre escuyer, que le meilleur de vos chevaux estoit encloué et que vous ne vouliez point partir. Apres vous envoyastes reconnoistre l'embuscade, par un de vos gens, desguisé en paysant, qui parloit perigourdin, lequel ayans advisé, ils luy demanderent si vous veniez, mais leur ayant esté respondu que vos chevaux avoient esté dessellez, ils se mirent à renier et dirent qu'il falloit aller repaistre à un bourg qu'ils nom-

merent à deux lieues de là; où les ayant fait suivre, aussi-tost vous montastes à cheval, et apres quelques autres petits dangers, arrivastes en seureté chez M. de Longa et le lendemain à Bergerac, où estoit le roy de Navarre, qui vous embrassa plus de six fois, demeurant bien estonné d'entendre tout le succez de l'entreprise de M. le prince et les particularitez de vostre voyage.

## CHAPITRE XX.

*Conseil tenu par les Protestans. Avis courageux de Rosny. Voyage périlleux du roi de Navarre. Perte de St-Bazile. Départ du roi de Navarre pour la Rochelle.*

[1586] Peu apres vostre arrivée aupres du roy de Navarre, l'on commença à parler de l'armée du mareschal de Matignon, qui venoit assieger Castillon ou Monsegur, ausquels lieux vous vous allastes aussi-tost jetter, ayant mis bonne partie de vostre argent à profit; car vous vous trouvastes environ quarante mille livres, et ne croyons pas que toute la Cour du roy de Navarre ensemble en eut autant. Ledit sieur de Matignon alla au siege de Castes, que le roy de Navarre alla faire lever, par une grande cavalcade, où nous vous avons oüy dire que vous pensastes tous mourir de froid, car cela fut environ le mois de fevrier mil cinq cens octante six, et se passa plusieurs particularitez telles que s'ensuivent.

L'armée de Guyenne, que devoit conduire M. du Mayne, estant assemblée, il vint en icelle, avec telle espouvante d'un chacun, qu'il est impossible de le croire; toutes les villes du party du roy de Navarre se munissoient, luy estoit fort empesché, ne sçachant que devenir, car il sembloit n'y en avoir aucune assez forte, pour éviter la premiere furie d'une si grande armée, et mettre sa personne en seureté; les uns luy conseilloyent d'aller en Languedoc, ce qu'il ne vouloit faire, à cause que c'estoit hors de son gouvernement; les autres de s'en aller par mer en Angleterre pour y trouver assistance d'argent, et avec cela passer en Allemagne pour amener luy mesme l'armée qui se preparoit pour son secours.

Nous avons pris toutes ces particularitez des Memoires du sieur de la Font, qui les avoit recueillis du sieur de Maignan, et que lors qu'il fut question de prendre vostre advis, vous luy dittes: « Sire, pour mon regard tous lieux et tous pays me sont bons, car par tout où vous hazarderez vostre vie et fortune, je dois tenir à honneur et à gloire, de perdre la mienne en vous

« servant ; car, puis que je me suis donné à vous, je dois compter la longueur de ma vie, non par le grand nombre d'années, mais par la quantité de services que je vous rendray ; j'ay, grace à Dieu, de l'argent pour vous suivre par tout le monde ; mais, si vous me permettez de parler librement, je vous diray que vous devez oublier ce qui semble vous retenir en ce pays ; pourvoir à toutes les places d'iceluy de bons gouverneurs et des autres choses necessaires pour leur defence autant qu'il vous sera possible ; laisser un lieutenant de qualité sur le tout, pour oster les jalousies du commandement ; voir le chemin que tiendra M. du Mayne ; considerer quels seront les premiers desseins, et puis prendre une bonne troupe facile à exploitter chemin, et vous retirer à la Rochelle ; car c'est une suffisante retraite pour la seureté de vostre personne. Ce ne sera point vous enfuyr, au contraire vous approcher de Paris, et estre en lieu commode pour vivre et tirer des deniers et commoditez de la mer, et pour passer aux pays estrangers toutes les fois qu'il vous plaira, qui ne sera neantmoins jamais mon opinion ; car vous devez avoir un jour trop bonne part à la France pour la quitter de gayeté de cœur ; par ce moyen vous ferez quatre fortes testes à vostre party : l'une par vous mesme et M. le prince à la Rochelle et aux environs ; car vostre personne estant là, vous estendrez vos limites : l'autre par M. de Mont-morency en Languedoc ; l'autre par M. de Lesdiguiere en Dauphiné ; et l'autre par M. de Thurenne en Guyenne. Et puis, vostre armée d'estrangers venant à la traverse, si elle est bien conduite, tout cela donnera bien à penser à ceux qui rendent vostre ruine si facile. »

Sur ce discours le Roy vous dit : « Je suis bien aise de vous avoir entendu, il y a du temps pour se resoudre à tout cela, et M. du Mayne n'est pas si mauvais garçon, ny si disposé, qu'il m'empesche de me pourmener par la Guyenne. » Tellement que, le dés lendemain, il resolut de faire un voyage en Bearn, tant pour donner ordre à quelques affaires, que de temps en temps il avoit remises à sa venue en ce pays-là, que pour visiter madame Catherine, sa sœur, où il ne séjourna que huit jours,

A son retour à Nerac il eut plusieurs avis que les armées de M. du Mayne et de M. le mareschal de Matignon s'estans jointes, ils avoient fait border toute la riviere de Garonne à leurs gens de guerre, et mis des gardes aux principaux passages d'icelle, pour essayer de l'attraper en repassant, le bruit ayant desja couru qu'il vouloit aller à Bergerac pour s'acheminer de là vers le Poictou et la

Rochelle, afin de s'approcher de la mer et de la riviere de Loire, et user de l'un et de l'autre selon que ses affaires et le progres de son armée estrangere le pourroient requerir, auquel lieu de Nerac ayant séjourne deux jours seulement, il en partit au matin à l'aube du jour, ayant auparavant publié qu'il vouloit aller à Leytoure, n'ayant, pour tous gens de guerre, qu'environ cent hommes armez et autant d'harquebustiers à cheval de ses deux gardes, et prit le chemin de Barbaste comme s'il eust voulu aller à Chastel-Jaloux, puis tournant vers Damasan il y séjourna environ une heure pour donner de l'avoyne aux chevaux, et boire chacun un coup.

Et voulant partir de là, il choisit vingt d'entre vous autres messieurs, des mieux montez et armez et qu'il tenoit des plus resolus aux perils, et autant de soldats de ses gardes sans bagage et fort peu de valets, et baillant la conduite du surplus, à M. de Lons, son premier escuyer, et au sieur de la Roque, il prit son chemin tout ainsi que s'il eust voulu tirer derechef vers Chastel-Jaloux, marchant à travers des lieges et des brandes, desquels l'exercice de la chasse luy avoit enseigné tous les sentiers, tours et detours, puis, comme il eut fait une bonne demi lieuë, il tourna tout court à main gauche et s'en alla gaigner Caumont, où il repust et dormit environ trois heures ; passa la riviere comme le jour se fermoit et marcha toute la nuit quasi à travers de tous les quartiers de l'armée ennemie, voire alla passer sur le bord des contr'escarpes de Marmande, en tous lesquels lieux vous entendistes forces, qui va là, des sentinelles ; car vous estiez l'un des vingts que le Roy avoit choisis, mais il ne sortit rien apres vous ; puis ; prenant le chemin vers la Sauvetat, d'Aimet et Duras, fit si bonne diligence qu'il arriva à deux heures de jour à Saincte Foy ; auquel lieu semblablement se rendirent, sur le soir mesme, tous ceux qui estoient demeurez derriere avec vos bagages, sans qu'il eust esté fait perte d'un seul valet, ny d'un cheval, dequoy M. du Mayne ayant eu advis certain, il fut en extrême colere ; mais voyant que c'estoit une chose faite, où il n'y avoit plus de remede, il se resolut d'aller assieger Montignac le Comte, où le capitaine Roux et le sergent More firent des merveilles de se bien defendre au commencement ; mais la place estant foible et mal fournie d'hommes et de munitions, ils se rendirent à honorable composition qui leur fut fort bien gardée ; ne disant rien davantage de ce siege, pource que vous n'y eustes nulle part.

De Montignac, M. du Mayne s'en alla attaquer la ville de Saint Basile sur Garonne, dans

laquelle, quelques jours auparavant, le roy de Navarre avoit envoyé, pour y commander en cas de siege, le sieur Despueilles, gentil-homme de bonne qualité, estimé fort vaillant et grandement expérimenté pour la défense des places assiegées, auquel il bailla trois cens harquebussiers et trente gentils-hommes de sa maison, pour l'assister et apprendre le mestier sous luy. Or pource qu'il estoit allié de la maison de Courtenay, dont estoit madame vostre femme, et qu'à cette occasion il recherchoit fort vostre amitié, vous importunastes tant le Roy, qu'après plusieurs refus, il vous nomma entre les trente qu'il avoit destinez pour aller avec luy, et ne fut possible de vous en divertir, quelques remontrances que vous sceussent faire vos parens et vos amys, alleguans que cette place n'estoit nullement propre pour gagner gloire ny honneur; mais au contraire de telle qualité qu'il en faudroit sortir par capitulation honteuse, ou user de défense perilleuse. Aussi lors que vous y fustes arrivez et que vous l'eustes bien visitée, il n'y en eut un seul de vous qui eust tant soit peu de sens qui ne la jugeast encore pire que l'on ne vous l'avoit faite, d'autant qu'elle n'avoit pour murailles que les maisons des habitans, la plupart desquelles n'estoient que de bois et de bauge et de tapi, et pour les autres choses necessaires à sa defence, si mal garnie d'armes, vivres, munitions de guerre, outils et instrumens à travailler, qu'il n'y avoit pas apparence d'y faire longue resistance. Neantmoins tous vous autres gentils-hommes fistes bonne mine, de crainte d'effrayer les habitans et les soldats, vous encourageans à travailler à l'envy chacun en son quartier, en la plupart desquels, et sur tout au vostre, où vous nous faisiez tous employer avec tous vos valets, et vous meame y mettiez les mains, il fut fait de si profonds retranchemens, larges et hautes terrasses, que nonobstant la furieuse batterie qui fut faite et les ruines des bestimens qui volloient par esclats de tous costez, car le canon transperçoit les maisons, voire traversoit la ville d'une extremité à l'autre, vous demeuriez à couvert en toute assurance, et partant inietiez tousjours à soustenir un assaut avant que de vouloir entendre à parlementer.

Mais M. Despueilles, soit que son grand jugement et sa longue experience luy fissent mieux recognoistre le peril, l'impossibilité d'une suffisante defence ou d'un prompt secours, soit pour autres raisons à vous incoegneues, si tost qu'il vit la breche faite, il pratiqua de ses parens et amys dans l'armée ennemie qui demanderent de parler à luy, lesquels entrèrent dans la ville sur sa foy, et le secoururent si bien manier, intimider les habi-

tans et la plupart des soldats, qu'eux s'offrans de demeurer pour luy en ostage, il sortit dehors, alla trouver M. du Mayne et traita avec luy, sa personne estant en la puissance des ennemis, qui fut une de ses fautes, dont il fut le plus blasmé. Et depuis estant rentré en icelle, il acheva de si bien induire les soldats et les habitans à son advis, que nonobstant l'opposition de tous vous autres qui estiez de la maison du Roy, et tout ce qu'en particulier comme son amy vous luy sceustes dire, vous fustes contraint de suivre la pluralité des voix par un silence plein de despit et de regret de vous estre venu fourrer dans cette place pour en sortir sans combat, de laquelle la capitulation fut d'autant plus blasmée qu'elle se trouva plus avantageuse et plus exactement observée. Les roys et les chefs d'armée, approuvans davantage que l'on sorte des places le baston blanc en la main, apres avoir tenté tous hazards et perils, et s'estre défendus jusqu'à l'extremité, que de s'en revenir avec armes et bagages, tambour battant, enseignes desployées, mesches allumées des deux bouts, balles en bouches et pieces roulantes, et ne s'estre point battus. Aussi trouvastes vous, lorsque vous arrivastes à Bergerac, le roy de Navarre en merveilleuse colere contre tous vous autres de sa maison, principalement jusques à n'en vouloir pas voir un seul, croyant que tout se fust passé de leur advis; mais quand il eut esté informé de la verité, il demeura plus content de vous autres, et tourna tout son couroux contre M. Despueilles, lequel ayant envoyé querir, apres qu'il eust fait la reverence, il luy dit : « Hé! bien, monsieur « Despueilles, qu'avez-vous fait de la place que « je vous avois donnée en garde pour le service « de Dieu, et la conservation des eglises? car je « sçay bien que ces gentils-hommes, que je vous « avois baillez pour acquerir de l'honneur et ap- « prendre le mestier avec vous, n'ont pas esté de « vostre opinion. » A quoy l'autre, tout en furie et mutiné de ce qu'il avoit oüy dire que le Roy l'accusoit de lascheté, luy respondit : « Sire, j'en « ay fait ce que vostre majesté en eut peu faire, « si estant en ma place elle eut rencontré tous « les habitans et la plus grande partie des soldats « entierement bandez contre toute autre resolu- « tion que celle que j'ay prise. » Pardieu, repartit « le Roy, plus irrité qu'auparavant, vous n'avez « que faire de m'alleguer ainsi mal à propos, « et par ma comparaison penser couvrir vostre « faute, que je n'eusse jamais commis une telle « lascheté, sçachant trop bien que ceux de nostre « profession sont obligez de preferer l'honneur à « la vie, et en tout cas je n'eusse jamais fait cette « bestise que de laisser entrer mes ennemis en ma

« place avec une entière liberté de parler à un « chacun, et encore moins me fus-je mis entre « leurs mains pour capituler : et afin que par « vostre exemple les autres soient enseignez à « user de plus de generosité et de prudence, sui- « vez cét exempt des gardes qui vous menera où « vous meritez. » Et en cette sorte, sans luy don- ner loisir de repliquer, il fut mené en prison, de laquelle il sortit huit jours apres, tant à la priere de ses amys et parens, que pour le besoin que le roy de Navarre avoit de se servir de sa troupe. Aussi se voyant avoir trop peu de forces pour opposer à de si grandes armées que celles qu'il avoit sur les bras, lesquelles avoient desja investy Castets, apres qu'il eut jetté ce qu'il pût de munitions et de gens de guerre dans cette place, ensemble dans Monsegur, Castillon, Sainte Foy et Mont-flanquin, pour lesquelles munitionner vous luy prestastes six mille francs, à cause que M. de Bethune, vostre cousin, estoit gouverneur de l'une d'icelles; et ayant laissé M. de Thurenne pour son lieutenant general en Guyenne, afin d'éviter la jalousie des commandemens, et de pourvoir au mieux qu'il luy seroit possible aux accidens non préveus, il partit un matin de Bergerac avec cent chevaux seulement et les deux compagnies de ses gardes, et s'achemina vers Ponts, Sainct Jean d'Angely, et la Rochelle, où il se delibera de faire delà en avant son principal séjour, suivant ce que vous aviez toujours désiré et que luy aviez souvent conseillé.

## CHAPITRE XXI.

*Rosny chargé d'une négociation près de Henri III. Prise de quelques places par le roi de Navarre. Siège et prise de Fontenay.*

Peu de jours apres que le roy de Navarre fut arrivé à la Rochelle, il receut des lettres du Roy pour envoyer quelqu'un de ses principaux serviteurs, afin de traiter avec les députez des quatre cantons protestans des Suisses qui estoient à Paris, et aussi pour entendre de sa Majesté plusieurs autres choses d'importance pour son service et le bien de l'Estat. A quoy faire le roy de Navarre vous destina aussi tost; et avec passeport envoyé en blanc, vous vous acheminastes à la Cour qui estoit à Sainct Maur, ayant avec vous M. de la Marciilliere qui de là devoit essayer de passer en Allemagne vers Clervan et Guित्रy; et vous estant adressé à M. de Ville-Roy, il vous tesmoigna que le Roy avoit un grand contentement du choix que le roy de Navarre avoit fait de vostre personne; vous dis-

nastes chez luy, et le lendemain il vous presenta au Roy. Nous vous avons oüy dire que vous le trouvastes dans son cabinet l'espée au costé, une cappe sur les espaulles, son petit toquet en teste, et un pannier pendu en escharpe au col comme ces vendeurs de fromages, dans lequel il y avoit deux ou trois petits chiens pas plus gros que le poing.

Après que vous eustes fait vostre harangue, le Roy reprit tous les points d'icelle, sans mouvoir ny pieds, ny mains, ny teste, et sembloit comme immobile : et vous dit de plus qu'il falloit que le roy de Navarre s'accomodast à sa volonté, au temps et à la nécessité de ses affaires, et que c'estoit le seul moyen de ruiner la ligue qui ne prenoit autre pretexte pour faire la guerre que sa personne et sa religion, qu'il n'avoit que faire de sa conscience, mais que s'il vouloit aller à la messe, il feroit tomber les armes des mains à toute la ligue. Vous luy respondistes que cela ne profiteroit de rien, d'autant que le Roy de Navarre venant ainsi seul, ne luy apporteroit que de la charge et point de force, et si n'osterait pas le pretexte de ceux de la ligue, mais l'augmenteroit, et leur creance aussi faisant croire au peuple que leurs armes auroient porté ce fruit là, et qu'il falloit achever le reste. Apres plusieurs repliques vous fustes faire la reverence à la Reyne, mere du Roy, qui vous fit fort bonne chere, vous parla fort dignement du roy de Navarre, et comme si elle l'eust bien fort aymé vous offrit de vous faire plaisir, bref vous donna sujet de contentement.

Vous vous en allastes apres à Paris pour traiter avec les députez des quatre cantons, auxquels apres leur avoir fait un fort beau festin et représenté l'estat des affaires, ce que vous sçaviez des intentions du Roy et de la ligue, quels moyens de subsistance avoit le roy de Navarre, et de quel secours il auroit besoin, et avoir eu deux responses assez favorables, vous retournastes trouver le Roy, qui vous reitera ses premiers propos et quasi les mesmes choses que ces messieurs de Lenoncourt, Poigny et Brulart avoient dites, et en fin fut convenu avec le Roy, nonobstant que ce fust contre vostre advis; mais vous en eustes deux commandemens reiterer du roy de Navarre, que les Suisses secourroient le roy de Navarre de vingt mille hommes, dont quatre mille yroient en Dauphiné, et les seize mille le viendroient joindre; mais que si le Roy leur commandoit pour son service contre la ligue, qu'ils seroient tenus de luy obeyr; dont il advint l'inconvenient que nous dirons cy-apres.

Vous sejournaastes en suite de ces traittez seulement huit jours avec madame vostre femme,

laissastes M. de la Marcelliere, qui estoit venu avec vous, à Paris, pour, sous ombre de la continuation des affaires que vous aviez entamées, achever les autres dont il avoit charge touchant l'armée d'Allemagne, et vous en retournastes trouver le roy de Navarre qui vous receut fort bien, et loüa tout haut d'avoir tres-bien negocié.

Peu de jours apres vostre retour, le roy de Navarre, ayant reduit les Rochelois à s'accommoder à ses volonte, et obtenu d'eux tout ce qu'il voudroit d'artillerie pour mener en campagne toutes les fois que bon luy sembleroit, il fit dessein d'elargir ses limites; et pour y parvenir, ayant fait recognoistre Talmont sur le Jard, par Mignon-ville, et Bois du Lys, il bailla trois canons, deux cens chevaux et douze cens hommes de pied à M. de la Trimouille, auquel la place appartenoit en propriété, afin qu'il l'allast assieger, et mit près de luy, vous, Mignon-ville et Fouquerolles, pour luy servir de conseil et de mareschaux de camp; le chasteau fut investy, sans que ceux qui estoient dedans s'y attendissent; car vous trovastes le bourg avec fort peu de gardes, et garny de tous meubles et vivres: en peu de jours vous eustes fait vos approches à l'entour de ce chasteau, l'un des plus mal flanquez qu'il estoit possible, et logé vos pieces qui estoient deux canons et une coulevrine, car ce fut vous qui eustes cette charge particuliere, toutes prestes à faire batterie, et neantmoins voyant l'espaisseur des murailles, il fut trouvé à propos de vous renvoyer par mer à la Rochelle, où il n'y a que pour six heures de chemin, ayant bon vent, afin d'amener encore des poudres; informer le roy de Navarre de l'estat du siege, et le prier de renforcer les assiegeans de quelques gens de pied, d'autant que l'on avoit advis certain que les amis de Maronniere, gouverneur de la place, et investi dedans, assembloient gens de tous costez, et sollicitoient M. de Malicorne à faire le semblable pour la secourir; à quoy ce prince desirant de pourvoir puissamment, à cause de la consequence que tirent apres eux les bons ou mauvais succez des premieres entreprises, il envoya faire levée de deux mille hommes de pied és environs de la Rochelle, Saint Jean, Melle, et Saint Maixant. Puis s'embarqua luy mesme avec tout ce qu'il put rassembler de gens de guerre, tant de pied que de cheval, et fit faire voile vers Talmont, vous ramenant avec luy, durant lequel voyage il fut assailly d'une si furieuse tempeste, que les trois vaisseaux qu'il menoit furent escartez, l'un d'un costé, l'autre de l'autre, et coururent fortune de se perdre plusieurs fois, pendant deux jours que dura cette malace; mais enfin tout

estant venu surgir sans aucune perte dans le Havre de Talmont, les assiegez sçachant l'arrivée du Roy, demanderent à parler sur la chamade qu'il leur fît faire en son nom, disans: qu'ils ne se vouloient rendre qu'entre ses mains, tant à cause de sa qualité de Roy, que de ce qu'il estoit renommé d'estre doux et element, et de garder inviolablement sa foy et sa parole, à quoy ils furent receus et bien traittez. Le Roy visita vostre batterie, et loüa vostre grand travail et l'industrie dont vous aviez usé à bien loger vos pieces.

De Talmont, voyant ses troupes fraisches et de bonne volonté pour n'avoir aucunement paty en ce siege; que les autres gens de guerre qu'il avoit envoyé lever estoient pour la pluspart ensemble; que l'artillerie estoit bien équipée et fournie de bœufs, cordages et munitions necessaires, et que M. de Malicorne, faute d'argent, ne s'estoit pu mettre en campagne; il alla attaquer le chasteau de Chisé, où commandoit un capitaine nommé la Fayolle, avec cent bons hommes, lesquels aussi pour le commencement firent merveilles de se bien défendre, tirans en furie et comme en saluë, sur tout ce qui paroissoit; aussi y en eut il plusieurs des vostres mouchez, avant que de vous pouvoir loger et mettre vos pieces en batterie, à quoy tout le monde mettoit la main, jusqu'au Roy mesme.

Les assiegez avoient une coulevrine avec laquelle ils faisoient de fort bons et avantageux coups, mais bien plustost de loin que de pres, à cause que ne pouvant estre logée que sur le haut d'une grosse tour voustée, ils ne la pouvoient faire plonger en bas, ny dans les tranchées et batteries, et fut fait un coup si estrange, qu'il merite de n'estre pas oublié, qui arriva en cette sorte. Madame seur du roi de Navarre, envoyant un sien maistre d'hostel, du nom duquel vous vous souviendrez mieux que nous, vers luy, pour sçavoir de ses nouvelles, et iceluy s'estant en arrivant arresté assez loing du chasteau, avec quelqu'un de sa cognoissance, et se retournant pour voir arriver des troupes qui entroient en garde, un coup de cette coulevrine fut tiré, duquel le boulet entrant justement par le milieu du fondement de son cheval, vint sortir au beau milieu du poictrail, luy traversant entièrement le corps, demeurant le cheval tout roide mort sur ses quatre pieds, sans se mouvoir, ny tomber de plus de demy quart d'heure apres.

Il arriva encore en ce siege un autre accident, lequel en produisit bien d'autres de plus grande importance; car un certain gentil-homme, dont nul ne scait le nom, venant d'Allemagne de la part de messieurs de Clervan et de Guित्रy, pour

informer amplement le roy de Navarre, de l'estat auquel estoit son armée estrangere, et sçavoir de luy quel chemin ils luy devroient faire tenir : luy estant venu faire la reverence dans les tranchées, apres lui avoir baillé un petit billet, qui estoit cousu dans la ceinture de ses chausses, qui ne contenoit que deux lignes en creance, de laquelle voulant s'acquitter, ayant approché sa bouche contre l'oreille du Roy, comme il eut proferé ces mots : « Sire, messieurs « de Clervan et de Guitry m'ont dépesché de « Heydelberg vers vostre majesté pour luy faire « entendre... » Une harquebusade luy donna par la teste, de laquelle il tomba tout roide mort, sans prononcer une seule parole, tellement que le roy de Navarre demeura aussi incertain de l'estat de son armée, et de ce que ses serviteurs desiroient sçavoir de luy, comme auparavant.

Et a t'on sceu, depuis la défaite d'icelle, que ce gentil-homme venoit pour recevoir un commandement absolu pour vider les disputes et contensions, en quoy estoient tombez tous les plus qualifiez et autorisez en cette armée, sur les diverses routes qu'un chacun d'eux luy vouloit faire prendre. Les uns proposans de luy faire tenir le chemin de Lorraine, pour faire un puissant divertissement des forces de la ligue, et entreprenant la conquête d'icelle. Les autres vouloient que l'on prist la source de Loire, pour entrer dans les provinces de Bourbonnois, Limagne, Berry et Poictou, et par icelle joindre le roy de Navarre; les autres, à quoy inclinoient messieurs de Mont-morency et de Chastillon, estimoient plus à propos de couler le long du Roane, et descendre en Languedoc, pour essayer de s'en rendre les maistres absolus et des autres provinces voisines, pour là se cantonner, en cas d'une dissipation du royaume que l'audace de ceux de la ligue et la faineantise du Roy faisoient sembler fort prochaine; et les autres, qui fut le pire de tous, de venir dans le gras pays de Beause, où tout fut dissipé; et peut-estre que sans cette mal-heureuse harquebusade qui empescha les advis donnez et à donner, que les choses eussent succédé avec plus de bonne fortune, tant par de foibles moyens et accidens en apparence, les decrets du ciel s'acheminent à leur fin.

Trois jours apres la Fayolle, gouverneur de Chisé, n'oyant point parler de secours, et plusieurs choses venans à luy manquer, qu'il n'eut jamais (ny tout autre qui n'a point passé par telles expériences) creu pouvoir estre du tout necessaires pour soustenir un siege, et sur tout des chirurgiens, instrumens et drogues à eux necessaires, du linge, de la chandelle, des ar-

muriers, du charbon, des moulins et des fours, il entra en capitulation, laquelle fut observée en tous ses points.

De Chisé, le roy de Navarre envoya investir un autre chasteau nommé Sasay, qui fut pris deux jours apres en parlementant, d'autant que tout le gazon qui revestoit quelques petits espérons que l'on avoit faits à cette place estant tombé, les fassines que l'on avoit mises pour tenir la terre paroissans dehors, les soldats s'en servirent pour monter dessus.

Ces petites prosperitez enflèrent le courage d'un chacun, et grossirent de sorte les troupes (plusieurs soldats, mesme du party contraire, se venans rengier en icelles), que le Roy prit resolution d'aller attaquer la ville et chasteau de Saint Maixant, sur l'advis qu'il receut que les habitans avoient refusé la garnison que M. de Malicorne leur avoit voulu envoyer, tellement que la place ayant esté investie un matin à la pointe du jour, et dans le lendemain l'artillerie, composée de trois canons, la coulevrine de Chisé et deux bastardes prises à Sasay, ayant esté logées dans ses platte-formes, sçavoir : les trois canons dont vous eustes la charge, sur le haut de la prée pour battre les murailles du costé des tanneries, et la coulevrine et les deux bastardes sur tout le haut de la montagne pour battre du long de la breche en courtine; aux premieres vollées de toutes lesquelles pieces, les habitans (qui ne s'estoient à rien moins attendu qu'à un siege, et avoient les esprits et les intentions portées plutôt à trafiquer et commercer avec tous les deux partis, qu'à guerroyer contre aucun) s'estans effrayez, ils entrèrent incontinent en capitulation qui fut autant avantageuse et aussi bien observée qu'ils le sceurent desirer. Aussi les logis y ayans esté faicts par les mareschaux des logis du Roy, il entra dans la ville, luy, toute sa Cour et les gens de guerre qu'il destina pour la garde d'icelle, tout ainsi que si elle n'eust point esté conquise par les armes, toutes les boutiques y estans trouvées ouvertes, et tous les hommes, femmes et enfans espandus aux portes et par les ruës, crians vive le Roy, et enseignans leurs logis à ceux qu'ils sçavoient estre leurs hostes, lesquels ne leur firent aucun desordre, ny prindrent rien sans payer, la ville s'estant volontairement cottisée pour le payement de la garnison, durant deux mois.

Saint Maixant estant ainsi pris, et un si bon ordre estably que chacun estoit content; le Roy, sçachant que M. le prince et M. de la Rochefoucault, qu'il avoit faict coronel de son infanterie; le venoient joindre avec deux cens chevaux et quinze cens hommes de pied, bien armez, et



ceux de la Rochelle l'ayant de nouveau assuré de luy fournir encore toute l'artillerie et les poudres dont il auroit besoin, moyennant que ce fust pour prendre Fontenay; il se résolut au siege de ceste ville, qui est la seconde du Poictou en richesses, fertilité de pays et commoditez pour le trafic de la Rochelle, encore qu'il y eut bonne et forte garnison, tant de cavalerie que d'infanterie, et un gouverneur fort estimé, nommé, ce nous semble, Roussiere; lequel ayant entrepris, à cause du grand nombre de gens de guerre qu'il avoit, de garder non seulement la ville, mais aussi les faux-bourgs Desloges qui sont deux fois aussi grands et riches que la ville, et qui de longue main avoient esté fossoyez et retranchez.

Ils furent attaquez une nuit fort noire par les deux costez de la prée et par la teste en mesme temps. Le roy de Navarre avoit ordonné quarante gentils-hommes de sa maison, du nombre desquels vous fustes, pour donner avec le comte de la Roche-foucault, qui, comme coronel, avoit la charge de l'attaquement, avec lequel vous combatistes deux heures, durant les barricades de la teste du faux-bourg, desquelles vous estans approchez cinq ou six qui marchiez ensemble des premiers, chacun deux pistolets à la ceinture et une hallebarde au poing, et vous estiez donnez parole de ne vous abandonner point. Il nous semble que Dangeau, Vaubrot, Avantigny, Challandeau, Fuqueres, Brasseuses et le Chesne en estoient; voulans franchir et renverser une barricade, à cela aydez de vos hallebardes, ceux qui les défendoient estans venus aux mains, vous fustes repoussez par trois fois, à coups de piques et de hallebardes, et vous, Vaubrot et Avantigny, vous estans attachez à une grande cave à vin et opiniâtres à la renverser, vous fistes tomber sur vous cinq ou six barriques, remplies de fumier, dessous lesquelles vous fustes tous trois embarrassez, et eusmes toutes les peines du monde à vous en retirer. Cependant ceux qui donnoient par les costez ayans forcé deux barricades, et ayant entré par icelles dans les plus prochaines et communes maisons commencèrent à crier dedans; ce qu'entendu par ceux qui défendoient la teste, ils commencèrent à se retirer, craignans que l'on leur coupast le chemin de la ville; aussi furent ils suivis de si pres, que pour se garantir que vous n'entrassiez pesle-mesle avec eux dans la ville, ils furent contrains de mettre le feu à deux ou trois maisons des plus prochaines de la porte, et à un grand tas de pieces de bois, de fagots et poinçons que l'on avoit mis au milieu de la rue, pensant en faire des barricades, si le loisir leur enquist esté donné; la flamme du feu vous empes-

cha de passer, donnant loisir à ceux qui se retiroient, de rentrer dans la ville, de lever les ponts, fermer les portes, et de garnir le portail et les courtines d'arquebusiers.

Ceste soudaine et non attendue prise de ces grands faux-bourgs apporta de grandes commoditez, tant pour les logemens que pour l'abondance de vivres et denrées qui s'y trouverent; car le gouverneur n'avoit pas voulu que les habitans en entrans portassent rien. Le roy de Navarre fut logé dans une grande maison au milieu du faux-bourg, de laquelle aussi bien que de toutes les autres, la sortie et l'entrée estoient fort perilleuses, d'autant que le portail de la ville commandoit quasi tout du long de la grande rue, et la ville par le dehors des maisons, du costé des prez; aussi ne se passoit il gueres d'heures qu'il n'y en eust quelqu'un de mouché, du nombre desquels vous eussiez esté sans vostre valet de chambre Liberge, lequel se tenant fort prés de vous, receut l'arquebusade, qui vous venoit donner dans la teste, dans vostre casque qu'il portoit haut à la main; laquelle neantmoins ne fit que blanchir dessus; mais si elle fut parvenuë jusqu'à vostre personne, elle ne vous eust pas, à nostre advis, trouvé la peau si dure, et l'eust plutost rougie que blanchie.

Cet accident vous fit aussi tost faire tendre une corde d'une maison à l'autre, à travers la rue, à l'endroit du logis du Roy, sur laquelle vous fistes mettre des linceuls, ce qui fut apres pratiqué par tout. Le roy de Navarre voulut aussi bien que les autres avoir son quartier d'attaquement, qu'il choisit au bastion, appelé des *Dames*, auquel il vous employa, tant aux batteries qu'aux trenchées et mines, où vous fistes des merveilles en grandeur et assiduité de travail; car vous mettiez vous mesme la main au pic, à la pioche, et au louchet; beuviez, mangeiez et couchiez dans les trenchées, sans en estre, tant que le siege dura, sorty que deux fois, l'une pour aller changer de chemise et d'habit, pource que les vostres estoient tous terre, et l'autre pour entrer en garde à cheval, une fois que l'on eut un advis qui contenoit pour certain qu'il se preparoit du secours pour jeter des gens de guerre, de la poudre et de la mesche dans la ville: car le Roy fit quasi monter toute sa cavalerie à cheval, et les posa en garde luy mesme, les uns sur une advenue, les autres sur une autre, et nous souvient qu'il vous mit en garde avec vingt hommes, bien montez et armez, à un guay de la riviere, qui passe le long de la prée, que l'on avoit laissé seul pour le passage, tous les autres ayans esté rompus et retranchez; auquel lieu il vous arriva un accident dont nous

vous ferons ressouvenir , pource qu'il y eut dequoy rire, lors que vous en fistes le conte au roy de Navarre.

Ayant donc esté posé en garde à ce guay, un soir, qui fut suivy d'une nuit fort noire; comme se vint sur la minuict, vous entendistes, comme chose encore esloignée, une espece de cliquetis d'armes, et raisonnement de trac de chevaux, qui sembloient s'acheminer droit au guay que vous gardiez; dequoy ne pouvant faire jugement certain par le benefice des yeux, à cause de la trop epaisse obscurité, vous mistes vos vingt chevaux en ordre, en deux bandes, de dix chacune sur le bord du passage, avec le pistolet au poing, à dessein de combattre tout ce qui se presenteroit, et de ne tirer qu'en touchant, ayant donné charge à un des vostres qu'aussi-tost qu'il vous verroit au combat, il s'en allast au galop en advertir le Roy, et en passant les corps de gardes, et pour cet effet luy donnastes le mot. Ce bruit donc de cliquetis et de trac, et marcher de chevaux, continuant tousjours de la mesme façon, et s'augmentant à mesure qu'il s'avançoit, vous fustes tous ébahis, qu'il cessa du tout lors qu'il fut, selon le jugement que vous en pouviez faire, à quelque deux cens pas du guay de la riviere, tout ainsi que si ceux qui le faisoient eussent escouté et recognu quelque chose; puis tout à coup ce mesme bruit commençant plus impetueusement qu'auparavant, et tout ainsi que s'il y eut eu quantité de chevaux et gens armez dessus qui vinssent droit à vous au grand galop, pour passer le guay de force, et de fait s'estans tous jettez de furie dedans l'eau, nul de vous ne douta plus que ce ne fussent ennemis, et qu'il n'en fallut venir aux mains, jusques à ce qu'estant quasi teste à teste de vos chevaux, vous apperceustes qu'il n'y avoit point d'hommes sur ceux-là, et enfin recongneustes que ce n'estoit autre chose, sinon quelque nombre de chevaux et de cavales entravez de fer que l'on laissoit paistre à l'abandon dans ces grandes prairies, que l'amour, la gailhardise et le libertinage faisoient ainsi volter, panader et courir les apres les autres, et en cette maniere fut vostre allarme convertie en esclats de rire, bien ayse neantmoins que vous ne l'eussiez point donnée aux corps de gardes, ny au Roy.

Il se fit durant ce siege divers attaquemens et autres factions guerrieres, dont nous laissons le recit aux historiens, pource que nous n'avons point appris qu'il vous y soit rien arrivé digne de remarque, vostre principal soin et occupation estant aux logemens et batteries des pieces d'artilleries, en laquelle charge le roy de Navarre jugea dès lors que vous seriez un jour des plus

entendus. Et nous contenterons de dire que le Roy, estant tousjours dans les tranchées, et travaillant luy mesme du pic et de la pioche avec tous vous autres Messieurs, pour avancer les logemens dans les douves du fossé, du costé de la ville, vous y usates tous de telle diligence et assiduité, à cause de la presence du maistre, qu'en fin luy estant dans le trou il commença le premier à entendre le murmure des voix de ceux de dedans, ausquels il se mit à parler, voire mesme à se nommer, dequoy les autres estonnez, ils entrerent en parlement, et luy seul fit avec eux la capitulation, de laquelle ils dirent ne vouloir rien mettre par escrit, ny demander des ostages, mais se fier entierement en sa foy et en sa parole qu'ils sçavoient bien estre inviolable : dequoy ce brave courage se trouva tellement touché qu'il accorda tant aux gens de guerre qu'aux habitans quasi tout ce qu'ils voulurent demander, et le leur fit observer loyaument, traittant ceux de la ville tout ainsi que si elle n'eust point esté prise par siege.

Le nom desquels, afin d'entre-mesler tousjours nos memoires de quelques contes pour vous apprester à rire, nous fait souvenir de celui qui vous fut faict, en notre presence, d'une pauvre femme; laquelle ayant tué le matin, dont la capitulation fut arrestée sur le midy, un pourceau fort gras qu'elle avoit, des plus grands qu'il estoit possible de voir, et craignant que les hostes qu'elle pourroit avoir ne le vendissent ou le mangeassent, elle voulut essayer de le faire transporter hors la ville en une maison de ses amys, qui estoient du party du roy de Navarre, et pour y parvenir sans soupçon, ayant bien lié ce pourceau de cordes, le plus à la ressemblance du corps d'un homme qu'il luy fut possible, elle l'enveloppa de linceuls, tout ainsi que si c'eust esté un corps mort; luy mit une croix dessus, et le posa sur un grand ais qu'elle mit sur deux treteaux. Ses hostes entrans dans la maison, elle leur dit, faisant la pleureuse, que c'estoit son pauvre mary qui avoit esté tué; qu'elle les prioit de trouver bon qu'elle le pût aller faire enterrer au grand cimetiere qui est hors de la ville; ce qui luy ayant esté accordé, elle envoya chercher quatre hommes pour le porter, et deux prestres pour assister à l'enterrement, et ainsi eux chantans et elle pleurant, pour le pauvre pourceau, il fut inhumé en terre sainte, aspergé d'eau beniste, et la fosse bien couverte de buyts; et la nuit estant arrivée, comme cette femme avec quelques hommes et femmes, ausquels elle s'estoit decouverte de son dessein, estoient apres à deterrer ce pauvre corps de pourceau, ils furent decouverts par

des soldats, estans en sentinelle, lesquels voyans ces gens fouiller en terre, creurent que ce fut or, argent et autres richesses que l'on eust là cachées; et ayans chassé tous ceux qui fouilloient en ce lieu, ils acheverent ainsi de deterrer monsieur le porc, pour lequel il y eut bien le lendemain des risées, lors que les prestres en conterent toute l'histoire, la femme s'en estant confessée à l'un d'eux, qui fut toujours depuis appelé le chappellain du goret.

Le roy de Navarre ayant estably les ordres necessaires pour la conservation de la ville et des habitans de Fontenay, et pourveu le sieur de la Boulaye du gouvernement, il s'en alla à l'abbaye de Maillezais, de laquelle recognoissant la scituation avantageuse, il se resolut d'en faire une forte place, et dès l'heure commença d'en faire luy mesme le dessein, vous appelant pour luy en donner vostre advis, sçachant bien que vous aviez étudié aux mathematiques, et vous plaisiez fort à faire des cartes, tirer des plants de places et à designer des fortifications. Un parent de M. de la Boulaye, nommé, ce me semble, d'Availles, y fut mis pour gouverneur.

De Maillezais le roy de Navarre s'en alla vers Mauleon avec son armée, pour l'attaquer, duquel siege et prise nous ne dirons rien, non plus que la surprise que M. de Genevois fit du chasteau de la Garnache sur sa propre mere, ny de ce qu'en luy pensant encore excroquer Beauvais sur mer où elle s'estoit retirée, elle mesme le prit et le retint long-temps prisonnier, d'autant que vous n'eustes aucune part en nulle de ces trois factions.

## CHAPITRE XXII.

*Séjour de Rosny dans sa famille qu'il préserve de la peste. Négociation de Catherine de Médicis avec le roi de Navarre. Le duc de Joyeuse chargé du commandement de l'armée de Henri III.*

Nous vous ramentevrons comme dès le partement de Maillezais, suivant ce qui en est dit au chapitre precedent, vous, ayant demandé congé au roy de Navarre, pour, sous la faveur d'un passe-port que l'on vous avoit envoyé de la Cour, aller faire un voyage chez vous à Rosny (duquel vous et les autres, qui lirez ces Memoires, nous permettrez de vous reciter quelques particularitez, encore que ce ne soit pas affaires d'Estat ny de guerre; mais simplement domestiques, voire des plus basses, car c'est aussi plutost vostre vie qu'une histoire que nous avons entreprise de vous représenter), auquel lieu de

Rosny madame vostre femme faisant sa residence, en vertu des prolongations que vous aviez obtenües du Roy, lors que vous le fustes trouver de la part du roy de Navarre à Saint Maur, il y avoit eu une telle peste que la pluspart des habitans du bourg en estoient morts, et dans le chasteau, une des damoiselles, une femme de chambre, un page, un laquais et un cuisinier de madame vostre femme, et vous avoit on mandé qu'elle avoit esté deux jours et deux nuicts dans la foret de Rosny, sans avoir osé prendre ny pû trouver autre retraite ny couvert que son carrosse, pour boire, manger et dormir, tant chacun faisoit difficulté de luy ouvrir sa porte.

Neantmoins à vostre arrivée vous la trouvastes logée en un chasteau nommé Huets, que madame de Compagnac, vostre tante, à laquelle il appartenoit, luy avoit fait prester, n'ayant, pour tout train, qu'une damoiselle, une chambriere, un cocher et un laquais, duquel lieu elle vous fit refuser les portes par plusieurs fois, vous priant d'une fenestre, les mains jointes et les larmes aux yeux, de ne la vouloir point approcher d'un mois; n'y ayant nulle apparence de souffrir que vous, venant d'un bon air, entrassiez parmy eux tous, qui venoient d'un lieu tant pestiféré; mais, nonobstant toutes ces allegations, vostre amour surmontant ces raisons et toute autre prudence, vous la voulustes voir, et d'abord luy allastes sauter au col la baisant et embrassant plusieurs fois sans entrer en aucune apprehension. Vous n'aviez mené avec vous, de vos gentils-hommes, que le sieur de Bois-brueil et l'un de nous quatre, et pour le reste qu'un page et un valet de chambre, avec lesquels vous demeurastes environ un mois tous seuls, sans estre visitez de creature vivante, tant chacun fuyoit vostre maison comme pestiférée; et neantmoins, à ce que nous vous avons souvent ouy dire depuis, vous n'avez jamais fait une vie si douce ny moins ennuyeuse que cette solitude, où vous passiez le temps à tracer des plans des maisons et cartes du pays, à faire des extraits de livres, à labourer, planter et greffer en un jardin qu'il y avoit leans, à faire la pipée dans le parc, à tirer de l'harquebuse à quantité d'oyseaux, lievres et lapins qu'il y avoit en iceluy, à cueillir vos salades, les herbes de vos potages et des champignons, columelles et diablettes que vous acomodiez vous mesme, mettant d'ordinaire la main à la cuisine faute de cuisiniers; à jouer aux cartes, aux dames, aux eschets et aux quilles, et à caresser madame vostre femme, qui estoit tres-belle, et avoit un des plus gentils esprits qu'il estoit possible de voir.

De ce lieu vous envoyastes celui de nous quatre qui estoit avec vous, à Paris, chez les marchands Lustin, Philippes et Dohain qui vous devoient encore vingt-quatre mille livres du reste de vos bois de haute fustaye, desquels il ne pût tirer que dix mille livres, ne les osant contraindre pour le surplus, de peur qu'ils ne fissent saisir vostre argent par le Roy, comme tous vos autres biens.

A son retour voyant que toute apparence de danger de peste estoit hors du chasteau de Rosny, où l'on avoit osté les meubles des lieux ausquels il y avoit eu de la peste, et bien évanté et flambé les logemens, vous y remenastes madame vostre femme; puis ayant appris que M. de Joyeuse s'acheminait en Poictou avec des forces, pour empêcher la continuation des progrès du roy de Navarre qui, depuis peu, avoit encore failly deux entreprises, l'une sur Niort et l'autre sur Parthenay, le contraindre de quitter la campagne, de se retirer dans sa coquille de la Rochelle, ou de l'assiéger en tout autre lieu qu'il se pourroit mettre; vous vous en retournastes en Poictou, trouvastes le Roy à la Rochelle, où il s'en estoit déjà retourné pour adviser et pourvoir à ce qui seroit jugé nécessaire pour la conservation des places qu'il avoit prises, la plupart desquelles il fit raser, ne réservant que Fontenay, Talmont, Maillezais et Saint Maixant, ayant esté dès auparavant menacé par la Reine mere lors des conférences de Coignac, Saint Loris, Saint Maixant, des grandes forces que l'on estoit résolu de luy faire tomber sur les bras, sous la conduite de ce chef, lequel, avec son compagnon, possédoient toute l'affection du Roy et toute autorité dans les affaires du royaume.

Or nous souvient il de vous avoir oüy dire que, pendant le séjour de cette reine aux lieux cy-dessus nommez, ausquels le roy de Navarre vous menoit souvent avec luy, qu'en discourant avec mesdames d'Uze et de Sauve, vers lesquelles le roy vous envoyoit parfois, pour essayer à découvrir quelque chose sous ombre de civilité et courtoisie, sachant que vous aviez amitié particulière et grande confiance avec l'une et l'autre, dont vous sçavez bien les causes sans qu'il soit besoin de les dire; vous leur fistes une fois des plaintes des mauvaises procédures dont usoit cette princesse envers le Roy son gendre, par lesquelles il estoit facile à juger que tout le dessein estoit de l'amuser afin qu'il n'entreprist plus rien, et qu'il fit retarder l'acheminement de son armée estrangere; sur quoy elles vous parlerent assez librement toutes deux ensemble, mais bien plus chacune à part; car lors elles vous

dirent, quasi en mesmes termes : « Voyez-vous, mon fils, car ainsi vous nommoient elles, nous cognoissons tout ce qui se passe de mal autant que vous en sçauriez dire; partant asseurez le roy de Navarre que nous sommes ses tres-humbles servantes; que nous affectionnons sa personne, desirons la prospérité de ses affaires, avons grand déplaisir qu'il ne soit mieux traité, et partant le conseillons nous qu'il ne s'arreste plus à ces belles paroles et promesses qui ne sont qu'autant de vaines esperances que l'on essaye de luy faire concevoir afin de l'amuser, et qu'il sache et tienne pour certain qu'il y a de trop grands desseins formez pour en sortir jamais que l'espée à la main; car sa religion n'est que le prétexte et non la vraie cause des projets faits contre luy. »

Peu de temps donc apres que la Reine mere s'en fut retournée sans avoir rien fait, M. de Joyeuse fit avancer ses troupes, chacun parlant diversement de ce voyage, voyant que le Roy esloignoit ainsi de luy une personne qu'il tesmoignoit toujours luy estre infiniment chere, les uns disans que le dessein du Roy estoit de procurer veritablement la ruine des huguenots, envoyant ainsi contr'eux toute sa puissance et ce qu'il ayroit le plus; les autres que ce n'étoit que pour rabaisser la grande reputation et créance que prenoient les chefs de la ligue parmy les peuples, d'autant qu'ils avoient paru jusques alors estre les seuls qui avoient persécuté les huguenots, en les faisant maintenant attaquer puisamment par ceux qui estoient ses plus particuliers confidens : les autres disoient qu'il esloignoit ce mignon, à cause qu'il luy traversoit quelque nouvelle amitié naissante; les autres qu'il avoit découvert des intelligences de luy avec les chefs de la ligue; et que detestant une telle desloyauté, il eut esté bien aise de sa perte, et pour cet effect luy mettoit-il en teste un ennemy heureux et genereux tout ensemble. Quoy que ce soit dès les premiers mois de l'an 1587, ledit seigneur duc de Joyeuse, avec une belle et grande armée, abondamment pourveuë de toutes choses, et luy, accompagné de tous les principaux seigneurs et plus galands hommes de la Cour, s'achemina en Poictou.

Le roy de Navarre avoit quatre ou cinq regimens sur pied, dont les deux premiers estoient ceux des sieurs de Charbonnières et de Desbories, lesquels il destina pour estre mis en garnison dans la ville de Saint Maixant en cas de siege; et pour éviter qu'ils ne mangeassent les vivres de la place, et les tenir neantmoins tout prêts à jeter dedans lors qu'il en seroit besoin, il les fit loger à la Motte Saint Eloy, apparte-

nant, ce nous semble, à M. de Lansac, luy ordonnant de s'asseurer du chasteau; mais à la priere du sieur de Saint Gelais, qui estoit parent du seigneur d'iceluy, et qui leur en respon-dit, ils n'y mirent personne dedans.

Le roy de Navarre fit en ce mesme temps une calvacade audit Saint Maixant pour le fournir de vivres, poudres, mesches, et autres munitions; et vous avons oüy dire, d'autant que vous nous aviez laissez à la Rochelle, que vous n'aviez jamais fait une telle calvacade: car vous partistes de la Rochelle et y revintes sans repaistre, ny reposer qu'une seule heure; le roy de Navarre se trouvant tant oppressé de sommeil sur la fin de ceste corvée qu'il ne se pouvoit plus tenir à cheval, il fut contraint de se mettre dans une charrette à bœufs qu'il rencontra la nuit allant à la Rochelle, où au bout de trois ou quatre jours il eut nouvelle de la défaite de ses deux regimens logez dans la Motte Saint Eloy, où il fut exercé des cruantez inouïes, ce malheur estant arrivé par faute de s'estre logez dans le chasteau, dans lequel on logea des hommes peu à peu par lesquels ils furent les premiers attaquez.

M. de Joyeuse prit Saint Maixant, Maillezais et quelques autres places, et défit encore quelques compagnies du roy de Navarre, et entr'autres celles du sieur Despeilles, qui estoit logée quasi à la veuë de la Rochelle: desquelles factions guerrieres, nous laisserons les particularitez aux historiens, d'autant que vous n'eustes part en aucunes d'icelles; mais ainsi que ledit sieur de Joyeuse s'en retournoit de Xainte à Niort, après avoir pris Tonne-Charente, le roy de Navarre vous ordonna pour aller à la guerre avec cinquante chevaux que vous choisistes de ceux que vous estimiez vos plus intimes amys, et les plus disposez à l'obeyssance.

Et apres avoir appris des nouvelles certaines du chemin que deliberoit tenir l'armée des ennemis, vous resolutes de ne revenir sans faire quelque chose de signalé; pour à quoy parvenir vous vous allastes mettre dès une heure devant le jour en embuscade, ce nous semble, dans la forest de Benon, par l'orée de laquelle passe le chemin de Xainte à Niort, vous tenans cachez dans le plus espais du bois; et comme il fut assez grand jour, vous fistes monter un homme du pays sur un fort grand chesne, lequel decouvroit la campagne deux ou trois lieües de tous costez, où il n'eust pas esté plus de deux heures, qu'il commença de voir marcher des troupes et en suite peu à peu tout le camp: de ceux qui estoient avec vous, les uns vous disoient: « Re-

« comme desja quelques paysans ont fait, infail-  
« failliblement toute l'armée nous tombera sur  
« les bras, et ayans cinq lieües de retraite, dif-  
« ficilement la pourrons nous faire sans grande  
« perte ou grande honte. » D'autres, comme les  
sieurs d'Avantigny, Fequeres, le jeune Bessais,  
Palcheux, Chalandeau, Ville-pion, Le Chesne,  
Brasseuse, vous disoient: « Chargeons quelques  
« unes de ces premieres troupes qui sont de no-  
« tre portée, et tant esloignées des autres, que  
« nous aurons fait nostre execution avant qu'ils  
« puissent estre secourus, et ayans quelques  
« prisonniers, nous nous retirerons au travers le  
« fort de la forest, où jamais les troupes ne s'em-  
« barrasseront, de crainte d'embuscade; car, par  
« ce moyen, l'on ne nous reprochera pas que  
« nous n'ayons rien fait. »

Vous escoutiez patiemment tous ces advis; mais enfin vous leur dittes: « Messieurs, j'ay  
« souvent oüy dire au Roy qu'il ne faut jamais  
« entreprendre aucune faction guerriere à la teste  
« d'une armée qui marche en ordre, par une  
« campagne rase, large et spacieuse, telle qu'est  
« celle-cy; partant il me semble que, suivant la  
« maxime de nostre maistre, nous devons laisser  
« passer l'armée; car il est impossible qu'à la re-  
« traite quelques paresseux ne nous presentent  
« l'occasion de faire quelque effet, sans trop  
« nous hasarder. » A quoy chacun s'estant ac-  
cordé, vous eustes la patience de voir passer  
toutes les bandes les unes apres les autres, voire  
de les compter vous mesme, car vous voulustes  
monter à l'arbre, et voyant que les dernieres  
marchoient toutes armées et fort serrées, vous  
jugeastes qu'il ne viendroit plus rien apres, et  
que celles-cy estoient ordonnées pour faire la re-  
traite, et partant vous descendistes de l'arbre,  
comme tout désespéré de pouvoir rien entrepren-  
dre qu'avec peril extrême: ce qui vous avoit esté  
expressement défendu par le roy de Navarre.

Desja vous faisiez preparer vos compagnons  
pour reprendre le chemin de la Rochelle, lors  
que celuy qui estoit monté sur l'arbre vous dit  
qu'à une grande lieüe de là, sur le mesme che-  
min qu'avoient tenus les troupes, il en voyoit  
quelqu'une qui ne paroissoit pas grosse, et encore  
une lieüe par de là, une espece de poussiere qui  
en tesmoignoit encore une autre, de laquelle il ne  
pouvoit pas bien juger. Quand la premiere passa,  
qui estoit d'environ soixante chevaux, vous la  
vouliez encore laisser passer, et attendre à char-  
ger sur la derniere; mais ceux qui estoient prés  
de vous, vous importunerent tellement que vous  
attaquastes ce qui se presentoit; laquelle vous  
défistez, en tuastes douze ou quinze, et en em-  
menastes autant de prisonniers, mais tous gens

de peu, les uns armez, les autres sans armes : sur quoy l'alarme se donna aussi-tost, qui vous contraignit de vous retirer dans le fond de la forest; et, quatre heures apres, vous sceustes que la dernière troupe qui devoit passer estoit M. de Joyeuse avec quarante ou cinquante des plus signalez et galands de la Cour; lesquels ayans fait la colation à Surgeres, s'en venoient sur des hacquenées, sans armes, pour regagner les troupes : lors vous pensastes tout desesperer, car c'estoit une défaite infaillible, laquelle, outre la gloire, vous eust mis pour cinq cens mille escus de butin en prisonniers.

A vostre arrivée à la Rochelle tout le monde vous en fit la guerre, et le roy de Navarre mesme, en riant, vous disoit que vous aviez intelligence avec M. de Joyeuse qui avoit vos freres pres de luy : pendant le séjour duquel à Niort, l'un d'eux vint voir le roy de Navarre à la Rochelle, vous le promenastes par tous les remparts et fortifications de la ville, et douze jours apres vous allastes à Niort pour traitter du lieu et des conditions d'un combat qui s'estoit proposé entre les Albanois de Mercure et pareil nombre des Escossois des Ovimes; mais, sur ces entrefaites, M. de Joyeuse eut nouvelles que le Roy avoit pris des jalousies de luy, et que son compétiteur en la faveur luy diminuait la sienne par mauvais offices; et pour y remedier se resolut de faire un voyage en Cour, qu'il pensoit colorer sous le bruit d'aller seulement jusqu'à Mont-resor; et comme il vous en parla vous luy dittes : « Monsieur, je croy que vous irez un peu plus loin, car l'on vous taille de la besogne à la Cour. » Lors il respondit : « Voyez ces huguenots, ils sont si curieux et presumptueux qu'ils pensent à tout sçavoir. » Et se retournant vers un de messieurs vos freres, il luy dit tout bas : « Avez-vous dit mon voyage à vostre frere ? » Lequel luy fit toutes sortes de sermens que non, aussi ne vous en avoit-il point parlé. M. de Joyeuse vous pria de vous en retourner, vous dit que vous estiez trop enquerant, et qu'aussi bien ne permettroit-il point ces combats dont il avoit esté parlé.

Il partit aussi-tost que vous vous en fustes allé à la Rochelle, et dittes au Roy en arrivant : « Sire, il se presente une belle occasion, car M. de Joyeuse est party avec tous les courtisans et la meilleure partie des chefs de toutes les troupes de son armée, laquelle, partant, se retirera en grand desordre et confusion. » Ce que jugeant bien estre indubitable, il rassembla toutes ses garnisons, et avec cinq ou six cens chevaux, et autant d'harquebusiers à cheval, il poursuivit ces troupes desbandées, desquelles

il défit bonne partie, et entr'autres les compagnies mesmes de M. de Joyeuse, celle de Vic, Belle-maniere, Marquis de Rennel, Ronsoy, Pienne et autres. Nous estions avec vous lors que vous donnastes dans leurs quartiers, nous trouvastes les uns au lit, les autres à la table, sans aucune garde.

Le roy de Navarre alla jusques près de la Haye en Tourraine, où il tint ces troupes ennemies assiegées quatre ou cinq jours; et s'il y eut peu temporiser davantage, il les eut fait rendre par famine. Quelques uns de vous autres messieurs passastes l'eau, et trouvastes tous ces soldats espandus par les villages cherchans du pain. M. de Laverdin commandoit à ce reste d'armée, lequel, suivant sa coustume, ne gardoit pas grand ordre. Il fut tué ou pris plus de six cens hommes, ayans tous une grande espouvante, et entr'autres vous donnastes avec six chevaux seulement, dans des hameaux où il y avoit forces soldats qui n'avoient quasi point d'armes, les ayans laissées dans les logis pour mieux piller. Vingt-cinq ou trente se vindrent rendre à vous, desquels vous fistes esteindre toutes les mesches, prendre leurs harquebuses qui estoient sur des lits et des tables, leur ostastes leurs espées, et les fistes lier en faisceaux avec lesdites mesches, puis ayant le tout fait charger sur les espauls de trois ou quatre d'iceux, vous revinstes trouver le roy de Navarre auquel vous dites en arrivant : « Sire, voicy un troupeau de moutons que je vous ameine. » Et marchoiert quelques quarante soldats devant vous, sans espées ny bastons, la plupart se mirent dans vos troupes.

### CHAPITRE XXIII.

*Dangers que court Rosny dans un voyage qu'il fait à Paris. Bataille de Coutras.*

Monsieur le comte de Soissons (1) ayant de long-temps traité avec le roy de Navarre, pour se joindre à son party, s'achemina vers la riviere de Loire, en mesme temps de la desroutte des troupes de M. de Joyeuse dont il a esté parlé cy-dessus, au devant duquel le roy de Navarre envoya des siennes pour lui faciliter son passage aux Rosiers, lesquelles luy donnerent le moyen de faire une entreprise sur le bagage de M. de Mercure (2), et les gens de guerre qui luy servoient d'escorte, lesquels marchoiert, ne se doutans de rien tout du long de la levée, et furent toutes défaites sans presque combattre. Il s'y fit un grand butin où vous gaignastes environ

(1) Charles de Bourbon, frère du prince de Condé.

(2) Le duc de Mercœur.

deux mille escus, tant en argent, chevaux, que meubles et vaisselle; l'un de nous y gaigna deux cens escus.

Auparavant cela vous aviez donné moyen à messieurs vos frères de sortir hors de la Haye en Tourraine, et à eux fait donner passe-port pour se retirer. Eux aussi vous en avoient obtenu un avec lequel vous fustes à Paris voir madame vostre femme, laquelle, sous nom desguisé, sejournoit en cette ville, et y estoit accouchée quasi au temps que ces femmes furent brulées; et est chose estrange que le presche, en un temps si dangereux, s'y continuoît tousjours. Vous y fistes baptiser vostre fils, dont fut parrain M. de Rueres, prisonnier en la conciergerie, et un nommé M. de Chauffaille et sa femme. Il se passa infinis hazards que vous courustes là, lesquels nous obmettons pource que nous n'y estions pas, et qui seroient trop longs à raconter. L'on se mit lors à faire une recherche dans Paris, qui vous obligea d'en desloger seul, sans valet, ny laquais. Vous allastes passer à Ville-preux, et, par un chemin hors de cognoissance, vous vous rendistes à Rosny.

Quelques jours après vous vous en retournastes près du roy de Navarre; vous eustes infinies peines à passer, à cause que vostre passe-port estoit finy et en aviez racourté la datte. Vous trovastes plusieurs compagnies sur les chemins qui s'advançoient pour composer une nouvelle armée à M. de Joyeuse, lequel irrité de ses troupes défaites, se resolut de combattre le roy de Navarre, à quelque prix que ce pût estre.

Après donc qu'il se fut bien fait prescher par les chaires des parroisses de Paris, qui vantaient ses exploits de Poictou à merveilles, les exaltant d'autant plus, que plus ils avoient esté cruels et sanguinaires; amplifians des deux tiers tous ses autres faicts et gestes, avec des paroles si empoullées d'orgueil, qu'il sembloit, à les ouyr parler, que cét homme eut esté destiné du ciel pour la destruction des huguenots: si bien qu'après s'estre fait adorer comme tel, par toute la badaudaille de cette grande ville ou plutost petit monde de Paris, il forma son armée de toutes les meilleures troupes qu'eut le Roy, lequel ne luy refusoit ni hommes, ni argent, et outre cela convia ce qu'il y avoit de plus leste et esclatante noblesse dans la Cour, la priant de le vouloir suivre, non seulement, disoit-il, pour se trouver en une bataille, mais aussi à une victoire certaine et triomphe préparé; puis, ayant conféré particulièrement avec les principaux chefs de la ligue, et pris toutes sortes d'intelligences et bonnes correspondances, avec tout le

party en general, pour l'avancement du dessein qu'ils avoient projeté pour parvenir à une entiere dissipation d'Estat, en laquelle chacun d'eux pût profiter, il s'achemina vers Tours, auquel lieu son beau frere, le duc de Mercure, l'attendoit, suivant le rendez vous qu'il luy en avoit donné quelque temps auparavant; le voyage duquel avoit esté comme un petit exemplaire de ce qui succeda depuis par la défaite de toutes les troupes qui l'accompagnoient et prise de son bagage, ainsi qu'il en a esté parlé cy-devant.

M. de Joyeuse estant arrivé à Poictiers, où il faisoit estat de sejourner huit ou dix jours, afin d'y attendre le reste des troupes qui le suivoient et devoient composer son armée, que le commun populaire nommoit la redoutable, et plusieurs seigneurs et gentils-hommes de la Cour, lesquels estoient demeurez derriere, les uns pour acheter des chevaux et des armes, les autres pour dresser leur equipage, les autres pour trouver de l'argent, les autres pour dire adieu aux belles dames, et les autres pour ne les vouloir abandonner; il receut des advis certains que toutes les bandes des huguenots se rassembloient en diverses provinces, et que le roy de Navarre, avec ce qu'il avoit pû tirer de l'Aunis, Poictou, Anjou, Tourraine et Berry, ayant pris deux canons et une coulevrine à la Rochelle, fort bien équippez et munitionnez, en estoit party pour s'aller joindre avec les autres, et, tous ensemble, s'acheminer au devant de son armée estrangere par les costez de la Guyenne, du Languedoc et du Lyonnais, afin de gagner la source de Loire, joindre tousjours nouvelles troupes en marchant. Cet advisement le fit resoudre de partir promptement de Poictiers, et de suivre, en tous lieux, le roi de Navarre avec ce qu'il avoit desja de gens de guerre, montant à huit mille hommes de pied, et deux mille chevaux, sans attendre le surplus de ses forces; faisant bien estat que le mareschal de Matignon le viendroit bien-tost joindre.

Or, pource que nous ne nous pûmes trouver aupres de vous à la bataille de Coutras, comme nous avons accoustumé de faire en tous les lieux où vostre service le requeroit, ou ausquels il y avoit de l'honneur à gagner; et partant vous nous excuserez si nous obmettons beaucoup de circonstances et de particularitez qui se passèrent devant, durant et après cette bataille; et si mesme nous abregeons celles que quelques uns des vostres nous ont depuis conté vous y estre arrivées; car, remettans toutes ces narrations à ceux qui feront l'histoire entiere, nous nous contenterons de vous ramentevoir que le roy de

Navarre ayant joint à luy messieurs les princes de Condé et comte de Soissons, vicomte de Thurenne, seigneur de la Trimouille, comte de la Roche-foucault et autres seigneurs, avec ce que chacun d'eux avoit pu rassembler de gens de guerre, il s'avança, en partant de Ponts, vers Mont-lieu, Mont-guyon et la Roche-chalais, le jour de devant que M. de Joyeuse eut pris son logement aux environs de Chalais et d'Aubeterre, tellement que le jour suivant il arriva que chacun des deux camps fit un mesme dessein; à sçavoir : de se saisir des guez et passage des rivières de l'Isle et Drone; le premier, afin qu'ayant mis ces rivières entre son ennemy et luy, il poursuivist plus librement son chemin entrepris; et l'autre pour l'empescher de passer, et, par ce moyen, de gagner la rivière de Dordogne, où il sçavoit qu'il estoit si fort, à cause de la quantité de bonnes villes qu'il tenoit sur icelle, qu'il luy seroit impossible de le contraindre à combattre, comme il s'en estoit vanté et en avoit eu expres commandement du Roy; et chacun des deux chefs, estimant que le logis de Coutras seroit grandement avantageux pour ce qu'il voudroit entreprendre, fit aussi tout ce qu'il pensa pouvoir servir à s'en assurer; mais M. de la Trimouille ayant eu cette commission du roy de Navarre avec une troupe de deux cens ou deux cens cinquante chevaux et autant d'harquebusiers à cheval, et trouvant M. de Laverdin en campagne avec ce mesme dessein et beaucoup plus foible que luy, il le contraignit, apres s'estre un peu chamaillez, de luy quitter le logis et de se retirer sur ses pas, pour advenir M. de Joyeuse qu'il avoit esté prévenu.

Le roy de Navarre s'estant donc aussi-tost logé avec toute son armée dans Coutras dont il y en avoit plusieurs au piquet, et desirant de la faire passer la rivière sans embarras, dès le lendemain il ordonna M. de Cler-mont, vous, Bois du Lys et Mignonville, pour faire accommoder les passages, et passer toute la nuit l'artillerie, son cariage et les bagages du camp; à quoy vous travaillastes tous quatre en telle diligence et si grande assiduité, et vous particulièrement, vous fourrant, à tous momens, dans l'eau et dans la bourbe jusqu'aux genoux, que chacun s'estonnoit comment vos corps pouvoient porter tant de peines; et neantmoins tout vostre soin, industrie et diligence, penserent estre plutost dommageables qu'utiles; d'autant que M. de Joyeuse ayant esté adverty de ce dessein, tant par ses espions que par quelques prisonniers que M. de Laverdin luy avoit amenez, et le voulant empescher, à quelque prix que ce pût estre, fit sonner à cheval et battre aux champs

dés les dix heures du soir, et marcher son camp toute la nuit, envoyant devant quelques troupes, pour apprendre des nouvelles du roy de Navarre; lequel en ayant fait autant de son costé, ces batteurs d'estrade se rencontrèrent et se battirent à bon escient avant que de se vouloir retirer, duquel combat nous ne dirons rien, d'autant que vous n'y estiez pas; mais tant y a que le roy de Navarre estant fait certain au retour des siens, par quelques prisonniers qu'ils avoient amenez, que tout le camp marchoit en gros et en diligence, resolu de donner bataille, et qu'il pourroit estre à veuë du sien dès les sept à huit heures du matin, il recognust aussi tost qu'il lui seroit impossible d'avoir fait passer plus de la moitié de ses troupes, avant que d'avoir l'ennemy sur les bras, et partant qu'il valloit beaucoup mieulx se résoudre à la bataille avec toutes ses forces, que de se laisser attaquer par pieces en se retirant; à quoy tous les gens de qualité et les capitaines qui l'assistoient conclurent semblablement; si bien que l'on n'oyoit plus retentir autre voix parmi eux, que *bataille! bataille!* et, en mesme temps, ayant appelé M. de Cler-mont, vous, et Bois du Lys, car quant à Mignonville, qui avoit esté des vostres aux passages, il le voulut retenir pour ordonner les gens de pied, et vous commanda de faire repasser l'artillerie promptement avec son équipage, et la loger au lieu où il vouloit prendre son champ de bataille qu'il vous montra luy mesme, et en vous separant de luy pour aller travailler, avec une chere gaye, et assurance de ne vous esparagner pas, il vous dit, en vous accollant : « Mon amy Rosny, c'est à ce coup qu'il faut faire paroistre vostre esprit et vostre diligence, qui nous est mille fois plus necessaire qu'elle n'estoit hier, à cause que le temps nous presse, et que de l'artillerie bien logée, bien munie et bien exploitée, dépendra en grande partie le gain de la bataille, lequel j'attends de Dieu, puis qu'il est ici question de sa gloire, et que nous combattons pour la conservation du royaume que ces gens-cy veulent dissiper (car M. de Joyeuse estoit ligueux), et mon dessein est de le restablir. »

Cette petite pointe de loange et d'encouragement fut de telle vertu envers vous qu'il eut esté difficile de rien adjoûter aux effets qu'elle fit produire; nonobstant lesquels neantmoins, ny tout ce que messieurs de Cler-mont et Bois du Lys y peurent apporter, si vous fut-il impossible de faire repasser les pieces et munitions pour s'en servir, et de placer tout cela où le roy de Navarre vous avoit commandé, qui estoit une petite elevation de terre fort advantageous, que les



deux armées ne fussent desja rengées en ordre de combat l'une devant l'autre prestes d'en venir aux mains, et n'eust esté la faute que M. de Joyeuse fit, d'avoir mal logé ses pieces à l'abord (car recognoissant que pour estre trop basses elles luy seroient inutiles, il fut contraint de les desplacer et replacer ailleurs, en quoy il fut consommé beaucoup de temps; et si encore tout cela ne luy servit-il de guerres, faute de jugement et d'expérience, et qu'il usoit plustost de furie et de precipitation, tant il desiroit se venger des troupes que le roy de Navarre luy avoit défaites, et satis-faire aux esperances qu'il avoit conceües en luy et données aux autres), celles que vous aviez en charge fussent arrivées trop tard pour le combat : lequel nous ne nous amuserons point à descrire, tant à cause que nous n'y estions pas, que vous n'y eustes quasi nulle part, estant employé à l'artillerie, que pource qu'il a esté décrit amplement par plusieurs, voire peut-estre prolixement par aucuns par complaisance et pour y vouloir faire faire des merveilles à ceux qui les en ont priez, et sont si divers entr'eux qu'il est difficile de juger de quel costé est la verité; mais tous demeurent bien d'accord, que les deux canons et la coulevrine que que M. de Cler-mont, vous, et Bois du Lys aviez en charge, firent des merveilles, ne tirans une seule volée qu'elle ne fit des rues dans les escadrons et bataillons du camp ennemy, qui estoient jonchées de douze, quinze, vingt, et quelque-fois jusqu'à vingt-cinq corps d'hommes et chevaux, si bien que les ennemis, lesquels, pour avoir d'abord renversé les deux troupes où commandoient messieurs de Thurenne et de la Trimouille, avoient desja crié victoire; ne pouvans plus souffrir une destruction de pied coy, furent contrains de venir au combat en desordre, et sans attendre le commandement : ils furent mis en route par les trois escadrons du roy de Navarre, du prince de Condé, et du comte de Soissons, chacun desquels par les coups qu'il donna, et ceux dont ses armes estoient martelées, tesmogna suffisamment la grandeur de son courage, et que ces braves princes en telles occasions ne s'espargnoient non plus que des simples soldats.

Si tost que vous vistes les ennemis en desroute, et que, sans doute, la bataille estant gagnée, vous n'aviez plus que faire au canon, vous montastes sur vostre grand cheval d'Espagne bay, que vous aviez eu de M. de la Roche-guyon, le-lequel M. de Bois-breuil vous faisoit tenir prest derriere les pieces, pour essayer d'apprendre des nouvelles de messieurs vos freres, que vous cuidoies estre avec M. de Joyeuse, et sçavoir aussi

en quel estat le roy de Navarre estoit, lequel vous rencontrastes par de là la Garenne, l'espée toute sanglante au poing poursuivant la victoire : et si tost qu'il vous apperceut vous cria : « Et bien, mon amy, c'est à ce coup que nous serons perdre l'opinion que l'on avoit prise, que les huguenots ne gaignoient jamais de bataille; car en cette cy la victoire y est toute entiere, ne paroissant aucun ennemy qui soit mort ou pris, ou en fuite, et faut confesser qu'à Dieu seul en appartient la gloire, car ils estoient deux fois aussi forts que nous; et n'il en faut attribuer quelque chose aux hommes, croyez que M. de Cler-mont, vous, et Bois du Lys, y devez avoir bonne part, car vos pieces ont fait merveilles : aussi vos promets-je, que je n'oublieray jamais le service que vous m'y avez rendu. » Le lendemain de la bataille (1), comme vous estiez dans la salle, vous vistes que sur une table l'on avoit mis les corps, tous nuds et seulement couverts d'un linceul, de messieurs de Joyeuse et de Sainet Sauveur, son frere.

#### CHAPITRE XXIV.

*Suite de la bataille de Coutras. Défaite de l'armée allemande qui venoit secourir le roi de Navarre. Voyage de Rosny.*

Les rumeurs du gain de la bataille de Coutras estant aucunement appaisées, le roy de Navarre vous appella, et vous ayant tiré à part dans un jardin, vous dit : « J'ay envie de vous faire un voyage qui importe grandement au bien de nos affaires; mais, avant que vous dire quel il est, je seray bien aise d'entendre de vous quel fruit et quels avantages vous estimez que nous pouvons tirer d'une tant illustre et signalée victoire. »

« Sire, luy respondistes vous, à ce que vous nous en avez conté depuis, les fruits et les avantages en seront plus ou moins grands à proportion de ce que vous et ces deux princes de vostre sang qui vous assistent demeurerez veritablement bien unis de cœur et d'affection, et poursuivrez un mesme dessein par mesmes voyes; lequel, selon que j'en puis conjecturer par ce qui apparoit maintenant, doit butter à tenir vos forces unies toutes ensemble encore deux mois, lesquels vous employerez à faire de deux choses l'une : la premiere, de marcher droit vers le haut de la riviere de Loire; comme vers la Charité, Nevers et Desize, ausquels lieux vous don-

(1) La bataille de Coutras, livrée le 20 octobre 1587.

« nerez rendez-vous à vostre armée estrangere, « afin qu'elle, estant d'un costé de la riviere, « et vous avec la vostre de l'autre, il soit en « vostre puissance de vous conjoindre par la prise « de telles de ces villes là, qu'il vous plaira d'attaquer ; la seconde, à prendre toutes les villes « de Xaintonge, Angoulmois, Poictou et Anjou « deçà Loire, excepté Poitiers et Angoulesme ; « car toutes les autres ne vous sçauoient résister si vos troupes ne se dissipent point, et « que vos resolutions ne soient point diverses ; « et par le moyen de telles conquestes, vostre « armée estrangere vous venant joindre en prenant la source de Loire, comme c'est son plus « assuré chemin, vous vous cantonnerez si paisiblement en toutes ces provinces de deçà la « riviere de Loire, que si le Roy, par lascheté, « faineantisme ou irresolution, laisse mettre son « Estat en partage par les ligueurs et le roy « d'Espagne, comme c'est le but auquel ils visent, vous puissiez en retenir la plus grande « portion, qui servira un jour à conquerir le total, si mon precepteur la Brosse, selon ce que « je vous en ay dit autrefois, a un diable de verité dans le corps. »

« Or bien, respondit le Roy, je penseray à « tout ce que vous avez proposé ; donneray avis où besoin sera de la resolution que j'auray prise, et, en attendant, je seray bien aise que « comme j'ay envoyé Mongiat vers mon armée « estrangere, pour la faire acheminer vers le « haut de la riviere de Loire, vous fassiez un « voyage en France, qui vous sera chose plus « facile qu'à nul autre, à cause des cognoissances « que vous avez aux gouverneurs des passages, « vers mon cousin le prince de Conty (1), afin « que, suivant la resolution qu'il m'a mandé « d'avoir prise, il assemble le plus de ses amys « et serviteurs que faire se pourra, et faisant « semblant d'aller joindre les forces du Roy, « coule jusques dans mon armée estrangere dont « je le constitueray general, et vous retienne auprès de sa personne pour l'assister d'avis et « de conseil, luy faire sçavoir mes intentions, « et le maintenir és bonnes qu'il a pour mon « service. » A toutes lesquelles choses vous vous disposastes aussi-tost, et ayant eu, dès le soir, toutes vos dépesches qui ne consistoient qu'en une simple lettre de trois lignes portant creance entiere, vous partistes le lendemain au matin, et nous vintes prendre à Ponts où nous estions demeurez malades, et vous acheminastes vers le Mayne où vous esperiez trouver M. le prince de Conty.

Mais dautant que toutes les belles esperances

(1) François de Bourbon, frère du prince de Condé.

que l'on avoit conceûs de cette illustre victoire, et tous les projets et propositions que l'on avoit fondées sur icelle s'en allerent à neant, voire eurent des effets et des succes contraires à tout ce que l'on s'en estoit persuadé, nous avons creu estre icy un lieu propre pour vous en ramentevoir les causes principales telles que vous nous les appristes à vostre retour, dont la premiere provint des jalousies, envies et défiances qui alloient de plus en plus augmentant entre le roy de Navarre et M. le prince de Condé, si tost que quelques heureux succez et prosperitez leur ostoit la crainte, et leur eslevoit leurs esperances à quelque grand establissement, lesquelles jalousies estoient fomentées par M. de Thurenne d'une part, et par M. de la Trimouille de l'autre, qui sollicitoit incessamment ce prince de se rendre chef absolu, sans recognoissance d'autrui, dans les provinces d'Anjou, Poictou, Aulnais, Xaintonge et Angoumois au moins, laissant tout le surplus des autres provinces de France au roy de Navarre ; et pour y parvenir, si tost que par le gain d'une tant signalée bataille, il pût concevoir quelque esperance de faire des progres dans ces provinces, ils firent separation des troupes qui estoient à leur devotion, s'estans mis en fantasie que la reputation de cette victoire, leur rendoit infaillibles les prises des foibles places de ces provinces : voire jusqu'à s'imaginer de pouvoir emporter Xaintes et Broûage, à cause de la prise de M. de Saint Luc.

Monsieur de Thurenne, de son costé, qui ne manquoit de vanité ny d'ambition, et qui couvoit tousjours en son cœur le dessein qu'il fit depuis tout ouvertement esclatter en l'assemblée de la Rochelle, qui estoit de pouvoir estre esleu chef absolu en quelques provinces, et sur une dissipation d'Estat que chacun croyoit estre fort prochaine, se cantonner en icelles, sur ces mesmes esperances de prendre toutes les places de Lymosin et Perigord, des environs de ses maisons ; fit toutes sortes de menées et de belles ouvertures (comme son esprit excelloit en telles propositions) pour separer des troupes et en former un camp avec l'artillerie, comme il en vint à bout, sans que rien neantmoins de tout ce qu'il entreprit eut aucun heureux succez, voire fut mal mené devant Serlat, qui n'est qu'une fort foible ville, et contraint d'en lever le siege.

Monsieur le comte de Soissons, d'autre costé, qui estoit venu trouver le roy de Navarre, plutost pour espouser sa sœur, que ses affections ny son party, qu'il tenoit ne pouvoir pas avoir longue subsistance, fondant ses opinions sur ce

qu'il voyoit le pape, l'empereur, le roy d'Espagne et quasi toute la France buttez à l'entiere destruction des huguenots; et qu'ayant espousé madame Catherine, il se retireroit à la Cour, et s'approprieroit tous les grands biens que cette maison de Navarre avoit deçà la riviere de Loire; et sur ce projet faisoit des continuelles instances et sollicitations, afin que le roy de Navarre le voulût mener voir sa maistresse en Bearn, lesquelles instances rencontrans pour complices de telles passions dans l'esprit du Roy, l'amour qu'il portoit lors à la comtesse de Guiche, et la vanité de presenter luy mesme à cette dame les enseignes, cornettes et autres despoüilles des ennemis, qu'il avoit fait mettre à part pour luy estre envoyées; il prit pour pretexte de ce voyage l'affection qu'il portoit à sa sœur et au comte de Soissons: tellement qu'au bout de huit jours, tous les fruicts esperez d'une si grande et signalée victoire s'en allerent en vent et en fumée, et au lieu de conquerir, l'on vit toutes les choses deperir; le roy de Navarre et le comte de Soissons se mettans si mal ensemble, par rapports et supçons, que depuis ils se separerent quasi comme ennemis.

Monsieur le prince ne fit du tout rien; et l'armée estrangere ne recevant nuls commandemens absolus du roy de Navarre, ny advis des lieux où il la vouloit joindre, ny avec quelles forces; demeurant comme un grand vaisseau dans le milieu des ondes courroucées, assailly d'autant de divers desseins, qu'il y avoit de diverses testes et de diverses fantaisies, ayans autorité ou credit parmy les bandes dont elle estoit composée, ne continuoit point trois jours en une mesme resolution, et marchoit plutost par boutades et par hazard que par conseil et prémeditation; si bien que s'estant venuë envelopper dans des provinces toutes ennemies, bornées de grosses rivières tres-difficiles à passer, et circuyé de quatre ou cinq armées qui luy eschantillonnoient tousjours quelque lopin de son grand et pesant corps d'armée, et la rendoient disetteuse de vivres et toutes autres commoditez nécessaires pour sa subsistance.

Finalement il arriva que vous n'ayant point trouvé M. le prince de Conty chez luy, d'autant qu'il estoit party deux jours avant vostre arrivée en sa maison pour aller joindre cette armée, vous allastes passer à Rosny afin de le pouvoir suivre plus seurement, d'autant que sur le chemin qu'il avoit tenu, l'on avoit jetté des troupes qui battoient l'estrade pour attraper ceux qui tiendroient sa route; auquel lieu n'ayant sejourné que deux jours pour laisser reposer vos chevaux qui estoient grandement fatiguez, dès la premiere

journée que vous fistes, estant allé coucher à Neaufles, l'un de nous quatre nous vint dire que le bruit courroit de la défaite de cette armée, et le lendemain vous sceustes au vray ce qui s'estoit passé à Aulneau, et que douze mille Suisses avoient capitulé avec le Roy pour le servir ou s'en retourner librement en leurs contrées: de tous lesquels accidens ne prevoyant que ruine et finale destruction du surplus de ces troupes, sans faire semblant que vous eussiez interest à tout cela, au contraire publiant que vous aviez quitté le roy de Navarre et vous estiez donné au Roy, vous vous en retournastes chez vous; et apres une promenade que vous fistes en Normandie, par les maisons de vos cognoissances durant le reste du mois de novembre 1587, afin de laisser aucunement assoupir le feu de cette grande desroutte, vous vous en retournastes trouver le roy de Navarre, lequel estoit lors à Bergerac, estant de retour de son voyage de Bearn; duquel lieu il fit executer une entreprise, dessinée par le vicomte de Thurenne sur Castillon qui fut repris pour deux escus de despences, au lieu que M. du Mayne avoit despencé un million d'or en son siege, duquel nous n'avons point parlé, non plus que nous ne faisons des particularitez de la reprise, d'autant que vous n'avez esté ny en l'une ny en l'autre de ces factions, estant, ce nous semble, à Bergerac environ le mois de mars 1588.

## CHAPITRE XXV.

*Mort du prince de Condé. Journée des barricades. Négociation avec Henri III. Brouillerie du roi de Navarre et du comte de Soissons. Catherine de Médicis fait la paix avec la ligue.*

[1588] Le roy de Navarre, apres la prise de Castillon, faisant quelque sejour à Bergerac, eut nouvelle comme M. le prince estoit mort empoisonné (1), qu'un de ses domestique avoit esté tiré à quatre chevaux, et plusieurs autres soupçonnez de ce malefice, dont nous laissons le recit aux historiens, car vous n'y estiez pas.

Le roy de Navarre, reprenant ses brisées vers la Rochelle comme il fut dans l'Angomois, il luy fut amené un courrier qui portoit à M. d'Espèrnon la nouvelle des barricades de Paris, et comme le Roy en avoit esté chassé honteusement par le peuple. Nous passons sous silence le recit

(1) Henri, prince de Condé, mourut à Saint-Jean-d'Angely le 5 mars 1588. Charlotte-Catherine de la Tremouille, sa seconde femme, fut accusée de l'avoir empoisonné; elle fut reconnue innocente après six ans de captivité.

de cette action, car vous n'y estiez pas; et nous contenterons de vous dire que sur cet avis nous recognumes entre tous vous autres messieurs, de deçà Loire principalement, une merveilleuse resjouissance, chacun criant qu'il fallait aller secourir le Roy; et mesme vous commençastes le premier à dire au roy de Navarre qu'il se devoit envoyer offrir au Roy. Vous desiriez avoir ce voyage, mais les envies et jalousies de Cour vous le traverserent, et le firent donner à un secretaire.

Cét accident fit augmenter les mescontentemens de M. le comte de Soissons, et prendre une absoluë resolution de quitter tout à fait le roy de Navarre; comme il l'executa quelques jours après, avec des reproches et autres fort mauvaises parolles des deux costez, et s'en alla trouver le Roy, son esprit remply de grandes esperances de tout gouverner à la Cour. Vous estiez lors assez bien avec luy, et par concert pris avec le roy de Navarre, vous faignistes d'estre mal satisfait de luy, afin que vous regeant plus facilement aupres du comte de Soissons, qui essayoit de desbaucher ses serviteurs, vous pûsiez aller avec luy à la Cour, et mander des nouvelles de ce qui se passeroit de consequence.

Vous fistes donc le voyage avec M. le comte, lequel tout le long des chemins, croyant que vous fussiez tout à fait dégousté du roy de Navarre, vous faisoit ses plaintes, disant que l'on l'avoit pipé, jugeant bien alors que toutes les esperances à luy données, du mariage de madame Catheriné, n'avoient eu autre but que sa retraite hors de la Cour, la ruine de sa fortune, et l'empescher qu'il ne prist creance aupres du Roy pour y gouverner les affaires; ny ayant point de doute, comme il en avoit de bons avis, qu'il n'y gouvernast tout à present s'il ne l'eut point abandonné pour se jeter parmy ses ennemis: vous essayâtes d'appaiser cet esprit ulcéré, autant qu'il vous fut possible, sans trop decouvrir votre intention, de crainte que vous luy devinsiez par trop suspect, luy remontrant seulement que si le Roy, et tous ceux qui resistoient en France du sang royal ne vivoient en bonne amitié et intelligence, qu'en fin leurs ennemis communs, qui ont joint à eux le pape, l'empereur et le roy d'Espagne, les destruiroient entiere-ment, et qu'ils y devoient bien tous penser.

Nous nous en allâmes à Nogent le Rotrou, et de là à Mante, où estoit le Roy, que nous trouvâmes grandement irrité des affronts honteux qu'il avoit receus à Paris, et des blâmes qu'il entendoit luy estre donnez en plusieurs autres villes, et encore plus mesprié dans sa Cour, pource que tout de nouveau il avoit conféré les

charges d'admiral et de gouverneur de Normandie, vacquans par la mort de M. de Joyeuse, à M. d'Espernon, quoy qu'il sceust bien, comme chacun le publoit, que l'amitié excessive qu'il portoit à sa personne, et les grands biens et honneurs qu'il luy avoit prodigalement départis, sans aucun precedent service, dont Sa Majesté ou l'Estat eussent receu advantage, estoient les principaux et plus specieux pretextes de la haine publique.

Le Roy ne fit pas trop bonne chere au comte de Soissons, pour tesmoigner, comme il l'a dit depuis, qu'il n'approuvoit pas le voyage qu'il avoit fait vers le roy de Navarre, et encore moins qu'il se fût trouvé à la bataille de Coutras avec ses ennemis, en laquelle avoit esté tué M. de Joyeuse. Lors que vous luy fistes la reverence, il vous demanda si vous aviez quitté le roy de Navarre: à quoy luy ayant respondu que ce n'en estoit pas encore le temps, puisque vous esperiez de le voir bien-tost près de Sa Majesté, à quoy vous sçaviez qu'il avoit tousjours esté disposé, mais à present plus que jamais, et de luy rendre toutes sortes de tres-humbles services. Il se tourna de l'autre costé, sans vous respondre aucune chose, tant il avoit crainte que quelqu'un des siens ne glosast sur ces parolles.

En ce mesme temps la Reine mere travailloit de tout son pouvoir à la reconciliation des chefs de la ligue avec le Roy, et y employa tant de peines et de voyages, qu'en fin il se fit une espeece de traité de paix, dont les articles se voyent dans l'histoire, et en suite une resolution d'assembler les Estats; le tout du commun avis de tant de gens si divers en desseins et fantaisies, d'autant que chacun d'eux ayant son secret dans l'esprit, il esperoit bien par brigues et menées faire tourner toutes choses à son advantage, et s'approprier tous les fruicts de cette assemblée.

## CHAPITRE XXVI.

*Assemblée des protestans à la Rochelle. Se-  
conds États de Blois. Rosny chargé d'une  
négociation importante auprès de Henri III.*

Le roy de Navarre, voyant le Roy et la ligue reconciliés avec projet d'une tenuë d'Estats, ne doutant nullement que la Reine sa belle mere ne luy fut contraire en toutes choses dans cette assemblée; il convoqua aussi, afin de se fortifier d'amis, de serviteurs et de partisans, une assemblée generale des eglises dans la Rochelle, en laquelle diverses brigues se decouvrirent contre luy, dont l'on faisoit autheur le vicomte

de Thurenne, lequel ayant aiguisé son ancien appetit par la mort de M. le prince, et voulant essayer de tenir la place qu'il avoit dans le party huguenot, y tramoit les memes choses que M. de Guyse faisoit dans le party catholique, ainsi que le roy de Navarre en fit des plaintes, et en parla en ces termes à plusieurs deputez et autres d'entre la noblesse, les conjurant d'estre pour luy, contre ces ingrats ambitieux qu'ils cognoissoient bien, sans qu'il fut besoin de les nommer, de tous lesquels discours, pour ce que vous estiez encore à Rosny, et que vous m'aviez renvoyé à la Rochelle pour avoir soin de vostre équipage, l'un de nous vous escrivit une grande lettre, vous informant amplement de tout ce qui se disoit de part et d'autre sur ce sujet, laquelle nous voudrions bien que vous eussiez conservée afin de la pouvoir inserer toute entiere cy-dedans.

Pendant toutes ces menées, le roy de Navarre fit une entreprise par escalade sur la ville de Nîort, de laquelle il se rendit maistre apres un grand combat, la veille de la mort de M. de Guyse, et trois ou quatre jours devant celle de la Reine, mere du Roy : de tous lesquels evenemens, aussi bien que de la grande maladie du roy de Navarre et du siege de la Garnache, nous laissons les particularitez à ceux qui feront l'histoire entiere, quoy qu'il y en ait eu plusieurs dignes de remarque, pource que vous n'eustes nulle part à toutes ces choses, lesquelles changeroient grandement la face des affaires; et neantmoins le Roy ne laissa pas de se montrer plus animé que jamais à la destruction des huguenots, pensant par ce moyen empêcher les soulèvements des peuples; mais ses declarations n'estant suivies d'aucunes genereuses actions, sa negligence et fétardise (1) ordinaire, et la furie enragée des peuples luy firent perdre Orléans, et en suite tant d'autres villes, qu'il n'avoit quasi plus que Baugency, Blois, Amboise, Tours et Saumur où il pût resider.

[1589] Tant d'estranges mutations vous firent soudainement partir de Rosny pour vous acheminer vers le roy de Navarre. Vous vintes à Blois avec dessein de vous y rendre et passer incognito; mais en traversant les ruës, M. de Rambouillet, avec lequel vous aviez de grandes habitudes, vous entre-vid demy bouché de vostre manteau : il envoya un nommé le Boulay pour vous recognoistre et aussi vostre logis; parla de vous au Roy, lequel luy commanda de sçavoir les causes de vostre venue à Blois, et s'il n'y avoit point moyen de traiter quelque chose pour vous avec le roy de Navarre, dau-

(1) Paresse, lenteur.

tant qu'il vous avoit trouvé en 1588, et depuis à Mante, fort raisonnable et grandement affectionné à l'Estat; tant y a que M. de Rambouillet, ayant conféré avec vous, trouva moyen de vous faire parler au Roy, qui vous tesmoigna de vouloir reconcilier le roy de Navarre à luy, et de s'en servir confidemment. Apres plusieurs propos qui seroient trop longs à reciter, toute la difficulté tomba en l'assurance d'un passage sur la riviere de Loire.

Il vous commanda de partir promptement pour aller faire entendre son intention au roy de Navarre, et luy rapporter la sienne, et refusa d'escrire ny mesme de vous bailler un passeport, de peur, vous dit-il; que le cardinal Morosin (2) et le duc de Nevers ne le sceussent, qui descrieroient les affaires, voire mesme s'ils sçavoient que vous fussiez là, il ne pourroit pas empêcher qu'ils ne vous fissent arrester prisonnier : et en cet estat d'affaires tant embarrassés et enveloppés de craintes, vous allastes trouver le roy de Navarre au siege de la ville de Chantelleraut qu'il prit le jour mesme de vostre arrivée. Vous luy exposastes deux choses : l'une, la charge que le Roy vous avoit donnée, et y adjoustastes les persuasions de M. de Rambouillet, et l'autre, que le sieur de Brigueux, gouverneur de Baugency, en partant de Blois, vous avoit dit ces mots : « Monsieur, je voy bien que le Roy se va perdre par timidité, irresolution et mauvais conseil, et que la nécessité nous jettera es mains de la ligue : pour moy, je n'en seray jamais, et veux plutost servir le roy de Navarre; partant dittes-luy que je tiens un passage sur Loire qui est Baugency, et que s'il me veut envoyer, vous ou M. de Rebours, je mettray dedans celui qu'il m'enverra et l'iray trouver. » Sur cette ouverture, le roy de Navarre songea un peu, en se grattant la teste, puis vous dit : « Estimez-vous que le Roy ait bonne intention en mon endroit et qu'il veuille traiter de bonne foy avec moy ? — Ouy pour le present, dittes-vous, Sire, et n'en devez nullement douter; car la nécessité de ses affaires l'y contraint, n'ayant autre remede en ses dangers que vostre assistance. — Je ne veux donc pas luy prendre ses villes, vous dit-il, pendant qu'il traittera de bonne foy avec moy; retournez vous en le trouver, et luy portez mes lettres et mes intentions, car je ne crains ny Morosin, ny Nevers. » Il vous fit apporter à disner dans son cabinet mesme, et aussi-tost vous fit prendre la poste.

Le Roy s'estoit avancé jusqu'à Mont-richard, où vous pensastes coucher par les ruës, tous les

(2) Jean-François Morosini, évêque de Brescia, légat en France.

logis étant pris quand vous arrivastes, et ne vous osans nommer pour en demander un, de peur de vous decouvrir et gaster vostre negotiation. Enfin le sieur de Maignan chercha tant qu'il trouva le logis de M. de Ramboüillet, qui vous fit loger dans un logis qui estoit marqué pour un de messieurs vos freres qui estoient allez devant à Tours. Environ la minuict l'on vous mena parler au roy en haut du chasteau, lequel vous despescha la nuit mesme; approuva tout ce que luy demandoit le roy de Navarre, luy promit une ville sur la riviere de Loire; et de faire avec luy, non une paix apparemment pour le commencement, mais une bonne trefve, qui dans leurs deux cœurs seroit desja une paix eternelle et reconciliation sincere.

A vostre retour à Chastelleraut ce ne furent que resjouyssances; tout le monde couroit au devant de vous, et le pauvre Vaulbraut vous appelloit le Dieu Rosny, et disoit aux autres : « Voyez vous mon frere, mon amy, cét homme là? Pardieu nous l'adorerons tous, et luy seul » restablira la France; il y a plus de six ans que « je l'ay dit, et Vilandry avoit mesme opinion » que moy. »

Après avoir parlé au roy de Navarre, il approuva tout ce que vous luy proposastes; mais ne s'amusant pas tant toutes-fois aux paroles qu'il laissast les effets en arriere. Sur l'avis qu'il eut que ceux de la ligue s'estoient saisis d'Argenton, il delibera de le secourir, et cela fit-il si à propos, que s'il fût arrivé ou plus-tost ou plus-tard il n'eût rien fait : vous en sçavez les raisons, trop longues à reciter, esquelles nous ne nous arresterons point; pource qu'en cette execution vous n'eustes point plus de part que les autres. Vous fistes ce voyage avec luy, et quand il voulut mettre M. de Beau-pré dans le chasteau, il vous l'envoya visiter, et faire une description des munitions qui y estoient, et de celles qui y seroient nécessaires.

Au retour de vostre voyage, vous tombastes malade d'une fièvre continué, qui vous tint douze jours. Cét accident avec les menées du sieur du Plessis (1), et les gens du Consistoire qu'il fit parler pour luy au roy de Navarre, vous arracha la gloire publique d'avoir achevé une œuvre desja par vous faite, et d'en cueillir les fruits qui s'en perceurent, qui fut le gouvernement de Saumur, enquoy Dieu fit tout pour le mieux, pour vous et pour la France; car peut estre que vous amusant à Saumur, vous n'eussiez depuis esté si dignement employé, ny executé tant de belles choses pour le bien de l'Estat, qui meritent une gloire immortelle, comme la suite de ces Me-

(1) Philippe du Plessis-Mornay.

moires la fera voir. Cela ne laissa pas de vous mettre aucunement mal aupres du roy de Navarre, voire il vous prit fantaisie de le quitter : vos freres et vos autres amis vous en pressaient, et M. le comte de Soissons mesme parla au Roy, afin que, sur ce mescontentement, il vous retirast près de luy.

## CHAPITRE XXVII.

*Entrevue des rois de France et de Navarre au Plessis-lez-Tours. Tentative sur Chartres. Combat près de Châteaudun. Mort de la première femme de Rosny.*

Le traité entre les deux Roys ayant esté achevé, comme il a esté dit au precedent chapitre, Saumur se delivra. L'entre-vue des deux Rois se fit au Plessis-lez-Tours, avec une telle joye et acclamation qu'il ne se peut dire plus, et y eut tant de presse en icelles qu'ils furent demy quart d'heure à cinquante pas l'un de l'autre sans se pouvoir approcher. Il nous souvient qu'à deux lieux du Plessis, en s'y acheminant, le roy de Navarre mit pied à terre dans un pré pres d'un moulin, et voulut prendre advis des siens s'il devoit aller à Tours séjourner à la Cour; quelle forme de vivre y tenir, et confiance y prendre : apres une grande diversité d'opinions, vous branlastes la teste deux ou trois fois sans rien dire; car vous estiez encore en colere : en fin le Roy se retournant vous dit : « Hé! bien, M. de Rosny, » que vous en semble? Vous ne dittes mot? — « Il me semble, luy dittes-vous, Sire, que quelques precautions que vous sçachiez prendre, » le Roy sera toujours le plus fort à la Cour; et « qui craint que l'on ait dessein sur luy, ne doit » pas y aller : mais en cas semblable à celui qui » se presente, il faut jetter beaucoup de choses » au hazard, qui est tout ce que je vous diray. » Surquoy apres plusieurs contestations, le roy de Navarre finalement respondit : « Allons, allons, » il n'en faut plus parler, la resolution est prise. » Il ne coucha qu'une nuit ou deux à Tours, et s'en retourna en son quartier à Maillé; vous demeurastes en la ville pour visiter vos parens et amis qui estoient en grand nombre en cette Cour, et fustes loger au faux-bourg de Saint-Sephorien.

Deux jours apres, le Roy, n'ayant nulle nouvelle de l'armée de M. du Mayne, faillit d'estre pris s'en allant promener avec vingt chevaux sans armes à Marmoustier, et revint plus viste que le pas.

Peu apres l'armée ennemie commença de paroistre. Il y avoit six ou sept regimens du Roy

logiez esdits faux-bourgs, lesquels mesprisans tous advis et conseils, n'avoient fait aucune barricade qui valût. Vous les allastes voir, et leur en ayant dit encore vostre advis, ils ne s'en firent que mocquer; alors vous appellastes vostre escuyer, et luy dittes: « Allez tout à cette heure faire seller mes chevaux, charger mon bagage, et menez le tout loger à la ville. » Ce que voyans les gens de guerre, ils commencerent à vous crier: « Comment, monsieur, vous avez peur? — Pardonnez-moy, leur dittes-vous, je n'en ay plus; car tout mon fait s'en va dans la ville. »

Toute la matinée vous demeurastes aux escarmouches, et à défendre quatre ou cinq maisons qui estoient sur le haut de la colline, lesquelles furent souvent gagnées et perduës, et en fin il fallut les quitter au canon que M. du Mayne y fit mener. Vous vous en allastes lors en la ville, pour manger un morceau, et vous en retourner aussi tost; mais en revenant vous trovastes le Roy à la porte de la ville qui vous en empescha, et dit: « Ne sortez pas, M. de Rosny, j'ay plus affaire de serviteurs dans la ville que dehors; car aussi bien n'empescheriez vous pas la prise des faux-bourgs. » Ayant sejourné là demie heure, et voyant que l'on vouloit condamner les portes, vous vous en retournastes avec messieurs vos freres, ce nous semble, aux Jacobins qui respondent sur les murailles de la ville, d'où vous vistes attaquer les faux-bourgs aussi furieusement que ceux qui les gardoient firent pauvre défense; car, comme vous l'aviez bien dit aux capitaines, ils ne peuvent garder leurs barricades pour estre foibles, sans fossez devant, et par trop commandées et enfilées, qui furent prises par le bas de la riviere, et aussi-tost tout quitta, et se retira en gros vers la ville, avec une telle presse et confusion sur le pont, que si l'ennemy eut poursuivy furieusement, et fait marcher deux pieces pour tirer sur iceluy, il eut tout tué ou fut entré pesle-mesle dans la ville: ce que voyant vous pristest vos armes et retournastes à la porte; mais on ne songeoit plus qu'à la terrasser, et à rompre les ponts de bois, avec une grande espouvante; en fin l'escarmouche s'alentissant, tout ce qui estoit sur le pont entra à la file apres qu'ils eurent fortifié l'autre bout du pont.

Une heure apres, M. de Chastillon arriva, auquel tout ce que vous estiez de gens du roy de Navarre vous joignistes et allastes en gros supplier le Roy, de vous bailler ce qu'il estimoit estre le plus en danger, que vous mourriez tous, ou le conserveriez. L'on vous bailla les Isles (1), où toute la nuit il fut fait un tel travail qu'elles estoient imprenables: et le Roy, estant venu le

matin vous visiter et faire apporter du vin et des vivres pour desjeuner, en fut esmerveillé, et vous dit: « Hé, quoy, M. de Rosny! travaillez-vous tousjours ainsi? C'est pour n'estre jamais surpris. »

Trois heures apres le roy de Navarre arriva, et en mesme temps M. du Mayne se retira, ayant ruiné et fait mille meschanscetez aux faux-bourgs, jusques dans les eglises, et fut sa retraitte imputée à l'arrivée du roy de Navarre, duquel les loüanges et celles des pauvres huguenots volloient lors par les bouches d'un chacun, et ne les trouvoit-on pas indignes de toutes charges, comme on a fait depuis.

Les deux Roys sejournerent ensemble huit ou dix jours, et se fit deux desseins: l'un du Roy pour se faire recevoir à Poitiers, dont nous n'avons rien à dire, car vous n'y fustes pas; l'autre du roy de Navarre, qui vous dépescha environ trois cens chevaux et cinq cens harquebusiers à cheval, avec des petards, des eschelles et un pont vollant pour prendre Chartres, sur lequel M. de Maintenon avoit dressé de longue main une entreprise. Vous fistes la plus grande traite qui se peut dire, n'ayans repu que deux fois tout à cheval, depuis Tours jusques aupres de Bonneval, où vous rencontrastes le sieur de Recrainville avec vingt-cinq chevaux seulement, lequel fut sulvy et chargé par vos coureurs, et appristest lors par quelques prisonniers, qu'il y avoit trois ou quatre cens chevaux en campagne, vers lesquelles troupes vous resolustes tous de marcher, laissant vos harquebusiers à cheval à costé suivre le chemin de Chartres.

Les autres, ayans aussi appris par ceux qui s'estoient sauvez avec le sieur de Recrainville, qu'il y avoit des troupes en campagne, et eux estimans seulement que ce fut le sieur de Lorges, lequel, depuis quinze jours, s'estoit saisi de Chasteau-dun, avec cent ou six-vingts chevaux, cherchoient de vous rencontrer, comme ils firent demie heure apres un peu trop tost pour eux, et montans par costes opposites un petit tertre, ne vous recogneustes point qu'à deux cens pas les uns des autres: quelques harquebusiers que vous aviez firent une saluë, ce nous semble, tout à cheval, et aussi-tost les deux gros se choquerent si furieusement, qu'il se fit un monceau sur terre de plus de quarante chevaux et hommes pesle-mesle les uns sur les autres, entre lesquels nous vous recogneusmes, messieurs de Chastillon, de Mouy, de Mont-bazin, d'Aventigny, de Presaigny et autres; vostre cheval avoit un grand coup de lance tout au travers du nez qui lui traversoit dessous la machoire, lequel neantmoins se releva aussi-tost, vous dessus, qui allastes en-

(1) L'Isle, quartier de Tours.

core par trois ou quatre fois à la charge, d'autant que les ennemis se rallioient toujours tant qu'ils furent dix ensemble, et retournoient au combat. Vous aviez deux grands pistolets que l'un de nous vous avoit chargez de carreaux d'acier, avec lesquels nous vous viames percer les armes devant et derriere de deux des ennemis : vos deux espées furent aussi rompuës, l'une seulement à la pointe, l'autre jusques dans la garde. Nous ne disons point ce que les autres firent, mais ce ne fut rien moins ; aussi n'estimons nous point que pour trois cens chevaux ou environ de chaque costé, il ne se fit jamais un plus furieux et opiniâtre combat où il demeura sur la place pres de deux cens des ennemis. A la fin d'iceluy il tomba la plus violente pluye qu'il est possible de voir, contre laquelle vous n'aviez pour couvertures que des armes à cru, tellement que nous estions tous traversez.

Sur cet instant, comme vous pensiez vous aller loger et rafraischir, voila un advis certain, qui vous vint, comme M. du Mayne ayant sceu vostre passage vous suivoit avec mille ou douze cens chevaux, dequoy chacun fut assez effrayé ; car la plupart n'avoient plus ny pistolets ny espées, et tous les chevaux estoient si las qu'ils ne pouvoient quasi marcher. Le conseil se tint tout à cheval, plusieurs proposerent d'aller passer la riviere de Seine, les uns à Rosny, les autres au pont de Samois pour se retirer à Senlis, où la bataille avoit esté gagnée deux jours devant. En fin il fut conclu de marcher plutost toute la nuit, et sans repaistre gagner Baugency, comme il fut fait, et y arrivastes tous si las, si affamez, alterez et endormis, que vous ne sçaviez par où commencer ; nous sçavons bien que vous demandastes à boire, et en l'attendant vous vous jettastes sur un lit où vostre maistre d'hôtel vous trouva si endormy, qu'il fallut remporter la collation, car l'on ne vous pût eveiller. Le sieur de Brosse Saveuse fut emmené prisonnier fort blessé. Le roy de Navarre, dès son arrivée, le visita, et consola avec de fort courtoises paroles, voire promesses et louanges de son courage ; mais ayant appris par ses trompettes la mort de quasi tous ses parens et amys, il se desespera de sorte qu'il ne se voulut jamais laisser panser, et de despit et colere la fievre l'ayant pris, il mourut au bout de deux heures.

Le roy de Navarre s'en alla de Baugency à Chasteau-dun, où vous sejournamest huit ou dix jours en grande liesse, estant fort bien et plaisamment logé ; mais cela fut converty pour vous en grande tristesse, car vous eustes la nouvelle que madame vostre femme estoit à l'extrémité ; vous priastes congé du roy de Navarre pour l'aller

secourir, qui vous bailla M. Orthoman son premier medecin. Vous eustes beaucoup de peine à passer, car tout tenoit pour la ligue ; et pour renfort de douleur, M. vostre frere estant dans le chasteau, et sçachant vostre venue, s'y rendit le plus fort, et vous fit hausser le pont-levis, disant estre obligé de parole à ceux de la ligue de ne vous y laisser pas entrer. En fin comme il vit que vous estiez resolu de ce faire ou de mourir, et desja preniez des eschelles pour essayer de monter, il laissa ouvrir la porte. Vous trovastes madame vostre femme en tel estat, qu'elle mourut quatre jours apres. Vos desplairs furent proportionnez à ses merites et à vostre bon naturel, qui est assez dit pour les exprimer, sans en parler davantage. Cet accident vous retint un mois chez vous, pendant lequel il se fit quelques factions de guerre, et notamment es sieges de Gergeau, Pluviers, Estampes, Chartres, Poissy, Pont-oise, l'Isle-Adam, Beau-mont, Creil et autres telles places ; car tout estoit revolté de l'obeyssance royalle, et n'y rentroit que par la force. Toutes lesquelles choses nous laissons à l'histoire generale, parce que vous ne fustes en aucune de ces occasions, et nous contenterons de dire qu'un maistre de camp nommé Charbonnières fut tué en l'une d'icelles, le roy de Navarre ayant les deux bras et l'estomach appuyez sur luy.

## CHAPITRE XXVIII.

*Siège de Paris. Mort de Henri III. Avènement de Henri IV. Journée d'Arques.*

Après avoir rendu au decez de madame vostre femme tous les devoirs à quoi vous obligoient vostre bon naturel et son merite, vous retournastes trouver le roy de Navarre au siege que le Roy avoit lors mis devant Paris, où tous les jours il se faisoit plusieurs escarmouches, ausquelles vous n'estiez pas des derniers, et nous souvient que le jour de la blessure du Roy, le roy de Navarre s'estant avancé avec une bonne troupe vers le pré aux Clercs, et vous voyant des plus avancez le pistolet au poing, il appella l'un de nous quatre et luy dit : « Maignan, allez dire à M. de Rosny qu'il se retire, et qu'il se fera prendre ou blesser indiscrettement. » Il luy respondit qu'il n'avoit garde de vous aller tenir ces parolles ; mais bien vous droit-il qu'il vous demandoit. Ce qu'ayant fait, vous le vinsastes aussi-tost trouver ; et ainsi qu'il vous parloit, vous reprenant de vous hazarder trop, il arriva un gentil-homme au galop, lequel luy dit trois ou quatre mots à l'oreille, sur lesquels vous ap-



pellant aussi-tost, il vous dit : « Mon amy, le Roy vient d'estre blessé d'un coup de cousteau dans le ventre, allons voir que c'est; venez avec moy. » Il mena encore avec luy vingt-cinq gentils-hommes; vous trovastes le Roy dans le liet en assez bonne disposition apparemment : car on lui avoit donné un clistere qu'il avoit bien rendu sans sang ni douleur. Les medecins en avoient assez bonne opinion, et luy mesme dit au roy de Navarre qu'il eseroit que ce ne seroit rien, et que Dieu le preserveroit encore pour luy faire paroistre combien il l'aymoit; sur cela il prit congé et s'en retourna en son quartier à Meudon.

Vous estiez logé, au pied du chasteau, chez un nommé Sauvat, où ainsi que vous souppez, le secretaire Feret vous vint dire : « Monsieur, le roy de Navarre, et peut-estre le roy de France vous demande; car M. d'Orthoman luy mande qu'il se diligente de venir à Saint Clou, s'il veut trouver le Roy en vie. »

Estant dans la chambre du Roy, il vous dit : « Mon amy, on me mande que le Roy est mort ou autant vaut; que vous semble de l'estat des affaires? je croy que nous y verrons de grandes confusions, à cause de la diversité des religions. — Sire, j'espere, dittes-vous, que vostre majesté sera un jour paisible et bien-heureuse; mais ce ne sera pas sans beaucoup travailler, et sans courir de grands hazards. J'ay eu un diable de precepteur, lequel, comme je le vous ay desja conté autre-fois, m'a dit que cela estoit infaillible; il faut aller voir ce qui en est, et puis il y aura loisir de disocourir. » Aussi-tost l'on amena les chevaux, et allastes quelques trente avec luy à Saint Clou, armez de vos cuirasses sous la juppe. A l'arrivée l'on dit que le Roy se portoit bien, lors l'on vous commanda de vous desarmer, et, comme vous passiez une petite rue, vous oüystes un homme criant : « Ha mon Dieu ! nous sommes tous perdus. » Le Roy de Navarre l'appelle, luy demandant qu'il y avoit ? « Ah ! dit-il, le Roy est mort ! » Et l'ayant si bien interrogé qu'il recogneust qu'il estoit vray, il vous ordonna de reprendre vos armes; puis allans au logis du feu Roy, le roy de Navarre devenu Roy (car en France le mort saisit le vif sans aucune formalité ny ceremonie) rencontra premierement ceux de la garde Escossoise qui se jetterent à ses pieds, disans : « Ha Sire ! vous estes à present nostre Roy et nostre maistre. » Messieurs de Biron, de Belle-garde, d'O, Chasteau-vieux, Dampierre et plusieurs autres vindrent aussi-tost le saluer; il se passa plusieurs autres particularitez que nous laissons pource qu'elles ne furent recueillies de vous, ny

de personne, et que nous estions demeurez à vostre logis.

Le Roy vous envoya au quartier de M. le mareschal d'Aumont pour dire à toutes ses troupes ce qui estoit arrivé; le prier, luy en particulier, de parler à toute la noblesse, afin de la convier à faire son devoir, donner ordre aux gardes, et faire en telle sorte que les plus grands et principaux le vinsent trouver l'apres-disnée. Le Roy vous dit : « Mon amy, regardez à ce qu'il faut faire à vos quartiers pour mon service; pensez-y bien, et m'en donnez advis. — Ce qui est de plus pressé, dittes-vous, c'est de pourvoir à Meulan, d'autant qu'il y a un homme dedans, nommé Saint Marc, qui est de la ligue en son cœur, et grand ennemy des huguenots; et si vous n'asseurez la place, au premier esloignement vous la perdrez infailliblement; je le cognois et l'iray sonder et amuser de belles parolles; oependant envoyez M. d'Aumont, ou quelqu'autre en qui vous vous fiez, avec troupes, faisant semblant de vouloir seulement passer sur le pont, et quand il sera dans le fort, il s'y rendra maistre, et vous y attendra. » Tout cela ainsi executé, le Roy vous offrit la place; mais le dessein qu'il disoit avoir de s'en aller vers Tours, vous empescha de la prendre, craignant de ne pouvoir pas lever promptement assez de gens pour soustenir un siege. M. de Belangreville (1) y fut mis avec son regiment.

De là vous retournastes tous à Poissy, où M. d'Esperson et beaucoup d'autres quitterent le Roy, lequel s'en alla prendre Clermont et autres places.

Vous aviez lors une entreprise sur Louviers, que le Roy vous ordonna d'aller executer. Il vous bailla sa compagnie de chevaux legers que menoit Arambure, et pour gens de pied, ne se voulant défaire des siens, dont il n'avoit pas trop, plusieurs l'ayans abandonné avec leur coronel qui en desbauchoit le plus qu'il pouvoit, vous assura que le sieur Couronneau estoit à Nogent, dont le capitaine Bethune, fils du chevalier, estoit gouverneur, avec un regiment de douze cens hommes : il leur escrivit à tous deux de faire ce que vous leur commanderiez; mais quand ce fut à vous en servir, il se trouva que Couronneau estoit encore vers Tours; et n'y eut moyen de rassembler que deux ou trois cens hommes de pied, qui n'estoit pas nombre suffisant pour l'execution de cette entreprise, d'autant que messieurs d'Aumale, de la Londe, Fontaine, Martel, Medavit, Contenant, et tous les principaux de la ligue estoient arrivez à Louviers depuis trois jours; l'entreprise estoit infail-

(1) Berengreville,

libre et des plus utiles, qui eut eu des gens suffisamment, elle se faisoit par un grand canal de la rivière d'Eure, qui a son entrée dans la ville, à travers de grands treillis de bois; or avoit-on lors destourné l'eau, pour racourtr les moulins qui avoient esté emportez par des avalasses, tellement que l'on alloit quasi à pied sec, jusques contre les grilles qu'il estoit aisé d'emporter avec le petard, posé sur le madrier, comme vous estiez garny de tout cela; et outre cela l'on pouvoit monter le long de la douve du fossé, qui est fort haut, et venir au pied de la muraille, sur laquelle l'on peut monter avec peu d'ayde, pource qu'elle est fort basse, ne servant quasi que de parapet au rempart. Quand le ruisseau passe, il y a grande quantité d'eau qui empesche toutes ces approches, et pour faire voir à ceux que le Roy vous avoit baillez, comme vostre projet estoit bien fait et infallible, vous y envoyastes les deux soldats qui le menoloient avec deux capitaines qu'Arambure, et le fils du chevalier de Bethune vous baillèrent, lesquels, sans avoir donné aucune allarme, entrèrent dans la ville, en ressortirent et vous vindrent retrouver; lors tout le monde fut à se desesperer et maudire Couronneau, tellement que n'osant attaquer, vous vous en retournastes.

De Rosny vous alastés passer au pont de l'Arche, et fustes trouver le Roy à Escotuy, où il fut mis en deliberation de s'en aller à Tours; mais les Normands firent resoudre le siege de Roüen, donnans mille belles esperances qui manquerent toutes quand ce fut à l'effet.

Pendant qu'ils firent leurs preparatifs, vous fustes avec le Roy aux prises de Gournay, Neufchastel, Eu, et le Trepot, où il ne se fit pas de grands combats, ny ne se passa rien de particulier qui vous concerne; puis à Dernetal où le Roy, ayant esté quelques jours sans grand fruit, il eut advis que M. du Mayne amassait une grandissime armée, pour le venir assieger en quelque part qu'il pût aller.

Sur ces nouvelles il envoya sonder le commandeur de Chattes, gouverneur de Dieppe, qui se montra vray François et l'un des plus hommes de bien du monde. Il vous envoya aussi à la guerre avec cinquante chevaux, pour aller prendre langue de l'armée de M. du Mayne, quelque part qu'elle fût. Vous la trouvastes logée à Mante et és environs par toutes vos terres. Vostre retraite fut dans vostre forest; appristes nouvelles certaines de tout, et comme l'armée estoit composée de vingt-cinq mille hommes de pied et huit mille chevaux; vostre rapport fait, aussi-tost le Roy se resolut d'aller à Dieppe, pour parler luy mesme au commandeur, qui

luy confirma ce qu'il luy avoit auparavant mandé; et que s'il en doutoit, il mettroit dans la citadelle tel qu'il luy plairoit de choisir.

Après on vint loger à Arques; plusieurs blasmolent bien fort la resolution du Roy d'attendre, avec si peu de troupes et en lieu si foible, de si grandes forces ennemies, lesquelles estans venues loger à Martinglise, village distant de demie lieuë du bout de la chaussée d'Arques, au dessus de laquelle sont des bois en costes et quelques terres labourables au dessous, traversées par le milieu d'un grand chemin fort profond, bordé de hayes des deux costez, et au dessous de tout cela un grand marais à la main gauche. Là furent ordonnées quelques foibles tranchées, y ayant une chapelle entre celles d'au dessus du chemin, et celles d'au dessous.

En chacun des costez fut mis un bataillon de douze cens Suisses, aux tranchées d'en-haut six cens lansquenets, et dans la chapelle cinq ou six regimens qui faisoient en tout mil ou douze cens hommes. Le Roy separa la cavalerie en deux, et mit trois cens chevaux aupres de luy au dessus du chemin, et environ autant au dessous: dès le soir il estoit luy mesme entré en garde, craignant que l'ennemy fit un effort durant l'obscurité pour gagner le bout de la chaussée. La nuit se passa sans nulle allarme; à la pointe du jour le Roy se fit apporter à déjeuner dans une grande fosse, où il vous fit tous ceux de qualité, asseoir en rond, où, comme chacun déjeunoit de bon cœur, pensant s'en aller reposer après, l'on commença de donner l'allarme bien chaude, et luy fut rapporté que les vedettes perduës avoient recogneu toute l'armée ennemie qui se rengeoit en ordre de bataille.

Il envoya le vidame de Chartres avec Palcheux, Brasseuses, Aventigny et sept ou huit autres dans les bois, lesquels luy amenèrent prisonnier le sieur de Belin qui, avec cinq ou six chevaux, s'estoit avancé dans les mesmes bois, afin de venir recognoistre l'assiette des troupes du Roy, lequel, en riant pource que le Roy l'avoit receu et embrassé de mesme, l'assura que, dans deux heures, il auroit trente mille hommes de pied et dix mille chevaux sur les bras, et qu'il ne voyoit pas là des forces suffisantes pour leur resister. » Vous ne les voyez pas toutes, M. de Belin, dit le Roy; car vous n'y contez pas Dieu, ny le bon droit qui m'assistent. »

Incontinent après chacun s'en alla au lieu à luy ordonné: vous fustes mis en bas avec dix ou douze seulement, qui estoient demeurez de vostre troupe aupres de vous, les autres s'estans allez rafraischir en leurs maisons. Aussitost les tranchées d'en-haut furent attaquées par

des lansquenets, lesquels, faisant semblant de se rendre, se saisirent d'icelles, et mirent le Roy en fort grande peine ; il se fit là plusieurs factions de guerre où vous n'estiez pas, et partant nous n'en parlons point. Au dessous du chemin vous fustes attaquez par huit ou neuf cens chevaux en trois escadrons, lesquels vous chargeastes et menastes, battans l'espée dans les reins, jusques au retournant du vallon, et si n'estiez pas cent cinquante chevaux. Vous fustes chargez par quatre autres escadrons qui vous ramenerent plus viste que le pas jusqu'à un petit heurt (1), où, ayant trouvé quelques autres cent cinquante chevaux que commandoit le comte d'Auvergne, retournastes tous ensemble à la charge, et menastes ces gens encore battans, le pistolet dans les reins, jusqu'au mesme tournant de la vallée, de laquelle il vint sur vos bras plus de trois mille chevaux qui vous ramenerent battans jusqu'à la chapelle, d'où les gens de pied leur firent une saluë qui les arresta sur le cul ; là fut tué Sagonne et beaucoup d'autres ; mais les lansquenets ayans gagné la tranchée d'en-haut, leur firent quitter ladite chapelle et le creux chemin avec grande espouvante ; ce qui vous fit retirer à la teste du bataillon des Suisses qui arresta tout court ceux qui suivoient : là vostre cheval tomba ayant esté blessé, et le sieur de Maignan vous en fit amener un autre. Les ennemis lors envoyerent cinq cens chevaux par le bas des terres, pour gagner le flanc des Suisses, afin de les enfoncer de deux costez ; mais ils s'embastirent dans un marais tremblant, où ils enfoncerent jusques aux sangles, et la pluspart des hommes furent contraints de se sauver à pied, laissant leurs chevaux et leurs lances dedans le marais.

Les choses estans en cet estat d'incertitude, et la pluspart de vous autres estans sans pistolets ny espées dont vous vous peussiez ayder, et plus prests à fuir qu'à combattre, l'on vous pria d'aller trouver le Roy, pour luy dire l'estat où estoient toutes choses ; le peu de moyens que vous aviez de vous plus défendre, et le prier de vous renforcer en bas de quelque cavalerie fraische, mais vous le trovastes estre en bas, et nous souvient qu'il vous dit, car vous nous aviez menez avec vous : « Mon amy, je n'ay « personne à vous envoyer, mais si ne faut-il « perdre courage. » Sur cela neantmoins il appela M. le Grand, et luy dit : « Je vous prie, « mon amy, rassemblez ce que vous pourrez « des plus frais, et vous en allez au-dessous du « chemin où vous dira Rosny. » Vous luy montrastes par où il falloir aller, puis vous en vinstes,

(1) Élévation de terrain.

criant en bas : « Courage, messieurs, courage ; « voicy des troupes fraisches que le Roy nous « envoie. » Lors chacun s'advança jusqu'au heurt pour faire nouvelle charge, mais l'on descouvrit toute l'armée, cavalerie et infanterie marchant en ordre de bataille pour vous venir enfoncer ; et y en avoit peu de vous autres qui estimast de se pouvoir sauver, ny mesme que le Roy pût regagner le bout de la chaussée qui estoit fortifié. Comme les choses estoient en ce desespoir, le broüillard, qui avoit esté fort grand tout le matin, s'abaissa tout à coup ; et le canon du chasteau d'Arques descouvrant l'armée des ennemis, il en fut tiré une volée de quatre pieces qui fit quatre belles ruës dans leurs escadrons et bataillons ; cela les arresta tout court, et en fin trois ou quatre volées suivantes qui faisoient de merveilleux effets, les firent desordonner, et peu à peu se retirer du tout derriere le tournant du vallon, à couvert des coups de canon, et finalement en leurs quartiers.

Le Roy s'estant retiré à Arques, puis à Dieppe, il se fit là, durant un mois, plusieurs factions de guerre, et se passa plusieurs accidens qui meritent bien d'estre particularisez par les historiens : il s'en pourroit quasi faire un grand livre, et entr'autres de celui du pré, où le Roy sautant luy mesme au saut de l'Allemand (2) avec tous vous autres messieurs, il luy fut fait une saluë de deux cens mousquetaires qui s'estoient coulez sur le ventre entre deux hayes jusques à deux cens pas de luy au plus, lors ce fut à vous autres de vous escarter et retirer en diligence.

A la fin de ces factions diverses, M. du Mayne se retira du tout, voyant qu'il estoit arrivé quatre mille Anglois ou Escossois, et que messieurs de Soissons, de Longueville, d'Aumont et de Biron, venoient joindre le Roy avec de grandes forces, desquelles se voyant accompagné, il se resolut de relever sa reputation allant attaquer Paris, où il s'achemina, alla passer à Meulan et Poissy, et vous envoya avec M. de Mont-pensier avec des troupes passer pres de Vernon pour voir si l'espouvante et les amis que vous aviez dedans ne le disposeroient point à se rendre ; mais n'y ayant voulu entendre, M. de Mont-pensier sa retira en Normandie, et vous retournastes trouver le Roy à Villepreux.

## CHAPITRE XXIX.

*Tentative de Henri IV sur Paris. Défense de Passy par Rosny. Lettres du Roy.*

Le Roy ayant formé un dessein pour prendre

(2) Jeu militaire.

Paris, dressa l'ordre de ses troupes pour se saisir des faux-bourgs du costé où il estoit. Vous donnastes par celuy de St.-Germain, avec messieurs d'Aumont et de Chastillon, où ayans enclos, entre deux troupes, dans une rue pres la foire de Sainct Germain plusieurs Parisiens, il en fut tué quatre cens en un monceau en moins de deux cens pas d'espace. Vous nous dittes lors : « Je suis las de frapper, et ne sçauois plus tuer des gens qui ne se défendent point. » Lors l'on commença à piller ; vous et huit ou dix des vostres ne fistes qu'entrer et sortir dans six ou sept maisons où chacun gagna quelque chose, et y eustes par hazard quelque deux ou trois mille escus qui vous furent baillez pour vostre part. De là vous avançastes vers la porte de Neale qui estoit demeurée ouverte, si bien que quinze ou vingt de vous autres entrastes dans la ville quasi jusques vis à vis du Pont-Neuf, d'où l'on vous fit bien retirer ; si les troupes eussent esté prestes à donner par là, je croy que la ville se pouvoit prendre, mais peut-estre que l'armée se fut perdue dedans ; et si celuy qui estoit envoyé pour rompre le pont de Sainct-Mexen, eut bien fait son devoir, il y a grande apparence qu'elle se fut rendue ; M. du Mayne ne pouvant y arriver à temps.

Le Roy se retira deux jours apres, et s'en alla prendre Estampes ; d'où il vous renvoya à Rosny pour le servir en ce pays là pendant son voyage de Tours. Il prit toutes les foibles villes de Touraine, Anjou, le Mayne et basse Normandie, dont nous ne disons rien parce que vous n'y estiez pas.

[1590] Pont-oise fut pria par la ligue, et Meulan assiégué, que vous assistastes de tout vostre pouvoir et leur fistes passer des hommes à nage, pour leur faire entrer des poudres par une fort jolie invention, et les advertir du secours prochain. Le Roy vous escrivit afin d'aller joindre M. le marechal de Biron. M. d'Aumale qui estoit venu auparavant à Mante, passa dans la forest de Rosny, et si ceux que vous envoyastes en embuscade eussent suivy vostre ordre, sans doute, ils vous l'eussent amené prisonnier. Nous laissons à part les petites factions que vous fistes à vostre séjour à Rosny, où le siege d'Aufreville fut levé par une gentille invention dont vous usastes. Le mareschal de Biron, par vostre entremise, prit Evreux sans canon, et à vostre instance le Roy vint à Vernueil et à Ivry, pour secourir Meulan. Vous nous montrastes une lettre, où il escrivoit ces mots, pour response à la vostre : « M. de Rosny, par vostre importunité je m'achemine au secours de Meulan ; mais s'il m'en arrive inconvenient, je vous le reproche-

« ray à jamais. » Estant à Ivry il vous envoya par deux fois à la guerre. La seconde fois, vos chevaux estans las, il vous fit bailler ceux de M. de Beau-lieu Rusé. Vous ramenastes des prisonniers, et rapportastes que toute l'armée de l'ennemy passoit la riviere, et luy venoit sur les bras. Or avoit-il laissé toute son infanterie vers Honfleur ; tellement que se voyant contraint de se retirer à Vernueil, à cause qu'il estoit trop foible, il se mit en une merveilleuse colere contre vous, et dit : « Je voy bien que c'est pour sauver « vostre maison que vous ne vous estes point soucié « de hazarder ma vie. » Lors vous respondistes : « Sire, je ne vous avois pas escrit de venir sans « vostre armée ; et si vous l'aviez toute amenée, « comme je m'y attendois, le siege fut desja « levé. »

Peu apres, l'ayant jointe, il vous renvoya à la guerre, et luy rapportastes que l'ennemy levoit le siege ; avoit ja retiré le canon qui estoit deçà l'eau ; et que s'il ne marchoit en diligence, il n'y trouveroit plus personne ; comme il arriva le lendemain, il vous fit mener les coureurs, et trovastes M. de Bellangreville sur la chaussée de la Sangle. Le Roy entra dans le fort, et le lendemain il monta au haut d'un clocher, d'où il fut contraint, aussi bien que tous vous autres, de descendre un baston et une corde entre les jambes, d'autant que les ennemis avoient, de trois ou quatre vollées de canon, couppé toute la petite montée, et y tiroient tousjours. L'apres-dinée, le Roy voulut loger quatre pieces pour tirer dans la ville, et se mit en colere contre vous, de ce que l'on vouliez empescher, luy disant : « Pardieu, Sire, s'ils entendent leur mes- « tier, ils mettront bien-tost vostre canon le ventre « au soleil : » comme ils n'y faillirent pas, et fallut attendre la nuit pour le retirer.

Le Roy estant allé loger aux Orgreux, fut contraint de revenir à cause que vous l'advertistes que l'ennemy avoit fait un puissant effort au pont de delà, et pris la moitié d'iceluy. Vous vous en allastes apres à Rosny, où vous eustes advis par hommes expres que le sieur d'Allegre s'estoit saisi du chasteau de Rouen ; le Roy fut au secours et vous avec luy, mais à Gaillon l'on sceut la prise dudit chasteau ; le Roy s'en alla à Passy, qu'il vous bailla pour garnison, afin d'y rafraischir vostre troupe, cependant que luy alla assieger Dreux, d'où M. du Mayne, ayant joint l'armée espagnolle, entreprit de luy faire lever le siege ; et pour cet effet, il vint à Mante le dixiesme de mars, ayant une grande et forte armée, avec laquelle il passa la riviere, et vint loger dans vos terres et aux environs.

Le lendemain, l'avant-garde que conduisoit

M. de Rosne, vous vint assieger dans Passy ; et comme il sceut que c'estoit vous qui estiez dedans, à cause que vous estiez parens, avant que vous faire sommer, il vous escrivit un mot de lettre, en ces termes : « Monsieur mon cousin, « vous n'estes pas fin de vous estre fourré dans « une bicoque, à la descente d'une armée telle « que la nostre, contre laquelle vous ne sçauriez « tenir un jour ; et neantmoins desirant de vous « gratifier, regardez de quelle sorte vous voulez « sortir de là, car je m'y accommoderay pour « votre honneur. » Quelques heures auparavant vous aviez receu une lettre du Roy, où il vous mandoit : « Je viens d'avoir advis que l'armée « des ennemis vient passer la riviere à Mante ; « ils ne faudront pas de vous attaquer ; je sçay « bien que votre place n'est pas en estat de resister, si n'y avez fort travaillé, partant advisez à vous : car estant soldat et capitaine, ou le « devant estre, je remets en vostre disposition « de prendre vostre party à propos et me tenez « adverty de tout. » Cette lettre ambiguë et qui ne vous prescrivait rien de certain, vous avoit mis en peine ; tellement que vous resolustes, quoy qu'il en pût arriver, de soustenir un effort avant que vous retirer. Et partant vous respondistes à M. de Rosne, que vous le remerciez de ses courtoisies ; que la qualité de votre place ; les bons hommes que vous aviez dedans ; et l'armée du Roy preste à vous secourir, donnoient à vostre honneur un autre conseil que le sien ; tellement que croyant estre attaqué le lendemain, vous en advertistes le Roy, et fustes toute la nuit sur les escarpes de vos fosses, qui estoient assez bons (car de murailles il n'y en avoit quasi point) pour faire relever ce qui estoit éboulé, et accommoder des logis couverts à vos soldats, afin de soustenir un premier effort ; mais sur la pointe du jour vous entendistes un grand bruit et tumulte, dans leurs logemens, de personnes s'entr'appellans les uns les autres, et un peu apres des bruits de chartiers, qui faisoient haye et claquer leurs fouets, et pensiez qu'ils se vinsent loger avec l'artillerie sur vos contr'escarpes ; car de garder aucuns dehors, vous ne pouviez ; mais fustes estonné que ces bruits s'alloient tousjours esloignans, et peu apres vous vistes toutes leurs huttes en feu, qui vous fit dire à ceux qui estoient pres de vous : « Or, « graces à Dieu, nous voila hors de peine de « nous défendre, car les ennemis s'en vont. » Nous oubliions à dire que la nuit vous vistes de grands signes au ciel, de deux armées fort bien distinguées, et les hommes et les chevaux aussi se battans furieusement, et quasi tout ainsi que vous la vistes en effet le lendemain ; aussi sur le

soir vous eustes un courrier du Roy, qui vous escrivoit ainsi ;

*Lettre du Roy à M. de Rosny.*

Mon amy, je ne pensay jamais mieux voir donner une bataille que ce jourd'huy, mais tout c'est passé en legeres escarmouches et à essayer de loger chacun à son advantage. Je m'asseure que vous eussiez eu regret toute vostre vie, de ne vous y estre pas trouvé ; partant, je vous advertis que ce sera pour demain : car nous sommes si pres les uns des autres, que nous ne nous en sçaurions desdire. Je vous conjure donc de venir, et d'amener tout ce que vous pourrez, sur tout vostre compagnie et les deux compagnies d'harquebusiers à cheval de Badet et James, que je vous ay laissées ; car je les cognois et m'en veux servir ; adieu mon amy.

CHAPITRE XXX.

*Bataille d'Ivry. Conversation entre Henri IV et Rosny.*

Si tost que vous eustes receu la lettre du Roy, de laquelle est fait mention au precedent chapitre, vous fistes sonner la boutte-selle, montastes à cheval si à propos, et marchastes avec telle diligence, que vous arrivastes seulement une heure et demie devant la bataille, et desja quasi toutes les deux armées estoient en ordre pour en venir aux mains (que nous ne nous amuserons à descrire, d'autant que plusieurs autres l'ont fait, n'ayant icy à parler que de ce qui vous y arriva). Si tost que le Roy advisa vos troupes, il s'avança et vous dit : « Mettez « vostre compagnie en ordre sur mon aisle droite, « dans le corps de mon escadron ; faites mettre « vos harquebusiers pied à terre : car je les « cognois, je veux qu'ils me servent aujourd'huy « d'enfans perdus ; et leurs dittes qu'ils envoient « leurs chevaux avec les bagages ; et quand à « vous, venez avec moy : car je vous veux montrer toute la disposition des deux armées, afin « de vous instruire à vostre mestier. » Et en cette maniere vous ayant quasi passé devant toutes les troupes, et encouragé un chacun, et dit un mot sur les causes de l'ordre qu'il avoit estably ; il ne fut pas quasi revenu devant son escadron, que l'on commença à escarmoucher.

Les chevaux legers faillirent à estre renversez sans M. d'Aumont, qui les soustint et fit merveilles : ce jour là, l'artillerie du Roy estoit bien logée, et faisoit de grands effets ; et tout au contraire celle des ennemis ne faisoit quasi rien. Deux escadrons de l'ennemy, à sçavoir ; un de

mil ou douze cens reistres, et celui du comte d'Egmont estoient destinez pour charger celui du Roy; les reistres vindrent assez furieusement; mais, comme ils furent à trente pas, ils tournèrent court, sans vouloir combattre; la plupart tirans leurs pistolets en l'air, d'autant qu'ils estoient quasi tous de la religion. Le comte d'Egmont donna avec une grande hardiesse, et tous les siens combattirent de mesme; car vous fustes les uns teste à teste des autres un quart d'heure durant, frappans à qui mieux mieux avant que nul cedast ny que les escadrons ployassent: en fin les ennemis firent jour; plusieurs de l'escadron du Roy s'enfuirent et quasi toute la main gauche d'icelui; il y en eut de tuez et de blessez et force chevaux aussi; vous et vostre cheval fustes renversez, vostre cheval blessé d'une mousquetade des enfans perdus, qui luy perçoit le nez et tout le col, et alloit sortir à la selle, et d'un grand coup de lance, qui vous emporta le molet de la jambe, et luy descousit deux pieds du ventre; vous eustes encore un coup d'espée en la main, et un coup de pistolet en la hanche qui sortoit au petit ventre; estant ainsi mal mené, vostre escuyer eut tant d'heur qu'il vous amena un autre cheval, sur lequel vous montastes assez legerement, veu vos blessures. Mais à la seconde charge vous fustes encore porté par terre, vostre cheval tué, et vous blessé d'un coup de pistolet dans la cuisse et d'un coup d'espée à la teste; avec tout cela vous ne laissastes de vous relever; mais à cette fois vous ne trouvastes nul des vostres, tellement que vous demeurastes dans le champ de bataille, sans sçavoir où aller, n'y que faire, et voyant venir à vous un des ennemis, l'espée au poing pour vous charger, lequel infailliblement vous eut tué, car vous estiez sans casque, vous gagnastes un poirier que vous nous avez montré depuis deux fois, lequel avoit les branches si basses et si estenduës qu'il ne vous pût approcher; et ainsi, apres vous avoir tournoyé longtemps, il vous quitta.

Lors vous rencontrastes la Roche-foret (qui a depuis esté à vous et que vous ne cognoissiez point en ce temps là) qui menoit un petit courtant en main qu'il avoit gagné, lequel vous le bailla, et luy baillastes cinquante escus que vous aviez dans vostre pochette, car vous aviez cette coutume de porter tousjours de l'or sur vous lors que vous alliez aux combats; avec ce cheval vous en allant parmy le champ de bataille ainsi mal équipé, vous vistes venir à vous sept des ennemis, dont l'un portoit la cornette blanche et generale de M. du Mayne, lesquels se suivoient à la file qui vous crièrent *qui vive*, vous leur

dittes vostre nom; lors le premier d'iceux vous dit: « Nous vous cognoissons bien tous, vous voulez nous faire courtoisie et nous sauver la vie? — Comment! dittes vous, vous parlez comme des gens qui ont perdu la bataille. — Est-ce tout ce que vous en sçavez? respondi-  
rent-ils. Ouy, nous l'avons perduë, et si sommes trois qui ne nous sçaurions retirer, car nos chevaux sont comme morts. » Aussi y en avoit-il deux qui n'alloient qu'à trois jambes, et l'autre les trippes luy sortoient du ventre.

Vous acceptastes ce party, et ainsi messieurs de Chastaigne-raye, de Sigongne, de Chanteloup et d'Aufre-ville se rendirent à vous, avec la cornette blanche, que Sigongne vous mit en main avec force belles paroles. Les autres, qui estoient messieurs de Nemours, chevalier d'Aumale, et Tremont, voyans les troupes du Roy s'avancer vers vous, crierent: « Adieu, monsieur, adieu: nous nous sauverons bien encore, car nos chevaux ont bonnes jambes et bonne haleine; mais nous vous recommandons ces quatre gentils-hommes. » Ces trois seigneurs s'estans donc ainsi eschappez de vos mains, pource que vous ne les pouviez pas tenir, ny par persuasion, ny par force, et les quatre autres vous estans demeurez avec la cornette blanche semée de croix noires de Lorraine en memoire des occis à Blois, d'autant qu'il leur estoit impossible de se retirer, vous pristez vostre adresse vers le gros des Suisses, tous lesquels (autant ceux du Roy que ceux de la ligue) estoient les piques basses, et les harquebuses en jouë les uns devant les autres, en ordre de combat, sans neantmoins s'entre-donner aucun coup de pique, ny tirer une harquebusade: plusieurs troupes, tant d'une part que d'autre, couraient et vacquoient esparces dans le champ de bataille, les uns fuyans devant tout ce qu'ils voyoient de plus fort venir droit à eux, et les autres chargeans tout ce qu'ils voyoient avoir apparence d'ennemy, fut fort fut foible.

Tellement qu'une de ces troupes voyans ceux que vous aviez pris, avec des casaques de velours ras noir parsemées de croix de Lorraine sans nombre, en broderie d'argent, et cette cornette blanche aux croix ligueuses encore debout (car elle estoit entre les mains d'un des grands pages du Roy, que vous aviez rencontré là par hazard, auquel vous l'aviez baillée en garde, ne la pouvant porter à cause d'un grand coup d'espée que vous aviez dans la pointe du coude du bras gauche, et un autre moindre au poignet de la main droite); cette bande donc de gens de guerre s'en vint droit à vous, comme en un butin certain et tout préparé; mais vous

estant avancé vers eux, et ayant rencontré les sieurs de Chambray, Larchant, de Rolet, de Creve-cœur, de Palcheux, de Brasseuses et quelques autres de vos amis fort particuliers qui vous reconnurent (mais plutôt à la parole qu'aux lineamens du visage, d'autant que vous l'aviez tout tantoüillé de sang et de bouë), et s'arrestèrent à parler à vous, à quoy se joignit apres peu à peu le surplus de leur bande, qui estoit commandée par le comte de Thorigny, lequel ayant sceu qui estoient vos prisonniers et vous voyant si fort blessé, qu'à son opinion vous estiez en mauvais estat pour bien défendre ceux qui pourroient avoir des ennemis particuliers, il vous pria de luy vouloir mettre entre les mains le sieur de Chastaigne-raye qui estoit son parent, et qu'il s'obligeoit de parole de le remettre entre les vôtres si-tost que vous seriez en lieu de seureté : à quoy vous vous accordastes au grand dommage du prisonnier, d'autant que peu apres il fut tué par trois hommes d'armes de la compagnie de M. d'O, qui avoient esté des gardes du feu Roy, lesquels l'ayant recogneu, sans le menasser, luy donnerent chacun un coup de pistolet, en luy criant : « Ah ! mordieu, traistre à ton Roy, » tu t'es resjouy du meurtre de ton Roy, et as « porté l'escharpe verte de sa mort, » ainsi que vous le conta depuis le comte de Thorigny mesme, lors que vous luy redemandastes vostre prisonnier, de la rançon duquel plusieurs disoient qu'il vous estoit obligé, voire vous conseilloyent de luy demander, mais vous n'en volestes rien faire, tant pource qu'il estoit vostre amy fort particulier, que pource que vous sçaviez bien qu'il portoit assez de desplaisir de ce qui estoit arrivé à son parent.

Pendant le temps que vous fustes à parler au comte de Thorigny, et à quelques autres de la troupe qui s'enqueroient à vous par quelle bonne fortune estant si blessé, si mal monté et toutes vos armes tant fracassées, cette cornette blanche et ces bons prisonniers vous estoient tombez entre les mains. M. d'Anelot s'estant accosté de M. de Sigongne, qui luy offrit toute sorte de courtoisie, et voyant sa cornette blanche en la main d'un page, sans s'enquérir s'ils avoient esté pris par quelqu'un, se va mettre en fantaisie qu'il se pourroit prévaloir de ses despoüilles d'honneur et de profit tout ensemble ; et sur cette imagination il dit au sieur de Sigongne qu'il ne l'abandonnast point, et qu'il empescheroit bien qu'il ne receut aucun mal ny desplaisir, et au page qu'il le suivist et luy gardast bien cette cornette : puis, sans attendre leurs responses, sur un bruit qui s'esleva quasi par tout que l'ennemy se rallioit, et la survenuë du mareschal

d'Aumont qui dit au comte de Thorigny : « Al-  
« lons, monsieur, allons voir où sont ces ennemis  
« qui se rallient, et croyez que je les vous sepa-  
« reray bien ; » sur cét accident, dis-je, le sieur d'Anelot se rejoignit dans le gros qui s'achemina au grand trot vers le lieu d'où venoit cette allarme, qui se trouva fausse, car ce n'estoit autre chose que messieurs de Humieres, Mouy, la Boissiere et autres Picards, lesquels avec trois censchevaux arrivoient tout nouvellement à l'armée, pensans arriver à temps pour le combat, auquel vous sentant du tout impuissant à cause de vos playes et du sang perdu, vous laissastes courir tous ces messieurs ; et avec vostre cornette des ennemis et le reste de vos prisonniers, vous vous allastes renger à la teste du regiment de M. de Vignolles, qui avoit merveilleusement bien fait cette journée, lequel estoit de vos plus anciens et intimes amis, pour éviter tous autres accidens : et là fustes-vous contraint de faire chercher un chirurgien pour vous faire bander cette grande playe de la hanche qui venoit sortir dans le petit ventre, par laquelle vous perdiez tout vostre sang, et de vous faire apporter du vin pour empescher l'esvanoüissement où vous alliez entrer : et en cette sorte vous conduittes jusques à Annet, où vous appristes que le Roy avoit passé la riviere d'Eure poursuivant la victoire, comme il fit jusqu'à Rosny, où il alla coucher chez vous.

Si tost que vous fustes arrivé dans le chasteau d'Annet, le concierge vous fit apprester une chambre et un bon lict, où peu apres M. le mareschal de Biron, qui passoit par ce lieu pour suivre le Roy avec sa troupe de reserve, vous vint visiter, vous usa de plusieurs complimens, et voulut, pendant qu'il se faisoit apporter la colation, voir mettre le premier appareil à vos playes (à quoy s'employoit un chirurgien nommé Hubert) ; et voyant vos prisonniers dans vostre chambre, et la cornette blanche des ennemis au chevet de vostre lict, vous dit en s'en allant : « Adieu, monsieur mon compagnon, vous ne de-  
« vez point plaindre vos playes ny vostre sang  
« respandu, puis que vous remportez une des  
« plus signalées marques d'honneur que sçauroit  
« desirer un cavalier le jour d'une bataille, et  
« que vous avez là des prisonniers qui vous four-  
« niront dequoy payer vos chevaux tuez, faire  
« panser vos blessures, et boire de bon vin pour  
« faire de nouveau sang. »

Peu apres qu'il fut party, M. d'Anelot entra dans vostre chambre avec cinq ou six hommes armez de cuirasses, un visage tout interdit, ayant une mine despitée et refrongnée, lequel, apres une froide salutation, vous dit : « Monsieur,  
« voilà un gentil-homme (montrant M. de Sigon-

« gne) qui est mon prisonnier ; et une cornette  
 « blanche (montrant une des deux qui estoient  
 « au chevet de votre lit, car le sieur de Vassan  
 « y venoit d'apporter celle de votre compagnie)  
 « qui me doit appartenir ; partant , je vous prie  
 « de me faire mettre l'une ou l'autre entre les  
 « mains. — Voy ! monsieur , lui respondistes-  
 « vous , hé ! vray Dieu , que pensez-vous dire ,  
 « je croy que vous vous moquez ? — Pardieu ,  
 « repartit-il tout en colere , je ne me moque  
 « point , et suis resolu de les avoir. — Ho , ho !  
 « monsieur , luy dites-vous , c'est donc à bon  
 « escient ; mais puisque vous le prenez-là , faites  
 « tout ce que vous pourrez , car je ne m'en sou-  
 « cie gueres : que si j'avois les bras et les jambes  
 « en aussi bonne disposition qu'hier , la dispute  
 « en seroit bien-tost vuidée. — Et bien , bien ,  
 « dit-il , voyant entrer quinze ou vingt de vos  
 « cavaliers dans votre chambre , la plupart ar-  
 « mez , nous en parlerons donc une autre-fois. »  
 Et sur cela , voulant aborder M. de Sigongne , il  
 en partit tout despité ; pource qu'il luy dit qu'il  
 ne devoit pas contester une chose où il n'avoit  
 nul droit , estant veritable qu'à vous seul il avoit  
 donné sa foy et remis sa cornette entre les mains.

D'Annet vous vous en allastes dès le fin matin  
 à Passy , par eau ; là estoit votre garnison et  
 votre équipage. A votre arrivée vous y trouvas-  
 tes tous vos domestiques et vos gens de guerre  
 en peine de votre personne et doute du succez  
 de la bataille , d'autant qu'au commencement ils  
 avoient eu de mauvaises nouvelles de l'un et de  
 l'autre par quelques-uns qui s'en estoient fuis  
 (comme il y avoit apparence) sans avoir voulu  
 attendre la fin des combats : lesquels ayant ap-  
 pris votre arrivée et comme toutes choses s'es-  
 toient terminées , ils eurent une telle honte de  
 se presenter , et que l'on pût sçavoir leur nom ,  
 que dès la nuit mesme , voyans qu'on les cher-  
 choit , ils deslogerent à beau pied , laissant qua-  
 tre chevaux en une estable , sans aucunes re-  
 marques par lesquelles on ne pût deviner qui en  
 estoient les maîtres : desquels ayant fait perqui-  
 sition tout le lendemain , sans en avoir pû rien  
 apprendre , les chevaux furent par votre ordon-  
 nance vendus à l'enquan , et l'argent distribué  
 aux blessez qui avoient le moins de moyen de se  
 faire panser.

Le lendemain ayant fait faire un brancard  
 assez à la haste (à cause des nouvelles que vous  
 eustes que Mante capituloit , et que vous preten-  
 diez au gouvernement ) de branches d'arbres  
 sans peler , accommodé de cercles de poinçons ,  
 vous vous listes porter à Rosny : mais en arri-  
 vant par le costé de Bevrans pour éviter les mon-  
 tées et descentes de la Rouge-voye et de Chas-

tillon , vous vistes , du haut du costau , la plaine  
 d'alentour toute couverte de gens de cheval et de  
 chiens qui chassoient tirans vers le bourg , dans  
 lequel estant aussi entré par l'autre costé vous  
 fustes rencontré par le Roy (qui revenoit du chas-  
 teau y ayant esté prendre la collation) en l'équi-  
 page qui s'ensuit.

Premierement marcholent deux de vos grands  
 chevaux menez en main par deux de vos pale-  
 freniers , puis vos deux pages montez sur deux  
 autres de vos grands chevaux , le premier des-  
 quels estoit votre grand coursier gris , sur lequel  
 vous aviez combattu la premiere fois , et qui avoit  
 trois pieds de long de la peau de l'espaule droite  
 et des costez fendus , du coup de lance qui vous  
 avoit emporté la botte et un morceau du molet  
 de la jambe ; et une harquebusade qui luy avoit  
 traversé le nez et une partie du col , et luy estoit  
 venu sortir dans la criniere pres des panneaux  
 de la selle , lequel apres s'estre relevé sans sellé  
 s'en alloit courant par le champ de bataille , et  
 en fin par un grand heur avoit esté repris par  
 trois de vos harquebusiers qui avoient servi d'en-  
 fans perdus au combat.

Ce page avoit vestu votre cuirasse , et portoit  
 la cornette blanche des ennemis ; et l'autre vos  
 brassars et votre casque au bout d'un bris de  
 lance , d'autant que pour estre tout fracassé et en-  
 fondré de coups , il estoit impossible de le porter  
 en teste ; apres ces pages venoit le sieur de Mal-  
 gnan votre escuyer , ayant la teste bandée et un  
 bras en escharpe à cause de deux playes , lequel  
 estoit sulvy de votre valet de chambre Moreines  
 monté sur votre haquenée angloise , lequel por-  
 toit votre casaque de velours orangé à clinquant  
 d'argent sur luy et en la main droite comme un  
 trousseau de trophées , tout cela lié ensemble ;  
 divers morceaux de vos espées , pistolets et pan-  
 naches que l'on avoit ramassez.

Après cela vous veniez dans votre brancart ,  
 couvert d'un linceul seulement ; mais , par des-  
 sus , pour parade des plus magnifiques , vos gens  
 avoient fait estendre les quatre casques de vos  
 prisonniers qui estoient de velours ras noir , tou-  
 tes parsemées de croix de Lorraine sans nombre  
 en broderie d'argent , sur le haut d'icelles les  
 quatre casques de vos prisonniers avec leurs  
 grands panaches blancs et noirs tous brisez et  
 despenaillez de coups ; et contre les costez des  
 cercles estoient pendus leurs espées et pistolets ,  
 aucuns brisez et fracassez : apres lequel brancart  
 marcholent vos trois prisonniers , montez sur des  
 bidets , dont l'un , à sçavoir le sieur d'Aufre-  
 ville , estoit fort blessé , lesquels discouraient  
 entr'eux de leurs fortunes , et des succez contrai-  
 res aux esperances que M. du Mayne et le comte



d'Egmont avoient données à un chacun, ne parlans deux jours devant la bataille que d'assiéger la ville où le Roy se retireroit, ne s'attendant nullement que le Roy se deust résoudre au combat, attendu l'inégalité de ses forces. Après ces prisonniers, marchoit le surplus de vos domestiques; puis le sieur de Vassan qui voulut en arrivant porter vostre cornette; et à sa suite vostre compagnie de gens d'armes, et les deux compagnies d'harquebusiers à cheval des sieurs Jammes et Badet, qui avoient servi d'enfans perdus devant l'escadron du Roy, lors du combat; tout cela fort diminué de nombre (car vous en aviez perdu plus de cinquante tant des uns que des autres), mais grandement augmentez de gloire, aucuns d'eux se faisans porter dans des brancars comme vous, d'autres ayans les testes bandées, ou les bras et les jambes en escharpe.

Le Roy et tous ceux qui estoient avec luy voyans cette espee d'ovation, trouvoient cela bien disposé, encore qu'il eut esté fait par hazard un peu entremeslé de la vanité du sieur de Maignan vostre escuyer, auquel le Roy en parla comme cela (car il le cognoissoit, son pere ayant esté un de ceux qui ayda bien à le garantir du peril d'Eause), et puis s'approchant de vostre brancard, vous dit : « Mon amy, (car ce prince debonnaire comme vous sçavez mieus que nous, depuis que l'estant venu trouver au siege de Chastellerault, vous luy apportastes nouvelles de sa reconciliation que vous aviez négociée en passant à Blois, avec le roy Henri III, ne vous appelloit ni ne vous escrivoit quasi point autrement, sur tout lors qu'il vouloit vous gratifier ou que vous aviez fait quelque action qui luy plaisoit) » Je suis tres-ayse de vous voir avec un beaucoup meilleur visage que je ne m'attendois pas, et auray encore une plus grande joye si vous m'asseurez que vous ne courrez point fortune de la vie, ny de demeurer estropié, (car pour les autres coups ce ne sont qu'autant d'accroissemens de gloire et par consequent de contentemens, lesquels font supporter patiemment toutes les douleurs des playes, comme je l'ay moy-même éprouvé) d'autant que le bruit courroit que vous aviez eu deux chevaux tués entre les jambes, esté porté par terre, saboulé et petillé aux pieds des chevaux de plusieurs escadrons, et matrasé et charpenté de tant de coups que ce seroit grande merveille si vous en eschappiez, ou pour le moins ne demeuriez mutilé de quelque membre. »

Ausquelles amiables paroles vous respondistes ainsi (car nous nous estions approchez tout contre le Roy tout expres pour entendre vos dis-

cours) : « Sire, Vostre Majesté m'apporte autant de consolation qu'elle m'honore excessivement, de tesmoigner un si grand soin de moy; aussi n'ay-je point de paroles proportionnées à mes ressentimens, ny condignes aux louanges que meritent vos vertus. Et partant, laissant les choses à moy impossibles, je luy diray pour responce à ce qu'elle desire, sçavoir : Que j'ay recogneu une tant visible assistance de la main paternelle de Dieu, parmy tant de diverses fortunes et bonnes et mauvaises qui m'ont esté occurrentes pendant la bataille que la delivrance des uns et la gloire des autres en appartient à luy seul, qui a conduit favorablement les coups que j'ay receus; m'a tiré d'entre les pieds de plus de deux mille chevaux qui m'ont passé sur le ventre; et, ce croy-je, planté un poirier dans cette campagne avec les branches si basses qu'elles m'ont guarenty d'un coup, duquel j'ay veu tuer le pauvre Feuquieres, et puis m'a fait tomber es mains non-seulement trois des principaux gentils-hommes de l'armée (dont en voilà deux au cul de mon brancard, qui payent les chirurgiens et mes chevaux tuez), mais aussi une marque fort exquise et speciale d'un honneur non commun, qui est la cornette blanche du general de l'armée ennemie que j'estime plus que tout le reste. Et quant à mes playes, elles sont, graces à Dieu, en si bon estat combien qu'elles soient fort grandes, et sur tout celle de la hanche qui vient sortir au petit ventre, que j'espere dans deux mois au plus tard me trouver assez fort et disposé pour en aller encore autant chercher pour vostre service, avec telle affection que je voudrois estre assuré d'en recevoir autant à mesme prix. »

Surquoy le Roy repartit et vous dit : « Brave soldat et vaillant chevalier, qui sont, à mon advis, les tiltres plus glorieux que l'on puisse donner à un homme d'honneur faisant profession des armes, j'avois tousjours eu tres-bonne opinion de vostre courage, et conceu de bonnes esperances de vostre vertu; mais vos actions signalées en une tant importante occasion, et vostre responce grave et modeste qui attribué tout à Dieu, a surmonté mon attente, ayant bien jugé, comme c'est aussi mon advis, qu'il n'y a rien si mal seant à un homme de qualité, que d'user de vaines jactances, pour les choses signalées qu'il peut avoir faites, esquelles son honneur et sa profession l'obligent : et partant en presence de ces princes, capitaines et grands chevaliers qui sont icy pres de moy (desquels les ames genereuses, la fermeté de leurs cœurs, la force et la vigueur de leurs bras, et l'affilé trenchant de leurs

« espées, sont appuïts qui maintiennent et illustrent ma personne et ma couronne), vous voulez embrasser des deux bras, et vous déclarer à leur veuë, vray et franc chevalier non tant de l'accolade, tel que je vous fais à présent, ny de S. Michel, ny du S. Esprit, que de mon entiere et sincere affection, laquelle jointe aux longues années de vos fïdels et utiles services, me font vous promettre, comme je fais aussi aux illustres vertus de tous ces braves et vaillans hommes qui m'escoutent, que je n'auray jamais bonne fortune ny augmentation de grandeur que vous n'y participiez; et, craignant que le trop parler préjudiciast à vos playes, je m'en retourne à Mante; et partant, adieu mon amy, portez vous bien, et vous assurez que vous avez un bon maistre. » Et sur cela, sans vous donner le loisir de le repliquer, il prit le galop et s'en alla continuer sa chasse dans vostre garenne d'entre Rosny et Mante.

Le Roy s'en retourna coucher à Mante où il séjourna environ quinze jours inutilement, duquel séjour furent cause les necessitez d'argent, où tenoient enveloppé ce prince tous ceux qui avoient charges aux finances, et sur tout le sieur d'O (1), concerté pour cela avec les autres catholiques de sa faction, qui ne pouvoient supporter la domination, quelque douce et familiere qu'elle fut, ni les prosperitez d'un Roy huguenot, et ressentoient autant d'ennuy et de desplaisir, de l'honneur qu'il avoit acquis et la victoire signalée qu'il avoit remportée sur ses ennemis, que ceux-là mesme qui avoient perdu la bataille: et par la malice de telles gens furent perdus la plupart des fruits qui se devoient percevoir par un si haut fait d'armes dans un party composé de peuples qui ont accoustumé de s'estonner des mauvais succez, et de changer leurs affections selon les vents divers de prosperité ou d'adversité.

Pendant ce séjour de Mante, M. d'Andelot renouvella ses pretentions, desquelles il vous avoit parlé dans le chasteau d'Annet, touchant le sieur de Sigongne et la cornette blanche de M. du Mayne, et en fit de telles instances et plaintes au Roy, qu'il assembla les mareschaux de France et autres capitaines, et s'en alla à Rosny, où vous estiez detenu au lict, sans vous pouvoir quasi tourner qu'avec de grandissimes douleurs, pour vous entendre tous deux, l'un devant l'autre, en leur presence, sur vos differends; lesquels apres avoir oüy, et les raisons alleguées de chaque costé, mais sur tout les depositions de vos prisonniers et du page du Roy, auquel vous aviez baillé la cornette à porter, terminerent

(1) François d'O, l'un des favoris de Henri III.

vostre dispute par risées (car nous y estions pressés) que l'on fit au nez de M. d'Andelot, le Roy mesme luy demandant comment il n'avoit point de honte de contester une chose si mal fondée; ce qui le mutina de sorte que ce despit joint à d'autres, qu'il meditoit peut-estre de plus longue-main en son esprit, fut cause qu'il se rendit de la ligue quelques semaines apres.

## CHAPITRE XXXI.

*Prise des faubourgs de Paris. Blocus de cette ville. Le prince de Parme fait lever le siège. Retraite du prince de Parme. Tentative de Rosny sur Joigny.*

[1590] Le Roy ayant séjourné environ quinze jours à Mante, avoit, dès les premiers d'iceux, eu nouvelle d'une bataille que ses serviteurs avoient gagnée en Auvergne, contre le sieur de Randan, chef des ligueurs en cette province, le propre jour de celle d'Ivry. Apres, à force de crier, de se tourmenter et de solliciter messieurs les financiers, et sur tout M. d'O, il eut recouvert quelque argent, et fait faire montre à ses Suisses, et autres gens de guerre qui crioient apres le payement à eux deub à cause du gain de la bataille, il s'achemina vers Sens, sur les esperances de quelques intelligences, qu'aucuns de ses serviteurs disoient avoir dans cette ville-là; lesquelles ayans manqué, l'on passa jusqu'à s'engager en un siege, sur une autre presumption aussi mal fondée; à sçavoir, que ces peuples n'ayans ny bons capitaines, ny guerre de gens de guerre estrangers, ny vivres, ny munitions, ne verroient pas plustost jouer une furieuse batterie, que l'effroy ne les fit entrer en une capitulation; mais rien de tout cela ne succedant heureusement, le Roy n'ayant pas de munitions suffisamment pour la batterie d'une telle place, il prit resolution de lever le siege, et (pour couvrir la honte) un pretexte fort specieux, qui fut d'aller prendre Paris, lequel en effet il assiegea, ayant pris auparavant Corbeil, Melun, Lagny et Saint Denys, pour éviter que ces places n'incommo-dassent les vivres de son armée, et la travaillassent de continuelles allarmes; en tous lesquels sieges, aussi bien qu'en ceux de Dreux, Sens, et grande partie de celui de Paris, il se passa plusieurs particularitez dignes de remarque, lesquelles nous remettrons neantmoins aux historiens, d'autant que vos bleseures vous empêcherent de vous trouver aupres du Roy, jusques à ce qu'ayant oüy dire qu'il se faisoit tout plain de belles choses devant Paris, il vous prit fantaisie d'en avoir pour le moins la veuë, car vous

alliez encore à potences et aviez un bras en escharpe.

Estant donc arrivé en l'armée, encore que vous eussiez eu de grosses paroles avec le Roy, lors qu'il fut à Rosny, jusques à luy reprocher la longueur de vos services, tant de despences faites, de playes receuës, et de sang espandu, à cause qu'il vous avoit refusé le gouvernement de Mante, de crainte d'offencer les catholiques, si ne laissa-il pas de vous faire bonne chere, de vous donner force louanges devant tout le monde, de vous commander de loger pres de sa personne, de n'aller en nul lieu qu'avec luy, et qu'il vous feroit tout voir, comme il n'y manqua pas, notamment trois jours apres : car ayant projeté de se saisir en une mesme heure de tous les faux-bourgs de Paris, afin que, n'ayant plus que les portes de la ville à garder, il pust dautant plus facilement empescher les vivres d'y entrer, et ne se servissent de tant de fruicts et d'herbages, qui sont dans les jardins de dehors, et par consequent affamer tant plutost ce grand peuple.

Ayant donc choisi une nuit fort noire, afin de faciliter son execution et de voir tant mieux l'escopeterie d'un si grand et general attaquement, tel, à la verité, que nous n'estimons point s'en estre jamais veu un semblable pour si peu de sang respandu, dautant que Sa Majesté, ayant separé son armée en dix parts, et icelles ordonnées pour attaquer en mesme temps les faux-bourgs Saint Anthoine, Saint Martin, Saint Denys, Mont-martre, Saint Honoré, Saint Germain, Saint Michel, Saint Jacques, Saint Marceau, et Saint Victor, il s'en alla à l'abbaye de Mont-martre, où il ne mena avec luy que les vieillards, les gens de plume et les blessez, qui ne pouvoient combattre, au nombre desquels vous fustes, et mesme Sa Majesté vous fit apporter un siege aupres de luy, à sa mesme fenestre où il entretenoit vous, le bon homme M. du Plessis-rusé, M. de Fresne, et, ce nous semble, M. Alibour.

L'escopeterie commença sur la minuit, et dura deux grandes heures, avec telle continuation qu'il sembloit que la ville et les faux-bourgs fussent tout en feu, tant ces peuples tiroient, la plupart du temps sans besoin, et cela neantmoins fort esgalement; reservé vers la porte Saint Anthoine, où l'attaquement se fit de plus loin et plus lentement, et la défense de mesme, à cause qu'il n'y a autre faux-bourg que Saint Anthoine des Champs; mais, quoy que ce soit, nous croyons que qui pourroit faire faire un tableau de cette nuit là, où le bruit des voix et des coups d'harquebuses se pust représenter aussi bien que tant de bluettes de feu qui paroisoient,

il n'y auroit rien au monde de si admirable : et succeda ce dessein tant heureusement, que tous les faux-bourgs furent quasi pris en mesme temps, et toutes les portes de la ville si bien bloquées, qu'il n'y pouvoit plus rien entrer ny en sortir, ce qui causa de grandes necessitez au pauvre peuple, qui meritoient bien d'estre recitées; mais laissant cela aux historiens, nous nous contenterons de dire, que si le Roy eut esté bien servy, et que la plupart des capitaines et gens d'autorité n'eussent point permis l'entrée des vivres, pour en retirer des escharpes, plumes, estoffes, bas de soye, gans, ceintures, chapeaux de castor, et autres telles galantises, il leur eut esté impossible d'attendre le secours du prince de Parme, l'arrivée duquel, sous esperance, comme disoit le Roy, de donner bataille, luy fit lever le siege.

Tellement que le premier ou second du mois de septembre 1590, Sa Majesté, voulant faire les choses avec ordre, et prevenir tous inconveniens, elle fit retirer toutes ses troupes des faux-bourgs, deux heures avant le jour, et leur donna rendez-vous avec toutes les autres, pour les joindre en corps d'armée et s'en aller, selon que les occasions le pourroient requérir; et, ayant sceu que le prince de Parme avoit fait le semblable des siennes et s'estoit venu camper à Meaux et aux environs, il envoya sa cavalerie legere à Claye, avec charge d'aller à la guerre, pour essayer d'enlever quelque quartier, à tout le moins apprendre leurs desseins, ordre, et formes de marcher, loger et camper. En cette reconnaissance, ceux qui la firent virent souvent les ennemis, les armes à la main, et s'y passa mesme quelques combats, non indignes de memoire; mais nous en laissons les particularitez aux historiens, dautant qu'à cause de vos playes vous n'eustes aucune part à iceux; et dirons seulement que les nostres quitterent leur premier logis à l'ennemy, et deux jours apres celuy de Claye mesme, quoy que ce fût contre l'opinion du Roy et de plusieurs de ses vieux serviteurs; mais le mareschal de Biron s'en fit croire, et conseilla de prendre le logement de Chelles comme beaucoup plus avantageux; et neantmoins le prince de Parme ne laissa pas de venir planter son camp à deux canonnades de là, sur une autre montagne en pente, qui avoit un marais au pied, lequel estant entre les deux camps et fort fascheux à passer, estoit suffisant pour empescher les deux armées de venir en gros au combat, sans un trop grand desavantage de celle qui voudroit attaquer.

Tellement que ce séjour de trois ou quatre jours se passa en legeres escarmouches, deflits

particuliers, et carabinages de peu de fruit, ny d'un costé ny d'autre; reservé que le prince de Parme se servant de l'occasion, assiegea et prit d'assaut la ville de Lagny, quasi devant les yeux du Roy; lequel jugeant bien que, par ce moyen, le chemin estoit ouvert aux ennemis, pour secourir facilement la ville de Paris, apres avoir tenté, mais inutilement, un dessein par intelligence qu'il avoit sur icelle, il se retira ensemble toute son armée vers la riviere d'Oyse, logeant sa personne au chasteau de Creil, auquel lieu il nous souvient vous avoir ouï dire, qu'il se trouva reduit en de grandes fascheries et perplexitez, à cause de ce grand esclat des heureux succez des ennemis, du secours de Paris, les vents de prosperité et adversité, changeans diversement de moment en moment les affections, les courages et les actions de ceux qui ne pouvoient supporter qu'avec chagrin et despit la domination huguenotte, les principaux desquels, lors des moindres mauvais succez, alloient exagerant les plus petites infirmités de ce prince, et par la disette d'argent artificieusement pratiquée, donnoient sujet de plaintes à ceux qui servoient le mieux.

Nonobstant toutes lesquelles difficultez et travaux d'esprit, ce prince sçachant par experience n'y avoir rien pire, que de laisser des gens de guerre oysifs, il s'en alla assieger Clermont, qu'il prit en peu de jours, en mesme temps que le prince de Parme assiegea Corbeil, à la defence duquel un nommé Rignaut fit des merveilles; mais en fin le foible estant contraint de ceder au fort, la place fut prise d'assaut avec une grande tuërie de soldats et desolation d'habitans; et voyant que les autres villes royales estoient trop fortes, trop bien pourveües d'hommes et de vivres, et munitions pour estre assiegées avec apparence de bons succez, il reprit soudain, tout ainsi que si des affaires importantes à son maistre l'eussent grandement pressé, le chemin des Pays-Bas: dequoy le Roy adverty, il se mit à ses trousses, et le suivit de si pres qu'il ne se passoit quasi jour sans quelque beau combat, dont le plus remarquable fut au passage de la riviere d'Aisne, auquel le baron de Biron se trouva tellement engagé, que si le Roy luy mesme, avec tout ce que vous estiez de gens de qualité prez de sa personne, n'eust fait une furieuse charge aux ennemis, il ne s'en fut jamais retiré. Votre compagnie estoit demeurée à Mante, le Roy l'y ayant renvoyée dès le logement de Creil, afin de faire la guerre à Paris, Houdan et Chartres; mais vous suppliâtes tant Sa Majesté, que quelque incommodité que vous eussiez encore de vos blessures, il vous permit de demeurer apres

de luy, afin de voir ce qui se passeroit à l'affrontement de ces deux armées, dont l'une se retiroit et l'autre poursuivoit: car de vous pouvoir trouver à toutes les factions de guerre, c'estoit chose impossible, ne vous tenant encore que de travers à cheval, et ne tenant la bride que de la main droite, ayant l'autre en escharpe, à cause de vostre blesseure au coude.

Vous vous trovastes donc, des yeux seulement, à tous ces combats, et pour cette raison en laissons-nous les particularitez à l'histoire generale, et nous contenterons de dire que cette retraitte du prince de Parme, que la plupart de vous autres, pour faire valoir le mestier et rehausser la reputation du maistre, appelez une fuite honteuse, augmenta de sorte la gloire du Roy et la reputation du party royal, que le duc de Nevers, lequel, jusques alors, ne voulant, comme il l'avoit dit auparavant, servir un roy mal sentant de la foy, s'estoit tenu neutre en ses terres, le vint trouver avec toutes sortes de submissions, craignant peut-estre que le faix ne luy tombast sur les bras, ou que ceux de la ligue ne luy donnassent parmy eux le rang que sa vanité luy faisoit imaginer de devoir tenir: à l'exemple duquel plusieurs personnes de qualité recogneurent leur devoir, d'autres reprindrent le courage qu'ils avoient perdu, et quelques villes mesmes se reduirent au service du Roy; lequel, apres ce voyage, afin de rafraischir ses troupes qui estoient fort harassées, s'en alla faire quelque sejour à Mante, pendant lequel vous dressastes quelques pratiques sur Gisors, par le moyen d'un nommé de Fourges, duquel le fils estoit de vostre compagnie, en suite desquelles la ville fut prise; et à cette occasion vous pretendiez bien que le gouvernement vous devoit appartenir; mais les grandes oppositions que firent sur cela MM. de Nevers, d'O et autres catholiques, ayans esté cause que le Roy vous le refusa tout à plat, vous eustes sur cela de grosses paroles avec Sa Majesté, jusqu'à lui reprocher, comme vous aviez auparavant fait apres la bataille d'Ivry, vos services continuels de dix-huit années à vos propres cousts et despens, tant de peines et de fatigues souffertes, tant de perils courus, tant de playes receües et de sang respandu.

À tous lesquels reproches il ne vous respondit jamais autre chose sinon: « Je vois bien que vous estes en colere à cette heure; nous en parlerons une autre-fois; » et s'en alla d'un autre costé; puis vous voyant avoir fait de mesme, il dit à ceux qui le suivoient: « Il le faut laisser dire, car il est d'humeur prompte et soudaine, et a mesme quelque espece de rai-

« son ; neantmoins il ne fera jamais rien de meschant ny de honteux , car il est homme de bien et ayme l'honneur. » Le depit neantmoins vous porta à faire un voyage en la vallée d'Aillan et en Combraille pour voir vos terres , laissant vostre compagnie à vostre lieutenant , pour en avoir soin en vostre absence , et ne menastes que six gentils-hommes avec vous , outre vos domestiques.

Vous courustes plusieurs perils en allant , et mesme estant à Bontin , M. de Tonnerre vous y vint voir , et vous communiqua une entreprise qu'il avoit sur Joigny , à l'exécution de laquelle il vous pria de le vouloir assister de soldats et assembler le plus de vos amis que vous pourriez , et les mener avec vous , ce que vous fistes , et aviez ramassé quelques deux cens harquebusiers , avec lesquels ayant rompu une poterne , qui ne s'ouvroit plus il y avoit long-temps , à coups de petard , il entra dans la ville plus de trois cens pas ; mais ayant lors receu une harquebusade dans la cuisse dont il fut porté par terre , ses soldats oyans crier par les ruës , *arme , arme , et tué , tué* , s'effrayèrent si fort , que luy ayans aydé quelque deux cens pas à le faire marcher , et voyans courir des gens armez par les ruës , ils le laisserent à trente pas de la poterne , et s'enfuirent tous , sans qu'il fut jamais en vostre puissance , quoyque vous eussiez mis pied à terre , de les faire retourner , et fallut , qu'avec vingt hommes armez vous rentrassiez dans la ville pour en retirer ledit sieur de Tonnerre ; que si vous eussiez tardé un quart d'heure davantage , il estoit mort sans remede ; car les habitans s'estans recognus , et par la frayeur des vostres , ayans perdu celle qui les avoit saisis au commencement , ils s'en vindrent tous en gros à la défense de cette poterne , aupres de laquelle ils l'eussent trouvé.

L'ayant donc ainsi retiré , rassemblé ce que vous pustes de ses soldats et remonté à cheval , vous vous retirastes à Bontin , et luy se fit porter apres à Saint Forgeau et de là à Gien , dont il estoit gouverneur.

## CHAPITRE XXXII.

*Siege de Chartres. Danger que court Sully en s'y rendant. Prise de Noyon. Embuscade dressée à Mantes. Susprise de Louviers.*

[1591] Tant de genereux exploits , dont les chapitres precedens sont remplis , vous augmentoient tellement de jour en jour le courage , que les occasions vous manquans pour le faire paroistre , vous voulustes aller trouver le Roy à

Chartres où s'en presenta une telle que s'ensuit : M. de Chastillon , qui estoit arrivé depuis peu , ayant demandé un quartier d'attaquement , et fait faire un pont fort bien inventé , avec lequel il fit faire un effort à la ville , auquel vous estant trouvé , et le Roy vous y ayant veu fort bien faire , il vous en donna publiquement des loüanges , et prit ce sujet là , pour vous user d'une infinité de belles paroles et promesses ; ce qui vous ayant remis en bonne humeur , il vous commanda de faire venir vostre compagnie pour demeurer au siege ; ce que vous fistes , et l'estant allée quérir vous mesme , afin d'amener vostre équipage et apporter de l'argent tant pour vous que pour faire faire une montre à vos compagnons , comme vous fustes à trois lieues de Mante , vers le bourg de Touery , vous vistes venir , sur le chemin qui va de Dreux à Paris , une troupe de quelques vingts chevaux , lesquels ayant envoyé recognoistre , le sieur de Tilly vous rapporta qu'ils portolent tous des escharpes blanches , ce qui vous fit continuer vostre chemin sans allarme , et eux ayans pris à gauche entreurent dans un bois , où il fallut qu'ils fissent grande diligence de marche , et qu'ils sceussent bien tous les chemins du pays ; car ils vous vindrent joindre à la croisée de vostre chemin et de celui qui sortoit de ce bois , demandans *qui vive* ; à quoy sans vous douter que ce fussent ennemis , leur voyant des escharpes blanches , vous respondistes en riant , *amy , amy , vive le Roy !* et eux s'advançans tousjours , deux d'iceux vous osterent le chapeau , et les autres mettans le pistolet au poing , vous chargerent , dont il y en eut trois qui tirerent sur vous chacun leur coup , l'un desquels vous donna dans la lèvre de dessus , entra dans la bouche , et vint sortir derriere au chinon du col ; d'autres coups porterent sur des vostres , la Potterie et Tilly eurent chacun un coup de pistolet qui ne perça que le chapeau de l'un et la juppe de l'autre , et la Ruë fut porté par terre d'un coup de pistolet.

Sur cet accident , tant inopiné , tous vos gentils-hommes , au nombre de six et quatre de vos domestiques , crians *vive Rosny !* se rallierent avec vous et retournastes tous ensemble vers ceux qui vous avoient chargez , et coururent espars sans se joindre par le champ , et soit que la cognoissance qu'ils eurent de vostre nom , ou que le ralliement qu'ils vous virent faire les estoñnast , ils commencerent à se retirer vers une maison entourée de grandes hayes , vous les poursuivant et criant , autant que vostre blessure le pouvoit permettre , *tourne , traistre , tourne* , mais ils n'en firent jamais aucun semblant , et comme vous approchastes de ces maisons , de

dedans une haye il vous fut tiré trois harquebusades qui n'estoient chargées que de petites dragées, dont il vous en donna dix ou douze dans le visage et la teste, qui entrèrent un peu dans la peau, et toutes celles qui donnerent dans les habits de vous et de vos gens, à toute peine les percerent-ils et ne donnerent pas jusques à la chair. Ce second accident aussi que ces gens se retiroient à toute bride et la quantité de sang que vous perdiez, vous fit tourner bride, et vous en aller à Touery chez M. d'Autueil où vous vous fistes panser, et puis porter à Mante pour achever de vous guerir, où vous sejournaistes un mois ou six semaines, pendant lesquelles Chartres fut pris, par le moyen de M. de Chastillon principalement, dont nous laissons le recit aux historiens, d'autant que vous n'y estiez pas.

Le Roy, au partir de Chartres, s'en alla en Picardie, à cause de l'affection qu'il portoit à une fille de M. d'Estrée, nommée Gabrielle, et pendant le sejour qu'il fit à St.-Quentin, il fut dressé une entreprise sur Corbie, laquelle succeda heureusement, par le moyen de M. de Parabere, et nous semble qu'un de messieurs vos freres fut à l'exécution, dont nous laissons les particularitez aux historiens, aussi bien que des choses qui se passerent au siege de Noyon, pource que vos blesseures vous empêcherent de vous trouver à l'une ny à l'autre de ces factions.

Mais, d'autant qu'il ne s'est quasi point fait de siege, où il se soit rendu tant de divers combats, et plus bravement exécutez qu'à celuy de cette ville là, nous vous ramentevrons en gros, laissant le détail à ceux qui s'y sont trouvez, que le sieur de Rieux, soldat fort brave et industrieux, qui estoit gouverneur de Pierrefonds, se jetta bravement dans Noyon avec cinquante chevaux et autant d'harquebusiers, et fut luy seul cause de la grande resistance que fit la place. Un nommé la Chanterie, mestre de camp, fit aussi dessein de s'y jeter avec son regiment; mais il fut taillé en pieces, et luy se sauva dans la ville avec vingt-cinq des siens seulement. Le sieur de Tremblecourt voulut faire le semblable avec son regiment; mais il fut entierement défait, et n'y pût mettre un seul homme. Le vicomte de Tavenne, qui estoit mareschal de camp des troupes que M. du Mayne avoit laissées en ces quartiers de Picardie, sous le commandement de M. d'Aumale, voyant ces deux mauvais succez, voulut essayer de faire quelque chose de mieux; et, pour cet effet, il rassembla environ quatre cens harquebusiers, avec lesquels ayant marché toute la nuit, s'approcha jusqu'à deux ou trois portées de mous-

quet de l'armée, sans avoir donné aucune allarme; mais à l'oüye du premier *qui va là*, provenant seulement des vedettes de cinquante ou soixante chevaux qui estoient là en garde, tous les siens entrèrent en un tel effroy que plusieurs prindrent la fuite, et quelque exhortation qu'il leur pût faire, il n'en mena pas le tiers au combat, et encore attaquèrent-ils si laschement, qu'entendans de tous costez sonner à cheval, et ceux qu'ils avoient en teste crièrent *charge et tué*, que tout prit l'espouvante et fut défait, le vicomte de Tavenne pris et blessé, ensemble plusieurs autres chefs.

M. d'Aumale, qui faisoit son sejour à Han, ressentant un tel desplaisir de tant de mauvais succez en suite des uns des autres, et de si grandes pertes, se resolut de chercher les moyens de les reparer par quelque faction signalée; et pour cet effet, ayant rassemblé cinq cens chevaux et autant d'harquebusiers à cheval, il fit dessein, non de se jeter dans la ville, ny d'essayer d'y faire entrer du secours, mais d'enlever deux quartiers des chevaux legers qu'il avoit fait recognoistre par le sieur de Bellanglise, lequel luy avoit rendu la chose bien facile, et à cette occasion luy en bailla-il la conduite, et de fait, ayant renversé les vedettes et le corps-de-garde, il donna fort furieusement dans le logement: mais il les trouva quasi tous à cheval, d'autant que le Roy les avoit mandez pour le venir trouver, les voulant envoyer à la guerre: tellement que le sieur de Bellanglise et les siens y furent bien receus d'une autre façon qu'ils ne s'attendoient, et en peu d'heure, sur cette allarme, le baron de Biron, et les sieurs de la Hargerie, de la Boissiere et de Lannoy, qui montoient aussi à cheval pour aller trouver le Roy, arrivans au secours des leurs, firent une si furieuse charge que tout fut mis en déroute, et ses principaux chefs tuez ou pris, et en arriva bien peu à Han qui ne fussent charpentez de coups d'espée ou pistolet, et quasi tous en sang; auquel lieu arrivant en mesme temps M. du Mayne, il eut le desplaisir de voir une telle déconfiture, laquelle jointe aux precedentes, et à la perte de la place si elle n'estoit bien-tost secouruë, qu'il se resolut d'assembler toutes ses forces et de faire lever le siege ou donner bataille; et, pour cet effet, il manda à M. de Rosne, qui commandoit une armée qu'il avoit vers la frontiere de la Champagne de quelque douze cens chevaux, desquels estoit le chef le prince d'Ascoly, et de sept ou huit mille hommes de pied, de le venir joindre, et ayant rassemblé toutes les garnisons, il forma un corps d'armée d'environ deux mille chevaux, et huit à neuf mille hommes de pied: mais quoy qu'il

eut publié qu'il fust plus fort que le Roy d'un quart en nombre d'hommes, que l'on l'allast tousjours agacer jusques dedans son camp, et que ceux de Noyon eussent esté receus à capitulation, laquelle portoit qu'ils remettroient la place és mains du Roy, si M. du Mayne dans six jours ne faisoit lever le siege, ou ne jettoit par force deux mille hommes de combat dedans, et que ces conditions luy eussent esté signifiées par un gentil-homme que le Roy permit à ceux de la ville de luy envoyer; nonobstant, dis-je, toutes ces considerations, M. du Mayne, M. d'Aumale, ny le prince d'Ascoly, ne voulurent jamais se résoudre à une bataille, et laisserent perdre Noyon.

Pendant ce siege, il arriva deux choses que nous avons obmises : l'une, la sortie de M. de Guyse, hors du chasteau de Tours, où il estoit prisonnier, dequoy nous laissons les particularitez à un autre, à cause que vous n'eustes aucune part à tout cela : et la seconde, une entreprise que M. du Mayne fit sur Mante, où vous estiez lors empesché à vous faire guerir de vos playes, de laquelle neantmoins ny vous, ny messieurs d'O, de Buhy et vos freres ne peustes sçavoir autre chose, si non que M. du Mayne, avec toutes les garnisons de Dreux, Paris et Pont-oyse, sous esperance de quelque intelligence, vindrent jusqu'à la portée du mousquet des murailles de la ville, sans avoir donné aucune allarme, et n'en eustes tous advis que le jour ne fut desja grand, et n'eussent esté descouverts par les sentinelles, lesquelles leur tirerent quelques harquebusades, au bruit desquelles vous fustes sur les remparts, avec vostre teste encore bandée et leur fistes tirer quelques mousquetades et coups de pieces; et ainsi ils se retirerent en bon ordre, laissant deux cens chevaux derriere : de là ils s'en allerent à Houdan, où il y avoit quelques Suisses, et la compagnie d'un de messieurs vos freres logez, qu'ils firent sommer de se rendre, ou de prendre passe-port pour se retirer; mais s'estans mocquez de cela, et n'ayans respondu qu'à mousquetades, ils reprindrent chacun le chemin de leurs garnisons.

Or, voyant qu'on advertissoit à tous propos M. vostre frere, gouverneur de Mante, qu'il y avoit sans doute une entreprise sur la place, laquelle infailliblement s'executeroit, s'il n'y donnoit bon ordre, dautant qu'il y avoit des intelligences avec des habitans et mesme des soldats, vous luy dittes une fois qu'il vous en parloit afin d'y apporter remede : « Tous ces advis « si mal circonstanciez me semblent bien fort « vagues : et neantmoins, afin de ne rien negli- « ger, si vous me voulez laisser faire, nous « en decouvrirons quelque chose, voire peut-

« estre leur dresserons nous une si bonne amorce, « que nous leur ferons maudire l'entreprise. » De quoy s'estant totalement remis à vostre prudence et conduite, vous envoyastes querir six soldats qui avoient esté avec vous, et servy d'enfans perdus le jour de la bataille d'Ivry, lesquels vous aviez mis de la compagnie de M. vostre frere, et leur donniez à chacun huit livres par mois outre leur solde; et leur ayant fait entendre ce que vous desiriez faire, ils s'y resolurent aussi-tost, qui fut de se retirer de la garnison sous couleur d'un grand mescontentement, et par le moyen d'amis se faire recevoir dans la garnison de Pont-oyse, et au bout de quelques jours proposer à M. d'Alincourt une entreprise sur Mante, la rendre si facile par le moyen des intelligences qu'ils disoient y avoir, que les autres, s'il y en avoit, peussent estre descouvertes, et, en tout cas, tous autres desseins quittez pour embrasser celui-cy.

Il se passa infinies choses avant que de les amener au point désiré, dont le recit des particularitez seroit trop long et peut-estre ennuyeux; et partant il suffira de sçavoir qu'ils firent mettre, par les facilitez que vous y apportiez, entre les soldats de la garnison de Mante, quatre soldats de M. d'Alincourt, lesquels vous cognoissiez bien, mais n'en faisiez pas semblant, et eux n'estimans nullement estre descouverts, donnoient advis de tout ce qui se passoit, et confirmerent ceux que bailloient les six soldats congediez; et fut tout cela si bien conduit que l'on sceut tous les habitans qui avoient quelque affection à la ligue, et que la resolution fut prise d'executer ce dessein à un certain jour, M. du Mayne, pour la seconde fois y estant en personne, à cause de la consequence de l'entreprise, M. le cardinal de Bourbon (1), le conseil du Roy, et le grand conseil faisans là leur residence ordinaire : cependant vous aviez préparé des matelats de poudre à canon pour les enfouir dans le rempart où se donnoit l'escalade, afin d'y mettre le feu lors que ceux qui seroient entrez se mettroient dessus, et aviez clos toutes les advenues, et fait percer les maisons en plusieurs lieux, bref accommodé si bien toutes vos inventions qu'il sembloit impossible qu'il se pust sauver un seul de ceux qui donneroient.

Tout cela ainsi préparé, vous fistes peu à peu, afin de ne donner point d'allarme, filer des gens de guerre dans Mante, des garnisons de Nogent, Vernon et Meulan; et le jour pour l'exécution estant arrêté, vous envoyastes le sieur de Tilly vers le Roy à Compiègne pour luy donner advis de

(1) Charles de Bourbon, frère du prince de Condé mort à Saint-Jean-d'Angely.

toute cette menée, laquelle il trouva si bien conduite et pleine d'apparence d'un bon succez, que ne voulant, selon sa coustume, laisser passer aucune occasion où il y eut dequoy mener les mains, sans y avoir part, il se delibera de se trouver en celle-cy, renvoyant neantmoins le sieur de Tilly sans luy dire autre chose sinon qu'il approuvoit vôtres desseins, et que vous regardassiez à l'exécuter aussi bien qu'il estoit commencé : mais comme le soir de la nuit que vous luy aviez cottée fut venu, il arriva dans Mante du costé du pont avec cinquante hommes armez choisis, qui n'avoient que chacun un valet, avec dessein de faire luy mesme la charge qui avoit esté projetée par le dehors lors que l'on verroit l'espouvante parmy les troupes ennemies, cause de la perte de tant de gens sur les remparts, dans les fossees, et sur les contr'es-carpes, d'autant que toutes les tours, portaux et courtines, devoient estre bien garnis d'harquebusiers, mousquetaires et petites pieces.

Vous estiez sur les remparts bien embesogné à faire accommoder un matelats de poudre, vos barricades des advenües et disposer l'ordre des gens de guerre, lorsque l'on vous vint dire la venue du Roy, laquelle vous apporta un merveilleux desplaisir, vous doutant déjà qu'il seroit impossible de la tenir si secrette que les ennemis n'en fussent advertis (quoy que vous eussiez fait arrester et enfermer les quatre soldats de Pontoyse et deux habitants qui avoient intelligence avec eux sans vostre intention) et n'en prissent un tel ombrage que cela les empescha de donner; tellement que plain de dépit, de colere et d'apprehension que vos six soldats ne courussent fortune, vous vous en allastes trouver le Roy, et ne vous pûtes empescher de luy dire en le saluant : « Pardieu, Sire, vous avez fait « une belle levée de boucliers, qui infailliblement « empeschera un signalé service que nous vous « voulions rendre. Hé quoy ! n'avez-vous pas « acquis assez de gloire et d'honneur en tant de « combats et batailles où vous vous estes trouvé « plus que mille autres de ce royaume, sans « vouloir tousjours faire ainsi le cheval léger ? « Pour moy, je tiens que cette vanité (pardon- « nez moy si je l'appelle ainsi) fera tourner en « vent et en fumée toutes nos belles esperances ; « et partant je n'ay plus besoin de rien preparer « pour leur faire voir mes feux de joye, ou plutost « de mort, et ferez peut-estre (ce luy dittes-vous « tout bas à l'oreille) faire pendre six pauvres « soldats que j'ay employez à un tel hazard pour « l'affection qu'ils ont à vostre service, de quoy « ce sera grand dommage. »

Le Roy vous voyant ainsi en colere, et jugeant

bien que ce n'estoit pas sans raison, ne s'amusa pas aussi à respondre à vos paroles ; au contraire, il se mit à vous flatter afin de vous appaiser et vous faire retourner sur les remparts pour continuer vostre ordre, voire peu apres il voulut aller voir luy mesme tout ce que vous faisiez et tout vostre travail, lequel il approuva, et s'en alla soupper chez monsieur vostre frere, car il n'avoit point amené de cuisine. Apres soupper toutes choses estant préparées selon le projet, luy qui estoit las de sa cavalcade et avoit grande envie de dormir, se jetta sur un lict tout vestu et botté avec ses armes aupres de luy ; et vous et un de messieurs vos freres, l'autre demeurant en sa chambre, vous en allastes chacun au quartier à luy destiné, mettre les gens de guerre et toutes autres choses necessaires en l'ordre requis pour bien exploitter, où vous demeurastes toute la nuit à escouter, sans allarme quelconque, et voyant la pointe du jour blanchir l'orient, et par consequent qu'il ne se falloît plus attendre à aucun effet, vous vous desarmastes et vous jettastes sur un matelats, y dormistes environ une heure et demie, et puis vous en allastes trouver le Roy au chasteau, ainsi que M. de Bellangre-ville y arrivoit, ne faisant que venir de Meulan, lequel luy dit en le saluant : « Pardieu, Sire, messieurs de Mante peuvent bien « remercier vostre venue, car il ne faut point douter que sans icelle la ville estoit prise, d'autant « que deux mille hommes de pied et trois cens « chevaux, entre lesquels estoit M. du Mayne, « estant venus jusqu'à Bourgenville, si tost qu'ils « eurent appris par quelques paysans qui avoient « esté le jour de devant à Mante, qu'il y estoit « venu force gens, et que mesme ils y avoient « veu Vostre Majesté, ils s'estoient arrestez tout « court, et apres estre entrez cinq ou six dans « une chambre et estre ressortis l'on avoit crié : « Il faut s'en retourner, car nous sommes des- « couverts, le Roy estant arrivé à Mante avec « force gens de guerre : ce qui avoit mis une telle « espouvante parmy eux, qu'ils sembloient avoir « fait à sauve qui peut, ayant laissé des charrettes chargées d'eschelles, de cordages et de « piques, que j'ay commandé estre amenées icy « par les paysans mesmes ausquels ils ont parlé, pour vous les faire voir et entendre, afin « que vous ne doutiez nullement de ce que je « vous dis. »

Le Roy, qui n'estoit pas moins fasché que vous d'avoir fait faillir un si beau dessein, et voulant faire tout ce qui seroit possible pour le renouër, disputa tousjours avec M. de Bellangre-ville, qu'il n'y avoit nulle entreprise sur Mante ; mais, nonobstant tout, il n'y eut jamais



moyen de disposer M. du Mayne à plus rien entreprendre, vos soldats s'estans sauvez d'entre leurs mains, et les leurs d'entre les vostres, qui descouvrirent tout.

Le Roy sejourna quelque temps à Mante, y ayant fait venir le reste de sa Cour et suite, pendant lequel il executa luy mesme une entreprise que de longue-main le sieur du Rollet avait pratiquée sur Louviers par le moyen d'un certain prestre qui estoit aux gages ordinaires de la ville pour se tenir au clocher, afin de descouvrir tout ce qui en approcheroit, en quoy il s'estoit montré si soigneux et si exact qu'il sonnoit jusqu'à un homme de pied, et portoit une banderole du costé où il arrivoit quelqu'un. Or ce prestre ayant esté gagné par le moyen de deux cens escus au soleil que par diverses fois l'on luy avoit distribuez, et promesse d'un benefice de mille escus de rente, Rollet gagna encore un corporal et trois soldats de la garnison par le mesme moyen, lesquels depuis un mois ou deux, le jour qu'ils estoient de garde à la porte, avoient peu à peu accoustumé dix ou douze bourgeois de la ville, qui entroient en garde avec eux, de s'en aller disner et se fier de la garde de la porte tant à eux que sous la confiance qu'ils avoient au prestre du clocher.

Toutes ces choses ayans donc ainsi esté bien disposées, le Roy partit de Mante une nuit avec trois cens chevaux et cinq cens harquebusiers à cheval, marcha tout le reste d'icelle et tout le lendemain, et prit si bien ses mesures qu'il n'arriva à la veuë de la ville que sur les onze heures; tellement que marchant droit à icelle sans aucun son de cloche, la premiere troupe que menoit Rollet fut admise dans la ville par son corporal et ses trois soldats gagez, sans aucune allarme, et en suite vous y entrastes tous comme vous eussiez pû faire dans une ville amye; si bien que les bourgeois se trouvant ainsi surpris lors qu'ils estoient à table, et voyant tant de troupes dans leurs ruës avec des escharpes blanches, ils regarderent plutost à se renfermer dans leurs maisons, à cacher tout ce qu'ils avoient de meilleur, et sauver leurs filles et leurs femmes, qu'à prendre les armes ny résister. Il y eut seulement un (il ne nous souvient pas bien si ce fut le sieur de Fontaine-martel ou autre) qui avoit sa compagnie de gens-d'armes là dedans en garnison, lequel prist les armes et tascha de rallier ses compagnons; mais ce fut avec telle precipitation et si mauvais ordre, que tout cela fut aussi-tost dispersé et contraint de se rendre avec la ville, qui fut toute pillée, le principal butin estant en toilles et en cuirs, dont les sieurs de Bois-brueil, Tilly, Maignan,

Camorde, Beaugrard, qui estoit de Louviers et en sçavoit tous les aistres, du Peyard, la Trape que vous aviez seulement menez avec vous, en ramasserent quantité que vous partageastes, et en eutes quelque mille escus pour vostre part.

### CHAPITRE XXXIII.

*Capture précieuse faite par Rosny. Siège de Rouen. Conversation entre Henri IV et Rosny.*

Les prosperitez du Roy croissans journellement, tant par les heureuses victoires et prises des villes susdites, que par la conquête d'une infinité de petites places que faisoit M. de Montpensier, luy enflèrent tellement le courage et de tous vous autres messieurs de son conseil, que sur les persuasions et offres des Normands, et les esperances d'assistances de la reine d'Angleterre, des Hollandois et des Allemands, comme ils en avoient donné parole lors qu'il voudroit entreprendre quelque chose de grand, il se resolut d'attaquer Rouën.

Pendant que l'on preparoit toutes choses pour cet effet, le Roy s'en alla vers Compiègne pour des causes secretes, mais sous couleur de dépêcher le vicomte de Thurenne pour aller faire une levée de reistres; et vous, estant demeuré à Mante, vous y vistes madame de Chasteau-pers, dont vous devinstes tellement amoureux, et elle peut-estre de vous, qu'en peu de jours vous convinstes de vous marier ensemble. Il vous arriva lors aussi une petite fortune que vous nous permettez de vous ramentevoir, pource qu'il y eut dequoy rire et dequoy profiter tout ensemble, dont l'occasion fut telle.

Le Roy avoit fait faire des défences expresses de ne laisser aller aucuns vivres ny commoditez à Paris ny à Rouën, nonobstant lesquelles les gouverneurs des villes, et sur tout de celles qui estoient sur les rivières, s'accordans ensemble pour profiter, donnoient journellement des passeports pour faire passer vivres, denrées et marchandises de Paris à Rouën, quoy que vostre compagnie traversast souvent leurs desseins, d'autant que vous qui n'aviez jamais désiré de profiter, sinon avec l'honneur et l'avantage de vostre maistre, la faisiez courir sur les passages, et preniez souvent, nonobstant les passeports des gouverneurs, des bœufs, moutons, pourceaux, poullaliers, coquetiers et autres choses allans à Paris. Or un jour, comme vous fustes revenu de faire une course, vous fustes adverty par un gentil-homme nommé de Fourges, qui estoit à vous, qu'il estoit passé en vostre absence un grand bateau tout chargé de moruë, haranc,

saumon et maquereau salé, pour lequel tous les gouverneurs ayans traité, montoit de Rouën à Paris, où tout cela se devoit vendre, et en rapporter le prix encor dans un petit bateau, dans lequel devoit estre au retour le pere du sieur de Fourges, avec les passeports des gouverneurs pour la conduite de cette somme, que l'on disoit ne pouvoir estre moindre de cinquante mille escus; à cét advis vous ne fistes semblant de rien, mais vous ne laissastes pas d'envoyer apres ce bateau pour essayer d'apprendre quelque chose du retour de l'autre, et fustes si bien et si heureusement servi en cette occasion, que faisant tenir un bateau en garde sur la riviere entre Meulan et Mante, dans six jours vous eustes advis que le bateau descendant estoit pris; aussi-tost vous montastes à cheval, allastes le long des rivages de Seine; et les ayant rencontré vous vous mistes dedans et l'amenastes à Mante, au grand desplaisir de monsieur vostre frere, car il avoit passeport de luy, dequoy neantmoins il ne vous osa jamais parler, tant par respect que pource qu'il sçavoit bien que le Roy vous soustiendrait en cela, et se mettroit en colere contre luy.

Dans ce bateau, il n'y avoit que deux petits balots liez comme de la marchandise, esquels vous estimiez qu'auroient esté cachez les cinquante mille escus dont on vous avoit parlé; mais les ayant desballez, et n'y trouvant que des eschevaux de soye d'Espagne et des bobines d'or et d'argent, vous demeurastes bien estonné et en colere; vous demandastes au sieur de Fourges où estoit le prix des salines qui avoient esté vendus, lequel vous respondit qu'il n'y en avoit en essence que ce que vous voyiez dans les balots et que le surplus estoit en lettres de change, desquelles il vous en montra pour trente six mille escus, ce qui augmenta encor vostre colere; mais en vous promenant avec le sieur de Fourges, et le menaçant de le mettre en prison s'il ne disoit verité, il arriva que ses chausses, pour avoir esté trop chargées ou mal cousues, s'entre-ouvrirent par le derriere, d'où il sortit une trainée d'escus au soleil qui s'espandoient sur le planché de la chambre, et lors qu'il se voulut arrester vous luy dittes: Allons, allons « M. de Fourges, car je voy bien qu'il y aura « plus de plaisir et de profit à vous faire prome-  
« ner qu'à vous faire asseoir. » En fin apres plusieurs autres tels propos, l'ayant fait despoüiller et fouïller, vous trovastes que l'on avoit cousu environ sept mille escus en or dans ses habillemens, qui vous vindrent bien à propos pour attendre la vente de vos bleds de Bontin, et de vos foins et bois de Rosny.

Nous ne nous amuserons point à reciter les coleres de M. vostre frere et de M. de Bellangreville, ny les risées du Roy lors que tout cela fut sceu. Mais revenans aux preparatifs pour le siege de Rouën, ceux de Caën et autres villes de Normandie tenans le party du Roy, fournirent argent, vivres et munitions.

La Reine envoya d'Angleterre quatre mille Anglois, dont estoit general un nommé Roger Willemes, et de plus y envoya, au temps du siege, le comte d'Essex, lors son mieux aymé, avec quelque infanterie et bonne troupe de noblesse angloise: les estats des Provinces Unies, outre les deux regimens qu'ils entretenoient d'ordinaire au Roy, luy envoyerent le comte Philippe de Nassau avec une flotte de cinquante voiles bien esquippez, fournis d'environ deux mille cinq cents soldats: et M. de Thurenne qui avoit esté envoyé, comme nous avons dit, vers les princes d'Allemagne confederes de la France, ramena le prince d'Anhalt avec cinq ou six mille reistres et quelques lansquenets: et le Roy, ayant ramassé d'ailleurs tout ce qu'il avoit pû, formoit un corps d'armée de pres de quarante mille hommes, compris six mille Suisses, avec lesquelles forces il s'en alla prendre son logement à Dornet, où vous pristés aussi un logement particulier pour vostre personne; et vous doutant bien que ce siege ne seroit pas un ouvrage de trois jours, vous accommodastes si bien vostre maison et vous pourveustes si abondamment de toutes choses, que vous ny vos chevaux ne manquastes jamais de rien.

Vostre compagnie de gens d'armes, comme toutes les autres, avoit esté logée en la campagne par les villages, afin de les faire vivre, et nous semble que vostre quartier s'appelloit Fresnay Lesplan, où vous n'alliez pas souvent; mais n'abandonniez jamais le Roy, ou le mareschal de Biron, afin de voir tout ce qui se feroit aux tranchées, logemens d'artillerie, et attaquemens de la place, ausquels vous faisiez estat de vous trouver le plus souvent qu'il vous seroit possible; mais tous ces desirs, où beaucoup d'autres se portoient aussi bien que vous, furent aussi-tost reiglez pour éviter la confusion; et le Roy luy mesme entrant en garde avec deux ou trois cens gentils-hommes des siens de quatre en quatre jours, vous mit de ce nombre: tellement qu'il vous fallut contenter de cela. Il se fit durant ce siege et despendances d'iceluy (qui durerent, ce nous semble, depuis le commencement d'octobre, que le fils de M. du Mayne et le sieur de Villars se vindrent jeter dans la ville, jusqu'au vingtiesme de mars, que M. le prince de Parme quitta la Normandie) plusieurs factions de guerre des

plus signalées, et qui meritent bien que toutes les particularitez en soient fidellement recitées par ceux qui feront l'histoire : car cela seroit trop long pour de simples Memoires, comme les nôtres où nous nous sommes resolu de ne toucher que comme en passant toutes les choses où vous n'avez point eu de part.

Le siege estant formé, les premieres sorties des assiegez furent sur le quartier des lansquenets, vers le bas de la riviere, lesquels s'en sentirent tellement incommodez, qu'ils furent fort ayse de ceder leurs logemens à ceux de Hollande qui les demandoient; lesquels, plus usitez aux sieges que les autres, se retrancherent, de sorte qu'ils empescherent bien les ennemis de sortir plus librement. Le baron de Biron, mareschal de camp, fut logé sur le haut, pres du fort Sainte-Catherine, où l'on se resolut, suivant l'advis ou plutost la volonté de son pere, car il ne pouvoit souffrir d'estre contredit, de faire les plus grands attaquemens, lequel dessein nous vous oüismes grandement blasmer, ayant toujours en la fantaisie qu'il falloit attaquer la ville de Roüen, que vous disiez estre fort foible en de certains endroits, et par consequent fort facile à prendre; au lieu de s'amuser à attaquer une teste si estroite que le sieur de Villars, qui avec un merueilleux courage et diligence se trouvoit quasi toujours par tout, pouvoit défendre avec deux fois autant de gens que l'on le pouvoit attaquer. Et voyant qu'au lieu de s'avancer vers le fort, de nouvelles fortifications s'avançoient vers les assiegeans, plusieurs vindrent à croire, et le bruit n'en estoit pas trop sourd, que le vieil mareschal de Biron, mal content de ce qu'ayant demandé le gouvernement de Roüen au Roy, il luy avoit respondu qu'il en estoit engagé de parole à M. de Montpensier, pour M. de Halot, il faisoit toutes choses par despit, et ne vouloit nullement que la ville se prist.

Le Roy vous voulut bailler une bande d'artillerie à loger et executer; mais le mareschal (à cause qu'une fois disnant avec luy, vous lui dites : *Ville prise, chasteau rendu*), les sieurs de la Guiche, de Bort, la Fayolle, et autres officiers ne le voulurent souffrir, quoy que vous offrissez de travailler sous eux tant que vous avez toujours eu d'inclination à apprendre ce mestier, ce qui fut un grand bon-heur pour vous, d'autant que le Roy avoit delibéré de vous bailler une partie des pieces qui furent depuis prises.

Or, le Roy essayant par diligence, assiduité, industrie, et l'exposition de sa propre personne à tous perils, de reparer les deffauts et mauvaises volontez de plusieurs qui ne lui estoient que trop manifestes, voulut avoir sa nuit de garde

dans les tranchées, ausquelles il entroit de quatre nuits l'une, avec deux ou trois cens de vous autres messieurs qu'il avoit esprouvez : et comme il eut esté adverty que ceux du fort avançoient une longue trenchée du long la pente et declin de la coline, où il entroit en garde toutes les nuits six ou sept cens hommes, afin de venir attaquer les siennes par le derriere, il delibera d'y faire un effort pour s'en saisir la nuit qu'il seroit de garde, et, pour cet effet, ayant choisi trois cens gentils-hommes armez de toutes pieces, la plus-part d'armes à l'espreuve, il vous ordonna d'avoir tous des hallebardes et des pistolets à la ceinture, et sçay bien que vous en aviez deux, chargés de carreaux d'acier, car vous fistes tant avec le Roy que, connoissant et ayant le pere d'un de nous quatre, qui l'avoit si bien servy à la prise d'Eause, il vous permit de mener avec vous le fils dont bien vous servit; outre cela prit quatre cens mousquetaires ou piquiers à l'eslite; et avec ces forces estant dans sa garde environ la minuit, et ce nous semble au mois de decembre, car nous sçavons bien qu'il faisoit grand froid, il fit donner un furieux assaut en divers lieux de ces trenchées, lesquelles durant demie heure, furent assez bien défenduës, à force de mousquetades et de coups de main, tant de piques que de hallebardes, de quelques-uns desquels vous fustes renversé par deux fois en voulant monter sur les bords relevez des trenchées pour vous jeter dedans, et trouvastes que vostre resolution d'avoir mené avec vous, celuy de nous quatre dont nous avons parlé, ne fut pas inutile, car il vous ayda à vous relever et reagencer vos armes, voire mesme vous luy baillastes vostre hallebarde, dont l'allumelle estoit rompue, et pristes la sienne : enfin tous vous autres encouragez par la presence du Roy, qui ne s'espergnoit non plus que le moindre de tous, ces attaquemens furent tellement opiniatz et par tant d'endroits que cette trenchée fut emportée, dans laquelle l'on trouva quelque cinquante morts, ou tellement blessez qu'ils ne valloient guere mieux, lesquels furent jettez dehors sur le penchant de la montagne.

Le Roy, qui esperoit toujours venir à bout de son dessein, avoit fait porter de grandes pieces de bois, et des barriques et petits gabions pour mettre dessus, afin de faire des traverses pour empescher les veuës et enfilures des lieux eminens du fort, dans les trenchées, qu'il commit en la garde des Anglois; dequoy M. de Villars adverty par quelques prisonniers, et que c'estoit le Roy en personne avec les principaux seigneurs et gentils-hommes de sa suite qui en avoient fait l'attaquement, il ne sepût empescher de dire tout

haut : « Pardieu , ce prince là , pour sa valeur ,  
 « merite mille couronnes : et suis marry que par  
 « une meilleure croyance , il ne nous donne au-  
 « tant d'envie de luy en acquerir de nouvelles ,  
 « que par celle qu'il tient , il nous donne de sujet  
 « de luy debattre la sienne ; mais si ne sera-il pas  
 « dit que j'aye manqué à tenter de ma personne  
 « ce qu'un grand Roy a executé de la sienne. »  
 Et sur cela se resolvant de recouvrer ce que les  
 siens avoient perdu , il choisit d'entre tout le  
 meilleur de ses gens de guerre quatre cens hom-  
 mes armez , comme il avoit appris qu'avoient esté  
 ceux du Roy , et huit cens mousquetaires ou  
 piquiers à l'eslite avec lesquels il assaillit les An-  
 glois d'une telle furie et obstination , qu'apres  
 un combat de deux heures durant , où l'on dit  
 que les Anglois firent des merveilles , ils en fu-  
 rent enfin chassés , laissant plus de cinquante de  
 leurs morts ou pris et la trenchée perdue pour le  
 Roy , lequel ne pouvant souffrir la gloire et la  
 vanité que M. de Villars en prenoit , il delibera  
 d'en tenter le recouvrement , et y aller encore  
 plus fort que l'autre fois le premier jour qu'il  
 seroit de garde ; ce qu'entendu par le general  
 des Anglois , afin de faire cesser le blâme que  
 les ennemis de la religion donnoient à ceux de  
 leur nation d'avoir mal défendu ce qui leur  
 avoit esté baillé en garde , il le supplia de vou-  
 loir prendre au nombre de sa noblesse cent gen-  
 tils-hommes anglois , et , au lieu de gens de pied  
 françois , de ceux d'Angleterre tels qu'il les choi-  
 siroit , l'assurant de faire un tel effort qu'ils y  
 mourroient tous ou qu'ils regagneroient leurs lo-  
 gemens ; ce que le Roy ayant eu agreable , le  
 jour de sa garde venu , il se trouva selon sa cou-  
 stume dans les trenchées , avec tout ce qui devoit  
 donner avec luy ; et , à l'heure ordonnée estans  
 tous armez comme l'autre fois , vous secondâtes  
 si furieusement la noblesse angloise , qui avoit  
 insisté d'avoir la pointe , et fustes si vaillamment  
 assistez par les mousquetaires , piquiers et hal-  
 lebardiers anglois , que les ennemis estonnez  
 d'un si impetueux assaut fait en tant de divers  
 endroits , qu'ils quitterent et filerent vers le fort  
 sans opiniâtrer que fort peu le combat , et fu-  
 rent les trenchées regagnées en demie heure ,  
 dans lesquelles les Anglois se logerent si forte-  
 ment , et se tindrent tousjours depuis si bien sur  
 leurs gardes , qu'il fut non seulement impossible  
 aux ennemis de les desloger , mais aussi empê-  
 cher qu'ils ne s'advançassent de trop pres vers  
 les contr'escarpes de leurs ravelins.

Le lendemain le Roy ayant appris que vous  
 le blasmez de ce qu'il se hazardoit par trop en  
 des choses indignes de sa qualité royale ; que  
 vous aviez grande amitié avec M. de Villars , et

mesme avoit un maistre d'hostel que vous luy  
 aviez donné , lequel avoit esté autrefois le vostre ,  
 et qui vous affectionnoit grandement , il vous  
 tira à part dans l'embrasure d'une des fenestres  
 de sa chambre , et commençant son propos de  
 loin , vous dit : « Hé bien ! que vous semble-il  
 « de ces deux derniers attaquemens que nous  
 « avons faits avec un si heureux succez ? ne me-  
 « ritent-ils pas que la memoire en soit conser-  
 « vée ? — A la verité , Sire , luy dites-vous , quien  
 « pourroit descrire au vray toutes les particula-  
 « ritez , et entre les autres celle où Vostre Ma-  
 « jesté a pris part , et s'est hazardée comme le  
 « plus déterminé de nous tous , j'estime qu'il ne  
 « se verroit rien de si celebre en tout ce que l'on  
 « dit avoir esté fait par les plus grands chefs de  
 « guerre de nostre siecle et de tous ceux du passé ;  
 « que s'il y avoit quelque chose à blâmer , c'est  
 « nostre grande obeysance à vous tolerer d'aller  
 « en des lieux si hazardeux ; car , si vostre personne  
 « venoit à se perdre , il ne faut plus croire qu'il en  
 « reste d'assez capables pour restablir la France.  
 « — Il n'y a remede , mon amy , ce vous dit-il ,  
 « car puis que c'est pour ma gloire et pour ma  
 « couronne que je combats , ma vie et toute au-  
 « tre chose ne me doit estre rien au prix ; à quoy  
 « je suis bien resolu , comme vous le verrez en  
 « toutes les occasions qui me seront presentées  
 « par un si important siege , que je crains bien  
 « qu'à la fin nous serons contrains de lever  
 « aussi bien que celuy de Paris ; car j'ay advis  
 « que le prince de Parme se prepare pour mar-  
 « cher avec un commandement absolu de secou-  
 « rir cette place , et neantmoins qu'il ne se has-  
 « tera pas qu'il ne la sçache à l'extremité ; et  
 « nous avons affaire à un homme , qui est le Vil-  
 « lars , merueilleusement resolu et déterminé , et  
 « lequel n'estant pas aisé à estonner , ne parlera  
 « jamais de capituler , qu'il ne se voye hors d'es-  
 « perance de secours. Or vous ay-je dit tout cecy  
 « pource que j'ay appris que vous avez grande  
 « amitié et confidence ensemble , et qu'il a un  
 « maistre d'hostel , nommé la Fond , qui a esté  
 « autrefois le vostre , lequel vous luy avez donné ,  
 « et le gouverne entierement ; que si par son  
 « moyen vous pouviez traiter quelque chose  
 « avec luy et le rendre mon serviteur , il n'y a  
 « rien que je ne leur accordasse ; car , par ce  
 « moyen , je me rendrois la Normandie paisible  
 « entierement.

« Sire , luy respondistes-vous , j'avois desja  
 « bien pensé à tout cela ; voire avois essayé , par  
 « le moyen de la Fond , de pouvoir parler à luy ;  
 « mais il n'y a jamais voulu entendre , disant  
 « qu'il se mettroit en trop grand soupçon parmy  
 « les siens , et feroit perdre le courage à ceux qui

« se preparent pour le venir secourir; qu'il n'est  
 « pas encore en estat d'avoir besoin d'entre-met-  
 « teur, et que si jamais cela arrive qu'il n'en  
 « prendra point d'autre que moy, qui est toute la  
 « responce que j'en ay pû tirer; tellement que  
 « c'est à vous à regarder lequel des deux seroit  
 « le meilleur, ou d'aller au devant du prince de  
 « Parme si tost qu'il approchera de Neuf-chastel  
 « et luy donner bataille, ou le faire repasser la  
 « Somme avec honte et dommage, ou, sans vous  
 « amuser plus à ce fort de Sainte Catherine, at-  
 « taquer puissamment la ville et la battre furieu-  
 « sement; car vous avez une armée capable de  
 « l'un et de l'autre, et n'estime pas que vous en  
 « puissiez de long-temps rassembler une telle;  
 « et y a plusieurs raisons qui font croire que  
 « ceux qui tant obstinement vous attachent à ce  
 « fort, n'ont pas envie que la place soit prise,  
 « ny que vous veniez au dessus de vos affaires  
 « tant que vous serez de la religion; voire il y  
 « en a qui n'en font point la petite bouche,  
 « et qui ont esté si audacieux que de me le dire.

« Je croy bien tout ce que vous me dittes,  
 « vous respondit le Roy, et voy bien davantage,  
 « qui est le pis, c'est que la pluspart des zelez  
 « catholiques se lassent de cette guerre, et se-  
 « roient à la fin gens pour se separer de moy et  
 « faire un party à part, ou se joindre avec ceux  
 « de la ligue, avec lesquels ils ne cellent point  
 « qu'ils compatiroient bien mieux qu'avec les  
 « huguenots, qui seroit la ruine de l'Estat et de  
 « la maison de Bourbon; car estant rejeté, ja-  
 « mais ils n'en admettront un autre, quelque  
 « chose que se puissent imaginer mes parens; et  
 « pour toutes ces raisons endurez-je d'eux tous  
 « mille choses qui me faschent bien fort, et ha-  
 « zardez-je ainsi tous les jours ma vie pour main-  
 « tenir ma reputation, remettant en Dieu, et moy  
 « et mes affaires, (comme il est dit en mon  
 « pseume) puis qu'il m'est beaucoup meilleur  
 « de mourir les armes à la main que de voir dis-  
 « perser mon royaume et aller mandier secours  
 « hors d'iceluy; et partant suis-je bien resolu  
 « d'aller au-devant de l'armée ennemie si tost  
 « que je scauray que les estrangers auront joint  
 « les François rebelles, mais non avec toute la  
 « mienne, car ce seroit lever le siege de trop  
 « bonne heure, et nous avons affaire à un vieil et  
 « rusé capitaine, lequel ne faudroit pas, ayant  
 « obtenu de si loing l'effet qu'il desire, d'en faire  
 « vanité, et de s'en retourner sans rien hazarder  
 « n'y s'engager dans le royaume, en lieu où je  
 « luy puisse faire voir qu'il y a encore au monde  
 « d'aussi bons capitaines que luy. Comme cette  
 « situation de Rouën y est fort propre, et par-  
 « tant estimé-je qu'il suffira de prendre six mille

« chevaux et mille harquebusiers à cheval, les-  
 « quels aussi-bien sont inutiles à ce siege sinon  
 « contre un secours, et m'en aller vers la fron-  
 « tiere, pour voir si je pourray entamer ses  
 « troupes, comme j'en viendray bien à bout s'il  
 « s'il se jouë, ou M. du Mayne, de m'opposer  
 « leur cavalerie, ou les empescher de passer la  
 « riviere de Somme; bref, decouvrir leurs reso-  
 « lutions et recognoistre leurs forces; et partant,  
 « afin de ne vous entretenir pas long-temps (car  
 « les catholiques prennent jalousie quand je  
 « parle à part à un huguenot), allez vous en au-  
 « jourd'huy coucher au quartier où est logée  
 « vostre compagnie de gens-d'armes, et sur tout  
 « choisissez-en quinze ou vingt des mieux mon-  
 « tez et armez pour les mener avec vous, car je  
 « veux que vous soyez du voyage; et afin que  
 « ceux qui vous regardent ne soupçonnent rien  
 « de tout ce dont nous avons parlé, je m'en vay  
 « dire à messieurs de Nevers, de Longueville,  
 « de la Guiche, d'O et Chateau-vieux, qui chu-  
 « chotent là vers la cheminée aux oreilles les uns  
 « des autres, que ce que je vous ay entretenu si  
 « long-temps, a esté pour sçavoir ce que le sieur  
 « de Villars vous a fait dire par son maistre  
 « d'hostel qui a esté autre-fois à vous, et ce que  
 « vous avez à dire et faire sur tout ce qu'ils vous  
 « proposeront. »

Et s'estant avancé vers eux, vous vous en  
 allastes monter à cheval pour aller coucher à  
 vostre quartier où vous sejourastes deux jours,  
 et nous fistes parler en secret à quinze ou vingt  
 de vostre compagnie, que vous estimiez le plus,  
 afin de se tenir prests de marcher au premier  
 avis; et vous en estant retourné à Dornetel,  
 vous appristes, à vostre arrivée, que M. de Vil-  
 lars ayant fait une sortie à cheval avec cent  
 hommes bien armez et montez, avoit d'abord  
 renversé et mis en fuite la troupe qui estoit en  
 garde, voire l'avoit quasi couruë jusques dans  
 Dornetel, et eût bien fait d'autres ravages s'il  
 n'eust rencontré par hazard le Roy à cheval avec  
 sa cuirasse; lequel rallia ceux qui fuyoient avec  
 ce qu'il avoit, qui leur fit teste. Il se passa, en  
 cette sortie et démeslement de combat, une in-  
 finité de particularitez des plus remarquables de  
 tout le siege, du recit desquelles neantmoins  
 nous nous abstenons, pource que vous n'y eus-  
 tes nulle part; et nous contenterons de dire en  
 gros que le baron de Biron, un capitaine anglois,  
 duquel nous n'avons pas retenu le nom, et  
 M. de Grillon y firent bien; le dernier desquels  
 y eut un bras froissé d'une harquebusade; mais  
 que sur tous le Roy y fit des choses admirables  
 de jugement, de valeur, de diligence et de dis-  
 position, quasi semblables à ce que l'on raconte

du premier monarque des Grecs, lors qu'il se jetta du haut des murs dans la ville des Oxidracés.

#### CHAPITRE XXXIV.

*Tentative du prince de Parme pour faire lever le siège de Rouen. Le Roi marche contre lui avec sa cavalerie. Imprévoyance du duc de Nevers. Rencontre d'Aumale.*

[1592] Le Roy qui avoit toujours de coustume de chercher de nouvelles occasions à ses genereux desseins, quitte le siege de Roüen; et y ayant mis le meilleur ordre qu'il luy fut possible pendant son absence, et laissé toute la charge d'iceluy au mareschal de Biron, il choisit trois à quatre mille chevaux sur toute la cavalerie françoise, environ autant de ses reistres, et mil harquebusiers à cheval, et partit avec cela pour aller au devant du prince de Parme, lequel commençoit à marcher, mais assez lentement, à cause qu'il attendoit encore la jonction des forces papales, et plusieurs de celles de M. du Mayne, lequel luy mesme, avec une bonne partie de ce qu'il avoit de meilleur et de plus confident, avoit esté contraint de s'en retourner à Paris en diligence, pour donner ordre à une grande esmotion et combustion qui y estoit survenuë touchant la penderie du president Brisson et de quelques conseillers du parlement, où il fut nécessité de séjourner plus long-temps qu'il ne pensoit, pource qu'il luy fallut faire pendre quatre des Seize.

Mais toutes ces affaires estant hors de nostre dessein (qui n'avons entrepris de vous ramentevir que les choses que vous avez veuës, ouïes, faites, ou esquelles vostre interest particulier a esté meslé), nous reviendrons au voyage du Roy, lequel partit de Dernetal avec les forces que nous avons dittes, et prit le chemin de la riviere de Somme, sur les rivages de laquelle le prince de Parme avoit logé ce qu'il avoit de forces, tant d'un costé que d'autre; resolu neantmoins de ne s'avancer pas davantage, s'il n'y estoit contraint, et ce pour trois raisons, comme le Roy l'apprit depuis de quelques prisonniers. La premiere qu'il attendoit, ainsi qu'il a esté dit, le duc de Sfondrato, nepveu du pape Grégoire, avec ses troupes; la seconde, l'absence de M. du Mayne pendant laquelle il ne vouloit rien hazarder; et la troisieme, que M. de Villars lui avoit mandé que sa place n'avoit encore nulle nécessité, ny ne se sentoit pressé des ennemis, et partant qu'il pouvoit, sans rien precipiter, donner ordre aux autres affaires plus urgentes, et prendre le loisir d'assembler toutes ses forces, pour venir apres,

la teste baissée, droit au Roy, lors que la grandeur et gaillardise de ses forces seroient davantage consommées et allenties par le temps et les fatigues, luy promettant de ne les laisser cependant guere en repos.

La premiere journée le Roy s'en alla, ce nous semble, loger vers Boissiere et le Neuf-chastel, le lendemain vers Blangny, Londiniere, Longueville, Senarpont et Gamaches, et le troisieme jour il s'achemina vers les quartiers de l'ennemy; lequel, de son costé, ayant aussi fait avancer quelques troupes, conduites, comme il fut depuis dit au Roy, par les sieurs de Rosne, Ballagny, Vitry, le baron de la Chastre, Sainct Paul, la Mothe et autres des plus esveillez François de son armée, il se fit, à la rencontre de tant de braves gens, un fort grand combat, qui fut, ce nous semble, pres de Folle-ville où le Roy mesme se mesla. Il vous avoit ordonnez une trentaine de ceux qu'il cognoissoit de longue-main, et avoit esprouvez en maintes occasions, pour avoir l'œil sur sa personne, et ne l'abandonner en aucune façon sans son expres commandement. Il vit donc, et vous aussi, car vous estiez du nombre des trente, faire deux ou trois fort belles charges et recharges par les sieurs baron de Biron, de Laverdin, Givry, Sainct Geran, Marjaut, Chanlivaut, la Curée, Arambure et autres, esquels ils se trouverent plus rudement enfoncez qu'ils n'avoient estimé et tellement embarrassez, Laverdin et quelques autres ayans esté portez par terre, que le Roy fut contraint d'aller à la charge, avec vous autres et deux cens chevaux separez en deux escadrons pour les des-engager, voire de mander à tout le gros de ses six mille chevaux, où commandoit M. de Nevers, de s'avancer en diligence.

Il demeura en ces combats quelques morts, prisonniers et blessez des deux costez; et le Roy croyoit desja avoir rencontré l'opportunité par luy tant désirée, de pouvoir affronter sa cavalerie à celle de l'ennemy sans son infanterie; mais eux voyans marcher tant d'escadrons, se retirerent au corps de leur armée, suivant le mandement expres que leur envoya faire le prince de Parme. Et le Roy ne voyant nulle raison de les aller attaquer à la mercy de tant de bataillons, qui sembloient une forest de picques, et que la nuit approchoit, il fit aussi retirer ses troupes, et s'en alla loger, ce nous semble, à un bourg nommé Bretueil, et quelques autres proches de là, où l'on fut fort pressé; car il ne falloit pas s'escarter ayant l'ennemy voisin, voire il y en eut plusieurs logez au piquet quelque grand froid qu'il fist, car il me souvient que tout estoit couvert de neiges.

Il se fit encore, durant deux ou trois jours, plusieurs combats de diverses troupes, desquels nous ne dirons rien de particulier, d'autant que vous n'y fustes pas, vous tenant toujours pres de la personne du Roy, et nous contenterons de vous ramentevoir deux occasions où vous vous trovastes durant ce voyage, vous priant de nous excuser si nous en transposons peut-estre l'ordre et le temps, pource qu'à la verité il ne nous en souvient pas bien; car encore qu'en l'une d'icelle, vous, ny les troupes où vous estiez, ne missiez point les armes à la main, si ne laisse-elle pas de meriter d'estre entenduë; car à tout le moins vous servira-elle d'un conte pour rire, enveloppé de divers et fascheux accidens, lesquels arriverent ainsi.

Le Roy ayant sceu que M. de Guyse avec son escadron de cavalerie, qu'il commandoit comme ayant charge de l'avant-garde du prince de Parme, estoit logé sans aucune infanterie dans un gros bourg, nommé Bures, il se resolut d'essayer à l'enlever; et, afin de luy couper en mesme temps le chemin de sa retraite dans le corps de son armée, il fit faire deux gros, l'un de douze cens chevaux, et de mil harquebusiers à cheval où il commandoit en personne pour faire l'attaquement de Bures, et l'autre de pareil nombre de cavalerie sans infanterie, dont il bailla la conduite à M. de Nevers, luy ordonnant d'aller passer la riviere sur laquelle estoit situé ce bourg de Bures, à celui de Bully, ou en tel autre lieu qu'il feroit recognoistre et jugeroit plus à propos, pour s'aller mettre sur le chemin qui va de Bures au corps de l'armée ennemie, afin de tailler en pieces tout ce qui, s'enfuyant, y voudroit faire sa retraite, y ayant apparence que ce seroit piece à piece et en grand desordre, à cause de l'espouvente et de l'embaras des bagages. Tout cela donc ainsi bien ordonné, eut eu son effet semblable, s'il eust esté aussi bien suivy par tout comme il le fut par les troupes où commandoit le Roy; car luy mesme se trouvant partout, fit si à propos et si furieusement attaquer ce logement de M. de Guyse, qu'il fut forcé, plusieurs des siens tuez sur la place, et tout le bagage tant de luy que des siens entierement perdu, jusques à sa cornette verte qui fut emportée et présentée au Roy; de laquelle faction nous laissons les autres particularitez aux historiens pource que vous n'y fustes pas.

Le Roy ayant ordonné, à vostre grand regret et desplaisir, que soixante chevaux qu'il vous avoit baillez à mener pour cette execution seroient de la troupe de M. de Nevers, lequel par sa lenteur et improvidence ne fit rien du tout, voire fallit à se perdre luy-mesme; car

ayant, si tost que le Roy luy eut donné son ordre, envoyé recognoistre un passage sur la mesme riviere où est assis le bourg de Bures, l'on trouva que le plus commode estoit celui de Bully; mais n'y ayant laissé personne pour s'en assurer ny advertir de ce qui surviendrait, il arriva, comme il a esté sceu depuis, que, sur les avis receus par le prince de Parme, que le Roy s'avançoit vers les logemens de son avant-garde, qui n'estoit que de cavalerie, il avoit envoyé un regiment de quinze ou seize cens hommes pour les départir par leurs quartiers, afin d'y faire garde, et luy pouvoir donner loisir de les secourir s'ils estoient attaquez; mais ces troupes n'ayans voulu se resserrer, à cause qu'elles estoient desja fort pressées de logis, pour faire place aux gens de pied, ils avoient esté contraints d'aller chercher giste ailleurs; lequel n'estant guere bon au piquet à cause de l'extresme froid qu'il faisoit lors, la terre estant couverte de glaces et de neiges, ils s'en allerent loger à ce bourg de Bully où M. de Nevers avoit fait dessein de passer, et n'y arriverent qu'il ne fut nuit fermée; tellement que ne vous en ayant pû estre donné avis, ny eux non plus le recevoir de vostre acheminement, vous marchastes quasi toute la nuit, afin de vous rendre à la pointe du jour à Bully, M. de Nevers ayant mis devant cinquante chevaux avec de bons guides pour luy servir de coureurs et marcher deux ou trois mille pas devant son gros, et entre les deux encor cent autres chevaux pour seconds coureurs, afin de le tenir adverty à temps et à propos de tout ce qu'ils apprendroient.

Or, pource qu'il arriva lors un accident des plus estranges, sans aucune meslée, combat ny perte d'aucun costé, et que tant d'embaras qui s'en ensuivirent, ne se terminerent en fin qu'en une histoire de plaisir, vous nous permettrez de vous faire ressouvenir d'une partie des particularitez qui s'y passerent, que nous considerasmes autant que nuls autres; car vous nous aviez mené avec vous.

M. de Nevers donc, ayant marché toute la nuit suivant l'ordre cy-devant dit, estant dans son carrosse, un mancheron à la main, dont il se bouchoit le nez et la bouche, vous arrivastes à soleil levé sur le haut de la montagne, au pied de laquelle est situé Bully; ses premiers coureurs marchans toujours devant, comme nous avons dit, se trouverent à l'entrée du bourg, sans avoir pris ny donné allarme, jusques à ce qu'ils furent entrez dedans, et virent près de la porte un corps de garde fort bien garny de piques, corcelets, harquebuses et mousquets, et plusieurs soldats ayans mine d'estrangers qui es-

toient rengez à l'entour d'un feu, dequoy les uns ne furent pas moins estonnez que les autres, tellement que ces soldats voyans ces escharpes blanches coururent aux armes et aux portes qu'ils fermerent; sur quoy vos gens ne pouvans ressortir par la porte qu'ils estoient entrez, traverserent le bourg en diligence et sortirent par la porte opposite, les pistolets à la main, avant que les chefs de cette infanterie eussent pû donner aucun ordre pour les en empêcher. Pendant cét embarras M. de Nevers et tous vous autres messieurs estiez arrivez sur le haut de la montagne, croyans certainement que vos coureurs seroient passez sans difficulté ny rencontre, puis que vous n'en aviez autres nouvelles, et que vous feriez le semblable.

Aussi desja M. de Nevers, en son carrosse, s'estoit enfoncé dans le chemin de la descente qui estoit fort creux, fort estroit et fort en tourniollant pour estre rendu moins roide, lors qu'il entendit tirer quelques mousquetades, lesquelles alloient tousjours en augmentant, et qu'il vit revenir à luy ses seconds coureurs, espars par la montagne, lesquels cryoient qu'il eust à se retirer promptement, d'autant qu'il y avoit grand nombre d'ennemis logez dedans ce bourg qui en sortoit à puissance et tiroient en furie; sur lequel avis il y eut bien à crier des fois *diantre*, appellant de ses gens pour le venir tirer du carrosse, desteller ses chevaux et les attacher au derriere pour le retirer à mont; ce qui fut fait avec beaucoup de peines, et neantmoins sans aucune perte de part ny d'autre, vous estans tous retirez sur vostre piste, et allez loger à un bourg que vous aviez passé la nuit à une lieuë de là, où vous eustes nouvelles du bel exploit que le Roy avoit fait dans le quartier de M. de Guyse, où il fut rendu peu de combat, la cavalerie n'ayant quasi songé qu'à fuyr, sauver le moule du pourpoint, et laisser la cornette verte, et le bagage pour les gages.

L'autre occasion fut bien d'une autre nature, car au lieu d'apprester à rire, elle pensa preparer des larmes éternelles à la France, d'autant que le Roy faillit à estre tué, n'estant que trop prodigue de son sang pour espargner celuy des siens, ce qui arriva en cette maniere.

Le Roy voyant le prince de Parme, pour éviter que l'on ne l'engageast à aucun combat, que conjointement avec son infanterie, avoit rejoint son avant-garde au corps de son armée, afin de marcher et loger seurement, fit dessein de s'en aller à Aumale avec six mille chevaux; mais M. de Givry, qui estoit à la teste, et avoit esté envoyé pour prendre langue, luy ayant donné advis que tout le camp marchoit, et

croyoit-on que c'estoit à dessein de le venir forcer dans ses logemens, ou le contraindre d'en partir avec honte et peut-estre dommage. Apres avoir sur ce tenu conseil avec tous les principaux d'apres de luy (où vous fustes aussi appelé; car le Roy en envoya l'un de nous quatre vous appeller), il resolut, afin d'éviter l'embarras, de renvoyer tout son gros à Ophy, Blangy et Neufchastel, et de retenir seulement quatre cens chevaux à l'eslite, et cinq cens harquebusiers à cheval, sans aucun bagage, et avec cela aller luy mesme reconnoistre l'armée de l'ennemy, leur contenance, ordre de bataille, et forme de marcher, voire essayer d'entamer quelqu'un de ses escadrons, si quelqu'un de sa portée s'émancoit de quitter la faveur des bataillons.

Ayant donc, selon sa coustume, choisi trente de vous autres ses anciens serviteurs, pour vous tenir pres de sa personne, il monta le costeau d'Aumale, et marcha bien deux lieuës sans alarme, ny voir aucunes gens de guerre: jusques à ce qu'estant parvenu à une grande plaine, et le temps s'estant rendu fort clair, M. de Givry qui menoit ses coureurs fort loin devant luy, manda qu'il oyoit des trompettes et tambours du camp ennemy, et peu apres qu'il l'avoit decouvert et recogneu, marchant en ordre de bataille infiniment serré, sa cavalerie enclose entre ses bataillons, et le tout enfermé de plusieurs chariots, marchans en file sur les costez, réservé quelques troupes de chevaux legers et de carabins, par turmes ou brigades voltigeans sur les aisles par la campagne, ce qu'entendu par le Roy, et voyant par cét ordre et forme de marcher, le peu de moyen qu'il y avoit de rien entreprendre sur un corps si bien disposé, apres qu'il en eut luy mesme fait la reconnaissance, et jugé que l'armée pouvoit estre de seize à dix-huict mille hommes de pied, et de six à sept mille chevaux, et qu'il se fust tiré plusieurs coups de carabines et de pistolets entre les plus avancez des deux costez; il separa encore sa troupe en deux, et ne retenant que cent chevaux ou environ pres de luy, il envoya le surplus, de crainte de confusion, repasser la chaussée et le bourg d'Aumale, leur enjoignant de faire ferme sur la croupe de la montagne, afin de le pouvoir soutenir, s'il se trouvoit trop pressé à sa retraite; puis ayant commandé à M. de Laverdin de s'aller loger à l'advenuë du bourg avec cinq cens harquebusiers, et en garnir les fossez, hayes et rideaux de la descente, pour arrester les plus eschauffez des ennemis. Les voyans marcher vers luy, il s'avança vers eux (1) avec un si grand desplaisir de vous tous

(1) « Si le roi, dit Mezeray, fut blâmé de s'y être engagé



qui l'aymiez veritablement, de le voir ainsi se hazarder sans besoin, que vous ne vous pouviez empescher d'en grommeler tout haut, et enfin de concerter ensemble pour luy faire remonter, et fustes prié de luy en vouloir parler, ce que vous fistes en ces mesmes termes.

« Sire, ces messieurs qui vous ayment plus que leur vie, m'ont prié de vous dire, qu'ils ont appris des meilleurs capitaines, et de vous plus souvent que de nul autre, qu'il n'y a point d'entreprise plus imprudente et moins utile à un homme de guerre, que d'attaquer estant foible à la teste d'une armée. » A quoy il vous respondit : « Voyla un discours de gens qui ont peur ; je ne l'eusse pas attendu de vous autres. — Il est vray, Sire, luy repartistes vous, mais seulement pour vostre personne qui nous est si chere ; que s'il vous plaist vous retirer avec le gros qui a passé le vallon, et nous commander d'aller pour vostre service ou vostre contentement, mourir dans cette forest de piques, vous recognoistrez que nous n'avons point de peur pour nos vies, mais seulement pour la vostre. » Ce propos, comme il vous l'a confessé depuis, luy attendrit le cœur, tellement qu'il vous dit : « Je le croy, et encore choses plus genereuses, de vos courages ; mais aussi croyez de moy que je ne suis pas si estourdy que vous estimez ; que je crains autant ma peau qu'un autre ; et que je me retireray si à propos qu'il n'arrivera aucun inconvenient. »

L'armée du prince de Parme marchoit tousjours en avant, luy estant au milieu sans aucunes armes, ny mesme des hottes, dans un chariot tout descouvert ; lequel (ne voulant rien hazarder, pource qu'il ne sçavoit pas, à la verité, si cette troupe estoit soustenuë d'une plus grosse, et toutes les deux de toute la cavalerie du Roy, que l'on luy avoit dit estre de six à sept mille chevaux, ausquels la sienne n'estoit nullement comparable) ne faisoit faire que de fausses charges, defendant aux siens de s'engager. Mais apres que par plusieurs voltigemens de ses chevaux legers et carrabins, qui donnoient par les costez de la troupe du Roy, il eut descouvert que le gros de ses escadrons avoit passé le vallon, et qu'il n'y avoit de son costé que cent ou six vingts chevaux qu'il voyoit, il commanda, lors que l'on fut proche d'Aumale (ainsi que quelques prisonniers conterent tout cecy au Roy quelques jours apres), que l'on chargeast de queue et de teste, ce que l'on fit si bravement et par tant d'endroits, que le Roy et sa troupe furent poussez et renversez jusques sur la teste du vallon,

« en volontaire, il fut loué de s'en être démêlé en capitaine. »

où il pensoit trouver ses harquebusiers logez pour le soustenir et arrester l'impetuositè de ceux qui le poursuivoient : tellement qu'il tourna teste et fit ferme, criant *charge*, sans neantmoins avoir dessein de charger, comme il vous en avoit tous advertis. Mais estant arrivé que la pluspart de ses harquebusiers estoient descendus plus bas, soit de peur, soit à dessein de tirer advantage des rivages du ruisseau, les ennemis, qui, à ce cry de charge, et aux premieres harquebusades tirées, avoient tenu bride en main, croyans que toutes les hayes, fosses et maisons seroient garnis de mousquetaires, voyans qu'ils n'avoient tiré que cinquante ou soixante coups, et que la salve ne continuoit plus, ils commencerent la charge plus furieuse qu'auparavant, et le Roy ne put empescher qu'ils ne se meslassent parmy les siens, et que la pluspart d'entre vous n'en vinssiez avec eux aux coups de pistolets et d'espées, entre lesquels se trouvant luy mesme des plus avant et plus embarrassez (ainsi qu'il demouroit derriere pour vous faire tous retirer en ordre et filer vers le pont, afin de le passer sans confusion), il receut une harquebusade dans les reins, nonobstant laquelle il ne laissa pas de faire bravement sa retraite, sans s'estonner, ny autre desordre ou perte que de cinquante ou soixante des siens, entre lesquels le bon-heur voulut qu'il s'en trouva fort peu de qualité. Puis ayant passé le pont il fit derechef ferme, et en suite il se retira au pas vers le costau, où les quatre cens chevaux qu'il y avoit envoyez faisoient ferme avec une mine si asseurée, que le prince de Parme ne pouvant juger de ce qui estoit derriere eux, et craignant d'engager sa cavalerie contre toute celle du Roy, il envoya defendre aux siens de monter sur la plaine, et se contenta de faire ses logemens dans Aumale, comme le Roy de son costé s'en alla gagner Ophy, et de là à Neuf-chastel où il arriva une chose estrange, qui fut que le Roy s'estant mis au liet pour se faire panser de son harquebusade, apres qu'elle eut eu son premier appareil, il se mit à deviser avec vingt-cinq ou trente de vous autres messieurs qui estiez à l'entour de son liet, sur les particularitez de ce combat, et combien que vous y fussiez tous trouvez, si ne pûtes vous jamais vous accorder à un mesme recit.

Le lendemain le Roy sceut que le prince de Parme ne voulant rien entreprendre sans M. du Mayne, et craignant les brusques resolutions de ce prince, s'en estoit retourné sur ses pas regagner la riviere de Somme ; et à ces causes il se mit à ses trousses nonobstant sa blesseure, esperant tousjours de faire quelque chose qui reparast son erreur d'Aumale ; mais ce vieil et rusé

capitaine luy faisoit toujours des testes d'infanterie. Il n'exécuta rien d'importance; et l'ayant suivy jusques au Pont-dormy, il s'en retourna à Neuf-chastel, et de là loger à Claire, envoyant ses troupes à leur premier logement pour se rafraischir. M. de Claire, comme vostre amy et allié, vous fit donner une petite chambre dans le chateau où vous demeurastes (avec un valet de chambre, un page et un laquais seulement), auprès du Roy, qui se faisoit encore panser de sa blesseure; et nous renvoyastes tous, partie à Dernetal, et l'autre à vostre quartier de Fresnay-lesplan.

### CHAPITRE XXXV.

*Prise de Neuchâtel par le prince de Parme. Levée du siège de Rouen. Situation critique du prince de Parme. Sa retraite. Second mariage de Rosny. Projets du Roi. Négociations avec l'Espagne et les ligueurs.*

Si vous avez veu la fortune grandement contraire au Roy dans le discours du precedent chapitre, vous la verrez encore davantage à l'entrée de cettuy-cy, par la nouvelle qu'il receut estant au presche, où il arriva un gentil-homme qui luy rapporta que M. de Villars, la nuit passée, avoit fait une furieuse sortie du costé du fort de Sainte Catherine avec deux mille mousquetaires ou piquiers, et trois à quatre cens hommes armés, et s'estant avancé vers Dernetal estoit venu investir le parc de l'artillerie, avoit mis en route les lansquenets qui le gardoient, emmené six canons et toutes les poudres qui estoient en ce lieu-là; puis, suivant leur point et leur bonne fortune, avoient attaqué les trenchées par le derriere, de la pluspart desquelles s'estant rendu maistre, il avoit tué trois ou quatre cens hommes, mis le surplus de ce qui estoit en la garde d'icelle en route, et rempli une partie des logemens, ce qui apporta un merveilleux desplaisir au Roy, duquel neantmoins il n'osoit faire demonstration, à cause que cela estoit advenu par la negligence du mareschal de Biron qu'il ne vouloit accuser de peur de le despiter, et qu'il ne fit là dessus quelques brigues avec les plus malicieux catholiques (lesquels, au moindre desastre, attribuoient tout à la religion du Roy) pour le quitter et faire separation au temps d'une tant importante conjoncture d'affaires; tellement que pour ne fascher les meschans et ne descourager les bons, il fallut faire le bon compagnon, disant, tout haut, que ce n'estoit rien et que dans peu de jours il repareroit bien toutes ces petites traverses, à quoy le mestier des armes est sujet,

par le gain d'une seconde bataille ou plutost troisieme bataille. Mais tous ces beaux discours ne pouvoient remettre les affections des plus malins catholiques en bonnes postures, ny les empescher que, par leurs visages tristes, leurs contenance melancoliques, leurs haussemens d'espaules, leurs levemens d'yeux vers le ciel, leurs croisemens de bras sur la poitrine, leurs chuchotemens à l'oreille et leurs predictions de tous mauvais succez tant que le Roy seroit huguenot, ils ne tesmoignassent avec combien d'ennuy et de despit ils supportoient la domination d'un Roy de cette religion et la hayne qu'ils avoient contre ceux d'une telle croyance : laquelle leur fit lors produire une action des plus cruelles et honteuses tout ensemble contre quelques-uns d'iceux, lesquels ayant esté tuez avec les autres en cette furieuse sortie, avoient aussi esté mis en mesmes fosses dix à dix et douze à douze dans les plus prochains cimetières, les voulans faire arracher de là pour les faire reconnoistre entre les autres et les faire jetter aux loups et aux corbeaux; mais le choix s'en trouva si difficile à faire, qu'ils ne peurent venir à bout de leur dessein, aussi que la pluspart de l'armée, en laquelle il y avoit les deux tiers de huguenots, menacerent les auteurs de ces violences de leur faire desplaisir; toutes lesquelles broüilleries affligeoient plus le Roy que sa blesseure ny que ses autres infortunes, lesquelles sa ferme resolution, sa constance et son grand courage changerent bien-tost en prosperitez.

Car, quelques jours apres, il vint advis certain que M. du Mayne ayant mis ordre aux broüilleries de Paris, avoit joint M. le prince de Parme, avec tout ce qu'il avoit pû rassembler, ensemble le duc de Sfondrato, et qu'ils marchoient en corps d'armée, resolu de donner bataille; sur lesquelles nouvelles le Roy, ne songeant plus à toutes ces fascheres passées, tesmoigna une telle allegresse et resjouissance, ne criant que *bataille, bataille*, et embrassant tantost l'un, et louant tantost l'autre, qu'il remit ceux qui avoient tant soit peu de bonne volonté pour luy et pour la France, en courage et en joye, tesmoignant par ses paroles et par ses actions, qu'il ne doutoit nullement de la victoire s'il pouvoit une fois affronter les ennemis, et qu'il redoutoit plus leurs ruses et leurs esquivemens de combats, que non pas leurs armes, ny leurs courages; et aussi-tost il despescha M. de Givry pour s'aller jetter avec de bonnes troupes dans Neuf-chastel, se doutant bien, à cause de l'importance de sa situation, qu'ils attaqueroient cette place, et ne s'avanceroient point vers Rouën tant qu'elle subsisteroit, ainsi qu'il ar-

riva : mais elle fut bien plutost prise que l'on ne pensoit.

Nous ne dirons rien des particularitez de ce siege, d'autant que vous n'y estiez pas; mais le bruit courroit que ceux que l'on y avoit envoyez, ayans des parens et des amys intimes dans l'armée ennemie, n'y avoient pas tous faits leur devoir, dont il y eut des paroles de blasme et de reproches entre les sieurs de Givry et de Palcheux, lequel avoit tousjours tres-bien fait en une infinité d'autres combats, où il avoit reçu, faisant toujours fort bien, plus de playes qu'il n'en avoit fait : mais les plus foibles portans ordinairement le faix, Palcheux fut retenu quelque temps prisonnier à Dieppe.

Le Roy, voyant donc le Neuf-chastel pris environ le douze ou quinziesme de mars de l'année 1592, il rassembla ses forces de toutes parts; et ayant mesme retiré des trenchées ceux qui tenoient Roüen assiegé, il forma son corps d'armée selon l'ordre qu'il faisoit estat de combattre, et s'en alla au-devant des ennemis sur le plus droit chemin qu'ils pouvoient tenir pour aller à Roüen; puis s'estant mis en bataille dans une belle et raze campagne, leur envoya presenter le combat; mais le prince de Parme, qui ne vouloit pas legerement mettre en compromis la grande reputation qu'il s'estoit acquise aux armes, estant tenu pour le plus advisé capitaine de la chrestienté, et tout au contraire tascher de faire toutes ses expeditions sans rien hazarder, faisant amuser l'armée du Roy par diverses escarmouches et demonstrations, tant par effets que par paroles de vouloir donner bataille; tout d'un coup, ayant retiré sa cavalerie, et fait toute la teste de ses bataillons sur lesquels il se confioit le plus, il fit filer le reste par des vallons et lieux couverts, et se rendit finalement dans Roüen avec toutes ses forces, sans aucun combat, laissant le Roy se morfondre dans son camp de bataille, où vous demeurastes tous pres de vingt-quatre heures; au bout desquelles Sa Majesté, ne voyant plus paroistre aucun ennemy en campagne, et mesme ayant appris que les deux ducs faisoient passer la plupart de leurs troupes de l'autre costé de la riviere pour aller vivre vers le Ponteau de mer (que depuis peu de temps le sieur de Hacqueville, gouverneur de cette place pour le Roy, avoit, par une des plus sales trahisons que l'on scauroit imaginer, rendu de la ligue), de crainte d'affamer Roüen, il separa aussi son armée, envoyant ses troupes les unes aux environs d'Arques et Dieppe, les autres à Gournay, Andely, Gisors et Magny; les autres vers Mante et Meulan; luy se logea dans Louviers, et le reste du gros de son armée

entre le Pont de l'Arche, Louviers, Evreux, Passy, Vernon, Conches et Breteuil, commandant à chacun de se renforcer le plus qu'il pourroit, et tenir sa troupe preste pour marcher et le venir joindre au premier mandement vers le Pont de l'Arche; ne doutant point que les ennemis, à la retraite qu'ils seroient contrainsts de faire dans un mois ou six semaines au plus tard, ne pourroient éviter qu'il ne prit sur eux sa revanche avec usure.

Or, le prince de Parme, voyant l'armée du Roy ainsi licentée, et ne luy pouvant entrer en l'imagination qu'il la püst rassembler en peu de temps, s'en alla attaquer Caudebec, où commandoit un nommé la Garde, d'autant que cette ville, empeschant les denrées qui montoient du Havre avec la marée, Roüen et ses troupes en estoient incommodées; et cette place, ne valant rien du tout, elle fut bien-tost prise, et remplie en peu de jours de tant de vivres, que la plupart de l'armée (se logeant aux environs et le long de la riviere jusques à Roüen) en estoit nourrie et rafraischie : son dessein estant, si tost que ses troupes seroient reposées et remises en esquipage, de reprendre son chemin par le Neuf-chastel, Aumale, Valery et Pont-dormy, pour s'en retourner aux Pays-Bas, où les affaires le rappelloient.

Dequoy le Roy estant adverty, il rassembla presde huit mille chevaux et vingt mille hommes de pied en moins de huit jours, et s'alla loger à Varicarville, Fontaine le bourg, et autres villages voisins; puis faisant couler ses troupes vers le bas, il se saisit de tous les passages qui estoient jusques à la riviere entre Caudebec et Roüen, où M. du Mayne estoit fort malade.

Le lendemain, le Roy se vint mettre en bataille avec trois mille chevaux et dix mil hommes de pied, devant le quartier de M. de Guyse qui commandoit l'avant-garde, et le fit attaquer en sa presence avec tant de furie et en tant d'endroits, qu'apres un fort grand combat où il fut tué force gens, il se trouva contrainst de desloger, et de se retirer au corps de l'armée, laissant la plupart de son bagage à l'abandon duquel le butin fut fort grand. Le prince de Parme voyant, contre ce qu'il s'estoit attendu, et ce que M. du Mayne mesme luy avoit tousjours asseuré, le Roy s'en revenir vers luy la teste baissée avec de si grandes et de si gaillardes forces, et l'attaquer si brusquement, voulant essayer d'asseurer les autres quartiers, il logea M. de Guyse à Yvetot, resserra toutes ses autres troupes (qui n'avoient pu estre comprises dans son camp retranché pour en estre l'enceinte trop petite et n'avoir pas compris toutes les eminences

qui pouvoient commander dedans ) le plus pres de luy qu'il luy fust possible : et au devant de cela, sur la principale advenue pour aller à luy, il envoya loger trois mille hommes de pied, partie mousquetaires, partie piquiers, de ceux ausquels il se confioit le plus, dans un bois fort espais, qu'il leur ordonna de retrancher et d'accommoder un chemin fortifié qui allast de ce bois dans son camp, afin qu'il y eut communication, n'estimant pas qu'ils pussent jamais estre forcez là dedans, ny que le Roy eut tant de temerité que de les y oser attaquer; mais il se trouva deceu en cette presumption aussi bien qu'en beaucoup d'autres; car ce genereux prince, dès le lendemain, fit attaquer ce bois par le baron de Biron avec huit mille hommes de pied, tant François, Anglois, Hollandois que lansquenets, afin que la jalousie d'entre les nations leur servit de persuasion à qui feroit mieux, et six cens hommes armez, qui les attaquèrent de tant de costez et si furieusement, qu'après un combat de trois heures, et grande occision de ceux qui deffendoient, ils furent contraints de ceder ou à la valeur, ou à l'obstination, ou à la bonne fortune, et de se retirer au corps de l'armée, laissant plus de huit cens morts ou de blessez, qui ne valotent pas mieux, et la plupart des logemens des troupes entierement descouverts et sur tous celuy d'Yvetot, où s'estoit retiré M. de Guyse et toute la cavalerie de l'avant-garde, lequel le Roy, estant allé recognoistre luy mesme, il y entendit une merveilleuse rumeur, de divers cris confus, que l'on ne pouvoit pas bien discerner, et plusieurs trompettes sonnantes, les unes houte-selle, les autres à cheval, et les autres à l'estendard; ce qui luy fit aussitost juger qu'il y avoit quelque desordre parmi ces gens-là, duquel il falloit profiter et prendre l'opportunité comme il fit sur le champ, faisant avancer quatre mille mousquetaires, harquebusiers ou piquiers et mille hommes armez avec haliebardes et pistolets, par lesquels, après avoir rengé son armée en bataille, il fit en sa presence attaquer si furieusement ce quartier, et par tant d'endroits, que le prince de Parme fut contraint d'y venir en personne pour essayer de trouver les moyens de les défendre, et en tout cas de les faire retirer sans desordre ny confusion. A quoy s'employant en capitaine et en soldat, il receut une grande harquebusade dans le bras, nonobstant laquelle, quoy que par cet accident la valeur et le courage des siens en fussent grandement diminuez, il se mit à la teste des troupes et les fit filer dans le camp retranché avec peu de perte de gens de grande qualité, mais de sept à huit cens hommes de guerre et de tout le

bagage; logeant depuis le reste de ses troupes si serrées, qu'elles estoient toutes dans les tranchées, ou si proches d'icelles, qu'elles en pouvoient estre défendues.

Tous ces bons succez encouragerent tellement le Roy et les siens, qu'il se resolut d'attaquer les ennemis dedans leurs retranchemens, et pour cet effet fit preparer toute la nuit six pieces d'artillerie, et mander à toutes les troupes, suivant l'ordre qu'il leur avoit fait sçavoir, de se trouver avant soleil levé au champ de bataille du jour precedent; en quoy chacun tesmolgna une grande diligence et affection, le bon-heur faisant taire les malings, et parler bien haut les gens de bien. Mais comme le Roy s'avançoit et faisoit marcher l'artillerie environ soleil levant pour commencer son attaque, il demeura bien estonné et encore plus desplaisant, lors que les plus avancez luy envoyerent dire que les ennemis avoient quitté leur camp retranché et Caudebec aussi, sans avoir laissé un seul des leurs deçà l'eau, et qu'il fut sceu par ceux de Caudebec qui se rendit aussi-tost, que le prince de Parme, avec une merveilleuse assiduité, travail, industrie et diligence, avoit fait faire un pont (des batteaux qu'il ramassoit il y avoit huit jours, se doutant toujours de ce qui luy advint) sur ce large fleuve, et avoit fait passer son armée toute la nuit de l'autre costé de l'eau.

A ces nouvelles affaires non preveuës, il falut prendre nouveaux conseils, dont le premier fut de renvoyer les troupes des garnisons du Pont de l'Arche, Louviers, Evreux, Vernon, Mante et Meulan; dequoy vous fustes des plus resjouys, d'autant que vous aviez donné rendez-vous à Mante à madame de Chateau-pers, vostre maistresse, pour l'espouser, ce que vous listes le jour que le prince de Parme logea dans Houdan, gagnant Paris à grand'haste, infiniment affligé tant des mauvais succez de cette entreprise, qui fut la dernière des siennes où il parut, que de la douleur et incommodité de son harquebusade, laquelle luy dura jusqu'au tombeau, comme il sera recité cy-apres.

Or le Roy, qui, en magnanimité, hardiesse, industrie et hautes conceptions, voire en vertu politique et civile, s'est toujours montré desiroux de pouvoir imiter Cesar et Scipion par preference à tous les hommes illustres, comme vous, Monseigneur, le devez mieux tesmoigner que nul autre, vous l'ayant souvent dit, lors que vous discouriez des faits et gestes de ces grands hommes de l'antiquité, ne pouvant supporter sans extrême regret, ennuy et desplaisir, que contre son attente les ducs de Parme et du

Mayne, plutôt par ruses et par finesse que par vaillance et les armes à la main, après tant de défaites particulières, se garantissent ainsi d'une disconfort générale; la première chose qu'il proposa dans un conseil, où il avoit fait appeler ses meilleurs capitaines, plus grands hommes d'Etat et confidens serviteurs, entre lesquels vous estiez tousjours des premiers appelez; après avoir résolu de renvoyer, comme il a esté dit, toute la cavalerie des villes de la rivière de Seine, chacune en sa garnison, se doutant bien que les ennemis, s'ils vouloient éviter une ruine totale, ne pouvoient avoir autre dessein que de gagner diligemment Paris, ce fut de faire marcher promptement toute son armée en corps, aller passer la rivière de Seine au Pont de l'Arche ou à Vernon, et leur couper chemin entre Dreux, Mont-fort et Houdan, faisant avancer devant tout son camp quatre ou cinq mille chevaux, afin de les harceler et infester, de sorte, par continuelles escarmouches et attaques, qu'estans contraints de marcher posément, le reste de l'armée royale pût arriver à temps pour les combattre, et ce prince insista tellement sur cette opinion, ensemble la plupart de vous autres, ses vieux serviteurs, que par deux ou trois fois cette résolution, ainsi que nous vous l'avons ouy assurer, fut prestée d'estre suivie, quoy que ceux qui la contestoient alleguassent que les ducs de Parme et du Mayne, et toutes leurs troupes, ayans déjà passé la rivière de Seine, avoient leur chemin tout droit, sans estre contraints de faire aucun destour ny séjour, et par consequent pouvoient en quatre ou cinq posades de camp, gagner facilement Paris; au lieu que le Roy et les siens se trouvant engagés et embarrassés dans ces lieux bas de Caudebec, et la rivière de Seine, depuis là jusques aux passages du Pont de l'Arche ou de Vernon, faisant quantité de plis et replis et sinuositez toutes environnées de vallons, cavaux, montagnes et collines, couvertes de forêts grandement espaisées et de chemins serrez, creux et difficiles à passer, tels que l'on les avoit éprouvés en allant; que ce seroit tout ce que pourroit faire l'armée royale, esparsée, lassée et fatiguée comme elle estoit, que de se réunir en un corps et passer de l'autre côté du Pont de l'Arche en cinq ou six jours.

Surquoy le Roy tout en colère, et plein de despit de voir ces obstacles pleins d'artifice et de malice, repliqua que la plupart de ces objections estoient vaines, pour ce que par des gens pleins de bonne volonté et bien résolus de marcher à une victoire infaillible, et la plus mémorable qui se fut encore obtenue, le Pont de

l'Arche pouvoit estre gagné en deux jours et Vernon en quatre; n'y ayant point de doute que les ducs de Parme et du Mayne ne trouvassent de grandes difficultés et ne missent beaucoup de temps à passer la rivière d'Ure, à cause des places de Louviers, Passy, Maintenon, Nogent le Roy et Chartres, que le Roy tenoit aux rivages d'icelle, sur laquelle il ne restoit de ponts que ceux d'Aquigny, Cocherel, Serizy et deux ou trois autres lieux qu'il falloit en toute diligence envoyer rompre ou brusler: mais nonobstant l'extrême desir que tesmoignoit ce prince de donner bataille, Dieu voulant, comme il a paru depuis, amener à leur fin les choses qu'il avoit ordonnées par autre voye que celle des armes, et d'une entière et absolue victoire, le pire conseil fut suivi pour quatre causes et raisons, dont la première et la principale provint des plus zelés et qualifiez seigneurs catholiques, desquels vous sçavez bien les noms sans que nous les disions, car il y en avoit de vos plus proches et de vos intimes amis; la seconde fut que le mareschal de Biron se ressouvenant toujours qu'il avoit esté refusé du gouvernement de Rouen et le sieur de Hallot préféré à luy, et faisant à cette occasion toutes choses comme par despit, proposa de mener l'armée sur le chemin que pourroit tenir le prince de Parme se retirant de Paris aux Pays-Bas, disant cela estre nécessaire, de crainte que par surprise, espouvante, impétueux attaquement ou autre artifice de guerre, il n'enlevast quelque place en passant, usant de cet artifice pource qu'il savoit bien que le Roy aymoient ces quartiers là (1); la troisieme que les Anglois et Hollandois se voulurent retirer en leurs contrées sans passer la rivière de Seine; et la quatrieme que ceux des finances, pour reduire les choses où ils desiroient, firent manquer l'argent que l'on avoit promis aux Suisses et reistres, lesquels protesterent de ne vouloir marcher qu'ils n'eussent fait monstre.

Le Roy donc en cette sorte et par telles voyes se trouva contraint de céder aux volontés de ceux qui luy devoient toute obéissance, et de faire bonne mine au milieu de tant de difficultés, lesquelles alloient journellement augmentant; et luy reconnaissant bien, selon la disposition des esprits et des affaires, que pour mettre la France en repos, eslever sa gloire et soulager ses peuples, comme c'estoit son dessein et but principal, et n'en avoit eu d'autres depuis qu'il avoit pleu à Dieu l'appeler à la couronne, il avoit à s'accommoder avec quatre diverses sortes de personnes, desquelles les prétentions, les desirs et les desseins estoient non seulement contraires,

(1) C'est là que demeurait Gabrielle d'Estree.

mais tellement opposez les uns aux autres, qu'ils se rendoient du tout incompatibles.

De toutes lesquelles choses il se tenoit desjà plusieurs discours, les uns en secret et à l'oreille, et les autres en public et par les ruës, lors que gens de mesme humeur se rencontroient ensemble; les Espagnols luy faisans sentir sous main (par l'entremise de gens affidez à ceux là mesmes qui voulurent traiter avec luy au lieu d'Agemau, du temps qu'il n'estoit encore que Roy de Navarre, comme il en a esté dit quelque chose au commencement de ces Memoires) que le plus facile et prompt moyen de se rendre Roy paisible et de tenir en obeyssance tous ses sujets, tant de l'une que de l'autre religion, estoit d'avoir l'amitié et le secours de leur Roy, pour assurer ce qui se pouvoit obtenir et non autrement, en luy cedant tous les droits des duchez de Bretagne et de Bourgogne, lesquelles aussi bien luy appartenoient par droit héréditaire, luy mettant en avant, pour le disposer à cela, les exemples des roys François I et Henry II; lesquels, pour obtenir la paix et le repos de leurs peuples, de ceux qui estoient ses devanciers, et qui n'avoient pas lors un si grand pied dans la France qu'il pouvoit avoir à cette heure, n'avoient point fait de difficulté de luy quitter, l'un les souverainetez de Flandres et Artois, et l'autre de luy restituer plus de pays et de villes qu'il n'en est contenu dans les dix-sept provinces des Pays-Bas.

Les principaux chefs de la ligue de leur costé, peut-estre las de l'arrogance espagnole, luy faisoient faire des propositions par les sieurs de Ville-roy, Jeannin, Zamet et autres de le recognoistre pour Roy, mais à telles conditions, que, par icelles, leur party subsisteroit tout entier et formeroit un corps dans l'Estat, demeurant nantis de tant de places et avec tant de forces entretenües en icelles, qu'ils fussent demeurez beaucoup plus puissans que luy, et son peuple reduit à de plus grandes surcharges, foules et oppressions que jamais, à cause des sommes immenses qu'ils demandoient pour payer leurs garnisons, leurs debtes, et leurs entretenemens. La plupart des princes, seigneurs, gouverneurs des villes et provinces, chefs de gens de guerre et autres notables personnages catholiques qui tenoient son party, ne chuchotans plus aux oreilles les uns des autres comme ils avoient accoustumé, commençoient à discourir tout ouvertement de leurs diverses fantaisies; disans qu'ils avoient trop temporisé et trop longtemps supporté un Roy huguenot au prejudice de leur conscience; et qu'il le falloit supplier, voire mesme sommer, de se faire catholique dans un certain temps prefix qu'ils luy prescriroient;

et à faute de ce faire, protester de l'abandonner; de se joindre à ceux de la ligue, et tous ensemble proceder à l'eslection d'un Roy de leur religion, soit des princes de son sang ou autres au refus de ceux là.

Les huguenots factieux, qui, par leur autorité, belles paroles et raisons de la gloire de Dieu et salut de ses eglises, emportoient le plus grand nombre (et sur tous les ministres et gens de consistoire) à leur opinion, insistoient à ce qu'il se gardast bien de changer de religion et de quitter Dieu, car c'estoient leurs termes, et, en cas qu'il se fit catholique, le menaçoient de ne poser point les armes qu'il ne leur eust accordé des edits et des conditions si avantageuses pour eux et si des-avantageuses pour luy, et des precautions si grandes contre l'inobservation de ses promesses, qu'il ne fut quasi demeuré Roy entr'eux, sinon autant que bon leur eut semblé et qu'il eut pleu à cinq ou six personnes et autant de villes que vous nous avez dit qu'il vous nomma, lors qu'estant à Mante il vous discourroit de tous ses projets et des peines et anxietez où il estoit reduit à cause d'iceux, et que vous ne nous avez jamais voulu particulariser.

#### CHAPITRE XXXVI.

*Prise d'Épernay par les troupes royales. Mort du maréchal de Biron. Ce qui s'est passé dans les provinces à l'époque du siège de Rouen. Amours de madame Catherine et du comte de Soissons. Séjour de Rosny dans ses terres. Il se procure le traité de la ligue avec le roi d'Espagne. Son retour auprès du Roi.*

Laissant tous discours et embarras d'esprits et d'affaires pour revenir aux effects, le Roy, comme c'estoit son humeur (croyant n'y avoir rien pire, ny qui donnast de plus mauvaises pensées que l'oysiveté), ayant contenté ses troupes le mieux qu'il luy fut possible, en licentiant celles de ses estrangers qui avoient le plus de desir de se retirer, donnant quelque argent aux uns et caressant et faisant mille belles promesses aux autres, il prit sa brisée vers Compiègne, et envoya le mareschal de Biron assieger Épernay, où, voyant que les choses ne s'avançoient pas à sa fantaisie et que l'on bruyoit de quelque secours, il s'y achemina et defit certaines troupes qui se vouloient jeter dans la ville, laquelle, à cette occasion, se rendit à luy, le mareschal de Biron y ayant, quelques jours auparavant, esté tué d'un coup de canon; de toutes lesquelles choses, d'autant que vous n'y eustes nulle part,

nous laisserons les particularitez à ceux qui feront l'histoire générale, et aussi de plusieurs faits d'armes et autres accidens notables qui se passerent en diverses provinces, auparavant, pendant, ou peu apres ce grand siege de Roüen : comme la sortie de M. de Guyse hors de sa prison du chasteau de Tours, l'entreprise du chevalier d'Aumale sur Sainct Denis où il fut tué, la défaite du vicomte de la Guerche par le sieur de la Roche-posay, les blocus de Poitiers, les divers succez de M. d'Espéron en Provence, les exploits de M. de Lesdiguières et du cornel d'Ornano en Dauphiné, Provence et Lionnois contre messieurs de Savoye et de Nemours; la défaite de quelques troupes du Roy par M. de Joyeuse pour avoir esté négligemment logées par le sieur de Themines, la brave resistance qu'il fit s'estant jetté dans Ville-mur apres cet accident, le siege de cette place et la défaite dudit sieur de Joyeuse (où il fut noyé pensant se sauver) par les sieurs de Messillac, Legues et Chambault; la perte de la bataille de Craon par mauvais ordre; le voyage du Roy à Sedan, pour marier M. de Thurenne avec mademoiselle de Sedan; le siege, la défense et la prise de Stenay; la défaite du sieur d'Amblise et la prise de Dun en Lorraine (ces trois derniers effets par l'entremise du sieur de Thurenne); et les escapades de M. le comte de Soissons qui ne demouroit quasi jamais trois mois sans avoir quelque broüillerie avec le Roy, ou s'en retirer mal content, à cause de la diversité d'humeurs de ces deux princes, qui sembloient former entr'eux une antipathie naturelle, l'un estant d'un naturel libre, franc, ouvert et familier, de complexion gaye et prompte, qui ne cachoit jamais rien sur le cœur, et ne haysoit rien tant que la dissimulation, les ceremonies, le fast et les formalitez non absolument necessaires; et l'autre estant froid, retenu, circonspect, faisant le serieux en toutes choses, et quelques petites qu'elles peussent estre, y vouloit tousjours apporter l'apparat et toutes les formalitez.

Mais de toutes ces broüilleries d'alors nous n'en particulariserons qu'une seule, à cause qu'elle fut la source de plusieurs autres, esquelles vous fustes souvent employé et quelquefois bien embarrassé; pour laquelle mieux desvelopper, vous vous souviendrez que le Roy, dès l'année 1585, se voyant tomber sur les bras cette grande guerre de la ligue, et ne se voyant en estat de pouvoir avoir des enfans, à cause de ce qui se passoit entre luy et sa femme, ny aussi de se pouvoir des-marier à cause qu'il luy eut fallu passer par les mains du Pape, il se mit à regarder sa sœur comme sa certaine et unique

heritiere, et se resolut de la marier comme telle, à quelque prince dont l'humeur luy revint, et en pût faire estat comme d'un fils; et ne voyant nul prince en France ny dehors d'icelle, qui apparemment pût avoir les conditions plus sortables à ses desirs que M. le comte de Soissons, il luy fit proposer ce dessein, lequel, comme luy estant honorable et utile tout ensemble, il tesmoigna aussitost de le vouloir embrasser; tellement qu'apres plusieurs entremises il se vint ranger près de luy; comme il a esté dit cy-devant, et apres la bataille de Coutras s'en allerent en Bearn voir madame Catherine, où il s'engendra des amours reciproques; mais quelques langages ou procedures dont usa M. le comte de Soissons, ou quelques advis soient vrayz ou faux que le Roy receut de la Cour, que M. le comte en estoit party par concert fait avec ses ennemis de venir espouser sa sœur, et puis le quitter là, et se prevaloir de ce mariage pour jouyr de tous les biens qu'il avoit où il estoit sans puissance, sans se soucier que devint sa fortune, sa personne et sa vie; car ce sont les-mesmes propos que vous nous avez dit vous avoir esté tenus par le Roy, lors que, sur le sujet de la mort de M. de Guyse et les longueurs qui s'interposoient à l'accomplissement de son mariage, il quitta tout à fait le roy de Navarre, avec de mauvaises paroles de toutes parts, et peu d'esperance de reconcilier jamais bien ces deux esprits.

Or, nonobstant cette separation, l'amour ne laissa pas de se continuer entre Madame et M. le comte de Soissons, et telles intelligences basties entr'eux qu'ils resolurent de se marier à la premiere commodité, sans attendre ny requerrir le consentement du Roy, lequel estoit embarqué en ce grand et long siege de Roüen. Les deux amoureux jugerent que c'estoit le temps le plus propre pour executer ce qu'ils avoient projeté ensemble par lettres et messages, et l'intelligence de plusieurs des hommes et femmes qui estoient pres de Madame; et, pour cet effet, ayans préparé des chevaux par relais, faisant semblant de s'en aller seulement jusques à Nogent, il passa jusqu'en Bearn; mais ils ne peurent estre si fins, ny leurs affaires maniées si secrettement que le Roy n'en eut quelque vent, ny luy faire si bonne diligence qu'à son arrivée il ne trouvast le sieur de Pangeas et plusieurs autres avec pouvoir du Roy pour s'opposer à tous leurs desseins, de telle sorte que M. le comte fut chassé du pays et contraint de s'en revenir sans rien faire.

Or, pendant tout ce que nous avons dit qui se passa au voyage du Roy en Champagne et au siege d'Espenay, vous sejournaastes tousjours à Rosny, vous y estant retiré tant pour vous faire

panser du coup de pistolet que vous aviez eu dans la bouche, durant le siege de Chartres, lequel s'estoit apostumé, que pour quelque dépit que vous aviez pris de ce que le Roy, sur l'opposition de M. de Nevers, de M. d'O et autres animez catholiques, avoit esté contraint de vous refuser les expéditions d'une lieutenance de roy, avec le gouvernement d'une place estant en icelle, dont il vous avoit donné esperance.

Après lequel siege et prise d'Espernay, le Roy licentia bonne partie de ses troupes. Mais luy estant depuis venu advis certain de plusieurs costez que le prince de Parme rassembloit une nouvelle armée pour entrer la troisieme fois en France, afin de fortifier, par sa presence et la crainte de ses conseils et de ses armes, les deliberations qui seroient prises à l'avantage de son Roy, dans les assemblées que l'on projettoit de faire à Paris et autres grandes villes de France, il se resolut de refaire promptement un corps d'armée, qui pût estre capable d'empescher ces estrangers d'entrer dans le royaume. Et pour cét effet, ayant, comme à tous les autres gouverneurs et lieutenans de roy dans les provinces plus proches de luy, mandé à M. de Buhy (1), lieutenant de roy au Vexin, de le venir trouver avec le plus de cavalerie qu'il pourroit rassembler, ledit sieur de Buhy vous vint voir à Rosny, (où vous passiez le temps et adoucissiez vos playes et vos despits, à jardiner, arboriser, mesnager, faire des extraits des meilleurs livres, et vous faire lire ce que nous avions fait de ces presens Memoires); lequel, apres quelques complimens et civilitez, vous dit qu'il avoit receu des lettres du Roy qu'il vous vouloit montrer, par lesquelles il luy mandoit de marcher en diligence pour le venir trouver, et amener avec luy toute la noblesse de son département, vous priant de vouloir estre de la partie.

A quoy demy en colere, vous luy respondistes qu'il y avoit long-temps que vous sçaviez aller tout seul, et partant n'aviez plus besoin d'estre mené; que le Roy avoit accoustumé de vous escrire quand il avoit besoin de vostre service; que si vous receviez de ses lettres, vous y adviseriez et feriez tousjours vostre devoir: et sur cela vous vous separastes assez mal satisfaits l'un de l'autre, ce qui fut cause que le sieur de Buhy interposa un homme de robe-longue, qui fut, ce nous semble, M. Miron; lequel à son arrivée, lors que le Roy luy demanda de vos nouvelles, luy respondit que vous estiez chez vous du tout porté à vostre mesnage, à jardiner, arboriser et visiter vos livres, sans vous esmouvoir de tout ce que l'on vous pouvoit dire. A quoy le Roy

(1) Pierre de Mornay, frère de Duplessis Mornay.

repartit: « Il a donc bien changé d'humeur; car « il n'a jamais manqué de se trouver aux occasions semblables à celle qui se prepare; neantmoins quoy qu'il s'excuse sur ses playes, je « cognois bien où il luy tient; il est en colere « contre moy, voire peut estre avec raison, et « voudra d'oresnavant faire le philosophe; mais « lors que je le verray, je sçauray bien accommoder tout cela, car je le cognois. »

Tous lesquels discours vous ayant esté rapportez un jour que vous estiez à table, donnant à disner au president Seguier, lequel vous estoit venu voir à Rosny, vous distes en branslant la teste: « Il est vray, je suis en colere de ce que « le Roy, de crainte de desplaire à des gens qui « ne l'ayment point et qui luy en joueront d'une, « s'il n'y prend garde, desnie les recompenses « méritées à ceux qui l'ayment plus qu'eux mesmes, et qui ont tant de fois respendu leur sang « et hazardé leurs vies pour garentir la sienne, « et qui feront tousjours mieux que ceux que « l'on essaye de contenter à leur prejudice, « comme, si ce que l'on dit est vray, il en fera « bien-tost l'experience. » Sur quoy le president Seguier ne repartit jamais autre chose, sinon: « Monsieur, il semble que vous soyez un peu en « colere; nous sommes en un temps auquel il est « bien difficile de vivre en tranquillité d'esprit, « mais les plus sages useront de silence et de patience, sous l'esperance d'un meilleur siècle; « et le Roy est si bon et si sage que Dieu luy aydera et le rendra nostre restaurateur. »

Vous sejournaistes donc quelques mois à vous faire panser; mais si tost que vostre playe fut aucunement consolidée, ne hayssant rien tant que l'oysiveté, vous montastes à cheval, avec cinquante de vos compagnons, et vous en allastes courir sur les chemins de Paris à Dreux et à Vernueil; et au second voyage, comme vous rebroussiez chemin de Dreux à Paris, entre les villages de Marolles et de Goussainville, vous vistes venir droit à vous dix ou douze hommes de pied, lesquels si tost qu'ils vous apperceurent, s'escarterent les uns dans des bois proches du chemin, les autres dans des hayes; ce qui vous fit desbander dix ou douze chevaux de vostre troupe, pour essayer d'en attraper quelqu'un, et surtout de ceux qui portoient livrées; mais il fut impossible de prendre que deux pauvres hommes, qui avoient sur leur dos des cages dans lesquelles on porte des poulailles, mais qui estoient vuides; lesquels, apres plusieurs menaces vous confesserent qu'ils venoient de porter des vivres à Paris, n'allans que la nuict lors qu'ils estoient chargez, et que trois laquais, qui estoient avec eux, estoient cause qu'ils s'estoient



advanturez de passer de jour, dont l'un estoit à M. de Vieux-pont, l'autre à M. de Medavit, et l'autre à M. de Mercure : ce qui vous fit encore desbander des gens pour courir apres, mais on ne les pût attraper; et prit-on seulement deux hommes de Vernuell, desquels par menaces vous ne peustes jamais rien apprendre. Mais par le moyen de quatre escus d'or que vous leur donnastes avec vostre foy qu'ils n'auroient aucun desplaisir, ils vous menerent vers un chesne, environné d'un gros buisson, où ils disoient que ces laquais s'estoient arrestez, et croyoient qu'ils avoient jetté quelques papiers dans le creux d'iceuluy, en intention de les venir reprendre lors que vous seriez passez. Et de fait vous y trouvastes deux boëttes de fer blanc et un petit sac de couty, dans lesquels il y avoit des commissions de M. du Mayne, pour lever des gens de guerre, force lettres en chiffres et plusieurs autres memoires adressez à M. de Mercure, entre lesquels il s'en trouva un dont vous ne cognoissiez pas lors l'escriture, et depuis avez verifié (car nous l'avons veu plusieurs fois, et nous asseurons bien que vous ne l'aurez pas perdu) qu'il estoit de la main du president Jeannin, contenant les conditions avec lesquelles il avoit traité en Espagne, lors qu'il y fut envoyé par M. du Mayne, duquel la coppie s'ensuit que j'ai prise sur l'original :

*Traité de la ligue avec l'Espagne.*

« Que la ligue soit en la protection du roy d'Espagne, sous l'autorité du Pape, jusques à ce qu'il y ait un roy recogneu du consentement de Sa Sainteté et du roy d'Espagne.

« Qu'il plaise à Sa Majesté catholique d'accroistre le secours qu'elle accorde, selon le besoin, et à ce obliger les successeurs de son Estat :

« Moyennant quoy que les places de . . . . . seront mises entre les mains de sadite Majesté catholique, ou sera aydée à les prendre.

« Et si en quelque façon elles venoient entre les mains de quelques catholiques, ils les mettront entre les mains de Sa Majesté catholique, pour deposit des frais qu'elle a faits; et y demeureront jusques à l'eslection d'un roy, recogneu de la façon susdite, en satis-faisant aux frais faits.

« Que M. du Mayne demeurera lieutenant general jusqu'à ladite eslection.

« Que les places qui se prendront seront mises entre les mains des François catholiques, et presteront le serment à la France, sous l'autorité de M. du Mayne et la protection du roy d'Espagne, et entre icelles ne s'entendent celles qui sont baillées en deposit.

« Que M. du Mayne commandera l'armée que Sa Majesté promet entretenir de seize mille hommes de pied et trois mille chevaux, et qu'en ce nombre il y aura deux mille hommes de pied François ou autres, et cinq cens chevaux François, desquels il pourra particulièrement disposer pour la garnison et pour la campagne.

« Que Sa Majesté luy entretiendra, outre ce, quatre mille fantassins et cinq cens chevaux, jusques à ce qu'il l'aye reduitte si ce party endure bourrasque.

« Cela achevé, il commandera comme gouverneur sous le Roy, qui sera esleu, et mettra Soissons entre les mains des Espagnols, qui sera au nombre des villes de deposit.

« Que devant ce il ne peut quitter ledit Soissons, n'ayant point d'autre lieu de seureté.

« Si l'on ne peut venir à l'eslection d'un roy, et qu'il ne puisse jouyr de la Bourgogne, le roy d'Espagne et ses successeurs s'obligeront luy donner et à ses descendans, la valeur de cent mille escus de rente en duche, comtez, et marquisats, lesquels luy demeureront et aux siens, encore qu'il se fit un accord avec ledit roy d'Espagne et le Roy.... et en ce cas neantmoins les biens de M. du Mayne en France demeureront à la discretion du roy d'Espagne.

« Que sa pension de dix mille escus par mois luy sera augmentée jusques à vingt mille.

« Qu'il ne se fera point de Roy, qui ne promette de payer toutes les debtes de M. du Mayne, de sa femme et de ses enfans en quelque façon qu'elles soient.

« Et si les affaires n'alloient pas bien, le roy d'Espagne s'obligera de luy payer toutes ses debtes.

« Qu'il luy donnera presentement cent mille escus, et cent mille autres escus apres la ratification du traité.

« Que par beaucoup de raisons il desire que la conference se tienne pour destourner les traittez particuliers, justifier les armes, les continuer, rejoindre ce qui reste du party; et quand bien il n'y envoyeroit point les autres députez qui s'y doivent trouver, feroient leur cas à part et se separeroient de luy.

« Qu'en outre il contentera les seigneurs et villes dudit party.

« Que si l'archiduc ne luy peut accorder incontinent cecy, qu'il fasse differer la conclusion de ce traité pour un mois, auquel temps il enverra ses députez, et qu'on le secoure cependant pour la Bourgogne qui s'en va perduë.

« Et si on ne luy veut rien accorder du tout, qu'on luy permette de se retirer.»

*Response de l'archiduc Ernest.*

« Que l'intention de Sa Majesté a esté de continuer la guerre contre le roy de Navarre.

« Le secours de la Picardie sera de plus de seize mille hommes de pied et trois mille chevaux, outre ceux des autres provinces.

« Que le roy d'Espagne sera chef du party.

« Que M. du Mayne mettra Soissons entre les mains du roy d'Espagne, qu'il restituera apres l'eslection d'un roy.

« Qu'il se deffera de ceux qui sont aupres de luy.

« Qu'il aura dix mille escus par mois.

« Que venant à l'armée avec cinq cens chevaux françois et deux mille fantassins, ils luy seront entretenus pendant qu'il y sera.

« Que pour la Bourgogne il luy donnera presentement pour lever mille lansquenets et trois cens chevaux.

« Si M. du Mayne est pressé en Bourgogne, Son Altesse le secourra d'une partie de son armée.

« Tout ce que M. du Mayne conquerra en Bourgogne luy demeurera, comme ce qui sera conquis par l'armée en la main des Espagnols. »

Toutes les autres lettres en chiffres furent portées à Mante, desquelles vous tirastes, estant déchiffrées, de grandes lumieres pour sçavoir les menées et pratiques qui se faisoient touchant le tiers party, estant fait mention des plus grands qui fussent aupres du Roy, et de plusieurs gouverneurs de places, desquels il ne se fut jamais mefflé ny vous aussi : cette descouverte, ainsi heureusement faite, fut cause que tous vos despit contre le Roy se changerent en pitié et en amour. Vous pristés resolution de l'aller trouver, et le jour que vous partistes, mettant les papiers qui estoient de consequence dans vostre pochette, vous appelastes messieurs de Gadencour, de Vassan, d'Espinay, de Tilly, et l'un de nous quatre, et leur dittes : « Il y a icy d'estranges menées, encore que pour estre la pluspart de ces papiers en chiffre, je ne les aye pû tous decouvrir : mais j'en sçay assez pour juger que le Roy aura plus affaire de ses anciens et loyaux serviteurs que peut-estre il ne s'imagine. »

Or, à vostre arrivée à Compiègne, où il sejournoit, à ce que publioient ceux qui cherchoient à le blâmer, à cause de quelques amourettes, mais en effet pour estre en ce lieu plus propre à y attendre la jonction de toutes ses forces, pour aller sur la frontiere au devant de celles du prince de Parme, apres vous avoir embrassé et fait fort bon visage, il vous de-

manda pourquoy vous estiez venu si tost, puis-que vos blessures vous avoient empesché de venir avec les autres : à quoy vous luy respondistes, vous souvenant encore de ce que l'on vous avoit mandé qu'il avoit dit au sieur de Buhy : « Sire, Je vous viens apporter trois plats de ma philosophie. » Puis luy montrant les papiers que vous aviez, vous luy dittes qu'il les falloit lire en particulier, et que cependant vous luy diriez une partie de ce que vous en aviez pû decchiffrer. Sur quoy, vous ayant tiré à part, il parla plus d'une demie heure avec vous en grand secret; et sur le soir, lors qu'il fut retiré en son cabinet, n'y ayant que luy, vous, Choirin et Beringuen, il fit lire et decchiffrer vos papiers à Choirin; par le moyen desquels il recogneut une partie des menées que l'on tramoit pour former ce tiers party dont il a esté tant parlé, et les noms des principaux que l'on estimoit en devoir estre, quoy que ce qui estoit mandé à M. de Mercure, et les articles du president Jeannin y semblassent entierement contraires; tant toutes sortes de personnes qui projettoient de nuire au Roy et à la France, estoient differens et divisez en conseils et en desseins entr'eux mesmes, comme par la suite de ces Memoires il sera davantage esclaircy; et sommes marris que vous n'avez gardé toutes ces lettres ou coppies d'icelles pour les inserer icy aussi bien que les articles du president Jeannin.

Quoy que ce soit, apres que vous eustes sejourné trois jours à Compiègne, le Roy voyant que vostre playe de la bouche vous empeschoit encore de parler facilement, il vous renvoya chez vous, estans demeurez fort contents l'un de l'autre; et en partant il vous dit : « Adieu, mon amy, ayez tousjours l'œil au guet, servez moy bien, et vous assurez de mon amitié. »

## CHAPITRE XXXVII.

*Conférence importante entre Henri IV et Rosny. Celui-ci conseille au Roi de se faire catholique.*

[1593] Or, faut-il avouer que peu souvent avons nous bien cherché parmy vos vieux papiers, ny mesme bien exactement espluché les plus raturez et embrouillez d'iceux, que nous n'y ayons quasi tousjours trouvé quelque chose de nouveau, et qui meritoit bien de n'estre pas oublié dans les Memoires que nous dressons de vostre vie, lesquels font aussi mention de la pluspart de ce que vous avez veu, cogneu et remarqué des admirables vertus, faits et gestes de nostre grand Roy, ainsi qu'un discours par nous

trouvé dans vostre cabinet vert, entre plusieurs papiers jettez sous des armoires, le verifera, estant tel que s'ensuit.

*Memoire des choses d'importance qui m'ont esté ce jourd'huy occurrentes le quinziemes fevrier 1593.*

Le Roy m'ayant envoyé querir par le secretaire Feret un soir fort tard, car aussi trouva-je Sa Majesté au liet, qui avoit desja donné le bon soir à un chacun; lequel, si-tost qu'il me vit entrer, me fit apporter un carreau et mettre sur iceluy à genoux contre son liet, et puis me dit :

« Mon amy, je vous ay envoyé querir ainsi tard, pour vous parler des choses qui se passent, et entendre vos opinions sur icelles, car j'advoüe que je les ay souvent trouvées meilleures que celles de beaucoup d'autres qui font bien les entendus, ne vous en voulant pas parler souvent ny longuement devant le monde, pource que cela vous concite de l'envie, et à moy de la hayne et des reproches de diverses sortes de personnes, des uns pource que vous estes de la religion, et des autres pource qu'ils apprehendent tousjours que je vous employe en mes principales affaires, croyans que j'ay opinion qu'ils ont plus en recommandation leurs interests que les miens, et pense bien qu'il en est quelque chose, ce que je n'ay point encore aperceu en vous; que si vous continuez en me laissant le soin de ce qui vous touche, et prenez celui continuel de ce qui regarde mes affaires, c'est sans doute que nous nous en trouverons bien mieus tous deux; car je ne vous veux plus celer qu'il y a long-temps que j'ay jetté les yeux sur vous, afin d'employer vostre personne en mes plus importantes affaires, et sur tout en celles de mes finances, car je vous tiens pour loyal et laborieux.

« Or, ce que j'ay pour le present à vous dire est touchant ce grand nombre de personnes de tous partis, de toutes qualitez et de bien diverses humeurs qui se font de feste et fort les endemenez pour s'employer aux entremises de la pacification du royaume, car j'en reçois lettres et instances de tous costés, lesquels tous me proposent de grandes felicitez, voire un infailible retablissement d'affaires d'Estat, principalement si je me resous à quelque accommodement pour ce qui regarde la religion. Mais lors que je viens à bien approfondir toutes leurs propositions, j'y voy bien de belles et fastueuses paroles; mais jusques icy peu de solides raisons pour m'en faire croire la facilité, et encore moins d'apparences de bien certains expediens pour concilier tant de divers esprits qui

« se veulent interesser en cette pacification, en sorte qu'il se puisse conclure quelque chose à l'avantage des peuples de mon royaume, et du vray et absolu rétablissement de l'autorité royalle, sans lesquelles deux conditions, je suis bien resolu de n'entendre à negociation ny traité quelconque, en laquelle opinion je me suis davantage confirmé par les discours conformes à cela que j'ay sceu que vous en tenez souvent à part avec les uns et les autres qui vous mettent sur ce propos, et par les froidures dont vous usez lors que je vous en parle devant le monde ou en presence de ceux de mon conseil; à quoy neantmoins je suis bien resolu notwithstanding toutes les belles esperances que plusieurs me veulent faire prendre de leurs entremises, qui sont toutes personnes diverses en humeurs, desseins, interests, factions et religions. Sur toutes lesquelles choses (et celles que vous en avez pû apprendre d'ailleurs) je vous ordonne de bien mediter, car aussi bien est-ce vostre coustume sur tout ce que je vous propose, de me demander du temps pour y penser avant que de m'en vouloir dire vostre advis, et puis dans trois ou quatre jours je vous en voyeray encore querir pour m'en dire ce qu'il vous en aura semblé. »

Sur lequel propos, le Roy m'ayant licentié par un bon soir, il ne faillit pas de m'envoyer encore le mesme Feret afin que je le vinsse trouver encore au liet, aupres duquel m'ayant fait mettre à genoux comme l'autre fois, il me dit : « Or sus, contez moy à present et bien à loisir toutes vos folles fantaisies (car c'est ainsi que vous avez tousjours nommé tous les meilleurs conseils que vous m'avez jamais donnez) sur les questions et propositions que je vous fis l'autre soir, d'autant que je vous veux escouter tout du long sans vous interrompre. » De laquelle faveure ayant remercié Sa Majesté, mon propos fut tel.

« Sire, suivant vostre commandement, j'ay medité non seulement sur ce qu'il plust à Vostre Majesté de me dire il y a trois soirs, mais aussi souvent et à diverses fois sur ce que j'ay pû apprendre d'ailleurs des affaires de mesme nature, desquelles diversité de personnes de toutes qualitez et religions, jusqu'à des femmes, m'ont parlé pour me faire parler, et voir si je ne sçavois nulles particularitez de vos secretes intentions; et par tout ce que dessus ay-je recogneu que trop de personnes se mesloient de telles affaires, et puis selon qu'ils apprennent, voire quelquefois qu'ils inventent, ils vont conter merveilles à Vostre Majesté, laquelle se travaille l'esprit inutilement entre tant de diverses

« sortes d'ouvertures et propositions, lesquelles  
 « sont toutes non seulement absurdes et imperti-  
 « nentes, mais aussi d'impossible succez ni bonne  
 « execution, voire que quand elles réussiroient  
 « conformément à ce que la plupart d'eux ont  
 « en fantaisie, elles ne vous pourroient apporter  
 « que perte, ruïne et destruction pour vos peu-  
 « ples, et honte et ignominie tant en vostre per-  
 « sonne qu'en vostre autorité royale, et finale-  
 « ment une entière dissipation du royaume en  
 « diverses parts, sans esperance de le pouvoir ja-  
 « mais réunir en un seul corps d'Etat, ayant trop  
 « intéressé de gens puissans en sa dissipation, et  
 « ne faut rien esperer de tout ce que l'on vous  
 « propose, quand il n'y auroit que ce grand et  
 « ridicule nombre de tant de personnes; car j'es-  
 « time qu'ils ne sont pas moins de cent qui s'en  
 « font de feste, qui se veulent mesler de faire  
 « les entremetteurs et negociateurs de paix et de  
 « reestablissemens d'Etat et de royaume, entre  
 « lesquels je ne pense pas qu'il s'en rencontre  
 « deux qui soient en tout et par tout d'un mesme  
 « avis, ny mesme un seul qui ait pour but vos-  
 « tre seule autorité, veu le grand nombre de po-  
 « tentats et autres puissances qui paroissent s'in-  
 « teresser en tous ces traittez, n'y en ayant pas un  
 « qui n'ait quelques affidez entre ces negociateurs,  
 « lesquels ne manqueront de recommander leurs  
 « interests, tous lesquels, sans un seul excepter,  
 « aspirent à obtenir quelque chose aux despens et  
 « detriment de la pauvre France, qui ne scauroit  
 « estre si peu de chose, quelque peu que chacun  
 « en obtienne en son particulier, qu'il ne soit  
 « ruineux pour elle en general.

« Les principaux d'iceux estans le Pape, l'Eni-  
 « pereur, le roy d'Espagne, le cardinal de Bour-  
 « bon, le comte de Soissons, les duc de Savoye,  
 « de Lorraine, de Mercure, de Guyse, de Mayenne,  
 « d'Aumale, d'Elbeuf, de Nemours, de Nevers,  
 « et tant de gouverneurs, officiers de la couronne  
 « et autres chefs d'armées et grands ecclésiasti-  
 « ques, tous de ce party de destruction; que le  
 « nombre en estant infiny, infinies en seront aussi  
 « les bresches qu'ils feront à la France et à la  
 « royauté, s'il se fait une pacification d'agreation  
 « avec eux tous ensemble, suivant ce que ces pa-  
 « cificateurs le demandent: voire peut-estre ceux  
 « qui font semblant d'estre les meilleurs François  
 « seront-ils les plus déraisonnables en leurs ins-  
 « tances: et en general il se trouvera qu'une in-  
 « finité tant d'une que d'autre religion, ont pour  
 « but de rabaisser en quelque sorte la royauté,  
 « me semblant, sire (car entre tant d'affaires es-  
 « pineuses et dignes de larmes, je vous en veux  
 « parler d'une pour rire), que tout ce que l'on  
 « entend resonner si hautement de tant d'allées,

« de venues, d'escrits, de lettres, de voyages,  
 « d'entremises, de traittez, discours, pourparlers  
 « et conferences, de tant de diverses sortes de pa-  
 « cificateurs et reestablisseurs d'Estats, royaumes,  
 « royautez, peuples et couronnes, la plupart à  
 « trois et quatre visages, et parlans, se disent-  
 « ils, de mysterieux, mais plutost captieux lan-  
 « gages, ne se peuvent mieux comparer qu'à cette  
 « fourmiere de procureurs du Palais qui font  
 « mille virvoustes par la grande salle, sous ombre  
 « de vuidier procez, et cependant ce sont eux  
 « qui leur donnent naissance, et seroient bien  
 « marris qu'il en mourût un seul; ou aux plai-  
 « doyers des advocats de diverses parties, qui  
 « tesmoignent de grandes passions de benevo-  
 « lence pour ceux qui les employent, et de mer-  
 « veilleuses aversions les uns contre les autres,  
 « sans qu'au partir de là un seul d'entr'eux se  
 « soucie du droict ou du tort, ny qui gagnera  
 « ou perdra sa cause, moyennant que les escus  
 « s'embourcent, et qu'à force de bien crier, il  
 « ils soient reputés eloquens, sçavans et bien  
 « pourvus d'inventions et de subtilitez, pour  
 « soutenir quelque sorte de cause que ce puisse  
 « estre qui leur soit baillée à défendre; et ainsi se  
 « trouvera-il à la fin que tous ces negociateurs,  
 « qui font tant les entendus et les zelez à quatre  
 « visages, ne conclurront que des chimeres et ne  
 « produiront que des monstres d'articles ridicu-  
 « les, et des conditions honteuses et impossibles  
 « à entendre et pratiquer.

« Et partant, sire, sans plus vous attendre à  
 « ces traiteurs et negociateurs qui ne font que  
 « vous piper, importuner, embarrasser l'esprit et  
 « remplir ceux de vos sujets de doutes et de scru-  
 « pules, je conclurray definitivement en peu de  
 « paroles qu'il vous faut encore user quelque  
 « temps de grande dextérité, patience et pru-  
 « dence, afin de vaincre par icelles et par les  
 « longueurs ennuyeuses des incommoditez et ne-  
 « cessitez que reçoivent les peuples les plus obs-  
 « tinez d'iceux, sans neantmoins, durant toutes  
 « ces longueurs, laisser passer ny temps, ny oc-  
 « casions d'employer à propos vos armes, afin  
 « de faire tousjours quelques progres par icelles,  
 « et sans laisser non plus en arriere les prati-  
 « ques, industries ny faciendes propres à vous  
 « acquérir les plus dociles, et diviser les plus  
 « obstinez de vos ennemis, vous gardant tous-  
 « jours bien neantmoins de traiter jamais avec  
 « eux en les unissant ensemble en forme d'asso-  
 « cieez, ni de leur donner de communs interests  
 « à poursuivre conjointement en vos pacifica-  
 « tions particulieres, qui leur puisse former des  
 « societiez d'instances communes, et encore moins  
 « donner à icelles un corps, une teste, des bras

« ny des jambes pour les faire agir et aller d'un  
 « mesme bransle; car se trouvant ainsi tous des-  
 « membrez, et vous faisant gratifier en particu-  
 « lier chaqu'une ville de celles qui se sont encore  
 « conservées la liberté de pouvoir disposer d'el-  
 « les mesmes comme il leur plaira, ainsi qu'en  
 « quelque sorte peuvent faire celles de Paris,  
 « Toulouse, Aix, Arles, Lyon, Rion, Poitiers,  
 « Orleans, Troye, Reims, Amiens, Abbeville et  
 « autres semblables, il arrivera infailliblement  
 « qu'en continuant les procédures cy-dessus dit-  
 « tes, sans vous en ennuyer ny vous relascher de  
 « courage, que tant de diverses testes, capri-  
 « cieuses humeurs, aviditez et fantaisies qui  
 « composent tout ce grand confus anarchique  
 « et chimerique corps, qu'ils nomment entre eux  
 « la sainte union catholique, il s'engendrera  
 « tant d'envies, jalousies, haines et contestations,  
 « voire des desirs et desseins si contraires, comme  
 « desja Vostre Majesté a sceu que grand nombre  
 « d'iceux avoient mesmes pretentions à se faire  
 « eslire roy; lesquelles s'entrechoquent tellement  
 « les unes les autres, qu'estant impossible de les  
 « pouvoir concilier, elles produiront en fin plu-  
 « sieurs divisions qui n'arriveront jamais que  
 « vous n'en profitiez puissamment; tant qu'enfin  
 « estans tous mal contents les uns des autres, et  
 « desespererez de leurs importuns desseins, il  
 « faudra que tout ce qu'il y a de François parmi  
 « eux se viennent jeter entre vos bras par pie-  
 « ces et loppins, comme vous devez désirer, ne  
 « recognoissant que vostre seule royauté, ne  
 « cherchent protection, appuy ny support qu'en  
 « elle, ni n'esperent d'obtenir bien-faits, dignitez,  
 « charges, offices ny benefices que de vostre  
 « seule grâce et liberalité.

« A toutes lesquelles choses, afin que Vostre  
 « Majesté ny d'autres aussi ne m'accusent pas  
 « que je suis un esprit de contradiction, puisque  
 « je n'ay rien trouvé de bon en toutes les pro-  
 « positions qui vous ont esté faites par ces grands  
 « negociateurs, j'adjousteray à mes advis et con-  
 « seils, qu'à la verité une catholicité vous deven-  
 « nant bien fort agreable, et icelle estant bien  
 « prise et bien receüe à propos par les formes  
 « honorables et agreables, seroit de grande uti-  
 « lité, voire pourroit servir de ciment et liaison  
 « indissoluble entre vous et tous vos sujets ca-  
 « tholiques, et mesme faciliteroit tous vos autres  
 « grands et magnifiques desseins, dont vous m'a-  
 « vez quelquefois parlé: surquoy je vous en di-  
 « rois davantage, si j'estois de profession qui me  
 « permit de le faire en bonne conscience, me  
 « contentant de laisser operer la vostre en vous  
 « mesme sur un sujet si chatouilleux et si delicat.  
 « Or, sire, encore que mille espreuves par moy

« faites depuis vingt-un ans qu'il y a que je vous  
 « sers et vous suits continuellement, m'ayant  
 « fait cognoistre que non seulement la vivacité  
 « de vostre esprit a des comprehensions admi-  
 « rables, mais aussi que Vostre Majesté, par ses  
 « universelles et longues experiences, s'est acquis  
 « une si grande solidité de jugement qu'elle peut  
 « recevoir et donner l'intelligence des choses,  
 « des affaires et des paroles les plus impliquées,  
 « obscures et enveloppées, voire l'ayant veu  
 « quelquefois penetrer à bon escient jusques de-  
 « dans les pensées, cogitations et intentions d'au-  
 « truy, je croyois en fin qu'elle se pourroit ren-  
 « dre capable de tirer la lumiere des tenebres.  
 « Mais nonobstant tout cela, si ne laisseray-je  
 « pas neantmoins de la supplier tres-humblement  
 « de vouloir considerer que tout ce que je viens  
 « de luy représenter n'est qu'un simple sommaire,  
 « et encore le plus succinct abrégé et racourcy  
 « qu'il m'a esté possible, d'un bien grand dis-  
 « cours que j'avois projeté de vous faire, voire  
 « de le mettre par escrit, tant pour remedier à  
 « mon deffaut de memoire, que pour en rafrais-  
 « chir la vostre quand bon luy sembleroit, sur  
 « tout ce qui me sembloit estre necessaire pour  
 « faire clairement entendre à Vostre Majesté mes  
 « expediens advis, conseils et opinions sur les  
 « ouvertures et propositions qu'il luy plust de me  
 « faire il y a trois soirs, lesquelles me semblerent  
 « tant importantes, et neantmoins si embarras-  
 « sées, que pour les desveloper de tels labyrin-  
 « thes, elles meriteroient bien d'estre distinguées  
 « par la diversité des traittans, des traitteurs et  
 « des traittez, point par point, particularité  
 « par particularité, et circonstance par circons-  
 « tance.

« Tellement que ce manquement me faisant  
 « apprehender qu'elle ait trouvé ce que je luy  
 « ay dit trop racourcy, et par consequent trop  
 « obscur et mal expliqué, je la supplieray encore  
 « une fois tres-humblement de n'en faire nul  
 « jugement déterminé que je ne luy aye baillé le  
 « tout par escrit, bien mis au net par les formes  
 « que je luy viens de specifier; car lors ne crain-  
 « dray-je point de le luy presenter tel qu'il sera,  
 « ny qu'elle le fasse voir à tous ceux que bon  
 « luy semblera, car je me suis fourny de puis-  
 « santes raisons pour bien deffendre mes folles  
 « fantaisies. »

A toutes lesquelles choses le Roy me repartit  
 soudain, qu'il n'avoit que faire d'escrits plus  
 amples que ce que je luy en venois de dire, dau-  
 tant que n'estant quasi que les mesmes choses  
 lesquelles luy estoient souvent venues en l'es-  
 prit, il avoit tellement en luy mesme discouru,  
 songé, resvé et medité sur icelles, que le moins

dre mot que quelqu'un luy disoit sur ce sujet, luy en faisoit comprendre tout le surplus.

« Et afin, me dit-il, que vous jugiez que j'ay bien pris vos opinions, je vous diray qu'elles se résolvent quasi en un seul poinct, lequel consiste à me garder bien de rien traiter avec qui que ce puisse estre, en sorte qu'il s'establissee quelque apparence de liaison, faction, société, ny corps entre plusieurs qui ayent la moindre apparence du monde de pouvoir subsister et se maintenir par eux mesmes ou leurs associez dans une partie des despendances de mon royaume, tel qu'il m'est venu de succession; d'autant que (comme vous avez tres-bien remarqué) ce seroit former une royauté dans la mienne, et me bailler un roy ou plusieurs roys pour compagnons, capables d'y en attirer encore d'autres: voire mesme suis-je bien resolu de ne souffrir jamais qu'il se desmembre aucun des droicts royaux de l'Estat, tant pour le spirituel que pour le temporel; et afin de vous faire encore mieux juger que je comprends fort bien toutes vos imaginations et representations, c'est qu'il nous faudra un jour essayer de faire le semblable pour ce qui regarde tous ceux de la religion, voire pensé-je avoir desja en l'esprit un expedient par lequel j'y parviendray fort facilement, et sans mal contenter personne. »

Sur toutes lesquelles paroles du Roy je luy respondis que je me resjouyssois de luy voir ainsi bien prendre l'intelligence de ses affaires, qu'il se rendoit si soigneux de mediter sur icelles, et d'en prendre conseil avant que de les conclure; et partant n'avois-je plus autre chose à luy dire, sinon de conseiller Sa Majesté de faire tousjours ainsi à l'advenir, aussi bien au temps de prosperité qu'il fait en celui d'adversité; et pour le present de vouloir prendre son repos de corps et d'esprit, et me permettre semblablement d'aller prendre le mien, d'autant que je mourois de sommeil, y ayant deux nuicts que je n'avois point dormy, tant j'avois esté attentif tout le long d'icelles à mediter et mettre par escrit ce que je luy voulois représenter, tellement que sans plus rien dire, le Roy me donna le bon soir, et moy je m'en revins à mon logis.

#### CHAPITRE XXXVIII.

##### *Mort du prince de Parme. Suite de la conférence.*

Si ce dire commun, que toutes choses violentes sont de peu de durée, se trouve veritable en

plusieurs, on l'a expérimenté tel en la puissante armée du prince de Parme, la mort duquel la rendit entierement dissipée, les troupes d'icelle prenans diverses routes et divers partis; et, par cet accident, le Roy se voyant hors d'appréhension qu'une armée estrangere pût entrer de longtemps en France, il se resolut de se rapprocher de Paris, à cause de plusieurs pratiques qui se faisoient de toutes parts, comme si les exploits militaires eussent quitté la place aux facientes et debats de paroles, et s'en vint séjourner à Mante où madame sa sœur et le conseil estoient arrivez depuis peu de temps, auquel lieu il receut divers advis; lesquels non seulement confirmerent ce qu'il avoit descouvert par les lettres que vous luy aviez portées, mais aussi qu'il y avoit des desseins contre sa personne et sa vie; tellement qu'il commença d'en avoir soin plus que de coutume et de travailler à hon escient pour y chercher des remedes, jusques à se trouver quelquefois contraint de faire venir loger des troupes angloises dans Limay qui est comme un des faux-bourgs de Mante.

Telles menées ou pour le moins les bruits et advis d'icelles s'augmentans journellement, le Roy en estant fort travaillé en son esprit, et se defiant de la plupart de ceux qui avoient de grandes charges et les grandes autoritez pres de luy, il vous envoya querir un jour fort matin par un nommé Jacquinot, qu'il estoit encore au lict, et vous ayant fait seoir au chevet d'iceluy, vous dit: « Hé bien! mon amy, que dittes-vous de tant de menées qui se projettent contre ma conscience, ma vie et mon Estat; car pour moy, selon que je voy les esprits de ceux que j'ay essayé d'obliger en toutes manieres, disposez, et la malice de quelques uns, que je vous nommeray un jour, s'augmenter journellement, j'estime avoir sujet de croire qu'il n'y a vertu ny bien-fait qui puisse obliger un meschant courage, et que telles gens ne me laisseront jamais en repos, et peut-estre enfin attenteront à ma liberté et à ma vie; et partant je vous prie m'en dire librement vostre opinion, et de quels remedes, exempts de cruauté et de violence, je pourrois maintenant user pour éviter tant d'embusches et de monopoles que l'on fait contre les droicts qui me sont acquis par la volonté de Dieu, la nature et les loix du royaume. »

A quoy vous luy respondistes: « Sire, en affaires tant arduës et difficiles et qui tirent apres elles tant de bonnes ou mauvaises consequences, vous auriez besoin d'une plus grande sagesse que la mienne; et neantmoins, puis qu'il vous plaist que je parle, je vous diray

« qu'en celles qui se presentent, selon ce que j'en  
 « ay pû cognoistre et qu'il vous a pleu me les  
 « deduire presentement, je n'estime pas que les  
 « remises et temporisemens, non plus que les  
 « longs discours soient de saison; et pour cette  
 « cause laisseray-je les paroles et les raisons à  
 « part, pour vous dire qu'il n'y a, ce me semble,  
 « que deux voyes à tenir pour vous delivrer de  
 « peril, mais non de soucy; duquel les roys et  
 « les princes, plus ils sont grands, moins s'en  
 « peuvent ils garantir s'ils veulent regner heu-  
 « reusement; l'une de vous accommoder aux  
 « desirs et aux volontez de ceux dont vous avez  
 « deffiance, et l'autre de vous assurer des plus  
 « puissans, plus qualifiez, qui vous sont les plus  
 « suspects, et les mettre en tel lieu qu'ils ne vous  
 « puissent nuire; vous les cognoissez quasi tous;  
 « et à leurs despens, car il y en a de fort riches,  
 « vous pourrez long-temps faire la guerre; car  
 « de vous conseiller d'aller à la messe, c'est chose  
 « que vous ne devez pas, ce me semble, attendre  
 « de moy estant de la religion, mais bien vous  
 « diray-je, que c'est le plus prompt et le plus  
 « facile moyen pour renverser tous ces monopo-  
 « les, et faire aller en fumée tous les plus malins  
 « projets. »

Sur quoy il vous repartit : « Mais, je vous  
 « prie, dittes moy librement ce que vous feriez  
 « si vous estiez en ma place. — Sire, luy res-  
 « pondistes vous, Vostre Majesté sçait bien que  
 « je fais tousjours ce que je puis pour ne luy don-  
 « ner jamais conseil en chose d'importance que  
 « je n'aye fort medité sur icelle. Or, usant de  
 « mesme forme en ce qui me regarde, je vous  
 « puis bien assurer que je n'ay encor jamais pensé  
 « à ce que je devois faire pour estre roy,  
 « m'ayant tousjours semblé que je n'avois pas  
 « teste capable ny destinée à porter couronne;  
 « mais quant à Vostre Majesté, c'est un autre  
 « discours, à laquelle ce desir est non seulement  
 « louable, mais aussi necessaire, n'y ayant nulle  
 « apparence que le royaume puisse estre restably  
 « en sa hauteesse, opulence et splendeur, que par  
 « le seul moyen de vostre eminente vertu et cou-  
 « rage vraiment royal, tout le surplus de ceux  
 « de vostre maison n'en pouvant donner l'esper-  
 « rance à qui que ce soit; mais quelque droit  
 « que vous ayez au royaume, et besoin qu'il aye  
 « de vostre courage et vertu pour son restablis-  
 « sement, si, m'a-il tousjours semblé, que vous  
 « ne parviendrez jamais à l'entiere possession et  
 « paisible jouyssance d'iceluy, que par deux  
 « seuls expediens et moyens : par le premier  
 « desquels, qui est la force et les armes, il  
 « vous faudra user de fortes resolutions, seve-  
 « ritez, rigueurs et violences, qui sont toutes

« procedures entierement contraires à vostre hu-  
 « meur et inclination, et vous faudra passer par  
 « une milliasse de difficultez, fatigues, peines,  
 « ennuis, perils et travaux, avoir continuelle-  
 « ment le cul sur la selle, le halecret (1) sur le  
 « dos, le casque en la teste, le pistolet au poing  
 « et l'espée en la main; mais, qui plus est, dire  
 « adieu repos, plaisirs, passe-temps, amours,  
 « maistresses, jeux, chiens, oyseaux, et basti-  
 « mens; car vous ne sortirez de telles affaires  
 « que par multiplicité de prises de villes, quan-  
 « tité de combats, signalées victoires, et grande  
 « effusion de sang.

« Au lieu que par l'autre voye qui est de vous  
 « accommoder, touchant la religion, à la vo-  
 « lonté du plus grand nombre de vos sujets,  
 « vous ne rencontrerez pas tant d'ennuis, peines  
 « et difficultez en ce monde; mais, pour l'autre,  
 « luy dittes vous en riant, je ne vous en res-  
 « ponds pas; aussi est-ce à Vostre Majesté à y  
 « prendre une absoluë resolution d'elle mesme  
 « sans la tirer d'autrui et moins de moy que de  
 « nul autre, sçachant bien que je suis de la reli-  
 « gion et que vous me tenez prez de vous, non  
 « pour theologien et conseiller d'eglise, mais  
 « pour homme de main et conseiller d'Estat,  
 « puis que vous m'avez donné ce tiltre et de  
 « longue-main employé pour tel. » Sur quoy  
 s'estant pris à rire et mis en son seant sur son  
 lit apres s'estre plusieurs fois gratté la teste, il  
 vous respondit :

« Je cognois bien que tout ce que vous me  
 « dittes est vray : mais je voy tant d'espines de  
 « tous costez, qu'il sera fort difficile que quel-  
 « ques unes d'icelles ne me piquent bien serré;  
 « car d'une part vous sçavez assez que mes cou-  
 « sins les princes du sang et messieurs de Ne-  
 « vers, de Longue-ville, Biron, d'O, Rieux,  
 « Manou, Chasteau-vieux, Vitry, Antragues,  
 « Sourdis et beaucoup d'autres, mais sur tous  
 « Espernon, qui fut si hardy que de me declarer  
 « tout haut qu'il ne recognoistroit jamais roy,  
 « ny luy, ny tous ses amis, qui fust d'autre re-  
 « ligion que la sienne, me pressent incessamment  
 « de me faire catholique ou qu'ils formeront un  
 « tiers party, et se joindront à la ligue : d'ail-  
 « leurs je sçay de certain que messieurs de Thu-  
 « renne, de la Trimouille et leur sequelle, solli-  
 « citent journellement de toutes parts, afin que,  
 « si je me fais catholique, il soit demandé une  
 « assemblée pour ceux de la religion, pour faire  
 « resoudre un protecteur et un establissement de  
 « conseils, subsistans par les provinces, toutes  
 « lesquelles choses je ne sçaurois supporter; et  
 « s'il me falloit leur declarer la guerre pour l'em-

(1) Corselet de fer qui couvrait la poitrine et les épaules.

« pescher, ée me seroit le plus grand ennuy et  
 « déplaisir que je scaurois jamais recevoir, mon  
 « cœur ne pouvant souffrir de faire mal à ceux  
 « qui ont si long-temps couru ma fortune, et  
 « employé leurs biens et leurs vies pour défendre  
 « la mienne, voire y en ayant grand nombre et  
 « de la noblesse, et des villes, qu'il n'est pas  
 « en ma puissance de me garder d'aymer tous  
 « jours. »

Sur lesquels discours vous vous jettastes à  
 genoux, luy baisastes les mains, les yeux  
 decoulans de larmes de joye et luy dittes : « Sire,  
 « je me resjouys infiniment de vous voir si bien  
 « intentionné envers ceux de la religion, mon  
 « apprehension ayant tousjours esté que si une  
 « fois vous veniez à changer de religion, comme  
 « c'est chose que je voy bien qu'il vous faudra  
 « faire, l'ou vous persuadast à hayr et mal trait-  
 « ter ceux de nous autres, tant des villes que de  
 « la noblesse, qui vous aymerons tousjours cor-  
 « dialement et vous servirons loyalement, des-  
 « quels le nombre se trouvera incessamment si  
 « grand, que s'il se leve parmy eux quelque ava-  
 « ricieux, ambitieux et factieux qui voulussent  
 « faire le contraire, ils seront contrains par les  
 « autres de se remettre en leur devoir; ny ayant  
 « rien, à mon advis, qui fust tant necessaire de  
 « faire changer aux catholiques zelez, que cette  
 « creance qu'ils tesmoignent avoir prise et la  
 « voudroient bien faire prendre à tous les autres,  
 « que ceux de la religion sont tous damnez; et y  
 « a bien aussi quelques ministres et autres im-  
 « pertinents esprits des huguenots, qui voudroient  
 « aussi essayer de nous en persuader autant des  
 « catholiques; ce que pour moy je ne croy nul-  
 « lement, mais au contraire tiens pour infaillible  
 « qu'en quelque sorte de religion dont les hommes  
 « fassent profession exterieure, s'ils meurent en  
 « l'observation du decalogue, creance au sym-  
 « bole, ayment Dieu de tout leur cœur, ont cha-  
 « rité envers leurs prochains, esperent en la mi-  
 « sericorde de Dieu, et d'obtenir salut par la  
 « mort, le merite et la justice de Jesus-Christ,  
 « qu'ils ne peuvent faillir d'estre sauvez, pource  
 « que dès lors ne sont ils plus d'aucune religion  
 « erronée, mais de celle qui est la plus agreable  
 « à Dieu; dequoy j'ay autresfois discouru avec  
 « quatre ou cinq de vos ministres; à sçavoir  
 « M. de la Rochechandieu, de Vaux, d'Espe-  
 « rien, Gardesi et de Nord, lesquels se trou-  
 « voient bien empeschez à blasmer cette opinion.

« Que s'il vous plaisoit de la prendre, vous  
 « resoudre de la mettre en pratique tout le temps  
 « de vostre vie, et que Dieu vous en fit la grace,  
 « non seulement je ne douterois point de vostre  
 « salut, quelque profession exterieure que vous

« fassiez de la religion catholique, mais demeu-  
 « rerois bien assuré que ne nous regardans point  
 « comme des gens execrables et damnez vous  
 « n'entreprendriez jamais aussi la destruction,  
 « ny persecution de ceux de nostre religion, qui  
 « vous aymeront vraiment, et obeyront et ser-  
 « viront loyalement, ainsi que Dieu commande  
 « à tous subjets de le faire envers leurs roys et  
 « princes legitimes, voire mesme à l'endroit de  
 « ceux qui se gouvernent desordonnement : con-  
 « cluant par tous ces discours, qu'il vous sera  
 « impossible de regner jamais pacifiquement,  
 « tant que vous serez de profession exterieure  
 « d'une religion qui est en si grande aversion à  
 « la plupart des grands et des petits de vostre  
 « royaume, sans laquelle tranquillité universelle  
 « il ne vous faut point entreprendre, ny esperer  
 « de le mettre en l'opulence, splendeur, richesse  
 « et felicitez de peuples que je vous en ay veu  
 « souvent faire le projet, et encor moins vous  
 « persuader de pouvoir jamais parvenir à l'exe-  
 « cution de vos hauts et magnifiques desseins,  
 « pour l'establisement d'une republique univer-  
 « selle, tres-chrestienne, composée de tous les  
 « roys et potentats d'Europe, qui professent le  
 « nom de Christ; d'autant que pour procurer un  
 « si grand bien, il vous faut necessairement  
 « posseder tranquillement un grand, riche, opu-  
 « lent et peuplé royaume, et estre en condi-  
 « tion de pouvoir faire de grandes et loyales  
 « associations estrangeres. »

Sur lequel discours le Roy vous ayant fait  
 paroistre de l'avoir eu bien agreable, il vous  
 dit qu'il y vouloit mediter, mais qu'en attendant  
 il vous falloit donner telles esperances à  
 ceux de vos intimes amis, que vous cognoissiez  
 de le desirer le plus, et que, de son costé, il  
 assembleroit cinq ou six de ses principaux et  
 plus anciens serviteurs pour entendre leur advis  
 là dessus; à toutes lesquelles choses vous satis-  
 fistes l'un et l'autre, comme il sera dit au cha-  
 pitre suivant.

#### CHAPITRE XXXIX.

*Conférence de Henri IV avec les seigneurs  
 protestans. Discours de ce prince. Négocia-  
 tions.*

Conformement à ce qui est dit au chapitre  
 precedent, trois jours apres que le Roy vous eut  
 tenu les discours mentionnez en iceluy, il as-  
 sembla, ainsi que nous vous l'avons ouy dire,  
 messieurs de Thurenne, vous, Sancy, du Plessis,  
 de Salignac, un nommé Morlas, Constans  
 et Sallette.



De reciter icy tous les propos particuliers qui furent tenus entre vous, cela seroit trop long; car vous fustes pres de deux heures en contestation, et n'en avons pû apprendre autre chose de vous, sinon que le Roy vous dit à l'entrée : « Messieurs, je vous ay icy assemblez comme mes plus anciens et affidez serviteurs, pour prendre conseil de vous de ce que je dois faire sur les advis certains qui m'ont esté donnez, que l'abbé de Bellozane a veu en cachette les sieurs de Ville-roy et Jeannin, et que depuis cela, luy et les deux Durets font tout ce qu'ils peuvent, pour persuader mon cousin le cardinal de Bourbon, de se vouloir rendre chef de ce tiers party dont l'on bruit tant, afin d'espouser l'infante d'Espagne, et se faire declarer roy de France par tous les catholiques; estans bien assurez que tous ceux qui sont aupres de moy ou me servent ailleurs, m'abandonneront aussi-tost, et ne sont plus retenus que d'une seule difficulté, qui est de sçavoir ce qu'ils feront de ma personne, les uns disans qu'il s'en faut saisir et s'en assurer, et les autres plus malins et audacieux, qu'il me faut depescher; adjoustans, que tels oyseaux que moy ne valent rien en muë ny à garder en cage. L'on m'a donné advis certain que jusques icy le cardinal a tousjours des-approuvé telles procédures violentes principalement pour ce qui touche ma vie. Mais il est à craindre que par importunité, ou ambition, ou autres motifs, il ne se laisse emporter à leurs persuasions et mauvais desseins; et partant je vous prie de me dire librement vos sentimens. »

Lesquels, comme je l'ay appris de vous et d'un mien amy, qui est fort familier d'un nommé Salette, furent quasi tous divers; aucuns, dont vous direz les noms quand il vous plaira, se jettoient dans l'absoluë violence, disans que, puis que la malice de ceux sur lesquels on l'exerce-roit, l'auroit rendu nécessaire, le temps et les occasions luy feroient porter le tiltre de justice. Les autres vouloient que l'on s'assurast seulement de huit ou dix des plus puissans et plus suspects, sans toucher à leurs vies, mais vous et un autre, qui aviez plus particuliere cognoissance des inclinations du Roy et des resolutions ausquelles il se pourroit porter, reprouvastes ces deux voies et conclustes à chercher des accommodemens; et cependant à se fortifier d'amis, à se tenir sur ses gardes, et surtout d'essayer à regagner avec certitude les affections et bonnes volontez de messieurs le cardinal de Bourbon et comte de Soissons, et à pratiquer pour cet effet quelques uns de leurs plus confidens serviteurs : lequel conseil pource qu'il se

trouva plus conforme à l'humeur du Roy, fut aussi par luy le plutost approuvé, et mesme vous donna charge, apres que l'on fut séparé, d'y travailler diligemment, sçachant que vous estiez fort bien tant avec monsieur le cardinal, qui disoit tout haut qu'il n'y avoit homme en France pour estre huguenot qu'il aymast tant que vous, qu'avec M. le comte de Soissons, en grande amitié avec l'abbé de Bellozane et une dame nommée de Rozieres qu'il aymoît, et encore plus avec les Durets.

Neantmoins vous vous adressastes premiere-ment au sieur de Bellozane, comme le plus facile à persuader et gagner par louanges et par offres; et en le flattant, amadoüant et feignant de croire qu'il avoit tousjours resisté aux Durets, car il y avoit une envie mortelle entre luy et eux, lors qu'ils vouloient porter leur maistre à des conseils violens et qui passolent par delà les bornes de l'humanité, l'assurant que le Roy vous avoit donné charge de l'en remercier; le prier de luy continuer les bons et utiles services qu'il luy avoit rendus, et de luy promettre le premier bon evesché qui viendrait à vaquer, voire de le faire cardinal si tost qu'il seroit catholique; à quoy il estoit tout resolu, et partant ne pouvoit plus manquer d'estre roy absolu; lesquelles paroles opererent si bien en cet esprit vain et ambitieux, que tant pour ces belles esperances, que pour se vanger de ceux qui luy disputoient la faveur du cardinal, qu'il vous dit ce qu'il sçavoit et ce qu'il ne sçavoit point; sur tout il accusa les Durets, pour essayer de les ruyner entierement, de plusieurs pernicieuses pratiques et mauvais conseils qu'il avoit tousjours destournez, jusqu'à vouloir persuader son affection avoir tousjours esté telle envers le Roy et la France, que sans sa résistance aux mauvaises deliberations, son maistre s'y fut souvent-fois laissé emporter; dequoy vous le remerciastes, le priastes de continuer et de trouver bon que le Roy fut amplement informé de toutes ces particularitez, afin de luy augmenter tant plus le desir qu'il avoit de luy faire du bien, ce qu'il approuva grandement, et mesme vous en requit; de toutes lesquelles choses le Roy, sur ce qu'il apprit que ledit de Bellozane depuis avoir parlé à vous avoit encore veu en secret Ville-roy et Jeannin, ayant conféré avec monsieur le cardinal, sans luy rien celer, en demeura tellement offensé contre ledit de Bellozane, jugeant par les discours qu'il vous avoit tenus, et qu'il vouloit faire imputer à ses conseils et à son credit et autorité pres de luy, tout ce qu'il y avoit de louable en sa pieté, prudence et bon naturel, qu'à cette occasion il l'esloigna peu

à peu de ses bonnes graces et de la principale entremise de ses affaires, et se resolut par l'avis de ses contretenans les deux Durets, qui par despit de luy se portèrent d'une extrémité à l'autre, de s'accommoder entierement et de bonne foy avec le Roy, à quoy ayda bien la copie des articles accordez par le president Jeannin avec le roy d'Espagne, lors qu'il fut envoyé vers luy par M. du Mayne, dont il a esté parlé cy-devant, laquelle vous luy fistes voir et recognoistre pour estre escrete de la main dudit president; car vous fustes choisi par tous les deux pour estre entremetteur entr'eux, porter les paroles, et faire les allées et venues de l'un à l'autre, lors qu'ils n'auroient pas la commodité de se voir, ou de pouvoir parler ensemble; en toutes lesquelles choses vous rendistes un si bon devoir et vous en acquitastes si dignement et si heureusement que la reconciliation s'y trouva toute entiere; de laquelle nous voudrions bien sçavoir toutes les particularitez, pour les inserer dans ces Mémoires; mais toutes les fois que nous vous en avons parlé, vous nous avez tousjours dit que les discours en seroient trop longs.

Or, combien qu'en nostre dessein nous nous soyons proposez, comme nous l'avons souvent dit, de ne vous représenter que les choses où vous avez eu part, de crainte de destourner, par quelque digression ou narration d'autre nature, l'attention de ceux qui liront ces Memoires du fil de vostre propre histoire; neantmoins ayans parlé cy-devant des peines et anxietez où estoit reduit le Roy à cause de tant d'ennemis qui lui estoient opposez, et de tant d'embusches qui luy estoient dressées, nous avons estimé, tant pour faire voir que le plus souvent la vengeance divine jette dans des lacs et des filets de difficultez extrêmes ceux qui procurent le mal d'autrui, que pour rendre plus intelligible tout ce qui se dira cy-apres de vous, lors que vous serez trouvé meslé dans la pluspart des grandes affaires de l'Estat, rendu participant des conseils plus secrets et importants de nostre Roy, nous avons estimé, disons-nous, estre obligez de vous ramentevoir un discours que vous tinsites à M. vostre frere, gouverneur de Mante, et à M. du Perron ensemble, avant que vous luy eussiez procuré l'evesché d'Evreux, ne doutant point que comme des plus affidez de M. le cardinal de Bourbon, ils n'en discourussent apres avec luy; lequel propos tendoit à leur faire voir le peu de solidité qu'il y avoit aux esperances fondées sur des personnes si diverses en intentions qu'estoient tous ceux qui contrarioient les justes desseins du Roy.

Et, commençant par le Pape de nouvelle pro-

motion, qui estoit Clement VIII, vous leur distes qu'il estoit desja recogneu de plusieurs pour n'estre en aucune façon d'humeur violente et obstinée comme avoit esté Sixte V, ny d'esprit si envenimé contre la France, et de conduite si estourdie qu'estoit son devancier Gregoire XIV; mais tout au contraire que comme prince sage et advisé, qui desiroit maintenir la chrestienté en repos, et l'autorité pontificale en sa splendeur, il n'avoit nulle envie de fomentier les troubles de France, et encore moins que le roy d'Espagne en püst devenir roy paisible, jugeant bien que ce seroit luy ouvrir le chemin à la monarchie chrestienne, et par consequent reduire les pontifes romains à devenir, si bon lui sembloit, ses simples chappelaluz, et sur telles apprehensions estoit homme pour embrasser tous les expediens qui lui seroient proposez, afin de faire tomber la France sous toute autre domination que celle d'Austriche, voire pour recevoir le Roy comme chose plus juste et plus facile, plutost que nul autre, moyennant qu'il se voulust faire catholique, comme vous leur distes que vous ne doutiez point qu'il ne s'y resolust, sans se soucier de ces mots bruyans de relaps, dont les Espagnols et plusieurs ligueurs faisoient tant de parade.

Puis venant au roy d'Espagne, comme estant le premier et principal mobile qui donnoit ce malheureux bransle à tous nos mouvemens, vous leur dittes sçavoir de bonne part que les temps et les evenemens l'ayant esclairey de beaucoup de choses, et fait mieux recognoistre la naturelle impatience et legereté des François, il jugeoit bien qu'il luy seroit du tout impossible de les tenir en obeysance qu'avec de tres-grandes forces et despences si excessives, qu'elles ne pouvoient compatir avec celles à quoy l'obligeoit la defense des Pays-Bas; que d'ailleurs le duc du Mayne, mais beaucoup moins ceux de Savoye, de Lorraine, de Nemours, de Mercure et de Guise, ny les principaux seigneurs de France ne le desiroient nullement pour leur roy et maistre absolu: et partant ne songeoit-il plus aussi à parvenir à cette dignité, ny à la pouvoir faire obtenir à aucun de la maison d'Austriche, mais seulement à essayer d'emporter quelques pieces de l'Estat qui luy fussent aisées à garder en s'accommodant avec le Roy, et en tous cas de maintenir les divisjons commencées, par les diverses esperances qu'il donneroit à chacun des chefs, afin que ne pouvant avoir la France pour luy, il essayast d'en faire autant de parts qu'il y avoit de pretendans, suivant l'ancien desir de l'empereur Charles V.

Que quant aux chefs de la ligue, ils commen-

poient à recognoistre combien les langages et les procedures du nouveau Pape estoient differentes de celles de ses predecesseurs contre le Roy ; que celui d'Espagne seroit homme pour s'accommoder avec luy , et se bander peut estre apres contr'eux mesmes , ayant senty quelque vent des propositions secrettes de dom Bernardin de Mandosse , de Taxis , et du commandeur Moreau ; combien les Espagnols , qui estoient en France (qu'il estoit à presumer de suivre en cela les intentions de leur Roy) , se monroient rogues et hautains en leur endroit és lieux où ils estoient les maistres ou pensoient avoir de grandes brigues ; combien ils tesmoignoient avoir de defiances de leurs affections et intentions , et se monroient peu desireux de voir à tous ensemble ny à un seul d'eux en particulier , aucun establissement certain ni autorité absolüe , traversans , par leurs ministres et partisans , toutes celles qu'ils essayoient d'acquérir , tellement qu'ils n'esperoient jamais plus rien d'asseuré par le moyen du Roy d'Espagne ; cognoissans qu'il les vouloit tenir en un perpetuel travail dans les armes comme de simples stipendiaires , ainsi qu'il en avoit usé envers le prince de Parme et tous les autres grands chefs de guerre qui l'avoient servy és Pays-Bas et ailleurs , et qu'entr'eux mesmes ils voyoient les difficultez de s'accorder en un mesme dessein et mesmes procedures , s'augmenter journellement ; et partant desiroient de pouvoir traiter quelque chose de certain avec le Roy , pendant qu'il estoit huguenot , afin de meliorer leur condition , en sorte (ainsi qu'ils l'avoient fait proposer par les sieurs de Ville-roy et president Jeannin) qu'en luy laissant le tiltre et nom vain de Roy , eux le demeurassent en effet dans chacune des provinces où ils desiroient s'establir , protestant aux princes et seigneurs catholiques de party contraire au leur , qu'il n'y avoit que la seule religion que le Roy professoit qui les empeschast de le recognoistre , et par consequent que le royaume ne fust mis en paix et en repos , comme ils tesmoignoient le desirer , alleguans pour preuve de leurs bonnes intentions , et qu'ils ne vouloient point dissiper l'Estat ny le transporter en main estrangere , qu'ils estoient tous prests de s'unir ensemble avec lesdits princes et seigneurs catholiques qui se voudroient separer du Roy , et consentir qu'il fust choisi un d'entr'eux de la maison de France pour espouser l'infante d'Espagne et estre esleu roy : estant à croire qu'ils ne faisoient toutes ces ouvertures que pour amuser les peuples et les grands , affoiblir le party du Roy , accroistre les difficultez d'un reestablissement d'Estat , et par icelles reduire le Roy à ne leur refuser nulle

des conditions qui luy avoient esté proposées par ceux que nous avons dit cy-dessus , desquelles vous leur monstrastes une copie , laquelle nous y avons depuis trouvée parmy vos papiers et l'avons icy inserée telle que s'ensuit.

## CHAPITRE XL.

### *Propositions faites par la ligue à Henri IV. Négociations. Prise de Dreux par le Roi.*

« Premierement , que le Roy promist de se faire catholique dans trois mois au plus tard.

« Plus , que l'exercice de la religion catholique fust restably publiquement et librement sans aucune restriction en toutes les villes de France sans aucune excepter.

« Plus , que si l'on vouloit permettre à ceux de la religion de demeurer en France , que ce fust par un edict de tolerance limité à certain temps , sauf à le proroger lors qu'il seroit jugé à propos.

« Plus , que nul de ceux de la religion ne püst estre pourveu d'aucunes charges , estats , dignitez , capitaineries , gouvernemens , offices , benefices , ambassades ny legations.

« Plus , que le Roy ne püst faire aucune nomination pour benefices , que conformement aux decrets et canons.

« Plus , que les estats se tinssent de six en six ans , suivant l'advis desquels toutes affaires , et sur tout celles d'Estat , des armes , de la justice , de la police et des finances seroient administrées.

« Plus , que le Roy ne pourra mettre garnison aux villes que tiennent les chefs de la ligue qui seront nommez au traité , ny en toutes autres si elles ne sont frontieres.

« Plus , entretenir les compagnies de gens d'armes desdits seigneurs , et pour cet effet y affecter le taillon des provinces dont ils seront gouverneurs.

« Plus , entretenir en leurs places des garnisons necessaires , le payement desquelles sera pris sur les tailles desdites provinces.

« Plus , adjoûter au gouvernement de Bourgonne celui du Lionnois , Forest et Beau-jolois , et les bailler à M. du Mayne , avec la nomination des gouverneurs et capitaines des places , et la provision aux offices et benefices , et luy bailler la charge de lieutenant general ou de connestable , n'y en ayant nulle autre qui soit digne de luy.

« Plus , qu'à mesmes conditions l'on baillast le gouvernement de Provence à M. de Nemours , de Languedoc à M. de Joyeuse , de Bourbonnois et la Marche à M. d'Elboeuf , de Bretagne à M. de Mercure , les deux Vexins au sieur d'Alincourt en tiltre de gouvernement , partie de Normandie

à M. de Villars, de l'Isle de France à M. de Rosne, d'Orleans et Berry à M. de la Chastre, de Picardie à M. d'Aumalle, et la Champagne à M. de Guyse avec la charge de grand maistre et tous les benefices qui avoient esté en la maison de Lorraine.

« Plus, quatre mareschaussées de France, à tels qu'ils seroient nommez.

« Plus, que le Roy payast toutes les debtes des princes et seigneurs de la ligue jusqu'au nombre de vingt qui seroient nommez, et semblablement des pensions selon la qualité d'un chacun d'eux.

« Plus, de comprendre audit traité quelques princes estrangers qui seroient nommez, et notamment le Pape, tous lesquels se rendroient garands de l'observation des conditions d'iceluy. »

Sur lesquelles conditions ayant esté remontré audit sieur de Ville-roy, par les sieurs mareschal d'Aumont et de Thurenne, d'O, du Plessis et autres serviteurs du Roy, qu'il y en avoit plusieurs d'impossible execution, d'autres fort honteux, d'autres excessifs et d'autres impertinens, et qu'en general ils meritoient tous moderation et interpretation; et luy en ayant escrit en ces mesmes termes au president Jeannin, il luy respondit, par lettres du huictiesme may, mil cinq cens quatre vingts douze, du camp de Caudebec: qu'il s'estonnoit des difficultez qu'on faisoit d'accorder lesdits articles, n'y voyant pas grands avantages pour M. du Mayne, ny seureté pour le party; que l'on ne pouvoit approuver que le mareschal de Thurenne et le sieur du Plessis, estans huguenots, fussent les negociateurs de ce traité, d'autant qu'ils ne desiroient nullement la paix, la guerre leur estant plus utile; que M. du Mayne, ny les autres princes n'entendoient point traiter comme vaincus, ou inferieurs en puissance, et se plaindroient qu'il n'avoit point parlé des villes de seureté qui estoient demandées, ny des engagemens des domaines de provinces dont ils auroient les gouvernemens, ny de les rendre hereditaires à leurs enfans, dont il avoit souvent discouru avec luy; qu'ils ne vouloient point que l'on parlât d'abolition; pource qu'elle presupposoit crime, et que leurs armes estoient trop pleines de justice, d'honneur et de raison pour en user ainsi, ny estre traittez à la huguenotte qui quittoit tout pour un presche; que cette paix ne se devoit pas estimer un simple edict qu'un Roy accorde à ses sujets, mais un traité comme entre esgaux qui recognoissoient un Roy ayans eu sujet de ne le faire pas tandis que le cardinal de Bourbon a vescu, ny depuis n'estant pas catholique; et que mesme y auroit-il difficulté d'y faire condescendre M. de Nemours, pour avoir basti

une souveraineté aux Lyonnais et lieux voisins, et confirmé en icelle par le roy d'Espagne; et partant ne falloit-il pas s'arrester à toutes ces difficultez pour avoir un royaume, alleguant plusieurs autres raisons qui seroient trop longues à desduire, aussi qu'il ne nous souvient quasi plus de ce que vous nous avez dit, que vous en contâtes lors M. du Plessis, et qu'en avez entendu depuis dire aux sieurs de Ville-roy et Jeannin discourans des affaires de ce temps-là.

Puis en continuant vostre discours vous leur dites que quant aux princes et seigneurs catholiques, les plus gens de bien et les plus judicieux, quoy qu'au commencement ils eussent applaudy à telles chimeriques ouvertures, ils alloient peu à peu recolnoissans la vanité, peu de solidité et sincerité d'icelles, descouvrans des intentions contraires à icelles dans les esprits et secrets desseins du Pape, du roy d'Espagne et des princes, des Maisons d'Austriche, Savoye et Lorraine, y ayant apparence de plus d'utilité pour eux tous de traiter avec un roy huguenot qu'avec un catholique, et que finalement pour ce qui regardoit les peuples, villes, communautéz et noblesse de la campagne, qui en effet estoient plus puissans que tout le reste, et pouvoient par leur multitude donner le bransle et l'arrest à toutes deliberations, ils estoient la plupart revenus de leurs extravagantes fantaisies, et commençoient à discourir que le Pape avoit changé d'opinion à l'endroit du Roy; que le roy d'Espagne vouloit la France toute pour luy, et la perdre pour tout autre et pour elle mesme; que tous les chefs de la ligue, par leurs diverses intentions et pretentions, accroistroient plustost les guerres, troubles, ruynes et saccagemens du royaume, qu'ils ne le pacifieroient et restabliroient en splendeur; que ce nouveau party que l'on parloit de former paroissoit encore si foible et si desnüé de solidité, union et raison, que les irresolutions de ceux qui le composeroient, augmenteroient plustost les miseres qu'elles ne les termineroient, voire que quand le Pape, le roy d'Espagne, les chefs de la ligue et tous ceux dont on parle pour le tiers party, seroient en une parfaite union, et se rencontreroient en un mesme dessein, si n'y avoit-il esperance de pouvoir establir une tranquillité à l'Estat, ny de le pouvoir jamais remettre en son lustre, ayans affaire à un prince dont le droit estoit indubitable, et qui avoit tant de courage, de bonne fortune et de vertu, que quand il ne tiendrait plus que dix villes en France, condition en laquelle il n'estoit pas prest d'estre réduit, à cause des huguenots de France et des secours des estrangers de cette profession, s'y défendrait-il tousjours ses justes pretentions avec les armes, et ne laisseroit jamais respirer

les peuples qu'il ne fust recognu pour tel que Dieu l'avoit fait naistre, et partant que tous les gens de bien ne pouvoient prendre un meilleur conseil que de prier pour sa conversion, et se resoudre à le tenir pour Roy aussi-tost qu'il seroit catholique.

Tous lesquels discours furent escoutez fort attentivement par ceux à qui vous les teniez et reconnurent bien que vous n'en sçaviez pas tant que le Roy n'en sceut encore davantage ; ce qui ayant esté rapporté à monsieur le cardinal de Bourbon, servit grandement à le disposer aux choses que vous aviez traittées comme nous avons dit, et desquelles tous les plus contraires au Roy (lesquels nous ne nommerons point, encor que nous les cognoissions bien pour vous les avoir oüy nommer) ayans esté informez, ils s'adoucirent, de sorte que, par vostre entremise, dont les particularitez sont fort notables, mais que nous passerons sous silence de crainte d'estre trop longs et de desplaire à quelqu'un, ils se reconcilièrent tous avec le Roy, et prirent une telle creance pres de luy, que déferant plus à leurs conseils qu'aux vostres ny à luy mesme, il se laissa emporter par effet quelques mois apres au changement de religion, dont au commencement ny luy, ny vous ne leur pensiez donner que des esperances.

Pendant toutes ces entremises, et tant d'allées et venues, qu'il vous fallut faire pour ramener les esprits en bonne assiette, et qui durerent toute l'année quinze cens quatre-vingt douze et partie de quatre-vingt treize, diverses sortes de personnes s'entremirent de negocier, les uns d'un costé, les autres d'un autre ; les uns avec sincerité, les autres avec artifice, d'autres par vanité, d'autres pour se faire de feste et tascher d'y faire leurs affaires ; d'autres pour se bien entretenir avec les deux partis, et d'autres avec affection pour rechercher les moyens de parvenir à quelque bonne paix : mais tant de pourparlers et d'entrevuës, quoy que messieurs le cardinal de Gondy, mareschaux d'Aumont et de Thurenne, amiral de Biron, d'O, de Bellievre, de Ville-roy, de Vitry, de Lus, du Plessis, president Jeannin, de Bellozane, de la Verriere, de Zamet, de Fleury, l'abbé de Chesy, et infinies autres s'en entremis- sent, n'eurent neantmoins autre succez, à cause des diverses fantaisies de tant de differentes sortes de personnes, de leurs divers desseins et de leurs envies et jalousies, les uns desapprouvans ce que les autres approuvoient et destruisans ce que les autres edifioient, sinon que la resolution fut prise d'une conference qui se tint depuis à Surresne, en avril 1593, des particularitez de laquelle nous ne dirons autre chose, à cause qu'ayant esté

resolu qu'il ne s'y trouveroit aucun huguenot, vous n'y fustes pas, sinon qu'elle fut aussi inutile que les autres entrevuës, les députez s'estant separez sans pouvoir rien conclurre, à cause des impertinentes demandes des chefs de la ligue, desquelles il a esté fait mention cy-devant, parlant des sieurs de Ville-roy et Jeannin.

Tellement que les choses paroissans prestes de retomber aux premieres difficultez, à cause des irresolutions de messieurs du Mayne, de Nemours et de Mercure sur tous autres, et des confusions de cette bizarre assemblée d'estats imaginaires qui se tenoient à Paris, le Roy, s'en estant retourné à Mante, commença d'approcher de sa personne des docteurs, pour luy parler des differens de la religion, et fit faire en suite une conference entre iceux et quelques ministres, pendant laquelle le Roy, à vostre instant pour- suite, afin de ne laisser ses troupes oysives, s'en alla assieger Dreux, vous employant à rassembler toutes les pieces et munitions necessaires pour cet effet, et à trouver quelque argent par le moyen d'un emprunt sur les principaux habitants de Mante ; tant que finalement il partit de ceste ville en avril 1593, s'en alla loger à Serisi, où il y a un pont sur la riviere d'Ure, fit investir la place par M. l'amiral de Biron ; lequel se fut bien-tost saisi des faux-bourgs et reduict la ville à telle extremité, qu'elle fut prise sans grand combat, ne restant plus que le chasteau et une grosse tour nommée la Grise, contre laquelle le Roy desesperant de rien faire avec le canon, il se resolut de la miner, sur l'assurance que vous et quatre mineurs anglois et escossois luy donnastes d'y travailler en sorte qu'il en auroit contentement : et de fait vous estans logez au pied d'icelle, à la faveur de quelques mantelets et de grandes pieces de bois, dont l'on faisoit des appentis tout à l'entour, afin d'y estre à couvert des quartiers de pierres qui estoient jettés d'en haut ; ayant trente six forts carroyeurs avec des pics à teste, marteaux de carroyeurs et massons propres à tailler, des rapés, limes ; scies à pierre, pinces, pieds de chevres, tenailles et autres instrumens à ce necessaires, vous en faisiez tousjours travailler quatre, avec telle abpreté qu'ils estoient incontinent mis hors d'haleine et tous en sueur (où comme M. de Montpensier vous voulut aller voir travailler, il recut une harquebusade dans le visage et le col), puis quatre autres se mettoient en leurs places, les changeans ainsi de temps en temps ; tellement que dès le premier jour ils eurent fait une entaille dans la tour, de cinq pieds de haut, trois pieds de large et quatre de profond. Les autres jours on n'alla pas si viste, à cause que les ou-

vriers se trouvoient plus à l'estroit; mais tant y a dans six jours vous eustes fait faire un approfondissement de huit à neuf pieds de creux en ligne droite dans cette tour; puis vous fistes tourner vos ouvriers moitié à gauche, moitié à droit, afin de faire des chambres dans le milieu de l'épaisseur de la muraille de six à sept pieds de creux, qui furent un peu eslargies par le profond; puis ayant mis trois à quatre cens livres de poudre de la plus fine que vous pustes trouver en chacune d'icelles, et posé deux longues saucisses de cuir bien sec, grosses de trois pouces, remplies de poudre bien battuë, qui prenoient leurs racines dans le milieu de la poudre de chaque chambre, et se rejoignoient au sortir d'icelles pour n'en composer plus qu'une, dont le bout venoit sortir hors de la tour, puis fistes remurer tout cela avec pierres et du meilleur plastre qu'il se pût trouver, d'autant qu'il fait soudainement corps.

Toutes ces choses ainsi préparées, l'on fit faire une longue trainée de poudre qui alloit joindre le bout de la saucisse, à laquelle, apres que l'on eut fait retirer un chacun, le feu ayant esté mis, il courut à la saucisse qui prit feu et le porta dans les chambres de poudre qui bruslerent aussi : car cela fit une grande fumée et un bruit sourd sans autre effect de pres d'un demy quart d'heure; tellement que l'on commençoit desja à parler contre vous, principalement ceux qui vous portoient envie, crians : « La mine de M. de Rosny ! la mine de M. de Rosny ! » Et mesme le Roy ne se pût empescher de dire : « Il a bonne volonté, mais il est si estourdy qu'il veut que tout cede à ses imaginations. »

Si vous estiez marry, honteux et en colere tout ensemble, vous en dittes assez depuis pour le croire; et desja chacun commençoit à se separer, lors que l'on vit sortir de la tour une beaucoup plus grosse fumée que la premiere, et icelle se fendre par la moitié depuis le haut jusqu'en bas, dont l'une d'icelles se renversa par terre en une infinité de pieces, emportant avec elle une quantité d'hommes, et quelques femmes et enfans, qui furent tous écrasez et brisez à sa cheute; et l'autre moitié demeurant debout, l'on vit sur quelques restes de voûtes et de planchers, et dans des embraseures et renforcements de portes et de fenestres, d'autres hommes, femmes et enfans, tous à descouvert sans se pouvoir cacher, tendans les mains, et crians misericorde. Il se faisoit lors une si grande huée de toute l'armée que l'on ne pouvoit rien entendre; et quelques soldats commençans à les tirer comme à l'affust, il en fut tué cinq ou six, et eussent les autres couru mesme fortune, sans le Roy qui en

prit pitié, fit cesser ceux qui les tiroient, et envoya un exempt de ses gardes avec douze soldats pour les aller querir et les luy amener; ce qui ayant esté fait, il leur fit donner à chacun un escu, et leur permit d'aller où bon leur sembleroit. Il y eut quelque dispute pour ce gouvernement, que vous estimiez ne vous pouvoir estre refusé, tant à cause que vous aviez esté un des principaux promoteurs du siege et de la prise de la tour Grise, que pource que la ville estoit proche de vos terres; mais les zelez catholiques s'y opposerent, selon leur bonne coustume, et M. d'O l'emporta par dessus tous, au grand regret du Roy, qui vous en fit des excuses en ces propres termes :

« Mon amy, c'est à mon grand regret et des-  
« plaisir que je ne vous ay peu bailler ce gouver-  
« nement, car vous le meritez mieux que nul  
« autre, à cause du bon devoir que vous avez  
« fait en ce siege; mais vous voyez comme tous  
« ces gens icy me gesnent en toutes mes actions,  
« jusqu'à me forcer en celles dont ils ne vou-  
« droient pas que je leur fisse la moindre instance  
« du monde, ne craignans point de dire tout  
« haut, voire de me menacer de m'abandonner,  
« et se joindre aux ennemis de l'Estat et de moy,  
« si je ne change de religion. Vous avez ouy  
« parler des belles conditions que le sieur de  
« Ville-roy a mises en avant, de la part de M. du  
« Mayne, moyennant lesquelles il offre de me  
« recognoistre pour Roy; mais j'aymeroie mieux  
« estre mort que de les avoir acceptées, à cause  
« du desavantage qu'en recevroit l'Estat et tous  
« mes anciens et plus loyaux serviteurs. Que s'il  
« me faut faire quelque passe-droit pour mettre  
« ce royaume en paix, et sortir de la tyrannie de  
« ces gens qui me travaillent ainsi, croyez qu'il  
« n'y aura que moy seul qui en patisse; mais  
« aussi vous pouvez vous assurer que si je puis  
« un jour estre Roy et maistre absolu, que je fe-  
« ray du bien et de l'honneur à ceux qui comme  
« vous m'auront bien et utilement servy. Partant  
« prenez patience aussi bien que moy, et con-  
« tinuez à bien faire. »

## CHAPITRE XLI.

*Démarches pour la conversion du Roi. Conseil tenu sur une demande des grandes villes de France. Discours de Rosny. Conversion du Roy.*

Le dessein du Roy de changer de religion, prenant tousjours de nouvelles forces, fut cause qu'il s'en retourna dans Mante, qui estoit lors son Paris, où toutes sortes de gens de qualité et

d'affaires s'estans rassemblez, il s'y trouva quantité de solliciteurs pour luy faire changer de religion, dont les principaux, sans entrer dans le secret de sa conscience, duquel luy seul peut estre le vray juge, furent l'extrême pitié qu'il avoit de voir ainsi tous les peuples de France, qu'il nommoit ses enfans, exposez, s'il n'y appliquoit ce remede, à de perpetuelles ruynes, miseres et calamitez; sa liberté et sa vie estre continuellement aguettées et mises à la discretion de ceux ausquels (s'il ne vouloit faire un changement general des principaux officiers) il estoit contraint de commettre l'une et l'autre : les puissantes et subtiles raisons theologiques du temps dont il estoit rebattu par M. du Perron; son agreable entretien et douce conversation; les connivences pleines d'artifices de quelques ministres et huguenots du cabinet, qui vouloient profiter du temps à quelque prix et par quelque voye que ce pût estre; l'infidelle ambition de plusieurs des plus puissans et autorisez parmy ceux de la religion, à la mercy desquels il apprehendoit de retomber si les catholiques se resolvoient de se separer et l'abandonner; le dépit où il estoit entré contre aucuns faisans les zeles catholiques, pour luy avoir parlé insolemment et fait des harangues impudentes et impertinentes, pour le presser, mesmes avec menaces de changer de religion, dont l'un des plus hardis avoit esté le sieur d'O, usant de termes salles de goinfre et de cabaret à sa mode accoustumée; le desir que ce prince avoit de se pouvoir passer de telles gens, et leur faire sentir un jour leur temerité; la crainte où il estoit entré, qu'en fin les estats qui se trouvoient lors assemblez à Paris, quelques malotrus qu'ils peussent estre, n'esleussent M. le cardinal de Bourbon pour Roy, et ne luy procurassent l'infante d'Espagne (1) pour femme; la lassitude et l'ennuy d'avoir tousjours eu le halecret sur le dos, depuis l'âge de douze ans, pour disputer sa vie et sa fortune; la vie dure, aspre et languide, qu'il avoit escoulée pendant ce temps; l'esperance et le desir d'une plus douce et agreable pour l'advenir; et finalement quelques-uns de ses confidens et plus tendres serviteurs, entre lesquels se peut mettre sa maistresse, y firent apporter l'absoluë conclusion, les uns par supplications et larmes, les autres par remonstrances, et les autres par prudence humaine, laissant les cas de conscience à part operer en luy seul.

Pendant toutes ces sollicitations, qui ne rencontrerent pas de petites difficultez, une bonne partie des grandes villes, qui estoient de la ligue,

(1) Clara Eugenia, seconde fille du roi d'Espagne Philippe II.

et sur toutes Paris, ne pouvans plus supporter tant d'incommoditez et de necessitez où elles se voyoient reduittes, sans apparence d'en pouvoir estre delivrées (par le moyen de tant de roys imaginaires, desquels les divisions et l'arrogance commençoit à les ennuyer bien fort), estans privées de tout traffic et commerce entre elles-mesmes et avec les estrangers, à cause des formels empeschemens qu'y mettoient les places qui tenoient pour le Roy, ils esmeurent plusieurs tumultes, et en fin contraignirent tous leurs chefs de consentir qu'il fut envoyé vers le Roy, pour requerir et obtenir de luy la liberté du commerce : à quoy ayant esté député M. de Belin, il vint trouver le Roy à Mante ou à Vernon (au moins ce nous semble); mais nonobstant tout ce qu'il pust alleguer, quasi tout le conseil du Roy se montra contraire à sa proposition, les catholiques ayans des raisons particulieres, et les huguenots les leurs, chacun d'eux pour diverses considerations qui regardoient la perseverance ou le changement de la religion du Roy, qui seroient trop longues et difficiles à desduire; d'autant qu'en ces occasions chacun retenoit à dire encore qu'en celle-cy il n'y en eut pas un qui ne se fût mis sur les belles paroles, sans neantmoins avoir formé aucune opinion certaine, quoy que le Roy les en sollicitast instamment : tellement que vous voyant tout pensif, appuyé contre un des jambages de la cheminée de sa chambre, assez esloigné des autres qui estoient assis, le Roy se tourna vers vous, et vous dit : « Et vous, « monsieur de Rosny, qui faites là le resveur, « ne nous direz-vous rien d'absolu, non plus que « les autres? » A quoy, en vous levant tout debout, vous luy respondistes en ces mots :

« Sire, je voudrois avoir si bien resvé que je « puisse concilier tant d'opinions que je vois « dans vostre conseil, et trouver des expediens « propres pour medeciner plusieurs maladies « desquelles vostre Estat est travaillé, et purger « les mauvaises humeurs des esprits qui sont « cause de ces agitations, rendus de telle nature « que les moindres propositions sont par eux reduittes aux impossibilitez, lesquelles je voudrois bien estre capable de surmonter, en les « espluchant si particulierement que l'execution « d'icelles se trouvast vuide et garentie de tous « inconveniens. Mais plusieurs experiences et « les propres enseignemens de Vostre Majesté « m'ayans appris que qui voudroit attendre cette « perfection aux deliberations, qu'il ne s'en feroit jamais une seule principalement lors qu'il « est question de faits militaires et de grandes « affaires d'Estat, je ne craindray point de dire « qu'en celles qui se presentent, il faut jetter

« quelque chose au hazard et à la fortune, la-  
 « quelle decide les affaires plus enveloppées par  
 « des voyes non pourpensées; et sur ce fonde-  
 « ment seroy-je d'avis d'essayer si les medeci-  
 « nes douces, lenitives et accommodantes, de-  
 « viendront plus profitables que les violentes,  
 « ameres et corrosives, lesquelles jusques icy  
 « semblent avoir plutost endurcy les cœurs et  
 « obstinué les esprits, qu'elles ne les ont flechis  
 « et ramenez à la raison; et afin de n'user de  
 « plus longs propos, de crainte d'ennuyer Vostre  
 « Majesté, je serois d'avis de voir ce que pourra  
 « produire, non seulement cette liberté de com-  
 « merce si instamment demandée par les peu-  
 « ples, malgré la volonté de leurs chefs, mais  
 « aussi une trêve generale s'ils la desirent, comme  
 « il me semble que M. de Belin en a dit quelque  
 « chose en passant; car, pour moy, je ne me  
 « scaurois persuader que ces peuples ayent desja  
 « pris la hardiesse de faire resoudre quelque chose  
 « par tumulte, de demander tout haut, voire  
 « avec menaces, la paix ou du pain, osé souvent  
 « nommer et tout publiquement ce nom de Roy  
 « sans queuë, parlans de Vostre Majesté, et en  
 « quelque sorte approuver l'arrest que les gens  
 « du parlement restans à Paris se sont enhardis  
 « de donner pour la conservation de la royauté  
 « en la maison royale; duquel M. du Mayne  
 « s'est tant irrité, que ces peuples, dis-je, s'ils  
 « viennent une fois à gouter la douceur du re-  
 « pos, à respirer dans une communication mu-  
 « tuelle, à ressentir les ayses et les commodités  
 « du vivre par vostre beneficence, veoir vostre  
 « personne royale, esprouver le libre accez que  
 « chacun trouve vers elle, la gentillesse, dou-  
 « ceur et familiarité de sa conversation, qu'ils  
 « se rejettent jamais qu'avec grande contrainte,  
 « dans les desordres, miseres et calamitez dont  
 « ils tesmoignent estre si las et ennuyez, puis-  
 « sent plus supporter l'orgueil et l'arrogance es-  
 « pagnole, la servitude et sujection d'un nombre  
 « infiny de roys imaginaires, et cette multipli-  
 « cité de seigneurs souverains, tous divisez en  
 « tr'eux mesmes, sous nul desquels ils recognois-  
 « sent bien maintenant qu'ils ne scauroient jamais  
 « trouver de repos ny de tranquillité certaine, et  
 « beaucoup moins cette forme heureuse de re-  
 « publique, en laquelle chacune grande ville  
 « avoit estimé de se pouvoir establir. Que si l'on  
 « se trouve en peine des manieres de parler dont  
 « il faudra user, afin de ne debattre des droits et  
 « tiltres pretendus par ceux qui ont la principale  
 « autorité dans les deux partis, sous les noms  
 « desquels il faudra former et publier les condi-  
 « tions de cette liberté de commerce et trêve  
 « generale, j'espere, lors qu'il n'y aura plus que

« cette difficulté à vuidier, qu'entre tant de bons  
 « esprits qu'il y a pres de Vostre Majesté, il s'en  
 « trouvera qui feront des ouvertures non mespri-  
 « sables. »

Vos discours furent escoutez (l'envie commen-  
 çant des-jà contre vous, à cause des familiaritez  
 que le Roy vous tesmoignoit) des uns avec des-  
 pit, des autres avec mespris, et entre tous se  
 formerent apres tant de contestations, que M. de  
 Belin s'en retourna sans rien faire : de sorte que  
 le Roy voyant n'avoir plus moyen de surmonter  
 tant de diversitez qui alloient augmentant ses  
 peines et ses ennuyes, il prit une resolution ab-  
 soluë de se faire catholique. Nous ne nous arres-  
 terons point à reciter les divers propos qu'il eut  
 sur ce sujet avec les catholiques, d'une part, et  
 avec les huguenots de l'autre, craignant que cela  
 ne fût trop long et peut-estre ennuyeux; mais  
 dirons seulement que la conclusion en estant  
 prise devant tous les plus qualifiez des deux  
 costez, ce fut avec l'extrême joye des uns, et le  
 silence et haussement d'espaules des autres, et  
 que la ville de Sainct Denis fut choisie pour le  
 lieu le plus propre à cette solemnité, tant à cause  
 du patron de France qui l'a reverée, que de la  
 proximité de Paris.

Ces affaires donc de si grande importance  
 ayans esté ainsi resoluës, tous les ecclesiastiques  
 se rengerent à l'envy aupres du Roy, chacun  
 s'y faisant feste pour remporter partle de la  
 gloire d'avoir servy à son instruction et conver-  
 sion, pour laquelle parfaire avec quelque espece  
 de cognoissance de cause, l'on assembla des  
 docteurs et des ministres en conference amia-  
 ble, pour y disputer des poincts de la religion,  
 en laquelle ayant esté convié par vostre singu-  
 lier amy M. du Perron, lors evesque d'Evreux  
 par vostre moyen, qui tenoit le haut bout en  
 icelle par sa suffisance, s'y faisant tout blanc de  
 son espée, de distinctions et concordances des  
 peres, vous luy respondistes : « Monsieur, je n'ay  
 « que faire d'estre present à vos disputes, pour  
 « sçavoir de quel costé seront les plus fortes et  
 « les plus valables raisons; car l'estat des af-  
 « faires, vostre nombre et vos richesses requie-  
 « rent que vos distinctions prevaillent, » comme  
 elles firent avec grand bruit et grand esclat, qui  
 ne vous esmeut pas beaucoup neantmoins pour  
 vous faire changer de religion, ny vous servir des  
 exemples des grands pour reigler vostre creance.

Environ le vingtiesme de juillet le Roy s'en  
 alla à Sainct Denis, où la Cour se trouva plus  
 grosse que de long-temps on ne l'avoit veuë,  
 chacun desirant voir une action si celebre, la-  
 quelle, en esperance, comme elle le fut en effet,  
 devoit apporter de si notables changemens. Nous



ne vous lasserons point l'esprit par la representation des ceremonies et magnificences qui se firent à la profession que le Roy fit de la religion catholique (1), laissant les particularitez de toutes les pompes et autres semblables habioles et fanfares aux historiens, lesquels se plaisent à enfler leurs volumes de telles niaiseries, beatilles et baguenauderies, laissant le plus souvent en arriere les choses substantielles et instructives, ausquelles nous arrestans, nous dirons que durant le séjour du Roy à Saint Denis, il arriva trois choses où vous avez eu quelque part, lesquelles, selon nostre advis, ne doivent pas estre oubliées.

La premiere concerne la confession de foy que l'on dressa pour le Roy, laquelle quelques malicieux ou extrêmement bigots avoient remplie de toutes les traditions et inventions humaines les plus bigottes, tellement que ne la voulant approuver, on la fit voir à d'autres prelatz, lesquels y ayans retranché tout ce qui n'estoit point des points essentiels de la religion, et non absolument necessaires à salut, ceux qui l'avoient fabriquée s'en scandaliserent grandement, et sur ces contestations et les refus que le Roy faisoit de signer et professer des choses dont entr'eux mesmes ils n'estoient point d'accord, cette affaire sembloit s'en aller remise à un autre jour : dequoy M. d'Evreux extrêmement desplaisant, et sçachant bien que vous ne le seriez pas moins de voir que les choses en fussent venues si avant et ne s'achevassent pas de bonne grace, il vous vint querir par la priere des parties contestantes, mais sur tous de M. le cardinal de Bourbon; lequel depuis que vous fustes devenu l'entremetteur de sa reconciliation avec le Roy, ne pensoit pas qu'il y eut rien de bien fait si vous ne vous en mesliez, pour aller d'eux vers le Roy, et du Roy vers eux; en quoy vous travaillastes si industrieusement et heureusement, à cela grandement assisté par ledit cardinal et ledit sieur d'Evreux, que la confession du Roy fut reformée avec le gré d'un chacun, de laquelle vous retintes une copie, laquelle ayant trouvée parmy vos papiers, nous nous sommes licentiez de l'insérer en ces Memoires : et est telle que s'ensuit :

« Moy. . . . . je crois de ferme foy, et confesse tous et un chacun les articles contenus au symbole de la foy, duquel use la sainte Eglise romaine, sçavoir est :

« Je croy en Dieu le Pere tout-puissant, createur du ciel et de la terre, et de toutes choses visibles et invisibles; et en un souverain Seigneur Jesus-Christ, fils unique de Dieu, engen-

dré du Pere, avant tous les siècles : Dieu de Dieu, lumiere de lumiere; vray Dieu de vray Dieu, engendré non pas créé; consubstantiel au Pere par lequel toutes choses ont esté créées; lequel pour nous hommes, et pour nostre salut est descendu du ciel, et a esté incarné du Saint Esprit, né de la Vierge Marie, fait homme, et crucifié pour nous sous Ponce Pilate, et enduré mort et passion, et apres enseveluré, et ressuscité le troisieme jour, selon les escritures, et monté au ciel à la dextre de Dieu son Pere, d'où derechef il reviendra en sa gloire, pour juger les vivans et les morts.

« Je croy au Saint Esprit, souverain Seigneur, vivifiant tout ce qui procede du Pere et du Fils, et qui avec le Pere et le Fils est adoré et glorifié et qui a parlé par ses prophetes.

« Je croy une sainte Eglise catholique et apostolique.

« Je confesse un baptesme pour la remission des pechez, et attends la future resurrection des morts, avec la vie du siècle à venir.

« Je reçois et embrasse fermement les traditions des apostres et de la sainte Eglise, avec toutes les autres constitutions et observations d'icelles.

« J'admets et reçois la sainte Escriture, selon et au sens que cette mere sainte Eglise tient et a tenu, à laquelle appartient de juger de la vraye intelligence et interpretation de ladite Escriture; et jamais je ne la prendray ny exposeray que selon le commun accord et consentement des Peres.

« Je confesse qu'il y a sept sacremens de la nouvelle loy, vrayement et proprement ainsi appelez, instituez par nostre Seigneur Jesus-Christ, et necessaires (mais non pas tous à chacun) pour le salut du genre humain, lesquels sont : le Baptesme, la Confirmation, la sainte Eucharistie, la Penitence, l'Extrême-Onction, l'Ordre et le Mariage; et que par iceux la grace de Dieu nous est conférée, et que d'iceux, le Baptesme, la Confirmation et l'Ordre, ne se peuvent reiterer sans sacrilege.

« Je crois aussi et admets les ceremonies, approuvées par l'Eglise, et usitées en l'administration solennelle desdits sacremens.

« Je reçois aussi et embrasse tout ce qui a esté définy et déclaré par les saints Conciles touchant le péché originel et la justification.

« Je reconnais qu'en la sainte messe on offre à Dieu un vray, propre et propiciatoire sacrifice pour les vivans et pour les morts; et qu'au tres-saint Sacrement de l'Eucharistie est vrayement, reellement, et substantiellement, le corps et sang de nostre Seigneur Jesus-Christ avec l'ame

(1) L'abjuration d'Henri IV eut lieu le 25 juillet 1593.

et la Divinité; et qu'en iceluy est faite une conversion de toute la substance du vin au sang; laquelle conversion l'Eglise catholique appelle transubstantiation.

« Je confesse aussi que sous l'une des especes, on prend et reçoit Jesus-Christ tout entier et son vray sacrement.

« Je confesse qu'il y a un purgatoire où les ames detenuës peuvent estre soulagées des souffrages et bienfaits des fideles.

« J'advouë qu'on doit invoquer les saints et saintes bien-heureux et regnans avec Jesus-Christ, lesquels prient et offrent à Dieu leurs oraisons pour nous, et desquels on doit venerer les saintes reliques.

« Comme aussi que l'on doit avoir et retenir les images de nostre redempteur Jesus-Christ, de sa bienheureuse Mere perpetuellement vierge, et des autres saints et saintes, en leur faisant l'honneur et veneration qui leur appartient.

« J'advouë davantage que nostredit Redempteur a laissé en son Eglise la puissance des indulgences; et que l'usage en est tres-salutaire au peuple chrestien.

« Je recognois la sainte Eglise catholique, apostolique et romaine, mere et superieure de toutes les eglises; promets et jure vraye obeysance spirituelle au saint Pere de Rome, successeur de saint Pierre, chef des apostres et vicair de Jesus-Christ.

« J'approuve sans aucun doute, et fais profession de tout ce qui a esté decisi, déterminé et déclaré par les saints canons et conciles generaux, et rejette, reprouve et anathematise tout ce qui leur est contraire et toutes heresies condamnées, rejetées et anathematisées par l'Eglise.

« En cette foy catholique, hors laquelle nul ne peut estre sauvé, et donc je fais presentement profession, je promets, moyennant la grace de Dieu, persister entierement et inviolablement jusqu'au dernier sospir de ma vie. »

## CHAPITRE XLII.

*Négociation inutile avec l'Espagne. Trêve générale. Les Parisiens vont voir Henri IV à Saint-Denis. Attentat de Barriere. Lettre du Roi à Rosny.*

Nous avons dit cy-devant qu'il arriva trois choses à Saint Denis, desquelles vous fustes participant : la premiere, la profession du Roy, dont je viens de toucher la substance.

La seconde est telle, que M. d'Antragues, qui aymoît à se mesler de toutes faciences, qui se trouvoient en fin plutost malicieuses que sence-

res, vous vint voir un matin à vostre logis, où, apres quelques complimens et assurances de sa fidelité au service du Roy, il vous dit que depuis deux jours il estoit arrivé un certain espagnol à Saint Denis, nommé Ordognes, lequel il disoit avoir nourry estant fort jeune garçon, et depuis l'avoit donné au seigneur dom Bernardin de Mandosse, lors qu'il estoit ambassadeur en France, avec lequel ayant tousjours demeuré depuis, il s'estoit servy de ce qu'il avoit la langue et la façon françoise pour l'envoyer vers luy, afin qu'il trouvast le moyen de le faire parler à vous, comme un des plus anciens serviteurs du Roy, sçachant bien que vous estiez avec luy dès le temps qu'estant en Bearn, il faisoit traiter une confederation entre le Roy, son maistre, et luy, par l'entremise du commandeur Moreau et du vicomte de Chaux, et auquel il avoit plus de confiance, disant avoir des choses à vous proposer que vous jugeriez grandement avantageuses au Roy et à la France, sans que ledit personnage luy eût voulu rien specifier davantage.

Cette proposition vous my-partit l'esprit aucunement, ne vous flant que de bonne sorte à M. d'Antragues, à cause de son esprit embarrassé, broüillon et desireux de nouveleitez; et neantmoins ne le voulant pas refuser absolument, sans estre informé des volonteiz du Roy, vous le remistes au soir à luy rendre responce lors qu'il seroit nuict, disant cette heure estre plus propre pour tenir l'affaire secrette; et vous en allastes aussi-tost que ledit sieur d'Antragues fut party de vostre logis, trouver le Roy, auquel, ayant conté tout ce que vous avoit dit M. d'Antragues, et cet homme à luy, il en prit mesme opinion que vous aviez fait, et dit : « J'estime que tout cecy n'est qu'une fourberie de l'homme, que vous cognoissez pour se faire de feste, ou, s'il y a quelque chose de vray, c'est une ruse des Espagnols, pour donner des jalousies à mes alliez, ou tenir en suspens ceux qu'il estime estre prests de l'abandonner en France. Neantmoins il n'y a point de mal que vous escoutiez tout ce qu'il vous dira, et puis sur cela nous jugerons de ce qu'il faudra faire. »

Vous estant donc trouvé sur le soir à vostre logis, M. d'Antragues ne manqua pas de s'y rendre avec l'homme dont il vous avoit parlé, lequel, apres quelques civilitez, vous dit qu'il avoit eu charge expresse de son maistre, dom Bernardin de Mandosse, de s'adresser à vous, afin que par vostre moyen le Roy sceut le desir qu'il avoit de voir son maistre et luy en bonne amitié, dequoy il avoit les moyens en main, et sur cela luy en avoit dit quelque chose; mais

qu'il jugeoit bien (les choses estans grandement changées en France par la conversion du Roy) que ce qu'il avoit à proposer ne seroit pas maintenant convenable, mais qu'il se mettroit en avant d'autres choses non moins avantageuses, maintenant qu'il est catholique, le Roy d'Espagne, ayant une fille qu'il ayme infiniment, et qu'il sçait bien ne pouvoir jamais mieux apparier qu'avec un roy de France; mais que pour ce sujet et les autres conditions qui s'en peuvent ensuivre, il vous prioit de ne trouver point mauvais s'il reservoit de les dire au Roy mesme, et de faire en sorte qu'il pust parler à sa royalle Majesté; dequoy vous luy fistes de grandes difficultez, sans neantmoins l'en desesperer du tout que vous n'eussiez sceu sa volonté; à laquelle en ayant parlé, il vous commanda de le luy amener, mais vous prioit de le visiter par tout auparavant, et s'il ne vouloit souffrir cette visite le rejeter tout à fait.

Cét homme vous estant venu retrouver à l'heure que luy aviez donnée, amené tousjours par M. d'Antragues, vous leur dittes que le Roy avoit trouvé bon qu'il vint parler à luy, sans en faire aucune difficulté ny mesme prescrire l'heure ni la forme, les remettant à vostre discretion; mais que pour vostre devoir et le contentement de vostre esprit, vous ne l'entendriez pas que vous ne l'eussiez bien visité par tous ses habits, ne se devant point offenser de cette formalité, veu le lieu suspect dont il venoit, s'il n'avoit quelque mauvaise intention, dautant que c'estoit un ordre estably depuis peu, à cause de plusieurs mauvais desseins que l'on descouvroit se projetter contre la personne du Roy; ny, qui plus est, trouver mauvais, si vous le faisiez mettre à genoux, et luy teniez tousjours les deux mains pendant qu'il parleroit à Sa Majesté. A toutes lesquelles choses cet Ordognes ou Nugnes (car nous l'avons trouvé nommé de ces deux noms dans les petits Memoires que nous faisons des choses que nous vous oyons dire) s'estant accommodé par le conseil dudit sieur d'Antragues, vous le visitastes et fistes encore visiter ses habits par vos deux valets de chambre, l'Espiné et du But, dont l'un estant tailleur ne laissa ply, reply, ny couture où il ne fouillast, et en mesme temps le menastes au Roy; et l'ayant fait mettre à genoux en le salüant, et vous luy tenant les deux mains, il luy tinst au commencement les mesmes propos qu'il vous avoit tenus, puis luy fit plusieurs autres belles ouvertures sur le fait du susdit mariage, et finalement conclust que s'il vouloit envoyer secrettement quelque sien confident serviteur vers son maistre, dom Bernardin de

Mandosse, qu'il en rapporteroit toute sorte de satisfaction.

Pour abreger ces longs discours, dautant que vous n'eustes nulle part depuis en cette affaire, le sieur de la Varenne fut choisi par le Roy, contre vostre opinion, seulement sous couleur d'aller comme de luy mesme et sans charge ny lettres du Roy, travailler à quelque reglement des postes des frontieres, pour lesquelles il y avoit lors quelque dispute avec le courier major d'Espagne; mais ledit sieur de la Varenne, soit par vanité ou autrement, ne s'estant pû empêcher de publier les causes de son voyage, et faire le grand ambassadeur, et dom Bernardin l'ayant receu comme tel avec grand apparat et peu de paroles substantielles, cela pensa causer de grandes altercations, du costé d'Angleterre, des Provinces Unies et des princes d'Allemagne, alliez de la France, et y eut grande peine à les dissuader, qu'en ce voyage le Roy n'eût eu dessein de traiter, sans eux ny leur sceu, quelque chose avec le roy d'Espagne, sur le point de sa catholicité, afin de se separer d'eux apres, et de les abandonner.

La troisieme affaire fut que les peuples de Paris, ayans gousté quelque petite liberté d'aller voir ce qu'ils appellent leur lieu à l'entour de Paris, pendant la conference de Suresne, pour laquelle tenir plus librement l'on avoit fait une trêve de quelque deux lieuës à la ronde, l'avoient trouvée si douce, que voyans le Roy fait catholique, ils ne laisserent jamais M. du Mayne en repos, qu'il n'eut requis du Roy, sans y adjoûter de Navarre, une trêve generale, au moins pour six mois, laquelle ayant esté par luy demandée, et le Roy, ayant assemblé son conseil sur cela, il y eut quasi autant de contestations qu'il en fut fait lors de la demande pour la liberté du commerce, à cause que M. du Mayne ne voulut jamais consentir qu'il fut nommé comme Roy, en l'instrument d'icelle, disant que les peuples s'y opposoient formellement; neantmoins plusieurs, et le Roy mesme, se laissant aller aux raisons que vous alleguiez tousjours, qu'au nom de Dieu il se fit voir aux peuples de Paris et à tant de députez qu'il y avoit là assemblez sous la couleur de leurs estats pretendus, et leur usast de ses gentils discours, civilitez et formalitez accoustumées, lesquelles infailliblement produiroient bien tost quelque mutation en leurs cœurs.

Finalement elle fut accordée pour trois mois, et publiée au commencement d'aoust, 1593, et dès le lendemain ou deux jours apres, il arriva une si grande affluence de peuple, noblesse et autres gens de qualité de la ligue, à Saint

Denis, que l'on ne se pouvoit quasi tourner par les ruës, lesquels ne pouvans quasi encore adjoûter foy à ce quel'on publoit de la conversion du Roy, cherchoient des lieux de tous costez dans l'église Sainct Denis et sur les chemins du logis du Roy en icelle (car le Roy la voulut allonger expres pour les contenter) afin de le voir à la messe ou pour le moins en passant pour y aller, tous lesquels ne l'eussent pas plutost veu avec sa bonne mine, que depuis les plus grands jusques aux plus petits, fort peu exceptez, ils ne criassent, vive le Roy avec acclamations, levant les mains au ciel, et une infinité, sur tout les femmes, jetter des larmes de joye, et crier sans cesse : *Hé! Dieu le benie, et le vueille bien tost amener en faire autant dans nostre eglise Nostre Dame*, luy donnans mille louanges, et prians Dieu pour sa prospérité, bonne et longue vie; sur quoy vous pristés occasion de vous arrester, d'autant que vous marchiez devant le Roy, pour luy dire : « Hé bien! Sire, que vous « en semble de ce peuple que l'on disoit ne vou- « loir pas vous accorder la qualité de Roy dans « l'instrument de la trêve; ne reconnoissez vous « pas bien maintenant qu'il n'y a jamais pensé; « puis que si librement il vous l'a donné par ac- « clamations publiques, benedictions et larmes « de joye; » ce qui luy en causoit une si grande en luy mesme, que quasi les larmes luy en venoient aux yeux, et continuerent les visites de ces Parisiens, tant que le Roy fut à Sainct Denis.

Il s'en alla quelques jours apres à Champs sur Marne, pour visiter le fort de Gournay, de là à Brie-Comte-Robert et à Melun, où, pendant son sejour, il eut des advis que les jesuites, capucins et autres zelez religieux pratiquoient des personnes pour entreprendre sur sa vie; et de fait trois jours apres il arriva un gentil-homme de Lyon, qui advertit Sa Majesté, que, pour certain, un homme estoit party de Lyon, resolu de le tuer, ainsi que luy avoit dit un ecclesiastique, auquel ce meschant garnement s'en estoit confessé, et le designa si bien par la taille, les habits et les traits de visage, que deux jours apres il fut pris, et en suite convaincu du crime et défait par justice, dont le Roy s'esmeut aucunement, si bien que vous luy venant peu apres demander congé, de faire un voyage à Bontin pendant la trêve, prenant pour sujet d'iceluy, que vous y aviez pour cinq ou six mille escus de bled à vendre, apres qu'il vous l'eust permis et prié de revenir bien tost, il vous dit :

« Mon amy, est-ce pas une chose estrange de « la malignité des cœurs des hommes, que d'en « voir qui font profession d'estre religieux, aus- « quels je ne fis jamais de mal ny n'en ay la vo-

« lonté, qui attendent journallement contre ma « vie. L'on m'avoit tant de fois dit que me fai- « sant catholique toutes ces mauvaises volontez « cesseroient, et que M. du Mayne et ses parens « n'attendoient que cela pour me recognoistre; « mais je commence à voir qu'il y a dans leurs « cœurs plus d'ambition et d'avarice que de reli- « gion et de justice : mais à vostre retour nous y « verrons plus clair et vous en diray davantage. »

Et sur cela vous estant séparé de luy, vous fistes venir madame vostre femme et vous en alastes à Bontin, où vous trouvastes quantité de bleds à vendre; desquels le debit estoit fort bon, à cause de la liberté que donnoit cette trêve de commercer dans les grandes villes, lesquelles, instruites par les necessitez et disettes passées, tascherent à se munir de sorte qu'elles n'y retombassent plus; mais vous n'eustes pas loisir d'estre long-temps marchand de bleds, car à peine en eustes vous vendu pour deux ou trois mille escus, que l'on vous payoit tout en pistoles, que le Roy vous envoya une lettre, écrite de sa main, dont la teneur estoit telle :

*Lettre du Roy à M. de Rosny.*

Mon amy, je ne vous avois donné congé que pour dix jours, et neantmoins il y en a desja quinze que vous estes party : ce n'est pas vostre coutume de manquer à ce que vous promettez ny d'estre paresseux, partant revenez vous en me trouver : c'est chose necessaire pour mon service, tant pour voir des lettres que madame de Simiers et un nommé la Font, (qui à mon avis est celuy de qui vous sçaviez des nouvelles, durant nostre grand siege) qui vous escrivent de Roüen, lesquelles sont en chiffres, et par si peu que nous en avons peu deschiffrer, car je les ay fait ouvrir, nous jugeons qu'elles importent à mon service. Il y en a encore une d'un nommé Desportes, qui demeure à Vernuell, lequel vous prie de luy mander s'il sera le bien venu pour vous parler d'une chose dont vous conferastes une fois ensemble à Evreux, dans vostre abbaye de Sainct Taurin, que le feu Roy vous donna. J'ay aussi plusieurs choses à vous dire, et s'en presente tous les jours une infinité, sur lesquelles je seray bien ayse de prendre vos advis, comme j'ay fait sur beaucoup d'autres dont je me suis bien trouvé. Partant partez en diligence et me venez trouver à Fontaine-bleau, adieu. Ce troisieme septembre, 1593.

Ayant leu cette lettre, aussi-tost vous resolustes de laisser madame vostre femme pour achever la vente de vos bleds, et de mettre ordre à vos affaires, et vous acheminastes à Fontaine-bleau, où à vostre arrivée le Roy vous dit :

« Depuis que je ne vous ay veu, j'ay bien appris  
 « des nouvelles, et cogneu qu'il y en a beaucoup  
 « qui me font bonne mine, et veulent que l'on  
 « les tiennent pour bons François, qui ont toute  
 « autre chose dans le cœur; mais il n'en faut pas  
 « faire le semblant, et s'en servir comme l'on  
 « pourra. » Et sur cela vous baillant les lettres  
 que l'on vous escrivoit, vous dit : « Voylà venir  
 « force gens qui ne sont pas trop contents quand  
 « ils voyent que je vous entretiens long-temps,  
 « craignant que vous ne me parliez de la religion  
 « et des desordres de l'Estat, à cause d'une  
 « grande lettre que vous m'en escrivistes un jour  
 « dont ils ont eu quelque vent, encore que je la  
 « misse au feu deux jours apres l'avoir receuë;  
 « partant allez vous essayer à deschiffrer tout ce  
 « que l'on vous escrit, et je diray aux principaux  
 « de ceux qui viennent, que je vous parlois de  
 « ces lettres; et une autre fois je vous entretien-  
 « dray plus à loisir. »

#### CHAPITRE XLIII.

*Détails sur les états de la ligue, et sur les négociations entamées par divers partis. Digression sur la conduite de Villeroy.*

Plusieurs particularitez assez remarquables s'estoient passées dans les affaires, dont nous n'avons fait aucune mention; toutesfois nostre memoire nous en fournissant pour le present de quelques unes que vous racontiez lors aux sieurs de Choisy, Bois-brueil et à l'un de nous quatre, nous les reprendrons de plus loin, et vous ramèterons ce que nous en avons retenu, et nous semble qu'elles commençoient ainsi :

Lors que durant la vie du prince de Parme, et qu'avec une grande armée il se preparoit à entrer pour la troisieme fois en France, afin d'y faire proceder à l'eslection d'un roy tel qu'il plairoit au roy d'Espagne son maistre, de nommer, l'on avoit, selon son desir, fait assigner une assemblée d'estats à Rheims, afin qu'au mesme temps de la nomination de ce roy imaginaire, il y pût estre sacré; mais apres que ce prince fut mort, et son armée toute dissipée, M. du Mayne fit changer cette assemblée et ordonner qu'elle se tiendroît à Paris, qui la demandoit instamment, et les ministres du Pape et du roy d'Espagne aussi : où en mesme temps neantmoins que les deputez des provinces furent arrivez, diverses humeurs et fantaisies commencerent à travailler les esprits de ceux qui composoient ce grand corps anarchique, chacun des principaux d'iceluy formant des desseins et forgeant des desirs à part et differens des autres, à sçavoir le Pape, ses

nonces et legats d'une façon; le roy d'Espagne et ses ministres d'une autre; et les ducs de Savoie, de Lorraine, du Mayne, de Nemours, de Mercure, de Guyse et autres, chacun à sa mode; et la ville de Paris, y compris le parlement, à la sienne aussi : nul desquels ne pouvoit faire exécuter son projet sans la destruction de tous ceux des autres; lesquelles contrarietez commencerent à paroistre manifestement lors de la proposition qui fut faite pour tenir une assemblée ou conference à Suresne, entre des personnages notables et tous catholiques, de la part du Roy et de ceux de la ligue, en laquelle, quoy qu'il ne s'y resolût rien d'important, neantmoins une petite trêve dont il fut auparavant convenu pour la facilité d'icelle, fut trouvée de si bon goust par le peuple de Paris, que le desir d'une plus longue et de plus grande estendue luy demeura tousjours fiché en l'esprit, voire s'augmenta jusqu'à celuy d'une paix generale : tellement que dès cette heure-là les divisions s'accroissent, de sorte, entre tant de diverses testes remplies d'ambition, qu'ils ne pûrent jamais plus depuis convenir à un mesme dessein, et ne firent quasi plus rien que par boutades et à bastons rompus; le comte de Mansfeld mesme, qui fut envoyé, au défaut du prince de Parme, avec une grande armée en France, n'ayant jamais osé passer plus avant que Noyon.

Et, quoy que le duc de Feria, dom Inigo de Mandosse et Jean Baptiste de Taxis passassent jusques à Paris pour fortifier l'entremise de dom Diego d'Ibarre, si ne peurent ils beaucoup avancer en leurs desseins, n'estans pas secondéz par de puissantes armes ny abondance de deniers, et eussent encore beaucoup moins fait sans un voyage que le Roy fit à Tours, et le siege qui fut mis devant Selle avec mauvais succez; lesquels causans l'absence du Roy, donnerent moyen au comte de Mansfeld d'assiéger et prendre Noyon, ce qu'il n'eust osé entreprendre si le Roy eut esté seulement à Compiègne, et les nouvelles qui leur arriverent d'Italie, que le Pape ayant sceu que le cardinal de Gondy et le marquis de Pisany estoient envoyez vers luy de la part du Roy non encore catholique, leur avoit fait faire défençe d'entrer dans l'estat de Rome : aussi ces petites desfaveurs aux affaires du Roy leur donnerent telle hardiesse de proposer le mariage de l'Infante avec le royaume de France et M. le cardinal de Bourbon conjointement, duquel il fut dressé des articles iceux signez et envoyez à l'abbé de Bellozane pour les faire voir et approuver audit sieur cardinal, non qu'ils eussent intention de les exécuter, mais seulement pour servir d'occasion audit sieur cardinal de se separer du party du Roy, et ensemble avec luy M. le comte de Soissons,

messieurs les ducs de Nevers et de Longueville, et plusieurs autres catholiques, lesquels l'on disoit estre liez d'intelligence ensemble ; mais ces escrits et deliberations n'estans pas dans les cœurs des principaux chefs de la ligue esgalement, elles ne pûrent aussi estre tenuës assez secrettes ny mesnagées comme il estoit requis, ny avoir leurs suites necessaires ; tellement qu'elles produirent en la pluspart des effets tous contraires à leurs attentes, ausquels commença de donner mouvement l'arrest du parlement dont a esté parlé cy-devant, lequel estant bien tost apres suivy de la conversion du Roy, les desseins de tous les grands chefs de la ligue se trouverent encore plus contraires que jamais, chacun songeant à traiter separement afin de rendre ses conditions plus advantageuses, comme il a depuis esté sceu de la pluspart d'eux ; car, quoy qu'ils eussent pour la pluspart protesté qu'il n'y avoit que la seule creance erronnée du Roy qui les empeschast de donner la paix à la France, par une entiere et absoluë recognoissance de sa royauté, neantmoins quand ils sceurent que l'on parloit à bon escient de sa conversion, ils en receurent un desplaisir extrême, et firent, tant les ministres du roy d'Espagne qu'eux, tout ce qui leur fut possible pour en empescher l'effet, jusques à lui faire donner, par personnes tierces interposées et qu'en tout cas l'on pourroit des-advouër, des esperances de traiter avec luy à certaines conditions où il ne seroit point parlé de religion.

Et quoy que les sieurs de Ville-roy, de Bellievre, Jeannin, Belin, Zamet et autres qui vouloient estre tenus pour pacifiques dans le party du Roy (1), se montrer amateurs de l'Estat, et favoriser la legitime royauté, luy asseurassent tousjours que sa conversion seroit suivie d'une generale recognoissance, neantmoins l'on sceut depuis, par le moyen d'une dépêche, que le cardinal de Plaisance avoit faite au Pape, laquelle fut prise vers Lyon et apportée à Sa Majesté, qu'en mesme temps que lesdits de Ville-roy et Jeannin faisoient faire tant de belles protestations, voire seulement deux jours avant sa profession catholique, il s'estoit tenu un conseil secret tres-solemnel de tous les ministres du Pape et du roy d'Espagne, et de tous les principaux chefs de la ligue ou des deputez, des ducs de Nemours, Mercure et autres qui estoient absens ; auquel il fut fait un serment general entre les mains du legat du Pape, sur l'hostie, la croix et l'evangile, avec plusieurs execrations, de maintenir à tousjours la ligue catholique ; et de ne s'en separer jamais, pour quelque cause et occasion

(1) Ce qui est dit ici ne s'accorde point du tout avec les témoignages de l'histoire.

que ce pût estre, qu'il n'y eut eu un Roy esleu et recogneu de tous qui fust agreable à celui d'Espagne, et de n'entrer jamais en aucun accord, traité, convention ny communication avec le Roy ny les siens, quelque profession qu'il pust faire de la religion catholique, et preuve d'une vraye conversion qu'il donnast, et autres semblables conditions dont il estoit bien difficile que les sieurs de Ville-roy et Jeannin fussent entierelement ignorans, comme ils le voulurent feindre lors qu'estant l'un d'eux venu trouver le Roy à Fontaine-bleau, luy estant des-jà catholique, pour continuer à donner de belles paroles, il leur fit voir ceste dépêche du legat, plaine de choses contraires aux assurances qu'ils luy vouloient faire prendre, et notamment l'original ou copie signée du legat de cet execrable serment cy-dessus dit.

Aussi la suite des affaires a-elle tesmoigné que tous ces gens-là n'eurent jamais inclination à servir le Roy, et que ce qu'ils en ont fait depuis n'a esté que par la vive force, et pour se voir abandonnez des peuples ; dequoy il se pourroit alleguer une infinité d'exemples que nous avons veus depuis : mais, pour eviter prolixité, nous nous contenterons de ceux qu'en donnerent le sieur de Ville-roy, son fils, et ceux qui dependoient de leurs volonte que nous avons choisis expres, pource qu'il estoit un de ceux qui de mines ou de paroles montroient plus de sincerité ou d'affection au Roy et à l'Estat. Et neantmoins quoy que le Roy eut fait profession de la religion catholique, eut envoyé à Rome messieurs de Nevers, cardinal de Gondy et marquis de Pizany, pour recognoistre le Pape et luy prester l'obeysance ; qu'il eut esté fait une trêve pour trois mois ; que le sieur de Ville-roy en eut obtenu la prolongation particuliere pour luy et pour son fils, pour deux autres mois, voire en eut poursuivy la continuation encore pour trois mois, laquelle neantmoins il ne pust obtenir ; que les armes à la fin d'icelles trêves se fussent reprises de tous costez ; que le Roy eut esté solennellement sacré à Chartres ; que les sieurs de Vitry et de la Chastre, et les villes de Meaux, Orleans et Bourges, et ce qui en dépendoit, eussent recogneu le Roy ; que ceux de la ville de Lyon se fussent saisis de M. de Nemours et traité avec Sa Majesté ; qu'elle eust fait une declaration pour recevoir dans un mois tous ceux qui voudroient rentrer dans sa legitime obeysance, avec protestation d'estre privez de toute grace s'ils laissoient passer ce temps-là, si est-ce que ledit sieur de Ville-roy ne voulut jamais permettre que son fils ny ceux qui dependoient de luy se rengeassent à leur devoir, quoy que les places qu'ils tenoient

ne vallussent que fort peu de chose : mais au contraire il fit tant par menées et l'intervention de ses amys de Cour qui convoient de long-temps avec luy, et en avoient reçu plusieurs courtoisies durant les guerres, qu'il obtint une trêve particuliere de trois mois pour luy, son fils et ceux qui dependoient de luy, laquelle encore il voulut faire approuver à M. du Mayne, afin de nager tant qu'il pourroit entre deux eaux, qu'ils pussent tous deux vivre comme neutres entre les deux partis, et ne se trouver obligés de s'exposer aux dangers, ny en venir à l'expérience des armes ; jusques à ce que voyant Beauvais, Amiens, Abbe-ville, Paris et Rouën rendus, ils mesnagerent si bien leurs temporisemens par le moyen du sieur du Plessis, qui estoit fort son amy, et du sieur de Sancy, qui avoit lors tout credit aupres du Roy, à la fille duquel aussi il maria son fils, qu'ils ne recogneurent tous deux le Roy qu'en se faisant acheter bien chèrement, d'autant qu'il eut l'argent de la recompense de sa charge, et encore apres la charge de secretaire d'Estat : ce que nous avons mis icy par prevention de temps, pour faire voir que non les bonnes volontez et inclinations d'autrui, mais le seul courage, la vertu et la fortune du Roy, assisté des benedictions du ciel, ont esté les uniques causes de ses prosperitez et de la splendeur où il a mis cet Estat.

#### CHAPITRE XLIV.

*Surprise de Fécamp par Bois-rozé. Négociations de Rosny avec Villars, gouverneur de Rouen. Henri IV est sacré à Chartres.*

Pendant vostre voyage à Bontin, et le séjour que le Roy fit à Melun et à Fontaine-bleau, il s'estoit tenu encor deux conférences à Andresy et à Milly, desquelles nous ne disons rien, d'autant que vous n'y eustes nulle part, à la fin desquelles le Roy s'en alla à Mante et de là à Dieppe pour assister le sieur de Bois-rozé, auquel M. de Villars, durant une si douce trêve, menoit une fort dure guerre, dont nous avons estimé vous devoir ramentevoir les motifs, tant pour ce que depuis vous vous meslastes des affaires de ce fort de Fécamp dont il estoit lors question, et vous pensa estre cause d'un grand accident quand vous fistes quelque temps apres le traité de Rouën, que Bois-rozé fut depuis des gentils-hommes de vostre suite et vostre lieutenant en l'artillerie, que pource qu'en cette narration il s'y rencontrera plusieurs accidens notables et dignes de n'estre pas oublier.

Vous vous souviendrez donc, monseigneur,

afin de prendre les choses dès leur origine, comme M. de Biron assiegea et prit le fort de Fécamp sur ceux de la ligue, dans lequel s'estant trouvé le susnommé sieur de Bois-rozé, avant que d'en sortir, il remarqua si bien sa situation maritime et toutes les advenues d'icelle, qu'il se forma des-lors en l'esprit un dessein de le pouvoir reprendre un jour : et de fait, ayant pratiqué depuis deux soldats qu'il trouva moyen de faire jeter parmy ceux de la garnison, et les ayant bien instruits de ses intentions, il fit une entreprise sur ce fort par un moyen que chacun eust estimé impossible, si l'exécution n'eust verifié le contraire, d'autant que le lieu par où il la designa est un rocher haut de cent toises, coupé en precipice, le pied duquel estoit ordinairement baigné de vagues et flots de la mer, de plus de deux toises de haut, réservé quatre ou cinq fois l'année, au temps des plus basses marées, que durant quatre ou cinq heures seulement, quelquesfois la nuit et quelquesfois le jour, la mer laisse quinze ou vingt toises de diametre à sec au pied d'iceluy : l'une desquelles opportunités ledit sieur de Bois-rozé ayant choisie et fait accommoder auparavant un gros cable qu'il vous a fait voir plusieurs fois depuis à Rouen, de hauteur convenable pour le roc qu'il vouloit graver, et à iceluy, d'espace en espace, fait faire des nœuds pour se tenir des mains, et des estriers de cordes avec des petits bastons pour y apposer les pieds, il rassembla cinquante soldats des plus determinez de sa cognoissance, la pluspart matelots qui grimpent aux hunes, lesquels il avoit esprouvez en plusieurs perils ; et avec iceux s'embarqua dans deux chaloupes, et vint une nuit, qui par bonne fortune se rencontra fort noire, aborder au plus pres de ce roc que la basse marée luy peut permettre, sur le haut duquel l'un des deux soldats de la garnison qu'il avoit gagnés logeoit ordinairement, comme en un lieu dont l'on ne se fust jamais defflé, et depuis six mois avoit accoustumé de s'y rendre la nuit à toutes les basses marées pour y entendre le signal, auquel il jetta aussi-tost un menu cordeau de longueur suffisante, au bout duquel fut soudain attaché celui du gros cable que le soldat tira incontinent amont ; et ayant attaché une agraiffe de fer qui y estoit à l'entre-deux d'une canonniere, avec un gros levier, aussi-tost le sieur de Bois-rozé fit monter l'un des deux sergens de ces cinquante auquel il se fioit le plus, et l'ayant fait suivre par tous les autres, il monta luy mesme le dernier, afin que nul ne s'en peust desdire, et qu'il leur servist de chasse-avant.

Or, pendant le temps qui s'estoit employé à

tous ces mysteres, à s'agencer tous cinquante sur cette corde et à monter les uns apres les autres avec leurs armes qu'ils s'estoient liées au corps, la marée avoit commencé de revenir, voire estoit desja remontée pres de six pieds contre ce rocher, que ledit sieur de Bois-rozé et ses cinquante soldats n'estoient encor qu'à la moitié d'iceluy. Estans donc ainsi pendus et comme enfilez à ce cable, il ne leur restoit plus nulle esperance de salut que par la prise de la place, de laquelle Bois-rozé, pour son regard, ayant un courage intrepide, et resolu à mourir ou s'en rendre maistre, ne doutoit nullement, lors que son sergent qui montoit le premier, soit à cause de l'extrême hauteur où il estoit parvenu, soit pour le grondement et tintamarre furieux que demenoient les flots et vagues impetueuses de la mer contre cette roche bise, commença de s'effrayer et à dire qu'il n'estoit plus en sa puissance de monter plus haut, et que la teste luy tournoit; ce qui estant rapporté de bouche à autre jusques audit sieur de Bois-rozé, et luy voyant que, quoy qu'il luy eut peu mander, il n'avançoit point, il prit resolution d'y aller luy mesme; et ainsi passant par dessus les corps et les testes de tous ses compagnons suspendus en l'air, il parvint jusques à luy, et le rassura aucunement, et puis le poignard à la main le contraignit de continuer à monter, tant qu'en fin le jour estant fort prochain, ils entrèrent tous cinquante sur ce haut rempart sans aucun inconvenient, bruiet ny allarme, où estans receus par ces deux soldats, et cognoissans tous les estres et advenües du fort, ils surprirent facilement le corps de garde et les sentinelles qui estoient de l'autre part devers le bourg, ne se faisant d'ordinaire nulle garde du costé de la mer, à cause de l'extrême hauteur du rocher qui le faisoit estimer du tout inaccessible; et les ayant taillez en pieces, ensemble tout ce qui vint piece à piece au secours, il se rendit finalement maistre de ce fort: dequoy il advertit aussi-tost M. de Villars, tant afin qu'il lui envoyast gens pour se saisir du bourg et le pouvoir garder, que pour s'asseurer du gouvernement de la place, qui estoit dans l'estenduë de sa charge.

Mais estant quelque temps apres entré en mauvais mesnage avec luy, et encor plus avec le commandeur de Grillon, craignant que l'un ou l'autre le privast de ce qu'il s'estoit acquis avec tant d'industrie, de labeur et de peril, il se donna du tout au Roy, environ le temps de sa conversion, et ne recogneut plus les mandemens dudit sieur de Villars; de quoy estant entré en extrême colere il l'envoya investir, logeant des troupes aux environs de sa place, qui l'incom-

moderent, de sorte qu'il fut contraint de recourir au Roy et luy demander secours, lequel à ceste occasion s'achemina promptement à Dieppe, et puis s'en alla loger à Saint Vallery en Caux, auquel lieu arriva M. de Belin, de la part de M. du Mayne, pour luy remonstrer que l'assistance par luy donnée au sieur de Bois-rozé estoit une pure infraction de trêve qui seroit cause de la faire rompre par tout, ce qui ne luy sembloit pas à propos pour pacifier le royaume, mais, au contraire, la devoit prolonger encor de trois mois, outre les cinq accordez en deux fois, dautant qu'il luy falloit encor ce temps pour le voyage de M. le cardinal de Joyeuse à Rome, et celuy du sieur de Mont-pesat en Espagne, avant le retour desquels il ne pouvoit pas absolument disposer de luy: mais le Roy, qui se souvenoit de la depesche du legat de Plaisance au Pape, et du beau serment fait entre ses mains, dont il a esté fait mention cy-devant, apres vous avoir parlé de tout cela à part, et en plain conseil à quelques autres esuels il se confloit le plus, il rejetta l'une et l'autre proposition du sieur de Belin, et s'estant avancé vers Canny, Vallemont, Gonde-ville, Baulebec et Etretat, il contraignit les troupes du sieur de Villars de se retirer, et pourveut aux choses necessaires pour la conservation du fort de Fescamp.

Pendant ces demeslemens d'affaires vous escrivistes à madame de Simiers et au sieur de la Font en responses de leurs lettres cy-devant dittes; mais ils vous manderent que cét accident de Fescamp avoit tellement alteré l'esprit de l'homme, dont ils vous avoient escrit, qu'il falloit remettre l'entre-veuë proposée de vous et de luy en une autre saison, laquelle estant venuë ils ne manqueroient de vous en donner advis.

Quelques jours apres, le Roy s'en retourna vers Mante, auquel lieu ayant esté adverty que M. de Vitry estoit resolu de le recognoistre pour Roy dans Meaux, il s'achemina vers Lagny afin de le fortifier en sa deliberation et l'assister s'il en avoit besoin; et furent les choses si bien conduites que ledit sieur et sa place, sans aucun inconvenient, se remirent, le premier jour de l'an 1594, en l'o beyssance de leur vray Roy, lequel à cette occasion entreprit le siege de la Ferté Milon, où vous sejournaastes quelques jours, duquel lieu, pource que le Roy ne vous voulut pas donner congé pour aller jusques à Bontin, vous mandastes à madame vostre femme qu'elle s'en vint à Montreau et que vous l'iriez voir en ce lieu là, pour ce que le Roy vous avoit destiné pour aller voir faire la monstre à quelques Suisses, et que de là vous la feriez passer à Mante par le moyen d'un passe-port ou autrement. Mais le



jour mesme qu'elle arriva dans Montreau, et deux auparavant celui de la monstre des Suisses, il arriva deux choses qui vous empescherent de suivre vostre dessein : l'une que M. le comte de Chaligny, qui estoit venu en l'armée du Roy avec passe-port pour de là passer jusques à Paris, luy ayant demandé quelque gentil-homme de qualité des siens pour le conduire jusques là, et ayant en mesme temps montré au Roy des lettres que vous aviez nouvellement receuës de madame de Simiers et de M. de la Fond, par lesquelles advis vous estoit donné que l'homme dont ils vous avoient auparavant escrit estoit remis en bonne posture, et que si vous vouliez venir en ces quartiers-là, et leur donner advis du lieu où vous seriez, vous en verriez des preuves.

Sa Majesté resolut aussi-tost de vous faire partir et se servir de l'occasion du comte de Chaligny, pour faciliter vostre passage sans détour; de sorte que vous le conduisistes à Paris, où vous vistes M. du Mayne, et de là vous en allastes à Mante et à Louviers, puis à la maison d'un nommé le sieur Saint Bonnet, à deux lieues de Roüen, d'où ayant escrit à ceux que besoin estoit, l'on vous vint le lendemain querir toute la nuit, et fustes mené avant le jour au fort Sainte Catherine, où le capitaine Boniface vous fit tres-bonne reception et magnifique traitement jusques au soir, que M. de Villars luy seul, sans avoir amené qu'un laquais, vous vint voir, et apres vous avoir entretenu deux heures, s'en retourna coucher à Roüen, estans demeurez fort satisfaits l'un de l'autre; et se passa tout cela comme en cachette, et sans que vos gens mesmes, reservé un valet de chambre que vous menastes seul avec vous, sceussent ce que vous estiez devenu, tant pource que M. de Villars ne vouloit pas que l'on sceust encore qu'il traittast avec le Roy, que pource que plusieurs gouverneurs des villes de Sa Majesté, qui profitoient du trouble et parmy les rebellions des grandes villes, eussent traversé vostre negociation, comme ils n'y manquerent pas lors qu'elle fût cognüe, ainsi qu'il se dira cy-apres.

[1594] Vous sejournaistes cinq jours dans le fort Sainte Catherine, pendant lesquels il ne s'en passa un seul que M. de Villars ne vous vinst entretenir, son principal soin et sa plus grande peine consistant à pouvoir descouvrir par vos discours s'il y avoit entiere seureté à traiter avec le Roy, et sujet de se fier en sa foy et en sa parole, de laquelle vous luy parlastes de sorte que vous les luy fistes estimer pour inviolables; et cette creance universelle suivie de continuel effects ont esté les principales causes de l'establissement du Roy.

Et sur telles presuppositions vous estans concertez et entierement esclairsis, vous de ce qu'il pouvoit desirer, et luy de ce qu'il pourroit obtenir, vous vous en retournastes trouver le Roy à Chartres, où il ne faisoit que d'arriver pour s'y faire sacrer, à dessein de vous en retourner incontinent à Roüen, avec pouvoir en forme, pour conclure le traité.

#### CHAPITRE XLV.

*Réconciliation du comte de Soissons et du duc de Montpensier. Négociation relative aux amours de Madame, sœur du Roi, et du comte de Soissons. Pouvoirs donnés à Rosny pour traiter avec Villars.*

Durant vostre sejour à Chartres, il survint deux affaires tres-importantes, et lesquelles, le Roy n'estimant pas les pouvoir terminer à son contentement sans vostre entremise, vous retindrent près de luy dix ou douze jours plus que vous ne pensiez; lequel sejour fut cause de grands accidens pour vous, comme il se verra cy-apres.

La premiere fut, le raccommodement de messieurs le comte de Soissons et du duc de Montpensier, entre lesquels il paroissoit des haynes et animositez, provenuës des envies et jalousies que l'on voit ordinairement entre les grands seigneurs de mesme condition, et particulièrement à cause des pretentions qu'ils avoient à mesmes gouvernemens et à mesme maistresse; chacun d'eux pretendait de parvenir au mariage de Madame sœur du Roy, le premier comme se tenant plus favorisé d'elle; et l'autre pour estre plus agreable au Roy, et sur tels sujets avoient ils esté plusieurs fois prests d'en venir aux mains; mais la partie se fust trouvé mal faite alors, d'autant que l'un, à cause de ses grands biens, de son gouvernement et qu'il estoit plus aymé du Roy, se trouvoit, au temps de ce sacre, accompagné de quatre ou cinq cens gentils-hommes; et l'autre (ayant peu de moyens et peu de faveur aupres du Roy, à cause de sa derniere escapade durant le siege de Roüen, qu'il ne se passoit point une saison entiere qu'il n'en renouvellast quelque autre, et qu'il n'avoit nulles places ny gouvernemens) n'estoit suivy que de dix ou douze gentils-hommes, et neantmoins sa naissance et son haut courage luy faisoient tenir des langages tous tels que s'il eust eu forces esgales : ce qui travailloit grandement l'esprit du Roy, lequel sçachant que M. le comte de Soissons avoit lors grande creance en vous (laquelle les choses qui se passerent vous firent perdre tout à fait, voire firent qu'il vous picota

tousjours depuis) et en M. du Perron, evesque d'Evreux, il vous ordonna tous deux pour travailler à ceste reconciliation, laquelle, apres mille peines et contestations qui seroient trop longues et ennuyeuses à deduire, estans enveloppées de plusieurs contrarietez, opiniatretez et raisons fondées sur le vent, vous fistes enfin, sinon en effet et dans le cœur, car il en eut fallu oster les causes, ce qui n'estoit pas en vos puissances, à tout le moins en apparences exterieures, en paroles et embrassades d'accord devant le Roy, lequel se contenta de cela, tant pource qu'il jugeoit bien qu'il estoit impossible d'obtenir davantage, que pource qu'il vouloit vous employer en une autre affaire qui luy tenoit encor plus au cœur, qui fut la seconde, qui vous retint à Chartres.

Mais, afin de la mieux esclaireir, nous reprendrons succinctement ce qui a esté cy-devant dit du voyage de M. le comte de Soissons en Bearn, pour espouser Madame sœur du Roy malgré luy; et quoy que Sa Majesté y eut pourveu comme il a esté dit, neantmoins si ne peut il empescher que par le moyen de la comtesse de Guiche, laquelle estoit irritée contre luy et se plaisoit à le fasher, pource que l'ayant aymée non seulement il ne l'aymoit plus et en aymoît d'autres, mais mesmes encor avoit honte, à cause de la laideur où elle estoit venuë, que l'on dit qu'il l'eust aymée, ils ne se vissent et ne s'entredonnassent des promesses de mariage, lesquelles le Roy desiroit non seulement retirer, mais aussi leur faire bailler une declaration qu'ils se quittoient l'un l'autre et revoquoient toutes les promesses qu'ils s'estoient faites, tant de bouche que par escrit; et avoit le Roy une telle passion à ceste affaire, pour ce que quelques malins luy avoient mis en teste, que ce mariage mettroit sa vie en danger s'il en venoit des enfans, que vous ne l'aviez jamais veu parler d'affaire avec telle violence, ny en solliciter l'entremise et conclusion avec telle instance et obstination; laquelle considerant vous essayastes plusieurs fois à vous descharger d'icelle, voyant bien les difficultez qui s'y rencontreroient, et qu'elle seroit suivie de divers et peut estre facheux accidens, pour lesquels éviter vous representastes au Roy que ceste affaire estoit de longue haleine et de difficile discussion, et qu'en ayant une autre en main de beaucoup plus grande importance qui estoit le traité pour la reduction de Roüen, le Havre, et autres villes de Normandie en son obeyssance, lequel luy rendroit la plus grande et la plus riche province de son Royaume paisible, des conditions duquel vous estiez quasi d'accord avec M. de Villars, et que

vous ne doutiez nullement de la conclusion d'iceluy si vous y retourniez promptement avec les pouvoirs necessaires pour cet effect en bonne forme; mais que si cela estoit tiré en longueur, il y pourroit arriver des accidens qui destruiroient ce que vous aviez desja si bien mesné, ou pour le moins en allongeroient grandement l'execution, ayant bien resseny aux paroles du sieur Boniface, que le roy d'Espagne et M. du Mayne devoient envoyer en bref des deputez de qualité vers M. de Villars avec des promesses tres-amples; et partant le priez vous de remettre le démeslement de l'affaire de madame sa sœur et de M. le comte de Soissons à un autre ou à une autre fois, et vous permettre d'aller achever ce que vous aviez si bien commencé, et que mesme croyez vous qu'il vous faudroit passer à Vernueil, pource que le sieur de Medavit n'attendoit autre chose pour traiter que vostre parole d'estre bien receu, bien traité, et assurance que ce qui luy seroit promis luy seroit observé par Sa Majesté.

Mais, nonobstant toutes vos remonstrances et allegations, Sa Majesté vous dit que l'affaire de madame sa sœur et de M. le comte de Soissons luy importoit plus pour le repos de son esprit, que Roüen, ny toute la Normandie, les affaires generales prenans un tel train que la pluspart suivroient les exemples de Meaux, Bourges et Lyon, si tost qu'il seroit sacré, ne vous voulant point celer, sachant bien que vous y garderiez le secret requis, qu'il estoit d'accord avec M. de Belin, gouverneur de Paris et les principaux officiers de la ville, de la remettre en son obeyssance si tost qu'il s'en rapprocheroit, apres que cette ceremonie, necessaire pour contenter la fantaisie des plus scrupuleux, auroit esté parfaite, et que cela arrivant, il ne doutoit point que Roüen n'en fit de mesme; et partant vous prioit-il, toutes autres affaires laissées en arriere, d'employer tout vostre travail, vostre esprit et vostre industrie pour retirer les promesses de mariage que s'estoient entredonnées madame sa sœur et M. le comte de Soissons. A quoy il vous fallut obeyr, quoy que vous pussiez dire au contraire; et afin que vostre entremise fut renduë plus facile et plus efficace, vous le suppliastes de trouver bonnes toutes les formes que vous tiendriez pour cet effect, et sur tout qu'il se gardast bien, comme vous feriez de vostre part, de dire qu'il vous en eust donné aucune charge, ce qu'il vous promit, et de plus de ne s'offencer en aucune façon de tout ce que vous auriez dit et fait en cette affaire jusques à ce qu'il en eust veu la fin : ce qu'il vous accorda.

Tellement que ne voulant point perdre de temps, de crainte que l'affaire de Roüen, par la longueur d'iceluy, déperist, vous en allastes sur l'heure mesme voir M. d'Evreux, comme l'un de vos plus intimes amys, et encor que son frere ne vous fut pas si familier pour lors, si estimastes vous plus à propos de vous servir de luy que de l'autre, en l'artifice dont vous pretendiez user, qui estoit de faire sçavoir à Madame et à M. le comte, par personnes tierces qui ne leur pussent estre suspectes, que vous seul sçaviez les moyens de faire reüssir leur mariage; ce que vous dittes au dit sieur du Perron le jeune, comme par forme de discours seulement, apres avoir neantmoins tiré parole de luy qu'il n'en parleroit jamais à personne, pour ce que sçachant cela de la propre bouche du Roy avec deffiance de le dire à qui que ce peust estre, s'il venoit à estre decouvert, il croiroit asseurément que vous luy auriez manqué de loyauté, et partant perdriez toute la confidence en quoy vous estiez pres de luy, et peut estre vous y ruyneriez du tout; en quoy son frere et luy perdroient plus que vous mesmes; les ayans choisis pour vos plus intimes et chers amys, et pour personnes propres à eslever aux plus hautes dignitez de l'Eglise.

Ce discours opera si bien qu'il reüssit comme vous vous l'estiez imaginé, car il en parla en confidence, ce nous semble-il, à M. de Courtenay, à un nommé Beaulieu-bonin, et encor à un autre, du nom duquel vous vous souviendrez mieux que nous, qui estoient tous trois des plus confidens de M. le comte de Soissons; et cela trotta si bien par les bouches et par les oreilles des plus interessez, que deux jours apres allant voir Madame, sous couleur de luy dire adieu, comme si le Roy vous eut commandé de vous en retourner soudain à Roüen, elle vous fist si bonne chere que vous cogneustes bien qu'elle avoit esperance en vous, et cela se mesnagea de sorte qu'enfin la comtesse de Guiche, qui estoit lors tout le secret et tout le conseil des deux amans, vous dit en leur presence en vous embrassant : « Voicy un homme qui vous pourroit bien ayder « en vos desseins s'il vouloit, et le faut obliger à « vous faire office en cela. » A quoy Madame respondit : « Monsieur de Rosny sçait bien que « M. le comte et moy, l'avons tousjours particu- « lierement aymé, que s'il nous vouloit mainte- « nant ayder à regagner les bonnes graces du « Roy mon frere, comme je sçay bien qu'il le « peut, nous en aurions tous deux de perpetuels « ressentimens. » A quoy vous luy respondistes : « Madame, si je sçavois que vous n'eussiez point « tres-tous de langue et que vostre resolution

« absoluë fut de suivre en tout et par tout mes « conseils, je vous dirois des secrets que vous ne « sçauriez sçavoir de nul autre que de moy; « mais le peril qu'il y a si ce que je vous dirois « venoit à estre decouvert, me fait tenir en si- « lence et poser le doigt sur les levres. »

Surquoy vous ayans fait toutes sortes de sermens, que jamais ils n'en parleroient à personne que par vostre permission, vous leur dittes que vous vouliez esprouver, en peu de choses, s'ils seroient fideles sur beaucoup, et partant ne leur diriez rien pour le present, sinon qu'à la verité vous sçaviez les moyens propres pour faire reüssir ce qu'ils desiroient; mais que vous ne leur diriez point encor quels ils estoient que vous n'eussiez esprouvé durant trois jours comment ils auroient mesnagé les ressorts de leurs langues, les prians de se contenter de cela pour le present; et vous estant ainsi separé d'eux avec promesse de retarder sous quelque specieux pre-texte vostre retour à Roüen, vous revinstes voir Madame au bout de trois jours, et, apres quelques discours faits, complimens rendus, et assurances données de ne relever jamais nulles des paroles qui auroient esté tenuës, vous luy dittes ne douter nullement qu'elle n'approuvast les expediens que vous aviez à luy proposer, d'autant que vous les teniez de la propre bouche du Roy, qui vous avoit en cela déclaré le plus secret de ses intentions sur un tel sujet; c'est que luy ayant depuis peu de temps tenu quelque propos touchant le mariage d'eux deux, comme si vous vous fussiez estonné de luy voir une si grande aversion en l'accomplissement d'iceluy, puis qu'il sembloit n'y avoir rien de plus sortable en France ny quasi dehors, que d'eux deux : à quoy il vous avoit respondu que ce n'estoit pas aussi pour l'inegalité qui se trovast entre eux qu'il en reprouvoit l'alliance, mais pour ce qu'il n'y pouvoit trouver son contentement, ny le repos de son esprit; que dès les années mil cinq cens quatre-vingts-six et quatre-vingts-sept, il avoit bien eu ce desir de les marier ensemble, d'autant que se voyant marié sans esperance d'avoir des enfans ny de se des-marier, à cause de la diversité des religions, et par consequent que sa sœur devoit estre son unique heritiere, il desira de luy voir des enfans de quelqu'un de sa propre maison, de si douce humeur et agreable conversation que l'un et l'autre l'aymassent comme leur pere, et luy se peust confier en eux comme en ses enfans; mais que M. le comte n'eust pas plutost veu Madame, qu'il luy donna sujet de croire qu'il la desiroit obtenir par ses propres merites et non par sa beneficence, et qu'il estoit bien disposé d'espu-

ser sa sœur, mais non pas son party, ses intérêts et ses volontez, comme ses desirs avoient toujours esté tels, et en vindrent les choses à si manifeste rupture qu'ils s'étoient separez comme vous le sçaviez mieux que nul autre, avec de mauvaises paroles et encore pires intentions l'un envers l'autre; lesquelles M. le comte n'avoit jamais essayé de meliorer, mais au contraire avoit toujours fait paroistre de vouloir parvenir à cet avantage, le plus grand qu'il pouvoit esperer, contre ses bonnes graces et sans son consentement, voire n'avoit quasi laissé passer saison sans faire quelque action qui le faschast, et luy fit cognoistre qu'il y avoit une antipatie naturelle entre leurs humeurs et complexions, laquelle mauvaise intelligence avoit esté portée aux extremitez par cette dernière action durant le siege de Roüen; que neantmoins, comme il avoit l'esprit facile à se reconcilier avec un chacun, et entierement porté à oublier les plus cruelles offences, lors qu'il cognoissoit que les mauvaises intentions estoient absolument changées, qu'il n'y avoit point de doute, et de cela vous en donnoit il parole; que si sa sœur et M. le comte vouloient de leur propre mouvement, sans artifice ny induction de personne, luy parler franchement, reduire en son entière disposition toutes leurs volontez, remettre librement entre ses mains toutes les promesses par escrit qu'il sçavoit bien qu'ils s'étoient faites l'un à l'autre, et declarer qu'ils se departoient de toutes autres obligations et liaisons verbales, que devant que trois mois se fussent escoulez, apres telles submissions, qu'il les viendrait prendre tous deux un jour lors qu'ils y penseroient le moins, et les choisissant pour ses enfans, les prieroit de se vouloir aymer l'un l'autre, le tenir pour leur pere, et, en se mariant ensemble, espouser les intérêts de sa personne et de son Estat, et de s'accommoder à ses humeurs: « Et croyez pour chose tres-certaine, Madame, luy dittes-vous, que si vous et M. le comte voulez suivre ce chemin, que les effets seront semblables à tout le bien que l'on en sçauroit desirer. »

Sur lesquelles propositions, il se passa plusieurs autres discours et contestations entre Madame, monsieur le comte, madame la comtesse de Guiche et vous, lesquelles se terminerent en une resolution de vous remettre en main les promesses qui s'étoient faites, si-tost que ladite comtesse de Guiche, qui les avoit euës en dépôt, les auroit fait venir de Bearn, où elle les avoit laissées, et que cependant ils feroient conjointement la declaration que vous aviez proposée; moyennant neantmoins que vous leur jurassiez que rien de tout cela ne partiroit de vos

maines, et que vous diriez au Roy que vous vous y estiez engagé de parole sans aucune requisition de leur part, prenant, comme ils le vous dirent, telle fiance en vos paroles, que sans la seureté d'icelles, jamais ne se fussent reduits à telles submissions; tellement que tout cela ainsi resolu, vous le communiquastes au Roy, qui fit de sa part de grandes difficultez à consentir que ces promesses ne fussent pas confiées à luy mesme. Neantmoins le desir qu'il avoit de voir madame sa sœur en liberté d'estre mariée à un autre, luy fit passer par dessus toutes autres considerations; et vous ayant la declaration esté mise entre les mains, et depuis les promesses aussi, et les ayans encor parmy vos papiers, nous avons estimé à propos de les inserer dans ces Memoires, estans telles que s'ensuit :

« Nous Catherine, sœur unique du Roy, et « nous Charles de Bourbon, comte de Soissons, « de nostre pure, libre et franche volonté, sans « aucune induction, force ou contrainte, avons « déclaré et declarons par ces presentes, toutes « et chacunes les promesses de mariage qui pour- « roient estre ou avoir esté faites entre nous, « nulles, de nul effet et valeur, en quelque forme « et en quelque lieu qu'elles soient; avons con- « senty et accordé, consentons et accordons, que « toutes lesdites promesses nous soient respec- « tivement rendues, demeurans les choses comme « non faites et non advenues, renonçans à tout « ce que nous pourrions prétendre en vertu d'i- « celles, et que sans y avoir esgard, chacun de « nous soit libre et deslié, et qu'il puisse, quant « et avec qui il luy plaira, faire et contracter « mariage; en tesmoing dequoy, et pour preuve « de nostre volonté et intention, nous avons si- « gné de nostre main et scellé de nos armes la « presente declaration, et pour la rendre plus « authentique l'avons voulu jurer, et faire en « presence et es mains de..... Lesquels sont sous « signez avec nous, fait, etc. »

Or, voyons nous bien que nous avons esté trop longs en ce discours; mais il nous a semblé, estant ces intrigues de grande consequence, ne les pouvoir pas esclaircir avec moins de paroles, ny faire comprendre autrement, d'autant qu'elles furent les causes secrettes de toutes les brouilleries que vous eustes depuis avec Madame et monsieur le comte, ainsi qu'il se verra par la suite de ces Memoires.

La troisieme affaire qui vous fit sejourner à Chartres, fut l'arrivée du sieur Desportes de Vernueil, qui vint prier M. d'Evreux de prester sa maison de Condé à M. de Medavit, et vous dit vouloir passer pour conférer ensemble et traiter de toutes les conditions de sa reduction

en l'obeyssance du Roy; ce qui ayant esté ainsi resolu, toutes les choses cy-dessus dittes effectuées et en suite d'icelles, des apparentes reconciliations entre le Roy, Madame, monsieur le comte et la comtesse de Guiche; apres avoir encor pris les intentions particulieres de Sa Majesté sur toutes les choses que les sieurs de Villars, de Medavit et autres demandolent et fait expedier vostre pouvoir en forme pour leur accorder ce que vous jugeriez estre à propos, ledit pouvoir estant tel que s'ensuit :

*Pouvoir expedie à M. de Rosny pour le voyage de Rouën.*

Henry, par la grace de Dieu, roy de France et de Navarre, à tous ceux qui ces presentes lettres verront, salut : Sçavoir faisons que, pour la parfaite et entiere confiance que nous avons de la personne de nostre amé et feal conseiller en nostre conseil d'Estat, le sieur de Rosny, de Bethune, et de ses sens, suffisance, loyauté, prudence, experience et bonne diligence; iceluy, pour ces causes et autres bonnes et grandes considerations à ce nous mouvans, avons commis, ordonné et député, commettons, ordonnons et deputons, par ces presentes, pour se transporter en nostre ville de Rouën, traiter en nostre nom avec le sieur de Villars et tous autres que besoin sera, des conditions et moyens raisonnables pour eux remettre et entrer en nostre obeyssance, comme estant leur Roy legitime, leur promettre et accorder ce qu'il verra bon estre et selon qu'il scait estre nostre intention, de les bien et favorablement traiter, tant pour leur seureté et conservation ensemble de leurs dignitez, charges, estats et biens, qu'en gratifications particulieres, selon qu'ils voudront bien meriter de nous et du public en cette occasion, et sur ce passer et signer tels articles et promesses en telle forme qu'il sera requis et necessaire; et generalement faire, traiter, convenir et accorder pour l'effet susdit, tout ce qu'il appartiendra ainsi que nous mesmes ferions ou faire pourrions si presens en personne y estions, jaçoit que le cas requist mandement plus special qu'il n'est contenu en cesdites presentes : par lesquelles promettons en bonne foy et parole de Roy avoir agreable et tenir ferme et stable tout ce que par ledit sieur de Rosny sera fait, traité, accordé et promis en nostre nom, touchant les choses susdites, circonstances et dépendances d'icelles; le ratifier et approuver, observer et accomplir de point en point selon sa forme et teneur, et en relever et indemniser ledit sieur de Rosny et les siens. En témoin dequoy nous avons fait mettre le seel à cesdites presentes : car tel est nostre plaisir.

Donné à Mante le premier jour de fevrier, l'an de grace 1594, et de notre regne le cinquiesme.

HENRY.

Et sur le repli : par le Roy, REVOL. Et seelé.

## CHAPITRE XLVI.

*Rosny part pour Rouen. Il s'arrête au château d'Anet, chez la duchesse d'Aumale. Réception qu'on lui fait à Rouen. Négociations avec Villars. Lettres de Henri IV.*

La route que vous pristés pour faire vostre voyage de Rouën fut telle : vous partistes de Chartres et vous en allastes coucher à Annet, d'autant que madame d'Aumale vous avoit envoyé prier de luy donner lieu pour parler à vous, et que s'y confiant entierement elle avoit chose de consequence à vous dire, y estant venuë depuis quinze jours, sous les passe-ports du Roy, que vous mesmes luy aviez fait obtenir. Estant arrivé dans le bourg avec douze ou quinze gentilshommes, vous vous logeastes dans la meilleure hostellerie, et commandastes, à vostre maistre d'hostel, de faire dépescher vostre souper, cependant que vous yriez visiter madame d'Aumale, et que vous le trouvassiez prest à vostre retour. Cette princesse, qui prevoyoit bien le declin du party de la ligue et qui avoit de grandes necessitez en sa maison, ne manqua pas de vous rendre tous les honneurs et faire toutes les carresses accoustumées envers ceux dont l'on pense avoir affaire et qui sont en reputation d'avoir credit et autorité, et proches d'entrer en grande faveur comme chacun jugeoit que vous estiez; mais toutes ses bonnes cheres, de mines et de paroles, vous tournerent apres à quelque incommodité; car, apres que pour vous entretenir plus à loisir des affaires de son mary et d'elle, et vous faire diverses propositions pour le reconcilier avec le Roy, elle vous eust promené par les beaux jardins, salles, chambres, galleries et cabinets, voulant luy donner le bon soir pour vous en aller souper, elle vous pria et finalement importuna tant de vouloir souper avec elle, que craignant d'estre accusé d'incivilité ou discourtoisie, vous vous y laissastes persuader et envoyastes tous vos gentilshommes souper, ne retenant qu'un page pour vous servir à table.

Mais vostre souper fut si long-temps à s'apprester, que vous croyiez qu'il ne viendrait jamais, en encor apres fut-il si maigre, si mal appresté, les viandes si dures, le pain et le vin si mauvais, et le linge si sale et si moëte que vous

ne mangeastes quasi point, et quoy qu'une telle esprouve deust estre suffisante pour ne vous laisser plus attraper une autre fois; car ne vous ayant jamais voulu permettre d'aller coucher au bourg où l'on avoit tendu vostre liet de camp, elle vous mist à la verité dans une chambre plus grande, plus belle et mieux marbrée que la vostre, mais en laquelle il faisoit si froid que l'on n'y pouvoit quasi durer, car c'estoit sur la fin du mois de fevrier, et pour vous reschauffer, quasi toutes les verrieres estoient rompuës, le liet n'avoit qu'une couverture et des rideaux de taffetas fort mince, et ne peustes jamais avoir autre bois que des fagots de houx et de genievre tous frais coupez, pour lesquels allumer vous pensastes brusler toute la paille de vostre liet et si n'en peustes tirer autre plaisir qu'un nombre infiny d'escopeteries; et pour comble d'incommodité, vous trouvastes vos draps si humides que vous fustes contraint de vous rhabiller et de dormir dans vostre robe de nuit.

Vous partistes fort matin, allastes disner à Condé où vous fustes tres-bien receu par les gens de M. d'Evreux et vous mistes aussi-tost au liet, pour vous recompenser de la mauvaise nuitée que vous aviez eue à Annet, en attendant la venue de M. de Medavit qui arriva sur le midy. Vous le trouvastes au commencement fort irresolu, ne sçachant quasi ce qu'il vouloit faire, et grandement douteux et déflant, tesmoignant de croire que l'on ne luy tiendrait jamais rien de tout ce que l'on luy promettoit. Mais finalement, apres que vous luy eustes conseillé en amy de se desembarasser de ses mauvaises affaires, lesquelles, comme vous le sçaviez tres-bien, yroient toujours en empirant, voire ne vaudroient plus du tout rien s'il attendoit que Roüen, le Havre, Paris, Amiens, Abbe-ville et une infinité d'autres places meilleures que la sienne, qui traittoient, fussent rendus, il vous bailla des articles et conditions, sur lesquelles ayant longtemps contesté, vous tombastes enfin d'accord; mais il vous pria de ne l'astreindre point à se declarer que M. de Villars n'eust traité, ou que le mois de mars ne fust expiré, pour ce qu'il s'estoit engagé de paroles à luy jusques à ce jour là seulement, et qu'il envoyeroit son Desportes avec vous à Roüen, pour voir comment les affaires passeroient afin de luy en donner advis.

Ces choses ainsi resoluës, vous vous en alastes coucher le lendemain à Louviers, d'où ayant mandé vostre acheminement à M. de Villars, il donna ordre pour vous faire recevoir tout ouvertement dans la ville, où vous arrivastes le premier jour de mars avec un grand applaudissement du simple peuple qui commençoit à se

lasser infiniment des incommoditez de la guerre. Vous trovastes, à la porte de la ville, le sieur d'Isencour, capitaine des gardes de M. de Villars, avec bonne troupe de ses compagnons, afin de faciliter vostre entrée et empescher que l'on ne demandast ny dist rien à vous ny à aucun des vostres; mais comme vous le cogneustes depuis, il n'en estoit nul besoin tant le peuple estoit joyeux de vostre venuë, tous courans par les ruës apres vous lors que vous y passiez, en vous donnant des loüanges et benedictions.

Le sieur de la Font vous vint aussi recevoir à la porte, et vous mena loger à la Croce, où, comme vos gens se voulurent entremettre de faire preparer vostre souper, l'hostesse dit à vostre maistre d'hostel qu'il ne se mit point en peine de cela, et que vostre souper estoit tout achepté et elle payée pour vostre despence de ce jour là et du jour suivant, sans qu'elle eust pû sçavoir de qui cela procedoit; mais vous sceustes depuis que le sieur de la Font, maistre d'hostel de M. de Villars, et qui, dès l'an 1584, avoit esté le vostre, s'estoit mis à faire le magnifique pour vostre arrivée: car mesmes le soir vous eustes la musique de voix et d'instrumens, et des sauteurs, danceurs et joïeurs de passe-passe, lesquels, quelque argent que l'on leur offrist, ne voulurent jamais rien prendre.

Vous envoyastes visiter de vostre part M. de Villars, madame de Simiers et M. de Tiron par le sieur du Perat, et les prier de vous mander comment vous aviez à vous conduire, afin de ne faire rien mal convenable au temps, au lieu, aux personnes ny aux affaires que vous aviez à demesler; que vostre desir eust bien esté de les pouvoir aller voir dès le jour mesme; mais que vous ne l'aviez pas voulu entreprendre sans sçavoir leur intention: ils vous envoyèrent aussi peu apres visiter par un nommé le sieur de Perdriel, et vous prier de vous reposer pour ce jour là, et que le lendemain matin ils vous feroient sçavoir de leurs nouvelles.

Monsieur de Tiron ne laissa pas neantmoins de vous venir voir lors qu'il fut nuit, et apres les complimens ordinaires vous dit qu'il estoit bien marry de ce que vous aviez tant diferé vostre retour, pource qu'il estoit depuis survenu plusieurs accidens qui avoient aucunement traversé les preparatifs que vous aviez faits à vostre premier voyage, et quelque peu esbranlé les fondemens que vous aviez jetté pour parvenir bien-tost à quelque bonne conclusion; dautant qu'en premier lieu le seigneur dom Simon Anthoine et le sieur de la Chapelle-marteau estoient arrivez quatre jours devant vous, l'un de la part du roy d'Espagne, et l'autre de la

part de M. du Mayne, avec des offres tres-grandes; voire quasi la carte blanche, au nom du premier, si M. de Villars vouloit parler ouvertement et prendre tout à fait l'escharpe rouge; que d'autre costé vostre trop long retardement avoit engendré des soupçons et des défiances en l'esprit de quelques-uns, joint à cela plusieurs lettres qu'eux tous avoient receuës des principaux catholiques de la Cour du Roy, lesquels escrivoient qu'ils s'estonnoient bien fort, comment M. de Villars s'estoit voulu confier et jeter entre les mains d'un heretique pour faire son traité, qu'il y en avoit de plus autorisez que luy pres du Roy, desquels, si l'on se fust voulu servir, ils eussent fait leurs conditions beaucoup plus avantageuses, et se fussent trouvez plus puissans dans les affaires, et le credit pour en garantir l'observation. Mais en vous monstrant ces lettres vous remarquastes que des uns les signatures avoient esté deschirées; et qu'es autres il n'y avoit qu'un chiffre, aussi ne vous en voulut-il jamais dire les noms; il vous monstra puis apres trois autres lettres qui parloient bien un autre langage.

La premiere estoit de M. le cardinal de Bourbon à M. de Villars; par laquelle en substance il luy mandoit qu'il ne doutoit point que plusieurs ne le desgoutassent de traiter avec le Roy, et principalement par l'entremise d'un huguenot; mais qu'il se gardast bien de deférer ny à l'un ny à l'autre de ces conseils, pource que pour le premier point c'estoit son devoir, puis que le Roy estoit bon catholique, comme il l'en pouvoit bien assurer pour le sçavoir de science; que devant qu'il fût peu de temps toutes les grandes villes du Royaume le recognoistroient, et qu'il ne devoit pas attendre à faire ses conditions en compagnie ny des derniers; dautant qu'elles yroient tousjours en diminuant, le priant de recevoir cét advis de luy comme estant, selon l'obligation de sa naissance, tres-bon François, et son bon amy en particulier. Et pour le second point: qu'il ne pouvoit avoir un entremetteur qui fût davantage son amy, comme il sçavoit bien qu'il l'avoit esprouvé autresfois, qui fût plus esgal entre les catholiques et les huguenots, n'en faisant distinction qu'à proportion du plus ou du moins d'affection qu'ils portoient au Roy et à l'Estat, qui fust plus religieux observateur de sa foy et de sa parole, qui eust l'esprit plus ferme, ny pour avoir un jour plus de faveur aupres du Roy, qu'il en avoit desjà beaucoup, et selon que l'on pouvoit conjecturer yroit tousjours en augmentant.

La seconde lettre estoit de M. du Perron, eveque d'Evreux, à M. de Tiron, par laquelle

aussi en substance il luy mandoit qu'il cognoissoit mieux le monde et la Cour que luy mesme, puis qu'il n'en avoit jamais tant appris que par son moyen, et partant que comme son obligé, il luy pouvoit bien donner assurance que M. de Villars n'eust jamais pû choisir un plus favorable, ny puissant entremetteur que vous, quelque huguenot que vous fussiez, qu'il ne devoit douter de l'observation de vostre foy, ny que vous ne fussiez un jour l'un des plus grands ministres de l'Estat, par les mains duquel les autres auroient à passer, tant vous gardiez d'égalité en toutes choses, et partant qu'ils se gardassent bien de changer de negociateur, de s'en défier, ny de le tenir en longueur.

La troisieme lettre estoit de M. de Vitry à madame de Simiers sa sœur, qui n'avoit que cinq ou six lignes, en ces propres mots:

« Ma chere sœur, vous sçavez comme j'ay  
« donné le bon an au Roy, nostre oncle de la  
« Chastre luy a fait les bignets; et partant faites  
« en sorte que ceux où vous estes luy fassent la  
« my-caresme à cheval; sur tout gardez vous  
« bien de tirer les choses à la longue, ny de  
« changer d'entremetteur; car il est tout entier  
« dans la confidence de son maistre et a bonne  
« volonté pour vous. »

Ces lettres leuës, M. de Tiron vous dit qu'il vous estoit venu voir en particulier pour vous donner cét advis; vous faire voir ces lettres; vous dire qu'il estoit entré mille sortes de fantaisies en l'esprit de leur homme, à cause de diverses sortes de propositions grandement specieuses, qui luy estoient journellement faites, quoy qu'à la verité il y en eût de bien vagues; qu'il ne falloit pas neantmoins que vous abandonnassiez vostre negociation, en laquelle il vous assisteroit; mais que vous laissassiez seulement passer à M. de Villars toutes ses fougues, sans rejeter aucune de ses demandes, de crainte qu'il ne s'imaginast que vous fussiez venu icy avec ce concert de la Cour; mais le remettre à y adviser, vous ayans esté baillées par escrit; afin que si vous y contestiez apres quelque chose, il puisse croire que ce sont des considerations, qui de vostre propre raison vous sont venuës en l'esprit, et peu à peu nous le rengerons, vous dit-il, à ce qui sera juste et possible; dequoy encor que vous jugeassiez bien qu'il y pouvoit avoir de l'artifice en tout ce langage, vous ne laissastes pas d'en demeurer d'accord; et apres plusieurs autres propos il se retira vous donnant le bon soir.

Pendant que vous employiez les jours à disposer les esprits de ceux qui avoient la suprême autorité, pouvoir et faveur, vous travaillez

les nuits à préparer les peuples, par le moyen des officiers de justice et de ville, et mesme quelques capitaines et gens de guerre qui vous venoient visiter en secret, et à donner des advis au Roy de tout ce qui se passoit, afin d'estre dautant plus autorisé par ses responces en tout ce que vous aviez à gerer, negocier et conclure. Estant marry qu'il n'a esté gardé copie de vos lettres, car il s'y verroit de belles choses enveloppées de traverses et difficultez, mais en ce défaut nous insererons icy tout de suite cinq lettres que le Roy vous escrivit en responce des vostres, sur les traittez de Normandie et dépendances d'iceux, lesquelles ont esté trouvées apres avoir remply ces Memoires de l'année 1594.

*Lettre du Roy à M. de Rosny.*

Mon amy, j'ay veu, par vostre lettre du dernier fevrier, ce que vous avez traité avec le sieur de Medavid, ce qui m'est encores plus particulierement représenté par les articles que m'avez envoyez, lesquels je suis content d'accorder en la forme qu'ils sont, dont vous pourrez donner assurance audit sieur de Medavid, et que je trouve bon qu'il voye le sieur de Villars, et qu'ils se remettent ensemble à mon service; mais je veux que, dès à present ledit sieur de Medavid fasse suspension d'armes comme je feray faire de ma part, et qu'il vous donne assurance de se faire et declarer mon serviteur dans certain temps; encores que ledit sieur de Villars ne fit le semblable. Quant au capitaine Braquetier, je desire me servir de luy et veux qu'il me vienne trouver en mon armée avec sa compagnie, où il me peut servir davantage à present qu'en nul autre lieu, l'assurant que je n'oublieray de le mettre par apres en garnison, ou luy donner autre moyen de me servir. J'ay commandé au sieur d'Incarville de partir; donnez moy incontinent advis de ce que vous aurez fait. Et sur ce je prie Dieu qu'il vous ayt en sa garde.

De Chartres, le 2 mars 1594. HENRY. Et plus bas POTIER.

*Lettre du Roy à M. de Rosny.*

Mon amy, j'ay entendu ce que vous m'avez mandé par le sieur de Luat, et ce que m'a aussi rapporté le sieur de Morlans. Pour toute responce, je vous prie d'achever de conclure avec le sieur de Villars, suivant ce que je vous ay fait sçavoir de mon intention, tant par escrit que verbalement, et le pouvoir que vous avez de moy qui promets derechef par la presente confirmer et approuver tout ce que vous aurez

conclud et arrêté en vertu d'iceuluy, dont je desire que vous vous depeschiez le plutost qu'il sera possible; priant Dieu vous avoir en sa sainte garde.

Ecrit à Sainct Denis, ce 17 mars 1594. HENRY. Et plus bas, REVOL.

*Autre lettre du Roy à M. de Rosny.*

Mon amy, j'adjousteray à l'autre lettre que vous porte de ma part le sieur de Luat, que je n'ay fait difficulté d'accorder de mettre le sieur de Contenant avec sa compagnie dans Gournay, à faute de volonté de le gratifier et donner tout le contentement que je puis au sieur de Villars, mais seulement pour la consideration de mon cousin le duc de Longueville, qui s'attendoit que ladite ville deust demeurer en neutralité: toutefois je ne veux que pour cela vous laissiez de passer outre, quand vous serez d'accord de toutes autres choses, estant content de satisfaire encores de ce particulier au desir dudit sieur de Villars s'il en fait nouvelle instance; et depeschez le plutost que vous pourrez, car la longueur ne peut servir qu'à donner moyen, aux ennemis du repos de ce royaume, de faire nouvelles pratiques, pour l'empescher et pour troubler mesmes le sieur de Villars en ses affaires. Je prie Dieu vous avoir en sa sainte garde.

Ecrit à Sainct Denis, le 17 mars 1594. HENRY, et plus bas, REVOL.

*Lettre du Roy à M. de Rosny.*

Mon amy, dautant que vous estes le principal interprete de toutes les resolutions qui sont comprises au traité que vous avez, par mon commandement, negocié avec mon cousin l'admiral, vous me ferez service tres-agreable, lors qu'il se presente des difficultez, oppositions ou empeschements (comme je ne doute point qu'il n'y en ayt desja plus que je voudrois sur l'exécution et accomplissement du traité) que vous informiez ceux de mon conseil de tout ce qui s'y est passé, et leur faire cognoistre comme il a fallu fermer les yeux à beaucoup de choses importantes à mon autorité et à mon service, pour parvenir à un bien si désiré et de telle consequence: comme aussi postposer l'interest de beaucoup de particuliers, comme le mien propre, au bien, repos et soulagement de toute ma province de Normandie, tenant au surplus la main en tout ce qui vous sera possible à l'effet de mes promesses portées par lesdits articles; du manquement desquelles vous recevrez autant de regret que moy mesme qui prie Dieu vous tenir en sa sainte garde.



Escrit au camp de Laon, le 2<sup>e</sup> jour d'aoust 1594.

HENRY, et plus bas, POTIER.

*Lettre du Roy à M. de Rosny.*

Mon amy, le sieur de Medavid m'a remonstré plusieurs difficultez que l'on fait à l'execution de mon intention, en ce que je luy ay accordé par les articles du traitté de la reduction de ma ville de Vernueil en mon obeysance; et parce que je ne desire nullement qu'il soit frustré de l'esperance qu'il a eüe en se rendant mon serviteur, je fais sçavoir ma volonté à mon conseil et à quelques autres particuliers; mais puis que vous avez, suivant mon commandement, fait cette negociation avec ledit sieur de Medavid, je vous mande, par cette lettre, que vous apportiez de vostre part tout ce qui vous sera possible, afin que ce que vous avez fait avec luy et que je luy ay promis, luy soit maintenu et gardé, en effectuant ma volonté de point en point au contentement dudit sieur de Medavid, sans qu'il soit sujet en autres sollicitations et longueurs de procez, voulant sur toutes choses que l'on recognoisse le desir que j'ay que ma parole soit inviolablement maintenüe; et m'assurant que vous satisferez à ce que je vous recommande, je prieray Dieu qu'il vous ayt en sa sainte garde.

Escrit au camp de Laon, le 4 aoust 1594.  
HENRY, et plus bas, RUZÉ.

#### CHAPITRE XLVII.

*Continuation des negociations. Lettre remarquable de Henri IV. Affaire de Dupré. Conclusion du traité avec Villars. Lettre de Rosny au Roi. Réponse du Roi.*

Vous ne fustes pas long-temps dans Roüen sans commencer vostre negociation; car, Incontinent apres vostre arrivée, M. de Villars vous manda, par le sieur de la Font, que si vous aviez agreable de vous trouver au logis de madame de Simiers, sur les neuf heures, qu'il s'y rendroit aussi-tost pour avoir ce bien de vous y embrasser, à quoy vous ne manquastes pas; et dès cette premiere fois ébauchastes si bien les affaires, que vous jugeastes à peu pres où se pourroient rencontrer les difficultez, dont les plus grandes furent: la demande que M. de Villars faisoit de ne recognoistre point M. de Mont-pensier, gouverneur de la province, de trois ans dans toutes les villes et les bailliages de Roüen et de Caux; l'office d'admiral dont il avoit esté pourveu par la ligue, et que le Roy avoit baillé à M. de Biron;

le fort de Fescamp que le sieur de Bois-rozé avoit pris si bravement, avec laquelle place il s'estoit mis au service et sous la protection du Roy; les abbayes de Jumieges, Tiron, Bon-port, Vallasse et Saint-Taurin, que le Roy avoit données à de ses serviteurs; et celle de Montivilliers pour la sœur de madame de Simiers; que l'exercice de la religion ne seroit point plus pres de Roüen que six lieües; la conservation de tous les officiers pourvus par la ligue; quinze cens hommes de pied et de trois cens chevaux entretenus dans les places qu'il remettroit en obeysance; douze cens mille livres pour payer ses debtes; soixante mille livres de pension et quelques autres points, de tous lesquels dans quatre jours vous convinstes ensemble et en demeurestes entierement d'accord, voire de Saint-Taurin, quoy que l'abbaye fust à vous. Reservé des trois qui concernoient M. de Mont-pensier, M. de Biron et le sieur de Bois-rozé, car encore que vostre pouvoir fut fort ample, neantmoins vous desirastes avoir un commandement particulier de la propre main du Roy là dessus, à cause de la haute qualité des deux premiers et de l'injustice qu'il sembloit y avoir en l'autre; et, pour cet effet, dittes à M. de Villars que ces trois points excedoient vostre pouvoir, comme ils devoient par prudence estre hors de son desir. Mais il vous respondit, comme tout en fougue, ainsi qu'il venoit d'entretenir Simon Anthoine et la Chapelle-marteau, qu'il ne falloît donc point parler du reste, et qu'il y en avoit qui luy en offroient la carte blanche et des monceaux d'or comptant; et partant qu'il vous prioit de convenir de tout ou de rompre tout à fait. Sur quoy, apres plusieurs contestations, vous luy asseurastes que vous alliez dépescher un courrier au Roy, pour ce sujet, et que vous en écririez de sorte que vous ne doutiez point qu'il n'eust contentement; et, pour faire voir que tel estoit vostre creance, que vous le priez de trouver bon que vostre traitté fust mis en forme, signé de vous deux, et la foy donnée l'un à l'autre pour l'observation entiere d'iceluy; et que, sur ces trois articles, il fut mis seulement, pour vostre descharge, remis au Roy; et que neantmoins vous luy feriez promesse par escrit qu'au cas qu'ils ne luy fussent accordez, que tout le traitté demeureroit nul, et la foy qui se seroit donnée desengagée, ce qu'il contesta fort long-temps; mais en fin avec l'ayde et l'intervention de madame de Simiers, de M. de Tiron et du sieur de la Font, qu'il aymoît fort, les choses passerent de cette façon, dont bien vous prist; car les accidens qui survindrent pendant le voyage de vostre courrier, eussent infailliblement destruit tout ce que vous aviez fait.

Pour lesquelles mieux esclaircir vous vous souviendrez, Monseigneur, que l'on vous avoit bien adverty, en passant à Louviers et au pont de l'Arche, que le sieur du Rollet recevoit un extrême desplaisir de vostre voyage, n'apprehendant rien tant que de voir le sieur de Villars, Rouën et les autres places qu'il tenoit, en l'obeyssance du Roy, d'autant que la rebellion d'icelles luy apportoit un grandissime pouvoir et profit qu'il voyoit prest de cesser, ces reductions estans faites. Or y avoit-il environ un an qu'il avoit dit au Roy, soit qu'il fut vray, soit qu'il fut faux, qu'il avoit un moyen infailible pour se saisir de Rouën et de la personne de M. de Villars, lequel il mettroit en peu de temps à execution si Sa Majesté luy vouloit accorder le gouvernement de Rouën et de tout le pays enclos entre les places qu'il tiendrait, dequoy luy furent données toutes les asseurances qu'il pust desirer. Or, vous voyant retourner à Rouën pour la seconde fois, sans que le Roy se fust souvenu de cela pour vous en advertir, ny mander que l'on ne travaillast plus à ce dessein tant que vous y seriez, il eust apprehension que vous ne tombassiez d'accord; et, pour y mettre tout l'empeschement qu'il luy seroit possible, il se resolut de renouveler ses vieilles pratiques, quelques foibles qu'elles peussent lors estre, esperant qu'en tout cas, si elles ne pouvoient reussir, à tout le moins traverseroient elles vostre negociation, ainsi qu'il arriva.

Sur ce dessein donc, vous voyant passer au pont de l'Arche, il mist à la suite de vostre train un certain capitaine, nommé, ce nous semble, le Pré, qui avoit mené par le passé, toutes ces intelligences dans Rouën, et peut-estre les luy avoit faites plus grandes et plus certaines qu'en effet elles n'estoient, afin que par vostre moyen l'entrée de la ville luy fust renduë plus facile, faisant subtilement croire qu'il estoit de vostre suite. Quoy que ce soit, il entra dans Rouën, sans estre apperceu de vous, ny estimé de qui que ce fust autre que de vos gens; si bien qu'il alloit librement par tout solliciter ces antiques faciendes, qui estoient à ce que l'on sceut depuis de se saisir du vieil palais, et en mesme temps de M. de Villars, et le mettre dedans, voire de le tuer s'il ne s'y pouvoit amener, et ne tenoit point autre langage à ceux qu'il vouloit attirer à son entreprise, la leur rendant pour infailible; mais il ne pust trouver tous ceux auxquels il s'en descouvrit, tellement loyaux et secrets que tout son dessein ne fust en fin rapporté à M. de Villars, lequel, comme il estoit d'un esprit prompt et mutin, n'eust pas plutost entendu ces paroles de *le prendre ou tuer*, et qu'elles avoient esté tenuës par un homme qui estoit venu dans Rouën

avec vous, qu'il ne se persuadast que cela estoit manié par vous mesmes; et sur cette fougue, quoy que M. de Tiron pust faire pour l'adoucir (car il l'estoit allé voir à son logis, afin de luy tout conter), il vous envoya aussi-tost chercher par le sieur d'Isencourt, et prier de venir chez M. de Tiron, lequel vous trouva dînant chez M. de la Pile, procureur general de la chambre des comptes, car il ne se passoit quasi jour que quelque officier de cour souveraine ne vous traitast, ne pensant à rien moins qu'à ce qui vous arriva, d'autant que venant de recevoir un courrier du Roy, avec des lettres de sa propre main pour responce à ce que vous luy aviez escrit touchant messieurs de Mont-pensier, de Biron et de Bois-rozé, conceüs en ces mots :

*Lettre du Roy à M. de Rosny.*

Mon amy, vous estes une beste d'user de tant de remises et apporter tant de difficultez et de mesnage en une affaire de laquelle la conclusion m'est de si grande importance pour l'establissement de mon autorité et le soulagement de mes peuples. Ne vous souvient il plus des conseils que vous m'avez tant de fois donnez, m'alleguant pour exemple celuy d'un certain duc de Milan (1) au roy Louys XI, au temps de la guerre nommée du *bien public*, qui estoit de separer par interests particuliers tous ceux qui estoient liguez contre luy, sous des pretextes generaux, qui est ce que je veux essayer de faire maintenant, ayant beaucoup mieux qu'il m'en couste deux fois autant, en traitant separement avec chaque particulier, que de parvenir à mesmes effects par le moyen d'un traité general fait avec un seul chef (comme vous sçaviez bien des gens qui me le vouloient ainsi persuader) qui pust, par ce moyen, entretenir tousjours un party formé dans mon Estat : partant ne vous amusez plus à faire tant le respectueux pour ceux dont il est question, lesquels nous contenterons d'ailleurs, ny le bon mesnager ne vous arrestant à de l'argent; car nous payerons tout des mesmes choses que l'on nous livrera, lesquelles s'il falloit prendre par la force nous cousteroient dix fois autant. Comme donc je me fie du tout en vous et vous ayme comme un bon serviteur, ne doutez plus aussi à user absolument et hardiment de vostre pouvoir que j'autorise encor par cette lettre entant qu'il en pourroit avoir besoin, et concluez au plutost avec M. de Villars; mais asseurez si bien les choses qu'il n'y puisse arriver d'alteration, et m'en mandez promptement des nouvelles; car je seray tousjours en doute et en impatience jusques à ce que j'en aye receu; puis lors

(1) François Sforce.

que je seray Roy paisible, nous uscrons des bons mesnages dont vous m'avez tant parlé, et pouvez vous assurer que je n'espargneray travail ny ne craindray peril pour eslever ma gloire et mon Estat en leur plus grande splendeur. Adieu, mon amy.

De Senlis, ce huitiesme de mars 1594, HENRY.

Ayant donc, suivant cette lettre, mis des apostils en marge des trois articles, où il avoit esté escrit, remis au Roy, conceuës en ces propres termes, escrits de vostre main (ces trois articles ont esté depuis accordez en vertu des lettres à moy escrites de la propre main du Roy), vous portiez le traité en la main pour le montrer audit sieur de Villars, et qui plus est aviez mis une escharpe blanche dans vostre pochette, tout cela avec dessein, en entrant dans sa chambre avec joye et allegresse, de l'aller embrasser et le saluer comme amiral general de France, et gouverneur en chef des bailliages de Rouën et Caux, et en mesme temps luy mettre cette escharpe blanche au col; mais luy qui avoit bien d'autres fantaisies en l'esprit, ne vous vit pas plutost entrer que, sans vous donner loisir d'ouvrir la bouche pour parler, il s'en vint droit à vous avec une mine renfrongnée, un visage bouffy, et des yeux estincellans de courroux; et vous ayant arraché le traité que vous portiez haut à la main (vous nous excuserez, Monseigneur, si nous usons des propres termes que vous nous avez dit qu'il vous tinst, quoy qu'il y ayt des juremens meslez, pour ce qu'en autre maniere ne pouvons nous pas naïvement représenter l'humeur du personnage, l'estat des affaires, ny la peine où vous fustes reduit, avant que de pouvoir ramener cet esprit à la raison), sa langue estant donc begayante de colere, il vous dit avec des mots interrompus et qui n'avoient ny sens ny suite :

« Ah ! morbieu, Monsieur, où allez vous ainsi resveillé et tout plein de resjouyssance ? Par le sangbieu vous n'en estes pas encor où vous pensez, et devant que le jeu se departe, il n'y aura peut-estre pas à rire pour vous, au moins si je vous traite comme vous meritez; mais quoy que c'en soit vous estes bien loing de vostre compte, et vostre roy de Navarre aussi; car par le corpsbieu il a chîé au panier pour moy, et s'il n'a point d'autre vallet que de Villars, croyez qu'il sera mal servy. » Et lors prenant le traité qu'il vous avoit arraché de la main, il le deschira en cent pièces et le jetta dans le feu, en disant : « Allez, je reniebieu, allez, voyla vos beaux articles au feu, et ne m'en parlez jamais d'un seul, si vous ne voulez que je vous fasse un aussi mauvais tour qu'a desservy la trahison que vous avez essayé

« de me jouer; m'avoir voulu assassiner terre-bieu ! m'avoir voulu oster l'honneur et la place ! parbieu c'est trop; et encore vous morbieu, que j'aymois de tout mon cœur, et en qui je me fiois plus qu'en homme de France, tant à cause de nostre ancienne amitié, qu'à cause de de la prud'homme que l'on publicoit estre en vous; aussi tout mon plus grand regret est de l'avoir tant exaltée et de m'estre ainsi trompé au choix de mes amitez : mais parbieu, je le vous rendray bien et à vostre prince de Béarn aussi, qui, sous ombre de traiter avec moy, fait faire des pratiques contre ma vie et mon honneur; car dans demie heure je concluray avec Simon Anthoine et la Chapelle-marteau, et me mettray en estat que toutes les forces de vostre maistre ne me feront ny mal ny peur. » Et lors sans dire plus une seule parole il se mit, en clopinant, à se promener au grand pas parmy la chambre; et lors sans vous estonner ny vous monstrier en colere pour tout ce qui s'estoit passé, vous luy dittes :

« Hé bien ! Monsieur, en avez vous assez conté à tort et à travers ? Vous devez estre bien satisfait en vous mesmes d'avoir ainsi fait l'enragé sans que personne vous aye contredit en vos extravagances; mais si ne vous en yrez vous pas sans replique : car quant à moy, pour vous en dire la vérité, je ne me sçaurois imaginer autre cause ny fondement en vos paroles furieuses pleines de menaces et d'offences envers le Roy et moy, sinon que vous cherchez quelque apparence de pretexte, pour rompre vostre foy et vostre parole, comme vous avez deschiré et bruslé vostre nom et vostre signature; mais je rendray vostre dessein inutile, et feray voir par ma loyauté et prud'homme que c'est à tort que vous avez eu reputation d'estre excellent en ces deux qualitez. »

Lors il s'arresta tout court, et vous dit : « Ah morbieu ! Monsieur, ne dittes pas cela, car c'est chose qui ne m'arriva jamais ny arrivera, je suis trop homme de bien et d'honneur; et ces manquemens de foy ne sont bons que pour ceux qui trahissent leurs amis et les veulent faire assassiner. — Or bien, Monsieur, luy re-partistes vous, j'advoué tout ce que vous sçauriez dire là dessus; et puisque vous commencez à escouter raison, voyons qui en aura le plus, ou de vous ou de moy, et debattons à qui sera le plus homme de bien, et qui gardera le mieux sa foy et sa parole; car si j'ay fait quelque chose contre l'une de ces trois qualitez, non seulement j'advoué que vous avez eu raison de parler comme vous avez faict, et de n'observer en aucune façon nostre accord, mais aussi de

« me traitter cruellement, car je l'ay merit  si  
« cela est, et ne vous en demande en ce cas ny  
« faveur ny grace; car je vous puis jurer en  
« verit  que je ne s ais pas meme de quoy il est  
« question, ny ce que vous voulez dire. — Com-  
« ment, vous repartit-il, voudriez vous main-  
« tenir que vous n'avez pas amen  du pont de  
« l'Arche un certain capitaine le Pr , pratiqu   
« par le Rolet, pour se saisir du vieil palais,  
« me mettre dedans, voire m'assassiner? —  
« Monsieur, luy dittes vous, je ne cognois  
« ny le Pr , ny sa m re, ny n'ay amen  avec  
« moy homme que je ne cognoisse et ne repr -  
« sente quand vous voudrez; mais je voy bien  
« que c'est les pistoles d'Espagne, que vous ne  
« verrez n anmoins jamais dans votre bourse,  
« qui vous ont  blouy les yeux et relasch  les  
« ressorts de ce g n reux courage dont vous  
« estiez renomm . Or tout ce qui me fasche de  
« cecy est que je me vois au chemin de perdre  
« celui de mes amis que je tenois le plus cher,  
« et luy cette gloire et cette reputation qu'il  
« s'estoit acquise par tant de braves actions, et  
« que je seray tenu pour un sot et pour une  
« beste d'avoir tant magnifi  sa foy et sa loyaut ,  
« et qu'il ayt commenc  par moy   tesmoigner  
« le contraire; car pourveu que vous reconnois-  
« siez que je n'ay rien escrit au Roy que vous  
« ne m'eussiez promis, jur  devant Dieu et sur  
« votre honneur, et que c'est vous qui manquez  
« de foy, et non moy de faire mon devoir, je  
« passeray mes douleurs et mes amertumes plus  
« doucement. »

« Moy, morbleu, repartit-il soudain tout en  
« furie, que je confesse que j'aye manqu  de foy  
« et fauss  mon serment! j'aimerois mieux mou-  
« rir que d'avoir fait cette laschet  ny de la con-  
« fesser, et ne vous y attendez pas! — Pardieu,  
« Monsieur, car vous m'apprenez   jurer, si fau-  
« dra-il bien, nonobstant vos lac rations et brus-  
« lemens d'articles, que vous les observiez ou  
« que vous les rompiez, et que selon cela vous  
« remportiez le nom de loyal ou de parjure.  
« — Parbleu voicy qui n'est pas mauvais, re-  
« pliqua-il, ceux qui nous doivent nous deman-  
« dent; l'on m'a voulu trahir, l'on m'a voulu  
« assassiner, l'on m'a voulu prendre ma place,  
« et encor j'auray tort de ne le vouloir pas  
« souffrir. »

« Je ne suis nullement d'avis, luy dites-  
« vous, que vous l'enduriez, mais que vous pu-  
« nissiez les coupables, et tous les complices le  
« plus rigoureusement que vous pourrez, voire  
« que vous commenciez par moi si j'en suis par-  
« ticipant, ny d'effet, ny de pens e; mais aussi  
« estant innocent, estes-vous oblig  de me garder

« la foy et la parole que vous m'avez donn e, et  
« au Roy semblablement, car je lui ay mand   
« que vous aviez sign  le trait  et jur  devant  
« Dieu de l'observer. » Alors M. de Tiron luy  
dit : « Monsieur, c'est sans doute que M. de  
« Rosny n'est nullement coupable des desseins  
« que l'on a projett  contre vous; il est trop  
« homme de bien pour l'avoir fait, et en tout  
« cas trop habille homme pour se venir mettre  
« entre vos mains, ayant la moindre cognois-  
« sance du monde d'un tant execrable trafic; et  
« partant n'est-il pas raisonnable qu'il en porte  
« la peine. Le prisonnier en a desja trop dit   sa  
« d charge pour avoir autre creance; faites de  
« luy tout ce que bon vous semblera, et tenez  
« votre parole, cela vous sera plus honorable,  
« plus utile et plus seur que toute autre proc -  
« dure dont vous s achiez user. — Or sus cou-  
« rage, Monsieur, luy dites-vous, suivez le con-  
« seil de vos meilleurs amis et celui de vos  
« propres sentimens, car je cognois bien que la  
« colere seule a est  cause de tant et tant de pa-  
« roles inutiles et indignes de vous, et que desja  
« dans votre propre conscience milles poignans  
« regrets vous agitent, et autant de raisons vous  
« crient : Brave et g n reux chevalier, tenez  
« votre foy et votre parole. »

Sur cela on l'advertit que madame de Simlers  
le venoit voir, surquoy il dit : « Parbleu, voil   
« encor de nouvelles batteries qui se viennent  
« dresser contre ma colere et mon despit; » et  
puis se tournant vers vous, il dit : « H  bien !  
« Monsieur, o y, je vous ay donn  ma foy et ma  
« parole, et la veux tenir; mais regardez aussi  
«   ne manquer pas sur les trois poinets dont  
« nous estions demeurez en differend. — Si les  
« flammes de votre colere, Monsieur, repartistes  
« vous, n'eussent point brusl  ce pauvre papier  
« que je vous apportois, vous y eussiez trouv   
« apostill  de ma propre main tout ce que vous  
« eussiez peu desirer; mais il n'y a rien de gast ,  
« car j'en ay encor une coppie au net qui sera  
« bien-tost reform e et sign e. » Comme vous di-  
siez cela, madame de Simlers entra dans sa  
chambre; et allant au-devant d'elle, il lui dist :  
« Ne criez point, Madame, car toutes nos coleres  
« sont apais es : mais pardieu le traistre qui en  
« a est  cause en mourra devant que je mange  
« ny boive, et verrons ce qu'il dira. » Et de faict  
il l'envoya querir; et l'ayant encor fait inter-  
roger sur ce qui pouvoit estre de vous, et bien  
reconn  par ses responces qu'il ne vous cognois-  
soit pas seulement de veu , il l'envoya pendre  
tout   l'heure   une fenestre.

Il se passa encore une infinit  de discours sur  
toutes les choses pass es, et meme vouloit voir

la lettre que le Roy vous avoit escrite; mais vous distes ne la luy pouvoir monstrez qu'il ne se fust declaré son serviteur, dequoy il se contenta; et passerent depuis les choses si doucement, que le traitté fut refait et signé, chacun de vous deux en gardant un original pour soy, et resolustes neantmoins que l'on n'en publieroit rien, mais diroit on qu'il n'y avoit encor rien de conclud jusques à ce que vous en eussiez adverty le Roy en response sur vos lettres, et que M. de Villars eust fait encor entrer quelques gens de guerre dans la ville afin de s'y rendre le plus fort; de quoy neantmoins il n'estoit point besoin comme il se verra cy-apres lors de sa declaration. Vous escrivistes donc dès le lendemain au Roy une lettre en ces mots :

*Lettre de M. de Rosny au Roy.*

Sire, la bonté de Dieu, vostre vertu et vostre fortune ont tellement fortifié mon courage et bien heuré mon entremise, que je vous puis maintenant nommer duc paisible de toute la Normandie, au moins si la foy et le seing d'un homme de bien et d'honneur en peut estre caution suffisante; car M. de Villars a tres allegrement signé les articles dont j'ay cy-devant envoyé copie à vostre Majesté, et m'a fait tous les sermens requis; mais nous en avons différé la declaration publique, jusqu'à ce qu'il se soit renforcé de gens de guerre, et que je sçache si vostre Majesté mesme veut estre presente à un si bon œuvre, comme les bonnes qualitez du cavalier dont il est question, et l'importance de cette ville et de plusieurs autres qui suivent son exemple, semblent le meriter : surquoy, attendant l'honneur de vos commandemens, je prieray le Createur, etc.

Ansistost que la lettre fut escrite et l'eustes fait voir à M. de Villars, à madame de Simiers et à M. de Tiron qui la trouverent bien, vous fistes partir vostre courrier, lequel fit si bonne diligence qu'il ne mist que quatre jours à aller et à revenir, et vous rapporta des lettres encor de la main du Roy, dont la teneur ensuit :

*Response du Roy à M. de Rosny.*

Mon amy, j'ay veu, tant par vostre derniere lettre que par vos precedentes, les signalez services que vous m'avez rendus pour la reduction entiere de la Normandie en mon obeysance, lesquels j'appellerois volontiers des miracles, si je ne sçavois bien que l'on ne donne point ce tiltre aux choses tant journallieres et ordinaires que me sont les preuves par effect de vostre loyalle affection, laquelle aussi je n'oublieray jamais. Je seray tres-aise de pouvoir faire

promptement le voyage auquel vous me conviez, car la personne et l'ouvrage le meritent; mais une autre de non moindre importance me retient icy attaché, à laquelle mesme je seray bien aise que vous participiez : partant je vous prie, apres neantmoins que vous aurez si bien affermy vostre traitté que votre absence n'y puisse apporter d'alteration, venez me trouver vers le vingtiesme à Senlis, ou le vingt-uniesme de ce mois, à Saint Denis, afin que vous veniez ayder à crier *vive le Roy* dans Paris, et puis nous en yrons faire autant à Roüen : monstrez cette lettre au nouveau serviteur que vous m'avez acquis, afin qu'il voye que je me recommande à luy, sçache que je l'ayme bien, et que je sçay priser et cherir les braves hommes comme luy. Adieu, mon amy.

De Senlis, ce quatorziesme mars 1594.  
HENRY.

Aussi-tost que vous eustes receu cette lettre, vous la portastes à M. de Villars, qui en receut un si grand contentement qu'il vous dist : « Par dieu, ce prince est trop gentil et courtois, de se souvenir de moy et d'en parler en si bons termes; aussi m'en ressentez - je tellement obligé, que j'en rendray des tesmoignages arrivant pres de luy : et quant aux seuretez pource que vous avez traitté avec moy, n'en cherchez point d'autres que celle de ma foy que je vous ay donnée, et n'ayez crainte qu'il y soit rien changé pour vostre absence. » Et ainsi apres plusieurs autres discours et complimens, et avoir dit adieu à madame de Simiers, qui vous pria d'amener son frere avec des troupes à vostre retour pour fortifier d'autant M. de Villars, et à M. de Tiron, vous partistes de Roüen.

## CHAPITRE XLVIII.

*Entrée de Henri IV à Paris. Sa bonté et sa clémence.*

Vous arrivastes si à propos à Saint Denis, que vous trovastes le Roy sur le point de s'acheminer vers Paris, avec esperance d'exécuter heureusement à cette fois l'entreprise que de si long-temps il avoit continuée sur cette ville, tant de fois diversifiée et tentée par l'entremise de tant de diverses sortes de personnes et moyens, que les desseins des uns avoient tousjours ruiné ceux des autres. En tous lesquels; quoy que vous n'ayez eu aucune part, sinon parce que le Roy vous en a conté, neantmoins pour faire voir que tous les bons succez qu'a eu ce prince ont toujours esté tellement enveloppez

de difficultez et traversez par les siens mesmes, qu'ils se doivent plutost attribuer à l'assistance du ciel, à son industrie, vertu, dextérité et bonne fortune, qu'aux aydes d'autrui, nous vous ramentevrons quelques petites particularitez dont il nous souvient que nous avons apprises de vous mesmes, vous ayans ouy dire que desja, dés la prise du sieur de Belin, peu avant que ce commençast le grand attaquement du combat ou bataille d'Arques (car le canon ayant joué de toutes parts, et les troupes de cavallerie et d'infanterie, marché, choqué et combattu les uns contre les autres, l'on luy peut bien donner ce tiltre), ce gentil-homme receut tant de courtoisies du Roy, et en fut tant humainement traité, que ses douces paroles et sa generosité luy engendrèrent quelques regrets de s'estre joint à la faction de ceux qui luy dispuoient son legitime heritage; et que depuis ayant esté plusieurs fois envoyé vers luy pour diverses faciendes, cette premiere semence fructifia de sorte que peu à peu il s'estoit laissé disposer à luy devenir serviteur, et enfin se resolust sur quelque dégoust qu'il prist sur M. du Mayne, et encor plus des Espagnols, de se declarer tel en luy rendant quelque signalé service qui le rendit recommandable et luy assurast une honorable fortune: et pour cet effect, estant gouverneur de Paris, il voulut essayer d'y faire des amis, afin de faciliter la remise qu'il en desiroit faire entre les mains du Roy, et desja en avoit-il pratiqué un si bon nombre et préparé si bien toutes choses, qu'il sembloit ne rester plus qu'à faire approcher le Roy avec forces suffisantes, et prendre l'occasion et le jour à propos pour l'exécution.

Mais toutes ces pratiques n'ayant peu estre si bien conduittes et mesnagées et les ressorts des langues estre si bien cloz, que M. du Mayne n'en eust quelque vent, n'en prist du soupçon, voire ne se laissast persuader qu'il y avoit de la verité, il le priva du gouvernement nonobstant toutes les instances des principaux et plus gens de bien de la ville; et pour se mieux asseurer, voyant que M. de Brissac s'estoit toujours monstré et se monstroît plus que jamais des plus eschauffez, et envenimez contre la personne et les droicts du Roy et du royaume, et ne reclamoit qu'Espagne et Lorraine, il le pourveut de ladite charge et luy fit faire des sermens les plus solempnels qu'il luy fut possible, de luy estre loyal, voire mesmes avec des execrations; et croyant avoir par ce moyen suffisamment raffermi son autorité, et rassuré ses affaires dans Paris, il se resolust de faire un voyage vers Soissons, Laon, Noyon et la Fere,

où diverses pratiques et broüilleries le convioient d'aller mettre ordre; mais il ne fut pas plutost party que M. de Brissac voulant poser des fondemens solides à ce nouvel establissement, duquel il se proposoit à l'entrée de former une republique à l'instar de celle de Rome, dont il lisoit souvent l'histoire, n'eust pas plutost sondé ceux desquels il desiroit faire le plus d'estat, et fait ouverture des moyens dont il vouloit user pour parvenir à son but, qu'il recogneut l'impossibilité de son dessein: tous les esprits en estans allienés et plutost disposez à se rejeter sous l'autorité royale que de continuer à vivre dans les incommoditez qu'ils avoient souffertes, et que s'ils ne trouvoient quelqu'un qui les y portast doucement avec methode, seureté et utilité, ils s'y precipiteroient confusément et impetueusement, et peut-estre avec la honte et le dommage de ceux qui s'y voudroient opposer, ou seulement ne leur y donner pas ayde et assistance.

Toutes lesquelles considerations, comme nous avons ouy dire qu'il en parloit ainsi à ses intimes amis, le firent resoudre à quitter ce chemin plein d'espines, et prendre le dessein qu'avoit eu le sieur de Belin, où il se voyoit des roses et des utilitez toutes apprestées; de quoy il donna soudain advis à son beau-frere le sieur de Sainct Luc, afin qu'il mesnageast en sorte cette bonne disposition aupres du Roy que l'un et l'autre y peust trouver son avantage.

Et est une chose aussi estrange que digne d'estre remarquée, de dire que M. d'O, quoy qu'il eust esté un des plus violens à presser le Roy d'estre catholique, alleguant sans cesse la paix du royaume et le reestablissement des affaires, qu'il fut super-intendant absolu des finances, et eut les provisions de gouverneur de Paris et Isle de France, estoit neantmoins celuy de tous les serviteurs du Roy qui apprehendoit le plus cette reduction de Paris, disant entre ses amis qu'elle n'apporteroit nulles commoditez ny revenus au Roy, mais, tout au contraire, surchargerait d'excessives despenses, luy, sa noblesse et ses gens de guerre, tant par les luxes et delices, qui se fourroient parmi eux, que par les importunités dont useroient envers le Roy les habitans de cette ville, tant ceux qui y estoient tousjours demeurez que les refugiez ailleurs, tous gens de négoce, de robe et de plume, pour estre payez de leurs rentes, tant des arrerages que du courant, que par les poursuites que feroient en justice toutes ces sortes de gens-là, contre la noblesse et les gens de guerre pour estre payez de leurs debtes vieilles et nouvelles; et se monstroît ce seigneur telle-

ment passionné sur ce discours, voire en parloit si publiquement, que le Roy, qui formoit en son esprit des desseins bien plus relevez, et ne songeoit pas à ce que M. d'O devoit en son particulier (car c'estoit cela qui le faisoit parler ainsi), estoit contrainct de luy cacher tout ce qui se traittoit touchant cette reduction : des conditions de laquelle M. de Saint Luc estant convenu avec M. de Brissac, au nom du Roy, l'on en advertit M. de Belin et ceux de son intelligence, afin que, s'estant toutes les deux jointes ensemble en un mesme dessein, l'exécution en fust renduë plus facile, comme cela succeda si heureusement que le Roy et toutes les troupes qu'il avoit destinées pour le servir, entrèrent dans Paris sans meurtre, tuërie, ny opposition qui merite le parler; les principaux officiers et habitans de la ville ayans pourveu de leur costé à luy tenir les portes prestes à ouvrir si tost que Sa Majesté se presenteroit, laquelle de sa part avoit si bien choisi et ordonné ses troupes, instruit et discipliné ses capitaines et soldats, à ne piller, saccager, se débander, ny entrer en aucune maison sans commandement exprez, que sept ou huit mil hommes de guerre entrèrent dans la ville, et passerent par les ruës où il leur estoit ordonné, tout ainsi qu'ils avoient accoustumé de marcher en celle de Mante, Melun et Compiègne, lors qu'ils y passoient les rivières ou qu'ils entroient en garde devant le logis du Roy.

Vous estiez auprez du Roy, lorsque sur les cinq heures du matin il entra par la Porte-neufve, où il trouva, ce nous semble, le prevost des marchands l'Huillier, l'eschevin l'Anglois, et quelques autres pour le recevoir; puis s'estant saisi du Louvre et envoyé des gens de guerre pour se saisir des deux Chastelets et du Palais, et sceu que toutes choses estoient tranquilles là et aux environs, il s'en alla tout armé à Nostre Dame y faire rendre graces à Dieu d'un tant favorable succez; et quoy que la Bastille et le Temple tinssent encor pour la ligue, et que les ducs de Feria, dom Diego, d'Evora et autres chefs des Espagnols, Napolitains et Wallons qui estoient encor en nombre de trois ou quatre mil, tinssent tous ces quartiers de Saint Antoine, du Temple et Saint Martin, et fussent en armes, n'attendant que l'heure d'estre attaquez, resolu de constituer leur salut en leurs mains plutost qu'en leurs pieds, si l'on leur refusoit honorable party, et la plupart des troupes du Roy en bataille dans les principales places et carrefours, si est-ce que peu apres midy toutes les boutiques des marchands se trouverent ouvertes, prenant confiance sur les proclamations de pardon, paix

et seureté au nom du Roy, et le commerce aussi libre qu'il fut dix jours apres.

Et pour faire voir la familiarité et humanité de ce prince, c'est chose à noter, qu'il envoya au cardinal de Plaisance, legat du Pape, et au cardinal de Pelvé, ses plus envenimez ennemis, et à tous les estrangers cy-dessus nommez, toutes les seuretez qu'ils desirerent pour se retirer à Soissons; et que dès le soir madame de Montpensier, qui avoit tant declamé contre luy, l'estant venu saluer, il luy fit aussi bonne chere et l'entretint aussi doucement et familièrement que si ellé ne se fust jamais meslée que de dire son chapellet.

## CHAPITRE XLIX.

*Départ de Rosny pour Rouen. Cette ville se déclare pour le Roi.*

Après que cette journée de triomphe fust passée en acclamations et resjouyssances du peuple de Paris, le Roy estant au Louvre, et la presse estant un peu escoulée, il vous appella dans l'embraseure d'une des fenestres de la grand chambre royalle, et vous dit :

« Mon amy, j'ai esté bien ayse que vous ayez  
« esté present à tout ce qui s'est passé en la re-  
« duction de cette ville, de laquelle les diverses  
« occurrences m'ont tellement occupé l'esprit,  
« que je ne me suis peu donner le loisir de vous  
« entretenir et d'apprendre de vous les particu-  
« laritez de vostre negociation de Normandie, et  
« en quel estat vous avez laissé toutes choses;  
« partant je vous prie de m'en esclaireir. » Sur-  
quoy, apres luy avoir conté ce qu'il y avoit eu  
de plus important, sultant ce qu'il en a esté dit  
cy-devant, il vous respondit : « Vrayement vous  
« avez eu affaire à un esprit bien impetueux et  
« farouche, et ne vous a pas fallu user de peu  
« de patience, d'industrie et de force d'esprit  
« pour surmonter tant de traverses, d'aspres dif-  
« ficultez et perils eminens, et vous jure qu'il  
« ne me souvinst jamais quand vous partistes de  
« Chartres de vous advertir des menées que le Ro-  
« let m'avoit autrefois dit avoir faites sur Rouen  
« pour se saisir du vieil Palais, ny de luy mander  
« que pendant vostre entremise il n'y continuast  
« rien; car il m'en avoit tant de fois parlé sans  
« y avoir veu aucune apparence, et y avoit si  
« long-temps qu'il ne m'en disoit plus rien, que  
« je n'estimois pas qu'il y pensast plus; or, outre  
« que j'ay esté bien ayse que vous vissiez la prise  
« de Paris, afin d'en informer ceux de Rouen,  
« j'ay désiré de parler à vous devant que les ar-  
« ticles que vous avez accordez touchant M. de

« Montpensier et M. de Biron soient divulgués, afin que vous m'aydiez tant mieux à les contenter, ce que j'estime qui sera plus facile par la voye que je me suis imaginée, qui est que je feray semblant, lors qu'ils seront icy, de vous appeler pour sçavoir des nouvelles de ce que vous avez fait à Roüen, comme si vous ne m'en aviez point encor rendu de compte; et sur cela les appellans pour vous ouyr dire ce qui s'est passé, vous direz que vous fussiez facilement venu à bout de toutes choses; mais que la considération des deux articles qui les concerne vous avoit empesché de rien conclure, sçachant bien que j'aymerois mieux perdre de Villars et Roüen que non pas eux, mais que vous les estimiez aussi m'estre tant acquis et si pleins de prudence qu'ils ne consentiroient jamais que pour quelque petit interest particulier qui les regarde, duquel je les sçauray bien recompenser d'ailleurs, ils me fissent perdre l'opportunité d'avoir une telle province que la Normandie du tout en mon obeyssance. »

Invention qui succeda tant heureusement en ayant usé bien à propos, que tous deux n'eurent que repliquer à tout cela; mais au contraire la honte qu'ils eurent de voir que le Roy vous disoit tousjours qu'il aymoît mieux perdre la Normandie que de les fâcher, fit qu'ils vous prièrent de passer outre à vostre traitté, mais d'adviser aussi en mesme temps quelle recompense le Roy leur pouvoit donner : celle de M. de Biron fut d'un estat de mareschal de France et de sept vingts mille escus en argent. Il fut proposé d'adjoindre le Perche et le Mayne à la Normandie, pour M. de Montpensier : mais M. de Villars usa peu apres d'une telle honnesteté et prudence, comme il sera dit cy-apres, que l'on n'en fut plus en peine.

Dés le lendemain le Roy vous renvoya à Roüen, pour faire declarer M. de Villars, et ordonna au sieur de Vitry de s'y acheminer avec trois cens chevaux, suivant la requisition que vous en aviez faite, afin d'y porter les assistances que vous jugeriez necessaires; car, quant au Roy, il luy survint tant d'affaires à Paris, à cause d'une infinité de gens de qualité et de places qui faisoient tous les jours parler de se remettre en son obeyssance, et qu'il luy fallut restablir et reordonner toutes les cours souveraines, l'université, la Sorbonne et le corps de ville; qu'il luy fut impossible de partir pour aller à Roüen, comme il en avoit eu le desir.

Remettant donc à vostre prudence et loyauté tant esprouvée, le parachevement de cét œuvre si bien commencé, vous arrivastes à Roüen, le 26 de mars, où vous trouvastes encor Simon An-

thoine et la Chapelle-marteau, travaillans tousjours à empescher que M. de Villars ne vous receust plus si librement dans la ville, dequoy ils ne peurent jamais tirer response absoluë; ains, tout au contraire, dès qu'il sceut vostre venuë, il envoya le sieur de la Font à la porte de la ville pour vous recevoir, vous faire entrer sans que ceux de la garde s'enquissent de rien, ny demandassent aucune chose à nul de vos gens, et vous menast loger à un fort beau logis bourgeois, appartenant au sieur de Martinbault, que l'on avoit fait meubler et accommoder de toutes choses necessaires, tant pour vous et vos gens que pour vos chevaux; et neantmoins le sieur de la Font vous ayant donné advis que le seigneur dom Simon Anthoine et le sieur de la Chapelle-marteau s'estoient d'eux meames conviez à souper avec M. de Villars, qu'avec eux s'y devoient trouver les sieurs de Tiron, president de Boquemare, de Medavid, de Haqueville, de Loynes et Bretinieres, conseillers au parlement, le docteur Dadraeus et un eschevin nommé Rosiere, et qu'il vous conseilloit d'estre de la partie, sans attendre que l'on vous en priast, sans avoir crainte que cela fâchast M. de Villars, ny que cela traversast vos affaires, dequoy il vous respondoit, ny mesme vous retirer de la compagnie, quelque demonstration que ledit sieur de Villars ny autres pussent faire de ne l'agréer pas, pourveu neantmoins que vous y procedassiez comme si c'eust esté une chose inopinée et faite sans dessein; à quoy vous estant resolu, comme vous vistes la nuit approcher, vous vous en allastes à Saint Oüen, où vous trouvastes M. de Villars dans la grande gallerie qui se promenoit avec les susdits sieurs Simon Anthoine et la Chapelle-marteau, tous les autres cy-dessus nommez estans assis ensemble au bout d'embas de la gallerie, et entrant dans icelle vous vous en allastes à demy courant embrasser M. de Villars, et luy dittes :

« Monsieur, je vous viens donner le bon soir, » resolu que vous me donnerez à souper, » tant que j'ai plusieurs singularitez à vous conter. » Surquoy il vous respondit que vous estiez le bien venu, mais qu'il craignoit pour le regard du souper que l'eussiez surpris en temps mal convenable, tant pource qu'il souperoit fort tard, que pource qu'il estoit desja engagé pour le mesme effet avec des personnes entre lesquelles il se trouveroit peut-estre des esprits mal assortis avec le vostre.

« Monsieure, luy dittes-vous, n'ayez point peur » de toutes ces diversitez de fantaisies, car, pour » mon regard, je m'accommoderay à tout, et » m'assure que ces messieurs, laissant à part les



« passions des partis, n'auront point desagreable  
 « d'entendre les gentillesces et actes genereux  
 « dont le Roy, mon maistre, a usé à la prise ou  
 « reduction de Paris; car le recit de tant d'ac-  
 « tions vertueuses ne scauroit desplaire à des  
 « gens de vertu tels que sont ces messieurs icy.  
 — « Vous voyez (repartit lors M. de Villars se  
 « tournant vers Simon Anthoine), seigneur, où  
 « j'en suis reduit si je me veux exempter d'inci-  
 « vilité de toutes parts, et partant estimeray-je  
 « ne pouvoir mieux faire que d'en remettre la  
 « resolution à vostre prudence. — Monsieur, res-  
 « pondit Simon Anthoine, la compagnie d'un si  
 « brave cavalier que le seigneur de Rosny, le-  
 « quel j'ay ouy dire avoir fait des merveilles en  
 « diverses batailles et affaires d'Estat, ne scau-  
 « roit estre ennuyeuse à qui que ce soit; et quant  
 « aux nouvelles qu'il nous pourra conter je com-  
 « mence à me douter qu'il faudra d'oresnavant  
 « preparer nos oreilles à en entendre souvent de  
 « pareilles, puis qu'il apparoist manifestement  
 « qu'au lieu que le soleil s'avance vers son as-  
 « cension, les affaires des bons catholiques en  
 « France tendent à la declinaison; et de plus j'es-  
 « time qu'il n'y en aura un seul de nous qui ne  
 « soit bien ayse d'apprendre que sont devenus  
 « messieurs les illustrissimes cardinal legat, et  
 « celuy de Pelvé, les seigneurs ducs de Feria,  
 « Diego, d'Evora et autres serviteurs du Roy  
 « mon maistre, et de quelles courtoisies ce prince  
 « victorieux aura usé en leur endroit: car sa ge-  
 « nerosité et sa debonnaireté sont tant celebres  
 « qu'il est à croire qu'il n'aura rien fait de me-  
 « diocre. — A ce que je vois, Messieurs, repar-  
 « tist M. de Villars, me voila donc obligé à vous  
 « traiter tous, et partant en apprehension que  
 « vous ne le soyiez pas selon vos merites. » Et  
 sur ces discours tous les autres qui estoient au  
 bout de la gallerie s'estans approchez de vous  
 quatre, monsieur le premier president de Bo-  
 quemare vous dit :

« J'estime, Monsieur, que nous n'aurons qu'à  
 « preparer nos oreilles, pour oüyr le recit au  
 « vray de tant de diversitez notables que l'on  
 « dit s'estre passées à Paris; car nul ne nous en  
 « scauroit dire de plus certaines ny de plus frai-  
 « ches nouvelles que vous, qui, à mon advis,  
 « avez tout veu et tout sceu, et en estes party,  
 « comme je le scay, il n'y a que deux jours. —  
 « Monsieur, luy dittes-vous, je remettray le recit  
 « de tout cela lors que nous serons à table. » Et  
 ainsi tous les autres vous venant embrasser, vous  
 vous mistes à discourir ensemble de propos com-  
 muns seulement jusques à ce que les viandes  
 estans servies, et que vous tous ayans lavé,  
 M. de Villars s'alla asseoir au beau milieu de

la table, et dit tout haut : « Quant à moy, Mes-  
 « sieurs, je suis tres-mauvais maistre des cere-  
 « monies : et partant que chacun prenne place  
 « selon ses dignitez et honneurs. » Surquoy tous  
 les assistans se mirent à s'entre-regarder, et  
 vous voyant que Simon Anthoine que vous sca-  
 viez estre un vieil chevalier honoré de plusieurs  
 grades et d'un esprit fort altier et entreprenant,  
 seroit homme, si vous luy defferiez tant soit  
 peu, pour prendre le haut bout à l'avantage de  
 celuy qu'il representoit, sans dire mot, ny faire  
 semblant de rien, vous vous allastes asseoir à  
 la maistresse place, puis luy dittes : « Seigneur,  
 « s'il n'estoit question que de nos personnes, je  
 « cederols volontiers toutes choses à vos merites;  
 « mais quant aux royales majestez que nous re-  
 « presentons, il y a un long-temps que je scay  
 « que tous les rois de la chrestienté, voire du  
 « monde, cedent à celuy de France, et que mesme  
 « les roys d'Angleterre debattent le second rang  
 « aux roys d'Espagne. »

Surquoy le sieur de la Chapelle-marteau, s'a-  
 dressant à Simon Anthoine, il luy dit : « Vous  
 « voyez, seigneur, comment M. de Rosny, pour  
 « avoir veu le Roy son maistre, prendre posses-  
 « sion de la ville capitale du royaume, veut faire  
 « le semblable de la préeminence pretendue par  
 « les roys de France sur tous les autres de la  
 « chrestienté. — Je vois bien cela, dit Simon  
 « Anthoine, et mesme crains que cét avantage  
 « ainsi pris, ne nous soit comme un augure de  
 « tres-mauvais succez en tous nos desseins; mais  
 « il n'y a remede, il ne faut pas laisser de rire,  
 « de nous monstrier de sociable compagnie, de  
 « boire à la santé de nos maistres qui ne sont  
 « point ennemis, n'y ayant point de guerre de-  
 « clarée entr'eux, et d'escouter patiemment les  
 « courtoisies dont ce genereux prince a usé, tant  
 « envers les bourgeois de Paris, que les estran-  
 « gers qui estoient dedans. » Et ainsi, apres plu-  
 sieurs autres discours semblables, où chacun des  
 assistans voulut prendre part, reservé M. de Ti-  
 ron et le docteur Dadræus qui ne dirent jamais  
 un seul mot, vous entrastes au recit de tout ce  
 qui a esté cy-devant dit sur la reduction de Pa-  
 ris, que vous amplifiastes encor et enrichistes de  
 sorte, sur tout en ce qui touchoit les generositez  
 et gentillesces du Roy, qu'il n'y en eut un seul  
 d'eux tous qui ne conclud tout haut que le Roy  
 se pouvoit nommer pour l'un des excellens et  
 illustres princes, non seulement de son siecle,  
 mais aussi de tous les siecles passez.

Sur les unze heures vos gens vous estans venus  
 requerir, M. de Villars en sortant vous dit : « Mon  
 « sieur, ne me venez point voir pour tout demain-  
 « je vous en prie, et je ne vous iray point visiter

« aussi; car je seray empesché à esclaircir ces gens icy de mes resolutions, et à leur faire prendre les leurs pour se retirer à Soissons; de quoy faire vous leur baillerez, s'il vous plaist, les escortes et seuretez requises; mais allez voir les dames l'apres-dinée; car là vous serez informé de tout ce qui se passera; et de ma part je prepareray toutes les choses necessaires pour faire le lendemain tout ce que vous jugerez estre à propos, le remettant entierement en vostre prudence. » Et vous ayant embrassé vous vous retirastes à vostre logis.

Puis le lendemain, suivant ce qui avoit esté convenu entre vous deux, l'apres-dinée vous vous en allastes voir madame de Simiers, de laquelle vous appristes que ledit sieur de Villars, et les sieurs Simon Anthoine et la Chappelle-marteau avoient esté enfermez plus de trois heures, et eu de grosses paroles et contestations ensemble, jusques à en estre venus aux reproches de part et d'autre, lesquelles en temps et lieu produirent de mauvais effets, comme il se verra cy-apres, mais qui pour lors se terminerent à faire donner escortes et seuretez suffisantes à ses deux députez, pour se retirer vers M. du Mayne ou à Soissons; et en suite M. de Villars, ayant fait entrer plusieurs gens de guerre à sa devotion dans la ville, s'estant bien asseuré du fort de Sainte Catherine, du vieux palais, du chateau et autres lieux forts d'icelle, et fait parler à tous les plus puissans et accreditez habitans, il vous envoya dire, par le sieur de la Font, que le lendemain il se declareroit serviteur du Roy à la premiere instance que vous luy en feriez.

Tellement qu'ayant passé une nuit fort joyeusement, vous vous levastes assez matin, pensant aller donner le bon jour à M. de Villars dans l'abbaye de Sainet Oüen; mais vous trovastes qu'il y avoit pres d'une heure qu'il se promenoit dans la grande place d'icelle, où il estoit accouru une telle affluence de peuples de toutes conditions, et aussi de gens de guerre, que, non seulement ladite place, mais aussi les ruës par où l'on y venoit en estoient si remplies, et y avoit une telle presse, que l'on n'y pouvoit quasi passer: mais en fin, ayant, à l'ayde des sieurs de Perdriel, d'Inscourt, de la Font et de quelques soldats des gardes de M. de Villars, qui marchoient devant vous, traversé toute cette multitude qui tesmoignoît une merveilleuse joye de vous voir venir, vous le vinstes saluer, ainsi qu'il se promenoit avec M. le premier president de Boquemare et le sieur de Medavit; puis ayant tenu à luy et aux principaux d'alentour de luy, plusieurs propos de compliment et civilité, vous luy dittes :

« Or sus, Monsieur, c'est maintenant qu'il vous faut tesmoigner l'antiquité de vostre noblesse, la generosité de vostre courage et que vous estes vrayement bon François, car vous ne le sçauriez faire en temps ny en lieu où vous donniez plus de liesse, ny où une tant loüable resolution soit mieux receüe; car puis que le Roy, comme vous l'avez tousjours désiré, est bon catholique, et que la ville capitale du royaume vous a tracé le chemin à une si juste recognoissance, je n'estime pas qu'il y en ait un seul qui n'approuve la resolution que vous prendrez là dessus. » A quoy il vous respondit : « Monsieur, là où les effets doivent rendre preuve de la volonté, les paroles n'y sont plus necessaires; et partant, sans user de plus long discours, si vous me voulez honorer d'une escharpe blanche au nom du Roy, comme estant l'ancienne marque des vrayes François, je la mettray à mon col, et la graveray de telle sorte dans mon cœur, qu'elle n'en partira jamais tant que je vive. » Et lors ayant tiré de vostre pochette une fort belle escharpe blanche, et luy ayant mise au col (vous nous permettez, Monseigneur, et les dames semblablement si quelqu'un lit jamais ces Memoires, d'user de ses propres termes) il dit : « Allons morbieu, la ligue est f.... que chacun crie, *vive le Roy*. » Et lors il se fit une telle acclamation que tout l'air en retentissoit, laquelle entenduë et un signal préparé tout expres, donné du clocher au fort Sainte Catherine, aux vaisseaux du port et autres lieux où il y avoit du canon et des gens de guerre, il se fit une saluë de pieces et harquebuses, qui dura fort long-temps, qui faisoit trembler la plupart des maisons de la ville; puis les cloches retentissantes de toutes parts, vous prist M. de Villars par la main, et luy dittes : « Monsieur, ce son de cloches et sur tout Georges d'Amboise nous appelle à Nostre Dame, pour y aller rendre graces à Dieu et chanter le *Te Deum* : » à quoy il se disposa aussi-tost. Vous y assistastes et à toutes les autres ceremonies, jusques à ce que la messe estant preste de se dire, vous vous en allastes à vostre logis, auquel, apres le service, M. de Villars vous vint prendre en son carrosse, et vous mena disner où vous fustes traité en festin et fort magnifiquement, y ayant convié tous les principaux officiers des Cours souveraines, du corps de ville et des gens de guerre.

Cette journée achevée, vous ayant, dès que vous sortistes de l'église, dépesché un courrier au Roy, pour luy donner advis de ce qui s'estoit passé, comme l'on alloit envoyer à Verneuil, le Ponteau de mer, le Havre où estoit le cheva-

lier Doise, à Harfleur, Montivilliers, Tomblaine et autres lieux où M. de Villars estoit recogneu pour faire le semblable, suppliant Sa Majesté de députer quelques uns de son conseil avec pouvoir pour establir le parlement et autres compagnies.

Le lendemain, ceux de la ville vindrent en corps vous remercier du bien qu'ils avoient receu par vostre moyen; et, pour tesmoigner le gré qu'ils vous en sçavoient, ils vous firent present d'un buffet de vaisselle d'argent doré valant trois mil escus; et trois jours apres vous receustes des lettres du Roy pour responce aux vostres, par lesquelles il vous commandoit de vous en retourner le plustost que vous pourriez: il y en avoit aussi pour M. de Villars, par lesquelles le Roy l'appelloit son cousin, et le tiltroit *admiral de France* et *gouverneur en chef de Roüen*, le Havre et des bailliages de Roüen et Caux, le prioit de le venir trouver au plustost et l'asseuroit d'estre fort bien receu; et vous, voyant qu'il luy falloit encor quelques jours pour preparer le magnifique equipage avec lequel il designoit de se presenter devant le Roy, vous pristez congé de luy, et vous acheminastes devant.

## CHAPITRE L.

*Rencontre singulière de Rosny et de Bois-rosé dans une hôtellerie de Louviers. Soumission de Lyon. Évasion du duc de Nemours.*

La ville de Roüen estant ainsi reduite en l'obeyssance du Roy par vostre moyen, et toute la Normandie renduë paisible, vous partistes de Roüen et vinstes coucher à Louviers, où le soir vous eustes une plaisante rencontre estant à l'hostellerie, de laquelle vous avez bien ry plusieurs fois depuis, et qui arriva sur une telle occasion, qui fut que le sieur de Bois-rosé, ayant entendu que Roüen, le Havre et les autres villes de la ligue, en toute la Normandie, s'estoient déclarées pour le service du Roy, et desouvert, par le moyen de quelques amis qu'il avoit encor pres M. l'*admiral de Villars*, que par le traitté d'icelle, vous luy aviez accordé que le fort de Fescamp luy seroit remis entre les mains, ne pouvant supporter qu'une place qu'il s'estoit acquise avec tant d'industrie, de travail et de peril, et dans laquelle le Roy luy avoit tousjours asseuré de le vouloir maintenir, luy fut ainsi ravie sans aucune recompense, dont il peust faire asseuré estat, il se resolut de s'en aller à la Cour pour en faire ses plaintes, supplier le Roy de ne permettre point qu'un tel outrage luy

fut fait, apres avoir rendu un tant signalé service à Sa Majesté, et y employer tous ses amis entre lesquels le sieur du Rolet estant des premiers, et de ceux qui estoient les moins contens de M. de Villars, et qu'il se fust rendu serviteur du Roy; il s'en vinst passer à Louviers, pour le prier d'en escrire au Roy en sa faveur et aux amis qu'il avoit en Cour; et, arrivant assez tard, il s'en vinst pour loger en l'hostellerie où vous estiez arrivé deux heures auparavant; mais on luy dit qu'il y avoit un grand train logé d'un seigneur qui s'en alloit à la Cour, lequel estoit fort en faveur pres du Roy, sans que l'on luy dit, ny qu'il s'enquist de vostre nom, et, croyant que vous fussiez encor à Roüen, il monta en vostre chambre, ne vous cognoissant point de veuë, et s'imaginant que ce fust quelqu'autre, il vous vinst faire la reverence, et vous dit:

« Monsieur, encor que je ne sois pas peut estre cogneu de vous, j'ay neantmoins pris la hardiesse, sçachant que vous estes bon serviteur du Roy, que vous avez du credit auprez de luy, et que vous favorisez ceux qui l'ont bien servy, de vous prier de vouloir m'estre aydant en une affaire la plus juste qui fut jamais, que l'on me veut faire perdre indigement. » A quoy vous, sans le cognoistre ny luy demander mesme son nom, vous luy dittes: « Monsieur, j'ay tousjours aymé et maintenu les gens de bien, et partant je vous promets, vostre affaire estant telle que vous le dites, que j'employeray pour vous si peu de credit que je puis avoir aupres du Roy. » A quoy il vous respondit: « Monsieur, les principales de mes plaintes sont contre un seigneur qu'on nomme M. de Rosny, qu'au diable soit-il donné, tant il me fait de mal sans l'avoir en rien offensé, auquel le Roy, ayant donné pouvoir de traiter pour la reduction en son obeysance, de toutes les villes qui sont de la ligue en Normandie, sous ombre qu'il est des anciens amis de M. de Villars, il semble qu'il n'aye songé qu'à le contenter au prejudice de qui que ce puisse estre, sans se soucier de plusieurs bons serviteurs du Roy, au nombre desquels je suis, et m'appelle Bois-rosé, gouverneur de Fescamp, voire n'a point craint de s'adresser à messieurs de Mont-pensier et de Biron, tant il abuse de son pouvoir et de la faveur qu'il croit avoir aupres de son maistre; mais, par bieu, il en pourroit tant faire, mettant tant de gens au desespoir, qu'il se repentiroit, et quelqu'un aussi estourdy qu'il sçauroit estre luy en joueroit d'une, si l'on ne craignoit d'offencer le Roy. » A quoy, en riant, vous luy respondistes:

« Monsieur, je n'estime pas que ce M. de Rosny, dont vous parlez, ait rien fait que par le commandement de son maistre, car il a toujours affectionné les bons François, et ne doute point mesme que le Roy, à sa sollicitation, n'ayt pensé à vous donner si bonne recompense que vous aurez sujet de contenter; car vous jugez bien qu'il n'eust pas esté raisonnable de manquer à conclurre un traité de si grande importance que celui qu'a manié M. de Rosny, pour l'intérêt de quelques particuliers; aussy ay-je appris qu'il a voulu commencer par luy-mesme, et donner exemple aux autres en quittant l'abbaye de Saint Taurin d'Evreux que le feu Roy luy avoit donnée, et m'asseure qu'il ne vous aura point porté de prejudice sans penser à vous en recompenser: de quoy je vous oseray quasi respondre, d'autant que je le cognois, voire est tellement de mes amis, que je luy feray faire en vostre faveur tout ce qui sera raisonnable; et lors que nous serons à la Cour, venez m'en parler, et je vous feray paroistre que je suis vostre amy et que je prise vostre courage. » Surquoy, apres quelques remerciemens, il se retira fort content de vous, sans sçavoir qui vous estiez; mais, estant descendu en bas et ayant demandé vostre nom à un de vos pages, afin de s'adresser à vous en ses affaires, il prist une telle allarme, croyant que vous vous seriez offensé des propos qu'il avoit tenus et des menaces dont il avoit usé en vostre endroit, qu'il remonta soudain à cheval, s'en alla loger à une autre hostellerie, et partit, dès la pointe du jour, pour aller en Cour faire luy mesme ses plaintes au Roy, sçachant bien que c'estoit un prince qui escoutoit familièrement les doleances d'un chacun et sans les renvoyer à ses ministres, en comprenoit les causes et y faisoit pourvoir.

Vous partistes aussy le mesme jour et vous en allastes coucher à Mante, où estoit encor madame vostre femme, laquelle vous menastes à Paris où, si-tost que vous fustes arrivé, vous allastes trouver le Roy, luy contastes tout ce qui s'estoit passé en la declaration de messieurs de Villars, chevalier d'Oyse, Medavit, la Londe, Haqueville, Roüen, le Havre et autres personnes de qualité et villes en Normandie, sans en oublier quasi une seule particularité; car il les voulut toutes sçavoir, dont il y eut bien à rire lors que vous luy contastes ce qui s'estoit passé entre vous et le sieur de Bois-rosé; surquoy Sa Majesté vous dit qu'il luy estoit venu faire de grandes plaintes de vous, et le prier de le vouloir pourvoir sans le renvoyer à vous, d'autant qu'il sçavoit bien que vous estiez son ennemy à

cause de quelques propos qu'il vous avoit tenus sans vous cognoistre; et partant qu'il vous prioit de l'envoyer querir, l'asseurer que vous l'aymiez comme vous faisiez tous les braves courages qui en avoient rendu de si signalées preuves que luy, et que vous auriez un soin particulier de ses affaires et de sa personne: ce que vous executastes dès le lendemain et de si bonne façon, que vous luy promistes et asseurastes deux mil escus de recompense plus qu'il ne s'estoit attendu, d'avoir une pension de douze cens livres, une place de capitaine appointé, voire le retinastes depuis à vostre suite, et luy donnastes vostre lieutenance en l'artillerie au département de Normandie, lorsque vous fustes grand maistre.

Vous demeurastes, tout les mois d'avril et de may, à Paris, sans qu'il se passast rien de fort remarquable où vous fussiez employé, quoy que journellement des villes et des seigneurs de qualité dans toutes les parties du royaume se réduissent en l'obeyssance du Roy, mais ayant desja tous eu d'autres entremetteurs, vous ne vous en meslastes que comme les autres du conseil; de toutes lesquelles affaires, traitez et negociations nous laisserons pour cette raison les particularitez aux historiens, réservé pour ce qui regarde la ville de Lyon, à cause de plusieurs accidens notables qui meritent que nous vous ramentevions que M. de Nemours (qui avoit tousjours eu en fantaisie s'il ne pouvoit estre esleu aux estats de Paris, pour espouser l'infante d'Espagne et estre roy de France à cause des fortes oppositions qu'il sçavoit bien que son frere, M. du Mayne, y faisoit journellement, de se former au moins une petite royauté des provinces de Lionnois, Forests, Beau-jolois, Masconnois et Dombes, sous la protection du roy d'Espagne), ayant voulu quelque temps auparavant, par une trop ouverte demonstration, s'asseurer de ladite ville de Lyon, les habitans qui trouvoient son joug insupportable, l'ayant voulu secourir, s'estoient mesme saisis de sa personne et l'avoient mis prisonnier, sans neantmoins changer encor de party, mais au contraire avoient asseuré M. du Mayne de la continuation de leur affection au party de l'union, laquelle ils luy avoient jurée. Mais M. de Sainct Sorlin, frere de M. de Nemours, ayant eu recours à M. de Savoye et au duc de Terre-noüe, gouverneur de Milan, afin de l'assister de gens pour la delivrance de son frere, et contraindre ceux de Lyon à se remettre en leur devoir; et eux, se voyans pressez de ce costé et sans assistance de M. du Mayne, ils prirent resolution d'appeler le coronel d'Ornano et ses forces à leur secours, et de se déclarer pour le Roy; ce qui fut executé

avec grande joye de tout le peuple et une telle demonstration d'animosité, qu'ils deschirerent et traînerent par les boïes les armes, livrées et devises d'Espagne, de Savoye et de Nemours; et firent faire l'effligie d'une grande femme hideuse et affreuse qui avoit escrit sur son front *la ligue*, laquelle comme sorciere ils firent brusler publiquement; et quelque temps apres la trop grande joye rendant ceux qui gardoient M. de Nemours plus negligens, il trouva moyen, en se déguisant comme son valet qui vuidoit le bassin de sa chaise percée, de se sauver de prison par le moyen d'un tel office, portant ce bassin, tournant la teste de l'autre costé et courant en diligence pour l'aller jeter afin d'éviter la pauteur.

Il se parla lors des affaires de Provence et des grandes diversitez qui se passerent en icelle, à cause de tant de diverses sortes de personnes qui firent des desseins pour profiter de sa desolation; mais le discours en estant trop long et meritant d'estre traité tout d'une suite depuis le commencement de ces embarras jusques à la fin d'iceux, nous les remettrons au temps que le gouvernement en fut baillé à M. de Guyse, pour l'oster à tous les autres pretendans; et en continuant les suites de vos Memoires, nous dirons que le Roy ayant eu advis que le comte Charles de Mansfeld, à la sollicitation de M. du Mayne, s'approchoit de la frontiere avec une fort puissante armée et grande quantité d'artillerie, il fit soudain mander toutes ses troupes qui estoient esparses, afin d'en former un corps d'armée pour s'aller opposer à tout ce que le susdit comte de Mansfeld voudroit entreprendre: mais un chacun se jettoit tellement dans la negligence, à l'occasion de tant de reductions de villes et autres prosperitez, que les bandes ne se peurent si tost rejoindre, ny le Roy faire si grande diligence que ledit comte de Mansfeld n'eust investy, assiégé et pris la Capelle.

## CHAPITRE LI.

*Conduite de Rosny relativement à un présent que lui avoit fait la ville de Rouen. Ses principes en administration. Villars vient présenter ses hommages au Roi. Siège de Laon. Rosny obligé de quitter ce siège pour aller conférer avec le cardinal de Bourbon.*

En continuant ces Memoires il nous est souvenu d'avoir oublié, en suite de ce qui a esté dit de vous et du sieur de Bois-rozé, deux particularitez qui peuvent donner quelques remarques du bon naturel, et de l'industrie et bonne conduite,

tant du Roy et de M. de Mont-pensier, que de M. de Villars et de vous; nous avons estimé à propos de vous les ramenter icy avec double annotation qui puisse servir pour les faire mettre cy-apres en ordre, si tant est que nous repassions un jour ces Memoires pour les faire transcrire au net, ou que vous daigniez jeter les yeux sur iceux, pour y apporter les corrections et additions qui leur seroient bien necessaires de vostre part, ou que des plumes plus élégantes que les nostres se voulussent employer à donner de l'ornement à nostre stile, que nous cognoissons bien estre nud, simple et entierement desnudé des plus belles fleurs de l'éloquence, à quoy se plaisent ceux de nostre siecle; voire confessions de l'avoir fait exprez, fondez sur l'opinion par nous prise, que les longues digressions, exemples, rapports, instructions et autres narrations hors du principal sujet que l'on s'est proposé, font perdre le fil, la tisure, et par consequent, la claire Intelligence de la vie de celuy dont l'on veut faire mention, ou de l'histoire que l'on entend représenter: et, afin de ne tomber point nous mesmes dans les fautes et erreurs que nous blasmons en autrui, nous retournerons à nostre dessein, suivant lequel nous vous ramenterons que la première particularité par nous omise regarde le présent de vaisselle d'argent doré que vous firent ceux de la ville de Rouën; lequel, quoy que vous l'eussiez accepté avec plusieurs difficultez, vous y voulustes (soit par bien seance, soit par artifice, soit que vous vous fussiez dès lors proposé de ne tirer jamais profit des charges que vous auriez, sinon par la seule liberalité de vostre maistre, comme vous l'avez tousjours pratiqué depuis), outre ces refus, garder une telle circonspection, c'est qu'un matin, le Roy estant encor au lit, vous fistes apporter dans sa chambre deux grandes manes où estoient le susdit buffet de vaisselle d'argent doré; les pieces duquel le Roy ayant veües, et demandé ce que c'estoit, vous luy respondites que ceux de Rouën vous ayant fait ce present de vaisselle d'argent, et vous fait dessein de ne prendre jamais rien pour affaires que vous manieriez, sinon par les liberalitez de vostre maistre, vous le luy aviez fait apporter pour en disposer selon son bon plaisir; à quoy il vous respondit qu'il seroit bien riche, si tous ceux qui s'estoient entremis de ses affaires avoient fait le semblable, mais qu'il vous donnoit ledit buffet de bon cœur, vous en feroit depescher un brevet pour apprendre à tous autres, comme ils en devoient user, lequel brevet estoit tel que s'ensuit:

« Aujourd'huy vingt-huitiesme jour de juillet 1594, le Roy estant au camp devant Laon,

« ayant eu advis que pour recognoistre le sieur  
 « de Rosny, et le gratifier en consideration de  
 « ce qu'il s'est tres-dignement employé en la ne-  
 « gotiation de la reduction du sieur admiral de Vil-  
 « lars, et des villes de Roüen et autres, occupées  
 « en Normandie, au contentement, repos et sou-  
 « lagement de tous ceux de la province, les ha-  
 « bitans de la ville de Roüen luy ont fait offrir  
 « quelques presens, lesquels il a refusé et ne les  
 « veut accepter; Sa Majesté neantmoins le jugeant  
 « digne d'iceux, pour s'estre tres-dignement et  
 « avec beaucoup de peine et de travail acquitté  
 « de la charge qui luy avoit esté sur ce par elle  
 « commise, a agreable, et permet audit sieur de  
 « Rosny d'accepter et recevoir lesdits presens,  
 « sans qu'il luy en puisse estre par quelque per-  
 « sonne que ce soit imputé aucun blasme ou re-  
 « proche, m'ayant commandé luy en expedier le  
 « present brevet pour luy servir de descharge  
 « suffisante, par tout où il appartiendra, l'ayant,  
 « pour cet effet, signé de sa main et fait contre-  
 « signer par moy, son conseiller et secretaire  
 « d'Estat. »

HENRY. Et plus bas, POTIER.

Mais qui plus est, dès le lendemain matin, pour tesmoigner le gré qu'il vous sçavoit d'une telle procedure, il vous envoya trois mille escus en or par M. de Beringan, avec des paroles de louanges qui valloient encore mieux que les escus.

L'autre particularité regarde ce qui avoit esté accordé au prejudice de M. de Mont-pensier, à M. de Villars, lequel, estant arrivé à Paris avec un train et un équipage des plus beaux, ayant cent gentilshommes à sa suite ordinaire, entre lesquels il y en avoit plusieurs de qualité fort relevée, et faisant une despençe plus splendide qu'aucun prince ny seigneur de la Cour, apres qu'il eut fait la reverence au Roy qu'il accompagna d'une telle humilité qu'il se mist à genoux, d'où, ayant esté promptement relevé par Sa Majesté avec ces paroles : « Monsieur l'ad-  
 « miral, c'est devant Dieu qu'il faut user de  
 « cette submission et non devant un roy de  
 « France, qui ne desire nulle qualité plus haute  
 « que de pere envers ses subjets, et de vray amy  
 « entre ses vrayes serviteurs; » tel qu'il l'estimoit, sçachant bien qu'il avoit trop de courage pour manquer jamais à ce qu'il avoit juré et promis entre vos mains, car c'estoit vous qui le presentiez; à quoy M. de Villars respondit, qu'encor qu'il sceut bien qu'il n'y avoit sorte de soubmission dont l'on ne fust redevable envers son souverain, neantmoins qu'il ne s'estoit pas mis à genoux devant luy en qualité de monarque des François, mais de vray Roy de toutes vertus,

entre lesquelles la valeur et la clemence marchoient à la teste.

Il se passa en suite plusieurs autres discours, trop longs à reciter, lesquels finis, M. de Villars s'en alla baiser les mains à M. de Mont-pensier, qui luy fit d'abord assez froide reception; de quoy luy comprenant bien la cause, il luy dit :

« Monsieur, j'avoué que j'ay outre-passé les  
 « bornes de la defference deuë à ce que merite  
 « le sang royal de France, en insistant sur cer-  
 « tains articles du traité qu'il a pleu au Roy  
 « m'accorder; mais mon intention ayant esté toute  
 « autre, je viens icy pour vous remettre le tout  
 « entre les mains, pour en disposer absolument;  
 « voire, sans attendre l'esclaircissement de vostre  
 « volonté, dès à present je me departis de cet ar-  
 « ticle, et proteste de vous recognoistre, non  
 « seulement pour mon gouverneur en chef, mais  
 « aussi pour estre apres le Roy mon vray sei-  
 « gneur et maistre, auquel nulle obeysance ne  
 « sera desniée en tous les lieux où j'auray pou-  
 « voir. » M. de Mont-pensier qui ne s'attendoit pas à cette submission demeura tout surpris d'une telle harangue. Neantmoins apres l'avoir derechef embrassé, il luy dit :

« Monsieur l'admiral, j'avois tousjours gran-  
 « dement estimé vostre valeur et brave resolu-  
 « tion, les tenant pour vertus incomparables en  
 « vostre personne; mais à present j'avoué que la  
 « discretion et la courtoisie ne leur cedent en  
 « rien : aussi en honorant ces quatre qualitez, je  
 « vous embrasseray pour la troisieme fois, avec  
 « protestation de vous aymer cordialement et  
 « tenir au nombre de mes plus chers amis. »

Nous laissons leurs autres complimens pour revenir à ce que nous avons dit du siege, que le comte Charles avoit mis devant la Capelle, laquelle, comme nous avons desja dit quelque chose, ne pût estre secouruë, d'autant que le Roy s'estant avancé jusques à la veuë de l'armée ennemie, avec ce qu'il avoit peu promptement ramasser de forces, et marchant selon sa coutume à la teste d'icelles pour tout recognoistre, et y apporter son jugement, lequel ses longues experiences jointes à la vivacité de son esprit et à la fermeté de son courage, faisoient tousjours trouver plus certain et plus penetrant que nul de tous ceux de ses capitaines; il trouva ses gens si bien retranchez dans leurs postes et logemens, d'attaquement et de deffence, qu'il n'y avoit aucune apparence de pouvoir jeter dans la place, ny hommes, ny vivres, ny munitions proportionnées au besoin qu'ils en avoient, par la negligence et trop grande épargne dont avoit voulu user le gouverneur que vous cognoissez assez sans que nous le nommions, et encor moins d'en-

treprendre de les pouvoir forcer et contraindre à lever le siege avec le peu de troupes que le Roy avoit, sinon avec honte et dommage; pour lesquels éviter et tout ensemble recompenser la perte de cette petite place (qui se rendit peu apres devant que l'armée du Roy fut en corps) par la conquête d'une plus grande, plus forte et plus importante, il s'en alla investir la ville de Laon, où M. du Mayne avoit estably pour gouverneur le sieur du Bourg, l'un des plus capables et determinez chefs de guerre qu'il eust, et mesmes y avoit fait jetter son second fils, nommé, ce nous semble, le comte de Sommerive, accompagné d'une bonne troupe de gentils-hommes des plus braves et resolués qui fussent aupres de luy, comme estimant cette place l'un des plus principaux boulevards de toutes celles qui luy estoient restées, et la plus propre pour y acquérir de la gloire et se garantir de honte, sa situation estant desavantageuse et tellement eminente de tous costez, qu'elle semble avoir esté là posée par la nature pour dominer tout son voisinage.

Nous laissons le surplus de la description d'icelle, et de la pluspart des particularitez de ce grand siege, à ceux qui feront l'histoire generale, et nous contenterons, selon nostre dessein, de vous ramentevoir les occasions où vous estes trouvé, et les affaires diverses où vous avez esté employé pendant le temps d'iceluy, et le sejour que fit l'armée es environs de cette place; lequel dura, ce nous semble, depuis la fin de may jusqu'au commencement d'aoust, pendant lequel vous envoyastes trois fois en voyage l'un de nous quatre à Rosny, pour vous querir de l'argent, et les deux autres à Moret où estoit lors madame vostre femme. Tellement que de ce que vous fistes et vistes à la défaite du grand convoy, à l'arrivée ennemie pour le secours des assiegez, à la grande escarmouche qui se fist le lendemain, et à la défaite des gens de guerre qui avoient esté envoyez pour entrer dans Laon, apres la capitulation, nous pourrions bien manquer en quelque chose, d'autant que nous n'en avons sceu que ce que nous vous en avons entendu dire à bastons rompus, et que vos gens nous en ont conté.

Le premier employ que vous eustes, fut avec le bon homme M. de Born, lieutenant general de M. de la Guiche, grand maistre de l'artillerie, qui avoit une batterie de six canons à commander, avec lequel le Roy vous ordonna de demeurer pour y travailler, et en faire executer la moitié; et, afin de luy faire agreer vostre entreprise, il l'assura qu'estant de son conseil, vous donneriez si bon ordre à toutes choses, qu'il ne manqueroit jamais de rien; neantmoins

vous n'y fistes pas grande chose, pource qu'il se presenta diverses affaires et occasions qui vous en détournèrent.

La premiere fut une lettre que l'on apporta de la part de M. le cardinal de Bourbon, qui estoit demeuré malade à Paris, dont la teneur estoit telle, car vous me la baillastes à garder et en retins coppie pource qu'elle me sembloit fort honorable.

*Lettre de M. le cardinal de Bourbon à M. de Rosny.*

Mon cousin, vostre entremise s'estant trouvée la plus sincere et pour cette raison la plus heureuse de toutes celles qui se sont meslées de m'acquérir et conserver les bonnes graces et la bien-veillance du Roy, monseigneur, vous aurez agreable, je m'en assure, que je vous employé librement à la continuation d'un si bon œuvre, et que pour cet effect je vous prie d'obtenir permission de luy de faire icy un voyage vers moy, d'autant que j'ay des choses d'importance à luy dire que je ne peux escrire, ny faire scavoir par personne qui ne luy soit entierement confidente, et à moy aussi, qui vous conjure d'user de diligence, et de m'aymer cordialement puis que je vous ayme de tout mon cœur; et de croire que je suis, vostre bon cousin et plus affectionné amy, Charles, cardinal de Bourbon.

De Paris, ce 12 juin.

Laquelle lettre ayant esté montrée au Roy, il vous demanda si vous ne vous doutiez point de quelles affaires il pouvoit avoir dessein de vous parler. A quoy luy ayant respondu que non, il vous dit: « Je suis bien marry de vous divertir  
« de vostre batterie, pource qu'il me semble re-  
« cognoistre que si je n'ay tousjours quelqu'un  
« de mes anciens serviteurs affidez aux factions  
« de guerre importantes, que les choses y sont  
« maniées négligemment, et quoy que je sois ca-  
« tholique, voire aye esté assez esclairey pour  
« croire que je puisse faire mon salut en cette  
« religion là, si ne vous celeray-je point qu'en ce  
« qui concerne ma personne, ou les affaires  
« contre la ligue et les Espagnols, je m'assure  
« davantage en ceux de la religion et aux catho-  
« liques qui en ont quelques ressentimens, et ne  
« font pas tant les zelez, qu'aux autres; et pour  
« cette cause ay-je desja jetté les yeux plusieurs  
« fois sur Vignolles, ou Parabere, ou Trigny  
« pour mettre en vostre place, avec le sieur de  
« Born: car je voy bien qu'il faut que vous alliez  
« à Paris, non seulement à cause de la lettre que  
« vous escrit mon cousin le cardinal de Bourbon,  
« mais aussi pour essayer de descouvrir des me-  
« nées qui s'y font contre mon service, où l'on

« dit que le comte d'Auvergne, son beau-pere et  
 « sa mere, M. et madame d'Antragues sont bien  
 « avant meslez, afin que si vous en pouvez veri-  
 « fier quelque chose, vous les fassiez arrester.  
 « Je vous bailleray des lettres de ma main pour  
 « cet effet addressantes à mon procureur gene-  
 « ral du parlement, au lieutenant criminel et au  
 « prevost de l'Isle. Vous apprendrez aussi ce que  
 « c'est que des poursuites que ceux de l'Univer-  
 « sité, cette belle fille aînée des Rois, et les  
 « curez de Paris veulent faire contre les jesuites,  
 « et qui c'est qui favorise ceux-cy, afin d'y don-  
 « ner ordre. »

Ayant vostre dépesche, le Roy commist aux  
 pieces d'artillerie qu'il vous avoit baillées à ex-  
 ploïtter (au moins comme il me semble), le sieur  
 de Parabere, et le jour mesme arriva le sieur de  
 Balagny (qui avoit auparavant traité avec le  
 Roy pour mettre luy et ses places en son obeys-  
 sance, à condition neantmoins qu'il demeureroit  
 prince souverain de Cambray sous la protection  
 de France, et plusieurs autres avantages qui  
 seroient aussi ennuyeux à reciter, qu'ils furent  
 vains et de peu de durée), avec un vray equipage  
 et maison de grand prince souverain, ayant  
 aussi deux mille harquebusiers et trois cens  
 chevaux des plus lestes qu'il se pouvoit voir.

Le lendemain vous vous en allastes coucher  
 à Crespy, et le jour suivant à Paris, où vous  
 trouvastes M. le cardinal de Bourbon fort ma-  
 lade et chagrin, s'estant aigry l'esprit sur quatre  
 choses : l'une, que l'Université de Paris et les  
 curez eussent entrepris le procès contre les je-  
 suites sans luy en parler ; la seconde, que M. d'O  
 vouloit faire chasser de Paris l'archevesque de  
 Glaco (1), Escossois, qui portoit le nom de vostre  
 maison, lequel il affectionnoit infiniment ; la  
 troisieme, qu'il n'avoit pas eu bonne responce  
 du Roy d'une permission qu'il luy avoit deman-  
 dée, de pouvoir disposer de ses benefices ; et la  
 quatrieme, qui estoit celle qui le faschoit le plus,  
 qu'il n'estimoit pas de pouvoir réchaper de ceste  
 maladie, s'estant fourré en l'opinion que ma-  
 dame de Rozieres l'avoit ensorcelé, à cause qu'il  
 avoit desapointé l'abbé de Bellozane qui l'entre-  
 tenoit, ainsi que l'on disoit ; aussi fut-ce elle de  
 laquelle il vous parla en arrivant : car, comme  
 vous le saluastes dans le lit, en vous jettant les  
 bras au col, il vous dit : « Mon cousin, je suis  
 « aussi aise de vous voir, que je m'assure que  
 « vous serez marry de me trouver ainsi en lan-  
 « gueur par la meschanceté de cette maudite  
 « madame de Rozieres, dont chacun croit que  
 « j'ay esté ensorcelé, de telle sorte qu'il faut  
 « qu'elle ou moy mourions bien-tost ; il n'y a que

(1) Jacques de Béthune, archevêque de Glasgow.

« trois jours que ma cousine vostre femme m'est  
 « venu voir, qui me réjoût fort, car elle m'as-  
 « seura que cette femme estoit à l'extrémité, et  
 « je prens quelque esperance que son sort mour-  
 « roit avec elle.

« Mais, laissant ces discours desquels la con-  
 « tinuation ne feroit que renouveler mes en-  
 « nuyeuses douleurs, puisqu'aussi bien toute la  
 « science et l'experience des plus suffisans me-  
 « decins n'en ayant peu cognoistre les causes ny  
 « fournir les remedes il me les faut esperer de la  
 « seule providence et bonté divine sans aucune  
 « ayde humaine, je commenceray à vous entre-  
 « tenir des choses qui m'ont fait desirer avec  
 « passion votre arrivée pres de moy ; lesquelles,  
 « quoy que du tout dépendantes du seul conseil  
 « de Dieu aussi bien que toutes autres, si ne  
 « laisse-il pas de vouloir que les hommes agissent  
 « en icelles, soient comme cooperateurs avec  
 « luy, et se servent de l'esprit et du jugement  
 « qu'il leur a donné, tant pour la conduite de  
 « leur vie et de leur fortune, que pour le demes-  
 « lement des affaires publiques en ce monde. »  
 Et lors nous ayant tous fait sortir de sa chambré,  
 et ordonné qu'il vous fut apporté une chaise  
 basse, afin que vous asseyant plus pres de son  
 lit, il ne luy fut pas necessaire d'eslever si haut  
 sa voix, il vous dit en substance ce qui sera dit  
 au chapitre suivant.

### CHAPITRE LII.

#### *Conférence de Rosny avec le cardinal de Bourbon.*

Continuans la suite des discours du precedent  
 chapitre, M. le cardinal de Bourbon vous dit  
 que comme il vous avoit tousjours esprouvé en  
 plusieurs occasions tres-importantes, plein de  
 foy, de loyauté, de verité et de sincerité entiere  
 en toutes choses, et tres-affectionné à celles qui  
 l'avoient touché en son particulier, aussi avoit  
 il desiré de vous communiquer plutost qu'à nul  
 autre de ses parens et amis, quatre affaires prin-  
 cipales qui luy travailloient l'esprit, prendre  
 sur icelles vos bons advis et conseils, et mes-  
 mes de vous en remettre tout le mesnagement  
 apres du Roy, avec lequel il vous sçavoit en  
 telle creance pour l'industrie, et en telle confi-  
 dence pour la loyauté, qu'il ne trouveroit rien  
 mauvais de vous, luy ayant souvent oüy dire  
 qu'il se gardoit bien de vous faire encor pa-  
 roistre toute l'estime qu'il faisoit de vostre es-  
 prit, ny l'amitié qu'il portoit à vostre personne,  
 de crainte que cela vous suscitant trop d'envie,  
 il donnast sujet à ceux qui ne sçavent rien faire,



ny ne vouloient laisser faire les autres, d'en discourir, et à cause de vostre religion, prejudicier à son dessein et à ses affaires, et que peut estre à vous mesme il ne donnast trop de gloire et de bonne opinion de vos sens, s'il vous eslevoit aussi soudainement, voire ne vous enhardist à faire comme d'autres qui estoient montez en telle presumption d'eux mesmes pour en avoir fait trop de cas, qu'il ne les pouvoit plus empescher, quoy qu'il leur eust fait remonstrer par leurs amis, d'exalter leur valeur, leur industrie et leur suffisance par dessus la sienne propre, qui estoit l'offence de toute la plus sensible à un maistre qui n'estoit pas du tout stupide ny hebeté; mais qu'en effet, il vous tenoit comme en reserve pour s'en servir un jour (si vous ne changiez point d'humeur et ne vous mescognoissiez point en son endroit) en ses plus importantes affaires, et sur tout en celles des finances, vous ayant tousjours veu si bon mesnager qu'au milieu de ses plus grandes necessitez vous ne manquiez jamais d'argent, et si despensiez fort honorablement: ce qu'il vous prioit neantmoins ne faire pas semblant d'avoir appris de luy, de ne laisser pas de vous conduire tousjours aupres de Sa Majesté avec telle modestie et discretion que vous luy donnassiez non seulement la gloire et la louange que meritoient veritablement ses rares vertus et genereuses actions, mais y fissiez aussi rapporter toutes les vostres, et de prendre le temps à propos pour ménager aupres de luy ces quatre affaires qu'il vous avoit dit vous vouloir communiquer; dont la premiere, et qui luy apporteroit le plus de soulagement en ses langueurs, concernoit la bien-veillance et confidence esquelles il desiroit estre dans l'esprit de Sa Majesté, non seulement comme ayant l'honneur d'estre de son sang et son cousin germain, mais aussi comme admirateur de ses vertus, l'ayant cordialement, et n'ayant serviteur ny sujet plus loyal ny plus desirieux de sa gloire, de son honneur, de sa prosperité et de la grandeur de son Royaume, qu'il estoit; esquelles qualitez aussi prenoit-il la hardiesse de le supplier par vostre bouche de vouloir procurer, le plus instamment qu'il luy seroit possible, sa reconciliation entiere avec le saint siege, obtenir au plutost la benediction apostolique, et se mettre en bonne intelligence avec le pape d'alors, qui estoit fort sage, fort pacifique, grand politique, et qu'il sçavoit bien ne desirer nullement que la domination ny l'autorité d'Espagne s'accrussent d'avantage, d'autant que ce luy seroit un moyen certain pour faciliter la dissolution de son mariage avec la royne Marguerite, duchesse de Vallois, chose que tous les bons François desi-

roient ardemment, et à laquelle luy et tous ceux de sa maison portoient une telle passion, qu'ils n'auroient jamais le cœur en repos qu'ils ne visent ce dessein réussir, et par iceluy naistre des heritiers legitimes à la France, ne voulant point celer qu'ils ne pouvoient tous gouter ny souffrir les pretentions de celuy sur lequel plusieurs desirieux de nouveautez faisoient demonstration de jeter desja les yeux; lequel ses freres et luy croyoient en leur conscience n'estre point de la race royale, et qui neantmoins (si par sa prudence il n'y mettoit ordre en donnant des enfans au Royaume, ou le faisant dès à present rejeter de la succession) seroit peut-estre cause un jour d'y former des partialitez et exciter des mouvemens, troubles et grandes dissensions. Il s'estendit fort largement sur ce discours, et vous mit en avant plusieurs exemples et raisons; de la deduction desquels nous nous abstiendrons, afin de ne déplaire ny prejudicier à personne.

La seconde affaire dont il vous parla, fut touchant les bruits qu'il disoit estre tous communs, de plusieurs brigues, menées et pratiques qui se faisoient sous main par les plus advisez, et quasi tout ouvertement par les indiscrets et passionnez pour faire bannir hors du Royaume la totale société des Jesuites, laquelle vous sçaviez bien avoir une si grande creance dedans et dehors le royaume, sur tout entre les plus zelez catholiques qui s'estoient remis depuis peu au service du Roy, leur amitié pouvant grandement pour la tranquillité de l'Estat, et leur mal-veillance encor plus pour le trouble d'iceluy; leurs ennemis et haineux se servans des vieilles haines et animositez, tesmoignées autrefois par la Sorbonne, l'Université et les curez de Paris (fondez sur la diminution de quelques profits qu'ils avoient accoustumé de tirer pour l'instruction de la jeunesse), les ayans persuadez d'entrer en cause avec eux, et de se declarer tout ouvertement leurs parties; que si tout cela venoit des secretes volontez ou intentions du Roy, ou que Sa Majesté estimast y aller de son service, qu'il n'auroit nulle opposition à y apporter, mais se contenteroit d'user de simples remonstrances et ce encor par vostre seule entremise, par lesquelles, à son advis, Sa Majesté et vous mesmes, quelque huguenot que vous fussiez, jugeriez suffisamment que le temps ny la disposition des affaires n'estoient pas encor bien propres pour agiter ces questions et renouveler des instances de telle nature, à tout le moins jusques à ce que sa catholicité fut un peu de plus vieille datte (qui estoient les propres termes dont plusieurs usent desja), qu'il apparust de sa reconciliation avec le saint siege, qu'il eust receu la

benediction apostolique, ou pour le moins il fust paisible possesseur de tout son royaume, de crainte que les voyes et les procedures qui seroient tenuës par les parties ou leurs advocats en plaidant (lesquels s'exempteroient difficilement de toutes offences, blasmes et reproches) ne fissent faire des discours mal proportionnez au temps present, et que les mal contens et les malins, dont le nombre estoit tousjours le plus grand dans un Estat, n'en tirassent des consequences dommageables et pernicieuses à l'Estat; tout ainsi que si Sa Majesté n'estoit pas encor bien affermie dans l'entiere creance de l'Eglise, et que sa conversion n'eust esté faite que par faintise et dissimulation, ne vous voulant point celer (à vous qui estiez son amy et qu'il vous prioit neantmoins de ne dire point avoir appris de luy) que messieurs de Longueville, de Nevers, le mareschal de Biron mesmes (depuis qu'il avoit appris que le Roy s'estoit engagé de parole pour le gouvernement de Laon qu'il desiroit avoir, à un autre qu'à luy) et plusieurs autres grandement qualifiez et accreditez luy en avoient fait parler en ces termes par messieurs de Humieres, d'Antragues, de Sourdis et autres; ce qu'il vous prioit de bien et meurement examiner, s'assurant, considéré la prudence et moderation qu'il avoit tousjours reconnuë en vous, en toutes vos procedures, lors qu'il avoit esté question des differens des religions et des moyens de les faire compatir ensemble, que vous conclurriez avec luy qu'il seroit à propos, avant que de jeter des choses de telle importance aux dernieres extremitez, de voir comment ceux de cette société, apres qu'ils auront veu le Roy estre reconcilié à l'Eglise et au saint siege, se conduiront en France, tant pour ce qui concerne la grandeur du royaume que la gloire et l'honneur de la personne royale en sa Majesté regnante, ou, quoy que ce soit, attendre qu'aucuns d'entr'eux, comme ils n'y manqueroient pas s'il y avoit de mal intentionnez, eussent donné quelque specieux pretexte pour les travailler ouvertement, auquel cas il protestoit d'estre le premier à solliciter contr'eux, s'assurant bien qu'à son exemple, ceux qui se monstroient à present les plus scrupuleux, feroient lors comme luy.

La troisieme affaire dont il vous parla, fut touchant l'archevesque de Glasco qu'il vous dit estre si bon homme, et avec lequel il avoit, de longue main, une fort particuliere amitié, l'ayant mesme tousjours apparenté, à cause qu'il portoit, comme vous, le nom de Bethune; lequel, sans avoir esgard à son vieil aage, à sa resolution de ne se mesler jamais d'affaire publique et d'a-

chever ses jours en France comme un bon François, puisque la Reyne, sa maistresse, n'estoit plus, M. d'O persecutoit à outrance, le voulant contraindre à sortir de Paris et de l'Isle de France, quelque priere qu'il luy eust fait faire en sa faveur; voire il sembloit que son intercession luy eust porté prejudice, comme il en avoit autant recogneu en beaucoup d'autres affaires qui avoient despendu de ses charges; car il l'avoit voulu employer depuis qu'il s'estoit sincerement reconcilié avec le Roy et s'estoit entierement donné à luy comme au chef de sa maison, qui estoit vraiment son Roy et son maistre, croyant peut-estre que, parmy les familiaritez desquelles Sa Majesté l'avoit honoré, il luy auroit nommé tous ceux qui l'avoient le plus asprement sollicité pour le faire jeter à la desesperade dans les embarrasemens d'un tiers party; et partant vous prioit-il de vouloir parler de sa part au Roy en faveur de ce bon prelat et d'y joindre mesme vos prieres et vos interets, afin d'empescher une tant induë vexation que l'on essayoit d'exercer contre vostre parent, qui vous aymoît tant cordialement qu'il ne parloit jamais de vous que les larmes aux yeux lors qu'il se representoit que vous n'estiez pas dans l'Eglise.

Et la quatriesme affaire dont il vous fit instance, fut touchant la permission qu'il desiroit obtenir du Roy pour disposer librement de tous les benefices qu'il possedoit s'il venoit à deceder de la maladie dont il estoit detenu, vous alleguant plusieurs raisons pour fondement de ce desir, dont les principales estoient qu'il souhaitoit de pouvoir descharger la conscience de feu monsieur le cardinal son oncle et la sienne, en gratifiant d'iceux benefices quelques uns de ceux des maisons desquels ils les tenoient, suivant le vœu qu'ils en avoient tous deux fait; en quoy si vous luy donniez parole de vous employer de bonne sorte aupres du Roy, et pour les autres trois premieres affaires prenant le temps à propos, comme si une partie de tout cela venoit de vostre propre mouvement, et usant de vostre industrie et dextérité accoustumée, il ne doutoit nullement qu'il n'en receust toute sorte de satisfaction et qu'elle ne luy apportast une grande allegiance à sa maladie.

Sur quoy vous luy usastes de mille sortes de remercimens de la confiance qu'il tesmoignoît avoir en vous, louastes infiniment sa prudence et son bon naturel, et luy fistes une infinité de protestations de vous employer sincerement et de bonne foy és choses qu'il luy plaisoit de vous commander, jugeant qu'il n'y en avoit une seule qui ne fut juste, raisonnable et possible, et par consequent d'indubitable obtention, moyennant

que de vostre part il n'y eust nulle precipitation, et que de la sienne, il ne vous deniaist point le temps necessaire pour bien mesnager l'esprit du Roy et le faire tomber sur tous ces propos sans qu'il parust que ce fust à dessein, afin que vos avis et conseils fussent moins suspects d'aucun concert et premeditation.

Comme vous estiez encor sur ces propos, que nous avons abregez autant que nous avons peu, M. Duret, le medecin, entra dans la chambre, lequel vous ayant salué et embrassé par deux fois, car il faisoit grand estat de vostre amitié, dit à monsieur le cardinal qu'il ne doutoit point qu'il ne fut bien ayse de vous entretenir, mais qu'il falloit prendre cette delectation modérément, dautant que le beaucoup parler luy estoit infiniment prejudiciable; et, pour cette raison, l'estoit-il venu trouver, sachant que vous estiez avec luy, afin que, s'il restoit encore quelques particularitez à vous faire entendre de celles dont il sçavoit bien qu'il avoit désiré de vous parler, vous en discourussiez ensemble en sa presence, comme il fut fait si amplement, estant, comme vous sçavez, un homme qui a un tres-grand sçavoir et qui parle des mieux, que le discours en seroit trop long, à la fin duquel il fut resolu que vous vous en retourneriez au plutost trouver le Roy, pour donner ordre à ces affaires avant que les inconveniens dont l'on estoit en apprehension arrivassent.

Vous demeurastes neantmoins trois jours à Paris, afin de vous informer bien particulièrement de toutes choses, pendant lesquels vous appristes que plusieurs dans le Parlement favorisoient, mesmes avec brigues, la cause des jesuites; voire que des deux factions qui estoient lors tout ouvertement formées en iceluy, la plus puissante penchoit de leur costé, faisant tout ce qui luy estoit possible pour empescher que les advocats des parties, qui estoient les sieurs Arnault et Dollé d'une part, et Duret et Versoris de l'autre, ne s'estendissent en accusations contumelieuses, blâmes, reproches et injures, et en tout cas ne plaidassent en audience publique; vous appristes encor que M. et madame d'Antragues, aussi bien que le comte d'Auvergne, avoient une tres-mauvaise volonté pour le Roy, et que leur logis estoit le lieu où s'assembloient le plus souvent ceux qui favorisoient les affaires d'Espagne et de la ligue; et qu'il ne se passoit quasi nuit, que tous les plus suspects, pour estre de ces factions là, n'y eussent de longues conferences ensemble; de toutes lesquelles choses cy-dessus dites, vous parlastes à monsieur le chancelier de Chiverny, de Bellievre, de Pontcarré et de Maisses, afin qu'ils y apportassent

les circonspections et temperamens requis, et fissent en sorte que rien n'éclatast par trop, jusques à ce que, sur vostre rapport fait au Roy de tout ce qui se passoit, Sa Majesté leur eust fait sçavoir sa volonté, mais de tout cela et d'essayer d'en descouvrir encor davantage, en donnastes vous charge plus particuliere à M. de Maisses, comme celuy avec lequel vous aviez plus de confidence et sçaviez bien n'estre nullement bigot, luy declarant à part les causes qui vous convioient d'en user ainsi; mais, quoy que ce soit, tous ces messieurs receurent ces avis en faveur des jesuites beaucoup mieux de vous que de nul autre, sçachant qu'à cause de vostre profession vous ne pouviez estre tenu pour suspect.

Vous parlastes aussi à M. d'O, touchant l'archevesque de Glasco; mais vous et luy, n'ayans jamais esté long-temps fort bien ensemble, soit à cause de vostre religion, ou de ce que l'on disoit de monsieur vostre second frere, vous n'en rapportastes pas grande satisfaction, et cognustes bien que si l'autorité du Roy n'intervenoit en la conservation de ce bon prelat, il luy procureroit du desplaisir.

#### CHAPITRE LIII.

*Compte rendu par Rosny de sa conférence avec le cardinal de Bourbon. Déterminations du Roi. Divers événemens du siège de Laon.*

Après que vous eustes ainsi disposé les quatre affaires dont monsieur le cardinal vous avoit si longuement entretenu, vous allastes prendre congé de luy, lequel vous trouvastes grandement diminué, et pristest vostre chemin pour aller en l'armée, où en arrivant à Bruyeres, auquel lieu vous aviez laissé vostre train, vous sceutes que pendant vostre absence M. du Mayne (en attendant l'acheminement de toute l'armée qui luy avoit esté promise en Flandres, pour essayer de faire lever le siege de Laon, en laquelle devoit commander le comte Charles de Mansfeld, en tiltre de general) s'estant avancé avec quelques troupes jusques à la Fere, avoit essayé par deux fois à jeter dans la ville de Laon cent chevaux et deux cens harquebusiers à cheval avec quantité de poudres et mesches qu'ils portoient, et qu'à la premiere fois, ayant esté rencontrés par le sieur de Givry, qui battoit l'estrade avec deux cens bons chevaux, qu'ils n'estoient pas encor esloignez de plus d'une lieuë de la Fere, ils avoient esté contrains d'y faire une retraite en forme de fuite sans avoir rendu aucun combat; mais qu'à la seconde fois s'estans avancez jusqu'à la veuë de la place assiegée, ils avoient trouvé M. le

comte de Soissons en garde (car le Roy pour monstrier l'exemple aux princes y entroit aussi à son tour) avec trois cens chevaux, lequel les avoit chargez et mis en route, quelques uns ayans esté tuez au combat, et les autres partie pris prisonniers, et partie mis en fuite s'estans retirez dans la forest, favorisez de la nuit qui survint.

Or, le jour mesme que vous arrivastes prez du Roy, qui fut sur les trois heures apres midy, vous trovastes Sa Majesté au lict, à cause qu'il s'estoit fait estuver et oindre les pieds qu'il avoit tous escorchéz et pleins d'ampouilles par dessous, pour avoir tout le jour de devant et le long de la dernière nuit passée, couru et tracassé par les penchans et declins de cette montagne, sur laquelle est assise la ville de Laon, pour visiter les trenchées, la plupart desquelles, comme vous le sceutes depuis, il avoit ordonné de faire plus larges et plus profondes, de changer aucuns detours, retours et arrieres-coings que l'on y avoit faits, et d'y augmenter et hausser quelques forts et redoutes pour couvrir les enfilures, par le moyen desquels le chemin pour gaigner les contr'escarpes s'abregeoit de sorte qu'il gaignoit plus de deux jours de travail; il avoit aussi fait changer quelques places de batteries, plates-formes, embraseures et autres logemens de pieces, et avoit marqué les lieux où l'on devoit entamer les ouvertures et approfondissemens des deux mines que l'on avoit advisé d'y faire: aussi en vous embrassant il vous dit:

« Vous soyez le bien venu, et m'asseure que vous n'avez pas esté peu estonné de me trouver ainsi dans le lict, vous, qui me cognoissez de longue-main, et sçavez assez que ce n'est pas ma coustume de trop dormir en semblables occasions, et encor moins de faire l'accouchée dans un lict lors qu'il faut travailler et user de diligence; mais j'ay tant tracassé cette nuit passée par les lieux aspres et precipiteux de cette montagne pour visiter le travail d'un chacun, que je ne me puis quasi soustenir, et afin que vous ne pensiez pas que je fasse le doüillet je vous veux monstrier mes pieds. » Lesquels ayant aussi-tost tirez hors du lict, vous les vistes enveloppez de serviettes et quasi tous couverts d'emplastres qu'il fit lever, vous faisant voir plusieurs fentes et crevasses toutes tantoüillées de sang et de grosses cloches en divers lieux. « Et pour vous faire cognoistre, vous dit-il, que je n'ay pas entrepris cette penible besongne sans besoin et en rapporter utilité, il faut, lors que vous serez un peu reposé, que vous alliez voir tout ce qui a esté fait en nos attaquemens depuis vostre partement, ce que j'ay changé à ce qui avoit esté commencé ou ordonné de plus ou de moins, et

« que vous m'en disiez vostre advis, comme j'y ay desja envoyé pour le mesme effet, plusieurs de ceux que j'ay estimé qui s'y cognoissoient, ou qui sont curieux comme vous de s'instruire en toutes sortes d'expeditions et de faciendes, lesquels reviendront bien tost; car je leur ay ordonné de se trouver icy environ les cinq heures, afin de tenir conseil sur des advis d'importance que j'ay receus, lesquels vous sçauvez lors, car je veux que vous y soyez, quand j'en feray la proposition; et en les attendant je seray bien aise d'entendre tout ce que vous avez veu, fait et appris en vostre voyage de Paris. » Et pource qu'il estoit couché sur une paillasse et deux matelats bas sans aucun bois de lict, il vous fit apporter un carreau, sur lequel vous vous mistes à genoux; et lors luy ayant representé fort particulièrement tout ce qui s'estoit passé à Paris, pendant vostre séjour en ce lieu là, suivant ce qui en a esté cy-devant dit en general, il approuva l'ordre que vous y aviez mis et les esperances que vous aviez données à M. le cardinal de Bourbon, en conformité desquelles et des supplications que vous luy fistes sur ce sujet, il commanda deux lettres au sieur de Beaulieu-ruzé: l'une à M. d'O, par laquelle il luy mandoit en substance que son humeur ayant toujours esté (comme il ne l'ignoroit pas) plus enclinée à la douceur et à la clemence qu'à la rigueur et à la violence, il ne pouvoit approuver que l'on inquietast la vieillesse du pauvre archevesque de Glasco Escossois, en le voulant contraindre à sortir de Paris; que si bien autresfois du temps de la reine d'Escosse sa maistresse, il s'estoit montré passionné pour l'Espagne et ceux de Guyse, il sembloit plutost estre à louer qu'à blasmer en cette affection, n'estimant point qu'il y eust autres personnes ny autres moyens pour garantir la vie et la liberté de cette princesse, sur la forme de la mort de laquelle qui en voudroit discourir, il y auroit beaucoup de choses à dire; mais, quoy que ce soit, qu'il n'y avoit pas apparence, maintenant qu'elle estoit hors de ce monde, que ce vieil bon homme qui n'ose retourner en Escosse, et n'a que deux abbayes (1) en France pour tous biens, estats et pensions, se veuille plus engager au service de nul prince estranger, ny se mesler d'aucunes menées et pratiques contre cet Estat, où il fait dessein de terminer ses jours, joint qu'il luy en avoit esté donné de telles assurances par aucuns de ses plus spéciaux et affidéz serviteurs qu'il ne doutoit nullement de sa droite intention, et partant desiroit Sa Majesté qu'il fut traité honorablement, selon sa qualité; à quoy il luy enjoignoit

(1) Notre-Dame de l'Absis en Poitou, et Saint-Pierre de Pontoise.

de tenir la main, et y apporter tout ce qui dépendroit de l'autorité de sa charge.

La seconde lettre s'adressoit à M. le chancelier de Chiverny, par laquelle Sa Majesté luy mandoit aussi en substance, qu'ayant appris par vous ce qui se passoit à Paris, touchant les differends d'entre la Sorbonne, les supposts de l'Université et les curez de Paris, d'une part, et les religieux qui se tiltrent de la compagnie de Jésus, d'autre; les bons advis que vous luy aviez donnés là dessus, et les ouvertures que vous aviez faites en son conseil sur telles occasions, il luy vouloit bien dire que son intention ayant tousjours esté de laisser le cours de la justice libre entre tous ses sujets, sans aucune acception de personne, ny distinctions prejudiciables aux loix, ordonnances et constitutions du royaume, aussi ne vouloit-il pas maintenant empescher que ces parties contestantes dont il estoit question, ne peussent faire telles plaintes, demandes, requisitions, et plaidoyers les uns contre les autres, qu'ils adviseroient bon estre; mais bien eust il désiré que tout cela se peut passer sans aigreurs, injures, diffames, ny invectives les uns contre les autres, gardant la gravité, modestie, et circonspection ausquelles leurs professions sembloient les obliger; et en tout cas approuvoit-il, suivant ce que vous luy en aviez dit, que leurs plaidoyers, s'ils en venoient jusques là, se fissent sans esclat qui peut alterer les esprits, ny engendrer des altercations entre les peuples, et mesme qu'il ne fust rien prononcé par les juges qu'il n'eust auparavant esté informé de leurs sentimens ou qu'il ne fust de retour à Paris.

La troisieme lettre fut escrite comme de la main par le sieur de Lomenie, secretaire du cabinet, dautant qu'elle s'adressoit à M. le cardinal de Bourbon, par laquelle Sa Majesté (sur ce que vous luy aviez donné conseil de lui escrire le plus en conformité de ses requisitions qu'il seroit possible, afin d'essayer de soulager cet esprit plein d'inquietudes, lequel apparemment ne la feroit pas longue en ce monde, et partant ne pourroit tout ce qu'il luy promettoit tirer à aucune consequence future) luy mandoit semblablement en substance (car nous n'avons jamais peu avoir copie de ces trois lettres, et n'en avons eu cognoissance que lors que vous les leustes en la presence de M. de la Font et de l'un de nous quatre, avant que de les envoyer) qu'ayant tousjours esprouvé par effect la sincerité de son affection, depuis l'assurance que par vostre entremise ils s'en estoient entredonnée l'un à l'autre, qu'aussi l'avoit-il tousjours aymé comme s'il eust esté son propre fils et son heritier; dequoy luy voulant donner des tesmoignages, il luy en-

voyoit la lettre qu'il avoit désirée en faveur de l'archevesque de Glasco, ensemble celle qu'il escrivoit en conformité de ses advis et conseils à monsieur le chancelier et autres de son conseil, touchant les differens intervenus entre les personnes desquelles vous luy aviez parlé de sa part, et trouvoit bonne toute telle disposition qu'il deliberoit de faire de ses benefices, de laquelle il le prioit de luy envoyer l'estat, afin de le faire suivre, s'assurant tant de sa probité et bonne conscience envers Dieu et de sa prudence et sincere affection envers sa personne et son Estat, qu'il ne feroit rien au prejudice des saints canons ny des loix du royaume, grandeur et secreté d'iceluy.

Peu après que vos discours eurent esté achevez et ces lettres commandées, au stile desquelles, à nostre advis, vous eustes bonne part, arriverent messieurs de Biron, de Saint Luc, de Givry, de Marivault, de Parabere, de Vignolles, de Fouqueroles et autres dont il ne nous souvient pas, qui venoient, comme le Roy vous l'avoit dit, de visiter les tranchées, logemens d'artillerie, et le commencement du travail des deux mines, dequoy chacun d'eux dit sa ratellée sans s'accorder trop bien en mesme advis, et en eussent esté les contestations plus longues, mais le mareschal de Biron emportoit tousjours tout, quelque fois aussi souvent par haut parler que par raison, aussi que le Roy leur imposa silence, pour tenir le conseil qu'il vous avoit dit sur des advis qu'il venoit de recevoir par le moyen de trois divers espions qui ne se cognoissoient, ny ne sçavoient rien l'un de l'autre, et neantmoins se trouvoient tous conformes en cecy: à sçavoir que le comte de Mansfeld ayant joint M. du Mayne, ils s'estoient resolus, par commun advis, avant que de vouloir tenter un combat general pour faire lever le siege, et en attendant que les troupes, harassées du chemin, se fussent rafraischies, d'essayer encor une fois s'il y auroit moyen, en jettant un grand renfort de cavallerie et d'infanterie dans la ville de Laon avec quantité de munitions de guerre et de bouche, de contraindre le Roy à lever le siege avant que de hazarder tout le camp, et de marcher avec telles forces en cette expédition qu'elles peussent combattre tous les batteurs d'estrade qu'ils rencontreroient; voire mesme passer outre nonobstant tous les plus forts corps de garde qui pourroient estre posez: auquel conseil, où le Roy vous retinst, apres divers advis et contestations, il fut resolu d'aller dresser une embuscade à ce convoy dans la forest qui est entre Laon et la Fere, à travers de laquelle passe le grand chemin qui va d'une ville à l'autre, et la composer de troupes

si gaillardes et fortes, qu'elles fussent suffisantes pour combattre et mettre en route tout ce qui leur seroit opposé. Sur lesquelles forces le Roy ayant ordonné M. de Biron pour faire l'exploit, et à luy remis de prendre telles troupes en tel nombre qu'il adviseroit bon estre, il choisit huit cens Suisses et douze cens hommes de pied à l'eslite, trois cens chevaux legers, deux cens hommes d'armes et cent gentils-hommes pour estre pres de luy, la pluspart de la maison du Roy, du nombre desquels vous fustes, à force d'en importuner Sa Majesté, dautant qu'il vous refusa par trois fois d'estre de la partie, disant qu'il avoit encor plusieurs choses à sçavoir de vous, touchant vostre voyage de Paris.

M. de Biron ayant donc assemblé les troupes qu'il faisoit estat de mener avec luy et disposé son ordre pour bien combattre, il partit sur les six heures du soir, se rendit dans la forest à une heure de nuict, et marcha à travers icelle jusques à l'Orée, qui est du costé de la Fere, où il s'arresta, et y demeura caché en son embuscade pres de vingt heures entieres, donnant ordre qu'il ne pust estre descouvert, ny qu'il ne passast personne qui en pust aller donner advis au camp ennemy, faisant tenir seulement quelques vedettes sur les aisles de la forest, un peu avancées pour descouvrir tout ce qui sortiroit de la Fere et s'avanceroit sur le chemin de Laon. En quoy toutes choses reüssirent tant heureusement à M. de Biron et à tous vous autres messieurs, que comme vous commenciez à vous ennuyer d'une trop longue attente à vostre gré, estant desja les quatre heures du soir ou environ, ceux que M. de Biron avoit envoyé descouvrir le vindrent advertir qu'ils avoient descouvert sur le grand chemin de la Fere à Laon une si longue file de gens de guerre, qu'à leur avis ce ne pouvoit estre autre chose que tout le camp des ennemis, lesquels ayant eu advis de leur embuscade, le faisoient marcher en gros, pour les venir attaquer sans péril. Il y en eut plusieurs des principaux de vos troupes qui entrèrent en cette mesme opinion, et sur ce fondement conseilloyent, en chuchotant aux oreilles les uns des autres, de penser plutost à une honneste voire prematuree retraite, qu'à une attente perilleuse; à quoy ils vouloyent insister, et les nommeriez bien si vous vouliez, s'ils n'eussent veu M. de Biron, et plusieurs capitaines et gentils-hommes d'entre vous autres messieurs, oppiniastrent au contraire et estre resolu, quoy que l'on vous pust dire, de faire encor mieux reconnoistre ces gens de guerre de crainte de rien déterminer de honteux. Ce qu'ayant fait faire par le sieur de Fouquieroles, au moins ce nous semble, et deux

ou trois autres des plus judicieux, du nom desquels il ne nous souvient point, pource que nous n'estions pas lors pres de vous, et ne parlons de tout cecy que sur ce que nous en avons ouï conter à vous et à d'autres à leur retour, et surtout à monsieur le mareschal de Biron, lequel fut entierement esclairey que l'armée ne marchoit point en corps, et que ce qui faisoit une si longue file et si grande monstre estoit environ trois cens harnois de vivres, poudre et autres munitions, à la teste desquels marchoient, comme l'on sceut depuis au vray, huit à neuf cens mousquetaires ou piquiers parties Wallons, lansquenets et Liegeois à la queue, pareil nombre de gens de pied, tous Espagnols naturels, des meilleures terces du camp, et devant tout cela quatre cens chevaux en autant d'escadrons : tous lesquels voyant marcher en si bon ordre, il y eut encor grande dispute entre messieurs de Biron, de Givry, Montigny, Marivault, vous et autres capitaines principaux qui estoient pres de luy, touchant la forme d'attaquement dont il seroit à propos d'user, les uns voulans que l'on les chargeast en teste, à laquelle marchoit toute la cavallerie, avant qu'ils entrassent dans la forest, les autres que l'on les laissast passer et entrer dans la forest assez avant, afin de leur fermer le passage de la retraite, et puis que l'on les chargeast en queue, y ayant apparence qu'ils seroient davantage surpris et par consequent en demeureroient plus effrayez.

Neantmoins la premiere proposition fut tellement debattuë par messieurs de Givry, de Montigny et de Marivault, qui commandoient la cavallerie, et croyoient trouver plus de facilité et moins de peril en cet attaquement que s'adresser d'abord à de l'infanterie favorisée de charrois, qu'elle fut suivie, comme de fait, dès la premiere charge. Quoy qu'au commencement la cavallerie ennemie tesmoignant une grande resolution et mesme vint fort bravement au combat, neantmoins ils ne l'oppiniastrent pas longuement, mais se desbanderent quasi aussitost, et, par une espece de demie fuitte, se retirerent aux deux costez de leurs charriots et parerent de leur premiere troupe d'infanterie, laquelle s'estant mise en bon ordre, tiroit en telle furie qu'elle faisoit bien tenir le large à toute la cavallerie que M. de Biron avoit ordonnée pour faire la premiere charge : de quoy luy en extrême colere, il leur manda qu'ils eussent à enfoncer cette infanterie par le flanc gauche, et que, pour leur monstrier l'exemple et le chemin du devoir et de l'honneur, il en alloit faire autant par le flanc droict, en quoy il monstra bien qu'il sçavoit prendre son party au moins de peril ; ce qui fut executé

de toutes parts avec telle resolution que ces neuf cens hommes de pied , de la teste des charrois , et ce qui restoit de cavallerie furent aussi-tost mis en route et contrains de se retirer entre les chariots , d'où ils recommencerent leurs salves ; enquoy estans secondez par les autres neuf cens hommes de pied , tous Espagnols , qui s'estoient mis en bataillon de piquiers fortifiez en teste , aux aisles et à la queue de leurs mousquetaires et de leurs charrois , ils se défendoient si obstinément que M. de Biron fut contraint , toute sa cavallerie n'en voulant plus manger et cela non sans raison , de faire avancer son infanterie , tant Suisses que François , qui à l'envy attaquèrent fort bravement les ennemis , desquels n'ayans pas esté moins courageusement receus , il se fit entr'eux un des plus obstinez combats que l'on ait guerres veu : tellement que M. de Biron voyant qu'ils ne pouvoient estre forcez par les seuls gens de pied et que la longueur de cet attaquement pourroit donner loisir d'en porter l'advis au camp ennemy et de luy faire tomber sur les bras des forces du tout disproportionnées aux siennes , il prist resolution avec vous autres messieurs de la Cour , qui estiez avec luy , de faire mettre pied à terre à toute la cavallerie , pour aller la hallebarde ( dont l'on avoit fait apporter quantité ) au poing , assistée du pistolet et de l'espée , enfoncer les Espagnols qui faisoient une tant obstinée resistance , tesmoignans de ne s'estonner nullement de tout l'effort des gens de pied. Ce qu'ayant aussi-tost commandé et luy mesme monstre , comme il l'avoit dit , le chemin et l'exemple aux autres , il fut soudain obey de tous avec promptitude et courage merveillex ; tellement que faisant marcher devant luy , à ce que l'on nous a dit , messieurs de Guित्रy , Montigny , Marivault , Trigny , d'Arembure , la Curée , d'Heures , Loppes et autres dont il ne nous souvient pas bien , avec trois cens hommes armez ou environ , et les suivant de pres avec quasi pareil nombre , duquel vous estiez avec tous les autres de la maison du Roy qui l'avoient suivy en cette expedition , les ennemis furent attaquez d'une telle hardiesse et impetuosité de tant de costez et de si pres , que les mousquetades , voire mesme les coups de piques pour la plupart estans devenus inutiles à cause de la proximité des combattans , et des coups de main qu'ils se donnoient , s'entretenans comme collet à collet , qu'ils furent contrains de ceder à une telle furie , de se débander , se sauver dans les bois et sous leurs charettes et chariots ; et fut la tuërie si grande qu'il en demeura pres de mille ou douze cens morts sur la place , tous les chariots demeurans en la possession de M. de Biron , qui ne pust neantmoins jamais empescher

que la plupart des vivres et munitions ne fussent enlevées , degastées et gouspillées par ses gens de guerre ; aussi que ayant esté tué ou estropié plus de quatre cens des chevaux desdits chariots ou de la cavallerie , il n'en peut amener que la moindre partie en l'armée.

Il y eust aussi quelques prisonniers , mais en petit nombre et de peu de qualité , tous ceux qui estoient restez à cheval s'estans sauvez à la course vers la Fere , ce qui restoit de gens de pied sains ayans jetté leurs armes et s'estans espars dans la forest , en sorte qu'il n'y eut moyen de les attrapper : outre que M. de Biron ( apprehendant tousjours que l'armée ennemie ou grande partie d'icelle luy tombast sur les bras ainsi las et harassés qu'estoient ses gens de guerre ) leur fit faire des deffenses expresses , sur peine de la vie , de se débander pour courir apres , et , en suite ayant remis ses troupes en ordre propre pour faire encor une brave retraite , s'il en estoit besoin , apres que chacun eut pris sa refection du pain , vin et viandes cuites , dont il se trouva quantité en ce convoy , il se retira toute la nuit amenant ces charrois et ses prisonniers avec luy , et arriva en cet esquipage dans le corps de l'armée , sans avoir eu aucune allarme , avec autant de gloire , d'honneurs et de louanges de la part du Roy envers vous tous , d'accollades et d'embrassades des plus qualifiez ( car c'estoit une monnoye de laquelle de longue main Sa Majesté s'estoit aydée pour faire faire montre aux gens de vraye vertu ) , que d'envie , jalousie et regret de tous ceux qui n'y participoient pas. Le Roy estoit encor au lit lors que vous arrivastes , et M. de Biron luy contant tout ce qui a esté dit cy-dessus , ce ne fust sans y entremesler quelques vanitez et vanteries à sa mode , qui meritent quelques excuses , puis que le plus grand Roy et plus grand capitaine du monde se laissoit bien emporter à ces deux passions.

Or , comme l'on entretenoit le Roy de ces discours , il arriva deux espions qui advertirent Sa Majesté , que tant s'en faut que le camp des ennemis , estonné de cette défaite et de la perte d'un si grand convoy , fit dessein de se retirer , comme ils avoient trouvé que l'on le publioit par l'armée , depuis l'arrivée de ceux qui avoient eu part à un si grand exploit , que , tout au contraire , ils avoient appris que le comte Charles de Mansfeld et M. du Mayne , dépités de cela , se preparent pour marcher en gros et venir faire lever le siege à vive force ; parlans de cela les uns aux autres tout publiquement dans leur armée , et disans , n'attendre plus que l'arrivée de quelques troupes qui les devoient encor venir joindre : ce qui fit resoudre le Roy ( nonobstant

que le mareschal de Biron se mocquast de cet advisement) d'envoyer M. de Givry, maistre de camp de la cavallerie legere, à la guerre, avec trois cens chevaux, qu'il cholsit des plus lestes et reposez de l'armée, luy donnant charge expresse de ne revenir point qu'il ne luy apportast nouvelles certaines du lieu où estoit le camp des ennemis, de quelles forces il estoit composé, et quels pouvoient estre leurs desseins : à quoy M. de Givry obeyssant, il partit trois heures apres le commandement receu; et ayant demeuré pres de trois jours dehors, il revint asseurer le Roy qu'il n'y avoit aucune bande des ennemis qui eust encor passé la riviere d'Oyse, et que selon ce que l'on pouvoit conjecturer de leurs desseins, il y avoit plus d'apparence que le camp fût plutost prest de reprendre la route de Flandre que de vouloir plus rien entreprendre pour faire lever le siege de Laon : tellement que le Roy se fondant et s'asseurant sur ce rapport comme tres certain, il fit dès le mesme soir une partie pour aller le lendemain disner à Saint Lambert, membre dépendant du comté de Marie, domaine de Navarre, situé dans la forest auquel il y avoit une mestairie où, estant jeune, il estoit allé souvent manger des fruicts, de la cresse et du fromage, se delectant grandement de revoir ces lieux là où il avoit esté en son bas âge.

Or, pource qu'il ne se passoit gueres nuit qu'il ne veillast et allast revisiter le travail que l'on faisoit aux batteries, mines et tranchées, si tost qu'il eust disné avec dix ou douze des principaux d'entre vous autres messieurs qu'il avoit menez avec luy jusques au nombre de trente chevaux seulement, il se jeta sur un lit pour se reposer (car nous dirons en passant que les peines et les fatigues de sa jeunesse l'avoient tellement habitude à tout ce qui estoit necessaire pour un Roy, soldat et capitaine tout ensemble, qu'il sommeilloit et s'éveilloit quand il vouloit), où le voyant endormy, vous vous en allastes promener huit ou dix ensemble vers le plus couvert et le plus frais du bois (car c'estoit le temps des plus aspres chaleurs de la fin de juin, ou commencement de juillet), tirant vers le chemin de la Fere à Laon, et n'eustes pas fait douze ou quinze cens pas, que vous entendistes un grand bruit de plusieurs voix confuses, divers cris et houpemens de personnes, qui sembloient s'entr'appeller les unes les autres, hannissemens de chevaux, et en suite des bourdonnemens de tambours et retentissemens de trompettes, mais ceux-là encor comme grandement esloignez. Vers lesquelles rumeurs vous estant acheminez pour en apprendre les veritables causes, vous advisastes à travers les branchages quelques huit cens pas

de vous sur ce grand chemin, une quantité de goujars et valletaille qui suivoient des troupes d'infanterie, lesquelles marchaient devant en fort bon ordre, sans bruit ny battement de tambour, que vous jugeastes, quoy que de loin, estre tous estrangers, et puis apres vistes des charrois et pieces d'artillerie qui suivoient tout cela, les chartiers crians *hay*, tant qu'ils pouvoient, et faisant claquer leurs fouets qui retentissoient fort dedans ces bois; tout cela marchant en apparence d'un grand corps d'armée : ce qui vous estonna bien fort, et fit aussi-tost retourner sur vos pas, en grande diligence, tant pour éviter le peril que pour en advertir le Roy, lequel vous trouvastes resveillé, se promenant dans un jardin et venant de hoher un prunier de damas blanc, qui portoit les plus belles et meilleurs prunes, à ce que vous me distes me contant tout ce, que vous avez jamais mangées, auquel en l'abordant vous criastes : « Pardieu, Sire, nous venons de « voir passer des gens qui semblent avoir desseins « de vous preparer une collation de bien autres « prunes que celles-cy et un peu plus dures à digerer, si vous ne montez promptement à cheval, pour aller donner ordre à vostre armée. — « Que voulez vous dire par là ? repartit le Roy. — « Nous voulons dire, Sire, respondites vous « quasi tous en foule, que nous venons de voir « passer, au moins selon nostre advis, tout le « camp des ennemis, avec l'artillerie au milieu, « ceux qui sont devant marchant en silence sans « aucun son de tambour que nous ayons oüy, tout « cela filant en fort bon ordre dans le chemin qui « va de la Fere à Laon à travers de cette forest, « et est à craindre qu'il n'en arrive des troupes « à la teste de quelques quartiers des vostres, « avant qu'elles en ayent ny allarme, ny advis, « tant les batteurs d'estrade ont esté peu solgneux de prendre bien langue. »

Surquoy le Roy, apres que vous luy eustes juré que tout cela estoit tres-vray, s'émouvant grandement et criant *des chevaux ! des chevaux !* il vous dit : « Il y a bien un quart d'heure qu'il me « sembloit entendre quelques resonnemens de « tambours et trompettes ; mais tout cela me sembloit si esloigné, aussi que je me reposois sur « le rapport de Givry, que j'estimois que ce fussent ceux de mon armée. » Et sur cela montant à cheval, il se mit au grand gallop, prenant le chemin de son quartier, criant à cheval, par tous ceux où il passoit et à tous les particuliers qu'il rencontroit, leur commandant de se rendre tous en armes à son quartier ; et outre cela il dépescha douze de ceux qui estoient avec luy, pour aller passer en trois ou quatre quartiers qu'il leur départit aussi tost à chacun (car il por-



toit tousjours dans sa pochette un controlle de tous ceux des logemens de son armée), pour commander de sa part à toutes les troupes de cavallerie de monter à cheval armez de toutes pieces, et de se venir ranger par escadrons aux environs de son logement; à celles d'infanterie, de se venir mettre en bataillons, formez pour le combat entre son quartier et les logemens des trenchées, et attendre là ses mandemens: lesquelles prevoyances et diligences (comme ce prince les avoit admirables, et, le cul sur la selle et l'espée au poing, se monstroient tousjours le plus judicieux et ferme de courage de tous ses capitaines) servirent grandement pour éviter beaucoup d'accidens fascheux, d'autant que quelque soin et celerité qu'il eust tesmoignée de sa personne, si n'étoit-il peu arriver en son quartier qu'il n'y eust desja quantité de troupes de cavallerie ennemie à la veuë d'iceluy, lesquelles se formoient en escadrons à mesure qu'ils arrivoient, suivant le commandement de leur general, lequel (comme c'est l'ordinaire des grandes entreprises principalement és faits militaires, que de se trouver sujettes à des accidens et difficultez non preveuës) n'ayant peu faire marcher ses troupes avec la diligence qu'il s'estoit imaginée, tant pource que les bandes du camp, comme il fut sceu depuis, n'estoient peu toutes arriver au rendez-vous pris à l'heure ordonnée, pour les embarras qu'elles avoient apres trouvez dans le grand chemin qui traverse la forest, de plusieurs hommes et chevaux morts, charlots et charrettes rompues, demeurées en iceluy de la déroutte de ce grand convoy, pour ce que l'essieu d'une coulevrine s'estant rompu il avoit fallu faire halte, afin d'y en remettre un autre, que ceux qu'il avoit envoyez reconnoistre une scituation avantageuse pour le campement de son armée (en laquelle sur tout il y eut bois, eau, et facilité de recouvrer des fourrages, toutes les moissons estans encor debout) avoient esté plus long-temps à revenir qu'il ne s'attendoit, que pource qu'il n'avoit pas jugé à propos de faire paroistre ses troupes qu'elles ne fussent toutes hors de la forest, en ordre de bataille, sçachant bien qu'il avoit affaire à un des plus vigilans, laborieux, industrieux et déterminez princes de son siecle; auquel par tous ces dilayemens et retardemens (comme quelquesfois il advient que la trop grande circonspection et retenue prejudicie autant que pourroient faire les conseils prematurez et la precipitation) il avoit donné loisir d'avertir par tous les quartiers, et de disposer ses escadrons et bataillons pour un combat general sans desavantage, ny estre contraint d'affoiblir les gardes des trenchées: tellement que tout le reste

de cette journée, tant le Roy que les chefs ennemis se portans plus à loger et camper si seulement leurs troupes, qu'elles ne donnassent nulles prises sur elles qu'à nul autre dessein, il ne se fit aucune faction de guerre, ayant de toutes parts eu defences expresses de ne s'avancer ny engager à aucune chose, sans commandement particulier, ne faisant à cette occasion que s'entre-regarder, faire fanfarer leurs trompettes et bruire leurs tambours, chacun à la mode de sa nation; et fut le Roy si heureux, ou pour mieux dire, si judicieux et prevoyant, que vous ayant envoyé reconnoistre tout à l'entour sur le haut une certaine petite colline qui paroissoit entre les troupes des ennemis et les siennes, et luy ayant rapporté qu'elle estoit toute seule, en forme quasi ronde, et de telle eminence qu'elle pouvoit apporter un tres-grand desavantage à son siege, si d'abord les ennemis s'en fussent saisis, il y envoya un regiment pour s'y loger et retrancher, et peu apres deux bastardes, à l'exécution desquelles Sa Majesté vous commanda de demeurer, et y vinst peu apres luy mesme pour reconnoistre et ordonner de tout; et ainsi cette journée s'estant toute passée à faire des logemens, ordre et dispositions des troupes, il ne se fit aucune faction de guerre qui merite de le reciter.

Mais le lendemain ne se passa pas ainsi, car chacun s'estant préparé durant la nuit, il s'attaqua peu apres de toutes parts (chacun essayant de se saisir d'un petit boqueteau tout isolé qui estoit demeuré entre les deux camps, sans avoir esté occupé ny des uns ny des autres) une des plus grandes escarmouches qui ne se soit guerres veuë, sans grand effet neantmoins, ayant entendu dire du depuis à M. de Parabere, qui vint le soir souper avec vous sur le haut de vostre colline où vous estiez fort commodément huté pres de vos deux pieces, qu'il estimoit ne s'estre pas tué vingt hommes ny blessé deux fois autant de tous costez, quoy qu'il se fust tiré plus de cinquante mil coups d'harquebusades ou mousquetades, l'intention de M. le comte Charles de Mansfeld ny de M. du Mayne n'ayant jamais esté, ainsi qu'il fut depuis sceu de quelques prisonniers, de donner bataille ny donner ouverture à un combat general, redoutant par trop la suffisance du Roy au mestier de la guerre, son courage intrepide et l'excellence de sa cavalerie, quasi toute composée de noblesse françoise, à laquelle il sçavoit bien, par jugement et par diverses experiences, que la leur n'estoit nullement comparable, mais d'essayer, sous l'apparence de la presentation d'icelle bataille ou de la proximité de la ville, de faire lever le siege, ou

trouver moyen de jeter dans la place trois mil hommes de pied et trois cens chevaux, lesquels par diverses et furieuses sorties eussent apres empesché toutes sortes d'approches pres des fosses, voire eussent entrepris de faire des logemens dehors à moitié costé, et finalement contraint le Roy de se retirer. Toutes lesquelles choses ne leur ayant pas réussi, ils leverent eux mesmes leur camp une nuit et se retirerent à la Fere par le mesme chemin et avec le mesme ordre qu'ils s'estoient avancez, sans aucune autre faction de guerre, le Roy n'ayant pas voulu les faire suivre; mais se contentant de la honte qu'il leur avoit fait recevoir, il retourna toutes ses pensées au parachevement de son siege.

#### CHAPITRE LIV.

*Capitulation de Laon. Opinion du Roi sur Biron et sur Bouillon. Rosny chargé d'une mission vers ce dernier.*

Encor qu'il se fût passé tant de factions, actions et choses notables et dignes de remarque, durant ce grand et long siege de Laon, (dautant que toutes les forces d'Espagne, des Pais-Bas, et celles des ligueurs de France conjointement porterent toutes leurs affections, industries et puissances pour secourir cette place et en faire lever le siege) que qui en voudroit représenter toutes les circonstances et les particularitez, il s'en pourroit faire un gros volume, si ne laissons nous pas, nous qui avons fait des recueils abrezgez des Memoires de vostre vie, d'avoir trois raisons, ce nous semble-il, suffisantes pour excuser toutes nos obmissions : la premiere, que nostre intention est de parler seulement en général de toutes les choses où vous n'aurez pas esté; la seconde, que la pluspart de ce que nous pourrions adjouter à ce que nous en avons dit, sont choses publiques que les historiens ne manqueront pas de ramentevoir; et la troisieme, voire la principale, que vous ne demeurastes pas tousjours aupres du Roy durant ce siege, Sa Majesté vous ayant fait faire plusieurs voyages en divers lieux et vers diverses personnes, pour vous faire essayer de descouvrir plusieurs affaires d'importance qui se demenoient et traumoient toujours, lors que l'on sçavoit le Roy estre attaché en de grands sieges ou affaires, pour lesquelles vous allastes à Paris, Roüen et autres lieux, par deux ou trois fois, et en suite à Sedan : pour lesquelles causes, continuant d'abrezger ce qui se passa en ce siege de Laon, depuis que l'admirable experience du Roy au demeslement des affaires de la guerre, et sa vraye vail-

lance, et tousjours active diligence et prevoyance en icelles eut contraint les duc du Mayne et comte de Mansfeld, avec leurs grandes et puissantes armées rassemblées de toutes parts, de s'esloigner de la présence de Sa Majesté, à la sourdine et avec grande frayer, nous vous ramentevrons seulement qu'à vostre retour de Sedan, du voyage duquel nous dirons cy apres quelque chose de ses causes et de ce que vous y fistes, vous trovastes que la ville et garnison de Laon, où il y avoit un des fils de M. du Mayne renfermé dedans, avoient capitulé et traité de se rendre dans certains jours, au cas que pendant iceux ils n'eussent point de secours notables; et partant laisserons nous tout ce qui se passa en suite de cette capitulation, pour revenir à la deduction des causes de vostre voyage à Sedan, pour lesquelles rendre plus intelligibles, il faut sçavoir que deux jours apres la défaite du grand convoy, à cause de laquelle M. de Biron tenoit des propos grandement extravagans, le Roy vous envoya querir si matin qu'il estoit encore au lict (et n'y avoit en sa chambre que l'Oseray et Armaignac), lequel apres quelques discours de ce qui s'estoit passé en ces grands combats où vous vous estiez trouvé, et voyant que vous louiez M. de Biron, il vous dit : « Tout ce que vous dites est bien vray; « mais outre qu'il en parle tant et y adjoust tant « de choses qu'il semble que vous n'avez tous rien « fait, et que tout ce qu'il en dit n'est qu'à des- « sein de me demander le gouvernement de cette « place, de la fortification de laquelle il parle « desja tout ouvertement, jusques à menacer de « faire quelque escapade si je luy refuse; mais « outre que j'en suis desja engagé de parole en- « vers d'autres que j'ayme et ausquels je me fie, « je craindrois qu'en luy baillant et la fortifiant « comme il dit, de le rendre insupportable lors « de ses despits et vanteries, capable, luy es- « tant si proche des Pays-Bas, de tout mespriser « et tout imaginer; et partant vous prié-je de « penser à toutes ces choses et le mettre un peu « sur ces discours pour voir ce qu'il dira, car « l'on m'a dit qu'il vous carresse en esperance « que vous consentirez, ou pour le moins ne « vous monstrez point contraire au mariage « qu'il desire faire de son second frere avec « vostre niepce de Saint Genies, qu'il sçait estre « fort riche; car d'un tel esprit et tant presomp- « tueux, qu'il voudroit persuader au monde qu'il « m'a mis la couronne sur la teste, me semble-il « qu'il en faut craindre toutes choses; et partant « essayez de le faire parler, et puis m'en dittes « vostre advis; car j'experimente tous les jours « qu'il y a des esprits qui ne se peuvent rassasier

« de biens et d'honneurs, et des naturels de si perverse inclination que l'on ne sçauroit obliger.

« Mais, me voulant promettre que vous ne serez jamais de ceux-là, je vous prie de me dire ce que vous pensez touchant les procédures de M. de Bouillon qui fait tant le sapient, et que vous cognoissez de longue main aussi bien que moy, et combien tant plus je l'ai obligé, tant plus il m'a fait d'argarades et tascé tousjours de faire défler les huguenots de moy, et tesmoigné peu de soin de me bien servir et de desir de mon établissement en une absoluë autorité royale. Vous sçavez comme je luy ay fait avoir l'heritiere de Sedan en mariage, notwithstanding que plusieurs personnes me le desconseillassent, et peut-estre avec raison; vous sçavez aussi comme je luy entretiens grande quantité de gens de guerre, sous-ombre de garder comme frontieres les places de ce qu'il appelle son Estat, que je voy bien qu'il ayme mieux que moy, mon service ny son devoir, puisque nonobstant qu'il ne soit pas loin d'icy, qu'il m'ayt veu engagé en un si grand et long siege, qu'il n'aye point ignoré qu'il s'assembloit de toutes parts, et en France, et en Flandre, de grandes forces pour secourir Laon, si ne m'a-il fait sçavoir depuis deux mois aucunes nouvelles de luy, ny fait offrir de me venir servir de sa personne et des troupes que je luy entretiens, comme vous jugez bien que c'estoit le devoir d'un loyal et obligé serviteur, et n'est pas possible qu'il fasse tout cela par innocence, si elle n'est fourrée de malice bien noire, laquelle trois autres ne l'ont pas moins, mais ne sont pas si soigneux de la cacher que luy : à sçavoir le comte d'Auvergne, le duc d'Espèrnon et le mareschal de Biron, qui semblent avec luy tous concertez à desirer que je ne sois jamais Roy absolument obey dans toutes les parties de mon royaume, tant ils craignent que je me ressouvienne tousjours des belles fredaines qu'ils m'ont faites autresfois : or me faut-il prendre patience et sortir le plus doucement que je pourray de ce difficile siege où je suis engagé; et cependant veillez tousjours à descouvrir tout ce que vous pourrez de tous costez, et sur tout du comte d'Auvergne, car l'on m'a dit qu'il a envie de faire une escapade, quoy que si c'est de sa seule intelligence je n'en apprehende point d'accident où il ne me soit facile de remedier. »

Sur lesquels derniers propos le Roy vous ayant licencié, il arriva le lendemain que vous estiez allé à son coucher et qu'il estoit prest de prendre sa chemise de nuict que le sieur Berin-

guen vous vint dire tout bas à l'oreille, qu'il y avoit à la porte de la chambre un gentil-homme de la part de M. de Bouillon, qui avoit des lettres à presenter au Roy; lequel Sa Majesté ayant fait entrer, luy dit avoir esté envoyé de la part de M. de Bouillon pour luy faire des excuses de ce qu'il ne l'estoit pas venu trouver pour le servir de sa personne et de ses troupes qu'il commandoit, mais que l'empeschement en estoit aussi legitime que la cause funeste et douloureuse pour luy, comme Sa Majesté le cognoistroit mieux par la lettre qu'il en escrivoit; laquelle luy ayant esté baillée, il la leut aussitost, puis dit au gentil-homme qu'il estoit infiniment desplaisant de son desastre et deplorable accident, mais qu'estant chose sans remede, il falloit que, comme sage et craignant Dieu, il eut recours à luy, et que quant à ce qui despendoit des hommes il lui feroit paroistre, tant en cette occasion qu'en toutes autres, qu'il le tenoit pour son serviteur particulier, et qu'aussi luy tesmoigneroit-il qu'il luy seroit tousjours bon Roy et bon maistre, dequoy il lui donneroit des assurances par un de ses plus affidez serviteurs qu'il cognoissoit de long-temps, et que le lendemain il auroit ses depeschés pour le devancer. Sur lesquelles paroles le gentil-homme s'estant retiré, le Roy vous bailla les lettres de M. de Bouillon à lire, desquelles n'ayant peu retenir les propres paroles vous nous en distes quelque chose de la substance qui estoit telle, à sçavoir : qu'il n'eust pas manqué, en s'aquittant du devoir d'un tres-humble, tres-obligé et tres-loyal serviteur, de venir servir Sa Majesté de sa personne et des troupes qu'il luy avoit baillées à commander, comme les occasions luy avoient semblé le requérir, s'il n'en eust esté absolument empesché par une occasion autant legitime que deplorable, funeste et douloureuse pour luy, qui estoit la mort de sa femme, laquelle luy estoit d'autant plus sensible, que plus elle luy avoit tesmoigné de cordiale et sincere amour en mourant, luy ayant fait un don universel de tous et un chacun ses biens, lesquels, à ceste occasion, il envoyoit remettre sous sa protection, le suppliant tres-humblement de vouloir appuyer sa juste possession de son autorité royale et bien-veillance accoustumée, ne doutant point qu'il ne se trovast plusieurs pretendans de grande qualité qui luy voudroient disputer son droit, duquel, lors qu'il plairoit à Sa Majesté, il luy en donneroit entiere cognoissance, et l'ayant veu l'en feroit le seul juge.

Lesquelles nouvelles et depeschés le Roy vous ayant encor fait voir une autre fois, il vous dit : « Hé bien ! M. de Thurenne est-il pas bien hon-

« neste et bien humble? cela veut dire qu'il a  
 « fort affaire de moy; car, s'il vous en souvient,  
 « il ne parloit pas si doux à Mont-auban et à  
 « Sainct Paul de la Miatte, lors d'une assem-  
 « blée qui s'y tint, où vous me vinstes trouver,  
 « en laquelle estoit un des docteurs de l'electeur  
 « Palatin, nommé Butrix, avec lequel les mi-  
 « nistres et gens de sinode et de consistoire, luy  
 « et ses partisans; comme Constans, Aubigny,  
 « Sainct Germain, Beaupré, Sainct Germain de  
 « Clan, Bresolles et autres tels broüillons, fai-  
 « soient toutes sortes de menées et pratiques,  
 « pour faire que toutes les eglises de France re-  
 « solussent de se mettre en espee d'Estat popu-  
 « laire et republique comme les Pays-Bas, esli-  
 « sant pour protecteur, afin d'en tirer secours  
 « puissant en temps opportun, le susdit comte  
 « Palatin, qui establirait, disoient-ils, quatre  
 « ou cinq lieutenans dans les provinces avec  
 « puissance esgale, sans se fonder plus sur les  
 « princes du sang, desquels les esperances de  
 « pouvoir parvenir à la couronne diminueoient  
 « grandement le zele de la religion et les rendoit  
 « plus circonspects à n'offencer pas legerement  
 « les grands et villes du royaume; enquoy il ne  
 « tesmoignoit pas moins d'ignorance que de ma-  
 « lice et de mauvais dessein contre moy, ne  
 « considerant pas que la grande diversité des si-  
 « tuations des eglises de France, esparses par  
 « tout le royaume, de celles des provinces unies  
 « et reduittes en un petit canton de difficiles  
 « acez, ne permet pas d'user de mesmes for-  
 « mes de proceder; et vous vous souviendrez,  
 « si jamais vous voyez les eglises de France,  
 « comme ils les appellent, desnudées des princes  
 « du sang dont l'autorité et la consideration  
 « les soutienne et unisse en mesme resolution,  
 « et qu'un roy de France les attaque puissam-  
 « ment et soudainement, que tous les grands et  
 « plus qualifiez et les grandes villes faisans pro-  
 « fession de la religion, ne se voulant point de-  
 « férer les uns aux autres, feront des desseins  
 « chacun à part, et entreront en de telles divisions  
 « qu'un grand affoiblissement, voire peut-estre  
 « une destruction totale, se rendra inevitable  
 « parmy eux; et encor que M. de Thurenne soit  
 « en reputation d'avoir un grand esprit, de sça-  
 « voir beaucoup de choses, et qu'en effet, il parle  
 « des mieux dans les assemblées et les conseils  
 « où il se trouve, si ay-je tousjours reconnu  
 « qu'aux choses fort importantes son jugement  
 « est grandement fautif, et qu'il a tousjours  
 « pris les mesures de ses desseins, ou trop  
 « estendues, ou trop resserrées, et plutost selon  
 « que sa passion et ses interets l'ont porté,  
 « que selon la raison et l'équité, desquelles pro-

« cedures et intentions il ne s'est jamais dé-  
 « party, mais les a tousjours renouvelées de  
 « temps en temps, comme il les tesmoigna dès  
 « le lendemain de la bataille de Coutras où son  
 « escadron ne fit pas des mieux. Et neantmoins,  
 « croyant que la reputation du gain d'icelle au-  
 « roit tellement effrayé les provinces de Perigort  
 « et de Limosin que tout se reduiroit sous sa  
 « puissance, il me débaucha (comme vous sça-  
 « vez, car je vous en fis des plaintes lors que je  
 « vous envoyay trouver mon cousin le prince de  
 « Conty) le tiers de mon armée pour mener en  
 « ces provinces là, sous des esperances qu'il  
 « donnoit et promesses qu'il faisoit de les faire  
 « tous riches de butin; et de chasser la religion  
 « catholique de ces provinces là, où neantmoins  
 « il ne fit rien qui vaille, ne prit pas une bico-  
 « que et furent les siens bien battus à Sarlat  
 « (dont, Dieu me veille pardonner, je ne fus pas  
 « trop marry); et encor depuis en l'assemblée  
 « de la Rochelle, un peu devant et apres la mort  
 « de M. de Guyse, vous sçavez s'il n'essayoit pas  
 « de faire les mesmes choses contre moy, que  
 « l'autre estoit prest d'exécuter contre le Roy,  
 « et bien plus rescentement durant nostre grand  
 « siege de Roüen, que se voulant prevaloir de  
 « cinq ou six mil reistres qu'avoit amenez le  
 « prince d'Enhalt, auquel il persuadoit ce qu'il  
 « vouloit, combien de peines m'a il données,  
 « estant tousjours en contestation avec le ma-  
 « reschal de Biron, et de bravades m'a il faites,  
 « me menaçant, si tost que je luy refusois quel-  
 « que chose, de ramener les reistres; et de fait,  
 « j'ay eu advis certain qu'il a esté cause qu'ils  
 « se sont deux fois mutinez et nous ont contrain-  
 « t de boursiller par tout pour leur fournir ar-  
 « gent, dautant que ce corps là, separé de mon  
 « armée, le prince de Parme n'eust esté que trop  
 « puissant pour me faire lever le siege et me  
 « mettre sur la défensive.

« Mais comme vous sçavez que c'est mon hu-  
 « meur d'oublier facilement les offenses que l'on  
 « m'a faites, et que je n'entends pas plutost la  
 « repentance dans la bouche du coupable que  
 « je n'aye le pardon dans le cœur et la volonté  
 « de luy tesmoigner que je n'ay plus souve-  
 « nance de ses fautes, aussi ne vous dis-je point  
 « tout cecy pour ressentimens que j'aye des fau-  
 « tes passées de M. de Bouillon, mais seulement  
 « pour vous en instruire, afin que s'il vous vient  
 « à alleguer ses merites et services dont il est  
 « accoustumé de faire grande parade, ou s'il  
 « vous met sur des discours approchans de cela,  
 « vous ayez dequoy luy respondre, non point  
 « en mon nom, mais comme de vous mesme;  
 « car, pour mon regard, je vous declare que,

nonobstant tout ce qui s'est passé, je suis résolu de luy donner des preuves de ma bienveillance et de mon assistance, pour lesquelles « rendre plus notables et certaines, je desire, « outre les lettres que je luy escriray, que vous « l'alliez visiter et consoler de ma part, luy don- « niez sur ses requisitions toute sorte de bonnes « paroles, et mesmes voyez les donations de sa « femme, dont il parle en ses lettres, afin que, « sur le rapport que vous m'en ferez, je puisse « soutenir ses pretentions avec plus de raison « et de justice, lors que les apparens heritiers « de ces biens m'en feront quelque instance : « j'ay desja fait faire les responcez à ces lettres, « mais je n'ay pas voulu les faire fermer que « vous n'en ayez oüy la lecture. » Et les ayant lors fait apporter, vous trouvastes qu'elles disoient ainsi :

*Responce du Roy à M. de Bouillon de Thurenne.*

Mon cousin, j'approuve vos excuses et vos submissions : je plains vostre perte qui est tresgrande, ayant trouvé et puis perdu une femme fort vertueuse, de douce humeur, riche et de bonne maison, qui sont toutes qualitez excellentes, lesquelles ne se rencontrent pas souvent ensemble ; mais je sçay aussi que vous estes si sage, et avez tant d'experiences de l'instabilité des choses mondaines, que vous recevrez cette affliction comme de la main de Dieu, duquel seul vous pouvez attendre l'entiere allegiance à vos douloureux ressentimens ; et ne laisseray pas neantmoins de contribuer, pour un si bon sujet, tout ce qui pourra dependre de ma bienveillance, assistance et protection, sur tout si vous estes fondé en droict, raison et bons tiltres, comme vous me l'escrivez ; mais, en quelque sorte que les choses soient passées, je vous feray paroistre que je vous ayme, vous tiens pour mon serviteur et que je vous seray bon maistre : de toutes lesquelles choses j'ay donné charge à monsieur le baron de Rosny, que vous cognoissez de longue main, et auquel j'ay toute confiance, de vous donner des assurances plus particulieres, à prendre de vous celles que vous ne voudrez pas confier au papier, et voir tous les tiltres sur lesquels vous fondez vos pretentions, afin que, sur son rapport, j'en puisse parler plus ouvertement et certainement. Sur ce je prieray Dieu, mon cousin, qu'il vous ayt en sa garde.

Du camp devant Laon, ce 8 juillet 1594.

Ayant entendu la lecture de ses lettres, le Roy vous dist que ne vous pouvant davantage instruire de ses intentions que par ce qu'il vous

avoit dit et que vous aviez ouy, il vous prioit de partir au plutost, de faire bonne diligence, vous informer de toutes choses le plus particulièrement que vous pourriez, et prendre bien garde à vous par les chemins, à cause des places que tenoit M. de Guyse, quoy que sa mere luy eust desja porté parole qu'il estoit son serviteur dans l'intention, et que bien-tost il le feroit paroistre par effet. Ayant pris congé du Roy, il vous embrassa par deux fois, et vous dit : « Adieu, mon amy, revenez bien-tost et « prenez garde à vous ; car j'en ay encor bien « affaire, trouvant vostre entremise des plus « sinceres et des plus heureuses, quoy que « j'apprehende bien que vous ne serez pas long- « temps sans estre mal avec ma sœur et le « comte de Soissons, car j'ay appris qu'ils se « plaignent que vous leur avez donné des as- « rances de beaucoup de choses à Chartres, au « temps de mon sacre, dont ils disent que l'ap- « parence des effets va journellement en dimi- « nuant ; dequoy nous parlerons à vostre re- « tour.

CHAPITRE LV.

*Lettre de Rosny au cardinal de Bourbon, Voyage de Rosny à Sedan. Conférences avec le duc de Bouillon.*

Le bruit des armes et des combats et l'embaras de nostre memoire, entre tant d'autres affaires diverses que vous nous racontastes en ce mesme temps, les entremeslans les unes parmy les autres, selon que l'occasion s'en presentoit, nous en ayant fait oublier une partie, nous vous ramentevrons comme, à vostre retour de la desrouté du grand convoi des ennemis, vous dépeschastes dès la nuit mesme un de vos gentils-hommes, nommé le sieur du Peyrat, parent de l'un de nous quatre, vers M. le cardinal de Bourbon, pour luy porter les trois lettres du Roy, de la substance desquelles il a cy-devant esté fait mention. Nous avons creu, nous en estans maintenant ressouvenus, que vous n'auriez point desagréable, quoy que ce soit hors de son ordre, que nous inserassions icy la lettre que vous luy escrivistes pour les accompagner, de laquelle la teneur s'ensuit :

*Lettre de M. de Rosny à M. le cardinal de Bourbon.*

Monseigneur, encor que la nature ny la fortune, ou pour mieulx dire et parler en chretien, cette haute divinité qui donne estre, vie,

mouvement et intelligence à toutes creatures, selon la diverse condition de leurs natures (et au regard de laquelle et de son immensité, les cieus, les terres, les mers, et tout ce qui est contenu en iceux sont moins estimez qu'un point) ne m'aye pas eslargy ses graces ny départy ses faveurs à proportion du besoin que j'en avois pour me rendre digne de vostre bienveillance, et de la confiance que vous avez tesmoigné d'avoir en moy, je n'ay point neantmoins perdu courage; je ne me suis point laissé accabler sous le pesant faix de commandemens si difficiles à executer qu'estoient les vostres, quelques inégales que leur fussent mes forces; mais me consolant en la grandeur de mon zele et de ma devotion à vostre service, m'esvertuant en vostre vertu, me relevant d'esperance en l'excellence de vos merites, me fondant sur les merveilles de la generosité et bon naturel du Roy et en la cordiale affection que je sçavois bien qu'il vous portoit, je me suis employé de toute ma puissance à l'execution de vos volontez, en quoy j'ay pris le temps si à propos, ay si bien suivy les methodes que vous m'aviez prescrites, rencontré de si favorables conjonctures et trouvé l'esprit de Sa Majesté si bien disposé en vostre endroit, que j'estime en avoir obtenu tout ce que vous eussiez peu desirer, et par consequent dequoy vous consoler et ramener à convalescence, comme vous le jugerez trop mieux par trois lettres que je vous envoie de sadite Majesté : la premiere de sa propre main à vous adressante; la seconde à monsieur le chancelier; et la troisieme à M. d'O. J'ay aussi donné charge au sieur du Peyrat, present porteur, afin de vous resjouyr l'esprit, de vous représenter, lors que vous l'aurez agreable, quelques particularitez sur l'estat present des affaires, la bonne disposition de plusieurs esprits et ce qui s'est passé en ce tant brave et opiniastreté combat de la défaite du grand convoy des ennemis, craignant que les longs discours ne rendissent mes lettres ennuyeuses, lesquelles pour cette cause je finiray icy, mais non le zele et la devotion que j'ay au service de vostre hautesse; lesquels yront tousjours en augmentant tant qu'il restera de jours et de vie à celui qui prie le Createur pour vostre convalescence, hautesse et prosperité, et vous baise tres-humblement les mains, comme estant, Monseigneur, vostre tres-humble, tres obeyssant et tres-obligé serviteur. MAXIMILIAN DE BETHUNE.

Du camp devant Laon, ce 6 juillet.

Or, reprenant le discours que j'avois laissé pour faire place à cette lettre, nous vous ramentevrons comme vous partistes au bout de

trois heures que vous eustes pris congé du Roy, estant allé prendre vostre train qui estoit à Bruieres, ensemble douze gens-d'armes de vostre compagnie que vous y aviez fait venir expres pour vous accompagner en vostre voyage de Sedan; estimant que ce nombre avec ce que vous aviez des gentils-hommes de vostre suite et de domestiques bien armez de cuirasses, casques et pistolets seulement, faisans en tout vingt-cinq bons chevaux sans aucun bagage que deux males sur la croupe de deux forts courtaux, seroit plus propre à exploiter chemin et ne se laisser pas surprendre, ny battre qu'une plus grande troupe avec bagage; comme de fait vous arrivastes à la veuë de Sedan, sans avoir fait aucune rencontre que celle de M. de Bouillon mesme, lequel ayant eu advis trois jours auparavant que vous aviez eu charge du Roy de le venir visiter et consoler de sa part en son affliction, monta soudain à cheval pour venir au devant de vous, et vous rencontra, ce nous semble, à un village nommé Torey, assez proche de Sedan, qu'il vous dist en vous saluant estre la separation de ses terres souveraines d'avec celles de France, vous tesmoigna de parole (car pour le visage il l'avoit fort triste) une grande joye du choix que le Roy avoit fait de vostre personne, estant de telle qualité que vous estiez, et fort bien aupres de Sa Majesté, pour luy tesmoigner sa bienveillance, et la compassion qu'elle avoit de son indicible perte. Il se passa (apres qu'en vous promenant pour ce que vous aviez mis tous deux pied à terre, il eut fait la lecture des lettres du Roy, lors et depuis estans remontez à cheval) plusieurs civilités et compliments entre vous deux qui seroient trop longs à reciter, aussi que vous ne nous les avez jamais tous dits et qu'ils ne sont pas trop necessaires à vous ramentevoir, n'estans pour la pluspart que propos communs et ordinaires en telles occasions de condoleances, affaires et assurances de bien-veillances generales à donner.

Estans arrivez au chateau il vous logea et traitta fort splendidement et avec les mesmes honneurs et ceremonies, que si vous eussiez esté envoyé comme ambassadeur vers luy, et non comme pour une simple visite d'un maistre à son serviteur, telle qu'avoit esté l'intention du Roy, que fust vostre voyage en son endroit : dequoy vous luy en distes bien quelque chose; mais tout cela neantmoins ne le fit pas changer de forme de proceder, dequoy tous nous autres qui vous avions suivis n'estions pas trop marries, dautant que nous en fusmes bien mieux traittez. Vous eustes durant trois jours entiers

que vous sejournaſtes là, plusieurs longues conférences enſemble, tant dans vos logemens qu'en vous promenant à l'entour des fortifications qu'il faiſoit commencer avec grand ſoin et grande deſpence à ſon chateau, lesquelles il exaltoit à merveilles; dequoy neantmoins eſtant parmy nous en particulier retiré dans voſtre chambre, vous vous mocquiez, diſant que cette place eſtoit en une tant deſadvantageuſe aſſiette, qu'il n'y avoit deſpence, travail, ny induſtrie qui la pût jamais rendre fort bonne.

Nous voudrions bien nous pouvoir entiere-ment ſouvenir de tous les diſcours qu'à diverſes fois vous nous avez dit qu'en ces temps-là vous euſtes enſemble; car il ne vous entretenſt pas ſeulement ſur les choſes pour lesquelles vous aviez eſté envoyé vers luy, mais vous fit une infinité de queſtions et propoſitions ſur toutes ſortes d'affaires les plus importantes du dehors et du dedans du royaume, dont nous vous enramentevrons icy quelque choſe en general, afin que cela vous convie d'y adjoûter le ſurplus, et pluſieurs particularitez que nous pourrions avoir oubliées, ou que meſmes vous ne nous avez pas dittes. Apres donc tous ces propos communs et complimens accouſtumez en ſemblables occaſions tant au nom du Roy qu'au voſtre, il ſe miſt ſur les remerciemens d'iceux, la louange des vertus excellentes du Roy, les obligations dont il luy eſtoit redevable, et les proteſtations de ſa fidelité à ſon tres-humble ſervice : puis vous ayant demandé des nouvelles du ſiege de Laon, et vous luy ayant conté ce que vous en ſçaviez et ſur tout les particularitez de la défaite du grand convoy, l'acheminement de l'armée ennemie, ſa preſentation en poſture et ordre de bataille, la grande eſcarmouche du lendemain, avec deſſein de jeter du renfort dans la place aſſiegée; les diligences et prevoiances du Roy contre tous ces deſſeins, la retraite nocturne du camp ennemy, ſans ſon de tambour ny de trompette, l'eſtonnement de ceux de dedans la ville, voyant que tout cela leur avoit eſté inutile, et les eſperances que l'on concevoit de ſa prochaine reduction, il vous demanda ce qu'à voſtre avis pourroit faire le Roy apres tant de bons ſucces et un ſi notable exploit de guerre, et ſ'il ne ſe reſoudroit pas enfin (voyant qu'à toutes occaſions les armées eſpagnoles eſtans és Pays-Bas, entroient dans le royaume et luy faiſoient une guerre ouverte) à la declarer à ces provinces et peuples voiſins qui demeuroient en repos, pendant que ceux de ſon royaume eſtoient troublez et travaillez, puis que c'eſtoient elles qui nourriſſoient les en-

nemis dans leur ſein, et que ſans la fertilité et commodité d'icelles, leurs troupes n'auroient pas eu moyen de ſe maintenir et ſubſiſter ſi longuement; et partant luy ſembloit-il qu'il y auroit beaucoup plus d'honneur et d'utilité à les traiter comme ennemis publics et tous decouvertſ (puis qu'aussi bien ils l'eſtoient deſja dans le cœur, voire teſmoignoient leurs mauvaiſes volontez à toutes occaſions par les effets) que de les laiſſer plus long-temps paix et ayſe et en repos dans leurs foyers, et ſous ombre de je ne ſçay quelle voiſinance de peuple à peuple, leur donner l'opportunité, non ſeulement de trafiquer librement et utilement pour eux dans le royaume, mais aussi d'y faire des menées et pratiques au dommage du Roy et de l'Eſtat; que ſi Sa Maſteſté vouloit trouver bon (comme il eſtoit bien reſolu de l'en ſupplier) que l'on ſe declarast ouvertement contre ces provinces, et que l'on leur fiſt la guerre guerroyable, il ſ'aſſeuroit bien de les incommoder, de ſorte qu'il les reduiroit, au lieu de l'offenſive ſimplement volontaire où ils ſe maintenoient, ſur une deſſenſive abſolument neceſſaire; voire croyoit-il que de ſon coſté il pourroit faire de ſi grands progres dans les provinces de Luxembourg, le Liege et Namur, ſur les principales et plus fortes places deſquelles il avoit de longue-main tramé des entrepriſes, dont il y en avoit quelques-unes d'infailibles, qu'il donneroit moyen au Roy par l'exécution d'icelles de faire conjointre, quand bon luy ſembleroit, ſes armées avec celles des provinces unies des Pays-Bas.

Et ſur ces propos il fit des geſtes et montra des apparences toutes telles, que ſ'il euſt voulu là terminer ſon propos. Et neantmoins quaſi tout aussi-toſt apres, ſans vous donner loisir de repliquer, il reprist la parole et vous dit que ſ'il n'eût apprehendé de vous eſtre trop long et ennuyeux en ſes diſcours, et encor plus que vous en racontant quelque choſe à voſtre retour à la Cour, à des gens qu'il ſçavoit bien et vous aussi, qui luy avoient tousjours rendu de mauvais offices, lesquelſ (faiſans comme les areignées qui convertiſſent en ord et ſale venin la ſubſtance des plus belles, odorantes et ſavoureuſes fleurs dont elles tirent leur nourriture) ne manqueroient pas d'en diſcourir à tors et à travers, de prendre ſes paroles à contre ſens, ou d'y donner des interpretations entiere-ment contraires à ſes intentions, il vous euſt fait voir à l'œil, toucher à la main et juger par l'intelligence, une infinité d'autres utilitez et avantages, qu'il eſtimoit ſe pouvoir tirer et percevoir par l'approbation de tels conſeils et la ſuite et continuation de ſemblables procedures et operations, tant par le Roy

et l'Estat, que par tous ceux de la religion : conjointement lesquels se trouveroient à jamais liez et attachez à mesmes interests à cause des deux grandes factions formées en la chrestienté, sous le tiltre de François et d'Espagnole, en la premiere desquelles les roys ses devanciers (quoy que superlatifs en catholicité, et qu'ils n'ignorassent point que, réservé leur royaume et l'Estat Venitien, le surplus des roys, princes et peuples qui la composoient estoient tous de profession contraire à la Romaine) s'estoient neantmoins trouvez reduits par raison d'Estat et de prudence royale, de laisser les zelez inconsiderer à part, et non seulement de se renger en cette faction, mais aussi de s'en dire chefs, voire en quelques temps de se nommer protecteurs et defenseurs de la liberté germanique, de crainte que l'Angleterre prenant cet avantage et par consequent eux demeurans destituez de tant de partisans, ils vissent perir l'indépendance de leur couronne, et fussent contrains, en se reduisant dans l'autre faction, à deferer comme simples adherans en icelle, non seulement au Pape, mais aussi à l'empire et à la maison d'Autriche, de laquelle il n'y avoit guere plus de deux cens ans que les plus emihens d'icelle se fussent estimez, honorez d'estre stipendiales de celle de France; au lieu que maintenant ces trois puissances réunies et jointes ensemble par le plus indissoluble de tous les liens d'amitié, qui est celui de la communauté d'interests, ne font plus de difficulté de publier tout haut leurs hardies pretentions à la monarchie tant spirituelle que temporelle de la chrestienté; ce que le Roy à présent regnant, s'il estoit bien conseillé et ne se vouloit laisser abuser aux deceptives raisons et frivoles allegations des zelez et devots de ce siecle, devoit plus diligemment considerer que nul autre des roys precedens, et avoir incessamment devant les yeux et en l'esprit, les mesmes causes et les mesmes raisons pour fondement de la conduite de sa vie et du regime de ses peuples et de son Estat; et partant n'y avoit-il nul doute que ce ne fust un desir des plus vains et une proposition des plus absurdes, que de vouloir exalter sa personne royale en eminence d'honneur, de gloire et de grandeur supreme, et en mesme temps tesmoigner de la haine et de l'animosité sur les differences de creance en la religion, et de procurer l'avilissement, l'affoiblissement et la dissipation de tous ceux qui estoient les plus certains appuis et solides fondemens de sa puissance royale, gloire et reputation mondaine, estimant quant à luy qu'aussi bien luy seroit-il du tout impossible (attendu la longue profession qu'il avoit faite de la religion reformée, et la

confiance qu'il ne se scauroit, à son advis, jamais empescher de tesmoigner beaucoup plus grande en ceux de ses domestiques estans de cette profession, qu'és autres, mais sur tout en ceux qui sont employez aux services particuliers de sa bouche et de sa personne) de faire paroistre tant de refroidissement d'amitié, ny de diminution d'intelligence avec les Estats, princes et peuples protestans ses anciens et loyaux allies, ny de s'assujettir de sorte à toutes les superstitieuses ceremonies romaines, qu'il peut estre trouvé suffisamment devotieux au gré des zelez catholiques espagnolisez, ny faire si bonne mine en toutes les cimagrées dont il faut user, et babilles où il se faut amuser, que la caffarderie des mendians et les equivoques ambitieuses des Jesuites en recessent entiere satisfaction.

Toutes lesquelles choses il estimoit que vous (suivant le devoir d'un bon François, bon huguenot, fidele, loyal, et judicieux serviteur de Sa Majesté tout ensemble) luy deviez instamment représenter; mais neantmoins comme de vous mesme, et sans faire aucune demonstration que ces ouvertures, advis, et conseils procedassent de luy, afin de les rendre moins suspects d'aucun concert ny sien dessein premedité, et par consequent plus eflicacieux en l'esprit de ce prince tant plein de vivacité, de jugement et d'experiences, qu'il scavoit en perfection toutes les circonspections qu'un bien sage et genereux prince doit observer avec leurs deües proportions, pour maintenir ses allies et confederer estrangers en bonne union et correspondance les uns avec les autres, et tous ensemble en ferme et loyalle amitié avec sa personne et sa couronne, et de quelle douceur, familiarité, equanimité, amour et droiture, un souverain doit user à l'endroit de ses sujets et serviteurs, pour en tirer une gaye et volontaire obeysance, et par icelle s'establir en la jouyssance d'une tres-heureuse domination, ayant assez esté enseigné en une tant utile science et pratique, par toutes les sortes de traverses, perils, travaux et difficultez, par lesquels les roys, princes, et grands chefs d'armées, qui ont esté battus de la Fortune, se sont trouvez ordinairement sujets : tout cela conformément au discours que luy en avoit un jour fait en vostre presence et en la sienne, le vieil bon-homme, M. de Segur Pardaillan, lequel neantmoins nous ne transcrivons point icy, pour y estre usé de propos un peu trop libres en ce qui regarde les puissances terriennes, et lesquels par consequent pourroient estre mal receus; mais reprendrons vostre responce sur le total, d'autant qu'elle nous semble plus circonspecte, en laquelle essayant d'imiter, en quelque



sorte, son style, vous luy dittes qu'il avoit d'ordinaire des conceptions si relevées, un langage si épuré, disoit tousjours de si belles choses, et les exprimoit en termes si clairs, intelligibles et significatifs, qu'il ne devoit douter que vous n'y donnassiez, voire mesme avec singulier plaisir, delectation et contentement, toute l'attention qui leur seroit necessaire pour en retirer les profits et avantages que vous ne doutiez point s'y devoir rencontrer : et partant le priez vous de vouloir continuer son propos, sans crainte qu'il en pust estre fait de mauvais comptes sur vostre rapport, s'ils ne procedoient du Roy mesme (auquel à la vérité vous ne luy vouliez pas dénier que vous ne luy celeriez rien de tout ce dont il vous pourroit souvenir), d'autant qu'envers tous autres vous mesnageriez de sorte ces avis et conseils, qu'ils n'en pourroient mal user, ny en discourir à la mode des gens du temps, qui est de blâmer tout ce qui n'est pas de leur invention, ou qui surpasse la capacité de leur esprit.

Il reprit donc lors son propos, mais avec des paroles que nous trouvâmes tant enveloppées lors que vous m'en fistes le recit, tant ambiguës et pleines d'équivoques, qu'il sembloit n'avoir eu autre dessein que de dire de belles et fastueuses paroles, qui ne peussent estre entendues, ou pour le moins fussent si bien assaisonnées d'une double intelligence, qu'il restast en sa puissance dequoy y donner telles explications que bon luy sembleroit, et que le temps à venir, l'estat des affaires, et les occasions luy fourniroient de sujet de le desirer ; tellement que tout ce que nous peusmes faire lors, comme nous avons dit que vous nous en parlastes, fut d'en tirer quelque substance aucunement bien intelligible telle que s'ensuit, à sçavoir :

Qu'il ne falloit point douter que l'ouverture publique d'une guerre generale contre tout ce qui paroistroit estre de faction espagnole dans la chrestienté, ne fut un moyen pour, avec le temps, unir inseparablement en un mesme dessein la France et tous les roys, princes, potentats, republicques et villes qui redoutent la grandeur de la maison d'Autriche, et ne fut tres efficace pour effacer dès à present une infinité de soupçons qui se formoient journellement dans l'esprit des plus loyaux et asseurez serviteurs de Sa Majesté en ce royaume, et ceux des plus certains allies et confederez de cette couronne, dont il avoit parlé hors d'iceluy, la plupart desquels desja aucunement mal satisfaits du changement advenu dans la religion du Roy, sans s'estre soucié de pourvoir à l'honneur et seureté de ceux d'autre profession, lesquels, apres Dieu, se pou-

vans dire avoir esté les deffenseurs de sa vie et de son bon droit en cet Estat, commençoient à craindre que, se laissant peu à peu porter à la bigotterie de leurs haineux, il se rendit enfin persecuteur d'eux tous, au lieu de protecteur qu'il leur avoit esté par tant d'années ; courant desja entr'eux des bruits qui sembloient n'estre pas du tout hors d'apparence ny de vraysemblance, à sçavoir, que le Pape et les cardinaux, obsedez et possedez absolument par la puissance de la maison d'Autriche qui les environne et circuit de toutes parts, avoient promis, voire s'estoient obligez par serment solemnel de ne recevoir jamais le Roy à reconciliation avec le Saint Siege, ny luy conferer la benediction apostolique (car c'estoient les propres termes dont il sçavoit bien que l'on usoit entre les Espagnols) qu'il n'eust approuvé, juré et signé une certaine quantité d'articles qui tendoient à luy faire entreprendre, conjointement avec les autres puissances catholiques unies à la maison d'Autriche en la chrestienté, l'extermination et ruïne absolue, comme du temps des Albigeois, de tous ceux qui ne voudroient recognoistre les pontifes romains pour chefs de l'Eglise chrestienne, et se trouvoient ces opinions desja tellement enracinées dans les cerveaux de la plupart des ministres et gens de synodes et consistoires, voire d'aucuns princes et grands personnages fort puissans et accreditez parmy ceux de la religion aussi bien dehors que dedans le royaume de France, qu'ils ne faisoient point de difficulté de conclurre lors qu'ils discourroient entr'eux de semblables affaires, comme d'une chose qu'ils estimoient indubitable, que ceux de la religion s'en alloient reduits en beaucoup pire condition qu'ils n'estoient du temps des plus furieuses guerres de la ligue, d'autant qu'alors, comme ils le sçavoient tres-bien remarquer, ils vivoient sous les seuretez des edits publics, lesquels leur servoient de traittez conventionnels avec leurs roys, par lesquels, selon le droit des gens, ils obligeoient leur foy, leur honneur et leur parole à l'entiere observation des promesses qui leur y estoient faites, et par icelles à les preserver et garantir de toute injure, violence et oppression, avoient lors, sinon par permission expresse, au moins par tolerance tournée en coutume par les laps du temps, un protecteur puissant et autorisé, tant par son eminente qualité de premier prince du sang et presomptif heritier de la couronne, que par ses grands biens et seigneuries, qui s'osoit nommer tel et hardiment entreprendre de les tenir en union, et user des prevoyances et precautions necessaires contre toutes invasions et subits attaquemens, avoit à la Cour ses

agens à descouvert, pour y représenter comme de par luy les plaintes de tous en general et d'un chacun en particulier ; et en cas de refus et absolus desnis de justice, le courage et le pouvoir de deffendre leurs droits par armes, qu'il faisoit apres approuver pour justes et legitimes, voire avoir esté prises et gerées pour le service du Roy et le bien de l'Estat ; au lieu que maintenant il sembloit que ceux de cette profession ne deussent plus esperer de vie, libertez, honneurs, biens et dignitez, qu'à temps et par tolerance ( comme cela, ainsi que vous sçaviez bien, avoit esté demandé au Roy par les articles qui luy furent apportez à Fontaine-bleau par le sieur de Villeroy, de la part de messieurs de Lorraine, du Mayne et de Mercœur ), ne subsistant plus en l'Estat, à present que Sa Majesté s'estoit faicte catholique sans avoir tesmoigné de s'estre souvenu en aucune façon de ce qui leur estoit necessaire, que sous le benefice d'une je ne sçay qu'elle trefve bastie à la haste, ny n'avoient plus d'autre protecteur que celuy seul qui, par les dignitez où il estoit monté, le changement de religion qu'il avoit subitement fait, sembloit estre obligé à devenir leur partie, au moins s'il se vouloit faire croire vrayement converty et acquerir creance à Rome, et parmy les grandes et puissantes villes du royaume qui l'exciteroient incessamment à les affoiblir et diminuer ; à quoy il estoit à craindre qu'il ne se portast trop facilement, tant pour son propre interest, qu'il se laisseroit persuader y estre attaché, que pour complaire aux puissans de ce siecle et aux grands corps et communantez, comme c'estoit l'ordinaire des hommes de courir aux plus prochaines et apparentes utilitez, et de se conjoindre et unir aux plus puissans et autorisez, outre tous lesquels maux estoient encor à redouter le grand credit que ses longues habitudes luy avoient acquis parmy eux, les douces cajoleries dont il leur useroit, esquelles il estoit des plus experts, et la distribution qu'il avoit en main de toutes les charges, honneurs, biens et dignitez du royaume, au charme de laquelle les plus cupides et desireux de tels avantages, qui faisoient tousjours le plus grand nombre, se laisseroient de sorte persuader, qu'il s'en trouveroit peu qui ne fleschissent sous ses volontez, et encor moins qui osassent contester contre luy les ordres, disciplines et reglemens qu'il avoit luy mesme autrefois tant et tant debatus et maintenus comme estans les seuls et uniques fondemens de la subsistance des eglises reformées.

Tous lesquels inconveniens bien et meurement examinez par les prudens, mieux sensez et pleins de zele et devotion, il ne falloit point douter

que si Sa Majesté ne se resolvoit de les mettre bien-tost en condition qui les asseurast contre tous les orages et tempestes de leurs haineux et mal-veillans, ils n'essayassent de trouver en eux mesmes les remedes qui leur defaillioient en autrui, et que pour y parvenir ils ne jettassent les yeux sur quelque protecteur de dedans ou dehors le royaume, pour y avoir recours en temps d'adversité, de quoy il avoit sceu qu'il s'estoit desja avancé quelques propos en un synode tenu à Sainct Maixant ; lequel avoit adjousté qu'en attendant le choix, la probation et recognoissance d'un personnage de l'eminence, probité, puissance et capacité requise pour une tant importante charge, il seroit tenu une assemblée generale à Saincte Foy, pour en determiner, ou à tout le moins establir un conseil general de quelque nombre de deputez nommez par toutes les provinces, qui subsistast tousjours en un certain lieu, avec lequel eussent correspondance dix conseils provinciaux, en quoy ils estimoient à propos de separer tout le royaume, par les advis desquels ce conseil general prenant ses resolutions, il eust, en quelque petit nombre qu'il se trovast, lors des occasions, non seulement autant de pouvoir qu'un protecteur approuvé, mais aussi qu'une assemblée generale composée des trois ordres accoustumez en France, tant pour envoyer les desputez en Cour y faire des requisitions pour tout le corps et chaque particulier, selon que l'occasion le pourroit requerrir, que pour resoudre les difficultez qui surviendroient, et advoüer et autoriser ceux qui, pour se garantir d'oppression, seroient reduits à lever les armes sans commission du Roy, fortifier places et prendre villes, chasteaux et deniers royaux ; desquelles propositions il ne doutoit point que les plus animez et scrupuleux catholiques ne fissent grand bruit, et ne prissent sujet sur icelle de déclamer hautement contre tous ceux de cette profession, sans mettre en consideration les violences que l'on exerce contre eux, et la petite et fort tardive justice que l'on rend à leurs plaintes et doleances, à l'exemple de plusieurs qui se trovans en felicité, et par consequent contens de leur condition, s'offensoient contre ceux qui se plaignent du temps et de leur miserable fortune ; dequoy tous ceux de la religion s'estimoient estre fort prochains, si une fois, comme la chose n'estoit pas trop esloignée d'apparence, Rome, l'Empire, la France, l'Espagne, l'Italie et leurs dependances s'unissoient ensemble en forme de croisade, comme il vous en avoit desja dit quelque chose, pour du tout exterminer dans la chrestienté tous ceux qui leur seroient de contraire creance, si eux

aussi de leur costé, pour esviter tant de dangers qui les menaçoient, ne se confedereroient sincerement et courageusement ensemble pour les devancer. Quoy qu'à tous ceux qui luy avoient tenu ou fait tenir ces langages, il leur eust mis en avant les difficultez infaillibles qui se rencontreroient en ces unions presupposées, et usé de toutes les remonstrances et raisons dont il s'estoit peu adviser pour leur oster ces fantaisies de l'esprit, si n'y avoit-il pû parvenir, y en ayant eu de si hardis et chauds en leur zele de luy dire que puis que le Roy avoit bien quitté le soin du salut de son ame pour parvenir plus facilement au royaume, qu'il se rendroit encor bien plus facile à laisser en arriere le soin de conserver ses anciens et loyaux serviteurs, pour regner seurement et delicieusement.

Il vous tinst encor plusieurs autres discours sur ces mesmes sujets qui seroient trop longs à reciter, par tous lesquels il estoit facile à juger qu'il eust esté bien ayse, en donnant des apprehensions de tous ces accidens, de se rendre entremetteur necessaire de telles faciendes, et donnant occasion de croire, par ses discours affectez, qu'il pouvoit bien avoir esté l'auteur et le promoteur de ce qu'il attribuoit aux advis, fantaisies, craintes, défiances et pratiques d'autrui, comme l'experience future et la suite des affaires et de ces Memoires le pourront verifler.

Sur tous lesquels discours que vous escoutastes tout du long fort attentivement avec grande patience, et sans rien repliquer ny l'interrompre, vous respondistes apres, les distinguant seulement en trois chefs principaux, qu'encor que le Roy se fust fait catholique, si ne le cognoissiez-vous en aucune façon diminué d'affection envers ses anciens serviteurs, pour faire de l'honneur et du bien à tous ceux qui persevereroient en leur premiere loyauté, ny aussi envers tout le general des eglises reformées, ausquelles il estoit resolu, comme il vous l'avoit encor juré depuis un mois, de ne refuser aucunes des conditions qui seroient jugées necessaires pour la liberté de leurs consciences et conservation de leurs honneurs, vies, fortunes, biens et familles, tant pour le present que pour l'advenir, mais que ce seroit prématurément proceder et choisir une saison mal propre que de le vouloir presentement presser sur telles concessions, et encor plus imprudemment fait que d'en vouloir precipiter les expeditions, ny demander des asseurances par escrit pleines de perilleuses consequences, en un temps qu'il avoit tant d'affaires à démesler à Rome et dans le royaume, et tant de diverses sortes d'esprits à contenter.

Que quant aux alliances et confederations

estrangeres dont il vous avoit parlé, c'estoit autant de chimeres que toutes ces unions du Roy avec ceux de la maison d'Autriche, d'autant que vous sçaviez de science qu'il y avoit une telle adversion qu'il n'en pouvoit ouyr parler sans horreur et despit; et que tout au contraire il n'avoit rien si bien gravé ny plus vivement empraint dans le cœur, que de pouvoir (apres avoir pacifié son Estat, et iceluy remis en lustre, richesse et force) faire une ferme et solide liaison avec tous les roys, Estats, princes et potentats de la faction françoise (la plupart desquels il sçavoit bien estre de la religion, ou pour le moins ennemis de Rome et d'Espagne), pour la destruction de cette maison, qu'il voyoit bien avoir le dessein commencé dès Charles V, d'empieter, soit par force ou par fraude, la monarchie de la chrestienté, recognoissant en eux tous une telle ambition, qu'il n'y auroit jamais ny pieté, ny charité, ny religion, ny respect de Pape, de saintet siege, ny de parentage et d'alliance, qui les pust divertir de ce dessein, ny les empescher d'estendre leur domination par tout où leurs armes et la bonne fortune les pourrout porter, ne faisant point de doute que luy, qui estoit des plus judicieux et intelligens en telles affaires d'importance, n'en eust les mesmes sentimens.

Que quant à la declaration de la guerre contre l'Espagne avant la pacification de dedans le royaume, c'estoit, selon vostre jugement, une proposition des plus problematiques qui se pouvoit faire; mais que neantmoins les premieres raisons qui vous estoient venuës en l'esprit vous portoient à dire qu'il ne falloit encor rien innover, que c'estoit le chemin le plus seur et le moins sujet à diversité d'inconveniens, diverses experiences vous donnant sujet de croire que le Roy d'Espagne s'esvertueroit bien d'une autre façon, lors qu'il se verroit directement attaqué, et qu'il yroit de son honneur, et d'une guerre purement sienne, qu'il ne faisoit à présent qu'il ne se considere que comme simple auxiliaire; à quoy, comme affaire des plus importantes, il falloit bien penser avant la resoudre.

Et que pour le regard de son affection au service du Roy, vous croyez n'y avoir rien à desirer ny discourir là dessus, estant de trop longue main attaché par l'ame et par les sermens, à la gloire, grandeur et prosperité de Sa Majesté, et d'abondant si obligé à sa personne par abondance d'honneurs et biens receus d'elle, que ce seroit un des plus effroyables prodiges qui se sçauroit voir, lors qu'il viendrait à manquer de devoir en son endroit, ou qu'il auroit besoin d'estre conforté en iceluy, et que pour ceste

cause ne luy usiez-vous d'aucunes persuasions sur ce sujet.

Nous serions trop longs et peut-estre ennuyeux, si nous voulions maintenant vous ramener tout ce que nostre memoire nous fournit là dessus, à mesure que nous recherchons les plis, replis et cachots d'icelle; et partant nous nous contenterons de dire, en reprenant le fil de ce que vous luy distes sur la mort de sa femme et le desir que le Roy avoit qu'il vous fît voir le testament qu'il disoit qu'elle avoit fait en sa faveur, que toutes vos instances furent inutiles, prenant pour excuse que cette donation estoit dans une cassette, où, après luy avoir fait lire, elle l'avoit mise elle mesme, l'avoit cachetée et à luy fait promettre de ne l'ouvrir point que pour s'en servir en justice contre ceux qui luy voudroient troubler ou disputer son bien-fait. Aussi bien ne le pûstes vous persuader à s'en aller trouver le Roy, ni lui envoyer aucune partie des troupes qu'il luy avoit mandé estre prestes pour son service, d'autant qu'il ne pouvoit, comme il vous dist, quitter sa nouvelle seigneurie et encor moins sa forteresse sans inconvénient à redouter, ny aussi peu se deffaire de ses troupes, les ayant distribuées dans les lieux importants de son Estat.

#### CHAPITRE LVI.

*Détails sur la réduction de Laon. Soumission de Poitiers. Mission confiée à Rosny. Mort du cardinal de Bourbon. Lettre de Henri IV sur cette mort.*

La charge que le Roy vous avoit donnée, touchant M. de Bouillon, exécutée, vous en partistes, et repristes vostre chemin pour aller trouver le Roy pres duquel vous arrivastes le quatriesme jour, et d'abord fustes estonné de le rencontrer à cheval, à la portée d'harquebuse de Laon, qui s'en alloit à la chasse, sans qu'il luy fut tiré ny à plusieurs autres qui estoient plus pres des murailles une seule harquebusade; mais vous appristes aussi-tost que la capitulation estoit faite à condition de remettre la place es mains du Roy, si, dans dix jours, elle n'estoit secouruë par une armée qui fist lever le siege, ou qu'il entrast huit ou neuf cens hommes de secours dans ladite place, comme ils avoient essayé de ce faire il n'y avoit que deux ou trois jours : ayant M. du Mayne envoyé environ ce nombre là dans la forest et à eux ordonné d'essayer d'y entrer la nuict, mais n'ayant peu faire si bonne diligence qu'ils ne fussent surpris dès la pointe du jour, estans encor pres d'une lieuë

loin, ils resolurent d'en remettre l'exécution à la nuict suivante, et, pour y parvenir plus facilement, ils se jetterent tous dans un boqueteau fort espois, avec dessein d'y passer la journée sans se descouvrir, ayant porté du pain et du vin avec eux, ce qui leur eust aisement succédé, car ce bois estoit esloigné de tous les quartiers; mais il estoit arrivé que le Roy, en attendant l'expiration de la trefve et du terme donné pour la reddition, allant souvent à la chasse, tira par fortune vers ces quartiers là, et s'estant approché de ce bois, avec deux ou trois cens chevaux, ses gardes et quelques carabins, les chiens en questant, estant entrez dans ce boqueteau, descouvrirent tous ces soldats (lesquels ayant ouï le bruit de la chasse alloient connillant et se trainant quasi le ventre contre terre pour se cacher au plus espois et profond du bois), et s'estans mis à japper et aboyer apres, le Roy envoya des lacquais voir à quoy ils en vouloient; lesquels les ayans veus, crièrent que c'estoient des soldats des ennemis qui se cachoient; et appellans tous leurs compagnons, ils se mirent à courir apres et trouverent ces pauvres gens si effrayez de se voir ainsi environnez sans aucune esperance de se pouvoir sauver, qu'ils jetterent tous leurs armes bas sans entrer en aucune sorte de defence, et ainsi furent-ils deffaits, pris et devalez, plutost par les lacquais que par la noblesse de la Cour, les gardes du Roy ny carabins. Si tost donc que vous approchastes du Roy vous mistes pied à terre, luy allastes faire la reverence, et luy vous ayant embrassé et dit que vous fussiez le bien revenu, il vous fît monter à cheval et vous entretint quasi tout le temps de la chasse, s'enquerant de ce que vous aviez veu, ouï, fait et appris en vostre voyage; dequoy vous luy rendistes compte fort particulier selon qu'il a esté dit cy-dessus.

A quoy il vous respondit en substance : « Voila  
« les fantaisies ordinaires de M. de Bouillon,  
« qui voudroit tousjours estre l'entremetteur des  
« intrigues et broüilleries, voire bien souvent de  
« celles dont il est l'auteur, et faire durer la  
« besongne afin de se rendre nécessaire; quant à  
« sa donation, qu'il voyoit bien ce qu'il en de-  
« voit croire, puis qu'il ne vous avoit rien voulu  
« faire voir; mais que neantmoins estant mai-  
« tre de la place, luy de la religion des habi-  
« tans, et les apparens heritiers de creance con-  
« traire, l'estat de mes affaires, vous dit-il,  
« requiert que je tesmoigne d'estre content de  
« ses procedures, et de le vouloir maintenir en  
« sa possession sans me trop avant enquerir du  
« titre d'icelle » Et que pour ce qui touchoit la

declaration de la guerre contre l'Espagnol, que c'estoit une affaire où il trouvoit autant de testes, autant d'opinions, et sur laquelle il se deliberoit, ayant mis ordre aux affaires de la Picardie, de s'en retourner à Paris, y assembler un conseil de ses principaux, plus intelligens et affidez serviteurs, pour y prendre resolution finale.

Quatre jours apres le Roy eut nouvelles de la reddition de Poitiers'en son obeysance et de quelques autres villes, les particularitez desquelles nous laissons aux historiens: le lendemain, le comte de Sommerive, les sieurs du Bourg et Jeannin, voyant que tous les secours promis leur avoient manqué, et que les peuples, ne pouvant plus supporter leur unique domination, estoient pres de tumultuer, ils remirent la ville de Laon en l'obeyssance du Roy; lequel ayant mis ordre à ce qui estoit necessaire pour reparer ses ruynes et à sa conservation à l'advenir, vous envoya trouver M. le cardinal de Bourbon qui estoit toujours à Paris et alloit de jour en jour diminuant, tant pour luy porter des nouvelles de ses bons succez que pour essayer de descouvrir des menées dont l'on luy avoit donné des advis; et Sa Majesté s'en alla vers les frontieres faire une promenade, tant pour recevoir les villes de Picardie qui se mettoient en son obeysance que pour essayer de mettre à execution quelques entreprises, qu'aucuns de ses serviteurs disoient avoir sur des villes d'Artois et Hainault, toutes lesquelles particularitez nous laissons à l'histoire generale, tant pour ce que tous ces desseins manquerent, que pour ce que vous estiez ailleurs.

Et dirons seulement en passant que, vous estant à Paris, monsieur le cardinal vous monstra une lettre, par laquelle ou luy mandoit que M. du Mayne voyant Laon pris, que toutes les villes de Picardie, qui estoient en la puissance des peuples, l'abandonnoient, et que M. de Guyse employoit ses amis pour se reconcilier et faire sa condition avec le Roy, avoit, par l'advis du president Jeannin, qui de longtemps l'en sollicitoit, resolu d'essayer de réunir ses forces trop esparses, et se reduire en une seule province qu'il designoit tousjours devoir estre la Bourgongne, tant pour ce qu'il la possedoit quasi toute, que pource qu'elle estoit avoisinée de la Savoye, Franche-Comté, Suysse, Allemagne et Lorraine, que pource qu'elle appartenoit de droit et par legitime succession au roy d'Espagne, duquel il y auroit moyen d'en obtenir la cession, et par l'ayde du Pape et de l'Empereur la faire eriger en royaume, comme elle en avoit porté le tiltre

autrefois, et plusieurs autres raisons de vanité, que cette lettre disoit luy avoir esté alleguées par le president Jeannin; ausquelles ayant deféré apres avoir mis de grandes et fortes garnisons, la plupart d'estrangers dans Dourlans, la Fere et Soissons, il s'estoit acheminé vers la Bourgongne. Nous laissons encor à l'histoire generale toutes les particularitez et factions de guerre qui se passerent en Bretagne entre M. d'Aumont et de Mercure, l'un assisté des Anglois, avec lesquels il prit Morlais et Quimper, et l'autre des Espagnols, par le moyen desquels il construit le fort du Croisil, pour incommoder le Havre de Brest; je laisse aussi à l'histoire plusieurs beaux exploits de guerre qui se firent en Provence, Dauphiné, Savoye et Piedmont, entre M. de Savoye et messieurs de Lesdiguières et de Crequy, esquels la fortune favorisa tantost les uns, tantost les autres, dont le plus grand inconvenient fut la défaite et prise de M. de Crequy. Il se fit aussi en Bourgongne des choses admirables, qui commencerent à la fin de quatre vingts quatorze, et ne finirent qu'en avril quatre vingts quinze, sur tout en la ville de Beaulne, dont les habitans firent des merveilles, tant en affection envers le Roy et leur patrie, qu'en courage, resolution et perseverance, ayant, par eux seuls, défait, ou contraint de s'enfuyr dans le chasteau une grande et forte garnison que M. du Mayne avoit mise dans leur ville: s'estans retranchez et barricadez contre ledit chasteau, ils appellerent M. de Biron à leur secours, auquel ils permirent d'entrer avec une armée dans l'enclos de leurs murailles, et de là logger chez eux six semaines durant que dura ce siege du chasteau, lequel estoit fort bon, ayant esté continuellement attaqué pied à pied, ensemble par une furieuse batterie de douze canons. Pendant que vous fustes à Paris, et le Roy en Picardie, Sa Majesté ayant esté advertie par un courrier que vous luy envoyastes tout expres, pour luy faire sçavoir au vray la mort de monsieur le cardinal, il vous escrivit une lettre là dessus, et touchant la disposition des benefices de monsieur le cardinal, dont la teneur ensuit:

*Lettre du Roy à M. de Rosny.*

Mon amy, j'ay sceu la mort de mon cousin le cardinal de Bourbon, dequoy je suis bien marry, pour y avoir perdu un bon parent et serviteur qui m'aymoit en vérité: force gens m'ont demandé de ses despoüilles; à tous j'ay dit que j'en avois desja disposé. Maintenant que vous estes par de là, voyez si vous ne pourriez point faire envers l'abbé de Tiron, qu'en luy baillant l'ar-

chevesché de Roüen qui vaut trente mil livres de revenu pour le moins, vous pourriez disposer les choses de façon que les abbayes de monsieur le chancelier et du Rollet leur demeuraissent, qui m'en demandent de recompense sur ladite despouille deux fois plus qu'elles ne valent. Je croy qu'il pourroit contenter le chevalier d'Oyse, en luy faisant quatre mil escus de pension sur l'archevesché, et ce faisant, il luy demeurerait, outre la recompense de celle que pretend ledit abbé de Tiron, près de deux mil escus à son profit, pour luy ayder à soustenir la dignité. Quant à l'abbaye de Saint Oüen, j'en recompenseray quelqu'un de mes serviteurs, mais à quiconque je la bailleray ce sera à la charge de vous bailler dix mil livres de pension; mesnagez cette affaire avec dextérité, et m'en rendez responce en toute diligence par homme expres. Souvenez-vous de dire à monsieur l'archevesque, s'il l'est, que je veux achepter Gaillon de luy, mais que je luy en donneray recompense, et que cela se fera à loisir. Sur ce Dieu vous ait, mon amy, en sa garde.

HENRY.

A Paris, ce 26 mai.

## CHAPITRE LVII.

*Conduite de d'O, surintendant des finances. Mort de ce ministre. Lettre de Rosny au Roi, sur les moyens de rétablir la paix, et de faire fleurir le royaume. Suite de la négociation avec le duc de Guise. Accommodement.*

Outre toutes les affaires cy-devant dites, vous fustes employé en plusieurs autres, dont la première concernoit une certaine lettre que vous receustes de M. de Lieramont, gouverneur du Castelet, deux jours apres celle du Roy, par laquelle il vous prioit de parler à M. d'O, pour donner ordre à luy faire payer sa garnison, fournir quelque argent pour les fortifications de sa place, et pour y mettre des armes, outils et munitions de guerre et de bouche, ce que vous fistes avec grande instance, voire mesme jusqu'à luy protester que si la place venoit à estre prise on luy en imputeroit la faute; mais pour tout cela il n'en fit rien davantage, et n'en pûstes jamais avoir autre responce, sinon qu'il y avoit des affaires bien plus pressées et de plus grande importance que le Castelet, ausquelles il falloit pourvoir avant que de penser à celle là; et voyant que vous l'aviez quitté comme tout en colere d'une telle responce, il se tourna vers les sieurs d'Edouville et de Mouchy, qui estoient près de luy et avoient entendu vos instances et contestations, et leur dist, comme vous le sceutes de-

puis du dernier qui avoit espousé une de vos parentes: « Par le corpshieu il nous la baille belle avec son Castelet et son Lieramont; car j'ayme mieux voir la place entre les mains des Espagnols que des huguenots, parce que des premiers, il y aura esperance de l'en pouvoir retirer et des autres jamais, le Roy les favorisant de sorte en son cœur qu'il leur donneroit plus-tost de nouvelles places que de leur en oster. »

Peu avant vostre arrivée à Paris, comme environ le quinzième ou seizième de juillet 1594, s'estoient faits les plaidoyers contre et pour les jesuistes, sur lesquels il se faisoit des discours divers, selon la variété des humeurs et fantaisies, dequoy nous laisserons les particularitez à l'histoire generale.

Quelque temps apres, le Roy ayant receu en son obeissance les villes de Montreüil, Abbeville, Amiens, Peronne et autres villes, et fait son entrée en aucunes d'icelles, toutes lesquelles particularitez nous laissons à l'histoire; voyant l'hiver approcher et voulant prendre resolution sur une trefve que luy demandoit M. de Lorraine, et les instances que luy faisoit madame de Guyse, de vouloir recevoir son fils à son service, estant chose qu'elle avoit toujours sollicitée envers luy, sans l'y avoir pû faire resoudre jusques alors, il s'achemina vers Paris, où peu apres M. d'O tomba malade d'une retention d'urine, de laquelle il mourust au bout de quelques jours, et se vit lors une chose merveilleusement estrange, pour un homme qui avoit l'administration, voire quasi absoluë disposition de toutes les finances de France, par les mains duquel estoit passé plus de quatre millions de livres de deniers à luy appartenans, et qui faisoit une despence des plus splendides en toutes sortes de choses qui fust à la Cour, que n'estant pas encor mort, ny mesme du tout hors d'esperance de guerison, quelques-uns de ses parens qui faisoient profession d'amitié avec luy, de ses domestiques et autres qui se pretendoient ses creanciers, firent saisir tous les meubles de son logis, et aussi-tost les enlever, voire jusques à faire destendre la propre tapisserie de la chambre où il respiroit encores.

Quelques jours apres le Roy s'estant laissé persuader aux instances de madame et mademoiselle de Guyse (lesquelles se ressentant de l'honneur qu'elles avoient de luy estre, l'une au premier degré de cousine, et l'autre au second, l'affectionnoient de sorte, qu'elles l'en importunoient incessamment), il fit donner des passeports pour les sieurs de la Rochette, de Pericart et Bigot, lesquels M. de Guyse desiroit d'envoyer vers Sa Majesté, afin de requerir quelques conditions, et convenir du temps et du lieu propre pour luy

venir faire ses submissions, et commist messieurs le chancelier de Chiverny, le duc de Retz et le secretaire d'Estat Beaulieu-Ruzé, pour traiter avec eux ; entre lesquels s'estant fait plusieurs conferences, et passé plus de dix jours sans venir à aucune conclusion, madame de Guyse, ennuyée de telles longueurs, vint trouver le Roy, comme il se promenoit avec vous, vous parlant de la mort de M. le cardinal de Bourbon, et en suite d'une lettre que vous luy aviez escrite touchant l'estat de ses affaires, en 1593, peu avant son changement de religion, se pleignant de l'avoir perduë, et disant qu'il eust bien désiré d'en avoir autant si vous en aviez gardé coppie, de laquelle vous luy en fistes faire une par Balthazar, vostre secretaire, qui nous en bailla autant, que nous avons bien voulu inserer icy, encor que ce soit hors de temps et de son lieu, pource qu'elle nous a semblé assez bien faite, et representant en quelque sorte l'estat confus de cette année là, estant telle que s'ensuit :

*Entrelasement d'une grande lettre escrite par  
M. de Rosny au Roy, dès l'année 1593.*

SIRE,

Comme en un grand embrasement, à l'extinction duquel les interests publics et privez obligent aussi bien les petits que les grands, et les foibles que les forts, de s'employer à bon escient, nul à mon advis ne se rencontrera si desraisonnable que de vouloir blasmer celuy lequel, par foiblesse, indigence ou autre incommodité, manquant de jeter sur ce feu un seau ou autre grand vaisseau plein d'eau, y accourroit neantmoins avec le pot et l'esguiere pour essayer de suppléer, par ce tesmoignage de zele et devotion, tous les defauts de son impuissance : aussi ay-je estimé que moy considerant les desordres, confusions et combustions qui agitent cette pauvre France, ma chere patrie, et reduisent quasi toutes les provinces de vostre royaume en feux et en flammes allumées par la haine des malins et envieux de vostre gloire et vertu, par la rage et la furie des fausses devotions et zeles inconsideres des factions populaires, et par l'audace, ambition, avarice et vanité des plus puissans et autorisez de vos sujets, je ne serois sujet à aucune reprehension, ny mesme taxé d'impertinence et temerité, sur tout par ceux qui auront bonne intention et quelque judicieuse equanimité, si à l'exposition de ma vie et à l'employ ordinaire de ma personne, de mon travail et de mes moyens pour essayer d'ayder à esteindre ou à tout le moins moderer tels grands et iniques embrasemens des cœurs et des courages mal intentionnez, j'adjoustois, par forme de supplément à mes plus

grands defauts, quelques advis et conseils que mes ordinaires meditations et consultations sur choses tant importantes m'ayent peu suggerer, et les expediens qu'en feüilletant les histoires je me suis imaginé de pouvoir estre propres pour medeciner telles langueurs et maladies d'Estat ; lesquels, quelque foibles et debiles qu'ils puissent estre, voire peut-estre impertinens qu'ils soient estimez par aucuns, ne demeureront pas neantmoins du tout inutiles et infructueux, au moins selon mon opinion, s'ils sont considerez selon mon zele et devotion, examinez par les regles de patience, de prudence, et pratiquez par ordre et par degrez selon les saisons et les occasions, et non prematurement, precipitamment, ny à contre-temps.

Lesquelles ouvertures j'essayeray d'assaisonner de telle briefveté, qu'elle les puisse exempter du tout ennuyeux examen et longue consideration et consultation ; et suivant ce que diverses experiences ont appris aux mieus censez aussi bien qu'à moy, que les plus efficients conseils et resolutions entre plusieurs bons fondemens, en ont trois principaux et quasi infailibles, à sçavoir pour le premier les causes et les raisons des substances des choses et des reelles pretentions ; pour le second, les rapports, paralleles et comparaisons des affaires des personnes et des vertus, mœurs et affections, et pour le troisieme, les exemples, imitations et pratiques des conseils, des desseins et des operations : dans lesquelles trois bornes et limites me reduisant absolument en cette lettre et me dispensant de toutes autres ouvertures qui les pourroient obscurcir, envelopper ou rendre moins intelligibles par leur prolixité, et par consequent moins efficients, je prendray la hardiesse de dire à vostre Majesté, pour ce qui concerne le premier fondement, que toutes sortes de droits et de raisons militent en sa faveur, soit que l'on regarde le sang et la naissance, lesquels vous ayant rendu et prince et legitime Roy, puis qu'estes descendu de race royale des deux costez par de tant antiques et de si longues successions de grands roys, sont cause que toute haute pretension qui en un autre se pourroit qualifier du tiltre de vanité, audace, presumption et ambition, prendra en vous celuy de juste, equitable et loüable resolution ; soit que l'on regarde en vostre personne royale, la merveille des roys de nostre siecle, tant et tant d'excellentes vertus, morales, politiques et militaires, et sur toutes cette douce et familiere conversation tant agreable, cette clémence incomparable, de laquelle il y a tant d'exemples que chacun en est ravy ; cette generosité, vaillance, experience, celerité aux exe-

cutions et admirable suffisance et capacité au fait des armes, n'y ayant quasi jamais eu roy, prince, ny chef d'armée, qui se soit trouvé en tant de sieges, combats, escarmouches et batailles, ny qui ait si souvent mis la main à l'épée que vous avez fait, qui sont autant de charmes pour acquérir et conserver les cœurs; soit que l'on regarde le rétablissement et la manutention de ce royaume en son ancienne gloire, amplitude, opulence et splendeur, la paix, le repos, l'honneur, le contentement et le soulagement de tous vos sujets, de toutes sortes de qualitéz; soit mesme que l'on considere les substances de tous les royaumes, Estats et republicues estrangeres, qui desirent les uns se delivrer de l'esclavitude espagnole et de ses attaquemens, et les autres se garantir d'icelle: tous lesquels ne peuvent entrer en de si douces esperances et moins encor en ressentir les effets, que par le moyen des benignes influences du brillant soleil de vos vertus, par les fructueuses operations de vostre bel esprit et genereux courage, et le bonheur entier de vos sacrez auspices; au lieu qu'en vos iniques ennemis tous ces grands avantages manquent absolument, n'y ayant, pour le premier chef, guerres plus de trois cens ans que ceux de cette nouvelle maison Austrienne (car de l'ancienne de laquelle j'ai l'honneur d'estre descendu de par la maison de Coussi, ne sont-ils nullement) n'estoient que des petits comtes de Haspbourg et de Quibourg, lesquels ne tenoient rang que de gentilshommes qui entroient à la solde des villes, comme Strasbourg, Basle, Zurihc et autres; lesquels se fussent tenus bien honorez de servir les roys, vos devanciers, de leur temps, en qualité de maistre d'hostel et de camp, comme Raoul, le chef de leur maison, au fils duquel commença la souche de la nouvelle maison d'Austrie en quittant leur premier surnom, le fut d'Othocarus, roy de Boheme; secondement nulle des personnes de ceux de cette maison qui subsistent à present n'estans eminens en vertus morales, ny en science, ny experience à la guerre, ny en gloire, honneur et haute renommée entre les hommes; et en troisieme lieu leur orgueil, fierté, insolence et ambition, estant non seulement formidable, mais aussi en execration et horreur à tous princes, roys et republicues qui veulent vivre en honneur et liberté, et leur aspre domination insupportable à qui en a esprouvé la rigueur et la cruauté.

Quant au second fondement des trois cy-dessus posez, qui est celuy des rapports et comparaisons des personnes, vertus et fortunes, de crainte d'estre trop ennuyeux à vostre Majesté, je n'en iray point rechercher dans l'antiquité,

ny parmy les nations estrangeres, voire mesme n'en choisiray-je que quatre d'entre tous vos illustres predecesseurs, qui seront Clovis I, Charles le Grand, Philippes Auguste et Charles le Sage, lesquels, sans m'arrester par cette lettre aux particularitez de l'histoire, mais me contentant de prendre le sommaire de leur vie pour en faire un raport avec la vostre, j'ay choisis expres, pour ce qu'entr'eux et vous il m'a semblé y avoir plus de conformitez de personnes, vertus, mœurs et fortunes qu'entre nuls des autres; dautant qu'ils eurent tous quatre, comme vous, une grande vigueur, force et disposition de corps (reservé le dernier qui la perdit par un malefice), une vivacité d'esprit et intelligence merveilleuse, une solidité de jugement admirable et une ame toute genereuse et magnanime, le miracle du monde en vaillances, victoires et misericordes; qu'ils eurent encor comme vous, leurs Estats divisez en partialitez et factions populaires, voire telles fois tellement envahis par les estrangers ou embarrassés de rebellions par leurs sujets, qu'ils n'en possedoient paisiblement que la moindre partie; qu'eux encor, comme vous, par une constante resolution et hardiesse incroyable, poursuivirent leurs legitimes droits sans s'exempter des labeurs, peines et perils, qu'attirent apres elles les grandes et longues guerres; et qu'eux enfin, tous couverts de lauriers et glorieux de triomphes, comme j'espere en Dieu que vous serez un jour, ayant reduit leurs sujets en devoir et obeyssance, et chassé les estrangers de leurs Estats, ils s'appliquerent diligemment et perseveramment à reformer les abus, malversations et corruptions qui s'estoient glissées dans les personnes et les affaires de toutes qualitez durant la licence des armes civiles; et par ce moyen s'estans tirez des necessitez semblables aux vostres, ils soulagerent leurs sujets, rendirent leurs royaumes riches et opulens, et firent trembler tous leurs mauvais voisins, comme non seulement j'espere, mais crois absolument que vous ferez, s'il plaist à vostre Majesté de prendre une ferme resolution sur ce que je vous presenteray, puis qu'en l'exemplaire imitation et operation des advis, conseils, expediens, moyens et procedures, qui ont esté suivis par ces quatre grands, sages et valeureux monarques, gist le troisieme et dernier, mais le plus solide fondement de la substance des affaires, duquel, pource qu'il consiste en grande diversité de parties, j'en discoureray de bouche avec vostre Majesté, à diverses reprises, selon que je verray qu'elle y prendra goust et qu'il luy plaira de m'en donner le temps et le loisir; et cependant, comme par forme d'eschantillon et theses generales, laissant



le surplus, ensemble les hypotheses et les specialitez, à la vive voix, je feray par cette lettre huit sortes d'ouvertures et propositions à vostre Majesté, desquelles la meditation m'a semblé luy estre absolument necessaire, afin de les pratiquer, apres y avoir bien pensé, peu à peu par progrez de temps, et selon que vostre prudence et admirable sagesse le jugeront à propos.

Desquelles la premiere consiste à reduire toutes les revoltes et rebellions de vostre empire à une deüe et volontaire obeysance, par le moyen des expediens que je vous proposeray et trouverez, je m'en asseure, de facile execution.

La seconde, à esteindre et amortir toutes les haines, envies et animositez d'entre les partis et religions diverses qui sont dans vostre Estat, en quoy vostre seul exemple et volonté absoluë pourra tout.

La troisiemesme, à faire une perquisition bien exacte de toutes les facultez et revenus du royaume, de quelque nature et qualité qu'ils puissent estre, avec un esclaireissement bien particulier des causes, origines, establesemens et perceptions d'iceux, ensemble des droits et redevances qui ont esté abolis par le temps, la negligence des officiers, et autres causes que l'on pourra decouvrir, et des amenagemens et ameliorations qui se pourront faire sur les uns et les autres.

La quatriemesme, un estat bien particulier de toutes les debtes ausquelles la France peut estre obligée, soit à cause des engagemens et alienations de domaines, ou autres revenus, soit par creations et constitutions de rentes, sur toutes les diverses natures de revenus, soit par affectations de gages, taxations, droits et attributions d'officiers de toutes sortes, soit par recognoissances particulieres en vertu d'arrests du conseil et des cours souveraines, ou par vertu d'acquits, lettres et mandemens patents, et receptions expediees, en approfondir la cognoissance jusques à la cause, source et origine d'une chacune d'icelles, et regarder aux moyens de les régler, diminuer et acquitter peu à peu, de temps en temps, selon que l'estat des affaires et les qualitez des personnes le pourront permettre.

La cinquiesme, de faire un registre bien certain de tous les officiers royaux qui sont au royaume, tant commençaux et militaires, que de judicature, police, escritoire et finance, avec une specification de ceux qui sont absolument necessaires, et de ceux dont l'on se pourroit bien passer, afin de les diminuer peu à peu, ensemble leurs gages, droicts et attributions, autant que l'estat des affaires le pourra permettre, dequoy

faire il sera mis en avant des expediens faciles pour y parvenir.

La sixiesme, de faire un estat de toutes les villes, chasteaux et forteresses royales et seigneuriales qui sont de consequence, auquel soit specifié celles qui sont absolument necessaires pour la deffense et seureté du royaume, celles qu'il faudra essayer de demolir peu à peu lors que les gouvernemens vacqueront, ou que les qualitez des personnes qu'il n'est pas à propos d'offenser le permettront.

La septiesme, de faire une visitation generale de toutes les frontieres, limites et confins du royaume, avec les observations necessaires, principalement és costes maritimes, afin d'en dresser des cartes bien exactes, ausquelles soient remarquées toutes les emboucheures des rivières, les hauteurs des marées, les rums des vents, les rades, abris, cales, ports, havres, et leurs profondeurs, et sur tout les lieux où il y a ou se pourroit faire de bons ports et havres, pour l'entrée, residence et conservation des plus grands vaisseaux de guerre, afin d'essayer de rendre la France aussi puissante et forte par la mer qu'elle l'est par la terre.

La huitiesme, de faire en premier lieu une deüe recognoissance par visitations, gratifications et payemens de debtes envers tous les roys, potentats et republics estrangeres, desquels la France a esté et est encor tous les jours assistée en ses urgentes necessitez, puis essayer de faire et former une bonne union, alliance et confederation entre tous les potentats qui hayent ou apprehendent la domination d'Espagne et d'Autriche, entr'eux premierement, et puis conjointement avec vous, afin d'en former des desseins conformes aux sagesse, prudences, puissances et generositez de vous, et de tant de grands roys cy-dessus nommez, suivant ce qui s'en pourra proposer de vive voix, avec plusieurs autres particularitez pour la facilité des executions qui ne se trouveront à mespriser en l'essay d'icelles.

Or ne doutay-je nullement, sire, que si vostre Majesté communique prématurement toutes ces miennes propositions à des personnes que je sçay bien, ils ne les blasment, voire peut-estre ne les accusent d'impertinence, precipitation et temerité, comme avancées les unes devant leur temps et leur saison, et les autres pleines d'extravagances et impossibilitez, voire que vostre Majesté mesme, si elle en fait jugement avant que de m'avoir entendu, sur les temps, les formes et les manieres diverses que j'estime estre propres pour cet effet, n'en prenne quelque impression; mais nonobstant tout cela si ne perdray-je point courage, et ne laisseray de me faire

fort que si vostre Majesté se veut resoudre à constituer toutes ses plus ordinaires delectations, plaisirs et passe-temps, en l'exaltation de son honneur, gloire et renommée, et d'employer toute la vigueur de son corps, la vivacité de son esprit et la solidité de son jugement, en l'exécution de ces choses, que vous n'en perceviez des fruicts encor plus doux que je ne les ose dire, voire que vous ne voyez un tel calme dans vostre royaume, une tant volontaire obeysance en tous vos sujets, une telle amour de vos peuples, une telle affluence de biens et richesses dans vostre Estat, un si grand amas de tresors, armes, artilleries, munitions et vivres, et vostre personne et vostre reputation estre en telle admiration et veneration entre les potentats, peuples et nations estrangeres, que vous entreprendrez encor choses plus hautes que je ne me les sçaurais imaginer. Sur laquelle esperance, voire certitude, je supplieray le createur, etc.

Or retournans à madame de Guyse, qui s'en-nuyoit des remises dont l'on usoit au traité de son fils, laquelle trouvant le Roy qui vous tenoit par la main et parloit à vous, comme il a esté dit cy-dessus, elle luy dit demy en colere :

« Sire, vous nous avez baillé trois hommes « pour faire le traité de mon fils, avec lesquels « je crains que nous ne conclurons jamais rien « si vostre Majesté n'y donne ordre, car l'un ne « fait que hausser les espauls sans dire autre « chose sinon : Il y faut voir, il y faut bien advi- « ser et faisons mieux ; l'autre parle incessam- « ment sans rien determiner, ny qu'aucun de la « compagnie, ny peut estre luy mesme, puisse « clairement entendre ce qu'il veut dire ; et le « dernier est toujours en furie et en colere, ne fait « que nous menacer, user de reproches, dire qu'il « ne nous faut rien accorder, et que nous sommes « encor heureux que vous nous receviez à mercy « et nous donniez la vie ; mais ce ne seroit pas « nous recevoir en vos bonnes graces ny nous « donner la vie que de nous desnier vos bien- « faits, faveurs et liberalitez : car sans icelles « nous ne sçaurions vivre, ny mesme, pour le « regard de ma fille et de moy, posseder aucune « joye ny contentement. »

Sur quoy le Roy, tout esmeu de la voir parler d'une telle affection, qu'en luy prenant et baisant les mains comme par force, les larmes luy en venoient aux yeux de trop grande ayse, il luy dit : « Hé bien ! ma cousine, que desirez-vous de moy ? « car de toutes choses possibles et qui ne me se- « ront point deshonorables ou trop dommagea- « bles à mon Estat, je n'en refuseray une seule à « l'affection que vous me tesmoignez. Voulez-vous « donc que je vous baille d'autres de mes servi-

« teurs pour voir s'ils feront mieux et plus dili- « gemment que ces trois dont vous vous plai- « gnez ? S'il n'y a que cela à faire pour vous con- « tenter, je le vous accorde de bon cœur ; partant « choisissez en vous-mesmes quelqu'un en qui « vous sçachiez bien que je me fie, et il ne vous « sera point refusé. » Et lors elle luy respondit toute joyeuse : « S'il vous plaisoit, sire, nous « bailler celuy-là seul que vous tenez par la main « (qui estoit vous), lequel s'est desja entremis de « tant d'autres traittez, negociations et affaires, « et vous y a servy, ainsi que je le vous ay oüy « dire, tant loyalement et heureusement, vray- « ment vous nous obligeriez à toute extrémité.— « Quoy, repartit lors le Roy (parlant de vous), « ce meschant huguenot ! vraiment je le vous « accorde fort franchement, encor que je sçache « Lien qu'il est vostre parent et qu'il vous ayme « infiniment ; » et, sur l'heure mesme, voyant M. de Gesvres assez proche de là, il le fit appeler et luy commanda de vous dépêcher une commission qui fut scellée du grand sêau, quoy qu'avec quelque espee de regret de monsieur le chancelier, qui avoit eu cette mesme charge ; lequel neantmoins, comme il estoit souple et un des plus civils et advisez courtisans de son siecle, ne vous en fit aucun semblant, mais au contraire, vous dit : « Je suis bien ayse que vous ayez ce « pouvoir, car le Roy ne le pouvoit mettre en « meilleure ny plus heureuse main que la vostre ; « et partant me sera ce contentement de voir « que vous fassiez mieux que nous n'avons fait ; » de laquelle commission la teneur ensuit.

« HENRY, par la grace de Dieu roy de France « et de Navarre, à tous ceux qui ces presentes « lettres verront et orront, salut. Sçavoir faisons « que pour l'entiere et parfaite cognoissance et « confiance que nous avons de la personne de « nostre cher et bien aimé conseiller en nos con- « seils d'Estat et privé, nostre chambellan ordi- « naire et capitaine de cinquante hommes d'ar- « mes de nos ordonnances, le sieur baron de « Rosny, Maximilian de Bethune, et de ses sens, « suffisance, loyauté, prud'homme, experience « et bonne diligence, et bien memoratifs des « grands et signalez services qu'il nous a rendus « depuis longues années en plusieurs affaires de « paix et de guerre ; iceluy pour ces causes et « autres bonnes et grandes considerations avons « commis, ordonné et député, commettons, or- « donnons et deputons par ces presentes signées « de nostre main, pour se transporter par tout « où il jugera que besoin sera, et traiter en nos- « tre nom avec le sieur duc de Guyse, ou ceux « qu'il deputera, et tous autres qui voudront re- « cognoistre leur devoir et se soumettre en nostre

acquérir créance à leurs despens, en interpretant sinistrement toutes leurs intentions, ils vous faisoient mille frasques, toutes leurs opinions estans tousjours concertées contre les vôtres, et toutes les affaires que vous entrepreniez, et les personnes que vous favorisiez rebutées, et en passerent si avant qu'il ne se tenoit plus de conseils en vostre presence (principalement où il estoit question de finances, tant ils apprehendoient tous que vous y missiez le nez), que de choses quasi de neant, et tenoient des conseils secrets à part, où ils dispoient de toutes choses par correspondances avec Messieurs le chancelier de Chiverny, de Sancy et autres qui manioient les affaires pres du Roy : dequoy vous estant apperceu vous resolustes (apres leur en avoir parlé assez haut et protesté que puis qu'ils tenoient des conseils à part, que vous ne vouliez plus estre nommé ny trouvé signé dans les resultats du conseil) de vous retirer à Moret, d'où ils ne vous pûrent jamais faire revenir, quelques semonces qu'ils vous en fissent faire, mesme par M. le prince de Conty, auquel vous escrivistes que puisque vous n'aviez pas la puissance d'empescher le mal, vous ne luy vouliez pas servir d'ombre.

Environ ce temps le Roy marchant avec ses forces vers le Lyonnois, M. le comte eut une telle broüillerie avec luy, qu'il le quitta et s'en revint à Nogent, voire fit ce qu'il peut pour ramener sa compagnie de gens-d'armes, et en dégouter plusieurs autres de ce voyage, dont les causes, sinon vrayes, à tout le moins apparentes, vous furent cognues par une lettre particuliere que le Roy vous en escrivit, outre la generale addressante à tout son conseil laissé à Paris, quoy qu'il creust que vous y fussiez encor comme il l'avoit ordonné; mais le courier passant à Moret vous bailla la vostre, qui estoit telle :

*Lettre du Roy à M. de Rosny.*

Mon amy, vous sçavez mieux que nul autre, car vous y avez esté souvent employé, si je n'ay pas toujours fait tout ce qui m'a esté possible pour vivre en bonne intelligence avec mon cousin le comte de Soissons, et s'il m'a jamais esté possible de tenir deux mois durant cet esprit là en bonne humeur : je ne doute pas qu'il n'aye du courage, car il en est de race, ny mesmes qu'il n'aye de bonnes intentions; mais il les mesnage si mal et prend son temps si mal à propos, qu'il se fait plus de tort qu'à nul autre, dequoy, en l'occasion qui se presente, le jugement n'en sera pas fort difficile à faire à tous ceux qui sçauront que le lendemain de la réception des lettres de

mes cousins le connestable et mareschal de Biron, par lesquelles ils me donnoient advis que le connestable de Castille assembloit de grandes forces en Lombardie avec dessein de descendre aux Lionnois et en la Bourgogne, et me prioient de me vouloir avancer, pour ce qu'il y aura des coups à donner et par consequent de l'honneur à gagner : dequoy, comme j'eus commencé de parler tout haut et à convier ma noblesse à se preparer et montrer courageuse selon sa coutume, mondit cousin le comte de Soissons fit mettre en avant une question suffisante pour diviser, voire dissiper mon armée, consistant à sçavoir si ce n'estoit pas mon intention que, comme grand maistre de France, il commandast apres moy à toutes mes armées, et sur tout en celle que j'estois prest de former, par preference à mesdits cousins connestable et mareschal, lesquels ont les meilleures troupes dont je me puisse servir; et vous qui les cognoissez pouvez juger si ce sont gens pour souffrir ce passedroit. Surquoy j'ay fait dire et remontrer tout ce qu'il m'a esté possible à mondit cousin le comte de Soissons, voire luy ay usé de mesmes prieres que s'il eust esté mon fils ou mon frere; mais tout cela n'a peu empescher qu'il ne m'ayt quitté et emmené tout ce qu'il a peu de sa compagnie, quasi (ainsi se peut-il dire) à la veille d'une bataille ou apparence de quelque signalé combat; car vous, qui me cognoissez de longue-main, et vous estes trouvé pres de moy en tant de combats et de fortunes de guerre, ne douterez nullement, je m'en assure, que si les ennemis s'approchent je ne reculeray pas, surtout si ce sont Espagnols, ny ayant rien de plus doux aux vertueux que d'eslever les humbles et abaisser les orgueilleux. De toutes lesquelles choses j'ay bien voulu donner advis à mon conseil qui est à Paris, et encor à vous en particulier, afin que vous fassiez bien comprendre ce qui se passe à mon cousin le prince de Conty, l'assurez de ma bienveillance, et sollicitiez les autres de prendre garde aux comportemens de ceux qui tesmoigneront quelque mescontentement. Priant Dieu, mon amy, qu'il vous ait en sa garde.

Du camp pres Auxerre, ce 12 juin 1595.

Quelques trois ou quatre jours apres, l'on vous vint dire qu'il arrivoit des gens-d'armes à Saint Mamer, village estant à vous, à un quart de lieuë de Moret, sur le confluent des rivières de Seine et Loing, lesquels se dispoient d'y loger; vers lesquels ayant envoyé un gentilhomme des vôtres nommé Camor, pour sçavoir quels ils estoient, et les prier par courtoisie de vouloir prendre autre logis, il revint aussitost, et vous dit qu'il avoit trouvé des gens les plus

discourtois qu'il estoit possible, lesquels sans avoir esgard à vos prieres, ny mesmes dire les noms des chefs qui leur commandoient, mais seulement qu'ils estoient à M. le comte de Soissons, et qu'ils avoient accoustumé de loger par tout, pource qu'ils vivoient fort bien, et qu'ayant ce jour-là fait une grande traite, ils ne pouvoient aller chercher giste ailleurs, leurs chevaux estans las : sur cette response vous leur fistes une telle lettre :

« Messieurs, qui commandez aux gens de guerre arrivez au village de Sainct Mamer qui m'appartient, je ne sçauois croire que vous apparteniez à M. le comte de Soissons, d'autant que n'ignorant point que je suis son serviteur, et qu'il me fait cet honneur de m'aymer, vous sçauriez quand et quand qu'il n'auroit nullement agreable que vous me refusassiez la courtoisie que je vous ay demandée; que si vous vivez si bien que vous m'avez mandé, et que je sçay bien que monsieur le comte veut que fassent ceux de sa compagnie, attendu qu'ils sont payez, je vous prie de vous en venir tous loger à Moret, où s'il n'y a assez d'hostelleries pour vous loger tous dans la ville, je vous feray marquer des escuries et logis bourgeois. A quoy m'asseurant que vous vous disposerez plutost que de m'offencer de gayeté de cœur, je vous baise les mains, et suis vostre serviteur, ROSNY. »

Ayant baillé cette lettre au sieur de Camor, il vous dit qu'il n'esperoit pas qu'ils deferassent davantage à vos lettres qu'aux prieres qu'il leur avoit faites en vostre nom, ayant tenu de telles paroles qu'ils sembloient estre venus là tout expres pource vous fasher, et partant que vous flissiez comme si vous deviez estre refusé tout à plat : ce qu'entendu par madame vostre femme, elle se mit fort en colère contre luy, et luy dit qu'il sembloit qu'il voulut former une querelle, qu'il n'avoit que faire de redire tout cela, et qu'elle aymeroit mieux que Sainct Mamer fust mangé, que vous eussiez à leur occasion une broüillerie avec M. le comte de Soissons, ou une querelle avec les chefs de sa compagnie; desquelles paroles vous vous fashastes contr'elle, luy distes qu'elle se meslast de filer sa quenouille, et vous laissast disposer des choses qui concernoient les armes où vous n'estiez pas apprentif ny n'aviez pas accoustumé de mettre vostre honneur en compromis de crainte des perils; que vous estiez bien sorty à vostre avantage d'affaires plus facheuses que celle-là.

Et en mesme temps estant sorty du chasteau, vous envoyastes prier quelques gentils-hommes, vos voisins et vassaux, de se rendre à Moret, avec leurs chevaux et leurs armes; mandastes

à tous les paysans, portans armes, des villages circonvoisins, de vous venir aussi tost trouver; fistes battre le tambour par la ville, et faire garde aux portes, avec défences de laisser sortir cinq ou six gens-d'armes de cette troupe là, qui estoient venus en icelle pour ferrer leurs chevaux, racoustrer leurs brides, selles, pistolets, bottes et souliers, et achepter leurs petites necessitez; mais de laisser entrer tous ceux qui arriveroient encor; et fistes soudain preparer un grand batteau accommodé de planches à canonnières; bref donnâtes si bon ordre à vos affaires, que dans deux heures vous eustes rassemblé trente chevaux et cent cinquante harquebusiers dont il y en avoit cent d'assez bons, et fait retenir douze de ces gens-d'armes dans la ville : si bien qu'au retour du sieur de Camor, qui ne vous apporta que des refus avec des menaces de ce que vous reteniez de leurs compagnons par force, vous sortistes dehors avec environ cinquante harquebusiers, trente piquiers, trente assez bons chevaux, et fistes embarquer le surplus dans vostre batteau couvert de planches, lequel vous fistes aussi-tost descendre la riviere et s'aller ancrer vis à vis des maisons du village, qui sont toutes sur le bord d'icelle.

De quoy les gens-d'armes logez advertis, ils commencerent à s'estonner et envoyèrent vers vous pour sçavoir que vouloit dire tout cela. « Rien autre chose, leur respondistes-vous assez brusquement, sinon que vous vouliez aller loger à Sainct Mamer, qui estoit à vous et le quartier de ces gens de pied. » Et vous estant en mesme temps avancé en bon ordre du long des lieux couverts, il fut fait tant d'allées et venuës, qu'en fin ils vous manderent qu'ils ne doutoient point que monsieur le comte ne s'offençast, lors qu'il sçauroit qu'ils auroient logé sur vos terres, et partant qu'ils deslogeroient et payeroient ce qu'ils avoient despendu, ainsi qu'ils firent; et comme ils furent sur le haut du costeau tirant vers Dormelles, et vos harquebusiers du batteau logez dans Sainct Mamer, vous leur renvoyastes leurs douze gens-d'armes, et eux des remerciemens, recommandations et offres de service; en sorte que toutes choses reconciliées vous leur fistes present de deux pastez de venaison et de douze bouteilles de vin.

Ces choses ainsi passées vous demeurastes (reservé un voyage que vous fistes vers M. le prince de Conty, pour l'informer de ce dont le Roy vous avoit donné charge par ses lettres) pres de trois mois à Moret, qui fut le plus grand sejour que nous croyons que vous eussiez encor jamais fait en aucune de vos maisons, et le plus long que nous ayons veu se passer, depuis que

je vins à vostre service jusques alors, sans faire voyage ou estre employé en quelque affaire de paix ou de guerre, où neantmoins je ne vous vis jamais ennuyer, quoy qu'ils vous faschast aucunement d'entendre que les ennemis s'avançoient du costé de la Picardie et de la Bourgogne; mais tout à fait receustes vous un desplaisir signalé des desordres et pertes arrivées vers la Picardie, et lors que vous sceustes les périlleux combats que le Roy avoit rendus à Fontaine-françoise, sans vous y estre trouvé, des particularitez desquelles factions nous ne dirons rien, suivant nostre costume, pour ce que vous n'y fustes pas. Mais à cause des choses memorables en bonne et mauvaise fortune qui s'y passerent, et qu'elles meritent d'estre sceües par la posterité, nous nous licentierons d'insérer icy les lettres qui vous en furent escrites, tant des braves exploits et bons succez d'un costé, que des manquemens et desastres de l'autre; la teneur desquelles lettres s'ensuit, et premièrement celles du sieur de la Fond touchant les choses advenues en Picardie.

*Lettre de M. de la Fond à M. de Rosny.*

MONSEIGNEUR, voyant les divers artifices dont l'on a usé parmy nous-mesmes pour desguiser ce qui s'est passé en ces mal-heureuses occasions de Picardie, je me suis resolu de vous en escrire la pure verité, suivant ce que mes yeux et mes oreilles en ont peu comprendre, m'y sentant obligé par ce que je dois à la memoire de feu M. l'admiral de Villars, vostre singulier amy, et à vostre service particulier. Je ne m'arrestera point aux ordres establis par le Roy, avant son partement pour faire vivre messieurs de Nevers, de Longue-ville, de Sainct Paul, de Bouillon et de Villars en bonne intelligence, afin de faire en sorte qu'ils s'entr'assistassent les uns les autres aux occasions, car vous le sçavez mieux que moy : mais vous diray, que, nonobstant les assurances qu'ils donnerent tous cinq de suivre les intentions de Sa Majesté, dès la premiere jonction qu'ils firent, il fut du tout impossible d'empescher la naissance de plusieurs envies et debats entre messieurs de Nevers et de Bouillon; tellement que les affaires estant en cet estat, M. le comte de Fuentes et M. de Rosne, se prevalans de l'absence du Roy, et peut estre de la cognoissance qui leur fut donnée de ce mal entendu de nos capitaines, vindrent assieger le Castelet et la Capelle, qu'ils emporterent avant que le secours pust estre assemblé : le premier, faute de vivres et munitions; la seconde par deffaut de resolution en celui qui estoit gouverneur.

Peu apres ces deux places perduës, le gouverneur de Han, ayant receu du mescontentement de la garnison estrangere qui estoit dans la ville, prist resolution de se rendre serviteur du Roy, et de remettre le chasteau, et, par le moyen d'iceluy, la ville en son obeysance : de quoy ayant donné advis à M. de Longue-ville et de venir bien fort à son secours, à cause de la grandeur de la garnison, il advertit aussitost tous ses amis, afin de les assembler et sur tous M. de Bouillon; mais ayant manqué de diligence et l'affaire pressant, à cause que le chasteau estoit assiégué par la garnison de la ville, messieurs de Longue-ville et de Humieres, avec leurs seuls amis de la province, furent contraincts de courir au secours et de se jeter partie dans le chasteau et partie se loger aux environs de la ville, qu'il fallut attaquer comme une place assiegée avec diverses escalades et applications de petard, par le moyen desquels, apres plusieurs combats bien soutenus des ennemis, ils entrèrent dedans par les retranchemens qui avoient esté faits du costé du chasteau où il se passa des choses fort memorables que je serois trop long à vous particulariser; la conclusion desquelles fut, que nonobstant que ces estrangers se ralliassent plusieurs fois dans les places et carrefours, voire deffendissent des maisons particulieres, ils furent tous taillez en pieces, au nombre de mil ou douze cens, mais avec bien autant de perte de nostre costé (quoy que le nombre de personnes fut beaucoup moindre), à cause de vingt-cinq ou trente braves gentils-hommes et gens de commandement qui y ont esté tuez, et entre iceux M. de Humiers, qui est la plus grande perte qu'eust peu faire la Picardie, et les maistres de camp des Cluseaux et la Croix.

Cette execution ainsi faite, messieurs le comte de Sainct Paul, mareschal de Bouillon et admiral de Villars, s'estant joints avec de belles troupes chacun de son costé, ils resolurent ensemble de secourir Dourlans, que messieurs le comte de Fuentes et mareschal de camp Rosne avoient assiégué, où ils s'acheminèrent en cet ordre : M. de Bouillon menoit une troupe de quatre cens chevaux; M. de Villars marchoit apres avec environ pareil nombre, et M. le comte de Sainct Paul le dernier, avec cinq cens chevaux et deux mil hommes de pied, qu'ils faisoient estat de jeter pour renfort dans la place, au cas qu'ils n'en peussent faire absolument lever le siege.

Or, comme M. de Bouillon fut à demie lieuë de la place, il fit avancer cinquante chevaux, cinq cens pas devant luy, en forme de coureurs,

afin d'aller gagner le sommet d'une montagne, duquel on pouvoit descouvrir la place et le siege; quatre chevaux qui marchaient devant les quarante-six restans, n'approcherent pas plustot du haut de la montagne qu'ils ne descouvrirent la ville, et peu apres grande partie de l'armée de l'ennemy en forme de bataille, rangée entre la ville et le costeau, sur l'advis qu'elle avoit eu de nostre acheminement. M. de Bouillon informé de cela, voulut luy mesme en faire la recognoissance avec tout son escadron, croyant qu'il se presenteroit peut-estre occasion de se faire signaler par quelque bel exploit; mais il ne parut pas plustot sur le sommet de la montagne qu'il ne vist un petit escadron, qui paraissoit d'environ quelque cent chevaux, qui faisoit ferme comme ressentant son corps de garde; mille pas plus derriere estoient deux escadrons, de chacun six cens chevaux, soutenus de trois autres escadrons de cavallerie chacun d'environ pareil nombre, et de plusieurs bataillons d'infanterie qu'il jugea estre de sept à huit mille hommes de pied; de tous lesquels estant ainsi decouvert, il vid soudain s'avancer au petit trot les premiers cent chevaux, et en suite marcher au grand pas droit à luy les deux autres premiers escadrons, la salade en teste et la lance sur la cuisse, ce qui luy fit soudain juger, ainsi qu'il nous l'a dit depuis, que les ennemis avoient eu advis de nostre dessein, et qu'il seroit difficile que la journée se passast sans en venir aux mains, s'il ne leur empeschoit, par industrie, la recognoissance de ce qui le suivait; et afin de faire plus grande monstre, et par consequent donner occasion aux ennemis de marcher plus retenus et la bride en main, il envoya un gentil-homme vers monsieur l'admiral, luy mandant qu'il s'avançast en bon ordre et prest à combattre, d'autant qu'il jugeoit fort difficile de s'exempter de quelque meslée.

Sur lequel advis, M. de Villars haussant le bras en l'air, commença de crier : « Or sus, « compagnons, voicy l'occasion par nous tant « désirée, qui se presente maintenant pour faire « cognoistre nostre affection et loyauté envers « le Roy et la France, et nostre valeur aux ennemis, et partant que chacun de vous me suive « et se resolve à faire comme moy. » Et sur cela nous ayant tous fait prendre nos salades, ainsi que luy avoit pris la sienne, nous eusmes bientôt gagné l'aisle gauche de la troupe que menoit M. de Bouillon; lequel voyant M. l'admiral si bien deliberé, luy dit : « Monsieur, il nous faut « empescher les ennemis de recognoistre nostre « derriere, car tout seroit perdu, et pour cet « effet, nous faut-il resoudre, chacun de son

« costé, à leur faire (nous l'entendismes tous) une « furieuse charge. » A quoy ce brave cavallier et tous nous autres ne manquasmes pas, voyant des-jà, ce nous sembloit-il, l'escadron de M. de Bouillon, duquel croyant d'estre secondez, voire mesme craignant d'estre devancez, une pointe de jalousie à qui mieux feroit, nous fit prendre la charge au grand trot et nous aller mesler avec l'escadron de la main gauche, le pistolet au poing dans leur forest de lances, avec telle impetuosité, que si nous n'eussions eu affaire qu'à six cens chevaux, j'estime que nous les eussions rompus; mais M. de Bouillon n'ayant fait qu'une fausse charge (comme il dit depuis n'avoir dit autre chose à M. de Villars, et non une furieuse charge comme nous l'asseurons) et un caracol pour reprendre le chemin de la retraite, la troupe qu'il avoit fait mine de charger, voyant M. de Villars mal mener celle qu'il avoit attaquée, le vint charger en flanc et en queue, avec telle impetuosité, que ne la pouvant soutenir, plusieurs des siens aymerent mieux penser à sauver leur vie qu'à conserver leur honneur; si bien que M. de Villars ayant esté (ensemble les plus braves des siens) portez par terre, il fut tué de sang froid et plusieurs autres avec luy : en suite d'une telle desconfiture, M. de Bouillon fut mis en route, le comte de Saint Paul pareillement, plusieurs de leurs troupes tuez et pris prisonniers, et quasi tous leurs gens de pied, se trouvant ainsi abandonnez de la cavalerie, taillez en pieces; lequel exploit mit tel effroy au cœur des assiegez, que ne faisans quasi plus tous qu'à sauver qui peut, ils furent forcez et taillez en pieces en offrant de se rendre. En toutes lesquelles factions cy-dessus, pour ne vous rien celer de la verité, je puis dire s'estre perdu plus de trois mil hommes, et entre iceux plus de noblesse qu'il n'en mourut, à ce que l'on dit, à Coustras, Arques, ny Ivry; ce que vous n'entendrez point sans extrême regret, je le sçay bien, principalement y ayant perdu ce galland cavallier, monsieur l'admiral de Villars, vostre intime amy, soit pour avoir mal entendu, ou n'avoir pas esté bien secondé. Le temps et les personnes interessées en cet accident ne me permettant pas de vous en dire davantage, je finiray par une protestation de vouloir demeurer à jamais, monseigneur, vostre plus humble et obligé serviteur, LA FOND.

*Lettre du sieur Balthazard à M. de Rosny, touchant ce qui se passa à Fontaine-françoise.*

Monseigneur, suivant le commandement qu'il vous pleut me faire lors que vous m'envoyastes

suivre la Cour, à la poursuite de quelques affaires où le sceau estoit necessaire, d'estre curieux d'apprendre tout ce qui se passeroit d'importance en ce voyage de Lion, Bourgogne et la Franche-Comté, que vous aviez tant contesté au dernier conseil qui se tint à Paris sur ce sujet, en quoy vous fustes emporté par les voix d'autorité de messieurs le chancelier de Chiverny, de Sancy, d'Elbœuf et autres, qui avoient quelques interests vers ces quartiers là; à cela fortifiez par les lettres reiterées de messieurs le connestable de Mont-morency et mareschal de Biron, qui se voyoient une armée estrangere preste à leur tomber sur les bras, laquelle eust reduit leur offensive à la deffensive, et peut-estre en pertes, ainsi que je vous ay oüy discourir de tout cela, lors que, contre vostre gré, le Roy vous laissa en son conseil d'affaires residant à Paris. Suivant donc, comme j'ay dit, vos commandemens, j'ay mis par Memoires tout ce que j'ay veu faire et entendu dire pendant ce voyage, desquels faisant un abregé le plus succinct qu'il me sera possible, je vous diray que, nonobstant tout ce que je vous ay ouy raconter des faits esmerveillables et valeurs incomparables du Roy, si ay-je appris de ceux qui s'y sont, à ce qu'ils se vantent, trouvez aussi-bien que vous, que ce qu'il a fait en ces occasions de la Franche-Comté, de son jugement, de son courage et de son espée esgale, voire surpasse tous ses precedens faits heroïques; desquels reprenant l'origine et les premieres causes, vous sçavez, monseigneur, comme environ sur le temps que le Roy partit de Sens pour aller à Troyes, il receut advis, ainsi que je l'ay sceu de M. Jassault, de monseigneur le mareschal de Biron, comme l'exploit admirable de Beaune luy ayant facilité les reductions de Nuys et Authun, et tout cela disposé les habitans de Dijon à tumultuer contre leur garnison, enquoy se voyant les plus foibles, à cause des grandes forces rassemblées par le vicomte de Tavanès, ils l'avoient appellé à leur secours, où il estoit aussi-tost accouru et arrivé si heureusement que les habitans estans reduits à quelques cantons de rué et une seule porte, il avoit aussi-tost mis pied à terre, attaqué si brusquement les ennemis qu'il avoit fait quitter toute la ville au vicomte de Tavanès et aux siens, et iceux contraints de se retirer aux chasteaux de Dijon et de Tallan, où il les avoit investis, attendant l'arrivée de Sa Majesté dont il avoit grand besoin; et partant la supplioit-il de vouloir user de ses diligences accoustumées, d'autant qu'il sçavoit de certain que M. du Mayne, qui avoit reduit le sommaire de sa fortune à la conser-

vation de la Bourgogne, pressoit, sollicitoit et obtestoit le connestable de Castille de marcher au secours d'icelle, l'assurant qu'à la seule veuë et presence de son armée, Beaune, Nuys, Authun et la ville de Dijon, nouvellement conquise, se remettroient entre ses mains.

Le Roy receut ces advis comme il arrivoit à Troyes, d'où il se résolut de partir aussi-tost et de marcher avec tout le corps de son armée, sa grande experience à la guerre luy faisant conjecturer, comme je luy ay oüy dire deux ou trois fois tout haut, que tout ce jeu ne se passeroit point sans que le connestable de Castille, M. du Mayne et toute leur armée, quelque commandement expres qu'eust le premier de ne s'amuser à rien, et de marcher en diligence vers les Pays-Bas, ne fussent de la partie comme ils n'eussent pas failly de devancer de plusieurs jours le Roy, s'ils ne se fussent amusez à la reprise de Vesou et autres petites places prises par les Lorrains en la Franche-Comté, et que le débordement de la riviere de Saone ne leur eust empesché le passage à Gray, où ils furent contraints de sejourner quelques jours, pendant qu'au dessous de la ville l'on faisoit construire un pont pour leur passage, avec telle lenteur qu'il sembloit que ce connestable redoutast de s'engager deçà les rivières, sur le bruit qui couroit de l'approchement du Roy avec son armée, lequel ne fut arrivé qu'après le perte de Dijon, si l'ennemy l'eut imité en ses diligences.

Sa Majesté partant de Troyes, dépescha le comte de Thorigny devant avec quatre cens chevaux et quatre à cinq cens harquebusiers à cheval, pour aller renforcer M. de Biron, comme ces secours luy arriverent fort à propos, qui furent suivis du Roy quatre jours apres, lequel, avant que de descendre de cheval, s'en alla recognoistre toutes les advenües de Dijon, du costé que les ennemis pouvoient venir, sur lesquelles il fit faire de grands retranchemens, comme aussi entre les chasteaux de Dijon et Tallan, dont jusques alors le mareschal de Biron n'avoit peu empesché la communication toute libre: mais tous ces ordres ainsi establis ne contentant pas encor l'esprit de nostre brave Roy, il resolut, afin de retarder l'acheminement des ennemis, et donner par ce moyen du temps suffisamment pour achever en perfection les ouvrages commencez, d'aller au devant de l'armée ennemie, et essayer de la rencontrer encor sur son passage de la riviere; et pour cet effet, ayant donné rendez-vous à Lux et Fontaine-françoise, et cependant avec cent cinquante chevaux ou environ, et autant d'harque-

busiers à cheval, il s'avança devant jusques sur la rivière de Vigennes, proche du bourg de Sainct Seine, d'où ayant dépesché le marquis de Mire-beau, avec cinquante ou soixante chevaux pour aller prendre langue des ennemis, il passa luy mesme cette rivière avec quelque cent ou six vingts chevaux, et se mit sur ses pas, marchant en simple capitaine de chevaux legers, avec dessein de mieux recognoistre l'assiette du pays, pour y prendre ses avantages si les armées avoient à s'affronter. Mais il n'eust pas fait guere plus d'une lieuë de chemin, en telles recognoissances, qu'il vit revenir le marquis de Mire-beau plus viste que le pas, et un peu en desordre, lequel luy dit n'avoir pas esté en sa puissance de bien recognoistre l'armée des ennemis, d'autant qu'il avoit esté chargé brusquement par un gros de trois ou quatre cens chevaux qui ne luy avoient pas donné loisir destendre sa veuë comme il eut bien désiré; mais que neantmoins il croyoit que toute l'armée du connestable de Castille marchoit en corps pour venir prendre le logement de Sainct Seine. En mesme temps arriva M. le mareschal de Biron, qui s'offrit aussi-tost d'aller voir les ennemis et d'en rapporter nouvelles certaines; mais il n'eust pas fait mille pas qu'il descouvrit sur le haut d'une combe quelques soixante chevaux là arrestez comme s'ils eussent esté en garde, lesquels il chargea aussi-tost et les contraignit de se retirer, et luy laisser leur place, en laquelle estant parvenu, il descouvrit toute l'armée, marchant en ordre de bataille, dont il y avoit quatre cens chevaux plus avancez qui en poursuivoient environ cent cinquante de ceux du Roy qui fuyoient en desordre, que l'on a sceu depuis estre le baron d'Aussonville. Ces quatre cens chevaux voyans ces fuyards s'esloigner trop, et decouvrant le mareschal de Biron qui faisoit ferme sur ce haut, s'avancerent droit à luy separez en deux bandes, dont l'une prit sa main gauche et l'autre sa droite, plutost pour recognoistre ce qui estoit derriere luy que pour prendre encor la charge; et environ six cens chevaux separez encor en deux bandes, qui suivoient les quatre cens premiers, pour lesquels empescher la recognoissance qu'il jugeoit bien qu'ils vouloient faire, avant que de l'enfoncer, il separa sa troupe, d'environ trois cens chevaux, en trois, dont il bailla une tierce partie au marquis de Mire-beau, pour s'estendre à sa main droite, une autre au baron de Lux, pour se jetter sur la gauche, et luy, avec le surplus, fit ferme sur le milieu: les ennemis, voyant cela, desbanderent cent cinquante chevaux de chaque costé, avec charge d'engager le

combat à quelque prix que ce fut, comme ils firent. Surquoy M. de Biron s'avança, et trouvant le baron de Lux mal-mené, fit une charge pour le des-engager, d'autant que luy et plusieurs des siens avoient esté portez par terre: mais, voyant plusieurs escadrons s'avancer, il fut contraint de penser à la retraite, qui se changea bien-tost en une espece de fuitte (tant il fut chargé impetueusement), avec quelques coups d'espées sur les oreilles, et passa la carriere assez viste jusques à la veuë du Roy, qui débanda cent chevaux pour aller soutenir M. de Biron et arrester les fuyards: mais ce secours courut mesme fortune, et aussi-tost renversé et mené battant jusques au Roy, lequel, pour se voir sept ou huit cens chevaux sur les bras en six escadrons, ne perdit ny jugement ny courage, mais, prenant l'un et l'autre accroissement dans la grandeur du peril, appelle par nom les plus qualifiez, les convie à le suivre et faire comme luy, commandant à M. de la Trimouille de prendre cent cinquante chevaux et de les charger, et qu'il en alloit faire autant de son costé avec pareil nombre, à quoy il ne manqua pas (et sans cette brave resolution tout s'en alloit en des-routte); et furent ces deux attaques tant furieuses et si bien opiniastrees (le Roy, quoy qu'il n'eust point de salade, se meslant dans le plus aspre combat, servant d'exemple de valeur aux plus hardis, et animant les moins courageux), que tous ces six escadrons estonnez, se renversans les uns sur les autres, se mirent en desordre; à quoy se rejoignant encor M. de Biron, qui avoit rallié quelques six vingts chevaux des premiers mis en fuitte, ils se retirerent comme en demie desroutte jusques dans le gros de M. du Mayne, dans lequel le Roy faisoit estat de donner, s'il ne luy eut fallu effleurer deux bois tous farcis de mousquetaires, et n'eust descouvert deux autres gros de cavallerie, qui, sortans d'un bois, s'avançoient pour fortifier cette avant garde: ce qui luy fit faire ferme pour rallier toutes ses troupes dispersées, avec lesquelles ayant fait faire une nouvelle charge, il se fit faire large, et sans difficulté il retourna gagner le lieu du combat: où peu apres estans arrivez les sieurs comte de Chiverny, chevalier d'Oyse, Vitry, Clermont, Rissé, la Curée, Arambure, d'Heure, Sainct Geran, la Boulaye et leurs troupes, au nombre de huit cens chevaux, les ennemis croyans que toute l'armée du Roy estoit arrivée, et craignant d'attaquer des gens si determinez qu'ils les avoient esprouvez, estans en six fois plus grand nombre, firent passer leur cavallerie devant leurs



bataillons, auxquels ils firent faire la retraite, le Roy les poursuivant tousjours jusques à ce qu'il leur eust fait repasser la riviere de Saone au pont de dessous Gray, laissant la Bourgogne à la discretion et volonté du Roy, qui s'en rendist maistre en peu de jours reservé de Seurre; et mesme prist toutes les villes foibles de la Franche-Comté, qu'il laissa en repos à la requisition des Suisses. Et partons maintenant pour aller à Lyon, qui est tout ce que j'ay peu apprendre des choses qui se sont passées, suppliant l'Eternel, monseigneur, etc.

# CHAPITRE LXI.

*Le Roi, au retour de Bourgogne, s'arrête à Moret. Entretien avec Rosny. Offre des Parisiens. Départ du Roi pour Calais. Perte de cette ville. Leçon donnée par le Roi au duc de Montpensier.*

Après toutes ces diverses factions militaires, et succez contraires aux esperances prises et données, le Roy se disposa de quitter les deux Bourgognes et le Lyonnais, et de s'en venir en diligence à Paris, pour essayer d'empescher le cours impetueux des prosperes progrez des ennemis; à son retour il passa par Moret où il vous entretint de ce qui s'estoit passé en son voyage, duquel il vous dit ne remporter rien dont il se peut prevaloir en ses affaires que sa reconciliation avec le Pape, en quoy il loüoit les bons services que luy avoient rendus messieurs du Perron et d'Ossat; et puis s'estant enquis des causes qui vous avoient fait quitter le conseil de Paris, où il vous avoit estably avec esperance que vous empescheriez qu'il ne s'y passast rien au prejudice de son service, et vous luy ayant conté tout ce qui en a esté dit cy-dessus, avec amplification de plusieurs autres particularitez qui n'estoient pas à vostre des-avantage, il vous dit demy en colere : « Je vois bien que c'est. Ces gens-là ne  
« veulent personne que j'ayme particulièrement,  
« ny qui m'affectionne passionnement, de crainte  
« qu'ils ont qu'il apporte trop de lumiere dans  
« leurs desseins et n'esclaire leurs actions; mais  
« ils ont beau faire, car plus il vous montreront  
« de haine et d'envie de vous reculer, plus ils  
« accroissent mon amitié envers vous, et le desir  
« que j'ay de vous avancer, recognoissant de  
« plus en plus les merites de vostre grande intel-  
« ligence et loyauté. Neantmoins, pour l'heure  
« presente, il nous faut tous deux prendre pa-  
« tience, tolerer les mauvais aussi-bien que les  
« bons : car je voy bien que nous n'aurons pas  
« trop de tout, et encor ne sçay-je si mē servant

« des uns et des autres j'en auray assez pour  
« reparer les grands desordres et confusions ad-  
« venus en Picardie par les animositez, je n'ose  
« dire malices et mauvaises intelligences de ces  
« quatre personnes de qualité que j'y avois lais-  
« sées, auxquels j'avois tant recommandé l'union  
« entr'eux et la loyauté envers moy, surquoy ils  
« m'avoient fait des promesses tant solemnelles  
« que j'eusse pensé leur faire tort que de douter  
« de la verité d'icelles; mais je croy qu'enfin il  
« se trouvera que le pauvre mort qui ne faisoit  
« que d'entrer en mon service aura esté celuy  
« (contre toutes les impressions que les autres es-  
« sayoient de m'en donner lors que je leur nom-  
« may pour estre avec eux) qui s'y sera le plus  
« vaillamment et loyalement comporté. »

Le Roy ne fit que coucher à Moret, où il vous tint plusieurs propos sur les mauvais conseils qui luy avoient esté donnez touchant ce voyage de la Franche-Comté, et du peu d'esperance qu'il avoit de secourir Calais ny Cambray, les pertes de Castellet, Ardres et Dourlans né luy touchant nullement au prix de ces deux-là, devant lesquelles il sçavoit y avoir de si fortes armées, qu'il luy seroit impossible d'en pouvoir, si tost qu'il seroit besoin, ramasser une assez puissante pour contraindre les ennemis à lever le siege. Ces discours là dessus durerent quasi tout le soir, dont le recit estant trop long et non necessaire, nous nous contenterons de vous dire comme il partit le lendemain au matin et vous emmena avec luy à Paris, où, si-tost qu'il fut arrivé, tous les chefs des corps, et compagnies l'estant venu trouver pour se condouloir avec luy de tant de pertes, offrir leurs biens et leurs personnes pour son assistance, il leur respondit en substance avec peu de paroles, que ce ne luy estoient pas choses nouvelles que les des-faveurs de fortune, sur tout aux faits militaires, y ayant passé tant de fois qu'il y estoit comme habitué, sans que tels accidens luy diminuassent en aucune façon le courage, comme il le feroit bien paroistre avant qu'il fut peu de temps, s'ils estoient aussi soigneux d'observer les promesses qu'ils luy faisoient de l'assister aussi liberallement de leurs moyens, qu'il estoit disposé de courir toutes sortes de perils pour leur défense et la conservation de l'Estat; dequoy il ne leur tien-droit point plus longs discours, ayant mieux des effets que des paroles, et une demie assistance volontaire, que dix entieres par contrainte; qu'il laisseroit donc en leur liberté d'en user comme bon leur sembleroit, et que quand bien ils ne feroient pas leur devoir, il ne laisseroit pas de faire le sien, et de se monstrier non seulement vray Roy, mais aussi vray pere de tous ses sujets.

Il se passa plusieurs autres propos d'apparence de bonne volonté de la part des Parisiens, mais l'exécution ne fut pas semblable; aussi le Roy, sans s'y arrester, partit-il le lendemain, s'en alla en trois jours à Peronne, où M. de Balagny le vint trouver, aussi esveillé à caqueter qu'il s'estoit montré peu resolu à defendre sa royauté, discourant de tout cela comme s'il eust parlé des guerres de Simandius, ou de Sesostris, avec estonnement d'un chacun, comment ayant perdu honneur, femme, souveraineté et biens par sa faute, il avoit encor une langue pour en pouvoir parler et desirer de survivre à une si grande calamité.

Le Roy fit apres tout ce qu'il luy fut possible, et luy mesme, par deux fois, n'ayant pas d'armée suffisante pour attaquer les ennemis à vive force, estant à Boulongne, fit embarquer avec luy quantité de noblesse, et de soldats, pour essayer de les jeter dans Calais, avec poudre, mesches, vivres, armes et autres munitions dont l'on estimoit qu'ils auroient le plus de besoin; mais les vagues et les vents, lesquels ordinairement ne sont pas si dociles que l'on en dispose comme l'on veut, le renvoyerent autant de fois deux heures apres son partement. Neantmoins ce prince s'opiniastrant tousjours aux choses utiles, fit pour la troisieme fois embarquer, sous la charge d'un gentil-homme nommé Matelet, gouverneur de Foix, qui se viut offrir de faire des merveilles, et d'entrer dans Calais ou de mourir en la peine, quatre ou cinq cens que gentils-hommes, que soldats munis de toutes choses; lesquels, suivant leurs promesses, s'obstinerent de telle sorte à surmonter toutes les plus furieuses bourasques et tempestes de ce despitieux element, qu'apres avoir couru toutes sortes de perils, ils entrerent dans Calais malgré les vaisseaux ennemis. Mais ce fut une chose estrange que ces gens choisis, et qui avoient tesmoigné un courage presque invincible en allant, ne furent pas si tost entrez, qu'au lieu de communiquer la hardiesse qu'ils y avoient apportée à ceux de la vieille garnison, se laissant emporter à leurs persuasions, ils se saisirent de la frayeur qui les possedoit, et les uns et les autres ne songerent plus qu'aux moyens de capituler et de pouvoir sortir de là, comme ils firent quelques jours apres, mais sans capituler. Laisant toutes les particularitez des choses qui s'y passerent à ceux qui feront l'histoire entiere, dautant que vous n'eustes nulle part en aucune d'icelles, il ne faut point douter (comme c'est l'ordinaire des naturels allegres et sanguins d'estre plus chauds et bouillans que les autres, d'avoir les premiers mouvemens plus actifs et plus prompts, et les

ressentimens, soit à la joye, soit à l'ennuy plus vifs et plus aigus) que le Roy, voyant toutes les vigilances, diligences et industries dont il avoit usé, toutes les fatigues, travaux et peines qu'il avoit prises, tous les beaux langages qu'il avoit tenus à Paris, en passant, toutes les hautes et fastueuses promesses que ceux de cette ville luy avoient faites, de luy envoyer un prompt et grand secours d'hommes et d'argent, tous les perils, dangers et hazards qu'il avoit courus et sur terre et sur mer, jettant par deux fois sa personne royale à la mercy des vents grondans et enfuriez, et des ondes tempestueuses et courroucées, et tous les secours que, malgré les mesmes vents, la mer et les vaisseaux ennemis, il avoit fait entrer dans Calais, luy estre demeurez non seulement vains et inutiles, mais qui pis est avoient en quelque sorte accru ses pertes, et augmenté ses ennuis et fascheries, il ne faut point douter, disons-nous, que tant de mauvais succez n'eussent esté infiniment sensibles et grandement douloureux à ce brave et genereux prince. Neantmoins ayant esté de longue main accoustumé à telles traverses, défaveurs et bourasques de fortune, et possedant un cœur si haut et magnanime, qu'il se relevoit contre les adversitez, afin de les surmonter, il n'eust pas plutost receu nouvelles certaines de la déplorable perte de Calais, qu'au lieu de s'en monstrier estonné, comme faisoient les autres, ou de s'amuser, ainsi que les courages lasches et pusillanimes, à s'en doloir et plaindre et faire le triste et le melancolique, il s'escria tout haut avec un visage aussi serain que si cet accident ne l'eust point affligé :

« Or sus, mes amys, il n'y a remede, Calais  
« a esté pris, voire mesme avec quelque espece de  
« malheur; mais si ne se faut-il pas pourtant es-  
« tonner ny se rabaisser de courage, puis que  
« c'est dans les afflictions que les vaillans hom-  
« mes s'évertuent et se renforcent d'esperances;  
« ce sont choses ordinaires à la guerre que de  
« perdre en un temps et de gagner à l'autre;  
« les ennemis ont eu leur tour, et avec l'assis-  
« tance de Dieu, qui ne m'a jamais delaisé quand  
« je l'ay prié de bon cœur, nous aurons le nos-  
« tre; et en tout cas une chose me console gran-  
« dement, c'est qu'il n'y a eu aucun défaut de  
« ma part, et ne pense avoir rien obmis de ce  
« qui estoit en ma puissance pour secourir mes  
« amys et mes serviteurs; voire mesme je veux  
« croire, que tous ceux qui se sont employez à  
« cela s'en sont dignement et loyalement acquit-  
« tez; et partant qu'il ne nous faut plus penser  
« à faire des plaintes et doleances ny à user de  
« blasme ou de reproches contre aucun; au con-  
« traire celebrons avec honneur la memoire des

« morts, ne desnions point les louanges deuës à  
 « la genereuse deffense des vivans, et regardons  
 « à rechercher les moyens pour, avec usure,  
 « prendre notre revanche sur les ennemis, et de  
 « faire en sorte, comme je l'espere, avec la fa-  
 « veur du ciel, que cette place ne demeure pas  
 « seulement autant de jours entre les mains des  
 « Espagnols, que nos devanciers l'ont laissée  
 « d'années en la possession des Anglois. »

Après qu'il eut recueilly amiablement, consolé et assisté de plusieurs choses à eux necessaires, ceux qui estoient sortis de Calais, et pourveu à Boulongne, Monstreüil, Mont-hulin, Abbe-ville et autres places frontieres au mieux qu'il luy fut possible, il s'achemina vers Saint Quentin, à cause de quelques troupes des ennemis qui s'en estoient approchez, ausquels lieux celles des siennes qu'il avoit mandées de toutes parts, esperant les avoir à temps pour secourir Calais à vive force, arriverent à la file, où se trouverent aussi peu apres la pluspart des grands et plus qualifiez seigneurs de France, aucuns desquels, au lieu de bien servir leur Roy et de le consoler et soulager en ses ennuis et tribulations, essayerent de se prevaloir d'icelles pour s'en advantager à son dommage, luy faisant faire des ouvertures et propositions estranges, desquelles, à force d'importunitez et de subtiles raisons, recherchées dans la plus noire malice des auteurs de telles impertinences, ils rendirent M. de Montpensier le porteur, lequel, ainsi que le Roy vous en fist le recit trois jours apres, l'estant venu trouver en sa chambre en suite de plusieurs protestations de son affection, luy dit :

« Que plusieurs de ses meilleurs et plus qualifiez serviteurs, voyans les grandes forces ennemies qui luy tomboient à tous momens sur les bras, desquelles il ne pouvoit empescher les progrès à faute d'avoir tousjours sur pied une grande armée bien payée et disciplinée, avoient selon leur advis excogité un moyen, par lequel il luy en seroit entretenu une grande et forte bien soudoyée, qui ne se desbanderoit jamais, estant toujours complete de ce qui luy seroit necessaire; voire mesme de vivres et d'une bande d'artillerie de quinze ou vingt pieces de canon avec son attelage et des munitions pour tirer tousjours deux ou trois mille coups, lesquels il pourroit mener par tout où bon luy sembleroit. » Surquoy le Roy voyant que M. de Montpensier avoit comme fait une pose à son propos, il luy repartit soudain : « Que son discours estoit beau et bon et de belle apparence; mais qu'il falloit que des cervelles bien timbrées et des personnes bien fondées, bien esperimentées et bien puissantes, s'en meslassent

« pour en produire les effets; qu'il ne luy res-  
 « pondoit encor rien qu'il n'eust recogneu auparavant si les moyens en estoient aussi faciles et aussi certains, comme ses paroles belles et bien specieuses en apparence, et partant desiroit-il qu'il continuast et les luy fist entendre. » A quoy M. de Montpensier, en le suppliant de prendre en bonne part ce qu'il proposeroit, luy dit : « Que ce n'estoit pas chose qui n'eust esté autrefois pratiquée et dont les roys ne se fussent bien prevalus, laquelle consistoit seziement à trouver bon que ceux qui avoient des gouvernemens par commission les peussent posséder en propriété, en les recognoissant de la couronne par un simple hommage lige, et d'autant qu'il se pourroit trouver quelques seigneurs bien qualifiez de grand merite et longue experience qui n'avoient point de gouvernemens, ils auroient advisé de separer quelques contrées de ceux qui estoient les plus amples et de plus grande estenduë dont ils seroient pourvus avec le gré et commun consentement d'eux tous; lesquels apres, en general et un chacun en son particulier, s'obligeroient à luy fournir et soudoyer par avance telles troupes et autres équipages que besoin seroit, pour en former une grande et forte armée bien équipée pour la conduire par tout où les occasions le requerroient, et son grand courage, plein d'experience, le pourroit desirer. » A quoy le Roy, quelque despit et mutiné que devint son esprit à la premiere parole de telles impertinences, ne tesmofigna neantmoins aucun courroux ny alteration; au contraire, ayant escouté patiemment toutes les raisons qu'il voulut alleguer pour autoriser son dire, il respondit tout froidement :

« Mon cousin, mon amy, je crois que quelque malin esprit a charmé le vostre, ou que vous n'estes pas en vostre bon sens; car le langage que vous me venez de tenir est entierement disconvenable à un homme de bien et un bon naturel comme le vostre, et tellement disproportionné à la qualité d'un prince de mon sang, qui se voit à present plus proche de la couronne que je n'en ay autrefois esté, que je pense songer en vous escoutant; aussy ne sçaurois-je croire que des desseins si pleins de diffame pour moy et du tout pernicieux à cet Estat, puissent estre procedez d'un esprit si doux et d'une nature si debonnaire, que j'ay tousjours recogneu estre la vostre, non plus que vous, à mon avis s'imaginer que des gens si meschans que ceux qui ont ainsi abusé de vostre facilité et simplicité, m'ayans despoüillé des principaux et plus magnifiques droits de la royauté, eussent par apres jamais grand esgard aux vostres,

« de prince du sang ; et ne vous puis celer que  
 « si je vous estimois avoir dans le cœur et dans  
 « le désir choses si indignes pour vous et pour  
 « moy que celles que j'ay ouïes sortir de vostre  
 « bouche, je vous eusse fait paroistre qu'un cœur  
 « vraiment royal et genereux ne s'offence pas  
 « si cruellement sans chastiment, et donner une  
 « bien longue penitence : partant, mon cousin,  
 « mon amy, revenez en vous mesme et sortez  
 « absolument du precipice de fantaisies tant es-  
 « garées ; gardez vous bien de faire paroistre à  
 « ceux qui vous ont employé en un si mauvais  
 « ouvrage que vous m'en ayez parlé en aucune  
 « façon : mais en feignant que toutes les raisons  
 « cy-dessus vous sont venues en la pensée, dites  
 « leur qu'elles vous ont non seulement empesché  
 « de m'en dire aucune chose, mais aussi fait  
 « avoir la proposition en telle horreur, que vous  
 « estes resolu de tenir pour ennemy mortel qui-  
 « conque la voudra mettre en avant ; et pour ce  
 « qui nous regarde, oublions tous deux pour ja-  
 « mais, mon cousin, mon amy, je vous en prie,  
 « tout ce qui s'est maintenant passé entre nous,  
 « comme je vous promets bien, en foy et parole  
 « de Roy, qui doit estre sacrée et inviolable, de  
 « le faire de ma part, afin que je vous demeure  
 « incessamment bon Roy, bon maistre et bon pa-  
 « rent, et vous à moy loyal sujet, fidelle servi-  
 « teur et vray cousin. »

Ils eurent encor quelques autres discours de complimens, à la fin desquels ils se separerent, au moins apparemment, fort contents et satisfaits l'un de l'autre ; et l'on a sceu depuis pour certain que M. de Mont-pensier n'oublia pas de tenir à ces gens-là, qui l'avoient ainsi pipé, lesquels vous nommeriez bien si vous vouliez, le mesme langage que le Roy luy avoit ordonné, ce qui les estonna grandement.

## CHAPITRE LXII.

### *Projet du Roy d'envoyer Rosny en Angleterre avec le duc de Bouillon. Refus de Rosny.*

Comme c'estoit la coustume du Roy d'entretenir un chacun à mesure que l'occasion s'en presentoit, apres avoir quitté M. de Mont-pensier, il conféra longuement avec M. de Bouillon et comme en secret, lequel l'estoit venu trouver depuis peu avec de fort belles troupes de gens de guerre, ce qui mist beaucoup de gens, voire vous mesme aucunement en peine, craignant qu'il fust encor arrivé ou prest d'arriver quelque eschet ou fascheux accident, tant on y estoit accoustumé depuis certain temps : mais dès le lendemain de ces longs pour-parlers, le Roy vous

envoya querir, fort matin qu'il estoit encor couché, par le sieur Jacquinot, valet de garde-robe ; et vous ayant fait mettre à genoux sur un carreau pres de son lit, ayant quasi la bouche sur vostre oreille, il vous conta tous les propos que M. de Mont-pensier luy avoit tenus, et les responses qu'il luy avoit faites conformément à ce qui en a esté dit cy-dessus, et puis vous demanda ce qu'on disoit, pour luy avoir veu entretenir M. de Bouillon si longuement et si particulièrement, et ce que vous mesme en pensiez : à quoy luy ayant respondu que chacun en tenoit des discours, mais que c'étoit si diversement qu'il estoit fort difficile d'en former une opinion commune ny bien certaine, et que pour vostre regard vous estimiez qu'il luy avoit peu parler de ce qui s'étoit passé à Han et à Dourlans, et ayant esgard à ce qu'il vous venoit de conter les propositions de M. de Mont-pensier, qu'il pourroit bien aussi luy en avoir dit quelque mot, croyant peut-estre, comme l'apparence y estoit grande, que telles resolutions ne se seroient pas faites sans sa participation.

A quoy Sa Majesté soudain repartit, que vous vous estiez trompé en vos opinions aussi bien que les autres, d'autant qu'elle n'avoit eu garde (considéré l'estat où estoient à present reduites ses affaires, et le besoin qu'il avoit de tous ses serviteurs, autant mauvais que bons) de faire paroistre à aucun d'iceux qu'il eust la moindre cognoissance et ressentiment de leurs malices et pernicioeux desseins, et sur tout à celuy dont il estoit question, estant un homme fin, ruzé, dissimulé et qui entendoit à demy-mot, mais qu'il l'avoit ainsi secrettement et si longuement entretenu, tant pour essayer de descouvrir de loing et sans qu'il s'en déflast, si M. de Mont-pensier luy auroit point dit quelque chose des discours qu'ils avoient eus ensemble, et par là juger tant mieux de leur intelligence, que pour estre esclaircy par sa propre bouche par quels défauts il avoit manqué à l'exécution de tant hauts desseins et importantes entreprises qu'il luy avoit asseuré d'avoir sur des principales et plus fortes places des provinces de Luxembourg, Liege, Hainault et Namur, sur l'infailibilité d'aucunes desquelles il n'avoit pas nié d'avoir fondé les conseils qu'il luy avoit donnez pour faire guerre ouverte au roy d'Espagne et aux siens : surquoy il luy avoit tenu de fort longs discours qu'il avoit trouvez aucunement embarrassés, desquels en fin il n'avoit peu tirer autre substance, sinon que M. de Nevers, par l'extresme envie qu'il luy portoit, et la jalousie qu'il avoit des progres qu'il eust pû faire, luy avoit sous-main empesché toutes ses levées en Champagne,

et mesme desbauché aucuns de ses meilleurs capitaines et soldats, mais que surtout l'Angleterre et les Hollandois avoient esté les principales causes de tous ses manquemens, les chefs qui leur commandoient n'ayant peu, ou plustost voulu faire les puissantes diversions dont ils s'estoient vantez, fourny les troupes par eux promises, ny jetté leurs camps et tourné les progres de leurs armes vers ces quatre provinces dont il avoit parlé, comme ils luy avoient assuré que c'estoit là leur dessein : mais que sans se soucier de leurs paroles ny des infestations et intérêts d'autry, ils n'avoient pensé qu'à eslargir leurs coudées par terres à eux tenantes et voisinantes leurs mers et leurs rivières du costé de Louverissel et de la Frise, et tout ce mal provenu, à son advis, de ce que Sa Majesté n'avoit pas eu un serviteur à luy affidé et capable de s'accréditer parmy ces peuples, pour y agir puissamment en son nom, et leur faire, selon les occasions, embrasser ses interests comme communs avec les leurs, qui estoit le seul moyen pour rendre des alliances, societéz et confederations indissolubles et toujours avantageuses au plus puissant, et partant jugeoit-il du tout necessaire (au moins si Sa Majesté vouloit esviter à l'advenir semblables inconveniens à ceux dont elle se plaignoit) d'insérer de nouveaux articles en ses alliances, tant d'Angleterre que des Provinces Unies, et former des confederations tant specialement circonstanciées, que tous accidens, occurrences et conjonctures d'affaires y fussent ponctuellement spécifiées, et que s'il luy plaisoit l'honorer de cette charge, il esperoit de s'en acquitter si dignement que Sa Majesté en demeureroit satisfaite et contente; ou à tout le moins si parfaitement esclaircie de leur pouvoir et de leur vouloir, qu'elle ne se fonderoit plus sur de fausses et vaines esperances, mais scauroit au vray jusques à quel point elle pourroit faire estat de l'amitié de ces gens là, et par ainsi jetteroit-elle plus certainement ses plombs et ses mesures : et en continuant ce discours luy avoit tenu tant d'autres beaux langages, si bien sceu colorer son dire, alleguer tant de sortes de raisons et donné tant de vray semblables bonnes esperances, qu'il avoit estimé prudence de luy tesmoigner d'y avoir adjousté une entiere foy et creance, et de luy promettre cette charge, voire de commander sa commission portant un fort ample pouvoir pour aller traiter avec les uns et les autres, quoy qu'il se déflast tousjours qu'il n'entre-meslast quelque chose de ses interests particuliers, et qu'il ne les preferast aux siens et à ceux de la France, comme c'estoit sa bonne constame; et pour cette

raison eust-il bien désiré, afin d'avoir un serviteur affidé pres de luy, dont la presence le rendit plus circonspect et retenu, ou pour le moins luy peust faire au retour un rapport certain de ce qui se seroit passé, que vous eussiez agreable de faire ce voyage et vous accommoder en cela avec luy : dequoy vous vous excusastes si formellement et avec tant d'instance, voire d'opiniastreté, et allegastes de si justes et fortes raisons, importantes mesme au service de Sa Majesté, qu'elle vous dispensa d'une si fascheuse commission; car il n'eust jamais failly, selon que l'on peut conjecturer de l'humeur du personnage, comme aussi c'avoit esté une des principales raisons que vous aviez représentées au Roy, de rejeter sur vous et vos comportements tous les défauts et manquemens que l'on eust remarquez en sa negociation, comme il en sera dit quelque chose plus amplement cy-apres.

Or, quoy que Sa Majesté eust decouvert en quelque sorte que cette commission vous avoit esté pratiquée par des principaux de son conseil des finances, lesquels, plus ils voyoient qu'elle se loüoit des bons succez de vos entremises, qu'elle tesmoignoît de confiance en vostre suffisance et prud'homie, et de desir de vous avancer, plus en prenoient ils de jalousies, et leur croissoit l'envie de vous reculer de la Cour; si ne se pouvoit elle empescher de déferer quelque chose à leurs conseils, pour vous employer au loing, tant ils les scavoient rendre plausibles et specieux, les colorer du bien de son service, voire mesme de vostre propre avantage : ce desir, fondé sur l'amitié qu'ils disoient vous porter, et l'estime qu'ils faisoient de vostre suffisance et capacité és traitez et negociations, ainsi que vous l'aviez tesmoigné en toutes celles qui avoient passé par vos mains, aussi qu'en discutant avec Sa Majesté du fait des finances, ils rendoient les charges d'icelles si difficiles, que, pour en tirer utilité, il estoit du tout necessaire de choisir des personnes d'une profonde science en icelles, grande intelligence et longue experience; et par là concluoiient-ils, de n'y devoir jamais estre employé que des gens bien stilez en ce mestier, et par un long usage, si l'on ne vouloit voir toutes les affaires en ruïne et confusion : ce que Sa Majesté apprehendant, elle differeroit, de temps à autre, le dessein qu'elle avoit tousjours eu en son esprit de vous establir en ses finances, croyant qu'à la longue la grandeur de vos services et la multiplicité de vos employs aux affaires d'importance, luy en faciliteroient l'execution, en disposant les anciens conseillers à vous recevoir volontairement avec eux, ainsi que la suite de ces Memoires le justifiera.

## CHAPITRE LXIII.

*Le Roi propose à Rosny d'aller seul en Angleterre. Nouveau refus. Siège et prise de la Fère. Entreprise sur Arras. Mort des ducs de Nevers et de Nemours. Accommodement du duc de Mayenne.*

[1596] Lors que toutes les troupes que le Roy avoit mandées furent jointes à luy, qu'il sceut que celles des ennemis estoient séparées et retirées aux garnisons, pour s'y rafraischir et soulager de tant de fatigues qu'elles avoient souffertes en tous ces sieges dont il a esté parlé, qu'il eut recouvert quelque somme d'argent pour distribuer à ses gens de guerre, il prit resolution d'assiéger la Fère; et, jugeant que ce seroit une entreprise difficile et de longue halaine, apres qu'il eut placé ses logemens et aucunement avancé ses retranchemens de camp, il vous appella une fois qu'il alloit à la chasse, et vous dit qu'il voyoit bien ce siege estre de telle nature, qu'à son advis il ne s'y passeroit pas des grands combats de long-temps, qui fussent propres pour gens de vostre condition; mais que, quand bien cela seroit, si ne vouloit-il plus vous mettre à tous les jours, ny vous laisser exposer à tous perils, comme il avoit cy-devant fait, de crainte de quelque mal-heureux coup qui rompiست le dessein qu'il ne vous vouloit plus celer d'avoir tousjours eu de vous employer en ses finances si tost que vous y auriez acquis quelque intelligence; en attendant laquelle, afin de vous esloigner du peril, et de ne vous laisser pas inutile, il avoit advisé, avec de vos amis, et aucuns mesmes des principaux de son conseil qui l'avoient jugé fort à propos, et à luy promis de vous bien traiter en cet employ, de vous envoyer ambassadeur ordinaire en Angleterre si tost que M. de Bouillon en seroit de retour, puis que vous n'y aviez pas voulu aller avec luy; dequoy il vous avoit bien voulu advertir de bonne heure, afin que s'il en estoit besoin, vous fissiez auparavant un tour en vos maisons, pour donner ordre à vos affaires et à preparer vostre femme à faire le voyage avec vous, si tant estoit que ce fust là vostre dessein à tous deux, ce qu'il ne vous conseilloit pas neantmoins, dautant qu'il faisoit estat de ne vous laisser pas plus de sept ou huit mois en cette charge ainsi esloignée.

Nous serions trop longs, monseigneur, s'il nous falloit icy reciter par le menu toutes vos raisons et allegations pour improuver ce dessein, et les contestations que vous nous avez dit qui se passèrent sur ce sujet entre le Roy et vous, n'ignorant point que si ceux qui desiroient vostre esloignement de la Cour avoient eu assez d'in-

dustrie et de puissance sur l'esprit de Sa Majesté pour vous faire partir contre vostre volonté, voire le propre goust d'elle mesme, ne trouvassent en suite des causes et raisons assez specieuses pour empescher vostre retour de fort long-temps; mais tant y a que le Roy se laissant plustost persuader à vos remontrances que vous à ses opinions, il se resolut de donner cette charge à un autre, et de vous envoyer trouver ceux de son conseil à Paris, pour leur représenter le dessein de son siege de la Fère, les choses qui luy estoient necessaires pour en faciliter et avancer la prise, servir pres d'eux de solliciteur et chasse-avant pour le recouvrement et envoy d'icelles, et sur tout afin de chercher des marchands fournissans et faire marché avec eux au meilleur prix qu'il se pourroit, pour fournir pain, vin, avoine, foin et autres choses propres pour son armée.

En quoy vous travaillastes de telle sorte qu'elle ne manqua jamais de rien, encor que le siege fut un des plus longs que le Roy eust jamais faits, ayant duré, ce nous semble, pres de six mois, tant à cause qu'il y avoit en cette place une grande et forte garnison de tres-braves et resolut soldats, accoustumez dès long-temps à la fatigue et à patir, et deux excellens capitaines, l'un François, qui estoit seneschal de Mont-limar, et l'autre Espagnol, nommé Osorio, que pource qu'un certain homme des Pays-Bas, qui avoit demeuré long-temps en Hollande, estant venu visiter le sieur de Beringan, qui estoit son parent ou son amy intime, luy ayant mis en teste qu'il seroit facile, moyennant une certaine chaussée, de submerger la place de plus de six pieds de haut aux plus relevez endroits d'icelle, en moins de quinze jours, ils s'opiniastrent tellement en ce dessein et en importuna et tourmentèrent si fort et si souvent le Roy et les principaux chefs du camp qu'ils s'y laisserent enfin emporter, contre vostre advis et toutes les grandes instances que vous fistes de ne s'amuser pas à telles nivelleries, lesquelles, en tous les essais qui s'en estoient jamais faits, s'estoient tousjours trouvées tres-fautives, dont vous alleguiez plusieurs exemples et entr'autres celle de Pavie, qui avoit esté en partie cause de la perte de la bataille et prison du Roy François, s'estant tellement amusé à vouloir divertir le Tesin, que les ennemis avoient eu loisir d'assembler des troupes suffisantes pour le défaire; aussi toute cette inondation presuppосée de la Fère se trouva elle enfin inutile, la chaussée s'estant rompuë deux ou trois fois et l'eau n'ayant jamais monté à six pieds pres de ce que l'on s'estoit mis en fantaisie; si bien que l'abondance du pain et des

vivres que vous fistes tousjours fournir à l'armée du Roy, et la disette en laquelle s'en trouverent reduits les ennemis, furent seuls causes de leur reddition.

Vous vinstes deux ou trois fois en l'armée durant le siege, dont l'une des causes vous affligea infiniment. Le Roy estant tombé malade à Traversi, où il estoit logé, jusques à douter de sa vie, tant necessaire à la France et à tous les bons François, que l'experience nous l'a fait ressentir par le passé, et encor peut estre ne sommes nous pas au bout de si douloureuses espreuves.

Cette place estant donc renduë, le Roy vous renvoya encor à Paris, pour arrester les comptes avec les marchands fournisseurs, ayant esté adverty que d'Escures et la Corbinerie joint avec aucuns de son conseil, s'estoient interessez en ces marchez, croyans que les estats de la despendence en seroient par eux verifiez, apres que le Roy eut pourveu à la garde et reparation de la Fere, dont, à l'instance priere de madame de Liancourt, il donna le gouvernement à son bastard Cesar, et fit le sieur de Manicamp son lieutenant, à cause qu'il estoit son parent.

Il s'en alla vers les frontieres d'Artois, prit par force le chasteau d'Imbercour, fit executer une entreprise sur Arras, en laquelle trois petards jouèrent fort heureusement; mais au quatriesme, qui eust rendu l'entrée de la ville toute libre, par de certaines pierres jettées ou tombées d'enhaut, le petard et le petardier furent renversez au fonds des fosses; si bien, qu'à faute d'avoir fait encor apporter une couple de petards, comme le Roy l'avoit voulu et long-temps disputé contre M. le mareschal de Biron, cette importante execution fut empeschée, ce qui causa depuis beaucoup de desastres; car outre la perte d'Amiens qui apparemment en proceda l'année suivante, à la retraite de ceux qui s'estoient le plus avancez, il y eut plusieurs gens de bien tuez et blessez: dequoy le mareschal de Biron grandement irrité, il s'en alla passer sa colere vers Bapaulme, où il fit de grands ravages et saccagemens; les particularitez desquels et des deux autres exploits cy-dessus dits en gros, nous remettons à ceux qui feront l'histoire generale de France, aussi-bien que celles de la mort de M. de Nevers, qui arriva environ ce temps, de M. de Nemours qui mourut (demy desesperé du mauvais succez de ses grands desseins, tendans à une royauté) comme son traité avec le Roy estoit quasi conclud, lequel fut repris et achevé par le marquis de Saint Sorlin, son frere; du traité de M. de Lorraine qui convertit sa trefve en une paix, confederation et bonne voi-

sinance avec le Roy et la France: de celui de M. du Mayne, lequel se voyant foiblement assisté par les Espagnols, et qu'ils tesmoignoient, de plus en plus, de ne se soucier pas d'avancer leurs affaires à la ruine des siennes, voulut essayer de trouver la paix et au repos les avantages qu'il n'avoit peu obtenir par les armes et beaucoup de travaux; du traité de M. de Joyeuse, qui avoit quitté le froc de capucin pour endosser le harnois, et se recompenser avec usure en toutes sortes de delices de celles dont il avoit esté privé estant dans le cloistre; de la reduction de Thoulouse et autres grandes villes de ces quartiers en l'obeyssance du Roy; des divers desseins, entreprises et combats d'entre M. de Guyse (qui s'estoit, par commandement du Roy, joint d'intelligence avec la comtesse de Sault et M. de Lesdiguières) et M. d'Espéron, à qui se maintiendrait gouverneur de Provence, et en chasserait son compediteur, en quoy le dernier se trouva enfin le plus foible: nous laissons, disons nous, à l'histoire les particularitez de toutes ces choses, d'autant que vous n'eustes nulle part en toutes ces negotiations, desseins et faits de guerre, et qu'il en a esté assez dit cy-devant sur l'occasion du traité que vous fistes avec madame de Guyse.

#### CHAPITRE LXIV.

*Rosny, se trouvant à Moret, est chargé de conduire madame de Liancourt près du Roi. Lettre remarquable de ce prince sur l'état de ses finances et sur le dénûment où il se trouve. Singulière prédiction d'un astrologue. Danger que court madame de Liancourt dans ce voyage.*

Les advis de tant de bons succez dont il a esté parlé venans au Roy, les uns en suite des autres, comme ils luy firent reconnoistre une speciale assistance de Dieu, aussi luy apportèrent-ils non seulement une grande consolation sur ses pertes passées, mais releverent encor tellement ses esperances, et luy firent naistre de si hauts desseins, qu'il prist resolution en luy mesme, ainsi qu'il vous fut facile de le conjecturer par une lettre qu'il vous escrivit, de laquelle il sera parlé cy-apres, d'entrer avec armée dans l'Artois, d'assiéger l'une des principales villes de cette province; et sur ce dessein il escrivit une lettre à ceux du conseil de ses finances, telle en substance que l'on en pourra juger par la vostre, ensemble de la responce qu'ils y firent; si bien, que s'estant resolu de faire venir pres de luy madame de Liancourt, afin d'avoir, comme il vous en dit quelque chose à vostre arrivée à Cler-

mont, une personne confidente pour luy pouvoir communiquer ses secrets et ses ennuyes, et sur iceux recevoir une familiere et douce consolation, telle qu'il estimoit cette dame obligée de luy estre, par les grands interets qu'elle avoit à la conservation de sa personne; et sur ce dessein il luy escrivit qu'elle s'acheminast au plustost à Clermont où il la viendroit rencontrer, mais qu'elle sceut avant que partir où vous estiez, afin de vous amener avec elle, suivant une lettre qu'il vous en escrivoit, par laquelle il vous commandoit de l'aller trouver et de faire ce qu'elle vous diroit : à toutes lesquelles choses cette dame ne manqua pas; car un jour ainsi que vous vous promeniez dans les grandes prairies de Moret, en faisant niveller les hauteurs de la riviere à deux mille pas plus haut que le chasteau, afin de voir si vous en pourriez tirer deux ruisseaux pour passer des deux costez d'une grande allée que vous projetiez de faire là, qui est aujourd'huy, une des belles de France, vous entendistes un huchet de postillon, et peu apres vistes arriver un des gens de madame de Liancourt, lequel vous fit ses recommandations, vous bailla une de ses lettres où il n'y avoit que ce peu de mots :

« Monsieur, vous sçavez, par une lettre que le Roy m'a escrite, laquelle je vous envoie, comme il veut que nous l'allions trouver ensemble; à quoy me disposant et croyant bien que vous ferez le semblable, je vous attendray jusques à mardy tout le jour à Paris, avec dessein de partir le mercredy, et m'en aller coucher à Maubuisson. Sur ce je vous baise les mains et suis, etc. »

Et en apostille il y avoit escrit : « Je vous envoie aussi un paquet du Roy tout cacheté comme je l'ay receu; » lequel vous ayant esté aussi-tost baillé par ce courrier, vous l'ouvristes et y trouvastes une fort longue lettre toute escrite de la main du Roy; car apres l'avoir leuë vous nous monstrâtes de loin une grande feuille de papier; dont l'un des feuillets estoit escrit des deux costez, et nous dit : « Voyez si le Roy doit estre estimé paresseux et peu soigneux de ses affaires, puisqu'il m'escrit de si grandes lettres de sa main, lesquelles, quoy que tres excellentes, je suis neantmoins obligé de brusler, » comme vous fistes, deux jours apres, en nostre presence; de laquelle (ayant neantmoins depuis recouvert une copie par le moyen qui sera dit cy-apres) la teneur ensuit :

*Copie d'une lettre envoyée du Roy à M. de Rosny.*

Mon amy, vous savez aussi-bien que nul autre

de mes serviteurs, puis que vous m'avez tousjours suivy et servy en mes plus grands dangers et aspres difficultez, par quelles peines, travaux et fatigues il m'a falu passer, quels perils et hazards j'ay courus, et quels obstacles et oppositions j'ay surmontées, pour garantir ma vie et ma dignité, contre tant de sortes d'ennemis, qui se sont en divers temps eslevez contre moy pour me despoüiller de l'un et de l'autre; et neantmoins je vous jure, et ce avec verité, que toutes ces traverses ne m'ont point tant affligé ny despité l'esprit, que je me trouve maintenant chagrin et ennuyé de me voir en de continuelles contradictions avec mes plus autorisez serviteurs, officiers, et conseillers d'Estat, lorsque je veux entreprendre quelque chose digne d'un genereux courage et de ma naissance et qualité, à dessein d'eslever mon honneur, ma gloire et ma fortune, et celle de toute la France au suprême degré que je me suis tousjours proposé, qui est de restablir ce royaume en sa plus grande amplitude et magnifique splendeur, soulager mes pauvres peuples que j'ayme comme mes chers enfans (Dieu ne m'en ayant point jusques à present donné d'autres) de tant de tailles, subsides, foules et oppressions, dont ils me font journellement des plaintes, et de pratiquer, lorsque je me verray dominateur pacifique de ce qui m'appartient, une certaine loy, dont vous m'avez tousjours fait tant de cas, introduitte par les Grecs, à la fin de leurs grandes guerres et combustions civiles, par laquelle toutes offences, et publiques et privées, estoient de toutes parts oubliées.

Or, me trouvé-je maintenant dans l'ennuy d'une des plus cuisantes contradictions de ceux qui manient mes affaires que j'aye jamais ressentie sur une telle occasion; c'est qu'ayant voulu faire executer par petard une entreprise que j'avois de longue main sur Arras, toutes choses avoient réussi tres-heureusement, comme vous en avez peu oüy parler, jusques au quatriesme petard, lequel nous donnoit l'entrée absoluë dans la ville, que par je ne sçay quel mal-heur qui ne se pouvoit imaginer, de certaines grosses pierres ruées ou tombées du portail, tant le petard que le petardier furent renversez au fonds des fosses, lors que l'on estoit prest à mettre le feu, et par faute d'avoir porté jusques à six petards, comme je l'avois expressement commandé (mais quelque opiniastre s'en voulut faire croire), nostre entreprise a esté non seulement tournée à néant, mais à la retraite avons perdu plusieurs braves gens, ausquels j'ay un extrême regret; et neantmoins, parmy tous ces desastres encor nous estoit-il resté quelque espece de consolation,



en ce que telles approches si près de cette grande ville nous avoient donné le moyen d'y recognoistre des faiblesses et défauts qui nous en faisoient tenir la prise infaillible par la vive force, en moins d'un mois ou six semaines, si nous pouvions mettre ensemble une bande de quinze canons, des munitions pour tirer deux mille coups, et assembler une armée capable de n'estre point forcée à lever le siege, comme tout cela m'estoit facile avec de l'argent.

Mais ayant escrit à ceux de mon conseil des finances, comme j'avois un dessein, d'extrême importance en main (duquel je ne leur mandois point les particularitez pour ce que toute la vertu de l'execution consistoit au secret) où j'avois besoin qu'il me fut fait un fond de huit cens mil escus, et partant les prioys et conjurois par leurs loyautéz et sincerés affections envers moy et la France, de travailler en diligence au recouvrement certain de cette somme; mais toutes leurs responces, apres plusieurs remises, excuses et raisons pleines de discours embarrassez, dont les uns destruisoient les autres, n'ont eu finalement autres conclusions que des representations de difficulté et impossibilité, voire n'ont point craint de me mander que tant s'en falloit qu'ils me peussent fournir une si notable somme, qu'ils se trouvoient bien empeschez à recouvrer du fonds pour faire rouler ma maison, ce qui m'afflige infiniment, voire me porte quasi au desesper et m'aigrit de sorte l'esprit contr'eux, que cela m'a fait absolument jeter les yeux sur vous, sur les assurances que vous m'avez souvent données, d'avoir le vouloir et le pouvoir de me bien servir en cette charge, et m'a remis en memoire ce que vous me distes à Saint Quentin, lors que je vous parlay des desseins de plusieurs grands, des grands divertissemens qui avoient esté faicts depuis la mort de M. d'O, de notables sommes de deniers, provenuës de plusieurs alienations que l'on avoit faites de mes aydes, gabelles et autres revenus; ce qui m'ayant donné envie de m'en esclaireir davantage, j'en ai bien encore appris d'autres plus que de vous, car l'on m'a donné pour certain, et s'est-on fait fort de le verifïer, que ces huit personnes que j'ay mises en mes finances (pensant bien faire pour ce que l'on m'avoit fait croire que la ruine de mes revenus n'estoit provenuë que de ce qu'un seul en dispoisoit avec autorité absoluë) ont bien encor pis fait que leur devancier, et qu'en l'année dernière et la presente que j'ay eu tant d'affaires sur les bras, faute d'argent, ces messieurs là et cette effrenée quantité d'intendans qui se sont fourrez avec eux par compere et par commere, ont bien augmenté les grivelées, et mangeant le

cochon ensemble, consommé plus de quinze cens mille escus, qui estoit somme suffisante pour chasser l'Espagnol de France, en payement de vieilles debtes par eux pretenduës; voire m'a-on assuré qu'aucuns d'entr'eux ont achepté à fort vil prix de celles des Suisses, reistres et Allemands, entre lesquels on m'a nommé un certain Otoplote, et me les ont fait payer entierement, principal et interest, ce que je serois bien aysé de pouvoir verifïer. Mais en quelque sorte que les choses ayent passé, je me suis resolu de recognoistre au vray si les necessitez qui m'accablent proviennent de la malice, mauvais mesnage ou ignorance de ceux que j'employe, ou bien de la diminution de mes revenus et pauvreté de mon peuple, et pour cet effect, convoquer les trois ordres de mon royaume, pour en avoir advis et secours, et en attendant establir quelque mien confident et loyal serviteur parmy eux, que j'autoriseray peu à peu, afin qu'il me puisse advertir de ce qui se passera dans mon conseil et m'éclaircir de ce que je desire sçavoir.

Or ay-je, comme je vous ay desja dit, jetté les yeux sur vous pour m'en servir en cette charge, ne doutant nullement que si vous me voulez donner vostre foy et vostre parole, car je sçay que vous en faites cas, de me servir loyalement, d'estre aussi bon mesnager de mon bien à mon profit, que je vous l'ay toujours veu estre du vostre, et de ne desirer de faire vos affaires que de mon sceu, et par ma pure liberalité, qui sera assez ample pour un homme de bien, et un esprit réglé comme le vostre; je ne doute point, dis-je, qu'observant toutes ces choses, je ne reçoive utilité et contentement de vostre administration.

C'est donc maintenant à vous à prendre resolution de suivre absolument mes intentions, et m'en parler librement; et afin de vous y porter avec plus de raison et par consequent de sincere affection, je vous veux bien dire l'estat où je me trouve réduit, qui est tel, que je suis fort proche des ennemis, et n'ay quasi pas un cheval sur lequel je puisse combattre, ny un harnois complet que je puisse endosser; mes chemises sont toutes deschirées; mes pourpoints troüez au coude; ma marmite est souvent renversée, et depuis deux jours je disne et soupe chez les uns et les autres, mes pourvoyeurs disans n'avoir plus moyen de rien fournir pour ma table, d'autant qu'il y a plus de six mois qu'ils n'ont receu d'argent. Partant jugez si je merite d'estre ainsi traité, et si je dois plus long-temps souffrir que les financiers et tresoriers me fassent mourir de faim, et qu'eux tiennent des tables friandes et bien servies, que ma maison soit pleine de ne-

cessitez et les leurs de richesses et d'opulence, et si vous n'estes pas obligé de me venir assister loyalement, comme je vous en prie. Ne faillez donc pas, mon amy, de venir avec ma maistresse à laquelle j'escris, et luy ordonne de vous advertir du temps de son partement, afin de vous amener avec elle, et de vous envoyer secrettement et seurement cette lettre, que vous bruslerez apres avoir leuë; car vous jugez bien qu'elle me seroit d'importance estant veuë par d'autres. J'ai encore en l'esprit deux ou trois autres affaires de consequence, où je vous veux employer aussi-tost que vous serez arrivé; mais ne parlez de tout cecy à qui que ce soit, non pas mesme à vostre femme. Adieu mon amy que j'ayme bien.

D'Amiens, ce 15 avril 1596. HENRY.

Or si tost que vous eustes leu cette lettre, vous rendistes response à madame de Liancourt, et renvoyastes son courrier. Nous n'avons pas sceu ce que vous luy escrivites, mais nous en entendismes bien que vous commandastes en mesmes temps à vostre escuyer et maistre d'hostel, de preparer vostre equipage pour aller trouver le Roy et que vous vouliez aller coucher le lendemain à Corbeil; et vous ayant veu, comme nous l'avons desja dit, le jour mesme de vostre partement, brusler cette lettre que le Roy vous avoit escrite, il faut bien que vous en eussiez fait faire une coppie; car vous en baillastes une à l'un de nous quatre, toute telle que nous l'avons mise cy-dessus, lors que vous fustes fait grand maistre de l'artillerie, croyant bien, à mon advis, que le Roy en ce temps-là ne se souleroit pas que l'on sceust ce qu'il vous avoit escrit, puis les effets en estoient tous publics.

Vous allastes donc coucher le samedy à Corbeil, et le dimanche vous pensiez aller loger en chambre garnie aux Balances pres du Marché-neuf, pour estre plus pres du Palais, où vous desiriez achepter le lundy quelques broüilleries, croyant que madame de Liancourt, suivant ce qu'elle vous avoit mandé, ne partiroit point jusques au mercredy; mais comme vous fustes au bas de la ruë de la Coustellierie avec vostre train, vous rencontrastes un homme que madame de Liancourt envoyoit au devant de vous, pour vous advertir qu'elle ne vous avoit peu attendre à Paris, comme elle vous avoit promis, à cause que sa sœur l'abbesse de Maubuisson s'estoit trouvée extrêmement mal et l'estoit allée voir, vous priant de vous rendre à Pont-oyse le plutost qu'il vous seroit possible, d'autant qu'elle avoit receu encor des lettres du Roy, qui la pressoient de se haster. Et lors vous arriva-il une chose grandement estrange; car, comme

ce message redoublé vous eut fait resoudre à ne point sejourner à Paris, craignant que ce mandement si pressé ne fut quelque artifice de Bour, pour vous nuire si d'avanture vous n'arriviez pres du Roy avec elle, et qu'à cette occasion vous eustes commandé à vostre escuyer et maistre d'hostel, de se fourrer en la premiere hostellerie trouvée, où vous ne feriez que repaistre, afin d'aller coucher le jour mesme à Maubuisson, ils allerent descendre aux trois Pigeons, au bout du haut de la ruë de la Coustellierie.

Auquel lieu, ayant mis pied à terre vous montastes à une grand'chambre, dans laquelle vous trovastes un certain homme de haute taille, assez maigre en visage, la barbe longue, mais fort claire et fourchuë, un grand chapeau qui luy cachoit quasi tout le visage, un long manteau noir boutonné au collet, une espée assez mal agencée au costé, des bottes fort larges, et en la main gauche une grande gibeciere à deux revers, pour mettre à l'arçon d'une selle, lequel se promenoit avec telle attention qu'il ne s'esmeut en aucune façon pour vostre arrivée; car non seulement il ne vous salüa pas, mais ne tourna pas mesme les yeux sur vous, jusques à ce que vous lui demandastes que c'est qu'il faisoit en cette chambre ainsi attentif à ses promenades, et s'il estoit logé là dedans. A quoy vous ayant respondu qu'il avoit loué cette chambre, et qu'il pensoit à ses affaires comme vous pouviez faire aux vostres, vous luy repartistes, aucunement en colere d'une telle responce aigre et de ce qu'il ne vous avoit pas salüé, que vous le priez de vous prester cette chambre pour deux heures seulement, d'autant que vous n'y feriez que disner et en partiriez aussitost. A quoy en grommelant il sembloit vouloir faire difficulté de vous quitter la chambre, croyant, à mon advis, que vous fussiez seul; mais lors qu'il vit entrer trois de vos gentils-hommes, vos pages et autres de vos domestiques, jugeant bien par là que vous deviez estre homme de qualité, et peut-estre d'humeur pour prendre sa chambre malgré luy, il changea de mine et de langage, vous osta son chapeau, et vous dit que tout ce qu'il avoit estoit à vostre service; puis s'estant mis à vous regarder fixement, il vous demanda où vous alliez; luy ayant respondu que vous vous en alliez en Cour trouver le Roy: « Quoy! monsieur, ce vous » dit-il aussi-tost, le Roy vous a-il mandé? Je » vous prie de me le dire, et aussi à quel jour et » à quelle heure vous avez receu ces lettres, et » estes party pour commencer vostre voyage; » car je ne vous en parle pas ainsi sans cause. » A quoy l'ayant satisfait, en riant et comme vous moquant, il vous demanda encor à voir vos

« obeyssance, dans la province de Champagne, et  
 « notamment pour reprendre, continuer et ame-  
 « ner à sa perfection, le pourparler qui a esté  
 « commencé pour cet effet avec nostre tres-chere  
 « et bien aymée cousine la duchesse de Guyse,  
 « les sieurs de la Rochette et de Pericart, pour  
 « la reduction de ses enfans, et tous autres à la  
 « recognoissance de nous comme estant leur  
 « Roy legitime et prince souverain; et pour y  
 « parvenir, convenir avec elle et autres qui au-  
 « ront pouvoir de sesdits enfans des conditions  
 « et moyens raisonnables pour eux remettre en  
 « leur devoir, leur accorder et promettre tout ce  
 « qu'il verra bon estre, et, selon qu'il est ample-  
 « ment informé de nostre intention, pour les  
 « bien et favorablement traiter, tant pour la  
 « seureté et conservation de leurs personnes que  
 « celles de leurs dignitez, honneurs, estats, char-  
 « ges et biens, qu'en gratifications particulieres,  
 « selon qu'ils voudront bien meriter de nous et  
 « du public et en cette occasion, et sur tout ce  
 « que dessus passer, arrester et signer tels articles  
 « et promesses, et en telle forme qu'il sera requis  
 « et necessaire; et generalement faire, traiter,  
 « convenir et accorder, pour l'effet susdit, tout  
 « ce qu'il appartiendra, et ainsi que nous mes-  
 « mes ferions ou faire pourrions si present en per-  
 « sonne y estions, jaoit que le cas requist man-  
 « dement plus special qu'il n'est contenu en  
 « cesdites presentes, par lesquelles promettons,  
 « en bonne foy et parole de Roy, avoir agreable,  
 « et tenir ferme et stable tout ce que par ledit  
 « sieur baron de Rosny sera fait, geré, traité et  
 « promis en nostre nom touchant les choses sus-  
 « dites, circonstances et dépendances d'icelles, le  
 « ratifier, approuver, observer et accomplir de  
 « point en point, selon sa forme et teneur, et  
 « en relever et indemniser ledit sieur de Rosny  
 « et les siens. En tesmoin de quoy nous avons  
 « fait mettre nostre grand seel en ces presentes;  
 « car tel est nostre plaisir.

« Donné à Paris le 15 de juillet, l'an de grace  
 « 1594, et de nostre regne le cinquiesme. HENRY.  
 « Et plus bas sur le reply, par le Roy, POTHIER.»

Or estoit-il arrivé pendant tous ces delais et  
 remises qui avoient esté interposées en la con-  
 clusion de ce traité (en partie à cause des ex-  
 cessives demandes que faisoient les députez de  
 M. de Guyse, suivant la coustume des peuples  
 qui se sentent les plus forts, qui est d'estre mua-  
 bles, volages et legers, aymer à changer de con-  
 dition, et se porter ordinairement d'une extre-  
 mité à l'autre) que ceux de Reims, ayant eu  
 avis qu'entre les villes, qu'ils se faisoient forts  
 de remettre en l'obeyssance du Roy, ils se pre-  
 valloient principalement de la leur, et eux ayans

commencé, dés il y avoit desja plusieurs mois, à  
 s'ennuyer de cette domination turbulante des  
 Lorrains, ils eussent bien voulu essayer, en se  
 donnant eux mesmes au Roy, de s'en advantager  
 de quelques immunitez et privileges; et pour  
 cet effet travailloient-ils à s'asseurer des plus re-  
 muans et hardis de leur ville, et mesmes met-  
 toient desja des corps de garde du peuple la  
 nuit aux places, et le jour aux tours et portaux  
 de la ville. Dequoy M. de Guyse ayant senty le  
 vent, et, craignant s'il temporisoit davantage  
 que non seulement ceux de cette ville luy es-  
 chapassent, mais aussi qu'il ne leur eschapast  
 pas, il manda par courrier expres à sa mere et  
 aux sieurs de la Rochette et Pericart, pour les  
 conjurer que, se departant des poincts où il se  
 rencontroit le plus de difficultez, ils eussent à  
 conclurre promptement avec vous qui estiez son  
 parent et son amy, et qu'il sçavoit bien que le  
 Roy avoit de nouveau commis pour traiter avec  
 eux: tellement que dés la seconde fois que vous  
 vous assemblastes avec eux, vostre negociation  
 fut renduë si heureuse par les accidens cy-dessus,  
 que vous les fistes departir de l'estat de grand  
 maistre de la maison du Roy, dont avoit esté  
 pourveu M. le comte de Soissons, lors du meur-  
 tre de M. de Guyse, du gouvernement de Cham-  
 pagne, possédé par M. de Nevers, depuis le  
 mesme temps et pour les mesmes causes, et de  
 tous les benefices qui avoient appartenu au car-  
 dinal de Guyse, et sur tout de l'archevesché de  
 Reims, dont estoit pourveu M. du Bec, parent  
 de madame de Liancourt, qui estoient les trois  
 poincts, sur lesquels tomboient les plus grandes  
 difficultez, ayant mis en avant de bailler à M. de  
 Guyse, au lieu de tout cela, le gouvernement de  
 Provence, sçachant bien que le Roy, pour plu-  
 sieurs raisons ne le trouveroit pas mauvais,  
 voire mesmes peut estre en seroit tres-ayse, afin  
 de pouvoir opposer quelque puissant competeur  
 à M. d'Espernon, qui se vouloit maintenir en  
 iceluy contre sa volonté, au prejudice du bien  
 de son service et contentement de la province.

Tellement que vous estant allé trouver le Roy,  
 et luy ayant raconté tout ce que vous aviez fait,  
 et s'estonnant qu'en si peu de temps vous eussiez  
 gagné ces trois poincts, que les trois autres di-  
 soient avoir tant disputez sans l'avoir peu obtenir,  
 et ne sçachant pas d'où en provenoit la cause,  
 tout cela tourna à vostre si grand avantage  
 qu'il ne se peut tenir de dire: « Il faut bien que  
 « vous ayez eu une industrie ou bonne fortune  
 « merveilleuse d'avoir ainsi promptement obtenu  
 « ce que les autres disoient leur avoir esté impos-  
 « sible, en l'espace de quinze jours ou trois sep-  
 « maines qu'ils ont travaillé en cette affaire, ou

« qu'il y ayt eu en eux bien de la malice, ou de l'ignorance, ou du mal-heur. Et puis que vous avez si bien commencé, je vous prie d'achever le plutost que vous pourrez, trouvant bon ce que vous avez mis en avant pour la Provence, où M. d'Espéron tasche de s'establiir contre ma volonté et le bien de mon service; et ne pouvions mieux faire que de luy mettre M. de Guyse en teste, d'autant que luy reünissant de son costé ceux qui se ressentent encor de la ligue et mes serviteurs affidez (comme messieurs d'Ornano, Lesdiguières et autres, ausquels je l'enjoindray ainsi), tout le credit que peut avoir acquis M. d'Espéron sera bien-tost réduit à neant, et luy contraint, apres y avoir bien despendu, de s'en revénir me trouver et faire le bon valet.»

Ayant ainsi receu les commandemens absolus du Roi, vous travaillastes tant diligemment et heureusement que le lendemain au soir ayant convenu de tous les articles du traité, dont la plus-part avoient desja esté accordez par ceux qui l'avoient manié auparavant vous, que vous les signastes au nom du Roy, en vertu de vostre pouvoir, et fistes signer à madame de Guyse et aux sieurs de la Rochette, Pericard et Bigot.

Et dés le lendemain il arriva une chose qui mérite d'estre escrite pour faire voir la gentillesse de l'esprit, bonne foy, et loyauté du Roy, qui fut que les habitans de Reims, s'étant enfin resolus de se donner au Roy, voire de contraindre M. de Guyse à faire le semblable ou se saisir de sa personne, s'estans aigris deux ou trois fois depuis huit jours contre luy, et luy contr'eux jusques à user de reproches et menaces, pour ce qu'ils avoient refusé de laisser entrer des troupes qu'il avoit voulu faire venir, et que nonobstant ses deffences, ils n'avoient pas laissé de continuer leurs gardes dans les tours, portaux et autres lieux forts de leur ville: pour ces raisons donc, ayant député six des principaux de leurs citoyens vers le Roy, et iceux s'estans adressez à vous pour ce qu'ils avoient appris à leur arrivée à Paris, que le Roy s'estoit remis en vostre fidelité et suffisance pour mettre une fin au traité de M. de Guyse, ils vous dirent qu'estans tres-assurez de vostre ancienne loyauté au service du Roy et de l'entiere confiance qu'il y avoit, ils s'estoient librement adressez à vous, sachant que vous useriez bien de leur bonne volonté et tiendriez secret ce qui le meriteroit, pour vous dire qu'il n'estoit nul besoin que le Roi se constituast en grands frais et despences, ny accordast de difficiles conditions à M. de Guyse, sous couleur qu'il les rameneroit à son service, d'autant qu'ils se remettroient bien d'eux-mêmes à ce devoir sans son intervention; voire, si

vous leur donniez parole que le Roy l'auroit agreable, ils ne parolstroient point davantage en Cour, mais s'en retourneroient à Reims, et trouveroient bien moyen sans aucun doute, difficulté ny peril, de se saisir de la personne de M. de Guyse, et de le livrer luy mesme (au lieu qu'il les vouloit livrer) entre les mains du Roy, et que par ce moyen ils recouvreroient sur les siens une partie des pertes dont ils leur avoient esté cause; et que pour vous monstrier combien ils estoient resolus et affectionnez en cette affaire, si vous leur vouliez faire avoir par escrit un adveu du Roy pour cela, voire seulement leur en donner un signé de vostre main, ils vous feroient donner dix mil escus par la ville, et feroient executer toutes leurs propositions; lesquels vous escoutastes fort attentivement, et les ayant loüez de l'affection qu'ils tesmoignoient à leur Roy et à leur patrie, et remerciez du present qu'ils vous vouloient faire, vous les priastes de trouver bon que vous füssiez entendre le tout au Roy avant que de leur faire aucune response. Et ainsi s'estans retirez à leur logis, vous vous en allastes trouver le Roy, auquel, ayant conté l'arrivée de ces députez de Reims à Paris, les causes de leur venuë, les offres qu'ils vous avoient faites et la remise dont vous aviez usé à leur faire response, il se mit à faire trois ou quatre tours dans son petit cabinet d'où il avoit fait sortir tout le monde, réservé le sieur de Beringuen, pour ce que vous luy aviez dit d'avoir quelque chose qui meritoit d'estre tenuë secrette à luy faire entendre; puis, apres s'estre gratté la teste deux ou trois fois, et s'estant mis à sousrire, il dit: « L'on dit bien vray qu'il n'y a rien si volage qu'une multitude de peuple ny qui se porte plutost d'une extrémité en l'autre; » et s'estant encor promené une fois, il vous appella contre la fenestre, et vous demanda où vous en estiez du traité de M. de Guyse. A quoy luy ayant respondu que tout estoit d'accord et que les articles en avoient esté signez dés le soir de devant.

« Quoy donc, vous dit-il, vous avez signé les articles en mon nom en vertu de vostre pouvoir? — Oüy, Sire, je les ai signez, luy dites-vous, suivant le commandement expres et absolu que vous m'en aviez fait par trois fois, et n'ay pensé en cela vous deservir ni vous déplaire. — Aussi n'avez vous fait, respondit-il; car je suis assuré de vostre bonne intention; mais aussi puis que les choses en sont venuës si avant et que vous y avez engagé ma foy et ma parole, je le veux observer inviolablement: et partant faites venir ceux de Reims parler à moy, car je les veux remercier, les gratifier de ce qu'ils me demanderont, en ce qui se

« pourra faire honnestement, et tesmoigner comme bien j'estime leur zele à mon service. » Toutes lesquelles choses dont les particularitez seroient trop longues à reciter, furent ainsi executées et le traité de M. de Guyse reduit en forme au nom du Roy, et signé de M. de Gesvres.

Nous nous sommes resolu de n'insérer point ces articles dans les recueils que nous faisons à present, tant afin de les abréger tousjours le plus qu'il nous sera possible, que pource qu'ayans esté imprimez ils se trouveront par tout; et nous contenterons de dire qu'en consequence d'iceux, en vertu de la foy du Roy, tenuë pour inviolable, et des assurances particulieres de vous aux députez de M. de Guyse (car quand à madame de Guyse et mademoiselle sa fille, elles n'en voulurent jamais d'autres que le bon naturel du Roy, et leur extrême affection en son endroit), qu'il recevroit tres-bon traitement et que vous l'assisteriez et serviriez de tout vostre cœur: il s'en vint trouver Sa Majesté, avec le plus de ses amis qu'il peut rassembler, de laquelle il fut reçu fort favorablement et avec les mesmes carresses, façon riante, familiarité, privauté et liberté en paroles, que s'il eust esté nourry près de luy dès ses premiers ans, et ne luy eut jamais rendu que fidele service et entiere obeysance. Tous ceux qui voyoient ces actions, demeurans infiniment esmerveillez de trouver une si grande facilité en ce prince, à user de telles courtoisies et civilitez, et admirant un si gentil naturel et une vertu tant illustre, sur tout lors que M. de Guyse ayant respondu à icelle avec des tesmoignages de grande servitude et submission, et protesté de reconnoistre à jamais sa Majesté pour son seul Roy et unique maistre, et en cette qualité de luy demeurer tous les jours de sa vie tres-humble sujet, loyal et obeysant serviteur; il le vint, avec apparence de grande joye, embrasser pour la troisieme fois en l'appellant son neveu, luy dit, apres quelques remercemens de son affection et assurance de la reconnoistre, que son pere et luy, avoient passé une partie de leur jeunesse ensemble, et quoy qu'ils se trouvassent souvent rivaux en amour et en plusieurs autres desseins et pretentions qui ont accoustumé d'allier les affections, si n'avoient-ils laissé d'estre fort familiers amis et de faire grand cas de la personne et vertu l'un de l'autre, et que tout au contraire, nul d'eux ne s'estoit jamais peu accommoder à l'humeur de M. d'Alençon, s'asseurer en son amitié ny se confier en ses paroles, tant ils l'estimoient prince de malin esprit, volage, cauteleux et desloyal, se reconnoissant l'un à l'autre avoir mesme une certaine naturelle antipathie avec luy: à quoy M. de Guyse repartit que le Roy

faisoit trop d'honneur à la memoire de son pere, et luy demeureroit tres-obligé d'en parler en si dignes termes.

Il se passa lors et depuis plusieurs autres semblables discours et complimens entre le Roy et M. de Guyse, lequel n'oubloit nulle sorte de complaisances pour se rendre agreable, qui seroient trop longues à reciter, et ne serviroient qu'à faire cognoistre les bonnes inclinations du Roy, sa douceur, familiarité et agreable conversation, et qu'en la frequentation et société ordinaire et es jeux, plaisirs, festins et autres passe-temps, il se rendoit comme compagnon et amy d'un chacun: aussi bien qu'es batailles et combats, foy, loyauté, prudence, magnanimité, clemence, dits, faits et gestes heroïques, il faisoit paroistre qu'il estoit à bon droit le Roy, le maistre, le chef, le capitaine et le plus excellent de tous, dequoy les choses cy-dessus dites rendans des tesmoignages assez suffisans, et les suivantes le confirmant encor plus amplement.

Sur lequel discours nous ramentevrons, comme madame de Guyse, estant une apres disnée venuë voir le Roy en sa chambre, et trouvé entrant que M. de Guyse luy presentoit la serviette de collation pour laver, elle se mit à faire des exclamations d'esjouissance à sa mode, et puis dit au Roy en substance, au moins ce nous semble, car il nous a esté impossible, encor que deux de nous y fussions presens, de bien retenir toutes ces belles paroles, qu'elle recevoit une extrême joye et contentement de voir son fils se rengier ainsi bien en son devoir, et que la bonté de Sa Majesté daignast agréer son service, d'autant que c'avoit tousjours esté le but de ses plus ardentés prières envers Dieu, et incessamment désiré, comme sa tres-humble servante, de le voir roy de France, paisible et bon maistre à elle et à tous les siens, ne voulant point celer qu'elle n'eust eu des souhaits contraires pour son devancier, voire ne luy eust esté tres-odieux, pour des raisons que l'on pouvoit assez conjecturer sans qu'il fut besoin d'en dire davantage, et que maintenant s'estant toute donnée à Sa Majesté elle luy consacroit aussi tous ses enfans, et sur tout son fils aîné, afin qu'ayant esté cy-devant un fol, il devint sage en si bonne escolle: à quoy s'il venoit à manquer de loyauté envers luy et l'Estat, elle le des-avoüeroit pour fils et ne le voudroit jamais voir; ce que le Roy trouva si bon qu'il courut la baiser et embrasser, luy disant qu'il avoit tousjours fait mesme estat de son affection qu'elle la tesmoignoît maintenant, et pour cette cause estoit-il resolu de servir de bon pere aussi bien que de bon Roy et de bon maistre à elle et aux siens.

Or n'y a-il point de doute que le Roy dit tout cecy du meilleur cœur qu'il eust à cette princesse, diverses experiences du passé et de l'advenir, ayant tesmoigné qu'il n'y en avoit une seule à la Cour qu'il aimast tant, ny de qui la compagnie luy fut si agreable, ayant souvent dit tout haut (à ce que nous avons appris de vous et d'autres) qu'il l'affectionnoit de cette sorte, pour ce qu'elle l'avoit tousjours aymé, n'avoit point l'esprit malin et n'estoit nullement envieuse, médisante ny broüillonne, la trouvoit tousjours de bonne humeur et de bonne compagnie, pour son regard, ayant les meilleures rencontres qu'il estoit possible, et de certaines naïfvetés et simplicités en ce qu'elle disoit et faisoit, lesquelles, provenans plutost de gentillesse, de dextérité, d'industrie et de dessein de complaire, que d'aucune lourderie, niaiserie, sottise, ny volonté de nuire ou offencer quelqu'un, rendoient sa conversation des plus douces et agreables; ce qui est cause que nous donnons ces louanges bien méritées à ceux de cette maison, qui vous ont aimé en toute saison, et sur tout à la mere et à la fille, qui ont tousjours plus estimé et fait valoir l'honneur que vous aviez de leur appartenir, que nulle autre des princesses, encor que vous ne leur fussiez pas moins proche.

#### CHAPITRE LVIII.

##### *Affaires de Languedoc. Détails sur l'accommodement du duc de Guise.*

Or combien que nous recognoissons assez de nous estre desja tant estendus aux chapitres precedens, en parlant de madame de Guyse, de ses enfans, de leurs reductions au service du Roy, et de ce qui s'en est ensuivy en consequence d'icelles, que ceux qui les auront en adversion, et vous aussi, pourront bien prendre là dessus occasion de nous accuser d'affectation aux louanges d'eux et de vous, si n'avons nous pas estimé que, pour crainte de leur desplaire, nous deussions supprimer quelques discours, faits par deux d'entre nous, lesquels ils avoient extraits de divers broüillards de papiers trouvez dans les armoires de vostre petit cabinet et à vous adressez, lesquels parlent encore des mesmes choses, avec quelques explications, non, à nostre advis, inutiles, et de plusieurs autres qui meritent bien de n'estre pas oubliés; mais principalement pour deux raisons: La premiere, dautant qu'il s'y verra une espece d'apologie, que vous fustes contraint de faire pour esclarcir le Roy des raisons que vous aviez eues pour faire des choses que l'on essayoit de vous tourner à blasme, tou-

chant la Provence, et messieurs de Guyse, d'Espéron, disant que vous aviez obligé l'un sans cause en desobligeant l'autre contre raison; et la seconde, pour d'autres discours, par lesquels s'apprendront plusieurs particularitez non inutiles à sçavoir; et mesme commencerons par le recit de celuy qui parle le moins de la Provence, ny de messieurs de Guyse et d'Espéron, pource qu'il a precedé l'autre en temps, et que d'iceluy se peut tirer des enseignemens et remarques en quelque sorte capables de faire aucunement discerner les bonnes d'avec les mauvaises intentions, les biens d'avec les mal-faites entreprises, les vrays d'avec les desguisez serviteurs, les excellens d'avec ignorans capitaines, et les vrayement genereux courages, d'avec les artificieux. Le premier de ces discours estant une lettre à vous adressée, qui vous en indique une autre, le tout tel qu'il s'ensuit:

« MONSIEUR, encor que nos desseins en recueillant ces Memoires du cours de vostre vie, durant quelques années, ayent tousjours esté de n'y parler que des particulieres actions du Roy et des choses ausquelles vous aurez eu quelque part, soit en faits militaires, soit en conseils, desseins, entremises, discours, entretiens, ambassades, traitez, voyages et negociations ou esquelles vos interets sont meslez et les causes de vostre fortune spécifiées, ou ce que vous avez veu et seu particulièrement des faits et gestes memorables de nostre grand Roy et de ses hauts et genereux projets, ainsi que nous l'avons dit en tant d'autres lieux de ces recueils abrezgez, tirez des grands Memoires de vostre vie, que ceux qui les liront ne le sçauroient oublier, neantmoins ayant trouvé entre plusieurs de vos vieils papiers une lettre qui vous estoit escrite par un nommé le sieur d'Ariat de Mont-auban, faisant mention de diverses factions de guerre qui s'estoient passées en Languedoc à cause du siege de Ville-mur, en la pluspart desquelles il disoit s'estre trouvé, j'ay estimé que tant de diversitez qui s'y verront, desquelles se peuvent tirer de bonnes instructions et prendre de grandes cognoissances de la varieté des accidens du monde, et disposition des esprits des hommes, meritoient bien d'inserer cette lettre en ces presens Memoires, laquelle estait telle que s'ensuit:

« MONSIEUR, encor que je sçache bien que l'on ayt envoyé au Roy le discours des faits d'armes et autres actions qui se sont passées en Languedoc, à cause du siege de Ville-mur, et que je ne doute point que vous ne les ayez veus, neantmoins, me semblant y avoir eu plusieurs particularitez obmises qui sont de ma science, j'ay pris la hardiesse de vous escrire la presente let-

tre, par laquelle vous sçavez que le 15 de juin M. de Joyeuse ayant rassemblé aux environs de Tholouze une armée de cinq ou six mille hommes de pied et de huit ou neuf cens chevaux, il s'avança vers les quartiers de nostre ville de Montauban le vingtiesme dudit mois de juin, ce qui nous mit en de grandes allarmes, lesquelles augmentèrent grandement lors que plusieurs des peuples de la campagne se venant refugier à Montauban, nous donnerent cognoissance des ravages, saccagemens, bruslemens, violemens et meurtres execrables que commettoient impunement tous ceux de cette armée, et plus encor qu'il eut pris par force tous les chasteaux, villottes et lieux fortifiez, dont je vous en nommeray quelques uns, pour ce que je sçay bien que vous les cognoissez, à sçavoir : Mont-bequin, Montbartier, Mont-beton, la Barte, Maussac, Saint Leophaire, Saint Maurice et autres; tous lesquels heureux succez le firent resoudre d'aller assieger Ville-mur, que je vous avois oüy dire plusieurs fois ne valoir rien si l'on l'attaquoit par les lieux que les ignorans en fortifications estimoient le plus fort, qui estoit le costé du château; mais, de bonne fortune pour nous, il s'opiniastra du costé de la ville à cause de la riviere et de la grande quantité de bleds, vins et autres vivres qu'il sçavoit y avoir dedans, desquels il faisoit estat de se servir utilement pour de plus grands desseins; car l'esprit et le courage de ce seigneur estoit capable d'entreprendre choses grandes, bonnes et mauvaises, ce qui fit aussi resoudre nos magistrats et consuls (à quoy les continuelles sollicitations de plusieurs de mes parens et de moy ne furent pas inutiles) d'envoyer vers M. de Themines pour le prier de nous assister, lequel ne manqua pas de se rendre aussi-tost à Montauban et de tesmoigner qu'il aymoît nostre communalité, mais plus encor le bien du service du Roy, donnant aussi-tost advis à M. d'Espernon de ce qui se passoit, le priant de le vouloir assister de plusieurs troupes siennes qui battoient la campagne, lesquelles, pour estre sans employ utile, ne faisoient que destruire les peuples, et lesquelles l'on disoit qu'il avoit levées pour faire passer en Provence, avec intention de s'en conserver le gouvernement, (nonobstant, ce disoit-on, que le Roy eust autre volonté) chose qu'il ne luy peut refuser, au moins en apparence, à cause que c'estoit sur le chemin qu'elles devoient tenir, et en les attendant M. de Themines jetta quelques gens de cheval et de pied dans Ville-mur lequel ils trouverent tellement investy, qu'ils furent contrains de renvoyer leurs chevaux et d'y entrer à pied : à l'arrivée des troupes de M. d'Espernon, elles firent bien la mine de nous vouloir

secourir puissamment, ne crians que *bataille*, *ba. aille* pour les premiers jours; mais ils changerent bien-tost de langage lors que l'on leur proposa d'en venir affectivement aux mains, car ils faisoient naistre incessamment difficultez sur difficultez; et enfin quelques uns qui ne les approuvoient pas nous descouvrirent qu'ils avoient charge expresse de passer outre sans rien hasarder, mais que si en faisant bonne mine ils pouvoient donner quelque empeschement au siege, ils croyoient bien que l'on n'y manqueroit pas; ce qui fut accepté, ne pouvant rien obtenir davantage, chose qui neantmoins nuisit plus à Ville-mur qu'elle ne luy servit, d'autant en premier lieu, lors que les forces furent jointes ensemble, elles apprirent aux nostres à vivre en picorant et à se garder nonchalamment : tellement que nonobstant qu'à cette occasion M. de Joyeuse eut un peu esloigné ses troupes et les eut logées serré, si est-ce que luy se doutant bien, soit qu'il en eut eu advis ou non, que ces troupes de M. d'Espernon passeroient bien-tost outre, il ne s'esloigna jamais tant qu'il ne peust facilement apprendre tout ce qui se passeroit parmy nous.

« De sorte qu'ayant esté adverty par ses espions, dont il avoit quantité parmy nous, que les troupes de M. d'Espernon estant fort mal disciplinées, vivoient desordonnément et faisoient mauvaise garde, voire avoient esté imitées par les nostres, il se resolut de leur donner une estrette à toutes les deux, comme elles se trouverent attaquées une nuit si puissamment qu'elles furent mises en fuite, et y eust eu une desroute entiere, si M. de Themines, avec ce qu'il s'estoit reservé de forces, ne fut accouru à leur secours, et encor n'y peut-il donner si bon ordre qu'il n'y demeurast sept ou huit cens hommes du bagage et de l'artillerie; laquelle disgrace nous mit en altercations les uns contre les autres, et fut cause que les troupes de M. d'Espernon se retirerent d'avec nous, et prenans des chemins escartez et plus esloignez des hazards et des ennemis, reprindrent le chemin de Provence suivant le commandement qu'ils en receurent, et qui fut cause que M. de Joyeuse reprit son siege de Ville-mur plus obstinément et plus puissamment qu'auparavant, tellement que M. de Themines ne se voyant nul moyen en main pour le faire lever par ses seules forces, il se resolut d'en envoyer chercher d'autres, et cependant d'employer sa personne et sa vie pour défendre la place tant qu'il pourroit; et de fait il entra dans Ville-mur peu de jours apres, avec cent ou six vingts bons chevaux et deux cens cinquante harquebusiers, et en fit sortir M. de Regniers, qui en estant seigneur par engagement, estoit si incommodé

de ses membres qu'il n'y pouvoit pas beaucoup servir, et l'envoya solliciter de tous costez pour avoir secours; et moy m'estant rangé pres la personne de M. de Themines avec de mes parens et amis, nous y fismes tous, et sur tout les gens de qualité, des merveilles, tant à bien attaquer qu'à bien défendre, entre lesquels je vous nommeray, pource que vous les cognoissez, messieurs de Mausac, estably gouverneur de la ville pour l'absence de M. de Regniers, de Desme, de Chambret, de la Magdeleine, de Bonne-coste, d'Entreigues, de la Chaise, de Ducros, de Bassignac, de Murs, de Mostolak, de Bure, de Calvet, de Bourjade, d'Aleigre, de Cap-bossu, de Constans et de Subsol. M. de Joyeuse, adverty de ce renfort dans la place, voulut aussi renforcer son armée; enquoy ceux de Tholouze l'assisterent puissamment, et plusieurs de la noblesse du pays aussi: mais le principal secours qu'il receut, s'il en eut seu bien user, fut les bons conseils que luy vindrent donner messieurs d'Onous et de Mont-berault, car ils estoient sages et bons hommes de guerre, nonobstant toutes lesquelles assistances nous ne laissions guerres nos assiegeans en repos, ayant fait une sortie bien à propos par le moyen de laquelle nous luy taillasmes en pieces grande partie d'un regiment de douze cens hommes que ceux de Tholouze soudoyoiient et luy avoient envoyé quasi tout composé des enfans de la ville (dans lequel attaquement je ne m'esparnay pas) et m'en revins neantmoins sans autre mal que de deux petites blessures.

« Pendant ces attaques et défences, M. de Regniers sollicita encor M. d'Espernon et tout de nouveau M. de Matignon de nous vouloir secourir; mais ny de l'un ny de l'autre il ne receut que des excuses et des remises qui nous laissoient bien peu d'esperances d'en recevoir du secours, ce qui fit prendre la hardiesse à M. de Themines d'en escrire au Roy mesme par courrier expres, lequel le cognoissant et l'ayant comme vous sçavez qu'il fait et notre ville aussi, ne manqua pas d'y donner ordre, luy renvoyant aussi-tost son courrier avec lettres à M. de Mont-morency et à M. d'Espernon, leur commandant expressément d'y pourvoir jusques à y employer leurs propres personnes si besoin estoit, enquoy le dernier ne monstra pas grande affection, et tesmoigna bien qu'il avoit d'autres desseins; mais le premier n'y manqua pas, car il nous envoya aussi-tost de fort bonnes troupes toutes huguenottes, commandées par messieurs de Leques et de Chambault, leur ordonnant expressement de ne revenir point que le siege ne fust levé, dequoy ils essayerent plusieurs fois de prendre l'occasion; mais ils trouverent tousjours M. de

Joyeuse si bien logé et retranché, luy si fort et eux si foibles, qu'ils estimerent ne le devoir plus tenter qu'ils n'eussent encor de nouvelles troupes, pour lesquelles essayer de recouvrer ils escrivirent tous à M. de Messillac, lieutenant du Roy en Auvergne, et à M. le vicomte de Gourdon, homme à la verité de mauvaise taille, mais de grande affection, de bon cœur et de grande creance, lesquels sans user d'excuses ny remises, comme messieurs d'Espernon et de Matignon, tesmoignerent qu'ils estoient vray serviteurs du Roy, tellement qu'ayant rassemblé promptement ce qu'ils purent de leurs amys, ils se rendirent à Mont-auban avec deux cens quatre-vingts bons chevaux et huict cens harquebusiers à cheval, lesquels joints avec les troupes de messieurs de Leques et de Chambault, ils s'assemblerent aussitost pour deliberer sur ce qu'ils avoient à faire, et fut resolu de se loger plus pres de l'armée assiegeante qu'ils n'estoient auparavant.

« Mais estant arrivé dès le lendemain de cette conclusion, que M. de Joyeuse (lequel en tout ce siege a tesmoigné une grande hardiesse, vigilance, soin et diligence) avec son armée vint à l'improviste se presenter devant eux en ordre de bataille, grandement bien disposée pour combattre, la plupart des nostres tesmoignerent quelque espece d'estonnement disposé à la retraite, ou pour le moins à s'esloigner; et par cette action venant à recognoistre qu'ils avoient affaire à un ennemi plus fort qu'eux (car il avoit bien cinq à six mille hommes de pied et huict ou neuf cens chevaux, et eux ne pouvoient avoir plus de sept cens chevaux, et trois mil sept cens harquebusiers), et qui estoit grandement entreprenant, voire plutost temeraire que hardy, ils jugerent bien qu'ils n'en auroient pas si bon marché qu'ils avoient estimé, laquelle defiance leur devint fort profitable, car elle les rendit plus soigneux de se loger avantageusement, de faire venir de l'artillerie de Mont-auban, des munitions et quantité de vivres dans leurs logemens, de s'y mieux resserrer, avoir plus de soin de leurs gardes, afin que l'on ne peust user de surprise sur leurs troupes, comme il avoit esté fait sur celles de M. d'Espernon et les nostres lors de leur jonction, et de ne hazarder point de bataille ny d'attaquement general que sur une opportunité fort avantageuse, laquelle se presenta plutost qu'ils n'eussent osé esperer par une telle occasion.

« M. de Joyeuse, croyant avoir recogneu par sa presentation en bataille que les ennemis auxquels il avoit affaire le craignoient, et ne seroient pas gens pour beaucoup hazarder, il commença, en les mesprisant, à mespriser les



conseils que luy avoient tousjours donnés messieurs d'Onous et de Mont-berault, de loger toute sa cavalerie dans son camp retranché comme au piquet, depuis la jonction de nos troupes, comme elles s'y accommoderent quelques quinze jours; mais enfin ce qu'il y avoit de noblesse la moins accoustumée aux fatigues et incommoditez des gardes et logemens si serrez, persuaderent si bien les autres que tous ensemble, d'un commun accord, ils vindrent prier M. de Joyeuse de leur permettre de s'aller rafraischir pour cinq ou six jours seulement, dans quatre ou cinq villottes et bons villages qui estoient du long du haut de la riviere du Tar, afin que s'il avoit besoin d'eux plutost, il les pust plus promptement mander et mieux advertir, en tirant seulement trois coups de canon, lesquels il leur seroit facile d'entendre, et se trouveroient aussi-tost prests à partir.

« Cette permission fut long-temps disputée, comme m'a conté un de mes amys de leur party, auquel estant mon parent je sauvay la vie, duquel j'ai aussi appris la pluspart des particularitez que je vous escriis touchant leurs déconvenues : mais enfin contre les advis desdits sieurs d'Onous et de Mont-berault, il fut permis à cette cavalerie, qui estoit des meilleures, de s'aller loger où ils avoient demandé, ce qu'ils firent bien soudainement, et s'en repentirent tout à loisir : d'autant que M. de Messillac, qui est un cavalier fort actif, brave et vigilant, et qui avoit tousjours quelque espion dans leur armée, ayant eu aussi-tost advis par un d'iceux du délogement de cette cavalerie, assembla en mesme temps tous les autres principaux chefs de leurs troupes, et leur dit : « Messieurs, j'ay oüy parler d'un vieil proverbe qui dit *qu'il faut battre le fer pendant qu'il est chaud*; or ne sçay-je si celui que portent nos ennemis est chaud ou froid, mais je sçay bien qu'il est temps d'essayer à le bien battre, car nous n'en aurons peut-estre jamais si belle opportunité; » et là dessus leur particularisa ce que ses espions luy avoient appris de cette cavalerie délogée du camp et logée au loing; sur quoy tous les autres chefs, qui avoient aussi tres-bonne volonté, conclurent à ne laisser pas perdre une occasion de se delivrer des fatigues, leurs amys assiegez de peines, acquerir de l'honneur et servir le Roy; tellement que sans grande dispute M. de Chambault ayant dit tout haut : « Or sus, sus, messieurs, il est du tout necessaire de ne laisser pas perdre cette opportunité de bien servir le Roy, nos amis, et d'acquerir de l'honneur; et parlant ne faut-il plus parler que de vaincre ou de mourir : » et sur telles conclusions, s'estans resolus

à leur ordre d'attaquement, ils l'entreprendrent par quatre endroits desja auparavant recognus par messieurs de Pedouë, Mont-oison et Clouzels, que bien cognoissez; lesquels, d'un commun accord avec les autres chefs, estimerent à propos de reserver un regiment de huit cens hommes de pied, et de trois cens chevaux, pour se tenir tousjours en bataille à la veüe des retranchemens des ennemis, et d'employer le surplus à les attaquer puissamment, mettant avec les gens de pied, separez en quatre troupes, cinquante hommes d'armes, pied à terre avec chacun une hallebarde au poing, l'espée au costé et deux pistolets à la ceinture, pour se mettre à la teste de leurs gens de pied et y faire le plus grand effort, si tost que quatre cens hommes de pied, que l'on avoit ordonnez d'attaquer les premiers retranchemens, leur auroient fait descharger toutes leurs harquebuses par leurs premieres salves de l'abord.

« Or ne peurent tous ces ordres, rumeurs et mouvemens d'iceux estre tenus si secrets que M. de Joyeuse n'en descouvrist quelque chose; car il avoit force espions parmy nous, et ne fut au repentir d'avoir mesprisé l'advise des vieux capitaines, et sur tous ceux de messieurs d'Onous et de Mont-berault; et afin d'y apporter quelque espee de remede, il envoya quatre cens hommes pour renforcer les deux cens establis à garder son premier retranchement, à cause qu'il n'estoit pas encor du tout achevé, et fit tirer les trois coups de canon donnez pour signal à sa cavallerie de monter à cheval. Mais tout cela fut executé si tumultuairement et si peu diligemment par les douilletts et paresseux, et ceux qui aymoient mieux le lict que le combat, et la bouteille et le jambon que l'espée et le pistolet, qu'il ne fut pas suffisant de le garantir de peril et de ruine; d'autant que les sieurs de Pedouc, de Clouzels et Mont-oison, et de la Barte, qui menaient les quatre cens premiers harquebusiers et piquiers, parurent si matin (le soleil n'estant pas encor du tout levé) et firent leur attaquement avec telle promptitude et impetuositè, qu'ils firent voler toutes les premieres charges des harquebuses et pieces preparées pour la deffence de ce premier retranchement; et furent suivis de si pres et avec telle resolution, qu'avant qu'ils eussent eu loisir de recharger, nos troupes, en demie heure, furent montées sur les escarpes des fossez, desquels ayant fait leurs escopeteries et descendu de furie dans le bas du retranchement, ils estonnerent tellement ceux de la deffence d'iceluy, qu'apres en avoir esté tué quatre-vingts ou cent des premiers deffenseurs, le reste tourna le dos et s'enfuit vers le second retranchement; mais ce fut

avec tel desordre et confusion, qu'ils y apportèrent plus d'embarras que de secours, aussi qu'estant suivis plus diligemment et furieusement par nos gens victorieux qu'ils ne s'estoient imaginé, ils ne sceurent quasi à quoy se resoudre : de sorte que ce second retranchement, qui, à la verité, estoit assez bon pour le deffendre, fut aussi-tost gagné que l'autre, et lors eux tous ayant tous pris l'espouvante, ce fut à sauve qui peut, et dire : *Maudit soit le dernier!* Sur lequel desarroy survenant leur cavallerie, tant s'en faut qu'elle leur fît prendre courage, arrestât leur fuite et les fît resoudre au combat, qu'eux mesmes, voyant marcher ce bataillon de huit cens hommes de pied, et leur escadron de trois cens chevaux qui avoient esté reservez, ils se jetterent, comme tous estonnez, parmy leurs gens de pied, mais sans aucune absoluë resolution pource qu'ils devoient faire, encor que ce fussent de belles et fortes troupes, d'autant que la fuite des autres leur donnoit desja tant d'espouvante que M. de Themines, sortant de la ville avec tout ce que nous estions de gens de guerre avec luy, cavallerie et infanterie, et les chargeant furieusement, les mit en tel effroy que, survenant de tous costez tout le reste de l'armée à la charge, tout courage et advis se trouverent esvanouis, et nul des ennemis ne songea plus à se deffendre, mais, en se mettant en route absoluë, à chercher le moyen de se pouvoir garantir du feu et du fer par le moyen de l'eau; et lors se jetterent ils si grand nombre de gens sur un pont de cordes et de planches que M. de Joyeuse avoit fait accommoder sur le Tar, qu'il se rompit et enfondra dans la riviere, avec tout ce qui estoit dessus, entre lesquels estoit mondit sieur de Joyeuse : ceux qui suivoient à la file en s'enfuyant survenoient si esperdus, que, sans penser à la rupture du pont, ils se jettoient eux et leurs chevaux à corps perdu dans le fleuve, comme si c'eust esté un pont, ce que nous, estans las de tuer et frapper, regardions par admiration, disans que ce qui paroissoit ressembloit à la submersion de Pharaon. Nous n'avons peu sçavoir au vray le nombre des morts, à cause des diverses sortes d'icelles, mais les bruits courent que les ennemis disent y avoir perdu plus de trois mil de l'infanterie, et bien quatre cens de la cavalerie. Nous y avons aussi gagné cinq pieces d'artillerie et vingt-deux enseignes ou cornettes, et ne s'y est pas perdu trente hommes de nostre part. Toutes lesquelles choses et particularitez d'icelles j'ay veu en partie, ayant appris les autres par le discours que j'en ay oüy tenir à nos principaux chefs, lorsque M. de Themines leur donna à souper au retour de la poursuite et

desconfiture des ennemis et de l'un d'iceux que j'avois pris et puis laissé aller sans rançon; vous suppliant d'excuser la prolixité de cette lettre, et me tenir, monseigneur, etc. »

Le second de ces discours, desquels nous avons parlé, commence encor par une lettre à vous adressée, qui commence ainsi :

« MONSIEUR, nous vous dirons que Madame de Guyse (comme d'une partie de tout cecy il en a esté parlé cy-devant) ayant demandé au Roy quelques uns de ses confidens serviteurs, par le moyen desquels elle pût sçavoir sous quelles conditions seures et honorables, Sa Majesté auroit agreable que tous ses enfans luy vinssent protester de leur tres-humble service, avec serment de ne s'en departir jamais, et remettre en son obeysance dix ou douze villes ou places qu'ils tenoient encores, le Roy luy en nomma quatre, tous gens bien qualifiez; mais lesquels, comme ils estoient differens en conditions, affections, interets et fantaisies, demurerent toujours aussi de tant divers advis et opinions qu'ils consumoient plus de temps en contestations entr'eux qu'en resolutions d'affaires : dequoy madame de Guyse estant venuë faire plainte au Roy (luy vous tenant lors par la main et discourant de ce que vous aviez traité en Normandie) et le prier de ne luy donner plus tant de commissaires, mais qui fussent mieux d'accord ensemble et ne procedassent pas si douteusement les uns des autres, ny de la science de ses intentions, tous lesquels propos furent tant demenez que le Roy vous choisit, vous seul, pour donner promptement perfection à ce que quatre n'avoient quasi pas commencé d'entamer; dequoy il ne faut point douter que ces messieurs ne demeurassent fort offensez, mais ne l'osant pas faire paroistre au Roy, ils tournerent tous leurs depits et leurs coleres contre madame de Guyse et vous, s'estans persuadez que tout cela s'estoit mesné par concert fait entre vous deux, qui aviez grande amitié et parentage ensemble. Mais leurs desplaisirs augmentèrent grandement, lors qu'ils sceurent que vous eustes si diligemment et facilement convenu de toutes choses, elle s'estant promptement departie de toutes celles les plus importantes qu'elle leur avoit toujours les plus contestées, et vous, par espece de quelque compensation, luy en ayant aussi-tost accordé d'autres, ausquelles ils n'eussent jamais consenty, d'autant qu'elles prejudicioient à de leurs amis intimes qui estoient absens, et mesmes croyoyent estre prejudiciables au royaume, tellement qu'il ne se faut point estonner s'ils essayerent à blasmer toute vostre entremise et la faire trouver mau-

vaise : auquel dessein ayans encor adjoincts plusieurs des autres adorateurs de la vieille Cour , qui regrettoient incessamment les delices d'icelle, eux tous ensemble, et quelquesfois separément, dirent tant de choses au Roy là dessus, les exagererent de sorte et reitererent si souvent leurs instances, que vous paroissant Sa Majesté avoir pris opinion que vous pussiez avoir par trop gratifié madame de Guyse à cause de vostre parenté, vous fustes reduit à en faire dresser une espece d'apologie et la luy bailler par escrit, laquelle ayant leuë, encor qu'il tesmoignast de la trouver bien faite, de l'approuver et d'en demeurer fort content en luy mesme, si ne laissa-il pas de vous dire que pour certaines considerations du temps, il ne luy sembloit pas à propos que ces discours fussent veus d'autres que de luy ; ce que vous listes observer. Mais nous n'estimant pas qu'aucune des considerations de ces temps là soient de necessaire observation en celuy-cy, nous n'avons point fait de difficulté d'amplifier ceux que nous avons tenus cy-dessus, touchant le traité de M. de Guyse, d'un autre discours mentionné cy-devant, estant iceluy tel que s'ensuit :

Les heureux succez des villes d'Aix, Arles, Marseille et autres villes et peuples de Provence, ne furent pas des moins dignes de remarque ; mais le discours de toutes les particularitez d'iceux qui meriteroient bien de n'estre pas oubliées dans les histoires, estans trop longs pour de simples Memoires qui n'ont au commencement esté faicts que pour vous ramentevoir ce que nous avions peu sçavoir de vos plus celebres actions et fort diverses fortunes, et que nous n'avons depuis amplifiées, suivant vostre commandement, que des seules particularitez que vous nous avez dit avoir veuës, sceuës et connuës, desdits faicts, gestes et fortunes admirables du feu Roy, nous nous contenterons d'insérer icy un Memoire que nous en avons dressé, et iceluy rendu le plus succinct et abregé que nous avons peu, sur divers broüillards que nous avons trouvez parmy vos vieux papiers qui estoient mis dans les armoires vertes de vostre petit cabinet de derriere, lequel est tel que s'ensuit :

La Provence devant estre estimée pour l'une des plus importantes provinces, desquelles est composé le royaume de France tel qu'il est maintenant, et ce pour des causes et raisons grandement considerables, mais de trop longue deduction, joint que nous en avons dit quelque chose ailleurs, et partant dirons nous seulement qu'aussi a-elle esté l'une de celles qui a esté traversée de plus de diverses sortes d'accidens et d'agitations, tant par elle mesme, que pour avoir esté desirée

et tasché d'estre empietée par les roys et potentats estrangers, ses voisins ; et pour telles raisons avons nous estimé que le present discours, quelque succinct et abregé que nous ayons essayé de le rendre, ne sera point des-agreable aux esprits curieux, par lequel, en peu de mots, leur seront representez les estranges et bizarres mouvemens, accidens et fortunes, ou plutost desastres et infortunes, par lesquels passerent, et les perils eminens esquels furent jettez cette province et toutes les villes et peuples d'icelle de toutes conditions, par la trop extravagante vivacité et subtilité de leurs esprits, et les envies, inquietudes et partialitez d'aucuns des plus grands autorisez et accreditez d'entr'eux mesmes. Lequel neantmoins, pour plus facile intelligence, nous ferons preceder par un discours des causes qui apparemment vous furent données des raisons que vous eustes ou des pretextes que vous pristez ou voulustes prendre, pour entremesler telles affaires de la Provence, qui sembloient ne vous concerner en rien, parmy les discours qui n'avoient esté faicts que pour parler seulement de plusieurs actions personnelles du Roy, et par occasion de quelques unes des vostres ; lesquelles occasions de toutes ces choses furent que Sa Majesté vous ayant fait expedier un pouvoir pour aller traiter avec l'admiral de Villars, la ville de Roüen et autres gouverneurs et villes de la ligue en Normandie, pour les reduire en son obeyssance, et l'estant venu retrouver à Paris (trois jours apres qu'il y eut esté receu avec joye, acclamations et applaudissemens universels de tous les peuples de cette ville) pour l'asseurer que vous aviez laissé toute la noblesse, les villes et peuples de la ligue en Normandie en disposition de se remettre sous son obeyssance, il arriva les jours suivansque madame de Guyse l'estant venu trouver, vous les rencontrastes se promenans ensemble dans la grande chambre du Louvre, laquelle lui faisoit de grandes instances et supplications de vouloir agréer le tres-humble service d'elle et de tous ses enfans, l'assurant qu'ils ne respiroient maintenant autre chose que l'honneur de pouvoir elle et eux se mettre en ses bonnes graces, et de luy rendre toute obeyssance, desquels il sembloit que ceux qu'il avoit nommez pour en traiter avec elle, qui estoient le chancelier de Chiverny, le duc de Rets et les secretaires d'Etat, Beaulieu-rusé et de Gesvres, fissent tout ce qu'ils pouvoient pour en retarder l'effet ; et les discours qu'ils eurent là dessus, trop longs à reciter, furent tant continuez qu'ils se conclurent par un pouvoir qui vous fut expedié, afin de parachever vous seul ce qui avoit esté commencé par quatre ensemble, qui ne s'estoient pû de rien ac-

corder, chacun retenant à dire ce que vous terminastes bien-tost et fort heureusement par une excessive faveur de la fortune, trop longue à reciter, ayant en fin accordé à M. de Guyse le gouvernement de Provence pour le faire départir de celui de Champagne, de l'office de grand maistre de France et de tous les benefices qui avoient appartenu au cardinal de Guyse, qu'il disoit luy devoir estre restituez, dautant que son oncle et son pere en avoient esté violemment despoüillez.

Or pource que les esprits d'humeurs contredisantes et les jaloux et envieux de vostre personne, de vos employs et des grandes faveurs de vostre fortune lors naissante, et ceux qui affectionnoient les serviteurs du feu Roy, userent de toutes sortes d'artifices pour descrier tout ce que vous aviez fait, et sur tout essayoient-ils de faire trouver mauvais au Roy, que vous eussiez entrepris (sans qu'il fust specifié dans vostre pouvoir ny vous avoir esté expressément commandé par le Roy) d'accorder à madame de Guyse pour son fils, qui avoit toujours esté ennemy du Roy et de la France, voire jusques à s'estre fait proposer pour en estre Roy, pource, disoient-ils, qu'elle vous apparentoit, le gouvernement d'une province de telle importance, en laquelle ceux de la maison de Lorraine pretendoient droit de propriété, et d'en despoüiller un homme de qualité, merite et service, qui avoit toujours esté des plus aupres des roys et des plus affectionnez à l'Estat; et reïtererent si souvent leurs instances que le Roy faisant paroistre de ne les trouver pas mauvaises, il vous fallut, pour vostre justification, excogiter des causes et des raisons pour luy faire approuver ce que vous aviez fait à bonne intention, comme vous n'y manquastes pas, suivant la fertilité de vostre esprit en belles inventions, dont entre plusieurs nous en specifierons icy cinq principales seulement que vous luy baillastes par escrit, afin qu'il n'en perdist pas la memoire.

La premiere, que par ce moyen, comme il a esté dit, vous deschargiez Sa Majesté des grandes recompenses qu'il luy eust fallu donner ou d'un costé ou d'autre, touchant les trois demandes cy-dessus spécifiées.

La seconde, pour achever de deslier tout à fait M. de Guyse d'avec ceux de sa maison, en l'esloignant de la Champagne, Lorraine, Pays-Bas, Picardie et Bourgongne où ils avoient eu leurs plus grandes intelligences et pretentions.

La troisieme, pource que vous sçaviez de science que madame de Guyse, M. de Guyse et ses freres, estans tous mal contens de tous les autres de leur maison, pour avoir recogneu de

n'en avoir point eu de plus contraires aux grands que le Roy d'Espagne faisoit demonstration de leur vouloir procurer; que ceux de Lorraine, de Savoye, de Nemours, du Mayne et de Mercure, qui tous les vouloient precéder par tout et en toutes choses.

La quatrieme, qui estoit comme une preuve de la precedente, la franchise de la responce de la mere et des enfans, lors que l'on leur vouloit parler de les maintenir toûjours tous ensemble en une particuliere et bonne intelligence avec tous les sus-nommez, ayant déclaré que les choses passées leur ayant enseigné celles où ils devoient aspirer pour l'advenir, ils ne vouloient plus avoir d'intelligences particulieres qu'avec la couronne de France et le Roy seul, ayant restraint toutes leurs amitez, parentez et desseins dans celles du bon plaisir et service de Sa Majesté.

Et la cinquieme, que vous souvenant d'avoir souvent entendu Sa Majesté faire des plaintes de l'adversion que M. d'Espernon avoit tousjours témoignée d'avoir à sa personne, à sa royauté, à son contentement et à ses desseins, vous aviez creu de ne luy pouvoir rendre un meilleur ny plus agreable service, que de reduire une personne si mal intentionnée en son endroit, à sa discretion, chose qui ne se pouvoit, ce vous sembloit-il, mieux ny plus facilement faire, qu'en luy opposant pour competeur au gouvernement (dont il s'estoit emparé contre son desir et qu'il projettoit de retenir malgré luy), celui de tous les pretendans à celui qui le pouvoit le mieux et le plus promptement reduire à raison, et là dessus faisiez ressouvenir Sa Majesté de huit plaintes principales, entre les autres, qu'elle vous en avoit le plus souvent faites.

La premiere, de l'ostentation et vanité dont il avoit usé en ses paroles et forme de vie lors qu'il le vint visiter en Guyenne, comme de la part du Roy, ayant tousjours vescu et parlé avec luy quasi comme de pair à compagnon, jusques à l'avoir fait sonder par tierces personnes interposées du mariage de sa sœur.

La seconde, qu'il avoit tousjours essayé d'empescher que le Roy ne l'adjoignit à luy en corps de Cour ny d'armée; mais ayant esté d'avis qu'il se devoit contenter, puisque l'estat de ses affaires le requeroit ainsi, de l'admettre à son service, tenans tousjours leurs personnes, leurs camps et leurs troupes distinctes et séparées les unes des autres, afin d'esviter les jalousies et menées.

La troisieme, que n'ayant peu empescher cette entiere et absoluë jonction avec le Roy, il avoit tousjours rendu bien peu de respect à sa personne et à sa qualité, jusques à luy avoir

plusieurs fois contesté audacieusement toutes ses propositions, tasché de traverser tous ses desseins et entreprises, et de s'estre vanté qu'il luy tenoit souvent teste et le contrecarroit en toutes choses.

La quatriesme, qu'il avoit bien eu l'imprudence que de le refuser, quelque instance qu'il luy en eust faite et fait faire, de vouloir signer la déclaration qu'avoient signée tous les autres grands du royaume, par laquelle ils le recognoissoient pour Roy legitime.

La cinquiesme, que l'ayant fait instamment prier par Belle-garde et Roquelaure, et autres ses amys plus particuliers, voire prié luy-mesme, mais tout cela en vain, de ne commencer point la dispersion et dissipation de son armée, par la retraite de luy et de ses troupes, mais de vouloir luy ayder avec icelles à venger la mort du feu Roy son bon maistre auquel il avoit tant et tant d'obligations.

La sixiesme, pour avoir sceu de bonne part qu'en particulier il avoit blasmé ceux de ses amis qui avoient recogneu la royauté de Sa Majesté, sans l'avoir auparavant abstrainte à changer de religion.

La septiesme, de s'estre vanté que, soit que Sa Majesté luy accordast les provisions de gouverneur de Provence, ou non, il estoit bien resolu de s'en rendre maistre s'il pouvoit, puis que son frere luy en avoit remis la charge.

Et la huitiesme, qu'ayant sceu qu'il assembloit des troupes pour passer en Provence, et que le chemin d'icelles se rencontroit près de Ville-mur, que M. de Joyeuse avoit assiégué, Sa Majesté l'ayant fait prier, voir prié par lettres expresses de les vouloir joindre aux troupes qu'elle faisoit preparer pour faire lever ce siege, il s'estoit contenté d'en avoir fait le commandement pour la mine seulement, mais avec secrette deffence aux siens de hazarder pour cet effet aucun combat : tellement que partie de ses troupes ayant esté deffaites par M. de Joyeuse pour avoir esté mal disciplinées, mal logées et fait mauvaise garde, cela l'avoit tellement fâché et despité, qu'il fit aussi-tost continuer à ses troupes le chemin de Provence, sans se soucier d'aucuns des mandemens de Sa Majesté, ny du bien de son service. Toutes lesquelles considerations vous avoient semblé suffisantes pour vous faire gratifier M. de Guyse du gouvernement de Provence, puis que c'estoit le plus prompt, facile, et puissant moyen pour reduire à suivre ses intentions, un homme qu'il disoit l'avoir tousjours eu en si grande adversion, et que Sa Majesté mesme confessoit de n'avoir jamais eu sujet de beaucoup aymer.

Or laissant les discours qui regardent les par-

ticuliers pour parler de ceux qui touchent le general de la Provence et des Provençaux, en les reprenant dès le temps de la mort du grand prieur de France, frere legitime des trois derniers Roys, par laquelle le gouvernement de cette province fut donné au duc d'Espernon, ce que plusieurs des Provençaux avec leurs testes chaudes, altieres et mesdisantes, n'eurent pas fort agreable, tant, disoient les plus audacieux, à cause de son extraction qu'ils mesprisoient, comme beaucoup plus basse que celles de leurs precedens gouverneurs, qu'ils sçavoient bien n'estre parvenu aux dignitez qu'il possedoit alors, que par voyes, services et complaisances, desquels le bruit commun ne parloit pas bien, que pource qu'il avoit la reputation d'avoir l'esprit altier, aigre, de peu familiere conversation, et qui ayant accoustumé de se faire adorer aux courtisans, voudroit que les Provençaux fissent le semblable. Tellement que luy, ayant entendu quelque chose de tous ces bruits, et jugeant bien que cette charge et celle des mignonneries et delices de la Cour, seroient comme incompatibles ensemble à cause que chacune d'icelles requeroit une residence personnelle sur les lieux, il fit bailler ce gouvernement à son frere de la Vallette, qui avoit desja celuy de Dauphiné, lequel estant d'humeur plus douce et posée, moins imperieuse et beaucoup plus familiere, sociable et caressante, il s'accommoda pour quelque temps assez bien à l'humeur des Provençaux et des Dauphinois conjointement; tellement qu'il conduisit aucunement heureusement les peuples et les affaires de ces deux provinces pour le service du Roy, durant les années 1586, 1587 et partie de 1588, que le Roy estant venu à entrer en défiance du duc d'Espernon, jusques à croire qu'il le desservoit et nuisoit à sa personne et à ses affaires, il se voulut faire saisir de sa personne à Angoulesme, pour le reduire à son devoir et luy faire suivre ses volontez, et prist là dessus sujet de priver aussi la Valette de ses bonnes graces et de ses gouvernemens, auxquels neantmoins il fut restably depuis, apres la mort de M. de Guyse, la necessité des affaires du temps le requerant ainsi; mais ce fut avec un grand changement en sa premiere creance et autorité que la diminution de la fortune de son frere et sa spoliation de ses gouvernemens avoient desja fort extenuées; mais le furent bien encore davantage par la formation de plusieurs partis dans cette province, d'autant qu'en premier lieu, les grandes villas s'en voulant faire accroire, tascherent à se mettre dans un libertinage absolu. D'ailleurs le Roy d'Espagne essayoit de former un party du tout à sa devo-

tion, le duc de Savoye un autre à la sienne, la comtesse de Sault un à la sienne, le comte de Carces et le sieur de Vins un à la leur, Louys d'Aix et Casaux un autre à la leur, et les sieurs de Ligny, Martinengue, Empus et Besaudun chacun le sien à part; mais tous pour le commencement furent tellement engloutis, par l'avidité, puissance et autorité du Roy d'Espagne, que le duc de Savoye son gendre fist tenir une assemblée d'Estats, par laquelle il fut déclaré comte, propriétaire de Provence; mais neantmoins avec cette condition (afin d'obliger le Roy d'Espagne à continuer ses assistances) qu'il tiendrait ladite comté en feodalité, de la couronne d'Espagne, au lieu de celle de France, qu'ils repudioient du tout: tellement qu'entre tant de menées, pratiques et confusions, la Valette ne faisoit plus que languir dans les charges auxquelles il avoit esté restably et ne s'y maintenoit qu'à proportion qu'il recevoit quelques secours et assistances de messieurs de Mont-morency, Lesdiguières et d'Ornano; lesquels neantmoins ne peurent empescher qu'il n'allast tousjours diminuant de puissance et de credit, et qu'en fin il ne fust tué devant une meschante bicoque qu'il vouloit prendre. Lesquelles nouvelles de sa mort entendues par le duc d'Espèrnon, il prit resolution d'empieter ce gouvernement, s'il y avoit moyen, et afin d'y rencontrer moins d'obstacle, et se couvrir d'un plus specieux pretexte, il envoya, mais pour la forme seulement, demander les provisions à Sa Majesté; lesquelles plutost par la prudence necessaire au temps, que par inclination, ne luy furent pas refusées, mais ne furent pas neantmoins suffisantes pour faire que tant de partis formez se peussent reformer, ny que Sa Majesté tint plus assurées à luy les places que tenoit le duc d'Espèrnon, que celles que tenoient tous les autres partis cy-dessus nommez. »

Toutes lesquelles raisons cy-dessus baillées par escrit au Roy, par luy leuës et quelque peu considérées sans dire mot, finalement il vous demanda où vous en aviez tant appris, veu que plusieurs de ces choses pouvoient bien estre vrayes; mais qu'il ne s'en souvenoit pas de la moitié, et ne trouvoit pas mauvais ce que vous en aviez fait mettre par escrit, jugeant par là que vous aviez eu quelque raison de faire ce dont quelques-uns vous blasmoient; dequoy encor qu'il demeurast maintenant bien content, voyant que vous n'aviez eu que bonne intention, si ne jugeoit-il pas à propos de faire voir ce discours à d'autres qu'à luy, le temps, l'estat des affaires, ny la disposition des esprits, ne permettant pas encor que toutes veritez fussent bon-

nes à dire; ce que vous luy recogneustes aussi-tost, et que sa providence en cette occasion se montrant des plus exquises, vous ne manqueriez pas de suivre en tout et par tout ses intentions.

Ausquels discours d'entre le Roy et vous, d'autant que nous n'en pûmes pas de long-temps recouvrir la copie, nous avons depuis adjousté ce qui s'ensuit: à sçavoir, que tant de bizarres fantaisies de divers particuliers, et de confuses dispositions et d'affaires qui se dominoient en Provence, commencerent à prendre quelque apparence de se pouvoir accommoder, lors que l'on sceut que M. d'Espèrnon n'avoit plus le gouvernement, et que M. de Guyse en avoit obtenu les provisions du Roy, mais tout cela bien plus efficacement à son arrivée, lors que l'on entendit qu'il disoit tout haut, qu'il n'auroit jamais d'autre party que celui du Roy et de la couronne, ny dessein que de faire vivre en paix et en repos les peuples de son gouvernement, et de bonifier la province, et qu'il effectuoit ce qu'il disoit, préférant les interests du Roy, de l'Estat et des peuples, à tous autres, voire aux siens propres: tellement qu'il eut bien tost réduit le duc d'Espèrnon à venir rechercher des indulgences plénieres, afin de luy faire regagner les bonnes grâces du Roy, lesquelles Sa Majesté n'ayant jamais refusées à qui que ce fust, ne les luy desnia non plus.

Mais pour terminer ce discours et donner la gloire des bons succez de la Provence à qui l'a mérité, il faut confesser que M. de Guyse usa d'une grande prudence, industrie et dextérité, pour restablir l'autorité du Roy, et par consequent la sienne, entre tant d'embarras de divers partis et d'intentions contrariantes, dont les particularitez sont deües à l'histoire ou aux Memoires des gens de M. de Guyse, nous contentans de dire que la reduction de Marseille (où son courage et sa prudence et une favorable fortune parurent fort illustres) est une des plus belles actions militaires et politiques qui se soient passées de nostre temps. Or, pource qu'entre les divers particuliers de grande qualité dont il a esté fait mention en ce discours, M. d'Espèrnon est un de ceux duquel il semble avoir esté dit le plus de choses qui se pourroient mal interpreter par luy ou les siens, pour ce qui regarde ses procedures et comportemens envers le Roy, et nous mesme qui avons transcript ce discours, les jugeans telles, projetions d'en retrancher celles qui nous sembleroient sujettes à estre les plus mal prises, si nous n'eussions trouvé que les historiens, voire ceux qui luy adressoient leurs escrits, et semblerent avoir eu pour but principal de luy chanter

de perpetuels eloges, de faire tenir sa vie et toutes ses actions pour irreprochables, voire ses vertus comme exemplaires à imiter ; si telles gens, disons nous, ne luy eussent imputé à gloire, honneur et louange, à grandeur de courage et zele catholique, ce que nous en voulions retrancher et oster comme l'estimant aucunement disproportionné à une singuliere prudence et modestie telle que la sienne, et au devoir d'un bon sujet et serviteur envers son legitime Roy et maistre, tel que nous l'estimons.

## CHAPITRE LIX.

*Crédit de Sancy. Gabrielle empêche qu'il ne soit nommé surintendant. Établissement d'un conseil de finances. Déclaration de guerre à l'Espagne. Attentat de Jean Châtel. Les Jésuites chassés du royaume.*

Nous vous avons en quelques uns des chapitres precedens oüy parler de la mort de M. d'O, laquelle n'est pas si tost arrivée que M. de Sancy tant pour ce qu'il avoit, à la verité, rendu de bons services aux roys Henry troisieme et quatrieme, en ses voyages et negociations de Suisse et d'Allemagne, qu'il estoit d'un esprit vif et entreprenant, et avoit souvent donné des advis au Roy de la mauvaise administration des finances, dont usoient les intendans, tresoriers et financiers, par l'intelligence, tolerance et nonchalance dudit sieur d'O, que pource qu'il se rencontroit lors au goust de Sa Majesté, luy donnant milles belles esperances et se familiarisant avec luy (soit par complaisance ou autrement aux jeux, festins et autres petites débauches), s'imagina incontinent qu'il prendroit la place dudit sieur d'O, et s'acquerroit la mesme puissance et autorité qu'il avoit tant dans les affaires que les finances : mais madame de Liancourt, que le Roy aymoît passionnément, et s'estoit laissé persuader d'en avoir eu un fils, luy estant devenu absolument contraire, rompit son dessein, pource qu'il avoit tenu des propos un peu libres et hardis de la forme de sa vie passée et presente, et de la naissance de ce fils, qui avoit esté nommé Cesar, de laquelle plusieurs autres aussi bien que luy faisoient en ce temps là des discours et des contes à leurs fantaisies, dont celui de M. Alibour, s'il est faux, comme nous le croyons, fut des mieux inventez.

Car on disoit qu'un jour le Roy ayant envoyé ce bon homme, qui estoit son premier medecin, visiter cette belle dame que l'on luy avoit dit s'estre trouvée mal toute la nuict, à son retour, il luy dit qu'elle avoit un peu d'esmotion, mais

que la fin d'un tel mal ne seroit, à son advis, que fort bonne : « Mais, luy repartit aussi-tost le Roy, ne la voulez-vous pas faire purger et seigner?—Par le jour qui nous esclaire, Sire, dit ce bon homme (car c'estoit-là son juron), je n'ay encor garde, il faut attendre qu'elle soit à my-terme.—Que voulez-vous dire, bon homme? » respondit le Roy aucunement en colere. Je croy que vous resvez et n'estes pas en vostre bon sens. Aussi comment seroit-elle grosse; car je sçay bien que je ne luy ay encor rien fait, et estes pour cette fois un tres-mauvais medecin, et faut que vostre esprit ayt esté poussé à cette malice par un plus meschant que vous.—Je ne sçay pas ce que vous avez fait ou point fait, » Sire, respondit le sieur Alibour, tout en colere; mais je sçay bien que vostre consequence se trouvera plus fausse que moy impertinent medecin, et devant qu'il soit sept mois l'effet le veriflera. » Et sur cela le Roy s'estant separé de luy s'en alla, ce dit le conte, tout despit et mutiné, trouver sa belle malade, à laquelle il conta tout et luy fit une belle vie, à ce qu'on dit, quoy que rien de tout cela ne parut pour lors : aussi ne laisserent-ils pas de demeurer en mesme intelligence qu'auparavant, et n'en arriva autre accident visible, sinon qu'elle accoucha de ce fils, nommé Cesar, et que le pauvre M. Alibour, faute de bon appareil, ou autrement, mourut quelques mois apres, duquel le Roy eut grand regret, ne luy voulant nul mal pour avoir dit librement ce qu'il pensoit.

Cette dame donc rompit, comme nous avons dit, le dessein du sieur de Sancy, en usant de telles menées et pratiques, et mesnageant si dextrement l'esprit du Roy, qu'au lieu de laisser establir un seul super-intendant avec absoluë autorité, elle fit former un conseil des finances, dont M. de Nevers fut estably chef, assisté de messieurs le chancelier de Chiverny, duc de Reths, de Bellievre, Sancy, Schomberg, Maisse, Fresnes et la Grange-le-roy, duquel le Roy eut quelque envie de vous mettre deslors; mais eux tous redoutant vostre esprit actif, intelligent et courageux, ils s'y opposerent formellement; et sur tous M. de Nevers (qui ne vous aymoît nullement, se souvenant toujours qu'en un procez que vous aviez eu contre luy, d'autant qu'il vouloit que vous procedassiez comme s'il eust esté un grand prince, et vous un simple gentil-homme, vous luy aviez reparty que pour l'ancienneté de vostre maison, elle n'en devoit rien à la sienne, y ayant eu des princes de la maison de Bethune, comtes de Nevers, avant que ceux de Gonzagues eussent acquis ce tiltre là) en fit de telles instances, alleguant que vous estiez hu-

guenot de pere en fils, ayant autrefois veu vostre grand pere à Nevers, en assez pauvre estat, que le Roy se trouva reduit à remettre ce dessein de vous avancer à une autre fois; dequoy il vous dit quelque chose en forme d'excuse sur l'estat de ses affaires.

Tous ces conseillers de finances donc ainsi establis, messieurs de Fresne et de la Grange-le-roy qui faisoient les subtils, intelligens, et transcendans en matiere de finances plus que tous les autres, furent chargez du Roy et de la compagnie, de dresser des reglemens pour l'administration et ménagement des revenus et deniers royaux; enquoy ils s'employèrent quelques mois, et de sorte que l'on en eut bien fait un gros volume, lesquels n'estans faits que pour la mine, afin de repaistre l'esprit du Roy d'une belle apparence, servirent comme il sera dit cy-apres; mais tant y a que le Roy fut retenu tout le reste de l'année dans Paris, tant pour examiner les articles de ses reglemens et reformatiions, traiter une trefve avec M. de Lorraine dont M. de Sancy estoit le negociateur, que pour les divers conseils qu'il falut tenir sur les propositions que ne faillit pas de faire M. de Bouillon, comme il le vous avoit dit à Sedan, si tost qu'il fut arrivé à Paris, de declarer la guerre au roy d'Espagne et à tous ses sujets et partisans, tous ceux avec lesquels l'on en consultoit les trouvant des plus problematiques que l'on eust peu pour lors mettre en avant; aussi y eut-il tant de divers advis, d'altercations et contentions sur ce sujet, dans les conseils qui furent tenus pour cét effet, que le Roy demeura plusieurs mois sans sçavoir à quoy s'en resoudre. Neantmoins enfin, nonobstant toutes vos allegations pour ne rien innover, car vous fustes l'un de ceux qui insista le plus sur cét advis, comme il en a esté dit quelque chose cy-devant en vostre voyage de Sedan, le Roy, contre ses propres sentimens, se laissa emporter à faire cette declaration de guerre, sur la certitude du traitté quasi conclud avec M. de Lorraine, sur l'assurance que, par sa connivence, donnoient tous les principaux chefs et gens de guerre qui l'avoient servy, de faire la guerre pour la France, sur les persuasions des ambassadeurs d'Angleterre et de Hollande (qui promettoient de faire de si grandes diversions que les forces d'Espagne y estans toutes occupées, elles n'auroient nul moyen de s'opposer aux armes du Roy, enquoy, comme l'experience le verifia depuis, ils penserent plus à leurs affaires qu'à celles de France), mais principalement sur les esperances que donnerent M. de Bouillon d'une part, de faire des merveilles dans le Luxembourg, ayant, comme il disoit, des entreprises infailibles sur les principales villes de

cette province et les voisines, et M. de Sancy de l'autre, de faire le semblable dans la Franche-Comté; voire de porter tous les treize Cantons à la conquête d'icelle, toutes lesquelles raisons vous appristes du Roy lors qu'il vous voyoit trop oppiniasté contre cette declaration, laquelle fut publiée environ le mois de janvier, dont nous laissons les particularitez à l'histoire generale, aussi bien que celles de la repartie qu'y fit le roy d'Espagne, en laquelle il n'appelloit le Roy que prince de Bearn, dautant que vous ne vous meslastes quasi point de tout cela.

Et vous ramentevrons comme quelques jours auparavant, et le vingt-sixiesme jour de decembre, le Roy estant dans sa chambre au Louvre, fut blessé d'un coup de cousteau dans la bouche, ainsi qu'il se baissoit pour embrasser messieurs de Ragny et de Montigny, lesquels venans d'arriver, luy faisoient la reverence, et ce par un jeune escolier enseigné par les jesuistes, nommé Jean Chastel; en consequence de l'execution à mort duquel, toutes les animositez, desja auparavant excitées par les plaidoyers des sieurs Arnault et Dollé, se resveillèrent de sorte, et des vents contraires soufflerent si violamment au visage de ceux de cette profession, que par arrest du parlement toute leur société fut bannie du royaume de France; Jean Guignard pendu pour avoir dressé des theses contre la vie et l'autorité des roys, et Jean Gueret, Pierres Varades, Alexandre Majus, François, Jacob et Jean le Bel, condamnez à faire amende honorable et à bannissement perpetuel. Lors de la blessure du Roy, il y eut une grande esmotion dans sa chambre, pource que du commencement l'on ne sçavoit qui avoit fait le coup, le meurtrier ayant aussi tost laissé tomber le cousteau et s'estant escoulé parmy la presse, nous vous vismes si transi de frayeur, voyant le Roy tout en sang et apprehendant que le coup eust passé jusques à la gorge, qu'il ne vous resta quasi nulle couleur au visage; mais tout cela fut aussitost appaisé, le meschant parricide ayant esté pris, le cousteau trouvé sur le plancher et recogneu que le Roy n'avoit que la levre offensée, et un peu d'une dent rompuë; et luy mesme monstrant un courage asseuré, dit le premier que cela n'estoit rien, et mesme lors qu'il sceut que ce maudit garnement avoit esté nourry et enseigné par les jesuistes, il ne dit neantmoins rien contr'eux, sinon : « Ce n'estoit donc pas as- » sez que par la bouche de tant de gens de bien, » « ceux de cette société fussent reputés ne m'ay- » mer pas, s'ils n'en estoient encor convaincus » par ma propre bouche et mon sang espandu. »

Nous laissons à l'histoire generale les particularitez du traitté fait avec M. de Lorraine, des



courses et ravages qu'à cette occasion les sieurs de Tremblecourt, de Saint Georges et autres chefs de ces troupes licenciées, et leurs gens de guerre firent comme volontaires dans le comté de Bourgogne, de la défaite quasi entière de toute la garnison de Soissons, que conduisoient les sieurs de Conan et de Belle-font, par les sieurs de Mouchy, Dedouville, de Gadancourt, lieutenant de votre compagnie, et de Bays, la réduction de Vienne et prise de Monliët par M. le connestable de Mont-morency, les réductions des villes de Nuis, Authun et Dijon par l'entremise de M. de Biron, et la défaite de huit ou dix troupes de cavalerie du comte de Mansfeld, dans le Luxembourg, par messieurs de Bouillon et comte Philippe de Nassau, d'autant que vous n'eustes nulle part à toutes ces affaires et combats.

## CHAPITRE LX.

*Motifs qui décident le Roi à porter la guerre en Franche-Comté. Conseil des finances. Rosny se retire à Moret. Lettre du Roi sur la retraite du comte de Soissons. Rosny réprime l'insolence d'un capitaine attaché à ce prince. Actions militaires en Picardie. Combat de Fontaine-Française.*

[1595] Les entreprises cy devant recitées, ayant ainsi heureusement succédé au Roy, luy donnerent de grandes esperances, et le porterent à de plus hautes : sur tout voyant les gaillardes troupes que messieurs le connestable et mareschal de Biron avoient sur pied, l'un en Lionnois et Bresse, et l'autre au duché de Bourgogne, ensemble celles licenciées de Lorraine qui estoient dans le comté, sans y trouver opposition, il se vint à imaginer que les ralliant toutes en un corps, avec ce qu'il meneroit de gens de guerre quand et luy, il auroit moyen de faire quelques progres vers ces provinces là. Il luy prenoit quelque-fois des fantaisies de s'y acheminer, lesquelles luy passaient aussi-tost qu'il se remettoit devant les yeux le peril que couroient ses provinces de Picardie et Champagne s'il s'en esloignoit de cette façon : et ainsi combatu diversement par ses diverses propositions, il fut à la fin, voire contre ses propres sentimens, emporté à la pire resolution, dont furent causes principales, premierement, les sollicitations continuelles qu'en faisoit le connestable de Montmorency, lequel (comme vous le sceustes depuis par le Roy mesme, lors qu'à son retour de la Franche-Comté il se pleignoit de ceux qui l'avoient induit à ce voyage) voulant essayer de

faire valoir et donner quelque lustre à cette espée fleurdelisée, qui luy avoit esté nouvellement mise en main, estant passé en Dauphiné, Lionnois, et Bresse, avec quatre mil hommes de pied, et quatre cens chevaux grandement lestes; et à la faveur d'iceux, chassé ce qui restoit de troupes de messieurs de Savoye et de Nemours en ces quartiers là; traité par argent et promesses avec le sieur de Disimieux, pour faire que luy et la ville de Vienne, dont il estoit gouverneur pour M. de Nemours, se remissent, comme il en a desja esté dit quelque chose, en l'obeyssance du Roy, et fait dessein de passer en Bresse, commençant par le siege de Monliët.

Mais sur cela nouvelles luy estant venues que le connestable de Castille estoit passé d'Espagne en Lombardie, où il faisoit de grandes levées et bruire avec éclat ses armes et ses desseins, pour entrer en France, suivant le commandement exprés qu'il en avoit receu de son Roy; lequel irrité et despité en son cœur de ce que le Roy, qu'il n'appelloit que prince de Bearn, ayant encor une grande partie de la France revoltée contre luy, eust eu neantmoins la hardiesse et la resolution (qu'il nommoit imprudence et temerité) de luy declarer la guerre, avoit mandé au comte de Fuentes, general de ses armes au Pays-Bas, aussi bien qu'enjoint à son connestable, que quand ce seroit mesme à la perte et au prejudice de ses Estats de Flandres et de Milan, ils eussent à entrer en France, et y faire de tels attaquemens, qu'ils convertissent l'audace et la presumption du prince de Bearn, et des François qui le recognoissoient pour Roy, en repentance et desplaisir.

Tellement que ces nouvelles, comme il a esté dit, entendues par le connestable de Montmorency, il commença d'entrer en apprehension que ce faix trop pesant ne luy tombast sur les bras. Et pour éviter cet inconvenient usoit-il de telles sollicitations pour faire avancer le Roy, envers lequel celles de M. de Biron n'estoient guerres moindres pour mesmes raisons, à cause des sieges qu'il avoit mis devant le chasteau de Dijon, qui estoit fort, et un autre que l'on nommoit Talan (1), qui vaut encor mieux, et que s'il les luy falloit lever il flétriroit toute la gloire et les lauriers qu'il avoit acquis par ses dernieres expéditions tant heureuses, auxquelles instances s'adjoustoient encor celles du sieur de Sancy, qui estoit celuy des serviteurs de Sa Majesté qui paroissoit avoir lors plus de creance près d'elle et de M. le chancelier de Chiverny, lequel plein d'industrie avoit, par le moyen d'une dame, afin

(1) Ce chateau était situé sur une montagne à trois quarts de lieue de Dijon.

d'avoir un adjoint puissant à faire valoir son opinion, persuadé à madame de Liancourt, qu'en ce voyage le Roy conquerrait facilement la Franche-Comté, laquelle avoit peu de places fortes, et qu'il faudroit après faire en sorte qu'il en donnât la propriété utile à son fils Cesar, qui estoit né, ce nous semble, à Coussy, pendant le siege de Laon, et la souveraineté honorifique aux cantons des Suisses, afin qu'ils en entreprissent la deffence et protection.

Ce voyage donc ainsi resolu et posé sur tels fondemens que vous nous distes estre, lors que vous en sceustes quelque chose, du tout ridicules et absurdes, le Roy neantmoins s'y affectionna au commencement; et comme il estoit plein de prudence et de prévoyance, desirant d'éviter qu'en son absence il n'arrivast des accidens facheux et dommageables sur les frontieres du royaume, si les diversions promises par les Anglois et Hollandois ne se trouvoient pas suffisantes, il ordonna que messieurs de Nevers, de Saint Paul, de Bouillon et admiral de Villars prissent bonne intelligence les uns avec les autres, afin de réunir après en un mesme corps toutes les forces qu'un chacun d'eux pourroit mettre sur pieds, s'entre-communicassent les desseins et entreprises particulieres qu'ils pourroient avoir, vescussent en bonne union et concorde, et courussent conjointement où les plus grandes utilitez ou bien le besoin et la nécessité des affaires le pourroient requérir, déferant neantmoins le commandement du total, lors qu'ils se trouveroient tous ensemble, à M. de Nevers.

Et afin aussi de tenir le gros des affaires en reputation et en ordre dans le royaume, et sur tout celles des finances, qui sont le grand ressort de toutes bonnes operations, et qu'il y eut quelque corps sedentaire et resident en lieu certain, auquel se pussent adresser toutes les plaintes et demandes des provinces, y donner provision sur celles qui presseroient par trop ou ne tireroient point à trop grande consequence, advertir le Roy des choses qui se passeroient, recevoir sur toutes ses volonte, et tenir la main à l'exécution d'icelles, il établit un conseil resident à Paris, duquel M. le comte de Soissons, à cause de sa qualité et capacité, desira de pouvoir estre nommé chef, et mesme en fit sentir quelque chose au Roy; mais il y avoit trop d'antipathie entre ces deux esprits et naturels, qu'ils ne demeuroient quasi jamais deux mois sans brouilleries. Tellement que le Roy apprehendant cela, ne s'y pût disposer, quelque chose mesme que vous luy en dissiez en sa faveur; et afin qu'il ne l'en pressast pas davantage, un jour

à son disner, auquel messieurs les princes de Conty et de Soissons estoient tous deux, il appella le premier, et luy dit tout haut, car autrement ne l'eust-il pas entendu, que s'estant resolu de faire un voyage à Lyon et en Bourgogne, il l'avoit choisi pour représenter sa personne à Paris, et en toutes les autres provinces dont il seroit trop esloigné, ensemble pour estre chef d'un conseil qu'il laisseroit pour la direction des affaires et finances; et en mesme temps dit à M. le comte qu'il le vouloit mener avec luy en son voyage, s'assurant qu'il aymeroit bien mieux cela pource qu'il y auroit des coups à donner et de l'honneur à acquerir, et partant qu'il fût preparer sa compagnie des gens-d'armes, sachant bien qu'elle estoit des meilleures, et par consequent de celles dont il se serviroit le mieux.

A quoy il fut respondu avec fort peu de paroles, se contentans tous deux de faire des reverences, l'un pource qu'il ne pouvoit parler, et l'autre pource que ce n'estoit pas ce qu'il desiroit. Quoy que ce soit, les choses passerent de la sorte, et le Roy ayant fait dresser des instructions pour la forme de conduite qu'auroit à tenir ce conseil, il nomma, ce me semble, M. de Retz, quelque reclus qu'il fust à cause du mal dont il mourut, qui commençoit à le travailler, Messieurs de Schomberg et de Fresne qui estoit en faveur à cause de Madame de Liancourt, encor que son esprit aigre et contredisant ne fust pas fort agreable au Roy, M. de Maisons, M. de la Grange-le-roy, les intendans Hudicourt, Marcel et Guibert, et Maillant pour secretaire, auquel il vous fit adjouster trois jours après, prenant pour pretexte (afin de couvrir encor aucunement le dessein qu'il avoit de se servir de vous en ses finances comme il vous en dit quelque chose après) que M. le prince de Conty ayant toute creance en vous, se disposeroit, par vostre moyen, à tout ce qu'ils adviseroient entr'eux qu'il devoit dire et faire.

Au bout de quelques jours le Roy partist de Paris, avec charge à toutes les troupes qu'il avoit destinées pour estre du voyage de le suivre en diligence; il vous mena jusques à Moret qui estoit à vous, où sejournoit Madame vostre femme, et de là vous renvoya bien instruit de ses intentions à ce conseil de Paris: tous ces ordres furent beaux et magnifiques en apparence, et les esperances de bons succez encor plus grandes; mais les evenemens ne furent pas semblables; car, en premier lieu, ce conseil de Paris ne vous pouvant gouster, et disant que vous estiez un espion parmy eux qui leur rendriez incessamment de mauvais offices afin de vous

deux mains, lesquelles ayant bien visitées et sceu que vous estiez né le douziesme de decembre 1560, il vous dit : « Vrayment, monsieur, je vous cede bien volontiers ma chambre, car je vois bien que vous le meritez, et qu'il y en aura beaucoup d'autres avant qu'il soit peu de temps qui vous quitteront leurs places avec plus de regret que je ne fais la mienne; et si vostre phisionomie et les lignes de vos mains ne me trompent, vous ferez une tres-grande fortune, et serez des plus confidens du prince que vous allez trouver; que s'il vous plaist me dire l'heure de vostre naissance, aussi-bien que vous avez fait l'an, le mois et le jour, à vostre retour si vous prenez la peine de venir icy, ou de me mander où vous serez, je vous diray tout ce qui vous est arrivé et ce qui vous arrivera cy-apres; et m'excuserez, si je ne vous entretiens pas davantage, car j'ay icy des papiers dans ma gibeciere qu'il faut que j'aille porter au Palais à mon advocat et à mon procureur. » Et sur cela il vous dit adieu.

Nous entendismes tous ces discours avec demonstration de joie; dequoy vous vous mistes à rire et vous mocquer de nous, disant que nous estions des fols de fonder des esperances tant fallacieuses que celle-là : et neantmoins vous ne laissastes pas d'escire à madame vostre femme, tout ce qui vous avoit esté dit par cet homme-là que nous ne croyons pas que vous ayez jamais veu depuis.

Le jour mesme vous allastes coucher à Maubuisson, qui est comme une espece de faux-bourg à Pont-oyse, vistes dès le soir madame de Liancourt dans l'abbaye, et pristes le lendemain ensemble vostre chemin vers Clermont, sur lequel il faillit à luy arriver un fort grand inconvenient; car estant dans sa litiere et le carrosse où estoient ses filles et femmes la suivant, comme elle fut environ à une lieuë de Clermont, où le chemin s'estressit entre une colline et l'orée d'un vallon fort precipiteux, le carrossier estant descendu pour faire de l'eau, et s'estant esloigné du carrosse sans mettre personne à tenir ses chevaux qui estoient jeunes, ombrageux et fougueux, un des mulets de coffre qui marchaient derriere, vint passer avec ses brimbaes et clochettes, et se mist à braire plus effroyablement que ne fit jamais l'asne de Silene au val de Bathos; dequoy ses chevaux espouventez se mirent à courir prenant le frein aux dents avec telle furie, que le carrosse rencontrant les coffres des deux mulets qui marchaient devant, ils les renverserent avec leurs charges, et vint bien à propos pour eux que le chemin avoit encor assez de largeur

pour ne rouler pas dans le precipice; les filles et les femmes qui estoient dans le carrosse estans ainsi emportées avec telle impetuosité, criaient et pleuroient à bon escient, n'attendant autre chose que la mort, voyant un si profond precipice où elles ne doutoient point qu'ils ne les jetassent ou renversassent.

Le cocher et tous les gens de pied avoient beau se tourmenter et crier *Arreste! arreste!* madame de Liancourt et ses muletiers de litiere, oyans un tel bruit et tintamarre derriere eux, ne sçavoient à quoy se resoudre, n'y ayant point assez d'espace de chemin pour la litiere et le carrosse ensemble. Vous et vostre train, qui estiez quelque sept ou huict cens pas devant, ayans tourné la teste à ces cris et rumeurs, voyant ce desordre, ne sçaviez que dire ny que penser, estans trop esloignez pour vous pouvoir jeter devant ces chevaux de carrosse courans en telle furie, et les arrester avant qu'ils pussent choquer la litiere, que vous ne doutiez nullement, en ce cas, qu'ils n'eussent bouleversée dans ce precipice, où tout ce qu'il y avoit se fust brisé en pieces. Comme le carrosse n'estoit plus qu'à environ cinquante pas de la litiere, et que desja vous disiez au sieur de la Fond, qui s'estoit remis avec vous peu apres la mort de M. l'admiral de Villars : « Ah! mon amy, que ferons-nous là, car voilà nostre femme depeschée et mise en pieces? que deviendrons-nous, et que dira le Roy? » tout d'un coup le ciel reservant cette femme à fortune aussi estrange, les usses de l'essieu de devant estans sortis des trous, les deux rouës s'escarterent l'une d'un costé et l'autre de l'autre, les deux bouts du corps du carrosse donnant dans la terre, il s'arresta tout court, et l'un des deux chevaux de derriere tomba sur le costé; les deux autres de devant, ayans rompu leurs attelages et continuans à courir, passerent si pres de la litiere, qu'il n'y a nul doute qu'ils n'eussent tout renversé si le carrosse les eust suivis. Vous les arrestâtes vous mesmes, et les faisans prendre par vos laquais, les ramenastes vers la litiere, et vinstes faire le bon vallet à cette dame, faisant mille exclamations de la peur que vous aviez eue de son danger, et autant d'acclamations de joye de ce que Dieu l'avoit ainsi miraculeusement preservée; puis l'ayant consolée, remise de son estonnement, et usé du même devoir envers les autres filles et femmes du carrosse, vous continuastes vostre chemin, chacune d'elles louant Dieu d'estre ainsi réchapées d'un tel peril, et ne s'entretenant d'autres choses que de belles affres qu'elles avoient eues : tout cela ne se passa pas sans quelques bastonnades, qu'à la priere expresse de

cette dame; vous donnastes à son carrossier. Et ainsi toutes choses estans raccommo­dées, n'abandonnans plus les costez de la litiere, vous continuastes vostre chemin à Clermont, où le Roy arriva un quart d'heure apres, bien estonné d'entendre les perils que sa maistresse et toutes ses femmes avoient couru.

Or laissant à part les salutations, complimens et carresses faites et receuës, pource que vous doutant bien que le Roy ne seroit pas trop marry de remettre les discours des affaires à une autre fois, vous les laissastes ensemble, et vous en allastes en vostre logis.

#### CHAPITRE LXV.

*Mission de Rosny près du duc de Montpensier, pour sonder ses sentimens et lui proposer la main de Madame, sœur du Roi. Rosny chargé de faire consentir Madame à ce mariage. Conférence avec cette princesse qui aimoit le comte de Soissons.*

Le Roy ne se contentant pas de vous avoir fait entendre par escrit son dessein, il vous le confirma de vive voix, vous disant que c'estoit une chose estrange que de voir la legereté et mauvaise inclination de la plupart des esprits des hommes de maintenant, telle qu'il sembloit n'y avoir nul moyen, ny par carresses, ny par bien-faits, ny par raison, ny par apprehension de peines, de vivre avec ordre et droicure parmy eux; que vous vous pouviez souvenir des discours qu'il vous avoit dit avoir eus avec M. de Mont-pensier, lors de ses impertinentes propositions à Saint Quentin, et des sermens et protestations qu'il luy avoit faites de ne prester jamais l'oreille et encor moins le cœur à choses qui luy peussent estre dommageables ou desagrees; et que neantmoins il avoit receu divers advis que, dans la plupart des villes de Normandie et sur tout à Roüen, il s'y renouvelloit quelques pratiques et facliendes, sous le nom de ce prince, pour luy assurer des particuliers serviteurs, avec cette clause, qui voulussent le servir sans s'enquerir à quoy; qu'il ne l'estimoit nullement malicieux, mais homme si facile et si aysé à persuader, sous les moindres pretextes desguisez et raisons finement inventées qui luy estoient représentées, qu'on le portoit aussi-tost au mal qu'au bien par faute de pouvoir discerner entre l'un et l'autre; qu'il voyoit bien n'y avoir que deux princes en France ausquels il pût bailler sa sœur en mariage (car de relever ceux de Lorraine en France par une telle proximité avec luy et pretention à son heritage, c'estoit

chose qu'il ne feroit jamais), à sçavoir monsieur le comte de Soissons et M. de Mont-pensier; que le premier et luy avoient une telle antipatie et contrariété d'humeurs qu'ils estoient tousjours en garde l'un contre l'autre; qu'il estoit tellement opiniastre en ses bizarreries et fastueux en toutes ses actions et paroles qu'il luy estoit impossible de se resoudre à le faire jamais son beau-frere et encor moins son heritier, de crainte des fausses propheties; et partant estimoit-il plus à propos pour le repos de son esprit de s'acquiescer entierement M. de Mont-pensier par une faveur tant signalée; qu'il vouloit donc que vous fissiez deux choses: la premiere, de vous en aller dès le lendemain à Roüen, où il sçavoit bien que vous estiez fort aymé, à cause que vous les aviez si doucement remis à son service et aviez acquis beaucoup d'amis particuliers, par le moyen desquels vous pourriez facilement descouvrir en quoy consistoient ces menées dont on luy avoit donné advis, et selon ce que vous en apprendriez, parler comme de vous mesme à M. de Mont-pensier, tant pour luy remonstrer son devoir, s'il y avoit presté l'oreille, fait ou dit chose qui le meritast, que pour luy proposer ce mariage, comme de vous mesme, vous offrir d'en parler et de le servir de sorte en cela, que vous esperiez de m'y faire condescendre, moyennant que, de son costé, il gagnast les bonnes grâces de celle que vous luy vouliez procurer pour maistresse.

Nous serions trop longs si nous voulions deduire par le menu toutes vos allées et venuës, et les discours qui furent tenus entre le Roy et vous, et en suite lors que vous fustes à Roüen, entre M. de Mont-pensier et une douzaine des principaux de la ville et vous, sur ces deux affaires. Tellement que pour abréger nous vous ramentrions seulement vostre voyage, et comme apres vous estre familiarisé avec messieurs de la Cour; premier president de Boquemarre, de Lanctot; de Grimouille, de Bouterode, de Bernieres, tous du parlement, abbez de Tiron et de Martinbault, de Mote-ville, des Hameaux, de la Pille, chez qui vous logiez tousjours, du Mesnil, capitaine du vieux Palais, de la Haulle, de Menencour, du Menil-basil et autres de vos vieilles cognosances dont il ne nous souvient pas bien, vous appristes que c'estoient des gens qui s'estoient voulu faire de feste, esperant tirer quelque present, estat ou pension en advertissant le Roy de ces ducs imaginaires, dont l'on avoit parlé un an auparavant, et qu'encor ce n'avoit jamais esté qu'entre personnes peu accreditées qui craignoient l'ordre et les loix, estoient tous pauvres et necessiteux, et comme vous dirent messieurs

de la Cour et de Thiron vous en parlans ensemble, tous gens lesquels n'ayans ny pain en leurs huches, ny vin en leurs caves, ny lard en leur cellier, eussent bien voulu revoir le temps auquel on fôtilloit librement en ceux d'autrui; et vous asseurerent quasi tous ces messieurs qu'un seul homme de qualité, ny de la noblesse, ny des officiers, ny des ecclesiastiques, ny mesmes des corps des villes, voire de tous les peuples, n'avoit entendu parler de ces sottises; et que ce qui s'en estoit dit entre les autres, ce n'avoit esté qu'en chuchottant aux oreilles et avec moquerie, mépris et courroux; et qu'à present M. de Mont-pensier tesmolignoît d'avoir ces propositions tellement en horreur, qu'il se mettoit en extrême colere, comme de chose qui l'offençoit bien fort, contre tous ceux qui en disoient le moindre mot du monde; blasmant (lors qu'il en parloit à ses plus affidez) infiniment ceux qui l'avoient voulu coiffer de cette marotte, estant là ses propres termes, et protestant tout ouvertement, et en public et en privé, qu'il n'auroit jamais autres volonteiz que celles du Roy, ny dessein à aucune grandeur ou avantage que ceux qui luy seroient suggerez par Sa Majesté mesme, qu'il vouloit tousjours tenir pour son malstre.

Les mesmes paroles vous ayant esté tennës par ce prince, un jour que vous aviez dîné avec luy, vous pristès, sur ce fondement, occasion de luy donner mille loüanges et de le prier de vous vouloir tenir pour son serviteur particulier; et lors vous protesta-il de son amitié immuable, ce que vous avez continué l'un et l'autre jusques à sa mort; et en suite de telles assurances, lors entre vous données, vous luy listès ouverture du mariage de Madame, vous offrant, s'il y vouloit entendre, de vous en rendre l'entremetteur vers le Roy, et de le prendre si à propos que vous luy feriez avoir agreable vostre proposition; laquelle ce prince écouta fort attentivement, la receut comme pouvoit meriter un tel avantage et faveur tant speciale, vous en fist mille remerciemens, vous embrassa par trois fois (car tous nous autres qui estions à l'autre bout de la salle vismes ses gestes) et vous promit merveilles au cas que ce mariage reüssist par vostre entremise, ne craignant d'estre traversé en ce bien et honneur par luy tant désiré, outre le defect de son merite, ce qu'il disoit par une humilité à luy bien seante, que par les inclinations de Madame qui sembloient l'avoir engagée ailleurs, et tel lieu qu'ils avoient desjà en plusieurs brouilleries ensemble à cause des gouvernemens de Bretagne et de Normandie, et du rang de sa patrie, ce que vous sçaviez

mieux que nuls autres, vous et M. d'Evreux ayans esté employez par le Roy au temps de son sacre à Chartres, et merveilleusement embesongnez à trouver quelque espece d'accommodement entr'eux; et neantmoins il estimoit que, si son affection pouvoit estre approuvée et favorisée du Roy, et toute autre rejetée, que rien ne le sçauroit divertir de la recherche des bonnes graces d'une dame de tant de merite; de laquelle aussi bien estoit-il tousjours obligé; attendu son éminente qualité, de se dire et estre en effet son tres-humble serviteur.

Vos responses et ses repliques seroient de trop longue et peut-estre ennuyeuse deduction; et partant il suffira, pour la suite et l'esclaircissement de ces Memoires, de ramentevoir qu'apres avoir esté six jours à Rouën, sans s'en estre passé un seul que M. de Mont-pensier ou quelcun de ces gros messieurs de la ville ne vous traitast et nous aussi, vous vous en retournastes trouver le Roy à Amiens; lequel demeura tellement content de vostre voyage, lors que vous luy eustes conté bien au long tout ce qui s'estoit passé en iceluy, qu'il ne se peut empescher d'en parler deux ou trois fois à madame de Liancourt, se loüant de vos services et affirmant qu'il n'en trouvoit point d'autre qui rencontrast tant de bon-heur, ny apportast tant de dextérité que vous faisiez aux entremises et negociations où il vous employoit, et partant estoit-il bien resolu de ne vous laisser pas oisif, dequoy elle vous donna soudain advis. En conformité duquel vous ayant un soir fait venir à son coucher, apres qu'il se fust mis au lit et tous les autres retirez, il vous fist mettre à genoux sur un carreau et vous dit, qu'ayant eu si bonne main pour l'acheminement des choses dont il vous avoit donné charge, qu'il ne les vouloit pas laisser imparfaites, mais essayer de leur donner perfection par vostre mesme entremise, et pour cette cause eust-il bien désiré que vous voulussiez faire un voyage vers sa sœur, sous le seul pretexte de l'aller visiter de sa part, l'asseurer de sa bienveillance, luy tesmoligner le desir qu'il avoit de la voir vivre heureuse et contente, sçavoir ce qu'il pouvoit apporter en cela, ensemble ses intentions et des nouvelles de sa santé; mais principalement et en effet, lors que vous la verriez en bonne humeur, pour luy remonstrer, comme de vous mesmes, le peu d'esperance que Sa Majesté avoit qu'elle peust jamais rencontrer toutes les felicitez qu'il luy desiroit en mariage en la personne de celui qui la pretendoit, tant à cause de son peu de biens, qui seroit cause de lès reduire en de continuelles necessitez, avec lesquelles toutes choses importunent, de ses bizarr-

res humeurs, extravagantes fantaisies et son esprit défiant et soupçonneux, que pour l'antipatie que chacun et eux mesmes avoient tous-jours reconnus entre leurs naturels; dequoy vous luy allegueriez plusieurs exemples, comme vous n'en ignoriez un seul, ayant cognoissance de tous les mauvais mesnages et brouilleries qui s'estoient passées entr'eux, et partant devoit elle user de prudence, et, mettant à part toute passion dommageable, se resoudre à suivre les inclinations et volentz de luy qui estoit son Roy, son frere, et luy vouloit servir et faire office de bon pere, lequel, par ce moyen, luy feroit toutes les faveurs, graces et avantages qu'elle scauroit desirer, et la vouliez bien advertir, comme son tres-humble serviteur, que si elle en usoit autrement et pretendoit de se marier contre son gré à personne qui ne se peust accommoder avec luy, et auquel il ne peust prendre confiance telle que doit avoir un pere envers son fils et son héritier, vous sçaviez de certain, pour luy avoir ouy dire, voire affirmer par serment, qu'il se resoudroit aussi-tost à faire partage avec elle, et ne luy donner que ce qui luy pouvoit appartenir selon la coustume des lieux où leurs biens estoient situez et assis, qui seroit si peu de chose qu'il luy seroit impossible de vivre que fort petitement; puis en suite, selon que vous verriez les occasions, luy proposer M. de Mont-pensier en luy exaltant ses grands biens, sa douce humeur et ses autres bonnes qualitez et conditions, en quoy vous useriez de grande prudence et circonspection, afin de mieux mesnager l'esprit de sa sœur, qu'il sçavoit estre soudain, despit et colere.

Tous lesquels commandemens ayant attentivement escoutez et meurement considerez, vous vous trouvestes en merueilleuse peine; et apres vous estre mis à resver et gratter vostre teste (et que le Roy vous eut dit qu'il voyoit bien que vous vous grattiez où il ne vous demangeoit pas, mais qu'il n'y avoit remede, et falloit passer par là, n'ayant personne qui peust s'acquitter si heureusement de cette corvée qu'il sçavoit bien que vous feriez), vous le suppliastes de ne vous surcharger point de telles affaires tant épineuses, remplies de difficultez, et qui pouvoient estre suivies de tres-fascheux accidens; et sur tout de considerer qu'il n'y avoit personne moins propre que vous pouviez estre pour luy rendre ce service, pour plusieurs tres-fortes raisons, dont celle-cy estoit sans repliche; à sçavoir, que vous ayant commandé, au temps de son sacre à Chartres, d'essayer de retirer de madame sa sœur et de monsieur le comte de Soissons, les promesses de mariage qu'ils s'entr'estoient faites,

vous trouvant bien empesché en l'execution de chose si difficile que vous luy voyez affectionner si passionnément, vous craignistes d'encourir son courroux et sa malveillance si vous y manquiez; qu'apres avoir discouru en vous mesmes sur toutes sortes d'expediens propres pour parvenir à ce qu'il desiroit, vous aviez enfin usé de cette dextérité ou plutost artifice, que de les asseurer qu'il vous avoit donné sa parole de consentir à leur mariage, moyennant qu'ils luy tesmoignassent leur affection et obeysance par la reddition volontaire de ces promesses, sans qu'ils sceussent rien de son dessein, lequel il vous avoit deffendu de leur declarer, et partant les aviez priez de tenir la chose secrette, et n'en dire jamais rien à personne, et que vous leur respondiez que dans l'année de la reddition de ces promesses vous retireriez de Sa Majesté tels consentemens qu'ils desireroient, et qu'ayant sur telles assurances retiré d'eux lesdites promesses, il n'y avoit nulle apparence d'aller maintenant tenir des langages si contraires à madame sa sœur, ny qu'en disant ce dont il vous vouloit donner charge, vous peussiez éviter une grande brouillerie et peut-estre la haine irreconciliable de l'une et de l'autre; ce que vous le suppliez tres-humblement de vouloir considerer avec son équité, prudence et bonté accoustumée, de ne charger vos foibles espauls d'un fardeau si pesant, et partant vous dispenser d'un voyage qui seroit si infructueux pour luy et à vous tant dommageable. Surquoy vous eustes diverses contestations ensemble prés de trois jours durant, desquelles toutes les particularitez nous sont quasi toutes eschapées de la memoire; mais tant y a que, nonobstant toutes vos raisons, allegations et justes apprehensions, il voulut montrer qu'il estoit Roy et maistre absolu, et vous sujet et serviteur obeysant, et par consequent que sa volonté fust faite en vous donnant aussi sa foy et sa parole de ne vous abandonner point, mais de vous maintenir envers tous et contre tous, pourveu que vous luy fussiez tous-jours aussi loyal serviteur que vous aviez esté par le passé, et qu'il vouloit faire valoir entre vous deux le vieil proverbe qui disoit, *à bon maistre hardy valet*.

Or, combien qu'il eust emporté le dessus à vous faire agréer ce voyage, si fut-il hors de sa puissance de vous faire partir, qu'outre la lettre commune de complimens et civilitez, servant de pretexte à iceluy, il ne vous en baillast encor une autre de sa propre main, en laquelle estoit specifié tout ce qu'il vous enjoignoit de faire et dire, voire les formes dont vous useriez pour cet effet, quelque colere enquoy elle se peust

mettre, disant que vous vous deffiez de sa foy, ce que n'avoient jamais fait ses plus grands ennemis; tellement qu'en fin il vous bailla la lettre, vous la fit lire avant que de la fermer, pour voir si vous la trouveriez bien, et advoia, son esprit estant rappaisé, que vous aviez eu raison de la demander, tirant neantmoins promesse de vous, de ne la faire voir qu'en toute extremité, voire de la luy rendre si vous n'en aviez point besoin.

Ayant donc esté bien instruit des intentions du Roy et receu toutes vos dépesches de la substance qu'il a esté dit cy-dessus, vous pensiez partir le lendemain; mais le Roy vous retint encor deux jours sur l'arrivée d'un grand nombre de deputez de Tholouze, Marseille et autres villes des provinces de Languedoc et Provence, qui luy venoient faire leurs submissions et fidelité au nom de tous leurs concitoyens; desquels il voulut que vous entendissiez les harangues et vissiez les humilitez et offres de subjection pour en faire rapport à madame sa sœur. Lesquels parlerent tous fort éloquemment et avec de grandes loüanges du Roy; mais sur tous se fit admirer celuy qui porta la parole pour Marseille, exaltant l'antiquité de sa ville à merveilles et les hauts faits de ses concitoyens avec mille belles allegations de raisons et d'exemples.

Après lesquelles ceremonies vous partistes, allastes passer à Paris où vous sejourastes un jour seulement et arrivastes le lendemain à Fontaine-bleau, où Madame (ayant desja esté advertie de vostre deputation vers elle, mais simplement sur le sujet de la premiere lettre et non de la seconde, le Roy l'ayant escrite et fermée luy mesme sans la bailler à Lomenie) vous receut tres-bien, vous fist bonne chere et force carresses, avec dessein de vous parler des promesses que vous luy aviez faites à Chartres et sçavoir quel ordre vous donniez pour les observer et en avancer l'exécution. Cette bonne chere ne dura que deux jours seulement, car au troisième vous ayant mis sur les propos où son cœur aspirait, et vous luy ayant respondu que vous voyez toutes vos esperances sur ce sujet aller journellement en diminuant par la mauvaise conduite de monsieur le comte, qui sembloit prendre plaisir à fâcher le Roy, usant de contestations sur tout ce qu'il disoit, et tesmoignant en toutes choses, jusques aux moindres, des contrarietez d'affections; tellement que pour vostre regard, voyant ces desseins aller en reculant et n'en parlant mesme jamais au Roy qu'il ne se mist en colere contre vous, en vous alleguant toutes les escapades qu'il luy avoit faites et faisant mesmes des plaintes contr'elle comme si elle eust esté de l'intelligence d'icelles, vous ne

luy osiez plus donner aucune parole de vous y vouloir employer; mais tout au contraire, si vous estimiez qu'elle fust en volonté d'entendre vos propositions, luy donneriez vous des conseils qui seroient plus faciles à executer, et plus utiles et heureux en leurs progres.

Ayant donc cette princesse entendu de vous un tout autre langage qu'elle ne s'estoit promis, après avoir changé de plusieurs couleurs pendant que vous luy parliez, et qu'elle se fut remise dans sa chaire, car elle s'estoit levée pour vous recevoir, elle vous dit en substance, avec des gestes, un ton de voix et des termes qui resentoient quelque espece de colere et de despit, qu'elle n'eust jamais estimé que vous qui vous disiez son serviteur et la teniez pour de vos amies, qui faisiez profession d'honneur et de garder vostre foy et vostre parole, eussiez voulu commencer par elle à user de tromperie et de ruse, l'ayant, ainsi que vos paroles ne luy en avoient que trop rendu de preuves, laschement deceuë par vos belles assurances que vous disiez si certaines, afin de retirer de ses mains les promesses escrites que vous en desiriez avoir, afin de faire le bon valet pres du Roy son frere, l'habile negociateur, et puis vous mocquer encor d'elle sous ombre des bons conseils que vous luy proposiez de luy vouloir maintenant donner, lesquels, si elle vouloit encor escouter, seroient, comme elle n'en doutoit point, aussi pleins de fraude et d'abus que ceux dont elle se plaingnoit; et partant estoit elle d'avis que vous vous adressassiez à d'autres, lesquelles ne cognoissans pas si bien vos malices qu'elle faisoit, seroient aussi plus faciles à se laisser piper; et que, sans user de plus longs discours, vous vous en retournassiez trouver le Roy son frere, auquel elle escriroit par un autre les bons tours que vous luy aviez faits, que si vous n'estiez venu vers elle de sa part et ne luy aviez apporté de ses lettres elle vous en diroit davantage et peut-estre seroit chose qui vous fâcherait, mais qu'elle respectoit celuy au nom duquel vous estiez venu et non vostre personne, dont elle avoit esté offensée sans qu'elle vous en eut jamais donné aucun sujet; et lors, voyant qu'elle s'estoit teuë, vous respondistes que vous estiez extrêmement fâché de voir qu'elle eust pris sujet de mescontentement aux paroles que vous luy aviez tenuës, d'autant que vos intentions estoient toutes différentes aux opinions que vous voyez bien qu'elle en avoit prises, estant vostre dessein tout autre que celuy qu'elle s'estoit voulu imaginer, et partant la suppliez vous de vouloir ouyr avec patience les propositions entieres que vous aviez à luy faire, et que peut-estre y trouveroit elle des

expediens propres pour reparer ce qu'elle se persuadoit estre du tout ruyné, et des remedes pour prevenir les maux qu'elle apprehendoit, lesquels il vous estoit impossible d'y appliquer sans son ayde, et celle de M. le comte de Soissons aussi, et peut-estre semblablement à eux sans la vostre, et par consequent y estoit necessaire un mutuel travail de vous trois. Sur lesquels propos s'estant aucunement remise de son courroux, elle vous demanda que c'est que vous entendiez par ces mots d'applications et aydes mutuelles auxquels elle ne comprenoit rien, voire croyoit, plustost qu'autrement, que ce fust encor quelque finesse dont vous voulussiez user pour luy persuader ce que bon vous sembleroit; à quoy vous repartistes qu'elle n'avoit garde d'avoir peu entendre ce que vous desiriez de luy proposer, puis qu'elle ne l'avoit pas voulu escouter, et sembloit par là qu'elle prist plaisir à rejeter les services que l'on taschoit de luy rendre: « Vrayement, vous dit-elle lors, vous m'en avez rendu de bons et de beaux par le passé, et sur tout lorsque j'estois à Chartres, n'est-il pas vray? »

« Or, voyons maintenant quels seront ceux de l'advenir, puis que vous en faites tant de cas et usez de telles instances pour estre escouté encor une fois, et partant dites tout ce que vous voudrez, car je suis resoluë d'ouïr avec patience toutes vos fantaisies, encor que j'en apprehende plus tost du mal que je n'en espere de bien. » Alors prenant la parole vous luy dites (ce me semble, en substance, car il m'a esté impossible d'en retenir les propres termes), que c'estoit une maxime tenuë pour generale entre les plus sages, voire une commune opinion entre tous ceux qui avoient tant soit peu de sens, que nuls expediens n'estoient meilleurs pour medeciner les maladies tant du corps que de l'esprit, ny pour oster ou diminuer les obstacles et difficultez qui survenoient aux affaires d'importance, que de parfaitement cognoistre les vraies causes d'icelles, et que sur ce fondement, en reprenant les choses dès leur origine, luy vouliez vous faire ouyr la substance d'un discours que le Roy son frere vous fit un jour à vostre retour de la Cour où il vous avoit envoyé en l'année 1586, pour traiter avec le roy Henry III et les deputez des quatre cantons protestans de Zurich, Berne, Basle et Schafousen; lequel vous dit que se voyant attaqué violemment par la ligue, il sembloit que quasi tous les plus puissans potentats de l'Europe eussent conjuré ensemble pour la ruine et desolation de sa personne, sa maison et son party, sans qu'il se peust dire estre assisté sincerement de personne, non pas mesme de ceux des plus grands

de son party, lesquels, quoy qu'auparavant enveloppez en semblables dangers, et pour mesmes causes, tesmoignoient neantmoins presque tous de ne se soucier que fort peu de sa perdition particuliere, ny sans considerer que le party de la religion dans lequel ils se trouvoient attachez par quelques diverses causes et raisons que ce peut estre, estoit de telle nature et condition, qu'estans tous bien unis en mesmes volonte, desseins et communs interests, et absolument resolu de prodiguer une partie de leurs biens et facultez pour sauver le reste, ils estoient comme invincibles; et qu'au contraire il n'y avoit rien de si foible ny si facile à reduire à finale destruction que ceux de ce party, lors que les grandes villes et principaux seigneurs qui le composoient venoient à se fantasier de se pouvoir maintenir et conserver en faisant bande à part, et cherchant pour chacun d'eux des subsistances et seuretez particulieres, comme tesmoignoient de vouloir faire son cousin le prince de Condé d'une part, lequel ne se souciant pas que devienne ny sa personne ny le total des affaires, moyennant qu'il se puisse former une superiorité particuliere sans aucune recognoissance de qui que ce soit dans les provinces de Poitou, Xaintonge, la Rochelle et l'Aunis: M. de Thurenne de l'autre costé, lequel a tousjours cet impertinent dessein de pouvoir faire eslire l'electeur Palatin pour protecteur des églises reformées de France, sous esperance d'avoir sa lieutenance generale en Guyenne, où il sçavoit bien qu'il ne viendrait jamais: M. le mareschal de Montmorency de l'autre, lequel croyoit que la France s'en alloit tomber en une dissipation d'Estat, ne songeoit qu'à se conserver dans le Languedoc et empescher que luy n'y mist le pied, esperant par ces deux moyens de s'en rendre un jour souverain; et M. de Lesdiguières de l'autre, lequel encor, qu'à cause de la bassesse de son extraction, il n'eust pas les pensées si extravagantes que de ne le vouloir pas recognoistre pour chef ny en desirer un autre, si eust-il esté bien content qu'il n'allast jamais en Dauphiné, n'en tirast aucuns deniers, et luy laissast mettre toutes les contributions et rations de la province dans ses coffres, qui ne seroient jamais assez remplis à son gré tant il estoit insatiable d'argent. Toutes lesquelles considerations luy avoient fait resoudre à essayer d'approcher son cousin le comte de Soissons de sa personne, pour en faire un second luy mesme, s'il le rencontroit d'humeur accommodante à la sienne, et en ferme volonté de courir toutes ses fortunes, et n'esperer grandeur que dans celle qu'il possederait, afin de le soulager en beaucoup d'occurrences,



ausquelles ne pouvant estre present, il y compa-  
roistroit comme son bras droit. Ainsi , que pour  
le rendre tel et aussi ployable qu'il le desiroit, il  
luy fist dès lors proposer, comme elle en avoit  
peu sçavoir quelque chose, non seulement le mari-  
age d'elle et de luy, mais aussi qu'il les vouloit  
reputer eux et les leurs pour ses enfans et uni-  
ques heritiers, voyant bien que n'estant marié  
ny en estat de le pouvoir estre, il ne luy en fal-  
loit point esperer d'autres : sur lesquelles offres  
et conditions à luy apposées il se resolut de le  
venir trouver, comme il fit, aux Rosiers, avec  
apparence de grands contentemens des deux  
costez, s'entr'estans fait des promesses et ser-  
mens l'un à l'autre, où il n'y avoit rien à redire.  
Que vous laissiez, pour abreger vostre propos,  
tout ce qui se passa depuis entr'eux jusques à  
leur arrivée en Bearn pour l'aller voir, où M. le  
comte se declara son serviteur. Et peu après le  
Roy son frere, comme il revenoit de la chasse,  
receut un paquet par homme expres que l'on  
luy envoyoit de Paris, par lequel il estoit adverty  
de prendre garde à M. le comte, d'autant qu'a-  
yant que partir de la Cour, il avoit juré es mains  
de quelques ecclesiastiques fort qualifiez, de ne  
se joindre jamais au party huguenot, et promis  
au roy Henry troisieme qu'il l'abandonneroit  
s'il ne le pouvoit porter à se faire catholique  
aussi-tost qu'il auroit eu espousé sa sœur, la-  
quelle il rameneroit avec luy. Que ces advertis-  
semens, soit qu'ils fussent vrays ou faux, car  
vous ne vouliez asseurer ny l'un ny l'autre, com-  
mencerent à engendrer de la froideur entr'eux,  
et en suite de telles defiances, qu'enfin M. le  
comte ayant sceu que le roy Henry troisieme  
avoit esté chassé de Paris, et croyant que s'il es-  
toit aupres de luy (à cause qu'il estoit quasi  
abandonné de toutes personnes de qualité fort  
relevée), il gouverneroit luy et l'Estat, quitta  
tout à fait le Roy, son frere, et se separerent  
avec de mauvaises paroles et reproches, voire  
jusques à user de menaces, et que les choses  
n'estoient pas allées depuis en amendant; le  
Roy, son frere, ayant creu que nul ne s'estoit  
plus formellement opposé que luy à son retour  
à la Cour, lors que vous traitastes la reconcilia-  
tion des deux roys à Blois, Montrichart et Tours,  
après la mort de M. de Guyse. Qu'elle mesme  
sçavoit bien de quelles boutades et menées, le  
bruit avoit couru qu'il avoit usé après que le roy  
Henry troisieme eust esté tué à Saint Cloud,  
pour empescher qu'il ne fust reconnu pour roy  
s'il ne se faisoit catholique, se joignant en ce  
dessein avec messieurs de Nevers, à la fille du-  
quel l'on parla de le marier, de Longue-ville,  
d'Espernon, de Biron, d'O, de Humieres et au-

tres. Qu'elle ignoroit encor moins ses escapades  
pendant le grand siege de Roüen pour aller en  
Bearn, puis que l'on tenoit qu'elles s'estoient fai-  
tes avec son intelligence; avoit bien oüy parler  
des disputes qu'il forma entre luy, messieurs de  
Longue-ville, d'Aumont et baron de Biron, à qui  
seroit defferé le commandement des troupes  
qui marchioient pour secourir le Roy qui estoit  
comme assiegé à Arques et Dieppe, ce qui les  
retarda quelque temps de se joindre et de s'a-  
cheminer vers luy; des menées et pratiques  
qu'il avoit tant de temps continuées pour for-  
mer le tiers party, croyant que son frere aîné  
estant d'eglise, il seroit déclaré chef des armes;  
son prompt retour du voyage de Bourgogne  
avec tout ce qu'il peut desbaucher de gens de  
guerre, auquel le Roy avoit fait, entre mille pe-  
rils, tant de merveilles de son jugement, de son  
courage et de son espée; l'affront par luy fait  
au sieur de Pangeas, auquel il avoit presque fait  
rompre le col à Pont-oyse, l'ayant jetté de haut  
en bas d'un degré à la veuë du Roy, et plusieurs  
autres pareilles actions dont l'on a parlé. La  
verité desquelles neantmoins vous ne vouliez  
maintenir estre certaine, n'estant pas de vostre  
entiere et absoluë science; mais bien qu'elles ont  
produit en l'esprit du Roy les mesmes effets que  
s'ils avoient esté tous entierement veritables,  
sçachant tres-bien, pour luy avoir souvent oüy  
dire, qu'il avoit adjousté foy à tous les rapports  
qui luy en avoient esté faits, sur lesquelles cho-  
ses elle devoit porter son attention et les mediter  
prudemment avant que rien determiner.

En suite duquel recit de tant de ponctilles  
et fascheuses resouvenances, vous adjoustastes  
(voyant qu'elle estoit devenuë toute resveuse sans  
rien repliquer) qu'à vostre opinion, voire à celle  
des mieux sensez, plus judicieux et considera-  
tifs, il avoit esté non seulement difficile, mais  
presque impossible que tant d'intrigues, d'em-  
barras, dissensions, broüilleries et autres mau-  
vais mesnages intervenus entre deux princes de  
tant eminente extraction, grandeur de cœur et  
autres conceptions, ne produisissent des aigreurs,  
despits, chagrins, haynes et animositez extres-  
mes, contre lesquelles par consequent il faudroit  
un long temps, une grande prudence et de mer-  
veilleuses industries, dextérité et bonnes con-  
jonctures d'affaires, pour effacer de leurs cœurs  
et arracher de leurs esprits, des opinions que le  
laps du temps avoit tournées comme en habi-  
tude et nature; et que l'un deux, voire tous les  
deux usassent de bien delicates souplesses,  
poyemens et soumissions d'esprits et inclinations,  
pour former une parfaite reconciliation, entiere  
oubliance de toutes offences receuës, et des affec-

tions cordiales telles qu'elles estoient requises, des peres aux enfans et des enfans aux peres; et de grandes observations, esgards et circonspections pour leur donner une continuité convenable. Que neantmoins et nonobstant tous ces obstacles à l'accomplissement des choses tant desirables, voire mesme, comme il sembloit, desirées de toutes parts, si elle et luy vouloient absolument suivre vos conseils et les mettre en pratique six mois durant, vous oseriez bien les assurer, voire en respondre, de vostre vie, si elle l'estimoit digne gage d'un si grand prix, qu'ils obtiendroient du Roy tous les consentemens, contentemens, cordiales affections, bienfaits et avantages qu'ils scauroient desirer; mais qu'en cela falloit-il user de diligence, ne rien obmettre ny negliger pendant que les choses estoient encor en leur entier; que le procez de la princesse de Condé n'estoit pas encor supprimé, elle entierement justifiée, son fils encor huguenot, relegué dans la Rochelle, et non encor universellement reconnu pour legitime premier prince du sang, et presomptif heritier de la couronne: toutes lesquelles choses ceux qui leur attouchoient, poursuivoient instamment, et auxquelles le Roy ne scauroit apporter si peu d'oppositions, voire de simples défaveurs, que toutes telles pretentions (comme il n'y avoit si bon droict qui ne se perdist faute de deffence, ou de puissance, ou de justice) ne deperissent absolument, et ne fist convertir tous ces avantages en celui d'elle et monsieur le comte, tant qu'en fin ils seroient reconnus eux et les leurs, non seulement pour ses heritiers paternels et maternels, mais aussi pour ses successeurs à la couronne, chose à quoy il avoit tousjours eu dessein, et n'avoit manqué d'effet que par leurs propres imprudences et mauvaise conduite, si l'on n'en vouloit attribuer le deffaut au ciel et à la fortune, pour en avoir autrement ordonné.

A quoy, paroissant entierement remise de sa colere, elle vous respondit assez doucement en ces propres mots, que vous n'aviez point oublié vostre stile accoustumé, qui ne manquoit jamais de beaux discours, ny de specieuses raisons, mais lesquelles ne produisoient jamais rien de certain, et encor en celui que vous luy aviez tenu, y voyoit-elle tant de déguisemens, de suppositions et de fausses accusations, qu'elle auroit sujet de s'en offencer, et vous en dire son advis; mais qu'elle vouloit auparavant vous faire parler clairement, et specifier quels estoient ces conseils si excellens que vous vous vantiez tant d'avoir à leur donner, et cependant les reduisiez tousjours à des promesses, à des esperances, et les remettiez à une autrefois; et ne scauroit

mesme croire que tout ce que vous aviez mis en avant, ne fust de vostre seule imagination et invention, sans que le Roy, son frere, vous en eust donné aucune charge, d'autant qu'il ne luy en disoit pas un seul mot ny près ny loing par les lettres que vous luy en aviez apportées, desquelles elle scavoit tout ce qu'il y avoit dedans devant vostre arrivée; encor que pour vous dire ce qu'elle pensoit des intentions de son frere, touchant son mariage, « C'est qu'il me proposera, » vous dit-elle, toujours à chacun, et ne me livra jamais à personne, à force d'amour qu'il me porte. Pense-t'il que j'aye oublié tant de partis dont à diverses fois il m'a fait parler, desquels je n'en ay peu avoir un seul? Premièrement, et je croy que vous ne l'ignorez pas, l'on me proposa, estant encor fort jeune, François duc d'Alençon, lors troisieme fils de France, ce que le Roy, mon frere, n'eut pas agreable, à cause de la haine qu'il luy portoit. Depuis le roy Henry III, lors qu'il revinst de Pologne, me fut aussi proposé; à quoy la reine mere Catherine s'opposa, tant elle hayoit nostre maison, à cause que l'on luy avoit dit que le Roy, mon frere, succederoit à ses enfans. Apres l'on me parla du duc de Lorraine dont je ne voulus point, pource qu'il estoit trop vieil et que ses heritiers estoient nez: en suite il fut quelque bruit de me faire espouser le roy Philippes d'Espagne; mais la difference de religion et qu'il vouloit que le Roy, mon frere, se joignist avec luy pour faire la guerre à la France, en empescherent l'effet, et croy que vous en avez bien sceu quelque chose, car vous estiez lors en Bearn. Le duc de Savoye envoya aussi pour me demander, mais tous ceux de la religion s'y opposerent. M. le prince de Condé m'a long-temps desirée, mais sa pauvreté et qu'il ne m'agreoit pas, en empescherent l'effect. Depuis l'on me voulut marier au Roy d'Escosse; pour celui-là j'advoüe que je fus si sotté à cause de quelques fantaisies que j'avois lors en la teste que je n'y voulus point entendre. Et finalement, en divers temps, trois qui ne sont point de ma qualité, ont eu assez d'audace pource que je leur faisois bonne chere, que de pretendre à mon alliance, dont le dernier fut le prince d'Enhalt qui vint devant Roüen avec grand nombre de gens de guerre, auquel j'estime, si j'eusse voulu y entendre, que l'on ne m'eut pas refusée, afin de payer ses reistres à mes despens. Des deux autres, dont l'un est de la religion et l'autre papiste et simplement gentils-hommes, je ne les nomme point, pource que j'en ay honte et qu'aussi bien vous les cognoissez assez, vous ayant

« quelquesfois parlé de leurs folles : et enfin le  
 « pauvre comte de Soissons estant arrivé des  
 « derniers, pource qu'il m'a désirée plus cordia-  
 « lement que tous, et s'est affermy à me com-  
 « plaire, il pourra bien advenir que, comme je  
 « suis mal-heureuse, il sera aussi rendu mal-heu-  
 « reux à mon occasion ; et qu'enfin si nous adjous-  
 « tons foy à vostre dire, et d'autres qu'il y a de for-  
 « mez au moule du Roy, mon frere, nous en  
 « demeurerons tous deux là pour la prisée. Mais  
 « laissant le discours de tant de mariages ima-  
 « ginaires, revenons un peu aux particularitez  
 « de ces tant excellens advis et conseils que vous  
 « dites avoir à me donner, et qui me doivent ap-  
 « porter, en les suivant, tant de contentemens,  
 « de bonnes fortunes et de felicités : discourez  
 « en librement et ne les tenez plus cachez comme  
 « si c'estoient des mysteres profonds, car je suis  
 « à cette heure resoluë de vous escouter patiem-  
 « ment, quoy que vous puissiez dire, pour voir  
 « si en la conclusion d'iceux j'y trouveray mon  
 « conte, et mesme de differer à vous y respondre  
 « et de dire ce que je pense de vos helles inven-  
 « tions et accusations, jusques à ce que vous  
 « m'ayez representé tout ce que vous pouvez avoir  
 « en l'imagination sur le sujet de vostre voyage  
 « et la charge que l'on vous a donnée vers  
 « moy. »

Ce qui vous ayant fait prendre aussi-tost la  
 parole, vous discourustes ainsi (car des derniers  
 propos de cette princesse et de vos responses en  
 suite d'iceux, ay-je essayé, d'autant que j'y fus  
 tousjours present, d'en rapporter les propres  
 termes) : « Madame, je vous supplie en toute hu-  
 « milité de m'excuser et n'avoir point desagreable  
 « si, amplifiant mon discours de quelques repre-  
 « sentations generales, afin d'esclaircir et faciliter  
 « l'intelligence de mes propositions particulieres,  
 « je prends la hardiesse de vous dire que ceux  
 « qui veulent flatter et se rendre complaisans  
 « aux grandeurs mondaines et autoritez su-  
 « prêmes, afin d'en tirer profit et avantage en  
 « leur particulier, publient et maintiennent hau-  
 « tement qu'il n'y a sorte d'honneur, gloire,  
 « venerations, services, subjections et obeys-  
 « sances qui ne leur soient deuës, et doivent  
 « estre renduës par tous ceux qui sont sous leur  
 « domination sans nul excepter, et pour les con-  
 « firmer en cette opinion, disent que les roys,  
 « monarques et potentats souverains sont dits et  
 « reputés estre, voire sont en effet, la vraye et  
 « vive image de Dieu en terre, ce que je veux dire  
 « estre aussi faux, estant mal adapté et appro-  
 « prié, qu'il est tres-veritable estant bien entendu  
 « et reduit à son vray usage.

« Car il ne se faut pas imaginer, madame,

« que ces dominateurs des nations soient dits re-  
 « presenter cette divinité suprême, qui n'a figure,  
 « traits ny lineamens, à cause de leurs person-  
 « nes, ny à l'esgard de cette hautesse et pleni-  
 « tude de puissance sans bornes, limites ny obli-  
 « gations à aucuns droits, loix ou devoirs qu'ils  
 « se veulent arroger, mais seulement en ce qu'ils  
 « sont sages, prudens et tres-exacts et loyaux  
 « observateurs des volontez, statuts et mande-  
 « mens de celui sans la faveur duquel ils seroient  
 « reduits au rang des plus infirmes et chetifs de  
 « la terre ; et partant faut-il conclurre que les  
 « roys sont dits estre la vraye, vive et resplan-  
 « dissante image de Dieu, non en ce qu'ils li-  
 « vrent à la mort, à l'occision et au dégast de  
 « l'interdit, tous ceux de leurs sujets que bon  
 « leur semble, mais bien en ce qu'ils leur sont  
 « en salut, consolation, tuition et deffence, et  
 « que, comme ce grand Createur de toutes cho-  
 « ses, ils peuvent donner la vie à ceux qui ont  
 « mérité la mort, les ayant offencés en leur par-  
 « ticulier : non en ce que ces potentats se rendent  
 « en frayeur, espouvtement, crainte et terreur  
 « à leurs peuples, mais en ce qu'ils leur sont en  
 « appuy, protection, assurance et soulagement :  
 « non en ce qu'ils s'approprient les biens, pos-  
 « sessions et facultez de leurs subjects par exac-  
 « tions, tributs, impôts, tailles et subsides, mais  
 « en ce qu'ils les maintiennent et font vivre en  
 « paix, repos et tranquillité, et les garantissent  
 « de toutes violences, foules, surcharges et op-  
 « pressions : non en ce qu'ils punissent et chas-  
 « tient toutes offences rigoureusement, mais en  
 « ce qu'ils sont indulgens et pitoyables aux fautes  
 « commises sans malice et se plaisent à faire mi-  
 « sericorde : non d'autant que, pour remedier aux  
 « craintes et déflances où la cognoissance de leur  
 « dure administration les reduit, ils sont inces-  
 « samment environnés d'armes et d'armées in-  
 « nombrables ; mais pource qu'en regissant avec  
 « mansuetude et prudence, ils vivent assurez en  
 « la seureté publique, et n'ont besoin d'autres  
 « gardes que leur équanimité, l'amour et la bien-  
 « veillance de leurs peuples : non en ce qu'ils y  
 « sont oysifs, nonchalans, paresseux et volup-  
 « tueux, mais en ce qu'ils s'addonnent à la vertu,  
 « travaillent incessamment pour le bien public,  
 « et taschent donner leurs vies pour exemplaire  
 « de bien vivre : non en ce qu'ils sont superbes,  
 « orgueilleux, fiers et hautains, mais en ce qu'ils  
 « se monstrent affables, amiables, doux et be-  
 « nins : non en ce qu'ils paroissent chagrins, des-  
 « pits et remplis de haynes et rancœurs, mais en  
 « ce qu'ils sont sociables et abondent en compas-  
 « sions : non en ce qu'ils se sentent importunés  
 « des plaintes, clameurs, doleances et requisi-

« tions de ceux qui se sentent oppressez et les re-  
 « jettent imperieusement, mais en ce qu'ils se  
 « rendent accessibles à tous affligez, reçoivent  
 « doucement leurs requestes et les appointent  
 « soudainement et favorablement : bref, non en  
 « ce qu'ils dominent sur beaucoup de nations,  
 « portent le tiltre d'empereurs, roys et monar-  
 « ques, et sont appelez altesses, majestez, sires,  
 « seigneurs et maistres, mais en ce qu'à l'imita-  
 « tion du Roy des roys, ils font gloire de nom-  
 « mer leurs sujets et leurs serviteurs, leurs enfans  
 « et leurs amis, et se delectent d'estre appelez  
 « peres, et de produire des offices conformes à  
 « ces noms si doux et pleins de consolation.

« Or, ay-je mis tout cecy en avant, madame,  
 « pource que s'il y eut jamais de roys qui ayent  
 « merité, suivant toutes ces consequences par  
 « moy alleguées, d'estre estimez la vraye et vive  
 « image de l'Éternel en terre, le Roy vostre frere,  
 « comme j'estime, est un de ceux auxquels ce tant  
 « beau tiltre appartient le plus justement, ayant  
 « tousjours recogneu, depuis vingt-quatre ans que  
 « feu mon pere me mist à son service, toutes ses  
 « inclinations entierement portées à ces vertus  
 « et qualitez louables, et veu incessamment dé-  
 « tester les choses qui leur estoient contraires,  
 « prenant un extrême plaisir à ce beau tiltre de  
 « pere de ses peuples, à les nommer ses enfans  
 « et leur user de gratuité, et tousjours (encor à  
 « l'imitation de ce bon Dieu, qui se rend indul-  
 « geant à tous forfaits par la seule contrition de  
 « cœur et confession de bouche) prest à pardon-  
 « ner toutes offences à luy faictes, si tost que l'on  
 « les luy advoioit franchement avec tesmoignage  
 « de regret de les avoir commises et ferme desir  
 « de n'y retourner jamais : toutes lesquelles par-  
 « ticularitez, peut-estre un peu trop longues,  
 « ay-je ainsi, de propos delibéré, mises en avant  
 « en vostre presence, madame, pour, sur ce fon-  
 « dement, tirer des conclusions indubitables, que  
 « si le Roy est d'un tel naturel, tant doux et be-  
 « nin, si affable et accessible à tous ses sujets,  
 « qui ne luy appartiennent en aucun degré de  
 « consanguinité, que de les nommer ses enfans  
 « et les vouloir traiter comme tels, de quelles  
 « graces, faveurs, bien-faits, cordiales affections  
 « et tendresse de cœur, n'usera-il point envers  
 « vous premierement, qui avez tousjours esté et  
 « estes encor sa tres-chere et bien-aymée sœur  
 « et sa seule et unique heritiere, et en suite à  
 « l'endroit de M. le comte de Soissons, qui a  
 « l'honneur d'estre de son sang royal et son cou-  
 « sin au premier degré, lors que vous l'aimerez  
 « chèrement et l'honorerez et revererez tous deux  
 « véritablement ? et que si semblablement ce  
 « grand Roy, vostre bon frere, est tant debon-

« naire, genereux et magnanime, qu'il a par-  
 « donné et pardonne encor tous les jours sur une  
 « simple recognoissance et advoïement des cri-  
 « mes commis, à tant d'attentats et de desseins  
 « formels contre son bien, son honneur, sa vie  
 « et son Estat, alors qu'il y remarque une non  
 « feinte repentance ; de quelles componctions et  
 « tendres ressentimens ne sera-il point serieu-  
 « sement esmeu et vivement touché, lors que vous  
 « deux luy ouvrant vos cœurs et ne luy cachant  
 « ny desguisant nulles des particularitez de tou-  
 « tes les ponctilles entre vous passées, desquelles  
 « aussi bien n'est-il pas ignorant, vous descou-  
 « vrirez devant luy vos douloureux regrets, à  
 « cause de toutes ses défiances et mauvaises in-  
 « telligences, vous espandrez vos filiales larmes  
 « dans son sein paternel, avec lesquelles entre-  
 « meslant infailliblement les siennes, tout remply  
 « de sinceret et cordiales affections et de parfaicte  
 « consolation, joye et liesse pour de tant verita-  
 « bles et heureuses reconciliations, il vous jet-  
 « tera les bras au col, vous baisera mille et mille  
 « fois, et vous embrassera, aymera et cherira  
 « tous deux comme ses chers et bien aymez en-  
 « fans, seuls et uniques heritiers ?

« Que s'il vous plaist à present, madame,  
 « comme j'en supplie tres-humblement vostre  
 « prudence et bonté, de considerer attenti-  
 « vement toutes mes paroles, et notamment  
 « celles qui forment et produisent les advis et  
 « conseils que j'avois à vous donner, les peser à  
 « la balance de vostre équitable jugement, purgé  
 « de toutes preoccupations et passions d'autrui  
 « et de vous memes, examiner mes raisons et  
 « leur donner le prix merité, selon leurs desti-  
 « nations, faire vostre profit des exemples pro-  
 « posez, recevoir les diverses instructions qui se  
 « peuvent tirer des divers evenemens, prendre  
 « une entiere confiance en la foy que je vous en-  
 « gage de vous servir loyalement, utilement et  
 « agreablement en toutes ces affaires dont il s'a-  
 « gist, me charger de faire toutes les ouvertures  
 « qui seront necessaires pour cet effet, seulement  
 « comme de moy-mesme (si vous le voulez ainsi,  
 « afin de ne vous engager à aucune chose que  
 « vous n'y voyez les bonnes dispositions requises  
 « de toutes parts), trouver bon que je prenne le  
 « temps et les occasions à propos sans rien aigrir,  
 « negliger ny precipiter, et que je ménage pru-  
 « demment l'esprit, l'humeur et les fantaisies  
 « du Roy vostre frere, je vous oserois respondre  
 « de ma vie, de mon honneur, voire de mon sa-  
 « lut, que tous les succez en seront aussi favora-  
 « bles que vous le sçauriez desirer, et que vous  
 « obtiendrez tout ce qui est requis pour vostre  
 « honneur, bien, grandeur, contentement d'es-

« prit et de corps , et continuez la félicité qui est  
« tout ce que je vous saurois représenter , tou-  
« chant la charge qui m'a été donnée et le sujet  
« de mon voyage vers Vostre Hautesse. »

« Est ce là donc tout ce que vous aviez à me  
« dire , répondit aussi-tôt cette princesse , et les  
« tant excellens conseils que vous me vouliez  
« donner ? Vrayement , M. de Rosny , je voy bien  
« que vous avez de longue main bien étudié  
« votre leçon , et vous estes rendu plus soigneux  
« de faire l'éloquent , et le bien disant , pour des-  
« guiser vos artifices , que de me rendre de bons  
« offices et de me servir utilement , comme vous  
« m'aviez promis ; et encor qu'il me soit facile à  
« juger que je ne puis pas beaucoup espérer de  
« toutes vos cajoleries et discours recherchez , et  
« comme je dois prendre vos belles allegations  
« qui m'offencent , neantmoins , afin que vous  
« n'essayiez de profiter de mes réponses à mon  
« prejudice , et voyant aussi bien que vous m'a-  
« vez tant amusée à vos beaux discours pleins  
« de ruse , qu'il s'en va tantost nuit , je veux re-  
« mettre la réponse à demain au sortir de mon  
« disner , afin que j'aye loisir d'y bien penser et  
« de prendre conseil avec les miens et le chevet  
« de mon lit ; partant vous pouvez vous retirer  
« en votre logis , comme je vais faire en mon  
« cabinet. » Et sur cela vous ayant quitté , vous  
« aussi , apres avoir fait de grandes reverences ,  
« et dit quelques paroles de compliment aux da-  
« mes qui estoient dans la chambre et icelles priées  
« de vouloir donner bon conseil à Madame , si elle  
« leur en demandoit , et vous rendre de bons offi-  
« ces près d'elle , vous vous en allastes à votre  
« logis.

## CHAPITRE LXVI.

*Suite de la conférence avec Madame. Refroidis-  
sement momentané de Henri IV pour Rosny.*

Toutes les particularitez d'une si notable né-  
gociation n'ayant pu estre deduites et comprises  
dans les bornes d'un seul chapitre , nous les con-  
tinuerons par le present , vous dirons que le  
lendemain vous retournastes voir Madame , espe-  
rant la trouver au sortir de table , et neantmoins  
vous ne vous peustes tant diligenter qu'elle ne  
fut desja entrée dans son cabinet , où elle avoit  
fait appeller mes dames de Rohan , comtesse de  
Guychen , de la Barre et de Neufvy ; tellement  
qu'à vostre arrivée vous ne trovastes dans sa  
chambre que mes dames de Gratains et de Pan-  
geas , mademoiselle Gracienne et la Naine , des-  
quelles vous estant approché , vous leur deman-  
dastes où estoit Madame et qui estoit avec elle.

A quoy vous ayant satisfait suivant ce qui est dit  
cy-dessus , vous leur dites estre bien marry qu'elles  
ne fussent à la place des autres , pource qu'elles  
estoient sages , discrettes et sans malice , aymoient  
veritablement le Roy et Madame , et avoient  
tousjours désiré de les voir en bonne intelligence  
l'un avec l'autre , et que les autres n'avoient ny  
mesmes humeurs ny mesmes affections , voire  
que tesmoignant assez de n'estre pas trop con-  
tentes du Roy , elles tascheroient d'aigrir l'esprit  
de Madame , de luy faire prendre de mauvaises  
resolutions , et de la faire mettre en colere con-  
tre vous. Surquoy elles vous dirent bien qu'il ne  
vous falloit pas croire cela , mais ce fut si froi-  
dement et avec de telles mines et souris , que  
vous eustes sujet de juger qu'elles n'en pensoient  
pas moins que vous en aviez dit.

Quoy que ce soit , vous demeurastes bien là  
une heure à attendre , au bout de laquelle Ma-  
dame estant sortie , aussi-tôt qu'elle vous apper-  
ceut elle vous appella et vous dit : « Venez ,  
« venez , M. de Rosny , que je vous dépêche pre-  
« sentement comme vous savez dépêcher un  
« chacun et vous fasse réponse en peu de paroles ,  
« mais un peu plus veritables que les vostres ,  
« telles que meritent vos belles harangues , vos  
« grands apparats de langage et curieuses recher-  
« ches de choses entierement esloignées de celles  
« dont vous aviez charge , encor que je n'aye pas  
« tant medité dessus qu'il est aysé à cognoistre  
« que vous avez fait , ayant usé de tant d'artifi-  
« ces et de ruses que je m'y suis quasi laissé sur-  
« prendre et presque emporter à suivre vos con-  
« seils , quoy que je m'en fusse si mal trouvée  
« autrefois et notamment à Chartres , comme je  
« le vous ay desja reproché , vous en souvient-il  
« bien ? Mais en fin ayant , suivant vostre priere  
« mesme , considéré de plus pres tous vos affectez  
« langages , et mieux examiné vos raisons et al-  
« legations , j'ai fort bien recogneu que vous n'a-  
« viez autre but , afin de faire l'entendu et l'ha-  
« bile negociateur , que de nous faire condamner ,  
« mon cousin le comte de Soissons et moy , par  
« nos propres bouches , et nous faire advoüer  
« mille erreurs et offenses ausquelles nous n'a-  
« vons jamais pensé ; lesquelles pour la pluspart  
« viennent à mon advis de vos subtiles inven-  
« tions , quoy que vous ayez peu dire , que le Roy  
« mon frere n'en croit pas le quart de ce que vous  
« nous en avez reproché , et que mesme , quant  
« au voyage de Bearn , duquel il peut avoir dit  
« quelque chose , il ne m'en a jamais osé ou voulu  
« parler , sachant bien de qui en vient la faute ,  
« et que s'il y en a quelques-uns qui ayent su-  
« jet de s'en plaindre et de s'en tenir offencer ,  
« c'est nous , à cause de tant de procedures vie-

« lentes dont il fut usé sans besoln , et des mau-  
 « vais traitemens et indignitez par nous receuës  
 « de certains estourdis comme vous pourriez es-  
 « tre , que je n'y pense jamais que je n'en aye  
 « les despits au cœur , les soupirs en la bouche  
 « et les larmes aux yeux , voire m'estonne que  
 « ce gros bulle de Pangeas n'a encore pis eu que  
 « vous n'avez dit.

« Mais retournant à mon premier propos, afin  
 « de vous dépesoher, je vous diray qu'il n'y en  
 « a un seul de ceux et encor moins de celles qui  
 « ont entendu ou sceu les propos impertinens que  
 « vous m'avez tenus , qui ne se soit émerveillé  
 « de vostre imprudence, d'avoir ainsi legerement  
 « entrepris des affaires tant espineuses et diffici-  
 « les qui sont à démesler entre des personnes de  
 « si eminente qualité qu'elles devoient estre trait-  
 « tées par gens d'autre condition que de petits  
 « gentils-hommes comme vous , de qui le plus  
 « grand honneur est d'avoir esté nourry de jeu-  
 « nesse en nostre maison , et que tous les vostres  
 « en ayant tousjours esté serviteurs , et de vous  
 « estimer capable de régler ceux qui sont si pro-  
 « ches parens, lesquels s'accorderont tousjours à  
 « la fin et le plus souvent aux despens de ceux  
 « lesquels, comme vous, veulent mettre les doigts  
 « entre le bois et l'escorce, et s'entre-mettre des  
 « choses plus hautes que leur portée. Nous avons  
 « aussi considéré avec estonnement vostre effron-  
 « terie d'avoir osé tenir en ma presence deux  
 « discours, l'un au blâme general de tous les  
 « roys et princes souverains, et l'autre en l'of-  
 « fence de mon cousin le comte de Soissons et de  
 « moy, nous imposant mille choses fausses et faisant  
 « tenir des langages au Roy mon frere, ausquels  
 « je sçay bien qu'il n'a jamais pensé, non plus  
 « qu'à vous avoir donné charge des impertinen-  
 « ces que vous avez mises en avant de sa part;  
 « dequoy je lui sçaurai bien donner advis par au-  
 « tre que par vous, à qui je conseille de se reti-  
 « rer sans attendre que je vous baille de mes let-  
 « tres, de ne vous entremesler plus d'affaires où  
 « j'auray interest, ny prendre charge de revenir  
 « jamais vers moy de la part du Roy mon frere,  
 « voire vous prie de vous abstenir de venir en ma  
 « maison ny de vous trouver en lieu où je sois. »  
 A laquelle harangue vous estant aucunement at-  
 tendu et préparé ( à cause qu'elle avoit pris con-  
 seil des dames que j'ay tantost nommées, lesquel-  
 les hayssant le Roy, pour diverses raisons trop  
 longues à desduire, faisoient tousjours du pis  
 qu'elles pouvoient à tous ceux qu'il aymoît, pour  
 entretenir les aigreurs entre le frere et la sœur),  
 vous respondistes doucement et sans vous esmou-  
 voir, en ces propres termes :

« Madame , avant que de me retirer, suivant

« vostre commandement et mon desir, je vous di-  
 « ray encor pour fin de tous mes propos, que je  
 « suis infiniment marry qu'un peu de colere, mais  
 « beaucoup plus les artifices et persuasions d'es-  
 « prits non si bontifs ny si sages qu'est le vostre,  
 « vous ayent fait prendre toutes mes paroles à  
 « contre-sens mon intention et leur vraye intelli-  
 « gence, et user de tant de mespris et de menaces  
 « envers moy, qui ne l'ay pas merité : car en ef-  
 « fet je n'ay rien dit touchant le general des roys  
 « et des princes que les bons et sages pussent  
 « trouver mauvais, ayant seulement remarqué  
 « les vertus de ceux qui meritent d'estre estimez  
 « la vraye et vive image de Dieu en terre, les-  
 « quels aussi je confesse ne se pouvoir assez re-  
 « verer, louer ny magnifier. Quant à vous et à  
 « monsieur le comte, je n'ay parlé que des bruiets  
 « qui avoient couru, de la verité desquels non  
 « seulement j'ay dit ne vouloir pas estre garand,  
 « mais aussi que quoy qu'ils pussent estre faux  
 « pour la pluspart, si n'avoient-ils pas laissé de  
 « produire les mesmes effets que s'ils eussent esté  
 « veritables. » Que pour le mespris qu'elle avoit  
 fait de vostre personne, vous appellant un petit  
 gentil-homme, vous le preniez en patience, don-  
 nant cela à sa qualité, à son impatience et à la  
 passion d'autrui : qu'à la verité vous n'estiez pas  
 si relevé en dignitez ny en biens que beaucoup  
 d'autres qui avoient peut estre moins de merite  
 que vous en toutes sortes, mais que tousjours  
 vous estoit-il facile de verifier quant à l'extrac-  
 tion, qu'il n'y avoit gueres de seigneurs en France  
 dont la maison fust plus ancienne, et en laquelle  
 il y eust eu plus d'alliances de roys et de princes.  
 Que quant aux biens, vous confessiez franchement  
 de n'en avoir pas tant que vos predecesseurs, par  
 le mauvais mesnage desquels ils avoient diminué,  
 mais tousjours aussi estoit-il vray que vous n'a-  
 viez pas laissé de vivre fort honorablement, de  
 suivre incessamment le Roy son frere à vos des-  
 pens, sans luy avoir jamais esté en charge, ny  
 qu'il vous eut oncques rien donné ny elle aussi,  
 à laquelle vous ne craindriez point de dire, quel-  
 que petit gentil-homme qu'elle vous estimast,  
 (car, comme vous m'avez confessé, ce terme vous  
 tenoit un peu au cœur) qu'il ne laissoit pas d'es-  
 tre sorty de vostre maison en divers temps plus  
 de cent mil escus de rente qui estoient entrez par  
 alliances avec des filles d'icelle dans les maisons  
 de Bourbon et d'Autriche; et que quant à vostre  
 charge, tant s'en falloît que vous l'eussiez en au-  
 cune façon surpassée, que vous en aviez beau-  
 coup moins dit qu'il ne vous avoit esté commandé,  
 comme il vous estoit facile de le faire paroistre,  
 s'il luy plaisoit de voir l'escriture et entendre la  
 lecture d'une lettre de la propre main de Sa Ma-

jesté à elle adressante (laquelle vous luy monstres en mesme temps l'ayant en la main), pour à laquelle satisfaire entierement (puis que vous cognoissiez bien d'estre reduit à telle extremité qu'il vous estoit impossible d'éviter le courroux et reproche ou du frere ou de la sœur), vous luy vouliez bien dire, par forme d'advertissement et comme son serviteur particulier que vous estiez en verité (quelque creance contraire que des esprits malicieux luy eussent fait prendre), que la disposition de l'esprit de Sa Majesté (laquelle vouloit absolument la voir mariée), l'estat du temps et celuy des affaires estoit maintenant tel, qu'il falloit que sans aucune remise ny desguisement, elle et monsieur le comte s'accomodassent à tout ce que vous luy aviez déclaré estre de ses volonte et intentions, voire luy en fissent concevoir des certitudes infaillibles par bons et frequens effets; desirs lesquels, à vostre advis, n'estoient nullement mal fondez, puis qu'il leur tenoit lieu non seulement de pere, de frere et de cousin, mais aussi de roy, de souverain et de maistre, aussi bien qu'au moindre de son royaume. Que si elle ne pouvoit disposer monsieur le comte à ce juste devoir, elle se resolut de son costé à faire de deux choses l'une, à sçavoir, de prendre tel autre mary de la main du Roy que bon sembleroit à Sa Majesté, laquelle ne luy en choisiroit point qui ne fust sortable à son eminente condition, qui n'eust de grands biens, et ne fust de mœurs et d'humeurs telles, qu'ils seroient pour vivre heureux, contens et splendidement l'un avec l'autre; ou en cas qu'elle resistast obstinément à ce sien propre advantage, qu'elle se resolut au retranchement de toutes les liberalitez royales, et à se voir reduite à son simple partage de Navarre, lequel ne se trouveroit si ample, les loix de la maison et les coustumes des pays estant suivies (comme vous aviez charge du Roy, son frere, de luy dire que c'estoit sa volonté), qu'elle eust sujet de tant mespriser ceux qui avoient moins de biens que leurs devanciers, ny moyen de continuer à tenir une maison et un équipage d'une bien grande reine, tel qu'elle l'avoit eu jusques à present.

Surquoy s'estant irritée et mise en colere plus qu'elle n'avoit point encor fait, elle respondit qu'elle ne pensoit point que vous ne fussiez hors du sens, de vous delecter à l'offencer ainsi de gayeté de cœur, luy parlant si hardiment de la contraindre à mariage, que vous sçaviez bien estre une action en laquelle chacun devoit estre libre; de la privation des liberalitez du Roy, lesquelles ne despendoient pas de vostre discretion; du partage de sa maison, lequel surpassoit vostre intelligence; et de l'équipage qu'elle avoit,

où vous n'aviez rien à ordonner; voire falloit que vous eussiez le diable au corps de vous estre voulu charger de luy venir annoncer de si mauvaises nouvelles et user de telles offences qu'elle ne vous sçauroit jamais pardonner, au lieu de rejeter tous ces fascheux offices sur les lettres du Roy, son frere, si tant estoit, ce qu'elle ne croyoit nullement, que vous en eussiez d'un si estrange stile, d'autant qu'elles luy eussent rendu ses ennuyes et ses deslairs plus honorables et moins insupportables. Mais quoy qu'il y eust, qu'elle n'avoit affaire ny de vous, ny de vos lettres, ne vouloit voir ny l'un ny l'autre, et feriez fort bien de vous retirer, de ne prendre plus nulle charge pour rien traicter avec elle, de ne rentrer plus dans sa maison, ny de vous trouver en lieu où elle fust.

Et sur ce mot se retira en son cabinet toute en furie, et vous vers vostre logis. Mais comme vous fustes au bas du degré, vous entendistes une voix qui crioit, M. de Rosny, M. de Rosny; et aussi-tost vistes madame de Neufvy venir droit à vous toute échauffée, laquelle vous dit que Madame l'avoit renvoyée expres apres vous, afin de retirer la seconde lettre que vous aviez dit avoir du Roy, son frere, pour elle, desirant voir ce qu'il y avoit dedans et la garder. Mais vous luy respondistes (comme vous doutant bien que c'estoit un nouveau conseil pris avec ses dames) que Madame vous ayant dit elle-mesme qu'elle n'avoit que faire de la lettre ny de vous et ne vouloit voir ny l'un ny l'autre, vous ne croyez pas qu'elle eust si tost changé de volonté, et qu'aussi ne la voulant mettre en autres mains que les siennes, et encor apres la retirer, comme il vous l'avoit esté enjoint, vous la garderiez soigneusement, pour tesmoigner, lors qu'il en seroit besoin, que vous n'aviez fait ny dit chose qu'il ne vous en eust esté encor ordonné d'avantage; et aussi-tost luy disant adieu, sans attendre sa replique, vous vous en allastes monter à cheval et coucher à Moret, pource que madame vostre femme y estoit, où, ayant sejourné seulement un jour, vous pristez le chemin de Paris avec dessein d'y demeurer jusques à ce que vous eussiez eu response du Roy aux lettres que vous luy aviez escrites par vostre courier party de Fontaine-bleau.

Mais le lendemain le jeune Boesse, qui estoit maistre d'hostel de Madame et avoit esté envoyé par elle vers le Roy pour luy faire ses plaintes des offences qu'elle disoit avoir receuës de vous, en l'exécution de la charge qu'il vous avoit donnée, vous vinst trouver à vostre logis et vous bailla des lettres du Roy, lesquelles, comme vous le sceustes depuis, avoient desjà esté por-

tées toutes ouvertes à Fontaine-bleau, puis re-fermées et rapportées à Paris, dont la lecture vous mist en peine et en colere pour un temps, comme à la verité il y en avoit quelque sujet, la teneur en estant telle :

*Lettre du Roy à M. de Rosny.*

Monsieur de Rosny, je suis en peine et grandement estonné de n'avoir receu aucunes lettres de vous depuis vostre partement, qui me peussent informer de ce que vous avez avancé touchant les affaires dont je vous avois donné charge vers ma sœur, et principalement pour ce que j'ay receu de ses lettres par lesquelles elle se plaint merveilleusement de vous; disant en avoir esté tellement offensée et en tant de sortes qu'elle ne vous le sçaurait jamais pardonner, et partant me prie de luy en vouloir faire raison et justice, bien est-il vray que par sa lettre elle ne spécifie aucunes particularitez, ce qui me fait estimer qu'il n'y a pas peut-estre tant de mal qu'elle en fait de bruit; mais en general elle dit que vous luy avez tenu tant d'insolens langages que je ne luy en voudrois pas avoir usé de semblables. Vous sçavez bien qu'une telle procedure seroit contre vostre devoir, mon desir et la forme que je vous ay ordonnée à vostre partement de vous comporter envers elle, luy parlant avec le mesme honneur, respect et deference que vous feriez à moy-mesme, luy donnant des asseurances de ma bien-veillance, luy remontrant en de certaines choses doucement son devoir, les obligations qu'elle m'a, les avantages que je luy veux faire si elle me sçait complaire, et ce qui est de mes intentions sur toutes ces particularitez: partant pensez à ce que vous avez dit et fait, et s'il y a la moindre chose qui l'ayt peu justement fâcher, allez la retrouver, luy en faites d'honnestes excuses, voire la priez de vous pardonner si la chose le merite, ce qu'elle fera aussitost et n'y serez pas mal receu, car j'y ai pourveu comme il faut. Mais quoy qu'il y ayt donnez luy satisfaction, car je ne voudrois pas souffrir, estant ce qu'elle m'est, qu'un seul de mes sujets l'offençast sans le chastier, s'il refusoit à user des submissions qui luy sont deuës. Et sur cela je prieray Dieu, monsieur de Rosny, qu'il vous ayt en sa garde. D'Amiens, ce 15 de may 1596.

HENRY.

Comme vous eustes leu ces lettres et apres que le sieur de Boesse fut party, vous appellastes l'un de nous quatre et luy distes, le visage tout chagrin et despit: « Par Dieu, ce n'est pas sans cause si l'on dit qu'il se cueille plus d'espines que de rozes au jardin des courtisans, et que, pour un verre cassé auprès des roys et des

« princes, bien souvent vingt années de services  
« demeurent bien égarées. Il y en a, comme vous  
« sçavez, plus de vingt-quatre que je sers ce prince  
« à mes despens, et qu'il s'est trouvé en fort peu  
« de perils et de mauvaises fortunes que je ne les  
« aye couruës, et neantmoins il me traite assez  
« mal par une sienne lettre que je viens de re-  
« cevoir, et le tout pour luy avoir esté trop  
« loyal et fait trop absolument ses volontez,  
« voire apres les luy avoir long-temps contes-  
« tées, m'estre defendu de ce mal-heureux  
« voyage vers Madame, autant qu'il m'a esté  
« possible, et lui avoir remonstré qu'en faisant  
« et disant ce qu'il m'ordonnoit, je n'en revien-  
« drois point (cognoissant les affections de cette  
« princesse trop enracinées, et son humeur al-  
« tiere, collere, soudaine et despitée) sans avoir  
« broüillerie avec elle, voire peut estre qu'elle  
« ne me prit en hayne bien grande, comme tout  
« cela m'est arrivé, pour estre trop obeyssant à  
« mon maistre; lequel ne pensant plus à moy ny  
« à ce qu'il m'a ordonné, mais seulement aux  
« despits de sa sœur, tesmoigne d'estre aussi mal  
« satisfait de mes obeysances qu'elle fait elle  
« mesme de mes libres remonstrances. Et main-  
« tenant est-il aisé à voir que bien m'a servy  
« d'avoir voulu emporter une lettre escrite de la  
« propre main de S. M. et de ne l'avoir pas bail-  
« lée, mais icelle gardée fort soigneusement;  
« dans laquelle, tout ce que j'ay dit et fait en  
« particulier, m'est generally commandé;  
« voire encor plus expressement et durement  
« enjoint, et qui plus est, beaucoup d'autres  
« choses, desquelles je me suis abstenu par res-  
« pect et modestie. Tellement que me voila ins-  
« truit par cet exemple, à vivre plus retenu et  
« circonspect, à ne me jeter pas si legerement  
« que j'ay fait, à l'abandon des haynes et ani-  
« mositez d'autrui, pour vouloir loyalement et  
« trop absolument executer les volontez d'un  
« maistre que je sers, puis qu'il oublie si facile-  
« ment ses promesses de protection, et n'a plus  
« en memoire ce vieil proverbe qui dit: *A bon  
« maistre hardy valet*; lequel il se vantait tant  
« lors qu'il me dépescha de vouloir remettre en  
« pratique et en lustre; et tascheray d'oresna-  
« vant à me détacher le plus doucement, et  
« neantmoins entierement, qu'il me sera pos-  
« sible, de toutes ces entremises et faciendes  
« d'affaires contre les uns et les autres, et sur  
« tous, les princes et les grands qui sont en puis-  
« sance et autorité, esquelles je recognois bien  
« qu'il fait dessein de m'employer, et de s'y ser-  
« vir de ma trop grande franchise et bonne vo-  
« lonté à son service. Voyez un peu ce qu'il m'es-  
« crit. » Et lors nous leustes-vous la lettre que



vous en aviez receuë, telle qu'elle a esté inserée cy-devant. « Et jugez s'il n'a pas eu tort de me « tenir un si aspre langage; s'il ne me donne « pas sujet de m'en pleindre, de luy en dire librement mon advis, et de le servir cy-apres « avec un peu moins de passion et plus de circonspection que je n'ay fait par le passé; car « de le quitter tout à fait et me retirer chez moy « ayant tant d'enfans que j'en ay et une femme « qui en fait tous les ans, outre que je sçay bien « qu'il ne me le permettroit jamais, et qu'il « ne manquera pas à me faire mille excuses, « alleguer force raisons, et enfin me donner occasion de contentement, comme il est admissible en telles cajoleries lors qu'il veut regagner un serviteur dont il croit pouvoir avoir besoin, mon cœur et la longue amitié que je luy ay portée, ne le pourroient souffrir, ayant mis en ma fantaisie, pour m'avoir esté prédit de plusieurs, que je serois eslevé en fort grande fortune et autorité près de luy, et que je deviendrois un de ses principaux ministres pour l'exaltation de sa gloire, et le rétablissement de son royaume; joint qu'il me seroit imputé à grande imprudence de quitter ainsi les affaires pour un petit ponctille, me voyant à la veille d'entrer en grand credit, et par le moyen d'iceluy relever ma maison, que le mauvais mesnage de mon grand pere, et la maligne exheredation de mon oncle le vicomte de Gand, ont presque ruinée, m'ayant privé de plus de cinquante mille livres de rente dont je devois heriter d'eux. Je suis donc resolu, et je crois que c'est le mieux que je puisse faire, de ne jeter pas, comme l'on dit, le manche apres la cognée, mais user de prudence et de patience, sans me haster de satisfaire à cette lettre, apparamment procedée plutost de colere et de promptitude que de raison; car, quelque chose qu'elle chante, Madame, son courroux et son despit estans tout recens, et au milieu des plus ardens brasiers d'un esprit ulceré, ne se pourroit empescher de me faire des affronts et des indignitez, et plutost, afin d'avoir excuse, feindray-je d'estre malade pour avoir loisir d'attendre une seconde depesche, et voir ce qu'aura produit la lettre que j'escrivis de Fontaine-bleau par un courier express vers Sa Majesté. »

Celuy de nous auquel vous tinstes ce discours vous ayant escouté attentivement vous lōua et pris grandement en luy-mesme, vous consola et conseilla de le suivre, le fortifiant de toutes les raisons dont il se peust adviser; aussi à la verité eust il bien fâché à tous nous autres qui vous suivions, vous tenant

si proche d'avancer vostre fortune et par icelle la nostre, de voir flestrir le verd de nos esperances par un despit precipité. Tout ce soir et le lendemain matin vous demeurastes assez melancollique et mesmes envoyastes querir un medecin auquel ayant feint plusieurs douleurs, il vous ordonna, ce nous semble, deux ou trois purgations et quelques seignées; mais sur les quatre heures du soir arriva le courier Picault qui vous apporta des lettres du Roy dont la teneur ensuit :

*Lettre du Roy à M. de Rosny.*

Mon amy, je ne doute point que cette lettre ne vous trouve en colere du stile de ma precedente que Boesse vous aura renduë, laquelle je n'ay faite que par son importunité, pour me desliver de celles de ma sœur et appaiser un peu les premiers bouillons de son courroux. Vous la cognoissez aussi bien que moy : nous sommes tous deux prompts et mutins, mais nous revenons aussi-tost. Ne prenez donc pas garde à cette premiere lettre que je vous ay escrite, mais seulement à cette-cy par laquelle je vous reconfirme les assurances que je vous donnay à vostre partement. Je sçay bien que vous n'aurez rien fait que suivant mes intentions et m'assure que vous n'aurez non plus esgaré cette lettre qui vous sert de garand et que je me doutay bien que vous demandiez à cette fin lors de vostre depesche. N'ayez donc crainte que je vous desavoie ny souffre vous estre fait desplaisir; servez moy toujours à ma mode, aymez moy comme je veux vous aimer; venez me trouver au plutost pour m'informer encor plus particulièrement de tout ce qui s'est passé en vostre voyage (que je ne l'ay esté par vostre courier, lequel s'estant desmis un pied en courant la poste, comme il me l'a dit, n'a peu m'apporter plutost vos lettres), et vous asseurez d'estre aussi bien receu de moy que vous ayez jamais esté, quand je devrois prendre la vieille devise de Bourbon *qui qu'en grogne*. Adieu, mon amy.

D'Amiens ce dix-septiesme de may, 1596.

Cette lettre vous remist en bonne humeur, et vous purgea beaucoup mieux de la mauvaise en quoy vous estiez, que n'eussent fait toutes les medecines qu'on vous avoit ordonnées, lesquelles vous ne pristés pas; mais partistes le lendemain dès la pointe du jour, allastes coucher à Clermont et le jour suivant à Amiens où le Roy vous receut fort bien, voire usa de caresses extraordinaires, lors que vous luy eüstes fait le récit de tout ce qui a esté dit cy-devant.

## CHAPITRE LXVII.

*Résolution de faire entrer Rosny dans le conseil des finances. Intrigues pour en empêcher l'exécution. Entrevue du Roi et du duc de Mayenne. Installation de Rosny au conseil des finances.*

Le Roy se ressouvenant des promesses qu'il vous avoit faites lors qu'il vous dépescha pour faire le voyage vers Madame, et moyenner son mariage, et desirant les executer, vous fit venir un matin dans son cabinet, et vous dit :

« Or sus, mon amy, c'est à ce coup que je me suis resolu de me servir de vostre personne aux plus importants conseils de mes affaires, et sur tout en celuy de mes finances. Ne me promettez vous pas d'estre bon mesnager, et que vous et moy couperons bras et jambes à madame Grivelée, comme vous m'avez dit tant de fois que cela se pouvoit faire, et par ce moyen me tirer de nécessité, et assembler des armes et des thresors à suffisance, pour rendre aux Espagnols ce qu'ils nous ont presté ? Mais afin, comme je vous l'ay toujours dit, que je vous puisse establir doucement, et sans que cela, par le despit qu'en pourroient prendre ceux du conseil de mes finances, mette aucun desordre ny confusion en mes affaires, je vous veux envoyer vers eux sous pretexte de deux affaires, dont je veux estre esclairey : puis, en faisant succeder d'autres à la suite de celles là, afin de vous faire continuer à demeurer avec eux, vous vous y familiariserez, de sorte qu'en y vivant doucement, les caressant et asseurant de vostre amitié, ils ne vous desnieront point la leur, et arrivera mesmes qu'en vous donnant quelques louanges sur la forme de vostre conduite, lors que je les mettray sur ce propos, je prendray de là occasion de vous mettre avec eux sans qu'ils s'y puissent directement opposer ny dire que vous ne sçavez rien aux finances. »

Ayant ouï patiemment tout ce discours, vous luy dites qu'il repugnoit directement à ce qu'il avoit tesmoigné vouloir faire de vous, estant impossible comme chose contre la raison et vostre propre naturel de faire amitié avec quelqu'un, et se sentir obligé à luy, et puis luy rendre de mauvais offices, ou seulement blâmer ses portemens et s'obstiner contre ses opinions ; et partant le suppliez vous de vous excuser, et vous dispenser de cet employ, almant mieux demeurer comme vous estiez que d'entrer au conseil de ses finances par obligation envers ceux qui en estoient, pour avoir apres à vous opposer à ce qu'ils feroient et diroient : « Et que voudriez

vous donc que je fisse ? vous respondit lors le Roy : quoy ! que je donnasse des batailles contre tous mes serviteurs, et renversasse toutes mes affaires pour vous establir seul en leur place, afin que toutes choses despendissent de vous, et de vos fantaisies ? C'est chose à quoy il ne vous faut pas attendre ; vous en avez aussi peu la capacité que moy la volonté ; partant, puisque vous estes si bizarre et ponctilleux, il ne faut plus parler de ce dessein, je me serviray de vous en quelqu'autre chose, où vous ne me serez pas inutile ny ne demeurerez pas oisif ; car je sçay bien que vostre esprit dans le repos, est travaillé d'impatience, et qu'il est necessaire de vous occuper. » Et sur cela vous quitta comme à demy en colere, et s'en alla chez madame de Liancourt, que l'on commençoit d'appeler marquise de Monceaux, à laquelle apparamment il conta tous ces propos, et eurent sur iceux quelques contestations, dautant que dès le lendemain matin, comme vous fustes au lever du Roy, sans plus songer à finances ny financiers, mais bien à le supplier de vous donner moyen de vous entretenir aupres de luy, n'estant pas raisonnable que vous continuassiez à le servir à vos despens, vous faisant faire tant de voyages, dont vous ne pouviez apres rien tirer des tresoriers ny quasi mesmes de vos estats et pensions, quelques ordonnances qu'il vous en fît delivrer, si tost qu'il fut habillé, il vous prit par la main, vous mena vers un coin de la chambre où il n'y avoit personne, et vous dit : « Vous ne sçavez pas : j'ay conté à ma maistresse tous les discours et contestations que nous eumes hier vous et moy, sur lesquelles nous avons eu de grandes et longues disputes, et enfin m'a mis tant de raisons en avant, qu'elle m'a quasi persuadé que vous aviez raison et moy tous les torts du monde, de vous vouloir establir en des affaires de telle importance et tant chatoüilleuses que sont les finances, par l'intervention, agreation et obligation d'aucun autre que de moy seul, comme à la vérité cela n'est pas sans apparence ; partant je suis resolu, apres en avoir dit un mot au connestable, seulement pour la forme, et afin qu'il ne se puisse joindre aux autres qui s'en plaindront, de commander dès aujourd'hui vos expéditions à Ville-roy, lequel, quant à luy, n'a pas le cœur aux finances, et aussi n'y a-il jamais rien entendu. » Si bien qu'estant peu apres entrez tous deux ensemble dans sa chambre, il tira le connestable à part et l'entretint quelque temps, et apparamment luy parla de vos anciens et signalez services, et de ce qu'à cette occasion il vouloit faire pour vous ; car

aussi-tost apres il vous appella, et puis M. de Ville-roy auquel il dit :

« M. de Ville-roy, Rosny m'a si bien servi de puis vingt-cinq ans, et prends telle confiance qu'il fera encor mieux à l'advenir, que je me suis resolu de le mettre dans le conseil des affaires, et luy donner charge en mes finances, pour servir de chasse-avant aux autres : partant faites luy toutes les expéditions necessaires pour cet effet. » Ce que monsieur le connestable fit quelque demonstration d'approuver, mais seulement par signes de la teste sans proférer une seule parole; et M. de Ville-roy ne dist autre chose au Roy, sinon qu'il executeroit ses commandemens aussi-tost qu'il auroit recouvert un formulaire des provisions des autres conseillers des finances, afin de dresser les vostres toutes semblables.

L'apres-disnée le Roy s'en alla à la chasse, et vous fustes remercier madame de Monceaux, des bons offices que le Roy vous avoit dit qu'elle vous avoit faits; et le jour suivant vous fustes visiter M. de Ville-roy pour voir s'il vous bailleroit vos provisions de luy mesme sans les demander, ou à tout le moins un brevet pour seurété d'icelles; mais tousjours il vous remettoit sur ce formulaire de provisions, vous priant de luy en bailler un, si vous en pouviez recouvrer, et qu'aussi-tost il vous expedieroit. Cela traïna ainsi trois ou quatre jours, pendant lesquels arriva un certain gentil-homme nommé d'Estiennes de la part de M. du Mayne, pour supplier Sa Majesté de luy ordonner un lieu où elle auroit agreable qu'il luy vint baiser les mains, afin de luy faire ses submissions et protestations de tres-humble subjection, et servitude, aussi bien de bouche qu'il les avoit engravées dans le cœur, jurées, mises par escrit et signées de sa main; à quoy le Roy respondit à ce gentil-homme qu'il n'eust peu arriver plus à propos, pource qu'aussi bien avoit-il envie de faire un voyage à Monceaux pour voir son parc, bastimens et jardins, et qu'il le pourroit venir trouver là, n'estant pas loin de Soissons : puis dit à M. de Beaulieu-rusé qu'il fit des lettres à M. du Mayne pour luy faire entendre sa volonté.

Le lendemain le Roy partit d'Amiens avec fort petit train, n'ayant voulu mener que vingt gentilshommes, du nombre desquels il vous commanda d'estre, s'en alla passer à Liancourt, assez belle maison appartenant à M. le premier écuyer de Liancourt, lequel l'y traitta fort bien, et aussi M. le chancelier et tous ceux du conseil des finances, auxquels le Roy avoit mandé de le venir rencontrer en ce lieu là pour leur parler de quelques affaires, comme il fit assez longue-

ment; et apres qu'ils eurent usé de toutes les belles paroles qu'il leur fut possible pour donner au Roy des assurances de leur prud'homme et sincerité à son service, et tenu quelques autres propos sur l'estat et conduite des affaires presentes, ordre des finances, et excuses des lettres qu'ils luy avoient escrites les mois passez, dont mention a esté cy-devant faite, ils luy firent une espece de plainte des mauvaises impressions que certaines personnes, à dessein de s'en prevalloir, essayoient de luy donner de leur administration, de laquelle ils pouvoient jurer de s'estre tousjours acquittez avec droieture et en bonne conscience; mais que tant de fascheux accidens avoient traversé leurs justes desseins qu'il avoit esté impossible d'en percevoir tous les fruicts qu'il y avoit eu apparence d'en esperer, et qu'il seroit encor plus difficile que des gens nouveaux et inexperimentez en telles affaires, auxquels le bruit couroit qu'il vouloit prendre toute confiance, peussent user de meilleures procedures, ny donner de plus advantageux succez aux affaires en un temps si espineux et remply de difficultez et necessitez, contre lesquels neantmoins ils estoient bien resolu, s'il plaisoit à Sa Majesté les assurer de sa continue bien-veillance et absolue confidence, de s'esvertuer en sorte (en ayant desja préparé plusieurs moyens) qu'ils les surmonteroient, mettroient les affaires en si bon estat, et useroient de telle loyauté, soin et diligence à menager son bien et à meliorer ses revenus, qu'ils luy donneroient entier contentement, et satisferoient cy-apres aux despences de sa maison et de ses gens de guerre, selon que les occasions le pourroient requerir. Ces discours et promesses tant advantageuses traverserent derechef la volonté que le Roy avoit eüe de vous autoriser dans ses finances, et eut ce prince quelque espece de regret de s'estre si avant engagé avec vous, que d'avoir commandé vos provisions, comme ce qui se dira cy-apres donne sujet de le conjecturer.

Tant y a qu'ayant sejourné un jour entier à Liancourt, et s'estant separé, luy et ceux de son conseil, avec apparence de grande satisfaction de toutes parts, eux s'en retournerent à Paris, croyans estre fort bien remis dans son esprit, et luy estimant qu'ils luy tiendroient promesse, et qu'à l'advenir il ne seroit plus travaillé de tant de necessitez, il s'en alla coucher à Monceaux, où M. du Mayne le vint trouver deux jours apres, ainsi qu'il se promenoit en l'estoille du parc, et, s'estant avancé vers luy, l'embrassa par trois fois, l'assurant qu'il estoit le bien venu, et embrassé d'aussi bon cœur que si jamais rien ne se

fut passé entr'eux. M. du Mayne mit un genouïl en terre, luy embrassa la cuisse, l'assura de sa tres-humble servitude et subjection, disant qu'il se recognoissoit grandement son obligé, tant pour l'avoir remis avec tant de douceur, de bonté et de gratifications particulieres dans son devoir, que pour l'avoir delivré de l'arrogance espagnolle et des cautelles et ruses italiennes; puis le Roy l'ayant fait lever et embrassé encor une fois, luy dit qu'il ne doutoit nullement de sa foy ny de sa parole, pource qu'un homme de bien et d'un brave courage n'avoit rien tant cher que l'observation d'icelle, le prit par la main, se mit à le promener à fort grands pas, luy monstrant ses allées et contant tous ses desseins, et les beautés et accommodemens de cette maison. M. du Mayne, qui estoit incommodé d'une sciatique, le suivoit au mieux qu'il pouvoit, mais d'assez loin, traissant une cuisse apres, fort pesamment; ce que voyant le Roy, et qu'il estoit grandement rouge, eschauffé, et souffloit à la grosse haleine, il se tourna vers vous, qu'il tenoit par l'autre main, et vous dit à l'oreille : « Si je promene encor long-temps ce gros corps icy, me voilà vangé sans grande peine de tous les maux qu'il nous a faits, car c'est un homme mort. » Et là dessus s'estant arrêté, il luy dit : « Dites le « vray, mon cousin, je vay un peu viste pour « vous, et vous ay par trop travaillé. — Par ma « foy, Sire, respondit M. du Mayne, en frappant de sa main sur son ventre, il est vray, et « vous jure que je suis si las et si hors d'haleine, « que je n'en puis plus; que si vous eussiez continué à me promener ainsi viste, car l'honneur « et la civilité ne me permettoient pas de vous « dire c'est trop, et encor moins de vous quitter, « je croy que vous m'eussiez tué sans y penser. » Lors le Roy l'embrassa, luy frappa de la main sur l'espaule, et luy dit avec une face riante, un visage ouvert et luy tendant la main : « Allez, touchez là, mon cousin, car pardieu voilà tout le mal et le desplaisir que vous recevrez jamais de moy, et de cela vous en donné-je ma foy et parole de bon cœur, lesquelles je ne violay ny violeray jamais. — Pardieu, Sire, » respondit M. du Mayne en luy baisant la main, et faisant ce qu'il pouvoit pour mettre un genouïl en terre, « je le croy ainsi, et toutes les autres choses genereuses qui se peuvent esperer du meilleur et plus brave prince de notre siecle; aussi m'avez-vous dit cela d'un si franc courage et avec une si bonne grace, que mes ressentimens et mes obligations en sont redoublées de moitié; et partant vous juré-je derechef, Sire, par le Dieu vivant, sur ma foy, mon honneur et mon salut, que je vous seray

« toute ma vie loyal sujet et fidelle serviteur, ne « vous manqueray ni abandonneray jamais, ny « n'auray de vie, ny desirs ny desseins d'importance qu'ils ne me soient suggerez par vostre « Majesté mesme, ny n'en recognoistray jamais « en d'autres, fussent-ils mes propres enfans, que « je ne m'y oppose formellement et ne vous en « donne advis aussi-tost. — Or sus, mon cousin, « repartit le Roy, je le croy; et afin que vous me « puissiez aimer et servir longuement, allez vous « en reposer, rafraischir et boire un coup au « chasteau, car vous en avez bon besoin; j'ay « du vin d'Arbois en mes offices, dont je vous en « enverray deux bouteilles, car je sçay bien « que vous ne le hayés pas; et voylà Rosny que « je vous baille pour vous accompagner, faire « l'honneur de la maison et vous mener en vostre « chambre : c'est un de mes plus anciens serveurs, et l'un de ceux qui a receu le plus de « joye de voir que vous me vouliez aimer et servir de bon cœur. » Et sur cela s'en retourna vers le profond du parc, et vous menastes M. du Mayne dans un cabinet fort couvert, car il faisoit grand chaud, où il y avoit des sieges pour reprendre un peu d'haleine; puis s'estant fait amener un cheval, il s'en alla peu apres avec vous au chasteau; il vous tint plusieurs discours à la loüange du Roy, disant que sa bonté, sa douceur et son genereux courage pouvoient aller du pair avec les plus renommez princes des siecles passez : les propos qui se passerent sur ce sujet entre vous deux seroient de trop longue deduction, aussi bien que ceux de vos civilités reciproques, partant je ne m'y arresteray pas.

Mais, en reprenant la suite de ces Memoires, nous vous ramentevrons comme estant arrivé au Roy des depeschés de M. le connestable et de Ville-roy, et ayant trouvé dans le paquet d'icelles une lettre pour vous avec vos provisions pour les finances, il retint l'un et l'autre, les donna peu apres à garder au sieur de Beringuen, avec deffence de vous les bailler ny de vous en parler en aucune façon qu'il n'eut autre commandement de luy. Mais comme ceux qui sont aupres des roys tiennent ordinairement à prudence de pouvoir trouver les occasions d'obliger ceux qu'ils voyent en faveur, il ne peut si bien cacher sa langue et luy fermer les levres, que vous ne fussiez adverty de tout, sous les sermens et protestations neantmoins que vous fistes de n'en donner rien à cognoistre au Roy, lequel ayant laissé les choses en cet estat là, sans vous faire semblant de rien, ny vous parler en aucune façon du fait des finances, un jour que de certaines personnes qui avoient accoustumé de luy donner des memoires, soit vrays, soit faux, des

choses en quoy il estoit mal servy et grandement desrobé, luy estant venu dire que l'on avoit vendu pour trente mil escus de rentes d'aydes en Normandie, à fort vil prix, et que les deniers en provenans n'avoient esté employez qu'en paiement de vielles debtes, et que les cinq grosses fermes, gabelles du sel et les parties casuelles n'estoient baillées à ferme que pour le quart de ce qu'elles valoient, d'autant que la plupart de tous ceux de son conseil des finances estoient interessez aux baulx d'icelles avec Zamet, Gondy, Cenamy, le Grand, de l'Argenterie et autres, et que s'il n'y donnoit ordre tout cela yroit encor en diminuant de jour à autre, puis que de nouveau l'on avoit accordé des rabais fort excessifs sous ombre des pertes de Calais, Ardres, Cambray et autres places; dequoy s'estant esmeu et piqué de voir continuer les mauvais mesnages dont il s'estoit plaint; il vous envoya querir, et vous dit qu'il estoit necessaire que vous vous en allassiez à Paris afin d'avoir soin de ses affaires, prendre garde qu'il ne se passast rien à son prejudice dans son conseil sans l'en advertir, et aussi pour essayer de descouvrir s'il y en avoit quelques-uns d'iceluy qui fussent interessez avec les fermiers et partisans des aydes et grosses fermes; dequoy vous vous pristez à sousrire, et luy dites que vous ne vous estimiez pas capable ny assez entendu pour le servir en choses si grandes et de telle importance, principalement n'ayant ny entrée ne seance dans son conseil des finances, et par consequent ny les moyens ny l'autorité requise pour recouvrer les pieces et papiers necessaires à faire exactement une telle verification; et partant le priez-vous de vous en vouloir excuser, et de donner cette charge à un autre plus puissant et mieux entendu aux finances que vous n'estiez pas. « Comment, » ce vous dit-il lors, feignant de ne sçavoir aucune chose de ce qu'il avoit luy mesme défendu, « Beringuen ne vous a-il pas encor baillé vos provisions pour les finances qu'il y a plus de quinze jours que je luy ai mises entre les mains, ensemble une lettre de M. de Ville-roy, avec charge de vous les delivrer? Vous trouverez que ce gros Allemand les aura oubliées; faites parler à luy, et vous en allez preparer pour aller coucher à Claye, car il vous faut diligenter. » Et aussitost il envoya querir le sieur de Beringuen, n'estimant pas qu'il vous eut adverty de ce qui s'estoit passé, luy fit bien le bec, afin de faire l'estonné lors qu'il vous apporteroit ces provisions, vous prier de vouloir excuser son oubliance, et de ne faire point semblant au Roy qu'il eut esté si long-temps sans vous bailler ces depesches; dequoy il s'acquitta fort bien, mais

non sans rire des finesses dont il usoit pour vous cacher ses irresolutions.

Tant y a, qu'ayant receu vos provisions en cette sorte, vous le fustes trouver, jouâstes fort bien vostre roolet, pour sauver le pauvre Beringuen. Et entre plusieurs propos que vous eustes ensemble à vostre parlement sur l'ordre et conduite des affaires (en quoy vous vous estendistes de sorte pour ce qui concernoit les finances, qu'il recogneut bien que vous y aviez fort estudié depuis quelque temps), vous luy distes que s'estant resolu de tenir une forme d'assemblée d'Estats, fait faire des expéditions necessaires pour cet effet en toutes les provinces, et indiqué le temps et le lieu, que vous eussiez bien désiré de pouvoir faire un voyage avant la tenuë de cette assemblée, en cinq ou six des plus grandes et prochaines generalitez, sur lesquelles ceux de ses finances jettoient le plus ordinairement leurs desseins, afin de vous instruire bien particulièrement des valeurs de toutes les sortes de ses revenus, des ameliorations qu'y s'y pouvoient faire, et de l'ordre qui s'y estoit tenu jusques à present; et voir s'il n'y auroit point moyen dans ces seules generalitez là de luy rassembler ces sommes de trois ou quatre cens mil escus, dont il avoit fait tant d'instances à ceux de son conseil, et qu'ils luy avoient tousjours dit estre chose impossible, ainsi qu'il vous l'avoit escrit lors qu'il vous avoit mandé avec madame la marquise de Monceaux; mais qu'il faudroit, par la commission qui vous en seroit donnée, vous donner pouvoir de suspendre les fonctions des officiers des finances de dessus les lieux, et d'y en commettre au lieu d'iceux de tels que bon vous sembleroit, pour ce qu'autrement vous seriez merveilleusement traversé par eux tous, et n'auriez nul moyen d'en gratifier quelques-uns en particulier, comme c'estoit chose du tout necessaire, qui vous descouvrirent tous les secrets, monopoles et divertissemens qui se faisoient au manieement de ses deniers, afin qu'à vostre retour vous le pussiez informer de tout, y faire un bon reglement, et le faire approuver et autoriser en l'assemblée qu'il vouloit faire. Ce que le Roy, apres y avoir un peu resvé et contesté quelques particularitez avec vous, afin, comme il vous le dit, d'en estre mieulx esclairey, approuva grandement, mais qu'il ne falloit pas que vous parlassiez de ces ouvertures à personne, de peur que l'on ne creust qu'elles vinssent de vous, ny qu'il fist semblant de vous y vouloir employer, mais que discutant avec les sieurs de Sancy, Schomberg, Fresne, la Grange-le-Roy, Incarville et des Barreaux, qui faisoient plus les entendus, il leur feroit cette ouverture comme ve-

nant de luy mesme, et ayant dessein de le prattiquer par toutes les provinces, et employer en ces commissions les intendans de ses finances et deux ou trois autres des plus intelligens de ses conseillers d'Estat ou maistres des requestes, afin qu'ils se doutassent tant moins qu'il pensast aucunement en vous. Toutes lesquelles choses et formes proposées vous louastes grandement au Roy, et les approuvastes comme estant, luy distes vous, tres judicieusement advisées; et en cette resolution vous en allastes à Paris prendre vostre place au conseil des affaires et finances, où vous fustes receu avec applaudissement par M. le chancelier de Chiverny, lequel, comme un madré courtisan, et un esprit souple et delié, et qui ne monstroït jamais de trouver rien mauvais des volontez absolües du prince, vous dit qu'il y avoit long-temps que cognoissant vostre bon esprit, gentil naturel, brave courage et illustre extraction, il vous avoit désiré avec eux, et que c'estoit de tels personnages que vous que le Roy devoit remplir ses conseils, qui avoient les bons advis en la bouche, la loyauté au cœur et l'exécution au bras; tous les autres vous firent aussi assez bonne reception, mais avec des mines et des sousris qui ne tesmoignoient pas trop d'allegresse.

#### CHAPITRE LXVIII.

*Voyage de Rosny dans les provinces. Examen des comptes des trésoriers et receveurs généraux. Il vient trouver le Roi à Rouen. Nouvelles intrigues contre lui. Sancy succombe dans une dispute qu'ils ont ensemble devant le Roi.*

Quelques jours apres ce qui est recité au precedent chapitre, le Roy manda tout son conseil qui estoit à Paris, ensemble M. le connestable et M. de Ville-roy, qu'il avoit laissez à Amiens, et les fist venir loger à Meaux, ausquels il fit, de si bonne sorte, et avec telle industrie et dextérité, les propositions cy-devant dites, qu'elles furent approuvées de tous, et les commissions de ceux qui seroient employez en l'exécution d'icelles dressées si amples et avec tel pouvoir par les intendans, les sieurs de Fresne et de la Grange-le-Roy, qui croyoient bien, à cause de leur pretenduë suffisance, d'estre des premiers nommez, qu'ils n'y avoient rien oublié; et lors que toutes choses furent disposées en sorte qu'il n'y avoit plus moyen d'y faire intervenir des oppositions et difficultez, il se fit apporter dix commissions en blanc, desquelles il en fit remplir deux du nom du sieur de la Grange-le-

Roy, seul de tous ceux qui pensoient y estre employez; et des autres, il en fit remplir quatre de vostre nom pour quatre generalitez, deux pour M. de Caumartin en deux autres, deux pour M. de Bisouse en deux autres, et deux autres pour deux maistres des requestes, du nom desquels il ne nous souvient pas.

Il y en eut quelques-uns aucunement estonnez de telles nominations; mais nonobstant toutes les longueurs qu'ils essayerent de faire intervenir en ces executions, afin d'avoir loisir d'avertir par les generalitez, sur tout en celles qui estoient de vostre département, vous ne laissastes pas de partir quatre jours apres, car vous vous y estiez préparé dès lors que le Roy vous en parla.

Si nous voulions icy représenter entierement et par le menu toutes les traverses qui vous furent faites, les obstacles et empeschemens qui vous furent donnez, les menaces dont l'on essaya de vous intimider, les induës vexations et violences dont l'on vous calomnia, les faux bruiets que l'on fit courir de vous, et autres semblables accidens qui vous furent occurrens pendant vostre voyage en l'exécution de vostre commission, encor qu'il y en eut de fort notables, le recit en pourroit peut-estre sembler trop long et ennuyeux à quelques-uns, aussi-bien que celui des dexterez, industries, resolutions, artifices, souplesses et promesses dont il vous fallut user pour surmonter tant de difficultez, et recouvrer si grande somme d'argent que vous fistes voicturer à Roüen.

Partant nous nous contenterons de vous ramentevoir que la pluspart de ceux du conseil, et sur tous les intendans, ne laisserent en arriere aucunes ruses ny advis à vous donner pour vous faire mal recevoir dans les grandes villes, y susciter des emotions populaires, et faire trouver tous les officiers bandez contre vous et formellement opposez à tout ce que vous voudriez entreprendre, leur mandant qu'ils ne se missent point en peine de vos boutades, d'autant que ce ne seroient que des orages et grondemens de tonnerre qui ne feroient que rouler et passer aussi-tost sans esclat ny fracas qui fust de durée, car vous vistes des lettres de messieurs de Fresne, Incarville et des Barraux qui usoient des mesmes termes. Aussi trouvastes-vous les thresoriers de France, esleus, controolleurs et greffiers des eslections et bureaux, et partie des receveurs tellement obstinez à ne vous rien dire ny monstrier aucuns estats, et à s'absenter des villes à vostre arrivée en icelles, que vous n'en peustes jamais chevir ny disposer d'un seul que vous ne les eussiez tous interdits et suspendus

de leurs offices, et choisi entr'eux deux thresoriers en chaque bureau, et deux esleuz en chaque eslection pour exercer les charges de tous, faisant publier que ceux-là seuls demeureroient en leurs offices, que l'on feroit rente de la finance des autres, et que cela seroit autorisé par l'assemblée de Rouën, qui n'estoit convoquée, ce leur faisiez vous croire, que pour supprimer cetté effrenée quantité d'officiers qui destruisoient tous les revenus du Roy, sur tout les thresoriers de France, qui ne songeoient qu'à dissiper et desrober, sans s'employer en aucune façon à ce qui estoit principalement des fonctions de leurs charges. Tellement qu'enfin estans tous ces gens portez dans l'estonnement, vous estant fait représenter non seulement tous les estats de l'année courante et precedente, et les mandemens, acquits, patentes, rescriptions et autres assignations levées sur toutes natures de deniers, mais aussi les comptes et estats des trois années precedentes, vous grapillastes si bien pour le Roy, et principalement sur les assignations levées pour vieilles debtes, remboursement de prests, anciens arrerages de gages, rentes et pensions à gens sans merite, rescriptions en blanc ou payables au porteur ou à personnes sous noms supposez, que vous rassemblastes bien cinq cens mil escus, sans que nul des autres commissaires, reservé le sieur de Caumartin qui fist venir deux cens mil livres, rapportast un seul denier au Roy, mais seulement quelques memoires de parties que l'on pourroit reculer ou retrancher si le conseil l'ordonnoit ainsi. De toutes lesquelles sommes ainsi par vous recouvertes vous fistes dresser quatre petits bordereaux pour vos quatre generalitez (que vous n'eustes pas loisir d'achever, d'autant que le Roy vous pressoit de revenir), où estoient spécifiées par receptes et natures de deniers toutes les sommes par vous voiturées et iceux signez par les huit receveurs generaux des deux années dernieres, comme leur ayant esté mis es mains par les receveurs particuliers; lesquels bordereaux vous portastes toujours sur vous, et vous vindrent bien à propos, comme il sera dit cy-apres. Vous aviez un equipage de soixante et dix charrettes chargées, pource que vous aviez esté contraint de prendre quantité de monnoye, à la suite desquels estoient les huit receveurs generaux, accompagnez d'un prevost et de trente archers pour l'escorte.

Or si vous aviez eu l'esprit travaillé durant cette odieuse commission, le Roy en eut bien sa bonne part, d'autant que ceux qui envioient ce vostre premier grand éclat de bonne fortune, en matiere de finance, où tous vouloient tous-

jours luy persuader que vous n'entendiez, ny n'entendriez jamais rien, ce mestier estant de trop difficile discussion et intelligence pour un esprit impetueux comme le vostre, qui ne vous estiez jamais meslé que de porter une harquebuse, endosser un harnois et faire l'estradiot, susciterent tous les princes et grands, et notamment monsieur le connestable et tous ceux desquels le Roy affectionnoit plus les personnes et leur assiduel service pres de la sienne, pour luy aller faire des plaintes que vous aviez pris toutes leurs assignations, et que quand l'argent que vous apportiez, dont il se faisoit tant de bruit, seroit arrivé, il n'en profiteroit pas d'un liard, pource qu'il le faudroit rendre aux uns et aux autres ausquels vous l'auriez osté; puis firent courir le bruit que vous traissiez apres vous plus de cinquante receveurs et officiers, tous prisonniers, et que, sans cette violence, vous n'eussiez pas plus apporté d'argent que les autres. Tellement que le Roy, lequel ne se fust jamais pu imaginer qu'il n'y eust quelque chose de vray en toutes ces accusations que l'on luy donnoit pour toutes certaines, ne sçavoit quasi que repliquer, jusqu'à ce que vous estant arrivé et l'estant allé trouver (apres que vous eustes mis toutes vos charrettes dans une grande cour de vostre logis chez le sieur de Martinbault et une autre proche de là, que vous aviez envoyé retenir expres pour cet effet, à la garde desquelles vous laissastes leurs commis et les archers), il vous eut dit, lors que vous luy fistes la reverence, en vous embrassant assez gratieusement, mais un peu plus froidement et avec moins de carresses que vous n'aviez esperé, luy faisant voicturer tant d'argent qu'il ne s'en estoit jamais veu une telle somme qui ne fust affectée qu'à ce qu'il luy plairoit. « Hé bien ! « Rosny, si vous avez eu bien de la peine, « comme je n'en doute point, en l'exécution de « vostre commission, croyez que je n'en ay pas « moins eu à soustenir tant de plaintes que l'on « m'a faites de tous costez, de l'argent que vous « avez pris aux uns et aux autres, qu'il leur faudra toujours rendre : car mon esprit ne sçau- « roit supporter toutes ces crieries, et aussi, à « la verité, ne seroit-il pas juste d'oster à tant « de gens de qualité ou autres, dont je ne me « puis passer pres de ma personne, ce que je « leur puis avoir ordonné pour y vivre et s'y en- « tretenir. »

« Je voy bien, Sire, luy dites vous, que l'on « vous a fait de beaux contes, et que vous y « avez un peu trop promptement adjousté foy. « L'argent que je vous ay fait voicturer est à « vous et le pouvez rendre à qui il vous plaira ;

« mais je n'estime pas que vous cognoissiez trois  
 « hommes de tous ceux qui vous en pourroient  
 « importuner. — Comment, dit le Roy (car  
 « nous estions presens à tous ces discours bien  
 « estonnez et marris tout ensemble que vous  
 « n'aviez esté plus carressé à vostre arrivée),  
 « vous n'avez pas pris les assignations de mes  
 « cousins les princes de Conty, comte de Sois-  
 « sons, duc de Mont-pensier, de mon compere  
 « le connestable et de tant d'autres personnes  
 « que vous sçavez que j'ayme particulièrement,  
 « ou desquelles je ne me puis passer, qu'il ne  
 « me souvient pas de la dixiesme partie de ceux  
 « qui sont venus crier apres moy à cette occa-  
 « sion? — Non, Sire, respondistes vous, je vous  
 « puis jurer devant Dieu que je n'ay pas apporté  
 « un seul denier de toutes les assignations qui  
 « estoient sous les noms de ces messieurs ny d'au-  
 « tres que j'aye pensé que vous cogneussiez tant  
 « soit peu, mais leur en ay à tous laissé le fonds,  
 « ne leur ayant fait autre prejudice que d'a-  
 « voir à mon arrivée arresté le payement de tou-  
 « tes assignations; mais à mon partement j'ay  
 « baillé main levée et ordonné aux receveurs de  
 « payer, suivant leurs estats, mandemens et  
 « rescriptions, toutes telles parties desquelles  
 « vous pourriez estre importuné, et m'assure  
 « que messieurs les princes du sang, monsieur  
 « le connestable, madame la marquise et les  
 « menus officiers servans près de vous, sont à  
 « present payez de leur quartier d'avril, et le  
 « seront aussi de ceux de juillet et d'octobre  
 « lors qu'ils escherront. — Mais m'assurez vous  
 « de cela? dit le Roy. — Ouy, Sire, dites vous,  
 « je vous en assure, et vous le jure en bonne  
 « foy. Hé! hé! vray Dieu, m'estimeriez vous bien  
 « si beste et si effronté que de vous dire une men-  
 « terie qui se pourroit aussi-tost verifïer.

« Pardieu! dit le Roy, voilà de meschantes  
 « gens, et d'impudentes calomnies et impostures.  
 « Mais quant à tous ces receveurs et officiers  
 « que vous amenez prisonniers à vostre suite,  
 « qu'en ferez vous? Mais que voulez vous que  
 « je fasse, moy, de receveurs et officiers prison-  
 « niers? — Sire, repartistes vous, hélas! que  
 « voudroient les autres que j'en fisse moy  
 « mesme? Il faudroit bien que j'eusse eu le sens  
 « pervers, d'en avoir usé de la façon: aussi ne  
 « sçay-je que c'est que l'on veut dire de tout  
 « cela, ny surquoy on le peut fonder, car il y a  
 « encor moins de pretexte qu'en l'autre accusa-  
 « tion. — Quoy, dit le Roy, vous n'avez pas ar-  
 « resté prisonniers plus de cinquante receveurs  
 « ou officiers? — Pardieu non! pas seulement  
 « un, Sire, luy dites vous, et s'il se trouve la  
 « moindre chose fausse de tout ce que je vous

« assure, je veux perdre vos bonnes graces, et  
 « que vous me priviez à jamais de l'honneur de  
 « vostre amitié, qui sont les choses que je tiens  
 « les plus cheres en ce monde. — Puisque vous  
 « le dites de cette façon, je le croy, dit le Roy;  
 « mais n'en parlons plus, j'en rendray de bien  
 « estonnez lors que je leur diray que toutes les  
 « choses que l'on m'avoit dit de vous sont autant  
 « de mensonges. Mais quant à l'argent que vous  
 « m'avez apporté, quelle somme y a-il bien?  
 « dites le moy à peu pres, si vous ne le sçavez  
 « du tout au vray. — Sire, dites vous, je croy  
 « qu'il s'y trouvera bien quinze cens mil livres  
 « et plus; car aussi n'a-il pas esté diverty un  
 « seul denier de tout ce que j'ay ramassé à au-  
 « cune despence, n'ayant pas mesme rien voulu  
 « prendre pour moy, soit de mes estats et pen-  
 « sions, soit des frais de mon voyage. — Or bien,  
 « dit le Roy, je feray en cela tout ce que vous  
 « voudrez, et m'avez si bien servy, que des à  
 « present je vous donne six mille escus, outre ce  
 « qui vous sera deu, et augmente vostre pension  
 « de mil francs par mois, à six cens escus, afin  
 « de vous donner moyen de dépendre. Servez  
 « moy tousjours bien et loyalement seulement  
 « comme vous avez fait jusques icy; ne vous  
 « souciez pas du reste, ne parlez à personne de  
 « ce que nous avons dit, et faites des demain  
 « mettre à part dix-huit cens escus pour chacune  
 « de nos six compagnies de Suisses, afin de leur  
 « faire faire apres demain la monstre; car je  
 « suis pressé de cette partie. »

Il se passa plusieurs autres particularitez du-  
 rant vostre séjour à Roüen, desquelles il se pour-  
 roit faire un gros volume; mais craignant qu'elles  
 ne fussent ennuyeuses, comme choses estimées  
 trop basses, nous nous reduirons à peu, les-  
 quelles, quoy qu'icelles mesmes ne soient rem-  
 plies que de nivelleries et petites picoteries de  
 serviteurs plains d'envies et de jalousies les uns  
 contre les autres, serviront à faire voir comme en  
 un miroir les fortunes des courtisans, leurs pei-  
 nes et anxietez, et comme leurs exploits, avan-  
 cemens et faveurs vont montant et declinant,  
 tantost selon la qualité de leurs merites, services  
 et capacitez, et tantost selon les imaginations,  
 humeurs et fantaisies des roys et des princes,  
 quelques fois assez bien et quelques fois assez  
 mal fondées, desquelles particularitez nous ne  
 vous en ramentevrons que trois seulement dont  
 la première fut telle.

Si-tost que vous eustes quitté le Roy, vous  
 vous en allastes à votre logis pour donner ordre  
 à vostre équipage d'argent, et employastes le  
 reste de ce soir et tout le lendemain à faire des-  
 charger vos charettes, faire mettre les caques



par ordre, selon les receptes, especes et natures de deniers, dans un lieu fort spacieux; duquel vous fistes changer les serrures et mettre de gros cadénats à trois clefs diverses, dont chacun des quatre receveurs en année en avoit une et vous l'autre, ayant auparavant fait mettre à part les dix mil huit cens escus des Suisses en grosse monnoye, ainsi que le Roy vous l'avoit commandé, et les envoyastes dès le fin matin vers leur quartier avec trois commis et dix archers d'escorte.

Or, faut-il noter qu'environ une heure apres que cette voiture fut partie, M. le Charron vous vint trouver, et vous apporta un petit billet où il n'y avoit que ce peu de paroles : « Monsieur, « je vous prie de faire promptement delivrer « trente mil escus à M. le Charron : car je m'en « vay partir pour aller faire faire monstre à nos « Suisses, et il est nécessaire que l'argent y soit « aussi-tost que moy; c'est vostre serviteur, « SANCY. »

Ayant veu ce billet, vous en demeurastes aucunement piqué; tellement que vous demandastes à M. le Charron, que vouloit dire ce billet, et de la part de qui il venoit. A quoy il vous respondit que M. de Sancy l'avoit escrit de sa propre main, et luy avoit ordonné de vous l'apporter, prendre l'argent, et le faire voicturer au quartier des Suisses. A quoy vous repartistes avec une espee d'accent d'indignation : « Hé ! « qui est-il ce M. de Sancy ? je ne cognois ny luy ny son escriture. — Comment, monsieur, ce vous dit M. le Charron en sousriant et faisant l'estonné, » vous ne cognoissez pas M. de Sancy ? Hé ! hé ! je pense que si faites. » Vos contestations là dessus furent assez longues, mais si fallut-il qu'il s'en retournast sans avoir seu tirer autre parole de vous, sinon que vous ne sçaviez qui estoit ce M. de Sancy, et que vous ne cognoissiez point ses ordonnances. Vers lequel luy s'en estant retourné, comme il le vid venir de loin, il luy cria : « Hé bien, M. le « Charron, avons nous nos trente mil escus ? — « Je ne croy pas que ce soit encore argent prest, « monsieur, respondit-il, si autre chose ne survient. — Comment, si autre chose ne survient ! « qu'est-ce à dire cela ? et que vous a dit M. de « Rosny ? — Ce qu'il m'a dit, monsieur, repli- « qua M. le Charron, fort peu de chose, mon- « sieur, mais encore ne vous l'oserois-je dire. — « Qu'entendez-vous par là ; vous ne me l'oseriez « dire ? et pourquoy non ? dites, dites hardi- « ment. » Ce que M. le Charron se voyant pressé de faire, enfin il luy dit : « Pardieu, monsieur, « je n'en ay peu tirer autre chose, sinon qu'il « ne sçavoit qui vous estiez et qu'il ne cognois-

« soit ny vous, ny vostre escriture, ni vos ordon- « nances. » Or, luy dit-il cela devant tant de gens, qu'il s'en sentit d'autant plus piqué; tellement que tout rouge en visage, et bouffi de despit et de colere de se cognoistre mesprisé par un nouveau venu, car il ne vous appelloit quasi point autrement, luy qui s'estoit tousjours main- tenu en si grande faveur et creance auprès du Roy, qu'il n'y en avoit un seul lequel ne luy cedast, et ne procedast avec luy, comme s'il eust esté chef du conseil et super-intendant des finances, son esprit vif, prompt et hardy luy faisant entreprendre toutes choses, il repartit à M. le Charron : « Hé, pardieu ! nous verrons s'il « ne sçait pas qui je suis, et s'il ne me devra « pas cognoistre. » Et de ce pas s'en alla dans Sainct Oüen pour en parler au Roy, lequel se promenant dans la gallerie, si tost qu'il le vit de loin, il luy cria : « Hé bien, Sancy, n'allez- « vous pas faire faire monstre à nos Suisses ? — « Non, je n'y vay pas, Sire, respondit-il en voix « toute mutinée, car il ne plaist pas à vostre « M. de Rosny, qui fait l'empereur dans son logis, « et dit qu'il ne cognoist personne; mais tant y a « que je ne vous vois pas en estat de pouvoir « facilement disposer de l'argent qu'il a fait « venir, estant là assis sur ces caques d'argent, « comme un singe sur son bloc, et ne sçay si « vous y aurez plus de credit que les autres. »

« Que veut dire tout cela ? dit le Roy. Je voy « bien que c'est ; l'on ne sera jamais las d'accuser « et de faire de mauvais offices à cet homme là, « pource que je me fie en luy, et qu'il me sert « bien : aussi ne sçaurois-je croire qu'il ait refusé « l'argent pour la monstre des Suisses, d'autant « qu'avant hier au soir je luy en parlay, et il ne « m'y fit aucune sorte de difficulté. — Or si vous « ne me croyez, Sire, dit M. de Sancy, puisque « vous tesmoignez d'avoir si bonne opinion de « cet homme là, demandez à M. le Charron, que « voilà, ce qui en est, et il vous assurera que je « ne suis pas menteur, ny que je n'accuse per- « sonne à tort. — Et bien-bien, dit le Roy, il le « faut ouyr ! » Et se tournant vers un de ses va- lets de chambre, il luy dit : « Biart, allez querir « M. de Rosny, et lui dites qu'il vienne tout à « cette heure parler à moy. » Ce que vous ayant fait, d'aussi loin que le Roy vous apperceut, il vous cria : « Rosny, pourquoy n'avez-vous pas « envoyé l'argent que je vous avois commandé « pour faire faire une monstre aux Suisses ? — « Sire, luy distes vous, cela est fait, et y a long- « tems que l'argent est à leur quartier entre les « mains de trois commis. — Et qu'est-ce donc « que veut dire Sancy ? repartit le Roy. — Je « vous vais dire ce qui le fait ainsi parler, Sire,

« luy dites-vous; c'est que vous m'ordonnastes  
 « avant hier au soir de preparer dix mil huit  
 « cens escus, pour faire faire une monstre à vos  
 « dix huit cens Suisses, et luy ce matin m'a  
 « envoyé un billet en forme d'ordonnance, comme  
 « si j'eusse esté un de ses clerks, ou quelque  
 « commis de thresorier, pour faire delivrer, in-  
 « continent la presente receüe, trente mille escus  
 « à M. le Charron. Or ay-je respondu, que je ne  
 « le cognoissois point; comme je ne feray ny luy,  
 « ny tout autre, dont les volonteiz seront diffé-  
 « rentes des vostres, voire n'estime pas qu'il se  
 « doive ingérer de me rien ordonner. »

« Pardieu, ce dit M. de Sancy en s'avancant  
 « vers le Roy et vous, je me soucie fort peu de  
 « vous rien ordonner, car il y a grand acquest,  
 « non pas.—Vous ferez fort bien, luy respondis-  
 « tes vous, de ne l'entreprendre pas, car vous  
 « seriez mal obey.—Or sus, tout beau, tout beau,  
 « dit le Roy, c'est trop disputé; il suffit, puis que  
 « l'argent que j'avois ordonné a esté delivré et  
 « voituré, et ne faut plus que vous contestiez si-  
 « non à qui mieux me servira.—Je n'ay point  
 « d'autre but que cela, Sire, luy respondistes vous;  
 « mais aussi en faisant bien ne veux-je pas que  
 « M. de Sancy entreprenne de superiorité sur  
 « moy; il se doit contenter que nous soyons com-  
 « pagnons, puis qu'en cela il y reçoit pour le  
 « moins autant d'honneur que je scaurois faire. »  
 Tous ceux qui estoient dans la gallerie en grand  
 nombre, dont la plupart n'estoient pas trop satis-  
 faits des boutades et rebufes de M. de Sancy,  
 ne laissoient pas neantmoins de porter envie à  
 vostre fortune naissante, faisoient des éclats de  
 rire, estans bien ayses de vos contestations, et  
 disoient les plus qualifiez les uns aux autres :  
 « Pardieu ! voilà un estourdy qui en a trouvé un  
 « autre, lequel ne luy quittera pas aysément la  
 « partie. » Les autres disoient : « M. de Sancy a  
 « trouvé chaussure à son pied, et sera bien diffi-  
 « cile que ces deux esprits durent long-temps en  
 « mesme charge sans que l'un bouleverse l'autre;  
 « mais selon l'humeur dont est le Roy, le meil-  
 « leur mesnager sera son homme. »

Vous estant ainsi separez, le Roy, en atten-  
 dant l'arrivée de tous les deputez, s'en alla pro-  
 mener à Arques et à Dieppe, tout exprés pour  
 revoir les lieux où s'estoient passez tant de com-  
 bats. Il vous avoit mené avec luy et puis revint  
 passer à Caudebec, Yvetot, et autres lieux de-  
 signez dans ces Memoires pour mesme effet; et  
 ne se passa pas ce voyage sans discourir avec tous  
 ceux de vous autres qui s'estoient trouvez lors  
 près de luy, des grandes merveilles qui s'y es-  
 toient faites.

## CHAPITRE LXIX.

*Ouverture de l'assemblée des notables dans la  
 ville de Rouen. Discours du Roi. Nouvelle  
 intrigue contre Rosny.*

Le Roy ayant reduit en son obeysance tous  
 ceux qui estoient les plus obstinez et bandez  
 contre son service, afin de pacifier en tout et  
 par tout son royaume, et de pourvoir aux de-  
 sordres et confusions de l'Estat, assembla pour  
 cet effet les notables en la ville de Rouen, où il  
 fit luy mesme l'ouverture de l'assemblée à la-  
 quelle en substance il dit (car nous estions pre-  
 sents et croyons mesmes que vous en aviez sceu  
 quelque chose auparavant, d'autant que nous  
 vous en avions entendu parler de la sorte) que,  
 comme il n'avoit nullement voulu imiter les roys  
 ses devanciers, en l'affectation et designation de  
 certains deputez particuliers à sa fantaisie, pour  
 en disposer selon icelle, soit bonne, soit mau-  
 vaise, mais en avoit deféré la nomination à ceux  
 de l'Eglise, de la noblesse et du peuple, aussi ne  
 leur vouloit-il maintenant, qu'ils estoient assem-  
 blez en corps, prescrire aucunes regles, formes,  
 bornes ny limites; mais en leur laissant la liberté  
 entiere de leurs opinions, voix, suffrages et de-  
 liberations, les prioit-il seulement d'avoir pour  
 principal but en icelles, le retablissement du  
 royaume et la dignité royale en son entier et  
 ancienne gloire, amplitude et splendeur; la paix,  
 le repos et la tranquillité publique, la descharge  
 et soulagement du peuple, et sur tout des plus  
 pauvres, lesquels en general il aymeroit comme  
 ses chers enfans; trouvoit bon qu'ils reglassent  
 et retranchassent toutes superfluités, prodigali-  
 tés et despenses non necessaires, moyennant  
 qu'auparavant ils entrassent en la parfaite cog-  
 noissance de celles qui estoient inevitables, et  
 sans lesquelles l'Estat et la dignité royale ne se  
 pouvoient conserver ny maintenir; et là dessus  
 regardassent à faire un fonds certain pour sub-  
 venir continuellement en temps et à propos à  
 icelles, soit par le mesnagement de ses revenus,  
 soit par l'amélioration et augmentation d'iceux  
 ou d'autres voyes qu'ils jugeroient les plus con-  
 venables; de quoy il leur bailloit la disposition  
 absoluë. Et combien que sa barbe grise, ses lon-  
 gues experiences, ses grands travaux, et tant de  
 perils qu'il avoit courus pour sauver l'Estat, me-  
 ritassent bien d'être exceptés des regles gene-  
 rales, que neantmoins ne vouloit-il pas laisser  
 de s'y soumettre comme les autres, tenant pour  
 une des plus infaillibles marques de la decadence  
 des royaumes et principautez, lors que les roys  
 vont mesprisant les loix, croyent de s'en pouvoir  
 dispenser, et veulent distribuer leurs faveurs,

beneficences, honneurs, charges, dignitez, offices et benefices, avec autres esgards, respects et considerations, que l'integrité, intelligence, vaillance, noblesse et loyauté d'un chacun, selon la diversité des applications, operations et fonctions necessaires, à quoy aussi estoit-il bien resolu de ne manquer pas, afin de leur servir de modelle et d'exemplaire, pour les rendre tant plus soigneux et diligens à s'acquitter de leur devoir, lequel il leur recommandoit au nom de Dieu. Et sur cela ce prince s'estant retiré avec tous ceux de son conseil qui estoient entrez avec luy, il vous commanda expressément à tous de fournir à ceux de l'assemblée tous les papiers, memoires, estats et instructions qu'ils pourroient desirer, afin qu'ils ne pussent pas former des excuses de bien faire, sur tels manquemens. Nous laisserons aux historiens tout ce qui se passa en cette assemblée, qui ne vous concerne point, et vous ramentevrons la seconde broüillerie d'importance que vous eustes, laquelle arriva ainsi.

Comme le bruit des choses, soit en bien, soit en mal, est ordinairement plus grand que la vérité, celui qui courtur des grandes sommes de deniers que vous aviez apportées, fit imaginer à plusieurs qu'elles ne se pouvoient espulser; et sur telles fantaisies il y eut tant de demandeurs, dont une partie estoient suscitez par vos envieux, que vous ne cessiez d'estre importuné, le plus souvent avec des paroles fort indiscrettes. Tellement qu'apres avoir fait faire une monstre generale à tous les gens de guerre que le Roy avoit en campagne qui estoient ceux dont vous aviez le plus de soin et vigilance, afin de mieux soulager le pauvre peuple,ourny les deniers necessaires suivant la volonté du Roy, pour mettre sur pied et en estat de service une bande de vingt pieces d'artillerie, leurs equipages doubles, des boulets et poudres pour tirer trois mille coups, des pics, pioches, palles, sacs à porter terre et autres ustancilles requises pour un grand siege; fait voicturer tout cela dans Amiens, et mis cinquante mil escus à part pour les menus plaisirs du Roy, qui ne s'estendoient gueres lors qu'en gratifications particulieres à de vieux capitaines, soldats et serviteurs siens, dont il ne vouloit pas que l'on sceust rien à cause que la plus grande partie estoient de la religion: desirant vous descharger donc de toutes ces importunités, vous resolustes de ne garder plus ces deniers dans vostre logis, ny ne vous mesler pas davantage en particulier de la distribution d'iceux, mais de les mettre és mains des tresoriers de l'espargne, qui en delivreroient leurs quittances aux receveurs generaux qui les leur four-

nistroient (lesquels d'ailleurs pressoient infiniment d'avoir congé pour aller faire leurs charges); dequoy vous fistes telles instances au Roy, qui vous disoit tousjours: « Si cet argent est une fois és mains de ces tresoriers, il sera bien tost dissipé, » qu'en fin il vous le permist, sous l'assurance que vous luy donnastes de prendre si bien garde à la distribution de ce qui resteroit, qu'il n'y auroit rien d'esgaré; et suivant cela vous fistes mettre environ quatre cens cinquante mil escus és mains des deux tresoriers, Morfontaine et Gobelin, gardant tousjours fort soigneusement les quatre bordereaux dont nous avons parlé cy-devant, pour justification de ce que vous aviez assemblé; desquels vous ayant esté demandé copie par les receveurs generaux, vous leur distes (et ce croyons nous avec artifice et dessein) que vous les aviez deschirez si tost que vous fustes arrivé à Roüen, croyant qu'ils ne servoient plus de rien, puis qu'eux mesmes y estoient en personne; ce qui estant par eux rapporté, comme vous le sceustes depuis, fut cause de la seconde broüillerie dont nous avons parlé, que vous eustes, non avec le sieur de Sancy, mais avec le sieur d'Incarville. Car comme il se fut passé environ un mois sans que vous fissiez semblant de vous mesler plus en particulier de la distribution de l'argent, de laquelle neantmoins vous faisiez tousjours des memoires de la despense, suivant les ordonnances qui s'en expedioient au conseil, il arriva que le Roy en voulant faire une entreprise d'importance sur les frontieres de Picardie, et sur celle qu'un certain particulier disoit avoir sur Hedin, comme il en parla aux sieurs de Sancy, de Schomberg et de la Grange-le-roy, pour envoyer deux cens mille escus à Amiens, ils luy respondirent, que s'il alloit tousjours ainsi viste à cet argent, il n'y en auroit tantost plus, n'estimant pas qu'il en restast plus, apres ce qu'il en demandoit, entre les mains des tresoriers; mais qu'ils s'en informeroient d'eux, et du controlleur general des finances d'Incarville, qui tenoit le registre de tout ce qui se recevoit et despendoit: lequel ayant fait venir parler au Roy, il luy dit qu'il n'estimoit pas que les deux cens mille escus que l'on luy avoit dit y fussent de reste; dequoy le Roy estonné, car vous luy aviez dit, il n'y avoit que trois jours, qu'il y avoit bien encor prés de quatre cens mil escus, il vous envoya querir et vous conta tout cela; dequoy vous vous mistes à rire et luy dites qu'il ne fit pas difficulté d'employer quatre ou cinq cens mille livres pour une si bonne affaire que celle qu'il vous avoit dite, et que vous donneriez bien ordre qu'il n'y auroit rien d'esgaré de ces deniers.

Sur lesquels propos les sieurs de Sancy, d'Incarville, d'Hudicourt, des Barraux et de Bussy, Guibert, estans arrivez, le Roy les appella et leur demanda quel argent il pouvoit bien encor avoir de reste; tous lesquels s'estans mis à regarder le sieur d'Incarville, et repliqué que c'estoit luy qui en pouvoit rendre meilleure raison, comme ayant les registres, il dit qu'il n'estimoit pas que le Roy peut plus faire estat que d'environ deux cens mille escus. « Comment deux cens mille escus? repartistes vous. Hé, « vray Dieu! que seroit devenuë encor pareille « somme ou à peu pres qu'il faut qu'il y ait de « reste? — Monsieur, repartit M. d'Incarville, « tout cela consiste à voir la recepte et la des- « pence par bons papiers bien signez, dautant « que la memoire, quelque bonne que vous la « peussiez avoir, n'estoit pas capable de retenir « tant de particularitez, et que s'il plaisoit au « Roy il luy en rapporteroit un estat au vray « conforme à ses registres, ausquels il ne s'estoit « encor jamais trouvé d'erreur. — Et bien, ce « dit le Roy (craignant comme il vous le dit « apres que vous vous fussiez abusé, voyant que « tant de gens faisoient si bonne mine et par- « loient si assurément), dressez cet estat au- « jourd'huy et me l'apportez demain au matin. » Et si-tost qu'ils furent sortis, Sa Majesté vous dit tout ce que dessus, et que vous prissiez bien garde à ne vous estre pas abusé et à ne contester pas contre tant de gens des choses que vous ne peussiez verifler. « Sire, luy respondites vous, « je vous supplie croire que je ne dis rien que je « ne justifie fort bien, si ce n'est qu'ils ayent « fait faire des despences depuis que l'argent « n'est plus à mon logis, que vous ny moy n'a- « vons point sceuës, ny qui n'ont point esté re- « soluës en plain conseil, car j'ay esté soigneux « de tout escrire. — Mais regardez bien, vous « dit le Roy, à ne vous tromper pas; car aussi « ne vouldis-je pas que vous ostassiez l'argent de « vostre logis, et serez cause du mal s'ils ont « diverty quelque chose. — Sire, dites vous, ne « vous mettez point en peine de cela, car j'ay « tous mes papiers prêts pour verifler ce que « je dis. — Or bien, dit le Roy, preparez-vous « pour demain matin. » Auquel estans revenus tous ces messieurs avec leurs estats, le sieur d'Incarville monstra au Roy un estat fort embarrassé pour le regard de la recepte à cause de la diversité des natures de deniers et des années dont vous aviez ramassé l'argent, croyant, comme les receveurs leur avoient dit, que vous n'aviez nuls papiers pour la faire voir au vray par pieces signées, et que le Roy ne se donnant pas loisir d'assister à de si longs examens, ils en feroient

remettre la preuve sur ce qu'en demanderoient les receveurs generaux, qui feroient reduire l'affaire, comme ils le desiroient, à longs jours.

Mais si tost que vous eustes veu ces estats ainsi enveloppez, vous leur dites qu'il ne falloit faire qu'un bref estat de la recepte où toutes natures fussent confonduës, afin d'en faire voir la somme totale au Roy sans aucune peine; dautant, que par la despence n'ayant fait payer une seule partie sans son commandement, tant que l'argent avoit esté en vostre logis, et le semblable ayant deu avoir esté observé depuis, Sa Majesté se souviendrait bien de toutes. « Partant, « monsieur, dites vous au sieur d'Incarville, sca- « chons seulement combien vous estimez que « monte le total des deniers que j'ay fait voictu- « rer, car pour le surplus je n'en suis pas en « peine. — Je n'ay pas fait le calcul de tant de « diverses sortes de natures de deniers, à cause « de la diversité des eslections et receptes. — « Mais encore, repartit le Roy, combien monte « toute la recepte? car je vous tiens si intelligent « et diligent, que vous ne l'ignorez pas. » Sur- quoy se voyant ainsi pressé, il dit : « J'estime, « Sire, qu'elle peut monter à douze cens mil « livres ou environ, qui est une somme tellement « immense pour ceux qui n'ont jamais veu que « le revenu de leur maison, qu'il leur semble « qu'elle ne scauroit jamais estre toute employée. « — Monsieur, luy repartistes vous un peu en « colere, tout ce que vous dites est bon, mais je « maintiens, puis qu'il en faut venir si avant, « qu'il y a faute de plus de deux à trois cens mil « livres, et m'assure que si les receveurs, es « mains desquels j'ay fait remettre les deniers, « estoient icy, qu'ils ne le nieroit pas, et suis « bien marry que je n'ay retenu les recepissez « par inventaire qu'ils m'en avoient donnez. — « Et bien, monsieur, puis que vous n'en avez « rien pour le justifier, vous dit la Grange-le-roy « (car M. de Sancy ne disoit mot), il faut donc, « sans davantage contester, faire une bonne dé- « pesche aux receveurs generaux, afin qu'ils « envoient un estat de ce qu'ils ont fourny à « l'espargne avec l'ampliation de leurs quittan- « ces. — Non, non, monsieur, luy repartistes « vous, il ne faut pas remettre cette affaire à si « longs jours. — Et bien donc, monsieur, dit le « sieur d'Incarville, s'il vous plaist prendre la « peine de venir en mon logis, dautant que les « registres du Roy n'en sortent point, nous veri- « fierons vous et moy sur iceux les estats que « j'ay presentement apportez au Roy, lesquels, « à la verité, seroient de trop ennuyeux examen « devant Sa Majesté, et tousjours n'en croiriez « vous rien que sur pieces signées, que vous

« verrez toutes escrites de d'Arnault et de l'Hoste  
« que vous aimez, et lors que je vous auray  
« rendu le cœur content, vous tirerez celui du  
« Roy de la déflance où vous le jettez sans grand  
« sujet. »

Vous estant donc ainsi separez des autres et acheminez ensemble à son logis, il vous fit voir et feuilleter entierement ses registres, sur lesquels ayant calculé toutes les sommes employées en recepte sous le nom des voictures que vous aviez fait faire, vous trouvastes qu'il s'en faloit, comme il avoit dit, environ quatre-vingt mil escus de vostre compte. Surquoy vous ayant demandé si vous aviez maintenant quelque chose à douter : « Non, » luy respondites vous, aucunement mutiné, dequoy outre la perte du Roy l'on essayoit à diminuer vos services, « je n'ay rien à douter, car je suis tres-assuré que vos registres sont defectueux et faux, me ressouvenant fort bien des recouvrements et voictures de deniers que j'ay fait faire, desquels il n'a esté distribué, outre les despences ordonnées au conseil, dont j'ay un bref estat, que les six mil escus que j'ay pris, tant pour les frais de mon voyage que pour le don de quatre mil escus qu'il a pleu au Roy de me faire, duquel vous avez contrerollé l'acquit. — Monsieur, ce vous dit-il, vous devez plutost croire à mes registres qu'à vostre memoire, n'y en ayant point de si bonne qui ne se trompe quelquefois, et si vous n'estes encor assez esclaircy, envoyons, comme il a esté dit devant le Roy, vers les receveurs generaux qui nous manderont la verité de tout, sans plus travailler l'esprit du Roy là dessus. — Or bien, monsieur, luy dites vous, vous ferez telles depesches qu'il vous plaira; mais, pour moy, je m'en vay trouver le Roy, auquel je diray ce que j'en pense, et luy feray voir dequoy le justifier. » Comme vous fistes, et afin d'abreger, car ces discours de contestations ont desja esté trop longs, nous vous ramentevrons seulement que vous montrastes au Roy l'estat signé par les receveurs generaux, qu'il fist aussi-tost voir par le sieur d'Incarville; lequel se voyant ainsi surpris fit rapporter par un de ses commis, fait au badinage, une feuille de papier separée des registres, où cette somme estoit escrite; lequel, rejetant sur luy mesme la faute, dit que n'ayant peu trouver la clef du coffre des registres, et les receveurs estans pressez de partir, jusques à n'avoir pas voulu attendre que l'on eust recouvert les clefs du coffre aux registres, que le sieur l'Hoste avoit emportées s'en allant à la ville, il avoit escrite cette somme si notable sur une simple feuille de papier à part sans en donner aucun

avis au sieur d'Incarville, avec dessein neant moins de luy en parler, et de l'inscrire aux registres si tost qu'il auroit recouvert les livres du contrerolle des finances; mais que depuis, pour ce que l'on l'avoit envoyé chez le sieur d'Hudicourt, il avoit oublié de faire l'un et l'autre, dont il estoit fort marry; suppliant tres-humblement Sa Majesté et son maistre aussi de l'excuser et luy vouloir pardonner cette faute, commise plutost par inadvertance et peu de memoire, que par malice ny aucune mauvaise intention.

A quoy le Roy, qui cognut tres-bien, à ce qu'il vous dit apres, que toutes ces belles paroles d'innocence et d'oubliance n'estoient que purs desguisemens et artifices, et que ce commis avoit esté dressé au badinage pour garantir son maistre de reproche, et couvrir le manquement trop grossier dont il avoit usé, ne responoit jamais autre chose sinon : « Hé bien, hé bien, c'est assez, il n'en faut plus parler; nous avons tous raison, puis que mes quatre-vingts dix mille escus sont recouverts; mais une autre fois que contrerolleurs et commis soient plus soigneux et diligens; car je ne veux plus que l'on m'en joüe de telles. » Et sur cela, sans attendre leur replique, il s'en alla au devant de monsieur le connestable qu'il voyoit entrer par la porte du bout d'embas de la gallerie, auquel il cria de fort loin (car nous qui estions au fond d'icelle l'entendismes tous) : « Vous ne sçavez pas, mon compere, il y a bien des nouvelles (car il luy avoit plusieurs fois parlé de cette affaire, et de toutes vos altercations sur icelle); en fin nostre homme a eu raison, mais aussi n'ay-je pas eu tort, puis que nos quatre-vingts dix mil escus qui ont esté contestez trois jours durant, se sont finalement retrouvez, et cela m'apprend de qui je me dois fier ou désier. »

Nous avons esté un peu longs sur ces picoteries et disputes d'argent, pleines de redites et paroles frivoles, nous le confessons, Monseigneur, mais il nous eut esté fort difficile, à nostre avis, d'user de moins de langage pour bien démesler l'embarrasement de telles ruses et finesses, et faire suffisamment voir et comprendre par quelles causes et sur quels fondemens les grandes creances et autoritez des autres du conseil commencerent à decliner, les vostres petites à s'augmenter, et le grand establissement où nous vous avons veu depuis, à s'enraciner et prendre pied ferme.

Quant à la troisieme affaire publique de celles qui se passerent en l'assemblée de Rouën, et qui fut des plus importantes à l'Estat, de laquelle nous avons dit que nous ferions quelque men-

tion, d'autant que vos interests particuliers s'y trouverent meslez, encor que de son entrée elle fut cause que le Roy augmentast de confiance en vostre endroit, et qu'en son issuë, pour ce que les succez en furent tels que vous les aviez denoncez, elle le fit entrer en une meilleure opinion que jamais de vostre jugement et de vostre esprit, voire luy fit croire, comme il le disoit souvent, qu'il y avoit je ne sçay quel bon-heur qui accompagnoit les affaires où vous estiez employé, si ne fut-ce neantmoins par aucune brouillerie qui intervint entre les autres du conseil et vous, comme il estoit arrivé de ces deux precedentes, mais pour une simple difference d'opinions qui se forma entr'eux et vous, sur des propositions faites à Sa Majesté par les deputez de l'assemblée, en laquelle, quoy que chacun de vous insistast sur son avis et demeurast ferme en iceluy, le tout se passa neantmoins sans aigreurs ny altercations quelconques, les uns et les autres trouvant plus à propos de remettre les preuves de la solidité de vos divers conseils, aux effets et à l'evenement, que d'en disputer d'avantage.

#### CHAPITRE LXX.

*Réflexions sur les États généraux. Opérations des notables. Conseil de Raison. Système suivi par le Roi, d'après les avis secrets de Rosny.*

Le discours que nous allons vous faire au present chapitre de ce qui se traita en l'assemblée des notables tenuë à Roüen, servira principalement pour monstrier quels fruicts ont esté percus de celles du passé, quels on les tira de celle-cy et quels on les doit esperer de celles de l'advenir; et pour vous ramentevoir aucunes des plus importantes particularitez de cette dernière affaire dont nous avons dit vouloir faire mention à cause des interests de l'Estat et des vôtres, à l'examiner dès sa source et origine, selon ses avancemens, progresz, consultations, resolutions, executions, evenemens et succez : de tous lesquels, si l'on apporte les considerations requises et qu'ils soient appropriez à leur droict usage, il se pourra tirer plusieurs bons exemples et salutaires enseignemens pour le regime et la conduite d'un Estat.

Nous vous prions donc de nous excuser si pour choses tant notables, nous nous dispensons d'user de digressions et de narrations qui nous esloignent de nostre principal sujet, qui est le recit des actions particulieres du Roy, et tirent hors du fil et de l'ordre que nous nous estions

proposé en faisant ces recueils tirez des memoires de vostre vie, et en ce faisant vous disons que mille sortes d'exemples et d'experiences nous apprennent qu'il est non seulement bien difficile, mais quasi impossible en toute nombreuse assemblée de personnes qualifiées et autorisées pour proposer et former loix, ordre, reglemens et constitutions d'Estat, de pouvoir faire en sorte que ceux dont elle seroit composée fussent tous de mesmes humeurs, naturels et complexions, eussent mesmes buts, desseins et desirs, prissent mesmes formes, voyes et chemins pour y parvenir, et fussent également spirituels, intelligens, sages, sçavans, experimentez et judicieux, afin d'éviter toutes sortes d'animosités, envies, arrogances, mespris, contrarietez, altercations et diversité de conclusions; lesquelles ont esté et seront incessamment cause que telles assemblées ne produiront jamais rien de bien proportionné, tant pour le Souverain que pour ses sujets, d'autant que si telles assemblées se tiennent sous un Roy puissant, absolu, et qui s'en veuille faire croire, sans autres esgards ny considerations que de ses seules fantaisies, passions et cupiditez, lesquelles en la plupart des puissans dominateurs des nations ne sont pas le plus souvent trop bien réglées, il ne se resoudra et encor moins executera-il jamais rien qui n'aboutisse à l'esclavitude des plus grands, signalez et qualifiez personnages de l'Estat, et à la foule, surcharge et oppression des peuples; que d'austre costé, si telle vocation se fait sous un Roy niais, idiot, foible, hay et mesprisé, duquel l'Estat soit rempli de partialitez toutes formées, troubles et dissensions subsistantes, ou que les grands ou les peuples soient puissans, autorisez et tumultueux, comme nous avons veu la France sous Henry III, toutes propositions, deliberations, conclusions et operations ne se termineront enfin qu'à la fless-trissure du Souverain, avilissement de l'autorité royale, diminution des revenus de l'Estat, accroissement de pouvoir és plus audacieux et tumultueux, et reculement de toutes esperances de paix, repos et tranquillité bien asseurée, ainsi que les regnes d'un Childeric l'Enfroqué, Louys le Faineant, Charles le Simple, Jean l'Estourdy et Charles le Fou, en servent de preuves à nostre nation, sans aller chercher des exemples hors icelle; et par iceux peut-on juger facilement que pour esperer de bons et avantageux succez de telles assemblées, il seroit besoin de ces tres-bonnes et tres-heureuses, mais tres-rares conjonctures, esquelles les souverains et les sujets s'aiment mutuellement et sont esgalement bons, sages, et gardent les proportions

requises entre le superieur et l'inferieur, pour vivre heureux et contens l'un de l'autre, auquel cas aussi les assemblées, pour faire nouvelles loix et nouveaux reglemens, ne se trouveront gueres frequentes; d'autant qu'alors les roys doivent et peuvent pourvoir d'eux memes à toutes choses, bien assurez qu'ils sont de n'y estre jamais traversez, les peuples ayans toute confiance en eux pour avoir toujours veu marcher la prudence, la douceur et l'equanimité devant toutes leurs œuvres.

Mais laissant ces discours generaux des droicts et prosperes comportemens des souverains et des sujets les uns envers les autres, pour revenir au particulier de cette assemblée de Roüen, touchant les deputez d'icelle, il faut sçavoir qu'ils ne voulurent nullement estre distinguez par les trois ordres accoustumez, de crainte que les nobles ne pretendissent de faire un corps separé, auquel ils ne voulussent pas admettre les officiers, mais les reduire au rang du peuple, et par ainsi les precéder, soit en general, soit en particulier : ils prindrent un titre nouveau et se firent appeler messieurs les notables, lesquels estoient quasi tous ou d'eglise, ou de judicature, ou de finance, ou d'escritoire; car quant aux gentils-hommes, ils estoient en si petit nombre, et tellement mesprisez et leurs rangs rabaissez par le fast et l'ostentation des officiers, que rien ne leur estoit defferé, estans leurs propositions, voix et suffrages rendus comme vains et inutiles; ce que vous devez aussi bien sçavoir que nous, croyans que vous n'aurez pas oublié un certain discours qui fut tenu à vostre table sur ce sujet par M. de Sigongnes, lequel nous sembla ne vous desplaire pas, car nous y estions presens, et l'un de nous quatre vous donnoit à boire, lequel neantmoins nous n'insérerons pas icy, afin de ne fascher personne, mais seulement la conclusion d'iceluy qui fut que, par tous ces discours il estoit facile à juger que l'on ne sçau-roit establir de meilleurs ordres et reglemens en un Estat, que d'enjoindre à chacun de se mesler seulement de sa vacation, profession et mestier, et de s'estudier continuellement à se rendre bien expert en iceux. Le contre-pied desquelles maximes ayant esté pris par ces messieurs les notables de Roüen, ils s'amuserent à compiler tant de sortes de loix et d'ordonnances, si fort disproportionnées aux temps presens, à l'estat des affaires, aux dispositions des esprits des nobles et des peuples, et à l'humeur et inclination mesme du prince (laquelle dans un Estat purement monarchique est toujours le grand ressort et le premier mobile de tous establissemens et observations), que tout leur labeur ne servit qu'à grossir les tomes des ordonnances, tant par les défauts cy-dessus remarquez, par les difficultez qui se rencontrerent aux simples et premiers essais des executions de leurs fantaisies, par les accidens de la surprise d'Amiens, que par les changemens survenus aux affaires à cause du bon ordre et du bon mesnage dont vous usastes, de l'heureuse reprise d'Amiens, de la conquête de toute la Bretagne, et de la paix conclüe avec l'Espagne; et pour cette cause, laissant tous ces inutiles reglemens, pour servir de matiere à ceux qui se plaisent de grossir leurs escrits de vaines ceremonies, nous nous contenterons de vous ramentevoir seulement trois de leurs propositions, d'autant que l'on leur donna des noms specieux, que l'on essaya de les mettre en pratique, et qu'elles receurent mesme quelque espece d'establissement, à sçavoir :

« La premiere, la composition d'un certain conseil, dont la nomination des conseillers appartiendroit à l'assemblée, et en suite aux cours souveraines, et seroit nommé le Conseil de Raison, d'autant qu'il la rendroit à un chacun. La seconde, la separation de tous les revenus du royaume en deux esgales portions, l'une desquelles montant, selon la presupposition de ces venerables notables, à cinq millions d'escus, seroit affectée au payement des gages d'officiers, fiefs et aumosnes, rentes, arrerages d'icelles, œuvres publiques et debtes du general et des particuliers, dont ce Conseil de Raison auroit la disposition et ordination absoluë, sans que le Roy, son conseil, ny les cours souveraines y eussent aucun pouvoir, ny qu'ils en pussent rien divertir, changer ny innover, laissant l'autre portion qui reviendroit à la mesme somme de cinq millions au Roy, et à ceux de son conseil des finances, pour les despences de sa personne royale, sa maison, gens de guerre, artillerie, fortifications, garnisons, ambassades, pensions, dons, presens, recompenses, bien-faits, bastimens et menus plaisirs de Sa Majesté. Et la troisieme, l'imposition du sol pour livre, qui se leveroit sur toutes sortes de vivres, denrées et marchandises, tant menuës pussent elles estre, qui seroient vendües en détail, du revenu de laquelle, les auteurs d'icelle, comme s'ils eussent trouvé la pierre philosophale, ou les mines du Perou, faisoient une grande parade, publiant que tel revenu monteroit à plus de cinq millions de livres, faisant un certain calcul imaginaire sur la despence des particuliers, lequel aussi à l'execution se trouva ridicule et impertinent.

Lesquelles trois propositions ayant été représentées en particulier au Roy, par messieurs les notables, et par iceluy renvoyées à ceux de son conseil pour y estre examinées, il s'esleva une si grande rumeur entr'eux sur cette formation de Conseil de Raison et separation des revenus du royaume en deux esgales portions, que tous ensemble l'estant venu trouver ils se mirent à parler de ses affaires, en foule, chacun croyant se monstrier le meilleur serviteur du Roy et de l'Estat, qui plus rejetteroit telles requisitions et leur donneroit des blâmes, disant, que si elles estoient approuvées, ce seroit dresser autel contre autel, former un Estat dans l'Estat, établir deux roys, et partager l'autorité royale; lesquelles allegations le Roy, du commencement, trouvoit tres-bien fondées, se resolvoit d'y déferer grandement et de rejeter absolument telles ouvertures tant pernicieuses que l'on luy avoit représentées, jusques à ce qu'ayant pour la forme voulu faire opiner d'ordre, et chacun s'estant fort estendu en son opinion, avec amplification de plusieurs raisons fort specieuses, quand ce vint à vous à parler, vous dites seulement, mais avec des sousris et une merveilleuse froideur, que tous les autres, et en particulier et en foule, avoient si bien dit et allegué de tant belles raisons, que n'ayant rien à y adjouster, vous ne pouviez estre d'autre advis, que de l'advis commun : de laquelle procedure toute contraire à vostre coûtume qui n'estoit pas d'observer un timide silence, lors qu'il estoit question des interets du Roy et de l'Estat, le Roy demeura tout estonné au commencement; mais peu apres ayant bien considéré les mines et sousris que vous aviez faits, il se vint à douter que vous aviez respondu de cette sorte plustost par maniere d'acquit que pour declarer quels estoient vos sentimens, et conclud finalement en son esprit, comme il le vous dit depuis, que vous reserviez quelque chose d'importance dans le vostre, avec dessein de luy représenter en particulier, et en estre informé avant que rien conclurre : il dit seulement, qu'en affaires de si grand poids, il estoit bien à propos d'en opiner deux fois, et partant remettoit-il la resolution finale d'icelle au lendemain, vous ordonnant à tous de vous trouver pour cet effet au mesme lieu et à la mesme heure; et ayant ainsi separé le conseil sans rien resoudre absolument, il s'en alla disner.

Mais les tables ne furent pas plustost levées, qu'il ne vous envoyast querir, et vous ayant tiré à part et demandé pour quelle cause vous n'estiez pas de l'opinion des autres qu'il avoit trouvée tres-bien fondée, ayant bien cogné à vos

mines et froideurs, quelque conformité que vous eussiez tesmoignée vouloir apporter à l'opinion commune, que la vostre particuliere neantmoins n'estoit pas telle en verité, que ce n'estoit pas en semblables occasions tant importantes où il falloit faire le bizarre et le retenu; et partant vous commandoit-il de luy en parler librement, et de ne luy desguiser nuls de vos sentimens.

A quoy vous luy respondistes, apres quelques petites ceremonies, et des excuses pleines de bienveillance, afin de luy faire tant plustost agréer et approuver vostre dire, que l'impertinence des propositions et absurditez des demandes de ces messieurs les notables d'une part, et de l'autre les ridicules apprehensions que messieurs de son conseil avoient tesmoignées de l'establissement d'icelles, vous avoient saisi d'un égal estonnement, ne vous pouvant assez émerveiller comment des gens si sages, tant expérimentez, et qui faisoient si fort les entendus en finance, n'avoient mieux examiné et digéré des affaires de si grande importance, avant que de luy en parler, et mieux jugé de l'impossible execution et pratique d'icelles, par leur tant grande disproportion avec la forme d'un Estat purement monarchique, le courage, la prudence et l'expérience d'un grand Roy, la qualité des affaires occurrentes, la condition des temps, et la disposition des esprits du siecle, par lesquelles observations ils eussent suffisamment recogneu que toutes ces ouvertures n'estant que pures chimeres et frivoles imaginations de cerveaux passans outre leurs portées, elles se détruiraient d'elles-mêmes, par les difficultez ausquelles leur propre nature les assujettissoit dès les premiers essais de les mettre en execution, usage et pratique.

« Voire, dit le Roy, mais quelles seuretez y a-t-il à prendre en l'opinion de vous seul, contre la mienne propre, et celle de tous les mieux sensez de mon conseil et autres mes serviteurs? et sur quelles raisons et fondemens appuyez-vous votre dire pour m'y faire adjouster foy, et croire qu'en le suivant, je n'encourray ny blâme ny perte? » A quoy vous repartistes, qu'ayant meurement considéré toutes ces propositions et icelles rapportées à ce que vous aviez remarqué des humeurs d'un chacun, et recogneu dans les provinces, lors qu'il vous y avoit envoyé, les mauvais mesnages qui s'y faisoient quasi en toutes ces sortes de revenus, vous en aviez tiré des conclusions infaillibles et formé des raisons telles et si bien fondées, qu'il luy seroit facile de juger de leur solidité, et pour cette cause n'en aviez vous voulu faire aucun semblant en opinant dans son conseil, afin aussi, comme tous vos desseins tendoient tousjours à



sa seule glorification, de les réserver à luy seul en particulier, et que par ce moyen les produisant et mettant en avant comme venantes de son seul jugement et propre volonté (sans apparence d'aucune instigation, ny persuasion d'autrui, voire mesme contre les advs de tous ceux de son conseil, lesquels estoient desja suffisamment divulguez pour ne les ignorer pas), le gré, la grace, la louange et l'honneur infaillible, qui se remporteroit d'une tant amiable et liberale concession et judicieuse procedure, demeurassent toutes siennes : dequoy vous estiez bien assuré qu'il ne feroit plus aucun doute, si tost qu'il lui plairoit, suivant la vivacité de son esprit et solidité de son jugement, d'entrer en la consideration des achopemens et difficultez de ces nominations de conseillers en ce chimerique conseil, desquelles ils ne s'accorderoient jamais pour en venir à des conclusions de bouche, que ce ne fut avec mille discords et envies dans le cœur de ceux qui auroient eu le moins de voix, des contrarietez d'opinions où ils tomberoient lors qu'il seroit question de former des estats pour la distribution des deniers, desquels la disposition leur seroit laissée; mais sur tout de l'impossibilité à faire des justes evaluations de tous les revenus du Royaume en l'estat où estoient de present les affaires, y en ayant plusieurs qui augmentent tousjours et d'autres qui diminueront incessamment, voire peut-estre s'aneantiront du tout; et partant leur sera-il impossible de s'empescher d'y commettre mille sortes d'erreurs qui tourneront à leur reproche, honte et dommage, et par consequent seront suivis d'autant de penitences, regrets et despiets qu'ils s'en sont imaginez de profits, de gloire et d'autorité, estant manifeste qu'il estoit du tout hors de leur puissance d'empescher qu'ayant fait leurs evaluations, comme il n'en falloit rien dire qu'elles n'eussent par eux esté arrestées et signées, Sa Majesté ne choisist telle partie qu'il luy plairoit pour composer son estat de cinq millions d'escus, desquels ils avoient désiré qu'elle se contentast; en laquelle se comportant selon les designations qui en seront par vous faites et à luy baillées, vous luy donniez vostre foy et vostre parole, comme de chose dont vous estiez tres-assuré, que sa portion augmenteroit d'un tiers avant peu de temps et seroit toute en deniers de facile recouvrement, exempts de non valeurs et de toutes oppressions, et doleances des peuples, au lieu que ce qui leur seroit laissé yroit tousjours en diminuant et se trouveroit si difficile à lever, qu'ils attireroient sur eux toutes les haynes et crieries des peuples, et les plaintes, reproches et importunités des demandeurs; de-

quoy l'exemple de l'imposition du sol pour livre, duquel ils faisoient telle parade que de l'estimer à plus de cinq millions de livres, en servoit desja et serviroit encor mieux à l'advenir de preuve indubitable, leur en laissant faire à eux mesmes l'establissement, et destinant les deniers qui en proviendroient à partie de leur portion; lesquels, quoy qu'ils peussent dire et faire, ne leur reviendroient jamais à deux cens mil escus, tous frais deduits. Et prenant, au lieu d'icelle, jusques à la concurrence de leur estimation, les revenus des provinces engagez, les parties casuelles, gabelles, forests, domaines mal alienez, cinq grosses fermes, impositions des rivières, droicts d'embocheure, patentes des provinces d'Estats, et les aydes anciennes, sur le pied de leurs valeurs presentes, il n'y avoit point de doute que tels revenus ne doublassent, voire triplassent avant qu'il fut deux ans : dequoy vous ne faisiez nulle difficulté de luy respondre, pource que vous aviez desja des gens solvables en main qui vous en avoient signé des offres, ausquels vous aviez deffendu d'en parler à qui que ce pust estre, et partant le suppliez vous, au nom de Dieu, de ne demeurer plus en suspens là dessus, mais de se vouloir accommoder à toutes leurs demandes avec demonstration, neantmoins, que le faisant ainsi contre l'advis de son conseil, c'estoit pour d'autant mieux faire paroistre de quelle affection il aimoit ses peuples et combien il estoit religieux observateur de la parole qu'il leur avoit donnée, dès la premiere seance de l'assemblée, de vouloir approuver toutes leurs propositions et defferer entierement à leurs conseils. Vous luy alleguastes encor qu'il estoit contre le sens commun de s'imaginer, qu'un conseil composé de tant de diverses testes ramassées de diverses provinces, tous estans de diverses humeurs, et ayant divers interets, tant pour leur regard que celui de leurs provinces, sans pouvoir estre reglez par l'absolué autorité de quelqu'un, pust subsister trois mois seulement, et tant d'autres raisons trop longues à déduire, qu'elles se trouverent de suffisante effiace en l'esprit du Roy pour le disposer à prendre une finale resolution contraire aux advs de tout son conseil, qui fut assemblé le lendemain suivant ce qu'il avoit ordonné, voire en apparence le vostre mesme (car vous fustes de l'advis commun, afin de mieux couvrir vostre dessein), et le faire aller le jour suivant en l'assemblée où il leur declara qu'il approuvoit les trois ouvertures qui luy avoient esté faites de leur part, tant il desiroit de gratifier ses sujets, defferer aux conseils des plus sages et témoigner qu'il aimoit ses peuples comme ses

chers enfans : et partant les prioit-il de nommer, dans vingt-quatre heures, ceux qu'ils estimoient devoir estre de ce Conseil de Raison, qu'ils avoient demandé tant instamment, et dresser, pareil temps apres, un estat d'estimation de tous les revenus de France auquel fust comprise cette nouvelle imposition du sol pour livre par eux tant industrieusement inventée; sur lequel, apres, il formeroit le partage qu'ils avoient désiré estre fait entr'eux et luy, n'y ayant point de doute que, puis qu'ils faisoient les lots d'estimation, que ce ne fust à luy à choisir ce qu'il jugeroit estre le plus commode pour ses gens de guerre, esquels consistoit la deffence de l'Estat et la seureté d'eux tous, estant tres-ayse qu'il en fust ainsi usé, afin de faire voir qui seroient les plus equitables et meilleurs ménagers de luy et de son conseil, ou d'eux.

Nous nous sommes desja tant estendus en diverses narrations sur le sujet de cette assemblée, que nous en estans quasi rendus ennuyeux à nous mesmes, nous nous abstiendrons du recit des embarras où les députez d'icelle se trouverent, en l'observation des formes à eux prescrites par le Roy, ne pouvant dire qu'elles ne fussent tres-justes, et des altercations qui intervindrent entr'eux sur l'exécution de leurs propres propositions, dautant qu'ils commencerent à y reconnoistre plusieurs difficultez non imaginées et divers inconveniens non preveus, desquels il sera parlé cy-apres.

## CHAPITRE LXXI.

### *Réconciliation de Rosny avec Madame sœur du Roi.*

L'assemblée des Estats tenue à Roüen estant don ainsi finie et terminée, l'on parla de s'en aller à Paris, avant lequel voyage vous nous contastes vostre reconciliation avec Madame, sœur du Roy, dont, s'il nous en souvient bien, les causes et la maniere furent telles.

Dix ou douze jours apres que vous vous fustes separé de cette princesse en si mauvais message qu'il a esté dit cy-devant, elle receut divers advis, comme vous l'avez sceu depuis par madame de Pangeas, de ses serviteurs en cour, mais principalement du sieur de la Varenne, lequel elle sçavoit l'affectionner infiniment, ne s'estant jamais présenté occasion qu'il ne luy eust tesmoigné, pour ce, comme il le publoit luy-mesme, que l'ayant servie en l'un des sept offices de sa maison, elle l'avoit donné et continuellement recommandé au Roy, et par consequent esté en partie cause de cette grande for-

tune qu'il avoit faite pour un homme de sa sorte; par lesquels advis l'on luy écrivoit, que tant s'en falloit que le Roy vous eust fait quelque espece de mauvais visage à vostre retour, pour les plaintes qu'elle luy avoit faites de vous, que tout au contraire vous n'en aviez jamais esté mieux receu, davantage carressé, ny plus particulièrement entretenu, et qu'il ne falloit point qu'elle estimast de vous pouvoir rendre un mauvais office en se plaignant des paroles que vous luy aviez tenuës, dautant que le Roy y prenoit davantage de confiance, sçachant bien que vous aviez resisté plus de trois jours à ce voyage vers elle, et ne vous y estiez resolu que par force, et apres qu'il se fut mis plusieurs fois en colere de vos refus, voire n'estiez jamais voulu partir qu'il ne vous eut baillé escrit, et signé de sa main, tout ce qu'il vous donnoit charge de luy dire, en quoy il estoit certain que vous n'aviez rien outrepassé, mais diminué et adoucy les choses autant qu'il vous avoit esté possible; et partant n'avoit-elle pas sujet de se monstrier tant animée contre vous et de se vouloir rendre irreconciliable envers un homme qui alloit avoir tout credit aux finances, et par les mains duquel toutes ses assignations auroient à passer : tellement qu'il est à presupposer que dès cette heure-là, cette princesse commença de minuter les moyens de se remettre en bonne intelligence avec vous, qu'en effet elle avoit affectionné de longuemain, et commença d'en donner quelques indices par le moyen de madame vostre femme, laquelle vous aviez laissée en couche à Moret.

Car, comme estant allée au presche à Fontaine-bleau, un jour que Madame gardoit le lit, elle s'en voulut retourner sans la voir, madame de Pangeas luy fit grande instance de vouloir disner avec les dames, ou à tout le moins ne partir point sans voir Madame, et qu'elle se fust excusée de l'un et de l'autre, disant n'y avoir point d'apparence qu'elle pust estre bien venuë en la maison d'une princesse qui vouloit tant de mal à son mary, que de luy en avoir deffendu l'entrée, et ainsi s'en retournast disner à Moret. Cela ayant esté rapporté à Madame, la seconde fois que madame vostre femme vint au presche, elle luy envoya dire qu'elle ne fist plus de difficulté de la venir voir, et qu'elle seroit la tres-bien venuë. Ce qu'ayant fait, elle luy dit qu'elle n'estoit pas si mauvaise ny si vindicative qu'elle l'avoit estimée, et que ses courroux ne passoient pas outre la personne qui l'avoit offensée, pour l'estendre sur tous ceux qui lui appartenoint, et qui ne pouvoient mais de ses malices; qu'elle la tenoit pour bonne femme, et partant ne laisseroit pas de l'aymer, quelque mal que vous luy

eussiez fait, sans vous en avoir donné sujet, qu'elle eust plutôt attendu de tout autre que de vous, veu le long-temps qu'il y avoit que vous vous cognoissiez, ayans esté comme nourris ensemble dès l'enfance, avec des témoignages reciproques, vous de luy estre affectonné serviteur, et elle de vos meilleures amies, que vous deviez estre souvenu, avant que d'entreprendre une commission que vous ne doutiez point qui ne l'offençast grandement, veu les assurances toutes contraires que vous luy aviez données à Chartres, de l'honneur et des faveurs qu'elle vous avoit autrefois faites à Pau, de vous avoir mis de son balet, et pris la peine de vous en monstrier elle-mesme les pas et les figures, et encor à Corase, chez monsieur de Miossens, lors qu'il y fut couru une bague, qu'elle s'estoit offerte de donner, laquelle voyant que c'estoit vous qui l'aviez gagnée, et se doutant bien que vous la luy viendriez, sans aucune doute, demander, elle ne voulut pas bailler celle qu'elle avoit préparée pour ce mesme effect, qui estoit de mediocre valeur; mais elle s'en estoit fait apporter une autre, qui valoit bien deux mil escus, qu'elle vous donna, se souvenant de la bienveillance que la Reine sa mere portoit à vostre pere, qui l'avoit portée plusieurs fois entre ses bras.

Toutes lesquelles particularitez et autres semblables luy avoient fait prendre une entiere confiance de vous, en quoy elle avoit esté grandement deceuë, et falloit bien que vous eussiez plusieurs desseins qu'elle ne pouvoit en aucune façon comprendre, de vous estre si mal gouverné en son endroit, qu'il luy estoit impossible qu'elle vous pust jamais vouloir de bien; mais qu'elle ne vouloit pas laisser neantmoins de la bien aimer et de la chérir tousjours lors qu'elle la viendroit voir, ce qu'elle la prioit de faire le plus souvent qu'il luy seroit possible, tant pource qu'elle la trouvoit tres-bonne femme, de tres-bonne compagnie et que son humeur luy plaisoit extrêmement, que pour l'amour de M. de Saint Martin son oncle, qui avoit esté premier gentilhomme de la chambre du Roy son frere, dont la femme estoit de sa parenté estant sœur de M. de Miossens.

En suite de ces bonnes et agreables paroles, madame vostre femme continua tousjours de la voir, luy parlant de fois à autre de vous, à quoy elle y respondoit avec des apparences d'un esprit qui avoit passé ses coleres et despit, et qui eust esté bien ayse de n'en estre pas entré si avant, tant qu'un jour durant l'assemblée de Rouën, sur ce que vous luy aviez facilité le payement de plusieurs siennes assignations, madame vostre femme l'estant venuë voir au lit, elle l'en re-

mercia, luy disant qu'elle ne doutoit point que ce ne fust elle qui fust cause de ce bon office, et qu'elle sçavoit bien qu'il ne venoit pas de vous. Surquoy madame vostre femme ayant dit que si, et qu'elle n'en avoit pas seulement jamais ouy parler, voire la pouvant assurer que vous recherchiez toutes occasions de luy faire service et luy dire franchement, que si elle sçavoit bien avec quelle contrainte vous vous estiez chargé de cette tant fascheuse commission dont elle se plaignoit, et de quels artifices l'on usoit pour vous entretenir mal avec elle, qu'elle changeroit d'opinion. Surquoy elle luy repartist qu'elle sçavoit de toutes ces choses plus qu'elle ne s'imaginait, et que pour cette cause, avant qu'il fut peu de temps, elle en tromperoit tel qui la vouloit rendre du tout irreconciliable. Surquoy M. de la Force, qui estoit à la ruelle du lit, proche de madame vostre femme, luy dit, qu'une bonne et genereuse action comme celle-là ne se devoit point differer davantage, et qu'elle n'eust sceu prendre un temps plus à propos, ny faire chose qui estonnast davantage ceux qui ne la desiroient pas, que de vous trouver causant avec elle à la ruelle de son lit lors qu'ils y arriveroient; à quoy ayant esté confortée par mesdames de Rohan, de la Barre et de Pangeas, et disposée par les supplications que luy en fit madame vostre femme, elle s'y resolut aussitost, luy commanda de vous envoyer querir et donna toute assurance d'oublier tout le passé, de vous bien recevoir, vous aimer et tenir au nombre de ses bons serviteurs et meilleurs amys. Ce qui succeda si heureusement que depuis nul ne luy fust plus confident: de quoy tous les tesmoignages particuliers seroient trop longs à reciter, et partant nous nous contenterons de vous en ramenter deux, dont l'un fut la proposition qu'elle vous fit faire du mariage de M. de Rohan et de mademoiselle vostre fille aînée, avec offre d'y contribuer tout ce que vous desireriez de son bien, puis qu'aussi bien luy estoit-il si proche qu'il estoit presomptif heritier du Roy son frere et d'elle du costé de Navarre, s'ils mourroient sans enfans; ce que le Roy, pour de certaines causes trop longues à reciter, empecha pour lors, et depuis le fist luy mesme; et l'autre que, quand elle sortit hors de France, pour aller en Lorraine, elle dit ne s'en aller contente de la Cour ny s'y sentir obligée qu'à trois personnes, dont vous en estiez l'une.

Après le démeslement de toutes ces sortes d'affaires cy-devant recitées et de plusieurs autres que nous obmettons pour briefveté, le Roy et toute la Cour s'en retournerent à Paris le..... du mois de.....

## CHAPITRE LXXII.

*Divers événemens arrivés dans les provinces en 1595 et 1596. Principaux souhaits de Henri IV.*

Nous laisserons, ainsi que de coutume, à ceux qui feront l'histoire générale, toutes les particularitez arrivées en diverses provinces du royaume durant les années 1595 et 1596, esquelles vous n'avez eu aucune part, quelques importantes et signalées qu'elles puissent avoir esté, comme furent les desseins, entreprises et faits d'armes de messieurs le mareschal d'Aumont, de Saint Luc et autres serviteurs du Roy en Bretagne, contre M. de Mercure et les siens.

La desroute des Croquans en Limousin, au nombre de quinze mil, par M. d'Abeins.

Les sieges et combats faits en la mesme province, entre messieurs de Vantadour, de la Roche-foucault, Chasteau-neuf, Saint Angel, Loustanges et Chambaret serviteurs du Roy, d'une part, et messieurs de Pompadour, Rustignac, Saint Chamant, Mont-pesac et la Chappelle-Biron, d'autre part, tous ligueurs, esquels ces derniers eurent plusieurs avantages; et y fut le comte de la Roche-foucault tué.

Le siege de Blaye. La prise d'Agen.

Les desseins, entreprises et factions guerrieres qui se passerent en Piedmont et Dauphiné, sous les conmandemens de messieurs Lesdiguières et de Crequy contre les partisans de Savoye et d'Espagne.

Et les divers combats et executions de Provence, desquels nous avons desja fait ample mention cy-devant, entre messieurs de Savoye et les siens, d'une part, et messieurs de Guyse et d'Espéron, de l'autre; lesquels avoient tous trois divers desseins, divers partisans, et diverses armées.

Le premier continuant à essayer d'empieter sur la Provence, et les deux autres à l'en empêcher, et encor entr'eux mesme mal d'accord, à se diminuer l'un l'autre, et voir à qui demeureroit le gouvernement de cette province, dont ils estoient tous deux pourvus; enquoy M. de Guyse eut enfin meilleure fortune, d'autant que se trouvant assisté de la comtesse de Sault, qui avoit en icelle des partisans, et de messieurs d'Ornano et de Lesdiguières, mais qui bien plus estoit, du nom, de l'autorité, de l'argent et des armes du Roy; M. d'Espéron, en ayant esté comme chassé, il fut contraint de recourir au Roy, par lettres de grandes submissions et profondes humilitez, qui eut les advis de toutes ces choses estant à Gaillon, desquels il receut une grande joye. Et cette occasion de M. d'Espéron,

ainsi humilié, nous remet en memoire certaines particularitez touchant la personne du Roy, dont il ne nous estoit pas souvenu en leur temps, quoy qu'elles soient dignes de remarque et meritassent bien de vous estre ramentuës, et de parvenir à la cognoissance de ceux qui reverront la generosité de ce brave prince, aymeront sa bonté, et liront en ces Memoires ses actions plus particulieres avec attention.

Comme donc apres que Sa Majesté ayant receu telles depeschés, se fut promenéé assez longuement dans les hauts jardins en terrasses environnées de galeries de cette magnifique maison de Gaillon, avec messieurs le chancelier, le grand escuyer, d'O, de Fresnea et Forget, et, selon qu'il se peut conjecturer, fait lire toutes ces lettres venuës de Provence, discours avec eux sur icelles, et qu'ils se furent retirés, elle entra seule dans la galerie du bout de ce jardin où elle vous fist venir, et en se promenant vous dit : « Voilà des nouvelles que je viens de recevoir de Provence, desquelles je m'assure que vous ne serez gueres moins joyeux et resjouy que moy. Mais, avant que de vous les montrer, je vous veux faire un discours d'assez longue haleine, lequel je vous commande, sur l'affection que vous me portez, de tenir secret, des diverses fantaisies qui de long-temps me sont venuës à diverses fois en l'esprit, desquelles les succez de Provence m'ont fait ressouvenir, voyant quelque espece d'acheminement à leur accomplissement. »

« Vous devez donc sçavoir, qu'entre plusieurs desirs que j'ay eus et souhaits que j'ay faits, il y en a eu dix principaux, pour le succes desquels j'ay le plus souvent et le plus instamment fait humbles prieres à Dieu. »

« Le premier, afin qu'il luy pleust de m'assister tousjours en cette vie, et m'user de misericorde à la fin d'icelle.

« Le second, que je ne fusse jamais estropié, mais tousjours maintenu en vigueur et santé de corps et d'esprit.

« Le troisieme, de faire heureusement subsister la religion et le party pour la défence duquel je combattois lors et employois les biens et la vie.

« Le quatrieme, qu'il me delivrast de ma femme et que j'en pusse recouvrer une autre de qualité convenable à ma naissance, qui fut de douce et complaisante humeur, qui m'aimast, que je pusse aimer, et me donnast des enfans de si bonne heure qu'il me restast encor assez d'années pour les instruire à ma mode, afin d'en faire de braves, galands et habiles princes.

« Le cinquiesme, de parvenir à la couronne

de France, puis que celui qui m'y precedoit ne pouvoit avoir d'enfans, et rendre mon regne assez long et prospere pour restablir ce royaume en sa splendeur, afin de pouvoir soulager et rendre heureux les peuples d'iceluy, et faire du bien et de l'honneur à ceux qui m'auroient loyalement et utilement servy.

« Le sixiesme, de recouvrer mon royaume de Navarre, ou à tout le moins conquerir la Flandres et l'Artois, afin que par traité de compensation je les puisse rejoindre en propriété au corps de l'Estat.

« Le septiesme, de gagner en personne une bataille contre le roy d'Espagne, pour revanche de tant de maux qu'il m'a faits, et une contre le Turc, où je fusse general des armées chretiennes, ayant tousjours eu cette emulation contre dom Juan, bastard d'Austrie, afin de rendre ma gloire et ma renommée celebre dans le monde.

« Le huitiesme, de pouvoir aneantir non la religion reformée, car j'ay esté trop bien servy et assisté en mes angoisses et tribulations de plusieurs qui en font profession, mais la faction huguenotte, que messieurs de Bouillon et de la Trimouille essayent de rallumer et rendre plus mutine et tumultueuse que jamais; sans rien entreprendre neantmoins par la rigueur et violence des armes ny des persecutions, quoy que peut-estre cela ne me seroit pas impossible, mais bien d'y parvenir sans ruyner plusieurs provinces, perdre la bien-veillance de plusieurs miens serviteurs, affoiblir grandement le royaume en le diminuant tellement de moyens et de soldats, que je n'oserois jamais plus rien entreprendre de glorieux ny d'honorable hors de France.

« Le neufiesme, de pouvoir executer, avant que mourir, deux certains magnifiques desseins que j'ay en l'esprit, sans les avoir jamais communiqué à personne, desquels, quoy que je ne doute point qu'ils ne vous resjouyissent grandement, je ne vous diray maintenant aucune chose, ny peut-estre jamais à personne, que je ne voye, par une paix universelle bien estable dans tout mon royaume, des dispositions à l'infailible execution d'iceux.

« Et le dixiesme, lequel, quoy que ce ne soit que nivellerie au prix des autres, ne laisse pas de me toucher grandement l'esprit, de pouvoir reduire à ma mercy, avec un sujet legitime et apparent d'en faire punition fort exemplaire, ceux des miens qui malicieusement ont, sans cesser, envié et traversé ma fortune et mon contentement, dont les trois principaux, et qui m'ont fait le plus d'ennuy, sont messieurs de Bouillon, d'Espernon et de la Trimouille, non

en intention de m'en venger severement, mais seulement de leur ramentevoir toutes les escarpades et malices noires qu'ils m'ont faites, et leur faire experimenter ma singuliere clemence, douceur et bonté, en leur pardonnant de bonne grace, pour esprouver si une tant grande benignité et singuliere beneficence pourroit (ce que je n'attends pas neantmoins de leurs mauvais naturels envers moy) changer leurs cœurs et faire en sorte qu'ils m'aimassent veritablement et servissent loyalement, comme j'ay une certaine inclination à faire cas d'eux, et de certaines bonnes parties qui sont en leurs personnes qui ne me peut quitter. » Et le Roy finissant là son propos, vous mit en main les depesches de Provence pour les lire (desquelles nous ne ferons nulle mention, pource qu'il en a esté assez parlé cy-devant par prevention et suite de temps), et s'en alla monter à cheval pour aller à la chasse.

### CHAPITRE LXXIII.

*Préparatifs pour le siege d'Arras. Travaux de Rosny pour acquérir la science des finances. Fin du Conseil de Raison.*

Nous avons au chapitre precedent, fait mention du voyage que l'on projettoit de faire à Paris; et maintenant, pour entrer aux particularitez des choses qui se passerent en suite d'iceluy, nous vous dirons, Monseigneur, que le Roy, son conseil, la cour, les notables et leur Conseil de Raison estans tous arrivez en cette grande ville, chacun d'iceux commença de mettre l'esprit et les mains en œuvre pour l'avancement de ce qu'il avoit le plus en affection : à sçavoir, le Roy à composer son armée et faire toutes autres provisions necessaires pour le siege d'Arras, lequel il avoit resolu, par l'advise de ses plus confidens et intelligens serviteurs faisant profession des armes (car es conseils pour semblables expéditions n'appelloit-il jamais les gens de robe longue ny d'escritoire, mais le seul secretaire qui avoit le departement de la guerre); et, suivant ce dessein, commanda-il à ceux de son conseil d'assembler quantité d'argent, artilleries, armes, munitions de guerre, outils et autres instrumens propres pour un grand siege; vous ordonna pour solliciter le recouvrement de toutes ces choses et d'en estre comme le chasseur-avant dans son conseil, et de plus vous chargea en particulier de luy trouver des marchands solvables et bien entendus, pour fournir cinquante mille pains par jour, en telle des villes de Sainct Quentin, Peronne, Corbie, Amiens,

Abbeville, Montreuil et Boulongne, et dix lieues à l'environ d'icelles, que bon luy sembleroit, nommant ainsi tant de lieux divers, afin de mettre en doute son dessein. En quoy vous travaillastes, de sorte que dans douze jours vous passastes contract pour cet effet avec les sieurs de Santeny, Robin de Tours, Maulaville et Lambert, chevalier du guet à Orléans, à prix si raisonnable, que le Roy en loüoit tout haut vous et les munitionnaires aussi, lesquels neantmoins, à cause de l'accident de la surprise d'Amiens, ne laisserent pas de bien gagner en ce marché, pource qu'ils se trouverent deschargez des frais des charrois et du port des mulets.

Pendant tous ces emplois, vous ne laissastes pas, selon vostre coustume, de vacquer tousjours à diverses sortes de recherches, dans les registres du conseil d'estat, des parlemens, chambre des comptes, cour des aydes, anciens secretaires d'estat (car quant à ceux qui estoient en charge, vous ne pustes jamais rien tirer d'eux), bureaux des thresoriers de France, thresoriers de l'espargne et chambre du tresor, et dans les tomes des ordonnances, desquels vous faisiez des extraits et dressiez des instructions et memoires touchant les affaires d'estat et sur tout des finances, afin de pouvoir establir en l'administration d'icelles de tels ordres et reglemens, comme la suite de ces Memoires fera voir que vous n'y aviez pas manqué, que les revenus de France pussent estre mis à leur juste valeur, les deniers royaux si bien mesnagez, et iceux si bien dispensez, qu'il ne s'en fist aucun divertissement, et par ce moyen tous les assignez fussent entierement payez. En quoy vous travaillastes avec tant de soin, diligence et assiduité, aussi bien la nuit que le jour, sans vous donner quasi loisir de prendre ny repos ny repas, que nous, qui estions à vostre suite et service, et tous autres qui entendoient parler d'un tel labeur, demeuroident esmerveillez des peines et fatigues de corps et d'esprit que vous preniez si continuellement, et que les plus autorisez dans le conseil du Roy, voyans bien que telles procedures, proportionnées à son humeur active et laborieuse, desquelles il n'estoit pas ignorant, vous confirmeroit en une si haute creance et confidence dans son esprit, qu'enfin vous deviendriez absolu dans cette charge, se reprochoient les uns aux autres (ainsi que M. de Maisses, qui estoit vostre intime amy, vous assura leur en avoir entendu parler de la sorte) la trop foible resistance et opposition dont ils avoient usé à l'entremise aux affaires d'un esprit ambitieux, actif, entreprenant et indus-

trieux, tel qu'ils recognoissoient bien avoir tousjours esté le vostre, lequel, pour ne démentir leur opinion, voulut aussi travailler avec le controolleur general, les intendans des finances, les thresoriers de l'espargne, les thresoriers de France et les receveurs generaux, à la confection tant de l'estat general des finances que des particuliers, és generalitez pour l'année 1597 lors courante. Mais quoy que vous maniassiez vous mesme quasi tousjours la plume et le jetton, si ne pustes vous si bien faire (comme nous vous avons oüy dire que vous le reconneustes depuis, et y donnastes bon ordre en Bretagne au second estat en l'année 1598) qu'ils ne vous en fissent passer quinze pour douze, s'estans tous accordez à se reserver une bonne somme dont ils pussent disposer sans vous, ny empescher qu'il ne se trouvast encor près de deux millions de livres de faute de fonds dans l'Estat, ce qui vous estonna un peu du commencement, car c'estoit le premier estat des finances où vous eussiez mis la main à bon escient. Voyant plusieurs parties des despences fort considerables qui demeuroident sans assignation, vous vous opiniastres à ne vouloir plus souffrir (comme c'estoit leur bonne coustume, afin de laisser la liberté aux tresoriers de l'espargne et receveurs generaux de preferer celles que bon leur sembleroit) que l'on chargeast une recepte de plus grandes despences que le fond d'icelle, tellement que pour remedier à tout cela, vous retirastes des mains du duc de Florence, sous le nom de Gondy et de Zamet, Senamy, le Grand, Parent et autres anciens partisans, les parties casuelles, gabelles, cinq grosses fermes et peages des rivières qu'ils tenoient à vil prix, par l'intelligence d'aucuns du conseil, lesquels y avoient part, et en augmentastes le prix de plus de vos deux millions de faute de fonds; ce que ceux du conseil essayèrent bien d'empescher, mais vous y fistes intervenir le Roy, lequel, par vous adverty d'un tant evident profit, y apporta son autorité toute entiere et s'en voulut faire croire.

Le Conseil de Raison, formé par les notables de Roüen, essayant aussi de sa part à mettre en reputation leur charge et donner un bon acheminement, fit l'establissement de ses seances dans l'evesché de Paris, et M. le cardinal de Gondy, chef d'iceluy, estimant qu'il seroit aussi bon ménager des deniers publics, qu'il l'avoit esté des siens particuliers. Mais tout aussi-tost qu'ils vindrent à l'essay de faire valoir les parties de recepte, entrer en exacte cognoissance des debtes et autres despences dont ils s'estoient chargez, mettre papiers sur table et entrer aux supputations pour l'année 1597, ils se jurerent

bien loin des imaginations qui leur estoient montées en l'esprit.

En premier lieu, à cause des grandes difficultés qu'ils rencontroient en l'establissement de ce beau sol pour livre, dont ils avoient fait tant de cas au Roy, et luy avoient voulu bailler pour cinq millions de livres, somme, disoient-ils, suffisante pour entretenir tousjours vingt mil hommes de pied, et à trouver gens qui en-voulussent faire le recouvrement.

Secondement, pource que tant plus ils alloient en avant, plus arrivoit-il de diminution aux natures de revenus qui leur avoient esté delaissez et d'augmentations en leurs despençes, se descouvrant journellement de nouveaux demandeurs qui venoient à eux avec de grandes importunités, croyant selon leurs premieres jactances, lors de leurs propositions, d'y trouver une ressource de finances perpetuelle. De sorte qu'au lieu d'establir quelque bon ordre, et de former un estat general sur le pied de leurs cinq millions d'or imaginez, et travailler à surmonter peu à peu les difficultez qui survenoient és choses dépendantes de leur administration, ils consumerent plusieurs sepmaines à disputer les uns contre les autres, s'entreprôchant la peu judicieuse estimation qu'ils avoient faite des revenus du royaume, par le moyen de laquelle le Roy, beaucoup mieux informé et conseillé par gens fins et rusez, et plus intelligens aux finances qu'ils n'estoient tous, avoit sceu si bien choisir, qu'ils se trouvoient circonvenus de plus de cinq millions de livres par an, les parties qu'il avoit retenües augmentans journellement, et celles qu'il leur avoit laissées diminuant incessamment; et passerent ces contestations si avant, que ne se pouvant de rien accorder, chacun pensant plus sçavoir ou plus valoir que son compagnon, enfin ils envoyèrent supplier vous et M. d'Incarville de vouloir venir dans leur conseil, et prendre la peine d'y assister une fois la sepmaine, afin de leur aider de vos bons advis et conseils, leur donner moyen de meliorer les revenus qui leur avoient esté laissez, comme ils avoient appris que vous aviez fait ceux du Roy, et mettre fin aux altercations et difficultez qui survenoient à tous propos entr'eux et en leurs affaires. De quoy vous les refusastes tousjours absolument, avec des excuses fort specieuses, disant n'avoir desja que trop d'affaires sur les bras, à cause de leurs belles propositions, qui avoient reduit le Roy à partager son royaume avec eux par égale portion, sans vous charger davantage ny vous mesler de conseiller de si grands personnages, qui avoient plus que vous de science, d'intelligence et de capacité; jusques à ce que s'en estans ad-

dressez au Roy mesme, il vous commanda de les contenter en cela, dequoy neantmoins ils ne tirerent pas grande assistance, dautant que, comme nous vous l'avons oüy dire depuis, vous ne leur disiez rien dont ils pussent tirer quelque esclarcissement, estant mesme bien aise de les voir tomber dans les difficultez que vous aviez predites au Roy de devoir arriver, lesquelles pour cette raison vous taschiez plutost à augmenter qu'à diminuer.

Sur la narration de toutes lesquelles altercations, intrigues et embarras nous ne nous ar-  
resterons point davantage, craignant de vous ennuyer, et ceux qui prendront la peine de lire ces Memoires, et nous contenterons de vous ramentevoir qu'au bout de deux ou trois mois, tous ces messieurs du Conseil d'imaginaire raison, furent mis à raison; dautant qu'ils vindrent trouver le Roy en corps, auquel ils tindrent de si grands discours, que chacun en estoit ennuyé, la substance et sommaire desquels fut qu'ils reconnoissoient maintenant que leur Conseil de Raison auroit eu enfin grand tort de vouloir partager avec luy, qui en sçavoit plus qu'eux tous, et qui sçauroit mieux mesnager tout le royaume que tous les siens, ensemble une simple partie d'iceluy; et partant le supplioient-ils tres-humblement de les vouloir décharger de leur commission, rejoindre tous ses revenus ensemble, et disposer du total selon son équité, intelligence et prudence accoustumée. A quoy ils furent receus, après quelques difficultez que le Roy en fit, afin de faire mieux valoir la marchandise, bien aise de voir que vos predictions et ses intentions eussent eu tant heureux succez.

#### CHAPITRE LXXIV.

*Mademoiselle de Rosny demandée pour M. de Laval. Fêtes à la Cour. Prise d'Amiens par les Espagnols. Rosny chargé par le Roi de trouver des ressources pour recouvrer cette place. Son plan.*

[1597] Le Roy, voyant que les notables et conseil de raison avoient esté contrains de se departir de leurs projets dont ils n'avoient peu venir à bout par raison, pour estre trop fantastiques et sans fondement, et que vos propositions, comme plus solides et judicieuses, avoient esté suivies, il conceut une telle bonne opinion de vostre sain et fort jugement, ainsi qu'il avoit fait et faisoit à mesure que vous en rendiez de nouvelles preuves; et le faisiez paroistre aux occasions, qu'il ne se passoit quasi aucune affaire de consequence que vostre bon advis et conseil n'y intervint; ce

qui accreut et augmenta de jour en jour vostre credit, reputation et autorité, en telle sorte que celui là s'estimoit grandement heureux qui avoit part en vos bonnes graces et pouvoit entrer en vostre alliance : laquelle M. et madame de Fervagues desirans prendre pour l'appuy qu'ils en esperoient, et comme estant l'une des plus honorables de la Cour, vous vindrent voir plusieurs fois pour vous prier d'avoir agreable la recherche qu'ils faisoient de mademoiselle vostre fille pour M. de Laval. Surquoy vous leur dites qu'ils vous faisoient trop d'honneur, veu le peu de mariage que vous faisiez estat de donner à vostre fille, quoy que vous en eussiez desja reçu une semblable de la part de Madame, sœur du Roy, qui vous en avoit fait parler pour M. de Rohan, qui avoit l'honneur de luy estre si proche que d'estre son heritier, si le Roy son frere et elle n'avoient point d'enfans, mais qu'à l'un ny à l'autre ne pouviez vous entendre, quelque avantageux que vous pussent estre les partys, que cela ne vint du Roy mesme, qui vous avoit dit vouloir marier vos enfans, et defendu d'entendre à aucun party que luy mesme ne le vous proposast ; et partant les suppliez-vous de ne trouver point mauvais si vous les renvoyez à la volonté de Sa Majesté, à laquelle ils ne faillirent pas d'en parler le lendemain, et le supplier de leur estre favorable en l'alliance qu'ils desiroient prendre en vostre maison : ce qu'il leur promit d'autant plus librement, qu'estant lors mal satisfait de madame de Rohan, il ne vouloit nullement que vostre fille espousast son fils, comme il vous en parla en ces termes deux jours après, et vous commanda de traiter avec madame de Fervagues pour le mariage du sien, ce que vous fistes.

Pendant que tous ces entrelas et envelopemens d'affaires publiques, cy-devant spécifiées, se demenoient et démesloient entre ces grands conseillers de raison sans raison, les princes, les seigneurs et la noblesse, tant gentils-hommes que de ville, s'occupoient à divers sortes d'ébats, plaisirs et passe-temps ordinaires et bien seans à la jeunesse, faisans diverses parties, les uns pour rompre en lice, les autres courre la bague, combattre à la barriere, jouer au balon, au palemil et à la paume, demener l'amour aux dames, dancer et faire momeries et mascarades, tant que sur la fin de toutes ces recreations, M. le mareschal de Biron, qui estoit esperduëment amoureux d'une des plus belles dames de la Cour, qui avoit un vieil mary de grande qualité que vous cognoistrez bien par là sans que nous le nommions, se resolut de dancer un balet pour l'amour d'elle, à cause du baptesme de son fils ; auquel ayant convié douze des plus galands

de la Cour, ils vindrent tous treize vous faire tant d'instance de vouloir estre de la partie et faire le quatorziesme, qu'il vous fut impossible de vous en excuser, joint qu'ils vous le firent commander par le Roy ; et sembla que comme ce balet fut de tres-belle invention et des mieux dancez, aussi devoit-il estre la fin de vos resjouyssances, d'autant qu'il arriva de tels accidens qu'ils donnerent bien d'autres pensées, soucis, peines et fatigues au Roy, à ses serviteurs et à tout le royaume ; lequel desastre (estimé irremediable par aucuns qui l'eussent bien désiré tel, lesquels, n'aymans pas plus que de raison la personne du Roy ny sa gloire, n'aprehendoient rien tant que de voir une tranquillité bien assurée dans l'Estat, et un restablissement absolu des affaires d'iceluy) fit decouvrir plusieurs mauvaises volontez et pernicious desseins dans lesquels se trouverent enveloppez catholiques et huguenots, comme il en sera cy-apres dit quelque chose, lors du recit du siege d'Amiens, de la prise duquel les nouvelles vous furent apportées en cette sorte la nuit mesme de vostre balet.

Comme donc apres que vous l'eustes dancé, jusques à deux heures apres minuit, vous vous fussiez separez et retirez chacun à son logis, vous n'eustes pas esté une heure et demie au lict, que l'on vous vint éveiller et advertir que le sieur de Beringuen vous venoit parler de la part du Roy, lequel estant quasi aussi-tost entré en vostre chambre, vous dit tout effrayé, en disant de fois à autre que tout estoit perdu, que le Roy vous demandoit, vous priant de vous lever promptement et de le venir trouver en diligence, pour ce qu'il luy estoit arrivé un mal-heur qui luy faisoit avoir besoin plus que jamais de tous ses bons serviteurs, et que la premiere chose qu'il avoit faite, si tost qu'il en avoit eu les nouvelles, c'estoit de luy commander de vous venir querir et de ne revenir point qu'avec vous.

« Mais quoy, mon amy, repartistes vous, le Roy est-il malade ? car ce seroit là un mal-heur irremediable pour la France si nous venions à le perdre ; mais pourveu que Dieu le conserve et qu'il se porte bien, il ne scauroit arriver si grand desastre que par le moyen de son courage et de ses autres vertus, il n'y soit apporté quelque remede. Partant dites moy librement, mon amy, quel est cét accident qui vous afflige si fort et rend si esperdu. » A quoy il respondit, que le Roy luy avoit défendu de vous le dire, afin de voir la diversité des opinions de ses principaux serviteurs, sur la premiere nouvelle d'un si grand mal-heur tant inopinément survenu, vous suppliant de ne l'en



enquerir point davantage, mais seulement de vous haster de venir au Louvre, pour ce qu'il sçavoit bien que le Roy estoit en impatience de vostre arrivée, n'ayant garde, quant à luy, de vous dire plus rien au prejudice des défences de Sa Majesté; qu'il luy avoit fait une bonne reprimande, sur tout ce qu'il vous dit un jour de vos lettres de provision en finance estant à Monceaux, ne pouvant s'imaginer comment elle eut peu deviner cela, si vous mesme ne luy aviez dit ou conté à quelqu'un qui luy en eut fait le rapport.

Quoy que ce soit, estant peu apres monté en vostre carrosse, vous vous en allastes au Louvre, où vous trovastes le Roy dans sa petite chambre au delà de son cabinet aux oyseaux, ayant sa robe, son bonnet et ses botines de nuit, se promenant à grands pas, tout pensif, la teste baissée, les deux mains derriere le dos; plusieurs de ses serviteurs desja arrivez devant vous, appuyez tout droit contre les murailles sans se rien dire les uns aux autres, ny que le Roy parlast à eux ny eux à luy, lequel ne vous eut pas plutost aperceu entrer qu'il s'avança vers la porte, et vous posant, selon sa coustume, l'une de ses mains sur l'une des vôtres, en vous la serrant, s'escria en voix plaintive tout haut: « Ha ! mon amy, quel malheur ! Amiens est pris. — Comment, Sire, Amiens pris ! luy repartistes vous. « Hé, vray Dieu ! qui peut avoir pris une si grande et si puissante ville, et par quel moyen ? — Les Espagnols, vous dit-il, s'en sont saisis par la porte, en plain jour, pendant que ces mal-heureux habitans, qui ne se sont peu garder et n'ont pas voulu que je les gardasse, s'amusoient à se chauffer, à boire et ramasser des noix que des soldats, desguisez en paysans, espandoient expres près du corps de garde. — Or bien, Sire, luy dites vous, je voy bien que c'est une affaire faite, à laquelle les blasmes d'autrui ny les plaintes de nous ne sont pas capables d'apporter remede; il faut que nous l'esperions de vostre brave courage, vertu et bonne fortune; car, à quelque prix que ce soit, il nous le faut reprendre : aussi n'est-ce pas la premiere fois que vos affaires estans bien en pire estat, je vous ay veu parachever des choses plus difficiles. Vivez seulement, portez vous bien, ne vous melancoliez point, mettez les mains à l'œuvre, et ne parlons tous ny ne pensons plus qu'à prendre Amiens; et moyennant cela j'oserois répondre d'un heureux succez.

« À la vérité, dit le Roy, ce que vous dites n'est pas du tout sans apparence, aussi ay-je esté grandement consolé par un tel langage, car nul ne m'avoit dit parole qui ne ressentit

« sa plainte, sa douleur, voire quasi son desespoir. Et neantmoins, afin de ne bastir pas des chasteaux en Espagne, mais de pouvoir promptement dénicher les Espagnols qui en ont pris en France, dites moy un peu surquoy vous fondez de tant indubitables esperances que vous nous les voulez faire prendre, et où pensez vous recouvrer en bref les forces et moyens pour reprendre une si grande et si forte ville et si bien munie ? car, comme vous le sçavez aussi bien que moy, toutes nos pieces d'artilleries, munitions, vivres et outils que nous avons assembles, voire mesme si peu d'argent que nous avlons reservé de celuy que vous m'aviez fait venir par vostre voyage aux generalitez, estoient dans cette place; et ne faut point douter (car c'est ce que je ferois si j'estois en leur place) que les ennemis ne jettent hors d'icelle toutes les personnes qui ne leur pourront de rien servir, et au lieu de ces bouches et habitans inutiles, ne la remplissent d'une grande quantité de bons capitaines et de leurs meilleurs et plus aguerris soldats, auquel cas ils ne manqueront pas de nous faire d'aussi furieuses sorties qu'il fit jamais le feu admiral de Villars, vostre bon amy, au second siege de Roüen.

« Sire, luy respondites-vous, je voy bien que tout ce que vous alleguez a beaucoup de vray semblance, et que vos paroles ressentent l'excellence et parfait jugement d'un grand roy et d'un grand capitaine; et neantmoins si ne faut-il pas perdre courage, mais s'affermir, voire s'opiniasttrer d'autant plus que les difficultez paroissent grandes; car c'est par tels moyens que vostre vertu s'est renduë tant illustre, et que vostre Majesté s'est acquis une tant glorieuse renommée parmy les nations, et n'y a point de doute, je l'ose dire encor une fois, que si tout ce qu'il y a de bons François se veut évertuer et y contribuer, les uns leurs courages et leurs moyens, et les autres l'un ou l'autre selon leur puissance, ainsi que je vous promets bien de n'y manquer pas de mon costé, que nous recouvrirons en bref, soldats, argent, canons, vivres, munitions, instrumens et autres provisions convenables pour reprendre Amiens, et peut-estre faire encor quelque chose de mieux.

« N'allons pas si viste, dit le Roy, car cet ouvrage seul équipole bien, ce me semble, nostre portée; et partant voyons un peu où vous pretendez prendre tout cela : aussi par vostre foy croyez-vous que cela soit si facile que vous le faites, ou si vous le dites pour relever les courages d'un chacun ? car, pour vous dire ce que j'en pense, je le tiens un peu plus difficile. —

« Ouy, Sire, respondites-vous, je croy certaine-  
 « ment tout ce que j'ay proposé, et ne l'ay dit ny  
 « par jactance ny vanité; et pour vous le tes-  
 « moigner, sans plus consumer le temps en dis-  
 « cours, plaintes, ny paroles vaines, permettez  
 « que j'aille en mon logis chercher argent parmy  
 « mes papiers; car je m'asseure de vous apporter  
 « des moyens pour en recouvrer, car il en faut  
 « avoir n'en fust-il point, estant raisonnable de  
 « n'espargner personne, puis que tous les gens de  
 « bien et vrais François ont interest de ne laisser  
 « pas ainsi une telle tanriere d'ennemis irrecon-  
 « cilliables, pires que bestes farouches, si pro-  
 « ches de la capitale du royaume, et vaut mieux,  
 « comme l'on dit en commun proverbe, pays  
 « ruyné que pays perdu.

« Je louë vostre resolution, dit le Roy, et vous  
 « sçay bien gré des bonnes esperances d'un heu-  
 « reux succez que vous prenez et voulez essayer  
 « de faire prendre aux autres; mais tout cela ne  
 « sont que langages et papiers, et le mal qui  
 « nous presse n'est pas, comme je vous en ay dit  
 « un mot, de la qualité de ceux qui se guerissent  
 « par paroles, escritaux et billets, ny par seaux,  
 « ny par signatures, desquels l'on dispose comme  
 « l'on veut; car il n'y a rien si aisé, comme  
 « vous le sçavez quelquesfois si bien dire au  
 « chancelier et aux secretaires d'Estat, lors qu'ils  
 « veulent égaler leurs labeurs et leurs services à  
 « ceux qui se meslent des armes et d'amasser ar-  
 « gent, que de faire signer et seeller; mais cela  
 « ne produit pas tousjours, et à point nommé,  
 « une certaine matiere d'or qui ne se laisse pas  
 « attraper pour la desirer, ny des armes, artil-  
 « leries, vivres, munitions et soldats courageux,  
 « disciplinez, appropriez aux fatigues d'un grand  
 « siege, comme tout cela nous est necessaire. Et  
 « partant voyons ce que produira cette bonne  
 « volonté que vous tesmoignez: car quant à vos-  
 « tre esprit, j'advouë qu'il est actif et inventif,  
 « et que vous ne manquez pas de diligence ny  
 « d'industrie—Or bien, Sire, dittes-vous, ce n'est  
 « que trop discoursu pour un homme auquel il  
 « vous plaist de donner telle louange, plustost  
 « neantmoins selon mon advis pour m'encourager  
 « que pour en estre digne; et partant, sans plus  
 « repliquer, je vous dis adieu, et m'en vay tra-  
 « vailler de façon que vostre Majesté cognoistra  
 « ma diligence, affection et loyauté.»

Et sur cela estant sorti du cabinet du Roy,  
 vous-vous en allastes à vostre logis, où, apres  
 avoir bien feuilleté tous vos memoires et papiers,  
 et vous estre à bon escient alambiqué l'esprit  
 apres toutes sortes d'inventions, vous ne pustes  
 trouver moyens plus prompts pour tirer de l'ar-  
 gent (ne voulant nullement surcharger le peuple

de la campagne, pour estre trop pauvre comme  
 c'estoit là l'opinion des riches, afin de s'exemp-  
 ter) que de faire contribuer les plus opulens; et,  
 pour cet effet, vinstes vous proposer au Roy  
 en particulier, premierement, de demander une  
 decime ou deux à messieurs du clergé, de créer  
 quatre conseillers en chaque cour souveraine,  
 quatre maistres des comptes en chaque chambre,  
 deux tresoriers de France en chaque bureau,  
 deux conseillers en chaque siege royal, deux es-  
 leus en chaque eslection. Et d'autant que l'exé-  
 cution d'une partie de telles choses pourroit tirer  
 en longueur, et que le peril consistoit au retarde-  
 ment, faire promptement un emprunt sur tous  
 les plus aysez, tant de la Cour que des grandes  
 villes, assignant leur remboursement et l'inté-  
 rest de leur prest sur une amelioration de douze  
 cens mil livres que vous aviez faites en la ferme  
 des gabelles, et des cinq grosses fermes, et le re-  
 culement d'une demie année des debtes que l'on  
 payoit aux partisans du temps du roy Henri III,  
 requerir aux provinces de l'Isle de France et  
 Berry, jointes ensemble à celles d'Orleans et  
 Touraine, aussi jointes, et à celle de Normandie,  
 seulement trois regimens de quinze cens hom-  
 mes chacun, qui porteroit le nom d'icelles sous  
 tel mestre de camp qu'elles voudroient nommer,  
 entretenus pour trois mois du jour de leur arri-  
 vée au siege, jusques à leur partement; faire  
 faire une augmentation de quinze sols pour mi-  
 not de sel, qui seroit continuée apres l'occasion  
 passée pour la suppression des officiers que l'on  
 jugeroit les plus en charge; faire expedier une  
 commission pour la recherche de toutes malver-  
 sations commises en finances, ne doutant point  
 que, pour en éviter l'exécution, les officiers puis-  
 sans ne la fissent bien tost commuer en une con-  
 tribution par forme de prest à jamais rendre; et  
 adjoûter un triennal (1) à tous officiers de  
 finance, ancien et alternatif.

Tous lesquels advis ayant fait voir au Roy en  
 particulier, il les leust patiemment, voire avec  
 plaisir, et vous en demanda le memoire, afin de  
 le copier de sa main, et puis le faire voir, comme  
 venant de luy seul, en une grande assemblée  
 de tous les principaux de la Cour, de la ville  
 de Paris, et des notables de Roüen, dont il y en  
 restoit encor la pluspart à Paris; en laquelle il  
 dit en peu de paroles que les tenant tous pour  
 bons François, ses loyaux serviteurs et gens de

(1) *Un triennal*: les offices de finances étaient possédés par deux personnes en charge. Le premier s'appelait l'ancien; le second, qui avait été établi depuis, s'appela *alternatif*, et on nomma ce troisième *triennal*, parce qu'il roulait de trois ans en trois ans avec les deux autres, auxquels seulement il fut permis de rembourser le triennal.

(Note de l'abbé de l'Écluse.)

courage et d'entendement, il s'asseuroit qu'il n'y en auroit un seul qui ne conclud qu'il falloit reprendre Amiens à quelque prix que ce püst estre; tellement que ne mettant pas cela en question, les prioit-il seulement de regarder aux moyens de trouver un fonds d'argent suffisant et prompt pour subvenir aux despences, tant des soldes et entretenemens darant plusieurs mois, de son armée et officiers d'icelle, des vivres et de l'artillerie, qu'il vouloit composer d'un bon nombre de gens de guerre, de cheval et de pied, si bien policez et disciplinez qu'il n'y survinst nul desbandement ny relaschement de courage, et la pourvoir abondamment de canons, vivres, munitions, matieres, drogues, outils, instrumens et ustancilles requis à un grand et long siege, que pour les grands frais qu'il faudra faire d'entrée aux achats de tant de choses diverses, fontes, remontages et radoubts de pieces de batteries, fabrication de boulets, confection de poudres et ouvrages d'artisans; les longues experiences par lesquelles il avoit passé, et la prudence humaine le conviant, voire la nécessité l'obligeant de proportionner ses armes et provisions à l'importance de l'entreprise, grandeur et force de la place qu'il convenoit assieger, nombre et valeur des gens de guerre preposez à la defence d'icelle, abondances de pieces, vivres, armes et munitions qu'ils avoient là dedans, et aux grandes forces qu'il ne falloit point douter luy devoir tomber sur les bras, pour luy faire lever le siege, de crainte qu'en pensant reparer un desastre, l'on ne retombast en un plus grand, par la perte d'une bataille, comme il arriva devant Pavie, ce qui n'arriveroit point que sa mort ne s'y trovast envelopée, estant bien resolu de ne survivre point à une telle desolation et calamité, pour se voir derechef plongé dans les anxietez et perplexitez d'esprit, peines et fatigues de corps, par lesquelles il avoit passé, lors que les siens propres luy donnoient plus d'ennemis et de traverses que non pas les ennemis, et qu'il les luy falloit courtiser au lieu d'en estre servy et de leur commander, les priant derechef tous de ne se separer point sans quelque conclusion.

Sur lesquels propos fondez en de tant solides raisons, chacun de ceux qui estoient là presens furent long-temps à s'entre-regarder sans dire mot, les plus grands se remettans sur les plus entendus en finance, et ceux cy sur les autres; et enfin, à force d'estre pressez de parler par le Roy, apres que chacun en eut discoursu à sa mode, l'on proposa de faire de nouvelles levées sur le peuple, des creations d'officiers et de nouvelles attributions aux autres; mais le Roy

voyant qu'il y avoit de grandes diversitez d'opinions dont ils n'estoient pas pour s'accorder promptement, il tira son memoire de sa pochette et leur dist, que pour leur monstrier que de sa part, quelque peu entendu qu'il fust en finance, il n'avoit pas laissé d'essayer, de luy mesme, à trouver des moyens, lesquels il avoit escrits de sa propre main, adjoustant, apres les avoir fait lire, qu'ils eussent à en trouver de meilleurs, plus faciles et plus prompts, ou autrement qu'il feroit absolument executer tous ceux là. A quoy chacun ne repliquant rien, le Roy dit qu'il voyoit bien que ses advis seroient en fin les meilleurs, mais que jugeant bien luy mesme que n'estans pas tous d'esgale facilité en l'execution, aussi ne pretendoit-il pas de s'en servir que subsidiairement les uns apres les autres, selon que la nécessité le pourroit requerir, et vouloit que l'on commençast par les prests les plus ayses, tant pource que ce seroit l'argent le plus prompt pour employer aux provisions et preparatifs du siege, que pour recognoistre pour les meilleurs François et qui luy porteroient le plus d'amitié ceux qui plus librement se taxeroient eux mesmes, et payeroient volontairement une bonne somme, aimant neantmoins peu, de cette façon, que beaucoup par force : à quoy nul ne devoit manquer puis qu'il avoit ordonné un fonds certain (comme ceux de son conseil pouvoient certifier), par le moyen duquel ils seroient tous remboursez dans deux ans avec l'interest de leurs deniers, dont afin qu'ils doutassent moins, il leur en donnoit d'abondant sa foy et sa parole, à laquelle il aymeroit mieux mourir que de manquer, comme il n'avoit encor jamais fait; vouloit que l'on continuast apres par les quinze sols pour miuot de sel, l'establissement de tous comptables triennaux, et la commission pour la recherche des malversations aux finances, ce qui fut finalement conclud et si bien executé, tant les paroles et la presence du Roy eurent de vertu, que l'on tira trois cens mil escus de prests volontaires, environ douze cens mil escus des triennaux, et autant des financiers, qui aymerent mieux venir à composition et contribuer cette somme par forme de prest à jamais rendre (en laquelle tous les tresoriers de France furent compris) que de souffrir cette recherche.

#### CHAPITRE LXXV.

*Rosny choisi pour diriger seul les finances. Présent offert à madame de Rosny. Divers voyages de Rosny au siege d'Amiens. Il est chargé par le Roi d'écrire aux chefs protestans qui veulent remuer, Lettre très-*

*remarquable adressée à la Trémouille. Mort de Saint-Luc, grand maître de l'artillerie. Pourquoi le Roi ne donne pas sur-le-champ cette place à Rosny. Lettres de Henri IV et de Rosny. Reprise d'Amiens.*

Combien que nous eussions sujet de laisser aux historiens une infinité de particularitez des signalées factions de guerre qui se passerent durant et devant le siege d'Amiens, desquelles il se pourroit faire un gros volume et dire de tres-belles choses, d'autant que vous ne fustes meslé en la pluspart d'icelles, neantmoins nous vous en reciterons quelques-unes esquelles vous eustes part. La premiere fut un conseil que le Roy alla tenir chez M. de Schomberg, pource qu'il estoit au lict ayant son point, auquel le Roy ayant proposé son partement dans trois jours, leur dit vouloir establir un tel ordre, que ne manquant d'argent ny d'autre chose, il n'eust à songer sinon à bien travailler et bien combattre, enquoy il promettoit bien de ne s'espargner pas. Et d'autant qu'il avoit souvent expérimenté que ce dont plusieurs avoient également la charge, estoit tousjours negligé, il vouloit choisir un particulier de son conseil qui eust à luy respondre de tout, servist comme de solliciteur et de chesavant aux autres, et auquel il eust aussi à s'adresser en particulier, et luy demander les choses qui seroient necessaires; et afin de les tirer hors de peine pour en faire l'eslection, qu'il vous choisiroit comme celui qu'il cognoissoit de plus longue main, le plus jeune et vigoureux pour aller et venir, et auquel il diroit le plus librement ses veritez s'il venoit à manquer. Surquoy il ne se fit aucune replique, plusieurs jugeans bien par là que c'estoit commencer en vostre personne un establissement absolu aux finances, duquel ils s'estoient tousjours doutez : de sorte que messieurs de Sancy et de Schomberg, qui s'estoient le plus arrogé d'autorité, se resolerent de suivre le Roy, et quitter le conseil sedentaire de Paris, auquel ils ressentoient bien que leur grande puissance alloit de jour en jour diminuant, à mesure que la vostre recevoit accroissement, comme ils voyoient bien que cette dernière action du Roy l'establissoit du tout, le premier prenant pour pretexte de sa retraite, l'occasion de ce grand siege, où il se vouloit trouver comme homme de guerre, à cause de sa charge de coronel des Suisses.

Ce siege donc ainsi resolu, le Roy donna ordre aux expeditions necessaires pour vous faciliter le recouvrement des deniers; puis, vous ayant recommandé la vigilance et la diligence, il partit de Paris, et s'en alla rassembler ses troupes,

afin de commencer au plutost ses logemens necessaires à l'entour de cette ville; et vous, de vostre costé, pourveustes à faire trouver de l'argent, amasser artillerie, munitions et vivres, fistes dresser un hospital pour les malades et blessez de l'armée, traitastes avec des marchands, pour y faire voiturer toutes sortes de vivres pour hommes et chevaux, marchandises et autres denrées; enquoy il vous reussit si bien, que toutes choses abonderent tousjours en l'armée, voire mesmes les delicieuses et voluptueuses, jusques-là que plusieurs personnes de qualité et de moyens, estans malades, se faisoient porter en cet hospital, pour y estre mieux accommodez et traittez que dans Paris. Tous les mois vous ne manquiez pas de vous acheminer en l'armée, et de faire voiturer avec vous cent cinquante mil escus, dequoy vous receviez force loüanges et bonne chere des capitaines.

Or, un jour au retour d'un de ces voyages, apres que l'edict pour l'establissement des triennaux eut esté verifié, comme vous usiez de toutes sortes d'industries pour en tirer le plus d'argent comptant qu'il vous seroit possible, jusqu'à faire l'office de greffier du conseil et de tresorier des parties casuelles, en vendant vous mesme les offices, et baillant un billet à l'acheteur adressant au tresorier, afin qu'il receut son argent, et luy delivrast sa quittance, tellement que nul du conseil n'y pouvoit gratifier son parent ny son amy, il arriva qu'une apresdinée un certain Robin de Tours, que nous sçavons bien qui estoit boiteux, car il s'adressa à l'un de nous quatre pour le presenter à Madame, à laquelle il vint offrir un diamant de six mil escus pour vous, et un de deux mil pour sa part, si elle pouvoit faire en sorte que vous ne voulussiez point empescher que messieurs du conseil luy adjugeassent tous les offices triennaux des generalitez de Tours et d'Orleans, pour soixante et douze mil escus; dequoy elle et luy vous estans venus parler ensemble, vous ne vous fistes que mocquer, et dire : « A d'autres, à d'autres, M. Robin; car l'on ne prend rien ceans qui ne vienne des liberalitez du Roy, lequel perdroit trop à ce marché, ayant deja gens en main qui ne demandent que la moitié de ces offices et m'en offrent soixante mil escus; et ne vous jouiez plus de venir faire des offres ceans pour tromper le Roy. » Et ainsi se retira ce boiteux; et dès ce soir et le lendemain matin vous delivraastes des billets de ces offices pour près de quatre-vingt mil escus.

Tellement que cette occupation vous ayant retardé d'aller au conseil, monsieur le chancelier vous envoya par deux fois un huissier vous

prier de venir, d'autant que la compagnie vous attendoit pour resoudre une affaire dont le Roy toucheroit soixante et quinze mil escus comptant, ce qui vous fit haster, croyant que ce fut de quelques nouveaux moyens qu'il entendist parler; mais, comme vous entrastes dans la chambre du conseil, monsieur le chancelier frappant des deux doigts sur la table, vous dit : « Monsieur, monsieur, il y a long-temps que nous vous attendons; le Roy croit que vous soyez des plus diligens, et neantmoins vous venez quasi tousjours le dernier.—Monsieur, repartistes-vous un peu mutiné de ce langage, quoy que je sois des derniers au logis, si n'y suis-je pas inutile; car ce matin j'ay fait des affaires pour plus de cinquante mil escus dont vous orrez parler. »

« Nous en avons aussi fait au conseil qui valent bien les vôtres, vous repartirent messieurs de Fresnes et de la Grange-le-Roy, car nous avons vendu des offices pour soixante et quinze mil escus tout argent comptant, afin que vous puissiez faire dans huit jours une voiture au Roy, duquel nous avons receu deux lettres qui ne chantent qu'argent.—Et quels offices sont-ce, respondistes-vous, car il pourroit estre que nous nous serions rencontrés?—Ce sont les offices des generalitez d'Orleans et Tours, dit monsieur le chancelier, que le conseil a trouvé bon d'accorder au sieur Robin de Tours, pour cette somme, jugeant cela plus à propos que de les vendre moitié comptant, et l'autre moitié payable dans deux mois, comme le portent quasi tous vos billets, et est là une forme du tout inusitée.—Ho ! ho ! Monsieur, repartistes-vous, je voy bien qu'il y a partie dressée; mais si j'eusse voulu les gants, d'autres ne les eussent pas eus; et pour moy sur l'occasion d'un siege tant important où le Roy hazarde sa personne, comme le moindre capitaine (car par deux fois que j'ay esté voiturier de l'argent, je l'ay tousjours trouvé dans les tranchées, et la dernière ayant le casque en teste et la pique en la main, prest d'aller droit aux ennemis qui avoient fait une sortie), je pense qu'il n'y aura pas trop de tout et ne faut rien bailler à vil prix. »

« Or bien, bien, monsieur, repartist monsieur le chancelier, nous ne doutons point de la valeur et vigilance du Roy. Mais que voulez vous dire par ces gants et par ces formes dont vous usez au prejudice de l'ordre des finances et reglemens du conseil?—Je ne veux dire autre chose, monsieur, sinon que j'avois desja refusé ce Robin, de ce qu'il vous a offert, dites-vous, et que par tout où je pourray faire le profit du

« Roy, et luy amasser de l'argent, puis qu'il m'a chargé de cela particulièrement, je ne m'arrestay pas à toutes ces formes.—Ce n'est que trop disputé, ce dit M. de Fresnes, il faut voir si ce que le conseil a fait demeurera, ou si nous le laisserons changer par un particulier. »

Somme que pour abreger l'affaire mise en deliberation, il fut dit que l'adjudication faite au conseil auroit lieu, avec deffences au tresorier des parties casuelles d'avoir plus d'esgard à aucuns billets particuliers, et vous mesme en vostre opinion ne dites autre chose, sinon que vous estiez de l'avis commun. Et sur cela estant sorty du conseil pour vous en retourner à vostre logis, vous y fustes à peine arrivé que le secretaire Fayet vous vint trouver avec cet arrest en minute, signé de tous les autres, afin de vous le faire signer; mais vous l'en refusastes tout à plat, et apres plusieurs contestations (car il avoit charge de vous presser) vous luy dites que vous n'en feriez rien, que vous n'eussiez eu responce du Roy, d'une lettre que vous luy escrивiez touchant cette affaire, où vous n'espargniez ny la verité, ny les personnes; laquelle lettre (vous ayant tant importuné que vous luy en fistes la lecture, où il estoit dit que Robin avoit fait les offres que vous aviez refusées à madame de Sourdis, qui gouvernoit monsieur le chancelier, laquelle avoit associé avec elle une certaine madame de Deuilly sa parente, de laquelle M. de Fresnes estoit amoureux) il vous pria de n'envoyer point qu'il n'eust esté trouver messieurs du conseil, et ne fut revenu vers vous; ce qu'ayant fait, afin de ne nous amuser pas davantage à ces pointilles, la minute de l'arrest fut rompuë et vos billets continuez comme auparavant.

Quelque temps apres vous allastes faire une voiture d'argent en l'armée, où estant arrivé, M. de Saint Luc, entre les mains duquel M. de la Guiche s'estoit defait de sa charge de grand maistre de l'artillerie, vous invita à dîner, et apres iceluy vous mena voir toutes les trenchées et logemens d'artilleries; dequoy le Roy adverty, il luy en sceut mauvais gré et s'en courrouça fort contre vous, disant qu'il vous defendoit absolument de faire le mestier de la guerre, ny d'aller en lieu perilleux tant que ce siege durerait (d'autant que s'il vous arrivoit mort ou grande blessure, tout vostre ordre venant à manquer, aussi feroit le payement de son armée, et par consequent la subsistance d'icelle), ny mesme d'aller plus aux trenchées qu'avec luy, y en ayant de tels qui, pour se deffaire de vous, seroient bien aises de vous faire donner quelque niffiade, voire ne craindroient point de se hazarder eux-mesmes pour cela.

Le lendemain comme vous veniez pour prendre congé du Roy, afin de vous en retourner à Paris, préparer de l'argent pour une autre monstre, vous le trouvastes tout resveur et chagrin, et vous ayant tire à part vous demanda si vous ne l'aviez pas trouve plus triste que de coustume : et luy ayant respondu que ouy, il vous dit qu'il avoit receu des nouvelles comme l'on sollicitoit fort et ferme ceux de la religion, de s'assembler pour luy envoyer des deputez demander un certain edict, que les plus mutins et seditieux d'entre eux avoient complice a la sollicitation de gens affidez a messieurs de Bouillon, la Trimouille, du Plessis et autres, lequel il seroit hors de sa puissance de pouvoir jamais faire verifier aux cours souveraines, ny souffrir l'establisement d'iceluy aux catholiques, et a son refus de prendre les armes pendant qu'il estoit ainsi occupe en ce grand, facheux et si difficile siege : que la plupart des eglises, et sur tout des grandes villes et des principaux de la noblesse avoient bien declare de ne le vouloir pas presser d'aucunes nouvelles concessions, tant que le siege d'Amiens durerait, dont il se sentoit leur estre oblige ; mais qu'il craignoit qu'a la longue ces messieurs de Bouillon, de la Trimouille, du Plessis, accompagnez par quinze ou vingt de leur caballe, dont les deux Saint Germain, Aubigny, la Valliere, la Case, la Saulsaye et Constant estoient des plus eschauffez, qui les sollicitoient a cela, ne les y disposassent avant qu'il eut pris Amiens, qui seroit la ruine entiere de ses affaires ; et partant vous prioit-il, ainsi qu'il avoit fait ses autres affidez serveurs, d'en escrire a vos amis particuliers comme vous listes, et entre iceux a M. de la Trimouille, d'autant qu'entre luy et vous il y avoit toujours eu quelque espee de plus grande amitié qu'avec nul des autres. Et sans nous amuser par le menu au recit de telles menées, nous nous contenterons d'insérer icy la lettre que vous escrivistes a M. de la Trimouille, laquelle en dira quelque chose, la teneur en estant telle :

*Lettre de M. de Rosny à M. de la Trimouille.*

Monsieur, l'extrême affection que j'ay tousjours eue au service du Roy, au bien de l'Estat, à l'avancement de nostre religion et a vostre particulier, m'a persuade que je ne me devois point taire parmy tant d'occasions qui se presentent et me couvient à parler, où quelquefois une parole dite et receue à propos peut apporter beaucoup d'utilitez. J'ay eu cognoissance de vos advis particuliers et des resolutions generales de l'assemblée de nos eglises, lesquelles à la verité m'ont fort affligé, pour ce qu'elles me semblent

manquer aux raisons des temps presens, a la disposition des affaires et aux formes de proceder. Recevez, je vous supplie, de bonne part les conseils que je vous donne, puis que j'en suis par vous requis et par une bonne conscience, loyale a sa patrie : car ils sont fondez sur le devoir et la raison qui me commande de bien faire en tout temps et d'inciter les autres a faire le semblable. Et pour venir aux particularitez des affaires, je vous diray avec franchise, que je vous supplie avoir agreable comme procedante d'un cœur qui est tout vostre, que je ne voy point en vos lettres une telle moderation et prudence, que l'excellence de vostre esprit et le zele que je vous ay tousjours creu avoir au service du Roy et de vostre patrie, m'avoit fait esperer de vous.

Je considere leur defectuosité en ce qu'elles particularisent bien les maux, mais ne specifient point les remedes ; en ce que vous exprimez bien les mauvaises deliberations, mais ne protestez pas de n'y estre point consentant et ne promettez de demeurer ferme au service de Sa Majeste, et vous opposer formellement aux remuemens que l'on voudroit faire contre son autorité, ainsi que tout droict divin et humain vous y oblige. Les resolutions generales sont mal prises, en ce que l'on veut par la faire porter au Roy l'ennuy et la peine du peché, dont il n'est pas l'auteur ; car de croire que l'intention de Sa Majeste soit telle que les choses dont l'on se plaint ayent lieu, il n'y a nulle apparence ; ses effets, en ce qui despend de son pouvoir, y contredisant ; et m'asseure qu'en vostre ame vous et plusieurs de l'assemblée n'ignorez point sa bonne volonté, et toutes-fois, au lieu que vous devriez tous fortifier sa foiblesse, secourir sa necessite et soulager ses travaux, il semble qu'au comble d'iceux l'on aye pris le temps d'adjouter affliction sur affliction, afin de l'accabler et tout a l'apetit des interets particuliers, que l'on cognoist assez estre les causes de tout ce mal.

Souvenez-vous que Dieu est juste et certain juge de nos pensees et de nos actions, et que le Roy estant innocent, comme je seay qu'il est des choses pour lesquelles on l'afflige, il ne souffrira point qu'il succombe, mais relevera son autorité a la ruine et confusion de ceux qui couvriront leurs mauvais desseins et leurs interets particuliers du zele de la religion ; et a la verité la nayve bonté de Sa Majeste redouble le peché de ceux qui le veulent offencer. Outre ces raisons concernans son service et le repos public, celui mesme de la religion contredit à ce qui s'est fait, car estant la seule parfaite fondee sur le droit et la verité, elle doit rendre exempts ceux qui la tiennent non seulement de tout mauvais

pretexte , mais mesmes de toutes apparences de mal.

Jusques icy Dieu par sa grace nous a exemptez de tous ces soupçons , ayant tesmoigné qu'il n'y avoit jamais rien eu que son seul service qui eut poussé ceux de nostre religion aux choses violentes et extraordinaires , ce qui a tousjours justifié nos armes et nos desseins. Maintenant si l'on y procede autrement , comme il semble que vos lettres donnent sujet d'en croire quelque chose , cette bonne opinion se perdra ; et outre cela celle que l'on avoit tousjours eüe , que le party de la religion estoit le plus asseuré party de France , à cause de l'union des volontez et interets de ceux qui en faisoient profession , diminuera grandement , dont les foibles et inutiles effets que je sçay que l'on peut faire par delà seront la seule cause ; car ne vous imaginez pas qu'à ces nouveaux et precipitez remuemens nos eglises de deçà soient concurrentes , ny mesme que plusieurs de delà les approuvent ; tellement que cette division causera beaucoup de mauvais effets , et parmy ce qui demeurera uny en ce mauvais dessein en son progrez , il y naistra tant de confusions , tant de desobeyssances et tant de necessitez , chasque particulier ayant pour principal but et objet le bien de ses affaires , et non celui de la religion et du party en general , que ceux qui plus y prendront d'autorité seront ceux qui plustost experimenteront la verité de mes opinions , et regretteront de n'avoir plus prudemment et raisonnablement borné leurs desirs et conduit leurs entreprises.

Si mes parolles ne sont si bien agencées qu'elles vous persuadent à mieux faire que vous dites que l'on n'a commencé , au moins seront-elles des presages des maux infaillibles , et si vous les gardez en ce papier elles vous serviront quelquesfois de consolation et de guide à un meilleur chemin , ayant recognu que selon icelles les maux et les peines seront retombées sur leurs auteurs. Je desirerois estre prés de vous pour vingt-quatre heures , car l'affaire qui se presente est un champ si spacieux qu'il ne me laisseroit manquer de raisons pour vous ramener tous à la raison , et vous montrer clairement qu'en l'assemblée , si la conclusion en est telle que vous me mandez , il ne s'y est resolu aucune chose qui puisse revenir à la gloire de Dieu , à l'utilité de la religion , au bien et repos du Roy ny du royaume , ny de vous particulierement.

J'ay tousjours estimé que vous ne pecherez jamais par ignorance ; ramenez-vous donc devant les yeux les raisons que la clarté de vostre jugement et la vivacité de vostre esprit vous presente , et je m'asseure que vous ferez changer de dessein

à cette assemblée , ou que pour le moins vous vous opposerez à la violence de ceux qui le voudront suivre , tesmoignant à chacun que vous estes vraiment huguenot , c'est à dire , entierelement desireux de conserver la religion et l'Estat , balançant tellement vos conseils et actions que l'excez de la passion au bien de l'un ne puisse devenir la ruine de l'autre. Excusez la liberté dont j'use en vostre endroit , la passion que j'ay à vostre service , et l'amitié que m'avez promise m'y contraint. Cette lettre est pour vous seul , remettant toutes-fois en vostre prudence de la communiquer en temps et lieu. Voilà ce que j'ay estimé ne vous devoir point celer , vous priant de le recevoir d'aussi bonne part que je prie Dieu de bon cœur vous donner , etc.

Estant retourné à Paris vous preparastes une quatriesme voicture , les nouvelles de laquelle resjouyrent toutel'armée et vous y fist recevoir avec plus grand applaudissement que jamais ; tous les capitaines et soldats , crians tout haut qu'il paroissoit bien maintenant que le Roy avoit mis en ses finances un gentil-homme d'illustre maison , qui estoit bon François , bon soldat et en avoit tousjours fait le mestier , puis qu'il servoit si bien le Roy et la France , donnoit si bon ordre au payement des soldats et faisoit en sorte que rien ne manquoit à l'armée.

Le lendemain de vostre arrivée , comme vous entreteniez le Roy et l'asseuriez de luy faire fournir encor trois monstres pour le moins à poinct nommé , voire peut-estre la quatriesme , s'il tenoit bon contre ceux que vous voyez bien avoir envie de se reserver quelque fonds , M. de Ville-roy et peu apres M. de Montigny entrerent comme tous esmeus dans la chambre du Roy , et luy parlerent chacun à part assez long-temps avec apparence de grande affection , et de ne s'en estre pas separez trop contens. Surquoy le Roy vous ayant appelé , vous dit :

« Le pauvre Sainct Luc n'a pas long-temps  
« gardé son estat de grand maistre de l'artillerie ;  
« ces deux hommes qui viennent de partir , m'es-  
« toient venus advertir qu'il vient d'estre tué le  
« plus malheureusement du monde dans une de  
« ses batteries , regardant par entre les gabions  
« et deux madriers si prés l'un de l'autre qu'il  
« n'y avoit quasi que le passage de la balle entre  
« deux. C'est dommage , car il estoit homme de  
« service ayant l'esprit et le courage bon , estant  
« fort actif , inventif et diligent , et neantmoins  
« ne faisoit pas beaucoup , à cause de la grande  
« abondance de conceptions qui luy entroient  
« dans la teste , dont la derniere venuë luy sem-  
« bloit tousjours la meilleure et detruisoit toutes  
« les autres. Or , venoient ces deux hommes pour

« me demander sa charge ; à sçavoir : Ville-roy  
 « pour son fils Alincourt ou son neveu Chasteau-  
 « neuf-l'Aubespine, deux gentils-hommes de  
 « haute extraction, dont le premier, comme vous  
 « sçavez et moy aussi, a un peu les ongles bien  
 « pasles pour une charge où il ne faut rien crain-  
 « dre et estre tousjours au peril ; et quant à l'au-  
 « tre je ne luy ay jamais veu faire que des gri-  
 « maces et simagrées ; et par là pouvez vous  
 « juger si je leur bailleray cette charge. Montigny  
 « m'en a aussi parlé pour luy mesme, et a de  
 « bonnes parties pour la meriter ; car il m'ayme,  
 « est fidelle et loyal, est vaillant, actif et dili-  
 « gent ; mais il a peu de jugement, peu d'inven-  
 « tion et encor moins d'ordre et de ménage, qui  
 « sont conditions tres-necessaires en un grand  
 « maistre. J'ay en mesme temps pensé en vous,  
 « car je sçay que j'en recevrois contentement ;  
 « mais faisant estat de vous rendre seul absolu  
 « dans mes finances, je n'estime pas qu'il vous  
 « fut possible de vous bien acquitter de ces deux  
 « charges ensemble, chacune d'icelles meritant  
 « bien un homme tout entier. Neantmoins j'y  
 « penseray, mais ne dites à personne que je vous  
 « en aye parlé ; car tousjours de tout ce siege ne  
 « vous en voudrois-je pas pourvoir, de crainte de  
 « vous divertir de vostre ordre accoustumé pour  
 « le payement de mon armée, et d'en faire per-  
 « dre l'esperance à plusieurs ; lesquels, sous cette  
 « attente, essayeront de servir à qui mieux  
 « mieux.

« Sire, luy dites-vous, je n'ay rien à requier  
 « de vostre Majesté, puis qu'elle a soin de moy.  
 « avant que j'y aye pensé, et ne veux en cela  
 « que ce qu'il vous plaira ; mais s'il m'étoit per-  
 « mis et bien seant de repliquer, je dirois que  
 « tant s'en faut que ces deux charges soient in-  
 « compatibles ; que, selon mon advis, elles de-  
 « vroient estre tousjours ensemble, et que jamais  
 « l'artillerie ne sera mise en son lustre, et n'en  
 « tirerez l'utilité qu'elle doit produire, qu'elle ne  
 « soit exercée par un super-intendant des finan-  
 « ces, qui entende le métier de l'un et de l'autre  
 « et ne manque pas de courage ; mais vostre  
 « prudence estant par dessus tout ce que je sçau-  
 « rois dire, je la laisseray operer, resolu de  
 « n'avoir jamais autre volonté que celle de vos-  
 « tre Majesté. »

Et sur cela vous estans separez, vous laissastes  
 passer tout le reste du jour et de la nuict sui-  
 vante sans sortir de vostre logis, ny aller en ce-  
 luy du Roy, jusques au lendemain apres disner,  
 en l'esprit duquel vous trovastes bien d'autres  
 fantaisies ; car, vous ayant appelé si tost qu'il  
 vous apperceut, il vous dit : « J'ay pensé avoir  
 « une grande querelle pour vous ; mais enfin, à

« force de larmes et de prieres, je me suis laissé  
 « vaincre, ma maistresse m'ayant tant importuné  
 « que je luy ay accordé la charge de grand mai-  
 « tre de l'artillerie pour son pere, me remons-  
 « trant, comme elle avoit esté si long-temps en  
 « sa maison, que ce luy seroit une honte et un  
 « deshonneur, voire un tesmoignage certain que  
 « je ne l'aymerois plus si je la refusois, et se re-  
 « solvoit, en ce cas, de me quitter, de s'aller  
 « cacher, et enfin de se rendre en quelque reli-  
 « gion. A tous lesquels assauts je confesse n'avoir  
 « pas eu assez de force pour y resister ; je luy  
 « ay dit que je destinois, sans rien nommer neant-  
 « moins, cette charge pour un homme dont  
 « j'estois assuré d'estre bien servy, ce que je  
 « ne pouvois pas esperer de son pere, et tant d'au-  
 « tres choses, qu'enfin elle est demeurée d'accord  
 « de faire quitter l'office à son pere, à la pre-  
 « miere charge de qualité qui viendrait à vac-  
 « quer, voire d'en prendre recompense s'il me  
 « vient quelque grande guerre sur les bras, pour  
 « la bailler à celui que j'avois en fantaisie, le  
 « nom duquel elle ne me vouloit point demander.  
 « De sorte que, dès à present, je vous promets  
 « qu'elle ne passera jamais des mains de M. d'Es-  
 « trée, sinon és vostres. » Dequoy vous le remer-  
 « ciastes sans rien contester, jugeant bien que vous  
 y perdriez vostre temps.

Le lendemain vous en retournastes à Paris  
 pour continuer vostre accoustumé recouvre-  
 ment de deniers, où vous receustes advis, quel-  
 que huit jours apres, de la mort de monsieur  
 vostre second frere que vous aviez laissé au  
 siege d'Amiens, se portant fort bien, et le jour  
 suivant une lettre du Roy dont la teneur s'en-  
 suit :

*Lettre du Roy à M. de Rosny.*

Mon amy, puis que vous pensez continuelle-  
 ment à faire subsister mon armée sur pied et à  
 plusieurs autres miennes affaires en mon ab-  
 sence, il est bien raisonnable que j'aye quel-  
 quesfois soin des vostres, lors que vous estes  
 absent de moy. Cette lettre donc est pour vous  
 dire que sur la mort de vostre second frere (que  
 je ne doute point que vous n'avez sceuë par  
 une autre voye), plusieurs me sont venus de-  
 mander le gouvernement de Mante, et vostre  
 jeune frere plus instamment que nul des autres ;  
 mais à tous j'ay respondu que vous m'en aviez  
 desja escrit, et ne pouvois, me servant si utile-  
 ment que vous faisiez, le donner à un autre,  
 vous le desirant. Advisez donc à leur respondre  
 de mesme, afin que nous ne soyons trouvez en  
 diversité de paroles, car je vous veux gratifier  
 en tout ce que je pourray. Adieu mon amy.



Du camp devant Amiens. (Il n'y avoit point de datte.)

Vous rendistes responce au Roy, en le remerciant et acceptant sa bonne volonté, envoyastes vostre secretaire Balthazard à Amiens en retirer les expéditions, puis allastes faire un tour à Mante prendre possession du gouvernement. Pendant vostre séjour, qui ne fut que de quatre jours, ceux du conseil, qui l'estimoient devoir estre plus long, prirent ce temps pour faire une lettre au Roy, signée d'eux tous, par laquelle ils luy mandoient en substance, comme vous le sceustes depuis, qu'ils avoient si bien travaillé depuis cinq mois, que son armée n'avoit manqué d'argent ny d'autres choses; qu'ils feroient encor tout leur possible pour faire fournir un mois de plus, mais qu'après cela il n'en falloit plus esperer des moyens qu'il avoit ordonnez, d'autant que ce qui restoit à recevoir n'estoit plus que restes et fondrilles incertaines, dont il ne se scauroit que bien peu tirer, et encore avec grande longueur de temps. Et partant le supplioient-ils de mander sa volonté sur les nouveaux moyens dont l'on auroit à se servir pour continuer à fournir comme l'on avoit fait jusques à present, de quoy encor ne luy osoient-ils donner nulle assurance, mais bien qu'ils y feroient tout leur possible.

Le Roy ayant receu cette lettre, ne s'arresta pas du commencement à regarder la souscription, en laquelle il avoit huit ou dix seings, et croyant que le vostre y fust, il se mit à vous déchiqueter un peu tous l'un après l'autre, et vous plus que pas un (se souvenant des promesses que vous lui aviez faites à vostre dernier voyage, de luy fournir encore trois à quatre mois, dans lequel temps il ne doutoit point qu'il ne prist Amiens, principalement depuis la mort d'Arnaut Teille; mais rejettant les yeux pour la seconde fois sur les seings de sa lettre et n'y voyant point le vostre, il demanda au courrier où vous estiez quand il partit, lequel luy ayant dit que vous estiez allé jusques à Mante, il reprit quelque espece d'esperance, et vous escrivit soudain ces trois mots de sa main en tels termes :

*Lettre du Roy à M. de Rosny.*

Mon amy, un homme de bien comme vous n'a que sa parole, c'est pourquoi m'estant fié sur celle que vous m'avez donnée de faire encor fournir pres de quatre monstres à mon armée, je vous envoie la lettre que m'escrivent ceux de mon conseil, par laquelle ils me desesperent d'en pouvoir fournir plus d'une, afin que vous vous acquittiez de ce que m'avez promis, et fassiez voir que vous en sçavez plus qu'eux. S'il

y a des difficultez qui requierent vostre presence pres de moy, afin que soyez assisté de mon autorité, venez en diligence, et je vous assisteray en tout. Attendant vostre responce, je vous dis adieu et vous aime bien.

Du camp devant Amiens, le vingt-huictiesme juillet.

A laquelle lettre vous fistes une telle responce.

*Lettre de M. de Rosny au Roy.*

Sire, je ne me puis imaginer surquoy messieurs de vostre conseil ont fondé la lettre qu'ils vous ont escrite pendant mon absence de quatre jours seulement : je remets à vous dire de bouche tout ce que je pense sur icelle; et, afin de vous consoler en attendant, je vous dis moy, que vous ne vous souciez que de conserver vostre personne, de faire avancer vos ouvrages, de frapper fort si ce prestre vient en personne pour vous faire lever le siege, et trouver bon que je ne perde point une si bonne occasion à employer ma vie pour vostre service; et pour le surplus, je vous promets, de sens rassis et non à l'estourdy, comme l'on m'a dit que trois ou quatre de vostre conseil disent que je parle et fais les choses, que vous ne manquerez d'argent ny de toutes autres choses de quatre mois. Priant le Createur, etc.

Vostre responce remit le Roy en bonne humeur, il la fit voir aux principaux chefs de l'armée. Bref, pour abreger, vous executastes si bien ce que vous aviez promis, que l'armée du Roy subsista, chassa par deux fois les ennemis, notamment ce cardinal, et finalement prit la ville; du recit de toutes lesquelles particularitez nous nous abstiendrons pource que vous n'y eustes nul part, et que les historiens ne les oublieront pas. Or ayans trouvé en remuant vos papiers pour les mettre en ordre et en liasses selon la nature, les temps et la qualité des affaires, grande quantité de lettres du Roy et autres de cette année 1597, nous en avons choisi trente, d'autant qu'elles parloient de ce grand et important siege d'Amiens, et ne les pouvant interposer en leurs lieux propres, à cause que la plupart sont sans dattes, et que ces Memoires estoient desja trop avancez d'escire, nous nous sommes resolus d'en faire trois chapitres de suite en ce lieu, ausquels ceux qui les liront avec attention et desir de cognoistre la verité des choses, pourront recourir et les approuver selon leurs qualitez et stiles.

## CHAPITRE LXXVI.

*Lettres de Henri IV et de Rosny, pendant le siège d'Amiens.*

*Lettre de la main du Roy à M. de Rosny.*

Mon amy, une autre fois je vous donneray plus de loisir pour estre plus long-temps chez vous; mes affaires m'appellent en diligence à mon armée; et je vous fais ce mot le pied à l'estrié, pour vous prier, incontinent la presente receuë, de vous en venir icy pour aider à faire mes affaires, car j'y ai besoin de telles gens que vous, et c'est à ce coup qu'il faut que vous me fassiez paroître vostre affection. Adieu mon amy.

A Paris, ce 4 juin 1597.

HENRY.

*Lettre du Roy à M. de Rosny, contre-signée.*

Monsieur de Rosny, je suis tres-mal content de la chambre des comptes, et de ceux qui les ont favorisez en la reduction des officiers creés en icelle, qu'ils ont obtenuë de moy, puis qu'ils me manquent de parole, ainsi que je leur escrïs, et au president Nicolay, par les lettres que je vous envoie, ausquelles s'ils ne satisfont, advertissez m'en incontinent, avec vostre advis de ce que je dois faire pour me faire obeyr; car je n'ay pas deliberé de souffrir que l'on me meine de cette sorte, et que l'on se mocque ainsi de moy et du public, comme ils ont fait depuis qu'ils ont obtenu de moy ce qu'ils desiroient. J'escris aux sieurs de Beillievre et de Sancy qu'ils ne partent point de Paris que les deniers que ladite chambre a promis me faire toucher des offices retenus ne soient receus; car c'est aujourd'huy le plus important et pressé affaire que j'aye, et m'avez fait service agreable de m'avoir adverty de l'estat d'iceluy par ce porteur. C'est le moins que je puis employer aux fortifications des villes frontieres de Picardie et Champagne, que vingt-quatre mil escus, comme j'escrivis hier au sieur d'Incarville, mais il est besoin que j'en reçoive comptant presentement la moitie, afin de pourvoir à Montreuil, à Boulogne et à Abbeville, que l'ennemy menace d'assiéger cependant que je suis engagé icy. Partant mettez cette somme à part des premiers deniers qui proviendront des triennaux, et ne l'envoyez le plutost que vous pourrez, car je ne veux pas qu'elle passe par les mains des officiers, afin qu'elle soit mieux employée. Je feray le departement des autres douze mil escus quant je scauray qu'ils seront prests. Je vous ay escrit mon intention sur la vente des offices triennaux, mais tenez la main que tous les huit jours on

m'envoie un estat des deniers qui auront esté receus, et de l'employ ou destination d'iceux, afin que je sois informé de tout, car je ne veux pas qu'il soit rien fait sans moy. Priant Dieu, monsieur de Rosny, qu'il vous ait en sa sainte garde.

Escrit au camp d'Amiens, le 2 juillet 1597.

HENRY. Et plus bas, DE NEUF-VILLE.

J'ay depuis avisé de ne retarder point le sieur de Sancy pour les fruicts que j'espere recueillir de son voyage de Normandie.

*Lettre du Roy à M. de Rosny, contre-signée.*

Monsieur de Rosny, il se fist dernièrement une fonte, en mon arsenac, de quatre canons, dont la Chevalerie me dit qu'il s'en estoit trouvé un gasté, de sorte que je ne devois faire estat de ladite fonte que de trois pour me servir, comme de fait on n'en a pas envoyé icy davantage: toutes-fois on m'a adverty que le quatriesme estoit reüssi aussi bon que les autres, mais qu'il avoit esté destourné et envoyé à Melun à la poursuite du sieur de la Grange, ce que je ne puis bonnement croire; mais si cette faute avoit esté faite, je la trouverois tres-mauvaise, et ne voudrois la passer sous silence. C'est pourquoy je m'en adresse à vous, et vous prie mettre peine de descouvrir ce qui en est, et m'en advertir fidellement. Il vous sera facile de le sçavoir; car le larcin ne se peut pas cacher sous la cappe. Les officiers de l'arsenac doivent sçavoir ce qui en est, et vous assure que me ferez plaisir de m'en esclaireir. Au reste, j'ay fait escrire à un nommé la Planche, qui est à Paris, qu'il vous communique une invention d'un pont dont il a escrit par deçà, afin de voir que c'est, et s'il y a apparence qu'elle puisse reüssir pour y entendre apres, suivant ce que vous m'en manderez. Voyez donc que c'est et m'en mandez vostre advis. Priant Dieu, etc.

Escrive au camp devant Amiens, ce sixiesme jour de juillet 1597. HENRY. Et plus bas, DE NEUF-VILLE.

*Lettre de la main du Roy à M. de Rosny.*

Mon amy, je vous fais ce mot par Guichard, l'un de mes valets de chambre, pour vous dire qu'incontinent et au plutost qu'il vous sera possible, vous donniez ordre, suivant ce qui avoit esté resolu avant mon partement de Paris, que les quatre mil escus, destinez pour mon artillerie, soient envoyez icy; car, à faute de cela, je prevois beaucoup de mal, s'en estant allé d'aujourd'huy desja cinq canonniers et les autres officiers ne voulans servir sans argent. Donnez aussi ordre à ce qu'il faut pour mes escuries, c'est pitie de voir comme je suis de ce costé là,

comme aussi à ce qui est nécessaire pour mes habillemens, d'autant que je suis tout nud; et il me semble qu'il n'est pas raisonnable que m'employant, comme je fais, pour le salut de la France, je sois ainsi traité. Je vous recommande ces trois choses là et vous prie de les affectionner si vous m'aimez et desirez me faire service agreable. Adieu, etc.

Au camp devant Amiens, ce 8 juillet 1597.

HENRY.

*Lettre du Roy à M. de Rosny, contre-signée.*

Monsieur de Rosny, je me fais à croire qu'ayant receu la lettre que je vous escrivis hier au soir apres avoir veu la vostre du huictiesme de ce mois, par laquelle vous me mandiez que vous deviez partir de Paris aujourd'huy, pour aller en Bourgongne, que vous y serez demeuré suivant mon commandement pour y continuer le soin que vous avez eu jusques à present de ce qui concerne mon service. De sorte que j'espere que la presente vous trouvera encores là, par laquelle toutesfois je ne vous écriray aucunes particularitez; mais je remettray le tout à la lettre que j'escris presentement à ceux de mon conseil, par laquelle je leur mande mon intention sur tous les points de la vostre. Partant il ne me reste qu'à vous prier de tenir la main qu'ils soient suivis et executez comme vous avez accoustumé de faire en tout ce qui concerne et importe à mon service, dont j'ay tel contentement qu'il faut aussi que vous croyez que je me repose sur vous de toutes mes affaires, autant et plus que sur les autres qui y sont employez; mais il me semble qu'il n'est pas raisonnable que les corps des compagnies soient deschargées du prest, les chefs et plusieurs autres desdits corps y ayant satisfait; car sont-ils pas membres de l'Estat comme eux et doivent-ils pas la vie et les biens à la défense du public? Ne vous laissez d'en parler, et s'il est possible, obtenez leur consentement pour vous ayder d'un demy quartier de leurs gages, suivant l'ouverture qui en a esté faite, afin qu'au moins j'en tire quelque chose. Je prie Dieu, etc.

Ecrit au camp devant Amiens, le neufiesme jour de juillet 1597. HENRY. Et plus bas, DE NEUF-VILLE.

*Lettre du Roy à M. de Rosny, contre-signée.*

Monsieur de Rosny, vous m'avez fait tres-grand plaisir d'avoir remis à un autre temps vostre voyage de Bourgongne, suivant la priere que je vous avois faite; car il me semble que j'en suis bien plus fort en mon conseil quand je sçay que vous y estes; et sans vostre presence je

desesperois du payement du cinquiesme mois de mon armée, à quoy il faut nécessairement bien tost pourvoir, d'autant que si nos soldats n'ont de l'argent, ils ne s'assujettiront jamais aux tranchées, et en seray tres-mal servy. Il faut aussi que vous me fassiez envoyer quatre ou cinq mil escus pour continuer nosdites tranchées, ausquelles il faudra employer jusques à dix mil escus, outre les dix mil escus qui furent baillés à Erard, quand il alla à Paris. Mais aussi j'espere avec cela, que nous yrons jusques dans les fosses d'Amiens, desquels nous approchons tous les jours; mais si nous n'eussions fait besogner nos soldats à trente sols la toise, nous n'en serions pas si près. Vous me ferez plaisir de verifier davantage le fait du canon, s'il est vray que celui à qui il a esté baillé, en aitourny la matiere, et comment il luy a esté delivré; car je n'en suis pas content, et faudra que la Chevalerie m'en responde. Je remets le demeurant sur la lettre que j'escris à ceux de mon conseil, approuvant ce que vous avez fait pour le comte Bothuel. Priant Dieu, etc.

Ecrit au camp devant Amiens, le treiziesme juillet 1597. HENRY. Et plus bas, DE NEUF-VILLE.

*Lettre de M. de Rosny au Roy.*

SIRE,

Pour respondre à la longue lettre qu'il a pleu à vostre Majesté de m'escire de sa main, le neufiesme de ce mois, j'ay estimé estre à propos de luy rendre raison particulièrement sur tous les points contenus en icelle. Et premiere-ment, j'asseureray vostre dite Majesté que l'on n'obmet aucune chose qui puisse servir à la vente des offices triennaux, ny à la reception de ceux qui sont pourvus desdits offices, ayant le sieur Puget présenté ses lettres en la chambre des comptes, et estant desja prest d'estre receu en l'office de tresorier de l'espargne, ce qui servira de planche pour la reception de tous les autres. J'espere que le sieur de Ligny, qui a esté pourveu de l'office de tresorier des parties casuelles moyennant dix-sept mil escus, selon l'intention de vostre Majesté, le sera incontinent apres. J'ay desja trouvé une partie des marchands desdits offices, et travaille maintenant de tout mon pouvoir pour en recouvrer d'autres, afin d'avancer le plus que l'on pourra la partie des Suisses que je sçay estre si necessaire, que de peur d'y toucher j'ay differé d'envoyer de l'argent à vostre Majesté pour faire besogner aux ouvrages et tranchées, jusques à ce qu'elle estant remplie comme elle est maintenant, je puisse envoyer des premiers deniers qui seront receus,

comme aussi la partie des quinze cens escus pour un mois des officiers des vivres.

Pour les quatre mil escus pour l'artillerie, je les ay envoyez il y a huit jours suivant le commandement de vostre Majesté, à laquelle j'ay fait responce par mes dernieres qu'il n'y avoit pas grande esperance aux six vingts milliers de poudre dont vostre Majesté faisoit estat, à laquelle j'envoye aussi un memoire par lequel elle pourra cognoistre les difficultez qui sont survenues au fait des pionniers, qui furent ordonnez lever au commencement de l'année. Pour la partie des quinze mil escus des munitionnaires de l'armée, l'on leur a baillé un des deux offices de tresorier de l'ordinaire de la guerre, lequel on leur a promis de leur faire valoir, au cas qu'ils ne trouvassent marchands. Les articles du majeur de Montreüil, touchant les bleds qu'il faut mettre à Boulongne, Montreüil et Rué, ont esté veus et respondus selon ce que l'on a estimé pour le mieux; et en attendant que lesdits bleds puissent estre fournis par ledit majeur, j'ay donné ordre et fourny argent pour en acheter cent cinquante muids, lesquels seront fournis promptement, à sçavoir trente muids à Sainct Fremin pour Rué, et le reste esgalement par moitié dans Boulongne et Montreüil.

Quant à l'office de receveur de Chaalons qui a esté destiné aux fortifications, l'on en a envoyé deux mil escus, et en seront envoyez les deniers à mesure que l'on les recevra. Pour les trois mois des garnisons de Picardie, j'ay desja fait sçavoir à vostre Majesté qu'il y en avoit un prest; pour les deux autres, il n'y a point eu de traité à faire avec les sieurs Zamet et Cenamy, car ils ont voulu avoir dix mil escus pour l'avance, lesquels nous avons esté contrains en vostre conseil de leur accorder. Pour celle de Champagne, l'on a reçu lettres du sieur de Verzenay, tresorier de France, auquel vostre Majesté avoit commandé faire le voyage, par lesquelles il represente à vostre conseil la misere de la province, et l'impuissance du pauvre peuple; ayant esté par les eslections pour le recouvrement des deniers, il fait par icelles quelques ouvertures pour l'acceleration d'iceux, ausquelles on a pourveu au mieux qu'il a esté possible. Quant aux compagnies du regiment de Piedmont qui sont à Mets, leur payement est compris dans les cent cinquante mil escus dont on fait estat pour le payement de l'armée, et n'a on fait autre fonds pour le payement d'icelles. Neantmoins, pour subvenir ausdites compagnies, il sera emprunté, sous mes promesses et du sieur d'Incarville, ce qui leur faut pour un mois, dont nous serons remboursés sur les pre-

miers deniers de la composition des financiers.

Nous avons escrit au sieur de Sobolle, en corps de conseil, que nous regarderions les moyens de luy pourvoir et de le satisfaire au mieux que nous pourrons. Pour le fait des escaries de vostre Majesté, nous nous sommes obligez pour une partie de sept mil escus au receveur general de Rouën, ledit sieur d'Incarville et moy, et sommes apres pour faire fonds de quelque huit cens escus pour les selles d'armes et autres choses necessaires pour vostre dite Majesté. Nous pourvoyrons aussi luy et moy au sieur de Fouquerolles d'un moyen que nous avons en main pour le payement de son voyage, comme nous avons fait à celui du fils du prevost des marchands. Pour l'establissement du chemin des postes de Paris à Rome, j'ay baillé le memoire de Valerio au sieur de la Varenne, et doivent communiquer ensemblement sur ce sujet pour voir quel sera le meilleur chemin et plus asseuré. Quant à la partie de douze mil escus du colonel Galaty, il luy a esté mandé qu'elle seroit payée avec la premiere monstre, comme aussi celle de trois mil escus pour deux mois de ce qu'il faut de reste aux Suisses. Vostre Majesté me mandera par lettres expresses que l'on luy envoye la partie, deslors qu'elle sera preste, par terre ou par eau jusques à Crevant, et sous quelle escorte, estant à craindre que ceux de Seurre, ou du Gaucher, ou des ennemis estrangers, ayans eu nouvelles de ladite voicture, ne fassent quelque entreprise sur icelle, afin que suivant la responce et le commandement de vostre dite Majesté, il soit donné ordre à l'acheminement d'icelle, comme je ne manqueray pas de faire à celui des deniers de la prochaine monstre, et de me trouver à Compiègne vers le premier d'aoust, suppliant vostre Majesté de vouloir escrire en general à tous nous autres messieurs de son conseil les mesmes choses qu'il luy plaist de me mander en particulier; car cela facilitera les expeditions et me deschargera en quelque sorte d'envie, encor que cela ne m'empeschera pas de faire tousjours mon devoir, sans autre esgard que de vostre service et du bien de l'Estat: Sur ce je prie le Createur, etc.

Du 19 juillet 1597, Rosny.

*Lettre du Roy à messieurs de son conseil d'Estat et de finances.*

Messieurs, j'ay veu par vostre lettre du 24, ce que vous me proposez et qui a esté advisé en mon conseil, touchant la descharge que vous jugiez se devoir faire à mon peuple, du dixiesme de ce qui a esté imposé pour la presente année. Je desirerois que l'estat de mes affaires et les

grandes despendes que je suis contraint de faire pour la conservation de cet Estat, mesmes à l'occasion de ce siege, me pussent permettre de leur donner plus de soulagement, et leur accorder plus grande descharge que celle que vous me proposez par vostredite lettre, laquelle j'ay fort agreable, et que l'execution s'en fasse suivant l'ordre duquel vous me donnez advis par vostredite lettre, sinon pour le regard des parroisses les plus pauvres et affligées auxquelles je veux faire ressentir davantage le fruit de la grace que je fais à mondit peuple, et qu'au lieu des quatre-vingts mil escus que vous estes d'avis d'affecter à la descharge et soulagement desdites parroisses, qu'il en soit pris encor cent mil des six cens mil que j'accorde en general, dont le departement se fera au profit desdites parroisses qui sont les plus pauvres et affligées. C'est la grace que je veux à present faire à mon peuple, mesmes aux parroisses les plus ruinées; ce que vous ferez observer et executer par les tresoriers de France et autres officiers de chacun bureau, leur donnant l'ordre et instruction de ce qu'ils auront à faire, pour faire jouyr mes sujets du benefice de ladite descharge suivant mon intention. J'ay veu le rolle de la taxe des offices triennaux, lequel j'ay agreable en la forme qu'avez advisé, mesme que la distraction soit faite d'aucuns desdits offices. J'ay agreable les dispences de quarante jours pour les deux offices pour la resignation desquels vous avez composé, puis que lesdits offices eussent esté supprimez, et que les deniers qui en proviennent sont employez si utilement. Je desire que ceux de mon conseil qui sont obligez pour mon service envers la veufve du feu lieutenant civil, soient deschargez de la poursuite qui se fait contr'eux; si vous n'y pouvez disposer ceux qui font ladite poursuite, vous en trouverez l'expedient et m'en donnerez advis.

J'auray agreable que Vienne soit contenté de ce qui luy a esté promis pour la capitulation de ma ville de Troyes; mais je ne puis trouver bon qu'il soit assigné sur le fonds qui est destiné et qui peut servir à l'entretienement de mon armée.

La monstre derniere fut faite le vingtiesme du mois passé; les soldats patissent beaucoup et n'ont moyen de vivre que de l'argent de leurs monstres et que du pain qui leur est distribué journellement. Si ladite monstre leur manque, je perdray par la faim et necessité ceux qui demeureroient en mon armée, et ne sera en ma puissance de retenir les autres, qui me fait vous prier, d'autant que vous aymez le bien de mon service, d'assembler promptement ce qu'il faut pour ladite monstre, et me l'envoyer en atten-

dant que vous ayez toute la somme. Envoyez moy cent mil escus aussi-tost que ladite somme sera ensemble. Je feray partir l'escorte pour la mener; et m'assurant que vous userez en cela de toute la diligence possible, je prieray Dieu, etc.

Ecrit au camp devant Amiens, le 27 juillet 1597.

HENRY. Et plus bas POTIER.

Et plus bas en apostille est escrit :

J'ay resolu la monstre de mon armée au peultiesme ou dernier de ce mois; je ne la puis retarder sans la perte de mon armée, et si les deniers de ladite monstre ne sont rendus en mon armée le premier ou second jour du mois prochain, il sera impossible de retenir les soldats, lesquels ont beaucoup de necessité, qui me fait vous prier de donner ordre que l'argent que vous pourrez assembler pour ladite monstre soit porté à Compegne, et qu'il y arrive le dernier de ce mois, au plus tard. Si vous n'avez ce qu'il faut pour la monstre entiere, vous enverrez par ladite premiere voicture cent mil escus, ou, pour le moins soixante mil, pour distribuer à l'infanterie. Cette occasion est si importante à mon service, que je m'assure que n'y ferez faute; aussi, faudroit-il lever le siege si l'argent de ladite monstre n'estoit envoyé dans ledit temps. J'escris aux habitans de ma ville de Paris pour l'argent des Suisses, à quoy je vous prie tenir la main, et donner ordre que ce que vous enverrez pour la monstre de mon armée, soit le dernier de ce mois audit Compegne.

*Lettre de la main du Roy à M. de Rosny.*

Mon amy; suivant vostre lettre, j'ay fait entendre à ceux de mon conseil, ma volonté sur tout ce qui m'a esté proposé par leurs precedentes depesches, comme j'ay aussi fait à vous pour le regard des advis que vous m'avez donnez. J'ay veu par vostre derniere l'estat de la recepte et la despence qui a esté faite depuis mon parlement, aussi ce que l'on a assemblé d'argent pour la monstre de mon armée, ce qui m'est fort agreable; mais croyez qu'il n'est moins necessaire, car mon armée ne peut subsister si elle n'est payée. J'escris à ceux de mon conseil, et les prie instamment d'envoyer promptement ce qu'il faut pour ladite monstre, et si toute la somme n'est ensemble, envoyer cent mil escus qui seront departis aux plus necessiteux, attendant le surplus. A quoy je vous prie tenir la main, et me donner incontinent advis du temps dans lequel les deniers de ladite monstre pourront estre apportez en mon armée. Enquoy m'assurant que n'oublierez rien de vostre diligence et affec-

tion accoutumée au bien et advancement de mes affaires, je prieray Dieu, etc.

Au camp devant Amiens, le 27 juillet 1597.

HENRY.

La nécessité des soldats est telle que j'ay résolu leur monstre au penultiesme ou dernier de ce mois; il faut que l'argent de ladite monstre soit à Compiègne au mesme jour. Donnez ordre qu'il y soit envoyé. Si toute la somme n'est assemblée, que l'on envoie ce que l'on pourra par la première voiture et dans ledit jour, et le reste à mesure qu'il se recevra; mais il n'y faut manquer, car de là despend la ruïne ou la conservation de mon armée.

*Lettre du Roy à M. de Rosny, contre-signée.*

Monsieur de Rosny, un avis qui me fut hier donné, qu'il estoit passé du costé de Clermont cinq ou six cens chevaux des ennemis, fut cause que je n'envoyay, dès hier à Compiègne, l'escorte nécessaire pour amener icy la marchandise que vous y avez conduite, et que ladite escorte ne pourra partir encor aujourd'huy, parce que nous fusmes tout le jour à cheval avec toute nostre cavallerie, laquelle y est demeurée encore toute la nuit, de sorte qu'il faut qu'elle se repose aujourd'huy; mais je donneray ordre que ladite escorte partira demain de bon matin, afin de gagner, le jour mesme, ladite ville de Compiègne, si faire se peut, et vous delivrer de ladite conduite, faisant estat de faire venir l'artillerie et les poudres qui sont là avec le reste. Partant vous ferez tenir prest toutes choses. Priant Dieu, etc.

Escrit au camp devant Amiens, ce quatriesme aoust 1597. HENRY. Et plus bas, DE NEUF-VILLE.

## CHAPITRE LXXVII.

### *Suite des lettres.*

*Lettre du Roy à M. de Rosny, contre-signée.*

Monsieur de Rosny. J'ay opinion que viendrez jusques en ce lieu vous ayant mandé, mais vous n'avez point pour retourner à Paris: vous sçavez veu l'estat de ce siege et cognez combien il est nécessaire de maintenir les forces qui sont au siege, et en faire veoir de nouvelles, ce qui ne se peut qu'en leur donnant moyen de vivre et servir. C'est pourquoy j'escris à ceux d'iceul, qu'ils travaillent pour assembler ce qui leur est nécessaire pour achever le siege de la manière dernière, et celle qui se fait dans le siege et de vous. Ceux de mondit siege ont donné avis de l'offre de deux

cens quarante mil escus faite pour les offices de receveurs triennaux; mais je trouve que la condition que l'on demande pour l'avance deadits deniers est trop desavantageuse pour mon service. J'escris à ceux de mondit conseil, qu'ils considerent cet offre en mon conseil, et qu'ils oyent ceux qui voudront faire ma condition meilleure, et qu'ils m'en donnent avis. Je desire que vous y soyez present quand ladite proposition se fera, et que vous m'en escriviez particulièrement vostre avis; et quand les deniers de ladite monstre seront ensemble, vous viendrez me trouver: vous trouverez lors nostre ouvrage bien avancé. Et cependant je prie Dieu, M. de Rosny, vous avoir en sa garde.

Au camp devant Amiens, ce dixiesme jour d'aoust 1597.

HENRY. Et plus bas, POTHIER.

*Lettre du Roy à M. de Rosny, contre-signée.*

Monsieur de Rosny, je m'attendois de vous voir avec l'argent que vous avez conduit à Compiègne, si l'escorte qui l'est allé querir vous y eust encore trouvé; car j'avois commandé à celui qui la conduisoit de vous amener; mais puis que le soin que vous avez de mon service, vous a fait retourner à Paris si promptement, je suis assuré que vous avez jugé qu'il estoit nécessaire de ce faire. Toutesfois je vous diray que je seray bien aise de vous voir, et que vous fassiez un tour jusques icy quand vous cognoistrez que mon service vous permettra d'eschapper. J'ay veu l'estat que vous nous avez envoyé, tant de la recepte et despense de l'argent, procedant des moyens que nous avons destinez au payement de nostre armée, que de la partie que j'ay remise au peuple, dont ceux de mon conseil m'avoient ja adverty. Avec vingt mil escus encores, nous sortirons nettement du payement du cinquieme mois de l'armée, l'artillerie payée; mais il sera difficile que nous le fassions à moins, pour infinies despences extraordinaires qui se presentent: partant faites que j'en sois secouru promptement, et continuez à m'advertir de toutes occurrences. Priant Dieu, etc.

Escrit au camp devant Amiens, le 12 aoust 1597.

HENRY. Et plus bas, DE NEUF-VILLE.

*Lettre du Roy à M. de Rosny, contre-signée.*

Monsieur de Rosny, n'attendez à me venir voir que vous ayez recouvert et mis ensemble l'argent qu'il faut pour le payement du sixiesme mois de mon armée. car je veux parler à vous; et si je veux que vous voyez nostre besongne devant qu'elle soit plus avancée, davantage il ne faut pas faire apporter icy lesdits deniers qu'il

ne soit temps de les employer, car il y a tant d'affamez icy comme ailleurs, que s'ils sçavoient que nostre bourse fust plaine, ils ne cesseroient de m'importuner pour y mettre les doigts et me seroit difficile de m'en défendre. Il faut assembler par delà nos deniers, les mettre et garder dedans nos coffres, en faire la meilleure provision que nous pourrons et la tenir secrette pour la faire apporter icy quand il sera temps et besoin de l'employer. Voila mon intention et la raison d'icelle, laquelle vous tiendrez la main qui soit suivie; mais vous avez bien fait de vous estre opposé à la demande et poursuite de Mortier, car je n'entends point mesler des parties de mascarades avec les deniers destinez pour mon armée. Ne permettez donc que cela ait lieu, et quant à l'assignation que l'on demande pour mon neveu le duc de Guise, j'y veux penser devant que d'en ordonner; ce sera demain que je vous en escriray ma volonté. Je prie Dieu, etc.

Escrit au camp devant Amiens, le 18 aoust 1597.

HENRY. Et plus bas, DE NEUF-VILLE.

*Lettre du Roy à messieurs de son Conseil.*

Messieurs, je suis tres content de la resolution que vous avez prise avec le prevost des marchands, eschevins et habitans de ma bonne ville de Paris, et encores de l'affection et franchise avec laquelle ils l'ont embrassée, ainsi que j'ay appris par vos lettres du 23 de ce mois, que je receus hier au soir; car j'ay grand besoin de gens de pied tant pour avancer la prise de cette ville, en laquelle il se pert tous les jours quelqu'un, que pour secourir mes autres places que je crains que mes ennemis attaquent pour me divertir d'icy, ou se revanger de la perte que j'espere, avec l'ayde de Dieu, qu'ils feront bientôt de celle-cy. Partant le plustost que je pourray avoir les douze cens hommes de pied que vous avez proposez et qu'ils ont accordé de soudoyer, ce sera le meilleur. J'estime que vous avez considéré qu'il faudra donner aux mestres de camp et aux capitaines, à chacun cent escus pour le moins, pour en faire la levée, et adviser où l'assemblée s'en fera, et quel chemin vous leur ferez tenir pour les envoyer icy, afin d'y faire dresser d'heure les estapes, à ce que le peuple n'en soit foulé, non plus qu'a esté celuy de Normandie de celles que j'y ai faites. Si vous ne l'avez encor fait, je vous prie y donner ordre si tost que vous aurez receu la presente, car c'est le principal pour faire que j'aye bien-tost lesdits gens de guerre et pour donner contentement à mes sujets de ladite levée dedans aujourd'huy. Je choisiray les mestres de camp et capitaines, desquels je veux estre servy à cette occasion,

et vous en advertiray par ce dernier courrier que vous m'avez dépesché, que j'ay retenu pour cela. Au reste, j'approuve que madite bonne ville soit déchargée du demy doublement des aydes, suivant la proposition que vous en avez faite; mais advisez si pour cet effet il est necessaire de revoquer l'edit fait et verifié pour l'establisement d'iceluy, ou s'il suffira d'en surcoir ou revoquer l'execution seulement pour le regard de ladite ville, pour ne l'esnerver et rendre moins recevable et utile aux autres villes et provinces où il doit estre exécuté, et recognois que vous entendez et est aussi necessaire qu'il ayt lieu. Toutes-foiz je remets le tout à vostre meilleur advis; car enfin, j'entends que ladite ville en soit deschargée aux conditions que vous m'avez escrites: partant faites en faire les expeditions telles que vous jugerez estre pour le mieux, vous repetant que je suis fort aise de cette resolution, et qu'elle est passée sans faire assemblée generale par vostre diligence et prudence, et le bon devoir que le prevost des marchands y a fait avec mes bons serviteurs de ladite ville, comme j'escriray ce jourd'huy audit prevost en particulier et ausdits habitans en commun, et desire cependant que vous leur fassiez entendre.

Au demeurant, il est certain que le cardinal Albert est d'hier arrivé en son armée, que le vieil comte de Mansfeld y commande en qualité de mareschal de camp, et qu'il s'approche de nous; ce sera pour essayer de jeter quelques gens dedans cette ville, ou pour en assieger une autre, car je ne puis croire que ledit cardinal me veille faire tant de bien que d'entreprendre de me combattre pour nous faire lever le siege: toutes-foiz, en pensant faire l'un, peut-estre qu'il s'engagera à l'autre; pour le moins je vous assure que je n'en perdray l'occasion si elle s'offre. Car je defends et combats une si juste cause, que je me promets que Dieu m'en donnera la victoire si nous en venons là; mais, pour ce faire avec plus de seureté, il est necessaire de faire avancer toutes les forces de cheval et de pied que j'ay mandées, dont je vous envoie un estat, afin que vous y teniez la main de vostre costé, avec vostre accoustumée diligence.

Il est necessaire aussi que nous recevions les vingt mil escus de ma bonne ville de Paris, à temps, pour pouvoir faire monstre à nos Suisses, lesquels ont perdu des soldats depuis ce siege, comme ont fait les autres, que l'on sera contraint de leur payer jusques à ce qu'ils aient fait ladite monstre. Partant si lesdits deniers n'estoient prests, comme il me semble avoir appris par lettres du sieur d'Incarville, qu'ils sont, prenez ladite somme de ceux que vous avez as-

semblez pour le sixiesme mois de mon armée, et me l'envoyez en diligence, avec dix ou douze mil escus, pour fournir à infinies despences pressées et inevitables, qui se presentent journellement; et pour ausquelles pourvoir j'ay esté contrainct d'emprunter de madame de Beaufort, quatre mil escus qu'elle avoit fait apporter icy, lesquels je vous prie faire rendre par delà au sieur Pujet, à la reception de la presente, car je l'ay ainsi promis et desire qu'il n'y ait point de faute, vous priant de croire que lesdits deniers ont esté bien employez, comme seront tous ceux que vous nous enverrez, car il ne s'en débourse rien que par mes commandemens; et en feray voir la despence au sieur de Rosny quand il sera icy; vous en aurez aussi l'estat au premier jour.

Pourvoyez semblablement au paiement de l'extraordinaire de mon cousin le connestable, car il ne peut s'entretenir icy sans cela, et vous sçavez combien sa presence m'y est necessaire. Je desire aussi que vous fassiez bailler quelque chose à mon nepveu le duc de Nevers, sur sa pension, afin qu'il puisse partir et aller recueillir en Champagne les forces que j'ay commandé y estre assemblées pour amener icy; car ce renfort n'est à mespriser, et le puis avoir à propos si mondit nepveu fait diligence, comme il m'a mandé qu'il fera s'il est secouru de ladite pension, laquelle luy sera bien employée. Il est necessaire pareillement que vous changiez l'assignation que vous avez donnée au sieur d'Ecluseaux pour payer sa garnison, d'autant qu'il m'a remonstré qu'il ne peut garder sa place si elle n'est payée, ce qu'il dit ne pouvoir faire des offices du parlement de Paris nouvellement créés, sur la vente desquels vous l'avez assigné, parce qu'il ne trouve point d'acheteurs; partant il desire que vous repreniez lesdits offices et que vous luy donniez une assignation de laquelle il puisse recevoir argent plus promptement, ce que je vous prie de faire. Vous pourrez vendre apres, tout à loisir, lesdits offices, pour vous en servir à faire les derniers mois de l'armée. Je vous ay escrit pour les quatre compagnies de Chevaux legers, de Champagne, afin de leur donner assignation d'un mois, outre ce qu'elles ont receu pour les raisons que je vous ay mandées; à quoy j'auray bien agreable que vous donniez ordre, comme au paiement des gages des sieurs de la Riviere, Dulaurens, de Lomenie et Clerville; car leur service m'est necessaire; et leur est impossible de se maintenir s'ils ne sont payez. Mais je vous diray, sur toutes les susdites despences, que je n'entends pas, pour y satisfaire, que vous touchiez à la provision des cent cin-

quante mil escus qu'il faut que vous faissiez pour le sixiesme mois de mon armée; car je veux qu'elle soit preferée à toute autre chose, et que vous mettiez à part ce dont vous la devez composer, sans qu'il y soit touché par qui que ce soit; car il ne faut pas qu'elle me manque sur la venue de l'armée ennemie et le fort de la besogne. Messieurs, je vous prie donc d'en avoir soin par preference à toute autre chose; et si vous jugez n'estre à propos que les deniers dudit mois soient mis et gardez dans les coffres du Louvre comme j'avois escrit, advisez à les bailler en garde à quelqu'un qui s'en acquitte fidellement, afin qu'il n'y soit touché et ne soient consommez à mesure qu'ils seront receus; et comme je m'assure que vous y sçavez donner ordre, estans esclaireis de mon intention, je ne vous en feray autre recommandation par la presente; à laquelle j'adjousteray seulement que nos assiegez firent hier deux sorties pour donner dedans nos trenchées, mais ils furent relevez de la peine de la moitié du chemin; car nos gens alloient au devant d'eux et les chargerent si rudement, qu'ils les firent tourner quasi sans resistance, et en fut tué neuf ou dix et pris deux. Nous gagnames aussi deux de leurs casemattes que nous leur avons rendus inutiles, et avons avancé chemin dedans leurs fossez; de sorte que j'espere que nous arriverons dedans deux ou trois jours à leurs remparts. Je prie Dieu, messieurs, qu'il vous ait en sa sainte garde.

Escrit au camp devant Amiens, le vingt-cinquiemes jour d'aoust 1597. POTHIER.

*Lettre du Roy à M. de Rosny, contre-signée.*

Monsieur de Rosny, voyez la lettre que j'escris à ceux de mon conseil, et tenez la main qu'elle soit suivie. Venez me trouver aussi, suivant ce que je vous ay mandé, et amenez un bon cheval avec vos armes, afin de m'ayder à recevoir la benediction du cardinal, s'il nous vient voir comme il nous en menace, et apres retourner par delà, car je sçay que vostre personne m'y est necessaire. J'ay commandé au sieur de Ville-roy de respondre plus particulièrement à la lettre que vous luy avez cy-devant escrite. Je prie Dieu, etc.

Escrite au camp devant Amiens, le vingt-cinquiemes aoust 1597.

HENRY. Et plus bas, DE NEUF-VILLE.

*Lettre de M. de Ville-roy à M. de Rosny.*

Monsieur, je vous envoie les lettres du Roy, pour recommander la verification de l'edit de grand voyer, qui ne font aucune mention de vous; je desire qu'elles profitent. Je ne vous



eusse demandé les vingt-cinq mil escus que vous nous envoyez, si j'eusse peu fournir à infinies despences qui se presentent ainsi que je vous ay escrit; car j'ay la mesme crainte que vous, c'est que cela empesche que nous ne touchions si tost les sommes qu'il faut pour faire faire monstre à l'armée et la payer; mais je vous assure qu'il ne sera touché à ce que vous nous envoyez que par force c'est à dire, pour chose nécessaire. Il est vray, qu'il faudroit que nous sceussions au vray dedans quel temps nous recevrons le reste de nostre mois, afin d'en donner assurance à nos gens et leur donner plus de courage d'attendre leur payement, apres lequel ils commencent fort à crier, et principalement nostre cavalerie legere et celle qui n'est payée du thillon, car elle sera plus incommodée qu'elle ne souloit, l'ennemy approchant et nous ostant la riviere. Je croy qu'il a esté à propos de faire la déclaration que vous avez proposée, pour réchauffer nos triennaux, mais sçachez qu'une moindre somme recuë à propos profite plus qu'une plus grande trop attendue. La depesche du conseiller des aydes est tres-bonne, et espere qu'elle ne sera inutile. Le Roy fut hier reconnoistre l'armée de l'ennemy, il la trouva passée deçà la riviere d'Authie, il la vid par devant et par derriere, il l'estime composée de douze à treize mil hommes de pied, et de deux mil cinq cens à trois mil chevaux, mais sans chef et conduite. Il croit qu'elle yra au pont Dormy, mais il espere loger aujourd'huy nos gens dedans leur ravelin, où nous faisons jouer nos mines cette apres-dinée, et apres aller gratter leurs remparts plus seurement. Nous esperons d'en estre maistres dedans quatre jours avec l'ayde de Dieu, ou de nous battre avec le cardinal. Je prie Dieu qu'il nous donne la victoire, etc.

Du camp devant Amiens, le quatorziesme septembre 1597. DE NEUF-VILLE.

*Lettre du Roy à M. de Rosny, contre-signée.*

Monsieur de Rosny, nous n'avons pas combattu le cardinal, mais nous l'avons empesché de jetter du secours dedans cette ville; c'estoit nostre but qui nous est bien succédé, graces à Dieu; mais si j'en eusse esté creu, il n'en eust esté quitte à si bon marché, car nous l'eussions combattu et comme je croy battu. J'ay suivy le conseil des plus sages, et comme j'espere que cecy me donnera bien tost cette ville, je veux dire avec eux que je n'auray pas peu fait; nous y allons travailler à bon escient. Mais si vous ne m'envoyez bien-tost dequoy faire faire monstre et payement à mon armée, elle se débandra; toutes les compagnies de cheval et de pied y

sont à present completees, voire plus fortes que le nombre ne porte. C'est pourquoy il faut que vous m'envoyez du moins cent mille escus pour y satisfaire; tenez la main, je vous prie, que je les reçoive au plustost. Souvenez-vous de la fausse retraite que fit le duc de Parme, quand il vint secourir Roën; il faut craindre que cetuy-cy en fasse de mesme. Cognitoissant quelle est l'ardeur des François, comme ils se refroidissent et retirent, l'occasion d'une bataille estant passée, j'apprehende cela merveilleusement. C'est pourquoy il faut contenter ceux qui tirent solde, afin qu'ils tiennent pied-abouille; partant, je vous prie derechef d'en avoir soin. Vous avez bien fait d'avoir fait faire la declaration en faveur des triennaux, dont vous m'avez donné advis, et sçay bon gré au tresorier de l'espargne Gobelin, de la bonne volonté qu'il a de continuer, tant qu'il luy sera possible, les avances qu'il a faites jusques à present, pour faire aller ma maison et contenter mes gardes. J'approuve aussi le marché que vous avez fait pour les vivres de l'armée, et si vous avez besoin de quelques lettres, tant à ceux du parlement qu'à autres pour avancer mes affaires, me le mandant, je vous les enverray. Mais je vous prie derechef de donner ordre que j'aye tost dequoy payer l'armée, et aussi que je sois secouru de poudre à canon; car la provision que j'en ay fait commence fort à diminuer. Ayez soin pareillement du fait des liguees, afin que l'argent que nous y avons mis ne soit inutile. Priant Dieu, etc.

Escrit du camp devant Amiens, le dix-huitiesme jour de septembre 1597. HENRY.

Et plus bas, DE NEUF-VILLE.

*Lettre du Roy à M. de Rosny, contre-signée.*

Monsieur de Rosny, je vous prie faire que l'on m'envoye promptement encores trente ou quarante mil escus, pour parfaire le mois à mon armée, car si je ne la paye entierement il s'en desbandera une grande partie, et faudra que je quitte la campagne, ce qui amortiroit le fruit des avantages qu'il a pleu à Dieu me donner. Je feray faire la monstre jeudy, qui est le jour que nos assiegez doivent sortir; ce sera pour amuser et consoler nos gens qui verront sortir les autres à regret. J'ay receu vostre lettre du 18, laquelle m'a fort contenté, car elle me donne esperance d'obtenir le secours que je vous demande; mais il est nécessaire que je l'aye à temps, pour pouvoir payer ensemble ladite armée, sans en faire à deux fois. Apres ce mois je ne vous en demanderay plus qu'un pour le reste de cette année, afin de pouvoir bien employer

soit en Lorraine. C'est là le sujet de la mienne, que je finiray pour prier Dieu, mon amy, vous avoir en sa garde.

Ce cinquieme octobre, à Monceaux.

HENRY.

*Lettre de M. le marquis de Rosny au Roy, pour advis sur le dessein du siege de Dourlans.*

SIRE,

Je supplie tres-humblement vostre Majesté de croire que, comme je n'ignore nullement à quels et combien grands devoirs les mandemens divins et les loix humaines obligent les bons sujets et loyaux serviteurs envers leurs princes legitimes et maistres debonnaires, et recognois que je tiens, dois et veux incessamment tenir de vos faveurs, graces et benescences, tout ce que j'ay et auray en ce monde d'avancement et d'accroissement de bonne fortune, aussi n'espargneray-je jamais, vie, bien, peine, travail ny industrie pour rendre à tous vos commandemens l'obeyssance dont je leur suis redevable. Mais comme cette vehemente affection m'a fait aussi-tost mettre la main à l'œuvre et user de toute sorte de diligence possible, afin de donner ordre que rien de tout ce qui peut despendre de moy ne puisse manquer pour vostre entreprise du siege de Dourlans, dont il a pleu à vostre Majesté de m'escire, aussi cette mesme devotion à son service me fait-elle prendre la hardiesse de luy escire mon advis sur chose tant importante, sans en estre requis : m'imaginant que les grandes peines, fatigues et incommoditez souffertes par les soldats de vostre armée, pendant un si long siege que celuy d'Amiens, et les autres occasions qui se sont presentées par la survenüe du cardinal d'Autriche en corps d'armée, faisant demonstration de vouloir venir à la bataille, les nouvelles asseurées qui sont venues à vostre Majesté, ainsi qu'il luy a pleu de me l'escire, de la subsistance de cette armée sur les frontieres, que l'on peut conjecturer n'estre ainsi retenuë en corps, sinon à dessein d'essayer de prendre leur revanche des affronts signalez que vostre grande prudence et valeur ont fait recevoir à ce venerable prelat et tous ces bravaches Espagnols, si vous luy en laissez naistre l'occasion, et d'abondant l'hiver pluvieux où nous sommes entrez, ne conviennent gueres bien avec le dessein de former un nouveau siege, auquel vous aurez à camper à l'air, dans des terres grasses et humides, à forcer ceux de dedans qui s'opiniastrent sur l'esperance d'un secours, à vous remparer et défendre contre ceux de dehors s'ils s'advancent avec leur armée, comme toutes les raisons de la guerre le veulent

ainsi, et à garantir vos soldats des pluies, du froid et des fanges, qui seules peuvent devenir suffisantes à vous faire lever le siege, sinon avec honte, à tout le moins, non sans desplaisir et peut estre dommage et beaucoup de despences et de peines inutiles. Suppliant vostre Majesté de m'excuser, si j'entreprends de donner conseil en affaires de guerre à un si grand Roy, lequel, en l'intelligence et pratique de ce mestier, excelle par dessus tous les autres, et des siecles presens et des siecles passez. Et finiray la presente par une devotieuse priere envers Dieu, à ce qu'il luy plaise, Sire, vous donner bon conseil, santé et continuelle longueur de jours, accroissement de domination et succez heureux à tous vos desseins.

De Paris ce 7 octobre 1597. ROSNY.

*Lettre du Roy à M. de Rosny, contre-signée.*

Monsieur de Rosny, j'ay veu bien particulièrement, par vostre lettre du cinquieme de ce mois, l'avancement que ceux de mon conseil ont donné aux affaires qui se presentent pour mon service, et principalement pour ce qui touche l'entretienement de mon armée et les despences qui sont requises pour l'artillerie, poudres et vivres, dont il est necessaire que ceux de mon conseil ayent autant de soin pendant ce siege comme ils ont eu lors de celuy d'Amiens, estant la conqueste de Dourlans necessaire pour la seurété de mes villes d'Amiens et d'Abbeville, et assize en tel lieu qu'elle incommode le meilleur pays de mes ennemis plus que nulle autre de cette frontière. Je l'ay fait investir ce jourd'huy, et feray user de telle diligence à l'avancement de ce siege, qu'encores que la saison soit fascheuse, j'espere en avoir une prompte et heureuse yssuë, moyennant le bon devoir et courage que chacun y apportera. Il faut faire avancer les poudres, pourvoir aux vivres et envoyer promptement l'argent pour travailler aux tranchées, et pourvoir de bonne heure pour les fonds de la monstre prochaine. Quant aux sommes imposées pour les petits soldats, il seroit à propos que le tout ou partie fust levé pour servir au travail qui se fera durant ce siege. J'ay mandé au sieur de la Grange qu'il aille en diligence à Roüen, pour faire verifier purement et simplement, l'edit des triennaux. Je luy ay envoyé les depeschés necessaires, et à ceux de la chambre des comptes, pour cet effet. Maintenant qu'Amiens est reduit, la Picardie estant plus libre, les offices de ladite province seront en meilleure vente. Quant aux villes qui pensent estre deschargées du secours qu'on leur demande, il faut leur faire cognoistre combien importe au general de mes affaires, et

delà, nous traiterons du voyage de Bretagne ; qui est tres-desiré d'un chacun. Le Roy m'a dit avoir ja donné l'ordre duquel vous luy avez donné advis par vostre lettre, depuis laquelle j'ai receu la lettre du 11. Je prie Dieu, etc.

Du camp de Belbat, le 13 octobre 1597.

DE NEUF-VILLE.

*Lettre du Roy à M. de Rosny contre-signée.*

Monsieur de Rosny, il se commet plusieurs abus et desordres en l'administration de mes finances, qui procedent de diverses causes ; mais celle qui leur donne plus de couleur, et qui en effet produit plus de mal, est celle qui est fondée sur les non-valeurs que les comptables disent estre et se trouver par chacun an en la recepte de leurs charges, car ordinairement ils s'en servent pour s'excuser d'acquitter les despences qui leur sont commandées ; et comme autres qu'eux ne verifient si lesdites non-valeurs sont veritables, au moins si exactement qu'il seroit necessaire, il advient que lesdits deniers demeurent en reste en leurs mains, dont ils disposent et se jouient apres quasi comme il leur plaist. Je sçais bien que mon peuple est tres-pauvre, de sorte qu'il est difficile qu'il paye sa taille entierement comme il faisoit devant la guerre, et que cette pauvreté engendre des non-valeurs qui sont inevitables. Toutesfois plusieurs m'ont remonstré et fait entendre qu'à la fin l'on le fait bon payeur en une sorte ou autre, et que comme le temps fait perdre la memoire et cognoissance desdits deniers passez en non-valeurs, ils servent apres à acquitter des parties esgarées à moitié gain. Je ne veux pas croire que tout ce qui s'en dit soit véritable, et n'entends par la presente faire tort aux gens de bien ; mais je desire verifier par vostre moyen, en l'estenduë des receptes generales où je vous ay envoyé, si le peuple doit tant d'ar-rerages de tailles et du taillon des années passées, et principalement des deux dernières de quatre-vingts quatorze et quatre-vingts quinze. Au moyen dequoy je vous prie d'y travailler, tant par la verifcation des estats de recepte et despense des receveurs particuliers et generaux, que par une sommaire enquete que vous en ferez par les eslections que lesdits comptables vous diront estre demeurées en reste ; et si vous decouvrez quelques parroisses de cette qualité-là, informez-vous d'où en procede la cause, car souvent elle procede autant de desobeissance ou de la negligence des officiers, que de pauvreté ; de quoy je desire fort d'estre esclaircy à la verité. Vous me ferez doncques ce service, avec les autres que j'attends de vous, en l'exécution de vostre commission, et me donnerez advis de la re-

ception de la presente. Priant Dieu, monsieur de Rosny, qu'il vous tienne en sa sainte garde.

Ecrit à Roüen le dix-septiesme jour d'octobre 1597.

HENRY, et plus bas, DE NEUF-VILLE.

*Lettre du Roy à M. de Rosny, contre-signée.*

Monsieur de Rosny, suivant l'advls que vous me donnez, et ce que j'ay entendu du sieur de la Corbiniere, pour ce qui concerne l'assignation qui luy a esté baillée sur Normandie, j'escris à mon cousin le duc de Mont-pensier que je veux qu'elle ait lieu, et qu'il apporte en cela ce qui depend de son autorité pour faire observer ma volonté, ainsi que je me veux promettre qu'il fera. J'escris aussi à ceux de mon conseil qu'ayant resolu de faire demeurer ma cavalerie legere dans les garnisons de ma frontiere de Picardie, et voulant que les fournitures qui leur ont esté ordonnées leur solent entretenues, ma volonté est qu'ils donnent assignation et assurance audit sieur de la Corbiniere pour avoir moyen de continuer lesdites fournitures, qui sont autant necessaires, comme l'on doit avoir soin de la conservation de mes villes frontieres, qui despensent de l'entretienement des gens de guerre que j'ay ordonnez en icelle ; à quoy je vous prie de vostre part tenir la main autant comme vous aymez le bien de mon service. J'ay veu par vostre ditte lettre comme vous travaillastes hier aux articles de ceux de la religion ; cette affaire ne se peut terminer si tost comme je le desire, la longueur dont on use estant prejudiciable à mon service. J'ay escrit ce jourd'huy au sieur de Chiverny, mon chancelier, et au sieur de Ville-roy, pour faire prendre une prompte resolution en cét affaire, à quoy je desire que vous teniez la main de vostre part, et que l'on ne cesse qu'elle ne soit terminée. L'abbé duquel m'escrivez n'est mort et n'a esté malade ; s'il en fut advenu autrement, je vous avois destiné l'une des abbayes. Je reserveray la volonté que j'ay de vous gratifier en une autre occasion ; et cependant je prieray Dieu, monsieur de Rosny, vous avoir en sa garde.

A Monceaux, ce 14 novembre 1597. HENRY.

Et plus bas, POTHIER.

CHAPITRE LXXIX.

*Conseil tenu après la prise d'Amiens. Tentative sur Dourlans. Retour du Roy à Paris. Le pape Clément VIII se porte pour mediateur entre la France et l'Espagne. Voyage en Bretagne. Rosny tient à Rennes les états de cette province. Traité avec le duc de Mercœur. Edit de Nantes.*

[1598] Ayant achevé la transcription des let-



mil chevaux et douze canons, que le Roy faisoit estat de mener avec luy en Bretagne, et celle de six mil hommes de pied et douze cens chevaux qu'il laissoit en Picardie sous la charge de monsieur le connestable, pres duquel il laissoit aussi messieurs de Bellievre, de Ville-roy et de Sillery.

Nous licenciant, pour nostre regard, de faire icy une petite digression, quoy que ce soient affaires où vous n'eustes nulle part, et neantmoins necessaires à sçavoir pour l'intelligence de ce qui sera dit cy-apres, par laquelle nous vous ramentevrons que le Pape, Clement huictiesme, desirant de pacifier les troubles de la chrestienté, avoit, dés-avant le siege d'Amiens, fait partir de Rome le cardinal de Florence, pour venir, en qualité de legat en France, essayer de disposer le Roy à la paix; lequel, lors qu'il luy en avoit parlé, n'en avoit peu tirer autre responce, sinon que le bruit qui se faisoit pour reprendre Amiens, luy avoit bouché les oreilles, et n'entendrait à aucune voye d'accord qu'il n'eust repris cette place, afin que l'on n'estimast pas qu'il y eust entendu par force. Et en mesme temps, avoit aussi le pape envoyé Calatragironne, patriarche de Constantinople, sonder les intentions du roy d'Espagne sur mesme sujet; lequel, du commencement, il trouva grandement difficile, sur tout lors qu'il eut premierement les nouvelles de la surprise d'Amiens; car ceux qui avoient fait cette execution en parloient si avantageusement, qu'il sembloit que, dans peu de temps, ils deussent avoir tout le pays jusques à la riviere d'Oyse et de Seine. Mais ayant depuis appris que le Roy s'opiniastroit à reprendre cette ville, et l'avoit assiegée avec un si grand ordre et prevoyance, et de si grandes forces, qu'il ne pouvoit rien mettre ensemble qui fust assez suffisant pour luy faire lever le siege; et d'ailleurs se trouvant assailli d'une cruelle, furieuse et sordide maladie, dont il cognoissoit bien qu'il luy estoit impossible de réchapper, et considérant qu'il estoit bien dangereux de laisser en mourant à son fils, jeune, et de peu de sens et d'experience, un si grand et valeureux ennemy que le Roy sur les bras, il se resolut enfin d'entendre à la paix. Tellement que ce patriarche ayant repassé à Rome, et estant venu trouver le legat de Florence, en France, apres la prise d'Amiens, lors que, conjointement, ils supplierent derechef le Roy, puis que le roy d'Espagne se disposoit à un bon accord, de ne le refuser point, il leur dit le trouver maintenant bon, puis qu'Amiens estoit repris; mais qu'ils sceussent aussi qu'il ne conclurroit jamais de paix tant que l'Espagnol tiendrait un poulce de terre dans son royaume. Dequoy luy ayant esté

donné esperance, il laissoit en Picardie les trois cy-devant nommez comme ses deputez, avec pouvoir de traiter cette paix; de laquelle leur ayant laissé toute la charge, il partit au commencement de mars pour s'acheminer en Bretagne faisant marcher son armée apres luy, et vous ayant laissé derriere avec aucuns de son conseil, de ceux qu'il estimoit qui vous deferoient le plus, pour donner ordre aux estats des finances, recouvrer de l'argent et faire fonds pour les despences des troupes de Picardie et des deputez pour la paix: desquels, ny de toute leur negociation, nous ne dirons rien davantage, tant pource que vous n'y eustes nulle part, que pource que tous les historiens n'en oublient nulles particularitez; mais bien que vous ayant pourveu aux choses cy-dessus dites, vous vous acheminastes en Bretagne, pensant y trouver le Roy arrivé; mais vous fustes bien estonné de voir qu'il n'eust point encores passé Angers, où il avoit esté arrêté, avec divers artifices, par la ruse de ceux qui ne desiroient pas voir la ruyne totale de M. de Mercure; dont madame la marquise de Monceaux, maistresse du Roy, avoit fait jouer les plus puissans ressorts, ayant disposé madame de Mercure à venir rencontrer Sa Majesté audit Angers, luy ayant envoyé passe-port pour cet effet, si tost qu'elle sçauroit sa venue en ce lieu-là, pour luy faire toutes sortes de submissions au nom de son mary, jusqu'à luy offrir leur fille unique pour en disposer en faveur de tel prince qu'il luy plairoit d'ordonner; ayant bien cette opinion neantmoins, que ne la voulant pas donner à un de sa maison, il la réserveroit pour son fils Cesar, comme cela est depuis arrivé; et sceurent si bien cajoler toutes ces femmes, que le Roy condescendit à traiter avec M. de Mercure, sans s'avancer davantage qu'Angers; où vous estant arrivé et allé faire la reverence à Sa Majesté, il vous dit, en vous embrassant des deux bras et serrant, selon sa coustume, vostre teste contre son cœur:

« Mon amy, vous soyez le bien venu, je suis  
« tres aise de vous voir icy, car j'y avois bien  
« affaire de vous. — Et moy, Sire, tout au con-  
« traire, luy respondites vous, suis tres-marry  
« vous trouver encor en cette ville; car vous  
« avez et auriez bien à faire ailleurs. — Il y a si  
« long-temps que nous nous cognoissons, repar-  
« tit le Roy, que nous nous entendons l'un l'autre  
« à demy mot: c'est pourquoy je me doute  
« desja bien de ce que vous voulez dire; mais si  
« vous sçaviez ce qui se passe, et comme j'ay  
« desja bien avancé toutes choses, vous chan-  
« geriez d'opinion, et me tiendriez autre langage  
« que celui que je voy bien que vous avez en

loir mal ; qu'e s'ils vous avoient apporté quelque desplaisir, ç'avoit bien esté innocemment et contre leur intention ; et partant vous prioit-elle de les vouloir aimer comme vos parens et amis, et les assister de vostre credit près du Roy. Vous luy usastes de plusieurs complimens, et alleguastes beaucoup de raisons trop longues à reciter, dont la substance fut que vous les reveriez de tout vostre cœur, comme ressentant l'honneur que vous aviez de leur appartenir ; mais que le Roy et son service vous estoient plus chers que toutes choses, et que lors qu'ils se seroient soumis à leur devoir, ils n'auroient point un meilleur serviteur près de Sa Majesté, ny qui leur rendit de meilleurs offices que vous feriez en toute occasion.

Peu apres vous montastes à cheval et allastes coucher à Chasteau-gontier ; le lendemain, ce nous semble-il, à Vitré, où vous donnastes ordre à faire payer les gens de guerre ; et les loger de sorte et avec telle police, avec l'assistance que vous y firent messieurs de Salignac et de Moüy, mareschaux de camp, que tous les peuples, qui s'estoient retirez dans des bois retranchez, et estoient tous les jours prests d'en venir aux mains les uns contre les autres, vous en envoyerent faire des remerciemens, et donnoient tout publiquement mille louanges. Cela vous fit ausai merveilleusement bien recevoir à Rennes, où l'on vous logea en un fort beau logis chez mademoiselle de la Riviere, femme à tout faire, des plus habiles, galantes et de la meilleure compagnie qu'il se peut imaginer, et qui eut tant de soin de vous faire bien passer le temps, que nous vous avons oüy dire maintes-fois, depuis, n'avoir jamais mené une si douce vie, les affaires publiques pour lesquelles vous estiez envoyé s'estans renduës si faciles qu'il ne vous y fut besoin d'aucun soin ny sollicitation, les estats ayans volontairement accordé huit cens mil escus au Roy, etourny leur tresorier pour en faire l'avance ; à sçavoir : cent mil escus chacun des premiers deux mois, et deux cens mil escus de six mois en six mois apres, à s'en rembourser, et des interests d'icelles sommes, sur une imposition de quatre et deux escus pour pipe de vin. Ayant donné advis au Roy de tout cela, il vous en sceut merveilleusement bon gré, et encor plus de ce que ceux de la province vous ayant voulu donner six mil escus, vous les aviez refusez. Tellement que, pour le tesmoigner, il vous envoya un don de dix mil escus, à prendre sur les clairs deniers de son espargne, dont il ne faut point demander si vous fustes bien payé ; car ceux de la province l'ayant acceu, voulurent que cette somme fut prise outre les huit cens mil escus du Roy ; et fut le premier pre-

sent de somme notable que le Roy vous eut encor fait depuis vingt-six ans qu'il y avoit que vous le serviez, tous les precedens biens-faits n'ayant jamais passé deux mil escus, reservé les quatre mil qu'il vous donna lors que vous luy apportastes tant d'argent à Rouën.

Pendant vostre sejour d'un mois ou six semaines à Rennes, le Roy acheva son traité avec M. de Mercure, et s'en alla sejourner à Nantes, où tous les deputez de ceux de la religion et quelques-uns des principaux seigneurs faisant profession d'icelle, se rendirent pour demander au Roy un edit perpetuel, sous lequel ils vescuissent d'oresnavant, et non plus sous le simple benefice provisionnel d'une trefve : ce qui leur fut accordé.

Les ambassadeurs, d'Angleterre, qui fut le millord secretaire Cecille, et de Hollande, qui fut l'admiral Justin de Nassau, arriverent aussi en ce lieu pour divertir le Roy de conclurre la paix avec les Espagnols, le premier luy offrant, en ce cas qu'il voulust faire la guerre, de fournir et soudoyer incessamment six mil hommes de pied et cinq cens chevaux anglois ; et le second quatre mil hommes de pied : et outre cela, tous les deux ensemble, de l'assister d'artillerie, vivres, munitions et navires de guerre pour la reprise de Calais et Ardres seulement. Mais une infinité de raisons, trop longues à desduire, empêcherent le Roy d'accepter ces offres et le firent resoudre d'agreer la paix, qui fut peu apres conclue à Vervins, laquelle ne l'empescha pas, neantmoins, de continuer ses alliances avec l'Angleterre et les Provinces unies, et de leur promettre toute assistance d'argent, comme en payement de debtes, afin que le Roy d'Espagne ne peust avoir juste sujet de se plaindre d'aucune infraction de paix. Nous avons traité toutes ces affaires, tant grandes, importantes et de si longue disction qu'il se pourroit faire un gros volume des particularitez d'icelles ; ainsi succinctement, tant pource que vous n'eustes quasi nul part en icelles que pource que plusieurs historiens les ont fort au long inserées en leurs livres.

#### CHAPITRE LXXX.

*Séjour du Roy à Rennes. Conférence de Henri IV avec Rosny sur les manœuvres des Protestans, sur la dissolution de son mariage avec Marguerite de Valois, et sur le choix d'une nouvelle épouse. Lettre de Rosny à la reine Marguerite. Réponse de cette Reine.*

Toutes ces affaires ainsi heureusement et

le reste d'icelle, ainsi que j'escris à ceux de mon conseil. Surquoy je me remets, priant Dieu, etc.

Du camp devant Amiens, le vingt-uniesme de septembre 1597. HENRY.

Et plus bas, DE NEUF-VILLE.

*Lettre de la main du Roy à M. de Rosny.*

Mon amy, suivant ce que je vous ay cy-devant escrit de pourvoir à ce qu'il fut baillé fonds au maistre de ma chambre, aux deniers pour les passez de ma maison durans les mois derniers et nostre siege, je vous fais encor ce mot à mesme fin, ayant donné charge au sieur de Mont-glat, mon premier maistre d'hostel, de vous en solliciter; car il m'a assuré qu'autrement, à faute de cela, ma marmite est preste de donner du nez à terre, et cela me viendrait fort mal à propos. Cette-cy n'estant à autre fin, etc.

D'Amiens ce vingt-sixiesme septembre 1597.

HENRY.

*Lettre de la main du Roy à M. de Rosny.*

Mon amy, j'envoye deux Memoires à monsieur le chancelier, ausquels je desire que vous et ceux de mon conseil pourvoyez au plutost, comme tres-importans au bien de mon service, ainsi que vous le pourrez cognoistre. Je vous laisse et à luy le jugement auquel il sera besoin de travailler le premier. J'oubliay hier à vous commander de faire pourvoir à ce qu'il faut pour l'accomplissement du traitté que j'ay cy-devant fait avec mon frere le duc de Lorraine; à quoy je vous prie de tenir la main; et cette-cy n'estant à autre fin, etc.

Ce vingt-septiesme septembre, à Monceaux

HENRY.

*Lettre de la main du Roy à M. de Rosny.*

Mon amy, vous entendrez par Vexin l'occasion pour laquelle je le vous envoye, que je luy ay commandé de vous communiquer. Je desire que vous teniez la main de tout vostre pouvoir à ce que j'en puisse retirer la commodité que je m'en suis promis; et pour cét effet, empeschez que, par faveur, ceux qui y ont interest ne puissent rien obtenir, en mon conseil, au prejudice de ce que ledit Vexin vous proposera et que je luy ay commandé de vous dire; dont je vous prie de le croire comme moy mesme, qui ne vous en diray davantage, pour prier Dieu, etc.

Ce vingt-septiesme de septembre, à Long-pré.

HENRY.

CHAPITRE LXXVIII.

*Suite de lettres.*

*Lettre de la main du Roy à M. le comte de Chiverny, chancelier.*

Monsieur le chancelier, sur ce que j'ay esté adverty que l'on fait quelque difficulté, en mon conseil, à l'erection du siege presidial, que j'ay ordonné estre fait en mon comté d'Armagnac, en ma ville de Lectoure, je vous ay bien voulu faire ce mot pour vous dire que c'est chose que je veux, et que j'ay accordé la finance qui proviendra des offices de cette erection au sieur de Fontrailhas, au payement de certaines debtes, esquelles je luy ay cy-devant, comme comte d'Armagnac, esté condamné par arrest de ma Cour de parlement de Paris. Tenez donc la main à l'execution de ma volonté, et que personne que vous, le sieur de Rosny et le secretaire qui faudra qui en fasse les dépenses, ne le sachent pour plusieurs considerations, mesmement pource que ma sœur veut que je luy donne la finance qui proviendra desdits estats; et bruslez cette-cy apres l'avoir veuë, laquelle n'estant à autre fin, etc.

Ce cinquiesme octobre, à Monceaux.

HENRY.

*Lettre de la main du Roy à M. de Rosny.*

Mon amy, j'ay sceu que l'on fait quelque difficulté, en mon conseil, pour l'erection du siege presidial, que j'ay ordonné estre fait en mon comté d'Armagnac et en ma ville de Lectoure, et que ma sœur en a esté advertie, chose que je ne desirois nullement pour plusieurs considerations, mesmement pource qu'elle veut que je luy donne la finance qui proviendra de l'erection des estats qu'il y faudra faire, et que je l'ay destinée au sieur de Fontrailhas, au payement de certaine somme de deniers, en laquelle, comme comte d'Armagnac, j'ay cy-devant esté condamné envers luy, par arrest de ma Cour de parlement de Paris. Et pour ce que c'est chose que je desire, et que j'ay accordée audit sieur de Fontrailhas, je vous fais ce mot pour vous dire (comme aussi je l'escris à monsieur le chancelier) que vous fassiez dépescher cét affaire, et qu'il n'y ait que vous, luy et le secretaire par les mains duquel il faudra que la dépesche passe, qui le sachent, afin que ma sœur n'en ayt point d'adviz, et qu'elle croye l'affaire refusée. Je vous prie que cela soit conduit secretement. Car aussi j'escris audit sieur de Fontrailhas que quand il aura les expéditions, il n'en poursuive la verification ny l'execution que ma sœur ne

soit en Lorraine. C'est là le sujet de la mienne, que je finiray pour prier Dieu, mon amy, vous avoir en sa garde.

Ce cinquième octobre, à Monceaux.

HENRY.

*Lettre de M. le marquis de Rosny au Roy, pour avis sur le dessein du siege de Dourlans.*

SIRE,

Je supplie tres-humblement vostre Majesté de croire que, comme je n'ignore nullement à quels et combien grands devoirs les mandemens divins et les loix humaines obligent les bons sujets et loyaux serviteurs envers leurs princes legitimes et maistres debonnaires, et recognois que je tiens, dois et veux incessamment tenir de vos faveurs, graces et beneficences, tout ce que j'ay et auray en ce monde d'avancement et d'accroissement de bonne fortune, aussi n'espargneray-je jamais, vie, bien, peine, travail ny industrie pour rendre à tous vos commandemens l'obeyssance dont je leur suis redevable. Mais comme cette vehemente affection m'a fait aussi-tost mettre la main à l'œuvre et user de toute sorte de diligence possible, afin de donner ordre que rien de tout ce qui peut despendre de moy ne puisse manquer pour vostre entreprise du siege de Dourlans, dont il a pleu à vostre Majesté de m'escire, aussi cette mesme devotion à son service me fait-elle prendre la hardiesse de luy escrire mon avis sur chose tant importante, sans en estre requis : m'imaginant que les grandes peines, fatigues et incommoditez souffertes par les soldats de vostre armée, pendant un si long siege que celui d'Amiens, et les autres occasions qui se sont presentées par la survenue du cardinal d'Autriche en corps d'armée, faisant demonstration de vouloir venir à la bataille, les nouvelles asseurées qui sont venues à vostre Majesté, ainsi qu'il luy a pleu de me l'escire, de la subsistance de cette armée sur les frontieres, que l'on peut conjecturer n'estre ainsi retenuë en corps, sinon à dessein d'essayer de prendre leur revanche des affronts signalez que vostre grande prudence et valeur ont fait recevoir à ce venerable prelat et tous ces bravaches Espagnols, si vous luy en laissez naistre l'occasion, et d'abondant l'hiver pluvieux où nous sommes entrez, ne conviennent gueres bien avec le dessein de former un nouveau siege, auquel vous aurez à camper à l'air, dans des terres grasses et humides, à forcer ceux de dedans qui s'opiniastrent sur l'esperance d'un secours, à vous remparer et défendre contre ceux de dehors s'ils s'avancent avec leur armée, comme toutes les raisons de la guerre le veulent

ainsi, et à garantir vos soldats des pluies, du froid et des fanges, qui seules peuvent devenir suffisantes à vous faire lever le siege, sinon avec honte, à tout le moins, non sans desplaisir et peut estre dommage et beaucoup de despences et de peines inutiles. Suppliant vostre Majesté de m'excuser, si j'entreprends de donner conseil en affaires de guerre à un si grand Roy, lequel, en l'intelligence et pratique de ce mestier, excelle par dessus tous les autres, et des siecles presens et des siecles passez. Et finiray la presente par une devotieuse priere envers Dieu, à ce qu'il luy plaise, Sire, vous donner bon conseil, santé et continuelle longueur de jours, accroissement de domination et succez heureux à tous vos desseins.

De Paris ce 7 octobre 1597. ROSNY.

*Lettre du Roy à M. de Rosny, contre-signée.*

Monsieur de Rosny, j'ay veu bien particulièrement, par vostre lettre du cinquième de ce mois, l'avancement que ceux de mon conseil ont donné aux affaires qui se presentent pour mon service, et principalement pour ce qui touche l'entretenement de mon armée et les despences qui sont requises pour l'artillerie, poudres et vivres, dont il est necessaire que ceux de mon conseil ayent autant de soin pendant ce siege comme ils ont eu lors de celui d'Amiens, estant la conqueste de Dourlans necessaire pour la seurété de mes villes d'Amiens et d'Abbeville, et assize en tel lieu qu'elle incomode le meilleur pays de mes ennemis plus que nulle autre de cette frontière. Je l'ay fait investir ce jourd'huy, et feray user de telle diligence à l'avancement de ce siege, qu'encores que la saison soit fascheuse, j'espere en avoir une prompte et heureuse yssuë, moyennant le bon devoir et courage que chacun y apportera. Il faut faire avancer les poudres, pourvoir aux vivres et envoyer promptement l'argent pour travailler aux tranchées, et pourvoir de bonne heure pour les fonds de la monstre prochaine. Quant aux sommes imposées pour les petits soldats, il seroit à propos que le tout ou partie fust levé pour servir au travail qui se fera durant ce siege. J'ay mandé au sieur de la Grange qu'il aille en diligence à Roüen, pour faire verifler purement et simplement, l'edit des triennaux. Je luy ay envoyé les depeschés necessaires, et à ceux de la chambre des comptes, pour cét effet. Maintenant qu'Amiens est reduit, la Picardie estant plus libre, les offices de ladite province seront en meilleure vente. Quant aux villes qui pensent estre deschargées du secours qu'on leur demande, il faut leur faire cognoistre combien importe au general de mes affaires, et



au bien et repos de mon royaume, que les autres villes, qui sont icy occupées par mes ennemis, soient aussi remises en mon obéissance. Je desire que l'on fasse avancer, le plus qu'il se pourra, les forces qui me viennent trouver, d'autant que les ennemis pourront faire quelque effort pour secourir les assiégés, et si cela est, ce sera dans le quinze ou vingtiesme de ce mois au plus tard. Je vous ai accordé volontiers le rachat que vous devez pour la succession de defunt vostre frere. En toutes autres occasions je vous feray cognoistre combien j'ay agreable le service que vous me faites, et sur ce, je prie Dieu, etc.

Escrit au camp de Dourlans, le 9 octobre 1597.

HENRY, et plus bas, DE NEUF-VILLE.

*Lettre de la main du Roy à M. de Rosny.*

Mon amy, je me souviens qu'ayant cy-devant esté parlé du fait de Palot, j'ay remis cette affaire à vous, estant bien ayse neantmoins qu'il demeurast en cette charge, puis mesme qu'il en avoit la commission. Depuis j'ay appris que ceux de la religion consentent qu'il l'exerce, pourveu qu'il commence seulement ledit exercice l'année prochaine, ce qui me fait soupçonner qu'ils veulent tenir cette affaire en obscurité, et distribuer, pour cette année, les deniers à leur poste, obligeant ceux que bon leur semblera, par avantages et gratifications. Cela m'a fait resoudre de vous escrire ce mot pour vous dire que mon intention est que Palot l'exerce dès cette année, afin que la distribution se fasse selon mon vouloir et intention, et que je sçache à qui m'en prendre, s'il y a du defaut. Aussi m'asseurerai-je que vous, qui avez le soin general de mes plus importants affaires, y verrez plus clair par cet instrument que par nul autre; et cette-cy n'estant à autre fin, je prieray Dieu, etc.

De Monceaux, ce 9 octobre 1597. HENRY.

*Lettre de la main du Roy à M. de Rosny.*

Mon amy, sur ce que j'ay esté adverty que ma marmite est presté de tomber et donner du nez en terre, ce qui me viendrait fort mal à propos en ce lieu et en cette occasion, s'il n'y est promptement pourveu, attendu mesmement que, durant le siege d'Amiens, la despence de ma maison a monté plus que l'on ne pensoit, et qu'il n'y a moyen qu'en prenant l'argent du marc d'or qu'ont payé ceux qui ont esté pourvus des estats que j'ai fait créer, je vous ai bien voulu faire ce mot de ma main, pour vous dire qu'en creant lesdits offices je n'ay pensé à faire les affaires d'autrui, ains les miennes. C'est pourquoy je veux que l'argent provenu dudit marc d'or, soit employé au payement des despences faites en ma

maison et avancées par ceux qui m'ont servy en cette occasion; à quoy vous tiendrez la main comme chose que je veux et que j'affectionne. Je vous recommande aussi l'affaire du controulleur general Parfaict, duquel je vous ay cy-devant escrit. Sur ce, Dieu vous ayt, etc.

Ce 11 octobre, au camp de Beauval devant Dourlans. HENRY.

*Lettre de M. de Ville-roy à M. de Rosny, pour responce sur le siege de Dourlans.*

Monsieur, Dieu a pourveu, à mon grand regret et plus encores de celui du Roy, à l'apprehension que vous avez eue du siege de Dourlans; car les pluyes nous contraignent de changer de dessein, estant si grandes que nous n'avons soldat qui puisse demeurer en pied: de sorte que Sa Majesté a pris resolution aujourd'huy de lever le camp d'icy et mettre son armée à couvert; cela estant, vous nous verrez bien tost si Dieu plaist, pour faire responce à toutes vos lettres. Cependant je vous diray que j'ay leu au Roy celle du dixiesme de ce mois que vous m'avez adressée; ce n'a esté sans se loier du soin que vous avez de son service: monsieur le mareschal de Biron estoit present seul. Sa Majesté est contente d'accorder à M. Gobelin les six ou huit mil escus dont messieurs du conseil ont jugé estre raisonnable le gratifier, outre les seize mil escus qu'ils luy ont accordez pour ses avances, à la charge aussi qu'il continuera à secourir sa maison le reste de cette année, et en ce quartier comme il a fait aux autres, ainsi qu'il luy escrit par la lettre que je vous envoie pour luy bailler, à quoy sadite Majesté vous prie de le disposer. J'ay esté contraint de prester cent escus aux cent Suisses de la garde, des deniers extraordinaires, pour leur ayder à vivre en attendant leur payement, dont il vous plaira advertir monsieur le tresorier, afin qu'il les retienne pour les nous rendre. Tocquevert est mort de peste cette nuit, qui estoit enseigne d'iceux, dont le Roy a pourveu Reier. C'est bien l'intention du Roy de retrancher toutes les garnisons, augmentées ou establies depuis la perte d'Amiens, puis que l'occasion pour laquelle Sa Majesté les avoit ordonnées est passée. Partant j'en escrirs des lettres à plusieurs d'iceux, que je vous prie leur faire tenir, comme il vous sera plus facile de faire de Paris que nous d'icy; et si j'en ay obmis quelques uns, ne laissez pas à en faire revoke les payemens et leur faire escrire, par messieurs du conseil, qu'ils cassent leurs gens de guerre, et faites contre-mander ceux qui estoient en chemin pour nous venir trouver, et en descharger le pays s'il est possible; et quand nous serons par

dela, nous traiterons du voyage de Bretagne, qui est tres-desiré d'un chacun. Le Roy m'a dit avoir ja donné l'ordre duquel vous luy avez donné advis par vostre lettre, depuis laquelle j'ai receu la lettre du 11. Je prie Dieu, etc.

Du camp de Belbat, le 13 octobre 1597.

DE NEUF-VILLE.

*Lettre du Roy à M. de Rosny contre-signée.*

Monsieur de Rosny, il se commet plusieurs abus et desordres en l'administration de mes finances, qui procedent de diverses causes; mais celle qui leur donne plus de couleur, et qui en effet produit plus de mal, est celle qui est fondée sur les non-valeurs que les comptables disent estre et se trouver par chacun an en la recepte de leurs charges, car ordinairement ils s'en servent pour s'excuser d'acquitter les despences qui leur sont commandées; et comme autres qu'eux ne verifient si lesdites non-valeurs sont veritables, au moins si exactement qu'il seroit necessaire, il advient que lesdits deniers demeurent en reste en leurs mains, dont ils disposent et se jouent apres quasi comme il leur plaist. Je sçais bien que mon peuple est tres-pauvre, de sorte qu'il est difficile qu'il paye sa taille entierement comme il faisoit devant la guerre, et que cette pauvreté engendre des non-valeurs qui sont inevitables. Toutesfois plusieurs m'ont remonstré et fait entendre qu'à la fin l'on le fait bon payeur en une sorte ou autre, et que comme le temps fait perdre la memoire et cognoissance desdits deniers passez en non-valeurs, ils servent apres à acquitter des parties esgarées à molié gain. Je ne veux pas croire que tout ce qui s'en dit soit véritable, et n'entends par la presente faire tort aux gens de bien; mais je desire verifiser par vostre moyen, en l'estenduë des receptes generales où je vous ay envoyé, si le peuple doit tant d'ar-rerages de tailles et du taillon des années passées, et principalement des deux dernières de quatre-vingts quatorze et quatre-vingts quinze. Au moyen dequoy je vous prie d'y travailler, tant par la verifcation des estats de recepte et despense des receveurs particuliers et generaux, que par une sommaire enquete que vous en ferez par les eslections que lesdits comptables vous diront estre demeurées en reste; et si vous decouvrez quelques parroisses de cette qualité-là, informez-vous d'où en procede la cause, car souvent elle procede autant de desobeissance ou de la negligence des officiers, que de pauvreté; dequoy je desire fort d'estre esclaircy à la verité. Vous me ferez doncques ce service, avec les autres que j'attends de vous, en l'execution de vostre commission, et me donneres advis de la re-

caption de la presente. Priant Dieu, monsieur de Rosny, qu'il vous tienne en sa sainte garde.

Ecrit à Rouën le dix-septiesme jour d'octobre 1597.

HENRY, et plus bas, DE NEUF-VILLE.

*Lettre du Roy à M. de Rosny, contre-signée.*

Monsieur de Rosny, suivant l'advis que vous me donnez, et ce que j'ay entendu du sieur de la Corbiniere, pour ce qui concerne l'assignation qui luy a esté baillée sur Normandie, j'escris à mon cousin le duc de Mont-pensier que je veux qu'elle ait lieu, et qu'il apporte en cela ce qui depend de son autorité pour faire observer ma volonté, ainsi que je me veux promettre qu'il fera. J'escris aussi à ceux de mon conseil qu'ayant resolu de faire demeurer ma cavalerie legere dans les garnisons de ma frontiere de Picardie, et voulant que les fournitures qui leur ont esté ordonnées leur soient entretenues, ma volonté est qu'ils donnent assignation et assurance audit sieur de la Corbiniere pour avoir moyen de continuer lesdites fournitures, qui sont autant necessaires, comme l'on doit avoir soin de la conservation de mes villes frontieres, qui despensent de l'entretienement des gens de guerre que j'ay ordonnez en icelle; à quoy je vous prie de vostre part tenir la main autant comme vous aymez le bien de mon service. J'ay veu par vostreditte lettre comme vous travaillastes hier aux articles de ceux de la religion; cette affaire ne se peut terminer si tost comme je le desire, la longueur dont on use estant prejudiciable à mon service. J'ay escrit ce jourd'huy au sieur de Chiverny, mon chancelier, et au sieur de Ville-roy, pour faire prendre une prompte resolution en cét affaire, à quoy je desire que vous teniez la main de vostre part, et que l'on ne cesse qu'elle ne soit terminée. L'abbé duquel m'escrivez n'est mort et n'a esté malade; s'il en fut advenu autrement, je vous avois destiné l'une des abbayes. Je reserveray la volonté que j'ay de vous gratifier en une autre occasion; et cependant je prieray Dieu, monsieur de Rosny, vous avoir en sa garde.

A Monceaux, ce 14 novembre 1597. HENRY.

Et plus bas, POTHIER.

CHAPITRE LXXIX.

*Conseil tenu après la prise d'Amiens. Tentative sur Dourlans. Retour du Roy à Paris. Le pape Clément VIII se porte pour médiateur entre la France et l'Espagne. Voyage en Bretagne. Rosny tient à Rennes les états de cette province. Traité avec le duc de Mercœur. Edit de Nantes.*

[1699] Ayant achevé la transcription des let-

tres dont nous avons fait mention, nous adjouterons à la suite d'icelles que nostre intention a esté de faire juger aux plus sages que le Roy entendoit fort bien toutes ses affaires jusques aux moindres particularitez, qu'il en avoit un grand soin, les vouloit toutes sçavoir, et qu'il ne fut absolument disposé d'aucune sans sa cognoissance et ordonnance. Sur laquelle verité, en reprenant la suite de ces Memoires, nous dirons que le Roy ayant avec grand honneur et avantage reduit la ville d'Amiens en son obeysance, battu et mis en fuite, en détail et par pieces, les ennemis, et depuis iceux receu bravement et chassé honteusement en gros leur cardinal archiduc, present en corps d'armée et ordre de bataille; et ne voulant point laisser de si grandes et belles troupes oysives (car sur le bruit de la venuë de l'armée espagnole et d'une bataille preste à donner, toutes les troupes subsidiaires et auxiliaires des provinces s'estoient jointes, et tous les braves gens y estoient accourus), il vous depescha un courrier afin de le venir trouver et luy apporter le plus d'argent que vous pourriez; à quoy vous obeystes dans six jours, et augmenta vostre arrivée (lors que l'on sceut que vous faisiez voicturer une monstre entiere) tellement les precedentes resjouyssances et courages surhaussez à cause de tant d'heureux succez, que tous d'une voix, avec celle du Roy, qui ne manquoit jamais de braves desirs, crioient qu'il ne falloit pas laisser tant de braves soldats et une si grande quantité de vaillante noblesse inutiles.

Tellement que Sa Majesté ayant fait assembler un conseil de ses plus capables et confidens serviteurs, il s'y fist sur ce sujet une infinité de propositions, chacun estimant de faire d'autant plus priser son esprit et son courage, qu'il mettoit en avant des entreprises hautes et difficiles. Neantmoins en fin il ne fut pris resolution que sur trois d'icelles: la premiere, de suivre courageusement l'armée de l'ennemy jusques dans son pays et luy presenter la bataille; la seconde, de tenter une entreprise dressée de longue main sur une ville des plus importantes du pays d'Artois; et la troisieme, d'assiéger Dourlans: surquoy le Roy voulut que chacun opinast; ce qui fut fait. Et sans nous arrester aux advis des autres, nous vous ramentevrons seulement ce que vous nous dites depuis du vostre, qui fut que pour le premier poinct vous croyez que cette action seroit plutost d'esclat que d'effet, et de bruit que de fruit, n'y ayant nulle apparence que le cardinal voulut hazarder de gayeté de cœur une bataille qu'il avoit refusée, lors qu'il sembloit y estre engagé par l'honneur et le besoin de secourir Amiens; que, pour la seconde, il arrivoit

fort peu souvent que telles entreprises sur de grandes places, par surprise, réussissent heureusement, surtout lorsque le pays estoit en alarme et couvert de troupes ennemies; mais que, neantmoins, vous ne trouviez pas grand inconvenient à redouter en l'un ny en l'autre, d'autant que dans quinze jours au plus tard ces deux desseins seroient executez ou faillis, et par consequent n'engageroient en aucune façon l'armée mal à propos; mais que ce n'estoit pas de mesme pour le siege de Dourlans, auquel il estoit impossible de travailler si diligemment que l'on ne se trovast envelopé dans l'hyver bien avant, lequel devenant pluvieux et humide, il seroit impossible de camper, faire logemens de gens de guerre, ny tranchées sur tout d'un costé où les terres estoient grandement grasses et marescaugeuses.

Neantmoins ces trois propositions ne laisserent pas d'estre suivies; des deux premieres il en fut remporté de la gloire, quoy qu'il ne s'executast rien de consequence, mais cette presentation de bataille et le refus d'icelle sonna fort haut aux pays estrangers, et mesmes, dit-on, fut cause de faire resoudre le roy d'Espagne à la paix, ainsi qu'il sera dit en la suite de ces Memoires, mais le dessein de Dourlans fist recevoir de la perte et de la honte, à cause qu'apres plusieurs fatigues qui penserent dissiper l'armée, les pluies, boües et disette de vivre contraignirent au levement du siege (comme les lettres cy-devant transcriptes tout d'une suite en ont dit quelque chose); apres lequel le Roy mist ses troupes en garnison, leur fist faire monstre, non pour les rafraischir, comme c'est la façon de parler, mais pour les rechauffer et seicher, d'autant qu'ils transissoient de froid et estoient tous couverts de fange et de bouë; et puis s'en retourna triomphant à Paris, où, sans perdre temps, il fist ses preparatifs pour aller vers le printemps attaquer vivement M. de Mercure, afin de nettoyer la Bretagne d'ennemis, lequel n'avoit fait que l'amuser, sous divers pretextes et divers traittez qu'il avoit proposez, dont neantmoins il advint que plusieurs des siens, lassez de telles longueurs et craignant qu'il s'accommodast sans eux, le firent sans luy.

Le Roy passa tout ce reste d'hyver en telles et semblables faciendes, et vous à establir l'ordre que vous aviez projectté de longue main en l'administration des finances, à meliorer les revenus du royaume, ramasser tous les restes des deniers dont avoit esté fait fonds pour le siege d'Amiens, rechercher toutes parties esgarées et nouveaux moyens, afin de pouvoir soudoyer l'armée de douze mil hommes de pied, deux

mil chevaux et douze canons, que le Roy faisoit estat de mener avec luy en Bretagne, et celle de six mil hommes de pied et douze cens chevaux qu'il laissoit en Picardie sous la charge de monsieur le connestable, pres duquel il laissoit aussi messieurs de Bellievre, de Ville-roy et de Sillery.

Nous licenciant, pour nostre regard, de faire icy une petite digression, quoy que ce soient affaires où vous n'eustes nulle part, et neantmoins necessaires à sçavoir pour l'intelligence de ce qui sera dit cy-apres, par laquelle nous vous ramentevrons que le Pape, Clement huitiesme, desirant de pacifier les troubles de la chrestienté, avoit, dés-avant le siege d'Amiens, fait partir de Rome le cardinal de Florence, pour venir, en qualité de legat en France, essayer de disposer le Roy à la paix; lequel, lors qu'il luy en avoit parlé, n'en avoit peu tirer autre responce, sinon que le bruit qui se faisoit pour reprendre Amiens, luy avoit bouché les oreilles, et n'entendrait à aucune voye d'accord qu'il n'eust repris cette place, afin que l'on n'estimast pas qu'il y eust entendu par force. Et en mesme temps, avoit aussi le pape envoyé Calatragironne, patriarche de Constantinople, sonder les intentions du roy d'Espagne sur mesme sujet; lequel, du commencement, il trouva grandement difficile, sur tout lors qu'il eut premierement les nouvelles de la surprise d'Amiens; car ceux qui avoient fait cette execution en parloient si avantageusement, qu'il sembloit que, dans peu de temps, ils deussent avoir tout le pays jusques à la riviere d'Oyse et de Seine. Mais ayant depuis appris que le Roy s'opiniastroit à reprendre cette ville, et l'avoit assiegée avec un si grand ordre et prevoyance, et de si grandes forces, qu'il ne pouvoit rien mettre ensemble qui fust assez suffisant pour luy faire lever le siege; et d'ailleurs se trouvant assailly d'une cruelle, furieuse et sordide maladie, dont il cognoissoit bien qu'il luy estoit impossible de réchapper, et considérant qu'il estoit bien dangereux de laisser en mourant à son fils, jeune, et de peu de sens et d'experience, un si grand et valeureux ennemy que le Roy sur les bras, il se resolut enfin d'entendre à la paix. Tellement que ce patriarche ayant repassé à Rome, et estant venu trouver le legat de Florence, en France, apres la prise d'Amiens, lors que, conjointement, ils supplierent derechef le Roy, puis que le roy d'Espagne se disposoit à un bon accord, de ne le refuser point, il leur dit le trouver maintenant bon, puis qu'Amiens estoit repris; mais qu'ils sceussent aussi qu'il ne conclurroit jamais de paix tant que l'Espagnol tiendrait un poulce de terre dans son royaume. Dequoy luy ayant esté

donné esperance, il laissoit en Picardie les trois cy-devant nommez comme ses deputez, avec pouvoir de traiter cette paix; de laquelle leur ayant laissé toute la charge, il partit au commencement de mars pour s'acheminer en Bretagne faisant marcher son armée apres luy, et vous ayant laissé derriere avec aucuns de son conseil, de ceux qu'il estimoit qui vous deferoient le plus, pour donner ordre aux estats des finances, recouvrer de l'argent et faire fonds pour les despences des troupes de Picardie et des deputez pour la paix: desquels, ny de toute leur negociation, nous ne dirons rien davantage, tant pource que vous n'y eustes nulle part, que pource que tous les historiens n'en oublient nulles particularitez; mais bien que vous ayant pourveu aux choses cy-dessus dites, vous vous acheminastes en Bretagne, pensant y trouver le Roy arrivé; mais vous fustes bien estonné de voir qu'il n'eust point encores passé Angers, où il avoit esté arrêté, avec divers artifices, par la ruse de ceux qui ne desiroient pas voir la ruyne totale de M. de Mercure; dont madame la marquise de Monceaux, maistresse du Roy, avoit fait joier les plus puissans ressorts, ayant disposé madame de Mercure à venir rencontrer Sa Majesté audit Angers, luy ayant envoyé passe-port pour cet effet, si tost qu'elle scauroit sa venue en ce lieu-là, pour luy faire toutes sortes de submissions au nom de son mary, jusqu'à luy offrir leur fille unique pour en disposer en faveur de tel prince qu'il luy plairoit d'ordonner; ayant bien cette opinion neantmoins, que ne la voulant pas donner à un de sa maison, il la réserveroit pour son fils Cesar, comme cela est depuis arrivé; et sceurent si bien cajoler toutes ces femmes, que le Roy condescendit à traiter avec M. de Mercure, sans s'avancer davantage qu'Angers; où vous estant arrivé et allé faire la reverence à Sa Majesté, il vous dit, en vous embrassant des deux bras et serrant, selon sa coustume, vostre teste contre son cœur:

« Mon amy, vous soyez le bien venu, je suis  
« tres aise de vous voir icy, car j'y avois bien  
« affaire de vous. — Et moy, Sire, tout au con-  
« traire, luy respondites vous, suis tres-marry  
« vous trouver encor en cette ville; car vous  
« avez et auriez bien à faire ailleurs. — Il y a si  
« long-temps que nous nous cognoissons, repar-  
« tit le Roy, que nous nous entendons l'un l'au-  
« tre à demy mot: c'est pourquoy je me doute  
« desja bien de ce que vous voulez dire; mais si  
« vous sçaviez ce qui se passe, et comme j'ay  
« desja bien avancé toutes choses, vous chan-  
« geriez d'opinion, et me tiendriez autre langage  
« que celui que je voy bien que vous avez en

« l'esprit. — Je ne suis pas si ignorant que vous  
« estimez, Sire, luy dites vous, car je sçay que  
« l'on vous amuse sous des propositions de nop-  
« ces qui ne vous pourroient faillir quand vous  
« voudriez; car ayant réduit pere et mere à vos-  
« tre discretion, comme cela vous estoit facile,  
« vous y auriez bien aussi la fille, et n'auriez nul  
« besoin d'entrer en des traittez qui vous couste-  
« ront beaucoup. Il falloit aller droit à Nantes et  
« là traiter à coups de canon, dont il n'en eust  
« pas fallu quantité pour faire dire à ce prince,  
« qui a tousjours fait le fin, vous ayant amusé  
« deux ans sur des traittez, maudit soit le der-  
« nier.

« Ce que vous dites eut esté fort bon, dit le  
« Roy, si j'eusse eu toutes mes forces et mes ar-  
« tilleries prestes; mais il n'y a pas trois jours  
« qu'elles estoient encore toutes séparées et vous  
« encore bien loin, sans mesme sçavoir comme  
« vous estiez d'argent; car d'aller attaquer une  
« telle ville sans moyens dequoy la prendre, ce  
« n'estoit ny mon intention ny la raison. — Je  
« vous assure, Sire, respondites vous, car je  
« le sçay par gens qui en sont sortis, qu'à la  
« premiere chamade faite, vous present, tous les  
« habitans se fussent sous-levez et eussent con-  
« traint M. de Mercure de se retirer dans son  
« chasteau, voire peut-estre se fussent-ils saisis  
« de l'un et de l'autre, et vous les eussent livrez.  
« Mais je voy bien à vos discours que d'autres  
« causes vous ont retenu, contre lesquelles je  
« perdrois tousjours la mienne; car je ne reco-  
« gnois rien icy des accoustumées generositez et  
« diligences de mon brave Roy, que je n'ay ja-  
« mais veu s'esloigner si fort des ennemis pour  
« parler à eux comme il faut à present: mais il  
« n'y a remede, je n'en dispute plus.

« A la verité vous me ferez plaisir, dit le Roy,  
« car je cognois aussi bien tout cela que vous  
« sçauriez faire; mais vous sçavez que je suis pi-  
« toyable à ceux qui s'humilient, et que j'ay le  
« cœur trop tendre pour refuser une courtoisie  
« aux larmes et supplications de ce que j'aime,  
« partant n'en parlons plus, mais bien de faire  
« vos dépesches pour aller à Rennes au lieu de  
« moy, tenir les estats et traiter avec eux pour  
« une subvention qu'ils m'ont promise, si je de-  
« livrois la province et la mettois en repos, comme  
« je feray avant que de partir d'icy; car je suis  
« assuré de M. de Mercure et de tout son party,  
« voire mesme de Blavet et de d'Overnanes, où  
« il y avoit des Espagnols ou gens qui faisoient  
« mine d'estre à leur devotion; venant aussi de  
« recevoir advs de messieurs de Bellievre et de  
« Sillery, comme le traité de paix avec le roy  
« d'Espagne est fort avancé, ayant enfin pensé

« l'article de la reddition de toutes les places que  
« les Espagnols tiennent dependantes de la cou-  
« ronne de France, où la Bretagne est speciale-  
« ment nommée, et ne restera selon cela que  
« Cambray, pour lequel vous mesme m'avez tous-  
« jours conseillé de ne l'insister pas fort. J'ay  
« aussi nouvelles que la reyne d'Angleterre et  
« les Pays-Bas unis m'envoyent des ambassa-  
« deurs. Je ne sçay si c'est pour intervenir en  
« cette paix ou m'en divertir, mais je croy plu-  
« tost le dernier que le premier. Il faut que vous  
« partiez dans deux jours, tant pour donner or-  
« dre aux logemens des troupes de mon armée,  
« qui sont es environs de Vitré et Rennes, où il  
« y a plusieurs lieux barricadez, afin qu'il n'en  
« arrive point d'inconvenient, leur faisant faire  
« une monstre suivant ce que vous m'avez escrit  
« l'avoir toute preste, que pour faire avancer  
« les estats, et par consequent la levée des de-  
« niers qu'ils m'accorderont. » Toutes lesquelles  
« choses vous executastes heureusement les unes  
« en suite des autres, comme il sera dit cy-apres.

Le jour de vostre parlement, le Roy vous de-  
« manda si vous n'aviez point veu madame de  
« Mercure, et luy ayant respondu que non, il vous  
« dit que vous la deviez avoir visitée, tant par ci-  
« vilité deus aux dames, que pour ce qu'elle di-  
« soit que vous estiez parens, et qu'elle vous avoit  
« tousjours fort affectionné. « A la verité, Sire,  
« repartistes-vous, tout cela est vray, car il y a  
« eu des filles de Bethune mariées à la maison de  
« Luxembourg, et de celles de Luxembourg en  
« celles de Bethune; et c'est d'un de ces costez-  
« là, si les grands roys pouvoient avoir de leurs  
« sujets et serviteurs pour parens, que j'aurois  
« l'honneur de vous appartenir. — Je le sçay  
« bien, dit le Roy; mais allez les voir, car cette  
« visite les consolera, d'autant que je sçay bien  
« qu'ils croyent que vous leur estes du tout con-  
« traire. »

Suivant donc la volonté du Roy, vous fustes  
« voir mesdames de Martigues et de Mercure, qui  
« vous receurent avec beaucoup d'honneur, de  
« caresses et de complimens, entre lesquels madame  
« de Mercure vous dit que, voyant l'estat des af-  
« faires de monsieur son mary, requerir d'avoir  
« des amls près du Roy, elle avoit aussi-tost jetté  
« les yeux sur vous, estans proches parens comme  
« vous estiez, esperant de recourir à vostre faveur;  
« mais qu'elle avoit appris depuis deux jours que  
« vous ne luy rendiez pas office de parent, ains  
« tout au contraire, que vous conseilliez au Roy  
« de les ruyner; qu'elle ne pensoit point que mon-  
« sieur son mary, ny elle, et encor moins une pe-  
« tite parente, leur unique heritiere, que vous  
« aviez, vous eut jamais donné sujet de leur vou-

loir mal ; qu'eussent-ils vous avoient apporté quelque desplaisir, ç'avoit bien esté innocemment et contre leur intention ; et partant vous prioit-elle de les vouloir aimer comme vos parens et amis, et les assister de vostre credit près du Roy. Vous luy usastes de plusieurs complimens, et alleguastes beaucoup de raisons trop longues à reciter, dont la substance fut que vous les reveriez de tout vostre cœur, comme ressentant l'honneur que vous aviez de leur appartenir ; mais que le Roy et son service vous estoient plus chers que toutes choses, et que lors qu'ils se seroient soumis à leur devoir, ils n'auroient point un meilleur serviteur près de Sa Majesté, ny qui leur rendit de meilleurs offices que vous seriez en toute occasion.

Peu apres vous montastes à cheval et allastes coucher à Chasteau-gontier ; le lendemain, ce nous semble-il, à Vitré, où vous donnastes ordre à faire payer les gens de guerre ; et les loger de sorte et avec telle police, avec l'assistance que vous y firent messieurs de Salignac et de Moüy, mareschaux de camp, que tous les peuples, qui s'estoient retirez dans des bois retranchez, et estoient tous les jours presta d'en venir aux mains les uns contre les autres, vous en envoyèrent faire des remerciemens, et donnoient tout publiquement mille louanges. Cela vous fist aussi merveilleusement bien recevoir à Rennes, où l'on vous logea en un fort beau logis chez mademoiselle de la Riviere, femme à tout faire, des plus habiles, galantes et de la meilleure compagnie qu'il se peut imaginer, et qui eut tant de soin de vous faire bien passer le temps, que nous vous avons oüy dire maintes-fois, depuis, n'avoir jamais mené une si douce vie, les affaires publiques pour lesquelles vous estiez envoyé s'estans rendues si faciles qu'il ne vous y fut besoin d'aucun soin ny sollicitation, les estats ayans volontairement accordé huit cens mil escus au Roy, etourny leur tresorier pour en faire l'avance ; à sçavoir : cent mil escus chacun des premiers deux mois, et deux cens mil escus de six mois en six mois apres, à s'en rembourser, et des intersts d'icelles sommes, sur une imposition de quatre et deux escus pour pipe de vin. Ayant donné advis au Roy de tout cela, il vous en sceut merveilleusement bon gré, et encor plus de ce que ceux de la province vous ayant voulu donner six mil escus, vous les aviez refusez. Tellement que, pour le tesmoigner, il vous envoya un don de dix mil escus, à prendre sur les clairs deniers de son espargne, dont il ne faut point demander si vous fustes bien payé ; car ceux de la province l'ayant sceu, voulurent que cette somme fut prise outre les huit cens mil escus du Roy ; et fut le premier pre-

sent de somme notable que le Roy vous eut encor fait depuis vingt-six ans qu'il y avoit que vous le serviez, tous les precedens biens-faits n'ayant jamais passé deux mil escus, reservé les quatre mil qu'il vous donna lors que vous luy apportastes tant d'argent à Rouën.

Pendant vostre séjour d'un mois ou six semaines à Rennes, le Roy acheva son traité avec M. de Mercure, et s'en alla séjourner à Nantes, où tous les deputez de ceux de la religion et quelques-uns des principaux seigneurs faisant profession d'icelle, se rendirent pour demander au Roy un edit perpetuel, sous lequel ils vescuissent d'oresnavant, et non plus sous le simple benefice provisionnel d'une trefve : ce qui leur fut accordé.

Les ambassadeurs, d'Angleterre, qui fut le millord secretaire Cecille, et de Hollande, qui fut l'admiral Justin de Nassau, arriverent aussi en ce lieu pour divertir le Roy de conclurre la paix avec les Espagnols, le premier luy offrant, en ce cas qu'il voulust faire la guerre, de fournir et soudoyer incessamment six mil hommes de pied et cinq cens chevaux anglois ; et le second quatre mil hommes de pied : et outre cela, tous les deux ensemble, de l'assister d'artillerie, vivres, munitions et navires de guerre pour la reprise de Calais et Ardres seulement. Mais une infinité de raisons, trop longues à desdire, empescherent le Roy d'accepter ces offres et le firent resoudre d'agrecer la paix, qui fut peu apres conclue à Vervins, laquelle ne l'empescha pas, neantmoins, de continuer ses alliances avec l'Angleterre et les Provinces unies, et de leur promettre toute assistance d'argent, comme en payement de debtes, afin que le Roy d'Espagne ne peust avoir juste sujet de se plaindre d'aucune infraction de paix. Nous avons traité toutes ces affaires, tant grandes, importantes et de si longue disction qu'il se pourroit faire un gros volume des particularitez d'icelles ; ainsi succinctement, tant pource que vous n'eussiez quasi nul part en icelles que pource que plusieurs historiens les ont fort au long inserées en leurs livres.

#### CHAPITRE LXXX.

*Séjour du Roy à Rennes. Conférence de Henri IV avec Rosny sur les manœuvres des Protestans, sur la dissolution de son mariage avec Marguerite de Valois, et sur le choix d'une nouvelle épouse. Lettre de Rosny à la reine Marguerite. Réponse de cette Reine.*

Toutes ces affaires ainsi heureusement et

avec dextérité accomplies, le Roy s'en vint à Rennes, où vous aviez toujours séjourné pendant toutes ces facientes. Auquel lieu étant arrivé, il se trouva obligé d'y demeurer quelque temps, afin d'accélérer, par sa présence, les expéditions de plusieurs choses d'importance qui avoient esté résolues; et s'estimant comme oisif, pour ce qu'il n'avoit rien à faire qu'à s'enquérir de ce que les autres faisoient et comment ils avançoient les affaires dont il leur avoit donné charge, il essayoit de se divertir en s'occupant tantost à l'entretien de plusieurs dames de qualité de la province qui estoient venues expres pour avoir l'honneur de le voir; tantost à visiter madame de Monceaux qui se trouvoit fort grosse (comme de fait, elle accoucha peu après d'un fils qui fut nommé Alexandre); tantost à se trouver aux resjouissances que demenoient les dames de la ville, pour tant d'heureux succez dont il estoit la cause; tantost à faire des parties à courir la bague, jouer au balon, à la longue et à la courte paulme; et tantost à la chasse, à laquelle par deux diverses fois il vous commanda de le suivre, disant avoir à vous parler de quelques affaires d'importance, chose qu'il avoit déjà faite par deux fois auparavant, l'une à Saint Germain et l'autre à Angers, sans qu'en pas une des quatre il vous eut, neantmoins, jamais dit chose d'apparente consequence: de sorte qu'estant en peine de telles procédures, et vous alambiquant l'esprit à découvrir les causes d'icelles, vous vinstes à vous imaginer, car vous nous avez conté cette histoire tout du long, de laquelle et du discours qui se passa entre le Roy et M. de Bouillon, si nous avons oublié quelques particularitez importantes, ou les avons rendues trop concises, nous vous supplions, monseigneur, de les vouloir suppléer, et aussi d'en retrancher ce que vous y reconnoîtrez de prolix, ou de superflu, nostre esperance estant que vous prendrez la peine d'en faire autant de tout le surplus de ces Memoires; vous vinstes donc à vous imaginer que ce prince pouvoit avoir en l'esprit quelques fantaisies que luy mesme n'approuvoit pas, et qu'il croyoit bien que vous feriez peut-estre encor moins; et partant eut esté bien aise que vous les eussiez acueës sans estre obligé de vous les dire, apprehendant les libertez que ses commandemens absolus vous avoient fait prendre de luy dire toujours verité, et de ne luy celer nul de vos sentimens sur les affaires qu'il vous proposeroit, ou seulement tesmogneroit de vouloir entreprendre.

Or, un certain jour qu'il estoit allé, au sortir de son disner chez l'Alloüé de Rennes, visiter M. de Bouillon qui estoit logé chez luy et detenu

au lit à cause des goutes; après qu'il l'eut entretenu assez long-temps seul à seul, ayant fait sortir tout le monde hors de la chambre, il arriva qu'ainsi que le Roy estoit déjà redescendu le degré pour s'en retourner en son logis, il vous vid entrer dans la cour de celuy où il estoit; et lors ayant commandé de faire ouvrir un jardin assez beau qu'il y avoit là dedans, il vous appella et vous ayant pris par la main à nud, et passé ses doigts entre les vôtres comme c'estoit sa coutume, il vous dit: « Allons nous promener nous deux, seuls; car j'ay à vous entretenir longuement de choses dont j'ay esté quatre fois tout prest de vous parler, vous ayant par ailleurs tant de fois fait venir avec moi à la chasse, vous en souvient-il bien? mais toujours me sont survenues, en ces occasions, diverses fantaisies en l'esprit qui m'en ont empesché; mais à present je m'y suis resolu. » Et sur cela estans entrez dans le jardin, tous seuls, et ayant commandé aux gardes de n'y laisser aller personne, après avoir fermé la porte il vous parla ainsi:

« Avant que de vous entretenir sur le sujet qui m'a fait vous amener en ce lieu, je vous diray comme nous venons d'avoir de grands discours, M. de Bouillon et moy, car, comme vous sçavez, il n'est pas homme à un mot, ny qui manque d'invention ny de belles paroles, lors qu'il veut parer de bien lourdes fautes de la belle robe d'innocence. Il m'a tenu une infinité de beaux langages, et fait plusieurs belles protestations; mais, nonobstant tous ces déguisemens et allegations, je n'ay pas laissé de luy ramentevoir quelques-unes de ses plus noires et plus grandes malices (car si j'eusse voulu les luy reprocher toutes, il m'eut fallu plus de temps que je n'en ay esté avec luy), et entre les autres, n'ay-je pas oublié les bons tours qu'il m'avoit faits durant le siege d'Amiens, m'ayant esté rapporté de divers endroits et tres-bien justifié (comme vous ne l'ignorez pas, car j'ay bien sceu que vous en avez escrit en ces termes à M. de la Trimouille, lequel, quelque profession d'amitié que vous ayez faite ensemble, et bons offices que vous essayez de luy rendre tous les jours, a fait des risées de vos lettres), que ma bonne tante de Rohan, avec toutes ces resveries, luy, messieurs de la Trimouille, du Plessis, de S. Germain, Clan, de Beaupré, de Bertichères, de Leignan, de la Casse, de Preaux, de la Valiere, de Bassignac, Constants, Aubigny, Reignac, Bessais, la Sausaye et autres, avoient couru et tracassé par les eglises et synodes, et usé d'une infinité de mauvais discours, artifices et calomnies, non seulement pour mettre tous ceux de la religion en ombrage de moy, mais aussi pour

les disposer à prendre ouvertement les armes, alleguant entr'autres raisons, que moy ayant ainsi legerement changé de religion, non par ignorance ou faute de cognoistre la verité, mais par pure ambition et avoir plus de liberté à me plonger es plaisirs et delices mondains (car ce sont les propres termes dont a usé cette satirique langue d'Aubigny), sans m'estre soucié de mettre leurs consciences en liberté, et leurs biens, vies et fortunes en seureté, en leur donnant un edict perpetuel, et non les laissant dans une tolerance provisionnelle du feu Roy; qu'il ne falloit plus que ceux de la religion s'attendissent à aucuns miens bien-faits, ny gratifications volontaires, ny que je leur donnasse les conditions avantageuses qui leur estoient necessaires pour se maintenir et mettre en pouvoir de defence contre leurs ennemis, sinon par force, par la necessité de mes affaires et le besoin que je pourray avoir de leurs assistances et services; et qu'estant par ces raisons du tout necessaire de prendre un temps à propos pour obtenir ces choses de moy, ils n'en eussent peu choisir un plus opportun que celui qui lors se presentoit, l'Espagnol ayant un grand pied dans la France, M. de Mercure faisant tousjours la guerre, plusieurs malcontents grondans encores dans l'Estat, moy estant en necessité d'argent et engagé en un grand siege, qu'il ne falloit point douter que le cardinal archiduc, comme c'estoit chose à quoy il se pre-paroit, ne fust bien-tost lever, principalement si eux prenoient les armes, ceux de la religion ne devant rien tant apprehender qu'une paix generale, tant dedans que dehors le royaume, qui puisse produire des amitez, alliances et unions entre les couronnes de France et d'Espagne, et par icelles entre le Pape, l'Empereur et autres princes catholiques qui entreprennent à communes armes (comme il n'y a point de doute qu'ils n'en ayent tousjours le dessein dans le cœur) la ruine et entiere destruction de la religion reformée et protestante, aussi bien en France que hors icelle.

« Et partant falloit-il prevenir de si grands inconveniens par la continuité des guerres et necessitez du royaume, voire y en avoit-il eu d'entr'eux (et par là pouvoit-on juger jusques à quelles extremitez tels broüillons estoient capables de porter les affaires, car je ne dis, ny ne diray rien qui ne soit dans les lettres d'avis qui m'en ont esté données), lesquels, pour se faire voir exceller en zele de religion, ou estimer sçavans en l'histoire, avoient fait grand cas d'un certain conseil d'un pape donné à un roy de Naples, de la maison de France, qui avoit prisonnier en ses mains son compediteur au

royaume, par lequel il luy mandoit (je ne sçay s'il me pourra bien souvenir des termes et des noms propres qui sont dans la lettre que l'on m'en escrit) que la mort de Conradin estoit la vie de Charles, et que la vie de Conradin estoit la mort de Charles; lequel advertissement disoient-ils devoir servir d'instruction à ceux de la religion en France, pour faire cognoistre, à cause de la haine que l'on leur porte et du dessein sans discontinuation que l'on avoit de les exterminer, que la prosperité, force, puissance, opulence et tranquillité bien assurée du royaume, devoit estre estimée la ruine, calamité, destruction et desolation de ceux de leur profession; et l'abaissement, foiblesse, necessité et continuelle infestation de l'Estat, l'accroissement, force, repos et seureté des eglises reformées.

« Surquoy je luy ay protesté, pour luy faire perdre cette opinion, de tout ce que vous m'avez souvent oüy dire de mes bonnes intentions à la conservation de tous ceux de la religion dans mon royaume, et du dessein formel que j'ay dans l'esprit de faire un jour puissamment la guerre à l'Espagnol, estant cette passion la plus violente de toutes celles que je sçaurois avoir. Puis ay adjousté que luy (ayant trouvé tout le corps en general de ceux de la religion entiere-ment alienné de telles fantaisies, ny de rien faire qui me pust desplaire, sur tout pendant que je serois occupé en un si grand siege) n'avoit pas quitté le dessein de me nuire; mais, ne se pouvant servir des huguenots en general, avoit essayé de me broüiller par le moyen de quelques catholiques en particulier, dont je luy ay allegué tout ce que vous avez veu que l'on m'en a écrit, et sur tout la prise de Mande par Fosseuze, et l'escapade du comte d'Auvergne, lesquels n'avoient rien fait que suivant ses conseils et avis. Je ne luy ay celé non plus les divers, mais tres-certains avis qui m'avoient esté donnez, et dont je luy ay dit n'estimer point qu'il n'ait eu toute cognoissance et participation, des mauvais langages qu'aucuns de ceux de la religion avoient tenus aux sieurs Cecile et Justin de Nassau en particulier, et des instantes sollicitations dont ils avoient usé vers eux en general, pour les persuader à s'opposer formellement, au nom de ceux qui les avoient envoyez, à la paix, que l'on voyoit bien que je me disposois de conclurre avec les Espagnols par l'entremise du Pape. Usant pour cet effet de toutes les raisons et remonstrances que leur grande prudence leur pourroit suggerer, jusques à en venir finalement, au cas que je voulusse passer outre, à une protestation de rupture d'alliance, et qu'eux aussi non seulement s'accommoderolent et trait-



teroient paix avec le roy d'Espagne, mais aussi conclurroient une alliance estroite en forme de ligue offensive et défensive pour le recouvrement, à communes armes, et poursuites de toutes les pretentions que l'Espagne et l'Angleterre pouvoient avoir sur diverses provinces de France; quoy, comme je luy ay dit, que telles menées, pratiques et sollicitations eussent esté, mais par la seule prudence et discretion des deux ambassadeurs, aussi peu avantageuses à leurs mauvais desseins, et pernicieuses aux miens équitables, qu'avoient esté tous leurs autres monopoles dans mon royaume, ainsi que je le recognus deux ou trois jours apres : d'autant que ces deux ambassadeurs (mais de cecy n'en ay-je rien dit à M. de Bouillon) m'ayant envoyé prier de leur donner une audience où je fusse seul et eux aussi, ou, si je voulois avoir quelques-uns de mes serviteurs, que ce fut seulement vous et Lomenie, pour ce qu'ils sçavoient bien que vous estiez tout à moy, et n'aviez nuls mauvais desseins contre vostre patrie, ma personne, ny leurs pays et affaires aussi; mais vous estant lors à Rennes, je leur manday que je serois seul.

• Tellement que m'estans venus trouver seuls, et m'ayant proposé une alliance et association perpetuelle pour faire, sans intermission, conjointement la guerre au roy d'Espagne, et sans que l'un des trois peut traiter paix ny trefve que par le consentement des deux autres; auquel cas, si je m'y voulois resoudre, ils avoient charge (pource qu'ils ne doutoient point que ce ne fut à moy à faire et soustenir les plus grands efforts) de m'offrir (et à cela obliger ceux qui les avoient envoyez) un secours continuel de dix mille hommes de pied, mille chevaux bien entretenus et payez dans mes armées, autant de vaisseaux bien armez que la nécessité des affaires qui me surviendroient le pourroit requerrir, et des artilleries, vivres et munitions proportionnées au besoin que j'en pourrois avoir : sur lesquelles propositions, que je ne voulus contester, apres les avoir courtoisement remerciez de leurs belles et tres avantageuses offres, et tesmoigné de leur en sçavoir le gré et avoir les ressentimens qu'elles meritoient, je les priay seulement de considerer que les differences et diversitez, voire contrarietez qui se trouvoient entre leurs pays, terres et seigneuries et les miennes, et situations, qualitez de terres, heritages et revenus tant publics que privez, dominations des superieurs, et subjections des inferieurs, loix, polices, disciplines, constitutions, humeurs, dispositions et conditions des peuples, estat present des affaires et formes de gouverne-

ment, estoient cause que ce qui se trouvoit advantageous ou supportable es uns, estoit tres-dommageable, voire insupportable aux autres, leurs pays estans tellement circuits et environnez de mers, grands fleuves, rivières, canaux, paluds et marescages, qu'ils s'estoient rendus inaccessibles et hors de tout danger d'attaquement et invasion d'ennemis, reservé par la mer, sur laquelle leurs forces estoient tellement superieures à toutes autres qu'ils n'avoient rien à craindre, au lieu que la France estant ouverte de tous costez et par terre et par mer, et ses advenües faciles en l'un et en l'autre, pource qu'elle estoit foible en vaisseaux, elle avoit besoin, venant à estre reduitte sur la defensive, d'autant d'armées que de provinces pour prevenir toute hostilité; leurs terres, heritages et revenus estans bien labourez, entretenus et mis en leur juste valeur, au lieu que la France estoit lors quasi reduitte en desert, et tous les revenus publics et privez la plupart en non-valeur; leurs dominations bien establies sans disputes, et leurs sujets accoustumez à l'obeyssance, voire ne respiroient que bonne volonté et affection, au lieu qu'il n'y avoit, par maniere de dire, que trois jours que j'estois reconneu pour Roy, et cela non pas encor generalement, et que mes sujets, pour la pluspart, ne se pouvoient accoustumer à l'obeyssance absoluë ny à la bien-veillance inalterable; leurs loix, polices, disciplines et constitutions estans bien establies et observées sans opposition ny contravention, au lieu que celles de France estoient quasi toutes perverties, renversées et sans aucune execution; les humeurs, dispositions et conditions de leurs peuples estans bien reconneüs, assurées et prosperes, au lieu que l'on ne reconnoist du tout rien en celles des François, et qu'il n'y a parmy eux que ruine, desolation et desordre; l'estat present de leurs affaires estant tres-solidement fondé sans qu'il eust besoin de nouveaux ordres, establissemens et reglemens, au lieu que celuy des affaires de France estoit plein de confusion, dispersion, et avoit besoin d'estre reformé en son tout et en ses parties; et les formes de leurs gouvernemens estans continuées au contentement et gré de tous sans aucuns desirs tendans à innovation, au lieu que celles du gouvernement de France estoient ordinairement aussi diverses qu'il y venoit de nouveaux roys et de nouveaux conseillers et administrateurs d'affaires, lesquels encor le plus souvent ne pouvoient rien faire au gré de tous, voire arrivoit-il le plus ordinairement que ce qui plaisoit à un desplaisoit à cent. Non que pour toutes ces difficultez, leur dis-je, mon courage soit abaissé, mes cordiales affec-

tions envers la reine d'Angleterre, ma bonne sœur, et messieurs les Etats, mes loyaux amis, soient en aucune façon diminuées, ny mes esperances de battre un jour l'Espagnol affoiblies, mais pour vous faire comprendre que n'y ayant quasi eu ville ny chasteau dans mon royaume qui ne se soit senti des ruines et desolations de la guerre, ny revenus publics et privez qui ne soient en degast et non-valeur, la France et moy avons besoin de reprendre haleine, et, sous le benefice de quelque espede de cessation d'armes, pouvoir reparer tous ces défauts, comme je suis bien assuré de faire; de telle sorte que j'aurois d'autant plus de moyen de les secourir d'argent, sous pretexte de payemens de debtes, comme je leur promettois de n'y manquer pas, les priant de faire trouver bonne, aux lieux où ils s'en retourneroient, la paix où toutes ces raisons me convioient d'entendre. Desquelles remonstrances, apres quelques petits discours, ils monstre- rent de se contenter, voire de recognoistre que j'avois raison et d'approuver celles que je leur avois alleguées; disant en ma louange qu'ils s'estonnoient de me voir avoir une tant generale et parfaite cognoissance, non seulement de toutes les parties et affaires de mon royaume, mais aussi de la plupart de leurs Etats; toutes lesquelles choses ils me promettoient de faire valloir, en sorte que j'en aurois contentement, et que je ne trouverois nulle alteration en la bienveillance et affection de ceux au nom desquels ils parloient, et sur cela se retirerent.

« De tous lesquels derniers discours j'ay bien dit une partie à M. de Bouillon, et pour conclusion, apres quelques repliques qu'il m'a faites, lesquelles seroient trop longues, que sans l'accuser ny excuser aussi du tout, d'avoir toujours esté l'un des principaux auteurs de toutes telles menées, je luy voulois bien dire que, comme j'avois pardonné à tous mes ennemis, je ne me voulois pas monstrier moins indulgent envers mes serviteurs, au nombre desquels ayant tousjours fait profession d'estre, aussi l'assurois-je, voire luy donnois ma foy et ma parole que je rendrois à jamais inviolables, d'avoir oublié toutes ses fautes passées et les traverses qu'il m'avoit données; mais aussi le voulois-je bien advertir qu'estant maintenant pacifique dans mon royaume et dehors, je ne voulois plus souffrir que l'on manquast au respect et obeissance qui m'estoient deus, et partant non seulement je luy commandois comme son roy et son maistre, mais aussi le priois comme son amy particulier, de vivre d'une autre façon qu'il n'avoit fait, de m'aymer veritablement et de me servir loyalement, s'il ne vouloit à l'advenir autant esprouver ma juste se-

verité qu'il avoit fait ma trop indulgente clemence; et sur cela, en l'embrassant, me suis separé de luy sans vouloir escouter sa responce; et remettant au temps à faire voir comment ces douces et amiables remonstrances auront profité en un tel esprit, je reviendray au discours pour lequel je vous avois emmené en ce jardin.

« Lequel je ne commenceray point, afin de l'abreger, pour vous représenter les perils et les hazards que j'ay courus, et les peines, fatigues, soucis et ennuis par lesquels j'ay passé avant que je sois parvenu à estre roy paisible dedans et dehors le royaume, comme je m'en vois à la veille par le traité de Vervins qui s'en va conclud, n'estimant quasi plus rien ce qui reste à reduire ny mesme le marquisat de Saluces, car je recouvreray tout cela en me jouant, lors que je n'auray plus à faire qu'à un duc de Savoye et quelques petits particuliers non soustenus ouvertement d'Espagne; mais je viendray aux travaux qu'il me faudra supporter parmy les negociés et affaires politiques, et en l'establisement des ordres, loix, reglemens et disciplines, tant civiles que militaires, esquelles j'apprehende qu'il me conviendra vacquer assiduelement, n'ayant jamais eu l'humeur bien propre aux choses sedentaires, et me plaisant beaucoup plus à vestir un harnois, picquer un cheval et donner un coup d'espée, qu'à faire des loix, tenir la main à l'observation d'icelles, estre tousjours assis dans un conseil à signer des arrests, ou voir, examiner des estats de finance: et n'estoit que je m'attends d'estre en cela secouru de Bellèvre, de vous, de Ville-roy, de Sillery et de deux ou trois autres de mes serviteurs que j'ay en fantaisie, je m'estimerois plus malheureux en temps de paix qu'en temps de guerre, quoy que je connoisse bien neantmoins que, sans ces ordres, formes et mesnagemens, il me seroit impossible de parvenir à cette gloire que je me suis proposée, par le restablisement de ce royaume en son ancienne grandeur et splendeur, et la descharge et soulagement des peuples que Dieu m'a commis, du regime desquels je seray un jour obligé de luy rendre compte; ne voyant en tous ces beaux et magnifiques desseins qu'un seul deffaut et manquement (lequel toutesfois ne laisse pas de m'affliger de telle sorte qu'il me fait quasi perdre courage et n'avoir plus autre dessein que de vivre au jour la journée, comme l'on dit, et pousser le temps à l'espaule ainsi que les faineans) qui est de sçavoir au profit de qui viendra tout mon travail apres moy, et si mes labeurs auront leurs justes retributions, que j'estime consister en une bonne renommée dans le monde, en la louange que me donneront, au

gré que me sçauront, et en l'affection que tesmoigneront à ma personne et à ma memoire, ceux qui auront à me succeder : d'autant qu'en l'estat où sont de present les affaires de ma succession au royaume, il y a plus d'apparence d'une prochaine dissipation d'Estat et renversement de mes ordres, formes et mesnages establis, que de voir une imitation de mes conseils, desseins et conduite, attendu les diverses pretentions et contentions toutes préparées entre mon nepveu le prince de Condé et les autres princes de mon sang ; ausquelles il semble impossible d'apporter des remedes certains, si je ne me dispose à donner des enfans venans de moy à la France, comme c'est chose que j'ay tousjours infiniment désirée, et de laquelle j'ay pris bonne esperance, depuis que l'archevesque d'Urbain, les sieurs du Perron, d'Ossat, de Marquemont et autres ecclesiastiques à Rome, m'ont donné advis que le Pape facilitera en tout et par tout mon desmariage, tant il desire et souhaite que je laisse la succession du royaume de France libre et sans dispute.

« De sorte qu'il semble ne rester plus, pour l'accomplissement de ce dessein, si non de voir s'il y aura moyen de trouver une autre femme si bien conditionnée que je ne me jette pas dans le plus grand des mal-heurs de cette vie, qui est, selon mon opinion, d'avoir une femme laide, mauvaise et despite, au lieu de l'aise, repos et contentement que je me serois proposé de trouver en cette condition. Que si l'on obtenoit des femmes par souhait, afin de ne me repentir point d'un si hazardeux marché, j'en aurois une, laquelle auroit, entr'autres bonnes parties, sept conditions principales ; à sçavoir, beauté en la personne, pudicité en la vie, complaisance en l'humeur, habilité en l'esprit, fecondité en generation, eminence en extraction, et grands Estats en possession. Mais je croy, mon amy, que cette femme est morte, voire peut-estre n'est pas encor née ny preste à naistre, et partant voyons un peu ensemble quelles filles ou femmes dont nous ayons ouy parler seroient à desirer pour moy, soit dehors, soit dedans le royaume. Et pource que j'y ay dé-jà, selon mon advis, plus pensé que vous :

« Je vous diray, pour le dehors, que l'infante d'Espagne, quelque vieille et laide qu'elle puisse estre, je m'y accommoderois, pourveu qu'avec elle j'espousasse aussi les Pays-bas, quand ce devroit estre à la charge de vous redonner le comté de Bethune ; je ne refuserois pas non plus la princesse Reibelle d'Angleterre, si, comme l'on publie que l'Estat luy appartient, elle en avoit esté seulement déclarée presomptive heritiere : mais il ne me faut pas attendre à l'une ny

à l'autre, car le roy d'Espagne et la roine d'Angleterre sont bien esloignez de ce dessein-là. L'on m'a aussi quelquesfois parlé de certaines princesses d'Allemagne, desquelles je n'ay pas retenu le nom ; mais les femmes de cette region ne me reviennent nullement, et penserois, si j'en avois espousé une, de devoir avoir tousjours un lot de vin couché aupres de moy, outre que j'ay ouï dire qu'il y eut un jour une reine en France de cette nation qui la pensa ruiner ; tellement que tout cela m'en degoust. L'on m'a parlé aussi de quelqu'une des sœurs du prince Maurice ; mais outre qu'elles sont toutes huguenottes, et que cette alliance me pourroit mettre en soupçon à Rome et parmy les zelez catholiques, qu'elles sont filles d'une nonnain, et quelque autre chose que je vous diray une autre fois, m'en aliene la volonté. Le duc de Florence a aussi une niece que l'on dit estre assez belle ; mais estans d'une des moindres maisons de la chrestienté qui porte titre de prince, n'y ayant pas plus de soixante ou quatre-vingts ans que ses devanciers n'estoient qu'au rang des plus illustres bourgeois de leur ville, et de la mesme race de la reine mere Catherine, qui a tant fait de maux à la France, et encor plus à moy en particulier, j'apprehende cette alliance, de crainte d'y rencontrer aussi mal pour moy, les miens et l'Estat.

« Voila toutes les estrangeres dont j'estime avoir esté parlé. Quant à celles de dedans le royaume, vous avez ma niece de Guyse, qui seroit une de celles qui me plairoit le plus, nonobstant ce petit bruit que quelques malins esprits font courir, qu'elle ayme bien autant les poulets en papier qu'en fricassée : car pour mon humeur, outre que je croy cela tres-faux, j'aimerois mieux une femme qui fist un peu l'amour, qu'une qui eust mauvaise teste, dequoy elle n'est pas soupçonnée ; mais au contraire d'humeur fort douce et d'agreable et complaisante conversation, et pour le surplus de bonne maison ; belle, de grande taille et d'apparence d'avoir bien tost de beaux enfans ; n'y apprehendant rien que la trop grande passion qu'elle tesmoigne pour sa maison et sur tout ses freres, qui luy pourroient faire naistre des desirs de les eslever à mon prejudice, et plus encor de mes enfans si jamais la regence de l'Estat luy tomboit entre les mains. Il y a aussi deux filles en la maison du Mayne, dont l'ais-née, quelque noire qu'elle soit, ne me despleroit pas, estans sages et bien nourries ; mais elles sont trop jeunes. Deux en celle d'Aumalle, et trois en celle de Longueville, qui ne sont pas à mespriser pour leurs personnes, mais d'autres raisons m'empeschent d'y penser.

«Voilà pource qu'il y a de princesses. Vous avez après une fille en la maison de Luxembourg, une en la maison de Guimené, ma cousine Catherine de Rohan, mais cette-là est huguenotte, et les autres ne me plaisent pas ; et puis la fille de ma cousine la princesse de Conty, de la maison de Lucé, qui est une tres-belle fille et bien nourrie, aussi seroit-ce celle qui me plairoit le plus si elle estoit plus aagée ; mais quand elles m'agréeroient toutes, pour si peu que j'y recognois, qui est-ce qui m'assurera que j'y rencontreray conjointement les trois principales conditions que j'y desire, et sans lesquelles je ne voudrois point de femme ? A sçavoir qu'elles me feront des fils, qu'elles seront d'humeur douce et complaisante, et d'esprit habile pour me soulager aux affaires sedentaires, et pour bien regir mon Estat et mes enfans, s'il venoit faute de moy, avant qu'ils eussent âge, sens et jugement pour essayer de m'imiter, comme apparemment cela est pour m'arriver, me mariant si avant en l'âge. »

« Mais quoy donc, Sire, luy respondistes-vous, que vous plaist-il entendre par tant d'affirmatives et de negatives, desquelles je ne sçauois conclurre autre chose, sinon que vous desirez bien estre marié, mais que vous ne trouvez point de femmes en terre qui vous soient propres ? Tellement qu'à ce conte il faudroit implorer l'ayde du ciel, afin qu'il fist rajeunir la reine d'Angleterre, et ressusciter Marguerite de Flandres, mademoiselle de Bourgogne, Jeanne la Loca, Anne de Bretagne et Marie Stuart, toutes riches heritieres, afin de vous en mettre au choix ; car, selon l'humeur que vous avez témoignée parlant de Clara Eugenie, vous seriez homme pour agréer quelques-unes de celles-là qui possedoient tant de grands Estats. Mais laissant toutes ces impossibilités et imaginations vaines à part, voyons un peu ce qu'il faut faire, car de toute nécessité, tant pour les raisons que vous mesmes avez alléguées, que de crainte que n'ayant point d'enfans, ce défaut vous fit perdre le courage nécessaire d'eslever vostre royaume en la splendeur où j'espere de le voir par vostre vertu, il faut que vous soyez promptement desmarié, puis aussi-tost remarié à quelqu'une de celles que vous avez nommées, si mieux vous n'aymez faire une chose dont je serois d'avis, si j'estois capable de vous donner conseil en chose sujette à tant de divers accidens, sans vous en declarer neantmoins, que toutes les formalitez pour l'assurée dissolution d'avec la Reine vostre femme n'eussent esté observées, qui seroit (et cecy sera un conseil pour vous faire rire) de faire publier par tout vostre royaume, que tous les peres, meres, ou tuteurs qui auroient de belles filles de

haute taille, au dessus de dix-sept à vingt-cinq ans, eussent à les amener à Paris, afin que sur icelles vous éleussiez pour femme celle qui plus vous agréeroit, où les ayant toutes veuës, considérées et entretenuës de paroles, s'il s'en trouvoit plusieurs qui vous agréassent esgallement, les faire mettre en un logis à part, sous la charge de quelques vieilles et sages dames à vous du tout confidentes, afin de les observer en toutes leurs paroles et actions, cognoistre leurs humeurs et complexions de leurs santez et beautez cachées, et autres particularitez nécessaires, pour éviter que vous n'y trouvassiez rien à contre-cœur, qui pust faire apprehender qu'elles n'eussent point de lignée ; puis sur les rapports qui vous en seroient falts former vostre election : car pour mon opinion, ny biens ny royale extraction ne vous sont point absolument nécessaires. Ayez seulement une femme que vous puissiez aimer et qui vous fasse des fils ; car, moyennant cela, vous ne devez douter que tout ce qu'il y a de bons François ne s'en resjouyissent, ne recognoissent pour roys les enfans qui viendront de ce mariage, et ne les aiment de tout leur cœur sous esperance qu'ils imiteront les vertus du pere ; quoy qu'il soit souvent arrivé que de grands personnages et tres-excellens princes ayent produit de fort chetifs enfans, dequoy Ninus, Anaxindaris, Nabuchodonosor, Cyrus, Alexandre, Cesar Auguste, Trajan, Constantin, Charlemagne et autres en bon nombre servent de suffisantes preuves. »

« Or bien, dit le Roy, laissant vostre avis à part d'une assemblée de tant de filles qui apprestoient à rire au monde, et toutes vos histoires de galands hommes qui ont eu de tristes enfans, car j'espere vous en faire qui vaudront encor mieux que moy, puis que vous concluez principalement à ces trois conditions, que la femme que je prendray doit avoir, à sçavoir qu'elle soit belle, qu'elle soit d'humeur complaisante (car aussi sans ces deux là me seroit-il impossible de l'aymer) et me fasse des fils, songez un peu en vous mesmes si vous n'en pourriez point cognoistre quelqu'une, en laquelle tout cela se pust rencontrer. »

« Telles nominations, Sire, respondites vous, ne se doivent point faire par songes ny fantaisies, mais par vraye science et parfaite cognoissance. Or, ne sçay-je point de filles ny de femmes de tel merite, avec lesquelles j'aye jamais eu assez de familiere conversation pour en avoir toutes les certitudes requises, tant pour sçavoir s'il n'y a rien de caché, ny en son humeur, ny en aucune des parties de sa personne et de son esprit, qui vous pust desagréer ou manquer à vous don-

ner des enfans.—Et que direz vous, dit le Roy, si je vous en nomme une? — Je diray, Sire, dites vous, que vous aurez eu de plus grandes familiaritez avec elle que moy, et qu'il faut que ce soit une veufve; car autrement vous ne sçauriez estre bien asseuré qu'elle soit capable d'avoir des enfans, y en ayant eu des mieux formées et des plus saines qui n'en ont jamais peu avoir. — Ce sera tout ce que vous voudrez, respondit le Roy, mais si vous ne vous en pouvez adviser d'une, je la nommeray.—Nommez la donc, Sire, dites vous, car j'advoué que je n'ay pas assez d'esprit pour cela. »

« O la fine beste que vous estes, dit le Roy. Ah! que si avez bien si vous vouliez, voire celle-là mesme que je pense, car il n'est pas que n'en ayez entendu bruire quelque chose; mais je vois bien où vous en voulez venir, en me faisant ainsi le niais et l'ignorant, c'est en intention de me la faire nommer, et je le feray; car vous me confessez que toutes ces trois conditions peuvent estre trouvées en ma maistresse; non que pour cela je veille dire que j'aye pensé à l'espouser, mais seulement pour sçavoir ce que vous en diriez, si faute d'autre cela me venoit quelque jour en fantaisie. — Je vous dirois, Sire, dites vous en souriant, que comme les filles de Loth, n'estimant plus qu'il y eust homme en la terre, sinon leur propre pere, par lequel il leur fust possible de reparer le genre humain qu'elles croyoient pery entierement, passerent par dessus toute pudeur et bien seance; ainsi vostre Majesté, pour cognoistre femme propre à luy donner des enfans autre que madame la marquise, de crainte de priver l'Estat et nous tous d'un si grand bien, n'auroit pas apporté toutes les considerations requises à l'égard de vostre personne et de vostre dignité. »

« Il y a trop de subtilité en vostre repliche, dit le Roy, pour me bien satisfaire l'esprit. Mais remettant la decision de cette question (sur laquelle vous avez respondu avec artifice) à une autre fois, voyons un peu, vous et moy, de quels inconveniens pourroit estre suivie la conclusion et l'exécution d'icelle, vous ordonnant de m'en parler librement, sans apprehender que je m'en fasche, puis que je vous ay choisi pour me dire mes veritez en particulier; mais vous me ferez plaisir de ne l'entreprendre jamais devant le monde, car je vous advoué que je m'en offence-rois bien fort. »

« Ny devant le monde, Sire, distes-vous, ny en particulier ne seray-je jamais si sot ny si impudent que de dire chose que j'estime vous devoir desplaire, si ce n'estoit que, pour le taire, vostre vie ou vostre Estat peussent courir fortune; car en ces deux cas perdrois-je tout res-

pect et discretion, quand mesme j'estimerois en devoir mourir ou qu'il vous pleust de m'en donner le commandement absolu, comme vous venez de faire maintenant. Auquel rendant obeysance, je vous diray, Sire, qu'outre le blâme general que vous en pourriez encourir, et la honte qu'un repentir vous apportera, lors que les bouillons d'amour seront attiedis, que je ne puis imaginer nuls expediens propres pour desenvolver les intrigues et embarras et concilier les pretentions diverses qui surviendront à cause de vos enfans, nez en si diverses manieres et avec des formes tant irregulieres; dautant qu'outre les beaux contes que l'on en a faits (dont vous en avez sceu le moins, et toutes-fois ne les avez pas entierement ignorez, sur tout celuy de M. Alibour, qui a tant couru; car je sçay que Regnardiere vous en a dit un jour quelque chose en paroles couvertes, que vous entendistes bien neantmoins; car, n'en voulant pas faire semblant, vous vous servistes du despit de monsieur l'admiral pour le faire battre, afin qu'il se retirast de la Cour), le premier de vos enfans, puis que vous les nommez tels, ne sçauroit nier qu'il ne soit né dans un double adultere; le second, que vous aurez à present, se croira plus avantage, à cause que ce ne sera plus que sous un simple adultere, et ceux qui viendront apres, lors que vous serez marié, ne faudront de pretendre qu'eux seuls doivent estre estimez legitimes; à toutes lesquelles difficultez je vous laisseray penser à loisir avant que de vous en dire davantage. »

« Ce ne sera pas trop mal fait, repartit le Roy, car vous en avez assez dit pour la premiere fois; dequoy je vous promets bien de n'en dire jamais rien à ma maistresse, de peur de vous mettre mal avec elle. Car il est vray qu'elle vous ayme et encor plus vous estime, quoy qu'il luy reste tousjours quelque scrupule en l'esprit, que vous ne luy serez pas des plus favorables aux avantages que je voudrois faire à elle et à ses enfans, disant que vous mettez tousjours tant cét Estat et ma gloire en avant, qu'il semble que vous les aimiez mieux que mon contentement ny ma personne. »

« Sire, dites vous, elle a en cela quelque raison; mais moy aussi n'ay-je pas tort d'avoir également soin de vous et de vostre Estat, puis-que vous, sans luy, ne sçauriez vivre glorieux et content; ny luy, sans vous, subsister en splendeur longuement, vostre seule vertu estant l'esprit qui anime tout ce grand corps? — Je trouve tout cela bien dit, repartit le Roy; mais voyons de plus près, si cette action, au cas que je m'y resoluasse, pourroit de mon vivant exciter quel-

que emotion ou trouble dans l'Estat, et qui apparemment seroient ceux qui l'approuveroient absolument, ceux qui la tolleroient par respect, obeysance et complaisance, et ceux lesquels formellement essayeroient de s'y opposer. » Et suivant ce dessein, vous parcourustes toutes les provinces de France, et discourustes sur les humeurs diverses des grandes villes, peuples et personnages plus qualifiez et puissans; du recit desquels discours nous nous abstiendrons, dautant que cela seroit merueilleusement long, et pourroit offencer les uns et donner vanité aux autres, et peut estre ennuyer vous et ceux qui pourront lire ces Memoires; lesquels, en certaines occasions, afin d'en oster l'obscurité et faire mieux cognoistre les humeurs des personnes, et les vrayes causes des effets plus extraordinaires, nous confessons que nous rendons trop prolixes: tellement que pour abreger nous nous contenterons de vous ramentevoir seulement que le Roy, soit avec verité, soit par artifice, vous donna sujet de croire, par ses dernieres paroles, que vos raisons et remonstrances luy avoient aliené l'esprit de ce mariage. De telle sorte que de tous vos longs propos vous ne conclûtes autre chose, sinon qu'il se falloit bien garder de faire aucune demonstration qu'il eust aucun dessein formé en faveur de nulle fille ny femme, jusques à ce que toutes les formalitez necessaires pour le des-mariage eussent esté accomplies, de crainte qu'à cette occasion le Pape, la reine Marguerite et d'autres encor qui eussent creu s'y devoir sentir interessez, ny apportassent des traverses et empeschemens.

Et sur cela le Roy sortit du jardin où vous aviez demeuré près de trois heures d'horloge, chacun s'estonnant, voire s'ennuyant bien fort de vos tant longs propos, les uns discourans d'une façon, les autres d'une autre sur les causes d'iceux, et s'en alla souper, et vous à vostre logis. Auquel ayant medité sur tous ces discours passez, vous pristres resolution d'escrire comme de vous meisme à la reine de Navarre, pour voir si vos raisons la pourroient persuader à faire les choses necessaires pour faciliter le des-mariage du Roy et d'elle; vostre premiere lettre estant telle que s'ensuit :

*Lettre de M. de Rosny à la Reine Marguerite.*

MADAME,

Voyant que les bizarres caprices de la fortune par lesquels le Roy, mon unique maistre, avoit passé, non seulement depuis son enfance jusques à maintenant, mais qui avoient encor davantage traversé ses devanciers, commençoient à se moderer et aucunement à s'adoucir, j'ay es-

timé que tout cela venoit des faveurs et benedictions de Dieu, lequel, comme tout bon et tout puissant, ne laisseroit point imparfait un si grand œuvre et tant necessaire à la chrestienté. Cette douce esperance m'a remis en memoire non seulement les temps de ces plus grandes afflictions, qui furent lors qu'il entra en vostre alliance, et moy à son service, mais aussi m'a fait ressouvenir qu'entre les jeunes gens qu'il nourrissoit près de luy, que moy estant un de ceux qui se monstroient le plus soigneux à rendre subjection, service et obeysance à vostre Majesté, il me sembloit aussi que j'estois un de ceux auquel sa bonté témoignoit le plus d'affection, et se plaisoit davantage à l'employer, voire quelquefois à parler à luy, ce qui m'a tousjours rendu tres-desireux de la voir en une plus auguste fortune que celle que je luy ay veu posséder par tant d'années. Mais celle de mon maistre me semblant quasi pire que la vostre, dautant que la plupart des potentats de la chrestienté sembloient conspirer contre sa dignité, sa vie, et mesme son ame, je creus que, quelque grande devotion que je peusse avoir à vostre commun service et contentement, il me seroit impossible, tant que vous auriez tous deux la fortune contraire, et seriez encor contraires en desseins, de rapprocher jamais intentions, volonte, et desseins de telle aversion; tellement qu'il ne m'en restoit lors que le seul desir, sans aucune esperance de le voir jamais sortir à effet. Or vous dis-je tout ce, madame, ma chere Reine, afin que, vous en ressouvenant, vous ne mesprisiez point le projet que je fais d'essayer à vous reconcilier sincerement et de bonne foy l'un avec l'autre; et quoy que je voye bien que les choses dont la France a tant de besoin, ne se puissent pas trouver entierement en la réunion de vos personnes, qui est une succession legitime à cette couronne, j'ay estimé que vostre esprit que j'ay tousjours recogneu tant excellent, vostre prudence et grand jugement seroient capables de bien recevoir les ouvertures que je luy proposerois, pour vous faire vivre et converser ensemble, avec de tels temperamens et assaisonnemens que vous y trouveriez tous deux dequoy raisonnablement vous contenter, puis qu'il n'y a rien qui vous doive maintenant estre devenu tant agreable que de vous pouvoir voir continuellement et vivre ensemble en toute confiance et sincerité, comme un bon frere et une bonne sœur doivent faire ensemble, chose que je vous puis assurer d'estre fort facile, si vous me tesmoignez d'y avoir bien agreable mon entremise. Surquoy attendant l'honneur de vos commandemens, je prieray le Createur, etc.

De Rennes ce 13 avril 1598. Quelque temps apres vous eustes responce à la susdite lettre, telle que s'ensuit :

*Responce de la Reine Marguerite à la lettre de M. de Rosny.*

Mon cousin, j'ay reçu une lettre de vous qui contient plusieurs choses qui meritent consideration, d'aucunes desquelles il m'estoit quelquesfois bien souvent souvenu des autres, vostre lettre m'en a rafraischy la memoire, et toutes donné sujet de cherir vostre affection à mon bien et repos, dont les felicités me sont encor incogneues. Le pelerinage de mes jours ayant incessamment esté triste et languoureux, partant ne doutez point que je n'aye receu vos propositions d'une esperance de mieux comme elles meritent, et ne tiendra point à ce qui dépend de moy, que le succez n'en soit tel que vous tesmoignez de le desirer, mettant à un si haut prix les vertus heroïques du Roy, et les moyens qui me seront présentés pour me faire trouver quelque part en ses bonnes graces, que toutes sortes de conditions où il sera besoin de me soumettre, me seront tousjours tres-agreables, puis que c'est vous qui m'en parlez avec tant d'affection; vous reputant si vertueux que je ne recevray jamais conseil de vous qui ne me soit honorable et utile, ny loy d'un Roy si prudent et si genereux que le nostre, qui ne soit equitable et juste; et partant pouvez vous donner commencement à un si bon œuvre, toutes les fois que vous le jugerez à propos. J'en laisse donc la conduite à vostre prudence et à vostre affection, desquels j'attendray les effets avec impatience, et aussi les occasions de vous tesmoigner que je suis, mon cousin, vostre tres-affectionnée et fidelle cousine, MARGUERITE.

De Usson, vingtiesme septembre 1598.

CHAPITRE LXXXI.

*Lettres diverses sur la politique, la guerre, les finances et les affaires de Bretagne.*

*Lettre du Roy à M. de Rosny, contre-signée.*

Monsieur de Rosny, j'ai sceu le refus que font les officiers de mes cours de parlement, chambre des comptes et autres communautés de ma ville de Rennes, de fournir davantage que la moitié des taxes portées par le rouble qui m'a esté envoyé par les estats de mon pays de Bretagne, jusques à ce que tous ceux de la province, tenus à mesme attribution, en ayent autant; mais considerant la peine que l'on a eue, jusques

à cette heure, à tirer d'eux ce qu'ils me doivent fournir le premier jour de mon entrée avec mon armée en la province, estant tres-requis pour mon service d'éviter la mesme longueur, voire plus grande qu'il est à croire qui se trouvera au fournissement du surplus, ma volonté est et vous mande fort expressément que toutes ces excuses cessans, vous ayez à faire contraindre toutes lesdites cours, chambre et communauté au paiement entier de leur taxe, et user en cela de toutes les voyes les plus exactes et severes que faire se pourra, sans acception de personne quelconque, n'estant mon intention de demeurer plus avant frustré de leurs belles promesses et du mespris que je ressens en cela de mon autorité. M'assurant que ferez serieusement executer sur ce ma volonté, je prieray Dieu, etc.

Escrit à Nantes, le 18 avril 1598. HENRY.

Et plus bas, POTHIER.

*Lettre du Roy à M. de Rosny, contre-signée.*

Monsieur de Rosny, je me persuade que vous aurez maintenant recouvert et mis ensemble de quoy payer une monstre à mon armée; c'est pourquoy je vous envoie l'estat d'icelle entier de la cavalerie et infanterie, auquel je desire grandement que vous ayez moyen de satisfaire, autant pour leur oster le pretexte qu'ils prennent de mal faire que pour leur donner quelque contentement et moyen de vivre. Mais si vous n'avez assez d'argent pour y fournir, en ce cas je veux que vous preferiez le paiement des gens de pied aux autres, car je veux les renvoyer en Picardie si tost qu'ils auront fait montre; j'entends les cinq regimens françois qui sont en l'armée, qui sont Navarre, Piedmont, l'Isle de France, Boniface et Breauté, lesquels ne peuvent s'y acheminer trop tost pour le bien de mon service, pour les raisons que je vous diray quand je vous reverray. J'ay escrit en Normandie pour leur dresser des estappes, à quoy je me promets qu'ils donneront ordre; et je feray apres aller la cavalerie, ou bien elle viendra avec moy : car il faut par nécessité que je sois en Picardie dans un mois au plus tard. Le regiment de mes gardes pourra partir en mesme temps avec les compagnies de Suisses que nous retenons, lesquelles il faut aussi payer, et pareillement celle de lansquenets, dont je vous envoie aussi l'estat; car je m'en veux servir. Pourvoyez doncques que mon intention soit suivie au paiement desdits gens de guerre par l'ordre que je vous mande, et tenez main que nos deniers soient mesnagez le mieux que faire se pourra, me donnant advis de ce qui s'en suivra. Au reste, je suis en doute si

je dois aller à Rennes ou non. Mandez m'en vostre avis; mais, à vous dire la verité, je serois tres-aise de m'exempter de ce voyage, si mon service et le bien de mes affaires pouvoient s'en passer, car je partirois et retournerois plus tost en Picardie, où ma presence est tres-necessaire. Toutesfois je m'en resoudray sur ce que vous m'en manderez. Priant Dieu, etc.

Escrit à Nantes, le 21 aoust 1598. HENRY.

Et plus bas, de NEUF-VILLE.

*Lettre de M. de Rosny au Roy.*

SIRE,

J'escrivis hier bien amplement à vostre Majesté, en responce sur tous ses precedens commandemens, avec information bien particuliere de plusieurs siennes affaires. Depuis il m'a honoré d'une autre lettre que je viens de recevoir, suivant laquelle je commenceray dès ce jourd'huy à faire couter et encaquer l'argent necessaire pour faire faire monstre aux cinq regimens françois et à toutes les compagnies de Suisses et de lansquenets. S'il y eut eu assez d'argent au coffre, j'en eusse fait faire autant aux compagnies de gens d'armes et de chevaux legers, aux officiers et chevaux d'artillerie, et donné contentement à ceux des vivres. Toutes-fois cela ne sera differé que jusques à mardy prochain, que je feray recevoir les sommes necessaires, ayant appris à ceux qui m'avoient donné parole de fournir l'argent plutost qu'à mon endroit (ainsi que j'ay fait en vostre escole), promettre et tenir est une mesme chose. Au commencement, ceux de cette province, et sur tout de la ville, me trouvoient un peu trop exact; mais ayant recogneu par mes procedures que je ne le suis pas moins à faire observer la parole que je leur donne qu'à leur faire tenir leurs promesses, ils commencent à trouver bon mes ordres et formes de proceder, voire à me donner des louanges au lieu de blâmes, dont j'ai bien sceu que l'on vous avoit fait des contes. Quoy ce soit, je n'obmettray ny diligence ny prud'homme pour bien mesnager vos revenus, assembler vos deniers, les dispenser loyalement et par bon ordre, et soulager conjointement vos peuples, autant que les necessitez presentes me le pourront permettre, et ne crains point le reproche de ce qui aura passé par ma cognoissance et mes ordonnances, ny qu'il en vienne apres moi un autre qui fasse mieux.

Quant à vostre acheminement à Rennes, je continué à croire qu'il seroit fort necessaire, d'autant qu'il y a une infinité d'affaires de consequence ausquelles la presence du maistre apporterait un grand advancement et amelioration à beaucoup d'autres que j'acheve tant que je

puis, apprehendant que si vostre Majesté part de cette province sans se faire voir en cette ville-cy, qui s'estime la capitale, qu'il ne demeure plusieurs choses en arriere, desquelles il y auroit moyen de vous bien prevaloir. Neantmoins, quand d'autre costé je viens à considerer, suivant ce qu'il a pleu à vostre Majesté de m'en mander par Guichard, les autres affaires plus serieuses et importantes qui se manient vers la Picardie, et que ceux qui s'y employent vous mandent qu'un trop grand esloignement de vostre personne est suffisant pour faire perdre beaucoup de bonnes occasions que l'on regretteroit apres, qu'il n'y auroit plus moyen de les recouvrer, je passeray par dessus toutes les causes et raisons qui pourroient prolonger vostre sejour en cette province, et voire mes propres desirs (qui tendoient, je ne le nieray point à vostre Majesté, à faire en sorte que vous peussiez voir et sçavoir par vous mesme quels ont esté mes comportements en cette province, notamment en cette ville, et en quelle estime j'y suis), et conclueray à courir au plus pressé; car si bien il demeure icy quelques affaires que vostre presence eust grandement facilitées, si ne seront elles pas perduës pourtant, et les laisseray en estat d'en pouvoir profiter avec le temps. Mais, soit que vostre Majesté vienne ou ne vienne pas, je m'en vay faire jouir tous mes ressorts et employer tout mon esprit, mon credit et mon industrie pour vous assembler de l'argent, afin que vostre Majesté puisse emporter avec elle environ cent quatre-vingts mille escus, que j'espere avoir tous prêts dans dix jours au plus tard (au moins si l'on ne me manque point de promesse, ainsi que l'on me vient encor de donner assurance de n'estre point trompé), afin que vostre Majesté, avec les soixante et dix mille escus dont le terme de payement eschet au 15 de may prochain, vous ayez dequoy faire faire une montre entiere, tant aux troupes que vous ramenez avec vous, qu'à celles qui font corps d'armée en Picardie, qu'aux garnisons de Picardie et Champagne; car autrement je plaindrois infiniment vostre Majesté, d'avoir tant de crieries et d'importunités à supporter, qu'inafailliblement sans cela vous en recevriez en arrivant. Et ne seroit pas raisonnable que vous, faisant si bien vostre office de grand Roy, de grand capitaine et de bon maistre, vous manquassiez au besoin de bons sujets, de vrais serviteurs et loyaux officiers, qui eussent soin de vostre soulagement, pour lequel augmenter je m'en vay travailler nuit et jour; esperant que, moyennant ce bon devoir, vous serez en repos pour deux mois, pendant lesquels je m'employeray de sorte que les



choses yront toujours en se bonifiant, notwithstanding lesquelles je ne laisseray de dire à votre Majesté que si vous pouvez parvenir à la paix generale (comme la vieillesse decrepite du roy d'Espagne, ses longues et douloureuses langueurs, la jeunesse, incapacité qu'il recognoist en son fils, et l'apprehension que pour cette cause il doit avoir de le laisser en guerre avec un si grand Roy et vieil routier de guerre qu'il vous a espruvé, et que je sçay qu'il vous estime et croit), il vous faudra resoudre à retrancher une bonne partie de vos regimens françois, suisses, lansquenets et cavalerie, d'autant qu'il n'y auroit pas moyen sans cela de ménager comme je desire, ny de mettre vos affaires en l'estat dont je me suis vanté, ny celles de vos peuples aussi. Il y a aussi plusieurs garnisons qui sont plustost entretenues pour donner contentement aux particuliers que pour besoin qu'en ayent les places; lesquelles vous pourrez retrancher en donnant quelque entretenement à ceux qui le meriteront, et le plustost vaudra le mieux, incontinent que la paix sera toute assurée; d'autant que l'esclat d'icelle esbloüira les yeux et assoupira les sens des plus estourdis et turbulens, et nous donnera moyen de bien mesnager, et de faire de si puissantes provisions d'argent, armes, artilleries et munitions, que non seulement votre Majesté et son royaume ne puissent plus retomber dans les miseres et necessitez qui vous ont pensé accabler, et desquelles votre eminente vertu nous a retirez, mais aussi de faire trembler ceux qui ont essayé de vous faire craindre.

Si votre Majesté ne vient point en cette ville, ceux de la cour de parlement essayeront de s'exempter de verifier les edits où ils peuvent avoir quelque interest. Mais en ce cas s'il plaist à votre Majesté m'crire une lettre de sa main, par laquelle il me soit enjoint bien expressément de les en solliciter à toute reste, avec resolution d'y venir en personne s'ils m'en refusent, j'espere que par le moyen de telles paroles je leur feray passer carriere, les plus difficiles s'estans adoucis par le moyen de quelque douceur dont je leur ay donné esperance de votre part. J'ay escrit au sieur d'Incarville ce qui m'est necessaire d'avoir pour l'office de garde-seau, et un autre d'Alloüé; s'il m'envoye les provisions et les quittances en blanc, j'en tireray encor plus que je ne vous avois fait esperer, et vous en enverray l'argent aussi-tost, puis que c'est pour vos menus plaisirs; estant bien raisonnable que j'en aye soin et redouble mes sollicitudes pour vous contenter, puis que sans le requerir il vous a pleu me donner une si notable somme que dix mille escus; laquelle neantmoins ne vous constera

rien, d'autant que par industrie d'amis, j'ay fait en sorte que les estats ont resolu que je la toucherois, non sur les huit cens mille escus que je vous ay fait accorder, mais outre iceux. Neantmoins je ne laisse d'en rendre graces tres-humbles à votre Majesté, d'autant que, sans sa liberalité, je n'en eusse pas voulu, comme je luy proteste derechef de ne profiter jamais, en quoy que ce soit, sans son sceu et volonté, laquelle me sera toujours pour loy inviolable. Sur cette vérité, je prieray le Createur, Sire, qu'il augmente votre Majesté en toute royale grandeur, felicité et santé.

De Rennes, ce 26 avril 1598. C'est vostre tres-humble, tres-obeissant et tres-fidelle sujet et serviteur,  
Rosny.

J'ay escrit cette lettre à grand haste, et partant votre Majesté m'excusera s'il y a quelques paroles mal agencées.

*Lettre du Roy à M. de Rosny, contre-signée.*

Monsieur de Rosny, j'ai appris par vostre lettre du vingt-sixiesme et l'estat que vous avez envoyé au sieur d'Incarville, que les cinq regimens françois, les deux compagnies suisses, celle de lansquenets et la cavalerie de mon armée ont esté payez suivant l'estat que je vous avois envoyé, et qu'il ne reste plus à payer que les officiers de l'artillerie, à quoy vous esperiez pourvoir dans huit jours, et recouvrer les dix mil escus que je vous ay demandez pour defrayer les regimens que je veux renvoyer en Picardie, dont j'ay receu tres-grand contentement, assuré que si vous n'y eussiez mis la main vivement, comme vous avez fait, ladite armée ne seroit pas encore payée. Depuis que mon cousin le mareschal de Brissac a esté arrivé, j'ay voulu adviser avec luy de l'ordre que je puis laisser pour Blavet : sur cela nous avons arresté que je lui laisseray les regimens de Boniface et de l'Isle de France; de sorte que je ne renverray, pour le present, en Picardie, que les dix-huit compagnies du régiment de Navarre, onze de celui de Pied-mont et les dix de Breauté. Pour cette cause il suffira, pour les faire marcher, que nous ayons six mil escus au lieu des dix mil que nous avons demandez; mais je voudrois qu'ils fussent prests à toucher, afin de faire acheminer lesdites forces qui sont necessaires en Picardie, et en descharger ce pays où elles ne servent plus de rien qu'à le piller. Partant je vous prie faire tant pour mon service que de trouver incontinent lesdits six mille escus sans attendre la huitaine; car, si tost que le tresorier de l'extraordinaire les aura receus, je feray marcher sans faute ladite armée, ou j'en-

voyeray, dès demain, le sieur de Mouy accompagné de Escures pour se charger de la conduite d'icelle, au lieu du sieur de Salignac qui a demandé congé de retourner en Limosin. Et si les habitans de ma ville de Rennes ont quelque interest que le pays soit bien tost deschargé de ladite armée, ils vous ayderont à trouver cette partie, comme je vous prie de leur dire de ma part, et que, dès le lendemain que ladite somme sera touchée, je feray avancer hors du pays ladite armée. Mais j'ay advisé de demeurer icy jusques à lundy, à cause de la feste de demain que je dois toucher les malades, et pour aussi donner tel ordre en cette ville qu'il ne soit plus de besoin que j'y retourne, ains puisse prendre de Rennes le droit chemin de Tours, comme estant le plus court pour retourner à Paris, où je recognois tous les jours ma presence estre merueilleusement necessaire. Je prie Dieu, monsieur de Rosny, qu'il vous ayt en sa sainte garde.

Escrit à Nantes, le 29 avril 1598. HENRY.

Et plus bas, DE NEUF-VILLE.

*Lettre du Roy à M. de Rosny, contre-signée.*

Monsieur de Rosny, je vous envoie ce courrier expres avec mes lettres de jussion pour ma chambre des comptes, afin de lever les modifications qu'elle a mises au registrement des articles secrets que j'ay accordez à mon cousin le duc de Mercure. Elle s'est tant oubliée que d'avoir pensé que je les envoyois pour en avoir advis et les mettre en deliberation. En telles affaires je ne communique mon pouvoir à personne, et à moy seul appartient, en mon royaume, d'accorder, traiter, faire guerre ou paix ainsi qu'il me plaira. Ça esté une grande temerité aux officiers de madite chambre de penser diminuer un yota de ce que j'ay accordé : nulle compagnie de mon royaume n'a esté si presomptueuse; aussi ne les fay-je pas juges ny arbitres de telles choses; cela ne s'achepte point aux parties casuelles. Faites donc entendre ma volonté à madite chambre, et qu'elle obeyse incontinent à mes commandemens, car je veux tenir inviolablement ce que j'ay promis; et m'envoyez incontinent l'arrest dudit registrement pur et simple par ce porteur. Priant Dieu vous avoir en sa sainte garde.

Escrite à Nantes, le dernier avril 1598.

HENRY. Et plus bas, DE NEUF-VILLE.

*Lettre de la main du Roy à M. de Rosny.*

Mon amy, ceux qui commandoient dans Roche-fort ayant fait tout ce que j'ay voulu, mesmes sortis du chasteau, lequel ils ont fait raser comme je leur ay commandé, je vous fais ce

mot, à ce que vous teniez la main que ce qui leur a esté promis par leur capitulation soit effectué comme chose que je desire, et que leur peage ne soit point revoqué. Cette-cy n'estant à autre fin, je prieray Dieu qu'il vous ayt, mon amy, en sa garde.

Ce 8 may, à Ville-roy.

HENRY.

*Lettre de la main du Roy à M. de Rosny.*

Mon amy, je vous fais ce mot et vous envoie ce courrier expres pour vous dire qu'au partir de Rennes pour vous rendre à Paris, vous preniez vostre chemin droit à Tours, où vous me trouverez, d'autant que j'ay necessairement à parler à vous, pour chose qui importe à mon service; dudit Tours je vous meneray avec moy en poste à Paris. Adieu, mon amy.

Ce mardy au soir, 19 may à la Fleche. HENRY.

## CHAPITRE LXXXII.

*Traité de Vervins. Biron envoyé à Bruxelles. Commencement de ses mauvais desseins. Récapitulation des principaux événemens de 1598. Rosny est plus en crédit que jamais.*

Quelques jours apres les succez des affaires dont il a esté parlé aux chapitres precedens, le Roy ayant mis le meilleur ordre qu'il avoit pu aux affaires de la province, et à faire continuer l'exécution des choses resoluës, il reprit son chemin vers Paris, sur la fin du mois de may, passant expres par la Fleche, pource qu'il y avoit esté nourry fort jeune, et prenant la route de la riviere de Loire. Vous demeurastes cinq ou six jours apres luy, afin de pourvoir à plusieurs choses demeurées inexecutées touchant les finances et le payement des gens de guerre en campagne, et les garnisons, établissant des personnages de probité, d'autorité et de police pour suivre l'armée à son retour, afin d'empescher qu'elle n'apportast aucune vexation au peuple de la campagne, duquel vous aviez toujours un soin merueilleux, disant souvent au Roy, que le labourage et pasturage estoient les deux mamelles dont la France estoit alimentée, et les vrayes mines et tresors du Perou.

Vous priastes vostre chemin, afin d'éviter les grandes villes, les ceremonies et les grandes harangues, par le Mayne, le Perche et Rosny où estoit madame vostre femme, que nous y trouvâmes bien embesognée à commencer vostre bastiment, ayant failly d'estre accablée elle et tous vos enfans sous les ruynes de quelques vieux bastimens qu'elle faisoit desmolir.

Arrivant à Paris, vous trouvastes que le Roy en estoit déjà party, estant allé en poste à Amiens, afin d'estre plus proche des deputez qui avoient traité la paix de Vervins, et informé par la bouche des siens de toutes les moindres particularitez et formalitez qui s'y estoient observées, et faciliter par sa presence la reddition des places qui luy devoient estre restituées, et pourvoir à la repopulation, garde et conservation d'icelles, lors qu'elles auroient esté remises en son obeissance. Auquel voyage il ne fut que huit jours, courant incessamment tantost d'un costé, tantost de l'autre, selon que la necessité des affaires le pouvoit requerir; et fut receu à son retour à Paris avec un merveilleux applaudissement des peuples et personnes plus qualifiées, chacun faisant des admirations de ses soins et diligences, et de cette humeur infatigable au travail qu'il avoit tousjours eue, et encor plus grandes de sa vertu et de sa fortune qui luy avoient enfin fait surmonter tant de perils et de difficultez, et reduit une si puissante ligue que celle qui s'estoit eslevée en France contre luy (assistée du Pape, de l'Empereur, du roy d'Espagne, du duc de Savoye et de tout ce grand corps des ecclesiastiques de la chrestienté) à faire paix avec luy, le remettre en l'entiere possession de son royaume, et à luy le tiltre d'un des plus vaillans roys et plus excellens chefs de guerre : l'accompans chacun diversement, selon qu'il se souvenoit des grands monarques et capitaines plus estimez, à Ninus, Sesostris, Cyrus, Alexandre, Pirrus, Scipion, Hannibal, Sertorius, Pompée, Silla, Marius, Cesar, Trajan, Constantin, Charlemagne, Clovis et autres. Suivant nostre ordre accoustumé, nous remettrons à ceux qui feront l'histoire generale, les particularitez de plusieurs choses (quoy qu'aucunes d'icelles fort remarquables) qui se passerent environ les temps de l'année 1598, du recit desquelles nous nous sommes dispensez, tant pour abreger que pource qu'il ne nous a point semblé qu'il y eut rien en icelles qui concernast grandement le cours de vostre vie ny vos actions; comme furent les particularitez des formalitez et ceremonies desquelles userent les deputez des roys de France et d'Espagne, tant au commencement qu'en la continuation et conclusion de la conference de Vervins, les particularitez des articles de la paix qui fut resoluë en ce mesme lieu, celles des sermens prestez pour l'observation d'icelle, à sçavoir, par le Roy dans Paris, en presence de messieurs le duc d'Ascot et admiral d'Arragon et autres ostages et deputez envoyez expres pour cet effet; par le cardinal archiduc, dans Bruxelles, tant en son nom, que du Roy d'Es-

pagne, en presence de M. le mareschal de Biron, assisté de messieurs de Bellievre et de Sillery, deputez semblablement pour cet effet, lequel sieur de Biron avoit esté, peu avant ce voyage, fait duc et pair de France, afin de le rendre plus qualifié en une action tant celebre, et auquel les vains honneurs à luy rendus en ce pays-là, et les loüanges qui luy furent données par dessus tout excez, (à dessein, comme l'ont depuis publié les Espagnols, s'ils ne le pouvoient gagner utilement pour eux de le perdre dommageablement pour luy et pour la France), luy bouffrent tellement le courage et le remplirent de tant de vanité, qu'il se laissa porter à des desseins pervers qui le precipiterent en ruyne; et par M. de Savoye, dans Chambéry, en presence du sieur Gadaignes Botheon, gouverneur de Lyon, semblablement député pour cet effet; les particularitez du renvoy du sieur de Buzenval en Hollande, et de ses instructions declaratives des intentions du Roy, pour l'alliance qu'il vouloit conserver avec messieurs des Estats, celles des depesches et instructions du sieur de Sillery-Bruslard, envoyé pour estre ambassadeur à Rome, à l'instance sollicitation de madame la duchesse de Beaufort, à laquelle il s'estoit engagé, de paroles, de faciliter en bref la dissolution du mariage du Roy, son mariage avec elle, et la legitimation des enfans qui luy estoient déjà nez, pour estre estimez enfans de France, et elle à luy en ce cas de luy faire avoir les seaux à son retour, nonobstant les interets de sa bonne tante de Sourdis, et l'office de chancelier lors qu'il viendroit à vacquer; les particularitez des defences du port d'armes en France, avec ses exceptions ordinaires; celles des retranchemens des gens de guerre, et des ordres et disciplines establies lors parmy eux, à l'observation desquelles vous serviez de si bon solliciteur, que les peuples en recevoient grand soulagement; celles de l'apparition d'un grand phantome dans la forest de Fontaine-bleau, devancé d'une meutte de chiens et environné d'un grand bruit de chasse, toutes lesquelles choses s'évanouissoient lors que l'on pensoit s'en approcher ou le questionner; celles des poursuites des jesuites pour estre reestablis en consequence d'un article du traité de Vervins, sous la generalité duquel ils disoient estre compris, encor qu'ils n'y fussent pas specifiez; celles de la conference de Boulogne entre les Espagnols et les Anglois, que le Roy, contre vostre advis, s'estoit laissé persuader de vouloir procurer, voire d'y faire intervenir, en son nom, les sieurs de Caumartin et Jeanin, pour faciliter entre eux quelque accord, en laquelle rien ne se traitta, estant d'abord entrez en dispute sur les

preseances; celles d'une grande assemblée du clergé de France, qui voulut remuer plusieurs questions et proposer divers reglemens hors de saison, laquelle continua jusques bien avant dans l'année 1599; celles de la promotion de diverses personnes au cardinalat, entre lesquels, un des enfans de madame de Sourdis fut nommé, par l'extreme faveur qu'elle avoit près de madame de Beau-fort, laquelle en fist de tant instantes sollicitations au Roy, qu'il luy fut impossible de s'en défendre, quoy que ce fut un jeune homme qui ne luy agreast gueres; celles des fiançailles de Madame, sœur du Roy, avec le prince de Lorraine, où il se trouva de grandes difficultez à cause des diversitez de religion; et celles de plusieurs lettres escrites au Roy, à diverses fois, de divers pays, desquelles il vous fist part: dont entr'autres nouvelles, l'on luy faisoit le discours d'une baleine de quatre-vingts pieds de long, prise en Hollande; celui d'un grand tumulte arrivé en Portugal, sur la creance donnée au peuple, qu'un certain homme qui couroit le monde, duquel les Espagnols s'estoient saisis, estoit vrayement Dom Sebastien leur roy, comme il se disoit aussi tel; celui des guerres de Suede et sur tout de la bataille gagnée par le duc Charles, contre son nepveu legitime roy de Suede, et choisy roy de Pologne; celui du grand débordement du Tybre qui avoit ruyné une infinie quantité de maisons dans Rome; et celui d'une certaine conspiration de tous les juifs, pour persuader au grand Turc de ruiner le sepulcre de Nostre Seigneur en Hierusalem, moyennant cinq cens mille ducats par eux assemblez, qu'ils offroient de luy donner.

Laisant donc, comme nous avons dit, les particularitez de toutes ces choses aux historiens, lesquels ne les auront pas oubliées, nous vous ramentevrons que le Roy ressentant tous les jours, et de plus en plus, les grandes utilitez, soulagemens et commoditez que sa personne et son Estat recevoient de vostre entremise aux affaires, et recognoissant par veritables effets qu'il n'y avoit point eu de vanité aux promesses que vous luy aviez faites, et par consequent n'y auroit point de manquement aux esperances que vous luy aviez fait concevoir de vostre employ, ne se pouvoit empescher de louer le choix qu'il avoit fait de vostre personne, quoy qu'il cogneust bien que de certains esprits n'en estoient pas trop contens, et que l'envie s'en augmentoit contre vous, laquelle il eut esté bien ayse de pouvoir diminuer. Mais plus il essaya d'y parvenir, tant plus esprouva-il la verité d'un ancien proverbe, qui dit : *Que l'envie suit la faveur et la vertu, tout ainsi que l'ombre fait le corps.* Aussi ne

laissoit-il pas pour cela de continuer à vous employer en toutes sortes d'affaires de paix et de guerre qui survenoient, de vous autoriser de plus en plus en la charge des finances, et de maintenir de telle sorte vos opinions, lors qu'elles estoient contestées par vos emuleurs, que non seulement ceux qui, dans le conseil, à cause de la douce trempé de leurs esprits ou du respect qu'ils portoient à vostre illustre extraction et à vos grands et longs services rendus au Roy, vous avoient tousjours deféré quelque chose, mais aussi ceux qui avoient tousjours estimé n'estre rien moins que vous, voire avoient pretendu de vous devoir preceder en autorité dans le conseil, commencerent à se lasser de contester vos opinions et de n'y rien gagner.

Tellement que d'iceux les derniers quitterent peu à peu l'administration des finances, et mesmes ne venoient plus au conseil s'ils n'y avoient affaire pour le particulier d'eux ou de leurs amis, et les autres n'entreprenoient plus rien sans en avoir auparavant concerté avec vous. De sorte que toute la creance au maniemment des finances se trouvant quasi reduitte en vostre seule personne, et vous jugeant par là que tout le bien ou le mal qui en réussiroit vous en seroit aussi imputé, le desir du premier et l'apprehension du dernier vous animerent tellement au travail, à bien prendre l'intelligence de toutes les formes, ordres et reglemens touchant cette charge, et à faire une recherche tres-exacte de toutes les sortes de revenus, impositions, levées de deniers et des frais, despenses et distributions d'iceux jusques aux moindres et moins cogneus, que non seulement ceux qui vous affectionnoient et frequentoient plus familièrement, mais aussi vos emuleurs et envieux estoient contrains de confesser que vous aviez un esprit et un corps du tout infatigable aux affaires, et de recognoistre entr'eux, lorsqu'ils estoient à part, que jamais les finances n'avoient esté administrées avec tant d'ordre, d'autorité, d'intelligence et d'integrité au profit du Roy et de l'Estat, qu'elles l'estoient depuis que vous en aviez pris cognoissance: de quoy les peuples, qui en entendoient parler, tenoient des discours entr'eux à vostre grande gloire et louange; lesquelles, par les années, allerent tousjours en augmentant, à mesure que l'on percevoit les doux fruits de vos labeurs.

Et ferons voir, par la suite de ces Memoires, que vous n'avez point sans raison acquis cette grande renommée, tant celebrée en un panegyrique sous vostre nom, que l'on tient avoir esté fait en François par un Intendant et president des comptes, lequel l'a fait mettre en latin par Borbonius, et que nous nous resolvons d'insérer

à la fin de ces Memoires, ensemble une espece de prediction, ditte ancienne, à la gloire de vostre nom, et de plus, pour tesmoigner vostre atile et vos gentilles inventions, l'abregé de la vie de Henry le Grand, les paralleles de Cesar et de luy, et vostre adieu à la Cour, lors que ce grand Roy eut esté ainsi mal-heureusement assassiné. Tout cela fait par vous en françois, et les deux derniers mis en latin par le mesme Borbonius, et aussi quelques autres œuvres faites pour vous ou par vous, et notamment vostre discours des desseins du Roy lors de sa mort, vostre Traitté de la guerre, vostre Mareschal de camp et vos Instructions de police et milice, au moins s'il vous plaist de nous les faire voir en leur perfection, comme vous avez fait en leurs commencemens, desja lors avancez à plus de la moitié.

### CHAPITRE LXXXIII.

#### *Diverses lettres relatives aux finances.*

Monseigneur, ayant receu commandement de vous, à vostre retour de Bretagne, de faire l'inventaire des papiers de vos cabinets, comme c'est vostre coustume, y ayant trouvé entre iceux quelques lettres du Roy à vous écrites, toutes de diverses dattes et sur diverses affaires, nous avons estimé que vous n'auriez point desagréable que nous les comprissions toutes en un seul chapitre, estant telles que s'ensuit :

#### *Lettre de la main du Roy à M. de Rosny.*

Mon amy, j'ay receu vostre lettre par Beringuen. Vous m'avez fait service tres-agreable d'avoir parlé à mon cousin le comte de Soissons, suivant le commandement que je vous en avois fait, et suis tres-ayse de ce que vous l'avez trouvé tres-resolu aux propositions que vous luy avez faites. J'estime que ce sera pour le meilleur que je ne luy en parle qu'apres le baptesme de mon fils. Ledit Beringuen m'a apporté les mille livres que vous m'avez envoyées : je trouve fort bon ce que vous m'avez mandé, par luy, touchant messieurs de Bellievre et Sillery. J'avois pensé, pour leur tesmoigner comme le service qu'ils m'ont fait m'a esté tres-agreable, de leur donner le premier évesché ou abbaye de mon royaume qui viendrait à vacquer, et qui seroit de bon revenu ; mandez moy si cela ne sera pas bien à propos, et vostre avis là dessus, ou ce que vous pensez que je leur doive donner. Pour les manufactures, ne craignez point que je gaste rien ; faites seulement ce que je vous ay commandé : mais sur tout souvenez-vous de traiter

avec M. de Gondy, car cela m'importe, comme vous le pouvez bien juger. Adieu.

Ce 26 aoust, à Crosne, où je séjourne encore aujourd'huy. HENRY.

#### *Lettre de la main du Roy à M. de Rosny.*

Mon amy, j'ay esté adverty que ceux qui vous veulent mal, font courre un bruit que vous faites composer, par le Luat, un livre par lequel l'on me conseille que pour mettre tel ordre en mon royaume et en mes affaires et finances, qu'il seroit besoin, qu'il faut que je chasse M. le connestable, M. le chancelier et ceux qui les ont cy-devant maniées, y en appellant d'autres en leur lieu, à l'imitation d'un de mes predecesseurs qui s'en trouva bien, et que l'on décrit en ce livre celuy qui le luy conseilla et le poussa à ce faire, de vostre humeur et façon de faire. Ce que je vous ay bien voulu mander, et vous prier de m'ecrire ce qui en est, vous en enquérant bien particulièrement dudit le Luat ; car ces artifices là, desquels se pensent servir vos ennemis pour vous faire de mauvais offices, seroient trop grossiers, et ne le pourroient sur moy qui vous ayme. Continuez seulement à me bien servir et fidellement, et laissez parler ces gens-là, qui, lassez de mesdire, ne vous porteront envie que pource que vous ferez bien. Je vous depesche ce lacquais exprez pour ce sujet-là. Adieu.

Ce 12 septembre, à Fontaine-bleau. HENRY.

#### *Lettre de la main du Roy à M. de Rosny.*

Mon amy, hier je receus la vostre du cinquiesme, comme j'estois à la chasse. Je m'estonne de ce que vous me mandez n'avoir receu la responce à la vostre du premier de cettuy-cy, veu que je la vous ay envoyée par un de mes lacquais, si que depuis la vôtre je croy que vous l'aurez receüe : ainsi je me contenteray de faire responce à vostre dernière. Puis que M. Zamet ne veut rien avancer pour mes bastimens sur les quarante mil escus qui me sont reservez en Bretagne, je vous prie d'emprunter jusqu'à trois mil escus, que vous ferez mettre entre les mains de M. de la Grange-le-roy, pour en faire comme je luy ay ordonné ; vous promettant par cette-cy, que je feray qu'ils seront rendus des premiers deniers qui proviendront desdites impositions ou autres ; à quoy vous mesmes je veux que vous teniez la main. Je vous ay fait responce sur vostre avis des impositions, et outre cela commandé à M. de Ville-roy, qui s'en alla hier d'icy, de vous en parler, et resoudre du moyen de le faire exécuter. Beringuen m'a parlé de la défense des traittes de bleds ; dequoy j'ay donné charge au sieur

de Ville-roy de communiquer avec vous. C'est tout ce que vous aurez de moy pour responce à la vostre, pour prier Dieu vous avoir en sa garde.

Ce 5 octobre, à Monceaux au matin. HENRY.

*Lettre de la main du Roy à M. de Rosny.*

Mon amy, cette-cy sera la responce à la vostre du huitiesme que je receus hier, et point par point, afin que sur tous je vous fasse entendre ce qui est de ma volonté touchant les frais des nopces de ma sœur. Si je ne vous en ay escrit, ce n'a esté que je l'aye oublié, mais je vous en veux parler pour resoudre cela avec vous, et ce sera la premiere fois que vous me viendrez trouver. Je suis tres-ayse de ce que l'edict de la creation d'un siege presidial à Lectoure soit despesché, comme que vous donnerez ordre à ce qu'il ne manquera aucune chose pour le voyage de M. de Sillery à Rome et son séjour. Pour le sieur de Pilles, j'attends qu'il me vienne trouver icy pour le faire consentir à ce que vous me mandez, ce que j'espere; dequoy je vous donneray advis aussi-tost. Vous avez bien fait d'avoir escrit à M. de Bragelongne ce que vous me mandez. Pour les quatre personnages de qualité que vous voulez envoyer avec les commissions, pour prendre la source des rivières, pour establir les ordres et reglemens necesaires pour les impositions, je vous en laisse à vous seul le choix; advisez y donc bien : et si vous voyez que ceux de mon conseil en voulussent nommer quelques-uns qui ne vous fussent agreables, vous m'en advertirez, afin d'y interposer mon autorité; car je n'en ay aucuns d'affectez pour ce regard. Souvenez-vous que, parmi ces rivières là, vous avez oublié la Charante, et qu'il faut bien prendre garde où l'on establira le bureau de la recepte des impositions; car les grandes villes s'y opposeront, et aux fortes les gouverneurs s'en voudront faire croire, si que nous n'en tirerons le profit que nous esperons. Vous m'avez fait plaisir de faire delivrer les trois mil escus pour mes bastimens, comme d'avoir donné ordre de satisfaire à la garnison de Romans, pour le sieur de Sainct Feriol. Pour l'estat de mon procureur à Fontenay, je vous en ay ce matin escrit ma volonté, que je veux estre suivie; et comme je vous priois de me venir trouver en poste mardy ou mercredy de la sepmaine prochaine, mais si les affaires, touchans mes gabelles ou autres, vous en empeschoient, vous remettrez ce voyage au jour que vous adviserez. Je serois bien aise que M. d'Incarville vint aussi et amenast avec luy Chastillon, qui m'apporterait les plans de toutes mes villes de frontiere, pour voir où je se-

rois d'advise que l'on fist travailler, si vous et ledit sieur d'Incarville avez pourveu aux moyens de ce faire. Toutefois si vous trouvez bon que l'un de vous deux demeure tousjours par de là, tandis que vous viendrez, ledit sieur d'Incarville ne bougera et viendra apres. Pour le sergent major du Havre, je trouve fort bon et fort agreable ce que vous m'en mandez : quant au fait du sieur du Volé, j'attendray à quand je vous verray de vous parler de cette affaire là. Pour le commis de M. de Fresnes, je ne l'affectionne au prejudice de mon service; aussi bien ledit sieur de Fresnes me dit que, quoy que je luy accordasse et vous en escrivisse, il ne croyoit que cela luy servit de rien, et que M. de Gondy ne le feroit; mais il a desiré cela de moy, afin que l'on cogneust que pource qu'il me servoit sous luy, je luy voulois faire du bien. Touchant Demeurat, mon procureur à Rion, si je ne vous eusse escrit de luy faire payer les arrerages de sa pension, j'estime qu'il ne m'eut permis de commencer ma diette tant il estoit pressant et m'importunoit, et ne trouvay autre moyen de le chasser d'icy; mais pour l'advenir je seray tres-ayse qu'il en soit payé, car c'est un bon serviteur et qui m'a bien servy. Vous me ferez service fort agreable de travailler à faire trouver les vingt mil escus restans pour les estats d'Hollande. Pour la lettre tres-expressse que vous demandez aux prevost des marchands et eschevins de la ville de Paris pour leurs registres, je vous envoie un blanc que vous ferez remplir par Clairville qui est à Paris, comme vous le luy ordonnerez et comme je le luy escry. Je suis bien aise que vous ayez pourveu à ce que le sieur de Casaubon ait dequoy amener sa famille à Paris; quant pour sa pension j'y adviseray lors que vous serez près de moy. J'ay receu le memoire que vous m'avez envoyé de ce à quoy se peut monter le sol pour escu destiné pour mes bastimens. Je suis de vostre advis touchant les deputes de Languedoc, et qu'ils ne sont venus icy que pour empescher l'establissement des gabelles; mais il le faut, car il y va trop de mon service. Pour le party des gabelles de France, je croy ce que vous me mandez, et que les marchands adjudicataires ont fait un grand brouhaha, mais qu'ils ne feront mieux que Zamet ny si bien; toutefois il y faut adviser de prés, car ce fait importe. Vous me ferez plaisir de faire donner contentement à mes menus officiers et nommément à ceux de ma bouche. Pour M. de la Rochepot, pour cette année, il faut qu'il se contente d'estre payé de ce à quoy il est employé sur l'Estat; mais pour l'advenir il ne seroit juste, ayant mesme charge que les autres,

d'estre autrement traité qu'eux. Voila ce que vous aurez pour ce coup pour responce à la vostre, finissant pour prier Dieu vous avoir, mon amy, en sa garde.

Ce 9 octobre, à Monceaux au matin. HENRY.

*Lettre de la main du Roy à M. de Rosny.*

Mon amy, le sieur de Pillés, qui est venu icy, se loüe non seulement de la bonne assistance qu'il a eüe de vous, mais aussi de vostre procedure, et m'a dit que ce qui luy a fait poursuivre avec tant d'instance, ce qu'il demandoit, estoit pour en retirer le plus qu'il luy en seroit possible; mais que vous luy ayant remonstré la nécessité de mes affaires, il s'en retournoit vous trouver pour emporter ce que vous luy aviez promis, et de là où mon service et le deub de sa charge l'appelle; mais je voudrois, s'il est possible, que vous luy fissiez donner jusques à trois mil escus. Il m'a si bien servy, et avec tant de candeur et d'affection, que je ne luy veux desnier ce tesmoignage de son obeysance et de l'envie que j'ay de faire pour luy, et luy en tesmoigner les effets aux occasions. Je vous prie de faire qu'il soit promptement depesché; vous sçavez assez juger l'importance de son retardement, et qu'en l'estat que l'on dressera pour l'année prochaine qu'il ne soit point oublié pour la pension que je luy ay accordée, car je le luy ay promis et veux qu'il y soit compris et en soit payé. Je voudrois en avoir plusieurs semblables à luy, aussi ne vous veux-je celer que je l'ayme, et qu'il en vait la peine. Adieu, mon amy. Ce dixiesme octobre.

HENRY.

Je vous recommande ce qui touche mon neveu le duc de Guyse et sa pension.

*Lettre de la main du Roy à M. de Rosny.*

Mon amy, j'ay cy-devant fait responce à la vostre du huictiesme; pour celle du neufiesme je vous diray que je remettray à vous parler du fait des gabelles et de Zamet à quand je vous verray, qui sera l'un des jours de cette sepmaine. Comme je le vous ay mandé, et pour ceux de la maison de ville, je suis de vostre advis; aussi ne veux-je que l'affaire en demeure là, et vous ay envoyé un blanc, afin de le faire remplir par Clerville, comme vous aviseriez. Vous m'avez fait service agreable d'avoir donné quelque contentement à mes officiers de la bouche. J'attends que M. d'Incarville m'escrira touchant les offres que l'on fait pour les traittes des bleds et vins en Languedoc, pour m'y resoudre, ou vous en mander ma volonté. Et sur ce, Dieu vous ayt, mon amy, en sa garde, ce unziesme octobre.

HENRY.

*Lettre de la main du Roy à M. de Rosny.*

Mon amy, je ne doute nullement que le bruit qui a couru de ma maladie ne vous ayt affligé, et que l'on ne l'ayt fait plus grande et cause d'autre cause qu'elle ne s'est trouvée; mais Dieu soit loué que j'en suis tantost guery, et que la fièvre m'ayant pris sur les six à sept heures du soir dimanche, ne m'a laissé que ce matin par une grande sueur qui me l'a emportée du tout. Ce qui me mettoit en peine estoit que depuis vingt ans fièvre ne m'avoit tant duré, sinon qu'à la Motte-frelon, quand j'eus cette grande pluresie, et que je me voyois tellement abatu contre mon naturel ordinaire que vous cognoissez et avec cela si chagrin que tout me desplaisoit. Aujourd'huy je me suis levé pour disner et puis remis au lit pour me reposer, et espere me lever pour souper. Si cette nuit je me trouve mieux que je n'ay fait la dernière (car elle m'a esté extrêmement fascheuse), je m'habilleray demain et sortiray un peu dehors, pour prendre l'air et me promener, mais non pour aller loin. Si je n'eusse hier pris de la casse qui m'a extrêmement purgé, j'estois pour estre plus long-temps malade, et c'est merveille, veu ce que j'ay vuider, que je ne l'ay esté davantage. Je seray tres-aise de vous voir dimanche; amenez avec vous M. d'Incarville et Chastillon, mais nuls autres. Que si quelques-uns veulent venir avec vous ne vous en chargez; au contraire, dites leur que je vous ay défendu d'en amener aucuns, et que vous venez seulement pour me voir sans me parler d'affaires pour qui que ce soit. L'on me vient parler de force auditeurs des comptes morts; j'ai fait responce que je n'y voulois nullement entendre, quelques offres que l'on m'ayt faites. Je vous prie, courons en la suppression. Vous verrez avant partir monsieur le chancelier, et sçavez de luy s'il a rien à me mander, et luy direz que je trouve un peu estrange de ce que, contre ce que je luy avois escrit, touchant l'erection du siege presidial de Lectoure, de n'en parler à personne, il en a communiqué à quelques autres de mon conseil qu'à vous, et qu'il y fait de la difficulté apres mon commandement. Faites que je n'oye plus parler de cette affaire et que je ne luy en escrive plus ny à vous. Adieu, mon amy, etc. Asseurez tout le monde de ma guerison.

Ce jeudy, à sept heures du soir, quinziesme octobre, à Monceaux.

HENRY.

*Lettre de la main du Roy à M. de Rosny.*

Mon amy, je vous prie, incontinent la presente receuë, de faire delivrer aux sieurs Marescot, Martin et Rosset, medecins, à chacun cent

escus pour m'estre venus voir icy par mon commandement, et à Regnault, mon chirurgien, cinquante, demain par M. de Schomberg qui s'en yra; je vous escriray pour vous assembler avec monsieur le chancelier, messieurs de Bellievre, Sillery et autres de mon conseil, pour adviser, maintenant que la Saint Martin approche, le moyen qu'il faut tenir pour la verification de mon edict avec ceux de la religion, dequoy vous advertirez les deputez : aussi vous adviserez, avec M. de Ville-roy, à ce qui sera necessaire à M. de Sillery, pour son voyage de Rome, maintenant que M. de Luxembourg retourne, car il est des plus necessaires pour mon Estat et pour mon contentement, et la despence que l'on y fera y sera, ce me semble, necessaire. Je vous prie aussi vous souvenir de la pauvre receveuse de Gisors, pour le commencement de l'année prochaine, vous sçavez comme elle a bien servy. Adieu.

Ce troisieme novembre, à Monceaux. HENRY.

*Lettre de la main du Roy à M. de Rosny.*

Mon amy, cette-cy sera la responce à la vostre du vingt-neufiesme du passé, que plutost vous eussiez eue sans ma rencheute. Je commenceray avant de vous dire que je me porte un peu mieux, Dieu mercy, mais non si bien, et cette derniere maladie m'a rendu tout chagrin, je fais tout ce que mes medecins veulent, tant j'ay d'envie de guerir. Je suis tres aise de ce que vous avez fait payer les Suisses et le regiment de mes gardes, comme compter l'argent pour la solde des trois compagnies de chevaux legers, des quatre autres regimens, et sept compagnies de gens de pied, des garnisons ordinaires de Picardie et Mets, et des appointemens accordez aux capitaines retranchez, et que le party des gabelles ayt esté resolu, comme vostre advis sur les quatre quartiers des rentes sur le sel; mais je veux que l'on cognoisse cela proceder de ma liberalité, afin que l'on m'en sçache gré, et par ce moyen faciliter ce que nous voulons faire verifler en la chambre des comptes et cour des aydes. Pour le licenciement des Suisses, j'ay songé, depuis, à ce que messieurs de Bellievre et Sillery m'en escrivent, dont ils vous ont parlé, et ay resolu, tant pour le bien de mon service, que pour les raisons qu'ils me mandent, que j'entre-tiendray encor pour quelques temps aux colonnels Galaty, Heid et Baltazard, à chacun une compagnie de cent hommes : de façon que je vous prie de pourvoir à leur entretenement, car pour les retranchemens que vous me mandez sur les François, j'y en ay tant fait que je n'en puis faire davantage. Je trouve fort bon que vous

ayez asseuré les cinquante mil escus pour les nopces de ma sœur, et encor meilleur l'expedient que vous me proposez pour donner contentement à messieurs des Estats, comme le remplacement de cette somme, et des dix mil escus deubs au sieur Zamet, sur la nature de deniers que vous me mandez. Je vous laisse le soin et la disposition des fermiers des rivières, et à trouver fermiers et personnes propres pour le reglement des impositions. Pour celle de Saint Quentin, je veux qu'elle soit toute entiere, et faites en faire les expeditions, car apres s'ils se viennent plaindre, comme ils feront sans doute, ils tiendront ce que je leur en rabattray de ma liberalité, et si cela les apprendra d'obeyr une autre fois. Donnez moi le loisir d'estre mieux, et que j'aye M. de Ville-roy aupres de moy, pour resoudre l'estat des garnisons et gens de guerre entretenus pour l'année prochaine. Vous m'avez bien envoyé la responce que vous avez faite à mon cousin le comte de Soissons, mais non celle qu'il vous a escrite, que je serois bien-aise de voir pour vous en escrire ma volonté. C'est bien fait de travailler à l'estat de l'année prochaine, comme au magasin d'armes. J'ay veu M. d'Estrée, qui m'a parlé de sa charge et de ce que vous avez advisé ensemblement pour mon artillerie. Pour la broüillerie que vous avez eue avec M. d'Espernon, vous aurez veu M. de Schomberg, et entendu ce que sur cela je luy ay commandé de vous dire : je suis d'avis que vous vous racommodiez avec luy, et que vous vous monstriez doux à chacun, fors és choses où il yra de mon service, asseuré que je ne vous abandonneray, et vous feray voir comme vostre service m'est agreable. Continuez donc à me bien servir seulement, et croyez en ce fait-là vos amis. Adieu.

Ce sixiesme novembre, à Monceaux au soir.

HENRY.

*Lettre de M. de Rosny au Roy, du septiesme novembre 1598.*

SIRE,

La naissance et la nature qui m'ont rendu vostre sujet, la nourriture que j'ay receuë de vostre Majesté dès ma premiere jeunesse, et ma preinclination qui m'a causé ce bon-heur de vous avoir eu pour mon seul et unique maistre, estoient des liens et des chaines assez fortes pour vous assujettir toutes mes volontez et disposer mes actions aux choses qui seroient agreables à vostre Majesté. Mais tant de bien-faits receus, et tant de faveurs nouvelles dont avez daigné m'honorer, et principalement le ressentiment qu'il vous a pleu monstrier de ce qui s'estoit passé ces derniers jours en vostre conseil, la demons-



tration qu'avez faite de ne me vouloir abandonner, ains de m'assister de vostre autorité, et les assurances particulieres que vostre bonté singuliere m'en a données et fait donner, ont tellement acréu toutes mes precedentes obligations, que non seulement je ne puis produire aucunes œuvres, ny rendre aucuns services à vostre Majesté, qui approchent tant soit peu de ce que je luy dois, mais mesmes je ne me puis imaginer aucunes paroles propres pour remercier suffisamment vostre bonté de l'honneur qu'elle m'a fait; et quand j'aurois employé mille vies et consumé tous mes jours en l'obeyssance de vos commandemens, si ne penseray-je avoir satisfait au moindre des services dont je suis redevable à vostre Majesté, laquelle je supplie tres-humblement de ne se vouloir altérer l'esprit pour les choses advenues, car elles sont passées de telle façon qu'il n'y peut avoir occasion de plainte, ny d'un costé ny d'autre, et espere que le reste se conduira avec telle prudence et respect de vostre Majesté, qu'il ne sera nul besoin qu'elle en oye plus parler; ne voulant aussi luy travailler l'esprit de nouvelles affaires, je mettray peine d'accomplir tout ce qu'elle m'a commandé par M. de Schomberg, et attendray en patience son intention sur tous les pointes de ma dernière lettre. En attendant l'honneur de ses commandemens, je supplieray le Createur, etc.

*Lettre de la main du Roy à M. de Rosny.*

Mon amy, incontinent la presente receüe montez à cheval pour me venir trouver, et soyez icy à ce soir à quelque heure que ce soit, car je veux parler à vous pour chose qui importe à mon service : apportez avec vous les offres de ceux qui veulent faire le party du sel, les memoires là dessus, et le dernier contract d'adjudication fait aux derniers marchands. Adieu.

Ce lundy, à une heure apres midy, huitiesme novembre, à Saint Germain en Laye. HENRY.

*Lettre de la main du Roy à M. de Rosny.*

Mon amy, cette-cy sera la response aux deux vostres des septiesme et huitiesme de cettuy-cy : ne doutez nullement que je n'aye soin de vous et que je ne vous le fasse paroistre; ne craignez point que je me laisse emporter aux importunités qui me pourroient estre faites par qui que soit, touchant les deniers qui ont esté saisis à Dieppe. J'ay veu celle que vous a escrite mon cousin le comte de Soissons, et la response que vous luy avez faite; mais je croy que depuis vous l'aurez veu, et tesmoigné l'envie que j'ay de faire pour luy lors que l'occasion s'en presentera, et que mes affaires me le permettront,

lesquelles vous luy pouvez mieux faire entendre que nul autre, pour en avoir plus parfaite connoissance. Sur-ce, Dieu vous ayt en sa garde.

Ce dixiesme novembre, à Monceaux. HENRY.

*Lettre de la main du Roy à M. de Rosny.*

Mon amy, M. le chancelier et ceux de mon conseil m'ont fait entendre qu'il estoit besoin qu'ils sejourassent à Paris jusques à lundy, afin de pourvoir aux affaires des particuliers; ce que je trouve bon, afin que je ne sois point importuné lors que vous serez icy. Demeurez-y donc et prenez garde qu'il ne s'y passe rien au prejudice de mon service, et soyez icy lundy à disner. Adieu.

Ce vingt-huitiesme novembre, à Saint Germain en Laye. HENRY.

## CHAPITRE LXXXIV.

*Evaluation des impôts levés sur les peuples.*

Nous vous avons cy-devant, selon les temps, lieux et saisons, représenté les grands labeurs et travaux qu'avez pris pour le service de Sa Majesté en toutes ses affaires. Maintenant nous parlerons de ceux par vous faits aux finances, de l'utilité et profit qu'ils ont apporté, et de la gloire qu'ils vous ont acquise, et ferons voir, comme nous l'avons desja dit, que ce n'a pas esté indignement, sans crainte qu'il puisse justement nous en estre autant reproché ainsi qu'à de certains faiseurs de livres à gages, lesquels donnent des loüanges excessives à des sortes de personnes de basse extraction, et en la vie desquels il s'est peu remarquer quelque espee de blancheur : elle se trouvera marquée comme la peau du leopard de tant de taches noires de leurs mauvais desseins et procedures contre le Roy et l'Estat, ou de telles faineantises et inutilitez en leurs actions, qu'il est aisé à cognoistre que ces escriveurs à journée n'ont chanté leurs merites qu'à proportion de l'argent qu'ils en avoient receu pour cet effet, ou qu'ils ont voulu par leurs escrits former une vraye comedie où rien ne doit paroistre sur le theatre qui ne soit deguisé, nommant pilliers d'Estat des pilleurs de royaume qui se sont enrichis par-là, et que l'on devroit voir pendiller pour cela, si justice avoit lieu.

Aussi n'aurions-nous esté si impudens que d'avoir entrepris vostre vie, ny de vouloir parler de vous si hautement que nous faisons, si nous n'avions trouvé que vous eussiez jamais trempé en aucune faction, pratique ny menée contre le Roy et l'Estat, que vous eussiez eu des

malices noires et une vie sans utilité pour le public, ou saillie de faineantises, débauches et voluptez. Et pour cette cause, afin de confirmer nostre dire, avons nous pris resolution de toucher quelque chose (car le tout nous seroit-il impossible) de vos penibles recherches, curieux examens d'affaires plus secretes et cachées, et des utilitez que vous en avez peu à peu fait percevoir au Roy et au royaume, et cela ferons-nous dès maintenant et non par l'ordre que vous y avez travaillé pres de six ans continuels par anticipation de temps et tout d'une suite, afin de ne donner la peine à ceux qui cy-apres voudront essayer de vous imiter, d'en aller chercher les instructions et moyens par-cy par-là en diverses années et par les divers lieux de ces Memoires.

Et d'autant qu'il y a plusieurs choses à dire là dessus, que, pour n'entendre pas trop bien nous-mêmes, nous pourrions déduire obscurément, nous nous deliberons de n'y mettre du tout rien du nostre, mais nous contenter d'insérer icy mot à mot un certain Memoire que vous en avez fait tout escrit de vostre main propre, lequel nous trouvâmes parmy les papiers de vostre petit cabinet de derriere, lors que vous nous en fistes tirer les meilleurs, quoy qu'il ne soit qu'en forme de project, et qu'à nostre advis vous n'y ayez pas mis la dernière main, d'autant qu'il y a plusieurs ratures, divers renvois par notes, et quelques discours et periodes qui semblent non complectes. Voire nous croyons que la deplorable mort de nostre grand Roy, le peu de cas que l'on a fait de sa memoire, tant glorieuse par tous les pays estrangers, parmy les siens, et dans sa Cour, les resjonysances que nous vismes demener de sa mort par aucuns fort avancez en credit apres icelle, et le peu de soin que l'on a eu (à la grande honte, nous l'osons dire, de ceux qui estoient obligez à ce devoir) de luy faire faire une sepulture honorable, ayant tant heroïquement vescu, et laissé assez grande quantité de thresors pour n'y plaindre point toute sorte de superflue despence, en laquelle, en gravant ses hauts faits d'armes, ses merveilleuses vertus et ses dits plus notables, se fussent trouvez tous les preceptes necessaires pour exciter les braves courages à la gloire et à l'honneur; nous croyons, disons nous, que tous ces mespris de choses tant à priser, vous ont si fort aigry l'esprit et bouffé le courage, que vous avez laissé ces discours imparfaits, lesquels neantmoins, tels qu'ils sont, nous estimons tant utiles à l'Etat, et que la posterité en recevrait un si grand dommage s'ils estoient supprimez, que nous nous sommes enhardis de les inserer icy, tout ainsi que nous les avons trouvez escrits de vos-

tre main, reservé quelques lieux que nous avons raccommodez au mieux que nous avons peu, selon quelques advis que nous en avons tirez de vous à bastons rompus, ne nous en ayant jamais voulu instruire suffisamment; desquels Memoires la teneur ensuit :

« Project touchant les finances, pour présenter au Roy lorsqu'il sera mis en sa perfection, et que j'auray en main tous les estats, pieces, papiers et memoires propres pour justifier la verité et solidité de toutes les propositions, dispositions, expediens et assertions contenuës en iceluy, et faire voir clairement qu'en toutes sortes de revenus, levées et despences esquelles l'on assujettist ses sujets, par faute, la pluspart du temps, d'intelligence, d'ordre et de soin (en ce non compris les choses necessaires pour leur vivre ordinaire, l'usage et commodité de leurs personnes, familles et maisons, et tout autre entretien de la société humaine), il sort de la bourse de ses peuples, qui sont compris sous les trois ordres de son royaume, de toutes sortes de deniers, plus de cent cinquante millions de livres par chacun an. »

*Project et Memoires de M. de Rosny touchant les finances.*

Estat de tous les deniers qui sortent de la bourse des sujets du Roy, de toutes conditions et pour toutes sortes de despenses, soient volontaires, soient necessaires, reservé la vie, le vestement, le logement et l'entretien des choses necessaires pour iceux; le tout par estimation, estant impossible d'en rien supputer avec certitude : ce qui se pouvant faire, les sommes en seroient effroyables, et partant s'est-on contenté de prendre une espee de pied sur lequel il s'en peut former quelques unes, sinon vrayes à tout le moins vray semblables.

Premierement, à gens d'églises, pour baptesmes, confessions, confirmations, distributions de sacremens, predications, visitations de malades, services extraordinaires, consecrations et frais pour huisles, eaux et pains benits, cires, flambeaux, clerges, bougies, huisles de luminaires et autres frais de marguilleries, à raison de deux cens escus par parroisse l'une portant l'autre, et de quarante mille parroisses qu'il y peut avoir partout le royaume, compris les eglises qui ne font point parroisse, le tout par estimation huit millions d'escus, qui valent. . . . .

24,000,000

Plus pour aumosnes generales et particulieres, à devotion, constructions d'églises, monasteres et autres lieux saints, lais testamen-

<i>Montant de l'autre part....</i>	24,000,000	<i>Montant ci-contre.....</i>	132,500,000
taires, pour œuvres pies, obits, fondations de services, consecrations d'églises et gens d'église, magnifiques sepultures, processions, ornemens d'églises, images et croix, festes, confrairies à patrons et bâtons, voyages et pèlerinages és lieux saints, par estimation à raison de trois cens escus par paroisse, et sur le mesme nombre de quarante mille eglises ou paroisses, douze millions d'escus, qui valent.....	36,000,000	de ses commissions, et dont ses officiers font les estats, selon ce qui se monte en cette année.....	20,000,000
Plus pour les dismes payées aux prestres et curez, et dedans des eglises fondées à raison de cent escus par paroisse et eglise, et sur le pied de quarante mille, quatre millions escus, valans.....	12,000,000	Plus pour toutes sortes de deniers qui se levent par forme de taille et lettre d'assiette, tant du grand seau que des petits seaux, pour les affaires particulieres des parroisses, tant pour l'expedition qu'enregistrement desdites lettres, qu'attaches sur icelles, et frais de l'imposition, par estimation.....	4,000,000
Plus pour les decimes payées au Roy par les gens d'église et autres despences du clergé ou decimes extraordinaires, avec les frais pour toutes ces choses, par estimation, quinze cens mille escus, vallans...	4,500,000	Plus pour toutes sortes de deniers qui se dépendent ou déperissent au dommage des particuliers, pour chaumages de festes, pertes de journées de marchands, artisans, laboureurs et manœuvres, et les despences qu'à l'occasion d'icelles ils font és tavernes, jeux et brelans, ensemble pour les maîtrises et confrairies des artisans et mestiers, par estimation à raison de cent escus par paroisse, sur le pied cy-devant pris.....	12,000,000
Plus pour argent porté à Rome, pour toutes sortes d'expeditions et annates, pour indulgences, dispences, consecrations de prelatz, dedicaces d'églises et autres semblables despences, par estimation....	4,000,000	Plus pour tous deniers levez sur le sel par le Roy, tant pour ses droits que ceux des officiers, prix de marchand, archers, droits de passe-port, d'emboucheure, peage de rivières et autres, par toutes les provinces de France, par estimation.....	14,000,000
Plus pour achapts d'offices, quarts, deniers pour resignation et marcs d'or, expéditions de lettres et receptions d'officiers, obtentions d'honneurs, dignitez, noblesses, exemptions, droits, prerogatives et privileges que le Roy confere, par estimation.....	12,000,000	Plus pour tous deniers qui se levent pour le Roy, par forme d'aydes nommez quatriesme, huitiesme et vingtiesme, à prendre sur le vin, pommé, poiré et cervoise, compris tous les frais des officiers, par estimation.....	5,000,000
Plus pour toutes sortes de frais qui se font par toutes sortes de conditions de personnes, pour affaires de procez et plaidoyeries, pour avoir justice, tant pour les juges et presens qu'il leur faut faire, que pour les voyages et chaumages des parties, salaires de solliciteurs, advocats, procureurs, huissiers et sergens, les sommes en sont inestimables, et neantmoins cy, par estimation.....	40,000,000	Plus pour tous deniers qui se levent pour le Roy par forme d'entrée dans les villes, peages sur les rivières, ponts et passages, traites, foraines, domainiales, resve, hauts passages, douanes, entrées de drogueries et espiceries, impôts, billets, ports, havres, brieux, traites de bestes vives, droit d'ancrage et d'admirauté, par estimation.....	8,000,000
Plus pour toutes sortes de tailles qui se levent pour le Roy, en vertu		Plus pour toutes sortes de deniers qui se levent par les villes et bourgs, tant par forme de deniers	
<i>Reporté ci-contre.....</i>	132,500,000	<i>Reporté de l'autre part....</i>	195,500,000

*Montant de l'autre part.* . . . 195,500,000  
communs et patrimoniaux, que  
d'octroy pour les employer en leurs  
menuës necessitez. . . . . 4,000,000

Plus pour toutes sortes de deniers qui se déboursent par toutes sortes de conditions de personnes, mais sur tout par les grands et riches de la Cour et des bonnes villes, outre ce qui est necessaire de l'honneur et bien seance en ceremonies de jours solennels, estrenes, gasteaux des roys, chandelour, festins, banquets, yvrogneries et crapules, amourettes, chasses, habits, meubles, equipages, bastimens, jardinages, dorures, diaprures, bagues, joyaux, commedies, mascarades, balets, danses, jeux, berlans et autres bombances, sump-tuosités, luxes et dissolutions superflus, au moins. . . . . 40,000,000

SOMME TOTALE. . . . (1) . . 254,000,000

#### CHAPITRE LXXXV.

*Remise des arrérages dus par les peuples. Réformes dans les finances. Réclamations de plusieurs personnes puissantes. Explication donnée au Roi par Rosny.*

Or, continuans à desduire ce qui a esté cy-devant recité de vostre employ ordinaire, pour le reste de cette année 1598, nous reprendrons seulement la suite des affaires qui se passeront par vostre entremise, ou dans lesquelles vos interests se trouveront meslez; et vous ramenterons, conformément à ce qu'il vous pleut de nous en dire deslors (car nous le faisons aussi tost dans les Memoires que nous faisons jour par jour, afin de pouvoir apres former ceux cy de toute vostre vie, de crainte d'en oublier les propres termes), que voyant la paix affermie par les sermens de l'observation d'icelle donnez et receus de toutes parts, le port des armes inhibé, les gens de guerre grandement retranchez, bien payez et bien disciplinez, les peuples fort satisfaits du gouvernement present, tous leurs esprits inclinans à l'obeyssance et entierement alienez de toute soulevation, en cela puissamment instruits par tous les frais ressentimens des mal-heurs d'icelle, le Roy prisé pour sa vertu, reveré pour sa

(1) Le total est de 239,500,000; il y a donc une erreur d'addition, ou des omissions pour une somme de 14,500,000.

justice, redouté pour sa vaillance et celerité, aymé pour sa clemence et familiarité, et autorisé pour ses heureux succez, vous vous resolustes de mettre à bon escient les mains aux ouvrages que vous aviez de long-temps projettez, mais ausquels vous n'aviez pas seulement osé penser de toucher tant soit peu, de crainte que plusieurs personnes s'estimant interessées en tels ordres, reglemens et mesnagemens, vous n'affoiblissiez les bonnes volontez, n'alterassiez du tout les tres-delicates, et qu'au lieu d'en tirer du fruit vous n'esmeussiez des rumeurs et du bruit; et commençastes, afin de donner bonne odeur de vos desseins, par les remises absolües des arrerages de toutes tailles de toutes les années passées, au precedent l'année 1596, et surceance du payment d'icelles en payant ceux de 1597; pour le payment de tous lesquels arrerages montans à plus de vingt millions par tout le royaume, les peuples estoient asprement poursuivis et merueilleusement vexez, sur tout en Provence, Dauphiné, Languedoc et Guyenne, à cause que la plupart de tels deniers estoient pretendus par les gouverneurs et capitaines des pays et places, et par les officiers de justice et de finance.

En suite de ce bon œuvre, ayant tousjours l'esprit mal satisfait de la confection de l'estat general des finances, que vous aviez vous mesme fait en l'année 1596, pour l'année 1597, et semblablement de celui que vous aviez aussi dressé en 1597, pour l'année 1598, d'autant que vous n'y aviez quasi travaillé que par les avis des intendans des finances et tresoriers de l'espargne, et sur les estats particuliers que tant eux que les tresoriers de France avoient fournis, vous rassemblastes toutes les commissions des tailles envoyées par les generalitez, tant au commencement desdites deux années, que durant le cours d'icelles; tous les edicts et lettres patentes en vertu desquelles s'estoient levez tous les subsides et impositions sur les denrées et marchandises, les tableaux et pancartes en vertu desquelles elles se levoient, et les sous-affermes qui s'en étoient faites par les fermiers generaux, ausquels la perception de tous ces droits avoit esté adjudgée à ferme-clause par ceux du conseil du Roy ou les tresoriers de France.

Et apres avoir bien feuilleté tous ces papiers, calculé toutes les sommes, et recherché toutes choses dès leur source, voyant quelques abus qui se commettoient sur le fait des commissions ordinaires des tailles, de beaucoup plus grands sur les commissions extraordinaires à vau l'an-

nés, mais du tout excessifs sur le fait des fermes; et ayant verifié que les sous-fermages montoient quasi deux fois autant que les adjudications generales faites au conseil du Roy ou pardevant les tresoriers de France, vous en donnastes advis à Sa Majesté, laquelle vous commanda aussitost de pourvoir à tout cela comme vous l'entendriez, et que vous ne doutassiez point qu'il n'autorisast tout ce que vous auriez ordonné, fait et dit là dessus. Tellement que, sur ce fondement, vous listes faire arrest sur tous les deniers des tailles levez par commissions extraordinaires, et mandastes aux receveurs d'en faire recepte comme des autres deniers de leurs charges venans à l'espargne, afin de les y faire voiturier. Vous fermastes aussi la main aux fermiers generaux, listes defences aux sous-fermiers de leur plus rien payer, avec commandement de rapporter leurs sous-baulx, et faire voiturier à l'espargne tout ce qu'ils pouvoient devoir et devoient par apres; tellement que, par cet ordre, vous descouvristes que la plus-part de ceux du conseil ou qui avoient orédit pres d'eux, et quelques tresoriers de France, avoient part avec les fermiers generaux, et eustes, par ce moyen, dequoy satisfaire à plusieurs fautes de fonds et nouvelles despences qui survenoient journellement, ce qui resjouyt infiniment le Roy, et le rendit, plus que jamais, affectionné en vostre endroit.

Ces choses ainsi executées, vous en entrepristes de bien plus grandes et importantes encor, qui fut de remettre entre les mains du Roy des alienations et engagemens de certains revenus en tailles, aydes, gabelles, traites, foraines et domainialles, cinq grosses fermes, parties casuelles, peages des rivières, comptablerie de Bourdeaux et patentes de Languedoc et Provence, faits à gens tous grandement qualifiez et qui en jouyssoient tous par leurs mains, dont entre les autres estoient la reine d'Angleterre, le comte Palatin, le duc de Wirtemberg, ceux de Strasbourg, les Suisses, Venise, le duc de Florence, plusieurs partisans italiens, Madame, sœur du Roy, tous les princes et seigneurs qui avoient esté de la ligue, messieurs le connestable, messieurs de Bouillon, du Plessis, de Pichery, heritiers du feu sieur de Villars, du Gast et une infinité d'autres; lesquels ne manquerent pas d'en venir aussitost faire leurs plaintes au Roy, avec des crieries accompagnées de tres-grandes importunité; lesquelles luy ne pouvant que trop impatiemment supporter (car c'estoit quasi le seul defect de ce prince, que d'estre tendre aux contentions d'esprit) il vous envoya aussitost querir à demy en colere contre vous, tellement qu'en arrivant il

vous dit : « Ha ! mon amy, qu'avez vous fait ? » — Je me doute desja bien que c'est que vous voulez dire, Sire, luy respondites vous, mais « je n'ay rien fait que bien, et m'assure que « vous le trouverez ainsi, m'ayant entendu, voire « mesme que ceux qui en crient le plus haut ne « diront pas le contraire, apres que j'auray parlé « à eux; et s'il vous plaist d'envoyer querir quelques uns, vous verrez qu'ils demeureront contents, et qu'en fin il en yra de ces crieries comme « de celles des fermiers generaux que j'avois tous « depossédez, lesquels en fin se sont accommodez « avec moy et ont quasi tous doublé toutes vos « fermes, pource que je n'entends rien en pots « de vin, à entrer en part ny à estre associé; « je crois, Sire, que vous entendez bien tous « ces termes. — Ouy, je les entends bien, vous « dit-il, et vous aussi; et si vous pouvez faire « taire le petit Edmond, agent de la reine d'Angleterre, un grand gentil-homme allemand du duc « de Wirtemberg, Gondy pour le duc de Florence, ma sœur et mon compere, je croiray « le semblable du reste; et pour en avoir une « preuve il faut faire venir monsieur le connestable qui ne fait que de partir pour aller chez ma « sœur; car c'est un de ceux qui m'en parle « plus souvent. »

Ce qu'ayant esté fait, le Roy luy dit en entrant : « Et bien, mon compere, dequoy vous « plaignez vous de Rosny ? — Sire, je me plains, « respondit-il, de ce qu'il m'a mis au rang du commun, m'ayant osté une pauvre petite assignation que j'avois en Languedoc, sur une imposition de laquelle vous ne touchastes jamais « rien. — Or bien, monsieur, luy dites vous, je « confesse avoir eu tort, si mon intention a esté « de vous rien faire perdre; mais elle a esté toute « contraire; partant dites moy, s'il vous plaist, « ce que vous tiriez de cette imposition, et je « vous feray payer pareille somme. — Je trouve « cela bon, vous dit-il; mais qui m'assurera « d'en estre payé à point nommé comme je suis ? » — Ce sera moy, luy respondites-vous, et vous « bailleray le Roy pour caution, qui ne fera point « banqueroute, je vous le promets, au moins s'il « me laisse mesnager ses revenus comme je l'entends, et je luy serviray encor de contre-caution, qui m'attens bien en le faisant riche, « qu'il me fera tant de bien, que je ne seray « jamais reduit au saffran. » Tout cela le fit rire, et rendit tant satisfait, qu'il vous dit : « Or sus, « monsieur, je m'en fie du tout en vous, à qui « je recognois franchement que je n'affermois « cette imposition que neuf mille escus par an, « et encor en donnois-je deux mille tous les ans « au tresorier des Estats, afin de faire faciliter

« la levée. — Je sçavois bien tout cela, monsieur, « luy dittes-vous, aussi est-ce ma resolution de « vous faire payer franchement vos neuf mille « escus, et si le Roy me veut laisser tirer le pro- « fit de la ferme, je luy feray donner encor dix- « huit mille escus, et si j'en auray encor quatre « mille pour moy. »

Ce discours appresta fort à rire au Roy, voyant l'estonnement qu'en faisoit monsieur le connestable ; et tout cela estant ainsi accordé, vous fistes parler le lendemain au Roy, un homme qui, sous le nom des Estats, prit la ferme à cinquante mil escus, et luy dites que vous ne vouliez point qu'il vous fist du bien en prenant rien sur ces fermes, d'autant que c'estoit une ouverture tres-dangereuse pour le bien de ses affaires, que de souffrir qu'aucuns de ceux de son conseil ny de ses finances fussent jamais interessez en nul de ces revenus, et que c'estoit par cette voye là que s'estoient faittes toutes les profusions des finances sous le regne de son devancier, lequel propos contenta encor le Roy plus que tout le reste ; et pource que vous luy fistes avancer douze mil escus sur cette ferme, il vous en envoya quatre mil par le sieur de Beringuen, deux jours apres qu'il eut touché son argent. Et enfin, par ces voyes et formes toutes semblables, furent toutes autres plaintes et crieries, dont le Roy avoit tesmoigné tant d'apprehension, entierement apaisées, et les revenus du Roy sur ce qui leur avoit esté baillé à jouyr, augmentez de près de six cens mille escus.

Vous envoyastes peu apres M. de Maupeou, maistre des comptes, en Bretagne, pour l'observation des reglemens en finance que vous y aviez faits, pour faire valoir les fermes du pays, et faire venir à l'espargne les deniers dont vous aviez fait le fonds ; M. de Champigny, es generalitez de Tours et Orleans, pour regler les peages des rivières ; le sieur Coesnard, auditeur des comptes, en Poictou, et le sieur de Bisouze en Guyenne.

#### CHAPITRE LXXXVI.

*Baptême du fils de la duchesse de Beaufort. Cette dame aspire à devenir reine. Opposition de Rosny. Conduite de Henri IV avec son ministre et sa mattresse. Dispute de Rosny et du duc d'Epemon. Maladie du Roi. Arrivée d'Alexandre de Médicis, légat du Pape.*

Peu de temps apres l'execution des choses dites au chapitre precedent, se fit le baptesme d'Alexandre, dont madame de Beaufort avoit accouché au voyage de Bretagne ; les ceremonies s'en firent à

Sainet Germain, où il se passa plusieurs choses qui vous despleurent tellement, que vous ne vous pustes empêcher d'en parler, et d'en blasmer ceux qui estoient cause de ces excez, d'autant qu'ils estoient tous semblables à ce qui s'observoit aux enfans des roys, et cela fistes-vous d'autant plus hardiment que le Roy, vous en parlant, tesmoigna de le trouver mauvais, et dit que l'on avoit fait beaucoup plus qu'il n'avoit commandé. Ce mauvais commencement eut encor une plus fascheuse suite, d'autant que vous en eustes trois jours apres une grande broüillerie avec madame de Beaufort, sur une telle occasion.

Le Roy, sur les longs discours que vous aviez eus ensemble à Rennes, touchant son desmariage et remariage, suivant ce qui en a esté dit cy-devant, ayant jugé et finalement conclud et arresté, qu'il estoit necessaire de tenir secrette et cachée quelque sorte de resolution qu'il pût avoir en faveur d'aucune fille ou femme pour l'espouser, et de n'en declarer ny tesmoigner la moindre pensée, que toutes les ceremonies et formalitez pour la dissolution de son mariage n'eussent esté entierement observées, accomplies et parfaites, vous estimiez luy rendre non seulement un grand et signalé service, et conforme à sa volonté, mais qui luy devoit et aussi à celle qu'il pretendoit espouser estre tres-agreable que d'en user ainsi, et sur toutes autres à madame la duchesse, et que vous essayassiez de faire cesser les bruits que certains escrits, ingenieux au mal, faisoient courir que le Roy avoit du dessein pour elle, comme un sujet sur lequel il estoit pour intervenir le plus de difficultez et d'obstacles, la Reine Marguerite, duchesse de Valois, qui de tout temps vous avoit fort affectionné et lors prins toute confidence en vous, ne vous l'ayant point celé par une lettre qu'elle vous avoit escrite, laquelle vous aviez fait voir au Roy, dont la substance estoit : Qu'estant née fille de France, ayant esté fille, sœur et femme de roys, et seule restée de toute la royalle race des Valois, qui respirast l'air de cette vie, elle ayroit si cherement sa patrie, affectionnoit tellement la personne et les contentemens du Roy, et desiroit si ardamment de luy voir des enfans legitimes, qui peussent succeder sans dispute à cette couronne, que n'estant pas en estat de luy pouvoir faire trouver ce bon-heur en sa personne, elle le desiroit et soubhaittoit voir en une autre qui fut digne de luy, et que pour ce mesme effet estoit elle resoluë de contribuer tout ce qui seroit en sa puissance pour faciliter et acclereler la dissolution de son mariage ; mais que si c'estoit pour mettre en sa place une femme de si basse extraction et qui avoit demené une vie si sale et si vi-

laine, comme estoit celle dont on faisoit courir le bruit, elle feroit tout le contraire et ne quitteroit rien du sien pour le voir si mal colloquer ; ce qu'elle vous prioit de bien peser et de faire tout ce qui seroit en vostre pouvoir pour empescher un si grand diffame pour le Roy, pour elle et pour toute la France, et lequel seroit pour faire naistre grande quantité de contentions et débats pour la succession du Royaume.

Toutes lesquelles raisons avoient my-party l'esprit du Roy ; et quoy que vous en eussiez fait sçavoir quelque chose à M. de Fresne et à M. le chancelier de Chiverny, que madame de Sourdis gouvernoit, afin que cela pust parvenir jusques aux oreilles de madame la duchesse, neantmoins, cette femme, soit de son propre instinct et que l'ambition estouffast en elle toute prudence ou qu'elle y fut persuadée par ce M. de Fresne et madame de Sourdis, ausquels le Roy attribuoit tout ce que cette duchesse faisoit de mal, elle ne laissoit pas de faire tousjours courir le bruit d'estre en esperance d'espouser le Roy ; et pour y accoutumer le monde, ou voir ce que l'on en diroit, en tesmoigner de fois à autre quelque chose par quelques escrits. Tellement que M. de Fresne ayant fait une ordonnance de payer ce qu'il falloit aux heraux, trompettes et haut-bois, pour avoir servy au baptesme d'Alexandre Monsieur, comme enfant de France, et vous estant apportée afin d'ordonner qu'elle fust acquittée, vous la retinistes, et fistes une autre ordonnance au tresorier de l'espargne pour leur payer une certaine somme sans faire mention d'Alexandre, et d'autant qu'ils la trouverent moindre qu'ils n'esperoient, ils vous dirent : « Monsieur, la somme que nous devons avoir assistant aux baptesmes des enfans de France, est de long-temps réglée. » Lors voyant qu'ils contestoient trop opiniastrement, vous alleguant deux ou trois fois M. de Fresne, enfin, en colere, vous leur dites : « Allez ! allez ! je n'en feray rien ; il n'y a point d'enfans de France. »

Et s'en estans allez, sur ce que vous appristes qu'ils s'estoient vantez de s'en aller plaindre à madame de Beau-fort, vous vous doutastes bien qu'elle s'en offenceroit et essayeroit de vous faire quelque mauvais office ; et pour le prevenir vous vous en allastes aussi-tost au Louvre, où vous trovastes le Roy, qui se promenoit avec M. d'Espernon, lequel aussi-tost qu'il vous vid, vous demanda s'il y avoit quelque chose ; lors vous luy dites : « Sire, je crois que vous vous souvenez bien de la resolution prise, de tenir secrette la faveur que vous voudrez faire à quelque femme que ce soit pour l'espouser, et sur tout pour ce qui regarde madame la du-

chesse ; et neantmoins l'on m'a apporté une ordonnance qui la publie, voire declare pour faite avant qu'elle soit commencée ; car si vos enfans sont déjà tenus pour enfans de France, il faut qu'il y ait eu mariage legitime au precedent. » Lors il vous demanda où est cette ordonnance ; laquelle ayant leuë, il vous dit : « Il y a là de la malice de M. de Fresne ; mais je l'empescheray bien : deschirez cette ordonnance. » Puis il se tourna vers trois ou quatre les plus proches de luy, et leur dit : « Voyez la malice du monde, et les traverses que l'on donne à ceux qui me servent bien et selon mon gré. L'on a envoyé à M. de Rosny une ordonnance à dessein de m'offencer s'il la passoit, ou d'offencer ma maistresse s'il la refusoit ; mais j'y pourvoiray bien. Allez vous en, dit-il, la voir, contez luy tout ce qui s'est passé là dessus, et la contentez en ce que vous pourrez ; et si cela ne suffit, je parleray en maistre et non en serviteur. »

Vous allastes donc aussi-tost au cloistre Saint Germain, où ladite dame estoit logée, laquelle vous voyant entrer, vous dit : « Jesus, monsieur, hé ! où allez vous ? Je ne pense pas que ce soit moy que vous veniez voir, veu les desplaisirs que j'en reçois tous les jours. » Lors vous luy dites : « Madame, je vous viens voir par commandement du Roy, pour vous représenter tout ce qui s'est passé touchant une affaire, dont je vois bien que l'on vous a donné de mauvaises impressions ; mais je n'ay rien fait que le Roy ne trouve bon et qu'il n'ayt jugé utile à son service et au vostre. » Lors elle vous dit : « Je suis bien advertie de tout, et n'ay que faire d'en sçavoir davantage, car je ne suis pas faite comme le Roy, à qui vous persuadez que le noir est blanc.—Ho ! ho ! madame, luy dites vous, puisque vous le prenez de cette façon, je vous baise les mains et ne laisseray pas de faire mon devoir pour vos coleres. »

Et sur cela vous vous en retournastes trouver le Roy au Louvre, auquel ayant conté ce qui s'estoit passé, il tesmoigna de le trouver tres-mauvais, et vous dit : « Allons, venez avec moy, et je vous feray voir que les femmes ne me possèdent pas comme de certains malins esprits en font courir le bruit, que je sçay maintenir mes serviteurs en droit et en raison, comme j'advouë qu'ils sont entierement pour vous en cette occasion, et que je parleray à elle en maistre et non en serviteur ; car si je l'accoustois à de telles fredaines, je voy bien qu'elle m'en feroit bien d'autres, et partant ay-je plus d'intérêt que vous à tout cela. » Et lors estant monté dans vostre carrosse mesme, pource que

le sien tardoit trop à venir, il s'en alla au logis de madame la duchesse, laquelle ayant sceu sa venuë s'estoit avancée jusques à la premiere porte de la salle où il la rencontra; et lors l'ayant prise par la main, sans la baiser ny carresser, ny dire aucune parole de compliment, comme il avoit accoustumé, il luy dit seulement: « Allons, allons, madame, allons en vostre chambre et qu'il n'y entre que vous, Rosny et moy; car je vous veux parler à tous deux et vous apprendre à bien vivre ensemble. » Puis ayant bien fait fermer la porte et regardé s'il n'y avoit personne dans la chambre, garde-robe et cabinet qui le peust entendre, en la tenant par une main, et vous par l'autre, il luy dit: « Voy, madame, hé! vray Dieu, qu'est-ce que cecy? Quoy! vous voulez donc me fascher de gayeté de cœur pour esprouver ma patience! sont-ce là les beaux conseils que l'on vous donne? Mais, pardieu, j'en jure, si vous pensez continuer ces façons de faire, vous vous trouverez bien esloignée de vos esperances, car je ne veux pas pour des sottises fantaisies que des gens que je sçay bien vous mettent en la teste, perdre le meilleur et plus loyal serviteur que j'aye jamais eu, qui n'a rien fait que de mon sceu et pour mon bien, mon honneur et vostre propre avantage; et n'estant pas si beste que de me vouloir faire croire le noir pour le blanc, comme aussi ne suis-je pas si sot que de me laisser ainsi mener par le nez; et partant veux-je que vous l'escoutiez patiemment sur ce qu'il avoit à vous dire, et que vous preniez mesme ses conseils en vos affaires d'importance, comme je fais aux miennes et m'en trouve fort bien; et faut que vous sçachiez que vous ayant principalement aimée pource que je vous trouvois douce, gracieuse et d'humeur complaisante, sans estre testuë ny accariastre, si vous veniez ainsi à changer soudainement, vous me feriez croire que tout cela n'auroit esté que feintise, et que vous reviendriez au naturel des autres femmes si tost que je vous aurois eslevée où vous desirez; et ne crains point de dire tout cecy devant Rosny, d'autant que je le tiens si advisé que ces louanges l'encourageront plutost à mieux faire que jamais, qu'elles ne l'enorgueilliront pour le faire manquer à son devoir. »

A quoy cette femme ayant les larmes aux yeux, les sanglots à la bouche, et les gémissemens au cœur, et taschant de luy baiser les mains, se mit à esclater et dire: « Ha! Dieu, que je suis mal-heureuse, d'avoir ainsi violemment mis mon amitié en un prince qui oublie si facilement ce qu'il a tant de fois protesté

« d'aymer comme luy mesme. Si j'avois un poingnard je m'en donnerois dans le cœur, afin que vous estant apres présenté, vous y vissiez vostre effigie si bien engravée, qu'il m'est impossible de l'en effacer qu'en me privant de vie, ce que vous n'ignorez pas, je le sçay bien; et partant dois-je croire que vous voulez que je meure, puis que vous me voulez priver de vos bonnes graces, dequoy je ne dois plus douter, puisque vous preferez l'amitié d'un autre à moy. Si c'estoit pour quelque belle dame, encore que cela m'apportast la mort, si me seroit-elle plus supportable, car je ne serois pas la premiere qui seroit morte d'amour, pour l'ingratitude et legereté d'un homme; mais de me gourmander et me menacer de me quitter pour maintenir un de vos valets qui m'a offensée plusieurs fois à toute extremité, sans que je m'en sois aucunement plainte ny ressentie; tesmoins les beaux discours qu'il a tenus au baptême de vostre fils et le mien, jusques à essayer de vous faire trouver mauvais l'honneur que l'on luy faisoit, et maintenant que l'on luy a porté une ordonnance pour ceux qui avoient assisté à cette ceremonie, suivant la coustume ordinaire, hélas! Sire, que n'a-il point dit au mespris de vos enfans et de moy? Et puis vous l'endurez! O Dieu! dit-elle, en se jettant sur un liect, il ne faut plus vivre apres tant de disgraces, et voir que vous aymez mieux un serviteur de qui tant de gens se plaignent, qu'une maistresse de qui tout le monde se loue. »

Le Roy se trouva l'esprit merveilleusement traversé par tant de discours plains d'artifice, ausquels il ne s'estoit pas attendu et encor moins préparé à y respondre: neantmoins ce courage et cette vertu naturelle qui luy avoient fait surmonter tant de difficulté, se resveillant en luy, il repartit et dit: « Madame, je ne m'attendois pas à tant de discours plains d'artifice sur un si foible sujet; aussi voy-je bien que tous ces langages viennent d'un autre esprit que le vostre, lequel ne sauroit estre un quart d'heure avec moy qu'il ne me conteste quelque chose et ne me dispute. Or, afin que vous ne pensiez rien emporter sur moi de haute lutte, et aussi peu par larmes ny par ruses, je vous ordonne de vous mettre bien avec Rosny, qui ne m'a jamais donné conseil pour ce qui vous regarde, que conformément à son devoir et à mes sentimens. Je vous prie de ne m'en parler plus, aymez moy seulement comme de coustume, et vivez avec moy et mes bons serviteurs avec la mesme douceur d'esprit que vous avez fait par le passé, et je vous aymerai aussi de ma part comme je dois. »



Et sur cela le Roy voyant que son esprit ne se remettoit point, s'esclamant de fois à autre qu'il falloit mourir plutost que de vivre avec cette vergongne, de voir soustenir un valet et un serviteur contr'elle qui portoit titre de maistresse, et encore en sa propre presence, afin de l'en-orgueillir contr'elle, il luy dit : « Par dieu, madame, c'est trop, et voy bien que l'on vous a dressée à tout ce hadinage pour essayer de me faire chasser un serviteur duquel je ne me puis passer, je ne crains point de le dire devant luy, et qui m'a toujours loyalement servy depuis vingt-cinq ans. Mais, pardieu, je n'en feray rien, et afin que vous en teniez vostre cœur en repos et ne fassiez plus l'accariastre contre ma propre volonté et le bien de mes affaires, je vous declare que si j'estois réduit à cette nécessité que de choisir à perdre l'un ou l'autre, que je me passerois mieux de dix maistresses comme vous, que d'un serviteur comme luy, que vous avez appelé valet en ma presence et la sienne pour l'offencer, chose que je ne trouve nullement bonne; aussi est-il de toute autre naissance, ceux de ma maison n'ayant point desdaigné l'alliance de la sienne. » Et comme sur cela le Roy fit demonstration de vouloir sortir pour s'en retourner, elle vint se jeter à genoux à ses pieds, avec plusieurs prieres et larmes; et finalement le voyant avec plus de fermeté d'esprit, que ceux qui l'avoient conseillé de faire cette escapade n'estimoient, elle commença de s'adoucir, et finalement apres plusieurs autres discours trop longs à desduire, suivant ce que vous nous avez dit, toutes choses se reconcilierent de toutes parts.

Environ ce mesme temps vous eustes une grande querelle contre M. d'Espernon, à cause de certain deniers qui se levoient de son autorité dans ses gouvernemens sans aucunes lettres patentes du Roy, et se montoient ces sommes pres de soixante mille escus, sur lesquelles, quasi malgré le conseil, vous fistes faire arrest, défense de continuer la levée, et ordonner aux tresoriers de France d'en informer. Dequoy M. d'Espernon ayant esté aussi-tost adverty par les premiers du conseil, il y vint le lendemain et se mit à parler fort haut, alleguant ses qualitez et croyant par là de vous intimider. Mais vous relevastes tous ces discours avec grand courage et tesmoignage de vouloir et pouvoir vous esgaller à luy, mettant en avant vostre extraction : tant y a qu'il y eut de grosses paroles de toutes parts, jusques à estre presta de mettre les mains aux espées dans le conseil; mais vous fustes separez, et vous en allastes chacun en vos logis

attendre des nouvelles l'un de l'autre. Le Roy, qui estoit à Fontaine-bleau, ayant dans peu d'heures appris cette dispute, vous escrivit une lettre où il vous mandoit qu'il avoit sceu que vous aviez eu querelle pour ses affaires; que cela ne vous estonnast point, qu'il avoit ordonné à tous ceux qui l'affectionnoient de s'aller offrir à vous, et qu'il vous serviroit de second s'il en estoit besoin; quelques jours apres il vous accommoda et vous fist tous deux embrasser.

Le Roy fut en ce temps tellement malade à Monceaux, qu'il fut plusieurs jours que l'on desesperoit de sa santé. Il vous commanda de ne partir point de là, et de fois à autre vous envoyant querir, il ne vous tenoit jamais autre discours, sinon : « Mon amy, je n'apprehende nullement la mort comme vous le sçavez mieux que personne, m'ayant veu en tant de perils dont je me fusse bien peu exempté; mais je ne nieray point que je n'aye regret de partir de cette vie sans eslever ce royaume en la splendeur que je m'estois proposée, et avoir tesmoigné à mes peuples, en les soulageant et déchargeant de tant de subsides, et les gouvernant amiablement, que je les aimois comme s'ils estoient mes enfans. »

Quelque temps apres qu'il fut guarý, le cardinal de Florence, legat du Pape, et qui depuis fut luy-mesme pape, nommé Leon XI, revenant des frontieres de Picardie pour s'en retourner à Rome, et venant passer à Paris pour prendre congé du Roy, Sa Majesté qui estoit à Monceaux, où vous l'estiez venuë trouver en poste, vous renvoya en diligence pour le faire recevoir, loger et traiter honorablement. Il voulut aller voir Saint Germain, et vous l'y voulant traiter, dites au garde-meubles Momier qu'il allast tapisser les salles et chambres des plus riches tapisseries; entr'autres il en choisit une que la feuë reine Jeanne de Navarre avoit fait faire toute de devises, dont il y en avoit plusieurs contre le Pape et les ecclesiastiques, laquelle, sans y penser, il avoit esté tendre comme l'une des plus riches à la chambre du legat, lequel à toute force vous vouloit mener quant et luy dans son carosse. Mais vous le priastes de vous excuser et voulustes aller devant au gallop pour voir si tout estoit bien accommodé, ce qui vint fort à propos pour vous, car autrement il eut trouvé cette tapisserie à sa chambre, et eut creu et publié que vous l'eussiez fait expres pour vous moquer de luy et du Pape; la trouvant tendue, vous vous mistes en extrême colere contre Momier, et la fistes oster en diligence et en tendre une autre : depuis vous avez fait changer toutes ces devises.

## CHAPITRE LXXXVII.

*Mort et testament de Philippe II.*

Monseigneur, encor que la personne et la condition de Philippes second, roy des Espagnes, soient d'une eminence tant suprême par dessus tout ce que l'on sçauroit imaginer de vous, que nuls de vos interets particuliers ne puissent jamais avoir eu rien de commun avec le moindre des siens, et que nous nous soyons toujours proposés, en dressant ces Memoires de vostre vie, de n'y entremesler aucunes particularitez de quelques affaires que ce pust estre si elles n'avoient passé par vostre entremise, ou qu'elles n'eussent en quelque sorte touché vos interets, neantmoins estimant que ce ne vous seroit point chose desagréable, ny peut-estre inutile, ny à tous ceux qui liront ces Memoires, si nous finissions nos narrations de tant de grandes choses qui se sont faites et passées en cette année 1598, par la catastrophe de la vie du plus puissant des roys de nostre siecle et la representation des piteuses yssues de ses folles entreprises, dequoy nous avons pris le sujet sur une lettre à vous escrite par un certain agent du Roy vers messieurs les princes protestans d'Allemagne, nommé, ce nous semble, Bongars, laquelle nous trouvasmes parmy vos papiers, une fois que nous faisons l'inventaire suivant vostre commandement, comme ce vous estoit une coutume ordinaire par chacun an, laquelle lettre faisoit mention de la forme de la mort du Roy d'Espagne, et d'une certaine coppie qu'il disoit estre la disposition testamentaire, ou plutost instruction d'affaires d'Etat de ce Roy à son fils; nous avons creu, disons nous, que ce ne vous seroit point chose desagréable ny inutile, ny à ceux qui jetteront les yeux sur ces Memoires, si nous y transcrivions l'un et l'autre, pour finir par une piece tant memorable nos representations de l'année 1598; ne doutant point qu'un grand esprit comme le vostre n'y trouve à profiter grandement, soit que le tout soit entierement vray ou entierement faux, ou qu'il soit entremeslé de l'un et de l'autre pour en faire d'autant plus priser celuy que l'on en fait l'auteur; car nous ne voulons estre garands d'autre chose, sinon que la lettre de M. de Bongars est tres-vraye, car nous cognoissons son escriture et qu'il vous a envoyé cette coppie conformément à ce qu'il vous en escrit par la susdite lettre, de laquelle et de la coppie d'instruction qu'il vous a envoyée, la teneur ensuit :

*Lettre du sieur de Bongars touchant la testament du roy d'Espagne.*

Monseigneur, estant, comme vous sçavez, agent pour le Roy vers messieurs les princes protestans d'Allemagne, et faisant ma residence plus ordinaire en la cour de M. le land-grave de Hessen, ce prince tres-bon, tres-sage, et grandement curieux de toutes choses excellentes et rares, m'a communiqué deux certains discours, lesquels (quoy qu'ils luy ayent esté envoyez de deux endroits assez esloignez et differens, à sçavoir, l'un de la cour imperiale, dans les conseils de laquelle il a des amis intimes et familiers, et l'autre de la ville de Gennes, où il a aussi de feables et fort particulieres correspondances) sont neantmoins si pareils, que s'ils estoient en mesme langue ils sembleroient avoir esté coppiez l'un sur l'autre, et asseurent ceux qui luy en ont fait part que c'est la vraye copie des instructions secrettes laissées au roy Philippes troisieme d'Espagne par Philippes second son pere, sans que l'on sçache encor neantmoins au vray s'il les a trouvées dans le cabinet à la clef royale (dont le principal confident des roys a la garde, ainsi que dom Christophe de Mora l'ayant eue du pere, le marquis de Denia l'a maintenant du fils) ou si elles luy ont esté baillées par son pere mesme durant le cours de ses longues et fascheuses maladies. Car, comme vous en avez peu oüy parler, ce grand monarque qui avoit tant vexé et travaillé les autres, a luy-mesme esté crucié et miserablement affligé, plus de huit ou neuf mois durant, de tres-espouvantables et langoureux accidens, son corps estant extenué et descharné comme un schellette, couvert de sordides et boüeux ulcères, puans comme une sentine, et rongé de poux et de vermine comme un Herodes. De toutes lesquelles langueurs, tant effroyables et cruelles, ce prince neantmoins, ainsi que le publient les siens, qui veulent exalter la sublimité de son esprit, la solidité de son jugement et la hautesse de son courage, a toujours tiré de tres-douces et agreables consolations, disant luy mesme en la plus grande anxiété de ses angoisses, que tant de douloureux ressentimens estoient des visitations et corrections favorables de la pitoyable main de Dieu, qui vouloit par leur exces luy faire souffrir en ce monde toutes les peines et chastimens que pouvoient avoir meritez ses fautes et offenses, afin qu'estant purgé d'icelles il fut exempt de tourmens en l'autre vie : comme au contraire ceux qui abhorroient sa memoire disoient que toutes ses souffrances, quelques horribles et rigoureuses qu'elles peussent estre,

n'estant nullement proportionnées à ses crimes, n'estoient aussi que les arres et comme l'eschantillon de celles que la vengeance divine luy reservoit en son ire et en sa fureur, pour punition, et merité supplice de tant d'execrables cruautéz qu'il a fait exercer contre les enfans de Dieu et vrayes membres de Jesus-Christ, de sang innocent qui a esté respandu aux Indes et ailleurs, et de meurtres, occisions, saccagemens et depopulations de pays, villes et citez commises par les siens sous son autorité, afin d'assouvir son avarice et son excessive ambition.

Mais laissant decider à de plus speculatifs et judicieux que moy, laquelle de ces deux opinions a plus de vray semblance, je vous diray qu'ayant remarqué en ces instructions secretes plusieurs choses dignes de l'esprit, attention et meditation, non seulement des grands princes, mais aussi de tout administrateur d'affaires d'Estat, j'en envoie une coppie à vostre grandeur, comme je fais au Roy, m'assurant que vous en ferez cas, et vous suppliant de la recevoir autant agreablement, que passionnement je suis vostre fidele serviteur. J'honore vostre pieté envers Dieu, et vostre vertu entre les hommes, et vous demande la continuation de vos faveurs pour le payement entier et par quartier de mes appointemens, estans si modiques qu'ils ne scauroient estre si peu retranchez ou retardez, que les moyens de servir le Roy, avec le soin, la despençe et l'assiduité que requierent les affaires dont il m'a baillé charge, ne me fussent ostez. Attendant donc, avec certitude, les effets accoustumez de vostre bien-veillance, j'invoqueray incessamment l'Eternel, à ce qu'il vous benie et comble de toutes sortes de felicitez spirituelles et corporelles, et me donne le moyen de tesmoigner, par effet, que je suis veritablement, monseigneur, vostre plus humble et plus obligé serviteur.

De Cassel, ce 27 octobre 1598. BONGARS.

*Testament du Roy d'Espagne.*

Prince, me voyant parvenu à la fin des temps ordonnez au ciel pour ma domination en terre, comme vous au premier des ans de la vostre, j'ay estimé que je pourrois estre blasmé, voire accusé de peu de prudence et de jugement, ou de manquement de soin et d'affection en vostre endroit, si je vous laissois, ainsi jeune et peu expérimenté que vous estes, tant de grands Royaumes, Estats, terres et seigneuries en heritage, sans vous donner en mesme temps, les preceptes, advis et conseils, qu'une infinité d'experiences, peines, labours, desseins et pretentions, la

pluspart devenus inutiles, m'ont fait cognoistre (mais trop tard, pour le bien et repos de moy, de mes peuples et de mes voisins) estre du tout necessaires pour rendre une tant importante administration que va estre la vostre (et qui s'estendra sur tant de peuples, langues et nations diverses, si esloignées les unes des autres et separées par de tant grandes et vastes estendues de terre et de mers) sage, equitable et prudente, par consequent toute douce, heureuse et prospere, et beaucoup moins remplie de chagrins, soucis et inquietudes que n'a esté la mienne; de laquelle vous serez un jour obligé, ainsi que je m'en vay estre bien proche maintenant, de rendre compte à celui qui est le Roy des roys, devant lequel toutes excuses, subterfuges et desguisemens sont de nulle valeur, d'autant qu'il cognoist les inclinations, les desseins et les secrets des cœurs des hommes avant qu'ils en ayent conceu les pensées, et qui scait exercer ses jugemens sur les plus grands et puissans monarques de la terre, ainsi que, sans aller rechercher les historiens antiques, j'en sers maintenant de preuve par les extrêmes langueurs où je suis reduit depuis tant de mois, avec des douleurs et accidens tant estranges, que je me suis en supplice à moy-mesme; lesquels je supplie à ce bon Dieu de vouloir bien-tost finir, en m'appellant de la terre dans le Ciel, usant plus favorablement de ses compassions et misericordes que moy et les miens n'avons fait envers une infinité de peuples qui nous en requeroient, et qu'il luy plaise se contenter de mes cruelles peines et cuisantes douleurs presentes, pour expiation et satisfaction de mes fautes passées.

Or, pource que les exemples et les experiences d'autrui, et principalement de ceux que nous honorons, respectons et nous sont ascendans en proximité de lignage, nous touchent plus vivement les sens, et se rendent plus efficaces à l'esprit pour les disposer aux choses excellentes (sur tout au temps des chauds bouillons d'une premiere jeunesse qui ne se pouvoient reduire aux meditations et temperamens requis) que toutes les remonstrances, raisons et belles paroles dont l'on scauroit user, je ne consumeray point le temps en de longues deductions et remonstrances pour vous persuader; mais me contenteray de vous représenter fort sommairement, pour ce que des-jà j'escris ce discours et parle avec beaucoup de peine, ce que j'estime y avoir eu de plus remarquable et instructif en la vie de l'Empereur, mon pere, et de moy, ce qui vous sera comme un tableau de racourcissement pour vous faire voir les traits parfaits, les naturels lineamens et les traces infaillibles

qu'il vous faut suivre, et sur lesquelles vous aurez à former vos desseins et comportements, et conduire vostre vie, afin qu'ils puissent estre rendus honnestes, honorables et utiles, pour vous, vostre Estat, vos peuples et vos successeurs. Dedans cet excellent miroir vous apprendrez qu'il n'y a rien si difficile à regir que les chaudes affections d'une jeunesse ambitieuse et cupide d'honneurs, ny à dompter que l'orgueil d'une haute domination que la fortune carresse et favorise de ses heureux succez; et comme l'Empereur mon pere, se voyant encor en plus bas aage que le vostre, succeder comme vous à tant de couronnes, terres et seigneuries, et en suite avoir esté peu apres, malgré toutes les pratiques et menées des plus grands roys et potentats de la chrestienté, esleu et choisi pour Empereur entre les chrestiens, il devint fort plausible à cet admirable et genereux esprit d'entrer en une specieuse esperance de se pouvoir rendre non seulement monarque d'Europe, mais aussi par la réunion des Estats d'icelle, passer plus outre, comme c'estoit là sa devise, et entreprendre la destruction des infidelles.

Vous apprendrez encor que ce grand prince rencontra, enfin, de telles contrarietez à ses hauts et magnifiques desseins, qu'ils se trouverent mélangez d'autant de hontes, dommages, qu'ils avoient eu de gloire et d'avantage en leur principe; dequoy il conceut de tels chagrins et depits qu'il se resolut de chercher hors des dominations terriennes, entremises, et démeslemens d'affaires du monde, le repos du corps et tranquillité d'esprit qu'il n'avoit peu trouver en icelles. Il se desmit, estant encor fort sain et vigoureux, de tous ses Estats en ma personne, et me donna de tres-bons et salutaires enseignemens, si je les eusse bien sceu mediter, gouter et mettre en usage et pratique en temps et lieu; mais l'audace ambitieuse d'une jeune royauté, que tout le monde flatoit et enflait du vent de milles belles esperances, à laquelle nul n'eust osé dire une verité desagreable; les glorieux succez d'une favorable fortune, et deux batailles gagnées les premieres années de mon regne, m'aliennerent l'esprit, non seulement des enseignemens de l'Empereur mon pere (lesquels me prescrivoient, sur tout, de n'aspirer jamais à la monarchie de la chrestienté, comme chose que l'experience luy avoit appris estre impossible à aucun des roys d'icelle de pouvoir parvenir, à cause des diversitez de religions, qui rend les peuples trop ostinez contre un prince de contraire creance à la leur, les legeretez et inconsistances d'iceux, lesquels leur font desirer les choses nouvelles, et ennuyer des presentes, le

nombre infiny des grandes et fortes villes, et l'aguerrissement universel auquel s'entretiennent toutes les nations de l'Europe), mais aussi de toutes pensées et cogitations pacifiques et tranquilles; tellement que je me jettay soudain dans les hautes mers de toutes sortes d'extravagans et ambitieux projects et desseins, parmy les flots impetueux desquels il m'a depuis esté impossible de pouvoir trouver aucun port, havre, calle ny abry certain, les hautes entreprises, peines et soucis d'icelles s'entresuivant et tirant generation les unes des autres dans mon esprit, ainsi que font les ondes bruyantes de l'Océan, agitées de vents contraires.

Estant maintenant contraint de confesser par la verité des choses, par les succez d'icelles, bien esloignez de mes attentes, qu'apres avoir envié l'Empire à mon oncle Ferdinand, fait vainement toutes sortes de pratiques et menées pour obtenir de luy, qu'à l'exemple de l'Empereur mon pere, il me voulut faire nommer roy des Romains au lieu de son fils Maximilian, aspiré à me faire declarer Empereur du nouveau monde, à m'approprier l'Italie, à dompter mes sujets rebelles des Pays-Bas, à me faire dire roy d'Irlande, à conquerir l'Angleterre, par le moyen de la plus grande et formidable armée navale qui ayt quasi jamais esté veuë, en la composition de laquelle j'ay employé plus de six ans continuels, et consumé plus de vingt millions de ducats, et à faire le semblable du royaume de France, par le moyen de mes intelligences, achetées bien cherement, avec les plus grands et ambitieux esprits d'iceluy fondez sur la faineantise du Roy lors reigning, et des differends allumez pour la religion que j'avois suscitez par le moyen des ecclesiastiques mes pensionnaires, et avoir en tous ces desseins employé trente-deux années de mon âge, consumé plus de six cens millions de ducats en despences extraordinaires qui ont passé par ma connoissance particuliere, et dont vous trouverez les estats escrits de ma main, dans mon cabinet secret, esté la cause du meurtre ou de l'occision de plus de vingt millions d'hommes et de la destruction et dépopulation de plus de provinces et d'estenduë de pays, que je n'en possède en l'Europe, je me trouve n'avoir rien emporté de tant de magnifiques desseins, despences, fatigues et ruines, que le seul petit royaume de Portugal, celuy d'Irlande m'estant eschappé par le peu de foy qu'il y a en ces sauvages, l'innaccessibilité de cette isle et l'ennuyeuse demeure d'icelle, celuy d'Angleterre par un furieux coup de vent, et celuy de France par la legereté naturelle des François, l'incompatibilité de cette nation avec toutes les autres,

et l'admirable vertu et fortune du nouveau Roy, avec lequel j'ay à cette occasion voulu vous laisser en paix, l'Allemagne par les jalousies de mes propres parens, et le tout en general par la volonté absoluë de Dieu qui en avoit ordonné autrement : sur tous lesquels exemples vous enjoignant de mediter soigneusement, Je viendray aux enseignemens que j'ay jugé vous estre plus necessaires, et commenceray à vous faire entendre mes intentions par les choses domestiques qui me touchent maintenant le plus l'esprit.

Premierement, quant à vostre mariage, j'en ay laissé le memoire escrit de ma main et bien cacheté, entre les mains de Loo, lequel vous me ferez plaisir de suivre. Aimez chèrement vostre sœur comme moy, gardez loyalement vostre foy donnée sur les saincts Evangiles, en faveur des avantages que je luy ay faits et à son mary. Faites du bien aux docteurs Ollias et Vergais, qui m'assistent soigneusement en mes maux; aimez Christophe de Mora, lequel m'a esté en tout temps tres-agreable, tres-loyal et tres-utile serviteur, ayant incessamment preferé le bien de mes affaires aux siennes, ce qui est rare en des serviteurs. Si vous vous servez de luy, comme je le desire et vous en prie (quoy que je ne m'y attende pas, d'autant que c'est un des plus grands et plus ordinaires défauts des roys, que d'affectionner peu les confidens de leurs devanciers), vous ferez sagement et vous en trouverez bien. Conservez l'archevesché de Toledé à Garcie Loyolla, et n'y prenez rien dessus si les affaires de la guerre ne vous y contraignent. Ayez soin de tous mes autres serviteurs ausquels j'ay tesmoigné de l'amitié ou de la confiance, et vous gardez de rien diminuer és biens, charges, honneurs et offices dont je les ay gratifiez, car leur dommage tourneroit à ma honte. Essayez de raccommodez Anthonio Perez avec vous, mais ne permettez qu'il demeure en Espagne, en France, ny és Pays-Bas : il sera mieulx en Italie qu'en tout autre pays.

Ayez l'œil sur ceux que vous eslirez pour vos confidens, consellers et secretaires; instruisez vous aux chiffres; voyez toutes les depesches les plus importantes et les responces à icelles, et ne vous en remettez jamais à un seul par negligence de jeter les yeux dessus. N'offencez jamais en l'honneur les gens nobles et courageux, vostre aîné s'en estant mal trouvé; chérissiez et salariez la vertu et les services receus en quelque sujet qu'ils se trouvent; ne meslangez ny ne confondez point la nouvelle et imaginaire noblesse, avec la vraye et ancienne; servez vous de cette-cy, mettez en prix parmy elle la foy, l'honneur et la modestie, et departez à ceux qui auront ces

vertus, les biens, charges, offices et dignitez qu'aurez à distribuer; car encor que les biens et les honneurs, joints à l'illustre extraction, eslevent les courages et fassent quelquesfois naistre des desirs ambitieux, si est-ce que les laschetes, les desloyautez et les trahisons sont plus rares entre telles gens, qu'entre ceux qui sont sortis d'une gent vile et plebee.

Aidez vous des trop amples revenus des ecclesiastiques en vos urgentes necessitez, car l'abondance des richesses les precipite dans les delices et voluptez, et souvent dans l'impieté. Diminuez tant qu'il vous sera possible le nombre des gens d'église, officiers domestiques, de judicatures et pecuniaires, car telles gens consomment la graisse de vos Estats et ne les amplifient jamais de rien; et multipliez le plus que vous pourrez les marchands, laboureurs, artisans, pasteurs et la soldatesque, au nombre de laquelle je comprends la noblesse; car les premiers font peu de despence et enrichissent les provinces, et les derniers, par leur valeur et police militaire, vous feront redouter à vos voisins, defendront vos dominations, maintiendront la paix dans iceux, par le moyen de laquelle florira la marchandise, la manufacture, et abonderont les tresors et les vivres.

Voilà en sommaire pour le dedans de vos Estats; et quant au dehors, entretenez vous bien avec le Pape et les cardinaux; ayez nombre de voix dans le conclave; faites bien payer et par mains secrettes et fidelles vos pensionnaires; mesnagez avec soin et diligence les evesques et prelatz d'Allemagne, et sur tout ceux qui sont electeurs; faites leur payer vos gratifications par vos propres ministres, et que les deniers n'en passent plus par les mains de l'Empereur ny des siens; maintenez vous tousjours neantmoins en amitié avec luy et tous ceux de nostre maison, et en prenez la protection aux occasions. Conservez vous fort soigneusement l'entiere et absoluë navigation des deux Indes, en laquelle vous n'avez à craindre d'estre traversé par la France ny autre royaume chrestien, d'autant qu'ils sont ou negligens de la mer, ou foibles, mais seulement par l'Angleterre et les rebelles des Pays-Bas, qui abondent en toutes choses propres à vous nuire. Changez souvent de principaux ministres et officiers en ces lieux là, de crainte que les richesses, l'autorité et l'esloignement ne leur engendre des pensées ambitieuses à s'y establir pour eux-mesmes. Ne refusez nulles conditions aux rebelles des Pays-Bas, pourveu qu'ils vous veillent reconnoistre à prince : mais en tout cas ne laissez pas d'avoir paix avec eux, s'il y a moyen, afin de les retirer des estroites et

à eux nécessaires alliances de France et d'Angleterre, dont la vertu et la generosité des souverains qui dominent maintenant en ces royaumes là est à craindre, estans joints avec eux.

N'ayez nulles apprehensions d'attaquemens du costé d'Allemagne ny d'Italie, ces pays sont possédez par un trop grand nombre de princes divers, qui ne veulent rien déferer les uns aux autres, estans quasi tous differens en humeurs, affections et interets; ny du costé de la Pologne, quelque ample domination que puisse avoir le Roy d'icelle, car il est trop esloigné de vos Estats, a de trop grands voisins qui l'inquietent, et est plutost officier que seigneur de ses peuples; ny semblablement de la part des roys de Dannemarc et Suede, car ils sont trop reculez et enfoncez dans les mers enfreidurées, marais, paluds, bocages et deserts, sont trop peu pecunieux, et leur gent mal aguerrie et encore pirement disciplinée: mais ayez tousjours les yeux et les pensées tournées vers les isles et mers Britanniques, principalement si une fois, comme l'apparence en est grande, ces trois royaumes s'unissent sous une mesme couronne, sont dominez par un prince remuant et belliqueux, se confederent sincerement avec la France et vos rebelles, et se resolvent en un mesme dessein contre vous; car de ceux-cy avez-vous toutes sortes de dangers à redouter, s'ils entreprennent conjointement de vous attaquer par mer et par terre, car ces trois puissances jointes ensemble abondent en nombre de bons soldats, vaisseaux, argent, munitions et vivres. Et partant n'espargnez argent, offres, pratiques ny industrie pour les separer d'intelligence et diviser d'amitié, vous servant des interets d'Estat que vous fonderiez sur les pretentions des Anglois en la France, et les diversitez de religion. Ne laissez pas neantmoins d'esloigner les anciens espions anglois, lesquels, pour estre à present trop soupçonnez, ne vous scauroient plus de guerres servir, et en pratiquez de nouveaux au lieu de ceux-là.

Deschargez-vous des pensions françoises que les changemens de l'humeur des peuples, la bien-veillance d'iceux que leur Roy s'est acquise, et la paix en laquelle je vous ay voulu laisser avec luy, vous rend du tout inutilles. Que si neantmoins le mespris de ces miens enseignemens (lesquels tendent plutost à conserver et bien assurer ce que vous possédez qu'à l'augmenter) et les inquietudes de vostre esprit vous jettent dans la vanité des conquestes des Estats d'autrui, et disposent à vouloir essayer si vous y serez plus heureux que l'Empereur mon pere ny moy, prenez garde surtout aux mutations, chan-

gemens, mauvais gouvernemens et grande necessité d'iceux, de crainte que si vous ne prenez à propos le temps de leurs divisions ou foiblesses de princes, vous entrepreniez sans fruct et non sans danger.

Lisez souvent ces Memoires et Instructions, aussi celles qui me furent laissées par l'Empereur mon pere, que j'ay ployées et cachetées ensemble, afin que nul ne les voye que vous, et ceux auxquels vous les voudrez communiquer, qui doivent estre peu en nombre. Conferez-les les unes avec les autres, et en examinez les differences et conformitez, afin de vous en servir selon la prudence requise aux occasions, qui est ce que mes douloureux ressentimens des mains, et les inquietudes de mon esprit, à cause des afflictions du corps, m'ont pû permettre de vous laisser par escrit. Vous priant, mon fils, d'aymer et servir Dieu, d'estre sage, et ne mespriser pas mes preceptes, etc.

#### CHAPITRE LXXXVIII.

##### *Continuation des réformes dans les finances.*

Or, reprenant la suite de nos discours touchant les hautes et admirables merveilles des royales oeconomies, politiques, militaires et domestiques de nostre grand Roy, et les loyales et utiles servitudes, obeysances et administrations de vous (que veritablement nous pouvons dire avoir esté celuy d'entre tous ses serviteurs auquel il a tesmoigné une plus universelle bien-veillance et confié le plus de ses secrets), lesquels récits nous avions discontinuez pour faire voir les memoires qui vous avoient esté envoyez des dispositions testamentaires de Philippe II, roy d'Espagne, nous dirons, par forme d'avant-propos et preface à ce chapitre, et qui en servira aussi aux precedens et subsequens, à tous ceux qui trouverront que nous avons avec excez exalté, glorifié et magnifié les excellentes vertus et inclinations du feu Roy, et trop surhaussé ses dits, faits et gestes heroïques, et que nous avons semblablement trop avantageusement parlé de vos utiles et loyales servitudes, obeysances et administrations, que nous les prions, avant que de nous blâmer, de bien prendre nos intentions qui n'ont esté autres, pour le regard de ce grand Roy, que de faire consister sa plus exquise glorification es seules faveurs et benedictions speciales de Dieu, lequel l'avoit choisi pour son bien-aimé et un second Roy selon son cœur, et luy avoit departy toutes les graces et beneficences, tant du corps que de l'esprit, pour le rendre instrument capable de la restauration de

ce royaume, et letablissement des affaires d'iceluy, d'où sont procedées tant de belles et loüables voire admirables inclinations et dispositions de sa personne, de son jugement et de son courage, en l'operation desquelles il le conduisoit comme par la main, et regissoit son esprit par le sien, pour le bien et salut des peuples et nations qu'il avoit mis sous sa domination. Tellement qu'en l'exaltant par tant de loüanges nostre dessein a esté d'en attribuer toute la gloire à Dieu et luy rendre graces de luy avoir esté tant liberal de ses plus exquises beneficences, lesquelles se trouveront telles, si l'on vient à faire comparaison de ses vertus, dits, faits et gestes admirables, avec celles des plus grands monarques de l'univers ausquels Dieu avoit le plus departy de ses faveurs et benedictions temporelles en ce monde, tels que Ninus, Sesostris, David, Salomon, Cyrus, Alexandre, Cesar Auguste, Trajan, Flavius, Constantin, Theodose, Charlemagne, Othon le grand, et en nostre France, Philippe Auguste, n'y en ayant eu un seul de tous ceux-là qui, par sa vertu, ayt surmonté de plus grandes difficultez que celles qu'il a rencontrées en son establissement, se soit trouvé en plus de combats et perils, ayt tesmoigné plus de jugement, de courage et clemence, et autres vertus personnelles, ny auquel il se soit trouvé moins d'imperfections, defauts et manquemens; et que pareillement aussi nos intentions n'ont elles point esté autres en vous donnant tant de loüanges et attribuant tant de belles actions et utiles administrations, industries et dexteritez, que d'en deferer l'honneur et la gloire principale à celuy auquel veritablement elle appartient, qui est nostre grand Roy, sans reserver pour vous que celle d'avoir esté grandement aymé de luy, bien instruit, enseigné et conduit en tout ce que vous avez entrepris, et d'avoir esté choisi comme un esprit et un courage par luy dressé à l'obeyssance et à la loyauté, pour luy servir de principal ministre et instrument en la restauration de son royaume ettablissement des affaires d'iceluy, vous conduisant comme par la main et fournissant d'adviz, instructions, enseignemens, voire mesme memoires necessaires pour vous rendre de facile execution tout ce qu'il vous ordonnoit, commandoit et en quoy il vous employoit; n'estimant point d'apporter diminution aux loüanges que nous vous avons données, mais au contraire, leur donner leurs justes proportions en vous ramenant, et à tous autres aussi, ce que nous vous avons souvent oüy recognoistre et confesser ingenuement : à sçavoir, que ce que l'on remarquoit de plus exquils en la vivacité de vostre

esprit, assiduité au travail, vigilance, diligence, industrie et dexterité en toutes vos operations, procedoit de la bonne nourriture que dés vostre premiere jeunesse vous aviez prise avec luy, et qu'en la pluspart de vos grandes recherches, instructions et inventions, il y avoit plus du sien que du vostre, y en ayant peu sur lesquelles vous n'eussiez receu des ordres, reglemens, ordonnances et commandemens, voire quelquefois des memoires bien amples et bien instructifs. Et partant, comme nous avons rendu graces à Dieu pour ses grandes liberalitez envers le Roy, aussi devons nous tous rendre graces au Roy de vous avoir choisi, et, par son soin, affection, bons preceptes et enseignemens, vous avoir rendu capable de bien et loyalement effectuer ses bonnes intentions et sages commandemens. Et afin que cette grande et cordiale amitié qu'il vous portoit, ne soit trouvée estrange et ne semble incroyable, combien que, par une infinité de lettres à vous escrites de sa propre main, nous en pussions donner de suffisans tesmoignages, nous nous contenterons seulement, tant pour faire voire la sincerité d'icelle que le style dont il vous escrivoit, d'en incerer trois principales que vous trouverez à la fin du chapitre suivant, qui est le quatre-vingt-neufviesme, d'autant que l'imprimeur avoit esgaré la copie desdites trois lettres du Roy à vous.

Or, ayant parachevé de faire les recueils que nous avons estimé à propos de tirer des grands Memoires de vostre vie, en forme de journal, touchant l'année 1598, par tant de choses memorables que nous y avons trouvées, et principalement pource que vous avez sceu, veu et cognu des plus particulieres vertus et bonnes intentions du feu Roy, et de ses dits, escrits, faits et gestes admirables, une grande partie desquelles les escrivains de ces derniers temps enveloppent sous le tenebreux-voile du silence, par malice ou ignorance, aussi bien que les grands et utiles services qu'il a tirez de vous par vostre administration, sous l'obeyssance de ses sages et prudens commandemens, nous continuerons nos discours, et commencerons ceux pour l'année 1599, par les choses que nous avons veuës et cogneuës, qui regardoient les commandemens et instructions du Roy sur l'administration de vostre charge des finances, en laquelle vostre autorité alloit croissant à mesme proportion que vous y preniez davantage d'intelligence, par le moyen des sages instructions que vous receviez du Roy, et que vous vous rendiez loyal et soigneux à bien executer ce qu'il vous ordonnoit, et dont le plus souvent il vous envoyoit des memoires de sa main propre; et cela ferons nous avec des admi-

rations du soin incroyable, merveilleuse industrie, travaux extrêmes et nonpareille diligence, dont, suivant les particuliers commandemens du Roy, vous usastes en la confection de l'estat general des finances pour l'année lors courante, sans craindre qu'il nous puisse estre reproché que nous ayons parlé par excez de zele à vostre service, ou par flatterie et adulation, en magnifiant si hautement tant de sortes d'exactes recherches desquelles vous usastes, afin d'éviter qu'il ne se fit plus doresnavant, en semblables estats, aucune obmission d'aucunes natures de deniers royaux et publics, tant petits, esloignez et cachez pussent-ils estre, de tous les mesnagemens que vous fistes pratiquer, afin de les mettre en leur juste valeur, et de tous les ordres et reglemens que vous establistes pour rendre les distributions de deniers conformes aux destinations, tant pour ceux qui s'acquittent près du Roy et de son sceu, que pour ceux que l'on employe en suppositions de non valeurs, reprises d'estats, reparations domainiales, remises et dons de droits casuels, droits, taxations et attributions d'officiers, payemens de rentes et debtes imaginaires, frais de ports et voictures de deniers, espices, façon et reddition de comptes, en toutes lesquelles choses et plusieurs autres semblables il se commet de grands larcins et brigandages, si l'on n'y prend garde fort soigneusement; vous affermissant sur toutes choses à faire suivre absolument, tant les estats generaux et particuliers que vous aviez diligemment dressés pour les recettes particulieres et generales, et pour l'espargne, que deux certains estats de distribution de recepte sur la despence, et de despence sur la recepte, dont les comptables n'avoient encor jamais esté déjeunés, non plus que de faire faire recepte entiere et reprise aux thresoriers de l'espargne, et leur ostant tous recouvrements et payemens de deniers si tost que vous aviez verifié leurs estats de l'année de leur exercice, en baillant les recouvrements d'iceux à faire à leurs compagnons entrans en charge, et assignant, sur ces reprises, tous les officiers, lesquels, par paresse, malice ou insuffisance, pouvoient avoir esté cause ou avoient pu empêcher telles non valeurs; faisant observer tous ces ordres tant exactement, que nuls comptables, ny mesme la chambre des comptes avec leurs beaux chapitres de remplages de deniers, payables par ordonnance de la chambre, de surhaussement d'espices et de multiplications de comptes, selon la diversité des comptables ou natures de deniers, ne se pouvoient plus reserver aucuns fonds, reculer les payemens des uns pour preferer ceux des autres, ny favoriser en aucune fa-

çon les parens et amis du cœur comme ils nommoient ceux qui estoient les plus amiables compositeurs; bref vous donnastes par tels ordres, expediens et moyens, et autres trop longs à reciter, un tel establissement en l'administration des finances, que les gens de bien et de solide jugement en conceurent une esperance presque certaine de voir la France bien-tost remise en sa splendeur désirée; tellement, qu'à nostre avis, il nous a esté loisible de parler avec admiration de vos labeurs, sans apprehension, comme nous l'avons desja dit, d'estre accusez de trop grande et ennuyeuse cajolerie, puis que la force de la verité nous y contrainst, et que, quand nous nous en tairions par une ingratitude oubliance, les effets et les heureux succez des choses nous le reprocheroient aussi, et que c'est la voix du Roy et celle universelle des peuples qui nous met ces paroles en la bouche, faisant encor en cela tout le contraire de l'écho, laquelle, pour un mot que l'on dit, en prononce plusieurs, où nous d'une grande quantité de loüanges que le Roy et les gens de bien et bons François vous donnoient, nous ne vous en attribuons que la moindre partie.

#### CHAPITRE LXXXIX.

*Suite du même sujet. Marguerite d'Autriche passe en Provence pour aller épouser Philippe III. Mariage de Madame avec le duc de Bar. Lettres de Henri IV.*

[1599] Ayant donc ainsi de vostre propre main, en particulier, dans vostre cabinet (sans aucune ayde que de l'un des clerks de vos secretares, qui escrivoit, chiffroit et calculoit des mieux), dressé et mis au net tous ces estats et reglemens avant que de les monstrer au Roy, vous les voulustes porter au conseil, auquel, lecture en ayant esté faite avec une attention et fort particulier examen de toutes les parties d'iceux par les plus entendus, et sur la suffisance et autorité desquels tous les autres avoient accoustumé de se rapporter entierement, ils se retindrent d'en dire autre chose (quelque despit qu'ils eussent en eux mesmes de voir que vous entrepreniez ainsi de travailler seul sans communication d'aucuns d'eux, et neantmoins si bien qu'ils y trouverent plutost dequoy admirer que sujet d'y rien corriger), sinon que c'estoit grandement bien travaillé à vous, d'avoir ainsi tant escrit de vostre main, et que vos secretares vous en demeuroient infiniment obligez; et combien qu'ils eussent dit tout cela en souriant et par forme de gausserie, si ne se peurent-ils empêcher de dire les uns aux autres, lors que vous en fustes allé



du conseil, comme messieurs de Maïsses et le secretaire Fayet, qui vous estoient amis fort affidés, vous le firent sçavoir, que si en toutes les affaires qui auroient à passer par vos mains, vous les examiniez tousjours tant soigneusement, et les alliez ainsi rechercher dès leurs principes et leurs origines, il ne seroit plus besoin d'y repasser apres vous, ny mesme vous en pouvoir cacher ny deguiser aucunes particularitez, tant petites peussent elles estre. Tellement qu'en suite de tout cela, ayant deux jours apres fait voir et lire ces estats au Roy en leur presence, et Sa Majesté leur ayant demandé s'ils estoient bien dressez, s'ils n'y trouvoient rien à redire, et si vous n'estiez pas l'un des plus assidus et laborieux aux affaires qu'ils eussent cogneus, et les ayant pressez par plusieurs fois de respondre, ils ne se peuvent garantir de dire qu'à la verité ces estats et reglemens estoient fort bien dressez, et que pour un homme qui n'avoit jamais quasi fait autre profession que celle des armes, ils n'en avoient point veu qui écrivissent tant de leur main, ny qui se peussent ainsi soudainement reduire à une vie si fort sedentaire.

Mais, laissant ces discours de vos actions et loüanges particulieres que les seuls ennemis de la vertu pourront trouver trop longs et ennuyeux, nous vous ramentevrons que le lendemain matin le Roy vous envoya le jeune Lomenie, depuis nommé Ravane, pour vous faire voir les lettres que M. de Guyse luy escrivoit, par lesquelles il luy donnoit advis comme Marguerite d'Autriche, fille de l'archiduc de Grets, fiancée au roy d'Espagne, Philippe III, passant pour aller en Espagne, devoit, ensemble l'archiduc cardinal Albert, prendre terre à Marseille ou proche de là, sur les terres de Provence; et partant le supplioit il de luy mander en ce cas quelle reception il luy devoit faire faire, sorte d'honneurs luy rendre et argent y despendre, afin qu'il suivit exactement ses intentions en toutes choses. Surquoy il luy avoit fait responce qu'il receut l'un et l'autre royalement, lequel mot comprenoit tout; mais sans y despendre neantmoins plus de cinquante mille escus au plus, pour lesquels il vous ordonnoit de faire faire le fonds, et d'envoyer un homme expres sur les lieux, soit la Font, ou le petit homme de vostre femme, que vous luy aviez dit estre si bon mesnager et si exact en matiere d'argent, afin de tenir la main à l'employ du sien; à toutes lesquelles choses vous satisfistes sans y envoyer personne, pource que vous y aviez un homme de cognoissance sur les lieux. Mais il ne fut point besoin d'aucune despence, pource que cette princesse, quoy qu'elle se sentit fort fatiguée de la mer, lors qu'elle

avoisina les costes de Provence, si ne voulut-elle entrer en aucune ville de France, mais fit tendre des tentes sur le rivage de la mer, pour se deslasser et y faire dire la messe: auquel lieu M. de Guyse et ceux de Marseille luy furent faire la reverence avec force belles paroles et offres au nom du Roy. L'archiduc descendit peu accompagné dans Marseille, mais il ne fit autre chose qu'entrer en quelques eglises pour y baiser des reliques, et puis s'en retourna trouver la reine d'Espagne, sans avoir voulu entrer en maison, ny boire ny manger dans la ville; et ainsi peu après se rembarquerent-ils pour continuer leur voyage.

Quasi en ce mesme temps furent solemnisées à Paris les nopces de Madame, sœur du Roy, avec M. le prince de Lorraine, ausquelles (dautant que vous aviez esté commis, avec d'autres du conseil du Roy, pour convenir des articles avec les deputez de M. de Lorraine et dresser le contract) il vous fut fait de fort beaux presens par Madame, M. de Lorraine et M. le duc de Bar, lesquels vous fistes aussi-tost presenter au Roy, qui vous commanda de les garder, et y avoit entr'autres choses un cheval d'Espagne richement enharnaché, des plus beaux, du meilleur travail, et des mieux manians qu'il estoit possible.

Ces nopces de Madame et de M. le duc de Bar nous remettent en memoire un conte pour rire que le Roy vous fit, où un de nous se trouva present, touchant un sien frere batard que l'on avoit autres-fois nommé M. de Lectoure, et qui avoit eu depuis peu l'archevesché de Roüen, et M. de Roquelaure, que ceux qui auront comme vous cognu de longue main l'un et l'autre, leurs humeurs et la sorte qu'ils avoient vescu ensemble en toute liberté, ne douteront point de le tenir pour veritable et d'en rire comme faisoit à bon escient le Roy en le vous contant. Que si pour ne vous concerner en aucune façon ny les affaires du royaume, vous le jugez hors de propos ou que vous l'estimiez indigne de ces Memoires, il vous sera facile de l'en oster lors que vous y apporterez vos corrections, comme nous vous supplions de faire en cet endroit et plusieurs autres que nous recognoissons bien en avoir grand besoin. Duquel conte l'occasion se presenta sur le sujet des difficultez qui intervindrent au mariage de Madame, laquelle faisant demonstration de ne vouloir en aucune façon changer de religion, il ne se trouvoit point d'evêques qui voulussent la marier, dequoy le Roy, infiniment en peine, il envoya querir ce sien frere bastard, fait depuis peu archevesque de Roüen, plutost par faveur que pour son grand sçavoir, croyant (veu ce qu'il luy estoit et qu'il

avoit autres-fois esté assez bon compagnon, ayant souvent fait la débauche au jeu, à faire bonne chere et autres choses encor, sur tout avec M. de Roquelaure ) qu'il luy feroit faire tout ce que bon luy sembleroit; mais luy en ayant parlé à bon escient et voyant qu'il ne faisoit pas moins de difficultez que les autres, voire qu'il usoit des mesmes paroles et des mesmes scrupules, en alleguant à tous propos les saints canons, il luy dit : « Voy, mon frere, et de puis quand, je vous prie, estes vous devenu si conscientieux sur toute chose où ma volonté vous est manifeste et en laquelle il y va du bien de mon service et de celui de ma sœur, à laquelle vous devez quelque chose aussi-bien qu'à moy? Je ne sçay d'où vous est provenu cette grande suffisance, et qui vous en a tant appris. Mais, puis que vous faites ainsi l'entendu, afin de ne me fâcher pas davantage contre vous, j'envoyeray vers vous un grand docteur pour vostre pere confesseur, et qui entend merveilleusement bien les cas de conscience. » Et sur cela s'estans separez, le Roy envoya aussitost querir M. de Roquelaure, auquel en arrivant il dit : « Vous ne sçavez pas, Roquelaure, vostre archevesque ( car ce fut vous qui me parlastes le premier de luy bailler Roüen ) veut faire le prelat et le docteur, me venant alleguer les saints canons, où je crois qu'il entend aussi peu que vous et moy, et cependant par ses refus ma sœur demene à marier. Je vous prie, parlez à luy comme vous avez accoustumé, et le faites souvenir du temps passé. — Ha pardieu, Sire, cela ne va pas bien, dit M. de Roquelaure, car il est temps, au moins selon mon opinion, que nostre sœur Catelon commence à taster des douceurs de cette vie, et ne crois pas que d'orénavant elle en puisse mourir par trop grande jeunesse. Mais, Sire, dittes moy un peu, je vous prie, que dit ce bel evesque pour ses raisons, car il en est quelquefois aussi mal garny que je sçarois estre; et m'en vay le trouver, si l'avez agreable, pour luy apprendre son devoir. » Et s'en estant allé de ce pas en son logis, il luy dit en entrant dans la chambre : « Hé quoy! que veut dire cecy, mon archevesque? L'on m'a dit que vous faites le fat; mais, pardieu, je ne vous le souffriray pas, car il yroit trop de mon honneur, puis que chacun dit que je vous gouverne. Ne sçavez vous pas bien qu'à vostre priere je me rendis vostre caution vers le Roy, lors que je luy parlay pour vous faire avoir l'archevesché de Roüen? Or ne me faites pas trouver menteur, en vous opiniastrant ainsi à faire la beste; cela seroit bon entre vous et moy,

« qui nous sommes veus quelquefois ensemble aux brèches raisonnables et les dez en la main, mais il s'en faut bien garder lors qu'il y va du service du maistre et de ses absolus commandemens. — Hé, vray Dieu! que voulez-vous que je fasse? dit M. de Roüen. Quoy! que je me fasse moquer de moy et reprocher par tous les autres prelates une action où chacun dit qu'il y va grandement de la conscience, n'y ayant eu evesque auquel le Roy n'en ayt parlé, et qui ne l'en aye aussi-tost refusé? — Ho! morbieu, ne le prenez pas-là, dit M. de Roquelaure, car vous et eux sont choses bien diverses, car ces gens s'alambiquent tellement le cerveau apres le grec et le latin, qu'ils en deviennent tous fous; et puis vous estes frere du Roy, obligé de faire tout ce qu'il commandera sans opposition, ne vous ayant pas choisi ny fait archevesque pour le sermonner, ny luy apprendre ou alleguer les canons, mais pour luy obeyr en toutes choses où il yra de son service. Que si vous faites plus le fat et l'accariastre, je le manderay à Jeanneton de Condom, à Bernarde l'Esvellée et à maistre Jullien, m'entendez-vous bien? et partant ne vous le faites pas dire deux fois, puis que rien ne vous doit estre si cher que les bonnes graces du Roy, lesquelles et mes sollicitations vous ont mieux valu que tout le latin ny le grec des autres. Pardieu! c'est bien à vous à faire à parler des saints canons, où vous n'entendez que le haut allemand. — Vous ne serez jamais las de gausser en parlant à moy, dit M. de Roüen : cela estoit bon en mes jeunes ans, et en des choses de neant; mais en chose si serieuse comme celle-cy, où il y va de mon salut, il faut parler de sens rassis et sans se moquer, car quoy que j'estime l'honneur des bonnes graces du Roy autant que ma vie, si m'est paradis encor plus cher que l'un ny l'autre. — Comment morbieu, paradis, dit M. de Roquelaure, et estes-vous si aze que de parler d'un lieu où vous ne fustes jamais, ne sçavez quel il y fait, ny si vous y serez receu quand vous y voudrez aller? — Oui, si j'y seray receu, dit M. de Roüen, n'en doutez nullement. — C'est bien discouru à vous, dit M. de Roquelaure, car, pardieu, je tiens que paradis a esté aussi peu fait pour vous que le Louvre pour moy. Mais laissons un peu là vostre paradis, vos canons et vostre conscience à une autre fois, et vous resolvez à mairier Madame, car si vous y manquez, je vous osteray trois ou quatre mechans mots de latin que vous avez à toute heure à la bouche, et plus n'en sçait ledit déposant, et puis adieu la croce et la mitre, mais qui pis est cette belle

« maison de Gaillon et dix mille escus de rente. » Ils eurent encor d'autres discours trop longs à reciter, lesquels se terminerent en telle sorte, que M. de Roüen se resolut de marier Madame comme il a esté dit.

*Lettre du Roy à vous.*

Mon amy, je suis bien marry de vostre affliction, laquelle je viens d'apprendre par celle de M. du Laurens, auquel j'ay commandé de vous aller trouver en diligence, et apporter tout ce qu'il sçait et est de son art pour la conservation et santé de vostre fils, ne vous aymant pas si peu que si je pensois que ma presence y fut necessaire, que je ne vous allasse rendre ce tesmoignage de mon affection. Hier je vous avois dépesché un courrier, par lequel je vous mandois de vous rendre icy avec monsieur le chancelier, demain ou mercredi au plus tard, pource que je voulois avoir vostre avis sur quelques dépesches apportées par sainte Catherine, du president Jeannin; mais la maladie de vostre fils fait que je trouve bon que vous differiez vostre parlement encore pour deux jours, voire davantage s'il en est de besoin, ce que vous ferez entendre à monsieur le chancelier, comme aussi je luy escrïs. Adieu, mon ami. HENRY.

*Autre lettre du Roy à vous.*

Mon amy, je ne pensois vous dépescher mon cousin de Rohan qu'à ce soir; mais ayant appris de ma femme, au retour du promenoir, que madame de Sully estoit accouchée d'un fils, j'ay hasté son parlement pour vous asseurer que, comme je crois que nul de mes serviteurs n'a eu plus de joie de la naissance de mon fils d'Anjou que vous, aussi veux-je que vous croyez que je surpasse en ayse tous vos amis de la naissance de vostre fils. Vous aurez bien la teste rompüe de cajoleries, mais l'assurance de mon amitié vous sera plus solide que toutes leurs paroles. Je fais icy mes recommandations à l'accouchée. Renvoyez-moy M. de Rohan demain au matin.

HENRY.

*Autre lettre du Roy à vous.*

Mon amy, puis que ma presence est necessaire avec mon conseil, comme je vois par vostre lettre, je partiray demain, iray coucher à Essone, et jeudy je seray à Paris. Quant à ce que vous me mandez que lors que vous servez le mieux, c'est à cette heure-là que l'on juge sinistrement de vos actions, c'est chose qui arrive, je ne diray pas souvent, mais tousjours que ceux qui manient les grandes affaires sont sujets à cela, et plus par envie que par pitié;

vous sçavez moy-mesme si j'en suis exempt et d'une religion et d'autre. Ce que vous avez à faire, c'est comme je prens conseil de vous en toutes mes affaires, vous preniez conseil de moy aux vostres quand elles importeront tant soit peu, comme du plus fidelle amy que vous ayez au monde, et du meilleur maistre qui fut jamais.

HENRY.

CHAPITRE XC.

*Oppositions du clergé et des parlemens à la publication de l'édit de Nantes. Rosny obtient que les Protestans consentent à des modifications.*

Le royaume de France sembloit lors entiere-ment pacifié, n'eust esté les reglemens qui estoient à faire touchant ceux de la religion, ausquels on commença de travailler par l'édit de Nantes, lequel fut présenté aux Cours souveraines pour y estre verifié. Sur lequel lesdites Cours, tant de leur propre mouvement qu'à l'instigation des deputez de l'assemblée du clergé de France, qui se trouvoit encor lors sur pied à Paris, du recteur de l'Université, de la Sorbonne et autres zelex catholiques, firent de grandes difficultez sur plusieurs articles; des particularitez desquelles sollicitations, poursuites, remises, refus, contestations et debats, nous en laisserons la deduction aux historiens, reservé celles qui se passerent touchant l'article des assemblées synodales, de l'entremise duquel il vous fut impossible de vous exempter absolument, comme vous aviez fait de tous les autres; car, comme tous les susnommez opposans virent que, par cet article, il estoit permis à ceux de la religion de tenir telles assemblées en tel lieu, en tel temps et toutes les fois que bon leur sembleroit, sans en demander permission au Roy ny à ses magistrats, et que les ministres et docteurs des princes et pays estrangers y pourroient estre admis, comme, au semblable, ceux de France aller en tous synodes estrangers, le parlement en vint faire de grandes plaintes au Roy, luy remontrant qu'en cela son autorité royale estoit grandement lezée, ses magistrats mesprisez, le royaume privé de ses anciens droits, et la liberté donnée à ses sujets, d'aller faire telles menées et pratiques hors de France, qu'il leur plairoit, et aux estrangers de faire le semblable en France; que la tolerance des juridictions ecclesiastiques n'avoit desja que par trop enervé la royale; que si l'on n'eust trouvé le remede des appels comme d'abus des entreprises des juges, clerics, il ressortiroit plus d'appellations aux

sieges metropolitains et à Rome qu'en tous les parlemens de France; mais qu'encor s'estoient tousjours les roys reservé ce droit, que de pourvoir aux éveschez, abbayes et autres principales dignitez de l'Eglise, et de ne leur souffrir faire aucunes assemblées sans permission, esquelles nuls prelatz estrangers, residans hors le royaume, n'estoient jamais admis.

A toutes lesquelles plaintes et remonstrances s'adjoignirent les deputez de l'assemblée du clergé de France, le recteur et la Sorbonne et autres ecclesiastiques, y adjoustant que ce seroit donner de plus amples et favorables privileges à ces nouveaux predicans, qu'à toute l'ancienne Eglise catholique, apostolique et romaine, et plusieurs autres raisons trop longues à deduire, pour lesquelles ils supplioient Sa Majesté de revoquer absolument cet article, et ne luy sembler point estrange, s'il se trouvoit accompagné par eux de continuel refus et oppositions. Lesquelles plaintes considerées par le Roy, il leur dit ne sçavoir pas bien comment cet article tant important avoit esté ainsi passé sans difficulté dans l'edict, ne se souvenant point que l'on luy en eust parlé en aucune façon, comme il avoit ordonné estre fait de tous articles nouveaux ou importants; qu'il s'enquerroit de tout cela, et leur en rendroit responce, ou y pourvoiroit avec une telle dextérité et prudence qu'ils auroient sujet de contentement; et sur cela s'estans retirez, le Roy vous envoya querir et vous conta tout cela. Et voyant que vous trouviez cet article tres-mauvais, y remarquiez les mesmes inconveniens cy-dessus, et de plus qu'il estoit grandement pernicieux à tous les gens de bien de la religion, dautant que c'estoit former un pretexte tres-specieux pour les accuser de faire des brigues hors le royaume avec les estrangers, par le moyen de ceux qui se trouveroient aux synodes hors d'iceluy, et dans le royaume, par les estrangers qui viendroient aux synodes de France; toutes lesquelles raisons par vous alleguées estans bien prises par le Roy, il vous commanda de n'en parler en aucune façon, ny faire le moindre semblant qu'il vous en eut rien dit, dautant qu'il vouloit que vous vous trouvassiez en une assemblée, qu'il ordonneroit ce faire, de tous les plus qualifiez et autorisez de la religion, afin d'y représenter les inconveniens de cet article, et leur faire consentir la reformation d'iceluy; auquel lieu vous prenant l'affirmative pour ce qui estoit du bien de son service, il ne doutoit nullement que vos raisons et vostre autorité n'y servissent grandement. A toutes lesquelles choses vous obeystes.

Le Roy envoya aussi querir (au moins comme

il nous semble) messieurs de Schomberg, president de Thou, Calignon et Jeannin, qui avoient esté par luy commis pour traiter avec ceux de la religion, se plaignant avec quelque espece de reproche qu'ils eussent passé un article tant important et duquel tout le clergé se tenoit tant offensé, si facilement et sans luy en avoir parlé en aucune façon: dequoy messieurs de Schomberg et de Thou, qui estoient les deux plus autorisez, ne rendirent autre raison, sinon que messieurs de Bouillon, de la Trimouille, du Plessis, leurs ministres et deputez de ceux de la religion, l'avoient tellement oppiniasté, voire usé de telles protestations de se retirer et de n'accepter nullement l'edict s'il ne passoit ainsi, qu'ils avoient jugé (en l'estat auquel estoient pour lors les affaires de France, la paix d'Espagne n'estant pas encor assurée) plus à propos de l'accorder que de rompre, pour rejeter le royaume dans ses anciens desastres, voyant et des catholiques et des huguenots, quoy que diversement intentionnez, qui ne laissoient pas de tendre à cette mesme fin: ce qu'estant représenté par le Roy au scindic du clergé, nommé, ce nous semble, M. Berthier, et que les sieurs de Schomberg, de Thou et Jeannin, estans de tout temps bons catholiques, il les avoit laissé faire, croyant qu'ils ne manqueroient pas d'avoir soin des choses qui concerneroient la religion et l'Eglise.

A quoy le sieur Berthier respondit, comme tout en colere, que quand l'on avoit allegué les mesmes choses dans l'assemblée du clergé, plusieurs d'icelle des plus zelez avoient dit qu'il ne se falloit pas estonner du peu de soin que tels deputez avoient eu des choses que Sa Majesté avoit dites, veu que tout le monde sçavoit bien qu'ils estoient catholiques au gros grain, y ayant fort long-temps que nul d'eux ne prioit nullement les Saints et mesme ne s'agenouilloit plus devant l'image de la Vierge, ny la croix, et ne croyoient point les indulgences, le merite des bonnes œuvres, les prieres pour les morts, le purgatoire, les pelerinages, ny les jeusnes par distinction de viandes; et partant supplioit Sa Majesté, au nom de tout le clergé de son royaume, comme bonne catholique qu'elle estoit, et croyant toutes ces choses qui estoient de la foy de l'Eglise, de vouloir prevenir le scandale d'un tant pernicieux article, sans plus déferer aux fantaisies de ceux qui s'estoient rendus tant faciles, lesquels il avoit deputez pour faire cet edict, puis qu'ils estoient reputez de plusieurs pour croire aussi peu à la messe qu'au presche. A quoy le Roy luy assura de rechef, de travailler en sorte qu'il donneroit sujet de contente-

ment de toutes parts, si tous se rendoient capables de la raison.

Le lendemain vous vous trovastes en l'assemblée generale qui fut faite de tous les plus qualifiez de ceux de la religion qui fussent lors à Paris, en laquelle vous aviez esté prié le jour devant, croyant peut-estre que vous les en refuseriez comme les autres fois, tellement que M. de Bouillon vous dit en entrant: « A ce que je voy, monsieur, nous aurons enfin le bien que vous nous aviez tant desnié, qui est de vous voir parmy nous au démeslement de nos affaires, et devons croire, puis que vous avez pris cette peine, que ce n'est pas sans sujet. » A quoy vous luy respondites que les autres fois vous estiez tellement empesché à la confection des estats des finances que vous n'aviez eu moyen de vacquer à nulles autres affaires; mais qu'estant maintenant parachevez, vous aviez usé de ce loisir pour leur tesmoigner vostre affection à la religion et au service d'eux tous, sans autre dessein quelconque, ne sçachant pas mesme pourquoy vous aviez esté prié en cette compagnie. « Nous le croyons comme vous le dites, » repartit M. de la Trimouille; mais quelque sujet que ce soit qui vous ait amené icy, la compagnie le tient à faveur. » Puis changeant de discours, messieurs de Mouÿ, de Clermont et de Sainte Marie du Mont, entre lesquels vous estiez assis, vous dirent: « Monsieur, n'aurez-vous point desagreable que nous desirions sçavoir si vous n'estes pas informé des causes de cette assemblée? » A quoy leur ayant respondu que non, ils repartirent que si estoient bien eux, et que c'estoit pour un article que l'on avoit fait glisser dans l'edict, lequel estoit desaprouvé de la pluspart d'eux tous, et n'estoit maintenu que par messieurs de Bouillon, de la Trimouille, du Plessis et quelques autres par eux pratiqués, lequel, à ce qu'ils avoient appris, estoit de l'invention du premier, afin que son eglise de Sedan pût estre du corps des eglises de France, sans prejudicier à ses pretentions d'estre prince estranger, comme il estoit apres, à ce qu'ils avoient appris, à mettre Sedan en fief d'Empire, afin de se titrer et prendre le rang de prince de l'Empire sans dispute d'aucun, voyant que non seulement les ducs et pairs, mais aussi les mareschaux de France, lors qu'ils estoient ses anciens, le vouloient preceder; mais que tout cela estant maintenant trop divulgué entre eux, il n'auroit pas beaucoup de voix pour maintenir son article. Sur lequel ayant esté opiné, vos raisons furent prises de bonne part et conclud qu'il le falloit reformer, comme il fut fait, et plusieurs autres encor avant que cet edict pust estre veri-

fié; y ayant des esprits malicieux aussi-bien d'entre les huguenots que les catholiques, lesquels sous-main faisoient tout ce qu'ils pouvoient pour le faire absolument refuser, afin qu'il servit de sujet pour rejeter la France dans les malheurs des guerres civiles dont elle ne faisoit que sortir. Mais le Roy apporta contre toutes ces mauvaises pratiques tant de belles paroles, tant de bons effets de prudence et de fermeté d'esprit, qu'il surmonta toutes telles difficultez, dont nous laissons les particularitez aux historiens, à cause que le recit en seroit trop long.

## CHAPITRE XCI.

*Conférence sur la religion tenue en présence de Madame, sœur du Roi. Mort de plusieurs personnes de distinction, entre autres, de la connétable de Montmorency, et de la duchesse de Beaufort. Rosny console Henri IV.*

La difficulté que faisoient plusieurs prelatz de marier Madame tant qu'elle seroit de sa religion, fut cause qu'en ce mesme temps il se fit une dispute de religion en sa presence, entre un docteur nommé du Val et un ministre appelé Tilenus; mais tout cela (comme c'est l'ordinaire de telles contentions) demeura inutile, chacun des disputeurs interpretant tousjours à son avantage tout ce qui se passoit, et le publiant ainsi par tout. Vous arrivastes sur la fin de la dispute, et comme les uns et les autres vous voulussent conter ce qui s'estoit passé, vous les suppliastes de ne prendre point cette peine, ny de s'entre-mettre jamais de disputer de la religion, que la Sainte Escriture ou cet amas de livres escrits par tant de docteurs, tous les canons des papes et tous les registres des conciles, qui s'accordoient comme chats et rats, n'eussent esté supprimez ou bien conciliez. Il se passa plusieurs discours là dessus entre tous ceux qui estoient là presens, trop longs à reciter et de peu d'utilité; et partant nous les passerons sous silence, pour vous ramentevoir que, durant le cours de cette année, il mourut plusieurs personnes de qualité en France, comme l'archevesque de Lyon, nommé d'Epinaç, homme de grand esprit, et qui avoit esprouvé en sa vie toutes les sortes de fortunes, bonnes et mauvaises, messieurs de Chiverny, chancelier de France, de Schomberg, des premiers au conseil des finances, et d'Incarville, controoleur general d'icelles, par la mort desquels et des vertigots ordinaires du sieur de Sancy, vous demeurastes seul en l'administration des finances; mademoiselle de Bourbon, madame la duchesse de Beaufort et madame la con-

nestable, de la mort desquelles deux dernières il a esté fait de grands et forts divers discours, les plus malicieux disans, que s'estans addonnées toutes deux à la magie pour parvenir aux hautes dignitez où l'une estoit montée et l'autre esperoit de bien tost parvenir, le maistre de cette science les estoit venu visiter à leur fin; cette opinion en partie fondée sur les estranges accidens ausquels elles tomberent quasi esgallement pendant leurs maladies de peu de jours et en leur mort, lesquels leur avoient tourné la face et tous les traits du visage s'en-devant derriere et s'en-dessus dessous, et herissé les cheveux de telle sorte, qu'ils avoient rendu ces beautez, estimées les plus excellentes de leur temps, non seulement laides, mais tellement difformes qu'elles faisoient horreur à regarder.

Et se fait par les medisans un conte de la dernière (que l'un de nous a neantmoins ouy affermer pour veritable à trois dames de qualité, du nombre de plusieurs autres que cette connestable avoit priées à une assemblée qui se faisoit chez elle), à sçavoir, que comme elle estoit causant et devisant, en apparence fort joyeuse, avec les susdites dames et autres, une de ses femmes luy vint dire qu'il estoit effrontément entré dans sa chambre un grand gentil-homme d'assez bonne mine, mais de teint et poil fort noir, qui demandoit de parler à elle, disant avoir des choses pressées et de grande consequence à luy dire, et prié que l'on la vint querir. Duquel message demeurant comme toute esperduë et interdite, elle ne laissa pas neantmoins d'ordonner à sa femme de chambre d'aller dire à cet homme qu'il s'en allast et revint une autrefois, d'autant qu'elle ne pouvoit pas quitter la compagnie; mais que l'autre n'ayant pas pris ces excuses en payement, et luy ayant mandé qu'elle ne faillit pas de venir, sinon qu'il l'iroit querir, elle se resolut d'y satisfaire, et pour cet effet s'en vint avec un visage quasy demy mort separer la compagnie, prenant pour excuse qu'elle se trouvoit infiniment mal; et en quittant ces trois dames, ses intimes amies, elle leur dit adieu avec les larmes aux yeux et des paroles comme si elle eut desesperé de sa vie et de les voir jamais plus, ainsi qu'il advint, car elle mourut fort peu apres en la sorte qu'il a esté dit, n'ayant esté que trois ou quatre jours malade.

Mais laissant ces vaudevilles, soient vrais, soient faux, courir à leur mode, nous nous reduirons, pour le regard de madame la duchesse de Beaufort (car de l'autre ne vous en avons-nous pas oüy dire de grandes particularitez), à ce que vous nous en avez conté, tout le surplus n'estans que deviner, nous vous ramentevrons que cette dame

ayant peu à peu, par la sugestion d'aucuns siens parens et alliez pleins de vanité et d'ambition (car d'elle mesme elle n'avoit pas l'esprit assez vif ny relevé pour tant presumer de sa personne), pris des esperances de pouvoir parvenir à des couronnes et diademes pour elle et ses enfans, la curiosité de sçavoir ce qui estoit caché dans l'advenir, luy faisoit rechercher (comme la foiblesse de l'esprit des femmes est ordinairement susceptible de telles vanitez et choses frivoles) toutes sortes d'expediens et de personnes que l'on luy disoit estre propres à un tel dessein: enquoy elle faisoit souvent de fascheuses rencontres et recevoit des responce fort esloignées de ses eminentes pretentions, les uns luy disant qu'elle ne devoit jamais estre mariée qu'une seule fois, les autres qu'elle mourroit assez jeune, les autres qu'un enfant luy feroit perdre le fruit de ses esperances, les autres qu'une certaine personne qui luy estoit fort familiere luy joueroit un mauvais tour, et tous en general qu'ils ne voyoient ny marques, ny signes, ny en sa nativité, ny es lignes et lineamens de sa personne qui la destinassent à porter ny sceptres, ny couronne royale, ny mesmes aucuns enfans venans d'elle: ce qui l'affligeoit de telle sorte qu'une certaine Gratiennne qui la servoit, vous a dit qu'elle ne faisoit que pleurer et soupirer toutes les nuits sans qu'elle en pust deviner la cause.

Or, quoy que cette dame fust ainsi agitée de tels soucis et fantaisies, et outre cela fort grosse et fort incommodée de sa grossesse, si ne laissa elle pas neantmoins de vouloir aller avec le Roy à Fontainebleau vers la fin du caresme. Mais comme luy vit les festes approcher, et que s'il la retenoit pres de luy et en ses jours de devotion, cela pourroit apprestre à parler, voire apporter du scandale aux plus scrupuleux, il luy commanda de s'en aller faire ses Pasques à Paris, pendant qu'il feroit les siennes aux champs, et la voulut conduire quasi à moitié chemin, où en se separant il se fit de part et d'autre autant de complimens, de mysteres et ceremonies que s'ils eussent bien sceu qu'ils ne se devoient jamais plus revoir, voire elle en partant, et ayant les larmes aux yeux, luy recommanda son Cesar, son Alexandre et sa Henriette, ses bastimens de Monceaux et ses pauvres serviteurs; ce qui attendrit tellement le cœur du Roy, qu'il ne se pouvoit quasi tirer d'entre ses bras, voire fallut que M. le mareschal d'Ornano et messieurs de Roquelaure et de Frontenac les vinsent separer et le ramener à Fontaine-bleau.

Il nous seroit facile d'amplifier grandement ces discours et de choses encor beaucoup plus émerveillables que ce que nous en avons dit cy-

dessus, si nous voulions vous ramentevoir, non pas tout ce qu'une certaine femme nommée la Rousse et son mary (lesquels avoient long-temps servy cette dame, et que vous avez gardez six ans prisonniers à la Bastille, pour avoir parlé trop librement des actions et vie d'icelle) vous en avoient dit, car vous le teniez secret, mais seulement ce qu'elle en contoit à nous autres lorsque nous luy voulions donner audience (car c'estoit toute sa delectation que de pouvoir trouver qui la voulust escouter là dessus). Mais le respect de cette dame, de ses enfans et parens, la memoire de l'amitié que le Roy luy a portée, et l'animosité que cette Rousse et son mary tesmoignoient contr'elle, qui nous rend suspect de fausseté la pluspart de ce qu'ils en disoient, nous impose silence, et nous fait contenter de vous ramentevoir comme elle estant revenuë à Paris, et vous ayant fait partie avec madame la princesse d'Orange et autres personnes qualifiées d'aller faire la cene à Rosny, pour leur montrer les desseins de vos bastimens qui s'avançoient fort, par le moyen des dix mil escus que le Roy vous avoit donnez au voyage de Bretagne, vous estant allé dire adieu à cette duchesse avant vostre partement, laquelle estoit logée chez le sieur Zamet, elle vous fit bonne chere, vous pria instamment d'oublier toutes les broüilleries qui s'estoient passées entre vous, comme elle vous protestoit d'avoir fait de son costé, de la vouloir aymer et d'affectionner ses interests comme de celle que vous trouveriez tousjours pour estre la meilleure et plus assurée de toutes vos amies; qu'elle avoit tousjours grandement estimé vostre vertu, mais qu'outre cela vos grands et utiles services rendus au Roy et à l'Estat l'obligeoient plus que jamais à vous procurer tout bien et honneur pour des raisons qu'elle vous diroit à vostre retour, sa resolution estant de ne faire plus rien sans vos bons conseils et advis. Vous luy usastes de plusieurs civilités, submissions et remerciemens, sans neantmoins faire aucun semblant de vous douter de ce qu'elle vouloit dire, quoy que vous ne l'ignorassiez nullement, ne vous estant jamais peu entrer en l'esprit, comme vous nous l'avez souvent dit (veu les agitations où vous aviez souvent veu entrer celui du Roy, qui tousjours combattoit entre l'honneur et l'amour, et la difference qu'il y avoit de sa gloire acquise à la honte qu'il recevroit d'un tel mariage, vous en parlant tousjours en ces termes lorsqu'il vous entretenoit en particulier là dessus), que les hautes esperances de cette dame peussent jamais réussir; joint à ces difficultez la résolution que la reine duchesse de Valois tesmoignoit d'avoir prise, suivant trois

lettres qu'elle vous en avoit escrites, d'empescher formellement ce dessein. Vous ne laissastes pas, nonobstant ces opinions, d'envoyer madame vostre femme, lorsque vous fustes prest à partir, prendre aussi bien que vous congé de cette duchesse, laquelle luy fit pareillement fort bonne chere, l'assurant que vous estiez tous deux en tres-bonne intelligence ensemble, et qu'elle la vouloit aymer et affectionner comme sa meilleure amie, la priant aussy de la vouloir aymer, de vivre librement avec elle, et de venir à son lever et à son coucher quand bon luy sembleroit. Et s'estans separées de cette sorte apres plusieurs autres pareils complimens, madame vostre femme vous conta tout cela, et vous demanda que vouloit dire la harangue de cette femme, et si elle estimoit qu'elle fust si beste que de tenir à honneur la liberté qu'elle luy avoit donnée d'aller à son lever et à son coucher, qui estoit tout ce qu'elle pourroit faire, veu vostre qualité, envers une reine de France pleine d'honneur et de vertu. A quoy vous respondistes que vous sçaviez bien ce qu'elle vouloit signifier par ces langages, et que vous luy en diriez une autre fois davantage, mais qu'elle se gardast bien, en attendant, d'en parler à personne ny de dire ses sentimens là dessus, sur tout à la princesse d'Orange, qui s'imaginoit y avoir de grands interests, et qu'elle verroit un beau jeu et bien joué si la corde ne rompoit; mais que pour vostre opinion celle des autres ne succederoit pas comme ils s'estoient imaginez.

Le lendemain vous vous en allastes à Rosny, où deux jours apres, un matin, quelque peu avant le jour, qui estoit le samedy de Pasques, comme vous devisiez avec madame vostre femme, luy parlant de ce mariage, et commenciez à luy dire ce que vous en estimiez, les grands obstacles que vous prevoyez à son accomplissement, et les inconveniens et desastres dont il seroit infailliblement suivy s'il se faisoit, vous entendistes fort sonner la cloche de la porte, laquelle avoit une corde qui passoit de là les fosses, et une voix peu apres qui crioit incessamment *de la part du Roy, de la part du Roy*, ce qui vous fit mettre la teste à la fenestre pour appeller de vos gens, afin d'aller abaisser le pont et ouvrir la porte. Ce qui ayant esté fait, et vous estant descendu en bas avec vostre robbe de nuit, il entra un courrier qui vous dit comme tout esmeu : « Monsieur, le Roy ne vous escrit point, mais « m'a commandé de vous venir trouver toute la « nuit pour vous dire de sa part que vous ne « failliez pas, si vous luy voulez jamais faire « plaisir, d'estre aujourd'huy à Fontaine-bleau. « — Jésus, mon amy, luy dites vous, le Roy est-

« il malade? — Non, monsieur, respondit le « courrier, mais il est le plus fasché et ennuyé « que je l'aye jamais veu pour quelque accident « qui luy soit arrivé, car madame la duchesse « est morte. — La duchesse est morte! luy dites- « vous, et comment cela? De quelle maladie si « prompte a elle esté atteinte? Eh! comment le « sçais tu? Je te prie, monte à ma chambre, « d'autant que je me morfonds icy, et en des-jeu- « nant (car je crois que tu as bon appetit), tu « me conteras toute cette histoire. » Et lors estant venu retrouver madame vostre femme au lict, en la baisant vous luy dites : « Ma fille, il y a bien « des nouvelles; vous n'irez point au coucher ny « au lever de la duchesse, car la corde a rompu : « mais puisqu'elle est veritablement morte, Dieu « luy doint bonne vie et longue. Voila le Roy « delivré de beaucoup de travaux d'esprit parmy « tant d'irresolutions dont il estoit agité. Mais es- « coutons les particularitez que nous en peut dire « ce courrier. — Je les sçais toutes, monsieur, « repartit-il, car j'ay passé par le logis de ma- « dame la duchesse, où j'ay trouvé M. de la Va- « renne merveilleusement affligé, lequel m'a tout « conté, se doutant bien que vous vous en infor- « meriez, pource qu'elle luy avoit dit, il n'y avoit « pas six heures, lorsqu'elle estoit tombée malade, « beaucoup de bien de vous, et assuré que vous « estiez maintenant en bonne intelligence; et « neantmoins craignant que je n'en oubliasse « quelque chose, il m'a baillé une lettre où il « m'a dit qu'il vous en fait tout le discours. » La- quelle vous ayant mise en main vous y leustes ce qui s'ensuit :

*Lettre de M. de la Varenne à M. de Rosny, sur  
ce qui s'est fait et passé en cette mort.*

Monseigneur, ne doutant point que vous ne soyez en peine de sçavoir toutes les particu- ritez qui se sont passées touchant madame la duchesse (et ce avec raison, car elle vous aymoît et estimoit plus que seigneur de France), je vous diray que s'estant separée du Roy, environ à moitié du chemin de Fontaine-bleau à Paris, avec plus de demonstration de passion amoureuse et de regrets l'un pour l'autre que jamais, voire avec des paroles telles que s'ils eussent deslors jugé qu'ils ne se devoient jamais plus voir, comme je l'estime bien maintenant, le Roy me commanda de l'accompagner, et de la mener loger chez M. Zamet, comme je fis. Et le len- demain, qui estoit le jeudy absolu, apres qu'elle eut bien disné, et de fort bon appetit, car son hoste l'avoit traittée de viandes les plus friandes et delicates et qu'il sçavoit estre le plus selon son

goust, ce que vous remarquerez avec vostre pru- dence, car la mienne n'est pas assez excellente pour presumer des choses dont il ne m'est pas apparu, elle s'en alla oüyr tenebres au petit Saint Anthoine, où il se fait tous les ans, à mesme jour, un des plus excellens concerts de musique qui se puyssent oüyr, durant lequel il luy avoit pris quelques ébloüyssemens qui l'avoient fait revenir plutost qu'elle n'avoit deliberé au logis dudit sieur Zamet. Auquel lieu, pendant qu'elle se promenoit dans le jardin, elle avoit esté sur- prise d'une grande apoplexie, qui, dès l'heure mesme, l'avoit pensé suffoquer : de laquelle es- tant un peu remise, elle n'avoit eu autre parole, sinon que l'on l'ostast promptement de ce logis, et que l'on la portast en celui de madame de Sourdis, au cloistre Sainct Germain (ce que l'on avoit esté contraint de faire, à cause de la pas- sion extrême qu'elle tesmoignoit avoir de deslo- ger du logis du sieur Zamet, et aller en l'autre), où elle ne fut pas si tost arrivée que s'estant mise au lit, elle n'eust des redoublemens de son premier accez tellement frequens, que je me re- solus d'en advertir le Roy, et de lui mander que tous les medecins doutoient fort de sa vie, sur tout à cause qu'estant fort grosse l'on ne pouvoit pas user de remedes proportionnez à la violence du mal; mais que depuis, la voyant tellement empirée et changée, qu'il n'estoit nullement à propos que le Roy la vist ainsi defigurée, de crainte que cela ne l'en dégoutast pour jamais, si tant estoit qu'elle pust revenir à conva- lescence, je me suis hazardé, tant pour cette raison que pour éviter les trop grands regrets et des- plaisirs du Roy, s'il eust veu tant souffrir une creature qu'il avoit si fort aymée, de luy escrire que je le suppliois de ne venir point, d'autant qu'elle estoit morte, et que sa veuë ne luy feroit que rengreger ses douleurs et luy causer quel- que fascheux accident, et en tout cas apprester à parler à beaucoup d'esprits malicieux. A quoy Sa Majesté se resolut, par l'instance formelle de tous ses plus qualifiez et affidez serviteurs qui fussent aupres d'elle lors qu'il a receu ma lettre, s'en estant sur ses pas retourné à Fontaine-bleau. Et moy je suis icy tenant cette pauvre femme comme morte entre mes bras, ne croyant pas qu'elle vive encor une heure, veu les effroyables accidens dont elle est travaillée. Ce courrier, que vous cognoissez, vous dira le surplus, et fera entendre ce que le Roy desire de vous; à quoy je ne doute point que vous n'obeyssiez aussi-tost, je vous en supplie, luy ayant tousjours ouy dire qu'il n'a jamais trouvé serviteur qui l'ayt si puissamment consolé que vous en tou- tes ses afflictions, et vous jugez assez qu'il a be-



soin de l'estre en celle-cy, ayant fait une telle perte. Sur ce, je prie Dieu, etc.

Ayant leu cette lettre tout haut, le courrier vous dit que c'estoit ce que M. de la Varenne luy avoit donné charge de vous dire, n'ayant rien à y adjoûter, sinon qu'à la première lettre qu'il faisoit là mention d'avoir écrite au Roy, Sa Majesté estoit aussi-tost montée à cheval et s'estoit acheminée vers Paris; mais qu'ayant receu la seconde à my chemin, il s'estoit arresté tout court, disputant en luy mesme s'il yroit voir cette femme, que l'on luy mandoit estre morte, ou s'il s'en retourneroit à Fontaine-bleau. Surquoy, apres que messieurs d'Ornano, de Roquelaure, de Frontenac et autres particuliers serviteurs luy eurent persuadé de s'en retourner, il l'avoit appelé au milieu de la campagne et commandé de vous venir trouver et dire ce que vous aviez entendu de luy, vous priant de faire diligence, à quoy vous ne manquastes pas; car, estant aussi-tost monté à cheval, vous vous en allastes desjeuner à Poissy et disner à Paris. Là vous empruntastes le carrosse de monsieur l'archevesque de Glasco, qui portoit le nom de Bethune, avec lequel vous allâtes prendre la poste à Essone.

Vous arrivastes sur les six heures du soir à Fontaine-bleau. Le Roy estant lors seul dans la galerie de sa chambre, en laquelle vous voyant entrer il vous alla embrasser et vous dit : « Mon amy, vous soyez le tres-bien venu, car je suis infiniment ayse de vous voir, cognoissant, par la diligence dont vous avez usé, l'affection que vous me portez et les ressentimens que vous avez de mon affliction, encor qu'elle m'ait reduit en tel estat que je n'ay point maintenant de plus doux contentement que de pouvoir demeurer seul à entretenir mes tristes pensées, ny de plus forte apprehension que de voir nouvellement quelqu'un de mes affidez et familiers serviteurs comme vous, d'autant qu'alors se redoublent en moy les douloureux ressentimens de mon extrême perte, sur laquelle j'ay estimé pouvoir tirer plus de consolation de vous que de nul autre, qui est la seule raison pourquoy je vous ay mandé en telle diligence; et partant faites en sorte que je ne sois point frustré de mon attente. »

« Sire, luy respondites-vous, en une occasion tant importante je me garderay bien d'entreprendre sur les œuvres esmerveillables de Dieu, celles du temps, ny de vostre tant excelente et singulière prudence, desquelles seules doivent proceder les plus efficaces consolations que vous sçauriez recevoir, ny de vouloir alléger vos ennuis en extenuant vostre perte

« ou en ravallant le prix du sujet que vous regrettez, et encor moins useray-je de corrections et remonstrances sur l'excez qui se pourroit trouver en vostre affliction, pource qu'elle tirera plus facilement le temperamment dont elle aura besoin, de vostre grand jugement et sagesse, que de toutes les paroles et raisons dont je me pourrois servir pour cet effet : aussi que l'entreprenant par l'une de ces deux voyes ce seroit plutost vous ennuyer que vous consoler et accroistre vos desplaisirs que de les adoucir; et me semble bien plus à propos de vous ramentevoir quelques couplets de ceux que vous nommiez vos pseumes estans de la religion, que le changement d'icelle ne vous aura pas, à mon advis, effacé de la memoire, afin que vous vous en serviez maintenant utilement comme je vous ay veu faire autrefois en vos plus grandes desconvenues et anxietez.

« Le premier desquels commence ainsi :

Remets en Dieu et toy et ton affaire,  
En lui te fie, et il accomplira  
Ce que tu veux accomplir et parfaire...

« Le second est tel :

Laisse Dieu faire, attends-le et ne te donne  
Soucy aucun, regret ny desplaisir...

« Et le troisieme aussi est tel que je vous ay souvent ouy dire, lors que Dieu avoit converty en bien des accidens tres-fascheux en l'apparence humaine :

O Dieu ! quelle hautesse,  
Des œuvres que tu fais;  
Et quelle est, en tes faits,  
Ta profonde sagesse.

« J'en pourrois encor alleguer d'autres semblables, que j'ay plutost retenus pour vous les avoir ouy dire que pour les avoir leus, si je ne craignois de vous ennuyer, et ne cognoissois qu'en ce peu de paroles prononcées par l'esprit de Dieu, vous y pouvez trouver toutes les consolations qui vous peuvent estre maintenant necessaires. Et partant, Sire, ayez agreable de remettre en Dieu et vous et vos affaires; confiez-vous, Sire, du tout en luy, et il accomplira ce que je vous ay tousjours veu le plus ardemment souhaitter, qui est d'avoir une femme que vous puissiez aimer, laquelle vous fasse des enfans qui puissent, sans dispute, vous succeder au royaume. Laissez aussi faire Dieu, Sire, ne vous mettez en nul soucy, et n'ayez regret ny desplaisir des choses où sa providence opere, comme elle fait manifestement au sujet qui se presente, et admirez la hautesse de ses œuvres et sa tres-profonde sagesse en tous ces accidens, desquels vous vous plaignez et desquels il se veut servir, n'en

« doutez point, pour operer les choses admirables  
 « dont il veut que vous soyez l'instrument ; pour  
 « vous descharger de beaucoup de soucis, et  
 « mettre vostre esprit en repos en le delivrant de  
 « tant de contentions dont il estoit inquieté ; pour  
 « avoir des desirs que vostre honneur et vostre  
 « propre prudence, je le sçay bien, desapprou-  
 « voient entierement, et des desseins à accomplir,  
 « que par la multiplicité des obstacles ausquels  
 « la nature d'iceux les assujettissoit, vostre gene-  
 « rosité et solide jugement vous faisoit estimer  
 « inexécutables, sinon par des formes et des  
 « moyens entierement disproportionnez à tant  
 « de gloires par vous acquises et à cette haute re-  
 « nommée de vos vertus insignes que l'univers  
 « publie. »

Le Roy vous escouta fort attentivement, et voyant que vous vous estiez teu pour attendre sa response, il se mit à vous regarder fixement ; puis, ayant fait dix ou douze pas parmy la gallerie, il vous dit : « A la verité, mon amy, j'avois bien  
 « esperé de vostre venuë quelque espece de con-  
 « solation ; mais, considéré la vivacité de vostre  
 « esprit, vostre humeur prompte et soudaine, et  
 « les commandemens absolus que je vous ay sou-  
 « vent faits de me parler librement, lors que vous  
 « seriez seul avec moy, et de ne me celer et des-  
 « guiser nuls de vos sentimens aux choses que  
 « vous me verriez entreprendre au prejudice de  
 « ma personne et de mon Estat, j'attendois de  
 « vous plutost des remonstrances pareilles à  
 « celles que vous m'avez faites autresfois sur ce  
 « mesme sujet, que non pas louanges telles que  
 « vous m'avez données, enquoy neantmoins vous  
 « m'avez fait plaisir ; car aussi, pour en dire la  
 « verité, n'est-ce pas au temps qu'un esprit est  
 « grandement affligé qu'il luy faut reprocher ses  
 « fautes. Que si vous avez touché aux miennes,  
 « vous l'avez fait si doucement que je ne m'en  
 « sçaurois plaindre, vous estant contenté de me  
 « faire faire ma leçon par un roi, inspiré du Roy  
 « des roys, de laquelle je profiteray, je vous le  
 « promets, prenant de fort bonne part tout ce que  
 « vous m'avez dit, voire je recognois bien que,  
 « craignant de me fâcher, vous n'avez pas voulu  
 « achever la suite du dernier couplet, et par là  
 « fait cognoistre que les esprits vifs et prompts  
 « ne laissent pas d'estre fort circonspects, lors  
 « que les occasions le requierent. » Vous eustes  
 encor plusieurs propos, le Roy et vous sur ce  
 sujet, qui seroient trop longs à reciter, apres  
 lesquels il sortit de la gallerie, et fut trouvé  
 beaucoup moins triste par ceux qui estoient dans  
 sa chambre, qu'ils ne l'avoient veu auparavant.  
 Et quelques jours apres, sa vertu surmontant  
 peu à peu ses passions, et n'y ayant plus per-

sonne qui l'entretint en icelles, il revint en son  
 premier naturel et vacqua comme auparavant  
 aux affaires de son Estat.

## CHAPITRE XCII.

*Conversions éclatantes. Marthe Brossier. Af-  
 faires du marquisat de Saluces. Ambassa-  
 deurs du duc de Savoie. Prohibition des  
 marchandises étrangères. Négociations avec  
 Marguerite de Valois. Le Pape déclare nul  
 le mariage de Henri IV et de cette princesse.*

Incontinent apres la mort de madame la du-  
 chesse de Beau-fort, la marquise de Belle-isle se  
 rendit feuellantine par devotion, et M. de  
 Joyeuse estant pressé du Pape de rentrer en reli-  
 gion, du vœu de laquelle il n'avoit esté dispencé  
 que pour faire la guerre au Roy, et pendant  
 icelle seulement, apres avoir marié une seule  
 fille qu'il avoit heritiere unique de toute la mai-  
 son de Joyeuse à M. de Mont-pensier, et quelques  
 jours auparavant pris sa derniere main des de-  
 lices, plaisirs et voluptez du monde, se remist  
 capucin. Quasi au mesme temps fut suscitée, par  
 quelques malins et pernicieux esprits, une cer-  
 taine fille, nommée Marthe Brossier, à contre-  
 faire la demoniaque, afin de s'en servir à de tres-  
 mauvais desseins contre le Roy et l'Estat, ausquels  
 Sa Majesté, quelque prudence, diligence et  
 generosité dont elle usast, ne remedia pas sans  
 beaucoup de peine et grande longueur de temps,  
 car cette fille fut promenée jusques à Rome ; et  
 dura cette manigance pres d'un an et demy, de  
 laquelle je laisse les particularitez aux historiens  
 qui les recitent amplement. Pour mesme raison,  
 je ne dirai que peu de chose au prix des longs  
 traitez qui en ont esté faits, des diverses proce-  
 dures et productions de titres qui se firent à  
 Rome et ailleurs, touchant les contrariantes pre-  
 tentions du Roy et de M. de Savoye, sur le  
 marquisat de Saluces, lesquelles consumerent  
 beaucoup plus de temps qu'ils n'estoit convenu  
 par le compromis pour l'arbitrage remis au Pape ;  
 lequel, par certaines offres que luy fit un am-  
 bassadeur de M. de Savoye (qui sembloient con-  
 clurre qu'il s'entendit avec le Roy, sous l'espe-  
 rance à luy donnée, que sentenciant en sa faveur,  
 il donneroit ledit marquisat à un de ses neveux  
 pour le tenir en hommage lige de la couronne  
 de France), prit sujet de se desporter pour tous-  
 jours du susdit arbitrage. Pendant tous lesquels  
 temps de ses debats et contestations par tiltres  
 et papiers, M. le duc de Savoye ne laissa pas  
 d'avoir envoyé en France, à diverses fois, les  
 sieurs de Jacob, de la Rochette, de Lullins, de

Bretons et de Roncas, pour essayer s'il n'y auroit point moyen de traiter quelque chose plus avantageux pour luy avec la propre personne du Roy, qu'il ne voyoit apparence de l'esperer par le jugement du Pape ny les assistances d'Espagne.

Tous lesquels deputez faisant fondement sur la grande faveur que l'on disoit que vous possediez lors (laquelle estoit plutost neantmoins en l'opinion des hommes qu'en effet, d'autant que le Roy, comme prince sage, n'ayant jamais aimé à se coiffer de favoris inutiles et par simple humeur et fantaisie, tous les plus accreditez des siens ne se trouvoient jamais avoir de pouvoir ny d'autorité en la resolution des affaires qu'à proportion de leurs bons conseils, utilité de leurs services et vertus), vous en parlerent souvent, vous donnant de grandes assurances de l'amitié de leur maistre, de l'estime qu'il faisoit des bonnes parties qui estoient en vous, et de l'intention qu'il avoit de ne laisser point long-temps, sans digne reconnaissance, les obligations que vous acqueriez sur luy, en facilitant son accommodement avec le Roy, sans la perte de ce qui estoit justement sien. Mais nonobstant tous leurs beaux discours si ne peurent-ils tirer autre responce de vous, sinon que vous ne desiriez emporter autre remuneration de toutes vos actions que la seule gloire et louange d'avoir toujours esté utile et loyal serviteur de vostre Roy, en ne luy conseillant jamais rien de dommageable ny de honteux, comme seroit ce delaisement par apparence de force. Que si M. de Savoye avoit quelque gratification à desirer de Sa Majesté, il la falloit attendre de sa pure liberalité, qui ne seroit jamais dite telle, tant que la chose à luy demandée ne seroit pas en son absoluë disposition, mais possedée par un autre; ne doutant nullement aussi que les choses estans remises en l'estat convenable à la dignité d'un si grand Roy, qu'il n'en usast apres, ainsi qu'il appartenoit à son eminente vertu et haute renommée.

Lequel mesme langage ces deputez ayant aussi entendu de la propre bouche du Roy, sans leur donner nul plus grand esclaireissement de ses intentions, ils commencerent à se douter que leurs voyages ne seroient pas de grande utilité par la voye qui leur avoit esté ordonné de suivre; et partant, afin de se faire estimer habiles negociateurs en ne retournant pas les mains vuides, ils voulurent essayer d'en tirer quelque fruit par une autre maniere; dequoy ils conceurent esperance, ayant entendu, par hazard, et comme les uns et les autres discouroient par-cy par-là, des plaintes et bruits de divers mescontentemens; lesquels, ayans voulu davantage ap-

profondir, et les trouvant plus communs qu'ils ne se fussent peu imaginer (comme c'est l'ordinaire des gens oysifs, et sur tout des courtisans françois, de se plaindre quasi tousjours du gouvernement present du Roy et de ses principaux ministres, et d'envier ceux qu'ils voyent plus employez qu'eux, et tout cela le plus souvent sans sçavoir pourquoy), ils firent sur telles niveleries et paroles vaines jettées en l'air un fort grand fondement; se vindrent à persuader, que si une fois leur maistre pouvoit venir luy mesme en personne en cette Cour, il luy seroit facile, par l'autorité de sa presence, la gravité de ses discours, ses deceptives enjoleries et ses insignes liberalitez, de fomentier de sorte tels mescontentemens, que venant à produire des fruits conformes à telles semences, le Roy trouveroit assez de besongne taillée dans son propre Estat, sans en aller chercher chez ses voisins; ne considerant pas que la legereté des hommes est ordinairement telle, mais sur tout celle des courtisans françois, que comme ils s'alterent facilement pour un rien, aussi s'appaisent-ils tout de mesme pour fort peu de chose, voire arrive fort souvent qu'une bonne œillade, un doux sousris, une louange, une gracieuse parole et une accolade de leur Roy, change les cœurs les plus ulceriez, et leur fait protester tout haut d'employer biens et vies pour son service.

Tellement que sur semblables presuppositions, M. de Savoye tesmoigna de grandes froideurs aux Espagnols, refusa son fils aîné et sa fille aînée au roy d'Espagne, qui les luy demandoit pour estre nourris pres de luy avec offres de les entretenir de toutes choses, et leur donner un équipage digne de la grandeur de la maison d'Espagne de laquelle ils estoient sortis, et se resolut de s'en venir en France, ses imaginations le portant à s'estimer si adextre, si eloquent, fin et rusé, qu'il s'accommoderoit en tout et par tout avec le Roy, et conserveroit tout ensemble son marquisat. Et en cette maniere, sur telles causes, et pour telles raisons, fut entierement rompu tout l'arbitrage du Pape, et le Roy, qui avoit avec difficulté permis au duc de Savoye de venir en France, disposé à recouvrer le sien par la voye des armes, si l'arrivée du duc ne luy apportoit le contentement qu'il avoit tesmoigné aux siens d'en attendre, et mesme luy en avoit fait sentir quelque chose par une sienne lettre.

Cependant sur les advis receus par Sa Majesté, que le duc de Biron, en un voyage par luy fait en Guyenne, avoit usé de carresses excessives à l'endroit de toute la noblesse, gratifié de plusieurs dons et liberalitez les plus remuans et accreditez d'icelle, tenu table ouverte fort

splendide à tous venans, et des propos fort insolens et audacieux au milieu du vin et des viandes, esloignez du respect deu à son Roy; et qu'en d'autres provinces quelques autres grands du royaume, dont les humeurs estoient plus cachées, y faisoient des menées sourdes et pratiques sous-main, qui valloient encor moins que ces escapades publiques et propos enflez de vent du duc de Biron. Sur telles nouvelles dont Sa Majesté vous parla, elle se resolut d'aller passer son esté à Bloys, sous pretexte d'y manger des melons; mais, en effet, afin qu'estant plus proche des lieux où s'espandoient ces mauvaises semences, et toutes ces rumeurs dont l'on bruioit, il les descouvrit plus facilement, ou amortist entiere-ment (comme tout cela luy succeda fort heureusement pour lors), son approchement, son humeur douce, ses propos familiers, ses agreables cajoleries, son habilité à pratiquer les esprits et descouvrir les ruses et menées d'autrui, et sur tout cette valeur incomparable et diligence admirable à courir aux occasions produisans tous ces effets.

En ce lieu de Bloys vous vint trouver la princesse d'Espinoy, avec ses trois fils et sa fille aînée (la jeune estant nourrie avec la marquise de Roubais, vostre tante et la sienne, veufve du vicomte de Gand, vostre oncle et vostre parrain), pour vous requerer d'assistance contre les violences des prince et princesse de Ligne leurs parens et les vostres, lesquels leur usurpoient tout leur bien, et de vouloir accepter la tutelle de ses fils, qui vous avoit esté defferée comme estant le plus proche de leurs parens, du costé paternel en France : ce que vous fistes fort franchement apres en avoir parlé au Roy, qui promit d'appuyer vos demandes de son autorité; et pour dire en trois lignes toute cette histoire qui dura six ou sept ans, vous retirastes pres de vous ces trois jeunes seigneurs et les entretinstes comme vos propres enfans, jusques à ce que vous leur eussiez fait rendre quelque six vingt mille livres de rente en fonds de terre qui leur avoient esté usurpez.

Ceux de Tours vindrent aussi à Bloys pour vous parler de faire défendre l'entrée de toutes sortes de manufactures estrangeres, se faisant forts de fournir toute la France de semblables estoifes. Vous leur remonstrastes combien à l'exécution ils trouveroient leur proposition difficile, et qu'il falloit auparavant faire un grand établissement pour les soyes et le tirage de l'or et l'argent, et considerer de quelle perte seroient cause telles défences si soudainement faites pour toutes les autres villes qui trafiquoient hors le royaume. Mais ne se laissant pas persuader à vos

raisons, ils s'adresserent à la propre personne du Roy, laquelle ils solliciterent ou plustost importunerent tellement, par le moyen d'amis et de presens, qu'enfin, pource que vous ne voulustes pas insister à soutenir vostre opinion, ils obtindrent ce qu'ils demandoient. Mais tout cela ayant esté ainsi basti sans les fondemens necessaires pour un si grand dessein, s'en alla, dans six mois, en ruine, les incommoditez que quasi toute la France recevoit de ces défences ayant contraint le Roy de les revocquer, estant à Lyon.

La mort de la duchesse de Beaufort ayant fait cesser les difficultez que plusieurs avoient faites de parler au Roy de se vouloir marier, peu de gens de bien voulans parler en faveur d'elle, et tous craignans d'attirer sa mal-veillance sur eux en parlant pour une autre, chacun commença lors d'en presser le Roy ouvertement. Le parlement en corps, par la bouche de son procureur general, et plusieurs autres corps et compagnies, luy en firent des remonstrances, appuyées de si fortes raisons et pleines de tesmoignages d'une tant sincere et universelle affection de ses peuples, que ces choses, jointes au desir qu'il avoit toujours eu de pouvoir laisser des enfans legitimes qui luy succedassent au royaume, et pussent joüyr des doux fructs que tant d'amertumes qu'il avoit goustées et de penibles travaux qu'il avoit pris, luy avoient enfin fait savourer, le firent resoudre aux sollicitations necessaires pour parvenir à un tel bien.

Et dautant que la Reine, duchesse de Valois, estoit celle qui pouvoit le plus avancer ou retarder un si bon œuvre, duquel elle s'estoit toujours monstrée fort alliennée, disant tout haut (car c'estoient ses propres termes et ceux des lettres qu'elle vous avoit escrites sur ce sujet) qu'elle ne donneroit jamais son consentement pour parvenir à la dissolution ou nullité de son mariage, tant qu'elle estimerait que l'on voulut donner l'honneur dont elle se verroit privée, à cette bagasse de Gabrielle (car le despit ne luy permettoit point de nommer lors autrement madame la duchesse de Beaufort), le Roy desirant de l'adoucir et rendre plus traittable, luy escrivit une lettre de complimens et civilitez, et pour fin, disoit luy avoir bien voulu donner advis des grandes instances qui luy estoient faites par tous ses peuples universellement, autant grands que petits, de vouloir donner à la France des enfans legitimes qui luy peussent succeder au royaume; mais qu'il n'y avoit pas seulement voulu penser, sans sçavoir auparavant quelle pouvoit estre là dessus son intention, afin de s'y conformer. Il voulut aussi que vous luy en escrivissiez, mais plus expressément et plus clairement qu'il n'a-

voit fait, sachant la grande confiance qu'elle vous avoit tesmoignée depuis quelques années; vostre lettre estant telle que s'ensuit :

*Lettre de M. de Rosny à la reine Marguerite, et sa responce.*

MADAME,

Ayant reconnu par la responce dont il plut à vostre Majesté d'honorer la lettre que je luy escrivis de la ville de Rennes, que mes inclinations à vous rendre tres-humble service, mes emplois à procurer vostre contentement, joye et felicité, et mes desirs à la production des effets, vous avoient esté non seulement bien agreables, mais que vostre grand jugement et singuliere prudence avoient tesmoigné de vouloir prendre une telle confiance en ma prud'homme, foy et loyauté, que vous leur remettiez volontiers tout le soin et la conduite d'une affaire de telle eminence, lesquelles graces et faveurs qui devancent de bien loin mes merites, m'ont si fort augmenté le courage, qu'en mesnageant (comme j'ay desja fait et continueray cy-apres) les esprits qui en ont eu et auront besoin, et prenant les temps, les saisons et les occasions bien à propos, toutes mes sollicitations jointes à celles de M. l'Anglois, qui vous sert icy fort industrieusement et loyalement, ont desja rencontré de tant favorables conjonctures, et sur tout de tant amiables dispositions en l'esprit et bon naturel de nostre vertueux Roy, qu'il n'y a rien de nul costé qui ne prenne le chemin de vostre entier contentement, et vous puis respondre que vostre Majesté rencontrera toute sorte de facilité aux expéditions qui luy seront necessaires sur ce sujet, le Roy m'ayant desja commandé celles qui dépendent de mes charges et recommandé la sollicitation des autres : à quoy je ne manqueray pas, vous en donnant ma foy et ma parole; vous suppliant tousjours de vouloir croire absolument le conseil de ceux qui sont tout à vous en cette Cour, desquels M. l'Anglois sçait les noms, qui sçavent mieux que nuls autres, les voyes et les sentiers qu'il vous faut tenir pour posséder un heur certain et entiere felicité. A quoy esperant que vous ne manquerez non plus que moy à les procurer incessamment, je prieray le Createur, madame, qu'il vous augmente ses saintes graces et benedictions.

De Paris, ce 6 de mars 1699.

*Responce de la reine Marguerite à M. de Rosny.*

Mon cousin, je commence à prendre bonne esperance de mes affaires, puis que j'ay tant d'heur que vous les voulez prendre en vostre protection, comme vos lettres m'en assurent :

j'en desire l'avancement avec bon succez, pour avancer le contentement du Roy et celuy de tous les bons François, que vous m'escrivez desirer si ardemment de voir des enfans legitimes au Roy, qui luy peussent sans dispute succeder à cette couronne qu'il a retirée de ruyne et dissipation avec tant de labeurs et perils, que si j'ay cy-devant usé de longueurs et interposé des doutes et difficultez, vous en sçavez aussi bien les causes que nul autre, ne voulant voir en ma place une telle descritee bagasse, que j'estimois sujet indigne de la posseder, ny capable de faire jouïr la France des fructs par elle desirez. Mais maintenant que les choses sont changées, par un benefice du ciel, et que je ne doute nullement de la prudence du Roy et du sage conseil de ses bons serviteurs pour faire une bonne élection, lors que je la verray faite, une seurété à mes affaires, à mes titres et à ma condition et forme de vivre (car je veux achever le reste de mes jours en repos de corps et tranquillité d'esprit), en quoy le Roy et vous pouvez tout, je m'accommoderay à tout ce qui sera convenable et que vous mesme me conseillerez. Sur tout assurez moy ma pension et l'argent pour payer mes creanciers, afin qu'ils ne me tourmentent plus, ainsi que j'ay donné charge à M. l'Anglois de vous le requérir en mon nom, et vous m'obligerez à le reconnoistre en tout ce qui dependra de moy; prenez-en donc assurance et me tenez pour vostre plus affectionnée et fidelle cousine,

MARGUERITE.

A Usson, ce 29 juillet 1599.

Or, d'autant que les lettres ne peuvent repliquer aux objections des raisons qu'elles contiennent, et que la presence d'une personne de sens, jugement et qualité, capable d'user de toutes ces choses en temps et à propos, est beaucoup plus efficaceuse à persuader, qu'un simple papier, le Roy rendit porteur de ses lettres, le susdit sieur l'Anglois, tres-habile homme, que la Reine, duchesse de Vallois, aimoit, et qui avoit esté fait maistre des requestes, gratis, pour avoir esté un des plus adextres instrumens de la reduction de Paris; lequel s'acquitta si dignement de sa charge, qu'il obtint de cette princesse tout ce qui s'en pouvoit desirer. De sorte qu'ayant elle mesme escrit de sa propre main au Pape, en tels termes et substance qu'il avoit esté jugé necessaire, le cardinal d'Ossat eut charge de solliciter sa Sainteté et le sieur de Sillery, ambassadeur, de faire le semblable, soit conjointement, soit separément, selon qu'ils le jugeroient plus à propos; lequel se cognoissant par la mort de madame la duchesse de Beaufort (à laquelle il avoit obligation, ayant esté envoyé à Rome

à son instance et pour servir à ses intentions, tel qu'il a esté dit cy-devant, avec assurance des seaux luy succédant bien), delivré de la crainte de voir sa sollicitation pour le desmariage du Roy, suivie d'un autre qui seroit reprouvé d'un chacun et luy tourneroit à opprobre, il y proceda bien plus hardiment et franchement qu'il n'avoit osé faire, et se rendirent ces deux personnages si adextres et heureux négociateurs, que le Pape commit les sieurs cardinal de Joyeuse, l'archevesque d'Arles et l'evesque de Modene, son nonce en France, pour proceder en cette affaire en cognoissance de cause, laquelle fut decidée par la voye de nullité et non de dissolution. Dequoy nous laissons les particularitez aux historiens, aussi bien que de plusieurs autres affaires qui se passerent pendant le séjour du Roy à Bloys, comme de l'estat de chancelier donné au sieur de Bellievre et celui de controolleur des finances au sieur de Vienne, favorisé de vous; l'avis donné au Roy par un capucin de Milan, d'un assassin qui avoit dessein sur sa vie, lequel fut pris; les plaintes du roy d'Espagne, sur le grand nombre de Francois qui alloient librement en Hollande, sur lesquelles furent faites quelques deffences; la permission demandée au Roy par M. de Mercœur pour aller en Hongrie; la nouvelle que le Roy eut de la déposition du roy de Suede par les estats du royaume, et de l'installation du duc Charles, nommé auparavant duc de Supermanie, son oncle, à la couronne, au lieu de luy, et vostre établissement en la charge de grand-voyer de France, dont s'ensuit la teneur de vos provisions que nous ne transcrivons point estant enregistrées par tout.

### CHAPITRE XCIII.

*Passion du Roi pour mademoiselle d'Entragues. Il lui fait une promesse de mariage. Rosny déchire cet écrit. Suite de l'affaire du marquisat de Saluces. Rosny devient grand-maître de l'artillerie.*

Sur la fin de l'esté, le Roy s'en retourna vers Paris et Fontaine-bleau, où ceux qui ne s'entretenoient en quelque credit aupres de luy qu'en le servant es plaisirs et voluptez, et n'avoient autres parties pour se faire estimer, sinon quelques entregents de Cour, faire quelques contes pour rire, jeter des exclamations sur tout ce qu'il disoit, et l'accompagner aux banquets et autres lieux de desbauches, luy loüerent tellement les beautez, gentil esprit, cajoleries et bons mots de mademoiselle d'Antragues, qu'ils

luy firent venir l'envie de la voir, puis de la revoir, et enfin de l'aymer. Vous vistes naistre ses nouvelles amours avec grand regret, et en eustes encor plus de desplaisir, apprenant que ce bec affilé, par ses bonnes rencontres, luy rendroit sa compagnie des plus agreables, et voyant passer cette affection si advant qu'il vous fallut (nonobstant que vous eussiez à faire fonds extraordinaire cette année, de trois à quatre millions, pour le renouvellement de l'alliance des Suisses) trouver cent mille escus pour donner à cette baquenaut; laquelle ne finist neantmoins pas là ses habiletez et artifices, ny n'executa pas ce dont elle avoit donné toute assurance; mais adjoustant ruse à subtilité, elle fit intervenir son pere et sa mere à la traverse, pour l'observer de si pres, qu'il parut estre hors de sa puissance de trouver un lieu commode pour l'accomplissement des promesses qu'elle avoit faites pour ces cent mille escus, sur lesquelles se trouvant pressée par le Roy, elle luy disoit ne manquer nullement de bonne volonté, en son endroit, mais qu'il falloit aussi essayer d'avoir celle de ses pere et mere favorable, afin qu'ils ne l'observassent plus de si pres, à quoy elle mesme travailleroit de son costé à en trouver les moyens. Lesquels, apres plusieurs longueurs et remises, elle dit n'avoir peu estre ployés à consentir tout ce que le Roy auroit agreable, sinon que, pour garantir leur conscience envers Dieu et leur honneur parmy le monde, Sa Majesté luy voulut faire une promesse de mariage; qu'elle avoit fort essayé à les faire contenter que ce fut de paroles en leur presence, mais qu'ils n'avoient pas voulu, et s'estoient du tout opiniastrez à en avoir une par escrit, quoy qu'elle s'en fut moquée et leur eust remonstré que l'une n'estoit pas plus assurée que l'autre, sçachant bien qu'il n'y avoit point d'official suffisant pour citer un homme qui avoit tant de courage et si bonne espée, et qui pouvoit tousjours produire en toute occasion trente mil hommes bien armez, et trente canons pour maintenir son dire; mais que neantmoins, puis qu'ils s'arrestoient tant à cette vaine formalité, s'il l'aimoit autant qu'elle faisoit luy, il ne devoit pas faire difficulté de les satisfaire en cela, se contentant pour son regard qu'elle fust avec toutes les conditions qu'elle sçavoit bien estre par luy désirées; et sçeut cette pinbeche et rusée femelle cajoler si bien le Roy, le tourner de tant de costez et gagner de telle sorte tous les porte-poulets, cajoleurs et persuadeurs de desbauches qui estoient tous les jours à ses oreilles, pour luy proposer qui un plaisir et qui un autre, qu'il se laissa enfin persuader à faire cette promesse,

puis qu'autrement ne pouvoit-il avoir l'effet de celle qui luy avoit desja tant cousté, et luy avoit tant de fois esté faite promesse.

Et comme il faisoit lors fort peu de choses, quelques grandes ou petites qu'elles pussent estre, sans vous en communiquer quelques choses, un matin, estant à Fontaine-bleau, comme il estoit prest de partir pour aller à la chasse, il vous envoya querir, et vous ayant pris par la main, vous mena seul en sa premiere gallerie; puis vous dit qu'ayant accoustumé de vous faire part de tous ses secrets, il vouloit bien maintenant vous faire voir une chose qu'il faisoit pour la conquête d'un pucelage que peut-estre il n'y trouveroit pas; et lors, vous mettant un papier entre les mains et se tournant de l'autre costé, avec une certaine façon, comme s'il en eust eu honte de vous le voir lire, vous dit: « Lisez cela, et puis m'en dites vostre advis. » Lequel ayant leu, vous trouvastes que c'estoit une espece de promesse de mariage qu'il faisoit à cette mademoiselle d'Antragues, et sommes marris que vous n'ayez retenu copie d'icelle, afin de l'increr icy en ses propres termes (encore qu'elle ait depuis bien veu du pays); mais en substance, nous sçavons qu'elle portoit une condition qui de sa propre nature la rendoit nulle de toute nullité, n'estant qu'une assurance de l'espouser au cas que dans un an il eut d'elle un enfant masle. Laquelle ayant leuë vous vous en revinstes vers le Roy, ce papier tout ployé à la main; lequel vous ayant demandé ce qu'il vous en sembloit, vous luy respondistes n'avoir pas assez medité sur une tant importante affaire en son affection, pour en dire ce qu'il vous en sembloit: « La, la, vous dit le Roy, parlez-en librement et ne faites point tant le discret; vostre silence m'offence plus que ne sçauroient faire toutes vos plus contrariantes paroles: car sur un tel sujet, que je me doute bien que vous n'approuverez pas quand ce ne seroit que pour les cent mille escus que je vous ay fait bailler avec tant de regret, je vous promets de ne me fascher de rien que vous me puissiez dire: partant parlez librement et me dites ce qu'il vous en semble; je le veux et vous le commande absolument. — Vous le voulez donc, Sire, et me promettez de n'en estre point en colere contre moy, quoy que je puisse dire et faire? — Ouy, ouy, dit le Roy, je vous promets tout ce que vous voudrez, car aussi bien pour vostre dire n'en sera-il ny plus ny moins. » Et là dessus en prenant cette promesse comme si vous luy eussiez voulu rendre; mais au lieu de la luy mettre en main, vous la deschirastes en deux pieces. « Voilà, Sire, puis qu'il vous plaist le sçavoir, ce qu'il me

« semble d'une telle promesse. — Comment, mor-  
« bieu! ce dit le Roy, que pensez vous faire, je  
« croy que vous estes fou? — Il est vray, Sire,  
« dites vous, je suis un fou et un sot, et voudrois  
« l'estre si fort que je le fusse tout seul en  
« France. »

« Or bien, bien, dit le Roy, je vous entends  
« bien et ne vous en diray pas davantage, afin de  
« vous tenir parole; mais rendez moy ce papier.  
« — Sire, sans vostre expres commandement, je  
« me fusse bien gardé d'entreprendre ce que j'ay  
« fait, encor que s'il vous souvient bien de ce  
« que vous m'avez autrefois dit de cette fille, et  
« de son frere, du temps de madame la du-  
« chesse (1), des langages que vous en teniez  
« tout haut, et des commandemens que vous me  
« fistes faire à tout ce bagage (car ainsi appel-  
« liez vous lors la maison et famille de M. et  
« madame d'Antragues), de sortir de Paris, vous  
« seriez un peu plus en doute que je ne vous voy,  
« de trouver la pie au nid, et en tout cas jugeriez  
« vous que ce n'est pas une piece qui merite d'es-  
« tre acheptée cent mil escus (et Dieu voulut  
« qu'il ne nous en coutast pas plus à l'advenir),  
« et encor moins d'un tel papier, vaille que vaille,  
« lequel apprestera aux malins matiere pour par-  
« ler mal à propos de vostre Majesté: voire ne  
« doutay-je point que les vivacitez de vostre es-  
« prit et les lumieres de vostre grand jugement  
« n'agiront jamais puissamment en vous, que  
« vostre Majesté ne reconnoisse que vous destrui-  
« sez tous les preparatifs de vostre desmariage,  
« et par consequent vous vous ostiez les moyens  
« d'entrer en un légitime mariage, d'autant que  
« cette promesse estant divulguée (car l'on ne  
« vous la demande point à autre fin), jamais la  
« Reine vostre femme ne fera les choses neces-  
« saires pour valider vostre desmariage, ny mesme  
« le Pape n'y apportera-il son autorité apostoli-  
« que, et cela sçais-je de science. »

Le Roy vous escouta tout du long, et puis, sans vous rien respondre, sortit de la gallerie, entra dans son cabinet, demanda de l'ancre et du papier au sieur de Lomenie, et y ayant demeuré environ demy quart d'heure à faire, comme vous le conjecturiez, un autre pareil escrit de sa main, il en ressortit, et quoy qu'il vous rencontrast en bas, si monta-il à cheval devant vous sans vous dire un seul mot, et s'en alla chasser vers le bois Males-herbes, où il séjourna deux jours entiers ou environ.

Quelque temps apres le Roy vous ayant mandé sur les lettres qu'il venoit de recevoir de M. de Lesdiguières, par lesquelles il luy mandoit (car il vous les monstra) qu'encor que M. de Savoye

(1) Il s'agit ici de la duchesse de Beaufort.

preparast son équipage pour venir en France visiter Sa Majesté, fist courir le bruit qu'il venoit à dessein de la contenter, que neantmoins il faisoit fort travailler aux fortifications de ses places, tant de Savoye que de Bresse, et y assembloit une merveilleuse quantité de vivres, armes et munitions, et parloit-on sourdement qu'il avoit renvoyé en Espagne pour se remettre bien avec ce Roy, et à Rome vers le Pape, pour le persuader à vouloir renouer le compromis, et luy ayder à faire en sorte que les François ne se vissent point nicher de l'autre costé des monts, et que c'estoient de tres-dangereux voisins pour luy et pour tous les autres princes d'Italie, sur tout ayant un tel Roy pour leur commander; le Roy, dis-je, sur telles lettres vous ayant envoyé querir, vous dit :

« Mon amy, la prudence m'oblige de juger par toute la vie qu'a demenée M. de Savoye, par ses procedures dernieres en ce qui a regardé les differends du marquisat de Saluces, par celle de tous ses agens qu'il m'a envoyez, par l'opinion courante de luy dans l'esprit des hommes qui ont passé par ses mains, par des lettres tant expresses que j'ay receuës de M. de Lesdiguières, par celles que M. de Ville-roy receut, il y a trois jours, des sieurs du Passage et du comte de Carces, lesquelles je luy commanday de vous faire voir, et par une infinité d'autres semblables advis que j'ay receus de Rome, de Florence et autres lieux d'Italie, que cet homme pense estre si eloquent, si subtil, fin et rusé, qu'il est capable de circonvenir et abuser tout le monde. Or, y a-il déjà trop long-temps qu'il m'amuse de belles paroles, et croy, quant à moy, qu'il ne vient icy que pour essayer de mener les choses de longue, gaigner mes principaux serviteurs, et faire des pratiques et menées dans mon royaume; à quoy il nous faut donner ordre soigneusement, en le pressant de me resoudre promptement, et luy faisant voir que je ne suis pas de ces oyseaux niais, propres à se laisser duper et prendre en tels lacs. Tellement que, pour vous en dire mon opinion, je croy que ce differend du marquisat ne se vuidera point que les armes en la main et à bons coups de canon, y ayant plusieurs fortes places en Bresse, Savoye et Piedmont qu'il nous faudra necessairement attaquer, et par tant j'auray plus de besoin d'artillerie et d'un bon grand maistre sur telles occasions, que de tous autres capitaines et gens de guerre, ne tenant pas M. de Savoye suffisant, veu qu'il s'est mis mal avec Espagne, et qu'il est mal voulu de tous les autres princes d'Italie, à cause de son esprit inquieté et de ses ambitions desme-

« surées, enrageant de despit de ce que son bon beau-pere ne luy a laissé pour supplément de partage de sa femme, qu'un crucifix et l'image de la Vierge, au lieu qu'il a donné à son autre fille toutes les dix-sept provinces des Pays-Bas et la Franche-Comté, ce qui vaut beaucoup mieux que les deux Castille ny le Portugal : or, vous ay-je dit tout cecy afin que nous advisions, vous et moy, quel ordre je pourray donner à mon artillerie, ayant un grand maître qui n'y entend rien du tout, voire qui n'est ny capitaine ny soldat. Je recognois bien, maintenant que j'ay besoin de gens de courage et de capacité, la faute que j'ay faite de ne vous avoir pas baillé cette charge, lors que Sainct Luc fut tué, comme je vous en fis dès lors quelque ouverture, et ne suis pas à me repentir de m'estre laissé emporter aux prieres et larmes, voire, puisse-je dire, aux importunités de madame la duchesse en faveur de son pere. Mais la chose estant faite, et ne luy voulant pas oster sa charge par force ny avec affront, d'autant qu'il est grand pere de mes enfans, je me suis advisé d'un expedient par le moyen duquel je pourray estre bien servy si vous m'y voulez ayder, comme je vous en prie et veux croire que vous ne m'en refuserez pas, qui seroit de retirer du vieil Born sa charge de lieutenant general de l'artillerie, de laquelle aussi bien il cherche à se défaire et m'en a fait demander permission, la faire eriger en tiltre d'office, luy donner autant de pouvoir sur tous les lieutenans provinciaux dans les provinces comme il y en a dans les armées, lors qu'il n'y a point de grand maistre, l'excepter des provisions d'iceluy et augmenter les gages et appointemens; et lors, estant rendu ainsi honorable, ma resolution seroit de la bailler à un certain homme que je cognois et vous aussi, qui a le courage bon, l'esprit vif, est actif, diligent, a tousjours affectionné cette fonction, et tesmoigné, en plusieurs occasions, qu'il n'en est pas ignorant; lequel en estant ainsi par moy pourveu, pourra faire la charge entiere de l'artillerie, reservé les provisions aux offices, tout ainsi que s'il estoit grand maistre, car je feray en sorte que M. d'Estrée ne se trouvera point dans les armées ny dans les provinces, estant resolu, dés-à-present, sous pretexte d'honneur, de l'attacher au gouvernement de la ville de Paris. Or, devinez maintenant qui est cet homme-là, et m'aydez à luy persuader de vouloir prendre cette charge, car il est fort de vos amis. »

Tous ces discours, pleins de tels preparatifs à la persuasion (à ce que vous nous en avez dit),



vous mipartirent tellement l'esprit et l'attachèrent si bien à penser sur tous autres, que vous ne songeastes jamais à vous-mesme : tellement que vous luy repartistes naïvement que vous ne pensiez point cognoistre personne assez entendu et qualifié pour commander absolument à tout ce qui dépendoit de l'artillerie, qui voulut s'assujettir sous les bizarres commandemens d'un tant impertinent et peu qualifié grand maistre; mais qu'aussi n'appartenoit-il qu'à Sa Majesté, qui estoit parfaite au mestier de la guerre, de cognoistre fort bien les capacitez d'un chacun en iceluy; et partant le priez-vous de le vouloir nommer sans s'en attendre à vous, qui ne laisseriez pas d'en dire vostre avis, puis qu'il vous le commandoit, encor qu'il ne vous appartint pas de faire un jugement contraire à ses sentimens.

« Or bien donc, dit le Roy en se souriant et « vous mettant sa main sur la vostre, voyons ce « qu'il vous semble de cet homme-là que je veux « dire, lequel se nomme le marquis de Rosny : le « cognoissez vous bien ? — Ouy, Sire, dites vous « aussi tost, je le cognois fort bien et ne le tiens « nullement capable d'exercer cette charge, sur « tout ayant pour superieur un homme duquel « il ne sçauroit rien apprendre, ny mesme en « recevoir les commandemens sans honte : » car, pour ne vous rien celer, nous sçavons que vous estiez irrité de ce que le Roy vous ayant autrefois parlé de la charge principale il vous reduisoit maintenant à un diminutif. « Comment, dit « le Roy, est-il possible que vous me vouliez re-  
 • « fuser d'une chose dont je vous prie avec tant « d'affection, où il y va de mon service et du « bien de mon Estat, et qui plus est me facilite « le moyen de vous establir où je recognois bien « que vous aspirez ?

« Sire, luy dites-vous, je n'aspire à rien qu'à « ce qu'il vous plaira, je vous supplie le croire ; « aussi ay-je desja tant d'autres affaires sur les « bras que je me tiens insuffisant d'en entrepren-  
 • « dre davantage. — Ce n'est pas où il vous tient, « dit le Roy, car je sçay que vous ne manquez pas « de bonne opinion de vous mesme, pour aspirer « encor plus haut. Mais puis que vous avez si « peu d'esgard à mon contentement et que vous « preferez vos fantaisies à mes prieres, je ne vous « en parleray plus, vous laisseray vivre à vostre « mode, comme je feray aussi moy à la mienne. » Et sur cela vous quitta comme tout en colere; et neantmoins, comme vous le sceustes depuis, il ne laissa pas de faire parler à M. d'Estrée, pour le disposer à vouloir prendre récompense de sa charge, comme vous fistes bien aussi de vostre costé, par le moyen de madame de Nery,

qui le gouvernoit absolument, sur laquelle trois mil escus, que vous luy fistes promettre par M. et madame du Pesché, eurent telle puissance, que huit jours apres celuy de la colere du Roy il vous envoya querir, sous ombre de plusieurs autres affaires dont il vous parla; puis, comme vous estiez desja à douze ou quinze pas de luy, il vous appella et vous dit : « J'avois oublié à « vous dire que j'ay tant fait avec M. d'Estrée « qu'en fin il s'est resolu à prendre récompense « de la charge de grand maistre; car je ne fais pas « comme vous, qui preferez vos fantaisies à vostre « propre bien, duquel je suis plus soigneux que « vous mesme, celuy de mes affaires y estant « aussi joint, car je viens de recevoir encor des « lettres qui me font tenir pour certain que nous « ne recouvrirons jamais nostre marquisat, sinon « à coups de canon, enquoy je recognois que « vous estes capable de me servir; et partant, « en oubliant toutes mes coleres, advisez de « traiter avec M. d'Estrée pour sa charge : mais « puis que je vous gratifie ainsi franchement, « advisez aussi à bien faire et à user de vos diligences accoustumées pour préparer toutes les « choses necessaires en l'artillerie pour de grands « attaquemens. » Vous eustes encor quelques autres propos qui finirent par de grands remerciemens et soubmissions de vostre part, et de grands tesmoignages de confiance de celle du Roy; en suite desquels vous traitastes avec M. d'Estrée, moyennant quatre-vingts mil escus sans les menus suffrages, lesquels vous empruntastes à rente, et trois jours apres vous fûtes pourveu de l'estat de grand maistre de l'artillerie.

#### CHAPITRE XCIV.

*Rosny s'établit à l'Arsenal. Voyage du duc de Savoie à Paris. Ses intrigues. Le Roi consent à épouser Marie de Médicis.*

Vos provisions de grand maistre de l'artillerie ainsi expédiées, comme il a esté dit au chapitre precedent, et vostre serment fait, vous-vous en allastes loger à l'Arsenac, que vous trouvastes tres-mal basty, et encor plus dénué de pieces de canons, munitions et armes; à quoy desirant pourvoir, vous mandastes tous les officiers, desquels vous cassastes quatre ou cinq cens, qui estoient tous les valets des gens de justice, officiers de finances et d'escritoire, fistes des marches avec les commissaires des salpestres pour une grande fourniture de poudres, avec des maistres de forges pour une merveilleuse quantité de boulets des six calibres, et de diverses sortes de fer pour ferrures d'affûts, avec les char-

rons et charpentiers, pour bon nombre de flasques, moyeux, raix, gentes, timons et entretoises, et avec des marchands estrangers pour fournir quantité de cuivres de messelle, rosette, potin, culot, hallebardes, estain, mitraille et autres métaux; tous lesquels marchez vous fistes voir au Roy, qui les voulut signer luy-mesme.

Or ayant esté en cette année 1599 reduits en vostre seule personne les charges de super-intendant des finances et de l'artillerie, comme il a esté dit, des bastimens par la resignation de M. de Saucy, et des fortifications par la mort de M. d'Incarville, vous essayiez de les administrer toutes quatre, en sorte que le Roy en pust recevoir contentement, le royaume accroissement et amelioration, et le peuple descharge et soulagement. Quinze jours apres que vous fustes logez dans l'Arsenac, le Roy vous y vint voir, et apres quelques discours sur le fait de vos charges, vous dit avoir receu advis que M. de Savoye se preparoit pour venir en France, et qu'il falloit donner ordre à Lyon afin de l'y faire recevoir honorablement, dautant que les courtoisies et civilitez volontaires estoient tousjours bien-seantes en tout temps, voire mesme entre ennemis, et partant que vous donnassiez ordre aux finances et à l'artillerie pour fournir ce que vous jugeriez necessaire pour sa reception: mais tout l'ordre que vous y donnastes, quoy que fort honorable, ne luy apporta pas tous les contentemens par luy desirez à son arrivée dans le royaume, dautant qu'à l'église Sainct Jean de Lyon luy furent refusez quelques honneurs qui avoient accoustumé d'estre rendus aux ducs de Savoye comme comtes de Villars. Nous laisserons aux historiens tout ce qui se dit et fit sur ce sujet, sur son voyage et reception à Fontaine-bleau, son arrivée à Paris, ses procedures envers le Roy et ses serviteurs, leurs communs discours et les liberalitez dont ce prince usa aux estreines, dautant que vous n'eustes quasi nulle part en toutes ces choses, ayant mesme refusé une boîte de diamants valant quinze mil escus; et vous ramentevrons comme le Roy, trois jours apres son arrivée à Paris, vous ordonna de le traiter à l'Arsenac, d'y convier le duc de Savoye et les principales dames et principaux seigneurs de la Cour.

Or comme M. de Savoye, soit à dessein ou par hazard, fut arrivé long-temps avant les autres, il vous demanda aussi-tost où estoient toutes vos armes, munitions et artilleries; surquoy vous-vous trovastes bien empesché, ayant honte de luy faire voir une maison si pauvre et desnuee de toutes ces choses qu'estoit l'Arsenac: tellement qu'au lieu d'aller aux magazins vous

le menastes aux atteliers; atisquels vous faisiez ouvrir à puissance; et lors voyant quelque quarante affuts et roüages esquels on travailloit, vingt canons nouvellement fondus, et des provisions et preparatifs pour en fondre encor autant, il vous demanda que c'est que vous vouliez faire de tant d'artillerie nouvellement fonduë. Vous luy respondistes en riant: « Monsieur, c'est pour prendre Mont-melian. » Lors il vous demanda: « Y avez vous esté? — Non, monsieur, dites-vous. — Vrayement jé le vois bien, respondit-il, car vous ne diriez pas cela; Mont-melian ne se peut prendre. — Bien, bien, monsieur, dites-vous, je vous en crois, neantmoins, ne mettez pas le Roy en cette peine; s'il me l'a voit commandé j'en viendrois bien à bout. Mais je veux croire qu'il n'en sera point besoin, et que le Roy et vous, vous separerez bien contents l'un de l'autre. — C'est là mon intention; ce vous dit-il, et si ce n'est vous qui l'empêchez tout ira bien, car l'on m'a dit que vous ne luy donniez pas conseil de me gratifier. » Sur cela le Roy arrivant à l'Arsenac et les dames aussi, il fallut changer de discours, puis peu apres aller souper.

Le soir mesme Sa Majesté nomma de sa part pour commissaires messieurs le connestable; chancelier de Bellievre, mareschal de Biron, vous, messieurs de Maisses et de Ville-roy; et M. de Savoye nomma, ce nous semble, M. de Belly son chancelier, messieurs le marquis de Lullins, de Jacob, le comte de Morette; le chevalier Breton et des Allimes, tous desireux que vous n'en fussiez pas, leur ayant esté rapporté que vous insistiez formellement au recouvrement du marquisat de Saluces, ou pour l'eschange d'iceluy, d'emporter toute la Bresse et tout le Rosne depuis Geneve jusques à Lyon:

Tellement que M. de Savoye mettant en œuvre toutes sortes de pratiques et d'artifices pour essayer de vous disposer et rendre favorable à ses intentions, vous envoya un matin, cinq jours apres celuy des estreines, M. des Allimes; lequel, ensuite de quelques compliments accoustumez en semblables visites receus et rendus de part et d'autre, vous dit que M. le duc son maître l'avoit chargé de plusieurs propositions à vous faire; qu'il s'asseuroit que les ayant bien comprises et meurement considerées vous trouveriez grandement honorables et utiles pour le Roy et pour la France, et que comme telles et pleines de generosité, vostre esprit genereux les embrasseroit infailliblement; qu'il avoit aussi charge de vous presenter le portraict de ce prince, vous priant de le vouloir garder comme estant venu d'une fille de France; et luy resola

d'aymer et servir le Roy tout ainsi qu'un bon François, de se jeter dans tous les interets de la France, comme les choses qu'il avoit à vous dire en rendroient des preuves indubitables; et lors vous mit entre les mains le portraict dont il vous avoit parlé, estant dans une boîte d'or tant enrichie de tres-beaux diamants que vous l'estimastes valloir quinze ou vingt mille escus, laquelle, à nostre advis, vous tenta un peu; car, comme vous nous l'avez conté, vous la pristez sans accepter ny refuser; ny dire autre chose, sinon: « Monsieur, voyons un peu ce que vous avez à me proposer, dautant que de la qualité de ces choses depend la maniere de responce que je vous puis faire. »

Surquoy il vous dit qu'il ne falloit point que vous estimassiez que M. le duc son maistre eut entrepris un voyage de telle consequence pour chose de prix si contemptible que le marquisat de Saluces; mais qu'ayant fait resolution, comme il vous l'avoit des-ja dit, d'estre François de faction comme il l'estoit de naissance, il vouloit ouvrir des moyens au Roy, lesquels luy faciliteroient l'obtention de l'Empire et la conquête du royaume de Naples et du duché de Milan. Moyennant lesquels avantages il ne voyoit rien qui pust divertir ny retarder un brave et judicieux esprit comme le vostre à conseiller au Roy de prodiguer un chetif marquisat de Saluces tout composé de loppins et pieces rapportées pour parvenir à la possession de si amples estats et magnifiques récompences; qu'il vous prioit donc de représenter ces choses au Roy, et luy donner vos bons conseils pour les luy faire genereusement embrasser, et lier à son service un prince de telle puissance, merite et vertu que M. le duc de Savoye son maistre, qui se vouloit unir inseparablement avec la couronne de France, comme il l'avoit desja suffisamment tesmoigné, s'estant mis en si mauvais mesnage avec les Espagnols à cause de ce voyage qu'il avoit fait en France contre leur gré.

Surquoy vous luy usastes de plusieurs remerciemens, complimens et civilitez dont la substance fut, pour le regard des affaires d'estat, que le Roy ny vous n'aviez jamais affecté la restitution du marquisat de Saluces, ny pour la valeur ny pour la consistance d'iceluy, mais seulement pour l'honneur du Roy et du royaume, lesquels recevroient une grande honte et flestrisseure s'ils enduroient qu'il leur fut ainsi retenu par la vive force; et partant ne pouvoit nullement M. le duc de Savoye rien faire de mieux ny de plus convenable à l'estat des affaires presentes (au moins selon vostre avis) que de remettre purement et simplement le marquisat de Saluces

entre les mains de Sa Majesté, pour une plus ample preuve de l'affection qu'il disoit avoir envers elle et la France, puisqu'il se monstroient ainsi soigneux de conserver l'honneur et la gloire de l'un et de l'autre, laquelle restitution vous ne doutiez nullement que le Roy ne recogneust apres comme il appartenoit à la dignité, prudence et generosité d'un si grand Roy, que la seule vertu, et non aucune ambition ny avarice, faisoit insister au recouvrement de ce marquisat, duquel la France avoit esté spoliée au temps qu'elle devoit esperer assistance et secours de M. de Savoye, tres-obligé au Roy Henry defunct, pour les graces et bien-faits qu'il en avoit receus à son retour de Polongne et encor depuis; et pour monstrer que telle estoit la disposition de l'esprit de Sa Majesté, et qu'elle n'avoit nulles fins ny passions ambitieuses, elle desiroit que la possession de l'Empire et des Estats de Naples et de Milan tombast plustost es mains de M. le duc de Savoye qu'es siennes propres; en quoy il luy ayderoit de son nom, armes et autorité, voire de sa propre personne, s'il voyoit les choses de telle facilité qu'il les faisoit, afin de luy donner moyen de partager royalement sa numereuse et florissante lignée.

Puis ayant ouvert et bien consideré la boîte d'or enrichie de diamants qu'il vous avoit baillée, vous en tirastes le portraict, et luy dites que vous le reteniez avec beaucoup d'honneur et de joye, pour la memoire continuelle qu'il vous donneroit de la bien-veillance d'un si grand et vertueux prince que monsieur le duc son maistre, et luy tesmoigner que vous aviez de tous autres sentimens et inclinations pour luy qu'il ne se montroit disposé de croire; mais que pour la boîte, à cause de son prix excessif et que vous estiez de serment de ne recevoir jamais de presens de valeur que du Roy, vous le priez de la vouloir remporter.

Surquoy vous ayant respondu qu'il ne pouvoit separer les gratifications de son maistre sans blasme et reproche, et fort insisté là dessus, vous luy rendistes l'un et l'autre; et finalement, apres plusieurs semblables discours, il se retira vers son maistre, auquel, par le recit de ce qui s'estoit passé, il donna fort peu d'esperance de pouvoir rien obtenir de vous qui peust estre desavantageux au Roy ou à la France. Tellement que voyant ce premier moyen luy avoir esté peu fructueux, il tourna tout son esprit à faire en sorte que le Roy nommast un autre député en vostre place, qui ne fust pas si revesche et accariastre, car c'estoient les qualitez qui vous estoient données par luy et les siens, voire mesmes par aucuns de ceux du Roy. Lesquels voyant

l'esprit de Sa Majesté fort difficile à ployer à leurs intentions, ils userent d'un autre stratagème, qui fut que M. de Savoye prioit Sa Majesté de trouver bon, puis que le Pape avoit esté nommé juge arbitre entre les parties, que le patriarche de Constantinople, estant nonce de Sa Sainteté, se trovast à la conference, fut du nombre des députez en icelle, comme amy commun, ce que le Roy approuva, ne pensant point à leur finesse qui fut le lendemain. Le Roy ayant ordonné, à cause qu'il vouloit aller jouer au jeu de paulme de la Sphere, de tenir le conseil chez monsieur le connestable, il s'y rendit; en partant il commanda à tous de travailler, et à vous à l'oreille, il dit : « Prenez bien garde à tout, et que l'on ne me trompe pas. » Et ainsi vous renvoya sans attendre vostre response.

Or, comme Sa Majesté fut partie, au lieu que vous estimiez les voir tous s'asseoir et travailler avec diligence, vous les vistes tous se separer deux à deux et trois à trois, et vous laisser seul, comme contagieux. Et puis ayant esté les uns apres les autres parler au susdit patriarche, finalement M. de Bellievre vint vers vous, et vous dit : « Monsieur, vous avez tousjours esté bon François, et avez tant dignement servy le Roy, et incessamment preferé le public à vos interests particuliers; je m'assure que vous ne voulez pas en user autrement, maintenant qu'il est question d'un si grand affaire. — Non, je vous assure, monsieur, respondites-vous. » Lors il vous dit : « Monsieur, je parle pour ce bon-homme de patriarche, qui est icy nonce de nostre Saint Pere; il est en si grande reputation à Rome, car il papege et dit que s'il s'étoit trouvé en conseil avec un huguenot qu'il seroit perdu; partant, monsieur, nous vous prions tous de vouloir déferer quelque chose à la fantaisie de ce bon-homme, qui aime tant le Roy. — Jesus, monsieur, luy dites-vous, je le veux bien; partant je m'envois. » Et sans autre propos, fistes une grande reverence à toute la compagnie, qui pensoit estre bien despeschée de vous.

Mais comme vous pensiez sortir du logis de monsieur le connestable, vous rencontrastes le Roy sous le porche où il s'estoit arresté à parler à M. de Bellangre-ville, qui vous dit : « Où allez-vous? est-ce desja achevé? — Non, Sire, dites-vous, l'on n'a pas seulement commencé. » Lors vous luy contastes tout ce qui est dit cy-dessus; dequoy il entra en une extrême colere, et vous dit : « Or retournez-vous y-en, et s'il y a quelqu'un qui s'offence de vostre presence, c'est à luy à se retirer et non à vous. » Ainsi vous remontâtes au conseil, où ils furent estonnez de

vous revoir, et vous demanderent pour quel sujet vous reveniez si tost. « Pource, dites-vous, que j'ay trouvé le Roy sous le porche, et luy ayant conté les raisons pourquoy je m'en allois, il m'a dit que je m'en revinsse; » et leur dites le reste neantmoins. Pour ce matin là l'on ne fit rien, mais fut resolu que chacun s'en yroit dîner et reviendrait incontinent apres. Enfin, apres plusieurs autres telles traverses, difficultez et artifices, vous demeurastes des deputez pour traiter; et comme vous recognustes que les voix se portoient à faire deux partis à M. de Savoye, et luy donner six mois de temps pour choisir, vous dites au Roy que cette resolution le rejetteroit dans la guerre infalliblement, d'autant que M. de Savoye estant maistre de luy mesme, et sçachant aussi bien à present ce qu'il feroit d'icy à six mois, lequel des deux partis luy estoit le plus utile, que s'il demandoit ce terme, ce n'estoit point pour en estre mieux informé, mais pour renoüer ses intelligences et se preparer à une plus ferme et obstinée defence; et le Roy vous demandant : « Qu'est-ce donc que vous voudriez faire? » vous luy dites : « Sire, M. de Savoye est venu en France sous la seureté de vostre foy et de vostre parole, il faut qu'elle luy soit gardée inviolablement; et afin qu'il ne luy arrive inconvenient en s'en retournant en ses pays, je desirerois que vous le fissiez accompagner avec quinze mil hommes de pied, deux mil chevaux et vingt canons que j'auray bien tost prests, et si tost qu'il sera dans Mont-melian ou autre telle place de ses Estats, la plus proche des vostres, luy faire donner resolution sur le choix qu'il pretend faire, et à son refus, mettre en œuvre vostre escorte pour le mieux persuader. — Ho, ho, dit le Roy, vous allez un peu bien viste; je ne puis plus faire cela, puis que j'ay desja promis le contraire. — Sire, dites-vous, c'est le seul moyen d'éviter la guerre : mais puis que vous n'approuvez pas mon opinion, vostre volonté soit faite. » Il se passa plusieurs autres particularitez qui vous concernent, lesquelles meriteroient bien d'estre escrites; mais outre que nous ne les sçavons pas assez bien, cela seroit trop long.

La dissolution du mariage du Roy ayant esté faite, comme il a esté dit, Sa Majesté commist messieurs le connestable, le chancelier, vous et M. de Ville-roy, pour traiter son mariage et de la princesse Marie de Florence, avec un nommé le sieur Joïaniny, qui avoit cette charge au nom du duc de Florence, et apres que vous fustes convenus de tous les articles, et qu'iceux eurent esté signez de vous autres, un jour que vous

alliez trouver le Roy pour autres affaires, il vous demanda d'où vous veniez. « Nous venons de vous marier, Sire, luy dittes-vous. » Surquoy il fut demy quart d'heure resvant et se grattant la teste et curant les ongles sans vous rien respondre; puis tout soudain il vous dit, en frappant d'une main sur l'autre, « Hé bien! de pardieu soit; il n'y a remede, puis que, pour le bien de mon royaume et de mes peuples, vous dites qu'il faut estre marié, il le faut donc estre. Mais c'est une condition que j'apprehende bien fort, me souvenant tousjours de combien de mauvaises rencontres me fut cause le premier où j'entray, et outre cela je crains tousjours de rencontrer une mauvaise teste qui me reduise à d'ordinaires contentions et contestations domestiques, lesquelles, selon que vous cognoissez de longue main mon humeur, vous ne doutez point que je n'apprehende plus que les polytiques ny militaires, de quelque plus grande consequence qu'elles puissent estre. »

En suite de ce discours, et pour achever les nostres de l'année 1599, nous insererons icy un chapitre tout de lettres de ladite année, que nous avons trouvées apres ces Memoires escrits, icelles estant toutes de diverses dattes et affaires dont il a desja esté parlé.

## CHAPITRE XCV.

### *Lettres diverses.*

#### *Lettre de la main du Roy à M. de Rosny.*

Mon amy, je me suis resolu de n'aller point par Conflans et de passer à Paris, où j'espere me rendre vendredy prochain, Dieu aydant, et n'y sejourner qu'un jour, afin que vous ne perdiez le temps durant que j'y seray, pour pourvoir aux affaires où ma presence sera requise : mais je vous prie de faire que ceux de mon conseil se disposent de venir à Fontaine-bleau avec moy, ou incontinent apres. Je vous renvoye la lettre que j'escris à ceux de mon parlement, que vous leur ferez presenter. Sur le premier advis que j'eus de la mort de feuë d'Unes, ma maistresse estant presente, me fit ressouvenir de vous; et pource que je ne le tenois encor pour certain, je ne le vous voulus escrire; mais depuis en ayant eu la confirmation, je le vous escrivis aussi-tost, et sans l'en advertir : dequoy elle me veut mal et est resoluë que ce sera de sa main que vous en recevrez les dépesches, non de la mienne, à ce qu'elle dit. Je suis bien aise de la voir en cet

humeur pour ceux qui me servent bien comme vous; je m'asseure qu'elle vous en escrit afin que vous luy en sçachiez gré; et moi je luy dis que c'est à moi seul que vous le devez. Adieu.

Ce mardy 9 mars, à Monceaux, au soir. HENRY.

#### *Lettre de la main du Roy à M. de Rosny.*

Mon amy, Ville-roy n'estant près de moy, je n'ay peu commander les dépesches dont vous m'escrivez à messieurs des Estats, pour vostre cousin le sieur de Bethune, auquel je serois tres-aise qu'ils baillassent le vieil regiment des François, si le sieur de la Nouë ne le veut reprendre, car pour Vignolles il n'y songe plus, et a un autre dessein; et au cas que ledit sieur de la Nouë le reprint, j'escriray à Busenval de faire tant envers lesdits sieurs des Estats, que l'estat de maistre de camp des sept compagnies nouvelles luy soit baillé; car j'ay receu trop de services de feu son pere pour ne l'aimer et faire pour luy, dequoy vous vous pouvez asseurer. Adieu.

Ce dernier mars, à Fontaine-bleau. HENRY.

#### *Lettre de la main du Roy à M. de Rosny.*

Mon amy, je vous prie de partir le lendemain de la feste pour me venir trouver en ce lieu, suivant le commandement que je vous fis quand je vous permis d'aller en vostre maison, car mes affaires ne se peuvent pas passer plus long-temps de vostre presence aupres de moy; et comme je ne vous fais la presente à autre fin, je prieray Dieu, etc.

Escrit à Fontaine-bleau, le huitiesme avril 1599. HENRY.

#### *Lettre de la main du Roy à M. de Rosny.*

Mon amy, j'ay receu la vostre par ce porteur. Pour response je vous diray que je parlay dernièrement au sieur de Vigny, qui m'a assuré de me faire un signalé service : j'estime qu'il ne manque d'affection, mais il le faut eschauffer à ce qu'il commence à travailler à cette affaire pour tant plutost y voir une fin. J'ay sceu par Lomenie ce que vous luy aviez commandé de me dire touchant le prevost des marchands de Merly, auquel j'escry la lettre que je vous envoie et que vous luy ferez rendre. Je trouve fort bon ce que vous avez fait pour asseurer le payement du regiment de mes gardes pour dix mois, et des autres regimens pour huit; mais de cela nous parlerons plus amplement à Fontaine-bleau, où je vous prie de vous rendre un des jours de la semaine prochaine et en poste, afin que là je resolve avec vous de la pluspart de mes affaires,

avant que de commencer mon voyage, puis de là vous pourrez aller faire un tour chez vous pour me revenir trouver où je vous diray. J'es-cry par ce porteur au sieur de Lussan et à ceux de la maison de ville, de ma ville de Nantes, que ma volonté est que le sieur de la Bouchetiere soit maire en ladite ville cette année, suivant ce que cy-devant je leur en avois escrit : je vous envoie celle que vous desirez pour ma chambre des comptes, que j'advouë estre d'estranges gens. Je m'en vais coucher à Fontaine-bleau. Bon jour.

Ce huitiesme may, à Ville-roy. HENRY.

*Lettre de M. de Ville-roy à M. de Rosny.*

Monsieur, M. de Bellievre vous fera voir la dernière dépesche que nous avons receuë de Rome, afin que vous contribuez vostre bon avis et secours sur icelle, comme vous avez accoustumé de faire en tout ce qui importe au Roy et à son Estat, chose plus necessaire en l'occasion qui se presente qu'en toutes autres que nous ayons sur le bureau. Partant je vous prie de nous y assister; je remets le demeurant à mondit sieur de Bellievre, pour prier Dieu, etc.

De Fontaine-bleau, le premier jour de juin au soir.

DE NEUF-VILLE.

*Lettre du Roy à M. de Rosny, contre-signée de Neuf-ville.*

Mon amy, je m'attends donc de sçavoir, par vos premieres, la resolution que vous avez prise sur les offres de Zamet, ainsi que vous m'avez escrit par vostre lettre. du sixiesme, et trouve bon que vous retardiez vostre parlement de Paris, jusques à vendredy, et qu'apres chacun prenne quelques jours pour donner ordre à ses affaires; car je me contenteray que l'on se rende à Orleans dix ou douze jours apres que vous vous serez separez, ne faisant pas estat d'y passer plutost, et seray bien aise de vous y rencontrer en ce temps-là, afin que nous allions de là ensemble à Bloys, où je feray cependant avancer le regiment de mes gardes, puis que vous avez donné ordre à sa monstre, car je m'en passeray bien par les chemins. Je n'entends pas que vous changiez l'advis que vous m'avez escrit avoir esté pris en mon conseil sur le bail des cinq grosses fermes, et auray à plaisir que le sieur de Gondy s'accommode en cela à ce qui est du bien de mon service. Quant à la demande de mon cousin le duc du Mayne, je la juge de consequence comme vous, et me semble, si vous n'en pouvez composer à bon compte avec luy, qu'il faut en remettre la resolution à quand nous serons rassemblez, afin de la prendre avec

plus de consideration. Vous m'avez fait plaisir d'avoir dépesché Rappin, et envoyé la coppie des inventaires de feu madame la duchesse. J'ay aussi receu la lettre du prevost des marchands, et me semble que l'on doit faire une bonne reprimande à ce gros accusé, d'avoir pris du sang sur les barbiere, car cette curiosité ne peut estre de bonne odeur. Parlez-en à monsieur le chancelier, et le faites venir en mon conseil pour luy faire sentir sa faute, si vous estimez en iceluy qu'il soit à propos d'en user ainsi. Au reste, souvenez-vous bien des commandemens que je vous fis estant à Saint Clou, pour faire payer presentement à mon nepveu le comte d'Auvergne un quartier de la pension que je lui donne, afin qu'il puisse vivre. Il m'a mandé que s'estant levé du lit pour vous porter une lettre que je vous ay escrite pour luy, vous luy aviez respondu que vous ne pouviez rien faire pour luy que je ne sçache comment cela s'est passé, et le faites secourir dudit quartier, en attendant que l'on puisse faire davantage. Je prie Dieu, etc.

Escrit au bois de Males-herbes, le septiesme juin 1599. HENRY. Et plus bas, DE NEUF-VILLE.

*Lettre de M. de Ville-roy à M. de Rosny.*

Monsieur, je ne vous ay pas envoyé d'autres lettres de M. de Caumartin que celle de laquelle vous m'avez escrit par vostre dernière la reception; partant je ne vous parleray plus de cela, ce sera aussi à M. de Gesvre à respondre aux lettres de messieurs du conseil, car c'est sa charge et la mienne de vous entretenir : donc je vous prie de trouver bon que je vous envoie un paquet pour M. Edmont, dans lequel sont les lettres que le Roy escrit par luy et pour luy à la Reine, afin que vous commandiez, s'il vous plaist, à quelqu'un qu'il luy porte ledit paquet, quant vous luy ferez aussi porter le present du Roy, afin qu'il reçoive les deux ensemble. Quand vous m'enverrez les commissions pour l'artillerie je les dépescheray; au reste nous continuons à dire que nous partirons samedi, mais je n'en responds pas. J'ay baillé à M. de Bouillon son paquet, lequel nous a fait part des nouvelles de Bonnes, mais nous en avons receu de Suisse, qui nous donnent bien autant de peine que les autres. On dit que M. de Savoye recherche fort lesdits Suisses assisté du roy d'Espagne. Je me recommande tres-affectueusement à vostre bonne grace, et prie Dieu, etc.

Du bois Males-herbes, le neufiesme juin, 1599.

DE NEUF-VILLE.

*Lettre de la main du Roy à M. de Rosny.*

Mon amy, vous entendrez par Petit, que je

vous dépesche expres, ce qui se passa hier au soir icy, et la plus signalée meschanceté dont vous ayez jamais oüy parler : ce que je vous ay bien voulu faire entendre au vray, de peur que desja vous ne l'ayez oüy conter autrement, et que la verité ne vous ait esté déguisée et nullement bien racontée, et que cela ne vous fit entreprendre de favoriser ceux qui ont tort ; et remettant le surplus à la suffisance du porteur, je vous prieray de le croire, et Dieu vous avoir en sa garde.

Ce 11 aoust, à Paris.

HENRY.

*Lettre de la main du Roy à M. de Rosny.*

Mon amy, je séjourneray icy jusques à lundy prochain, que j'en partiray pour aller coucher à Orleans, et me rendre mardy de bonne heure à Bloys, pour donner ordre à ce qu'il faut pour ce qui se passa icy mardy au soir ; car encor que ce soit esté sans dessein ny sans suite et que le mal ne soit grand, si est-ce que je veux que la justice aye son cours, me reservant le pouvoir d'en ordonner. Je ne doute nullement que si je ne vous eusse adverty par homme expres comme le fait s'estoit passé, et que vous l'eussiez sceu d'ailleurs, que cela ne vous eut bien donné de la peine. Je vous prie de donner ordre à faire compter la partie qu'il faut envoyer à messieurs des Estats, car cela importe à mon service, lequel je vous recommande, comme aussi que vous teniez la main que le cahier de ceux de la religion soit veu et dépesché au plustost. Bon soir.

Ce vendredy au soir, 13 aoust, à Paris.

HENRY.

*Lettre de la main du Roy à M. de Rosny.*

Mon amy, j'ay remis jusques à demain mon parlement de cette ville, pour ce que j'espere en ramener avec moy M. le Grand, non en poste comme je suis resolu d'aller, mais il partira avec moy et me suivra en carrosse. J'ay arresté le cours de la justice contre M. de Jainville, pour les raisons que je vous diray, lesquelles je m'assure que vous approuverez ; et je puis dire avec verité qu'en ce fait là, ma Cour de parlement a monsté avoir plus de vigueur pour la conservation de mon autorité, qu'elle n'avoit eu cy-devant pour le fait de Sainct Maigrin, Vautabran et autres. Je partiray demain, Dieu aydant, pour me rendre à Bloys vendredy, et là je vous diray le reste de ce qui s'est passé en ce fait icy, finissant par prier Dieu, etc.

Ce mercredy matin, 18 aoust, à Paris.

HENRY.

*Lettre de la main du Roy à M. de Rosny.*

Mon amy, cette-cy sera la responce à la vos-

tre du vingt-septiesme que je receus hier au soir. Je vous ay fait entendre ma volonté sur l'estat de mon procureur à Fontenay, laquelle je desire que vous suiviez. Je n'ay point parlé à ma sœur de ce que je luy baillerois pour les frais de ses nopces ; mais en ayant parlé à Fontaine-bleau au sieur d'Atichy, il m'a dit le luy avoir fait entendre, et qu'elle se contenteroit de ce que je voudrois, si que ce sera assez des quarante mil escus que je vous ay dit, et vous en pourrez parler audit sieur d'Atichy de ma part : je seray tres-ayse que l'on verifie l'accusation faicte contre ce controolleur general de mes gabelles ; laquelle, si elle se trouve veritable, je veux que la punition s'en fasse telle que le merite l'offence. Pour mon frere le duc de Lorraine, employez vous à ce qu'il reçoive tout le contentement qui se pourra, et comme vous cognoistrez que le bien de mes affaires et service le pourront permettre. Quant au sieur de Pilles, si de ces deniers recellez en Provence, dont l'on vous a parlé, on en pouvoit tirer quelque chose de comptant, je serois tres-ayse que l'on luy en fit bailler quelque chose ; et ne se pouvant, je trouve bon que l'on luy baille quelque argent comptant et que plutost on l'emprunte : car de le prendre sur le retranchement des cinq regimens, il n'est nullement à propos et ne se peut faire, les ayant desja assez retranchez. Faites donner au sieur de Casaubon des moyens pour s'entretenir à Paris et y faire amener sa famille, car je luy ay fait venir pour remettre l'université de Paris et la faire refleurir, non pour estre près de moy. J'ay cy-devant ordonné aux sieurs du Coudray et Cases à chacun cent escus par mois, en attendant que l'edit soit verifié ; faites leur donc fournir cette somme en attendant cela. Je trouve bon que vous avez envoyé au sieur Maupeou le memoire que vous a baillé le sieur de Cussé : je luy escrits le contentement que j'ay de son service, par la lettre cy-incluse que je vous envoie pour luy faire tenir. Concluez avec le sieur Zamet l'advance des quarante mil escus reservez en Bretagne pour mes bastimens, comme chose que j'ay à cœur. J'attends icy aujourd'huy le sieur de Gesvres, pour sçavoir si mon cousin le mareschal de Brissac luy a point envoyé l'estat des frais faits à l'embarquement des estrangers en Bretagne et demolition du fort de Blavet, pour incontinent apres vous l'envoyer, et adviser, avec les sieurs de Bellievre et Sillery, un expedient pour en retirer ce que je vous ay commandé ; et s'il ne l'a, j'en escriray à mon cousin le mareschal de Brissac et au sieur Turquan, pour les prier de me l'envoyer. Donnez moy souvent advis et advertissez moy de ce qui se

passera par delà pour mon service et qui viendra à vostre cognoissance, faisant que l'on travaille aux deux memoires que j'ay envoyez à monsieur le chancelier; et croyez, suivant ce que je vous ay promis, que s'il vient à vacquer quelque benefice, que je ne vous oublieray point. Hier il en vacqua un icy aupres, de dix-huict cens livres, lequel je ne jugeay digne de vous, et pour cette cause je le donnay à un autre. Adieu.

Ce 29 septembre, à Monceaux. HENRY.

*Lettre de la main du Roy à M. de Rosny.*

Mon amy, par une autre lettre que je fais à ceux de mon conseil, vous verrez le desir que j'ay de créer un presidial en ma ville de Lectoure, au lieu de celuy de Contal qui y est. Mais pour ce que je desire que cela soit tenu secret pour les raisons que vous fera entendre ce porteur, je vous fais ce mot à ce que vous y teniez la main, et que peu se trouvent quand la resolution s'en prendra; autrement, l'affaire estant divulguée, je serois empesché en cét affaire. Sur ce Dieu, etc.

Ce premier octobre, à Monceaux. HENRY.

*Lettre de la main du Roy à M. de Rosny.*

Mon amy, suivant ce que je vous escrivas hier par un de mes laquais touchant l'erection d'un siege presidial en ma ville de Lectoure, je vous prie tenir la main de tout vostre pouvoir à ce que monsieur le chancelier seele cela et que je n'en oye plus parler, estant chose que j'affectionne. Vous luy ferez entendre que je trouve mauvais ce qu'on m'a rapporté, qui est qu'il a divulgué cette affaire au prejudice de ce que je luy en avois escrit, car j'ay appris que ma sœur l'a sceu. Adieu.

Ce 16 octobre, à Monceaux. HENRY.

*Lettre de la main du Roy à M. de Rosny.*

Mon amy, je vous ay cy-devant parlé des dix mil escus de pot de vin que l'on me vouloit donner pour la ferme des rivières d'Anjou, dont je vous dis que je voulois prendre cinq mil escus pour mettre dans mes coffres. Il me semble que l'on devoit entendre à cela maintenant, à cause des despences qu'il faudra faire pour la venue de M. de Savoye : je me contenteray d'en faire mettre dans mes coffres deux mil, et les trois autres pourront servir ou pour les postes qu'il faudra faire à cause de ladite venue ou autres choses necessaires; advisez y donc et promptement. J'ay veu Berthier et la dépesche qu'il m'a apportée d'où il estoit allé, que j'ay trouvée tres-bien. Advancez cet affaire le plus qu'il vous sera possible; faites donner de l'argent à Dar-

banne, mon tapissier, pour s'en aller à Fontaine-bleau y faire porter des meubles necessaires pour la venue de M. de Savoye et faire accoustrer ce qu'il faut pour l'y recevoir. Je m'en vais coucher à Monceaux. Adieu.

Ce 25 novembre.

HENRY.

*Lettre de la main du Roy à M. de Rosny.*

Mon amy, hier je receus la vostre par le sieur de Caumartin : je suis bien ayse de ce que le party du sel a esté conclud, et que vous advisiez à prendre les seuretez de Parant, comme des conditions que vous me mandez pour lesquelles il luy a esté adjudgé, encor que mon neveu de Lorraine vienne et soit par les chemins. Je n'ay rien changé en ce que je vous ay cy-devant mandé pour les vingt-huict mil escus deubs à messieurs des Estats que je vous prie de leur faire fournir au plutost; et pour le fait de ma sœur, si vous pouviez faire fournir jusqu'à quatorze mil escus, qui n'est que deux mille plus que vous ne me mandez, je m'assure de luy faire faire une partie de ce que je voudray. Soyez icy vendredy de bonne heure sans faute : j'escry à monsieur le chancelier qu'il soit icy lundy avec tous ceux de mon conseil; mais je seray bien ayse d'avoir parlé à vous deux jours avant leur venue, et pour cause. Adieu.

Ce jedy matin troisieme decembre, à Saint Germain en Laye.

HENRY.

## CHAPITRE XCVI.

*Conférence sur la religion entre du Perron, évêque d'Évreux, et du Plessis Mornay. Tentative pour empoisonner le Roi. Retour du duc de Savoye dans ses États. Conversation du chancelier de Bellièvre et de Rosny sur la guerre. Préparatifs contre la Savoie. Entrée des troupes françaises dans la Bresse et dans la Savoie. Conduite équivoque de Biron. Siège et prise de Charbonnières.*

Pour l'année 1600, nous vous dirons qu'elle commença, pour vostre regard particulier, par les preparatifs que le Roy vous commanda de faire pour la guerre, Sa Majesté ayant enfin defféré aux raisons que vous luy aviez représentées, et confirmations qui luy avoient esté données de vos advis touchant les grandes brigues, pratiques et menées, desquelles M. de Savoye usoit pour gagner tous ses serviteurs plus accreditez, et toutes sortes d'autres personnes qu'il aymoît et avoient quelque pouvoir sur son esprit : en ayant eu desja plusieurs qui luy avoient fait



grand cas de l'esprit et du courage de ce prince, jusques à luy dire que s'il le pouvoit gagner tout à luy, cette acquisition luy seroit plus avantageuse que le recouvrement du marquisat, qui estoit en telle situation, de telle nature et de si peu de valeur qu'il luy cousteroit tousjours six fois plus à garder qu'il ne luy vaudroit de revenu.

En continuant la suite des affaires nous vous dirons qu'environ ce temps se fist la dispute d'entre messieurs d'Evreux et du Plessis (1), que vous essayastes d'empescher de tout vostre pouvoir, et y aviez disposé le Roy et mesmes aucunement M. d'Evreux; mais vous trovastes le sieur du Plessis si opiniastre, qu'il n'y eut moyen de l'en divertir, et neantmoins il se défendit si foiblement, qu'il faisoit rire les uns, mettoit les autres en colere, et faisoit pitié aux autres; ce que voyant le Roy il vous vint demander : « Et bien, que vous en semble de vostre Pape? — « Il me semble, Sire, dites vous, qu'il est plus « Pape que vous ne pensez; car ne voyez vous « pas qu'il donne un chapeau rouge à M. d'Evreux? Mais au fonds je ne vis jamais homme « si estonné, ny qui se defendit si mal. Si nostre « religion n'avoit un meilleur fondement que ses « jambes et ses bras en croix (car il les tenoit « ainsi), je la quitterois plutost aujourd'huy que « demain. »

Monsieur de Soissons commença dès lors à se refroidir de l'amitié qu'il vous avoit tesmoignée, et à vous prendre en haine, à cause de ce qui s'estoit passé touchant Madame. Il descouvrit lors au Roy qu'une femme, nommée Nicole Mignon, l'estoit venuë sonder et luy ouvrir des moyens de le faire empoisonner; ce qui ayant esté bien vérifié elle fut bruslée.

Nous vous avons parlé aux chapitres precedens du voyage de M. de Savoye en France, et du sujet qui l'y avoit amené; mais ce voyage ne lui réussit pas selon ses intentions: car il s'en retourna apres avoir seulement convenu de deux sortes de conditions, à en choisir l'une d'icelles dans trois mois : à sçavoir, qu'il rendroit le marquisat de Saluces purement et simplement au Roy dans le premier jour de juin, ou en échange d'iceluy le pays de Bresse jusques à la riviere de Dain, le vicariat de Barcelonnette jusques à l'Argenterie, le val de Sture, celuy de la Perouse et Pignerol; et que, pour le surplus, les parties restitueront toutes les places qu'ils occupoient dans les pays, l'une de l'autre. Mais ce premier jour de juin estant venu, sans qu'il fust

apparu d'aucunes diligences de M. de Savoye, pour l'exécution de ce qu'il avoit promis, le Roy commença ses preparatifs pour le voyage de Savoye : le discours duquel sera un peu long, car les circonstances le méritent, et encor en obmettrons-nous plus de la moitié, dont la cognoissance ne seroit pas inutile.

Toutes choses alloient assez lentement, car la pluspart y estoient contraires. L'on fit faire un grand sejour à Moulins, et madame de Verneuil, qui estoit demeurée grosse à Paris, faisoit ce qu'elle pouvoit pour y rappeler le Roy. Mais le ciel en ayant autrement disposé, il envoya un coup de tonnerre, lequel entrant dedans sa chambre et passant sous son liet, il la fit accoucher de frayeur d'un enfant tout mort, lequel accident vous ayda grandement à renverser toutes les menées et pratiques contraires à l'acheminement du Roy à Lyon; duquel vous le pressiez et solicitiez avec telle instance, voire obstination, et d'entrer aussi-tost en armes dans la Savoye, qu'il ne fut pas jusques à M. le chancelier de Bellievre qui ne vous vint voir pour vous disposer au temporisement; lequel usa en substances de telle parole (car nous estions lors pres de vous) : « Hé quoy ! monsieur, hé ! « vrai Dieu, où est la prudence que doit avoir un « grand conseiller du Roy et d'Estat, comme vous « estes, et auquel, je ne le vous celeray point, « l'on dit que vous donnez de precipitez conseils « pour la guerre ? Helas ! que pensez vous faire « de conseiller ainsi le Roy contre l'avis de tout « le monde, de vouloir declarer la guerre au roy « d'Espagne et au duc de Savoye, et à tous « ceux de leur intelligence ensemble ? car vous « n'en attaquerez point l'un que tous les autres « ne s'en meslent. Nous avons tant heureusement « travaillé à la paix de Vervins, et vous allez « renverser tout ce que nous avons fait. Et en- « cor, pour commencer une telle guerre, j'ap- « prends que le Roy n'a que six canons, peu de « munitions prestes, guerres d'argent, six ou sept « mille hommes de pied et douze ou quinze cens « chevaux ! Seroit-il possible que vous le vou- « lussiez porter hors de son royaume avec de si « petites forces ! Cela est indigne d'un grand et « puissant Roy comme celuy de France. »

Lors vous lui distes : « Ho ! ho ! monsieur, « vous prenez l'allarme bien chaude. Cela est « pardonnable à ceux de vostre robbe; mais « quand j'auray à discourir avec le Roy ou de « bons capitaines, je leur feray voir que M. de « Savoye n'a fondé sa principale defence que sur « la timidité de ceux qui vous ressemblent et sur « les belles promesses d'autres, qui, pensant « tromper le Roy, ruineront le duc de Savoye.

(1) Dispute théologique qui eut lieu entre du Perron, évêque d'Evreux, et du Plessis-Mornay, auteur d'un livre intitulé : *Instruction de la Sainte Eucharistie*.

« Et n'y a point d'apparence que le roy d'Espagne entre en guerre, luy qui est un jeune prince, qui n'a ny grand esprit ny grand courage, qui a de grandes necessitez dans ses Estats, et qui est possédé par un favory qui le meine par le nez, comme il luy plaist, lequel de son costé n'est nullement homme de guerre, veut tirer à soy ou aux siens tout ce qu'il pourra, et saccager luy seul tous les biens de son maistre; ce qu'il ne pourroit pas faire, ayant une si grande guerre sur les bras; car il faudroit que tout l'argent qu'il peut maintenant gripper fut employé à cela. Tellement que ny du costé d'Espagne ny du costé de Savoye, il n'y a nulles forces prestes, lesquelles soient propres, ny pour attaquer ny pour défendre. Que si nous usons de diligence nous les surprendrons, et aimerois mieux les attaquer maintenant avec quatre mil hommes, qu'en l'année qui vient avec trente mil. Et quant à l'artillerie et à l'argent, c'est à moy à y pourvoir. Je respondray de ma vie, que l'un ny l'autre ne manquera point au Roy; partant, monsieur, mettez vostre esprit en repos; faictes vostre charge et laissez faire aux gens de guerre la leur. » Surquoy demy en colere, il vous dit: « Je n'ay que faire de vos gens de guerre et suis obligé à bien conseiller le Roy, ce que je feray tousjours, quoy que vous veuilliez dire. » Et se retira sur cela tout mutiné.

Ces mesmes propos furent rebatus devant le Roy, et enfin son courage et vos persuasions le porterent à Lyon, où derechef l'on usa de mille artifices pour jeter Sa Majesté dans l'hiver. Tantost M. de Savoye envoyoit des députez pour proposer d'autres expédiens; tantost disoit qu'il vouloit executer de bonne foy ce qui avoit esté arresté à Paris sur cela, tant pour faire nouveau fonds d'argent que pour faire avancer l'artillerie et les munitions. Le Roy vous dépescha en poste à Paris. Mais avant que partir vous envoyastes à toutes les receptes generales faire deffences d'acquitter plus aucunes assignations, si non pour les garnisons des frontières et les gens de guerre en campagne, dautant que vous disiez vouloir faire payer toutes les autres despeses argent comptant à l'espargne; et partant que l'on y fist voiturier tous les deniers en diligence. Vous fistes aussi deffences aux payeurs des rentes d'en acquitter plus aucunes sans arrest du conseil, dautant que le Roy avoit fait verifler que l'on en payoit plusieurs qui avoient esté rachetées ou qui avoient esté constituées sans argent. Vous envoyastes aussi trois commissaires de l'artillerie en Languedoc, Provence et Bourgogne, pour ramasser toutes les bonnes pieces

de batteries et munitions qu'ils pourroient decouvrir, donnastes pareille charge à vos lieutenans à Lyon et en Dauphiné, et de faire par tout fondre boulets, battre poudre, amasser affusts, cordages, mesches, sacs, pics, pioches, pelles, besches et autres outils, et faire le tout voiturier à Lyon et Grenoble. Et apres cet ordre estably, vous-vous acheminastes en telle diligence qu'en trois jours vous fustes de Lyon à Paris, où estant arrivé, vous envoyastes aux provinces voisines faire les mesmes choses qu'aviez faites ailleurs, baillastes des commissions pour lever nombre de gens de guerre, sans forme de compagnie ny de regimens, afin de servir seulement pour remplir les troupes qui estoient pres du Roy, qui se trouveroient trop foibles. Vous atiltrastes six marchands, lesquels assemblerent tous les roulliers et voituriers, par eau et par terre, qui estoient à trente lieues de Paris, lesquels firent marché avec eux de voiturier trois millions trois cens milliers pezzants de marchandise, à tant le cent, à la charge de le rendre dans quinze jours à Lyon, du jour de la livraison. Quand ils furent bien obligez par devant notaires, vous leur fistes delivrer vingt canons, six mil boulets, six vingts milliers de poudre, et toutes autres sortes d'outils et ustancilles d'artillerie, jusqu'à concurrence du poids. Tous lesquels voituriers se vouloient desdire, contestans que ce n'étoit point de la marchandise; mais enfin, ayant desja la pluspart assemblé leurs chevaux et batteaux, leurs charrettes, cordages et lievres, et les ayant menacez qu'ausi-bien vous saisiriez-vous de tout cela, ils entreindrent leur marché, et vous rendirent dans seize jours le tout à Lyon. Que s'il l'eust fallu mener avec chevaux d'achapt ou de solde roulliere, comme l'on avoit accoustumé et vouloit-on que vous le fissiez, vous n'en fussiez pas venu à bout, sans une excessive despense et un temps de deux ou trois mois.

Pendant toutes ces faciendes M. de Savoye ne cherchant qu'à gagner l'hiver, et vous voyant party, fit apparente demonstration de vouloir accepter l'un des deux partis que l'on luy avoit baillez à choisir à Paris, et la chose en vint si avant, que les ostages de part et d'autre furent nommez et envoyez pour seureté de l'execution: tellement que le Roy vous envoya trois courriers, l'un sur l'autre, pour vous advertir que tout estoit d'accord, et partant n'aviez plus que faire de rien avancer ny le constituer en plus grande despense. A toutes ces lettres vous ne luy respondites jamais que trois lignes en cette substance,

*Lettre de M. de Rosny au Roy, sur les  
deceptions de M. de Savoye.*

SIRE,

Je vous supplie très-humblement de m'excuser si je contrarie vos opinions et contreviens à vos commandemens; car je sçay de science, que M. de Savoye ne veut que tromper, à quoy beaucoup de ceux qui sont près de vous ne lui nuisent pas, et ne demande qu'à gagner l'hyver: c'est pourquoy j'avanceray toutes choses, et me rendray près de vous dans quinze jours, bien fourni de tout ce qu'il faut pour vous empescher de recevoir ny honte ny dommage.

Quatre jours apres vostre derniere response faite au Roy, vous receustes une autre du Roy que nous vismes en vos mains, où il y avoit ces mots.

*Autre lettre du Roy à M. de Rosny.*

Mon amy, vous avez bien deviné, car M. de Savoye se mocque de nous; partant venez en diligence, et n'oubliez rien de ce qui est necessaire pour luy faire sentir sa perfidie. Adieu.

De Chambéry, ce lundy.

Cette lettre vous trouva des-jà avancé à Montargis, où partie de vos équipages s'étoient rendus par eau, pour aller, de là, gagner la riviere de Loire. Apres avoir pourveu aux choses necessaires pour faire marcher tout l'équipage avec ordre et diligence, vous allâtes en poste trouver le Roy, lequel, encor qu'il s'amusast à ouyr des comediens et fist travailler à ce qu'il falloit pour son mariage, si n'obmettoit-il rien du devoir d'un grand capitaine et provident chef de guerre; car ayant fait recognoistre les villes de Mont-melian et de Bourg, la premiere par des capitaines de M. de Lesdiguières, et la seconde par les sieurs de Vienne et de Castenet qui estoient de vostre suite, si tost que vous fustes arrivé il enlit executer les entreprises fort heureusement: des particularitez desquelles nous ne dirons rien, dautant que vous n'y fustes pas, n'estoit que par les divers succez de la derniere, il se justifie qu'aucunes-fois ce qui est réputé à desastre et malheur au commencement, devient enfin la cause d'un bon effet, et que les traverses des malins facilitent les operations vertueuses des gens de bien.

Comme donc toutes les choses necessaires pour ces deux executions eurent esté preparées, afin de les faire réüssir en une mesme nuit, M. le mareschal de Biron commist M. de Crequy pour celle de Mont-melian, et voulut estre en personne à celle de Bourg, laquelle il disposa de sorte que l'execution s'en devoit faire sur la minuict: de-

quoy le sieur de Bouvens, gouverneur de cette place, fut aussi-tost adverty (et fut sceu longtemps depuis que ç'avoit esté par le moyen du mareschal de Biron mesme, lequel commença lors premierement à produire des effets de ses defections, lesquels luy réussirent aussi mal que toute la suite d'icelles); tellement que luy, comme brave soldat, diligent et avisé chef de guerre qu'il estoit, fist soudain assembler en armes tout ce qu'il avoit de gens de guerre dans sa place, tant en soldats de la garnison qu'en habitans de ville, et leur dist en substance, qu'ayant eu advis, de lieu si certain qu'il n'en falloit nullement douter, qu'il y avoit entreprise sur sa place, laquelle devoit estre executée sur la demie heure de devant ou d'apres minuict, il les exhortoit et prioit tous, voire leur commandoit absolument, en tant que besoin en pouvoit estre, de se resoudre à veiller toute cette nuit et de demeurer tousjours sur leurs armes aux lieux qu'il leur ordonneroit, tant dedans les portaux que sur les ramparts et bastions, qu'és trois lieux de dehors où il vouloit diligemment establir trois bonnes et fortes troupes, comme estant cette voye la plus asseurée forme de garde qui se pouvoit pratiquer contre toutes sortes de surprises nocturnes, soit par intelligence, soit par petard, escalade ou saulcisse, comme il estoit adverty que le dessein avoit esté projeté sur les trois premiers; et pource que l'on luy avoit mandé qu'il avoit esté choisi pour cet effect, des plus resolu et determinez capitaines et soldats qu'il avoit esté possible de trouver, il ne leur vouloit point celer qu'il ne fut bien aise d'éviter que sa soldadesque se trouvast obligée d'en venir main à main avec telles gens, de crainte que quelques-uns des siens non encor usitez à tels impetueux et opiniastrez insults de front à front, venans à s'effrayer, ne donnassent sujet aux autres de combattre en confusion, et peut estre de se retirer en desordre, et qu'en ce cas il ne se trovast réduit à les laisser tous tailler en pieces à sa veuë, plutost que de les recevoir, ou qu'en les voulant aller secourir ou leur ouvrant les portes, les ennemis n'entrassent pesle-mesle dans la ville et peut estre en suite dans la citadelle: tellement que par forme de prevention à tels et semblables inconveniens, il leur ordonnoit de faire de si grands feux aux lieux de leurs gardes, et jeter de doubles et triples sentinelles perduës, si loing, que par ces grandes clarteiz et tant de *qui va là?* si fort esloignez, ils fissent perdre aux ennemis l'envie de s'avancer davantage, et, en tout cas, moyen de se retirer de bonne heure, à loisir et sans desordre, ou bien faire ferme si l'ennemy marchoit en tas.

tonnant et comme ayant crainte. Tous lesquels ordres et raisons alleguées ayant esté grandement approuvées par ceux qui les avoient entendus, chacun d'iceux, si tost qu'il eut soupé, se rendit au lieu de sa garde, suivant l'ordre à luy prescript (que le sieur de Bouvens avoit fait mettre par escrit, et mesme baillé une coppie d'iceluy à chacun des chefs), et se trouverent tous dès les huit à neuf heures, où ayant tousjours l'oreille au guet et les armes sur le dos et en la main, ils contoient toutes les heures de l'horloge; et comme ce vint sur les onze heures jusques à une heure, ils renforcerent les flammes de leurs feux, se mirent en posture sur leurs armes et avancerent encor davantage leurs sentinelles, afin de les tenir advertis de meilleure heure.

Mais lors qu'ils entendirent frapper deux heures, puis trois heures, et quatre heures, et que des-jà de tous costez les coqs chantoient pour annoncer la prochaine venue du nouveau jour, ils vindrent à croire que leurs ennemis ne viendroient plus du tout, et qu'infailiblement ils avoient descouvert leurs feux et reconnu leurs corps de garde de dehors, et s'estoient retirez. De sorte que s'étans fortifiés les uns les autres en cette opinion, tant par l'apparence qu'il y en avoit, que par ce que l'on se persuade facilement ce que l'on desire, ceux de dehors ayans quitté les lieux de leurs gardes, ceux des tours, portaux et ramparts ayant fait le semblable à leur exemple, ils s'en allerent tous rians et sautans en leurs maisons, les uns se mettant au lit, et les autres à des-jeuner avant que de dormir, sans qu'il demeurast que quelques chetives sentinelles, par forme d'acquit.

Or, estoit-il arrivé pendant toutes ces dispositions et faciendes de ceux de Bourg, que les troupes du Roy marchantes de nuit s'estoient grandement esgarées, soit par la faute des guides, ou que cela eust esté fait à la main par ceux qui avoient si mal commencé; tellement que comme ils approcherent de la ville, ils virent que le jour commençoit à poindre, ce qu'estant reconnu par M. le mareschal de Biron et quelques autres chefs, dependans absolument de luy, ils voulurent que l'on se retirast. Mais M. de Boësse, auquel le Roy avoit donné parole du gouvernement de Saint Angel, Chambaret, Loustanges, Vienne, et sur tous Castenet (qui estoit à vous et s'étoit fait fort de poser et faire jouer le petard, quand ce seroit en plain jour, voire quand toutes les courtines seroient bordées) oppiniastrent tellement à marcher et donner avec protestation, quant à eux, de ne revenir point qu'ils n'eussent fait tout leur pou-

voir pour prendre la ville, que M. de Biron fut contrainct de ceder à leurs fantaisies, ce qui estant resolu fut aussi-tost executé. Tellement que Castenet avec trois autres que vous luy aviez baillez pour luy aider à porter quatre petards, s'estant avancé, suivy de douze hommes de main, armez de toutes pieces, jusques sur les contrescarpes, une sentinelle luy demanda : « Qui va là ? » A quoy il respondit suivant vostre ordre : « Amis, amis ! Nous venons advertir M. de Bouvens, que grand nombre de gens de guerre ont marché toute nuit par la campagne, sont venus jusques à deux mille pas de cette place, et puis s'en sont retournés sur leurs pas, et de quelques autres affaires qui concernent le service de monseigneur le duc et la seureté de sa place : ce que nous vous prions tres-instamment de luy aller dire tout ce que nous vous disons, afin qu'il nous envoie ouvrir la porte. » A quoy la sentinelle ayant répondu qu'il ne manqueroit pas, et ayant en mesme temps quitté sa garde pour cet effet, Castenet continua son chemin vers la porte, posa son petard et emporta le pont-levis, sans allarme, par l'ouverture duquel les douze qui le suivoient avec de courtes eschelles, car le fossé n'estoit guere creux, entrerent dans la ville, où, estant suivis par le reste des troupes, elle fut prise sans combat, le sieur de Bouvens ayant à peine eu loisir de se retirer avec ses soldats dans la citadelle.

Mont-melian ayant esté semblablement pris, le Roy fit investir Chambery, dont il prit la ville et les faubourgs par l'effroy des habitans, les soldats s'estans retirez au chasteau où ils protestoient de se vouloir défendre, et de n'en sortir sans mandement de leur duc. Mais la presentation que vous leur fistes de huit canons mis en batterie dès le lendemain matin mesme, leur fit bien-tost changer de langage, et leur brave resolution en une seure capitulation qui leur fut fort bien gardée. Et se passa lors une chose grandement à remarquer, que, dès le lendemain de cette reddition, madame vostre femme persuada vostre hostesse de faire une assemblée des principales dames de la ville, où le bal fut tenu avec la mesme liberté et gayeté que s'il y eust eu un an que le Roy en eut esté le maistre, tant toutes choses estoient conduittes avec douceur, bon ordre et police.

De Chambery, le Roy vous renvoya à Lyon, pour aller donner ordre aux finances, à l'artillerie, aux vivres et munitions, et reconnoistre la citadelle de Bourg, Sainte Catherine, Seissel, Pierre Chastel, l'Escluse et autres places de Bresse; et luy s'en alla assieger Conflans, Mio-

lens, Monstiers, Sainct Jacomo, Sainct Jean de Morienne et Sainct Michel; des particularitez desquels sieges nous ne dirons autre chose, pour ce que vous n'y fustes pas et qu'il ne s'y passa rien de fort memorable, toutes ces places s'estans renduës d'espouvente quasi à la veuë du canon, sinon qu'à la prise de Miolens, il se trouva un homme dans les prisons, qui vous fut présenté apres par le sieur de Fugeres, lequel vous dit, en nostre presence, qu'il avoit esté quinze ans prisonnier, mais qu'encor n'en pensoit-il pas estre quitte à si bon marché, dautant qu'un homme qui se mesloit de predire, l'avoit menacé d'une fort longue prison, de laquelle il ne seroit delivré que par les armes d'un Roy de France, chose qu'il desesperoit de voir jamais arriver et neantmoins luy estoit advenuë.

Au partir de Lyon vous vous en allastes dîner à Villars et coucher à Bourg, où vous trouvastes M. de Biron, qui vous receut et traitta fort courtoisement, lequel, comme il vous vit resolu de reconnoistre la citadelle, il vous en dissuada autant qu'il pust, vous disant qu'il y avoit trop de peril, et qu'il ne le permettroit jamais. Neantmoins vous ne laissastes pas de vous en esclaircir le cœur, de voir et de reconnoistre tout, ce qui ne se fit pas sans extrêmes perils, aussi bien la nuit que le jour, et sembloit qu'ils fussent advertis, car tout estoit affusté sur vous. Depuis vous en voulant retourner à Lyon, l'on vous advertit qu'il estoit arrivé deux cens chevaux des ennemis, à un Chasteau proche de vostre couchée; mais quand vous en parlastes à M. de Biron, il s'en moqua. Neantmoins, à cause que vous n'estiez venu qu'avec vingt chevaux, par l'importunité que vous luy en fistes, il vous bailla ses gardes pour vous faire escorte; mais avec charge expresse et secrette de vous laisser à Villars et de le revenir trouver. Auquel lieu estant arrivé et vos mulets desja deschargez, comme vous vistes que ses gardes s'en vouloient retourner, quelque priere ou commandement que vous leur fissiez, vous entrastes en soubçon et dites à vos gentils-hommes : « Cette « procedure ne me plaist point, et ne fait point « seur coucher icy; allons ailleurs. » Et fistes aussi-tost recharger vos mulets et allastes encor à Vimy, qui est à trois ou quatre lieux de là, et trois heures apres que vous fustes deslogé, cent chevaux et autant d'arquebusiers donnerent droit à vostre logis et firent mille exclamations, ne vous y trouvant point; ce que sçachant, vous commençastes à soubçonner M. de Biron de quelque mauvais dessein. A vostre arrivée à Lyon vous trouvastes un courrier du Roy avec une lettre de sa main, disant :

*Lettre du Roy à M. de Rosny.*

« Mon amy, nous avons pris plusieurs petites places, et sommes à present devant Conflans; qui fait mine de se vouloir faire battre. Partant venez me trouver le plutost que vous pourrez; car vostre presence est icy du tout necessaire, et envoyez devant vous, puis que vous viendrez en poste, quatre ou cinq bons commissaires, autant de vos meilleurs pointeurs, douze bons canonniers, quatre cens pionniers et force outils pour remuer terre et faire logis de batterie. »

Ce que vous fistes aussi-tost; et deux jours apres vous acheminastes vers Sa Majesté, que vous trouvastes à Sainct Pierre d'Albigny, Conflans s'estant rendu à l'arrivée de l'équipage que vous y aviez envoyé, ayant en passant recognu Mont-melian et Charbonnières. A vostre arrivée le Roy vous embrassa par trois fois et vous dit : « Mon amy, vous soyez le plus que tres-bien « venu; car vous m'avez dignement servy, et « avec un merveilleux travail, industrie et diligence. Enfin ceux de Conflans se sont rendus, « quand ils ont veu vostre équipage. Mais j'ay « peur que nous n'aurons pas si bon marché de « Charbonnières; et quant à Mont-melian c'est « une merveilleusement forte place : les avez- « vous point veuës ?—Oüy, Sire, dites-vous, je « les ay recognuës ensemble, Bourg, Saincte « Catherine et toutes les autres places de Bresse. « —Or bien, dit le Roy, laissons-là Bresse pour « maintenant, et me dites ce qu'il vous semble « de Mont-melian, car je la trouve la meilleure « place que je vis jamais; il est vray que je ne « l'ay pas bien veuë de près. » Lors vous respondistes : « Sire, la place est bonne, à la verité, « mais non pas si forte que je ne la prenne bien, « si vous me le commandez.—Oüy, dit le Roy, « mais dans quatre ou cinq mois, et l'hyver ne « nous donnera pas ce temps là.—C'est pourquoy « dites-vous, Sire, il nous faut haster; car je ne « vous demande que cinq sepmaines au plus, du « jour que j'auray donné le premier coup de pie « aux tranchées.—Cinq sepmaines ! reprist le « Roy; je vous en donne bien dix et n'y faillez « pas. Mais nous en parlerons une autre fois; « allez-vous en souper, car vous devez avoir bon « appetit : voila Parfait qui a charge de vous « faire bonne chere. » Puis il appella à part monsieur vostre frere et M. de la Varenne, ausquels il dit : « Bethune, vostre frere a bonne volonté; « mais dites luy qu'il ne se vante pas tant, pour « ce qu'il y en a qui en font leur profit. Aussi « est-il certain qu'il ne prendra pas cette place « dans le temps qu'il promet. » Ce que monsieur vostre frere vous estant venu rapporter, vous luy

dites : « Je feray encor plus que je ne dis, pour-  
« veu que le Roy me laisse faire ; car j'ay bien  
« reconnu toutes les incommoditez de cette place,  
« ce qu'il n'a pas fait, ny aucuns de ceux qui  
« sont pres de luy. »

Le lendemain le Roy prit son chemin à Grenoble, laissant ses troupes es environs de Montmélian, et vous pour y commander. Lors vous fistes dresser un plan de toute la forteresse et des environs où estoient représentées toutes les batteries que vous y entendiez faire, et avec cela vous en allastes trouver le Roy à Grenoble, afin d'y faire resoudre le siege; car il vous avoit defendu expressément de le former, jusques à ce qu'il y eut advisé en son conseil, lequel à vostre arrivée il fit assembler. Mais ce ne furent que contestations et diversitez d'advis, dont les plus opposez à toutes vos ouvertures, estoient messieurs les comte de Soissons et duc d'Espèron et de la Guiche, et ne se trouva que messieurs de Lesdiguières et de Crequy, de vostre opinion: ce que voyant, vous dites au Roy : « Sire, je  
« voy bien que par ces disputes l'on nous veut  
« traisner jusques dans l'hyver; mais pardieu il  
« n'en yra pas ainsi, car j'auray plutost pris la  
« place que je n'aurois accordé tant d'opinions  
« diverses. » Et là dessus jettant vostre plan sur la table, vous dites : « Sire, voila le plan et ce  
« que j'y veux faire, faites disputer dessus tant  
« qu'il vous plaira, et ce pendant que je preparay toutes choses pour Montmélian, je m'en  
« vay attaquer Charbonnières. » Et aussi-tost vous montastes à cheval, et mandastes de tous costez de faire avancer l'artillerie et les munitions. Mais les chemins estoient si estroits, traversez de rochers et borde d'un costé, de la riviere d'Arc, dont les bords sont tous precipices, que vous ne pouviez faire une lieue par jour, et par plusieurs fois il vous fallut mener vostre canon, n'y ayant qu'une rouë qui portast à terre, estant l'autre en l'air sur ces grands precipices ; il fit lors aussi tant de pluyes et mauvais temps, qu'il sembloit que toutes choses fussent contraires à vos desseins, car vous aviez promis au Roy, apres avoir reconnu Charbonnières, de le prendre dans huit jours, et neantmoins il vous avoit fallu quasi ce temps-là à cause des pluyes, pour charroyer tout ce qui vous estoit necessaire: tellement que M. le Comte de Soissons, qui vous picotoit tousjours, dit au Roy : « Sire, il vous  
« avoit promis que dans huit jours il prendroit  
« cette place.—Il est vray, monsieur, dites vous,  
« mais l'on m'avoit promis qu'il ne pleuvroit  
« point, et que les rivières ne deborderoient point.  
« Toutes-fois il n'y a remede : j'ay affaire à un  
« bon maistre qui excusera mes defauts; il a prou

« expérimenté qu'à la guerre l'on ne fait pas tout  
« ce que l'on veut. » Or, aviez-vous tant travaillé, sué et esté mouillé, qu'il vous avoit pris une éboulution de sang, et aviez le corps tout rouge, dont vous ne vous estiez point apperceu ; et le Roy fut le premier, qui vous regardant le col et puis l'estomac, vous dit : « Jesus ! mon amy,  
« vous estes perdu. » Et appellant M. du Laurens, il luy dit : « Quest-ce que cela, M. du Laurens ?  
« —C'est, dit-il, Sire, une éboulution de sang  
« pour s'estre trop eschauffé; il le faut faire saigner promptement et ce ne sera rien. » Ce que vous fistes faire aussi-tost que vous fustes arrivé à vostre quartier qui estoit à Sernoy.

Le Roy estant logé à la Rochette, lequel, dès le lendemain matin, vous envoya visiter par M. de Termes, croyant qu'il vous trouveroit encor au liet ; mais il vous trouva montant à cheval pour aller disposer vos batteries, ce qui fit esmerveiller le Roy quand il luy dit. Vous vous en allastes à Aiguebelle qui est la ville au pied du fort, en laquelle il y avoit quelques regimens logez; ceux du fort tiroient en furie par tout où vous passiez, et sembloit qu'ils vous reconnussent. Quand vous eustes bien considéré cette place, vous la trouvastes meilleure que vous ne pensiez; car c'estoit un roc inaccessible de tous costez, fors en un seul endroit qui avoit esté remparé, de sorte qu'il sembloit que ce fut roc naturel, comme le reste. Mais une nuit bien noire vous en approchastes si pres, qu'avec une pique que vous fichastes dans ce bastion, vous appristes que ce n'estoit que terre et fascine, si bien recouvertes d'herbe que l'on ne pouvoit juger si c'estoit roc ou non : d'avantage encor que cette place fut fort commandée, neantmoins les montagnes des environs estoient tellement inaccessibles, que c'estoit tout ce que pouvoit faire un homme à pied que d'y monter. Toutesfois, ayant gravity sur les plus difficiles rochers, vous reconnustes un chemin par le derriere, par lequel, à force de bras, l'on pouvoit monter du canon, mais il le falloit passer auparavant par un chemin si proche du fort qu'ils y pouvoient jeter des pierres. Tellement que, pour éviter tous perils, vous choisistes une nuit la plus noire, et pristès deux cens Suisses et deux cens François, ausquels vous promistes à chacun un escu pour tirer l'artillerie, à force de bras, du long le chemin, et falloit faire basse voix, car autrement le chasteau les eut couverts de coups de pierres, mousquetades et d'artilleries. Aussi; en tirant, ils se disoient les uns aux autres à l'oreille et de main en main, *chet, chet!* Et pour encor destourner l'oreille et les yeux des ennemis ailleurs; vous fistes mener des chevaux et

chartiers vers d'autres chemins, comme si l'on eut voulu passer par là des pieces, lesquels estoient couverts d'arbres, gabions, madriers et murailles, et faisans claquer leurs fûets en quantité, crioyent, *hay, hay!* et jettoient plusieurs autres voix semblables, de telle sorte que les ennemis tiroient là sans relasche.

Or, comme vous eustes ordonné tout cela, vous commistes le commissaire la Vallée, vostre lieutenant en Bretagne, pour faire tout marcher; et vous en allastes visiter les autres batteries; pendant lequel temps il vint une si forte pluye que la Vallée abandonna l'artillerie et s'en alla souper et coucher chez M. de Grillon, et tous les Suisses et soldats aussi quitterent et prirent le chemin de leur quartier. Sur lequel vous revenant pour voir comment la Vallée avoit avancé son carriage, vous les rencontrastes, et les ayant recognus, vous leur demandastes pourquoy ils avoient abandonné le canon; et ils vous dirent que la pluye en avoit chassé tous les officiers de l'artillerie et eux apres. Lors encor que vous n'eussiez point de manteau et eussiez essuyé toute l'ondée de la pluye en pourpoint, neantmoins, apres plusieurs contestations, et les menaçant qu'ils n'auroient argent de trois mois, vous les fistes retourner et derechef atteller au canon, dont ils passerent six pieces cette nuit là avec grands hazards, car il y en eut six tuez et huict de blessez; et quand la dernière piece fut hors du danger du chasteau, vous vous en allastes, avec autant de diligence que l'obscurité de la nuit le pouvoit permettre, en vostre quartier, changer d'habits, car vous estiez tout traversé et tout plain de bouë et de terre.

Après avoir dormy une heure et des-jeuné, retournant pour faire monter les pieces sur le haut des rochers, en chemin vous rencontrastes la Vallée, qui est un grand hableur, lequel ayant trouvé le matin les six pieces passées, et ne sçachant point que vous y eussiez assisté, s'en voulust prevaloir et s'en vint à vous, riant et disant: « Mon maistre, mon maistre, nos six pieces sont bravement passées. » Lors luy ayant demandé qui les avoit passées, il respondit qui ç'avoit esté luy; ce qui vous mettant en colere, fut cause que vous luy dites: « Allez sot et menteur que vous estes; n'avez vous point de honte de vous vanter de ce que moy-mesme ay fait? » Lors, sans s'estonner, il vous dit: « Quoy! vous y avez esté? vraiment j'advouë que je suis un sot. — Oüy, vous l'estes, et pis encor; mais n'y retournez plus, et recompensez vostre faute par diligence et travail à faire monter nos pieces et munitions à

« bras, car il n'y a cheval qui puisse monter. »

Sur les neuf heures, vos pieces furent au plus haut des rochers où l'on avoit desja fait des gabions et scié des madriers, tréfans et aisses pour les plattes-formes; mais quand ce fut à remplir les gabions il ne se trouva point de terre à un demy quart de lieuë de là, mais seulement des pierrotages qui eussent estropié tout le monde: tellement que vos officiers s'en vindrent à vous tous estonnez, disans: « Monsieur, nous ne sçaurions icy faire platte-formes, ny logemens, ny embrasures, ny remplir gabions, car il n'y a point de terre. » Lors vous dites: « Vous estes bien effarez; là, là, faites la pallissade que je vous ay commandée tout du long de la coste, et promptement, pour oster vos logemens de la veuë des ennemis; faites-la bien haute et bien espaisse, et je m'en vais donner ordre au surplus. » En mesme temps vous fistes venir tous vos charpentiers et scieurs de long, tous ceux qui estoient parmy les pionniers, et fistes, en moins de rien, abattre deux cens gros foustaux que vous fistes mettre par troncs, les unes rondes, les autres aucunement escarries, afin de les faire tenir les unes sur les autres; avec les rondes vous remplistes les gabions, et avec les autres et des gabions de roulage vous fistes vos logemens et trenchées; en sorte qu'à deux heures apres midy vos six pieces furent en batterie.

Or, afin de cacher à l'ennemy le lieu d'icelles, de peur qu'il n'y fit contre-batterie, vous aviez, en des lieux aux deux costez, formé des especes d'embrasures de gabionnades, où les ennemis tiroient en furie et croyoient vous avoir empesché vos logemens, car ceux qui estoient les vrais logemens avoient esté si bien cachez par vos pallissades de feuillards qu'il estoit impossible de les descouvrir. Sur les trois heures le Roy vous vint voir, lequel trouvant toutes choses si avancées et ayant sceu les difficultez que vous y aviez rencontrées, il en fit des exclamations et vous embrassa trois ou quatre fois, et puis vous dit: « Or ça, voila vos batteries prestes de tous costez; qui empeschera de les saluer? — Jesus, Sire, dittes-vous, il s'en faut bien garder, car nous rendrions inutile l'artifice dont j'ay usé pour leur cacher mes pieces, lesquelles si ils descouvrent devant la nuit, ils me prepareront durant icelle une contre-batterie qu'il faudra que je combatte et desloge demain au matin devant que je puisse battre en batterie. » Ce que le Roy approuva; mais depuis ayant parlé à messieurs le comte de Soissons, d'Esperson, la Guiche, Ville-roy et autres, il changea d'avis et dit: « Je veux voir quel

« effet feront vos pieces, car il me semble que  
« ce ravelin que vous voulez battre est un roc  
« où vous ne ferez rien. » Vous contestastes  
quelque temps, et le Roy s'estant mis là-dessus  
en colere, vous dit : « Vous voulez faire le maistre  
« par tout et c'est moy qui le suis. — Oüy vraye-  
« ment, Sire, vous estes le maistre, dites vous,  
« aussi serez-vous obey quand je devrois tout  
« gaster. » Lors vous criastes : « Hola, ho ! tout  
« le monde aux batteries, au fourrage, à la pou-  
« dre, aux boulets, aux leviers, aux coins et  
« haut les bras. » Et aussi-tost la palissade ren-  
versée l'on commença à mettre feu ; mais c'es-  
toit à tirer, tantost en un endroit, tantost en un  
autre, sans s'arrester à rien de certain, car tout  
le monde commandoit et ne vous mesliez de  
rien.

Vous estant esloigné tout en colere de voir ce  
desordre, le petit la Guesle vous vint dire :  
« Monsieur, le Roy vous demande. — Dites luy,  
« dites vous, que je n'ay que faire là pour tirer  
« aux moineaux, et que le soleil va se coucher ;  
« partant, entre-cy et là, que chacun fasse  
« comme il l'entend. » Peu apres le Roy fit tout  
cesser, ayant seulement fait tirer quelque cent  
coups qui ne servirent de rien. Vous couchastes  
en vos batteries et ne voulustes point aller en  
vostre quartier. Toute la nuict il pleut fort, et  
neantmoins vous ne laissastes de faire travailler ;  
les ennemis en faisoient autant, et apperceviez des  
feux et de la chandelle en trois ou quatre lieux,  
ausquels vous fistes tirer quelques vollées pour  
les empescher. A la pointe du jour il se leva un  
si grand broüillard que l'on ne voyoit point la  
forteresse à six heures, ce qui vous mit en peine,  
car vous vous estiez vanté aux courtisans de  
prendre la place le lendemain, et commençastes  
à dire en riant : « Je veux esprouver si le bruit  
« et le vent du canon ne dissipera point les nuées  
« et les broüillards, comme firent les heaumes  
« en la tour de l'univers. » Lors vous mandastes  
à toutes les batteries qui estoient des autres cos-  
tez, au nombre de quatre, qu'aussi-tost qu'ils  
oyroient le tintamarre de vos pieces, ils fissent  
haut les bras partout ; et à la seconde vollée tous  
les broüillards s'escarterent, et vit-on le fort  
tout à clair ; duquel quatre pieces logées dans  
les embrasures du roc qu'ils avoient taillées la  
nuict, commencerent à tirer dans les vostres,  
vous blesserent deux commissaires, tuerent six  
canonniers, huit pionniers, et blesserent douze  
ou quinze personnes de toutes qualitez : telle-  
ment que deux pieces furent abandonnées jus-  
ques à ce que vous eussiez deslogé les leurs ; et  
vous mesmes allastes pointer une piece qui donna  
droit dans l'embrasure du roc, rompit deux

pieces qui y estoient, tua un de leurs canon-  
niers et blessa les deux autres. Sur ce bruit le  
Roy vint au galop, arriva sur les neuf heures  
et fit apporter là son disner. Vous luy aviez fait  
preparer un lieu garni de gros arbres tous en-  
tiers, l'un sur l'autre, pour le mettre à couvert  
et luy faire voir sans danger tout ce qui se fe-  
roit, et luy monstrastes les morts et blessés cy-  
dessus, luy en disant les causes. Ceux qui, le  
jour de devant, l'avoient irrité contre vous, es-  
sayerent encor à faire le semblable : ce que  
voyant vous luy dites : « Sire, je m'en vay dis-  
« ner, car je n'ay de ce jourd'huy mangé, et si  
« suis au travail dés le soir ; pendant ce temps  
« là que chacun fasse le grand maistre qui vou-  
« dra, car quand j'auray disné, ou l'on me lais-  
« sera faire à ma fantaisie, ou je quitteray tout  
« là. » Lors le Roy vous envoya querir un pasté  
de truite que l'on luy avoit envoyé de Geneve,  
le plus grand qu'il estoit possible de voir : on  
l'envoya à vostre table qui estoit de quarante  
serviettes, dressée sous un grand roc en forme  
de demie voute tout tapissé de lierre. Vostre  
disner fut court, et revinistes aussi-tost dire au  
Roy : « Sire, au nom de Dieu, laissez-moy battre  
« en juste batterie et au lieu que j'ay recognu,  
« car je sçay bien que par là je prendray la place  
« aujourd'huy. — De belles, ce vous dit le Roy ;  
« je voudrois bien estre asseuré de la prendre  
« dans trois jours ; mais faites ce que vous vou-  
« drez : » Lors la Guesle, qui estoit pres de luy,  
dit : « Si j'estois là dedans, l'on ne me prendroit  
« d'un mois. — Allez vous y-en, dites-vous, et  
« si je ne vous fais tous pendre aujourd'huy, je  
« veux estre tenu pour un fat. »

Lors Sa Majesté s'en alla dans une tente où  
son couvert avoit esté mis ; mais il y fut plus  
d'une heure avant que son disner vint, et au-  
tant quasi à disner, puis voulut aller voir vostre  
parc, tellement que vous eustes trois heures à  
battre à vostre mode ; et comme Sa Majesté ve-  
noit, disant à M. le comte de Soissons : « Cette  
« place ne sera pas prise aujourd'huy. — Aussi,  
« Sire, vous en devriez-vous faire croire, respon-  
« dit-il, car ce qu'il bat est un roc. — Nous le  
« verrons bien maintenant, dit le Roy, laissons  
« le faire tout aujourd'huy. » Et en ce mesme  
temps ils oyrent la chamade et crier qu'ils vou-  
loient parler ; dequoy le Roy fut aussi aise  
que vos envieux en furent marris. Mais l'af-  
faire ne fut pas encor terminée pource que, car,  
comme le lieutenant fut venu trouver le Roy, il  
demanda des conditions tellement excessives,  
que vous ne vous peustes empescher de dire :  
« Jesus ! Sire, n'ont-ils point de honte ? Je vous  
« prie me les laisser un peu manier, et je leur



« feray bien chanter un autre langage. — Oüy, « monsieur, dit le lieutenant, nous sommes deux « cens hommes là dedans qui vous donnerons « de l'exercice pendant plus de huit jours. Par- « tant ne soyez point marry que Sa Majesté des- « ploye sa liberalité en nostre endroit, à nous « qui sommes soldats, et il en est le pere. — Il « ne seroit pas raisonnable, dittes-vous, que les « enfans fissent recevoir une honte à leur pere. « — Et bien, dit le Roy, je vous en laisseray « faire entre vous. Je laisse Lesdiguières et Ville- « roy avec Rosny, pour adviser des conditions, « et ce pendant je m'en vay souper à mon quar- « tier. »

Comme le Roy fut parti, M. de Lesdiguières vous dit : « Monsieur, descendons bas, et nous « en allons au fort, car je cognois ces gens, ils « sont à nous. — Ouy bien peut estre, monsieur, « sous conditions honteuses, dittes-vous; mais je « n'en accorderay jamais de telles. — Monsieur, « dit M. de Ville-roy, il faut avoir la place, « comment que ce soit. — Nous verrons ce qu'ils « diront, dittes-vous, mais je sçay bien que je les « auray aujourd'huy d'une façon ou d'autre. » Et ainsi vous descendistes en bas en discourant toujours sur ce sujet. M. de Lesdiguières vous mena jusques à deux ou trois cens pas du chasteau, à la mercy de toute leur courtine. Lors vous luy dites : « Quoy! monsieur, voulez-vous « que nous nous mettions à la discretion de tous « ces gens-là, lesquels, si ils ne se veulent point « rendre, si tost que leur lieutenant sera rentré, « nous feront retirer plus viste que le pas, et peut « estre en demeurer quelqu'un en la place? Or je « ne veux ny l'un ny l'autre, ny estre blessé en « novice. Et partant je m'en vay derriere un roc « que je vois à cent pas de nous, d'où il y a « moyen de se retirer à couvert; et ce pendant « je donneray ordre à toutes mes batteries, pour « faire tenir toutes choses prestes à battre plus fu- « rieusement que jamais. »

Au commencement, ces messieurs se rioient dequoy vous vous en alliez ainsi tout seul derriere ce roc; mais enfin ils vous y suivirent bien tost en courant, d'autant que peu apres revint le lieutenant avec ses premieres conditions; ce qui vous mit en colere et dire : « Pardieu, je ne « sçauois plus souffrir une telle effronterie, car « je les auray plutost pris que vous n'auriez escrit « ce qu'ils demandent. Adieu, vous dis-je, je « m'en vay faire beau bruit. — Monsieur, dit le « lieutenant, nous ne nous estonnons pas pour le « bruit. » Monsieur de Ville-roy vous dit : « Mon- « sieur, advisez ce que vous ferez, car si nous « n'avons la place aujourd'huy, nous serons obli- « gez de dire au Roy qu'il n'a tenu qu'à vous. —

« Or, monsieur, dittes-vous, dites ce que vous « voudrez, je m'en vay faire ce que je dois. » Et ayant mis par escrit quelques articles d'une capi- tulation, vous leur baillastes, disant : « Voila « ce qu'il leur peut estre accordé; vous me man- « derez si ils s'en contentent ou non. » Et sur cela vous vous en allastes à vostre batterie, d'où vous donnastes le signal aux autres; et lors fust battu avec telle furie et si heureusement, que de la seconde volée vous mistes le feu à leurs poudres, qui leur fricasserent vingt ou vingt-cinq soldats, et six ou sept femmes. A la troi- sieme volée, le petit ravelin tomba, et y eut bresche raisonnable, qui ne se pouvoit deffendre, à cause qu'il falloit passer par un chemin estroit, pour y venir, et tout à decouvert; vous leur tuez leurs meilleurs hommes, ce qui les mist en telle peur qu'ils envoyèrent faire une chamade.

Et pource que vous ne laissiez pas de faire toujours tirer, mesme que le tambour qui faisoit la chamade fut eslevé plus de deux toises en l'air, sans avoir mal, d'un coup de canon qui luy donna dans des terrasses sous ses pieds, ils firent mettre un linge au bout d'une pique, et commen- cerent à crier : « Monsieur de Rosny, monsieur « de Rosny, nous nous rendons et acceptons ce « que vous nous avez offert. — Et moy, dites- « vous, je vous rends à tous les diables, tirez « toujours. » Or comme ils virent que vos batte- ries ne cessoient point de tirer et que tout s'en alloit d'effroy parmy eux, ils firent signes et tendirent les mains aux soldats qui estoient au dessous de la bresche, leur disant : *Montez, montez, soldats*, lesquels aussi-tost entrèrent dedans à la foule; et fustes lors contraint de cesser de tirer, car vous eussiez tué les vostres. Vous montastes à cheval aussi-tost, et vous en allastes au gallop dans le fort, où tous se vindrent jetter à genoux devant vous, disans : « Monseigneur, nous sommes à vostre discretion, « ayez pitié de nous. » Surquoy vous leur dittes : « Ne sçavez vous pas bien que je vous ay promis « de vous faire tous pendre? il faut que je vous « tienne promesse. » Lors ils vous presenterent leurs blesses, puis leurs bruslez. Nous n'esti- mons point qu'il se puisse voir chose si horrible et si pitoyable ensemble : d'abondant les femmes vous vindrent prier les genoux en terre, les mains jointes et les larmes aux yeux; il y en avoit de belles, et une entr'autres, la plus belle que l'on eut sceu voir. Tout cela vous attendrit le cœur, et enfin leur baillastes la mesme capi- tulation que leur aviez premierement offerte, laquelle vous fistes observer de point en point, et furent conduits en lieu de seureté.

CHAPITRE XCVII.

*Siège et prise de Montmélián. Lettres du maréchal de Biron.*

Vos entreprises ayant tousjours heureusement succédé, suivant les assurances que vous en aviez données au Roy, vous fistes lever toutes vos batteries de devant Charbonnières, acheminer vos pieces et munitions vers Mont-mélian, et allastes trouver le Roy au gallop, afin de faire conclurre de l'assiéger. Les premieres constestations estans renouvelées, contre lesquelles vous opiniâtrant tousjours, enfin le Roy vous dist : « Regardez bien ce que vous faites, car si nous sommes contrainsts par le temps à lever le siege, tout le monde criera apres vous, et moy peut estre tout le premier. — Pourveu que vous me promettiez une chose, Sire, dittes-vous, je vous engage mon honneur et ma vie de vous mettre dedans d'aujourd'huy en cinq semaines. — Et que voulez-vous que je vous promette? dit le Roy, car dés-à-present je le vous promets. — C'est, dittes-vous, Sire, que vous n'y viendrez point, car c'est la plus meurtriere place que je vis jamais, et s'il vous arrivoit quelque accident, je serois au desespoir. » Et là dessus vous en allastes, leur ayant derechef jetté un autre plan sur la table.

De descrire icy toutes les particularitez du siege, et toutes vos veilles, dexteritez, diligences et travaux admirables pour mettre des batteries en lieux où des gens de pied mesmes ne pouvoient aller, cela seroit trop long, et mesme il ne nous en souvient pas de la pluspart. Et partant nous contenterons-nous de vous ramentenir six seulement, dont la premiere concerne le logement de vos pieces, et le nombre de vos batteries, que vous trouviez dautant plus difficile, que mieux vous veniez à recognoistre les avantages particuliers de la place, tant ceux de sa naturelle scituation que ceux de l'artifice humain y avoit adjoustez, estant un rocher des plus durs, si haut eslevé qu'il domine tout son prochain voisinage, precipiteux de toutes parts, et du tout inaccessible, reservé du costé de la ville, duquel la pente est plus douce, mais aussi en laquelle a esté pratiqué, avec un grand temps et labeur merveilleux, un fossé taillé dans le roc à la pointe des ciseaux acerez, et trois bastions non sujets à la mine, à la sappe, et autres attaquemens de main, dautant que, plus d'une toise et demie de haut, leur fondement est de roc dur comme marbre; que si cette place a quelques montagnes circonvoisines, elles sembloient, les unes, du tout inaccessibles, non seulement aux pieces d'artilleries, chevaux et charrois, mais

encor aux hommes mesmes; et leurs sommets, si droits et pointus, et d'un roc si dur et desnudé de toute terre, qu'il sembloit du tout impossible d'y pouvoir dresser aucune platte forme, ny logis de pieces, quelque mediocres qu'elles pussent estre, et les autres si esloignées, qu'elles paroisoient hors de la portée du canon.

Sur telles anxietez où ces recognoissances de difficultez vous jettoient, à force de travailler, de vous hazarder et de vous alambiquer l'esprit, vous découvristes deux choses, de la premiere desquelles vous estant entré quelque opinion en la fantaisie, vous en trouvastes la certitude par un tel moyen. Vos logemens et trenchées du costé des vignes et du bastion nommé Mauvoisin, ne pouvant approcher assez pres du fort pour vous contenter l'esprit de ce que vous desiriez sçavoir, à cause de la dureté des rocs continus qui se trouvoient à fleur de terre, vous vous resolustes à un moyen tellement perilleux que chacun vous en blasmoit, qui fut de faire dresser durant une nuit fort noire, et qu'il ventoit et pleuvoit fort, une hutte de clayes et de chaume fort près de ce bastion de Mauvoisin, que chacun et vous mesmes aviez tousjours creu n'estre rien qu'un roc continu taillé au ciseau. Or si tost que le jour fut venu, et que les ennemis virent cette hutte si proche d'eux, et sur tout d'un lieu duquel ils apprehendoient la recognoissance, madame la hutte ne manqua pas d'estre abondamment saluée, mais de mousquetades seulement, dautant que l'artillerie n'y pouvoit pas plonger : ce que vous leur laissastes continuer deux jours durant, au bout desquels eux voyans qu'il n'entroit ny sortoit personne de cette hutte, ils vindrent à croire (comme le chevalier de Brigueiras vous le dit depuis, lorsqu'il sortit pour aller trouver le duc de Savoye) que l'on ne l'avoit là mise que pour les faire tirer dessus et se moquer d'eux, et n'en firent plus de cas. Alors vous pristez vostre temps pour vous aller mettre une nuit dedans avec une fort grande rondache à preuve de mousquet, où vous demeurastes jusques à plus de trois heures de jour, et eustes par ce moyen loisir de recognoistre tout ce que vous desiriez sçavoir. Si bien qu'ayant veu durant la nuit de la lumiere dans le plus bas du bastion de Mauvoisin, vous jugeastes qu'il estoit creux et non de roc massif, et le jour recognu qu'il n'y avoit point d'espaule au flanc, et par consequent qu'il seroit fort facile à emboucher; vous en demeurastes fort satisfait, toute la difficulté de vostre dessein demeurant terminée en vostre retraite qu'il falloit faire en plain jour à la veüe de toute la courtine à cent pas d'icelle, et ayant deux cens pas ou environ à passer tout à descouvert avant que de pouvoir

trouver aucun lieu asseuré; lequel vous resolvant de gagner avec la plus grande vitesse qu'il vous seroit possible, vous laissastes vostre grande rondache dans la hutte, dautant qu'il vous estoit impossible de la porter sur le dos et aller plus viste que le pas; et lors que vous vistes que l'on estoit pres de changer les gardes, qui est le temps que les soldats commencent à s'ennuyer et sont les plus negligens, vous sortistes tout à coup de la hutte et vous mistes à courir tant que jambes vous pouvoient porter. Quatre sentinelles qui estoient proches de là commencerent à crier, puis à tirer, et finalement à hausser leurs voix et appeller tous les soldats des corps de garde; mais avant que tout cela eut loisir de s'affuster, vous eustes gagné vous plus proches logemens, en fustes quitte pour trois ou quatre mousquetades qui vous sifflerent aux oreilles, et autant qui firent voler la poudre et sauter le caillottage à l'entour de vos pieds.

Vous recogneustes encor un autre certain endroit à la pointe du chasteau vers l'Izere, auquel il y avoit place pour loger une batterie de six canons, et des relais d'espace en espace, depuis le pied jusques en haut pour faciliter la montée de l'artillerie, et mettre à couvert bon nombre de gens de guerre, afin de donner aussi-tost que les canons que l'on auroit montez auroient arazé les murailles de la closture de cette pointe; chose grandement facile, pource que croyant cet endroit là du tout inaccessible, l'on les avoit faites fort foibles. Mais ayant depuis esté de l'autre costé de l'eau, et trouvé un lieu fort propre pour loger six pieces, et leur faire voir l'advenuë du puits, celles des magasins, l'entrée du donjon et le lieu des corps de garde, vous estimastes que toutes ces commoditez vous pouvoient tirer de grands perils qu'il vous eut fallu courir, exempter des despenses qu'il vous eut fallu faire et des travaux qu'il vous eut fallu prendre pour dresser une batterie à la pointe du fort du costé de l'Izere.

La seconde particularité concerne vostre logement d'artillerie au rocher du haut precipice qu'il vous fallut aller recognoistre par un destour d'une lieuë, et puis pour trouver un espace suffisant pour un logement de six pieces de canon, couper des rocs si durs que tous ceux que vous faisiez travailler à tels ouvrages s'en mocquoient, desesperant de les pouvoir amener à perfection, ce qui vous y rendoit plus assidu. Et arriva que ceux du fort ayant vu tant de roches coupées et un commencement pour faire quelque logement en une telle domination, en ayant pris l'allarme, voulurent essayer d'empescher vos ouvrages; et pour cet effet ayans là

pointé six canons (car ils en avoient trente dans la place et des munitions pour tirer huit mille coups) un jour que vous faisiez là travailler, ayant vostre baston en la main, votre mandille verte couverte de passement d'or à jour, et vostre grand pennache blanc et vert au chapeau, jugeant bien que vous estiez quelque homme de commandement, ils pointerent là toutes leurs six pieces, ausquelles ayant mis feu, la premiere volée porta fort haut, la seconde donna bas, et voyant mettre le feu à la troisieme, vous dites aux sieurs de Lezines, de Maignan et de Feuges, qui estoient prés de vous: « Pardieu, c'est à moy que ces gens en veulent à cette fois; » car ayant mis haut et puis bas ils pourroient « bien maintenant donner au milieu. » Et vous estant en mesme temps mis derriere un banc de roc qui estoit tout contre, que vous aviez fait reserver exprés pour cet effet, et avancé une pique au lieu où vous estiez auparavant, ils ne faillirent pas de donner là si justement, qu'un boulet vous brisa en la main vostre pique que vous aviez mise en vostre place, et les autres alerent tuer trois pionniers, deux canonniers, et casser les cruches, bouteilles et verres que l'on avoit apportez pour vostre collation que l'on avoit mis dans un trou de roc. Sur l'occasion de ces deux perils, que quelqu'un de vos amis avoit rapportez au Roy, encor peut estre beaucoup plus grands qu'ils n'avoient esté, Sa Majesté vous escrivit une lettre demy en colere en ces mots:

*Lettre du Roy à M. de Rosny.*

Mon amy, autant que je louë vostre zele à mon service, autant je blasme votre inconsideration à vous jeter aux perils sans besoin. Cela seroit supportable à un jeune homme qui n'auroit jamais rendu preuve de son courage, et qui desireroit commencer sa fortune; mais la vostre estant desja si avancée que vous possédez les deux plus importantes et utiles charges du royaume, vos actions passées vous ayant acquis envers moy toute confiance de valeur, et ayant plusieurs braves hommes dans l'armée où vous commandez maintenant, vous leur deviez commettre ces choses remplies de tant de dangers: partant advisez à vous mieux mesnager à l'advenir; car si vous m'estes utile en la charge de l'artillerie, j'ay encor plus besoin de vous en celle des finances. Que si par vanité vous vous les rendiez incompatibles, vous me donneriez sujet de ne vous laisser que la derniere. Adieu, mon amy que j'ayme bien; continuez à me bien servir, mais non pas à faire le fol et le simple soldat, etc.

La troisieme particularité fut lors que le Roy vous manda que vous luy donnassiez à disner, qu'il vouloit voir l'estat du siege et comme vous avanciez besongne. Apres qu'il eut disné, il vous dit : « Il n'y a remede ; quoy que je vous aye promis, je veux aller voir vos batteries ; et afin que vous n'y contredissiez pas obstinément, à cause du danger que je pourrois courir, j'iray par tout où vous voudrez, je reviendray de mesmes, et n'y meneray que mon cousin le comte de Soissons, M. d'Espernon, M. le Grand et vous. — Or bien, Sire, dites-vous, puis que ma contestation ne serviroit de rien, et que c'est un faire le faut, je vous prie que tout le monde demeure, et prenez chacun un meschant manteau, afin de cacher vos clinquans et vos bonnes mines. Sur tout il y a un certain espace d'un champ plein de cailloux par où il faut passer, ou prendre demie lieue de destour, qui est fort dangereux ; car il y a tousjours dix ou douze pieces pointées, et le plus souvent trente ou quarante mousquetaires à l'affust, pource qu'ils sçavent bien qu'il faut passer par là pour aller à nies deux grandes batteries des precieuses. » Vous estans donc ainsi acheminez tous cinq, et allans en file, il fut tiré quelques mousquetades qui ne plaisoient pas trop à la compagnie. Mais comme vous fustes dans le susdit champ tout à decouvert, vous fustes saluez de dix ou douze coups de pieces et de tant de mousquetades, que ce fust une merveille qu'il n'y en eut de frappez ; aussi fustes vous quasi tous couverts de terre et de cailloux qui en esgratignerent quelqu'un, et commença le Roy à faire le signe de la croix : surquoy vous luy dites : « Vrayement, Sire, c'est à ce coup que je vous reconnois bon catholique, car c'est de bon cœur que vous faites ces croix. — Allons, allons, ce dit-il, car le sejour ne vaut rien icy. » Lors vous passastes outre, et fut d'advis la compagnie de revenir par le plus long chemin derriere les montagnes, comme vous fistes y ayant fait mener les chevaux.

La quatrieme particularité fut que le Roy s'en voulant aller à la Tarantaize, il vous laissa le commandement du siege ; et comme il voulut revenir, dautant que vous luy aviez mandé que toutes vos batteries estoient prestes à executer, il desira de passer près de Mont-melian, et voir tout sans hazard. A cette cause il vous manda que vous essayassiez de faire une trefve comme vous fistes pour quelques heures, et apres qu'il eut tout veu ce qu'il vouloit voir, restant encor quelques heures de la trefve à expirer, et vous desirant faire tirer le canon en batterie afin d'avoir vostre droit de grand maistre qui montoit beau-coup, vous ordonnastes à quelques commissaires

de se prevaloir du temps de la trefve pour faire monter à sa batterie quelques munitions dont il avoit encor besoin, ce que decouvrant ceux du chasteau, et crians que l'on rompoit la trefve, et qu'ils tireroient ; finalement voyans que l'on ne tenoit compte de leurs menaces, ils tirerent douze ou quinze coups de pieces. Or aviez vous mandé par toutes les batteries que chacun chargeast, amorcast et pointast ses pieces droit au donjon du chasteau, tous prests à faire haut les bras, et que si tost qu'ils verroient ceux du chasteau tirer, qu'ils missent le feu par tout, comme ils n'y manquerent pas, et à recharger incontinent, dont ceux du chasteau surpris et estonnez du grand fracas qui s'estoit fait par cinquante pieces en un mesme temps, ils commencerent à faire signal, puis à crier, *Monsieur de Rosny, monsieur de Rosny, la trefve, la trefve*, ce que vous leur accordastes avec demonstration de difficulté.

Des-lors ils commencerent à s'estonner, de sorte qu'ils ne cherchoient que l'occasion de pouvoir entamer un traité, qu'ils firent naistre en cette façon. Madame la comtesse de Brandis estant femme de bon esprit, qui se plaisoit aux mécaniques et sur tout à faire des ouvrages de verre, envoya des pendans d'oreilles et une couple de chaisnes de cette matiere fort industrieusement élaborées à madame vostre femme, avec ses recommandations, laquelle en eschange luy envoya une douzaine de perdreaux, six lapreaux, six lévraux, douze cailles grasses, une douzaine de pains blancs molets et douze bouteilles de vin, et la pria de faire en sorte qu'ils peussent parler ensemble, ce qu'elle tesmoigna desirer. De sorte que, trois jours durant, elles se voyoient toutes les apres-disnées fort familièrement, sans parler neantmoins que de discours communs au commencement ; lesquels se terminerent en propos de capitulation, que vous fistes continuer. De sorte que ces deux femmes, selon les instructions qu'elles recevoient de leurs maris, convinrent de plusieurs points, par forme de desirs seulement, sans tesmoigner d'en avoir communiqué à personne, ce qui ne se peut cacher longuement : car M. le comte de Brandis ayant prié madame vostre femme de luy faire avoir un passe-port pour sa femme qu'il disoit estre malade, afin de s'aller rafraischir aux champs, et luy ayant esté par elle respondu que vous l'en refuseriez s'il ne se resolvoit de faire le semblable, il fut tant disputé qu'il ne s'esloigna pas de capituler : dequoy vous advertistes le Roy, qui y envoya messieurs d'Espernon et de Biron, pour vous trois ensemble faire la capitulation, par laquelle il leur fut donné, contre vostre advis,

un mois de terme, si dans ce temps ils ne faisoient lever le siege ou recevoient secours.

La cinquieme particularité fut lors que le legat arriva, car le Roy vous ordonna pour l'aller recevoir et conduire, ce que vous fistes avec cinq cens chevaux et trois mille hommes de pied des plus lestes que vous aviez disposez en fort bonne ordonnance. Outre cela vous aviez parlé à ceux du chasteau, lesquels commençoient à vous defferer beaucoup, et leur aviez dit que vous aliez au devant du legat du Pape, que vous feriez saluër de vostre harquebuserie, puis de vostre artillerie : qu'ils se preparassent donc de faire le semblable, mais qu'ils attendissent que vous eussiez fait vos saluës; ce qu'ils recognoistroient à une enseigne blanche que vous feriez eslever à la batterie du grand precipice. Tout cela fut observé comme vous l'aviez ordonné, executé et fait si à propos que vos gens de pied redoublèrent deux fois leur salve sans nulle discontinuation, comme si ce n'eust esté que de la premiere charge. Le semblable fut observé pour l'artillerie dont les coups furent si bien proportionnez qu'il y eutegalité de distance entre iceux, comme si aussi ce n'eut esté qu'une salve sans recharge. Tellement qu'il fut tiré sept vingts coups de canon, qui faisoient un retentissement si merveilleux, à cause des valons et concavitez des rochers, que le legat et tous ses gens faisoient le signe de la croix et disoient : *O Dieu! qui pourroit resister à telle furie?* Lors fut levée l'enseigne blanche, et firent ceux du chasteau leur salve qui fut aussi fort belle, car ils avoient trente pieces d'artillerie. Vous menastes le legat disner à Nostre Dame de Miens, et par les chemins eustes plusieurs discours : entr'autres vous luy distes : « Monsieur, vous trouverez icy force gens qui se feront de feste et qui vous feront à croire qu'ils ont force credit, mais ne vous y amusez pas; car vous verrez des effects contraires, et vous souvenez de ce que je vous en dis, principalement sur les razemens des places qui seront prises. » Et ainsi vous en retournastes à vostre siege, l'ayant déposé és mains de ceux que le Roy avoit envoyez pour le recevoir apres vous.

La sixiesme particularité fut sur l'adviz que le Roy eut, qu'il y avoit vingt-cinq mil hommes qui passaient les monts pour le venir combattre, d'autant qu'il luy faschoit d'aller au devant d'eux et laisser la reddition de cette place incertaine, et là dessus il vous demanda s'il n'y auroit pas moyen d'en avancer le terme. Surquoy vous luy respondistes que si l'on ne vous eut associé personne à la capitulation qu'il ne seroit pas en cette peine. « Il est vray, dit-il; mais l'un estant

« mareschal de France et de camp general, et  
« l'autre coronel de l'infanterie, duc et pair,  
« comment m'en pouvois-je exempter? et puis  
« quelle haine eussay-je concltée contre vous?  
« Partant il n'en faut plus parler, mais essayer  
« à s'asseurer de la place; allez y travailler. »

Or, pource que le comte de Brandis avoit besoin de diverses sortes de vivres et autres choses tant pour luy, sa femme, que pour les soldats, et sur tout pour des malades et blessez, incessamment il entroit et sortoit gens au chasteau, et quelques fois il y avoit telle presse à la porte qu'il s'y ruoit des coups. Dequoy ledit comte s'estant plaint à vous, vous mistes un corps de garde de cinquante soldats devant la porte, tous gens esleus et choisis, et dont les chefs sçavoient vostre intention, lesquels entroient quand ils vouloient dans le chasteau trois ou quatre à la fois, puis en ressortoient pour les accoutumer peu à peu. Enfin le desordre crut tellement (auquel vous ne nuyiez pas) que quelques soldats forcerent ceux de dedans et entrèrent malgré eux et par force dans le chasteau, pource qu'ils n'osoient tirer ny frapper. Dequoy derechef le dit comte de Brandis vous fit plainte, et vous luy dittes : « Hé quoy! monsieur, que ne gardez vous bien vostre entrée, et ne tuez tous ceux qui usent d'indiscretion. — Monsieur, ce vous dit-il, mes soldats sont intimidéz et n'osent frapper les vostres; c'est pourquoy je desirerois qu'ils eussent cette charge là. » Lors vous luy dites : « Si mon corps de garde estoit aussi bien dedans que dehors, et que ce fust à mes soldats à ouvrir et fermer la porte, j'empecherois bien d'entrer que ceux qu'il faudroit. » Ce qu'il trouva bon qui fut fait.

Or, estoit-il déjà entré, parmy la confusion, quelque trente soldats dedans, lesquels avec les vostres cinquante qui entrèrent lors et quelques-uns de plus, et puis vous et vos gentils-hommes apres, tout cela vous rendit comme le maistre du bas fort, et petit à petit par les mesmes moyens, du donjon. Tellement que le tout estant remply de vos soldats et de vos gentils-hommes, le comte de Brandis vous fit luy mesme prier de venir loger dedans le donjon, et qu'il remettoit le tout sous vostre foy et parole. Ainsi, dès le lendemain que le Roy vous l'eut commandé, vous soupastes et couchastes le maistre dans le donjon, puis le vintes trouver et luy dites qu'il s'en pouvoit aller au devant des ennemis quand il voudroit, et que vous estiez maistre de la place, mais que neantmoins vous garderiez la capitulation, puis que vous l'aviez signée en son nom et par son expres commandement, et ne les mettriez dehors que le terme ne fust venu. Ainsi le Roy s'en alla au

devant de l'armée ennemie, qui ne parut neantmoins point, et vous laissa au siege, emmena tout ce qui vous eust peu contester le commandement. En partant vous luy conseillastes de faire destruire cette forteresse et toutes les autres, puis qu'aussi bien, en paix faisant, il les faudroit rendre; mais il n'y voulut nullement entendre. Le terme de la reddition venu, vous mistes M. de Crequy dedans, comme le Roy vous l'avoit commandé, et fistes observer en tout et par tout la capitulation.

Or, combien que les lettres de M. de Biron ne soient venuës à vostre cognoissance qu'en l'année 1602, neantmoins, pource qu'elles n'avoient point de dattes, et que la substance d'icelles tesmoigne qu'elles furent escrites dès l'an 1600, je me suis resolu d'en inserer icy cinq tout de suite à la fin du chapitre de la prise de Mont-melian : desquelles la teneur ensuit :

*Lettres de M. de Biron en chiffre.*

Au nom de Dieu, de la main de ce mien amy et parent, a de la fidelité et de l'affection. Vous pouvez adjoûter foy à ses paroles et parler franchement; car outre ce qu'il a de la prudence d'homme, il desire vostre grandeur, et moy je suis plus à vous qu'à moy; § par ces caracteres vous cognoistrez que c'est 2 qui parle à 30, puis \$\$\$ les hazards empeschent plus longs discours. Vous bruslerez cette en sa presence, ou elle me sera rapportée.

O

Au nom de Dieu, monseigneur, oyez et croyez celuy qui est 49, car le principal qui avoit mesme charge a dit à 2 ne pouvoir vous voir, pour les affaires qu'il a 18. Ils ont toute esperance de marchandise de 71. Ne doutez de sa prudence d'homme, car en 80 on espere de vous et desire toutes choses bonnes. Je n'ay eu nulles nouvelles de ce que 2 vous dit; je croy que l'autre de qui on attendoit est passé par 58. C'est tout, vous brûlerez la presente.

*Lettre de M. de Biron à M. de la Fin.*

Monsieur, j'ay donné charge à ce lacquais, si estes à Moulins, vous rendre celle-cy ou la mettre es mains d'aucun des vostres assurez, ou aller jusques chez vous pour m'apporter de vos nouvelles et vous faire entendre des miennes, qui est que je suis malade en cette ville de Beaune depuis deux jours : toutes-fois je me porte un peu mieux, et m'en retourne à Dijon, envoyant ce lacquais pour sçavoir quand le Roy sera à Lyon, pour m'y rendre si je puis. Je croy qu'aurez veu le Roy à Moulins, comme le devez et croy qu'il est besoin. Je ne vous escrïs des nou-

velles de deçà, à cause que mon chiffre est à Dijon en mon cabinet. Nous louons tous Dieu de la fortune que le Roy a failli à courre de cette malheureuse et damnable femme qui le vouloit empoisonner. M. le comte de Soissons a tesmoigné qu'il ayroit le Roy, il luy est obligé par les bien-faits qu'il en a receus; voila tout ce qui se passe icy. Or, monsieur, pour changer de discours, l'affaire que je vous avois prié faire pour moy et mes amis à Paris, et vous avois baillé deux lettres pour faciliter les conditions, je vous prie les brusler, car elles ne servent; car il faut attendre que je vous aye veu; car telle chose est bonne en un temps et non en l'autre; car il y a des gens amis de leurs œuvres : il faut voir la fin de leur proceder. Si vous apprenez des nouvelles de paix ou de guerre du duc de Savoye, mandez m'en. Je croy, s'il fait le mauvais, on luy rivera bien son clou; vous n'en serez marry, car on se rouille en une si longue paix. Vous ne sçauriez croire la bien-veillance que le Roy acquiert par ce qui s'est passé entre l'evesque d'Evreux et le Plessis Mornay; les jugemens sont differens, et par la verité, et par la protestation du Roy à la religion catholique. Dieu benisse et conserve le Roy; j'imite vostre priere. S'il y a quelque nouveauté à la Cour, faites m'en part par chiffre ou autrement, et me croyez le plus humble et le plus vray de tous vos parens, amis, et le plus assuré et devotieux à vous faire service : c'est jusques au tombeau que cela vous est voué. Je suis vostre bien-humble cousin et tres-affectionné amy pour vous faire service.

BIRON.

A Beaune, ce 28 juin 1600.

*Lettres de M. de Biron.*

Monsieur, je vous adresse ce porteur, et vous prie, favorisez son allée au fort Sainte Catherine, comme il vous dira; c'est chose qui vous tournera à honneur, et luy rendez cette lettre. Je suis à vostre service.

BIRON.

O

Au nom de Dieu, croyez ce porteur, § §

§

Monsieur, je me suis infiniment ennuyé depuis avoir perdu vostre agreable compagnie, de laquelle je me sentoys honoré et satisfait. Arrivant près du Roy, je trouvay Mont-melian qui traitoit. Jugez quel avantage a Sa Majesté de prendre une telle place, et munie comme elle est de si grande munition de guerre : je ne vois pas que le duc d'un mois la puisse secourir, ny avec plus de temps que cela. De bons hommes, encor qu'ils fussent peu, la devoient défendre trois mois, et, y ayant nombre suffisant, la rendre imprenable :

c'est une poltronnerie signalée. Jugez que peut faire le duc de Savoye, ayant perdu Mont-melian, pourveu de tant de munitions d'Espagnols, et entreprendre d'attaquer l'archiduc par la Flandre à la prime. Renvoyez en diligence le valet du duc de Savoye, et ne faut pas qu'il espere rien de ses amis, s'il ne secourt Mont-melian; et qu'il ne faut point que le valet de la Fin soit renvoyé pour encor avec les vingt mil escus que l'on a mandé; ains qu'il vienne avec quelqu'un bien informé de leur dessein et pouvoir, et qu'il aye de la discretion et prudence, et que c'est trop souvent tromper ses amis. Ce coup de Mont-melian a tant estonné, qu'il est cause que le comte de Soissons a pris et accepté la charge de l'armée du Roy, et fait le bon valet; et tous avoient resolution de faire la guerre au Roy. Le vieux amy mordoit à la pomme. Je crains que le connestable perde baricade tout à fait. Or donc il faut advertir en diligence le duc de Savoye de ce qui se passe, sans faire semblant de conter ny blâmer leur tromperie, ains faire bonne mine; il ne faut qu'ils attendent ce que demande le duc de Biron touchant cinquante mil escus.

#### CHAPITRE XCVIII.

*Députation de la ville de Genève au Roi. Discours de Théodore de Bèze. Arrivée de Marie de Médicis. Prise et démolition du fort de Sainte-Catherine. Traité de paix avec le duc de Savoie.*

Vous quittastes Mont-melian et fistes mener partie de vos équipages en Bresse, pour attaquer la citadelle de Bourg et le fort Sainte Catherine; et le Roy vous ayant demandé qui vous estimiez le plus fort de Mont-melian ou de Bourg, vous luy dites: « Sire, il faut distinguer; car pour attaquer l'un et l'autre avec dix ou douze canons seulement, Mont-melian vaut dix Bourgs, d'autant qu'il ne faut que cela pour prendre Bourg, estant une place reguliere, qu'il faut attaquer par methode et pied à pied; et l'autre une sorte de forteresse qu'il faut emporter de furie, par battre en ruyne et incommoder tout le lieu par abondance de canon: tellement que qui n'auroit que dix canons ne le prendroit de long-temps; mais qui aura soixante pieces, Mont-melian ne vaut pas mieux que Bourg. »

Le Roy voulut attaquer le fort Sainte Catherine premier que Bourg, à cause que ceux de Geneve l'en prioient, et les vouloit gratifier, et eux fournissoient quelques commoditez pour

cet effet. Estant arrivé devant iceluy, le mareschal de Biron estoit logé desja aux environs, lequel vous demanda si vous vouliez venir recognoistre la place tout à cheval. Vous luy respondistes: « Monsieur, il me semble qu'il fait bien clair pour cela, que nous sommes trop de gens, trop enclinquantez et trop empanachez (car il avoit un grand pannache et un grand cheval blanc) pour en approcher bien pres. » Lors il vous dit: « Rien, rien; ne vous mettez point en peine, morbieu, ils ne nous oseroient tirer. — Allons donc comme vous voudrez, dites-vous, car s'il pleut sur moy il degouttera sur vous. » Et de fait il vous mena avec vingt chevaux tout à l'entour du fort, et en approchiez à deux ou trois cens pas, sans que l'on vous tirast jamais que douze ou quinze meschantes harquebusades. Surquoy vous luy dites: « Monsieur, il n'y a personne là dedans, ou bien ils dorment, ou ils ont peur de vous. » Cette recognoissance faite, vous allastes ensemble trouver le Roy, auquel vous contastes cela, lequel s'en émerveilla, « car, dit-il, nous y fusmes hier avec six chevaux, et je ne vis jamais tant tirer. Avez vous bien tout recogneu? — Non, Sire, dites-vous, j'y retourneray demain au matin pour m'en esclaircir l'esprit, mais j'iray seul et à pied. » Comme vous fistes, qu'il n'estoit que la pointe du jour, et n'aviez avec vous que Erard et Feugeres.

Mais vous ne fustes pas si tost apperceus sur la campagne (qui est si raze, en pante si douce de tous costez également, la place en faisant le centre et le sommet, que l'on y verroit courir un rat), qu'ils vous tirèrent comme en batterie, et de pieces et de mousquetades perpetuelles; en telle sorte que le Roy pensant qu'ils eussent fait une sortie et que ses troupes fussent à l'escarmouche, envoya le sieur de Montespan voir ce que c'estoit, lequel ne voyant personne dehors, s'en vint à vous et vous demanda: « Monsieur, à qui en veulent ces gens? — C'est à moi, dites-vous, mais j'ay veu ce que je voulois voir. Si tost que nos tranchées seront arrivées sur le bord du fossé, ils sont à nous; car les fossez ne valent rien, et les flancs des pieces sont tous éboulez et tous descouverts. » Ce que vous fustes rapporter au Roy, lequel vous priastes de trouver bon, après avoir tracé les tranchées, pendant que l'on les feroit, que vous allassiez promener à Geneve; ce qu'il fit. Vous y en allastes le lendemain avec bien cent chevaux, et y arrivastes si à propos, que vous ostastes messieurs de la ville de l'allarme où ils estoient, de voir tant de catholiques dans leur ville, et principalement messieurs de Guyse, d'Elbœuf, d'Es-

pernon, de Biron, de la Guiche, et autres dont les noms les faisoient souvenir des persecutions passées; car vous estans venus trouver et fait quelque plainte de cela, vous leur dites: « Messieurs, tenez vos cœurs en repos, le Roy a trop de bonne volonté pour vous, et est trop autorisé parmy tous les siens, pour croire que personne osast rien entreprendre à vostre pre-judice. Toutes-fois, pour vous oster toute doute, je ne partiray point d'icy que tous ces gens ne soient dehors. » Et de fait, dès le soir mesme vous leur en parlastes au nom du Roy, et ils s'en allèrent tous dès le matin. Ceux de la ville avoient député, pour faire la reverence au Roy, dix ou douze des principaux de leur ville, entre lesquels estoit M. de Beze, pour porter la parole, lequel, eux ayans esté par vous présentés au Roy, parla ainsi :

« Sire, nulle éloquence de paroles humaines n'estant capable d'exalter vos louanges jusques au sommet du merite de vos œuvres admirables, et mon style estant trop bas et ma voix trop foible pour l'eminence et magnificence des vertus de vostre Majesté, que l'univers publiera sans cesser, tout ainsi qu'elle ne cesse jamais de produire des actions dignes de gloire et de louanges, je laisseray aux saints anges la celebration des éloges qui luy sont deubs, pour avoir tiré les eglises du Seigneur d'oppression, et acquis aux enfans de Dieu une ample liberté pour le servir selon ses divins preceptes, et pour l'invoquer uniquement en trinité de personnes; et partant me contenteray, és choses humaines, de dire comme Simeon és divines :

Or laisse, Créateur,  
En paix ton serviteur,  
Puis que mes yeux ont eu  
Le crédit d'avoir veu,  
Avant que mourir,  
Le Sauveur  
Et le libérateur

« de nous vos tres-humbles serviteurs, des fidelles en general, voire de toute la France. » A quoy le Roy luy respondit: « Mon pere, ce peu de paroles grandement signiflantes estans dignes de la reputation que M. de Beze s'est acquise au bien dire, je les reçois avec le gré, la grace et les tendres ressentimens qu'elles meritent; et vous diray qu'ayans les roys, mes devanciers, tousjours tenu vostre ville en leur protection, je suis non seulement resolu de les imiter en cela, et toutes autres choses dignes de la gloire d'un Roy de France; mais aussi d'adjouster en sa faveur tous autres effets dignes des cordialles affections, que je sçay que vous avez toujours tous eues pour moy. En quoy je veux que celui que je tiens par la

main, qui vous a presenté et qui vous aime tous, serve de solliciteur, et que vous parliez à luy, des choses que vous desirerez de moy; lesquelles seront bien difficiles, si vous ne les obtenez pas. Je sçay des-jà bien, luy dit-il tout bas à l'oreille, ce que vous desirez le plus de moy (car vous luy en aviez des-jà parlé), c'est la desmolition du fort Sainte Catherine qui vous tient en eschet. Force gens me veulent persuader de n'en rien faire, et voy bien que c'est par malice; aussi n'y auray-je nul esgard. Je vous ayme et veux faire pour vous, s'il y a quelque chose qui vous accommode en ce que je conquerray pres de votre ville; et dès à present je vous en donne ma foy et ma parole, que, qui en parle, le fort Sainte Catherine sera desmoly; et voicy un homme (vous tenant par la main) en qui vous vous fiez bien, et avez raison, à qui je le commande dès à present, et le feray plus expressément quand il sera temps. » Il ne se fit pas grandes expeditions en ce siege; car les ennemis voyans les grands preparatifs que vous faisiez pour les attaquer, et leur manquant plusieurs choses de principales pour se defendre, ils capitulerent, à condition de sortir de la place, s'ils n'estoient secourus dans dix jours, qui n'estoit que pour la forme.

Et le Roy ayant eu lors nouvelles de la prompte arrivée de la Reine à Lyon, s'y en alla en poste par le plus mauvais temps qu'il estoit possible; il vous mena avec luy et arrivastes à unze heures du soir au bout du pont de Lyon, où vous demeurastes plus d'une heure et demie avant que l'on vous vint ouvrir; car le Roy n'avoit pas voulu donner advis de sa venue; luy et tous vous autres endurestes un grand froid au bout du pont. Et enfin, estant entrez, vous fustes avec le Roy jusques à son logis, où apres avoir veu la Reine il vous envoya tous souper et vous coucher; et luy en fit peu apres de mesme.

Deslors de l'arrivée du cardinal Aldobrandin, l'on avoit commencé à jeter des propos de paix, et le Roy avoit commis, pour la traiter avec luy, messieurs le cardinal du Peron, le connestable, Bellievre, Ville-roy et Jeannin, qui en avoient tousjours discouru; mais il n'y avoit rien d'avancé, la négociation s'eschauffa un peu d'avantage à l'arrivée du Roy: Bellievre et Ville-roy avoient tousjours asseuré ledit cardinal, que nulles des places prissur M. de Savoye ne se desmoliroient et sur tout le fort Sainte Catherine, dont il avoit fait plus d'instance que de toutes les autres, afin qu'elle fut tousjours une maille en l'œil de ceux de Geneve; aussi n'avoient-ils pas sceu que le Roy eut engagé sa parole de la faire ruyner: tellement qu'un soir lesdits sieurs



de Bellievre et de Ville-roy, luy estans venus dire qu'ils avoient promis cela au cardinal, en son nom, et qu'il en avoit déjà escrit au Pape, lequel l'en remerciéroit bien-tost, Sa Majesté leur dist : « Vous vous estes bien hastez sans sçavoir mon intention : si elle est autre, vous aurez vainement donné vos paroles ; il y a du dessein là dessous que je n'approuve pas. » Ils se voulurent fonder en raisons ; mais il leur dit : « Et bien, j'y penseray, et dans peu de jours vous en sçavez ma volonté. »

Le lendemain matin il vous envoya querir, vous conta tout cela, puis vous dit : « Je veux neantmoins tenir ma parole à ceux de Geneve, encor que je ne sois plus huguenot ; ils m'ont trop bien assisté pour leur manquer. Partant devant que le legat m'en parle, donnez ordre de faire voler tous ces cinq bastions le plus couvertement que vous pourrez, et faites advertir ceux de Geneve de toute cette histoire, afin qu'aussi-tost ils fassent de leur costé en sorte qu'il n'y ayt plus d'apparence de fort. » Tout cela fut executé : vous fistes faire des mines sous les bastions, et les ayans fait r'emplir entierement de poudres, une nuit l'on les fist tous sauter ; dequoy advertis ceux de Geneve, il y vint une telle affluence de peuple, qu'en un jour ou deux il n'y eut plus d'apparence de forteresse, et emporterent tout ce qu'il y avoit de matériaux.

La nouvelle vint aussi-tost à Lyon que le feu du ciel avoit bouleversé tous les bastions de ce fort, laquelle fut cruë par quelques heures ; mais, bien tost après, l'on descouvrit la verité, dequoy le legat fit de grandes plaintes, et dit tout haut : « Il n'y a que M. de Rosny qui ne m'a point trompé, car il m'a tousjours reconnu qu'il feroit ce qu'il pourroit pour faire ruyner toutes les forteresses et sur tout celle-là ; qu'il sçavoit bien qu'elle le seroit, et que je ne fisse point d'instance au contraire. Je le dis à mes sieurs de Bellievre et de Ville-roy, qui s'en mocquoient et m'asseuroient tout autrement, et sur leur parole, j'en ay escrit avec certitude au Pape, qui est ce qui m'offense le plus par cet accident. » Le traité de la paix fut discontinué par trois ou quatre jours, puis repris ; mais avec telles algreurs de toutes parts, qu'en fin il fut rompu du tout, estant demeurez en differends sur sept poincts, sçavoir : de quitter oute la riviere du Rosne, ce qui seroit sur le ord des deux costez, que M. de Savoye ne pourroit fortifier à une lieuë près les terres, pour le passage des Espagnols, les cent cinquante mil escus pour les frais de la guerre, les villages d'alentour de Geneve, la desmolition de Besche-

dauphin et la restitution de Chasteau-dauphin. Tellement que le Roy vous envoya querir aussitost, et vous dit : « Mon amy, il y a bien des nouvelles, la paix est absolument rompuë ; partant pensez à prendre la citadelle de Bourg et à trouver de l'argent suffisamment, car je veux passer les Monts. » A quoy vous luy respondites : « Quant à Bourg, Sire, si l'on m'eut laissé faire il fut maintenant pris ; tellement qu'en reprenant mon premier dessein, si l'on ne m'y traverse plus, ce sera bien tost fait, et quant à de l'argent, si vous me donnez loisir d'aller un tour à Paris, j'espere que vous n'en manquerez point. — Voire, mais ce vous dit-il en vous tirant à part, que ferons-nous de ceux dont nous sçavons qu'ils nous trahissent ? — Il ne les faudra pas croire, ce dites-vous, et les employer le plus loing de la teste de vos armées, qu'il vous sera possible ; faut faire M. de Lesdiguières mareschal de France, lui donner le gouvernement de Piedmont ; car il yra comme il doit, puisqu'il vous a fait advertir des menées de M. de Bouillon, et du voyage qu'a fait un nommé Odevous pour telles pratiques, encor qu'il y ayt un peu de negligence au sieur de Calignon qui en avoit eu la charge, car si nous eussions peu attraper ce meschant garnement là, nous eussions esté esclaireis de tout. — Je trouve tout cela bon, dit le Roy ; mais partez dès demain pour aller trouver de l'argent. — Je ne sçaurois partir de quatre jours, dites-vous, Sire, car il me faut donner ordre à tout l'esquipage de l'artillerie, à ce qu'il faut de preparer le siege de la citadelle de la ville de Bourg, à faire monstre à tous vos gens de guerre, et pourvoir à toutes les despences, tant de vostre maison, qu'extraordinaires ; afin que de six semaines vous ne puissiez estre importuné d'aucune chose pressée, et devant ce temps là je seray de retour. — J'approuve encor tout cela, dit le Roy, et allez travailler. »

Dés le lendemain vous fistes partir madame vostre femme avec tout vostre train, et luy ordonnastes d'attendre de vos nouvelles à Roüanne, où vous faisiez estat de prendre la riviere de Loire jusques à Orleans ; mais elle sejourna là, trois ou quatre jours plus que vous ne pensiez, pource qu'après avoir pourveu à tout ce qui est dit cy-dessus, vous fustes un matin prendre congé du roy qui vous embrassa, disant tout haut : « Bon courage, diligence, de l'argent et des munitions, mon amy, et adieu. » Lors vous luy dites : « Sire, trouverriez-vous mauvais que j'allasse dire adieu au legat ? — Non, vous respondit-il, vous feriez bien, car il vous aime et vous estime fort. — S'il me parle, dites-vous,

« de la paix, que vous plaist-il que je responde? — Vous sçavez mes affaires et ma volonté aussi bien que moy, dit le Roy, faites ce que vous jugerez plus à propos. » Sur cela vous passastes la riviere pour aller au logis du legat, et envoyastes devant iceluy vos chevaux de poste, afin de la monter à cheval tout devant luy. Or, sçachant que vous le veniez visiter, il vous rendit toutes les sortes d'honneurs et de defferences qu'il se peut dire; et vous voyant botté, vous demanda où vous alliez: « Monsieur, luy dites-vous, je m'en vais à Paris faire venir de l'argent et des munitions, pour passer les Monts et aller en Italie, et c'est à ce coup qu'en bonne compagnie j'iray baiser les pieds du Pape; mais je n'ay voulu partir sans venir prendre congé de vous, et vous assurer de mon tres-humble service, et prier de dire au Pape, que je suis son tres-humble serviteur. — Comment, respondit monsieur le legat, en Italie! Ho! monsieur, il ne faut pas cela; je vous prie, aydez-moy à renoüer cette paix; car il la faut faire à quelque prix que ce soit. — Je le veux, dites-vous, monsieur, mais vous sçavez bien que je ne suis point trompeur ny dissimulé; partant il me faut dire librement sur quels articles la paix a esté accrochée et ce que vous pouvez faire; car de ma part je vous diray franchement mon opinion, touchant ce que le Roy pourra contester ou conceder. »

Lors vous ayant représenté les sept poincts cy-dessus, vous luy dites: « Monsieur, adjoutez vous foi à ce que je vous diray? — Oüy, respondit-il. — Or bien, je vous declare que pour les poincts de la riviere du Rosne, les villages pres de Geneve, Chateau-dauphin et Besche-dauphin, vous ne les obtiendrez jamais. — Et pourquoi? respondit-il. — Monsieur, dites-vous, il y a tant de bonnes raisons qu'elles seroient trop longues à desdire; c'est pourquoy, sans insister davantage là dessus, croyez qu'il ne s'en fera que ce que je vous en ay dit. » Lors il se promena deux ou trois tours de chambre avec vous, sans dire mot, puis soudain il repartit: « Mais aussi, monsieur, si je quittois ces quatre poincts là, m'accorderiez vous les autres? — Monsieur, dites-vous, je n'ay point de charge expresse et ne pensois à rien moins que d'avoir à traiter de la paix avec vous, et neantmoins je vous oserois quasi assurer que le Roy defferera cela à vos prieres. — Monsieur, dit-il lors, je vous prie, mettons une fin à ce bon œuvre, vous et moy, et allez trouver le Roy, pour le disposer à trouver bon ce que nous avons projeté. — Je m'y en vay, monsieur, dites-vous, et vous assure de rapporter une confirmation

« du total. » En mesme instant vous retournastes trouver le Roy, qui vous dit: « Hé! quoy, vous voila encor, ne partez-vous point? — Je crois que non, Sire, dites-vous, car il y a d'autres nouvelles; la paix est renoüée si vous le voulez. » Lors luy contastes-vous tout ce qui s'estoit passé: surquoy il vous ordonna de retourner trouver le legat, et luy donner parole en son nom. Tellement qu'apres plusieurs allées et venues que vous fistes de la part du legat vers le Roy, et du Roy vers luy, vous deux seuls conclustes et arrestates les articles de la paix, lesquels furent pour lors en simple sommaire tels que s'ensuit:

### *Précis du Traitté.*

Premierement, le duc de Savoye cede au Roy toute la Bresse, tout le Rosne compris d'un et d'autre costé depuis Geneve jusques à Lyon, sans aucune chose en reserver que le pont de Gresin, et quelques autres villages pour le passage de Savoye en la Franche-Comté; esquels lieux neantmoins, ny proche des rives du Rosne, ledit duc ne pourra lever aucun tribut, ny bastir forteresse ny chateau, et ne pourra passer aucuns gens de guerre par ledit pont de Gresin, sans permission du Roy, et suivant cela sera la citadelle de Bourg remise és mains de Sa Majesté.

Plus, cede ledit duc au Roy les villages d'Aire, Chaucy, Avully, Pont-arli, Sessel, Chana et Pierre Chastel.

Plus, ledit duc cede au Roy le bailliage de Gets.

Plus, restituera ledit duc au Roy la ville, chastellenie et tour du pont de Chateau-dauphin, et tout autre lieu des dependances du Dauphiné deçà les monts.

Plus, desmolira ledit duc les fortifications de Besche-dauphin.

Plus, payera ledit duc au Roy cent mil escus pour la permission du passage du pont de Gresin.

Plus, moyennant ce que dessus, le Roy cede audit duc tout le marquisat de Saluces, et les places de Cental, de Monts et de Roque-esparviere.

Plus, restituera le Roy audit duc tout ce qui a esté occupé sur ses pays pendant les guerres, mais pourra retenir l'artillerie et les munitions estans esdites places.

Plus, seront tenus tant le Roy que le duc à l'observation des choses par eux legitiment deües et promises à ceux des Estats et pays qu'ils se cedent l'un à l'autre

Plus, en vertu des choses cy-dessus reciproquement accordées, y aura paix, amitié et bonne voisinance entre le Roy et le duc.

Plus, tous sujets et serviteurs du Roy et du duc qui auroient esté despoillez de leurs biens et charges, à cause des divers partis, y seront restablis.

Plus, tous prisonniers detenus és galleres du Roy ou du duc, à cause des guerres, seront mis en liberté, comme aussi tous prisonniers de guerre sans rançon, en payant les despens.

Plus, tous jugemens donnez durant les guerres, où les parties ont contesté volontairement, seront valables, et les autres non.

Plus, les habitants et sujets des choses eschangées ne pourront estre molestez de part ny d'autre.

Plus, tous beneficiers des terres eschangées pourveus canoniquement, ne pourront estre troublez.

Plus, M. de Nemours sera favorablement traité és terres qu'il a sous la domination, tant du Roy que du duc.

Plus, tous gens de guerre, levez à l'occasion des presens troubles, seront licentiez dans un mois.

Plus, le present traité sera verifié és cours souveraines où besoin sera.

Plus, les presens articles seront signés par les députez du Roy et du duc, lesquels les pourront estendre pour plus facile intelligence, s'ils le jugent à propos, sans neantmoins rien changer quant à la substance, de laquelle M. le legat Aldobrandin au nom du Pape, et M. le marquis de Rosny au nom du Roy, sont verbalement convenus, suivant qu'il est contenu cy-dessus, pour estre ratifiéz, et ensuite solennellement jurez, tant par le Roy que par le duc.

Faict, etc.

Or, quoy que ces articles eussent esté depuis signez de tous costez, par ceux qui en avoient charge et pouvoir, tant du Pape et du Roy, que de M. de Savoye, si ne laissa il pas d'intervenir de grandes longueurs et difficultez en l'exécution et accomplissement des choses promises, à cause d'une infinité de plaintes que fist M. de Savoye des conditions accordées, qu'il disoit luy estre d'un merveilleux prejudice, et des refus qu'à cette occasion il fist de les vouloir ratifier, à cela fortifié par les persuasions du comte de Fuentes, qui ne desiroit rien tant que la guerre : la deduction desquelles particularitez remettant aux historiens, tant pour ce qu'elles seroient trop longues et ennuyeuses, à cause de plusieurs redittes, que pour ce que vous n'y eustes nulle part, nous nous contenterons de vous ramentevoir que le Roy, tenant pour indifferente la paix ou la guerre, tant son esprit estoit préparé à toutes sortes d'accidens, apres avoir donné ordre à ce qui estoit

nécessaire pour renforcer l'armée et la faire marcher s'il en falloit revenir aux mains, que pour la payer et licentier si les choses promises s'exécutoient, et laissé monsieur le connestable, M. de Lesdiguieres, M. de Ville-roy et deux ou trois autres de son conseil à Lyon, où estoient aussi les députez de M. de Savoye, pour terminer les choses et pourvoir à ce qui seroit nécessaire, en l'un et en l'autre cas, il prist la poste et s'en alla en diligence à Paris, afin que s'il falloit reprendre les armes, il y disposast plus efficacement les affaires du dedans du royaume, et pourveut à ce qu'il laisseroit derriere luy, s'il falloit retourner en Savoye.

Nous laisserons aux historiens, suivant nostre coustume, les particularitez de plusieurs affaires estrangeres dignes de remarque, advenues pendant l'année 1600, d'autant que vous n'y eustes point de part, comme le jubilé de Rome; la mutinerie des Espagnols en Flandres; les diverses factions militaires de l'archiduc et du prince Maurice; le duel du sieur de Breauté, qui, ayant tué son ennemy, fut assassiné de sang froid; le voyage du sieur d'Alincourt à Rome, pour les affaires du mariage du Roy; les sollicitations de M. de Belle-garde, afin d'aller espouser la princesse Marie de Medicis au nom du Roy, dequoy ayant esté refusé absolument, il obtint d'estre porteur de la procuration adressée au duc de Florence, pour faire cette action; les magnificences qui se firent sur le lieu pour cet effet; les espousailles celebrées à Lyon; l'eslection de M. de Mercure, en tiltre de lieutenant general de l'Empereur contre le Turc; et les diverses factions qui se passerent là dessus.

Le Roy s'en estant allé devant à Paris, comme il a esté dit, et voyant que la Reine semblablement estoit preste de s'y acheminer, vous partistes huit jours devant elle, afin de disposer et preparer avec plus de loisir les choses nécessaires pour son entrée à Paris, comme vous fistes fort magnifiquement et avec beau bruict d'artillerie, dont nous ne ferons point plus ample recit, laissant ces discours à ceux qui se plaisent à remplir leurs escrits de fanfares et ceremonies. Le lendemain le Roy, la Reine et toute la Cour vindrent disner chez vous à l'Arsenac, où vous leur fistes tres-bonne chere, et sur tout aux filles italiennes de la Reine, lesquelles s'en allerent si gaillardes que le Roy cogneut bien que vous leur aviez fait quelques malices, comme vous n'y aviez pas manqué, voyant qu'elles prenoient si grand plaisir à chinquer du vin d'Arbois; car ayant recouvert d'excellent vin blanc aussi clair qu'eau de roche, l'on en remplissoit les esguieres pour tremper leur vin.

## CHAPITRE XCIX.

*Lettres du Roi, et autres. Conclusion des quatre-vingt dix-neuvièmes premiers chapitres. Deux souhaits de Henri IV.*

*Cinq lettres de la main du Roy à M. de Rosny.*

Mon amy, y ayant desja force gens qui m'importunent de leurs pensions et assignations de debtes, et de vous en escrire, je vous faits ce mot pour vous dire que vous les remettiez tous à mon conseil ou quand vous serez pres de moy, mais que personne ne sçache point que je vous l'aye mandé. Bon jour, mon amy.

Ce vendredy matin, 13 fevrier, à Fontaine-bleau.

HENRY.

Mon amy, j'ay veu la lettre que M. le chancelier et vous m'avez escrite; je trouve qu'une sepmaine de temps ne sera mal employée à pourvoir à tout ce que vous me mandez, et quatre ou cinq jours de retardement à mon parlement ne prejudicieront tant à mes affaires, que ne donner ordre à cela. Je seray, Dieu aydant, demain à Paris, et j'yray disner chez Zamet, où je vous convie; mais advertissez-le dés ce soir, et là je parleray à vous, et adviserons ensemble de toutes choses. Mon advis est que demain du matin il soit tenu un conseil particulier pour le fait du retard des rentes où je ne vous puis donner aucun advis, seulement approuver les resolutions que vous prendrez pour mon service, me confiant entierement en vostre bon mesnage; et si dans la sepmaine où nous allons entrer l'on a bien pourveu à tout ce que vous me mandez, ce ne sera pas peu fait. Adieu, mon amy.

Ce samedy à midy, 27 may, à Verneuil.

HENRY.

Mon amy, je vous fais ce mot pour vous dire que ma volonté est que vous escriviez à ceux de ma cour des aydes à Rouën, qu'ils ayent à surseoir la verification de l'edict pour les esleus jusques à ce que j'en aye autrement ordonné, afin que celui fait en faveur de mon cousin le duc de Mayenne, et verifié depuis peu, puisse avoir lieu comme chose que je desire. Sur ce, Dieu, etc.

Ce 3 juin.

HENRY.

Mon amy, il y a deux jours que j'ay receu la vostre à laquelle je n'ay fait aucune responce, pour ce que je pensois partir demain et en estre moy-mesme le porteur. J'ay esté bien ayse d'avoir recogneu par icelle le soin que mes serviteurs ont de moy, et l'apprehension qu'ils ont eue de mon mal, et vous particulièrement; mais je vous diray que je vis asseuré d'une chose, c'est que qui a la garde d'Israël pour soy ne doit rien

craindre; que c'est luy qui jusques à icy a eu soin de moy, et qu'il me continuera encore cette mesme faveur, puis que je ne desire vivre que pour faire droict à tous et tort à personne, et soulager mes peuples. J'estois resolu de partir demain matin et m'en aller coucher à Cosne pour arriver le lendemain à Moulins, comme hier je l'escrivis à Ville-roy; mais des causes que je vous diray m'ont retenu icy. Je partiray mardy matin sans faute pour me rendre à Moulins mercredy, dequoy vous vous pouvez asseurer et en asseurer les autres, leur faisant part de celle-cy. Cependant je vous prie de faire en sorte qu'à mon arrivée à Moulins je trouve tellement mes affaires ébauchées, que je n'y sejourne que cinq ou six jours au plus pour me rendre incontinent à Lyon, où vous ferez avancer le regiment de mes gardes, mes compagnies de chevaux legers et le plus de vostre equipage que vous pourrez, afin que je les y trouve à mon arrivée. Adieu, mon amy.

Ce dimanche 26 juin, à quatre heures du soir, à Fontaine-bleau.

HENRY.

Mon amy, je seray bien ayse que vous accompagniez d'une de vos lettres la troisieme jussion que j'envoye à ma cour de parlement de Tholouse pour la verification de mon edict des deux conseillers presidiaux en Languedoc créés durant le siege de ma ville d'Amiens, et verifié en tous mes autres parlemens, m'estant aydé des deniers qui en sont provenus en une occasion si importante: ce que vous leur ferez bien entendre, afin qu'ils cognoissent par ce que vous leur escrirez, que c'est chose que j'affectionne, et qui n'est affectée à personne du monde que pour mon service, dautant que j'ay esté adverty que la creance qu'ils ont eüe que lesdits deniers estoient destinez à d'autres effets a esté en partie cause du refus qu'ils en ont fait. Adieu, mon amy.

Ce 11 juillet, à Moulins.

HENRY.

*Lettre de M. de Ville-roy à M. de Rosny.*

Monsieur, je n'ay peu jusques à present vous escrire aucune certitude de nostre negociation avec les deputez de M. de Savoye; lesquels, apres avoir fait au Roy la declaration de laquelle je vous envoye un double, nous avoir aussi fait voir le pouvoir duquel pareillement je vous envoye une coppie, n'ont toute-fois jamais voulu signer et accorder les articles que vous trouverez avec la presente, que sous le bon plaisir de leur maistre; davantage ils ont traité avec telle crainte, principalement Roncas, qui est le dernier qui a veu le duc, qu'ils nous ont donné plus d'occasion de croire qu'il ne veut qu'allentir

les armes du Roy et gagner le temps, et non proceder nettement en ce fait : ce qu'ayant rapporté à Sa Majesté, elle a pris resolution d'avancer toutes ses forces et provisions de guerre le plus qu'elle pourra, afin de pouvoir choisir tel party qu'il luy plaira, dont elle m'a commandé vous advertir, ainsi que vous verrez par la lettre qu'elle vous escrit, desirant que vous donniez pareil advis à tous ceux qui sont par delà que vous sçavez qu'elle a mandez et mesmes à M. de Mayenne, luy faisant tenir la lettre que je vous envoie s'ils satisfont à ce que nous leur avons demandé. Pour le regard de l'artillerie, ils nous fourniront vingt bons canons, unze demy canons (ils les baptisent ainsi par leurs inventaires), trente quatre quarts de canons et environ quarante quatre entre-sacres, faulcons, faulconneaux, esmerillons et mousquets, ces derniers tant bons que mauvais, ainsi que vous verrez par leur inventaire qu'ils nous ont représenté, que je n'ay eu le loisir de faire doubler, mais que je vous reserveray. Je vous envoie aussi la lettre que l'archiduc a escrite à la Boderie, quand il luy a demandé les vingt mil escus de M. Zamet; s'il tient ce qu'il promet par icelle, vous en pourrez faire estat; j'escriray tousjours à la Boderie qu'il l'en poursuive. Monsieur, ces gens cy n'ont encore voulu signer les articles que je vous envoie sous le bon plaisir de leur maistre; ils marchent sur espines, dont je suis tres-mal edifié; mais le Roy espere que vostre venuë et vostre équipage qui arrive journellement, les fera parler franchement. Je prie Dieu, etc.

De Lyon, le 31 juillet 1600. DE NEUF-VILLE.

*Lettre du Roy à M. de Rosny, contre-signée.*

Mon cousin, je viens presentement de recevoir vostre lettre escrite de mardy dernier, par laquelle j'ay veu les discours que vous a tenus le marquis de Lulin et la responce que vous luy avez faite que j'ay trouvée tres-bonne : je croy que ce gentil-homme a bonne intention; mais son maistre s'en mocque. M. de Nemours est venu icy, auquel luy et l'archevesque de la Tarantaize ont tenu mesme langage. Je ne puis dire que je ne veux point ouyr parler de paix, car je parlerois contre mon cœur, et me semble que je ferois tort à ma reputation et à mon service; mais je ne veux plus estre abusé, et n'y a rien qui me puisse faire differer n'y allentir l'employ de mes armes que des effets tous contraires à ceux que j'ay veus. Je l'ay dit ouvertement au patriarche de Constantinople comme vous aurez sceu par ce qui en a esté escrit à M. le chancelier, qui a eu charge de le vous

communiquer; je l'ay dit aussi audit duc de Nemours, et m'avez fait plaisir d'en parler audit marquis de Lulin, comme vous avez fait. Je suis bien d'avis d'advertir tous ceux qui nous doivent venir servir qu'ils se hastent et qu'ils ne s'arrestent pas au bruit de la paix que l'on publie expres pour cet effet, et me semble que sçachans et voyans que je suis icy en personne, ils n'ont besoin d'autre esperon. Je suis bien ayse que vous ayez assisté d'argent le duc de Biron, vous estant en cela rencontré avec ce que je vous en ay mandé, et desire que vous acheviez de pourvoir à ce qui luy fait besoin, en sorte qu'il ayt sujet d'estre content et pour cause. Il semble veritablement que Dieu ne favorise pas seulement mes justes armes, mais qu'il espouvente celles de mon ennemy, et n'attends plus que vostre personne et vos flustes pour le faire aller en cadence. Le sieur de Lesdiguières estime Mont-melian grandement fort, et que neantmoins nous le pourrons prendre ayant vingt canons et dequoy tirer huit mille coups; mais je remets le tout à vostre recognoissance et à vostre soin et diligence. Je fais venir les huit qui sont à Grenoble et les cinq que vous avez fait venir de Valence; mais il faut aussi que vous fassiez avancer ceux de Lyon le plutost que vous pourrez, vous servant pour ce faire des rivières de Rosne et l'Isere. Il faut semblablement faire avancer tout le reste des munitions que vous avez fait voicturer de Paris, car il est du tout necessaire de haster nostre besongne cependant qu'il fait beau, que nostre ennemy est foible et fort estonné. Ceux de la ville de Chambéry ayans esté sommez ont respondu de façon que je cognois bien qu'ils n'attendent que l'on leur fasse voir le canon, ce que nous ferons si tost que vous serez icy avec vostre esquipage. Dittes à M. de la Guiche qu'il s'avance avec sa troupe, et venez en diligence apres que vous aurez pourveu à ce que vous estimerez estre necessaire pour mon service. Priant Dieu, etc.

De Barrault, ce seiziesme jour d'aoust 1600.

HENRY.

Et plus bas, DE NEUF-VILLE.

*Lettre du Roy à M. de Rosny, contre-signée.*

Monsieur de Rosny, je suis venu loger icy pour avoir plutost raison de cette ville, laquelle, encor qu'elle ne vaille rien du tout, je ne puis forcer sans canon. Et partant hastez-vous de venir, car j'aurois à plaisir de vous voir commencer en ma presence à prendre possession de vostre charge par effet, et prenez la poste pour vous rendre icy au plutost, m'assurant tant sur vostre active diligence et vraie affection, que

vous aurez achevé de pourvoir à mes autres affaires, pour lesquelles votre presence étoit nécessaire par delà, et ne faillez d'amener vos plus entendus commissaires et meilleurs peinteurs en poste, d'autant que nous en avons besoin, prenant vostre chemin par Laiguebelette, car la Varenne vous dira que l'on y peut passer seurement et commodement. Faites venir aussi les trésoriers de l'extraordinaire des guerres, avec l'argent nécessaire pour faire faire les monstres aux compagnies et pourvoir aux autres despesces qui se presentent; non que je vueille avancer lesdites monstres plutost qu'elles doivent estre faictes, mais afin que nous ayons dequoy y satisfaire quand il sera temps, se presentant icy tous les jours plusieurs despesces ausquelles nous n'avons aucuns moyens de pourvoir sans vous; et mesme je ne veux pas que l'on touche à l'argent que par vostre ordre. Il est nécessaire de penser aussi à ce qu'il faut faire pour mes nopces, autrement nous nous y trouverrions surpris. Nous avons commis le sieur de Maisses pour en avoir le soin, comme vous l'avez désiré: resolvez donc avec luy ce qu'il faut faire, et luy donnez moyen de l'exécuter. Je sçay bien que le moins que nous y pourrons despendre sera le meilleur; je suis apres à me servir d'un moyen pour ce faire, que je vous diray quand je vous verray. Toutesfois il ne faut laisser de donner ordre que les choses se fassent le plus honorablement que faire se pourra; et me semble qu'il seroit bon que ledit sieur de Maisses allast devant à Marseille, pour, estant sur les lieux, preparer toutes choses. Parlez-en avec monsieur le chancelier et avec ledit sieur de Maisses, et resolvez avec eux ce qu'ils auront à faire pour cela, car je m'en fie en vous, et n'ay le loisir pour le present d'en escrire à l'un ny à l'autre. Je me remets du surplus sur ce que vous en dira de ma part ledit sieur de la Varenne, ayant receu la lettre que vous m'avez escrite du quinzième de ce mois, à laquelle il n'eschet de faire autre responce, puis que je vous dois voir bientôt. J'ay aussi chargé ledit la Varenne des lettres pour madame de Nemours et madame de Guyse, afin de les faire avancer. Je desire que vostre femme aille avec elles. Pour les cardinaux de Joyeuse et de Gondy, vous leur ferez tenir mes lettres, et leur escrirez vous mesme à tous. Priant Dieu, etc.

Escrit au camp des faux-bourgs de Chambéry, le 18 aoust 1600. HENRY.

Et plus bas, DE NEUF-VILLE.

*Lettre de la main du Roy à M. de Rosny.*

Mon amy, je vous fais ce mot pour vous dire,

suivant ce que je vous manday dernièrement par Fresnes, que je veux que vous fassiez delivrer la quittance de l'office de conseiller en ma cour de parlement de Paris que fait le jeune Chauvelin, avec la dispense des quarante jours, moyennant la somme de quatre mille escus contant, que l'on fera bailler au trésorier de mes parties casuelles, laquelle servira bien maintenant pour mon armée. J'escris le mesme à monsieur le chancelier, afin que de sa part il ne fasse aucune difficulté de seeller les lettres nécessaires. Et cette-cy n'estant à autre fin, Dieu vous ait en sa garde.

Ce 18 aoust, aux Marches. HENRY.

Toutefois je ne veux en cecy rien faire qui prejudicie à ceux de la religion, ny à ce qui leur a esté promis; mais si on ne leur fait point de tort, ces quatre mille escus vous serviront bien, car croyez que je n'en veux rien pour moy ny pour d'autres, quoy que l'on vous ait dit.

*Lettre du Roy à M. de Rosny, contre-signée.*

Mon cousin, ne vous ébayssez pas si les commandemens que je vous faits sont differens pour ce qui concerne vostre charge, car ils dépendent des advis que me donnent ceux que nous estimons les plus sages et mieux entendus des affaires du pays, ainsi que vous verrez quand vous serez icy. Il faut que nous ayons tout l'équipage que vous avez préparé, suivant le memoire en forme d'inventaire que vous avez envoyé à M. de Ville-roy pour me le faire voir. Partant donnez ordre à cela, et faites tout achever et conduire au port de la Gasche, ainsi que je vous escravis hyer, et me venez trouver aujourd'huy ou cette nuit en ce lieu, car je n'en puis partir que je n'aye parlé à vous, pour les raisons que je vous diray quand je vous verray: desirant outre cela conferer avec vous de plusieurs affaires d'importance qui concernent mon service, autres que celles qui regardent vos charges. Mais faites incontinent dépescher ce courrier que j'envoye à Bourg, en Bresse, par le chemin de Lyon, sans qu'autre que vous le sçache, pour les raisons que je vous diray. Priant Dieu, etc.

Escrit au camp Saint Pierre d'Albigny, ce 30 aoust 1600. HENRY.

Et plus bas, DE NEUF-VILLE.

*Lettre du Roy à M. de Rosny, contre-signée.*

Mon cousin, je ne vous verray pas si-tost de deux jours comme je pensois quand je suis party, pour les raisons que je vous diray quand je vous verray. Toutefois je partiray d'icy demain et iray à Beau-fort par Faverges, faisant estat que

le patriarche de Constantinople arrivera icy aujourd'huy avec le secretaire du Pape nouvellement venu ; mais je me contenteray de les ouyr, et remettre à faire responce, qui sera quand j'auray parlé à vous à Chambery, où je le renvoyeray devant. Je m'asseure que vous ne perdrez pas cependant le temps ; mais je vous prie faire faire une bonne quantité de petits gabions de trois pieds de haut seulement, et de neuf pieds en diamettre, pour servir à ce que vous sçavez, seachant bien que vous avez bonne provision de sacs, de balles de laine, de pics, de pelles et de pioches, afin de pouvoir mieux, et plus seurement et diligemment avancer nostre besongne à mon retour, sans perdre plus de temps, pendant qu'il est encor beau et que le duc de Savoye nous laisse en repos. Je vous envoie ce courrier expres, afin qu'il m'apporte de vos nouvelles, dont je suis en impatience ; priant Dieu, mon cousin, qu'il vous conserve.

D'Anessi, le 8 octobre 1600. HENRY.

Et plus bas, DE NEUF-VILLE.

*Response de M. de Rosny au Roy.*

SIRE,

J'ay receu une lettre de vostre Majesté, du huictiesme de ce mois, contre-signée M. de Ville-roy, à tous les poincts de laquelle je ne manqueray de travailler tant assiduellement, que vostre Majesté en aura contentement, reservé pour le regard d'un seul poinct, sur lequel je me trouve bien empesché, dautant que nonobstant que j'aye leu trois fois la lettre pour essayer de le comprendre, si faut-il que je confesse mon peu d'esprit et ignorance, et reconnoisse le si haut stile et profonde science de celuy qui a fait la lettre, que je n'y entends du tout rien, voire n'estime pas que vostre Majesté l'ait ainsi commandée, si ce n'est qu'ayant achepté des moutons à la Tarantaize, elle ait dessein de les faire parquer, dautant que des gabions de trois pieds de haut et neuf pieds de large ne sçauroient estre bons à autre chose. Surquoy, attendant d'autres commandemens de vostre Majesté ou l'explication de l'escrivain, je prie Dieu, etc.

Du Touvet, ce 11 octobre.

*Lettre du Roy à M. de Rosny, contre-signée.*

Mon cousin, je ne haste pas tant les gens que vous : s'ils veulent se contenter de trois semaines, je suis d'avis que nous les leur accordions ; mais non passer outre, comme voudroient ceux qui s'en meslent avec vous. Partant faites les resoudre et m'advertissez de leur responce ; car si ma presence ou mes lettres vous sont necessaires pour fortifier vostre opinion, vous n'en

manquerez pas. Je ne vous verray pas ce matin comme j'avois promis, pour m'estre un peu trouvé mal cette nuict. J'ay dit ma volonté à ce porteur pour la vaisselle d'argent qui est à Lyon, qu'il faut faire apporter icy pour servir le cardinal Aldobrandin. Je prie Dieu, mon cousin, qu'il vous conserve, etc.

De Chambery, le 14 d'octobre 1600.

HENRY.

Et plus bas, DE NEUF-VILLE.

*Lettre du Roy à M. de Rosny, contre-signée.*

Mon cousin, j'ay esté bien ayse de sçavoir, par la lettre que vous m'avez escrite par le sieur de Sainct Julien, la sortie du chasteau de Montmelian du comte de Brandis, l'ordre que vous avez donné à toutes choses necessaires pour cét effet, et que vous ayez mis Crequy dedans avec sa compagnie. Mais je suis d'avis que vous pourvoyez à munir ledit chasteau de vivres et autres choses necessaires pour la nourriture de la garnison que vous y avez establee ; car, en ce faisant, la place ne pourra estre surprise, et en tout cas nous retirerons tousjours bien l'argent que nous aurons employé en l'achapt desdits vivres. Usez aussi de toute diligence pour retirer vos canons, les faire embarquer et porter où nous avons advisé. Au reste, j'ay quelque esperance que nous pourrons faire un bon effet sur l'ennemy, dequoy je me resoudray dans ce soir et vous en donneray incontinent advis, et aussi de ce que vous aurez à faire, soit pour estre de la partie, ou pour vous en aller en Bresse. Nous avons appris par un Espagnol qui a esté pris, que les ennemis ne sont pas plus de six ou sept mil hommes en tout, et encor la pluspart bizognes, mal commandez, incommodez de vivres et logez si escartez les uns des autres, qu'il est facile de leur en prester d'une. Je vous prie de donner ordre que le regiment du chevalier de Mont-morency soit payé promptement, suivant la monstre qui a esté faite ; car les soldats s'en yront s'ils ne sont payez promptement. Je prie Dieu, etc.

Escrit à Villars, ce 19 novembre 1600.

HENRY.

Et plus bas, DE NEUF-VILLE.

Ayant rassemblé maintenant les recueils par nous cy-devant faits de ce que vous avez veu, sceu et cognu des vertus et fortunes de nostre grand Roy, et de ce que nous avons aussi pû sçavoir de vos loyautez et utiles services à luy rendus, à l'avantage et contentement de Sa Majesté, de son royaume, repos et soulagement de ses peuples, et iceux jugez assez amples pour en former un livre, nous avons mis fin à cestuy-cy par une apparence de grand changement, le-

quel nous jugions devoir estre tel par la dernière paix faite en Savoye, et en suite solennellement jurée à Paris et à Thurin, qui sembloit devoir estre la fin des longues guerres, troubles, disputes et dissensions qui avoient esté entre ces deux grandes maisons de France et d'Austriche et celles de leurs dependances.

*Les deux desirs du Roy, qu'il dit ne vouloir pas encor dire en la page 243 de ce volume.*

Le premier, de disposer tous les potentats de la chrestienté à choisir trois des diverses sortes de religions, d'entre plusieurs qui ont quelque cours en icelle, lesquelles paroissent tellement establies, qu'il est hors d'apparence que l'une d'icelles puisse entreprendre la destruction des deux autres sans se mettre au mesme hazard pour elle mesme, afin d'excogiter apres des expedients convenables et agreables à la pluralité des voix d'iceux, qui pussent estre propres pour les concilier tant équitablement, qu'elles puissent estre capables de subsister en l'estat auquel elles se retrouvent au siecle present, sans haine, envie ny guerre les unes contre les autres, comme c'estoit chose qu'il estimoit assez facile, si chacun vouloit bien prendre ses raisons.

Le second, de faire encore convenir tous les potentats de la chrestienté au choix de tels ordres et reglemens, que par iceux toutes les dominations royales qui se voudront maintenir hereditaires, et d'une puissance absoluë sur leurs peuples conjointement, ayent agreable de se reduire à une si fort approchante égalité de puissance, tant en force qu'en estenduë de terres et pays, que nul d'iceux par l'exces d'iceux n'entre en l'avidité d'en opprimer quelqu'un, ny l'un d'iceux en l'apprehension de le pouvoir estre de luy.

*Dix des Maximes royales d'Estat, des meditations de Henry le Grand, touchant les devoirs des roys envers leurs peuples et de leurs peuples envers eux, et instruction à tous roys qui pourroient desirer d'accroistre leurs Estats.*

« Les lumieres divines, en elles invisibles, se font voir aux mortels par les astres au ciel, et par les roys en terre.

« Dieu seul establisant les dominations, luy seul aussi en est le vray propriétaire, tous les roys n'en estans que les usufruitiers; et partant doivent ils en rendre loyal compte.

« Comme les bons sujets à la voix de leurs roys rendent incessamment alaigre obeyssance,

ainsi doivent les roys obeyr au grand Dieu, regnans ainsi que luy en droicteure et clemence.

« Les roys sont establis du grand Dieu, il est vray, pour estre ses images, et le faire paroistre par estre doux et sages.

« Justice et jugement sont les throsnes des roys, sur lesquels s'aseans continuellement, leurs empires seront à Dieu bien agreables.

« Si les roys, comme Dieu, desirent de regner sur leurs peuples sousmis, qu'ils paroissent non roys, mais, comme luy, vrais peres.

« Ceux qui siegent les throsnes tiennent en main les sceptres, et portent sur le chef le royal diademe : qu'ils sçachent que la foy, la clemence et la loy en sont les pedestals et les vrais stilobates.

« La premiere loy des dominations legitimes est l'obeyssance volontaire des sujets à leurs roys, et celle de l'absoluë deference des roys aux statuts et ordonnances des Estats qu'ils ont jurées prenans possession d'iceux.

« Ainsi qu'un beau soleil, par sa lumiere et sa chaleur illumine les cieus, eschauffe la terre, reverdit les plantes, diapre les fleurs et meurit les fruits; tout ainsi les vrayz roys, par leurs prudences et beneficences, illustrent les esprits, eschauffent les courages, reverdissent les douces esperances, affermissent leurs peuples et fertilisent leurs chevances.

« Quelques esclatans et apparemment specieux desseins que puissent former quelques potentats que ce puisse estre, avec intention d'en despoüiller quelques-uns de leurs biens, chevances et possessions, et quelques efficacieux et avantageux qu'en soient ou deviennent les poursuites et les succez; si se trouveront-ils tousjours neantmoins à la fin plutost suivis de blasmes que de loüanges, d'ennuis que de contentemens, de haines que de bienveillance et de repentirs que d'éjouyssances, si telles conquestes sont pour demeurer tousjours litigieuses et que pour parvenir à icelles, ils ayent esté contraints de vendre et alliéner leurs propres revenus et domaines, de surcharger leurs naturels sujets de tributs, impôts, tailles et subsides, d'aneantir le trafic, le commerce et le labourage, et de laisser piller, saccager, ruiner et destruire les naturels sujets, n'y ayant point de doute que ce ne soit une imprudence des plus dommageables, que d'exposer ses propres et legitimes revenus à perdition, pour le seul desir d'usurper ceux d'autrui, d'autant que demeurans tousjours en dispute, ils leur cousteront incessamment trois fois plus à garder et conserver qu'ils ne leur vaudront de revenu annuel. »

Ayant, en nostre premier livre des OEconomies



royales et servitudes loyales, fait particuliere mention de dix des principaux desirs de nostre grand Roy, pendant les temps de ses mauvaises fortunes, nous avons fait encore inserer cy-dessus, pour servir d'entrée à nostre second livre, dix des Meditations royales de ce vertueux prince, reservans pour le troisiemesme et quatriemesme (si tant les Memoires sur lesquels nous les faisons en peuvent bien former) dix des principales et plus excellentes Œconomies, qu'il se resolvoit d'adjouster aux siennes precedentes, pour mettre en tant exquise valeur ses revenus ordinaires, qu'ils eussent pû subvenir à toutes les plus splendides dépenses qu'il projettoit de faire, et dix reglemens, pour toutes sortes de conditions de personnes, moyennant l'observation desquels chacune d'icelles eust trouvé une grande amelioration à sa condition et à ses facultez, et des expediens convenables pour s'exempter de tous luxes, superfluitez et dépenses non necessaires, avec l'establissement d'un si bon ordre en l'exercice de la justice, que les longueurs et les frais pour l'obtention d'icelle, eussent esté diminuez des trois parts sur les cinq.

## CHAPITRE C.

*Avant-propos. Projets de Henri IV. Éloge de ce prince. Travaux de Rosny. Devises des jetons distribués à la fin de 1600.*

[1600] Monseigneur, suivant ce que nous avons pû apprendre des Memoires en forme de journal, de ceux qui disent d'avoir fait un fidelle recueil de tout ce que vous avez veu, sceu et cognu des dits, faits, gestes, mœurs et fortunes de nostre grand Roy, et qu'ils ont peu sçavoir des vostres, en suivant sa personne et courant toutes ses adventures, nous n'en avons non plus qu'eux, comme il a esté dit ailleurs, commencé les discours que vers le temps du plus effroyable, calamiteux et desplorable accident de toutes les traverses, tribulations et persecutions, par lesquelles ayt passé nostre vertueux Roy, qui fut celui de la sanguinaire bourrellerie du vingt-quatriemesme jour d'aoust 1572, de laquelle les suites ont esté si longues, que la premiere crise de quelque apparence d'esperance de mieux pour guarir telles langoureuses afflictions, n'en apparut que vers le deuxiesme de may 1598 (qui sont vingt-six ans de plus dure penitence que toutes celles des anachorettes), les benedictions de Dieu ayant favorisé ses vertus et ses armes, et par icelles reduit ses plus grands, plus puissans et plus invetere ennemis à convenir avec

luy, à Vervins, d'une paix quasi aussi avantageuse qu'il l'eust pû desirer, laquelle fut en suite et quelque temps apres reconfirmée par celle que vous renouïastes avec le cardinal legat Aldobrandin, nepveu du Pape, lors que l'on l'estimoit entierement rompuë, comme il est dit au Chapitre XCVIII de ce volume; à la conclusion de laquelle et de la ceremonie des sermens sollemnels, prestez à Paris et à Thurin pour l'observation d'icelle, nous avons estimé à propos de finir nostre premier livre et de commencer nos recueils du second, afin qu'il semble, que sortant d'un vieil et tenebreux monde tout remply de ruynes, dégats, meurtres, occisions, troubles, guerres, haines et combustions, nous venions à entrer dans un nouveau monde tout esclatant de belles lumieres, lequel apparamment devoit estre nommé celui de paix, concordes, reconciliations, douceurs, œconomies et mesnagemens.

Mais avant que de commencer nos discours touchant les affaires qui se passerent en l'année 1601 et les suivantes, nous vous dirons avec vostre licence et requisition de pardon, lors que nous en aurons besoin, qu'encor que nous quatre cy-devant designez et recognus par nous et par d'autres pour vos tres obligez serviteurs, vous ayons tousjours présenté au nom commun de nous quatre les recueils de nostre premier livre, comme l'on a voulu que nous fissions encore maintenant ceux du second, si ne laisserons-nous pas de dire librement que si vous en recevez service et contentement, c'est à deux d'entre-nous seulement que le gré en est deu : dautant que les deux autres ayans trouvé des emplois plus profitables, ils se sont non seulement fort souvent dispensez de cettuy-cy, mais ont esté en partie causes que nous differasmes trop longtemps à entreprendre ce dessein, ne l'ayans fait à bon escient, que plusieurs années depuis la mort de nostre bon Roy et non encore avec la premeditation qu'il meritoit, mais seulement par une espee de promptitude d'esprit, du despit et de la colere où nous entrasmes de voir une si grande nonchalance en la celebration des honneurs et gloires bien meritées de ce grand Roy, et le malicieux silence des historiens de ces derniers temps, qui se sont delectez à cacher et supprimer ses plus admirables vertus particulieres, à extenuer et desguiser celles tant publiques, que leurs bailleurs de Memoires ne les ont osé du tout faire taire; et finalement à luy supposer des desseins, projets et entreprises du tout impertinentes et absurdes, et le calomnier d'avoir eu des defauts et des vices ausquels il ne pensa jamais, et qui estoient aussi entierement disproportion-

nez à la grandeur de son courage et de son jugement.

Tellement, qu'à cause de nostre tardiveté, il nous a esté bien difficile de pouvoir corriger les manquemens et remarques des temps de diverses affaires, et celles des dattes, des lettres de la main du Roy, d'autant qu'il n'y en mettoit quasi jamais, à cause de la proximité des lieux d'où il vous les escrivoit : de sorte que ces inconveniens nous avoient fait une fois resoudre de reserver ces discours pour ceux de vostre maison et de nos familles particulieres, sans penser à rien moins qu'à les faire mettre en lumiere. Mais les changemens des temps, celui de l'estat des affaires, les diverses sortes d'administrateurs et d'administrations que nous avons veuës, et les sollicitations de nos amis particuliers, nous firent croire que quelque jour les libertez dont nous avions usé à dire la verité de beaucoup de choses importantes, ne seroient pas tousjours hors de saison. Et en attendant, nous nous resolumes, pour éviter tout blâme, de vous en faire une adresse particuliere, avec une tres-humble supplication de vouloir lire nos recueils, et d'y corriger et adjouster ce que vous jugeriez à propos.

Mais avant que d'entrer en la suite d'iceux et pour leur servir de quelque espece de preparatif, nous dirons à vous et à tous autres qui les liront, que comme tous les individus de la nature humaine ausquels, apres leur depravation, il est encore resté quelque espece de cognoissance et de ratiocination, ont tousjours tenu qu'il y avoit cinq parties principales en iceux qui meritoient le plus de consideration, et pour cette cause les ont-ils nommez les cinq sens de nature, de leur premier estre et conformation que leur depravation n'avoit point du tout destruites, puis qu'elles se remarquoient semblablement aux animaux ; aussi ont tenu les autres plus sages, judicieux et speculatifs, tant ceux de la venerable antiquité que ceux de la continuité des siecles, lesquels sont entrez en une vraye recognoissance du ravage de leur depravation, et en suite de leur restablissement par grace en un bien estre et vraye reformation, qu'il y avoit cinq autres parties en iceux qui les constituoient, à sçavoir pieté en l'ame, solidité au jugement, vivacité en l'esprit, generosité au cœur et charité en la conversation : concluans en mesme temps que ceux ausquels ces cinq parties avoient esté le plus universellement eslargies, estoient aussi ceux qui meritoient le plus de gloire et de louanges. Tellement que ce fondement ainsi presupposé, nous avons estimé que nul ne nous sçauroit blasmer, ny accuser de flatterie ny de mensonge, lors qu'en nos recueils abregez nous

avons tant hautement exalté et magnifié le feu Roy, et luy avons fait de continuels éloges ou le ferons cy-apres, ny s'il s'en rencontre aussi quelques-uns qui vous concernent, moyennant que ce soit avec les esgards necessaires et les proportions requises bien observées : à sçavoir, en parlant de Sa Majesté, comme d'un grand, puissant et vertueux Roy, et de vous comme d'un tres-humble, loyal et utile sujet ; du Roy, comme d'un sage, bon et officieux maistre et bien-faicteur, et de vous comme d'un tres-obeyssant serviteur, confident et tres-obligé conseiller d'Estat ; de Sa Majesté, comme d'un grand, magnanime et magnifique monarque, qui tient son principe, son bien estre et toutes ses grandeurs immediatement de Dieu, et de vous comme d'un ministre qui tient de vray son bien estre de Dieu, mais son bon-heur, felicité terrienne et ses grandeurs dans le monde, des faveurs et gratifications de son maistre, duquel l'exemple et les enseignemens luy ont esté pour guides continuelles en toutes ses voyes : desquelles veritez il se pourroit tirer millé preuves certaines, par tout ce que nous avons dit et dirons de Sa Majesté royale, et de vostre servitude loyale, dont l'une des plus exquises pour le regard de nostre grand Roy est le recit des merveilles de ses hautes meditations et de ses magnifiques projets et desseins les plus admirables, desquels sont ceux dont la plus grande part du monde a le moins de vraye cognoissance, quoy que l'on en ayt beaucoup parlé au temps de sa mort et encore plus depuis icelle ; sans neantmoins que nul en ayt encore rien dit de certain ny veritable, voire est arrivé que ceux qui se sont voulu mesler de faire les historiens, en ont dit les choses les plus ineptes, absurdes et mensongeres, comme l'on cognoistra faicement si l'on vient à les comparer avec celles qui se trouveront mentionnées en ces recueils, selon la pure verité.

Pour ausquelles donner quelque commencement, nous vous dirons que ces cinq excellentes parties de l'homme renouvelé, desquelles nostre grand Roy avoit esté specialement et en toute abondance favorisé de Dieu, luy avoient fait naistre des desirs et former des desseins proportionnez à ses excellentes qualitez, desquels nous en specifierons seulement sept pour un eschantillon des autres.

Le premier, de rechercher les moyens propres pour l'establissement d'une seule profession de religion dans l'Europe chrestienne, et, en cas d'impossibilité, se contenter de faire en sorte que les princes et peuples se voulussent resoudre à en choisir seulement trois de celles qui sont desja le plus universellement establies et ont

apparemment une tant esgale estenduë de pays et puissance, que l'une d'icelles ne scauroit entreprendre de ruiner les deux autres sans se destruire elle mesme.

Plus le second, d'associer autant de puissances souveraines qu'il luy seroit possible au dessein qu'il faisoit de reduire toutes celles des monarchies hereditaires à une presque esgale puissance, tant en estenduë de pays qu'en richesses, afin que les trop excessives des uns ne leur fissent venir le desir d'opprimer les foibles, et à ceux cy la crainte de le pouvoir estre.

Plus le troisieme, d'essayer à faire poser entre les quinze dominations, desquelles devoit estre composée la chrestienté d'Europe, des bornes si bien ajustées entre celles qui sont limitrophes les unes des autres, et de regler tant equitablement la diversité de leurs droits et pretentions, qu'ils n'en pussent jamais plus entrer en dispute.

Plus le quatriesme, de faire bien comprendre à toutes ces quinze sortes de dominations la resolution que Sa Majesté avoit prise de se contenter de l'estenduë qu'avoit à present la sienne, afin qu'à son exemple les autres roys hereditaires voulussent faire le semblable, en sorte que si l'un d'eux avoit quelque chose de plus, ce plus fut desparty entre les dominations eslectives estans sujetes aux loix.

Plus le cinquiesme, d'essayer encore par son exemple de disposer toutes ces quinze sortes de dominations de commander tant amiablement à leurs sujets, et desirer deux choses si equitables qu'ils les disposassent à leur obeyr volontairement et gayement.

Plus le sixiesme, d'essayer de faire convenir ces quinze dominations à la composition d'un conseil d'entr'eux tous si bien ajusté, qu'avec le commun consentement aussi de tous, il demeurast l'arbitre amiable de tous leurs differends.

Plus le septiesme, apres neantmoins que l'on seroit convenu de tous les precedens, d'essayer à former une tant proportionnelle cottisation entr'eux touchant ce que chacune de ces quinze dominations auroit à fournir à son regard pour l'entretien des armées, qu'elles fussent suffisantes et capables de demener une guerre continuelle contre les infideles.

Toutes lesquelles meditations, quelques loüables et magnifiques qu'elles pussent estre, et moyens excellens que le Roy eut excogitez pour les faire facilement reduire en acte, si ne laissa-il pas de les tenir longues années rencloses et renfermées dans luy-mesme sans en vouloir encore rien declarer ouvertement, ny mesme en confier aucune partie à ses plus speciaux minis-

tres ny serviteurs, qu'il n'eust auparavant davantage avancé tous les preparatifs qu'il avoit jugez necessaires pour faciliter les commencemens, poursuites, progresz et perfection de ses hauts, splendides et magnifiques desseins; essayant incessamment d'accroistre et augmenter extremement, amiablement, sans bruit, rumeur, ny donner l'alarme à personne, ses amitez, alliances et associations avec le plus de puissantes dominations estrangeres qu'il luy seroit possible, en les interessant toûjours plus avantageusement que luy mesme en tous les desseins, projets et entreprises qu'il leur proposeroit; faisant pour son regard telle et tant grande provision de deniers, armes, artileries, munitions, instrumens, outils et vivres, que non seulement ses armées n'en pussent jamais manquer, mais qu'il en pût mesme ayder à ceux de ses loyaux associez qui en auroient besoin; continuant à remarquer et entretenir en bonne devotion la plus grande quantité de bons capitaines et soldats françois qu'il pourroit, et sur tout se conciliant de plus en plus cette grande amour et bienveillance si bien commencée de tous ses peuples de toutes qualitez et conditions, et des trois sortes de religions qui devoient avoir le plus de cours dans l'Europe chrestienne; disant sur cela, lorsque quelques-uns luy en parloient serieusement comme ne l'approuvant pas, qu'il ne vouloit pas entreprendre de s'estimer plus sage que Dieu, lequel, quoy que comme tout puissant il pust en un instant, sans crainte de guerres civiles, rebellions, revoltes ny seditions de peuples, destruire toutes religions à luy desagrees, ne laissoit pas neantmoins d'en tolerer de tant de diverses sortes dans l'estenduë de son empire universel: et partant n'estoit-il pas resolu de se tourmenter pour en destruire aucune des trois qu'apparemment Dieu vouloit qui eussent cours dans sa domination et celles de ses alliez.

Or, par tout ce que nous venons de dire, avons dit en nostre premier livre, dirons en ce second et encore és autres suivans, se peut-il soustenir qu'il n'y a rien dans les volontez, decisions et determinations des hommes, qui n'ayt esté precedemment dans la prescience, le decret et l'ordonnance de Dieu; et tout cela se peut-il encore plus specialement et absolument conclure pour ce qui regarde les monarques, empereurs, roys et autres dominateurs des peuples et nations. Dequoy entre mille preuves qui s'en pourroient donner, nous nous reduirons à celle seule de nostre grand Roy, n'y ayant nulle doute que le Dieu tout puissant ne l'eut fait, formé et façonné, tant pour le regard de l'esprit que du corps, pour s'en servir à operer choses grandes et magnifi-

ques, ses faveurs estans suivies de telles remarques et circonstances, qu'elles nous ont fait juger, et le feront aussi à tous autres qui voudront les considerer attentivement, que cette bonté divine l'avoit choisi pour son second Roy, son mieux aymé, et pour un second serviteur selon son cœur, se pouvant faire entre David et luy un nombre infiny de rapports, comparaisons et similitudes des mieux ajustées. Mais les particularitez d'icelles estans de trop longs discours, et nous eloignans pas trop de ceux que nous avons entrepris, nous nous contenterons d'en specifier quelques-unes en general, estant vray de dire qu'ils eurent tous deux d'excellentes vertus morales, furent tous deux recommandables en pieté, charité, prudence, vaillance, clemence et benignité, sont tous deux parvenus à une royauté lors qu'ils ne s'y attendoient nullement, ont esté également traversez en l'obtention pacifique d'icelle, ont eu par longues années de grandes guerres pour la posseder contre de puissans ennemis, ont esté tous deux grands guerriers, et se sont trouvez en plusieurs batailles et combats, ont tous deux couru de grands perils et hazards dans les demeslemens des armes; a esté fait plusieurs entreprises et attentats contre leurs vies et leurs fortunes, ont tous deux esté sujets aux haines, calomnies, detractions et medisances des meschans, ont eu l'un et l'autre des desirs et affections à l'endroit des femmes, où il s'est remarqué quelques imbecilitez; mais tousjours se peut-il dire que celles de David ont esté les moins excusables et ont produit de plus mauvais accidens; ont tous deux passé par plusieurs incommoditez et afflictions domestiques, ont fait de grandes conquestes, esté grands œconomes et assemblé de grands thresors, ont fait de grands preparatifs et amplies provisions, et finalement ont tous deux eu de hauts, pieux et magnifiques desseins; l'un desirant d'edifier un admirable temple à Dieu pour estre la figure de ses fideles et de son Eglise, et l'autre d'establir une republique tres chrestienne tousjours pacifique en elle mesme pour glorifier incessamment le bon Dieu.

Mais, quelques saints, sacrez et louables que pussent avoir esté leurs deux desirs et desseins, si n'a pas voulu cette sapience eternelle (et ce pour des causes en elle cachées) qu'ils leur donnassent l'accomplissement et perfection par eux désirée, dautant que devant icelle il les a retirez tous deux des peines, perils, fatigues et travaux de la terre, pour les colloquer également dans les plus exquises beatitudes du ciel: où les laissant tous deux en leur repos, nous reprendrons les discours qui peuvent regarder nostre Roy, pour dire quel-

que chose des particuliers desseins qu'il tesmoignoit d'avoir eus lors qu'il quitta le royaume de la terre pour aller prendre possession de celui des cieus, lesquels, quoy que, comme nous avons souvent oüy dire à ses plus anciens serviteurs, sa naissance favorisée du ciel eut mis en son cœur une vraye hardiesse naturelle, et qu'en son ame une certaine generosité toute portée à la gloire luy eut tracé en l'esprit quelques idées de tels projets et desseins dès sa plus grande jeunesse, ce fut neantmoins si foiblement et tant confusément, qu'il fut facile aux autres fantaisies du premier âge, suivies de tant de bizarres sortes d'accidens de la fortune, d'effacer en quelque sorte ses premieres traces et lineamens d'une vraye vertu.

Mais comme Dieu ne les luy avoit pas eslargis de naissance pour les y faire demeurer oysifs, aussi se trouvoit-il une grande facilité en luy à leur faire reprendre une nouvelle vigueur, tellement que dès l'année 1572, qu'il n'avoit qu'environ dix-neuf ans, trois choses luy renouvelèrent ses precedentes belles pensées et cogitations. La premiere, que tous ceux qui faisoient des nativitez et se mesloient de predire les choses advenir, luy denonçoient souvent qu'il parviendroit à la couronne de France, et qu'elle devoit estre continuée en ses enfans. La seconde, le bruit qui courut lors de cette victoire obtenuë le 7 octobre 1571 par les chrestiens sur les Turcs, en la bataille de Lepante, et de la grande gloire et renommée qu'y avoient acquis Marc Anthoine Colonne, general de l'armée du Pape, Sebastien Venier, general de l'armée des Venitiens, mais sur tous dom Joan, bastard d'Autriche, general de l'armée d'Espagne, et generalissime des trois armées, une pointe d'honneur et une louable jalousie le sollicitant d'aspirer à ce à quoy estoient parvenus des personnes de moindre condition et naissance que luy. Et la troisieme, les assurances qui luy furent données de la sincere et particuliere affection du Roy Charles IX en son endroit, lequel portant jalousie à son frere le duc d'Anjou, à cause que sa mere le pousoit à la gloire et à l'acquisition d'une haute renommée par preference à luy, et hayssant d'inclination la personne et l'humeur de son frere d'Alençon, il se vouloit joindre d'amitié avec luy, et le mettre dans son entiere confidence, afin d'en faire son bras droit, et luy faire bailler toutes les expeditions et employs honorables où il ne se pourroit pas trouver en personne, et pour servir de pretexte à telles faveurs, disoit luy vouloir faire espouser sa sœur Margot qu'il aymoît tant, et leur faire à tous deux de grands dons et avantages.

Tellement que telles cogitations luy roulans incessamment dans l'esprit, il est à croire qu'elles n'y estoient pas de petite efficace. Mais tous ces renouvellemens de hautes pensées furent bien-tost tournés non seulement en fumées, mais aussi en cruels ennuis, desplaisirs et absolus desespoirs de toute bonne fortune par le mal-heureux succez des nopces que l'on luy avoit préparées, non pour luy bien faire, mais pour luy tourner en piege et devenir des manottes à sa libté, laquelle demeura entierement opprimée durant quatre années, et mesmes ne s'en pust-il retirer qu'en rentrant dans une nouvelle servitude suivie de tant de fascheux accidens durant unze années, qu'il luy fallut bien avoir d'autres pensées que celles du temps d'aparavant ses desastreuses nopces.

Or ces unze années de miseres ainsi escoulées, et les esperances d'une grande et puissante armée estrangere qui marchoit sous ses auspices, et une grande bataille par luy gagnée d'un austru costé en ce mesme temps, luy firent revenir quelque chose en l'esprit de ses premiers desseins et vertus tournées en luy en habitude par la bonté divine, pour agir si tost que la moindre apparence de faire quelque action pleine de splendeur et de gloire luy seroit présentée, dont cette-cy ne dura gueres plus que la premiere, dautant que par la malice et l'envie des siens propres, ny sa grande armée ny sa victoire ne furent pas suivies de succez conformes aux esperances et apparences.

De sorte qu'il fut bien tost conseillé par sa prudence accoustumée à tenir encore secret son dessein; et se continuerent tous ses divers et fascheux accidens durant pres de trois ans, au bout desquels ayant esté appelé au service de son Roy, ce fut avec tant de tesmoignages de bienveillance, de hautes promesses à luy faites, de jonctions de tant de puissantes armées, et d'un attaquement tellement glorieux et splendide en apparence, que tout cela eut derechef bien-tost renouvelé en luy ses magnanimes desirs, lesquels, pour la troisieme fois, furent aussi-tost esteins qu'allumez par la survenuë de la desastreuse mort de ce puissant Roy qui l'avoit appelé à son secours, lequel ne le regardoit point autrement que comme un pere fait son enfant, et ne parloit point à luy qu'avec des paroles qui luy donnoient sujet de croire qu'il le tenoit pour tel.

Et quoy que par cette mort il deust sembler que ses premieres esperances devoient estre aucunement reverdies, si est-ce que cette succession luy apportant plus d'ennuis, de peines, de fatigues et de travaux d'esprit et de corps qu'il

n'en avoit quasi encore jamais eu, toutes ses pensées demeurerent attachées à la seule defense de sa vie, de sa libté, de sa fortune et de sa royauté, durant neuf années continuelles, pendant lesquelles, combien qu'il eut eu plusieurs bons succez, si ne laissoient-ils pas d'estre suivis de tant d'autres traverses et contradictions, qu'il n'avoit pas le loisir de se rafraischir le souvenir de ses anciens desirs. Et bien encore que, par les travaux de ces neuf années, ses armes, favorisées de Dieu, eussent, comme nous avons dit, reduit ses plus grands ennemis à convenir d'une paix à luy fort avantageuse; que, par d'autres siennes prudences, tous les differends tumultuaires que l'on avoit malicieusement entretenus avec ceux de la religion, eussent esté terminez, et que, sur la conclusion de tant de grandes affaires à l'avantage de Sa Majesté, deux grandes et puissantes dominations desja ses alliées, et confederées, l'eussent par ambassadeurs expres envoyé rechercher avec de grandes offres, par augmentation de conditions à son advantage, voire mesme par des ouvertures d'entreprises qui sembloient regarder une partie de ses projets et desseins, et d'en faciliter le moyen et le commencement, si ne leur voulut pas encore ce grand et sage prince faire semblant d'avoir pensé à telles choses. Mais apres plusieurs remercemens et representations de raisons qu'ils tesmoignerent de trouver tres-justes, il leur respondit pour conclusion que l'on luy avoit par tant et de si longues années entamé, et continué de si fascheuses et perilleuses guerres, tant contre sa personne que le general de ceux de la religion, desquels il avoit entrepris la defense; et que Dieu l'ayant à present tellement favorisé, que par une paix, où il avoit reduit ses plus puissans ennemis, il avoit mis eux et luy en repos, il n'estimoit pas que nul pust raisonnablement s'offenser s'il vouloit essayer, pendant ce temps de tranquillité, de reparer tant de dommages receus par l'un et par l'autre, afin de se mettre en estat et eux aussi de pouvoir embrasser efficacement le soustien et la defense de ses anciens amis et bons alliez, par le moyen de la melioration de ses revenus, et des aisances et commoditez de ses peuples, les asseurant que son courage n'estoit point changé ny son affection diminuée en leur endroit, comme il leur feroit bien paroistre s'ils venoient à en avoir besoin pour leur defence, voire leur entameroit-il en temps et lieu de telles propositions qu'elles leur feroient croire tout ce dont il les avoit asseurez. Dequoy eux estans apparemment demeurerez fort contens et satisfaits, ils se retirerent vers ceux qui les avoient envoyez, et luy reprit peu

de temps apres le chemin de Paris, pour commencer à travailler à bon escient à toutes ces choses, comme il n'y manqua pas, ainsi que les particularitez s'en verront dans la suite de ces recueils.

Ayans donc terminé le premier livre de nos recueils abrez des affaires de France, ausquelles vous avez esté employé, par la conclusion d'une paix si generale et tant solennellement ratifiée et jurée, qu'elle sembloit devoir mettre fin à toutes factions et pensées martiales dans le royaume, voire à tous soupçons d'icelles entre ces deux grandes maisons de France et d'Austrie, et celles de leurs dependances, en commençant nostre second livre, nous luy donnerons entrée par vos employs tous pacifiques, qui furent, qu'ayant dès la fin de l'année 1600 dressé cinq projets des estats generaux dependans de vos charges, à sçavoir :

Le premier estant un projet d'estat general des finances de toutes les provinces particulieres du royaume, par lequel se cognoissoit tout ce qui se leve en France de toutes sortes de natures de deniers, ce qui se despense sur les lieux en charges ordinaires, et ce qui en revient de bon au Roy.

Le second, un projet d'estat general au tresorier de l'espargne, par lequel se void tout ce qu'il devoit recevoir durant l'année de son exercice, et en quoy l'employer.

Le troisieme, un projet d'estat general de la recepte et despense de l'artillerie avec un inventaire de toutes les artilleries, armes et munitions desquelles le Roy se pourroit servir avec specification des lieux où elles estoient.

Le quatrieme, un projet d'estat general de la grande voyrie, ponts, pavés, chemins, chaussées et reparations de France, tant royales que provinciales.

Et le cinquieme, un projet d'estat general de toutes les reparations et fortifications des villes, chasteaux et places des frontieres de France, avec specification des qualitez des assiettes d'icelles.

Tous lesquels projets d'estats ayant fait voir au Roy dès le mois de decembre de l'année 1600, vous les luy vinstes apporter, mis au net dans des livres bien reliez, lors que le premier jour de l'année 1601, suivant la coustume, vous luy apportastes pour ses estrenes et à la Reine aussi, à chacun, deux bourses de jettons, dont les uns estoient d'or et les autres d'argent, avec les devises de Sa Majesté, telles qu'il vous avoit donné le sujet de les devoir faire, de laquelle devise le corps estoit un nid d'Alcions, qui avoient tranquilisé la mer pour y eslever leurs petits,

et avoit pour ame ces paroles : *Nostri dant olia terris* : laquelle devise nous ayant fait ressouvenir que nous avions oublié d'insérer en nostre premier livre toutes les autres que le Roy avoit prises chacune année, depuis son advenement à la couronne, nous avons estimé que vous ne trouveriez point mal à propos ny ceux qui liront ces recueils, que nous vous les representations icy telles que nous les avons pû recouvrer, et qu'elles s'ensuivent.

## CHAPITRE CI.

*Devises des jetons distribués au commencement de chaque année, depuis 1589 jusqu'en 1601.*

1590. Premièrement, sur la fin de l'année 1589, à cause que le Roy avoit esté recogneu pour tel sur une montagne attribuée à un Saint, en faisant allusion à ce qui est dit au second pseume, touchant David, figure de Jesus-Christ, vous baillastes à Sa Majesté, en corps de devise, pour l'année 1590, un haut mont sur lequel il tomboit du ciel une couronne, et pour ame ces paroles : *Constitutus rex super Sion*.

1591. Plus à la fin de l'année 1590, à cause des grandes oppositions que le Roy avoit trouvées à son commencement, et des combats qu'il luy avoit fallu faire, et des batailles qu'il avoit gagnées, vous luy baillastes, en corps de devise, pour l'année 1591, une espée royale environnée de branches de lys et de palmes, et pour ame ces paroles prises du même second pseume, *In virga ferrea confringuntur*.

1592. Plus à la fin de l'année 1591, à cause que le Roy publioit à haute voix qu'en tous ses heureux succez il estoit conduit de Dieu, vous luy baillastes, en corps de devise, pour l'année 1592, une estoile brillante, faisant allusion à celle qui apparut aux trois roys d'Orient qui vindrent adorer Jesus-Christ, et pour ame ces paroles, *Ductus regum*.

1593. Plus à la fin de l'année 1592, à cause de tant de contradictions que le Roy avoit trouvées en icelle, chacun s'émancipant, aux moindres mauvais succez, à faire le Roy, et faisant allusion à ce qui apparut sur les tentes de Octavius Cesar, Antonius et Lepidus, lorsqu'ils s'assemblerent pour diviser le monde entr'eux, vous baillastes à Sa Majesté, pour corps de devise, en l'année 1593, trois soleils, dont les deux estoient fort pasles et blafarts, et celui du milieu infiniment rouge et brillant, et pour ame ces paroles, *Affulget Cæsari nostro*.

1594. Plus à la fin de l'année 1593, à cause que le Roy se relevoit de courage plus les diffi-

cultez à pacifier son royaume sembloient se multiplier, vous luy baillastes, en corps de devise, pour l'année 1594, un feu allumé sur une haute montagne soufflé des quatre vents du ciel, et pour ame ces paroles, *Agitatus cresco*.

1595. Plus à la fin de l'année 1594, à cause de tant de villes qui se remirent en l'obeyssance du Roy, nonobstant les menées du roy d'Espagne et de la ligue, vous luy baillastes, en corps de devise, pour l'année 1595, une mer tempestueuse, battuë des vents, lesquels faisoient eslever ses ondes jusques aux nuës, et pour ame ces paroles, *Turbant sed extollunt*.

1596. Plus à la fin de l'année 1595, à cause de tant de pertes de villes et d'actions glorieuses entremeslées dans cette année 1595, vous baillastes au Roy, en corps de devise, pour l'année 1596, une flamme de feu au milieu de la mer, laquelle jettoit des estincelles fort luisantes, nonobstant l'agitation des ondes, et pour ame ces paroles, *Rerum immersabilis undis*.

1597. Plus à la fin de l'année 1596, à cause que nonobstant toutes les pertes des années passées, le Roy avoit remis ses affaires, estably un bon conseil, assemblé quelque argent et faisoit des preparatifs pour faire florir ses armes dans l'Artois et assieger Arras, vous luy baillastes, en corps de devise, pour l'année 1597, une lance entortillée d'un lys, faisant allusion à celle que Cadmus et ceux de sa race portoient empreinte à la cuisse, et pour ame ces paroles, *Generis insignia nostri*.

1598. Plus à la fin de l'année 1597, à cause de la reprise glorieuse d'Amiens, et que le Roy contraignit l'archiduc de se retirer honteusement, et que ces heureux succez furent cause que l'on commença de toutes parts à rechercher Sa Majesté de paix, vous luy baillastes, pour corps de devise, en l'année 1598, une plante de laurier couronnée de branches d'olivier tombant du ciel, et pour ame ces paroles, *Pax in armis*.

1599. Plus à la fin de l'année 1598, à cause que le Roy ayant conquis toute la Bretagne et reduit le roy d'Espagne à faire paix avec luy, il projetta de se marier, de restablir son royaume, de delivrer le peuple de toutes oppressions et le soulager des excessives impositions tolerées à cause des guerres, vous luy baillastes, en corps de devise, pour l'année 1599, un chesne signifiant les sujets et citoyens, tout parsemé de couronnes de branches de laurier et d'olivier entremeslées, faisant allusion à ce que le peuple romain fit envers Auguste, lors qu'il eut pacifié l'empire, et pour ame ces paroles, *Salus populi mihi laurus*.

1600. Plus à la fin de l'année 1599, à cause

que par le bon ordre estably par le Roy (enquoy vostre soin et travail à le faire observer et en tirer les utilitez désirées estoient admirables) toutes sortes d'allegresses et seuretez de conditions se multiplioient de jour à autre, vous baillastes à Sa Majesté, pour corps de devise, en l'année 1600, un arc en ciel, faisant allusion sur celuy donné de Dieu à Noé pour seureté contre toutes inondations, et pour ame ces paroles, *Solvunt formidine terras*.

1601. Plus à la fin de l'année 1600, à cause que M. de Savoye, lors que voulant profiter des troubles de la France eut pris le marquisat de Saluces, choisit pour devise un centaure foulant aux pieds une couronne royale avec ces paroles, *Opportune*, et que le Roy eut conquis la Bresse et la Savoye, vous luy baillastes, pour corps de devise de l'année 1601, un Hercule renversant un centaure et relevant une couronne, et pour ame ces paroles, *Opportunus*.

## CHAPITRE CII.

*Premières inquiétudes du maréchal de Biron.  
Conférence avec le Roi sur les affaires des  
Pays-Bas. Acquisition de la terre de Sully.  
Réformes dans l'administration.*

[1601] Huit jours apres que vous eustes présenté au Roy les jettons de l'année presente 1601, vous receustes une lettre de M. de Biron, qui tesmoignoît que son esprit n'estoit pas sans inquietude, lors qu'il venoit à penser à la grandeur et impertinence de ses desseins, et aux difficultez et perils dont l'exécution d'iceux seroit précédée, accompagnée et suivie, et aux blâmes et reproches que meritoit une tant enorme ingratitude envers son Roy, son maistre et son bienfaiteur, de laquelle lettre la teneur ensuit :

*Lettre de M. de Biron à M. de Rosny.*

Monsieur, l'assurance que vous m'avez donnée de vos bonnes graces et amitié fait que librement je m'adresse à vous, afin que par vostre moyen je puisse sortir de la peine où je suis. Si je reçois ce bon office de vous je vous seray obligé, pour le moins n'esperé-je en recevoir de mauvais, car je tiens vos paroles pour trop vraies, et aussi vous ay-je voué tout humble et devotieux service. Or, monsieur, tous ceux qui m'escrivent de la Cour ou qui parlent à de mes amis, me mandent que le Roy tesmoigne à un chacun une tres-mauvaise volonté pour moy; je ne sçay d'où procede cela, car je ne croy point, ny en mes faits ny dits, depuis l'avoir veu au fort Sainte Catherine, en avoir donné sujet, ains crois avoir

mesné et regy mes actions pour donner tout contentement à Sa Majesté : si cela n'est je suis bien trompé. Je vous supplie donner un demy quart-d'heure d'audiance à M. Prevost sur ces sujets-là. On me mande que le voyage que je desire faire à Dijon, que le Roy croit que c'est pour faire le mal-content : je vous jure que cela n'est point et ny ay pensé, et si n'estoit la nécessité de mes affaires, je n'y irois ; je seray de retour dans douze jours. En fin on me dit tant de diverses choses, que je ne sçay quels remedes y apporter ; car recherchant de pres mes intentions et volonte, je les trouve telles que les doit avoir un bon sujet et fidelle serviteur ; si je faux c'est par imprudence. Monsieur, une teste à preuve de canon comme la vostre se troubleroit, jugez que peut la mienne qui n'est ny posée, ny solide. Or donc, je vous supplie que le Roy me prescrive, ordonne et commande ses volonte, et comme il veut que mes paroles et mes actions aillent ; et si je faux, que je sois blasmé. Mais depuis le plus grand jusques au plus petit, un chacun discourt et parle des propos que le Roy tient de moy, qui ne sont à mon advantage : je ne les en croy la pluspart toutesfois, car je croy n'avoir fait le pourquoy. A jointes mains je vous supplie que je reçoive cet office de vous, vous offrant ma vie et tout ce qui est à moy pour vous faire service ; et suis, etc.

A Mascon, ce 3 janvier 1601. BIRON.

Or, reprenant le fil de ces Memoires, nous vous ramentevrons comme, environ le mois de may, le Roy et la Reine furent gagner les pardons au jubilé à Orleans ; vous allastes avec eux jusques à Fontaine-bleau, et encore jusques à la moitié de la premiere journée, qu'eux allans coucher à Puizeaux, vous pristés vostre chemin vers Chasteau Landon, pour vous en aller, pendant ce petit loisir qui vous fut donné pour dix jours, visiter la terre de Baugy, que vous faisiez decretter, à cause des sommes notables qui vous estoient deuës dessus, ainsi que depuis elle vous fut adjudgée. Mais comme vous fustes à deux lieus de vostre couchée, vous vistés venir un courrier faisant bruire son huchet de tant loin qu'il apperceût vostre équipage, lequel vous apporta une lettre du Roy telle que s'ensuit :

*Lettre du Roy à M. de Rosny.*

Mon amy, je vous avois donné dix jours pour vostre voyage de Baugy ; mais ayant receu des lettres d'importance de Buzenval que je desire vous faire voir, et sçavoir ce qu'il vous semble du dessein que l'on me mande en icelles, vous me ferez plaisir de venir ce soir coucher en ce lieu de Puizeaux, où vous n'avez que faire de

rien apporter, ayant fait donner ordre pour vostre logis, auquel j'ay envoyé mon liect de chasse, et commandé à Coquet de vous tenir un souper prest et vostre des-jeuner du matin, car je ne vous retiendray pas davantage. Adieu, mon amy, que j'ayme bien.

Suivant ce mandement, vous pristés aussitost deux gentils-hommes, un page, un valet de chambre et un palfrenier, et donnant le bon soir à madame vostre femme, vous vous en allastes à Puizeaux, où vous trovastes le Roy dans la cour du prieuré, qui faisoit luter et sauter au plain saut la jeunesse qui le suivoit ; lequel, aussi-tost qu'il vous vit, appella le sieur Pasquier, qui luy avoit apporté de la part de M. de Ville-roy les lettres dont il vous avoit escrit, par lesquelles M. de Buzenval luy mandoit que M. le prince Maurice voyant l'hyver passé, avoit fait une reveuë de tous ses gens de guerre mis en garnison durant iceluy, en avoit tiré les meilleures et plus gaillardes troupes, et d'icelles composé une merveilleusement belle armée et bien assortie de toutes les choses necessaires pour faire un grand et long trajet de chemin par terre, le nombre des chariots pour porter vivres, munitions et autres commoditez approchant de deux mille, faisant estat, à ce qu'il avoit sceu du mesme prince et de ses plus affidez, de traverser le Brabant, Liege, Henault et Artois, du long les frontieres de France, afin d'en pouvoir tirer des assistances et de prendre le dessus des rivières, pour s'en aller en Flandres faire la guerre vers Gravelines, Bergues, Sainct Vinoc, Dumkerque et Nieuport ; et que l'archiduc ne se voyant pas forces suffisantes pour s'opposer à celles-là, demeroit spectateur de cét acheminement sans s'y oser opposer à vive force, se contentant, avec ce qu'il avoit pû rassembler, en attendant les forces que l'on disoit luy devoir estre bien-tost envoyées d'Italie et d'Allemagne, de costoyer de loin son ennemy, afin de le faire marcher serré, et se tenir prest pour le secours des pays et places qui seroient attaquées : de tous lesquels desseins et projets il avoit creu devoir advertir Sa Majesté, afin que, par sa grande prudence et ses longues experiences, il pust juger de la qualité d'iceux et de ce qui s'en devoit esperer ou craindre, attendant que le temps et les evenemens en donnassent l'entiere certitude.

Il y avoit aussi une autre lettre de Constantinople, par laquelle on advisoit le Roy que le grand Turc ayant sceu que le Sophy avoit envoyé une grande ambassade vers le Pape, l'Empereur et le roy d'Espagne, pour leur offrir amitié et confederation, sans avoir eu charge



de passer en France, il se resolvoit de prendre cette occasion, afin d'envoyer vers Sa Majesté pour le mesme effet, disant tout haut qu'il estimoit plus l'amitié et les armes des François seules, que celles de tous les autres princes chrestiens. Sur lesquelles lettres le Roy vous ayant demandé vos advis, vous luy distes que pour le dernier advis il n'y avoit autre chose à dire ny à faire que d'en attendre l'effet, mais sur le second vous le reprouvastes absolument, pour beaucoup de raisons qui seroient trop longues à particulariser, dont les plus considerables estoient la representation de la longueur du chemin par tant de terres ennemies et pays difficiles, et sur tout celuy du Liege, remply de tant de bois, hayes, voyes creuses, estroittes et quasi inaccessibles à tant de charrois, que vous teniez ce dessein du tout impossible à exécuter, et croyez que ce seroit la ruine du prince Maurice, s'il s'oppiniastroit en iceluy. Tellement que le Roy, apres avoir discouru là dessus, approuvant vos raisons et se confirmant en son opinion par la vostre toute semblable, fit aussitost des dépesches au prince Maurice, pour luy représenter tout ce que Sa Majesté pensoit de son entreprise, et luy conseiller d'en faire quelque autre qui eust plus d'apparence de facilité.

Puis vous permit de reprendre vostre chemin de Baugy, sur lequel vous visitastes Sully pour l'acheter, comme vous fistes l'année suivante, et de son costé il continua son voyage d'Orleans, pour y faire ses devotions, durant lesquelles il posa la premiere pierre pour la reedification de l'église Sainte Croix; lesquelles achevées, il s'en revint à Paris, où vous estiez aussi arrivé trois jours auparavant, vostre principal travail consistant lors, les armes ne bruyant plus et le calme paroissant de toutes parts, à bien faire suivre les cinq estats que vous aviez baillez au Roy, à vous bien instruire aux finances, à essayer de penetrer dans les plus profonds secrets d'icelles, à corriger tous les abus qui s'y estoient glissez pendant les licences des guerres, et les negligences des siècles passez, principalement pour ce qui regardoit la chambre des comptes, les thresoriers de France, engagements et usurpations des domaines royaux, les constitutions de rente sur les aydes, gabelles, tailles, equivalents, cinq grosses fermes, decimes et autres revenus de l'Estat; à tascher d'establir par de bons reglemens une sorte d'ordre qui ne se peut pervertir, amasser de l'argent, des armes, artilleries, munitions et outils, fortifier les villes frontieres; essayant de subtiliser, par quelques nouvelles inventions, les arts d'attaquer et defendre places, et gens de guerre; à reparer les maisons royales,

en commencer de nouvelles, les bien meubler et parer; à travailler aux argines, turcies et levées, ponts, pavez, chemins et chaussées, et faire en sorte que les deniers octroyez aux villes et communautéz pour tels ouvrages, y fussent bien employez. En toutes lesquelles choses, comme il se verra par la suite des années, vous avez fait par dessus l'esperance des hommes, et faisiez exalter les vertus du Roy, luy attribuant toutes ces choses.

### CHAPITRE CIII.

*Outrage fait à la Rochepot, ambassadeur du Roi à Madrid. Ambassades des Vénitiens et du Grand-Seigneur. Voyage du Roi à Calais. Voyage d'Elizabeth, reine d'Angleterre, à Douvres. Lettre d'Elizabeth à Henri IV. Mission de Rosny en Angleterre. Ses conférences avec la Reine. Secrètes menées du maréchal de Biron. Entretien de Rosny avec ce seigneur. Mission de Biron à Londres. Conseils que lui donne la Reine. Le comte de Béthune, frère de Rosny, ambassadeur à Rome. Dispute entre les ministres à l'occasion de cette nomination. Sagesse et modération de Henri IV.*

Peu apres le retour du Roy à Paris, il fut adverty qu'il se faisoit quelques menées par les partisans espagnols sur les villes de Metz, Marseille et Bayonne, contre lesquelles il apporta les remedes convenables à la prudence d'un tant excellent prince, sans pour ce faire aucun esclat ny demonstration d'estre mal satisfait d'eux. Mais ayant peu apres receu des lettres de M. de la Rochepot, son ambassadeur en Espagne, narratives de plusieurs injures et indignitez publiques par luy et les siens receuës en ce royaume là; ces offenses, trop cogneuës d'un chacun pour les pouvoir dissimuler (sans flestrissure de tant de gloires par luy acquises), luy en aigriront si fort l'esprit, qu'il ramena aussitost en sa memoire toutes les noires malices que les Espagnols luy avoient faites depuis la paix de Vervins tant solennellement jurée. Tellement que vous ayant envoyé querir sur ce despit, il vous dit: « Je vois bien que vostre opinion se trouvera en fin mieux fondée que celle de Ville-roy et de Sillery, qui ont tant contesté contre vous, qu'il y avoit moyen d'establir une ferme amitié et loyale correspondance entre la France et l'Espagne. » Et lors exagerant ce qui lui avoit esté mandé touchant le neveu de M. de la Rochepot, que l'on avoit traité ignominieusement, il ramena en sa memoire plusieurs autres

malices noires des Espagnols, où ne fut pas oublié ce que M. de Biron luy avoit déclaré des efforts qu'ils avoient faits pour l'alliéner de son devoir, les pratiques faictes par les partisans d'Espagne dans Rome pour empescher que le Pape ne prononçast comme arbitre pour la restitution du marquisat de Saluces, et en Suisse pour rompre les anciennes alliances de ceux de cette nation avec la France, les troupes envoyées par le comte de Fuentes au duc de Savoye pendant que l'on lui faisoit la guerre, et les nouveaux desseins qu'ils avoient pour renoüer leurs intelligences avec les ducs de Biron, de Bouillon, comte d'Auvergne, prince de Joinville et autres. Et sur telles ressouvenances s'estant grandement esmeu, il vous dit : « Je vois bien que ces gens icy ne me laisseront jamais en repos tant qu'ils auront moyen de me troubler, et que les diverses jalousies de gloire et d'honneur et les interets d'Etat sont trop difficiles à faire compatir entre ces deux couronnes, et qu'il faut prendre d'autres fondemens qu'une simple confiance en la foy et parole donnée pour subsister avec seureté, tant qu'enfin ils me contraindront à des choses où je n'avois point eu dessein. Mais, pardieu, j'en jure, si je puis avoir une fois mis mes affaires en bon ordre, assemblé de l'argent et le surplus de ce qui est nécessaire, je leur feray une si furieuse guerre, qu'ils se repentiront de m'avoir mis les armes à la main. »

Les Venitiens, environ ce temps là, envoyerent une celebre ambassade au Roy pour luy protester de leur inviolable devotion, et le prier d'avoir une affection sincere pour eux, bien asseurez qu'ils devoient demeurer l'un et l'autre de ne voir jamais intervenir d'alteration en leurs promesses et amitez, puis que les interets d'Etat les obligeoient à mesmes desirs et desseins, et faisoient avoir communs amis et communs ennemis. Le Grand Seigneur y envoya semblablement son medecin (1), qui estoit chrétien, en qualité d'ambassadeur, afin de lui faire confirmer les anciennes alliances d'entre la maison Othomane et celle de France, et luy declarer qu'encor que son ennemy le Sophy eut envoyé vers le Pape, l'Empereur et le roy d'Espagne, pour lier amitié avec eux et les requerir d'assistance, et qu'il eut obtenu d'eux telles promesses qu'il avoit désiré, il ne les craignoit neantmoins en aucune façon, moyennant que la France demeurast ferme en son alliance, et qu'il fut assuré de l'amitié d'un si grand prince, qu'il le tenoit pour sa valeur, hautesse et prudence, le plus estimé Roy de la creance de Jé-

(1) Barthélemy Cœur, Marseillais renégat.

sus. Cet ambassadeur apporta plusieurs beaux presens au Roy, et à vous deux cimenterres fort rares que je vous ay veus, et croy que vous les avez encores.

Le Roy ayant eu advis que les Espagnols formoient un siege devant Ostendes, s'en alla vers Calais; dequoy les archiducs prindrent grand ombrage, craignant que ce ne fut en intention de traverser leurs desseins ou pour se venger des affronts receus par M. de la Rochepot, tellement que, pour essayer d'en descouvrir la verité, ils envoyerent le comte de Sore en ambassade vers Sa Majesté, sous-ombre de complimens, et charge de prendre le temps à propos pour en jeter quelques paroles en forme de plaintes, sur lesquelles il leur en fut donné d'autres de pareille nature, accompagnées de tant d'asseurances de vouloir observer la paix, moyennant que, de leur part, ils s'abstinissent de toutes menées et pratiques contraires à icelle, que la bien-seance les contraignit à faire demonstration de s'en contenter.

Pendant le sejour du Roy à Calais, son port de mer luy fit recevoir des nouvelles de beaucoup de costez, tant de dedans que du dehors du royaume, et s'y passa aussi plusieurs affaires d'importance. Mais laissant, suivant nostre coutume, le recit de celles qui estoient sceuës d'un chacun, aux historiens, en n'en disant qu'un mot par-cy par-là, nous nous contenterons de vous en ramentevoir deux seulement, qui regardent particulièrement la personne du Roy et vostre employ en icelles, que l'on fit ce que l'on pût pour les tenir fort secrettes; pour desquelles vous ramentevoir ce que nous en avons pû apprendre, vous vous souviendrez comme le Roy arrivant à Calais, et vous apparemment ayant sceu quelque chose du desir, que luy d'une part et la reine d'Angleterre de l'autre, avoient long-temps eu de se voir et de communiquer ensemble des affaires generales de la chrestienté, et sur tout de celles dont il en fut dit quelque chose par ambassadeurs au temps du traité de la paix de Vervins, vous commandastes aux deux Arnaults (d'entre les six secretaires que vous aviez pour les expeditions de vos quatre principales charges de super-intendant des finances, grand maistre de l'artillerie, de grand voyer de France, et la plus espineuse de toutes, celle de l'entremise des intrigues et broüilleries domestiques et de Cour) de faire des memoires des choses secrettes et d'importance qui se passeroient pendant que le Roy séjourneroit à Calais (dequoy, pour dire la verité, nous deux M. de La Font et moy ne fusmes pas trop contents); tellement qu'eux seuls ayant fait des memoires

de ces deux affaires dont nous avons parlé, nous nous contenterons (sans y rien adjouster du nostre) de les transcrire icy, estans tels qu'il s'ensuit :

Monseigneur, suivant le commandement particulier que vous nous fistes à nous deux de retirer de vous et de tous autres que nous pourrions, des advis et instructions des choses les plus secrettes et de plus grande importance qui se passeroient durant le voyage du Roy à Calais et celui de la reine d'Angleterre à Douvres, nous vous dirons comme cette genereuse et brave reine Elizabeth n'eut pas plutost appris l'arrivée du Roy à Calais, qu'elle l'envoya visiter en son nom par le milord Edmont, son ambassadeur, qui luy apporta des lettres escrites de sa main, remplies de tant de complimens, offres, courtoisies et civilitez, que le Roy voulant encherir sur icelles, il luy en escrivit d'autres de sa main avec tant de louanges et déférences, voire de submissions, qu'elles la firent resoudre de s'en venir à Douvres, d'où elle dépescha soudain le sieur de Stafort, dit milord Sidney, avec de secondes lettres au Roy. Et ainsi s'entretindrent-ils de lettres et de messages multipliez, nous estans bien marris du peu de soin que vous et tous autres ont eu de retirer coppie de tant de belles lettres qu'ils s'entr'escrivirent, et de faire des Memoires des choses qui se traitterent lors entre ce Roy et cette Reine, n'ayans jamais peu recouvrir de vous ny d'autres que le double de la penultième lettre qu'elle luy escrivit, et la coppie d'un Memoire en forme d'articles conventionnels, d'autant que le Roy vous ayant baillé ladite lettre, non seulement vous la montrastes à un de nous, mais vous en fistes faire une copie, ce qui fut cause de vous donner cognoissance du surplus de ce qui se traitta, de laquelle lettre la teneur ensuit :

*Lettre de la reine d'Angleterre au Roy.*

Monsieur mon tres-cher et bien-aimé frere, j'avois tousjours estimé les conditions des souverains estre des plus heureuses et des moins sujettes à rencontrer des contradictions à leurs justes et legitimes desirs; mais nostre séjour en deux lieux si proches l'un de l'autre, commence à me faire croire que ceux des hautes aussi bien que des mediocres qualitez rencontrent souvent des espines et des difficultez, puis que par certains esgards et respects, plutost pour satisfaire à autrui qu'à nous mesmes, nous sommes tous deux empeschez de passer la mer; car je m'estois promise ce bon-heur et contente-

\* me de vous baiser et embrasser des deux

bras, comme estant vostre tres-loyale sœur et fidelle alliée, et vous ce mien tres-cher frere que j'ayme et honore plus que chose du monde, duquel (afin de vous dire le fonds de ma pensée) j'admire les vertus incomparables et sur tout sa valeur entre les armes, ses civilitez et courtoisies entre les dames, aussi que j'ay quelque chose de consequence à vous communiquer que je ne puis escrire ny confier à aucun des vostres ny des miens pour maintenant. Tellement qu'attendant le temps propre à cela je me resoudray, dans peu de jours, de m'en retourner à Londres, et prieray Dieu, mon tres-cher et bien-aimé frere, qu'il vous continue ses saintes graces et benedictions. C'est vostre plus affectionnée sœur et loyale alliée,

ELIZABETH.

Or, le Roy ayant receu cette lettre, la leut deux ou trois fois avec grand contentement, et particuliere attention sur les dernières paroles d'icelle, et ne sçachant comment les prendre, il vous envoya querir par le sieur Ferret, secretaire, et à vostre arrivée vous dit : « Je viens de recevoir des lettres de ma bonne sœur la reine d'Angleterre que vous aymez tant, plus pleines de cajoleries que jamais. Or, voyez si par la cognoissance que vous avez d'elle, vous devinerez mieux que moy ce qu'elle veut dire sur la fin de sa lettre. » Laquelle ayant leuë plusieurs fois et confessé que vous n'y pouviez rien comprendre, le Roy vous dit : « Mon amy, je ne vous celeray point que je suis en peine de sçavoir ce que cette princesse veut entendre par telles paroles; car, à mon advis, ne les dit-elle point sans grande cause. Mais j'ay pensé un expedient qui sera peut-estre propre pour en descouvrir quelque chose, sans faire action qui puisse estre desagréable de nul costé, qui seroit de vous en aller demain du matin à Douvres, comme si c'estoit de vous mesme, faisant demonstration de n'y vouloir pas arrester, mais de passer outre vers Londres pour voir le pays, afin que si vous rencontriez quelqu'un de vostre cognoissance, la Reine pust estre advertie que vous seriez à Douvres pour voir ce qu'elle feroit; d'autant que si elle vous envoyoit querir, peut-estre qu'en discourant ensemble en pourriez-vous descouvrir quelque chose. »

Vous eustes encore plusieurs autres discours sur ce sujet, qui seroient trop longs à reciter. Mais quoy que ce soit, vous vous embarquastes sans dire mot à personne le lendemain fort matin, dans une petite barque avec peu de train, et arrivastes, sur les dix heures, au havre de Douvres, sur les rivages duquel vous vistes

quantité de gens dont les uns se débarquoient, les autres s'embarquoient et les autres se promenoient sur la greve, d'entre lesquels il s'en advança cinq ou six vers vous, dont l'un d'iceux, qui estoit le milord Sidnay, vous ayant soudain reconnu, n'y ayant que cinq ou six jours qu'il vous avoit veu à Calais, vous vint incontinent embrasser, et avec luy les sieurs Coban Ralech et Gréffin, et peu apres les comtes d'Evencher et de Painbroc; tous lesquels, apres quelques civilitez et complimens reciproques, vous demanderent où vous alliez, et si vous veniez trouver la Reine de la part du Roy, vostre maistre. A quoy vous leur respondistes que non, et que le Roy n'avoit pas seulement sçeu vostre partement de Calais, et partant les priez-vous tous que la Reine ne sceut pas vostre arrivée, de crainte qu'elle ne s'offençast contre vous, voyant que vous ne luy apportiez ny lettre, ny recommandations du Roy, ny n'aviez à luy parler d'aucune affaire. Surquoy ils se mirent tous à rire, et vous dirent que la Reine ne vous laisseroit pas passer sans vous entretenir, ny ayant pas plus de trois jours qu'elle parloit de vous en fort bons termes, et qu'il ne falloit point que vous doublassiez que le vaisseau, de garde au port, ne luy eust desja mandé de vos nouvelles, et par consequent que vous ne vissiez bien-tost quelqu'un de sa part. Dequoy vous fistes semblant d'estre fort fâché, bien que ce fust chose que vous desirassiez suivant le dessein du Roy; pour lequel tant mieux cacher, vous les priastes instamment de ne dire point vostre arrivée à personne ny où vous seriez logé. Et sur cela vous pristez congé d'eux afin de vous aller loger, faisant demonstration de vouloir partir si tost que vous auriez disné.

Mais vous ne fustes quasi pas retiré dans votre chambre au logis que vous aviez pris, qu'un capitaine des gardes de la Reine ne vous vinst embrasser par derriere comme vous parliez à l'un de nous de tout cela et ne vous dit qu'il vous faisoit prisonnier de par la Reine. A quoy, en l'embrassant aussi et en vous sousriant, vous luy respondistes que vous preniez cette prison à beaucoup d'honneur. Et en cette sorte apres qu'il vous eut fait entendre que la Reine vous demandoit, vous l'allastes trouver; laquelle, d'aussi loin qu'elle vous apperceut, vous cria : « Hé quoy, M. de Rosny, est-ce ainsi que vous rompez nos hayes, et encore avec dessein de ne me venir point voir? dequoy je suis bien estonnée, car j'ay veu que vous ne parliez que de m'affectionner plus que nul de mes serveurs, et ne pense pas vous avoir donné sujet de changer cette bonne volonté. » A quoy vous

luy respondistes qu'elle vous avoit tousjours tant fait d'honneur et tesmoigné tant de bienveillance, que vous l'aymiez et honnoriez à cause de ses excellentes vertus, et la serviriez à jamais en toute humilité, non seulement par vostre propre inclination, mais aussi pour ce qu'en cela vous faisiez chose tres-agreable à vostre Roy.

Vous eustes encore plusieurs autres propos en conformité de ceux-là, trop longs à reciter, desquels elle fut si contente, qu'elle adjousta aux siens : « Or sus, M. de Rosny, pour vous tesmoigner que je croy tout ce que vous m'asseurez de la bien-veillance du Roy, mon frere, et de la vostre, je vous veux parler de la derniere lettre que je luy ay escrite. Je ne sçay si vous l'aurez point veuë, car Stafort et Edmont m'ont dit qu'il ne vous cache gueres de ses secrets. » Et lors luy ayant tesmoigné que vous n'en estiez pas ignorant, elle repartit aussitost qu'elle en estoit bien aise, et aussi dequoy vous aviez passé la mer, d'autant qu'elle ne feroit point de difficulté de vous dire librement, à vous, ce qu'elle avoit voulu dire par la fin de cette lettre. Et là dessus vous ayant tiré à part, elle vous entretint longuement de la pluspart des choses qui s'estoient passées depuis le traité de Vervins, qui meritoient un grand discours, et finit le sien par cette enquete, à sçavoir, si les affaires du Roy, son bon frere, estoient en meilleur estat qu'en l'année 1598, et s'il seroit à present en commodité d'entamer à bon escient ce grand dessein qu'elle avoit proposé dès ces temps-là? Surquoy vous luy dites : « Madame, encore que depuis ce temps-là le Roy ayt eu de grandes affaires à demesler, tant à cause de la guerre de Savoye, que de plusieurs menées et mauvaises pratiques dans son Royaume, desquelles il n'estoit pas encore exempt, tous lesquels demeslemens d'affaires l'avoient constitué en de fort grandes despences, que, neantmoins, vous n'aviez laissé de si bien mesnager ses revenus et toutes autres choses, que vous aviez amassé bonne quantité d'artillerie, munitions de guerre et de bouche, voire mesme d'argent; mais que tout cela ne seroit pas suffisant, neantmoins, pour luy conseiller de porter seul le faix d'une guerre ouverte contre toute la maison d'Autriche qui estoit si puissante, qu'il ne se falloit point mesler de l'attaquer à demy; voire vous sembloit-il que la seule association de luy, d'elle et des États, n'estoit pas encore suffisante pour commencer un si grand ouvrage, mais estoit necessaire d'essayer à faire une bonne union et confederation avec tous les autres roys, princes, potentats, republiques et peuples qui apprehendoient

expeditions duquel il intervenoit tous les jours de nouvelles difficultez, lesquelles vous surmontastes par le moyen de vostre credit et autorité dans les affaires, et luy en fistes toucher l'argent, moitié comptant et l'autre moitié dans un an. Dequoy vous estant un jour venu remercier, et vous sçachant desja quelque chose des causes de défiances qu'il donnoit de fois à autre au Roy, par les propos de mespris et de flestrisseure de ses actions qu'il en tenoit, et les vaines, voire insolentes jactances dont il usoit lors qu'il se mettoit sur ses services et ses vaillantises; et considerant de plus que, tout à l'opposite de la forme de vie qu'il avoit tousjours suivie au precedent, il se jettoit dans les devotions et bigotteries, et à rechercher, avec soin et curiosité, les peuples, les villes, la noblesse et les soldats, fomentant les plaintes qu'ils faisoient, vous pristez sujet de luy parler ouvertement de toutes ces particularitez, en qualité de son intime amy, tel qu'il vous protestoit, en ce mesme temps, de vous vouloir demeurer à jamais, en reconnaissance de la gratification dont il vous venoit remercier, laquelle, disoit-il, il sçavoit bien ne tenir que de vous seul et nullement du Roy, qui ne s'estoit jamais guere soucié de luy, sinon lors qu'il avoit eu affaire de son courage et de son espée, sans lesquels il ne fut pas neantmoins jamais parvenu si facilement à la couronne.

A quoy vous luy respondistes que vous voyez bien que l'on luy mettoit en la fantaisie beaucoup de choses mal à propos, et desquelles il ne tireroit jamais honneur ny utilité; que pour son regard vous estimiez qu'il ne pouvoit mieux faire que de parler avec tout honneur et respect du Roy, comme en verité son courage, sa prudence et sa douceur le meritoient; qu'il n'y avoit rien que les roys pleins de vertu comme luy, ne supportassent plus impatiemment et dont ils eussent des ressentimens plus dangereux que quand l'on parloit avec mespris de leurs personnes; que l'on vouloit flestrir la gloire qu'ils s'estoient acquise par leurs armes, et que l'on payoit d'ingratitude leurs bien-faits, comme il sembloit que ce fust son intention en vous imputant ce don de trente mil escus et non à Sa Majesté; que vous luy pouviez bien jurer en avoir esté le solliciteur des expeditions aussi bien que le volontaire et liberal donateur de la somme, et que, pour le convier à luy continuer ses bien-faits, il le devoit aller remercier des precedens; qu'il falloit que vous et luy fissiez ensemble une amitié indissoluble, pour servir conjointement Sa Majesté en un mesme dessein, qui eust sa gloire pour but, et vos loyautez pour fondement, sans espargner industrie, travail, biens ny vie

pour eslever sa gloire au suprême degré de hautezse, et dilater sa domination au long et au large; et que luy estant en estime du plus brave et grand homme de guerre qui fut en France, et ayant acquis toute creance et autorité parmy ceux de cette profession, et vous maniant, avec grand pouvoir et entiere confiance du Roy, tout le surplus des principales affaires de France, il n'avoit point de doute qu'estans tous deux vous et luy, vous ne fussiez bien unis à bien faire et loyalement à servir le Roy, vous ne trouviez, dans l'exaltation et grandeur du Roy et de son Estat, toutes les sortes d'honneurs, grandeurs, biens et dignitez ausquelles personnes de vostre condition pourroient aspirer, toutes autres voyes et procedures ne pouvant estre que vaines et inutiles, voire honteuses et perilleuses à tous ceux qui en voudroient user, et obtenir quelque chose par bravade, et se faire craindre à son maistre.

Il vous tint là dessus plusieurs discours trop longs à reciter, remplis de plaintes de la mesconnaissance de ses services et de l'exaltation d'iceux, qui ressentoient bien quelque chose de perty et mal-agencé en son esprit et desseins dont il fut depuis accusé, lesquels neantmoins se terminerent par de bonnes paroles, pour essayer de ne vous laisser aucun soupçon de ce qu'il projettoit, comme vous le jugeastes au mesme instant; et par là vous vous sentistes obligé de représenter au Roy toutes ces particularitez sur lesquelles (comme l'humeur de ce prince estoit des plus douces et sa bonté incomparable) il vous dit qu'il croyoit bien tous ces langages du mareschal, mais qu'il ne falloit pas tousjours prendre au pied de la lettre toutes ses rodomontades, menaces, jactances et vanitez, mais en supporter comme d'un homme qui ne se sçavoit non plus empescher de mal dire d'autrui et de se vanter excessivement luy mesme, que de bien faire lors qu'il se trouvoit aux occasions le cul sur la selle et l'espée en la main, luy ayant veu faire une infinité de bonnes actions au milieu de ses plus grands despits, plaintes et menaces; qu'il falloit neantmoins prendre garde à ses actions, dautant que s'il se joüoit à vouloir passer ses mespris et menaces jusques à la production des effets, il estoit bien resolu d'y apporter des remedes convenables, et luy faire paroistre qu'encor qu'il ne fust pas si remply d'ostentation que luy, il ne laissoit pas d'avoir autant de courage et de resolution, comme il luy avoit bien fait paroistre à Fontaine-françoise et autres lieux, où le voyant chargé bien rudement et luy se retirer assez diligemment, il estoit couru à son secours, et n'avoit point fait de difficulté de se mettre au devant des coups et d'ex-

poser sa personne aux perils pour garantir la sienne, de laquelle il seroit bien ayse qu'il ne luy ostast point les moyens de s'en servir tous-jours; et partant, afin d'essayer de le divertir de tous ses chagrins, despits, ambarras d'esprit et mauvaises pensées, il vouloit continuer à luy faire des honneurs et des biens, et pour cet effet l'envoyer, comme il fit, ambassadeur extraordinaire vers la reine d'Angleterre, sa sœur, de laquelle il sçavoit bien qu'il ne devoit plutost des instructions que des persua-sions pour le faire passer à son devoir, ainsi qu'elle fist avec prudence et bonne intention: d'autant que, pendant son sejour pres d'elle, luy l'ayant comme expressément mise sur le propos du comte d'Essex, en le plaignant de ce que, apres avoir si bien servy, il avoit fait une tant déplorable fin, elle luy respondit doucement, et tint de tels discours que si elle eust sceu quelque chose de ce qu'il projettoit, luy magnifiant la puissance et le droit des roys et princes souverains establis de Dieu, et le devoir des sujets envers eux, lesquels estoient obligez, selon Dieu, la conscience, l'honneur et la vertu, de les aymer, reverer, servir et leur estre loyaux et respectueux, tant pour ces raisons-là, que celles d'une bien assaisonnée prudence qui obligeoit les grands hommes à ne se jeter pas volontairement aux perils remplis de difficultez insurmontables, ordinairement suivies de blasme et infamie, ainsi qu'elle desiroit qu'il sceust qu'avoit fait le comte d'Essex, sans considerer le peu de moyens qu'il avoit d'executer ce qu'il pourpensoit, ny, lors qu'il le reconnut bien, user de prudence pour faire oublier les choses passées; mais adjoustant audace et fureur à presumption et temerité, il avoit rejeté tous les expediens à luy offerts pour se tirer de peine, plusieurs de ses amis luy disant de sçavoir bien de science que la seule recognoissance et repentance de ses fautes luy feroient trouver toutes les sortes de graces qu'il sçauroit desirer, icelles suivies d'une oubliance de tout le passé.

Au retour duquel voyage du marechal de Biron, le Roy, par une debonnaireté sans pareille, continuant à s'obstiner à le vouloir sauver, en luy faisant passer ses folles fantaisies de presumption par une continuation de faveurs, honneurs et bien-faits, il l'envoya encor ambassadeur extraordinaire en Suisse, pour jurer le renouvellement d'alliance avec cette nation, esperant que les exemples et enseignemens de ces grands politiques luy donneroient envie de le devenir, et de regler son esprit et ses desirs. Son voyage fut suivy d'une solemnelle ambassade de tous ces peuples, qui vint à Paris pour faire

le semblable, et fustes commis, vous et messieurs de Sillery, de Vic et de Caumartin, pour conclurre les traittez, en quoy il ne se passa rien que à l'ordinaire, qui se termina entre vous à boire d'autant, à leur faire toucher trois millions sur leurs debtes, et en presens de forces chaines d'or avec les medalles du Roy, afin de les renvoyer bien satisfaits, comme ils furent.

Quelque temps apres, vous procurastes apres du Roy la charge d'ambassadeur à Rome pour monsieur vostre frere, comme vous luy aviez fait obtenir, quelques années auparavant, celle d'Escosse, jugeant, par ce que vous cognoissez de son naturel grandement retenu et circospect, que ce seroit celuy de tous les emplois où vous le pourriez avancer, auquel il réussiroit le mieux: en quoy vous fustes fort traversé par messieurs de Ville-roy et de Sillery, lesquels s'estans joints d'amitié ensemble, aim de resister plus puissamment à vostre faveur qu'ils voyoient aller journellement en augmentant, et contester plus efficacement vos opinions, qu'ils nommoient fantaisies, vouloient essayer de faire en sorte que la nomination de tous les ambassadeurs dépendist absolument d'eux deux, et par ce moyen vous exclurre de toute correspondance avec iceux, et oster la cognoissance et l'intelligence des affaires estrangeres. Et sur ce qu'ils debattoient et vouloient faire rejeter la nomination que vous aviez faite de monsieur vostre frere, vous entrastes en de grandes contestations, d'autant qu'ils mirent en avant qu'il avoit peu d'intelligence des affaires de Rome, et n'avoit point encores tant rendu de services au Roy ny à l'Estat, qu'il deust estre preferé à d'autres qu'ils avoient à proposer, sans neantmoins nommer encore personne. Sur quoy vous leur respondistes que s'estant bien acquitté de l'ambassade d'Escosse, il ne manqueroit non plus de donner satisfaction à Sa Majesté pour celle de Rome; et que, quant à ses services, estans joints avec les vostres et l'ancienneté de vostre maison, il ne s'y trouveroit rien à rejeter ny à mespriser. Et là dessus vous estant mis à vous entreprier, chacun essayant de mettre en avant ce qu'il estimoit le plus valoir en soy et le moins en autrui, et vous estant persuadé par les discours qu'ils tenoient, qu'ils vouloient faire aller leurs services du pair avec les vostres, vous leur respondistes, demy en colere, que toutes comparaisons estans tousjours tenues pour odieuses entre toutes personnes, elles seroient incessamment reputées telles entre les vostres, eu esgard à la diversité des naissances, professions, qualité et quantité de services; et comme ils vouloient repliquer, et sur tout le petit M. de Ville-roy, fier

comme un aspic, ayant les jouës bouffies et les yeux rouges de despit, le Roy leur imposa silence, et vous dit à tous trois, avec demonstration de colere, qu'il ne trouvoit nullement bonnes ces picotteries, contestations et reproches mal fondées; qu'il vous défendoit d'en user jamais, sur tout en sa presence, et qu'il vous tenoit tous trois pour bons et utiles serviteurs, dequoy diverses actions luy avoient rendu des preuves notables.

Surquoy le despit vous faisant passer mesure vous repartistes, et vous adressant au Roy mesmes, luy dîtes que puis qu'il approuvoit ainsi esgalement les services des uns et des autres, que vous n'aviez plus rien à repliquer, d'autant que son opinion et sa creance, en telles matieres, devoient estre les juges souverains et decisifs de ce differend; mais que si vous aviez à debattre cette cause avec un autre que vostre Roy et vostre maistre, les volontez duquel vous seroient toujours pour loix inviolables, vous penseriez luy faire bien recognoistre par vives et solides raisons (sans mesme mettre en avant que vous aviez incessamment couru sa fortune, quelque deslabrée qu'elle eust esté longues années, que vous n'aviez jamais eu d'autre maistre ny assisté ses ennemis, et que vous aviez plus receu de playes qu'ils n'avoient taillé de plumes, et plus respandu de sang pour son service qu'ils n'avoient mis d'ancre dans leurs escritaires) qu'il y avoit grande difference entre les services des gentils-hommes et gens de guerre, et ceux des gens de robbe longue et d'escritoire, les vacations et emplois de ceux-cy estans de telle nature qu'ils ne pouvoient jamais desplaire, desobeyr, contredire, ny manquer à faire ce qu'il leur estoit commandé s'ils ne vouloient, leurs charges ne consistans qu'à prosner, caqueter, faire la mine, escrire et seeler, qui sont toutes choses qui resident en la volonté; au lieu que ceux-là qui faisoient le mestier de la guerre et s'employoient aux finances, estoient obligez à produire des realitez, des substances et des effects, qui ne dépendoient pas de leur vouloir, l'argent ne se trouvant pas, les places ne se fortifians, attaquans ny defendans pas, les combats ne se faisoient pas, les pieces d'artillerie ne s'exploictans pas, les batailles ne se donnans pas, les victoires ne s'obtenans pas avec des mains de papier, des peaux de parchemin, des coups de ganivet (1), des traits de plumes, des paroles vaines, des seaux et de la cire; bref, avec des imaginations, fantaisies, mines et simagrées: ce que vous ne doutiez point que Sa Majesté ne reconnut encore mieux que vous ne l'aviez représenté, la sup-

(1) Canif.

pliant neantmoins de vous excuser si le mespris que l'on faisoit de vostre frere et de vous, avoit esté cause de l'excez dont l'on pourroit accuser vos paroles, et de leur accorder un pardon convenable à l'offence.

A quoy le Roy respondit brusquement, et comme si la continuation de tels langages luy eut depleu: « Bien! bien! je vous le pardonne et aux uns et aux autres, et considere vos paroles comme il faut; mais à la charge toutesfois que vous ne rentrez plus en telles picotteries, et que quand l'un d'entre vous désirera favoriser quelqu'un de ses amis pres de moy, les autres ne s'y opposeront plus avec aigreur et animositez, mais s'en remettront doucement à mon choix, lequel je fais pour le present, en faveur du sieur de Bethune, duquel j'estime la maison, l'esprit, la preud'homme, mesme la capacité, l'ayant employé en diverses affaires de paix et de guerre, desquelles il s'est dignement acquité; et afin que vous n'estimiez pas, dit-il, adressant sa parole à M. de Ville-roy, que je prefere Bethune à ceux que vous projetiez de me nommer pour la charge d'ambassadeur à Rome, dès à present, je vous promets de la leur reserver au retour de Bethune, avec lequel, cependant, je vous ordonne de vivre en bonne amitié et parfaite correspondance, afin que mon service n'en recoive dommage. » Et sur cela vous ayant derechef commandé à tous trois de vous comporter avec affection et respect, les uns avec les autres, il quitta le promenoir où il avoit esté plus de deux heures avec vous, à cause de vos disputes, et s'en alla disner.

#### CHAPITRE CIV.

*Digression sur les affaires des Pays-Pas. Défense de transporter de l'argent hors du royaume. Riche capture faite près de la frontière. Chambre de justice contre les financiers. Crédit de Conchini et de Léonor Galigai. Digression sur la manière dont ces Mémoires ont été composés. Naissance du Dauphin. Henri IV fait tirer son horoscope.*

Nous vous avons cy-devant parlé de la route que prenoit la grande armée du prince Maurice, de laquelle le Roy, sur son partement de Calais, et vous aussi receustes les lettres d'avis de M. de Buzenval, par lesquelles il vous mandoit que M. le prince Maurice, ayant pris Rhimbergue, il se disposoit d'aller attaquer Bosleduc, en intention, ce disoit-il, de faire lever le siege d'Ostende, ou bien de prendre cette place qu'il estimoit la plus importante du Brabant; duquel

dessein le Roy vous ayant demandé vostre avis, vous luy dites que vous aviez bien esté aultresfois à Bosleduc, mais en si jeune aage, que vous n'aviez pas lors la capacité d'en faire un jugement certain; toutesfois qu'il vous souvenoit assez de sa situation, grandeur et abondance des habitans, pour conclurre qu'il seroit fort difficile de l'assieger et circuir du tout, à moins de vingt-cinq mil hommes, ny d'en faire les approches et logemens, pour les incommoder et empescher qu'il n'en sortist ny entrast hommes, armes, munitions et vivres, qu'avec une grande longueur de temps. Plusieurs autres qui estoient prés du Roy, en dirent leurs avis, mais tant diversement que l'on en remit la certitude au succez, lequel Sa Majesté ne voulant pas attendre, non plus que celui du siege d'Ostade, il s'en retourna à Fontaine-bleau, où il avoit laissé la Reyne à cause de sa grossesse.

Auquel lieu estant de sejour, sur les plaintes qui luy furent faites des grands abus qui se commettoient és expositions des monnoyes estrangeres, et transports qui se faisoient d'or et d'argent, lesquels en desnuaient entierement son royaume, il fit faire un descry de toutes sortes de monnoyes estrangeres, reservé de celles d'Espagne, et en suite une prohibition de transporter or ny argent monnoyé ou autrement hors du royaume, à peine non seulement de la confiscation des choses transportées, mais aussi de tous et uns chacuns les biens de ceux ausquels elles appartiendroient, ou qui auroient favorisé lesdits transports; et en fit le Roy tout haut, estant à table, tant de sermens de n'exempter de cette rigueur qui que ce pust estre, que chacun apprehendoit d'estre surpris en cette faute.

Et neantmoins, comme l'avarice et l'avidité du profit sont celles de toutes les passions de l'homme qui gardent le moins de moderation, encor s'en trouva-il qui ne laisserent pas de vouloir continuer ce trafic, duquel ils avoient accoustumé d'user; desquels vous en cognoissant quelques-uns, et qui en facilitolent les voitures, et avoient cognoissance des intelligences qui s'entretenoient pour cet effet hors le royaume, vous pratiquastes en sorte ces derniers, sous promesses que vous leur fistes de leur donner le quart de tout ce qu'ils vous feroient decouvrir, qu'environ un mois apres ils vous donnerent avis comme il se projettoit un transport de deux cens mil escus en especes d'or, dont l'on avoit fait amas pour cet effet, ne craignant sinon qu'il ne se fist pas tout d'une voiture, et que la premiere se surprenant, ils arrestassent tout court les autres; et partant que c'estoit à vous à adviser si vous desireriez vous attaquer à celle-là,

d'autant qu'à leur avis elle seroit de la moindre somme. Surquoy vous jugeastes à propos d'en dire quelque chose au Roy, et prendre encor sa parole pour vous en donner la confiscation, luy faisant neantmoins la chose douteuse. Surquoy il vous dit que si la prise ne montoit point plus de dix mil escus, il vous la donnoit, mais qu'il vouloit avoir le surplus s'il s'y en trouvoit, pour remplacer des pertes qu'il avoit faites au jeu, dont il ne vous avoit osé parler, ny penser à les prendre sur ses deniers ordinaires.

Vous receustes ces paroles comme de celui qui vous pouvoit donner la loy en toutes choses, et consentistes à toutes ses volonte; suivant lesquelles, afin d'abreger cette petite histoire (laquelle vous fournit dequoy ayder à vos bâtimens de Baugy, que vous aviez acquis l'année precedente), vous fustes adverty si à propos du parlement de cette premiere voiture, et la listes suivre avec tant d'industrie, qu'elle fut arrestée demie lieuë hors des terres de France (car de le faire avant la sortie du royaume, ils n'eussent pas failli de dire qu'ils fussent allez en quelques-unes des villes frontieres d'iceluy); et se trouva dans diverses balles de marchandises de peu de prix, quarante-huit mil escus en escus, sols, pistolets, pistoles et quadruples, lesquels furent desavoüés des conducteurs, disans ne sçavoir point qu'ils fussent là dedans; et quelque bruit que l'on fist d'une telle prise, et grande qu'en fust la perte, si ne fut-elle jamais reclamée de personne. Tellement que, sans aucune plainte ny peine, le Roy en donna vingt-cinq mille livres à vos advertisseurs, sans les cognoistre (n'y ayant jamais eu qu'un homme de paille qui eust parlé à vous); et du surplus, montant cent dix-neuf mille livres, le Roy en retint vingt-quatre mille escus, pource, comme il le vous dit, que ces debtes du jeu montoient autant, et ne vous laissez que quarante sept mille livres, avec serment neantmoins qu'il ne prendroit du tout rien sur la premiere voiture que vous feriez attraper, ains vous en laisseroit l'entiere disposition entre vous et vos advertisseurs. Mais ny les uns ny les autres ne fussent plus en peine de rien partager, tant chacun (par cet enseignement du dommage d'autrui) se rendist soigneux de ne plus contrevenir aux défences royales.

Le Roy ayant, ainsi qu'il a esté dit, par sa valeur et sa prudence, calmé toutes les tempestes desquelles l'Estat avoit esté agité par tant d'années, vivoit paisiblement dans son royaume, avec la mesme douceur et familiarité qu'un bon pere de famille fait avec ses enfans et domestiques, s'employant soigneusement à trouver les moyens propres pour assoupir toutes haines, ani-



mositez et querelles particulieres, à faire rendre justice esgale à un chacun, sans acception de personnes, à meliorer ses revenus et soulager son peuple; et sur tout, sçachant par experience qu'il n'y a rien qui tesmoigne davantage la decadence prochaine d'un Estat que l'effrenée multiplicité d'officiers, et la licence que se donnent ceux de justice et de finance, de s'enrichir excessivement aux despens des revenus publics et des biens des particuliers, il fit premierement un grand retranchement d'officiers; et, pour rompre la coustume qu'avoient prise ceux de finance de faire des profits indeubs, il fit establir une chambre royale (1) pour la recherche des abus et malversations commises par les thresoriers, receveurs et autres financiers: laquelle, contre vostre advis, comme toutes les autres du passé, se termina par les brigues, menées et abondance de presents des plus riches aux courtisans et favoris, tant hommes que femmes, que vous sçavez bien sans que je les nomme, en une composition qui fut cause que les pauvres grimelins de larronneaux payerent pour les grands voleurs et brigands, ausquels seuls vous vouliez que l'on s'adressast, et leur fist-on rendre gorge tout à fait, voire que l'on les punist par corps, tant, ce disiez-vous au Roy, pour donner telle apprehension à ceux de l'advenir qu'ils fussent contraints de vivre en gens de bien, que pour oster et bannir entierement le luxe, la superfluité et toutes sortes d'excez en habits, pierreries, festins, bastimens, dorures, carrosses, chevaux, trains, équipages et mariages de fils et filles, que le seul exemple de telles gens introduisoit à la ruine de la vraye et ancienne noblesse acquise par les armes (lesquelles seules peuvent donner le titre de gentilhomme); la plupart desquels induits à telle vanitez, et afin de satisfaire à icelles, ne prenoient plus alliance les uns avec les autres, à cause des petits mariages qu'ils avoient moyen de donner à leurs enfans, mais aux fils et filles de ces gens de robe longue, financiers et secretaires, desquels les peres ne faisoient que de sortir de la chicane, de la marchandise, du change, de l'ouvroir et de la boutique, ce qui enfin abastardiroit de sorte toute la vraye noblesse, qu'il ne se trouveroit plus de gentils-hommes qui ne fussent mestifs et plus propres à faire les marjolets, berlandiers et batteurs de pavé, qu'à s'employer à la

(1) Elle fut composée d'un président du parlement de Paris et de deux conseillers, de deux maîtres des requêtes, d'un président et de quatre conseillers de la chambre des comptes, d'un président et de trois conseillers de la cour des aides, d'un des avocats généraux du parlement, etc. On envoya dans les provinces des commissaires pour informer contre ceux qui avoient malversé.

(Note de l'abbé de l'Écluse.)

vraye vertu et aux armes pour bien servir leur Roy et defendre leur patrie: toutes lesquelles raisons le Roy goustoit fort bien et s'y laissoit quelques fois entierement persuader.

Mais il se trouva en fin tellement importuné par la Reine et autres dames qu'il aymoit, par monsieur le connestable, messieurs de Bouillon, de Belle-garde, de Conchine, de Roquelaure, Souvray, Frontenac, la Varenne, Zamet, Gondy, Bonnueil et autres personnes qui l'approchoient et pouvoient quelque chose sur son esprit par coustume ou services de complaisance, ausquels tous les presents n'estoient point espargnez, qu'il se laissa emporter à la pire resolution. L'on fit aussi quelques defences contre l'entrée des manufactures estrangeres, et le port et usage de toutes estoifes et passement d'or et d'argent; et le vieil Mars de Grece se trouvant absolument banny de la France par la prudence et valeur du jeune Mars françois, et sa vertu ne pouvant demeurer oysive pour son regard, il n'y avoit sorte de gentils exercices où il ne s'employast, et par son exemple il n'y fist resoudre les autres. Tellement qu'à la cour, à Paris, à Fontaine-bleau et à l'Arsenac, l'on ne voyoit que toutes sortes de galanteries et parties se faire pour aller à toutes sortes de chasses, courir la bague, rompre au faquin et en lice, faire de toutes sortes d'armes, ballets, mascarades et assemblées de dames, tout cela sans excez de despences, que le Roy ne trouvoit nullement bonnes: lequel, neantmoins, quelques belles et honnestes occupations qu'il donnast aux esprits des hommes pour les divertir de toutes mauvaises pensées et pernicious desseins, si ne peut-il empescher que les malignes inclinations ne se fissent cognoistre.

Et pource que le plus souvent dans les intrigues du monde, et sur tout de la cour, des choses fort contemptibles et de bien foibles causes produisent de tres-fascheux accidens, nous vous ramentevrons, afin qu'une histoire des plus tragiques soit prise dès son origine, que la Reine arrivant en France amena, entre-autres personnes, Virgille Ursin, son cousin, lequel ayant esté nourry jeune avec elle, avoit conçu des esperances par dessus sa condition, un nommé Johan de Medicis, son oncle bastard, un jeune homme nommé Conchine et une fille qui s'appelloit Leonor, et avoit-on projeté de les marier ensemble, comme ils ont esté depuis. Or, d'autant que ceux qui devant nous ou conjointement avec nous, ou nous separement sans eux, avons travaillé à ces recueils de vostre vie, quasi depuis le temps de vostre enfance (mais par nous seulement commencez à vostre entrée au service du Roy) jusques à la fin de l'année 1611, où s'a-

chevent ces Memoires, ayans esté si retenus et circonspects que de n'y avoir voulu employer sinon ce que nous avons oüy et veu, ou que nous avons appris par les lettres, extraicts et memoires par nous trouvez entre les papiers de vostre petit cabinet verd ( lors que vous nous en faisiez faire les inventaires, comme ce vous estoit chose ordinaire tous les six mois, afin de vous rafraischir la memoire des plus importantes), ou par vos discours communs, ou par les communications particulieres, desquelles vous nous avez tousjours honorez depuis que nous vous eumes fait approuver nostre projet; voyant qu'il ne tendoit qu'à l'honneur et gloire de nostre grand Roy, et à faire en sorte qu'en exaltant Sa Majesté, nous trouvassions parmi ses œuvres admirables dequoy ne laisser pas vostre personne, vos actions et vos tant utiles services rendus à vostre maistre et à l'Estat, sans quelque espee de renommée.

Or, ne travaillant donc pour le commencement, ceux qui ont fait des memoires de vostre vie, en forme de journal seulement, que sur les choses et affaires de vostre cognoissance et la leur, et vos mediocres fortunes, et emplois d'une grande jeunesse, et l'esloignement de la Cour royale de France où estoit retenuë celle de Navarre, ne vous permettant pas d'avoir beaucoup de part dans les démeslemens et principaux secrets des affaires publiques, ny entrée dans les conseils d'estat, ny d'estre entierement dans la confidence de l'esprit du prince que vous serviez, quelque inclination qu'il tesmoignast d'avoir à vous aimer ( vous ramentevant souvent la promesse qu'il en avoit faite à la Reine, sa mere, et à monsieur vostre pere ), toutes ces choses s'avançant seulement peu à peu et par degrez, à mesure qu'il entroit en cognoissance de la vivacité et activeté naturelle de vostre corps et de vostre esprit, qui vous faisoient hair l'oysiveté, et de la solidité de vostre jugement avec un soin des plus exquis à suivre toutes ses volonte, à prendre ses enseignemens et ses exemples pour seuls preceptes de bien vivre et de bien faire, preferant la vertu et l'observation de foy et parole, à toutes choses, estimant entre vos actions l'heur qui les accompagnoit au desmeslement des affaires de consequence où il vous employoit, tant pour ce qui regardoit les choses civiles que militaires, qui n'est pas une des parties la moins requise pour l'avancement d'un serviteur aupres d'un prince, qui, estant sage et advisé, n'esleve jamais les siens qu'à proportion de leur suffisance et loyauté.

Lequel propos nous dispensera ( comme nous prions vous et tous ceux qui liront ces Memoires

de l'avoir agreable ) de dire en passant, comme par forme de digression, que vous n'estes pas parvenu aux honneurs, charges et dignitez que vous possédez maintenant, comme ont fait quasi en un moment et sans l'utilité de precedens services, plusieurs gens de nostre siecle, de basse extraction, les uns par des affections bien-seantes au silence, les autres par des adulations et complaisances qui se doivent taire, les autres par des inclinations et rencontres d'humeurs, conformes en nonchalances et faineantises, et les autres par applaudissemens aux desseins pernicieux formes contre leurs amis et associez, lesquels ont esté suivis de telles ruynes, degats et desolations, qu'il est à craindre que les auteurs de ceux qui les ont commencées avec joye, n'en voyent les suites avec larmes; mais estes parvenu par merites et services precedens, et apres avoir passé par tous les degrez honorables, jusques aux moindres, ayant mesmes commencé par celuy de simple soldat portant l'arquebuse, et suivy par tous les autres, tant es charges de police et milice que de finance, sans reproche d'aucune precipitation en vostre maistre ( puis qu'il s'est escoulé plus de vingt-cinq années pendant vostre progrez ) ny remarque d'aucun mauvais succez en vos desseins generaux, ny en vos operations particulieres. Or comme donc, ainsi que nous l'avons desja dit, ce long cours d'années qui s'est passé en la formation de vostre fortune, et nostre peu d'accez avec les gens d'affaires, sembleroient nous avoir privez, et vous aussi, de la cognoissance de plusieurs importantes particularitez, desquelles, par conséquent, ces memoires se devoient trouver autant desnuez, pauvres et defectueux, que riches, amples et abondans; ceux des années suivantes, sur tout depuis le retour de Savoye, que l'utilité de vos conseils embrassez, et vos signalez services rendus en diverses occasions pendant les années 1598, 1599 et 1600, vous eurent donné un employ quasi general en toutes sortes d'affaires et si grande creance et absoluë confidence dans l'esprit du Roy, qu'il sembloit n'estimer rien bien dit ny rien bien fait, qu'il ne vous en eust communiqué auparavant, voire que vous n'eussiez approuvé et qui n'eust passé par vostre entremise; ne vous celant ny desguisant nulles de ses actions, desirs, desseins, secrets, cogitations ny pensées, jusques à ses maladies, douleurs, desplaisirs, ennuy et fascheries plus interieures et cachées, notamment es choses domestiques et qui pouvoient toucher la Reine sa femme, ses enfans, sa sœur, ses amourettes, ses maistresses, les princes de son sang et autres siens parens, voire mesme les vostres et ceux de la religion dont vous faites

profession, tant il vous reputoit tout à luy et à son Estat, loyal, fidelle et sans passion pour nul autre qui luy püst prejudicier.

Les evenemens et succez d'affaires ayans fait cognoître qu'il ne s'abusoit pas, comme la continuation de ces recueils en justifiera quelque chose, et le feroit bien plus amplement si vous nous aviez voulu dire tout ce que vous avez veu, sceu, et fait voir toutes les lettres que Sa Majesté vous a escrites de sa propre main, en si grand nombre, que je l'estime excéder (selon que je l'ay pû conjecturer, les rooles et liasses d'icelles que nous en avons inventariées) plus de trois mille, entre lesquelles je sçay bien qu'il y en a plusieurs qui ne desguisent ny celent nulles des veritez ny defauts de tous les dessus nommez, mais vous parlent en toute liberté de leurs humeurs, complexions et desseins, et des contentemens et desplaisirs que le Roy en recevoit, lesquelles le respect deub aux uns et la crainte d'en courir la haine et recevoir desplaisir des autres (comme vous le disiez fort librement en nous en desniant la communication) vous a empesché de nous les monstrer, voire esté la cause que vous nous avez celé beaucoup d'autres particularitez tant importantes, qu'elles ont peut estre esté la source et l'origine des plus grandes desconvenües de la France, lesquelles ne sont pas prestes de finir, selon l'opinion des mieux sensez et plus judicieux, si d'autres esprits et d'autres desseins que ceux qui ont paru depuis l'exécrable assassinat de nostre grand Roy, ne sont introduits en l'Estat.

Tant s'en faut donc que ces grandes cognoissances que vous avez eües de tous secrets et de toutes affaires nous ayent donné moyen d'enrichir ces Memoires de plusieurs choses rares, que, tout au contraire, les grandes circonspections que vous avez voulu apporter à nous en dire quelque chose, de crainte d'offencer ceux, comme je l'ay desja dit, que vous aimiez ou respectiez, les rend deffectueux de plusieurs particularitez, voire quasi du tout steriles ou grandement obscurs et enveloppez; d'autant qu'il nous en a fallu deviner une grande partie, apprendre l'autre d'ailleurs que de vous, et remettre l'autre au supplément que nous vous prions vouloir faire sur toutes nos narrations, duquel vous ne devez, ce nous semble, priver le public ny la posterité; car, encor que l'on ne voye plus, en ce qui se dira cy-apres, tant de hauts desseins et de genereuses actions guerrieres, si n'est-il pas moins necessaire pour l'esclaircissement du cours des affaires, de sçavoir et cognoître les causes des sourdes menées, ambitions, extravagantes amours, indiscrettes envies, haines, jalousies, mauvaises pratiques, artifices, fraudes, cautel-

les, malices noires, intrigues et embarras, despits, offices d'amis desloyaux et autres trifouilleries de Cour.

Toutes telles manigances neantmoins ne tirans pour la pluspart leur origine que de habioles et choses de neant, le succez d'icelles verifie l'opinion de ceux qui ont toujours maintenu que les hommes estoient ordinairement les vrais architectes de leurs bonnes ou mauvaises fortunes, voire qu'ils n'avoient le plus souvent autres maux que ceux qu'ils ourdissoient et attiroient sur eux mesmes par leurs impertinents desirs, imprudence et mauvaise conduite, estant la coutume des esprits mal agencez (et ce d'autant plus que plus ils sont haut montez) de rendre les grandes affaires de telle nature, que la bonne ou mauvaise administration, et les heureux ou malheureux succez d'icelle, dependent plutost d'un flateur et d'une flaterie, d'un badin et d'une badinerie, d'un cajoleur et d'une cajolerie, d'un faineant et d'une faineantise et d'un fat et d'une fatesse, que de causes hautes, excellentes et magnanimes, ny de loy, raison, justice ou bon exemple.

Mais, retournant à la suite de nos narrations de laquelle nos desplaisirs de voir toutes choses aller, ce nous semble il, en desperissant, nous avoient tirez, nous vous ramentevrons, pour achever ces memoires de l'année 1601, comme le Roy et la Reine receurent une extrême joye le vingt-septiesme de septembre, par la naissance d'un dauphin que Dieu leur envoya, à laquelle allegresse participa toute la France, et vous notamment, tant les prosperitez du Roy et de l'Estat vous estoient sensibles, chacun esperant que d'un prince tant genereux, debonnaire et prudent, il viendrait des enfans à luy semblables: ce que le Roy confirmoit par les projets qu'il faisoit de le nourrir comme il avoit esté, et de n'obmettre nul soin pour essayer à luy faire prendre son exemple pour regle de sa conduite. Et comme il s'est fort peu veu de grandes joyes, et liesses qui ayent esté entierement espurées de tous soucis et sollicitudes, voire n'ayent esté entremeslées ou suivies de desplaisirs et traverses, aussi arriva-il lors qu'une curiosité non necessaire diminua en quelque sorte l'extrême contentement du Roy, dont la cause fut telle: Sa Majesté ayant un premier medecin nommé la Riviere, lequel n'avoit pas grande religion, mais neantmoins inclinoit plus à la reformée qu'à la romaine, et qui se mesloit de faire des nativitez, en quoy il avoit souvent fort bien rencontré, elle luy commanda, lors qu'elle vit la Reine, sa femme, en travail, de mettre une montre bien adjustée sur la table, pour cognoître certainement l'heure et la minute que

l'enfant viendrait au monde, afin, si c'estoit un fils, d'en tirer une figure natale : ce qu'il promit de faire, et neantmoins fut quinze jours sans en parler. Dequoy Sa Majesté se ressouvenant, lors que vous luy parlastes de la Brosse, autrefois vostre precepteur, qui se méloit aussi de predire, il appella ledit sieur de la Riviere, et l'ayant tiré à part luy dit devant vous : « Mais à propos, M. de la Riviere, vous ne me dites rien sur la naissance de mon fils le Dauphin. Qu'en avez-vous trouvé ? — Sire, répondit-il, j'en avois commencé quelque chose; mais j'ay tout laissé là, ne me voulant plus amuser à cette science que j'ay en partie oubliée, l'ayant tousjours recogneu grandement fautive. — Ho ! dit le Roy, je vois bien que ce n'est pas là où il vous tient, car vous n'estes pas de ces tant scrupuleux; mais c'est en effet que vous ne m'en voulez rien dire, crainte de mentir ou de me fâcher. Mais quoy qu'il y ait, je le veux sçavoir; voire vous commande, sur peine de m'offenser, de m'en parler librement. » Surquoy le sieur de la Riviere se voyant pressé, apres trois ou quatre autres refus, finalement comme tout en colere, luy dit : « Sire, vostre fils vivra aage d'homme, regnera plus que vous; mais vous et luy serez tous differens en inclinations et humeurs. Il aymera ses opinions et fantaisies, et quelquesfois celles d'autrui; plus penser que dire sera de saison; desolations menacent vos anciennes assistances; vos mesnagemens seront desmenagez. Il executera choses grandes; sera fort heureux en ses desseins, et fera fort parler de luy dans la chrestienté; tousjours paix et guerre; de lignée il en aura; et apres luy les choses empireront, qui est tout ce que vous en sçauvez de moy, et plus que je ne m'estois resolu de vous en dire. » Surquoy le Roy s'estant mis à resver assez melancolique, il luy dit : « Vous entendez les huguenots, je le vois bien; mais vous dites cela pource que vous en tenez. — Sire, dit M. de la Riviere, j'entends tout ce qu'il vous plaira; mais vous n'en sçauvez pas davantage de moy. » Et comme tout mutiné se retira. Puis le Roy, vous ayant pris par la main, vous mena dans le creux d'une fenestre où il vous entretint assez long-temps sur ce sujet, comme nous l'avons entendu de vous mesmes, sans neantmoins en avoir rien sceu apprendre davantage, ce que vous supplerez quand il vous plaira.

Environ ce temps de la naissance de monsieur le Dauphin, nasquit une fille au roy d'Espagne<sup>(1)</sup>; et peu apres le Roy fit faire le descry

(1) Cette fille du roi d'Espagne fut la célèbre Anne d'Autriche.

de toutes monnoyes estrangeres reservé celles d'Espagne, et reduire les rentes au denier seize sur la grande instance que vous luy en fistes, alleguant entre autres raisons, que c'estoit un moyen pour faire davantage estimer les fonds de terre de la noblesse et ameliorer le trafic, à cause que le grand profit qui se tiroit de l'argent au denier dix et douze sans peiner, travailler ny risquer, avilissoit l'un et faisoit negliger l'autre.

## CHAPITRE CV.

### *Lettres diverses sur les événemens de 1601.*

Or, dautant que plus vous vous rendiez soigneux et assidu à vaquer à toutes vos charges sans vous en divertir par faineantise, plaisirs, passe-temps, ny desbauches, plus que le Roy recognoissoit que toutes les affaires de vos charges et offices et plusieurs autres qu'il vouloit faire passer par vostre cognoissance et entremise, alloient elles se facilitant et ameliorant, ce qui luy faisoit prendre un peu plus de licence à ses divertissemens en visites, voyages, chasses, bastimens, jeux, festins, banquets et autres plaisirs et passe-temps. Tellement que n'estant plus si soigneux de discourir avec vous pour apprendre ce que vous faisiez en ses affaires et vous faire entendre ses intentions, mais se contentant de vous en escrire ou faire escrire des lettres, et d'estre informé de tout ce que vous faisiez par les vostres, nous donnerons dorénavant l'intelligence du cours des affaires plutost par lettres qui vous estoient escrites, que par nos particulieres narrations, tout nostre regret estant de n'avoir pû recouvrer la copie des vostres en responce à icelles, comme nous avons facilement recouvert celles qui vous estoient escrites par Sa Majesté, M. de Ville-roy et autres : tellement que nous ferons icy un chapitre de plusieurs lettres à vous adressantes, telles que s'ensuit.

### *Lettre de M. de Ville-roy à M. de Rosny.*

Monsieur, je n'ay receu qu'aujourd'huy vostre lettre, laquelle vous m'avez escrite le dernier jour du mois passé. Et dautant que je m'assure que le Roy vous en aura fait voir toutes celles que je luy ay escrites depuis, et d'autres encor, je ne vous en feray redite; mais vous prieray seulement de faire en sorte que nous sçachions la volonté de Sa Majesté sur icelles, car telle qu'elle sera, nous la suivrons et executerons le mieux que nous pourrons. Nous sommes obligez de représenter à Sa Majesté ce que nous cognoissons et jugeons estre nécessaire de faire pour

le bien de son service : si elle n'a moyen ou qu'elle ne trouve bon de suivre nostre advis, nous nous en despartirons et luy obeyrons. Vous aurez aussi veu le comte Octavio Tassone, que monsieur le legat a envoyé au Roy, devant que vous receviez la presente. Je ne doute point que ledit sieur legat ne fasse signer à M. de Savoye la ratification de la paix, puis que les Espagnols la trouvent bonne, comme j'ay tousjours estimé qu'ils feroient. Toutesfois comme c'est chose qui est à faire, et partant incertaine, nous ne doutons point que vous ne conseillez au Roy de ne se desarmer pas plus qu'il l'est, estant ledit duc encor armé. C'est pourquoy nous avons esté contrainct de prendre le conseil que nous luy avons escrit, pour l'exécution duquel s'il faut augmenter la despence, de laquelle l'on avoit fait estat, il faut s'en prendre audit duc et à l'estat que nous avons fait sur la parole dudit sieur legat, qu'il accompliroit le traité.

Nous avons fait payer la compagnie de Bareul, et les carabins de M. de Biron, comme les autres; car ils ont tousjours servy et servent encores à Bourg, et avons jugé, comme vous, estre raisonnable de leur faire pareil traitement. Quant à M. de Lus, il se plaint de la despence qu'il est contrainct de faire audit Bourg et voudroit fort qu'il luy fust permis de se retirer : c'est au Roy à l'ordonner, et à nous à le prier, comme nous avons fait, de ne le faire pas sans la permission de Sa Majesté. Un mois de ses appointemens ne le nourrira deux ny trois. Toutesfois nous luy donnerons tout le courage de continuer que nous pourrons, et espere qu'il en aura de reste; et avons advisé de faire fournir à la compagnie de M. Boësse, je veux dire à sa creuë, pour entrer en la citadelle, du pain pour luy donner moyen de vivre en attendant qu'elle soit payée. Il y a long-temps que j'ay delivré au thresorier de Murat, les estats des garnisons de sa charge; c'est donc à luy à les vous représenter. Quant à ceux du charon, comme le Roy a déclaré, vous estant par deça, n'y vouloir rien changer, j'en ay adverty tous les gouverneurs et les ay delivrez à son commis, reservé celuy des regimens que j'ay remis à depescher. Lors que nous aurons executé le traité de la paix de toutes parts, dautant qu'il faut les regler selon le succez d'iceluy, s'il est possible, nous vous deschargerons du payement du mois de fevrier, des garnisons de Savoye; car il est raisonnable, comme vous le dites fort bien, que M. de Savoye le porte, estant cause du retardement de l'exécution de ladite paix. Nous en avons ja parlé à ses deputez qui ne s'en excusent; mais ils n'osent l'obliger sans charge expresse de luy. Quant nous

aurons retiré la citadelle de Bourg, il touchera à eux d'en faire la diligence. J'advertiray M. de Lesdiguieres de la responce que vous m'avez faite, de laquelle je veux croire qu'il se contentera. J'ay escrit au Roy, comme monsieur le legat avoit bien receu vos lettres, et pris telle creance sur icelles, qu'il est aussi-tost party d'Avignon. J'estime que M. de Gastines vous aura donné advis de tout ce que j'ay escrit au Roy, comme je l'en ay prié, afin de ne vous donner la peine de lire ma mauvaise esriture, vous suppliant de nous tenir tousjours advertis des intentions du Roy, et de me continuer vostre amitié et bonne grace, etc.

De Lyon, le 9 fevrier 1601. DE NEUF-VILLE.

*Lettre de M. de Ville-roy à M. de Rosny.*

Monsieur, vostre lettre du 24 fevrier, que je n'ay receuë que le trois du present mois, nous a plus esclaircis des intentions et des affaires du Roy, que les autres qui nous ont esté escrites. Vous dites que trois choses ont meu Sa Majesté, d'accorder le delay d'un mois demandé et obtenu par le comte Octavio Tassone, suivant le desir de monsieur le legat. La premiere, que Sa Majesté n'avoit aucune execution preste contre le duc; la deuxiesme, qu'elle a voulu gratifier monsieur le legat; et pour la derniere, justifier son intention à tout le monde. Pardonnez-moy si je vous dis sur les deux dernieres, que Sa Majesté s'en estoit si avant acquitté en faisant le traité, que ce qu'elle y a adjousté de plus en cette occasion, a esté interpreté et receu plutost pour foiblesse qu'autrement, et vous sçavez combien nuisent à la réputation d'un prince, les actions que l'on estime proceder de là. Davantage, n'estimez pas que ceux de la Cour de Rome, moins que les autres, se puissent obliger par graces, qu'ils croient leur estre faites par nécessité : vous sçavez mieux que personne quelles ont esté les faveurs que monsieur le legat a receuës de Sa Majesté, en son voyage, puis qu'elles ont passé par vostre entremise. L'on escrit d'Italie que les siens se plaignent qu'il n'a esté traité comme il merite. Je ne croy pas en verité que cela procede de luy; car il seroit trop ingrat, et j'ay melleure opinion de son naturel : toutesfois a-il fait tort à Sa Majesté de l'avoir engagée si avant en ce traité, sans estre mieux asseuré de l'intention du roy d'Espagne, estant honteux, que ledit Roy nous fasse traïner, comme il fait, apres cette belle ratification, et que la paix et la guerre demeurent en sa main et discretion, veu mesmes que nous sçavons qu'il a aussi grand besoin de repos que nous.

Mais voicy l'avantage que le Roy avoit et

pouvoit conserver sur ledit duc, si Sa Majesté n'eust accordé ledit delay; c'est qu'il couroit fortune de perdre la citadelle de Bourg par famine, sans estre mise en compte sur ledit traité. Je vous dis que les siens et l'ambassadeur d'Espagne en avoient telle apprehension, devant l'octroy de ladite prolongation, qu'ils nous faisoient la cour, seulement pour obtenir un delay de six ou huit jours; dequoy Sa Majesté les a si bien delivrez, qu'ils ont depuis fait peu de compte de nous. Vous me direz que ceux de ladite citadelle s'estans conservez jusques à present, que Sa Majesté n'y eust rien gagné; je responds que l'incertitude qu'en avoient les autres les eust hastez de se resoudre d'envoyer ladite ratification. Or, il ne faut plus parler du passé: le Roy peut encor à present tirer le mesme advantage de l'estat auquel est reduitte ladite citadelle, ainsi que vous apprendrez par les lettres de de M. de Biron, que j'envoye presentement à Sa Majesté, et celles qu'il vous escrit et nous aussi. Partant je vous supplie, suivant ce que vous avez tousjours fait, de remonstrer à Sa Majesté ce que vous cognoistrez appartenir à sa dignité et à son service, sur ce que nous luy mandons, en l'assurant que ses commandemens, quels qu'ils soyent, seront toutefois suivis au pied de la lettre. Ce que nous avons retranché, toutes courtoisies et honnestetez, à ceux de ladite citadelle, les a reduits aux termes où ils sont; il faut en profiter cette fois sans en perdre l'occasion. J'entends que M. de Biron est bien resolu de faire ce service au Roy. M. de Lus nous a donné pareille assurance de luy, nous estant venu voir icy; et vous diray qu'il me semble qu'il seroit à propos que le Roy leur fist don à chacun de quelque argent, car ils se plaignent de leur despence; je l'escris à Sa Majesté et vous prie luy ramentevoir et luy conseiller. Nous mesnagerons l'argent que vous nous avez envoyé par lettres d'eschange, de façon que vous aurez occasion de vous en louer, et si tost que nous aurons receu l'estat du payement fait des regimens qui sont en Provence, je vous en enverray un general des gens de guerre qu'il faut payer par deçà, auquel sera compris ce qu'il faut pour le munitionnaire. Nous faisons porter à la Savoye l'entretienement des garnisons qui y sont, pour les mois de fevrier et pour le courant, de façon que j'espere que vous en serez deschargé. Monsieur le connestable a esté bien aise d'entendre ce que vous m'avez escrit touchant le canon et les munitions qu'il avoit ordonné estre envoyées en Provence; mais je n'ay receu l'ordonnance pour faire recevoir et employer aux fortifications de Saint Trops et Dan-

tibe les six mil escus de Paris, que vous m'avez escrit, par vostre dite lettre, d'avoir ordonnez; il faut qu'elle ayt esté oubliée. Je me recomande bien-humblement à vostre grace, et prie Dieu, etc.

De Lyon, ce 7 mars 1601.

DE NEUF-VILLE.

*Lettre de la main du Roy à M. de Rosny.*

Mon amy, j'ay veu vos lettres et celles qui vous ont esté escrites par messieurs le connestable, de Ville-roy, de Sillery et de Gastines, sur lesquelles je vous diray que je trouve bon que l'on reduise les compagnies des regimens de Navarre, Piedmont et Champagne, qui estoient à Bourg, à raison de cinquante hommes pour enseigne, compris les chefs, comme je vous l'avois cy-devant dit: comme aussi que l'on licentie celles du sieur de Saint Angel, et les compagnies du sieur de Lux, du Brüel et la cruë des carabins de M. de Biron; aussi que l'on fasse le semblable du regiment du sieur de Crequy, à mesure que l'on le sortira des places que nous rendrons. Je trouve qu'il seroit fort à propos de laisser encor pour quelques jours en Provence les compagnies du regiment de mes gardes et celles des Corses, les reduisant au nombre que je vous ay ordonné, comme aussi que l'on licentie celles du sieur du Bourg et du chevalier de Montmorency, et que l'on fasse fournir le pain aux compagnies du regiment de mes gardes et celui des Corses, ce que vous ferez entendre à monsieur le connestable, afin qu'il le trouve bon. Toutes-fois il me semble que s'ils font leurs monstres comme nous l'avons ordonné, qu'il ne leur faudroit fournir de pain, ou que l'on accommode M. de Lesdiguières avec les deputez de M. de Savoye, ce que je veux croire qui se pourra, si mes serviteurs s'y employent comme ils doivent. Pour le voyage du sieur de Gastines en Suisse, puis que rien ne presse, je trouve bon de mettre la resolution de cette affaire-là jusques à l'arrivée du sieur de Ville-roy, qui sera icy à la fin de ce mois. Pour ceux de Geneve, ils m'ont escrit cela mesme que M. de Sillery escrit qu'ils ont fait à monsieur le connestable par leur député qui est icy, lequel je vous renverray, afin que vous leur fassiez entendre ce qui a esté traité avec M. de Savoye, et qu'ils se resolvent à ce qu'ils doivent, afin que vous puissiez mettre l'ordre qui est necessaire pour le bien de mon service en ce pays-là. Quant à Bourg, voyez sur l'estat des fortifications que je vous ay renvoyé, où l'on peut prendre encor deux mil escus pour travailler aux fortifications dudit lieu, car je ne suis pas d'advis que l'on touche à ce que j'ay or-

donné pour Barrault ny pour Exilles : pour les munitions qui y sont nécessaires , je m'en repose sur vous pour y pourvoir, comme vous verrez à propos pour mon service. M. le mareschal de Biron ne m'a rien mandé, que les chefs qui sont sortis de Bourg se soient efforcez d'accroistre leurs troupes et lever de nouveaux soldats pour mener en Italie, ce que je ne veux que l'on souffre. Mon advis n'est point de mettre la Bresse en la generalité de Lyon , ains la laisser en celle de Bourgogne, mais bien qu'elle ressortisse à la Cour des aydes à Paris , comme nous l'avions resolu ensemble. Je suis bien ayse que vous ayez pris reglement avec ceux de mes comptes, comme aussi que vous vous assembliez aujourd'huy avec le cavalier Vinta, et que demain vous fassiez de mesmes avec ceux de mes aydes. Je me trouve tout desbauché d'un flux de ventre qui me priut hier au soir et me meine un peu viste et me rend foible. C'est ce que j'ay à vous dire pour cette heure. Adieu, mon amy, etc.

Ce 20 mars à midy, à Saint-Germain en Laye.

HENRY.

*Lettre du Roy à M. de Rosny.*

Mon amy, il a quelque temps que je recommanday à M. le Grand de me faire amener à Paris en ma grande escurie des poulins de mon harras de Meun ; et pour ce que pour les amener et nourrir par les chemins et ceux qui les ont amenez, il y a fait faire quelques frais, je vous prie incontinent de faire pourvoir au payement et remboursement d'iceux, comme chose que je veux et qui a esté faite par mon commandement. Au demeurant, je vous ay ce matin escrit par Gondy et en sa faveur : souvenez-vous que ce sont lettres que je ne luy ay pû refuser ; mais de n'y rien faire au prejudice de mon service que je vous recommande sur tout. J'escris le mesme à M. de Sillery auquel aussi j'avois escrit en sa faveur. Adieu, mon amy, etc.

Ce samedi, à deux heures après midy, 14 avril, à Fontaine-bleau.

HENRY.

*Lettre de M. de Ville-roy à M. de Rosny.*

Monsieur, vous estes party d'ici si matin que je n'ay pû vous voir et prendre congé de vous, et vous bailler la lettre de M. de la Boderie que vous recevrez avec la presente, et si vous desirez que je fasse des offices sur le sujet d'icelle, j'y satisferay me le mandant. Nous avons receu une depesche de M. de Sillery, à laquelle nous ne pouvons respondre sans vous ; j'espere la lire au Roy demain ( car il a esté à la chasse aujourd'huy ), puis je vous advertiray de sa volonté. Sa Majesté a permis que les deux prisonniers de

l'entreprise de Mets soient conduits à Calais, par un des lieutenans de Rapin, comme vous proposastes dernièrement ; partant il vous plaira d'y pourvoir, afin qu'ils partent au plutost ainsi que j'escris à M. le chancelier. Il a passé par icy un courrier venant d'Espagne, qui partit de Valledolit le quinziesme de ce mois, qui m'a dit que M. de la Rochepot y estoit encores. Je prie Dieu, etc.

De Fontaine-bleau, le 22 may 1601.

DE NEUF-VILLE.

*Lettre du Roy à M. de Rosny, contre-signée.*

Mon cousin, puisque vous avez cinquante mil escus prests pour les Hollandois, pour satisfaire au premier terme des deniers que je leur ay accordé, faites les mettre entre les mains du tresorier du temps, et le chargez de les faire porter promptement et seurement en ma ville de Dieppe, où les Hollandois les enverront prendre, car la voiture en doit estre faite à leur frals, comme il a esté pratiqué cy-devant, et me mandez en quel temps seront payables les autres termes, afin que j'en advertisse mon agent ; mais le plus secrettement que lesdits deniers pourront estre comptez et transportez sera le meilleur pour mon service, pour les raisons qui vous sont assez cogneuës : partant je vous prie d'en avoir soin. Quand vous serez icy, je me resoudray du lieu et du temps que je donneray audience aux ambassadeurs de Venise, lesquels vous ferez cependant recevoir et traiter honorablement comme je vous ay escrit par mes precedentes. Et quant à la valeur de leurs presens, il me semble qu'il faut qu'elle soit semblable à celle des autres qui furent faits aux sieurs Gradenigo et Delphin, quand la seigneurie les envoya vers moy : toutesfois je m'en remets à ce que vous en adviserez. Priant Dieu, mon cousin, qu'il vous ayt en sa saincte et digne garde, etc.

Escrit à Fontaine-bleau, le 29 may 1601.

HENRY.

Et plus bas, DE NEUF-VILLE.

*Lettre de la main du Roy à M. de Rosny.*

Mon amy, mon intention estant que le sieur de Marabat, qui vous rendra cette-cy et qui m'a bien et utilement servy, soit payé de la somme de deux mil escus, restans d'un don que je luy ay cy-devant fait en consideration de ses services, je vous prie de l'en faire assigner sur les deniers revenans bons de ce qui avoit esté cy-devant ordonné pour l'entretienement de l'assemblée de Saumur, laquelle, comme vous sçavez, est rompuë, dautant que c'est chose que je veux

et desire, et croyez qu'en ce faisant vous me ferez service tres-agreable. Sur ce, Dieu, etc.

Ce 16 juin, à Monceaux.

HENRY.

*Lettre de la main du Roy à M. de Rosny.*

Mon amy, j'ay veu la lettre que vous m'avez escrite touchant M. d'Ornano; envoyez querir Biçose, il vous dira ce qui se passa entre nous deux. A la verité, je n'ay jamais vu tant d'ignorance et d'opiniastreté ensemble; mais je dis tres-dangereuse: il fit le corse à toute outrance. S'il fait ce qu'il vous a dit, il m'offencera si aigrement, que je m'en ressentiray. Comme son amy, faites le luy sentir, et qu'il ne me donne point sujet de le faire recognoistre pour ce qu'il est, c'est à dire indigne des honneurs que je luy ay departis. Sa seule fidelité m'y obligeoit, ses desobeysances me dispenseront de parler ainsi; il faut dire vray, que je suis fort rebuté de luy. Voilà tout ce que je vous en puis dire. Bon soir.

Ce 19 juin.

HENRY.

*Lettre de la main du Roy à M. de Rosny.*

Mon amy, ce pourquoy je vous mande de me venir trouver en ce lieu et d'amener avec vous M. de Ville-roy n'est pas que je desire que vous y fassiez sejour de plus d'un jour, ny que vous y apportiez vos papiers, car je vous veux voir ensemble pour prendre vostre advis sur les bruits et advertissemens que j'ay cy-devant eus à Calais de M. de Chasteau-neuf; car ils m'ont esté reconfirmer d'autres endroits, mesme que l'on en a veu à cheval qui ont esté congediez et renvoyez jusques à un autre temps, si que ce mal seroit pour croistre s'il n'y estoit promptement pourveu. C'est pourquoy je vous prie de vous en venir incontinent, et prendre en passant M. de Ville-roy; aussi que j'ay nouvelles d'Espagne sur lesquelles je seray tres-aise que nous prenions quelque bonne resolution, ne voulant parler d'autres affaires pour la premiere sepmaine des couches de ma femme, où nous serons assez empeschez à garder qu'elle ne se morfonde. N'amenez donc point avec vous personne d'affaires, car vous pouvez croire que je ne vous retiendray ici qu'un jour. Bon soir, mon amy.

Ce 19 septembre, à Fontaine-bleau. HENRY.

*Coppie d'une lettre de l'archiduc au Roy, touchant le prince d'Espinoy.*

MONSEIGNEUR,

J'ay receu par le sleur de la Boderie la lettre qu'il a pleu à vostre Majesté m'escire, et entendu, tant par icelle que ce qu'il m'a déclaré de vostre part, le desir qu'avez de conserver toute bonne amitié, paix et voisinance entre vostre royaume

et ces pays, vous pouvant assurer que de ma part je ne manqueray à la conserver et maintenir aussi de tout mon pouvoir, pour tant y aller et du bien de toute la chrestienté et de nos communs sujets. Et quant au differend des comte et comtesse de Ligne avec les enfans du feu prince d'Espinoy leurs neveux, je les ay amenez si avant, qu'ils sont contens d'entrer en amiable communication pour voirs'ils pourront s'accorder, ne restant sinon de choisir les personnes à y entremettre, et le lieu où ils se devront joindre, ce qui se pourra faire dans fort peu de jours; vous assurant au surplus que j'y apporteray toute facilité, afin que ledit differend se vuide amiablement, pour donner à vostre Majesté contentement et satisfaction, comme je desire faire en toutes autres occasions, selon que ledit de la Boderie vous pourra faire entendre. Priant Dieu qu'il donne à vostre Majesté, monseigneur, santé tres-longue et heureuse vie; de vostre Majesté tres affectionné serviteur.

ALBERT.

Du camp devant Ostande, le 22 septembre 1601.

*Lettre de M. de Ville-roy à M. de Rosny.*

Monsieur, le Roy m'a commandé de faire la depesche à M. de la Boderie, de laquelle vous m'avez escrit, à quoy je satisferay, luy faisant tenir la lettre que vous m'avez adressée, comme celui qui desire vous servir de tout son pouvoir, dequoy je vous prie faire entier estat. Je vous prie aussi nous renvoyer le courrier venu d'Espagne, car il y a trois jours que sa depesche l'attend. Souvenez-vous aussi, s'il vous plaist, de celle de Suisse que j'ay adressée, par le commandement du Roy, à M. le president Jeannin. Je sçay qu'il est plus difficile de pourvoir à ce que M. de Sillery demande par icelle qu'à le vous recommander; mais il faut se resoudre en une sorte ou en autre: surquoy Sa Majesté attend vostre advis. M. de la Force, qui vient de Guyenne, dit qu'il ne faut point mespriser les menées dont vous avez ouï parler: toutesfois je persiste en mon opinion, qu'il y a plus de malice et de sottise que de pouvoir de mal faire. Neantmoins le Roy dit qu'il ne veut rien negliger, et parle de s'approcher de la riviere de Loire et de passer outre s'il en est besoin, devant que d'aller ailleurs, apres que la Reine sera accouchée. Ce sera tout ce que je vous escriray pour cette fois, en saluant vos bonnes graces de mes humbles recommandations, et prie Dieu, etc.

De Fontaine-bleau, ce 26 septembre 1601.

DE NEUF-VILLE.

*Lettre du Roy à M. de Rosny, contre-signée.*

Mon cousin, entre tant de miraculeux tesmoi-



gnages de l'assistance de Dieu que l'on a peu remarquer en ma faveur depuis mon advenement à cette couronne, il n'y en a un seul qui m'ait fait ressentir plus vivement les effets de sa divine bonté, que l'heureux accouchement de la Reine mon épouse, qui vient presentement de mettre au monde un fils dont je reçois une joye que je ne puis assez exprimer. Mais comme j'ay tousjours plus considéré les calamitez publiques durant les miseres passées que mon particulier interest, aussi ne reçois-je pas tant de plaisir et de contentement pour ce qui me touche en cette naissance que pour le bien general de tous mes sujets, qui auront bonne part en cette occasion de resjouissance : dequoy je vous ay bien voulu advertir par la presente, afin que vous participiez à la joye et au plaisir que j'en ay, et que vous fassiez tirer, en signe de resjouissance, les canons de mon arsenal, selon que vous entendrez plus particulièrement par le sieur de la Varenne, que j'envoye pour cet effet. Priant sur ce, etc.

. Escrite à Fontaine-bleau, le 27 septembre.

HENRY.

Et plus bas, RUZÉ.

*Lettre de la main du Roy à M. de Rosny.*

Mon amy, j'attendray à Saint-Germain, où j'espere estre en bref, que vous et ceux de mon conseil me representent l'importance de l'affaire de Saint-Quentin, pour sur cela vous faire à tous entendre ce qui est de ma volonté. Je trouve bon ce que vous avez fait pour le sieur Zamet sous un nom emprunté, comme les conditions que vous m'avez mandées, aussi que vous n'avez les oreilles bouchées si d'autres offrent davantage. Suivant vostre advis, j'escris à ceux de mon conseil et au prevost des marchands et eschevins de ma ville de Paris les lettres que vous me mandez. Pour Vernay de Chinon, il lui faudra bailler une bonne assignation de ce que montent les deniers destinez pour la garnison de Chinon durant cette année, qui luy ont esté promis par le sieur de Souvré en sortant de la place, et au capitaine Dauphin les certains, à ce qu'il ayt moyen d'y entretenir les soldats que je luy ay ordonnez. Je suis bien ayse que ce qu'il faut pour le voyage et ameublement du sieur de Silery, pour son ambassade à Rome, soit prest, dautant que je veux qu'il parte au plutost. Puis que la commodité de mes affaires ne me permet davantage pour le present, il faut qu'il s'en contente; et quelque autre occasion s'offrant, je seray bien ayse de luy tesmoigner comme je l'ayme. Je suis d'advis que l'on tienne les estats de Languedoc au bas, dautant que c'est la premiere fois qu'ils sont réunis, et qu'il ne seroit à

propos que mes serviteurs, pour la premiere fois, allassent où estoient ceux de la ligue : pour l'année qui vient, on les tiendra au haut. Je trouve bonne la nomination que vous avez faite de la personne de M. de Maisse pour aller en Languedoc et Provence, et pour cet effet, je luy escris de s'apprester pour ledit voyage, comme celle du sieur de Jambville, pour envoyer sur les rivières regler et establir les impositions, auquel j'escris aussi, estant assez capable, pourveu qu'il veuille bien faire. Je vous envoie le dernier traitté qui a esté fait avec le sieur Zamet, lequel j'ay veu, l'ayant signé de ma propre main. Pour l'abbaye du Bays, dont m'escrivez que vous pensiez vaquante par la mort de M. de Langres, mon cousin le duc de Biron me l'avoit envoyé demander par Prevost, qui fait ses affaires; mais n'en ayant eu aucunes nouvelles depuis, je croy qu'il n'est pas mort. Ne doutez nullement que s'il vaque quelque chose, que je vous oublie, ny la promesse que je vous ay faite. Adieu, mon amy.

A Monceaux, ce 16 novembre. HENRY.

J'oubliois à vous mander qu'il importe à mon service que le sieur de La Fontaine s'en retourne en Angleterre, où sa presence est necessaire. C'est pourquoy, je vous prie, que l'on luy fasse bailler des moyens, à ce qu'à faute de cela il ne sejourne pas plus long-temps par deçà. Tenez la main que l'on ne distraye point les deniers destinez pour le pont de ma ville de Paris, dautant que je veux que l'on y travaille au commencement de l'année qui vient, ainsi que je l'escris à monsieur le premier president, qui est un des commissaires.

## CHAPITRE CVI.

*Prétentions du comte de Soissons. Affaires étrangères. Découverte de la conjuration du maréchal de Biron.*

Environ le temps de la naissance de monsieur le Dauphin, mourut la princesse de Conty, et lors M. le comte de Soissons fit parler au Roy d'achepter les droits qu'il disoit avoir en Piedmont, à cause de la maison de Montaffier (1), de laquelle sa femme estoit heritiere, et faisoit grande parade d'iceux; pour la liquidation et prisée desquels vous ayant esté commis, ce prince demeura grandement offensé (sans en faire neantmoins rien paroistre pour lors) de ce que

(1) Le prince de Conti avait épousé en premières noces Jeanne de Coesme, dame de Bonne-Table, veuve de Louis, comte de Montaffier en Piémont; et le comte de Soissons avait épousé Anne de Montaffier, fille de Louis et de Jeanne de Coesme.

(Note de l'abbé de l'Écluse.)

vous dites que tout cela n'estoit pas de grande valeur, et encor situé en pays si desavantageux pour en jouyr et tellement litigieux, qu'il cousteroit à en percevoir les revenus autant qu'ils valaient. Sa Majesté envoya sur la fin de l'année monsieur le Dauphin à Saint Germain, pour y estre nourry à cause de la bonté de l'air, et vult, tout jeune qu'il estoit, qu'il passast par les ruës de Paris, et fut monstré tout à descouvert au peuple, qui le vid et receut avec acclamations publiques.

Or, le Roy ayant receu, pendant cette année 1601, en divers temps diverses lettres des choses de consequence qui se passoient aux pays estrangers, et vous les ayant envoyées lors qu'il les recevoit, vous nous en dites quelque chose, que nous vous ramentevrons icy en gros, laissant la particularitez d'icelles aux historiens, pour ce qu'il n'y avoit rien qui touchast vostre particulier : comme la defaite des Espagnols, joints aux Irlandois revoltez contre cette brave reine Elizabeth, laquelle ayant fait assieger la principale et plus forte ville qu'ils occupassent, nommée Quinzal, et le comte de Tiron, chef des rebelles, et dom Alonce del Campo, des Espagnols, estans accourus au secours avec tout ce qu'ils avoient peu r'assembler, ils furent taillez en pieces par le milord Persy, general des Anglois, Alonce fait prisonnier et la ville conquise; la conference ou diette tenuë à Ratisbonne, entre les docteurs de plusieurs princes d'Allemagne, catholiques et protestans, pour trouver quelque accommodement sur les differens pour la religion, de laquelle ils se retirerent sans aucun fruit, dautant qu'il n'y fut traité que de l'autorité de la sainte Escripture, les catholiques soutenant qu'elle dependoit du jugement et sens de l'Eglise, et notamment du Pape, qu'ils disoient estre cet homme spirituel, dont il est parlé en la premiere epistre aux Corinthiens, chapitre 2, vers. 15. *Qui a pouvoir de discerner de toutes choses et de n'estre jugé de personne*, dequoy les protestans s'estans mocquez et maintenu le contraire, ils s'estoient separez plus animez les uns contre les autres qu'auparavant; les mouvemens et rebellions des Transilvains et des waivodes Battory et Michæl contre l'Empereur, sur lesquels il se passa diverses actions et accidens grandement memorables, ayans esté enfin vaincus par Georges Baste et la ville de Clausembourg prise; les heureux progrez du duc de Mercœur en Hongrie d'une part, lequel ayant pris Albe-regale, que l'on reputoit imprenable, la delivra encor depuis d'un grand siege que les Turcs y avoient mis; et de l'autre, les mauvais succez de l'archiduc Ferdinand devant Canise;

les impetueux tumultes arrivez à la porte du roy des Turcs, les jannissaires ayant pris les armes contre celuy qui dominoit lors, nommé Mahomet, le menaçant de le déposer et d'en mettre un autre en sa place, s'il ne devenoit plus diligent, vaillant, laborieux et loyal en ses promesses, et moins cruel, avaricieux et voluptueux, et en vindrent à telle audace, qu'ils luy estranglerent sept de ses mignons dans son serrail en sa presence; l'apparition d'un certain homme, soy disant estre dom Sebastien, roy de Portugal, que l'on avoit tenu pour mort, luy ressemblant tellement, faisant voir des remarques non communes en sa personne et recitant des paroles et faits tant secrets et particuliers pour les affaires qui avoient passé, que peu s'en trouva de non passionnez ou interessez contre luy, qu'ils ne l'estimassent tel qu'il se disoit, surquoy le roy d'Espagne, voyant cette creance quasi universelle en sa faveur, eut l'esprit tellement agité d'apprehensions, que pour se développer d'icelles, il en fit desempestrer le monde; la prise et destruction de la ville de Passava en la Morée, par les chevaliers de Malte; la formation d'une grande armée navale pour le roy d'Espagne, dont le prince d'Oria fut fait general, des desseins de laquelle l'on a discours tant diversement que jusqu'icy l'on n'en a sceu autre chose, sinon qu'apres avoir rodé une partie de la mer Mediterranée, elle eut les vents si contraires et fut assaillie de telles bourrasques, que, sans avoir fait aucun exploit d'importance, elle relascha au port de Barcelonne, estant fort deslabrée, voire quasi ruynée.

Peu apres, le Roy receut des advis de plusieurs lieux bien certifiez (ainsi qu'il vous en dit quelque chose estant appuyé avec vous sur le balcon de la grande allée de l'Arsenac, où il s'estoit venu promener pour voir vos magazins que vous commenciez à bien munir d'armes, artilleries et autres ustancilles) que, nonobstant tout ce que M. le mareschal de Biron luy avoit confessé à Lyon, se promenant avec luy dans les Cordeliers, des menées qu'il avoit faites avec M. de Savoye, sous esperance d'espouser sa fille, le pardon qu'il en avoit requis et obtenu, et les sermens et protestations qu'il luy avoit faites de ne retomber de sa vie en semblables crimes, ny de ne sçavoir jamais rien qui peut prejudicier à son service, sans l'en advertir; nonobstant encor toutes les faveurs, honneurs, beneficences et gratifications dont il avoit usé en son endroit, pour le retirer de ses folles fantaisies et pernicieux desseins, il s'estoit tout de nouveau restraints d'amitié avec messieurs le comte d'Auvergne et mareschal de Boüillon, jusques à s'estre donné la foy et fait

une association générale entr'eux, avec promesse par escrit pour s'entre-maintenir, et deffendre l'un l'autre envers et contre tous, avec ces mots, *sans nul excepter*, comme je l'ay sceu par personnes de probité qui l'ont veu; et que, suivant leur premier projet, ils traittoient avec le roy d'Espagne et le duc de Savoye; qu'en France, ils essayoient de gagner des plus grands, voire jusques à de ses princes et plus autorisez officiers, et usoient de toutes sortes de malicieux artifices envers la noblesse, les villes et les peuples, pour fomentier ce qu'ils y voyoient de mal-contentemens, et en exciter de nouveaux, en exagérant sur toutes choses cette imposition du sol pour livre, contre laquelle vous aviez esté tant contraire en l'assemblée de Rouen, et qui se continuoient encor, nonobstant tout ce que vous aviez pû dire pour la faire esteindre, et la gabelle du sel qu'ils faisoient courir le bruit se devoir bien tost establir en Poictou et Guyenne, enquoy ils ne faisoient pas un petit progresz, ayans des gens appostez fort propres pour jeter telles pernicieuses semences dans les esprits les plus legers, et ne se trouvant personne qui eut charge de contre-dire, ce faux bruit et faire cognoistre la verité.

Or, sur tel sujet prendrons-nous licence de vous faire un petit discours par forme de disgression, pour vous dire et à tous autres, si jamais ces recueils sont mis en lumiere, qu'il ne s'est quasi jamais veu d'Estat, principauté, royaume ny republique si bien composée, estable et affermie, de prince, de roy ny de souverain si doux, si sage et si heureux, ny de forme de gouvernement et d'administration tant équitable, modérée et réglée avec ses justes et deües proportions, qu'ils se trouvassent également agreables à tous ceux qui leur seroient sous-mis et assujettis. Mais que tout au contraire mille sortes d'experiences nous enseignent que, par la depravation, corruption et perversité de la nature humaine, tous les esprits capables de raison se trouvent tellement des-raisonnables, tant inquietez, impatientiens de repos et desirieux de nouveutez et changemens, que la condition la plus heureuse où ils scauroient estre, les chagriner, leur ennuyer et degouter, et sont tant universellement et puissamment possédez d'un esprit de despit et mal contentement, qu'ils ne se scauroient empescher de se plaindre, doulouir et mal-contenter, non seulement de leurs souverains princes, leurs ministres, magistrats et superieurs, de leurs egaulx, emulateurs et compagnons, de leurs inferieurs et serviteurs, de leurs femmes, enfans, parens et amis, quelques bons et amiables qu'ils puissent estre; mais aussi de parler quelquefois

contre Dieu et eux-mesmes, quelques-uns se trouvant de si maligne inclination, tant estourdis et inconsideres, que de se despitier et courroucer contre les animaux tant doux et innocens, desquels ils tirent de si grandes utilitez et commoditez qu'ils ne s'en scauroient passer; voire contre le ciel, la terre, la mer, les eaux, les astres, les meteores, les saisons, le chaud, le froid, les herbes, les plantes et les choses dont ils se substatent, comme si elles estoient causes de leurs maladies, douleurs et incommoditez, et non leurs imprudences et mauvais usage.

Et partant, comme il paroist que le mal-contentement est un des plus universels defauts qui soient és hommes, aussi fut-il du tout impossible à nostre grand Roy d'éviter que ses vertus et prosperitez ne fussent envieés des malins, et que nonobstant sa prudence, valeur, debonnaireté, familiarité, foy entiere et agreable conversation, il ne se formast quelques mal-contentemens contre luy, les peuples estans à cela sollicités par ces trois puissans esprits que j'ay nommez et autres de leur faction, et qu'ils n'engendrassent des mauvais bruits, tumultes et rumeurs, ausquelles Sa Majesté desirant pourvoir et remedier elle se resolut à deux choses : la premiere, à essayer de decouvrir jusques où pouvoient passer les mauvaises pratiques de messieurs de Biron, comte d'Auvergne et mareschal de Bouillon; et, pour cét effet, resolut de practiquer le sieur de La Fin (lequel estant accousiné par le premier et le dernier, s'estoit le plus entremis de ces facientes, et fait quasi tous les voyages vers le duc de Savoye et comte de Fuentes) qu'il avoit appris s'estre depuis peu retiré en sa maison aucunement mal satisfait du duc de Biron, et y employa si dextrement et heureusement le visdame de Chartre, son nepveu, qu'il le fit disposer à venir à Fontaine-bleau et à ne luy rien celer de tout ce qu'il scavoit de ces menées et pratiques; et l'autre de porter sa personne vers le Poictou, Limousin et Guyenne, esquelles provinces s'espandoient le plus toutes ces mauvaises semences, et vous envoya à Paris pour donner ordre à ce qui estoit necessaire pour un tel voyage. Puis si tost que La Fin fut arrivé à Fontaine-bleau, et qu'il en eut tiré l'esclaircissement qu'il desiroit, l'ayant fait loger à la Mivoye, afin qu'il ne fut veu que de ceux qu'il ordonneroit où il l'alloit entretenir, il vous escrivit une lettre où il n'y avoit que ce peu de paroles.

« Mon amy, venez me trouver en diligence  
« pour chose qui importe à mon service, vostre  
« honneur et le commun contentement de nous  
« deux. Adieu. Je vous ayme bien. »

Sur cette lettre vous pristez incontinent la poste, arrivastes à Fontaine-bleau comme il s'en alloit à la chasse, et le trouvastes tout à cheval dans le milieu de l'advenuë du chasteau. Lors ayant mis pied à terre, vous luy vintes embrasser la botte et il vous serra la teste contre son cœur, selon sa coustume, puis vous dit : « Mon amy, il y a bien des nouvelles, toutes les conspirations contre moy et mon Estat, dont nous ne faisons que nous douter, sont maintenant decouvertes, le principal des negotiateurs d'icelles m'est venu demander pardon et me tout confesser. Il y embarasse beaucoup de gens et des plus grands et des plus obligez à m'aymer. Mais c'est un grand menteur et suis resolu de ne rien croire de luy que sur bonnes preuves ; entre-autres il y en met que vous ne penseriez jamais : or, devinez qui. — Jesus ! Sire, dites vous, deviner un homme qui soit traistre, c'est ce que je ne feray jamais. » Et apres qu'il vous eut dit deux ou trois fois, « mais encores, devinez ? » et que vous luy eustes tousjours respondu que vous ne devineriez jamais cela, il vous dit : « M. de Rosny en est ; le cognoissez vous bien ? » Lors vous vous mistes à rire, et luy dites : « Hé quoy ! Sire, les autres n'en sont-ils point plus que moy ? Si ainsi est, vous ne vous devez pas mettre en beaucoup de peine ; car l'effet vous justifiera la sincerité de mon cœur. — Or bien, dit le Roy, aussi n'en ay-je rien creu, et pour vous le monstrar j'ay commandé à Bellievre et à Ville-roy de vous aller trouver et vous porter toutes les accusations, tant contre vous que contre tous les autres, et faire voir les preuves ; et mesmes j'ay dit à La Fin, qui est celuy qui m'a decouvert la menée, que je voulois qu'il vous vist, et vous parla librement de tous ces desseins. Il a esté aux pressoirs, est caché à la Mivoye, et vous ira trouver dans la forest entre-cy et Moret. Mandez-luy l'heure et le rendez-vous, et qu'il n'y ait personne que vous deux. » A quoy vous ne manquastes pas ; et ayant longuement entretenu ledit sieur de La Fin au lieu que vous luy aviez designé dans la forest, et amplement veu et visité avec messieurs de Bellievre et de Ville-roy tous les papiers, lettres, memoires et preuves qu'il avoit fournies contre messieurs les duc de Biron, comte d'Auvergne, mareschal de Bouillon et autres, que nous ne nommerons pas et pour cause, il fut tenu un conseil par le Roy avec vous trois, auquel il fut resolu de ne faire encor rien esclater contre aucun d'eux, mais de tenir le tout secret jusques à ce que l'on eut moyen de faire venir M. de Biron en Cour, et cependant ( afin de donner moins d'ombrage et dis-

siper plus efficacement toutes ces rumeurs, menées et practiques dans les provinces où elles estoient les plus fomentées ) avancer le voyage de long-temps projectté vers les Blaizois, la Tourraine, le Poictou et la Xaintonge.

## CHAPITRE CVII.

*Lettres diverses de l'année 1601. Restitution faite par le grand-duc de Florence du chdteau d'If et de l'île de Pomegue.*

Comme nous nous disposions de mettre fin à nos recueils des choses que le journal de vostre vie nous peut avoir appris estre venuës à vostre cognoissance des merveilles du Roy durant l'année 1601, nous avons recouvert par hazard un gros roolle de lettres de sa main à vous adressantes, sur lesquelles nous nous sommes trouvez bien empeschez à discerner de quelles années elles pouvoient estre escrites, à cause qu'elles n'avoient autres dattes que celles des jours et peu souvent des mois. Mais en ayans rencontré quelques-unes entre icelles qui estoient contre-signées et dattées de l'année 1601, d'entre ce grand nombre de celles de la main du Roy que nous avons estimé devoir estre de ladite année, nous avons, afin d'abreger le plus qu'il nous sera possible, choisi quelques-unes des plus courtes, voire mesmes aucunes de la moindre consequence, pour faire voir que, jusques aux plus petites choses, Sa Majesté prenoit bien la peine de vous en escrire de sa main, et mesme vouloit que les plus autorisez dans ses affaires, passassent par vos ordres et advis, comme messieurs de Bellievre, de Sancy et de Sillery en serviront de preuves dans quelques-unes desdites lettres, par le chapitre desquelles nous terminerons donc nos recueils de 1601 ; vous supplians neantmoins tant d'obliger ceux qui les liront que de vouloir faire ranger en leur ordre et en leur temps toutes ces lettres et autres qui en auront besoin, s'il est possible que vous ayez encore assez bonne memoire pour vous souvenir de tout cela apres un si grand nombre d'années escoulées depuis qu'elles ont esté escrites.

*Dix-neuf lettres de la main du Roy et cinq contre-signées, à M. de Rosny (1).*

Mon amy, je n'ay voulu differer plus long-temps à vous faire part de mon contentement,

(1) Dans les quatre éditions différentes des *Economies royales* que nous consultons habituellement, on lit *vingt-trois lettres de la main du Roy et sept contre-signées*, bien que dans le chapitre CV il ne s'en trouve que vingt d'une part et cinq de l'autre. Au lieu de vingt, nous n'insérons ici que dix-neuf lettres de la main du Roi, parce que nous en supprimons une du 19 septembre, déjà imprimée

qui est que la Reine ma femme vient tout presentement d'accoucher d'un fils, à ce que vous vous en resjouyssez avec moy, qui vous dépêche la Varenne expres pour vous porter cette bonne nouvelle. Adieu, mon amy.

Ce jeudy 27 septembre, à Fontaine-bleau, à dix heures du soir. HENRY.

Mon amy, j'ay fait dépêcher une ordonnance au sieur Garnier, mon predicateur ordinaire, de la somme de deux cens escus, pour avoir presché devant moy l'Advent et le Caresme; et outre ce, je le meine encor en ce voyage. C'est pourquoy et pour le contentement que j'ay de luy, attendant que j'aye moyen de faire mieux pour luy, je vous prie de faire qu'il soit payé comptant de ladite somme de deux cens escus, et que me servant bien comme il fait, il ait autant d'occasion de contentement et d'affectionner mon service qu'ont eu les autres employez en sa charge par les roys mes predecesseurs. Et sur ce, Dieu vous ayt, mon amy, en sa sainte et digne garde.

Ce 6 avril, à Fontaine-bleau. HENRY.

Mon amy, je vous envoie avec cette-cy trois memoires qui m'ont esté baillez, desquels l'on m'a assuré que je pourray recouvrer force argent; c'est pourquoy je vous prie de les bien voir, et les faire voir à ceux de mon conseil que vous jugerez à propos, pour sur iceux prendre quelque bonne resolution, ayant resolu que les deniers qui en proviendront ne seront distribuez que par vostre ordonnance. J'escry à Santenay de vous en parler et vous solliciter de cela. Cette-cy n'estant à autre fin, je prieray Dieu qu'il vous ayt, mon amy, en sa sainte garde.

Ce 12 avril, à Fontaine-bleau. HENRY.

Mon amy, je seray demain au soir, Dieu aydant, de bonne heure à Paris, et jeudy ma femme et moy nous trouverrons apres disner à l'Arse-nac, pour voir fondre les quatre coulevrines, et de bonne heure. Bon soir, mon amy.

Ce mardy au soir 17 septembre, à Saint Germain en Laye. HENRY.

Mon amy, faites payer au sieur Zamet la somme de quarante-neuf mille neuf cens dix livres que je luy dois, laquelle il m'a prestée à plusieurs et diverses fois, durant l'année dernière, et dont il m'a rendu compte, et faites employer ladite partie au premier roolle de comptant, que vous ferez expedier comme chose que je desire. Sur ce, Dieu vous ait, mon amy, en sa sainte et digne garde.

Ce 11 fevrier. HENRY.

dans le chapitre précédent. Ce double emploi a été reproduit dans les quatre éditions dont nous venons de parler. (Note de M. Petitot.)

Mon amy, sur ce que j'ay entendu que le sieur Martin poursuit la suppression des deux estats de collecteurs des tailles en mon duché d'Albret, lesquels ont esté pourvus desdits offices par moy, et desquels j'ay receu la finance, et que de tout temps mes predecesseurs ducs d'Albret ont jouy de ce privilege, comme vous verrez par les lettres de provision qui vous en seront montrées, aussi que outre ledit privilege, ma sœur a interest à la conservation desdits offices, pource que cela est dans son partage provisionnel, et que si les pourvus estoient supprimez, pour leur remboursement ils saisiroient son revenu le plus clair; cela est cause que je vous ay bien voulu faire ce mot de ma main, pour vous dire que vous fassiez surseoir le jugement de cette affaire, jusques à ce que je vous aye sur cela fait entendre plus amplement ce qui est de mon intention, comme aussi j'escry le semblable à monsieur le chancelier. Et sur ce, Dieu vous ait, mon amy, en sa sainte et digne garde.

Ce 16 aoust, à Saint Germain en Laye, au soir. HENRY.

Mon amy, depuis vous avoir fait entendre ma volonté touchant le droict de patente de Languedoc, on m'a représenté de la part du pays, que ce n'est pas une ferme, mais bien un octroy non sujet aux encheres, fondé sur le devoir, auquel ledit pays s'est mis de m'assister outre mes deniers ordinaires, dont il a esté desjaourny en mon espargne cinquante mille escus, apres qu'il a esté trouvé nécessaire, pour le bien de mon service, et raisonnable de gratifier en cela le pays par l'intercession de l'evesque de Lodesve, qui se doit rendre aupres de moy dans peu de jours. C'est pourquoy ne voulant donner occasion à mes sujets dudit pays de se plaindre, je vous prie d'adviser sur ce fait-là avec ceux de mon conseil, pour en ordonner ce que vous jugerez estre à propos pour le bien de mon service, remettant cette affaire là à vous. Sur ce, Dieu vous ayt, mon amy, en sa sainte garde.

Ce 18 may, à Fontaine-bleau. HENRY.

Mon amy, je vous envoie un placet que m'a présenté mon neveu le prince de Joinville, afin que sur iceluy vous me mandiez vostre advis; car je serois tres-ayse, l'aymant comme je fais, de le pouvoir gratifier de cela, si c'est chose qui ne porte pas grand prejudice à mes affaires et à mon service. Cette-cy n'estant à autre fin, Dieu vous ayt, mon amy, en sa sainte garde.

Ce 14 may, à Fontaine-bleau. HENRY.

Mon amy, il y a quelques jours que je vous escrivy de me donner advis d'un placet que mon neveu le prince de Joinville me presenta, pour,

si l'on ne faisoit aucun estat des deniers contenus en iceluy, luy en donner quelque somme. Mais lors je ne me souvenois que le dernier voyage que je fis à Paris, la marquise de Verneuil m'ayant demandé la mesme chose, je la luy avois accordée, si que mon neveu ne s'est aucunement prevalu dudit advis, qui a fait que sur d'autres qu'il m'a presentez, je luy ay accordé dix mille escus, comme vous verrez par le brevet que je luy en ay fait expedier, où ils sont specifiez. C'est pourquoy je vous prie de les voir, afin que si vous jugez qu'ils soient justes et faisables, vous teniez la main à ce que mondit neveu puisse jouyr de la liberalité que je luy ay accordée, et vous me ferez service tres-agreable, dautant que je l'ayme et desire faire quelque chose pour luy. Sur ce, Dieu vous ait, mon amy, en sa sainte garde.

Ce 26 may, à Fontaine-bleau. HENRY.

Mon amy, j'ay sceu que vous estiez arrivé à Rosny; je vous ay despesché ce courrier, pour vous mander que vous me veniez trouver, pour ce que j'ay receu des nouvelles de M. de La Rochepot, sur lesquelles je veux prendre vostre advis, qui est le sujet de la mienne.

Ce 17 septembre, à Fontaine-bleau. HENRY.

Mon amy, il est impossible de croire comme ma femme se porte bien, veu le mal qu'elle a eu. Elle se coiffe d'elle mesme et parle desja de se lever, mesme elle va jusques à sa garderobe; elle a un naturel terriblement robuste et fort. Mon fils se porte bien aussi, Dieu mercy, qui sont les meilleures nouvelles que je puis mander à un serviteur fidele et affectionné, et que j'ayme. Vous sçavez comme ma femme a gagné Monceaux, puis qu'elle m'a fait un fils. C'est pourquoy je vous prie d'envoyer querir le president Forget, et conferer avec luy de cette affaire là, et adviser des moyens et de la seureté qu'il y faut tenir pour mes enfans, donnant ordre que la somme pour laquelle je le prends leur soit bien assurée. Comme j'achevois cette-cy, j'ay receu la vostre. Je croy comme vous ce que vous me mandez de la faveur que Dieu m'a faite de me donner un fils, et que vous et tous les gens de bien de mon royaume, et qui m'ayment, s'en resjoüyssent avec moy. Hier, revenant de courre un cerf que je faillis, j'ouys tirer le canon de Paris. Adieu, mon amy.

Ce 29 septembre, à Fontaine-bleau. HENRY.

Mon amy, estant resolu, durant que je feray ma diette, de prendre plaisir à quelque chose et passer mon temps, ma femme a fait le mariage de Magdeleine sa More, avec un des siens, et moy en faveur d'iceluy, je luy ay promis la

somme de six cens escus, luy en ayant, à cette fin, fait expedier un acquit patent; et pour ce qu'elle ne veut espouser qu'elle n'ait ladite somme, je vous fais ce mot pour vous dire que vous commandiez que ladite somme de six cens escus luy soit promptement payée, afin que la consommation dudit mariage ne soit reculée, auquel ma femme est resoluë de faire quelque festin digne d'une si belle beauté. Adieu mon amy.

Ce 14 may, à Fontaine-bleau. HENRY.

Mon amy, souvenez-vous de parler au prevost des marchands de ma bonne ville de Paris, pour luy faire entendre comme ils devroient bailler à ma femme la tapisserie qu'ils luy ont promise à cause de son heureux accouchement de mon fils le dauphin. Bon jour mon amy.

Ce 15 novembre, à Saint Germain en Laye. HENRY.

Mon amy, pour ce coup vous serez exempt de nous donner à souper à nostre arrivée à Paris, où je seray demain au soir, Dieu aydant, et j'y veux parler à vous; c'est pourquoy à mon arrivée je vous manderay où je seray, pour me venir trouver. Ma femme y arrivera le lendemain, qui ira descendre chez Gondy, où nous coucherons ce soir-là; et le lendemain, apres y avoir dîné et veu la foire, nous irons coucher au Louvre. Bon jour mon amy.

Ce mercredy matin, 7 fevrier, à Fontaine-bleau. HENRY.

Mon amy, à mon autre que vous recevrez par cette mesme voye, j'adjousteray encore ce mot, pour vous dire que je suis bien trompé si, quelque mine que fassent ces gens icy, ils ne nous veulent tromper et gaigner temps. Au demeurant, je vous prie de vous enquerir, sans qu'on s'en apperçoive, d'un voyage qui a esté fait depuis peu à Bar, en poste, et si celuy que vous sçavez n'y a pas esté avec M. de Mont-pensier, en habit desguisé, comme l'on me l'a mandé, et vous en enquerez si particulierement, qu'à vostre retour j'en puisse avoir des nouvelles: vous sçavez si cela me touche. Adieu mon amy.

Ce dimanche, 30 juillet, à Lyon, à midy.

HENRY.

Mon amy, quelque temps avant mon partement de Paris pour aller à Lyon, le sieur de Sancy me proposa un advis, duquel il me dit que je pourrois tirer une notable somme de deniers; et par ce que si cét advis se trouvoit bon, je serois tres-ayse d'en prendre quelque chose pour employer à mes bastimens, dautant que le fonds que nous y avons destiné pour cette année n'est suffisant, j'ay commandé audit sieur de

Sancy, par les mains duquel vous recevrez cette-cy, de conferer avec vous dudit advis, lequel il trouve si certain, qu'il offre de me vendre son grand diamant, à prendre son assignation sur cette nature de deniers. Mandez-moy donc vostre advis sur iceluy; car s'il est tel que l'on m'asseure, je seray tres-ayse, en retenant la meilleure partie pour moy, d'assigner ledit sieur de Sancy de quelque chose sur ce qui luy est deu; et si d'aventure l'on vous en parloit, vous direz comme je l'ay, il y a long-temps, retenu pour moy; mais je vous prie de m'en escrire vostre advis. Au demeurant, j'ay commandé à Zamet de vous parler d'un leopardier qui est venu avec ma femme, de Florence, et qui s'y en retourne. Je vous prie de luy faire donner de l'argent pour s'y en retourner, comme j'ay commandé audit Zamet de vous dire de ma part. Sur ce, Dieu vous ayt, mon amy, en sa sainte garde.

Ce 16 avril, à Fontaine-bleau. HENRY.

Mon amy, ce pourquoy je vous envoyay chercher hier matin pour parler à vous, estoit pour avoir oublié de vous dire comme le chevalier Vinta m'avoit supplié de vous commander de vous assembler, vous, monsieur le chancelier et le sieur de Maisses, ou autres de mon conseil, que vous adviseriez pour achever de traiter avec luy ce que l'on avoit commencé à Lyon; ce que je vous prie de faire incontinent. Aussi comme Antonio Perez m'estoit venu trouver et remercier des trois mille escus que je luy donnay, et tesmoigner comme il en estoit tres-content et l'obligation qu'il m'en avoit, me suppliant que sur l'estat, l'on le couchast pour quatre mille, afin que si d'aventure les Espagnols en avoient cognoissance, ils ne sceussent qu'il fust pirement traité en cette année, qu'il l'avoit esté les precedentes. C'est pourquoy, pour contenter la vanité de cet homme, je vous prie de l'employer sur ledit estat pour ladite somme de quatre mille escus. Adieu mon amy.

Ce 17 mars au matin, à Saint Germain en Laye. HENRY.

Mon amy, le sieur de Gondy s'en va par de là pour achever de faire ce qui reste és affaires que j'ay avec mon oncle, le grand duc de Toscane, et qui me concernent, passer les quittances et arrester les comptes, et par mesme moyen il demande d'arrester les siens propres, et separer ce qui luy est deu, des sommes deuës à mondit oncle. C'est pourquoy je vous prie de voir le tout et le traiter favorablement en ce qui touche son particulier, me faisant entendre ce qui en est, pour le depescher comme j'aviserais et sera rai-

sonnable; cette-cy n'estant à autre fin, je prieray Dieu qu'il vous ayt, mon amy, en sa sainte garde.

Ce 14 avril, à Fontaine-bleau. HENRY.

Mon amy, j'ay receu la vostre par Beringuen; vous m'avez fait service tres-agreable d'avoir parlé à mon cousin le comte de Soissons, suivant le commandement que je vous en avois fait, et suis tres-ayse de ce que vous l'avez trouvé tres-resolu aux propositions que vous luy avez faites; j'estime que ce sera pour le meilleur, que je ne luy en parle qu'apres le baptesme de mon fils. Ledit Beringuen m'a apporté les mille livres que vous m'avez envoyez. Je trouve fort bon ce que vous m'avez mandé par luy touchant messieurs de Bellievre et Sillery. J'avois pensé, pour leur tesmoigner comme le service qu'ils m'ont fait m'a esté tres-agreable, de leur donner la premiere évesché ou abbaye de mon royaume, qui viendrait à vacquer et qui seroit de bon revenu. Mandez-moy si cela ne sera pas bien à propos, et vostre advis là dessus, ou ce que vous pensez que je leur doive donner. Pour les manufactures, ne craignez point que je gaste rien, faites seulement ce que je vous ay commandé; mais sur tout souvenez-vous de traiter avec M. de Gondy, car cela importe, comme vous le pouvez bien juger. Adieu mon amy.

Ce 26 aoust à Crosne, où je sejourne encore tout aujourd'huy. HENRY.

*Lettre du Roy à M. de Rosny, contre-signée.*

Mon cousin, vous sçavez par la lettre que j'escriis à ceux de mon conseil, la resolution que j'ay prise sur les trois points desquels vous aviez donné charge au sieur de Ville-roy de me faire rapport; partant je ne vous en feray reditte par la presente, seulement je vous prieray donner ordre que les choses passent comme je l'ay ordonné. Pourvoyez pareillement au payement du voyage de Venise et de l'ameublement du sieur de Fresnes, Canaye, ainsi que nous l'arrestasmes dernièrement ensemble, afin qu'il s'y puisse acheminer au plutost, et vous souvenez de la provision qu'il faut envoyer en Hollande, en m'advertissant du temps que la premiere voiture sera preste à partir. Preparez aussi le present que j'ay deliberé d'envoyer au roy d'Escoce, avec l'argent necessaire pour celui par lequel je le veux envoyer, que j'entends faire resider quelque temps aupres dudit Roy, suivant ce que je vous dit dernièrement; car j'ay choisi un homme que j'estime, qui sera propre pour me servir en cette occasion. Je prie Dieu, mon cousin, qu'il vous ait en sa sainte et digne garde.

Escrite à Fontaine-bleau, le premier de may 1601.

HENRY.

Et plus bas, DE NEUF-VILLE.

*Lettre du Roy à M. de Rosny, contre-signée.*

Mon cousin, vous sçavez combien il importe à mon service, que la fortification de ma ville d'Antibe soit achevée, estant en tel estat maintenant qu'il est tres-facile non seulement de la forcer, mais aussi de la surprendre, comme m'a remonstré ce porteur que les habitants ont envoyé vers moy. Les deux mil escus faisans portion des cinq mil que ceux de Provence avoient levez sur eux, pour payer les cinq cens hommes qu'ils m'avoient offert d'entretenir aupres de moy durant la guerre de Savoye, lesquels nous avons depuis affectez aux fortifications de ladite ville et de Saint Tropez, n'ont esté payez, ayans esté divertis à autres effets contre ma volonté. Tellement que l'on ne travaille point à ladite ville, ny à l'autre, dequoy j'ay escrit mon advis à mon neveu le duc de Guyse et à ceux dudit pays. Mais je pense qu'il sera difficile de retirer d'eux lesdits derniers, encor que je leur aye commandé expressément de les remplacer et que je sois bien resolu de ne les leur quitter : c'est pourquoy je vous prie d'ouyr les ouvertures que vous fera cedit porteur au nom desdits habitans, offrans de faire un bastion à leurs despens et de s'esvertuer pour achever ladite fortification si je les y veux assister, chose que je desire grandement, cognoissant combien il importe à mon service d'asseurer ladite place et les autres dudit pays. Oyez le donc et le faites promptement despescher le plus favorablement que faire se pourra. Priant Dieu qu'il vous ayt, mon cousin, en sa sainte garde, etc.

Escrite à Fontaine-bleau, le vingt-quatriesme jour de may 1601.

HENRY.

Et plus bas, DE NEUF-VILLE.

*Lettre du Roy à M. de Rosny contre-signée.*

Mon cousin, j'escrivis à ceux de mon conseil des finances, le 20 de ce mois, l'advis que j'avois eu de l'arrivée en ma ville de Lyon des deux ambassadeurs que la seigneurie de Venise envoie vers moy, afin qu'ils advisassent à donner ordre à leur reception, logement et traitement, leur mandant que je voulois qu'il en fust usé comme il fut fait envers les sieurs Gradenigo et Delphin, qui me furent envoyez par la mesme republique apres mon entrée en ma bonne ville de Paris, eux y (entre lesquels est encore ledit sieur Delphin) venans pour me visiter, tant sur le fait de la paix que sur celui de mon mariage,

à quoy j'estime que lesdits sieurs de mon conseil et vous aurez pourveu. Toutesfois comme c'est chose qui importe à ma dignité et à mon service, et que j'ay esté adverty qu'ils doivent arriver aujourd'huy ou demain en ma ville d'Orléans, j'ay voulu vous rafraischir ce commandement, afin que vous donniez ordre que mon intention soit en cecy suivie et effectuée, comme il convient. Vous preparez aussi les deux presens qu'il faut faire ausdits ambassadeurs, quand nous les licencierons, ce que je fais estat de faire le plutost que je pourray, ayant mandé à leur ambassadeur ordinaire qu'il advertisse les autres, qu'ils prennent le droit chemin d'Orléans en madite ville de Paris. Tellement que j'estime qu'ils y arriveront bien-tost, ce que je vous mande, afin que vous donniez ordre que vous n'y soyez surpris; je m'en repose donc principalement sur vous, et prie Dieu, mon cousin, qu'il vous ayt en sa sainte et digne garde.

Escrite à Fontaine-bleau, le vingt-cinquesme jour de may, 1601.

HENRY.

Et plus bas, DE NEUF-VILLE.

*Lettre du Roy à M. de Rosny, contre-signée.*

Mon cousin, estant encore incertain du temps que je partiray d'icy, je desire que monsieur le chancelier et vous m'y veniez trouver avec ceux de mon conseil des finances, et que vous y soyez vendredy de bonne heure; mais faites entendre à un chacun que je ne veux y parler d'autres affaires que des miennes, encore des plus pressées, comme je l'escris audit sieur chancelier, par la lettre que j'adresse en general à ceux de mondit conseil. Donnez ordre devant que de partir qu'il demeure quelqu'un aupres des ambassadeurs de Venise, qui ait soin de leurs personnes et traitement durant vostre absence; et quand je vous auray veu je me resoudray du temps et lieu de leur audience. Faites aussi despescher Miramont, ainsi que j'escrivis à ceux de mondit conseil, et dites au mareschal d'Ornano, qu'au retour d'icy vous luy porterez mon intention dernière sur sa depesche : cependant il pourra demeurer à Paris, où vous retournerez deux ou trois jours apres vostre arrivée icy. Je prie Dieu qu'il vous ait, mon cousin, en sa sainte garde.

Escrite à Fontaine-bleau, le vingt-huictiesme may 1601.

HENRY.

Et plus bas, DE NEUF-VILLE.

*Lettre du Roy à M. de Rosny, contre-signée.*

Mon cousin, je me suis resolu de faire venir en ce lieu les ambassadeurs de Venise, suivant ce que j'escris à monsieur le chancelier,



plutost que de les faire attendre à Paris mon retour de Monceaux et celui de la Reine, ma femme, apres la premiere audience que je leur eusse donnée audit Paris, puis que leur legation est commune à madite femme comme à moy. Je me deschargeray aussi en ce faisant de la despençe qu'ils eussent faite attendant mondit retour, et croy qu'ils estimeront plus la reception privée que je leur feray en ce lieu, que si elle se faisoit à Paris avec plus de solemnité. Dites leur que je desire qu'ils partent vendredy pour venir coucher à Melun, le lendemain, qui sera samedy, ils se pourront rendre de bonne heure en ce lieu, et le dimanche ensuivant je leur donneray audience : le lundy ils se reposeront, et mardy prochain ils pourront prendre congé et s'en retourner mercredy à Paris, pour se rafraichir si bon leur semble, et y attendre ma depesche et les presens que je leur feray. Je vous prie donner ordre à tout ce qui leur faudra : faites partir le maistre d'hostel La Clielle avec eux et les autres qui peuvent servir à leur traitement et conduite, afin de les défrayer par les chemins, comme j'entends qu'ils soyent icy. Envoyez querir d'Herbanes, et luy commandez de ma part qu'il se trouve icy dès demain, s'il est possible, ou vendredy de bon matin, avec cinq tentures de tapisserie et trois ou quatre lits, et s'il en faut davantage ils se trouverront icy : faites apporter aussi de la vaisselle d'argent de cuisine avec cinq ou six bassins et autant d'esguieres, et dix ou douze flambeaux d'argent. Et n'oubliez à envoyer un mareschal de mes logis devant à Melun, pour faire marquer le logis desdits ambassadeurs ; et si vous n'en avez par delà, j'enverray d'icy un des miens quand je sçauray quelle suite ils ont avec eux ; mais pour tout cela ne laissez de vous rendre icy au temps que je vous ay mandé. Et sur ce je prie Dieu, mon cousin, qu'il vous ayt en sa saincte et digne garde.

Escrit à Fontaine-bleau, le 30 may 1601.

HENRY.

Et plus bas,

DE NEUF-VILLE.

Or, pour ce qu'entre les susdites lettres à vous escrites par le Roy, il est parlé d'une affaire qu'il vous ordonnoit de traiter avec le chevalier Vinta, et nous semblant à propos de specifier quelle elle estoit, nous vous dirons succinctement et à ceux qui le voudront sçavoir, comme du temps du roy Henry III, lors que chacun prenoit sa piece sur le royaume, le duc de Florence se saisit des isles de Pomegue, Rotonneau et chasteau d'If, et que le roy Henry IV les voulant r'avoir, M. de Ville-roy escrivit à M. d'Ossat, evesque de Rennes, qu'il essayast d'en convenir avec luy, comme il fit, à condition de luy payer

pres de trois cens mille escus qu'il disoit y avoir despendus, et que, pour seureté de sa dette, douze personages d'aupres du Roy s'obligeroient particulièrement au payement d'icelle. Ce qui ayant donc ainsi esté accordé par M. d'Ossat, et luy-mesme en ayant fait une promesse particuliere, le sieur de Gondy et le chevalier Vinta vous en firent parler pour vouloir estre l'un des douze ; mais vous ne fistes jamais que rire au nez de ceux qui vous en estoient venus parler. Ce qu'entendu par M. de Ville-roy, il vous en vint faire instance, disant qu'il falloit descharger M. d'Ossat. Surquoy vous luy dites : « A ce que je voy, M. le duc de Florence me prend pour un banquier ou un marcadant ; or veux-je bien qu'il sçache qu'il n'y en eut jamais en ma race, et partant que je n'en feray rien. » A quoy vous ayant repliqué que les autres du conseil, que Gondy et Vinta avoient nommez, n'en faisoient point de difficulté comme vous, tout en colere vous luy repartistes : « Je croy ce que vous dites, monsieur, car aussi n'y en a-il pas un de tous ceux-là qui ne soit venu de la banque de la mercantie ou de la sotane ; » ce que n'estiez pas vous, et que partant encore une fois n'en feriez vous autre chose. Il fut contesté là dessus avec grand bruit, tant que l'on en vint parler au Roy, lequel ne leur respondit qu'en riant, et disant : « Vrayement vous avez bien travaillé d'en estre allés parler à Rosny, sans me le dire, car moy ne luy en ayant rien dit, je m'estonne qu'il ne vous a respondu encore plus rudement. Ne cognoissez-vous pas bien l'homme qui est glorieux et fait grand estat de sa noblesse illustre, comme, à la verité, elle est telle ? C'est pourquoy achevez cette affaire-là, sans qu'il s'y oblige ny nul autre aussi, car je n'avois donné nulle charge à l'evesque de Rennes de s'obliger à tout cela. »

Mais pour faire voir que c'estoit avec quelque juste raison que vous estiez resolu de ne vous point obliger au payement de la susdite somme de trois cens mille escus ou environ, et que vostre instance fut cause que le Roy ne le voulut plus aussi pour aucun des autres, nous avons bien voulu inserer icy la declaration dudit grand duc, par laquelle il quittoit Sa Majesté de l'obligation à luy accordée par le sieur d'Ossat, des douze fidejusseurs ou respondans d'icelle, la contre-promesse dudit duc estant telle que s'ensuit.

« Dom Ferdinand de Medicis, grand duc de Toscane, comme ainsi soit que le premier jour de may de la presente année 1598, ayant esté arrestez et accordez certains articles entre nous et monsieur l'evesque de Rennes, conseiller d'Estat du Roy tres-chrestien, au nom de Sa

Majesté tres-chrestienne, sur la restitution du chasteau et isle d'If et de l'isle de Pomègue, aupres de Marseille, et sur le remboursement des despences par nous faites pour la conservation dudit chasteau et isles, et qu'entre lesdits articles il y en ayt un, par lequel est promis que Sa Majesté tres-chrestienne fera que douze personages françois, que nous luy ferons nommer, s'obligeront, eux et leurs heritiers, et leurs successeurs, envers nous pour les sommes et en la façon qu'il est contenu au susdit article, et en une promesse dudit sieur évesque; et ayant Sa Majesté tres-chrestienne ratifié purement et simplement les susdits articles, par ses lettres patentes du 25 juin dernier passé, et puis fait nous requerir de vouloir, pour plusieurs dignes respects, le delivrer et quitter de la prestation des susdits douze fidejusseurs: nous, voulans complaire à Sa Majesté tres-chrestienne, déclarons par la presente que nous n'entendons point et ne voulons nous ayder ny servir du susdit article et promesse concernant lesdits douze fidejusseurs, ains y renonçons et quittons Sa Majesté tres-chrestienne et tout autre. En foy dequoy nous avons souscrit la presente, et y fait apposer nostre scel accoustumé.

« A Florence, en nostre palais de Pitti, le 4 aoust 1598. »

## CHAPITRE CVIII.

*Devise des jetons distribués au commencement de 1602. Le Roy donne à Rosny le commandement de la Bastille. Lettres diverses.*

[1602] Nous commencerons ces Memoires de l'année 1602 par le bon jour et le bon an que vous allastes donner au Roy le matin du premier jour de janvier, pour porter à luy et à la Reine leurs bourses de jettons d'or dont vous aviez formé la devise, sur ce que le Roy voyant les brouilleries qui se minutoient par aucuns des plus grands du royaume, et discourant d'icelles avec vous, lors qu'il fut question de resoudre l'estat des gens de guerre à la campagne, vous dit: « Ne me parlez point de rien retrancher à mes regimens entretenus ny à mes garnisons, ny aux compagnies de cavallerie, car tant s'en faut que j'estime mes affaires en estat de le pouvoir faire, que je suis resolu de demander une levée de six mille Suisses, que nous ne ferons neantmoins marcher si le besoin ne s'en offre, si bien que cela nous coustera peu, les succez des affaires et diverses experiences m'ayant appris que comme par les armes les empires se forment, que sans icelles aussi nulles

« dominations ne se sçauroient bien maintenir: surquoy je veux que vous me dressiez une devise pour l'année 1602. » A quoy vous aviez satisfait au moins mal que vous aviez pû, le corps d'icelle estant un dard fiché en terre, lequel y ayant pris racine, reverdissoit et jettoit des branches, faisant allusion à celuy de Romulus, lequel ayant jetté un dard de cormier de dessus le mont Palatin tant qu'il avoit pû, pour designer la grandeur en circonference de la ville qu'il vouloit bastir, dont le lieu où il estoit devoit estre le centre, ce dard s'estant fiché en terre, y prit racine, verdoya et devint arbre, qui a duré jusques sous Caligula, et le tenoit-on comme pour l'une des fatalitez à la grandeur de l'empire, et pour ame à ce corps ces paroles: *Ni vigeant arma labitur imperium.*

Le Roy trouva cette devise assez bien, et, selon son intention, la monstra à ceux de qualité ou de sçavoir qui vindrent à son lever, et leur en fit cas. Or, avant que partir du Louvre, il vous dit: « Vous vous souvenez bien comme La Fin vous avoit voulu envelopper dans les desseins des brouillons; dequoy je me suis mille fois estonné, ne me pouvant imaginer qu'il n'eust esté practiqué par quelqu'un pour me mettre en défiance de vous, et me convier par ce moyen à en mettre un autre dans mes finances qui ne les entendit pas si bien que vous, ne m'y fust pas si loyal, si exact en l'administration d'icelles, ny si ferme et resolu à resister aux importuns et à rejeter les mauvaises affaires; en quoy je vous prie de continuer vos louables procedures. Et pour vous tesmoigner que je me fie en vous plus que jamais, et le faire croire aussi aux autres, je veux que les lettres de provision de capitaine de la Bastille, que pour certaines considerations j'avois voulu estre mises sous le nom du sieur de la Chevalerie, soient maintenant mises sous le vostre, afin que si j'ay des oyseaux à mettre en cage et tenir seurement, je m'en repose sur vostre prevoyance, diligence et loyauté. Car, pour vous en dire la verité, voyant tant de gens enveloppez dans ces practiques et menées, je ne voy que vous qui ayt toutes les parties requises pour me bien servir en une tant importante occasion; et dès ce soir je commanderay au sieur de Ville-roy de vous en faire les expéditions. » Lesquelles vous eustes quelques jours apres, que nous ne transcrivons point icy, pour éviter prolixité, n'y ayant rien d'extraordinaire en icelles.

Pour achever ce chapitre, nous insererons six lettres, quoy qu'elles soient de diverses dattes et diverses affaires, telles que s'ensuit.

*Lettre de la main du Roy à M. de Rosny.*

Mon amy, je vous fais ce mot et vous depesche ce courrier expres, pour vous prier de partir demain au soir tout tard, pour vous rendre icy à la nuit; vous en repartirez le lendemain de bon matin, car je ne me puis resoudre du jour de mon partement pour aller à Blois que je ne vous aye veu, aussi que j'ay d'autres choses à vous communiquer; mais je vous prie que personne ne le sçache. Bon soir, mon amy.

Ce 18 mars, à Saint Germain en Laye.

HENRY.

*Lettre de la main du Roy à M. de Rosny.*

Mon amy, j'ay veu M. d'Espernon, qui m'a confirmé l'assurance de son tres-humble service, et n'avoir autre passion en l'ame que le desir de me le tesmoigner; il m'a parlé fort librement de plusieurs choses, et de vous entre-autres, louant l'eslection que j'ay faite de vous et vostre façon de proceder pour mon service; m'ayant tesmoigné vous aimer, il m'a fait cognoistre par ces paroles qu'il vous ira voir. C'est pourquoy je vous fais ce mot, afin que vous le preveniez et l'alliez voir le premier; plus il vous fera de submissions, je vous prie de luy en rendre davantage, car il importe pour mon service. Bon soir, etc.

Ce 2 avril, à Fontaine-bleau, au soir. HENRY.

*Lettre de la main du Roy à M. de Rosny.*

Mon amy, j'ay tant sejourné aujourd'huy à Saint Germain, à y voir mes enfans et mes bastimens, qu'il estoit neuf heures quand j'en suis retourné, et que, à l'heure que je vous escry et que je m'en vais soupper, qui est unze heures, je n'ay pû voir qu'une partie des dames qui sont icy, ayant remis à voir le reste pour demain, puis que partant de cette ville, je n'y dois retourner de cinq ou six mois; cela sera cause que j'y sejourneray encor demain, mais mercredi sans faute, Dieu aydant, j'en partiray. Je vous prie de faire en sorte que l'on travaille fort en mon conseil par delà, afin qu'à mon arrivée je trouve force besongne faite. Si j'eusse esté par vous instruit de ce j'avois à dire à ceux de ma chambre des comptes, je l'eusse fait puis que je demeure icy. C'est pourquoy vous leur ferez faire une depesche à ce qu'ils me viennent trouver à Fontaine-bleau jeudy ou vendredy, afin que je parle à eux. Bon soir, mon amy.

Ce lundy 17 may, entre unze heures et minuit, à Paris.

HENRY.

*Lettre de M. de Ville-roy à M. de Rosny.*

Monsieur, le Roy a veu la lettre que vous m'a-

vez escrite par ce porteur. Il dit qu'il veut affectionner la justice de la cause des princes d'Espinoz, comme chose qui importe à sa reputation et à son service, et où il va plus du sien que du vostre. Il sera lundy au soir à Paris, où il resoudra avec vous s'il rendra M. le president Jeannin ou M. de Caumartin porteur de la depesche qu'il veut faire aux archiducs; cependant il desire que vous fassiez dresser les memoires et instructions qui seront necessaires afin de les luy représenter à son arrivée, et que rien ne retarde le partement de l'un ou de l'autre. Sa Majesté a veu aussi ce que vous m'avez escrit touchant la ferme des impositions de Calais; dequoy elle a esté tres-aise, comme je le seray tousjours de vous servir. Priant Dieu, etc.

De Saint Germain en Laye, le 2 fevrier 1602.

DE NEUF-VILLE.

*Lettre de M. de Ville-roy à M. de Rosny.*

Monsieur, le Roy m'a commandé vous envoyer la lettre de M. de Vic que vous trouverez avec la presente, et desire que vous envoyez le sieur Errard à Calais pour visiter et resoudre la proposition qu'il fait, laquelle Sa Majesté dit que le capitaine Gagemont vous a ja représentée. Le colonnel Schomberg, mareschal de la cour de l'Empereur, qu'il envoie vers le Roy, arrivera à Paris vers la my-careme, ainsi que Ancel nous a escrit. Son train est de quarante ou cinquante chevaux; dequoy Sa Majesté m'a commandé de vous advertir, afin que vous fassiez sçavoir de M. le mareschal de Bois-dauphin, qui est à Paris, comment il le faudra recevoir et traiter, car Sa Majesté entend qu'il en soit usé comme il a esté fait envers ledit mareschal. Mais il semble que Sa Majesté soit encores incertaine du lieu où elle le recevra; si elle ne part bien tost pour aller à Blois, ledit colonnel la trouvera encores en ces quartiers. Avec cela je salueray vos bonnes graces, etc.

De Fontaine-bleau, le troisieme jour de mars 1602.

DE NEUF-VILLE.

*Lettre de M. de Sillery à M. de Rosny.*

Monsieur, j'ay receu la lettre qu'il vous a pleu m'escire du vingt-deuxiesme de ce mois, sur laquelle je vous diray que si j'eusse eu l'honneur d'estre pres de vous, j'estime que vous seriez demeuré mieulx satisfait de mon intention, qui n'a point esté de rien rejeter sur vous, et j'en appelle Dieu à tesmoin; mais simplement d'accompagner les lettres de M. de Vic et confirmer en partie ce qu'il avoit escrit. Nous avons traité avec les Suisses, et leur avons promis, suivant le commandement du Roy, de faire payer un

million d'escus pour une fois, et quatre cens mil escus apres par chacun an ; et moyennant ce, ils ont accordé de renouveler l'alliance aux conditions qu'il a pleu au Roy d'agrée et d'accepter. Je veux esperer par raison, qu'ils satisferont de bonne foy à ce qu'ils sont obligez. Mais quand ils y auroient manqué, ce ne seroit pas à nous de garantir leurs fautes ny les evenemens, et suffit de justifier la verité de leurs promesses et de nos conventions, comme elles ont esté veuës et approuvées par Sa Majesté. Je recognois, monsieur, que c'est un grand effort de faire fournir un million d'escus en cette saison, apres tant d'autres despences. J'en ay parlé comme je dois en France et en Suisse, pour le faire estimer ; mais la grandeur des debtes, le grand nombre et la necessité de ceux à qui il est deub, est cause de susciter les plaintes et les difficultez qui ont esté representées par M. de Vic, nonobstant lesquelles j'espere que le million estantourny et distribué, comme il sera bien-tost Dieu aydant, le Roy sera servy selon son intention. Je n'ay point douté que la partie de Lumague, et les frais faits pour le renouvellement de l'alliance, ne doivent estre pris sur le million qui a esté promis, et l'ay ainsi déclaré à M. de Vic, et en estions demeurez d'accord ; mais ayant esté contraint de bailler aux magistrats et au general des cantons et alliez plus qu'il n'avoit pensé par le premier projet qu'il avoit envoyé au Roy, pressé des instances et de la necessité des colonels et capitaines, la part desquels se trouve d'autant diminuée, il a estimé, que ne pouvant avec le million satisfaire entierement aux uns et aux autres, qu'il falloit augmenter ou rejeter la partie de Lumague, encor qu'il recognoisse que ce soit un tres-bon mesnage, et s'est estonné souvent qu'on ayt pû traiter avec tant d'avantages. C'est pourquoy il avoit pensé (je dis il avoit pensé, car cette invention vient de luy à bonne fin) que ce seroit le service du Roy de faire avancer cent mil escus sur ce qui doit estre payé en cette année, pour ne perdre un si grand avantage, qui reviendrait de l'employ de la partie de Lumague.

C'est à vous, monsieur, de considerer selon l'estat des affaires, ce qui est pour le mieux, et d'en ordonner comme il vous plaira. J'ay pressé les tresoriers des Liges, suivant vostre intention, pour leur faire fournir et remplacer les autres deniers qui ont esté retenus ou employez, comme il appert par l'estat qu'ils vous ont envoyé. Je leur ay representé vos raisons, et ce que vous en avez escrit de vostre main ; vous pourrez voir, s'il vous plaist, la responce par un memoire cy-joint. Ils pretendent qu'il n'a esté

rien receu des quatre-vingts mil escus que vous leur aviez pensé laisser pour payer leurs gages et autres frais ; et partant cela vient à diminuer d'autant l'argent qui devoit estreourny. Il y a un autre memoire par lequel il appert d'une partie de vingt-deux mil tant d'escus payée et distribuée du vivant de feu M. de Morte-fontaine, qui fait part (comme m'ont dit lesdits tresoriers) des trois cens cinquante huit mil escus, qui est le premier article dont est fait le fonds du million promis. S'il faut monstrier et justifier aux Suisses la distribution entiere du million promis, il est certain qu'ils n'admettront pas cette partie payée si long-temps auparavant qu'on eust traité avec eux, non plus que ce qui a esté payé par les ordonnances de M. de Vic au commencement de la guerre de Savoye, encor que ce soit pour debtes de Suisses, comme vous l'avez bien observé. Mais le payement ayant esté fait quatorze ou quinze mois avant nostre traité, les Suisses ne le recevront pas sur le million promis, ainsi que M. de Vic l'a escrit ; car autrement cela n'est de mon fait ny de ma cognoissance, non plus que l'autre partie payée du temps de M. de Morte-fontaine, qui a esté indiquée par les tresoriers en traittant avec eux, pour verifier le fonds qu'ils doivent avoir suivant ce que vous m'avez escrit. Je sçay fort bien, monsieur, les grandes affaires que vous avez sur les bras, et que vous pouvez encores apprehender ; ce n'est pas aussi pour vous presser, mais simplement pour respondre à vos lettres, et vous représenter la verité ; et puis qu'il n'y a moyen de faire davantage, il faut essayer d'en sortir, et faire le moins mal qu'on pourra. J'ay envoyé vostre lettre à M. Puget, qui estoit absent, et ne l'ay veu qu'avant hier sur le tard ; il a promis de fournir soixante et dix mille escus dans trois jours ; lesquels, avec le reste qui est entre les mains du tresorier Le Roux, seront envoyez à Lyon, et partira la voicture dans cette sepmaine, comme ledit Le Roux m'a asseuré ; ladite voicture n'estant retardée que pour le convertissement qu'il faut faire de trente mil escus ou environ qui sont en douzains qui seront convertis partie en escus, qu'il faut fournir en especes, ou en composer à plus haut prix que ne coustera le change dont M. de Vic fait instance et en a escrit plusieurs fois. On pourra fournir vingt mil escus en or, à raison de trois sols pour escu, en baillant les douzains en payement, qui est la meilleure condition qu'on a pû trouver, comme vous entendrez par les lettres dudit sieur Puget. Le sur plus sera converty en grosse monnoye dont le prix n'est pas encores arresté ; j'ay pensé, pour le mieux, de prendre les soixante et dix mille escus qui se-

rout fournis par M. Puget, afin d'envoyer promptement les deniers à Lyon, et qu'ils puissent estre arrivez et distribuez en Suisse avant la journée de Saint Jean. Il reste à recevoir au tresorier Le Roux, comme il dit, vingt-deux mil escus en Auvergne, comme il escrit à M. de Beaumarchais et vous en doit rendre compte. J'ay receu vostre lettre du vingt-quatre, qui m'a depuis esté rendüe par M. de la Chevalerie, qui m'a déclaré particulièrement ce qui est de vostre intention, que nous suivrons absolument et en useray toujours ainsi, comme du respect que je dois à vos vertus et merites; et en toutes occasions je me rendray soigneux de faire cognoître, par effet, que je suis et seray à jamais, etc.

De Paris, ce 28 may 1602. BAULARD.

## CHAPITRE CIX.

*Voyage à Blois. Premiers nuages qui s'élèvent entre le Roi et la Reine. Fermentation dans le royaume. Le Roi sonde le duc d'Épernon et le duc de Bouillon. Conseil secret tenu par le Roi sur les mesures à prendre contre les conjurés. Voyage en Poitou. Biron attiré à Fontainebleau. Son obstination. Il est arrêté, ainsi que le comte d'Auvergne. Son jugement et son exécution. Le comte d'Auvergne est mis en liberté.*

Suivant les resolutions cy-devant prises, toutes choses estans préparées, tant pour le maintien et la subsistance des affaires à Paris et aux provinces desquelles le Roy s'esloignoit, que pour bien reordonner celles où Sa Majesté s'acheminait, elle, partant de Paris, prit son chemin par Orleans et Blois, auquel dernier lieu, ayant fait du sejour, il survint, se traitta et passa plusieurs affaires de grande importance, et entre icelles il y en eut quatre qui meritoient bien que vous nous en eussiez voulu bailler d'amples memoires, en attendant lesquels nous ne laisserons de vous en ramentevoir quelque chose, afin que le peu d'intelligence que vous verrez bien que nous en avons, vous fasse desirer de la suppléer par la vostre toute entiere.

Ce donc que nous avons peu sçavoir touchant la premiere d'icelles, fut un bruit qui courut par la Cour, qu'il y avoit quelques broüilleries entre le Roy et la Reine, dont nous eumes quelque opinion, lors qu'un jour, de grand matin, le Roy vous ayant envoyé querir par Armaignac, vous vous en allastes au chasteau, que le Roy et la Reine estoient encore au lict, mais en diverses chambres, et fistes quantité de voyages de l'une à l'autre, sur lesquels chacun demandoit

bien ce qu'il y avoit de mal entendu, mais nul n'en dit ny pût rien apprendre. Nous nous souvenons encore que plusieurs fois les apresdinées, le sieur Conchine de la part de la Reine venoit querir madame vostre femme, laquelle (tout devant vous il appelloit sa maistresse) demouroit souvent long-temps enfermée, tantost avec la Leonor toute seule, et tantost avec la Reine et elle ensemble. En suite de toutes lesquelles allées et venuës, et un jour apres icelles, le Roy vous manda un matin, par le sieur de la Varenne, que vous le vinssiez trouver dans une grande gallerie qu'il avoit commencée de bastir au dessus de celles des jardins bas de Blois, dans l'une desquelles est représentée cette bische qui a des cornes. Et falloit bien qu'il y eust de grandes intrigues et affaires à demesler, d'autant qu'apres qu'il eust fait mettre deux Suisses, qui ne parloient point françois, au bout d'embas de la gallerie, pour ce qu'il estoit tout ouvert, vous vous y promenastes tous deux seuls plus de deux grandes heures, sans cesser de parler de fort grande affection, comme le tesmoignoient vos gestes de l'un et de l'autre, que nous considerions avec autant d'attention que de desir de sçavoir les causes que vous en aviez (ce qui nous fut impossible, ny de comprendre les suites de vos paroles, quoy que vous nommassiez quelquefois de certaines personnes assez haut pour estre entendues de nous), sinon qu'ayans tous repris le chemin du chasteau, le Roy vous dit, en se separant de vous, si haut et si distinctement que nous le pusmes bien entendre : « Or  
« sus, c'est assez discouru; il n'en faut plus parler, puis que vous estes si arresté en vos opinions en cette affaire-là; je m'y conduiray en  
« tout et par tout, suivant vos conseils, afin qu'il  
« ne me soit plus reproché que je resouds toutes  
« choses de ma teste, et ne prens conseil de personne. Mais souvenez vous que peut estre vous  
« et moy, nous en repentirons un jour (car il ne  
« sçauroit pleuvoir sur moy qu'il ne degoutte  
« sur vous), et que cette affaire, cognoissant les  
« esprits de ceux qui s'en meslent, sera cause de  
« beaucoup de mal; ne niant point que la douceur et l'indulgence ne soient fort louables,  
« mais vous ne me nierez pas aussi que l'excez  
« n'en puisse devenir dommageable. » A quoy vous luy respondistes, qu'à la verité c'estoit une grande prudence de prévoir les accidens et de prevenir les maux, mais que de les avancer ou procurer soy mesme par des recherches trop curieuses, vous estimiez que c'estoit tout le contraire.

Et sur cela Sa Majesté s'en retourna au chasteau et vous à vostre logis. Que si la fantaisie

vous prenoit un jour de nous donner toute ou partie de l'intelligence de cette affaire-là, nous en ferions part à ceux qui viendront apres nous, comme estans choses que nous estimons le meriter bien (car le bruit courut assez publiquement, que par trois ou quatre fois il vous avoit fallu mettre à genoux devant le Roy et la Reine, pour en obtenir ce que vous desiriez); de toutes lesquelles aussi fut-il tenu d'assez longs discours quasi tous divers, sans que nous en ayons pû rien conclurre de bien certain, ny aucunement intelligible, oyans seulement parler quelquefois en divers temps sur diverses occasions et par diverses personnes, voire par vous mesmes du Roy, de la Reine, des ducs et duchesses de Florence et Mantouë, de Virgile, Ursin, dom Juan des couleurs du tanné, de Belle-garde, de Trainel, Vinti, Jouanini, Conchine, Leonor, Gondy, Catherine, Selvage, Verneuil et quelques autres personnes; mais tout cela tant confusément et quelquesfois si hors de propos (au moins ce nous sembloit-il), que nous n'y sceusmes jamais rien comprendre pour vous en ramentevoir davantage; et pour cette raison avons nous laissé à la suite de ce discours quatre feuillets en blanc dans nos manuscrits, pour y adjouster ce que vous trouverez à propos de nous en dire.

La seconde des affaires dont nous avons parlé fut que le Roy receut quantité de lettres et d'advis par messagers expres de la part de ses serviteurs particuliers et bien affidez, qu'il entretenoit tousjours dans toutes les provinces esloignées de son sejour ordinaire, et entre icelles en Anjou, Mirebalais, Chatelleraudois, haut Poictou, Xaintonge, Angoulmois, Perigort, Limosin, la Marche, Auvergne, haute Guyenne et haut Languedoc, pour le tenir tousjours adverty de tout ce qui se passeroit en icelles, par lesquels on luy faisoit sçavoir qu'il couroit et trottoit par les provinces cy-dessus grande quantité de gens, tant d'une que d'autre religion qui estoient pratiquez, ce disoit-on, par quatre ou cinq seigneurs des plus qualifiez de son royaume, que l'on ne luy vouloit point encore nommer que l'on n'en eust les preuves en main, lesquels faisoient tout ce qu'ils pouvoient pour descrire et rendre odieuse son administration, voire tascher de le mettre en la haine universelle de ses peuples, luy supposans plusieurs mauvais desseins, et entre autres qu'il ne faisoit point faire par un de ses plus confidens, qui aussi le luy persuadoit, un si grand amas d'artilleries, armes, munitions et thresors, que pour se rendre si puissant qu'il pust, sans peril ravalier ou destruire tous les grands du royaume, afin de regner apres sur le reste du tout à sa fantaisie, et celle de ceux qui

luy donnoient les conseils; mais que ne se contentans pas de presager des inconveniens sur des presuppositions de l'advenir, ils en specifioient de toutes presentes ou fort prochaines, pour l'execution desquelles il entreprenoit tout expres ce voyage, dont la premiere seroit un chastiment exemplaire de ceux qui s'estoient mutinez contre les sieurs de Jambeville, d'Amours et autres commissaires envoyez pour faire l'establissement de la pancarte ou sol pour livre, qu'il se deliberoit d'establir luy-mesme par sa presence, avec une telle reapreciation, que le droit luy en vaudroit deux fois autant; qu'il vouloit aussi faire establir les droits de gabelle dans toutes les provinces de franc-salé, faisant en mesme temps achepter tous les marais salans des proprietaires, et les payer en rentes sur l'Hostel de Ville de Paris.

Se parloit aussi qu'il estoit apres à obtenir des bulles du pape Clement, pour l'establissement d'une double decime ordinaire; qu'il vouloit faire payer aux peuples les arrerages des tailles par eux deus des années 1594, 1595 et 1596, desquels vous aviez sursis les poursuites, et à eux donné assurance de la remise entiere, lors que le Roy vous envoya par les generalitez; qu'il vouloit diminuer d'un tiers presentement et des deux tiers l'année prochaine, les assignations baillées pour le payement des garnisons des villes de ceux de la religion et des pensions de leurs ministres et autres particuliers, avec resolution de ne prolonger plus les années de leurs places de garde et seurété, ny ne conferer plus de provisions de charges ny offices sans la clause d'estre catholique.

Tous lesquels advis considerez par le Roy, encor qu'il recogneust bien qu'il luy seroit facile de destruire tous ces artifices et les faire bien-tost convaincre de fausseté, il jugea neantmoins bien qu'il ne falloit pas neantmoins que les roys, quelques grands qu'ils fussent, s'imaginassent de pouvoir heureusement regner sans soucis, ennuis, fascheries, prevoyance, prudence, diligence et bons ordres, puis que nonobstant qu'il eust reduit tous ceux de la ligue en une souple obeysance, et les estrangers à faire une paix avantageuse pour luy, si ne laissoit-il pas toutesfois de se voir maintenant travaillé par ceux mesmes desquels il s'estoit le plus confidemment servy pour reduire les autres à raison. Mais comme il avoit l'esprit vif et prompt, le jugement solide et le courage excellent, il se resolut aussi-tost de continuer en diligence son voyage (l'apprehension seule duquel leur avoit fait publier toutes ces niaiseries), afin de faire cognoistre par effets que tout ce que ces malicieux es-

prits essayoient de faire persuader par leurs supposts n'estoient que suppositions, calomnies et impostures, mais en usant de telles procédures que l'on imputast à sa prudence, debonnaireté, franchise et liberalité, toutes les gratifications et remises dont il useroit envers ses sujets, et non à timidité, foiblesse, contrainte et nécessité.

La troisieme fut la resolution qu'il prit de communiquer quelques-unes de ces particularitez à messieurs d'Espernon et de Bouillon, qui estoient lors tous deux à Blois, pour voir ce qu'ils diroient là dessus, comme il vous conta depuis qu'il avoit fait, ayant commencé par le premier; lequel sur telles propositions luy fit des réponses, soit par artifice ou sincerité, et tint des discours qui luy donnerent sujet de contentement, les propos duquel seroient trop longs à reciter; mais leur conclusion fut que, comme il ne vouloit pas nier qu'il n'eust quelque-fois ouy parler de telles extravagances ou plutost niaiseries et badinages, aussi pouvoit-il jurer que ce n'avoit jamais esté à aucun de ceux qui en fussent les auteurs ou fauteurs, et jamais à nul qui ne s'en fust mocqué comme d'une chose du tout ridicule, et encore tout cela si confusément et desordonnément, qu'il n'avoit jamois attendu que la ruyne et desolation de ceux qui appuyeroient leurs desseins là dessus, et que pour faire paroistre qu'il ne craignoit point d'estre accusé par qui que ce pust estre, d'avoir eu part à toutes ces niaiseries, il estoit resolu de ne partir point d'aupres de Sa Majesté, qu'elle ne fust delivrée de tous ces soupçons et deffiances, afin qu'il luy fust facile de le faire punir, comme il le meritoit s'il ne luy avoit dit presentement la pure verité. De toutes lesquelles choses le Roy le remercia, de sorte qu'ils demeurèrent tous deux fort contents l'un de l'autre.

Le lendemain le Roy usa de mesmes termes et procédures envers M. de Bouillon, et eurent aussi ensemble de fort longs discours tous pleins de belles assurances et protestations; mais si ne pust-il se rendre si souple qu'il ne fust paroistre que la franchise n'y estoit pas toute entiere, d'autant que finalement, apres plusieurs desguisemens et paroles à double entente, il luy dit pour conclusion qu'il estimoit que Sa Majesté se souviendrait encore de l'écriture qui dit : *Qu'il est nécessaire que scandales adviennent; mais aussi, adjouste-elle, mal-heur sur les auteurs d'iceux*; ce qui pourroit convenir à ceux qui essayent de mettre en scandale aupres d'elle ses plus loyaux et anciens serviteurs. Et partant ne doit-on pas trouver estrange s'ils leur supposent tels crimes et defections, puis que tous ceux qui font le mestier d'espions et delateurs ne sont

entretenus ny payez; que pour faire des accusations, soient vrayes, soient fausses, estans bien asseurez que les plus pleines d'invectives et de calomnies seront tousjours les mieux receues; son advis estant que tant de mauvais discours que l'on luy mandoit d'avoir esté tenus par les uns et les autres, comme tesmoignages de leurs mescontentemens des grandes surcharges et impositions dont ils sont accablez, ne provenoient d'ailleurs que de ce qu'ils sçavoient de science qu'aux resolutions de telles choses, n'estoient appelez que des gens de peu, et jamais les grands et qualifiez personnages du royaume, lesquels partant n'estoient pas capables de faire comprendre aux peuples les justes causes et raisons de telles surcharges, d'autant qu'ils n'en avoient pas esté informez.

Bien estoit-il vray que plusieurs, tant catholiques que reformez, se plaignoient que plus ses revenus croissoient, son royaume et ses affaires s'amelioient, moins se ressentoient-ils de ses beneficences et liberalitez; que quant à ceux de la religion, outre leurs plaintes communes avec les autres, il recognoissoit s'estre trouvé en lieu où l'on luy avoit voulu persuader que non seulement toutes les choses cy-dessus dites estoient veritables, mais qu'ils estoient fort prochains de se voir tenir eux ou leurs enfans, comme pestes, gangrenes, tumeurs et apostumes dans l'Estat, si Dieu les affligeoit tant que de perdre leur bon Roy, puis que nonobstant leur ferme resolution d'employer leurs biens et leurs vies pour son service, le bien et la defence de l'Estat, si ne manqueroient-ils pas d'estre flestris de toutes sortes d'opprobres et d'ignominies, estans declarez indignes et incapables de toutes charges, offices, honneurs et dignitez dans l'Estat; ausquelles plaintes, à la verité, il n'avoit peu repliquer chose valable, ny faire autre response à ce que l'on luy vouloit persuader que Sa Majesté revocqueroit un jour les privileges et franchises de son vicomté de Thurenne, et accepteroit les droits de ceux de la Marcq sur Sedan, sinon qu'il sçavoit bien que Sa Majesté ne le feroit jamais, et qu'elle avoit esté trop bien assistée d'eux tous au temps de ses plus grandes adversitez, pour les vouloir flestrir et des-honorer. Dequoy ne doutant nullement, il la supplioit tres-humblement de croire qu'en tout ce qui avoit esté dit, il n'y avoit rien qui pust diminuer son exquise loyauté, tant esprouvée à son service, ce qu'il luy juroit en son ame par le Dieu vivant.

Surquoy le Roy luy respondit qu'il se resjouyssoit de luy voir de si bonnes intentions, et partant se devoit-il asseurer que s'il vouloit demeurer assiduelement aupres de luy, ainsi que

M. d'Espernon de son propre mouvement luy avoit juré de faire durant six mois, il les appellerait tousjours tous deux en tous ses conseils d'importance, n'y resoudroit rien sans leurs bons avis, avec lesquels, auparavant qu'il fust six mois, il donneroit satisfaction et contentement aux huguenots et catholiques, sur toutes leurs plaintes et apprehensions, et feroit voir que tout ce que ces coureurs de provinces avoient voulu persuader estoit entierement faux et supposé; qu'il n'y avoit jamais pensé, n'avoit nul plus grand desir que de se faire aimer à tous ses peuples esgalement, les affectionner de mesme, faire vivre tant les catholiques que ceux de la religion en paix, concorde et amitié les uns avec les autres, s'en servir, selon les proportions requises, et tascher de si bien mesnager et bonifier ses domaines, revenus ordinaires et impositions reelles, qu'il eust moyen de descharger ses peuples de toutes tailles et cottisations personnelles: desquelles loüables resolutions le sieur de Bouillon faisant des admirations et tesmoignant une grande joye, il assura Sa Majesté de partir au plutost pour aller en ses maisons donner un tel ordre à ses revenus, qu'il eust moyen de demeurer non seulement six mois aupres de luy, mais assiduellement, si c'estoit chose que Sa Majesté eust tres-agreeable.

La quatriesme affaire qui se demena au séjour de Blois fust touchant M. le mareschal de Biron, dautant qu'en ce mesme temps-là, le sieur d'Escures estant revenu de Bourgongne, où le Roy l'avoit envoyé, pour essayer de disposer ledit duc de Biron à le venir trouver, il se resolut de tenir un conseil estroit, pour, avec l'avis d'iceluy, prendre resolution sur ce qu'avoit r'apporté ledit d'Escures; auquel le Roy n'ayant appelé que M. le comte de Soissons, monsieur le chancelier, vous, M. de Ville-roy et M. de Maisse, il vous proposa toutes les accusations de La Fin, dont il a esté cy-devant parlé contre le mareschal de Biron et autres, afin de prendre là dessus une resolution, et nomma tous les principaux jusques au nombre de huit, entre lesquels ceux que l'on craignoit le plus, estoient messieurs le comte d'Auvergne, les ducs d'Espernon, de Bouillon et de Biron; des trois premiers il estoit facile de s'en assurer, car le premier estoit à Paris et les deux autres à la Cour; et de fait l'un des plus grands d'entre vous quatre, opiniastroit sur tout qu'il se falloir saisir de ces trois comme les plus habiles, et que le dernier n'estant qu'un ambitieux estourdy, il seroit facile de le ramener à la raison, ou qui, en tout cas, ne feroit pas grande chose tout seul. Lors que ce fut à vous à opiner, vous distes au Roy :

« Sire, je me trouve en cecy bien empesché, car je ne vois encor aucunes preuves bien certaines contre messieurs d'Espernon et de Bouillon, et partant je ne scaurois estre d'avis de les arrester sur de simples conjectures et opinions, s'y rencontrans plusieurs inconveniens et difficultez, dautant que si vous les prenez comme accusez de trahison, en premier lieu vous effaroucherez les vrais coupables, et ne pouvant rien verifler contre ceux-cy qui seront pris, vous justifierez les autres, et faudra qu'il s'en ensuive sur les captifs plusieurs rigueurs mal convenables à vostre humeur si pleine de clemence; car telles personnes ainsi offencées sont de dangereuse reconciliation. Et pour moy, je ne voy point qu'il y ait plus de preuves contre ces deux-cy, que contre-moy, que La Fin, sous pretexte de deux lettres de civilité au mareschal de Biron, par lesquelles je le faisois ressouvenir des conseils que je luy avois donnez et de lier ensemble une amitié inalterable au cas qu'il les voulut suivre absolument, vouloit faire croire que j'estois de son intelligence et deffection; estant bien assuré que je feray croire le contraire par la suite de l'issuë de cette affaire et cognoistre qu'un innocent n'est pas tousjours garanty de la calomnie, et des langues envieuses et mesdisantes. »

Tellement que le Roy s'estant resolu à suivre cette opinion, le conseil se separa. Et comme vous fustes descendu dans la cour pour vous en aller à vostre logis, force gens coururent vous rencontrer, comme on fait les favoris qui ont de grandes charges, qui pour une affaire, qui pour un autre; M. d'Espernon aussi vous accosta. Il ne nous souvient pas bien des propos qu'il vous tint; mais il nous semble avoir entendu qu'il vous dit que tant de conseils si longs et particuliers mettoient beaucoup de gens en allarme; mais que pour luy qu'il n'y entroit nullement, dautant que sa conscience l'asseuroit. « C'est le meilleur refuge de tous, luy respondistes vous, monsieur, principalement au regne où nous sommes; car le Roy n'a nulle inclination à la violence ny à la severité; mais tout au contraire il est si benin que, quand quelqu'un auroit attenté contre luy et contre son Estat, s'il scavoit qu'il s'en repentist et desirast à bon escient, il luy pardonneroit aussi-tost et l'aymeroit comme auparavant. Je vois force gens qui s'esloignent de la Cour, mais ceux qui ont la conscience nette ne le doivent pas faire, car ils n'ont rien à craindre. — Or, je suis de ce nombre-là, dit M. d'Espernon, et ne partiray point de la Cour tant que ces ombrages dureront. — Vous ne scauriez mieux faire, monsieur, dites



« vous, et feray valoir cette resolution où il faut. » Et là dessus vous en allastes disner, et pource que le Roy ayant dessein de parler avec vous en particulier, vous avoit dit tout bas à l'oreille : « Allez vous en disner en soldat (c'est à dire ne mangeant que trois morceaux), et me venez trouver, devant que nul autre soit revenu de disner. » Ce que voulant executer, nous vous ramenterons icy un petit conte pour rire au milieu de tant de choses serieuses. Vous distes, en entrant à vostre logis, à vostre maistre d'hôtel : « Ne vous amusez point à me servir de second et me baillez tout promptement ce qu'il y a de prest; car je ne veux manger que trois morceaux, boire deux coups, et m'en retourner trouver le Roy, qui me l'a ainsi commandé. » Enquoy estant obey, il arriva comme vous ne faisiez que vous mettre à table que M. Nicolas, qui estoit de ces railleurs et faiseurs de bonne chere, et qui boivent d'autant, entra dans vostre salle et vous dit : « Monsieur, je m'en viens disner avec vous, afin de boire à la santé du Roy, de la Reine et de nostre petit Dauphin, et celle de leurs bons serviteurs. » A quoy vous luy respondistes : « Vous soyez le bien venu, M. Nicolas, lavez promptement et vous mettez à table; car je ne la puis pas tenir longue ayant affaire ailleurs. » Ce qu'ayant fait, si tost que vous eustes beu deux coups, vous demandastes le fruit et vostre bidet de housse; dequoy M. Nicolas estonné, il se mist à vous regarder, puis vous dit : « Pardieu, monsieur, je ne m'estonne pas si l'on vous publie pour l'un des plus habiles seigneurs de France; car je ne sçache point d'hommes si habiles qui puissent boire trois coups avec vous en un disner, tant vous y faites de diligence. » A quoy, en riant, vous luy dites : « La, la, M. Nicolas, ne laissez pas d'achever de disner, pour moy j'ay affaire à leurs. » Et ainsi vous levastes de table.

Peu apres vous vinstes rapporter au Roy tous les discours que M. d'Espernon vous avoit tenus; lequel en fut fort ayse, et vous dit : « Il m'en a dit autant, et en effet je croy bien que M. d'Espernon n'est point de toutes ces menées par actes visibles; il est trop habile homme et craint trop de perdre son bien et ses charges pour s'embarrasser parmy tous ces esprits brouillons, avec lesquels aussi bien il n'y a rien à gagner pour luy, et mesmes n'y scauroit jamais vivre ny compatir; et puis il ne voit pas grand fondement à tout cela, veu l'estat où sont maintenant mes affaires. Je ne dis pas qu'en son petit cœur, il ne fut peut estre bien ayse que quelqu'un me traversast, afin que j'eusse d'autant plus affaire de luy; mais diffi-

cilement se mettra-il jamais d'autre party que celui du Roy, ayant esprouvé de combien de difficultez, tels desseins sont ordinairement accompagnés, tesmoing ce qui s'estoit passé en Provence; neantmoins il le vous faut maintenir en cette bonne disposition; voyez aussi messieurs de Bouillon et de la Trimouille, et leur parlez de demeurer à la Cour, pour voir ce qu'ils vous diront; neantmoins attendez que nous soyons à Poictiers, car entre-cy et là, nous serons esclaircis de beaucoup de choses. » Ce que vous fistes; mais nonobstant tous vos discours et remonstrances, esquels estoient presens, ce nous semble, messieurs de La Nouë, de Constants, d'Aubigny et de Preaux, ils resolurent de se retirer.

Le Roy ayant pourveu au Poictou, en Limousin et Guyenne en y établissant absolument le sol pour livre, sa presence, prudence et reputation admirable ayant contenu les plus estourdis et malins, et ramené à la raison les plus dociles et debonnaires, il usa d'un trait de grande prudence et generosité; car ayant veu une obeysance si entiere et sans contraste à l'establissement de cette imposition que l'on avoit pris pour pretexte de toutes les rumeurs fomentées par ces trois conspirateurs, il en fist la revocation, fondée sur la seule prompte obeysance que les peuples avoient tesmoignée de vouloir rendre à tous ses commandemens; et fut cette menuë imposition tant onereuse convertie en une douce subvention, quelque temps apres du tout esteinte; et puis s'en retourna à Fontaine-bleau, où le mareschal de Biron le vint trouver apres plusieurs voyages que d'Escures et le sieur Jeannin firent vers luy. Des voyages desquels nous ne dirons nulles particularitez, d'autant que vous n'y eustes point de part, et vous dirons seulement que vous aviez fait loger toute la cavalerie legere du long de la riviere du Loing, où il y avoit des guays et des passages, ledit mareschal de Biron ayant pris resolution de venir pour les causes qui ensuivent. Premièrement, d'autant que ses traittez n'estoient pas encores bien conclus avec Espagne et Savoye; que l'argent à luy promis pour faire la guerre n'estoit pas encor arrivé; que le baron de Lux luy persuadoit d'endormir tousjours le Roy, jusques à ce temps-là; que Jeannin et d'Escures luy promettoient monts et merveilles; que La Fin l'asseuroit qu'ayant parlé au Roy, il avoit recogneu qu'il n'avoit aucuns advis bien certains de ses desseins; mais qui plus est, vous vous souviendrez comme dès plusieurs mois auparavant les defiances du Roy croissans tousjours contre ledit duc de Biron, il vous ordonna de laisser le moins d'artillerie et de munitions

qu'il se pourroit dans les places de Bourgogne, à la devotion dudit duc de Biron; et suivant cela, sous couleur de faire refondre ses pieces et rebattre ses poudres que vous luy aviez fait représenter estre du tout de nul service, et de le vouloir fournir de toutes choses de l'arsenac de Lyon, qui seroient bien conditionnées et prestes à employer, et en ayant mesme fait charger des bateaux, en presence de gens, à sa devotion, et fait iceux monter quelques journées à mont la Saone, il consentit que l'on tirast de ses places toutes les pieces et munitions qu'il y avoit. Mais il arriva, par vostre industrie, que l'on fit en diligence descendre celles qu'avoit livrées ledit mareschal, et arrester les vostres par le chemin, en sorte qu'elles ne monterent point. Tellement que quand le Roy le pressa de venir, il y fut contraint, le baron de Lus luy ayant représenté qu'il n'estoit aussi bien rien resté dans ses places dequoy se defendre, et que si le Roy venoit à luy la teste baissée, avec ses diligences accoustumées, il seroit contraint de quitter le royaume et n'apporter aux ennemis qu'un esprit ulceré et une fortune ruynée : dequoy il estoit en une telle furie contre vous, qu'il ne s'en pouvoit taire, jusques à user de menaces de vous poigner, disant que vous l'aviez affiné; dequoy le Roy ayant eu advis, il vous en advertit et mesmes fit commandement de vous bien accompagner. M. d'Espernon fit lors, sans y penser, comme il a dit depuis, une faute signalée; car il envoya au devant du mareschal de Biron s'offrir luy, et mesme luy donna à disner.

Si tost qu'il fut arrivé le Roy vous escrivit un mot de sa main à Moret, auquel lieu vous vous estiez allé promener, où il y avoit ces mots.

« Mon amy, nostre homme est venu, qui fait fort le retenu et le prudent. Venez en diligence, afin que nous advisions à ce que nous avons à faire. Adieu, je vous ayme bien. »

Aussi-tost vous prist des courtaux, vous en vinstes au gallop et trouvastes le Roy qui se promenoit avec M. de Praslin, devant la porte de vostre pavillon, en vous attendant. Si tost qu'il vous vit il quitta M. de Praslin, vous prist par la main, et se promenant, il vous dit : « Mon amy, voila un mal-heureux homme que le mareschal, c'est grand cas; j'ay envie de luy pardonner, d'oublier tout ce qui s'est passé, et luy faire autant de bien que jamais; il me fait pitié et mon cœur ne se peut porter à faire du mal à un homme qui a du courage, duquel je me suis si long-temps servy et qui m'a esté si familier. Mais toute mon apprehension est que, quand je luy auray pardonné, qu'il ne pardonne ny à moy ny à mes enfans ny à mon

« Estat; car il ne m'a jamais rien voulu confesser, et vit avec moy, comme un homme qui a quelque chose de malin dans le cœur. Je vous prie, voyez-le; il est vostre parent, et fait mine d'estre vostre amy, encor qu'en son ame il vous hayse merveilleusement, dautant qu'il dit que vous l'avez affiné par vos belles paroles. Ne laissez pas neantmoins de parler à luy comme à cœur ouvert; mais avec discretion et en sorte qu'il ne puisse pas juger que nous sçavons tout et que nous avons des preuves contre luy, suffisantes pour le convaincre; car il croit que nous ne sçavons rien, dautant que La Fin luy a dit à l'oreille en arrivant : *Mon maistre, courage et bon bec; ils ne sçavent rien*. Neantmoins s'il s'ouvre à vous sur les discours que vous luy tiendrez et certitude de ma bien-veillance que vous luy donnerez, assurez-le qu'il peut en toute flance me venir trouver, faire confession de tout ce qu'il a pensé, dit et fait, moyennant qu'il ne me cele rien et que je luy pardonne de bon cœur, comme je vous en donne ma foy et ma parole. »

Sur cela vous vous en allastes au chasteau, et trouvastes le mareschal en la chambre du Roy, assis au chevet de son lit, parlant à M. de la Curée; et comme à vostre arrivée il oüy le bruit de ceux qui vous saluoient et faisoient place pour ce que vous estiez fort accompagné, il s'avança et vous vint saluer, mais fort froidement. Vous l'embrassastes avec gayeté et tesmoignage d'affection, et luy dites : « Hé ! qu'est-ce que cecy, monsieur ? vous me saluez en sénateur et non pas à l'accoustumée. Ho, ho, il ne faut pas faire ainsi le froid, embrassez, embrassez-moy encore une fois, et allons causer; car si vous me voulez croire tout ira bien. » Là dessus vous estans tous deux assis au chevet du lit du Roy, vous luy dites : « Hé bien ! monsieur, quel homme estes-vous ? avez-vous salué le Roy ? quelle chere vous a-il faite ? que luy avez vous dit ? Vous le cognoissez bien; il est libre et franc, et veut que l'on vive de mesme avec luy. L'on m'a dit que vous aviez fait le froid et le retenu avec luy; cela n'est pas de saison, ny selon son humeur et la vostre. Je suis vostre parent, vostre serviteur et vostre amy : croyez mon conseil et vous vous en trouverez bien; dites moy librement ce que vous avez sur le cœur, et pour certain j'y apporteray remede, et ne craignez point que je vous trompe. » Lors il vous dit : « J'ay fait la reversion au Roy, avec le respect et l'honneur que doit un serviteur et sujet envers son maistre et son Roy. Je luy ai respondu sur tout ce qu'il m'a enquis; mais ce n'ont esté que propos com-

« muns et paroles générales ; aussi n'avois-je rien  
« davantage à luy dire. »

« Or, monsieur, dites-vous, ce n'est pas  
« comme il faut procéder envers cet esprit vraye-  
« ment royal : ouvrez luy vostre cœur et luy  
« dittes tout, ou à moy si vous voulez, et de-  
« vant qu'il soit nuit, je vous responds que  
« vous demeurerez contents l'un de l'autre.—Je  
« n'ay rien à dire au Roy, ny à vous, plus que  
« j'ay fait; mais si Sa Majesté a quelque défiance  
« ou mescontentement de moy, que luy ou vous  
« me le disiez librement, surquoy et que c'est, et  
« lors j'y respondray de mesme.—Ce qui fasche  
« le plus l'esprit du Roy, dites-vous, ce sont vos  
« froideurs; car d'autres particularitez, il n'en  
« sçait point de précises. Mais que vostre cons-  
« cience vous juge vous mesme, et vous condui-  
« sez tout ainsi que si vous croyez que nous sceu-  
« sions tout ce que vous avez fait, dit et pensé  
« de plus secret; car je vous jure en ma foy que  
« c'est le vray moyen d'obtenir du Roy tout ce  
« que vous sçauriez désirer. Pour moy, quand  
« j'ay fait quelque peccadille, je luy recognois  
« estre pour un grand peché, et c'est lors qu'il  
« fait tout ce que je veux; je ne vous donne point  
« d'autre conseil que celui que je prends ordi-  
« nairement pour moy-mesme. Hé! pardieu (vous  
« me faites jurer) si vous le voulez suivre, vous  
« et moy gouvernerons la Cour et les affaires.  
« —Je veux bien vous croire, vous respondit-il,  
« mais je ne sçay rien et n'ay à confesser peché  
« ny peccadille; car j'en sens ma conscience fort  
« nette depuis ce que j'ay confessé au Roy à  
« Lyon. » Après quelques autres propos de com-  
« plimens, il s'en alla en son logis.

Quasi aussi-tost le Roy arriva; auquel ayant  
conté tout ce que dessus, il vous dit : « Vous  
« avez esté un peu bien avant, voire assez pour  
« le mettre en soupçon et le faire en aller, et  
« vous voyez que vous n'en avez rien sceu tirer :  
« c'est ce que je vous ay tousjours dit, qu'il est  
« resolu de ne me point pardonner, quelque par-  
« don, bien et honneur que je luy fisse, s'estant  
« trop laissé emporter à ses esperances pleines  
« de vanité, et à vouloir devenir souverain. En-  
« trez dans cette gallerie et m'y attendez; car  
« je veux parler à ma femme et à vous ensem-  
« ble, et qu'il n'y ait personne que nous trois. »  
Peu apres il arriva avec la Reine, et ayant fermé  
la porte de la gallerie au verrou, il vous dit :  
« Hé bien ! ne recognoissez-vous pas bien main-  
« tenant quelle est la resolution du mareschal ?  
« Elle est de troubler mon Estat, que j'ay eu  
« tant de peine à pacifier, et de m'oster le moyen  
« de soulager mes sujets de tant de tailles et sub-  
« sides, dont ils sont oppressez et de leur faire

« voir que je ne suis pas seulement leur Roy,  
« mais aussi leur pere. Or, advisons donc le  
« moyen d'estouffer tant de pernicieux desseins  
« à leur naissance, dont je n'en vois point de  
« plus propres que de se saisir du comte d'Au-  
« vergne et du mareschal; et le tout consiste  
« maintenant à sçavoir comme il le faut faire.  
« J'en ay pensé un moyen, qui est de faire in-  
« vestir cette nuit les logis où ils seront cou-  
« chez, et les faire prendre au lict. Que vous en  
« semble ? » A quoy vous respondites : « Sire,  
« je n'ay pas tant songé à cette execution, que  
« l'importance d'icelle le merite; mais selon ce  
« qui m'est le premier venu en l'esprit, vostre  
« Majesté m'excusera, si je reprouve entièrement  
« la forme par elle proposée, et vous dis qu'il n'y  
« en a point de meilleure, que de les amuser ce  
« soir dans vostre chambre et cabinet, et là se  
« saisir d'eux, lors que la pluspart du monde  
« s'ennuyant de ces longueurs, se sera retiré;  
« car, par ce moyen, cela se fera facilement,  
« sans rumeur et à petit bruit. » Lors le Roy  
vous dit : « Je ne voy point d'apparence à ce que  
« vous dites, si je ne veux remplir de sang ma  
« chambre et mon cabinet, car ils mettront l'es-  
« pée au poing et se defendront; et si cela se  
« doit faire ainsi, je ne veux point que ce soit en  
« ma presence ny dans mon logis, mais dans le  
« leur. » Vous contestastes tousjours là-dessus;  
et neantmoins le Roy s'opiniastra au contraire;  
et vous dit : « Je suis resolu en cela et ne m'en  
« parlez plus; allez-vous-en à vostre logis soup-  
« per, puis, vers les neuf heures, bottez-vous et  
« tous vos gens, faites seller tous vos chevaux,  
« attendez de mes nouvelles, et vous tenez prest  
« de partir si je vous le mande. »

Ainsi vous en vinstes-vous à vostre pavillon  
qui estoit tout vis à vis celui du mareschal,  
et apres soupper vous vous bottastes, fistes  
botter tous vos gens, seller vos chevaux et ap-  
prester vostre bagage, puis vous retirastes dans  
votre petite chambre qui avoit veuë sur le pa-  
villon du mareschal, vous attendant d'heure à  
autre de le voir attaquer, vous promenant et  
quelquesfois lisant; vous ouïstes sonner neuf,  
dix, onze et douze heures, lors vous sortistes à  
la grande chambre, où vous nous trouvastes  
tous, les uns jouants, les autres causants et les  
autres dormants, et nous dites : « Il y en pourra  
« bien avoir eu qui n'auront pas bien pris leurs  
« mesures, et qui pour ne croire pas conseil, au-  
« ront laissé échapper des oyseaux qui ne se re-  
« clameront pas aisément et qui leur estoient al-  
« sez à retenir. Que l'on aille brider mes chevaux  
« et charger mon bagage pendant que je m'en  
« iray dans ma chambre pour escrire un mot; »

où vous n'eustes pas esté demie heure, que vous ouïstes rabaster à la porte de vostre pavillon, du costé des grands jardins, et en mesme temps crier : *Monsieur, le Roy vous demande.* Et ayant mis la teste à la fenestre, vous ouïstes parler La Varenne qui vous dit : « Monsieur, venez tost, le Roy veut parler à vous, et vous envoyer à Paris donner ordre à tout; car messieurs de Biron et comte d'Auvergne sont arrestez prisonniers.—Et où ont-ils esté pris, dites-vous ? —Dans le cabinet du Roy, ce dit-il.—Or Dieu soit loué, que le Roy ayt suivy bon conseil. »

En mesme temps vous l'allastes trouver, qui vous dit : « Nos gens sont pris, montez à cheval, allez leur preparer leur logis à la Bastille; je les enverray par batteau à la porte de l'Arsenac du costé de l'eau. Faites les y descendre, qu'il ne s'y trouve personne, et les menez sans bruit par vos cours et jardins, où il faut, puis apres que vous aurez tout ordonné et mesmes devant qu'ils arrivent (car ce ne sera pas longtemps apres vous), allez au Parlement et à l'Hostel de Ville, et leur faites entendre ce qui s'est passé, dont ils sçauront les causes et les raisons, à mon arrivée, lesquelles je m'assure qu'ils trouveront justes. » Tout cela fut executé par vous aussi heureusement, et en mesme temps que les prisonniers entroient dans l'Arsenac, madame vostre femme accouchoit de mademoiselle de Sully.

Quelque temps apres, monsieur le premier president, celui de Blanc-mesnil et messieurs de Fleury et de Thurin, conseillers, furent deputez de la Cour, pour interroger les prisonniers, lesquels vous fistes venir dans le petit pavillon du milieu de la grande allée de l'Arsenac. Quelques jours apres vous les fistes mener au Palais, pour estre interrogez par toute la Cour, dans un basteau couvert, et ramener de mesme, sans que personne s'en apperceut. Ils firent demander plusieurs fois de parler à vous; mais voyant que vous ne pouviez sauver la vie au mareschal, et aussi craignant que l'on ne soupçonnast quelque chose de vous mesme, à cause de l'accusation de La Fin, vous n'y voulustes point aller ny les voir, et ordonnastes leurs gardes si exactes, que ny vos soldats seuls, ny les soldats des gardes du Roy seuls, ne les pouvoient pas sauver, si tous generalement n'y estoient consentans, car ils se tenoient comme prisonniers les uns les autres, et aviez mis un corps de garde sur le bastion, vis à vis des fenestres des chambres des prisonniers, et un autre sur les terrasses du donjon. Le Roy vous escrivit, une fois, qu'il avoit advis qu'il y avoit desseiu fait pour les mettre

en liberté, que vous y prinsiez bien garde et que c'estoit à vous à en respondre.

Vous luy escrivistes qu'il falloit donc de deux choses l'une, que tous les soldats des gardes qu'il y avoit mis et les vostres aussi s'accordassent tous ensemble pour le trahir et vous aussi, ou que les anges s'en meslassent; que de tout le surplus vous estiez content d'en respondre. Le Roy vous donna encor un autre advis, qui estoit qu'il y avoit entreprise sur vostre personne, laquelle se tramoit de cette façon : l'on tenoit des chevaux de relais, en lieux secrets, de dix en dix lieuës, l'on avoit un basteau sur la riviere, garny de soldats qui devoient venir aborder à l'escalier de vostre porte de derriere, du costé de la riviere, mettre un petard à icelle et encore à la seconde porte, puis monter en vostre chambre, vous prendre au lict, vous enlever et mener en la Franche-comté, puis mander au Roy que vostre vie iroit pour la leur. Partant Sa Majesté vous ordonnoit d'asseurer bien vostre personne, pource que si vous estiez en peril, il vous rachepteroit des prisonniers et de choses encor de plus grandes consequences, s'il en estoit besoin. Vous luy escrivites que vous trouviez cela bien difficile à executer; et neantmoins que, pour le contenter, vous feriez mettre la nuit, un petit corps de garde à vostre porte de derriere. Enfin, leur procez fait et parfait, ils furent condamnez à estre executez en Grève; mais à la priere des parens vous obtinistes du Roy que ce seroit dans la Bastille.

Il se passa plusieurs particularitez que nous laisserons aux historiens, et nous contenterons de mettre par escrit ce que le mareschal dit de vous, au temps de l'execution, ainsi que le sieur Deffunctis, prevost de l'Isle de France, le recueillit et le vous bailla par escrit, qui est tel que s'ensuit. Apres avoir esté M. de Biron fort long-temps admonesté par les sieurs Garnier et Maignan, docteurs en theologie, s'estre mis à genoux et receu l'absolution d'eux, et voulant sortir de ladicte chappelle, il demanda s'il n'y avoit personne à M. de Rosny; ausquel fut respondu que ouy et que le sieur Cadet Arnault y estoit. Lors ledit sieur de Biron l'appella et luy dit : « M. Arnault, je vous prie de baiser les mains, de ma part, à M. de Rosny, et luy dire qu'il perd aujourd'huy un des meilleurs et plus affectionnez amis, parens et serviteurs qu'il eut; j'ay tousjours fait beaucoup d'estat de ses merites et de son amitié. » Puis eslevant sa voix en larmoyant et mettant son mouchoir sur ses yeux, dit : « Ha ! que si je l'eusse creu je ne fusse pas icy ! Je vous supplie luy dire que je luy recommande mes freres, specialement mon

« frere de Sainet Blancard, qui est son nepveu, et qu'à mon jeune frere il luy fasse donner une charge chez monsieur le Dauphin. Qu'on leur die que si j'ay esté meschant, qu'ils soient gens de bien, et qu'ils servent tousjours fidelement le Roy; mais qu'ils ne viennent pas si tost à la Cour, afin qu'on ne leur fasse quelque reproche à mon occasion. » Puis eslevant une autrefois sa voix, dit : « Ha ! que c'est un bon et fidele serviteur du Roy et de l'Estat, et un sage conseiller d'Estat que M. de Rosny ! que le Roy fait sagement et prudemment de se servir de luy; car tant que Sa Majesté s'en servira, les affaires de la France n'yront que bien, et si je l'eusse creu, les miennes iroient bien ! »

Après avoir achevé ce que dessus, il demanda sieur de Ruvigny, et dit : « Adieu, M. de Ruvigny, je suis marry que je ne puis faire quelque chose pour vous, et que je n'ay moyen de faire quelque present à mademoiselle de Ruvigny; dites luy que je luy baise les mains. » Et derechef les susdits docteurs l'admonesterent de son salut, et l'ayant fait une autrefois mettre à genoux pour prier Dieu, il sortit apres fort resolument de ladite chapelle, pour s'acheminer au supplice, sans estre lié, s'estant à la sortie d'icelle aigrement courroucé à l'executeur qui se presenta devant luy; puis estant descendu en la cour, il marcha droit vers l'eschaffaut, et, approchant d'iceluy, vit et reconnut M. le lieutenant civil Miron, auquel il dit fort haut : « Ha ! monsieur le lieutenant civil, ne vous accostez plus de ce meschant homme de La Fin, quelque mine qu'il fasse d'estre vostre amy; si vous vous en accostez, il vous fera perir. » Le comte d'Auvergne fut reservé par des moyens secrets, et aussi pour ce qu'il promit au Roy de luy découvrir tous les desseins des Espagnols, si l'on le vouloit mettre en liberté, d'autant qu'il feroit semblant de continuer ses premieres intelligences avec eux, advertiroit le Roy de tout, et feroit prendre tous ceux qui s'en mesleroient; mais le Roy creut et verifia depuis qu'il faisoit tout autrement, continuant en sa desloyauté, et sur cette opinion le fit reprendre, comme il sera dit cy-apres. Il se passa infinies autres particularitez touchant les desseins, captures, interrogatoire, jugement execution du mareschal de Biron, que nous laissons aux historiens, comme toutes les autres choses communes et ordinaires que chacun sçait.

## CHAPITRE CX.

*Indulgence du Roi envers les complices de Bi-*

*ron. Conversation dans laquelle il développe ses projets. Il pardonne au baron de Luz. Affaire des avocats au parlement de Paris. Dissensions en Dauphiné. Ordonnance sur les monnoies. Mines d'or et d'argent. Edit sur les duels. Divers événements. Pardon accordé au Prince de Joinville. Affaires étrangères.*

Le Roy, apres la mort du mareschal de Biron, prit resolution avec vostre conseil d'estouffer le reste des intelligences, en pardonnant à tous ceux qui pouvoient y avoir participé, en quelque sorte que ce fut. Trois ou quatre que vous sçavez bien des plus qualifiez du royaume, et qui depuis vous ont tant aymé à cette occasion, furent aisez à ramener, demanderent pardon au Roy en vostre presence seule et tindrent leur parole. Le Roy en voulant user de mesme envers M. de Bouillon, luy escrivit pour le venir trouver, l'assurant de faveur et gratification, vous commanda de le persuader à cela et vous donna sa parole par escrit (qu'il voulut depuis retirer quand il vous eut refusé), que s'il venoit sur la vostre, que, dès à present, il luy pardonnoit tout et le remettoit en ses bonnes graces comme auparavant. Mais il ne se voulut fier ny à l'un ny à l'autre, et se comporta comme chacun sçait, et qu'il en sera fait mention cy-apres.

Il nous souvient vous avoir oüy dire que le Roy, un jour, peu apres l'execution faite du duc de Biron, vous vint voir en vostre cabinet à l'Arsenac, et vous dit : « Hé bien ! vous voyez comme ceux ausquels j'ay fait le plus de fa-veurs, de biens et d'honneurs ont esté ceux qui m'ont donné le plus de traverses, et ont le plus envié ma grandeur et la prosperité de mes affaires. Car que n'ay-je point fait pour le comte d'Auvergne, les ducs de Biron et de Bouillon, et trois autres que vous sçavez et que je ne veux plus nommer, puis qu'ils se sont repentis ? voire que n'ay-je point souffert d'eux et de leurs extravagantes fantaisies, ambitions des-reglées et avarices insatiables ? car outre les honneurs et les dignitez dont je les ay pour-veus, vous sçavez mieux que nuls autres quelles grandes sommes de deniers ils ont touchées de moy, telles que quatre roys de France auparavant le defunt Roy (qui saccagea tout pour des mignons, lesquels luy ont esté ou dommageables ou du tout inutiles, ne se meslant que de prendre et vivre en plaisirs et delices) n'en donnerent jamais tant durant leur regne; et afin de le faire voir à quelques-uns qui sont pres de moy, qui parlent toujours

« pour ces gens-là, et voudroient, ce semble,  
 « justifier leurs actions et leurs plaintes, et con-  
 « damner les miennes, je vous prie de faire  
 « faire des extraits de ce que ces six personnes  
 « ont touché de moy, depuis qu'ils me servent  
 « comme Roy, sans y compter la seigneurie de  
 « Sedan et tous les biens de cette maison, que  
 « j'ay fait avoir par alliance à M. de Bouillon,  
 « et depuis les luy ay conservez par autorité,  
 « bien soudainement et sans beaucoup de justice  
 « (car vous sçavez tout cela mieux que tous  
 « autres) dont je ne suis pas à me repentir, et  
 « prevoy qu'il me contraindra à luy faire pis  
 « que je n'avois eu envie; car la verité est que  
 « mon inclination a tousjours esté de l'estimer  
 « et de me servir de luy, voire d'en endurer  
 « plus que de nul autre de mes serviteurs. Or,  
 « vous dis-je tout cecy non pour soupçonner que  
 « vous ayez besoin de cette leçon, ny que vous  
 « soyez de si mauvais naturel que de me rendre  
 « le mal pour le bien; mais je seray bien-ayse  
 « de vous faire entendre clairement mes inten-  
 « tions et que vous me disiez aussi franchement  
 « les vostres, afin que nous convenions ensemble  
 « de la forme de vivre que nous aurons à pren-  
 « dre et tenir pour durer longuement unis en-  
 « semble, persistants moy à estre incessamment  
 « bon Roy et bon maistre, et vous tousjours bon  
 « sujet, loyal et utile serviteur, comme nous  
 « nous sommes entre-essouvez tels l'un l'autre  
 « jusques à present.

« Ma resolution est donc de continuer à vous  
 « aymer plus que nul autre, d'eslever et en-  
 « richir vostre maison que je sçay bien estre  
 « ancienne, de vous faire des honneurs et des  
 « biens. Mais je veux tellement assaisonner tout  
 « cela, que non seulement il ne donne occasion  
 « à personne de hayne ou d'envie contre vous,  
 « par sa promptitude et son excez, qui ne vous  
 « puisse donner à vous mesme ny le moyen ny  
 « le desir de vous mesconnoistre, de vouloir faire  
 « vostre fortune sans moy, ny par autre voye  
 « que celle de mes bonnes graces et vos utiles  
 « services, mais aussi exempté mon esprit (le-  
 « quel rebattu de tant d'infidelitez devient vieil  
 « et par consequent plus défiant que de cou-  
 « tume) de toutes causes et occasions d'ombra-  
 « ges, et de soupçon contre vous, à qui pour ces  
 « raisons je veux bien bailler, lors que les occa-  
 « sions naistront et que l'estat de mes affaires  
 « le pourra requerir, des charges et des dignitez  
 « comme pairrie, offices de la coronne et gou-  
 « vernement de province, vous donner le pre-  
 « mier lieu de faveur et de credit au manie-  
 « ment des affaires. Mais ne vous attendez point  
 « que je vous baille de grandes villes et fortes

« places, par le moyen desquelles et de vostre  
 « grand credit et capacité, vous joignant ou aux  
 « huguenots ou à d'autres factions, vous puissiez  
 « vous passer de moy, voire troubler le repos  
 « de mon esprit et la paix de mon royaume  
 « quand bon vous sembleroit. Je veux donc en  
 « vous faisant des biens et des honneurs, qui ne  
 « seront pas petits, je le vous promets ainsi, et  
 « vous en donne ma foy et ma parole, ils soient  
 « neantmoins tels qu'ils dependent tousjours de  
 « ma bien-veillance, et qu'icelle vous venant à  
 « manquer, ils ne puissent par quelque despit  
 « vous porter à me nuire, et moy donner mau-  
 « vais exemple aux miens, faisant pour un ser-  
 « viteur plus que ne doit un bon Roy, qui a  
 « soin de son honneur, de sa reputation, de son  
 « estat et du soulagement, bien et repos de ses  
 « peuples.

« Donc outre vos estats et appointements,  
 « qui sont assez grands pour vous nourrir et tout  
 « vostre train, je vous veux encor donner tous  
 « les ans d'extraordinaire cinquante ou soixante  
 « mil livres, d'autant que cela joint avec vostre  
 « revenu, que vous espargnerez entierement  
 « (car je sçay, et c'est une des choses qui m'a  
 « autant confirmé à me servir de vous aux fi-  
 « nances, que vous ne l'employerez ny en fes-  
 « tins, ny en chiens, ny en oyseaux, ny en che-  
 « vaux, ny en habits, ny en maistresses), sera  
 « suffisant pour meubler et bastir vos maisons,  
 « et acquerir quelques terres tous les ans, afin  
 « de partager vos enfans, ausquels, quand vous  
 « les marierez, je feray encor voir ma liberalité  
 « et combien je vous ayme; voire j'ay desja quel-  
 « que chose en l'esprit (que je ne vous diray  
 « pas à present, mais en temps et lieu) dont  
 « vous aurez sujet d'estre content, et de dire  
 « que vous serez plus que vous n'aviez esperé.  
 « C'est maintenant à vous à me faire sçavoir et  
 « me declarer librement vostre opinion sur toutes  
 « ces choses, et vous en prie, comme estant vostre  
 « bon maistre et amy particulier. » Lors ayant  
 « pris la parole, vous luy dites :

« Sire, vostre prevoyance, vostre prudence,  
 « vostre courage et vostre bon naturel se ren-  
 « dent plus qu'admirables, et ne sçaurois assez  
 « les louer ny estimer, tant pour ce qui regarde  
 « vostre personne royale, vos enfans et vostre  
 « Estat, que moy-mesme, qui trouve desja en ce  
 « qu'il vous a pleu me proposer, non seulement  
 « de quoy me contenter et y trouver l'entier ac-  
 « complissement de mes desirs, mais aussi de-  
 « quoy confesser que c'est beaucoup plus que  
 « mes services, mes merites ne pouvoient atten-  
 « dre, voire mesmes mes esperances ne pou-  
 « voient concevoir. J'accepte donc avec hon-

« neur, humilité et joye indicible, les sacrées  
 « paroles de vostre Majesté, protestant de n'a-  
 « voir de ma vie ny ambition, ny convoitises  
 « de richesses, ny passions, ny affections que  
 « celles qui me seront subgerées par vostre  
 « Majesté mesme; et encor, si j'en recognoissois  
 « quelqu'une qui, par excez de vostre bien-veil-  
 « lance, me fut apprestée, et qui pust estre pre-  
 « judiciable à vous et à vostre Estat, de la re-  
 « fuser absolument, ne vous suppliant de plus  
 « que d'une seule chose, qui est de n'adjouster  
 « point foy aux calomnies et faux rapports que  
 « l'on vous pourroit faire de moy, et juger de  
 « mes intentions par mes effets et par mes ser-  
 « vices, et non du tout par mes paroles, craignant  
 « que la promptitude de mon esprit ne m'en  
 « pust faire eschapper quelquesfois quelqu'une  
 « mal à propos. Quant aux accusations, je ne  
 « les redoute point, ny ne desire nullement que  
 « vous les rejettiez; car un prince sage et judi-  
 « cieux doit tout escouter, et ne se confier ja-  
 « mais du tout en un seul servitenr, mais bien  
 « qu'il vous plaise n'y adjouster aucune foy,  
 « sans m'avoir oüy sur icelles, et veu quelles se-  
 « ront mes œuvres. » Le Roy fut fort satisfait  
 de vostre responce, et apres quelques autres pro-  
 pos de reciproques assurances vous vous sepa-  
 rastes.

Peu apres il envoya des troupes en Bourgongne  
 qui mirent, sans coup frapper, toutes les places  
 du duc de Biron en ses mains, donna le gou-  
 vernement de la province à M. le Dauphin, et  
 la lieutenance generale d'iceluy à M. Le Grand,  
 fit commander au baron de Lux de le venir trou-  
 ver avec assurance de la vie, pourveu qu'il luy  
 voulut confesser toute la menée. Il fallut qu'il  
 vint, car d'autre refuge que l'obeyssance il n'y  
 en avoit point lors contre un prince si coura-  
 geux, si prudent, si diligent, qui avoit aneanti  
 les complots des plus grands, par la mort des  
 uns, prisons des autres, fuitte des autres et sub-  
 mission des autres à sa misericorde, et lequel  
 l'amas que vous commenciez à faire d'armes,  
 d'artilleries, de munitions et d'argent, rendoit  
 redoutable dedans et dehors le royaume. Le ba-  
 ron de Lux, en arrivant, rencontra le Roy al-  
 lant à la chasse, aux pieds duquel il se jetta à ge-  
 noux et se voulant fonder en discours, il luy dit :  
 « Allez vous en voir M. de Rosny et puis je par-  
 « leray à vous. » Ce qu'il fist : et vous prome-  
 nastes long-temps ensemble à l'Arsenac, discou-  
 rant des choses passées, il avoit tousjours l'œil  
 au guet comme un esprit douteux.

Cependant le Roy avoit renvoyé ses gardes à  
 l'Arsenac, où il faisoit estat de venir repasser;  
 mais il eut tant de plaisirs à la chasse que la nuit

l'y surprist, et s'en alla droit au Louvre. Le ba-  
 ron de Lux, qui regardoit de plus pres que vous  
 à toutes choses, descouvrit aussi-tost les gardes  
 du Roy dans la cour, et comme il vit qu'ils ar-  
 rivoyent à la file, il commença à blesmir et vous  
 dire : « Hé! monsieur, je suis venu sur la parole  
 « du Roy et la vostre, ne me la voulez-vous pas  
 « tenir? — Pourquoy dites-vous cela, monsieur,  
 « en estes vous en deflance? — Ho! monsieur,  
 « vous dit-il, les gardes que je vois ainsi arriver  
 « à la file me font juger que ce n'est pas le Roy  
 « qui vient et qu'ils ne peuvent estre envoyez  
 « que pour moy à qui le Roy a pardonné, à la  
 « charge de luy dire tout, comme je suis resolu  
 « de faire, sans espargner personne; partant je  
 « vous supplie, monsieur, de ne reserrer point  
 « ma personne que je n'aye parlé à Sa Majesté. »  
 Lors vous luy distes : « Je voyois bien, il y a  
 « long-temps, que vous aviez l'esprit agité; mais  
 « n'ayez point peur, car je n'ay nulle charge de  
 « vous arrester : parlez librement au Roy, jurez  
 « luy fidelité et la gardez, et ne craignez rien.  
 « Si le duc de Biron en eust voulu faire autant  
 « il fut plein de vie; car je ne vis jamais une  
 « plus forte passion au Roy que de la luy con-  
 « server, s'il eut voulu confesser ses fantaisies,  
 « tesmoigner d'y avoir regret et desir de l'aymer  
 « et servir en toute loyauté. » Sur cela l'on vous  
 vinst requérir, les gardes les advertissant que  
 le Roy estoit allé droit au Louvre, ce qui ras-  
 seura du tout ledit baron de Lux, lequel entre-  
 tint le lendemain le Roy plus de quatre heures.  
 Il embarrassa beaucoup de gens, descouvrit plu-  
 sieurs desseins, dont il y en avoit (à ce que  
 nous en avons oüy dire) de bien vagues, accusa  
 plusieurs personnes qui n'en ont jamais rien  
 sceu et ausquels le Roy n'en fist jamais pire  
 chere, qui est tout ce que nous en avons peu ap-  
 prendre de vous, ne nous ayant jamais voulu  
 dire le surplus.

Pendant le cours de cette année 1602, il se  
 passa plusieurs autres affaires en France, non  
 point tant de consequence que les passées, et  
 pour cette raison en laisserons nous les particu-  
 laritez à ceux qui feront l'histoire entiere, et  
 nous contenterons de vous ramentevoir le som-  
 maire de quelques-unes : comme le balet de la  
 Reine qui se fit à caresme-prenant, lequel ne  
 pust estre parfaitement dancé, ny commodément,  
 veu que chez vous à l'Arsenac; ce que le Roy  
 prevoyant bien, il le fist differer huict jours,  
 attendant que vous fussiez guery d'un mal qui  
 vous estoit survenu à cause de ce coup de pistolet  
 que vous eustes dans la bouche durant le siege  
 de Chartres, afin de vous y pouvoir trouver lors  
 qu'il se danceroit, et donner les ordres neces-

saires, ainsi que vous aviez accoustumé; de-  
quoy vous vous acquitastes si bien alors, que  
le Roy et la Reine en eurent tout contentement.

La fanfaronnerie de trois ou quatre cens ad-  
vocats du palais à Paris, lesquels, pour ce que  
le parlement (sivant l'injonction à luy faite par  
le Roy sur la plainte renduë à Sa Majesté par  
M. de Luxembourg contre quelques-unes de ces  
harpies qui n'avoient point eu honte de luy de-  
mander quinze cens escus pour plaider une  
sienne cause) avoit, pour regler leurs salaires,  
ordonné qu'ils bailleroient quittance de tout  
l'argent que l'on leur bailleroit, et recevoient  
les pieces des parties, par inventaires, sous  
leurs recepissez, s'en allerent au greffe de la  
cour y remettre leurs chapperons et protester de  
cesser leur caquet; dequoy les baguenaudiers  
et pedants firent de grands cancans, tout ainsi  
que si le Royaume eust deu perir, pour estre  
repurgé de ces chicanneurs, lesquels refusoient  
impudemment d'obeyr aux bonnes intentions  
du Roy, arrests de la cour de parlement, des  
pairs de France et ordonnances du royaume re-  
soluës en plenes assemblées d'estats. Que si Sa  
Majesté eust voulu croire absolument M. de Si-  
gongnes (que nous ne sçaurions croire que vous  
n'eussiez excité et embouché, veu les choses que  
nous luy entendismes dire) elle n'eust pas cédé  
si facilement aux sollicitations d'un tas de cajo-  
leurs de Cour (qui semblent n'y estre que pour  
faire des exclamations et des admirations de  
tout ce qu'ils voyent et oyent, reïterer des *Je-  
sus, sire*, crier, en voix dolente, *il en faut  
mourir*, et favoriser toutes sortes de molestes et  
faineantises) et, à leur persuasion, changé ainsi  
soudainement une chose tant sainte et si bien  
ordonnée: car lors que Sa Majesté parla tout  
haut, dans son cabinet, des grandes instances  
qui luy estoient faites sur le sujet des audiences  
cessées et des raisons par eux alleguées, vous  
present et le sieur de Sigongnes aussi, il prist la  
parole et dit, comme s'il eust esté en colere et  
picqué contre cette race de gens: « Pardieu,  
« Sire, je ne m'en estonne pas, car voila des gens  
« qui monstrent bien ne sçavoir à quoy s'occuper  
« de bon, puis qu'ils se tourmentent tant et s'a-  
« lembiquent ainsi l'esprit pour des choses fri-  
« volles et de neant; car vous diriez, à les ouyr  
« criailier, que l'Estat s'en va perdu s'il manque  
« de clabauderies afflinées et de ruses pedan-  
« tesques, comme si le royaume, du temps de  
« ces grands roys (que vostre Majesté imite en  
« toutes sortes de vertus) Merovée, Clovis, Clo-  
« taire le grand, Charles Martel, Pepin, Charle-  
« maigne, Philippes Auguste, Sainct Loüis, Phi-  
« lippes le Bel et Charles le Sage, pendant le

« regne desquels les parties ne se servoient ny de  
« procureurs ny d'avocats, n'estoit pas aussi  
« florissant qu'il peut estre aujourd'huy, que  
« nous sommes mangez de cette vermine; et pour  
« monstrier que mon dire est veritable, il se trou-  
« vera que la premiere lettre royale du protecolle  
« de la chancellerie est intitulée, *Lettre de grace*  
« à plaider par procureur. Que si neantmoins  
« nostre siecle est si mal-heureux, que de ne se  
« vouloir passer de telle racaille, qui ne sert, la  
« pluspart du temps, qu'à destruire la noblesse  
« et à ruyner le traffic, n'y ayant artisan, pas-  
« teur, laboureur, ny mesme manoeuvre qui ne  
« soit plus utile dans un pays, que cette formil-  
« liere de gens qui s'enrichissent de nos folies,  
« et des ruses et cautelles qu'ils inventent pour  
« pervertir la verité, le droit et la raison; que si,  
« dis-je, l'on ne se veut point passer d'eux, que  
« l'on leur ordonne de continuer leur vacation  
« ordinaire dans huit jours, sous les conditions  
« et reigles apposées par la cour, et à faute de  
« ce faire, qu'ils aient à se remettre tous au tra-  
« fic et à l'agriculture d'où ils sont sortis, ou de  
« s'en aller, avec un mousquet sur le col, servir  
« en Hollande contre les ennemis de l'Estat; car  
« lors l'on les verra courir pour reprendre ces  
« magnifiques chapperons, comme vermine vers  
« un tas de froment. » Duquel discours le Roy  
vous voyant rire et tesmoigner de ne le reprover  
pas du tout, il en fit aussi des esclats de rire, et  
vous dit: « Il n'y a point de doute que Sigongnes,  
« quoy qu'il ayt dit tout cecy en colere et avec  
« aigreur, n'ayt quelque raison, et que le meil-  
« leur ne fut d'en user ainsi; mais qu'il recog-  
« noissoit bien qu'il seroit tellement importuné  
« de plusieurs qui estoient pres de luy, et avoit  
« pour lors tant d'autres fantaisies de plus grande  
« importance en la teste (car aussi estoit-il au  
« plus fort de ses agitations, touchant le reste  
« des conspirations du mareschal de Biron et  
« autres ses associez), que pour ne s'embarrasser  
« davantage l'esprit il vouloit remettre en une  
« saison plus opportune le reglement des procu-  
« reurs, advocats et juges, d'autant qu'ils en  
« avoient tous besoin. »

Le grand procez intenté par le tiers estat de  
Dauphiné, contre l'ordre du clergé et de la no-  
blesse, touchant la forme de l'assiette des tailles,  
pour lequel vuider vous fustes nommé avec treize  
autres commissaires de haute qualité; mais les  
altercations et animositez des parties se trou-  
verent telles qu'il fallut renvoyer informer sur  
les lieux, et qu'il se passa six ans avant que de  
pouvoir terminer ce different.

L'édict par vous procuré pour le surhausse-  
ment de prix des especes d'or et d'argent qu'il



avoient cours en France, ayant justifié que la trop grande disproportion d'entre celle-là et celles des pays estrangers, seroit la cause continuelle du furieux transport qui s'en faisoit.

L'ordonnance de compter par livres au lieu d'escus, afin d'essayer de moderer les ventes et achapts; car encor qu'il soit vray de dire que l'on pust aussi bien faire son compte en une façon comme en l'autre, neantmoins diverses experiences ont enseigné que la coutume à nommer un escu au lieu d'une livre, est cause de faire faire des demandes et des offres semblables.

L'exécution par justice d'un receveur general, nommé Jousseaulme, qui avoit emporté les deniers du Roy et fait banqueroute à ses creditiers; lequel s'en estant fuy à Milan, vous l'y envoyastes prendre et le fistes pendre, et en suite (et de pareil crime d'un nommé Pingray) faire un édict contre les banqueroutiers; que si l'on ne tient la main à le faire exactement observer, il s'en suivra plusieurs faillites et ruines de famille.

Les advis donnez au Roy de plusieurs minieres d'or et d'argent decouvertes en diverses provinces de son royaume, desquelles l'on luy faisoit un grand cas, et sur tous en fit le sieur de Beringuen tant d'instances et d'estre employé à les faire mettre à profit, que Sa Majesté luy en bailla le controolle general, et à monsieur le grand escuyer, la superintendance. Surquoy Renardiere, qui se mesloit de bouffonner et mordre en riant, luy dit qu'il ne pouvoit mieux faire que de bailler à un homme tout de mines toutes les mines de France à mesnager.

L'édict fait contre les duels, en la formation duquel vous vous opposastes tousjours pour empêcher que les peines n'allassent jusques à la mort, afin de n'estre contraint de l'enfreindre par les importunités des gens de faveur, ou considerations des personnes de haute qualité.

Le voyage de M. de Nevers en Hongrie, sous esperance de succeder en la charge, creance et reputation de M. de Mercœur. L'arrivée de plusieurs ambassadeurs des roys et princes chrestiens envoyez vers le Roy pour se resjouyr avec luy d'avoir tant heureusement esteint une tant importante conspiration que celle du mareschal de Biron et ses associez, estant le Roy tellement aymé des uns et redouté des autres, que le roy d'Espagne et le duc de Savoye, lesquels en effet estoient les auteurs, rendirent le mesme office, rejettant toute la faute de telles menées sur le comte de Fuentes. La grande ambassade des treize cantons de Suisse et leurs alliez, jusques au nombre de quarante deux, prenans qualité pour venir, au nom de leurs seigneurs et superieurs, jurer le renouvellement d'alliance, fait en l'année

precedente par M. de Biron, lesquels, comme il a desja esté dit par prevention, vous traitastes et les autres commissaires nommez par le Roy pour cet effet, et, qui plus est, leur fistes au nom du Roy, un present de grande quantité de chaines et medales d'or. La naissance de Madame, fille aînée du Roy, au mois de novembre. Et l'advis certain et bien justifié donné au Roy, que M. le prince de Joinville travailloit, par le moyen et entremise du comte de Channite, à former des intelligences avec les Espagnols, sur lequel ayant fait arrester sa personne et icelle presser de dire la verité, il declara qu'il ne diroit rien de ce qu'il sçavoit qu'au Roy seul et vous present. Or, dautant que vous estiez party le jour de devant pour aller voir vostre nouvelle acquisition de Sully, afin de donner ordre aux bastiments que vous aviez designez, n'y ayant rien de logeable au chasteau, Sa Majesté vous y dépescha un courrier et vous escrivit la lettre suivante, qui ne contient que ce peu de lignes.

« Mon amy, venez me trouver en diligence  
« sans vous arrester pourquoy que ce puisse es-  
« tre, car j'ay necessairement affaire de vous, et  
« seray en impatience jusques à vostre arrivée.  
« Adieu mon amy. »

De Fontaine-bleau, ce mardy à midy. HENRY.

Vous n'estiez arrivé à Sully qu'à nuit fermante, et comme vous soupiez, vous entendistes un huchet de postillon, et lors vous nous distes : « Je me doute bien que mon sejour ne sera guere  
« long en ce lieu. » Comme il fut vray, car ayant leu les lettres que le courrier vous apporta, l'impatience vous prist de sçavoir quelle affaire si pressée pouvoit estre survenuë de nouveau, tellement que vous partistes si matin, que vous ne vistes Sully qu'aux flambeaux. Estant arrivé pres du Roy, et M. de Joinville amené devant vous deux, il en confessa suffisamment pour se mettre bien en peine, s'il eust eu affaire à un prince moins sage et moins indulgent; encore que, pour en dire la verité, il ne parut en toute cette manigance ny sens ny raison, voire sembloit une vraye niaiserie d'enfant, que le Roy, par sa singuliere bonté, qualifiant ainsi, il envoya querir madame et M. de Guyse, et leur dit, en entrant dans son cabinet :

« Voicy le vray enfant prodigue, qui s'est  
« imaginé de belles folies : mais comme pleines  
« d'enfance et de nivelleries, je luy pardonne pour  
« l'amour de vous et de M. de Rosny, qui m'en a  
« prié à jointes mains; mais c'est à condition que  
« vous le chapitrerez bien tous trois, et que vous,  
« mon nepveu (adressant sa parole à M. de Guyse),  
« en respondrez à l'advenir, car je vous le baille  
« en garde, afin de le faire sage s'il y a moyen. »

Et quant à ce que vous appristes des affaires et pays estrangers, tant par les lettres que le Roy vous envoya que par celles qui vous en furent escrites durant cette année 1602, outre ce que nous en avons dit dès le commencement d'icelle, laissant comme de coustume les particularitez des choses aux historiens, nous vous ramentrevrons seulement en sommaire celles qui vous estoient escrites par les ambassadeurs et autres, à sçavoir :

L'usurpation du marquisat et forteresse de Final, faite par les Espagnols ; la continuation du siege d'Ostende, qui produisoit journellement des exploits dignes de remarques ; les grandes mutineries d'aucunes troupes d'Espagne en Flandre retirées à Ostrate, lesquelles par la rigueur estant portées au dernier desespoir, traitterent en fin avec le prince Maurice, mais avec des conditions grandement estranges ; la construction de douze galeres ou pataches des plus grandes, mieux équipées et des mieux fournies de gens de guerre qu'il estoit possible, que le roy d'Espagne fist construire et fournir en Sicile, sur lesquelles s'estant embarqué Federic Spinola comme general, avec une merveilleusement grande esperance de dominer la mer de Flandre par le moyen d'icelles, il y en eust qui perirent par la tourmente dès les costes d'Espagne, et des autres dix une partie fut prise et coulée à fonds par des navires hollandoises qu'elles rencontrèrent, reservé la dernière, où estoit le general, qui fut tant battué à coups de canon, que toute deslabrée elle vint eschoüer à la veuë de Calais, de laquelle tous les forçats s'estans retirez et enfuits, les uns qui deçà, les autres qui delà ; mesme leur general Spinola fut aussi contraint de se sauver à Calais, d'où tout triste et melancolique, il s'en alla trouver l'archiduc à Bruxelles, ne remportant rien d'un si superbe et magnifique appareil, que des plaintes et regrets contre la mer, les vents et l'inconstante fortune, lesquels ne s'en soucioient gueres. Les mouvements et brouilleries advenus à Emdem, entre le comte favorisé des Espagnols, quelque protestant qu'il fist demonstration d'estre, et ceux de la ville, et en passerent les animositez si avant, que la ville se maintint en une pleine et absolue liberté, et se reduisit en la protection des Estats. L'entreprise du duc de Savoye sur Geneve, si dextrement projectée et heureusement avancée, que sans advis ny allarme, il estoit entré deux cens hommes armez dans la ville sur les remparts d'icelle, lesquels ayant surpris la sentinelle, l'avoient tuée, fait le semblable d'une ronde, apres avoir pris d'elle le mot du guet, et par le moyen d'iceluy, taillé en pieces le plus prochain corps

de garde, montant tousjours cependant des gens de guerre à l'escalade pour suivre les premiers entrez. Et neantmoins, nonobstant tous ces avantages, de pauvres simples bourgeois et manants prirent une si brave et obstinée resolution, et donnerent telle espouvante à tant de gens armez, qu'ils firent sauter les murailles ou tuèrent et prindrent prisonniers (qu'ils firent apres pendre) tout ce qui estoit entré dans leur ville. Les revoltez de Transilvanie et la prise de la ville de Bistrith par les partisans du waivode Battori, rebelle à l'Empereur, laquelle ayant esté assiegée par George Baste et icelle capitulé sous certaines conditions, elles furent enfraintes par quelques gens de guerre en l'absence de Baste ; ce que par luy entendu, il fit pendre tout ce qui pût venir en sa connoissance avoir esté cause d'une telle infraction de foy, et payer tout le dommage receu par les habitans ; lequel acte de loyale observation de parole fut de telle efficace envers tous les rebelles, qu'ils se sousmirent entierement à l'Empereur sur la foy de Baste. La reprise d'Albe-regalle par les Turcs ; celle de Pest par les chrestiens, en laquelle se trouva M. de Nevers, aussi bien qu'au siege de Bude, où il fut blessé et contraint de se retirer, dautant que les Turcs le vindrent, avec beaucoup de force, faire lever.

## CHAPITRE CXI.

### *Lettres diverses sur les événemens de l'année 1602.*

#### *Lettre de M. de Ville-roy à M. de Rosny.*

Monsieur, j'ay parlé au Roy du fait du Carlat, suivant vostre advis ; il dit qu'il s'en resoudra quand vous serez icy, et semble qu'il incline plus à le conserver qu'à le desmolir, il vous dira ses raisons, que je ne pretends soutenir. Je luy dis hier au soir la cause de vostre retardement, suivant la lettre que vous m'aviez escrite, et il a sceu ce matin, par celle que vous luy avez adressée, que vous ne pouvez venir que demain ; mais il desire que vous n'y failliez pas, toutes choses estans remises à vostre venuë, tant pour le fait des prisonniers que pour l'armée de Bourgogne, et ce que doit faire M. de Laverdin. J'ay escrit à M. de Sillery ce qu'a apporté M. de Senecey, et la poursuite que veut faire M. de la Force, ce qui a mis le Roy en peine. Quand vous serez icy vous sçavez le demeurant, et le Roy prendra resolution. En attendant, je prie Dieu, etc.

De Fontaine-bleau, le 3 juillet 1602.

DE NEUF-VILLE.

*Lettre de la main du Roy à M. de Rosny.*

Mon amy, je ne vous escrivis point hier les nouvelles que j'avois eues de M. le mareschal de Laverdin, par Senecey, comme suivant l'opinion que vous en aviez tousjours eu, toutes les places de Bourgogne estoient en mon obeysance, et comme il avoit mis des hommes dedans, pource que j'esperois vous voir aujourd'huy et vous les dire moy-mesme: je vous prie d'estre icy demain, car j'ay beaucoup de choses à vous dire, et sur lesquelles je ne puis prendre aucune resolution que je n'aye parlé à vous. Adieu.

Ce mercredi à deux heures apres midy, ce 3 de juillet 1602, à Fontaine-bleau. HENRY.

*Lettre de M. de Ville-roy à M. de Rosny.*

Monsieur, je n'ay peu faire entendre au Roy le contenu aux lettres de vos lieutenans en Provence et à Lyon, et de l'ingenieur Bonne-font, plutost que ce matin, que je luy en ay fait le rapport; tout le commandement qu'il m'a fait a esté de vous faire sçavoir qu'il vous verra bien-tost, et que lors il prendra resolution sur le tout. Cependant il dit que vous pouvez ordonner des despences avancées à Lyon ce que vous jugerez estre raisonnable, comme sur le demeurant qu'il remet tout à vous; mais il semble n'approuver pas la desmolition de l'eglise des cordeliers de Bourg, de laquelle parle ledit Bonne-font. Je vous renvoye l'ordonnance du Roy qui concerne l'argent qu'il faut déposer en la Bastille, provenu de vostre bon mesnage. Mais Sa Majesté a fait difficulté de vous accorder vostre congé, quelque remonstrance et instance que j'en aye faite. Quand vous l'aurez veü, peut estre changera-t-elle d'avis: nous attendons le vostre sur la despesche de Suisse r'apportée par Picault, que jenvoyay hier audit sieur de Sillery pour vous la faire voir. J'estime que Sa Majesté vous mandera venir icy si tost qu'elle aura veu vostre dit avis; elle approuve l'ordre que vous avez baillé pour payer les recreuës des compagnies qui servent en Provence. Je vous supplie aussi vous souvenir de pourvoir au present qu'il faudra donner au camerier du Pape, car il sollicite sa depesche pour s'en retourner. Nous n'avons rien de Flandre digne de vous estre escrit; l'armée du prince Maurice estoit encores à Berg le 17 de ce mois, incertaine de ce qu'elle devoit devenir. Je me recommande humblement à vos bonnes graces, etc.

De Saint Germain en Laye, le 24 juillet 1602.

DE NEUF-VILLE.

*Lettre de M. de Ville-roy à M. de Rosny.*

Monsieur, nostre levée de Suisses a esté re-

tardée jusques au premier jour de septembre, et si entre-cy et là nous cognoissons que nous n'en ayons besoin, nous en serons deschargez; il est vray qu'il nous en coustera quelque chose outre ce qui a esté avancé: je vous enverray demain la depesche. Le Roy m'a commandé vous envoyer celle de la Boderie, que vous trouverez en ce paquet, qui ne sera veü que de vous, s'il vous plaist: voyez ce qu'il escrit. S'il faut que ces armées combattent, elles ne doivent tarder à le faire; pour cette cause, Sa Majesté voudroit attendre encore quinze jours à executer la reduction des compagnies du regiment de sa garde, afin de ne se deffaire de douze ou quinze cens bons hommes qui ont esté augmentez en icelles, que l'on n'ayt veu ce que feront lesdites armées. Cependant les dix compagnies qui sont en Bresse pourront revenir par deçà pour les retrancher toutes ensemble; mais Sa Majesté dit qu'il faut envoyer au devant d'icelles l'argent de la monstre jusques à Troyes, afin que les soldats aient moyen de vivre sans faire desordre, vous recommandant tousjours le soulagement de ses peuples. L'on en sera quitte, pour gagner ce temps-là, de payer un demy mois à ceux qui seront licentiez. La compagnie de cinquante chevaux legers de M. de Verneuil est assemblée auprès de Lyon; le Roy desire que vous y fassiez envoyer l'argent d'une monstre, afin qu'elle soit payée et qu'elle paye aussi cette chose que Sa Majesté a grandement à cœur. Elle desire aussi sçavoir ce que vous avez fait avec l'ambassadeur d'Espagne. Comme je fermois la presente, le Roy m'a fait sçavoir la responce de l'ambassadeur d'Espagne, de laquelle elle est demeurée contente, comme de l'ordre que vous avez donné au payement des dix compagnies des gardes qui sont absentes. Je prie Dieu, etc.

De Saint Germain en Laye, le 6 d'aoust 1602.

DE NEUF-VILLE.

*Lettre de M. de Ville-roy à M. le marquis de Rosny.*

Monsieur, le Roy m'a commandé vous escrire qu'il a receu la lettre que vous luy avez écrite de Paris le vingtiesme de ce mois, à laquelle il fera responce quand il aura veu le sieur Zamet, que vous luy avez mandé devoir luy faire entendre les ouvertures qui ont esté faites pour esteindre entierement le reste de l'imposition du sol pour livre; il attend icy aujourd'huy ledit Zamet. Sa Majesté eut la fièvre toute la nuit d'entre mercredi et jeudi, pour s'estre morfondu le matin en voyant travailler ses maçons, et s'estre promenée en ses allées la nuit; mais elle ne laissa d'aller hier à la chasse apres avoir disné, et s'en por-

toit mieux hier au soir, qu'elle me commanda vous escrire la presente, et de vous mander tout cela. M. de Sillery arriva comme il estoit à la chasse, qui luy a rendu compte des discours de M. le comte d'Auvergne. La Plume, que l'on avoit envoyé vers le baron de Lux, est revenu; il est prest à venir trouver le Roy et monstre le desirer, promet de dire tout ce qu'il sçait; mais il demande aussi d'estre asseuré, en cas qu'il ne die tout ce que l'on estime qu'il sçait, et que l'on ne demeure content de luy, qu'il luy sera permis de s'en retourner seurement: il demande aussi d'estre maintenu en sa charge, et de n'estre confronté à personne. Sa Majesté a sur cela mandé M. le president Jeannin, qui a le dernier parlé à luy, pour deliberer de la response qu'elle luy fera; mais il desireroit sur toutes choses d'avoir une lettre de vous. Nous avons lettres de Bruxelles du seiziesme: le prince Maurice ayant achevé le retranchement de son camp, poursuivant son siege, ceux de dedans Grave se défendoient mollement; et l'admiral d'Arragon ayant dressé un pont sur la riviere, devoit faire un effort sur l'un des quartiers de l'armée dudit prince, pour secourir la place, l'archiduc estant demeuré malade à Bruxelles. L'armée de mer assemblée en Espagne estoit encores à Cadix et au port de Sainte Marie: par lettres de Valledolit, le unziesme du present, l'on parloit tousjours diversement de l'employ d'icelle; mais la Terce n'est plus revoltée. Nous ne sçavons encores combien nous demeurerons icy, et j'ay parlé à M. le connestable du quartier pour vostre compagnie; il n'en fait nulle difficulté et en doit aujourd'huy parler à Sa Majesté. Je prie Dieu, etc.

De Monceaux, le 23 aoust 1602.

DE NEUF-VILLE.

*Lettre de M. de Villeroy à M. de Rosny.*

Monsieur, le Roy vous mande sa volonté pour le traitement de l'administrateur de Strasbourg; il trouve bon que M. le comte d'Auvergne soit traité, par vostre lieutenant, en la Bastille, en la forme que vous adviserez avec madame sa femme, et qu'il soit deschargé de la despence que font les officiers de Sa Majesté aupres de luy. Sa Majesté est contente aussi que les soldats des gardes qui ont esté commis pour le garder soient reduits à quatre et le lieutenant ou exempt, puis que vous jugez, par l'ordre que vous y avez donné, qu'il n'en peut advenir faute. Mais, quant à permettre audit comte d'aller aux terrasses, Sa Majesté dit qu'elle s'en resoudra apres avoir parlé à vous, et veut, tant pour cette cause que pour plusieurs autres, que vous veniez icy mardy, ainsi qu'elle vous escrit, et m'a commandé de

retenir la lettre que vous m'avez envoyée pour M. de Gastines, jusques à ce qu'elle vous ayt veu. M. le connestable a parlé au Roy du payement de vostre compagnie des gens d'armes, et a receu le commandement d'y pourvoir; tellement que vous pouvez faire estat d'un quartier qui sera tres-bien assigné, je vous en responds, quant à la commission, parce que mon commis est demeuré par delà. Mandez luy qu'il la fasse en la forme que vous jugerez la meilleure, et me l'envoyez, afin que je la dépesche. Je me recommande à vostre bonne grace, et prie Dieu, etc.

De Monceaux, le dernier jour d'aoust 1602.

DE NEUF-VILLE.

*Lettre du Roy à M. de Rosny, contre-signée.*

Mon cousin, j'ay veu l'extraict des assignations que nous avons affectées au payement des garnisons et fortifications de Barrault, Provence et Bourg en Bresse, que vous m'avez envoyé avec vostre premiere lettre escrite hier; elles ne peuvent estre meilleures ny plus certaines, comme j'ay commandé estre escrit à ceux qui s'en sont plaints: mais puis que le retardement de l'acquittement d'icelles procede, ainsi que vous avez recogneu et m'avez mandé, de la malice et negligence des thresoriers de France, et receveurs generaux, je trouve bon l'expedient que vous avez proposé, d'envoyer un commissaire sur les lieux, qui interdise tous lesdits thresoriers et receveurs, fasse luy mesme la charge desdits thresoriers, et commette quelqu'un à faire la recepte. Partant, je vous prie de faire eslection d'un homme de bien, et l'y envoyez vous mesme tel que vous adviserez. Mais je veux que ses frais soient pris sur les gages desdits thresoriers et receveurs, qui sont cause du mal, afin qu'ils recoivent cette punition avec celle de leur interdiction, et que je ne paye la peine de la faute qu'ils font à mon service et à leur devoir. Quant au traitement du fils du marquis de Brandebourg, duquel vous m'avez escrit par vostre derniere, encore que ce ne soit la coustume de traiter ceux de sa qualité hors d'aupres de moy, toutesfois cette maison tient un tel rang en Allemagne, et a tousjours esté si affectionnée à la France, comme elle se monstre encores maintenant en mon endroit, ainsi que vous le sçavez bien, que je veux que l'on caresse cettuy-cy, de façon qu'il ayt occasion de s'en louer, soit en le logeant et faisant deffrayer, ou en luy faisant tous les jours present de quelques viandes et vins exquis, ainsi que vous le jugerez plus à propos; la dépence n'en sera grande, car sa suite est petite, et si j'estime qu'il n'y séjournera gueres; mais, afin d'avancer sa dépesche, faites que le

sieur de Maisse le voye de ma part, pour sçavoir de luy s'il desire quelque chose de moy pour ses affaires, en attendant que je sois par delà, et apres je le feray venir icy si vous jugez qu'il soit à propos, afin de le renvoyer plus promptement. J'ay mandé les ambassadeurs d'Angleterre, Escosse et Savoye, afin de les oïr mardy; car je suis encor incertain du temps que je retourneray à Paris, d'autant qu'il fait si beau icy, et y trouve tant de plaisir pour la chasse que je n'en puis partir. Et afin que vous cognoissiez que ce n'est sans sujet, soyez-y mardy; par mesme moyen je vous diray moy-mesme mon intention sur les autres poincts de vos lettres, et plusieurs autres choses qui se presentent pour mon service. Priant Dieu, mon cousin, qu'il vous ayt en sa sainte garde, etc.

Escrit à Monceaux, le dernier jour d'aoust 1602.

HENRY.

Et plus bas,

DE NEUF-VILLE.

*Lettre du Roy à M. de Rosny, contre-signée.*

Mon cousin, je receus hier au matin à Boulougne, ainsi que j'en voulois partir, vostre lettre du vingt-neufiesme d'aoust, par laquelle vous m'avez escrit l'office que vous avez fait envers la Reine ma femme, sur mon acheminement en cette province, que je suis tres-aise qu'elle ayt si bien receu que vous m'avez mandé; je n'en esperoï pas moins de son affection au bien de mes affaires et de vostre entremise vers elle. Venez donc me trouver, le plutost que vous pourrez, car je veux que vous soyez pres de moy estant à Calais et pour cause. J'escris au president Jeannin qu'il vienne avec vous, car je suis de vostre avis qu'il pourra se presenter occasion de l'employer, et estime qu'il suffira que vous fassiez apporter vingt ou vingt-cinq mil escus outre les cent mil qui doivent estre envoyez à Dieppe, lesquels arriveront bien à propos pour estre employez à ce à quoy nous les avons destinez; et parce que j'espere vous voir bien tost, je ne vous feray la presente plus longue, pour prier Dieu, mon cousin, qu'il vous ayt en sa garde.

Escrit à Calais, le 2 septembre 1602. HENRY.

Et plus bas,

DE NEUF-VILLE.

*Lettre de la main du Roy à M. de Rosny.*

Mon amy, je desire que vous voyez et interrogiez Hebert avec le comte d'Auvergne, et que vous l'assuriez que l'abolition que je luy promets par le Memoire escrit de ma main, que j'ay mis en celle dudit comte, luy sera expediee et delivree, pourveu qu'il vous die ce que je sçay qu'il sçait des menées du duc de Biron, et

mesmes celles qu'il a faites pour luy au voyage dernier, qu'il a fait à Milan et Italie, et quel argent, Roncas et Alfonse, Casal apporterent et firent delivrer separément ou ensemble audit de Biron, la dernière fois qu'ils sont venus vers luy, et tout le reste de ce qu'il sçait, sans rien en reserver. Voyez-le donc au plutost, et donnez ordre cependant que personne ne l'advertisse et luy donne conseil où il est, contraire à son devoir et à ma volonté. Adieu.

Ce dixiesme octobre, à Saint Germain en Laye.

HENRY.

*Lettre de M. de Ville-roy à M. de Rosny.*

Monsieur, j'ay receu vostre lettre du unziesme avec les deux estats que vous m'avez envoyez, mais je n'ay pû encor les faire voir au Roy; il employa hier toute l'apresdinée à entretenir Constans et Saint Aubin, sur le fait de M. de Bouillon, duquel nous n'avons eu nouvelles depuis la lettre qui vous a esté envoyée. Sa Majesté va ce matin à la chasse, de sorte que je doute luy pouvoir faire voir lesdits estats devant qu'elle parte; je desire qu'elle les considere et ce que vous m'avez escrit sur iceux, comme j'estime estre non seulement vostre intention, mais aussi son service. Nous avons advis de divers endroits que le roy d'Espagne arme grandement de toutes parts pour l'année prochaine; tellement qu'il est besoin que nous pensions à nous à bon es-cient; Sa Majesté en est bien advertie. C'est pourquoy elle desire grandement que l'on fasse passer les édicts qu'elle a choisis; je l'escris par son commandement à monsieur le chancelier, et croy qu'il ne tiendra à luy ny à vous, que Sa Majesté n'en soit servie comme elle desire. Je prie Dieu, etc.

De Fontaine-bleau, le 13 decembre 1602.

DE NEUF-VILLE.

Avant que de mettre fin à nos recueils de l'année 1602, par les lettres cy-dessus, en continuant ce que nous avons observé pour l'année 1601, nous ayant fait recherche de la pluspart de vos vieux papiers jettez en confusion dans vos trois cabinets, et sur tout vos ormoires vertes, nous avons rencontré dans la plus basse d'icelles une liasse de sept roolles de lettres de la main du Roy, sur lesquelles nous fusmes bien empeschez à pouvoir discerner de quelles années elles devoient estre reputées; mais finalement ayant rencontré un des susdits sept roolles, avec lequel il y avoit une lettre de M. de Gèvres datée de l'année 1602, nous avons creu ne point faillir si nous transcrivions icy quelques-unes de celles que nous avons jugé le

plus apparemment devoir estre estimées de ladite année, afin de continuer à faire voir que le Roy prenoit la peine de vous escrire de sa main jusques aux moindres choses, et qu'il vouloit avoir cognoissance de toutes les affaires de son royaume; les lettres que nous avons choisies pour estre de ladite année estant telles que s'ensuit :

*Six lettres de la main du Roy à M. de Rosny.*

Mon amy, j'ay receu vostre lettre et ce que vous escrit mon nepveu le prince de Joinville, auquel vous manderez que pour ce que je vais demain au matin à la chasse, il se rende icy sur le soir à mon coucher, et qu'il me die qu'encor que je luy aye cy-devant pardonné et permis à ma niepce de Guyse sa sœur, et à M. d'Eguillon, de luy mander de me venir trouver, que toutes-fois il me demande encor pardon et me promet de se gouverner cy-apres, de façon qu'il ne me donnera jamais sujet de me fâcher contre luy, et ne fera rien qui me puisse desplaire ny estre desagréable. Pour vous, vous me ferez plaisir de n'estre par cy-apres protecteur de pas un de cette maison-là. Bon soir, mon amy.

Ce 30 juillet, à Saint Germain en Laye.

HENRY.

Mon amy, partez pour me venir trouver incontinent que vous aurez receu la presente par ce courrier que je vous envoie expres; car j'ay besoin de vous sur plusieurs occasions qui se presentent que je vous diray quand vous serez icy, où il faut que je séjourne huit ou dix jours, pour faire une diette que mes medecins m'ont ordonnée, pour me delivrer d'une fluxion qui m'est tombée sur la jambe, laquelle avec le temps pourroit meriter le nom de goutte. Sur ce, je prie Dieu qu'il vous ayt en sa sainte garde.

Ce 26 avril, à Blois.

HENRY.

Mon amy, je monte à cheval pour m'en aller courre un cerf à Marcoussis : je vous prie de mettre fin à ce qu'il faut pour le mariage de la Bourdaisiere; c'est chose que j'affectionne et dequoy je m'oubliai de vous parler dernièrement. Souvenez-vous de l'assignation de deux mille escus pour M. Le Grand, auquel j'ay dit que ç'avoit esté vous qui m'en aviez fait souvenir, afin qu'il vous en sceut gré; car je veux faire en sorte que tout le monde vous ayme, comme je fay. Je seray demain de retour, Dieu aydant, et vous verray icy ou chez vous mercredi matin, pour resoudre le jour que nous tiendrons conseil pour l'affaire que vous sçavez. J'ay commandé à Bastian, qui vous rendra ce mot, de vous parler de ces deux affaires et d'autres dont je l'ay chargé;

dequoy je vous prie de le croire comme moy-mesme. Adieu, mon amy.

Ce 21 janvier, à Paris.

HENRY.

Mon amy, j'ay tant séjourné aujourd'huy à Saint Germain à y voir mes enfans et mes bastimens, qu'il estoit neuf-heures quand j'en suis retourné, et qu'à l'heure que je vous escry et que je m'en vais souper, qui est onze heures, je n'ay pû voir qu'une partie des dames qui sont icy, ayant remis à voir le reste pour demain, puis que, partant de cette ville, je n'y dois retourner de cinq ou six mois : cela sera cause que j'y séjourneray encore demain; mais mercredi sans faute, Dieu aydant, j'en partiray. Je vous prie de faire en sorte que l'on travaille fort en mon conseil, par delà, afin qu'à mon arrivée je trouve force besongne faite. Si j'eusse esté instruit de ce que je devois dire à ceux de ma chambre des comptes, je l'eusse fait, puis que je demeure icy. C'est pourquoy vous leur ferez faire une dépesche à ce qu'ils me viennent trouver à Fontaine-bleau, jeudy ou vendredy, afin que je parle à eux. Bon soir, mon amy.

Ce lundy 17 may, entre onze heures et minuit, à Paris.

HENRY.

Mon amy, je vous envoie la lettre que j'escry à ma femme, afin qu'incontinent icelle receuë, vous la luy portiez vous mesme : munissez-vous de bonnes raisons, afin qu'elle ne se fâsche de ce voyage et ne s'ennuye de mon absence. Vous verrez la lettre par la coppie que je vous envoie. Pourvoyez à cela et aussi à tout ce qui est nécessaire pour ses couches, je vous en prie. Errard m'a demandé quelque chose sur un estat vaquant; je suis d'avis de faire quelque chose pour luy, mais mandez-moy quoy et vostre avis. J'eus hier au soir des nouvelles de Calais, où l'on me mande que les assiegez d'Ostende se defendent mieux qu'ils n'avoient point encore fait, et les assiegeans les assaillent plus mollement. Bon jour, mon amy.

Ce 27 aoust, à Vernueil.

HENRY.

Mon amy, j'ay veu par vostre lettre les propos que vous a tenus mon nepveu le duc de Guyse, touchant le séjour que je veux que le prince de Joinville fasse à Dampierre, et l'excuse qu'il prend qu'il n'y a point de meubles. Surquoy je vous diray que c'est une menterie, car par deux fois que la chasse m'a mené vers ledit Dampierre et Chevreuse, le receveur desdites terres m'y vint offrir des lits et autres meubles qui y sont; et mesme à Chevreuse, ledit receveur m'a accommodé et les seigneurs qui estoient avec moy, de neuf ou dix lits; joint que ma cousine, sa mere, m'a tousjours assuré que sadite maison

de Dampierre estoit bien meublée. Vous direz donc à mondit nepveu que je veux que son frere y aille aussi-tost qu'il aura esté oüy en sa deposition, sans s'arrester davantage à Paris. Vous aurez veu la lettre que j'envoyay hier à monsieur le chancelier, sur laquelle j'attends vostre advis. Adieu, mon amy.

Ce 4 decembre, à Fontaine-bleau. HENRY.

*Lettre de M. de Gesvres à M. de Rosny.*

Monsieur, le Roy, pour ce qu'il montoit à cheval pour aller à la chasse, m'a commandé de vous escrire pour vous donner advis que M. le prince de Joinville change de discours, ayant fait dire par M. de Guyse, qu'il est resolu de s'ouvrir entierement à Sa Majesté et luy dire tout ce qui s'est passé et dont il a eu cognoissance, dequoy Sa Majesté peut avoir mescontentement, laquelle il supplie luy vouloir pardonner, et par mesme moyen luy a fait dire qu'il craint qu'elle se courrouce contre luy, et la supplie de trouver bon, que ce soit par vous qu'il luy fasse entendre tout ce qu'il luy veut faire sçavoir. C'est l'occasion pourquoy Sa Majesté desire que vous soyez en cette ville demain au soir, et que vous veniez droit au Louvre la trouver avant qu'aller chez vous, m'ayant commandé vous envoyer ce courrier expres. Et apres m'estre humblement recommandé à vos bonnes graces, je prieray Dieu, etc.

De Paris, le 28 novembre 1602. POTIER.

CHAPITRE CXII.

*Devise des jetons distribués au commencement de l'année 1603. Lettres diverses sur quelques événemens de cette année.*

[1603] Suivant l'ordre que nous avons tenu les dernieres années passées, nous commencerons le premier chapitre de celle-cy, par la devise que vous fistes apposer aux jettons d'or que vous portastes au Roy, le premier jour de janvier, fondée sur ce que voulant donner une éducation vraiment royale à ses enfans, il en vouloit prendre le loisir par le moyen d'une bonne paix qu'il cultivoit soigneusement, tant pour le dehors que pour le dedans de son royaume; estant bien resolu d'achever d'estouffer toutes semences de troubles et mouvemens qui pouvoient encor rester par le moyen de ceux qui avoient trempé dans la faction du duc de Biron, ne restant plus que messieurs de la Trimouille et de Bouillon, qui fussent en quelque sorte considerables. Le corps de cette devise donc fut un nid d'alcons au milieu de la mer, lesquels ont

cette vertu de la tenir tranquille pendant qu'ils couvent et nourrissent leurs petits, ou bien la cognoissance que, de sa nature, elle doit estre telle en cette saison-là; et pour ame, y mistes ces paroles : *Nostri dant otia terris.*

Et continuerons ledit premier chapitre, par une grande quantité de lettres que nous avons trouvées ensemble en un roollet, lesquelles contiennent une partie de ce qui se passa durant cette année 1603, et sont telles que s'ensuit.

*Lettre de la main du Roy à M. de Rosny.*

Mon amy, j'ay donné charge au sieur Zamet de poursuivre le fait du marc d'or, et commandé à monsieur le chancelier de luy bailler toutes les expéditions necessaires, afin que, sans avoir esgard à plusieurs brevets qui ont esté cy-devant depeschez, chacun paye, si ce n'est quelques personnes de qualité et merite; à quoy je vous prie de tenir la main, afin qu'à mon retour de Mets je puisse recevoir le contentement que j'espere de mes bastimens de Fontaine-bleau, et empeschez que l'on ne donne cy-apres aucunes expéditions qui puissent en quelque façon retarder l'execution de ma volonté pour ce regard; car, comme vous sçavez, c'est chose que j'ay à cœur et que j'affectionne. Je vous prie aussi de faire bailler audit Zamet toutes les expéditions necessaires pour les deux sols et six deniers pour minots de sel, qui se levent pour l'augmentation des gages des presidents, ainsi que je vous ay dit à mon parlement, faisant bailler, par le tresorier de mon espargne, les expéditions necessaires à ce que l'argent soit delivré audit sieur Zamet à mesure qu'il se recevra. Je luy avols aussi commandé de vous parler de la resignation de l'office de conseiller en mon parlement, qu'entend faire le sieur de Boynville, et ce sans payer aucune finance, comme de prendre celui de maistre des requestes que l'on luy resigne de mesme, comme chose que je desire que cela ce fasse et que je luy ay promise et accordée; à quoy je vous prie aussi de tenir la main. Sur ce, Dieu vous ayt, mon amy, en sa sainte et digne garde.

Ce 25 fevrier, à Monceaux.

HENRY.

*Lettre du Roy à M. de Rosny, contre-signée.*

Mon cousin, sur la supplication que m'a faite mon grand escuyer, à la requeste des habitans de ma ville de Beaune, de laisser en ladite ville l'artillerie qui estoit au chasteau, devant qu'il fut desmantelé, laquelle vous sçavez avoir ordonné estre portée en ma ville de Dijon, j'ay advisé la laisser en ladite ville jusques à mon retour de Mets, que je resoudray lors avec vous

ce que je voudray en estre fait; mais je veux que celle de Saule-Duc soit dès à present portée en ladite ville de Dijon suivant mon premier commandement, ainsi que j'escris presentement audit grand escuyer : au moyen dequoy donnez ordre que ma volonté, en l'un et en l'autre point, soit executée. Vous sçavez le commandement que j'ay fait audit grand escuyer de faire parachever les hocquetons de mes gardes, pour lesquels vous avez verifié que le receveur de l'escrue a touché, il y a long-temps, jusques à quatre mille escus, de l'assignation que vous luy aviez donnée à cet effet par mon commandement. Je luy escriis maintenant qu'il en ayt souvenance, et s'il est necessaire de fournir pour cela quelque argent, plus qu'il n'a esté receu, qu'il vous en avertisse, l'asseurant que vous y pourvoyrez comme je vous prie faire; car je desire fort que mesdits gardes soyent remarquez par lesdits hocquetons, et suis marry qu'ils ne les peuvent avoir, en ce voyage, par la faute de ceux ausquels la charge de les faire faire a esté donnée. Au reste, le sieur de Sainct Germain m'est venu trouver, qui m'a parlé de l'argent qui souloit estre départy au duc de Bouillon pour garder ses places, avec tant d'affection à l'endroit dudit duc, que j'en suis tres-mal edifié, et prevoy, si nous n'y prenons garde, qu'il fera ce qu'il pourra à ce que ledit duc n'en soit frustré contre ma volonté. Partant je vous prie d'en parler audit sieur de Sainct Germain, de façon qu'il reconnosse, s'il a ce but, qu'il m'est des-agreable, et de vostre costé y donner si bon ordre que ma volonté soit suivie, et me faire sçavoir de vos nouvelles, le plus souvent que vous pourrez, sur toutes nos affaires, et maintenant par ce porteur, que j'envoye expres vers mondit grand escuyer, pour luy faire sçavoir qu'il m'envoye en diligence mes pages de la chambre qui sont sous sa charge avec leur gouverneur pour me servir en ce voyage, puis que ceux qui estoient sous celle dudit duc de Bouillon, estants congédiez, n'y peuvent estre. Je prie Dieu, mon cousin, qu'il vous ayt en sa sainte garde.

Ecrit à la Ferté sous Jouarre, le 28 fevrier 1603.

HENRY.

Et plus bas,

DE NEUF-VILLE.

*Lettre du Roy à M. de Rosny, contre-signée.*

Mon cousin, je vous envoye un memoire qui n'a esté présenté par le sieur du Bourg par lequel vous verrez que je suis supplié de quatre choses. La premiere, de vouloir nommer celuy succedera à la commission de Palot, en l'androchaine, et en commander les lettres ne- res. La seconde, de faire delivrer audit

sieur du Bourg les assignations de l'année courante pour tous ceux de la haute Guyenne et haut Languedoc, sans que ledit Palot prenne aucun droit sur eux, ensemble celles qui luy sont deües d'arrerages du passé. La troisieme, que pour les taxations pretendues par ledit Palot, les apostilles que vous avez mis au marge des plaintes dudit sieur du Bourg sortent à effet. Et la quatrieme, de commander aux sieurs de Maupeou et Beaumarchais, commissaires deputez pour voir les comptes dudit Palot, d'y vacquer en diligence et y en adjouster un troisieme non suspect. Sur le premier article duquel memoire je vous diray que j'ay bien voulu remettre ladite nomination jusques à ce que j'en aye con- feré avec vous, et pour ce n'ay-je trouvé bon que ladite commission fust presentement expediee. Et pour le regard des assignations qu'il demande de l'année courante et de la pension particuliere que je luy ay accordée, je veux qu'elles luy soient delivrees sans que ledit Palot puisse rien prendre pour ses taxations; et, pour celles des années passées qui restent à recevoir, j'entends que departement en soit fait audit sieur du Bourg, pour ce qui touche ceux de la haute Guyenne et haut Languedoc. Pour le troisieme article, vous adviserez à pourvoir sur les taxa- tions dudit Palot, ainsi que vous jugerez expedient et raisonnable; et, sur ce qui est porté par le quatrieme, je trouve bon que vous fassiez rendre compte audit Palot, pardevant lesdits sieurs de Maupeou et Beaumarchais, ou autres que vous adviserez, et mesmes y adjoustiez un troisieme si vous estimez qu'il soit à propos, luy faisant vider les mains des restes desdites assignations pour ce qui concerne lesdits pays de haute Guyenne et haut Languedoc. Dequoy je vous ay bien voulu avvertir par cette lettre, afin qu'estant informé de mon intention sur ce fait, vous teniez la main qu'elle soit suivie et effectuée, et que ledit du Bourg et autres qui y ont interest en tirent le contentement qu'ils se sont promis. Je prie Dieu, mon cousin, qu'il vous ayt en sa sainte et digne garde.

Ecrit à Dorman sur Marne le premier jour de mars 1603.

HENRY.

Et plus bas,

DE NEUF-VILLE.

*Lettre de M. de Ville-roy à M. de Rosny.*

Monsieur, j'ay dit au Roy les propos que vous m'avez escrit vous avoir esté tenus par le nonce; Sa Majesté dit que ce sont les Espagnols et Sa- voyarts qui sont cause que Sa Sainteté monstre avoir apprehension de son voyage à Lyon, et des preparatifs d'armes et d'argent et munitions de guerre dont il vous a parlé : quoy estant, elle



estime que cela doit plutost la fortifier en sa deliberation que de l'en desmouvoir, et neantmoins mettre peine d'oster à Sa Sainteté, tant que faire se pourra, la crainte que ledit nonce dit qu'il a de la guerre, sans toutesfois s'obliger de ne la point faire, afin de conserver nostre liberté et tenir tousjours les autres en eschec. Sa Majesté desire doncques que vous en parliez audit nonce en cette sorte s'il retourne vers vous : au reste, nous cheminons tant que nous pouvons, et n'avons rien de nouveau digne de vous estre escrit. Je finiray la presente en vous presentant mes humbles recommandations, et priant Dieu, etc.

D'Espernay, le 2 mars 1603. DE NEUF-VILLE.

*Lettre de M. de Ville-roy à M. de Rosny*

Monsieur, cette affaire touchant le nonce du Pape, en laquelle vostre entremise a esté si heureuse, me fit souvenir de vous supplier de vouloir favoriser un autre cardinal des plus affectionnez serviteurs du Roy, en Italie, qui est M. le cardinal d'Ossat, les merites duquel sont tels, que tous ceux qui le gratifieront en recevront gloire et louanges : et partant vous prié-je, tant pour cette consideration qu'à ma recommandation, de luy vouloir faire plaisir sans qu'il me soit besoin d'en parler au Roy, vous saluant de mes bien humbles recommandations, comme estant, etc.

De Saint Germain. DE NEUF-VILLE.

*Lettre de M. de Rosny à M. de Ville-roy.*

Monsieur, pour responce à la lettre que vous m'avez escrite en faveur de M. le cardinal d'Ossat, je vous diray, comme il y a environ un an, qu'un banquier me vint parler de quelques pensions que le Roy donne à Rome et entre-autres de celle de M. d'Ossat; mais ce fut avec de telles paroles que je ne l'en eusse pû refuser, tellement qu'il est vray que je le remis à y adviser lors qu'il m'en escriroit, comme il fit quatre mois apres, et ses lettres accompagnées d'une de mon frere : et combien que les siennes fussent encor avec moins de civilité que n'avoient esté les paroles du banquier, si ne laissois-je pas d'avoir envie de le gratifier. Mais lors que j'estois apres à dresser mes estats desdites pensions à Rome, j'en receus un advis que l'on me bailloit pour bien certain, comme ledit sieur d'Ossat tenoit des propos du Roy et de moy qui n'estoient guerres à l'avantage de Sa Majesté, taschant de faire accroire au monde que les attentats que l'on faisoit contre le Roy ne procedoient que de sa faute et de celle de ceux qui manient ses finances : tellement que je ne vous celeray point

que cela m'ayant fort piqué, je changeay son assignation qui estoit fort bonne, en une autre dont je me doutois bien qu'il ne tireroit pas grande chose. Et depuis ayant receu un memoire que l'on me mandoit avoir esté extrait d'une lettre qu'il vous escrivoit, laquelle tesmoignoit une grande ingratitude envers le Roy, qui retournoit en blasme contre moy, et sur des choses entierement mensongeres, je me resolus de ne l'assigner plus du tout sans un commandement expres du Roy, apres que je luy aurois fait voir ledit escrit duquel je vous envoye coppie, afin que si vous m'asseurez que c'est chose fausse et que ledit sieur d'Ossat n'a jamais tenu ces langages ny ne vous a rien escrit de semblable, je donne ordre à le faire payer, et ne le tienne plus pour un ingrat et un impudent, comme il meriteroit ces deux qualitez, si la chose estoit vraye; et ne manquerois pas de faire voir ledit extrait au Roy avant que de le faire assigner. Qui est tout ce que je vous puis dire sur vos grandes recommandations pour ledit sieur d'Ossat et les grandes louanges que vous luy donnez, vous baisant les mains en qualité de vostre serviteur.

ROSNY.

*Extrait d'une lettre de M. le cardinal d'Ossat à M. de Ville-roy.*

« Vous priant de prendre en bonne part un mot dont je suis gros il y a long-temps, c'est que sans quelque legereté, inquietude naturelle, ambition et avarice qui regne aujourd'huy parmy les François, les conspirateurs n'eussent jamais eu l'audace d'entreprendre sur le Roy, s'ils n'eussent veu la noblesse mal-contente, l'Eglise mal-menée et desconfortée, le pauvre peuple et tiers estat trop foulé et oppressé. Et ne puis m'exempter de la crainte de semblables recidives ny esperer un repos jusques à ce que le Roy aye reformé l'Estat, commençant par soy-mesme en prenant moins sur ses sujets et contentant les meilleures parties de l'Estat qui prevaient en nombre. Je sçay bien que ce propos est hardy; mais je l'estime encore plus vray et necessaire, et voudrois l'avoir desja escrit au Roy, et desire que vous luy lisiez cette lettre. »

Nous n'avons point pû assez bien apprendre, pour vous le ramenter suffisamment, ce que devindrent toutes ces poursuittes de M. de Ville-roy pour le payement des pensions de ce cardinal d'Ossat, qui estoit sa creature, d'autant que nous n'en avons rien trouvé dans les memoires de vos entremises journalieres, que vous faisiez rassembler tous les soirs par quelques-uns d'entre nous, vos secretaires; mais bien avons-nous dequoy verifier que, dans le livre imprimé des

lettres dudit cardinal d'Ossat, il y a une lettre de luy adressante à M. de Ville-roy, où il use des mesmes termes portez dans l'extraict qui vous en avoit esté envoyé. Et partant que ce n'estoit point sans cause que par vostre responce à M. de Ville-roy, vous le disiez meriter le tiltre d'ingrat et d'impudent, voire y adjousterons nous celuy de malicieux, et que M. de Ville-roy les merite luy mesme tous trois, s'il n'a fait une bonne et valable reprimande à son cardinal, d'avoir tenu de tels propos, et ne luy en ayt fait faire les satisfactions où il appartenoit, comme estant choses inventées et absolument fausses et mensongeres : estant vray de dire qu'en cette année 1603, date des susdites lettres, que le Roy ayant remedié à toutes les entreprises des malins, tant par la punition de M. de Biron que pour avoir fait cognoistre que tous les mauvais bruits que luy et ceux de sa sequelle avoient fait courir (qui estoit les mesmes choses qu'escrivoit le cardinal d'Ossat) estoient toutes calomnies, d'autant que sa noblesse estoit plus contente et satisfaite de luy que jamais, que tous les ecclesiastiques avoient sujet de l'estre, et notamment de vous qui les gratifiez particulièrement en tout ce qu'il vous estoit possible; et que quand aux peuples de la campagne, ils avoient toutes les sortes de soulagemens qu'ils pouvoient esperer, vous faisant, d'année en année, descharger les tailles de deux millions par chacune d'icelles, et ayant, dès l'année 1602, fait revoquer le sol pour livre, dont il s'estoit tant plaint, et fait voir que le Roy n'avoit jamais pensé à toutes les impositions que les malicieux avoient publié qu'il vouloit faire. Mais bien estoit-il vray que les catholiques zelez, tels que ce M. de Ville-roy et son cardinal, que d'autres nommoient envenimez, n'estoient pas contents en leurs petits cœurs de ce que le Roy ne se portoit pas aux choses qu'ils desiroient, voulant persuader Sa Majesté de se joindre aux desseins de la Cour de Rome pour mettre un roy catholique en Angleterre, et la faire départir des alliances qu'elle avoit avec la reine d'Angleterre, les roys d'Escosse, le nouveau roy de Suede, celuy de Dannemarc, et des princes et villes protestantes d'Allemagne et de Suisse, et se resoudre, si tost qu'ils eussent voulu, au rétablissement des Jesuites, comme de toutes ces circonstances il en apparoit quelque chose par les lettres du cardinal d'Ossat. Dequoy ne s'osant plaindre ouvertement ils luy imputoient fausement tout ce qui estoit porté par les lettres de ce cardinal à M. de Ville-roy, y en ayant mesmes quelques-unes qui tesmoignent qu'il n'estoit pas content de vous touchant ses pensions. De toutes lesquelles choses remettant la

verification à faire sur les lettres imprimées de ce cardinal, par lesquelles il se mesle de toutes choses, notamment de celles qui ne sont de sa profession, et encor moins de sa science et cognoissance, nous reprendrons les suites de nos Memoires par une suite de lettres telles que s'ensuit.

*Lettre du Roy à M. de Rosny, contre-signée.*

Mon cousin, j'escriis à monsieur le chancelier qu'il fasse expedier l'edict de la suppression de la chambre des requestes à Thoulouze, encores qu'il n'ait esté passé en mon conseil, car c'est chose que je veux estre faite et qui servira de planche pour en faire autant aux autres parlemens; dequoy j'entends que mes sujets recevront soulagement. Partant, donnez ordre que mon intention soit suivie et qu'il n'y soit plus fait de difficulté. Cherelles m'a fait dire que vous ne luy avez fait offrir que douze cens escus pour son voyage, au lieu de trois mil qu'il a verifiez avoir touchez pour celuy qu'il fit du temps du feu Roy, et qu'il luy est impossible de se deffrayer pour ladite somme de douze cens escus: au moyen dequoy je veux que vous luy en donniez jusques à deux mil et que vous les luy fassiez delivrer incontinent, afin qu'il ne retarde davantage son partement, car c'est chose que j'ay fort à cœur. Je suis bien aise que vous ayez pourveu aux huict mil escus de Geneve, et à la monstre de tous nos gens de guerre, ainsi que vous m'avez escrit par vostre lettre du 28 du mois passé, vous priant de vous souvenir de me mander des nouvelles des bastimens de Saint Germain, au retour du voyage que vous me mandez y devoir bien-tost faire, et continuer à faire avancer, tant qu'il vous sera possible, le transport des terres de la gallerie du Louvre, afin que les maçons puissent besongner, estimant qu'ils donneront ordre cependant à leurs materiaux, de façon qu'ils avanceront bien la besongne, quand la place sera nette desdites terres. J'ay encor receu et veu la lettre que vous m'avez escrite, le mesme jour, pour responce à la mienne portée par le courrier Fenot. J'escriis à mon grand escuyer qu'il vous envoie le receveur de l'escurie avec Blondeau, pour vous rendre compte de l'assignation donnée pour faire les hocquetons des archers de ma garde, afin que s'il y manque quelque chose vous y pourvoyez comme je vous en ay desja escrit. Le tresorier des menus n'est point icy, quoy que vous luy ayez desja commandé par deux fois, comme je l'ay bien sceu, ny personne pour luy qui paye les desbris des logis où je loge, de façon que nous passons sans payer, qui est une grande honte. Envoyez-le

querir et donnez ordre qu'il s'acquitte mieux de son devoir. Priant Dieu, etc.

Ecrit à Espernay, le deuxiesme jour de mars 1603.

HENRY, et plus bas DE NEUF-VILLE.

*Lettre du Roy à M. de Rosny, contre-signée.*

Mon cousin, je vous escriis la presente à part, à cause du sujet d'icelle que je desire n'estre sceu que de vous. Les Estats des provinces unies des Pays-Bas m'ont prié, par lettres que m'a envoyées Arsens, leur permettre de faire en mon royaume la recreuë des compagnies françoises qui sont à leur service : sans quoy il semble, par ce qu'eux et ledit Arsens escrivent, qu'ils ne puissent se mettre en campagne et executer leurs desseins : en quoy je veux bien les contenter, car vous sçavez combien il m'importe de le faire. Toutesfois je desire que cela soit fait le plus couvertement et promptement qu'il sera possible, pour les raisons que vous sçavez aussi bien que moy, qui m'y doivent mouvoir d'en user ainsi. A cette fin envoyez querir ledit Arsens, incontinent que vous aurez reçu la presente, sçachez de luy comment et par quelles formes ses maistres et luy entendent faire lesdites recreuës, et luy dites que je ne trouve pas bon qu'elles soient faites par les capitaines ny par leurs officiers, car nous avons trop reconnu et esprouvé leur indiscretion en celles qu'ils ont faites cy-devant, dont j'ay eu infinies plaintes et reproches; mais il me semble que ledit Arsens peut facilement retenir et assurer, sous-main et secrettement, les soldats qu'il leur faut, dont encores je veux, devant, sçavoir le nombre et les faire couler à la file aux lieux où il faudra qu'ils s'embarquent, en leur distribuant quelque argent pour se deffrayer par les chemins et passer la mer. La difficulté sera de trouver des soldats affidez qui ne le trompent point et n'emportent son argent; à quoy vous le pourrez bien ayder, et auray agreable que vous le fassiez. Davantage j'estime qu'il sera plus à propos qu'ils s'embarquent à Dieppe qu'à Calais, d'autant qu'ils seront moins remarquez et esclairez au premier lieu qu'en l'autre, à cause du voisinage dudit Calais. Toutesfois comme peut-estre le passage de Dieppe ne sera si commode, frequent et facile que l'autre, faites avec ledit Arsens, si l'on s'ayde de celui de Calais, au moins que les soldats ne s'y acheminent et rencontrent en plus grand nombre ensemble que de six ou de dix au plus, et avec leurs espèces seulement. En ce cas il faudra devant que vous en advertissiez le sieur de Vic auparavant, afin qu'il ayde à couvrir ledit embarquement; il faudra aussi que vous donniez pareil advis au com-

mandeur de Chastes pour Dieppe; et afin qu'ils adjoustent plus de foy à ce que vous leur manderez, soit par escrit ou de bouche, par hommes exprez, j'escris à chacun d'eux une lettre en creance sur vous, que vous recevrez avec la presente, fermées à cachet volant, afin que vous voyez ce qu'elles contiennent. Doncques ménagez ce fait avec ledit Arsens et lesdits gouverneurs selon mon intention, et si dextrement que je sois servi utilement et à mon contentement. A quoy j'adjouteray que j'ay pensé que si nous faisons faire encores une monstre aux compagnies du regiment de mes gardes, du nombre qu'a esté la dernière, qu'en tirant d'icelles les soldats que je veux mettre dedans la citadelle de Mets, suivant ma deliberation, je pourrois conserver ceux qui en sortiront, les faisant entrer ausdites compagnies en la place des autres, sans leur parler d'aucun retranchement, sinon quand nous serons de retour à Paris où je les licentierois, et pourrois lors les faire bailler à vostre cousin de Bethune ou à quelqu'un de sa part qui les luy conduiront en Hollande; par ce moyen il rempliroit sa recreuë facilement et de vieux soldats, lesquels n'estant ainsi retenus, quand ils seront mis hors ladite citadelle, indubitablement iront servir les archiducs, desquels ils seront bien receus. Or, il me semble qu'il sera plus à propos, pour mon service, qu'ils prennent l'autre chemin : c'est pourquoy je me suis advisé vous faire cette proposition, sur laquelle vous me manderez vostre avis; mais si vous l'approuvez donnez ordre à ladite monstre desibonneheure, que ladite proposition puisse estre effectuée à mon arrivée à Mets ou devant que j'en parte; car j'y veux arrester le moins que je pourray, et suis marry ne pouvoir faire plus grandes journées pour m'y rendre plutost, mais les mauvais chemins m'en empeschent. Je prie Dieu, etc.

Ecrit à Chaalons sur Marne, le quatriemesme jour de mars 1603.

Et plus bas,

HENRY.  
DE NEUF-VILLE.

*Lettre de M. de Ville-roy à M. de Rosny.*

Monsieur, il faut que vous ayez tous les jours, voire à toutes heures de nos lettres, puis que vous estes chargé de tout. Vous verrez le sujet de celle que la presente accompagne, et escrits presentement au sieur d'Arsens qu'il vous aille trouver pour entendre de vous les intentions de Sa Majesté; mais je m'estonne que M. de Bethune n'est arrivé, M. de Buzenval nous ayant escrit qu'il estoit sur son parlement. Au reste, nous receusmes hier au soir, à nostre arrivée en cette ville, des lettres de M. d'Espernon; il se plaint des plaintes de M. de Scholles, et dit

qu'il a tiré tant de vivres de la ville, qu'il a voulu pour luy et pour sa garnison, et qu'il n'a donné à entendre le contraire que pour avoir pretexte d'entamer le magazin de la citadelle. Ils sont en dispute aussi pour un certain Provençal, prisonnier à Vitry; nostre arrivée donnera ordre à tout cela : mais mandez-nous, s'il vous plaist, quel est celuy que vous avez donné au paiement de la garnison de ladite citadelle de Mets; car je m'attends bien qu'elle fera instance d'estre payée devant que de sortir. Je prie Dieu, etc.

De Chaalons, le quatriesme jour de mars, de l'année 1603.  
DE NEUF-VILLE.

*Lettre du Roy à M. de Rosny, contre-signée.*

Mon cousin, le sieur de Vic est encor à Paris, et seroit besoin pour mes affaires qu'il fut en sa charge de Suisse, à cause principalement de ce qui se passe à Geneve, où il est à craindre que l'on prenne des resolutions qui ne me contentent pas, faute d'entendre mes intentions, et d'avoir quelqu'un sur les lieux qui y prenne garde. J'entends que trois choses ont retardé son parlement : la premiere, l'irresolution du fait du sel pour Suisse; la deuxiesme, l'incertitude de la reception des deniers des assignations que nous avons données pour fournir les quatre cens mil escus que nous avons promis ausdits Suisses; et la derniere, l'attente de la verification, au parlement de Roüen, des édits de commissaires examinateurs et lieutenans particuliers, assessseurs criminels, afin de renvoyer devant les colonels et capitaines, qui sont demeurez à nos despens en la ville de Paris, attendant la distribution des deniers qui doivent provenir desdits édits. Sur le premier point, La Varenne m'a dit de vostre part, à son arrivée icy, les dernieres offres faites sur ledit sel, et que vous deviez les faire juger et resoudre jeudy dernier; tellement que je fais compte qu'il sera vuide à la reception de la presente. Toutesfois s'il ne l'avoit encores esté, je vous prie d'y mettre la derniere main en une sorte ou autre; je me remets à vous d'en disposer et ordonner, comme vous jugerez estre pour le mieux, et trouveray bon tout ce qui en sera fait, pourveu qu'il n'y soit plus usé de remise sous quelque pretexte que ce soit. Quand ausdites assignations, j'ay esté adverty que l'on n'en recevra dedans Pasques que six cens mil livres; mais que vous esperez de pourvoir au surplus dans un ou deux mois, et que vous en usez ainsi pour soulager mon peuple, dequoy je vous sçay bon gré, afin que chacun cognoisse que je l'ayme et ne sçay que trop sa pauvreté et disette d'argent. Je sçay bien que

cette nation ne reçoit gueres d'excuses en matieres d'argent; et neantmoins ne pouvant faire l'impossible, voicy ce que je veux que vous fassiez sur cela, c'est que vous fassiez partir sans faute, devant ladite feste de Pasques, une voiture de trois cens mil livres, et qu'elle soit suivie, trois sepmaines apres, d'une autre de pareille somme, afin qu'elles arrivent en Suisse au mesme temps ou bien-tost apres ledit sieur de Vic, qui leur donnera esperance du reste. Je veux aussi estre fait des lettres tres-expresses, par toutes les receptes ausquelles lesdites assignations ont esté levées pour en avancer l'effet, ainsi que j'escris presentement au sieur de Chasteau-neuf, à qui nous avons donné cette charge; mais mettez-y la main vous mesme, car autrement rien ne s'avancera. Et je considere si, apres avoir failly de payer ladite somme au premier terme, nous manquons encores à y satisfaire au mois de may, que les communes desdites ligues s'assemblent, ou du moins devant la journée generale que lesdits cantons tiennent à la Saint Jean, nous perderons tout credit avec eux, de sorte que je seray mal servy et assisté d'eux si j'en ay affaire, s'ils ne prennent encores de pires resolutions. Il faut faire un effort pour l'éviter : au moyen dequoy je vous prie d'y adviser d'heure, comme vous avez de coustume de faire aux choses qui importent grandement à mon service et contentement, et me faites sçavoir le remede que vous pourrez y apporter, car je l'attends de vous. Pour le regard de la verification desdits édits au parlement de Roüen, escrivez-en au premier president par ce porteur que j'envoie expres vers eux pour en faire la poursuite, afin que je sois obey, et que nous nous deschargions desdits colonels et capitaines, qui sont encores à Paris : tous lesquels vouloient me venir trouver en ce voyage sur le refus fait par ceux dudit parlement, afin de s'en plaindre et m'en demander raison; mais ils en ont esté destournez sur l'assurance que je sçay leur avoir esté par vous donnée qu'il y seroit remedié à leur contentement : mandez-le donc si expressement audit premier president et aux autres cours, qu'ils y satisfassent. Je suis bien ayse de ce que nous renvoyons lesdits colonels et capitaines en leur pays, contens; car ce sera le bien de mes affaires. Je prie Dieu, etc.

Escrite à Clermont, le 8 mars 1603. HENRY.  
Et plus bas, DE NEUF-VILLE.

*Lettre de la main du Roy à M. de Rosny.*

Mon amy, il y a quelques jours que je vous escrivy pour avoir vostre avis, lequel vous croyez le plus propre à me servir en la charge de

mon procureur au Chastellet, de Mazurier ou le Jay, conseillers en ma cour de parlement; et pour ce que je n'ay eu aucune responce de vous sur ce fait-là, je vous fais cette recharge pour vous prier incontinent de me donner vostre avis sur cela; car j'en suis pressé et le desire avoir avant que resoudre aucune chose pour l'un ou pour l'autre. Bon jour, mon amy.

Ce 8 mars, à Fontaine-bleau. HENRY.

*Lettre de M. de Ville-roy à M. de Rosny.*

Monsieur, je vous remercie de la faveur que vous m'avez escrit, par vostre lettre du quatriesme de ce mois, que vous voulez faire à Merle, car je participeray à l'obligation qu'il vous en aura. Le Roy vous a escrit sa volonté sur la re-creuë que veut faire le sieur Arsens, partant je ne vous en feray redite; mais le commandement de Sa Majesté ne peut estre executé, ce me semble, trop secrettement. Quant au fait de l'argent, Sa Majesté dit qu'elle retournera assez à temps par delà, pour en respondre audit Arsens: au moyen dequoy vous pourrez le remettre, pour ce regard, au retour de Sa Majesté, laquelle croit, comme vous faites, que ce que ledit Arsens avoit proposé pour obtenir l'avance de nostre premier payement, ne sera accomply, dont Sa Majesté n'est contente. Le sieur de Cherelles se contentera de quinze cens escus, puis qu'il plaist à Sa Majesté, et croy que Sa Majesté eut pû estre servie en sa place de personne de plus d'estoffe que luy et à meilleur prix, mais non plus fidellement, et avec plus d'affection qu'elle sera par luy. Nous avons icy M. de Lorraine, que j'ay trouvé vieilly; il s'en retourne demain à Nancy, et dit-on qu'il nous viendra voir à Mets, où il amenera Madame, encores qu'elle ne soit bien remise de sa maladie. M. de Bongars nous escrit que plusieurs princes allemands se preparent à venir visiter le Roy, s'il fait un peu de sejour à Mets. Ils n'ont rien fait qui vaille en leur assemblée de Heidelberg, où l'on dit que M. de Bouillon a essayé de tout broüiller, et est encore après. Ledit Bongars dit qu'il ne l'a point veu, dont il est en colere, mais qu'il a esté fort caressé desdits princes, qui ont aussi tout escrit à Sa Majesté en sa faveur. J'estime que nous ne demeurerons guere audit Mets, et ne sçay si nous repasserons par Nancy. Je ne vous diray rien de la lettre que le Roy vous escrit, sinon que nous avons sceu que vous avez donné ordre pour le fait du sel de Suisse et autres affaires plus pressées, et partant que vous ferez grand plaisir à Sa Majesté, de faire partir au plutost M. de Vic pour retourner en Suisse. J'ay leu ce matin à Sa Majesté vostre lettre dudit quatriesme

adressante à elle, à laquelle elle m'a dit qu'elle veut respondre de sa main, y ayant des choses dont luy seul a la cognoissance, et qu'en attendant je vous advise qu'il est fort content d'une petite lettre que vous luy escrives jeudy. Et partant n'ayant plus rien à vous faire sçavoir, je vous assure que vous avez toute puissance de me commander et que je suis, etc.

De Verdun, ce 10 mars 1603. DE NEUF-VILLE.

*Lettre de M. de Ville-roy à M. de Rosny.*

Monsieur, je vous escravis hier au soir; depuis nous avons receu vostre lettre du septiesme, à laquelle le Roy fait responce de sa main, et par mesme moyen à la precedente que je vous promettois par la mienne. Nous poursuivons nostre voyage et faisons estat d'arriver à Mets vendredy, où le Roy a bien delibéré de pourvoir aux affaires en maistre entierement et non à demy, et n'a serviteur auprès de luy qui luy conseille d'en user autrement; tellement que j'espere que nous aurons bien-tost achevé nostre besogne. Je suis incertain encores si à nostre retour nous passerons par Nancy, comme M. de Lorraine le desire: toutesfois, pour mon advis, je croy que nous luy ferions plaisir et à nous aussi de l'en descharger; il doit amener madame de Bar à Mets, laquelle fera ce qu'elle pourra pour nous conduire audit Nancy, pour dancer un ballet qu'elle a préparé: nous vous en escrivers tous les jours des nouvelles, et prie Dieu, etc.

De Fresnes en Verdunois, l'unziesme jour de mars 1603. DE NEUF-VILLE.

*Lettre du Roy à M. de Rosny, contre-signée.*

Mon cousin, je respondray par la presente à vos lettres du 4 et 7 de ce mois. J'ay esté bien aise de sçavoir que vous ayez fait resoudre la suppression des requestes de Thoulouse pour le regard du marc d'or. Je trouve bon que vous ayez esgard aux brevets que j'ay accordez aux officiers qui sont dignes de consideration, ou pour leurs qualitez ou pour leurs services, mais non aux autres; dequoy je me remettray tous-jours volontiers à vostre jugement. Le tresorier des menus a donné ordre au fait de sa charge, suivant le commandement que vous luy en avez fait, et croy que M. Le Grand aura maintenant envoyé vers vous les officiers de l'escurie, pour vous rendre compte du retardement des hocquetons, qui procede, ainsi qu'il m'a mandé, du manquement des assignations données pour cet effet: tellement qu'il n'a peu m'en envoyer que vingt et trois. Quand vous aurez oüy lesdits officiers, vous y verrez plus clair pour y donner ordre. J'ay fait escrire à

Cherelles qu'il se contente des quinze cens escus que vous luy avez fait offrir pour son voyage, comme je m'assure qu'il fera, et ne doute pas que vous ne vous trouviez bien empesché à faire fournir tant d'argent comptant, comme il vous est ordonné, pour les raisons que vous m'avez escrites; aussi j'en prise davantage le bon devoir que vous y faites. Mais je veux que la grace que j'ay faite au sieur de Boinville ait lieu, sans qu'il en soit rien retranché, puis que je luy en ay donné ma parole, et me promets que ma maison et celle de la Reine, ma femme, et de mes enfans, ne demeureront pour cela, par le bon ordre que vous y donnerez. J'ay considéré ce que vous m'avez remontré par vostre dernière, sur l'exécution du commandement que je vous avois fait touchant les recreües poursuivies par Arsens : puis que vous estimez ne pouvoir ny devoir vous en mesler, pour les raisons desduittes par vostre dite lettre, donnez ordre doncques que les capitaines s'en acquittent le plus secrettement et diligemment que faire se pourra, et m'advertissez de l'avancement qu'ils y donneront. Mais en verité il est nécessaire d'esloigner de cette frontiere le regiment de ma garde, devant que de reduire les compagnies : partant vous m'avez fait tres-grand plaisir d'avoir pourveu au fonds nécessaire pour une monstre entiere, apres laquelle j'ay resolu les retrancher. Quant à l'instance que fait ledit Arsens, qu'il luy soit déclaré quelle somme d'argent j'entends fournir cette année à ses maistres, et à quels termes, vous luy direz que j'y adviserez à mon retour par delà. Et pour le regard de mes bastimens, j'attendray la despesche particuliere que vous m'en devez faire, devant que vous faire autre commandement sur iceux. Je prie Dieu, mon cousin, qu'il vous ait en sa sainte garde.

Ecrit à Fresnes, en Verdunois, le 11 mars 1603. HENRY. Et plus bas, DE NEUF-VILLE.

*Lettre de la main du Roy à M. de Rosny.*

Mon cousin, ma presence estoit icy tres-nécessaire; vous ne sçauriez croire comme le sieur de Sobolles est généralement hay en cette ville, tant des habitants que des estrangers. Il a creu le conseil de ses amis et des sages qui luy ont parlé, de sorte qu'il est resolu de me remettre demain la citadelle entre les mains, sans capituler avec moy. J'estime que dans six jours j'auray fait les affaires qui m'ont amené icy, pour m'en retourner incontinent; j'y ay esté bien veu et receu de ce peuple qui desiroit fort de m'y voir. Cette ville est des plus belles et des mieux assises, et trois fois plus grande que

celle d'Orleans : la citadelle ne vaut rien, je voudrois que vous eussiez fait icy un tour, et que vous eussiez veu cette frontiere pour juger l'importance qu'elle m'est, et qu'il m'en eust cousté quelque chose de bon. Ma sœur arrive demain et iray au devant d'elle. Je me suis trouvé fort mal aujourd'huy et ay pris medecine, qui m'aura bien profité, car elle m'a fort purgé, et me trouve fort soulagé. Adieu, mon cousin.

Ce 15 mars, à Mets.

HENRY.

*Lettre de la main du Roy à M. de Rosny.*

Mon amy, je vous ay escrit ce matin, comme j'esperois en bref avoir mis fin aux affaires pour lesquelles j'estois venu icy; maintenant je vous diray qu'elles sont en tel estat, que la place est assurée pour mon service, et qu'il n'en peut plus arriver de faute; aussi que, tout presentement, je viens d'avoir nouvelles des Heidelberg, comme un nommé Le Plessis Bellay, frere du gouverneur de M. de Chastillon, avoit esté depesché à M. de Bouillon par M. de la Trimouille, de Long-jumeau en hors, avec force memoires qu'il luy avoit donné charge de passer à Sedan, et defendu de voir le Maurier ny se faire cognoistre à personne. Il est maintenant sur son retour; mais je croy, avant qu'il repasse par Paris, pour delà s'en aller retrouver ledit sieur de la Trimouille, que cette-cy sera parvenuë en vos mains, car il doit repasser audit Sedan. C'est pourquoy je vous prie d'aviser avec Rapin le moyen qu'il y auroit de le prendre, et s'en saisir entre Paris et Touars; car je ne voudrois que ce fut audit Paris, dautant que c'est lui qui reporte, comme je croy, la responce à Comblat; et le prenant hors de Paris, je m'assure que l'on le trouvera chargé de force lettres et despeschés. Faites que personne ne sçache rien de tout cecy que vous et ledit Rapin, s'il se peut; et si d'aventure il est prins, donnez m'en advis aussitost, et ordre qu'il soit mis en lieu où personne ne puisse parler à luy, ensemble de la reception de cette-cy. Bon soir, mon amy.

Ce 16 mars au soir, à Mets.

HENRY.

*Lettre de M. de Ville-roy à M. de Rosny.*

Monsieur, monsieur le chancelier vous montrera une lettre que l'electeur Palatin a escrite au Roy en faveur de M. de Bouillon, avec la responce que Sa Majesté y a faite, par laquelle vous verrez la grace qu'elle a voulu faire audit sieur de Bouillon, dont nous n'avons pas opinion qu'il use, et vous nous en manderez s'il vous plaist la vostre : en fin Sa Majesté a jugé que cette lettre ne luy pouvoit nuire. Nous som-

mes contraintes de faire Pasques en cette ville, pour donner ordre aux affaires d'icelle avec plus de loisir : tellement que je ne pense pas que nous vous revoyons plutost que le vingtiesme d'avril; car Sa Majesté a maintenant promis à M. de Lorraine de passer à Nancy. Le duc des Deux Ponts est arrivé icy ce soir avec sa femme et ses enfans pour visiter leurs Majestez; nous en serons quittes pour deux ou trois jours qu'il faudra le defrayer. L'argent des deux monstres de la garnison de la citadelle de cette ville, ny celuy pour la garde et pour les chevaux legers n'est encore arrivé; tellement qu'il a fallu que nous en ayons emprunté pour payer la premiere, afin de la faire sortir de la place, et pour prester le mesme à chacune des compagnies desdites gardes, pour luy donner moyen de vivre sans fouler le pays; mais tout sera remplacé des deniers destinez audit payement. M. de Barault nous a escrit avoir fait saisir à Saint Jean de Lus quatre mille cinq cens picques de Biscaye, qu'un marchand de Dumkerque avoit acheptées et embarquées sans permission du Roy, pour passer en Flandres; et, comme c'est marchandise defenduë, Sa Majesté entend que lesdites picques soient confisquées, comme elle a escrit à M. de Grant-mont, et veut qu'elles servent à meubler son arsenac de Paris. Dequoy sadite Majesté m'a commandé vous advertir, et à quoy j'adjouteray mes humbles recommandations à vostre bonne grace, et, mon ordinaire, à prier Dieu, etc.

De Mets, le 19 mars 1603. DE NEUF-VILLE.

*Neuf lettres de la main du Roy à M. de Rosny.*

Mon cousin, vous apprendrez de mes nouvelles par le sieur de Montigny, qui vous rendra cette-cy, et comme tout va pour mon service, comme ma presence y estoit necessaire pour la conservation de ceste ville en mon obeysance, de quelle importance elle est, et que je ne voudrois pour chose du monde n'y avoir esté; mesmes je voudrois qu'il m'eust cousté quelque chose de bon et que vous y eussiez fait un tour. J'en partiray le mardy d'apres Pasques, Dieu aydant, pour m'en retourner vers Paris : je prendray mon chemin d'icy à Nancy, où je pourray séjourner deux ou trois jours; de là j'iray à Thoul, et par Vitry, Reims et Villiers és Cotelets, et de là à Saint Germain en Laye voir mon fils, dequoy j'ay une extrême envie. Mandez-moy, je vous prie, ce que l'on fait à mes bastiments de là, et à Paris, et aussi à l'Arsenac, et à vostre astelier, depuis mon partement, et à quoy l'on travaille à present. Et remettant le surplus à la suffisance du porteur, je ne vous en

diray davantage, pour prier Dieu vous avoir, mon cousin, en sa sainte garde.

Ce 22 mars, à Mets.

HENRY.

Mon cousin, depuis mon autre lettre escrite, laquelle vous recevrez avec cette-cy par le sieur de Montigny, j'ay receu trois des vostres; l'une touchant mes bastiments, et les deux autres pour affaires desquelles je vous ay cy-devant escrit. Surquoy je vous diray, en attendant que plus amplement je vous y fasse responce, que je suis de vostre advis que la presence du sieur de Vic n'est aucunement necessaire pour la verification des édits ny pour les assignations données aux Suisses, et que son voyage ne doit estre retardé pour tout cela. Mais pour le fait du sel qui a esté accordé à ceux de Berne, il faut qu'il leur remporte la resolution, dautant que comme vous sçavez qu'il a principalement à traiter avec eux pour ce qui est des affaires de Geneve; et puis qu'il y reste si peu à faire comme vous dites, je vous prie de faire en sorte que cette affaire soit achevée, en sorte que son voyage ne puisse estre retardé, ny ce qui est de mon service et de mes intentions envers ceux de Berne. Au reste, j'ay accordé audit sieur de Montigny qu'il jouyra pour cette année de l'appointement que je luy donne pour gouverneur de Paris, encor qu'il commande icy; dequoy je vous ay bien voulu advertir, afin que l'on ne revoke l'assignation qui luy en a esté baillée : ce que je feray entendre à celuy que je pourvoiray du gouvernement de Paris, à ce qu'il ne s'y attende. Adieu, mon cousin.

Ce samedi à midy, 22 mars, à Mets.

HENRY.

Mon amy, il y a fort long-temps qu'il fut ordonné en mon conseil qu'il seroit levé, sur les vaisseaux estrangers qui entroient és ports et havres de mon royaume, un certain droit d'ancrage, à l'imitation des roys et princes mes voisins qui le prennent sur mes sujets, et que dès lors il en fut expédié des lettres adressantes à mes cours de parlement de Rouën et Rennes, sur lequel mon cousin, le mareschal d'Ornano, a esté assigné des sommes qui luy sont deuës, qui a, jusques icy, fait et fait faire beaucoup de despences pour la verification desdites lettres esdits parlemens, sans que pour cela il y ait pû rien avancer, quelques lettres et jussions que je leur aye fait expedier. Pour à quoy remedier et faire cesser telles longueurs pour un si maigre sujet, je vous prie que vous leur fassiez expedier telles jussions que vous adviserez, et icelles accompagner de vos lettres ausdits parlemens, premiers presidens et procureurs generaux d'iceux, leur

mandant que cela est mon intention et chose que je veux. Cette-cy n'estant à autre fin je ne vous en diray davantage, pour prier Dieu vous avoir, mon amy, en sa sainte et digne garde.

Ce 24 mars, à Mets.

HENRY.

Mon amy, je vous ay bien voulu advertir comme hier j'eus un acces de fièvre que je veux croire qu'il n'estoit que de rheume, pource que maintenant je m'en trouve mieux, Dieu mercy, et que j'espere que ce ne sera rien; et que vous m'avez fait plaisir de me mander des nouvelles de mes bastimens par celles que vous m'avez escrites. Mais j'eusse bien désiré que vous m'eussiez mandé si vous faites travailler à la gallerie de l'Arsenac pour mettre les armes et celles que l'on y a faites depuis mon partement; car je ne suis pas moins soigneux de cela que de mes bastimens. A Dieu mon amy, lequel je prie vous avoir en sa sainte et digne garde.

Ce 26 mars, à Mets.

HENRY.

Mon amy, j'ay receu la vostre par le neveu de Lomenie, où j'ay esté tres-aise d'apprendre le bon mesnage que vous avez fait en mes bastimens de Saint Germain en Laye. Je partiray d'icy mardy prochain, Dieu aydant, pour m'en retourner vers Paris, prenant mon chemin par Nancy où je séjourneray fort peu ny par les chemins. Si, d'aventure, la nouvelle que M. de Beaumont, mon ambassadeur en Angleterre, m'a envoyée par un courrier expres, de l'extrême maladie de la reine d'Angleterre, continuë, afin que s'il advenoit faute d'elle, je sois tout porté par delà pour pourvoir à mes affaires, selon les conseils que vous et mes serviteurs me donneriez sur cela, qui vous prie cependant tenir toutes choses en estat et les édits prests, afin qu'à mon arrivée je voye ce qu'il faudra faire pour mon service, à quoy je ne m'espargneray nullement. Mandez-moy, comme je le vous ay escrit, ce que vous faites faire à l'Arsenac, car je ne suis moins desireux d'en sçavoir des nouvelles que de mes bastimens. A Dieu, mon amy, lequel je prie vous avoir en sa sainte et digne garde.

Ce 27 mars, à Mets.

HENRY.

Mon amy, je vous prie de faire delivrer incessamment à madame la marquise de Verneuil la somme de six mille livres, de laquelle je luy ay fait don comme je vous l'ay dit moy-mesme et depuis mandé par Lomenie. Bon jour mon amy.

Ce 30 mars, à Paris.

HENRY.

Mon cousin, j'ay esté bien ayse d'apprendre par la vostre du 12 de ce mois, qui me fut renduë à Nancy le 6 au soir, vostre retour de Rosny à Paris, et que l'on continuë en la plus grande

diligence qu'il se peut mes bastimens du Louvre et de Saint Germain, comme ce que vous faites faire pour cette année à l'Arsenac. Je trouve fort bon vostre advis touchant Francine, pour raison de la grotte de Saint Germain; qu'il fasse le dessein et que l'on fasse prix avec les ouvriers qu'il mettra en besongne, ordonnant au contre-rolleur Donon d'y avoir l'œil. Je vous prie de faire un tour jusques à Saint Denis pour voir ce qu'il reste à faire à la sepulture du feu roy Henry, afin d'y faire travailler comme nous avons autrefois advisé, et seray tres-ayse que vous y ayez esté avant que j'arrive à Fontainebleau, où j'espere me rendre dans le 18 de cettuy-cy, Dieu aydant. Pour les autres points contenus dans la vostre, j'ay commandé la response. A Dieu mon cousin, lequel je prie vous avoir en sa sainte garde.

Ce 8 avril, à Thoul.

HENRY.

Mon amy, cette-cy sera pour vous dire que je me porte tousjours de mieux en mieux, Dieu mercy, et ma femme n'est point grosse, dequoy je suis bien marry, que j'espere estre jeudy à Paris; que vous vous souveniez de ce receveur qui est allé droit à la chambre des comptes, et que vous ne m'en avez envoyé les papiers comme vous m'avez dit. Madame de Verneuil est partie d'avec ma femme le mieux du monde; elle s'en va coucher à Marcoussi pour y faire demain sa feste; elle l'a priée d'estre icy de retour lundy, ce qu'elle luy a promis de faire. Bon jour mon amy.

Ce 17 may, à Fontainebleau, au matin.

HENRY.

Mon amy, je vous ay ce matin escrit par vostre lacquais des nouvelles de ma santé qui s'en va augmentant; car maintenant je me trouve beaucoup mieux, ayant bien reposé et me sentant sans fièvre. Je vous depesche ce courrier expres pour vous prier de m'envoyer par luy deux cens escus, pour faire distribuer aux pauvres malades, lesquels je ne puis encore toucher de quelques jours, et j'ayme mieux leur faire donner quelque chose pour attendre que je me porte mieux que de les renvoyer sans les toucher. A Dieu mon amy, lequel je prie vous avoir en sa sainte et digne garde.

Ce samedy, à dix heures du matin, 24 may, à Fontainebleau.

HENRY.

## CHAPITRE CXIII.

*Voyage à Metz. L'électeur Palatin s'intéresse au duc de Bouillon. Lettres de ce prince, qui*



*jettent beaucoup de lumière sur ses projets.  
Lettres de Henri IV.*

Il se passa en ce voyage de Lorraine plusieurs grandes affaires, dont, pour vous en ramener une partie, nous vous dirons que le Roy, usant de ses prudences et dextérité accoutumées, assura pour longues années les affaires de Mets et des pays de protection, les réduisant sous son absoluë autorité par l'establisement de M. de Montigny en la charge de lieutenant du Roy, et de son frere le sieur d'Arquien dans la ville et citadelle de Mets, en qualité de lieutenant de M. d'Espernon, lequel, comme le bruit en courut, ne demoura pas trop content de cet ordre, ny ne fut pas sans se repentir d'avoir voulu oster les Sobolles; mais n'ayant nul apparent sujet de se plaindre, veu que toutes choses s'estoient quasi passées de son apparent consentement, il se fallut resoudre à en faire le bon compagnon et dire le premier que le Roy n'eust pu choisir gens qui fussent d'avantage ses amis. Sa Majesté accommoda semblablement les affaires touchant l'evesché de la ville de Strasbourg, par le moyen d'un esgal partage des revenus d'iceluy entre les contendans, quelques divers qu'en pussent estre les tiltres et pretentions; fit conclurre le mariage de mademoiselle Catherine de Rohan, sa cousine, avec monsieur le duc des deux Ponts; et ayant reçu des lettres du comte Palatin en faveur de M. de Bouillon, il vous en envoya aussi-tost coppie, vous mandant de luy en escrire vostre avis, laquelle vous me baillastes à garder. Et pource qu'elle me semble d'un stile fort estrange pour un petit comte escrivain à un si grand Roy, j'ay estimé à propos de l'insérer en ce lieu pour faire voir son impertinente gloire en le requerant d'une grace fort speciale, la teneur en estant telle que s'ensuit.

*Lettre de l'électeur Palatin au Roy.*

Monsieur et tres-honoré cousin,

Cette lettre vous representera l'extrême desplaisir que j'ay de voir que le mal-heur en a tant voulu à M. le duc de Bouillon, mon cousin, que d'estre en vostre mauvaise grace, dont je n'ay eu aucune information de luy jusques à son arrivée par deçà ainsi qu' auparavant j'avois fait entendre au sieur de Bongars; d'ailleurs que je suis bien aise d'estre par ses propos tant plus assuré de son innocence au fait dont il est chargé d'accusations, m'ayant expliqué les raisons pour lesquelles il n'est allé en personne trouver vostre Majesté royale. Il m'a remonstré la qualité de ses accusateurs, ainsi que tres-humblement il vous a fait entendre, et qu'ayant, des son bas

âge, fait tous efforts possibles à procurer le service de vostre dite Majesté royale, l'énormité d'un tel crime ne luy auroit permis de se presenter devant sa face avant qu'en estre deschargé. Je vous supplie, monsieur et tres-honoré cousin, vouloir croire qu'ayant considéré la voye dont il use en son affliction, je n'ay pu y trouver défaut ou défiance quelconque, ains une étroite observation et tres-humble respect duquel il a tousjours chery vostre service. J'ay sceu que, sous vostre bon plaisir, M. le duc de la Trimouille, mon cousin, luy a depesché un sien gentil-homme, pour l'adviser qu'auriez pour plus agreable son sejour à Sedan qu'ailleurs, et que ledit gentil-homme l'a seulement atteint à Geneve, où il a prevenu l'intention de vostre Majesté royale suivant son commandement: de là il a pris son chemin par ce lieu, pour éviter les dangers des terres d'Espagne et de Lorraine, à ce convié singulierement pour l'alliance qu'il a avec ma femme, laquelle il n'avoit encore veüe. Et esperant que vostre dite Majesté royale sera suffisamment esclairee de son innocence et saine intention par la depesche que ledit gentil-homme luy porte, et sur laquelle il attend ses bons commandemens, j'adjousteray seulement que l'amour qu'il a si constamment portée à la vertu et à la justice, et le zele dont il embrasse sa patrie, et sur tout vostre couronne, m'assure d'abondant que s'il n'avoit sa conscience nette, il rougiroit de honte et se condamneroit luy mesme comme indigne du nom chrestien et des dignitez qu'il porte sous vostre liberalité, outre le tort qu'il feroit à l'alliance qu'il a prise avec moy et autres princes vos bons amis, et pour ne prejudicier à la prudence et consideration que vostre dite Majesté royale a accoustumé d'apporter en tels evenemens. J'arrestteray ce propos pour la supplier croire qu'elle me trouvera tousjours desireux de pouvoir tesmoigner que je suis, monsieur et tres-honoré cousin, vostre tres-humble et tres affectionné cousin.

FRIDERICK, electeur Palatin.

De Heidelberg, le 8 fevrier 1603.

En suite de cette lettre du comte Palatin, faisant mention de M. de Bouillon, nous avons estimé à propos de faire un chapitre de quelques discours et lettres concernantes ledit sieur de Bouillon, d'autant qu'elles serviront à donner quelque esclaireissement des choses qui seront dites de luy, sur ses defections envers le Roy dont il fut accusé, ledit discours commençant ainsi:

Or, pour esclaireir ce qui fut rapporté au Roy sur ce sujet, nous vous dirons comme un nommé Calvairac fit advertir Sa Majesté par tierce per-

sonne, sans vouloir au commencement estre nommé, qu'il se faisoit plusieurs brigues et menées en Auvergne, Limosin, Perigort et Guyenne, avec des intelligences en Espagne, et qu'il y avoit des personnes de qualité fort relevée qui s'en mesloient, tant catholiques que de la religion; à quoy il seroit bon que le Roy prit garde et taschast d'en descouvrir davantage, sçachant bien que ceux de cette menée avoient receu par gens venans d'Espagne plusieurs milliers de pistoles, dont ils avoient distribué une partie aux uns et aux autres, attendant de plus grandes sommes, voire mesme des secours d'hommes lors qu'ils se seroient declarez; à quoy faire les Espagnols ne vouloient point qu'ils commençassent, sinon par la surprise de quelques bonnes places maritimes ou forts frontieres d'Espagne; et avoit oüy dire y avoir des entreprises sur Blaye, Bayonne, Narbonne, Marseille et Toulon; et qu'en mesme temps qu'on les auroit executées, le comte d'Auvergne faisoit estat de se saisir de Saint-Flour. Lesquels advis, quoy qu'ils ne fussent pas assez circonstantiez pour y adjouster entiere foy, si ne laisserent-ils pas de mettre l'esprit du Roy et de vous plus alerte qu'auparavant, voyant que, nonobstant la profonde paix dont la France jouyssoit, les malins esprits ne laissoient pas d'essayer à broüiller. Tellement que sur quelques advis qu'eust M. de Bouillon, ou fit semblant d'avoir sur la prise du mareschal de Biron et comte d'Auvergne, et desirant de pouvoir descouvrir ce que le Roy et ses affidez serviteurs croyoient de luy et de ses intentions, il escrivit une lettre au Roy, dont nous n'avons pas pû recouvrer la coppie; mais, par une qu'il vous escrivit en mesme temps, l'on peut conjecturer quel en pouvoit estre le stile, la vostre estant telle.

*Lettre de M. de Bouillon à M. de Rosny.*

Monsieur, j'ay receu tout presentement une lettre du Roy, en datte du quatorziesme, qui m'a tres-fort estonné d'ouyr Sa Majesté et son Estat en peril. Je depesche ce gentil-homme vers elle pour recevoir ses commandemens et l'asseurer de la fidele et prompte obeyssance que j'y rendray, souhaitant que ces choses n'alterent rien en la douceur de son naturel et que son Estat n'en soit troublé: nul qui soit en ce royaume, sans regarder derriere soy, ne se portera ny plus diligemment ny plus fidelement où son devoir l'appelle, que je feray. Que Sa Majesté me commande, et vous donnez-moy vos bons advis, et soyez assurez de la tres-ferme volonté que j'ay de vous servir. Ce gentil-homme me rapportera

fidelement ce que vous luy direz. Je vous baise un million de fois les mains, etc.

A Thurenne, ce 18 juin, à onze heures du soir.  
HENRY DE LA TOUR.

*Responce de M. de Rosny à M. de Bouillon.*

Monsieur, vous m'avez fait beaucoup de faveur de me tesmoigner une telle confiance que de vouloir prendre mes conseils et advis sur affaires de si grande importance qu'elles vous mettent l'esprit en peine et en doute. Cette franchise m'obligera de vous donner un conseil en loyal serviteur, comme si nous estions freres, et que je prendrois pour moy-mesme en chose semblable, qui seroit de m'aller jeter promptement entre les bras du Roy, luy faisant voir en moy une loyale servitude toute entiere; voire en ferois de mesme quand bien je sçaurois que quelques-unes de mes actions ou intentions luy auroient desplu, tres-assuré que je serois de n'avoir pas plutost le regret en la bouche, que Sa Majesté n'eust l'indulgence et l'obmission au cœur; et vous oserois respondre, sur ma vie et mon salut, qu'il a de pareilles tendresses de cœur pour vous; et sur la foy que je vous en donne, en homme de bien et d'honneur, ayant toute la science et assurance qui est requise sur ce sujet, je vous baiseraï tres-humblement les mains.

De Paris, ce 6 juillet 1602.

*Lettre de M. de Bouillon à M. de Rosny.*

Monsieur, vostre lettre me fait envoyer le sieur de Rignac vers le Roy, duquel les commandemens sont differens de vos conseils, que j'ay esté prest de suivre; mais le Roy me l'ayant reiteré par toutes celles que j'ay receuës depuis mon partement, je crains de faillir si je faisais autrement. Le sieur de Vassignac va pour se justifier des informations qu'a envoyées le sieur de Jambleville. Excusez-moy si je vous dis que vos consequences sont quelquesfois bien promptes, que vos gens ne puissent dire que ce qu'ils oyent ou sont commandez de vous, de qui la sagesse ne peut pas estre infuse avec la nourriture qu'on leur donne. Vous verrez bien-tost madame de Badefou, qui vous aura bien de l'obligation. Je satisferay à tout ce que Sa Majesté me commandera, et vous rendray tous les services dont je me pourray adviser. Vous baisant humblement les mains, etc.

A Thurenne, ce 29 juillet 1602.

HENRY DE LA TOUR.

Or est-il besoin de noter, pour intelligence de cette lettre (dautant que nous n'avons pas celles du Roy dont elle fait mention), que le Roy

ayant escrit audit sieur de Bouillon que le mareschal de Biron avoit esté convaincu d'avoir entrepris contre son Estat, dequoy il luy diroit toutes les particularitez à son premier voyage en Cour, qu'il remettoit à sa discretion, il se trouva en telle peine, qu'il vous escrivit cette premiere lettre, laquelle ayant esté monstrée au Roy pour sçavoir quelle responce vous auriez à y faire, il vous dit : « Vous m'avez fait plaisir ; car, pour  
« mon regard, je ne veux pas mander expressément à M. de Bouillon qu'il me vienne trouver,  
« d'autant que s'il refusoit d'obeyr, il m'obligerait d'aller droit à luy avec les armes, et je  
« veux auparavant voir s'il cognoist son innocence estre assez grande, comme il s'en vante,  
« pour me venir trouver de luy-mesme. Mais,  
« puis qu'il vous demande advis là dessus, écrivez-luy, qu'encor que quelques-uns qui vous  
« approchent vous ayent asseuré qu'il ayt eu  
« quelque participation aux desseins de M. de Biron, vous ne laissez pas de luy conseiller de  
« me venir trouver au plutost, avec resolution  
« de faire paroistre clairement son innocence,  
« ou, s'il y a eu quelque faute de sa part, de me  
« la confesser librement et entierement en particulier ; et que vous l'osez asseurer, voire luy  
« donner vostre foy et vostre parole que s'il en  
« use ainsi, il ne doit rien craindre, mais s'asseurer de recevoir tout contentement et aussi  
« bon traitement de moy que jamais. Et afin,  
« dit le Roy, que vous ne fassiez pas difficulté  
« d'engager vostre parole, de l'observation de laquelle vous estes fort jaloux, et je vous en  
« aime mieux, je vous donneray ma foy que s'il  
« vient sur vostre lettre, je feray ce que vous luy  
« manderez, ou le laisseray retourner en toute  
« liberté où il voudra ; et afin que vous en doutiez  
« moins, je le vous bailleray escrit et signé de  
« ma main ; » comme il fit en ces termes :

« Je promets à M. de Rosny que si M. de Bouillon me vient trouver sur ses lettres escrites de sa main, les assurances qu'il luy donnera et les promesses qu'il luy fera, que je les observeray toutes sans y manquer, ou luy permettray de se retirer librement où bon luy semblera, sans qu'en venant ny retournant il luy soit fait aucun ennuy, desplaisir ny empeschement. Dequoy je donne ma foy et ma parole royale audit sieur de Rosny.

« Fait à Paris, ce 24 juin 1602. HENRY. »

*Cinq lettres de la main du Roy à M. de Rosny, touchant M. de Bouillon.*

Mon amy, sur ce que Rignac, auquel j'ay fait expedier une ordonnance pour son voyage de m'estre venu trouver, il y a quelque temps, de

la part de M. de Bouillon, m'a dit que vous aviez commandé qu'elle luy fut acquittée pour estre venu à ses journées, qui n'est pas ce que je desire, c'est pourquoy je vous fais ce mot, pour vous dire que ma volonté estant qu'il soit autrement traité, que vous le commandiez, attendu que je l'ay retenu icy pres de moy plus de six semaines. Bon jour, mon amy.

Ce vendredy matin, 27 septembre. HENRY.

Mon amy, vous verrez le party qu'a pris le duc de Bouillon par la lettre qu'il a escrite au Maurier, qu'il m'a apportée ce soir et que j'envoie à monsieur le chancelier, afin qu'il la vous monstre, que vous en conferiez ensemble et m'en mandiez vostre advis, en attendant que je vous fasse sçavoir le mien. Je me doutois tousjours bien qu'il ne viendrait me trouver, mais je n'eusse pas deviné qu'il eust pris le pretexte porté par sa lettre. Je prie Dieu qu'il luy donne un meilleur conseil et qu'il vous ayt, mon amy, en sa sainte garde.

De Fontaine-bleau, le 3 decembre à neuf heures du soir. HENRY.

Mon amy, je vous fais ce mot et vous dépêche ce courrier expres pour vous dire que soyez icy demain, et pour ce faire pourrez venir en poste. Amenez avec vous un commis de l'espargne avec trois mil escus pour les voyages qu'il faut faire faire. Vous direz au sieur de Saint Germain, député de ceux de la religion, qu'il me vienne trouver, comme aussi à Bretauville, gouverneur de Ponts. Je viens tout presentement avoir des nouvelles de Chamberet, qui commande à Figeac, comme M. de Bouillon y avoit passé le 29 du passé et qu'il s'en alloit à Castres. Bon soir, mon amy.

Ce jeudy, à deux heures apres midy, 5 decembre, à Fontaine-bleau. HENRY.

Mon amy, j'ay receu ce soir la lettre de M. de Bouillon (dont je vous envoie la coppie) toute ouverte, laquelle il envoyoit à du Maurier pour me l'apporter. J'estime que demain je pourray l'envoyer par delà M. de Sillery, pour en communiquer avec vous et monsieur le chancelier, et sur cela prendre vos advis et me les envoyer. Cependant vous pourrez communiquer à M. d'Esperson la coppie de ladite lettre, mais non à autre. Bon soir, mon amy.

Ce 9 decembre, à Fontaine-bleau. HENRY.

Mon amy, j'ay eu nouvelles de M. de Bouillon ; il fera le fol, il se dit vostre ennemy : venez donc incontinent, car je veux pourvoir à mes affaires au plutost. Bon jour, mon amy.

Ce samedi matin, 28 decembre à Paris.

HENRY.

Or, pource que voyant le voyage du Roy à Mets tout resolu, et qu'il se parloit souvent des grandes broüilleries qui estoient en cette ville entre M. d'Espéron, les Sobolles et plusieurs des principaux habitants de Mets des deux religions, et de plusieurs autres affaires entre les princes d'Allemagne; et cela nous ayant fait estimer, à M. de La Font et à moy, qu'il se pourroit passer en ce voyage plusieurs choses de consequence qui méritoient bien de n'estre pas oubliées dans nos recueils, nous priasmes deux de nos amis, fort vos serviteurs, et qui avoient de grandes familiaritez en Cour, de s'enquerir particulièrement des plus importantes affaires, et d'en faire des remarques et Memoires; à quoy n'ayant pas manqué, comme nous en voulions inserer quelque chose dans les recueils que nous faisons estat de vous adresser, nous sceusmes que messieurs les deux Arnaults, lors vos secretaires principaux, ayant entrepris de faire une relation particuliere de tout ce qui se passeroit pendant vostre voyage et ambassade en Angleterre, et que, pour bailler plus de lustre et une plus belle suite à leurs discours, ils lui avoient donné commencement par le recit sommaire de diverses sortes d'affaires qui s'estoient passées en l'année precedente, et iceluy continué par ce qui s'estoit passé au voyage du Roy à Mets et le vostre en Angleterre, nous recogneusmes bien que nous n'avions rien recueilly qui ne pût estre dans ladite relation, laquelle, pour cette cause, nous resolumes, sans plus parler de nos recueils, de l'inserer icy toute entiere, estant à vous adressante et telle que s'ensuit.

#### CHAPITRE CXIV.

*Récapitulation des événemens de 1602. Indication des principaux événemens de cette année. Conversation de Henri IV et de Sully. Détails sur le voyage de Metz. Mort d'Élisabeth, reine d'Angleterre. Rosny envoyé près de son successeur Jacques I. Jésuites de Verdun. Instruction donnée par Henri IV à Rosny sur son voyage en Angleterre. Maladie du Roi. Sa guérison. Préparatifs du voyage de Rosny. Le comte de Soissons se réconcilie avec lui.*

*Memoires des sieurs Arnaults, secretaires, et de La Fonds, ayans charge de la maison de M. le marquis de Rosny; le tout en forme de relation des choses et affaires qui se sont faites et passées pendant le voyage et ambassade extraordinaire dudit seigneur en Angleterre; lesquels, pour plus facile intelli-*

*gence et donner une meilleure liaison aux choses, ils ont fait preceder d'un recit sommaire des affaires precedemment passées; ayans le tout mis en suite de ce grand nombre de lettres de l'année 1603, cy-dessus transcrites, d'autant que plusieurs d'icelles peuvent servir de verification aux affaires qui sont traittées en ladite relation, icelle adressée à M. de Rosny, ainsi qu'il s'ensuit.*

Monseigneur, avant que d'entrer en la narration particuliere des choses et affaires qui se passèrent durant vostre voyage et négociation en Angleterre, suivant le soin particulier qu'il vous pleut de nous commander d'en avoir, d'autant que nous estions employez à vos dépenses, et desirans de donner un plus grand esclarcissement et meilleure liaison à nos discours avec ceux qui les ont precedez et suivis, nous avons estimé à propos de vous ramentevoir succinctement, et en gros seulement, quelque chose des affaires plus importantes qui se passèrent durant l'année 1602, de laquelle les menées, practiques et conspirations du comte d'Auvergne et des ducs de Biron et de Bouillon, et les remedes qu'il y fallut appliquer, consumerent une grande partie d'icelle année, dans les démeslemens desquelles quelques-uns voulurent essayer d'y embarrasser le duc d'Espéron, mais il ne se verifia rien contre luy.

En suite de tels desseins, Fontenelles eut la teste tranchée, et le baron de Lux, encor plus coupable que luy, obtint pardon. Le prince de Joinville fut aussi accusé de quelques mauvaises pratiques; mais y ayant en icelles plus de niaiseries que de bien fondées intelligences, il en fut quitte pour estre appelé fol et enfant prodigue, et estre mis en la garde de sa mere et de son frere aîné. La devise des jettons du Roy; vos provisions de capitaine de la Bastille; le voyage du coronnel de Schombourg, mareschal de l'empire, envoyé vers le Roy de la part de l'Empereur; le voyage du Roy à Blois où il se passa de grandes affaires spécifiées dans vos grands Memoires; l'exécution du receveur general Jousseaulme, que vous envoyastes prendre dans Milan; la continuation du siege d'Ostade; les grandes mutineries des troupes espagnoles qui prindrent Ostrate; la ruine d'une grande flotte d'Espagne, commandée par Frederic Spinola; les revoltes de Transylvanie contre l'Empereur; le voyage d'un camerier du peuple Clement vers le Roy; l'extinction generale du sol pour livre. Le duc de Savoye fit faire, par le sieur d'Aligny, une entreprise sur la ville de Geneve qui reu-

sit à la confusion de l'entrepreneur; le comte de Fuentes se saisit, pour le roy d'Espagne, de l'estat de Final en la coste de Genes; l'on parla quelques jours des revoltes des advocats contre les audiences, lesquels donnerent plutost matiere de rire que sujet de craindre. Le duc de Savoye entra en quelque traité avec la republique de Genes; l'alliance des cantons de Suisse fut renouvellee avec la France en grand apparat; la seigneurie de Venise et les ligues des Grisons firent une confederation du consentement du Roy, lequel fit des defences touchant les duels et les habits d'or et d'argent et autres luxes. Il fut fait une recherche des mines d'or et d'argent en France; un edict pour le reglement des monnoyes, les manufactures estrangeres et les plans des meuriers; le fils de madame de Vernueil fut legitimé.

Pour l'année 1603, outre les devises des jettons d'or de l'année avec ces paroles : *Nostri dant otia terris*, les principales affaires qui se demenerent en icelle, furent : les esmotions de Mets à cause des violences des Sobolles, que le duc d'Espernon essaya d'appaier; mais n'y ayant pû parvenir, le Roy fit le voyage qui donna ordre à tout, s'assurant de la place en laissant au duc d'Espernon le simple tiltre, et la puissance au sieur de Montigny; la suppression des requestes de Thoulouze; les sollicitations du comte Palatin en faveur du duc de Bouillon. Quelques princes d'Allemagne vindrent baiser les mains au Roy, lequel composa le different qui estoit entre le cardinal de Lorraine et le prince de Brandebourg, à cause de l'evesché de Strasbourg; les Jesuites firent instance au Roy pour leur restablissement en France, mais ils ne peurent encor rien obtenir. Sa Majesté visita madame de Bar, sa sœur, à Nancy, et s'en retournant à Paris, il eut advis de la mort de cette grande et genereuse Elisabeth, reine d'Angleterre, lequel accident nous fera diminuer le recit de plusieurs autres affaires, cestuy-là nous fournissant assez de matiere tout seul pour faire un grand discours. Auparavant lequel neantmoins nous vous ramentevrons encor le reste de ce qui se passa de plus important durant le reste de cette année 1603, comme vostre broüillerie avec monsieur le comte de Soissons pour avoir empesché l'establissement d'un grand impost sur les balots de toile sortant de Normandie et Bretagne; le passage de Taxis par la France, et en suite celuy du connestable Velasque, pour essayer de descouvrir les intentions du Roy, et aller traiter une alliance en Angleterre; la retraite du duc de Bouillon en Allemagne pour fuir la presence du Roy; le synode tenu à Gap,

dont il se fit grand bruit à cause d'un article qui offençoit le pape Clement; le restablissement des Jesuites pour le contenter; la demolition de la pyramide et la formation des Augustins reformez, les Recollects, des Carmes deschaussez, des Freres ignorans, des Fueillantines, Carmelites et Capucines, que nous laisserons travailler à leurs reformes, pour entrer en la representation des recueils que nous avons faits de vos dits, gestes, actions, discours et lettres à vous ou de vous et autres choses qui vous furent occurrentes en vostre voyage d'Angleterre, et que nous avons estimé pouvoir estre des dépendances, accessoires, precedences ou suites de vos negociations estrangeres.

Vous nous permettez, s'il vous plaist, de vous ramentevoir ( pour ce que c'est chose qui nous a semblé avoir quelque liaison avec les Memoires que nous avons faicts de vostre voyage et negociation en Angleterre ) ce que nous avons appris de vous, et que par ces discours nous apprendrons peut estre à d'autres, comme le Roy, apres que vous luy eustes porté ses jettons d'or et d'argent, du commencement de l'année 1603, vous manda un soir qu'il vouloit aller le lendemain visiter l'Arsenac, pour voir comme vous y avanciez toutes choses, tant pour les artilleries et armes que les munitions, et aussi pour vous parler de plusieurs affaires qu'il avoit en la fantaisie, lesquelles occupations consommeroient bien toute la journée; et partant vous falloit-il resoudre de luy donner à souper, mais avec six seulement, et tous gens qu'il sçavoit bien qui n'importuneroient ny luy ny vous, et par consequent ne vous empescheroient pas de considerer et dire tout ce que vous voudriez, et par ce moyen, auriez-vous assez de loisir pour luy faire voir tous ces estats dont vous le pressiez tous les jours, touchant vos charges des finances, de l'artillerie, fortifications, bastimens et ouvrages publics.

Toutes lesquelles choses ayans esté executées, selon son intention, et avec une representation plus grande de toutes choses qu'il ne s'estoit imaginé, et donné assurance de l'augmenter encore tous les ans, à mesure que vous bonifieriez ses revenus et les aisances de ses peuples, il s'en alla promener sous les grandes halles aux canons et armes proches de la Bastille, d'où ayant fait esloigner tout le monde, il vous dit, ainsi que nous deux l'avons depuis sceu de vous : « Je voy bien « que ce que vous m'avez souvent reiteré du dire « d'un certain empereur que vous me nommiez, « ce me semble, Vespasian, se trouvera verita- « ble; que plus les roys possèdent de grandes es- « tendues de pays et seigneuries, moins doivent-

« ils esperer d'estre en repos de corps et d'esprit,  
 « d'autant qu'il survient tousjours de nouvelles  
 « affaires qui requierent de la prevoiance et de  
 « l'employ, ainsi que je l'experimente mainte-  
 « nant : car aussi est-il vray que je ne suis jamais  
 « sorti de grandes affaires que je n'aye eu be-  
 « soin de m'employer en d'autres quasi non moin-  
 « dres, et ne me suis pas plutost veu hors de cel-  
 « les que j'ay eües avec le roy d'Espagne, M. de  
 « Savoye, et des conspirations de M. de Biron et  
 « sa sequelle qui n'estoit pas petite, que voicy  
 « de nouvelles espines, lesquelles, quoy qu'en  
 « effect elles ne soient pas si dangereuses, si ne  
 « laissent-elles pas de me picquer l'esprit bien  
 « serré, et trois entre les autres :

« La premiere, les restes des menées de M. de  
 « Biron, les malices de messieurs de Bouillon,  
 « de la Trimouille, du Plessis et une quantité de  
 « petites gens qu'ils employent par les provinces  
 « pour me descrier dans icelles parmy ceux de  
 « la religion, comme si j'avois des desseins ten-  
 « dans à leur destruction, tout cela ne me fas-  
 « chant pas tant pour les difficultez d'y apporter  
 « remede, que pour ce qu'il me faudroit exercer  
 « des rigueurs contre de mes anciens et familiers  
 « serviteurs domestiques. La seconde, touchant  
 « les dispenses necessaires à obtenir pour le ma-  
 « riage de ma sœur avec M. de Bar, où je pense  
 « recognoistre que je ne suis pas si bien servy  
 « que je desirerois par ceux que j'y employe en  
 « cour de Rome, eux, comme j'en ay eu des ad-  
 « vis, n'estans pas marris des difficultez que l'on  
 « y fait, sous esperance que, pour les surmonter,  
 « elles me reduiront en fin à contraindre ma  
 « sœur de changer de religion : ce que je ne  
 « scaurois faire sans exercer contre elle de gran-  
 « des rigueurs et violences, qui seroit faire ce  
 « que les autres trois cy-dessus desireroient, afin  
 « de confirmer les bruits qu'ils font courir que  
 « je deviendray un jour persecuteur de ceux de  
 « la religion, chose que mon cœur ne scauroit  
 « porter, eux m'ayant assisté lors que tout le  
 « monde m'assailloit. Et la troisieme sont les af-  
 « faires de Mets, lesquelles il faut traicter bien  
 « delicatement, à cause qu'estant ville d'Empire,  
 « si je venois à la perdre, je n'aurois jamais droit  
 « de la redemander, les broüilleries d'entre  
 « M. d'Espernon, les Sobolles et les principaux  
 « habitans de Mets, et pays Messin des deux re-  
 « ligions, estans telles qu'il m'y faut remedier  
 « promptement. Desquelles trois affaires vous  
 « ayant desja plusieurs fois parlé, vous en sca-  
 « vez autant que moy, et partant desirerois d'y  
 « apporter les remedes necessaires pendant que  
 « nous en avons le loisir, à cause des grandes  
 « affaires où les Espagnols se sont tellement em-

« barrassez, qu'elles ne leur permettent pas de  
 « penser ailleurs, comme sont celles de leurs mu-  
 « tinez, celles du siege d'Ostende par eux, et de  
 « celles de Grave et de Rimberg par le prince  
 « Maurice et autres, qui sont là les causes pour  
 « lesquelles je suis venu icy vous entretenir, afin  
 « que vous m'en disiez librement vostre advis,  
 « et puis je vous diray aussi le mien. »

Surquoy vous luy respondistes que, quant à  
 M. de Bouillon et à sa sequelle de broüillons,  
 vous vous en mocquiez ; d'autant que laissant  
 l'exercice libre à ceux de la religion, et ne les  
 declarant point ny par parole, ny par effets, in-  
 dignes de ses gratifications et des charges et di-  
 gnitez de son royaume, il n'y aura jamais que des  
 canailles qui se meslent de leurs fantaisies, tou-  
 tes les grandes villes sans gouverneurs, et nul  
 des gouverneurs puissans des autres places n'es-  
 tans pas si sots que de s'embarrasser dans de  
 telles inepties, ne croyant pas mesme qu'il y ait  
 une seule place qui aye les choses necessaires,  
 pour soutenir un subit attaquement de quinze  
 jours seulement. Et que quant aux deux autres  
 affaires, vous estimiez qu'un prompt voyage  
 vers la Lorraine, avec la Reine et toute la Cour,  
 afin qu'il semblast que ce ne fust que par forme  
 de visite, remedieroit à tout, ne faisant pour  
 vous aucune doute qu'il ne reduise messieurs de  
 Lorraine et de Bar à user de toutes telles sortes  
 de bons traitemens envers madame sa sœur,  
 qu'il scauroit desirer ; et que cela bien recogneu  
 à Rome par le Pape et par ses solliciteurs de dis-  
 pences, devant qu'il fust six mois, il en auroit  
 telle issuë qu'il voudroit ; ny ayant non plus de  
 doute que quant aux affaires de Mets, que le  
 grand embarras de toutes les parties les rendroit  
 tous chiens couchans, sans faire autre chose que  
 de tascher à rejeter les fautes de leurs intrigues  
 les uns sur les autres. Surquoy le Roy vous dit  
 qu'il estoit bien-aise de vous avoir entendu,  
 pource qu'ayant eu les mesmes pensées, il en ju-  
 geoit les conseils d'autant meilleurs qu'ils se ren-  
 controient aussi bien conformes, et partant de-  
 meuroit-il resolu d'exercuter tout cela, sans aucun  
 retardement, nonobstant les mauvais chemins  
 qui luy rendroient, à son advis, une Cour bien  
 crottée ; mais que pour donner ordre que les af-  
 faires ordinaires ne laissassent pas d'avoir leur  
 cours, et mesme qu'il y eust quelqu'un auquel il  
 se pust confier, et s'adresser pour ses dépesches  
 et paquets, il vouloit que vous demeurassiez à  
 Paris. Qui est ce que nous avons appris de vous,  
 à quoy nous adjousterons ce que l'un de nous  
 (que vous aviez ordonné de suivre la Cour,  
 pour vous advertir de tout ce qui s'y passeroit)  
 a pû recueillir des affaires qui se sont passées

durant ce voyage et séjour de Lorraine, dont le discours est tel.

Que les altercations, haines et animosités (toutes prestes à dégénérer en combustions, séditions, mutineries et rebellions), qui estoient intervenues entre le duc d'Espéron, les Sobolles, les habitans de Mets, des deux diverses religions et quelques-uns des dépendances du pays Messin, procedoient plutost de leurs interests particuliers et de l'autorité absoluë que chacun d'eux se vouloit arroger et s'y maintenir, que d'aucun desir et intention de bien et loyalement servir le Roy et leur patrie, s'estans tous là dessus tellement enaigris les uns contre les autres, qu'il n'y avoit que la seule presence et prudence du Roy, et l'ordre qu'il establet en cette affaire, qui pust remedier à tant d'intrigues et embarras, meslangez d'impostures, calomnies et suppositions; mais, outre ces deux pretextes tous apparens et publics, cinq causes et raisons secrettes de beaucoup plus grande importance l'avoient fait acheminer en ces quartiers.

La premiere, de plus prompte execution et la plus pressante, estoit pour retirer la citadelle, la ville et le pays Messin, sinon de l'apparente, au moins de l'efficacieuse puissance, disposition et absoluë autorité de celuy qui durant sa faveur de delices de la Cour, y avoit dominé en souverain, lequel Sa Majesté sçavoit bien (et en parloit quelquefois assez, et peut estre trop librement) ne l'avoir jamais guerres aymé, ny servy de cœur et d'affection, mais avoir esté tant imprudent, quelque grande inégalité de condition qui fust entre l'un et l'autre, de l'avoir souvent contre-quarré et contesté obstinément plusieurs choses contre luy, comme de pair à compaignon, du temps de son grand credit aupres du roy Henry III; qu'il sceut bien que lors de la mort d'iceluy il avoit essayé d'empescher qu'il ne fust reconnu pour Roy, traversé l'establissement de son autorité royale, autant qu'il luy avoit esté possible, tasché de s'establiir et de se maintenir en des gouvernemens et charges contre sa volonté, et qu'il ne doutast point qu'il ne fust d'humeur, affection et faction pour avoir incessamment en aversion ses hauts et magnifiques desseins. La seconde, pour essayer de trouver les moyens propres pour mesnager les occasions de rejoindre la Lorraine avec le royaume de France, sans prejudicier aux droicts de l'Empire ni libertez des peuples. La troisieme, pour essayer, par son approchement d'Allemagne, de renouer quelques intelligences qui paroissoient prestes de s'alterer entre quelques-uns des princes protestans d'icelle, qui estoient de sa confidence et particuliere association en desseins. La quatrieme,

pour rafraischir et raffermir toutes ses autres amitez, liaisons et confederations, tant d'une religion que d'autre, avec tous ceux qui estoient enclins à embrasser ses hauts et magnifiques projets et desseins. Et la cinquiesme, pour essayer, comme amy commun, de terminer à l'amiable plusieurs differends que, par les plaintes à luy faites, il avoit entendu y avoir entre quelques princes, estats, et villes catholiques et protestantes de la Germanie: surquoy, entre les autres, Sa Majesté obligea tellement, et avec tant d'équanimité, les maisons de Brandebourg et de Lorraine, et la ville de Strasbourg, et quelques autres princes et villes, que la pluspart des autres grands princez d'Allemagne se disposoient de luy aller faire la reverence, requerir son amitié et luy offrir leur service en personnes, s'ils eussent peu avoir le loisir de ce faire. Mais le prompt retour de Sa Majesté en France, à cause de la mort de la reine d'Angleterre, fut le subject que grande partie d'iceux, ne pouvant comparoistre avec la pompe et magnificence qu'ils preparent, furent contraincts de s'acquitter de ce devoir par ambassadeurs, et qu'il n'y eut que le cardinal de Lorraine, les ducs de Lorraine et de Bar, le duc des Deux Ponts, le prince de Brandebourg et de Pomeranie, le landgrave de Hessen et trois ou quatre princes des plus proches voisins du Rhin, qui vinssent en personne à Mets.

Le roy donc ayant appris au vray, comme il a esté dit cy-dessus, les nouvelles de la mort de cette magnanime et sage Elizabeth, reine d'Angleterre et d'Irlande, il en receut tous les ennuis et desplaisirs que pouvoit mériter une si grande perte, et aussi-tost jetta les yeux sur vous, comme vous estimant le plus propre de tous ses serveurs, qu'il pouvoit employer pour essayer d'establiir une pareille confidence qu'il avoit avec elle, entre luy et son successeur; dequoy il vous advertit incontinent par une sienne lettre dont la teneur ensuit.

*Lettre de la main du Roy à M. de Rosny.*

Mon amy, j'ai eu advis de la mort de ma bonne seur la reine d'Angleterre, qui m'aymoit si cordialement, et à laquelle j'avois tant d'obligation. Or, comme ses vertus estoient grandes et admirables, aussi est inestimable la perte que moy et tous les bons François y avons faite; car elle estoit ennemie irreconciliable de nos irreconciliables ennemis, et tant genereuse et judicieuse, qu'elle m'estoit un second moy-mesme, en ce qui regardoit la diminution de leur excessive puissance, contre laquelle nous faisons elle et moy de grands desseins, ce que vous sçavez aussi bien

que moy, vous y ayant employé. J'ai donc fait cette perte irreparable (au moins, selon mon avis) au temps que je me pensols davantage prevaloir de sa magnanimité et constante resolution, et que mes affaires s'en alloient les mieux disposées pour me conjoindre efficacement avec elle; ce qui me comble d'un ennuy et desplaisir extrême, n'osant me promettre de trouver autant de generosité, de cordiale affection envers moy, et de ferme resolution à diminuer nos ennemis communs, en son successeur; vers lequel me resolvant d'envoyer pour sentir ses inclinations, et essayer de le disposer à imiter sa devanciere, j'ay aussi-tost jetté les yeux sur vous, comme celuy de tous mes bons serviteurs, par lequel je puis le plus confidemment traitter avec luy de choses si importantes, tant à cause de l'amitié que chacun sçait que je vous porte, de la religion que vous professez, que pour vous estre acquis envers luy la reputation d'avoir de la franchise et d'estre homme de foy et de parole. Preparez-vous donc à faire ce voyage, et disposez en sorte mes affaires, qu'elles puissent avoir leur cours ordinaire pendant vostre absence, sans aucun mien prejudice. Soyez moy tousjours loyal, car je vous ayme bien et suis fort content de vos services. Adieu, mon amy.

De Nancy, ce 10 avril 1603. HENRY.

En ce voyage de Mets, les Jesuites de Verdun se sentant appuyez du sieur de La Varenne, qui avoit choisi la faveur de ces gens-là pour eslever luy et les siens, firent de grandes instances pour infirmer les arrests de la cour de parlement donnez contr'eux; mais pour cette fois ils ne purent rien obtenir. Le Roy estant sur le point de son retour, vous escrivit une lettre par laquelle il vous mandoit de le venir rencontrer par les chemins à quinze ou vingt lieues de Paris, afin qu'il eut plus de loisir de vous entretenir tant sur l'estat où estoient les affaires, et ce qui s'estoit passé en icelles pendant son absence, que sur ce qu'il devoit resoudre pour vostre voyage d'Angleterre, qu'il jugeoit de plus en plus estre du tout nécessaire, ayant appris que les Espagnols et les archiducs se resolvoient de faire toutes sortes d'efforts pour se restraindre d'alliance avec ce nouveau Roy, et l'alliener de la sienne, dequoy il discourroit plus amplement avec vous à vostre arrivée. Suivant laquelle lettre vous le fustes rencontrer à Monglat, dequoy il fut fort aise, à cause, comme il vous dit, que n'estant qu'une maison particuliere, il auroit peu de gens avec luy, et par consequent plus de loisir à vous entretenir.

A vostre arrivée il vous embrassa par trois fois, vous conta tout haut ce qu'il avoit veu et

fait de plus remarquable au veu et sceu d'un chacun pendant son voyage; et apres vous avoir enquis de ses bastimens, de ceux que vous faisiez faire à l'Arsenac, et de la quantité de canons, armes et munitions que vous aviez lors (lequel, suivant ce que vous sçaviez estre de son intention, vous ne diminuastes pas, afin d'entretenir vostre reputation), il vous prist par la main, vous mena dans un jardin tout seul, fit fermer la porte et y tenir des archers de la garde, afin que nul n'entrast; et en se promenant il vous reiterra, avec grande amplification, tout ce qu'il vous avoit escrit touchant la feuë reine d'Angleterre, et les projets qu'ils faisoient de se conjoindre ensemble, et associer à leur union les Venitiens, les Pays-Bas et villes d'Allemagne protestantes, pour travailler puissamment à la diminution de cette tant ample domination de la maison d'Austriche par la liberation des estats et peuples qui desireroient de s'en distraire.

Puis, entrant sur le fait de vostre voyage, il vous dit: « Vous sçavez mieux que nul autre si j'ay esté contraint de patienter beaucoup de choses qui me déplaisoient, de m'accommoder aux diverses factions et passions de mes sujets, et si ces procedures ne m'ont pas enfin succédé tant heureusement, qu'en continuant d'user de prudence et de discretion, je me sers utilement de tous, quelques défauts qu'il y puisse avoir en aucuns. Mon royaume, ainsi que nous le dit tousjours La Riviere, ressemblant à ces boutiques de droguistes qui ne sont pas seulement remplies de choses douces et odorantes, mais aussi de poisons et mauvaises senteurs; et moy à ces excellents medecins qui sçavent si bien corriger et approprier les choses, que ce qui de sa nature seroit poison, est rendu propre à conserver la santé; tellement qu'en usant des bons et des mauvais en cette maniere, et les discernant comme il appartient, je ne laisse rien d'inutile. Mais pour tout cela les affections des partis, formez de longue main, n'estans pas entierement arrachées des cœurs, il y a quelquesfois de mes plus proches et plus employez serviteurs, lesquels, par des discours tirez de loin, que je ne laisse pas de decouvrir, vou- droient bien essayer de me divertir d'une alliance et confidence tant restraite avec les princes, estats et communautez de religion contraire à celle dont je fais maintenant profession, et à me lier du tout avec les autres. Mais ne voyant nulle seurété en ce dernier, et ne se pouvant mesme tenter sans une trop grande diminution de la faction françoise dans la chrestienté et un excessif accroissement en celle qui luy est contraire, je me resouds de



« me tenir plus uny que jamais avec les anciens  
 « alliez de cette couronne, et mes amis intimes  
 « bien esprouvez, ne laissant pas neantmoins de  
 « faire bonne mine à chacun.

« Or, vous ay-je dit tout cecy pour ce que de-  
 « sirant, comme je vous l'ay escrit, vous en-  
 « voyer en Angleterre, il y a bien des choses  
 « generales à traiter, desquelles je pourray dis-  
 « courir avec vous en presence de mes autres  
 « serviteurs, vous en donnant la charge et mesmes  
 « leur faire dresser vos instructions sur ce sujet.  
 « Mais aussi y en a-il d'autres particulieres que  
 « j'ay en l'esprit, lesquelles doivent estre tenuës  
 « secretes entre vous et moy, dautant que je  
 « desirerois d'essayer s'il y auroit moyen de dis-  
 « poser ce nouveau Roy à suivre en tout et par  
 « tout les projets et desseins que nous avions faits,  
 « comme vous le sçavez, avec la feuë Reine sa  
 « devanciere, ma bonne sœur; et de plus luy  
 « proposer encore une alliance plus estroite par  
 « les mariages de nos enfans : toute ma difficulté  
 « consistant en la forme de luy en faire les ou-  
 « vertures, de crainte que si ce prince est d'un  
 « esprit mol et du tout porté à la vie pacifique  
 « avec tous, il n'essayast de tirer advantage de  
 « telles propositions, soit en se prevalant d'icelles  
 « envers mes ennemis, soit en refusant mon al-  
 « liance à cause de la religion : ce qui me tour-  
 « neroit à honte et desplaisir tout ensemble, et  
 « partant pourroit estre cause d'altérer l'amitié  
 « qui doit estre entre nous pour nostre commune  
 « conservation et accroissement.

« Or, ayant passé et repassé infinies fois tou-  
 « tes ces difficultez et inconveniens par mon es-  
 « prit, j'ay en fin trouvé (au moins ce me sem-  
 « bloit-il) un expédient propre pour les eviter  
 « entierement, qui seroit de ne vous faire traiter  
 « en mon nom et comme mon ambassadeur, sinon  
 « des condoleances et conjouyssances necessaires  
 « en une telle occasion, et des affaires publiques  
 « et generales qui ont accoustumé d'estre traittées  
 « en semblables conjonctures. Et quant aux au-  
 « tres n'en parler que comme de vous mesmes et  
 « comme y estant porté par l'affection particu-  
 « culiere que vous direz luy porter, et à vostre  
 « commune religion, afin que s'il les approuve  
 « et agréé, vous puissiez faire semblant de me  
 « les vouloir proposer et essayer de m'y porter  
 « semblablement. » A quoy vous respondistes à  
 Sa Majesté que, dautant plus que son esprit es-  
 toit vif et fertile en rares inventions, dautant  
 plus meritoient-elles d'estre exactement exami-  
 nées et soigneusement considerées avant que d'en  
 pouvoir dire vostre advis; et pour ces raisons le  
 suppliez-vous de vous donner quatre jours pour y

penser, lesquels, apres plusieurs autres discours  
 sur ce sujet, il vous accorda.

Or, vous estans ainsi separez, le Roy prit le  
 chemin de Jully et vous celui de Paris pour ce  
 que vous estiez en poste : auquel lieu Sa Majesté  
 estant arrivée et le temps qu'elle vous avoit donné,  
 passé, elle vint à l'Arsenac comme pour voir  
 seulement les galleries que vous y faisiez cons-  
 truire, et la quantité d'artilleries, armes, mu-  
 nitions, outils et ustensilles que vous y aviez  
 desja mis ensemble; puis s'estant quelque peu  
 promené sans vous dans vostre grande allée avec  
 les uns et les autres, en leur loüant vostre vigi-  
 lance et diligence, tous les accommodemens que  
 vous aviez faits en ce lieu-là, et ceux que vous  
 projettiez d'y faire, il vous appella, et vous ayant  
 mené selon sa coustume sur le bout de ladite  
 allée fait en forme de balcon, duquel on voit  
 tout Paris, et ayant fait retirer un chacun, il  
 vous demanda si vous aviez suffisamment pensé  
 aux propos qu'il vous avoit tenus à Monglat pour  
 y faire une responce absoluë. Surquoy vous re-  
 partistes aussitost :

Que luy ayant pleu de vous le commander  
 ainsi, vous n'aviez eu garde d'y manquer, et  
 qu'apres en avoir espluché toutes les circons-  
 tances, vous trouviez l'expedient par luy inventé,  
 ainsi que toutes ses autres œuvres, non seule-  
 ment bon, mais admirable et tres-asseuré pour  
 eviter tous les inconveniens qui pouvoient re-  
 garder sa personne, ses enfans, son Estat et ses  
 affaires, mais non pas les perils qui vous me-  
 naçoient en l'exécution et apres icelle, dautant  
 que pour parvenir à la confidence requise avec  
 ce Roy pour le disposer à bien recevoir de vous  
 des propositions de si grande importance, à vous  
 en dire librement et franchement tous ses sen-  
 timens, et vous prier de les luy proposer, estant  
 de retour en France, et essayer de faire approu-  
 ver, comme vous voyez que telle estoit l'intention  
 de Sa Majesté, il vous seroit necessaire d'user de  
 telles paroles pour tesmoigner vostre zele envers  
 la religion et vostre entiere devotion à son ser-  
 vice, que si un jour tels discours, comme ils  
 estoient sujets d'estre portez des uns aux autres  
 et de s'augmenter tousjours en chemin faisant,  
 venoient à estre rapportés à Sa Majesté, lors  
 que les occasions des affaires et raisons d'icelles  
 seroient passées, par personnes mal intentionnées  
 en vostre endroit, ils pourroient estre tellement  
 amplifiez et exaggez, ou elle se trouveroit en  
 si mauvaise humeur qu'elle ne manqueroit ja-  
 mais d'en prendre des jalousies et défiances à  
 vous tres-dommageables, sur tout si l'oubliance  
 avoit une fois passé par dessus les difficultez

qu'il auroit fallu surmonter pour l'exécution d'un si haut dessein ; non que vous pretendissiez par un tel discours vous exempter de suivre absolument ses volontez, mais afin seulement qu'il n'eust point desagréable les precautions que vous recherchiez pour éviter ces inconveniens, lesquels se pouvoient, selon vostre advis, garantir par le moyen d'une petite instruction écrite de sa propre main, en laquelle ses intentions fussent clairement expliquées, afin que si jamais quelqu'un essayoit de luy faire trouver mauvais ce que vous auriez fait, Sa Majesté se pust tant mieux ressouvenir que le tout se seroit passé suivant son commandement expres.

Lequel propos, apres que le Roy y eut un peu songé, il vous dit trouver tres-raisonnable. Et de fait, avant que de partir pour vostre voyage, il vous bailla cette instruction toute écrite et signée de sa main, mais qu'il cachetta apres vous l'avoir leuë, par laquelle il vous ordonnoit de n'espargner nulle sorte de paroles ny d'actions que vous estimassiez propres pour vous mettre en une confidence toute entiere avec le roy d'Angleterre et ceux qui auroient credit aux affaires, et leur faire croire que vous estiez tellement zelé en vostre religion, que vous en prefereriez la subsistance et accroissement à vostre propre Roy, maistre et patrie, et portiez telle affection à sa personne royale d'Angleterre et à sa grandeur, que s'il eust esté le vostre naturel. En suite dequoy vous luy feriez, comme de vous mesmes et comme si c'estoit chose que vous craignissiez mesme qui parvinst à la cognoissance de vostre Roy par autre voye que la vostre, toutes les ouvertures dont vous auriez discoursu ensemble, la substance desquelles nous ne sçaurions pas dire avoir sceu de vous par paroles expresses, d'autant que vous en ayans quelquesfois parlé pour en apprendre quelque chose, vous ne nous avez jamais fait autre responce, sinon que c'estoient lettres closes et non patentes ; mais bien depuis en avons nous pensé conjecturer quelque chose par aucunes de vos paroles entrejettées, magnifiant les grands desseins du Roy ; mais plus clairement en avons nous estimé recognoistre quelque partie en general seulement, par les divers rassemblements que nous avons faits à diverses fois dans vostre petit cabinet de derriere, aux ormoires vertes, sous la table duquel vous aviez jetté plusieurs papiers comme inutiles, entre lesquels il y avoit plusieurs minutes de lettres par vous écrites au Roy et des réponses des siennes à vous, quelques discours encommencez, d'autres deschirez à demy, d'autres corrigez et raturez comme minutes, de diverses sortes de projets sur des affaires d'importance, et parlant

de grands desseins du Roy ; mais tout cela tellement mutilé, embrouillé et si fort destitué de ses suites necessaires pour en prendre et donner l'intelligence, que nous avons mieux aimé nous en taire, et nous contenter d'insérer icy la coppie d'un certain Memoire de quelques poincts et articles pour presenter au Roy, quoy qu'il soit seulement en forme de questions non respondues, et les choses dont il est parlé si generales, que l'on n'en puisse aussi apprendre la consequence que fort generalement ; le Memoire estant corrigé, raturé et entre-ligné, lequel remis par nous au net, s'est trouvé tel que s'ensuit.

*Memoires pour sçavoir de Sa Majesté sur lesquels des poincts il trouvera bon que M. de Rosny fasse des propositions seulement.*

« Premièrement, si ce ne seroit pas chose à desirer que chacun voulust suivre tout ce qui avoit esté convenu entre le roy de France et la reine d'Angleterre en l'année 1601.

« Plus, s'il ne seroit pas à desirer que de tous les Estats et peuples de la chrestienté d'Europe, l'on pust former une seule republique.

« Plus, s'il ne seroit pas à desirer que toutes les puissances terriennes d'icelle peussent estre reduites à quinze sortes de dominations souveraines, dans lesquelles et sous lesquelles peussent estre compris tous les peuples tres-chrestiens de l'Europe.

« Plus, s'il ne seroit pas à desirer de pouvoir trouver le moyen de faire subsister cette republique tres-chrestienne tousjours pacifique en elle mesme et entre toutes les dominations dont elle seroit composée.

« Plus, s'il ne seroit pas à desirer de pouvoir rendre à peu pres toutes ces quinze dominations esgales en estenduë de pays, Estats, force, puissance et autorité, afin qu'ils n'eussent rien à craindre les uns des autres, ny cause de se porter envie, jalousie ou haine.

« Plus, s'il ne seroit pas à desirer qu'il n'y eust jamais plus de disputes, noises, haines, troubles ny guerre entre les diverses religions.

« Plus, s'il ne seroit pas à desirer de restablir l'empire de Germanie et les electeurs, prelatz, princes et villes d'iceluy en leur ancien droit de libre election de leur Empereur.

« Plus, s'il ne seroit pas à desirer de donner des bornes et limites si certaines et bien ajustées aux dominations limitrophes les unes des autres, qu'il ne pust jamais intervenir disputes, noises ny diversité de pretentions pour ce sujet.

« Plus, s'il ne seroit pas à desirer de vulder toutes les diverses pretentions des potentats

tres-chrestiens, en sorte qu'ils ne puissent jamais en disputer.

« Plus, s'il ne seroit pas à desirer de voir les plus grands potentats et le plus grand nombre d'iceux s'associer et confederer, voire se rendre freres d'armes pour maintenir et faire observer les choses proposées pour le bien universel de la republique tres-chretienne.

« Plus, s'il ne seroit pas à desirer de pouvoir en sorte descharger ces quinze dominations des despences extraordinaires auxquelles ils estoient obligez à cause des dissensions où ils entroient les uns contre les autres, qu'une telle espargne fust suffisante pour former et souldoyer des armées capables de mener une guerre continuelle contre les infideles.

« Plus, s'il ne seroit pas à desirer que tous les potentats fussent obligez à nommer des arbitres pour composer tous les differends qui pourroient intervenir pour leurs successions et partages d'icelles.

« Plus, s'il se trouve dans la chrestienté d'Europe quelques peuples, Estats ou provinces desquels la domination fut pretenduë par pluralité de grands princes, et par eux-mesmes sur eux-mesmes, et desquels la situation fut telle, que la possession absoluë d'iceux pust faire naistre de tels ombrages et jalousies aux potentats voisins, qu'ils pussent engendrer des guerres continuelles, dommageables à tous, s'il ne seroit pas à desirer de les pouvoir establir en une telle forme de gouvernement, qu'elle peust estre commode au general de la chrestienté.

Or, quoy que nous ne sçachions pas bien à la verité ce que contenoit vostre instruction secrette et particuliere que le Roy vous avoit luy-mesme baillée, si elle estoit escrite de sa propre main ou de celle de M. de Lomenie, si ces Memoires en forme de questions y estoient inserez ou non, ny quels particuliers commandemens vous aviez receus sur toutes ces choses, si sçavons-nous bien que le Roy, lors que vous pristez congé de luy, vous embrassa, bailla sa main à baiser, puis vous dit : « Adieu, mon amy, allez, et faites aussi bon voyage que je le desire et l'espere de vostre loyauté, prudence et capacité, me confiant tellement en vous, que je remets les executions de ce que je vous ay ordonné en particulier, à vostre jugement, pour en user selon que les temps, l'estat des affaires et la disposition des esprits avec lesquels vous aurez à traiter et negocier vous en donneront le moyen. »

Les choses et affaires dont est fait mention dans ce chapitre ayans esté ainsi examinées et projetées, le Roy se resolut d'aller à Fontainebleau, pour y faire vos dépesches d'Angleterre,

où toute la Cour le suivit, excepté le conseil, qu'il avoit remis à partir trois jours apres, afin qu'il eust ce petit loisir tout libre pour voir ses hastimens, jardinages et petites nourritures de divers animaux des plus rares. Mais le lendemain le conseil fut contremandé, à cause que le Roy estoit tombé malade d'une retention d'urine si grande, que les medecins desesperans quasi de sa vie, et luy n'en ayant pas meilleure opinion, il tourna toutes ses pensées à Dieu, et au soin d'establir un tel ordre au gouvernement et conduite des affaires du royaume, qu'il n'y pust arriver d'alteration. Et sur ce dessein, il vous escrivit une lettre telle que s'ensuit :

« Mon amy, je me sens si mal qu'il y a grande apparence que le bon Dieu veut disposer de moy. Or estant obligé, apres le soin de mon salut, de penser aux ordres necessaires pour asseurer ma succession à mes enfans, les faire regner heureusement à l'avantage de ma femme, de mon Estat, de mes bons serviteurs et de mes pauvres peuples, que j'ayme comme mes chers enfans, je desire conferer avec vous de toutes ces choses avant que d'en rien resoudre. Partant venez me trouver en diligence sans en rien dire à personne ny donner aucune allarme; faites seulement semblant de vouloir venir au presche à Ablon, et y ayant fait secrettement trouver des chevaux de poste, rendez-vous ce jour mesme en ce lieu. »

Comme vous fistes, et trovastes le Roy au lit, la Reine assise à son chevet, qui luy tenoit l'une de ses mains entre les deux siennes; lequel, si tost qu'il vous vid, il vous tendit l'autre main, et vous dit : « Venez m'embrasser, mon amy; je suis merveilleusement aise de vostre venuë, car c'est une chose estrange, que deux heures apres vous avoir mandé, j'ay commencé d'estre un peu soulagé de mes grandes douleurs, lesquelles s'en vont peu à peu, ayant desja pissé trois fois, et la derniere quasi à plein canal et sans forte douleur. » Puis se tournant vers la Reine, il luy dit : « Mamie, voila celui de mes serveurs qui a le plus de soin et d'intelligence des affaires du dedans de mon royaume, et qui vous eust le mieux servy et mes enfans aussi, s'il fust arrivé faute de moy. Je sçay bien que son humeur est un peu brusque et quelques-fois trop libre à un esprit fait comme le vostre, et que force gens sur cela luy eussent rendu de mauvais offices aupres de mes enfans et de vous, afin de l'en esloigner. Mais si jamais telles occasions se presentent, et que vous vous serviez de tels et tels (qu'il luy nomma tout bas à l'oreille, et que je ne sçay si vous avez sceu quels ils estoient, car nous n'en avons jamais pû rien

apprendre de vous), en croyant absolument leurs « conseils, et ne suivez ceux de cette homme là, « vous ruynerez les affaires de l'Estat, et peut « estre le royaume, mes enfans et vous mesme. « Or, l'avois-je mandé tout expres, afin d'adviser « avec vous et luy, aux moyens pour empescher « tels accidens; mais graces à ce bon Dieu, je « voy qu'il ne sera point encore besoin de telles « precautions, me sentant quasi du tout soulagé, « tellement que j'auray du temps pour y penser « et vous bien instruire de mes affaires et de mes « intentions. » Et dés le lendemain l'on dépescha courriers de toutes parts pour asseurer de la santé du Roy, car il en avoit couru de mauvais bruits. Il voulut, avant que de vous en retourner, que vous le vissiez pisser par deux fois; ce qu'il fit avec telle facilité que tout danger en estoit dehors.

Trois jours apres que vous fustes de retour à Paris, M. de Ville-roy vous escrivit la lettre que s'ensuit.

*Lettre de M. de Ville-roy à M. de Rosny.*

Monsieur, je renvoye ce porteur à M. de Beaumont qu'il nons avoit cy-devant dépesché; le Roy a trouvé bon l'advertir, par luy, de sa convalescence, car il ne doute point que l'on n'ayt escrit diversement de sa maladie. Il est à propos aussi qu'il sçache les causes de vostre retardement, fondées sur celui du baron du Tour et sur la faute qu'il a faite, de n'avoir annoncé à Sa Majesté la mort de la Reine, et l'assomption et recognoissance du roy d'Angleterre, et pareillement sur l'indisposition survenuë à Sa Majesté; advisez, s'il vous plaist, à escrire quelque chose par luy. Ledit Roy arriva à Londres le 17 de ce mois, M. du Tour devoit prendre congé de luy le lendemain, tellement que je croy que nous le verrons bien-tost. En verité Sa Majesté se porte à présent tres-bien, graces à Dieu, comme vous dira M. Zamet, qui part cette nuit pour aller par delà. Je prie Dieu, etc.

De Fontaine-bleau, le 24 may 1603.

DE NEUF-VILLE.

*Lettre de la main du Roy à M. de Rosny.*

Mon cousin, je vous remercie des deux portraits que vous m'avez envoyez, du roy et de la reine d'Angleterre, comme aussi de vos conseils pour ma santé, lesquels je suivray désormais. Je vous diray que hier matin, M. de La Riviere me fit seigner du bras gauche, et si à propos, que maintenant je me porte mieux, Dieu mercy, ayant assez bien reposé toute la nuit et sans fièvre; de façon que je pense qu'il ne faut plus faire autre chose que de me renforcer;

car, pour le reste, tout va de mieux en mieux, Dieu mercy. Bon jour mon cousin.

Ce samedy matin, 24 may 1603. HENRY.

*Lettre de la main du Roy à M. de Rosny.*

Mon cousin, je vous dépesche ce courrier expres, et vous faits ce mot pour vous dire que j'ay fort entretenu le baron du Tour, d'où il vient pour mon service où il faut que vous vous acheminiez. C'est pourquoy je vous prie d'estre icy demain au soir, afin que nous puissions resoudre vostre dépesche, et le jour de vostre parlement. Pour les nouvelles de ma santé, je vous diray qu'elle va en augmentant et que je me porte tres-bien, Dieu mercy, lequel je prie vous avoir en sa sainte et digne garde.

Ce mardy à dix heures du soir, 27 may, à Fontaine-bleau. HENRY.

En suite de la lettre cy-dessus, Sa Majesté vous en escrivit une autre pour donner à la seigneurie de Venise une paire de ses armes, avec lesquelles il avoit combattu, d'autant qu'elle luy en avoit fait requerir, afin, comme ils luy mandoient, de les eslever en lieu éminent et honorable, pour commemoration de ses vertus admirables à la posterité : à quoy vous ne manquastes pas.

Sa Majesté se sentant absolument guerrie et trouvant le chaud trop grand parmy ces sablons de Fontaine-bleau, s'en revint à Paris. Et, deux jours apres, il assembla messieurs de Bellievre chancelier, vous, de Ville-roy, de Maisses et de Sillery, avec lesquels il resolut le jour de vostre parlement pour le voyage d'Angleterre; et comme il voulut faire travailler à vos dépesches et dresser vos instructions visibles, vous luy dites : « Sire, j'ay veu, en venant en vostre cabinet, M. le comte de Soissons dans vostre chambre, et combien qu'il ne m'ayme pas plus que de raison, si ne laisse-je pas de desirer qu'il soit present lors que vostre Majesté me declarera ses intentions sur ma charge d'ambassadeur, et mesme cela sera, ce me semble, bien seant, vous estant si proche. » A quoy le Roy vous respondit : « A la verité, vous m'avez fait plaisir, car je ne sçavois pas qu'il fust là; mais laissez moy mesnager cette ouverture; car cognoissant son esprit, je m'en serviray pour former une reconciliation entre vous deux; » comme il fit.

Deux jours apres, M. le comte de Soissons vous rencontrant, comme vous entriez au logis du Roy, il vous dit qu'il avoit sceu de bon lieu, que vous luy aviez rendu un office honorable qu'il n'attendoit nullement de vous, duquel il ne vouloit point estre mescognoissant, mais vous

en remercier, oublier tout ce qui s'estoit passé de mal entendu entre vous, et devenir de vos bons amis. En laquelle disposition il ne demeura pas, neantmoins, bien long-temps, ne luy estant pas possible d'estre mal content du Roy, qu'il ne vous tesmoignast quelque mauvaise volonté.

L'instruction generale qui vous fut donnée pour l'Angleterre, estoit signée du Roy, et contre-signée de M. de Ville-roy, telle que s'ensuit.

## CHAPITRE CXV.

*Instructions officielles données à Rosny pour son ambassade en Angleterre. Instructions secrètes. Lettres du roi et de la reine de France au roi et à la reine d'Angleterre.*

« Ledit marquis commencera sa premiere audience, en laquelle il se presentera vestu en deuil, par se condouloir avec ledit Roy, au nom de Sa Majesté, de la mort de la feuë reine d'Angleterre, et usera pour ce faire des termes qu'il cognoistra, estant sur les lieux, estre plus propres et convenables, tant pour accomplir cet office dignement, comme le merite l'heureuse memoire de ladite Dame, et les plaisirs que Sa Majesté a receus de son amitié, que pour le rendre plus agreable audit Roy, et tesmoigner à un chacun la gratitude de Sa Majesté envers la defuncte.

« Apres il se conjoüira, avec ledit Roy, de son heureuse inauguration et assumption audit royaume, qui a esté favorisée de Dieu, vray protecteur de l'equité, et des communs vœux et universels des trois ordres et Estats dudit royaume, lesquels il asseurera ledit Roy avoir esté aussi accompagnez de celuy de Sa Majesté, avec l'affection protestée et promise audit Roy, et tesmoignée en tous lieux et par toutes ses actions, devant l'ouverture de la succession dudit royaume, ainsi que le pourra représenter plus particulierement ledit marquis, pour avoir tres-bien sceu l'interieure intention de Sa Majesté pour ce regard, et les divers offices qu'elle a faits en plusieurs occasions et endroits, en faveur du roy d'Angleterre, ayant toujours aymé sa personne, mesme par inclination naturelle, loué ses mœurs, et fait entier estat de son amitié.

« Ledit sieur marquis fera les mesmes offices envers le Roy, au nom de la Reine.

« Iceux accomplis, il dira audit Roy que Sa Majesté a esté tres-aise d'entendre, tant par ledit sieur Parey qu'il a confirmé son ambassadeur, que par sa lettre escrite le 16 dudit mois d'avril, qui ne luy a esté présentée que le 28 du-

dit mois de may ensuivant, qu'il ayt volonté de continuer et entretenir l'amitié et les traittez que la feuë reine d'Angleterre avoit avec Sa Majesté, comme ceux qui ont esté contractez entre leurs Majestez à cause du royaume d'Escosse; luy declarera que sadite Majesté a la mesme volonté et de procurer en sorte l'observation desdits traittez, que leurs Majestez et leurs communs sujets en tirent toutes sortes de commoditez, libertez et avantages, en remediand et pourvoyant diligemment et soigneusement à tout ce qui pourroit interrompre ou empescher, par mer ou par terre, directement ou indirectement, l'effet desdits traittez; se promettant que ledit roy d'Angleterre fera le semblable de son costé, dequoy il sera prié par ledit marquis au nom de Sa Majesté.

« Ensuite du propos de l'entretienement et observation des traittez, ledit sieur marquis, non à sa premiere audience, mais quand il rencontrera l'opportunité, parlera audit Roy des pirateries des Anglois sur les sujets de Sa Majesté, lesquelles il luy dira avoir esté si frequentes depuis le regne du Roy, et principalement depuis la paix de Vervins, tant en la mer Oceane qu'en celle du Levant, sous pretexte de la guerre que lesdits Anglois avoient avec lesdits Espagnols, qu'il a esté verifié que les prises faites par eux sur lesdits sujets de Sa Majesté, dont il n'a esté fait aucune reparation et justice, excedent la valeur d'un million d'or, ce qui a destruit entierement le commerce au dommage inestimable des sujets de sadite Majesté et au prejudice desdits traittez, de l'observation desquels Sa Majesté a esté neantmoins si religieuse et jalouse pour le respect qu'elle portoit à l'amitié de ladite Reine, qu'elle a mieux aimé dissimuler et endurer lesdites pertes que d'y appliquer d'autres remedes; s'estant contentée d'en reiterer souvent les plaintes à ladite Dame, laquelle a tousjours déclaré et commandé y estre pourveu. Mais comme l'effet ne s'en est ensuivy de son vivant, ledit sieur marquis dira audit roy d'Angleterre que Sa Majesté se promet qu'il y fera donner tel ordre, que tels desordres seront reparez pour le passé, et refrenez pour l'advenir, comme il convient à leur bonne amitié et au commun bien de leurs subjets: estant certain que lesdites pirateries incommodent et ruynent plus le public, et apportent plus de blâme à ceux qui les permettent et autorisent, qu'elles n'accroissent les particuliers qui y contribuent, et ne servent aux affaires des princes qui les tolerent.

« Pareillement il faut se resouvenir du desavantage et prejudice qu'ont les sujets de Sa Ma-

jesté en leur commerce avec les Anglois par lesdits traittez, et nommément par celui qui fut fait par le feu roy Charles IX, l'an 1572, par lequel il fut accordé ausdits Anglois des libertez en France, qui sont interdites en Angleterre aux François; ce qui a souvent excité de telles plaintes et murmures entre les marchands de part et d'autre, qu'il a esté tout besoin que Sa Majesté ayt interposé son autorité pour conserver et entretenir la bonne correspondance qui y doit estre.

« Et faut considerer que tel traité fait par le feu roy Charles n'eut lieu, tant qu'il vescu, à cause des troubles de la Saint Barthelemy, dont la suite dura autant que le reste de son regne, et qu'il n'a esté mieux observé durant celui du feu roy Henry dernier, à cause de la mauvaise intelligence qui estoit entre luy et ladite reine d'Angleterre, laquelle divertissoit et empeschoit ordinairement l'entre-cours du commerce d'entre leurs sujets.

« Tellement que nous pouvons dire que ledit commerce n'a esté libre entr'eux que depuis l'advenement de Sa Majesté à la couronne; mais il est certain que telle inégalité et difference de traitement retient et empesche les sujets de Sa Majesté de trafiquer en Angleterre, comme ils feroient si l'on y avoit pourveu; et que cela engendre, entre les marchands, de grandes plaintes et clameurs qu'il convient à la bonne amitié qui est entre leurs Majestez, faire cesser au plutost pour le commun bien de leurs sujets et royaumes, et affermir davantage leurdite amitié et bonne voisinance.

« Toutesfois ledit marquis s'abstiendra de parler de ce fait audit roy d'Angleterre, ny à ses conseillers et ministres, si estant sur les lieux il recognoist n'estre à propos de le faire, afin de ne donner sujet aux envieux de leur union et bonne amitié, de donner des doutes audit roy d'Angleterre de la volonté et sincerité de Sa Majesté à l'observation desdits traittez au commencement de son regne, et sur l'incertitude et irresolution presente des affaires publiques.

« Car il importe tant à l'un et à l'autre roy de se maintenir ensemble en union, bonne amitié et intelligence, pour les raisons que ledit sieur de Rosny sçaura tres-bien représenter, qu'il faut estre à present aussi soigneux d'en mesnager et conserver la reputation que l'effet, jusques à ce que nous voyons quel train et cours prendront les affaires; et principalement quelle resolution prendra ledit Roy sur les propositions qui luy seront faites, tant de la part du roy d'Espagne et des archiducs de Flandres, que de celle des Estats des provinces unies des Pays-Bas.

« Et comme les députez de ceux-cy sont arrivez vers luy les premiers, et qu'ils auront ja esté ouïs de luy, ledit sieur de Rosny arrivant par delà, il s'informera diligemment et au vray de l'estat de leur negociation, soit qu'il les trouve encor là ou qu'ils en soient partis, afin d'adviser et reigler, selon cela, ce qu'il aura à dire au roy d'Angleterre concernant leurs affaires.

« Car si ledit Roy les avoit ouïs et expediez favorablement, comme Sa Majesté a deu en concevoir quelque esperance par les langages que le baron du Tour a escrit à Sa Majesté luy avoir esté tenus par ledit Roy, lors qu'il luy a remonstré combien il luy estoit important de proteger lesdits Estats et conserver la ville d'Ostende, soit qu'il voulust continuer la guerre avec le roy d'Espagne et les archiducs, ou faire la paix avec eux, en ce cas ledit sieur marquis pourroit d'abordée traiter avec ledit roy d'Angleterre plus librement et ouvertement desdites affaires, qu'il ne doit faire s'il trouve les choses encor indecises, de peur d'ombrager ledit Roy et le jetter en la jalousie en laquelle vivoit ladite Reine quand elle est decedée, que Sa Majesté estoit bien-aise de nourrir la guerre entre le roy d'Espagne et elle pour en profiter; impression qu'il faut d'autant plus s'estudier de destourner de l'esprit dudit Roy, que nous sçavons que les conseillers d'Angleterre sont disposez de la luy donner telle qu'à ladite Reine.

« Mais advenant que ledit sieur de Rosny trouve encor par delà les deputez des Estats sans resolution, comme il y a apparence qu'il fera, Sa Majesté se remet à luy de prendre conseil sur le lieu, selon la disposition en laquelle il apprendra que sera ledit Roy, et les termes où il en sera avec lesdits deputez, de la façon de laquelle il aura à se conduire, pour enfourner la negociation desdites affaires avec ledit Roy.

« Car s'il a volonté de leur bien faire, il faut qu'il l'y conforte et eschauffe doucement, en luy representant les grandes utilitez et seuretez qu'il tirera pour ses royaumes, en conservant et protegeant lesdits Estats, les choses estant conduites et gouvernées par leurs deux Majestez avec bonne intelligence; en quoy il assurera ledit Roy qu'il trouvera tousjours Sa Majesté bien disposée d'observer fidelement ce qui sera jugé raisonnable et convenu entre leurs Majestez pour ce regard.

« Si au contraire il recognoist que ledit Roy n'ait intention d'assister lesdits Estats, il procedera plus retenu en son endroit, et ne luy decouvrira aussi celle de Sa Majesté sans grande consideration.

« Mais il fera tout ce qu'il pourra pour le faire

ouvrir le premier, en discourant avec luy de l'estat general auquel se trouve à present la chrestienté, laquelle estant aujourd'huy regie et commandée par trois roys, tous princes grands et puissans, desquels il faut que les autres prennent la loy et suivent les volontez, il est tres-necessaire qu'ils se conduisent, les uns avec les autres, avec grande prevoyance et prudence pour faire que chacun se contienne dans les bornes et limites de sa domination, sans s'accroistre au prejudice d'autrui.

« Chose que ledit marquis de Rosny fera entendre audit roy d'Angleterre, Sa Majesté estre deliberée d'observer de son costé, tant qu'il luy sera possible, comme celuy qui a grande occasion de remercier Dieu et se contenter des graces qu'il luy a faites, ayant reconquis et remis son royaume en l'estat florissant auquel il se trouve.

« Protestant que si Sa Majesté avoit autant d'occasions de s'asseurer de la foy, amitié et bonne voisinance des autres, comme aucuns d'iceux ont continué depuis la paix de Vervins à les luy donner de s'en délier et d'apprehender plus que devant leurs convoitises, inquietude et puissance, elle n'auroit à present autre pensement que de vivre en paix avec tout le monde, et jouir du doux fruit d'une assurée tranquillité, qu'elle gousteroit apres tant de sortes de travaux et perils qu'elle a supportez et courus plus que nul autre.

« Mais quand elle se represente quelle est la grandeur et puissance de la maison d'Austriche, tant par terre que par mer, laquelle luy sera déclarée par toutes ses parties, les efforts qu'elle a faits depuis l'empereur Charles V jusques à present pour estendre et amplifier son empire et domination; combien elle s'est accruë et advantagee par iceux; que Sa Majesté se remet en memoire à combien peu il a tenu depuis trente ans qu'elle n'est parvenuë au periode de la monarchie de la chrestienté, auquel elle a montré aspirer; qu'elle examine les moyens qui luy restent encore et ceux qu'elle employe journellement pour regagner les avantages qu'elle a perdus depuis quelques années par la toute-puissance de Dieu, qui s'est servi du courage de Sa Majesté et de la prudence de la feuë reine d'Angleterre, comme de la fermeté et constance des Estats desdites provinces unies des Pays-Bas pour s'y opposer, Sa Majesté ne peut qu'elle n'apprehende encore pour elle et pour ses voisins la poursuite d'un tel dessein, voyant que les Espagnols conservent encor et usent tousjours du mesme precepte de la religion, avec lequel ils ont penetré jusques aux foyers de leurs voisins, les Estats desquels ils ont par ce moyen remplis de

rebellion contre leurs princes naturels, de discorde et confusion, fortifiez de l'or et de l'argent que les Indes leur fournissent.

« Ledit sieur de Rosny pourra desduire sur ce propos audit Roy, ce que lesdits Espagnols ont attenté en ce royaume contre le Roy et son royaume depuis les deux derniers traittez faits à Vervins et à Lyon; en quel danger Sa Majesté a cuidé tomber, se confiant en la foy et amitié d'iceux; luy disant encore que Sa Majesté ait renversé une grande partie de leurs pratiques par la punition qu'elle a fait faire du mareschal de Biron, et la clemence de laquelle elle a usé envers ceux de ses complices qui s'en sont rendus dignes par leur submission et la recognoissance de leurs fautes, neantmoins estre bien advertie qu'ils continuent encor à user de toutes sortes d'artifices et inventions pour en desbaucher et practiquer d'autres et remuer mesnage en son Estat.

« Dequoy l'Angleterre a esté jusques à present aussi peu exempte que la France, comme ledit roy d'Angleterre ne tardera gueres à le recognoistre et esprouver, s'il n'y remede par sa vigilance et prudence.

« Sur ce, ledit sieur marquis pourra dire audit roy d'Angleterre que Sa Majesté ne s'est cy-devant entremise du differend des prestres anglois seculiers contre les Jesuites et leurs adherans, partisans d'Espagne, que pour affoiblir la faction et le pouvoir d'iceux envers les catholiques dudit pays, de la vie et simplicité desquels ils n'ont fait conscience d'abuser souvent pour s'autoriser audit royaume d'Angleterre, esperans s'en prevaloir, au moins quand ladite Reine decederoit, n'ayant peu abreger ses jours et renverser son Estat durant le temps qu'elle a regné; ce que sadite Majesté fit dire à ladite dame par son ambassadeur, et fit aussi entendre audit roy d'Angleterre, par celuy qui residoit aupres de luy, estant encore en Escosse.

« Si le conseil d'Espagne dresse telles parties contre la France et l'Angleterre, il n'en fait pas moins par tout ailleurs où il peut s'avantager et estendre sa puissance, ledit Roy s'estant emparé, depuis deux ans, aux yeux de toute la chrestienté, au mespris de l'Empire, et à la honte de toute l'Italie, du marquisat de Final et des biens des sieurs de Piombine, fiefs de l'Empire, ausquels il n'a autre droict que celuy de la bien-seance, qu'il possède à present aussi audacieusement qu'injustement, ayant rejeté honteusement les commissaires que l'Empereur avoit sur les lieux pour conserver, sinon en effet au moins en apparence, les droicts de l'Empire.

« A quoy il faut adjouster l'entreprise faite par

le duc de Savoye, assisté des forces desdits Espagnols, contre la foy publique et lesdicts traitez sur la ville de Geneve, et pareillement la coadjutorerie de l'evesché de Strasbourg, qu'ils ont contrainct M. le cardinal de Lorraine de consentir estre donnée par le Pape au beau frere dudit roy d'Espagne, expres pour se rendre maistre de ladite ville de Strasbourg, ville libre et protestante assise sur le Rhin, tres-importante à la Germanie et à la France.

« Telles procedures secretes et ouvertes doivent donner grande jalousie et pensement aux autres princes chrestiens, et particulierement à ces deux roys, voir en'or plus audit roy d'Angleterre qu'à Sa Majesté, à cause de la diversité de la religion dont il fait profession, laquelle sera cause que le Pape l'animerà tant qu'il pourra contre luy, et qu'il l'assistera de l'autorité qu'il pretend que le siege de Rome a audit pays, et pour les droits que le feu roy d'Espagne, et apres luy ses enfans, pretendent avoir à la couronne d'Angleterre, ainsi qu'ils ont publié par plusieurs escrits qu'ils ont fait imprimer, joint que ledit roy d'Espagne est puissant par mer et par terre, pour envoyer et faire passer des armées audit royaume quand bon luy semblera.

« A quoy il semble qu'il se prepare encore tous les jours, faisant à present construire de nouveau plusieurs grands navires et gallions sur la mer Oceane, et assemblant cette année en Portugal une armée qui doit estre composée de plus de quarante grands navires, sur lesquels il fait estat d'embarquer dix ou douze mille hommes, se disant parmy les siens, en Espagne et en Italie, qu'il fera ce qu'il pourra pour gagner l'amitié dudit roy d'Angleterre, afin de le separer desdits Estats, et s'il est possible de celle de Sa Majesté, pour pouvoir mieux subjuguier lesdits Estats par rigueur, ou les reconcilier par douceur, à quoy il ne doit rien espargner cette année.

« Mais, s'il voit ne pouvoir ranger ledit roy d'Angleterre à ce qu'il desire, son dessein est de s'ayder et servir de ses pratiques et intelligences esdits royaumes d'Angleterre, Escosse et Irlande, pour les troubler et faire ouverture à ses armes.

« Chose que ledit marquis de Rosny dira audit roy d'Angleterre avoir charge de Sa Majesté de luy représenter, pour s'acquitter envers luy de l'amitié qu'il luy a vouée, et considerer et peser ensemble l'interest commun qu'ils ont d'empescher l'accroissement de ladite maison d'Espagne, et sur cela adviser et resoudre ce qu'ils doivent faire, tant pour leur commune utilité, que pour l'animer et porter à la guerre contre ladite maison, ny le persuader ou engager en chose qui soit prejudiciable à ses affaires et pays.

« Il sera difficile que ledit roy d'Angleterre s'abstienne d'entrer en matiere avec ledit sieur de Rosny, luy discourant des choses susdites, et que sur cela il ne luy fasse quelque ouverture, ou ne le presse d'en entrer plus avant avec luy. Mais il est vray semblable, s'il se contient apres cela dans les termes generaux desquels usent les princes quand ils ne veulent faire ce qu'on leur propose, qu'il n'aura envie de s'engager et unir plus avant avec Sa Majesté. Quoy cognoissant ledit sieur de Rosny, il se contentera aussi de luy faire entendre qu'il sera peut-estre plus facile et utile à Sa Majesté que nul autre de conserver et asseurer la paix avec ledit roy d'Espagne par les moyens qu'il luy deduera, et en ce faisant, attendre, avec moins de hazard et peril, les effects de ses armes et de toutes ses pratiques ausdits Pays-Bas et ailleurs.

« Mais si ledit Roy s'esmeut desdits advis et declare estre content de se joindre à bon escient à Sa Majesté, pour obvier ensemblement aux inconveniens qui resultent d'iceux, il luy sera remonstré par ledit sieur de Rosny qu'il y a deux moyens de ce faire.

« L'un, par la paix, en disposant ensemble lesdits Estats des provinces unies des Pays-Bas à la recognoissance et obeysance dudit roy d'Espagne, à conditions les plus avantageuses pour eux que faire se pourra, et qu'ils se rendent protecteurs et cautions de l'observation d'icelle.

« Et l'autre, par la guerre decouverte ou ouverte, sçavoir est de faire dès à present une ligue défensive et offensive en laquelle lesdites Provinces Unies soient comprises contre le roy d'Espagne et lesdits archiducs, avec promesse et obligation de ne s'en departir jusques à ce que leurs Majestez ayent delivré entierement les dix-sept provinces desdits Pays-Bas, de la domination et puissance de la maison d'Austriche, pour estre apres maintenues, possedées et regies par l'ordre et forme que leursdites Majestez resoudroient et conviendroient ensemble.

« La couverte se peut faire, lesdits Roys s'acordans le plus secrettement que faire se pourra d'ayder lesdites Provinces Unies d'hommes et d'argent suffisamment pour leur donner moyen de se defendre et conserver contre lesdits Espagnols, sans prendre les armes ouvertement pour eux contre ledit Roy d'Espagne, jusques au temps qu'il sera convenu entre leursdites Majestez; neantmoins avec promesse et obligation qui seroit faite, dès à present, entre leursdites Majestez, en cas que ledit roy d'Espagne entreprist de faire la guerre à l'un des deux roys ou aux deux ensemble, de s'entre-ayder et secourir



de certain nombre d'hommes de cheval et de pied, navires et argent qui seroit arresté et convenu entre leurs Majestez.

« Si ledit Roy d'Angleterre propose ou choisit le party de ladite paix, ledit sieur de Rosny luy dira que Sa Majesté s'y conformera volontiers comme à celui qui semble estre le plus juste, et par le moyen duquel leurs Majestez pourroient mieux se descharger de dépense et de soucy.

« Mais il luy remonstrera qu'il faut considerer s'il sera facile, premierement : de disposer et reneger lesdites Provinces Unies à se remettre sous la puissance desdits Espagnols à cause des offenses passées, et si, apres leur reduction, il sera facile d'asseurer que les conditions qui leur seront accordées, seront observées à l'advenir.

« Car, encor que leurs Majestez jointes ensemble, soient puissantes et suffisantes pour cautionner et asseurer l'observation desdites conventions; neantmoins il sera difficile de faire croire ausdits Estats qu'elles demeurent tousjours unies en ce propos et dessein, et que leurs affaires leur permettent de prendre les armes et employer leur pouvoir toutes les fois qu'ils pourroient en avoir besoin, et que l'on violeroit lesdites conventions.

« Il faut considerer aussi, si ceux desdites Provinces Unies s'apperçoivent que lesdits Roys vueillent les porter à la paix, ils desireront l'entremise d'iceux, et s'ils n'aymeront pas mieux traiter eux memes avec lesdits Espagnols sans eux, soit par despit de se voir abandonnez d'eux et forcez de composer, desespererez de leur protection, ou pour, en complaisant à ceux au pouvoir desquels ils se remettront, les obliger à leur en sçavoir gré, et les mieux et plus favorablement traiter à l'advenir.

« Estant vray semblable qu'ils obtiendront tousjours de leurs princes, des conditions plus avantageuses quand ils traiteront d'eux-memes et sans l'intervention et caution desdits Roys; car il sera encore plus honorable et utile ausdits princes, de ce faire, que s'ils traittoient par le moyen desdits Roys à moindres conditions.

« S'ils prennent ce dernier party, lesdits Roys doivent considerer que lesdites provinces se porteront du tout aux volontez et commandemens desdits princes, sous la sujection desquels ils se seront remis et peut-estre avec plus d'animosité et de desir de se ressentir d'avoir esté delaissez par lesdits Roys, que autrement : auquel cas il faut recognoistre et avouer que la nation espagnole, qui seule profitera de la reduction desdites provinces, accroistra tellement sa puissance, qu'elle sera formidable à toute l'Europe. Car, outre qu'elle sera deschargée des frais de la guerre

des Pays-Bas en laquelle elle a cy-devant consommé et employe encor journellement des thresors inestimables et des hommes en grand nombre, elle disposera des moyens, navires et commoditez que possèdent à present lesdites provinces, et, qui plus est, jouyra sans empeschement et plus paisiblement que jamais, des richesses des Indes.

« Au moyen de quoy, si ledit roy d'Angleterre propose ce premier moyen, ledit sieur marquis luy representera les susdites raisons et considerations qu'il sçaura mieux estendre et faire valoir, qu'elles ne sont exprimées par ce memoire; mais s'il s'apperçoit qu'il ne vueille s'en departir, il ne s'opiniastiera davantage à le persuader de ce faire, car ce seroit imprudence de passer plus avant sans espoir d'y profiter.

« Seulement il essayera de luy faire trouver bon (attendant que l'on puisse disposer et faire resoudre lesdites Provinces Unies à ladite paix suivant ladite proposition) de leur donner quelque secours et assistance, afin qu'elles conservent cependant la ville d'Ostende et la reputation de leurs affaires, et que lesdits Espagnols estiment davantage leur reconciliation, soit pour en sçavoir plus de gré ausdits Roys qui la procureront, que pour faire qu'ils accordent ausdites provinces des conditions plus avantageuses; remontrant audit Roy les inconveniens qui arriveront, si dès à present l'on les abandonne entierement.

« Si de l'ouverture de ladite paix, vaincu desdites difficultez et raisons, il entre en celle de la guerre, et sortant d'une extremité il tombe en l'autre, qui seroit de declarer dès à present la guerre audit Roy d'Espagne, suivant l'article susdit qui en fait mention, ledit marquis de Rosny luy dira que Sa Majesté desire tant joindre et unir sa fortune avec la sienne, que s'il juge, apres y avoir bien pensé, ne pouvoir ny vouloir autrement secourir lesdits Estats et les maintenir, qu'elle s'y disposera volontiers, plus tost que de les laisser entierement perdre et desesperer de leur assistance et protection.

« Mais ledit marquis se contentera, pour le present, de luy en donner l'esperance, sans engager Sa Majesté plus avant à la conclusion d'un tel traité, qu'il n'ait autre commandement : seulement il mettra peine de tirer de luy doucement son intention et advis sur les conditions d'un tel traité, pour sçavoir quelles forces de terre et de mer il entendroit y employer de sa part, ce qu'il desireroit aussi que Sa Majesté y contribuast, par qui il entendoit qu'elles fussent commandées, par où l'on commenceroit à les mettre en besongne, quel fruit et recompense

chacun d'eux recueilleroit d'un tel dessein, ce qu'il luy semble qu'il faudroit que lesdites Provinces Unies y apportassent de leur part, et autres choses semblables, servans à faciliter la susdite resolution et l'exécution d'icelle.

« Et comme un tel traité ne peut estre conclu en si peu de temps que doit demeurer par delà le marquis de Rosny, il differera et exécutera sur cela ladite resolution, se contentant de faire tout ce qu'il luy sera possible pour empêcher que ledit Roy n'entre en ombrage de telle remise et dilation, de peur qu'il ne prenne prétexte sur cela de se refroidir de l'alliance de Sa Majesté, et recourir à celle d'Espagne.

« Adjoustant, pour luy donner bonne opinion de la volonté et disposition de Sa Majesté, qu'elle contribuera volontiers, dès à present, au secours qu'il est besoin de donner ausdits Estats pour se maintenir en l'estat qu'ils sont ; ce qu'il sera advisé entre les deux Roys, en attendant que ledit traité puisse estre conclu : mettant peine à toutes occasions de luy faire gouter et comprendre combien il importe de pourvoir, dès à present, audit secours, sans dilation et intermission, soit qu'il vueille porter lesdits Estats à la paix ou à la guerre, afin que leurs affaires n'empirent durant la negociation desdits traittez.

« Mais si ledit roy d'Angleterre, apres avoir considéré les difficultez et perils qui se rencontrent en la premiere ouverture, et n'est conseillé par les siens de s'engager, si tost apres son entrée au royaume d'Angleterre, en une guerre offensive contre le roy d'Espagne et les archiducs de Flandres, et sur cela proposé de faire la guerre couverte, en secourant d'une commune main lesdits Estats, ainsi qu'il est porté par l'article du present memoire qui en fait mention, ledit marquis de Rosny confortera tant qu'il pourra le Roy en cette deliberation.

« Luy disant que Sa Majesté juge estre la meilleure qu'ils puissent prendre ensemble en l'estat que les affaires de leurs royaumes se trouvent à present : car, comme il est necessaire que ledit roy d'Angleterre ait loisir d'establiir et asseurer la succession qu'il a recueillie ; aussi faut-il que Sa Majesté ait quelque temps pour disposer et preparer ses affaires, pour pouvoir apres mieux effectuer et accomplir ce qui sera arresté entre leurs Majestez, soit pour secourir lesdits Estats secrettement, tant et si long-temps qu'il sera advisé entre leurs Majestez, qu'elles devront ou qu'il leur sera permis de ce faire, ou pour entrer ouvertement en une guerre offensive contre ledit roy d'Espagne quand il le faudra faire, afin de n'y mettre la main à demy et foiblement.

• C'est pourquoy Sa Majesté estime si lesdits

Roys conviennent d'assister secrettement lesdits Estats, comme il sera impossible qu'ils puissent longuement en ce faisant conserver la paix avec ledit roy d'Espagne, ils doivent aussi, dès à present, s'accorder de faire ladite guerre offensive aussi bien que deffensive, et traiter et convenir secrettement et au plutost, des conditions et moyens de ce faire, afin de pouvoir l'entreprendre et commencer quand ils cognoistront le devoir faire, sans attendre qu'ils soient assaillis separement ou ensemble par ledit Roy d'Espagne, pour l'avantage qu'a en toutes choses celui qui attaque le premier son ennemy.

« Dequoy, si ledit roy d'Angleterre se rend capable, ledit marquis de Rosny tirera de luy son intention sur la guerre offensive, pour sçavoir quand il pourra et voudra la commencer, quelles forces et moyens, par mer et par terre, il y employera, et autres choses dont il est fait mention en l'article de la guerre offensive.

« En laquelle, si leursdites Majestez s'accordent d'entrer, comme l'opinion et la volonté de Sa Majesté n'est de le faire à demy, aussi son desir est de s'unir avec ledit roy d'Angleterre, si estroittement et avec des liens si forts et puissans, que leur amitié et conjunction dure pour leurs personnes et celles de leurs enfans à perpetuité.

« A cette fin, Sa Majesté est contente d'entendre, dès à present, aux mariages de monseigneur le Dauphin et de madame sa fille avec le fils et la fille aînée dudit roy d'Angleterre, si, de son costé, il s'y veut resoudre ; à la charge toutesfois de ne les publier et manifester qu'au temps que leurs Majestez commenceront la guerre contre ledit roy d'Espagne.

« Dequoy Sa Majesté a donné charge audit marquis de Rosny de se laisser entendre audit roy d'Angleterre, s'il cognoist, estant sur les lieux, qu'il prise et embrasse ladite ouverture quand elle luy sera faite, et qu'icelle puisse servir ou soit necessaire pour le faire resoudre de preferer l'alliance et amitié de Sa Majesté à celle d'Espagne, et entrer en la susdite union.

« Et neantmoins ledit marquis de Rosny menagera le commandement que Sa Majesté luy fait pour ce regard, avec sa prudence ordinaire, afin de conserver la dignité de Sa Majesté, et que la franchise et bonne intention soient receuës comme elles meritent, sans que l'on en puisse abuser.

« Si ledit Roy embrasse la proposition de ladite alliance, et de secourir secrettement lesdits Estats, en attendant que l'on passe à une guerre offensive, ledit marquis sçaura de luy ce qu'il voudra y contribuer. Et si sur cela ledit Roy de-

clare n'avoir moyen de le faire, s'il n'est payé des deniers que la feuë reine d'Angleterre a prestez à Sa Majesté, elle trouve bon que ledit sieur de Rosny luy die (toutefois quand il cognoistra estre à propos et non plutost) qu'il pourra disposer Sa Majesté de faire payer par an, en l'acquit desdites debtes ausdits Estats, la somme de quatre cens cinquante mille livres, pourveu que ledit Roy vueille adjouster à cela de ses deniers trois cens mille livres, et obtenir que Sa Majesté fournira encor ausdits Estats pareille somme de sept cens cinquante mille livres par an de ses deniers, qui feront en tout quinze cens mille livres, avec lesquels et ce que lesdits Estats y employeront du leur, il semble qu'ils pourront facilement subsister; lesdits Roys leur permettant de tirer de leurs royaumes des gens, et mesmes estans fortifiez et assistez de navires du Roy d'Angleterre.

• Mais il luy remonstrera qu'il seroit expedient, outre cela, qu'il s'abstinst de demander ausdits Estats, et de comprendre en ce secours les trois cens mille livres qu'ils avoient promis à la feuë Reine, luy payer tous les ans en deduction de ce qu'ils luy doivent, afin de les rendre plus forts.

• Car, jusques à ce que la guerre soit declarée par lesdits deux roys contre celuy d'Espagne, toute la puissance dudit Roy tombera sur leurs bras, à laquelle, comme ils auront peine de resister, il est à craindre aussi que leurs peuples se lassans et ennuyant de porter le fardeau de la guerre, rompent leur union, et traittent precipitamment et separément avec lesdits Espagnols.

• Toutesfois ledit marquis de Rosny ne se formalisera en cela, qu'autant qu'il apprendra des députez desdits Estats, qu'il sera à propos qu'il le fasse; sadite Majesté estimant que l'on ne doit differer de conclurre le dernier party du secours convenu pour ladite derniere somme de trois cens mille livres, de laquelle l'on desire qu'il descharge lesdits Estats, s'il refuse de l'accorder.

• Mais il faut luy proposer de faire que les sujets d'Angleterre contribuent au secours desdits Estats pareille somme, comme Sa Majesté a entendu qu'ils ont fait souvent du temps de ladite reine defuncte, ainsi que ledit marquis pourra apprendre du sieur Caron, qui a tousjours servy lesdits Estats en Angleterre, et d'autres qui ont eu cognoissance des choses passées.

• En tout cas, ledit sieur marquis mettra peine de conclurre le susdit party de secourir secrettement lesdits Estats d'une commune main aux conditions les plus avantageuses pour eux, de la part dudit roy d'Angleterre, que faire se pourra, et pareillement d'apprendre et rapporter sa volonté sur la conclusion de ladite ligue of-

fensive et défensive, fortifiée desdites alliances; car Sa Majesté estime que c'est celuy qui peut estre le plus utile à leursdites Majestez.

• Car il ne faut point esperer de disposer ledit roy d'Angleterre de continuer ausdits Estats la mesme faveur et assistance que ladite Reine a faite jusques à son deceds, et de faire voir ses navires aux costes d'Espagne et de Portugal, et sur la volte des Indes, pour incommoder ledit roy d'Espagne, divertir sa puissance, et suivre les erres qui ont esté tenuës par ladite Dame contre ledit Roy d'Espagne, tant qu'elle a vescu; parce que Sa Majesté n'a pas opinion que ce soit chose que ledit roy vueille faire.

• Toutesfois s'il recognoist, estant sur les lieux, qu'il y ait quelque apparence d'esperer de pouvoir persuader ledit Roy à suivre ce party, Sa Majesté entend qu'il commence sa legation par le presser et poursuivre de s'y resoudre, et de ne rien obmettre pour l'y faire condescendre; car ce seroit l'avantage de Sa Majesté, pour les raisons qui sont mieus cogneuës dudit sieur marquis que de nul autre.

• Mais aussi s'il cognoit que telle ouverture doive estre mal receue et desplaise audit roy d'Angleterre, il ne s'en declarera, et aura recours aux autres expediens deduits au present Memoire.

• Il reste encore un point à traitter, qui est : Si ledit roy d'Angleterre declare audit marquis de Rosny estre content de vivre en paix et bonne amitié avec Sa Majesté, et à cette fin entretenir les traittez faits entre les couronnes de France et celles d'Angleterre et d'Escosse, et mesme les estraindre, augmenter et regler, s'il est jugé à propos, pour le commun bien de leurs sujets et pays; mais aussi vouloir traiter de mesme avec ledit roy d'Espagne et les archiducs, afin de demeurer et regner en paix et bonne amitié avec tous ses voisins, soit pour se constituer arbitre entr'eux, ou pour ne vouloir offenser ses voisins, avec lesquels, comme roy d'Escosse, il a vescu en bonne paix et amitié. Et partant ne vouloir s'entremettre des affaires desdits Estats, non plus que des autres differends qui troublent la chrestienté, se contentant de jouïr des couronnes que Dieu luy a données et de les conserver, et laisser entieres à ses enfans avec l'amitié de tous ses voisins, et anciens amis et alliez. Et que sur cela il fasse instance d'estre payé par Sa Majesté des deniers prestez par ladite feuë Reine, et pour cét effet, demande des termes certains pour les payemens, ou qu'il soit mis en possession de certains revenus en France, ainsi qu'il avoit esté promis à ladite Reine : en ce cas ledit marquis de Rosny n'entreprendra

de le divertir ouvertement de ladite paix de la part de Sa Majesté; au contraire, il luy dira qu'elle luy sera aussi agreable, utile et assurée qu'à nul autre, pour les raisons qu'il luy scaura tres-bien représenter. Mais il pourra, discourant avec luy, luy remonstrer, comme de luy mesme, et par protestation de l'affection qu'il porte au bien de ses affaires, et comme ayant quelque interest qu'il prospere, à cause de la religion, les divers inconveniens qui luy peuvent succeder dedans et dehors ses royaumes, suivant ce conseil, tant à cause des divisions qui sont en sesdits royaumes fondées sur le point de la religion, que pour la naturelle convoitise et ambition des Espagnols; lesquels, ayans redressé leurs affaires aux Pays-Bas, voudront et poursuivront poursuivre l'entreprise de la monarchie que leurs peres leur ont tracée, et que la nation s'est figurée. A quoy ledit roy d'Espagne sera toujours excité et fomenté par les papes et les autres ennemis de la religion de laquelle il fait profession, y adjoustant encore les autres considerations et raisons qu'il jugera estre propres, pour luy faire cognoistre et apprehender la suite d'une telle neutralité, laquelle ne peut estre de durée.

« Ledit sieur de Rosny se souviendra aussi de luy lever l'opinion qu'il pourroit avoir de separer et desunir lesdits Pays-Bas, de la puissance et domination de la couronne d'Espagne, comme aucuns se sont persuadez, et que l'on verroit ressusciter la maison de Bourgogne par l'establisement audit pays des archiducs, luy remontrant que c'est un vray abus pour les raisons qu'il luy deduira, afin qu'il ne bastisse sa resolution sur tels fondemens imaginaires.

« Mais si ledit roy d'Angleterre, nonobstant ses raisons et remonstrances, persiste à déclarer vouloir suivre le chemin de ladite paix, soit qu'il vueille entretenir ladite neutralité, ou que ledit marquis descouvre qu'il vueille balancer du costé d'Espagne, il ne rompra toutesfois ouvertement avec luy, mais se licentiera de luy, et s'en retournera, le laissant en bonne esperance et opinion de la continuation de l'amitié de Sa Majesté; se contentant de s'informer diligemment de ceux qui le verront, de l'estat des affaires desdits royaumes d'Angleterre, d'Escosse et d'Irlande, et de la disposition generale des sujets d'iceux et de toutes autres choses qui pourront ayder à l'advenir à servir Sa Majesté.

« Il verra aussi les députez des Estats des provinces unies des Pays-Bas, et pareillement le sieur de Bernaveld, lesquels il assurera de la bonne volonté de Sa Majesté, leur faisant part des bons offices qu'il a charge de faire pour eux

et leurs affaires, avec ledit roy d'Angleterre, comme de ce qui s'en ensuivra.

« S'informerá aussi de leur deliberation sur les partis que prendra ledit roy d'Angleterre; et s'ils luy font quelques ouvertures à l'avantage de Sa Majesté, il les escouterá pour en rendre compte à Sa Majesté, à son retour : leur faisant entendre que sadite Majesté affectionne tellement leur conservation et prosperité, qu'elle recevra tousjours en bonne part et aura bien agreable tout ce qui luy sera proposé de la leur; les asseurant qu'elle les favorisera tousjours autant que ses affaires luy permettront et le bien des leurs.

« Il scaura d'eux quel contentement leur aura donné ledit roy d'Angleterre, s'il veut se separer d'eux, ce qu'il entend que deviennent les villes de Zelande gardées par les Anglois, et leur deliberation pour ce regard, soit qu'ils continuent la guerre, ou soient contraincts d'entendre à la paix, leur faisant offre, en l'une et en l'autre occasion, de la continuation et assistance de Sa Majesté.

« Pareillement il mettra peine de descouvrir si ledit roy d'Angleterre leur aura proposé d'entrer avec luy en plus estroite confederation et à conditions plus avantageuses pour luy, que n'estoient celles qu'ils avoient avec ladite reine d'Angleterre, et quelle aura esté la response qu'ils luy auront faite, et sera, cy-apres, leur deliberation sur cela ; leur faisant sentir, s'il juge qu'il en soit besoin, la juste et bien fondée occasion que Sa Majesté auroit d'approuver qu'ils donnassent, en leur pays, plus de pouvoir audit roy d'Angleterre, qu'ils n'ont fait à ladite Reine.

« Il faut, sur tout, descouvrir si ledit Roy aura extorqué d'eux, pour les assister, quelque promesse et obligation de luy déposer et mettre entre les mains quelque place maritime, conquise ou à conquérir en la coste de Flandre, du costé de France, faisant entendre audit Bernaveld, que telle chose offenserait grandement Sa Majesté pour les raisons que ledit sieur de Rosny luy confiera, comme à personne qui s'est tousjours montrée affectionnée au contentement de Sa Majesté.

« Laquelle a commandé aussi audit sieur marquis de faire entendre aux catholiques du pays d'Angleterre, qui s'adresseront à luy, que Sa Majesté luy a donné charge de les recommander audit roy d'Angleterre, et les assister et favoriser envers luy tant qu'il luy sera possible; de quoy il les assurera avoir tres-bonne volonté de s'acquitter. Et partant qu'il n'en perdra la commodité quand il la rencontrera, mesme qu'il aydera à la faire naistre, comme, de fait, Sa

Majesté entend qu'il fasse, toutefois avec telle discretion et moderation qu'il jugera estre à propos, pour n'alterer l'esprit dudit Roy, et ne luy donner ombrage et méfiance de la volonté de Sa Majesté.

« Il évitera de parler audit roy d'Angleterre et à tous autres du fait du duc de Bouillon, afin de ne luy donner occasion de se souvenir de recommander sa cause à Sa Majesté; car elle sera tres-aise que ledit Roy s'en abstienne, comme il luy fera cognoistre. Si apres avoir ouy les deputes de l'electeur Palatin, il s'y laissoit aller, Sa Majesté ayant sceu qu'ils doivent requérir ledit Roy de recommander à Sa Majesté ledit duc; luy representant, s'il le met sur ce propos, avec quelle moderation et equanimité Sa Majesté s'est comportée en ce fait, quelles sont les fautes qu'a commises ledit duc depuis son accusation, et de quelle consequence sont les crimes desquels il est chargé; faisant tout ce qu'il pourra envers ledit Roy, à ce qu'il ne s'engage en ce fait, comme il luy dira que Sa Majesté voudroit faire en faveur d'un de ses sujets, de quelque qualité et condition qu'il soit, qui l'auroit offensé, comme l'est Sa Majesté, dudit duc de Bouillon.

« Ledit sieur marquis a esté chargé de deux lettres du Roy, l'une escrite et l'autre signée de sa main, en creance sur luy, pour presenter audit Roy.

« Sa Majesté entend aussi qu'il visite la reine d'Angleterre, et si elle est encore en Escosse, qu'il dépesche un gentil-homme expres vers elle pour accomplir ledit office, s'excusant de n'estre passé jusques-là, sur la haste et nécessité de son retour en France, et l'importance des affaires qui luy ont esté commandées de traiter avec ledit roy d'Angleterre; mais il n'obmettra à faire faire, par celui qu'il enverra, aucune sorte de compliment envers ladite dame, au nom du Roy et de la Reine, qui seront propres pour luy témoigner et faire croire combien leurs Majestez affectionnent sa personne et son contentement et veulent faire profession d'amitié avec elle.

« Il donnera charge aussi à celui qu'il enverra en Escosse, de voir le prince et les autres enfans dudit Roy, qui sont avec ladite reine d'Angleterre, et les assurer de l'amitié de leurs Majestez, de laquelle ils rendront heritier monseigneur le Dauphin et leurs autres enfans.

« Si ledit sieur de Rosny recognoist qu'il puisse practiquer et obliger au service de Sa Majesté, quelques-uns des serviteurs dudit roy d'Angleterre, qui soient capables de la servir, avec sujet de s'y fier et d'en bien esperer, il n'en perdra l'occasion.

« Non plus que de rendre aux ambassadeurs et députes du roy d'Espagne, et des archiducs de Flandres, ou autres qui en seront dignes, selon la qualité de leurs maîtres, la visite dont les ministres des princes ont accoustumé d'user les uns envers les autres, pour conserver et demonstrier la bonne amitié et intelligence qui est entr'eux.

« Sa Majesté escrit au sieur de Beau-mont, son ambassadeur par delà, qu'il la serve aupres ledit sieur de Rosny, aux occasions qui se presenteront ainsi qu'il luy dira. Et dautant que Sa Majesté a fait dire audit roy d'Angleterre qu'il luy feroit sçavoir, par luy, son intention sur les plaintes qu'il avoit faites des deportemens dudit sieur de Beau-mont, il sçaura de luy, quelle satisfaction il a depuis donnée audit Roy, pour, selon cela, faire tel office en faveur dudit sieur de Beau-mont envers ledit Roy, qu'il jugera estre necessaire, afin qu'il ait sa residence et son entremise agreable, l'assurant de sa fidelité et preud'homme, et effaçant toutes les impressions que l'on luy a données à son prejudice: luy declarant que comme Sa Majesté auroit chastié ledit sieur de Beau-mont, s'il s'estoit tant oublié de son devoir que de faire ou dire chose qui pust déplaire audit roy d'Angleterre, Sa Majesté desire aussi qu'il le reçoive benignement, estant innocent et purgé de telles calomnies, et qu'il le traite favorablement comme son ministre et serviteur, tout ainsi que Sa Majesté fera son ambassadeur, resident pres d'elle; des deportemens duquel ledit marquis luy dira qu'elle est tres-satisfaite, ainsi qu'il luy promettra qu'il sera dudit sieur de Beau-mont.

« Sa Majesté a commandé estre baillé un alphabet en chiffre, audit sieur marquis de Rosny, pour s'en servir aux occasions d'importance qui se presenteront, afin de l'advertir plus ouvertement de toutes occurrences.

« Fait à Fontaine-bleau, le deuxiesme jour de juin 1603, presents messieurs le comte de Soissons, de Rosny, de Sillery et Jeannin, conseillers au conseil d'Estat.

HENRY.

« Et plus bas contre-signée, DE NEUF-VILLE. »

Outre ce que dessus, le Roy, ainsi que nous en avons desja dit quelque chose, vous bailla une autre instruction escrite et signée de sa main, pour essayer de traiter, comme de vous mesmes, une alliance encore plus estroite en forme de ligue offensive et defensive où seroient compris les Estats, et la restraindre par le mariage des enfans des deux Rois; mais tout ce qui suit, disons nous, sans en avoir eu nulle certitude, ains seulement pour en avoir trouvé, depuis vostre retour d'Angleterre, plusieurs me-

moires et discours parmy vos papiers tels que s'ensuit ; à sçavoir , de proposer le ravalement de la puissance espagnole et maison d'Austriche, et, sur ce, faire quatre sortes d'ouvertures pour y parvenir.

La premiere, que la France, l'Angleterre, le Dannemarc, la Suede et les Pays-Bas à frais communs, et neantmoins proportionnez aux puissances d'un chacun, essayassent de se saisir des Indes ou à tout le moins des isles qui sont sur le chemin des flottes d'Espagne, afin d'en empêcher le traject, et ce, par le moyen de trois armées navales de huit mille hommes chacune, lesquelles se rafraischiroient de huit en huit mois, afin de remplacer ce qui seroit devenu defectueux en icelles.

La seconde, d'arracher de la maison d'Austriche l'heredité de l'empire d'Allemagne et des Estats et royaumes de Hongrie, Boheme, Moravie, Silezie, Lusatie, Austriche, Carinthie, Stirie et Tirol, conviant, à ce dessein, tous les princes d'Allemagne, avec assurance que toutes les distributions s'en feroient à leur avantage et non d'autres, et faire le semblable touchant les Estats de Cleves, Juliers, Bergues, la Mark, Ravensberg et Ravestine lors qu'ils viendront à vacquer.

La troisieme, d'attaquer les Pays-Bas en se saisissant des rivières de Meuse et Moselle, et des bords du Rhin d'un costé, des costes de la mer de l'autre, et des frontieres de France de l'autre, afin d'empêcher que nuls vivres ny marchandises n'y pussent plus entrer, et, par ce moyen, de reduire les peuples d'iceux en necessité de toutes choses.

Et la quatrieme, plus grande et plus generale, par la reduction de toute la maison d'Austriche dans le seul continent des Espagnes, essayant d'interesser en la dissipation, dispersion et distribution de leurs autres Estats, non seulement la France, l'Angleterre, les Roys de Dannemarc et de Suede, les provinces unies des Pays-Bas, mais aussi les princes et villes imperiales d'Allemagne, Venise, Savoye et autres potentats, voire mesme le Pape, en leur distribuant toutes lesdites provinces dont ils seroient spoliez selon la commodité d'un chacun sans aucune portion pour les roys de France, d'Angleterre, de Dannemarc ny Suede ; mais tousjours avec charge de ne faire ces propositions que comme de vous mesme, faisant semblant de ne les avoir pas voulu faire au Roy, vostre maistre, sans avoir veu comment elles seroient receuës pour ces trois grands roys du Nord, et les provinces unies des Pays-Bas.

*Lettre de la main du Roy au roy d'Angleterre.*

Monsieur mon frere, je me resjouys de vous voir jouyssant à present du bon-heur et legitime accroissement que je vous ay souhaité il y a long-temps ; j'en louë et remercie Dieu avec vous de pareille affection que vous mesmes. Dequoy voulant vous rendre certain comme de la continuation de mon amitié, je vous envoie celuy entre tous mes serviteurs qui a plus de cognoissance de l'interieur de mon cœur ; c'est mon cousin le marquis de Rosny, qui a tousjours affectionné vostre contentement et prosperité, et, comme mon serviteur tres-fidele, désiré ardemment l'entretienement de nostre union et bonne amitié. Recevez-le donc en cette qualité aussi benignement que le merite la bonne volenté de laquelle il vous est envoyé et qu'il s'y presentera, et luy adjoutez pareille foy que vous feriez à la propre personne de vostre tres-affectionné bon frere.

*Lettre du Roy au roy d'Angleterre, contre-signée.*

Tres-haut, tres-excellent et tres-puissant prince, nostre tres-cher et tres-amé bon frere cousin et ancien allié ; si tost que nous avons esté advertis de vostre part, tant par vostre lettre escrite le 15 du mois d'avril, que par le sieur Parry, vostre ambassadeur, du trespas de la feuë Reine, nostre tres-cherre sœur et cousine, et de vostre assumption à la couronne d'Angleterre, nous avons fait partir nostre cousin, le marquis de Rosny, grand maistre de l'artillerie et grand voyer de France, capitaine de cent hommes d'armes de nos ordonnances, conseiller en nostre conseil d'Estat et superintendant general des finances de nostre royaume, par nous à cet effet destiné et nommé il y a long-temps pour vous aller saluër en nostre nom, vous renouveler les offres et assurances de nostre fraternelle et parfaite amitié, nous conjouyr avec vous de la felicité qui accompagne vostre entrée audit royaume. Et comme vous nous avez mandé par vostre dite lettre et nous a esté confirmé par vostredit ambassadeur, vostre intention estre d'entretenir et continuer les traittez que nous avons avec vous comme roy d'Escosse, et pareillement ceux que nous avons avec ladite defuncte Reine, à cause du royaume d'Angleterre, nous avons aussi donné charge audit marquis de Rosny de vous declarer que nous voulons faire le semblable de nostre costé, et que nous avons désir d'embrasser toutes sortes d'occasions qui se presenteront de les rendre aussi utiles à nos communs sujets que nostre ancienne et parfaite

amitié nous convie de les estreindre; pareillement nous avons eu bien agreable que vous ayez continué ledit Parry pour vostre ambassadeur aupres de nous; car, comme il s'est monstré jusques à present tres-affectionné à l'entretienement et augmentation de nostre bonne amitié et intelligence, nous esperons aussi qu'il perseverera en ce devoir aussi fidellement et sincerement que nous avons ordonné à nos ministres d'en user envers vous. Vous priant d'adjouter pareille foy à tout ce que nostre cousin, le marquis de Rosny, traittera en nostre nom avec vous, comme à nostre propre personne, ayans voulu l'employer en cette legation par preference à tous autres pour la tres-grande confiance que nous avons en luy, et la cognoissance que nous avons de son affection à l'entretienement et augmentation de nostre bonne amitié. Priant Dieu, tres-haut, etc.

Le 2 juin 1603.

*Lettre de la main du Roy à la reine d'Angleterre.*

Madame ma sœur, cette lettre que je vous escris de ma propre main, vous sera présentée par mon cousin le marquis de Rosny, mon fidelle serviteur, que j'envoye au roy d'Angleterre, mon bon frere, et à vous pour vous asseurer comme luy de la continuation de mon amitié, et la volonté que j'ay de la vous tesmoigner par toutes sortes d'effets dignes d'icelle. Il vous dira aussi le contentement que j'ay de vostre felicité et combien je desire que vous en jouyssiez longuement. Je vous prie donc de le croire, tant sur ce sujet que tous autres qu'il traittera avec vous, tout ainsi que vous feriez ma personne mesme, me faisant sçavoir par luy l'estat de vostre santé, pour laquelle je prie Dieu, madame ma sœur, qu'il vous continué sa divine grace et assistance, comme à vostre tres-affectionné bon frere.

*Lettre du Roy à la reine d'Angleterre, contre-signée.*

Tres-haute, tres-excellente et tres-puissante princesse, nostre tres-chere et tres-amée bonne sœur, cousine et ancienne alliée; l'une des choses que nous avons autant désirée depuis vostre assumption à la couronne d'Angleterre, a esté de vous faire visiter par personne de qui les bonnes qualitez rendissent plus celebres et remarquables les tesmoignages de nostre bonne volonté et inclination en vostre endroit; et ayant choisi pour cet effet nostre cher et amé cousin le marquis de Rosny, grand maistre de l'artillerie et grand voyer de France, capitaine de cent hommes d'armes de nos ordonnances et superintendant

de nos finances, nous vous prions avoir agreable cet office qu'il vous rendra de nostre part, et vous asseurer que, comme par le moyen de la couronne d'Angleterre, l'ancien lien d'amitié d'entre celles de France et d'Escosse se trouve davantage estrainct, nous aurons à plaisir de vous tesmoigner, en toutes occasions, des fruiets dignes de nostre affection et bien vueillance, ainsi que ledit marquis de Rosny vous fera plus amplement entendre. Et à tant, nous prions Dieu, tres-haute, tres-excellente et tres-puissante princesse, nostre tres-chere et bien-amée bonne sœur, cousine et ancienne alliée, qu'il vous ait en sa sainte et digne garde.

Escrit à Fontaine-bleau, le deuxiesme jour de juin 1603.

*Lettre de la reine au roy d'Angleterre, contre-signée.*

Tres-haut, tres-excellent et tres-puissant prince, nostre tres-cher et bien-amé bon frere, cousin et ancien allié; le Roy nostre honoré seigneur envoyant par devers vous nostre tres-cher et bien amé cousin le marquis de Rosny, grand maistre de l'artillerie, grand voyer et surintendant general des finances de France, nous luy avons donné charge de vous visiter et saluer de nostre part, et se conjoûir avec vous, en nostre nom, de vostre heureuse assumption au royaume d'Angleterre, laquelle nous vous avions d'autant plus ardemment désirée, que nous avons toujours recogneu, entre le Roy nostre dit tres-honoré seigneur et vous, une entiere et parfaite amitié, et bonne correspondance, dont mesme vous avez par cy-devant rendu de particuliers tesmoignages en nostre endroit. C'est pourquoy nous avons receu les nouvelles de ces bons succez et prosperitez avec un extrême plaisir, et les souhaitons augmenter de plus en plus à vostre contentement, ainsi que nostredit cousin le vous pourra représenter plus particulièrement de nostre part; auquel nous vous prions vouloir sur ce donner entiere creance, et nous en remettans sur luy, nous prions Dieu, tres-haut, tres-excellent et tres-puissant prince, qu'il vous ayt en sa sainte et digne garde.

Escrit à Fontaine-bleau, ce premier jour de juin 1603.

*Lettre de la main de la Reine à la reine d'Angleterre.*

Madame ma sœur, mon cousin le marquis de Rosny, grand maistre de l'artillerie et surintendant general des finances de France, s'en allant de la part du Roy monseigneur vers vous, je luy ay donné charge de vous visiter de ma part, et

se conjoûir avec vous en mon nom de vostre assumption au royaume d'Angleterre, et des heureux succez et prosperitez qui vous en sont reüssies; lesquelles ne seront jamais si grandes, que je les vous souhaite, non seulement pour la parfaite amitié et intelligence qui a tousjours esté entre nos royaumes et couronnes, mais aussi pour la proximité et alliance qui est entre nous, et pour l'estroite amitié et observance que je desire estre conservée d'une part et d'autre, laquelle, pour mon regard, je garderay tousjours inviolablement, comme vous dira plus particulièrement mondit cousin; sur lequel me remettant, je prie Dieu, madame ma sœur, qu'il vous ayt en sa sainte et digne garde.

Escrit à Fontaine-bleau, le premier jour de juin 1603.

## CHAPITRE CXVI.

*Rosny s'embarque pour l'Angleterre. Différend entre la marine françoise et la marine angloise. Détails sur le voyage de Rosny. Soulèvement du peuple de Londres contre l'ambassade françoise. Commencement de la négociation.*

En suite de toutes ces expéditions pour vostre voyage d'Angleterre, nous vous ramentevrons ce dont il nous souvient, et pour plus grand éclaircissement à ceux qui liront ces Memoires, nous insererons en chaque temps et occasion les lettres que vous escrивiez au Roy, pour luy rendre compte de ce qui se passoit.

Vous partistes donc de Paris au commencement de juin, et arrivastes à Calais, accompagné de plus de deux cens gentils-hommes, ou qui se disoient tels, entre lesquels il y en avoit plusieurs de bonne maison et fort qualifiez.

En ce lieu le sieur de Vic, qui avoit quelque dent de laict contre les Anglois, à cause des pirateries, comme vice-amiral de France, puis ceux d'Angleterre et des Provinces Unies se vindrent offrir à vous au nom de leurs maistres, et chacun d'eux vous prier qu'il eust l'honneur de vous recevoir en ses vaisseaux, et de vous en servir en vostre passage; diverses raisons vous firent choisir ceux d'Angleterre. Lesquels vous ayans en pleine mer dans leurs grandes roberges, et voyans venir vers vous le sieur de Vic avec le pavillon au grand mast de son vaisseau, ils s'en offenserent comme d'un affront qui estoit non seulement fait au Roy leur maistre, mais aussi au Roy de France, lequel vous representiez, et s'animerent de telle sorte les uns les autres à en tirer raison, que, sans la prudence et dextérité

dont vous usastes, leur disant que ce qu'en faisoit M. de Vic estoit par vostre ordre, afin de vous rendre plus d'honneur en le mettant bas sans delay au moindre commandement ou signal, ainsi qu'il fut fait, et sans cela il n'y a point de doute qu'il y eust eu de la batterie, où apparemment la France eust esté la plus foible, ce que vous couvristes sagement.

Estant arrivé à Douvres, le sieur de Beaumont vous y vint trouver, et aussi un nommé le sieur Loucnar, estant au roy d'Angleterre, non comme il vous le dit, pour vous porter aucune parole de sa part, mais seulement pour donner ordre à vous faire loger, et fournir chevaux, charriots, batteaux, vivres et guides.

De Calais vous aviez escrit une lettre au Roy, dont la teneur ensuit :

### *Premiere lettre de M. de Rosny au Roy.*

SIRE,

Depuis mon partement de Paris jusques à mon arrivée en cette ville, je n'ay appris aucune chose qui meritast vous estre écrite, sinon forces bruiets incertains d'une tres-mauvaise disposition, tant au Roy qu'aux peuples d'Angleterre, desquels vous avez esté adverty par M. de Vic, et notamment de ce qui s'est passé à l'embarquement du comte d'Arambergue, et le pour-parler d'entre le vice-amiral d'Angleterre et celui de Hollande. Vostre Majesté aura aussi appris, par la lettre du dit sieur de Vic, comme le susdit admiral a laissé deux roberges pour me servir en mon passage; mais dautant qu'il sembloit que ce fust plutost par maniere d'acquit, que d'affection et bonne volonté, et que tel estoit l'advis dudit sieur de Vic, je me resolvois de ne m'en aider point, et les remercier avec toutes sortes de courtoisies. Et toutesfois ayant depuis receu la lettre du sieur de Beaumont, dont j'envoye copie à vostre Majesté, et considéré que bien souvent les moindres circonstances et formalitez non observées apportent aux esprits, d'ailleurs mal disposez, des causes, si non vrayes, à tout le moins vray semblables, de se plaindre, je me suis resolu d'accepter lesdites roberges et passer dedans en Angleterre; afin d'oster à ces commencemens tout pretexte d'alteration, tant à l'endroit de vostre Majesté, que d'aucuns de vos ministres, et d'impression en l'esprit des hommes, qu'il y eust mauvaise intelligence entre vos Majestez, et en useray tousjours ainsi, quelque reconnaissance qui me puisse venir du contraire, fermant les yeux et les oreilles à beaucoup de choses, qui seront dites et faites, et les interpretant apparemment à bonne intention; gardant en mon esprit ce que j'en devray



croire et représenter à votre Majesté. J'ay aussi appris de M. de Vic que nul n'a apporté le dueil en Angleterre de la défunte Reine, ny qu'aucun ambassadeur ne s'est présenté en cet équipage devant le Roy qui y regne à present. Neantmoins, considerant l'ordre et le commandement que j'ay de votre Majesté, et qu'il y va bien autant de votre dignité et reputation, de tesmoigner encor un ressouvenir de l'amitié qu'avez portée à la défunte reine Elisabeth, et des bons offices qu'en avez receus, que d'en desirer la continuation envers ses successeurs, je me resolu de comparoistre à la premiere audience ainsi qu'il est porté par mon instruction.

Je sejourneray encore aujourd'huy en ce lieu pour attendre le sieur de Saint Luc, et quelques autres des plus paresseux qui me font ce bien de m'accompagner; mais, sans faillir, je partiray demain, soit qu'ils viennent ou non, afin de ne retarder ce qui est de votre service et du bien general pour l'interest d'un particulier. Or, combien que tout ce qui est dans cette lettre ne soit pas de grande consequence, si n'ay-je voulu faillir de le représenter à votre Majesté, afin qu'il ne se passe aucune petite particularité dont je ne la tienne fort amplement instruite et informée, ainsi que je continueray de faire durant mon voyage. Sur ce je prieray Dieu, etc.

De Calais, ce samedi quatorziesme jour de juin 1603, à dix heures du matin.

De Douvres vous allastes coucher à Cantorbery, où, pour une petite ville, vous trouvastes une merveilleuse affluence de peuple, avec acclamation non jamais rendue à aucun ambassadeur. En ce lieu vous vint trouver le sieur de Stafford, dit milord Sidenay, de la part du roi d'Angleterre, et à Gravezines, le comte de Sutherland, lesquels vous userent de plusieurs compliments, trop longs à reciter aussi bien que ceux qu'ils receurent de vous; et puis avec les barges du Roy, qui sont des vaisseaux fort agreables et bien mirelifiquez, vous menerent par la Tamise à Londres, où en arrivant il vous fut fait une saluë de canonnades ou pieces des vaisseaux de la Tour des plus belles dont j'aye jamais ouy parler; car il fut, selon mon advis, tiré plus de trois mille coups de pieces, sans les mousquetades sur le mole et place de devant la Tour. Vous trouvastes grand nombre de carrosses pour vous mener à votre logis, que vous pristés pour les premiers jours chez M. de Beaumont.

Dés le soir le sieur Cecile, chef du conseil des affaires, vous vint visiter, faire des excuses de l'absence du Roy, et vous asseurer de son prompt retour. Le lendemain vous fustes logé en un as-

sez beau logis respondant sur une grande place, et la pluspart de ceux de votre suite aux environs; et le soir il arriva un accident, qui eust bien causé du désordre, sans votre grand jugement, prudence et bonne fortune dont la cause fut telle.

Plusieurs de ceux qui vous avoient accompagné (ausquels vous n'aviez pas manqué de bien faire la leçon, et donner des instructions de la forme de vivre qu'ils avoient à tenir, et sur tout aux jeunes gens et marjolets de Paris), voulans faire la desbauche, s'en allerent chercher des femmes de joye, chez l'une desquelles le hazard voulut qu'ayans rencontré des Anglois, il y en eut un tué par un des vostres; ce qui suscita une telle rumeur dans la ville, que le peuple assemblé par les ruës, au nombre de plus de trois mille, ne parloit de rien moins que d'aller assommer tous vos gentils-hommes dedans leurs logis. Dequoy estans entrez en apprehension, ils les quitterent quasi tous et se vindrent sauver dans le vostre.

Vous ne sçaviez rien de tout cela et jouïez à la prime avec messieurs le marquis d'Oraison, de Saint Luc et de Blerancourt. Mais comme vous les vistes entrer trois à trois, quatre à quatre, et encore en plus grand nombre dans votre salle, comme tous estonnez, vous vous doutastes aussi-tost de quelque accident, et en ayant fait perquisition, les sieurs du Terrail et Gadancourt enfin vous confesserent que quelques uns de ceux qui vous accompagnoient, se souvenans mal de vos remonstrances, avoient tué un Anglois, sur la mort duquel, pour estre assez bien apparenté, le peuple s'estoit mis en armes, avec resolution de les aller tous sacmenter (1) en leur logis. Cette nouvelle vous affligea infiniment, la prenant comme une augure d'un mauvais succez en votre charge. Et neantmoins courant plustost aux remedes, qu'aux blasmes, reproches ny complaints, vous ordonnastes à bien cent qui estoient dans votre salle, qu'ils eussent à se ranger tout à l'entour de la salle, afin que vous les vissiez tous au visage pour en juger. Ce qu'ayant fait vous pristés un flambeau (car la nuit commençoit à se fermer), et les ayant tous regardez au nez et parlé à eux, vous en vinstes prendre un par le poing, qui estoit le fils unique du sieur de Combault, grand audancier de la chancellerie, et luy dites: « Pardieu je cognois bien à votre mine et à vos paroles que c'est vous qui avez tué cet homme, n'est-ce pas vray? » Il le voulut nier; mais vous le tournastes de tant de costez, qu'enfin il le confessa.

(1) Massacrer.

En faveur duquel M. de Beaumont vous vint parler, et vous prier de luy mettre entre les mains, afin qu'il essayast de le sauver, d'autant qu'il estoit son parent. Dequoy estant entré en colere vous dites au sieur de Beaumont. « Par-  
« dieu, monsieur, je ne m'estonne plus s'il y a  
« du mal entendu entre vous et les Anglois, puis  
« que vostre humeur est de préférer le particu-  
« lier au public, et l'intérêt de vos parens au  
« service du Roy. Mais je veux bien que vous  
« sçachiez que je n'en useray pas ainsi, et le sau-  
« veray bien mieux que vous; car je vous jure,  
« qu'après luy avoir fait faire une belle confession  
« de ses pechez, il aura la teste trenchée; car je  
« ne veux pas que le service de mon maistre, ny  
« tant de gentilshommes de bonne maison patis-  
« sent pour un petit godelureau de ville, tout  
« écervelé. — Comment, monsieur, repliqua  
« M. de Beaumont, faire trencher la teste à un  
« de mes parens, qui a vaillant deux cens mille  
« escus, et est fils unique à son pere! Ce seroit  
« une mauvaise recompense de la peine et de la  
« despense enquoy il s'est mis pour vous accom-  
« pagner. — Je n'ay que faire de telle compagnie  
« que celle-là, dites-vous, et puis que vous le  
« prenez si haut, je vous prie vous retirer en ma  
« chambre; car je suis resolu d'assembler les plus  
« vieux et sages de cette compagnie, et avec leur  
« bon advis de le condamner, car il merite la  
« mort. » Ce qui ayant esté fait vous m'envoyas-  
tes vers le maire de la ville, luy dire que vous  
veniez de sçavoir qu'il avoit esté tué ce soir un  
bourgeois de Londres; dequoy si bonne perqui-  
sition avoit esté faite, que l'on avoit trouvé le  
meurtrier, qui estoit un de vos gentils-hommes,  
lequel vous aviez aussi-tost condamné à avoir la  
teste trenchée. Et partant le priez-vous de com-  
mander à de ses archers de se tenir le lendemain  
prest pour le mener à la place, et faire en sorte  
que vous peussiez recouvrer un bourreau, d'au-  
tant que vous vouliez en faire faire justice exem-  
plaire afin de donner satisfaction à ceux qu'il  
avoit offensé, et faire cognoistre que vous ne  
vouliez souffrir nul desordre parmy les vostres.

Le maire vous manda qu'il avoit bien sçeu cet  
accident, et que mesme le peuple s'en estoit  
souslevé, ayant eu bien de la peine à empescher  
qu'il ne se fit quelque désordre, faisant estat de  
vous en venir faire plainte dès le lendemain et  
vous prier de leur en faire raison; mais qu'il ne  
pensoit pas que vous deussiez y aller si viste,  
ny avec tant de rigueur, laquelle il estimoit que  
vous deviez moderer. Surquoy vous lui man-  
dastes (car nous voulons abréger tout ce qui se  
dit et fit en cette occasion) que nulles prieres  
des vostres n'ayans eu pouvoir de changer votre

resolution, vous ne voyez qu'un seul moyen  
pour gratifier luy et eux, qui seroit que luy-  
mesme se voulut charger du prisonnier pour le  
punir de tel supplice que la justice d'Angleterre  
adviserait, d'autant que moyennant cela vous en  
seriez deschargé envers le Roy, vostre maistre,  
et n'auroit le peuple de Londres aucun sujet  
d'estre mal-content de vous. Lequel ordre fut en-  
fin suivy, et par les sollicitations de M. de Beau-  
mont le sieur de Combault fut delivré; vous  
estant ainsi honnestement desveloppé d'un si  
fascheux embarras.

Vous pristés loisir, en attendant l'arrivée du  
roy d'Angleterre, d'escire au Roy une lettre  
dont la teneur ensuit :

*Seconde lettre de M. de Rosny au Roy.*

SIRE,

Estant tres-veritable que les plus petites,  
et en apparence moins considerables actions des  
hommes, et surtout des grands princes et de  
leurs ministres, apportent autant de lumiere pour  
sçavoir ce qui est de leurs intentions, et de cer-  
titude en l'Estat et solide fondement que l'on  
doit faire de leurs amitez et alliances, que les  
plus visibles et signalez effets qu'ils produisent  
en public et de propos delibéré; pource que  
celles-là procedent d'un certain mouvement in-  
terieur et naturelle inclination qui regit et dis-  
pose aussi souvent leurs esprits et leurs resolu-  
tions, que toutes les raisons et la sagesse de ceux  
qui les veulent persuader, et celles-cy du seul  
artifice d'un conseil premedité, pour tenir la ve-  
rité de leurs conceptions et intentions plus se-  
cretes et plus cachées. Je n'obmettray en la  
presente lettre aucune des moindres circonstances  
qui se sont passées tant sur terre que sur mer  
depuis mon esloignement des pays de vostre  
obeyssance, et diray en passant sur chacun point  
et action particuliere un mot de mon advis et  
opinion, sans presumer neantmoins qu'elle doive  
estre suivie ny servir de loy à personne, mais  
pour ce qu'ordinairement les raisons et les con-  
siderations de ceux qui sont presens sur les lieux  
aident beaucoup à esclaircir l'esprit et former  
le jugement des absens et des esloignez.

Toutefois, avant que d'entrer en ce discours,  
j'ay estimé fort à propos et tres-agreable à vostre  
Majesté que je luy represente en peu de paroles  
ce que j'ay recogneu de l'humeur et du naturel  
de cette nation, laquelle comme c'est un peuple  
enclos et posé par la nature au milieu des flots  
impetueux et des ondes variables et inconstantes  
de ce grand Ocean, aussi est-il merveilleusement  
inesgal et disproportionné en ses deliberations  
et en luy-mesme; produisant quasi en mesme

temps des actions tant différentes de ses paroles, que si l'on n'estoit persuadé par l'expérience, il seroit impossible de croire qu'elles procedassent toutes d'une mesme personne et d'un mesme esprit. Car, estans poussez et meus d'une flerté et outrecuidance naturelle, ils reçoivent facilement toutes leurs imaginations et fantaisies pour veritez, et la fin de leurs desirs et affections pour certitudes et evenemens infaillibles, sans les avoir mesurées et balancées avec la seureté requise en icelles, l'estat des choses presentes et la condition des hommes avec lesquels ils ont à traiter, et sans avoir jugé par quelles voyes et par quels chemins ils peuvent parvenir à la possession de ce qu'ils souhaitent si ardemment. En sorte que la moindre objection ou difficulté les fait incontinent, et le plus souvent sans raison pertinente, departir de ce qu'ils avoient, ce leur sembloit-il, si sagement et si utilement conclu et arrêté, et qui estant apres bien espluché et examiné par les maximes d'Estat, se recognoist plutost proceder d'une pure arrogance et simple nonchalance, que d'un conseil bien digéré, et sans aucun esgard des moyens d'y parvenir, ny des suites et consequences necessaires et inevitables en telles choses; lesquelles leur estans representées avec vives demonstrations, les font aussi-tost incliner en la partie toute contraire, et comme stupides, estonnez et sans aucune replique valable, retomber en cette premiere irresolution de laquelle ils estimoient s'estre si courageusement desveloppez.

Toutes ces considerations, Sire, font que je ne desespere pas entierement de pouvoir traiter et conclurre choses aucunement conformes à vos desirs, utiles à vostre service, et au salut et repos general de la France, mais bien me donnent crainte de vous pouvoir conseiller de faire un solide fondement sur telles amitez et y bastir vostre grandeur et la seureté de vostre Estat, prevoyant et conjecturant que comme mes raisons auront eu la force de les porter d'une extremité en l'autre, que s'ils n'en sont continuellement persuadez et qu'elles ne leur soient souvent rafraichies ou resveillées par d'autres aussi valables, selon que le temps et les occasions le requerront, ils ne nous eschappent de rechef facilement, se laissant tousjours aller aux dernieres persuasions, et déferer aux objections et remontrances qui leur seront faites par ceux qui desirent les disposer à nostre dommage, si une fois ils peuvent tant gagner sur eux que de se faire escouter souvent et paisiblement. En sorte que pour marcher plus seurement en affaires si importantes, je confirmeray le conseil que j'ay plusieurs fois donné à vostre Majesté, qui est de

ne laisser passer aucune occasion ny moyen par lequel l'on puisse estraindre amitié avec les roys et princes vos voisins, mais de n'establir pas toutefois vostre principale esperance là dessus, ains sur vous mesme, sur ce que vous estes le plus prudent et le plus expérimenté grand Roy et grand capitaine qui soit aujourd'huy sur la terre, sur vos propres forces, et sur l'abondance du peuple guerrier et courageux que Dieu a commis sous vostre domination : ayant tousjours cru que jamais les roys de France ne se resoudront de constituer leurs principaux plaisirs en la seule augmentation de leur grandeur, reputation et manutention de la seule monarchie françoise non litigieuse, qu'ils ne deviennent sans difficulté les seuls arbitres de la chrestienté, et ne donnent absolument la loy à tous leurs voisins par leur prudence et ainsi douce association.

Or, revenant au discours des particularitez qui se sont passées en mon voyage, je diray à vostre Majesté comme je m'embarquay à Calais le dimanche quinziesme de juin, à six heures du matin, dans une des roberges du roy d'Angleterre, où je fus receu avec si grandes courtoisies que rien plus, voire mesme avec des offres et submissions viles et abjectes, tant un chacun s'humillioit à moy. Et tout soudain changeans leur procedure, et voyans venir à moy M. de Vic avec son pavillon au grand mast, sans m'en dire aucune chose et sans aucun respect ny souvenir de ce qu'ils me venoient de dire, qu'ils estoient tous à moy pour en disposer, et que je ne les estimasse point Anglois pour mon regard, mais vrais François, ils firent pointer toutes les pieces, au nombre de cinquante, droit au vaisseau dudit sieur de Vic. Dequoy estant adverty et voyant une grande rumeur dans le vaisseau, et la precipitation dont ils usoiient, je ne pus trouver autre remede en un si soudain inconvenient, que de leur dire que c'estoit par mon commandement que M. de Vic avoit levé son pavillon, et que j'avois convenu avec luy que pour me rendre plus d'honneur, aussi-tost que l'on luy feroit signe, et qu'il seroit pres de moy, il le mettroit bas, que je les priois de tirer à toute volée à l'escart du vaisseau, et qu'ils en verroient l'effet, ce qu'ils firent. Et neantmoins, à ce que l'on m'a dit, M. de Vic s'en est fort offensé, et projecté de leur rendre la pareille s'il les trouve en pleine mer à son advantage.

J'arrivay sur les trois heures apres midy à Douvres, où je trouvay M. de Beaumont, vostre ambassadeur ordinaire, accompagné du sieur Loucnard, qui a la charge de recevoir les ambassadeurs, comme M. de Gondy en France,

lesquels me receurent avec toutes sortes de civilité et courtoisies, l'un m'accommodant de son carrosse et m'offrant tout ce qui estoit à luy, et l'autre, au nom de son maistre, toute assistance, aide et faveur en Angleterre, me declarant qu'il avoit charge de me fournir chevaux, chariots et toute autre chose dont j'aurois besoin. Estant au logis, le maire de la ville me vint visiter et offrir au nom d'icelle tout service et assistance. Peu apres le nepveu du gouverneur du chasteau de Douvres (lequel pour avoir les gouttes ne bouge du liet) me vint trouver de la part de son oncle, pour me faire les mesmes offres que les precedentes, me priant d'aller voir le chasteau : le peuple aussi me rendit beaucoup de tesmoyage de bonne volonté, se resjoüyssant de ma venuë, me donnant mille benedictions, et souhaittant tout bon heur et felicité. Et neantmoins, apres tout cela, le sieur Loucnard ayant demandé le roolle de toute la noblesse et autres qui estoient avec moy, afin, disoit-il, de leur distribuer des chevaux et chariots par ordre et à suffisance, si tost qu'il l'eust entre ses mains, il se contenta de l'envoyer à Londres, et laissa la distribution des chevaux et chariots dont il avoit parlé, sans s'en soucier, et fallut que chacun en cherchast comme il pût, et les louast à un prix excessif, avec telle insolence du peuple, qu'il sembloit qu'il nous voulust tous mettre à rançon. Dequoy neantmoins un seul des miens ne fit semblant d'estre mal satisfait, les ayant priez et persuadez auparavant d'en user ainsi, et ne se formaliser de tout ce qu'ils verroient et orroient.

Le lendemain matin, avant que partir, j'allay au chasteau de Douvres, comme j'en avois esté derechef convié par le gouverneur d'iceluy, où nous ne fismes rien que poser nos espées à la porte (reservé la mienne, qu'ils me laisserent par honneur), et bailler nostre argent, car le gouverneur, nommé Thomas Vimes, que nous trouvâmes dans sa chambre en une chaise à cause des gouttes, fit une telle mine à tous ceux qui faisoient demonstration de regarder et considerer les tours et les murailles du chasteau, qu'il nous donna sujet de nous retirer incontinent, sans faire paroistre neantmoins aucun malcontentement ny desir d'en voir plus que nous n'avions fait, mais seulement que nous le laissions craignans de l'incommoder.

Tout du long des chemins entre Douvres et Cantorbery, où j'allay coucher, plusieurs de la noblesse me vindrent trouver et faire infinies offres et courtoisies, disans en avoir receu commandement de leur Roy. A l'arrivée à Cantorbery, le peuple monstroït une allegresse merveilleuse de ma venuë, me donnant autant

de benedictions et de louanges qu'ils avoient veu de mauvais œil le comte d'Arambergue un jour auparavant, et me carresserent en telle sorte, qu'allant parmy les ruës, aucuns me venoient embrasser la botte et baiser les mains, les autres me presenter des fleurs et des bouquets, ce qui, à mon advis, se doit attribuer au grand nombre de Flamans et Wallons qui sont refugiez pour la religion en cette ville de fort longtemps, et en sont quasi les deux tiers d'icelle. Je fus aussi à l'église, qui est tres-belle, et assistay à leur service et musique fort excellente, où chacun et les chanoines sur tous me carresserent infiniment quand ils sceurent que j'estois de la religion; et y en eut un entre-autres qui, ayant cy-devant cogneu deffunct Arnault, dit à son jeune frere qu'un secretaire du comte d'Arambergue luy avoit dit que son maistre alloit trouver le roy d'Angleterre pour faire contre vostre Majesté une ligue entre le roy d'Espagne, l'archiduc et luy, pour le disposer et persuader à la conquête des provinces qu'il pretendoit luy appartenir en France, et empescher que vostre Majesté n'executast les grands desseins qu'elle pouvoit avoir contre l'Angleterre et la Flandre, pour à quoy parvenir, vous faisiez de telles provisions d'argent, d'artillerie, de munitions et d'armes, que s'il n'y estoit pourveu dans deux ans, tous moyens de vous en empescher seroient ostez. Ce chanoine, en reiterant ses paroles, faisoit demonstration de n'avoir pas eu ce discours agreable, mais au contraire d'estre bon François et fort vostre serviteur.

En ce lieu, le milord Sidenay me vint trouver et usa en mon endroit de toutes sortes de complimens au nom du roy son maistre, et m'assura de trouver en luy une disposition telle que vostre Majesté le scauroit desirer pour estreindre avec vous une amitié et confederation indissoluble, voire par preference à tous autres princes; et qu'il avoit charge de donner ordre qu'il ne me manquast aucune chose en tout mon voyage, et me faire rendre tout l'honneur et la faveur que meritoit le ministre d'un si grand prince et ma personne particuliere. Il me tesmoigna aussi qu'il estoit fort vostre serviteur, et qu'il n'obmettoit jamais aucune action qui vous en pust donner assurance.

De Cantorbery, nous allâmes à Rochester, sur le chemin duquel la noblesse vint au devant de nous comme de coutume; mais il y eut mille difficultez pour les logemens, dautant que les habitans effaçoient les marques que les propres fourriers du roy d'Angleterre avoient faites aux portes de leurs maisons. Or, pource qu'en ce lieu j'appris que l'on avoit envoyé au devant du comte d'Arem-

bergue le milord Henry Haouard, qui est de beaucoup plus grande qualité que le milord Sidenay, d'autant qu'il est fils du frere du duc de Nordfolc, oncle du grand chambellan, et du conseil privé, j'eus apprehension, au commencement, que ce ne fust par mespris et pour tesmoigner de la desfaveur. Mais depuis, considerant que celuy qu'ils avoient destiné pour aller au devant de l'ambassadeur d'Espagne estoit encore de moindre condition que le milord Sidenay, et par consequent grandement inferieur à celuy qu'ils avoient envoyé au devant de celuy des archiducs, je jugeay qu'ils en avoient usé ainsi plutost Inconsiderément et nonchalamment, que de propos deliberé, pour m'offencer. Et neantmoins, en ayant communiqué au sieur de Beaumont, nous advisasmes ensemble qu'il estoit à propos de faire en sorte que cette vaine apparence n'apprestast à discourir aux esprits trop curieux, et donnast sujet au commun et à ceux qui ne penetrent pas trop avant, de croire qu'il y eust desja de l'alteration et mauvaises intelligences entre vos Majestez; et cela fut mené si dextrement par ledit sieur Beaumont, que le milord Sidenay mesme escrivit à la Cour qu'il estoit à propos, pour la bien-seance, d'envoyer au devant de moy quelque comte et homme de conseil, comme il fut aussi-tost fait. Tellement que le comte de Sutenton, qui est en faveur maintenant, me vint rencontrer à Gravezines avec grand nombre de noblesse, et me renouvela les offres qui m'avoient desja esté faites au nom du roy d'Angleterre.

En ce lieu, je trouvay quantité de batteaux couverts et fort bien accommodez, lesquels me porterent par la Tamise jusques à Londres, où, arrivant au port pres la Tour, je trouvay bon nombre de carrosses pour me mener et toute la noblesse qui estoit avec moy à mon logis, où je fus conduit, du moins en celuy du sieur de Beaumont, par les sieurs comte de Sutenton et milord Sidenay, avec une telle affluence de peuple, que nous ne pouvions quasi passer parmy les ruës. Si tost que je fus arrivé au logis dudit sieur de Beaumont, le comte de Sutenton me dit qu'il avoit charge d'aller trouver le Roy son maistre dès le soir, encore qu'il fust fort tard, et que Sa Majesté fust allée à Oinsore, qui est à vingt milles de Londres, pour luy rendre compte de tout ce qui s'estoit passé en mon voyage, me priant de croire qu'il estoit vostre serviteur, et qu'il n'obmettroit aucune action qui en pust rendre tesmoignage, et le vouloir charger de quelques particularitez pour porter au Roy son maistre, dont je le remerciay et luy monstray toutes sortes de confiances, sans user neantmoins

que de paroles generales. Apres, le milord Sidenay me fit prier de ne m'ouvrir pas entierelement audit comte de Sutenton, mais que si j'avois quelques bonnes paroles à faire entendre au Roy son maistre, qu'il en fust le porteur, comme m'estant venu trouver le premier, et le plus desireux de vous faire service, et voir vos Majestez en bonne amitié et parfaite intelligence; et jugeay par sa contenance, qu'il avoit quelque jalousie dequoy le comte de Sutenton portoit la premiere parole de ma part au Roy d'Angleterre : ce qui m'occasionna de m'ouvrir un peu davantage à luy, mais plutost toutesfois en apparence qu'en effet, et feignant luy decouvrir infinies choses que je desirois estre tenuës secretes, lesquelles neantmoins j'estois bien aise que chacun sceust.

Je soupay, couchay, et disnay le lendemain chez M. de Beaumont, à cause que je n'avois pû eneor avoir de logis asseuré, et y eut telle difficulté à loger la noblesse qui m'accompagnoit, que la pluspart faillit à coucher dans les ruës, tous les habitans refusans à ouvrir les portes de leurs maisons aux François, s'excusant sur les desordres, insolences et indiscretions qui furent commises par ceux qui estoient avec M. de Biron, telles que, si ce qu'ils en disent est veritable; je ne m'estonne point dequoy nostre nation estoit en si mauvaise odeur en ce pays-là. Depuis nous ayans un peu recogneus et la modestie avec laquelle chacun se comportoit, nous les avons trouvez beaucoup plus doux et gracieux, et espere qu'à mon partement je leur laisseray une meilleure impression des François, qu'ils n'avoient auparavant. Le matin les ambassadeurs de l'electeur Palatin me vindrent trouver et prendre congé de moy pour s'en retourner vers leur maistre, et n'y eut entre nous que des paroles de complimens.

Peu apres, M. le secretaire Cecile envoya son premier commis vers M. de Beaumont, pour sçavoir à quelle heure il me trouveroit ce jour-là à propos, et qu'il avoit charge de me venir visiter de la part du Roy, son maistre, comme il fit incontinent que nous eusmes disné; et apres les paroles ordinaires de courtoisie et civilitez qui me tesmoignerent combien le roy d'Angleterre avoit agreable ma venuë en son royaume, tant pour le regard de vostre Majesté qu'il aimoit et honoroit par dessus tous les autres princes du monde, que pour les qualitez et conditions qui estoient en moy, avec lequel il desiroit s'ouvrir entierelement le cœur, et monstrer toutes sortes de confiances et d'affection à demeurer vrayment et sincerement uny avec vostre Majesté, comme avec son bon frere, l'a-

mitié duquel il vouloit cherir et preferer à toutes autres choses. Nous nous retirasmes, les sieurs Cecile, de Beaumont et moy, dans ma chambre où nous eusmes plusieurs discours, dont les premiers et plus longs, furent plutost generaux que particuliers; narrans seulement les raisons et occasions que vos Majestez avoient de s'unir, lier et restreindre à bon escient, ensemble, les interests communs qui les y convioient, et les bons offices qu'en divers temps eux et leurs predecesseurs avoient receus les uns des autres, dont leurs esprits devoient estre infiniment contens, et nullement en doute que tels devoirs d'amitié ne demeuraissent eternels. Et pour particulier tesmoignage du respect que le roy d'Angleterre vous vouloit rendre, il me dit qu'il estoit party expres de Grenvich pour attendre ma venue, afin de n'estre pressé d'ouyr l'ambassadeur des archiducs qui estoit arrivé devant moy, et qu'il avoit charge de m'offrir mon audience sans attendre que je la demandasse, contre ce qui estoit accoustumé. Il me fit aussi sentir que je devois prendre son envoy vers moy, pour une tres-grande faveur, estant chose non jamais pratiquée. Surquoy je n'oublay pas à luy tesmoigner combien j'estimois chere cette courtoisie, et comme elle avoit redoublé mes esperances.

Tant y a que M. de Beaumont, M. de La Fontaine et les deputez des provinces unies des Pays-Bas prennent cela pour un tres-bon augure; et mesme, depuis que l'on a sceu mon acheminement en ce pays, le roy d'Angleterre a fait beaucoup meilleur visage ausdits deputez qu'il n'avoit fait auparavant, n'ayant pas mesme encor voulu ouyr parler ny dire un seul mot au prince de Henry Nassau. Or, discourant M. de Beaumont et moy, sur les procedures dudit sieur Cecile qui avoit, contre sa coustume, désiré, voire procuré une telle commission, nous avons jugé, quelque bonne mine qu'il fasse et creance qu'il veuille donner, qu'il gouverne entierement son maistre et toutes les affaires; que neantmoins il n'estoit point asseuré de l'esprit de ce prince, et craint qu'il ne soit possédé par d'autres à son desavantage, et que pour avoir toujours les plus grands manimens, il a esté bien-aise de prevenir tout autre qui eust voulu faire son profit de tout ce qu'il y aura à negocier avec moy. Quoy que ce soit, je recognois audit Cecile un esprit desireux de la paix, et me semble qu'il n'a pas bien considéré, à ce que j'ay pû juger par ses discours, les conditions qui en sont inseparables : comme d'abandonner les Estats à la mercy d'Espagne, ou les forcer de se jeter entre vos bras, se departir de tout trafic aux Indes, et rendre inutiles tous leurs vaisseaux de

guerre, et autres suites de consequences, que j'obmets pour briefveté. Il me fit aussi un grand discours sur le fait d'Ostade, dont le but tenoit à le faire abandonner, estimant aussi bien du tout impossible de le pouvoir plus conserver. Laquelle opinion je refutay par plusieurs bonnes raisons, et telles, qu'il me sembla en prendre aucunes en payement, et remettant le succez de ces affaires à ce qui seroit par moy traité en ce royaume. Surquoy nous nous separasmes avec resolution, que dimanche prochain j'aurois mon audience.

Incontinent apres, les deputez des Estats me vindrent visiter avec toute sorte d'honneur et tesmoignages d'affection et de servitude, à l'endroit de vostre Majesté, et demonstration de faire leur principal fondement sur sa bonne volonté en leur endroit. Ils s'essayerent fort à me persuader que la guerre se fit communément et ouvertement par vos Majestez et eux, et que j'en devois faire instance à ma première audience. Surquoy je leur respondis ce que j'estimay estre plus selon la dignité de vostre Majesté, le bien de ses affaires et sa particulière intention; remettant le surplus à nostre première veuë, pource qu'il estoit fort tard, et les tables servies. Je ne faudray pas de tenir vostre Majesté advertie de toutes les choses qui se passeront cy-apres, comme j'ay fait de celles qui ont precedé, la suppliant de m'excuser si je suis trop long et si je remplis ce papier d'infinies choses qui pourroient estre obmises sans dommage et que j'ay seulement escrites pour faire mieux cognoistre l'humeur et le naturel de ceux avec lesquels il me convient negocier. Sur ce je prie Dieu, etc.

De Londres, ce 20 juin 1603.

## CHAPITRE CXVII.

*Lettres de Henri IV et de Ville-roy sur la mission confiée à Rosny. Présentation de Rosny au roi d'Angleterre. Lettres de ce ministre à Henri IV, dans lesquelles il lui rend compte des négociations dont il est chargé.*

Vos depesches (dont il a esté parlé au chapitre precedent) ainsi faites et envoyées, vous receustes le mesme jour, vers le soir, deux lettres du Roy, à scavoir : une en chiffre sous-signée de Neuf-ville, dont la teneur ensuit.

*Lettre du Roy à M. de Rosny, contre-signée.*

Mon cousin, depuis vostre partement je n'ay rien appris digne de vous estre escrit, qu'un advis que Arsensm'a dit luy avoir esté donné par le sieur de Bernaveld, qui est de present en An-

gleterre pour le service des Estats de Flandres ; lequel, encor qu'il m'ayt dit vous l'avoir communiqué à vostredit parlement, j'ay toutesfois estimé vous le devoir faire sçavoir, non que je le trouve veritable, mais afin que vous sçachiez que j'auray à plaisir que vous preniez garde estant sur les lieux, à ce qu'il m'a dit, que ledit sieur de Bernaveld luy a mandé avoir sceu de bon lieu que le roy d'Espagne et les archiducs ont fait dire au roy d'Angleterre et offrir que s'il veut se lier avec eux et renouveler les anciennes alliances et confederations de la maison de Bourgogne, et conquerir en mon royaume les provinces qui luy appartiennent, et dont les roys d'Angleterre, ses predecesseurs, ont esté spoliez par les miens, jusques à luy faire offre de fournir les gens de guerre et les deniers necessaires pour un tel effet, à la charge qu'il ne fera jamais avec moy, paix ny accord sans eux, et qu'il se separera entierement et ouvertement de l'amitié desdits Estats de Flandres, ausquels, s'il ne veut faire la guerre à descouvert, il ne prestera aucune sorte d'assistance par mer ny par terre, sous quelque pretexte que ce soit.

Ledit sieur de Bernaveld a adjousté à tout cela une remonstrance de l'interest que j'ay, non seulement, d'empescher ladite reünion, mais aussi de preparer et dresser au plutost une partie qui soit assez forte pour resister ausdits Roys unis contre moy. J'ay remercié ledit sieur de Bernaveld, en la personne dudit Arsens, dudit advertissement, de l'effet duquel je luy ay dit avoir peu d'apprehension pour l'estimer difficile à resoudre, et encore plus à executer, pour plusieurs raisons que je luy ay dites, que vous sçauvez bien comprendre ; et neantmoins, je luy ay dit qu'il escrive audit sieur de Bernaveld et confere librement et confidemment avec vous, et qu'il vous nomme les auteurs dudit advis, afin de pouvoir mieux juger ensemble s'il merite que l'on s'y arreste ou non. Je recognois bien que les Estats de Flandres, craignans d'estre abandonnez dudit roy d'Angleterre, ne seroient pas marris d'avancer une rupture entre moy et ledit roy d'Espagne ; car cela serviroit à divertir les forces qu'ils prevoient leur devoir tomber sur les bras, et à consoler leur peuple en le deschargeant d'une partie de la despence qu'il supporte. C'est pourquoy j'ay soupçon ce propos avoir esté avancé par ledit Bernaveld, autant par art que par science, pour commencer à me donner martel de l'union desdits Roys, et neantmoins, il me semble qu'il ne faut s'esmouvoir legerement au bruit dudit advis : aussi ne devons nous le rejeter et mespriser entierement ; car il faut tout attendre de l'inimitié que me

portent les Espagnols, et tout craindre de l'inexperience du roy d'Angleterre : c'est pourquoy je vous prie d'observer les pratiques de tous, sans toutesfois faire paroistre audit Bernaveld que j'aye opinion que ses advis soient accompagnez d'artifice. J'ay veu une fois l'ambassadeur d'Angleterre depuis vostre parlement, il m'a de nouveau asseuré de l'amitié de son maistre, et parlé de quelques affaires touchant certains particuliers qui ne meritent estre escripts. Pareillement le courrier major d'Espagne est arrivé icy pour aller en Flandres, il doit passer en Angleterre, de la part dudit roy d'Espagne, qui sera tout ce que je vous escriray presentement, avec l'occasion du parlement du sieur de Saint Luc, qui va vous trouver pour vous accompagner en ce voyage, lequel vous asseurera de la continuation de ma bonne santé. Je prie Dieu qu'il vous ait, mon cousin, en sa sainte garde.

De Saint Germain en Laye, le 12 juin 1603.

HENRY. Et plus bas, DE NEUF-VILLE.

Et l'autre lettre de la main du Roy où il y avoit quelques mots du chiffre particulier que Sa Majesté avoit avec vous, de laquelle la teneur ensuit.

*Lettre de la main du Roy à M. de Rosny.*

Mon amy, outre la lettre que je vous escrïs par la voye de M. de Ville-roy, je vous fais ces deux mots de ma main pour vous dire que vous preniez garde à deux choses, et usiez de toute industrie pour descouvrir ce qui en est ; à sçavoir, si le roy d'Angleterre et ses ministres avoient quelque dessein de s'unir avec le roy d'Espagne contre moy, ainsi que je vous l'escris plus amplement, et s'il y a quelques-uns en Angleterre qui, au nom de messieurs de Bouillon, la Trimouille, du Plessis et autres, fassent des menées pour disposer le roy d'Angleterre à se dire protecteur des huguenots de France, et nommer le comte Palatin pour son lieutenant, comme l'on m'en a donné advis, et que ces trois hommes font pis que jamais. Prenez donc garde à tout cela et en empeschez les effets ; dequoy je ne doute point si vous y employez le soin, la diligence et dexterité avec lesquelles vous avez accoustumé de manier mes autres affaires. Adieu, mon amy, que j'ayme bien.

De Saint Germain, le 12 juin 1603. HENRY.

Vous receustes aussi deux lettres de M. de Ville-roy, desquelles la teneur ensuit.

*Lettre de M. de Ville-roy à M. de Rosny.*

Monsieur, je n'estois aupres du Roy quand l'ambassadeur d'Angleterre y est arrivé ; vous verrez par la lettre que M. de Lomenie m'en a

escrite, et par le double de la lettre du roy d'Angleterre qu'il a présentée à Sa Majesté, que je vous envoie, le sujet de son audience, et s'il survient quelque autre chose, je vous en tiendray adverty. Quant aux prestres seculiers anglois, le Roy en a entrepris la défense envers le Pape, par ce qu'ils s'estoient declarez ennemis des Jesuistes et d'un certain archi-prestre que ceux-cy avoient fait creer, afin d'affoiblir la faction desdits Jesuistes, qui estoient du tout à la devotion du roy d'Espagne, et qui, favorisez de luy, avoient souvent entrepris contre l'Estat et la personne de la feuë reine d'Angleterre. Les trois prestres qui passerent à Rome pour cette cause nous firent voir un passe-port de M. Cecile, ce qui fut cause que Sa Majesté embrassa plus volontiers leur protection, et aussi qu'ils protestoient qu'ils ne s'opposoient ausdits Jesuistes, que par ce qu'ils recognoissoient que ceux-cy vouloient destruire leur pays et troubler leur souveraineté sous pretexte de religion, pour faire service audit roy d'Espagne, auquel ils vouloient faire croire que la couronne d'Angleterre appartenoit. Cette défense entreprise par Sa Majesté fut bien receüe et louée à Rome, où l'ambition desdits Jesuistes, partisans du roy d'Espagne, fut decouverte et blasmée. Mais, depuis, certains mesdisans ont voulu dire que Sa Majesté avoit dressé cette partie de prestres seculiers pour s'en prevaloir contre le roy d'Angleterre apres la mort de la Reine; mais c'est chose qui n'est jamais entrée en l'esprit de Sa Majesté, ainsi que vous tesmoignera M. de Beaumont, lequel a esté informé de nos depeschés de temps en autre de tout ce que Sa Majesté a fait et dit en cecy; tellement qu'il vous en rendra bon compte, comme je feray de tout ce que vous desirerez de moy pour vostre contentement et service durant vostre absence. Je prie Dieu, etc.

De Ville-roy, ce 5 juin 1603. DE NEUF-VILLE.

*Lettre de M. de Ville-roy à M. de Rosny.*

Monsieur, ce que nous escrivons en chiffre doit estre tenu plus secret pour le respect de ceux qui en ont donné l'advis que pour autre consideration, comme vous sçavez tres-bien juger, esperant que vostre retour, voire vos premieres depeschés, nous donneront telle lumiere des choses de delà, que nous n'en jugerons pas apres à tastons, comme nous avons fait jusques à present. Cependant vous sçavez que M. de Savoye n'est venu en Savoye, comme il a esté dit, et que ceux de Geneve avec leurs allies ont plus grand besoin de faire la paix avec M. de Savoye, qu'ils n'ont de pouvoir de soustenir la guerre; tellement que je croy qu'ils recher-

cheront et embrasseront volontiers ladite paix, et que leurs amis feront bien de la leur conseiller et procurer. C'est aussi ce que Sa Majesté a commandé à M. de Vic; dequoy, s'il est pris quelque resolution devant que vous reveniez, je vous en feray part comme de toute autre occurrence, et maintenant vous serez assuré de la confirmation et de la bonne santé du Roy, comme du desir que j'ay que vous me departiez vos commandemens pour y obeyr, saluant vos bonnes graces de mes humbles recommandations; priant Dieu, etc.

De Saint Germain en Laye, le 12 juin 1603.

DE NEUF-VILLE.

Vous fustes logé au palais d'Arondel qui est l'un des plus beaux et commodes logemens, et qui a le plus de stances basses d'un mesme pied et tout d'une suite que nous ayons jamais veu. Et le lendemain le roy d'Angleterre vous donna audience en son palais de Grenvich, où vous fustes conduit dans les barges royales par le comte de Northumbelland. Il y eut une telle presse à vostre arrivée, que vous fustes un quart d'heure dans la salle sans pouvoir approcher du Roy, lequel descendit deux degrez du haut dais, pour venir au devant de vous et mesme les vouloit tous descendre pour plus promptement vous embrasser, tant il en avoit d'envie (comme vous le conta le sieur Oreladoux); mais quelqu'un de ses ministres luy dit que c'estoit trop ravaller l'esclat de sa dignité, auquel il respondit: « Quand bien « j'honorerois cét ambassadeur icy, outre la coutume ordinaire, je ne pretendrois pas qu'il deust « estre tiré à consequence par les autres, car « j'estime et ayme particulièrement cettuy-cy « pour ce que je sçay qu'il m'affectionne, pour « sa fermeté en nostre religion, pour sa loyauté « envers son maistre, pour les services signalez « qu'il luy a rendus et à sa patrie, et plusieurs « autres vertus fort recommandables. » Vous estant avancé près de luy avec la reverence convenable à sa dignité et à l'office que vous rendiez, vous luy fistes une harangue de soldat que les pedans trouverent trop courte, mais que les gens d'Estat et de Cour estimerent des mieux proportionnées à vostre condition et qualité, d'autant qu'en peu de paroles elle contenoit beaucoup de substance: de laquelle ayant retenu une coppie, nous l'avons icy inserée, estant telle que s'ensuit.

*Harangue de M. de Rosny au roy d'Angleterre.*

SIRE,

« J'aurois maintenant besoin d'une éloquence plus qu'humaine et d'une assistance toute divine pour bien représenter les hautes conceptions d'un Roy tant admirable que celui qui m'envoye vers



vostre royale Majesté, et sur tout pour exprimer suffisamment la franchise et la sincérité avec laquelle il desire de continuer, voire augmenter, s'il est possible, l'amitié, alliance et confederation, non jamais alterée d'entre vos deux Majestez, et celles tres-estroites qu'il a eues avec cette genereuse et tant celebre Reine, vostre devanciere. J'aurois encore autant de besoin d'une voix vrayement celeste et d'une abondance de paroles des plus exquises, pour rendre et donner aux insignes vertus de vostre royale Majesté (suivant la charge que j'en ay receuë du Roy, mon maistre) l'honneur, la gloire et la louange qu'elles meritent. Mais tout cela me defaillant, et par consequent la suffisance et capacité pour m'acquitter dignement de tous ces raisonnables devoirs, je supplieray tres-humblement vostre Majesté d'avoir agreable qu'en nommant vos deux personnes royales la merveille des roys de tous les siecles, je comprenne, sous ce titre sublime, la sublimité de tous les plus excellens monarques desquels la venerable antiquité a celebré la gloire, l'honneur et les louanges, qu'en continuant la charge qui m'a esté donnée de mon Roy, je die à vostre hauteuse royale, qu'autant que la perte d'une tant magnanime Reine, vostre commune sœur, luy a esté sensible et cuisante, et que sa mort luy a causé des regrets, ennuis et desplaisirs extrêmes, autant la reparation d'une telle disgrâce, par le moyen d'un si grand et tant digne successeur, l'a-elle consolé, et l'advenement heureux et paisible de vostre Majesté à tant de couronnes, luy a-il donné de joyes, de liesse et parfait contentement. Et que, pour le surplus des affaires generales, j'ay commandement expres de convenir amiablement et loyalement de toutes choses, pour l'honneur et la gloire commune de vos personnes royales, et l'assurance et felicité de vos posteritez, royaumes, sujets et bons alliez; et ce, en telle forme, maniere et façon, et d'en traiter en tel temps et lieu et avec telles personnes que vostre prudence royale me fera paroistre de l'avoir agreable. Protestant, pour ce qui regarde mon particulier, n'affectionner pas moins la prolongation de jours, felicité de regne, augmentation de sceptres et accroissement de gloire en vostre Majesté, qu'en celle du Roy mon maistre; que si vous m'estiez tel, et que je fusse vostre naturel sujet et serviteur, comme je ne manqueray d'en rendre des preuves par effets, sçachant bien que je ne dois et que je ne sçaurois rien faire de plus agreable au Roy mon maistre, comme je m'assure qu'il vous sera confirmé par ces lettres qu'il m'a donné charge de presenter à vostre Majesté, dont il y en a une de sa propre main, lesquelles je vous

supplie de recevoir avec la mesme affection et sincérité qu'elles sont envoyées et presentées à vostre Majesté. » Es mains de laquelle vous la mistes aussi-tost; puis les ayans leuës et remises es mains de M. Cecile qui estoit pres de luy, il vous usa de plusieurs complimens en forme de remercimens de la bien-veillance et honnesteté que le Roy son frere luy tesmoignoit par ses lettres et par vos paroles pleines de vertu et d'efficace (car ce furent les termes dont il usa), d'offres de semblable affection et sincérité en son endroit, et assurances d'en tesmoigner des effets, lesquels feroient paroistre qu'il n'avoit pas laissé en Escosse la passion avec laquelle il avoit tousjours chery celle du Roy vostre maistre, et désiré la prosperité de sa couronne et de ses affaires.

En suite desquelles paroles de courtoisie et civilité, vous eustes plusieurs autres discours ensemble, et vous fit une infinité de questions sur les choses du monde, trop longues à reciter, entre lesquelles il vous demanda s'il estoit vray que le Pape vous eut escrit; si vous luy aviez rendu responce, et de quels termes vous aviez usé en son endroit. Surquoy vous luy dites la verité de tout, et qu'un homme eslevé en si haute dignité entre les chrestiens, vous ayant honoré de ses lettres pleines de civilité et courtoisie, vous n'aviez eu garde de luy donner un autre titre que celui qu'il prenoit. « Voire, vous dit-il, ce nom là ne luy convient nullement; et vous, qui estes de la vraye religion, n'en sçauriez user envers un homme mortel sans offencer Dieu, lequel est seul nostre tres-sainct Pere, comme il nous a commandé de l'appeller et défendu de donner sa gloire à un autre.

« Je ne pouvois pas, Sire, dites-vous, adresser mes lettres que sous ce titre; autrement, il ne les eut pas receuës, et n'y a Roy ny prince chrestien qui n'en use de la mesme façon, escrivant au Grand Turc, et ne l'appelle grand empereur des Musulmans, qui est à dire roy des fideles: comme l'on voit parmy nous des roys et des princes qui prennent le titre de royaumes ausquels ils n'ont ny droit ny propriété, et si on ne laisse pas, en leur escrivant, de leur donner la qualité qu'ils s'attribuent. » Il vous parla aussi de M. du Plessis et de ce qui s'estoit passé en sa dispute, dont il tesmoigna de sçavoir toutes les particularitez; et adjousta que le Roy le devoit avoir un peu espargné, s'en estant autrefois confidemment servy, quoy qu'à la verité il eust commis deux erreurs, l'une d'avoir escrit sous son nom, avec tous les titres plus relevez qu'il croyoit avoir au royaume, contre la religion de son prince, et puis se jeter en une dispute où il falloit necessairement qu'il succom-

bast, ne pouvant avoir des juges qui ne le condamassent ou ne fissent tort à leur Roy. « Aussi « m'a-on dit, ce vous dit-il, que, quand il se vit « ainsi mal-mené, il demeura tout interdit, et « défendit depuis si mal une si bonne cause, que « ce fut pitié. »

Il se passa plusieurs autres tels propos entre vous deux, trop longs à reciter pour estre de peu de consequence, ausquels furent tous presens le prince Henry de Nassau et autres ambassadeurs des Estats, mais comme cachez et travestis, d'autant qu'ils n'avoient point encor pû avoir d'audience, et mesme avoient sceu que le roy d'Angleterre, soit par artifice ou autrement, afin de se faire plus solennellement rechercher par le roy d'Espagne, ne parloit jamais d'eux qu'avec quelque espece de blasme et de mespris, ne les nommant quasi point autrement que rebelles à leur prince.

Or, avons nous oublié à vous ramentevoir que le jour de devant vostre audience ces messieurs les Estats vous estoient venus visiter avec demonstration de grande allegresse de vostre venue, accompagnée d'une infinité de belles paroles tesmoignans d'avoir conceu de grandes esperances et confiances en vostre entremise, negociation et dextérité. Les ambassadeurs de Venise et ceux du comte Palatin vous rendirent ensuite les mesmes honneurs et complimens, les derniers vous faisans de grandes instances au nom de l'electeur leur maistre en faveur de M. de Bouillon. Les particularitez desquels discours passez entre tous ces messieurs et vous, nous passerons legerement, nous contentans d'insérer icy les lettres que vous escrivistes le lendemain au Roy, où tout ce qui s'estoit passé entre le roy d'Angleterre, ces ambassadeurs et vous, est amplement narré, desquelles lettres la teneur ensuit :

*Lettre de M. de Rosny au Roy.*

SIRE,

Continuant mon premier ordre d'escire, je diray à vostre Majesté, ensuite de ma lettre du 20 de juin, comme le lendemain le sieur de Bernaveld me vint voir en particulier, et me discourut fort au long des affaires de messieurs les Estats, me representant comme, sans une assistance qu'il sçait n'estre point en eux mesmes, il est impossible qu'ils puissent conserver Ostande encore trois mois, voire mesme qu'il craint, s'ils ne sont secourus plus puissamment que par le passé, en fin leurs peuples se desesperent et precipitent en quelque resolution dommageable à eux et à tous leurs amis et voisins, voyans les preparatifs que le roy d'Espagne fait pour les attaquer, et le peu de moyen qu'ils ont de s'y op-

poser, à cause des grands frais qu'il leur a convenu faire depuis la paix de Vervins, tels que les despences de vingt ans auparavant ne revenoient point à une somme si excessive : ce qui les a si fort espuisez et endebtez, qu'il leur est du tout impossible de continuer si vostre Majesté et le roy d'Angleterre ne prenez resolution de les secourir de meilleure sorte, et tout ouvertement. Surquoy je luy remonstray qu'il ne devoit pas seulement considerer l'estat de leurs affaires et leur particuliere utilité, mais celle de leurs amis; et que pour perpetuer leur secours, il le falloit demander conforme à leurs moyens, et proportionné à la condition des temps presens; qu'il ne devoit douter de l'affection et bonne volonté de vostre Majesté, tant de fois esprouvée, mais qu'il ne falloit par mettre sur luy seul tout le faix des affaires, puis que l'utilité en estoit receuë communement, que la principale resolution dépendoit de celle que le roy d'Angleterre voudroit prendre, dont j'attendois d'estre esclaircy par luy, que j'estimois avoir eu assez de temps pour decouvrir son inclination, selon laquelle j'avois ordre de me gouverner : le priant me faire part de tous les discours qu'il avoit eus avec luy, des responces qui luy en avoient esté faites, et quelles esperances il en avoit conceuës.

Surquoy il me dit que les paroles dont le Roy luy avoit usé en particulier, et celles qu'auparavant et depuis il avoit tenuës en public touchant leurs affaires, estoient si differentes et opposées les unes aux autres, qu'il se trouvoit bien empesché d'y faire aucun solide fondement; qu'à la verité, au commencement, il monstroït ne se soucier pas beaucoup de leur salut, ayant esté emporté par ce beau nom de paix qui retentissoit dans la bouche de ses conseillers d'Angleterre; mais qu'ayant depuis oüy ses raisons, et regardé de plus près aux moyens dont il falloit user pour parvenir à cette paix tant desirée, les conditions qu'il faudroit accorder pour la rendre durable, et l'estat auquel demeroit le roy d'Angleterre si le roy de France ou d'Espagne se rendoient paisibles possesseurs de dix-sept provinces des Pays-Bas, il sembla sortir comme d'un profond sommeil, et revenant en luy-mesme, dit, qu'il vouloit mieux considerer telles affaires si importantes, et voir, avant que rien resoudre, ce qui luy seroit apporté et offert par l'ambassadeur que le roy de France avoit député vers luy, auquel il avoit volonté de parler en toute confiance, et convenir avec luy de telles conditions que les affaires communes en tirassent un établissement asseuré; qu'il estoit mesme resolu de suivre vos bons conseils, tant il vous estimoit; et assister lesdits sieurs des Estats en la mesme

forme et maniere qu'ils seroient assistez par vostre Majesté, avec laquelle il desiroit conclurre une ferme amitié et alliance indissoluble, l'estreindre par toutes sortes de bons offices mutuels, et notamment par les mariages de vos communs enfans; qu'il faisoit tel estat de la prudence, experience et bonté de vostre Majesté, qu'elle ne luy voudroit donner aucun conseil pour le regard des affaires d'Espagne, sans estre resoluë de le mettre le premier en pratique, puis qu'il avoit double raison d'estre indigné contr'eux, et se ressentir des pratiques, menées et mauvaises procedures, dont ils avoient usé contre sa personne et son Estat, et que luy n'avoit pour sujet de défiance que leurs seules maximes universelles, par lesquelles ils tiennent pour justes et legitimes toutes les procedures qui leur peuvent ouvrir le chemin à quelque accroissement de reputation ou de seigneurie, et pour y parvenir ne laissent aucune chose en arriere, ains attendent incessamment, par voyes directes ou indirectes, sur la vie et l'Estat de tous les roys et princes leurs voisins: le priant, pour cette raison, de différer encor quelques jours, et jusques à mon arrivée à tirer resolution de luy.

Ayant repris tout ce discours avec ledit sieur de Bernaveld, je luy dis que je le voyois bien fondé en grandes raisons, mais je le tenois trop sage, trop advisé et trop expérimenté aux affaires du monde et mutations ordinaires d'iceluy, pour avoir entierement estably leur salut sur la seule prudence, fidelité et affection d'autrui. Que je croyois qu'il avoit discouru en luy-mesme sur toutes sortes d'accidens et d'evenemens, et pris quelque resolution en cas, comme la chose n'estoit point sans apparence, que le roy d'Angleterre ne se voulust plus mesler de leurs affaires, et entrer en paix avec tous ses voisins; qu'il avoit de trop chers et importans gages en leur Estat pour n'avoir preveu à les asseurer; qu'il falloit tenter tous moyens avant que de se perdre absolument; que je n'estimois pas l'estat de leurs affaires si miserable, que son salut ne consistast plus qu'en un seul expedient; qu'il convenoit à la prudence humaine de souhaitter et demander le plus, avec intention de se contenter du moins quand la nécessité le requerroit: le priant de parler à moy en toute confiance, et ne me rien celer de ce qu'ils avoient sur le cœur, et de ce qu'en toute extremité ils avoient projeté de faire. Lors il me dit qu'ils estoient trop obligez à vostre Majesté, avoient trop d'assurance en sa bonne volonté, et d'occasion de m'estimer leur bon amy, pour rien desguiser et dissimuler avec moy: et qu'à la verité ils avoient préparé leurs affaires pour ne se laisser dessaisir ainsi mal à

propos et hors de saison des places d'hostages qu'ils avoient baillées à la feuë reine d'Angleterre; qu'il y avoit bien eu un traité fait avec elle, quelques articles pour la restitution d'icelles au cas qu'elle fit la paix avec l'Espagne, mais qu'ils n'estoient assez precis, speciaux, explicatifs pour les pretendre en vertu d'iceux. Que tout ce qu'il estimoit estre plus à propos de faire presentement, au cas que le roy d'Angleterre les voulut abandonner, et entretenir sincerement la paix avec l'Espagne, c'estoit de remettre sus le traité commencé par le duc de Brunsvic de la part de l'Empereur, et continué par le comte de Wandrelep, afin de leur donner moyen de respirer, mettre Ostande en sequestre où neutralité pendant le cours de cette negociation, qui arrestoit semblablement les puissantes armées que le roy d'Espagne se dispose de leur jeter cette année sur les bras et par terre et par mer, dont ils ont infinis advis de toutes parts, n'estimans pas y avoir moyen de delivrer Ostande des dangers et perils eminens qui la vont infailliblement accabler, que par le moyen ou d'une forte et puissante armée de terre qui traversast tous les pays de l'archiduc, ou fit son entrée du costé de France pour faire lever le siege à vive-force, estant du tout impossible de faire descente par mer sans constituer tout leur Estat en manifeste peril dont l'experience les a rendus sages, et connu, par les choses passées, qu'il est au pouvoir de leurs ennemis de les combattre par pieces et parties de leur armée à mesure qu'elle voudroit prendre terre.

Et combien que je ne doute point que vostre Majesté n'ait esté informée du susdit traité du duc de Brunsvic et comte Wandrelep, neantmoins j'ay estimé à propos de luy ramentevir, en general seulement, comme ils proposoient de mettre les Provinces Unies sous l'Empire, et les descharger absolument de la subjection d'Espagne; en quoy lesdits Estats ne peurent convenir, pour ce qu'ils vouloient que cela eust lieu non seulement pour les villes et pays qu'ils possèdent, mais aussi pour toutes les dix-sept provinces des Pays-Bas, disans, pour leurs raisons, qu'ils ne s'estimoient pas autrement en seureté tant qu'ils auroient pour voisin un prince qui pretend estre leur legitime seigneur, et qui, pour cette raison, et moyennant la facilité que luy en donneroit la communication libre qu'une paix apporte, ne manqueroit jamais d'intelligences, et de faire menées et pratiques dans leurs provinces pour se les approprier. Voila ce qui s'est passé entre le sieur Bernaveld et moy.

L'apresdisnée, le secretaire, resident icy pour la seigneurie de Venise, me vint visiter, et me

tint plusieurs discours sur l'Estat present des affaires, et notamment sur l'incertitude où chacun estoit de la resolution de ce prince, à cause des differents langages dont il usoit; semblant qu'il eut pour seul but et dessein principal de ne se laisser encor entendre ny cognoistre absolument, et qu'ayant passé toute sa vie en simulations tres-profondes, lesquels luy avoient bien et heureusement réussi, il estimoit peut-estre necessaire de continuer cette forme de proceder jusques à ce qu'il pust mieux cognoistre l'humeur de ses nouveaux sujets, la disposition des affaires generales et l'inclination des autres grands princes ses voisins, avec lesquels il procederoit apres, selon qu'il jugeroit sa seureté et son utilité le requerir. Tout le reste ne furent que paroles generales tesmoignans l'affection de la seigneurie à l'endroit de vostre Majesté, et les jalousies et defiances qu'elle avoit du roy d'Espagne, sauf qu'il me dit avoir appris de bon lieu que les ambassadeurs de l'electeur Palatin avoient usé de grandes supplications, afin d'obtenir du roy d'Angleterre qu'il voulut s'employer à bon escient pour le duc de Bouillon, mais qu'ils n'en avoient pû tirer aucune satisfaction, ains au contraire leur avoit respondu qu'il ne s'en vouloit mesler aucunement, et n'estimoit utile ny honorable à un grand prince de s'entremettre envers un autre des affaires d'un sien sujet rebelle et desobeissant.

Peu apres que ledit secretaire de Venise eut pris congé de moy, un gentil-homme du Roy d'Angleterre me vint trouver de sa part et me dit qu'il envoyoit scavoir de mes nouvelles, et comme j'estois logé et accommodé; qu'il me prioit de ne m'ennuyer point, et que sans faillir j'aurois le dimanche ensuivant, 22 de ce mois, audience; que, cependant, il m'envoyoit la moitié du cerf qu'il avoit couru le mesme jour; que c'estoit le premier qu'il avoit jamais pris, n'y en ayant presque point en Ecosse, et estant le seul qu'il avoit chassé en Angleterre; qu'il attribuoit à mon heureuse arrivée en ce royaume cette bonne fortune; qu'il jugeoit bien que vostre Majesté estoit le roy des veneurs, puis que la seule personne de celuy qui le representoit en son royaume luy avoit causé cette heureuse prise. Surquoy j'usay de tous les plus honnestes remerciemens et civilitez dont je me pûs adviser, et entre autres luy manday que je me confirmois de plus en plus en l'esperance et au desir que j'avois tousjours eu de voir vos Majestez bien unies d'amitié, et demeurer en perpetuelle intelligence, pour ce que la conformité des mœurs apportoit ordinairement de si heureuses correspondances; paroles dont j'usay expres, d'autant

que j'ay sceu qu'il n'y a rien où il prenne si grand plaisir, ny où il se glorifie davantage, que quand on le compare en quelque chose à vostre Majesté.

Je luy manday aussi que je ne craignois qu'une chose, à sçavoir, qu'il se meust de grands debats et contentions entre vos Majestez, à qui aymeroit mieux la chasse, et avoit plus de science en un tel exercice; toutesfois, qu'au pis aller, il faudroit choisir des arbitres pour vous accorder, à quoy j'estimois estre fort propre, puis que ceux de cette qualité doivent estre sans passion ny affection, comme j'estois au fait de la chasse, et que je n'avois trouvé vostre Majesté contraire à luy qu'en une seule chose, qui est d'attribuer à mon arrivée en ses pays la bonne fortune qu'il avoit eue en la prise du premier cerf qu'il avoit couru en son nouveau royaume, et que, tout au contraire, vous estimiez ma presence de mauvaise augure à la chasse, et me renvoyiez ordinairement au logis manier d'autres affaires où mon entremise fust plus heureuse.

J'oubliois à dire à vostre Majesté qu'apres que le secretaire de Venise m'eut laissé, le comte d'Arambergue m'envoya visiter de sa part, me priant de l'excuser s'il n'estoit venu luy-mesme, et qu'il s'en acquitteroit si tost qu'il auroit eu sa premiere audience, estant chose accoustumée de n'user d'aucune visite, sinon apres ce temps-là; qu'il se resjouyssoit de ma venue en ce pays, s'assurant de ma bonne intention à la conservation de la paix et tranquillité publique, et me prioit de croire que je trouverois tousjours les archiducs ses maistres disposez à me faire plaisir et courtoisie, et luy à me rendre tous les services dont il se pourroit adviser, tant pour la consideration de mon merite particulier, que pour représenter la personne d'un si grand Roy, avec lequel il estimoit ses maistres en tres-bonne amitié et correspondance. J'usay, pour response, de toutes les courtoisies et belles paroles dont je me pus adviser, pour luy persuader que je croyois ce qu'il m'avoit mandé pour en avoir veu des tesmoignages manifestes en toutes ses paroles et actions. Et peu apres, je l'envoyay visiter par un gentil-homme, qui luy porta mesmes offres et mesmes remerciemens de ma part, et quand et quand, la moitié de la venaison que le Roy d'Angleterre m'avoit envoyée, dont je luy mandois luy avoir bien voulu faire present, tant pour le gratifier et luy tesmoigner mon affection à son service, que pour luy faire part des faveurs et courtoisies que je recevois du susdit Roy, desquelles je m'asseurois qu'il se resjouyroit aussi bien que moy, y ayant si bonne amitié entre nos maistres et entre nous-mesmes.

J'ay cy-devant escrit à vostre Majesté comme j'avois fait entendre à M. de Beaumont que j'avois charge expresse de comparoistre en habit de deuil en ma premiere audience, et comme il m'avoit fait response qu'il n'estimoit pas que ce fut chose agreable ny bien receuë en cette Cour, me priant de luy permettre d'en escrire à ses amis, afin de ne commencer pas mon ouvrage par une offence; ce que je trouvay fort bon, et de fait il en escrivit au chevalier Asquins et autres, dont il n'eut response le jeudy, vendredy, ny samedy tout le long du jour. Si bien que me separant le soir d'avec la noblesse qui m'accompagne, je les priay de s'habiller tous de deuil, et qu'il m'estoit ordonné par vostre Majesté de comparoistre en cet estat, à quoy chacun se resolvoit; mais sur les onze heures du soir, ainsi que je me mettois au liet, M. de Beaumont m'envoya une lettre du chevalier Asquins, par laquelle il me prioit, au nom de Dieu, de me divertir de ce dessein, et d'empescher que, pour chose de nulle substance, j'alterasse la bonne disposition du Roy son maistre. J'avois desja apprins de plusieurs, mesmes du vicomte Savart, du sieur de La Fontaine, des deputes des Estats, et du sieur Stafford, qui m'avoit envoyé visiter, et qui se monstre fort vostre serviteur, qu'ils tenoient cette procedure comme une espece d'affront, et un reproche public du peu de devoir qu'ils avoient rendu en cet endroit, et pour causer alteration parmy le peuple, luy faisant recognoistre l'obmission d'une telle civilité, respect et ceremonie accoustumée entre les princes.

Sur lesquelles raisons ayant consulté avec ledit sieur de Beaumont et autres vos serviteurs, par leur advis je me resolu de mander à la noblesse (dont la plus part estoient desja vestus en deuil) qu'ils eussent à changer de vestemens, ce qu'ils firent; et chacun se para comme il pust, convertissant nostre pleur en allegresse. Quoy que ce soit, tout le monde a sceu le commandement que j'avois, et que j'en ay changé la forme à l'appetit d'autrui; tellement que cela ne laissera de produire le mesme effect dans l'esprit des hommes, et peut-estre avec plus de vertu, encor que peu de personnes osent faire ou fassent mention de la defuncte Reine, estant sa memoire et tous ses gestes tant recommandables, ensevelis avec sa personne. Je supplie vostre Majesté me pardonner si en cela j'ay manqué à ses commandemens, lesquels je n'ay pas estimé devoir estre si absolus en pareille charge qu'en celle dont il luy a pleu m'honorer, que les occasions et les accidens inopinez n'y puissent changer quelque chose, principalement quand elle n'est point substantielle, et plutost pour la bien-

seance que pour la necessité ou utilité qui en revienne, Si j'ay failly, je me sousmets au chasiment, sinon, que par le reste de mes procedures et par ce qui réussira de ma negociation, il apparaisse que j'ay prudemment fait.

Le dimanche, 22 de ce mois, le sieur Loucnar me vint voir et tesmoigner le contentement qu'il recevoit du changement que j'avois resolu en la forme de nous habiller, et me dire, de la part du Roy, qu'il me donneroit audience sur les trois heures, et qu'il avoit charge de me faire preparer des carrosses et des barges pour aller prendre la Tamise pour me porter à Grenvich; que le comte d'Erby viendrait jusques à mon logis pour m'accompagner, et celuy de Northumbelland me recevoir sur le bord de la riviere à Grenvich pour me conduire vers Sa Majesté, ainsi qu'il fut fait; trouvant, à l'accoustumée, une infinité de peuple parmy les ruës, dont la pluspart me benissoit et donnoit mille louanges. Je trouvay le semblable sur la Tamise, et à mon arrivée à Grenvich, une telle presse que nous ne pouvions quasi passer. J'avois avec moy plus de six vingts gentils-hommes ou qui en portoient la mine, avec lesquels je fus mené en une chambre pour me reposer, ou la collation me fut offerte; car, jusques à ce jour, l'on ne m'avoit présenté un verre d'eau; et ont resolu de ne traiter aucun ambassadeur.

Peu apres le roy d'Angleterre m'envoya appeler et fus conduit dans une salle, où, tant à cause de ceux qui y avoient desja prins place, que de la noblesse françoise qui marchoit devant moy, je trouvay tant de presse que je ne pensay jamais parvenir pres du Roy, auquel, apres les reverences deuës, je luy fis une petite harangue fort succinte, telle que vostre Majesté le verra par la copie que je luy en envoye. Et puis, en discourant, luy dis que vostre Majesté s'estoit infiniment resjouye de la promptitude avec laquelle tous ses sujets l'avoient recogneu, et attribuoit tant de benedictions à la bonté de Dieu, à sa prudence et à la cognoissance qu'on avoit de ses vertus, lesquelles aussi vous avoient fait desirer son amitié et souhaitter tellement sa prosperité, grandeur et bonne fortune, que s'il eust eu besoin de vostre Majesté pour la faciliter, vous y eussiez porté vostre personne et tous vos moyens, ce qui vous faisoit esperer et croire asseurément qu'il se feroit entre vous une telle confirmation d'amitié et d'alliances, que tous vos peuples auroient sujet d'en louer Dieu eternellement.

J'adjoustay encor plusieurs autres complimens que je n'ay voulu icy rapporter de crainte de vous ennuyer, mais que je feray voir à vostre

Majesté quand il luy plaira; et croy qu'elle trouvera mes paroles conformes à ce qui luy sera représenté estre plus selon l'inclination du prince auquel je voulois complaire, comme j'en avois le commandement expres de vostre Majesté. Mais luy, sans reprendre aucuns des points de ma harangue ny de mes discours, ny me faire aucune mention de la reine d'Angleterre, me dit en substance, qu'il desiroit vivre en toute amitié et bonne intelligence avec vostre Majesté; que quand il auroit trouvé l'Angleterre et la feuë Reine en guerre avec la France, que neantmoins il estoit obligé, par l'amitié et fraternité que comme roy d'Ecosse il avoit inviolablement gardée avec vous, premierement comme roy de Navarre et depuis comme roy de France, de vivre maintenant en bonne paix et union, estant plus raisonnable que les choses si saintes et si desirables unissent à elles et changeassent la nature de leurs contraires, que non pas le mal aneantist et convertist le bien en sa propre substance (car ce furent ses mots propres) : mais qu'il n'estoit pas en ces termes avec vostre Majesté, ayant trouvé l'Angleterre en bonne union avec elle aussi bien que l'Escosse; ce qui luy donnoit double sujet de ne manquer en aucune occasion par laquelle il vous pust tesmoigner combien il tenoit chere vostre amitié et alliance, et en desiroit la conservation.

Après, estant monté sur les degrez du haut dais avec luy, nous nous mîmes à discourir de choses generales, et commençay par luy dire que je me resjouyssois infiniment de ce que Dieu me donnoit le moyen de luy tesmoigner, par presence, le tres-humble service que je luy avois tousjours et de longue main particulièrement voüé; que je recevrois autant de contentement de sa bonne fortune que j'avois fait lorsque je vis la France entierement reduite sous vostre obeysance, et que j'esperois luy rendre preuve, par toutes sortes d'effets, qu'il n'avoit sujet qui souhaitast plus sa grandeur que moy, tant pour mon inclination naturelle, que pour ce que je sçavois telles procedures estre fort agreables à vostre Majesté. Il me respondit qu'il sçavoit vous estre fort obligé, et à moy particulièrement; qu'il en conserveroit la memoire eternelle pour s'en revenger par toutes sortes de bons effets et offices dignes de telles faveurs et courtoisies; qu'il n'avoit pas tenu à l'artifice de plusieurs que cette creance ne luy ait esté ostée de l'esprit; qu'infinies fois on luy avoit mandé, et de France mesme, que vostre Majesté ne l'aymoit point, que je parlois de luy mal à propos et comme par mespris, et que mesme mon frere, à son retour, en avoit fait plusieurs plaintes et tenu

plusieurs discours fort à son desavantage : tellement qu'il fut un long-temps qu'il n'en sçavoit qu'en croire, n'ayant, comme il estimoit, donné aucun sujet à vostre Majesté ny à aucun de nous de le traiter ainsi; mais que s'estant depuis mieulx informé, il avoit descouvert que cela procedoit de l'astuce et finesse de vos ennemis communs, et du reste des mauvais François qui estoient encore en France, lesquels ne taschoient qu'à vous alterer l'un contre l'autre et vous desunir, pour profiter et tirer advantage de vostre ruïne commune. Mais qu'il esperoit que leurs intentions, estans bien descouvertes, elles produiroient des effets tous contraires, donnans sujet à vos deux Majestez de s'unir et se lier de tant plus grande amitié, afin de resister communement aux pernicious et ambitieux desseins de ceux qui, pour aspirer à la monarchie de la chrestienté, l'avoient continuellement troublée par guerres et seditions, employans toute leur industrie à pratiquer des revoltes et assassinats dans les pays de leurs voisins; que le roy d'Espagne, à present regnant, n'avoit pas grande vigueur de corps ny d'esprit pour faire des progrez semblables à ses predecesseurs, et qu'il y avoit bien moyen de l'en empêcher.

Je luy respondis que je me resjouyssois de luy voir la cognoissance si entiere du naturel des Espagnols, et qu'il estoit bien-heureux d'en avoir fait son apprentissage par les travaux et les miseres d'autrui : qu'ils faisoient semblant de se plaindre de vostre Majesté, mais que c'estoit pour couvrir le sujet qu'elle avoit de se douloir d'eux : que vous esperiez, apres la paix de Vervins, de vivre en repos, delivré de tout autre soin et sollicitude, sinon que de soulager vos sujets et restablir les ruynes que tant de longues guerres avoient causé en vostre royaume; mais que tout soudain vous recogneustes qu'il vous convenoit vivre avec plus de prudence et de circonspection qu'auparavant, pource que de toutes parts les menées des Espagnols vous furent descouvertes, tantost sur vos villes, tantost en divertissant vos principaux sujets de leur devoir, ayant mesme suscité le duc de Savoye à vous refuser ce qui si justement vous appartenoit, et dont il avoit convenu par traité fait expres, le secourant puis apres tout ouvertement d'hommes et d'argent, et, qui plus est, contre tout honneur et bien-seance requise entre si grands princes, il avoit pratiqué le duc de Biron et quelques autres seigneurs de vostre royaume, pour renverser vostre Estat s'en dessus dessous. Mais que vostre Majesté ne trouvoit plus estranges toutes leurs procedures, puis qu'ils tenoient pour maximes ordinaires de ne promettre ny

traiter aucune chose avec leurs voisins, qu'ils ne minutassent quand et quand de n'en rien observer, et de profiter en toute occasion de la confiance qu'on prendroit en leurs paroles, ce qu'il me dit cognoistre fort bien, et me tint tel langage contre le roy d'Espagne et les archiducs, que nul, se fondant sur iceux, ne le pourroit tenir que pour leur grand ennemy, et faut qu'il soit merveilleusement corrompu et dissimulé ou lasche de courage, s'il n'en produit les effets en temps et en saison.

De ce discours, nous passasmes à celui de la chasse, où il me tesmoigna porter une tres-grande passion; et reprenant ce que je luy avois mandé lors qu'il m'envoya sa venaison, il me dit qu'on luy avoit bien dit que je n'estois pas grand chasseur, mais que j'estois bon à tant d'autres choses, qu'un prince devoit tousjours faire cas d'un tel serviteur. Que ce qu'il m'avoit mandé touchant la prise du cerf, qu'il attribuoit à mon arrivée en son royaume, il ne l'avoit pas attribué à moy comme à M. de Rosny mauvais chasseur, mais comme à l'ambassadeur du plus grand Roy et du plus grand veneur du monde; qu'il vous pardonnoit si vous ne me desiriez pas souvent à la chasse, pource que je vous estois plus utile ailleurs; et que si j'estois grand chasseur, vostre Majesté ne le pourroit pas estre si souvent, pource que vos affaires vous occuperoient davantage, desquelles vous estes soulagé par mon assiduité et fidelité. Surquoy je luy respondis que vous aymiez bien toutes sortes de passe-temps et d'exercices honnestes; mais que cette affection ne vous divertissoit point de la plus necessaire en un prince, qui est du soin et de la cognoissance generale et particuliere de toutes ses affaires d'importance: que c'est en quoy vostre Majesté estoit admirable, ayant un esprit merveilleusement penetrant, et une dextérité incroyable à choisir entre plusieurs advis et conseils celui qui est le plus utile: que les princes sages et advisez en usent tousjours ainsi, ne se confians et ne se remettans jamais tellement sur la capacité de leurs serviteurs, qu'ils n'en voulussent cognoistre toutes les procedures, et que, pour mon regard, je n'avois nul plus grand contentement, sinon lors que vostre Majesté vouloit entendre les particularitez des affaires dependantes de ma charge, et que tout homme de bien et bon serviteur devoit avoir ce mesme desir; et non faire comme le roy d'Espagne et le duc de Lerme, ainsi qu'il avoit remarqué luy-mesme en parlant d'eux.

Lors il me dit que j'avois eu bien de la peine à regler les desordres que j'avois trouvez au fait des finances, et qu'il m'avoit fallu avoir l'esprit

bien ferme et resolu, pour resister à tant d'importunité des plus grands de France; et là dessus me raconta mille particularitez dont mesmes il ne me souvenoit plus. Apres (comme sa coutume est de changer souvent de discours et interrompre ce qu'on luy veut dire sans en attendre la conclusion) il me demanda comment se portoit vostre Majesté; et en paroles couvertes, je vis bien qu'il vouloit apprendre de moy s'il y avoit seureté en vostre vie, pource qu'aucuns malicieux, ainsi que j'avois bien sceu, luy avoient fait entendre, par diverses personnes, qu'elle n'estoit nullement assurée, et que l'on en avoit mauvaise opinion depuis vostre derniere maladie: ce qu'on m'a dit qui luy avoit fort travaillé l'esprit et rendu si irresolu en ce qu'il devoit traiter avec vostre Majesté, craignant qu'après avoir rejeté l'amitié des autres princes et posé son seul fondement sur la vostre, il fust à recommencer s'il venoit faute de vostre personne, n'estimant pas les choses assez establies en France, pour faire que la presence d'un enfant les pust conserver en leur entier, ny se porter aux mesmes desseins de vostre Majesté.

Dequoy me ressouvenant, je luy donnay toutes sortes d'assurances, le priant de ne prendre garde à ces bruits incertains; que les personnes de nos roys nous estoient si cheres et si sacrées, que le moindre mal qu'ils avoient nous faisoit tout apprehender; mais qu'il s'assurast sur ma parole, d'autant que j'avois une parfaite cognoissance de son entiere santé. Lors il me dit qu'il estoit bien marry d'une chose que l'on luy avoit ditte, qui est, que vos physiciens (car il usa de ce mot, voulans dire vos medecins) vous avoient défendu d'aller à la chasse. Surquoy je luy repliquay que c'estoit plutost par prudence et par prevoyance, que par nécessité ou besoin, et que c'est chose qu'on luy devoit conseiller à luy mesme, aussi bien qu'à vous, puis qu'il luy en estoit pensé advenir un si fascheux accident. Lors il me conta comme il s'estoit presque rompu un bras, puis en suite il me dit: « Hé bien! « vous avez envoyé de ma chasse au comte d'Arambergue, comment pensez-vous qu'il ayt pris cette courtoisie? Elle ne luy a nullement esté agreable, et dit que vous l'avez fait pour monstre qu'on faisoit plus d'estime de vous que de luy. Enquoy il a raison; car je sçay bien faire difference entre le Roy, mon frere, et ses maistres, qui m'ont envoyé un ambassadeur qui ne peut aller ny parler; il m'a demandé audience dans un jardin, parce qu'il ne peut monter au logis. » Puis s'enquistant de moy si l'ambassadeur d'Espagne avoit passé en France, je luy dis que ouy, et il recit de ce que

j'en avois appris; lors il repliqua : « On m'en-  
« voye un ambassadeur courrier, afin qu'il aille  
« plus viste, et qu'il fasse nos affaires en poste. »  
Bref il ne tomboit fois sur le roy d'Espagne et  
ses affaires, qu'il n'en parlast comme par mes-  
pris et desdain; ce que j'estime qui n'estoit pas  
trop desagreceable au comte de Nassau, qui estoit  
fort proche de nous, et pouvoit entendre quasi  
tous nos propos; lesquels continuant, il me de-  
manda si j'avois esté au presche à Londres. A  
quoy luy respondant qu'ouy, il me dit : « Vous  
« n'estes donc pas resolu de quitter la religion  
« comme l'on m'avoit dit, et faire ainsi que  
« Sancy avoit fait, pensant que c'estoit un moyen  
« pour asseurer sa fortune; mais que Dieu luy  
« avoit envoyé le contraire. » A quoy je luy dis  
que je n'avois point encor songé à tels change-  
mens; mais que le bruit en couroit, pour ce  
qu'on me voyoit fort familier et amy de plusieurs  
ecclesiastiques en France, et mesmes fort sou-  
vent visité du nonce du Pape.

Surquoy il me demanda si, parlant à luy,  
j'appellois le Pape sa Sainteté; à quoy je luy  
respondis que, discourant avec ceux de cette  
qualité, je me conformois ordinairement à leur  
façon de parler : lors il me dit que c'estoit of-  
fencer Dieu d'en user ainsi, et qu'il n'y avoit  
sainteté qu'en luy seul : sur ce je repliquay que  
j'en usois comme l'on fait avec certains princes  
qui pretendent aucunes couronnes et royaumes  
leur appartenir, dont la possession est entre les  
mains d'autrui, et que, neantmoins, pour ne les  
offencer de gayeté de cœur, on ne laisse pas de  
leur donner le tiltre qu'ils s'approprient eux  
mesmes.

Après il me demanda où estoit M. du Plessis,  
et me tesmoigna avoir quelque soin de sa for-  
tune et de sa condition, disant qu'il vous avoit  
fait autresfois de bons services, qui meritoient  
qu'il ne fust pas oublié du tout; que, neantmoins,  
sa faute estoit tres-grande, ayant fait imprimer  
un tel livre sous son nom, obligeant par là vos-  
tre Majesté, à cause des qualitez qu'il prenoit en  
l'intitulation, de faire contre luy ce qu'elle a fait  
depuis. En tous nos discours, il ne parla en au-  
cune façon des Estats ny de M. de Bouillon,  
mais, après avoir un peu blasmé M. de Savoye,  
taxé son esprit inquiet, son infidelité et son am-  
bition, desquels, comme il me dit, vostre Ma-  
jesté l'avoit fort bien sceu chastier, nous eusmes  
encore quelques propos communs de nulle con-  
sequence, puis il me dit qu'il s'en alloit temps de  
souper et de m'aller reposer; que en peu de  
jours il me verroit et discourrions ensemble plus  
à loisir et en particulier, puis se retira dans son  
cabinet. Lors je fus salué de quelques seigneurs

particuliers, entre autres, de l'admiral Haouard,  
du milord Montjoye, de M. Stafford, du grand  
chambellan et du chevalier Asquins, lequel, me  
conduisant jusques hors du logis du Roy, m'as-  
seura d'estre fort vostre serviteur, et qu'il n'ob-  
mettroit rien de ce qui estoit en sa puissance,  
pour faire en sorte que vostre Majesté et son  
maistre fussent bien liez par une estroite et par-  
faite amitié et eussent communs amis et com-  
muns ennemis. Le comte de Northumbelland me  
conduisit jusques au batteau, et, en chemin, me  
pria d'asseurer vostre Majesté qu'il estoit son  
serviteur en tout et par tout, et qu'il ne se pre-  
senteroit jamais occasion de le tesmoigner, qu'il  
n'y employast librement sa vie; qu'il desiroit  
faire amitié particuliere avec moy, et m'entre-  
tenir seul à seul, sur l'estat des affaires. Il est  
homme d'esprit, de credit, et tenu pour un des  
plus habiles, puissans et courageux seigneurs  
d'Angleterre, assez mal content du Roy et du  
present gouvernement. Par des mots et des dis-  
cours à moitié interrompus, il me monstra n'ay-  
mer ny n'estimer pas trop le Roy son maistre,  
et blasma une grande partie de ses actions et  
deportemens. A quoy je respondis fort sobrement  
avec la consideration necessaire en telles actions.

Voilà, Sire, ce qui s'est passé devant mes  
yeux et à mes oreilles, ouvertement, publique-  
ment, et en verité depuis la dernière lettre que  
j'ay escrite à vostre Majesté. Et voicy mainte-  
nant marcher en campagne les incertitudes or-  
dinaires du monde, les mescontentemens publics  
et privez, les jalousies et envies des courtisans,  
et les broüilleries domestiques et du cabinet,  
non entierement esclaircies, ny si bien discu-  
rées et particulièrement représentées, qu'il seroit  
necessaire pour en pouvoir faire un jugement  
certain; mais selon que je les ay pû apprendre  
diversement par-cy par-là, tantost des amis se-  
crets, tantost de ceux qui veulent feindre de  
l'estre, et le plus souvent de ceux qui sont mal  
contens des personnes et du gouvernement pre-  
sent, et ausquels toute mutation seroit agreable.  
Premierement donc, je voy quasi chacun reveillé  
de ce sommeil où la vanité du conseil d'une neu-  
tralité et d'estre en amitié avec tous, les avoit  
enveloppez; plusieurs commencent à dire que  
cela n'est pas possible, et à regretter le courage  
et la resolution de la Reine, et nommément les  
femmes qui, estans instrumens foibles en affaires  
solides, sont neantmoins tres-forts et puissans  
aux broüilleries du monde, et principalement la  
Reine s'en meslant, comme chacun le croit et non  
sans fondement. Car il paroist une certaine an-  
tipathie entr'elle et son mary, qui ne produira  
pas de petits effets avec le temps, si par une



grande prudence il n'y est remédié; car cette femme est d'un naturel hardy et fort entreprenant, et le Roy fort doux et timide, et qui, absent d'elle, la cognoist bien et prend de belles résolutions sur la forme de vivre qu'il luy doit prescrire; mais l'ayant pres de luy, s'y laisse entièrement posséder et ne luy peut rien celer ny refuser. Desja, contre son expres commandement, elle s'est accompagnée, pour le venir trouver, des comtes d'Ortenay et de Liscoit, Escossois, et a pris un grand chambellan pour sa maison, outre le gré du Roy son mary. Dequoy il s'est fort irrité contre le duc de Lenos, qu'il avoit envoyé vers elle pour luy faire entendre ses intentions, et l'a fait repartir dès le lendemain de son arrivée, pour retourner la trouver, afin de la faire obeyr absolument; ce que chacun juge fort difficile et qui embarrassera merveilleusement l'esprit de ce prince et de tous les courtisans; mais principalement celui du sieur Cecile qui, par une prudence (laquelle ne se trouvera pas, ce dit-on, bien compassée en toutes ses parties), s'est séparé d'intelligence quasi de tous ses anciens amis, et s'est uny avec les deux factions Escossoises qui se sont formées depuis l'advenement de ce Roy à la couronne d'Angleterre, de l'une desquelles est comme chef le duc de Lenos, et de l'autre le comte de Mare, lesquelles, quoy que non directement opposées en ce qui est des affaires generales, ne laissent pas d'avoir des defiances, envies et jalousies entr'eux, à qui aura le plus l'oreille de leur maistre; lesquelles ledit Cecile essaye d'esteindre tant qu'il peut, afin de les réunir entièrement; voire se persuader avoir tant de subtilité et d'artifice, qu'il pourra manier, ensemble, le Roy et la Reine; laquelle enfin s'est saisie de son fils en ce voyage, faisant semblant de le posséder entièrement. Elle fait apporter avec elle, tout mort, l'enfant dont elle est accouchée, afin de faire voir au Roy que ce n'est pas une fausseté, comme on luy avoit voulu persuader, et dit-on qu'elle veut eslever son fils à la faction d'Espagne, quoy que l'on le tienne de toute contraire inclination et d'un esprit inquiet, mais grandement genereux, et qui est pour faire de grandes choses en vostre faveur, s'il vit longuement, disant qu'il ne veut avoir pour modele de sa conduite, que vostre seule Majesté, ce qui fait enrager sa mere, que l'on dit, à cette occasion, avoir dessein de le faire transporter en Espagne pour y estre nourry, s'appuyant pour cet effet au party des catholiques et mal-contens d'Angleterre et d'Escosse, qui ne sont pas en petit nombre.

Dequoy le Roy a prins alarme, qui s'est encore augmentée sur la découverte d'un Jesuite

anglois, qui, ayant esté prins travesty dans un vaisseau passager, et iceluy examiné, a confessé qu'il estoit ainsi travesty pour essayer de delivrer l'Eglise de l'oppression du nouveau roy d'Angleterre, s'il recognoissoit qu'il n'eust point volonté de remettre la religion catholique et ceux qui en font profession en liberté, ny de se departir du secours des heretiques des Pays-Bas.

A tout cela s'est joint la procedure du comte d'Arambergue, qui estant en effect malade, ou, comme aucuns disent, feignant l'estre, a différé de jour à autre de se presenter à son audience; ce que plusieurs, et le Roy mesme a interpreté à artifice, et pour voir cependant l'effet des promesses dudit Jesuite, qui a encore confessé qu'il y en a huit autres qui sont en ce pays avec pareille volonté que la sienne.

Quoi que ce soit, depuis tous ces bruits et mon audience, le cours des affaires faisant de plus en plus cognoistre la vanité des premieres conceptions, et estant venu advis qu'il ne viendra point d'ambassadeur d'Espagne, la face de la Cour est quasi toute changée; chacun commençant à dire qu'il n'y a pas grande seureté en l'amitié d'Espagne; que tout ce qu'ils proposent est plein d'artifice; qu'il vaut mieux continuer amitié avec la France et s'y lier à bon escient, comme il semble que l'occasion se presente de le faire avec toute seureté, n'y ayant apparence que le roy de France eust voulu deputer une personne de telle qualité, si agreable à Sa Majesté, et duquel la presence luy est necessaire en toutes ses affaires, ny que luy-mesme eust voulu prendre une telle charge, et s'esloigner de la Cour contre l'ordinaire coustume des favoris, pour estre instrument de tromperie, ou pour ne rien faire en un voyage si important, flestrir aucunement la reputation qu'il s'est acquise par ses services, ne restant qu'une chose à faire, qui est que chacun des deux Roys coure pareille fortune en toutes choses, et ayent mesmes amis et mesmes ennemis. Si le sieur Cecile peut venir à bout de gouverner longuement tant de diverses humeurs, j'estime qu'il y aura beaucoup de sagesse, et encore plus de bonne fortune en son fait, car je tiens cela pour impossible.

Aussi desja on commence à cognoistre, comme à travers un nuage, que chacun essaye de joüer au plus fin, et qu'il s'est joint avec les Escossois, seulement pour avoir entrée et se faire cognoistre au Roy; mais qu'il a dessein, apres s'estre mis en creance, d'attirer toutes les affaires à luy, en priver les autres et mesmes en descharger le Roy, comme il espere en venir à bout par l'inclination qu'il pense avoir découverte en luy de n'aymer gueres à en estre im-

portuné. Et que les autres au contraire, ont bien voulu attirer à eux ledit Cecile, afin de s'instruire aux affaires d'Angleterre, desquelles ayans eu l'intelligence ils seront bien aises de se défaire d'une ame si ambitieuse que chacun l'estime, et qui veut tousjours entreprendre et manier. A cela vient à la traverse la partie angloise, qui commence à entrer en credit pres du Roy, et se compose la pluspart des partisans du feu comte d'Essex, dont le comte de Sutenton et le milord Montjoye sont des premiers et des plus agreables à Sa Majesté. A toutes lesquelles difficultez se joignent les mal-contens, qui ne diminuent pas, mais augmentent de tout leur pouvoir les deslances et jalousies des uns et des autres. Et chacun blasme maintenant quasi publiquement la faute qui a esté faite de n'avoir porté le deuil de la mort d'une si excellente princesse que la feuë reine Elisabeth, et d'autant plus qu'ils ont sceu que je voulois rendre ce devoir si on ne m'en eust empesché. J'espere avoir demain une autre audience qui me donnera sujet de faire une nouvelle dépesche : cependant je prieray Dieu, Sire, etc.

Du 24 juin 1603, à Londres.

En attendant une autre audience dont il a esté parlé cy-dessus, vous despeschastes encore un autre courrier vers Sa Majesté avec une autre lettre que vous escrivistes seul, sans appeller aucun de nous, comme vous aviez accoustumé, ny la nous faire mettre en chiffre; de laquelle ayans neantmoins recouvert une coppie, nous avons estimé à propos de l'insérer icy, à cause de sa consequence, et qu'elle fait voir que vous n'eustes pas de petites affaires à demesler, ny manque de suffisance, et de bonne fortune pour les terminer toutes au contentement et advantage du Roy et de la France; de laquelle lettre escrite et chiffrée de vostre main, la teueur ensuit :

*Lettre M. de Rosny au Roy.*

SIRE,

Je vous envoye ce courrier expres, pour ce que depuis ma lettre du vingt-quatriesme juin escrite ce matin à vostre Majesté pour luy rendre compte de ce qui s'estoit passé depuis sa dépesche du vingtiesme, le secretaire du comte de Northumbelland (avec lequel j'ay pris de grandes habitudes, sur tout depuis qu'il a receu les presens que vostre Majesté m'avoit donné charge de luy faire, et l'ay asseuré qu'ils luy seroient continuez tous les ans en mesme sorte) m'est venu trouver de la part de son maistre comme j'estois prest de me coucher, pour m'advertir (ainsi qu'il m'a dit, et useray

de ses propres termes, afin que vostre Majesté juge tant mieux que ce qui en peut estre) que ceux qui sont au roy d'Espagne ou aux archiducs residens en la cour d'Angleterre, et les catholiques anglois avec lesquels ils ont intelligence, avoient, peu apres l'arrivée de leur Roy en son nouveau royaume, fait faire, sous-main, de grandes instances et sollicitations vers les plus confidens et familiers serviteurs, qu'ils ayent maintenant pres de luy, qu'ils sçavent estre de faction contraire à la France, ou ennemis dans leurs cœurs de la religion protestante, afin d'essayer à disposer le roi d'Angleterre à former une parfaite reconciliation, union et inalterable confederation, et correspondance entre les deux couronnes d'Espagne et d'Angleterre, pour redemander conjointement à vostre Majesté la restitution des provinces de Bretagne et Bourgongne pour la premiere; et celles de Normandie, Poictou et Guyenne pour l'autre, comme à elles appartenantes legitiment; et en cas de refus, donner une paix ou trefve supportable aux Estats des Pays-Bas, selon que les deux Roys en conviendroient facilement, puis poursuivre leurs droits par armes communes; faisans à cette fin entr'eux une ligue offensive et defensive, qui seroit à peu pres ce dont vostre Majesté m'a escrit par sa lettre en chiffre du douziesme de juin que l'on luy avoit donné avis. Mais que depuis ces gens malicieux (voyans que le roy d'Angleterre, pour avoir, comme ils s'en plaignent, l'humeur trop peu guerriere, et ne vouloir, comme il ne le celoioit pas, entrer en guerre ouverte avec personne, à son nouvel advenement à cette couronne, rejettoit toutes telles propositions, les disans prematurément mises en avant, et de telle nature qu'il y falloit penser an et jour, avant que d'y rien resoudre, voire les differer jusques à ce qu'il se vist asseuré entierement de ses peuples et eux de luy) avoient changé de batterie, et fait d'autres ouvertures toutes pleines d'artifices, captions, ruses et cautelles, par lesquelles ils asseuroient que, sans armes ny guerres, l'on obtiendrait les mesmes advantages, qui seroit de faire faire conjointement aux deux Roys (apres, neantmoins, qu'ils auroient sondé la noblesse et les peuples, et iceux trouvez disposez en grande partie à desirer la liberté) une manifestation, par laquelle ils declareroient qu'encor que ces provinces susmentionnées leur appartinssent, et par droit d'heritage, voire qu'il fust en la puissance de deux si grands Roys de se les assujettir par la voye des armes, qu'ils en avoient neantmoins une si grande compassion, sçachant qu'ils estoient leurs vrais sujets, et leur portoient une

telle amour à cette occasion, que, pour éviter les ruynes, degats et saccagemens que pourroit apporter une telle conquête à la vive force et par les armes, ils aymeroient mieux se priver de leurs propres domaines, et se departir de toutes leurs justes pretentions, moyennant que vostre Majesté se mist à faire le semblable et consentist, comme eux estoient prests de le faire, que toutes ces provinces fussent rendues libres et mises en mesme forme de gouvernement que sont les Suisses, les estats des Pays-Bas et autres communautéz franches, se conduisans par eux-mêmes et leurs officiers et magistrats, qu'ils trouveroient bon d'eslire et choisir pour cet effet, eux demeurans, par ce moyen, exempts de gouverneurs, lieutenans et capitaines royaux, de toutes citadelles, chasteaux, garnisons et gens de guerre, et francs de toutes aydes, tailles, peages, gabelles, daces, subsides et autres impôts, adjurans les trois ordres du clergé, noblesse et tiers estat desdites provinces, d'entendre amiablement à une tant raisonnable proposition, et en ce faisant secouer le joug d'une si aspre servitude que celle en laquelle ils estoient detenus, et se soustraire pour jamais de toute autre obeysance et domination que la leur propre, avec promesse authentique et solemnelle de ces deux grands Roys fraternisans en ce dessein, de leur donner toutes les seuretez requises pour l'exécution d'une tant douce resolution, et tous les secours et assistances necessaires pour les y establir et maintenir, sans que, pour y parvenir, leur intention fust de jeter un seul homme de guerre dans leurs provinces, mais user de diversions et autres voyes, qui les garantiroient de toutes oppressions, pour reduire le Roy tres-chrestien en ce plus que raisonnable devoir : lequel advis me fut encore reiteré par les milords Coban et Rolech, disans m'estre venu voir express pour ce sujet.

Or combien que ces trois hommes estans, comme j'en ay desja escrit quelque chose à vostre Majesté, des plus broüillons, artificieux et inventifs d'Angleterre, ayent peut-estre puisé tout cecy dans leur cerveau, et m'ayent tenu ce langage pour faire valoir l'affection qu'ils me disent porter à vostre Majesté, sans qu'il en ait esté jamais fait mention ailleurs; voire que quand mesme il en seroit quelque chose, tout ce profet est si plein d'extravagances et sujet à tant de difficultez, que ce seroit vainement que l'on en apprehenderoit la conclusion, et encores plus l'exécution. Neantmoins, il semble d'ailleurs que les simples paroles et discours de telles chymériques ouvertures pourroient aussi rencontrer de telles bizarres conjonctures d'affaires,

qu'elles ne produiroient rien de bon, principalement vers le Poictou, l'Aunis, la Xaintonge, le Limosin, l'Auvergne et la Guyenne, où il y a tousjours des testes chaudes, des humeurs volages et des esprits inquietez : sur tout puis qu'ainsi est (comme vostre Majesté me l'escrit par sa lettre du 9 juin dernier) que messieurs de Bouillon, la Trimouille, du Plessis et autres de leur faction et intelligence continuent encore leurs mauvaises practiques avec tant d'obstination, que de vouloir faire prendre au corps de la religion le roy d'Angleterre pour protecteur. Or combien que tels advis à moy donnez semblent entierement, comme j'ay dit, destituez de sens et de raison, voire mesme de toute apparence de possibilité, j'ay creu estre obligé d'en advertir vostre Majesté, afin qu'elle interpose son grand jugement là dessus, et y pourvoye selon sa prudence accoustumée, comme de ma part je ne manqueray de travailler pour en decouvrir davantage, et user de toute sorte de dextérité, industrie et diligence pour renverser telles menées. Dequoy j'espere que Dieu me fera la grace de vous donner contentement de mon voyage; mais je ne m'en ose vanter, de peur de fausses propheties. Sur ce, je prie le Createur, Sire, etc.

De Londres, ce 5 juin 1603.

Le lendemain le roy d'Angleterre, suivant ce qu'il vous avoit promis, nomma le comte de Northumbelland, l'admiral Haouard, le comte de Mare et les milords Montjoye et Cecile pour conférer avec vous et les ambassadeurs des Provinces Unies, car nous les vismes tous venir en vostre logis, et peu apres vous retirer dans une grande chambre au bout de la grande gallerie, qui avoit veuë sur la Tamise, où vous aviez fait vostre cabinet, dans lequel vous demeurastes ensemble enfermez plus de trois heures, et y esbauchastes la pluspart des affaires dont je remets les particularitez à la lettre que vous en escrivistes au Roy, de laquelle la teneur ensuit.

*Lettre de M. de Rosny au Roy.*

SIRE,

Continuant la suite des affaires dont il a pleu à vostre Majesté me donner la charge, je commenceray cette quatriesme lettre par la fin de ma dernière du 23 juin, et diray à vostre Majesté comme le lendemain fut faite la ceremonie de la nomination des chevaliers. Le jour mesme le Roy me fit dire que, suivant ma requisition, il me donneroit une seconde audience mercredi 25 de ce mois, à deux heures apres midy, me priant d'y venir fort peu accompagné de noblesse, afin d'éviter la presse, et pour avoir plus

de moyen de m'entretenir en particulier, et seul à seul, comme il avoit deliberé de faire en ce jour-là; auquel le milord de Humes, grand escuyer d'Escosse, que vostre Majesté a veu en France, me vint prendre en mon logis à Londres, et me mena à Grenvich, en une chambre pour me rafraischir, où peu apres le petit Edmont me vint saluer; sans que de tous ses discours je peusse rien recueillir, sinon qu'il me sembla n'estre pas des plus contens, et vouloir inferer, par les termes dont il usoit, que ses services n'estoient pas recognus, ny luy traitté comme meritoit sa grande intelligence aux affaires de France.

Ses propos furent interrompus par l'arrivée du comte de Northumbelland, qui me vint prendre, et me conduisit à la chambre du Roy, lequel commandant à chacun de demeurer, me mena seul par de petits cabinets et destours en une gallerie petite et assez mal bastie, où, apres les civilitez accoustumées, je luy dis, comme en ma premiere audience j'avois publiquement et en termes generaux seulement assuré Sa Majesté de vostre bonne disposition à toutes les choses qui seroient jugées utiles pour vous deux et pour vos royaumes, que je louois Dieu de ce qu'il me donnoit moyen d'accomplir cet office, mesme en particulier, et de m'ouvrir entierement le cœur, en luy representant au vray les plus secrettes intentions de vostre Majesté, lesquelles je m'assurois qu'il trouveroit entierement conformes à tous les conseils et deliberations où il se vouldra jeter; que je n'estois venu préparé ny disposé de le porter plus à une chose qu'à l'autre, mais que tous expediens par luy choisis vous seroient tres-agreables, comme assuré en sa prudence et bonté, qui sçaura bien proportionner ses resolutions à l'estat des affaires, à la qualité du temps et à la condition des personnes. Que pour cet effet je le suppliois tres-humblement de ne rien dissimuler de ses conceptions, me parler en toute liberté, et non seulement comme à l'ambassadeur de son beau frere, ancien et perpetuel allié, mais comme à une personne entierement sienne, qui l'avoit tousjours fort affectionné, et esté le plus desireux de luy voir succeder toutes sortes de grandeurs et de felicitéz, pour l'accroissement desquelles j'employerois en tout temps de tres-bon cœur ma vie; à quoy je m'offrois d'autant plus librement que je sçavois, en le servant, faire chose agreable à mon prince et utile à ma patrie, puis que leurs interests particuliers, maintenant devenus si communs entr'eux, donnoient sujet de les reputer, non seulement comme deux freres, mais comme une seule et unique personne.

Surquoy il me respondit qu'à la verité il avoit sujet d'estre merveilleusement satisfait de vostre Majesté et fort content de toutes mes procedures et intentions; que pour cet effet il vouloit parler à moy franchement, s'y confier entierement, et mesmes recevoir mes advis et conseils sur toutes difficultez; qu'il consideroit l'estat des affaires tel entre vous trois grands princes, qu'il estoit necessaire d'y tenir la balance égale; qu'en apparence ny vous ny luy n'estiez en guerre avec le roy d'Espagne, mais qu'en effet aucun de vous deux n'aviez aucune occasion de l'aymer ny de vous y confier, dautant que ses fins ambitieuses vous estoient tres-manifestes, et ses maximes ordinaires trop pernicieuses; qu'il y avoit grande difference d'estre en querelle et dispute avec quelqu'un, ou bien ne l'aymer et ne s'en assurer pas; que vostre Majesté l'avoit, par sa sage conduite, enseigné comme il se devoit gouverner maintenant, qui est d'essayer à vivre en paix à son nouvel advenement à la couronne d'Angleterre, comme vous avez tousjours tâché de faire depuis la paix de Vervins, preferant l'utilité presente à la haine et au desdain que vous avoient pu conciter tant de mauvaises pratiques que le roy d'Espagne a tramées contre vostre personne et vostre Estat, dont faisoit foy la guerre de Savoye et la conspiration du duc de Biron, les diverses intelligences de ses ministres sur vos villes, et la nouvelle entreprise sur celle de Geneve, qu'il n'ignore pas estre en vostre protection. Que, pour son regard, il a desja reconnu, par la prise d'un jesuite envoyé d'Espagne, qu'il ne sera non plus exempt de telles machinations que vostre Majesté, avec laquelle il veut pour cet effet (et n'y ayant rien qui vous puisse jamais alterer l'un contre l'autre) s'unir par toutes sortes de liens d'amitié, et regarder avec quelle forme de justice vous pourrez tous deux proceder, au cas qu'il soit jugé necessaire de faire la guerre ouverte contre l'Espagne; qu'il ne croit point que vous ny luy en ayez encore nul pretexte apparent, et que dès qu'il naistra, il est resolu de le prendre, pourveu que cela se fasse communément; que, cependant, il estimoit ne pouvoir faire autre chose que de continuer à vivre en paix, sans neantmoins s'assurer trop sur icelle, et ce seulement jusques à ce que les choses soient mieux establies en vos royaumes et dans les siens.

Surquoy je luy respondis que je me rejoüissois infiniment de le voir si bien disposé à l'endroit de vostre Majesté, et si veritablement informé des astuces espagnoles, des profondes simulations avec lesquelles ils font gloire de circonvenir tout le monde, et du peu de fermeté

et seureté qu'il y a en leur amitié, laquelle ils postposeront tousjours, quelque bien liée qu'elle semble estre, à toute petite utilité et accroissement de seigneurie; que je louois son intention à la paix et de ne vouloir rien faire sans justice et équité, que pour cette raison Dieu luy avoit renduë en son temps; qu'en ayant usé jusques à maintenant, il ne s'en falloit pas départir légèrement; que la paix estoit le meilleur et le plus précieux thresor du monde, pourveu qu'elle n'engendrast et tirast apres elle des guerres tres-pernicieuses, et dommages irreparables; qu'il y avoit infinies differences entre les justices des particuliers et celles des roys et des princes, lesquels, pour n'avoir autre superieur qui puisse regler leurs actions que la force et la meilleure et plus trenchante espée, reputent pour juste et pour équitable tout ce qui accroist leur reputation ou leur grandeur, et apporte seureté à eux et à leurs peuples, le regime desquels Dieu leur a commis, non pour les perdre et ruyner par trop de bonté, ny pour se laisser abuser à un usurpateur, sous-ombre de bonne foy, mais pour sagement, prudemment et avec un courage magnanime, repousser la violence des iniques, et opposer la force à la force, et la ruse à la ruse, de laquelle l'Espagne vous veut tous deux maintenant emmieller, afin de parvenir plus facilement à l'entiere conquête des Pays-Bas; lesquels ayans une fois joints à sa grande, voire infinie puissance, elle espere donner loy à la chrestienté, et se rendre formidable à tous les autres princes, voire mesme en usurper la monarchie absoluë. C'est là le fonds de leurs intentions, c'est l'ordinaire ambition et convoitise espagnole, et le premier dessein de Charles V, continué par ses successeurs, esquels les deux maisons d'Espagne et d'Austriche estans unies, il est parvenu à un tel accroissement de grandeur en moins de cent ans, que l'imagination en est espouvantable à qui doit craindre leur oppression; ayans joints à leurs petits Estats, tant par mariage que par usurpations, les dix-sept provinces des Pays-Bas, le comté de Bourgogne, les royaumes de Grenade et Navarre, de Naples, de Portugal, l'empire d'Allemagne, le duché de Milan et toutes les Indes; et qui plus est, nous l'avons veu, en nos jours, fort proche de s'approprier la France et l'Angleterre, lesquelles, s'il eust attaquées l'une apres l'autre, ou qu'il n'eust point eu les Estats des Pays-Bas pour ennemis, je ne sçay ce qui en fust arrivé, la pretention desquels il a esté contraint de cacher sous le voile d'une paix, ne pouvant ensemble resister à la fermeté desdites Provinces Unies, et à la magnanimité et courageuse resolution de vos Majestez et de

la feuë reine d'Angleterre, qui seuls lui pouvez arrester le cours impetueux de ses conquestes. Non que pour toutes ces raisons j'aye charge de vous precipiter à la guerre ouverte, mais au contraire de convenir, s'il se peut, en une paix qui vous donne à tous deux loisir de respirer, d'asseurer les affaires du dedans de vos royaumes, et de poser de tels fondemens, que si l'occasion juste s'en presente un jour, vous puissiez chasser loin de vos limites un voisin si dangereux, et establir aux Pays-Bas un prince ou une forme de gouvernement qui vous soit communément agreable, et vous delivre de toute apprehension. Pour à quoy parvenir et laisser les choses en estat necessaire, il faut regarder aux moyens de preserver ces peuples de la ruyne où il semble qu'ils soient prests de tomber, si vos deux Majestez ne leur prestant la bonne main en une sorte ou en l'autre.

Lors, le Roy prenant la parole, me dit : « Quelle sorte d'assistance jugez-vous la plus à propos, pour le roy de France et pour moy ? » « N'est-ce pas de les porter avec nous à la paix, et demeurer comme garands et cautions des conditions d'icelle ? ausquelles le roy d'Espagne venant apres à manquer, j'estime que nous aurons trouvé le sujet de luy faire une juste guerre, et de le chasser entierement des Pays-Bas. Enquoy je desire que le Roy, mon frere, convienne, et arrestions ensemble avec quelles forces et par quels moyens nous paracheverons une œuvre si necessaire, si honorable et si utile pour nous et pour tous nos peuples. »

A quoy respondant, je dis : « Qu'il ne falloit point douter que le roy d'Espagne ne fist demonstration de prester l'oreille à une telle proposition, non peut-estre pour desir qu'il eust de la practiquer, n'y pour l'estimer possible, mais pour alentir vos secours, vous amuser en des longueurs, et cependant jeter tous ses efforts contre Ostande, que j'ay appris ne pouvoir plus guerres subsister, et estre neantmoins de telle importance, qu'avec sa perte se perdra le cœur et la resolution de toutes ces provinces, desnissant la Hollande et la Zelande, et les faisant porter par pieces, ou precipiter toutes ensemble à l'obeyssance d'Espagne; auquel cas vous tombez dans peu de jours au milieu de tous les dangers et perils que vous devez les plus éviter. Surquoy je supplie vostre Majesté de faire consideration digne de sa prudence et de son courage, et de regarder en ce cas quelle resolution elle veut prendre, afin de la rapporter bien particulierement au Roy mon maltre, qui, sans aucune difficulté, n'obmettra aucune chose à faire en une telle occasion,

« dont je luy peux donner la foy et la parole. »

Surquoy ayant songé quelque peu, il me dit : Qu'à la verité il n'avoit pas encore bien resolu sur telles difficultez et inconveniens, qu'il jugeoit semblablement devoir estre tirées en consequence, et qu'il avoit tousjours attendu ma venuë pour y adviser. Lors je luy dis : Que j'estimois tant sa prevoyance et l'experience de son conseil, que je m'asseurois qu'ils auroient discouru ensemble sur toutes ces affaires, et pris tel party sur chacune de celles où il verroit l'inclination d'autrui estre portée, qu'il ne viendrait à commettre une faute si signalée, qu'elle ne se pust plus corriger : que si moy, qui n'estois que serviteur, me faisois bien fort, au nom de mon Roy, de luy donner resolution sur tous les accidens et inconveniens qu'il me pourroit proposer et objecter, que par plus forte raison luy, qui estoit maistre, pouvoit-il mettre une fois la dernière main à tels doutes et irresolutions, lesquelles continuans ne luy apporteroient, en fin, qu'une honte envers autrui et une penitence envers luy-mesme, de n'avoir plutost suivy la generosité de son courage et l'exemple de ses maieurs, que les vaines persuasions de ceux dont toute la prudence consiste plus en temporisemens et remises, qu'en executions et bon conseil. Qu'il n'estoit point du tout necessaire pour remedier à telles apprehensions de se porter ouvertement à la guerre, s'il ne vouloit : au contraire, qu'il estoit facile de maintenir les affaires en l'estat present, et pourvoir ensemble qu'Ostade ne se perdist, que les Provinces Unies ne se desesperassent, et que le roy d'Espagne ne prit tel avantage et fît de tels progres, qu'il n'eut plus rien à craindre de la France et de l'Angleterre, quand bien elles s'uniroient ensemble contre luy; estant assuré de leur pouvoir resister, avec les moyens et les forces qu'il employe maintenant en Flandres, quand il seroit delivré de cette necessité. Que j'attendois tels expediens de sa sagesse, laquelle je m'asseurois estre si grande, qu'il se seroit bien gardé de poser les principaux et uniques fondemens de son salut, sur des apparences trompeuses et des presuppositions si incertaines, que la prud'homme et la sincerité d'autrui, puis que le monde estoit tant plein de tromperie et d'infidelité.

Je luy tins plusieurs autres tels discours pour ce que je recognoissois qu'il y prenoit plaisir, et que cela luy my-partissoit l'esprit et traversoit la premiere resolution qu'il avoit prise, la balançant avec mes raisons, ausquelles ne voulant ou ne pouvant respondre sur l'heure, il me dit simplement : qu'il estoit tres-aise de m'avoir oüy, et qu'il croyoit que nous avions representé de part

et d'autre, tout ce qui se pouvoit dire sur telle matiere; qu'il ne s'en traitteroit de long-temps de plus importante, ny qui eust plus besoin d'estre bien consultée; que pour cette raison, il me prioit de luy donner loisir d'en conferer avec deux ou trois de son conseil, afin d'y prendre une dernière resolution, laquelle il me vouloit desja bien assurer ne pouvoir estre de laisser perdre Ostade, et à faire desesperer les Provinces Unies. Qu'il vouloit, en tout et par tout, s'unir avec vostre Majesté, contre laquelle il n'avoit nulle cause d'inimitié ou de querelle, ny n'en vouloit jamais avoir. Que toutes ces vieilles pretentions qui avoient alteré vos deux royaumes estoient ensevelies par le temps, par la raison, par sa propre volonté et par le jugement de celui qui transporte les sceptres d'une nation en l'autre, et en avoit donné cy-devant sentence, dont la prescription estoit plus que centenaire. Propos qu'il me repeta deux ou trois fois durant nos discours, lesquels je ne rapporte pas tous icy et de mot à mot, mais en substance seulement, afin d'éviter une trop grande longueur.

Après, il me dit que remettant à dimanche prochain les affaires generales, il me vouloit parler d'aucunes particulieres, et commencer par le duc de Bouillon, pource qu'ayant esté requis par les ambassadeurs de l'electeur Palatin, de le favoriser vers vostre Majesté, il desiroit auparavant estre informé par moy de la verité, et comme vous prendriez les prieres qui vous en seroient faites, d'autant qu'il n'en vouloit user d'aucune qui pust, tant soit peu, alterer vos amitez, n'ayant jamais estimé juste qu'un prince favorisast la desobeissance ou la rebellion d'aucun des subjects de ses voisins, principalement quand il n'est question que d'un particulier, et que pour cette raison il ne s'estoit engagé de promesse, ny ne feroit sans mon bon conseil et avis; me priant de luy donner et declarer de cette affaire ce que j'estimois necessaire luy estre representé. Enquoy je le satisfis tellement, qu'il n'estima pas vous devoir prier d'adjouter chose aucune aux offres que vostre Majesté avoit faites audit duc de Bouillon, de luy aider à se justifier lorsqu'il se mettroit en estat requis, ou de luy pardonner tout ce qu'il voudroit confesser avoir fait contre vostre Majesté, et me dit que s'il en estoit plus importuné, il respondroit avec la mesme prudence dont il s'assure que vostre Majesté a usé et usera à l'advenir, lors qu'elle sera pressée d'interceder en faveur des catholiques de ses royaumes. Auquel propos, voyant qu'il m'avoit jetté sans y penser, je luy dis, qu'à la verité vostre Majesté avoit esté suppliée de les vouloir favoriser, et qu'elle m'avoit chargé de les luy re-

commander ; mais néanmoins avec toute modération et avec le respect que méritent vos amitiés , prenant le temps à propos , et m'informant auparavant si telle chose luy seroit ennuyeuse ou non.

Surquoy il me dit qu'il en avoit bien esté adverty , et que mon entremise luy seroit tousjours plus agreable que celle de nul autre , tant pour l'amitié qu'il me portoit que pour l'assurance qu'il avoit que je serois cet office plutost par une bonne volonté en son endroit , et par consideration d'Estat et du bien de ses affaires , que par passion ou dessein de bastir avec eux aucune intelligence ou correspondance qui luy pust estre prejudiciable , pour porter dommage à l'advenir. De laquelle opinion je le remerciay , et luy confirmay le plus qu'il me fust possible , l'assurant qu'il pouvoit prendre pareille creance de vostre Majesté , laquelle n'avoit jamais favorisé aucun catholique ny autre de ses sujets ou de la feuë Reine , que de crainte qu'estant rejettés par luy , ils ne se precipitassent entierement dans la faction espagnole , qu'il estimoit esgalement dangereuse et prejudiciable a vos personnes , royaumes et sujets.

Surquoy il me respondit qu'il estoit maintenant par mes paroles si bien informé de vos intentions , qu'il ne luy restoit aucun doute en l'esprit qui luy pust faire mal interpreter les actions de vostre Majesté , à laquelle , pour plus grand tesmoignage de confiance , il vouloit declarer le fonds de son intention sur le traitement qu'il estoit resolu de faire aux catholiques de son royaume , et y apporter le changement que vous mesmes jugeriez estre necessaire , apres avoir oüy ses raisons , lesquelles il me discourut fort amplement. Mais pour ce qu'il me pria de n'en faire part qu'à vostre Majesté seule , et qu'aussi bien je ne scaurois avoir responce avant mon parlement de ce pays , sur ce que j'en pourrois escrire , je remettray le tout pour vous estre representé de bouche comme infinies autres particularitez , les unes plus et les autres moins substantielles que j'ay apprises dudit Roy , et sur tout quelques discours que nous avons eus ensemble , sans y avoir rien dit en vostre nom ; de sorte qu'en me separant de luy , Sa Majesté m'assura derechef que , sans faillir , il me feroit entendre dimanche prochain sa resolution sur tous les poincts et difficultez qui avoient esté meüés et agitées entre nous deux.

Mais ayant appris , en sortant de son logis , qu'il faisoit estat de partir lundy pour aller au devant de la Reine , où il pourroit estre retenu plusieurs jours , et qu'il seroit difficile de vuidier entierement telles affaires en une seule audience ,

je luy envoyay remonstrer et supplier quand et quand . de me vouloir donner encore une audience , avant celle de dimanche : ce qu'il me manda ne pouvoir faire . à cause qu'il avoit distribué tous les jours qui restoit entre deux , à des occupations dont il ne se pouvoit divertir ; mais que . pour me satisfaire en partie , il députeroit aucuns de son conseil pour venir le vendredy conferer derechef avec moy , afin d'esbaucher et esplucher si bien toutes les matieres dont il falloit agir que les choses en fussent mieux esclaircies et plus faciles à conclure ; dequoy je me contentay pour l'heure et me retiray à mon logis à Londres , où , suivant ce que ledit Roy m'avoit mandé , me vindrent trouver vendredy 27 de ce mois , à trois heures après midy , messieurs le milord Haouard , admiral d'Angleterre , le comte de Northumbelland , le comte de Mare , le secretaire Cecile et le milord Montjoye , lieutenant general en Irlande. Lesquels , apres les civillitez accoutumées , me dirent par la bouche du sieur Cecile , comme ils avoient esté députez par le Roy , leur maistre , pour me faire entendre l'extrême contentement qu'il recevoit journellement de toutes mes procedures , et des vrayes tesmoignages que je luy avois rendus de vostre ferme amitié , qu'il recognoissoit estre toute sincere , sans desguisement et simulation , et que jugeant maintenant les paroles et le cœur estre une mesme chose , cela l'obligeoit à y marcher de mesme pied , et vous deferer tellement que tout l'honneur de vos communes entreprises pust estre attribué aux prudents conseils de vostre Majesté , sans lesquels , et sans scavoir auparavant ce que vous jugiez le plus à propos de faire , il ne vouloit conclurre ny executer chose aucune. Qu'il me prioit donc , en continuant la mesme franchise dont j'avois usé , vouloir declarer ce que la grande experience de vostre Majesté aux affaires de la guerre et du monde luy faisoit juger de l'estat des Provinces Unies , et du moyen par lequel Ostande pouvoit estre conservé et eux tous retenus de se jeter sans vos consentemens entre les bras du Roy d'Espagne ; qu'il ne reproveroit aucun expedient venant de vostre part , mais seroit par luy suivy et réputé le meilleur de tous ceux qui se peuvent prendre.

Surquoy je leur dis que j'estois venu par deçà plutost pour consentir et accorder , que pour requerir , persuader ou conseiller aucune chose , à cause qu'à mon parlement , le Roy , mon maistre , estant fort incertain de l'estat auquel je trouverois les affaires des Pays-Bas et les volontez de l'Angleterre , pour les bruits qui avoient couru sur de certaines paroles que le

Roy, leur maistre, et ceux de son conseil avoient publiquement tenuës, il ne m'avoit rien ordonné absolument; que c'estoit donc chose vaine de me presser sur ce qu'ils m'avoient proposé, pour ce que je n'avois autre commandement, sinon de me conformer à toutes les resolutions d'Angleterre, d'en promettre l'exécution et donner les assurances requises et necessaires; que je les priois donc de n'user plus de tels artifices en mon endroit, qui me feroient enfin croire que tout leur dessein estoit de profiter par la franchise, confiance et bonne volonté du Roy, mon maistre, que, selon mon naturel libre, je n'avois pas peut-estre assez mesnagée, mais trop promptement déclarée.

Lors ils me respondirent par la mesme bouche que je ne devois avoir cette opinion d'eux; que le Roy, leur maistre, vous aymoient et honoroient trop, qu'ils avoient si bonne opinion, et aymoient tant le ministre dont il se servoit en cette negociation, que pour rien du monde ils ne le voudroient abuser; mais qu'ils trouvoient tant d'oppositions en ces affaires, et les conclusions si difficiles à y prendre, que ce n'estoit sans fondement s'ils desiroient d'y proceder meurement, et avec le conseil de tous leurs amis, entre lesquels me mettans au premier rang, ils me prioient de leur vouloir dire librement ce que j'estimois qu'ils deussent faire, et quel party ils devoient choisir des quatre qui avoient esté ouverts; que, quant à la continuation de la guerre, sans nous, c'estoit chose dont il ne falloit nullement parler, et à quoy il me seroit impossible de les porter; qu'il y avoit maintenant trop bonne amitié entre nos maistres, et qu'ils estoient trop communs en mesmes interests pour les faire user de diverses procedures; qu'ils nous aymoient et estoient tellement, qu'ils vouloient nous imiter en toutes choses et courir semblables fortunes; qu'ils avoient esté trop long-temps en solitude, et qu'ils estoient resolués maintenant d'avoir des compagnons, tant en bonne qu'en mauvaise fortune, tant à la paix qu'à la guerre, laquelle ils ne feroient jamais seuls, quand bien tous les Pays-Bas se devroient perdre. Que la paix seroit fort à propos pour le bien de leurs affaires, mais que nous y avions tous remarqué tant de difficultez, qu'il n'y falloit rien esperer, mesmement les députez des Pays-Bas declarans haut et clair qu'ils n'y peuvent entendre, sans leur ruyne prochaine et inevitable; qu'il n'y avoit donc plus que le remede de la guerre qui se pouvoit faire de deux sortes: la premiere, à vive force et decouverte, laquelle l'estat de leurs affaires ne permettoit qu'ils pussent entreprendre si tost, à

cause de leur pauvreté, des grandes despences qu'il leur a convenu faire pour l'enterrement de la feuë Reine, et la reception du Roy, voyage de la Reine, reception et envoy d'ambassadeurs, et qu'il faudra encore continuer au couronnement et autres formalitez qui se doivent observer en toute nouvelle succession de royaume; que la prudence conseille d'asseurer par an et jour avant que de proceder à telles et si importantes innovations; que, neantmoins, pour s'accommoder à nous, ils essayeroient de preparer leurs affaires, en sorte que, dans les premiers jours de l'année prochaine, ils seroient en estat de nous secourir puissamment par la volonté et par les effets, et qu'en attendant il leur sembloit à propos que nous fissions un effort tous seuls pour la delivrance d'Ostende, lequel ils jugeoient nous estre facile, nos affaires estans en si bon estat, et nous pleins de repos, d'abondance et de richesses.

Surquoy je repris la parole en riant, et leur dis que aucun d'eux, à mon advis, n'avoit estimé cette proposition recevable ny civile; qu'ils l'avoient plutost mise en avant pour me faire parler, que pour opinion qu'ils eussent que je la trouvasse bonne, puis que leur seul exemple me la devoit faire rejeter, les estimans trop sages et trop prudens pour croire que vostre Majesté voulut user de procedures si contraires à celle qu'ils monstroient vouloir suivre, lesquelles aussi bien pourroient apporter grand ombrage et deffiance: car n'estimez pas, leur dis-je, que le Roy, mon maistre, portant seul le faix de la despence, il ne vueille aussi tout seul participer à l'utilité, et s'approprier quelque partie des pays qu'il auroit conquis ou conservez par ses armes et travaux; ce qui, sans doute, vous donneroit de l'ennuy, voire de la jalouse suffisante pour rompre toute amitié avec nous, laquelle voulant éviter, je voy bien qu'il se faut donc reduire à la defence secrette, et neantmoins convenir des conditions et des moyens, avec lesquels chacun fera la guerre et secourra son compagnon, au cas que, pour cette cause, le roy d'Espagne voulust attaquer aucun des deux ou tous les deux ensemble.

Lors, en me remerciant de la franchise dont j'avois usé en tous mes discours et actions, ils me dirent qu'ils ne me pouvoient resoudre presentement les difficultez qui s'estoient agitées, qu'ils avoient fort bien compris les intentions de vostre Majesté, lesquelles ils jugeoient fort considerables, prudentes et equitables; mais que c'est à leur Roy d'y donner la conclusion, comme ils esperent qu'il feroit au contentement de vostre Majesté, apres avoir ouï leur rapport; sur lesquelles ils estimoient neantmoins qu'il trouveroit



fort à propos , avant que d'y mettre la dernière main, de conférer tous ensemble avec les députés des Etats, afin de convenir unanimement d'un secours qui pût produire des effets conformes à vos desirs communs, esperances et desseins; et sur ce nous prîmes congé l'un de l'autre.

J'oubliois à dire à votre Majesté comme le comte d'Arambergue avoit remis son audience de jour en jour jusques à hier qu'il s'envoya excuser tout à fait d'aller vers le Roy, et le supplier de vouloir deputer vers luy aucuns de son conseil pour le venir trouver en son logis, afin d'ouyr de luy ce qu'il avoit charge de représenter au nom des archiducs ses maîtres, puis que son infirmité et maladie luy empeschoit de faire cet office en la forme ordinaire, et comme il luy estoit commandé. Dequoy encore que le Roy fut fort estonné et mal content tout ensemble, si ne laissa-il pas de commander au sieur Cecile qu'il allast trouver le comte d'Arambergue en son logis pour entendre sa charge : dequoy il se voulut aucunement excuser; mais ne le pouvant faire entierement, au moins fit-il telle instance de n'y aller seul, que le sieur Kainlos, Escossois, luy fut baillé pour adjoint, et luy fit demonstration de le prendre comme pour tesmoin de ses paroles et actions. Laquelle forme de proceder tant circonspecte et retenuë fait juger à un chacun que ledit Cecile n'est point si bien asseuré en sa faveur qu'il le veut faire croire à tout le monde, qu'il redoute les mauvais offices de ses ennemis qui ne sont pas en petit nombre, et de ses amis tous nouveaux, et dont il ne cognoist encore gueres l'humeur, et craint le naturel et l'esprit de son maître, auquel il ne rapporta des discours du comte d'Arambergue, que des paroles generales de complimens et civilitez. Et comme l'ayant pressé de s'ouvrir d'avantage sur des particularitez, il n'eut autre responce, sinon que son mestier estant plus de rompre une lance et porter une pique que non pas manier affaires, qu'il avoit commandement de prendre simplement l'intention du Roy, afin que si elle estoit de traiter et convenir des particularitez necessaires pour estraindre entre luy et ses maîtres une plus solide et estroite amitié et confederation, comme c'estoit leur desir et esperance, il en advertist ses maîtres, et qu'aussi-tost ils envoyeroient par deçà un homme de lettres et d'affaires, pour y mettre une fin. Desquelles paroles si froides et nullement substantielles, chacun a esté fort peu satisfait, et leur a, à mon avis, donné sujet de traiter plus librement avec moy, ce que je redoute tousjours neantmoins estre plutost en apparence qu'en effet, et artificieusement qu'en verité, pour la defiance en quoy ne

met la cognoissance de leur humeur, et sur tout du sieur Cecile, qui ne fut ny ne sera jamais de faire rien entierement, mais garder pour la bonne bouche, ce qui destruit tout ce que l'on pensoit avoir bien basti, fondé et conclu, et desirerois infiniment estre trompé de cette mauvaise opinion que j'ay conceüe d'eux. De toutes lesquelles choses j'espere donner entiere lumiere et certitude à votre Majesté, par ma première dépesche et par mon retour pres d'elle, que je commence à minuter, sans que je luy puisse, pour le present, donner aucune assurance du fruit qu'elle peut attendre de mon voyage, pour l'inegalité de leurs esprits et la vanité et pauvre resolution de leurs conseils. Sur ce, je prie, etc.

De Londres, ce 30 juin 1603.

Vous escrivistes aussi une lettre à M. de Ville-roy qui fut telle.

*Lettre de M. de Rosny à M. de Ville-roy.*

Monsieur, vous verrez par les lettres que j'escris au Roy comme vont les affaires en ce pays, où l'on veut contenter tout le monde, et user de tel artifice que leurs intentions ne puissent estre decouvertes; bref chacun aura de belles paroles et peut-estre aucun n'en louera les effets : les choses y sont si différentes d'un jour à l'autre, que je ne sçay quel fondement y faire. Au nom de Dieu, voyez la première lettre que j'ay escrite de ce pays au Roy, et vous verrez eux et leurs affaires si bien et naïvement représentées, qu'il ne s'y peut rien adjouter; ils mettent bien en consideration les raisons qu'on allegue, les inconveniens que l'on prévoit; mais pour cela nuls effets dignes d'une telle meditation, ains entierement contraires. Puis, pour toute excuse, ils alleguent leur impuissance, et pour tout remede leurs vaisseaux, la situation de leur isle qu'ils font inaccessible, et leur nation innombrable et indomptable. Avec toutes ces choses tant diverses, je me trouve l'esprit si confus, que je ne sçay quelles esperances ny quelles defiances vous donner; car toute sorte de bien et toute sorte de mal se peut croire de tels esprits si volages et si inégaux en eux mesmes. Par ma première lettre vous aurez, si je puis, la conclusion de tout ce que j'auray traité, qui ne sera peut-estre pas si mal que je l'apprehende, et par mon arrivée, une parfaite cognoissance de l'estat present d'Angleterre en toutes ses parties, et principalement en ce qui touche la Cour et ses humeurs, qui est surquoy vous devez principalement fonder vos resolutions. Continuez-moy vos bonnes graces, et vous asseurez de mon fidele service. Adieu, monsieur, je vous baise les mains en toute humilité.

De Londres , ce 30 juin 1603. C'est vostre plus fidele serviteur.

ROSNY.

### CHAPITRE CXVIII.

*Suite des negociations de Rosny. Lettres de Henri IV et de Villeroy sur les intrigues qui se tramoient en Espagne et en Angleterre.*

Après vostre seconde audience dont il a esté parlé au chapitre precedent, le roy d'Angleterre vous traitta en festin et toute vostre noblesse ; mais vous et M. de Beaumont seuls mangeastes avec luy à sa table et trouvastes bien estrange de le voir servir à genoux : il y avoit au milieu de la salle une pyramide toute couverte de vaisselles riches et de pierreries. Estant de retour à vostre logis, le sieur Bernaveld seul vous vint voir et fut plus de deux heures enfermé avec vous dans vostre cabinet.

Le lendemain, tous les conseillers cy-devant nommez pour traiter avec vous au nom du Roy leur maistre et les ambassadeurs des Provinces Unies se rendirent pour la seconde fois à vostre logis et fustes encore plus de trois heures enfermés tous ensemble dans vostre cabinet. A vostre separation vous priastes le milord Cecile de vous demander une troisieme audience ; laquelle vous ayant esté accordée à condition que vous iriez fort peu accompagné, pour avoir (comme le Roy vous le manda par le sieur chevalier Asquins) plus de moyen de vous entretenir en privé, vous ne pristés que quatre gentils-hommes et nous deux, vos secretaïres ; ayant dès le soir fait une cinquieme depesche au Roy, telle que s'ensuit.

*Lettre de M. de Rosny au Roy, sur le chiffre de M. de Ville-roy.*

SIRE,

Voicy la cinquieme lettre que j'escriis à vostre Majesté depuis mon esloignement de la Cour, et aurez par icelle la suite de ce qui s'est passé depuis ma depesche du vingt-huictiesme de juin, entre le roy d'Angleterre, ses ministres, les deputés des Estats et moy, et cognoistrez par là, que le premier jugement que j'ay fait de l'humeur d'Angleterre et de ceux qui la manient, a esté fort solidement fondé, et que si leurs belles paroles m'ont donné de l'esperance, leur mauvais naturel l'a enveloppée de mille doutes et fait croire qu'il ne se faut pas trop assurer sur leurs promesses et belles apparences. Pour lesquelles continuer, le roy d'Angleterre m'envoya advertir samedi 29 du mois dernier, qu'il deliberoit de me traiter en ceremonie, et que, pour cet effet, il me prioit d'aller le lendemain disner avec luy

et y mener toute la noblesse qui m'avoit accompagné, ce que je fis, et arrivay sur les dix heures du matin à Grenvich, où je fus avec le Roy au service ordinaire et au presche.

Il ne se passa, durant tout ce temps, que des propos communs entre le Roy et moy et sans qu'il usast d'aucune courtoisie ny compliment en mon endroit, ny qu'il dist un seul mot à aucun gentil-homme de ceux qui m'accompagnoient ; mais se mit sans autre preface sur le discours de la chasse. Après nous en allasmes disner, et me fit, Sa Majesté, asseoir à sa table et le sieur de Beaumont aussi : le commencement de nos discours fut encore de la chasse et de la chaleur qu'il faisoit lors, non ordinaire en Angleterre. Après les discours communs, il se mit à parler de la feuë reine d'Angleterre, avec un peu de mespris, et faire grand cas de la dexterité dont il usoit pour la manier, par le moyens de ses conseillers, qu'il se vantoit avoir tous gagez dès son vivant, en sorte qu'ils ne faisoient que ce qu'il vouloit. Tellement que ce n'estoit pas de cette heure qu'il gouvernoit l'Angleterre, mais plusieurs années avant la mort de la feuë Reine, dont la memoire ne luy est point trop agreable. Après demandant du vin, où il ne met jamais d'eau, il commença à me dire qu'il vouloit boire à vostre santé, ce qui fut fait reciproquement par luy, le sieur de Beaumont et moy, sans oublier les reines vos femmes et vos communs enfans, desquels me parlant, il me dit tous bas à l'oreille qu'il alloit boire au double parentage qui s'en devoit faire, dont je fus estonné pour estre la seule fois qu'il m'avoit monsté y penser, me semblant avoir prins le temps un peu mal à propos pour l'ouverture de chose si digne, et qu'il m'en devoit avoir parlé auparavant.

Je recueillis neantmoins cette parole avec quelque signe d'allegresse, et luy dis que vostre Majesté estant recherchée d'Espagne pour monseigneur le Dauphin, scauroit bien choisir et faire difference entre l'alliance d'un bon frere et assuré amy, avec lequel il n'auroit jamais rien à quereller, et celui dont jusques à cette heure il n'avoit reçu que des offences. Lors il me dit qu'il en faisoit ainsi, ayant esté requis par les Espagnols du mesme mariage pour son fils, qu'il offroient cette Infante à tout le monde, seulement pour abuser les princes.

Après qu'il me dit qu'il avoit entendu ce qui avoit esté dit et fait en la conference que j'avois eue avec ceux de son conseil, de laquelle il avoit toute satisfaction, approuvoit la proposition qui avoit esté faite de s'assembler encor le lendemain avec les députés des Estats, et qu'il desiroit les assister couvertement, ainsi qu'avoit

fait votre Majesté, remettant la forme et la manière d'y procéder à ce qui en seroit le lendemain traité et conclu entre nous. Et sur cela Sa Majesté me licentia et s'alla mettre au lit suivant sa coutume, où il demeure quelque-fois toute l'après-disnée; car osté le plaisir de la chasse, où il est un peu violent, sa vie est plus-tost contemplative que non pas active; il parle assez bien, est d'un naturel pacifique et fort doux, ayant la conscience merveilleusement scrupuleuse, et croy que par malice il n'offensera jamais personne. Lors que je luy parlay des pirateries, il se fâcha contre l'admiral et ceux de son conseil qui vouloient soutenir ce qui s'y faict; mais tout son défaut est de ne prendre pas assez d'intelligence et d'autorité aux affaires qu'il laisse quasi toutes à la disposition et discretion de deux ou trois des siens; et ces deux ou trois sont bien aises de le confirmer en une telle forme de vivre et nonchalance, afin d'usurper tant plus le pouvoir et l'entière direction des affaires de l'Estat.

Le lendemain matin le sieur Bernaveld me vint voir et représenter leurs affaires estre telles, que si je ne conclusois une ligue offensive et défensive entre les roys de France et d'Angleterre où ils fussent comprins, qu'infailliblement ils alloient tomber en manifeste ruyne dans peu de jours. Qu'au défaut de ladite ligue luy et les principaux de leur Estat, qui sçavoient ne pouvoir prendre seurété aux promesses espagnoles, estoient résolus, à son retour, de vendre tous leurs biens et se retirer ailleurs; ce qui ne vouloit dire autre chose, sinon l'establisement absolu des affaires d'Espagne en tous les Pays-Bas, avec une telle precipitation que chacun se jetteroit à l'envy sous leur domination, et une telle haine et animosité contre ceux qui, pour les avoir abusez et puis abandonnez, les y auroient contrainsts, ausquels ils seroient plus ennemis qu'ils n'avoient jamais esté aux Espagnols.

Sur ce je luy dis que ce n'estoit point à moy qu'il falloit donner ces apprehensions; ny exagérer ainsi les choses en les faisant beaucoup pires qu'elles n'estoient, pour ce que cela ne pouvoit augmenter la bonne volonté de votre Majesté, qui, par sa prudence, cognoissant tout ce qui peut advenir en semblables occasions, n'obmettra jamais aucune chose qui soit en son pouvoir, pour empescher tels et si prejudiciables accidens, dont il juge bien les suites et les conséquences nécessaires; qu'il devoit employer son industrie et son éloquence à persuader, non pas moy, mais les Anglois, que je sçavois bien qu'il trouveroit mal disposez et quasi tout changez depuis hier seulement, pour avoir esté asseurez

de l'acheminement de l'ambassadeur d'Espagne, de la venue duquel ils avoient esté ces jours passez en doute; que j'avois appris de bon lieu qu'ils vouloient arrester toutes nos resolutions et affaires sur le fait des debtes, tant de France que des Estats, jusques à ce qu'ils eussent entendu les grandes offres qu'ils s'imaginoient leur devoir estre faites par le roy d'Espagne.

A quoy ledit Bernaveld me dit que si les choses alloient ainsi, leurs affaires estoient entièrement perduës, et qu'il falloit que votre Majesté discernast maintenant, avec sa prudence accoustumée, lequel des deux luy estoit plus expedient, ou de commencer presentement la guerre au roy d'Espagne en leur compagnie, qui n'estoit point encore si foible qu'elle ne fust digne de consideration, ou bien d'attendre qu'elle luy fust commencée apres qu'il auroit assujetty leur Estat et uny leurs forces avec les siennes. Qu'il me l'avoit bien voulu représenter, afin d'en advertir votre Majesté et luy faire prendre resolution prompte sur telles affaires, où tout petit retardement apporteroit un grandissime desavantage. Je luy respondis que je jugeois bien une partie de ses discours estre veritables, mais qu'estant venu icy pour traiter de les assister communement avec l'Angleterre, je ne pouvois prendre aucune resolution sinon conforme à celle que les Anglois voudroient choisir eux-mesmes; tellement que s'ils mettoient la chose à la longue, je n'avois point charge de rien conclure presentement, mais d'apprendre de luy en particulier leur finale intention touchant leur dernière défense, et ce qu'ils voudroient faire des places d'hostage que tenoient les Anglois, n'estant, ce me sembloit-il, à propos de les laisser entre les mains de personnes si peu feables que ceux qui les tiennent maintenant, et avec lesquels, lors qu'ils se seroient une fois unis en la paix d'Espagne, il sera impossible qu'il n'arrive des contentions qui causeront mille desordres, et peut-estre enfin une guerre ouverte entr'eux.

Il me dit que cela estoit bien vray et que cette apprehension le mettoit plus en peine que toute autre chose, pour ce que, depuis peu de jours, le sieur Caron estant tombé sur ce discours avec Cecile, il avoit fait cognoistre que l'intention des Anglois estoit de faire la paix avec l'Espagne et de retenir, neantmoins, comme en neutralité lesdites villes d'hostage, à tout le moins jusques à l'entier payement de tout ce qu'ils estimoient leur estre deu: chose de telle importance, que delà peut venir la subversion de leur Estat et affaires. Ce que jugeant tres-bien il me fit cognoistre, mais en paroles couvertes seulement, qu'en toute extremité ils es-

toient résolus, s'ils ne pouvoient retirer lesdites villes par traité et conventions, d'y employer la vive force, laquelle ils sçavoient estre tellement de leur costé, par le bon ordre qu'ils y avoient estably, que l'avantage leur demeureroit tousjours. Mais qu'ils prevoient bien aussi que telles actions violentes les meneroient en guerre ouverte contre l'Espagne et l'Angleterre ensemble, laquelle ils ne pouvoient, en façon quelconque, supporter sans estre aussi assistez de la France ouvertement et absolument, à quoy ils n'estoient asseurez de la trouver disposée, me priant de luy en dire mon advis et quelle esperance il en pourroit concevoir.

Ma response fut en paroles generales, tesmoignant le ressentiment que vostre Majesté auroit de leurs travaux, et de desir d'y apporter les remedes necessaires, de la particularité desquels je ne les pouvois informer à present; mais qu'ayant representé ces choses à vostre Majesté, je m'asseurois qu'elle en useroit avec sa franchise et bonté accoustumée, et ne les voudroit tromper ny circonvenir en aucune façon, faisant reduire leurs affaires en la dernière extrémité, sous pretexte de son assistance, laquelle l'estat de ses affaires ne permettant de leur donner suffisamment, il leur declareroit librement, afin qu'ils pourveussent à leur seureté par autre voye.

Peu apres disner tous les députez des Estats me vindrent trouver en mon logis, suivant ce qui leur avoit esté mandé par le roy d'Angleterre, les conseillers duquel nommez en ma précédente dépesche, et qui s'estoient trouvez en la première conference, s'y rendirent aussi-tost, où, estans tous assemblez, le sieur Cecile, à l'accoustumée, parlant au nom de son Roy et pour tous ses compagnons, me dit que le Roy, son maistre, leur avoit commandé de me faire entendre la satisfaction qu'il avoit de tous mes comportemens et de représenter, en cette compagnie, la resolution qu'il avoit prise de secourir les Estats conjointement avec vostre Majesté; qu'il estimoit cette intention conforme à ma proposition, me priant de déclarer si j'en avois autre sentiment.

A quoy je luy respondis fort brièvement, en tournant ma parole vers les députez des Estats, ausquels je dis qu'ils voyoient comme deux si grands princes concurreoient en mesme volonté pour leur conservation; que cette franchise les devoit aussi inciter à n'user pas d'artifice, mais à se contenter d'un secours suffisant et proportionné aux moyens et à la disposition de ceux qui le leur offroient; qu'à cette cause je les priois de vouloir représenter l'estat de leurs affaires,

leurs esperances, le fonds de leurs moyens, quelles forces ils pourroient mettre en campagne, et de quelles ils auroient besoin d'estre assistez par nos deux maistres.

Surquoy ledit sieur Bernaveld, au nom de tous, fit un discours fort ample, lequel je ne repeteray point icy pour en avoir fait mention en partie cy-devant, en partie par mes autres lettres, la conclusion duquel fut qu'il ne falloit plus s'amuser à les secourir foiblement, mais prendre resolution de chasser entierement le roy d'Espagne de toutes les provinces des Pays-Bas, ce qu'il estimoit faisable dans un an, si chacun y vouloit contribuer selon ses moyens. Que pour leur regard, outre leurs garnisons ordinaires, ils mettroient en campagne douze à quinze mille hommes de pied et trois mille chevaux avec l'artillerie et munitions requises, et tiendroient armez, où il seroit communement advisé, cinquante grands vaisseaux, et que les deux autres en faisant chacun autant, sa proposition deviendrait indubitable.

Surquoy reprenant la parole, je luy dis encore une fois que j'estimois cela veritable, mais qu'il falloit proportionner leurs demandes au pouvoir et à l'intention de leurs amis, et, avant toutes choses, sçavoir si la volonté du roy d'Angleterre estoit d'entrer en paix ou en guerre, pour ce que j'avois charge expresse de me conformer entierement à ce que je recognoistrois luy estre le plus agreable; que, pour cet effet, je priois messieurs de son conseil presens de vouloir faire choix de la voye qu'ils pretendoient tenir, soit pour la paix sans les Estats ou avec eux, ou pour la guerre et assistance ouverte ou secrete, protestant de me conformer, en tout et par tout, à leur resolution.

Surquoy le sieur Cecile prenant la parole, dit qu'il falloit former un mutuel consentement, où chacun s'accommodast aux affaires de son allié, ainsi que j'avois représenté; que par les discours de messieurs les Estats ils ne vouloient point de paix; que les raisons d'estat de l'Angleterre les contraignoient de n'entrer, à cette heure, en guerre ouverte, et luy sembloit que la France en pensoit bien autant; qu'il falloit donc prendre la voye du milieu en donnant une assistance secrete, à quoy l'un et l'autre Roy, comme ils voyoient, estoit fort bien disposé; et que c'estoit à eux, députez des Estats, de demander maintenant les choses necessaires pour leur conservation, jusques à ce que les deux Roys et leurs royaumes eussent moyen de les assister de forces suffisantes pour une delivrance entiere. Pour à quoy adviser, s'estans les deputez des Estats retirez à part, nous nous mîmes à dis-

courir, le sieur Cecile et moy; et tombans sur l'assistance desdits Estats, il me dit que le Roy, son maistre, estoit resolu de ne les laisser pas perdre, mais non pas de se ruyner entierement pour les sauver; qu'il estimoit que nos maistres auroient bien fait leur devoir, si le sien fournissoit, en cas de guerre offensive, quatre mille hommes de pied et mille chevaux, envoyant deux flottes sur la mer, l'une aux costes d'Espagne et l'autre aux Indes, et vostre Majesté huit mille hommes de pied et deux mille chevaux; ce que le Roy, son maistre, offroit pour sa part, moyennant que j'en voulusse promettre autant pour le mien, et de payer, en deux années, tout ce qu'il devoit à l'Angleterre, pour ce que, sans cela, ils n'avoient aucun moyen de soudoyer leurs gens de guerre, ny d'entretenir leurs flottes.

Surquoy je luy dis qu'il falloit distinguer ces choses, traittant, premiere, de l'assistance secrette qu'on feroit ausdits Estats, et pour quelle part chacun y entreroit; davantage, quel secours chacun des deux Roys donneroit à son compagnon au cas que l'autre fut attaqué seul; puis, de quelles procedures ils useroient si on faisoit la guerre à tous deux à la fois; quelles forces ils mettroient ensemble pour la guerre offensive, au cas que l'estat de leurs royaumes requist de la faire; et finalement, quelle sorte de gouvernement seroit donné aux pays et provinces conquises par les armes communes des deux Roys. Que de projeter une guerre et une assistance en telle façon, que toute la despence en tombast entierement sur mon maistre, je n'y trouvois gueres d'apparence, pour plusieurs raisons, dont l'une des plus solides consistoit au peu de moyen qu'il a de le faire en cette sorte; mais bien qu'ayant une fois mis leurs royaumes en seureté, et les ayans tirez de la crainte en quoy ils sont, que le roy d'Espagne joignant la puissance des Pays-Bas à la sienne, desja assez formidable d'elle mesme, ne les voulust opprimer, chacun d'eux pourra apres, se retranchant de despence et mesnageant ses revenus, faire fonds suffisant pour payer, non seulement ce qu'ils doivent, mais pour en assister leurs amis et voisins: protestant au nom du Roy, mon maistre, qu'il n'a nul plus grand desir au monde, que de s'acquitter en vers la couronne d'Angleterre, tant de l'argent qu'il luy doit, que des autres bienfaits qu'il en a receus; mais que de la presser maintenant sur l'entier payement de ses debtes, il estoit du tout hors de saison, estant necessaire d'employer auparavant tous nos moyens pour l'execution de ce qui sera resolu. Que si le Roy, leur maistre, y veut contribuer

tant soit peu du sien, que vostre Majesté s'efforcera en sorte qu'il aura sujet d'estre content; y ayant apparence de croire qu'en fin ces assistances secrettes nous pourroient porter en des guerres ouvertes; auquel cas j'estimois qu'il n'y falloit pas entrer à demy, mais y proceder avec de telles forces et de telle vigueur, que l'honneur et la dignité de deux si grands Roys fust conservée, et leurs amis du tout delivrez de guerres et de craintes; que, pour y parvenir, le Roy, mon maistre, outre une armée de vingt mille hommes qu'il jetteroit vers les Pays-Bas, seroit conseillé de munir toutes ses frontieres de Guyenne, Languedoc, Provence, Dauphiné et Bresse. En toutes lesquelles costes il ne pouvoit moins tenir qu'autres vingt mille hommes, avec un bon nombre de galeres armées; lesquelles forces serviroient, non seulement, à la defence de ces provinces-là, mais à donner de telles jalousies au roy d'Espagne, qu'il seroit contraint de divertir grande partie de ses gens de guerre pour s'asseurer de ces costes-là. Que tous ces preparatifs sont de tels frais et dépenses qu'il est bien difficile de les supporter et payer des debtes ensemble; que, neantmoins, comme c'estoit la volonté de vostre Majesté de s'en acquitter au plutost, elle ne manqueroit de faire quelques payemens par années, et que pour la presente il faisoit estat, suivant la demande de la feuë Reine, de fournir deux cens mille livres; mais que n'estimant pas qu'en un voyage pareil au mien, telles instances se deussent faire, je n'avois aussi receu aucun commandement pour rien promettre davantage en icelle. Que le vray moyen d'estre plus facilement payé, c'estoit de commencer par le lien d'une vraye parfaite et fraternelle amitié qui, non seulement, nous rendroit plus desireux de les satisfaire et donner contentement de l'argent que nous devons, mais aussi de leur fournir du nostre à chasque occasion.

Sur tous ces discours, les choses commencerent à s'alterer, eux de leur part disans ne vouloir employer autre chose, sinon les sommes que ils tireroient de vostre Majesté, et que s'ils n'en touchoient rien, ils estoient resolus d'abandonner les Estats, et tousjours le sieur Cecile (comme c'est sa coustume de faire le subtil, et essayer de tirer advantage de tous propos) taschoit de faire confesser aux députés des Estats et à moy, d'avoir dit des choses à quoy nous n'avions point pensé; et monstroient une allegresse fort grande quand, par les propos confus et embarrassez dont il usoit, il avoit reduit les choses à tel point que personne n'y pouvoit rien comprendre. Pour fin, il commença à vanter la force

de leur royaume, les grandes offres qui leur estoient faites par les Espagnols sans rien particulariser neantmoins; et ainsi nous nous separasmes laissant les députez des Estats aussi incertains de ce qu'ils devoient esperer d'eux, comme le premier jour qu'ils arriverent en ce pays. Et pour mon regard je ne remportay autre chose, sinon que nos maistres devoient faire estat de l'amitié l'un de l'autre, et essayer de vivre en paix avec tous, puis que vostre Majesté ne vouloit faire la guerre sans eux, et qu'eux ne la pouvoient faire sans estre payez par vous et par les Estats, et que vous ny les Estats ne les pouviez presentement satisfaire; qu'ils ne faudroient de rapporter au Roy, leur maistre, ce qui s'estoit passé, et obtenir pour moy, suivant mon desir, une audience pour le prochain jour, où il seroit resolu de toutes choses et du temps que je pourrois estre licencié.

Ce que voyant je me delibray de ne m'ouvrir pas davantage sur le premier expedient, et de le remettre au Roy mesme, pour voir si les ayant laissez dormir sur telle disposition d'affaires, cela ne les reduiroit point à plus de facilité en la premiere audience, où je resolut de me gouverner en telle sorte, que quoy qui arrivast, je leur persuaderois d'estre party bien content et satisfait d'eux, et d'estre demeuré plein d'esperance, que vostre alliance et sincere confederation seroit tres-assurée et le parentage de vos communs enfans sans aucune difficulté; remettant tout le reste à vous estre représenté par une dernière dépesche, ou lors que je seray pres de vostre Majesté, ne luy pouvant encor absolument donner aucune esperance de bien, ny crainte de mal. Sur ce, je prie le Createur, Sire, etc.

De Londres, ce 6 juillet 1603.

Le lendemain vous receustes une lettre du Roy et une de M. de Ville-roy, desquelles la teneur ensuit.

*Lettre du Roy à M. de Rosny, contre-signée.*

Mon cousin, le sieur de Sainct Luc a esté porteur de mes dernières, et j'ay receu le 17 dudit mois les vostres escrites le 14. Vous avez bien fait de vous servir des roberges du roy d'Angleterre pour les raisons que vous m'avez escrites, comme de n'avoir changé la resolution que nous avions prise de comparoistre vestu en deuil, à vostre premiere audience, de laquelle je suis maintenant attendant des nouvelles à toute heure, pour sçavoir comment ce prince vous aura receu, et ce que vous aurez appris et fait par delà pour le bien de mon service depuis que vous y estes arrivé; car, encore que j'aye eu oc-

casion par les advs que m'a donnez le sieur de Beaumont par sa dernière dépesche, de bien esperer de vostre voyage, neantmoins je n'en seray certain ny content que vous ne m'ayez mandé ce qui s'en sera ensuivy, et je me promets que cette sepmaine ne passera que je n'en aye advs de vous; quoy attendant vous en recevrez deux par la presente (outre celuy de ma bonne disposition qui se va fortifiant et augmentant journellement, par la grace de Dieu), l'un est de la grande armée de mer que me prepare le roy d'Espagne à Lisbonne, et l'autre d'une negociation que j'entends se faire par delà, de la part du sieur d'Antragues, à laquelle je desire que vous preniez garde.

Quant audit armement d'Espagne, l'on m'a escrit d'Italie, de Bretagne, et mesme de la Cour dudit roy d'Espagne, qu'il doit estre composé de vingt-mille hommes, que l'on prepare avec toute la diligence possible, sans mesmes y espargner les jours de festes, ny que l'on sache ny die encore où il doit estre employé. Quelques-uns de mes amis d'Italie m'ont adverty, par courrier exprés, qu'il faut prendre garde au chasteau d'If et aux isles de Marseille, tenans pour assuré que ladite armée y doit fondre. Toutesfoi le Pape continué à m'asseurer aussi expressement qu'il a point fait cy-devant, que le roy d'Espagne veut vivre en paix avec moy, et qu'il n'a aucun vouloir ny dessein de me commencer la guerre; mais les speculatifs discourent et ont opinion que ledit Roy se gouvernera en cela selon ce qu'il traittera avec ledit roy d'Angleterre, duquel on dit vouloir acquerir l'amitié, à quelque prix que ce soit, ayant delibéré de consentir et accorder que les villes de Zelande demeurent en sa garde, et luy bailler outre cela une bonne somme d'argent comptant ou par années, pour le recompenser des frais faits par l'Angleterre depuis le commencement de la guerre; pourveu qu'en effet il abandonne les provinces unies des Pays-Bas, s'abstienne d'envoyer aux Indes, et de courre sus aux vaisseaux d'Espagne allans et venans ausdites Indes. Pour moy, je ne puis croire que ledit Roy d'Espagne m'attaque cette année; car il me semble que ses affaires ne sont à present en estat de ce faire; le duc de Savoye fait bien ce qu'il peut pour l'y embarquer. Mais comme le conseil d'Espagne recognoist qu'il est meü en cela, plus de son interest particulier que de vive raison, et de la seule consideration du bien des affaires dudit roy d'Espagne, il semble qu'il n'ayt pas assez de pouvoir pour leur faire prendre une telle resolution. Luy et ses enfans ont plus sejourné à Nice (d'où je n'ay point sceu encore qu'ils soient

partis) qu'ils n'avoient projeté, ce que l'on attribué au tour que luy a fait dom Charles Doria, general des galeres, que le roy d'Espagne entretenoit à Genes; lequel estant arrivé à Ville-franche, accompagné desdites galeres, avec charge de prendre et enlever lesdits princes de Savoye, a passé outre inopinément sans les attendre ou charger, les uns disant par despit, pour le peu de compte que lesdits princes avoient fait de luy, et les autres par l'intelligence mesme dudit duc, afin d'avoir couleur de séjourner davantage audit Nice, pour attendre le temps d'exécuter certaine entreprise que l'on veut que je croye qu'il a dressée et préparée en Provence. Mais d'autres me mandent que ç'a esté par commandement expres dudit roy d'Espagne, qu'il s'est ainsi hasté de s'acheminer audit pays sans attendre l'embarquement des princes de Savoye pour s'en servir en ladite armée de mer qu'il prepare, et la renforcer desdites galeres.

Or, nous verrons bien-tost où les affaires tomberont, du costé dudit roy d'Espagne, lequel tient en eschec tous ses voisins, par le moyen desdits armemens, dont nous n'aurons occasion de nous plaindre si les succez de cette année sont semblables à ceux des precedentes. Quant à la negociation susdite, que fait par delà le sieur d'Antragues, j'estime qu'elle est plus accompagnée de vanité que d'autre fondement: et toutesfois j'ay entendu que ledit sieur d'Antragues se sert en cela d'un nommé du Pany, qui hante quelquesfois au logis du sieur de Beaumont, et que sa principale entente et correspondance est avec le duc de Lenos et son frere, ce qui vous sera facile, à mon advis, d'approfondir. Mais si ledit roy d'Angleterre s'amuse au discours dudit sieur d'Antragues, il trouvera grandement à dire, entre ses faits et ses promesses. Je séjourneray encore icy huit ou dix jours, pour continuer à prendre des eaux de Pougues, dont j'ai commencé à user seulement aujourd'huy; puis, selon les advis que j'auray de vous, je resoudray ce que je deviendray et feray.

J'ay commandé vous estre envoyé le double d'une lettre que Hebert, qui servoit de secretaire au feu duc de Biron, a écrite à son frere, qui est thresorier de France en Languedoc, depuis avoir veu le comte de Fuentes à Milan et conféré avec luy, par laquelle vous cognoistrez la continuation de sa meschanceté, et la dreté et obstination d'un tres-malin esprit, du tout indigne de la grace qui luy a esté faite. Sa lettre est dattée de Florence, où je sçay bien qu'il n'a pas esté, et qu'il estoit lors à Milan; tellement qu'il est à presumer qu'il l'a faite et composée par l'adveu et sceu du comte de Fuentes, lequel l'a

envoyé depuis en Espagne, où je sçay qu'il est bien venu et carressé des ministres de ce Roy, qui est un signe de sa bonne volonté en mon endroit qui ne doit estre mis à nonchaloir. Vous sçauvez aussi amplement le reste, quand vous serez par deçà. Cependant ne laissez voir à personne la susdite lettre; car encor qu'elle soit pleine de mensonges et d'impostures, toutesfois il est meilleur de la supprimer que de la divulguer. Au reste, je persiste à vouloir que vous me serviez, par delà, suivant la resolution que j'ay prise avec vous en particulier, quand vous estes party: vous laissant neantmoins la liberté de vous y conduire, ainsi que vous jugerez estre pour le mieux, priant Dieu, mon cousin, qu'il vous ayt en sa sainte et digne garde.

Escrit à Monceaux, le 27 de juin 1603.

HENRY,

Et plus bas,

DE NEUF-VILLE.

*Lettre de M. de Ville-roy à M. de Rosny.*

Monsieur, je ne puis vous escrire de ma main, à cause d'un mal qui m'est survenu au poulce, lequel m'oste l'usage de la plume. Je n'ay pas grande chose aussi à vous mander, Sa Majesté vous faisant sçavoir tout ce qui se passe et est survenu icy depuis vostre partement. Mais depuis avoir escrit sa lettre, elle m'a commandé mettre avec icelle la coppie d'une que M. de Bouillon luy a n'aguères écrite, qui luy a esté présentée par le sieur d'Arthenes, qui fait icy les affaires de M. l'electeur Palatin, de laquelle je vous asseure qu'elle n'a pas esté plus contente que des precedentes, voyant qu'il continué à vouloir fuir sa presence et la justice, et à ne se vouloir rendre digne de sa clemence et bonté, sans toutesfois proposer autres moyens ny se mettre en aucun devoir de la contenter. Partant je puis dire que cette affaire-là n'est changée depuis vostre partement.

Vous sçauvez aussi que la guerre de Geneve continué tousjours, mais plus froidement, de part et d'autre, qu'elle n'a encore fait, plus par faute de pouvoir que de vouloir mieux faire. Certains cantons, non suspects aux parties, ont entrepris de composer et pacifier ladite guerre, ayans, à cette fin là, envoyé leurs deputez, tant à M. de Savoye qu'aux habitans de ladite ville, mais à cause du séjour du premier, à Nice, qui a esté plus long que l'on ne pensoit, cette negociation a esté retardée; s'il en réussit quelque chose devant que vous partiez pour revenir par deçà, je vous en advertiray. M. de Bethune, vostre frere, nous a escrit, par ses dernieres, que le Pape continué à se conduire avec grande prudence et moderation aux affaires d'Angle-

terre, jusques à n'avoir pas voulu recevoir ny permettre estre demeuré à Rome un nommé Colvin, qui a autresfois escrit contre le roy d'Angleterre, estant roy d'Escoce, et semble à Sa Majesté que ledit Roy doit donner occasion à Sa Saincteté de continuer en cette volonté en son endroit, plutost que de l'alterer par sa conduite. Toutesfois c'est une corde qu'il faut toucher doucement, pour les raisons que vous pouvez mieux juger estant sur les lieux, que nous ne pouvons faire d'icy. Je prie Dieu, monsieur, qu'il vous conserve longuement en sa saincte protection.

Vostre tres-humble serviteur,

DE NEUF-VILLE.

De Monceaux, le 27 juin 1603.

Et à costé est escrit :

Monsieur, le Roy m'a commandé encore de vous escrire qu'il a esté adverty que M. de Bouillon a depesché vers le roy d'Angleterre un anglois, nommé Wilem, autrement Le Blanc, qui a esté valet de chambre de Sa Majesté, et joueur de cornet, et que c'est pour luy offrir son service, et le supplier d'entreprendre sa protection; chose que Sa Majesté vous prie de découvrir et empêcher autant qu'il vous sera possible.

#### CHAPITRE CXIX.

*Suite des négociations de Rosny. Développement de son système politique. Tableau de la Cour de Jacques I<sup>er</sup>. Position des principaux États de l'Europe. Lettres de Henri IV et de Villeroy. Soustraction d'une dépêche.*

Suivant ce que le roy d'Angleterre vous avoit mandé, comme il est dit cy-devant, vous vous rendistes à Grenvich sur une heure apres midy du lendemain, où vous fustes receu, comme il nous semble, par le comte d'Erby, et conduit vers le roy d'Angleterre, lequel vous prit aussitost par la main, et faisant demeurer tout le monde, mesmes ses propres conseillers, vous mena dans ses galleries, desquelles ayant fermé les portes il vous embrassa par deux fois, puis ayant loué les vertus du Roy et vostre franchise, il vous dit (car de cecy nous a-il esté facile de le vous ramentevoir mot pour mot, d'autant que pour vous en mieux souvenir, si tost que vous fustes de retour à Londres, vous l'escrivistes avec intention, comme vous nous l'avez dit depuis en France en nous le montrant, de le faire voir au Roy, estant revenu vers luy, afin de luy faire juger que vous aviez pris le temps assez à propos, pour entamer au roy d'Angleterre les plus importans discours dont vous eussiez eu charge, et pour luy faire croire que cela ne pro-

venoit que de vous mesme), ce prince donc vous dit encore derechef, qu'il se recognoissoit de plus en plus grandement obligé au Roy son bon frere, luy ayant ainsi envoyé le plus ancien et confident de ses serviteurs (comme le portoient mesmes les lettres de sa main), duquel il ne se pouvoit quasi passer ny en souffrir l'absence sans impatience de son retour, ainsi que le sieur de Beaumont l'en avoit plusieurs fois asseuré, et celuy sur lequel luy mesme pouvoit prendre le plus de confiance, et conferer avec luy de toutes choses importantes avec le plus de franchise et de liberté. Surquoy voyant, comme il vous sembla, l'occasion tres-opportune pour entamer quelque chose, des secrettes instructions et hautes propositions que le Roy vous avoit ordonné de luy faire, mais seulement comme de vous mesme, vous luy respondistes en ces termes (au moins si nous avons bien retenu ce que vous nous en avez monstre par escrit) :

« SIRE,

« S'il estoit possible que vous eussiez obligation de mon acheminement en ce royaume à « quelqu'un, ce que je ne me scaurois neantmoins « persuader, ce seroit plutost à moy qu'à nul autre, non pas mesme au Roy, mon maistre, encore que ce soit luy qui m'y ait envoyé, car « c'estoit chose qu'il ne desiroit en aucune façon, « disant que j'avois trop d'autres affaires importantes qui ne me pouvoient pas donner ce loisir; mais je fis de telles sollicitations, supplications et pratiques, voire usay de tels artifices, « y employant ceux mesmes qui me portoient le « plus d'envie et de jalousie et que je scavois bien « ne desirer autre chose que mon esloignement, « qu'en fin le Roy mon maistre se laissa emporter « à leurs persuasions et aux miennes. Mais n'estimez pas, Sire, que j'aye ainsi de gayeté de « cœur et contre les maximes des gens de faveur, « voulu m'esloigner de mon maistre, et quitter « l'employ de tant de grandes charges et affaires « importantes où je suis employé, pour desirer que « j'aye eu de venir icy faire de simples complimens de condoleances pour la mort de la reine « Elizabeth, et des conjoüissances de vostre heureux advenement à ces couronnes, et pour « traicter des facientes et negoces ordinaires, et « accoustumées en semblables conjonctures d'affaires; tout cela ne m'eust pas fait resoudre à « quitter mon maistre ny mes journaliers emplois. Mais deux choses bien plus importantes « m'ont fait naistre ce desir, lesquelles je vous « diray lors que j'auray tiré de vostre Majesté « les sermens et assurances qui me sont du tout « nécessaires; à sçavoir, que vous n'en direz ja-



« mais rien à qui que ce puisse estre que de mon  
« consentement, afin que si ce sont choses esloi-  
« gnées de vostre goust, elles demeurent comme  
« ensevelies, et lesquelles, selon vostre grande  
« prudence, vous jugiez ne pouvoir servir au pu-  
« blic, qu'elles ne puissent au moins me nuire en  
« mon particulier. »

Lequel langage ainsi general et concis tout ensemble le roy d'Angleterre ayant considéré, fit sur iceluy plusieurs questions pour essayer d'en descouvrir davantage, et voyant que vous demeuriez r'enclos dans les premieres bornes et limites de vostre discours, il vous jura en son ame sur le sacrement, et fit tous autres sermens que vous pustes desirer, qu'il ne reveleroit jamais rien de tout ce que vous luy diriez, sans vostre licence, et lors vous luy distes :

« Sire, il faut que vous sçachiez que quelque  
« enveloppé que je puisse estre dans les vanitez  
« mondaines, que je prefere neantmoins la gloire  
« de Dieu, mon salut et la subsistance de la vraye  
« religion que je professe, au Roy mon maistre,  
« ma fortune, ma femme, mes enfans, ma patrie  
« et toutes autres considerations humaines. Tel-  
« lement qu'ayant reconnu, par le moyen de l'en-  
« tremise et participation que j'ay en toutes les  
« grandes affaires, tant du dedans que du de-  
« hors du royaume de France, que le Pape, l'Em-  
« pereur, le roy d'Espagne, les archiducs, les  
« princes ecclesiastiques d'Allemagne, et tous  
« autres grands et communautéz catholiques,  
« n'ont point de plus forte passion en l'esprit que  
« de former une puissante association, et faire un  
« furieux attaquement pour la ruïne et destruc-  
« tion de toute creance contraire à la Romaine,  
« et qu'ils ne soient retardez d'y travailler tout  
« ouvertement, sinon d'autant qu'ils n'ont point  
« encore peu faire joindre le Roy mon maistre à  
« ce mesme dessein, tant il apprehende qu'en  
« exaltant par trop la faction d'Austriche, il ne  
« ravalle tellement la sienne, qu'il soit contraint  
« de ployer sous cette dépendance, enquoy je le  
« confirme autant qu'il m'est possible. Mais es-  
« tant seul, il est à craindre que par la diminu-  
« tion de ma faveur (comme celle des princes est  
« sujette à varier) ou par de trop continuelles  
« sollicitations, accompagnées de raisons bien co-  
« lorées des princes ecclesiastiques et principaux  
« officiers et villes de France, qui applaudissent  
« tous à Rome, il ne se laisse en fin persuader,  
« s'il n'est retenu par d'autres voyes et moyens  
« plausibles à son genereux esprit (car c'est cette  
« vertu de magnanimité qui tient le premier  
« lieu en son ame), qui sont ceux desquels je  
« veux faire ouverture à vostre Majesté, et dans  
« quels aussi elle trouverra dequoy accroistre sa

« puissance et son autorité, amplifier sa domi-  
« nation, feliciter son regne, exalter son honneur  
« et sa gloire, et perpetuer sa renommée, qui est  
« le second but de mes desirs. D'autant que de  
« vous seul dépend l'execution des choses que je  
« veux proposer, lesquelles consistent premiere-  
« ment à vouloir faire, s'il y a moyen que j'y  
« puisse disposer le Roy mon maistre, une ligue  
« offensive et défensive entre luy, vous et les pro-  
« vines unies des Pays-Bas; associer à icelle  
« tous les autres roys, princes, et sur tout ceux  
« de Dannemarc et de Suede, Estats, republiques,  
« villes et communautéz protestantes, qui sont  
« comme obligez d'estre tousjours contraires à la  
« faction espagnole et d'Austriche, et confirmer  
« tout cela par l'alliance de vos communs enfans,  
« qui se trouverront d'age sortable les uns aux  
« autres, voire je ne desespere pas si je vous voy  
« gouter à bon escient mes ouvertures, et en  
« embrasser l'execution, comme le requiert un  
« tant genereux dessein, que je n'y porte le Roy  
« mon maistre, avec des conditions tant avan-  
« tageuses pour tous ses associez en iceluy, que  
« nous y adjoindrons le duc de Savoye, eu esgard  
« à son naturel volage, et à son vehement et am-  
« bitieux desir de porter couronne royale, les  
« plus puissans princes catholiques d'Allemagne,  
« pour l'esperance d'arracher la couronne impe-  
« riale de la maison d'Austriche et tous les estats  
« de Boheme, Austriche, Hongrie, Moravie, Si-  
« lesie et Lusatie, pour les restablir dans leurs  
« anciennes libertez, voire mesme le Pape en pro-  
« posant de luy faire posséder en propriété ce  
« dont il n'est reconnu que par une vaine appa-  
« rence de feodalité. »

Sur toutes lesquelles ouvertures, quoy que d'abord en general et en gros, le roy d'Angleterre fist demonstration d'y prendre goust, voire de les louer et approuver, si ne laissa-il pas d'en vouloir entendre tout le destail, et de former lors une infinité de difficultez sur la jonction en une loyale association de tant de diverses testes et tant diversement intentionnées et interessées sur la poursuite d'un si haut dessein; et principalement sur ce que vous projecttiez de faire en sorte, que vostre Roy se contenteroit de la seule gloire de l'entreprise, et consentiroit que l'utilité de toutes les conquestes se distribuast entre tous les associez, sans en retenir aucune chose pour luy, quoy qu'apparamment les plus grandes despences luy deussent tomber sur les bras, et que de sa personne et de ses armes dépendissent toutes les plus efficaces factions guerrieres.

Les discours que vous eustes lors, tant sur ce sujet que sur plusieurs autres tres-importans, vous retindrent plus de quatre heures seuls en-

fermez ensemble, comme les deux lettres que vous escrivistes le lendemain au Roy sur ce sujet en tesmoignent quelque chose, l'une fort grande en forme de recapitulation de tout ce que vous aviez geré, conclu et negocié en Angleterre, que vous estimiez pouvoir passer par la cognoissance des secretaires et de leurs commis; et la seconde un peu plus courte, entierement écrite de vostre main; de la premiere desquelles lettres la teneur ensuit :

*Lettre de M. de Rosny au Roy, du chiffre de M. de Ville-roy.*

SIRE,

Ayant esté retenu en ce lieu le jour mesme que j'en pensois partir par un mal qui m'est survenu, à cause de mon coup de pistolet dans la bouche, lequel, quoy que ce ne soit rien, ne laisse pas neantmoins d'empescher la diligence, dont je faisais estat d'user en poste, pour me rendre prés de vostre Majesté, afin de luy représenter de bouche au vray, d'une suite continué et non interrompü, toutes les choses qui se sont passées depuis mon partement jusques à mon retour; reprenant toutes les affaires dès leurs premiers commencemens, et les poursuivant par leurs degrez et progrez jusques à leur entiere et finale conclusion : ce qui, à mon advis, eust apporté quelque espece de satisfaction à vostre Majesté, ou à tout le moins des esclaircissemens et des lumieres suffisantes, pour approuver ou rejeter ce que bon luy auroit semblé en tout ce que je puis avoir traité, geré et negocié en Angleterre, m'y estant conduit le plus en conformité de mes instructions, et de ce que j'ay recogneu estre de vos intentions, qu'il m'a esté possible; et neantmoins en sorte que, sans crainte de reproche de la part de ce prince, la puissance et la liberté toute entiere de conclurre ou non en est demeurée à vostre Majesté, à laquelle craignant qu'un retenu silence, conjoint à un trop long retardement, n'apportast quelque travail d'esprit, et la laissast en peine sur l'incertitude de mes precedentes dépesches, comme ses dernieres lettres m'en ont deu, ce me semble, faire conjecturer quelque chose, je me suis resolu de suppléer aucunement à ma présence par cette lettre, comme je l'ay desja dit, faisant en icelle une espece de recapitulation assez ample tant d'une partie de ce que j'ay desja écrit, ou que je pourrais avoir obmis pour briefveté, que de ce qui est survenu ou qui s'est passé depuis mes dernieres lettres en ma penultième et dernière audience; suppliant vostre Majesté de m'excuser si voulant naïvement et au vray représenter toutes choses ainsi qu'elles se sont dites et passées, et faire

voir comme en un tableau les humeurs de ceux avec lesquels j'ay à traiter peintes de toutes leurs couleurs, il s'y rencontre des longueurs que j'ay le premier ressenties, des frequentes redites, des contestations vaines, des propositions espineuses, des propos entrecoupez, des discours faits à diverses reprises; voire mesme des obscuritez et implications non si bien deduites, développées et esclaircies, qu'il seroit à desirer, et que je le pourrais faire de presence, par le moyen des sages, curieuses et judicieuses repliques, questions et inquisitions qui me seroient faites sur chaque point par vostre Majesté, à laquelle je diray en continuation de ma dépesche du quatriesme juillet, comme, suivant la resolution qui avoit esté prise en la dernière conference que nous eumes ensemble les conseillers de ce prince, les deputez des Estats et moy, et d'autres encor avec les agens de ceux qui sont nommez dans mon instruction de la main, dont j'ay desja écrit quelques particularitez à vostre Majesté par mes lettres susmentionnées, le susdit Roy m'envoya le sieur Oreladoux, milord en Escosse, et fort grand amy du comte de Mare, qui ayme la France et hayt l'Espagne, pour m'avertir que le lendemain j'aurois audience particuliere dudit Roy, à laquelle je fus convié par le milord de Husmes et le vicomte Savard, qui me vindrent querir sur le midy, et me conduisirent à Greenwich, où je trouvay sur le port, pour me recevoir plus honorablement, le comte d'Erby, de la maison royale d'Angleterre, qui me conduisit vers le susdit Roy, en sa chambre. Lequel aussi-tost, avec ses ordinaires propos de respect et de courtoisie que j'obmets pour briefveté, me prit par la main, et commandant à chacun de demeurer derriere, me mena dans ses cabinets et galleries accoustumées, où, apres encore quelques autres complimens de part et d'autre, et qu'il m'eust prié de parler en toute liberté, comme si j'eusse esté en presence de vostre Majesté mesme, je luy dis que je recevois un extrême contentement en l'honneur continuel qu'il me faisoit de me donner de si frequentes, longues et particulieres audiences, et qu'en cela je recognoissois une assistance et faveur de Dieu à l'endroit de vos deux Majestez, d'autant plus speciale, que c'estoit le moyen de conclurre plusieurs choses utiles et honorables pour vos personnes royales, royaumes et sujets; que j'advoüois franchement de n'avoir jamais veu prince dont la sincerité, la prudence et l'equanimité meritast plus de gloire et de louanges; que l'ayant tousjours trouvé d'un courage vrayement royal et tout genereux, et d'un esprit plus intelligent, plus vif, plus penetrant et plus judicieux que nul de ceux de son

conseil, j'avois aussi toujours passionnement désiré de terminer et conclurre avec luy les affaires et non avec eux ; lesquels j'avois esté bien adverty luy avoir représenté avec quelque desguisement la plupart de ce qui s'estoit passé entre nous en la dernière conférence avec messieurs les Estats, comme j'esperois luy faire cognoistre, si son bon plaisir estoit de m'entendre en leur propre presence, et que je l'informerois tellement de la verité, que ne pouvant estre contredite par nul artifice, je m'asseurois, considéré son équité et ma franchise, qu'il demeureroit plus satisfait de mon maistre et de moy que de ses propres conseillers et ministres.

Lors il me dit qu'il ne m'avoit tiré à part à autre intention que pour m'oûir en toute liberté, pour adjouster foi à mes paroles, se disposer à toutes choses bonnes et convenables, et à ne me rien desnier qui fust en sa puissance dont la requisition seroit appuyée d'aussi solides raisons qu'avoient esté toutes mes precedentes propositions. Surquoy prenant la parole, je luy dis qu'à la verité messieurs de son conseil, les deputez des Estats et moy avions bien ensemble de fort longues conférences, mais plutost ennuyeuses qu'utiles, par faute de se vouloir bien entendre, et pour avoir pris un mauvais ordre, postposans les affaires qui devoient preceder, comme je m'asseurois bien que son grand jugement et son intégrité le scauroit bien recognoistre, et qu'ils en avoient ainsi usé contre son intention, qui s'estoit incessamment monstrée tres-favorable envers messieurs les Estats, et tres-desireuse du bien commun de vos deux Majestez esgalement, lesquelles avoient pareil interest à la conservation desdits sieurs les Estats, et d'apprendre d'eux mesmes, par consequent, quel estoit à la verité l'estat de leurs affaires, de quels secours et assistances plus pressées ils pouvaient avoir besoin, et par quelles voyes vos deux Majestez les pourroient aysément garentir de mal et leurs peuples de desespoir qui les precipitast dans des resolutions dommageables à eux mesmes, ennuyeuses et des-honorables à vos Majestez, sans que pour cela elles fussent contrainctes d'entrer en guerre ouverte avec l'Espagne. Mais que tout au contraire, ses conseillers, sans parler aucunement de toutes ces choses tant importantes, comme il leur avoit expressément enjoint en ma presence, ils avoient consommé le temps en disputes et altercations inutiles, essayans seulement d'alterer lesdits sieurs des Estats, les animer contre le Roy mon maistre et moy, en taschant de leur persuader que l'Angleterre estoit toute disposée à la guerre ouverte pour leur defence, mais que je n'y avois jamais voulu conclurre

pour la France. Puis changeans tout soudain de propos sans raison, et s'estans jetté sur le fait des debtes, m'avoient dit qu'il falloit commencer ma negociation par ce point, comme le principal et plus important, et sçavoir si vostre Majesté n'estoit pas resoluë de les acquitter entierement dans une ou deux années, et dès la presente leur bailler une bonne et notable somme comme de quarante ou cinquante mille livres sterlins, desquels ils faisoient estat de secourir puisamment messieurs les Estats, et sans cela de ne leur ayder d'aucune chose ny s'obliger à rien ; auquel cas, s'il leur arrivoit inconvenient, toute la faute et le reproche en devoit estre rejezté sur vostre Majesté, mais principalement sur moy, qui estant le grand thresorier de France, venois vers eux pour leur apporter non des effets, mais des apparences, non de l'argent, mais des paroles abusives à l'accoustumée. Qu'ils avoient plus de besoin d'un bon payement que de tous mes beaux langages pleins d'artifice pour les jettier à la guerre sans vous, et par leur travail conserver nostre repos à leur grande honte et dommage, et qu'il ne falloit plus esperer d'autres alliances ny amities que les communes, tant que la France leur refuseroit satisfaction. Lesquelles paroles et reproches, comme elles estoient pleines de calomnies et d'impostures pour le regard de vostre Majesté et de moy, aussi n'ignorois-je point qu'elles ne fussent directement contraires aux bonnes intentions de Sa Majesté, laquelle ne m'en avoit jamais dit une seule parole, mais avoit toujours esté disposée à considerer combien tels termes estoient esloignez de la dignité et gravité requise entre deux si grands monarques qui traittent ensemble de matieres si hautes, si importantes et si serieuses que la vraye, parfaite et perpetuelle union et alliances de leurs personnes, enfans, royaumes et sujets, et l'accroissement de la gloire indicible qu'ils s'estoient tous deux acquisé par leurs vertus. Ce qui ne devoit estre différé ou alteré par de si petites considerations et un prix si contemptible que cent ou cent cinquante mille livres sterlins, au payement desquels je pouvois donner parole à Sa Majesté qu'il seroit satisfait à son contentement, sçachant assez combien vos desirs estoient toujours conformes à la raison et proportionnez à la qualité des temps et des personnes. Que s'il m'en eust esté fait avant mes depeschés la moindre instance du monde, je n'eusse manqué d'en donner advis à vostre Majesté, et disposer tant elle que ses affaires à toutes choses justes et convenables. Mais que la prudence, franchise et generosité dont il avoit toujours usé en mon endroit en traittant avec luy, m'ayans donné sujet de les exalter jusques

au ciel, en écrivant à vostre Majesté et luy conseillant de faire sur telles vertus un tres-solide fondement, s'il venoit maintenant à changer si soudainement d'humeur et semblablement de langage, cela ne pourroit estre sans une grande diminution de sa gloire que j'avois tant publiée, un grand blâme de moy, un soupçon d'avoir usé de flatterie et d'adulation pour son regard, et d'estre accusé de me passionner trop en tous ses interets. Ce qui rendroit, en suite de tels reproches à moy faits, toutes sortes d'ouvertures si difficiles, et toutes conventions si incertaines dans les esprits les uns des autres, qu'il seroit enfin impossible de reparer ce qui auroit esté alteré par la tant legere et subite mutation d'un premier si magnifique et si louable conseil; laquelle je cognoissois assez ne provenir nullement de son propre sentiment, mais luy avoir contre iceluy esté jetté dans la pensée divers scrupules de neant, tant par ceux des siens qui se veulent attribuer tout l'honneur de sa prudente conduite, et le gré et la grace des bonnes resolutions qui seroient prises, que par ses emuleurs à la grandeur et à la gloire, envieux de ses prosperitez, et de l'avoir veu succeder à tant de couronnes, par le moyen desquelles et de la ferme alliance de vostre Majesté, il rabaisseroit tellement leur fierté, et diminueroit de sorte leur reputation, qu'il reprendroit l'ancienne prestance et rang d'Angleterre sur l'Espagne. Que donc il se disposast à suivre ses propres conseils et sentimens, et de rejeter tout ce qui leur seroit inferieur ou contraire, de quelques artifices qu'ils pussent estre desguisez, lesquels il avoit desja tellement recognus, que sa propre franchise l'avoit contraint de leur reprocher en ma presence qu'ils ne luy avoient pas tousjours veritablement rapporté toutes les particularitez des conferences qu'eux et moy avions eues ensemble, qu'il vouloit tout oïr et tout sçavoir par ma propre bouche; de quoy je me resjoüissois et l'en suppliois tres-humblement.

Et comme je recognus, par quelque mutation en son visage, gestes extraordinaires et paroles entrejettées sur les miennes, que mes raisons, les louanges que je luy avois données et les vertus que je luy avois attribuées, l'avoient fort ébranlé à suivre absolument les premieres resolutions entre nous prises, sans aucun esgard des contestations et oppositions de ses ministres, encor qu'en effet ce prince ne soit pas d'humeur guerriere, qu'il ne se plaise pas à entrer en propos des executions et factions militaires, ny homme pour se porter legerement à une guerre ouverte, et encore moins sa personne aux perils et hazards: neantmoins, comme il est d'un tres-

grand esprit et n'ignore gueres des sciences, aussi ayme-il merveilleusement à discourir d'affaires d'Estat, entendre parler des hautes et genereuses entreprises, les examiner par toutes leurs circonstances, et en remarquer toutes les utilitez et inconveniens, je me resolu d'essayer à le disposer du tout à ce que je desirois par la continuation de tels expediens, luy ouvrant quelque chose des discours que j'ay autresfois tenus à vostre Majesté sur le fait de ces deux grandes factions de la chrestienté; et pour y parvenir, je luy dis que je voyois bien qu'il avoit, par raisons particulieres, suffisamment jugé combien il luy estoit utile et honorable de se lier et retraindre cordialement avec vostre Majesté, mais qu'outre cela, la disposition generale des affaires du monde et l'inclination universelle des esprits des princes chrestiens luy imposoient cette necessité, comme je m'asseurois qu'il le recognoitroit luy-mesme lors qu'il luy auroit pleu me donner le loisir d'en discourir en sa presence, chose que je n'osois maintenant entreprendre, de peur de le trop ennuyer, veu le long temps qu'il y avoit que je l'avois desja retenu, et le divertir peut-estre d'autres occupations à luy plus agreables.

Surquoy il me respondit que je ne l'avois nullement fastidié (usant de ce mot), et qu'il falloit sçavoir quelle heure il estoit. Et lors, sortant de son cabinet, il le demanda à ceux de ses ministres qui estoient au bout de la gallerie, lesquels luy ayans respondu qu'il n'estoit pas encore trois heures, il me dit: « Or sus, monsieur l'ambassadeur, je veux rompre mon dessein de la chasse » pour vous entendre tout du long, m'assurant » que cette occupation me sera plus fructueuse » que l'autre. » Surquoy je le remerclay et suppliy de m'excuser si mon propos estoit un peu long, et les matieres non si bien expliquées que leur importance le meritoit, ce qui se pourroit faire à diverses reprises si c'estoit chose où il prist goust; que je ne voulois point parler en qualité d'ambassadeur ny au nom du Roy, mon maistre, mais comme son serviteur particulier et bon huguenot, et partant intéressé en l'exaltation de sa grandeur et prosperité, et de tous ceux de mesme religion, lesquels seroient incessamment la butte du party contraire qui ne laissera jamais en arriere aucunes occasions de leur ruyne. Et partant, pour sçavoir et bien certainement juger quelle pourroit estre à l'advenir la fortune et la condition de ceux de nostre profession, devoit-il considerer quelles alliances, amitez et liaisons il avoit à choisir et entretenir, et jusques à quel degrez faire estat d'une chacune d'icelles et s'en assurer. Et pour y parvenir luy estoit-il du tout

nécessaire de bien examiner et reconnoître, tant généralement que spécialement, quels estoient les intérêts, inclinations et dispositions des Roys, princes, Estats, republiques, villes et communautés souveraines de la chrestienté; en laquelle, depuis certains siècles, les temps, les occasions et les diversitez d'intérêts, de fantaisies et de religions, avoient donné sujet à plusieurs de remarquer en icelles deux grandes et principales factions, dont l'une s'attribuant le tiltre de catholique, et donnant à l'autre celui de huguenotte (quoy qu'en l'une et en l'autre il y eust du meslange des deux religions), estoit à présent composée du Pape, de l'Empereur, du roy d'Espagne, des archiducs de Flandres, des princes ecclesiastiques d'Allemagne, des princes temporels, villes et communautés catholiques d'Allemagne et Suisse, des ducs de Savoye, Florence, Ferrare, Mantouë, Modene, Parme, Estats de Genes, Luques et autres potentats d'Italie, de ceux de Boheme, Hongrie, Moravie, Silezie et branche electorale de Saxe, quoy que la plupart de ces derniers nommez soient d'autre profession que de catholique. A quoy se joignant la ligue catholique de la chrestienté, entièrement menée par le turbulent ordre des Jesuites, qui a pour but de voir la monarchie chrestienne en la couronne d'Espagne, et de destruire tout ce qui luy peut estre contraire, qui n'en augmente pas peu la puissance pour leurs grandes intelligences et menées.

La seconde faction demeurant par consequent composée des roys de France, d'Angleterre, d'Ecosse, d'Irlande, de Dannemarc et Suede, de la seigneurie de Venise, provinces unies des Pays-Bas, et princes, villes et communautés protestantes d'Allemagne et Suisse. Car quant aux royaumes, Estats et principautez de Pologne, Prusse, Livonie, Moscovie et Transilvanie, quoy qu'ils soient pour la plupart tous chrestiens, neantmoins ils sont tant esloignez, ont tant d'affaires à démesler entr'eux-mesmes et encor plus avec les Turcs et les Tartares, leurs voisins, qu'ils n'ont pas quasi loisir de s'intéresser en aucune des deux susdites grandes factions.

La premiere desquelles, quoy qu'apparemment la plus puissante à cause des rangs, preseaues, titres, estendues de pays, nombre de soldats et quantité de peuples, a neantmoins en elle mesme tant de diversitez d'intérêts, de fantaisies et de pretentions, que si la dernière se vouloit tenir unie et en bonne correspondance, comme cela ne dépend que de la France et de l'Angleterre, elle la pourroit grandement affoiblir.

Car, en premier lieu, encor que le roy d'Espagne ne tienne que le troisieme lieu en ordre

et dénomination, si est-il, en effet, le premier en toutes sortes, voire le chef et comme le souverain des autres, la plupart desquels supportent avec impatience sa domination, laquelle, en estenduë de pays, si l'on y comprend ce qu'il occupe aux Indes orientales et occidentales, ne contient pas moins de pays que le Turc et le Perse en possèdent ensemble, mais qui luy apportent quasi autant d'incommodité que d'avantage. Car si d'une part les Indes le fournissent d'or et d'argent, aussi de l'autre le desnuent elles de soldats, de vaisseaux et d'armes.

Quant au Pape, il demeure apparemment lié à cette faction espagnole, tant pource que l'Espagne et ses partisans les Jesuites, font demonstration de maintenir absolument l'autorité pontificale, que pour ce qu'il se void, de toutes parts, circuy des Estats et forces espagnoles qui ont moyen de luy gratifier et de luy nuire, sans esperance de pouvoir estre assisté d'aucun des autres princes catholiques. Et ne faut point douter qu'il ne fust tres-aise de se voir delivré d'une telle subjection, et qu'il ne le tesmoigne ouvertement toutes les fois que les occasions luy seront présentées de le pouvoir faire utilement et seurement.

Quant à l'Empereur, encor que son titre soit specieux, si est-il de peu d'efficace. Car, quoy que le nom de la maison d'Autriche l'intéresse et le tienne comme absolument attaché à l'Espagne, si ne laisse-il pas d'intervenir des jaloussies, des haines et des envies entre ces deux diverses branches de mesme nom. Et d'ailleurs, quoy qu'il semble devoir et pouvoir disposer des Estats et peuples de Hongrie, Boheme, Autriche, Moravie et Silezie, si est-ce que le voisinage du Turc, d'un costé, qui luy en eschantillonne tousjours quelque piece, et ce que la plupart de ces peuples sont de contraire religion à la sienne et pretendent leurs seigneuries estre eslectives, ne luy en laissent pas grande disposition. Et si ceux d'Autriche ne relevent leur reputation en Allemagne par le moyen de quelque prince plus brave et plus vertueux qu'il n'en paroist maintenant parmy eux, et qu'ils ne se conduisent fort circonspectement avec tous ces peuples, il y a grande apparence qu'ils en secoüeront le joug avant qu'il soit peu d'années, et tascheront de se remettre en une entiere liberté, tant pour le regard de la religion que de l'eslection.

Quant au duc electeur de Saxe, si se tient plus lié à l'Empereur pour ce qu'il estime en tenir sa dignité electorale, et est tousjours en apprehension que, par un changement, la branche de Jean Frederic n'essaye de recouvrer ce qui luy a esté ravy, que par grande affection, la-

quelle, d'ailleurs, est souvent traversée par les scrupules de la religion.

Quant aux archiducs de Flandres, ceux-là sont plutôt valets que souverains, n'ayant autre disposition ni d'eux-mêmes ni de leurs pays que celle qu'il plaît à l'Espagne, dont la domination leur est quelquefois aussi ennuyeuse qu'aux autres; et c'est à croire qu'ils n'ont faute de desirs à la liberté et souveraineté absolue.

Quant aux princes ecclésiastiques d'Allemagne et Suisse, l'intérêt de la religion et du Pape les y tient plutôt attachés que toute autre chose; et qui leur feroit voir de la sûreté au changement, et qu'ils fussent hors de dangers d'être sous-mis à un empereur huguenot, il n'y a point de doute qu'ils ne fussent bien aises de ne dépendre que d'eux-mêmes.

Quant aux princes temporels, villes et communautés d'Allemagne et Suisse, l'on en peut dire autant, voire qu'il n'y a un seul d'eux qui n'embrassât les occasions de pouvoir s'aggrandir en la diminution de la maison d'Autriche.

Quant au duc de Savoie, la seule nécessité et la crainte qu'il a de la France, le retient en cette faction. Mais il a tant de courage et d'ambition, tant d'affection à la dignité royale, une telle haine contre les Espagnols et un tel despit que sa femme a été si mal partagée aux prix de l'Infante archiduchesse, qu'il ne verra jamais ouverture à l'alliance de France, et par icelle à la décharge de la domination d'Espagne qu'il tient pour un joug tyrannique, qu'il n'y entende à bon escient.

Quant aux princes et États d'Italie, comme la seule peur les retient à l'Espagne, aussi par la même peur en seront-ils arrachés; et jamais l'Italie ne sera bien attaquée par les puissantes armes de France, d'Angleterre et de leurs partisans ausdites provinces conjointement, que l'on ne contourne toutes ces petites seigneuries aux premières faveurs de la fortune.

Quant à la seconde faction, encore que tous les peuples des États de Venise et plus de neuf parts, dont les dix font le tout de ceux de France, soient de profession Romaine, et qu'il y en ait encore plusieurs espars dans l'Angleterre et autres États de cette confédération, celle qui s'attribue le titre de catholique, ne laisse pas de lui imputer celui de protestante, laquelle, quoiqu'apparemment plus faible, demeure néanmoins en effet plus ferme et plus forte.

Premièrement, pour ce que dans icelle nul ne s'attribuant la qualité de chef absolu, n'en entreprenant la domination tyrannique, l'association n'en est ni ennuyeuse, ni insupportable à aucun.

Secondement, pour ce que l'autre butant à la ruine de la huguenotte et travaillant incessamment, tantôt par force ouverte, tantôt par fraudes et embusches secrètes, à la désolation du général d'icelle et d'un chacun des particuliers, le péril d'un d'iceux est rendu commun à tous. Et par ainsi, venant à avoir de communs intérêts, l'association en devient comme indissoluble, et tellement solide, que si la France, l'Angleterre, le Danemarck, la Suède et les États se délibèrent d'employer une fois toute leur puissance et vaillance, et celle de leurs associés, ainsi qu'il convient à la sagesse et générosité de leurs grands rois, il est sans doute qu'ils disperseront ou affaibliront grandement cette formidable domination espagnole. Jugeant bien, néanmoins, que s'il ne se faisoit entre vos quatre Majestés d'autres liaisons et confédérations que les communes, telles conceptions se réduiroient à néant; d'autant que les envies, jalousies et défiances ordinaires qui ont accoustumé de travailler les esprits des grands princes, n'étant point du tout éteintes entre vous, multiplieroient tellement les difficultés, déjà assez grandes par la nature propre de si hautes entreprises, que ce seroit plutôt folie que sagesse d'y occuper son esprit. Mais aussi oserois-je bien soutenir, et ne penserois manquer de bonnes et solides raisons pour le prouver, que si vos quatre Majestés veulent faire ensemble une amitié cordiale et union indissoluble, comme les fondemens en avoient déjà été jetés par la feuë reine d'Angleterre, que conjointement elles se veulent départir de toutes dépenses non nécessaires, et porter toutes leurs cogitations et puissances à la seule exaltation de leur gloire et accroissement de leurs dominations, constituant en cela leurs plaisirs et délices, qu'il n'y a rien en tout ce que j'ai proposé qui ne se rencontre de facile exécution.

Que je le suppliois donc, puis que la fermeté de l'alliance et confédération de vos Majestés étoit la première baze et principal fondement de toutes hautes et généreuses entreprises, de vouloir une fois pour toutes, sans plus user de remises, donner conclusion à ce qui avoit été, non seulement projeté, mais promis absolument, et dont, sur sa parole, j'avois déjà écrit à votre Majesté. Et partant que les choses n'étoient plus, ce me sembloit-il, en leur entier, sa foy, son jugement et son courage y estant maintenant engagé entièrement, lesquels il ne devoit laisser obscurcir par le moyen de ces petites contestations et altercations frivoles, pour le démeslement desquelles ses ministres avoient, sans aucun fruit, consommé la plus-part de toutes nos conférences.

Que, puis que toutes les raisons d'Estat, la justice et l'honneur vous obligeoient tous deux communément à la defence de messieurs les Estats et sur tout à empescher la perte d'Ostende, et qu'une entreprise qu'ils ont sur une des principales villes de Flandres ne tournast à neant (dont le sieur Bernaveld m'avoit parlé et prié de n'escire point le nom, mais le reserver de bouche), il y auroit des despences à faire de toutes parts, qui excederoient plusieurs fois toutes les debtes par eux pretendues, lesquelles par ce moyen, suivant ce qui avoit esté arresté, demeureroient plus que acquittées. Mais qu'en tout cas je luy osois bien bailler ma foy et ma parole, qu'en une sorte ou en l'autre, il seroit donné toute satisfaction à Sa Majesté sur le fait desdites debtes; pour ce qu'ayant à present pris une entiere cognoissance de tout l'estat de France, de ses facultez et des bons mesnagemens qui s'y pouvoient faire, et vostre Majesté estant resoluë d'en user avec la prudence requise, il n'y avoit point de doute qu'avant peu d'années, elle auroit dequoy acquitter, non seulement toutes ses debtes et assister tous ses amis, et confederez au besoin, mais aussi de faire un fonds suffisant, d'argent, d'armes, d'artillerie, de munitions et de vivres, pour, avec son courage, ses amis, sa creance, son experience et sa reputation, effectuer tout ce à quoy les plus hautes cogitations de quatre si grands roys pourroient atteindre; les conjurant au nom de Dieu, et par leur propre gloire, honneur et grandeur que, comme ils fraternisoient en toutes graces et vertus tres-excellentes, de vouloir symboliser en mesmes desseins et posseder mesmes fortunes sans envies ny jalousies: vos Majestez ayans en toutes choses suffisante occasion de se contenter chacun en soy-mesme, des graces que le ciel luy avoit départies, sans desirer rien d'ailleurs.

Ausquelles paroles qu'il tenoit pour des loüanges excédans toute mesure, puis qu'elles le comparoient à vostre Majesté, il tesmoigna une indicible joye, et une espee de courroux contre ceux qui l'avoient voulu dissuader de conclurre les ouvertures qui avoient esté faites, comme un resultat des conseils entre nous tenus, sommairement escrits de ma main, puis corrigez de la sienne. Tellement que tout soudain, en m'embrassant, il me dit en substance: « Non, non, monsieur l'ambassadeur, ne craignez point que je vienne à manquer à ce que nous avons accordé ensemble. Je vous veux en premier lieu, tout maintenant, tesmoigner que je prise, comme il faut, les ouvertures et propositions que vous m'avez faites, auxquelles je veux encore penser et vous en dire mon advis tout à loisir; et se-

condement, que je suis tout tel que vous m'avez estimé et publié par vos lettres et dans mon *dominium* (ainsi appelle-il ses pays). Et partant, sans plus grande ceremonie et consultation, ny sans prendre autre conseil que le mien et le vostre, je vous promets que, si vous voulez mettre en forme authentique ce qui n'a esté que minuté de vostre main, et corrigé de la mienne, et le signer au nom du Roy, mon frere, avec un ample pouvoir, si vous l'avez tel qu'il est requis pour cet effet, que je le signeray aussi; ou bien si vous le voulez emporter en France, ainsi qu'il est, je vous donne, dès à present, ma foy et ma parole que, si dans un mois ou six sepmaines du jour de vostre partement vous me le rapportez, ou envoyez en forme deuë, approuvé et signé du Roy, mon bon frere, je le signeray sans difficulté, ainsi qu'il me sera présenté. Car je ne donneray jamais sujet ny à luy ny à vous, de perdre la bonne opinion que vous avez tous deux conceuë de moy; et ne voudrois pas, pour beaucoup, que je n'eusse entendu de vous, ce qui concerne ces deux factions generales de la chrestienté; à quoy il faut que le Roy, mon frere, et moy et nos confederez, pensions à bon escient, et y prenions conjointement une ferme, tres-certaine, mais tres-secrete resolution, comme je vous diray plus amplement avant vostre partement. »

Et au mesme instant il appella les sieurs admiral Haouard, comte de Northumbelland, comte Sutenton, comte de Mare, milord Montjoye et secretaire milord Cecile, auxquels il dit: « Apres avoir conferé avec monsieur l'ambassadeur de France, sur infinies affaires de tres-grande importance, bien discuté le tout, et reconnu comme sur ma parole il a donné de bonnes assurances au Roy, mon frere, je ne l'en veux pas desadvoüer, ny faire trouver fausses ou pleines d'adulation, les louanges qu'il a publiées de moy par ses escrits. Et partant je demeure resolu d'approuver et ratifier ce qui a esté par luy escrit en nos presences, et par moy corrigé de vos advis, par forme de projet de la bonne intelligence et fraternité qui doit estre entre nos personnes, pays et peuples, si le tout m'est renvoyé dans un mois ou six sepmaines, passé et signé en instrumens authentiques, comme il appartient. Et ainsi je vous ordonne, à vous M. Cecile, que sans autre replique ny contestation, vous fassiez dresser toutes expeditions necessaires en cette conformité, suivant lesquelles j'en donneray de main la dextre (1) et toutes sortes d'assurances

(1) J'en ferai demain le serment.

« aux ambassadeurs de messieurs les Etats (qui estoit la seule fois qu'il les avoit ainsi appel-  
« lez). » Puis se tournant vers moy et me prenant par la main, me dit : « Et bien, monsieur  
« l'ambassadeur, n'estes-vous pas maintenant  
« bien content de moy ? »

A quoy je luy fis response que ses vertus et sa prudence donnoient sujet, non seulement de les louer, mais de les admirer ; le suppliant de ne me reputer point moins passionné à son service, qu'à celui de mon Roy, unique maistre et bien-faiteur, tant pour ce que c'estoit chose qu'il m'avoit commandée, que pour ce que mon inclination m'y portoit, et que les honneurs et faveurs que j'avois receus de sa benignité, m'y obligeoient tres-estroitement, le suppliant me permettre de luy baiser actuellement les mains en cette qualité. A toutes lesquelles paroles il monstra une joye tant excessive, qu'elle en desplaisoit à aucun de ses conseillers presens ; et ainsi en m'embrassant et me priant de l'aimer cordialement, il me licentia, commandant au comte de Northumbelland de m'accompagner jusques sur la Tamise, et ordonner, de sa part, au milord Sidnay, de me conduire jusques dans mou logis à Londres.

Voilà, Sire, en abrégé le plus qu'il m'a esté possible, mais aussi en totale substance, tout ce qui s'est dit et fait en ma penultième audience, reservant à mon arrivée pres de vostre Majesté les discours de la dernière, lors que j'ay depuis pris congé et me suis séparé de ce prince et de ses ministres : ensemble tout ce qu'il m'a dit touchant mes propositions sur les deux grandes factions de la chrestienté et quelques autres particularitez d'importance, touchant les affaires à moy tant recommandées par vostre Majesté, qu'il m'a prié et fait jurer de n'escire point et ne les dire qu'à vostre Majesté seule. De laquelle si à mon parlement j'eusse apporté les pouvoirs à moy necessaires pour conclurre et signer toutes choses, j'eusse peut-estre (et je n'en doute point) obtenu des conditions encore plus advantageuses que celles que je vous porte ; et en tous cas j'eusse si bien lié et assuré ce qui est escrit en forme de projet seulement, qu'il n'y eut point eu de changement à craindre aux volontez d'Angleterre, comme je recognois que vostre Majesté en est en quelque doute ; encor que pour mon regard je n'y apprehende rien, veu les paroles que ce prince m'a données avec tant de franchise en prenant congé de luy, et que pour mon regard il me soit bien plus seur de n'avoir rien signé ny arrêté absolument, mais laissé le tout en son entier, et par consequent en la liberté de vostre Majesté, de le com-

muniquer à qui bon luy semblera, et de le rejeter ou approuver avec maturité de conseil. Car par ce moyen et pour le present et pour l'advenir, lors que l'on ne se representera plus les raisons des choses passées, je demeureray exempt de calomnies et de tout reproche, soit de vous, de ceux qui vous succederont, ou des envieux des actions d'autrui. Suppliant vostre Majesté me pardonner tous les defauts de mes paroles et de mes procedures, les imputer non à ma loyauté, mais à mon insuffisance, et croire qu'en tout ce que j'ay dit, fait, geré, negocié et conclu, j'ay usé de mesme zele, assiduité, diligence et circonspection, que s'il eust esté question de mon salut, de mon honneur et de ma vie, comme j'ay fait et feray incessamment en toutes les choses qui concerneront la gloire, honneur, grandeur, felicité et contentement de vostre Majesté.

Que si elle ou aucuns de ceux auxquels il luy aura pleu donner part de mes depeschés, les trouvent trop longues, ennuyeuses et à diverses reprises, comme moi-mesme y vois de l'apparence, rencontrent plusieurs choses à corriger et contredire en mes paroles, projets, procedures, libertez et hardiesses à exposer mes conceptions, et m'accusent de louer excessivement ce prince, je supplieray vostre Majesté, et eux aussi, de se souvenir des commandemens et instructions qui m'ont esté baillées par escrit, où il m'est enjoint de prendre le temps, les occasions et l'estat des affaires à propos, pour m'y conduire diversement selon icelles : à sçavoir, tantost comme ambassadeur, tantost comme affectionné particulièrement à ce prince, et tantost comme huguenot, et par consequent interessé en la conservation de ceux de cette profession, afin de pouvoir dire et représenter des choses en l'une d'icelles, lesquelles n'auroient pas esté de la bien-seance des autres, comme j'ai fort heureusement fait. Et en cela se doit juger et remarquer la grande prevoyance et industrieuse prudence de vostre Majesté ; car par ces moyens j'ay discoursu plus largement et obtenu diverses choses, auxquelles autrement je ne fusse jamais parvenu. Et partant, je prie ceux qui voudroient determiner à mon desavantage sur tant de choses diverses, et donner sentence de condamnation contre moy, de prendre la patience d'attendre mon arrivée, et d'escouter benignement mes raisons ou, à tout le moins, la lecture entiere de cette dernière lettre, laquelle je juge desja de moy-mesme, si longue et si ennuyeuse, que je crains qu'elle dégousté vostre Majesté, d'en ouïr entierement la lecture. Et pour cette cause ay-je remis à mon arrivée, non seu-



lement les secrettes particularitez que l'on m'a fait jurer de n'escire point, mais aussi la plus-part des derniers propos et complimens qui se sont passez à nostre separation sur les questions que j'ay faites à ce prince, comme de moy-mesme, suivant vostre commandement. Surquoy j'ay encore receu tant de reiterées assurances et des sermens si solemnels, pour l'accomplissement du traité projectté et autres desseins secrets tres-importans, que je ne me sçauois imaginer que ce prince y vienne jamais à manquer. Sur cette creance, et que les empeschemens qui me retardent viendront bientost à cesser, je prieray le Createur, Sire, etc.

De Londres, ce 10 juillet 1603.

Nous desirans tousjours de ne rien obmettre de tout ce que nous avons pû sçavoir ou recouvrer, qui peut concerner vostre voyage, ambassade et negociation en Angleterre, nous adjousterons encore, à tant de lettres et discours cy-devant transcrits, trois lettres escrites de vostre main au Roy; deux chiffrées sur l'alphabet particulier que vous aviez avec Sa Majesté, gardé par M. de Lomenie, dont nous avons trouvé les minutes parmy quelques papiers mis dans une des petites armoires de vostre petit cabinet secret, quelque temps apres vostre retour d'Angleterre à la Cour. Lesquelles n'ayans pû mettre en leur ordre requis, à cause qu'elles estoient sans datte, nous avons estimé à propos de les interposer en ce lieu, à la suite de toutes les autres grandes lettres et discours cy-dessus par nous escrits et chiffrés sur l'alphabet de M. de Ville-roy, avant que de parler de ce qui se passa sur le temps de vostre partement, et depuis vostre retour d'Angleterre en France; ces trois lettres estant telles que s'ensuit :

*Lettre de la main de M. de Rosny au Roy.*

SIRE,

Continuant de rendre compte à vostre Majesté (suivant le commandement expres qu'il luy a pleu de m'en faire, sans apprehender qu'elle trovast mes lettres trop longues) de toutes les moindres particularitez, de tant soit peu d'importance, qui seroient venuës à ma cognoissance, je me suis proposé de luy représenter icy comme en un tableau peint de toutes ses couleurs, et comme partie des causes et fondemens d'aucunes de mes procédures qui pourroient sembler extravagantes à quelques esprits delicats, tout ce que j'ay appris et recognu des humeurs, fantaisies et dispositions de ceux avec lesquels il m'a fallu traiter, ou qui se pouvoient interesser avec eux, que pour plus grande intelligence du total, je distingueray en quatre

chefs principaux, dont le premier concerne le roy d'Angleterre et autres potentats du Nord, leurs humeurs et inclinations naturelles, judiciaelles et consideratives, tant envers vous, le roy d'Espagne, que les Provinces Unies. Le second, la diversité de ses conseillers et ministres, et leurs differentes inclinations envers les mesmes choses. Le troisieme, les pratiques, desirs et dispositions d'Espagne et des Archiducs. Et le quatriesme, l'estat des affaires des Provinces Unies, leurs affections, leurs esperances, leurs forces et leurs foiblesses; ce qui, à mon advis, donnera plusieurs lumieres à vostre Majesté, et dequoy arrester, ou au moins diminuer les blasmes des esprits trop curieux et contentieux, et qui ne trouvent jamais à leur goust aucunes des paroles ny des œuvres d'autrui.

Premierement, quant aux humeurs des susdits roys et potentats du Nord, encor qu'elles sont differentes en beaucoup de choses, si n'ay-je pas laissé de les trouver en mesme sentiment pour le regard des surseances et temporisement d'attendre, pour entamer les choses, la maturité des occasions, et de n'entreprendre point trop de grandes choses à la fois; et pour particularitez de ce que j'ay pû recognoistre, en communiquant tant de fois avec le roy d'Angleterre, il m'a semblé que son inclination envers vous et la France, n'estoit pas trop bonne lors que j'arrivay en Angleterre, dautant que les jaloux de vostre gloire avoient essayé de luy persuader que vous le mesprisiez et hayssiez tout ensemble; que vous en parliez indignement, l'appellant *capitaine és arts et clerc aux armes* (car ce sont les mots dont l'on m'a fait reproche); que mon frere et moy avions tenu plusieurs discours à son desavantage, voire mesmes il s'estoit fourré quelque chose en l'esprit des antiques pretentions angloises sur la France.

Quant à l'Espagne, ces roys du Nord la distinguoient en trois maisons, à sçavoir d'Espagne, d'Austriche et de Bourgogne.

Pour la premiere, le roy d'Angleterre en craignoit et hayoit la nation, la fierté, les astuces, la puissance et les desseins.

Pour la seconde, il la mesestimoit, comme foible et dénuée de personnes recommandables; mais de laquelle il eust bien désiré l'amitié, en la separant sinon de l'affection, au moins de la faction Romaine, espagnole et jesuistique, qu'il hayt infiniment.

Pour la troisieme, le nom, la situation et le reestablishement de cette maison de Bourgogne, luy sonne fort doux aux oreilles; et, à mon advis, n'espargneroit rien pour cét effet, moyennant qu'il la pust absolument separer de l'Espa-

gne et mesme de l'Austriche, sinon de la maison à tout le moins de la pretention.

Quant aux ministres et conseillers de ce prince, comme ils sont divers en pays, en naissances, esprits, qualitez et professions, aussi sont-ils differens en amitez et conseils, en desseins et en factions. Les uns, comme le comte de Mare, le milord Mont-joye, chevalier Asquins, Kainlos et quelques gentilshommes du lic et jouvenceaux, qu'ils appellent de la couche, ils sont tout à fait portez à la personne de leur maistre, à ses passions, à ce qui luy pourroit acquerir honneur, gloire et grandeur, et plustost penchans vers la France que nulle autre part, peu experimentez aux affaires, quelques-uns d'eux assez bons hommes de guerre, qui voudroient bien posseder seuls la faveur et en exclurre les autres : d'autres, comme l'admiral Haouard, le grand chambellan, bref tous les Haouards, le grand escuyer et tous les Husmes et quelques autres avec eux, sont entierement portez à la faction espagnole. Les autres, comme le chancelier, le grand thresorier, le milord Cecile et autres semblables, sont tous d'humeurs anciennes angloises, c'est à dire, ennemis de la France, peu amis de l'Espagne, et absolument portez pour faire ressusciter la maison de Bourgogne, et reduire les Etats à cette nécessité. Les autres, comme le comte de Northumbelland, de Sutenton, de Comberland, les milords Cobhan, Ralek, Griffin et autres, seront tousjours de toutes les factions qui voudroient remuer message, ou dedans ou dehors leur royaume ; voire aucuns d'eux contre leur propre Roy et leur patrie, et tous ces gens-là ensemble, demeurent buttez les uns contre les autres à qui possedera la faveur et fera suivre ses conseils. Mais l'on estime que les gens de robe et de plume l'emporteront par dessus les autres, comme plus sortables à l'humeur du Roy, plus intelligens d'affaires, plus fins, plus rusez, plus patiens à supporter les impetuosités des autres, moins sujets à donner des ombrages et des défiances à leur maistre, et à luy faire craindre leurs courages et leurs desseins. Si ce n'est que des mignons et favoris de chambre, comme l'on commence à l'appercevoir, ne traversent tant les uns que les autres et s'emparent de tout le credit.

Quant à l'Espagne, l'on croit, à ce que l'on a pu descouvrir et conjecturer jusques à present, soit par la cognoissance de leur naturelle fierté, de leurs anciennes convoltises et desseins à l'empietement de l'empire chrestien, soit par les pratiques et menées qu'ils ont desja faites et les intelligences qu'ils continuent avec tous ceux qui hayent la France, que tout leur but tend à en

empescher l'alliance et confederation avec l'Angleterre, et que plutost que de n'y parvenir, ils accorderont tout ce que voudra l'Angleterre, jusques à delivrer les Provinces Unies de toutes guerres, voire de subjection, pourveu que cela se traite sans la participation de la France, sur laquelle, ainsi qu'ils publient, tant eux que l'Angleterre ont de si grandes pretentions et si bien fondées, que ce seroit honte à l'un et à l'autre de ne les pas renouveler et ne s'unir ensemble que pour s'y reintegrer : chose aussi facile, disent-ils, à executer qu'à desirer, estans une fois sur ce sujet, ces deux couronnes et les dix-sept provinces des Pays-Bas, en paix, union, concorde et bonne intelligence ensemble. Mais de quelques belles paroles et specieuses apparences que puissent estre ombragez et fardez tous ces projets, si les estime-je, et peut estre eux mesmes aussi, de succez impossibles, tant à cause de la contrariété des religions, que des fondemens divers et maximes differentes que les uns et les autres ont à present au regime de leurs royaumes.

Quant à messieurs des Etats des Pays-Bas, comme les plus exposez à l'oppression et les plus proches des dangers, aussi ont-ils des penetrations plus vives et des apprehensions plus certaines, recognoissans bien en premier lieu que toutes les blandices d'Espagne ne sont qu'autant de pieges à leur liberté, les esperances d'Angleterre plutost des mines et des paroles que des certitudes ny des effets, et qu'il n'y a que la seule generosité, franchise et puissance de vostre Majesté qui soulage leurs ennuis, subvienne à leurs necessitez et renforce leurs courages. Et neantmoins ils cachent tant qu'ils peuvent telles opinions, et font demonstration qu'ils croyent estre facile de traiter à conditions raisonnables, et recevoir des assistances convenables de l'Angleterre ; afin que tenant vostre Majesté en jalousie, qu'ils ne se precipitent en l'un ou en l'autre party, ils augmentent, par cette apprehension, d'autant plus vostre resolution à les secourir puissamment et en suite conjoindre à ce secours la reputation des alliances et confederations angloises ; afin qu'elles ne se restraignent dans les factions à vous et à eux contraires, qui est tout le fruit, à mon advis, qu'ils esperent de leur voyage en Angleterre et de mon entremise pour eux audit pays ; et que de ma part, tant pour ce qui les touche que pour toutes les autres affaires que j'ay traitées pendant mon voyage, soit avec ce prince, ses ministres ou autres particuliers, j'ay estimé estre necessaire de vous représenter. Priant le Createur, etc.

*Lettre de la main de M. de Rosny au Roy.*

SIRE,

Encor que par l'ordre qu'il a pleu à vostre Majesté me commander d'observer, en luy faisant tenir des lettres touchant ses particulieres intelligences, tant anciennes que nouvelles, avec les Estats, royaumes, princes, peuples et villes protestantes et reformées, et autres faciendes que j'estimerois ne devoir pas estre publiées que par vostre commandement ou licence, vostre Majesté m'eust ordonné de les escrire toutes de ma main sur l'alphabet du chiffre particulier qu'elle m'avoit fait dresser, si me fusse-je neantmoins fort bien gardé de les faire telles et si longues que j'ay fait et fais encore maintenant, si M. de Lomenie, en me venant dire adieu, ne m'eust assuré que vostre Majesté luy avoit mis son chiffre entre les mains, et commandé de s'instruire si bien en iceluy, qu'il vous pust descharger de la peine de déchiffrer mes lettres. Tellement que sur cette confiance, Sire, joint le desplaisir que vous m'avez mandé d'avoir eu de l'esgarment fait par les commis de M. de Ville-roy, d'une lettre non chiffrée que j'escrivois et adressois à vostre propre personne, je prends la licence d'amplifier cette lettre sur vostre chiffre particulier d'une infinité de particularitez qui eussent pu permettre d'estre escrites du chiffre que j'ay avec M. de Ville-roy, et d'y adjoindre encore quatre ou cinq petites lettres que j'avois desja minutées et préparées pour vous estre envoyées à diverses fois, afin qu'elles vous fussent rendues moins ennuyeuses à faire déchiffrer et lire.

Par cette-cy donc, Sire, laquelle à mon advis sera la dernière que vostre Majesté aura de moy en son chiffre, je lui diray, en premier lieu, comme ceux qui avoient eu charge de la part des roys de Dannemarc et Suede pour y rendre les complimens accoustumés aux nouvelles royantez, arriverent en ce royaume un jour après moy. Surquoy nous estans entre-donnez les advis nécessaires pour ce que nous avions à communiquer ensemble, les visites s'en sont suivies telles qu'il estoit convenable; en quelques unes desquelles se sont par trois fois rencontrés le comte de Mare, le milord Mont-joye et le chevalier Asquins; mais tousjours faisant semblant que ç'avoit esté par hazard et comme d'eux mesmes, et grands amis des autres. Quoy que ce soit, nous avons eu à diverses fois plusieurs longs et divers propos ensemble, lesquels n'estans pas de la bienséance d'une lettre en chiffre, je remets à les faire entendre à vostre

lors que je seray pres d'elle. Mais pour

l'informer de quelques-uns d'iceux les plus nécessaires à sçavoir promptement, je luy diray que nonobstant que je n'aye pas trouvé en ces gens-cy ensemble, ny en tous les autres avec lesquels j'ay eu à traiter choses de consequence, cette vivacité d'esprit, fermeté de jugement, ny genereuse resolution aux hautes entreprises, esquelles excelloit vostre royale et loyale sœur la brave Elizabeth d'Angleterre, si n'ay-je pas laissé de faire projetter et resoudre plusieurs bons essais à faire et observations à practiquer. Je luy diray, d'ailleurs, qu'encor qu'ils n'ayent peu trouver rien à redire aux questions que vostre Majesté m'avoit commandé de leur proposer comme de moy-mesme, et sans aucune charge d'ailleurs, si n'ont ils pas laissé de leur associer tant d'esgards, circonspections, temporisemens, remises d'executions et d'observations à faire pour empescher de rien precipiter, mais d'attendre la maturité des occasions et la bonne assiette des esprits, qu'ils croient avoir pris des precautions contre tout ce qui les pouvoit obliger à s'embarquer en des desseins et entreprises de douteuses issues; et neantmoins si ne laisse-je pas de croire d'avoir obtenu tout ce que vostre Majesté pouvoit maintenant raisonnablement desirer d'eux, puisque par article expres il a esté convenu qu'ils suivront l'exemple de vostre Majesté en la distribution des Estats et seigneuries qu'il faudra départir. Et quoy que je ne doutasse pas de pouvoir bien trouver d'assez valables raisons pour y faire adoucir quelques uns de ces points en temperamens et assaisonnemens, si est-ce que ne voyant rien prest d'executer en toutes ces choses, ny qui pust presser vostre Majesté d'entrer en nul essay d'importance, je ne voulus pas m'en servir, de crainte que rencontrant des esprits capricieux ou opiniastres, nos resolutions doucement convenuës ne fussent changées en altercations, voire mesme en aversions apparentes, lesquelles eussent pu diminuer en quelque sorte l'opinion en laquelle, suivant le commandement de vostre Majesté, je m'estois resolu de laisser un chacun en partant de ce pays, qu'il y avoit une parfaitement bonne intelligence entre vous quatre grands roys, et une assurée fraternité d'armes et de desseins conformément à celle qui avoit esté concluë entre vostre Majesté et celle de la feuë reine Elizabeth: me semblant estre bien plus convenable à un ministre d'Estat, duquel les actions sont subjectes à recevoir de malicieuses interpretations, en laissant les choses apparemment en leur entier, de remettre le choix de l'innovation à vostre Majesté, encore que, pour dire ce qui m'en a semblé après avoir plus attentivement

medité sur toutes circonstances presentes et celles encor qui sont en la puissance de l'advenir, je ne croye pas que quand j'auray représenté tout ce qui m'a esté occurrent en ce pays, qu'elle accuse de lascheté ou d'imprudence mes procédures. A quoy desirant de preparer desja aucunement l'esprit de vostre Majesté, j'ay creu qu'elle ne me blasmeroit point si je luy faisais icy un sommaire fort abrégé de la principale raison qu'un chascun d'eux allegna en une assemblée qu'ils firent sans m'en advertir, mais que j'ay sceu depuis, par le moyen du milord Mont-joye, qui est vostre serviteur particulier et mon intime amy, pour les faire également convenir en un mesme sentiment sur les temporisemens, remises et attentes de la maturité des occasions cy-devant dites.

Le roy d'Angleterre, comme prince d'exquise sagesse et grandement speculatif, et qui mesme affecte de se faire tenir pour tel, disant qu'il estoit de la necessaire temperance et circonspection de toute nouvelle royauté de se donner an et jour de terme avant que de faire aucunes innovations, afin de n'en exciter point qui luy puissent nuire, et semble que celles qu'il apprehende le plus luy doibvent venir du costé de sa femme et de son fils aîné, quoy qu'ils ayent inclinations diverses.

De la part du roy de Dannemarc (lequel, à la verité, a domination sur de grandes et fort diversifiées estendues de terres et pays, mais la pluspart infertiles, de bizarre situation et grandement incommode habitation), il fut allegué par ses députez que ses peuples, bien qu'assez dociles, estoient neantmoins si divers en mœurs, humeurs et fantaisies, que, pour les contenir en obeyssance envers luy et patience entr'eux mesmes, il estoit contraint d'y changer souvent d'ordres, de formes et de reglemens, estant maintenant apres pour voir s'il en pourroit point establir de perpetuels; avant le succez duquel dessein l'estat de ses affaires l'obligeoit à ne s'engager absolument en nulle entreprise presente qui pust estre douteuse.

De la part du roy Charles de Suede (que vostre Majesté cognoist, et lequel, par son commandement, je fis assister d'hommes et d'argent pour faciliter sa nouvelle royauté), ses députez représenterent qu'estant venu advis à leur Roy au temps qu'ils partirent, que le Roy de Pologne, son neveu, faisoit quelque demonstration de vouloir encore renouveler ses pretentions sur la Suede, surquoy il s'estoit resolu de convoquer une assemblée de tous les Estats de son royaume, avant la conclusion de laquelle il ne leur sembloit pas à propos de s'embarquer en des mou-

vemens d'importance et de longue decision au dehors.

Et de la part de messieurs les Estats des Provinces Unies il fut dit, par le sieur Bernaveld, qu'il leur sembloit ne debvoir penser pour maintenant à rien de nouveau, qu'ils n'eussent veu que deviendroit ce grand dessein de l'attaquement et de la defence d'Ostade, ce que produiroient les mutinations de plusieurs troupes espagnoles, et ce qu'il réussiroit d'un dessein qu'ils avoient, dont l'heureux succez repareroit les dommages de la perte d'Ostade quand bien elle arriveroit. Et quoy que sur toutes ces allegations je voye bien qu'il y auroit beaucoup de choses à contredire, si ne perdez-je point l'opinion qu'il pourra survenir de tels accidens, diversitez d'advis et de conjonctures d'affaires, que vostre Majesté aura elle-mesme besoin d'user des temperamens qui luy sembleront peut-estre n'estre pas maintenant de saison. Suppliant vostre Majesté de m'excuser si mes lettres, mais principalement celles en chiffres, dont la nature prescrit brevité, sont trop longues et frequentes, peu éloquentes et souvent pleines de redites, estant bien difficile d'user de chiffrage sans plusieurs erreurs; me semblant que les miennes doivent estre couvertes par l'expres commandement que j'ay receu de vostre Majesté de n'espargner point ma peine en telles occasions : lequel me fera prendre encor la hardiesse d'amplifier cette lettre, quelque excessivement longue et peut-estre ennuyeuse qu'elle puisse estre, d'un recit de divers bruits qui courent en ce royaume en forme de vaude-ville, des diverses fantaisies des principaux de ceux qui auront à jouer leur personnage sur le theatre des affaires qui se demenent aujourd'huy, et desquelles il vous a plu que je m'entremisse de quelque partie. Mais estant venu à considerer qu'il me seroit du tout impossible de vous en représenter un detail bien intelligible, sans faire une excessivement longue et ennuyeuse lettre pour vostre Majesté et trop penible pour moy-mesme, je me suis resolu d'en differer le discours entier comme je fais celuy des articles secrets dont nous sommes convenus, au temps qu'une furieuse pluye et un grand vent la retenant dans la chambre, elle commande souvent à ses serviteurs, et frequemment à moy, de luy faire des contes. Mais afin que vostre Majesté ait plus de desir et plus de souvenir pour me l'ordonner ainsi, j'ay estimé qu'elle n'auroit point desagréable si, par anticipation, je luy en faisais icy un petit sommaire des plus abrezgez qu'il m'a esté possible, que pour plus facile comprehension je distingueray en cinq chefs principaux.

Le premier, pour ce qui concerne le roy d'Angleterre, ses humeurs, inclinations, opinions, desirs et dispositions, et les diversitez d'avis, conseils et intentions de ses divers ministres sur l'estat des affaires presentes et leurs égards à l'endroit des roys de France, d'Espagne, de Dannemarc, Suede, les archiducs de Flandres, les provinces unies de Hollande, et finalement l'Empereur, l'Empire, les Estats et princes d'Allemagne, et les Suisses; car il se discourt de toutes ces choses.

Plus le second, pour ce qui peut concerner les mesmes Estats, affaires et personnes cy-dessus, au regard des roys de Dannemarc et Suede, et leurs conseillers qui sont icy deputez.

Plus le troisieme, pour ce qui peut concerner les mesmes Estats, affaires et personnes cy-dessus, à l'esgard du roy d'Espagne et de ses conseillers et confidens qu'il a en ce royaume.

Plus le quatrieme, pour ce qui peut concerner les mesmes Estats, affaires et personnes cy-dessus, à l'esgard des archiducs de Flandres, les partisans qu'ils ont en ce royaume, leurs grandes villes et peuples.

Et le cinquieme, pour ce qui peut concerner les mesmes Estats, affaires et personnes cy-dessus, au regard des provinces unies des Pays-Bas, de la diversité des intentions de leurs conducteurs, et des inclinations de leurs villes et riches marchands, touchant la facilité du commerce aux deux Indes.

Sur tous lesquels discours, apres la requisition tres-humble d'un general pardon de toutes mes erreurs, estant bien difficile de n'en avoir point fait en de si longues lettres de ma main, toutes sur le chiffre particulier que vostre Majesté a voulu que j'eusse avec elle, je prieray le Createur, Sire, etc.

*Lettre de la main de M. de Rosny au Roy.*

SIRE,

Suivant le commandement que j'avois receu de vostre Majesté, en prenant congé d'elle pour mon voyage d'Angleterre, d'adresser à sa propre personne toutes mes lettres qui parleroient de ce qu'elle m'avoit donné charge de proposer comme de moy-mesme au roy d'Angleterre et autres à moy specifiez, pour essayer de diminuer la faction d'Espagne et maison d'Autriche qui s'amplifioit par trop de tous costez, et autres affaires que j'estimerois dignes de venir à sa seule cognoissance; je ne manquay pas de suivre vos intentions dès ma seconde dépesche, d'autant qu'elle parloit un peu librement des Anglois et de leurs humeurs et complexions hautaines et volages. Or, ayant appris par les lettres de vostre

Majesté, que cette mienne dépesche avoit esté soustraite et mise en autres mains que les vôtres, j'ay creu que cela n'avoit point esté fait sans quelque mauvais dessein de longue main premedité, et que je me devois rendre d'autant plus circonspect à escrire de telles matieres et soigneux d'observer exactement vostre ordre plein d'admirable prudence et prevoyance, comme les succez des choses en rendent des preuves manifestes. Et combien qu'en une lettre que je vous ay escrite ce jourd'huy, par la voye et maniere ordinaire, le paquet estant adressé à M. de Ville-roy, je la die estre une espece de recapitulation de tout ce qui s'est passé en mon voyage, et que j'ay traité, geré et negocié pendant mon sejour en Angleterre, si ay-je neantmoins obmis expressément et conformément à vos commandemens, la plus part des choses lesquelles selon, mon avis, requeroient le plus de secret, à dessein de les vous représenter apres, comme je fais par cette lettre de ma main (sans user neantmoins de chiffre, sa longueur ne me l'ayant pû permettre), et ce le plus brièvement que l'importance d'icelle m'en a laissé la liberté, jusques à reserver plusieurs particularitez fort substantielles à vous faire entendre de bouche, de crainte d'ennuyer vostre Majesté par de si longues et frequentes lettres, comme seroit le recit entier des occasions qui me furent presentées par les roys avec lesquels j'ay eu à negocier, sans qu'à mon avis ils aient pensé qu'il y eust de l'artifice, tout cela ayant esté fait si à propos, que j'eus moyen de leur faire toutes les propositions que vostre Majesté m'avoit commandées; et crois de m'y estre comporté en sorte qu'il leur a esté impossible de se douter que vostre Majesté en eust eu aucune cognoissance. Leur faisant croire absolument que tout cela procedoit purement et simplement de mes imaginations et fantaisies, et encore icelles engendrées par l'extreme passion que j'avois à la conservation et accroissement de ma religion, au contentement de sa personne royale d'Angleterre, et à l'exaltation de sa gloire et amplification de sa domination, comme celuy seul que j'estimois capable de pouvoir empescher les desseins que je voyois bien qui se minutoient entre tous les roys et potentats catholiques Romains, pour la ruyne de ceux qu'ils nommoient heretiques. Luy ayant ensuite, avant que de rien particulariser, fait faire tous les sermens solempnels que j'ay voulu, qu'il ne diroit jamais rien à qui que ce pust estre de ce que je venois de luy declarer de l'interieur de mon cœur, tant envers la religion en general, que sa personne en particulier, ny des autres ouvertures que j'avois encore à luy faire, sinon

de mon sceu et consentement ; de crainte que parvenant à la cognoissance de vostre Majesté par autre voye que la mienne, et sans y apporter les dispositions et precautions necessaires, elle ne s'offençast grièvement contre moy, de voir que j'aurois entrepris de parler à un prince estranger avec telle confidence de choses tant importantes, non seulement sans en avoir eu charge de vous, mais aussi sans vostre sceu, et ne fust en fin peut estre cause que de mon affection en son endroit procederoit ma ruine certaine.

Or, ay-je abregé tout ce que je luy dis et qu'il me respondit sur ce sujet, le remettant à vous en faire le recit estant pres de vostre Majesté pour respondre au commandement qu'elle me fait de m'informer de la perte de ma susdite seconde dépesche. Surquoy je luy diray que ceux qui ont charge de recevoir ses paquets, la coloreront de telles excuses que bon leur semblera ; mais je vous puis certifier, Sire, qu'elle a esté portée par mon courrier, que je confesse bien estre homme simple, mais fort fidele, et me servant à la chambre, dans le logis de M. de Ville-roy, dautant que vous estiez lors à la chasse, et mise entre les mains d'un de ses commis, du nom duquel, à la verité, il fut si beste que de ne s'en enquerir pas ; mais, à ce qu'il dit, Louvet parloit à luy, et mit en sa presence plusieurs paquets entre ses mains pour les bailler audit sieur de Ville-roy ; et faut, quoy que l'on vueille dire, qu'il y ait quelqu'un dans cette maison-là duquel vostre Majesté soit desloyalement servie, et qui fasse profit de vos depeschés, encor que pour celle-là il n'en tirera pas, à mon advis, grande utilité, dautant que la lettre estans entierement escrite de ma propre main, et ce qu'il y avoit de plus important, du chiffre particulier de vostre Majesté qu'elle me commanda de luy faire, il ne luy aura pas esté possible de la déchiffrer, et croy plutost qu'autrement que la trop grande circonspection dont j'ay usé, mettant sur la suscription de ma depesche, *paquet pour estre mis es mains propres du Roy sans estre ouvert*, aura esté cause de la substraction d'icelle, et que n'en pouvant profiter l'on l'aura bruslée.

Mais pour reprendre mon premier propos, qui a eu pour but de donner à vostre Majesté quelque espece de lumiere, en attendant mon arrivée, des discours plus importants que nous avons eus ensemble, le roy d'Angleterre et moy, outre ce qui est dit dans cette grande lettre en forme de recapitulation, je vous diray, Sire, et supplieray quant et quant vostre Majesté d'excuser la longueur de l'une et l'autre de ces deux lettres, que, dans la premiere d'icelles, entre ces

mots de *formidable domination espagnole*, et ceux-cy, *que s'il ne se faisoit entre vos Majestez*, j'ay obmis ce que j'adjoustay au roy d'Angleterre, qui fut tel que s'ensuit :

« Ou qu'à tout le moins ils renfermeront cette « faction austrichienne, qui essaye de dominer « sur tous les potentats de la chrestienté, dans « ce seul continent des Espagnes, borné de trois « parts des mers Oceane et Mediterranée, et du « quatriesme des monts Pyrennées. Ce qui se « pouvoit entreprendre, selon mon advis, ce luy « dis-je, par quatre diverses voyes et manieres « de proceder, desquelles, si je ne craignois de « luy estre trop long et ennuyeux, ou le destour- « ner d'autres occupations plus recreatives, je luy « dirois, dès maintenant, quelque chose, atten- « dant un autre sien plus grand loisir, que je « luy representerois d'une suite continué autant « que le sujet le meriteroit, toutes les imagina- « tions et fantaisies qui m'estoient entrées en « l'esprit sur un dessein de telle importance, et « qui neantmoins se conforme en tout et par « tout à ceux que vous avez eus de longue main, « esperant que tout ce qu'il y pourroit avoir de « vague ou defectueux ayant esté bien examiné, « tant par luy que par vostre Majesté, si tant estoit « qu'il jugeast à propos, l'ayant entendu, de vous « en parler, et en suite corrigé selon la pru- « dence de deux si grands Roys, il pourroit, se- « lon mon opinion et mon desir, estre rendu fort « facile à executer. »

Surquoy il me dit en m'embrassant : « Je vous « jure, M. de Rosny, que je n'ay jamais rien « trouvé de trop long ny de fastidieux (car il « use souvent du mesme mot) en vostre entre- « tien ; qu'il ne m'ennuya jamais moins qu'il a « fait cette apres disnée, et mesme crois que je « ne scaurois employer mieux le temps qu'à la « representation de choses si hautes. Et partant « vous priez-je de vouloir continuer, car je vous « veux donner tout autant de loisir qu'il vous « sera necessaire pour cet effet. » Surquoy je luy dis que des quatre moyens par moy imaginez, les deux se pouvoient facilement pratiquer, sans pour cela entrer en declaration de guerre ouverte contre l'Espagne, dont le premier estoit d'entreprendre de conquerir aux Indes, où, par tous les traittez, il estoit laissé en la liberté d'un chacun des roys d'y pouvoir negocier, sauf aux autres à s'en defendre au delà de la ligne, sans que toutes les aggressions et oppositions qui s'y feroient de part ny d'autre, pussent estre estimées à rupture de paix entre eux. Et que pour rendre cette entreprise fructueuse, il estoit necessaire de preparer trois bonnes flottes, composées de huit mille hommes de pied cha-

cune, et de tous vivres, armes, artilleries et munitions nécessaires pour un rafraichissement successif de six en six mois, afin de remplacer ce que le temps, les armes et les maladies, et autres incommoditez des terres et mers tant esloignées, pourroient avoir consommé et ruiné. Desquelles flottes les vaisseaux pourroient estre fournis par les Anglois, les artilleries, vivres, denrées et munitions nécessaires par les Pays-Bas, et les gens de guerre et leur solde, comme le plus onereux, par la France : demeurans tous les profits, avantages et conquestes partagez neantmoins également. L'autre moyen seroit de se tenir preparez pour embrasser les occasions de la succession de Cleves, et le deceds de l'Empereur, lesquelles ny l'une ny l'autre ne scauroient apparemment plus gueres tarder; sans permettre cependant qu'Ostade se perdist, ny qu'il fust esleu aucun roy des Romains. N'y ayant nul doute, que sur tels changemens, il ne survinst des causes de discord entre tous ceux de la maison d'Autriche, et la plupart des princes, Estats, villes et communautéz d'Allemagne, lesquels ouvriroient à la France, Angleterre, Danemarck, Suede, Pays-Pas et leurs associez, les infaillibles moyens pour non seulement faire tomber la succession de Cleves en telles mains que bon leur semblera, mais aussi pour arracher de la maison d'Autriche l'heredité de l'Empire et des royaumes et Estats de Boheme, Hongrie, Moravie, Stirie, Carinthie et Tirol, pour remettre le tout en la liberté élective des princes et des peuples, comme il estoit anciennement, sans que pour cela l'Espagne eust sujet apparent de se plaindre d'aucune agression ny d'infraction de paix; laquelle ne se pourroit ainsi éviter par les deux derniers expediens de ma proposition, dont le premier seroit de soustraire entierement par guerre ouverte toutes les dix-sept provinces des Pays-Bas de la domination d'Espagne, et les distribuer en tel nombre de principautez ou republicques libres et souveraines, qu'il seroit communément advisé par tous les associez, dont la conqueste se rendra assez facile si l'on scait bien user de la commodité qu'en donne la situation, laquelle estant de forme à peu pres triangulaire, compris avec les dix-sept provinces celles de Liege, Juliers et Cleves, l'un des costez du triangle se trouve tout borné de la mer, depuis Calais jusques à Emdem, sur laquelle l'Angleterre, le Danemarck, la Suede, les Provinces Unies et leurs associez sont tant puissantes, qu'il ne scauroit rien entrer ny sortir desdites provinces que ce qu'il leur plaira. L'autre costé du triangle est borné de la France, depuis Calais venant gagner la Somme, et de là jusques à

Mezieres, Verdun et Mets : tout lequel trajet se peut aussi tellement asscurer et clorre, par les pays et forces ordinaires de France, qu'il n'y scauroit semblablement rien sortir ny entrer que ce qu'elle voudra. Le troisieme et dernier costé du triangle, qui s'estend depuis Mets tout du long des rivières de Mozelle et du Rhin, et jusques à Dusseldorp, estant borné des Estats de Mets, de Treves, Cologne et Mayence. Sur lesquelles rivières logent les armées qu'il est espuissances des potentats cy-dessus de mettre sur pied, et ne se trouvant de resistance qu'à Thionville, qui ne peut pas long-temps durer contre telles forces, les autres Estats et villes qui seront du long ce trajet, se resoudront à telles loix et conditions que l'on leur voudra imposer; lesquelles ne tendront qu'à empêcher qu'il ne sorte ny entre aussi aucuns vivres, denrées, marchandises ny hommes dans les susdites provinces; esquelles, si aucunes villes s'opiniastrent à la défence, envoyant es environs d'icelles quatre ou cinq mille chevaux faire le dégast et fouragement des vivres, des villages et des campagnes lors qu'elles viendront en grain, il n'y a doute que la faim et la nécessité de toutes choses ne reduisent dans six mois au plus tard toutes les plus fortes et obstinées forteresses à tel party que l'on voudra; mais tousjours essayer de former de toutes ces provinces une seule republicque toute libre, comme un membre de l'Empire. Le quatrieme et dernier expedient estant beaucoup plus general, de plus grande consequence et remply de difficultez; aussi sera-il necessaire d'y user de plus grandes prevoyances, forces, preparatifs et negociations. Interessant au profit de la dissipation espagnole tous ceux qui pourroient donner quelque sorte d'empeschement à l'enclorre sa domination dans les seules bornes d'Espagne; leur faisant voir des seuretez suffisantes pour ce qui leur seroit promis, et que ce qui s'entreprendroit ne seroit pour aucunes fins ambitieuses ny pour en agrandir, en sorte quelconque, ny la France ny l'Angleterre, ny autre potentat, si puissant qu'il fust, pour devenir aussi ennuyeux et formidable aux autres que s'est maintenant renduë l'Espagne, laquelle, pour ce sujet seul, l'on veut essayer d'affoiblir; distribuant ce que l'on luy osteroit par l'advis commun de tous ceux qui entreroient en l'association, ce qui semble, sauf à y changer ce que l'on verra à propos, ne pouvoir estre plus équitablement fait qu'en disposant de l'Empire, de la Hongrie, Boheme, Moravie et Silezie, Autriche, succession de Cleves et des dix-sept provinces basses, comme il a desja esté dit cy-devant. Et pour le surplus baillier aux Suisses le Tirol;

l'Alsatie et la Franche-Comté; au duc de Savoye la Lombardie, la luy erigeant en royaume avec le Piedmont et la Savoye, formant des Estats des ducs de Florence, Mantouë, Parme, Modene, seigneuries de Genes, Luques et autres petits princes d'Italie, qui voudront contribuer à ce dessein, une especé de republique d'eux tous, afin de se pouvoir mieulx maintenir. Que si quelques-uns desdits princes ne veulent entrer en l'association, ils seront traittez comme ennemis; et quant au Pape, je croy qu'il souvient bien à vostre Majesté, comme le royaume de Naples luy a tousjours esté entierement destiné, comme a esté aux Venitiens toute la Sicille, et tout ce qui sera jugé leur estre plus commode vers le Friul et l'Istrie, en ce qui est possédé par l'Espagne.

Toutes lesquelles propositions, pour estre trop succinctement et superficiellement traittées, sembleroient d'abord à plusieurs (je n'en doutois point, et peut-estre à luy mesme et à vostre Majesté, lors qu'il auroit esté d'avis de vous en parler) plutost pures imaginations que ratiocinations solidement faites ny fondées, lesquelles, neantmoins, se pourroient tres-bien justifier et monstrier fort faisables; principalement tous les défauts d'icelles en ayans esté, comme j'ay desja dit, corrigez par quatre six grands roys et tant experimentez capitaines, lesquels je supplerois lors de me vouloir excuser, et imputer à l'extrême passion que j'ay à leur service, et à l'exaltation de leur grandeur, telles hautes cogitations que j'advoüois et recognoissois assez excéder ma portée, mais non celle de leurs Majestez que le ciel avoit pourvus de particulieres lumieres, dons et graces tres-excellentes, par preference à tous autres roys et princes.

Surquoy s'estant un peu mis à songer, il reprit avec une soudaineté merveilleuse la plupart des principaux poincts que j'avois touchez, y remarqua divers inconveniens, et forma plusieurs difficultez, bref, me fit quasi toutes les mesmes repliques de vostre Majesté, lors que je luy ay fait de pareilles ouvertures par trois fois, dont la premiere fut à son retour de Mets estant à Monglat, où elle prit resolution de m'envoyer vers ce prince, en partie pour luy ouvrir quelque chose de ces propositions, non toutesfois en vostre nom, mais comme de moy-mesme ainsi que j'ay fait, afin, comme il a desja esté dit, de voir ce qu'il en diroit. Pour à quoy parvenir et penetrer dans ses intentions, je luy respondis que toutes ces objections estoient dignes d'un tant sage et judicieux prince qu'il s'estoit montré en toute la conduite de sa vie; que je recognoissois assez l'importance d'icelles, et combien en telles ma-

tieres si espineuses le secret estoit principalement requis; ne doutant nullement que si jamais je venois à en parler à vostre Majesté, qu'elle n'y fist les mesmes difficultez et observations, pour trouver une grande conformité de vivacité d'esprit et solidité de jugement entre vos deux Majestez, qui est la plus excessive sorte de louange dont jesçaurois user en son endroit que de le comparer à vous, comme je pense vous l'avoir desja escrit. Que si son courage, nonobstant tout mon dire, ne se trouve assez relevé pour se jeter tout ouvertement dans de telles resolutions, au moins estime-je l'avoir entierement aliené de toutes propositions qui luy pourroient estre faites; ny pour le recouvrement des provinces qui ont autresfois appartenu aux Anglois, ny pour se restreindre d'alliance et d'amitié avec le roy d'Espagne et les archiducs à vostre prejudice, ny par aucune preference, ny pour se rendre protecteur de ceux de la religion en France, ny pour interceder contre vostre gré pour aucuns de vos sujets rebelles. Qui est tout ce que j'ay estimé devoir escrire à part à vostre Majesté, tout le surplus de ce qu'elle pouvoit sçavoir de moy avant mon arrivée estant dans la grande lettre de mesme datte que la presente; suppliant vostre Majesté de vouloir excuser ce qu'elle y trouverra de mal poly, ou non assez bien expliqué, ou de défauts au chiffre, chose que je crains d'autant plus que je l'ay escrite à la haste, et n'ay pas eu le loisir de la lire apres, tant j'estois accablé de sommeil, ayant esté toute la nuit à l'escire et à la chiffrer, ce qui peut-estre en rendra le deschiffrement plus difficile à M. de Lomenie, aussi qu'à mon arrivée je repareray tous ces défauts, vous portant des resolutions escrites, desquelles vous aurez, à mon avis, sujet de contentement. Sur lequel je prie le Createur, Sire, de vous vouloir journellement aceroistre et vous, etc.

De Londres, ce 10 juillet 1603.

Nous avions oublié à vous ramentevoir qu'un peu devant que vous voulussiez travailler aux deux susdites dépesches, vous aviez receu deux lettres du Roy, l'une estoit du 3 juillet et l'autre du 5, et deux de M. de Ville-roy de mesme datte, lesquelles la teneur ensuit:

*Lettre du Roy à M. de Rosny, contre-signée.*

Mon cousin, la Fontaine arriva icy dimanche au soir, avec vostre dépesche du 24 du mois passé; elle fait mention d'une du 20, que je n'ay encore receuë; partant vous adviserez à qui vous l'avez baillée, afin de sçavoir ce qu'elle est devenuë. J'ay fait responce à celle du 14, le 28 dudit mois passé, par la voye ordinaire de Calais. J'ay bien considéré les propos qui se sont



passiez entre vous et le sieur de Bernaveld representez au commencement de vostre dite lettre, et me semble que vous n'avez peu fait d'avoir tiré de luy sa conception pour la conservation de leur Estat, en cas que le roy d'Angleterre les abandonne et recognoissent ne pouvoir, avec l'assistance de leurs amis, se défendre et conserver par la force.

J'avois bien oüy parler du traité proposé par le duc de Brunsvic; mais aussi j'avois entendu que les difficultez qui en avoient empesché la suite, estoient procedées autant des archiducs et du roy d'Espagne, que des Estats des Provinces Unies : ceux-là ne voulans quitter à l'Empire la souveraineté des provinces et villes possedées par les autres; quoy estant, ce remede proposé serviroit plus à abuser les Estats de Flandres, qu'à les delivrer de peine et leur donner moyen de respirer; au moyen de quoy il seroit besoin qu'ils eussent recours à un autre remede, duquel la necessité où ils se trouveroient lors, pourroit leur faire ouverture. Qui sera tout ce que je vous diray sur le discours dudit sieur de Bernaveld.

Je n'ay rien à vous faire sçavoir sur ceux du secretaire de la seigneurie de Venise, sinon que j'ay eu à plaisir de les entendre, et principalement la responce qu'il vous a dit avoir entenduë, que ledit roy d'Angleterre a faite aux ambassadeurs de l'electeur Palatin, quand ils l'ont requis et pressé de s'employer pour le duc de Bouillon; car elle est telle que je la pouvois desirer et attendre de son amitié. Mais par ce que vous ne me l'avez confirmée par la suite de vostre dite lettre, je demeure en doute de la verité d'icelle, et d'autant plus que j'ay sceu que lesdits ambassadeurs, qui sont arrivez à Paris dès samedi dernier, ont jà déclaré à quelques-uns avoir rapporté toute satisfaction dudit roy d'Angleterre, dequoy je pourray peut-estre apprendre quelque chose d'eux, les voyans, comme je dois faire, devant qu'ils retournent trouver leur maistre.

Mais ledit duc de Bouillon me donne tous les jours quelque nouvelle occasion d'estre plus mal content de luy; car il fait tout ce qu'il peut dedans et dehors mon royaume, pour mettre mes sujets et mes voisins (faisans profession de la religion pretenduë reformée) en jalousie de moy. Il a conseillé audit electeur Palatin de bastir une nouvelle forteresse en son pays, pour la conservation (ainsi qu'il dit) de la pure religion; ayans sur cela osé escrire à Erard, mon ingenieur principal, sans ma permission, de l'aller trouver pour servir ledit electeur en cette occasion, ainsi que vous verrez par la coppie de la lettre qu'il luy a escrite, laquelle j'ai commandé

vous estre envoyée avec un double de certains articles de confederation contre ceux de ladite religion, que l'on a publiés et respendus en mon royaume, pour alterer mesdits sujets et les mettre en défiance de ma protection et volonté. J'ay sceu lesdits articles avoir esté forgez et publiez par ceux qui favorisoient ledit duc de Bouillon, au temps qu'ils ont creu que mon indisposition estoit plus grande qu'elle n'a esté, et ne doute pas qu'il n'en aye envoyé des doubles en Angleterre et ailleurs pour esmouvoir aussi nos voisins et les engager en leurs mauvais desseins. Mais comme ce sont inventions pleines d'impostures et d'impertinences, je me promets aussi qu'elles se destruiront d'elles mesmes à la confusion des auteurs d'icelles; toutesfois il ne sera que bon que vous vous en esclaircissiez avec ledit roy d'Angleterre, luy descouvrant la malice desdites inventions, et ce à quoy elles tendent.

Il m'a esté mandé s'estre tenu plusieurs assemblées et conseils en Poitou et à Saumur, sur le sujet de ma derniere maladie, et que le sieur du Plessis se monstre de jour en autre, par ses propos et actions, plus affectionné à la defence de la cause dudit duc de Bouillon, s'efforçant d'interessier et rallier en cela avec luy, tous ceux envers lesquels il a quelque creance, blasmant ma conduite en ce fait, comme si le tort estoit de mon costé, et traittois trop severement ledit duc de Bouillon, duquel il exalte les services et merites plus que de coutume. Et tout cela ne me donnera pas grande peine si ledit roy d'Angleterre veut vivre avec moy, comme il vous a fait entendre; car, joints ensemble, il nous sera facile de donner la loy et ranger à leur devoir nos mauvais voisins et sujets.

Or, je suis tres-satisfait et content des bons propos qu'il vous a tenus en vostre premiere audience. Aussi ne pouviez-vous vous comporter en son endroit et en toutes autres choses, plus prudemment et à mon contentement que vous avez fait, tant en la reception et reddition des visites et courtoisies qu'il vous a départies, qu'en tous les discours qui se sont passez entre vous. Tellement que si les effets correspondent à ses bonnes paroles, nous vivrons et regnerons ensemble tres-heureux, à quoy participeront nos enfans, qui est le but auquel vous sçavez que j'aspire.

Je suis à present, attendant ce que vous aurez traité de plus particulier avec ledit Roy, suivant la resolution que j'ay prise avec vous, devant vostre parlement, en laquelle je persiste; car il n'est rien survenu depuis, qui m'ayt deu faire changer d'opinion. Il est certain, ainsi que je vous ay escrit par mes dernieres, que

ledit roy d'Espagne dresse et assemble cette année des forces et par terre et par mer, plus puissantes que les precedentes. Celles qui doivent passer d'Italie en Flandres ont ja commencé à passer les monts, et les premieres troupes arriveront dedans quatre jours au pont de Gresin; mais il n'y a point d'apparence qu'elles s'arrestent à Geneve, ny qu'elles soient employées ailleurs qu'aux Pays-Bas.

Quant à ladite armée de mer, l'on m'a escrit d'Espagne, qu'elle doit estre preste à Lisbonne, à faire voile au 20 ou 25 du mois present, et veut-on que je croye qu'elle va en Barbarie et non ailleurs : toutesfois je ne puis m'y fier, sçachant qu'ils se sont cy-devant aydez de ce pre-texte pour couvrir et mieux desguiser leurs desseins contre ma personne et mon Estat. C'est pourquoy j'ay adverty mes serviteurs aux provinces de Languedoc, Provence et Dauphiné, de se tenir sur leurs gardes et estre prests de s'entre-secourir au besoin qui se presentera. J'ay aussi envoyé M. Le Grand en sa charge pour mesme effet, et luy ay commandé, comme j'ay fait au sieur d'Esdiguières, de se jeter dans la ville de Geneve, si on l'assiege. Je ne veux pas vous presser d'avancer vostre negociation, cognoissant le naturel de ceux auxquels vous avez affaire. Neantmoins, comme j'ay besoin de vostre presence, et qu'il est necessaire aussi de consoler et assister le plutost que faire se pourra les Estats de Flandres, je vous prie ne laisser perdre aucune occasion de serrer et faire resoudre les affaires que je vous ay commandées, et continuer à me donner advis de ce que vous y avancerez.

Vous avez bien fait de vous estre accommodé au desir dudit Roy, pour le regard du deuil avec lequel je vous avois commandé de comparoistre en vostre premiere audience pour les raisons que vous m'avez escrites. J'ay aussi telle creance et fiance en vostre prudence et affection, que j'approuveray tousjours tout ce que vous ferez en executant mes commandemens; ayant pris un singulier plaisir aux contestations et disputes qui se sont passées entre ledit Roy et vous sur le fait de la chasse, de laquelle vous luy direz que les medecins ne m'ont defendu l'usage, mais ils me conseillent d'en user un peu plus moderément que je n'ay fait cy-devant; ce que je commence à observer depuis vostre partement; de façon que je me suis trouvé à la mort de cinq ou six cerfs, sans aucune incommodité. Je me trouve aussi tres-bien de l'usage des eaux de Pougues, que j'ay commencé à prendre depuis cinq ou six jours, et continueray encore autant, puis je m'approcheray de Normandie pour avoir

plus souvent et promptement de vos nouvelles, et vous rencontrer aussi plutost si vous revenez, vous assurant que je ne me ressens à present en façon quelconque de la maladie que j'ay eue à Fontaine-bleau, ainsi que vous pourrez dire au roy d'Angleterre, afin de le tirer du doute qu'on pourroit luy avoir donné de la seureté de ma vie.

Il faut que je vous die que l'on m'a dépeint ce Roy, pour prince si irresolu, timide, et dissimulé, que je crains fort que les effets ne suivent les bonnes paroles et esperances qu'il nous a données, et que sur cela nous demeurions incertains de sa volonté et de ce que nous en aurons, pour maintenir et défendre la cause publique; à quoy les broüilleries domestiques et mescontentemens publics et privez, que vous m'avez representez, par vostre dite lettre, nous seront fort contraires : pour cette cause, je seray tres-aise que la reine d'Angleterre d'apresent arrive par delà pendant que vous y serez, pour recognoistre de plus pres son humeur, et quels effets elle produira. Je desire aussi que vous mettiez peine de descouvrir la verité de la déposition du jesuiste qui a esté pris travesty; car il nous importe de sçavoir si l'advis qui vous en a esté donné est veritable, les deux qui sont icy aupres de moy voulans que je croye que cela n'est point. Je ne vous commanderay rien sur les propos qui vous ont esté tenus par le comte de Northumbel-land, le chevalier Asquins et Stafford, assuré que vous sçauvez assez bien mesnager et accroistre leur bonne volonté, et faire le semblable envers les autres, qui s'en ouvriront à vous. Il est necessaire aussi que nous ayons des serviteurs aupres de ce prince, d'autant plus soigneusement, que nous recognoissons son naturel estre disposé à se laisser gouverner et manier par ceux qui l'approchent, que les Espagnols ne manqueront d'user de pareils moyens, et que ce prince nous peut faire plus de bien ou de mal que nul autre de nos voisins.

Je louë aussi la courtoisie de laquelle vous avez usé envers le comte d'Arambergue, luy faisant part, si à propos que vous avez fait, de la venaison que vous avoit envoyée le roy d'Angleterre, vers lequel la Boderie m'a escrit, que dom Joan de Taxis devoit bien-tost passer; toutesfois j'ay opinion qu'il attendra des nouvelles dudit comte d'Arambergue, afin de ne hazarder legerement la dignité et grandeur de son maistre. Quant à la ville d'Ostende, je n'ay pas opinion, quoy que vous ayt dit le sieur de Bernaveld, que les archiducs la forcent cette année, si les Estats continuent à la secourir comme ils ont fait jusques à present; car les assiegez se fortifient tous

les jours à la veuë des autres, lesquels aussi font paroistre, par leur conduite, avoir plus d'esperance au temps, que en leur bras et industrie. J'estime aussi que les forces qui leur viennent d'Italie, diminueront tellement par les chemins, devant qu'elles arrivent au pays, que la despence en excedera grandement le profit qu'ils en tirent; ja les mille chevaux levez sous la charge du duc d'Aumale se sont à demy débandez, et ceux qui restent font tant de mal, qu'ils sont insupportables, et seront contraints de les licentier pour en décharger le pays. Mon cousin, je prie Dieu qu'il vous ayt en sa sainte et digne garde.

Escrit à Monceaux, le 3 de juillet 1603.

HENRY.

Et plus bas,

DE NEUF-VILLE.

*Lettre du Roy à M. de Rosny, contre-signée.*

Mon cousin, si vostre depesche du 24 du mois passé, à laquelle j'ay fait responce par le courrier la Fontaine, le 3 du present, m'a contenté pour m'avoir rendu bon et particulier compte par icelle de vostre premiere audience, et de tout ce que vous avez appris et remarqué par delà, important à mon service et digne d'estre sceu, je ne l'ay pas esté moins du contenu de celle du 28 dudit mois passé, que j'ay receuë par ce porteur, le 4 du present, par laquelle j'ay entendu ce que vous avez traité avec le roy d'Angleterre en vostre seconde audience, et depuis avec ses conseiliers; en quoy vous ne pouviez veritablement me servir plus dignement et à mon contentement que vous avez fait. Et comme je n'ay rien à vous commander sur les poincts deduits par vostre dite lettre, et aussi que je me promets de vous revoir bien-tost, la presente ne servira que pour vous advertir que je vous attends en bonne devotion, pour vous declarer en personne la satisfaction que j'ay de toute vostre procedure, comme des lettres que vous m'avez escrites, vous assurez que vous serez le tres-bien venu; et quelque fruit que vous me rapportiez de vostre legation, je vous en sçauray pareil gré que si la moisson en estoit entiere et parfaite selon mon desir et le vostre, pour le bon devoir que vous avez fait de m'y servir. Et afin que vous sçachiez où me trouver, je vous diray que j'acheveray demain de prendre les eaux de Pougues, desquelles je vous assure, derechef, que je me trouve merveilleusement bien, que je partiray d'icy mardy ou mercredy, pour aller coucher à Tresmes, et le lendemain à Villiers-Coterests, où je demeureray quatre ou cinq jours, puis retourneray de là, par Merlou et Chantilly, à Saint Germain en Laye; et si vous vous estes licentié et separé de ce prince,

au temps que j'ay remarqué par vostre dite lettre que vous estimiez le pouvoir faire, je m'attends vous voir audit Villiers-Coterests, où sans passer par Paris, vous pouvez vous rendre commodément sur vos chevaux ou en poste, comme vous jugerez estre pour le mieux; mais sçachez que le plustost que je vous pourray voir en bonne santé, me sera le plus agreable. A tant je prie Dieu, mon cousin, qu'il vous ait en sa digne garde.

Escrit à Monceaux, le 5 juillet 1603.

HENRY.

Et plus bas,

DE NEUF-VILLE.

Et à costé est escrit :

Le sieur de Boisse m'a adverty, que le ter de dom Inigo de Borga, composé de vingt-deux enseignes d'Espagnol, passa le pont de Gresin, le premier de ce mois, suivi de dix compagnies Neapolitaines, qui estoient en Savoye, où est demeuré le ter de dom Sancho de Luna, pour, à mon advis, favoriser le traité du duc de Savoye avec ceux de Geneve, lequel est si avancé que l'on a opinion qu'il sera conclu dans le quinziesme de ce mois. Les quatre mille Milanois du comte de Saint Georges ont commencé aussi à passer les monts pour suivre les autres; tellement que les archiducs seront bien-tost grandement renforcez. Cette armée d'Espagne continue pareillement à se preparer en toute diligence, et le Pape veut que je croye que c'est chose qui ne me regarde pas. Vous sçavez le surplus quand je vous verray.

*Lettre de M. de Ville-roy à M. de Rosny.*

Monsieur, le Roy a esté tres-content de vostre depesche, ainsi que vous recognoistrez par sa responce; mais il est en peine et marry de la perte de celle du 20, de laquelle il faut decouvrir la cause. Je vous assure que Sa Majesté n'a trouvé aucune superfluité en vostre dite lettre, approuvant et loüant tout ce que vous avez dit, fait et escrit. Les enfans de M. de Savoye passeront le 20 du passé, à la veuë de Marseille, allans en Espagne, accompagnez de neuf galeres, quatre de Malte, trois du Pape, et deux dudit duc; ils ne salueront point le chasteau d'If. Nous avons eu confirmation aussi de l'avancement des forces d'Espagne et d'Italie, qui vont en Flandres, par lettres de Lyon du 25 du mois passé; tellement que j'estime qu'elles commenceront à passer, dedans deux jours, le pont de Gresin. Le Roy se porte merveilleusement bien des eaux de Pougues. Il prit encor hier un cerf, où la Reine estoit; mais commodément il voudroit sçavoir à toutes heures de vos nouvelles, et pense, que selon ce que vous luy manderez par

vos premières, il s'avancera de partir d'icy, pour aller du costé de Gaillon. Je vous baise bien humblement les mains, et prie Dieu, monsieur, qu'il vous conserve en bonne santé. Votre tres-humble serviteur,

DE NEUF-VILLE.

De Monceaux, le 3 juillet 1603.

Et à costé est escrit :

Le porteur eust esté renvoyé plutost, s'il n'eust esté contraint d'aller plus loing, ainsi qu'il vous dira.

*Lettre de M. de Ville-roy à M. de Rosny.*

Monsieur, j'escris aussi incommodément que l'accoustumée, mon mal de poulce n'estant encore guery. Le Roy se louë à bon droit de vostre conduite, comme font tous ceux qui en ont eu cognoissance. Mais nous sommes en grande peine de vostre premiere lettre, à laquelle vous desirez, par celle que vous m'avez escrite par le porteur, que nous ayons esgard, car elle n'est point comparuë; que si vous nous eussiez mandé par quelle voye vous la nous avez adressée, j'eusse fait diligence d'en avoir des nouvelles. Selon celles que vous nous mandez par vostre premiere dépesche, nous pourrions vous advertir plus certainement du lieu où vous nous trouverez. Sa Majesté desire que ce soit plutost en ses maisons aux champs qu'en la ville, afin de vous entretenir plus à loisir; que si vostre santé vous permet de prendre la poste, elle en sera tres-aise; toutefois elle entend que vous preferiez vostre-dite santé à toute autre chose. Mais je vous assure apres elle, que vous la trouverez en tres-bon estat de la sienne, qui est, à mon advis, la meilleure nouvelle que je vous puisse escrire: à laquelle j'adjousteray la confirmation du service que je vous ay voué, et de la disposition en laquelle vous me trouverez de vous obeyr. Et sur ce, monsieur, je prie Dieu qu'il vous conserve en sa sainte grace, et me recommande humblement à la vostre.

De Monceaux, le 5 juillet 1603.

Vostre humble serviteur,  
DE NEUF-VILLE.

CHAPITRE CXX.

*Retour de Rosny en France. Compte que Rosny rend au Roi de sa mission. Lettres du roi et de la reine d'Angleterre. Lettres de Beaumont, resté à Londres comme ambassadeur ordinaire.*

Combien que le Roy vous eust tesmoigné, par quelques lettres, qu'il eust bien désiré que

vous eussiez peu voir et entretenir la reine d'Angleterre, afin d'essayer de descouvrir quelque chose de ses inclinations, que l'on disoit estre toutes portées pour Espagne et pour Rome; neantmoins, voyant qu'elle estoit encore vers l'Escosse, que le Roy vous pressoit d'expedier les affaires pour lesquelles vous aviez esté envoyé en Angleterre et de vous mettre aussi-tost sur vostre retour, d'autant qu'une infinité d'autres de grande importance déperissoient ou se retardoient par vostre absence, que l'on vous mandoit que vos charges avoient besoin de vostre presence, vos amis de vostre faveur, et vous mesme de ne vous tenir pas plus long-temps esloigné de vostre maistre, vous resolustes d'envoyer M. de Vaucelas, vostre beau frere, faire les visites et complimens dont vous estiez chargé vers cette Reine et ses enfans. Tellement que luy ayant mis en main les lettres dont vous estiez chargé à elles adressantes, desquelles les copies ont esté cy-devant inserées, vous luy baillastes aussi toutes sortes d'instructions à luy nécessaires pour se comporter en cette action, ainsi que vous sçaviez estre des intentions du Roy, et que l'humeur de cette princesse le pouvoit requerir. Puis le lendemain, la fièvre et la douleur de vostre bouche, qui l'avoit causée, estant cessée, vous partistes de Londres avec la bonne odeur d'un chacun, tous les gens de qualité vous étant venus dire adieu, et protester de leur bienveillance, et repristes le chemin par lequel vous estiez venu; les sieurs milords Sidnay et le vice-amiral ayans eu charge de vous accompagner du long les chemins jusques à la mer, et vous faire assister abondamment de chevaux, charrois, logis, vivres, batteaux et navires. Estant arrivé à Douvres, vous receustes une lettre du Roy, et une autre de M. de Ville-roy, desquelles la teneur ensuit :

*Lettre du Roy à M. de Rosny, contre-signée.*

Mon cousin, je vous attends en ce lieu, tres-desireux de vous recevoir, et tres-content de tout ce que vous avez dit et negocié de ma part en vostre voyage, duquel, si vous me rapportez quelque resolution conforme à mon desir et digne du sujet que vous avez traité, je l'attribueray à vostre industrie et à vostre bonne conduite; qui sera tout ce que je vous escriray par ce porteur, que j'ay commandé vous estre renvoyé pour vous advertir que vous me trouverez en ce lieu; que le plutost que vous pourrez vous y rendre sans incommoder vostre santé, me sera le plus agreable, et que vous serez le tres-bien venu. Je prie Dieu, mon cousin, qu'il vous ait en sa sainte garde.

Escrit à Villiers-Coterests, le 10 juillet 1603.

HENRY.

Et plus bas,

DE NEUF-VILLE.

*Lettre de M. de Ville-roy à M. de Rosny.*

Monsieur, vous estes désiré et attendu avec impatience, et trouverez le Roy tres-satisfait et bien édifié de toute vostre conduite et procedure. Nous vous renvoyons ce porteur, afin qu'il advertisse les postes de vostre venuë, pour vous preparer des chevaux, si vostre santé vous le permet d'en user. Le Roy arriva en ce lieu hier au soir, et y demeurera jusques à lundy ou mardy, car la Reine veut faire un voyage à Liesse, où elle s'acheminera vendredy, pour en revenir lundy ou mardy. Et parce que j'espere avoir ce bien de vous voir bien tost, je ne vous entre-tiendray davantage, vous baisant les mains, et priant Dieu, monsieur, qu'il vous conserve en bonne santé.

De Villiers-Coterests, le 10 juillet 1603.

Vostre humble serviteur,

DE NEUF-VILLE.

La nuit mesme que vous arrivastes à Douvres, le temps devint fort mauvais, et se trouva la mer tant esmeuë que le vice-admiral fit ce qu'il put pour vous empescher de partir; mais la plus part de tous ces seigneurs, et bien davantage tous vos marjolets de ville que vous aviez menez, vous firent de telles instances de repasser en France, qu'icelles jointes à la bonne envie que vous en aviez, voyant les assurances qui vous estoient données, par lettres, d'estre fort désiré et le bien venu, vous ne laissastes pas de vous embarquer; dequoy plusieurs se repentirent à bon escient, ayans demeuré tout le jour à passer ce destroit avec une telle tempeste, que tous coururent fortune de se perdre, et beaucoup furent tellement malades, qu'ils ne se pouvoient quasi remuer; et quoy que vous eussiez plus de trois cens hommes de main, si est-ce que si vingt hommes bien sains et bien armez vous eussent attaquez, vous n'y eussiez peu resister tant vous estiez tous debiles.

A Boulongne, vous eustes encore une lettre de la main du Roy, dont la teneur ensuit :

« Mon amy, j'ay sceu vostre embarquement, et par ainsi croyant que cette lettre vous trouvera deçà la mer, je vous fais ces trois lignes, par lesquelles je vous dis derechef venez, venez, et le plutost que faire se pourra me sera le plus agreable; car je vous attends avec impatience pour estre esclaircy de tout ce que vous m'escrivez par vos deux dernieres lettres. »

Cette-cy vous fit rompre vos tables, remercier avec toutes sortes de courtoisies ceux qui vous

avoient accompagné, et prendre la poste à Abbeville sur les trois heures du soir, et arrivastes à Villiers-Coterests sur les huit heures du matin. Auquel lieu vous trovastes le Roy dans l'allée du parc qui aboutit à la forest, en laquelle il faisoit estat de s'aller promener, ayant fait venir des chevaux pour cet effet; mais si tost qu'il vous vid de loing, il dit à messieurs de Bellievre, de Ville-roy, de Maisses et de Sillery, avec lesquels il se promenoit, ainsi que vous le conta depuis M. de Maisses : « Voicy nostre homme tant désiré qui est en fin venu; il faut faire appeler mon cousin le comte de Soissons, qui se promene en cette allée, sur la main droite, avec Roquelaure et Frontenac, car je veux qu'il soit present à la relation qu'il fera en gros de ce qu'il a veu, oüy, dit et fait dont il ne m'a rien escrit, et que l'on renvoye mes chevaux, car je n'iray point en la forest. »

Toutes lesquelles choses ayans esté executées, et vous estant mis quasi à genoux en l'approchant, il vous releva, vous embrassa par deux fois et vous dit : « Vous, soyez le tres-bien venu, car il faut confesser, quoy que vous m'apportiez pour conclusion de toutes les affaires que vous avez maniées et traitées en Angleterre, que vous m'y avez tres-bien et dignement servy, et n'avez deu craindre que vos dépenses m'ayent ennuyé ny pour leur longueur ny pour leur frequence, car je n'en ay jamais recueu où j'aye pris tant de plaisir. Mais contez nous maintenant tout ce que vous avez obmis en icelles, sans nous parler de ce qu'elles contiennent, car de tout cela nous en discourrons à loisir; tout mon desplaisir ayant esté de ce que vostre seconde dépêche a esté ainsi malheureusement perduë sans que nous ayons peu descouvrir d'où en est venuë la faute, ny ce qu'elle est devenuë. »

« Sire, luy respondites vous, je ne sçay rien de cela plus que vous en sçavez vous mesmes; mais quant à ce que j'ay à vous conter qui ne soit point dedans mes lettres, je ne le sçaurois faire tout d'une suite ny en une seule fois, mais bien à mesure et selon que la memoire me le pourra fournir, et commenceray par vous dire que j'ay veu un prince à l'entretienement duquel il y a grand plaisir et ne s'y sçauroit on jamais ennuyer; car, premierement, il sçait beaucoup en toutes sortes de sciences, parle fort bien, prend plaisir que l'on discoure largement avec luy, ne laisse rien qu'il n'examine, ny surquoy il ne vueille estre esclaircy et ne fasse des questions; croyant que où il sçait le moins, c'est à la guerre et aux affaires qui en dépendent, et crains qu'il ait plus de meditation,

« que d'action. Sur tout je prenois un singulier  
 « plaisir aux louanges qu'il vous donnoit en l'un  
 « et en l'autre, disant que vous estiez le plus  
 « grand militaire de tous nos siecles, et qu'il ne  
 « penseroit point user d'adulation ; quand il vous  
 « diroit estre aussi bon capitaine que furent ja-  
 « mais Alexandre, Pyrrhus, Hannibal, Scipion  
 « ny Cesar ; et au contentement qu'il tesmoignoît  
 « lors que l'on l'accomparoit en quelque chose à  
 « vostre Majesté, laquelle il m'a protesté d'ay-  
 « mer et d'honorer plus que prince du monde, et  
 « de vouloir avoir avec elle une alliance et con-  
 « federation inviolable par preference à toutes  
 « autres. Que s'il faut adjouster foy aux sermens  
 « qu'il m'en fît, ausquels il n'oublia rien, vostre  
 « Majesté n'a aucune chose à craindre des advis  
 « qu'elle m'escrivit luy avoir esté donnez, soit  
 « pour se restraindre avec les Espagnols pour  
 « vous assaillir avec armes communes sous cet  
 « impertinent et neantmoins specieux pretexte  
 « en la teste des écervelez, de recouvrer conjoin-  
 « tement à la vive force les provinces de vostre  
 « royaume, où ils peuvent avoir l'un et l'autre  
 « quelque couleur de pretentions ; car il m'a dit  
 « plusieurs fois, lors que nous entrions sur sem-  
 « blables propos, que toutes ces pensées ne luy  
 « estoient jamais entrées en l'esprit, les estimant  
 « pures chymeres, desquelles la prescription es-  
 « toit plus que centenaire ; ny qu'il entende à se  
 « rendre jamais ny chef ny protecteur des hu-  
 « guenots, ny d'aucune menée ou faction en  
 « France, tant il abhorre tout sujet qui desseigne  
 « ou leve les armes contre son legitime prince,  
 « ou prend intelligence avec un estranger ; en-  
 « quoy je ne le trouve pas trop mal fondé, son  
 « royaume abondant tellement en esprits inquiets  
 « et factieux, que si j'eusse voulu prester l'oreille  
 « à tous ceux qui m'ont fait sonder sur ce sujet,  
 « je ne fusse point revenu sans luy bien tailler de  
 « la besongne ; et sur tout y en a-il quatre ou cinq  
 « bien qualifiez, que je nommeray une autre fois  
 « à vostre Majesté, lesquels me tromperont bien,  
 « si quelque jour ils ne courent fortune à cette  
 « occasion ; car ils sont trop inconsideres à par-  
 « ler de telles matieres tant chatoüilleuses, les  
 « propositions desquels j'ay aussi rejettées sui-  
 « vant ce que je sçavois estre de vos intentions  
 « et de vostre generosité, laquelle n'ayme point  
 « les ruses ny les cautelles.

« Mais afin, Sire, que vostre singuliere pru-  
 « dence puisse faire un plus solide jugement tou-  
 « chant l'humeur de ce prince, et de ce qu'elle  
 « en doit esperer ou craindre, je vous veux main-  
 « tenant rapporter les mesmes propos, mot pour  
 « mot, que nous eumes ensemble à mon parte-  
 « ment. L'ayant donc fait supplier de me donner

« heure pour prendre le dernier congé de Sa Ma-  
 « jesté, il me manda, par le sieur Oleradoux,  
 « que pour m'exempter de la peine d'aller à Gren-  
 « vich, il s'en viendroit coucher à Ovestmester  
 « (qui est comme son palais dans la ville de Lon-  
 « dres, en l'église duquel y a des sepultures tres-  
 « magnifiques), et que je ne sçaurois y venir si  
 « matin, que je ne le trouvasse prest à me don-  
 « ner audience, d'autant qu'il faisoit estat d'aller  
 « aussi-tost à la chasse pour se divertir et passer  
 « sa melancolie, à cause du desplaisir qu'il avoit  
 « de mon partement.

« Je ne manquay pas, suivant ce message, de  
 « me trouver si matin au palais, que j'eus encore  
 « pres d'une heure à visiter les choses rares du  
 « temple d'iceluy, attendant que ce prince fut  
 « habillé ; lequel m'ayant fait appeller et fait for-  
 « ces carresses, je luy dis, apres les complimens  
 « ordinaires, en ces propres termes : Sire, comme  
 « ce m'est aujourd'huy un tres-grand honneur  
 « d'estre admis en la presence de vostre Majesté,  
 « avec la faveur et familiarité qu'elle me demons-  
 « tre, en voulant que je sois seul tesmoing d'une  
 « tant celebre action que celle-cy, en laquelle je  
 « dois remporter la certitude et confirmation de  
 « toutes les promesses qu'il luy a pleu de me  
 « faire et de bouche et par escrit, pour l'esta-  
 « blissement et continuation perpetuelle d'une  
 « solide et loyale amitié, union et alliance entre  
 « deux tant excellens monarques, et reçois de  
 « joye et contentement de voir que Dieu me fait  
 « estre l'instrument de si heureuses correspon-  
 « dances, par le moyen desquelles vos royales  
 « personnes seront pleines de magnificences et  
 « de gloire, vos regnes d'heur et de prosperité  
 « entiere, et vos peuples, de paix et d'abondance :  
 « ainsi ressentez-je un grand ennuy et desplaisir  
 « d'estre reduit à m'esloigner de vostre Majesté,  
 « laquelle pour ses vertus et faits heroïques, et  
 « les graces et faveurs signalées que j'en ay re-  
 « çeues, me donnent des desirs vehemens de sa  
 « continuelle presence. »

« A quoy il me respondit en ces mesmes mots :  
 « Monsieur l'ambassadeur, je vous remercie,  
 « comme je dois, des louanges que vous me don-  
 « nez, et semblablement des tesmoignages de  
 « sincere affection que vous me rendez, et vous  
 « puis jurer que j'ay le mesme regret de vostre  
 « partement, comme je le vous manday hier par  
 « le sieur Oleradoux, jugeant bien que le grand  
 « et continuel employ que vous avez en France,  
 « ne vous permettra pas de repasser de long-temps  
 « la mer ; mais je me console d'ailleurs pour le  
 « bon office que vous allez rendre au Roy, mon  
 « bon frere, et à moy, en nous conjoignant en-  
 « semble d'un lien indissoluble. Car afin que la

« memoire vous demeure plus fraische de mes  
 « bonnes et tres-sinceres intentions, à la loyale  
 « observance de toutes les choses dont je vous  
 « ay donné la foy et la dextre, je vous jure en-  
 « core derechef, sur l'ineffable Trinité, sur le  
 « vray sacrement par lequel j'ay esté lavé de mes  
 « offenses et sur mon salut, que vous ne m'aurez  
 « point plustost envoyé le projet du traité que  
 « nous avons fait ensemble, mis en forme au-  
 « thentique et signé du Roy, mon frere, que je  
 « ne le signe en mesme temps qu'il me sera pre-  
 « senté sans y adjouster un alpha ny en oster un  
 « omega, et n'en jure solennellement l'observa-  
 « tion en presence de celui qui sera nommé pour  
 « cet effet. Et pour le surplus, ma resolution es-  
 « tant d'avoir la vie, les vertus, les desseins et  
 « les actions d'un tant heroïque prince que le  
 « Roy, mon frere, pour modele et prototype (car  
 « il usa de ce mot) tant de moy que de toutes  
 « mes œuvres, vous luy pouvez donner foy, de  
 « ma part, que je suivray en tout et par tout son  
 « exemple, soit en la grandeur et forme de l'as-  
 « sistance, dont auront besoin ceux que nous  
 « avons nommés pour nos communs allies, et  
 « desquels par le traité nous entreprenons la de-  
 « fense, soit en la maniere de proceder contre  
 « ceux qui les voudront molester, ou inquieter  
 « l'un de nous deux; que je ne feray jamais d'al-  
 « liance d'amitié ny de confederation qui puisse  
 « inflimer ce que j'ay traité avec vous, ny tour-  
 « ner au dommage des peuples et du royaume  
 « du Roy, mon frere, ny en desplaisir à sa per-  
 « sonne royale; que je n'auray jamais nulle in-  
 « telligence avec nuls de ses subjects et servi-  
 « teurs, soit d'une ny d'autre religion pour faire  
 « menées à luy desagrees, et que je ne l'im-  
 « portuneray jamais d'aucunes prieres en faveur  
 « d'aucun des siens, sans avoir auparavant son  
 « intention. M'assurant aussi, comme je vous  
 « prie de m'en donner maintenant foy et parole  
 « de sa part, qu'il observera la mesme circons-  
 « pection, sincerite et loyauté envers moy et les  
 « miens, et sur tout qu'il ne me requerra point  
 « d'user d'indulgence envers aucun Jesuite qui  
 « sera trouve travesty en mon royaume, ou sur  
 « des vaisseaux anglois, ou qui enfraindra les  
 « loix de mes pays, dautant que je les repute  
 « tous, attendu leurs vœux et maximes genera-  
 « les, non seulement pour ennemis de ma per-  
 « sonne particuliere, de ma religion et de mes  
 « Estats, mais aussi de toutes autres personnes et  
 « dominations qui ne veulent entierement depen-  
 « dre de Rome et d'Espagne. Jugeant, à cette  
 « occasion, que le Roy, mon frere, a tres-pru-  
 « demment fait, que de les avoir expulsez et fait  
 « le bannir de tous ses dominions, auxquels il ne

« les scauroit restablir sans le peril de sa per-  
 « sonne, et l'alteration de la bienveillance de  
 « ses peuples; cette obeysance aveugle qu'ils  
 « professent de rendre à un homme mortel estant  
 « tres irreligieuse et pernicieuse. Sur toutes les-  
 « quelles choses je m'estends expres et vous prie  
 « de les luy dire de ma part, dautant que j'ay eu  
 « advis de France qu'il est et sera encore plus à  
 « l'advenir sollicité et importuné par aucuns des  
 « siens qui ont credit et faveur pres de luy, de  
 « les restablir, voire mesmes approcher de sa  
 « personne, sans se soucier que deviennent les  
 « affaires publiques, moyennant que les leurs  
 « particulieres en tirent advantage. Vous priant  
 « encore une fois, monsieur l'ambassadeur, de  
 « me renvoyer au plutost pareilles assurances. »

« Dequoy, Sire, il me sembla ne pouvoir refu-  
 « ser de luy donner foy et parole au nom de vos-  
 « tre Majesté, au moins pour les choses qui le  
 « concernoient. Et en cette sorte, apres quelques  
 « autres complimens, pris-je congé de luy. Tel-  
 « lement que m'acquittant de ce à quoy je suis  
 « obligé, vostre Majesté, selon mon advis, verra  
 « (tant par les lettres du roy d'Angleterre et  
 « celles de M. de Beaumont, que par le traité  
 « que j'ay fait en forme de simple projet, neant-  
 « moins, pour les raisons que je vous ay mandées,  
 « signé de la main du roy d'Angleterre et de la  
 « mienne, comme vostre ambassadeur) la con-  
 « firmation de la pluspart des choses que je viens  
 « de deduire ou que je vous ay mandées cy-de-  
 « vant; m'ayant esté impossible de faire mieux,  
 « dautant que n'ayant point emporté de pouvoir  
 « authentique (ce que, pour ne diminuer l'opi-  
 « nion qu'ils avoient conceuë de vostre confiance  
 « en ma personne et loyauté, je ne leur voulus  
 « jamais decouvrir), il me fallut contenter de  
 « cela. Enquoy, à mon advis, il n'y aura neant-  
 « moins rien de gasté; ce prince m'ayant fait de  
 « trop grands sermens pour manquer à signer ce  
 « que l'on luy enverra en forme authentique  
 « conformement à ce que j'ay apporté, ny à ob-  
 « server les autres promesses entre nous faites. »  
 Et lors vous mistes entre les mains du Roy, tant  
 les deux lettres du roy d'Angleterre et M. de  
 Beaumont, que l'original du traité que Sa Ma-  
 jesté fit lire tout haut par M. de Ville-roy, de-  
 vant ceux que j'ay nommez, desquels le contenu  
 estoit tel que s'ensuit :

#### *Lettre du roy d'Angleterre.*

Tres-haut, tres-excellent et tres-puissant prince,  
 nostre tres-cher et tres-ame bon frere, cousin et  
 ancien allié; nous avons à vous remercier tres-  
 affectueusement des tesmoignages signalez que  
 nous avez voulu rendre de vostre bonne affec-

tion en nostre endroit, tant en participant et vous jouissant si publiquement avec nous de nostre bien et prosperité, comme en nous presentant les offres et assurances de vostre bonne et parfaite amitié, et en voulant estreindre le lien au bien commun de nos royaumes, par l'obligation des traittez d'alliance cy-devant faits entre couronnes. A quoy, pour nostre part, nous avons de tout temps esté enclins, et serons tousjours disposez de correspondre, par tous offices et tesmoignages reciproques, de concurrence et amitié tres-estroite. Nous recognoissons aussi, et tenons à tesmoignage particulier de vostre intime bien-veillance en nostre endroit, le choix qu'il vous a plu faire de ce seigneur, nostre cousin le marquis de Rosny, en cette legation, lequel vous estant si utile et necessaire par-delà, vous avez neantmoins voulu estre l'instrument de cette bonne conjonction. Nous avons receu beaucoup de contentement de traiter avec luy, et avons bien reconnu ses merites tres-dignes de la reputation qu'il s'est acquise au maniment des grandes affaires, et que c'est à bon droit que vous l'avez voulu honorer d'un caractère si expres de vostre faveur particuliere. Sa suffisance nous dispensera de faire autre recit de ce qu'il a traité avec nous, nous remettans à ce qu'il vous en r'apportera, et vous prions nous excuser si l'avons retenu icy plus long-temps que peut-estre ne permettoit la commodité de vos affaires, en rejetant la faute sur la grande foule des affaires que nous avons maintenant sur les bras; mais nous esperons que son retardement se trouvera recompensé par les bons effets de ce qu'avons traité ensemble. Et ainsi, nous recommandans tres-affectueusement à vos bonnes graces, nous prions Dieu, tres-haut, etc., qu'il vous ait à tousjours sous sa sainte et digne garde.

A nostre palais de Windsor, ce 26 juin 1603.

*Lettre du roy d'Angleterre à la reine de France.*

Tres-haute, tres-excellente et tres-puissante princesse, nostre tres-chere et tres-amée bonne sœur, cousine et ancienne alliée; le contentement que ressentons de la grace de Dieu sur nous, nous est redoublé voyans nos bons amis et allies participer aussi à cette joye. Mais entre tous ceux qui nous ont obligez de ce tesmoignage de leurs bonnes volontez, nous avons receu à singulier plaisir qu'il vous ayt plu joindre en cét endroit vos congratulations et jouissances avec celles du Roy, nostre bon frere, selon que vos lettres et les rapports particuliers de nostre cousin, le marquis de Rosny, le nous ont tesmoigné; et n'avons pas receu moins de

contentement de voir que vous vous rendiez si affectionnée au bien et à l'augmentation de nostre commune amitié, à laquelle nous apporterons, de nostre costé, tout ce qui dépendra de nous. Et comme nous sçavons que cette bonne affection, de vostre part, peut beaucoup ayder à l'estreindre aussi, nous nous en promettons, s'il vous plaist, de la continuer un tant plus grand affermissement à nostredite amitié; ce qui nous donnera d'autant plus d'occasion d'honorer vos vertus et merites, et de recognoistre par tous offices et courtoisies les tesmoignages que vous nous rendez de vostre bonne affection en nostre endroit. Et sur ce, nous recommandans tres-affectueusement à vos bonnes graces, nous prions Dieu, tres-haute, etc., qu'il vous ait en sa sainte et digne garde.

A nostre palais de Windsor, ce 26 juin 1603.

*Lettre de M. de Beaumont au Roy.*

SIRE,

Depuis le partement de M. de Rosny je n'ay rien entendu qui merite d'estre escrit à vostre Majesté. Le Roy doit arriver ce jourd'huy à Windsor avec la Reine et ses enfans. Desja le comte d'Arambergue s'y est acheminé en attendant l'ambassadeur d'Espagne, que l'on dit estre à Gravelines, dès le huitiesme de ce mois, prest à s'embarquer, avec la conduite des vaisseaux que ce prince luy a envoyez pour assurer son passage contre ceux de messieurs des Etats. Les plus sages et prevoyans craignent un grand changement en cette Cour à l'arrivée de la Reine, et semble que les mal contens, dont le nombre s'augmente de jour à autre, l'esperent et le tiennent comme certain. Toutesfois, veu le peu de gens de courage et de dessein qu'il y a aujourd'huy en Angleterre, je n'y voy pas beaucoup d'apparence; mais bien plutost je craindrois, selon la commune oppinion de plusieurs, que ce prince ayant le naturel du tout enclin à la paix, et l'ame remplie de superstition en la cause de messieurs des Etats, dont il croit, selon sa conscience, ne pouvoir justement embrasser la defence, il se laissast emporter aux offres specieuses et-avantageuses, lesquelles desja l'on publie que l'ambassadeur d'Espagne luy doit faire de la part du Roy son maistre, et que, par semblables artifices, estant assisté de peu de personnes d'experience et de conseil, son esprit doux, peu fin et rempli de beaucoup de sincerité en fust surpris et abusé.

C'est pourquoy, afin d'essayer à l'en garantir et pouvoir donner advis à vostre Majesté à toute heure de ce qui succedera ou se traittera de jour à autre en sa Cour, je me suis resolu de me



rendre pres de luy a Ouintsore pour estre plus prompt. selon les occasions qui naistront. d'entendre ses intentions et les rapporter a vostre Majesté. et le faire souvenir aussi, selon les occurrences. de ce qu'il a arreste avec M. le marquis de Rosny touchant les affaires communes de vos Majestez. et la confirmation de leur amitié. de laquelle ledit sieur emporte a vostre Majesté des tesmoignages si grands et des gages si particuliers. que j'estime qu'elle aura maintenant sujet de s'en tenir entierement assuree. et d'en esperer doresnavant toutes sortes de bons offices pour le repos et la seurete de son royaume. Enquoy. certes. je suis obligé de luy représenter que le choix. digne en toutes facons du jugement de vostre Majesté. qu'elle a fait de la personne dudit sieur marquis en la conduite d'un œuvre si important et si utile à ses affaires. a tellement servy à sa perfection s'estant ce seigneur rencontre si propre à l'entreprendre et manier que je puis. sans crainte de reproche d'adulation. veritablement affermer à vostre Majesté veu ce qui s'est passe en l'advenement de ce prince a cet Estat. et l'humeur de ceux de son conseil non moins irresoluë et insolente que negligente et imprudente que tout autre que ledit sieur marquis n'eust peu ny seue mesnager ledit prince avec plus de dexterite et de liberté. ny porter les siens à tant de raison. comme il a fait par sa prudence et bonne fortune. Car la reputation de son integrité au maniment des charges qu'il a en main. et de sa fidelite et creance envers vostre Majesté. et la bonne opinion que d'entree il luy a seue donner de sa franchise et de son affection particuliere au bien de ses affaires. et avec cela un bon-heur qu'il a eu. par la force de son jugement. de sçavoir. des le premier jour qu'il a traité avec ce prince. rencontrer et toucher son humeur. luy ont donné un tel avantage en toute sa negociation. que bien souvent. presuade par la force de ses raisons. il a pris. en sa presence. son party contre ses ministres a leur honte et tres-grand déplaisir. Et d'autre costé la vraye intelligence que ledit sieur a des affaires du monde. fortifiée d'une fermeté de jugement qui ne se peut assez admirer ny estimer. luy a si bien ayde a se garder de leurs subtilitez et surprises ordinaires. que non seulement. lors qu'il estoit assemblée avec eux. il relevoit incontinent les erreurs de leurs ignorances. et descouvroit aussi-tost l'intention de leur mauvaise volonté ou defiance. mais quasi contre leur dessein et resolution. il a toujours eu le pouvoir. en leur faisant cognoistre la verité et utilité de leurs interests. de les persuader à une partie de ce qui se pouvoit presentement

souhaitter et attendre d'eux. En sorte que je puis assurer vostre Majesté que ce prince a eu un contentement extreme de sa procedure. ayant declare tout haut. et par plusieurs fois. qu'il n'avoit jamais traité avec un personnage dont la communication luy fust plus agreable. et qui discourust des affaires avec tant de fondement et de suffisance. et qu'il ne pouvoit assez estimer l'eslection et le bon-heur de vostre Majesté en la rencontre d'un si digne ministre et si utile a la restauration de son Estat. Comme aussi je puis tesmoigner pareillement à vostre Majesté que tous ceux de son conseil. selon l'esperance qu'ils en ont faite. ont confessé publiquement qu'ils n'avoient jamais confere avec un tel ambassadeur dont le jugement fut plus solide. moins facile à surprendre et qui traitast des affaires avec plus de raison. de moderation. de sincerité et de patience: m'ayant tousjours avoué. le sieur Cecile en particulier. qu'il le tenoit pour le plus grand conseiller d'Estat et politique qui fust aujourd'huy en la chrestienté.

Ausquelles paroles j'oserois adjouster d'autant plus de foy. que je sçay qu'il est contrainct de faire ce jugement. autant pour la verité que pour l'experience qu'il en a faite à son dommage. Car il est tout certain qu'en toutes les conferences ou il s'est trouvé avec ledit sieur marquis. quelque effort qu'aye fait son esprit subtil et remply de sophisteries. et qui se proposoit de surprendre et d'embrouiller tous ceux avec lesquels il se mesle. il n'a jamais pu rien gagner sur le sien. Ains descouvrant quasi plustost ses ruses en traittant qu'il ne les avoit desployées. et avec une vivacité d'entendement en ses responses que je prise beaucoup. comme l'une des plus utiles parties que puisse avoir un grand negociateur. il destruisoit si promptement les maximes apparentes et cauteluses dont il se vouloit fortifier par des arguments certains et pleins de demonstration. au lieu que les siens estoient foibles et artificieux: que tout ainsi que ceux qui sont attachez à une dispute publique. voyans que la raison leur manque et que la force de leurs adversaires est trop grande. recourent aux artifices et aux inventions pour reprendre advantage. aussi ledit sieur Cecile. se jectant quelquefois defait et abbattu par M. le marquis de Rosny. essayoit. en luy proposant des choses du tout inciviles et hors de temps et de raison. de le mettre en cholere et luy troubler le jugement: et d'autre part. donnant au Roy une intelligence toute contraire de ce qu'il avoit traité avec luy. le divertir de la creance qu'il en avoit prise. et le faire changer de volonté aux choses dont il estoit convenu avec ledit

sieur. Mais, Dieu mercy, ses armes, aussi honteuses que mal-heureuses, ne luy ont pû réussir contre la moderation et la dexterité d'un si ferme et sage ministre. Et tant s'en faut qu'il se soit esmeu en aucune façon de tout ce qu'il mettoit en avant, bien qu'entièrement absurde et desraisonnable, ainsi peut-estre que ledit sieur Cecile eust bien désiré, qu'au contraire il s'en est tous-jours mocqué galamment, et si bien sceu représenter, à sa confusion, au roy la verité de ce qui se passoit, que, nonobstant tous ses artifices, il ne s'est voulu arrester qu'à ce qu'il avoit traité de bouche avec ledit sieur marquis, reprochant audit sieur Cecile, en sa presence, qu'il avoit oublié ou mal rapporté son intention en plusieurs choses qu'il luy avoit communiquées avec une si ouverte demonstration de sincerité et d'affection, que je ne doute point, si vostre Majesté luy eust donné absolu pouvoir de conclurre un traité avec ledit Roy, ainsi que j'eusse estimé estre fort à propos, qu'il n'eust eu moyen d'arrester presentement, avec beaucoup de facilité, ce que je crains en une autre saison, et qu'un autre que ledit seigneur marquis ne pourra si seurement ny dextrement obtenir de luy.

Mais je me promets que, comme il seroit tres-dangereux de laisser changer par le temps ou la diversité des affaires qui peuvent intervenir, la bonne volonté de ce prince, qu'aussi, suivant le rapport que ledit sieur luy en fera, vostre Majesté ne retardera pas longuement de l'inviter à renouveler leur alliance, et confirmer, par escrit authentique, ce qui a seulement esté traité par simple signature du Roy et dudit marquis, et que selon l'information qu'il rendra aussi à vostre Majesté de la disposition de ceux qui le possèdent aujourd'huy, elle se resoudra au plutost de les gagner à son service, ainsi que ledit seigneur marquis les y a convenablement obligés, ayant prevenu de bonne heure les offres du roy d'Espagne, par le moyen desquelles il estoit à craindre qu'ils pussent estre divertis et pratiquez au prejudice de la bonne intelligence que vostre Majesté doit desirer de se conserver en ce royaume. Cependant vostre Majesté verra, par un memoire que je luy envoie, ce qui se projette en Allemangne, pour l'accord de messieurs des Estats, ensemble ce qui en fut proposé par les gens du duc de Brunsvic, il y a quelques mois. A quoy toutesfois je ne puis croire qu'ils consentent en aucune façon, tant par ce que deslors qu'ils cesseront de faire la guerre, leur puissance viendra à estre ruynée, et leur grand profit à diminuer; comme aussi, qu'ils sçavent tres-bien que si la France et l'Angleterre n'interviennent en leur accord avec le roy d'Es-

pagne, qu'ils n'y peuvent fonder aucune seureté, quelque protection qu'ils ayent de l'Empire, foible aujourd'huy, et en partie, manié ou gaigné par ledit roy d'Espagne ou la maison d'Autriche. Leurs députez font estat de s'en retourner dans deux jours. Ils ont accepté pour colonel des Escossois, qu'ils delibèrent de lever, le milord Bucloud, que le Roy leur a nommé. L'ambassadeur du duc de Brunsvic arriva hier à Gravesines, qui est tout ce que je puis mander à vostre Majesté de particulier, laquelle je prie Dieu, Sire, etc.

#### CHAPITRE CXXI.

*Traité conclu avec Jacques I. Opinion du comte de Soissons sur ce traité. Divers présens faits au roi, à la reine d'Angleterre, et à plusieurs seigneurs de la Cour.*

« Le roy d'Angleterre a receu un singulier plaisir et contentement de la louable souvenance que le roy de France, son bon frere, ancien et perpetuel allié, a monsté avoir eu en tout temps de luy, et du tesmoignage qu'il luy en rend maintenant par une si honorable ambassade que celle de M. le marquis de Rosny, de laquelle il fait une grande estime, tant pour les offres tres-signalées et importantes qui luy sont faites, que pour les qualitez recommandables de celui qui luy est envoyé, lequel il prise et affectionne bien fort. Et pour preuve certaine du desir que Sa Majesté d'Angleterre a de conserver, avec tout honneur et dignité, l'amitié et alliance d'un si grand prince, son bon frere, elle trouve à propos, et mesme promet, comme aussi fait ledit sieur marquis au nom du Roy, son maistre, de renouveler non seulement les anciennes et non jamais interrompues alliances de France et d'Es-cosse, et celles qui avoient esté contractées entre le susdit roy de France et la serenissime Elizabeth, cy-devant reine d'Angleterre, mais aussi de les fortifier et restreindre par toutes autres sortes de conventions utiles et honorables; mesme par une ligue, qui sera particulièrement conclue entre leurs Majestez, pour la defense commune de leurs personnes, royaumes et sujets, dans laquelle ligue defensive seront compris tous les alliez de part et d'autre, qui seront nommez par leurs Majestez, communement ou separement, entre lesquels les provinces unies des Pays-Bas estant des principaux et plus considerables, leursdites Majestez procureront mutuellement envers le roy d'Espagne et les archiducs, qu'ils les vueillent laisser en repos et delivrer de toute invasion et hostilité, ou à tout le moins,

« homme ; car, en premier lieu, il avoit toutes  
 « langues à commandement comme sa naturelle,  
 « jusques au grec et à l'hebreu, contrefaisant  
 « tous les divers accens, mines et actions des  
 « peuples, des provinces diverses de France,  
 « comme s'il eust esté d'une chacune d'icelles,  
 « sçavoit beaucoup en la théologie, philosophie,  
 « physique, logique et mathématique, preschoit  
 « des mieux, tantost comme les catholiques  
 « et tantost comme les huguenots, disoit fort  
 « bien la messe, prenoit des plans de villes et  
 « fortifications qu'il entendoit assez bien, es-  
 « toit fort et disposé à lutter, sauter et danser,  
 « joüoit quasi de toutes sortes d'instrumens, en-  
 « tendoit bien la musique, avoit la voix fort  
 « agreable, composoit fort bien en vers, joüoit  
 « tres-bien tous les personnages d'une comedie  
 « et farce, sçavoit toutes sortes de jeux faisoit  
 « tres-bien à toutes sortes d'armes, estoit assez  
 « bon homme de cheval, et n'y avoit quasi mes-  
 « tier mecanique dont il ne s'aidast fort bien.  
 « Mais toutes ces bonnes parties estoient accom-  
 « pagnées de tant de vices et vilénies, que le  
 « mal surmontoit le bien ; car, premierement,  
 « il n'avoit nulle religion, estoit desloyal, cau-  
 « teleux, menteur, sanguinaire, lasche, poltron,  
 « pipeur, yvrongne, gourmand, friand, berlan-  
 « dier, putassier, ruffien ; bref, s'il sçavoit quel-  
 « que chose de bon, tout son soin et sollicitude  
 « estoit de l'employer à mal et en meschancetez  
 « noires ; et aussi de telle vie s'est il ensuivy une  
 « semblable fin, estant mort de peste dans une  
 « taverne en plein bordeau estant demy yvre,  
 « ayant la verolle, jurant et blasphemant le saint  
 « nom de Dieu ; bref, comme j'ay dit au com-  
 « mencement, c'estoit un prodige, voire chose  
 « monstrueuse que la nature se fust pleuë à met-  
 « tre tant de contraires en perfection en un mesme  
 « sujet. » Sur lequel, comme chacun en disoit sa  
 « ratelée, s'esmerveillant que tant de perfections  
 « et d'imperfections pussent compatir ensemble,  
 « l'on vint dire au Roy que sa viande qu'il avoit  
 « desja demandé par deux, estoit portée, ce qui  
 « fut cause d'interrompre vos discours, et s'en al-  
 « lant disner, il dit à M. de Ville-roy qu'il vous en  
 « donnast, et puis que vous vous en allassiez re-  
 « poser en vostre logis jusques au lendemain ma-  
 « tin qu'il vous entretiendroit encore, ne doutant  
 « point que vous ne fussiez bien las d'estre venu  
 « en poste et de vous estre tant promené ; et qu'il  
 « donneroit charge à Frontenac et à Parfait, vos  
 « bons amis, de vous faire servir de sa cuisine jus-  
 « ques à ce que vostre train fust venu.

L'apresdisnée, le Roy s'alla promener à che-  
 val dans la forest. A souper, il vous envoya deux  
 bons melons et quatre perdreaux, et vous manda

que vous le vinssiez trouver le lendemain fort  
 matin, afin qu'il vous pust entretenir seul avant  
 que les autres de son conseil fussent venus,  
 comme vous fistes ; et neantmoins vous trouvas-  
 tes qu'il estoit desja tout habillé, avoit pris son  
 bouillon, et regardoit jouer une partie à la paulme  
 dans la petite cour du chasteau qui sert de tripot.  
 Lequel ne vous eust pas plutost apperceu, qu'il  
 vous appella et vous dit : « Allons nous prome-  
 « ner pendant qu'il fait encor frais, car j'ay des  
 « questions à vous faire et des particularitez à  
 « vous demander, sur lesquelles je n'ay fait que  
 « ravasser toute cette nuict, m'estant levé de-  
 « vant quatre heures, pource que toutes les fan-  
 « taisies qui me sont venues en l'esprit là dessus  
 « m'empeschoient de dormir. » Et vous ayant  
 pris par la main, il s'en alla dans le parc, où il  
 demeura seul à se promener avec vous pres de  
 deux heures ; puis messieurs de Bellievre, de  
 Ville-roy et de Sillery estans arrivez, il se pro-  
 mena encore environ une heure avec vous qua-  
 tre, et continua cette forme trois jours durant.  
 N'ayant pû sçavoir tous les discours que vous  
 eustes pendant ce temps là, pour ce que vous  
 en ayant demandé quelque chose, afin de l'inser-  
 rer aux recueils que nous vous dismes avoir faits  
 de tout ce qui s'estoit passé pendant vostre am-  
 bassade, vous nous dites qu'il n'estoit point ne-  
 cessaire d'y mettre tous les discours que vous  
 aviez eus avec le Roy, d'autant que ce n'estoit  
 que des relations un peu plus estendues des  
 mesmes choses dont vous nous aviez informez,  
 réservé que vous luy aviez fait voir le roole des  
 principaux seigneurs et ministres des affaires  
 d'Estat du Roy d'Angleterre, qui avoient con-  
 venu avec vous, au sceu de leur maistre, de  
 prendre presens et pensions de Sa Majesté, du-  
 quel la teneur ensuit :

« Premièrement, au roy d'Angleterre, six  
 tres-beaux chevaux des mieux dressez, fort ri-  
 chement enharnachez, et le sieur de Saint-An-  
 thoine pour escuyer.

« Plus, à la Reine, un miroir de crystal de  
 Venise, dans une boîte d'or enrichie de dia-  
 mans.

« Plus, à M. le prince de Galles, une lance et  
 un heaume d'or, enrichie de diamans, un escri-  
 meur et un baladin.

« Plus, à la comtesse de Beth-fort, une mons-  
 tre d'horloge d'or enrichie de diamans.

« Plus, à madame Riche, une boîte d'or en-  
 richie de diamans, dans laquelle y avoit le por-  
 trait du Roy.

« Plus, à Madame de Rosmont, un collier de  
 perles de diamans à mettre au col.

« Plus, à Marguerite Aisan, fille de chambre

et favorite de la Reine, un diamant à mettre au doigt.

« Plus, au duc de Lenos, un cordon de chaîne enrichy de chattons de diamans.

« Plus, au comte de Northumbelland, une enseigne de diamans.

« Plus, au comte de Sutenton, un pennache de heron noir, avec une enseigne de diamans en forme de plumes.

« Plus, au comte d'Evencher, une enseigne de diamans.

« Plus, au comte de Rosbroug, une enseigne, en forme de nœud, tenu par deux Amours, le tout enrichy de diamans.

« Plus, au grand admiral Haouard, trois douzaines de boutons d'or enrichis de diamans.

« Plus, au comte de Mare, une enseigne, en forme de bouquet de fleurs, enrichie de diamans, rubis et autres pierres riches.

« Plus, au grand chambelland, une enseigne d'or, en forme d'aigrette, enrichie de diamans, où il y a un fort beau rubis au milieu.

« Plus, au grand escuyer Husmes, une enseigne, en forme de croix, enrichie de diamans.

« Plus, au grand thresorier d'Escosse, un pennache d'or, en forme d'aigrette, enrichie de diamans.

« Plus, au sieur secretaire milord Cecile, trois douzaines de boutons d'or enrichis de diamans.

« Plus, au sieur de Kainlos, un diamant en bague.

« Plus, au milord Sidnay, une chaisne de gros grains d'or remplis de parfum, enrichis de diamans, avec le portraict du Roy attaché à icelle.

« Plus, au chevalier Asquins, capitaine des gardes, une enseigne d'or, en forme de cœur, enrichie de diamans.

« Plus, au sieur Oleradoux, une enseigne d'or, en forme de lacs d'amour, enrichie de diamans.

« Plus, au sieur Haston, une boîte d'or enrichie de diamans, pour mettre un portraict.

« Plus, au sieur Levimus, commis du sieur Cecile, une coupe d'or.

« Plus, à M. de Beaumont, pour distribuer à ceux qu'il jugera à propos, douze cens escus.

Tous ces presens, revenans à soixante mil escus : et aviez si dextrement procedé pour faire bien recevoir ces presens, et les exempter de tout soupçon ou reproche, par la grande franchise que vous aviez tesmoignée envers ce prince, en luy demandant librement s'il auroit agreable, que vous usassiez de quelques gratifications au nom du Roy vostre maistre à l'endroit d'aucuns de ses serviteurs plus affidez, d'autant qu'en cela

ny en aucune autre chose, vous ne vouliez rien faire que de son sceu et consentement, qu'ils avoient tous receu commandement d'accepter ce que vous leur offririez.

## CHAPITRE CXXII.

### *Lettres diverses relatives aux négociations avec l'Angleterre.*

Encor qu'il se soit passé plusieurs autres affaires pendant vostre voyage d'Angleterre, du recit desquelles nous pourrions amplifier, voire enrichir ces Memoires, neantmoins, afin d'abreger, de crainte de vous ennuyer ou les autres qui les liront, nous nous contenterons d'adjouter icy, tout d'une suite, diverses lettres à vous adressées ou par vous escrites, encor qu'elles soient de diverses dattes, afin de finir par icelles tout ce qui concerne vostre voyage et negociation en Angleterre, craignant mesme, comme nous l'avons desja dit, d'avoir esté trop longs aux narrations d'iceux ; mais l'importance de la matiere nous a semblé devoir excuser cette prolixité.

#### *Lettre de M. de Beaumont à M. de Rosny.*

Monsieur, soudain que j'eus receu vostre lettre du 7, escrite de Douvres le 9 du present, je despeschay aussi-tost à la Cour vers le sieur Cecile ; lequel, apres avoir attendu de me faire response jusques à ce jourd'huy, que j'ay expressément différé de partir pour m'en aller à Oinsore, enfin me l'a envoyée en la façon que vous verrez par sa lettre, et je m'assure que vous jugerez aussi mal à propos, comme l'expedient qu'il a trouvé pour reparer un erreur dont il scait en son ame ne pouvoir estre excusable ; mais ce sont de ses tours ordinaires, où je ne suis que trop accoustumé, et dont je ne doute point qu'en fin il ne se fasse descouvrir pour tel que l'on l'a creu il y a long-temps. J'ay trouvé cette ville, à mon retour de Rochestre, pleine de discours autant en vostre faveur qu'à sa honte, sur ce qui s'est passé en vostre negociation, où je vous puis assurer, avec la pure verité, que vous avez acquis tant de reputation en ce royaume, que ne s'y pouvant rien adjouter, vous avez tres-grand sujet d'en estre content et d'en louer Dieu. J'espere que quand vous aurez fait vostre rapport aussi à Sa Majesté, et que chacun considerera combien vostre prudence et dexterité a servy pour persuader ce prince et les siens au party le plus agreable et utile à la France, que vous ne recevrez pas moins d'honneur et de

grace d'elle, comme vous avez maintenant de gloire et de loüanges en Angleterre.

Vous verrez, par la coppie cy enclose, ce que j'ay estimé selon ma conscience en devoir écrire à Sa Majesté, que je recognois bien que véritablement elle n'approche en rien du style ny des termes qui seroient convenables pour représenter vostre merite. Vous sçavez aussi, par une autre que j'ay recouverte, ce que desja l'on projette en Allemagne pour l'aceord de messieurs des Estats, les deputez desquels partent d'icy bien resolu de se defendre courageusement cette année, moyennant l'assistance que vous leur avez promise, et de n'entendre à aucun traité que la France et l'Angleterre n'en soient garands. C'est ce que le sieur de Bernaveld m'a assuré en particulier, lequel vous prie de vous ressouvenir de quelques poudres dont il vous parla, afin qu'il aye sujet de couvrir ce que vous sçavez qui fut arresté en secret, et que difficilement, si ce n'est avec ce moyen, l'on pourra desguiser au sieur Oinoust, lequel, estant en Hollande, sçaura et entendra toutes ces choses. Celuy qui avoit esté accusé de vouloir entreprendre contre ce prince n'est pas Jesuiste, mais bien prestre du seminaire, et le doit-on en peu de jours amener à la Cour, où l'on bruit aussi de quelque conspiration secrette des catholiques; mais veu leur foiblesse et le peu de gens de courage qu'il y a parmy eux, j'estime que l'on les accuse plutost par calomnie que par verité. J'ay esté adverty de bon lieu que l'on traite fort et ferme de la part d'Espagne avec les Escossois, dont vous avez icy le memoire. Au nom de Dieu, monsieur, faites envers Sa Majesté qu'elle les retienne, et les divertisse d'aller de ce costé là, autrement ses affaires seront en danger en ce royaume. Je n'oublieray rien cependant en mon sejour d'Oinsore pour les gagner de plus en plus, et de tout ce que j'y apprendray, je ne manqueray point doresnavant de vous en donner advis; car il faut que je vous confesse que vostre vertu et vos merites, avec la faveur qu'il vous a pleu me faire en vostre voyage, m'ont tellement lié à vostre service, que la plus forte ambition que j'aye aujourd'huy, c'est de m'en rendre digne, et que me retenant en vostre protection, vous me croyez et m'advouez, etc.

*Lettre de M. de Beaumont à M. de Rosny.*

Monsieur, l'assurance que j'ay que la lettre que j'escris à Sa Majesté, qui vous touche en beaucoup d'endroits, vous sera communiquée, m'empeschera de vous faire plus long discours par celle-cy que pour vous confirmer que vous avez laissé en l'ame de ce prince une si bonne

impression des affaires et une telle opinion de vostre particulier, que luy ny sa Cour ne se peuvent lasser de vous loüer à toute heure; en sorte que j'espere qu'il sera mal-aisé à l'ambassadeur d'Espagne, ny d'oster le lustre de vostre voyage, ny de traverser vostre negociation, et moins encore de destruire, quelque artifice qu'il y apporte, les bons fondemens de l'amitié que vous avez jettée en ce royaume. J'ay veu la Reine et luy ay fait vos excuses, qu'elle a bien receuës; les mal-contens ne la trouvent pas selon leur humeur, et de verité, pour plusieurs raisons, j'estime que l'aise, les plaisirs, les douceurs et les delices d'Angleterre la porteront plutost à affectionner le repos de son mary, que non pas à le troubler par son intemperée ambition, ainsi qu'elle a monsté de faire en Escosse.

Les dames de qui aujourd'huy elle se fie le plus, et dont je vous ay envoyé le nom, m'ont assuré qu'elle n'estoit point si Espagnole, comme on la publoit. Si bien qu'en les obligeant, ainsi que je vous supplie persuader à Sa Majesté de faire, je me promets, avec l'artifice que j'y apporteray, qu'elle prendra plus de creance et de seureté en son amitié qu'en celle du roy d'Espagne. J'ay sceu du Sourdaut que le sieur Cécille estoit un peu scandalisé et piqué de quelques bruits que l'on a fait courre à son desavantage, touchant ce qui se passa entre vous et luy; et davantage, je recognois tous les jours, de plus en plus, que luy et les Escossois que vous sçavez, possèdent entierement ce prince, et que comme le plus fin et et expérimenté il tourne les affaires comme il veut. J'ay pensé, afin d'adoucir son petit courage et le flater aucunement, qu'il seroit tres à propos que Sa Majesté luy escrivist de sa main, tesmoignant d'estre fort contente du rapport que vous luy avez fait de la bonne intelligence qu'il a prise avec vous, et des assurances qu'il vous donna, en partant, de favoriser ses affaires en ce royaume. A quoy, s'il vous plaist, vous adviserez avec M. de Ville-roy, auquel j'en escrïs comme de chose qu'il doit sçavoir, et que je ne doute point qu'il n'approuve, aussi bien que les autres lettres de courtoisie que je luy demande pour le comte de Mare, le comte de Northumbelland, le grand thresorier d'Escosse et autres; lesquels j'espere que Sa Majesté se resoudra d'obliger, et dont attendant toute certitude par vous, apres vous avoir bien humblement baisé les mains, je prieray Dieu, etc.

*Lettre de M. de Beaumont à M. de Rosny.*

Monsieur, j'oubliois à vous dire que l'on n'est pas en Angleterre si religieux d'accorder les

querelles qu'en France, et que le comte de Sution et le millord Gré, s'estans donnez des desments en nombre devant la Reine, et dit plusieurs paroles injurieuses, n'ont pas laissé le lendemain, sans autre satisfaction que de gré à gré, de s'accorder, moyennant le pardon du Roy et son autorité, capable de sauver l'honneur à qui n'a pas le courage de le maintenir et le garder de luy mesme. Je doute que le comte de Northumbelland et le colonel Vere ne soient pas si aisez maintenant à s'accommoder.

*Lettre du Roy à M. de Rosny.*

Mon cousin, le sieur de Sillery vous fera voir la dépesche que j'ay commandée pour Angleterre, sur celle que vous en avez apportée, et vous dira mon intention sur icelle, et vous scaurez, par la presente, que j'ay veu la lettre que vous avez faite pour le roy d'Angleterre, laquelle je trouve bon que vous luy envoyez en cette forme; car vous sçavez mieux que personne comme il veut et doit estre traité, et me semble que le plutost que nous pourrons l'obliger, par escrit, d'exécuter et accomplir ce que vous avez accordé avec luy, sera le meilleur et le plus seur pour toutes considerations. C'est pourquoy j'ay voulu que le jeune Guersan, fils du maistre de la poste de Calais, fust porteur du paquet du sieur de Beaumont, et desire que vous le fassiez partir promptement. Nous n'avons pû avoir autres nouvelles de la perquisition de vostre paquet perdu, sinon que la faute procede du maistre de la poste d'Escoüan, duquel, à cette cause, j'ay commandé au grand prevost faire la punition qu'il convient. Au reste, je vous envoie, avec la presente, l'original de vostredite lettre pour ledit roy d'Angleterre, et remets les autres choses audit sieur de Sillery. Priant Dieu, mon cousin, qu'il vous ait en sa sainte et digne garde.

Escrit à Villiers-Coterests, le 19 juillet 1603.

*Lettre de M. de Rosny au roy d'Angleterre.*

SIRE,

Encore que je sois maintenant esloigné de vostre Majesté par un si long espace de terres et de mers, si m'estime-je tousjours en vostre royale presence, mon esprit et ma pensée estant incessamment environnez des rayons et brillans esclairs du soleil de vos vertus et perfections, et des courtoisies, honneurs et faveurs infinies que j'ay receuës de vostre grace et bonté singuliere, laquelle me sera en memoire eternelle pour publier vos loüanges à jamais, et attendre avec impatience les occasions de pouvoir tesmoigner à tout le monde le ressentiment que j'ay en mon ame de telles obligations et beneficences : sup-

pliant vostre Majesté de croire que mon cœur est dédié, et mes volonteés entierement soubmises à l'observation de vos commandemens, lesquels j'exécuteray toute ma vie avec telle affection et fidelité, que si j'estois né vostre sujet ou vostre creature particuliere, laquelle qualité me sera tousjours autant honorable qu'agreable; puis qu'elle se peut facilement conjoindre avec l'utilité de ma patrie et le particulier commandement du Roy mon maistre. Lequel ayant appris, par mon retour, l'heureux succez des affaires, la franchise et la sincerité avec lesquelles elles ont été traitées, et la droiture et integrité que vostre Majesté observe en toutes ses actions et formes de proceder, il en a receu un merveilleux contentement, qu'il a tesmoigné en public et en particulier par toutes sortes de resjouyssances dignes d'un tel et si loüable evenement, que j'estime devoir estre le comble du bon-heur de vos deux Majestez, qui avez mutuellement rencontré en vos personnes chacun un prince selon son cœur, et dont la conformité des mœurs, les merites infinies et tant de qualitez vrayement royales apportent desja, de toutes parts, à leurs peuples une assurance certaine de perpetuelles felicitez, ausquelles Dieu me fait la grace de participer doublement, comme ayant l'honneur d'estre choisi pour ministre d'une alliance et confederation si grande et si utile à toute la chrestienté, et si bien gravée dans les cœurs de vos Majestez, qu'il ne reste plus maintenant qu'à la rendre notoire à tous les gens de bien qui soupirent et aspirent incessamment apres une telle faveur du ciel, qui, comme j'espere, exaucera bien-tost leurs vœux et leurs prieres, puis que si franchement et si promptement le Roy mon maistre a ratifié et approuvé la proposition et les articles que je luy ay presentez de vostre part, et qu'il envoie, pour cet effet, au sieur de Beaumont, son ambassadeur, un pouvoir suffisant pour les reduire en la forme plus utile et assurée qu'il sera advisé par vostre Majesté, laquelle je supplie m'honorer de ses commandemens et faire estat assuré de ma très-humble servitude, dont toutes mes actions vous rendront cy-apres une preuve tres-certaine. Ce qu'attendant je prieray le Createur, Sire, qu'il augmente vostre Majesté en toute royale grandeur, felicité et santé.

De Paris, ce 20 juillet 1603.

*Lettre de M. de Rosny à M. de Beaumont.*

Monsieur, s'il vous souvient de la dernière dépesche que je vous monstray à Londres, dont neantmoins vous n'eustes pas coppie comme des precedentes, je laissois le Roy entre la crainte et l'esperance, tant pour avoir quelque chose de-

nouveau à luy dire, qui donnast sujet de me caresser en arrivant, que pour empescher que, par la surprise de mes lettres, l'on vint à découvrir chose si importante, au seul secret de laquelle consistoit toute sa vertu substantielle, jusques à la confirmation des deux costez par acte publique et authentique. Cette incertitude, contenuë en ma lettre, mit Sa Majesté en telle inquietude et impatience, qu'aussi-tost elle me pria et conjura de l'aller trouver en poste, ce que je fis, d'Abbeville à Villiers-Coterests, où Sa Majesté me receut avec toutes sortes de resjouysances et de carresses, principalement lors que je luy eus représenté l'estat des affaires, ce qui s'estoit passé depuis ma dernière lettre, et la conclusion prise entre nous, suivant le memoire escrit de ma main, veu, examiné et approuvé par le roy d'Angleterre et son conseil, comme vous sçavez. Lors ce fut à regretter d'avoir esté un peu trop retenu à m'autoriser des formes visibles, et à recognoistre que les conseils les plus subtils et deliez ne sont pas tousjours les plus utiles et asseurez, d'autant que si l'on m'eust baillé un pouvoir ample et suffisant pour toutes fins et occurrences, l'on ne seroit pas maintenant en doute de la ratification, et en peine de faire signer ce que le Roy et un chacun trouve plus avantageux qu'ils ne l'eussent osé esperer.

Neantmoins je croy qu'il n'y aura rien de gasté, et que les humeurs et dispositions seront encore telles que je les ay laissées, dont je prie Dieu de tout mon cœur, afin que vous et moy ayons l'honneur d'avoir fait un si grand et recommandable service à nostre prince et à nostre patrie, où j'ay fait de tels discours et recits des choses passées en mon voyage, que les louanges du roy d'Angleterre sont maintenant publiques en la bouche du Roy et de ses sujets, comme vous serez informé par autres voyes que la mienne. Vous cognoîtrez aussi, par les lettres du Roy et par les pouvoirs qu'il vous envoie, de quelle sorte ma negociation a esté agreable à Sa Majesté, et qu'elle n'a rien voulu changer aux articles et memoires que j'ay apportez, escrits de ma main, et qui fust, comme vous sçavez et l'ay desja dit cy-devant, leu et releu plusieurs fois, puis corrigé et approuvé, tant par le roy d'Angleterre que par ses ministres, comme le recognoissant estre la substance de leurs propositions et le seul fonds de leurs volontez, dont je sçay bien que vous avez retenu coppie. Mais, de peur qu'en icelles vous n'ayez adjousté les corrections que le susdit Roy et son conseil y ont mis de la propre main du Roy par apostils, je vous en envoie encor un autre, du tout conforme à ce qu'ils me tesmoignerent lors estre de leur

intention, comme vous le jugerez facilement, par la conference que vous en ferez avec la copie que vous en avez desja et avec vostre propre souvenance, de laquelle je m'assure que vous n'aurez pas laissé échapper chose de tel prix et valeur, et qui, à mon advis, a esté vostre principale meditation depuis mon congé pris du roy d'Angleterre, auquel escrivant une lettre de courtoisie, pour m'entretenir tousjours en ses bonnes graces, j'ay estimé à propos de vous en envoyer une coppie, afin d'apprendre apres vostre opinion et le jugement du Roy et de son conseil sur icelle.

Quant à la confirmation de l'alliance et autres actions et formalitez requises, je croy que vous aurez tout sujet d'estre content, et que nul ne vous desrobera l'honneur et la gloire que vostre qualité, fidelité et capacité, meritent et vous acquierent dignement; au moins en ay-je parlé de telle façon au Roy, que ses actions tant celebres vous seront entierement commises, s'il ne survient quelque mutation importante qui donnast sujet au Roy de me renvoyer par delà, comme j'y voy Sa Majesté assez encline, si les choses retomboient en incertitude, et és premières difficultez que j'ay heureusement surmontées avec vostre ayde et bon conseil. J'ay veu, peu apres mon arrivée en cette ville, l'ambassadeur d'Angleterre avec lequel j'ay raccommoqué la lettre de la main; car je m'estois bien gardé de la bailler avec une telle suscription qui eust pû alterer les esprits et faire publier aux malicieux et desireux de nouveutez, qu'un tel erreur eust esté plutost fait par mespris et de propos delibéré que par mesgarde et sans y penser. Je jettay toute la faute sur moy, et voulus porter la penitence d'un peché que je n'avois pas commis, advoüant que j'avois perdu la lettre par les chemins, mais que j'en aurois bien-tost une autre, d'autant que j'avois escrit de la mer à cette fin. Quoy que ce soit, la lettre est maintenant baillée et bien reçue, ma faute oubliée, chacun fort content et plein d'esperance que l'amitié de ces deux grands Roys sera ferme et stable à jamais, ainsi que j'en prie Dieu de tout mon cœur, et qu'il me fasse la grace de vous rendre des preuves de mon service, dignes du ressentiment que j'ay de vos faveurs et courtoisies, et qu'il vous maintienne en sa sainte garde, vous baisant bien humblement les mains.

De Paris, le 20 juillet 1603.

*Lettre de M. de Beaumont à M. de Rosny.*

Monsieur, suivant la promesse que je vous ay faite de vous escrire à toutes occasions, je vous

diray, en peu de paroles, que ce prince (1) est en la mesme humeur que vous l'avez reconnu et laissé, tellement qu'il faut craindre et esperer de luy, en la façon que vous jugeastes à vostre retour, puis que l'arrivée de la Reine n'a non plus changé son esprit que sa Cour, et que luy et son conseil monstrent estre plus irresolus que jamais. L'ambassadeur d'Espagne ne comparoist point encore, dont je sçay qu'ils sont en peine. Le comte d'Arambergue eut audience dimanche dernier, et depuis, en ayant demandé une particuliere, elle luy a esté remise jusques à dimanche prochain 27; estant ce prince si fort attaché à la chasse qu'il n'en veut estre diverty pour quelque occasion que ce soit, dont ceux que vous cognoissez ne sont pas marris, car ils profitent de cette passion, et cependant s'establisent au gouvernement des affaires, et leur font prendre tel cours qu'ils veulent. Celuy que vous vistes en partant a dit, depuis peu de jours, à un ministre nommé Galoc, qu'il s'estonnoit de la fierté et insolence des Escossois, et qu'il avoit peine de retenir les Anglois qu'ils ne leur coupassent la gorge : ce qui leur ayant esté rapporté les a mis en cervelle, et fait resoudre la pluspart à se retirer. L'on tient qu'il a tenu ce langage à dessein, tant pour adoucir la plainte envers des Anglois luy, et l'extrême envie de toute la Cour, que pour laisser la place plus libre aux particuliers Estossois avec lesquels il s'est lié, et les delivrer des reproches que les autres leur font, et le Roy, du mescontentement qu'ils en prennent. Hier le comte de Northumbelland ayant rencontré le colonnel Vere, dans la chambre de presence, luy cracha au visage, dont toute cette Cour est en rumeur et le Roy infiniment offensé, qui me fait craindre, pour beaucoup de raisons, que ce seigneur soit mis en peine, m'ayant desja esté dit qu'il luy avoit esté ordonné de demeurer arresté à Lambec; qui est tout ce que je vous puis mander de deçà, me remettant à la dépesche du Roy, laquelle je desire que vous preniez la peine de voir, pour beaucoup de particularitez qui sont de consequence, et qu'il vous plaise, selon vostre promesse, me tenir, etc.

De Dormois, pres d'Oinsois, ce 24 juillet 1603.

*Lettre de M. de Beaumont à M. de Rosny.*

Monsieur, vos deux lettres du 20 et 22 m'ont esté renduës seulement aujourd'huy avec celles de Sa Majesté. Je n'ay jamais douté que, quand l'on considereroit en France ce qu'en vostre legation vous avez avec vostre prudence et dextérité remporté de ce royaume (qui est plus que jamais ambassadeur, en si peu de temps et en

une telle rencontre de diversité d'affaires, n'a obtenu des Anglois), chacun ne vous en donast de la gloire et des louanges, et que joignant, à vostre retour pres de Sa Majesté, la faveur avec le merite, elle ne se transportast d'aise et de courage à vous cherir, tant pour la seureté qu'elle recognoist que vous avez acquise en ses affaires et le produit plus grand, que veu l'estat de celles de ce royaume, l'on en pouvoit raisonnablement souhaitter, comme encore pour le contentement qu'elle a en particulier dans son ame, de faire voir à toute la France, que Dieu benit l'œuvre qu'elle a pris plaisir de former en vous, et que l'instrument que par son election elle a choisi plus propre et plus digne de se servir, rencontre si heureusement partout où elle l'employe. Or, Dieu soit loué que tous deux soyez contens, et que vostre voyage vous soit heureux en toutes façons; car, estimant d'avoir plus contribué par mes vœux à cette felicité que nul autre, je croy aussi d'avoir plus juste part au contentement que tous vos serviteurs en reçoivent. Et puis qu'il reste encor pour la rendre accomplie, que ce prince accorde ce qu'il a arresté si solennellement et sincerement avec vous en ma presence, et qu'il plaist à Sa Majesté de me donner la charge de l'en requier, ne doutez point que pour son service et pour vostre honneur, je n'y apporte toute la dexterité qu'il me sera possible, afin de l'y faire consentir en la façon que vous desirerez et que je trouve la plus seure et plus à propos. Mais, en verité, j'eusse bien souhaitté que tout eust passé par une mesme main; car, encor que je ne recognoisse nul changement en ce prince, ny aux affaires ny aux siens, qui me fasse craindre qu'il se dédisse de ce qu'il vous a promis, s'y apprehende-je l'humeur d'Angleterre et la longueur ordinaire et les subtilitez du petit sophiste.

Toutesfois j'espere avec vostre bon demon (lequel j'invoqueray pour la perfection de l'œuvre que vous avez si heureusement entrepris), que je surmonteray ma propre apprehension et toutes les difficultez. Demain j'espere voir le Roy et luy donner vostre lettre, digne certes de vostre stile, que je tiens inimitable, et de vostre condition qui n'est égale à aucun des autres ministres de prince, ny en merite, ny en suffisance; et sur ce qu'il m'en dira, je ne faudray de vous en advertir fidellement, remettant avec vostre permission, pour plus de seureté et moins d'importunité, à la dépesche que je fais à Sa Majesté ce qui se passe au fait de la conspiration nouvellement decouverte, laquelle je suis certain que vous ne trouverez pas moins estrange que mal conduite et mal entreprise. Mais

(1) Jacques I.



c'est un tres-mauvais augure, et qui monstre que bien souvent la longue paix aux royaumes y engendre, par l'oysiveté et les delices de l'abondance, de bien mauvaises humeurs et plus dangereuses que la guerre; tout y est encore fort embarrassé, et n'en peut-on bien discourir de l'origine ny du fondement. Quant à moy, j'ay ferme opinion que l'archiduc ou le roy d'Espagne y auront trempé; ce que je mettray peine de decouvrir en peu de jours, et je me promets que s'il en est quelque chose, que nos affaires ne s'en porteront que mieux, et que ce prince se sentira tant plus intéressé de se lier avec nous. Vous remerciant, monsieur, de l'honneur qu'il vous a pleu de me procurer envers Sa Majesté, pour les traittez et renouvellemens des alliances de ce royaume, et des assurances particulieres qu'il vous plaist de me donner de vostre bonne volonté en mon endroit, que je tiens fort chere, et qui m'obligeront à estre tousjours de plus en plus, etc.

De Reinster ce 30 juillet 1603.

*Lettre de M. de Beaumont à M. de Rosny.*

Monsieur, si tous les ambassadeurs des princes s'aqueroient autant de creance et de reputation envers ceux auxquels ils sont envoyez, comme vous en avez gagné avec le roy d'Angleterre, j'estimerois que leurs affaires deussent prosperer eternellement; car je vous proteste qu'il n'a moins bonne opinion de vostre affection envers luy, que du plus confident de son conseil, et déferé tant à vostre jugement et conscience, qu'aussi-tost qu'il eut leu vostre lettre, apres avoir loué et admiré les termes de ce stile, il me dit qu'il ne vouloit pas vous garder moins de respect que Sa Majesté mesme, et que tout ainsi qu'elle avoit approuvé tout ce qui avoit esté traité entre vous et luy, aussi vouloit-il advoüer ce que vous luy aviez rapporté de sa part. Tellement que je ne fais nul doute, veu ce qu'il m'a déclaré, qu'il ne signe les articles en la façon que Sa Majesté et vous le desirez; car outre cela le sieur Cecile, avec lequel il me pria de les conferer, comme celuy entre les mains de qui il les vouloit confier, n'en fait nulle difficulté et n'y trouve rien à changer; m'ayant prié, de la part du Roy, de m'assembler un de ces jours avec ceux qui traitteront avec nous, afin de les mieux considerer et arrester en leur presence. Ce que je n'ay pû refuser et dont je n'espere que tout contentement; car, comme vous sçavez que les afflictions quelquesfois nous rendent plus traittables et nous font mieux cognoistre la necessité de nos amis, aussi m'apperois-je bien que cette conspiration derniere, en

laquelle sans doute l'archiduc est meslé bien avant, leur avoit augmenté le desir de se joindre plus estroittement avec nous, et refroidy celuy qu'ils tesmoignoient de la paix. En quoy, certes, il semble que Dieu, par sa providence, leur vueille ouvrir les yeux afin de les retenir de se perdre, et d'attirer sur eux la haine de toute la chrestienté, laquelle ils avanceroient, establisans la puissance d'Espagne. Mais je laisse au sieur d'Oval à vous en conter les particularitez et les discours qui se font en cette Cour sur ce qui se passe en l'accusation des prisonniers de la Tour, ayant estimé le devoir depescher à Sa Majesté pour luy en rendre compte, et vous dire aussi de bouche ce que j'ay traité avec ceux dont je vous ay envoyé le memoire, et le moyen que je trouve le plus à propos et necessaire pour les engager. Vous suppliant, monsieur, en cela, et ce que particulierement il vous declarera qui me touche, de luy vouloir adjouster creance et le voir d'un bon oeil, ainsi qu'il vous a pleu de me promettre, et de croire que, vouant toute l'esperance de ma fortune à vostre amitié et à la bonne opinion que vous avez daigné prendre de moy, je ne veux doresnavant dépendre, apres Sa Majesté, que de vous et de vos commandemens, en qualité de, etc.

De Londres, ce 5 aoust 1603.

*Lettre de M. de Beaumont à M. de Rosny.*

Monsieur, j'envoye à Sa Majesté, par ce gentilhomme expres, les articles signez de la main du roy d'Angleterre, en la mesme forme que ceux qu'elle m'a envoyez et que vous avez traité, me tenant tres-heureux d'avoir pû rendre ce service à Sa Majesté si à propos, et à vous le contentement, lequel je m'assure que vous en recevrez, voyant vostre œuvre si bien achevée avec tant de profit et de seureté pour la France, et de gloire pour vostre reputation particuliere. En verité, si ma dexterité a servy de quelque chose pour en avancer la perfection, ça esté par la faveur de vostre nom, qui a tel credit envers ce prince et les siens, qu'ils vous tiennent pour un oracle de prudence, et vous reverent si fort avec cette opinion, qu'ils estimeroient de faillir s'ils vous contredisoient en aucune maniere. Or, je loué Dieu qu'en cette derniere occasion ils se soyent montrez si religieux, et que le tout se soit terminé en sorte qu'il n'aye point esté besoin de recourir promptement à vostre presence, et le prie que, dans peu de mois, vous la puissiez rapporter en ce royaume pour y jurer l'alliance; afin que la gloire vous en soit toute entiere aussi bien que le merite. J'ay reçu un roole de Sa Majesté de ceux qu'elle desire d'o-

bliger à elle ; mais d'autant que le sieur de Staffort n'y est pas compris, auquel, selon ce que vous me mandastes par vostre lettre du 22 du passé, je me suis engagé de parole, je vous supplie vous vouloir souvenir de luy, car ce me seroit beaucoup de honte de luy manquer, et je vous jure que j'ay eu peine à le persuader, et que je le recognois si franc et si soigneux de m'avertir maintenant de tout ce qui se passe, que j'aurois grand regret de le perdre, ne pouvant recevoir d'un seul de cette Cour des offices si à propos que de luy, à cause de la familiarité qu'il a de longue main avec moy, dont l'on ne prend point de soupçon, et les grandes cognoissances et alliances qu'il a dans ce conseil, par le moyen desquelles il scait la pluspart de ce qui s'y fait. Il vous plaira donc de ne le point oublier. Quant aux autres, le Sourdaut s'est r'advisé, et selon que j'estime, pour la crainte qu'il a de ses ennemis, il ne veut point s'engager à une pension, mais il m'assure d'estre toujours serviteur de Sa Majesté, et croy qu'il ne refusera pas quelques pierreries de deux mille escus. Pour le sieur Haston, j'espere qu'il s'y resoudra, et Oleradoux aussi ; mais estant du conseil, et l'un de ceux qui ont le plus de part aux affaires, il est raisonnable de luy donner deux mille escus comme aux autres, joint que je les luy ay offerts, espérant que je ne serois point desadvoüé. Pour M. le comte d'Evencher, le grand thresorier et le chevalier Asquins, je suis aussi certain qu'ils prendront une gratification de Sa Majesté, car ils en desirent l'appuy et la faveur en ce royaume où ils sont plus enviez que jamais. Toutesfoi n'ayant pu encores bien sçavoir s'ils la voudront recevoir en argent ou en pierreries, je me suis advisé, suivant ce que j'ay donné charge de bouche au sieur d'Oval, de vous représenter que, pour plus de seureté, il seroit bien à propos qu'il vous pleust luy donner, à son retour, une lettre d'eschange de douze cens escus, et une autre addressante à..... par laquelle vous luy ordonniez de me fournir des pierreries jusques à pareille somme, afin que j'aye promptement dequoy les engager tous, selon ce à quoy je verray qu'ils se resoudront ; vous asseurant que j'y apporteray, de ma part, tout le soin et la fidelité qui se doit desirer d'un homme de bien, et qui est plus vostre serviteur que de tous les hommes du monde. Je remets à la dépesche du Roy ce qui se passe icy, et vous diray seulement que l'on y est bien embarrassé, et que j'y prevoy de jour en jour beaucoup de broüilleries et de mal-heur, auquel, si nos interests ne nous y faisoient participer, j'y trouverois moins de dommage ; mais je crains que la simplicité de ce

prince et l'imprudencé de son conseil augmentans la force de nos ennemis, ne nous troublent grandement. Dieu le vueille bien assister ! Il auroit besoin de vous tous les mois, que je prie de tout mon cœur, etc.

Ce 12 aoust 1603.

*Lettre de M. de Rosny au roy d'Angleterre.*

SIRE,

Comme ce grand Dieu éternel, à qui rien ne défaut, et à la perfection et beatitude duquel les œuvres et actions de tous les hommes du monde ne sçauroient adjouster ny diminuer aucune chose, reçoit non seulement les vœux et les louanges de ses creatures, quelques infirmes qu'elles soient, mais les desire, s'y delecte, et fait demonstration d'y établir en partie son honneur et sa gloire ; aussi ay-je tousjours estimé que vostre Majesté, estant son image vive, et représentant, en ses royaumes, la puissance et vertu souveraine de sa divinité, auroit les memes esgards et considerations en mon endroit, recevant le fruit de mes levres et les vœux de mon cœur pour dignes recognoissances de vos vertus admirables, et des graces et faveurs infinies que je reçois incessamment de vostre bonté, dont les plus remarquables et sensibles effets consistent au particulier tesmoignage que vostre Majesté a fait d'approuver tout ce que j'ay rapporté et fait entendre de sa part au Roy mon maistre, m'estimant infiniment heureux d'avoir rencontré à negocier entre deux si grands et tant excellens princes, dont la justice, l'équité et la prud'hommeie sont les seuls pivots sur lesquels roulent et subsistent toutes leurs deliberations et volontez absolües, et entre lesquels chacun recognoist une telle conformité de mœurs, de fortunes et d'interests communs, que l'on y peut bastir une solide esperance de voir leurs amitez et confederations perpetuelles. A quoi je contribueray tousjours mon sang, ma vie et tout ce que Dieu m'a eslargy de ses graces, lequel je supplie, etc.

De Paris, ce 10 aoust 1603.

### CHAPITRE CXXIII.

*Nouvel impôt sollicité par le comte de Solssons. Opposition de Rosny. Colère du comte et de madame de Verneuil, intéressée dans ces sortes de taxes. Le Roi veille à la sûreté de Rosny.*

Nous pourrions amplifier ces Memoires de plusieurs autres lettres et choses qui se passerent en vostre voyage d'Angleterre ; mais ayant desja, ce nous semble, comme nous l'avons desja dit,

esté trop longs, nous n'en parlerons plus, et vous ramentevrons comme peu apres vostre retour, le Roy estant lors à Fontaine-bleau et vous à Paris, M. le comte de Soissons voyant qu'à cause de vostre bon ordre et mesnage des grands deniers que vous envoyez hors du royaume, tant pour maintenir les alliez de la couronne de France, que pour en acquerir de nouveaux, payer les debtes que le Roy avoit faites durant la ligue, assister ses alliez contre l'Espagne et amasser de l'argent dans ses coffres, il estoit fort difficile d'avoir de grandes liberalitez, ny que bien petite somme sur les deniers ordinaires, il supplia le Roy de luy accorder, à son profit, une certaine imposition de quinze sols pour ballot de toille entrant ou sortant du royaume, dont l'on luy avoit donné advis, et qui pouvoit valloir quelque huit ou dix mille escus par an. Lequel luy respondit qu'il luy donnoit de tres-bon cœur, moyennant qu'elle n'excédât point cinquante mille livres par an, que cela n'apportast point trop grande vexation au peuple, et n'alterast point le trafic et commerce, qu'il vouloit favoriser de tout son pouvoir, ensemble toutes sortes d'arts, mestiers et manufactures.

Et dès le soir vous escrivit comme quelqu'un, sans le nommer, luy avoit donné advis de mettre un impost de quinze sols pour ballot de toille entrant et sortant du royaume, et qu'il en tiendroit bien quarante ou cinquante mille livres; et partant, vous prioit de luy mander ce que cela pourroit valoir, et quel prejudice une telle imposition pourroit apporter au peuple et au trafic. Ce qu'ayant calculé sur les traictes foraines et doméniales, et entrées de grosses denrées, vous l'allastes trouver aussi-tost, et luy dites que cette imposition bien établie par tout le royaume, vaudroit pres de trois cens mille escus tous les ans; mais qu'aussi altereroit-elle grandement le commerce, et causeroit en fin la ruine des provinces de Bretagne, Normandie et partie de la Picardie, où croissoient ces excellents lins et chanvres. Surquoy Sa Majesté, toute estonnée vous dit : « Je voy bien maintenant que j'aurois fait une grande faute d'accorder ainsi légèrement une telle demande sans m'estre consulté avec vous sur la valeur et consequence d'icelle, qu'il faut neantmoins que vous m'aidiez à reparer bien secrettement, de peur que cela ne vous devienne l'occasion d'une forte brouillerie avec mon cousin le comte de Soissons, auquel j'ay accorde cet advis, m'en ayant tellement pressé, qu'il en a eu l'edict signé et scellé, dont il faudra empescher la verification aux cours souveraines, lesquelles, comme vous sçavez, j'ay defendu d'entrer en l'enre-

« gistrement d'aucuns edicts s'ils n'avoient des lettres de ma propre main ou de la vostre, quelques jussions qu'elles receussent, ou lettres de cachet qui leur fussent adressées. » A quoy vous luy respondistes qu'à la verité il s'estoit un peu bien hasté, mais qu'il falloit remedier à cette faute par la voye qu'il avoit ouverte luy-mesme, et partant qu'il ne se laissast pas aller aux sollicitations qui luy seroient faites par des personnes qu'il aymoit (et que vous sçaviez bien avoir un quint en l'affaire), à escrire des lettres contraires aux resolutions qu'il venoit de prendre, et que pour vostre regard, vous sçauriez bien tenir ferme contre tout ce qui porteroit prejudice à sa personne, dommage à son Estat, et detrimet à ses peuples; mais qu'il cognoissoit l'humeur de ce prince (lequel n'estant pas trois mois sans brouillerie avec luy, le contre coup en retomboit tousjours sur vous), et partant ne doutiez point que cette affaire n'excitast sa haine contre vous, nonobstant laquelle vous ne laisseriez de faire vostre devoir à son service, sans rien apprehender, vous asseurant aussi qu'il vous assisteroit comme un bon maistre est obligé de faire un bon serviteur. « Ho ! ne vous mettez point en peine de cela, dit le Roy, car je vous maintiendray contre tout le monde, en me bien servant comme vous avez tousjours fait, et confesse que j'ay occasion de m'en louer. »

Quelques jours apres que le Roy vous eust tenu ces discours, M. le comte de Soissons vous vint voir à l'Arsenac; et apres quelques complimens de part et d'autre, en vous embrassant, il vous dit : « C'est à cette fois, monsieur, que vous me pouvez rendre un excellent office de vray amy, et m'obliger d'estre à perpetuité le vostre, tout ainsi que si vous estiez mon propre frere, en facilitant, sans bruit ny esclat, comme je sçay que vous le pouvez, une gratification qu'il a pleu au Roy de me faire fort franchement; mais il faut que vous me premettiez de me bailler des lettres de vostre propre main, où il y ait un Maximilian de Bethune tout du long. — Monsieur, luy respondistes vous, je ne sais pas encor de quelle affaire il est question, ny à qui vous desirez que j'escrive, et partant ne vous puis-je pas donner absolument ma parole, estant si religieux observateur d'icelle, qu'à quelque prix que ce fust, je la voudrois tenir. — C'est pourquoy aussi, vous respondit-il, je la vous ay demandée, je desire l'avoir, et vous prie ne me la refuser point, ou autrement j'auray sujet de rompre la paille pour tousjours entre vous et moy. » Et là dessus il vous conta toute son affaire, et vous dit qu'il sçavoit bien le mot du

guet qu'il y avoit de la part du Roy et de vous avec les cours souveraines, et partant, vous prioit-il derechef de luy bailler une lettre telle qu'il vous avoit dit, adressante au parlement de Rennes, et une autre semblable à la cour des aydes de Rouën, pour les prier de verifler cét edict purement et simplement, d'autant que c'estoit la volonté du Roy et les advis de son conseil, à la pluspart desquels il en avoit desja parlé.

A quoy vous luy respondistes que le Roy ne vous avoit rien commandé de tel, qu'il n'en avoit esté fait aucune mention és conseils où vous vous estiez trouvé, et n'en aviez jamais veu ny signé d'arrest; que l'affaire estoit de grande importance pour le peuple, et partant meritoit bien d'estre meurement deliberée; que le Roy en entendit la consequence, et vous donnast ses commandemens là dessus par escrit, pour vous servir de garand contre les reproches qui vous en pourroient estre faits. Sur quoy il vous dit : « Hé bien, monsieur, c'est assez; car il est aysé de juger à quoy tendent tant d'excuses, de circonspctions et de formalitez; c'est, en un mot, que vous voulez ruynier mon affaire, et que la paille soit rompuë; et par là puis-je facilement recognoistre quel amy vous m'avez tous-jours esté cy-devant, et ce que je dois esperer de vous pour l'advenir. » Et en mesme temps il vous quitta en gromellant entre ses dents des paroles interrompuës, tesmoignant un grand mal-contentement.

Quelques jours apres, madame de Verneüil vous vint voir pour ses affaires (n'estant pas neantmoins trop contente de vous); elle vous trouva comme vous sortiez de vostre cabinet pour aller au Louvre, ayant un petit agenda roulé autour du doigt, qu'elle vous demanda que c'estoit. A quoy vous luy respondistes comme en colere : « Ce sont de belles affaires, madame, esquelles vous n'estes pas des dernieres. » Et en le deployant, vous luy leustes une liste de vingt ou vingt-cinq edits que l'on poursuivoit à la foule et oppression du peuple, avec les noms de ceux qui estoient interessez en iceux, dont elle estoit la sixiesme en ordre. « Et bien, ce dit-elle, que pensez vous faire de tout cela? — Je pense, luy distes vous, à faire des remonstrances au Roy en faveur du pauvre peuple, qui s'en va ruyné, si telles vexations sont approuvées, et peut bien le Roy dire adieu à ses tailles, car il n'en recevra plus. — Vrayement, ce dit-elle, il seroit bien de loisir de vous croire, et de malcontenter tant de gens de qualité pour satisfaire à vos fantaisies; et pour qui voudriez-vous donc que le Roy fist, si ce

« n'estoit pour ceux qui sont dans ce billet, lesquels sont tous ses cousins et parents ou ses maistresses? »

« Tout ce que vous dites seroit bon, madame, luy repartistes vous, si Sa Majesté prenoit l'argent en sa bourse; mais de lever cela de nouveau sur les marchands, artisans, laboureurs et pasteurs, il n'y a nulle apparence, estant ceux qui nourrissent le Roy et nous tous, et se contentent bien d'un seul maistre, sans avoir tant de cousins, de parens et de maistresses à entretenir. » Et voyant par tous vos discours que vous ne manquiez pas à essayer de faire trouver mauvaises au Roy telles vexations, elle se retira toute mutinée, et s'en alla de ce pas chez M. le comte de Soissons, auquel, comme vous l'avez sçeu depuis, elle fist plusieurs rapports de vous contre luy; entre autres que vous aviez dit que le Roy n'avoit que trop de parents, et que luy et ses peuples seroient bien-heureux s'ils en estoient défaits. A quoy son esprit desja ulceré, à cause de son edict des toilles, adjousta tout ce que la passion luy pouvoit suggerer, et firent un complot de vous dresser une querelle là dessus; comme de fait, dès le lendemain matin, M. le comte de Soissons alla trouver le Roy, et apres quelque preambule sur ses qualitez et grands services rendus à luy et à l'Estat, le supplia de luy faire justice de vous, qui l'aviez cruellement offensé en l'honneur, voire de telle sorte, qu'il falloit qu'il eust vostre vie.

Le Roy luy demanda que c'est que vous aviez fait ou dit, et si c'estoit parlant à sa propre personne ou bien à quelque autre. Surquoy il luy respondit, que si c'eust esté en sa presence, quelque grandeur de respect qu'il portast à ce qu'il aymoit, si ne se fust-il peu empescher d'en faire faire la reparation sur le champ; mais qu'il supplioit Sa Majesté de croire à ses paroles, esquelles il ne se trouva jamais de mensonge. « Si cela estoit vray, mon cousin, repliqua le Roy, vous ne tiendriez pas de ceux de nostre maison; car nous en donnons tous des plus belles, et sur tous vostre frere aîné estoit-il excellent en cela. Mais puis que c'est un autre qui vous l'a rapporté, dites moy qui il est et ce qu'il vous a dit, et puis j'adviseray ce que j'en devray faire, car je vous contenteray si la raison le peut faire. — J'ay fait serment, Sire, dit monsieur le comte, de ne nommer jamais ce luy de qui je les tiens; mais je croy en luy comme en moy-mesme, ny de ne prononcer jamais les paroles dont il a usé parlant de moy : car elles sont trop indignes. — Quoy donc, dit le Roy, mon cousin, vous ne me voulez pas dire ce que je vous demande sous

« ombre de vostre serment. et moy je fais aussi  
 « serment de ne rien croire de tout ce dont vous  
 « vous plaignez que ce que M. de Rosny m'en  
 « dira luy-mesme; car je le tiens pour aussi  
 « veritable que vous scauriez faire celuy qui  
 « vous a fait ces beaux contes. » Ils eurent sur  
 ce sujet plusieurs autres contestations et finalement se separerent mutinez l'un contre l'autre.

Le Roy vous envoya le sieur Zamet et La Varenne, pour vous advertir de cette escapade du comte de Soissons, et scavoir si vous aviez tenu quelque langage de luy, sur lequel il eust peu prendre quelque occasion d'offence. A quoy vous leur respondistes que vous n'estimiez point avoir parle de luy a personne ny en bien ny en mal, il y avoit plus de quinze jours. ny a sa personne depuis qu'il vous vint demander des lettres de vostre main pour faire verifier son ediet des toilles. Que madame de Verneuil vous estoit bien venue voir et aviez parle en general de ceux qui poursuivoient des edicts a la foule et oppression du peuple: que ce n'estoit pas bien fait et que vous l'empescheriez tant que vous pourriez, dequoy elle s'estoit mutinee contre vous; mais que M. le comte de Soissons n'avoit este nomme en particulier ny par elle ny par vous. Lequel propos ayant este rapporte au Roy, il dit aussi-tost : « Ho! il ne se faut plus enquerir d'où vient la broüillerie puis que madame de Verneuil est alleguee, car c'est un si bon bec. et si plein de malice et d'invention, que sur le moindre mot que Rosny luy aura dit, elle y en aura adjouste cent, voire mille; mais, pour tout cela, ne faut-il pas negliger cette affaire; et partant, vous, La Varenne, retournez le trouver, et luy dittes qu'il pense a s'asseurer, et qu'il s'accompagne si bien que l'on ne puisse pas facilement entreprendre sur sa personne, et que j'ayme bien mieux qu'il m'en conte quelque chose; car si je le perdois, je perdrois bien avec luy davantage, que tout ce qu'il scauroit despendre a se bien garder. » Et depuis il vous manda encore par le sieur de Beringuen que, pour tesmoigner qu'il vous aymoit autant que jamais, il vouloit, en faisant son voyage de Normandie, aller coucher a Rosny, ou il vouloit que vous le traitassiez, ensemble tous les princes et princesses, et monsieur le connestable, lesquels il y convieroit. Comme de fait, ils s'y rendirent tous quatre jours apres, ou vous les traitastes assez bien; mais l'eussiez fait plus magnifiquement sans le ravage des eaux de plusieurs moes qui creverent tout a coup, lesquelles entrerent dans les offices bas, et gasierent les plus beaux fruits et autres preparatifs pour un festin qu'il estoit possible de voir,

et mesme donna quelque allarme a plusieurs; de laquelle le recit seroit assez recreatif, mais nous l'obmettons pour briefvete, a cause que toutes ces apprehensions se tournerent en risée, si tost que l'on eust oste des terres d'un lieu par lequel avoient acoustume de s'esconler les eaux, que l'on y avoit mises pour assurer le passage des charrois du Roy, d'autant qu'une voûte que l'on y faisoit n'estoit pas achevee. Ces ravages d'eaux firent, dix lieues a la ronde, de grandissimes ruines, desquelles vous futes quitte pour deux ou trois cens escus en vostre particulier.

#### CHAPITRE CXXIV.

*Conversation de Henri IV et de Rosny sur les manufactures de soie et sur le luxe. Détails curieux sur les mœurs anciennes.*

Le Roy continua son voyage de Normandie, duquel il a este parle au precedent chapitre, jusques a Caen seulement, duquel lieu il osta M. de Creve-cœur Mont-morency sur les advis bien justifiez qu'il avoit receus, qu'il avoit des intelligences avec M. le comte d'Avvergne et messieurs de Bouillon et de la Trimouille desquels il estoit parent, et mist en sa place le sieur de Belle-font.

Au retour le Roy passa par Roüen ou il mit ordre a toutes les affaires de la province. Auquel lieu vous ayant autrefois este parle du mariage de vostre fille aisnee avec M. de Rohan, Madame, sœur du Roy, embrassant cette alliance avec offres de luy donner de son bien. l'on renouvella encor lors cette proposition. M. de Fervaques et sa femme vous firent aussi parler de M. de Laval; mais toutes ces ouvertures venues a la notice du Roy, il vous defendit d'entendre à M. de Rohan, et qu'il approuvoit le mariage de M. de Laval.

Il se passa en cette année 1603 plusieurs autres choses en France, qui ne devoient pas estre omises en une histoire generale. Mais par ces Memoires nous nous contenterons de vous ramener comme le Roy voulant establir en son royaume le plant des meuriers, l'art de la soye et toutes sortes de manufactures estrangeres qui ne se fabriquoient point en iceluy, à cette fin faire venir a grands frais des ouvriers de tous ces mestiers, et construire de grands bastiments pour les loger, vous fistes ce qu'il vous fut possible pour empescher tout cela; mais luy s'y passionnant bien fort, il s'en vint un jour a l'Arsenac, et vous dit : « Je ne scay pas quelle fantaisie vous a pris de vouloir, comme l'on me l'a dit, vous opposer à ce que je veux

« établir pour mon contentement particulier,  
« l'embellissement et enrichissement de mon  
« royaume, et pour oster l'oysiveté de parmy  
« mes peuples.

« Sire, luy respondistes-vous, quant à ce qui  
« regarde vostre contentement, je serois tres-  
« marry de m'y opposer formellement, quelques  
« frais qu'il y falut faire; car, ayant passé par  
« tant de travaux, traverses, fatigues et de perils  
« depuis vostre naissance jusques à present, il  
« est raisonnable maintenant que vostre Estat  
« est en repos et qu'il se va bonifiant de toutes  
« parts, que vous ayez aussi quelque plaisir et  
« recreation dont, si la despence estoit excessive,  
« je vous remonstrerois seulement que cela ne  
« conviendrait pas trop bien avec le dessein que  
« vous m'avez fait proposer, comme de moy-  
« mesme, au roy d'Angleterre, et puis je vous  
« obeyrois absolument; mais de dire qu'en cecy  
« à vostre plaisir soit joint la commodité,  
« l'embellissement et enrichissement de vostre  
« royaume et de vos peuples, c'est ce que je ne  
« puis comprendre. Que s'il plaisoit à vostre Ma-  
« jesté d'escouter en patience mes raisons, je  
« m'asseure, cognoissant comme je fais la viva-  
« cité de vostre esprit et la solidité de vostre ju-  
« gement, qu'elle seroit de mon opinion.

« Ouy dea, je le veux bien, dit le Roy, je suis  
« content d'ouyr vos raisons; mais aussi veux-je  
« que vous entendiez apres les miennes, car je  
« m'asseure qu'elles vaudront mieux que les vos-  
« tres.

« Si j'eusse estimé, Sire, que vous eussiez tant  
« deféré aux opinions des Bourgs et des Cumans,  
« dites-vous, je me fusse bien empesché de vous  
« parler des miennes qui n'auront jamais autre  
« fondement que vos volontez; mais pour mes  
« raisons, puis qu'il plaist à vostre Majesté pren-  
« dre la patience de les entendre, je les entre-  
« mesleray de propos que si vous les mesprisez à  
« present, peut-estre à l'advenir aurez-vous re-  
« gret de n'y avoir eu plus d'esgard. Car, en  
« premier lieu, Sire, vostre Majesté doit mettre  
« en consideration qu'autant qu'il y a de divers  
« climats, regions et contrées, autant semble-il  
« que Dieu les aye voulu diversement faire abon-  
« der en certaines proprieté, commoditez, den-  
« rées, matieres, arts et mestiers speciaux et  
« particuliers, qui ne sont point communes, ou  
« pour le moins de telle bonté aux autres lieux,  
« afin que par le traffic et commerce de ces chos-  
« ses (dont les uns ont abondance et les autres  
« disette), la frequentation, conversation et so-  
« ciété humaine, soit entretenüe entre les na-  
« tions, tant esloignées peussent elles estre les unes  
« des autres, comme ces grands voyages aux In-

« des orientales et occidentales en servent de  
« preuves. En second lieu faut il bien examiner  
« si ce royaume n'a point un climat, une situa-  
« tion, une eslevation de soleil, une temperature  
« d'air, une qualité de terroir, et une naturelle  
« inclination de peuples qui soient contraires aux  
« desseins de vostre Majesté. En troisieme lieu,  
« si la saison du printemps n'y est point trop  
« froide, humide et tardive, tant pour faire es-  
« clorre et vivre les vers à soye que pour y avoir  
« des feuilles aux meuriers pour les pourrir,  
« dont l'on ne scauroit avoir quantité suffisante  
« de quatre ou cinq ans, quelque diligence que  
« l'on fasse d'en semer et planter. Et en qua-  
« triesme lieu, si l'employ de vos sujets en cette  
« sorte de vie qui semble estre plutost medita-  
« tive, oysive et sedentaire, que non pas active,  
« ne les desaccoustumera point de celle opera-  
« tive, penible et laborieuse, en laquelle ils ont  
« besoin d'estre exercez, pour former de bons  
« soldats, comme je l'ay oüy dire plusieurs fois  
« à vostre Majesté; que c'est d'entre telles gens  
« de fatigue et travail que l'on tire les meilleurs  
« hommes de guerre; que, pour mettre en va-  
« leur tant de bons territoires, dont la France  
« est generalmente pourveuë plus que royaume  
« du monde, excepté celuy d'Egypte, le grand  
« rapport desquels consistant en grains, legu-  
« mes, vins, pastels, huilles, cidres, sels, lins,  
« chanvres, laines, toilles, draps, moutons,  
« pourceaux et mulets, est cause de tout l'or et  
« l'argent qui entre en France, et que par conse-  
« quent ces occupations vallent mieux que toutes  
« les soyes et manufactures d'icelles, qui viennent  
« en Sicile, Espagne, ny Italie; et tant s'en faut  
« aussi que l'establissement de ces rares et riches  
« estoffes et denrées accommodent vos peuples  
« et enrichissent vostre Estat; mais qu'elles les  
« jetteroient dans le luxe, la volupté, la fenean-  
« tise et l'excessive despence qui ont tousjours  
« esté les principales causes de la ruyne des  
« royaumes et republicques, les destituants de  
« loyaux, vaillans et laborieux soldats desquels  
« vostre Majesté a plus de besoin, que de tous  
« ces petits marjolets de Cour et de villes reves-  
« tus d'or et de pourpre. Car quant aux trans-  
« ports d'or et d'argent hors de vostre royaume,  
« des-ja tant de fois alleguez par ceux qui propo-  
« sent l'establissement de ces estoffes estrange-  
« res, riches et cheres, il n'y a rien si facile que  
« de les éviter sans aucun destriment pour qui  
« que ce puisse estre, deffendant toutes somp-  
« tuositez et superfluitez, et reduisant toutes  
« personnes de toutes qualitez, tant hommes que  
« femmes et enfans, pour ce qui regarde les ves-  
« temens de leurs personnes, leurs ameublemens,

« bastimens, logemens, plants, jardinage, pier-  
 « reries, vaisselles d'argent, chevaux, carrosses,  
 « esquipages, trains, dorures, peintures, lam-  
 « bris, mariages d'enfans, achapts d'offices, fes-  
 « tins, banquets, parfums et autres bombances,  
 « à ce qui se pratiquoit du temps des roys  
 « Louys XI, Charles VIII et Louys XII, sur  
 « tout pour ce qui regarde les gens de justice,  
 « police, finance, escritoire et bourgeoisie, qui  
 « sont ceux qui se jettent aujourd'huy le plus sur  
 « le luxe, durant lesquels regnes il s'est veu que  
 « des chanceliers, premiers presidens, secretaires  
 « d'affaires et plus relevez financiers, n'avoient  
 « que de fort mediocres logis sans ardoises, bri-  
 « ques, lambris, dorures ny peintures, ne por-  
 « toient point de plus riches estoffes de soye que  
 « du taffetas, et à quelques uns d'iceux leurs  
 « femmes que le chaperon de drap; n'avoient ny  
 « tapisseries de pris, ny lits de soye, ny vais-  
 « selle d'argent de cuisine, ny mesmes d'assiet-  
 « tes; ne donnoient que fort petit mariage à leurs  
 « enfans, et ne traittoient leurs parents et amis  
 « que chacun d'iceux n'apportast sa piece sur ta-  
 « ble; par l'excez desquelles choses il se con-  
 « sume maintenant dix fois plus d'or et d'argent  
 « que tout ce que l'on fait tant esclatter du  
 « transport d'iceux pour les manufactures d'es-  
 « tranges pays.

« Sont-ce là, vous dit lors le Roy, les bonnes  
 « raisons et beaux expedients que vous me deviez  
 « alleguer? Ho! que les miennes sont bien mei-  
 « leures, qui sont en effet que je veux faire les  
 « experiences des propositions que l'on m'a fai-  
 « tes, et que j'aimerois mieux combattre le roy  
 « d'Espagne en trois batailles rangées, que tous  
 « ces gens de justice, de finance, d'escritoire et  
 « de villes, et sur tout leurs femmes et filles que  
 « vous me jetteriez sur les bras par tant de bi-  
 « zarres reiglements, que je suis d'avis de re-  
 « mettre en une autre saison. — Puis que telle  
 « est vostre volonté absoluë, Sire, dites-vous, je  
 « n'en parle plus, et le temps et la pratique vous  
 « apprendront que la France n'est nullement  
 « propre à telles babioles. Mais pour le bastiment  
 « que vous voulez faire faire aux Tournelles (1)  
 « pour vos ouvriers, je voudrois que vous eussiez  
 « choisi un autre lieu, d'autant que j'ay dessein  
 « d'y faire faire une construction qui sera une  
 « des plus magnifiques de Paris, voire peut-estre  
 « de l'Europe, sans qu'elle vous couste rien; et  
 « m'asseure que quand vous en verrez les trois  
 « costez achevez, que pour laisser parachever le

(1) On voulait faire une place de soixante-douze toises  
 carrées, qui aurait porté le nom de *Place de France*. Huit  
 rues, appeles du nom d'une de nos provinces, auraient  
 abouti à cette place. La construction de la Place Royale a  
 été la réalisation d'une partie de ce projet.

« quatriesme, vous ferez vous-mesmes desmolir  
 « ce que l'on y aura basti pour les ouvriers. —  
 « Or bien, dit le Roy, alors comme alors. » Et  
 sur cela, le sieur Zamet estant entré qui luy dit  
 que le disner l'attendoit chez luy, il s'y en alla.

## CHAPITRE CXXV.

*Colonie dans le Canada. Synode de Gap. Let-  
 tres de Ville-roy relatives à ce synode et à  
 d'autres objets.*

Ayans trouvé parmy vos papiers plusieurs let-  
 tres qui vous avoient esté escrites des pays es-  
 tranges, nous en avons tiré des extraits et les  
 avons icy inserez pour vous les ramentevoir; et  
 joindrons à iceux quelques autres choses du de-  
 hors le royaume, comme: la navigation du sieur  
 de Monts pour aller faire des peuplades en Ca-  
 nada, du tout contre vostre advis, d'autant, di-  
 siez-vous, que l'on ne tire jamais de grandes ri-  
 chesses des lieux situez au dessous de quarante  
 degrez.

Le passage du connestable de Castille par la  
 France, où il fit mille fanfaronnades pour aller  
 donner perfection à la paix d'Angleterre, de la-  
 quelle Taxis avoit jetté les premiers fondemens.

Le synode general tenu à Gap par ceux de la  
 religion, où quelques esprits fantasques et desi-  
 reux de choses nouvelles, esmeurent forces ques-  
 tions hors de saison, se voulant rendre comme  
 entremetteurs des differends entre quelques prin-  
 ces estrangers, et declarer, par confession pu-  
 blique, le Pape lors seant à Rome estre l'Ante-  
 christ: lesquels deux poincts le Roy trouva fort  
 mauvais, et fallut qu'ils y reformassent quelque  
 chose.

La continuation du siege d'Ostende, durant  
 lequel, à compter depuis le premier jour d'ice-  
 luy jusques au dernier fevrier 1603, l'on disoit  
 que l'archiduc avoit fait tirer plus de deux cens  
 cinquante mille coups de canon, et les Estats  
 cent mille, et que les Espagnols y avoient perdu  
 dix-huict mil hommes, et les Hollandois sept  
 mille. Environ le mois d'avril ces premiers ayans  
 voulu faire un effort en forme d'assaut general,  
 jugerent, par la ferme resolution et brave resis-  
 tance de ceux de dedans, qu'ils n'emporteroient  
 point cette place que par la longueur du temps,  
 les maladies, la famine ou le defaut d'hommes  
 ou de toutes sortes de munitions.

Le siege que le prince Maurice mit devant  
 Bosleduc, par lequel, pour n'avoir pas mesuré  
 sa puissance et les moyens de son attaquement  
 avec la grandeur de la ville, sa force, les as-  
 sistances qu'elle pouvoit recevoir et la defence

que par ce moyen elle seroit pour faire, il pensa perdre ses affaires et alterer sa reputation.

L'entreprise des Espagnols sur Wactendone, lesquels, encore qu'ils se fussent rendus maîtres du chateau, neantmoins, quelques troupes des Estats allans à la guerre, passant près de là, par hazard estants adverties de cet accident, y accoururent aussi-tost, et s'estant jointes avec la garnison de la ville qui, pour s'estimer trop foible pour forcer le chateau, minutoit desja sa retraite, firent si bon devoir tous ensemble, qu'ils contraignirent les Espagnols de quitter ce chateau.

Le grand et furieux combat de Frideric Spinola avec douze galleres bien équipées, y ayant pres de trois mille hommes de guerre dessus, contre quatre vaisseaux des Estats, par lesquels elles furent bien battues, mises en fuite et Spinola tué.

La conjuration des milords Coban, Rallech, Gray et Smarcan, Anglois, pour tuer leur Roy, quoy qu'ils eussent esté des plus confidens serviteurs de la reine Elizabeth, et des premiers à le recognoistre pour leur souverain, dont le discours seroit trop long, auquel sur tout est à remarquer la forme de l'accusation, conviction, punition et indulgence.

Le dessein d'une armée navale d'Espagne pour attaquer Alger, sous esperance du secours a eux promis par le roy de Cusco, lequel les trahit, et prit l'argent et les hommes qui luy furent envoyez.

Le voyage des trois fils du duc de Savoye en Espagne, qu'il y envoyoit à dessein d'y resider, y estre nourris, entretenus et avancez aux plus grandes grades, honneurs et dignitez, desirant sur tout celuy de gouverneur de Milan et de vice-roy de Naples et Sicile, croyant, par ce moyen, de s'en pouvoir approprier quelque piece.

Le traité d'alliance d'entre les Venitiens et les Grisons, lequel, non seulement, se proposa par le sceu et consentement du Roy, mais aussi se conclut par sa persuasion et intervention, afin de fortifier d'autant plus la faction contraire à la maison d'Autriche, de laquelle, comme sont obligez d'estre tous les roys de France, il estoit le chef.

L'émotion tumultueuse des jannissaires contre leur Grand Seigneur, d'autant que se laissant par trop mener par le nez, à sa mere, toutes les affaires alloient en ruyne, sans qu'elles vinssent à sa notice; et passerent les choses si avant, qu'ils le contraignirent de faire trancher la teste, en leur presence, à deux capi-aga, lesquels administroient les affaires à leur mode et servaient

de conseil à sa mere, ayans empiété son esprit; laquelle il luy fallut aussi esloigner de sa porte et luy oster toute autorité.

La mort de ce Grand Seigneur, nommé Mahomet troisieme, estant frappé de peste; ayant, durant son regne, fait estrangler vingt de ses freres, sa femme et un sien fils.

Le combat de quatorze galleres portugaises de Goa, contre quelques vaisseaux hollandois qui alloient au traffic des especeries, lesquels prindrent cinq galleres, mirent les autres en fuite et rapporterent de grandes richesses.

*Lettre de M. de Ville-roy à M. de Rosny.*

Monsieur, le Roy m'a commandé vous escrire que l'on luy a escrit du Dauphiné, qu'il a esté resolu, en l'assemblée de Gap, qu'en la confession de foy des eglises pretendues reformées, l'on y doit adjouster que le Pape est l'Antechrist, et que cela doit estre imprimé et envoyé en toutes les universitez de l'Europe; ledit advis est semblable à celuy que je vous dits dernièrement m'avoir esté donné par un bon serviteur du Roy, duquel je n'avois rien dit à Sa Majesté, me contentant de le vous avoir fait entendre. J'ay representé à Sa Majesté combien vous aviez blasmé cette nouveauté, de laquelle vous recognoissiez la consequence comme Sa Majesté mesme, et que vous m'aviez dit que vous en parleriez aux sieurs de Saint Germain et des Bordes, afin qu'ils en empeschassent l'effet. Mais par ce que je n'ay sceu devant vostre partement si vous leur en aviez parlé et leur responce, Sa Majesté m'a ordonné vous r'amentevoir de faire ledit office, comme vous sçavez qu'il doit estre fait, pour obvier aux inconveniens qui arriveront d'une telle resolution et publication, si elle a lieu, et nous faire sçavoir, s'il vous plaist, l'ordre que vous y donnerez. Le chiaoux a esté ouy aujourd'huy; il yra demain à Paris, conduit par le controlleur Sancerre, qui vous ira trouver pour recevoir vos commandemens sur la nourriture et expedition dudit chiaoux, qu'il sera bon de renvoyer au plutost suivant vostre bon advis. Je prie Dieu, etc.

De Fontaine-bleau, le 19 novembre 1603.

DE NEUF-VILLE.

*Lettre de M. de Ville-roy à M. de Rosny.*

Monsieur, le Roy vous escrit sa volonté sur vostre lettre, et a fait coter sur memoire, qui l'accompagnoit, le surplus; sur tout Sa Majesté desire que Saint Antoine soit bien tost dépesché, et qu'il parte avec contentement, car il va en un lieu où il ne sera inutile à son service. Vous ne sçauriez croire combien Sa Majesté a en af-



fection le fait du Pape, considerant ce qui en arrivera. Elle dit que cette partie a esté dressée plus par faction que par religion : elle en appréhende grandement la suite, et luy ferez grand plaisir d'y remédier tant qu'il vous sera possible. Messieurs de Sainct Germain et des Bordes ne sont icy : nous croyons qu'ils sont retournés à Paris, ou vous les aurez veus et dit l'intention du Roy, devant que vous receviez la presente : car s'estans presentés à vous, je m'assure que vous n'aurez attendu le commandement de Sa Majesté pour le faire, ainsi que je luy ay dit : toutesfois elle a voulu qu'il vous fust envoyé par ce courrier. L'on luy a dit que M. de Bouillon est fort visité du costé de Champagne, et se ressouvient sur cela, de la faute que l'on a faite d'avoir laissé trainer cette poursuite. Sa Majesté parle d'envoyer audit pays M. de Nivers, pour desromper ses serviteurs de l'opinion qu'ils prennent, sur la froideur de cette procedure, de l'innocence dudit sieur de Bouillon. Nous ne parlons encores de partir d'icy, et attendray vos commandemens pour y obeyr. Priant Dieu, etc.

De Fontaine-bleau, le 23 novembre 1603.

DE NEUF-VILLE.

J'oubliais à vous escrire, monsieur, que le Roy vous prie de faire prendre garde à la salle des antiques du Louvre, qu'il a oüy dire qu'elle a pris cong ; vous luy ferez plaisir aussi de luy escrire des nouvelles de ses bastimens, quand vous en aurez le loisir. Et, pour mon regard, je vous conseille de luy escrire tousjours amplement de toutes choses, m'ayant dit deux ou trois fois qu'en cela luy faites vous plaisir, et que quelques longues que fussent vos dépesches d'Angleterre, elles ne l'ont jamais ennuyé.

*Lettre de M. de Ville-roy à M. de Rosny.*

Monsieur, deux heures apres avoir fait partir le courrier que nous vous avons dépescié, j'ay receu votre lettre écrite hier, par laquelle vous nous avez mandé l'office que vous avez fait envers M. de Sainct Germain, suivant la volonté du Roy, touchant le fait du Pape; dequoy j'ay à l'instant adverty Sa Majesté, laquelle a elle mesme leu vostredite lettre, dont elle est demeurée contente, comme de la responce que ledit de Sainct Germain (cedant à vos raisons) vous a faite. Mais Sa Majesté desire que vous teniez la main que l'effet s'en ensuive, afin d'éviter le mal qu'ont pretendu faire les auteurs de cette proposition, lesquels il seroit meilleur de tirer de peine par quelque voye douce, que d'y envelopper le general et troubler le public. Sa Majesté a opinion que le ministre Ferrier a esmeu ce fait, n'estant encores dehors l'adjournement

personnel qui luy fut donné à Castres, jacoit qu'il y ayt comparu, car le jugement n'a esté donné. A quoy l'on peut donner ordre, de façon qu'il demeurera delivré de ce pensement, sans qu'il en soit plus parlé ny fait chose qui offense le Pape: s'il vous plaist en conférer avec ledit sieur de Sainct Germain, et nous escrire ce qu'aurez advisé, je le représenteray à Sa Majesté, à ce qu'il soit suivi et effectué. Je vous prie aussi de voir la lettre que M. le cardinal d'Ossat a écrite au Roy, par le dernier ordinaire, touchant cette coadjutorerie de l'evesché de Bayeux: il a cela si à cœur que j'ay opinion, s'il en est esconduit, qu'il en mourra de desespoir. Ceux de Maintenon n'en parlent point, et pense qu'ils ne seront marris que le Roy refuse cette grace audit cardinal, pour n'estre le contract qu'ils ont fait avec luy, trop avantageux pour eux. Quand il plaira à Sa Majesté d'accorder l'effet d'iceluy, elle ne laissera de disposer de l'abbaye de Coulon en vostre faveur, ainsi qu'elle veut faire: car je prevoy que pour en esconduire ledit cardinal, lesdits sieurs ne consentiront pas plutost que ladite abbaye vous soit donnée. Sa Majesté ne delaissera aussi à leur donner la recompense qu'elle tirera de l'evesché d'Evreux, ou une bonne pension sur icelle, qui équipolera à peu près la valeur de ladite abbaye. Tellement qu'il ne leur demeurera aucune occasion de se plaindre, et nous donnerons la vie audit cardinal d'Ossat, qui est si utile au service du Roy, et a tant merite au public et du particulier. Je n'ay encores présenté ny leu au Roy sadite lettre, ayant désiré avoir, devant, vostre bon avis sur icelle, pour le respect que je vous porte et le service que je vous ay voué; partant je vous prie de le m'escrire aussi franchement que de bon cœur j'affectionne vostre contentement. Saluant vos bonnes graces, etc.

De Fontaine-bleau, le 24 novembre 1603.

DE NEUF-VILLE.

*Lettre de M. de Ville-roy à M. de Rosny.*

Monsieur, j'ay leu au Roy, ce matin, vostre lettre du 24, que je receus hier au soir; la Reine a esté presente, car ils estoient encores au lit. Leurs Majestez trouvent bon que vous fassiez faire un miroir pour mettre la peinture que la Reine veut envoyer à celle d'Angleterre, plutost qu'une boitte commune, pour les raisons que vous representez par vostredite lettre. Le Roy desire que M. de Termes fasse diligence de trouver les chevaux qu'il faut envoyer au roy d'Angleterre, et scavoir où il y a des bidets qui manient, afin de les prendre et acheter, qui ne pourra les avoir qu'en payant; doncques il vous

plaira dire audit sieur de Termes qu'il fasse cette diligence. Sa Majesté trouve bon que vous fassiez faire les harnois qu'il faut pour tous les chevaux qui n'en ont point, et que vous commandiez qu'ils soient faits tels qu'ils doivent estre, pour estre presentez au nom de Sa Majesté; elle est contente aussi que vous traittiez favorablement le sieur de Saint Antoine, pour les frais de son voyage pour les raisons portées par vostre dite lettre; elle est bien d'avis pareillement que vous n'espargniez quatre ou cinq mille escus pour avoir des pierreries dignes d'estre présentées de sa part, et d'autant plus, que l'on luy a mandé que l'ambassadeur d'Espagne fait de grandes liberalitez et riches presens, à ceux qui en veulent prendre. Nous avons oublié au memoire que nous avons dressé de ceux ausquels il faut faire des presens ou donner pensions, le sieur de Kainlos, lequel M. de Beaumont nous a escrit, par sa dernière, estre revenu d'Escosse, et avoir, avec la volonté, le moyen de servir. Monsieur, le Roy dit qu'il partira d'icy samedy, qu'il yra ce jour-là coucher à Melun, pour descendre par eau, le lendemain, à Paris. Tellement que nous vous verrons à temps pour resoudre avec vous ce que l'on fera pour ledit Kainlos, devant que Saint Anthoine parte; joint que M. de Beaumont nous escrit par sa dernière, qui est du 10 de ce mois, qu'il feroit partir cinq jours apres le sieur d'Oval, avec un ample memoire de son avis, sur lesdits presens et pensions; lequel nous estimons estre bon de voir devant que d'en ordonner, combien que ledit sieur de Beaumont presse fort l'envoy desdits presens, craignant que ledit ambassadeur d'Espagne le gagne de la main. Mais quand ils seroient prests, ledit Saint Anthoine ne l'est pas de partir; de sorte que nous ne perdons point de temps d'attendre ledit d'Oval. Vous resoudrez lors aussi si vous chargerez ledit Saint Anthoine, ou non, desdits presens. Ledit roy d'Angleterre persiste constamment en sa bonne volonté envers le Roy, ayant de nouveau promis de ne traiter avec le roy d'Espagne sans son avis; il est empesché du sejour en son royaume, de l'ambassadeur d'Espagne, lequel aussi ne perd pas le temps. L'on dit que ledit Roy a escrit au nonce qui est à Paris, une honneste lettre pour responce à celle dudit nonce, et semble qu'il desire s'asseurer des catholiques de son royaume par le moyen du Pape et de ses ministres, et non par l'entremise des autres princes.

La conference que l'on avoit proposé faire entre les protestans et puritains en Angleterre, a plutost aigry que reconcilié les esprits, dont ledit Roy et ses conseillers n'estoient demeurez contents. Je vous raconteray le reste quand je

vous verray. Je vous prie de m'envoyer un double des lettres escrites par l'electeur Palatin et M. de Bouillon à l'assemblée de Gap, et de la responce qui y a esté faite; car j'en ay besoin pour mes dépesches, afin d'en mieux et plus seulement informer ceux ausquels il convient en donner avis. Sa Majesté a esté tres-aise de l'assurance que vous nous avez donnée par vostre dite lettre qu'il sera pourveu à la suppression de la resolution prise en ladite assemblée contre le Pape, de façon qu'elle en demeurera contente et trouve bon que l'on tire de peine le ministre Ferrier, suivant vostre bon avis. J'ay veu ce que vous m'avez escrit sur l'affaire de M. le cardinal d'Ossat; je n'en attendois pas moins que cela de vostre prudence, équanimité et sincere affection au service du Roy et au bien de ses affaires: j'en ay fait la lecture à Sa Majesté, comme du demeurant, qui y a pris plaisir, a déclaré vouloir que vous ayez l'abbaye de Coulon quand elle vaquera, et qu'elle contentera M. de Maintenon sur l'évesché d'Evreux par une pension ou par un eschange; de sorte qu'elle ne laissera de contenter ledit cardinal, auquel j'escriray le tesmoignage que vous avez rendu en cette occasion de vostre bonne volonté et du jugement que vous avez fait de son merite. Mais, monsieur, vous avez oublié à nous faire sçavoir l'estat de la salle des antiques du Louvre, que Sa Majesté, ainsi que je vous ay escrit, desiroit que vous visitassiez pour recognoistre si elle a pris coup comme l'on luy a fait entendre; elle a creu que j'avois oublié à vous l'escire, voyant que vostre responce n'en faisoit mention; donnez luy ce contentement, et à moy celuy de vos commandemens pour y obeyr, comme je feray toujours de tres-bon cœur, etc.

De Fontaine-bleau, le 26 novembre apres-midy 1603. DE NEUF-VILLE.

## CHAPITRE CXXVI.

### *Récapitulation des services de Rosny.*

Or, combien que ces presentes narrations de l'année 1603, pour y avoir voulu employer tout ce que nous avions curieusement recueilly de vostre voyage et negociation en Angleterre, suites et dependances d'icelles, nous semblent desja grandement longues, et que, suivant nostre premier dessein d'escire simplement quelque chose de vos services, nous les puissions finir presentement pour ce qui vous regarde spécialement, par le traité que, suivant la volonté du Roy, vous fistes avec messieurs de Malicorne et de Laverdin, pour le gouvernement de Poic-

ou et l'employ de vos provisions, neantmoins diverses pratiques et menées descouvertes en cette année, et les subsequentes, nous ont fait prendre la licence d'une petite digression qui nous ramene au fil de nostre propos, par laquelle nous pretendons faire voir, par les diverses espreuves que le Roy, comme le maistre, et vous, comme le serviteur, en avez faites, qu'il se trouve rarement de prudence humaine tant excellente, de fortune si prospere, ny de vertus tant abondantes, qu'elles ayent la puissance de destourner les malignes constellations des astres, d'ameliorer les naturels despravez, de reformer les inclinations perverses, ny de repurger entierement les cœurs habituez au mal, de ce pestiferé venin des trois testes de Cerberes, ambition, avarice et envie, depuis qu'elles y ont une fois pris racines profondes, la suite des temps et des ans les accroissans tousjours, au lieu qu'ils diminuent ordinairement la plupart des autres vices.

Car, encore que Sa Majesté ne fist gueres de choses d'importance qu'avec une grande sagesse et judicieuse prevoyance, et sans mesme en avoir communiqué peu ou prou avec les plus grands et qualifiez qui fussent pres de luy; qu'il n'eslevast que fort peu aux grands honneurs, charges et dignitez, sinon des personnes illustres en extraction ou en capacité, ou qui eussent d'autres conditions propres pour advantager son service ou conserver ses peuples; qu'il deust estre craint et redouté pour ses victoires, son courage et sa puissance; honoré et reveré pour ses rares vertus et Majesté royale, et aymé, estimé et chery pour sa foy inviolable, ses carresses ordinaires, sa clemence admirable, sa facilité d'accez, sa douce conversation et son familier entretien avec tous; que pour vostre regard il n'eust, en aucune façon, precipité vostre fortune; qu'il ne vous eut honoré d'aucune charge ny employ sans une prealable cognoissance de vostre loyauté, diligence et assiduité au travail du corps et de l'esprit, et qu'il n'eust auparavant tiré des espreuves de vostre suffisance et capacité en l'exercice des charges qu'il vous départoit, comme avoit fait voir vostre industrieuse conduite, lors qu'il vous députa vers le roy Henry III, et les ambassadeurs des cantons protestans de Suisse en 1586; la reconciliation de ces deux roys, que vous traittastes à Blois en 1589 par l'entremise de M. de Rambouillet; l'industriel secours que vous donnastes en 1590 aux assiegez dans Meulan; l'heureuse decouverte que vous fistes en 1592 des menées de plusieurs qui estoient pres du Roy pour former un tiers party, par le moyen de certaines lettres que vous pristés pres de

Mantes sur le chemin de Paris; la dexterité dont vous usastes apres pour separer M. le cardinal de Bourbon de ce tiers party et le reconcilier absolument avec le Roy; vostre valeur tesmoignée en plusieurs combats et batailles; vos sages et heureuses procedures aux traittez que vous fistes avec messieurs de Medavit, de Villars et de Guyse pour les reduire en l'obeyssance royale; la belle police que de tout temps vous aviez établie dans les places et parmy les gens de guerre sur lesquels vous aviez eu pouvoir; l'excellent ordre et merveilleux mesnage qui apparut aux finances tout aussitost que vous y fustes employé; le grand soin et diligence que vous apportastes aux provisions d'argent, vivres, artilleries, munitions, drogues, outils et ustencils necessaires pour ce grand et important siege d'Amiens, auquel toutes ces choses furent fournies abondamment et à propos; vostre intelligence et grande oeconomie aux ouvrages publics, tant pour les voyes et chemins, que bastimens et fortifications, lors qu'en diverses années vous fustes pourveu des charges d'iceux; vostre grande suffisance en l'artillerie, acquise par plusieurs employs precedens en icelle, qui fut cause que Sa Majesté vous pourveut de l'office de grand maistre, voulant attaquer la Bresse et la Savoye qui furent conquises, où vous fistes des merveilles; le grand soin et loyauté que vous apportastes en la garde et conservation de la Bastille, et des prisonniers d'Estat grandement qualifiez qui furent mis en icelle; la fermeté de vostre courage et solidité de vostre jugement, au demeslement de plusieurs monopoles qui se continuerent contre le Roy, l'Estat et vous aussi; vostre modestie et conduite en l'elevation de vostre éminente fortune et visible possession speciale de la bien-veillance et faveur du Roy, ne vous estant jamais arrogé ny rang ny titre, outre celui de gentil-homme, quoy que vous en vissiez plusieurs, lesquels n'estant point de plus ny peut-estre de tant illustre et ancienne extraction que vous, qui vivoient et usoient de termes comme s'ils fussent descendus de lignée royale ou de grands princes souverains; que l'on ne vous ayt jamais veu asseoir au conseil au dessus de ceux qui avoient seance en iceluy avant vous, de quelque mecanique naissance qu'ils pussent estre, jusques à ce que vous fussiez officier de la couronne et depuis duc et pair de France; que vous fissiez observer un tel ordre aux conseils privé d'Estat et de finance, que tous les princes, ducs, pairs, officiers de la couronne, gouverneurs et lieutenans de Roy aux provinces et autres seigneurs de qualité qui avoient brevets du conseil, entroient en tous les trois, en tous temps et en tout lieu, et y

avoient seance et voix deliberative, vous asseant toujours au dessous de ceux qui vous prece-  
doient en rang ou dignité, quoy qu'il arrivast  
aucune fois qu'à cause de vostre intelligence aux  
affaires et cognoissance particuliere des inten-  
tions du Roy, vous recueillissiez les voix comme  
president, et signassiez les arrests; que vous  
gardassiez inviolablement vostre foy et vostre  
parole à tous ceux ausquels vous la donniez, tant  
en matiere d'argent qu'en toutes autres affaires;  
que vous eussiez vos audiences si methodique-  
ment réglées, que nul, jusques aux moindres,  
n'y trouvoient point de difficulté, n'avoient au-  
cune peine à vous parler de leurs affaires, ny à  
en tirer une resolution certaine suivie de promp-  
tes expeditions, et que nul n'estoit jamais assi-  
gné ou employé sur vos estats des finances qui  
ne fust entierement payé, sans vous solliciter,  
bonneter les financiers, ny gresser les mains de  
leurs clerks et commis. Et neantmoins nonob-  
stant tant d'admirables procedures de ce grand  
Roy et vostre prudente administration, si ne luy  
fut-il pas possible, non plus qu'à vous, de se  
garantir des langues medisantes de ces ambitieux,  
avaricieux et envieux esprits dont nous avons  
parlé, éviter leurs plaintes et mal contentemens,  
ny empescher leurs monopoles et mauvaises pra-  
tiques pour troubler la tranquillité de l'esprit du  
Roy, de son Estat et de ses peuples, et alterer  
l'ordre que vous observiez en la conduite des af-  
faires, deux sortes de personnes principalement  
et de bien differentes humeurs et conditions pa-  
roissans sur tous autres estre obstinez à ce des-  
sein; à sçavoir, les bigots catholiques fomentez  
des Jesuites, et les hipocrites huguenots excitez  
par quelques ministres factieux et messieurs de  
Bouillon, de la Trimouille, Desdiguières, du  
Plessis et leurs faciendaire, lesquels, sourde-  
ment contre le Roy et plus ouvertement contre  
vous, faisoient retentir leurs plaintes, et sem-  
bloient ceux mesmes de la religion estre plus  
animez contre vous que les autres, disans, en  
leur patois, que vous ne faisiez rien pour la gloire  
de Dieu ny l'avancement des eglises, quelque  
mine que vous fissiez d'estre affectionné à la re-  
ligion qu'ils professoient, et que vous possediez  
les honneurs, les faveurs, les charges et les di-  
gnitez qu'ils avoient meritez par leurs capacitez  
et services, comme il se presenta une occasion  
sur la fin de cette année, qui justifia une partie  
des choses dont le Roy ne se faisoit que douter,  
lesquelles, au lieu de vous nuire, augmentèrent  
vostre credit.

## CHAPITRE CXXVII.

*Rosny obtient le gouvernement de Poitou. Rai-  
son de Henri IV pour le lui donner.*

Pour témolgnier quelque chose de ce qui a  
esté dit au precedent chapitre, nous vous ramen-  
tevrans, comme vous en allant un jour au Lou-  
vre, pour faire voir au Roy les advis que l'on  
vous avoit donnez, des mauvaises volonte de  
ces gens là, dont il a esté parlé, eux concluant  
que vous leur nuisiez plus que les plus animez  
catholiques, vous trovastes Sa Majesté dans la  
premiere gallerie proche de sa chambre, se pro-  
menant pres le balcon d'icelle avec messieurs  
de Mont-pensier, cardinal de Joyeuse et due  
d'Espéron; de laquelle, au signe qui vous en  
fut fait, vous estant approuché, elle vous dit :  
« Or devinez sur quoy nous en estions, ces trois  
« hommes icy et moy, lors que vous estes entré.  
« — Sire, dites vous, les discours et les concep-  
« tions de trois si grands personnages, represen-  
« tez à vostre Majesté, pourroient estre tant re-  
« levez, qu'ils surpasseroient ma capacité et mon  
« imagination; et partant me seroit-il impossible  
« de les deviner.

« Or bien, dit le Roy, laissant les cajoleries  
« à part, je vous diray que nous parlions de  
« vous, et que sur l'advis qui me venoit d'estre  
« donné, des pratiques et menées de messieurs  
« de la Trimouille et du Plessis, en Anjou, Poic-  
« tou et Xaintonge, et ce que me disoit M. de  
« Mont-pensier, des mauvais propos qu'il avoit  
« ouï tenir au premier, en presence de M. Le  
« Grand et du comte du Lude (qui, à la verité,  
« faisoient les mal-contents, et ne m'espargnoient  
« pas non plus, ny vous aussi, afin de le faire  
« parler), ils me conseilloyent de vous donner le  
« gouvernement de Poictou, Chastelleraudois et  
« Loudunois. L'eussiez vous bien creu, eux es-  
« tans si bons catholiques, et vous si opiniastre  
« huguenot?

« Je croiray tousjours bien, Sire, dites vous,  
« que ces messieurs qui vous aymant grandement  
« n'auront pas manqué de vous donner ce con-  
« seil, s'ils ont estimé qu'il vous fust agreable et  
« utile à vostre service. — Or, dit le Roy, devi-  
« nez encor surquoy nous fondions cette resolu-  
« tion ainsi prise. — Je croy, Sire, dites vous,  
« que le principal sujet d'icelle a esté vostre bien-  
« veillance envers moy, ma loyauté au service de  
« vostre Majesté et de son Estat; car d'autres  
« merites en moy, il y en a bien peu. — Oüy  
« dea, ce dit le Roy, tout ce que vous dites là en  
« peut bien avoir esté en partie cause; mais la  
« principale est que vous estes huguenot, et que  
« vous, gouvernant en ces provinces, et sur tout

« avec les huguenots, avec prudence et suivant  
 « les instructions que je vous donneray, et fai-  
 « sant passer par vostre entremise toutes les gra-  
 « tifications qu'ils tireront de moy, vous prendrez  
 « toute la creance et la ferez perdre à tous les  
 « Bouillons et broüillons, sur tout leur faisant  
 « bien comprendre que mes intentions sont tres-  
 « bonnes en leur endroit, voire de tout ce qu'ils  
 « appellent leurs Eglises, et des particuliers aussi,  
 « tant qu'ils auront la prudence et la modestie  
 « requise pour se conduire et comporter, ainsi  
 « que de bons sujets et loyaux serviteurs doivent  
 « faire envers un sage Roy et un bon maistre,  
 « tel que je leur ay tousjours esté par effet, et  
 « veux aussi leur demeurer à l'advenir, si par im-  
 « prudence et mauvaises procedures, il ne con-  
 « traignoient mon naturel d'en user autrement;  
 « et partant qu'ils ne sçauroient faire une meil-  
 « leure union qu'avec moy, choisir une plus as-  
 « surée protection que la mienne, ny avoir de  
 « plus deffensables places de seureté, voire y fust  
 « la Rochelle, que mes bonnes graces, ma bien-  
 « veillance, ma foy et ma parole ausquelles je  
 « ne manqueray jamais, voulant incessamment  
 « demeurer en égalité d'affections, de faveurs  
 « et de bien-faits; gardant tousjours neantmoins  
 « les proportions deuës aux qualitez, capacitez  
 « et services d'un chacun, seul Roy, et seul pro-  
 « tecteur des catholiques et des huguenots. Car,  
 « quand bien je n'aimerois pas la religion des  
 « derniers, comme à la verité je ne l'approuve  
 « plus et desirerois qu'ils fussent tous de la  
 « mienne (ce qu'il disoit, comme je vous l'ay  
 « tousjours veu estimer ainsi, à cause de ceux qui  
 « estoient presens; car, outre les premiers, estoient  
 « là encor survenus pendant tous ces discours,  
 « messieurs de Brissac, d'Ornano et de Roque-  
 « laure), je ne laisse pas d'aimer leurs personnes,  
 « comme les services que j'en ay receus m'y obli-  
 « gent, ayans tant de fois hazardé leurs vies  
 « pour la deffence de la mienne; voire encore  
 « que la Rochelle, Bergerac et Montauban, me  
 « fassent par fois des escapades qui me desplaï-  
 « sent, neantmoins je ne me sçaurois empescher  
 « d'aimer en particulier ces trois villes là, et  
 « mesmes de leur donner tous les ans quelque  
 « peu de chose pour leurs fortifications et leurs  
 « colleges, tant pour ce que je sçay qu'en effet  
 « ils ayment ma personne et qu'ils ne se jetteront  
 « jamais aux extremitez contre moy, que pource  
 « qu'apparemment Dieu s'est servy d'icelles pour  
 « me sauver la vie et garentir d'oppression, lors-  
 « que le feu Roy, le roy d'Espagne, le Pape et  
 « toute la ligue ont essayé de me destruire,  
 « m'ayant envoyé tant de grandes armées sur  
 « les bras, contre l'effort desquelles j'ay tousjours

« trouvé l'affection et loyauté de ces peuples,  
 « tres-entieres en mon endroit, et en leurs mu-  
 « railles une si assurée retraite à ma vie et à  
 « ma personne, que l'on ne m'y a jamais osé at-  
 « taquer. Mais quand tout cela ne seroit point,  
 « je dis que la prudence acquise par une si lon-  
 « gue experience, que les cheveux me sont blan-  
 « chis en icelle, me conseille de les bien traitter,  
 « et de n'entreprendre jamais de les vouloir ruy-  
 « ner, pour ce que je n'y sçaurois parvenir, sans  
 « rejeter mon royaume et mes peuples, que  
 « j'ayme comme mes enfans, dans les desordres,  
 « confusions, et desolations par lesquelles j'ay  
 « passé, les en ayant retirez avec beaucoup de  
 « perils, de pertes, de peines et de despences, et  
 « de joindre à la destruction de ces opiniastres  
 « celle de mon Estat, ou pour le moins le voir  
 « affoiblir de telle sorte que luy et moy devien-  
 « drions la proye de nos anciens et irreconci-  
 « liables ennemis: ce propos me faisant souve-  
 « nir des belles preuves d'amitié que Taxis et  
 « Stuniga me vouloient rendre au nom de leur  
 « maistre (lors qu'ils insistoient à me faire aban-  
 « donner ses sujets heretiques et rebelles des  
 « Pays-Bas), qui estoient de m'offrir toutes ses  
 « forces et ses moyens pour m'ayder auparavant  
 « (afin que je cogneusse qu'il y procedoit since-  
 « rement) à destruire entierement tous mes sujets  
 « heretiques, entre lesquels ils sçavoient bien, di-  
 « soient-ils, y en avoir plusieurs et des plus qua-  
 « lifiez, lesquels ne m'aymoient gueres et en-  
 « vioient mes prosperitez, voire ne desiroient  
 « rien plus que de pouvoir troubler mon Estat;  
 « en quoy leur maistre ne les avoit jamais voulu  
 « assister, quelque instance qui luy en eust esté  
 « faite de leur part, tant il estimoit dangereux pour  
 « tous les Roys et potentats catholiques, l'ac-  
 « croissement de cette secte, laquelle n'affectoit  
 « rien tant que l'estat populaire et la republique;  
 « desquelles offres et discours, quoy que gran-  
 « dement specieuses et pleins d'artifices, la cap-  
 « tion et la malice ne me furent pas fort diffici-  
 « les à decouvrir, se conformans, comme il me  
 « sembla aussi-tost, à ce que j'avois ouï dire  
 « que l'empereur Charles V respondit à la Roche  
 « du Mayne, lors son prisonnier de guerre, se  
 « plaignant du mál-heur des Estats et sujets de  
 « luy et du Roy, son maistre, lequel il n'estimoit  
 « proceder que du peu d'amitié qu'il y avoit  
 « tousjours eu entre les personnes de leurs Ma-  
 « jestez, luy disant, que pour son regard il s'a-  
 « busoit bien fort, pource que tant s'en falloit  
 « qu'il hayst le roy de France, qu'il souhaitteroit  
 « qu'au lieu d'un seul il y en eut une vingtaine.  
 « Et partant par toutes ces raisons d'Estat et de  
 « prudence, dit le Roy, suis-je resolu de mainte-

« nir le dedans de mon royaume en repos et  
 « tranquillité, bien assuré que par ce moyen,  
 « par ma vigilance, la bien-veillance des gens  
 « de bien, qui excèdent en nombre infini les au-  
 « tres, mes armes et mon argent, j'empescheray  
 « que toutes ces nuées de broüilleries n'esclatent,  
 « à quoy la resolution que j'ay prise, par l'advís  
 « de ces messieurs icy, de vous bailler le gouver-  
 « nement de Poictou, me servira grandement;  
 « et partant faites parler à messieurs de Mali-  
 « corne et de Laverdin, qui en sont pourveus  
 « à survivance l'un de l'autre, car tous deux  
 « m'en ont fait parler pour s'en demettre en fa-  
 « veur de l'un de mes enfans naturels, moyen-  
 « nant quelque mediocre recompense, d'autant  
 « que Laverdin a mis son affection à celui du  
 « Mayne et du Perche, et dit ne les vouloir pas  
 « quitter (à cause que ses biens y sont situez et  
 « assis et qu'ils ne luy travaillent gueres l'esprit)  
 « pour la plus grande province de France; mais  
 « je juge plus à propos, pour le bien de mes af-  
 « faires, de vous bailler le Poictou, qu'à mes en-  
 « fans ny à aucun autre. » Et apres que chacun  
 de ceux qui estoient presens eut dit son mot, en  
 louange et approbation des discours et resolu-  
 tions du Roy, il s'en alla aux Tuilleries et vous  
 à l'Arsenac, d'où, sans perdre temps, vous fistes  
 partir le sieur de Mont-martin, pour proposer à  
 messieurs de Malicorne et de Laverdin ce qui  
 avoit esté résolu : en quoy il se comporta si  
 dextrement, se servant des raisons cy-dessus  
 envers M. de Laverdin, et de l'extrême vieillesse  
 et indisposition continuelle de M. de Malicorne,  
 qu'en peu de temps vous en fustes d'accord à la  
 somme de vingt mil escus pour eux, et deux ou  
 trois mil escus pour ceux qui les gouvernoient;  
 tellement que, sur leur demission, monsieur de  
 Fresne vous envoya les provisions de ce gouver-  
 nement, en datte du 16 decembre, lesquelles  
 nous ne transcrivons point icy, pour estre trop  
 longues et qu'elles sont enregistrées en plusieurs  
 lieux.

## CHAPITRE CXXVIII.

*Devise des jetons distribués au commencement  
 de l'année 1604.*

[1604] C'est chose tres-veritable, monseigneur,  
 ainsi que nous estimons l'avoir desja dit plusieurs  
 fois, que vos autres serviteurs, non plus que  
 nous qui avons travaillé les derniers à ces re-  
 cueils de ce que vous avez veu, sceu et cogneu  
 des faits et gestes de nostre grand Roy, ne pen-  
 sions à rien moins au commencement, qu'à nous  
 jetter dans de si amples discours, mais seule-

ment à faire quelques remarques de vos princi-  
 pales actions, dits et fortunes, afin de les laisser  
 à vos successeurs pour leur servir de modelle à  
 former leurs vies, et d'enseignemens pour les  
 guider et conduire parmy les espineuses affaires  
 de ce monde inconstant et variable, de la poin-  
 ture desquelles vous n'avez esté non plus exempt  
 que la plupart des autres grands hommes, es-  
 levez aux honneurs et dignitez par la seule vertu  
 sans s'en vouloir détraquer. Mais à mesure  
 qu'eux et nous sommes entrez en matiere, nous  
 avons trouvé vos dits, vos faits et vos fortunes  
 tellement entremeslées parmy une grande par-  
 tie des actions plus celebres de nostre grand  
 Roy, et les importantes affaires de Sa Majesté  
 et de son Estat, qu'il nous a esté du tout impos-  
 sible de les demesler ny separer; ce qui a esté  
 cause, ainsi que nous l'avons desja dit, et l'ap-  
 percevons mieux maintenant par les longues  
 suites de nos narrations de l'année 1603, d'en-  
 fler de telles sortes ces Memoires que nous crai-  
 gnons d'estre accusez d'avoir voulu contre-faire  
 les historiens, n'en ayant jamais eu l'intention  
 non plus que la capacité. Si bien que, pour évi-  
 ter ce blâme, nous nous estudierons cy-apres à  
 une plus grande briefveté, passant sous silence,  
 ou traittant fort legerement, toutes les choses  
 esquelles vous n'aurez eu nulle part ou qui ne  
 seront point de trop grande consequence ny du  
 tout necessaires pour l'esclaircissement des ma-  
 tieres dont nous parlerons.

Comménçant cette année, 1604, par le pre-  
 mier jour du mois de janvier, que vous vous en  
 allastes, dès le matin, donner le bon jour et le  
 bon an, au Roy et à la Reine, lesquels vous  
 trouvastes encor tous deux au lict, et comme  
 vous entriez dans la chambre (car à toute heure  
 que vous arriviez les portés vous estoient ou-  
 vertes), le Roy oyant faire des reverences, tira  
 le rideau, demanda qui c'estoit, et vous ayant  
 apperceu, dit à la Reine : « Ma mie, voicy Rosny,  
 « le quel, je m'assure, nous vient apporter nos  
 « estreines. — Il est vray, Sire, dites vous; mais  
 « celles-cy sont un peu plus belles que les ordi-  
 « naires du passé, car, outre les bourses de jet-  
 « tons d'argent, je vous en apporte, à chacun,  
 « deux bourses d'or. — Ces jettons devroient estre  
 « beaux, monsieur, dit la Reine au Roy. — Je le  
 « croy, ma mie, dit-il; mais, Rosny, vous serez  
 « vous souvenu d'y approprier une devise sur le  
 « sujet que je vous dis en presence de M. de  
 « Mont-pensier et du cardinal de Joyeuse, lors  
 « qu'ils me parloient des broüilleries de messieurs  
 « de Bouillon, de la Trimouille et de leur sequelle  
 « que nous cognoissons tous, dont l'on bruyoit  
 « lors et bruit-on encores à present, et que je leur

« répondis que mes sujets avoient grand tort de  
« vouloir ainsi traverser mon regne d'inquietudes,  
« veu que je n'avois nul plus grand désir que de  
« leur faire du bien à tous et d'estre aussi aimé  
« de tous, et vous ordonnay d'essayer à me faire  
« une devise qui specifiait tout cela ? car il faut  
« que je confesse que nuls de tous ceux qui se  
« meslent d'en faire ne rencontrent point si heu-  
« reusement et selon mon gré comme vous faites.

« Ouy, Sire, respondistes vous, je m'en suis  
« fort bien souvenu, encore que ce ne soit pas  
« chose facile que de bien exprimer tant de con-  
« ceptions, donner un corps agreable, qui en si-  
« gnifie une partie, soit par sa figure, sa nature  
« et ses proprieté, en reservant le surplus à de  
« belles et briefves paroles qui ayent une bonne  
« cadence, dequoy je m'estois acquitté le mieux  
« qu'il m'avoit esté possible : mais les louanges  
« que vostre Majesté me vient de donner, me  
« mettent en plus de peine et d'apprehension que  
« je n'estois auparavant, tant j'ay de peur de luy  
« faire perdre cette bonne opinion qu'elle a tes-  
« moignée d'avoir conceuë de moy. — Or bien,  
« bien, dit le Roy, cette discretion ne vous est  
« que bienseante : mais voyons un peu ce qui en  
« est, afin d'en dire nos advis. — La simple veüë  
« ne vous en sçauroit assez instruire ny suffisam-  
« ment satisfaire, Sire, luy dites vous, encor  
« qu'à mon advis, le corps n'en soit pas trop  
« laid ny les paroles mal agreables, y ayant une  
« grenade ouverte qui monstre une grande quan-  
« tité de ses grains de rubis, car je les ay fait bien  
« esmailler, et ces mots à l'entour, *Tot vota meo-  
« rum* ; mais j'estime que l'histoire vous en plaira  
« encor davantage, et que vous la trouverez ren-  
« contrer assez bien sur l'amour d'un Roy envers  
« ses sujets et d'eux envers luy. » Et lors vous  
racontastes l'histoire du monarque Darius et de  
son loyal serviteur Zopirus, laquelle pour estre  
trop longue et assez commune nous ne recite-  
rons point icy ; mais dirons seulement que de-  
puis cette prise de Babylone, comme quelques-  
uns magniflassent une si haute conquête,  
l'Empereur respondit : *J'aymerois mieux mon  
Zopire sain et entier que la possession de vingt  
Babylones.* « Et une autre fois ayant cueilly une  
« grosse grenade, dans ces magnifiques jardins  
« de Semiramis, laquelle comme celle de vostre  
« devise, Sire, dites-vous au Roy, monstroït  
« grande quantité de grains de rubis, et que ses  
« familiers luy eussent demandé de quelles choses  
« il desireroit avoir autant qu'il y avoit de grains  
« en cette grenade, il respondit : *Autant de  
« Zopires.* Mais au lieu de ce nom, j'ay mis  
« *Vota meorum*, qui signifie d'amour et de vœux  
« de vos sujets, ainsi que vostre Majesté m'avoit

« dit estre le plus grand de ses desirs. — Il est  
« vray, dit le Roy, et je trouve cette devise dau-  
« tant meilleure que l'histoire en exprime aussi  
« le cas qu'un bon maistre doit faire d'un excel-  
« lent serviteur qui s'expose à tous perils pour  
« luy, ce que peut estre n'y avez vous pas mis  
« sans penser à vous. » Il se passa en suite plu-  
sieurs autres discours sur ce sujet entre le Roy,  
la Reine, vous et messieurs de Roquelaure, Fron-  
tenac et La Varenne, qui entrerent en mesme  
temps dans la chambre, lesquels seroient trop  
longs à reciter.

Le lendemain le Roy vous envoya pour vos  
estreines une boîte de diamans, où estoit son  
portraict, la Reine une chaîne de parfum, enri-  
chie de diamants, et des bracelets fort riches à  
madame vostre femme.

#### CHAPITRE CXXIX.

*Mort de la duchesse de Bar, sœur du Roi. Dis-  
position que fait le Roi des biens de cette  
princesse : une de ses maisons donnée à la  
Reine, l'autre à la marquise de Verneuil.  
Conseil tenu sur les Jésuites. Conversation de  
Henri IV et de Rosny. Rétablissement des  
Jésuites.*

Au commencement de cette année mourut  
madame la duchesse de Bar, sœur unique du  
Roy, dequoy il receut un grand desplaisir ; au  
recit duquel nous ne nous amuserons point, non  
plus qu'à celui de plusieurs autres affaires qui  
se presenterent lors, et nous contenterons d'in-  
serer icy une lettre que le Roy vous en escrivoit  
de sa main, qui tesmoignera que vous estiez son  
mesnager à tout entreprendre et à tout faire,  
estant telle que s'ensuit.

##### *Lettre de la main du roy à M. de Rosny.*

Mon cousin, je vous prie d'achever l'affaire  
du sieur du Masses au plutost, car je desire qu'il  
s'en retourne en sa charge, où vous sçavez qu'il  
est necessaire pour mon service, c'est pourquoy  
je desire qu'il soit content, et de vous assembler  
ce jourd'huy en mon conseil, pour y traitter et  
resoudre, avec l'advis de messieurs le chance-  
lier, de Ville-roy et Sillery, les affaires tant de  
M. de Bouillon que de la Trimouille, quoy que  
je croye que jusques à ce que vous ayez des nou-  
velles de Russy la Place et de du Maurier, comme  
aussi de Parabelle et Constans, vous n'y puissiez  
prendre une bonnë resolution. Traitez avec les  
ministres de l'electeur Palatin, de luy faire payer  
sur ses debtes le plus qu'il sera possible, à la  
charge de retirer son fils de Sedan. Traitez avec

l'ambassadeur du duc de Virtemberg, et tesmoignez luy que je le desire gratifier en tout ce qui me sera possible, car je veux conserver ce grand nombre d'amis que je me suis acquis en Allemagne. Faites que Bongars soit depesché promptement, quoy qu'il faille, car son voyage importe, comme vous le sçavez. Enquerez vous où sont les bagues que feuë ma sœur la duchesse de Bar avoit envoyées engager en cette ville, pour payer ce qu'elle devoit de reste de sa maison, et qui les a, et pour combien elles sont engagées, car l'on m'a assuré qu'elles ne le sont que pour vingt mille escus; faites faire un inventaire des meubles qu'elle a laissez en sa maison, comme aussi des tableaux qui y restent, tant en la gallerie, chambre que cabinets, et verifler, sur l'inventaire qu'en a le concierge, si l'on en a osté, et qui, car ils me pourront servir pour mes galleries. Je veux que la maison soit vendue et separée en trois, tant pour achever de payer ce qui en restoit deub que pour payer ses debtes, ayant appris aujourd'huy qu'elles ne sont si grandes que l'on m'avoit assuré. De deux maisons que j'avois cy-devant données à feuë ma sœur, l'une estant à Fontaine-bleau et l'autre à Saint Germain en Laye, j'ay donné à ma femme celle de Saint Germain, et à madame de Vernueil celle de Fontaine-bleau. J'ay advisé depuis pour le dueil qu'il me faut porter, qu'il faut que le premier gentil-homme de ma chambre, maistre de ma garderobe, et ceux qui me servent ordinairement à la chambre et à la garderobe en soient vestus, comme aussi les pages de ma chambre et les lacquais estans en quartier; car il ne seroit honneste que moy vestu de dueil et mon cheval, ils courrussent devant moy vestus de livrée, et avec ma femme, ses dames d'honneur, d'atour, ses filles, femmes de chambre et lacquais estans en quartier. Je serois bien aise que dans trois jours vous me vinssiez trouver à Saint Germain, où je m'en vais, et m'apportiez la resolution que vous aurez prise sur les affaires que je vous escry, et ce que vous y aurez fait aussi; que vous veniez voir mon fils que vous n'avez veu il y a long-temps, et que vous luy fassiez apporter sa chappelle. Adieu, mon amy.

HENRY.

Ce 18 fevrier 1604.

Pour plus facile intelligence de ce qui sera cy-apres dit, qui se passa sur les propositions du restablissement des Jesuites (1), il se faut souvenir de ce que peu de gens ignorent, à sçavoir: que le Roy ayant par ses excellentes vertus, son industrie et sa catholicité, reduit tous ces de-

(1) Tout ce récit concernant les jésuites n'est pas très-exact.

bonnaires sujets catholiques à son obeysance loyale, et aussi les plus zelez catholiques espagnolisez et ligueurs passionnez; mais pour la crainte de ses armes, l'apprehension de leur ruyne, et à grande graisse d'argent, ils firent tous tant égale demonstration d'affectionner le Roy et le bien de la France, et rencontrèrent l'inclination de ce genereux prince tellement portée à l'indulgence et à une vraye et sincere reconciliation avec tous, que tous aussi furent receus et regardez de luy comme s'ils eussent eu sa mesme franchise et bonté naturelle, voire quelques-uns admis dans l'administration de ses affaires importantes et particuliere confidence; entre lesquels les sieurs de Ville-roy et Jeannin furent des plus employez. Ausquels neantmoins restant encor quelque diminutif de semence espagnolique et ligueuse dans la fantaisie, ils ne se pouvoient empescher aux occasions, lors qu'ils le pouvoient faire, sans se trop descouvrir, de favoriser ceux qui avoient de mesmes sentimens, et qui, pour acquerir credit à Rome, se monstroient avoir adversion à ceux qu'ils nommoient heretiques; adjoignant à ce dessein tous les grandement zelez et scrupuleux catholiques ou qui vouloient faire croire qu'ils estoient tels, comme le plus facile moyen pour faire avancer eux et les leurs aux grandes charges politiques et prelatures ecclesiastiques. Tellement que toutes ces diverses sortes de gens, ainsi intentionnez, sollicitoient continuellement le Roy pour le restablissement des Jesuites, la publication du concile de Trente, la rejection de ceux qu'ils nommoient heretiques des grandes charges du Roy et du royaume, sur tout des gouvernemens des fortes places et des dispositions des benefices à des confidens en leur faveur, à se départir des secours et assistances par luy données aux estrangers heretiques contre les catholiques, avec lesquels il estoit en paix; et d'autant qu'ils voyoient bien qu'envers un esprit tant genereux et judicieux que celuy du Roy, il falloit toucher cette corde bien doucement, de peur de luy donner quelque son qu'il pust trouver aigre, ils pensèrent qu'il la falloit faire manier par une main grandement harmonique. Tellement qu'ils reduisirent toutes leurs sollicitations à celle de la reconciliation du Roy avec le Pape et le Saint Siege, croyant que, par ce moyen, ils parviendroient plus facilement à ce qu'ils desireroient (comme il en arriva quelque chose), d'autant que y ayant un ecclesiastique à Rome, nommé Arnault d'Ossat, qui avoit servy aux ambassadeurs et protecteurs precedens, qui estoit creature du sieur de Ville-roy, et le faisant entre-



faire en sorte que le Pape mettroit tout ce qu'ils voudroient dans les conditions de son absolution. Et afin de faciliter tant mieux ce dessein, ils firent choisir au Roy pour envoyer demander son absolution un grand docteur en theologie, nommé le sieur du Perron, qui estoit des moins desagreables à ceux de la religion qui avoient du credit aupres du Roy, jusques là que c'estoit vous qui luy aviez procuré la nomination à l'evesché d'Evreux, et eux luy promirent que, prenant bonne intelligence avec ce M. d'Ossat, ils leur procureroient à chacun d'eux un chapeau de cardinal. Tellement que toutes les difficultez que fit le Pape de donner une absolution au Roy pure et simple, comme il n'y eut pas failly (tant les diminutions de son autorité en France, aussi bien aux choses spirituelles que temporelles, luy estoient insupportables, à cause de la grande perte de ses revenus), ne procederent que de la demonstration que firent ces deux negociateurs, de n'avoir point desagreable que le Pape apposast des conditions à icelle; entre lesquelles ils ne manquerent pas d'y faire mettre la publication du concile de Trente et le restablissement des Jesuistes. Enquoy se cognoist la malice des directeurs de ceux qui estoient employez en cette reconciliation; puis que, sur la premiere, la mesme proposition ayant esté faite à Paris au temps de l'assemblée des Estats de la ligue, où il y avoit un legat du Pape et toutes les catholiques zelées, elle y fut rejetée comme prejudiciable au Roy et royaume en vingt cinq ou trente articles. Et quant aux Jesuistes, il est certain que si le Roy de sa propre autorité n'en eust entrepris le restablissement, que jamais ils ne l'eussent obtenu, tant le Parlement, la Sorbonne, l'Université, plusieurs evesques et villes de France y avoient une grande aversion.

Suivant ce que dessus, voulant faire le discours de ce qui se passa sur la proposition du restablissement des Jesuistes, nous dirons, comme environ ce temps, ils eurent si bien dressé leurs batteries pour estre restablis (par le moyen des poursuites et sollicitations de plusieurs confidens serviteurs du Roy, et notamment du sieur de La Varenne, qui esperoit, par ce moyen, d'avancer ses enfans aux plus hautes dignitez de l'Eglise, jusques à parvenir au cardinalat), qu'ils commencerent de se couler et glisser dans la Cour, voire de s'approcher familièrement de la personne du Roy, dont les plus souples, complaisans et mieux s'accommodans aux esprits et affaires du temps present, estoient, ce nous semble, les peres Ignace, Majus, Cotton, Armand et Alexandre (car Gontery impetueux et bruyant comme un tonnerre ne parut pas si tost); tant qu'en fin

Sa Majesté s'estant laissée gagner en quelque façon à plusieurs raisons dont on luy rebattoit journellement les oreilles avec de merveilleux artifices, il commanda un jour à monsieur le connestable d'assembler chez luy messieurs de Bellievre, chancelier, vous, Chasteau-neuf, de Pont-caré, de Ville-roy, de Messes, presidens de Thou, Calignon et Jeannin, de Sillery, de Vic et de Comartin, pour entendre par la bouche de La Varenne les requestes, offres et propositions qui luy avoient esté faites au nom de toute la société des Jesuistes touchant leur restablissement en France, afin de les examiner, deliberer sur le tout, et luy r'apporter vos advis.

Sur lesquelles ouvertures, quand il fut question d'opiner, messieurs de Bellievre, de Ville-roy et de Sillery jetterent les yeux sur vous, et le dernier prenant enfin la parole dit, en se tournant tout à fait vers vous : « Si M. le marquis de Rosny vouloit opiner le premier, il obli-  
« geroit grandement la compagnie, car estant  
« des plus intelligens aux affaires politiques et  
« d'Etat, et des mieux informez des intentions  
« et volontez du Roy, son opinion donneroit de  
« fort utiles esclairemens aux autres. » Surquoy, vous desja demy en colere de ce que le Roy (comme vous en aviez esté adverty par l'Oseray, premier valet de chambre) ne vous ayant pas voulu nommer au commencement pour estre de ce conseil, croyant bien que vous seriez fort aise de vous en exempter, ce fin et cauteleux esprit avoit dit et représenté tant de choses à Sa Majesté (y entremeslant de telle sorte vos loüanges, qu'il sembloit n'estre incité à cela que pour tant plus vous honorer) qu'enfin elle vous avoit nommé avec les autres, et cognoissant bien que ce qu'il disoit lors n'estoit que pour vous faire porter toute la haine ou toute l'envie de l'approbation ou refus qui se feroit en l'affaire qui se demenoit.

Ainsi donc, un peu esmeu de tels artifices de M. de Sillery, vous luy respondistes : « Monsieur,  
« je ne desire en aucune façon interrompre ny  
« changer l'ordre accoustumé du conseil; et par  
« tant suis-je d'advise que vous opiniez en vostre  
« rang et moy au mien; car aussi bien quand  
« j'aurois parlé le premier, si n'en auriez vous  
« pas tiré les avantages que vous vous estes  
« peut-estre imaginé, tant à cause des charitez  
« que je sçay bien que l'on m'a prestée sur ce  
« sujet, que de la religion que je professe, la-  
« quelle feroit interpreter aux esprits malicieux  
« tout ce que j'en pourrois dire, ou à malveillance,  
« ou à cautelle et artifice, que je laisse pour ceux  
« qui s'y delectent, me gardant bien de rien de-  
« terminer en mon opinion sans avoir aupara-  
« vant consulté mon oracle. »

« A ce que je voy , monseur , repliqua M. de Sillery avec son ris jaune, il nous faudra donc attendre à sçavoir vostre advis que vous ayez fait un voyage sur les rivages de Seine à quatre lieux d'icy ; » voulant designer Ablon (1), ce que vous cogneustes aussi-tost, car vous luy respondites : « Monsieur, vostre enigme est fort facile à deviner, et, pour y satisfaire, je vous diray qu'en matiere de religion nuls hommes ne sont mes oracles, mais la seule parole de Dieu, non plus qu'en affaires politiques et d'Estat je n'en ay point d'autres que la voix et la volonté du Roy; de laquelle je veux estre particulièrement informé avant que de rien conclurre sur une affaire de telle importance et sujette à variété d'accidens, voire qui peut estre suivie de grands inconveniens sans apparence de beaucoup d'avantages en la precipitation d'icelle. — J'estime, repartit soudain M. le connestable (lequel, depuis que vous eustes esté le moyennneur de sa reconciliation avec le Roy, à cause qu'il s'estoit embarrassé, par les oreilles, dans les desseins de messieurs les comte d'Auvergne et mareschaux de Biron et Bouillon, vous avoit pris en merveilleuse affection), que l'advis de M. de Rosny sera le plus seur de tous et que nous ne sçaurions mieux faire que de sçavoir precisement les intentions du Roy avant que de rien conclurre, voire mesme que nous devons prier Sa Majesté d'estre presente à nos deliberations, quand ce ne seroit que pour moderer la chaleur des contestations qui s'y pourroient rencontrer, comme nous en venons de voir une espece d'eschantillon, et entendre les raisons d'un chacun pour les poiser (2) avec sa prudence, et en tirer telles conclusions qu'il jugera les plus utiles pour le bien de son service et de son Estat. »

« Monsieur, dit lors M. de Ville-roy à monseur le connestable, si nous suivons cét avis, je crains que nous ne rencontrions pas avec celui du Roy, lequel ayant (au moins si le retablissement des Jesuistes se conclud, comme il semble que les choses s'y disposent, veu l'intervention du Pape, les sermens qu'ils font d'estre bons François et de n'avoir jamais de provincial qui ne soit de mesme nation) à faire revoquer un arrest du parlement donné avec tant d'esclat et de solennité, seroit, à mon avis, bien aise que cela ne fust pas estimé provenir de son seul mouvement sans precedente maturité de conseil, et avoir pris l'advis des plus sages. » Surquoy M. de Thou, en branlant la teste, repartit à M. de Ville-roy : « Monsieur,

« si telle estoit la volonté du Roy et qu'il desirast s'exempter de tout blasme en cette action, voire de repentance, et peut-estre sa personne et son Estat de dommage et de dangers, qu'il renvoye toutes les requestes, offres et propositions de cette société au parlement et qu'il l'en laisse faire. » Il se passa encore plusieurs autres discours là dessus, car chacun en voulut dire son mot, lesquels se terminerent en une resolution d'en parler au Roy, avant que d'opiner davantage; tellement que ne s'estant rien fait ce matin, vous allastes à l'Arsenac.

Le matin du lendemain que ce conseil, dont il a esté parlé, touchant le retablissement des Jesuistes, eut esté tenu, vous fustes trouver le Roy et luy racontastes tout ce qui s'estoit dit et fait là dessus, et le fistes ressouvenir de ce que le roy d'Angleterre luy avoit mandé par vous, comme prophetie dont vous voyez l'accomplissement prochain; le priastes de vous dispenser d'estre du nombre de ceux qui devoient former un advis absolu sur une affaire tant scabreuse, ou bien de vous commander ce que vous aviez à faire. Enquoy vous procederiez apres à la jesuitique par une obeyssance aveugle, ne voyant nulles raisons assez puissantes hors celle-là qui vous pussent faire conclurre à casser un arrest du parlement, tesmoignant l'amour de ses sujets envers luy, qui tournoit entierement à sa gloire, à la honte de ceux qui avoient attenté à sa vie, et donnoit une terreur de semblables desseins à tous autres, ny au retablissement de cette secte, auquel il y avoit beaucoup de maux et de dangers à craindre, et peu de biens ny d'utilitez à en esperer.

« O bien, ô bien ! dit le Roy, puis que nous avons le loisir d'en discourir et que vous estes icy tout seul, dites moy librement tout ce que vous en apprehendez, et puis je vous diray aussi ce que j'en espere, afin de voir de quel côté penchera la balance. — Sire, dites-vous, si vous entreprenez la deffence de leur cause, elle sera bien mauvaise si je ne la trouve bonne, car aussi bien ayant desja conclud en vostre esprit ce que vous desirez qui en soit fait, ce seroit impertinence à moy de contester au contraire, ny d'alleguer des raisons qui ne sçaroient estre de mise, n'estant pas de vous admises. — Non, non, dit le Roy, je ne me laisse jamais tant preoccuper de mauvaises fantaisies, ne remplir l'esprit d'opinions, que de meilleures n'y trouvent place quand on me les propose; partant ne laissez pas de dire tout ce que vous pensez, car j'y auray tel esgard que de raison.

« Sire, dites-vous, puis que vostre Majesté

(1) Lieu de réunion pour les protestants.

(2) Peser.

« veut entreprendre de représenter les biens et  
 « avantages que l'on peut esperer de cette so-  
 « cieté par son restablissement en France, je m'en  
 « dispenseray du tout ; car aussi bien faut-il que  
 « je confesse que je m'y trouverois fort empesché,  
 « et me contenteray de remarquer, entre plusieurs  
 « inconveniens, sept des principaux ; me semblant  
 « bien difficile, pour le premier, que des esprits  
 « accoustumés ( par une si longue habitude qu'elle  
 « s'est changée en nature engendrée en eux par  
 « les cas de conscience et raisons de police et  
 « d'Estat tout ensemble ) à desirer et procurer,  
 « en toutes manieres et par toutes voyes, la gran-  
 « deur et prosperité de la faction d'Espagne et  
 « maison d'Austriche, et de voir leur domination  
 « s'estendre sur tous les autres potentats de la  
 « chrestienté, se puissent départir bien tost ny  
 « entierement et absolument d'un dessein qui  
 « semble ne pouvoir subsister que par la perte de  
 « votre personne et la destruction de la monar-  
 « chie françoise, comme estans les seuls puissans  
 « obstacles qu'il peut rencontrer. Pour la seconde  
 « de mes apprehensions, Sire, c'est que ces gens,  
 « lesquels j'advoué estre non seulement habiles,  
 « mais pleins de ruses et merveilleux artifices,  
 « estant une fois remis en pleine liberté sans  
 « aucunes limites ny restriction, comme je voy  
 « beaucoup d'apparence qu'ils gagneront cepoint  
 « là, n'excitent des algreurs, haines et animosi-  
 « tez entre vos sujets et serviteurs de differente  
 « religion, par le moyen de leurs familières con-  
 « versations, propos deceptifs, predications, con-  
 « fessions et penitences. Pour la troisieme,  
 « qu'ils ne gagnent tellement enfin votre oreille,  
 « voire peut-estre mesme votre cœur, qu'ils  
 « n'empietent une puissance d'esloigner ou d'ap-  
 « procher de votre personne et de l'administra-  
 « tion de vos affaires tous ceux que bon leur  
 « semblera ; auquel cas je me doute bien que je  
 « deviendray la butte de leurs plus grands ef-  
 « forts. La quatrieme, que cette obeyssance  
 « aveugle qu'ils ont voué de rendre au Pape et  
 « à leur general, leur ostant la disposition d'eux  
 « mesmes et l'execution de leurs propres volon-  
 « tez, voire de leurs inclinations naturelles, l'on  
 « puisse pretendre, avec raison, aucune asseu-  
 « rance ny seureté en tous leurs sermens, pro-  
 « testations et promesses, puisqu'ils ont premie-  
 « rement juré de changer d'affection et de  
 « volonté au moindre mandat de leur general qui  
 « est ordinairement Espagnol, mais tousjours de  
 « faction espagnole ou bien du Pape, lequel n'o-  
 « seroit desplaire au roy d'Espagne tant qu'il  
 « aura les ceps aux pieds et les manottes aux  
 « mains, estant circuy et environné des entraves  
 « de Sicile, Naples, Milan, Florence (le duc de la-

« quelle tremble tousjours si tost qu'Espagne  
 « parle), de l'Estat de Genes et des forteresses  
 « de Port-Hercule, Orbetello, Talamone, Piom-  
 « bino, Final et Monaco ( comme vostre Majesté  
 « me commanda de représenter tout cela au roy  
 « d'Angleterre ), desquels liens le Pape, avec  
 « toute sa sainteté, ne se scauroit depestrer,  
 « que vous ne fassiez esclater votre voix, bruire  
 « vos armes et tonner vos canons dans Milan et  
 « dans Naples, ce que je tiens fort facile si vous  
 « faites ce que vous devez et pouvez suivant ma  
 « proposition faite au roy d'Angleterre par vostre  
 « commandement. Auquel dessein je n'estime  
 « pas que celuy des Jesuites se puisse jamais  
 « conformer, puis que vous ne le scauriez execu-  
 « ter qu'avec l'assistance de tous ceux des pro-  
 « fessions protestante et reformée. Ma cinquieme  
 « apprehension est qu'ils ne vous jettent en fin  
 « dans une guerre civile en vostre royaume con-  
 « tre ceux de la religion, comme le plus excel-  
 « lent moyen, voire quasi l'unique et l'infailible,  
 « pour affoiblir de sorte vous et vostre Estat, en  
 « vous dénuant des bons et valeureux capitaines  
 « et soldats d'iceux que vous avez formez et es-  
 « quels vous abondez, consumer vos armes et  
 « thresors, et mettre vostre peuple à destruction,  
 « que vous n'osiez ny puissiez jamais rien entre-  
 « prendre contre l'Espagne ny à recouvrer ce que  
 « les Espagnols vous usurpent. Et la sixiesme,  
 « comme la plus importante, qui me touche da-  
 « vantage le cœur et l'esprit, voire me le transit  
 « du tout, lors seulement que j'y pense, est qu'au  
 « moyen de cette grande familiarité, en laquelle,  
 « par leurs astuces et blandices, ils parviendront  
 « infailiblement pres de votre personne et celle  
 « de vos principaux ministres, officiers et servi-  
 « teurs, la facilité ne leur soit donnée d'approcher  
 « de votre Majesté des esprits disposez à donner  
 « un boucon ou quelque malheureux coup. Et la  
 « septiesme de certains memoires qui m'ont esté  
 « envoyez comme venant d'Italie, par lesquels  
 « on essaye de me persuader que je dois advertir  
 « vostre Majesté qu'il s'y est fait, de longue  
 « main, une pratique et menée fomentée par de  
 « vos principaux serviteurs, lesquels ont autres-  
 « fois esté de la faction de la ligue espagnole en  
 « France, pour vous la faire embrasser et quitter  
 « l'association de vos anciens et bien asseurez  
 « allies et confederez qui sont ennemis de la re-  
 « ligion catholique et du siege de Rome. Mais  
 « qu'eux ne vous l'osant proposer, ils ont fait dis-  
 « poser le Pape, par une personne qui est du tout  
 « leur creature, de vous en escrire ou faire escrire  
 « en son nom ; estant ces memoires si bien cir-  
 « constantiez que s'ils sont jamais representez à  
 « vostre Majesté, elle a trop de prudence et de

« jugement pour n'en croire pas quelque chose.  
 « Mais le discours en estant trop long pour le  
 « rendre bien intelligible de bouche, je la supplie  
 « de trouver bon que je luy en baille un par es-  
 « crit. »

A quoy elle respondit que pour le regard de ce discours par escrit, dont vous parliez, non seulement elle trouvoit bon que vous luy fisses voir, mais encore vous l'ordonnoit ainsi. Mais que pour le regard des autres six poincts, il estoit facile à cognoistre que vous vous estiez un peu mieux préparé que luy sur cette matiere, dautant qu'apparemment vos raisons estoient sans replique; mais que sans tant de curieuses recherches que les vostres, il croyoit en avoir deux en l'esprit, lesquelles, à son advis, vous feroient à vous mesme changer d'opinion. La première, qu'ayant entretenu le Pere Majus, il luy avoit ingenuement reconnu que la plupart de ceux de leur société avoient voirement toujours favorisé la grandeur des Estats et prosperité des affaires d'Espagne, au prejudice de tous autres potentats, quels qu'ils pussent estre, dautant que dans tous les Estats, royaumes, pays, terres et seigneuries de sa domination, ils estoient non seulement admis et bien receus, mais incessamment cheries, gratifiez et reverez, au lieu qu'ailleurs, comme en France, et sur tout depuis vingt ans, ils y avoient esté mal traittez, voire mis à opprobre; mais que s'il luy plaisoit par actions contraires de leur tesmoigner de l'affection et de la bien-veillance, qu'en peu d'années il auroit tellement acquis la plupart de leur société, qu'elle rendroit des preuves indubitables d'estre tous à luy et à la couronne de France; voire mesme au prejudice de celle d'Espagne, leur inclination y estant toute portée: dequoy, en bonne conscience, il luy pouvoit donner la foy et la parole de tous ceux avec lesquels il en avoit conféré, qui estoient en grand nombre, lesquels se submettroient que, au cas de manquement à leurs protestations, ils fussent ignominieusement chassés et privez de ses bonnes graces, voire punis comme criminels et scelerats: « Or, ne douté-je point, vous adjousta le Roy, « que vous ne puissiez faire diverses repliques à « cette premiere raison; mais je n'estime pas que « vous en voulussiez seulement chercher à cette « seconde, qui est que, par nécessité, il me faut à « present faire de deux choses l'une: à sçavoir, « de les admettre purement et simplement, les « descharger des difames et opprobres desquels « ils ont esté flestris, et les mettre à l'espreuve de « leurs tant beaux sermens et promesses excel- « lentes, ou bien de les rejeter plus absolument « que jamais, et leur user de toutes les rigueurs

« et duretez dont l'on se pourra adviser, afin  
 « qu'ils n'approchent jamais ny de moy ny de  
 « mes Estats; auquel cas il n'y a point de doute  
 « que ce ne soit les jeter au dernier desespoir et  
 « par iceluy dans des desseins d'attenter à ma  
 « vie, ce qui me la rendroit si miserable et lan-  
 « goureuse, demeurant tousjours ainsi dans les  
 « défiances d'estre empoisonné ou bien assassiné  
 « (car ces gens ont des intelligences et corres-  
 « pondances par tout, et grande dextérité à  
 « disposer les esprits selon qu'il leur plaist),  
 « qu'il me vaudrait mieux estre desja mort,  
 « estant en cela de l'opinion de Cesar, que la  
 « plus douce est la moins preveuë et attenduë.

« Vous avez tres-bien conjecturé, Sire, dites-  
 « vous, en croyant qu'à cette derniere raison ou  
 « plutost inconvenient, je n'aurois rien à repli-  
 « quer; car plutost que de vous laisser vivre dans  
 « les tourmens de telles apprehensions et inque-  
 « tudes, je consentirois non seulement le resta-  
 « blissement des Jesuistes, mais aussi celuy de  
 « quelque autre secte que ce pust estre; parquoy  
 « sans en discourir davantage, puis que je voy  
 « de telles opinions rouler dans l'esprit de vostre  
 « Majesté, je me resous de devenir mesme le so-  
 « liciteur du reestablissement des Jesuistes, autant  
 « ou plus que le scauroit estre La Varenne, comme  
 « jespere que, dès le premier conseil qui se tien-  
 « dra sur ce sujet, vostre Majesté en aura des  
 « preuves. — Je ne vous nieray point, dit lors  
 « le Roy, que ce ne me soit un plaisir fort singu-  
 « lier de vous voir en cette disposition; et afin de  
 « vous y confirmer et fortifier, je vous veux dès  
 « maintenant asseurer contre deux de vos appre-  
 « hensions où vous avez interest, en vous don-  
 « nant ma foy et ma parole (lesquelles vous sça-  
 « vez bien que j'aymerois mieux mourir que de  
 « les violer, les estimant parties essentielles de  
 « la royauté, et sans lesquelles, par consequent,  
 « tout Roy est indigne d'estre roy) que jamais  
 « Jesuiste ny autre, non pas mesme le Pape,  
 « n'aurent le pouvoir de me jeter à la guerre  
 « contre ceux de la religion, si vous mesmes n'en  
 « estiez le solliciteur, ny d'esloigner ou défavori-  
 « ser aucuns de ceux de cette profession, à cause  
 « d'icelle; desquels je me trouve utilement et loya-  
 « lement servy, et sur tout de vous, de qui je di-  
 « rois volontiers ce que vous me disiez l'autre  
 « jour, que disoit Darius de son Zopire, et veux  
 « mesmes obliger tous ceux de cette société à  
 « vous aymer et reverer, comme vous le cognois-  
 « trez avant peu de jours. » Et sur cela, vous vous separastes.

Dés le lendemain matin, le sieur de La Varenne vous vint visiter et demander si vous auriez agreable qu'un bon père jesuiste, nommé Cotton, vous

vint baiser les mains chez vous, étant françois de nom et d'affection. A quoy vous luy respondites que ceux qui estoient constituez és charges publiques, demeuroident obligez de se rendre de facile accez à l'endroit d'un chacun, sans acception ny distinction de personnes, ainsi qu'il sçavoit bien que vous aviez accoustumé d'en user, et sur tout envers les ecclesiastiques, à l'endroit desquels, à cause de vostre profession en la religion reformée, vous vous rendiez plus respectueux et circonspect, de crainte de la calomnie; et partant ne devoit-il douter que celui qu'il vous avoit nommé ne vous fust agreable, sur tout vous l'ayant si bien qualifié, voire ne fust chery et favorisé en tout ce que le service du Roy et le bien de l'Estat le pourroient permettre. Dequoy il vous remercia, et dès le jour suivant, au sortir de vostre disner, qui estoit l'heure certaine tous les jours de vos audiences publiques, il vous presenta ledit jesuiste Cotton; lequel, apres plusieurs inclinations et humilitez surpassans toute mesure, vous dit qu'il vous estoit venu rendre les submissions et protestations des obeysances desquelles tout bon François vous estoit redevable, en general, à cause de vos excellentes vertus et des utiles et signalez services que vous rendiez journellement au Roy, et à la France, et luy encore en particulier, pour les faveurs qu'il avoit sceu de bon lieu que vous estiez disposez de rendre à ceux de leur société, laquelle vous la rendroit à jamais tres-devotieuse: sur lesquelles paroles tant courtoises, vous usastes des compliments et civilitez convenables aux qualitez des personnes et du sujet dont il s'agissoit.

Et le lendemain le conseil s'estant assemblé sur iceluy, composé des personnes cy-devant nommées, vous fustes d'adviz (sans user de grands discours ny alleguer autres raisons, sinon que les temps et la disposition presente des affaires et des esprits le requeroit ainsi) du restablissement des Jesuistes. Les particularitez duquel aussi bien que les formalitez qui s'étoient observées en la construction de la pyramide, et celles qui s'observerent en la demolition d'icelle estant fort longues et ne vous en estant nullement meslé, nous les laisserons aux historiens.

#### CHAPITRE CXXX.

*Voyage du Roi à Chantilly. Diatribe contre le cardinal d'Ossat. Grande conversation entre le Roi et Rosny sur les intrigues du comte d'Auvergne, de la marquise de Verneuil, et sur les affaires de l'Europe.*

Nous commencerons ce chapitre par des pa-

roles d'allegresse, en vous ramentevant comme le Roy reprenant de jour à autre une plus vigoureuse santé que jamais, il s'en alla prendre son plaisir de la chasse à Chantilly, sans rien obmettre neantmoins du soin requis en un sage prince, pour le bien de son Estat. Surquoy nous avons estimé à propos d'insérer icy une lettre qu'il vous escrivoit de sa main sur l'un et l'autre sujet, de laquelle la teneur ensuit.

#### *Lettre du roi à M. de Rosny.*

Mon cousin, mandez-moy en quel estat sont mes affaires et sur tout quel advancement vous donnez à ces trois dont nous parlâmes principalement dans la gallerie des armes, et si pour celles-là ou autres d'importance il est necessaire d'y faire intervenir mon autorité, ou si mesmes elles auroient besoin de ma presence; car, encores que je me donne du bon temps en ce lieu, que je ne trouvay jamais si beau, et que j'y prenne un grand plaisir à la chasse, et que mes medecins me conseillent, pour la confirmation de ma santé toute entiere, de demeurer encor quelques jours en ce bel et bon air et y continuer mes exercices avant les chaleurs, neantmoins, sçachant bien mettre difference, comme c'est chose que je dois, entre les choses qui regardent le bien de mes affaires, ma gloire, mon honneur et le soulagement de mes peuples, que vous sçavez que j'ayme comme mes chers enfans, et celles qui ne concernent que mes aises, plaisirs et passe-temps, et tousjours preferer les premieres aux autres, je ne manqueray de m'en retourner à Paris, si tost que vous jugerez à propos que je le dois faire pour un si bon sujet; mais aussi vous priez-je de ne me mander pas sans besoin et d'esbaucher si bien toutes choses, que je ne sois pas longuement retenu à Paris; car vous devez autant aymer ma santé que mes affaires, puis que vous dites si souvent que de ma vie dépend le salut de mon Estat. Adieu, mon cousin.

De Chantilly, ce 10 avril. HENRY.

Peu apres, le Roy estant revenu à Paris, suivant vostre responce à la susdite lettre, par laquelle vous luy mandiez qu'il estoit necessaire qu'il s'en revinst pour terminer et conclure une infinité d'affaires qui demeuroident indecises par son absence, et sur tout l'estat general de ses finances qu'il n'avoit veu qu'en projet, dès le soir de son arrivée, apres quelque propos sur les affaires plus communes, il vous demanda si vous vous estiez souvenu du discours que vous luy aviez promis de faire, touchant les sollicitations dont l'on usoit en son endroit, pour le faire adjoindre à la faction espagnole, et, en ce faisant, luy faire abandonner ses bien assurez amis, aliez et con-

federez anciens. A quoy luy ayant dit que vous n'aviez eu garde de manquer à l'obeyssance de ses commandemens sur un sujet de telle nature, et lors ayant tiré un papier d'entre vostre pourpoint et vostre camisole, vous le luy baillastes, qu'il prist, vous disant qu'il le vouloit lire à loisir et considerer, le discours en estant tel que s'ensuit.

« SIRE,

« Desirant d'obeyr aux commandemens que  
« je receus de vostre Majesté, ces jours passez,  
« lors qu'une seule raison de vous prevalut plu-  
« sieurs des miennes, je voulus essayer de faire  
« un extraict abrégé d'une lettre qui m'avoit esté  
« envoyée de Lyon, comme venant d'Italie, la-  
« quelle estoit sans autre signe que trois fermes-  
« ses, ny souscription que sur l'enveloppe du pa-  
« quet. Mais apres l'avoir leuë trois fois, afin de  
« m'en mieux acquitter, je recogneus que ce  
« n'estoit qu'un tissu continuel de malices et  
« faussetez de certaines gens, lesquels, sous om-  
« bre de devotion, de zele à vostre service et de  
« bons conseils pour vostre gloire, soulager vos  
« peuples et bonifier vostre royaume, vous blas-  
« moient et diffamoient; tout cela suivy de preu-  
« ves de telles faussetez et defences contre telles  
« calomnies. Tellement que ne me semblant pas  
« à propos d'y rien retrancher ny adjouster du  
« mien, j'ay estimé ne pouvoir rien mieux faire  
« que de bien transcrire ladite lettre et vous l'a-  
« dresser, comme je fais presentement, estant  
« telle que s'ensuit. »

*Copie d'une lettre anonyme adressée à M. de Rosny.*

Monsieur, desirant de vous advertir de ce qui s'est passé et passe tous les jours, au prejudice du Roy en cette ville de Rome, afin de rendre les choses plus intelligibles, nous les reprendrons dès leur principe, et vous dirons comme il y a eu de long-temps en icelle un certain Arnault d'Ossat, lequel n'ayant point eu de plus relevée condition que de valet et de pedant, durant plus de la moitié du cours de sa vie, estoit enfin parvenu à estre prier, abbé, évesque et finalement cardinal : la plupart de ces avan-  
cemens provenus des submissions et servitudes par luy rendues à M. de Ville-roy, de ses grands tesmoignages de hayne contre les religions contraires à la catholique et affection à la faction d'Espagne; tellement que ceux qui avoient senti-  
mens pareils, le jugeans instrument propre à procurer toutes ces choses et à suivre toutes leurs volontez particulieres, il n'a pas manqué de le  
faire aux occasions, comme cela se jugera par

une merveilleuse quantité de lettres que ce prelat a escrites au Roy et à M. de Ville-roy, et entre les autres, par huit lettres escrites au Roy, des 19 fevrier, 25 avril, 22 may, 17 et 30 juin 1600, et 26 novembre et 22 decembre 1601; et par six lettres à M. de Ville-roy, du 28 juillet et 23 de septembre 1601, 16 et 30 decembre 1602, mais sur tout, du 7 janvier et 10 fevrier 1603, qui sont des plus noires en malices, toutes tesmoignant, par tout, à vouloir eslever la faction espagnole et destruire la françoise, en rendant le Roy de France valet de celuy d'Espagne, dont une des principales remarques parut lors qu'il fut question de reconcilier le Roy avec le Pape et le Saint Siege, durant que cet entremetteur de telles faciendes, avant qu'il fust cardinal, supposa d'avoir rencontré de si grandes difficultez à obtenir son absolution, que pour les surmonter (quoy qu'en effet ce fust chose que le Pape et le Saint Siege desirassent si ardemment que le moindre retardement à envoyer la demander les mettoit en de merveilleuses peines et allarmes, comme leurs lettres mesmes le disent) ils firent semblant d'avoir esté contraincts d'accorder plusieurs choses agreables aux factionnaires d'Espagne, et prejudiciables au Roy, aux libertez de l'Eglise gallicane, et au repos de la France, comme; entre autres, la publication du concile de Trente; le restablissement des Jesuites et la rejection de ceux de la religion, des honneurs, charges, offices et dignitez du royaume; et, continuans tels artifices, ils supposerent d'avoir aussi rencontré tant de difficultez à obtenir la dispence du mariage fait de Madame, sœur du Roy, et de M. de Bar, qu'eux mesmes avoient suscitées et sollicitées, conseillant au Pape de s'affermir sur icelle, d'autant qu'il en adviendrait deux grands avantages à l'Eglise : l'une, que Madame quitteroit son heresie et se rendroit catholique, et l'autre, que le Roy l'ayant violentée en cela, il feroit croire à tous les huguenots qu'il leur deviendrait persecuteur, et qu'eux, chercheurs des expediens et assistances pour s'en garantir, ils ne les scauroient excogiter, tels qu'ils n'attirassent la hayne du Roy sur eux; qui les jetteroit finalement en une guerre civile qui ne seroit point qu'à l'avantage du Saint Siege, des zeles catholiques et des factionnaires d'Espagne; et pour monstrier que ce n'estoit qu'artifice que toutes ces difficultez sur telles dispences, un exemple de chose semblable qui survint au temps que ces memoires furent mis au net, le tesmoigne manifestement. Ils ont encor persuadé au Pape, ou pour le moins en font le semblant par leurs lettres, de faire de conti-

nuelles instances au Roy, de non seulement entretenir exactement la paix avec le roy d'Espagne, les archiducs et le duc de Savoye, mais aussi faire une association et confederation avec eux, telle qu'il abandonne tous ses anciens alliez et sur tout les Estats des Pays-Bas, qu'il ayde non seulement à les remettre en obeissance, mais que se joignans tous avec le Pape, ils entreprennent, avec puissance et armes communes, à changer la religion en Escosse et en Angleterre, et y establir des roys catholiques, agreables aux trois couronnes. Toutes lesquelles choses se justifient par les lettres cy-devant spécifiées, et une infinité d'autres par lesquelles il se voit que ce pedant cardinalisé se veut mesler de faire l'excellent capitaine, et le grand homme d'Estat, donnant des conseils sur le desmeslement des guerres et sur les formes de bon gouvernement des Empires et royaumes; mais principalement se met-il à discourir de celles du royaume de France et de la personne du Roy, en particulier, usant de ces propres termes es susdites lettres mentionnées, à sçavoir :

Que quand Sa Sainteté entendoit que le Roy avoit fait ou vouloit faire quelque chose en faveur des huguenots, il ne pouvoit qu'il ne s'en esmeut grandement et ne donnast à soupçonner et occasion de parler sinistrement de luy, et me demanda s'il ne m'avoit point escrit de la publication du concile de Trente et du reestablishement des Jesuistes, pour avancer le service de Dieu, l'edification de l'Eglise et le bien du Roy et de la France, non seulement au spirituel, mais aussi au temporel, et particulièrement pour l'honneur du Roy, qui l'avoit ainsi promis et juré, et qu'en ce faisant, il mettroit sur sa teste une couronne de plus grande gloire que n'estoient celles de ces deux royaumes, et que par ce moyen le Roy fermeroit la bouche, à jamais, à tous ceux qui voudroient detracter de luy. Et en deux autres lettres à M. de Villeroy, il y a aussi ces mots : « Vous priant de prendre en « bonne part que j'employe en ma lettre ces mots « dont je suis gros long-temps y a, et que je « vous ay cy-devant aucunement signifiez, mais « non appertement declarez, c'est que quelque « legereté et inquietude naturelle que une grande « partie des François aye, et quelque ambition « et avarice qui regne aujourd'huy parmy eux, « les conspirateurs n'eussent jamais eu l'audace « de faire leurs conspirations, et mesmement « sous le regne d'un si valeureux Roy, s'ils n'eussent veu la noblesse mal contente, l'Eglise mal « menée et desconfortée, et le pauvre peuple et « quasi tout le tiers Estat trop foulé. Et ne puis « m'exempter de la crainte de semblables reci-

« dives, ny esperer un entier et asseuré repos, « jusques à ce que le Roy aye reformé l'Estat; « commençant par soy-mesme, et entre autres « choses à moins prendre sur ses sujets, et con- « tenter les meilleures parties de l'Estat qui pre- « valent en nombre. Je sçay bien que ce propos « est hardy et que peu l'oseroient tenir; mais je « l'estime encor plus vray et necessaire, et si je « pensois qu'il deust profiter, je le voudrois desja « avoir escrit au Roy, au peril d'un million de « vies, et si autre chose ne vous retient, je desire « que vous lisiez cecy au Roy. » Et en l'autre aussi ces propres termes : « M. de Bethune m'a « communiqué la coppie de la lettre que le Pape « escrivit de sa main au Roy, le 2 decembre, par « laquelle il dit que le Roy se plaint des Espa- « gnols, et que les Espagnols et l'Archiduc se « plaignent que luy a de continuelles intelligen- « ces avec leurs rebelles des Pays-Bas, et que « ce luy est une grande affliction de voir que les « perfides ennemis de Dieu et si animez contre « le Sainct Siege soient favorisez par luy, qu'il « a receu tant amiablement et luy a procuré « une paix generale dans son royaume; et que « l'unique remede aux maux dont le Roy se « plaint des Espagnols et les Espagnols de luy, « est qu'il laisse de favoriser leurs rebelles des « Pays-Bas. Surquoy il me semble que s'il ne « tient qu'à cela que les Espagnols ne nous fas- « sent point de mal, que nous estans en paix « avec eux nous ne leur en devons point faire « aussi, et que le Pape a grande raison de nous « proposer ce remede. » Et plus bas, ledit sieur d'Ossat dit encore : « Je dis davantage, que, « outre l'observation de la paix generale, il se « devoit faire entr'eux une telle amitié, que « qui toucheroit l'un touchast l'autre, afin de « soulager leurs sujets qu'ils rongent jusques « aux os. Je serois encore d'advis que l'on pas- « sât contract du mariage de monsieur le Dau- « phin avec l'infante d'Espagne, duquel M. de « Bethune m'a parlé, afin de servir de pretexte « pour retirer le Roy de l'alliance des Hollan- « dois. » Et, apres plusieurs impertinens propos sur ce sujet, vers la fin de sa longue lettre il ad- « joute ceux-cy, à sçavoir : « Que le vray moyen « de rendre le Roy l'arbitre de la chrestienté, « c'est de garder la paix et ne faire tort à nul « de ses voisins, reformer, amender et ameliorer « son royaume, qui en a grand besoin, soula- « geant et rendant meilleure et plus heureuse la « condition de ses sujets, les remettant par ce « moyen en l'ancienne obeysance et bien-veil- « lance. Les grands princes recherchent son « amitié; hé! que seroit-ce si Sa Majesté avoit « fait ce que j'ay dit? Et, à la verité, monsieur,

« c'est cette gloire de repurger et restaurer le royaume qui reste au Roy à acquerir; et au moyen de ladite paix et bonne intelligence ou pourroit adviser et accorder d'un commun accord de mettre un roy catholique en Angleterre qui ne fust suspect à l'une ny à l'autre couronne. »

Page 740, il dit : « Toutes lesdites considérations que le Pape fait représenter au Roy sont bonnes et saintes, et, comme je croy, dictées à Sa Sainteté par le Saint Esprit, et seroit à propos que Sa Majesté se les representast une fois chacun jour, non seulement pour garder et asseurer la paix avec le roy d'Espagne et les archiducs, mais aussi pour en mieux regner, et apporter à l'Estat l'ameliorement et satisfaction que j'ay touché cy-dessus, ostant les abus et la corruption dont sont infectées toutes les parties du royaume, faisant refflorir la religion catholique et l'ordre ecclesiastique, la pieté et devotion, la justice, l'observation des loix et ordonnances, la concorde qui mette fin à toutes partialitez, la moderation des gouverneurs, l'integrité et doctrine des magistrats et officiers, la bonne foy, preud'hommie et probité des particuliers, l'ordre, la police, la discipline militaire, les bonnes lettres et sciences, les academies pour l'adresse et exercice de jeunes gentils-hommes, le labour et industrie des arts et mestiers, le trafic et commerce, le labourage des champs et l'abondance, et toutes telles autres choses bonnes et louables et dignes de la pourvoyance et sollicitude d'un grand Roy, et par ce moyen affermir de plus en plus les volontez des bons sujets, regagner celles des mauvais, oster toute esperance aux mauvais voisins de les suborner, et asseurer encore mieux son autorité, sa succession, et la tranquillité, repos et bonheur de la France, ce que je redis si souvent, et peut-estre trop, pour ce qu'il me semble possible et cela si necessaire qu'il ne pourroit jamais estre dit assez, et que tout ce que le Roy et son conseil pourroient faire, dire et penser de bon et de solide et perdurable consiste en cela, et que tout le reste que vous faictes et ferez cy apres, ne sont et ne seront que de petits remedes de peu d'efficace et de peu de durée, comme aposèmes et gargarismes pour refrigerer et entretenir la France malade, mais non pour la guerir et moins pour l'asseurer longuement, le mal pressant et requerant des remedes prompts et presens; et destrompant Sa Sainteté de ce qu'il croit à tort de nous, de ce que nous ne voulons pas garder de nostre part sincerement la paix jurée avec le roy d'Espagne et les archiducs, comme ils

« s'offrent de le faire par la bouche et la main de Sa Sainteté, et estraindre encore cette paix par toutes sortes de liens honorables et profitables. » Nous ayant semblé que ce peu que nous avons représenté des impertinens langages de ce venerable prelat en ses lettres, merite bien de vous estre adressé et par vous monstré au Roy, pour luy faire juger les malins artifices de ces ingrats, ausquels il a fait tant de biens et d'honneurs, lesquels sous ombre de devotion et de zele envers le Roy et son Estat, parlent de l'un et de l'autre avec plus de blâme et de diffame que ne firent jamais leurs plus grands ennemis.

Auquel discours, par nous trouvé entre vos papiers et memoires, nous adjousterons du nostre, que si M. d'Ossat, ses admirateurs ou ceux qu'il admire, trouvent qu'il ait esté malfait de donner à un cardinal le tiltre de valet et de pedant, nous les priions de considerer qu'il est aussi loisible à qui que ce soit de luy ramenter les deux plus honorables tiltres qu'il ait point eus durant plus de la moitié de sa vie, qu'il luy a esté bien seant de publier en Italie, sa tant longue grossesse et finalement son accouchement, sans avoir produit pour enfant, que le plus horrible et detestable de tout les monstres, qui est l'ingratitude pleine d'impudence qu'il a tesmoignée envers son Roy, son maistre et son bien-faicteur; lequel l'ayant tiré de la bouë et d'entre la valletaille et fait revestir de pourpre et de fin lin, pour recompense de tant d'honneurs et de biens faits il essaye de le diffamer autant qu'il luy est possible, tâchant par ses lettres trois cens vingt-cinq et trois cens vingt-sept, escrites à son protecteur, pleines de malicieuses, impertinentes et fausses accusations, de le rendre execrable à la posterité, publiant qu'il rongeoit son peuple jusqu'aux os, qu'il mal-contentoit sa noblesse, mal-menoit et desconfortoit l'Eglise, qu'il fouloit et oppressoit le tiers Estat, qu'il devoit reformer, amander et ameliorer son Estat qui en avoit tant de besoin, en commençant par sa propre personne, et entre autres choses en prenant moins sur ses sujets, ostant les abus de la corruption dont estoient infectées toutes les parties de son Estat.

Et ne s'est pas contenté ce venerable prelat d'en avoir escrit en ces propres termes, à un secretaire d'Estat, son confident, mais semble qu'il ait eu dessein de flestrir la memoire du plus sage, doux et amiable roy des François, en laissant à la posterité ses lettres imprimées, laquelle se persuadera que ce grand Roy devoit avoir esté un execrable tiran, puis qu'un venerable cardinal du Saint Siege, que ceux qui l'ont obligé et qu'il a obligé publient pour un



des plus sçavans, grands et habiles hommes de nostre temps, luy en impute toutes les marques. Et nous semble encor que nul non plus ne nous peut justement blâmer, si, outre le tiltre de valet et de pedant nous y adjoustons encor celui de médisant et d'imposteur, puisqu'il a bien eu la plume et la langue si malicieuse que, sans l'avoir offensé en rien, il a voulu diffamer, en general, tous ceux de nostre profession, les publiant, soit par malice ou par ignorance, pour impies, horribles, execrables et sacrilèges, nous qui ne faisons jamais de prières qui ne soient réglées sur l'oraison dominicale, ne croyons rien qui ne soit conforme au symbole des apostres, et tenons le decalogue de necessaire observation, comme estant la regle de toute justice; de sorte que ce prelat, par ces puantes calomnies contre l'exquise prudence, clemence et debonnaireté de nostre auguste monarque, par ses invectives contre nostre innocence, et par deux impudens, impertinens et ridicules conseils, desquels il tourmente le Roy, par toutes ses lettres à son confidant, l'un de quitter tous ses bien certains et inalterables amis, aliez, confederes et serviteurs et de se joindre à ses anciens et inveteres ennemis, voire qui ne luy sçauroient jamais estre autre. Et le second, de se joindre à eux et au Pape pour entreprendre, à communes armes, à destruire la religion d'Escosse et d'Angleterre, et d'y mettre un roy catholique agreable aux deux couronnes: toutes lesquelles quatre remarques sont de telles inepties et de chimeres, que comme toutes scandaleuses, et sur tout celles qui sont contumelieuses contre nostre Roy, qu'elles devoient n'avoir jamais esté imprimées, à cause de leur consequence envers la posterité, que nous voulons essayer de destromper par ce discours.

Or, reprenans le discours ordinaire de nos rivaux, que nous avons discontinué pour faire voir au Roy les lettres qui nous avoient esté écrites par des gens qui, ne se nommans point, disoient vous escrire de Rome, nous vous dirons que, dès le soir de l'arrivée du Roy à Paris, il vous envoya le jeune Lomenie, lequel vous dit de sa part que vous ne le vinssiez point voir au Louvre, à cause de plusieurs importuns qui ne faisoient que guetter l'occasion de vous pouvoir trouver ensemble, et que luy mesme vous viendrait voir à l'Arsenac, dès le fin matin, afin qu'il y eust peu de gens, pour discourir avec vous de plusieurs grandes affaires qui eussent esté trop longues par lettres, et aussi pour faire et arrester les estats de ses bastimens, de sa venerie, de ses menus plaisirs, des fortifications, de l'artillerie et de la grand voyerie; et partant que vous ne

faillissiez pas d'avertir les gouverneurs et ingenieurs des places, les intendans et controlleurs des bastimens, et ceux des officiers de l'artillerie et des ponts et chaussées que vous adviseriez bon estre, de s'y trouver de bonne heure.

A quoy ayant esté par vous satisfait, et Sa Majesté estant neantmoins arrivée devant aucuns d'iceux, elle vous mena promener dans la grande galerie d'armes, où elle vous parla de l'imposition de trente pour cent mise par le roy d'Espagne sur les marchandises entrantes et sortantes d'Espagne pour France; des broüilleries excitées par le comte d'Auvergne, due de la Trimoüille et mareschal de Bouillon, avec l'intelligence des sieurs Desdiguieres, du Plessis et autres, entre lesquels M. d'Antragues et madame de Verneuil mesme n'estoient, pas vous dit-il, des moins soupçonnez; de la surprise de plusieurs siens paquets, et les avis qui estoient donnez aux Espagnols et Flamants de ses plus secrettes resolutions és affaires qui le concernoient; tesmoignant que tout cela luy desplaisoit grandement, et qu'il eust bien désiré que vous luy eussiez ouvert quelques bons expedients pour descouvrir le fonds de ces menées et manigances, en chastier les uns et se venger des autres, qui par telles voyes contrevenoient directement à la paix qu'il avoit avec eux. Et, voyant que vous luy aviez demandé un jour de terme pour examiner des affaires de telle importance, afin de luy donner un avis plus solidement fondé, en vous l'accordant, il se mist à vous parler de la chasse, du plaisir qu'il avoit eu à Chantilly, des pertes qu'il avoit faites au jeu, des belles manufactures qu'il establissoit, de ses maistresses et de ses bastimens, vous priant de vouloir augmenter sur l'estat des finances de cette presente année, le fond de toutes ces despences, entre lesquelles il vouloit que vous missiez six mil escus à part qu'il vous donnoit pour travailler à vos maisons.

Surquoy, voyant que vous haussiez les espauls et vous grattiez la teste, sans rien repliquer; il vous dit: « Je voy bien que vos fantaisies et les miennes ne se rencontrent pas trop bien sur cette augmentation de despence, enquoy vous avez tort de ne vous accommoder pas volontairement à ce que je desire; car quand vous viendriez à considerer par quels perils et travaux de corps et d'esprit il m'a fallu passer depuis mon enfance jusques à present, il me semble que vous ne me devriez point plaindre ce qui est de mes petits passe-temps.

« Sire, luy respondites vous, si vostre Majesté n'a plus pour but que d'achever le cours de ses ans doucement et en repos, laissant les inquiettes

« tudes des genereux desseins et hautes entre-  
 « prises à ceux qui n'ont pas tant acquis de  
 « gloire et d'honneur par icelles, je confesse  
 « que j'ay eu tort, et qu'au lieu de contester  
 « sur ce qui est de la despence de vos plaisirs,  
 « je la dois faciliter de tout mon pouvoir, vos  
 « affaires estans, graces à Dieu et le bon ordre  
 « estably en icelles par vostre singuliere pru-  
 « dence, en estat d'y satisfaire; mais si vous de-  
 « sirez ameliorer ou chastier exemplairement le  
 « reste des meschans et pernicious brouillons  
 « qui se descouvriront dans vostre royaume,  
 « vous ressentir, avec les effets dignes de vostre  
 « generosité, des malices noires que vous font  
 « journellement les Espagnols, et secourir puis-  
 « samment vos allies dans une tant opportune  
 « conjuncture d'affaires de deux si grands et  
 « importants desseins, que ceux qui paroissent  
 « sur Ostande et l'Ecluse, et vous preparer,  
 « comme il appartient à l'illustre vertu et haute  
 « renommée d'un Roy tant exalté et magnifié  
 « parmy toutes nations, pour l'execution de ce  
 « que vous me commandastes de proposer au  
 « roy d'Angleterre comme de moy mesme, je  
 « vous diray franchement que ces deux fantai-  
 « sies, puis qu'il plaist à vostre Majesté de les  
 « nommer ainsi, se contrarient de telle sorte  
 « qu'ils ne peuvent compatir ensemble en éga-  
 « lité d'affections, et qu'il faut de nécessité que  
 « l'un de ces deux projets cede absolument à  
 « l'autre : mais de decider lequel, je confesse  
 « que je n'en ay ny la hardiesse, ny la capacité,  
 « cela ne pouvant despendre que de vous seul,  
 « de la cognoissance que vous avez de vous  
 « mesmes et de vos propres inclinations presentes;  
 « n'y ayant point de doute que d'icelles ne des-  
 « pendent les choses qu'il nous faut courageuse-  
 « ment embrasser et soigneusement poursuivre,  
 « ou celles dont il nous faut despartir en nous  
 « jettant dans la negligence et nonchalance,  
 « comme desnuez de tout autre soin que de vi-  
 « vre dans la douceur des plaisirs, rousler et pous-  
 « ser le temps à l'espaule, dautant que, pour  
 « maxime infaillible, rien ne scauroit bien reüs-  
 « sir de tout ce qui s'entreprendroit non seule-  
 « ment contre vostre gré, mais sans estre assisté  
 « de vostre affection, soin, vertu, vigueur, vail-  
 « lance et diligence accoustumée, voire si vous  
 « ne constituez vos principaux plaisirs en la  
 « poursuite et obtention des choses magnifiques  
 « et glorieuses. »

Sur lesquels discours Sa Majesté vous regarda  
 « long-temps depuis que vous vous fustes teu,  
 sans replicer aucune chose, diverses passions  
 faisant un conflict de juridiction dans son es-  
 prit, lequel aucunement moderé, il vous dit,

« comme tout en colere : « C'est une chose es-  
 « trange que, dautant plus que je vous ayme  
 « et prends bonne opinion de vostre esprit et  
 « capacité, il semble que vous la preniez mau-  
 « maise de moy depuis quelque temps, comme  
 « si j'estois si peu judicieux que de vouloir pre-  
 « férer mes passe-temps à ce qui est de ma gloire  
 « et de l'accroissement et prosperité de mon  
 « royaume, pour lesquels j'ay tant travaillé et  
 « hasardé tant de fois ma vie, chose qui ne m'en-  
 « tra jamais en l'esprit, comme je le vous feray  
 « bien paroistre, m'assurant mesme que vous  
 « en pensez tout autrement, et n'avez dit tout  
 « cela que pour m'embarrasser et me faire tom-  
 « ber à vostre point; et neantmoins, afin que  
 « le tort ny les defauts ne me soient pas impu-  
 « tez, je vous remets en vostre disposition d'en  
 « user comme bon vous semblera sur toutes ces  
 « despences que je vous ay commandées, et je  
 « cognoistray par l'effet quel soin vous aurez  
 « apporté à ce qui est de mon contentement. »  
 A quoy vous luy respondistes : « Sire, ce m'est  
 « un mal-heur tres-grand, un desplaisir fort sen-  
 « sible, voire un ennuy extrême de vous avoir  
 « rencontré ce matin de si mauvasse humeur,  
 « que ( ne vous souvenant plus de la resolution  
 « laquelle vous me dites avoir absolument prise;  
 « la derniere fois qu'il vous pleust me parler des  
 « mauvaises pratiques du roy d'Espagne, de  
 « vouloir d'oresnavant constituer vos princi-  
 « paux plaisirs et toutes vos delices en l'exalta-  
 « tion de vostre nom glorieux, et ravalement de  
 « la flerté des Espagnols) vous vous soyez mainte-  
 « nant mis en colere contre moy ( car je vois  
 « bien à vostre visage que vous estes fasché )  
 « pour vous avoir dit la verité, donné des  
 « conseils utiles et honorables, et tesmoigné mon  
 « entiere loyauté à vostre service; et faut par  
 « nécessité qu'il soit survenu quelque chose  
 « d'ailleurs qui vous ayt irrité, et traversé une  
 « tant genereuse resolution, laquelle estant chan-  
 « gée, il faut aussi changer de desseins et de  
 « procedures. Car n'ayant le cerveau creux ny  
 « vague, ny l'esprit remply de chimeres, de ca-  
 « prices, ny de vertigots, je me garderay fort  
 « bien de vous embarquer en une guerre ou-  
 « verte contre un si grand monarque et puis-  
 « sant potentat que le roy d'Espagne, lequel  
 « possede plus de regions et d'estenduë de pays  
 « que ne firent jamais les Romains, sans voir  
 « auparavant de mes yeux, et scavoir de mon  
 « esprit toutes les dispositions de ceux de vos  
 « confederez, et tous les preparatifs en vous mes-  
 « mes qui sont absolument necessaires, pour  
 « non seulement vous garantir de tous mauvais  
 « evenemens, mais aussi vous en faire avoir dû

« contentement parmy ces heureux succez, les-  
 « quels vray semblablement ne vous peuvent  
 « manquer si vous y voulez proceder, comme il  
 « appartient et selon vostre ancienne vertu :  
 « d'autant qu'en premier lieu le roy d'Angle-  
 « terre et les princes protestants d'Allemagne  
 « vous ont donné toutes les assurances que  
 « vous scauriez desirer de joindre leurs armes  
 « aux vostres, toutes les fois que vous voudrez  
 « entreprendre de restablir l'Empire en ses an-  
 « ciens droits de libre élection de l'Empereur,  
 « et qu'à cela seront concurrens en desseins tous  
 « les ecclesiastiques et villes imperiales des trois  
 « religions, voire encor eux tous à delivrer les  
 « dix-sept provinces des Pays-Bas de la subjec-  
 « tion d'Espagne, pour les mettre en liberté,  
 « pourveu que ce soit sans vous en approprier  
 « aucune partie. Je ne parle point des Hollan-  
 « dois, car ces peuples là sont tant ardens en ce  
 « dessein et sont tellement interessez au suc-  
 « cez d'iceluy, qu'ils ne manqueront jamais de  
 « fermeté ny à contribuer par dessus leurs pro-  
 « pres puissances, ne voulans pas neantmoins  
 « asseurer que le prince Maurice eust ce dessein  
 « bien fort agreable. Vous ne doutez non plus  
 « de ceux de Boheme et Hongrie et provincès  
 « en dependantes, et qu'ils ne secouënt le joug  
 « de servitude de la maison d'Austriche si tost  
 « qu'ils verront la moindre apparence de le pou-  
 « voir faire seurement, tant ils aspirent à une  
 « liberté pleniere d'election et de religion.

« Quant aux Suisses, c'est aussi sans doute que  
 « s'ils voyent la proposition que l'on leur fait,  
 « de vouloir agrandir leur Estat, estre de facile  
 « execution, qu'ils ne fassent, pour y parvenir,  
 « tout ce que vous desirez.

« Quant aux Venitiens, leurs interests à l'af-  
 « foiblissement de la faction espagnole sont tels  
 « et si palpables, qu'ils ne vous abondonneront  
 « jamais en l'entreprise d'iceluy. Pour le duc de  
 « Savoye, vous le cognoissez; il a tant d'ambi-  
 « tion et de vanité, qu'il ne scauroit voir pre-  
 « parer une couronne royale à son cerveau in-  
 « quiété et volage, qu'il ne se jette à corps perdu  
 « dans tous les projets qui auront apparence de  
 « la luy pouvoir faire obtenir; voire mesme ne  
 « desesperé-je pas que le Pape ne s'en mesle s'il  
 « voit les affaires bien acheminées, et apperçoive  
 « seureté contre l'oppression, et toutes autres  
 « sortes de mauvais succez : et trouverez peut-  
 « estre, Sire, que je ne dis pas cecy à vostre  
 « Majesté sans quelque apparence de raison,  
 « pour ce qu'estant allé voir par vostre comman-  
 « dement, il y a environ trois sepmaines, M. le  
 « cardinal Buffalo, pour luy parler du placart  
 « des trente pour cent, luy faire sentir que cela

« nous jetteroit dans une interruption de com-  
 « merce avec Espagne, Flandres et Milan, et  
 « d'icelle dans une guerre certaine; apres quel-  
 « ques discours que nous eumes là dessus, qui  
 « se terminerent par une resolution d'en adver-  
 « tir le Pape, afin qu'il y remediast par sa pru-  
 « dence et piété, il me vint à parler de cet ar-  
 « ticle du synode tenu à Gap, auquel ceux de  
 « ma profession ne s'estoient pas contentez de  
 « demeurer dans les theses generales, comme  
 « avoient fait les autres, mais avoient nommé  
 « la personne particuliere de Clement VIII;  
 « enquoy ils avoient eu grand tort, tant pour sa  
 « propre bonté que pour avoir usé de telle pru-  
 « dence et circonspection, qu'il avoit tousjours  
 « desconseillé d'user des armes ny de persecu-  
 « tion pour les amener à la foy. Surquoy pre-  
 « nant cette occasion pour cognoistre ses sen-  
 « timens en choses plus grandes, je luy dis que  
 « vostre Majesté avoit pourveu, par mon en-  
 « tremise, de telle sorte à cette petite chaleur  
 « de foye de quelques bigots huguenots, comme  
 « il s'en trouvoit aussi de trop aspres parmy les  
 « catholiques, qu'il ne seroit jamais plus parlé  
 « en public de la personne particuliere du Pape  
 « qui siege à present, que le general prisoit et  
 « affectionnoit pour ses vertus et son doux na-  
 « turel, pour le pouvoir asseurer qu'estant, il  
 « n'y avoit pas dix jours, en grande compagnie  
 « des plus qualifiez et mieux sensez de cette  
 « profession, l'on avoit dit beaucoup de choses  
 « en sa louange, et parlé de vouloir contribuer  
 « leurs armes et leurs moyens pour le rendre un  
 « des plus grands et puissants princes de la chres-  
 « tienté, en le delivrant des oppressions espa-  
 « gnoles, et adjoignant à ses Estats le Royaume  
 « de Naples et autres pieces de la domination  
 « d'Espagne qui luy seroient commodés, puis  
 « que desja la feodalité luy en estoit devoluë.  
 « Nos discours sur cela furent assez longs, les-  
 « quels j'abrege de crainte d'ennuyer vostre Ma-  
 « jesté; mais la substance et conclusion fut que  
 « le morceau si bien préparé, que l'on ne peust  
 « douter de l'obtention et possession asseurée,  
 « vaudroit bien de la peine de rompre son jeusne  
 « et sa trop grande circonspection envers les  
 « Espagnols; que si je disois cela en verité et  
 « non par forme de parler, et que je ne le trou-  
 « vasse point mauvais de faire sçavoir que je  
 « luy eusse tenu ce langage, il le feroit secrette-  
 « ment entendre à Sa Sainteté par gens qui  
 « avoient ces mesmes désirs, et essayeroit de  
 « tirer les sentimens et d'eux et de luy sur telles  
 « propositions, si jamais elles se mettoient en  
 « avant par vostre Majesté, et ne manqueroit de  
 « me dire tout ce qu'il en auroit appris.

« Mais quand tous ces gens là, Sire, vous seroient sincerement confederez et absolument resolus de se joindre à vostre Majesté par leurs armes en ce magnifique dessein, si ne l'estimerois-je pas suffisamment precautionné ny entierement exempt de tous mauvais succez, si les preparatifs necessaires de vostre part, tant en vostre personne qu'en vos affaires, ne correspondoient à la magnitude d'iceluy pour lesquels il faut faire estat, premierement, de constituer tous vos delices et plaisirs en sa diligente execution, trouver encor vingt-millions de livres tout contant, outre les vingt-cinq que j'ay desja assemblez, et preparer des moyens infailibles pour faire encor un fonds semblable pour les suites des années; ce dont je ne suis nullement en doute, si l'on me laisse mesnager ce que j'ay en l'esprit, afin de pouvoir entretenir trois ans durant (sans toucher à vos revenus ordinaires, ne surcharger vos peuples de la campagne ny les marchands, la protection desquels j'ay sur tout en recommandation) cinquante mille hommes de pied, desquels la despence reviendrait par mois à neuf cens mille livres; six mille chevaux souldoyez, pour lesquels aussi il faudroit trois cens quarante mille livres; pour quarante canons, cent cinquante mille livres; pour le déchet des vivres, pour les ouvrages et parties inopinées, cent cinquante mille livres; tout cela revenant par mois à quatorze cens quarante mille livres, et pour dix mois, à quatorze millions quatre cens mille livres; outre laquelle somme il faut encore adjouster, pour la premiere année, quinze cens mille livres pour les frais des levées et achapts de ce qui pourroit manquer en vos provisions faites de longue main; pour l'assemblage de toutes lesquelles choses et le mesnagement des personnes dont l'on auroit besoin, il me faut encor un loisir de deux années, et un relasche de toutes despences non absolument necessaires. »

« Je me doutois tousjours bien, vous dit le Roy, que toutes ces grandes entreprises par vous imaginées seroient des ouvrages de longues années, lesquelles pourront estre interrompues durant le cours d'icelles par une millie d'accidens, comme desja moy-mesme recognois tant de difficultez en l'execution finale d'icelles, que j'apprehende bien que nous laissons les choses presentes et assurees pour nous jetter à l'essor (comme fit l'autre jour un de mes oiseaux que je n'ay jamais pu recouvrer depuis) apres celles de l'advenir et bien fort incertaines; et neantmoins je ne laisseray pas de les avoir tousjours en l'esprit, et de favoriser

« tous vos mesnages, practiques et facillendes que vous jugerez à propos pour les avancer; et ne vous nieray point que je ne sois voirement (comme vous l'avez bien recogneu) en fort mauvaise humeur ce matin, à cause de divers advis à moy donnez que les broüilleries de tous ceux que nous avons tantost nommez se multiplient jusques à essayer d'y attirer mon neveu le prince de Condé, et y faire prester les oreilles à madame de Verneuil et à sa sequelle, comme l'on s'est fait fort de le justifier par leurs propres lettres ou tesmoins irreprochables, qui est ce qui m'embarresse le plus l'esprit, à cause de ma femme qui me picotte tousjours sur ce sujet, et me presse de la mal traiter pour en retirer cette promesse dont vous déchirastes le premier original à Fontaine-bleau (vous en souvient-il bien? et qu'à cette occasion je me mis tant en colere contre vous, encor que j'en refisse peu apres un autre que je luy portay, qui est celuy mesme que je la presse maintenant de me rendre, afin d'avoir repos avec ma femme, s'il y a moyen; bien qu'en effet cette promesse ne soit qu'une niaserie, estant conditionnée comme elle est, ainsi que m'en ont assuré les ecclesiastiques ausquels j'en ay parlé, et qu'elle mesme, lorsqu'elle me la monstra, pour la signifier, me dit ne me pouvoir nuire ny prejudicier, ny elle s'en servir ny s'en prevaloir, comme il me semble que je vous dis tout cela dans ma petite galerie proche de ma chambre. »

#### CHAPITRE CXXXI.

*Chagrins domestiques de Henri IV. Ses plaintes contre sa femme et sa maîtresse. Etablissement d'un seul receveur des rentes de la ville de Paris. Diverses lettres de Henri IV.*

Nous avons séparé les discours que le Roy vous tint lors en deux chapitres, afin d'ennuyer moins ceux qui liront ces Memoires; et pour en reprendre la suite, vous vous souviendrez, aussi bien que nous sçaurions faire, que le Roy, en suite d'iceux, vous tint un tel propos : « Mon amy, je vous confesseray qu'outre ce que je vous ay dit des causes de la mauvaise humeur où vous aviez jugé que j'estois, que je vis hier au soir madame de Verneuil, de laquelle je me separay fort mal et en grande colere, pour trois causes principalement : la premiere, pource qu'elle veut maintenant faire la fine, la rusée et la rencherie avec moy, comme si c'estoit par devotion et scrupule de conscience, ce que je croy proceder plutost de quelques nouvelles

« amourettes avec de certaines gens dont j'ay  
 « entendu parler, et dont la condition me des-  
 « plaist; la seconde, pour ce que luy ayant parlé  
 « des advis que j'ay eus de ses intelligences avec  
 « son frere et les autres faiseurs de menées con-  
 « tre ma personne et mon Estat, elle m'a respondu  
 « avec une fierté merveilleuse et mine desdai-  
 « gneuse, voire soustenu que tout cela estoit faux  
 « absolument; mais qu'à mesure que je vieillis-  
 « sois, je devenois si déflant et soupçonneux,  
 « qu'il n'y avoit plus moyen de vivre avec moy,  
 « et que le plus grand bien et faveur que je luy  
 « pourrois faire, seroit de ne la voir plus en par-  
 « ticulier, pour ce que de cela n'en tiroit-elle  
 « nul avantage, et ne laissoit pas de l'accabler  
 « de haines et d'envies, et sur tout de celles de  
 « ma femme, qu'elle m'a nommée d'un tel nom,  
 « que je me suis pensé échapper à luy don-  
 « ner sur la joue; la troisieme, touchant la  
 « priere que je luy ay faite de me rendre cete  
 « promesse de mariage, surquoy elle m'a inso-  
 « lamment respondu que je la pouvois bien cher-  
 « cher ailleurs, pour ce que d'elle ne l'aurois-je  
 « jamais; à cause duquel refus et de toutes ses  
 « autres procedures, nous avons eu plusieurs  
 « contestations pleines d'aigreur, et finalement  
 « me suis séparé d'elle en jurant que je luy ferois  
 « bien trouver cete promesse. Et neantmoins il  
 « me fasche d'user de violence contre elle, pour  
 « ce qu'elle est d'agreable compagnie quand elle  
 « veut, a de plaisantes rencontres, et tousjours  
 « quelque bon mot pour me faire rire, ce que je  
 « ne trouve pas chez moy, ne recevant de ma  
 « femme ny compagnie, ny resjouyssance, ny  
 « consolation, ne pouvant ou ne voulant se ren-  
 « dre complaisante et de douce conversation, ny  
 « s'accomoder en aucune façon à mes humeurs  
 « et complexions, faisant une mine si froide et si  
 « dédaigneuse lors que, arrivant de dehors, je  
 « viens pour la baiser, carresser et rire avec elle,  
 « que je suis contraint de la quitter là de despit,  
 « et de m'en aller chercher quelque recreation  
 « ailleurs : ma pauvre cousine de Guyse estant  
 « tout mon refuge lors qu'elle est au Louvre,  
 « encore qu'elle me die bien quelques fois mes  
 « veritez, mais c'est de si bonne grace, que je  
 « ne m'en offence nullement, et ne laisse pas de  
 « rire avec elle; et partant desirerois-je bien lors  
 « que vous venez parler à ma femme d'autres  
 « affaires, que vous prissiez l'occasion à propos  
 « pour luy parler de tout cela, sans qu'elle cog-  
 « neust que ce fust tout expres ny que cela vint  
 « de moy, et luy remontrassiez le tort qu'elle se  
 « fait de vivre avec moy de la façon que je vous  
 « ay dit, en l'assurant que si elle vouloit croire  
 « vostre conseil, qu'elle me divertiroit facilement

« de beaucoup de visites que vous sçaviez bien  
 « qui la faschoient. »

Comme Sa Majesté achevoit ce propos, et avant que vous eussiez eu loisir d'y faire aucune replique, messieurs de Vic, de Trigny et de Pilles Fortia entrerent dans la gallerie, luy dirent qu'il y avoit plus d'une heure que tous ceux qu'il avoit mandez pour ses fortifications, bastimens et autres affaires estoient arrivez, et s'en alloit si tard qu'il ne pourroit pas achever ce matin : tellement qu'il changea de discours, vous imposa silence sur ce qu'il vous avoit dit, jusques à ce qu'il vous en parlast derechef, et s'en alla trouver ceux qui l'attendoient en la salle, où une partie des Estats cy-devant dits, furent arrestez, et les deux jours suivans tout le reste.

Vous mesnageastes, en cete année 1604, grande quantité d'affaires, desquelles nous ferons mention selon leur ordre et les dattes d'icelles, et commencerons par l'establissement que vous fistes d'un seul receveur et payeur des rentes de la ville de Paris, en ostant les anciens qui estoient plusieurs, lesquels tous exerçoient ces charges avec grands abus et confusion, et cachoit tout ce que l'on y pouvoit descouvrir pour le soulagement des finances du Roy, qui montoit à grandes sommes. Enquoy le Roy, ayant esté auparavant informé de leurs malversations et du profit, que vous y esperiez faire pour luy et pour les legitimes rentiers, vous assista de tout son pouvoir, comme plusieurs lettres qu'il vous escrivit sur ce sujet le pûrent verifier, desquelles, pour éviter la longueur, nous nous contenterons d'en inserer icy une seulement sur ce sujet, et plusieurs autres pour monstrier son stile et son affection à ses affaires, desquelles lettres la teneur ensuit.

*Dix-sept lettres de la main du Roy à M. de Rosny.*

Mon cousin, ayant cy-devant contracté avec Montauban des six offices de receveurs des rentes de ma ville de Paris, un nommé Droüart se seroit présenté qui auroit fait party des aydes dépendans de ces charges, à condition de le rembourser et indamniser des deux offices desdites aydes, dont je l'ay pourveu. Depuis ledit Montauban en ayant esté adverty auroit jugé que cela luy estoit fort prejudiciable, en ce que la somme, à luy ordonnée pour son remboursement, n'estoit à beaucoup pres suffisante pour le desdommager, qui est cause qu'il me supplie d'avoir agreable de le faire jouyr de son contract et le mettre au lieu et place dudit Droüart, afin qu'il soit entierement jouyssant de ce que je luy

ay accordé, se submettant aux mesmes clauses, charges et conditions portées par le contract dudit Droüart. C'est pourquoy voulant gratifier ledit Montauban qui est mon domestique plutost qu'un autre, en consideration de ses services et de ce qu'il m'a donné l'advis de la suppression desdits six offices de receveurs, chose tres-utile à mon peuple, et fait tous les frais pour parvenir au fait d'un si bon dessein, je vous ay bien voulu faire ce mot pour vous dire que je veux que vous rompiez le contract dudit Droüart, comme ayant esté fait depuis celuy de Montauban, si vous jugez qu'ainsi se doive faire pour le bien de mon service, lequel vous est assez recommandé; et à cette fin que vous le mettiez en son lieu et place. Mes sujets en seront, par ce moyen, beaucoup plus soulagez, n'ayant à faire, pour le payement de leurs rentes, qu'à une seule personne; aussi qu'il me semble bien raisonnable que puis que son contract est fait le premier qu'il y soit maintenu, mesmement s'il fait ma condition aussi avantageuse que ledit Droüart ou autre; ce que vous ferez entendre à ceux de mon conseil et que telle est ma volonté. Sur ce Dieu vous ayt, mon cousin, en sa sainte et digne garde.

Ce 15 avril à Fontaine-bleau. HENRY.

Mon amy, en suite de ce que je vous ordonnay ces jours passez, je vous prie de regarder les moyens qu'il y a d'acquitter ce qui est deu à mon cousin le duc de Nemours, car mon intention est qu'il soit payé; et pour cet effet, si vous jugez justes et raisonnables les advis qu'il a, par mon commandement, mis es mains du sieur president Jeannin pour les rapporter en mon conseil, tenez la main à les y faire resoudre dès demain, faisant entendre à ceux de mondit conseil que c'est ma volonté, à l'effet de laquelle je desire que vous apportiez tout ce que vous pourrez, et s'il est besoin leur communiquer cette-cy. Adieu, mon amy.

Ce 2 avril, à Fontaine-bleau. HENRY.

Mon amy, je vous dépesche ce courrier expres pour vous dire que l'homme auquel Lomenie escrivit, par mon commandement, il y a quelques jours, et dont il vous bailla sa lettre pour luy faire tenir par celui que vous envoyez à vostre sœur madame de Badefou, est arrivé d'hier au soir en ce lieu, qui nous a bien fait voir des menées des gens de consistoire. C'est pourquoy je vous prie de vous rendre icy lundy au soir et M. de Ville-roy, afin de prendre quelque resolution sur ce qu'il m'a rapporté, comme chose qui importe à mon service. Je ne vous retiendray icy qu'un jour ou deux, et ne lairrez pas de vous en retourner faire la feste à Rosny comme Lo-

menie m'a dit que vous aviez dessein. Adieu, mon amy.

Ce samedi 10 avril, à Fontaine-bleau.

HENRY.

Mon amy, la dame de Pangeas m'a asseuré qu'elle se rendroit à Paris le lendemain des fetes, sans faute, et apporteroit avec elle les inventaires qu'elle avoit des bagues et pierreries de feuë ma sœur la duchesse de Bar lors de son deoeds, et ceux qui avoient esté faits depuis en Lorraine, ensemble ceux de ses meubles et autres choses qu'elle avoit en sa puissance alors : dequoy je vous ay bien voulu advertir par ce mot, et vous prier de prendre avec vous deux ou trois de mon conseil, tels que vous adviserez, pour verifier lesdits inventaires, et ce en la presence de ceux que mon frere le duc de Lorraine (qui est par delà) deputera, pour apres prendre ce qui m'appartient par la mort de madite sœur, et rendre à mondit frere ou aux siens ce qui est à luy. Et parce que vous sçavez en cela ce qui est de mon intention, je ne vous en diray davantage, pour prier Dieu vous avoir, mon amy, en sa sainte et digne garde.

Ce 17 avril, à Fontaine-bleau. HENRY.

Mon amy, je vous fais ce mot par ce porteur, afin que vous luy fassiez bailler incontinent ce qu'il luy faut pour son voyage, et que personne n'en sçache rien; et, pour cet effet, qu'il n'aille point querir son argent à l'espargne et le luy faites bailler d'ailleurs. Aussi-tost qu'il sera de retour icy je fais estat de le redépescher devers ceux qui me l'ont envoyé, et n'attends que M. de Ville-roy qui doit estre icy demain au soir. Bon jour, mon amy.

Ce 19 avril, à Fontaine-bleau au matin.

HENRY.

Mon amy, mon nepveu le duc de Guyse m'ayant fait entendre que pour jouyr du don que je luy fis, lors qu'il alla la premiere fois en Provence par mon commandement, de la creuë de certains offices que je fis en ma cour des comptes dudit lieu, il luy est de besoin d'avoir encore une jussion, laquelle monsieur le chancelier fait difficulté de luy expedier. Je vous fais ce mot pour vous prier d'apporter tout ce qui sera de vous à ce que ledit sieur chancelier seelle ladite jussion, luy faisant entendre que c'est chose que je veux, et que mondit nepveu jouisse de la gratification que je luy ay faite de la finance qui proviendra desdits offices. Adieu, mon amy.

Ce 27 avril, à Fontaine-bleau. HENRY.

Mon amy, vous apprendrez par cette-cy et par ce que La Varenne vous dira, le desir que j'ay de donner tout le contentement qu'il ma

sera possible à M. le duc de Wirtemberg, ainsi que je l'ay resolu avec le sieur de Sillery, et que je luy ay donné charge de le vous faire entendre; c'est pourquoy je vous prie d'y pourvoir, à ce que son ambassadeur, qui a pris congé de moy pour le retourner trouver, luy porte cette assurance. Vous luy ferez aussi donner un present de ma part, d'autant qu'il part sans plus retourner icy, et vous sçavez que ces choses là importent à mon service, comme vous le pouvez trop mieux juger. C'est pourquoy je ne vous en diray davantage, pour prier Dieu vous avoir, mon amy, en sa sainte et digne garde.

Ce 25 may, à Fontaine-bleau. HENRY.

Mon amy, la suffisance du sieur du Massés, qui vous rendra cette-cy de ma part, fera qu'elle en sera plus courte. Je me contenteray, par icelle, de vous assurer de la continuation de ma bonne volonté, de laquelle je vous tesmoigneray les effets aux occasions qui s'en offriront, et que je seray tres-aise d'entendre de vos nouvelles et ce que vous aurez appris en vostre voyage, important à mon service. Adieu, mon amy.

Ce 13 juin, à Saint Germain en Laye.

HENRY.

Mon amy, le feu sieur de Chappes ayant esté contraint entrer en grandes avances pour me dignement servir en Auvergne, comme il a fait, on luy auroit, pour parties desdites avances, donné des assignations sur des receptes particulieres qu'il n'auroit pû recevoir, et pour le surplus, il fut remis à estre remboursé du fonds qui seroit destiné pour l'acquittement des debtes contractées pour mon service en mesmes années. Toutesfois, faute de poursuite de la part de la fille dudit sieur de Chappes, à present femme du sieur du Chandieu, ladite partie n'a point esté employée, et sont, ledit de Chandieu et sa femme, travaillent en leurs biens, par les creanciers desquels cette somme là a esté empruntée; c'est pourquoy je vous fais ce mot pour vous prier de faire dresser ledit de Chandieu, pour le payement de ce qui estoit deu de reste à son beau pere, ou sur l'estat des debtes d'Auvergne, ou sur telle autre nature de deniers que vous verrez estre plus à propos: car les services que j'ay receus dudit feu sieur de Chappes, veulent que je vous prie, encor un coup, d'apporter tout ce que vous pourrez pour le contentement dudit sieur de Chandieu. Sur ce, je prie Dieu qu'il vous ayt, mon amy, en sa sainte et digne garde.

Ce 17 aoust, à Fontaine-bleau. HENRY.

Mon amy, j'ay commandé à La Varenne de vous aller trouver pour les affaires de mon cousin le duc de Nemours, et de ne rien faire en cela

que ce que vous luy ordonnerez. Adieu, mon amy.

Ce 23 aoust, à Fontaine-bleau. HENRY.

Mon amy, sur ce que j'ay entendu que le prest des marchands et eschevins de ma bonne ville de Paris, font quelque resistance à Lintlaer Flamant, de poser le moulin servant à son artifice, en la deuxiesme arche du Pont-Neuf du costé du Louvre, sur ce qu'ils pretendent que cela empescheroit la navigation, je vous prie les envoyer querir et leur parler de ma part, leur remontrant en cela ce qui est de mes droicts; car, à ce que j'entends, ils les veulent usurper, attendu que ledit pont est fait de mes deniers et non des leurs. Vous ne m'avez pas mandé que ceux qui vouloient faire le party des rentes, se sont dédit, comme M. de Maisses m'a dit. Je ne vous fais point encore de responce à la lettre que m'a apportée Lomenie ny à ce qu'il m'a dit, seulement je vous diray que les raisons qui y sont contenues, ne me font nullement dédire ny changer mon intention. Adieu, mon amy.

Ce 23 aoust, à Fontaine-bleau. HENRY.

Mandez moy des nouvelles de mes bastimens.

Mon amy, je vous fais ce mot en faveur de Baptiste Manchin, courrier, pour vous prier d'adviser à le faire contenter de neuf cens escus qui luy sont deus, pour des voyages qu'il a cy-devant faits à Rome pendant ces troubles, entre lesquels est celuy de la nouvelle qu'il apporta de mon absolution; ce qui fait que je vous en prie de toute mon affection, est qu'il est pauvre et que sa dette est juste, raisonnable et privilégiée. Adieu, mon amy.

Ce 29 aoust, à Fontaine-bleau. HENRY.

Mon amy, ce pauvre marchand de Gisors, qui vous rendra cette-cy, s'en va vous trouver pour le payement de deux cens cinquante et tant d'escus que je luy dois, pour du vin qu'il m'a fourny lors de mes plus grandes affaires, sa dette bien verifiée, avec beaucoup de frais et de patience. Je sçay bien que la consequence en est dangereuse, mais ma conscience d'ailleurs m'oblige d'avoir pitié de luy; c'est pourquoy je vous prie de luy donner tel contentement, qu'il n'ait plus d'occasion de se plaindre et retourner devers moy pour chose qui luy est justement deuë. Sur ce, Dieu vous ait, mon amy, en sa sainte et digne garde.

Ce 13 septembre, à Fontaine-bleau. HENRY.

Mon amy, celuy qui vous rendra cette-cy de ma part, nommé Latsague, est de ma compagnie de chevaux legers, et des plus anciens d'icelle, et tel que si la charge de mareschal des logis venoit à vacquer, je la luy donnerois, estant des vieux soldats que feu Belsunce m'amena plus

gentil-homme que riche ; lequel ayant esté fort malade et despendu tout ce qu'il avoit pû espar-  
gner de ses monstres passées, je luy ay fait de-  
pescher une ordonnance de la somme de trois  
cens livres, laquelle il vous presentera, avec  
cette-cy, et que je vous prie commander qu'elle  
luy soit acquittée incontinent, veu mesmement  
que c'est le premier don que je luy ay fait, afin  
qu'il s'en retourne trouver la troupe où elle est.  
Adieu, mon amy.

Ce 12 septembre, à Fontaine-bleau, au soir.

HENRY.

Mon amy, vous apprendrez par de Murat, qui  
vous rendra cette-cy, l'occasion de son voyage  
vers vous, et comme dés hier au soir, aussi-tost  
que j'eus l'advis pour lequel il vous va trouver,  
j'ay pourveu à ce qu'il n'arrivast aucun inconve-  
nient pour le bien de mon service : et remettant  
le surplus à la suffisance dudit de Murat, je ne  
vous en diray davantage, que pour vous prier  
de le croire. Adieu, mon amy.

Ce 6 octobre, à Fontaine-bleau. HENRY.

Mon amy, je vous envoie ce porteur expres,  
afin que vous entendiez par luy ce qu'il m'a rap-  
porté du lieu d'où il vient, où il y a des parti-  
cularitez qui sont bien considerables ; c'est pour-  
quoy je vous prie de l'entendre et me mander  
par luy quand vous serez icy pres de moy.  
Adieu, mon amy.

Ce samedi 16 octobre, à Fontaine-bleau.

HENRY.

Mon amy, je vous fais ce mot et vous dépes-  
che ce courrier, expres pour vous dire que le  
conestable de Castille arrive dimanche à Paris,  
où l'on croit qu'il sera pour faire la feste, pour  
incontinent se rendre icy, ce qui pourra estre  
mercredy ou jeudy au plus tard ; c'est pourquoy  
je vous prie de remettre vostre visite du canal  
jusques à une autrefois, et vous rendre icy mardy  
de bonne heure. Adieu, mon amy.

Ce vendredy matin 29 octobre, à Fontaine-  
bleau.

HENRY.

Mon amy, pour responce à celle que vous m'a-  
vez escrite sur ce que j'avois donné charge au  
sieur de Vic de vous faire entendre, de ma part,  
sur les défences du commerce d'Espagne, je  
vous diray que mon advis est, que vous assem-  
blez messieurs le conestable, chancelier, le  
commandeur de Chates, ledit sieur de Vic et  
vous, et que là, ledit sieur de Vic propose ce  
qu'il a à dire : surquoy vous entendrez ses rai-  
sons et les peserez. Mais mon advis est que l'on  
ne doit lever lesdites défences, mais, par sous  
main, faire entendre aux gouverneurs qu'ils per-  
mettent aux navires d'y aller, d'autant que de le-

ver lesdites défences, les Espagnols ne m'ayans  
fait aucune raison, il sembleroit que je le fisse  
par crainte d'eux ; ou quand on le souffrira aux  
marchands, par tolerance, nous serons tousjours  
sur nos pieds de faire republier lesdistes défen-  
ces et les faire executer ; et cela nous sera plus  
d'honneur qu'autrement, qui est ce enquoy nous  
devons autant adviser avec ces gens-là, et cela  
nous apportera plus de commodité que d'en user  
d'une autre façon. Sur ce, Dieu vous ait, mon  
amy, en sa sainte et digne garde.

Ce 14 novembre, à Saint Germain en Laye,  
au soir.

HENRY.

## CHAPITRE CXXXII.

*Affaire de L'Hoste, secrétaire de Villeroy. Di-  
verses lettres relatives à cette affaire. Indul-  
gence de Henri IV pour Villeroy. Digression  
sur la tolérance. Mémoire justificatif de Vil-  
leroy.*

En ce mesme temps il se passa une affaire  
d'importance, laquelle fist au commencement  
quelque bruit, et donna sujet à plusieurs person-  
nes de prendre de mauvaises impressions d'un  
des principaux ministres des affaires du Roy, et  
d'en tenir des langages fort à son desavantage,  
laquelle, neantmoins, en peu de jours s'appaïsa  
douceement, par la benignité et bon naturel de  
Sa Majesté, dont la cause, l'occasion et la suite,  
fut telle que s'ensuit.

Le Roy, suivant sa coutume, voulant s'en al-  
ler faire ses devotions des festes de Pasques à  
Fontaine-bleau, avant que de partir, fist com-  
mandement à tous vous autres messieurs de son  
conseil d'Estat, de le venir trouver la semaine  
de Quasimodo. Mais dés le Vendredy Saint vous  
receustes une lettre de sa main, dont la teneur  
s'ensuit.

### *Lettre du Roy à M. de Rosny.*

Mon amy, j'ay desja de long-temps quelque  
chose en la fantaisie, qui m'a travaillé l'esprit  
depuis trois jours, plus qu'il n'avoit encores fait ;  
c'est touchant une desloyauté qui se commet en  
mes principales affaires, à laquelle je voudrois  
bien essayer d'apporter quelque remede ; mais  
ne le voulant entreprendre sans vous en avoir  
communiqué, pour ce que vous avez esté le pre-  
mier qui en avez soupçonné quelque chose lors  
de vostre voyage en Angleterre, je vous prie ne  
manquer pas de me venir trouver dés le jour de  
Pasques, si tost que vous aurez fait la Cène à  
Ablon, où je donneray ordre qu'il se trouvera  
des chevaux de poste tout prêts ; car estant quasi  
tout seul en ce lieu, j'auray plus de moyen de



discourir avec vous sans estre importuné de personne. Adieu, mon amy que j'ayme bien.

De Fontaine-bleau, ce jeudy absolu. HENRY.

Vous executastes punctuellement ce qui vous estoit enjoinct; mais estant arrivé fort las et à nuict close, vous remistes au lendemain matin à voir le Roy; lequel, si tost qu'il vous apperceut, estant desja tout habillé encor que le soleil ne vint que de se lever, il vous prit par la main et vous dit (car nous y estions presens nous ayans menés avec vous): « Bon jour, mon amy, vous soyez le bien venu; allons nous promener ensemble. » Et lors il vous mena, tout seul, dans la gallerie proche de sa chambre, où il vous parla ainsi, comme vous me l'avez conté. « Mon amy, vous souvenez vous bien de la perte de votre seconde dépesche que vous m'escrivistes d'Angleterre, et de ce que vous me mandastes sur ce sujet, touchant M. de Ville-roy et les siens? aquoy il faut que je vous confesse nettement que je n'adjoustay pas lors beaucoup de foy, estimant que ce fust quelque mauvais office que vous luy rendissiez, comme c'est chose assez ordinaire entre les serviteurs d'un mesme prince, qui ont de la faveur et de l'employ en mesmes affaires et ont des fantaisies et des desseins contraires, comme je recognois souvent que vous avez. Mais depuis quelque temps il m'est venu tant d'avis reiterez de la pluspart de mes ambassadeurs, que les princes vers lesquels ils sont envoyez, savent autant qu'eux mesmes, voire bien souvent avant eux, tout ce qu'il y a de plus secret et mieux chiffré, tant dedans les dépesches qu'ils reçoivent de moy, que dans celles qu'ils m'envoyent, et notamment du sieur de Barault, encor depuis trois jours qui m'en a escrit un mot de sa main, par un homme qu'il a chargé de le mettre es mains propres, que je commence à croire que vous avez eu raison; et partant, je vous prie, essayons vous et moy, avant que de faire encor rien esclatter, à en découvrir davantage; car je ne sçaurois plus souffrir une telle perfidie. » Mais tout vostre travail eust esté vain et inutile si vous n'eussiez esté mieux assistez du hazard et de la fortune, que de vos industries et recherches; car, trois jours apres Pasques, une bonne partie de ce que vous desiriez sçavoir, fut découvert sur les plus malheureux, et non (au moins comme le bruit en courut) sur tous les coupables, et ce par une telle occasion que nous reprendrons dès son commencement, pour plus grand esclarissement.

Il y avoit donc, de long-temps, en Espagne un certain homme natif de Bourdeaux, nommé Jean de Leyre, dit Rafis, lequel, pour avoir

esté des plus envenimés partisans de la Ligue, n'avoit peu obtenir permission de demeurer en France, et pour cette cause s'estoit retiré en ce pays là, servoit les Espagnols et toutes les menées qui se faisoient contre l'Etat, et avoit pour cet effet pension d'eux. Mais, ayant recogneu depuis quelques années, qu'à mesure que ses intelligences vieillissoient, son credit et ses services diminuoient et tout de mesme ses salaires, il prist resolution de retourner en sa patrie, par le moyen de quelque service recommandable; et, pour cet effet, ayant sceu par l'accointance qu'il avoit avec un François, appelé Jean Blas, de long-temps domicilié en Espagne, qu'un nommé Nicolas L'Hoste (1), secretaire de M. de la Rochepot pendant son ambassade, avoit des intelligences avec les secretaires don Jean Idiaquez Francheses et Prada, pour leur découvrir tous les secrets des despesches de France, et qu'estant revenu en France, remis au service du sieur de Ville-roy, duquel il estoit filleuil, serviteur de pere en fils, et par luy commis aux deschiffrements de ses despesches, il continuoit encor les mesmes desloyautez, il trouva moyen de parler au sieur de Barault, lors ambassadeur, et luy dit que se repentant d'avoir esté mauvais François, il desiroit de rentrer es bonnes graces de son prince par un signalé service, en luy descendant une perfidie qui se commettoit au grand prejudice d'iceluy; mais qu'il n'en diroit point les particularitez, qu'il ne luy eust fait avoir auparavant une abolition de tous ses crimes, et promesse de quelques moyens pour vivre, le suppliant neantmoins que, si pour obtenir cela, il luy estoit besoin de venter en quelque sorte ses offres, il se gardast bien de le faire par lettres, ny d'en faire parler à autre qu'au Roy: ce que le sieur de Barault luy promit, tant il avoit envie de pouvoir découvrir ce secret. Mais ne se pouvant imaginer que M. de Ville-roy ny les siens pussent jamais estre enveloppez dans telles desloyautez, il ne laissa pas de luy escrire pour avoir cette abolition, laquelle luy fut promptement envoyée, et baillée à Rafis.

Lequel ayant veu qu'elle avoit passé par les mains de M. de Ville-roy, et non celles du sieur de Lomenie, comme il luy avoit dit le desirer, il luy declara toute l'affaire et luy dit qu'il vouloit, en mesme temps, monter à cheval pour se retirer promptement en France, pour ce que s'il sejournoit seulement un jour, l'on ne manqueroit pas de se saisir de luy. Suivant quoy M. de Barault luy ayant baillé Descartes, son secretaire, pour l'accompagner, ils partirent si à propos,

(1) Nicolas L'Hoste: il ajoutait à son nom celui de Duportail.

que le lendemain matin l'on fut au logis de Rafis pour se saisir de sa personne, suivant l'avis que L'Hoste en avoit fait donner; et ne le trouvant point, l'on courust soudain apres sur le chemin de France. Mais Rafis et Descartes avoient fait si bonne diligence, qu'ils arriverent à Bayonne sans fortune; et continuant leur chemin, ils apprirent à Paris que le Roy estoit à Fontainebleau, où ils s'acheminèrent tout droit sans s'arrester; et ayant rencontré M. de Ville-roy qui s'en alloit passer à sa maison pour se rendre le lendemain au mesme lieu, ils luy conterent toute cette histoire. A quoy il respondit qu'il y falloit pourvoir selon que le requeroit le service du Roy, sans s'en esmouvoir davantage, et leur ayant dit que son commis estoit demeuré à Paris, avec dessein de le suivre le lendemain, et qu'estant arrivé, il donneroit ordre à tout ce qui seroit necessaire.

Descartes et Rafis ne demurerent pas trop satisfaits de cette responce, et pour cette cause, comme gens qui avoient la teste chaude et vouloient faire valoir leur service, ils le prierent de leur bailler des lettres pour faire arrester ledit Hoste, et qu'eux mesmes retourneroient plutost à Paris pour cet effet, afin qu'il n'y eust nul manquement; mais ils n'en sceurent jamais tirer autre chose, sinon qu'il falloit user de secret et de silence, afin de ne rien faire esclatter qu'il n'eut parlé au Roy. Le lendemain, si tost que M. de Ville-roy fut arrivé à Fontainebleau, il s'en alla trouver Sa Majesté, avec les paquets qu'avoient apportez Descartes et Rafis, et luy en fist la lecture, que le Roy ne luy donna pas loisir d'achever tout du long; car si tost qu'il entendist le nom et la qualité de celuy qui trahissoit son service, il luy dist en ces mots: « Et où est-il donc, cét Hoste, vostre commis, ne l'avez vous pas fait prendre? — Je crois, Sire, dit M. de Ville-roy, qu'il est à mon logis; mais non pas encor pris. — Comment, dit le Roy, vous croyez qu'il soit à vostre logis et ne l'avez pas fait arrester? Pardieu, c'est trop de negligence; hé à quoy vous estes vous amusé depuis que vous scavez sa trahison à laquelle il falloit pourvoir à l'heure mesme? et partant retournez en diligence et vous en saisissez. » Et en cette façon partit M. de Ville-roy, le visage fort chagrin. Ce qu'il fist, ce qu'il dit et ce qu'il pensa, nous ne le scavons pas, pource que vous ne l'avez pas sceu au vray. Nous ne dirons non plus tout ce qui se passa lors que L'Hoste fut arrivé; car les bruits en ont esté grandement divers. Vous fustes present à toutes les lectures et discours cy-dessus en presence du Roy; car estant venu pour prendre congé de Sa Majesté,

afin de vous en retourner à Paris, vous vous promeniez, avec elle, dans la longue gallerie du jardin des Pins, lorsque M. de Ville-roy y arriva, duquel et de toutes ces lectures vous ne disiez pas ce que vous pensiez, de crainte que le Roy ne l'imputast à mauvais offices que vous luy voulussiez rendre, encor que pendant la lecture de ses dépesches Sa Majesté se fust mise à vous regarder et serrer la main trois ou quatre fois. Quoy que ce soit, vous dites adieu au Roy, sans avoir usé de grands discours là dessus, attendant de voir ce qui en arriveroit, et vous en allastes à Paris, en poste, où dès le lendemain vous receustes une lettre du Roy, de laquelle la teneur ensuit.

*Lettre du Roy à M. de Rosny, contre-signée.*

Mon cousin, Descartes, secretaire du sieur de Barault, mon ambassadeur resident en Espagne, vous va trouver, par mon commandement, accompagné de Rafis, par le moyen duquel nous avons sceu l'intelligence que le jeune L'Hoste, clerck du sieur de Ville-roy, avoit avec les ministres du roy d'Espagne, pour vous en faire le discours entier, comme de plusieurs autres particularitez qu'ils m'ont fait entendre, lesquelles importent à mon service. Ledit Descartes vous dira aussi comme ce traistre nous est trop mal-heureusement eschappé des mains, et le desplaisir extrême que j'en ressens pour les esclairecissements que nous eussions tirez de luy si nous eussions pû disposer de sa personne. Il vous dira aussi la diligence que nous avons faite, d'envoyer apres luy pour l'attraper, avec les avis que nous avons eus jusques à present, lesquels me donnent bien peu d'esperance que nous le recouvrirons, qui est un extrême mal-heur pour mes affaires. Neantmoins le service que je reçois maintenant dudit Rafis, en me descouvrant cette desloyauté, est tres-signalé et merite une grande recognoissance; car, comme ce malheureux avoit cognoissance d'une bonne partie des dépesches que ledit sieur de Ville-roy recevoit et envoyoit, et de tous les alphabets en chiffres dont nous nous servons, il faut croire qu'il en donnoit avis ausdits Espagnols à toutes occasions, jusques à leur avoir baillé des doubles desdits chiffres, avec quoy ils ont pû sçavoir autant de mes intentions et affaires quasi que nous mesmes; ce qui auroit duré si ledit Rafis, comme mon sujet, las de voir cette perfidie continuer si long-temps au prejudice de mon service, n'en eust adverty ledit sieur de Barault, ainsi qu'il vous dira, avec les preuves que nous en avons qui ne sont que trop confirmées par la fuite de l'auteur d'icelle; et estimant ne pouvoir trop dignement recog-

noistre ce service, tant pour l'importance d'iceluy, que pour profiter de l'exemple d'une gratification si bien colloquée, j'ay fait don audit Rafis de la somme de trois mille livres, laquelle je vous prie luy faire payer en deniers contants, et outre cela faire rembourser ledit sieur de Barault, de quinze cens soixante livres qu'il a avancées, pour donner moyen audit Rafis de se desgager et sortir d'Espagne, et pour le conduire jusques en ce lieu. Il faut pareillement faire payer audit sieur de Barault le dernier quartier de son entretenement de l'année passée, dont sondit secretaire vous dira qu'il n'a peu tirer aucune chose, quelques lettres que vous ayez escrites; car il luy est impossible de servir s'il n'est payé entierement de son estat, vivant aujourd'huy plus cherement en Espagne qu'ils ne souloient, ainsi que vous dira ledit Descartes.

Je vous prie donc d'y faire pourvoir, de facon que ledit Sieur de Barault ayt moyen de s'entretenir et continuer à me servir par delà, où il nous est tres-utile et necessaire. Et quand, en tout le temps de sa legation, il ne me feroit autre service que de m'avoir fait cognoistre ce traistre et sa malice, il auroit bien gagné ses despens et mieux encore. Davantage j'ay commandé vous estre envoyé un extrait des articles des dernieres depeschés qu'il a faites, qui font mention de nostre ordonnance et de leur placart de trente pour cent, afin que vous sçachiez les termes auxquels ils en sont par delà, et le tort que font à ma reputation et à mon autorité ceux qui violent nos defences, et que vous advisiez avec ceux de mon conseil à y remedier. Surquoy je vous diray qu'il me semble estre necessaire de faire faire exacte perquisition et rigoureuse punition des auteurs desdites contraventions, la plus grande partie desquels il nous mande sortir d'O-lone et des environs; et comme c'est de vostre gouvernement, il faut que vous embrassiez ce fait et envoyez sur les lieux un homme de bien avec une commission, pour faire ladite recherche et punition, le plus seurement que faire se pourra. Partant choisissez en un propre pour me faire ce service, qui n'est de petite consequence, car tant que cette porte de desobeysance demeurera ouverte à ceux qui voudront en user, nostre interdiction du commerce ne fera que honte et dommage à nous mesmes.

Vous verrez encor par une lettre que le sieur Barault a escrite au sieur de Ville-roy, des propos qui se sont passez entre luy et Prada sur ce sujet. Mon cousin, je vous prie, reprimons cette licence, de façon que l'exemple qui s'en ensuivra serve de terreur aux autres qui voudroient imiter tel abus, et que je sçache ce que vous en ferez.

Au reste, mon cousin le comte de Saint Paul m'a remonstré estre contraint, pour appaiser la violence de ses creanciers, de vendre son comté de Saint Paul, en gros ou en détail; sur cela, il m'a fait une ouverture avec laquelle il peut, ce dit-il, donner quelque contentement à sesdits creanciers, et par ce moyen avoir loisir de traiter avec moy de l'achapt ou eschange dudit comté, si je veux y entendre. Je luy ay fait escrire qu'il vous voye, et qu'il mene avec luy le sieur de Comartin, pour en conferer avec vous, dautant que je desire que vous m'en mandiez vostre advis devant que d'en resoudre; mais j'estime que je dois empescher, s'il est possible, que mondit cousin vende ledit comté aux estrangers, à cause des droits et preteutions de souveraineté que j'ay sur iceluy. Et s'il faut qu'il soit vendu, comme m'a déclaré ledit comte, qui ne s'en peut défendre si je ne le secours, je dois plutost le recompenser et prendre que de permettre qu'il tombe en autre main. Par ce moyen, nous pourrons dès à present l'obliger de ne vendre sa terre à autre qu'à moy, en l'accommodant de l'avance qu'il demande, sur le prix duquel l'on conviendra avec luy, et l'assignant sur la levée qui luy a esté cy-devant affectée. Outre cela, nous le garentirons pour quelque temps de la ruine de ses affaires qui le talonne de si pres qu'il luy sera difficile de l'éviter sans telle assistance. Toutesfois, je n'en ay donné ny donneray parole que vous ne m'en ayez escrit vostre advis. Mon cousin, j'escris au sieur de Sillery qu'il vous aille trouver pour estre present au raport desdits Rafis et Descartes, dont vous ferez apres part à monsieur le chancelier, ainsi que vous ferez des autres particularitez contenues en la presente. Priant Dieu, mon cousin, qu'il vous ait en sa sainte et digne garde.

Ecrit à Fontaine-bleau, le 24 avril 1604.

HENRY.

Et contre-signée, DE NEUF-VILLE.

Et en mesme temps vous receustes une lettre de M. de Ville-roy, de laquelle aussi la teneur s'ensuit.

*Lettre de M. de Ville-roy à M. de Rosny.*

Monsieur, je n'ay rien à vous escrire sur ce que vous diront ces porteurs, sinon que je suis outré d'ennuy et de douleur du mal-heur advenu au service du Roy, tant par l'infidelité de ce miserable garçon que j'avois nourry dès le berceau, ayant fait son pere tel qu'il estoit, que par sa fuite de laquelle je confesse que mon mal-heur est cause, ainsi que cesdits porteurs vous diront. J'y auray regret tant que je vivray, n'estimant pas pouvoir jamais faire service au Roy qui re-

pare cette faute, ou pour mieux dire, disgrâce, ny qui efface la tache et flattrisseure que ma reputation et non ma conscience en recevra. Monsieur, je vous supplie, en cette occasion de grande affliction, de vouloir faire paroistre vostre generosité en m'assistant de vos bons offices, et de favoriser Rafis en la gratification que Sa Majesté luy a accordée pour recognoissance du service signalé qu'il luy a fait, et vous m'obligerez de plus en plus à vous servir. Je vous prie de faire faire aussi le payement de l'entretienement de M. de Barault, qui n'a encores esté dressé du dernier quartier de l'année passée, ainsi que vous dira son secretaire qu'il faut luy renvoyer diligemment, car il n'a personne aupres de luy pour assureur en qui il se fie. Je ne feray plus longue lettre que pour vous presenter mon tres-humble service et recommandations, et prier Dieu, monsieur, qu'il vous conserve en bonne santé.

De Fontaine-bleau, le 24 avril 1604.

DE NEUF-VILLE.

Le jour suivant vous receustes encor une lettre de M. de Ville-roy, de laquelle la teneur ensuit :

*Lettre de M. de Ville-roy à M. de Rosny.*

Monsieur, depuis vous avoir escrit mon autre lettre nous avons sceu que ce traistre s'est noyé en la riviére de Marne, aupres du bac à Fay, se voyant poursuivy du prevost des mareschaux. Il avoit avec luy un Espagnol qui a esté pris et amené à Paris avec le corps de l'autre, dont il est raisonnable de faire une exemple publique, estant bien marry qu'il n'a esté pris en vie : aussi bien estant descouvert il ne pouvoit plus faire de mal au Roy, et sa mort, ainsi advenuë, y apportera peu d'avantage et de consolation à ceux qui esperoient par sa prise faire voir clair en ses intelligences et l'innocence d'autrui. Le Roy m'a commandé aussi vous advertir que ce-luy qui est en Flandre pour le servir, nous a escrit que Saint Denis Mailloc a envoyé s'offrir aux archiducs par l'adresse de M. d'Aumalle, pour luy servir non seulement de sa personne, mais encores avec luy nombre de gentilshommes qu'il promet y mener, afin que vous y fassiez prendre garde et employer l'autorité et creance qu'il sçait que vous avez sur luy, pour rompre ce dessein.

De Fontaine-bleau, ce 24 avril, 1604.

DE NEUF-VILLE.

Toutes ces affaires touchant M. de Ville-roy vous my-partirent de sorte l'esprit, qu'encor que la prudence et modestie vous imposassent silence, si voyoit on bien à vostre visage que vous n'es-

tiez pas satisfait de ce qui s'estoit passé et se passoit encor en cette affaire, surtout lors que vous eustes entendu de Descartes et de Rafis toutes ces autres circonstances et particularitez touchant la maniere dont L'Hoste s'estoit evadé, car tous deux vous en parloient fort mal, aussi bien que la pluspart de ceux qui estoient à vostre suite, lesquels, lors qu'ils en voyoient quelques-uns excuser M. de Ville-roy et adoucir ses fautes, disoient : « C'est dommage que ceux de « monsieur le grand maistre ne sont accusez de « semblables trahisons ; car, nonobstant toutes « ses innocences pretendues, il ne laisseroit pas « d'estre déchiré de toutes façons. »

Tout cecy rendu ainsi public, la pluspart des ambassadeurs, voire le nonce du Pape mesme, vous vindrent trouver et prier de parler au Roy, et de luy remonstrer que leurs maistres ny eux aussi n'oseroient plus escrire rien d'importance à Sa Majesté, tant que les dépesches auroient à passer par les mains de gens si peu feables que s'estoient montrez les commis de M. de Ville-roy : ce que vous representastes au Roy, l'estant revenu trouver à Fontaine-bleau expres pour cet effet, mais avec des termes si doux qu'il y paroissoit plutost de la faveur que de l'animosité, sçachant assez combien l'esprit du Roy estoit ployable au pardon et facile à oublier les fautes de ceux qui les confessoient ingenuëment, en tesmoignoient de la repentance, exaltoient sa bonté, louoient ses vertus et se submettoient à ses volonteiz. Comme de fait, sur ce que vous luy aviez remonstré, il vous dit : « Il est vray, « je le cognois bien, et aussi que tous ces gens ont « quelque apparence de raison, car il faut con- « fesser qu'il y a, en tout ce qui s'est fait, dit « et passé, grandement de la faute ou pour le « moins nonchalance de M. de Ville-roy. Et aussi « ay-je esté deux ou trois jours en doute sur la « façon dont je le devois traiter ; mais enfin il « m'a fait pitié, luy voyant les larmes aux yeux « et les genoux à terre pour me demander par- « don, lequel je ne luy ay pû desnier, m'ayant « aucunement fait paroistre qu'il y avoit en son « fait plus de mal-heur que de malice, de negli- « gence que de mauvais dessein, et par conse- « quent que nous le devons plutost consoler que « de l'affliger davantage, n'y ayant point de « doute que ce revers de fortune ne le rende « moins fier, et à l'advenir plus diligent et cir- « conspect au choix de ses commis, à veiller sur « leurs actions et ne leur confier pas toutes ses « dépesches. »

Quoy que ce soit, il se passa plusieurs jours pendant lesquels il se tint divers discours sur cette affaire, chacun prenant la licence d'en dire

sa ratelée à tort et à travers, en quoy, pour dire la verité, les huguenots de consistoire (se souvenant toujours des belles conditions qu'il avoit presentées à Sa Majesté, sous lesquelles luy et ceux de la ligue offroient de le recognoistre pour leur Roy) ne s'espargnoient pas. Mais en fin ces plus grosses rumeurs s'adoucirent peu à peu, à cause de la debonnaire indulgence du Roy qui vint à la cognoissance d'un chacun; laquelle s'augmenta tellement que vous ayant encore envoyé querir le lendemain par Jaquinot vous dit : « Mon amy, vous sçavez comme j'ay tout par-  
« donné à M. de Ville-roy; mais afin de remet-  
« tre entierement son esprit des frayeurs qu'il  
« avoit, que vous prissiez cette occasion pour  
« luy rendre de mauvais offices en souvenance  
« de ceux qu'il avoit autresfois rendus à ceux de  
« vostre religion, je vous prie de luy escrire une  
« lettre de consolation et d'assurance de vostre  
« amitié, comme je vous en escriray ce soir une  
« lettre pour cet effet, afin que, vous la mon-  
« trant à ses amis, chacun admire d'autant plus  
« ma clemence et bonté qui sont les fondemens  
« sur lesquels je veux essayer de pouvoir regner. »  
De laquelle lettre qui vous fut apportée le soir par Perroton la teneur ensuit :

*Lettre du Roy à M. de Rosny.*

Mon amy, vous sçavez (car je vous en ay desja dit quelque chose) comme, lors que je fus adverty que L'Hoste, commis du sieur de Ville-roy, s'estoit sauvé et depuis avoit esté trouvé noyé, j'avois esté long-temps en doute de ce que je devois croire de cette affaire et faire de luy; mais enfin il m'a fait pitié, luy voyant les larmes aux yeux, les souspirs en la bouche, les des-  
plaisirs au cœur et les genoux en terre pour me demander pardon, lequel, à cette cause, je ne luy ay pu refuser; et mesme, afin qu'il soit du tout remis en courage pour mieux servir que jamais, je vous prie de luy escrire une lettre d'honnesteté en forme de consolation et d'assurance de vostre amitié, car je sçay qu'il la recevra avec joye. Adieu mon amy.

De Fontaine-bleau, ce jeudy au soir.

HENRY.

Or, ayant receu cette lettre, vous vous resolustes bien d'en escrire une à M. de Ville-roy suivant icelle, mais de l'assaisonner de sorte qu'elle luy pust servir non seulement de consolation et d'assurance de vostre amitié, mais aussi de quelque espece d'admonition pour luy faire diminuer cette grande aversion qu'en toute occasion il tesmoignoit d'avoir contre ceux de vostre religion; la lettre que vous nous fistes

lire avant que de la fermer et la luy porter, estant telle que s'ensuit :

*Lettre de M. de Rosny à M. de Ville-roy.*

Monsieur, pour commencement de ma lettre je vous diray que je desire qu'elle vous serve de consolation et d'admonition tout ensemble; et partant vous diray-je sur la premiere que vous avez grande occasion de la recevoir tres-douce et tres-efficacieuse pour deux raisons. La premiere, d'autant que vous sçavez avoir affaire à contenter un prince qui a tant de vertus et, entre icelles, de si douces inclinations à l'indulgence, qu'il previent tousjours la demande d'icelle, estant le premier à excuser les fautes de ses serviteurs si elles sont venielles, ainsi que j'en ay fait moy-mesme plusieurs experiences, et peut-estre vous mesmes aussi; et que si elles sont si grandes qu'elles ayent besoin de misericorde et de pardon, il a l'un et l'autre au cœur devant que celui qui les demande les ayt en la bouche, et de cette façon ne les refuse-il jamais à personne, comme vous le sçavez par ce qui s'est passé touchant le mareschal de Biron, n'ayant jamais veu une plus forte passion en Sa Majesté que de rencontrer, en l'entiere confession de son malefice, une palliative occasion de luy pardonner sans consequence pernicieuse à sa vie, au repos de ses peuples et à la tranquillité de son regne. Et l'autre consolation, c'est celle qu'à mon advis vous pouvez prendre et tirer de vous seul, qui est l'innocence que vostre conscience vous fournit, et que vous ferez juger telle à tout le monde par vos actions et procedures subsequentes, lesquelles vous sçauvez mieux choisir et observer que je ne le vous puis enseigner. Et quant aux conseils, afin d'éviter non seulement les legitimes causes de plaintes, mais aussi les blâmes des langues medisantes, comme j'advoué et veux croire que vous avez sujet d'en craindre quelque chose par des langages d'aucuns de la religion, c'est de leur faire paroistre de n'avoir plus de haine ny d'aversion contre leurs vies ny leurs fortunes, comme les conditions que vous proposastes à Sa Majesté, si elle vouloit estre recognué pour Roy par les bons catholiques, leur a donné sujet d'en croire quelque chose, et n'avez pas essayé depuis à leur en faire perdre l'opinion, laquelle demeurera tousjours en eux tant qu'ils ne se verront regarder, de vous autres zelez catholiques, que comme ennemis de Dieu, heretiques et indignes des biens, charges et honneurs du Roy et du royaume; et que vous aussi peut-estre l'aurez-vous telle d'eux, tant que les huguenots ne vous regarderont que comme idolâtres, et par consequent impies. Pour

lesquels deux inconveniens éviter, je ne vois que ce seul expedient que j'ay tant de fois proposé au Roy en vostre presence, et de celles de messieurs de Believre, de Sillery, du Perron et de Cotton, dont l'entier et bien clair discours estant trop long pour une lettre, je vous l'enverray à part pour le considerer, vous priant de l'approuver et d'apporter tout ce que vous pourrez pour le faire practiquer, dautant que, par ce moyen, vous ferez cesser toutes les aver-sions pour les diversitez des religions, qui sont là les meilleures consolations et conseils que je pouvois, ce me semble, donner à vos justes causes d'affliction, dautant plus grandes que les soupçons que les fautes d'autrui ont pû faire former contre vous, sont sans raison et contre toute verité. Et partant vous dis-je de bonne foy et en toute sincerité que je vous assisteray et serviray en l'occasion qui se presente comme si nous estions freres et nous estions tousjours aymez cordialement. A quoy adjousteray, afin de faire esvanouyr les fausses gloses et les mauvaises interpretations que les malins essayent de faire prendre aux procedures dont ils veulent faire croire que vous avez usé en tout ce qui s'est passé touchant vostre commis, que vous en fassiez vous mesmes ou fassiez faire un discours representant la sincerité de laquelle vous avez usé en ce mauvais rencontre. Surquoy je vous baisera, en toute humilité, les mains, et demeureray

Vostre plus humble et obeyssant serviteur,  
MAXIMILIAN DE BETHUNE.

*Discours fait par M. de Rosny au Roy.*

Sire, puis que j'ay à parler devant vostre Majesté qui est tres-chrestienne, tres-sage et tres-judicieuse, et en presence de personnes fort prudentes, fort religieuses et bien versées en la theologie, je commenceray mon discours par la representation d'une chose dont nous sommes tous d'accord, à sçavoir, qu'il y a trois principales vertus chrestiennes, qui sont la foy, l'esperance et la charité. Or, est-il maintenant question de decider par quelles voyes les plus legitimes elles peuvent estre solidement establies entre les hommes, estant facile à juger que les deux premieres, qui sont la foy et l'esperance, dependent de la seule grace de Dieu et persuasion du Saint Esprit, et par consequent, que le plus ou le moins de perfection en icelles ne peut estre cognuë que de Dieu seul, et n'apporte advantage ny desavantage en la société humaine ny conversation civile, sinon autant qu'elles sont accompagnées d'un defect ou abondance de charité. Lesquelles choses, ainsi presupposées, il

semble que les hommes ne se doivent nullement interresser es choses qui ne dependent point des hommes, et ausquelles le plus ou moins de perfection en icelles ne leur peut apporter ny profit ny prejudice; et partant en doivent-ils laisser l'enseignement et la correction à Dieu seul, sans entreprendre de vouloir mulcter de peine ceux qui faillent pour n'avoir pas la puissance de ne point faillir, et dont la faute ne peut apporter dommage qu'à eux mesmes, et laquelle ne peut estre empeschée que par la misericordieuse assistance de Dieu. Par où il appert que les roys, les princes ny les magistrats ne sçauroient user d'une plus grande prudence que d'avoir compassion des devoyez, et de se reduire à ne prendre cognoissance que de la charité et ce qui en dépend, d'autant que du plus ou du moins de perfection en icelle dependent les plus grandes offenses contre Dieu, et conjointement les plus avantageuses ou pernicieuses à l'humanité et conversation civile, non encores du total d'icelle, mais de l'une de ses branches seulement, qui est celle qui consiste en actions et operations civiles, ausquelles le public ou les particuliers ont un manifeste, visible et sensible interest, soit en bien ou en mal. Car, quant à cette autre branche qui consiste en cette vraye amour cordiale et en cette dilection pure, sincere et interieure que les hommes ont en l'ame, tant envers Dieu que leurs prochains, elle ne procede, non plus que la foy et l'esperance, que de Dieu seul et des persuasions du Saint Esprit. C'est aussi à ces seules divines essences qu'en appartient la cognoissance, comme seules ils les peuvent augmenter ou diminuer; et se doivent par consequent contenter les Roys, potentats et magistrats, de faire observer la charité actuelle et de punir les defauts qui sont visiblement contre cette charité, comme sont toutes les actions contraires aux loix, à la nature et à l'observation commune. Et adressant maintenant ma parole à ceux qui croyent estre assis en la chaire de verité, je leur veux confesser une verité, les priant aussi de m'en recognoistre une autre : la mienne est qu'ils croyent plusieurs choses que je ne croy nullement, et la leur est que nous ne croyons rien qu'ils ne croyent, ou pour le moins ne sçauroient ils monstrent le contraire, puisque nous reconnaissons que si nous faisons des prieres qui ne soyent pas entierement conformes à l'Oraison dominicale en substance, nous sommes en erreur; si nous croyons quelque chose en substance qui ne soit entierement conforme au Symbole reputé des Apostres, nous sommes en erreur; et si nous croyons que le Decalogue ne soit pas de necessaire observation, nous sommes en erreur.

et nous soubmettons, en ces cas, d'en estre enseignez et corrigez par les docteurs; lesquels, s'ils ont de la charité, auront-ils plutost compassion de nous que de nous injurier ny supplicier pour ne prejudicier qu'à nous mesmes. Suppliant vostre Majesté, et tous ces messieurs, de vouloir excuser tous mes défauts, et de corriger ceux de ce discours.

Suivant laquelle lettre, et conformément à ce qu'il vous en escrivit par une des siennes, du 28 avril, parlant de quantité d'autres affaires, il fit quelques jours apres courir une espee de manifeste contenant les procedures dont il avoit usé pour faire prendre son commis, iceluy estant tel que ensuit :

*Manifeste de M. de Ville-roy.*

Le 22 d'avril 1604, Descartes estant en poste, rencontra le sieur de Ville-roy en carrosse, entre Juvisi et sa maison, et l'ayant salué, le pria de le suivre jusques là où il alloit coucher; où estans arrivez, Descartes luy fit voir tant de preuves de la trahison de L'Hoste, son commis, qu'il jugea l'advis estre veritable sans en douter. Le lendemain, 23 avril, le sieur de Ville-roy arriva à Fontaine-bleau, environ les dix heures du matin, et fit entendre au Roy la trahison de son commis; le suppliant de vouloir ouyr sur cela, dés le jour mesme, Rafis et Descartes qui l'accusoient, et que ce fut en lieu secret, afin que nul ne les vist. Ce qui fut fait, le sieur de Ville-roy estant demeuré aupres du Roy jusques à ce qu'il se mist à table, entre midy et une heure; puis luy sortant du chateau pour aller en sa chambre, il vid arriver au bureau de la poste deux courriers vestus à l'espagnole, qu'il commanda à Montagne d'observer, et luy s'en alla disner. Le Roy l'envoya querir, luy estant encore à table, et trouva que le Roy avoit desja disné, et estoit dans la gallerie de la basse-court, ayant desja ouy Rafis, touchant la trahison de son commis, auquel Sa Majesté fit plusieurs autres questions, present ledit sieur de Ville-roy, et commanda ausdits Rafis et Descartes de s'en retourner et se garder d'estre reconnus, puis sortit de la gallerie pour aller prendre la botte, et demeura ledit sieur de Ville-roy aupres de Sa Majesté jusques à ce qu'elle fust montée à cheval, et luy se retirant en sa chambre, il ne fut pas plutost en son cabinet, que l'evesque de Chartres, accompagné de plusieurs autres, y entra pour luy parler des ceremonies de l'ordre de la Jarretiere, et dura leur conference assez long-temps.

Si tost qu'il fut sorty, Descartes y entra qui dit au sieur de Ville-roy que L'Hoste, son com-

mis, estoit arrivé de Paris, en poste, avec Desnots, qu'il l'avoit entretenu et trouvé tout estonné, luy ayant dit qu'il estoit arrivé deux courriers espagnols, et demandé s'il ne les avoit point veus, puis luy avoit dit que, ne voulant pas que M. de Ville-roy le vist les bottes aux jambes, il s'en alloit débotter, et que n'ayant mangé depuis estre party de Paris, il vouloit aller en un cabaret pour trouver à disner, où il s'estoit offert de l'accompagner; mais qu'enfin, au lieu d'aller au cabaret, il estoit tourné tout court et entré en sa cuisine pour y demander à manger, et que ledit Descartes, le voyant là, estoit monté en sa chambre pour l'en advertir; mais que l'evesque de Chartres estant avec luy, il n'y avoit pas osé entrer. Ledit sieur de Ville-roy, entendant ce que dessus, partit aussi-tost de son cabinet pour aller prendre L'Hoste, et s'en alla au logis du Roy prier le sieur de Lomenie de l'assister en ce qui se passeroit, envoyant chercher le lieutenant du grand prevost; et cependant commanda à son maistre d'hostel d'aller trouver ledit L'Hoste, de demeurer aupres de luy et de ne l'abandonner point qu'il ne l'eust envoyé querir, sans luy en dire la cause. Du Broc, l'un des lieutenans du grand prevost, estant arrivé en la gallerie qui est pres de la chambre du Roy, ledit sieur de Ville-roy present, ledit sieur de Lomenie luy dit, de la part du Roy, qu'il allast prendre ledit L'Hoste en son logis, et dautant qu'il luy fit responce qu'il ne le cognoissoit point, il luy dit qu'il s'allast promener par la basse court du chateau, et qu'il arrestast celuy qui passeroit et seroit accompagné d'un de ses lacquais, par lequel il l'alloit envoyer querir, ainsi qu'il fit à l'heure mesme, luy disant qu'il trouveroit son maistre d'hostel avec luy. Et sur cela, lesdits sieurs de Ville-roy et de Lomenie s'en allerent en la grande gallerie pour voir faire cette capture des fenestres d'icelle; mais ledit sieur de Ville-roy voyant que ledit lacquais tardoit trop à venir et que son maistre d'hostel estoit passé seul par ladite basse-court, sans ledit L'Hoste, il soupçonna incontinent ce qui estoit advenu, à sçavoir, que ledit L'Hoste s'en estoit fuy d'efroy, ce qui fut aussitost verifié. Et à l'instant il dépescha des courriers et lettres de toutes parts qui ne le trouverent pas, que noyé pres du Bac à Fay; qui est représenter au vray ce qui s'est passé en l'évasion et fuite de L'Hoste, dont ledit sieur de Ville-roy ayt eu cognoissance.

Fait à Fontaine-bleau, le 3 de may 1604.

DE NEUF-VILLE.

## CHAPITRE CXXXIII.

*Lettre de Villeroy à Rosny sur la trahison de L'Hoste, et sur diverses affaires.*

Quelques jours apres ces affaires de L'Hoste, ainsi passées comme il a esté dit, vous receustes une lettre de M. de Ville-roy, pour responce à celles que vous aviez escrites au Roy et à luy, de laquelle la teneur ensuit :

*Lettre de M. de Ville-roy à M. de Rosny.*

Monsieur, j'ay leu au Roy vostre lettre de lundy; il m'a commandé d'y respondre pour luy, ainsi que vous entendrez par la presente; mais, devant que d'y entrer, il faut que je vous remercie de l'assurance qu'il vous plaist me donner de la continuation de vos bons offices, et de l'excellent et tres-prudent conseil que vous m'avez donné par celle qu'il vous a pleu m'escire, lequel je mettray peine de suivre, car je donneray ordre que mon desplaisir, fondé sur la desloyauté d'un autre, et mon malheur ne retardera le service du Roy en ce qui dépend de moy; vous demeurant obligé du tesmoignage d'amitié que vous m'avez départy en cette affliction et disgrâce, ainsi que j'ay appris tant par vostre lettre que par ce que mes amis m'en ont mandé. J'ay dit au Roy ce que vous m'avez respondu touchant Saint Denis Mailloc; Sa Majesté dit que s'il prenoit conseil d'aller servir ses amis et non les autres, que ce seroit le moyen d'exciter sa bonté et misericorde en son endroit, et de sortir, avec le temps et vostre recommandation, des peines ausquelles il se retrouve. Partant elle dit que vous pouvez luy donner ce conseil, et, s'il le suit, qu'il s'en trouvera bien. J'ay leu aussi à Sa Majesté les lettres du sieur Constant, que je vous renvoye; elle dit que c'est tousjours le stile de M. Constant, qui prend les impressions et les raisons du dernier qui parle à luy, escrivant mollement de toutes choses, et voulant donner en payement la monnoye et les paroles qu'il a receuës des autres. Sa Majesté desire que l'on verifie la perte de ce premier paquet qu'il vous escrit avoir confié et remis au maistre de la poste de Poitiers; car elle croit, s'il a esté desrobé, que M. de la Trimouille l'aura fait faire, pour decouvrir ce que M. de Parabelle et luy escrivoient. Davantage Sa Majesté dit que vous devez vous souvenir de l'advis que du Maurier vous a donné du conseil pris par le dit sieur de la Trimouille, de vous monstrier de l'amitié et confiance, afin de vous jeter en ombre avec Sa Majesté, car elle a opinion qu'ils suivront entierement ce dessein; mais elle croit qu'il leur réussira aussi mal tant en vostre en-

droit, qu'elle vous assure qu'il fera au sien, par le bon ordre qu'elle et vous y donnerez.

Sa Majesté a considéré ce que vous luy avez escrit sur la trahison de L'Hoste. En verité, estant jeune comme il estoit, je ne devois pas le tenir pour prudent, aussi je ne l'employois comme tel, mais pour sa fidelité, me representant les obligations qu'il m'avoit. Je suis bien contrainct encores me commettre et fier en d'autres, pour les dépesches du Roy qu'il faut transcrire et faire chiffrer et déchiffrer, ausquels je n'ay tant d'occasion de me fier que j'en avois en cestuy-cy. Pour moy, je sçay peu de remedes pour me garantir d'une pareille desloyauté, quand ils seront si mal-heureux que de se resoudre de la commettre, qui sera doresnavant ma plus grande crainte et inquietude, tant qu'il plaira à Sa Majesté se servir de moy. J'ay desja changé une partie de mon chifre, et pourvoiray au reste à mesure que j'escriray à nos ambassadeurs. Le Roy a bien remarqué ce que vous avez entendu luy remonstrer par vos lettres, sur les inconveniens qui peuvent advenir à son service, de la cognoissance qu'a l'Espagnol de ses intentions en son endroit. Quand vous dites qu'il faut à la resolution de telles choses appeller au conseil, pour la premiere partie, la cognoissance de nous mesmes et de notre inclination particuliere, pour la raison que vous luy avez representée à la suite de ce propos; sur cela, Sa Majesté m'a donné charge vous escire qu'elle n'a oublié ce que vous luy en dittes au dernier voyage que vous avez fait icy, dont elle dit n'estre pas demeurée d'accord du tout avec vous; mais elle veut que vous croyez qu'encor qu'elle prenne grand plaisir à la chasse et à ses bastimens, elle ne laisse de penser jour et nuict à ses affaires, et principalement à celles qu'elle prevoit devoir avoir à demesler avec ses voisins, et spécialement avec l'Espagnol, duquel elle a esprouvé et cognoist la mauvaïse volonté.

Je ne vous diray point les propos qui se sont passez sur cela entre Sa Majesté et moy, la Reine seule estant presente, car il y auroit trop à escire; mais Sa Majesté m'a commandé vous faire sçavoir qu'elle est resoluë de penser et pourvoir à ses affaires avec plus d'attention, soin et diligence que jamais, recognoissant ne pouvoir long-temps subsister avec ses voisins, aux termes ausquels elle se retrouve avec eux, et desire en deliberer et conferer avec vous et avec messieurs de son conseil, avec lesquels elle a accoustumé de traiter de telles affaires. C'est pourquoy elle seroit tres-ayse, si celles que vous avez par delà pour son service vous le peuvent permettre, que vous vinssiez tous icy lundy prochain (elle entend



monsieur le chancelier avec messieurs du conseil ordinaire des finances), voulant aussi bien adviser avec eux et vous ce qu'il faut faire pour faciliter le voyage de Provence, auquel elle monstre plus d'inclination que jamais, et dit qu'il suffira que vous partiez pour aller en vostre gouvernement au mesme temps qu'elle partira pour faire les susdits voyages; car elle fait estat de s'arrestier quelques jours à Pougues, pour donner ordre à sa santé et boire des eaux, ce qui vous donnera loisir de la venir joindre au rendez-vous qu'elle vous donnera devant que vous partiez.

Sa Majesté m'a commandé vous envoyer la lettre du sieur de Montalan, adressante à M. de Souvray, que vous trouverez avec la presente, par laquelle vous verrez que M. de la Trimouille pense bien à autre chose qu'à la douleur de ses gouttes et à se justifier en son endroit. Sa Majesté m'a dit avoir parlé à Armaignac de cette pratique avec madame de Chavigny, dequoy il l'a recognu surpris et estonné, ce qui luy a fait croire qu'elle est veritable, et n'en est pas contente comme elle est de ce que vous avez fait payer à Rafis les trois mille livres qu'elle a donnez, et à Descartes les quinze cens soixante livres avancez par M. de Barault; mais il est raisonnable encore de faire rembourser ledit Descartes des frais qu'il a faits pour amener icy ledit Rafis, et pour venir luy mesme trouver Sa Majesté, suivant les ordonnances qui luy ont esté baillées, car il ne doit porter lesdits frais. Sadite Majesté a esté bien aise aussi que vous avez pourveu au payement du dernier quartier de l'estat de M. de Barault, ainsi que vous luy avez escrit. Elle a fort considéré et loué vostre advis sur le point du commerce d'Espagne et l'imposition de trente pour cent; car elle dit qu'elle ne doit ceder à l'opiniastreté espagnole, et la rechercher la premiere de s'en départir; et d'autant plus qu'elle estime qu'elle n'y gagneroit rien pour ce sujet non plus que pour sa reputation; joint qu'elle les a fait rechercher huit mois devant de descharger ses sujets de ladite imposition, comme intolérable avec le trafic, devant que d'avoir fait ladite ordonnance, sans y avoir rien gagné, et n'avons jamais ouy parler de l'offre qu'ils disent avoir faite de consentir que les permissions se donnassent à Calais, comme le secretaire pourra dire à M. de Barault, lequel aussi l'eust sceu le premier, s'ils eussent fait telle ouverture.

Nous avons outre cela souvent prié le Pape de s'entremettre pour accommoder cette affaire; il en a aussi esté parlé à son nonce residant en Espagne, mais en vain, pour le peu d'esgard que lesdits Espagnols y ont voulu avoir. Toutesfois s'ils offrent maintenant, comme nous avons fait,

d'entrer en reglement pour ce regard, Sa Majesté ne refuseroit d'y entendre, ainsi qu'elle a tous-jours déclaré, et est mesme porté par son ordonnance. Cependant elle dit qu'il faut pourvoir seulement aux contraventions d'icelle, ainsi qu'elle vous a mandé et avez delibéré, approuvant grandement que vous y employez le sieur de La Fond, car elle est assurée qu'il servira tres-bien.

Quant à la punition qu'il a convenu faire du corps de ce traistre et de ce qui en dépend, M. de Gesvre ayant représenté à Sa Majesté les lettres de monsieur le chancelier, et des advis du conseil, elle a commandé la lettre à monsieur le chancelier, que je luy envoie par ce porteur; et parce que vous la verrez, je ne vous en feray reditte pour vous recommander de sa part, derechef, l'eschange du comté de Saint Paul qu'elle affectionne grandement pour les raisons qu'elle vous a escrites. Monsieur, le Roy ne m'a permis d'ecrire à autre qu'à vous du desir qu'il a de faire venir icy messieurs du conseil, voulant avoir sur ce vostre advis devant que de s'en declarer à autre. Monsieur, le Roy m'a mandé, par M. de Lomenie, ainsi que j'escrivais la presente, d'envoyer un courrier à Poitiers, au maistre de la poste, pour sçavoir s'il a eu le paquet de M. de Parabelle et Constant, que l'on dit estre esgaré, et ce qu'il est devenu. Sa Majesté dit aussi qu'il faut qu'elle fasse icy une diette devant que d'en partir, pour assurer sa santé, et que c'est pour cela qu'elle veut vous faire venir icy avec messieurs du conseil.

De Fontaine-bleau, ce 28 avril 1604.

DE NEUF-VILLE.

## CHAPITRE CXXXIV.

*Soupçons du Roi contre la marquise de Verneuil. Sa manière de vivre avec elle. Rosny se mêle malgré lui de cette intrigue.*

En suite des malcontentemens cy-devant recitez, que le Roy avoit eus de madame de Verneuil, pour luy avoir parlé arrogamment, et de la Reine, sa femme, en termes fort peu respectueux, il recevoit tous les jours nouveaux advis, fort bien circonstanciez, qu'elle prestoit non seulement les oreilles, mais aussi le cœur à la plus-part des trames et menées qui s'ourdissent contre sa personne et son Estat, ausquels il adjoystoit d'autant plus facilement foy, qu'elle témoignoit un plus grand refroidissement d'affection envers luy, sous des pretextes recherchez de devotion et scrupules de conscience qu'il disoit sçavoir bien qu'elle n'avoit nullement en l'ame; mais qu'elle en usoit ainsi, soit à cause de quel-

ques nouvelles amours qui la dominoient, soit qu'elle eust en l'esprit quelque fantastique dessein, à la persuasion d'autrui ou pour des haynes et despits secrets et cachez.

Quoy que ce soit, ces deux esprits qui ne pouvoient vivre l'un sans l'autre, ny compatir l'un avec l'autre, entrèrent dès lors en de telles aigreurs, que nous doutons bien fort qu'elles n'ayent outrepassé, d'un costé, la prudence, et de l'autre, le devoir et la raison : de toutes lesquelles particularitez nous ne discourerions pas à tastons ny en enigme, comme nous sommes contrains de faire, si vous nous eussiez voulu ayder de tous les memoires et lettres, tant du Roy, d'elle, que de vous, lesquelles nous scavons fort bien estre parmy vos papiers, ne s'estant quasi rien passé en tous ces intrigues d'amourettes, dont vous n'avez eu entiere cognoissance. Mais vous avez gardé un tel silence és choses plus importantes, de crainte de desplaire ou de nuire au Roy, que nous n'en pouvions raconter que ce que nous vous en avons oüy dire en passant, comme à bastons rompus, ou appris d'autres par cy par là, ou que nous en avons veu et entendu lors que vous nous meniez avec vous pendant l'employ de ses affaires, ou par le contenu de quelques lettres du Roy et d'elle, dont nous trouvâmes moyen de retirer quelques copies en travaillant aux inventaires de vos papiers, desquelles la premiere du Roy est telle :

*Lettre de la main du Roy à M. de Rosny.*

Mon amy, Sigognes vous dira mon intention pour ce que je desire que vous disiez à madame de Verneuil, outre ce que je vous dis dernièrement estant en ce lieu, mieux que je ne la vous scaurois escrire; car le discours en seroit trop long : mais en un mot, *Aut Cæsar, aut nihil*. Je desirerois faire un voyage à Paris; mais je voudrois que le fait des bagues de feuë ma sœur fust dépesché devant. Adieu, mon amy que j'ayme bien; je me porte bien.

De Fontaine-bleau, ce 14 d'avril 1604.

HENRY.

Suivant cette lettre, vous allastes et vinstes plusieurs fois au logis de madame de Verneuil. Or, combien que dès le commencement vous eussiez fait tout ce qui vous avoit esté possible pour ne vous point entremettre de telles affaires, tant pource que le sujet ne vous agreoit pas trop, que pour les espines que vous craigniez de rencontrer au démeslement d'icelle, neantmoins le Roy vous en fit tant d'instance et avec de telles adjurations, que, ne vous en estant peu empescher sans l'irriter, vous vous resolustes de ne rien dire, escrire, ny faire en cette entremise, qu'avec

grande circonspection et precautions contre tous accidens, dont bien vous servit; et dirons de cecy ce que nous vous en avons ouy dire assez haut à madame de Verneuil mesme : car, comme le Roy vous eust donné charge, outre cette lettre cy-devant, de porter plusieurs paroles de bouche à ladite dame, en tirer de mesme responce et la luy escrire, vous eustes apprehension, voyant que les repliques estoient en tels termes, qu'apparemment elles pourroient engendrer des despits, des plaintes et des reproches d'un costé, de l'autre des regrets, des repentirs, et ensuite d'iceux, des desadveux et denegations de les avoir tenus; et pour precaution du dernier, si tost que vous eustes escrit vostre lettre au Roy, pour luy rendre compte de ce que vous aviez dit et que l'on vous avoit respondu, vous envoyastes l'un de nous vers madame de Verneuil, luy porter une lettre de vous, toute ouverte, où il y avoit ces mots :

*Lettre de M. de Rosny à madame de Verneuil.*

Madame, j'escris en substance au Roy tous les propos qui se sont tenus entre vous et moy, dont je vous envoie la lettre mesme (par cét honneste homme en qui je me fie) toute ouverte, mais recouverte d'une enveloppe bien cachetée, vous suppliant de la voir, de me mander si j'auray bien exprimé vos conceptions, tiré nettement le sens de vos paroles, si vous y trouvez à augmenter ou à diminuer, ou s'il y a quelques particularitez sur lesquelles vous ne vous soyez point absolument r'avisée, comme ce ne seroit pas peut estre le pis que vous pourriez faire, mon advis estant que vous y devez bien penser avant que je depesche mon courrier, ce que je feray si tost que j'auray receu vostre responce, desirant qu'elle soit si prudente que vous ayez retranché tout ce qui peut estre trouvé mauvais d'une part, et apporter du repentir de l'autre. Je vous baise les mains et suis vostre serviteur.

De l'Arsenac, ce mardy à midy.

Avec cette lettre, sans qu'elle fust cachetée, vous en baillastes à celui que vous envoyez, une autre telle qu'il a esté dit par cette-cy, luy defendant expressément de se charger de vous rapporter aucune responce de bouche de sa part, mais faire en sorte que ce fust par escrit : enquoy il jugea bien apres, par le succez des choses, que vous n'estiez pas ignorant des humeurs de la dame; car ayant leu vostre lettre si tost qu'il luy eut baillée, puis ouvert le papier cacheté, leu et releu par trois fois ce qui estoit escrit dedans, quoy qu'il contint une feuille de papier escrete de tous costez, elle luy dit : « Mon amy, je vous prie de dire à M. de Rosny que j'ay

« leu et releu par trois fois la grande lettre qu'il  
 « m'a envoyée dans une enveloppe bien cachetée,  
 « laquelle je luy renvoye de mesme et le remer-  
 « cie. — Madame, luy dit il lors en l'interrom-  
 « pant, je vous supplie de ne me charger d'au-  
 « cune parole pour porter à mon maistre, d'autant  
 « que j'ay la memoire si mauvaise, que j'oublie  
 « tousjours la moitié de ce que l'on me dit, ou  
 « luy donne tout un autre sens; dequoy il m'a  
 « tancé tant de fois que j'ay juré de ne me char-  
 « ger jamais de luy porter parole de consequence;  
 « et partant vous suppli-je de luy escrire tout  
 « ce qu'il vous plaira, et je luy porteray vostre  
 « responce fort fidelement. » Elle et luy con-  
 « testerent long-temps là dessus; mais enfin il  
 obtient une lettre de sa main; car elle l'escrivist  
 devant luy telle que s'ensuit :

*Lettre de madame de Verneuil à M. de Rosny.*

Monsieur, j'ay veu la lettre qu'il vous a pleu  
 m'envoyer, laquelle je trouve telle que je l'eusse  
 sceu desirer, dont je me sens extrêmement vostre  
 obligée, et vous supplie de croire que je seray  
 eternellement vostre servante. Il me semble qu'il  
 n'y a qu'une chose qu'il peut trouver rude, qui  
 est ce que vous luy dites, que je le supplie de  
 trouver bon de me voir quelques-fois, mais sans  
 aucune privauté ny familiarité particuliere. Je  
 vous conjure de mettre que je le supplie qu'il ne  
 m'en demande point qui me puisse nuire; cela  
 se peut raccommoier en effaçant un mot, ou  
 nommant celle que vous sçavez, comme vous  
 sçauerez bien faire s'il vous plaist; vous baisant  
 tres-humblement les mains, et vous supplie de  
 me pardonner si j'en use si librement; mais je  
 cognois son humeur telle, que ce seul mot le  
 feroit monter aux nuës; car tout ce qui se peut  
 de familiaritez, il les aura de moy, lors que je  
 seray hors de crainte d'offenser et d'estre offen-  
 sée. Je ne vous puis dire autre chose, sinon que  
 je me sens si obligée en vostre bonté qu'il ne se  
 peut davantage, que vous jurer que je suis  
 vostre servante de cœur et d'affection, vous don-  
 nant le bon soir.

Ayant baillé cette lettre à celuy qu'aviez en-  
 voyé et à iceluy rendu le papier qu'il luy avoit  
 porté, aussi bien envelopé et cacheté qu'elle l'a-  
 voit receu de luy, il vous vint retrouver, mit le  
 tout en vos mains, et vous conta tout ce qui  
 s'estoit passé entre eux. Puis ayant leu sa lettre,  
 ouvert le papier cacheté et remis quelques mots  
 dans l'escriure, vous le refermastes, et le len-  
 demain, dès la pointe du jour, vous le rebail-  
 lastes à celuy qui l'avoit apporté, disant : « Il y  
 « en pourroit bien avoir qui, pour vouloir trop  
 « mettre en prix le mestier, faire les rusées et

« les rencherries, et vouloir trop de conditions,  
 « se trouveront peut-estre dans les repentailles, »  
 et luy commandastes de le porter au Roy, en  
 diligence, comme il fit aussi-tost. Il n'a jamais  
 peu sçavoir ce que contenoit cette grande lettre;  
 mais l'ayant baillée à Sa Majesté, elle la leut  
 par deux fois tout au long, avec demonstration  
 de despit et de courroux; puis, apres avoir dit  
 ce peu de paroles comme entre ses dents, les-  
 quelles il entendit bien neantmoins, « Hé bien !  
 « elle le veut et moy encore plus, à quoy je  
 « m'asseure qu'elle ne s'attend pas et se trouvera  
 « prise en ses propres finesses, » il demanda de  
 l'ancre et du papier, et vous escrivit une lettre  
 qu'il luy bailla, sans dire autre chose, sinon :  
 « Portez cette lettre à M. de Rosny, en diligence,  
 « et luy dites que je me recommande à luy. »  
 Or ayans trouvé moyen de recouvrer cette dé-  
 pesche, nous la coppiasmes telle que s'ensuit :

*Lettre de la main du Roy à M. de Rosny.*

Mon amy, puisque madame de Verneuil est  
 resoluë à ce que vous me mandez, je le suis  
 aussi à ce que je vous ay dit. Lundy je luy man-  
 deray mon intention, et feray voir que j'ay plus  
 de puissance sur moy que l'on ne dit, et ne  
 pense pas que cette nouvelle ne trouble ses pen-  
 sées, ce que je ne veux faire ces bons jours.  
 Adieu, je vous ayme bien et me porte bien,  
 Dieu mercy.

De Fontaine-bleau, ce 16 avril 1604.

HENRY.

Je ne sçay pas ce qu'il y avoit dans vos let-  
 tres, car nous ne les avons jamais veuës que  
 par dessus, ny ce qui se passa entre madame de  
 Verneuil et le Roy lors qu'il vint à Paris, car ils  
 ne nous appellerent pas à leurs contestations,  
 mais bien sçavons nous qu'un matin Sa Majesté  
 vint à l'Arsenac, ayant le visage tout refrongné  
 et chagrin, et vous ayant trouvé dans la fon-  
 derie, qui ordonniez de ce qu'il falloit pour faire  
 un fourneau d'alléement de metaux, il vous prist  
 par la main et vous dit : « Allons nous prome-  
 « ner en vostre grande allée du balcon, car j'ay  
 « bien des choses à vous conter, et faut qu'il y  
 « ait bien de l'invention et du mensonge d'un  
 « costé ou d'autre. » Vous fustes plus d'une grande  
 demie heure ensemble en de grandes contesta-  
 tions, au moins comme nous le jugions tous par  
 vos gestes, car des paroles nous ne les pouvions  
 pas entendre, d'autant que le Roy nous avoit fait  
 demeurer fort loing; lequel tout d'un coup vous  
 quittastes sur le balcon qui donne sur la riviere,  
 vous en allastes en vostre cabinet en diligence  
 et revinstes de mesme apportant un petit papier  
 en vostre main que vous baillastes au Roy, qui

le leut par deux fois, et puis vous en revinstes peu apres ensemble et le conduisistes jusques en son carrosse, sans que vous dissiez aucune chose ny l'un ny l'autre, reservé qu'en le montant en carrosse et levant la portiere, il vous dist : « Adieu, mon amy, faites depescher vostre fourneau d'alléements, aimez moy bien, car je vous aime comme un tres-homme de bien, en la bouche duquel je voy bien qu'il n'y a point de fallace. Aussi quelque chose que je vous aye dite en arrivant, si ne pouvois-je croire que la malice vint de vostre costé, cognoissant la franchise de vostre cœur et l'esprit extravagant et broüillon à qui nous avions à faire tous deux, et neantmoins vous avez esté bien advisé de prendre une telle precaution que vous me l'avez monstrée contre ses ruses. » Or, comme le Roy s'en fut allé, vous tirastes à part celuy de nous que vous aviez envoyé vers madame de Verneuil, et luy dites : « Croyez que j'ay plus fait pour vous que vous ne pensiez lors que je vous deffendis tant expressément de me rapporter aucune parole de la part de madame de Verneuil; car l'on n'eust pas adjousté foy à vostre dire ny à tous vos sermens, comme l'on a fait à sa lettre que vous me baillastes, par laquelle j'ay suffisamment verifié au Roy que je ne luy avois rien escrit d'elle qui ne fust vray et qu'elle n'eust reconnu pour tel : car sans cela cette maligne guespe nous eust tous deux piquez de son esguillon, ayant quasi tout desnié ce qu'elle m'avoit prié d'escire comme le fonds de son cœur, voyant que le Roy l'avoit pris tout d'un autre biais qu'elle ne s'es-toit imaginé : aussi crois-je au moins, s'il fait ce qu'il m'a dit, qu'il luy va bien laver la teste. » Qui est tout ce que nous avons peu scavoir de cette affaire et de ses suites, jusques à ce que le Roy la fist arrester prisonniere pour raisons d'Estat, comme il en sera dit quelque chose cy-apres.

#### CHAPITRE CXXXV.

*Recherche sur les rentes. Un des secrétaires de Rosny envoyé en Poitou pour empêcher le commerce avec l'Espagne.*

Or, laissant jusques à une autrefois le discours des broüilleries de madame de Verneuil, nous vous ramentevrons comme, ayant durant les années passées grandement travaillé à la recherche des bonnes et mauvaises rentes, et fait voir au Roy par bons extraits, pieces et memoires authentiques tirez des chambres des comptes, cour des aydes et autres lieux, qu'il y avoit

moyen, sans faire aucune injustice, de tirer de cette recherche un profit de six millions pour Sa Majesté, elle n'eust plus besoin d'estre sollicitée pour y apporter son autorité; car elle vous ramentevoit tousjours cette affaire par ses lettres, dont nous en insererons icy une seulement, de laquelle la teneur ensuit :

#### *Lettre du Roy à M. de Rosny, contre-signée.*

Mon cousin, je dois preferer la conservation de ma santé à toute autre consideration et affaire; c'est pourquoy estant conseillé par mes medecins de commencer une diette mardy ou mercredy, je ne dois la retarder; et quand je l'auray commencée, je ne pourray l'interrompre que je ne l'aye parachevée : autrement elle seroit inutile. Cela estant, je ne pourrois aller à Paris dans cinq ou six jours, comme vous m'avez escrit par vostre derniere lettre que vous estimez qu'il seroit à propos que je fisse pour favoriser et autoriser par ma presence le fait des rentes : mais estant la declaration pour les commissaires verifiée en la chambre des comptes et en la cour des aydes, comme elle a esté au parlement, nous ne laisserons pour cela de nommer les deputez des compagnies qu'il y faut employer, les faire solliciter qu'ils s'assemblent, et en un besoin les faire venir icy pour recevoir mon commandement, en attendant que je puisse moy-mesme aller là, comme je feray volontiers apres ladite diette pour y mettre la derniere main, car je ne plaindray point mes peines pour un si bon œuvre. Cependant, monsieur le chancelier, vous et ceux de mon conseil ordinaire des finances venans icy, je resoudray avec vous ce qu'il faut faire pour mon voyage de Provence (lequel je ne veux perdre l'occasion de faire cette année), où nous delibererons encore plus commodément et avec moins d'interruption et de divertissement qu'ailleurs de plusieurs autres affaires d'importance, qui ne se peuvent traiter et conclurre sans moy. Nous y parlerons aussi tant de vostre voyage de Poictou, pour lequel je vous donneray le temps que nous jugerons necessaire, afin de le rendre utile, que de l'advis que Montauban nous a donné; des lettres de Constans et du sieur de Parabelle, de la proposition du comte de Sainte Paul et du fait qui concerne le sieur de Villars. Cependant vous m'avez fait plaisir de n'avoir permis que l'arrest qui a esté donné pour le taillon de Toulouse, estant contraire à l'accord que vous savez que j'ay fait avec ceux du pays de Languedoc, ayt esté delivré; car je ne veux qu'il ayt lieu, d'autant qu'il faudroit que je rendisse l'argent que j'en ay receu et ma femme aussi pour le

bastiment de Monceaux, chose que je n'entends pas faire; et vous diray qu'il me semble que l'on ne devoit sans vous, resoudre ledit arrest en mon conseil, sçachant comme l'on sçayt, combien j'ay affectionné ledit accord. Quant au differend qui est entre Montauban et Droüart, tout bien considéré, je desire preferer le premier à l'autre, cestuy-cy estant poussé et assisté des anciens receveurs, lesquels nous ne devons laisser entrer en ce maniment pour les raisons qui nous ont meu de les en depousser: il me semble aussi que c'est vostre avis. Partant vous pouvez conclure ces deux derniers affaires devant que de partir, et suffira que vous soyez icy mardy ou mercredy et ceux de mondit conseil des finances; mais aussi je vous prie vous y rendre tous en ce temps là, et quand vous y aurez demeuré sept ou huit jours, vous pourrez retourner à Paris, pour achever ce que vous y aurez laissé imparfait. Je vous promets que je vous y suivray si tost que j'auray fait ladite diette, laquelle, comme j'ay dit, je ne dois reculer, puis que mesdits medecins la jugent necessaire pour assurer ma santé, qui est à present tres-bonne, graces à Dieu. Vous ferez donc entendre mon intention à mondit sieur le chancelier et aux autres de mondit conseil des finances qui y sont ordinaires; car je ne veux pas qu'il en vienne d'autres, afin que mondit sieur le chancelier y donne ordre. Je prie Dieu, mon cousin, qu'il vous ayt en sa sainte et digne garde.

Escrit à Fontaine-bleau, le 30 d'avril 1604.

HENRY.

Vous receustes aussi une autre lettre de M. de Villeroy, de sa propre main, parlant des mesmes choses, de laquelle la teneur ensuit:

*Lettre de M. de Ville-roy à M. de Rosny.*

Monsieur, le Roy fait responce à vostre lettre, et s'il n'eust esté obligé à cette diette il s'en fust allé à Paris pour les raisons que vous luy avez escrites; mais quand il vous aura tenu icy cinq ou six jours, il vous permettra de retourner par delà et s'y acheminera apres. Il dit plus haut que de coustume, qu'il ira cette année en Provence, mesmes il a voulu le faire dire aux ambassadeurs, afin qu'ils se preparent pour l'y accompagner: quand vous serez icy il s'en resoudra encores mieux.

Il est vray que la lettre du Roy portée par Descartes et les ordonnances qu'il vous a représentées sont diverses, mais c'est ma faute; car le Roy a entendu que M. de Barault fust remboursé de quinze cens soixante livres avancez à Basle, devant que de partir de Valadolt, et,

outre cela, des frais de son voyage, ainsi qu'il est porté par l'ordonnance particuliere que je luy ay expediee avec l'acquit des quinze cens soixante livres, au moyen dequoy je vous supplie de l'en faire payer. Je vous renvoye la lettre de M. de Parabelle, et vous supplie de croire que vous ne pouvez obliger personne de vos bons offices en la defence de son innocence, qui le reconnoisse plus sincerement et fidellement que je feray, en vous obeyssant et servant en toutes occasions. Je salue vos bonnes graces de mes humbles recommandations, et prie Dieu, monsieur, qu'il vous conserve en bonne santé.

De Fontaine-bleau, le dernier jour d'avril 1604.

DE NEUF-VILLE.

Le Roy, depuis la cognoissance qu'il avoit eue (par les diverses menées et pratiques des Espagnols à l'endroit de plusieurs de ses sujets et sur des villes de son royaume, et sur tout qu'ils avoient cy-devant incité, sous promesses d'estre assistez de leurs armes et deniers, les ducs de Savoye et de Biron, comte d'Auvergne, mareschal de Bouillon et autres dont il a esté parlé cy-devant, à tout ce qu'ils avoient entrepris contre sa personne et son Estat) que le Roy d'Espagne n'observoit point sincerement la paix de Vervins ny la foy et la parole qu'il avoit donnée sur icelle; Sa Majesté, disons nous, fondée sur toutes ces raisons et causes tres-justes, ayant, par sa grande prevoyance et singuliere prudence, assisté tous les ans messieurs les Estats des provinces unies des Pays-Bas, de cinq ou six cens mille escus, d'hommes et munitions, et par ce secours fait consommer plusieurs dizaines de millions d'argent au roy d'Espagne, il estoit tombé en si grande indigence et necessité, que recherchant à cette occasion toutes sortes de moyens et d'expediens, tant injustes ou de difficile execution pussent-ils estre, pour recouvrer deniers, il avoit, dès l'année passée, estably en Espagne et és Pays-Bas une imposition de trente pour cent sur toutes les denrées et marchandises qui viendroient de France en ses pays, ou sortiroient d'iceux pour entrer en France, qui estoit une dace (1) tant excessive, qu'elle avoit ruyné tout le trafic, avec de grandes plaintes et incommoditez des sujets des deux royaumes; sur lesquelles le Roy, pour les accroistre à l'endroit de ceux qui estoient cause du mal, ayant defendu absolument tout trafic et commerce és pays du roy d'Espagne et des archiducs, et depuis appris que plusieurs villes et particuliers de son royaume, en mesprisans ces injonctions à cause du grand profit qu'ils en tiroient, ne laissoient pas d'y por-

(1) Impôt.

ter des grains, toilles et autres denrées, desquelles ils avoient le plus de disette, Sa Majesté vous escrivit, par deux fois, d'envoyer quelqu'un de la qualité, capacité et fidélité duquel estant bien assuré vous luy respondissiez, pour cognoistre de telles contraventions, en informer, dresser ses procez verbaux, et vous les rapporter pour y estre pourveu selon qu'il le jugeroit à propos, et sur tout le long des costes maritimes, depuis l'emboucheure de Loire jusques en celle de Garonne, ces rivières comprises, par lesquelles l'on disoit que se commettoient les plus grands abus : en laquelle commission vous employastes le sieur de la Fond, qui estoit à vous, lequel s'en acquitta tant dignement, que le Roy en receut tout contentement, et le trouva si capable, exact et diligent, qu'il vous le demanda pour s'en servir, comme tout cela se verra par des lettres qu'il vous en escrivi depuis ; lesquelles nous insererons dans ces Memoires par l'ordre de leurs dates : car cette affaire ne finit pas là, ains fit beaucoup de bruit, pensa estre cause de troubler toute la chrestienté, passa par les mains du Pape et du roy d'Angleterre, et neantmoins ne pût estre terminée sans vostre entremise, tant la fortune sembloit avoir entrepris de favoriser toutes les affaires où vous estiez employé, comme tout cela se verra cy-apres.

#### CHAPITRE CXXXVI.

##### *Grands projets du Roy. Travail sur les rentes.*

Reconnoissans, par experience, que, quand bien nous ne ferions que continuer comme nous avons commencé, à inserer dans nos Memoires du reste de cette année 1604 et des suivantes, le seul et simple sommaire des actions du Roy et de vous, et les discours importans que vous eustes ensemble sur les occurrences de ces temps-là, que nous nous trouverions engagez dans de si longues narrations qu'elles pourroient devenir ennuyeuses à ceux qui les voudroient lire, voire mesmes les priver des fruits que l'on doit tirer d'une histoire, laquelle, à nostre opinion, ne sçauroit estre trop concise, moyennant qu'il n'y ayt point d'obscurité, qu'elle n'oublie point les desseins formels et les raisons et fondemens, ny les succez bons ou mauvais d'iceux, avec les causes, moyens et procedures qui les ont rendus tels, n'y ayant, selon nostre advis, rien plus impertinent ny qui merite tant d'estre blasmé en tout historien, que de faire de longues narrations, de discourir en philosophe sur toutes les vertus ou les vices qu'il remarque en ceux desquels il fait mention, en politique sur tous les conseils

et resolutions d'Estat qu'il met en avant, et faire l'homme qui a bien feuilleté les livres, en rapportant divers exemples sur les actions des hommes et les accidens des choses dont il luy convient traiter, toutes ces tant diverses sortes de narrations faisant tellement perdre la memoire du fil de l'histoire, que l'on demeure presque entierement privé de la cognoissance d'icelle et des enseignemens qu'autrement il s'en pourroit tirer. Pour lesquelles raisons nous nous contenterons de vous ramentevoir seulement les principales affaires qui ont passé par vostre entremise, les desseins qui ont esté formez sur icelles, quelques choses de leurs fondemens, les succez bons ou mauvais qu'ils auront eus, et de quelles causes ils auront procedé ; et d'inserer, selon les occasions, pour plus ample justification de ce qui en sera dit, des lettres du Roy, de M. de Villeroy et autres à vous adressantes (ayant autant de regret que c'est un grand dommage, tant pour messieurs vos enfans que pour le public, de ce que vous et nous n'avons esté plus curieux de garder coppies des vostres, car l'on y verroit de belles choses et un tout autre stile que celuy des autres), lors que vous estiez absent de Sa Majesté, laquelle ne perdant jamais le souvenir de ce magnifique dessein par vous proposé au roy d'Angleterre, ains essayant de disposer tousjours les choses qui seroient propres à en faciliter l'exécution, il forma lors trois principaux desseins pour le dedans de son Estat, lesquels avoient chacun plusieurs despendances.

Le premier, d'user de tous les mesnages qui se pourroient pratiquer par voye de justice pour assembler thresors, armes, artileries et munitions, et avoir moyen de secourir d'argent ses alliez inalienables qui estoient attaquez, dequoy il vous commist le principal soin.

Le second, pour essayer d'estouffer entierement, en germe et en naissance, le reste des mauvaises semences qu'avoient espanduës dans les cœurs le mareschal de Biron et ceux de son intelligence, et de celles qu'essayoient de semer de nouveau les zelez catholiques d'une part, et les bigots huguenots de l'autre, lesquels Sa Majesté disoit avoir esprouvez estre de telle nature les uns et les autres que, nonobstant toutes leurs devotes mines, grimaces et cimagrées, ils estoient tousjours plutost disposez à troubler et brouiller un Estat, qu'à esclaireir et nettoyer leurs consciences.

Et le troisieme, de prendre une entiere et parfaite cognoissance de toutes les limites, costes et frontieres de son royaume, tant maritimes que terrestres, et sur tout de celles d'où, en l'exécution de son grand dessein, il seroit obligé d'es-

loigner le plus sa personne et ses armées, afin de pourvoir de si bonne sorte à toutes les entrées, advenües et faciles accez d'icelles, que par des diversions importantes il ne pût estre diverty de l'exécution de ses hautes entreprises, et contraint de convertir son auxiliation d'amis en une défensive pour luy mesme. Pour l'acheminement du premier desquels trois principaux projets, Sa Majesté ayant, par plusieurs fois, conféré avec vous et veu divers memoires que vous aviez dressez pour establir de tels reglemens sur la forme de l'imposition, perception et distribution des deniers royaux, que par iceux tout moyen seroit osté à tous financiers de divertir aucuns deniers, ny faire en leurs charges nuls profits sans estre par vous descouverts, en assignant toutes les non-valeurs de l'année courante pour les gages des thresoriers de France de la subsequente (tous lesquels ordres Sa Majesté approuva grandement pour les amenagemens et recouvrements de deniers), vous luy fistes ouverture de neuf sortes d'expediens, afin de les pratiquer selon les temps et les occasions, se gardant toujours bien de les entamer tous à la fois. Le premier desquels fut la continuation de la verification des bonnes et mauvaises rentes, dont il a desja esté parlé cy-devant, et aviez lors dressé des maximes sur lesquelles les commissaires qui seroient établis se devoient regler, que le Roy jugea tres-necessaires, estans telles que s'ensuit :

*Vingt et une maximes ou reglemens proposez au Roy par M. de Rosny, pour estre observées en la verification des bonnes et mauvaises rentes.*

Premierement, que toutes charges ordinaires, de quelques natures qu'elles puissent estre, créées sur les domaines, aydes, gabelles, equivaillans, tailles, cinq grosses fermes, traittes foraines et domainiales, resve, hault passage, impots et billots, fôuages, peages des rivières et entrée des grosses denrées et marchandises, drogueries, espiceries, table de la mer et autres revenus de France, seront payées sur les natures speciales de leur premier hypothecque, sans pouvoir estre rejettées des unes sur les autres, et ce par preference à tous nouveaux acquireurs, lesquels, en cas de prejudice par eux pretendu, se pourvoiront vers le Roy pour leur estre fait droict.

Plus, toutes rentes créées sur lesdits revenus au denier dix ou douze, en vertu des edicts verifiez avant l'an mil trois cens soixante quinze, sans fraude ny déguisement, mais par argent entierement et actuellement desboursé, seront payez des quatre quartiers au denier seize, sur les fonds de leur affectation.

Plus, toutes rentes constituées à un tiers debtes non acheptées d'autrui, lesdites debtes n'estant point plus vieilles que vingt ans auparavant, et dont les acquireurs ont fourny les deux autres tiers en argent contant, seront payées des quatre quartiers sur le fonds de leurs assignations, et ce à raison du denier dix-huict.

Plus, toutes rentes constituées à moitié debtes, en la maniere cy-dessus, seront payées des quatre quartiers sur le fond de leur affectation, et ce à raison du denier vingt.

Plus, toutes rentes constituées à tiers ou moitié debtes vieilles, acheptées ou ramassées d'autrui, seront payées des quatre quartiers sur les fonds de leur affectation, et ce à raison du denier vingt-cinq.

Plus, toutes rentes du grand party de Lyon, pour lesquelles avoit esté composé avec les interessez à cinq pour cent et rachapt de soixante pour cent, et ont esté depuis mises au denier dix ou douze, seront reduites au denier vingt-cinq, et les arrerages receus outre cette proportion, imputez sur le sort principal.

Plus, toutes rentes constituées, d'arrerages de rentes, interests, dons, pensions, gages, recompenses et autres semblables natures, demeureront esteintes, et s'en payera seulement le sort principal, deduit sur iceluy tous les arrerages qui en auront esté perceus.

Plus, toutes rentes créées pour remboursement d'offices de judicature ou autres, desquels lesdits officiers ont apres disposé à leur profit particulier, demeureront esteintes.

Plus, toutes rentes constituées esquelles, par les contracts, l'on aura outre-passé les termes et conditions des edits, seront reduites à iceux, et, pour le surplus, réglées par leurs natures selon les maximes de leurs semblables.

Plus, toutes rentes constituées depuis l'an mil trois cens soixante et quinze, seront reduites, depuis leur origine, à raison du denier dix-huict, sinon qu'il fut bien justifié qu'elles eussent esté créées pour tout argent actuellement desboursé.

Plus, toutes rentes constituées pour payement de gens de guerre estrangers à François, ou autres estant domestiquez ou pensionnaires du Roy, seront reduites au denier vingt-cinq, et deduit sur le principal tout ce qui aura esté receu d'arrerage outre cette proportion.

Plus, toutes rentes constituées pour payement de gens de guerre françois, demeureront esteintes et payées seulement du principal, deduit sur iceluy les arrerages perceus.

Plus, toutes rentes constituées sans edits verifiez, mais seulement en vertu de brevets,

lettres closes ou patentes, seront esteintes et payées du sort principal si les debtes sont jugées bonnes, deduit sur iceluy tous les arrerages perceus.

Plus, toutes rentes constituées en blanc, et dont les arrerages se sont payez et payent encor, en vertu de mandemens ou lettres particulieres, closes ou patentes, seront esteintes et payées seulement du sort principal, deduit sur iceluy les arrerages perceus.

Plus, toutes rentes constituées aux principaux des conseils des roys, qui ont formé ou poursuivy les edits, ou aux officiers des cours souveraines où ils ont esté verifiez, ou aux prevosts des marchands et eschevins des villes, ou aux commissaires establis pour faire les ventes et passer les contracts et verifier les debtes, ou à autres dont ils auront depuis retrocession ou percevront leurs arrerages sous noms supposez, ou sous celuy d'un tiers, seront reglées comme celles de l'article precedent.

Plus, toutes rentes constituées aux villes et communautez pour deniers baillez au Roy, pour emprunts, dons gratuits, immunitéz ou privileges achetez, fortifications, octroys, graces, frais et despences d'entrées, festins, banquets, presens aux enfans de France, princes du sang, gouverneurs des provinces ou autres de semblable nature, seront esteintes, et les arrerages perceus sujets à restitution.

Plus, toutes rentes vendues par decret ou volontairement de particulier à particulier, se pourront amortir au profit du Roy, pour les sommes qu'elles auront esté acquises, dont entreront en payment les arrerages qu'ils auront perceus, outre la raison du denier douze.

Plus, toutes rentes qui auront esté confisquées demeureront esteintes du jour de la confiscation, et les arrerages perceus sujets à restitution, nonobstant tous dons et remises faites par les roys.

Plus, toutes rentes constituées à tiers ou moitié debtes, dont les debtes n'auront esté fournies ou bien seulement en dons, arrerages de pensions ou de rentes, seront esteintes pour les sommes fournies en papiers, et ce qu'ils auront receu d'arrerages desdits papiers, sujets à restitution ou à estre imputez sur le sort principal.

Plus, toutes rentes constituées au lieu de domaine engagé, dont l'acquisition auroit esté defectueuse, seront reduittes en cognoissance de cause, selon qu'il conviendra suivant les maximes cy-devant spécifiées.

Plus, toutes rentes constituées par traittez de paix ou reductions de provinces, villes, communautéz, ou particulier en l'obeyssance du

Roy, seront esteintes, et les arrerages perceus imputez en payment sur la somme principale.

#### *Estat des commissaires.*

Premierement, M. de Rosny, lors qu'il aura loisir.

Plus, messieurs de Chasteau-neuf, Calignon et Jeannin.

Plus, messieurs les president de Thou, de Nicolay et Ambonneau, alternativement, et de Rebours.

Plus, M. Le Gras, thresorier, et Regnouart, greffier.

### CHAPITRE CXXXVII.

*Moyens d'augmenter les revenus du Roi. Objections de Henri IV. Réponses de Rosny. Le Roi projette d'aller en Provence tandis que Rosny se rendra en Poitou.*

Conformément à ce qui a esté dit au precedent chapitre touchant les neuf sortes d'ouvertures par vous faites au Roy pour recouvrer de l'argent, nous viendrons au second expedient par vous proposé, qui fut la recherche de tous les divertissemens faits dans les estats et comptes rendus par tous ceux lesquels ayans de long-temps pris et tousjours continué, mais sous divers noms, les plus grands revenus du royaume, à ferme clause, sous couleur d'un employ de deniers le plus specieux qu'il estoit possible, et puis les ayans fait passer par contens, avoient rendu, par ce moyen, la couronne redevable de plusieurs millions que l'on payoit tous les ans.

Le troisieme fut la revision des comptes de Castille, qui avoit manié les deniers du clergé, sur lesquels il avoit commis plusieurs abus et malversations; dequoy il estoit defféré par quelques evesques, archevesques et cardinaux qui vous en avoient parlé, et depuis mis en main des articles et une requeste signée d'eux, de laquelle la teneur sera inserée en l'année que cette affaire fut poursuivie.

Le quatrieme expedient par vous proposé, fut une recherche generale contre tous financiers, les thresoriers de France y compris, qui sont les plus grands destructeurs des revenus du royaume, lesquels avoient malversé en leurs charges, asseurant Sa Majesté d'un grand denier s'il demeuroit ferme à les faire tous juger diffinitivement sans entrer en aucune composition, ny en exempter un seul par faveur ny importunité.

Le cinquieme, fut une verification exacte



de toutes les alienations du domaine et autres revenus du royaume, desquels plusieurs particuliers jouissent sans tiltre, et les autres à si vil prix, que les acquereurs avoient pû estre rembourser par la jouissance annuelle d'iceluy, qui avoit excédé l'interest de son argent au denier seize; surquoy vous monstrastes au Roy de tres-excellentes maximes à observer pour en tirer un grand profit.

Le sixiesme, fut une verification exacte de la finance, originellement payée par tous les officiers de France, pour la composition de leurs offices venaux, et desquels les deniers estoient entrez aux coffres du Roy, avec resolution de les en rembourser ou faire suppleer la juste valeur.

Le septiesme, fut la continuation du grand mesnage par vous tant utilement commencé, pour l'acquittement des debtes de Suisse, lesquelles, quelques grands deniers que l'on eust employez au payement d'icelles, auparavant que vous fussiez aux affaires, estoient tousjours allées en augmentant au lieu de diminuer, aviez trouvé un expedient pour acquitter huit millions, moitié sur le principal et moitié sur les interests, pour un seul million, et ainsi de tout le surplus desdites debtes.

Le huitiesme fut l'alienation à forfait de tous les domaines et revenus du Roy, qui consistent en menuës parcelles et droicts casuels, et pour lesquels il faut user de recherches, perquisitions et mesnages, ou qui sont sujets à de grandes reparations et entretenemens, et dont il faut faire baulx à ferme sur les lieux, qui sont toutes choses en quoy les thresoriers de France commettent de grands abus et brigandages, ayant verifié, en faisant de dix années une commune, tant desdits revenus que des frais et despences faites pour les faire valoir, qu'il s'en faut plus d'un cinquiesme que le Roy en tire aucune chose, desquels neantmoins, en les vendant, l'on pourroit faire un fonds de plusieurs millions, pour racheter toutes les bonnes rentes constituées au denier dix, ce qui apporteroit une grande discharge aux finances du Roy.

Le neufiesme expedient, fut un party pour lequel vous aviez gens en main, qui offroient de rachepter, pour quarante millions d'or, de tels revenus royaux qu'ils voudroient choisir, moyennant la jouissance d'iceux durant certaines années, à la fin desquelles ils les remettroient entre les mains du Roy, francs et quittes de toutes debtes.

Et le dixiesme, fut les conjunctions de la riviere de Seine avec Loyre, de Loyre avec Saone, et de Saone avec Meuze, par le moyen desquelles, en faisant perdre deux millions de revenus à

l'Espagne et les faisant gagner à la France, l'on faisoit, par à travers d'icelles, la navigation des mers Oceane et Mediterranée, de l'une dans l'autre.

Toutes lesquelles propositions entendues par le Roy, comme c'estoit un esprit merveilleusement vif et prompt, et qui en matiere de comprehensions faisoit de grandes diligences, il vous respondit aussi-tost que vous aviez mis en avant beaucoup de belles besongnes, dont il y en avoit quelques-unes qu'à la verité il n'entendoit pas suffisamment, d'autres dont les imaginations estoient, ce luy sembloit-il, bien vagues, et d'autres dont vous ne tireriez pas de long-temps beaucoup d'argent; voire prevoyoit-il que, pendant une si grande longueur de temps qu'il y faudroit employer, il arriveroit plusieurs accidens qui en aneantiroient la meilleure partie.

A quoy vous repartistes que la pluspart de ce que Sa Majesté avoit dit, pourroit bien devenir veritable, et qu'aussi ne luy aviez vous pas fait telles ouvertures pour les estimer toutes infailibles, ny propres pour en tirer de l'argent comptant, mais comme des mesnagemens à faire en plusieurs années, selon que le temps et l'estat des affaires en pourroient faciliter les moyens, travaillant aux uns plutost et aux autres plus tard, ausquels, pource que vous n'aviez pas le moyen de vaquer seul, dautant qu'il y falloit, en la pluspart d'iceux, employer des gens de robe longue, afin d'y observer les formes de justice, il n'y avoit point de danger de penser de bonne heure à preparer toutes choses, et à choisir des commissaires, afin de les instruire, osant bien respondre à Sa Majesté que si ces affaires estoient poursuivies comme elles meritoient, et non negligées par elle, ny abandonnées de son autorité, que, d'une façon ou d'autre, il s'en retireroit plus de deux cens millions à profit de mesnage; que vous ne laissiez pas d'avoir plusieurs autres inventions en l'esprit qui se trouveroient, vous n'en doutiez nullement, beaucoup plus selon son humeur, dautant qu'ils seroient de plus prompte execution et presente utilité, que vous seul estiez capable de les faire mettre en valeur quand la necessité des affaires le requerroit, et dont vous sçaviez tres-bien qu'il ne se tireroit pas moins de quatre-vingt millions d'or comptant; mais qu'il ne falloit jamais venir à ces moyens fort extraordinaires, comme creations d'offices, augmentations d'impositions, attributions, gages et droicts, et alienations de revenus, esquels consistoient tous ces moyens, que le royaume ne se vist en peril ou de grandes depences à faire du tout necessaires, pource que lors chacun s'y accommoderoit volontaire-

ment; et que, pour luy monstrier un eschantillon des fruits qui se pourroient tirer de vos veilles et labeurs, vous luy feriez voir une augmentation de revenu annuel, sans rien imposer de nouveau sur son peuple, de plus de cinq millions, sur six sortes de ses revenus seulement, et ce dans deux ans; de la vente desquels, si l'on se vouloit apres servir, l'on en tireroit plus de soixante millions d'argent comptant; mais qu'il falloit reserver tout cela pour un grand besoin, et cependant que l'on estoit en repos et de loisir, travailler aux amesnagemens qui sont de longue haleine. Duquel discours (beaucoup plus amplifié à cause des repliques de Sa Majesté par vous retranchées pour briefveté) le Roy demeura fort content et satisfait, et vous dit, pour conclusion, qu'il falloit donc travailler à tout cela par années; dequoy il se reposoit sur vostre soin et intégrité, et mesmes du choix des commissaires, desquels vous deviez neantmoins communiquer avec monsieur le chancelier, pour ceux qui seroient de justice, et qu'il vous assisteroit de sa personne et de son autorité, selon que vous jugeriez qu'il en seroit besoin.

Vous discourustes aussi les jours suivans, le Roy et vous, sur les deux derniers desseins, touchant les rumeurs, brouilleries et menées, dont l'on bruyoit en diverses provinces, et la reconnaissance des costes et frontieres d'icelles, sur lesquels, apres diverses propositions et raisons mises en avant de part et d'autre (dont le recit ne seroit pas sans utilité, mais de trop longue deduction, car ces propos furent demenez par trois divers jours, n'y ayant quasi rien eu de considerable dans le royaume tant es affaires, qu'aux personnes et provinces dont vous ne parlassiez), finalement vous conclustes au voyage que Sa Majesté avoit plusieurs fois projeté de faire en Provence et Languedoc, passant par le Berry, Bourbonnois, Lyonnais et Dauphiné, et celui que, sous couleur d'aller seulement prendre possession de vostre gouvernement de Poictou, il vouloit que vous fissiez par les provinces d'Orleans, Touraine, Anjou, Poictou, Xaintonge, Angoumois et Guyenne, pour le venir rejoindre à Tolouze, estimant qu'ils pourroient remedier à tous ces ambaras, ou pour le moins en prendre des cognoissances si particulieres, que l'on ne seroit plus en doute des remedes qu'il y faudroit appliquer, luy disant ne vous pouvoir imaginer que les choses fussent si proches des extrêmes, que Sa Majesté tesmoignoit de les apprehender: ce qu'elle soustenoit au contraire, se fondant sur la malice des esprits que l'on faisoit instigateurs de toutes ces pratiques, leur audace naturelle et la haine qu'ils portoient à sa

personne et encor plus à ses prosperitez, ce qui luy estoit confirmé par ceux qui luy donnoient ces advis, lesquels, de leur part, comme vous disiez le sçavoir bien, faisoient les choses beaucoup plus grandes qu'elles n'estoient, afin de faire aussi davantage valoir leur marchandise, et par ce moyen en tirer plus ample recompense. Tellement que sur telles conclusions, le Roy de sa part, et vous de la vostre, luy comme maistre, et vous comme serviteur, commençastes à parler tout haut de vos voyages (leur donnant des pretextes tous autres qu'ils n'estoient), à disposer les choses necessaires pour iceux, et pour essayer d'establir un tel ordre aux affaires des provinces de Bretagne, Normandie, Isle de France, Picardie, Champagne et Bourgogne, et à ce qui estoit du gros et general des affaires ordinaires de tout l'Estat, desquelles l'administration se fait quasi tousjours dans Paris, que tout cela pust souffrir vos absences par un si grand esloignement, sans apprehension d'aucun inconvenient.

Or, nous estant revenu en memoire plusieurs brouilleries et intrigues de Cour, de chambre et de cabinet, qui se passerent cette année, lesquelles apparemment sont d'importance, nous eussions bien désiré de les vous ramentevoir; mais deux choses nous en ont empesché; l'une, que nous n'en avons pas esté assez instruits pour en donner l'entiere intelligence, et l'autre, que nous n'avons pas eu assez de hardiesse pour parler librement de toutes les personnes interessées: et en attendant de vous de plus particulieres instructions et memoires, nous avons icy transcrit un recueil fait, à nostre advis, par les deux Arnaults, de quelques particularitez qu'ils avoient en divers temps apprises de vous, touchant le Roy, la Reine, madame de Verneuil, vous et quelques intrigues d'Estat et de Cour; dans lequel, encor qu'il y ait plusieurs choses obscures et d'autres où ils font paroistre qu'ils vouloient retenir à dire, nous avons estimé qu'il vous seroit facile de les esclaireir quand bon vous sembleroit: ce recueil estant tel que s'ensuit.

#### CHAPITRE CXXXVIII.

*Henri IV entretient Rosny de ses chagrins domestiques. Conseils et démarches de ce ministre.*

Or, combien que les ordres et prevoyances requises à tant de faciendes diverses et toutes importantes, telles qu'il a esté dit au chapitre precedent, fussent capables de tenir l'esprit du Roy et le vostre bien fort occupez, si n'en es-

toient-ils point tant inquietez et empeschez que des broüilleries domestiques esquelles le Roy et la Reine recidivoient ordinairement, dont il vous escrivoit et parloit plus souvent que vous n'eussiez désiré, tant vous apprehendiez de ne vous pouvoir mesler d'affaires ainsi espineuses, entre personnes si proches et de telle qualité, sans vous embarrasser et attirer sur vous la hayne de l'un ou de l'autre, et peut-estre le malcontentement de tous les deux. Or voyant que par tous les discours qu'il vous en faisoit et lettres qu'il vous en escrivoit, il ne prenoit neantmoins nulle resolution assez ferme et arrestée pour en empescher la continuation tant pour ce qui regardoit ses desirs et sa particuliere conduite, où il ne nioit pas, lors que vous en parliez librement, qu'il n'y eust quelque chose à redire, que pour celuy de la Reine, de laquelle il vous faisoit plusieurs plaintes, afin de la ranger à toutes choses bonnes et raisonnables dont il pust tirer contentement et vivre en repos d'esprit.

Les choses estans donc en cét estat entr'eux, il arriva un jour, ainsi que vous estiez tous deux seuls, vous promenans sous les grandes halles de l'Arsenac qui sont proche de la Bastille, parlans ensemble de plusieurs grandes affaires tant du dedans que du dehors du royaume, que le voyant, ce vous sembloit-il, tout triste et melancholique, et vous en ayant dit quelque chose, en luy en demandant la cause, vous ne vous pustes empescher de luy dire qu'il avoit grand tort de se chagriner ainsi sans grande raison, sur tout s'il venoit à bien considerer le lieu où il estoit, se promenant lors entre des renées de cent canons, ayant aux galleries de dessus et ailleurs desja dequoy armer quinze mille hommes de pied et trois mille chevaux, deux millions de livres de poudre dans le Temple, dans la Bastille cent mille boulets, et sept millions d'or comptant dans les coffres d'icelle, qui estoit à vostre advis dequoy se resjouyr, estans tous ingrediens et drogues propres pour medeciner toutes les plus fascheuses maladies d'Estat, pour donner terreur à autrui, assurance et contentement à luy mesme, et pour renverser en peu de jours, lors que bon luy sembleroit, tous ces petits broüillons et leurs foibles et mal fondez desseins dont l'on parloit, et toutes ces vaines rumeurs dont il tesmoignoît plus d'apprehension qu'elles ne meritoient, et qu'il ne convenoit à la grandeur de son courage, à son ancienne vertu, qui ne vieilliroit jamais en luy, et à ses longues experiences; n'ayant, selon vostre opinion, rien à faire qu'à se resjouyr, afin de conserver sa santé, remedier à toutes choses, comme il en avoit le moyen, sans se soucier ny

melancholier de rien, et non pas se facher, chagriner et melancholier de tout, sans remedier à rien, comme il en prenoit le chemin par ses irresolutions et en des choses mesmes quasi de neant; le suppliant de vous excuser, voir vous pardonner la hardiesse que vous aviez prise de luy en parler si librement, d'autant que ses travaux de corps et d'esprit, où vous le voyez souvent retomber, ruynoient entierement sa santé.

Surquoy vous ayant respondu que ce n'estoient pas les intrigues et embarras des affaires publiques et d'Estat qui l'attristoient maintenant, mais de petites broüilleries domestiques, dont il vous avoit escrit et parlé plusieurs fois, ausquelles il voyoit bien peu de remede : surquoy vous luy usastes d'une infinité de remontrances, fortifiées de raisons et d'exemples, suivies d'une conclusion qu'il se devoit absolument desembarasser l'esprit de toutes ces intrigues et barbouilleries qu'il avoit avec la Reine sa femme, en prenant une bonne et ferme resolution sur la forme de vie et de conduite, tant de luy que d'elle, et de tous ceux qui les approchoient le plus familièrement et privément, et des propos qu'ils auroient à tenir, n'y ayant rien en tous vos emplois de ses plus espineuses et difficiles affaires qui vous travaillast et affligeast tant le corps et l'esprit, que de voir ces ordinaires altercations entre leurs Majestez, lesquelles vous sembloient entierement disconvenables à leurs éminentes dignitez, mais sur tout à un grand Roy comme luy, duquel les faits heroïques l'avoient eslevé au sommet de la gloire et fait estre en admiration à tous peuples et nations; et partant le suppliez-vous au nom de Dieu, les mains jointes et les larmes aux yeux, d'y donner un tel ordre, par le moyen de sa prudence inimitable et de cette admirable generosité qui luy avoit fait surmonter les plus grands perils et aspres difficultez, que telles tricoteriez, voire fadezes (le suppliant de vous pardonner si vous ne leur aviez pu trouver un autre nom à l'improviste) n'arrivassent plus entr'eux, ou pour le moins ne sortissent jamais le seuil de leur chambre, à cause que cela prejudicioit à cette grande reputation qu'il s'estoit acquise par ses armes et pour s'estre rendu invincible à toutes autres choses.

Surquoy, demy en colere et mesme en jurant, il vous respondit : que vous aviez tort de le blâmer d'un mal dont il n'estoit en aucune façon la cause, vous demandant que c'est que vous eussiez voulu qu'il eust fait à tout cela, cognoissant son humeur comme vous faisiez, laquelle ne se pouvoit porter aux extrémités ny aux remedes violents contre qui que ce fust, que par contrainte et à vive force, sur tout envers ceux

qu'il avoit aymez et affectionnez et avec lesquels il avoit vescu en privauté et familiarité : qu'il vous devoit estre souvenu, avant que de l'accuser seul de tant de fautes, de la ferme resolution qu'il voulut prendre un jour à Blois, et dont il vous parla dans la gallerie haute des jardins, à laquelle vous vous estiez opposé formellement, et tant fait par vos instantes supplications, voire importunitéz, jusques à vous estre mis trois fois à genoux devant luy, qu'il s'en estoit absolument départy; qu'il sçavoit bien que vous n'ignoriez nullement que le plus grand de ses desirs ne fust de pouvoir vivre en amitié cordiale, union, paix et concorde avec sa femme, et encore moins que les défauts qui empeschoient une si douce et loüable vie entr'eux, vinssent en aucune façon de luy, puis qu'il vous avoit dit tant de fois (et à M. de Sillery aussi, lequel, pour ce qu'il desguise un peu mieux ces choses que vous, les mene plus doucement) que si vous la pouviez faire departir de ses opiniastretéz, la ranger dans la complaisance, et s'accommoder aucunement à ses humeurs, qu'il se retireroit entierement des choses qui luy aigrissoient le plus l'esprit, et vivroit avec elle de toute telle sorte que vous luy conseilleriez l'un et l'autre, mais qu'il y avoit tant de choses à reformer de la part d'elle, qu'il n'estoit pas que vous l'y puissiez jamais faire resoudre, ne vous niant point de sa part qu'il luy estoit impossible de supporter, sinon avec un extrême ennuy et chagrin, cette grande obstination et aversion d'esprit desquelles elle estoit tellement dominée, que jusques aux moindres et plus petites choses, depuis qu'elle prenoit une fois sa quinte, si luy vouloit d'un, elle vouloit d'autre, s'il estoit d'un advis, le sien estoit contraire; qu'il ne pouvoit non plus souffrir qu'elle luy grongnast et rechignast quasi tousjours, lors que, revenant de la ville, il la vouloit aller haiser, caresser, rire et s'esjouyr avec elle; les extrêmes animositez qu'elle tesmoignoit contre ses enfans naturels, nez long-temps auparavant qu'il eust ouy parler d'elle; les trop grandes faveurs et familiaritez dont elle usoit envers la Leonor et son mary, ses grandes liberalitez en leur endroit, lesquelles consumoient toutes celles qu'il luy pouvoit faire, et la tenoient en de continuelles necessitez, quoy que vous aussi bien que luy n'ignorassiez pas qu'il usoit plus de dons et gratifications envers sa femme que jamais roy de France n'avoit fait envers la sienne, soit pour l'ordinaire de sa maison, soit pour les biens-faits extraordinaires, enquoy il sçavoit bien que vous la favorisiez et que vostre femme luy servoit de solliciteuse, ce qu'il ne vous disoit pas pour trouver mauvais ce que vous en faisiez, vous l'ayant

plusieurs fois ainsi ordonné; les rapports ordinaires qu'elle endureoit que cét homme et cette femme luy fissent de luy, avec des paroles de blasme et de mespris, dequoy il avoit de bons et certains advis; les gens qu'ils tenoient ordinairement au guet comme espions à l'entour de luy, pour estre informez de toutes ses paroles et actions, ausquelles ils adjoustoient apres mille mensonges, et sur tout és choses qu'ils estimoient estre capables de l'aliener de son amitié, de l'irriter contre luy, et de luy rendre l'esprit tant plus obstiné contre ses volonteé : qu'il ne pouvoit non plus voir que cét homme et cette femme la menassent à toutes leurs fantaisies, sans leur oser rien contester, et que luy ny tous les siens y eussent si peu de pouvoir; qu'eux fissent tant les rogues et les hautains et de si excessives dépenses, et qui pis estoit eussent des desseins, qu'il sçavoit de fort bonne part excéder infiniment leurs abjectes et viles extractions, et se meslassent de menées qui ne pouvoient du tout rien valoir, puis que c'estoit par des intelligences avec les Espagnols, se servant en cela des gens du duc de Florence pour manier les choses plus secrettement, lesquelles pourroient en fin devenir pernicieuses à l'Estat, et peut estre à sa propre personne, s'il n'y estoit remedié de bonne heure en renvoyant ces deux garnemens en leur pays, comme il devoit avoir fait dès leur arrivée en France, ainsi que plusieurs de ses serviteurs affidez aussi bien que vous le luy conseilloyent dès lors.

De toutes lesquelles choses, apres plusieurs discours que vous eustes sur icelles, qui seroient trop longs à reciter, il vous commanda d'essayer à prendre le temps et l'occasion si à propos pour en parler à la Reine, qu'elle ne pust en aucune façon conjecturer que ce fut de son sceu ny que vous le fissiez de propos délibéré, et comme chose entre vous, luy ou autre, concertée, retenant mesme à dire ce que vous estimeriez (cognoissant son humeur comme vous faisiez) capable de la dépitier, se souvenant tousjours de la puissance que vous eustes une fois sur son esprit de luy faire escrire une lettre que vous aviez faite. Pour à quoy parvenir, vous en cherchant les opportunitéz, il s'en presenta une des mieux ajustées à ce dessein que vous eussiez peu desirer, dautant que d'Argouges vous estant venu apporter un certain edict, touchant les officiers des gabelles de Languedoc, pour lequel faire passer on offroit à la Reine quatre vingt mille livres, et vous luy ayant respondu que l'edict n'estoit pas mauvais, mais que pour le faire passer et en obtenir les deniers pour elle, il estoit necessaire de differer quelques jours d'en parler au

Roy, à cause qu'il n'avoit pas maintenant l'esprit bien satisfait d'elle, et qu'elle pourroit le mesnager cependant, à quoy vous luy ayderiez en ce qu'il vous seroit possible, si la Reine y avoit agreable vostre entremise et de déferer un peu à vos conseils, comme elle avoit fait autrefois et s'en estoit bien trouvée.

Lesquels propos r'apportez à la Reine, elle vous envoya querir, deux jours apres, pour vous faire voir une lettre qu'elle avoit escrite au Roy, vous prier de luy en dire vostre avis, et mesme de la reformer en telles paroles que vous adviseriez bon estre, sans neantmoins changer beaucoup à la substance. Surquoy vous ayant dit quelque chose de leurs broüilleries, vous pristés sujet de luy dire quasi tout ce dont vous aviez eu charge; mais avec telle sobriété et circonspection, sans rien obmettre neantmoins des choses necessaires, qu'elle ne pust jamais découvrir que vous disiez toutes ces choses par concert; tellement qu'apres luy avoir fait un autre projet de lettre, qu'elle trouva fort à son goust, elle vous remercia de l'un et de l'autre, comme de deux tres-bons offices. Et combien qu'en suite de ces remerciemens, en se plaignant des choses qui se passaient, enquoy elle s'estimoit interessée, elle usast d'une grande retenue en ses propos, si ne laissastes vous pas de reconnoistre, mais plutost par ses demy silences mystereux sur vos questions, et gestes affectez sur vos conseils et remonstrances, que non pas par ses paroles expresses, que ses plus grands débits et courroux, lesquels estoient seules causes de tout ce qu'on blasmoit en elle, procedoient des amourettes du Roy; mais que surtout n'avoit elle point assez de puissance sur son courage et son esprit pour supporter que madame de Verneuil parlast d'elle irreveremment, ny que cette putane (car ainsi l'appelloit elle tousjours) parlast de ses enfans en telle façon que si elle les eust voulu mettre en comparaison des siens, ny que le Roy, ayant eu advis qu'elle faisoit des menées contre son service, ayant des intelligences pour cet effet, avec son pere et son frere, dans la France et hors icelle, n'en fit nulle punition.

Surquoy vous la consolastes le mieux qu'il vous fut possible, luy donnant toutes sortes de bons conseils accompagnez d'esperances d'heureux succez, si elle les vouloit suivre absolument; et pour fin, la confortastes à envoyer au Roy cette lettre que vous aviez si bien assaisonnée; et en cette sorte vous separastes vous d'elle sans qu'apparemment elle eust recogneu, comme nous avons dit, que vos remonstrances fussent provenues d'aucun concert, ny premeditation avec le Roy ny autres. Or, Sa Majesté estant

lors allé faire un voyage à Paris, la Reine luy envoya la susdite lettre de laquelle il demeura fort content, croyant que ce fussent desja des effets de la charge qu'il vous avoit donnée, et là dessus luy fit une responce fort amiable. Mais la Reine ayant esté enaigrie depuis par ses mouches de Cour tenuës en sentinelle, lesquelles luy mardoient que le Roy n'observoit rien de ce que vous luy aviez fait esperer, ne laissoit pas d'aller voir bien souvent madame de Verneuil, ny elle de continuer à tenir des propos d'elle, en sa presence, fort insolens et injurieux, elle ne respondit au Roy (qui s'attendoit de recevoir d'elle des remerciemens de ses amiables cajoleries) que par la bouche de celui qui luy avoit apporté la lettre sans luy avoir voulu escrire: ce qui picqua bien fort le Roy, croyant qu'elle l'eust fait par mespris et desdain; dequoy ayant fait de grandes plaintes à plusieurs, il vous en fit participant par une lettre particuliere qu'il vous escrivit, de laquelle la teneur ensuit:

*Lettre du Roy à M. de Rosny.*

Mon amy, j'escrivis hier à ma femme, mais de sa grace elle n'a daigné me faire responce, s'excusant sur ce que je luy avois mandé que je la verrois aujourd'huy de bonne heure, ce qu'elle ne devoit faire. Cela m'a fait resoudre de ne partir encore d'aujourd'huy d'icy, mais ce sera pour demain, et arriveray à Fontaine-bleau de bonne heure. Je receus hier matin une lettre d'elle que j'ay recognuë de vostre stile, non du sien ny de celui de M. de Sillery; elle est estrange, et si vous ne le luy remonstrez, elle le deviendra encore davantage; car quand je me ressouviens des propos qu'elle me tint avant hier, cela ne peut qu'il ne me pese et me tienne au cœur et m'empêche de me bien porter de l'esprit, car du corps fort bien Dieu mercy. Au demeurant, j'ay trouvé icy forces broüilleries du comte d'Auvergne, et s'il en a bien conté par delà, il n'en a pas moins fait par deça, où il a dit à tous ceux qui ont parlé à luy les plus estranges choses du monde, et je crains qu'il en naisse des querelles; ce que j'empescheray si je puis. Hier je fus à Saint-Germain voir mes enfans, où je trouvay mon fils se portant bien; mais ma fille avoit esté tellement malade que c'est un miracle de ce qu'elle n'est morte: elle se porte maintenant mieux, mais non qu'elle puisse bouger encore de quinze jours de Saint-Germain, ce qui m'a fait resoudre de ne les point faire venir à Fontaine-bleau. Hier ma cousine, la comtesse de Soissons, accoucha d'un fils qui a esté un grand contentement à son mary et à elle; je le vy peu de temps apres faisant le stoïque, me disant que les prosperitez

ne l'eslevoient point, comme aussi les adversitez ne l'abbaissoient nullement, et qu'il estoit tous-jours luy mesme en l'une et l'autre fortune. Adieu, mon amy.

Ce mercredi à 9 heures du matin, 12 may, à Paris.

HENRY.

En suite de tant de discours, lettres et procédures grandement diverses qui se passerent lors, vous fistes tant d'allées et venuës, usastes de tant de remonstrances, et alleguastes tant de raisons, qu'en fin l'un et l'autre se laisserent persuader, se resolvans tous deux (au moins le disoient-ils ainsi) à n'escouter plus nuls des rapports de ces mouches de Cour; tellement qu'ils demurerent quinze jours ou trois sepmaines, tous deux en fort bonne humeur, et la Cour, à cette occasion, grandement gaye, plaisante et agreable.

Mais, madame de Verneuil, desirant de traverser, voire interrompre du tout telles bonnes intelligences, il n'y eut sorte d'artifices dont elle n'usât pour y parvenir, fit tant de promesses et forma tant de diverses sortes d'amours, les unes pour s'appuyer, les autres pour donner des jalousies, les autres pour susciter des querelles et des broüilleries, que, qui les sçauroit toutes et les voudroit publier avec intelligence, il y auroit dequoy faire un gros volume, et trouver le sujet d'une douzaine de comedies, et quelques unes d'icelles capables de degenerer en tragedies; tant elle et d'autres firent d'intrigues en leurs amours, jusques à supposer des mariages et en faire des bans, tout cela de trop longue deduction, à cause de divers artifices dont il fut usé de beaucoup de costez, et de lettres qui furent produittes en intention de verifier multiplicité d'amourettes bigarrées, pour la recognoissance de l'escriture desquelles lettres vous et un autre de grande qualité fustes interposez des deux costez; et là dessus se passa diversité de discours, d'intrigues et d'embarras, la representation desquels seroient desirez de beaucoup, mais de certains respects nous en retiennent; et vous ramentevrons comme ces rusées femelles continuerent leurs artifices tout le reste de leurs jours, dont l'une d'icelles, ensemble, son frere, son pere et sa mere, furent peu apres accusez de trahisons et de perfidies, et icelles averées, condamnez criminellement, mais quelques jours apres leurs peines commuées, et petit à petit tant extenuées, qu'en fin elle revint dans le monde conversable, et ne manqua pas de reprendre ses mesmes premieres ruses et intrigues d'amourettes qu'elle desguisoit et paroit du voile d'une grande devotion, accompagnée de mines, cimagrées et scrupules de conscience, dont elle faisoit mestier et marchandise, qui luy faisoient reprendre ses premieres auda-

ces, desquelles ayant esté fait rapport à la Reine, voire peut-estre avec accroissement, elle reprit aussi ses premieres haines et animositez, suivies de sollicitations vers le Roy de luy en faire raison, l'esprit doux et benin duquel, et qui par consequent avoit en aversion toutes voyes de fait, rigueur et violence, se trouvant travaillé, et desirant d'essayer d'allegger ses peines par voyes douces et amiables, pour des causes non du tout à mespriser, il vous envoya un jour querir par le sieur de la Varenne, et vous l'ayant trouvé dans l'orengerie des Tuilleries où il s'estoit retiré à cause de la survenuë d'une onnée de pluye, il vous prit par la main et vous dit:

« Mon amy, vous sçavez grande partie de ce « qui s'est passé touchant ma femme et madame « de Verneuil, comme j'ay tousjours fait tout ce « qu'il m'a esté possible pour, d'une part, adou- « cir et contenter l'esprit de l'une par toutes sor- « tes de belles paroles, recherches et tesmoigna- « ges de bien-veillance, dons et gratifications « toutes venuës à vostre cognoissance, et d'autre « part, comme pour ranger l'autre dans les res- « pects et submissions qu'elle doit, j'ay usé de « remonstrances, menaces et chastimens, les- « quelles procedures m'avoient donné pour un « temps quelque repos dans l'esprit; mais les « voyant rentrer, l'une dans ses premieres ai- « greurs et desirs de vengeance, et l'autre dans « ses audaces et indiscretions, j'ay desiré de par- « ler à vous; et partant puis que la pluye nous « retient icy renfermez, sans que personne puisse « entendre ce que nous dirons, je vous prie de « me dire librement ce qu'il vous semble de tout « cela, et que c'est que vous estimeriez que je « devrois faire pour y remedier. »

Surquoy apres des commandemens expres de luy en parler en toute liberté, et iceux accompagnez de sermens de n'en trouver nulle mauvaïse, vous luy dites que ses irresolutions aux applications des remedes absolument necessaires, estoient cause de tant de recidives de tous costez, pour lesquelles éviter il vous sembloit ne se pouvoir trouver meilleur expedient que de faire passer la mer sans retour ny reste de communication par deçà, à quatre ou cinq personnes, et à quatre ou cinq autres les montagnes, sans reste d'intelligence non plus du costé de deçà, que vous ne luy nommiez point à present, vous l'ayant fait cy-devant plusieurs fois sans utilité, dautant que ces huit ou dix personnes là, par leurs malicieuses suppositions et les interets qu'ils prenoient en toutes sortes d'affaires, estoient non seulement causes de plusieurs mauvaises paroles, procedures, menées et pratiques, et encore pires effets, mais aussi (par leurs rapports, la

pluspart faux et controuvez) estoient causes de ces recidives de toutes parts.

« Or bien, dit le Roy, nous nous cognoissons  
 « de si longue main, que je vous entends à demy  
 « mot, et vous moy; et partant vous diray-je  
 « que pour ceux du passage de la mer, je n'y vois  
 « pas beaucoup de difficultez, ayant desja de  
 « grands dégousts de la pluspart, voire quasi de  
 « tous; mais que pour ceux de delà les monts,  
 « la facilité ne s'y trouve pas semblable, à cause  
 « que sans me reduire en une vie du tout triste  
 « et langoureuse, il ne faut pas mesme qu'il pa-  
 « roisse que je le desire, mais faut que cela pro-  
 « cede du propre mouvement de celle que vous  
 « sçavez (1) : à quoy je ne voy gueres de gens  
 « desireux ny capables de s'employer et luy per-  
 « suader, et ne cognois quasi que vous qui ayt la  
 « loyauté avec l'industrie, pour l'entreprendre;  
 « et encore faudroit-il que ce fut avec de telles  
 « circonspections, qu'elle ne pût conjecturer que  
 « ce fut par concert formé, et moins avec moy  
 « qu'avec nul autre; car de me jeter sur les bras  
 « cinq esprits italiens, d'ordinaire tous vindica-  
 « tifs, ce seroit pour me tourmenter de soupçons  
 « et de défiances de ma vie, pires que la mort  
 « mesme, ausquelles je ne pourrois m'empescher  
 « d'entrer toutes les fois que je la verrois faire la  
 « triste et la melancolique ou la courroucée. Et  
 « partant ne vous sçaurois-je plus dire autre chose  
 « sur tout cela, sinon que je vous en laisse faire,  
 « me confiant en vostre loyauté, industrie et bon-  
 « heur à l'entremise des affaires espineuses, avec  
 « promesse que je vous fais que si vous pouvez  
 « parvenir à cecy, avec repos de mon esprit, que  
 « je me desisteray de toutes passions amoureu-  
 « ses, suivant le conseil que vous m'en donnerez,  
 « et de cela vous en donnay-je parole; sur la-  
 « quelle (voyant la pluye passée) je m'en iray  
 « promener, et vous laisseray mediter à loisir,  
 « pour employer vostre esprit, avec les esgards  
 « et circonspections necessaires pour faire éviter  
 « au mien toutes ces causes d'apparentes déflan-  
 « ces. »

#### CHAPITRE CXXXIX.

*Lettres diverses. Deux sonnets envoyés par l'ambassadeur du Roy dans les Pays-Bas. Erreurs dans lesquelles sont tombés quelques historiens, sur la position du duc d'Épernon. Lettres du duc de Bellegarde, par lesquelles les auteurs veulent prouver que Rosny étoit en bonne intelligence avec les*

(1) La reine.

*grands du royaume. Le voyage du Roy en Provence ajourné. Pourquoi.*

#### *Lettre du Roy à M. de Rosny.*

Mon cousin, les entrepreneurs des manufactures de ma bonne ville de Paris m'estant venus trouver en ce lieu, pour me faire entendre les offres qu'ils ont faites en mon conseil, pour estre receus à la ferme du sel, dite à la part du royaume, Bresse, Beuge, Veromey et bailliage de Gez, ainsi que la tient à present maistre Jean Houpil, pour huit années prochaines, en baillant bonnes et suffisantes cautions, qui sont aussi advantageuses pour le bien de mon service que celles qu'ont fait Paulet et Longuet, et preferez à iceux, et au cas qu'ils n'y fussent receus, que vous ordonnassiez que ceux ausquels elle demeureroit, seroient tenus de leur fournir dans ledit temps de huit ans, la somme de soixante mil escus que j'ay promise de leur fournir et bailler, je vous ay bien voulu faire ce mot par l'un d'eux, et vous dire que si vous trouvez que les offres desdits entrepreneurs soient aussi advantageuses pour le bien de mon service que celles desdits Paulet et Longuet, ou autres en ce cas, je veux et entends qu'ils y soient preferez; et où d'autres les feroient plus advantageuses, que vous ordonniez que ceux-là seront tenus de payer aux entrepreneurs desdites manufactures, dans lesdites huit années, ladite somme de soixante mil escus, laquelle je leur ay promise. Et pource que vous sçavez assez comme j'affectionne cela, je vous prie l'affectionner aussi et faire voir cette-cy à ceux de mon conseil, pour leur faire entendre que telle est ma volonté. Adieu, mon cousin.

Ce premier de may, à Fontaine-bleau.

HENRY.

#### *Lettre de M. de Ville-roy à M. de Rosny.*

Monsieur, j'ay leu au Roy vostre lettre du deuxiesme de ce mois; il ne m'a rien commandé sur icelle, faisant estat de vous voir jeudy, ainsi que vous luy avez escrit; il advisera lors avec vous ce que l'on fera de ce prisonnier de Poitiers, car il dit que cela n'a point de haste. Le courrier que j'avois envoyé à Poitiers par le commandement du Roy, pour sçavoir qu'est devenu le paquet que messieurs de Parabelle et Constant vous ont escrit avoir, dès le mois de mars, mis à la poste de ladite ville, pour estre porté à M. Arnault le jeune, est revenu ce soir avec la responce que vous aurez avec la presente, afin que vous fassiez verifler ce qu'il escrit; car Sa Majesté desire approfondir l'affaire. Je vous envoie deux lettres, l'une de M. de Vic,

et l'autre de M. de Buzenval, qui est la dernière que nous avons de luy, afin que vous sçachiez ce que nous sçavons icy de ce costé là, pour estre toutes ces affaires aussi importantes, qu'autres qui se soient offertes il y a long-temps.

De Fontaine-bleau, ce 2 may, au soir, 1604.  
DE NEUF-VILLE.

Quant à la lettre de M. de Vic, ce n'estoit que pour vous donner advis comme il avoit executé précisément les intentions du Roy et les ordres que vous luy aviez prescrits, vous pouvant assurer que tous les cantons estoient fort contents du Roy, et ne se pouvoient lasser de louer vostre bon mesnage; la lettre de M. de Buzenval n'estant qu'une lettre de complimens et de louanges, telle que s'ensuit :

*Lettre de M. de Buzenval à M. de Rosny.*

Monseigneur, je n'ay point estimé manquer à mon devoir si je manquois à vous escrire en particulier de toutes les nouvelles de ces provinces de deçà, n'en ayant ainsi usé que de crainte de vous ennuyer en faisant chose à vous du tout inutile, d'autant que je sçay bien que le Roy et M. de Ville-roy vous communiquent toutes celles que je leur escrits. Cette lettre cy donc n'est que pour vous supplier de me mander s'il vous plaist que j'en use autrement, car je m'en acquitteray selon vostre intention et mon devoir; et en attendant l'esclaircissement de vos volontez, je continueray à vous remercier de la continuation de vos faveurs au facile et entier payement de mes apointemens, que j'espere tousjours pareils de vostre prudence et bonté, lesquelles toutes ces Provinces Unies celebrent hautement, pour tant de bons offices et assistances qu'ils reçoivent du Roy, ausquels vos bons conseils contribuent grandement; et mesme se vouloient disposer à vous en faire des recognoissances condignes, n'eust esté que je les ay assurez que ce seroit plustost vous offenser que de vous gratifier, d'autant que vous les refuseriez. Ce qui a esté cause qu'ils se sont contentez d'envoyer à M. Hersens quelques coquillages fort rares pour vous les presenter de leur part, et de fort belles jumens pour le carrosse de madame vostre femme, qu'il luy presentera aussi. Or, ay-je estimé, cognoissant vostre humeur, vostre vertu et vostre affection à nostre religion, que vous n'auriez point desagréable si j'accompagnais cette lettre de deux sonnets que j'ay recouverts depuis peu, qui furent faits en ces quartiers au commencement des grandes souslevations et tribulations de Flandre, et qui mesme ne convenoient pas trop mal alors à celles de nostre France; desquelles nous n'avons esté delivrez que par les fa-

veurs de Dieu, prudence et vertus heroïques de nostre grand Roy, auquel soit gloire avec perpétuité de jours, de crainte que la France, s'il venoit à luy manquer, ne retombe en ses anciennes souffrances; vous suppliant me continuer vos bonnes graces, recevoir de bonne part ces deux sonnets (quoy que peut estre un peu grossiers à la flamande, et non selon la politesse et le stile de France, à cause de la traduction d'iceux, ayans esté premierement faits latins, mais n'ont encore esté retrouvez qu'en leur langue), et de croire, monseigneur, que je suis vostre tres-humble et obligé serviteur,

BUZENVAL.

A la Haye, en Hollande, le 15 avril 1604.

*Sonnets mentionnez en cette lettre.*

Miserables Flamands qui, seris à s'asservir,  
Ennemis des tyrans, servent la tyrannie  
Qui fait armer la Flandre à la Flandre ennemie,  
Et sçait d'un faux devoir sa liberté ravir :

La loy, le sens, nature, à l'homme font sentir  
Qu'il naist, vit, croist et doit ses biens, ses jours, sa vie,  
Aux amis, aux parens, à la chere patrie,  
Et qu'il doit, pour ces trois, naistre, vivre et mourir.

Or, d'un pareil devoir nous sommes tributaires  
Aux Roys qui d'un pays sont les roys et les peres,  
Mettre pour eux la vie et les biens et les ans :

Mais aux Roys de ruyne et de sang et de cendre,  
Cendre, sang et ruyne et autant leur faut rendre  
Qu'aux Albes, Federics, Requescons et dom Joans.

Les Roys, il est certain, sont de Dieu les images;  
Mais ils ne seront point ainsi bien renommez,  
Ni pour tels des Flamans grandement estimez,  
S'ils ne sont, l'imitant, pitoyables et sages;

Et n'observent en tout droictures et mesnages.  
Que s'ils sont de leurs chefs guerriers si fort charmez  
Qu'ils veulent les laisser tousjours ainsi armez,  
Et sans cesse exercer leurs vols et brigandages,

Qu'ils pensent lors à eux, et qu'ils sçachent que Dieu  
Est clemence, droicture et justice en tout lieu,  
Et qu'il faut que les Roys soient à eux tous semblables :

Et partant, fuyez Roy, fuyez l'extorsion,  
Et prenans des Flamans juste compassion,  
Delivrez les des ceps de gens impitoyables.

En suite de cette lettre et des vers de M. de Buzenval, nous vous ramentevrons comme vous receustes, quelques jours apres, une lettre de la main du Roy, dont la teneur estoit telle que s'ensuit :

*Lettre du Roy à M. de Rosny.*

Mon cousin, je pris hier medecine et ay esté seigné ce matin d'un sang fort mauvais et chaud; et comme je voulois disner, mon bras s'est r'ouvert de fascherie et de colere pour des occasions que j'en ay, et que je vous diray lors que je vous verray : de façon que messieurs de la Riviere et du Laurens ont resolu que je ne feray point de diette pour ce coup, et se contenteront de me faire prendre des bouillons pour me rafraischir.



Ce porteur vous va trouver avec les lettres qu'il a de M. de La Force pour vous, sur lesquelles il vous entretiendra. Je vous prie donc de l'écouter et luy donner moyen qu'il puisse parler au sieur de Tajac; car, outre qu'il s'est cy-devant employé pour ses affaires, il luy porte des lettres de sa femme qui le conjure de ne luy rien taire de ce qu'il sçait importer à mon service; j'estime qu'aussi ne fera-il, et que ce voyage ne sera inutile. Adieu, mon amy.

Ce mercredy, à deux heures apres midy, à Fontaine-bleau. HENRY.

*Lettre de M. d'Espernon à M. de Rosny.*

Monsieur, le ressentiment que vous me tesmoignez avoir de l'accident qui m'est survenu, et la faveur que vous me faites de vous souvenir de moy, comme j'ay veu par la lettre qu'il vous a pleu m'crire, dont je vous rends mille graces, m'obligent tellement à vostre service, que je ne cesseray de rechercher toutes occasions où je puisse vous faire paroistre, par quelques dignes effets de mon affection, voire mesmes par mon sang, combien je vous honore et estime, et avez de pouvoir sur moy, qui vous supplie bien-humblement de me conserver tousjours la faveur de vostre bien-veillance, et de croire que j'y correspondray avec autant de passion que je la chers. Ce porteur vous dira l'estat enquoy il m'a laissé, qui est, Dieu mercy, assez bon selon le mal que j'ay. La rupture de ma cuisse, celle de mon poulce qui m'empesche de vous escrire de ma main, et les blessures que j'ay eues au coude et à l'espaule, ont esté, graces à Dieu, si bien pensées que je n'en puis esperer qu'une entiere guerison avec l'aide de Dieu. Il n'y a que le temps qu'il faut à la nature pour luy laisser refaire ce qui estoit défait, qui m'ennuye; car il me faut encor demeurer vingt-cinq jours couché sur le dos pour achever mon quarantiesme. Je prie Dieu d'en estre bien-tost relevé, pour avoir moyen de vous rendre quelque service comme je le desire, et demeurer pour jamais, etc.

A Bordeaux, ce 3 juin 1604.

A la suite de cette lettre de M. d'Espernon à vous adressante, avec des tesmoignages d'une grande bien-veillance et familiarité, nous avons estimé à propos d'insérer icy la coppie d'une lettre (qui vous fut baillée par le sieur de Perronne qui s'entremettoit des affaires de M. d'Espernon) que le Roy avoit, quelque temps auparavant, écrite à M. d'Espernon, sur le succez de la dispute d'entre messieurs du Perron et du Plessis, dont la teneur s'ensuit :

*Lettre du Roy à M. d'Espernon.*

Mon amy, le diocese d'Evreux a gagné celuy de Saumur; et la douceur dont l'on a procedé a osté l'occasion à quelque huguenot que ce soit, de dire que rien y aye eu force que la verité. Ce porteur y estoit present, qui vous contera comme j'y ay fait merveilles. Certes, c'est un des grands coups pour l'église de Dieu qui se fit il y a longtemps. Suivant cette erre et cette forme nous ramenerons plus de separez de l'Eglise en un an, que par les voyes de la violence et de rigueur en cinquante ans. Il y a icy les divers discours d'un chacun qui seroient trop longs à mettre par escrit. Il vous dira la façon que je suis d'avis que mes serviteurs tiennent pour tirer fruit de ce saint œuvre. Bon soir, mon amy. Sçachant le plaisir que vous recevrez de ce qui s'est passé, vous estes le seul à qui je l'ay mandé.

Ce 5 de may.

HENRY.

Or, pour ce, comme il est dit en cette lettre, qu'il se tint plusieurs et divers discours sur ce qui s'estoit passé en cette action, il s'en tint bien autant sur les interpretations des intentions du Roy, M. d'Espernon ayant esté bien aise d'en faire courir des coppies : les uns disans que le Roy n'avoit eu autre dessein que de gratifier M. d'Espernon, afin de le retenir en son devoir, et l'empescher de prendre intelligence avec ceux qui faisoient des menées contre son service; les autres pour faire juger à M. d'Espernon que sa conversion estoit sans feintise, pour ce que l'on luy avoit voulu persuader qu'il estoit un de ceux qui croyoient le moins qu'elle fut bien veritable; les autres pour empescher les Jésuites de l'ecrire ainsi tant souvent à Rome, et que s'ils le faisoient plus, ils fussent convaincus de mensonge par cette lettre dont M. de Ville-roy avoit envoyé des coppies au sieur d'Ossat; les autres pour moderer la volonté de ceux qui l'importunoient de se joindre d'intelligence avec l'Espagne, pour entreprendre conjointement la ruyne des huguenots, par la force des armes, voyant qu'ainsi ouvertement il reprovoit cette voye et proposoit de n'en tenir point d'autre pour leur conversion que celle de la douceur des admonitions et conferences; et les autres pour faire taire les malicieux huguenots, qui vouloient persuader aux autres qu'un jour il les violenteroit par armes; et partant, faillloit-il chercher ailleurs qu'en sa bien-veillance, des moyens pour les en garantir.

Or cette lettre de M. d'Espernon cy-dessus transcribede, à vous adressée en datte du 3 de juin 1604, quoy qu'elle ne soit pas écrite de sa main, comme il avoit accoustumé, pour les causes dittes en icelle, tant pleine de remerciemens,

civilitez, complimens et de tesmoignages de famillieres bien-veillances, et la coppie de celle que le Roy luy escrivit touchant la dispute de messieurs d'Evreux et du Plessis, suivie d'un discours des diverses intentions que l'on estimoit que pouvoit avoir eu le Roy en l'escrivant, nous ayant remis en memoire plusieurs de nos meditations sur semblables sujets, et des bonnes ou mauvaises intelligences du Roy avec les grands de son royaume et d'eux avec luy, nous vous dirons, avant que de venir à la deduction d'icelles, que de plus en plus nous regrettons le trop peu de curiosité que vous avez eüe de garder les minutes des lettres que vous escriviez de vostre main, tant au Roy qu'aux particuliers, sur les affaires d'importance, et la faute que nous autres vos secretaires avons commise de ne garder non plus les copies des lettres de nostre main que vous nous faisiez écrire en vostre nom, d'autant qu'elles serviroient à faire cognoistre plusieurs secrets et veritez du cours des affaires plus importantes du dedans et du dehors du royaume du temps d'alors, et feroient voir plusieurs beaux preceptes, enseignemens, conseils, ordres et reglemens bons pour leur temps, et peut-estre encor pour ceux qui les ont suivis et suivront à l'advenir; encor que nous scachions bien qu'entre les lettres escrites de vostre main, il y en ait eu plusieurs, lesquelles n'estant qu'en responce sur celles que le Roy vous escrivoit et parloit librement des intrigues et broüilleries de Cour, des amourettes des dames et des menées, pratiques et defections de plusieurs personnes fort qualifiées, il semble bien que ce n'eust pas esté prudence à vous de les garder, puisque le Roy vous ordonnoit de brusler ces lettres qu'il vous escrivoit là dessus, et que vous le suppliez de faire le semblable de vos responses.

Or, laissant ce discours pour reprendre celui de nos meditations sur la lettre de M. d'Espernon à vous, et du Roy à luy, et de ce qui la suit, et de plusieurs autres semblables de luy et d'autres, qui se trouveront dans la continuation de ces OEconomies royales et Servitudes loyales d'un bon maistre et d'un bon serviteur, nous ferons voir combien le plus souvent sont fallacieuses les nouvelles des vaudevilles, et mensongers les bruits communs de la Cour et des villes, touchant les choses dites, faites, entreprises et desseignées, voire celles qui se publient sur ce sujet par ceux qui se veulent faire tenir pour bons historiens, sans avoir esté employez aux desmeslemens des grandes affaires publiques, ou tiré des memoires des gens non interessés ny passionnés qui en ont eu la conduite et administration; dequoy, par une seule preuve, nous es-

sayerons de tirer en consequence toutes les autres, y faisant de semblables observations, n'y ayant point de doute qu'il n'y ayt eu plusieurs personnes (les uns sur le rapport d'autrui, les autres par une grossiere ignorance, les autres par la simple et superficielle apparence des choses, les autres par malice et les autres par vanité) qui ayent essayé de persuader que le Roy avoit tousjours eu M. d'Espernon en quelque adversion, et que luy de son costé n'avoit jamais grandement désiré son contentement ny la prosperité de ses affaires et desseins; et en cela semblent-ils estre en aucune façon excusables, s'ils ont creu contre la verité, puis que les historiens qui semblent avoir escrit expres en sa faveur, ont publié qu'en de certaines occasions le Roy estoit demeuré si vivement piqué contre luy des offences qu'il en avoit receus, que Sa Majesté en avoit eu du ressentiment toute sa vie : toutes lesquelles choses paroistront manifestement fausses par la representation de la lettre cy-dessus que le Roy luy avoit escrite, la commençant par le tiltre de mon amy, qui est celuy dont il usoit envers ses plus speciaux, loyaux et confidens serviteurs, et de quelques-unes que nous représenterons cy-apres, lesquelles M. d'Espernon vous a escrites, par lesquelles il tesmoigne d'aimer uniquement le Roy, et de ne desirer pas plus la conservation de sa vie qu'il fait la prosperité des affaires et desseins de Sa Majesté.

Ces mesmes diseurs de nouvelles et ces escrivains disent encor qu'il avoit déclaré au Roy qu'il ne le recognoistroit jamais pour Roy, ny le serviroit jamais tant qu'il seroit huguenot; le contraire se verifiant par les effets, voire par leurs propres escrits et les dires de tous ces discoureurs à tors et à travers, puis qu'ils luy attribuent une grande quantité de signalez services pendant toutes les années qui ont precedé son changement de religion, specifiant, entre iceux, ceux de Limoge, Sainct Germain, Ville-bois, Chartres, où il secourut le Roy avec de grandes forces, Boulongne, Ville-mur, Mont-auron, Antibe et autres lieux. Et lors qu'ils se sont imaginez, et ont essayé de le persuader aux autres, que M. d'Espernon et vous, aviez eu des adversions l'un de l'autre, cela est provenu de ce que quelques escrivains vous avoient publié en general pour estre odieux aux grands du royaume, entre lesquels ils particularisoient messieurs d'Espernon, de Biron et de Bouillon, pource que ne satisfaisant pas tousjours à tous leurs desirs en matiere de finance, ils s'en pouvoient estre quelquesfois plains. Mais n'estant question maintenant que du premier, il sera facile à faire voir, tant par la lettre du Roy à luy escrite, cy-des-

sus spécifiée, que par trois d'entre plusieurs que Sa Majesté vous avoit escrites, touchant M. d'Espernon, qui seront insérées cy-apres, que les offenses que ces escrivains disent qu'il avoit faites au Roy, ne sont pas veritables, ou que, pour le moins, Sa Majesté n'en a pas eu du ressentiment toute sa vie; et par sept lettres qui seront aussi insérées cy-apres, d'entre plusieurs que M. d'Espernon vous a escrites, sera-il aussi fait voir que s'il y avoit eu de la froideur entre vous deux, qu'elle estoit changée en de mutuelles bien-veillances, ainsi que la suite des recueils de ces Œconomies royales et Servitudes loyales fera voir que tous ces grands, auxquels on a dit que vous estiez odieux, ont tous esté enfin de vos intimes amis, et ont parlé tousjours de vous fort honorablement, voire se peut-il dire que jamais favory de son Roy, ayant eu la principale administration de ses affaires et sur tout de celle des finances, n'a fait moins d'ennemis, eu moins de reproches et receu plus de louanges de sa bonne conduite, ny de qui la discontinuation de l'employ ait esté suivy de plus de regrets et de miseres.

*Trois lettres du Roy à M. de Rosny.*

Mon amy, je vous envoie Hambrelin avec cette lettre, par laquelle vous sçavez que M. d'Espernon est depuis peu revenu de Guyenne, qu'il m'a conté force nouvelles, tant d'une que d'autre religion, et donné toute occasion de croire qu'il a de bonnes intentions pour mon service. Il m'a aussi parlé de vous fort dignement et loué le choix que j'avois fait de vostre personne. Je sçay qu'il se delibere de vous aller voir; c'est pourquoy je vous prie de le devancer en cela, afin que ceux que j'ayme le mieux paroissent tousjours les plus honnestes, et qu'il croye que les assurances que je luy ay données sont certaines, puis qu'il est honoré par ceux que j'ayme. Adieu, mon amy.

De Fontaine-bleau, ce mercredi à midy.  
HENRY.

Mon amy, j'ay veu M. d'Espernon, qui m'a confirmé l'assurance de son tres-humble service, et n'avoir autre passion en l'ame que le desir de me le tesmoigner. Il m'a parlé fort librement de plusieurs choses et de vous entr'autres, louant l'eslection que j'ay faite de vous et vostre façon de proceder pour mon service, m'ayant tesmoigné vous aymer. Il m'a fait cognoistre, par ses paroles, qu'il vous ira voir; c'est pourquoy je vous fais ce mot, afin que vous le preveniez et l'alliez voir le premier: plus il vous fera de submissions, je vous prie luy en

rendre davantage, car il importe pour mon service. Bon soir, mon amy.

Ce 2 avril, à Fontaine-bleau, au soir.

HENRY.

Mon amy, Vion, maistre des comptes, est venu icy de retour de Guyenne d'une commission où il estoit allé pour mon service. Il m'a voulu bailler cinq mille livres, lesquelles je n'ay voulu prendre pour ce que j'ay appris qu'elles estoient affectées pour mes bastimens, luy ayant commandé de les porter au thresorier de mesdits bastimens; dequoy je vous ay bien voulu advertir, afin que vous envoyez querir Fourcy pour sçavoir de luy que c'est et me le mander, et prenez garde que l'on n'y fasse quelque passedroit. Au demeurant, j'oubliai, lors que vous partistes, de vous dire que M. d'Espernon estoit malade, et que vous l'allassiez voir, ce que je vous prie de faire et luy communiquer tout ce que vous avez fait en vostre voyage, excepté seulement le grand fait. Bon jour, mon amy.

Ce 17 juillet, à Villiers-Coterests. HENRY.

*Sept lettres de M. d'Espernon à M. de Rosny.*

Monsieur, je ne veux laisser passer ce porteur que j'envoie vers Sa Majesté, sans l'accompagner de ce mot, pour vous supplier, en me conservant la faveur de vostre bien-vueillance, faire assuré estat de mon humble service, duquel je vous donneray la preuve aux occasions où j'auray moyen de vous en rendre: que si quelqu'un vous a voulu donner opinion contraire depuis mon partement de la Cour, vous m'obligerez infiniment de le dire à cedit porteur, afin qu'il vous justifie la verité de la chose, et que par là vous cognoissiez la franchise de mon ame aussi entiere que leur artifice est malicieux. Monsieur, vous m'avez promis vostre assistance et faveur en mes malheureuses affaires, mesme en l'assignation dont Vallier vous poursuit sur l'imposition des rivières; je vous supplie de vous en souvenir, et de vous assurer que vous ne sçauriez jamais acquerir obligation sur personne qui soit plus que moy, monsieur, vostre humble et affectionné serviteur.

Escrite à Bourdeaux, ce 5 mars 1604.

J. LOUYS DE LA VALLETTE.

Monsieur, la faveur que vous m'avez faite de m'assurer de l'honneur de vostre amitié et de m'assister aux affaires que j'ay, dont mes gens ont charge de poursuivre les expéditions auprès du Roy, fait que je vous importune de cette supplication bien humble de vouloir favoriser mesdites affaires de vostre protection et assis-

tance, mesme en l'assignation que vous m'avez accordée sur Bourdeaux, de trente mil escus, recevant, s'il vous plaist, les acquits qui vous ont esté presentez par Vallier, mon secretaire, lesquels me furent, par commandement de Sa Majesté, delivrez à mon retour de Provence pres d'elle. La chose est si juste, monsieur, que quand il vous plaira de la considerer, je m'assure que vous n'y trouverez pas de difficulté. J'en escriis au Roy et le supplie tres-humblement de le vous commander, ce que je me promets de sa bonté, et l'effet de ce commandement des bons offices de vostre amitié, qui seront tousjours reconnus par services bien humbles, lors que j'auray le moyen de vous en rendre. Si vous venez en Poictou, et que j'en sois adverty, je me rendray en Angoulmois ou en Xaintonge, si je suis adverty à temps de vostre arrivée, pour ne perdre l'occasion et le bien de vous voir et assurer de vive voix, comme je fais par la fin de cette-cy, que je seray pour jamais, monsieur, etc.

A Bourdeaux, le 23 avril 1604.

Monsieur, la crainte que j'ay que les grandes affaires que vous avez tous les jours, ne vous fassent oublier le pouvoir que vous avez sur moy, fait que je vous importune si souvent de mes lettres, pour vous supplier de vous assurer que vous n'aurez jamais rien de mieux ny plus fidelement acquis que mon amitié et mon service. Lors que vous me ferez la faveur de me donner vos commandemens, mes actions vous donneront preuve certaine de la verité de mes paroles; je vous supplie donc d'en faire estat et me donner la part en vos bonnes graces qu'il vous a pleu m'y promettre. Je donne un advis au Roy, que j'ay appris en ces montagnes où je suis depuis huit jours; et, bien que ce ne soit qu'un bruit qui court parmy nos voisins, il me semble ne le devoir taire, mesmes me ressouvenant des advis que le Roy a eus sur semblable sujet, croyant, sans mentir, monsieur, que le jeusne se pourroit rompre pour un si bon morceau. Ayez agreable que, pour la fin de ma lettre, je vous supplie trouver bon que Vallier vous fasse souvenir de mes miserables affaires, et de m'y départir l'ayde et la faveur que je me promets de vos bonnes volontez; demeurant pour jamais, monsieur, etc.

Ce 4 d'octobre.

Monsieur, je ne veux laisser retourner le sieur d'Escures, que le Roy m'a fait l'honneur de m'envoyer comme vous sçavez, sans le charger de ce mot, et vous remercier bien humblement de l'obligation que j'ay receüe de vous en cette occasion, ainsi qu'il m'a esté assuré, avec assurance

que je vous fais de vous en rendre service en toutes les occasions où vous en voudrez tirer de moy. Vous sçavez dudit sieur d'Escures toutes choses et la grace que je desire du Roy, qui est si juste que je ne puis croire que Sa Majesté me la dénie, ny vous la continuation de l'amitié qu'il vous a pleu me promettre, puis que je suis, monsieur, etc.

Le 18 may.

Monsieur, j'ay beaucoup de regret d'estre si infortuné en ma condition, de n'avoir autre moyen de me revenger du bon conseil qu'il vous plaist me donner, par vostre lettre, en l'affaire qui se presente, et des bons offices que vous m'y rendez, que de vous en faire un million de bien humbles remerciemens, par ces foibles paroles, et de vous assurer de mon fidele service, comme je fais, monsieur, de toutes les puissances de mon ame, avec supplication de ne vous lasser à defendre la justice de ma cause. Vous sçavez, monsieur, de ce porteur la responce que je fais au Roy, et comme je le supplie tres-humblement de me donner un mois ou six sepmaines de temps pour me rendre pres Sa Majesté, ne pouvant y arriver au temps que le sieur d'Escures m'a marqué de sa part, qui est le dixiesme de juin, si ce retardement ne porte point de prejudice au bien de ses affaires; et, au cas que cela fust, je remets le tout à sa volonté, à laquelle je me conformeray tousjours, comme le devoir me le commande, ne laissant neantmoins, quoy que Sa Majesté fasse en cela, de diligenter le plus que je pourray mon voyage, pour continuer pres d'elle mon tres-humble service avec toute affection et fidelité, et vous tesmoigner en vostre particulier les ressentimens que j'ay des obligations dont vous me liez, resolu, en quelque lieu que je sois, de ne perdre occasion où je ne vous fasse voir par effet que je veux estre pour tousjours, monsieur, etc.

Ce 28 de may, 1605, à Cadillac.

Monsieur, la nouvelle que m'a mandé le sieur de Peronne, que le Roy estoit mal satisfait de quelqu'une de mes actions en ce lieu, m'est si sensible, que je n'auray repôs en l'esprit que Sa Majesté ne soit satisfaite, aymant mieux la mort que de luy desplaire en chose quelconque. C'est ce qui me fait vous supplier, comme je fais bien humblement, de me continuer les bons offices pres de Sa Majesté dont vous m'avez desja lié à vostre service, la suppliant de verifler ce qu'on luy peut avoir dit de moy; que s'il se trouve que j'aye esté guidé d'autre affection que de celle que je luy dois, je me sou mets à telle punition qu'il luy plaira. Faites moy cet honneur, mon-

sieur, je vous supplie, de croire que je ne feray jamais chose contraire à ce que j'ay tant de fois promis à Sa Majesté, et dont je vous ay supplié de l'asseurer, voulant suivre les bons conseils que vous m'avez fait la faveur de me donner, et desquels je me trouve si bien que je ne m'en veux jamais départir, ny de l'affection que je vous ay vouée, dont vous aurez preuve en toutes les occasions où vous me commanderez pour vostre service. Vous verrez, monsieur, la responce qu'a faite M. le cardinal de Givry au commandement que le Roy m'avoit fait, pour luy faire sçavoir son intention sur le sujet de la réunion de l'evesché au gouvernement du pays Messin, où il n'alleue aucune raison d'Estat; j'en adresse la dépesche à M. de Gesvre, où vous entendrez toutes les particularitez qui seroient trop longues à vous escrire; et me contenteray, pour la fin de cette-cy, de vous assurer que je suis pour tousjours, monsieur, etc.

A Mets, le 28 novembre.

Monsieur, avant que de recevoir la lettre que vous m'avez fait la faveur de m'escrire, le Roy m'avoit fait l'honneur de me mander l'accommodement de la broüillerie qu'on vous avoit faite avec M. le comte de Soissons et de qui elle venoit. Je me resjouys, autant que pas un de tous ceux qui vous honorent, de vous en voir hors, ayant tousjours creu que ce seroit un coup de la main du maistre, et qu'autre que luy ne le pouvoit faire. Vous avez trop de prudence, monsieur, pour ne juger mieux que moy que ce sont des espines que produit la fortune avec les faveurs qu'elle fait d'ailleurs; mais elles sont surmontées aussi par la vertu de ceux qu'elles piquent; vous en produisez les effets et en feriez leçon aux plus sages. Ce seroit presumption à moy de m'estendre là dessus; ce qui me fera changer de discours, et vous supplier bien humblement, monsieur, vous assurer de mon fidelle service, me conserver vos bonnes graces, et d'assister de vostre faveur le sieur de Peronne, porteur de cette-cy, aux affaires qu'il a aupres du Roy, dont je me tiendray aussi obligé à vous que si j'en ressentais le fruit en mon propre. Pardonnez, je vous supplie, à la liberté que je prends, et la recevez comme venant, monsieur, de, etc.

A Cadillac, le 23 novembre.

Nous adjousterons encor à ces lettres de M. d'Espernon à vous, deux autres de M. le grand escuyer de Belle-garde, que nous avons trouvées par hasard parmy vos papiers, pour faire voir que vous n'estiez pas tant odieux aux grands du royaume, comme le disoit un escrivain de notre temps, puis que deux de ceux avec lesquels

vous aviez eu le plus souvent quelque maille à départir, rendoient des preuves contraires: les deux lettres de M. le grand escuyer estant telles que s'ensuit:

*Lettre de M. de Belle-garde à M. de Rosny.*

Monsieur, je mets vos bonnes graces au nombre des choses du monde que je tiens des plus cheres, et que je souhaite autant conserver; voyla pourquoy je veux estre soigneux de vous en demander la continuation. La fortune ne me sçauroit mieux gratifier que de me donner le moyen de vous tesmoigner comme je les desire, ny vous, monsieur, m'obliger davantage que de m'offrir les occasions de les meriter. Nos nouvelles ne valent pas que vous preniez la peine de les entendre. La noblesse de cette province a esté sur le point de se broüiller sur la contention de l'esleu, à cause des brigues qui s'y estoient faites; tout s'est terminé comme il devoit. Si vous en desirez sçavoir les particularitez, le sieur de La Riviere vous les dira; pour moy je ne vous escriis que pour vous supplier tres-humblement et de tout mon cœur que vous m'aymiez, pource que je suis et veux estre toute ma vie, monsieur, etc.

De Dijon, ce 20 de septembre.

ROGIER DE BELLE-GARDE.

*Lettre de M. de Belle-garde à M. de Rosny.*

Monsieur, il est impossible que je vous remercie, ny comme je dois ny comme je desire, de l'affection dont l'image est si claire et si visible en vostre lettre. Il me suffira de vous jurer, hors de toute dissimulation et avec une verité dont je veux que ma conscience me soit tesmoing, que de tous les contentemens que je demande je n'en puis jamais recevoir un que je prefere à l'assurance que vous me donnez de vostre amitié. Je serois mal advisé d'en imputer l'acquisition à aucun merite que j'aye, aussi n'en veux-je devoir la continuation qu'à la seule bonté de vostre naturel. Je vous supplie donc, monsieur, tres-humblement, de me la vouloir accorder; et je vous proteste, avec les plus religieux sermens qui puissent exprimer les intentions de l'ame, qu'il n'y a point de fidelité au monde s'il n'y en a au vœu que je vous ay fait, et que de nouveau je vous reitere, de mon tres-humble service. Je ne puis sinon prodiguer ma vie à toutes les occasions que vous voudrez de le vous faire paroistre, je les attends avec impatience, et l'honneur de vous voir bien tost de retour. Cependant je vous baise tres-humblement les mains, et prie Dieu, monsieur, etc.

De Dijon, ce 25 octobre.

ROGIER DE BELLE-GARDE.

Or, comme les voyages du Roy en Provence et de vous en Poictou se fussent rendus tous communs, plusieurs se preparans pour iceux, il se rangea nombre de Poictevins aupres de vous, afin de vous y faire compagnie, et entre les autres les sieurs de Richelieu et du Pont de Courlay, avec ce dessein que, par le moyen d'une grande affection et servitude qu'ils feindroient vous avoir vouée, ils entreroient en telle familiarité pres de vostre personne et parmy vos domestiques, qu'ils decouvriroient facilement tout ce que vous diriez, feriez et desseigneriez, afin que s'il y avoit quelque chose d'importance dont l'on se pust prevaloir en faveur des catholiques et contre les huguenots, ils en peussent conferer avec quelques-uns de leur intelligence, pour tirer de là sujet de vous rendre de mauvais offices aupres du Roy, et par ce moyen diminuer vostre grande creance et faveur pres de Sa Majesté : à quoy ils ne manquerent pas de travailler puissamment, comme il se verra par la suite de ces Memoires, et qu'il leur réussit aussi mal qu'il y avoit d'utilité en vos services et de malice en leurs cœurs.

Chacun croyant donc ces voyages pour indubitables, les particuliers qui avoient des affaires aux conseils du Roy en pressaient l'expédition, afin de s'exempter d'une tant penible suite, et tous vous autres messieurs desdits conseils, celles des affaires generales qui estoient entamées, afin de laisser moins de besongne à ceux du conseil que le Roy faisoit estat de laisser à Paris; lequel voulant, sur toutes les choses presentes et autres occurrences qui pourroient survenir, consulter derechef avec les princes et autres siens plus qualifiez et confidens serviteurs, il fit advertir tous ceux qui estoient à Paris, de ces conditions, de se trouver un certain jour à Fontaine-bleau, pour, avec leur avis, prendre une absolue resolution sur toutes ces affaires. Mais comme la foiblesse de l'esprit humain et l'impertinence du jugement des hommes ne se demontre jamais davantage qu'aux choses où il porte le plus ses affections, d'autant qu'en telles occasions la raison cede ordinairement à la passion qui fait que, par la vehemence d'icelle, les habiilles et niveleries du monde y sont rendues plus considerables que les choses serieuses et substantielles; tout de mesme qu'il advient aussi souventes-fois à la plupart des hommes (lors qu'ils veulent reduire en acte des desseins de grande importance, de longue main projetez, et sur lesquels ils estimoient avoir meurement consulté les plus sages, examiné profondement toutes les raisons qui se pouvoient alleguer de part et d'autre, preveu suffisamment tous les accidens et préparé

mesme, sur chacun d'iceux, des remedes convenables, ou qu'ils veulent donner commencement à l'exécution des choses nouvelles, hautes et difficiles) qu'il leur survint, en ce temps-là, de nouvelles pensées et cogitations en l'esprit, et qu'il se presente en leurs entendemens, de nouveaux desirs, nouvelles imaginations et nouveaux inconveniens, lesquels, estans comparez et balancez avec les premieres raisons proposées, les affoiblissent de telle façon, et en diminuent de sorte et le poids et le prix, que non seulement elles les tiennent en suspens, mais aussi les arrestent tout court, voire font prendre des resolutions toutes contraires : dequoy ce conseil de tant de grands personnages que le Roy fist lors assembler pour conclurre sur toutes les affaires occurrentes, en sert maintenant de preuve; d'autant qu'en iceluy tant de nouvelles questions et propositions furent agitées, tant de raisons alleguées, d'objections faites et d'inconveniens mis en avant, qu'ils furent trouvez suffisans, voire par le Roy mesme, sans instance ny persuasion d'autrui, pour differer à une autre fois son voyage de Provence, qu'il avoit publié si haut et tesmoigné de tant affectionner, et fut mesme arrêté qu'en continuant le vostre de Poictou vous useriez du plus prompt retour que les affaires dont vous seriez chargé par le Roy vous le pourroient permettre, sans passer outre la province ny vous amuser à la visite et recognoissance des costes maritimes, ainsi qu'il avoit esté au commencement resolu.

Or, pour ce qu'il sembleroit y avoir eu une grandissime legereté ou extrême nonchalance en la tant soudaine mutation de ces premiers conseils et resolutions, si les causes en estoient entierement ignorées, en laissant à part les plus secretes (quoy que ce peut estre les plus efficaces, pour ce que nous les jugeons mieux seantes au silence et à l'oubly qu'au recit ny à la ressouvenance), nous vous ramentevrons seulement celles que vous nous dites avoir esté alleguées tout haut en plein conseil.

Dont la premiere fut l'incertitude en laquelle l'on demeurait des succez, bons ou mauvais, de ces deux grands sieges d'Ostende et de l'Ecluse, desquels les faveurs de la fortune tournans toutes d'un costé, donneroient un tel branle au cours des affaires generales que la proximité du Roy y seroit absolument requise.

La seconde, celle où l'on estoit semblablement de la conclusion ou rupture du traité de paix qui se negocioit entre l'Espagne et l'Angleterre, lequel estoit pour lors demeuré accroché sur la proposition faite par les Espagnols d'une ligue offensive et defensive avec les Anglois, moyennant

laquelle toute sorte de trafic leur seroit libre aux deux Indes ; comme eux aussi de leur part, en ce cas, ne donneroient plus aucune assistance ny faveur aux Etats des Provinces Unies, estant bien raisonnable que le Roy ne s'esloignast pas pendant l'indcision d'affaires tant importantes.

La troisieme, les contentions plus fortes que jamais qui se continuoient entre le comte de Fuentes et les Grisons, lequel essayoit de se rendre maistre de la Valtoline par le moyen de son fort ; le traité d'alliance qui se minutoit entre les Venitiens et les Grisons, afin de conserver ce trajet de petit pays qui facilite la communication d'entre les François, Suisses et Grisons avec les Venitiens, dequoy rien ne se pouvoit conclurre sans l'intervention du Roy ; les alterations que pourroient causer l'establissement du placart des trente pour cent, et l'interdiction absoluë de tout commerce entre France, Espagne et Flandres ; le voyage que le comte d'Auvergne avoit fait en ce pays-là par escapade, duquel l'on avoit advis qu'il faisoit plusieurs mauvaises pratiques, et tesmoignoit de ne vouloir pas revenir à la Cour ; l'allarme que l'on disoit que prenoit M. Desdiguieres du passage du Roy par le Dauphiné, laquelle pourroit estre cause de faire esclater quelque chose mal à propos ; le recouvrement que le Roy desiroit faire de la promesse de mariage par luy baillée à mademoiselle d'Antragues, duquel la Reyne le pressoit infiniment, et la vouloit contenter là dessus, ce qui ne se pouvoit esperer si le Roy s'esloignoit ; l'instance dont on avoit averty le Roy que M. le comte de Soissons luy vouloit faire, estant en Dauphiné, de retirer les places baillées pour ville de garde à M. Desdiguieres, et le faire recognoistre en icelles comme gouverneur, en ostant les garnisons ; les menées nouvellement decouvertes que faisoient le sieur d'Antragues et sa fille avec l'ambassadeur d'Espagne, et les aises, plaisirs et delices des dames, des marjolets, courtisans et d'aucuns mesmes des principaux seigneurs et ministres de l'Estat, qui estoient tres-aises de se pouvoir exempter d'un si long et penible voyage et tant plein de despençe.

## CHAPITRE CXL.

*Voyage de Rosny en Poitou. Lettres de Henri IV et de Villeroi, qui instruisent Rosny de ce qui se passe à la Cour pendant son absence. Découverte de la conjuration du comte d'Auvergne. Digression sur la position des rois de France, d'Angleterre, d'Espagne et du Pape. Projets dangereux du*

*duc de Bouillon et du duc de la Trémouille. Affaires étrangères.*

Le voyage de Provence ayant donc esté rompu pour les causes dites au precedent chapitre, et le vostre de Poictou resolu, vous partistes quelques jours apres. Et pource que nous ne voulons, comme nous l'avons desja protesté plusieurs fois, rien employer en ces recueils de vostre vie, sinon les choses que nous aurons ouyes et veuës, ou que nous aurons entenduës de vous ou apprises par lettres et memoires trouvez parmy vos papiers, nous laisserons aux historiens tout ce qui se fit et dit en France et aupres du Roy, tant pour ce qui regarde les affaires generales de l'Estat, que les intrigues et broüilleries de Cour, pendant le cours entier de vostre susdit voyage de Poictou, et mesmes les particularitez des choses, quoy que plusieurs assez importantes, qui vous furent occurrentes en iceluy, de crainte que les unes attirant le recit des autres, ces discours n'en fussent par vous et par d'autres estimez trop longs et ennuyeux ; et nous contenterons, afin de ne vous en laisser pas du tout sans quelque lumiere et ressouvenance et de donner aussi une espece de suite aux affaires, d'insérer icy quelques lettres qui vous furent escrites sur ce qui se passoit en ce temps, par le Roy, messieurs de Ville-roy et de Fresne, et par vous à eux ; dont la premiere que nous avons pû recouvrer estoit telle que s'ensuit :

### *Lettre du Roy à M. de Rosny.*

Mon amy, je ne vous ay point escrit depuis vostre partement, tant pource qu'il ne s'est rien passé dont il me fust besoin de vous tenir adverty, que pour avoir commandé au sieur de Ville-roy de vous informer amplement des affaires generales et sur tout des estrangeres, et encor presentement ne vous escrivy-je rien de particulier, m'en remettant encor audit sieur de Ville-roy, et à ce que vous en dira Escures de ma part (n'ayant rien voulu fier au papier), que j'envoye expressément vers vous dans trois ou quatre jours, afin de vous donner cognoissance de plusieurs meschancetez qui se brassent, auxquelles je veux apporter remede, mais non sans avoir pris vos bons avis, desquels je me suis tousjours si bien trouvé, que je ne les veux pas negliger, et aurois encor plus grand besoin de vostre personne, d'autant qu'il fait bon avoir des hommes propres à executer ce qu'ils conseillent, comme je vous ay tousjours trouvé prest de faire. Adieu, mon amy.

De Sainct Germain, le 21 juin 1604. HENRY.

*Lettre de la main du Roy à M. de Rosny.*

Mon amy, je vous fais ce mot, en attendant que dans deux jours je vous dépêche Escures, par lequel vous apprendrez que nous avons decouvert forces trahisons, esquelles le comte d'Auvergne et M. d'Antragues sont meslez, et des choses si estranges, qu'à peine vous les croirez. Nous avons aussi appris par des lettres que M. de Bouillon escrit, que nous avons surprises, qu'il brouille tousjours et que M. de la Trimouille est de la partie; d'Escures vous portera des nouvelles de tout. Je ne me portay jamais mieux que je fais à present, Dieu mercy, commé font ma femme et mon fils, et ma fille, qui sont là les meilleures nouvelles que je vous scaurois mander, et pour fin, que je vous ayme bien. Adieu, mon amy.

Ce 22 juin, à Sainct Germain en Laye.

HENRY.

*Lettre de la main du Roy à M. de Rosny.*

Mon amy, suivant ce que je vous ay escrit ce matin par la voye de la poste, j'ay pensé de vous envoyer Escures, present porteur, pour vous informer particulièrement de ce qui est venu à ma cognoissance jusques à present, touchant les affaires dont je vous ay escrit, lesquels je vous prie de considerer selon qu'il importe à mon service, et m'en mander vostre advis sur le tout. Je vous envoie semblablement un memoire d'autres advertissemens qui m'ont esté donnez, dont les lettres m'ont esté mises en main, pour vous monstrer comme j'ay esté servy par aucuns de la religion, desquels j'ay grande occasion de me tenir offensé, ayans si mal recognu la bonté dont j'avois usé, pour oublier ce qui avoit esté fait contre leur devoir et mon autorité en l'assemblée de Gap. Vous reconnoistrez par là le peu de conte qu'ils ont fait de vostre conseil et de ce qu'ils vous avoient promis. Vous vous en servirez, comme vous adviserez, pour remedier à l'advenir que pareils desordres n'aviennent plus. Je seray bien ayse d'entendre, par le retour dudit d'Escures, ce qui s'est passé en vostre voyage, et comme vous esperez le bien employer. Je desire qu'il finisse bien-tost avec heureux succez, afin que tant plutost je vous revoye. Adieu, mon amy.

Ce 22 juin, à Sainct Germain en Laye, au soir.

HENRY.

*Lettre de M. de Ville-roy à M. de Rosny.*

Monsieur, M. d'Escures vous dira ce qui se passe et s'est decouvert icy depuis vostre parlement. Je luy ay baillé aussi un petit memoire

des advis que nous avons eus de l'Escluse, depuis ceux que je vous ay envoyez avec ma lettre du 10 de ce mois, qui a esté mise à la poste. L'on nous mande de Bruges que l'Archiduc doit mettre ensemble quinze ou seize mille hommes pour assieger et forcer Ardanbourg, afin de s'ouvrir le chemin pour secourir l'Escluse; mais l'on dit que les fortifications du camp du prince Maurice sont telles, qu'il ne pourra les forcer, pourveu qu'il y ait assez de gens pour les garder et defendre. Quant à Ostande, chacun y travaille de son costé avec peu d'avantage; car ils poursuivent leurs mines de part et d'autre, qui ont jusques à present fait peu d'effet. Les Estats ont de nouveau jetté en la place mille ou douze cens hommes, pour rafraischir ceux qui y estoient, lesquels estoient las d'y servir. Jusques au 7 de ce mois, les députez qui traittent la paix en Angleterre, avoient peu avancé; ils estoient accrochez au point qui concerne les Estats des Provinces Unies, que les Espagnols demandent que les Anglois abandonnent, à quoy ceux-cy faisoient démonstration de ne se vouloir obliger; mais M. de Beaumont a tousjours opinion qu'enfin ils s'accommoderont, et que chacun biai sera et se relaschera de quelque chose. J'estime que vostre presence par delà sera utile au service de Sa Majesté; mais elle est icy tres-necessaire sur ces occasions qui se presentent, ainsi que vous reconnoistrez par ce que vous representera ledit sieur d'Escures; sur lequel me remettant, je prie Dieu, monsieur, qu'il vous conserve en santé, salüant vos bonnes graces de mes humbles recommandations.

De Sainct Germain en Laye, ce 22 juin 1604.

Vostre humble serviteur,  
DE NEUF-VILLE.

*Lettre de M. de Ville-roy à M. de Rosny.*

Monsieur, je vous envoie, par commandement du Roy, un discours venu d'Angleterre, mais que Sa Majesté a jugé avoir esté forgé en France. Elle desire que vous le consideriez, et que vous observiez le langage que l'on vous tiendra par delà sur ce sujet, se persuadant que vous les trouverez conformes aux discours en la bouche de quelques-uns qu'elle soupçonne autheurs d'iceluy; peut estre aussi qu'elle se trompe, et me semble qu'il nous servira de peu d'en decouvrir la verité. Les bons remedes que nous devrions appliquer à telles inventions, consistent plus en nous mesmes qu'il ne faut les attendre d'ailleurs. Nous avons lettres d'Angleterre du 14 de ce mois, par lesquelles nous apprenons que les commissaires de la paix ont eu de grandes contestations et disputes sur les trois poincts desquels je



vous ay donné advis ; mais ils s'estoient fort moderez, de façon que l'on avoit opinion qu'en fin ils s'accorderoient, toutesfois peu utilement et honorablement, tant pour les uns que pour les autres. Nous avons lettres de M. de Buzenval du 19 de ce mois, par lesquelles il nous mande qu'il fera ce que vous sçavez que Sa Majesté luy a commandé, nous asseurant avoir trouvé ceux ausquels il a eu charge de parler, tres-disposez à embrasser l'ouverture qu'il leur a faite ; mais je prevoy des difficultez tres-grandes en l'exécution, et seroit besoing que vous fussiez aupres de Sa Majesté pour nous ayder à les surmonter, car j'ay peur que le temps nous gagne et que les occasions nous eschappent. Le Roy a eu advis nouveau qu'il est arrivé à Sainct Sebastien, huit ou neuf navires anglois, chargez de grains qu'ils avoient acheptez aux sables d'Olonne, d'où sortent une grande partie des contraventions qui se font à son ordonnance. Cela est cause que les Espagnols se roidissent en faveur de leur placart, lequel l'on nous escrit de divers endroits, que ils auroient revocqué il y a long-temps, si l'on eust gardé ladite ordonnance. Sa Majesté m'a commandé vous escrire ce que dessus, afin que vous en fassiez informer et que vous y pourvoyez. Au reste, nous sommes venus en cette ville sur le sujet pour lequel nous vous avons envoyé le sieur d'Escures, sur lequel il y auroit prou de choses à escrire s'il n'estoit meilleur de les vous dire de bouche. Partant je seray excusé si je m'en tais.

De Paris, ce 25 juin 1604.

*Discours presupposé venu d'Angleterre.*

De long-temps l'Europe n'a veu trois grands roys voisins si pacifiques, et neantmoins tous trois en ombrage l'un de l'autre, et tous trois ayans moyen et l'avantage de se nuire, et pretentions l'un sur l'autre : l'un, Roy d'une nation factieuse et entreprenante, le second, d'un peuple remuant et courageux, et le dernier, de deux peuples fiers et belliqueux ; tous trois, neantmoins, ennemis de la guerre et amis de la paix, faisant tout ce qu'ils peuvent pour garder leur aise et leur repos. Le premier et le dernier ne sçavent que c'est que de guerre, et le second en est si las qu'il n'en veut plus ; le premier et le second pour cherir les voluptez, et le dernier pour se recognoistre en un Estat nouveau. Le dernier toutesfois a l'avantage, en ce qu'il est recherché des autres, avec dons, instances et flatteries, pour luy lever l'opinion de la froideur precedente ; pour se venger accortement, se fait prier et resblendir, prend le present, amuse l'un et l'autre, et fait cependant ses affaires ; a neantmoins plus d'inclination à continuer amitié

avec le second qu'à l'estreindre avec le premier, quoy qu'il ait et plus de pretentions et plus d'avantage, et tireroit plus de fruit d'attaquer le second que le premier. Le premier veut les Pays-Bas pour luy seul, comme son ancien patrimoine : chacun des deux autres seroit bien marry de l'en voir en possession paisible, et les aymeroit mieux chacun pour soy, comme fort en leur bien-seance, ores qu'ils ne l'osent dire ; et n'y pouvant parvenir, fomentent cependant cette distraction jusques à tant que les pays se forment en republique, guerre propre à les amuser tous trois, et les divertir de plus mauvais desseins l'un sur l'autre. Enfin, quoy que tous trois soient heureux, soient asseurez, soient accords, soient puissans en alliances et grands moyens, si semble le dernier plus heureux, asseuré, accord et mieux allié que les deux autres ; son heur s'est veu en son paisible et plausible établissement, sans despence d'un denier, sans effusion d'une goutte de sang ; sa seureté en l'assiette de ses isles, d'où il peut offencer autrui, et difficilement le peut estre par autrui ; et encores en nombre d'enfans, et d'âge de son aîné, a l'avantage qui manquoit des autres ; sa ruse à se faire prier de ce qu'il desire autant que les deux autres, et à secourir sous-main ceux lesquels en apparence il blâme ; et d'ailleurs, en flattant le Pape, ruyne la papauté tant qu'il peut en ses Estats. Son alliance n'est inferieure à celle des deux autres ; car tacitement il a tous les protestans pour luy, de quelque nation et climat qu'ils soient, et sans les rechercher en peut faire ce qu'il veut, son autorité et sa reputation luy ayant acquis ce credit, que pour estre le plus grand d'eux tous, il s'en peut dire le chef ; et à mesure que l'alliance et creance du second s'affoiblit parmy eux, celle du dernier s'en accroist à veüe d'œil. Les deux premiers n'ont appuy que le Pape, et le reste de l'Italie assez foiblement : par là jugez la verité de cette comparaison.

*Lettre de M. de Rosny au Roy.*

SIRE,

Ayant entendu, par le sieur d'Escures, l'estat et la condition des personnes et des affaires dont vostre Majesté luy a donné charge de me parler, j'en ay discouru amplement avec luy, afin qu'il luy puisse représenter quels sont mes sentimens sur telles occurrences, puis qu'il plaist à vostre Majesté de les sçavoir, outre lesquels et ce que je me reserve à vous dire de bouche sur plusieurs affaires importantes que j'ay apprises en mon voyage, lesquelles je ne puis confier aux personnes ny au papier, je me licencie-

ray de luy dire, par cette lettre, que je recognois en ceux dont le sieur d'Escures m'a discoursu, et toute leur sequelles, quantité de malices et de mauvais desseins, mais peu de jugement, pauvre conduite et fort petits moyens pour en apprehender les effets; et tout au contraire, je voy en vostre Majesté nombre infiny de vertus, beaucoup de bonnes intentions, peu d'inclinations à la rigueur, et neantmoins toutes sortes de raisons et de facilitez pour faire des punitions exemplaires, comme ce seroit bien mon advis que vous fissiez de ces ames impies qui ne peuvent estre ramenez à raison ny retenus en devoir, ny par amour et consideration de vertu, ny par reception de bien-faits, ny par indulgence d'offence, ny par apprehension de supplices; suppliant vostre Majesté de m'excuser, si, conformément à ce que m'a dit le sieur d'Escures de sa part, je ne luy mande encore nulles particularitez des choses qui se sont passées en cette province, d'autant que pour en escrire avec certitude, et poser là dessus quelque fondement, il m'a semblé necessaire de voir auparavant si les suites et conclusions seront conformes aux commencemens : ce qu'attendant, je supplieray vostre Majesté de croire que je n'obmettray ny industrie, ny diligence pour la servir loyalement et à son gré. Sur cette verité, j'invoqueray le Createur à ce qu'il luy plaise, etc.

De Poitiers, ce 26 juin 1604.

*Lettre de M. de Rosny à M. de Ville-roy.*

Monsieur, j'ay escouté le sieur d'Escures fort attentivement, et meurement examiné quelles sont les qualitez des personnes et des affaires dont il m'a parlé, ensemble toutes les circonstances d'icelles qui m'ont semblé le meriter, sur toutes lesquelles j'ay tant amplement discoursu avec ledit sieur d'Escures, qu'il luy sera facile de représenter clairement au Roy et à vous, tout ce que je pense sur telles recidives de ces malins esprits, inutiles au bien et enclins à tout mal, que les seules esperances des par trop communes indulgences du Roy pour des sujets qui ne le valent pas, endureissent aux delits et accoutument aux crimes; mais tout cela conduit avec tant d'impertinence, voire de manie, et enveloppé de tant de foiblesse, que la seule irresolution du Roy à leur faire cognoistre sa juste indignation, et ressentir ce qu'ils meritent, en empesche la destruction qu'ils ne scauroient éviter, si Sa Majesté ne prend plaisir, luy qui est tres-bon, à se jetter dans les perils, les peines et les soucis, pour en garantir ceux lesquels sont tres-mauvais.

Quant aux affaires d'Angleterre et Hollande

dont vous m'avez escrit, il m'est fort difficile d'en pouvoir faire de si loing un jugement bien certain; et neantmoins, selon ce que j'en puis conjecturer par ce que vos lettres m'en apprennent, j'estime que toutes les pertes ny aussi tous les advantages ne pencheront pas d'une seule part, et que chacun esprouvera que la fortune est muable; dequoy attendant que les succez nous rendent plus sçavans, je vous balseray les mains, prieray Dieu qu'il vous conserve, et demeurera, etc.

De Poitiers, ce 26 juin 1604.

*Lettre de la main du Roy à M. de Rosny.*

Mon amy, j'ay receu la vostre par d'Escures, et ay esté bien aise d'entendre, par luy et par icelle, les conseils que vous me donnez sur le sujet de son voyage vers vous, desquels j'espere, Dieu aydant, faire si bien mon profit que vous en louerez mes actions, lesquelles ne tendront qu'au bien de mes affaires et de mes sujets. Je trouve bon que vous alliez jusques en Broûage et à Saint Jean d'Angely, quand ce ne seroit que pour faire cognoistre que les bruits que l'on a fait courre que je vous y voulois envoyer pour acheter les marais sallans et autres, sont faux, aussi que je croy que vostre presence y sera necessaire, tant pour adviser à l'estat desdites places et aux fortifications que vous y jugerez necessaires, que pour autres raisons qui se pourront presenter par delà, pour le bien de mon service. J'ay veu la lettre que vous a escrite M. de la Trimouille, et suis de vostre advis. Pour le fait de Partenay, dont vous m'avez cy-devant escrit, je trouve bon que Serrouette l'ait, car je l'ay nourry petit garçon, et veux croire qu'en cette charge il me servira tousjours bien et fidellement comme il a fait jusques icy. Je renvoyeray, dans un jour ou deux, Escures en Auvergne, et de ce qu'il me rapportera de ce costé là, et de ce que j'auray fait en cette affaire, je commanderay que vous en soyez adverty, comme aussi vous ferez de ce que vous apprendrez par delà m'importer. Asseuré que me servant bien comme vous faites, je vous ayme bien aussi, qui est tout ce que je vous puis mander pour cette heure; et pour témoignage que je me porte bien, que je m'en vais tout presentement courre un cerf à Livry. Bon jour, mon amy.

Ce 28 juin, à Paris.

HENRY.

*Lettre de M. de Ville-roy à M. de Rosny.*

Monsieur, vous avez raison de desirer et conseiller au Roy qu'il fasse justice de toutes ces trahisons et conspirations qui se brassent et qu'il

descouvre journellement contre sa couronne, pour en arrester le cours qui est devenu trop commun et ordinaire, pour avoir trop souvent et indifferemment appliqué le remède de sa clemence aux occasions qui s'en sont offertes, estant certain que plusieurs ont creu que Sa Majesté en a ainsi usé, autant pour se descharger de peine et d'incommodité que pour exercer cette vertu, laquelle toutesfois nous cognoissons avoir pris telle racine en son ame qu'il est tres-difficile de luy donner des mouvemens contraires à icelles. Votre prudence seroit icy tres-necessaire pour cela, pour la creance que Sa Majesté a en vous plus grande qu'en tout autre, et pour le bon devoir que vous feriez de luy faire cognoistre et apprehender la consequence du fait qui se presente. Comme vous dites tres-bien, tous ces gens sont foibles en toutes choses, et ne doivent estre crains qu'en une, de laquelle tout autre ne peut sauver et garantir Sa Majesté qu'elle mesme. Ses fidelles serviteurs luy en ont dit ce qu'ils doivent à son service et à leur honneur, qui a esté pris en bonne part, comme a esté ce que vous en avez escrit et fait dire par le sieur d'Escures; et faut esperer que Sa Majesté inspirée de Dieu, aymant son Estat et ses enfans comme elle fait, prendra les conseils plus salutaires.

Monsieur d'Antragues a promis de représenter la promesse qui a servy de pretexte et de leurre au conte que les Espagnols ont fait de luy, et croy que nous renverrons dès demain en Auvergne ledit sieur d'Escures, avec charge conforme à vostre avis; l'on doit aussi continuer à interroger aujourd'huy Le Morgan, seul courtier de ce trafic, afin de le presser de dire tout, comme celui qui a tout manié, à quoy la rigueur de laquelle l'on a accoustumé d'user en justice, ne l'a espargné. Après il faudra parler à Fortay, et vous assure que, si j'en suis creu, l'on les fera servir d'exemple aux estrangers qui osent entreprendre de telles pratiques. Le Roy veut que vous passiez en Broüage pour les raisons qu'il vous escrit; j'estimois plus fortes et considerables celles qui nous devoient mouvoir de vous excuser de ce voyage, afin d'accelerer vostre retour: mais Sa Majesté a voulu desmentir les bruits qu'aucuns ont publiez de vostre dessein sur ladite place, par l'effet de vostre procedure; et toutesfois je ne doute point que les affaires qui se passent et traittent en Flandres et en Angleterre, ne vous donnent tout loisir de vous rendre aupres de Sa Majesté, à temps, pour l'assister de vostre conseil sur icelles. Les armées travaillent tousjours à leur tasche au pays de Flandre, avec esperance fort diverse

et contraire l'une de l'autre; car les Espagnols se vantent qu'ils forceront Ostande dedans la fin du mois de juillet, et qu'ils contraindront le prince Maurice de quitter l'Ecluse, et ledit prince veut que nous croyons qu'il en arrivera tout au rebours. Nous aurons icy M. de Buzenval bien tost, qui nous y pourra faire voir plus clair, dont nous vous donnerons advis. Et quant à la negociation d'Angleterre, le 21 de ce mois il n'avoit encores esté resolu qu'un article, qui est celui qui concerne le general de la paix, encore que les commissaires en eussent proposé et debattu plusieurs autres particuliers, lesquels jusques alors estoient demeurez indecis. Je me recommande humblement à vostre bonne grace.

De Paris, ce 28 juin 1604.

#### CHAPITRE CXLI.

*Suite des lettres qui instruisent Rosny de ce qui se passe à la Cour. Le comte d'Antragues remet à Henri IV la promesse de mariage qu'il a faite à la marquise de Verneuil. Traité entre l'Espagne et l'Angleterre. Situation de la Hollande.*

Pendant vostre voyage de Poictou, vous receustes plusieurs autres lettres que nous nous abstenons d'insérer en ces Memoires, de crainte d'estre trop longs, et nous contenterons de vous ramener celles que nous avons creu ne pouvoir estre obmises sans prejudicier à l'intelligence du cours des affaires, desquelles la teneur ensuit:

*Lettre de M. de Ville-roy à M. de Rosny.*

Monsieur, le Roy m'a commandé vous écrire qu'un nommé Durand, né à Geneve, qui se dit sieur de Haute-fontaine, a esté envoyé en Angleterre il y a quelques mois par M. le duc de Rohan, pour y conduire et presenter au Roy dudit pays un cheval de la part dudit duc, lequel s'est embrouillé en des pratiques prejudiciables au service du Roy, et y a semé de tres-mauvaises graines, abusant du nom dudit duc, lequel Sa Majesté ne peut croire avoir donné charge audit Durand de faire telles pratiques, jusques à proposer de le marier en Angleterre et le faire passer audit pays pour cet effet, puisqu'il n'en a fait advertir Sa Majesté et ne lui en a demandé la permission; car, encores qu'il y ait envoyé ledit cheval sans congé, ce qu'il ne devoit faire, Sa Majesté n'estime pas qu'il ait entrepris de faire le reste sans savoir sa volonté. Neantmoins, Sa Majesté desire que vous mettiez peine d'en apprendre par delà la

vérité, ayant opinion qu'il pourroit bien aussi s'estre laissé aller à faire cette faute, par le conseil de madame sa mère, de laquelle Sa Majesté dit que vous cognoissez la portée, comme elle fait. Sa Majesté pense aussi que ledit sieur duc vous verra devant que vous reveniez de Poictou, auquel cas vous pourriez, comme de vous-mêmes, et si vous aviez esté adverty par autre voye de l'arrivée en Angleterre dudit cheval et desdites menées, en sçavoir de luy la vérité, et sur ce luy remonstrer le tort qu'il se fait de se licentier d'envoyer en Angleterre, et de permettre que tels traittez s'y fassent pour luy, sans la permission et intention de Sa Majesté.

Sur tout il faut qu'il retire d'Angleterre cét homme en toute diligence; car c'est un tres-mauvais instrument, lequel il ne doit aussi retenir auprès de luy, ayant par ses actions desplu à sa Majesté; laquelle pareillement m'a donné charge de vous escrire avoir esté advertie de bonne part, telle qu'elle vous dira quand elle vous verra, que les factieux et broüillons qui sont par delà, n'ont pas delibéré, quelque honneur qu'ils vous fassent et confiance qu'ils vous monstrent, de vous decouvrir le secret de leurs deliberations, mais vous laisser faire vostre visite et vous promettre assez pour vous tenir peu, apres que vous en serez party; et dautant que l'on craint que M. de Parabelle, comme celuy qui a le cœur franc et qui vous affectionne, vous en die trop : Sa Majesté a sceu qu'il ne doit estre abandonné des sieurs d'Aubigny et Constant, pour le contenir jusques à ce qu'il vous ayt laissé.

Sa Majesté m'a commandé encores d'ajouter qu'il luy a esté rapporté que ceux de la religion pretendue reformée ont delibéré se bander et formaliser en corps pour M. de Bouillon envers Sa Majesté, afin d'obtenir qu'il puisse retourner en ce royaume et y demeurer en seureté : dequoy Sa Majesté vous prie de vous informer et mesme rompre, si vous pouvez, telles deliberations, lesquelles ne lui pourroient estre que desagrees, et mesmes prejudiciables à son service et affaires, estans en l'estat qu'elles sont.

Je vous diray aussi comme M. d'Antragues rendit hier au Roy cette pretendue promesse, en la presence de messeigneurs le comte de Soissons et duc de Mont-pensier, monsieur le chancelier et les sieurs de Sillery, de la Guelle, Jeannin, de Gesvre et de moy, dont il a esté dressé un acte en telle forme que les serveurs de Sa Majesté l'ont désiré, pour certifier et recognoistre que ledit écrit est le vray et seul écrit fait par Sa Majesté pour ce sujet, avec

des declarations qui ont esté jugées propres, tant pour empescher que l'on n'en puisse avec raison douter à l'advenir, que pour verifier comme tout a passé; de sorte que nous en demeurons contens, comme j'estime que vous serez pour ce regard, en estant informé plus particulierement. L'on parle maintenant de renvoyer à messieurs du parlement l'affaire de Morgan, avec les depositions de M. le comte d'Auvergne et de M. d'Antragues, pour faire le procez au premier et le faire servir d'exemple, et pour faire plus estimer la grace que Sa Majesté a delibéré faire aux deux autres. Cependant Sa Majesté a renvoyé le sieur d'Escures vers ledit comte pour estre mieux informé du fonds de ces affaires, encore que nous n'y voyons que trop clair. Vous sçavez aussi que nous tenons pour arresté la paix entre Angleterre, Espagne et Flandre, les deux derniers s'estans accommodez à tout ce qu'a voulu l'autre, tant pour le regard des villes hostageres, le voyage des Indes, la communication et trafic avec les Estats, le delaisement auprès d'eux des Anglois qui les servent, le rafraichissement qu'ils en voudroient faire à l'advenir, que pour le commerce libre des pays, sans estre sujets de payer les trente pour cent et autres conditions. Le connestable de Castille doit passer au pays au premier jour pour mettre la dernière main à cét œuvre, duquel je seray trompé si les uns et les autres jouissent heureusement ny longuement. Nous n'avons aucune nouvelle de l'Ecluse, mais nous attendons M. de Buzenval. Quant à Ostande, l'on y a fait jouer trois mines cette sepmaine qui ont peu servy aux assiegeans, ainsi que nous a mandé M. de Vic par le sieur d'Auval, revenu d'Angleterre ce jourd'huy. Le Roy doit partir demain ou lundy pour Monceaux, où il prendra des eaux de Pougues, comme il fist l'année passée.

De Paris, le 3 juillet 1604.

DE NEUF-VILLE.

#### *Lettre du Roy à M. de Rosny.*

Mon cousin, j'ai receu vostre lettre par le sieur de la Fond, lequel j'ay particulierement ouï sur ce qu'il a recognu estre du bien de mon service en l'exécution de sa commission, dont il a rendu bonne raison. Je l'ay depuis fait aussi ouyr en mon conseil, lequel m'a fait dire qu'il y a desja quelque temps qu'il vous a esté envoyé une commission en blanc, pour la remplir de tel de mes officiers que vous verrez bon estre, afin de proceder au jugement des fautes et abus qui ont esté commis contre les défences du commerce, estimant que par là

il auroit esté suffisamment pourveu à ce que vous pouviez pour ce regard desirer de deçà, parce que vous pourrez mieux que nul autre instruire le commissaire que vous choisirez, de tout ce qu'il aura à faire. Quant à la déclaration de ma volonté, elle n'est point changée depuis vostre partement, et est tousjours que lesdites fautes soient punies et chastiées selon les ordonnances. J'estime qu'il seroit bien à propos d'en excepter les habitans de la Rochelle; mais il faudroit les reduire au moins à tel point, qu'ils fussent necessitez de recourir à la grace, laquelle l'on leur fera valoir le mieux qu'il se pourra. Il sera bon aussi d'en excepter le sieur de Lussan, parce que l'ayant cy-devant fort blasmé de cette faute, par mes lettres, je luy en ay, par mesme moyen, fait la grace. Ma premiere opinion avoit esté de vous renvoyer ledit de la Fond; mais j'ay depuis esté adverty qu'il a remis entre les mains de mes officiers des lieux, toutes les procedures et verifications qu'il a faites: de sorte que sa presence n'y seroit doresnavant qu'inutile, n'ayant pû estre adjoint à la commission du commissaire, par ce qu'il n'est pas de la qualité de pouvoir juger. Vous serez informé de mes autres affaires par mes precedentes depeschés; et ne me reste rien à vous dire, sinon que je vous prie, quand le cours de vostre voyage sera achevé et que vous en serez sur vostre retour, de le faire icy le plus diligemment que vous pourrez. Je parts presentement pour aller coucher à Jully, et de là m'en iray à Monceaux, où je fais estat de prendre des eaux de Pougues, et pense que vous m'y trouverez encores à vostre dit retour. Sur ce je prie Dieu, mon cousin, vous avoir en sa sainte garde.

Escrit à Paris, ce 8 juillet 1604. HENRY.

*Lettre de M. de Ville-roy à M. de Rosny.*

Monsieur, j'espere que ce sera icy le dernier courrier que nous vous depescherons devant que vous reveniez; car je m'attends que vous ne retarderez plus vostre retour, puisque vous avez achevé vostre visite, et que le Roy veut que vous le reveniez trouver au plustost, ainsi qu'il vous escrit. Le procez de Morgan a esté mis au parlement, où je veux croire que le Roy et le public seront servis fidelement. Le sieur d'Escures est nagueres revenu d'Auvergne, qui a rapporté confirmation, non de tout ce qu'il avoit esté chargé du comte d'Auvergne, en ce premier voyage, de dire à Sa Majesté, mais d'une grande partie et de quelque autre chose nouvelle. J'estime qu'il y sera encores renvoyé; par il semble que ledit comte ayt envie qu'il l'amene et conduise vers le Roy, auquel il pro-

met de dire luy-mesme tout ce qu'il sçait, et représenter certaines lettres que madame sa sœur luy a escrites, qu'il dit estre d'importance. J'estime que vous arriverez encor à temps pour vous trouver aupres de Sa Majesté quand s'y presentera ledit comte, pour fortifier Sa Majesté de vostre bon, judicieux et genereux conseil; car, encor qu'elle l'ait bien compris par vos lettres, toutesfois il aura plus de force, vous present qu'absent. Mais il importe d'avancer la provision de poudre à canon que demande M. de Buzenval pour les Estats, comme vous cognoistrez par sa lettre, et c'est pour cela que ce courrier vous est envoyé, lequel je vous prie de nous redépescher au plustost avec la susdite provision. Un secours fait à propos et en nostre nécessité, oblige doublement celui qui le reçoit. Le capitaine Persi, le riche du regiment du sieur de Nerestan, est revenu nagueres d'Ostende, où il a visité et recogneu toutes choses. Il croit que la place ne sera forcée encores de six semaines ou deux mois; mais l'on peut bien s'abuser en tels comptes. Vous apprendrez par celle du sieur de Buzenval que le siege de l'Escluse n'yra pas encores si viste que l'autre, si l'on n'y change de conseil et de procedure: c'est chose que le Roy ne croit pas que l'on fasse, dequoy le dit sieur de Buzenval nous fera sages à son arrivée.

Je vous envoie un double du memoire que l'ambassadeur d'Angleterre a baillé au Roy, de la part de son maistre, pour luy rendre conte de la negociation de la paix<sup>1</sup> et du terme où il se trouve. M. de Beaumont ne doute point de la conclusion d'icelle, dont il ne faudra plus douter quand l'on verra que le connestable de Castille s'embarquera pour passer en Angleterre, comme l'on tient qu'il fera bien tost. De toutes parts l'on nous menace de la guerre d'Espagne, ce qui n'esmeut pas beaucoup Sa Majesté, non plus que certains advis que Sa Majesté dit que M. de la Trimouille continué à donner à ses affidés, pour les tenir en haleine et esperance d'un prompt et grand remuement en ce royaume, et contre la personne mesme de Sa Majesté, faisant un pot pourry de toutes les nouvelles de la Cour et de celles qu'il recueille d'Allemagne et d'ailleurs, pour fonder et autoriser ses imaginations, et les faire cadrer à ce qu'il desire, dequoy Sa Majesté remet à vous raconter les particularitez à vostre retour; mais, pour moy, je fais peu de conte de tels advis, apres mesmement avoir veu ce que vous nous avez escrit des affaires de delà. Le Roy veut aussi que je vous escrive que vous preniez garde à vous et à la conservation de

(1) Ce traité fut signé au mois de juillet 1604.

vostre personne, où vous passerez ; car il scait que l'on voudroit s'estre deffait de vous, non pour haine que l'on vous porte, mais pour priver Sa Majesté du service que vous luy faites. J'ay charge particuliere de vous escrire que Caravelle luy a fait sçavoir que l'on veut se servir de luy, contre Sa Majesté et la France, à quoy il a refusé jusques à present de s'engager, desirant au contraire se rendre digne de la clemence et misericorde de Sa Majesté, en luy faisant quelque signalé service, dequoy il se promet de rencontrer le moyen au contentement de Sa Majesté, laquelle a esté d'avis de ne mespriser son offre, parce qu'il ne demande argent ny parchemin, qu'après l'avoir mérité. Nous vous dirons le reste quand nous vous verrons, et serez cependant assuré de la bonne santé de leurs Majestez et de la resolution qu'elles ont prise de prendre icy les eaux de Pougues et de Spa, et de n'en partir de ce mois. Nous avons reçu vos lettres du trentiesme jour de juin par la poste, et celle du deuxiesme du present, par le courrier Picaud. Il vous plaira me renvoyer par le mesme courrier la lettre de M. de Buzenval, laquelle merite d'estre tenuë secrette, comme vous jugerez trop mieux.

De Monceaux, le douziesme jour de juillet 1604. DE NEUF-VILLE.

*Lettre du Roy à M. de Rosny, contre-signée.*

Mon cousin, je vous envoie un paquet que vous adresse le sieur de Buzenval, et aussi une lettre que j'en receus hier au soir, afin que vous sçachiez les causes de son retardement, et combien il importe que nous assistions les Estats des provinces unies des Pays-Bas, aux necessitez ausquelles ils se retrouvent, mesmement à present que le roy d'Angleterre est comme d'accord avec le roy d'Espagne et les archiducs, des conditions de la paix, ainsi qu'il a déclaré luy mesme à mon ambassadeur, et m'a fait dire icy par le sien, s'offrant de moyenner un accord entre moy et le roy d'Espagne sur le fait du commerce : dequoy j'ay estimé ne le devoir esconduire, tant par ce que c'est chose que je dois desirer et qui seroit utile à mes sujets, que pour ne luy donner sujet de croire que je n'aye agreable son entremise, non par forme d'arbitrage, mais seulement de mediation ; vous serez adverty de ce qui en réussira. Cependant comme lesdits Espagnols ont de nouveau mis par tout l'exaction des trente pour cent, ainsi que m'a escrit le sieur de Barrault, il faut aussi que nous fassions mieux observer que jamais nostre ordonnance sur l'interdiction dudit commerce ; car à la longue ils en recevront plus grande incommodité que nous. Et

quant à ce que je n'ay pas voulu traiter plus rigoureusement le sieur de Lussan, transgressant du commencement nostredite ordonnance, je l'ay fait pour bonne consideration, estimant qu'il sera meilleur que nous commencions d'en chastier quelqu'un de moindre étoffe, jaçoit que je n'ignore de quel efficace seroit l'exemple d'un de qualité ; mais ce sont remedes qu'il faut mesurer et pratiquer selon les temps et le cours des affaires qui regnent en la saison en laquelle l'on se retrouve, ainsi que je vous diray quand je vous reverray. Or, le principal maintenant est de maintenir et ne laisser deschoir lesdits Estats sur cette conjuncture de ladite paix d'Angleterre, au moyen dequoy secourons les promptement des poudres à canon qu'ils demandent, et leur en envoyons presentement cent milliers ; car comme les sieges d'Ostade et de l'Escluse durent plus qu'on n'estimoit, ils en consomment aussi une extrême quantité, et crains qu'ils n'y puissent fournir. Envoyez nous donc par ce porteur l'ordre necessaire pour faire fournir lesdites poudres. Au reste, puisque vous estes sur vostre retour, avancez le, et revenez le plutost que vous pourrez ; car vostre presence m'est icy si necessaire, que je ne m'en puis passer longuement, estant fort content du bon accueil qui vous a esté fait à la Rochelle, comme aux villes de vostre gouvernement, et de l'assurance que les habitants d'icelles vous ont donnée de leur fidelité et de la volonté qu'ils ont de vivre en paix, jouyssans du benefice de mes edits, sans s'arrester aux mescontentemens et desseins de certains particuliers qui s'efforcent de les entretenir en deffiance de mes intentions, et de les engager en leurs interests privez, aussi malicieusement que grossierement, ainsi que j'ay de nouveau appris par les avis que le sieur de la Trimouille continué à donner par tout où il pense avoir creance ; ce que je reserve aussi à vous dire quand je vous verray. Vous sçauvez cependant que je fais bien peu de conte de telles inventions, assuré que le tout resultera à la fin à sa confusion. Je fais estat de prendre en ce lieu des eaux de Pougues, comme fera la Reine ma femme, en mesme temps de celles de Spa, et partant y passer le reste de ce mois, si autre chose ne survient. Je prie Dieu, mon cousin, qu'il vous ayt en sa sainte et digne garde.

Escrit à Monceaux, le douziesme jour de juillet 1604. HENRY.

Et plus bas, DE NEUF-VILLE.

*Coppie de la lettre de M. de Buzenval à M. de Rosny.*

Monsieur, le vingt-cinquesme du present, j'ay reçu vostre dernière du quinziesme, comme je

croy que vous aurez fait les miennes du dix-huit et dix-neuf du mesme. Les Estats m'ont retenu en ce lieu pour y attendre avec eux quelque esclaircissement plus grand que celuy que nous avons eu jusques icy au traité d'Angleterre. duquel ils n'attendent que beaucoup de disgrâce en leurs affaires, quelque égard que le Roy d'Angleterre promette d'avoir sur icelles; car desja les Anglois commencent a gourmander et outrager ceux de ce pays qui se trouvent en leurs havres, à cause, disent-ils, qu'ils leur empeschent le commerce de la coste de Flandres qui leur est permis par leur Roy; ce qui navre extrêmement le cœur de ces provinces, et jusques la que si l'on ne tenoit la bride aux matelots de Flesseingues, ils se mettroient bien-tost en devoir d'en chasser la garnison angloise; et encores que l'on ne doute point qu'ils n'en vinssent facilement à bout, si est-ce que la consequence en estant plus perilleuse que la patience n'en est facheuse, on la prend jusques à ce qu'elle se rende insupportable. Le sieur Caron escrit du vingtiesme de ce mois et advertit ses maistres de la communication qu'il a eue avec les commissaires de la part dudit Roy à ce traité. Or comme il advoué que l'on a procédé jusques alors assez circonspectement pour ce qui est du fait de ces Provinces Unies, aussi dit-il qu'il voit bien qu'en fin ce marché se conclurra, encores qu'il y deust demeurer du poil desdites provinces. Quand on a touché cette grosse corde de la reddition des villes hostageres, les Anglois s'y sont monstrez fort contraires; et sur l'instance que les Espagnols ont faite qu'ils eussent plutost à les remettre es mains de ceux qui les leur ont delivrees, que non de les retenir, afin de ne laisser aucune semence de different et division entr'eux par ce gage, ils ont respondu qu'aussi-tost que le traité seroit conclu, qu'ils traitteroient sur ce sujet avec les députez des Estats qu'on manderait pour cét effet, et qu'ils leur offriroient leursdites villes à condition du remboursement des deniers pour lesquels elles tiennent, et ce à certains termes, au bout desquels, s'ils ne satisfaisoient à ce qui en auroit esté accordé, ils les rendroient aux archiducs, moyennant le payement desdites sommes pour lesquelles elles sont obligées. On remarque que les Espagnols ont voulu sonder l'intention et but des Anglois pour le regard desdites villes. Ce qui est du trafic empesche fort les uns et les autres, car les Anglois tiennent encor ferme pour n'y rien changer, et en ce qui est de celuy des Provinces Unies; et les Espagnols insistent à ce qu'ils ouvrent non seulement celuy des villes de la coste de Flandres, mais aussi celuy d'Anvers, sur la riviere de l'Escaut, que les Es-

tats tiennent bridée par plusieurs forts et notamment par celuy de l'Isio. Le sieur Winoud doit demain représenter en l'assemblée des Estats tout ce qui a esté fait jusques à cette heure en ces trois premieres seances, et les confirmer en la bonne intention de son maistre pour ce qui les regarde. Je ne me puis persuader qu'ils abandonnent les Estats à la mercy des Espagnols, sciemment, mais je crains leurs imprudences; les jalousies qu'ils ont de nous, leur serviront de mords pour ne les estranger par trop; mais M. de Beaumont vous peut plus particulièrement rendre compte de ce qui se passe entr'eux que moy. L'issue de l'Escluse apportera à mon avis un grand mouvement à tout cét affaire; ce siege va en longueur, mais on y joint la seurete de telle façon, que si l'on ne peut venir à bout de cette place par la violence et vive force, on la gagnera par la famine. C'est pourquoy on renforce les retranchemens et les conduit-on jusques à Ardembourg, pour oster tous les moyens à l'Archiduc de la secourir et se loger audit Ardembourg, et en mesme temps on pourvoit Ostande des onze compagnies qui y sont entrees, et d'un gouverneur, qui est le colonel Marquette, gentil-homme du pays, et de nouvelles munitions et d'argent pour travailler à un troisiemes retranchement, qui servira comme d'une citadelle et d'un dernier refuge pour une capitulation, s'il en faut venir là. Je vous assure que les Estats font d'estranges devoirs, et qu'il ne se passe jour qu'il ne leur couste vingt mil florins pour les extraordinaires de la guerre; ils me promettent de tirer jusques à la dernière piece pour assurer les affaires de Flandres, et donner moyen à Sa Majesté de les amener jusques à la frontiere de Calais, et croy qu'ils le pourront faire s'ils ont une fois conquis l'Escluse: mais il nous prie de considerer le faix qu'ils soustiennent, afin que, par faute de deux cens milliers de poudre, Ostande ne leur eschappe. Envoyez donc s'il vous plaist au plutost ce dont ils ont tant de besoin pour ladite ville, et n'attendez point ma venue, sinon pour lascher la parole au surcroist qu'ils demandent des cent mil escus, car il sera assez temps apres que vous m'aurez ouï pour vous resoudre là dessus; ils me promettent tout contentement sur ce que Sa Majesté desire d'eux. Je partiray d'icy dans deux ou trois jours au plus tard, pour sonder entierement le fait de l'Escluse et prendre parole aussi de M. le prince Maurice pour les places que vous avez designées; et si tost que je verray assurance en la prise de cette place, je partiray pour vous aller trouver et mettre sur le tapis tout ce que je sçauray et auray negocié; et ne doutez pas que, soit que je pro-

longe, soit que j'avance mon voyage, que je ne fasse le tout pour bonnes considerations, et pour le seul respect du service de Sa Majesté, qui m'est plus cher que tout le reste de ce monde. Celuy qui est venu de Sedan est le capitaine Sarroques, duquel je vous ay desja escrit, qui n'a rapporté ausdits Estats qu'un regret, de quatre ou cinq mil florins qu'ils ont despencez en une entreprise qu'il disoit vouloir et pouvoir executer sur leurs ennemis, mais tout cela en vain. Il a rapporté une lettre à madame la princesse d'Orange de M. de Bouillon; je l'ay veü : ce ne sont que complimens et excuses de ce qu'elle avoit creu de luy. Voila à mon advis toute la finesse de ce voyage; je verray si j'en descouvriray davantage, estant pres de mondit sieur le prince Maurice. Et sur ce, vous baisant bien humblement les mains, et prie Dieu, etc.

A la Haye, ce 28 juin 1604.

## CHAPITRE CXLII.

*Compte rendu par Rosny de son voyage en Poitou. Ses efforts pour réduire les impôts.*

Ayant mis fin à vostre voyage de Poitou et aux affaires qui en avoient esté cause, le jour de devant vostre parlement vous jugeastes à propos d'informer le Roy, avant vostre arrivée pres de Sa Majesté, des plus importantes particularitez qui s'estoient passées pendant iceluy, comme vous fistes par une lettre dont la teneur ensuit :

*Lettre de M. de Rosny au Roy.*

SIRE,

Quelque commandement expres que je puisse avoir receu de vostre Majesté, en prenant congé d'elle, de n'obmettre, en luy escrivant, aucunes des particularitez qui se seroient passées durant mon voyage de Poitou, lesquelles je jugerois estre de quelque consideration, suivant en cela le stile de mes depeschés d'Angleterre, qu'elle m'asseura luy avoir esté bien fort agreables, si n'aurois-je jamais esté si hardy ny mal advisé que de faire mention en mes lettres, des magnifiques receptions qui m'ont esté faites, des honneurs qui m'ont esté rendus, et de la bienveillance qui m'a esté tesmoignée, tant par les peuples et la noblesse, que mesmes par tous les ecclesiastiques, si je m'estois imaginé qu'en telles faveurs tant excessives, l'on n'eust eu esgard qu'à ma personne particuliere, à la dignité de ma charge, et mes seuls interests; mais seachant de science, par la cognoissance que j'ay de moy mesme et de mes foibles merites, par elle des

intentions d'autrui, qui ne m'ont point mesmes esté cachées, par celle de vos faveurs en mon endroit, excédantes l'utilité de mes services, et par vos vertus heroïques, la merveille des siecles, qu'ils ne m'ont considéré en toutes ces gratifications que comme un tres-loyal serviteur de vostre Majesté, qui porte le caractere de vostre nom glorieux sur le front, et une creature faite, formée et façonnée de pure grace, par vostre benevolence; tellement qu'en m'exaltant par dessus ce qui m'appartenoit, ils ont estimé de rendre, en quelque sorte, la reverence, le respect et les submissions deuës à vostre Royale Hauteesse, laquelle ne pouvant, comme infinie, jamais trouver dans les louanges, recognoissances et defferences des creatures finies, ses deuës proportions, les doit attendre de cette immense divinité, laquelle l'ayant desja comblée de tant de graces et benedictions temporelles, qu'elles sont en admiration à tous hommes, luy prepare et reserve, en toute plenitude, les abondantes richesses de ses faveurs spirituelles et celestes es siecles d'éternité.

Mais, laissant ces discours trop relevez pour ma capacité, je diray à vostre Majesté que, nonobstant la grande affluence de personnes de toutes qualitez et de toutes religions qui sont venuës au devant de moy à mon arrivée en cette province, qui se sont trouvées en mes entrées dans les villes, et m'ont accompagné par les chemins, j'ay esté si heureux par les douces influences de vous, Sire, qui estes l'astre benin, et favorable ascendant à la naissance et accroissement de ma fortune, qu'il ne s'y est veu une seule querelle ny dispute, ny entendu un seul propos ny question touchant la religion, s'estant tousjours remarqué en leur conversation une telle amitié, union et concorde, quelques divers qu'ils pussent estre en affections, conditions et religions, qu'il est facile à juger que les benins et sages princes sont capables de donner de doux et discrets mouvemens et comportements à leurs peuples, et que les louables exemples des superieurs peuvent adresser les esprits des inferieurs au chemin de la vertu. Je n'ay semblablement trouvé en ceux de Poictiers, que l'on a de tout temps estimé des plus revesches et fascheux, que toute courtoisie, douceur et benevolence, ne s'estant recognu de disputes, ny de contentions entre les habitans de cette grande ville, sinon à qui donneroit le plus de louanges et de gloire à vostre Majesté, à qui tesmoigneroit le plus de submissions à ses commandemens, de defference à ses volontez, de respect et d'amitié en mon endroit, et d'approbation du choix que vostre singuliere prudence avoit fait de ma personne pour



la servir en cette province, et à qui monstreroit plus de docilité, courtoisie et civilité à recevoir ceux que l'on logeoit en leurs maisons.

Ceux de la Rochelle aussi, quoy qu'ils ne soient dans l'estenduë du gouvernement, et que mesmes ils pretendent ne devoir avoir d'autre gouverneur que le Roy, et le maire que Sa Majesté ou son seneschal choisit d'entre trois qu'ils luy presentent, suivant les privileges qu'ils disent avoir obtenus des precedens Roys, pour marque et recompense des grands et recommandables services qu'ils leur avoient rendus, et à toute la France, qui sont les mesmes termes que m'a tenus un nommé Laleu, que vostre Majesté cognoist fort bien; et quoy encores qu'ils soient reputez rogues et hautains, et d'avoir des esprits merueilleusement délians, si n'ont-ils pas laissé d'en user tout ainsi que s'ils m'eussent reconnu pour leur gouverneur, et de proceder en mon endroit comme toutes les autres villes, ayant laissé entrer dans la leur tous ceux qui m'accompagnoient, sans distinction de religion ny esgard de nombre (car je n'avois pas moins de douze cens chevaux), et les ont voulu loger pour la plupart és maisons bourgeoises, où ils ont esté receus tres-favorablement, voire ont dit tout haut, qu'ils faisoient tel estat de ma pieté et loyauté, que quand j'aurois eu trois fois autant de monde, la resolution avoit esté prise, en conseil de ville, de les laisser entrer, voire protesté tout haut en plein festin, beuvant à la santé de vostre Majesté, de se confier tellement en sa bonté, prudence, foy et parole, que sur icelle ils ouvreroient leurs portes à vostre Majesté, quand bien elle seroit accompagnée de trente mille hommes, et que si elles ne se trouvoient assez grandes, ils abattroient trois cens toises de muraille. Et si l'ancien proverbe est veritable, lequel dit qu'*au vin il y a verité*, il faut croire qu'ils ont dit cecy naïfvement sans aucun artifice; car, par boutade et ayant bien chinqué, plusieurs jetterent ces voix en forme d'acclamation et d'esjouyssance d'avoir un si bon Roy.

En ce festin public qui me fut fait, il y avoit dix-sept tables, dont la moindre avoit seize serviettes. Le lendemain ils nous firent une tres-belle collation de confitures, et le jour suivant, entre Coreilles et Chef-de-bois, un combat naval de vingt vaisseaux, aux habits, armes, panonceaux et livrées de France, et vingt autres, aux habits, armes, panonceaux et livrées d'Espagne; auquel rien ne fut oublié de tout ce qui se pratique en une vraye guerre, laquelle se termina par la victoire des François sur les Espagnols, qui furent tous amenez prisonniers, et liez aux pieds d'un tableau de vostre Majesté,

puis à moy presentez comme ayant l'honneur d'estre son lieutenant general, au nom de laquelle je les remis tous en liberté, avec plusieurs paroles à sa louange.

De la Rochelle, suivant ce qu'il luy pleut me commander par ses lettres du 28 juin, je m'en allay à Saint Jean et à Broüage, où je fus receu par messieurs de Rohan et de Saint Luc et tous les habitants, tres-courtoisement, et avec plus d'honneurs et de submissions que je ne desirois et que je n'en merite, et cognus bien que le dire du quadran au soleil operoit lors en moy, qui, estant regardé favorablement par vous, devenois en grande consideration aux autres. Je ne manquay pas, comme de moy mesme, de parler au premier nommé, de tout ce que vostre Majesté m'avoit fait sçavoir (par une lettre que M. de Ville-roy m'avoit escrite en datte du 3 juillet) estre de son intention, luy remontrant la faute qu'il avoit commise, et qu'à mon advis il devoit reparer devant qu'elle vint à vostre cognoissance; sur lequel discours il fit paroistre d'estre estonné, et encore plus en peine de pouvoir descouvrir qui m'avoit pû faire ce rapport, duquel il y avoit, ce me dit-il, quelque chose de veritable, mais tout le surplus entierement faux et supposé, et qu'il falloit que ce fut quelque sien ennemy qui m'eut dit tout cela, lequel desirant luy nuire en pourroit dire autant à vostre Majesté; me priant, s'il venoit à ma cognoissance que cela eust esté fait ou se fist cy-apres, de vouloir prendre la protection de son innocence, me pouvant jurer de n'avoir jamais donné charge audit sieur Durant des choses que je luy avois dites, et que s'il les avoit avancées, il l'en desadvoüoit absolument; que, quant au cheval, il reconnoissoit la chose estre tres-vraye; mais qu'aussi esperoit-il bien de s'en justifier, si jamais vostre Majesté luy en parloit, d'autant qu'il la feroit fort bien souvenir qu'il ne l'avoit point entrepris sans luy en avoir demandé permission auparavant.

De Saint Jean, j'ay pris le chemin de mon retour par Thouars, afin de visiter M. de la Trimouille avant que sortir de la province, remettant à une autrefois la visite du plus haut et plus bas Poictou. En passant, les sieurs de Parabelle, Saint Germain, de Clan, Besses, la Valliere, Constant, Aubigny et autres, me vindrent rencontrer et accompagner, à mon advis, expres pour voir ce qui se passeroit entre M. de la Trimouille et moy, et luy ayder de leurs conseils, les uns d'une façon les autres d'une autre, s'il en avoit besoin. Quoy que ce soit, je fus tres-bien receu de luy, et me confirma ce qu'il m'avoit escrit par la lettre que j'envoyay à vostre

Majesté, encore que j'eusse appris de bon lieu, et pour luy avoir ouy dire, n'y avoir rien qui luy fust plus insupportable, que de me voir posséder, avec tant d'acclamations d'un chacun, cette charge du Poictou qu'il avoit tousjours le plus ardemment désirée et qu'il croyoit mériter avant tout autre. Nous eusmes, luy et moy, plusieurs discours seul à seul et puis en compagnie des cy-devant nommez, où se trouverent encore les sieurs de Preaux, de la Ferrière et de la Sausaye, lesquels se terminerent en assurances et protestations de sinceres et loyales servitudes d'eux tous à l'endroit de vostre Majesté, et de tesmoignages tres-speciaux de vouloir lier une étroite amitié avec moy; en quoy ils ont usé de telles defférences, submissions, protestations et sermens, qu'il m'a semblé y avoir trop d'affectation, et partant qu'il pourroit bien estre quelque chose du dessein que M. de Ville-roy m'escrivit par commandement de vostre Majesté; et mesme, ayant considéré certains termes dont ceux que je luy diray estant près d'elle, ont usé en discourant avec moy des affaires generales de France, d'Espagne et d'Angleterre, et de l'humeur et condition des roys qui y dominent à present, il se pourroit conjecturer qu'ils eussent veu autant du memoire que l'on disoit estre venu d'Angleterre, dont il me fut envoyé copie par M. de Ville-roy. Et pour fin de la presente, je puis assurer vostre Majesté que les pratiques et menées des broüillons sont grandement affoiblies; que plusieurs qui n'estoient point marris d'entendre leurs propositions, fuyent à present, comme la peste, ceux qui les veulent entamer, et que, quant à leur dessein de former des déflances de vostre Majesté en mon esprit, que cela est hors de leur puissance, cognoissant trop bien la grande prudence, sagesse et bon naturel de vostre Majesté; laquelle je supplieray aussi tres-humblement de tenir la promesse qu'elle m'en a fait donner de sa part, dans la lettre que M. de Ville-roy m'en a escrite par son commandement, suivant lequel je n'ay voulu faillir de luy rendre compte de ce qui s'est passé durant mon voyage, que j'acheve dans le Poictou par l'adieu que je viens de faire à M. de la Trimouille, lequel j'ay trouvé si empiré depuis deux jours, et en si miserable indisposition, que je n'estime pas qu'il vive encor trois mois. Sur ce je prieray le Createur, Sire, etc.

De Thouars, ce 16 juillet 1604.

*Lettre du Roy à M. de Rosny.*

Mon cousin, j'ay commandé vous estre envoyé un extrait des articles des dernieres despatches que le sieur de Barrault, mon ambassadeur

resident en Espagne, a faites, faisant mention de nostre ordonnance et de leur placart de trente pour cent, afin que vous sçachiez les termes auxquels ils en sont par delà, et le tort que font à ma reputation et à mon autorité ceux qui violent nos deffences, et que vous advisiez avec ceux de mon conseil à y remédier: surquoy je vous diray qu'il me semble estre necessaire de faire faire exacte perquisition et rigoureuse punition des auteurs desdites contraventions, la plus grande partie desquels il nous mande sortir d'Ollone et des environs; et comme c'est de vostre gouvernement, il faut que vous embrassiez ce fait, et envoyez sur les lieux un homme de bien, avec une commission, pour faire ladite recherche et punition le plus diligemment et severement que faire se pourra. Partant choisissez en un propre pour me faire ce service qui n'est de petite consequence; car, tant que cette porte de desobeissance demeurera ouverte et libre à ceux qui voudront en user, nostre interdiction du commerce ne fera que honte et dommage à nous mesmes. Vous verrez encore, par une lettre que ledit sieur de Barrault a escrite au sieur de Ville-roy, les propos qui se sont passez entre luy et le secretaire Prada sur ce sujet. Mon cousin, je vous prie, reprimons cette licence, de façon que l'exemple qui s'en suivra serve de terreur aux autres qui voudroient imiter tels abus, et que je sçache ce que vous en ferez. Adieu.

Vous receustes encore plusieurs autres lettres durant vostre voyage de Poictou, que j'obmets pour briefveté, craignant mesmes d'avoir esté trop long et ennuyeux en la transcription de celles qui precedent, pour vous ramentever comme, le jour mesme que vous partistes de Thouars, vous envoyastes au Roy cette dernière lettre, suivant le commandement que Sa Majesté vous avoit fait, en partant d'aupres d'elle, de ne faillir pas, si tost que vous seriez sur vostre retour, de luy escrire, selon vostre stile accoustumé où il se plaisoit, le sommaire des affaires que vous auriez maniées à l'avantage de son service, afin de le resjouyr en attendant vostre venue. Vous escrivistes aussi, par le mesme courrier, un mot de lettre à M. de Ville-roy; mais d'autant que ce n'estoient que complimens, et que pour les affaires vous l'en remettiez à celle du Roy, nous n'avons pas jugé necessaire de la transcrire: tellement qu'en laissant la suite des lettres et reprenant celle des discours, nous vous dirons comme vous arrivastes à Paris le 22 de juillet, où ayant trouvé une petite lettre du Roy du 18 juin, par laquelle il vous mandoit que puis que ses affaires ne vous avoient peu permettre de faire vous mesme la visite des costes, que vous

regardassiez à y envoyer quelques-uns de ses ingénieurs, comme vous en destinastes sur l'heure mesme deux, pour recognoistre celles de Normandie, Bretagne et du bas Poictou jusques à l'emboucheure de Charante, comme celles que vous estimiez les plus promptement necessaires, luy en escrivistes un mot, et luy envoyastes les commissions pour cét effet toutes dressées, sur lesquelles vous receustes une lettre de luy le jour mesme que vous partiez de Paris pour aller en Cour, laquelle nous ne nous dispenserons de transcrire encor icy, pour monstrier le soin particulier qu'il avoit que rien ne manquast aux choses que l'on entreprenoit, en vous advertissant de ce que vous aviez à faire, et que peut-estre vous eussiez oublié s'il ne vous l'eust mandé.

*Lettre du Roy à M. de Rosny.*

Mon amy, pour response à la vostre du vingt-deuxiesme que j'ay receuë ce matin, je vous diray que je trouve bon la commission que vous avez envoyée à Lomenie, pour Nicolay et Bois, pour aller visiter les costes de mes provinces de Normandie, Bretagne et Poictou; luy ay commandé de l'expedier et la vous renvoyer, suivant laquelle et la vostre il sera fort à propos que vous leur bailliez une ample instruction de ce qu'ils auront à faire pour mon service, et que vous les fassiez partir au plutost. Adieu, mon amy.

Ce 24 juillet, à Monceaux. HENRY.

*Lettre de M. de Ville-roy à M. de Rosny.*

Monsieur, je vous envoie, par le commandement du Roy, la lettre de M. de Beaumont que vous trouverez avec la presente, laquelle nous a esté apportée par le courrier. Vous verrez ce que les conseillers du roy d'Angleterre, employez à traiter la paix avec les commissaires de celuy d'Espagne et des archiducs, luy ont fait entendre de la resolution de ladite paix, et de la deliberation et volonté de leur maistre sur icelle et sur la conservation de messieurs les Estats, pour laquelle il veut demeurer joint et uny avec Sa Majesté, suivant ce qui a esté convenu entre leurs Majestez. Vous verrez aussi ce qu'ils luy ont dit touchant le commerce, et les offres qu'ils ont faites sur ce, envers lesdits commissaires d'Espagne et de Flandres. Mais vous notterez qu'ils n'ont laissé de conclurre leur traitté et le signer, encore que nostre accord et reglement avec les Espagnols, pour le regard du trafic, ne soit fait, jaçoit que ledit roy d'Angleterre eut donné esperance audit sieur de Beaumont d'en surseoir la resolution, pour luy donner loisir de faire la sienne avec lesdits commissaires d'Espa-

gne et de Flandres, lesquels l'ont maintenant remis à la venuë du connestable de Castille, ayant demandé que l'on pourvoye à la moderation ou descharge des daces qui se levent à Calais, dont ledit sieur de Beaumont s'est tres-bien deffendu, et semble qu'il espere leur faire passer carriere pour la revocation de ladite imposition de trente pour cent, sans toucher ausdites daces de Calais; et c'est l'intention du Roy qui persiste en ce propos, tant pour la bien-seance que pour la raison. Toutesfois Sa Majesté a voulu avoir vostre avis sur ce poinct, devant que d'en faire un commandement absolu audit sieur de Beaumont, dequoy elle m'a donné charge de vous advertir; en vous priant nous mander au plutost ce qu'il vous en semble, afin que nous puissions faire sçavoir audit sieur de Beaumont la volonté de Sa Majesté, pour quand ledit connestable arrivera par delà. J'ay desja envoyé audit sieur de Beaumont le double du tarif desdites daces de Calais que M. de Vic m'avoit envoyé, afin qu'il sçache qu'elles ne sont si excessives que l'on donne à entendre à Richardot; ledit sieur de Vic l'aura aussi instruit de la moderation avec laquelle elles ont esté levées jusques à present, l'en ayant adverty: mais advisez si nous devons luy mander autre chose, et s'il doit differer ledit accord si les autres s'opiniastrent en leur demande pour la moderation desdites daces, et cependant commandez que le voyage de ce courrier soit payé suivant son ordonnance, afin qu'il soit renvoyé audit sieur de Beaumont incontinent apres que nous aurons receu vostre response. Et dautant que M. de la Varenne doit vous aller trouver demain, avec l'intention de Sa Majesté, sur vostre venuë par deçà, lequel vous rendra bon compte de toutes choses, je ne feray la presente plus longue que pour saluër vos bonnes graces de mes humbles recommandations; et prie Dieu, monsieur, qu'il vous conserve en bonne santé.

De Fontaine-bleau, ce troisieme jour d'aoust 1604.

Vostre humble serviteur, DE NEUF-VILLE.

*Lettre du Roy, contre-signée, à messieurs de son conseil.*

Messieurs, mon cousin le marquis de Rosny, m'estant venu trouver à Fontaine-bleau pour m'informer de l'estat de mes finances, m'a representé que mon peuple se trouve fort chargé de tailles, et que, de toutes parts, les thresoriers de France et autres officiers ont remonstré que s'il ne me plaist descharger mondit peuple, il est impossible qu'il paye les sommes qui ont esté imposées sur luy en l'année presente; qu'en

icelle et en la dernière il a esté levé sur les contribuables ausdites tailles, quatre cens mil livres tournois, pour le remplacement d'une partie du sol pour livre, et qu'il seroit à propos à tout le moins de descharger mondit peuple de cette somme; et que pour autre partie du remplacement dudit sol pour livre, il avoit esté aussi imposé, par forme de subvention ou d'imposition sur les marchandises, autres quatre cens mil livres tournois, et que ces deux levées devoient finir en cette année, d'autant qu'elles ne sont vérifiées que pour deux ans; que la ferme des rivières de Bourdeaux finit en cette année; et que ce seroit un grand bien pour mondit peuple si je le voulois descharger de cette imposition. D'avantage il m'a fait entendre qu'il y a plusieurs autres fermes qui sont prestes à finir, et d'autres qui sont du tout inutiles à cause de l'interdiction du commerce d'Espagne, joint que mondit peuple est travaillé d'une infinité de divers edits qui luy portent plus de dommage que la taille: concluant à ce qu'il me pleust, en remettant lesdites levées, vouloir diminuer mes despences, afin de les proportionner avec la recepte. Surquoy me trouvant beaucoup de charges sur les bras, lesquelles je ne puis retrancher, et voyant mes voisins armez de tous costez, j'ay advisé que pour les remplacements du sol pour livre, tant par forme de taille, subvention, qu'imposition, la levée en sera continuée, comme sera aussi celle des deniers de mes tailles, et des impositions dont mes fermes qui vont finir sont composées, et ce à la mesme raison qu'ils ont esté levez en la presente année. Et pour le regard desdits edits, j'ay beaucoup de regret de ne les pouvoir revoke, d'autant qu'ils sont tous affectez à des despences si privilégiées ou à des personnes si recommandables, que je n'y puis toucher en la presente année sans prejudicier au bien de mes affaires: dequoy je vous ay bien voulu advertir par cette lettre, outre ce que vous en apprendrez de mondit cousin le marquis de Rosny; sur lequel me remettant, je prie Dieu qu'il vous ayt, messieurs, en sa sainte garde.

A Fontaine-bleau, le unzième jour d'aoust 1604.

HENRY.

Et plus bas, DE NEUF-VILLE.

### CHAPITRE CXLIII.

*Arrivée de Rosny à la Cour. Suite du compte qu'il rend de son voyage. Mémoire de ce ministre sur les abus qui tendent à l'affoiblissement du royaume. Jugement que porte Henri IV de ce mémoire. Rectification du*

*contrat par lequel le Roi avoit acquis le comté de Saint-Paul. Entretien de Henri IV et de Rosny sur la conjuration du comte d'Auvergne. Ordre donné à d'Escures et à Murat de l'arrêter. Diverses lettres dont la plupart ont rapport à cette affaire. Situation pénible du comte d'Auvergne.*

Ayant pris vostre chemin à Monceaux, suivant le commandement du Roy, vous receustes à la disnée à Claye, cette lettre du 24 juillet dont est fait mention au chapitre precedent, et arrivastes le soir à Monceaux, où le Roy achevoit de prendre ses eaux, lequel vous fist tres-bonne chere à vostre arrivée, et fust trois jours durant sans cesser de vous promener tous les matins, pendant qu'il beuvoit, où vous luy rendistes compte de toutes les particularitez qui s'estoient passées en vostre voyage; lesquelles, quoy que nous ne les ayons pas toutes sceues, seroient de trop longue deduction, et suffira d'en sçavoir le sommaire, qui se reduisit aux assurances données par vous au Roy que, quand aux catholiques, tous ces bruits que l'on avoit fait courre de l'achapt des marrais salans, de l'establisement de la gabelle aux provinces de franc-salé, des nouvelles daces sur les denrées vendues en detail, et d'une creation d'officiers en toutes sortes de juridictions, estoient entierement esteints, leur ayant fait cognoistre de quelle boutique ils procedoient, et donné vostre foi et vostre parole que tant s'en falloit que le Roy ny vous eussiez aucun dessein à telles surcharges et vexations, que l'un et l'autre (sçachant tres-bien que les nouvelles impositions outre qu'elles diminuent quasi autant les anciennes que l'on en reçoit de leur establisement, elles excitent des plaintes, alienent les volontez, destruisent les biens, perdent les cœurs, affligent les corps et engendrent des tumultes) ne desiriez rien tant que de les pouvoir soulager de celles mesmes qui estoient anciennes: à quoy ils avoient adjousté entiere creance et confiance par toutes les villes. Et quant à ceux de la religion, outre les intérêts communs qu'ils avoient avec les catholiques, desquels avec eux aussi ils demeuroient contens, vous leur aviez fait voir si clair dans les desseins formels que Sa Majesté avoit de tenir le dedans de son Estat en paix et repos parmy tous ses sujets, de garder une égalité avec ses justes proportions en la distribution de sa bien-veillance, faveurs, honneurs, charges, dignitez et gratifications, sans aucune distinction de religion; et que toutes les opinions au contraire que l'on avoit essayé de leur former en l'esprit, n'estoient procedées que de ceux, lesquels se sentans proche

d'une perdition inévitable, bien méritée par leurs énormes ingratitude, trahisons et crimes atroces, ne se fussent pas souciés, pour la retarder ou diminuer en quelque sorte, d'y envelopper les innocens et les gens de bien, d'honneur et de vertu, qui se doivent tousjours tenir bien asseurez de la bonne volonté du Roy que vous aviez charge de leur tesmoigner par gratifications proportionnées à leurs services et loyautez; laquelle creance et les effets que quelques-uns en ressentirent deslors, avoient tellement deffile la patenostre, que vous n'estimiez pas en estre demeuré six qui n'eussent rompu avec M. de la Trimouille, lesquels encores l'estimoient estre aux abbois de la mort, laquelle advenant vous sçaviez de certain estre si sensible à M. de Bouillon, pour ne trouver plus personne assez despit et desesperé pour embrasser toutes ses chimeres et caprices, qu'il avoit pris resolution de n'esperer plus rien en toutes ces pratiques, et se contenter en l'appuy du comte Palatin. Ce que vous aviez decouvert par une lettre interceptée que Sainct Germain escrivoit à un nommé la Sausaye, qui estoit pres de M. de la Trimouille, que vous fistes voir au Roy; lequel ayant bien recogneu l'escriture, cela fust cause qu'il adjousta foy à tout le surplus de vos discours, auxquels vous adjoutâtes, que pour leur faire croire tout ce que vous leur aviez dit des bonnes intentions du Roy et des vostres à suivre tous ses commandemens, que tant s'en falloit qu'il eust envie d'affoiblir son Estat, affoiblissant ses peuples par de telles surcharges, qu'il vous avoit ordonné de luy faire un memoire de toutes les choses qui pouvoient apporter affoiblissement à son Estat, afin qu'il s'empeschast de plus les entreprendre, mais de les éviter: duquel vous ayant demandé s'il y auroit moyen d'avoir copie de ce memoire, vous leur en fistes voir une, mais ne leur laissastes pas, estant telle que vous luy baillastes lors, et telle que s'ensuit :

*Estat et memoire dressé par commandement du Roy, et à luy baillé à vostre retour du royaume de Poitou, en l'année 1604, des choses lesquelles peuvent provenir de grands desordres et abus, et par consequent aussi apporter diverses sortes d'affoiblissements aux Royaumes, Estats et Principautés souveraines.*

Augmentations de tailles, tributs et dacs. *Affoiblissement d'Estat.*  
 Toutes impositions personnelles avec surcharge. *Affoiblissement d'Estat.*  
 Diminutions de trafic, commerce et marchandise. *Affoiblissement d'Estat.*  
 Diminutions d'ouvrages, et manufactures et labouirages. *Affoiblissement d'Estat.*  
 Encherissement de vivres et tous mauvais menages. *Affoiblissement d'Estat.*  
 Augmentations de chicaneries et

de formalitez de la justice. *Affoiblissement d'Estat.*  
 Excessives usurpations d'autorité aux officiers. *Affoiblissement d'Estat.*  
 Refus d'audiances aux complaignans et à tous opprimés qui demandent justice. *Affoiblissement d'Estat.*  
 Festins, banquets, mommeries, jeux et berlans. *Affoiblissement d'Estat.*  
 Indifferences entre les personnes de diverses qualitez et de conditions morgées et cimagrées. *Affoiblissement d'Estat.*  
 Usurpations de qualitez, tiltres et noblesses. *Affoiblissement d'Estat.*  
 Encherissemens de denrées et marchandises. *Affoiblissement d'Estat.*  
 Surhaussement et disproportions des monnoyes. *Affoiblissement d'Estat.*  
 Vanitez, curiositez, luxes, desbauches et delices. *Affoiblissement d'Estat.*  
 Indifferences en habits, ameublemens et trains. *Affoiblissement d'Estat.*  
 Exces en magnificences de bastimens, dorures, et diaprures d'iceux. *Affoiblissement d'Estat.*  
 Fastes, ostentations, vanitez, mines et cimagrées devotiueuses. *Affoiblissement d'Estat.*  
 Indifferences aux ceremonies et honneurs rendus à cause des parentages et visites. *Affoiblissement d'Estat.*  
 Delices, jeux, berlans, affiquets, cabinets et desbauches de femmes, filles et garçons. *Affoiblissement d'Estat.*  
 Tolerances de vices, luxes, pompes et bombances. *Affoiblissement d'Estat.*  
 Tolerances aux grands officiers de faire en leurs charges tout ce que bon leur semble. *Affoiblissement d'Estat.*  
 Exces de salaires aux ministres de justice, finance, police, advocats et procureurs. *Affoiblissement d'Estat.*  
 Grandes guerres sans besoin ny nécessité. *Affoiblissement d'Estat.*  
 Absoluë disposition des Souverains par un particulier ou plusieurs. *Affoiblissement d'Estat.*  
 Mespris des gens de qualité, capacité, merite et service. *Affoiblissement d'Estat.*  
 Les excessives affections des Rois et princes en de certaines sortes d'exercices, plaisirs et passe-temps et quelques particuliers. *Affoiblissement d'Estat.*  
 Les vicieuses inclinations des ministres d'Estat, mignons et favoris des Souverains. *Affoiblissement d'Estat.*  
 Toutes tolerances d'obmissions et mespris des bonnes loix, costumes et usages utiles. *Affoiblissement d'Estat.*  
 Toutes trop exactes recherches de vieilles erreurs, fautes et mauvais usages qui ne se voyent plus avec prejudice. *Affoiblissement d'Estat.*  
 Toutes augmentations de loix, edits, et ordonnances non absolument necessaires. *Affoiblissement d'Estat.*  
 Tous accroissemens de droits, gages, attributions, augmentations et privileges. *Affoiblissement d'Estat.*  
 Toutes sortes d'augmentations d'officiers en toutes sortes de charges et fonctions. *Affoiblissement d'Estat.*

Toutes nouvelles créations de cours souveraines. *Affaiblissement d'Estat.*  
 Tous excessifs enrichissemens de ministres manians les affaires publiques. *Affaiblissement d'Estat.*  
 Toutes vies oysives, faineantes et voluptueuses. *Affaiblissement d'Estat.*  
 Tous mespris de loix, constitutions, ordonnances et bonnes pratiques. *Affaiblissement d'Estat.*

Lequel estat ayant leu, il vous dit qu'il en discoureroit avec vous, pour s'esclaircir de plusieurs choses qu'il n'avoit pas bien comprises par une simple et premiere lecture, et puis vous ayant rendu ce memoire, et commandé que personne ne le vist, de crainte de donner des apprehensions à beaucoup de sortes de gens qu'il n'estoit pas à propos de fascher, il vous embrassa par trois fois, et dit que ce n'estoit pas la dixiesme fois que, par vos utiles services, vous luy aviez tiré l'esprit de beaucoup d'inquietude et mis le cœur en repos.

Or vostre retour ayant redonné aux affaires leur cours ordinaire, plusieurs d'icelles, que vostre absence avoit reduites en indecision, furent soudain terminées, et n'en trouvastes qu'une de consequence qui vous fascheast, laquelle l'on avoit achevée sans attendre vostre retour, qui estoit l'acquisition du comté de Sainct Paul, dont, à la verité, il avoit esté parlé avant vostre partement, et aviez tesmoigné de l'approuver; mais la forme n'estoit pas telle que vous desiriez. Sur laquelle ayant fait vos remonstrances au Roy, il vous respondit ne pouvoir comprendre la raison pourquoy vous desaprouviez maintenant l'acquisition de cette belle terre, qui estoit venuë de ses predecesseurs descendus des vôtres, que vous aviez vous memes sollicitée avant vostre partement. Surquoy vous luy repliquastes (car nous y estions presens dans vostre cabinet, coppiant un estat que Sa Majesté vous avoit demandé, de tout ce qu'il avoit d'argent comptant, et qu'il pourroit certainement assembler dans les années 1605 et 1606, artilleries, armes et munitions) que la chose en soi ne vous desagregoit pas, mais seulement la maniere que l'on avoit tenuë de faire cette acquisition par un contract public, lequel portoit necessairement Sa Majesté, ou dans la honte, ou dans la guerre: que pour le premier, vous sçaviez bien que son grand courage et sa valeur tant esprouvée, ne luy en permettroient encor moins la souffrance qu'à vous; que pour l'autre, vous n'y contrediriez nullement, moyennant qu'elle ne füst pas prematurement entreprise, que tous ses alliez ne correspondissent à ce dessein en mesme temps, et que l'assemblage de tout ce qui estoit necessaire pour son particulier, n'eust esté fait aupa-

ravant. Dequoy vous ayant demandé les raisons, vous luy representastes que la tenuë feodalle et justiciere de ce comté de Sainct Paul avoit de long-temps esté pretenduë esgallement par les comtes de Boulogne et d'Artois; et par les derniers traittez faits avec Espagne par les roys François premier et Henry second (à cause que ces diversitez de pretentions ne se pouvoient pas bien liquider), a esté accordé qu'il demeureroit, jusques à tant qu'autrement en eust esté advisé, en la liberté du propriétaire d'iceluy comté, de le reprendre de tel des deux comtes que bon luy sembleroit, sans que l'autre s'en pust formaliser ny deffendre ses pretentions par les armes; que jusques à present le choix que les comtes de Sainct Paul avoient fait, de reprendre plutost d'Artois que de Boulogne, couvroit aucunement le deshonneur de la France, ce qui ne se pourroit plus faire, la propriété en appartenant au Roy de France, qui ne sçauroit sans honte la reconnoistre tenir plutost d'un autre que de luy mesme, puis que l'option luy en estoit laissée toute libre; ce qui n'arriveroit point que les armes n'en parllassent; et par consequent sans declaration de guerre, à laquelle vous ne voyez pas que son esprit fust encor porté, ny les affaires tant de luy que de ses alliez bien preparées. Il se passa plusieurs autres fort longs discours là dessus, lesquels se terminerent de sorte que le premier contract fut rompu, et un autre passé sous le nom d'un tiers, avec resolution de le declarer, lors que Sa Majesté verroit les choses en estat de s'en pouvoir mettre en reelle possession.

Le lendemain et les jours suivans, le Roy vous entretinst des menées et intelligences du comte d'Auvergne, vous fist voir toutes les preuves qu'il avoit contre luy et ceux qui s'en mesloient; et afin de ne parler plus de cette mauvaise affaire, encor que les progres s'en soient passez en divers temps, nous les desduirons tout d'une suite, et vous ramentevrons que Sa Majesté, vous reconnoissant grandement animé contre telles perfidies, vous dit qu'il estoit bien resolu de n'user plus de pardon, mais d'en faire un si rigoureux chastiment, qu'il pust servir d'exemple aux autres; mais qu'il n'y avoit rien voulu entreprendre sans vostre advis et conseil, et que fussiez de retour aupres de luy.

Et lors vous dist que messieurs de Bouillon, de la Trimouille, d'Entragues et mesme madame de Verneuil (par despit de ce qu'il luy avoit fait rendre cette promesse et autres choses qui s'estoient passées, que vous sçaviez mieux que nul autre) et plusieurs autres en estoient, entre lesquels, pour ceux dont il avoit des preuves qui ne se pouvaient contredire, il vous nomma

force gens, mais tous foibles ou de peu de consideration, comme la Chapelle, Biron, Moraise, Calveirac, Giversac, Bremariques, Briganty, Foussat, Loubaignac, Gripel, Sainet Vrese, Tadjac, Lias, Reignac, Bassignac, Rodelles, Blanchart, Bethut et autres, dont la plupart estoient à M. de Bouillon, domestiques, ou tiroient entretenement de luy ; adjousta qu'il avoit essayé de disposer le comte d'Auvergne à le venir trouver ; mais que nonobstant ses lettres et les deux voyages d'Escures vers luy, il avoit tousjours usé de remises et d'excuses frivoles, qui luy faisoient juger, contre les advis qui luy en estoient donnez par ses serviteurs en Auvergne, qu'il n'avoit nulle envie de s'approcher ; et partant estoit resolu à essayer de le faire attraper par finesse, et si elle ne réussissoit, y employer la vive force, dequoy il vous donneroit la charge ; que cependant vous advisassiez, de vostre costé, à essayer de le faire prendre.

A quoy ne luy ayant respondu autre chose, sinon que vous n'obmettriez rien de ce qui dependroit de vous pour le servir loyalement et à son gré en cette occasion, comme vous estimiez l'avoir fait en plusieurs autres, il se mist à vous regarder assez long-temps sans parler ; et finalement vous dit qu'il s'estoit estonné plusieurs fois, comme il faisoit bien encores, lors que vous ayant souvent escrit et parlé des perverses inclinations et mauvais desseins du comte d'Auvergne, vous ne l'aviez neantmoins jamais enquis (comme il luy sembloit y avoir apparence de le faire) des raisons qui l'avoient pû induire non seulement à ne le chastier pas comme le mareschal de Biron, puis qu'ils estoient complices des mesmes crimes, mais l'avoir, outre la grace de la vie, mis en pleine liberté, et traicté depuis autant favorablement que jamais, et à se monstrar maintenant si animé contre luy et si desirieux de se saisir de sa personne, comme il vous le tesmoignoit par ces paroles.

A quoy vous luy respondistes que vous estant tousjours imaginé deux causes principales de telles indulgences (si mal colloquées) sur lesquelles, selon vostre advis, Sa Majesté n'eust pas pris plaisir de s'expliquer, vous ne les luy aviez pas aussi voulu demander, de crainte qu'il ne vous en sceust mauvais gré. Surquoy, comme Sa Majesté estoit d'un esprit merveilleusement vif et prompt, et qui faisoit coustume, voire gloire (et y rencontroit souvent assez bien) de penetrer soudain dans les intentions des personnes, par la cognoissance qu'il prenoit de leurs humeurs, interests et desseins, il vous repliqua aussi-tost que pour l'une des causes dont vous aviez parlé et sur lesquelles vous aviez fondé vos opinions,

il pensoit ne s'abuser pas de croire que vous l'estimiez avoir une si forte passion pour madame de Verneuil, qu'il n'avoit pû rien refuser à ses supplications et sollicitations, sur tout en choses qui luy devoient estre si cheres que la vie et la liberté de ce sien frere, ce qu'il ne vouloit pas nier absolument ; mais ne vous celer pas aussi que toutes les importunités de cette dame n'avoient jamais eu le pouvoir de luy faire conceder la liberté avec la vie. Et quant à la seconde cause que vous vous estiez pû imaginer luy avoir donné sujet d'user de si grandes graces, qu'il confessoit franchement de ne la pouvoir pas deviner, et partant desiroit-il que vous la luy disiez franchement sans apprehender qu'elle luy pust desplaire : ce que vous fistes, apres neantmoins qu'il vous en eust encor pressé jusques à la troisieme fois, luy disant que l'extrême amitié par luy tesmoignée envers ses bastards, vous avoit mis en fantaisie qu'il eust estimé leur faire un grand prejudice, s'il eust traitté comme le commun cettuy-cy qui estait de leur condition, de crainte qu'un tel exemple ne fust un jour tiré en consequence contr'eux, comme les fortunes des plus grands sont sujettes à variété d'accidens. Ce que le Roy vous assura de ne luy estre jamais venu en l'esprit, quoy qu'en effet cette consideration, s'il s'en fust souvenu, ne luy eust pas moins touché les affections que les prieres de madame de Verneuil, ausquelles s'estant jointes celles de monsieur le connestable, de ses trois filles, et de M. de Ventadour, qui s'estoient tous ensemble venus jeter à genoux devant luy pour la vie de ce pauvre miserable (monsieur le connestable ayant usé de ces termes), sans parler de la liberté qu'il dit remettre à sa prudence et discretion, il confessoit d'avoir volontiers concedé ce qu'ils demandoient pour sa vie ; mais que quant à la liberté, il luy avoit donnée pour d'autres raisons, qui ne regardoient ny ses enfans naturels, comme vous aviez pensé, ny madame de Verneuil, que les malices de son esprit avoient renduës aussi mal fondées que cette delivrance luy seroit à la fin inutile, voire peut-estre domageable. Et là dessus, vous ayant parlé de luy comme d'une ame qu'il estimoit des plus perfides (et d'autant plus dangereuse, que plus il avoit de capacité, d'intelligence et de bonnes parties pour bien servir, s'il se fust voulu sincerement employer), il vous conta comme se voyant asseuré de la vie par la parole royale qu'en avoient receuë monsieur le connestable et les autres cy-dessus nommez, il n'avait rien estimé cette grace si elle n'estait suivie de celle de la liberté entiere, pour à laquelle parvenir il l'avoit fait supplier de trouver bon qu'il eust l'honneur de pouvoir par-

ler à luy, d'autant qu'il avoit des choses à luy dire et proposer, desquelles il s'asseuroit qu'il recevroit contentement, et son royaume de tres-grands avantages. Ce que luy ayant accordé, il avoit commencé son propos par une apparence de generale confession et repentance entiere de toutes ses fautes passées, entre lesquelles il avoit magnifié, au lieu de les blâmer, ses intelligences et confidences avec les Espagnols, qu'il avoit peut-estre plus vantées qu'elles n'estoient grandes en effect, croyant par ce moyen faire davantage estimer sa marchandise, pensant peut-estre avoir l'esprit si subtil que de la pouvoir debiter des deux costez et en tirer des recompences de mesmes; et en suite luy avoit fait mille sermens de fidelité, et autant de protestations de le servir d'oresnavant tres-loyalement, et sur tout en l'obcasion dont il vouloit faire ouverture à Sa Majesté, qui estoit de telle importance que s'il plaisoit à sa clemence et bonté de luy remettre entierement tous ses crimes, aussi bien pour la liberté qu'il avoit desja fait pour la vie, en attribuant cette augmentation de grace et beneficence aux continuelles sollicitations et importunités de madame de Verneuil, afin de pouvoir inventer delà des excuses pour empescher que les ministres du roy d'Espagne ne prissent ombrage de luy à cause de telles faveurs, il renouvellerait en bref avec eux ses intelligences et correspondances anciennes, avec apparence de plus grande confiance et fermeté de sa part que jamais, et par ce moyen tireroit d'eux de grandes commodités et bien-faits, lesquels luy ayderoient à se tenir plus sujet pres de sa personne, et y despendre sans l'importuner, et en faisant semblant de les vouloir servir, il decouvrirait tous leurs secrets plus importants et les luy reveleroit aussitost, pourveu que Sa Majesté gardast le silence requis, et n'en parlast à aucun de ses ministres, de crainte que les uns n'en advisassent les Espagnols, et les autres ne luy fissent rejeter telles pratiques et faciendes qu'il sçavoit estre contraires à leurs humeurs et procedures, et qu'il n'entrast en aucune defiance de sa sincerité, à cause des voyages qu'il feroit faire en Espagne, et des paquets qu'il en recevroit, si aucuns d'iceux venoient à luy estre decouverts.

Duquel langage le Roy, en continuant son propos, vous dist estre demeuré grandement estonné, voire avoir escouté avec horreur, des propositions par lesquelles un homme de cette qualité s'offroit de luy mesme à user de telles fraudes et deceptions, et en un mot pour ne dire pis, à vouloir faire le mestier d'espion, luy estant du tout impossible en telles procedures de s'empreter de perfidie, voire trahison ou d'un costé

ou d'autre; et neantmoins qu'à l'exemple de ce Roy qui aymoît les trahisons et haïssoit les trahitres, il n'avoit laissé, sous ces conditions, de luy accorder sa liberté entiere, et promis tout le surplus de ce qu'il luy avoit demandé, afin d'esprouver en sa personne s'il y auroit moyen de tirer quelque avantageux service ou autre utilité d'un homme débauché, d'une inclination perserve, et d'un esprit plein de toutes sortes d'inventions, comme estoit le sien, donnant tant de specieux pretextes à ses persuasions qu'il n'estoit quasi pas possible de ne s'y laisser emporter, et trouver bonnes ses ouvertures, lesquelles (au lieu d'avoir esgard à tant de sermens par luy prestez et à sa foy et parole donnée) il avoit converties en de plus infames et sales pratiques que jamais, non en apparence seulement, comme il l'avoit dit, mais veritablement et en effect, s'estant restraint, attaché et engagé à bon escient de servir les Espagnols contre sa personne et son Estat, et pris des correspondances dans le royaume et hors iceluy avec l'homme que vous sçaviez, et tous autres qu'il avoit peu recognoistre mal intentionnez contre la France, estant tousjours demeuré à la Cour et le plus proche de luy qu'il avoit peu, afin d'avoir tant plus facilement dequoy escrire, mander, advertir et entretenir ses manigances, jusques à l'advis qu'il receut de l'interception de certaines lettres que luy et d'autres s'entr'escrivoient (lesquelles Lomenie luy avoit fait voir), par lesquelles l'on pouvoit prendre quelque lumiere de ses ruses et malices, et entre autres choses, qu'il ne contoît à Sa Majesté, touchant les affaires d'Espagne, que des niaiseries et balivernes, afin de le beffler et l'amuser, pendant qu'il donnoit aux Espagnols des advisemens certains et des conseils pernicieux à l'estat de France.

Lequel advis de ses lettres ainsi surprises, et qu'il ne doutoit point qu'estant venues à la cognoissance de Lomenie tout son fait ne fust en partie decouvert, le fist aussitost resoudre à se retirer promptement de la Cour, et prendre la route d'Auvergne, avec dessein, comme on luy avoit mandé de cette province, de ne s'en approcher plus de sa personne, voire de s'en aller hors le royaume, si tost qu'il se verroit trop pressé de venir à la Cour, auquel estat estoient encore toutes ses affaires lors qu'il avoit envoyé d'Escures vers luy pour essayer de le persuader doucement, afin de decouvrir plus certainement, par ses responces et refus absolus, la verité de ce qu'on luy avoit mandé d'Auvergne, bien resolu neantmoins de le faire arrester prisonnier à la premiere commodité qui s'en presenteroit, à quoy il avoit desja donné quelque ordre, et vous



prioit derechef d'y travailler aussi de vostre part, ce que vous luy promistes plus expressément qu'auparavant, avec tesmoinage de grande indignation contre telles ingrattitudes et crimes énormes, disant avoir desja, selon vostre advis, un homme en main, que vous luy nommeriez lors que vous auriez encore parlé à luy, lequel bruslant de desir d'estre employé aux affaires d'Estat, n'aimant nullement ce comte, ayant des parens, des amis et des intelligences en la province, et des pretextes specieux pour luy faire aller et sejourner quelque temps, sans donner aucun soupçon, ne seroit pas marry d'avoir cette charge, pourveu qu'il fust autorisé d'une commission du grand sceau (qui estoit le langage qu'il vous avoit tenu sur autres quasi semblables affaires), et que le tout se pust expedier et tenir secret : laquelle ouverture le Roy trouva bonne, et vous commanda de sonder donc ce personnage, mais avec telle discretion que s'il ne se vouloit pas employer en cette affaire, il n'en eût pas aussi assez de lumiere pour la pouvoir descouvrir ; comme vous fistes, et tant heureusement que les choses reüssirent enfin tout ainsi que le Roy et vous l'eussiez pû desirer.

Le Roy ayant agréé celuy que vous luy aviez nommé pour aller en Auvergne, afin de faciliter la prise de M. le comte d'Auvergne, qui estoit le tresorier de Murat, nous ne nous arresterons point au recit des propos que vous luy tintes pour luy représenter son devoir et le disposer à s'en acquitter loyalement, ny aussi à plusieurs particularitez qui se passèrent tant à la Cour qu'en Auvergne et ailleurs, pour l'exécution d'iceluy, mais nous contenterons, pour donner quelque espece de cognoissance d'icelles, d'insérer icy quelques lettres du Roy, de M. de Ville-roy et du sieur tresorier de Murat, desquelles la teneur ensuit :

*Lettre de la main du Roy à M. de Rosny.*

Mon cousin, ayant entendu qu'il y a eu beaucoup de non-valeurs en l'an 1602, sur les assignations des Suisses, et que l'on a fait quelques frais extraordinaires pour les Grisons des deniers de ladite assignation, que d'avantage on a pris quarante mil escus, et faut encore prendre soixante dans ce mois d'aoust, pour continuer le mesnage qui s'est fait sur les debtes desdits Suisses, je vous prie de faire remplacer lesdites non-valeurs, comme vous avez fait cy-devant, veu mesmes que les ambassadeurs qui ont esté par deça, se sont plaints du surhaussement des monnoyes fait depuis le renouvellement d'alliance ; et vous me ferez en cela service tres-agreable, ainsi que j'ay commandé au sieur de

Caumartin qui vous rendra cette-cy de ma part, de vous représenter et vous faire entendre plus particulièrement : sur la suffisance duquel me remettant, je ne vous en diray d'avantage, pour prier Dieu vous avoir, mon cousin, en sa sainte et digne garde.

Ce 13 aoust, à Fontaine-bleau.

HENRY.

*Lettre du Roy à M. de Rosny, contre-signée.*

Mon cousin, je vous envoie la commission et les lettres de cachet en blanc, que le tresorier de Murat vous a demandées pour me faire le service que vous luy avez proposé par mon commandement. Je ne doute point de sa fidelité ny de son affection ; je me promets aussi que le tout sera tenu secret, comme je recognois avec luy qu'il est necessaire ; mais j'ay crainte que luy et les siens ne soient forts et déterminiez assez pour executer ma volonté. Je fais conte de communiquer le tout à Escures, qui pourra partir d'icy lundy ou mardy, afin qu'il ait bonne intelligence avec ledit de Murat ; que l'un n'entreprenne ny tante rien sans l'autre, car s'ils faisoient autrement ils gasteroient tout. Mon intention est que ledit d'Escures essaye de faire venir par deça le personnage, sur le sujet que nous avons advisé, devant que d'entendre à faire autre chose : dequoy vous advertirez ledit de Murat ; car s'il veut venir, ce chemin sera plus court et seur que l'autre, pour parvenir à nostre but. Pour cette cause, il suffira que ledit de Murat arrive au pays trois ou quatre jours apres ledit d'Escures, et faut luy deffendre expressément de descouvrir sa commission à qui que ce soit, que ledit d'Escures ne soit d'accord avec luy de le faire, dautant que, s'il peut le disposer à venir, il ne faut pas que l'on sçache que j'aye donné audit de Murat ladite commission, laquelle je desire que vous portiez vous mesme à monsieur le chancelier, et que le sceau y soit mis en vostre presence, afin que nul autre en ait cognoissance que mondit sieur le chancelier. Dequoy je me repose sur vostre soin ordinaire aux choses qui importent à mon service, comme celle-cy ; priant Dieu, mon cousin, qu'il vous ait en sa garde.

De Fontaine-bleau, le 14 aoust 1604.

HENRY.

Et contre-signé, DE NEUF-VILLE.

*Lettre de la main du Roy à M. de Rosny.*

Mon cousin, j'ay receu quelque advisement pour raison duquel je veux que la conclusion de l'accord avec les financiers soit différé pour quatre ou cinq jours, pendant lesquels vous pourrez neantmoins traitter des conditions, pour

les rendre les plus avantageuses que faire se pourra, et dans ledit terme de cinq ou six jours vous aurez de mes nouvelles pour achever ledit accord, et de ce que je dois esperer de l'advertissement qui m'a esté donné. Adieu, mon cousin.

Ce 15 aoust, à Fontaine-bleau.

HENRY.

*Lettre du Roy à M. de Rosny, contre-signée.*

Mon cousin, ayant receu cette lettre du sieur president du Vair, et la trouvant avec plus d'effroy et d'apprehension que n'est son stile ordinaire, j'ay estimé qu'il en doit avoir recogneu quelque cause nouvelle; et parce qu'il semble qu'il refere le principal sujet de cette rumeur à un arrest de mon conseil, donné contre ceux de Marseille, j'ay advisé, avant que d'y faire response, de vous faire voir ladite lettre, afin que vous la consideriez, et vous faire représenter ledit arrest pour voir s'il y auroit lieu de le temperer en quelque chose, me donnant avis dequoy il est question; car s'il n'importoit que de peu, il vaudroit mieux éviter l'occasion de les faire precipiter à quelque faute que de se mettre en peine de les en chastier, comme par la raison et la dignité il faudroit faire. J'attendray donc sur ce vostre response avant que de faire la mienne. Et sur ce, je prie Dieu, mon cousin, vous avoir en sa sainte garde.

Escrit à Fontaine-bleau, ce 17 aoust 1604.

HENRY.

Et plus bas,

DE NEUF-VILLE.

*Lettre du Roy à M. de Rosny, contre-signée.*

Mon cousin, je vous renvoye le sieur de la Vallée avec les dépesches qu'il m'a apportées sur ce qui s'est passé à Craon; vous les verrez et donnerez ordre à y envoyer l'un des vostres pour la démolition, afin que la continuation de la garnison y établie ne me puisse apporter davantage de despence. Et remettant du tout cette affaire à vostre prudence et bonne conduite, je prie Dieu, etc.

Escrit à Fontaine-bleau, le 18 aoust 1604.

HENRY.

Et contre-signé,

RUSE.

*Lettre de M. de Villeroy à M. de Rosny.*

Monsieur, le sieur d'Escures partit hier pour aller en Auvergne, avec charge de suivre et executer ce qui fut resolu icy quand vous y estiez; partant vous pourrez faire partir le sieur de Murat quand il sera prest. Il ne faut pas qu'il remplisse la commission que je vous ay envoyée en blanc, qu'il ne soit arrivé sur les lieux, et n'en ait conféré avec ledit d'Escures, pour ad-

viser et resoudre ensemble au nom de qui ils la mettront; car ledit d'Escures m'en avoit demandé une pour luy, et celle-cy pourra suffire pour tous. Ledit de Murat ne doit aussi descouvrir à personne sa commission et charge, qu'il n'ait veu ledit d'Escures et conféré avec luy, dont Sa Majesté desire que vous l'advertissiez, l'instruisant si bien de tout ce qu'il fera devant qu'il parte, que Sa Majesté en reçoive le service qu'il se promet. Je vous envoie des lettres du Roy en blanc, pour des villes et des officiers des sieges presidiaux, qui seront remplies sur les lieux; ledit d'Escures a porté celle du sieur d'Eure, lieutenant de la compagnie de M. de Vendosme, qui est à Ganat, tellement que je ne vous en envoie point d'autres. M. du Vair m'a escrit une lettre à part de ce qui se passe à Marseille, laquelle ne nous presage et promet rien de bon pour le service du Roy de ce costé-là. Il adjouste, ce qu'il a représenté à Sa Majesté par la lettre qui vous a esté envoyée, que l'on a tenu grande rigueur aux Marseillois sur le fait du trafic d'Espagne, et neantmoins avoit esté permis à quelques marchands italiens d'envoyer en Espagne un navire chargé de marchandises, qui emporte tout le gain que pouvoient faire les habitants, qui en sont au desespoir, dequoy Sa Majesté m'a commandé vous advertir; mais vous ne direz point, s'il vous plaist, que ledit avis m'ait esté donné par M. du Vair, parce que cela pourroit nuire au service du Roy. Nous n'avons rien de l'Escuse ny d'Ostende qui soit digne de vous estre escrit, sinon que l'armée archiducal devoit tenter un autre effort pour secourir l'Escuse, dès le onze ou douziesme de ce mois, et sommes attendans ce qui en sera succédé, dequoy nous vous ferons part. Je vous prie aussi de m'envoyer vostre avis sur l'edit de la reduction des payeurs de la gendarmerie que mon commis vous porta estant icy, et me continuer vos bonnes graces que je saluë de mes humbles recommandations; priant Dieu, monsieur, qu'il vous conserve en bonne santé.

De Fontaine-bleau, le 18 aoust 1604.

DE NEUF-VILLE

*Lettre de M. de Ville-roy à M. de Rosny.*

Monsieur, je vous escrivi hier le partement d'icy du sieur d'Escures, et ce qu'il nous sembloit que devoit faire le sieur de Murat, vous envoyant les lettres de cachet que cettui-cy vous avoit demandées; et vous prie m'advertir de la reception d'icelles, le paquet ayant esté mis à la poste. Je vous écris celle-cy par le commandement du Roy, pour vous advertir que M. de Nemours estant arrivé aujourd'huy icy,

a aussi-tost parlé à M. de la Varenne de la pension que vous sçavez, de laquelle il luy a dit estre recherché de traiter avec vous, monstrant n'en avoir la volonté, parce qu'il dit que sa conscience l'oblige d'en convenir avec personne qui veuille employer ladite pension à œuvres pies, ainsi qu'entend faire ledit sieur de la Varenne, parce qu'il pretend l'affecter aux jesuistes. Il luy a dit aussi qu'il est fort pressé de l'archevesque d'Aubx d'en accorder avec luy, et qu'il luy offre quarante mil escus, en comptant deux années de ladite pension qui montent à seize mil escus, de façon que la recompense ne seroit que de vingt-quatre mil escus, et ledit sieur de la Varenne luy en a cy-devant offert (ainsi qu'il nous a dit) vingt-cinq mil. Sur cela, Sa Majesté desire sçavoir en quels termes vous estes de l'affaire avec ledit duc, ce que vous estes d'avis que nous y avancions icy, et si nous ferons traiter par ledit sieur de la Varenne, Sa Majesté ne desirant que cette pension luy eschappe pour l'employer à ce que vous sçavez, et voudroit que l'on pust recouvrer encore le benefice entier : nous vous prions doncques nous en mander votre avis. J'ay charge encores de vous escrire que celui qui a donné avis à Sa Majesté, sur lequel elle vous a escrit ces jours passez, de surceoir la conclusion de la composition des financiers, est arrivé icy aujourd'huy, et le vous renvoyera demain, apres qu'elle l'aura ouy; quoy attendant, elle vous prie ne vous engager à faire ladite composition. Nous n'avons aucunes lettres de Flandres depuis le 11 de ce mois. Je prie Dieu, monsieur, qu'il vous conserve en bonne santé, et me recommande humblement à votre bonne grace.

De Fontaine-bleau, le 19 d'aoust, au soir, 1604.

Vostre humble serviteur,  
DE NEUF-VILLE.

*Autre lettre de M. de Ville-roy à M. de Rosny.*

Monsieur, vous ayant quelquefois ouy dire que vous ne revisitiez jamais vos vieux papiers que vous n'y en trouvassiez quelqu'un duquel il ne vous souvenoit plus, j'ay fait maintenant une semblable experience, dautant qu'en recherchant parmy les liasses des lettres que j'avois reçues de Rome, j'ay trouvé une lettre de M. le cardinal d'Ossat (lors qu'il ne l'estoit pas encores), par laquelle, à la fin d'icelle, il me faisoit mention d'une personne avec laquelle vous et moy avons eu autrefois maille à départir (ne laissant pas d'estre à present de nos amis, au moins ce dit-il), par un extrait de laquelle vous verrez qu'il s'est meslé de beaucoup de sortes d'affaires en son temps, aussi bien que d'au-

tres, et en quelle opinion il estoit dans l'esprit des bons serviteurs que le Roy avoit en Italie, encore que, dans l'extrait que je vous envoie, j'en aye fait supprimer le nom, dautant qu'à mon avis vous ne laisserez pas de le recognoistre, par les circonstances et d'autres noms dudit extrait. Vous baisant bien humblement les mains.

De Fontaine-bleau, ce 24 d'aoust 1604.

C'est, etc.

DE NEUF-VILLE.

*Coppie de la lettre de M. d'Ossat à M. de Ville-roy.*

Monseigneur, cette affaire de 36 **Marseilles** me fait souvenir du personnage que vous sçavez, duquel ceux de Lyon escrivent qu'apres la prise de 64 Sisteron il avoit envoyé au Roy, pour se soumettre à son devoir; mais il ne sçavent pas qu'en mesme temps il envoya à Thurin à M. de Savoye, et à Milan au connestable de Castille, duquel il a obtenu soixante mil escus, à sçavoir, cinq mille comptant, dont on luy a achepté à Milan des armes et chevaux, et cinquante cinq mille en une lettre de change pour les prendre à Gennes, et, dit-on, que c'est pour advance de deux mois d'une pension de trente mil escus par mois que l'on luy donne pour estre bon François, comme il escrit par deça qu'il sera toute sa vie, et fait dire que l'argent qu'il prend à Milan, c'est argent qu'il y avoit en banque, comme si cela mesme d'avoir son argent à banque en une ville du roy d'Espagne (quand ainsi seroit), et l'y tenir bien assuré, n'estoit pas en ce temps un signe de n'estre guerres bon François. Ceux qu'il a envoyez à Thurin et à Milan s'appellent l'un Desmonts et l'autre Caumeny. Il y a plusieurs jours qu'il court icy un bruit qu'il a promis 55 Boulongne aux Espagnols, ce que je conjoints avec la nouvelle que nous avons par deça long-temps y a, que le roy d'Espagne fait une armée en Portugal et en Biscaye : il est homme pour, sur cette occasion, faire luy mesme courir ce bruit, pour estorquer du Roy ce qu'il veut. Mais comme ces troubles ont en grande partie commencé par luy, et à cause de luy, aussi peut-il estre que Dieu les veut finir en luy et avec luy, et par ce moyen donner aux gens de bien deux grandes joyes ensemble. Cependant vous avez à vous garder non seulement de luy, mais aussi de celui qu'il a mis à Boulongne 55, qui pourroit, sans luy, faire avec les Espagnols ce qu'on avoit commencé à faire à Han. Je ne sçay pourquoy desormais ses supots voudroient plutost servir luy que le Roy, Sa Majesté s'y aydant, attendu que la justice et l'honneur y est, et qu'elle peut estre recueillie

plus grande du Roy que de luy. A tant, monseigneur, etc.

De Rome, ce 17 janvier 1596. D'OSSAT.

*Lettre du Roy à M. de Rosny.*

Mon cousin, ayant appris par les lettres de Biçose, que vous cognoissez et qui est à moy de long-temps, que ma declaration vous donnant pouvoir de commettre des lieutenans sous vous en la charge de grand voyer de France, par toutes les provinces de mon royaume, avoit esté verifiée en ma cour de parlement à Bourdeaux, je vous fais ce mot pour vous prier de luy vouloir, pour l'amour de moy, accorder vostre lieutenance en Guyenne, sur l'assurance que je vous donne qu'il m'y servira bien et à vostre contentement. Sur ce Dieu vous ait, mon cousin, en sa sainte et digne garde.

Ce 19 aoust, à Fontaine-bleau. HENRY.

Le Roy ayant eu advis que le pape Clement VIII estoit tellement indisposé que l'on n'y eseroit pas longue vie, ordonna aux cardinaux de Joyeuse et de Sourdis de s'en aller promptement à Rome, afin de se trouver sur les lieux au temps d'un changement, s'il arrivoit; surquoy il vous escrivit une lettre telle que s'ensuit :

*Lettre du Roy à M. de Rosny, contre-signée.*

Mon cousin, ce a esté l'advis du cardinal de Joyeuse, avant que de partir d'icy, que je devois donner encores trois mil livres au cardinal de Sourdis, pour son emmeublement et les frais de son voyage à Rome, outre les six mil que je luy avois accordez, afin de luy parfaire jusques à trois mil escus; pour cet effet ledit cardinal de Joyeuse a aussi esté d'advis que je luy donnasse jusques à deux mil quatre cens escus de pension par chacun an, tant que ledit cardinal de Sourdis demeurera à Rome. J'ay fait expedier un brevet de cettuy-cy et une ordonnance de l'autre qui vous seront presentez avec cette lettre; partant donnez ordre que lesdits trois mil escus d'emmeublement de voyage luy soyent payez, pour favoriser et avancer son acheminement, afin qu'il soit prest à partir et puisse arriver à Rome au temps que nous avons resolu, et comme vous sçavez qu'il importe à mon service. Je prie Dieu, mon cousin, qu'il vous ayt en sa sainte et digne garde.

Escrit à Fontaine-bleau, le vingt-uniesme jour d'aoust 1604.

HENRY.

Et plus bas,

DE NEUF-VILLE.

*Lettre de M. de Ville-roy à M. de Rosny.*

Monsieur, ce porteur vient d'Auvergne, et,

II. C. D. M. T. II.

par ce que j'ay recogneu que son frere ne luy a descouvert la charge plus secrette qui luy a esté donnée, vous ne luy en direz rien, s'il vous plaist, et escoutez sa creance, apres avoir veu les lettres que je vous envoie, par lesquelles vous cognoistrez que M. le comte d'Auvergne n'a moins de crainte que de honte de se représenter au Roy. Tellement qu'il ne faut pas faire estat qu'il vienne, dequoy Sa Majesté n'est pas contente : vray est qu'elle dit ne s'y estre attenduë; neantmoins, son advis est de ne le presser maintenant davantage, pour ne l'éfaroucher plus qu'il est, mais faire sçavoir audit d'Escures qu'il mette peine de faire ce que Sa Majesté luy a commandé. Cependant l'on peut faire sçavoir audit comte qu'il commence à tanter les moyens qu'il dit avoir de descouvrir les traittez des Espagnols contre le Roy, afin de luy faire ce service durant son absence, puis qu'il juge qu'elle y est necessaire, et aussi qu'il ne desire pas se presenter qu'il n'ait fait ledit service. Nous verrons ce que produira cette responce : pour moy je ne m'attends pas qu'elle fructifie; mais aussi ne peut-elle nuire, puis qu'elle ne nous lie d'aucune obligation et promesse nouvelle, et que cela donnera plus de loisir et peut-estre de moyen audit d'Escures d'effectuer le commandement de Sa Majesté, sur lequel il faut faire plus de fondement que sur le reste : toutesfois Sa Majesté vous prie de luy faire sçavoir ce qui vous en semble. Nous n'avons rien d'ailleurs qui merite vous estre escrit. Je vous supplie doncques, pour finir la presente, de la faire brusler apres que vous l'aurez leuë, comme vous jugerez qu'il est necessaire pour le service du Roy, et aussi que personne ne voye les lettres particulieres dudit sieur d'Escures, ny sondit frere mesme; au moyen dequoy il vous plaira me les renvoyer dedans un paquet bien cacheté, comme sera la presente. Je me recommande humblement à vostre bonne grace, priant Dieu, monsieur, qu'il vous conserve en parfaite santé.

De Fontaine-bleau, le 24 aoust 1604.

Vostre humble serviteur,

DE NEUF-VILLE.

*Lettre de la main du Roy à M. de Rosny.*

Mon cousin, vous recevrez cette-cy par d'Aubigny, auquel j'ay fait expedier mes lettres de commission avec le sieur de la Grange Courtin, pour informer des malversations commises au fait de mes finances en Normandie; et par ce que je desire que ladite commission ayt lieu, j'ay commandé ausdits sieurs de la Grange et d'Aubigny de s'y acheminer en diligence, afin qu'à cette fois je sois esclairey d'une infinité de plain-

tes et de memoires qui m'ont esté donnez touchant lesdites malversations. C'est pourquoy je vous prie de tenir la main à ce qu'il ne leur soit donné aucun empeschement, et que les gens de mes comptes de Rotien leur communiquent les comptes et papiers dont ils auront besoin, auxquels je desire aussi que leur en escriviez, vous priant d'aporter tout le soin et la diligence qui se pourra, pour l'esclaircissement de cét affaire de l'extraordinaire des guerres, dont je vous escrivi dernièrement par ledit d'Aubigny. Adieu, mon cousin.

Ce 27 aoust, à Fontaine-bleau. HENRY.

En ce mesme temps le Roy vous ordonna de faire venir monseigneur le Dauphin et autres siens enfans, de Saint Germain à Fontaine-bleau, passant l'eau à Saint Cloud; mais sur ce que vous luy escrivistes estre plus à propos, pour le contentement du peuple de Paris, de le faire passer par dedans la ville, il vous fit une lettre telle que s'ensuit :

*Lettre de la main du Roy à M. de Rosny.*

Mon amy, je vous dépesche ce courrier expres pour vous dire que je trouve bon l'advis que vous m'avez donné par la Varenne de faire passer mon fils par Paris, et de là je luy ay commandé de passer jusques à madame de Monglat, pour l'en advertir, et luy escrire le chemin qu'elle aura à tenir, qui est de venir coucher demain à Saint Cloud, chez Gondy; dimanche passer au travers de ma ville de Paris, et venir dîner à Ville-Juifve et coucher à Savigny. Je m'asseure que si cette nouvelle se sçait à Paris, qu'il y aura bien du monde par les ruës pour le voir passer. Adieu, mon amy.

Ce vendredy, 27 aoust, à six heures du soir, à Fontaine-bleau. HENRY.

*Lettre de M. de Ville-roy à M. de Rosny.*

Monsieur, ayant leu au Roy la lettre de M. de Chamvallon que je vous envoie, Sa Majesté m'a commandé vous la faire tenir, afin que vous consideriez l'offre qu'il fait de la part de M. de Lorraine, et le bien qui nous en peut arriver, pour luy en mander vostre avis, estimant que c'est l'avantage de son service d'acquérir le prieuré qui est de la maison de Bavières, et empescher qu'il prenne party avec l'Espagnol, et d'autant plus qu'il doit succeder à l'electorat apres son oncle. Vous prendrez doncques la peine de peser cette ouverture et d'en mander vostre avis à Sa Majesté, laquelle dit que vous envoyez querir M. de Chamvallon pour en conférer avec luy; peut-estre pourra-on en avoir meilleur marché. Je me recommande humble-

ment à vostre bonne grace, et prie Dieu, monsieur, etc.

De Fontaine-bleau, le 19 aoust 1604.

DE NEUF-VILLE.

*Lettre du Roy à M. de Rosny, contre-signée.*

Mon cousin, la Reine ma femme m'a fait de mander en don quelques deniers que l'on luy a donné advis avoir esté levez en Quercy et Rouergue sans mes commissions, et pour estre employez contre mon intention: dequoy, avant que de luy en faire faire aucune expedition, j'ay voulu avoir vostre avis, vous envoyant à cét effet les provisions que l'on luy en fait demander, lesquelles je vous prie de voir et considerer si c'est chose dont elle puisse tirer quelque fruit et sans faire tort à mes finances ordinaires, reservant d'en rien ordonner que je n'aye sur ce vostre responce; et n'estant la presente à autre fin, je prie Dieu, mon cousin, vous avoir en sa sainte garde.

Escrit à Fontaine-bleau, ce 29 aoust 1604.

HENRY.

Et plus bas, FORGET.

*Lettre de M. de Murat à M. de Rosny.*

Monseigneur, le desir de voir mon frere m'a fait quitter le grand chemin de Dauphiné et passer en ce pays, où j'ay trouvé M. d'Escures fort en peine de ce qu'il ne peut persuader à monseigneur le comte d'Auvergne d'aller trouver le Roy; et parce que ledit sieur comte luy avoit fait entendre qu'il faisoit estime de mon affection à son service, il desira que, luy allant faire la reverence et luy parlant de la broüillerie qu'a eu mon frere avec luy, je me jettasse sur les discours des affaires dudit sieur comte, et apportasse ce que je pourrois à le persuader d'obeïr à Sa Majesté en ce point de l'aller trouver. Je fus donc à Vic, l'une de ses maisons, et dès son abord, apres peu de propos de l'affaire de mon frere, de luy mesme il se mit sur le discours des siennes avec le Roy, sans m'en rien celer que ce qu'il taist à d'Escures, se plaignant que Sa Majesté le veut voir à present sans besoin, et qu'aux trois premiers voyages de d'Escures, il ne luy avoit point fait entendre que le Roy eust cette volonté; que ce changement et cette grande persuasion que l'on apportoit à le faire partir, le faisoit reculer, et craindre tout ce qui se peut imaginer de mauvais traitement; qu'il choisira plutost d'abandonner le royaume et tout autre party que celui là d'aller à la Cour; qu'il avoit trop de honte de ses actions passées; qu'il ne vouloit et n'osoit comparoir devant Sa Majesté que ses services n'eussent precedé sa presence;

que sa défiance est augmentée et sa créance confirmée; qu'il n'y a point d'assurance à la Cour pour luy, par l'avertissement que luy en a donné un personnage de telle qualité, que ses avis ne peuvent estre revoquez en doute; qu'il seroit bien sot s'il n'estoit devenu advisé par le dommage de M. de Biron, mort pour avoir mespris les avis que l'on luy donnoit de ne bouger de Bourgogne; que pour toutes ces considerations il n'y vouloit point aller, ou qu'il n'eust servy le Roy par le moyen du brevet qui luy a esté rendu, ou si le Roy ne veut point de ce service, que son abolition ne soit vérifiée.

Sur tous ces pointcs, monseigneur, je m'efforçay, dès ma premiere veüe où j'estois seul, et hier encores avec M. d'Escures, de luy faire reconnoistre la malice de ces donneurs d'avis, si aucuns y en avoit, ce que je ne croyois point, du moins de la qualité qu'il les dépeignoit; qu'il n'avoit rien à craindre, puisque, sur la confession de ses fautes, Sa Majesté luy avoit donné abolition; qu'en cela il differoit avec M. de Biron, qui n'avoit pas voulu reconnoistre sa faute, lors qu'il en estoit temps, ny en estre pardonné; que les exemples de la bonté et clemence du Roy luy donnoient non seulement esperance, mais entiere assurance de n'estre jamais recherché du passé; qu'il seroit le premier envers qui Sa Majesté auroit manqué de parole; qu'il me pardonast si je luy disois que puis qu'il estimoit son abolition et le brevet insuffisans à le sauver, qu'il falloir qu'il n'eust pas tout dit ou qu'il eust commencé nouvelle pratique. Il nie l'un et l'autre, mais dit qu'il est relaps en cette matiere; qu'il y a loy qui permet de rompre la foy à ceux qui n'en ont point; et, quoy que je die, qu'il se resoudra à souffrir toute extremité de misere, plutost que de se voir en danger d'estre mis sur un eschaffaut, où il se porteroit s'il alloit à la Cour; car il y est mal avec le Roy, la Reine, tous messieurs les princes du sang, madame la marquise sa sœur, M. le grand escuyer, bref avec tous ceux qui ont l'honneur des bonnes graces du Roy; que nul de ses amis ne parle pour luy, ne luy escrit, non pas mesme monseigneur le connestable. Et ce qui luy fait adjouster foy à ces avis, est que vous, monseigneur, ny messieurs de Ville-roy et de Sillery, ne luy écrivez rien pour l'asseurer, parce, dit-il, que vous cognoissez la volonté de Sa Majesté mal disposée en son endroit, et que vous, ny lesdits sieurs de Ville-roy et de Sillery, ne voulez estre estimez instrumens de sa perte, luy écrivant chose contraire à ce que vous voyez.

Nous luy avons combattu toutes ces raisons, et l'avons reduit à n'en pouvoir dire une bonne.

Lors il revient à sa conclusion, qui est de n'aller point que son abolition ne soit vérifiée. Plus pressé, dit que son apprehension est que sa sœur luy veut mal de mort, et que sans doute elle et M. d'Antragues inventeront quelque fait que le Roy croira. A cela nous luy disons qu'il ne doit rien craindre; qu'à la verité il a raison, si elle sçait quelque chose plus meschante que ce qu'il a avoué au Roy; et passay jusques là de luy dire que si elle luy pouvoit reprocher qu'il eust promis d'attenter sur la personne de Sa Majesté ou de monseigneur le Dauphin, qu'à la verité cela pourroit rendre son abolition inutile, aussi bien apres que devant la verification; de sorte qu'inutilement il demandoit cette verification. Il se jetta fort loin de cela, et fit de grands sermens qu'il n'eut jamais l'ame si meschante; mais que sa sœur estant fine, elle pourroit supposer quelque chose vray semblable pour le perdre et faire sa paix à ses despens.

Enfin, monseigneur, nulle raison ne le peut remettre à la raison, ny nulle ouverture d'assurance assurer sa défiance. Croyez que toutes vos armes ne sçauroient armer ou, pour mieux dire, assurer la peur qui le possede, et toutes persuasions sont trop foibles pour bannir les apprehensions que luy represente sa conscience. Ses actions le témoignent; car dès qu'il a eu déclaré au sieur d'Escures qu'il ne vouloit aller à la Cour, il a abandonné les villes et les maisons des gentilshommes, s'est retiré à Vic, mauvaise bicoque, est tout le jour dans les bois, sous pretexte de chasser, et ne va plus en la maison de madame de Chasteau-guay; mais, pour se voir, se donnent des assignations à la campagne, et de nuit dans les villages, jamais deux fois en un mesme, posé des valets, des chiens ou des laquais en sentinelle sur les advenues et en lieux hauts, pour estre adverty par le son de son cor de chasse qu'il leur fait porter; et luy porte, despeinte en son visage, la frayeur et la tristesse, n'a pas un sol pour vivre; bref il est environné de maux et des afflictions que souffrent les enfans maudits et bannis par leurs peres. Il nous dit hier qu'il avoit songé que dans trois jours M. de Vitry seroit icy, pour le persuader d'aller à la Cour, à quoy il n'avanceroit rien.

Voilà les termes ausquels nous le laissames hier, et où il demeurera jusques au retour de Fougeu, frere de d'Escures, que nous irons le voir pour prendre nouvelle resolution; et, bien que je voulusse continuer mon voyage de Dauphiné, il m'a commandé d'attendre ce retour. Je luy ay promis; mais je erains, monseigneur, que le Roy ou vous trouviez mauvaise mon entremise en cette action, qui n'est point de ma profession

et qui surpasse ma capacité. Ledit sieur d'Escures l'a voulu, et je vous supplie tres-humblement de faire en sorte que Sa Majesté ne l'aye desagréable, puis que je n'y suis poussé que d'une fidelle affection a son service, et que je rechercheray tousjours l'occasion de luy tesmoigner mon obeysance à ses commandemens, si j'en recevois.

Vous supprimerez, monseigneur, ou communiquerez cette lettre, selon que vostre prudence le jugera à propos, ne me restant à vous dire, sinon que ledit sieur comte, se plaignant d'estre abandonné de ses amis, dit qu'il n'a aucune responce de quatre lettres qu'il vous a escrites, et qu'il porteroit toute creance à ce qui viendrait de vostre part. Je finis par deux prières, l'une à vous, de m'honorer tousjours, me tenant au nombre de vos tres-humbles serviteurs, et l'autre à Dieu, de vous donner, monseigneur, toute la grandeur, prospérité et felicité que vos merites vous promettent et que vous souhaitez de toute son affection, monseigneur,

Vostre tres-humble, tres-obeysant et tres-obligé serviteur, DE MURAT.

Depuis cette lettre escrite, monsieur le comte nous a envoyé querir pour l'aller trouver à trois lieues d'icy, et mande qu'il avoit changé d'avis et s'estoit resolu d'aller trouver le Roy. Je crains quelque artifice, me semblant qu'il n'est pas possible de changer si soudain d'une resolution qui paroisoit si ferme et si constante : d'Escures n'en escrit rien à M. de Ville-roy par la lettre que ce porteur luy delivra, d'autant que le messager est venu apres sa lettre close.

De Clermont, ce 29 aoust 1604.

*Lettre de M. de Rosny à M. de Murat.*

Monsieur, j'ay receu de vous, ce 6 de septembre, une fort longue lettre, contenant plusieurs poincts sur lesquels il me faut parler au Roy avant que de vous y faire responce, reservé sur celuy qui parle des quatre lettres que M. le comte d'Auvergne dit m'avoir envoyées sans en avoir pu tirer responce; ce qui n'a pas esté ma faute, mais de celuy qui ne me les a renduës que depuis peu de jours, et toutes quatre ensemble, encor qu'elles soient de fort differentes dattes; sur lesquelles siennes quatre lettres je ne luy fais qu'une responce, laquelle, pour bien rendre intelligible, je luy envoie la coppie d'une responce que je fis à M. de Biron sur pareilles lettres qu'aux siennes; vous adressant le tout à cachet volant, afin que vous le voyez et le distribuez selon que vous le jugerez expedient pour le service du Roy, me recommandant à vos bonnes graces.

De Paris, ce 9 de septembre.

C'est vostre plus affectionné à vous faire service,  
ROSNY.

*Lettre de M. de Rosny à M. le comte d'Auvergne.*

Monsieur, j'ay receu quatre lettres de vous en un mesme jour, quoy qu'elles soyent de differentes dattes, par lesquelles je recognois que vous avez l'esprit en peine, et que vous penseriez de l'en pouvoir tirer par mon moyen; surquoy j'aurois beaucoup de choses à vous dire que le papier ne me permet pas; et partant me contenteray-je, pour le present, de vous envoyer la coppie d'une responce que je fis à feu M. de Biron sur une lettre quasi semblable aux vostres, ne vous pouvant donner une meilleure assistance que de vous donner les mesmes conseils, lesquels s'il eut voulu suivre il eut évité ses desastres, comme vous ferez ceux que vous craignez si vous les voulez mettre en pratique. Surquoy attendant vostre responce, je vous bayseray tres-humblement les mains.

De Paris, ce 9 septembre 1604.

C'est vostre plus humble serviteur,

ROSNY.

*Coppie de la lettre de M. de Rosny à M. de Biron.*

Monsieur, je ne me puis imaginer d'où vous viennent ces advis, que le Roy tient des propos de vous qui ne sont à vostre avantage; car ils ne peuvent estre veritables, puis que moy mesme qui suis tousjours aupres de Sa Majesté, et avec lequel, comme vous sçavez, il discourt assez librement de toutes choses, ne luy en ay jamais ouy dire une seule parole de cette qualité; et donneriez sujet, si le bruit en venoit de vostre part ou des vostres, de soupçonner que vous cherchiez à tesmoigner du mescontentement, ou que vos propres pensées vous feroient prendre, de gayeté de cœur, telles apprehensions, desquelles il vous sera facile de delivrer vostre esprit, si vous voulez mettre en pratique les conseils que je vous ay souvent donnez, la continuation desquels nous mettant en bonne intelligence vous et moy, et cherchans tous deux conjointement les moyens de plaire au Roy et le servir loyaument pour eslever sa grandeur au sommet du merite de ses vertus, cette procedure nous rendra tous trois contents et assurez, luy de l'utilité de nos services, et nous de sa bienveillance, beneficence et confiance en nos loyautez; à toutes lesquelles choses, si vous contribuez tout ce que vous devez et pouvez, je ne doute nullement que le succez n'en soit bien-heureux.

Surquoy, attendant vostre responce, je prieray Dieu, etc.

#### CHAPITRE CXLIV.

*Arrestation du comte d'Auvergne. Il est mis à la Bastille sous la garde de Rosny. Affaires de finances. Deux lettres de Henry IV sur la marquise de Verneuil. Rosny chargé de négocier avec cette dame. Détails de cette négociation. Lettre relative au commerce extérieur. Traité de commerce avec l'Espagne. Propositions faites au Roi par le connétable de Castille. Observations de Rosny sur ces propositions. Établissement des jésuites à la Flèche. Deux lettres du Roi sur les intrigues des protestans.*

En suite et consequences des lettres et discours mentionnez au precedent chapitre, les sieurs tresorier de Murat et d'Escures prindrent de si bonnes intelligences ensemble et avec leurs amis, conduirent si dextrement leurs pratiques, sceurent si bien cajoler le comte d'Auvergne, et luy dresser tant d'embusches, que nonobstant ses agitations d'esprit, desquelles sa propre conscience le travailloit incessamment, les soupçons et défiances où il entroit de plus en plus, et qu'il fit profession d'estre le fin des fins et le maistre des ruses, et de pouvoir circonvenir un chacun par la subtilité de son esprit, si ne laissa il pas de se trouver enveloppé dans le plus grossier en apparence de tous les pieges qui luy étoient preparez, qui fut celuy de la monstre de la compagnie de chevaux legers de M. de Vandosme où commandoit le sieur d'Eure, par lequel il fut persuadé d'y estre present comme colonel de la cavalerie legere de France, estimant estre impossible qu'il y pust courir aucune fortune, dautant qu'il s'estoit monté sur un cheval qu'il disoit surpasser le vent en vitesse, et pouvoir courir dix lieuës d'une haleine, et resolu de ne mettre nullement pied à terre, ny d'entrer en lieu estroit ny fermé. Mais il ne se prist pas garde ny ne pût éviter que le sieur de Nerestan, survenant comme à l'improviste tout seul à cheval sur une petite haquenée, ne s'avancast pour le saluer, ny que de quatre soldats fort determinez qu'il avoit fait habiller tout exprez en lacquais, deux d'iceux ne luy saisissent les rennes de sa bride, les deux autres ne le prissent par une jambe et ne le jettassent de l'autre costé du cheval hors de la selle, tant impetueusement qu'il se trouva par terre tout de son long, et aussi-tost saisi de toutes parts, avant qu'il eust eu loisir de penser à mettre la main à l'espée ny

au pistolet, ny à prendre la fuitte, qui seront les seules particularitez que nous dirons icy touchant cette prise, que les historiens content assez au long.

Il fut conduit à Paris et mis dans la Bastille en vostre garde, où, reservé la seureté d'icelle en quoy vous estiez fort exact, pour ce qu'il estoit destiné à y demeurer longues années, il recevoit toutes les courtoisies et gratifications qu'il estoit possible de souhaitter, comme il s'en est toujours loué depuis. Au bout de quelques jours il fit declarer au Roy toutes les menées du dedans et du dehors de son royaume, et luy mit entre les mains la promesse d'association faite par M. de Bouillon à luy et à M. de Biron, de laquelle ayant veu la coppie que le Roy vous en envoya, nous l'avons icy inserée, estant telle que s'ensuit :

« Nous Henry de la Tour, promettons et jurons en foy et parole de gentil-homme et d'homme de bien, que nous ne nous separerons jamais de l'amitié que nous voulons porter au sieur comte d'Auvergne et duc de Biron, demeurans tousjours unis en ce qui sera de nostre conservation ; promettons en outre de ne dire jamais ce qui nous aura esté déclaré par eux, comme aussi de brusler ladite promesse, au cas qu'il arrive quelque nouveauté qui empesche ce que dessus. En foy de quoy avons écrit et signé la presente de nostre main. Fait à Paris, l'an 1602. »

Cette prise divulguée, M. de Bouillon retiré fuitif hors du royaume, et la mort de M. de la Trimouille arrivée quasi en ce mesme temps, toutes les menées que ces gens estimoient avoir bien solidement fondées, se dissipèrent aussitost, dont quelques-uns des particuliers furent pris, les autres se vindrent deceler et demander pardon, et les autres s'enfuiront, mais en fort petit nombre, hors du royaume. Nous avons cy-devant fait mention du placart des trente pour cent mis sur les denrées et marchandises, tant en Espagne qu'en Flandre, des alterations qu'il excitoit dans l'esprit des roys, et comme le nostre n'avoit pû trouver, selon l'advis de son conseil où il avoit appelé tous les plus grands du royaume, un expedient plus honorable et selon la dignité de la France, que d'interdire toute sorte de commerce avec les estrangers ; tous lesquels crians que c'estoit contrevenir aux traittez de paix, le Roy ne répondoit autre chose sinon que le deffaut ne venoit pas de son costé, mais de celui qui avoit estably un impost si excessif, qui seroit honteux à luy et dommageable à ses peuples s'il les y laissoit sousmettre. Les François mesmes se plaignoient de ces deffences, et



plusieurs gouverneurs de villes et provinces, nonobstant icelles, ne laissoient d'envoyer des vaisseaux aux pays estrangers, à cause du grand profit qu'ils y faisoient, la rareté des marchandises les leur faisant vendre ce qu'ils vouloient.

*Lettre du Roy à M. de Rosny.*

Mon cousin, Beaufort m'a fait entendre que quelques-uns, pour l'empescher de me continuer le service qu'il me veut faire pour m'aider à découvrir les larcins faits par quelques-uns de mes comptables de l'extraordinaire des guerres, et autres, cherchent de le mettre en peine, pour ce qu'il a retiré de ma chambre des comptes, deux quittances pour verifier la fausseté d'icelles, lesquelles et quelques memoires concernant mon service, luy ont esté pris par un sien domestique nommé Safart, qui se seroit retiré de son service. C'est pourquoy je vous fais ce mot, pour vous prier, incontinent que vous l'aurez receu, de parler à M. le president Nicolay, de ma part, luy faisant entendre que je ne veux pas que ledit Beaufort soit en peine, pour avoir retiré de madite chambre lesdites quittances; et si vous avez cognoissance que ledit Safart les luy ait prises, ensemble cesdits memoires, vous le ferez mettre prisonnier pour les luy faire rendre, d'autant que cela importe au bien de mon service, et que c'est chose que j'ay à cœur et que j'affectionne, comme aussi que ledit Beaufort continuë, sans aucun empeschement, la verification des faux acquits employez és comptes de l'extraordinaire des guerres et artileries. Sur ce, Dieu vous ait, mon cousin, en sa sainte et digne garde.

Ce 10 septembre, à Fontaine-bleau.

HENRY.

*Lettre de M. de Rosny au Roy.*

SIRE,

J'ay receu des lettres des tresoriers de France en Languedoc, par lesquelles ils me mandent que le parlement de Toulouze, de son autorité absoluë et directement contre celle de vostre Majesté, a défendu la sortie des bleds hors la province, et que, pour cette occasion, les fermiers des traittes foraines, domeniales et patentes, disent ne vouloir plus payer le prix de leurs fermes; de sorte que je prevoy que vos fortifications et vos galleres demeureront sans payement; car je n'ay moyen de remedier à cette entreprise de la cour de parlement, cela residant en vostre seule personne. J'ay d'ailleurs tant de remplacements à faire, tant pour les fermes qui ont manqué à cause de l'interdiction du commerce d'Espagne et és terres des archiducs de

Flandres, que pour les non valleurs que je voy preparées sur les tailles de cette année, à cause de la pauvreté du peuple qui va augmentant d'année en année, et de la contagion qui afflige plusieurs provinces, que, pour y satisfaire, il me faudra consommer une bonne partie du petit mesnage que j'avois fait les années passées. D'ailleurs je me voy chargé de tant de sortes de despences extraordinaires et nouvelles, et neantmoins la pluspart necessaires, et voy si peu d'ordre pour diminuer les despences non necessaires, que je ne sçay plus comment pourvoir à tant de choses moy seul; car chacun s'en excuse tant qu'il peut, et je n'ay pas tous les jours vostre autorité en main pour faire executer ce qui est resolu en vostre conseil, par vos cours souveraines, corps de villes et communautéz: tellement qu'il me sembleroit plus à propos d'appeller vostre conseil aupres de vous, afin que, vous estant représenté en iceluy toutes ces difficultez et autres qui se presentent journellement, il se pust donner une forme aux affaires, telle que le requiert le bien de vostre service. Je supplie vostre Majesté m'excuser si je luy escriis si amplement des choses qui luy pourront estre desagrees, mais j'y suis contraint et obligé par les devoirs des charges et estats dont il a pleu à vostre Majesté m'honorer, et par la fidelité et affection que je porte au bien de vostre service, auquel je ne manqueray jamais, et pour me descharger de blâme et de coulpe, si je ne representois toutes ces choses et ne faisols instance qu'il y fust remedié. Attendant sur ce l'honneur de vos commandemens, je prieray le Createur, Sire, qu'il augmente vostre Majesté en toute royale grandeur, felicité et santé.

De Paris, ce 13 septembre 1604.

Vostre tres-humble, tres-obeyssant et tres-fidelle sujet et serviteur, etc.

Monseigneur, ayant trouvé parmy les papiers de vostre petit cabinet verd de derriere, un recueil tout escrit de vostre main, r'attaché d'une espingle, contenant plusieurs minutes de lettres du Roy à vous et de vous à luy, apparamment de grande importance, et concernans tous M. le comte d'Auvergne, madame de Verneuil, M. et madame d'Antragues, nous les avons estimez meriter bien de n'estre pas oubliez; mais nous trouvans en peine de le disposer en sorte qu'il pust avoir ses precedances et subsequences convenables, à cause que toutes ces lettres dans leurs minutes n'avoient point d'autres dattes que celles des jours, reservé l'extrait d'une lettre de M. de Ville-roy qui estoit dans une des vostres, en datte du 3 juillet 1604, qui nous a fait resoudre de

l'insérer à la fin du recit d'un fort long discours que le Roy vous tint à vostre retour de la prise de possession de vostre gouvernement de Poictou : ledit recueil estant ramassé de divers temps et tel que s'ensuit, commençant par une lettre de la main du Roy à vous,

*Lettre de la main du Roy à M. de Rosny.*

Mon amy, je vous escriis cette lettre par laquelle je vous prie, voire ordonne, de prendre le temps et l'occasion si à propos pour voir madame de Verneuil de ma part, que vous luy puissiez tout au long faire entendre mes intentions et resolutions absolues sur les choses qui se sont passées entre nous depuis sept ou huit mois en ça ; et dautant que le discours et les causes et raisons d'iceluy seroient trop longs pour une lettre de ma main, et pour quelque autre sujet que je vous diray à nostre premiere veuë, j'ay rendu la Varenne porteur de cette lettre, avec lequel j'ay discouru de toutes les choses desquelles je veux que vous parliez avec madame de Verneuil, vous priant de le croire comme moy-mesme, et en parlant à elle avec les dexteritez et belles paroles desquelles vous vous servez lors que vous me donnez des conseils que vous estimez ne m'estre pas trop agreables : et sur ce, je prieray Dieu, mon amy, qu'il vous conserve.

De Fontaine-bleau, ce mardy à six heures du matin,

HENRY.

*Lettre du Roy à M. de Rosny.*

Mon amy, je vous ay escrit ce matin une lettre par la Varenne, afin que vous vissiez madame de Verneuil de ma part, pour luy dire mes intentions, dautant que quand je le fais moy-mesme, nous ne faisons que nous picoter sans rien conclurre. Mais Sigongnes venant tout maintenant d'arriver de sa part vers moy, je le renvoye vers vous et vers elle pour vous dire les mesmes choses dont j'avois chargé la Varenne, dautant que se confiant du tout en luy, elle croye que vous n'advancez rien du vostre, comme elle me l'a quelquesfois voulu persuader. Vous les escouterez donc tous deux, et prendrez le temps à propos pour me rendre les services que vous avez tesmoigné de tant desirer, qui est de terminer les continuelles broüilleries que j'ay à cause d'elle et de ses irresolutions, vous sçavez bien avec qui, car je vous y ay souvent employé. J'affectionne cette affaire et vous prie d'y mettre une fin. Adieu, mon amy.

De Fontaine-bleau, ce mardy à six heures du soir.

HENRY.

*Lettre de M. de Rosny au Roy.*

SIRE,

J'ay receu deux lettres de vostre Majesté, l'une par le sieur de la Varenne le mardy à deux heures apres midy, et l'autre par le sieur de Sigongnes le mercredy suivant à dix heures du matin ; toutes deux d'un mesme stile et pour un mesme sujet, qui est touchant madame de Verneuil, laquelle j'ay aussi-tost essayé d'aller voir pour m'acquitter de ce qui m'est commandé par ces deux lettres ; mais il m'a esté respondu, à la porte de son logis, qu'il estoit impossible de la pouvoir encor voir, dautant que luy estant tombé une défluxion sur les dents, ses grandes douleurs luy estoient bien passées, mais que la jouë luy estoit demeurée si enflée qu'elle ne vouloit pas se monstrier en cet estat ; que dans deux ou trois jours elle esperoit estre guarie, et qu'elle ne manqueroit pas de m'en advertir, comme je ne feray pas aussi de chercher la commodité, afin de pouvoir executer les commandemens de vostre Majesté à son contentement. Ce qu'attendant, je prieray Dieu, Sire, etc.

*Lettre de M. de Rosny au Roy.*

SIRE,

J'escrivis avant hier à vostre Majesté comme je n'avois encore pû voir madame de Verneuil, à cause d'une défluxion qui luy estoit tombée sur les dents et luy avoit enflé le visage, mais que j'esperois rendre ce devoir à vos commandemens dans deux jours, qui est celuy de ce jourd'huy. Pour à quoy satisfaire dès ce matin, j'ay envoyé un gentil-homme vers elle, afin d'apprendre l'heure de sa commodité pour l'aller voir ; mais avant son retour, un des siens m'est venu trouver de sa part pour la mesme chose, tellement que, suivant ce qu'il m'en a dit, je me suis rendu à son logis sur les deux heures apres midy, où nous avons eu plusieurs et bien longs discours.

Mais avant que d'entrer en la deduction de si grand nombre de particularitez toutes importantes, je la supplieray d'avoir agreable que je la fasse ressouvenir de huit autres, lesquelles, à mon advis, fortifieront grandement vostre Majesté en la resolution (digne de vostre vertu et de vostre courage) que messieurs de la Varenne et de Sigongnes m'ont asseuré qu'elle avoit prise, La premiere, de vous souvenir comme un jour, à son retour d'une visite que vostre Majesté estoit allée faire à Coussi, pendant le siege de Laon, elle m'envoya, pour plusieurs affaires d'importance, à Paris, et, entre les autres, pour faire desloger de Paris messieurs le comte d'Auvergne, d'Antragues, sa femme et ses filles, me nommant

tout cela d'un nom plein de diffame. La seconde, de ce que je vous dis, lors que vous m'ordonnastes de preparer tant de carolus pour le payement d'une pie, qu'à mon advis vous ne trouveriez pas au nid. La troisieme, des paroles que vous me tinstes, et de mes reponces, lors que vous me monstrastes une certaine promesse qui a bien fait du bruit depuis. La quatrieme, de ce que vostre Majesté me dit et que je luy respondis, lors qu'un enfant fut mis au monde à coups de tonnerre. La cinquieme, de la genereuse resolution que vous pristés pour empescher que madame de Verneuil ne vous suivist au voyage de Savoye, lors que, pour vous en faire venir l'envie, des gens d'un certain mestier vous firent voir une chanson qui commençoit, *Cruelle departie, mal-heureux jour*. La sixieme, de ce qu'il pleust à vostre Majesté me commander de luy aller dire, trois jours devant l'arrivée de vos deux Majestez à Paris. La septiesme, de tant de plaintes que vous me fistes un jour à l'Arsenac, contre cette femme, des broüilleries où elle enveloppoit vos plus utiles serviteurs, où je n'estois pas oublié. Et la huitiesme, de ce que vous sçavez que ses plus grandes intelligences estoient avec des gens qu'elle sçavoit bien qui ne vous aymoient point, et que vous n'aymiez gueres aussi. Mais sur tout supplié-je vostre Majesté de se souvenir comme dans le jardin de la cœnciergerie, à Fontaine-bleau, je vous protestay, en presence de Bastien et de Bonneuil, que je m'entremettois de telles affaires plutost par une obeysance aveugle que par une disposition volontaire, non pour manquer d'affection à vous rendre service en toutes sortes d'affaires et d'occasions, mais pour penser bien recognoistre celles-cy estre de telle nature, qu'il me seroit bien difficile de vous y donner entier contentement, et, à mon advis, services bien utiles conjointement; et que s'il en reüssissoit quelque chose de bien assaisonnée à l'opinion de tous, il se devra plutost imputer au hazard et à la fortune que non pas à aucune mienne habilité, industrie ou dextérité.

Or, afin de faire mieux juger à vostre Majesté les raisons de mes peines, je luy diray que l'une des plus fortes (au moins ce me semble-il), c'est que quand vostre Majesté m'en parle ou qu'elle m'en escrit, les choses m'y semblent aucunement differentes, et ne les trouve pas moins telles, quand madame de Verneuil m'en parle, m'en escrit, ou m'en fait parler, me semblant que vous aussi bien qu'elle ne me dites pas tout, mais que vous reteniez tousjours quelque chose à dire et à expliquer; ce qui me fait estimer que

si j'estois bien esclaircy et informé au vray de vos intentions de toutes parts, je trouverois peut-estre moyen de concilier tant de contrarietez, ou quelque bon conseil à donner pour les terminer. Et partant, afin d'estre mieux informé de toutes ces choses, et sçavoir de vostre Majesté si j'ay eu assez d'esprit pour penetrer dans le fonds de vos intentions, je vous représenteray tout ce que j'ay pû comprendre, depuis huit ou dix mois, de vos plaintes contre madame de Verneuil, et de ce que vous desirez qu'elle fasse; et puis je feray le semblable pour ce qui la regarde, afin que l'un et l'autre jugiez si j'auray bien compris vos conceptions.

Premierement donc, Sire, ce que j'ay pû comprendre de vos plaintes contre elle, sont: qu'elle parle quelquefois irreveremment de la Reine; qu'elle ne recherche pas assez les moyens de ne luy estre point desagreceable; que, quand elle parle de vos enfans legitimes et des siens, il semble qu'elle les vueille faire tenir pour esgaux; qu'elle a des intelligences en Espagne, par le moyen de son frere et de son pere, que vous sçavez bien y en avoir tousjours eu; que l'on vous a fait voir la coppie d'une lettre, par elle escrite à son frere, où elle parle de sa mere, qui donne occasion de soupçonner qu'elle a de mauvais desseins hors de France, et qu'elle desire d'en sortir; que l'on vous a aussi donné avis certain qu'elle a quantité d'amourettes, et offert de le verifier par lettres escrites de sa main, dont la froideur et la suffisance avec lesquelles elle vit avec vous et avec lesquelles elle vous reçoit depuis quelque temps, vous donnent sujet d'en croire quelque chose; et que toutes ces mines, grimaces, simagrées et fastueux langages dont elle usoit pour faire la repentie, la scrupuleuse et la devote, mais devant vous seulement et nullement devant d'autres que vous sçaviez bien, estoit ce qui vous offensoit le plus, ayant souvent esprouvé qu'en des esprits faits comme le sien, ces subits et prompts changemens de débauches en bigotteries, ne sont que pures hypocrisies, afin de mieux cacher leurs vices, malices et meschans desseins, comme ce furent tels artifices du mareschal de Biron qui vous mirent en plus grande deffiance de luy: qui est tout ce dont il me peut souvenir de vos plaintes contre madame de Verneuil. Et quant aux desirs de vostre Majesté pour sa forme de vivre, je ne m'en souviens point d'autres, sinon que ce que je luy en ay dit par forme de conseil, à sçavoir: qu'elle se devoit resoudre de n'avoir plus nulles intelligences aux pays estrangers, mais sur tout en Espagne; qu'elle ne se laissast plus frequenter à de malicieux esprits qui ne

vous aymoient point, médisoient perpetuellement de vous, et en tenoient ensemble des paroles de gausserie; que si tant estoit qu'elle fust veritablement repentante, zelée et devotieuse, que vous ne la vouliez nullement destourner d'un si louable dessein, pourveu que ce ne fust point par feintise, afin de vous mieux piper, et d'en aymer et cherir d'autres plus que vous, ce que vous ne disiez nullement par jalousie comme elle le publioit, et me l'avoit mesme dit, mais pour ce que c'estoit chose honteuse de voir qu'une femme que vous aviez aimée, de laquelle vous aviez des enfans que vous affectionniez, fist la rencherie et la rusée avec vous, et se prostituast à d'autres, vous le sçachant bien : et partant s'il estoit vray qu'elle eust une vraye devotion et repentance, devoit elle commencer à la tesmoigner, premierement par une vraye humilité envers vous et la Reine, et une requisition de pardon de toutes ses erreurs envers elle, et protestation de luy rendre tout respect et obeysance, de ne tenir plus à l'advenir ces langages de vanité touchant ses enfans, et de ne se laisser plus frequenter en cachettes, plutost la nuit que le jour, par des gens qu'elle sçavoit bien qui ne vous aymoient pas et que vous n'aymiez gueres aussi, moyennant toutes lesquelles observations, je me faisois bien fort d'obtenir de vostre Majesté une permission pour se retirer hors de France, pourveu que ce ne fust point en Espagne.

Sur tous lesquels grands discours, lors que je les luy ay tenus, je n'en pûs tirer autre response, sinon qu'elle me remercioit de mes bons conseils, et qu'il y falloit bien penser avant que de les suivre absolument; tellement que, revenant à vous parler de ce qu'elle m'a dit aussi sur ses plaintes et ses desirs, je diray à vostre Majesté que je n'en ay, non plus que sur mes conseils, pû apprendre autre chose, sinon que vous les sçaviez aussi bien qu'elle mesme, et partant les devois-je apprendre de vous, si je les voulois sçavoir, puis qu'aussi bien sçavoit elle de science, que je n'avois le pouvoir ny mesme la volonté d'y pourvoir à son contentement; et que quant à ses desirs, elle n'en avoit plus nuls autres, quelque creance que vostre Majesté pust avoir au contraire, que d'asseurer la vie, la fortune d'elle, de ses enfans, et de son pere et sa mere, et vous feroit volontiers mesme priere pour son frere, qui ne souffre que pour l'avoir aymée, qu'elle sçavoit bien que la Reine destruiroit, si elle venoit à en avoir le pouvoir, tellement qu'ils ne pouvoient estre delivrez de cette crainte, que par leur retraite hors de la France; mais que neantmoins n'en vouloit-elle

pas sortir pour aller mourir de faim ailleurs, et que, pour éviter toute necessité, ne luy pouviez vous moins donner que cent mille livres de rente, en fonds de terre bien asseurez, qui n'estoit pas trop, veu les belles esperances que malgré elle vous luy aviez autresfois fait prendre sur vos paroles : qui est tout ce que j'ay pû tirer d'elle, en plus de six fois que je l'ay mise sur ces discours, par vostre commandement, depuis quatre ou cinq mois.

A quoy j'adjousteray et diray de plus à vostre Majesté que la mine qu'a faite madame de Verneuil, en me faisant toutes ces plaintes, et qu'elle m'a dit que vous sçaviez bien sans me les dire, et qui, à mon advis, luy tient le plus au cœur, est la reddition de cette belle promesse que je déchiray, et pour laquelle action vous me dites que j'estois une beste, et sur tout la formalité qui a esté tenuë en icelle, dont je ne sçay rien par moy-mesme, dautant que je n'estois pas lors près de vostre Majesté, mais par une lettre que M. de Ville-roy m'en escrivist de sa propre main, en datte du 3 juillet 1604, en ces propres termes : « Je vous diray aussi comme M. d'Antragues rendit hier au Roy cette pretenduë pro-messe (que vous aviez tant contestée) en la « presence de messeigneurs le comte de Soissons « et duc de Montpensier, M. le chancelier, et « les sieurs de Sillery, de la Guelle, de Jeannin, « de Gesvres et de moy, dont a esté dressé un « acte en telle forme que les serviteurs de Sa « Majesté l'ont désiré, pour certifier et recognois-tre que ledit écrit est le vray et seul écrit fait « par Sa Majesté, pour ce sujet, avec des decla-rations qui ont esté jugées propres, tant pour « empescher que l'on n'en puisse avec raison « douter, que pour verifier comme le tout a « passé; de sorte que nous en demeurerons con-tens, comme j'estime que vous serez pour ce « regard, en estant informé plus particuliere-ment. L'on parle maintenant de renvoyer à « messieurs du parlement l'affaire de Morgan, « avec les depositions de M. le comte d'Auvergne « et de M. d'Antragues, pour faire le procez au « premier et le faire servir d'exemple, et pour « faire plus estimer la grace que Sa Majesté a « delibéré faire aux deux autres. »

Or ne pouvant rien imaginer de bon en ce qui se passe en tout cecy, ayant affaire à des esprits des plus malicieux, broüillons, inventifs et artificieux, lesquels, à mon advis, doivent tous avoir le poignard dans le sein et un desir ardent de se vanger, et par consequent vous, occasion de vous en tousjours deffier : et partant c'est donc maintenant, ce me semble-il, à vostre Majesté à me dire si j'ay oublié quelque chose

de ses plaintes ou de ses desirs, et quelle est sa résolution sur tant de diversités d'embarras, desquels vous ne sortirez jamais que par une seule voye que je reserve à vous dire de bouche, une lettre ne m'y semblant pas propre. Surquoy, attendant l'honneur des commandemens de votre Majesté, je prieray le Createur, etc.

*Lettre du Roy à M. de Rosny.*

Mon amy, encor que votre lettre soit bien longue, si n'ay-je pas laissé de la lire par trois fois, lesquelles m'ont fait cognoistre que vous n'avez rien oublié des choses qui peuvent estre venues à votre cognoissance; mais je vous en diray, lors que je vous verray, quelques-unes dont je voy bien que Sigongnes ne vous a pas voulu parler, de crainte de fâcher madame de Verneuil; lequel neantmoins je ne laisseray pas de renvoyer dans deux jours vers elle et vers vous, afin de prendre une finale résolution sur tout cela. Adieu, mon amy.

Ce mardy au soir, à Fontaine-bleau.

*Lettre de M. de Ville-roy à M. de Rosny.*

Monsieur, nous nous trouvons bien empeschez à ce fait du commerce, car nous avons toute occasion de croire que les Espagnols, qui seavent l'incommodité que nous en recevons, en desirent profiter, se confians en nostre impatience naturelle, et en la desobeysance que l'on rend aux commandemens du Roy. D'ailleurs les Anglois ne sont marris de ce mauvais mesnage; et pour moy j'estime que sous main ils le nourriront plutost qu'ils ne nous ayderont à le composer, et qu'ils esperent s'en prevaloir; et de fait l'on nous mande de toutes parts qu'ils enlèvent nos toilles et nos bleds à furie, pour transporter en Espagne, et que cela ruynera toute la navigation françoise. J'advertiray M. de Beaumont de ce que vous m'avez escrit par vostre lettre; mais quand je considere qu'il n'a pû disposer les ambassadeurs d'Espagne et de Flandres à se contenter de la promesse qu'il leur avoit faite de faire lever et descharger les nouvelles daces qui se levent à Calais sur les marchandises qui viennent d'Espagne, je n'ay pas opinion, quand bien les choses ne seroient accrochées qu'à cette difficulté, ce que je ne croy pas, qu'il les contente, y accordant la descharge des trois escus que l'on prend sur le vin d'Espagne qui passe en Flandres; mais j'ay opinion que les Espagnols et les Anglois nous entretiendront d'esperances et de belles paroles sans conclusion, en tirant les choses à la longue pour s'en advantager. Je l'ay représenté au Roy, qui desiré que vous preniez occasion de voir M. le car-

dinal Bufalo, pour luy faire entendre que si nous jettera par force à la guerre, si bien que l'on n'y remédie, afin qu'il l'ecrive au Pape et qu'il le die à l'ambassadeur d'Espagne, Sa Majesté estimant que cette crainte aydera à hâter et avancer cette résolution. Mais je ne suis de l'avis de Sa Majesté; j'estime au contrain qu'ils se hasteront moins d'y pourvoir, et qu'ils feront tout autre jugement de ce discours: le principal seroit de donner ordre que le Roy fust mieux obey qu'il n'est, et d'empescher les Anglois d'enlever nos grains et faire le trait d'Espagne à nos despens. J'ay cy-devant esté plusieurs fois à M. de Beaumont de prier de declarer au Roy d'Angleterre et à ceux de son conseil, que s'il faisoit la paix avec l'Espagne et Flandres sans nous mettre d'accord avec eux pour le commerce, que nous serions contrain de faire des reglemens pour empescher que les Anglois, ses sujets, fissent leur profit, à nostre dommage, de ce mauvais mesnage; et me semble que c'est aujourd'huy le poinct auquel il faut pourvoir, afin de ne nous attendre de tout comme nous faisons, à l'entremise du Pape et du Roy d'Angleterre, ny aux demonstrations que font les Espagnols de vouloir se reconcilier et accommoder avec nous: car c'est s'abandonner bon compte, ne voulant pas nous départir de l'amitié et assistance hollandoise, comme nous ne voulons ny ne devons faire, ny aussi nous resoudre à nous ressentir plus avant des offices que nous recevons desdits Espagnols et de la haine qu'ils nous portent. Toutesfois je ne laisseray de faire les despesches necessaires en Angleterre, Espagne et Rome, pour poursuivre le susdit accord autant qu'il sera possible de le faire en conservant la dignité de Sa Majesté. Cependant je dis qu'il seroit necessaire d'envoyer quelques marchands et officiers de Normandie, Bretagne et Poictou, et mesmes de Bourdeaux et Bayonne, pour adviser à mieux faire obeyr le Roy, et empescher que les Anglois ne fassent le trafic à nostre prejudice, en attendant que nous prenions de plus fortes et courageuses résolutions: il vous plaira doncques y adviser et faire pourvoir comme vous jugerez estre possible le mieux. J'ay dit au Roy l'avis que vous m'avez donné de l'adjudication des fermes du sel des gabelles de France, à la somme de quatre millions six cens vingt un mil livres, dont il a esté tres-aise, comme je serai toujours de vous servir.

De Fontaine-bleau, ce 22 septembre 1604.

DE NEUF-VILLE.

*Responce de M. de Rosny à la lettre cy-dessus.*

Monsieur, il n'y a point de doute que cet

affaire du commerce ne se trouve remplie de difficultez ; mais tout ce que j'en prevoy, est qu'elles iront tousjours en augmentant ; et en arrivera de mesmes en toutes nos grandes affaires, tant que nous les manierons, traiterons et resoudrons negligemment et par maniere d'acquit, comme nous faisons ; et encore le pis est qu'ayant deliberé quelque chose de bon, l'exécution en est tellement traversée par les particuliers, et si peu appuyée et poursuivie par ceux qui ont l'autorité, qu'il n'en peut arriver aucun fruit digne de l'esperance que l'on en avoit conçuë. En ces choses tant importantes, il faut prendre des resolutions bien considerées et fermement poursuivies, autrement je n'en prevoy rien de bon. Ce n'est pas seulement aux affaires de dehors où il faut mettre la main, mais à celles de dedans le royaume, où tout le monde crie et personne n'écoute. Je viens encore de recevoir des lettres des tresoriers de toutes les generalitez, et vous en envoie une pour eschantillon, afin que vous jugiez du reste. Je ne doute nullement que les Espagnols et les Anglois ne soyent bien-aises de nous traverser, afin de tenir les choses comme en égalité de balance entre ces trois grands princes ; car si l'un d'eux, comme il a tousjours esté estimé, avoit toutes choses à souhait, il feroit bien du mal aux autres. Chacun nous redoute maintenant, et cherchera de traverser nostre prosperité ; mais si nous voulions bien user de la fortune et des occasions que Dieu nous envoie et ne rien faire à demy, tous leurs essais seroient vains, et nostre vertu, nostre courage et nostre experience estant employez comme il faut, nous surmonterions facilement toutes difficultez. Je verray le nonce, et ne recognoistra nullement que ce soit à dessein, et feray en sorte qu'il ne se pourra prevaloir de ce que je luy diray, ny juger par là que nous ayons desir ny besoin d'avoir nouveau reglement sur cette affaire ; ains, au contraire, qu'il nous est fort supportable si les choses continuent. Il nous faudra garder mesme severité aux Anglois qu'aux Espagnols, ou autrement ils profiteront entierement de nostre dommage ; et me semble qu'il seroit à propos que nostre ambassadeur en die un mot au Roy d'Angleterre, et le fist parler clair et declarer son intention sur l'exécution des articles promis tant à la France qu'à l'Espagne, où il se rencontre non seulement de la diversité, mais aussi de la contrariété, et l'un desquels ne se peut observer sans contrevenir à l'autre : je n'ay besoin de les specifier, d'autant que les ayant tous deux, vous le pourrez facilement juger vous mesme. Il ne me semble point necessaire de parler à marchands ny officiers pour sçavoir quel

ordre nous y devons mettre, car la chose n'est pas fort difficile, moyennant qu'elle soit exécutée severement sans exception de personne ; et ne se doit user de plus grande indulgence du costé de Lyon que des autres lieux, car depuis qu'un a passé par dessus les loix, de degré en degré, chacun presume avoir mesme faveur et mesmes privileges : nous sommes au pays des consequences. Quant à moy je n'y sçaurois pourvoir seul, et icy chacun est tout desgouté d'en dire son avis, à cause de la façon dont l'on y procede ; aussi cette affaire ne peut estre concluë que par le Roy seul, et apres avoir bien considéré et balancé toutes les commoditez et incommoditez de part et d'autre, afin de ne nous en departir apres legerement pour la moindre difficulté et interest particulier. Voila ce que je puis respondre à vostre lettre plaine de plaintes et de craintes avec raison. Sur ce, je vous baise les mains, etc.

*Lettre de la main du Roy à M. de Rosny.*

Mon amy, pour response à celle que vous m'avez escrite sur ce que j'avois donné charge au sieur de Vic de vous faire entendre de ma part sur les deffences du commerce d'Espagne, je vous diray que mon avis est que vous assembliez messieurs le connestable, chancelier, le commandeur de Chates, ledit sieur de Vic et vous ; et que là ledit sieur de Vic propose ce qu'il a à dire : surquoy vous entendrez ses raisons et les peserez. Mais mon avis est que l'on ne doit lever lesdites deffences, mais par sous-main faire entendre aux gouverneurs qu'ils permettent aux navires d'y aller ; d'autant que de lever lesdites deffences, les Espagnols ne m'ayans fait aucune raison, il sembleroit que je le fisse par crainte d'eux, ou quand on le souffrira aux marchands par tollerance, nous serons tousjours sur nos pieds de faire republier lesdites deffences et les faire executer, et cela nous fera plus d'honneur qu'autrement, qui est ce à quoy nous devons autant adviser avec ces gens-là, et cela nous apportera plus de commodité que d'en user d'une autre façon. Sur ce, Dieu vous ait en sa sainte et digne garde.

HENRY.

Durant tous ces embarrasemens pour le commerce, le connestable de Castille passant par la Cour, s'en allant en Flandre et en Angleterre, il en fut parlé avec luy, et contesta tant de choses que rien ne fut lors conclu. Le roy d'Angleterre se voulut rendre arbitre de ce differend et caution des promesses qui interviendroient sur iceluy entre les roys de France et d'Espagne ; mais le Roy l'en remercia, ne voulant pas qu'il s'en meslast en cette qualité, mais seulement

comme de luy mesme et faisant office d'amy commun. Le Pape s'en mesla aussi avec beaucoup d'affection, et manda au cardinal Bufalo son nonce d'y apporter tout ce qu'il pourroit, craignant que ce differend n'engendrast la guerre entre les deux roys, laquelle par vos paroles vous tesmoigniez de desirer. Quelque temps apres, le connestable de Castille repassant encor à la Cour pour s'en retourner en Espagne, par son advis et à la sollicitation du cardinal Bufalo, il fut nommé des deputez de part et d'autre pour en traiter; mais tout cela traissant encor en extrême longueur, enfin, à l'instance et priere du cardinal Bufalo, le Roy vous donna charge d'en traiter seul avec luy et ceux qu'il jugeroit à propos : à quoy il fist condescendre dom Baltazard de Stuniga, ambassadeur d'Espagne, et Alexandre Rovidius, senateur de Milan, lesquels s'estans trouvez à son logis par deux fois, à la troisieme que vous y vinstes, vous maniestes tout cela si dextrement, trouvastes les esprits et les matieres si bien disposées, et leur donnastes de telles apprehensions de guerre, à cause des grandes demonstrations que vous faisiez de la desirer (leur demandant à tous propos à quoy ils estimeroient donc que vous puissiez conseiller le Roy d'employer trente millions qu'il avoit contant, si grand nombre d'experimenter capitaines et vaillans soldats dont son royaume abondoit, et tant d'armes, artileries et munitions qu'il avoit assemblées, si ce n'estoit à faire la guerre à ceux qui luy en donneroient sujet), que peu de jours apres vous conclustes de signer certains articles projettez en Angleterre pour cettere liberté de commerce. Dequoy ayant aussitost donné advis au Roy, il fit response à vostre lettre en datte du 26 septembre, estant telle que s'ensuit :

*Lettre de la main du Roy à M. de Rosny.*

Mon cousin, ce soir tout tard j'ay receu vostre lettre, laquelle ayant leuë et consideré les raisons contenuës en icelle, je trouve fort bon ce que vous avez traité avec M. le cardinal de Bufalo, et seray tres-aise qu'à mon arrivée à Paris, qui sera mardy au soir, Dieu aydant, je trouve cette affaire conclüe. Quant au present, je m'en remets à ce que vous adviserez pour le mieux pour mon service. Bon soir, mon amy.

Ce dimanche 26 septembre, à Fontaine-bleau, à 9 heures du soir.

HENRY.

La signature de ces articles ainsi resoluë, vous fustes adverty que messieurs de Ville-roy et de Sillery vous portolent une grande envie, de ce qu'en si peu de temps vous aviez terminé une affaire où ils avoient esté employez si long-temps

sans y rien avancer, et par consequent qu'ils seroient gens, comme c'estoit bien leur bonne coustume, pour y trouver quelque chose à blâmer; tellement que, pour éviter ce mauvais office, vous envoyastes l'aisné Arnault pour luy porter lesdits articles, et le prier de vous en mander son advis : à quoy, sans les vouloir lire, il vous manda que l'affaire estoit en trop bonne main pour y avoir rien à redire; et partant luy sembloit-il que vous l'ayant entreprise seul, qu'il estoit raisonnable que vous aussi en eussiez seul ou l'honneur ou la correction à y apporter. De laquelle response, vous n'estant pas content, vous luy renvoyastes ledit Arnault le prier de venir signer lesdits articles avec vous, et qu'à son refus vous luy aviez donné charge de s'en aller trouver le Roy, les luy porter, et luy dire que les difficultez qu'il faisoit vous avoient donné sujet de remettre le cardinal Bufalo, l'ambassadeur Stuniga et le senateur Rovidius à signer les articles dans deux jours : ce que luy considerant, et que s'il arrivoit cependant quelque nouvelle accroche et difficulté, elle luy seroit imputée par le Roy, il se resolut de venir aussitost au logis du cardinal Bufalo, où le tout fut signé de vous cinq; et aussitost vous en envoyastes la copie au Roy, avec la lettre que vous luy escriviez de ce qui s'estoit passé; surquoy il vous escrivit la lettre qui s'ensuit :

*Lettre du Roy à M. de Rosny.*

Mon cousin, depuis mon autre lettre écrite, j'ai receu la vostre par Arnault, avec le translât des articles pour le commerce que vous avez arrestez et signez avec le cardinal, l'ambassadeur d'Espagne et le senateur de Milan, dont j'ay esté tres-aise et content pour l'incertitude en laquelle nous estions de ce fait. Je tesmoigneray au cardinal de Bufalo le gré que je luy sçay de la peine qu'il a prise, et de l'affection avec laquelle il a embrassé et favorisé ce qu'il a estimé appartenir à ma dignité et au bien de mes affaires. Je n'oublieray pareillement de m'en louer par lettre à Sa Sainteté, en la remerciant du bon devoir qu'y a fait ledit cardinal, suivant vostre bon advis : cependant vous m'avez fait plaisir de m'avoir envoyé la croix de diamans que ledit Arnault m'a présentée, afin de la donner de ma main audit cardinal. J'ay delibéré aussi de le faire disner demain avec moy, si un fascheux mal de dents qui me tourmente me le permet. Au reste, le capitaine Commuin est arrivé ce soir en ce lieu, qui m'a confirmé par son rapport ce que je vous escrivi par mon autre lettre de la disposition qu'a le sieur de la Trimoüille de venir par deçà, ainsi qu'il vous dira

plus particulièrement dedans deux jours que je le vous enverray apres l'avoir ouy tout au long. Je prie Dieu, mon cousin, qu'il vous ait en sa sainte et digne garde.

Escrit à Fontaine-bleau, le 13 octobre 1604.

HENRY.

Et plus bas,

DE NEUF-VILLE.

*Lettre du Roy à M. de Rosny.*

Mon cousin, vous sçavez combien il importe à mon service de pourvoir l'avocat Boucault de quelque office au pays de Languedoc, qui luy donne autorité et moyen de continuer à m'y faire le service qu'il a acheminé et commencé assez heureusement. C'est pourquoy ayant entendu que celui de president en la cour des aydes de Montpellier est vacquant, je desire qu'il tombe en ses mains, et que vous l'en fassiez pourvoir par preference à tous autres. Ses services passez et l'esperance que j'ay de ceux qu'il me fera à l'advenir, meritent qu'il soit gratifié dudit office sans payer finance: de sorte que j'auray agreable qu'il recoive de moy ce bien-fait, si c'est chose qui se puisse faire sans consequence prejudiciable à mes affaires; sinon, faites que ledit office luy soit delivré en payant finance modérée, et je feray dépescher apres un brevet de ladite moderation sur l'avis que vous m'en donnerez. Nous devons veiller autant et plus diligemment que jamais sur les actions des factieux de la religion pretendüe reformée, afin de renverser leurs artifices avec lesquels ils s'efforcent d'esmouvoir et troubler mes bons et fideles sujets de ladite religion pour s'en prevaloir en leurs desseins. J'entends que le sieur de la Trimouille ne parle plus de me venir trouver, comme il vous avoit promis. Nous voyons aussi que le duc de Bouillon s'estudie plus par sa conduite à justifier ses actions qu'à rechercher et meriter ma bonne grace, et n'avons aucunes nouvelles de celui que nous sçavons estre passé par Auvergne pour l'aller trouver: d'ailleurs nous avons avis qu'il se fait des menées et pratiques dans aucunes provinces en faveur dudit duc; et encores que je n'adjouste foy entierement aux avis qui m'en sont donnez, neantmoins j'estime que nous ferons tres-bien d'establir et autoriser des hommes aux provinces plus esloignées, qui soient capables et propres pour s'opposer ausdites menées, en esclaireissant et informant mesdits sujets de la sincerité de mes intentions à leur repos et conservation, comme peut faire audit pays de Languedoc ledit Boucault; au moyen dequoy je vous prie l'assister en cette occasion, et me donner avis de ce que vous en aurez fait. Priant Dieu, mon cou-

sin, qu'il vous ait en sa sainte et digne garde.

Escrit à Fontaine-bleau, le treiziesme jour d'octobre 1604.

HENRY.

Et plus bas,

DE NEUF-VILLE.

Vous receustes encor deux lettres du Roy, touchant ce restablissement du commerce, l'une contresignée de Neuf-ville, et l'autre Forget, lesquelles nous avons encor icy inserées pour faire voir le soin que Sa Majesté avoit de son peuple, desquelles deux lettres la teneur estant telle que s'ensuit:

*Lettre du Roy à M. de Rosny.*

Mon cousin, je suis bien aise que vous ayez conclud et arresté avec le cardinal Bufalo, l'ambassadeur d'Espagne et le senateur de Milan, le traité dont je vous avois donné charge pour le restablissement du commerce. Je suis bien de vostre avis qu'il est necessaire d'avoir la ratification d'Espagne avant que faire la publication; mais cependant, parce que je sçay que c'est chose qui est fort désirée de mes sujets, vous leur ferez entendre, aux lieux que vous jugerez le plus necessaire, que, dès à present, je leur accorde la permission de faire transporter des bleds, sans les assujettir à prendre aucuns passe-ports ny autre seureté que les avis que vous leur donnerez de ma volonté, reservant à leur donner la liberté entiere des autres marchandises, lors que, la ratification estant venuë d'Espagne, je vous ordonneray de faire faire la publication generale dudit traité. Et n'estant la presente à autre fin, je prie Dieu, mon cousin, vous avoir en sa sainte garde.

Escrit à Fontaine-bleau, le 17 octobre 1604.

HENRY.

Et plus bas,

DE NEUF-VILLE.

*Lettre du Roy à M. de Rosny.*

Mon cousin, vous savez mieux que nul autre, puis que c'est vous qui l'avez fait, comme le traité pour la liberté du commerce ayant esté conclu et resolu, la publication n'en a esté différée que pour attendre la ratification qui en doit venir d'Espagne. Mais cependant, parce que je sçay que c'est chose qui est fort désirée de mes sujets et qui leur est importante et commode, j'ay estimé que le retardement de la publication ne devoit point retarder de leur donner cette consolation, de leur faire savoir ce qui s'en est passé, et encores de leur permettre, dès maintenant, de le pouvoir executer, pourveu que ce soit pour les bleds seulement. Pour cette occasion vous leur ferez sçavoir ce que dessus, et comme, de cette heure, la permission leur est par moy accordée pour le trans-



comme de luy mesme et faisant office d'amy commun. Le Pape s'en mesla aussi avec beaucoup d'affection, et manda au cardinal Bufalo son nonce d'y apporter tout ce qu'il pourroit, craignant que ce differend n'engendrast la guerre entre les deux roys, laquelle par vos paroles vous tesmoigniez de desirer. Quelque temps apres, le connestable de Castille repassant encor à la Cour pour s'en retourner en Espagne, par son advis et à la sollicitation du cardinal Bufalo, il fut nommé des deputez de part et d'autre pour en traiter; mais tout cela traissant encor en extrême longueur, enfin, à l'instance et priere du cardinal Bufalo, le Roy vous donna charge d'en traiter seul avec luy et ceux qu'il jugeroit à propos : à quoy il fist condescendre dom Baltazard de Stuniga, ambassadeur d'Espagne, et Alexandre Rovidius, senateur de Milan, lesquels s'estans trouvez à son logis par deux fois, à la troisieme que vous y vinstes, vous maniestes tout cela si dextrement, trouvastes les esprits et les matieres si bien disposées, et leur donnastes de telles apprehensions de guerre, à cause des grandes demonstrations que vous faisiez de la desirer (leur demandant à tous propos à quoy ils estimeroient donc que vous puissiez conseiller le Roy d'employer trente millions qu'il avoit contant, si grand nombre d'experimenter capitaines et vaillans soldats dont son royaume abondoit, et tant d'armes, artileries et munitions qu'il avoit assemblées, si ce n'estoit à faire la guerre à ceux qui luy en donneroient sujet), que peu de jours apres vous conclustes de signer certains articles projettez en Angleterre pour cettere liberté de commerce. Dequoy ayant aussitost donné advis au Roy, il fit response à vostre lettre en datte du 26 septembre, estant telle que s'ensuit :

*Lettre de la main du Roy à M. de Rosny.*

Mon cousin, ce soir tout tard j'ay receu vostre lettre, laquelle ayant leuë et considéré les raisons contenuës en icelle, je trouve fort bon ce que vous avez traité avec M. le cardinal de Bufalo, et seray tres-aise qu'à mon arrivée à Paris, qui sera mardy au soir, Dieu aydant, je trouve cette affaire conclüe. Quant au present, je m'en remets à ce que vous adviserez pour le mieux pour mon service. Bon soir, mon amy.

Ce dimanche 26 septembre, à Fontaine-bleau, à 9 heures du soir.

HENRY.

La signature de ces articles ainsi resoluë, vous fustes adverty que messieurs de Ville-roy et de Sillery vous portolent une grande envie, de ce qu'en si peu de temps vous aviez terminé une affaire où ils avoient esté employez si long-temps

sans y rien avancer, et par consequent qu'ils seroient gens, comme c'estoit bien leur bonne coustume, pour y trouver quelque chose à blâmer; tellement que, pour éviter ce mauvais office, vous envoyastes l'aisné Arnault pour luy porter lesdits articles, et le prier de vous en mander son advis : à quoy, sans les vouloir lire, il vous manda que l'affaire estoit en trop bonne main pour y avoir rien à redire; et partant luy sembloit-il que vous l'ayant entreprise seul, qu'il estoit raisonnable que vous aussi en eussiez seul ou l'honneur ou la correction à y apporter. De laquelle response, vous n'estant pas content, vous luy renvoyastes ledit Arnault le prier de venir signer lesdits articles avec vous, et qu'à son refus vous luy aviez donné charge de s'en aller trouver le Roy, les luy porter, et luy dire que les difficultez qu'il faisoit vous avoient donné sujet de remettre le cardinal Bufalo, l'ambassadeur Stuniga et le senateur Rovidius à signer les articles dans deux jours : ce que luy considerant, et que s'il arrivoit cependant quelque nouvelle accroche et difficulté, elle luy seroit imputée par le Roy, il se resolut de venir aussitost au logis du cardinal Bufalo, où le tout fut signé de vous cinq; et aussitost vous en envoyastes la copie au Roy, avec la lettre que vous luy escriviez de ce qui s'estoit passé; surquoy il vous escrivit la lettre qui s'ensuit :

*Lettre du Roy à M. de Rosny.*

Mon cousin, depuis mon autre lettre escrite, j'ai receu la vostre par Arnault, avec le translateur des articles pour le commerce que vous avez arrestez et signez avec le cardinal, l'ambassadeur d'Espagne et le senateur de Milan, dont j'ay esté tres-aise et content pour l'incertitude en laquelle nous estions de ce fait. Je tesmoigneray au cardinal de Bufalo le gré que je luy sçay de la peine qu'il a prise, et de l'affection avec laquelle il a embrassé et favorisé ce qu'il a estimé appartenir à ma dignité et au bien de mes affaires. Je n'oublieray pareillement de m'en louer par lettre à Sa Sainteté, en la remerciant du bon devoir qu'y a fait ledit cardinal, suivant vostre bon advis : cependant vous m'avez fait plaisir de m'avoir envoyé la croix de diamans que ledit Arnault m'a présentée, afin de la donner de ma main audit cardinal. J'ay delibéré aussi de le faire disner demain avec moy, si un fascheux mal de dents qui me tourmente me le permet. Au reste, le capitaine Commis est arrivé ce soir en ce lieu, qui m'a confirmé par son rapport ce que je vous escrivi par mon autre lettre de la disposition qu'a le sieur de la Trimouille de venir par deçà, ainsi qu'il vous dira

plus particulièrement dedans deux jours que je le vous enverray apres l'avoir ouy tout au long. Je prie Dieu, mon cousin, qu'il vous ait en sa sainte et digne garde.

Escrit à Fontaine-bleau, le 13 octobre 1604.

HENRY.

Et plus bas,

DE NEUF-VILLE.

*Lettre du Roy à M. de Rosny.*

Mon cousin, vous sçavez combien il importe à mon service de pourvoir l'avocat Boucault de quelque office au pays de Languedoc, qui luy donne autorité et moyen de continuer à m'y faire le service qu'il a acheminé et commencé assez heureusement. C'est pourquoy ayant entendu que celui de president en la cour des aydes de Montpellier est vacquant, je desire qu'il tombe en ses mains, et que vous l'en fassiez pourvoir par preference à tous autres. Ses services passez et l'esperance que j'ay de ceux qu'il me fera à l'advenir, meritent qu'il soit gratifié dudit office sans payer finance: de sorte que j'auray agreable qu'il recoive de moy ce bien-fait, si c'est chose qui se puisse faire sans consequence prejudiciable à mes affaires; sinon, faites que ledit office luy soit delivré en payant finance modérée, et je feray dépescher apres un brevet de ladite moderation sur l'avis que vous m'en donnerez. Nous devons veiller autant et plus diligemment que jamais sur les actions des factieux de la religion pretendue reformée, afin de renverser leurs artifices avec lesquels ils s'efforcent d'esmouvoir et troubler mes bons et fideles sujets de ladite religion pour s'en prévaloir en leurs desseins. J'entends que le sieur de la Trimouille ne parle plus de me venir trouver, comme il vous avoit promis. Nous voyons aussi que le duc de Bouillon s'estudie plus par sa conduite à justifier ses actions qu'à rechercher et meriter ma bonne grace, et n'avons aucunes nouvelles de celui que nous sçavons estre passé par Auvergne pour l'aller trouver: d'ailleurs nous avons advis qu'il se fait des menées et pratiques dans aucunes provinces en faveur dudit duc; et encores que je n'ajoute foy entierement aux advis qui m'en sont donnez, neantmoins j'estime que nous ferons tres-bien d'establir et autoriser des hommes aux provinces plus esloignées, qui soient capables et propres pour s'opposer ausdites menées, en esclaircissant et informant mesdits sujets de la sincerité de mes intentions à leur repos et conservation, comme peut faire audit pays de Languedoc ledit Boucault; au moyen dequoy je vous prie l'assister en cette occasion, et me donner advis de ce que vous en aurez fait. Priant Dieu, mon cou-

sin, qu'il vous ait en sa sainte et digne garde.

Escrit à Fontaine-bleau, le treiziesme jour d'octobre 1604.

HENRY.

Et plus bas,

DE NEUF-VILLE.

Vous receustes encor deux lettres du Roy, touchant ce restablissement du commerce, l'une contresignée de Neuf-ville, et l'autre Forget, lesquelles nous avons encor icy inserées pour faire voir le soin que Sa Majesté avoit de son peuple, desquelles deux lettres la teneur estant telle que s'ensuit:

*Lettre du Roy à M. de Rosny.*

Mon cousin, je suis bien aise que vous ayez conclud et arresté avec le cardinal Bufalo, l'ambassadeur d'Espagne et le senateur de Milan, le traité dont je vous avois donné charge pour le restablissement du commerce. Je suis bien de vostre avis qu'il est necessaire d'avoir la ratification d'Espagne avant que faire la publication; mais cependant, parce que je sçay que c'est chose qui est fort désirée de mes sujets, vous leur ferez entendre, aux lieux que vous jugerez le plus necessaire, que, dès à present, je leur accorde la permission de faire transporter des bleds, sans les assujettir à prendre aucuns passe-ports ny autre seureté que les advis que vous leur donnerez de ma volonté, reservant à leur donner la liberté entiere des autres marchandises, lors que, la ratification estant venuë d'Espagne, je vous ordonneray de faire faire la publication generale dudit traité. Et n'estant la presente à autre fin, je prie Dieu, mon cousin, vous avoir en sa sainte garde.

Escrit à Fontaine-bleau, le 17 octobre 1604.

HENRY.

Et plus bas,

DE NEUF-VILLE.

*Lettre du Roy à M. de Rosny.*

Mon cousin, vous savez mieux que nul autre, puis que c'est vous qui l'avez fait, comme le traité pour la liberté du commerce ayant esté conclu et resolu, la publication n'en a esté différée que pour attendre la ratification qui en doit venir d'Espagne. Mais cependant, parce que je sçay que c'est chose qui est fort désirée de mes sujets et qui leur est importante et commode, j'ay estimé que le retardement de la publication ne devoit point retarder de leur donner cette consolation, de leur faire savoir ce qui s'en est passé, et encores de leur permettre, dès maintenant, de le pouvoir executer, pourveu que ce soit pour les bleds seulement. Pour cette occasion vous leur ferez sçavoir ce que dessus, et comme, de cette heure, la permission leur est par moy accordée pour le trans-

port desdits bleds, sans les abstraire à prendre aucuns passe-ports ny autre seureté que cette declaration que vous leur ferez de ma volonté, leur ordonnant neantmoins de differer le transport des autres denrées jusques apres que ladite publication aura esté faite. Et n'estant la presente à autre fin, je prie Dieu, mon cousin, vous avoir en sa sainte garde.

Escrit à Fontaine-bleau, ce 17 d'octobre 1604.

HENRY.

Et plus bas,

FORGET.

A la suite desquelles lettres nous avons estimé à propos d'insérer les articles du traité que vous fistes touchant le restablissement du commerce. Nous avions une fois eu fantaisie de ne transcrire point tout au long ces articles, d'autant qu'ils ont esté autresfois imprimez par tout: c'est pourquoy nous avons pris dessein de n'en faire qu'un abrégé, comme de simples remarques, car nous abregeons, comme vous le cognoistrez, le plus que nous pouvons, tous nos discours: mais ayans depuis recogneu que c'estoit un original, et iceluy signé d'un secretaire d'Estat de France, nous avons donc jugé, monseigneur, qu'il seroit plus à propos d'insérer tous les articles entiers, plutost que d'estre abregez; le tout en la maniere que s'ensuit:

Comme par la persuasion et admonition du Roy d'Angleterre, le sieur Christophle de Harlay, comte de Beaumont, ambassadeur du Roy tres-chrestien en Angleterre, et le sieur Jean de Taxis, comte de Ville-mediave, ambassadeur du Roy catholique au pays d'Angleterre; les sieurs comte d'Aremberg, president Richardot et Louys Vroreylzen, ambassadeurs des archiducs d'Austriche et Bourgongne; et ayant souvent traité et conféré des moyens de faire cesser les differends survenus, à cause de la publication des placards, ils ayent aussi recogneu et trouvé bon que cét affaire se pouvoit composer selon les articles cy-apres inserez: tellement qu'en ayant lesdits ambassadeurs dudit Roy catholique et des archiducs, communiqué au connestable de Castille, il auroit esté de mesme advis, remettant neantmoins le tout au bon plaisir et volonté desdits roys et princes: mais d'autant qu'à cause du partement d'Angleterre dudit connestable, et pour aucuns empeschemens, lesdits articles n'ont pû estre signez par lesdits ambassadeurs, le cardinal de Bufalo qui, au nom de nostre tres-saint pere le pape Clement VIII, a embrassé et procuré, avec beaucoup d'affection, la paix entre lesdits princes et le restablissement du commerce, y ayant apporté tout ce qui dependoit de luy, a insisté, afin d'éviter audits perils et dommages que ce

retardement pouvoit produire, que les sieurs marquis de Rosny et de Sillery, de la part dudit Roy tres-chrestien, l'ambassadeur dudit Roy catholique, residant à Paris, et le senateur Alexandre Rovidius, qui a esté present audit traité en Angleterre, au lieu desdits ambassadeurs, voulussent signer lesdits articles; et d'autant qu'il est à propos qu'il apparaisse de ce qui a esté fait en Angleterre, à la persuasion dudit sieur Roy, sous le bon plaisir toutesfois et consentement desdits Roys et princes, lesdits sieurs marquis de Rosny, grand maistre et capitaine general de l'artillerie de France, et de Sillery, conseiller au conseil d'Estat dudit sieur Roy tres-chrestien, ont signé lesdits articles conclus et arreztez par lesdits sieurs ambassadeurs, en foi et tesmoignage dudit traité: remettant, neantmoins, le tout au bon plaisir et volonté desdits Roys et princes.

*Ensuit le traité fait en Angleterre sur la restauration du commerce.*

Il a esté arrêté que, de part et d'autre, et en mesme jour, seront ostez et levez par lesdits Roys et archiducs, les placards publiez pour l'imposition des trente pour cent et interdiction du commerce.

*Item*, a esté convenu que le dit sieur Roy tres-chrestien deffendra par edit public, incontinent apres la publication des presents articles, que aucuns de ses sujets, vassaux ou regnicolles, n'enlevent ou transportent directement ou indirectement, en quelque sorte et maniere que ce soit, en son nom ou celuy d'autrui, et ne preste son nom, ny aucun vaisseau, navire ou chariot, pour porter ou conduire navires, marchandises, manufactures ou autres choses, des provinces de Hollande et Zelande, en Espagne ou autres royaumes et seigneuries desdits roy d'Espagne et archiducs, et ne charge en ses vaisseaux, pour transporter audit pays, aucun marchand hollandois et zelandois, sous l'indignation de Sa Majesté et autres peines portées par ses ordonnances contre les infracteurs d'icelles.

Et afin d'empescher les fraudes qui se pourroient ensuivre, à cause de la ressemblance des marchandises, il a esté arrêté, par le present article, que les marchandises de France qui se transporteront ou conduiront aux royaumes et pays desdits Roy catholique et archiducs, seront enregistrees et seellées du sceau de la ville d'où elles seront enlevées, et ainsi enregistrees et marquées, seront tenuës et reputées pour marchandises françoises, et comme telles approuvées et admises, sauf à prouver la fraude, sans retarder ny empescher toutesfois le cours des marchandises et val-

seaux ; et quant ausdites marchandises quine seront registrées et marquées, elles seront confisquées et déclarées de bonne prise : semblablement aussi tous Hollandois et Zelandois qui seront trouvez dans lesdits navires, pourront estre pris et arrestez.

*Item*, a esté accordé que pour le regard des marchandises que les marchands françois acheteront en Espagne et autres pays dudit Roy catholique, et qu'ils transporteront dans leurs propres navires ou autres louiez et empruntez pour leur usage, exceptez toutesfois les navires hollandois et zelandois (comme il est dit cy-dessus), ne payeront pour ladite imposition de trente pour cent, pourveu qu'ils les conduisent audit pays dudit Roy tres-chrestien, ou ausdits ports de l'obeissance desdits archiducs ou autres lieux et endroits non deffendus par le placard sur ce fait. Et afin d'éviter à toutes fraudes et que lesdites marchandises ne soient transportées ailleurs, et specialement en Hollande et Zelande, a esté resolu que lesdits marchands, au mesme temps qu'ils enverront leurs navires en Espagne ou autres royaumes et seigneuries de l'obeissance desdits Roy catholique et archiducs, s'obligeront, par devant le magistrat du lieu d'où lesdites marchandises seront enlevées, de payer ladite imposition de trente pour cent, en cas qu'ils les transportent en autres lieux, et de rapporter, dans un an, certificat du juge des lieux où lesdites marchandises auront esté deschargées, soit au royaume de France ou aux ports et havres desdits archiducs, ou autres non deffendus par ledit placard, lequel certificat estant rapporté, lesdites obligations sur ce faites seront rendues et demeureront nulles.

Il est aussi accordé que le Roy tres-chrestien, incontinent apres la publication du present accord, deffendra qu'aucun ne transporte des marchandises d'Espagne ou d'autres pays dudit Roy catholique, ailleurs qu'en sesdits Royaumes et esdits ports et havres de Flandre, et lieux ci-dessus specifiez, ou autres non deffendus par ledit placard, à peine de confiscation desdites marchandises au profit dudit Roy tres-chrestien, dont la moitié ou la vailleu appartiendra au denonciateur, déduction préalablement faite dudit droit de trente pour cent, lequel sera payé aux commissaires à ce deputez par ledit Roy catholique, foy estant adjoustée aux preuves legitimelement receuës en Espagne et envoyées en France en forme authentique, sauf les exceptions et defences contre lesdites provinces.

De mesme a esté accordé qu'aucun magistrat desdits lieux és villes desdits royaumes qui baillera certificat de la descharge desdits navires ou

de l'enregistrement des marchandises, n'y commettra aucune fraude, à peine d'encourir l'indignation de Sa Majesté, d'estre privé de son office, et d'autre plus grieve punition si elle yeschet.

Et parce que l'intention desdits princes est de procurer que le commerce d'entre leurs sujets leur apporte plus de commodité et utilité, ils donneront ordre, autant qu'en eux sera, que les chemins soient ouverts à l'entrée et sortie de leurs ports, royaumes et seigneuries, afin que leursdits sujets puissent plus librement aller et venir avec leurs marchandises.

Et pour le regard de la revocation des daces imposées à Calais, depuis le traité de Vervins, sur les marchandises qui sont transportées d'Espagne en Flandres, et de Flandres en Espagne, cet article ayant desja esté arresté à l'instance dudit cardinal, au nom de sadite Saincteté, il sera executé selon sa forme et teneur.

Tous les articles cy-dessus specifiez seront reciproquement publiez avec ce qui y est contenu, et en sera la ratification desdits princes sollicitée, afin que la publication s'en fasse en mesme jour de part et d'autre, quarante jours apres la date des presentes.

Fait le douzième jour d'octobre 1604.

MAXIMILIAN DE BETHUNE, N. BRUSLARD, DE  
SILLERY, DON BALTAZAR DE GUNIGA,  
ALEXANDRE ROVIDIUS.

*Et plus bas est escrit,*

Veu les articles cy-dessus, son excellencé est de mesme advis sous l'approbation cy-dessus. Le mesme an, et le 16 du mesme mois, à Arras, signé dudit connestable, avec un paragraphe.

*Collation a esté faite à l'original desdits articles.* FORGET.

Quelques jours apres, toutes ces affaires du commerce accommodées comme il a esté dit au precedent chapitre, le Roy s'en estant retourné de Fontaine-bleau à Paris, il fut selon sa coutume visiter l'Arsenac et la Bastille, où, se promenant dans les galleries d'armes et rangées de canons, il vous dit que dès le lendemain que vous fustes tombé d'accord avec le cardinal Bufalo et l'ambassadeur d'Espagne, touchant le restablissement de la liberté du commerce, le connestable de Castille l'estoit venu trouver, avec des tesmoignages d'extrême réjouissance, prenant cette occasion pour luy faire de grands discours, qu'à son advis il avoit de longue main premeditez, desquels le Roy vous entretint plus d'une grande heure. Mais dautant que vous ne nous les avez pas tous dits (et qu'encor y a-il en ce que nous en avons appris de vous plusieurs prolixitez ennuyeuses, remplies d'arrogances et vaines jae-

tances espagnoles), et afin d'abreger ces memoires le plus qu'il nous sera possible, nous nous contenterons de vous en ramenter le sommaire et la substance, qui furent tels :

Que les Roys tres-chrestien et tres-catholique estans les deux plus puissans Roys de la Chrestienté, et qui dominoient les plus belliqueuses nations, le discours de la raison et l'experience des choses avoient appris que ce seroit tousjours non seulement vainement, mais aussi avec dommage, qu'ils entreprendroient de s'avantager sur la gloire et les Estats l'un de l'autre ; et partant estoient-ils obligez, selon la prudence requise en deux si grands monarques, de penser non plus à se ruiner, destruire ou prejudicier à la grandeur l'un de l'autre, comme ils avoient fait par le passé, mais à s'unir d'amitié, comme l'avoient esté autresfois les royaumes de France et de Castille, que les histoires remarquoient avoir esté tels qu'il y avoit alliance entr'eux, de Roy à Roy, de peuple à peuple, et royaume à royaume ; et de poser de tels fondemens d'une bonne et ferme paix entr'eux, qu'elle devint perpetuelle et inviolable ; se resoudre d'avoir communs amis et ennemis ; de s'entre-secourir l'un l'autre contre tous agresseurs ou injustes detenteurs, toutes rebellions, mouvemens et souslevations de leurs peuples et sujets feudataires et serviteurs ; de ne pretendre jamais aucun droit sur les Estats qui se trouveroient lors par un chacun d'eux absolument possédez ; se departir de toutes jalousies des éminences, autoritez, gloire, reputation, puissance et domination l'un de l'autre ; et tout au contraire, en s'accordant des pretentions qu'un chacun d'eux devoit avoir dans l'Europe, tourner leurs communes armes contre tous ceux qui dans tels departemens ne voudroient recognoistre l'un des deux pour supérieur, n'y ayant point de doute que ces solides fondemens, ainsi posez (et apuyez et fortifiez par la foy et parole qu'ils s'entredonneroient l'un à l'autre, y ayant trop de prudence en leurs intelligences, et de generosité en leurs cœurs, pour estre autres que loyales, sacrées et inviolables, et par un double mariage de leurs communs enfans, qu'il sembloit que Dieu eust rendus d'un âge sortable pour l'establissement d'un si grand bien), ils ne fussent en pouvoir de se faire tellement craindre et redouter par tous les autres roys et potentats chrestiens, qu'ils recevroient d'eux telles loix qu'ils leur voudroient imposer, et deviendroient non seulement un ferme rempart et boulevard contre tous les desseins, attentats et entreprises des mescreyans, heretiques et infidelles, mais aussi capables de faire de grands progres sur eux tous : desquelles propositions

(icelles luy estant venuës en l'esprit, sur les diversitez des choses qu'il avoit veuës et apprises en son voyage, et autres considerations faites de longue-main) il avoit esté bien aise de faire quelques ouvertures, comme de luy mesme, à Sa Majesté tres-chrestienne, afin que si elles estoient par elle goustées, comme sa prudence estoit des plus excellentes pour les mieux examiner que nul autre, il en parlast avec la mesme franchise à son Roy, et taschast de le faire entrer de bonne foy dans de si hauts et magnifiques desseins, vrayement dignes des Majestez tres-chrestienne et tres-catholique. A la fin desquels propos le Roy vous dist avoir esté bien aise de vous entretenir là dessus, et mesme s'estoit resolu de vous demander vostre advis, avant que de vous dire quelle avoit esté sa responce, pour voir si vos sentimens, comme cela estoit souvent arrivé, se trouveroient conformes l'un à l'autre ; surquoy vous luy dites qu'encor que vous ne jugeassiez pas estre fort difficile de prendre et donner un bon conseil sur des langages où l'artifice paroisoit aussi malicieux que grossier, que neantmoins vous le suppliez (pource qu'aussi bien estoit-il plus que temps d'aller dîner) de vous donner tout ce jour pour mieux y penser, afin que si d'avanture vous disiez quelque chose contre son goust, il ne vous accusast plus de trop grande promptitude, comme il avoit accoustumé de faire lors que vous faisiez sur le champ des repliques qui ne luy plaisoient pas : de laquelle responce et demande il se mist à sourire et vous l'accorda, en vous donnant un petit soufflet en se joüant, comme c'estoit sa coustume lors que vous le preniez en bonne humeur, et luy disiez de ses veritez qui ne luy desagreioient pas.

Et l'estant allé trouver le lendemain aux Tuileries, en vous promenant avec luy sur la terrasse pour aller aux Capucins, vous luy distes qu'apres avoir bien examiné tous les discours du connestable de Castille, vous jugiez qu'il y auroit dequoy faire quelque chose de bon, si tous les Espagnols estoient devenus blancs en loyauté comme des anges, et non pas demeurez basanez en perfidie comme des diables, et s'ils n'estimoient beaucoup plus les œuvres que la foy ; mais qu'estans aussi tels que cela, il n'estoit pas fort difficile à comprendre qu'il n'avoit eü autre dessein que de luy faire abandonner les provinces unies des Pays-Bas, destruire ses plus certains et confidens alliez, qui estoient quasi tous protestans, et de susciter des guerres civiles dans son royaume, qui le reduisissent à telle pauvreté, misere et destruction, que la conquête luy en fust renduë plus facile que son pere ne l'avoit

trouvée, à cause de la seule vertu de Sa Majesté, de la fermeté que les pauvres huguenots avoient monstrée à leur religion et à son service, et des bonnes assistances que les Anglois et les Hollandois luy avoient données. « Et n'estime pas, « Sire (distes vous finalement au Roy), de quel- « que prudence, modestie et civilité dont la res- « ponce de vostre Majesté ait peu avoir esté as- « saisonnée, que vous ayez jamais eü autre « creance ny pensée en l'esprit, sinon qu'il est et « sera tousjours absolument impossible, attendu « les ambitieux et orgueilleux desseins qu'ont « tousjours tesmoignez les Espagnols ( commen- « cez par Charles V, et continuez en ses succes- « seurs, qui ont tousjours eu mesmes conseils et « mesmes procedures, quelques divers qu'ils ayent « esté en humeurs et capacitez, de parvenir à la « monarchie chrestienne, et de déprimer, voire « opprimer tous autres potentats, peuples et na- « tions, pour avancer l'effet de leurs desirs), de « pouvoir jamais former une amitié, société, al- « liance et confédération de bonne foy, sincere et « loyale, entre eux et le plus auguste, magna- « nime et genereux Roy de nostre siecle, avec « lequel leur orgueil ne sçauroit permettre de « garder en aucune façon les deües proportions, « ny luy permettre de vivre dans la gloire que « ses vertus meritent, n'y ayant, au moins se- « lon mon opinion, mariages, quelques redou- « blez ou bien assortis qu'ils puissent estre pro- « posez, dont l'on doive esperer des fruits et des « avantages si doux et desirables que ce con- « nestable se les est imaginez, ou pour le moins « tasché de les faire imaginer aux autres, sur « tout ayant affaire à une nation si pleine d'ar- « rogance, de ruse et de cautelle. Aussi que, « pour en parler librement à vostre Majesté, « puis qu'elle me l'a ainsi commandé, et luy dire « mes sentimens sur tels parentages, j'estimerois « plus avantageux pour vostre personne royale, « vostre couronne et vos peuples, voire pour le « contentement et vie heureuse des enfans de « vostre Majesté, de les allier en des maisons « de princes mediocres, sur tout en celles dont « les Estats peuvent estre joints à celuy de France, « qui est la voye que les Espagnols ont tenué « pour l'accroissement du leur, qu'à celles des « grands roys, qui croient vous esgaller en puis- « sance et dignité : dautant que les premiers « s'estimeront honorez de tels mariages, et bien- « heureux de servir à vostre grandeur et à vos- « tre gloire ; au lieu que les autres penseront en « avoir autant fait pour vous que vous pour eux, « et ne laisseront de preferer les interests d'Es- « tat à toute alliance, et d'envier et prejudicier à « vos prosperitez et grandeurs, nonobstant icelle.

Surquoy le Roy vous dit que comme vous aviez discoursu de plusieurs choses qui luy estoient venuës en la fantaisie lors des propositions du connestable, aussi avoit-il eu esgard, en luy usant de belles paroles, à ne s'engager en chose qui luy pust porter prejudice, ny mettre empeschement aux avantages qu'il pourroit tirer des desseins dont vous aviez souvent parlé, lors que le temps, les occasions et l'estat des affaires luy donneroient moyen de les mettre à effet.

Outre les choses cy-devant recitées, et quelques remarques faites du doux naturel, familiere conversation et sage conduite de nostre grand Roy, qui tesmoignent que plus les dominations terriennes des roys et des princes sont amples, abondantes et populeuses, plus se trouvent-elles ordinairement sujettes à de grands desastres, accidens et varietez, s'ils ne sont prévenus et prévenus par l'intelligence, prudence et diligence des souverains, par une vraye amour qu'ils portent à leurs peuples, laquelle reflexchit apres vers eux ; par le soin qu'ils tesmoignent avoir du repos, protection et soulagement de tout ; par la recherche qu'ils font de tous bons conseils et sages conseillers ; par l'estime des hommes de vertu et de qualité, et le digne employ de ceux qui ont de l'experience et de la capacité, chacun selon sa vacation : comme, par opposition, il se peut semblablement conclurre que les regnes, royaumes et personnes des roys et potentats, lesquels manquent de toutes ces bonnes parties, sont d'humeur colere, dépité et accariastre, ont les cœurs remplis de haine et de vengeance, et méprisent les personnes sages et de qualité, seront quasi tousjours turbulens, tumultueux, inquietes, miserables et calamiteux.

Outre donc, comme j'ay dit, les affaires cy-devant déduites, il s'en passa plusieurs autres, et beaucoup d'autres discours entre le Roy et vous, sur la resolution et progrez desquelles escrivistes grande quantité de lettres, selon les occasions, tant à Sa Majesté, M. de Ville-roy, les autres secretaires d'Estat, les officiers de milice, finance, justice et police, dans les provinces de France, qu'aux princes, agens et ambassadeurs estrangers, et en receustes semblablement d'eux tous en grand nombre, mais principalement de la main du Roy, lesquelles pourroient confirmer ce que je viens de dire, et donner plusieurs esclaircissemens non à mespriser sur la conduite et les succez des affaires de ce temps, voire mesmes des enseignemens utiles pour ceux de l'advenir. Mais dautant que par telles et si amples narrations, au lieu de simples Memoires que nous avons eu dessein de tracer, nous cognoissons bien que nous nous trouverions engagés en

de grands volumes, nous nous dispenserons des particularitez de toutes telles choses, et nous en deschargerons sur les bons historiens, nous contentans de les vous représenter en substance et sommaire seulement, et d'insérer encor quelques lettres du Roy sur aucuns articles, pour plus grande lumière en iceux; et suivant l'ordre que nous avons accoustumé de tenir en ces Memoires, nous vous ramentevrons: comme, à la sollicitation du sieur de la Varenne, le Roy fit don de son chasteau de la Flesche aux Jesuistes, lesquels s'y establirent et commencerent d'y fonder un magnifique college de leur société; comme Sa Majesté, durant tout le cours de cette année, receut des advis plusieurs fois reiterez, et quelques-uns d'iceux si bien circonstancier, qu'ils avoient beaucoup de vray semblance, que messieurs de Bouillon, de la Trimouille, Desdiguieres, du Plessis et autres inquiets esprits de ceux de la religion, avoient fait ensemble de grandes unions, ausquelles ils essayoient de joindre tous le corps de leurs eglises, afin de les disposer à vouloir prendre les armes lors qu'ils leur manderoient qu'il en seroit besoin, sans en vouloir approfondir les raisons; mais ils n'y peurent jamais parvenir: surquoy vous eustes plusieurs discours avec le Roy, et en receustes quantité de lettres, dont j'en insereray icy quelques-unes, ainsi qu'il ensuit.

*Lettre de la main du Roy à M. de Rosny.*

Mon amy, j'ay receu vostre lettre par le capitaine Commin; je suis bien de vostre advis touchant cela; et ce qui m'y confirme davantage, est que nous avons bien appris de ces affaires-là par ceux qui sont venus de Dauphiné; dequoy je vous parleray lors que je vous verray, et prendray avec vous resolution sur le tout. J'avois commandé à M. de Ville-roy, lors que j'avois si mal aux dents, de vous escrire par Arnault de plusieurs choses qui importoit à mon service, à quoy vous ne m'avez fait aucune response: dequoy je m'estonne. Bon jour, mon amy.

Ce 19 octobre, à Fontaine-bleau. HENRY.

*Lettre de la main du Roy à M. de Rosny.*

Mon cousin, j'ay receu vostre lettre et vue celle que, par mon commandement, vous escrives à Aubigny, laquelle je vous renvoye: surquoy je vous diray que je la trouve fort bien, et qu'en cela vous avez suivy mon intention; mais je ne suis pas d'avis que vous l'envoyez encores, d'autant que j'ay hier, par un homme qui vient de Tournai, que M. de la Trimouille est recherché et en danger; que Parabelle, Constant,

Aubigny et forces autres y estoient retournés, si qu'il nous faudra voir que deviendra cela. Aussi madame la princesse envoya hier à son fils une lettre pour me faire voir que M. du Plessis luy escrivoit au nom de madame de la Trimouille, où il desadvoit celui qui luy avoit dit qu'elle ne la pouvoit voir. Et sur cela, je vous diray que je suis de vostre advis, qu'ils font la pluspart du temps des choses sans y bien songer, dont ils se repentent aussi-tost. Mais de cela nous discourerons plus amplement, et prendray resolution avec vous aussi tost que je seray arrivé à Paris, qui sera bien tost, Dieu aidant; lequel je prie vous avoir, mon cousin, en sa sainte et digne garde.

Ce 18 novembre, à Fontaine-bleau. HENRY.

CHAPITRE CXLV.

*Lettres diverses de Henri IV. Correspondance de Rosny avec les reines Marie de Médicis et Marguerite de Valois. Fin des recherches contre les financiers. Etablissement de divers ordres religieux. Les fermiers généraux déclarent qu'ils n'ont parmi eux aucun étranger. Réception d'un des fils naturels du Roi dans l'ordre de Malte. Différends avec le Pape sur le pont d'Avignon.*

Le Roy ayant souvent eu des advis qu'il y avoit tousjours des intelligences entre messieurs de Bouillon et Desdiguieres, en receut encor lors quelques-uns qui luy firent prendre entiere croyance; surquoy il vous escrivit trois lettres, desquelles la teneur ensuit:

*Lettre de la main du Roy à M. de Rosny.*

Mon amy, je vous fais ce mot pour vous dire que d'Escures vient d'arriver, qui a laissé le comte d'Auvergne à Moret, et qui sera ce soir à Melun, et demain de bonne heure à Paris; aussi que j'ay appris des nouvelles de M. de Lesdiguieres, que vous trouverez bien estranges: demain vous les apprendrez par celui qui me les a apportées (qui est de la part de Morges), et à quoy il faut bien pourvoir. L'on m'escrit d'Italie que l'on y voit une estoille en forme de comete, de laquelle chacun se mesle de discourir icy: elle se voit vers le levant; voyez si vous la verrez. Bon jour, mon amy.

Ce vendredy, 19 novembre, à Fontaine-bleau. HENRY.

Depuis cette lettre écrite j'ay receu une lettre de M. de Vantadour, par laquelle il me mande comme M. de Montpellier le vient d'avertir qu'un homme du comte d'Auvergne est passé

pour aller en Espagne. Je juge que c'est Yverné.

Ayant trouvé, en revisitant vos liasses de papiers, une grande quantité de lettres qui vous avoient esté écrites par la Reine et la reine Marguerite, nous en avons choisi quelques-unes d'entre celles qui estoient datées de cette année 1604, lesquelles nous avons icy inserées tout d'une suite, seulement pour faire voir le stile dont elles vous escrivoient; n'ayant pû trouver de vos responces que deux broüillars de lettres, que vous escriviez à la Reine, lesquelles, nous semblant meriter d'estre sceuës, nous avons essayé de mettre au net, le mieux que nous avons pû, aussi bien que celles de la reine Marguerite, lesquelles estans toutes de sa main, il en faut deviner la moitié, estans telles que s'ensuit; et les avons mises en suite de ces deux lettres du Roy à vous, touchant M. Desdiguieres.

*Lettre du Roy à M. de Rosny.*

Mon amy, je vous envoie le sieur de Bourg avec un de ses capitaines qui vous rendra cette-cy, qui est homme de bien, et pour tel reconnu par ceux qui le connoissent, mesmes par ledit du Bourg. Il vous dira ce qu'il a appris à Grenoble, et les propos que luy a tenus M. de Lesdiguieres. Escoutez-le, et qu'il n'y ait que vous et M. de Sillery; mesmes prenez garde que personne ne le voye parler à vous qui soit de Dauphiné. Faites luy payer son voyage, encor qu'il ne le demande; mais vous jugerez qu'il le merite. L'ayant oüy, renvoyez le moy promptement, et l'instruisez bien, car je le veux renvoyer promptement, et faire que personne ne le voye icy, moins parler à moy. Bon soir, mon amy.

Ce vendredy à onze heures du soir, 19 novembre, à Fontaine-bleau.

HENRY.

*Lettre du Roy à M. de Rosny.*

Mon amy, je vous envoie Morges avec une lettre et des papiers qu'il a receus de Dauphiné, encor plus amples que ceux qu'avoit apportez le Bourg, lesquels estans trop longs à lire, je vous les renvoie pour les considerer. Quant à ce qui touche l'oppression du peuple, je sçay bien que c'est un homme qu'en matiere d'argent l'on ne sçauroit jamais contenter; mais je ne doute point aussi que vous ne teniez la main au soulagement de mes peuples, autant qu'il vous sera possible, puis que vous sçavez que je les aime comme s'ils estoient mes enfans. Quoy que ce soit, vous verrez que c'est la suitte de ce que je vous ay mandé par le Bourg, et comme les affaires s'eschauffent en ce pays-là, où il faut pourvoir promptement, dequoy nous parlerons

vous estant icy. Bon soir, mon amy que j'aime bien.

Ce samedi 20 novembre, à Fontaine-bleau.

HENRY.

*Lettre de M. de Rosny à la Reine.*

MADAME,

J'ay esté adverty par madame Conchine (que j'ay tousjours trouvée la mieux intentionnée et la plus raisonnable de tous ceux qui vous approchent) que l'on essaye de vous persuader que je ne rends pas à vos lettres toute la deference que je devrois; ce qui pourroit estre vray, selon l'opinion des particuliers interessez, procedant à l'endroit de vostre Majesté comme je fais envers le Roy; tellement que quand il vous plaist m'honorer de lettres de vostre main propre, j'y satisfais aussi-tost, si je n'y reconnois un trop grand prejudice au service du Roy, ou oppression au peuple. Si je reçois des lettres de vostre main, je sçay bien discerner ce qu'il y a de meslé de l'interest des particuliers. Que si ce sont lettres de secretaïres (lesquelles la pluspart du temps sont écrites de la main des solliciteurs et partisans), à la verité, je les renvoie au conseil, afin que le refus n'en soit pas imputé à moy seul; ce que je m'asseure que vostre prudence aura bien agreable, comme elle doit avoir les conseils que je luy donne sur les autres choses qu'elle sçait bien, et qui luy delivreront l'esprit de beaucoup de mauvaises rencontres, puis qu'en effet je suis, madame, vostre tres-humble, tres-obeyssant et fidele sujet et serviteur.

MAXIMILIAN DE BETHUNE.

*Lettre de la Reine à M. de Rosny.*

Mon cousin, j'avois tousjours esperé que vos promesses seroient en fin executées, touchant ce que vous sçavez qui me tient le plus au cœur. Il me semble que j'ay fait tout ce que vous m'aviez dit qui estoit necessaire pour y parvenir, ce qui ne m'ayant pas beaucoup profité, je dois croire que vous n'y avez pas vous mesme fait tout ce que vous m'aviez asseuré, ou que les causes de mes plaintes ne cesseront jamais, et partant que ce n'est que s'abuser de l'esperer. Je ne laisseray pas neantmoins de faire mon devoir, comme j'y suis obligée, et, sans vous vouloir mal de tout ce qui se passe, je vous demeureray telle que j'ay tousjours esté. Priant Dieu, mon cousin, qu'il vous ait en sa garde.

Escrit à Fontaine-bleau, ce 20 d'avril 1604.

MARIE.

*Lettre de M. de Rosny à la Reine.*

MADAME,

Je vous supplie croire que j'ay fait et feray



tousjours tout ce qui me sera possible pour le contentement du Roy et le vostre, n'en ayant point de plus grand que quand je vous voy en bonne humeur l'un envers l'autre : pour à quoy parvenir, il sembleroit necessaire que le plus foible et le plus obligé ne forgeast pas des offences de gayeté de cœur, et desquelles il n'y a gueres d'hommes qui se soient pû entierement exempter, puis que le Roy, qui a esté nommé le plus sage des hommes, a esté le plus sujet à de semblables infirmités. Et neantmoins, je ne desespere pas que vous ne receussiez quelque assaisonnement à vos déplaisirs, si vous scaviez bien considerer quelle est l'humeur du Roy, et ce qu'il est besoin que vous fassiez pour vous y accommoder; car vous n'ignorez pas qu'il ne soit libre et gay, qu'il n'aime à rire, que l'on soit gay et libre avec luy, que l'on le loüe, flatte et carresse, et sur tout que l'on l'entretienne avec apparence de contentement; et essaye-t-on de luy complaire, et faire quelque conte pour rire, ainsi que vous voyez que fait madame de Guise, et qui est cause que souvent il vous quitte pour aller causer avec elle, disant qu'au lieu de venir au devant de luy le baiser, l'embrasser, le loüer et l'entretenir gayement, vous le recevez avec une mine froide, comme si c'estoit un ambassadeur; et là dessus vos esprits s'en aigrissent, se dépitent, et chacun fait au pis. Sur toutes lesquelles choses je supplie vostre Majesté de vouloir bien mediter, et les mettre en usage, car lors oserois-je respondre que le Roy se laissera conseiller aux choses convenables, finissant ma lettre par mes accoustumées protestations d'estre à jamais, madame, vostre tres-humble et tres-obeyssant et tres-fidele sujet et serviteur,

MAXIMILIAN DE BETHUNE.

De Paris, ce 28 avril.

*Lettre de la Reine à M. de Rosny.*

Mon cousin, apres que nostre edit des exemptions a esté verifié en toutes les cours souveraines de Paris, j'ay commandé à ceux qui avoient charge d'en faire la sollicitation, de poursuivre les lettres et expéditions necessaires pour l'exécution d'iceluy; entre lesquelles ayant esté conseillée, pour acclereler la poursuite et levée des deniers qui proviendront d'iceluy, de faire commettre le sieur president de Blanc-mesnil, mon chancelier, et Deslandes, conseiller en la cour de parlement, pour faire les taxes de la finance qui devra estre payée par ceux qui voudront jouir desdites exemptions, comme estans personnages remplis d'intégrité et qui s'en acquitteront fidelement; ayant aussi accordé la recepte desdits deniers à maistre Jacques le Secq, par

les quittances duquel je desire qu'ils soient levez, et le controolle d'iceux à maistre Henry du Bois, sieur de Haute-combe, afin d'éviter les longueurs et retardemens que l'on pourroit recevoir, s'il falloit en cela passer par les mains des tresoriers des parties casuelles et controolleurs generaux des finances; estant aussi bien advertie que l'on a souvent usé de cette forme en semblable cas, j'ay fait sur ce dresser les commissions necessaires : et parce qu'il est à propos qu'elles soient veuës au conseil du Roy, mon seigneur, je vous escriis celle-cy pour vous prier de les faire resoudre audit conseil, au premier jour, et donner ordre qu'elles soient paraphées ou signées en queue par l'un des conseillers d'iceluy, ou intendans des finances, afin qu'apres cela elles soient au plutost expédiées. Tenez y donc la main, je vous prie, et trouvez bon que ce porteur vous en sollicite, et vous voye sur ce sujet de ma part, afin que je puisse tant plutost obtenir une bonne issuë de cette affaire, qui traine depuis si long temps en ça, et que je scay ne se pouvoir terminer que par vostre bonne assistance; laquelle me voulant promettre, je ne vous feray plus longue lettre que pour prier Dieu, mon cousin, qu'il vous ait en sa sainte et digne garde.

Escrit à Fontaine-bleau, le vingt-sixiesme jour d'avril 1604.

MARIE.

Et plus bas, PHELIPEAUX.

*Lettre de la Reine à M. de Rosny.*

Mon cousin, j'ay veu par vostre lettre la proposition que vous me faites touchant l'expédition de mon edit. Je recognois que vous l'avez retardée pour l'affection que vous portez à mon service, et pour la creance que le changement que vous estes contraint de prendre aux edits du Roy et des Suisses me pourra apporter plus d'utilité que le chemin que je prends. Neantmoins, puis qu'il a pleu au Roy de me faire ce don, à la charge de racheter ses bagues, desirant de commencer à faire cognoistre à Sa Majesté que je suis bonne mesnagere, j'ay bien consideré que je ne pourrois accomplir l'intention que j'en ay par autre moyen que celui que j'ay proposé et demandé, veu la fidelité de ceux qui poursuivent cette affaire, lesquels je suis asseurée qu'ils ne me derobent, et me serviront plus pour gagner mes bonnes graces que pour leur profit particulier. Les frais ne seront pas si grands que l'on pourroit penser; l'exécution en sera plus prompte; et ne peut y avoir aucune oppression du peuple, puis que le privilege est volontaire, et que qui le voudra obtenir sera soudain despesché, sans autre despence que de la taxe. Partant je vous prie me tesmoigner encor en

cecy ce que je desire de vostre bonne volonté, me faisant dépescher promptement les commissions en la forme que je l'ay demandée, ne jugeant la devoir changer. Et sur ce, mon cousin, je prie Dieu vous tenir en sa garde.

De Fontaine-bleau, ce 4 may 1604.

MARIE.

*Lettre de la Reine à M. de Rosny.*

Mon cousin, les sieurs de Brancalcon et du Bois, ou l'un deux, vous yront trouver de ma part, pour vous parler de quelques declarations ou arrests qui sont necessaires d'obtenir au conseil du Roy, mon seigneur, tant en interpretation de nostre edict des exempts faits en chacune paroisse, que pour la facilité de l'exécution d'ice-luy : surquoy je vous prie de les escouter et voir les memoires qu'ils vous presenteront sur ce sujet, et vous y rendre tellement facile et disposé, y apportant ce qui est de vostre autorité, que lesdites declarations ou arrests soient au plutost expediez. Je fais tant d'estat de vostre amitié et de l'affection que vous apportez à ce qui me touche, que je me promets toute faveur et assistance de vous en cette affaire. C'est pourquoy je ne feray celle-cy plus longue que pour prier Dieu, mon cousin, qu'il vous ait en sa sainte et digne garde.

De Fontaine-bleau, ce dix huitiesme jour d'aoust 1604.

MARIE.

Et plus bas, PHELIPEAUX.

*Lettre de la Reine à M. de Rosny.*

Mon cousin, j'ay demandé en don au Roy, mon seigneur, quelques deniers qui se trouvent entre les mains de certains receveurs de Roüergue et Quercy, qui ont esté levez sans commission ny pouvoir de Sa Majesté, lesquels il m'a bien volontiers accordés; et neantmoins, auparavant que l'on en delivrast aucune expedition, il a désiré avoir sur ce vostre avis, et vous en escrit presentement; et parce que je recognois qu'il veut que je vous aye une bonne partie de l'obligation de cette gratification, je vous ay bien voulu aussi escrire celle-cy par ce porteur, que je vous envoie exprez, avec les memoires de cette affaire, et les expeditions que l'on desire sur icelles, pour vous prier, comme je fais bien affectueusement, de voir lesdits memoires, et donner sur ce vostre avis au Roy, mondit seigneur, qui soit tel que, par vostre moyen, je puisse jouir et me prevaloir de cette grace. J'espere cela de l'affection que vous me faites paroistre et des bons offices que vous me rendez continuellement en toutes les occasions qui s'en presentent. Et attendant sur ce de vos nouvelles,

je prie Dieu, mon cousin, qu'il vous tienne en sa sainte et digne garde.

Escrit à Fontaine-bleau, le dernier jour d'aoust 1604.

MARIE.

Et plus bas, PHELIPEAUX.

*Lettre de la Reine à M. de Rosny.*

Mon cousin, le Roy, mon seigneur, a fait don à ce porteur, nommé Santi, jardinier de Monceaux, de la somme de six cens livres, pour luy aider à se marier, et pour employer à la construction d'un moulin qu'il fait faire sous les jardins dudit lieu. C'est un homme que j'amenay avec moy lors que je vins en ce royaume, qui travaille fort bien aux jardinages, et qui y sert de telle sorte que le Roy, mondit seigneur, en a beaucoup de contentement. C'est pourquoy je vous prie de vouloir commander et tenir la main que ladite somme luy soit payée promptement, suivant l'ordonnance qui luy en a esté expédiée, et laquelle il vous porte pour cet effet; et vous me ferez en cela un singulier plaisir. Priant Dieu, mon cousin, qu'il vous ait en sa sainte et digne garde.

Escrit à Fontaine-bleau, le trentiesme jour d'aoust 1604.

MARIE.

Et plus bas, PHELIPEAUX.

*Lettre de la Reine à M. de Rosny.*

Mon cousin, depuis vostre partement de ce lieu, j'ay eu des nouvelles de celui qui m'avoit donné l'avis dont je vous avois cy-devant écrit, lequel me mande que les deniers dont est question ne sont point compris en la composition que vous et ceux du conseil du Roy, mon seigneur, avez faite avec ceux du pays de Roüergue et de Quercy, estant mesme encore entre les mains des receveurs, qui en voudroient estre honorablement déchargez, comme ayans esté levez sous un faux pretexte, et dont possible ils craignent d'estre plus particulièrement recherchez. Or, mon cousin, mon intention n'est point de prejudicier ny alterer en sorte quelconque ce qui est du service ny des affaires du Roy mondit seigneur, ny l'ordre que vous pouvez avoir mis pour l'establissement d'iceux, ny moins demander en cela chose qui apporte charge ou oppression à son peuple; mais aussi, si vous recognoissez que ce que l'on me fait entendre en cela soit vray, et que ces receveurs qui sont personnes particulieres, soient encore chargez de ces deniers, je vous prie de n'y faire aucune difficulté, ains y apporter ce qui y sera requis, et de vostre autorité, afin que je jouysse du fruit que je me suis promis de cette gratification, par telles voyes et expeditions que vous

jugerez y estre plus convenables, et mesmes sans y employer sergens ny commissaires, ny y faire aucuns frais, comme vous me le mandiez; me remettant de cela, comme de tout cét affaire, à ce que vous adviserez estre à propos. Et toutesfois je vous diray que je ne suis conseillée de prendre la voye que vous me proposez, de faire rembourser ces receveurs de Quercy de la finance qu'ils peuvent pretendre d'avoir payée, mais plutost, puis qu'ils sont pourvus et receus, de leur faire payer nouvelle finance pour la composition de leurs offices, puis qu'en effet ils n'ont rien financé, et outre cela leur faire rendre ce qu'ils ont induëment pris sous couleur d'arrérages des gages et des interets qui ne leur estoient nullement deubs. Vous me rendez en toutes occasions tant de bons offices, et me faites si souvent ressentir les effets de vostre affection et amitié, que je sçay qu'en cette occasion vous me les continuërez encores, comme je vous en prie, et de me mander par ce porteur que derechef je vous envoie expres, ce que j'en dois esperer. Priant Dieu, mon cousin, qu'il vous ait en sa sainte et digne garde.

Escrit à Fontaine-bleau, le treiziesme jour de septembre 1604.

MARIE.

Et plus bas, PHELIPEAUX.

*Lettre de la Reine à M. de Rosny.*

Mon cousin, vous avez tousjours promis de faire donner le fonds pour la despence de ma maison, jusques à la somme de cent quinze mil escus; et parce que jusques à present d'Argouges, mon tresorier, n'a touché qu'à la raison de cent huit mil, et que nous voicy tantost à la fin de l'année, je vous prie de luy faire ordonner le payement des sept mil escus restans, afin qu'il ait moyen de satisfaire aux depenses ordinaires de madite maison. Et sur ce je prie Dieu, mon cousin, qu'il vous ait en sa sainte et digne garde.

Escrit à Fontaine-bleau, le treiziesme jour de septembre 1604.

MARIE.

Et plus bas, PHELIPEAUX.

*Lettre de la reine Marguerite à M. de Rosny.*

Mon cousin, vous estes tousjours mon recours, et, apres Dieu, l'appuy de qui je fais tousjours le plus d'estat : ne vous sentez donc, je vous supplie, importuné si en choses petites, aussi bien qu'aux grandes, j'y requiers l'ayde de vostre autorité, et si, comme Dieu, qui ne se contente de créer les choses, mais a un perpetuel soin de les conserver, je vous supplie vouloir tenir la main à ce que je sente l'effet des biens-faits du Roy, comme je sçay que

c'est l'intention de Sa Majesté et la vostre, commandant à M. le Févrez, receveur de Bordeaux, de payer promptement le troisieme quartier de l'assignation des vingt-cinq mille escus de mes creanciers, qu'il leur doit depuis l'autre année, et avoit promis de le payer il y a un mois, disant l'avoir tout prest; mais, depuis, certains broüillons qui ne tendent qu'à retarder le payement de mes debtes, pour pescher en eau trouble, et mieux faire leur main, luy ont fait changer de langage, s'excusant qu'il a payé d'autres parties qui estoient apres la mienne, et voulant bailler de mauvaises rescriptions sur des receveurs particuliers, dequoy l'on ne seroit jamais payé. Je vous supplie m'obliger tant, s'il est à Paris comme l'on dit qu'il y est cy-devant allé, de luy faire cognoistre que c'est l'intention du Roy et la vostre que je sois mieux traitée, et s'il n'y est, je vous supplie m'obliger tant que de luy escrire de bonne ancre, et luy ordonner d'acquitter promptement le susdit troisieme quartier. J'ay aussi à vous requierir pour l'exemption d'Usson, où je ne vous demande rien que de justice; car ce bourg n'est pas de la qualité des villes cottizées qui ont foire et marché. Il vous a esté tesmoigné, par les enquestes des lieux circonvoisins et bureau des tresoriers, que le bourg d'Usson n'eust jamais ny foire ny marché; et outre, c'est prevenir, au prejudice de ma qualité, qu'il a pleu au Roy, par la déclaration de sadite Majesté, accorder au lieu de ma demeure, soit Usson ou Villers-Coterest, d'estre exempt pendant mon sejour; l'on leur en a desja accordé la moitié, le reste est si peu de chose qu'il ne se monte cent cinquante escus. Je vous supplie m'accorder cette juste demande, et me conserver le bien de vostre amitié, comme à celle qui honore d'avantage vostre merite, et qui recherchera avec plus d'affection une digne occasion pour se tesmoigner, mon cousin, etc.

D'Usson, ce 19 juillet 1604. MARGUERITE.

*Lettre de la reine Marguerite à M. de Rosny.*

Mon cousin, vous ne me pouvez d'avantage obliger que de me tesmoigner avoir assurance de la puissance que vous aurez tousjours sur tout ce qui dépendra de moy; je tiens beaucoup de felicité quand le ciel m'offre le moyen de vous en pouvoir rendre preuve, et principalement en cette occasion, où j'estime faire en M. Debor, pour personne que vous affectionnez et qui vous est necessaire; il n'y avoit point une plus preligante recommandation pour moy : aussi luy ay-je soudain fait expedier les provisions de l'abbaye de Saint Maurin, que me demandez pour

luy, que je luy envoie. J'ay de long-temps ouy parler de sa suffisance en la charge qu'il a sous vous; il est, certes, personne de merite, mais le plus grand qu'il puisse avoir en mon endroit est de le cognoistre aymé de vous. Je vous pensois de retour à la Cour : je sçay que vostre prudence n'a besoin de conseil; mais excusez-moy si l'affection que j'ay à vostre bien me contraint de vous dire que les absences les plus courtes, à ceux qui ont les fortunes que vous avez, sont les meilleures : la vertu et la fidelité à son maistre n'est jamais sans envie, et faut croire que les esprits prodigieux de ce temps, qui ne desirent que le mal du Roi et de cet Estat, cognoissent bien qu'ils n'y pourroient apporter un plus grand prejudice que de priver Sa Majesté d'un tel serviteur que vous. Pensez-y donc, non tant pour vostre particulier que pour le bien du Roy et de cet Estat, auquel en ce mal-heureux siecle rien n'est si necessaire pour le bien de l'un et de l'autre qu'une fidelité telle que la vostre. Ayant, comme vous, attaché ma fortune à celle du Roy, je ne puis que je n'apprehende avec passion tout ce qui luy pourroit estre prejudiciable : je prie donc Dieu qu'il vous ramene promptement aupres de Sa Majesté, et avec tout l'heur et felicité que vous pouvez souhaiter, et que le bien de vostre amitié me soit toujours conservé, comme à celle qui, avec plus d'affection, se tesmoignera tous-jours, etc.

D'Usson, ce 26 juillet 1604. MARGUERITE.

*Lettre de la reine Marguerite à M. de Rosny.*

Mon cousin, le Roy m'ayant tousjours fait cet honneur de me promettre l'appuy de sa faveur, lors que je voudrois poursuivre la succession de la Reine, ma mere, dequoy ce détestable Charles, Monsieur, que je ne nomme plus nepveu, puis qu'il est ennemy du Roy, m'en usurpoit une partie du bien, je n'ay toutesfois osé, pour la crainte que j'avois de sa malice et du pouvoir qu'il avoit en ce pays, commencer cette juste poursuite jusques à cette heure, que je voy le temps propre pour avoir un arrest, accompagné d'un commandement du Roy, pour faire aisément sortir des places les brigandeaux qu'il y tenoit, lesquelles importent pour le service du Roy d'estre razées; et Sa Majesté doit desirer que ce perfide et ses enfans (qui peut-estre seront un jour tels que luy) ne puissent jamais avoir l'autorité qu'il avoit en ce pays, afin qu'on ne fortifiast leurs desseins pernicieux. Ce que je requiers à Sa Majesté et à vous en cecy, est seulement de favoriser mon bon droit, en me faisant faire prompte et bonne justice, laquelle ne me peut estre desniée, la substitution du

contract de mariage de la Reine, ma mere (lequel j'ay recouvert par le moyen de Sa Majesté, à qui, apres Dieu, j'en ay l'obligation), estant si claire, donnant son bien à ses enfans, de fils en fils, tant qu'il y auroit, selon l'ordre de l'âge, et les fils venans à faillir sans enfans, le donnoit aux filles, qu'il ne faudroit que des yeux pour cognoistre que la Reine, ma mere, ne pouvoit disposer de son bien, ny aussi peu le feu Roy, mon frere, dernier mort, pour ce que (comme j'ay dit) la substitution ne finissoit pas à luy, mais venoit des fils aux filles, desquelles il a pleu à Dieu que je sois restée seule. Je vous en ay fait ce discours, pour ce que je sçay qu'autrefois ce malicieux, qui sçavoit tres bien pallier une fausseté à son profit, vous en a parlé; mais s'il vous plaist cognoistre la verité de cecy, il ne faut que prendre la peine de voir ledit contract de mariage de la Reine, ma mere, où en deux clauses cette substitution est tres-clairement en cet ordre de fils aux filles reiterée. Et de dire (qui est le dernier refuge dequoy il se sert) qu'au moins le feu Roy pouvoit disposer de sa legitime, l'on luy respond que les consentemens que ledit feu Roy a donnez pour sa part aux ventes et dons que la Reine, ma mere, a faits sur son bien, emportoient trop plus que la valeur de sa legitime, laquelle ne me pouvoit prejudicier, car je n'ay point consenty. Pour ce que je ne veux requerir mes amis que de choses justes, j'ay voulu vous faire cognoistre mon droit, auquel je vous supplie m'assister, pour en avoir prompte et bonne justice : ce me sera donner de tant plus le moyen de tesmoigner la volonté que j'ay de m'acquérir dignement la qualité de, etc.

A Luçon, ce 20 novembre 1604. MARGUERITE.

Il seroit à desirer d'avoir aussi bien vos lettres au Roy, et celles qu'il vous faisoit communiquer, comme il est dit es siennes, car elles éclairciroient tout ce qui n'est pas spécifié; mais nous autres vos secretaïres, ny vous, n'en ayant pas gardé coppie, il se faut contenter de ce que nous pouvons, et passer outre, pour vous ramentevoir comme, par commandement du Roy, en qualité de grand maistre de l'artillerie, vous expediastes une commission au sieur de la Valée Piquemouche, pour aller démolir le fort chasteau de Craon.

La recherche des financiers fut continuée toute cette année, et en fin, contre vostre advis, terminée en une composition à l'accoustumée, par le moyen de laquelle les gros larrons, en graissant les mains aux dames et courtisans de faveur, s'exempterent de chastiment, et firent tomber tout le faix des restitutions sur les pau-

vres grimelins de larronneaux. Nous laisserons tous les ordres tenus sur cette affaire aux historiens.

Cette année fut poursuivie l'entreprise, par vous de long-temps projetée, pour pratiquer un canal (1) qui joignist les navigations de Seine et Loire, et vous transportastes plusieurs fois sur les lieux, pour en recognoistre les commoditez, et prendre les hauteurs et desclins des montagnes; enquoy vous estiez souvent interrompu par l'importance des autres affaires, desquelles bien peu se resolvoient sans vous; pour preuve dequoy, nous transcrirons icy seulement une lettre entre plusieurs autres que le Roy vous escrivit sur ce sujet, de laquelle la teneur ensuit :

*Lettre de la main du Roi à M. de Rosny.*

Mon amy, je vous fais ce mot, et vous dépêche ce courrier expres, pour vous dire que le connestable de Castille arrive dimanche à Paris, où l'on croit qu'il sera pour faire la feste, pour incontinent apres se rendre icy, ce qui pourra estre mercredi ou jeudy au plus tard. C'est pourquoy je vous prie de remettre vostre visite du canal jusques à une autre fois, et vous rendre icy mardy de bonne heure. Adieu, mon amy.

Ce vendredy matin, 23 novembre, à Fontaine-bleau.

HENRY.

En cette année s'introduisirent divers ordres de religieux et de religieuses, et aussi plusieurs sortes d'ouvrages et manufactures rares et precieuses : surquoy vous representastes au Roy ce que Charlemagne avoit ordonné pour le premier, et les Romains pour le second.

Les bagues de madame la duchesse de Bar, sœur du Roy, furent, du consentement des creanciers qui les avoient saisies, mises en deposit entre vos mains, sans autre seureté que de vostre foy et parole; desquelles vous fustes depuis deschargé, par acte du 28 juin 1605, signé DES MARQUETS et BON-TEMPS, par lequel il appert que la Reine les receut.

*Declaration des fermiers françois.*

Le deuxiesme jour de novembre 1604, à la requeste de maistre Charles du Han, fermier general des cinq grosses fermes de France, j'ay, premier huissier ordinaire du Roy en ses conseils d'Estat et privé, soubsigné, monstre, signifié, et fait suffisamment à sçavoir l'arrest donné au conseil de Sa Majesté, à Fontaine-bleau, le vingt-sixiesme jour d'octobre dernier, signé Meliand, cy attaché (à l'encontre d'un nommé le Roy), au sieur Jacques Favier, commissaire ordinaire

(1) Le beau canal de Briare, achevé sous Louis XIV.

des guerres; maistre Pierre Heroüard, secretaire de la chambre du Roy; Claude Thiret, receveur general des traittes foraines en Champagne; Jean le Pilleur, controolleur des susdits droits en ladite province; François Jean, aussi receveur general des traittes en Normandie; Nicolas Chantemerle, receveur desdits droits à Roüen; Pierre Pomey, et Jacques Joly, bourgeois de Paris; tous associez avec ledit sieur du Han esdites fermes, en parlant à leurs personnes, trouvées en la maison dudit maistre Pierre Pomey, l'un desdits associez, size en cettedite ville de Paris, ruë Quinquempoix, à ce qu'ils n'en pretendent cause d'ignorance. Lesquels susnommez associez et chacun d'eux, à la requeste que dessus, j'ay sommez et interpelez de presentement declarer si aux participes en leur part de ladite association esdites fermes, il y a aucuns estrangers compris, protestant par ledit du Han, s'il s'en trouve par le moyen d'aucun d'eux, que, conformément à la volonté de Sa Majesté, portée par ledit arrest, ils seront tenus de repondre, et payer en leur propre et privé nom les cent mil livres mentionnez en iceluy, et autres peines au cas appartenantes, sans qu'iceluy du Han en puisse encourir aucune perte; à quoy toutesfois il se soubmet, au cas que de sa part il soit contrevenu audit arrest. Lesquels susnommez ont fait response, sçavoir : ledit sieur Favier, qu'il obeyra à l'arrest de messeigneurs du conseil, et qu'il n'a et n'aura aucuns estrangers associez avec luy, en sa part desdites fermes, sur les peines dudit arrest; ledit sieur Heroüard, qu'il n'a et n'aura aucuns estrangers en sadite part, se soubmettant à la rigueur de l'arrest, au cas qu'il se trouve le contraire; ledit sieur Thiret, qu'il n'a aucun associé avec luy, et qu'il obeyra à la volonté de Sa Majesté, portée par ledit arrest; ledit sieur Jean, qu'il n'a aucun estranger en sa part de ladite association, s'obligeant aux peines portées par ledit arrest, au cas qu'il y contrevienne; ledit sieur le Pilleur, que pour l'interest qu'il a en ladite association, il n'a aucuns estrangers qui participent avec luy, et entend obeyr aux peines dudit arrest; ledit sieur de Pomey, qu'il n'y a aucun estranger associé pour son regard, en ce qui est desdites fermes, et que s'il se trouve le contraire, qu'il se soubmet aux peines de l'arrest, au cas qu'il y soit par luy contrevenu; et ledit sieur Chantemerle, qu'il n'a et n'entend avoir aucun estranger associé pour sa part desdites fermes, aux peines portées par ledit arrest. A tous lesquels sus-nommez associez et à chacun d'eux a esté baillé et laissé coppie, tant dudit arrest du conseil, que presente sommation, interpellation et exploit, qu'ils ont signé en mon ori-

ginal avec ledit sieur du Han, auquel a esté baillé et laissé ces presentes pour luy servir et valloir ce que de raison. PARDOU.

Sur la fin de cette année, M. d'Antragues fut, ainsi qu'il a esté dit cy-devant, mis prisonnier; madame de Verneuil, sa fille, arrestée en son logis, gardée par le chevalier du Guet, leur procez fait et parfait, mais leurs peines commuées.

Alexandre, fils bastart du Roy, fut en la mesme année receu en l'ordre des chevaliers de Malte; dequoy nous laisserons les ceremonies aux historiens, aussi bien que les reparations qui furent commencées au pont d'Avignon, qui s'en alloit en ruine; mais bien vous ramentevrons que, nonobstant les pretentions du Pape, le Roy se maintint, par le soin que vous en eustes et l'ordre que vous y donnastes, en l'entiere propriété dudit pont, et ne nous dispenserons, quoy que cela soit un peu long, d'insérer un discours qui vous fut envoyé pour justifier les justes pretentions du Roy, la teneur duquel discours est telle que s'ensuit :

*Lettre des tresoriers de Tholouse à M. de Rosny.*

Pour respondre à la lettre qu'il a pleu à M. le marquis de Rosny d'escire à nous officiers du Roy, tant pour la justice que pour les finances, sur le sujet du differend qui est entre les officiers de Sa Majesté et de nostre Sainct Pere, pour raison du pont d'Avignon, port et passage de la riviere du Rosne, entre Avignon et Ville-Neufve, droicts et levées d'iceux pour ledit passage, et pour raison de l'ordre et forme en la reparation dudit pont;

Après qu'en suivant ladite lettre, lesdits sieurs ont fait faire recherche des actes et tittres servans à ladite cause, dans les archifs du domaine du Roy de la senechaussée de Nismes, et communiqué le tout avec les principaux officiers du Roy de la province;

Résulte que, bien que, de droit commun, les rivières faisant séparation des provinces de divers princes, soient censées être des dépendances desdites provinces, et par conséquent chacun avoir son terroir et estenduë jusques à moitié de la riviere, toutesfois le contraire est de la riviere du Rosne, lequel est du Roy seul, et en tout, et de la jurisdiction royale de bord en bord, tant en son ancien que nouveau canal, privativement à tous autres princes aboutissans ladite riviere, comme au duc de Savoye, au Dauphin, au Pape, comte de Provence, et prince d'Orange. L'autorité des docteurs anciens, tant François qu'Italiens, et les prejugez par les arrests du conseil privé, du grand conseil, de la cour du parlement de Paris et Tho-

louse; les sentences du seneschal de Beaucaire et Nismes, et du maistre des eaux et forests de Languedoc; les commissions dressées par lettres patentes du Roy à ses officiers de Languedoc, continuellement depuis trois cens ans en ça; les baux et inféodations des isles, et accroissemens dans la riviere du Rosne d'un bout à l'autre, faits par lesdits officiers; les droicts d'iceux, et des ports et peages qui sont sur ladite riviere, payez aux tresoriers du domaine de ladite senechaussée, ont establi cette maxime fondamentale au domaine du Roy; mesmes que lesdits arrests et sentences ont esté donnez en jugement contradictoire, sur les deffences ou consentement des parties adverses, et par exprés, le 7 septembre 1491, où lesdits officiers de nostre Sainct Pere, et les consuls d'Avignon, sur l'appel par eux relevé du maistre des eaux et forests, en la cour de parlement de Tholouse, gagnerent leur cause sur des lettres patentes par eux obtenues du Roy, par lesquelles ils se chargerent de ne bastir n'y reedifier aucunes pallieres du costé d'Avignon, sur le bord du Rosne, sans la volonté, congé, et licence du Roy; et par autre arrest du mesme jour, ils sont condamnez à rebastir à leurs despens les degrez de pierre qu'ils avoient ruinez et démolis de leur autorité; et, pour la folle entreprise, à quatre cens livres d'amende envers le Roy, deux cens livres applicables à la reparation du palais de Tholouse; et que le moulin qui estoit joignant Avignon serait ruiné, suivant l'ordonnance dudit seneschal.

Doit venir en considération que, ausdites causes, le gouverneur et vice-légat d'Avignon, et le corps de la ville assemblez en general, ont remis leurs procurations pour déduire leurs moyens d'intérêt, en la cour de parlement de Tholouse, et, devant les commissaires par elle députez, ont relevé appel, et recouru en ladite cour de parlement, et, par ce moyen, recogneu et approuvé la jurisdiction du Roy, non par actes forcez ou contraints, mais de volonté, et en forme authentique, et avec connoissance de cause.

Que s'il est opposé que, par les produits faits de la part de nostre sainct Pere, sur semblable differend, il appert que, conjointement par les officiers de Sa Majesté et de Sa Sainteté, il y a esté pourveu, la response y est facile: premierement que lesdits reglemens sont provisionnels, sans prejudice du droit des parties au principal, et ce, pour faire cesser les excez, meurtres et voyes de fait commises d'une part et d'autre; pour un second, c'estoit un commissaire de la cour de parlement de Paris, qui pro-

cedoit sans cognoissance de cause, et sans aucune recherche des droicts du Roy; pour un troisieme, les officiers du Roy et son procureur en ladite seneschauſſée s'y opposent, et remonstrent que lesdits reglemens, bien que provisionnels, sont de l'année 1340, et lesdits arrests qui sont definitifs, de trente et quarante ans apres.

Ne sont aussi considerables les contracts de ventes des portions du droict de port et passage, remis par les officiers de nostre saint Pere; car ce sont actes faits entre des particuliers, lesquels vendent à l'œuvre du pont, mesme à Jean Benoist, procureur de ladite œuvre, lesdites portions, et n'est pas vray-semblable que tels droicts appartiennent à des particuliers, parce que ce sont droicts publics, et le plus souvent des dépendances de la jurisdiction. D'ailleurs il y a eu erreur manifeste en la date, ou supposition, ou tromperie; car les mesmes contracts de l'an 1185, 1187, 1190, 1201, 1216, 1387 sont faits entre mesmes personnes, et receus par Estienne, notaire; toutes lesdites ventes sont faites au profit de l'œuvre du pont, et des freres et procureurs dudit pont, et non des officiers d'Avignon; et d'avantage, Allassis et Bertrand de la Garde, qui sont les deux premiers vendeurs en l'an 1187, chacun de la moitié dudit pont, vendent pour le prix de sept cens cinquante sols melgoires; et en l'an 1190, Giraldus Amicy vend une autre pour le prix de vingt-quatre mil sols melgoires: cette diversité de prix ne peut donner vertu ausdits contracts; d'ailleurs le prix est en monnoye de France.

Quant aux lettres patentes du roy Philippe ou d'autres roys, elles sont toutes obtenues par les recteurs de l'hospital Saint Benoist ou freres du pont, et adressées au seneschal de Beaucaire et Nismes, en cognoissance de cause, afin que, suivant ce qui luy apparoiſtroit, il fist jouir lesdits recteurs du revenu du pont, suivant ce qu'ils avoient auparavant bien et deuement jouy.

Est fort considerable que l'enquete faite par le maistre des eaux et forests, et tous les autres actes et tiltres, sont tous au nom de l'œuvre et profit du pont, des freres et recteurs dudit pont, sans qu'il y soit fait mention des seigneurs d'Avignon ny du Pape, depuis son acquisition, ny de leurs officiers; comme aussi par lesdits temoins appert que, lors que ledit port estoit mal servy, ou qu'il y avoit surexation, les officiers du Roy procedoient par saisie.

Mais, pour mettre fin à tous doutes, est remarquable que, bien que lesdits recteurs, depuis troiſesmes, ayent souvent recouru au Roy

et obtenu plusieurs lettres patentes sur leurs plaintes, fait enquete et beaucoup de procedures sur ce mesme sujet, toutesfois ceux d'Avignon ne rapportent aucunes sentences portant verification et entherinement desdites lettres, ny autres au profit desdits recteurs, et moins encores au profit desdits officiers de nostre saint Pere, ou des consuls d'Avignon, non plus que des actes d'exercice de justice et de jurisdiction, ny aucunes procedures, ny sentences par lesdits officiers de nostre saint Pere, donnez sur le sujet du pont, port, ou passage de la riviere.

Ladite riviere du Rosne, les isles et pont d'Avignon, et despendances, appartiennent au Roy, comme Roy, et par droict domanial et de regale, estant de Languedoc, et ses dépendances, de l'ancien domaine et patrimoine de sa couronne; car, bien que les comtes de Tholouse ayent esté seigneurs de la pluspart du Languedoc jusques en l'an 1350, la superiorité et souveraineté estoit de la couronne, de laquelle lesdits comtes de Tholouse, de Languedoc, tenoient en plain droit de la couronne, comme est à present, et de tout temps le costé de Languedoc a esté appelé le royaume, et de l'autre auroit esté appelé l'empire.

En suite de cette maxime du droict que le Roy a sur le Rosne, au dernier traité fait avec le sieur duc de Savoye, sur le transport du pays de Bresse, en eschange du marquisat de Saluces, ledit duc remet et cede au Roy toute la Bresse, jusques à la riviere du Rosne, et icelle comprise, de sorte que toute ladite riviere est du royaume de France, sans que ledit sieur duc puisse mettre ny lever aucunes impositions, ny aucuns peages sur ladite riviere, ny bastir aucun fort; et bien que ce droict soit par convention et reservation expresse, si est-ce qu'il y a grande apparence que les sieurs commissaires, deputez par Sa Majesté, ont voulu en cette nouvelle acquisition specifier ce que dessus, pour continuer les droits de regale que Sa Majesté a sur le Rosne, privativement aux autres princes qui tiennent le pays de l'autre rivage du Rosne.

Cette cause tire à grande consequence; car du costé de Provence et du costé de Dauphiné, les officiers desdits pays ont eu mesme pretention; de laquelle toutesfois ils ont esté deschus par tous les jugemens et arrests du conseil et des cours de parlement, qui sont remarquez par M. Bohery en son conseil pour les droits du Rosne, qui merite d'estre veu pour la decision de cette question; car, bien que le Dauphiné et Provence soient aujourd'huy du Roy, c'est par acquisition; et ne sont de l'ancien domaine de la couronne, comme est le Languedoc, qui y est

uny et incorporé inseparablement, et non le Dauphiné et la Provence, qui en pourroient estre distraits par appanage ou mariage.

C'est pourquoy en executant vos commandemens, nous vous donnons pour advis que Sa Majesté se doit affermir à la conservation de ce droict, comme tres-important, et qu'en suite de tant d'arrests, qui en ont esté donnez en causes particulieres par ses juges ausquels parties adverses ont recouru et approuvé leur jurisdiction, elle doit mettre fin à ce differend, par un arrest solennel et general, et declarer que le Rosne, isles, port, peages et le pont et despendances, luy appartiennent de plain droict, tant en regale qu'en domaine et patrimoine de la couronne, privativement à nostre saint Pere, au prince Dauphin, comte de Provence, et au prince d'Orange.

Et dautant que lors que le pont fut parachevé, il fut fort prudemment remarqué qu'un si grand édifice ne pourroit longuement subsister, si on ne pourvoyoit aux moyens necessaires, l'on fit un fonds qui ne revenoit pas à gueres moins de trois ou quatre mil livres de rente annuelle, pour subvenir à l'entretienement d'iceluy, et furent créés des recteurs dudit pont, pour avoir la charge et administration desdits deniers, lesquels ont esté divertis et si mal mesnagez, que ledit revenu ne sçauroit maintenant valoir mil livres : cela estant advenu par la malice d'aucuns de ceux qui ont eu la garde des tiltres et papiers, lesquels ont arraché et soustrait ceux qui faisoient pour eux, pour s'affranchir des cens et droicts que leur bien y faisoit ; et semble estre raisonnable que Sa Majesté doit faire rendre compte à quoy ont esté employez tous ces deniers, qui doivent revenir à une grosse somme, depuis si long-temps qu'on les a levez et perceus, laquelle religieusement conservée estoit bastante, non seulement pour entretenir ledit fonds, mais encore pour refaire ce qui en est tombé.

Fait à Ville-neuve lez Avignon, ce 13 octobre 1604.

Le Roy continuant ses prudences et prevoyances accoustumées pour s'acquérir des amis et des bienveillances, aussi bien hors du royaume, parmy les princes ecclesiastiques, comme parmy les protestans, à la pluspart desquels il donnoit entretenement, voyant dans vostre cabinet l'estat d'iceux, il vous ordonna d'y adjouster le coadjuteur de Cologne pour vingt mil livres, de quoy M. de Ville-roy vous avoit escrit auparavant une lettre inserée cy-devant.

## CHAPITRE CXLVI.

*Grand conseil tenu à Paris. Discours du Roi. Retraite préparée aux militaires vieux ou estropiés. Le trésor royal déposé à la Bastille. Affaires étrangères. Du Perron cardinal. Origine du Molinisme. Affaire de la Valteline et des Grisons.*

Pour mettre fin aux memoires de cette année 1604, nous employerons icy quelques expeditions obmises es années precedentes, quelques-unes de celles de la presente, et ce dont il nous est souvenu touchant les affaires estrangeres ; et commencerons par une lettre que le Roy vous escrivit, dont la teneur estoit telle :

*Lettre de la main du Roy à M. de Rosny.*

Mon amy, je vous fais ce mot, et vous depesche ce courrier exprez, pour vous dire que vous ne veniez point icy, pour ce que j'espere estre demain au soir, Dieu aydant, à Paris, ou jeudy matin au plus tard, resolu d'aller aussi tost à l'Arsenac pour y faire mes affaires, où je les feray mieux qu'en ce lieu cy. Bon soir, mon amy.

Ce mardy au soir, 7 decembre, à Saint Germain en Laye.

HENRY.

En suite de ce qui est dit en cette lettre, le Roy desirant de faire travailler aux amenagemens de son royaume, apres avoir resolu les especes d'expediens par lesquels il vouloit commencer, il voulut en faire luy mesme la proposition en une grande assemblée de quelques officiers de chacune de ses cours souveraines de Paris, et des principaux de son conseil d'Estat, justice, finances et police. Apres en avoir baillé la liste à monsieur le chancelier, et nommé un jour certain pour leur faire entendre ses intentions, lors qu'il sçeut qu'ils estoient tous assemblez dans le grand cabinet du bout de la grande salle des gardes, qui est joignant celuy de sa chambre, il ne manqua pas de s'y trouver aussi tost, et lors les ayant tous fait asseoir, il leur parla ainsi :

*Harangue du Roy aux deputez.*

Messieurs, j'estime que chacun de vous se souvient encore de l'estat miserable où estoient reduites les affaires de France lors qu'il pleust à Dieu m'appeller à cette couronne, et que, le comparant à la condition presente, il loue et remercie en son cœur la bonté divine d'un si heureux changement, pour la perfection duquel vous sçavez combien librement j'ay exposé ma vie aux perils, et supporté toutes sortes de travaux, lesquels je tiens bien et dignement employez, pourveu seulement que la memoire vous en demeure. Mais



mon affection paternelle envers mes sujets ne me permet point de m'arrêter en si beau chemin, ains me convie à employer derechef ma personne et chercher tous moyens pour rendre telles felicités plus durables, et faire en sorte que, malgré tous accidens, chacun puisse jouir à l'advenir, comme il fait à present, des commoditez publiques et privées, choses que je tiens tres-difficiles, s'il n'y est remedié par un bon ordre, et tres-grande prévoyance, à cause de l'extrême pauvreté que je recognois au peuple de la campagne, lequel est celui qui nous fait tous vivre : car arrivant un changement de regne, ou quelque mouvement de guerre en ce royaume, comment estimez vous qu'il soit possible de subvenir à telles despences extraordinaires, puis que tout le revenu d'iceluy, quelques excessives qu'en soient les impositions, peut à grande peine porter les charges et despences du courant ?

Lors que les roys mes predecesseurs sont tombez en pareilles adversitez, ils ont eu recours aux alienations de leurs domaines, constitutions de rentes, creations d'offices, augmentations de tailles, gabelles et impositions; mais maintenant toutes ces choses sont parvenues à tel excez, qu'il ne s'en peut tirer ny esperer aucune assistance. Quoy donc, faudra-il laisser dissiper l'Estat, ou l'assujettir aux estrangers ? Je m'assure que nul de vous n'a le cœur si lasche que de l'endurer. Pour mon regard, je souffrirois plutost mille morts, et espere vous laisser des enfans pour roys, qui n'auront pas moins de courage. Parquoy, ne sçachant où prendre des moyens, tenez pour certain que l'on s'adressera au fonds des rentes, comme le plus facile, et crains qu'en fin, telles affaires continuans ou tirans à la longue, eux ou moy soyons contraints par la necessité, qui est la loy de toutes les loix, de faire banqueroute non seulement à cette nature de dette, mais à tous creanciers de l'Estat, chose que je veux éviter de toute ma puissance, et l'éviteray infailliblement si vous y contribuez, ce que l'ancienne fidelité des François me fait esperer de vous.

C'est pourquoy, voyant que la paix et le repos universel que mes labeurs ont acquis à la France, nous promet, ou plutost nous appelle à des consultations et occupations si loüables et si justes, je me suis resolu, pour prevenir tels inconveniens, d'entrer au rachapt et admortissement des rentes, engagement de domaines, suppression d'offices et diminution d'impositions, en remboursant du sort principal les propriétaires qui les ont acquises loyalement et de bonne foi. Mais, avant que d'ouvrir aucun expedient, je desire prendre vostre conseil et recevoir vos ad-

vis communs ; et pour vous donner moyen les mieux former, je veux que sans vacquer aucune autre affaire, soit publique ou privée, vous vous assembliez deux fois le jour, afin de trouver les expedients plus propres et avantageux pour faciliter cette mienne intention. A quels j'escouteray volontiers, et les approuverai si l'exécution peut suivre la proposition : sur j'espere moy-mesme vous faire des ouvertures, ne seront à rejeter, ne desirant établir la justice en cette affaire que celle qui de droit peut pratiquer entre deux particuliers. Mais quoy qu'il y ait, tenez pour arresté en vos esprits que je ne me departiray jamais d'une telle resolution, quelques difficultez et empeschemens vous y puissiez apporter, d'autant que je le tiens non seulement juste et utile, mais tellement necessaire que la conservation de cet Estat y est conjointe et attachée. Travaillez donc de courage et de courage à un si bon affaire, qui est par vous mesmes, et pour le bien de tous en general, et chacun en particulier me fasse cognoistre combien il m'ayme, et desire faire service agréable, vous souvenant que je n'oublieray jamais ceux qui auront bien ou mal procedé en cette occasion, mais le recognoistray chacun selon son merite, et que je veux estre esclaircy de vos deliberations dans huit jours.

Le Roy n'estimant pas que des capitaines payez, des soldats negligez, levez à coups de baston, et retenus au camp et en devoir par crainte des prevosts, des prisons et des portes, portassent jamais grande amitié à ceux qui employeroient, ny combattissent de cœur et courage, comme il appartient, et supportassent gayement les peines, perils et fatigues de la guerre, se resolut de preparer des moyens pour les souldoyer suffisamment, et leur subvenir leurs necessitez, playes, et maladies ; et pour y parvenir, de mesnager tellement ses revenus et regler de sorte ses despences non absolument necessaires, qu'il pût faire tous les ans quelque reserve de deniers : ce que vous ayant fait pratiquer es années 1603 et 1604, il fit expedier une ordonnance pour la conversation d'iceux deniers, icelle estant telle que s'ensuit :

*Déclaration du Roy pour mettre de l'argent à la Bastille.*

Le Roy ayant resolu de faire un fonds de deniers, pour s'en servir et ayder aux occasions qui peuvent arriver, et par ce moyen pourvoir la seureté, manutention et conservation de son Estat et couronne, contre les mauvais et pernicieux desseins de ses ennemis, veut et ordonne que d'oresnavant tous les deniers revenans des

en son espargne, enfin de chacun quartier, apres les despences ordinaires et necessaires acquittées, estre par les tresoriers de sondit espargne, chacun en l'année de leur exercice, mis en son chasteau de la Bastille, és coffres que sadite Majesté y a fait mettre à cet effet, et ce en la presence du sieur marquis de Rosny, conseiller de sadite Majesté en ses conseils d'Estat et privé, grand maistre de l'artillerie de France, et superintendant des finances, et de maistre Jean de Vienne, conseiller audit conseil d'Estat, et controlleur general desdites finances; lesquels auront chacun une clef desdits coffres, et bailleront audit tresorier de l'espargne estant en exercice, qui aussi aura une clef, certifications signées de leurs mains, des sommes de deniers qui auront esté par luy mises esdits coffres, lesquelles certifications sadite Majesté veut et entend servir de descharge valable audit tresorier de l'espargne, jusques en fin de son exercice; apres lequel expiré, et avant la verification de son Estat, son compagnon d'office, qui luy succedera audit exercice, sera tenu, et luy ordonne sadite Majesté, de prendre lesdites certifications, et au lieu d'icelles expedier sa quittance, à l'acquit de son compagnon d'office, pour la somme à quoy monteront lesdites certifications, et qui sera esdits coffres, dont il pourra faire verification, si bon luy semble, laquelle somme sadite Majesté veut estre passée et alloüée és comptes dudit tresorier de son espargne, sortant d'exercice, en vertu de ladite quittance, par les gens de ses comptes, ausquels elle mande et ordonne ainsi le faire, sans aucune difficulté. Et pour plus ample approbation du contenu cy-dessus, sadite Majesté a voulu signer la presente ordonnance de sa propre main, et fait contre-signer par moy, son conseiller d'Estat, et secretaire de ses commandemens et finances.

A Paris, le vingtiesme jour de juillet 1602.

HENRY.

Et plus bas, DE NEUF-VILLE.

Nous finirons les Memoires de cette année 1604, par les choses qui se passeront au dehors du Royaume, lesquelles vous furent escrites par messieurs les ambassadeurs du Roy, à sçavoir : monsieur vostre frere à Rome, M. de Salignac en Turquie, M. de Barrault en Espagne, M. de Beaumont en Angleterre, M. de Busenval és Provinces Unies, messieurs de Vic et de Pascal és Suisses, et autres, sans neantmoins inserer leurs lettres, afin d'abreger, nous contentans de vous ramentevoir en sommaire et substance les choses principales d'icelles. Et commençant par Rome, nous dirons comme le Pape, se voyant vieil et maladif, et desirant, avant que mourir,

de fortifier son neveu le cardinal Aldobrandin, de nombre de creatures dans le conclave, afin qu'il peut faire apres un Pape à sa devotion, fit une promotion de dix-huict cardinaux, du nombre desquels il en accorda deux à la devotion de France; surquoy il y eut force brigues près du Roy, dautant que messieurs de Ville-roy, de Bellievre, de Sillery, et leurs amis, firent de merveilleuses instances à ce qu'il pleust à Sa Majesté nommer les sieurs de Villars, archevesque de Vienne, et de Marquemont : mais ils trouverent pour opposans, premierement le propre mouvement du Roy, qui voulut favoriser la pieté de Seraphin Olivary, et les merites et grand sçavoir de M. du Perron, evesque d'Evreux, appuyez de vos sollicitations qui prevalurent à tout ce qu'ils peuvent faire et dire. Et quoy que M. du Perron sceut bien que M. de Ville-roy s'estoit opiniastrement bandé contre luy, neantmoins, faisant par vostre conseil plutost le courtisan que le theologien, il luy en escrivit aussi bien qu'à vous des lettres de remerciemens, que je suis marry de n'avoir pû recouvrer, afin de les inserer icy.

Il vous fut encor donné advis de Rome de deux broüilleries qui y estoient arrivées : l'une, pour la franchise de la maison du cardinal Farnese, que l'ambassadeur d'Espagne soutint contre le Pape; et l'autre, sur trois propositions de trois Jesuistes, pour et contre lesquelles il fut bien discouru et bien escrit; la premiere, qu'il n'estoit point de l'essence de la foy de croire que le Pape fût successeur de Saint Pierre; la seconde, que la confession se pouvoit faire par missives; et la troisieme, par Molina, soutenant qu'en l'acquisition du salut, le franc arbitre concurreoit avec la grace. De Constantino-ple vous fut escrit comme Mahomet estant mort de peste, et son fils Achmet luy ayant succédé à l'âge de quatorze ans, l'une des premieres choses qu'il fit fut de releguer sa grand mere, qui avoit tout gouverné et gasté les affaires avec Sinan Bassa, lequel ayant esté mandé, s'enfuit. Le Perse luy fit la guerre, et prist sur luy quelques villes. D'Angleterre vous fut donné advis comme le roy d'Angleterre avoit fait son entrée à Londres, changé le nom dudit pays et d'Escosse en celuy de la Grande-Bretagne, fait tenir une conference entre les Puritains et Anglicans, et conclud la paix avec Espagne. M. de Busenval vous escrivit infinies particularitez du prompt siege et prise de l'Ecluse, et du long siege et capitulation d'Ostade; comme aussi messieurs de Vic et de Pascal, des grandes menées et pratiques dont usoit le comte de Fuentes envers les Grisons, pour leur faire rompre les alliances

qu'ils avoient avec France et Venise, et pour se saisir de la Valtoline, sur l'importance de laquelle, et les moyens de conserver l'un et l'autre à la dévotion de France, vous furent envoyez deux amples Memoires, sur lesquels vous fistes de grandes remonstrances au Roy, que pour leur importance nous nous sommes licentiez de faire icy inserer.

Deux advis envoyez par le sieur de B. à monseigneur L. M. D. R., apres avoir communiqué sa lettre et ses Memoires à plusieurs bons serviteurs du Roy et de la couronne de France, residens es pays de Suisse, Grisons, Valtoline, Bressan et Bergamas; que suivant l'intention dudit seigneur :

Premierement est à noter que tous les plus gens de bien, et qui se sont tousjours monstrez affectionnez à la couronne de France, quoy qu'entre iceux il y en ait plusieurs faisant profession de la religion catholique, apostolique et romaine, recognoissent et confessent tous unanimement que ce qui retient et oblige le plus aujourd'huy les cantons des Suisses, les trois ligues Grises et la Valtoline, à se maintenir en l'alliance de France, est la seule religion protestante, de laquelle le plus grand nombre, les plus puissans cantons et ligues Grises, et sur tout les plus apparens et qualifiez personnages, font ouverte profession, lesquels par consequent ne veulent, ne doivent, ny mesme ne peuvent, sinon en toute extremité et lors qu'ils se verront entierement dénuiez des secours et assistances françoises, s'allier ny confederer avec le Pape, ny le roy d'Espagne, lesquels ils estiment leur devoir estre à tousjours ennemis capitaux.

Plus, pour les raisons susdites et autres que la prudence et la loyauté du seigneur auquel ces Memoires s'adressent y peut adjouster, ils le supplieroient volontiers de vouloir estre leur intercesseur envers le Roy tres-chrestien son maitre, afin qu'il pleust à Sa Majesté de leur donner un ambassadeur de leur profession, ou pour le moins un de telle probité et inclination que M. Pascal, qui s'est tousjours monstré bon François, ennemy d'Espagne, et non contraire aux protestans, afin qu'avec plus de liberté, confiance et assurance, ils luy puissent, en tout temps et en toute occasion, communiquer tous leurs secrets et importantes affaires; et seroit à desirer qu'il fust homme de guerre et bon capitaine, car, par ce moyen, Sa Majesté de France seroit mieux servie, et beaucoup plus fidellement advertie de tout ce qui se passera, et mesmes pourroit arriver à tel temps et telles affaires, que celui qui auroit cette charge, ayant ces qualitez, en remporteroit gloire et utilité.

Plus, est à remarquer par ceux qui trouveroient quelque chose à redire en ces advis, que le principal fondement d'iceux est pour s'opposer aux desseins de l'Espagnol, contrequarrer ses pratiques, et user de ces mesmes artifices par lesquels il va minant et sappant, non seulement le credit et l'autorité que la France a tousjours essayé de se conserver parmi les cantons et ligues Grises, mais aussi tout leur estat democratique, tant par la corruption d'aucuns de leurs propres ministres, voire mesme de leurs docteurs ou pasteurs, qu'il gagne tantost par argent, tantost par promesses, tantost par menaces et autorité, lesquels luy aident en ses desseins envers les protestans, que par les persuasions des Jesuites et Capucins, et persuasions qu'ils impriment es cœurs des catholiques, apostoliques et romains : si bien qu'encor qu'ils soient en plus petit nombre, si est-ce qu'appuyez qu'ils se sentent des menées et larges promesses et remunerations d'Espagne, ils osent non seulement contrequarrer les protestans, mais entreprennent souvent de leur donner la loy, comme cela ne s'est que trop verifié en la ville de Bade, en la personne d'un libraire, lequel, portant parmi ses livres la delivrance de Geneve (lors qu'elle fut surprise par le duc de Savoye), fut condamné au foüet, le livre bruslé entre ses mains, et banny de leurs terres, quoy que ladite ville de Bade appartienne en general aussi bien aux cantons protestans qu'aux catholiques.

Plus, sera considéré que depuis peu l'on a construit dans la ville de Rapschveil, sur le lac de Zurich, un couvent de Capucins, quoy qu'il y ait desja grande quantité d'autres eglises, estant aisé à voir que cela ne se fait à autre dessein que pour favoriser ceux d'Espagne, attendu l'importance du passage, tant dudit Rapschveil, que de Laqua, villes fort bigottes, et de grande importance pour estre situées sur le lac, entre les terres de Zurich et le pays des Grisons, par où il faut necessairement passer pour se secourir les unes les autres; mesmes que lesdites deux villes sont voisines des cinq petits cantons, et que l'une d'icelles, à sçavoir Laqua, leur appartient, et se peuvent toutes deux rendre tres-fortes, à cause de leur belle assiette; et y a toutes sortes d'apparences que l'Espagnol s'en saisira, en cas que les Suisses ou Grisons entrent en guerre offensive ou deffensive contre luy, ou pour le moins taschera de jeter la division parmi les cantons des Suisses; et pour y parvenir assistera les cinq petits, qui sont tous à sa devotion, d'hommes et d'argent, pour leur donner courage de se saisir desdites deux villes et de les fortifier, afin d'empescher, comme il a esté dit, le passage

des vivres, que les Grisons ne peuvent avoir d'ailleurs que de Zurich par le lac.

Plus, est à noter qu'à la sollicitation des factionnaires d'Espagne, les cinq petits cantons, pour tesmoigner leur zele envers ce Roy, ont chassé de leurs terres tous les protestans, leur imputans d'estre de la faction françoise.

Plus, est à noter que c'est une opinion commune entre les plus qualifiez et mieux censez des Grisons, qui sont de faction françoise, qu'une partie des pensions que le Roy tres-chretien donne en leur pays, seroit mieux employée, si elles estoient departies secrettement aux ministres, qu'elles ne sont pas, estans distribuées à plusieurs autres qui n'ont ny grand merite ny grande creance parmy le peuple, lequel l'a quasi toute en ceux qui par leurs exhortations ordinaires le peuvent esmouvoir ou retenir en devoir envers le Roy tres-chretien : à quoy deux mil escus pourroient satisfaire, d'autant qu'il ne faut departir qu'environ vingt ou trente escus à chacun de ces ministres.

Plus, il se faut bien imprimer en l'esprit, comme chose tres-certaine, que l'Espagnol, quelque artifice dont il se serve pour le faire croire, n'accordera jamais aux Grisons ce qu'ils demandent ; à sçavoir que la capitulation qu'ils feront avec luy soit entenduë, sans prejudice des articles de l'alliance qu'ils ont avec les roys de France, pour le passage des forces qu'ils voudroient envoyer en Italie, par leurs terres, veu que cette clause est le principal but et visée de cette capitulation : tellement que les Grisons seront en fin contrainsts de pourvoir à leur seureté, par des fortresses qu'ils doivent opposer à celles que le comte de Fuentes a fait faire sur leur frontiere ; à quoy il sera bien difficile qu'ils puissent satisfaire, voire du tout impossible, à cause de leur extrême pauvreté, et auroient besoin d'estre assistez de grands et immenses tresors de Sa Majesté tres-chrestienne.

Plus, sera notté que les Grisons sont aujourd'huy divizez entr'eux à cause de la reformation que l'on a faite au manient de leurs affaires et revenus, laquelle porte coup contre l'honneur et le bien de ceux qui par cy-devant ont exercé les charges publiques et eu l'administration des deniers de leur republique, qui est cause de les avoir rendus partisans d'Espagne, afin de se garantir, par l'autorité du Roy de ce pays-là, de l'oppression où leurs poursuivans les veulent envelopper en ruine manifeste ; et sont à present en tel desespoir, qu'ils luy decouvriront toutes les affaires et secrets du pays, pour se maintenir en sa bienveillance et y trouver protection en cas de necessité.

Plus, est à remarquer qu'il n'y a eu quasi sorte d'artifice dont les partisans espagnols n'ayent usé pour persuader aux cantons et aux liguees Grises, voire mesme aux Venitiens, que Sa Majesté tres-chrestienne ne les veut faire entrer en ce dessein (qui les porte à une guerre infaillible) que pour donner des affaires au roy d'Espagne, à l'utilité et commodité des siennes, et nullement de celles de ses alliez ; ce qui a esté cause de la resolution dernièrement prise à Bade, contre les promesses que les cantons protestans avoient faites un peu auparavant en l'assemblée tenuë en la ville d'Aro : tellement que, pour le present, les Suisses semblent plutôt disposez à demeurer en paix qu'à se jeter en guerre, voire est à craindre que, s'accoustumant à ce relaschement de courage, ils aiment mieux voir un jour perdre les Grisons devant leurs yeux que de troubler leur repos pour les assister ; tout cela procedant des ruses et artifices de l'ambassadeur d'Espagne, les persuasions duquel ont eu plus de pouvoir envers les catholiques (d'autant qu'estant de leur religion, il leur parle avec plus de franchise, comme ayant mesmes interests de religion) que non celles de l'ambassadeur de France qui est catholique, ayant à traiter avec gens de contraire religion à la sienne, et partant ne sont esgalement portez avec mesme zele et mesmes interests de religion.

Plus, sera considéré, comme chose des plus importantes en cas de guerre, que les peuples des Grisons sont aujourd'huy inexperts aux armes, tellement qu'il n'y a pas beaucoup d'assurance en leurs forces, s'ils ne sont assistez de bons capitaines, voire de soldats pollicez et aguerris pour se discipliner avec eux ; et seroit à desirer, en cas de guerre, que l'ambassadeur de France fût de profession militaire, et non contraire à la religion de ceux qui sont par leurs propres interests (qui est le plus solide bien de toutes confederations) partisans des roys et de la couronne de France ; car de commencer la guerre avec gens nouveaux, il n'y a apparence quelconque, considéré mesmement que la plupart des hommes de la Valtoline (qui est le lieu par lequel apparemment la guerre viendra à se commencer) estant catholiques comme ils sont, ils inclineront et favoriseront plutost ceux de Milan que les Grisons, tant à cause de la religion que pour les particulieres commoditez du trafic qu'ils ont avec les peuples de ce duché, sans la communication desquels ils ne sçauroient faire aucun commerce, non pas mesmes vivre commodément.

Plus, doit estre considéré que le pays de la Valtoline est entierement destitué d'artillerie, et

qu'il est impossible d'y en faire passer du costé des Grisons, et que les fruicts, grains et autres vivres qui se recueillent en icelle, quelque fertile et abondante qu'elle puisse estre, ny les bestiaux qui s'y peuvent nourrir, ne sont pas capables de substanter ny vestir les habitans d'icelle, huit mois de l'année, à plus forte raison des troupes estrangeres, s'il y en falloit entretenir pour la conserver et garantir, ou reconquerir si les Espagnols s'en estoient saisis, comme ils n'y manqueront pas l'occasion s'en offrant; mais seroit-on contraint d'y apporter des vivres, sur le dos des hommes et des mulets, tant de Zurich et autres villes de Suisse, que de Bresse, Bergame et autres villes de l'Estat venitien, si ce n'estoit que les Suisses et Grisons ensemble en entreprissent la conquête, si elle avoit esté prise, et que les Espagnols, contre leur coustume, qui est de ne jamais quitter ce qu'ils tiennent, negligassent la deffense d'une piece si facile à garder, et qui leur est de si grande importance.

Plus, faut tenir pour assuré que les Grisons ne commenceront point plutost le travail des fortifications qui leur sont necessaires contre le fort du comte de Fuentes et pour la seureté des passages, que l'Espagnol ne s'efforce de l'empescher par toutes sortes de voyes; et de cela n'en doutent-ils en aucune façon: tellement que tous les serviteurs et partisans que Sa Majesté tres-chrestienne peut avoir en Suisse et pays des Grisons, tiennent qu'il sera impossible de les disposer à une telle entreprise, dont la despence qu'il leur faudra faire pour la mettre en sa perfection ne scauroit estre moindre de cent cinquante mil ducats, si Sa Majesté tres-chrestienne n'est resoluë d'y contribuer au moins les deux parts, et si ils ne sont assurez que monseigneur le marquis de Rosny, outre la bonne volonté qu'il tesmoigne par ses lettres en ce dessein, ne leur donne parole qu'il ne sera point abandonné, et qu'il se rendra le solliciteur d'iceluy, et l'intercesseur envers Sa Majesté, pour obtenir les choses necessaires.

Plus, est à noter (et à craindre que la verification ne s'en fasse que trop tost pour tous les partisans de la couronne françoise) qu'encor que l'Espagnol file maintenant assez doux, et tesmoigne de ne vouloir rien empieter sur le territoire des Grisons, et ait mesme fait retirer quelques tranchées qu'il y avoit avancées, à cause de la crainte qu'il a du courage, de la puissance et de l'opulence du Roy tres-chretien, si ne faut-il nullement douter qu'il n'abandonnera jamais le dessein que toutes sortes de raisons et d'utilitez pour la grandeur et seureté de ses Estats luy ont fait former, voire quand il n'y auroit que ces

deux seules causes, à sçavoir, pour joindre tous ses Estats d'Italie avec ceux d'Allemagne, et empescher le passage de tous gens de guerre ultramontains en Italie, et toute communication du Roy de France, des Suisses et des Grisons avec les Venitiens et leurs Estats, lesquels, par interests communs, qui est le plus ferme bien de toutes associations, sont confederez ensemble, et n'arrivera jamais affoiblissement de reputation ou de puissance en la monarchie tres-chrestienne que l'Espagnol ne tesmoigne qu'il ne se depart point du dessein cy dessus dit.

#### CHAPITRE CXLVII.

*Continuation de l'affaire de la Valteline. Mission de Mont-martin en Suisse, et dans le pays des Grisons.*

La Valteline est une terre située au pied des plus hautes montagnes du pays des Grisons, au delà des Alpes, tres-fertile, tant en bleds, vins, pasturages, qu'en arbres fruictiers et chataigniers, habitée de plus de cent mille creatures humaines, dont la plus grande partie font profession de la religion catholique romaine.

Sa longueur contient vingt-deux heures de chemin à cheval, mais sa largeur n'est que d'une petite lieuë françoise, au milieu de laquelle passe la riviere Ada, qui prend son origine au plus haut de ladite vallée, vers Bormes, par où on descend au comté de Tirol, laquelle riviere va de plus en plus grossissant, tout le long de ladite vallée, par les ruisseaux qui découlent des torrens de part et d'autre, en telle sorte que venant à se rendre et vider dans le lac de Come, pres du fort de Fuentes, elle n'est gueres moindre que la riviere de Marne en France.

Elle confronte, du costé d'orient, avec le comté du Tirol; toutesfois la vallée se resserre tellement que les entrées et yssuës y sont fort estroites et les passages tres-difficiles.

Du coté de midy, elle a ses confins sur le haut des montagnes de Bresse et Bergame, pays Venitien, dont la croupe inaccessible sert de rempart durant toute la longueur de ladite vallée: neantmoins de ce costé il y a deux passages frequens, l'un prés de Tiran, pour aller en Bresse, l'autre prés de Morben, pour aller en Bergame.

Du costé d'occident, elle est bornée des terres du duc de Milan, aboutissante au lac de Come, où le nouveau fort a esté construit, et par mesme moyen y sont faites les tranchées; en sorte que, depuis la montagne jusques au lac, on ne pourra entrer ny sortir de la Valteline dans le Milanois que par la porte de la tour faite sur le passage de la frontiere.

Du costé de septentrion, elle confronte les Alpes habitées par les Grisons, de maniere que toutes les vallées et passages desdites Alpes pour descendre en Italie, se viennent rendre dans ladite Valtoline; ce qu'il faut exactement remarquer, dautant que la disposition de son estendue d'orient en occident sert d'un grand et large fossé pour separer les Alpes qui appartiennent aux Grisons, d'avec les montagnes qui restent du costé de l'Italie, depuis le comté de Tirol jusques au lac de Come; et pourtant il est aisé à juger que cette consideration tant importante a esté le principal motif de la construction du fort que le comte de Fuentes a fait faire au bout de ladite vallée, sur un grand rocher eslevé au milieu de la plaine, esperant, par ce moyen, obtenir de deux choses l'une, ou de contraindre les Grisons à capituler avec luy, au prejudice des alliances qu'ils ont cy-devant faites avec les roys de France, ou, en cas de refus, se saisir de la vallée, lors que le temps et l'occasion s'en presentera, pour joindre les terres d'Austrie avec celles de Milan, par cette tant importante conquête.

Et que tel ne soit le dessein de l'Espagnol, il en apert assez, tant par les articles qu'il s'est fait n'agueres accorder à Milan par les deputez des Grisons, que par les tranchées et fortifications qu'il fait continuer depuis le fort jusques à la montagne opposite, pour brider les habitans de la Valtoline, et ne leur permettre d'oresnavant le passage que par les portes qu'il fait faire sur les limites de sa terre.

Que si les Grisons n'avoient affaire qu'à un duc de Milan, comme par le passé, il y auroit de l'apparence qu'ils pourroient opposer leurs forces aux siennes, pour guarentir et conserver ce qui leur appartient; mais ayant à present à démesler leurs affaires avec un roy d'Espagne, beaucoup plus puissant qu'eux, il faut croire qu'il se prévaudra de leurs foiblesses en temps et lieu, et fera naistre des occasions de jour en jour, pour venir à bout de ses desseins, soit en jettant la pomme de discorde, comme il a desja fait, parmy ceux qui ont quelque credit et autorité en leur gouvernement democratique, soit en troublant et inquietant les habitans de la Valtoline, par artifices dont il s'aydera, à cause de la diversité des religions, afin qu'en quelque façon il les retire volontairement de l'obeissance qu'ils doivent à leurs superieurs, par promesses emmiellées d'une plus grande franchise sous sa domination.

Mais comme la maladie est plus facile à guerir lors qu'elle est bien cognüe, aussi n'y a-il point de prise plus seure sur nos ennemis que de

sçavoir leurs desseins. Puis donc qu'il est notoire que les Espagnols ne visent à autre but que de se rendre maîtres de la Valtoline, pour les causes cy-dessus desduites, il est aisé à messieurs les Grisons de rompre leur dessein par trois remedes.

Le premier est de maintenir entr'eux la paix, la concorde et l'union qui doit estre entre les peuples qui se veulent conserver en liberté par Estat democratique, sans permettre que la diversité des religions y puisse rien alterer. Pour ce faire, il est requis d'assoupir tous differends qui peuvent estre entr'eux, en moderant les arrests donnez contre ceux qui ont cy-devant manié les affaires de leur republique; en telle sorte que la reformation qu'on fera ne porte aucun prejudice à leur honneur, mais qu'elle puisse aussi desormais regler les devoirs de ceux qu'on eslira, pour oster la cause des divisions et partialitez, afin que les resolutions qu'on fera pour l'advenir soient fermes et stables, dautant qu'il n'y a rien plus dangereux en un Estat que l'irresolution lors qu'il faut executer les deliberations d'un conseil. Voila pourquoy les charges importantes de leur republique ne doivent estre commises à gens ignorans ny presumptueux, mais à personnages d'experience, bien cogneus et qualifiez, et qui n'ayent seulement le sçavoir, mais aussi le pouvoir et le vouloir de bien faire.

Le second est de se maintenir en l'alliance du roy de France, afin que les Grisons puissent tousjours estre secourus d'un grand Roy qui ne leur soit point suspect, en cas que pour leur conservation il leur faille avoir recours aux armes; car en ce faisant, ils n'innovent rien; au contraire, ils demeurent fermes dans les alliances de leurs predecesseurs.

Le troisieme regarde les moyens qu'il faut tenir pour conserver la Valtoline sous leur obeysance par les forteresses qu'il y faut faire; l'une sur l'emboucheure de la vallée de Postchiane, afin que les Grisons ayent en tout temps ce passage libre pour entrer et secourir la Valtoline avec tel nombre de forces qui sera necessaire; l'autre forteresse doit estre une trenchée qu'il faut faire en tenaille, depuis la montagne du costé de midy, au lieu nommé le Tarteau, jusques contre le rocher qui se rencontre vis à vis, au pied duquel passe la riviere Ada; laquelle trenchée il faudra bastir de la pierre qui se trouve sur le lieu en grande quantité, et donner à la muraille qu'on y fera de pierre seche, trois toises de hauteur, sur deux toises d'espesseur au fondement, avec le tallu necessaire; faut aussi faire en chacun costé, sur le haut des rochers, une tour ronde pour asseurer le haut, et une porte avec son pont-levis, au

milieu de la tranchée, et pareillement les corps de garde requis pour la garde ordinaire.

Par ce moyen, messieurs les Grisons rompront le dessein de leurs ennemis, conserveront leurs anciennes alliances, pour se maintenir en force, et garantiront leurs sujets de la Valtoline des courses et invasions que l'Espagnol pourroit faire, tant de nuit que de jour, en cas de guerre; car de penser que l'Espagnol démolisse cy-apres le fort qu'il a fait faire sur eux, en consideration des capitulations qu'ils pourront faire avec luy, c'est se tromper; d'autant que, selon toute vraye maxime de guerre et d'Estat, la nature du lieu où le fort a esté construit, requiert necessairement qu'il y soit conservé, quand bien il seroit paisible possesseur de la Valtoline. Voila pourquoy il n'a point manqué de prendre son temps à la premiere occasion qui s'est présentée, et avec mesme ruse ne manque point encor d'entretenir les Grisons de vaines esperances, jusques à ce qu'il se puisse moquer de leur credulité, pour leur faire recevoir les capitulations qu'il leur presentera, au prejudice de leurs anciennes alliances, et par consequent au détriment de leur honneur et liberté.

*Lettre de M. de Mont-martin à M. de Rosny.*

Monseigneur, puis qu'il vous a plu me faire honorer du voyage vers les Suisses et Grisons, je manquerois à mon devoir et au tres-humble et tres-fidele service que je vous dois, si je ne vous representois ce qui s'y est passé.

Monseigneur, suivant mon instruction, qui portoit en ses termes de me conduire entiere-ment par les advis et conseils de M. de Vic, j'allay droit à Solleure le trouver, et dès le lendemain nous acheminasmes à Coire, où estoit assignée la diette des Grisons, qui commença le douziesme de juin. Mais ledit sieur de Vic ayant receu lettres de M. Canaye, ambassadeur pour le Roy à Venise, par lesquelles il mandoit le grand refroidissement des Venitiens pour l'assistance des Grisons, leurs confederez, ne fut d'advís que je presentasse les lettres du Roy, ny que je leur fisse entendre ma legation; et le voyant si ferme et arresté en son opinion, quelque instance que je luy en peusse faire, je me resolut de promptement executer ce qui restoit de mon instruction.

Monseigneur, nous avons recognu le mieux qu'il nous a esté possible les chemins de Via, Mala, Splougue, Cordenel, le fort de Fuentes, toute la Valtoline, les passages pour entrer au Berguamasque et Bressan; et retournant par la vallée de Posquiaux, qui me semble le plus aisé et facile chemin, j'ay veu soigneusement les pas-

sages de la montagne de Bernine, les vallées des Egnedines et la montagne de Burgun.

Monseigneur, nous avons tiré le plan dudit fort de Fuentes, à veüe de quatre a cinq cens pas, considéré de la montagne et de la plaine, par mesme fait une carte de toute la Valtoline, avec la remarque des passages, tant à venir d'Italie que de l'entrée des Grisons, joint une petite carte des Suisses, ce que j'espere, monseigneur, que nous vous ferons voir à vostre desire retour. Ledit fort de Fuentes est construit sur une montagne escarpée d'un roc, de hauteur de plus de deux cens pieds, et n'y a rien d'élevé aux environs a portée de canon pour placer une batterie; les fortifications sont formées sur la situation de la montagne, en petites pointes et angles; de la nature du lieu, la place est spacieuse, et se juge de trois journaux de terre; l'entrée est du costé du lac de Cosme, bien que ledit fort en soit esloigné de plus de six cens pas, et ce qui est entre-deux sont prairies et marais. Sur le bord dudit lac est placé, en veüe dudit fort de Fuentes, un autre petit fort pour empêcher le passage; car, en cet endroit, le lac n'est large que de deux à trois cens pas.

Monseigneur, le jugement des plus advisez d'Italie, des Grisons et Suisses, et mesmes du sieur de Vic, et du sieur Patavino, ambassadeur des Venitiens aux Grisons, sont conformes que ledit fort de Fuentes a son vray sujet pour posseder la Valtoline, se saisir des passages de l'entrée des Grisons et d'Italie, chose facile, faire une barre entre l'Italie et les Grisons, se joindre à l'Allemagne par le comté de Tirol, qui est attaché au bout de la Valtoline, et à considerer que dudit fort, en vingt heures de chemin facile et aisé, l'on peut entrer dans ledit comté de Tirol, qui est à l'Empereur.

Monseigneur, nous fismes si bonne diligence que nous arrivasmes à Coire plus de six jours devant que l'assemblée des Grisons se deust finir, en esperance que ledit sieur de Vic auroit changé d'advís, estimant qu'il estoit à propos, pour encourager et fortifier les Suisses et Grisons, de leur représenter en termes generaux, sans specifier, la bonne affection du Roy à la conservation de leurs souverainetez et libertez; mais ledit sieur de Vic opiniastra que ce seroit faire bresche et prejudice au service du Roy, alleguant ledit refroidissement des Venitiens pour ces raisons, et que ce seroit porter Sa Majesté à la guerre, mesmes n'eust agreable que j'en communiquasse avec l'ambassadeur de Venise. Et me voulant tenir dans les limites de mon instruction, et voyant qu'il estoit d'advís de mon retour, avec regret je suis venu sans voir la fin de la

diette, mesmement que Alfonse Cazal venoit à ladite assemblée de la part du comte de Fuentes, pour traiter avec les Suisses et Grisons; et croy qu'il s'est plus acheminé pour faire des pratiques parmi eux, au prejudice de l'alliance de France, que pour leur donner aucun contentement; d'ailleurs que lesdites lîgues Grises, par l'advis des Suisses, excepté des cinq petits cantons, ont resolu de n'entendre à aucun traité que ces quatre poincts ne demeurent fermes et stables :

Le premier, que l'alliance de France et de Venise demeurera en son entier;

Que le fort de Fuentes sera desmoly, le commerce et le passage qui est deffendu, libre. Mais ledit comte de Fuentes tirera ce traité en longueur, et cependant fera achever de revestir ledit fort, auquel l'on m'a dit que cent hommes travaillent continuellement.

Alfonse Cazal est secondé en ses pratiques d'un Julio de La Torre, qui est pres du legat du Pape à Lucerne, publiant que le Roy ne peut vivre; que la France tombera bientost en guerres civiles; mettant tousjours sur l'eschaffaut la grandeur d'Espagne; portant leurs quadruples, qui ont du pouvoir en cedit pays, non aux cantons protestans, mesmes que Glaris (dont les deux tiers sont de la religion) qui avoit escouté, est revenu au bon chemin.

Les ambassadeurs des Suisses arriverent à Milan le jour de la Trinité, furent receus avec grand apparat; ils y estoient encor lorsque nous partismes de Coire. J'estime que les cinq cantons, Lucerne, Shvits, Sug, Uri, Undervald, jureront et renouvelleront l'alliance et deffence de l'estat de Milan.

Je sçay de bonne part et d'un de la caze Martinengue, et d'autres de celle de Palavisins, qui ont nombre de parens dans l'estat de Milan, que le comte de Fuentes y est fort haï, que la noblesse, villes et peuples s'en plaignent, lesquels il traite tres-mal.

Monseigneur, ce que M. de Vic n'a esté d'advise que je fisse en public, je l'ay fait en particulier; car je les ay eschauffez et encouragez, tant aux Suisses qu'aux principaux des Grisons, et aux communes par où nous avons passé, à se maintenir vertueusement en l'alliance de France, et asseurez de la bonne affection du Roy en la conservation de leurs autoritez et libertez; ce que messieurs de Ville-roy et de Sillery ont trouvé à propos, et regrettent que je ne l'ay fait en public, suivant la charge que j'en avois.

Monseigneur, le Roy m'a permis faire un voyage à ma maison jusques à vostre retour, auquel temps je ne faudray de vous venir trouver.

Sa Majesté partist hier pour aller à Monceaux, pour boire des eaux.

Esperant avoir l'honneur de recevoir bien-tost vos commandemens, je demeureray toute ma vie vostre tres-humble, tres-obeysant, tres-obligé et fidelle serviteur.

A Paris, ce vendredy 10 de septembre 1604:

MONT-MARTIN.

En suite de cette longue lettre de M. de Montmartin à vous adressée, nous y en adjousterons une autre fort petite de luy mesme, que nous avons trouvée parmy vos paplers, qui vous avoit esté escrite quelque temps auparavant, laquelle estoit telle que s'ensuit :

*Lettre de M. de Mont-martin à M. de Rosny.*

Monseigneur, suivant ce que vous aviez dit quelquesfois, lors que par vostre entremise le Roy m'envoya en Suisse et aux Grisons, que Sa Majesté vous avoit un jour commandé de luy faire faire un memoire assez clair, mais neantmoins tellement abrégé qu'il se pust donner la peine de le lire, touchant la republique des Suisses et de tous les alliez d'icelle, afin de faire cognoistre à ceux qui luy en parlent souvent, qu'il n'en est pas du tout ignorant; dequoy m'estant souvenu, estant en ce pays, j'en ay dressé un, pour me servir à moy-mesme, que j'ay tiré en partie d'un nommé Simler, et sur iceluy fait encor un abrégé que je vous envoie, afin que vous le puissiez presenter au Roy, s'il vous en parle encor; que si vous le trouvez trop succinct, et Sa Majesté aussi, je l'amplifieray tant qu'il vous plaira : surquoy attendant l'honneur de vos commandemens, je prieray Dieu, etc.

De Soleure, ce 16 juin 1604.

*Coppie du discours fort abrégé, dont est fait mention à la susdite lettre, et par vous monstré au Roy, apres que vous luy eustes rendu compte de ce que le sieur de Montmartin vous avoit escrit par sa grande lettre cy-dessus.*

Monseigneur, desirant de satisfaire le mieux qu'il me sera possible à deux choses que vous m'avez ordonnées, qui semblent avoir quelque contrariété, qui sont de faire un discours fort abrégé, et neantmoins bien expliqué, touchant le pays de Suisse, je vous diray en peu de paroles ce que peu de gens ignorent, et m'estendray un peu d'avantage sur ce qui n'est pas sçeu de tant de gens, à sçavoir :

Que ce que l'on appelle proprement le pays de Suisse est compris sous le nom de treize cantons, dont les uns ont une grande estendue de pays, et les autres fort petite, et neantmoins les plus petits sont les plus mutins et les plus hardis,



que je nommeray par l'ordre de leurs pressances, à scavoir :

Zurich, Berne, Lucerne, Uri, Svits, Underval, Zoug, Glaris, Basle, Fribourg, Soleure, Schafouze et Appenzel, nommez entr'eux *Eydgrossen*, c'est-à-dire confederez, à quoy je n'adjousteray rien d'avantage pour le present.

Lesquels ont pour alliez Saint-gal; les trois Ligues, dites Grisons des droictures et de la Cadée; les Valesiens, distinguez en treize communautéz, séparées par le haut et bas Valais, qui consistent en cinquante-quatre paroisses, dont l'evesque par eux nommé, est seigneur; Rotville, où il y a chambre imperiale; Mulhouse, ville imperiale en la comté de Ferretre; Bienne, qui est sous la domination de l'evesque de Basle, et n'est alliée que du seul canton de Berne; Genève, qui n'est aussi alliée que de ce seul canton; Neuf-chastel, qui a quelque alliance à aucuns cantons, mais sur tout à celui de Berne, Bade, Bremgarten, Frawendel, Mellingen, Rapes, Chunil, villes qui se sont données aux Suisses, à condition de leur garder leurs privileges. Il y a encor neuf bailliages, appelez communs, gouvernez par sept des cantons, scavoir, les comtez de Bade et de Rore, de Sargans et de Rhintal; et les cinq bailliages de de-là les monts, à scavoir, Lugano, Locarno, Mendrise, Valmadie et Bellizone.

Que si le Roy ou vous en desirez un plus ample memoire, je l'ay desja tout préparé pour vous l'envoyer; mais celui-cy m'a semblé suffisant pour le lire au Roy, nous ayant estimé à propos de faire finir nos recueils de l'année 1604 par une piece ainsi generale, en suite de nos discours touchant les affaires estrangeres, et sur tout la Valtoline.

#### CHAPITRE CXLVIII.

*Digression sur Henri IV et sur Rosny. Henri IV dans son intérieur. Scène familière. Compte sommaire rendu par Rosny des parties de l'administration dont il est chargé. Récapitulation de tous les chagrins éprouvés par Henri IV depuis son enfance. Genre de vie adopté par Rosny.*

Monseigneur, ayant achevé de représenter succinctement, et le plus en abrégé que la nécessaire intelligence du discours nous l'a pu permettre, tout ce que nous avions appris pour l'année 1604, des Œconomies royales d'Estat, domestiques, politiques et pacifiques de nostre grand Roy, et de vos servitudes loyales, obeïssances convenables, et administrations utiles et amiables, avant que d'entrer au recit de celles de l'année 1605, nous avons estimé à propos de

leur donner entrée par un discours de choses meslées et de diverse nature d'affaires, que nous avons trouvé entre plusieurs de vos manuscrits, qui servira d'une espece de preface, en forme de digression, laquelle nous commencerons par vous ramentevoir et l'apprendre à ceux qui le voudront scavoir en bonne intention, que, nonobstant l'illustre extraction et haute noblesse de vostre maison, desquelles plusieurs historiens antiques et modernes font honorable mention, et des faits heroïques de vos devanciers, mais sur tout des hautes alliances qu'ils ont prises, et encore plus de celles où sont entrées les filles de leur maison, nous estant facile de verifler que, par diverses branches d'icelle, toutes les plus royales, splendides et magnifiques maisons de la chrestienté en sont descenduës; si ne vous avons nous toutesfois jamais veu estre desireux de vous prevaloir de tous ces avantages du sang et de la nature, ny des belles actions de vos predecesseurs, mais avoir tousjours eu plus d'inclination à meriter quelque chose par vous mesme, à aimer, cherir et suivre la vertu, à vous faire estimer homme d'honneur, de foy et de parole; à vous rendre agreable à vostre Roy et maistre, en le servant utilement et loyaument en choses honorables; à vous rendre bon serviteur de vostre patrie, et acquerir l'amitié des peuples d'icelle, en le servant et soulageant de tout vostre pouvoir, que d'acumuler biens sur biens, richesses sur richesses, ny vous plaire aux magnificences, grandes despenses, plaisirs, passe-temps, et autres vaines apparences; mais avez tousjours essayé de tirer vos plus exquises glorifications de ce que nostre genereux et debonnaire prince, par un excez de bien-veillance, croyoit de vous toutes ces choses-là, et vous en estimoit digne : ce qui estoit cause aussi de cette grande confidence qu'il vous tesmoignoit, et que, vous employant plus universellement que nuls autres aux demeslemens des plus importantes et speciales affaires d'Estat, domestiques, de finance, politiques, de Cour et de cabinet, il prenoit bien la peine de vous bailler luy mesme des maximes à observer, et des preceptes et enseignemens à suivre, pour rendre de facile execution tous les traittez, negociations, et autres faciendes secrettes qu'il vous confloit. Et partant ne craindrons nous point de dire (voire mesme sans entrer en apprehension que vous le peussiez trouver mauvais, comme si ce fut une verité qui diminuast en quelque sorte le prix et la valeur de vos vertus et services) que jamais dans les demeslemens d'un si grand nombre d'affaires tant épineuses, intriguées et entortillées, vous n'eussiez si facilement devidé tous ces escheveaux

si brouillez et doublement nouëz, si vous n'eussiez esté assisté d'ailleurs que de vos seules dextéritez, industries, esprit et jugement, et ne fussent accouruës au secours de vos foibles espauls, les admirables vertus et enseignemens de vostre bon Roy et maistre, sa bonne fortune et sa royale autorité; voire si Dieu mesme ne luy eût suggéré toutes ses hautes conceptions et louïables résolutions, et ne les eust soustenuës, maintenües et tousjours regies et conduites par sa bonté divine et main toute puissante; à laquelle, par conséquent, sont deuës toutes les merveilles exploictées par ce grand Roy, durant l'espace de quarante ans qu'il a esté réduit, comme un athlète de la vertu, à deffendre sa conscience, sa vie, son honneur et sa dignité royale, contre de furieux et envenimez ennemis, vingt fois plus puissans que luy, lesquels l'assailloient de tous costez, non seulement par armes apertes et decouvertes, mais aussi par ruses, cautelles, blandices, perillies, trahisons, proditions et assassinats.

A toutes lesquelles angoisses, fatigues, anxietez et tribulations, quoy qu'il eust semblé que Dieu eust voulu mettre une fin, et le delivrer de tant de soucis, peines et difficultez, par le moyen de l'absoluë conclusion d'une paix generale, publiée au commencement de l'année 1601; si est-ce neantmoins que la suite des temps, les succez des choses et des affaires, les desirs et les trempes des esprits plus autorisez, qui ont paru sur le theatre des affaires, ont fait cognoistre que nostre grand monarque avoit encore besoin de continuer à estre le Roy bien-aimé de Dieu, de luy choisi pour un instrument d'eslite, comme seul capable de restablir la France, l'ameliorer, bonifier et mettre en sa plus grande splendeur, et d'avoir sa continuelle assistance et protection, ainsi qu'il avoit eu durant tous les temps de ses plus grandes, furieuses et sanglantes guerres, puis que tous les démeslemens de ses desirs, desseins, faciendes, traitez et negociations, quelques pacifiques et à bonne intention qu'ils fussent en apparence, avoient neantmoins à estre enveloppez et environnez de non moindres perils, traverses, difficultez, angoisses, ennuy, fascherie et desplaisirs, que l'avoient esté toutes ses expéditions et factions martiales; dequoy il a desja esté dit quelque chose dès le commencement de nos discours, de nos premiers ans pacifiques, et se continuera par la suite de ces recueils et memoires de cette année, 1605, et celles d'après. Tellement que par iceux, se pourra-il absolument conclurre qu'il est du tout necessaire que celui qui fait les merveilles des establissemens, creations et conformations, appuye fortement,

et entreprenne le soin, la conduite et la sollicitude continuelle des manutentions, assistances et conservations.

Attendant que les succez, evenemens et suites des affaires, et sur tout de celles des rois, potentats, royaumes et dominations, fassent preuves de la certitude ou incertitude de ces propositions, nous adjousterons à ce discours, d'autant que nous le trouvons un peu trop serieux et relevé pour nos capacitez et nostre foible intelligence, une petite histoire meslée de divers discours et affaires, en maniere d'un festin éclatant de maintes belles fleurs, pour orner un frontispice, ou à l'imitation des festins et banquets des sages anciens de la grande Ionie, lesquels les assaisoïnoient non seulement de viandes exquisés et delicatés, et de propos agreables, doux et recreatifs, mais aussi de civiles conversations, discours honnestes, sentences graves, enseignemens utiles et affaires serieuses; laquelle est apres suivie d'un recit qui nous fera reprendre le fil des Memoires de ces OEconomies royales et de vos servitudes loyales, lesquelles par leurs conclusions feront bien juger et encor mieux recognoistre que nostre grand Roy n'estoit nullement de ceux que le Dieu tout-puissant avoit faits et formez, et puis les avoit laissez-là, mais qu'il avoit favorisé cettuy-cy, en toute plenitude et abondance, de dons d'esprit et du corps, et vouloit assister et accompagner de ses plus speciales benedictions, sa personne royale, son regne, son royaume, ses peuples et serviteurs, jusques à ce qu'il le retirast au ciel, pour le faire regner avec les bien-heureux, afin que durant tout le temps de son sejour temporel, il ne produisit aucune action qui ne fust digne de louange et profitable au public, aussi bien en ce qui regarderoit la conversation civile, sa vie domestique et familiere, que les grandes affaires d'Estat, justice, milice, finance et police: voire se recognoissoit-il souvent qu'en des choses, lesquelles apparemment estoient toutes recreatives, joyeuses et facetieuses, il ne laissoit pas d'en tirer, donner et faire recevoir de bons exemples et utiles enseignemens, comme il se jugera facilement par ce qui s'ensuit.

A sçavoir qu'un jour Sa Majesté estant saine, gaillarde, disposte et en bonne humeur, à cause de divers bons succez en ses affaires domestiques, et des agreables nouvelles qu'elle avoit receuës des pays estranges et provinces de son royaume, et voyant que le temps estoit beau, et qu'il y avoit apparence que le jour seroit serain, elle se leva de grand matin pour aller voler des perdreaux, avec dessein de revenir d'assez bonne heure pour les venir manger à son disner, disant

de ne les trouver jamais si bons ny si tendres que quand ils estoient pris à l'oyseau, et sur tout lors que luy mesme les leur pouvoit arracher de sa main. Enquoy toutes choses luy ayant succédé à souhait, il revint lors qu'il vit que le chaud commençoit à picquer : tellement qu'estant arrivé au Louvre, ayant en sa main les perdreaux, et monté en sa grande salle, il aperceut au bout d'enhaut d'icelle La Varenne et Coquet, qui s'estoient arrestez à causer ensemble, attendant son retour, auquel il cria tout haut : « Coquet, Coquet, vous ne vous devez pas plaindre nostre disner, à Roquelaure, Termes, Frontenac, Harambure, ny à moy, car nous apportons dequoy nous traiter; mais allez visiblement faire coucher à la broche, et, leur servant leur part, faites qu'il y en ait huit pour ma femme et pour moy, à laquelle Bon-neuil que voila portera les siens de ma part, et luy dira que je m'en vais boire à elle. Mais je veux que l'on reserve pour moy de ceux qui ont esté un peu pincez de l'oyseau; car il y en a trois bien gros que je leur ay ostez, et auxquels ils n'avoient encore gueres touché. » Et comme le Roy estoit sur ce discours, en faisant les partages, il vid venir La Cielie, avec son gros baston, et apres de luy Parfait, qui portoit un fort grand bassin doré, couvert d'une belle serviette, lequel de loing commença de crier fort haut : *Sire, embrassez moy la cuisse; Sire, embrassez moy la cuisse, car j'en ai quantité, et de fort bons.* Ce qu'entendant le Roy, il dit à ceux qui estoient aupres de luy : « Voila Parfait bien resjouy, cela luy fera faire un doigt de lard sur les costes; et voy bien qu'il m'apporte de bons melons, dont je suis bien aise, car j'en veux manger aujourd'huy tout mon saoul, d'autant qu'ils ne me font jamais mal quand ils sont fort bons, que je les mange quand j'ay bien faim, et avant la viande, comme l'ordonnent mes medecins. Mais je veux que vous quatre y ayez aussi part : c'est pourquoy n'allez pas apres les perdreaux, que vous n'ayez vos melons, que je vous donneray apres que j'auray retenu la part de ma femme et la mienne, et dequoy en donner deux à qui j'en ay promis. »

Et comme le Roy eût fait tous ces partages de perdreaux et de melons, il s'en alla en sa chambre, où, en entrant, il bailla deux melons à deux des garçons qui estoient à la porte, et leur dit quelque chose à l'oreille; puis, passant outre, comme il fut dans le milieu de sa grande chambre, il advisa sortir de son long cabinet aux oyseaux, Fourcy, Beringuen et La Fonts, le dernier portant un grand paquet enveloppé, auquel

il cria : « La Fonts, m'apportez-vous encore quelque ragoust pour mon disner? — Ouy, Sire, » respondit aussi-tost Beringuen, mais ce sont viandes creuses, et qui ne sont bonnes qu'à repaistre la veuë. — O ce n'est pas ce qui me faut, » dit le Roy, car je meurs de faim, et veux disner avant toutes choses; et, en attendant mieux, je m'en vais me mettre à table pour commencer à manger mes melons et boire un trait de muscat. Mais encore, La Fonts, qu'est-ce que cela que vous portez ainsi bien enveloppé? — Sire, » dit Fourcy, ce sont des projets de patrons de diverses sortes d'estoffes, tapis et tapisseries que veulent entreprendre de faire, par excellence, vos meilleurs manufacturiers.

« Or bien, dit le Roy, cela sera bon pour apres disner, afin de le monstrier à ma femme; et puis aussi bien me vient-il de souvenir d'un homme avec lequel je ne suis pas tousjours d'accord en tout, principalement lors qu'il est question de ce que vous sçavez qu'il appelle des babilles et bagatelles. Je croy, Fourcy, dit le Roy, que vous n'ignorez pas qui est celui que je veux dire, car je seray bien aise qu'il soit present avec ma femme, lors que vous nous monstrez toutes ces estoffes, lesquelles me feront souvenir de quelque chose que je leur veux dire estans ensemble, pour entendre leur opinion sur icelle; d'autant qu'il me dit souvent qu'il ne trouve jamais rien de beau ny de bien fait quand il couste le double de sa vraye valeur, et que je devrois en faire autant de toute marchandise excessivement chere; et n'ignore pas surquoy ny pourquoy il dit cela, mais je ne luy en fais pas semblant. Et ne faut pas laisser de l'oïr parler, car il n'est pas homme à un mot : et partant, Fourcy, envoyez-le querir en diligence, et que l'on luy mene plutost un de mes carrosses qui est en la cour, ou bien le vostre. »

Ce qui ayant esté fait, le carrossier rencontrant un de vos laquais que vous envoyiez au Louvre pour voir ce que faisoit le Roy, il apprit de luy que vous estiez à disner chez madame de Guyse, et y estant arrivé, trouva que vous aviez desja achevé. Suivant quoy vous montastes soudain au carrosse, et arrivastes si tost, que le Roy, vous entendant entrer dans sa chambre, en fut tout estonné et vous dit : « Vous estes bien diligent; mais il n'est pas possible que vous veniez de l'Arsenac? — Non, Sire, luy respondistes vous; je disnois chez madame de Guyse et ses enfans, où ils m'avoient souvent convié; mais vos affaires ne m'en avoient pas encore donné le loisir jusques à ce jourd'huy, qu'estant venu ce matin au Louvre pour vous

« y parler de trois affaires et trois estats, des-  
 « quels vous m'escrivistes avant-hier, et ayant  
 « appris que vous estiez allé à la chasse et reven-  
 « driez disner icy, je me resolut de m'en aller  
 « disner chez madame de Guyse, et d'attendre  
 « là des nouvelles de vostre retour, ayant ren-  
 « voyé à l'Arsenac les grands et amples estats  
 « que j'avois dressez sur ces trois affaires, et re-  
 « tenu seulement un memoire fort sommaire d'i-  
 « ceux, pour vous le faire voir, et mesme le bail-  
 « ler si vous le desirez.

« O! dit le Roy, je sçay bien que toute cette  
 « maison là vous apparence et vous ayme fort,  
 « et qu'aussi vous l'affectionnez, dont je suis tres-  
 « aise; car je croy que tant qu'ils vous croiront,  
 « comme ils m'ont fait dire qu'ils estoient bien  
 « resolut de faire, ils ne feront jamais rien qui  
 « nuise ny à ma personne ny à mon Estat. — Sire,  
 « repartistes-vous, vostre Majesté m'a dit tout cela  
 « de si bonne façon, que je voy bien qu'elle est  
 « en bonne humeur, et plus contente de moy  
 « qu'elle n'estoit il y a quinze jours. — Quoy, dit  
 « le Roy, vous souvient-il encore de cela? O que  
 « non fait pas à moy. Ne sçavez-vous pas bien  
 « que nos petits depits ne doivent jamais passer  
 « les vingt-quatre heures, comme je sçay que  
 « cela ne vous a pas empesché, dés le lendemain  
 « de ma colere, d'entreprendre une bonne affaire  
 « pour mes finances? Tellement que ces conside-  
 « rations, et plusieurs autres choses grandes et  
 « petites, que je vous diray, m'ont mis en la  
 « joyeuse humeur que vous m'avez rencontré,  
 « dont la principale est qu'il y a plus de trois mois  
 « que je ne m'estois trouvé si leger ny disposé que  
 « ce jourd'huy, estant monté à cheval sans ayde  
 « et sans montoir. J'ay eu un fort beau jour de  
 « chasse; mes oyseaux ont si bien volé, et mes  
 « lévriers si bien couru, que ceux-là ont pris  
 « force perdreaux, et ceux-cy trois grands lé-  
 « vreaux; l'on m'a rapporté le meilleur de mes  
 « autours, que je pensois avoir perdu. J'ay fort  
 « bon appetit, j'ay mangé d'excellens melons,  
 « et m'a-t-on servy demie douzaine de cailles des  
 « plus grasses et des plus tendres que j'eusse ja-  
 « mais mangées.

« L'on me mande de Provence que les broüil-  
 « leries de Marseille sont entierement apaisées;  
 « et de plusieurs autres provinces, que jamais  
 « l'année ne fut si fertile, et que mon peuple sera  
 « grandement riche, si je veux ouvrir les traittes.  
 « Sainct Anthoine me mande que le prince de  
 « Galles luy parle incessamment de moy et de ce  
 « qu'il vous a promis de son affection en mon  
 « endroit. J'ay receu advis d'Italie que les choses  
 « s'y disposent en sorte que je remporteray le  
 « gré, l'honneur et la gloire d'avoir reconcilié les

« Venitiens avec le Pape. Bongars me mande  
 « d'Allemagne que le nouveau roy de Suede est  
 « tousjours de mieux en mieux avec ses nouveaux  
 « sujets, et que le landgrave de Hessen m'ac-  
 « quiert tous les jours de nouveaux amis, alliez  
 « et serviteurs bien asseurez. Buzenval a escrit à  
 « Ville-roy que les succez des sieges d'Ostende  
 « et de l'Ecluse ayans partagé le bien et le mal  
 « entre les parties, les excessives despences d'ar-  
 « gent, la grande perte d'hommes et la furieuse  
 « consommation de munitions des deux costez,  
 « les a réduits dans les foiblesses et disettes tant  
 « esgales, qu'ils seront aussi bien tost esgalement  
 « contrainsts d'entendre à une paix ou à une  
 « trêve, dont il faudra de necessité que je de-  
 « vienne le moyenneur et le protecteur, qui sera  
 « pour commencer à me rendre l'amiable com-  
 « positeur de tous les differends d'entre les prin-  
 « ces chrestiens. Et puis, pour surcroist de tant  
 « de contentemens receus pour de si bonnes nou-  
 « velles, estant à table environné de ces gens  
 « sages que vous voyez (qui estoient, comme  
 « nous l'avons sceu depuis, messieurs du Lau-  
 « rens, du Perron le jeune, de Gurrion, des  
 « Yvetos, Chaumont, Cotton et Gontery), de  
 « l'affection desquels je suis tres-assuré, et que  
 « vous jugez capables, je le sçay bien, de m'en-  
 « tretenir de discours utiles et agreables, qui  
 « empêcheront que l'on ne me parlera point d'af-  
 « faires en mangeant, jusques à ce que j'aye  
 « achevé de disner; car lors escouteray-je tout le  
 « monde, et les contenteray, si raison et justice  
 « le peut faire.

« J'estime, Sire, dites-vous, que de si grands  
 « personnages, si judicieux et sages, et qui vous  
 « aiment vraiment, n'auront pas manqué de  
 « vous entretenir de discours utiles et agreables  
 « tout ensemble, et par iceux donner un tant  
 « plus doux assaisonnement aux viandes de vostre  
 « repas et à vos contentemens. — Ce que vous  
 « dites est vray, repartit le Roy, mais si ne lais-  
 « seray-je pas passer tout cela sans y contredire  
 « quelque chose; car quant aux excessives loüan-  
 « ges qu'ils m'ont données, je ne me cognois pas  
 « si peu moy-mesme que je ne sçache bien que  
 « j'ay mes défauts et manquemens comme les  
 « autres roys, et qu'il ne s'en est trouvé ny trou-  
 « vera jamais de tous parfaits. Et quant à mes  
 « heurs, felicitez et prosperitez qu'ils ont tant  
 « exaltées et magnifiées, s'ils avoient tousjours  
 « esté aupres de moy, et couru toutes mes for-  
 « tunes, depuis la mort du Roy mon pere jusques  
 « à l'année où nous sommes, ils changeroient  
 « bien de langage; car ils auroient recogneu que  
 « les mauvaises auroient esté plus frequentes mil  
 « fois que les bonnes, et que les angoisses, ennuyes

« et anxietez auroient infiniment surpassé les  
 « plaisirs, joyes et contentemens ; voire, qui est  
 « chose estrangé à croire, est-il arrivé que mes  
 « plus grands et envenimez ennemis, par toutes  
 « leurs animositez, persecutions et violences, ne  
 « m'ont point fait recevoir tant d'ennuys et des-  
 « plaisirs, ny causé tant de perplexitez, despits,  
 « chagrins et angoisses, que m'en ont fait es-  
 « prouver aucuns de mes parens, amis, alliez,  
 « partisans, soldats, serviteurs et sujets, par  
 « leurs defections, ingrattitudes, laschetes et des-  
 « loyantez.

« Sire, repartit aussi-tost M. du Perron, ce que  
 « vostre Majesté trouve si estrange de tant de  
 « sortes de contredisans et de contrarietez à ses  
 « justes et raisonnables desseins et entreprises,  
 « est non seulement fort croyable, mais aussi  
 « rendu certain par les ordinaires experiences ; à  
 « sçavoir, que quand Dieu veut exploicter ses  
 « merveilles par les secondes causes, il fait eslec-  
 « tion de sujets à plaisir, et puis les enrichit de  
 « mil et mil graces : mais afin qu'il se voye que  
 « les miracles sont procedans de luy, il leur fait  
 « rencontrer tant d'obstacles, et de difficultez en  
 « l'exécution, que chacun est contraint apres de  
 « confesser que les hommes n'ont point surmonté  
 « tant d'obstacles et empeschemens par un pou-  
 « voir humain ; mais qu'il faut necessairement que  
 « les vertus humaines par lesquelles ont esté ex-  
 « ploictées ces merveilles, soient toutes esmanées  
 « des divines vertus, et que ces grands exploits  
 « sont non exploits humains, mais ouvrages de  
 « Dieu, comme ce sont les qualitez qu'on donne  
 « maintenant à vos rares vertus et à tous vos mi-  
 « racles, voyant que tout le monde vous ayant  
 « esté contraire humainement, vous nous avez  
 « tous sauvez divinement. Et pour dire en un mot,  
 « Sire, il est vray que Dieu a mis les thresors de  
 « ses graces et beneficences en des vaisseaux  
 « d'argille, afin que la gloire en estant toute  
 « renduë à sa divine bonté, il rendist aussi glo-  
 « rieux à perpetuité celui dont il s'estoit servy,  
 « comme de cause seconde, pour faire ces mi-  
 « racles.

« Monsieur, repliquastes vous à M. du Perron,  
 « vous avez là parlé d'un si haut stile, qu'il seroit  
 « difficile d'y rien adjouster ; et neantmoins si ne  
 « laisseray-je pas de dire que si le peu d'assistance  
 « humaine que le Roy a receuë de ceux qui, se-  
 « lon l'humanité et la raison, luy en devoient le  
 « plus donner, estoit bien cogneu ; ce que vous  
 « avez dit se verifiroit encor mieux ; car lors il  
 « se recognoistroit estre vray ce que Sa Majesté  
 « a dit, que son esprit a plus esté travaillé par  
 « les siens propres et plus familiers, que par ses  
 « ennemis declarez, et que les temps pacifiques

« luy ont donné plus d'anxietez, de peines et  
 « soucis, que tous les plus turbulens et les plus  
 « militaires, comme il seroit facile de le faire  
 « comprendre à ceux ausquels auroit esté bien  
 « représenté tout ce que j'en ay veu. — Rosny,  
 « dit lors le Roy, si vous en vouliez mettre deux  
 « mots par escrit, et me les bailler, je les ferois  
 « voir à ceux qui en font les incredules.

« Sire, dites-vous, tant de diverses sortes d'in-  
 « trigues dans vos démeslemens militaires seroient  
 « de trop long discours, et mesme estimé-je qu'il  
 « me seroit impossible de m'en bien acquitter, et  
 « verray si dans les embarras de vos faciendes  
 « pacifiques, que vous avez eu à conduire parmy  
 « les vostres mesmes, et voyes pacifiques, il m'en  
 « pourra ressouvenir d'assez de remarquables et  
 « bien circonstancier, pour vous estre representez,  
 « et par iceux donner aux autres les intelligences  
 « que je voy bien que vostre Majesté desire : sur-  
 « quoy je luy demande du temps ; car pour ne  
 « faire que discourir, beaucoup de choses peuvent  
 « passer, qui ne seroient pas bien receuës de tous,  
 « estant escrites ; et en attendant, Sire, mon opi-  
 « nion là dessus, je diray à vostre Majesté ce que  
 « les choses passées me font juger des presentes,  
 « et conjecturer de celles de l'advenir : c'est que  
 « Dieu, en vous choisissant pour son Roy bien-  
 « aymé, et pour operer par vous ses œuvres mer-  
 « veilleuses, il vous a fait, façonné et formé selon  
 « son bon plaisir, enseigné de telle sorte, et mis  
 « en vostre personne tant de bonnes parties et de  
 « vertus exquises, et en vostre esprit tant de  
 « loüables desirs, de genereux desseins, de hautes  
 « conceptions et de magnifiques entreprises, mais  
 « en a environné l'exécution de tant de hayes, de  
 « ronces et d'épines, de difficultez, contradic-  
 « tions et oppositions, qu'il sembloit que jamais  
 « vous ne parviendriez à les executer : tout cela  
 « n'estant que pour faire admirer, et d'autant  
 « plus priser cette bonté divine, et les rares vertus  
 « qu'il eslargit à ceux qu'il veut faire operer,  
 « comme causes secondes, en ce qu'il determine,  
 « afin qu'en leur accomplissement tousjours il  
 « apparaisse que deux choses concourent, les  
 « unes comme principes, qui sont les speciales  
 « graces, faveurs et assistances de Dieu, et les  
 « autres comme instrumens par luy choisis, qui  
 « sont les excellens effects et operations admira-  
 « bles de vos exquises vertus, afin d'admonester  
 « les nations d'Europe, et sur tout les François,  
 « de vous mieux recognoistre et tenir pour le Roy  
 « de leurs felicitez, et d'exercer mieux entr'eux,  
 « pour les religions, la charité de Dieu, comme  
 « le seul deffaut qui le fera lasser de deployer  
 « sur eux ses benedictions ; soit retirant à luy son  
 « Roy bien-aymé, soit le destituant de ses rares

« vertus de prudence, clemence, justice et vaillance, ou leur donnant un Roy qui ne les aura pas; car lors devront-ils tous tenir pour infaillibles toutes calamitez et desolations. »

Lequel discours vous finistes là; d'autant que le Roy s'estant levé de table, s'en alla au devant de la Reine qui sortoit de sa chambre pour entrer en son cabinet, à laquelle d'aussi loin qu'il la vid, il luy cria : « Hé bien ! m'amie, vous ay-je pas envoyé de bons melons, de bons perdreaux et de bonnes cailles ? Si vous aviez aussi bon appétit que moy, vous leur auriez fait bonne chere; car je ne mangeay jamais tant, ny ne fus il y a long-temps en si bonne humeur que je suis. Demandez-le à Rosny; il vous en dira les causes, vous contera toutes les nouvelles que j'ay receuës, et les discours que nous avons eus ensemble luy et quatre autres et moy. — Or, Monsieur, dit la Reine, nous nous sommes donc bien rencontrés ce jour-d'huy, car je ne fus jamais plus gaye, ne me portay jamais mieux, ny ne disnay jamais de meilleur appétit; et pour vous continuer en vos joyes et allegresses et moy aussi, je vous ay fait preparer un ballet et une comedie de mon invention, où je ne nieray pas que je n'aye eu un peu d'aide, car Duret et La Clavelle n'ont bougé tout ce matin d'avec moy, pendant que vous avez esté à la chasse. Le ballet representera, comme ils m'ont dit, les felicités de l'aage doré, et la comedie, les passe-temps plus recreatifs des quatre saisons de l'année.

« O m'amie, repartit le Roy, que je suis aise de vous voir ainsi en bonne humeur ! Et partant, je vous prie, vivons tousjours de mesme; mais pour faire danser et voir bien à l'aise vostre ballet et comedie, il faudra que ce soit chez Rosny, en cette grande salle que je luy ay fait faire exprez pour cela, et qu'il ait le soin d'y faire entrer le monde par ordre. Or vous voulez je monstrier maintenant les patrons de tapisserie que Fourcy m'a fait apporter, afin que vous m'en disiez vostre advis; car quant à celui de Rosny, je ne m'en enqueste pas, je le sçay desja bien; mais je seray tres-aise qu'il nous fasse voir à tous deux ensemble un certain estat sommaire qu'il dit m'avoir apporté, auquel je croy que nous prendrons autant de plaisir qu'à tout ce que nous avons dit et veu. » Lequel estat, apres que le Roy vous eut retiré vers les fenestres et la Reine aussi, vous leur monstrastes à tous deux, estant tel que s'ensuit :

*Memoires des sommaires des trois estats generaux qui ont esté cy-devant specifiez.*

*Premier sommaire subdivisé en trois chefs.*

La premiere subdivision consistant à représenter au Roy un estat abrégé de toutes les fortifications de ses places de frontiere, depuis que j'en ay eu la charge.

La seconde subdivision consiste à représenter au Roy tous ses bastimens et reparations nouvelles en ses maisons royales, depuis que j'en ay la charge.

La troisieme subdivision consiste à représenter au Roy un estat de tous ses riches meubles, tapisseries, vaisselles d'or et d'argent, et de pierreries, que je luy ay rassemblées depuis que j'en ay la charge.

*Second sommaire subdivisé en trois chefs.*

La premiere subdivision consiste à représenter au Roy un estat de toutes les ameliorations et bouifications que j'ay faites en toutes ses sortes de revenus, depuis que j'en ay la charge.

La seconde subdivision consiste à représenter au Roy un estat de toutes les especes d'or et d'argent comptant que j'ay assemblées, depuis que j'ay eu la charge de ses finances.

Et la troisieme subdivision consiste à représenter au Roy un estat des mesnagemens que je veux commencer de faire, et des thresors que j'espere amasser à l'advenir.

*Troisieme sommaire subdivisé en cinq chefs.*

La premiere subdivision consiste à faire voir au Roy un estat de la quantité d'artillerie des six calibres qu'il peut avoir.

La seconde subdivision consiste à faire voir au Roy la quantité de boulets d'artillerie qu'il a, et le moyen de faire tout marcher ses équipages en bon ordre.

La troisieme, un estat pour représenter au Roy la quantité des poudres qu'il peut avoir des trois sortes.

La quatrieme, un estat de la quantité d'armes, outils, instrumens et équipages que le Roy peut avoir.

Et la cinquieme subdivision, un estat, par generalitez, de la quantité de noblesse, et de soldats propres à porter volontairement les armes, qui se pourront assembler.

Or, voulant essayer de donner une plus claire intelligence de ce qui a esté dit cy-devant et sera cy-apres, touchant les tribulations par lesquelles a passé nostre grand et vertueux Roy, voire mesme durant ses plus grandes prosperitez et les années les plus pacifiques de sa vie; en

reprenant les affaires dès le temps du Roy son pere, nous dirons en peu de paroles que la rupture de la trefve d'entre Henry II de France et Philippes II d'Espagne, ralluma les guerres entre ces deux royaumes, et suivant cet erreur de quelque costé qu'il fust provenu, la France en patist le plus, d'autant que M. de Guyse d'une part, et monsieur le connestable de l'autre, ayans empieté la faveur d'un Roy d'esprit facile à manier, ils jouèrent à qui se debutteroit l'un l'autre. M. de Guyse, à cause de cette rupture de trefve, passa en Italie avec grande armée, ou il ne fit rien qui merite le parler. Le connestable voulut démesler les guerres en France, ou il fit encore pis, car il perdit une bataille, fut prisonnier, et Sainet Quentin perdu. Thermes perdit la bataille de Gravelines. M. de Guyse et ses troupes furent contraintes de revenir d'Italie pour secourir la France. A son retour, il demeura seul puissant, favori et souverain chef des armes, avec lesquelles il prit Calais; et le connestable pour sortir de prison, traita une paix desavantageuse, maria la fille de son maistre au roy d'Espagne: son maistre fut tué aux magnificences des nopces. François II luy succeda, lequel ayant espousé la niepce de M. de Guyse, il luy commit l'absoluë conduite de sa personne et de son royaume, ou il joia d'estranges jeux, et se preparoit à de grands tintamarres tragiques, lors que François mourut d'un tintouin d'oreille. Charles IX luy succeda, lequel, encore enfant, laissa en apparence partager la faveur, l'autorité de la Cour, et la regieme de l'Estat entre la Reine mere, les princes du sang, ceux de Lorraine et le connestable; mais la Reine mere fit bien tost pancher la balance vers la Lorraine, ayant pris en telle haine ceux de Bourbon, sous l'opinion qu'un pronostiqueur luy avoit fait prendre que ses enfans n'en auroient point, et que la couronne escherroit à ceux du roy de Navarre, qu'à cette occasion elle projetta deslors de le destruire, et par ce moyen de mettre cette couronne sur la teste de ceux de Lorraine, dont sa fille avoit des enfans.

Et sur ce dessein se forma deux partis d'Estat et deux de religion, qui firent naistre entr'eux de telles haines et animositez, que ce ne furent que violences, confusions, persecutions, feux, flammes, tueries et massacres. Et arriva que le roy de Navarre ayant esté tué au siege de Roüen, tout le faix et l'accablement des envies, haines et animositez de la toute puissante autorité des regisseurs de France, du general des catholiques d'icelle, assistée du Pape, de l'Empereur, du roy d'Espagne, et de tous ceux de cette profession et de ses puissantes factions, tomberent sur

les foibles espauls de nostre jeune Mars françois. que luy, dès l'âge de sept ans, et les siens, supportèrent comme ils peurent, et comme chacun scait, en ayant dit une partie en nos premiers Memoires, a commencer des l'année 1560, que le Roy son pere fut tué, jusques en l'an 1593, que Dieu se servant du courage, de l'esprit et du jugement qu'il avoit mis pour cet effet en son Roy bien-aimé, luy se servit de la division que l'ambition avoit allumée entre ses puissans ennemis, de la lassitude, des travaux de ses peuples, et de la sagesse et docilité de luy, et d'une bonne partie d'eux, pour s'accommoder aux desirs et besoins de l'un et de l'autre. En sorte que peu à peu, voire mesme les plus animex estrangers et François, de tant de démeslemens d'affaires turbulentes et militaires, se jetterent tous dans ceux qui paroissoient doux et pacifiques, lesquels toutesfois n'exempterent pas pourtant nostre grand Roy des peines, soucis, travaux et fatigues accoustumées, et qu'il n'eust incessamment besoin de l'assistance de Dieu, et d'employer tousjours ses exquisés vertus aux affaires de paix, ainsi qu'il avoit fait en celles de guerre, comme cela se verra par une lettre que vous luy en escrivistes suivant son commandement, par laquelle vous luy ramenteviez une partie de ce que vous aviez sceu de ses tribulations passées, la lettre estant telle que s'ensuit:

*Lettre de M. de Rosny au Roy.*

SIRE,

Tous vos commandemens et contentemens m'estans incessamment tres-chers et precieux, j'auray tousjours plus de soin de leur accomplissement que de la conservation de ma vie; et quoy que je me reconnoisse incapable de bien suivre vos intentions, si ay-je mieux aimé estre accusé d'insuffisance que manquer d'obeyssance envers qui je la dois toute entiere. Suivant cette disposition, je voulds essayer de faire des remarques des plus grandes traverses et difficultez que vous eussiez point rencontrées en tout le cours de vostre vie; mais celles qui estoient provenuës par les armes et par la puissance de tant d'ennemis declarez, me semblant excéder ma portée, et que je serois reputé la truye qui voudroit enseigner Minerve, si j'entreprendois de les vous apprendre, je me suis reduit dans celles des démeslemens d'affaires pacifiques que vous avez eües avec vos parens, vos amis, alliez, partisans, soldats, serviteurs et domestiques.

Et commenceray, Sire, les ressouvenances de vos douloureux démeslemens d'affaires pacifiques, par la disposition la plus apparemment

pacifique qui se pouvoit imaginer; mais laquelle en un moment fut changée en la plus horrible, sanguinaire, déplorable et calamiteuse que vous ayez jamais éprouvée; laquelle fut le jour de la saint Barthelemy, qui est assez dit pour moy, d'autant que je n'estois lors qu'un enfant de douze ans, près de vostre Majesté, et que quand j'y repense, je fremis tout d'horreur et frissonne d'effroy, comme je croy que vous fistes bien lors, quelque cœur genereux et courage intrepide que vous puissiez avoir, veu les choses horribles qui se passerent devant vos yeux, lequel premier accez eut des suites estranges, vous estant retenu en prison, tantost plus et tantost moins serrée, durant près de quatre ans.

Plus, vous vous souviendrez comme durant les temps des plus esclatans et bruyans ressentimens des langues medisantes de la religion, ce fut cette partie qu'ils trouverent seule à blâmer en vous; et encore pour faire paroistre vostre exquis jugement, vous distes à tous ceux qui, comme vos amis, tesmoignoient de desirer en vous du changement, que vous seriez tousjours prest à bien escouter et suivre la raison qui vous seroit montrée par voye legitime, honorable et honneste; et que cependant, afin de ne pouvoir estre accusé d'aucune erreur, vous estiez resolu de croire, faire et vivre selon tous les preceptes et enseignemens du Decalogue, du Symbole des Apostres, de l'Oraison Dominicale et dépendances d'iceux, ne croyant pas qu'il se pust former aucune mauvaise creance de ce qui en seroit veritablement tiré.

Plus, vous vous souviendrez des temps (d'assez longue durée) pendant lesquels vous fûtes frauduleusement affligé, poursuivi et inquieté par des voyes de milices non militaires, et de pacification non pacifiques, et qui pouvoient degenerer de l'une en l'autre, puisque tels ennemis se disoient amiables, et leurs armes n'estoient que celles dont l'on use alors qu'on est sans guerre, ou qu'on n'y veut point entrer, mais qui n'eussent pas laissé de vous estre des plus importunes, cuisantes, et angoisseuses, si le Dieu tout-puissant ne vous eust assisté favorablement, et que, par vostre generosité naturelle, vous n'eussiez mesprisé, renversé et aneanti tous les efforts de ces serpens volans, viperes venimeuses, langues d'aspics, libelles medisans, et menasses impudentes, lesquelles ne laisserent pas neantmoins de vomir contre vous mil injures et detractions, dont le recit estant trop long, je me contenteray, pour monstrier un eschantillon de ces ridicules libelles diffamatoires, de vous ramentevoir quelques-uns de ceux de l'un de vos plus arrogans calomniateurs, qui eut bien l'ef-

fronterie (quoy qu'il fut de naissance, d'âge et d'éminence, ausquels la modestie eust esté bien sceante) d'user en vostre endroit, des termes d'impie, scelerat, endurci, mutin, seditieux, criminel, race bastarde, et plusieurs autres outrages, lesquels ne pouvant assez condamner, je renvoyeray ceux qui voudront sçavoir un diminutif de mon opinion sur une telle arrogance, à ce qu'en vostre nom il en fut affligé à sa barbe.

Vous vous souviendrez du temps que vous teniez vostre Cour de Navarre à Nerac, Agen et aux environs, laquelle estant lors composée de gens de qualité, tant de catholiques que de huguenots, et de Gascons que de Francimens, ces divers noms y faisoient naistre tant de partialitez, de haines, d'envies et de riottes, qu'elles vous donnoient plus de peine à concilier et à vous en bien et utilement servir, que vous n'en trouviez à resister à tous vos ennemis.

Plus, vous vous souviendrez comme au temps que la Ligue commença ses assemblées, sous pre-texte de la destruction des huguenots, vous en fistes faire une à Saint Paul de la Miatte, pour adviser aux moyens de vostre deffense et de la leur, en laquelle tous les plus grands des interessez s'estans trouvez, et aussi un député du comte Palatin, toutes ces sortes de gens tesmoignerent de penser plus à leurs profits et interests particuliers qu'à ceux du public, et à leurs ambition, aviditez et fantaisies, qu'ils vous donnerent plus de peine à regler (d'autant que chacun d'eux vouloit faire une royauté à part, pour mieux piller) que vous n'en trouvastes à vous deffendre de vos ennemis tous déclarez.

Plus, vous vous souviendrez comme toutes les fois que vous assembliez les grands de vostre party, pour faire quelque puissante resistance, vous les trouviez tellement differents en desirs, desseins, interests et en affections à l'endroit du party et de vous mesmes, qu'il vous falloit-là donner des batailles pacifiques, au lieu d'en aller donner de militaires contre vos ennemis déclarez. Je ne vous en dis point les noms, car vous les sçavez mieux que moy.

Plus, vous vous souviendrez comme Dieu vous ayant favorisé du gain de la bataille de Coutras, vous voulustes, suivant le droict de la guerre, marcher en diligence, en corps d'armée victorieuse, pour aller trouver vostre armée estrangere, et offrir un si grand et redoutable corps au Roy, pour joindre à celuy qui estoit tout à luy, afin de destruire entierement les ennemis de la France, comme cela infailliblement fut arrivé; mais messieurs le prince de Condé, comte de Soissons, de Turenne, de La Trimouille, Mongomery, La Roche-foucault et



autres que vostre Majesté scait, traverserent tellement ce genereux dessein, que de la rupture d'iceluy proceda la ruine de vostre armée estrangere, et que vous ne tirastes nul avantage du gain de la bataille.

Plus, vous vous souviendrez comme voulant unir vostre maison le plus qu'il vous seroit possible, par le moyen du mariage de madame vostre sœur avec M. le comte de Soissons, combien ce loüable dessein vous apporta, par longues années, de peines, d'ennuis, de chagrins et de déplaisirs.

Plus, vous vous souviendrez comme lors que le Roy fit une assemblée à Blois (qui se termina par la mort de M. de Guyse) pour destruire, ce disoit-on, ceux de la religion, vous en fistes une autre à la Rochelle, pour proposer les moyens de leur conservation, en laquelle messieurs de Turenne, de la Trimouille et autres de leur sequelle faisoient les mesmes menées et pratiques contre vostre autorité, avec les deputez qu'ils y avoient envoyez, que messieurs de Guyse faisoient contre le Roy avec ceux de Blois.

Plus, vous vous souviendrez comme sollicitant toujours vostre reconciliation avec le Roy, afin de pouvoir, conjointement avec luy, essayer de donner un repos à la France, vous et luy estiez tellement traversez en ce dessein, luy par messieurs le comte de Soissons, duc de Nevers, cardinal Morosin, d'Espernon et toute la mignonnerie de la cour, et vous par les plus autorisez prés de vous, voire par plusieurs eglises et ministres de la religion, qu'il vous falloit traiter tout cela secrettement et par un seul de vos serviteurs de chaque costé, que vostre Majesté cognoist assez sans que je les nomme.

Plus, vous vous souviendrez comme vous ne fustes pas moins traversez tous deux par les mesmes personnes et autres encore que vous cognoissez, lors que vous voulustes joindre vos forces en un seul corps d'armée, et convenir de conditions pour faire en sorte que vous recognoissiez le Roy pour vostre roy, vostre maistre et vostre pere, et luy, vous pour son loyal et fidele sujet, serviteur et heritier, et trouver ensemble des expediens pour tranquilliser à jamais les deux religions en France.

Plus, vous vous souviendrez comme le Roy, par vostre conseil, ayant commencé d'assiéger Paris par le siege de Pontoise, les bigots catholiques, les espagnolisez, les mignons et accreditez aupres de luy, essayerent de blâmer ce conseil, de le mettre en defiance de vous, et de diminuer vostre grande reputation aux armes; quelques-uns, mais sur tout ceux de la mignonnerie, estans si impudens que de contester toutes

vos propositions, vous contrecarrer et parler comme du pair.

Plus, vous vous souviendrez que le Roy ayant esté tué, la couronne à vous devoluë, et tous ceux de l'armée obligez, selon Dieu et l'honneur, de vanger la mort de leur maistre cruellement assassiné, neantmoins plusieurs furent si meschans et si lasches que de traverser vostre legitime qualité, et de desnier leur assistance pour vanger la mort de leur Roy, leur maistre et leur bien-faicteur, voire mesmes ceux desquels les rapacitez et les turpitudes avoient servi de pre-texte aux revoltes des peuples.

Plus, vous vous souviendrez comme, apres cette effroyable mort, vous fustes abandonné de la plus-part de vos sujets, voire par quantité de ceux de la religion, pour la deffence desquels vous aviez tant de fois hazardé vostre vie : tellement que vous fustes contraint à combattre une armée tres-grande avec une poignée de gens, et que lors que vous eustes besoin d'estre renforcé, les jalousies, envies et riottes d'entre messieurs de Soissons, de Nevers, de Longueville, d'Aumont et de Biron, et leur peu d'affection, ou autres causes cachées, les firent entrer en de telles disputes et contestations, que leurs longueurs à s'acquitter de leur devoir vous donnerent le loisir d'appeller des Anglois et des Escossois à vostre secours, lesquels y furent encore plutost qu'eux.

Plus, vous vous souviendrez que voulant tirer vostre raison des algarades de vos ennemis, et vous voyant une si belle armée, et en apparence si forte et si bien intentionnée, vous creustes de pouvoir faire un grand coup d'Estat en vous saisissant de Paris; mais ce dessein fut traversé par ceux qui ne vouloient point de Roy de la religion, tellement que M. de Montpensier et beaucoup d'autres troupes vous quitterent en chemin; et quand vous eustes pris les fauxbourgs de Paris, les autres empescherent que vous ne vous saisissiez de la ville.

Plus, vous vous souviendrez qu'ayant gagné la bataille d'Ivry, plusieurs de ceux qui avoient hazardé leurs vies pour cet effet dans l'ardeur des combats, firent apres tout ce qu'ils purent pour empescher que cette victoire n'eust ses suites, lesquelles apparemment estoient la prise de Paris, où vous voulant acheminer, ceux de vostre conseil et leur sequelle rendirent vostre armée immobile, la faisant manquer de toutes choses.

Plus, vous vous souviendrez comme, quelque temps apres, vous voulustes essayer d'affamer Paris; mais vous fustes si mal servi par tous ceux qui ne vouloient point de Roy huguenot dans

Paris, que tous les gouverneurs des places voisines laissant passer les vivres à puissance, et les chefs des troupes assiegeantes les laissant entrer librement dans Paris, pour de l'argent et des babioles, ils leur donnerent moyen et loisir d'attendre un secours pour estre fournis de vivres.

Plus, vous vous souviendrez comme sur les discours qui se tenoient que les catholiques ne vous devoient point reconnoistre pour Roy absolu si vous n'estiez de leur religion, et que les huguenots reconnoissoient que ce n'estoit point à eux de prescrire de religion à leur Roy legitime, il y en eut quelques-uns de vos serviteurs plus moderez, tant huguenots que catholiques, lesquels vous ayans osé conseiller là dessus de prendre conseil en vous mesmes, pour trouver sur telles difficultez un expedient propre à tranquilliser vostre royaume, vous les creustes; mais, de quelque costé que vous prissiez advis, vous resolustes de vous accommoder aux choses possibles à l'humaine pensée, laissant à Dieu à operer les impossibles. Et neantmoins est-il certain que quand une grande partie de ceux qui avoient le plus monsté de desirer vostre changement de religion, entre lesquels je comprends mesme ceux de la ligue, virent que c'estoit à bon escient, ils firent tout ce qu'ils peurent pour en empêcher l'effet.

Plus, vous vous souviendrez comme plusieurs des grands de vostre royaume qui vouloient vous reduire en cette necessité d'avoir tousjours affaire d'eux, projetterent de former un parti sous ombre de desirer vostre conversion, et fut nommée cette association *le tiers party*, la plus-part en dessein de se joindre à celuy d'Espagne et de la ligue. Mais ce dessein vague ayant eu de vagues suites, les peuples, qui n'entendent point de raillerie en matiere d'aise et de repos, mais ont tousjours en haine tous ceux qui les en privent, et aiment tous ceux qui leur procurent, ne laisserent pas, nonobstant les sermens prestez à Paris entre les mains du legat du Pape de ne vous reconnoistre jamais pour Roy quelque catholique que vous peussiez devenir, que les Papés vous eussent privé de la couronne et déclaré incapable d'icelle, voire excommunié tous les prelates qui vous recevroient à vous faire catholique; tous les peuples, dis-je, si tost qu'ils entendirent vostre changement de religion, n'attendirent pas à vous reconnoistre pour Roy qu'il vous fut venu du Pape l'entiere absolution: et par là semble-il ne se pouvoir assez blâmer la faute de ceux (soit qu'elle vint du Pape ou du conclave, ou des brigues d'Espagne, ou des ligueurs françois, ou des mauvais solliciteurs d'icelles) qui firent tant de difficultez à vous accorder vostre juste

demande, vous userent de tant de duretez et de tant de mépris envers les grands personnages par vous envoyez pour protester de vostre devotion, et vous imposèrent tant de honteuses conditions pour l'obtenir, qu'il sembloit qu'ils eussent envie de chercher noise, et dequoy rejeter vostre douce domination et la France en guerres continuelles. Et ce qui est encore plus considerable, est qu'ils croyoient que toutes les conspirations qui se faisoient contre vostre vie n'avoient pour pretexte que le deffaut de vostre absolution, et que les conspirateurs pensoient en cela servir le Saint Siege et meriter paradis, n'y ayant nulle apparence qu'il vint d'un Pape qui estoit si clement, et lieutenant d'un capitaine qui luy avoit appris à pardonner gayement, sans user de reabilitations terriennes, de tant de ceremonies, n'y vouloir mesler les affaires de la terre avec celles du ciel.

Plus, vous vous souviendrez comme de vos serviteurs secrets à Paris vous ayans fait sçavoir que de jour en jour le peuple se disposoit à se mettre en vostre obéissance, et que mesme Brisac (auquel depuis peu M. du Maine en avoit baillé le gouvernement, l'ayant osté à Belin) eust esté bien aise de traicter avec vous, pourveu que cela se pust conduire sans que nul des anciens serviteurs du feu Roy en sceut rien, d'autant qu'il y en avoit qui ne desiroient nullement que vous vous rendissiez maistre de Paris, dont un des principaux estoit M. d'O, quoy qu'il en fust gouverneur; tellement que vous fustes contraint de faire manier ce traité par M. de Saint Luc fort secrettement.

Plus, vous vous souviendrez (afin que vous n'ayez eu nul bien sans peine, et par consequent sans exercer vostre vertu, et que la speciale assistance de Dieu n'apparust en toutes vos œuvres) que les heureux succez de vostre sacre, des reductions de Paris, Rouën et autres grandes villes, furent meslangez de fascheuses espines et ronces qui vous picquoient fort sensiblement et agitoient l'esprit avec beaucoup d'angoisse, à cause que l'on essaya de persuader à vos sujets de la religion que vous les vouliez destruire, et qu'ils firent quelques actions, comme s'ils eussent voulu s'en garentir par autre voye que celle de vostre prudence et de vos bonnes grâces; et vous vis prendre cette opinion sur ce qu'on vous representa un nouveau reglement par eux fait à Sainte Foy, où ils parloient de prendre d'autres mediateurs envers vous que leurs loyauetez, affections et services.

Plus, vous vous souviendrez que les heureux succez d'Amiens, de la reduction de la Bretagne, et de la paix de Vervins, furent encor suivis de

témoignages que vous n'auriez jamais de bien sans peine, d'autant que les traicteurs de paix de Vervins vous y laisserent une espine au pied, pour donner de l'exercice à votre vertu, et que vos sujets vous ayans fait des instances pressées de leur vouloir laisser des roys d'une si bonne tige que la vostre, la resolution que vous pristez de vous démarier et puis remarier, vous environna de mil soucis, peines, angoisses et perplexitez, à cause des grandes difficultez qui se rencontroient à faire quadrer toutes les operations d'un tel projet à tout ce que pouvoit requerr votre devoir, votre honneur, votre conscience, la raison et votre desir conjointement.

Plus, vous vous souviendrez des grandes diversitez d'avis de vos principaux serviteurs, pour vuider les differends que vous aviez avec M. de Savoye, et comme la pluspart d'iceux, et par leurs conseils, et par leurs menées sous main, traversans vos desirs et vos resolutions, il fallut en fin, apres mil peines, disputes et contentions, que votre vertu seule remportast la gloire d'avoir tout surmonté, et monstrast qu'elle seule sçavoit faire la paix et la guerre.

Plus, vous vous souviendrez des plus sensibles déplaisirs, ennuis et soucis que vous ayez point eus, ayant decouvert que des plus grands et des plus qualifiez de votre royaume, que vous aviez le plus honorablement employez, et en effet aviez les plus obligez, avoient esté si malheureux, detestables et enragez, que d'avoir par de sordides ingrattitudes, usé de complots, machinations et conspirations contre votre vie et votre Estat, dont je ne dis rien d'avantage, car tout le monde le sçait, et ont encore leurs suites, et ne sont entretenues que par vos trop grandes indulgences.

Plus, vous vous souviendrez de tant de soucis, ennuis, soupçons et deffiances, où ont jetté votre esprit et le doivent tousjours tenir pour s'en garantir, tant de machinations et conspirations contre votre vie et votre Estat, de divers meurtriers, assassins et empoisonneurs particuliers, tels que des Nicole, Mignon, Barriere, Guignars, Chastel, Meragues, Luquisse et autres; et n'en manquera jamais, tant qu'il y aura des obeysances aveugles, des docteurs qui enseigneront, et des foux melancoliques, zelez catholiques, qui croiront que la pieté, la religion, le merite, la devotion, le meurtre, l'assassinat et l'empoisonnement sont de mesme nature.

Plus, vous vous souviendrez, comme de choses que je crains qui ne soient pas encore passées, de tant d'ennuis, fâcheries, soucis, despits et chagrins où vous ont jetté les riotes domestiques, afin que cela vous serve d'enseignement

pour les éviter: surquoy je ne m'expliqueray pas davantage, car vous m'entendez assez, et n'ignorez pas ce qu'il faut faire pour les terminer.

Plus, vous vous souviendrez des peines et anxietez où vous ont jetté les ruses, artifices, malices et cautelles de la Verneuil, ses semblables, et leurs sequelles et proxenetes, afin que cela vous serve d'enseignement pour vous en dépestrer tout à fait et pour tousjours.

Plus, si je voulois continuer à vous ramentenir toutes les autres, touchant les démeslemens pacifiques dont il me revient à toute heure des ressouvenances, et desquelles (selon ce qu'il a pleu à votre Majesté de m'en dire autresfois quelques-unes) il n'y en a point eu qui en quelque sorte ne vous ait fâché, mis en peine et soucié, je craindrois de vous ennuyer si je voulois entreprendre de les représenter au long et par le menu. Et partant me contenteray-je de vous en faire souvenir de quelques-unes par leur simple dénomination, telles qu'ont esté: l'affront receu par M. de la Roche-pot en Espagne, les incertitudes des négociations de paix d'entre Espagne et Angleterre, les divers accidens des guerres d'entre les archiducs et les Hollandois et sur tout les sieges d'Ostende et de l'Ecluse, les diverses assemblées du clergé et des huguenots et leurs demandes contraires, les rumeurs du sol pour livre, l'interdiction du commerce, les differends de M. d'Esperson, des Soboles et habitans de Mets, les trahisons de L'Hoste de Ville-roy, les differends roulans d'entre les Papes et les Venitiens, les doutes des recherches du duc de Savoye, et autres que je laisse, y en ayant assez pour verifiser ma proposition, que c'est la speciale grace et faveur de Dieu et vos heroïques vertus, qui vous ont fait surmonter tant de difficultez et resister à tant d'ennuis, d'angoisses, de peines et de traverses.

Et pour fin de mes ressouvenances que je crains bien avoir esté trop longues et à vous ennuyeuses, vous vous souviendrez tousjours, Sire, que des speciales assistances de Dieu toutes notoires, des insignes et admirables vertus toutes manifestes, et des prosperitez et felicittez tant esclatantes, ne seront jamais sans envieux, haineux et ennemis, tant qu'il y aura des cœurs lasches, malins et pervers au monde: enquoy les puissans et tous declarez ne vous sont point à craindre; car votre generosité admirable, votre courage invincible et vos autres vertus, vos tresors, vos armes et votre belliqueuse nation sont des remedes efficaces contre les accidens qu'ils peuvent produire; et n'avez seulement à prévoir et prévenir que les embusches,

machinations et attentats secrets et particuliers.

Ayant leu avec admiration des vertus et compassion des souffrances de nostre grand Roy, les vingt-huit articles faisant mention des soucis, ennuis, anxietez, inquietudes, angoisses et tribulations desquelles son esprit a esté agité, voire mesmes pendant les plus tranquilles et pacifiques années de sa vie, nous avons mis nostre principale attention sur le dix-neufiesme d'iceux articles, comme celuy qui nous a semblé le plus digne de consideration, à cause qu'estant là parlé des conspirations et attentats sur sa vie, il est aussi dit qu'ils ne procedoient point d'ailleurs (ce que le Pape, les cardinaux et le conclave tenoient pour veritable) que du retardement de son changement de religion, et iceluy estant fait, que du manquement de son absolution pontificale. Surquoy il nous a semblé estre une chose des plus estranges, que tant et de si grands personnages, si religieux, pieux, saints et sages, ayent par si longtemps différé à vouloir excogiter et apporter les remedes convenables pour empescher les enormes malefices de tant d'embusches, conspirations, attentats, empoisonnemens, meurtres et assassinats, qu'ils voyoient estre déployez contre l'oingt du Seigneur, qui se peut reputer pour crime commis contre lui mesme, puisqu'il est son image; et d'autant qu'il apparroit clairement que tels meschans garnemens ne sont enhardis à prodiguer leurs vies que par les folles fantaisies qu'ils se sont mises en l'esprit, ou les persuasions que l'on leur a données que telles enormitez execrables, meschancetez et attentats horribles sont actions devotieuses et œuvres meritoires, capables de les exempter des peines de l'enfer et les faire jouyr des joyes de paradis. Et partant, semble-il que tant de sages et saincts personnages, directeurs des consciences de tous les chrestiens, devroient, pensant aux leurs, excogiter des remedes capables, tant pour desabuser ces miserables enragez et les retirer de perdition, que pour garantir tous roys, princes et potentats, des attentats horribles, en declarant par des bulles expresses, qu'il n'y a point de crimes plus horribles que de penser seulement à vouloir nuire aux roys, lesquels sont establis par le vouloir de Dieu, quelques vicieux et meschans qu'ils puissent estre.

A tous lesquels discours tirez de vos memoires, nous nous licentierons d'y adjouster des nostres, ce qu'apparemment il est du tout necessaire de croire, à sçavoir, qu'un si bon et sage Pape que celuy qui est Clement de nom et d'effect, et qui est lieutenant de ce grand Capitaine

de misericorde et de la remission des pechez, ne manquera jamais de suivre pour enseignemens les benignes inscriptions de son general et misericordieux estendard de la croix, qui annonce, haut et clair, le salut au monde en ces magnifiques et mysterieuses paroles :

« Je ne suis point venu au monde pour condamner le monde, mais pour sauver le monde.

« Je ne suis point venu pour appeler les justes, mais les pecheurs à repentance.

« Je ne suis envoyé sinon aux brebis de la maison d'Israël qui sont peries.

« Apprenez que je suis debonnaire et humble de cœur, et vous trouverez repos en vos ames.

« Je ne suis point venu pour estre servi, mais pour servir et donner ma vie en rançon.

« Venez à moy, vous tous qui estes chargez, et je vous soulageray.

« Je veux misericorde et non point sacrifice.

« J'ay pris vos langueurs, et j'ay chargé vos maladies.

« Je ne jette point hors celuy qui vient à moy.

« Mon regne n'est point de ce monde, et ne reabilite point les chevances mondaines. »

Sur lesquels tant doux, benignes et salutaires preceptes et enseignemens de la vraye charité du fils de Dieu (qui s'est donné à imiter à tous hommes, mais sur tout aux gens d'église, et ne sera jamais ensuivi par aucun) nous admonestons tous roys, princes et potentats de se bien souvenir que l'homme sans souci de conserver sa vie, tient celle de l'autrui tousjours en sa puissance, et n'oublent non plus que tels seront aussi toutes obeysances qui sont vrayement aveugles, les superstitieux, les fous, melancoliques, les esprits effrayez, les ames esgarées, les consciences bourrellées, les cœurs espouvantés de leurs crimes énormes, et l'apprehension des peines des damnez : tellement que toutes ces sortes de gens hayssant ainsi leurs vies, ne les abhorrent pas moins, et par là sont rendus capables d'entreprendre tous sanglans malefices, meurtres, assassinats, turpitudes, felonniez et empoisonnemens, soit par fol desespoir de descendre aux enfers, ou par vaine esperance de monter dans les cieux. Tous lesquels inconveniens trop de fois arrivez, estans bien considerez par nostre saint pere le Pape, le sacré college des cardinaux, et tout ce qui compose le Saint Siege de Rome, ils devroient essayer de trouver les moyens, soit par decrets et voyes canoniques, ou par enseignemens, ou par confession, ou autres expéditions qu'ils jugeront les plus convenables pour faire bien comprendre à ces desesperes que tous les attentats sur la vie d'autrui, sous ombre de bien faire, sont des

cas plus enormes et dignes des enfers, mais principalement lorsqu'il est question des empereurs et roys, des princes souverains, voire des magistrats, et que par consequent tant s'en faut que, par quelque specieuse cause, puissante raison, ou absolu commandement de superieur que ce puisse estre, on soit bien fondé à perpétrer des meurtres et des assassinats, ou empoisonnements, ny que telles actions puissent jamais prendre le tiltre de saintes, pieuses, religieuses, ou meritoires, ny estre estimées dignes de louanges, ny de remunerations et recompenses devant aucuns hommes, ny mesme le tribunal de Dieu, celuy-là de l'Eglise du Pape, ou du conclave; que les seules pensées, imaginations et cogitations en telles entreprises, desirs et desseins, sont maudits, execrables, detestables, et dignes des enfers.

Or, reprenant le fil de nos discours, et usant de nostre stile accoustumé, nous commencerons cette année 1605 par le recit de vos procedures accoustumées pour le general, vostre maniere ordinaire et journaliere de vie, et par les ordres que vous teniez en la partition, distribution et conduite, tant des affaires generales de l'Estat, que de celles qui dependoient particulièrement des charges dont le Roy vous avoit honoré; la principale desquelles estoit celle d'avoir esté choisi pour son particulier confident; d'autant qu'elle vous rendoit participant de tous ses secrets, et plus interieures pensées et desseins, jusques à vous decouvrir ses maladies cachées, ses plaisirs et desplaisirs domestiques, ses esperances, ses craintes, ses amours, ses amitié et ses inimitiez plus couvertes; y ayant eu peu de personnes en France, ny dehors, desquelles soit en s'en loüant, ou en s'en plaignant, en les estimant, ou mesestimant, desquelles il ne vous ait escrit ou parlé en toute confidence et liberté, ce qui seroit facile à justifier, si vous en vouliez communiquer les lettres: estant à noter sur vostre forme de conduite, que pour ce qui regardoit les commandemens que vous receviez du Roy, pour l'aller trouver, ou pour luy parler des affaires pressées, qui le requeroient ainsi, ou recevoir des lettres de sa main, et y rendre responce de la vostre, ces operations n'avoient ny mois, ny sepmaines, ny jours, ny heures réglées ny certaines, mais estoient promptement executées aussi bien la nuit que le jour, et remettiez pour icelles toutes autres affaires ordinaires à une autre fois, pour le desmeslement et administration desquelles voicy comme vous en usiez.

Premierement, ainsi que vous le sçavez mieux que nous, il se tenoit le mardy, le jeudy et le samedy, deux fois le jour, conseil d'Estat et des

finances, ausquels vous ne manquiez jamais de vous trouver, et porter toutes les lettres et despèches qui meritoient d'estre consultées, et d'y prendre prompte resolution; voire le plus souvent vous joigniez à icelles les arrests tout dressez, et les responcez que vous y faisiez, ausquelles peu souvent estoit-il changé quelque chose: aussi estiez-vous tousjours dès les quatre heures du matin, soit esté, soit hyver, dans vostre cabinet à y travailler, afin de nettoyer tous les jours le tapis, vous ayant oüy souvent dire que qui en use autrement laissera beaucoup d'affaires indecises, sera cause de grandes crieries et confusions, et par consequent se rendra incapable de bien exercer tant de charges que vous en aviez. A six heures et demie vous estiez tout habillé; à sept, vous vous en alliez au conseil, auquel, selon la quantité ou importance des affaires, vous demeuriez jusques à dix, et quelquesfois unze heures. Le Roy vous envoyoit quelquesfois querir dès les neuf à dix heures, lequel se promenant avec vous, tantost seul, tantost conjointement avec messieurs de Ville-roy et de Sillery, et discourant de ses affaires principales, vous faisoit entendre ses resolutions, et donnoit à chacun, selon vos professions et vos charges, ses commandemens pour ce que vous aviez à executer en icelles. Au partir de là, vous alliez disner, vostre table estant de dix serviettes seulement, où estoient tousjours vostre femme, enfans et suite, fort frugalement servie; aussi n'y conviez vous gueres de gens de grande qualité, mais sur tout de ces friands et beuveurs d'autant, pour lesquels vous n'augmentiez jamais rien aux services d'icelle, disant ces paroles d'un ancien (lors que l'on vous sollicitoit d'y adjouster quelque chose): *S'ils sont sages, il y en a suffisamment pour eux; s'ils sont fous, je les traite ainsi afin qu'ils n'y viennent pas deux fois.* Apres disner vous entriez en vostre grande salle, que vous trouviez toute plaine de monde, afin de donner audience à chacun, et tousjours commenciez par les ecclesiastiques, tant d'une que d'autre religion, et en suite par les gens de village et autres simples personnes qui apprehendoient de vous approcher; et ne partiez jamais de-là que vous n'eussiez fait responcez à tous: lesquelles estoient fort succinctes, d'autant qu'à ceux qui demandoient choses justes, raisonnables et faciles, vous leur disiez promptement: « Monsieur, c'est assez, j'entends bien vostre affaire; elle est bonne, » et vous en promets l'execution. » Et aussi-tost en appelliez un autre, auquel si son affaire estoit difficile et de long examen et discussion, vous la luy disiez estre telle, et que pour vous la faire bien comprendre, il baillast tous ses papiers à

un des intendans ou de vos secretaires que vous luy nommiez, afin d'examiner ses demandes, ses raisons et ses papiers, pour vous en esclaircir, l'assurant que son affaire seroit responduë dans la sepmaine, et bien difficile si vous n'essayez à luy donner quelque contentement. Que si l'on vous parloit d'affaires manifestement injustes ou impossibles, sans porter grand prejudice à celles du Roy ou du public, ou faire tort aux particuliers, vous luy teniez ce langage : « Mon-sieur, je suis bien marry que vostre affaire n'est meilleure et plus facile; car vous estes personne de merite et service : et partant ne vous amusez plus à la poursuite de choses injustes et impossibles; mais demandez quelque autre chose, et je vous promets mon aide et mon assistance. »

Quant aux jours du lundy, mercredi et vendredi, vous en affectiez les matinées pour travailler aux affaires qui dépendoient de vos charges de grand maistre de l'artillerie, gouverneur de Poictou, la Bastille, Mante et Jargeau, grand-voyer de France et super-intendant des fortifications et bastimens; aux resolutions d'Estats desquelles deux dernieres charges le Roy ne manquoit pas de se trouver, et d'y appeller les gouverneurs des places et les officiers ordinaires, en la presence desquels ayant tout arrêté, il vous disoit tousjours : « Or bien, voilà mes fortifications et bastimens resolut; et vous, que faites vous en vos maisons? » A quoy luy respondant que vous n'y faisiez rien, faute d'argent, il repartoit, disant : « Or sus, voyons vos plans, et ce que vous y voudriez faire, si vous aviez de l'argent. » Lesquels ayans considerez, il vous donnoit ordinairement vingt mil livres, à la charge de les employer où il avoit advisé.

Les apres-dinées de ces trois jours là, vous les employez, si le Roy ne vous envoyoit point querir, ou ne vous commandoit rien d'extraordinaire, à donner des audiances, ou à vos affaires particulieres qui ne se pouvoient faire sans vostre intervention (car pour les autres vous en remettiez le soin et la conduite à madame vostre femme ou à vos gens), ou à passer vostre temps à voir faire les exercices à messieurs vos enfans, gendre, parens et amis particuliers, afin de vous delasser l'esprit; car l'Arsenac n'estoit jamais sans fanfares, réjouyssances, bonnes compagnies, et vertueux passe-temps. Le soir, dès l'heure

que vous aviez souppé, vous commandiez de fermer les portes, et deffendiez de ne laisser plus entrer personne pour affaires, s'ils ne venoient expressément de la part du Roy; mais de recevoir seulement ceux qui ne vouloient parler que de rire, jouër, se resjouyr, et vous faire passer le temps jusques sur les dix heures du soir, qui estoit celle où vous vous couchiez tousjours.

Or, desirant de fois à autre de faire voir en quelque sorte combien les prudences, prévoyances et bons mesnages du Roy, que nous avons tant exaltez cy-devant, estoient encor plus excellens que nous ne les avons representez, et que leurs operations ne s'estendoient pas seulement en l'administration et conduite des grandes, importantes et serieuses affaires d'Estat, mais aussi jusqu'aux moindres et plus petites, dont entre une infinité d'exemples que nous pourrions mettre en avant, si nous ne craignons point d'amplifier par trop ces Memoires, nous vous en ramentevrions plusieurs; mais nous nous contenterons d'une seule, d'autant que vostre particulier y estoit meslé, qui fut que mademoiselle du Marais, fille de madame vostre femme, estant nourrie chez la Reine, et se presentant occasion de la marier au fils de feu M. de La Boullaye, que le Roy avoit tousjours fort aimé, et luy voulant à cette occasion et aussi pour vous gratifier, augmenter jusques à cinq mil escus le present de robbe de nopces qu'il avoit accoustumé de donner aux filles de la Reine lors qu'elles se marioient, qui avoit esté réglé à deux mil escus, et empescher que cela ne peust estre tiré en consequence pour les autres à l'advenir, il desira que cette somme passast par un comptant : surquoy il vous escrivit de sa main une lettre telle que s'ensuit :

*Lettre du Roy à M. de Rosny.*

Mon cousin, je vous fais ce mot pour vous dire que pour les cinq mil escus que j'ay accordez en faveur de mariage à la damoiselle des Marais, vostre belle-fille, je veux que les fassiez mettre en un comptant, tant pour éviter à la consequence, que pour d'autres raisons que je vous diray lors que je vous verray. C'est pourquoy je vous prie de le faire ainsi, comme chose que je desire. Adieu, mon cousin.

Ce 8 janvier, à Sainct Germain en Laye.

HENRY.








	Pages.		Pages.
CHAPITRE XXXVIII. Mort du prince de Parme. Suite de la conférence.	108	CHAPITRE LIX. Crédit de Sancy. Gabrielle empêche qu'il ne soit nommé surintendant. Établissement d'un conseil de finances. Déclaration de guerre à l'Espagne. Attentat de Jean Châtel. Les Jésuites chassés du royaume.	189
CHAPITRE XXXIX. Conférence de Henri IV avec les seigneurs protestans. Discours de ce prince. Négociations.	110	CHAPITRE LX. Motifs qui décident le Roi à porter la guerre en Franche-Comté. Conseil des finances. Rosny se retire à Moret. Lettre du Roi sur la retraite du comte de Soissons. Rosny réprime l'insolence d'un capitaine attaché à ce prince. Actions militaires en Picardie. Combat de Fontaine-Françoise.	191
CHAPITRE XL. Propositions faites par la Ligue à Henri IV. Négociations. Prise de Dreux par le Roi.	113	CHAPITRE LXI. Le Roi, au retour de Bourgogne, s'arrête à Moret. Entretien avec Rosny. Offre des Parisiens. Départ du Roi pour Calais. Perte de cette ville. Leçon donnée par le Roi au duc de Montpensier.	199
CHAPITRE XLI. Démarches pour la conversion du Roi. Conseil tenu sur une demande des grandes villes de France. Discours de Rosny. Conversion du Roi.	116	CHAPITRE LXII. Projet du Roi d'envoyer Rosny en Angleterre avec le duc de Bouillon. Refus de Rosny.	202
CHAPITRE XLII. Négociation inutile avec l'Espagne. Trêve générale. Les Parisiens vont voir Henri IV à Saint-Denis. Attentat de Barrière. Lettre du Roi à Rosny.	120	CHAPITRE LXIII. Le Roi propose à Rosny d'aller seul en Angleterre. Nouveau refus. Siège et prise de la Fère. Entreprise sur Arras. Mort des ducs de Nevers et de Nemours. Accommodement du duc de Mayenne.	204
CHAPITRE XLIII. Détails sur les états de la Ligue, et sur les négociations entamées par divers partis. Digression sur la conduite de Villeroy.	123	CHAPITRE LXIV. Rosny, se trouvant à Moret, est chargé de conduire madame de Liancourt près du Roi. Lettre remarquable de ce prince sur l'état de ses finances et sur le dénuement où il se trouve. Singulière prédiction d'un astrologue. Danger que court madame de Liancourt dans ce voyage.	205
CHAPITRE XLIV. Surprise de Fécamp par Bois-rozé. Négociations de Rosny avec Villars, gouverneur de Rouen. Henri IV est sacré à Chartres.	125	CHAPITRE LXV. Mission de Rosny près du duc de Montpensier, pour sonder ses sentimens et lui proposer la main de <i>Madame</i> , sœur du Roi. Rosny chargé de faire consentir Madame à ce mariage. Conférence avec cette princesse qui aimoit le comte de Soissons.	210
CHAPITRE XLV. Réconciliation du comte de Soissons et du duc de Montpensier. Négociation relative aux amours de Madame, sœur du Roi, et du comte de Soissons. Pouvoirs donnés à Rosny pour traiter avec Villars.	127	CHAPITRE LXVI. Suite de la conférence avec <i>Madame</i> . Refroidissement momentané de Henri IV pour Rosny.	219
CHAPITRE XLVI. Rosny part pour Rouen. Il s'arrête au château d'Anet, chez la duchesse d'Aumale. Réception qu'on lui fait à Rouen. Négociations avec Villars. Lettres de Henri IV.	131	CHAPITRE LXVII. Résolution de faire entrer Rosny dans le conseil des finances. Intrigues pour en empêcher l'exécution. Entrevue du Roi et du duc de Mayenne. Installation de Rosny au conseil des finances.	224
CHAPITRE XLVII. Continuation des négociations. Lettre remarquable de Henri IV. Affaire de Dupré. Conclusion du traité avec Villars. Lettre de Rosny au Roi. Réponse du Roi.	135	CHAPITRE LXVIII. Voyage de Rosny dans les provinces. Examen des comptes des trésoriers et receveurs généraux. Il vient trouver le Roi à Rouen. Nouvelles intrigues contre lui. Sancy succombe dans une dispute qu'ils ont ensemble devant le Roi.	228
CHAPITRE XLVIII. Entrée de Henri IV à Paris. Sa bonté et sa clémence.	139	CHAPITRE LXIX. Ouverture de l'assemblée des notables dans la ville de Rouen. Discours du Roi. Nouvelle intrigue contre Rosny.	232
CHAPITRE XLIX. Départ de Rosny pour Rouen. Cette ville se déclare pour le Roi.	141	CHAPITRE LXX. Réflexions sur les états généraux. Opérations des notables. Conseil de Raison. Système suivi par le Roi, d'après les avis secrets de Rosny.	236
CHAPITRE L. Rencontre singulière de Rosny et de Bois-rozé dans une hôtellerie de Louviers. Soumission de Lyon. Évasion du duc de Nemours.	145	CHAPITRE LXXI. Réconciliation de Rosny avec Madame, sœur du Roi.	240
CHAPITRE LI. Conduite de Rosny relativement à un présent que lui avoit fait la ville de Rouen. Ses principes en administration. Villars vient présenter ses hommages au Roi. Siège de Laon. Rosny obligé de quitter ce siège pour aller conférer avec le cardinal de Bourbon.	147	CHAPITRE LXXII. Divers événemens arrivés dans les provinces en 1595 et 1596. Principaux souhaits de Henri IV.	242
CHAPITRE LII. Conférence de Rosny avec le cardinal de Bourbon.	150	CHAPITRE LXXIII. Préparatifs pour le siège d'Arras. Travaux de Rosny pour acquérir la science des finances. Fin du Conseil de Raison.	243
CHAPITRE LIII. Compte rendu par Rosny de sa conférence avec le cardinal de Bourbon. Déterminations du Roi. Divers événemens du siège de Laon.	153	CHAPITRE LXXIV. Mademoiselle de Rosny demandée pour M. de Laval. Fêtes à la Cour. Prise d'Amiens par les Espagnols. Rosny chargé par le Roi de trouver des ressources pour recouvrer cette place. Son plan.	245
CHAPITRE LIV. Capitulation de Laon. Opinion du Roi sur Biron et sur Bouillon. Rosny chargé d'une mission vers ce dernier.	160		
CHAPITRE LV. Lettre de Rosny au cardinal de Bourbon. Voyage de Rosny à Sedan. Conférences avec le duc de Bouillon.	163		
CHAPITRE LVI. Détails sur la réduction de Laon. Soumission de Poitiers. Mission confiée à Rosny. Mort du cardinal de Bourbon. Lettre de Henri IV sur cette mort.	170		
CHAPITRE LVII. Conduite de d'O, surintendant des finances. Mort de ce ministre. Lettre de Rosny au Roi, sur les moyens de rétablir la paix, et de faire fleurir le royaume. Suite de la négociation avec le duc de Guise. Accommodement.	172		
CHAPITRE LVIII. Affaires de Languedoc. Détails sur l'accommodement du duc de Guise.	180		

Pages.	Pages.
CHAPITRE LXXV. Rosny choisi pour diriger seul les finances. Présent offert à madame de Rosny. Divers voyages de Rosny au siège d'Amiens. Il est chargé par le Roi d'écrire aux chefs protestans qui veulent remuer. Lettre très-remarquable adressée à la Trémoille. Mort de Saint-Luc, grand maître de l'artillerie. Pourquoi le Roi ne donne pas sur-le-champ cette place à Rosny. Lettres de Henri IV et de Rosny. Reprise d'Amiens.	249
CHAPITRE LXXVI. Lettres de Henri IV et de Rosny, pendant le siège d'Amiens.	256
CHAPITRE LXXVII. Suite des lettres.	260
CHAPITRE LXXVIII. Suite de lettres.	264
CHAPITRE LXXIX. Conseil tenu après la prise d'Amiens. Tentative sur Dourlans. Retour du Roi à Paris. Le pape Clément VIII se porte pour médiateur entre la France et l'Espagne. Voyage en Bretagne. Rosny tient à Rennes les états de cette province. Traité avec le duc de Mercœur. Édité de Nantes.	267
CHAPITRE LXXX. Séjour du Roi à Rennes. Conférence de Henri IV avec Rosny sur les manœuvres des Protestans, sur la dissolution de son mariage avec Marguerite de Valois, et sur le choix d'une nouvelle épouse. Lettre de Rosny à la reine Marguerite. Réponse de cette Reine.	271
CHAPITRE LXXXI. Lettres diverses sur la politique, la guerre, les finances et les affaires de Bretagne.	280
CHAPITRE LXXXII. Traité de Vervins. Biron envoyé à Bruxelles. Commencement de ses mauvais desseins. Récapitulation des principaux événemens de 1598. Rosny est plus en crédit que jamais.	283
CHAPITRE LXXXIII. Diverses lettres relatives aux finances.	286
CHAPITRE LXXXIV. Évaluation des impôts levés sur les peuples.	290
CHAPITRE LXXXV. Remise des arrérages dus par les peuples. Réformes dans les finances. Réclamations de plusieurs personnes puissantes. Explication donnée au Roi par Rosny.	293
CHAPITRE LXXXVI. Baptême du fils de la duchesse de Beaufort. Cette dame aspire à devenir reine. Opposition de Rosny. Conduite de Henri IV avec son ministre et sa maîtresse. Dispute de Rosny et du duc d'Épernon. Maladie du Roi. Arrivée d'Alexandre de Médicis, légat du Pape.	295
CHAPITRE LXXXVII. Mort et testament de Philippe II.	299
CHAPITRE LXXXVIII. Continuation des réformes dans les finances.	303
CHAPITRE LXXXIX. Suite du même sujet. Marguerite d'Autriche passe en Provence pour aller épouser Philippe III. Mariage de Madame avec le duc de Bar. Lettres de Henri IV.	305
CHAPITRE XC. Oppositions du clergé et des parlemens à la publication de l'édit de Nantes. Rosny obtient que les Protestans consentent à des modifications.	308
CHAPITRE XCI. Conférence sur la religion tenue en présence de Madame, sœur du Roi. Mort de plusieurs personnes de distinction, entre autres, de la connétable de Montmorency, et de la duchesse de Beaufort. Rosny console Henri IV.	310
CHAPITRE XCII. Conversations éclatantes. Marthe Brossier. Affaires du marquisat de Saluces. Ambassadeurs du duc de Savoie. Prohibition des marchandises étrangères. Négociations avec Marguerite de Valois. Le Pape déclare nul le mariage de Henri IV et de cette princesse.	315
CHAPITRE XCIII. Passion du Roi pour mademoiselle d'Entragues. Il lui fait une promesse de mariage. Rosny déchire cet écrit. Suite de l'affaire du marquisat de Saluces. Rosny devient grand maître de l'artillerie.	319
CHAPITRE XCIV. Rosny s'établit à l'Arsenal. Voyage du duc de Savoie à Paris. Ses intrigues. Le Roi consent à épouser Marie de Médicis.	322
CHAPITRE XCV. Lettres diverses.	326
CHAPITRE XCVI. Conférence sur la religion entre du Perron, évêque d'Évreux, et du Plessis Mornay. Tentative pour empoisonner le Roi. Retour du duc de Savoie dans ses États. Conversation du chancelier de Bellièvre et de Rosny sur la guerre. Préparatifs contre la Savoie. Entrée des troupes françaises dans la Bresse et dans la Savoie. Conduite équivoque de Biron. Siège et prise de Charbonnières.	329
CHAPITRE XCVII. Siège et prise de Montmélan. Lettres du maréchal de Biron.	339
CHAPITRE XCVIII. Députation de la ville de Genève au Roi. Discours de Théodore de Bèze. Arrivée de Marie de Médicis. Prise et démolition du fort de Sainte-Catherine. Traité de paix avec le duc de Savoie.	344
CHAPITRE XCIX. Lettres du Roi, et autres. Conclusion des quatre-vingt dix-neuvièmes premiers chapitres. Deux souhaits de Henri IV.	349
CHAPITRE C. Avant-propos. Projets de Henri IV. Éloge de ce prince. Travaux de Rosny. Devises des jetons distribués à la fin de 1600.	354
CHAPITRE CI. Devises des jetons distribués au commencement de chaque année, depuis 1589 jusqu'en 1601.	359
CHAPITRE CII. Premières inquiétudes du maréchal de Biron. Conférence avec le Roi sur les affaires des Pays-Bas. Acquisition de la terre de Sully. Réformes dans l'administration.	360
CHAPITRE CIII. Outrage fait à la Rochepot, ambassadeur du Roi à Madrid. Ambassade des Vénitiens et du Grand-Seigneur. Voyage du Roi à Calais. Voyage d'Élisabeth, reine d'Angleterre, à Douvres. Lettre d'Élisabeth à Henri IV. Mission de Rosny en Angleterre. Ses conférences avec la Reine. Secrètes menées du maréchal de Biron. Entretien de Rosny avec ce seigneur. Mission de Biron à Londres. Conseils que lui donne la Reine. Le comte de Béthune, frère de Rosny, ambassadeur à Rome. Dispute entre les ministres à l'occasion de cette nomination. Sagesse et modération de Henri IV.	362
CHAPITRE CIV. Digression sur les affaires des Pays-Bas. Défense de transporter de l'argent hors du royaume. Riche capture faite près de la frontière. Chambre de justice contre les financiers. Crédit de Conchini et de Léonor Galigai. Digression sur la manière dont ces Mémoires ont été composés. Naissance du Dauphin. Henri IV fait tirer son horoscope.	370
CHAPITRE CV. Lettres diverses sur les événemens de 1601.	375
CHAPITRE CVI. Prétentions du comte de Soissons. Affaires étrangères. Découverte de la conjuration du maréchal de Biron.	380
CHAPITRE CVII. Lettres diverses de l'année 1601. Restitution faite par le grand-duc de Florence du château d'If et de l'île de Pomégue.	383
CHAPITRE CVIII. Devise des jetons distribués au commencement de 1602. Le Roi donne à Rosny le commandement de la Bastille. Lettres diverses.	389
CHAPITRE CIX. Voyage à Blois. Premiers nuages	

	Pages.		Pages.
qui s'élèvent entre le Roi et la Reine. Fermentation dans le royaume. Le Roi sonde le duc d'Épernon et le duc de Bouillon. Conseil secret tenu par le Roi sur les mesures à prendre contre les conjurés. Voyage en Poitou. Biron attiré à Fontainebleau. Son obstination. Il est arrêté, ainsi que le comte d'Auvergne. Son jugement et son exécution. Le comte d'Auvergne est mis en liberté.	392	comte de Soissons. Opposition de Rosny. Colère du comte et de madame de Verneuil, intéressée dans ces sortes de taxes. Le Roi veille à la sûreté de Rosny.	511
CHAPITRE CX. Indulgence du Roi envers les complices de Biron. Conversation dans laquelle il développe ses projets. Il pardonne au baron de Lux. Affaire des avocats au parlement de Paris. Dissensions en Dauphiné. Ordonnances sur les monnoies. Mines d'or et d'argent. Édit sur les duels. Divers événements. Pardon accordé au Prince de Joinville. Affaires étrangères.	400	CHAPITRE CXXIV. Conversation de Henri IV et de Rosny sur les manufactures de soie et sur le luxe. Détails curieux sur les mœurs anciennes.	514
CHAPITRE CXI. Lettres diverses sur les événements de l'année 1602.	405	CHAPITRE CXXV. Colonie dans le Canada. Synode de Gap. Lettres de Villeroy relatives à ce Synode et à d'autres objets.	516
CHAPITRE CXII. Devise des jetons distribués au commencement de l'année 1603. Lettres diverses sur quelques événements de cette année.	410	CHAPITRE CXXVI. Récapitulation des services de Rosny.	519
CHAPITRE CXIII. Voyage à Metz. L'électeur Palatin s'intéresse au duc de Bouillon. Lettres de ce prince, qui jettent beaucoup de lumière sur ses projets. Lettres de Henri IV.	419	CHAPITRE CXXVII. Rosny obtient le gouvernement de Poitou. Raison de Henri IV pour le lui donner.	521
CHAPITRE CXIV. Récapitulation des événements de 1602. Indication des principaux événements de cette année. Conversation de Henri IV et de Sully. Détails sur le voyage de Metz. Mort d'Élisabeth, reine d'Angleterre. Rosny envoyé près de son successeur Jacques I <sup>er</sup> . Jésuites de Verdun. Instruction donnée par Henri IV à Rosny sur son voyage en Angleterre. Maladie du Roi. Sa guérison. Préparatifs du voyage de Rosny. Le comte de Soissons se réconcilie avec lui.	423	CHAPITRE CXXVIII. Devise des jetons distribués au commencement de l'année 1604.	523
CHAPITRE CXV. Instructions officielles données à Rosny pour son ambassade en Angleterre. Instructions secrètes. Lettres du roi et de la reine de France au roi et à la reine d'Angleterre.	432	CHAPITRE CXXIX. Mort de la duchesse de Bar, sœur du Roi. Disposition que fait le Roi des biens de cette princesse : une de ses maisons donnée à la Reine, l'autre à la marquise de Verneuil. Conseil tenu sur les Jésuites. Conversation de Henri IV et de Rosny. Rétablissement des Jésuites.	524
CHAPITRE CXVI. Rosny s'embarque pour l'Angleterre. Différend entre la marine française et la marine anglaise. Détails sur le voyage de Rosny. Soulèvement du peuple de Londres contre l'ambassade française. Commencement de la négociation.	443	CHAPITRE CXXX. Voyage du Roi à Chantilly. Diatribe contre le cardinal d'Ossat. Grande conversation entre le Roi et Rosny sur les intrigues du comte d'Auvergne, de la marquise de Verneuil, et sur les affaires de l'Europe.	530
CHAPITRE CXVII. Lettres de Henri IV et de Villeroy sur la mission confiée à Rosny. Présentation de Rosny au roi d'Angleterre. Lettres de ce ministre à Henri IV, dans lesquelles il lui rend compte des négociations dont il est chargé.	449	CHAPITRE CXXXI. Chagrins domestiques de Henri IV. Ses plaintes contre sa femme et sa maîtresse. Établissement d'un seul receveur des rentes de la ville de Paris. Diverses lettres de Henri IV.	537
CHAPITRE CXVIII. Suite des négociations de Rosny. Lettres de Henri IV et de Villeroy sur les intrigues qui se tramoient en Espagne et en Angleterre.	469	CHAPITRE CXXXII. Affaire de L'Hoste, secrétaire de Villeroy. Diverses lettres relatives à cette affaire. Indulgence de Henri IV pour Villeroy. Digression sur la tolérance. Mémoire justificatif de Villeroy.	541
CHAPITRE CXIX. Suite des négociations de Rosny. Développement de son système politique. Tableau de la Cour de Jacques I <sup>er</sup> . Position des principaux États de l'Europe. Lettres de Henri IV et de Villeroy. Soustraction d'une dépêche.	475	CHAPITRE CXXXIII. Lettre de Villeroy à Rosny sur la trahison de L'Hoste, et sur diverses affaires.	549
CHAPITRE CXX. Retour de Rosny en France. Compte que Rosny rend au Roi de sa mission. Lettres du roi et de la reine d'Angleterre. Lettres de Beaumont, resté à Londres comme ambassadeur ordinaire.	495	CHAPITRE CXXXIV. Soupçons du Roi contre la marquise de Verneuil. Sa manière de vivre avec elle. Rosny se mêle malgré lui de cette intrigue.	550
CHAPITRE CXXI. Traité conclu avec Jacques I <sup>er</sup> . Opinion du comte de Soissons sur ce traité. Divers présens faits au roi, à la reine d'Angleterre, et à plusieurs seigneurs de la Cour.	501	CHAPITRE CXXXV. Recherche sur les rentes. Un des secrétaires de Rosny envoyé en Poitou pour empêcher le commerce avec l'Espagne.	553
CHAPITRE CXXII. Lettres diverses relatives aux négociations avec l'Angleterre.	505	CHAPITRE CXXXVI. Grands projets du Roi. Travail sur les rentes.	555
CHAPITRE CXXIII. Nouvel impôt sollicité par le		CHAPITRE CXXXVII. Moyens d'augmenter les revenus du Roi. Objections de Henri IV. Réponses de Rosny. Le Roi projette d'aller en Provence tandis que Rosny se rendra en Poitou.	557
		CHAPITRE CXXXVIII. Henri IV entretient Rosny de ses chagrins domestiques. Conseils et démarches de ce ministre.	559
		CHAPITRE CXXXIX. Lettres diverses. Deux sonnets envoyés par l'ambassadeur du Roi dans les Pays-Bas. Erreurs dans lesquelles sont tombées quelques historiens, sur la position du duc d'Épernon. Lettres du duc de Bellegarde, par lesquelles les auteurs veulent prouver que Rosny étoit en bonne intelligence avec les grands du royaume. Le voyage du Roi en Provence ajourné. Pourquoi.	564
		CHAPITRE CXL. Voyage de Rosny en Poitou. Lettres de Henri IV et de Villeroy, qui instruisent Rosny de ce qui se passe à la Cour pendant son absence. Découverte de la conjuration du comte d'Auvergne. Digression sur la position des rois de France, d'Angleterre, d'Espagne et du Pape. Projets dangereux du duc de Bouillon et du duc de la Trémouille. Affaires étrangères.	572

	Pages.		Pages.
CHAPITRE CXXI. Suite des lettres qui instruisent Rosny de ce qui se passe à la Cour. Le comte d'Entragues remet à Henri IV la promesse de mariage qu'il a faite à la marquise de Verneuil. Traité entre l'Espagne et l'Angleterre. Situation de la Hollande.	576	faites au roi par le connétable de Castille. Observations de Rosny sur ces propositions. Établissement des Jésuites à la Flèche. Deux lettres du Roi sur les intrigues des Protestans.	597
CHAPITRE CXLII. Compte rendu par Rosny de son voyage en Poitou. Ses efforts pour réduire les impôts.	581	CHAPITRE CXLV. Lettres diverses de Henri IV. Correspondance de Rosny avec les reines Marie de Médicis et Marguerite de Valois. Fin des recherches contre les financiers. Établissement de divers ordres religieux. Les fermiers généraux déclarent qu'ils n'ont parmi eux aucun étranger. Réception d'un des fils naturels du Roi dans l'ordre de Malte. Différends avec le Pape sur le pont d'Avignon.	610
CHAPITRE CXLIII. Arrivée de Rosny à la Cour. Suite du compte qu'il rend de son voyage. Mémoire de ce ministre sur les abus qui tendent à l'affaiblissement du royaume. Jugement que porte Henri IV de ce mémoire. Rectification du contrat par lequel le Roi avoit acquis le comté de Saint-Paul. Entretien de Henri IV et de Rosny sur la conjuration du comte d'Auvergne. Ordre donné à d'Escures et à Murat de l'arrêter. Diverses lettres dont la plupart ont rapport à cette affaire. Situation pénible du comte d'Auvergne.	585	CHAPITRE CXLVI. Grand conseil tenu à Paris. Discours du Roi. Retraite préparée aux militaires vieux ou estropiés. Le trésor déposé à la Bastille. Affaires étrangères. Du Perron cardinal. Origine du Molinisme. Affaire de la Valteline et des Grisons.	619
CHAPITRE CXLIV. Arrestation du comte d'Auvergne. Il est mis à la Bastille sous la garde de Rosny. Affaires des finances. Deux lettres de Henri IV sur la marquise de Verneuil. Rosny chargé de négocier avec cette dame. Détails de cette négociation. Lettre relative au commerce extérieur. Traité de commerce avec l'Espagne. Propositions		CHAPITRE CXLVII. Continuation de l'affaire de la Valteline. Mission de Mont-Martin en Suisse, et dans le pays des Grisons.	624
		CHAPITRE CXLVIII. Digression sur Henri IV et sur Rosny. Henri IV dans son intérieur. Scène familière. Compte sommaire rendu par Rosny des parties de l'administration dont il est chargé. Récapitulation de tous les chagrins éprouvés par Henri IV depuis son enfance. Genre de vie adopté par Rosny.	628











STANFORD UNIVERSITY LIBRARIES  
CECIL H. GREEN LIBRARY  
STANFORD, CALIFORNIA 94305-6004  
(415) 723-1493

All books may be recalled after 7 days

DATE DUE

28D MAR 13 1996



3 6105 012 201 419

944 Richard, J. F., ed. 1622 Nouvelle collection servir à l'histoire		NAME <i>R. Mellesman</i>		DATE <i>Dec. 21</i>	<i>RET</i>
LIBRARY <i>West 107</i>		DATE <i>4-10-70</i>			
<i>E. P. Steiner's</i> <i>M. W. Williams</i>		JAN 21 1932 NOV -1 34			
<i>TE 1584</i> <i>John A. Melles</i>		JUN 15 1938 JUL 5 1938			

117349



